


UNIVERSITY OF ST. MICHAEL'S COLLEGE



3 1761 01904322 3

B. K.

E


9

BIBL. RES.

Krijtberg S. J.

AMSTELAEDAM.

T. BASIL'S SE
LIBRARY
TRANSFERRED
+



142



Digitized by the Internet Archive
in 2010 with funding from
University of Ottawa

THEOLOGIAE CURSUS COMPLETUS,

EX TRACTATIBUS OMNIUM PERFECTISSIMIS UBIQUE HABITIS,
ET A MAGNA PARTE EPISCOPORUM NECNON THEOLOGORUM
EUROPÆ CATHOLICÆ,
UNIVERSIM AD HOC INTERROGATORUM, DESIGNATIS,
UNICÈ CONFLATUS,

*Plurimis annotantibus presbyteris
ad docendos levitas pascendosve populos altè positis.*

ANNOTARUNT VERO SIMUL ET EDIDERUNT

FR. J.-P. ET V.-S. M****.

TOMUS DECIMUS.

De Gratia.

EXPLICIT DOGMA.

PARISIIS

APUD EDITORES,

IN VIA GALLICÆ DICTA

RUE DES MAÇONS-SORBONNE, N° 7.

—
1837.

ELENCHUS
AUCTORUM ET OPERUM
QUI IN HOCCE VOLUMINE CONTINENTUR.

MONTAGNUS.

De Gratiâ, pars historica.

CLERICUS A BELLIBERONE.

De Gratiâ, pars dogmatica.

HABERTUS.

Ad partem dogmaticam de Gratiâ appendix prima : de Gratiâ sanctificante.

THEOLOGIA NANCEIENSIS.

Ad partem dogmaticam de Gratiâ appendix secunda : de Congruismo.

INDEX RERUM.

EXCUDEBAT E.-J. BAILLY, IN FORE SORBONICO, 2.

SEP 27 1961

MONTAGNI VITA.

Montagnus, gallicè Montagne (Claudius-Ludovicus), Gratianopoli natus anno 1687, primisque imbutus theologiæ rudimentis, parisiense S. Sulpicii seminarium, quo tempore Rev. Couturier rectore gaudebat, ingressus est. Quântacumque modestiâ adolescens præditus esset, sincerâque delitescendi cupiditate, tantam sagacitatis ac perspicaciæ suæ admirationem superiorum animis iniecit, ut dignus habitus sit, qui baccalaureis sorbonicis licentiæ gradum affectantibus publicas theologiæ lectiones daret. Quod stadium ipsemet decurrens, primisque exornatus laureis, demùm doctoralem clarissimè consecutus est.

Sulpitianiæ familiæ sodalitis mox adscriptus, perpetuum confratribus extitit exemplar. Vir miræ simplicitatis, conscientiæ regularumque seminarii servus usquè observantissimus, modestis secessibus ac studii deliciis adeò suaviter indulgebat, ut seminarii latebris, quandiu vixit, ne semel quidem excesserit, nisi, pius viator, carnutense B. Mariæ sacellum invisurus. Eo vivendi instituto, nec non eximiâ rerum ecclesiasticarum cognitione, discipulorum reverentiam et affectum sibi conciliavit. Quin imò, cum episcopi, Lutetiæ congressi, quid agendum ergà Jansenii sectatores deliberarent, in consilium accersitus est.

Montagnus, mense aprili, 1767, obiit.

Quæ elucubraverat opera theologica, Turnellii nomine inscripta evulgavit: 1^o, Turnellii compendium, 1751, 2 vol. in-8^o; 2^o, lectiones theologicas de opere sex dierum, 1752,

in-12; 3^o, de Gratiâ, 1755 et 1757, 2 vol. in-12; 4^o, de Sacramentis, 1758, 2 vol. in-12; 5^o, de Trinitate et de Angelis, 1750, in-12. Præterea tractatum scripsit de notis theologicis, quem in primo cursûs hujusce volumine imprimendum curavimus, quique libro de opere sex dierum, modo appendicis, ab auctore suffixus est. Tractatus de Gratiâ, typis primùm 1755 mandatus, multoties postea recusus est. Magnum discrimen extat primam inter et anni 1748 editionem. Altera enim undecim continentur dissertationes historiciæ de variis circa gratiam erroribus et controversiis ab Ecclesiâ conditâ; altera aliam insuper complectitur dissertationem de libro et systemate P. Quesnelii; prioris verò dissertationes in hæc compendiariò dantur, ita ut lector, qui documenta ampliora desiderat, ad antecedentes recurrat necesse sit. Quamvis hæ quæstiones historiciæ minoris hodiè sint momenti, quàm cum in Galliâ ferverent de Jansenismo disputationes tot et tantis tempestatibus fœtæ, Montagni opus, quântum licet, in extenso imprimendum nobis visum est, collatisque annorum 1748, 1755 editionibus cum editione anni 1755, omnium longè completissimam, nempe 332 paginis quàm cæteras locupletiolem conteximus. Ita nostra hæc editio undecies centum et quinquaginta consuetis Montagni paginis constat, et cunctas auctoris elucubrationes, varias per editiones diffusas, ne verbo quidem excepto, comprehendit.

TRACTATUS DE GRATIA.

Tantæ celebritatis est quod hic aggredimur de gratiâ Christi argumentum, tot splendidis ac diuturnis theologorum disceptationibus, necnon multorum naufragio famosum ut longiori opus non sit præfatione, quâ ejus dignitas, utilitas ac necessitas commendentur, quapropter ad rem ipsam statim accedemus.

Gratia variis modis spectari potest.

1^o Ex parte Dei qui est præcipuus ac principalis gratiæ auctor et principium, quique eam singulis pro suo beneplacito largitur.

2^o Ex parte Christi, quatenus est via ac veluti canalis ex quo in nos omne gratiæ donum derivatur, utpotè qui eam nobis pretioso suo sanguine promeruerit.

3^o Ex parte hominis, qui est gratiæ subjec-

tum, quique eâ ad justitiam disponitur, atque Deo acceptus efficitur.

Appositè ad triplicem hanc gratiæ considerationem tractatus de gratiâ in tres partes distribui posset; verùm cum de gratiâ tum ex parte Dei, tum ex parte Christi, jam alibi dictum fuerit, nimirum in tractatu de Attributis, ubi de divinâ scientiâ, voluntate, providentiâ, prædestinatione, morte Christi pro salute omnium (1), etc., restat nunc ut de gratiâ ex parte hominis agamus.

Intrâ hosce limites conclusum præsentem tractatum in duas generatim partes dividemus, historicam nempe et dogmaticam.

In parte historicâ de variis circâ gratiam erroribus disseremus.

In parte verò dogmaticâ, naturam, proprietates, affectus, aliaque id genus ad gratiam spectantia expendemus.

Utrique autem parti quæstionem proœmialem de nomine, definitione, et multiplici gratiæ divisione præmittere non abs re erit; subiciemus postea per modum appendicis, celeberrimam perinde ac intricatissimam de libertate et concordia ipsius cum divinâ gratiâ controversiam; sicque nihil erit præmissum eorum quæ ad plenam ac perfectam tractatus de gratiâ notitiam spectant.

QUESTIO PROOEMIALIS.

DE NOMINE, NOTIONE AC DIVISIONE GRATIÆ.

Tres erunt hujusce præviæ quæstionis articuli.

Primus, de variâ nominis gratiæ acceptione.

Secundus, accuratam gratiæ notionem proponet.

Tertius, multiplicem gratiæ divisionem, et varias ejusdem species explicabit.

ARTICULUS PRIMUS.

De variâ nominis gratiæ acceptione.

Non una est nominis gratiæ significatio: tribus præsertim modis usurpatur, ut observat S. Thomas 1 part., quæst. 110, art. 1.

1° Pro dilectione et benevolentia quâ quis alterum prosequitur; sic miles ergâ quem rex benè affectus est, dicitur regis gratiam habere; sic etiam de hominibus justis frequenter legitur in Scripturis, quòd gratiam invenerint coram Domino, Genes. 6, v. 8. Noè verò invenit gratiam coram Domino; et Lucæ 1, v. 20. Angelus beatissimam Virginem alloquens ait: Ne

(1) Vide tractatus de Deo et de Incarnatione in hocce theologiæ cursu completo.

timeas, Maria, invenisti enim gratiam apud Deum. Patet hic gratiam sumi pro amore et benevolentia.

2° Sumitur pro dono seu beneficio gratis alteri concesso; quò sensu is loquitur qui alteri quidpiam indebitum tribuens ait: Hanc tibi gratiam concedo. Ita dictum legimus, Psalm. 85: Gratiam et gloriam dabit Dominus.

3° Pro gratitudine seu recognitione, et ut loquitur S. Thomas pro recompensatione beneficii gratis dati et accepti. Juxtâ hunc sensum gratias agere dicitur is qui beneficium acceptum agnoscit, ipsiusque memorem animum retinet; quò sensu dicitur 2 Regum 2: Et ego reddam gratiam, eò quòd fecistis verbum istud.

Inter hæc tria is ordo est, quemadmodum observat S. Thomas loco mox laudato, ut secundum fluat ex primo, et tertium ex secundo. Ex amore enim et benevolentia, quâ aliquis ergâ alterum benè afficitur, procedit quòd ei aliquid gratuito largiatur; ex beneficio autem gratis accepto consurgit gratiarum actio. Primum non tam est gratia, quàm gratiæ præparatio. Secundum est donum ipsum quod gratis tribuitur, et absque meritis est in suscipiente. Tertium verò in eodem suscipiente ex beneficiis collatis spontè nascitur.

Est autem, ut ibidem annotat doctor Angelicus, istud discriminis amorem Dei inter et amorem hominis, quòd homo amore suo, meritum supponat in objecto quod amat; Deus verò amando, meritum illud operetur; undè dona sua ipse coronat, cum meritis nostris mercedem rependit, Ex dilectione Dei, inquit S. doctor, citato art. in corp. profluit aliquod bonum in creaturâ: voluntas autem hominis movetur ex bono præexistente in rebus... Patet igitur quòd quamlibet Dei dilectionem sequitur aliquod bonum in creaturâ causatum.

Tribus prædictis gratiæ acceptionibus quarta posset adjungi quæ interdum in Scripturis occurrit, in quibus gratiæ vocabulum quandoque usurpatur pro elegantia seu venustate tum oris, tum sermonis; hoc sensu Psalmo 44 dicitur: Speciosus formâ præ filiis hominum, diffusa est gratia in labiis tuis; et Prov. ultimo: Fallax gratia et vana est pulchritudo. Verùm hæcce nominis gratiæ acceptio à S. doctore hic consultè prætermittitur, utpotè cum prorsus aliena ab instituto theologorum, qui de gratiâ juxtâ secundam significationem disputare solent; quatenus nempe nomine gratiæ designatur donum aliquod gratis concessum.

Porro gratiæ vocabulum hoc modo intellectum, iterum dupliciter sumi potest.

1^o Generatim et minus propriè, pro quolibet dono seu beneficio gratis concessio, cujuscumque sit ordinis, sive supernaturalis, sive dumtaxat naturalis; sub illâ generali gratiæ significatione, creatio, conservatio, omnes corporis et animæ dotes, cæteraque naturalis ordinis Dei beneficia comprehenduntur, gratis quippe ac liberaliter nobis à Deo conceduntur. Juxta hanc acceptionem S. August. Epist. 177, alias 95, ad Innoc. S. pont. numero 7, sic habet: « Quâdam non improbandâ ratione dicuntur gratia Dei quâ creati sumus, ut non nihil essemus, nec ita essemus aliquid ut cadaver quod non vivit, aut arbor quæ non sentit, aut pecus quod non intelligit, sed homines, qui et essemus, et viveremus, et sentiremus, et intelligeremus; et de hoc tanto beneficio Creatori nostro gratias agere valeamus. » Cur autem hæc et alia hujusmodi gratiæ vocabulo insigniri possint, statim aperit sanctus doctor his verbis: « Quia non præcedentium aliquorum bonorum operum meritis, sed gratuitâ Dei bonitate donata sunt. »

Eodem planè sensu synodus VI generalis actione 11, Angelos et animas rationales immortales esse asserit *per gratiam*.

Ejusmodi gratiæ genus, nimirum creationis, conservationis, aliorumque donorum naturalium, ultrò admittebat Pelagius, atque ita hujusce vocis *gratiæ* ambiguitate Patribus Palæstinis turpiter illusit. Interrogatus enim an gratiæ necessitatem admitteret, respondit se admittere; at per gratiam, subdolè intelligebat naturam et liberum arbitrium.

2^o Strictè et propriè usurpatur gratiæ vocabulum pro donis supernaturalibus quæ ad salutem æternam per se pertinent atque conducunt. Hoc sensu Joan. 1, v. 17, dicitur: *Lex per Moysen data est, gratia et veritas per Jesum Christum facta est*. Rom. 3, v. 24: *Justificati gratis per gratiam ipsius*. Ibidem cap. 5, v. 17: *Abundantiam gratiæ.... accipientes in vitam regnabunt per unum Jesum Christum*. Et ad Ephes. 2, v. 5: *Convivificavit nos in Christo, cujus gratiâ estis salvati*. Ita etiam passim usurpatur gratiæ vox apud S. Augustinum, libris præsertim contrâ Pelagianos.

Posterior hæc gratiæ acceptio adeò familiaris est et pervulgata in Scripturis, SS. Patribus, aliisque auctoribus ecclesiasticis, ut ea solùm intelligatur in Ecclesiâ Dei, dum gratiæ nomen simpliciter et absolutè pronuntiatur. Quapro-

pter S. Augustinus laudatâ jam Epistolâ 177 observat, Pelagium cùm in synodo Palæstinâ seu Diospolitânâ dixisset se gratiam confiteri, absolutum fuisse à catholicis episcopis, « quia, » inquit, his auditis, catholici antistites, nullam aliam Dei gratiam intelligere potuerunt, nisi quam in libris Dei legere, et populis Dei prædicare consueverunt: eam utique..... quâ justificamur ab iniquitate, et quâ salvamur ab infirmitate, non quâ creati sumus cum propriâ voluntate. Quapropter, pergit ibidem S. doctor, non culpandi sunt judices (Palæstini Antistites) quia ecclesiasticâ consuetudine nomen gratiæ audierunt, nescientes quid hujusmodi homines (Pelagiani) vel in suæ doctrinæ libris, vel in suorum solent auribus spargere. »

Appositè et accommodatè ad posteriorem hanc gratiæ acceptionem, quæ certè propria est, stricta et accurata, toto decursu præsentis tractatus nobis agendum est de gratiâ; prætermittâ aliâ acceptione generali et minus propriâ, quæ gratiæ nomen extendit ad significanda etiam ea dona quæ sunt naturalis dumtaxat ordinis.

ARTICULUS II.

De definitione gratiæ.

Gratia propriè et strictè sumpta, prout nempe significat donum supernaturale gratuitum et indebitum, rectè definiri potest, donum supernaturale creaturæ intellectuali gratis à Deo concessum in ordine ad vitam æternam.

Ista definitio generalis est, omnemque veram Dei gratiam complectitur; tùm scilicet eam quæ à Deo gratis concessa fuit sine nullo prorsus respectu ad Christum, et intuitu meritorum ejus; qualis fuit, juxta S. Th. aliorumque vulgò theologorum sententiam, hæc gratia quam Deus contulit Angelis in suâ creatione, et primo parenti in statu innocentie; tùm etiam illam quæ hominibus à Deo nunc conferatur intuitu passionis ac meritorum Christi Domini.

Posterior hæc gratia solet appellari gratia Christi, seu gratia medicinalis; prior verò singulariter dicitur gratia Dei, seu gratia sanitatis.

Sin autem propriam ac specialem gratiæ Salvatoris, id est, ex meritis Christi concessæ definitionem requiras, sic paucis adjectis definiri debet, donum supernaturale creaturæ intellectuali gratis à Deo concessum intuitu meritorum Christi Domini, in ordine ad vitam æternam.

Posterior ista gratiæ Christi definitio eò solùm differt à præcedente quæ generalis est, omnique veræ Dei gratiæ competit, quòd superaddat intuitum Passionis ac meritum Christi.

Jam utriusque definitionis partes paucis sigillatim explicandæ. Dicitur 1^o *donum*; quæ vox tenet locum generis; convenit quippe omnibus donis tùm naturalis, tùm supernaturalis ordinis. Eadem particulâ *donum* significatur gratiam esse quidpiam positivum, animam hominis cui tribuitur afficiens, seu, ut loquitur S. Th. 1-2, q. 110, art. 1, speciale dilectionis Dei ergâ hominem effectum. Dicitur 2^o, *supernaturale*; ut gratia propriè dicta distinguatur à donis naturalibus, qualia sunt creatio, conservatio, aliæque corporis et animæ bona. In quo autem præcisè posita sit *supernaturalitatis* ratio, statim aperiemus. Dicitur 3^o, *creaturæ intellectuali*; ut significetur subjectum gratiæ capax, Angelus scilicet et homo. Dicitur 4^o, *gratis concessum*; particula *gratis* ad quam potissimùm attendendum est in præsentī definitione, significat gratiam secundùm quod gratis datur, omnem excludere debiti rationem, tùm ex parte dantis (Deus enim nullâ lege absolutè tenetur et obligatur ad gratiam conferendam), tùm etiam ex parte recipientis.

Potest autem, quemadmodùm observat S. Th. 1-2, q. 111, art. 1 ad 2, duplex debitum intelligi ex parte recipientis, creaturæ intellectualis videlicet; unum quidem ex merito proveniens, quod refertur ad personam cujus est exercere opera meritoria, juxtâ illud Rom. 4: *Ei qui operatur, merces imputatur secundùm debitum, non secundùm gratiam*; tale deditum solet appellari debitum seu jus ac meritum *personæ*; aliud verò est debitum secundùm conditionem naturæ; ut si dicamus debitum esse homini quòd habeat rationem, quòd libero præditus sit arbitrio, quòd habeat facultatem visivam, et alia hujusmodi quæ ad nativam hominis conditionem pertinent; tale debitum nihil aliud est quàm exigentia naturalis, et dicitur debitum *naturæ*.

Porro particula *gratis* in allatâ gratiæ definitione excludit utrumque debitum, *personæ* videlicet et *naturæ*. 1^o Excludit debitum *personæ* ex merito proveniens, juxtâ illud Apost. ad Rom. 11: *Si autem gratia, jam non ex operibus; alioquin gratia jam non est gratia*; quod idem docet S. Aug. in Psalm. 43, his verbis: *Meritò gratia nominatur, quia gratis datur*. Nec obstat quòd justī bonis suis operibus augmentum

gratiæ de condigno mereantur. Cùm enim bona hæc justorum opera ex ipsâ gratiâ gratis concessâ profluant; augmentum gratiæ in homine justificato, et merces et gratia dici potest et debet; merces, quia meritis rependitur; gratia, quia merita hæc ex gratiâ quæ in fonte, radice et origine prorsus est gratuita, procedunt; undè ut sæpius docet S. Aug. ac præsertim Epist. 194, aliàs 105, n. 19: « Cùm omne bonum meritum nostrum, non in nobis faciat nisi gratia; cùm Deus coronat merita nostra, nihil aliud coronat quàm munera sua. » 2^o Gratia excludit etiam debitum *naturæ*, quod ex naturali conditione et exigentiâ ita consequitur, ut habitâ ratione divinæ justitiæ, bonitatis, etc., denegari non possit; tùm quia meritum *naturæ* majus est merito *personæ*; Deus enim seipsum negare nequit, et prorsus repugnat ipsum agere quidpiam quod bonitati, æquitati, cæterisque ejus attributis repugnet; atqui ex mox dictis gratia excludit debitum ex merito *personæ* proveniens: *Si gratia, jam non ex operibus*, inquit Apost.; *alioquin gratia jam non est gratia*; ergo à fortiori excludit debitum *naturæ*, tùm quia à donis naturalibus in eo præsertim differt gratia propriè dicta, quod hæc, non illa, prædictum *naturæ* debitum excludant; tùm denique quia, ut ratiocinatur S. Thomas loco mox citato, dona supernaturalia rationem gratiæ specialiùs sibi vindicari debent, quàm dona merè naturalia; sed eam non sibi specialiùs vindicarent, nisi utrumque excluderent debitum; siquidem dona naturalia sunt indebita ratione meriti, nec enim ille cui dantur, est ea promeritus. Ergò dona supernaturalia ut specialiori ratione sibi vindicent gratiæ nomen, necessariò debent esse indebita, tùm debito *personæ*, tùm debito *naturæ*.

Totum istud disertè tradit doctor Angelicus loco mox laudato, his verbis: « Dicendum, inquit, quòd gratia secundùm quòd gratis datur, excludit rationem debiti. Potest autem intelligi duplex debitum; unum quidem ex merito proveniens, quod refertur ad personam cujus est agere meritoria opera, secundùm illud ad Rom. 4: *Ei qui operatur, merces imputatur secundùm debitum, et non secundùm gratiam*; aliud est debitum secundùm conditionem naturæ, puta si dicamus debitum esse homini quòd habeat rationem, et alia quæ ad humanam pertinent naturam.... dona igitur naturalia carent primo debito, non autem carent secundo debito: sed dona supernaturalia utroque debito carent; et ideo

« *specialiùs sibi nomen gratiæ vindicant.* » Hæc S. Thomas ex quibus manifestè patet in mente sancti doctoris gratuitam gratiæ conditionem omninò exigere ut detur, tum citrà jus ac meritum *personæ*, tum etiam citrà debitum ac exigentiam *naturæ*.

Hanc planè gratuitam gratiæ conditionem, velint nolint, prorsus evertunt, qui cum Baio et Jansenio asserunt, saltem habità ratione divinæ bonitatis, justitiæ ac providentiæ, impossibilem esse puræ aut etiam integræ nostræ statum, in quo homo sine peccato et gratiâ sive habituali, sive actuali conderetur; ex hac etenim sententiâ necessariò consequitur, gratiam ad exigentiam naturæ esse debitam, et secundùm connaturalem creaturæ rationalis statum concedi; adeòque integritatem primæ creationis, non fuisse indebitam naturæ humanæ exaltationem, sed naturalem ejus conditionem; quæ ipsissima est 27 propositio inter Baianas, et coincidit cum 21, 23, 24, 26, 78, 79, ejusdem Bani propositionibus proscriptis à summis pontificibus Pio V, Gregorio XIII et Urbano VIII.

Dicitur 3^o, *donum à Deo concessum intuitu Passionis ac meritorum Christi Domini in ordine ad vitam æternam*; quibus verbis declaratur, 1^o causa efficiens gratiæ, videlicet Deus; Psalm. 85: *Gratiam et gloriam dabit Dominus*; 2^o causa ejusdem meritoria in præsentī statu naturæ lapsæ, nimirum mediator Dei et hominum Jesus Christus; juxtà illud Joan. 1: *De plenitudine ejus nos omnes accepimus... quia lex per Moysen data est, gratia et veritas per Jesum Christum Dominum nostrum.* 3^o Finalis gratiæ causa denotatur, nempe vita æterna: *Gratia Dei*, inquit Apostolus Rom. 6, *vita æterna*; et S. Aug. Epistolâ jam citatâ 177: *Gratia enim est*, ait S. doctor, *quâ prædestinati vocamur, justificamur, glorificamur.*

Obiter hic observa, gratiam Christi potiori jure dici supernaturalem, gratuitam et indebitam. Illud enim magis gratuitum est, indebitum ac supernaturale, quòd indulgetur inimico, quàm quòd tribuitur non inimico; porrò medicinalis gratia Christi, donum est supernaturale gratis concessum inimico, videlicet homini et perduto per peccatum, juxtà illud Apost. Rom. 5: *Cum inimici essemus reconciliati sumus Deo per mortem filii ejus.*

Cum eximius gratiæ character, et una ex præcipuis ipsius conditionibus, sit *supernaturalitas*, de quâ commodior alibi non occurrit dicendi locus, non abs re erit, nec fortè inju-

cundum, plenam et accuratam entis supernaturalis notionem hic investigare; maxime cum sæpius in decursu præsentis tractatûs, et aliis in locis de donis et actibus supernaturalibus sinus acturi; aliundè verò ejusmodi notio alibi prætermissa, admodum utilis sit, imò et necessaria ad varias quæstiones theologicæ faciliùs intelligendas; id quâ poterimus brevitate ac perspicuitate distinctis quæsitis exequi conabimur.

Quæres itaque 1^o, in quo præcisè posita sit *supernaturalitatis* ratio. Respondeo mirum in modum intricatam esse præsentem quæstionem, circâ quam varias in sententias abeunt theologi. Discrepantes hanc in rem opiniones paucis saltem hic expendere juvat. Prima opinio eorum est qui asserunt minimè definiri posse in quo præcisè reponenda sit *supernaturalitatis* ratio. Sententiam hanc refert ac confutat Ripalda lib. 2. de ente supernat. disput. 4, sec. 2. Refellitur prædicta opinio; 1^o immeritò asseritur id exponi non posse, quòd omnes graviores theologi exponere conati sunt: porrò graviores theologi præeunte doctore Angelico variis in locis, maxime verò, 1-2, q. 110, art. 2 ad 2, et quæst. 112, art. 1, in corp., quæstionem hanc resolvere tentârunt; ergo 2^o exploditur eadem sententia iis omnibus momentis quibus communem ac tritam circâ præsentem controversiam theologorum opinionem postmodum stabiliemus.

Secunda opinio docet, illud esse supernaturale, quod activas naturæ vires excedit. Tribuitur Scoto in 4^a, dist. 10, quæst. 8, parag. *contrà rationem*. Refellitur, quia creatio animæ aut Angeli, activas totius naturæ vires excedit; nec tamen supernaturalis dici potest.

Tertia opinio asserit, ut aliquid sit supernaturale requiri et sufficere quòd excedat tum activas, tum passivas naturæ vires. Tribuitur à nonnullis, Cajetano, Bannesio, Cano, Vasques., etc. Refellitur: 1^o non satis constat quid ipsi velint per vires illas *passivas*; 2^o quidquid intelligatur per vires *passivas*, certè Angeli productio ejus est perfectionis, quæ superet vires tum *activas*, tum *passivas* totius naturæ; attamen hæc Angeli productio non est entitativè supernaturalis; 3^o ad esse supernaturale, præter vires naturales, tum activas, tum passivas naturæ, superanda est adhuc, ut mox dicemus, ejusdem naturæ exigentia. Tandem sententia quam hic impugnamus, auctoribus mox citatis immeritò adscribitur; etenim aliud est, activæ et passivæ virtutis naturalis excessum re-

quiri, ut aliud sit supernaturale; aliud verò eum excessum sufficere; prius disertè docent laudati auctores, at posterius neutiquàm tradunt.

Quarta opinio quorundam recentiorum est, qui rerum naturalium et supernaturalium essentiam à libero Dei arbitrio ita pendere volunt, ut quæ in hoc rerum statu naturalia sunt, eadem in alio rerum ordine (Deo ita decernente) supernaturalia esse possint; et vicissim, quæ nunc supernaturalia sunt, eadem in alio rerum statu vi divinæ voluntatis naturalia esse queant. Refellitur: 1° sententiam hanc, tùm Scripturæ, tùm SS. Patrum doctrinæ contrariam esse, theologi, post S. Thomam, 1, 2, q. 104, art. 5, vulgò docent. 2° Supponit prædicta opinio rerum essentias à libero Dei arbitrio pendere; quod falsum esse communiter tradunt philosophi, et demonstrat S. Thomas, 1 p., q. 25, art. 3, in corp. 3° *Omnis creatura*, ut optimè arguit Estius in 2, dist. 25, parag. 3, *Dei serva est*, juxtà illud Psalm. 11: *Omnia serviunt tibi*. Ergò, inquit ibidem Estius, quòd aliqua creatura assumatur in adoptionem filiorum Dei, et in amicitiam ejus, et in consortium divinæ naturæ (quod quidem fit per gratiam) conditionem creatæ naturæ superat, estque prorsus supernaturale. Nullo ergò in casu, gratia (idem dicendum de quolibet alio dono supernaturali) creaturæ strictè ac propriè fieri potest naturalis. Utitur hoc argumento S. Cyrill., lib. 12 in Joann. cap. 24.

Quinta sententia docet supernaturalia à naturalibus eò differre, quòd supernaturalia Deum ut trinum, naturalia verò Deum ut unum respiciant. Ita Zumel. 1, 2, q. 110, art. 4, disput. 5, et alii. Refellitur, quia actus fidei quo Deum credimus esse unum, summè bonum eumque sic apprehensum diligimus, nullo habito respectu explicito ad Trinitatem, supernaturalis est; naturalia ergò à supernaturalibus non differunt penès respectum ad Trinitatem.

Et verò nec respectus ad Trinitatem ut obiectum, nec respectus ad Trinitatem ut principium supernaturalitatem constituit. Non respectus ad Trinitatem ut obiectum, quia virtutes morales infusæ, aliaque complura accidentia supernaturalia, Trinitatem ut obiectum minimè spectant. Nec etiam respectus ad Trinitatem ut principium, quia supernaturalia perindè ac naturalia à Deo ut uno procedunt; scilicet procedunt à Deo ratione omnipotentiae, quæ tribus divinis Personis communis est; ergo respectus ad Trinitatem non est proprius supernaturalium conceptus.

Sexta sententia supernaturalitatem repetit à relatione ad Deum ut auctorem gratiæ et gloriæ. Ita Curiel. 1, 2, q. 110, dub. 1; Albelda 1 p. disput. 26, n. 9. Joan. Vincent. Relect. de grat. Christi fol. 34, etc. Refellitur ista sententia: 1° quia dùm sic merè traditur, obscura est, et ignotum per ignotius, aut saltem æquè abstrusum definit. 2° Opera moraliter bona intra naturæ ordinem, elicitæ ab homine justo, absque influxu actuali, vel virtuali charitatis, aut alterius supernaturalis virtutis, non sunt intrinsecè supernaturalia; atqui opera hujusmodi in Deum ut auctorem gratiæ et gloriæ referri docent plurimi theologi quos recenset Card. d'Aguirre, tom. 3, disput. 151, sect. 1. Ergo intrinseca et entitativa supernaturalitas à relatione in Deum ut auctorem gratiæ et gloriæ non est repetenda. 3° Semper querendum restat, undenam prædicta relatio habeat ut sit supernaturalis. Fatemur equidem id omne esse supernaturale, quod propriè et directè refertur in Deum ut auctorem gloriæ; at negamus hunc præcisè respectum causam formalem esse supernaturalitatis, de quâ hic unicè aut potissimùm quæstio; sed tantum ut efficientem, aut finalem, aut meritoriam causam admittimus.

Septima sententia eorum est qui supernaturalitatem in intimâ quâdam divinitatis *sicut in se est* communicatione et participatione constituunt; atque supernaturalia definiunt ea esse quæ participant divinam essentiam aut attributa prout sunt in se; naturalia verò quæ illa participant, prout sunt in alio. Ita plerique S. Thomæ interpretes.

Alii supernaturalia definiunt, quæ ad Deum *ut est in se*, seu ad ordinem visionis beatificæ spectant; naturalia verò quæ ab hoc ordine remota sunt. Ita Herrera, 1 p., q. 1, d. 2; Sossa q. 1, Prolo. diff. 4; Gonetius disput. 2, de essentiâ gratiæ. art. 3, etc. Alii asserunt entia supernaturalia esse illa quæ simpliciter sunt *ordinis divini*; naturalia autem quæ ad hunc ordinem non spectant. Ita Cajetanus, 1 p., q. 12, art. 5, et 1, 2, q. 61, art. 3, et alibi passim; Antonius Perez in Laureâ Salmant; certamine 4, scholastico, à n. 48, etc. Aliis placet supernaturalitatem in ordine ad Deum *ut est actus purissimus* consistere. Ita Pater Albertinus, tom. 1 principio 1, quæst. 2, theol. n. 4, et 2 principio quæst. 5, n. 2. Nonnulli censent supernaturalitatem rectè explicari per aliquam connexionem cum unione immediatâ Dei *ut est in se*; sive unio physica sit, qualis hypostatica; sive intentionalis, qualis visio beatifica, fruitio

et amor. Ita Valent. de Hierice, 1 p., tract. 4, disp. 48, cap. 5; Fasolus, 1 p., q. 12, art. 4, n. 22.

Has quinque varias exponendæ supernaturalitatis sententias in unum retuli, quòd vix aut parùm à sese invicem discrepent.

Refelluntur supradictæ sententiæ, iisdem omninò momentis quibus sexta opinio mox confutata fuit. Et verò semper querendum superest, 1º quid sit rem ad ordinem visionis beatificæ, ad ordinem divinum, ad Deum *ut est actus purissimus*, etc., pertinere. 2º Quà perfectione creatura in eum ordinem elevetur. 3º Quæ et qualis esse debeat communicatio et participatio per quam creatura ad ordinem divinum, ad Deum ut est in se formaliter pertineat. Dùm hæc non exponuntur, semper res sub tenebris remanet, semper sub desiderio relinquitur.

Octava sententia eorum est qui supernaturalitatem explicant per excellentiam supra vires et exigentiam naturæ, atque volunt ens supernaturale illud esse quod omnium substantiarum *nunc existentium*, et accidentium ipsis connaturalium vires et exigentiam superat. Ita Ægidius Coninch, disp. 4 de actibus supernat., n. 9, et alii recentiores. Refellitur illa sententia, tum quia plurium Angelorum merè possibilitum productio omnium substantiarum nunc existentium, necnon accidentium ipsis connaturalium, vires et exigentiam longè superat; atqui tamen hæc productio non esset supernaturalis; ergo, etc.; tum quia ens supernaturale, ut mox diximus, omnis substantiæ tam creatæ, quàm creabilis vires et existentiam excedere debet.

Nona sententia perindè ac præcedens supernaturalitatem explicat per excellentiam supra vires et existentiam naturæ; verùm addit, in quo distat à priori, naturam supra quam ens supernaturale elevatur, complecti non solum quamlibet substantiam nunc existentem, sed insuper et possibilem quæ Deum suis viribus videre non possit. Scilicet duplicis generis substantias possibles admittunt hujus sententiæ patroni; aliæ quæ propriis viribus absque elevatione Deum intuitivè videre possint; aliæ quæ citra elevationem hujusce visionis eliciendæ impotentes sunt; supra has, non illas substantias possibles elevatur ens supernaturale. Ita Major, in 4, dist. 89, q. 4; Durandus ibid., quæst. 2; Hurtado de Mendoza, tract. de visione Dei, disput. 6, et alii. Refellitur etiam ista sententia, quia supponit creari posse substan-

tiam supernaturalem, seu substantiam cui connaturalia sint accidentia supernaturalia; ac talem substantiam repugnare postea quæsito 4, demonstrabimus; ergò, etc.

Est et alia specialis eà de re Ripaldæ sententia quæ præcedenti coincidit. Censet auctor ille tom. 1 de ente supernat. lib. 1. disput. 3. sect. 2. ens supernaturale, illud esse, quod excedit vires tum physicas, tum intentionales omnium et singularum substantiarum nunc existentium; id est, quemadmodum seipsum ibid. exponit, illud est supernaturale, quod à substantiis in præsentī hypothesi existentibus, nec fieri, nec quidditivè cognosci potest. Refellitur ista sententia, quia etiam supponit, ens supernaturale non esse supra omnem generatim substantiam tam creatam, quàm creabilem; quod omninò falsum esse ex dicendis postmodum manifestè patebit.

Ultima tandem sententia quam amplectimur, quæque apud theologos longè plures et auctoritate majores pervulgata est,

Docet 1º, in quo certè consentiunt omnes ferè theologi, naturam supra quam ens supernaturale elevatur, omnem substantiam tam creatam quàm creabilem amplecti; seu, quod idem est, naturam quam res supernaturalis antecedit, complecti res omnes, quæ ex propriâ conditione et ex principiis naturæ intrinsicis possibles sunt, seu per se non repugnant, independentèr tum à libero Dei beneplacito, tum ab omni gratuito et naturæ indebito Dei beneficio, quo possibles reddantur. Docet 2º, quod ex priori sequitur, ens supernaturale superare exigentiam totius naturæ creatæ et creabilis, nec in ejus viribus activis contineri, sive physicis, sive intentionalibus. Illud in activis ac physicis alterius viribus censetur contineri, inquit Card. d'Aguirre, tom. 1, disput. 8, sect. 3, et Ripalda lib. 1 de ente supern. disp. 3, sect. 2, quod ab ipso produci potest. Illud verò continetur in viribus intentionalibus seu intelligibilibus, quod ab ipso intuitivè et quidditivè attingi potest. Docet 3º, supernaturalitatem præcipuè ac primario consistere, tum in supradicto exigentiæ, ac virium totius naturæ excessu; tum in eximiâ quâdam divinitatis, ut in se est, participatione; quæ quidem eximiâ divinitatis participatio posita est in speciali quâdam, cum ipso Deo, qualis in se est, spectato, conjunctione et unione; aut *reali et physicâ*, qualis est hypostatica unio; aut *intentionali* proximâ et immediatâ, qualis est visio beatifica; aut tandem *intentionali* minùs proximâ

mediatâ, qualis est gratia sanctificans, virtutes theologicæ, cæteraque hujusmodi dona quæ sunt ejusdem ordinis cum visione beatificâ, quæque ad illam per se disponunt, et ex naturâ suâ ordinantur. Ita S. Thomas variis in locis, præsertim verò 1-2, q. 110, art. 2 ad 1; Cajetanus 1-2, q. 61, art. 3; Salmaticenses tract. de grat. disput. proœmiali cap. 1, parag. 1; d'Aguirre loco mox citato, et tom. 3, disput. 151, sect. 3; Suarez de grat. prolegom. 3, cap. 2, Estius, Sylvius, Bellarminus et alii passim.

Tribus constat partibus ista sententia; antiquam autem probetur, ad pleniorē ipsius intelligentiam opere pretium erit nonnulla advertere. Itaque observandum I cum Bellarmino L. de grat. primi hominis, caput. 5, naturale variis modis dici posse. 1^o Naturale dicitur quod habetur à nativitate. Hic sensu justitia sicut et sanctitas originalis, licet intrinsecè supernaturalis, fuit Adamo naturalis; et originale peccatum nunc infantibus naturale est, justâ illud Ephes. 2: *Naturâ filii iræ*. 2^o Naturale dici potest quod est naturæ consentaneum, quodque eam non destruit, sed ornat et perficit. Et hoc sensu, quemadmodum observat S. Aug. lib. de spirit. et litt. cap. 27, gratia ornans et perficiens naturam, naturalis meritò dici potest, peccatum verò contra naturam. 3^o Dicitur naturale, quod tametsi donum sit gratuitum, tamen naturam non elevat ad opera supernaturalia, sed eam duntaxat juvat ac perficit in operibus merè naturalibus; quâ ratione, inquit Bellarminus loco mox citato, integritas naturæ distincta à gratiâ sanctificante, donum naturale dici potest. 4^o Naturale etiam dicitur, quod in conditâ rerum universitate assuetum est, quod secundum communes providentiæ leges frequenter et ordinariè contingit. Sic S. Aug. L. 26 contra Faustum cap. 3, omnia Dei opera in naturalia et contra-naturalia distinguit; ad primum genus, ordinaria et solita; ad secundum verò, extraordinaria et insolita revocat. Juxtâ hanc acceptionem, opera totius naturæ facultatem excedentia, ut sacramentorum operatio, et virtutum infusarum actus, aliæque supernaturalia opera, quæ miraculosa et insolita non sunt, naturalibus accenseri possunt. 5^o Rursus naturale dici potest quidquid creatura per potentiam obedientialem elicere aut recipere potest; cum enim potentia obedientialis, quâ creatura quælibet à Deo obediatur, ipsique perfectè subjicitur, realiter et entitativè naturalis sit; naturale quo-

que quâdam ratione dici potest, id omne ad quod sese extendit prædicta obedientialis potentia. Ita naturæ vocabulum usurpat S. Aug. loco mox citato his verbis: Deus creator et conditor omnium naturarum, nihil contra naturam facit. Id enim erit cuique rei naturale, quod ipse fecerit, à quo est omnis modus, numerus et ordo naturæ. Et L. 21 de Civit. Dei cap. 8: Quomodo, inquit, contra naturam, quod Dei sit voluntate, cum voluntas tanti conditoris, conditæ rei cujusque natura sit? Eâ ratione asserit S. D. L. de Præd. SS. caput 5, posse habere fidem, sicut posse habere charitatem, naturæ esse hominum. Juxtâ eundem sensum loquitur S. Thomas, 3 p., quæst. 44, art. 2 ad 1: Naturale est, inquit, cuilibet creaturæ, ut transmutetur à Deo secundum ejus voluntatem.

His quinque modis naturale directè non opponitur supernaturali, ut faciliè patebit attendenti, et constat exemplis modò adductis, neque his sensibus naturale hic usurpamus.

6^o Naturale sumi potest pro collectione substantiarum creaturarum, sed non creabilium, et accidentium ipsis connaturalium, seu pro eo quod non superat vires et exigentiam naturæ actu existentis. Opposito sensu, illud improprie et secundum quid supernaturale dici potest quod omnis naturæ creatæ, sed non creabilis, seu, omnis substantiæ actu existentis, sed non merè possibilis vires et exigentiam excedit.

7^o Tandem strictè et proprie naturale prout opponitur supernaturali illud dicitur, quod est vel natura, vel pars naturæ, vel fluit ex principiis et primordiis naturæ creatæ, aut creabilis, quod ipsi debitum est et secundum ipsius exigentiam, sine quo manca illa foret et imperfecta; vel quod est rationi et æquitati consentaneum, quodque Deus habitâ ratione justitiæ, bonitatis, sapientiæ et providentiæ naturæ denegare nequit. Hanc esse strictam et propriam naturalis acceptionem declarant Suarez, d'Aguirre, Bellarm. et aliis locis antea laudatis. Eâ significatione corpus et anima, facultates quoque tum sentiendi, tum intelligendi, et operationes quæ ab eisdem facultatibus exercentur, concursus etiam generalis ad easdem operationes eliciendas necessarius, et alia hujusmodi naturalia esse dicuntur.

Pressius, proprie et strictè naturale illud dicitur, quod est pars naturæ creatæ aut creabilis; vel ex ipsâ fluit, vel ipsi quoquomodò debetur; et hoc modo naturale spectatum proprie supernaturali opponitur. Hinc observan-

dum II, ex dictis supernaturale quod naturali directè opponitur illud est, quod nec est pars naturæ creatæ aut creabilis, nec ex ipsâ fluit, nec ipsi quoquomodò debetur, ac proinde omne meritum, tum naturæ, tum personæ excludit. Ita S. Thomas 1-2, q. 10, art. 1, et ibid, quæst. 110, art. 1 ad 2; ita etiam d'Aguirre locis citatis; Bellarmin. L. 1 de grat. et libero arb. cap. 1; Sylvius, Estius, Suarez et alii.

Observandum III, sicut ens naturale dicitur non solum substantia naturalis, sed etiam quæ ad illam quoquomodò pertinent, quales sunt ejus affectiones, aliaque ipsi quâdam ratione debita; ita pariter supernaturale dicitur, non solum substantia supernaturalis nimirum Deus; sed et ea quæ per modum qualitatum et affectionum ad illum pertinent; aut ab illo, ut supernaturalis est, dependent; aut ad assequendam ipsius, sicut in se est, possessionem, per se et ex naturâ suâ ordinantur, atque proximè aut saltem mediâtè disponunt; talia sunt gratia, virtutes theologicæ, lumen gloriæ, visio beatifica, etc.; hæc autem *participativè*; ille verò, nempe Deus, *essentialiter* supernaturalia dici possunt et debent.

Observandum IV, cum Card. d'Aguirre tom. 1 theolog. S. Anselmi, disp. 8. et 10, et Grandino tract. de Attribut. quæst. 12, art. 3, sect. 3, Deum bifariam spectari posse. 1º Ut in se est, et in se immediatè attingitur; seu ut est auctor gloriæ. 2º Quatenus relucet in creaturis et per eas abstractivè cognoscitur, seu, ut est auctor naturæ; priori, non autem posteriori modo, Deus est primum ens supernaturale, et tale *essentialiter*. Est autem ens supernaturale per participationem, omne illud creatum, per quod ut in se est Deus attingitur, sive immediatè, sive mediâtè; id est, quidquid ad illum attingendum per se et ex naturâ suâ refertur. Hinc unio hypostatica, visio beatifica, *participativè* supernaturales sunt, quoniam Deum ut in se est immediatè attingunt; gratia verò sanctificans, virtutes theologicæ, aliaque hujusmodi dona supernaturalia sunt, quoniam per se disponunt, et ex naturâ suâ ordinantur ad visionem beatificam.

Observandum V, cum iisdem auctoribus mox citatis, Deum, ut in se est, iterum duobus modis spectari posse. 1º *Entitivè* seu *objectivè*. 2º *Communicativè*, quatenus scilicet sese immediatè attingendum communicat, ut fit unione hypostaticâ et visione beatificâ, vel quatenus ad id disponit, ut fit virtutibus theologis. Deus hoc secundo modo spectatus propriè dicitur

auctor gloriæ; priori verò sensu dicitur objectum gloriæ.

Observandum VI, ens illud dici *participativè* supernaturale, quod ad Deum præsertim ut auctorem gloriæ refertur; ideò autem dicitur *participativè* supernaturale, quòd sit participatio quædam virtutis aut rationis, quâ se Deus immediatè attingit ex naturâ suâ; quod quidem ut clariùs percipiatur,

Observandum VII, virtutem et rationem quâ se Deus immediatè attingit, non esse aliquid naturæ divinæ superadditum; omnia enim quæ in Deo, utpote ante simplicissimo, reperiuntur, sunt quid unum et idem cum naturâ divinâ, ac proinde virtus divini intellectus, quâ se Deus immediatè cognoscit, nihil omnino superaddit intellectui divino, sed est ipsemet Dei intellectus, ut infinitæ perfectionis, et per se sufficiens sine ullo superaddito ad divinam essentiam immediatè attingendam; attamen virtus communicata creaturæ, per quam illa immediatè attingit Deum, propriè est virtus Dei, non quidem per quam Deus sese attingit sed per quam creatura ad esse divinum elevatur ut ipsum attingat.

Itaque virtus communicata creaturæ, per quam Deus sese immediatè attingendum communicat, v. g., lumen gloriæ, strictè et propriè dicitur et est virtus Dei elevans et ordinans creaturam ad Deum, ut in se est, illamque constituens in esse divino, juxta illud 2 Petri 1, v. 4, *divinæ consortes naturæ*. Idem dicendum de aliis entibus supernaturalibus quæ ad immediatam cum Deo unionem intentionalem, seu visionem beatificam disponunt, vel ad eam ex naturâ suâ referuntur.

Ex dictis sequitur 1º Deum, ut est auctor gloriæ, seu, quatenus sese unione hypostaticâ, vel visione beatificâ, immediatè attingendum communicat, vel ad id disponit, esse ens *essentialiter* supernaturale, primum et præcipuum entium supernaturalium, à quo alia et supernaturalia sunt et dicuntur. 2º Omne illud ens creatum *participativè* supernaturale dicitur, quod ad Deum præsertim ut auctorem gloriæ, hoc est, in se immediatè attingendum, ex naturâ suâ refertur, vel ad illud per se proximè aut saltem remotè disponit. 3º Supernaturale *participativè* generatim definiri aut describi posse, quod universæ naturæ creatæ aut creabilis ordinem, vires et exigentiam omnino excedit. 4º Supernaturale *quoad modum* duntaxat est donum naturale collatum modo propriè supernaturali, id est, excedente cujuscumque

naturæ vires et exigentiam; tales sunt, vita mortuo restituta, aut visus cæco. 5^o Supernaturale quoad entitatem, quod propriè supernaturale dicitur, peculiare Dei donum est, quod quidem donum, 1^o totius naturæ creatae et creabilis ordinem, vires et exigentiam transcendit; 2^o creaturam elevat et ordinat ad Deum, ut est auctor gloriæ, id est, ut in se spectatus, et per visionem intuitivam possidendus; in quo supernaturalia dona à naturalibus differunt, quæ spectant Deum ut auctorem naturæ, hoc est quatenus relucet in operibus suis, creaturis nimirum, et per eas abstractivè duntaxat est cognoscendus; 3^o mirā quādam et eximiā unionem (aut reali et physicā, qualis hypostatica unio, aut intentionali proximā et immediatā, qualis est visio beatifica; aut intentionali mediatā et minùs proximā, quales sunt gratia sanctificans, virtutes theologicæ, etc.), hominem Angelumque cum ipso Deo, qualis in se est, spectato, ita intimè conjungit, ut ipsos in Deum veluti transformet, atque *Deiformes* efficiat. Hinc per gratiam, quæ donum supernaturale est, 2 Petri 1, dicimur fieri *divinæ consortes naturæ*; et ut loquitur S. Dionys. de Eccles. Hierarch. cap. 1, *Deificati*.

His præsuppositis, jam facile est triplicem ultimæ sententiæ mox propositæ partem demonstrare. Et quidem prima pars, scilicet, naturam supra quam elevatur ens supernaturale, omnem substantiam tam creatam, quàm creabilem complecti, constat 1^o, quia hæc est, ut observat d'Aguirre tom. 1, disput. 10, sect. 1, communis ac constans sententia omnium ferè theologorum tam veterum, quàm recentiorum. Constat 2^o quia donum supernaturale creaturam cum Deo intimè conjungit, eamque in esse divino constituit, ut mox dicemus. Constat 3^o quia ex dicendis quæsito quarto repugnat substantia supernaturalis; ens ergo supernaturale elevat supra omnem substantiam tam creatam quàm creabilem. Secunda pars, scilicet ens supernaturale ordinem, vires et exigentiam cujuslibet naturæ excedere, iisdem omninò momentis mox adductis evincitur. Tertia pars nimirum donum supernaturale, eximiā quādam unionem ita intimè creaturam eum Deo conjungere ut ipsam in ordine divino constituat, eamque in Deum veluti transformet, colligitur 1^o ex jam dictis; 2^o ex mox dicendis; 3^o ex citato textu 2 Petri 1, ubi de supernaturali vocationis et gratiæ sanctificantis dono sic habetur: *Vocavit nos propriā gloriā et virtute, per quem maxima et pretiosa nobis pro-*

missa donavit, ut per hæc efficiamini divinæ consortes naturæ. Hinc de lumine gloriæ loquens doctor Angelicus 1 p., q. 12, art. 3, ad 3, ait: *Per hoc lumen fit creatura Deiformis*; porro quod de gratiā et lumine gloriæ asseritur, idem quoque de aliis donis quoad entitatem supernaturalibus, pari ratione dicendum est. Quarta tandem pars, nempe, supernaturalitatem essentialiter consistere, tum in excellentiā supra ordinem, vires et exigentiam cujuslibet naturæ creabilis, tum in prædictā eximiā unionem et conjunctionem cum ipso Deo, qualis in se est, spectato, probatur 1^o ex Scripturis. De gratiā quæ donum est supernaturale, dicitur 2 Petri 1: *Per hæc efficiamini divinæ consortes naturæ*; et 2 Cor.: *Qui adhæret Deo, unus spiritus est*. Ergo, etc. Probatur 2^o ex SS. Patribus, qui donorum supernaturalium ac præsertim gratiæ sanctificantis excellentiam ac dignitatem commendantes, perpetuò asserunt, eam in hoc præcipuè ac primariò consistere, quòd per hæc Deo intimè unimur ac Dei participes efficimur. Instar omnium satis sit hic retulisse S. Leonem: *Agnosce*, inquit serm. 1 de Nativit. lect. 6, *ô christiane! dignitatem tuam et divinæ consors factus naturæ, noli in pristinam vilitatem degeneri conversatione redire*.

Prob. 3^o speciatim ex S. Thomā, qui supernaturalitatem in quādam divinitatis, ut in se est, participatione positam esse passim docet, præsertim verò 1-2, q. 112, art. 1, his verbis: « Donum gratiæ excedit omnem facultatem naturæ, cum nihil aliud sit, quàm quædam participatio divinæ naturæ, quæ excedit omnem aliam naturam, et ideo impossibile est, quòd aliqua creatura gratiam causet. Sic enim necesse est quòd solus Deus deificet communicando consortium divinæ naturæ, per quamdam similitudinis participationem, sicut impossibile est quòd aliquid igniat, nisi solus ignis. » Et 3 part. quæst. 2, art. 10 ad 1: « Gratia, inquit, quæ est accidens, est quædam similitudo divinitatis participata in homine. » Ibidem quæst. 3, art. 4 ad 3: « Assumptio quæ fit per gratiam adoptionis, terminatur ad quamdam participationem divinæ naturæ secundum assimilationem ad bonitatem illius; secundum illud 2 Petri 1: *Divinæ consortes naturæ*, » etc. Idem sæpius repetit S. doctor.

Prob. 4^o ex constanti omnium ferè theologorum doctrinā, qui contra Major, Molinam, et paucos alios, statuunt, dari non posse substantiam supernaturalem. Porro si ita sit, mani-

festè sequitur supernaturalitatem positam esse in elevatione supra ordinem, vires et exigentiam cujuslibet naturæ creabilis; adeoque donum supernaturale creaturam in ordine divino constituere. Ita expressè tradunt Cajetanus, Salmaticenses, Suarez, d'Aguirre, Bellarminus, Sylvius, Estius, etc., locis antea citatis.

Prob. 3^o nonnullis momentis theologicis. 1^o Nulla alia occurrit circa præsentem controversiam probabilior opinio, uti constat ex cæteris modò confutatis hanc in rem sententiis. 2^o Nullum agnoscitur ens *quoad entitatem* supernaturale, quod non superet naturam creatam et creabilem, quodque creaturam in ordine divino non constituat; sic gratia, gloria, aliaque accidentia, quæ theologi supernaturalia agnoscunt, ordinem cujuslibet creaturæ possibilis excedunt, eamque in ordine divino collocant; et vice versâ nullum admittitur ens naturale quod supra ordinem, vires et exigentiam naturæ creabilis positum sit; ergò supernaturalitas in prædictâ elevatione et ordinatione meritò reponitur. 3^o Quemadmodum post S. Thomam ratiocinatur Sylvius 1 p. q. 12, art. 5, ens supernaturale illud est quod ordinatur ad Deum ut in se est, et ut in se immediatè attingitur; Deus enim sic spectatus præcipuum est entium supernaturalium, est ens *essentialiter* supernaturale, à quo cætera omnia *participativè* supernaturalia sunt et dicuntur; atqui Deus ut in se est, et per visionem intuitivam possidendus, ordinem, exigentiam et vires tum physicas, tum etiam intentionales cujuslibet possibilis creaturæ longè superat; ut enim loco mox citato discurret doctor Angelicus. « Ubi modus « essendi alicujus rei cognitæ excedit modum « naturæ cognoscentis, oportet quòd cognitio « (clara et intuitiva) illius rei sit supra naturam « illius cognoscentis; » porrò modus essendi Dei est supra conditionem et vires cujuscunque intellectus creati; Dei ergò, ut in se est, clara et intuitiva visio, cujuslibet intellectus creati vires excedat, necessum est.

Dices 1^o: Vix concipi ac explicari potest quâ ratione Deus, ut in se est, sese creaturæ communicare et participandum præbere possit, atque ipsam ad ordinem divinum elevare; ergò entis supernaturalitas in illâ elevatione et communicatione reponi nequit. Resp. rem de quâ firmis argumentis constat, non idcirco in dubium revocandam esse, quia *modus rei* vix à nobis explicari potest: *Numquid negandum est quod est apertum*, inquit S. Aug. L. de dono perseverant, c. 14, *quia comprehendere non potest*

quod occultum est? Porrò exemplo Incarnationis, visionis beatificæ, gratiæ sanctificantis manifestè patet, quoddam esse divinæ communicationis genus, quo Deus, ut in se est, sese communicat, atque naturam creatam in ordine divino constituit; ergò, etc. Quòd autem *modus*, quo fit ejusmodi communicatio et elevatio, vix à nobis concipiatur, communis est omnium mysteriorum difficultas.

Dices 2^o: Res naturales aliquatenus consortes sunt divinæ naturæ, et habent aliquam divinitatis participationem; ergò, etc. Resp. duplicem esse modum quo fieri possumus divinæ consortes naturæ: unum quidem, quo Deus aliter ac in se est, communicatur; alterum verò quo sicut in se est, sese communicat; aut qui per se disponit ad assequendam communicationem Dei, ut in se est; prior *modus naturalis* est, posterior *supernaturalis*, in eoque rationem supernaturalitatis positam esse contendimus.

Dices 3^o: Quidquid in naturâ creatâ finito modo recipi potest, illud ad naturam rei creatæ propriè pertinere meritò dici potest; atqui aliqua Dei, ut in se est, communicatio, v. g., visio beatifica, finito modo in naturâ creatâ recipi potest; ergò aliqua Dei communicatio, ut in se est, ad naturam rei creatæ propriè pertinere potest; ac proinde in eâ communicatione immeritò reponitur entis supernaturalitas. Resp. duobus modis aliquid posse finito modo in naturâ creatâ recipi. 1^o Tanquam aliquid naturæ proprium ac debitum. 2^o Sicuti aliquid ipsi adveniens et indebitum, gratuitoque beneficio concessum. Equidem illud naturale dici potest, quod in naturâ creatâ finito modo recipitur priori sensu, non autem posteriori; porrò quælibet Dei, ut in se est, communicatio in naturâ creatâ recipitur non ut propria et debita, sed duntaxat tanquam aliquid ipsi indebitum, gratuitoque beneficio concessum; nulla ergò Dei, ut in se est, communicatio, naturalis dici potest, et ad naturam rei creatæ propriè pertinere; nihil proinde obstat ex hâc parte, quin in prædictâ communicatione supernaturalitatis ratio constituatur. Etverò uti postea dicemus quæsito 4, ex hypothesi quòd communicatio Dei, ut in se est, ad propriam rei alicujus conditionem et naturam pertineret, tum ista natura, in quâ hujusmodi communicatio reciperetur, ejusdem esset ordinis cum Deo, nec jam esset creata, sed divina.

Ex dictis huc usque colliges ex S. Thomâ aliisque post ipsum communiter theologis, su

pernaturalitatem primariò et essentialiter consistere tum in excellentiâ supra ordinem, exigentiam et vires activas, tum physicas, tum intentionales ejuslibet naturæ tam creatæ quàm creabilis; id est, quod supernaturale dicitur, à nullâ naturâ creatâ produci, aut intuitivè cognosci potest; tum in mirâ Dei, ut in se est, communicatione, id est, in eximiâ quâdam cum ipso Deo, qualis in se est, spectato, conjunctione et unione; aut *reali et physicâ*, qualis est, *hypostatica unio*; aut *intentionali* proximâ, qualis est visio beatifica; aut *intentionali* mediâtâ et minùs proximâ, qualia sunt gratia sanctificans, virtutes theologicæ, aliaque hujusmodi dona, quæ ad assequendam ipsius Dei, sicut in se est, possessionem ex naturâ suâ ordinantur, ac per se disponunt.

Andentur entia quoad substantiam supernaturalia. Respondeo affirmativè. Namque existunt reipsâ unio hypostatica naturæ humanæ cum divinâ, visio beatifica, lumen gloriæ, gratia tum actualis, tum justificans, habitus et actus fidei, spei et charitatis, aliarumque virtutum moralium: porrò ista omnia sunt quoad substantiam supernaturalia; ergò existunt entia quoad substantiam, seu quoad entitatem, supernaturalia. Major fide certa est; minor verò tum ex sese constat, tum ex modò dictis de ideâ et notione entis supernaturalis.

Quotuplex sit supernaturale. Respondeo aliquid variis modis dici posse supernaturale. 1° Supernaturale aliud est. propriè, simpliciter et absolute; aliud verò impropriè, secundum quid et relativè. Supernaturale propriè, simpliciter et absolute, illud est quod ejuslibet naturæ creatæ et creabilis vires omnes et exigentiam excedit; ita visio beatifica, gratia justificans, cæteraque hujusmodi dona in vulgatissimâ theologorum sententiâ, quam mox paucis stabiliemus, quæ asserit repugnare substantiam supernaturalem. Supernaturale impropriè, secundum quid et relativè, illud est, quod alicujus duntaxat, non totius naturæ vires et exigentiam superat: sic intuitivè videre substantiam spiritalem, est supra conditionem hominis mortalis, non Angeli aut animæ à corpore separatæ. Hujus divisionis frequens est apud recentiores mentio. 2° Supernaturale propriè simpliciter et absolute rursus duplicis est generis: aliud *quoad entitatem*; aliud *quoad modum* duntaxat.

Supernaturale *quoad entitatem*, donum est, ut antè diximus, 1° totius naturæ ordinem, vires et exigentiam superans; 2° elevans et ordinans creaturam ad Deum ut auctorem gratiæ

et gloriæ, id est, ad Deum ut in se spectatum et per visionem intuitivam possidendum; 3° creaturam in esse divino constituens, illam reddendo divinæ naturæ consortem.

Supernaturale *quoad modum* duntaxat, illud est, inquit Ripalda, L. 1 de ente supernat. disput. 1, sect. 3 et 4, quod secundum entitatem continetur intra vires aut exigentiam naturæ; secundum modum verò quo producitur, seu acquiritur, universam naturam excedit; seu pressius, supernaturale *quoad modum* tantum, est donum naturale collatum modo supernaturali, hoc est excedente vires ejuscumque naturæ creatæ, ut resurrectio Lazari, restitutio visûs amissi, instantanea ac perfecta sanitatis admodum debilitatæ recuperatio, etc. Hujus divisionis meminit S. Damascen. L. 3 de Fide, cap. 2.

Porrò, quemadmodum annotat Ripalda loco mox citato, ad supernaturalitatem *quoad modum* non sufficit, ut modus quo res acquiritur aut producitur, sit supra vires unius aut alterius subjecti; sed requiritur insuper ut universæ naturæ creatæ vires et exigentiam superet. Scilicet, supernaturalia *quoad modum* eum supra naturam, ratione modi supernaturalis excessum postulant, quem exigunt ratione suæ entitatis et substantiæ, supernaturalia quoad entitatem, seu quoad substantiam; atqui supernaturalia quoad substantiam, seu quoad entitatem, exigunt substantiam, seu entitatem quæ superet vires et exigentiam totius naturæ; ergò, etc.

Juvat hic observare, id omne quod est supernaturale *quoad entitatem*, simul esse supernaturale *quoad modum*; at non vice versâ; ejus quidem discriminis ratio hæc est, quòd res in se naturalis, modo supernaturali, id est, supra vires et exigentiam naturæ conferri possit; è contrâ verò res in se, seu entitativè supernaturalis, utpotè omninò excedens vires et exigentiam ejuslibet naturæ creatæ ad superiorem ordinem, gratuito et indebito Dei beneficio non elevatæ, modo naturali conferri nullatenus potest.

3° Supernaturale *quoad entitatem*; aliud dicitur supernaturale excellentiâ dignitatis, aliud supernaturale excellentiâ causalitatis, seu virtutis. Ita Cajetanus 1-2, q. 12, art. 6, et cum eo plures præsertim è Thomistis. Supernaturale simpliciter excellentiâ dignitatis et perfectionis, illud est, inquit prædictus auctor loco citato, quod omnem substantiam tam creatam quàm creabilem dignitate ac perfectione superat. Hoc sensu solus Deus supernaturalis est.

Eò spectat attributum Dei apud auctorem libri de divinis nominibus et alibi passim frequentissimum, quo Deus Deitasque *super-substantialis* appellatur. Supernaturale excellentiâ causalitatis, seu virtutis illud est, inquit ibid. Cajetanus, *quod est supra posse cujuslibet creaturæ*. Ita gratia, virtutes infusæ, lumen gloriæ et alia hujusmodi; quippè hæc, licet mera sint accidentia, ejus tamen, inquit, sunt excellentiæ « ut superent facultatem omnis naturæ « creatæ et creabilis, tam activè quàm passivè; « activè quidem, quia possunt in effectus quos « non potest natura aliqua (sic gratia justificans hominem divinæ naturæ consortem reddi); passivè verò, quia non possunt fieri aut « pullulare à quâcumque naturâ; » seu non possunt in causalitate aut virtute naturali contineri.

4^o Supernaturale, aliud dicitur *supernaturale essentialiter*; aliud *supernaturale participativè*. Ita Salmaticenses, d'Aguirre et alii. Supernaturale *essentialiter* illud dicitur, quod primum est ac præcipuum inter entia supernaturalia, à quo cætera omnia supernaturalia sunt et dicuntur; sic Deus, quatenus est objectum aut auctor gloriæ, solus est ac dicitur *essentialiter* supernaturalis. Supernaturale *participativè* dicitur illud omne quod ad Deum ut objectum vel auctorem gloriæ, ex naturâ suâ refertur; sic visio beatifica, gratia sanctificans, virtutes infusæ, etc.

3^o Rursus tribus modis, inquit Bellarminus lib. 1, de grat. et lib. arb. cap. 2, aliquid potest esse supernaturale; 1^o simpliciter et absolute; ut si ex genere suo et secundum substantiam sit ordinis altioris, quales sunt actus virtutum infusarum, fidei, spei, charitatis, etc.; 2^o non simpliciter et absolute, sed ratione statûs; sic homo per peccatum debilitatus, multa non potest sine auxilio speciali efficere, quæ in statu innocentie et integritatis absque hujusmodi auxilio facillè effecisset. 3^o ratione modi, temporis, personæ, aut cujusvis alterius circumstantiæ; sæpè enim accidit, ut id, quod neque ex genere suo, neque ratione statûs, vires naturæ superat, easdem tamen superet ratione alicujus circumstantiæ: v. g., poterit homo sanus per se molem aliquam loco dimovere; non poterit tamen sine alterius auxilio, si alteram manum duntaxat adhibeat, aut si loco parum idoneo, vel moles ipsa, vel ipse fuerit constitutus. Verùm ultima hæc supernaturalis divisio ex parte coincidit cum iis quas 1 et 2 loco adduximus.

Denique alii addunt rursus aliud esse super-

naturale in genere activi, et in genere passivi. Supernaturale in genere activi, illud est, inquit, quod est supra vires agentis naturalis, etiam posito concursu ordinario et ipsi debito; tales sunt actus fidei, spei et charitatis. Supernaturale in genere passivi, est id quo naturalem creaturæ exigentiam superat; sic gratia ad actum supernaturalem eliciendum, est supra exigentiam naturæ nondum elevatæ. Non aridet ultima hæc *supernaturalis* divisio: nam, ut antea probavimus, quod agentis naturalis vires superat, non tamen continuo dicitur supernaturale, nisi ipsius itidem exigentiam superet.

De substantiâ creatâ supernaturali. — Observa 1^o, nomine *substantiæ creatæ supernaturalis*, hic intelligi, substantiam cui connaturalis esset intuitiva Dei visio; ac proinde aut ipsi connaturale esset et debitum lumen gloriæ; aut illa per se, et sine auxilio elevante Dei essentiam videre posset. Observa 2^o, alio etiam sensu dici posse substantiam creatam supernaturalem, eam scilicet, cui connaturales essent actus supernaturales et meritorii vitæ æternæ; ac proinde aut cui connaturalis esset et debita gratia ad hosce actus exercendos necessaria; aut quæ sine gratiâ ex sese et per sola principia naturalia hæc in vitâ bonos actus virtutis meritorios vitæ æternæ exerceret. Observa 3^o, certum esse ac constans apud omnes catholicos, nullam de facto dari substantiam creatam priori sensu supernaturalem; is enim fuit unus è præcipuis Beguardorum et Beguinarum error, *quòd quælibet intellectualis natura in seipsâ naturaliter est beata, quòdque anima non indiget lumine gloriæ ipsam elevante ad Deum videndum, et eo beatè fruendum*; qui quidem error disertè proscriptus fuit in concilio Viennensi Clementinâ *Ad nostrum*, de hæreticis. Observa 4^o, Pelagianos nedum possibilem, sed et actu existentem agnovisse substantiam posteriori sensu supernaturalem; siquidem contendebant hominem absque ullo supernaturali et indebito gratiæ auxilio per solas naturæ vires posse hæc in vitâ bonos et supernaturales actus virtutis vitæ æternæ meritorios elicere; is fuit Pelagianorum error à S. Augustino potissimum impugnatus et variis in conciliis damnatus. Observa 5^o: Qui cum Baio et Jansenio asserunt, *integritatem primæ creationis non fuisse indebitam naturæ humanæ exaltationem, sed naturalem ejus conditionem*, illi, velint nolint, fateantur necessum est, eodem posteriori sensu dari substantiam creatam supernaturalem, ut vel ex solo terminorum intuitu patet; nullum

quippe majus debitum, debito naturæ; si ergo gratia naturæ integræ debita sit, profectò et ipsi connaturalis dicenda est. Observa 6^o, has duas posteriores sententias æqualiter agnoscere actus vitæ æternæ meritorios substantiæ creatæ connaturales esse; in eo autem easdem inter se differre, quòd Pelagiani illos tribuant naturæ absque gratiâ; è contra verò Baii discipuli gratiam ad eosdem actus necessariam velint naturalem esse hominis conditionem; undè manifestè patet ipsos omnem funditùs evertere donorum gratiæ gratuitatem et supernaturalitatem. Visio siquidem intuitiva necessariò et essentialiter debetur gratiæ; hoc certum; gratia autem in eo systemate non est *indebita naturæ exaltatio, sed naturalis ejus conditio*, ipsissima sunt Baii verba: porrò debita naturæ humanæ exaltatio, naturalis ejus conditio, abusivè prorsus et illusoriè gratuita et supernaturalis diceretur. Verùm de his uberiùs in decursu tractatùs.

His præsuppositis, quaeritur hic an possibilis sit substantia cui connaturalis sit visio beatifica. Circa quam questionem duplex potissimum est sententia. Prima omnium est ferè theologorum, tam veterum, quàm recentiorum, qui duce S. Thomâ 1 p., q. 12, art. 5, negant ejusmodi substantiam possibilem. Ita Cajetanus, 1 p., q. 12, art. 5; Alvares de Auxiliis, disp. 79; Curiel, 1 - 2, q. 112, art. 1, dub. 1; Zumel, ibid. disp. 4; d'Aguirre, tom. 1, tract. 1, disput. 10; Antonius Perez in Laureâ Salmant. Suarez, Vasquez, Bellarmin. Sylvius, etc., quorum alii contrariam sententiam temerariam, alii periculosam, alii falsam et omninò rejiciendam pronuntiant.

Secunda sententia paucorum aliorum est, qui possibilem esse talem substantiam supernaturalem sentiunt. In eam ex antiquis inclinavit Major in quartum dist. 49. quæst. 4, ubi asserit, *non esse omninò certam repugnantiam substantiæ exigentis connaturaliter visionem beatificam*. E recentioribus verò Molina, 1 p., q. 12, art. 5, disput. 2, ibi opinionem hanc veluti dubiam proponit. *Primus omnium quos legerim*, inquit Card. d'Aguirre, loco mox indicato, *Ripalda, lib. 1, de ente supernaturali disp. 24, sect. 4, affirmativam partem, ut omninò probabilem amplexus est*.

His præmissis, ad questionem mox propositam respondeo nullatenùs possibilem esse substantiam creatam supernaturalem, seu substantiam, cui connaturalis sit visio beatifica, sive ipsi connaturale sit et debitum lumen glo-

riæ, sive illa per sola principia naturalia et sine auxilio elevante Dei essentiam intuitivè videre possit. Non est hujus loci quæstionem hanc fusiùs pertractare; è multis quibus ista sententia adstrui potest argumentis, pauca et quidem efficaciora seligemus. Itaque

Prob. 1^o ex Scripturis. 1 Ad Timoth. 6, de Deo dicitur: *Qui lucem inhabitat inaccessibilem; quem nullus hominum vidit, sed nec videre potest*, scilicet, naturæ viribus. Ast lux illa quam inhabitat Deus, naturæ viribus non esset inaccessibleis, nimirum absolutè, ut sonant apostoli verba, si possibilis esset substantia creata supernaturalis; huic enim connaturale esset et debitum lumen gloriæ, connaturalis visio beatifica. Ergò, etc. Et verò suprema illa Dei inaccessibleitas oritur ex infinito ipsius excessu, qui certè locum habet, tam in ordine ad omnes substantias intellectuales possibiles, quàm existentes; ergò, etc.; atque ita præoccupatum manet palmare adversariorum effugium, prædicta Apostoli verba interpretantium, non de quibuscumque substantiis creatis etiam possibilibus, sed de iis duntaxat quæ de facto existunt.

Prob. 2^o ex SS. Patribus qui nostræ sententiæ apertè favent. Satis sit hic instar omnium retulisse S. Aug. qui Epist. 147, aliàs 112, expendens mox exscripta Apostoli verba, sic loquitur: *Si queris quomodo Deus dictus sit invisibilis, si videri potest? Respondeo invisibilem esse naturâ; videri autem cum vult, sicut vult*. Quibus verbis, non obscurè innuit S. doctor, divinam majestatem transcendere naturalem quarumcumque substantiarum intellectualium notitiam, illamque longè supergredi, solùmque manifestari pro suæ voluntatis arbitrio et speciali auxilio; et lib. 12 de Civitate Dei, cap. 10: *Creatura, inquit idem S. doctor, non ex seipsâ potest esse beata, quia ex nihilo creata est; sed ex illo à quo creata est*; cùm ergò omnis creatura, non solùm existens, sed et possibilis, ex nihilo essentialiter creata sit, nulla proinde potest esse ex seipsâ beata; porrò, si dari potest creatura cui connaturale esset lumen gloriæ, cui connaturalis esset visio beatifica, dari quoque posset creatura quæ ex sese foret beata; siquidem in illâ intuitivâ et beatificâ visione, formalis creaturæ intellectualis beatitudo essentialiter consistit. Ergò, etc.

Prob. 3^o ex constanti omnium fermè theologorum doctrinâ; circa quod vide Card. d'Aguirre, tom. 1, disput. 10, sect. 1, et ipsummet Ripalda, tom. 1 de ente supernaturali, disput. 23, sect. 1,

Probatur 4^o momentis theologicis. Primum : Si dari posset substantia creata intellectualis quæ per se et sine auxilio elevante sibi indebito videret Deum, dari quoque posset substantia creata sancta per se et impeccabilis; siquidem sanctitas et impeccabilitas ex visione beatificâ necessariò consequuntur; atqui repugnat dari substantiam creatam sanctam per se et impeccabilem. « Bonum quod vitari non potest », inquit S. Aug. lib. de verâ religione cap. 19, Deus est, cætera autem omnia bona ex ipso sunt, quæ per seipsa possunt vitari, « quia per seipsa nihil sunt. » Consentiant alii SS. Patres. Etverò, quemadmodum docet S. Thomas, 1 p., q. 65, art. 1, « cuicumque creaturæ hoc convenit ut peccare non possit; hoc habet ex dono gratiæ, non ex conditione naturæ. Siquidem (inquit ibidem S. doctor) divina voluntas sola est regula sui actûs; quia non ordinatur ad superiorem finem; omnis autem voluntas cujuslibet creaturæ rectitudinem in suo actu non habet, nisi secundum quòd regulatur à voluntate divinâ... igitur in solâ voluntate divinâ peccatum esse non potest : in quâlibet autem voluntate creatâ (quamdiù sibi ipsi relicta est) potest esse peccatum secundum ordinem suæ naturæ. » Ergò, etc.

Secundum : Fide certum est, uti antè demonstravimus ex concilio Viennensi, nullam actu dari substantiam creatam intellectualem quæ Deum ex sese, et absque auxilio elevante intuitivè videre possit; porrò et quæ ratio probat creaturam intellectualem, quæ nunc datur, non posse per se et sine auxilio indebito et supernaturali Deum intuitivè videre, eadem probat et de omni naturâ creabili. Enimverò, sicuti ratiocinatur S. Thomas, 1 p., q. 12, art. 4, creatura intellectualis quæ nunc datur, non potest Deum intuitivè videre absque auxilio indebito et supernaturali, quoniam est in diverso genere immaterialitatis et proindè postulat per aliquod auxilium superius ad participationem quamdam ipsius esse divini, quod est in summâ immaterialitate elevari; atqui quælibet natura creabilis, quantumcumque supponatur perfecta, foret in diverso genere immaterialitatis; neque enim foret suum esse subsistens, sicut est Deus; ergò, etc. Et certè uti ibidem discurrit Angelicus doctor, facultatem cognoscitivam inter et objectum connaturale debet esse proportio saltem habitudinis, ita quòd objectum non debeat esse superioris ordinis quoad immaterialitatem; atqui Deus,

utpotè purissimus, illimitatus et infinitus, superioris est ordinis et generis quoad immaterialitatem; ergò, etc.

Tertium : Repugnat naturam creatam Deum esse; porrò substantia creata supernaturalis, cui connaturale esset et debitum lumen gloriæ, connaturalis visio beatifica, Deus foret. Namque substantia cui connaturalis est et debita virtus alteri propria, ejusdem est naturæ cum ipsâ; porrò lumen gloriæ, sicut et gratia, virtus est Deo propria; unde per eam ellicimur *divinæ consortes naturæ*, 2 Petri 1; *filiî Dei nominamur et sumus* 1 Joan. 3. Ergò lumen gloriæ, sicut et gratia, non potest esse alicui substantiæ connaturale et debitum, quin ejusdem naturæ sit cum ipso Deo, ac proindè quin habeat esse divinum. Hinc S. Thomas, loco mox laudato: « *Lumen gloriæ, inquit, non potest esse naturale creaturæ; nisi creatura esset naturæ divinæ, quod est impossibile; per hoc enim lumen fit creatura rationalis Dei formis.* »

Quartum : Repugnat creatura intellectualis quæ intrinsecè et connaturaliter exigit unionem realem, substantialem et hypostaticam cum personâ divinâ; ergò pariter repugnat creatura connaturaliter exigens unionem realem et intentionalem cum essentiâ divinâ. Porrò creatura supernaturalis cui debita esset et connaturalis Dei visio, ex sese exigeret unionem realem et intentionalem cum essentiâ divinâ sub ratione speciei intelligibilis, seu impressæ; visio enim beatifica, ut observat S. Thomas 1 p., q. 12, art. 5, non aliter oritur ab intellectu creato, quàm fecundato ab ipsâ essentiâ divinâ realiter ipsi unitâ sub munere speciei impressæ; ergò, etc.

Quintum : Cognoscibilitas quidditativa sequitur entitatem, sicut et proprietas essentiam; ergò, quemadmodum entitas, ita et cognoscibilitas divina longè transcendit ac supergreditur omnium creaturarum possibilitium vires et exigentiam, ac proindè nulli creaturæ etiam possibili, connaturalis et debita esse potest intuitiva Dei visio; idque pertinet ad sublimitatem majestatis divinæ. Quamobrem adversarii, dum videntur partes agere omnipotentiae divinæ, asserendo Deum posse producere creaturam naturaliter capacem ipsum videndi, depri-munt sanè non minimum summam ejus excellentiam ac majestatem, assignatâ creaturâ possibili, cui secundum se spectatæ, suæ divinitatis fulgorem abscondere nequeat.

Probatur 5^o, evertendo præcipua adversæ sententiæ fundamenta.

Opponunt 1^o adversarii : Deus potest producere substantiam ex naturâ suâ æquè perfectam, ac perfectus est intellectus simul cum lumine gloriæ ; siquidem intellectus cum lumine gloriæ est quid merè finitum ; atqui intellectui lumine gloriæ fecundato connaturalis est et debita intuitiva Dei visio ; ergò, etc. Respondeo, simili argumento probaretur possibilem esse creaturam quæ ex propriâ naturâ præsciat futura contingentia, occulta cordium, libera Dei decreta ; quæ etiam miracula propriè dicta connaturaliter operetur : quandoquidem conflatum ex intellectu et lumine, seu illustratione elevante, cui debetur notitia futurorum contingentium, occultorum cordis, secretorum Dei, finitum est, ut patet ; idem dicendum de creaturâ quæ ex speciali Dei motione et qualitate supernaturali transitoriâ operaretur miracula : attamen hæc omnia impossibilia esse, tum ex sese, tum ex unanimi theologorum consensu constat ; de quo videri possunt d'Aguirre tom. 1 ; theolog. S. Anselm. disp. 10, sect. 3 et 5, Valentia. 1, p. q. 8, puncto 5 ; Vasquez, disp. 208, cap. 1, etc. Itaque nego maj. et ad ejus probationem dico, etsi compositum ex intellectu creato et lumine gloriæ, sit quid merè finitum ; attamen substantia creata quæ ex naturâ suâ huic composito æquivaleret, foret, ut antea probavimus, ex se sancta, impeccabilis, imò Deus ; quod omnino repugnat.

Opponunt 2^o : Dari potest substantia creata perfectior et perfectior in infinitum, ac proinde ejus perfectio eò usque ascendere potest, ut intellectus lumine gloriæ imbuti perfectionem adæquet. Respondeo posse quidem in ordine naturæ produci substantiam creatam perfectiorem et perfectiorem in infinitum, non tamen eò usque ut intellectus lumine gloriæ imbuti, perfectionem æquet ; talis enim substantia foret supernaturalis ; porro ex dictis repugnat substantia creata supernaturalis, quoniam Deus esset.

Opponunt 3^o : Substantia creata supernaturalis non repugnat, nec quatenus substantia est, Deus enim substantia est supernaturalis ; nec quatenus creata, dantur enim accidentia supernaturalia ; ergò nullâ ex parte implicat. Respondeo, substantiæ creatæ repugnare supernaturalitatem, nec quâ præcisè substantia, nec quâ præcisè creata, sed quatenus utrumque simul complectitur, scilicet quâ substantia creata et supernaturalis.

Opponunt 4^o : Dari potest et reipsâ datur accidens supernaturale, v. g., fides, spes, cha-

ritas ; quidni ergò et substantia supernaturalis ? Respondeo, nego conseq. ; argumentum istud si valeret, probaret non tantum possibilem esse, sed etiam actu existere substantiam supernaturalem ; quemadmodum actu dantur accidentia supernaturalia. Disparitatis ratio in eo est, ut indicat S. Thomas, 1-2, q. 110, art. 1 ad 2, quòd accidens supernaturale sit id, quo natura supra seipsam extollitur ; at licet naturalis substantia supra seipsam elevari possit, repugnat tamen, eam per se exigere, ut supra naturalem suam conditionem elevetur :

« Quia gratia, inquit S. D. loco mox citato, est supra naturam humanam, non potest esse se quòd sit substantia, aut forma substantialis, sed est forma accidentalis ipsius animæ. »

Opponunt 5^o : Cæteræ Dei perfectiones creaturis communicari possunt, v. g., quòd sit intelligens, volens, bonus, sanctus, etc. ; ergò et ista, quòd Deus sit substantia supernaturalis. Respondeo 1^o, aliquas esse Dei perfectiones quæ creaturis communicari non possunt ; v. g., independentia, omnimoda puritas, simplicitas perfecta, etc. Resp. 2^o, duplicis generis esse perfectiones divinas : aliæ præscindunt ab esse divino, ut intelligentem esse ; aliæ non præscindunt, sed earum conceptus includit aut saltem connotat esse divinum, ut esse ens independentens, purissimum, simplicissimum, etc. Priores perfectiones participari possunt, non verò posteriores : porro esse substantiam supernaturalem, pertinet ad posterius genus. Resp. 3^o, inter illas Dei perfectiones quæ creaturis communicari possunt, et ejus substantiam supernaturalem, istud discriminis esse, quòd perfectiones illæ, quantumlibet sint in creaturis, non tamen sunt ipsis propriæ, essentielles et connaturales, sed extrinsecæ et accidentales ; è contra verò, ratio substantiæ supernaturalis, si creaturæ competeret, ipsi foret intrinseca, propria et essentialis ; omnis enim substantia est ad se non est aliud.

An dona supernaturalia producantur per creationem. — Sunt qui arbitrantur gratiam justificantem, et quodlibet aliud donum supernaturale è subjecto non educi, sed per veram creationem produci. Ita Alensis parte 2, quæst. 9, n. 4 et 8 ; Scotus, in 4, dist. 1, art. 4, q. 5 ; Ferrariensis, 4 contragentes cap. 57 ; Ledesma, Vega, etc. ; at alii longè plures docent dona supernaturalia actione eductivâ, non creativâ produci. Ita S. Thomas, variis in locis, præsertim verò 1-2, q. 110, art. 2 ad 3 ; Cajetanus ibidem, et parte 3, quæst. 62, art. 1 ; Curiel,



Zumei, Medina 1-2, q. 112, art. 1 et 2; Suarez lib. 2 de grat. cap. 2; Sylvius p. 1, q. 45, art. 4, etc. Juxta ultimam hanc sententiam.

Respondeo 1^o, gratiam aliaque dona supernaturalia verè et propriè non creari. Ita S. Thomas, loco mox citato, et quæst. 5 de potent. art. 8 ad 5. « Gratia, inquit, cum non sit forma subsistens... propriè non creatur. » Et quæst. 27 de Verit. art. 5 ad 9: « Creari propriè est rei subsistentis... formæ autem non subsistentes, sive substantiales, sive accidentales, non propriè creantur. » — Prob. 1^o Id quod creatur ita pendet à Deo, ut à nullo alio pendeat in quovis genere causæ; eò enim differt creatio à quolibet alio productionis modo; atqui gratia in aliquo genere causæ pendet ab alio quàm à Deo, nimirum in genere causæ materialis, à subjecto, sine quo citra miraculum non potest existere; ergo gratia verè et propriè non creatur. Major certa est, minor verò constat; cum enim gratia sit forma accidentalis, habet eundem existendi modum, quem habent omnia accidentia; hic autem modus necessarium importat dependentiam à subjecto, sine quo ut non potest inesse, ita nec esse, si secludatur miraculum. Eo ratiocinio utitur Sylvius loco mox laudato. — 2^o Gratia non annihilatur quando corrumpitur; ergo nec creatur quando producit. Consequentia patet, quia contrariorum eadem est ratio. Antecedens autem docet S. Thomas, p. 1, q. 104, art. 4, ubi universaliter asserit, tam in operibus gratiæ quàm naturæ non intervenire annihilationem. Et verò, sicuti creatio est productio ex nihilo, tum sui, tum subjecti, hoc est, productio entis independenter à presupposito subjecto; ita annihilatio est destructio entis nullo ipsius remanente subjecto; porro, dum in homine destruitur gratia, remanet anima quæ proprium est gratiæ subjectum; ergo, etc... Ita ratiocinatur Cajetanus parte 3, quæst. 62, art. 1. — 5^o Productio actuum gratiæ, etiam visionis beatificæ, non est creatio; ergo neque productio habituum gratiæ, aliorumque donorum supernaturalium. Antecedens constat, quia actus illi efficiuntur à nobis cum auxilio gratiæ; at, uti fatentur omnes, anima, etiam cum gratiæ auxilio, nihil efficit per creationem. Consequentia verò probatur, quia actus illi, perinde ac habitus gratiæ, sunt supernaturales. Etsi autem gratia, aliaque habitus supernaturales, in nobis verè et propriè non creantur; attamen moraliter et latiori quodam sensu dici possunt in nobis

TH. X.

creari; quatenus nempe, uti observat S. Thomas, 1-2, q. 110, art. 2 ad 3, dona supernaturalia nobis infunduntur nullis præcedentibus meritis viribus naturæ elicitis, atque ita quodammodo fiunt ex nihilo moraliter, id est, ex nullo merito, ut interpretatur doctor Angelicus: *Secundum hoc gratia dicitur creari*, inquit S. D. loco mox citato, *ex eo quòd homines secundum ipsam creantur, id est, in novo esse constituentur ex nihilo, id est non ex meritis.* Hinc illud Apostoli ad Ephes. 2: *Creati in Christo Jesu in operibus bonis*, et cap. 4: *Induite novum hominem qui secundum Deum creatus est.* Hinc etiam illud Psalm. 50: *Cor mundum crea in me, Deus.*

Respondeo 2^o, gratiam (idem dicendum de aliis donis supernaturalibus) non educi è naturali potentiâ subjecti. Ratio est, quia forma intrinsecè supernaturalis è naturali virtute subjecti educi nequit; atqui gratia est forma intrinsecè supernaturalis; ergo, etc... De hac assertionem nemini dubium esse potest, inquit Sylvius loco antea laudato, cum omnibus Orthodoxis constet, gratiam non esse quippiam nobis naturale, aut quod naturæ viribus acquiri possit, cujusmodi sunt ea quæ ex naturali potentiâ subjecti educuntur. Hinc S. Thomas, in 1, dist. 17, quæst. 2, art. 2, in corp.: « Dona gratuita, inquit, non educuntur quasi de potentiâ naturæ; quia nihil est in potentiâ naturali quod per agens naturale educi non possit, et ideò origo gratiæ est per novam infusionem. » Idem repetit quæst. 5 de potent. art. 8 ad 15.

Respondeo 3^o, gratiam educi de potentiâ animæ obedientiali. Ita auctores supra citati, quibus adde Bannes. 2-2, q. 24, art. 7, dub. 2; Salmaticenses; Joannem à S. Th. Gamachæum Puteanum ad præsentem quæst. et alios non paucos. Ratio est, quia ut aliqua forma dicatur educi de potentiâ subjecti, satis est quòd eâ ratione in ipsius potentiâ contineatur, ut neque fieri, neque conservari possit, nisi in subjecto in quo recipitur; atqui gratia eo modo se habet respectu substantiæ spiritualis, animæ v. g.; ergo meritò dicitur de potentiâ illius educi. Et verò, cum inter creationem et educationem nullum detur medium; aliud verò ex dictis præcedenti responsione constat gratiam aliaque dona supernaturalia non educi è naturali animæ potentiâ, restat ut ex ipsius obedientiali potentiâ educi dicantur.

An potentia obedientialis passiva dicenda sit supernaturalis? — Respondeo hæc in parte dis-

sentire theologos. Alii existimant potentiam hanc passivam, formaliter et intrinsicè supernaturalè esse. Sententiam hanc refert ac refellit Ripalda lib. 1 de Ente supernat. disput. 8, sect. 1, et meritò quidem. Namque perfectio debita naturæ, non est formaliter et intrinsicè supernaturalis; dona enim supernaturalia, omne debitum, præsertim naturæ, excludunt; atqui potentia obedientialis passiva, naturæ debita est, siquidem fluit ex supremo et essentiali dominio Dei in creaturas; ergo, etc.

Alii cum Scoto in 4, dist. 10, quæst. 8, et dist. 49, quæst. 9, censent potentiam passivam ex quâ dona supernaturalia educuntur, omninò naturalem esse, non solum prout naturæ opponitur supernaturali, verum etiam ut opponitur violento et ad utrumque indifferenti; undè facultatem recipiendi dona supernaturalia arbitrantur inesse naturæ cum positivâ inclinatione et innatâ propensione ad illa; atque ut istud probent utuntur S. Augustini testimonio lib. de Prædest. SS. cap. 5: « Posse habere fidem, sicut posse habere charitatem, naturæ est hominum; habere autem fidem, quemadmodum habere charitatem gratiæ est fidelium. »

Refellitur ista sententia efficaci hocce ratio-
cinio: Innatus et positivus appetitus, innata ac positiva inclinatio et propensio non fertur nisi in bonum quod viribus naturæ cognoscere et assequi homo potest; aliàs, natura frustra indidisset hujusmodi appetitum; atqui nullus homo dona supernaturalia propriis naturæ viribus consequi, imò nec cognoscere potest. Primum fides docet; alterum verò, longè communior est Theologorum opinio, præeunte doctore Angelico, p. 1, q. 17, art. 5, et in 4, dist. 10, art. 4, quæst. 4, idque manifestè colligitur ex allatâ superiùs supernaturalitatis notionem, juxta quam diximus naturale illud esse quod totius naturæ vires, tum physicas, tum intentionales, id est vim intelligendi excedit; ergo, etc. Locus autem S. Aug., lib. de Præd. SS., c. 5, perperam adducitur ab adversariis; loquitur enim S. doctor de merâ hominis capacitate recipiendæ fidei et charitatis, in quo natura rationalis ab irrationali secernitur. Ita textum S. Aug. interpretantur S. Fulgentius, lib. de Incarnat., cap. 24: « Naturam habemus, inquit, credulitatis fidei capacem, quod animalibus irrationalibus datum divinitus non est. » S. Prosper, aut qui auctor est librorum de vocat. gent. lib. 2, cap. 8, ubi de homine lapso loquens, ait: *reparabi-*

lem et sanabilem esse, de naturâ; reparatum autem et sanatum, de gratiâ. Et S. Thomas, 1-2, q. 113, art. 10, ex objectis S. Augustini verbis probat quòd *naturaliter anima est gratiæ capax.*

Ast non loquitur S. Augustinus citato loco de potentia activâ aut passivâ merè naturali quæ positivam inclinationem et innatam propensionem ad dona supernaturalia importet; nihil enim antiquius SS. Patribus ac præsertim S. Augustino quàm dona hujusmodi supra omnem mentis create sibi relictæ cognitionem, adeoque etiam supra omnem naturam ac positivam propensionem constituere. Ita docet S. doctor, lib. 15 de Trinit., cap. 16, et lib. de Symbolo ad Catechumenos.

Et verò loquendo de potentia activâ, etiam ab actu sejunctâ, posse credere, posse Deum sicut oportet diligere, ac generaliter posse benè in ordine supernaturali operari, non naturæ esse hominum, sed Dei gratiæ, passim manifestè tradit S. Augustinus, lib. 1 ad Bonifac., cap. 2: « Quid est quòd iste (Julianus) libero arbitrio vult benè vivendi tribuere potestatem, cum hæc potestas non detur nisi gratiâ Dei per Jesum Christum Dominum nostrum. » Lib. de grat. Chr., cap. 25: « Non solum Deus posse nostrum donat atque adjuvat, sed etiam velle et operari; » et infra: « Non quia idonei sumus aliquid cogitare à nobis, quasi ex nobismetipsis; sed sufficientia nostra ex Deo est. » Denique, ut cætera prætermittam, lib. de Corrept. et grat., cap. 11, loquens de gratiæ adjutorio Angelo et primo homini ante lapsum concessio, sic habet: « Si autem hoc adjutorium vel Angelo, vel homini, cum primùm facti sunt defuisset, quoniam non talis natura facta erat, ut sine adjutorio posset manere si vellet, non utique suâ culpâ cecidissent; adjutorium quippè defuisset, sine quo manere non possent. » Audis S. Augustinum asserentem excusabiles fuisse, et absque suâ culpâ cecidisse Angelum et hominem, si, cum primùm facti sunt, gratiæ auxilium ipsis defuisset; supponit ergo gratiam esse necessariam vel ipsi naturæ innocenti, tum ut agat, tum ut possit bonum naturale operari potentia etiam ab actu sejunctâ; excusatio enim ut sit legitima, cujuslibet veræ ad oppositum potentie exclusionem necessariò importat. Adde quòd juxta eundem S. doctorem primus homo absque adjutorio *sine quo*, non potuisset bonum operari et in bono perseverare, eodem modo quo utrumque poterat præsentem tali adjutorio; atqui homo primus beneficio adjutorii *sine quo*,

potuit bonum operari et in bono perseverare potentiâ duntaxat ab actu sejunctâ; ergo nequidem tali potentiâ, absque eo adiutorio potuit homo primus bonum operari et in bono permanere; porro, si homo innocens non potuit bonum supernaturale operari absque gratiâ, etiam potentiâ ab actu sejunctâ; quantô magis idem dicendum de homine lapso? Verum de citato textu alibi erit disputandi occasio.

Alii tandem, quorum sententia longè est vulgarissima, docent 1^o, potentiam passivam obedientialem realiter et entitativè non distingui à potentiâ naturali; aliâs, inquit, daretur processus in infinitum. Docent 2^o, potentiam hanc obedientialem virtualiter et connotativè ab eâdem potentiâ naturali distingui; scilicet, eadem actualiter entitas prout respicit effectus naturales, dicitur potentia naturalis; quatenus verò respicit effectus supernaturales, dicitur potentia obedientialis. Docent 3^o, potentiam hanc passivam ex quâ dona supernaturalia educuntur, simpliciter et absolutè nec naturalem, nec supernaturalem dicendam esse, sed obedientialem. Ita doctor Angelicus locis antea citatis; Cajetanus, p. 1, q. 12, art. 1; Ferrariensis 3 contra gentes, cap. 102; Medina 1, 2, q. 3, art. 8; Bannes, Victoria, Cajetanus, Suarez, Ripalda et alii; huic sententiæ tanquàm multò probabiliori adhærendum censemus.

Etsi autem (quod observa) nonnulli cum Scoto dixerint potentiam obedientialem passivam omninò naturalem esse, nullus tamen ex orthodoxis theologis reperire est, qui idem pronuntiaverit de potentiâ obedientiali activâ. Quin vel ipsemet Scotus supra laudatus, disertè fatetur et probat, nullam esse activam potentiam naturalem ad eliciendos actus supernaturales, aut alia dona supernaturalia efficienda. Verum de his alibi plenius, ubi de parte dogmaticâ hujusce tract. de gratiâ.

An omne donum gratuitum sit donum supernaturale, et vice versâ?—Antequàm respondeam, observa cum S. Thomâ antea laudato 1, 2, q. 111, art. 1 ad 3, duplex esse debitum, unum quidem ex merito proveniens, quod refertur ad personam, et dicitur debitum *personæ*; aliud verò est debitum naturale, sive secundum conditionem naturæ, et dicitur debitum *naturæ*; gratuitum ergo quod opponitur debito, dici potest, vel quatenus opponitur debito *personæ* duntaxat; vel quatenus opponitur debito tantum *naturæ*; vel prout utrique opponitur. Rursus gratuitum dici potest, vel relativè et secundum quid, id est, alicui deter^minatè naturæ; vel, simpliciter

et absolutè, id est, cuilibet naturæ creatæ et creabili. His præmissis, respondeo 1^o, donum ut gratuitum, quatenus excludit debitum *personæ* duntaxat, non esse supernaturale; namque creatio hocce sensu gratuita est, neque tamen simpliciter et absolutè dici potest beneficium supernaturale. Respondeo 2^o, donum ut gratuitum, quatenus excludit debitum non omni, sed alicui duntaxat naturæ propriè et simpliciter dici non posse supernaturale. Ratio est quia concursus ad universam legem naturalem adimplendam necessarius, homini lapso indebitus est et gratuitus; atqui concursus ille non est propriè et simpliciter supernaturalis; siquidem homini in statu naturæ puræ constituto à Deo concessus fuisset; ergo, etc.

Respondeo 3^o, donum ut gratuitum, quatenus opponitur debito tum personæ, tum naturæ creatæ et creabili, verè et propriè esse supernaturale; et vice versâ. Istud apertè sequitur ex adductâ supernaturalis notione; scilicet, supernaturale illud est, quod totius naturæ vires et exigentiam superat; porro quod omne tum *personæ*, tum *naturæ* etiam creabilis debitum excludit, cujuslibet profectò naturæ vires et exigentiam superat; et vicissim quod totius naturæ etiam creabilis vires et exigentiam excedit, omne prorsus tum personæ, tum naturæ debitum excludit: ergò, etc.

An et quodnam discriminis sit miraculosum inter et supernaturale?—Respondeo nonnihil discriminis esse: omne quidem miraculosum est supernaturale, at non vicissim. Scilicet ad veri proprièque dicti miraculi rationem tria requiruntur. Primum, ut ejus causa sit occulta, non solum respectivè et in ordine ad aliquos sicut rustico occulta est causa eclipseos, non astronomo; sed etiam absolutè et respectu omnium, quatenus nempe nulla causa in naturâ reperiri potest hujusce effectûs productrix. *Miraculum dicitur*, inquit S. Th. p. 1, q. 103, art. 7, *quod habet causam simpliciter et omninò occultam*; et lib. 3 contra gentes, cap. 101: *Illud simpliciter mirum est, quod habet causam simpliciter occultam, et hoc sonat nomen miraculi*. Secundum, ut fiat præter communem ordinem, seu solitum cursum naturæ, non unius vel alterius, sed totius. *Illâ*, ait doctor Angelicus citato cap. 101, lib. 3, contra gentes, *simpliciter miracula dicenda sunt, quæ divinitus fiunt præter ordinem communem servatum in rebus*. Duobus autem modis aliquid fieri potest præter communem rerum naturalium ordinem, 1^o positivè, cui natura quodammodò re-

sistit, sicut resistit penetrationi corporum; aut quod natum est quidem fieri per naturam, sit tamen contra modum, aut dispositiones quas natura postulat, ut gravissimi morbi repentina ac perfecta curatio. 2^o *Negative*, cui natura non resistit, et quod natum non est à naturâ produci, ut creatio et justificatio. Miraculum debet esse præter ordinem priori modo, ita scilicet ut in rebus aut in rerum ordine sit aliquid propter quod non debeat sic fieri; sive ut in rebus appareat aliqua dispositio, quæ juxta ordinem earum naturalem requirat aliter fieri. Hinc S. Th. quæst. 6 de potent. art. 2, in corp.: « Secundum se aliquid est mirum, » cujus causa simpliciter est occulta, et quando in re est contraria dispositio, secundum naturam, effectui qui apparet; et ista non solum possunt dici mira... sed etiam miracula, quasi habentia in se admirationis causam. » Et infra: « Illa quæ solâ virtute divinâ fiunt in rebus illis in quibus est naturalis ordo ad contrarium effectum vel ad contrarium modum faciendi, dicuntur propriè miracula. » Hujus conditionis defectu creatio et justificatio, prout communiter fit, non sunt propriè loquendo veri nominis miracula.

Dixi, *prout communiter fit*, quia, ut advertit Sylvius, 1-2, q. 114, art. 1, conclus. 3, justificatio est aliquando verè et propriè miraculosa, quando scilicet Deus modo insolito, subito scilicet et perfectè, quosdam convertit, præsertim si etiam exterius aliquid insolitum conjungatur. Tales fuere conversiones S. Pauli Act. 9, S. Aug., Genesii et plurium aliorum. Atque hinc patet in ordine supernaturali perinde ac in ordine naturali dari veri nominis miracula, cum nempe nonnulla præter aut contra consuetum gratiæ cursum contingunt. Ubi observa cum eodem Sylvio, 1 p., q. 105, § 7. 7, miraculum dici *insolitum*, non ex eo aræcisè quòd frequenter non fiat, sed quia præter aut contra consuetum ac solitum gratiæ aut naturæ cursum contingit; undè licet quotidie fiat transubstantiatio panis et vini in corpus et sanguinem Christi, non tamen desinit esse miraculum.

Tertium, quod ex præcedenti sequitur, vera miracula sunt supra omnem causarum naturalium virtutem, ac proinde solâ virtute divinâ fieri possunt. Hinc Scriptura uni Deo tribuit miracula; Psalm. 71: *Benedictus Deus Israel qui facit mirabilia solus*; et Psalm. 135: *Qui facit mirabilia magna solus*. Christus propterea suam divinitatem contra Judeos per miracula

ostendens, ait Joann. 5: *Opera quæ ego facio, testimonium perhibent de me*; et cap. 15: *Si opera non fecissem in eis quæ nemo alius fecit, peccatum non haberent*, scilicet, infidelitatis. Idem testantur SS. PP. et præsertim S. Aug. lib. 22 de civit. Dei, cap. 3 et sequentibus, et S. Th. lib. 3 contra gentes, cap. 102. Et verò sicut solus Deus est totius naturæ et gratiæ, ordinisque naturalis et supernaturalis institutor; ita solus præter aut contra totius naturæ et gratiæ solitum cursum operari potest.

Ex tribus supra dictis ad veri nominis miraculum necessariò requisitis, primum et tertium sufficiunt ut aliquid dicatur supernaturale, nec requiritur secundum; scilicet necessum non est ut sit præter communem rerum ordinem *positive*, ita ut natura ipsi resistat; undè impii justificatio, prout communiter fit, est supernaturalis, nec tamen miraculosa. Itaque omne miraculum est supernaturale; at non è contra, omne supernaturale dici potest miraculosum.

An, et quid sit discriminis *supernaturale inter et præternaturale*? — Antequàm respondeam, observa ex dictis quæsito præcedenti, variis modis aliquid dici posse præternaturale, 1^o latissimè, quod nempe rarò fit, juxta tamen communes ac cognitatas quibusdam saltem, naturæ leges; hoc sensu insoliti quidam celorum et astrorum motus qui rarissimè contingunt, et quorum causa solis peritioribus cognita est, improprio quodam sensu præternaturales dici possunt. 2^o Latiori etiam et improprio sensu præternaturale dici potest, quod novum est, inauditum, inusitatum, omnibusque prorsus incognitum, licet reipsa ex statutis naturæ legibus necessariò sequatur; hoc improprio sensu præternaturalis nomen usurpavit auctor recentior. Supponit ille Deum res universas, non speciales, sed generali duntaxat voluntate moderari, certasque ac generales leges statuuisse, certam motus quantitatem et determinationem, modificationes certas sic impressisse materiæ, ut ex earum concursu, coherentiâ, collisione, uno verbo, mechanicâ dispositione certò sequantur effectus omnes, etiam illi qui magis speciales et stupendi apparent, uti visus restitutio cæco nato, repentina ac perfecta ingravescentis morbi curatio, etc., qui quidem effectus non alio titulo præternaturales et miraculosi habendi sunt, inquit auctor ille, quàm quòd novi sint et inusitati, eorumque causa, licet naturalis, nobis tamen prorsus incognita. Quantum, systema illud in

religionem periculi invehat, quantum vim et naturam miraculorum evelat ac imminuat, nemo est qui facile non intelligat. 3^o Rursus improprie et abusive præternaturale dici potest, quod fit ab extrinseco virtute quâdam naturali, reluctante passo; sic projectio aut sustentatio lapidis sursum, etc., hoc sensu præternaturale coincidit cum violento. 4^o Iterum præternaturale dicitur id omne quod virtute divinâ fit præter communem naturæ ordinem, statutas naturæ leges, sive *positivè*, sive *negativè*, id est, sive natura ei resistat ac reluctetur, sive non. 5^o Tandem strictè et propriè dicitur præternaturale illud quod fit *positivè* præter communem naturæ ordinem, id est, contra modum, dispositiones aut exigentiam naturæ. His præmissis,

Respondeo 1^o, præternaturale triplici priori sensu usurpatum omnino distare à supernaturali: res est per se clara et ab omnibus concessa. Et verò supernaturale illud est quod totius naturæ vires et exigentiam excedit; porro præternaturale tribus antea assignatis sensibus, totius naturæ vires non superat; ergo, etc. Respondeo 2^o, præternaturale ultimo sensu acceptum, pro eo scilicet quod fit *positivè* præter communem naturæ ordinem, ex parte differre à supernaturali. Ratio est, quia juxta hanc acceptionem, omne præternaturale ipsissimum est miraculum, ac proinde est supernaturale; excedit enim totius naturæ vires; at non vicissim. Respondeo 3^o, præternaturale sumptum quarto sensu, quatenus nimirum significat id quod fit præter solitum naturæ cursum, sive *negativè*, sive *positivè*, coincidere cum supernaturali; siquidem supernaturale generatim id omne dicitur quod totius naturæ vires et exigentiam excedit, sive *negativè*, sive *positivè*, id est, sive natura ei resistat, sive non; ergo, etc.

Ex dictis hucusque patet quid sit naturale, violentum, præternaturale, contranaturale, miraculosum, supernaturale. 1^o Naturale illud est, quod est vel ipsa natura, vel pars naturæ, vel fluit ex principiis naturæ, ipsique quoquomodo debitum est, sive debitum illud ex merito *personæ*, sive ex debito *naturæ* proveniat; vel pressius, naturale illud dicitur, quod intra naturæ vires aut exigentiam continetur. Ita Bellarminus, Sylvius, Ripalda et alii. 2^o Violentum illud dicitur, quod est à principio naturali extrinseco, nihil conferente, imò repugnante passo; seu quod est à principio extrinseco contra inclinationem agentis. Ita

S. Thomas, 1-2, q. 6, art. 5. 3^o Præternaturale strictè et propriè, illud est, quod fit præter naturæ ordinem *positivè*, id est, ita ut natura ei resistat; seu, præternaturale illud est quod fit præter ordinarium solitumque cursum naturæ, ita scilicet ut in rebus aut in rerum ordine sit aliquid quod requirat non sic fieri, aut etiam aliter fieri. Ita S. Thomas, quæst. 6 de potent. art. 2; Sylvius p. 1, q. 103, art. 7; Grandin. disp. 1 de Fide, quæst. 1, sect. 3, parag. 2, etc. 4^o Contranaturale et miraculosum propriè et exactè loquendo coincidunt cum præternaturali. Ita iidem; quibus adde Salmaticenses, d'Aguirre, Ripalda, etc. 5^o Supernaturale illud est quod omnem omnino virtutem et exigentiam causarum naturalium superat; sive natura quodammodo resistat, sicut resistit penetrationi corporum; sive non resistat, sicut non resistit justificationi; sive rarò, sive sæpius contingat, quemadmodum sacramentorum operatio, transubstantiatio panis in corpus Christi, virtutum infusarum actus, et alia hujusmodi opera supernaturalia. Ita S. Thomas locis antea citatis, Cajetanus, Ferrariens, Medina, Canus, Sylvius et alii.

ARTICULUS III.

De existentia gratiæ.

Existere gratiam certius est quàm ut in eo demonstrando diutius immorandum sit; id enim passim inculcant Scripturæ, tradunt SS. Patres, demonstrat ratio.

1^o Gratia existentiam perpetuò commendant Scripturæ. Psalmo 85: *Gratiam et gloriam dabit Dominus*. Joan. 1: *Lex per Moysen data est, gratia et veritas per Jesum Christum facta est*. Actuum 7: *Stephanus plenus gratiæ et fortitudinis*. Ad Rom. 1: *Per quem (Christum) accepimus gratiam*. 1 Petr. 5: *Humilibus autem dat gratiam*. Hinc S. Aug. enarrat. in Psalm. 70: *In omnibus, inquit, Scripturis sanctis, gratia Dei quæ liberat nos, commendat se nobis*.

2^o Eadem catholicam veritatem constanter docent SS. Patres, præsertim verò S. Augustinus libris maximè contra Pelagianos; undè lib. de corrept. et grat. cap. 1, doctrinam de existentia et necessitate gratiæ, *veram et propheticam, et apostolicam, et catholicam fidem*, appellat sanctus Doctor.

3^o Idem evincitur momentis theologicis. 1^o Oratio apertissimum est existentia gratiæ argumentum: *quid verò evidentiùs*, inquit S. Aug. lib. de grat. et liber. arbit. cap. 4, *quàm Dei ostenditur gratia, ubi quod oratur accipitur?* et rursus Epist. 177, aliàs 193: *oratio, claris-*

sima est gratiæ testificatio. 2^o Gratiarum actio pariter ostendit gratiæ existentiam : *An et ista irrisoria petitio est*, inquit idem S. doctor. lib. dono persever. cap. 2, *cum id ab eo petitur quod scitur non ipsum dare, sed ipso non dante esse in hominis potestate ; sicut et irrisoria est etiam illa gratiarum actio, si ex hoc gratiæ aguntur Deo, quod non donavit ipse, nec fecit ?* 3^o Tandem gratiæ existentia demonstratur ex discrimine quod intercedit dilectionem humanam inter et divinam ; scilicet, quemadmodum observat S. Thomas 1-2, quæst. 110, art. 1, dilectio humana, utpote sterilis et inefficax, non causat ipsam creaturæ bonitatem, sed præsupponit eam, vel *in toto*, vel *in parte* ; at verò, dilectio divina, utpote actiosa et efficax, non præsupponit bonum in creaturâ sed illud causat ; porrò donum homini concessum, ex supernaturali Dei dilectione et benevolentia procedens, id ipsum est quod nomine gratiæ intelligitur ; ergò, etc.

ARTICULUS IV.

De divisione gratiæ.

Multiplex est gratiæ divisio ; varias hasce divisiones sigillatim referemus ; quæ sunt levioris momenti summatim proponemus, fusiùs dicturi de iis quæ sunt præcipuæ, et aliquâ disputatione celebrari solent apud Theologos.

Prima gratiæ divisio. — Dividitur 1^o in gratiam increatam et creatam ; fundatur ista divisio in doctrinâ S. Th. 1-2, q. 110, art. 1, part. 3 et q. 2, art. 10 ; pervulgata est apud veteres præsertim theologos. Ita Magister in 1, dist. 17, parte 3, Alensis quæst. 61, membro 1 ; Marsilius in 2, dist. 27, art. 1 ; Abulensis Matt. 19, quæst. 178. Eandem divisionem usurpant Salmaticenses tractatu 14, disput. 1, cap. 1, paragr. 2 et 3 ; Salmeron tom. 1. super Epist. S. Pauli lib. 1, proœm. part. 2, disp. 7 ; Bellarm. lib. 1 de grat. et lib. Arb. cap. 2 ; Suarez de gratiâ prolegom. 3, cap. 1 ; Estius in 2, dist. 26, paragr. 1 ; Sylvius 1-2, quæs. 110 ; art. 1, et alii.

Gratia increata hic propriè loquendo, æternus est ac supernaturalis Dei erga homines amor, quo eos diligit in ordine ad vitam æternam. Sic Suarez loco mox citato : « Amor divinus, inquit, quo Deus nos diligit est gratia Dei ; amor autem ille increatus est ; est ergo gratia increata. » Et rursus : « ipsa voluntas Dei, amor et prædestinatio rectissimè dicitur gratia increata. » Sic etiam Sylvius 1-2, q. 110, art. 1, conclus. 2 : « Ita sumitur gratia pro speciali et æternâ Dei erga

« nos dilectione ac benevolentia... et hæc gratia cum re non differat ab ipso Deo, est increata. »

Gratia verò creata, ea omnia generatim sunt ordinis supernaturalis beneficia, quæ ex æterno Dei amore, ut effectus ex causâ procedunt. « Gratia creata (inquit Bellarm. citato cap. lib. 1. de Grat. et lib. Arbit.) dicuntur beneficia vocationis et justificationis, quæ ex æternâ gratiâ, ut effectus ex causâ derivantur. » Utrumque hujusce divisionis membrum paucis his verbis complexus est doctor Angelicus. parte 3, quæst. 2, art. 10, « Gratia dupliciter dicitur : uno modo ipsa voluntas Dei gratis aliquid dantis ; alio modo ipsum gratuitum donum Dei. » Et 1-2. q. 110, art. 1 : « Gratia Dei (increata), inquit S. doctor, dicitur ipsa æterna Dei dilectio, secundum quod dicitur etiam gratia prædestinationis.... alio modo significat quiddam supernaturalis in homine à Deo proveniens. » Gratia priori sensu spectata, dicitur increata ; posteriori verò sumpta, pro dono scilicet creato, gratia creata appellatur.

Circa prædictam gratiæ divisionem, observa 1, cum Estio et Sylvio locis citatis gratiam increatam antea exposito sumptam, pro actu scilicet divinæ voluntatis, quo homines diligit in ordine ad vitam æternam, *reipsâ non esse aliquid à Deo, divinâque essentiâ diversum* ; quidquid enim est in Deo, utpote simplicissimo, reidentificatur cum ipso, divinâque essentiâ.

Observe 2, cum iisdem Estio et Sylvio, gratiam increatam eodem sensu intellectam, esse ac meritò dici æternam. Ratio est, inquit Salmaticenses, disput. 1 de Grat. cap. 1, paragr. 3, « quia prædictus actus etiam cum terminatione illâ ad creaturas, sub quâ denominatur electio, prædestinatio, convenit Deo ab æterno... juxta illud Apost. ad Ephes. 1: *Elegit nos in ipso ante mundi constitutionem.* »

Observe 3, non æternam duntaxat Dei dilectionem et benevolentiam dici gratiam increatam ; ipsa insuper, ut advertit Suarez citato cap. 3, prolegom. 3, de Gratiâ, tum Spiritus sancti, tum Verbi divini persona, quin et tota Trinitas, verè est et propriè dicitur gratia increata. Primò persona Spiritus sancti, siquidem ut rationatur ibidem Suarez, Actorum 8, et Roman. 8 : « Spiritus sanctus appellatur per excellentiam donum Dei : omne autem donum gratum propriè appellatur gratia, ergo sicut illud donum increatum est, ita etiam est gratia increata ; » hinc S. Aug. Serm. 61 de Verbis Domini, cap. 1 : « Gratia, inquit,

« Dei donum est, donum autem maximum ipse
 « Spiritus sanctus est, et ideo gratia dicitur. »
 Ipsa etiam Verbi divini persona gratis com-
 municata humanæ naturæ, gratia fuit infinita
 et increata : « Omnes enim theologi (subdit
 « ibidem Suarez) ponunt gratiam unionis in-
 « creatam in Christo. » Tandem tota Trinitas
 vera est gratia increata, quatenus peculiari
 modo iustis confertur, juxta illud Joan. 14 :
Ad eum venimus, et mansionem apud eum facie-
mus. Et Rom. 8 : *Charitas Dei diffusa est in cor-*
dibus nostris per Spiritum sanctum qui datus est
nobis.

Observe 4, gratiam increatam se habere
 comparatè ad gratiam creatam, quemadmodum
 causa ad effectum ; ex aternâ siquidem Dei
 erga homines dilectione dimanant omnia ordi-
 nis supernaturalis beneficia hominibus à Deo
 concessa, quæ quidem ipsissima sunt gratiæ
 creatæ dona ; istud enim discriminis est, quem-
 admodum notat doctor Angelicus 1-2, q. 110,
 art. 1, dilectionem divinam inter et humanam
 quòd divina non præsupponat bonum in crea-
 turâ, sed illud causet ; humana verò non cau-
 set, sed illud præsupponat.

Observe 5, prædictam divisionem gratiæ in
 gratiam increatam et gratiam creatam, coinci-
 dere cum illâ quam proponunt Sylvius 1-2,
 quæst. 109, versùs initium, et Estius citato
 lib. 2 sentent. dist. 26 : « Notandum inprimis,
 « inquit ille, gratiam posse intelligi, vel ex
 « parte Dei, vel ex parte nostrâ ; » gratia ex
 parte Dei, seu ex parte principii, ipsissima est
 gratia increata ; gratia verò ex parte nostrâ,
 seu ex parte subjecti, ipsa est quæ ab aliis gra-
 tia creata appellatur

Secunda gratiæ divisio. — Dividitur gratia
 creata, de quâ hic potissimum quæstio, in gra-
 tiam Dei et gratiam Christi. Divisionem hanc
 admittunt S. Thomas, Cajetanus, Ferrariensis,
 Salmaticenses, Estius, Sylvius, aliique vulgò
 theologi, qui cum S. Thomâ existimant quòd
 Adamo non peccante Christus non fuisset incar-
 natus.

Gratia Dei dicitur, non præcisè quia à solo
 Deo est, sic enim omnis gratia, gratia Dei dici
 deberet, utpote cum Deus cujuscumque gratiæ
 sit auctor ; sed ita appellatur, quòd ex purâ
 Dei liberalitate donetur, sine ullo prorsus re-
 spectu ad Christum Dominum, et intuitu meri-
 torum ejus. Talis fuit in prædictorum theolo-
 gorum opinione, gratia quam contulit Deus
 Angelis et primo parenti in statu innocentie
 et justitiæ originalis.

Gratia verò Christi dicitur illa quæ homini-
 bus à Deo gratis confertur intuitu Passionis ac
 meritorum Christi Domini ; qualis est gratia
 omnis quæ in præsentî naturæ lapsæ statu da-
 tur hominibus ut resurgant à peccato et salu-
 tem æternam consequantur.

Gratia Dei alio nomine vocatur gratia sanita-
 tis, quia homini in statu innocentie et sanitatis
 concessa fuit ; gratia verò Christi dicitur me-
 dicinalis, quia per eam ab infirmitate peccati
 liberamur. De hoc utroque gratiæ adjutorio sic
 loquitur S. Augustinus lib. de Corrupt. et
 Grat. cap. 11 : « Hæc prima est gratia quæ
 « data est primo Adam : sed hæc potentior est
 « in secundo Adam. Prima est enim quâ fit ut
 « habeat homo justitiam si velit ; secunda ergo
 « plus potest, quâ etiam fit ut velit, et tantum
 « velit, tantoque ardore diligat, ut carnis vo-
 « luntatem contraria concupiscentem volun-
 « tate spiritus vincat. » Cave tamen ne inde
 inferas, in præsentî statu naturæ lapsæ gra-
 tiam interioriorem semper esse efficacem, nec ipsi
 usquàm resisti ; de quo ex professo alibi.

Prædictam divisionem, ut mox observavi,
 agnoscunt ii qui cum S. Thomâ contendunt
 Adamo non peccante futuram non fuisse Verbi
 divini Incarnationem ; ast qui cum Scoto et
 Scotistis pro adversâ stant sententiâ, docent
 consequenter, omnem omnino gratiam, non-
 nisi propter prævisa Christi merita tam Angelis
 quàm hominibus fuisse collatam ; ac proinde
 gratiam creatam, non distribuunt in gratiam
 Dei et gratiam Christi ; sed eam dividunt in
 gratiam sanitatis seu Christi ut *Capitis*, et in
 gratiam medicinale, seu Christi ut *Redemptoris*.
 Ita Poncius, Richardus de Mediavillâ,
 Suarez, Valentia, Frassen et alii. *Censerem*
rectius, inquit Frassen disput. præviâ de gratiâ
 paragr. 2, *gratiam distribui in gratiam Christi*
ut Capitis, et ut Redemptoris. Gratia Christi ut
Capitis, pergit ibidem, ea est, quæ destinata et
 collata fuit tam Angelis, quàm hominibus ante
 peccatum, propter prævisam Incarnationem
 Christi venturi, etiamsi Adamus non peccasset ;
 gratia verò Christi ut *Redemptoris*, illa est, quæ
 hominibus lapsis confertur beneficio Passionis
 et mortis Christi.

Tertia gratiæ divisio. — Dividitur gratia
 Christi, in *gratiam externam et internam*.
 Externa dicitur omne gratuitum Dei donum
 ad conversionem et salutem suo modo condu-
 cens, quod pluribus commune est, eosque
 extrinsecus afficit ; talis est gratia legis et
 doctrinæ, seu prædicationis evangelicæ, etc.

Præter ejusmodi gratias externas, aliam adhuc, videlicet interiorem, esse admittendam, sæpissimè adversus Pelagianos probat S. August. præsertim verò lib. de grat. Christi, cap. 10. Interna dicitur, omne donum gratis à Deo concessum, et conducens ad salutem æternam, quod proprium est cujuslibet hominis, seu creaturæ rationalis cui tribuitur, et interiùs cum afficit. Talis est gratia de quà loquitur Apost. Roman. 5: *Charitas Dei diffusa est in cordibus nostris per Spiritum sanctum qui datus est nobis.* Et 2 Cor. 3: *Epistola estis Christi ministrata à nobis, et scripta, non atramento, sed Spiritu Dei vivi, non in tabulis lapideis, sed in tabulis cordis carnalibus.*

Quarta gratiæ divisio. — Gratia interna divitur in gratiam gratis datam, et gratum facientem. Gratia gratis data definitur à S. Thomà 1 2, q. 111, art. 1, *ea per quam unus homo cooperatur alteri ad hoc quòd ad Deum reducat, seu, est donum gratis et absque debito homini divinitus collatum, per se et primariò conducens ad salutem aliorum promovendam.* Hæc definitio fundamentum habere videtur in istis Apost. verbis 1 Corinth. 12: *Unicuique datur manifestatio spiritus ad utilitatem, videlicet aliorum.*

Quamvis autem omnis gratia sit gratis data, alioquin non esset gratia, Rom. 4, v. 6, attamen gratiæ gratis datæ vocabulum ad prædictam duntaxat gratiæ speciem significandam meritò restringitur, duplici potissimùm de causâ. Primò quia Christus Dominus ejusmodi gratias Apostolis conferens signanter admonet, eas et gratis acceptas esse, et gratis concedendas, Matth. 10, v. 8: *Infirmos curate, mortuos suscite..... dæmones ejicite; gratis accepistis, gratis date.* Secundò, quia vulgò receptum est, nomen generis ignobiliori speciei accommodari; gratia porrò gratis data; ignobilior est gratiâ gratum faciente; hæc enim, quemadmodum declarat S. Thomas, 1, 2, q. 111, art. 5, Deo immediatè conjungit, eique hominem gratum et acceptum reddit, non ita gratia gratis data; undè Christus Lucæ 10, v. 19, commonet Apostolos, ut de donis gratiæ gratis datæ non gaudeant, sed de donis gratiæ gratum facientis: *Verumtamen, inquit, in hoc nolite gaudere, quia spiritus vobis subjiciuntur: gaudete autem, quòd nomina vestra scripta sunt in cælis.*

Gratia gratum faciens, ea est, juxta S. Thomam, art. 1 citatè mox questionis, *per quam ipse homo Deo conjungitur;* seu, donum est supernaturale gratis à Deo concessum, ad propriam et spiritualem uniuscujusque salutem

primariò et per se ordinatum; quo quidem dono quis Deo gratus et acceptus redditur, sive *dispositivè*, si sit gratia actualis, sive *formaliter*, si sit gratia habitualis sanctificans. Ejusmodi gratia designatur apud Apost. 2 Cor. 12, his verbis: *Sufficit tibi gratia mea.* Et ad Ephes. 1: *In quà gratificavit nos in dilecto filio suo.*

Circa præsentem divisionem tria quæri possunt, 1º an legitima sit; 2º an species gratiæ gratis datæ convenienter enumerentur ab Apostolo 1 Corinth. 12; 3º an gratia gratum faciens sit perfectior gratiâ gratis datâ.

Tria hæc totidem Conclusionibus resolvemus.

CONCLUSIO PRIMA. — Legitima est et adæquata divisio gratiæ, in gratiam gratis datam, et gratum facientem.

Probatur: Ea divisio legitima est et adæquata, cujus membra dividentia tres sequentes habent conditiones ad legitimam et adæquatam divisionem requisitas; 1º quòd communem generis rationem participant; 2º quòd à se invicem distinguantur; 3º quòd adæquatè genus divisum partiantur. Atquæ prædicta divisio sic se habet. Primò, membra hujus divisionis communem generis divisi rationem participant; utraque enim gratia, Dei donum est creaturæ rationali gratis à Deo concessum, per se ac primariò ordinatum ad bonum supernaturale, æternam scilicet salutem, sibi vel aliis procurandam. Secundò, à se invicem distinguuntur. Namque gratia gratum faciens primariò ac per se ad propriam salutem recipientis ordinatur; gratia verò gratis data ad aliorum salutem præcipuè refertur. Tertiò denique duo illa membra generalem gratiæ rationem adæquatè partiantur; quia omnis gratia propriè dicta per se primò ad propriam, vel ad aliorum salutem ordinatur; ergo, etc.

Dices 1º: Gratia gratis data ordinatur etiam ad salutem propriam, sicut gratia gratum faciens ad salutem aliorum; ergò membra illius divisionis non sunt opposita; nec proinde legitima est prædicta divisio. Resp. dist. ant.: Gratia gratis data ordinatur ad salutem propriam, sicut gratia gratum faciens ad salutem alienam, secundariò, concedo; primariò, nego. Reverà gratia gratis data, secundariò et per accidens, videlicet ex intentione operantis, ordinari potest ad bonum proprii subjecti; nihil enim obstat quominus, v. g., ille qui habet donum scientiæ eo benè utatur ad propriam salutem, idque fieri posse testatur S. Gregorius homil. 17 in Ezechielem, et colligitur ex illo

Dan. 12 : *Qui docti fuerint fulgebunt quasi splendor firmamenti, et qui ad iustitiam erudiunt multos, quasi stellæ in perpetuas æternitates.* Pariter gratia gratum faciens secundariò et per accidens ordinari potest ad spiritualem aliorum utilitatem, cum nempe quis ejusmodi gratiâ instructus, ea pietatis et misericordiæ opera exerceat quæ bono sint exemplo respectu aliorum, juxta illud Matth. 5 : *Sic luceat lux vestra coram hominibus, ut videant opera vestra bona, et glorificent Patrem vestrum qui in cælis est.* At verò per se et ex naturâ suâ, quasi ex proprio fine, sive intentione operis, gratia gratis data non ordinatur ad propriam recipientis utilitatem, sicuti neque gratia gratum faciens per se ordinatur ad aliorum utilitatem; porrò, ut prædictæ divisionis membra sibi invicem opponantur, sufficit quòd gratia gratis data et gratum faciens habeant diversos fines primarios et sibi invicem oppositos.

Dices 2º : Potestas ministrandi sacramenta (idem dicendum de caractere sacerdotali, jurisdictione spirituali, etc.) est donum supernaturale, ac proinde gratia propriè sumpta; atqui potestas ministrandi sacramenta ad neutram prædictarum gratiæ specierum revocatur. Non ad gratiam gratum facientem, namque primariò confertur propter bonam eorum qui sacramenta suscipiunt; nec etiam ad gratiam gratis datam referri potest, quia hæc à solo Deo confertur immediatè; at potestas ministrandi sacramenta confertur quidem à Deo, non tamen immediatè, sed hominum ministerio; ergo præfata gratiæ divisio adæquata non est. — Respondeo cum Suarez de grat. prolegom. 3, cap. 5, Sylvio 1 2, q. III, art. 1 et 4, Grandin et aliis, potestatem ministrandi sacramenta, characterem sacerdotalem, jurisdictionem et alia hujusmodi meritò referri ad gratiam gratis datam; ad hoc enim sufficit quòd sint dona supernaturalia per se primò instituta ad salutem aliorum; neque refert, inquit auctores citati, quòd hujusmodi dona conferantur hominum ministerio, videlicet episcoporum; siquidem falsum est gratias omnes gratis datas à Deo duntaxat immediatè conferri, quamvis earum aliquæ, imò et illarum præcipuæ à solo Deo conferantur immediatè.

At, inquires, Apostolus, 1 Corinth. 12, distinguit gratias gratis datas ab opitulationibus seu ministrationibus, his verbis : *Divisiones gratiarum sunt, idem autem spiritus; et divisiones ministratorum, idem autem Dominus.* Porrò potestas ministrandi sacramenta est ministratio;

igitur non est gratia gratis data. Respondeo cum Suarez loco citato, distinguendo maj. : Apostolus distinguit gratias gratis datas à ministrationibus, secundum nomen, in quantum nempe prædicta potestas dicitur modò gratia gratis data, quatenus gratis datur in ordine ad æternam aliorum salutem; nunc opitulatio seu ministratio, quatenus inservit alteri, concedo; secundum rei veritatem, nego. Ita expressè docet S. Chrysostomus homil. 29. Idem indicat doctor Angelicus in commentariis Epist. 1 ad Corinth. cap. 12, lectione 1.

CONCLUSIO SECUNDA. — Conveniens est ac legitima gratiæ gratis datæ divisio, secundum quam novem ipsius species enumerantur ab Apostolo 1 Corinth. 12. nempe fides, sermo sapientiæ, sermo scientiæ, gratia sanitarum, operatio virtutum, prophetia, discretio spirituum, genera linguarum, et interpretatio sermonum.

Probatur 1º, quia id evincere videtur auctoritas Apostoli prædictâ divisione utentis 1 Corinth. 12. Probatur 2º, quia ita expressè docet S. Thomas, 1, 2, q. 111, art. 4, cui hæc in parte plerique omnes suffragantur theologi. Probatur 3º ratiocinio ejusdem S. Thomæ loco mox citato. Gratiæ gratis datæ, inquit S. doctor, in eum finem à Deo conceduntur homini ut coperetur aliorum salutem, non quidem interiùs movendo (hoc enim solius Dei est) sed exteriùs docendo vel persuadendo; porrò ad id tria requiruntur : Primum, ut homo habeat plenam rerum divinarum cognitionem, quantum pati potest humana conditio, ut erudire et informare possit alios. Secundum, ut possit probare et confirmare ea quæ dicit; aliàs enim non esset efficax ejus doctrina. Tertium, ut ea quæ novit convenienter possit auditoribus proferre et exponere.

Ad primum, ut scilicet homo habeat plenam rerum divinarum notitiam, tria necessaria sunt, 1º ut principia cognitionis rerum divinarum certissimè teneat; id verò fit per *fidem*, quæ numeratur inter gratias gratis datas, non quatenus est virtus quædam pertinens ad sanctificationem hominis in seipso; sed prout importat quamdam supereminentem certitudinem et convictionem fidei, ex quâ homo sit idoneus ad instruendum alios de rebus divinis; 2º ut conclusiones præcipuas quæ ex altissimis fidei principiis deducuntur, perfectè calleat; id verò fit per *sapientiam*; 3º ut abundet exemplis, et ope rerum humanarum aptè et expeditè divina valeat explicare; *invisibilia enim Dei per ea quæ*

facta sunt intellecta conspiciuntur; et quantum ad hoc ponitur *scientia*, quæ est cognitio rerum humanarum. Porro sapientia et scientia computantur inter dona Spiritus sancti, in quantum important quandam abundantiam sapientiæ et scientiæ, ut homo non solum in seipso possit rectè sapere de divinis, sed etiam alios instruere, et contradicentes arguere; secundum aliam verò acceptionem enumerantur inter dona Spiritus sancti, prout nempe mens hominis est planè mobilis per Spiritum sanctum, ad ea quæ sunt sapientiæ et scientiæ.

Ad secundum, nimirum ad confirmationem eorum quæ proponit evangelicus doctor, utpote cum illa sint supra rationem divinitus revelata, requiritur ut interdum ea operetur, quæ sunt divinæ virtuti propria, et hoc dupliciter: uno quidem modo, inquit S. Thomas loco mox laudato, ut doctorsacra doctrinæ faciat quæ solus Deus efficere potest in operibus miraculosis, sive sint ad salutem corporum, et quantum ad hoc ponitur *gratia sanitarum*; sive ordinentur ad solam divinæ potestatis manifestationem, sicut quod sol stet, vel mare dividatur, et quantum ad hoc ponitur *operatio virtutum*; secundò, ut possit manifestare ea quæ solius Dei est scire, hæc autem sunt, vel futura contingentiæ, pro quibus cognoscendis ponitur *prophetia*, vel occulta cordium, pro quibus ponitur *discretio spirituum*.

Ad tertium denique, nempe ut ea quæ percipiuntur convenienter possint proferri et auditoribus exponi, necessarium est 1º ut sacra doctrinæ prædicator eo loquatur idiomate, quo possit intelligi, et secundum hoc ponitur *gratia linguarum*; 2º ut ea quæ revelata sunt, eo sensu exponat quo dictata sunt à Spiritu sancto, atque debent intelligi, et quantum ad hoc ponitur *interpretatio sermonum*; ergò prædicta gratiæ gratis datæ divisio ab Apostolo tradita, legitima est et conveniens.

Dices 1º: Gratia sanitarum, operatio virtutum, prophetia, discretio spirituum revocari possunt ad unam gratiam gratis datam, scilicet ad donum miraculorum; ergo præfata divisio non est accurata. Respondeo: Dist. consequens: Non est accurata si expendatur ad rigorem logicæ, cujus legibus divisio fieri debet in immediata membra, concedo; si moraliter et sensu theologico, nego: ad hoc enim sufficit ut prædicta divisio complectatur omnia genera et species omnes gratiarum quæ dicuntur gratis datæ. Adde cum S. Thomà citato

art. 4 ad 3, gratiam sanitarum à generali operatione virtutum meritò distingui, quia speciali modo ad fidem christianam inducit, quatenus nempe ad Christum promptius faciliusque ille convertitur, qui beneficia Christi per salutem recuperatam experitur, quam qui externa miracula, divinam quidem virtutem demonstrantia, sed sibi nihil proficua cernit; similiter etiam *prophetia*, et *discretio spirituum*, habent speciales quasdam rationes movendi ad fidem; et ideò, inquit S. doctor, rectè ponuntur speciales gratiæ gratis datæ.

Dices 2º: Multa alia sunt dona supernaturalia ad spiritualem aliorum utilitatem ex se primò ordinata, quæ non videntur comprehendi sub assignatis novem gratiæ gratis datæ speciebus: hujusmodi sunt character Ordinis, seu potestas ministrandi sacramenta, *opitulationes*, *gubernationes*, etc., de quibus loquitur Apostolus 1 ad Cor. 12; ergo adducta gratiæ gratis datæ divisio in novem species adæquata non est. Respondent Suarez, Vasquez, Bellarminus, Lorea et alii, citato cap. 12 Epist. 1 ad Corinth. non fuisse propositum Apostolo recensere omnes omnino gratias gratis datas, sed earum duntaxat præcipuas; undè ad finem ejusdem capituli, sicuti et ad Rom. 12, quasdam alias enumerat, nimirum *Apostolos*.... *opitulationes*, *gubernationes*, etc. Respondent alii cum Ysamberto, Meratio, etc., quòd character Ordinis, seu potestas ministrandi sacramenta, jurisdictionis, etc., quamvis et gratis et in aliorum utilitatem dentur, atque ita pertineant ad gratias gratis datas, non sunt tamen gratiæ gratis datæ eo modo quo de illis citato loco agit Apostolus. Sermo enim hic est de gratis quæ sic sunt in aliorum utilitatem, sicque donantur gratis, ut non sit in liberà hominum facultate illas consequi, etiamsi velit, sed ex solà Dei voluntate pendeant, et à Deo solum immediatè conferantur; porro potestatem ministrandi sacramenta multi possunt si velint accipere, atque hæc confertur quidem à Deo, non tamen immediatè, sed hominum ministerio.

Respondent denique plerique alii, quòd aliæ quæ afferri possunt gratiæ gratis datæ, reductivè pertinent ad aliquas ex dictis novem; sic, v. g., character seu potestas ministrandi sacramenta commodè revocari potest ad eam gratiæ gratis datæ speciem, quæ dicitur *operatio miraculorum*; similiter ad eandem, vel etiam ad gratiam sapientiæ aut scientiæ reduci possunt *opitulationes* et *gubernationes*, etc. Ita Sylvius, Estius, Frassen, etc.; huic ultimæ

responsioni tanquàm probabiliori et doctrinæ sancti Thomæ conformiori adhærendum censemus. Itaque adducta Apostoli divisio legitima est, conveniens et adæquata.

Ex dictis facile est colligere quæ sit propria et accurata notio uniuscujusque et supra assignatis novem gratiæ gratis datæ speciebus.

Fides, prout est gratis data, describi potest, *Certissimus et firmissimus assensus, seu eximia quædam ac supereminens mysteriorum fidei intelligentia et convictio, ex quâ homo fit idoneus ad ea aliis exponenda, necnon ad intrepidè et firmiter illa defendenda.* Ita Sylvius post S. Thomam 1-2, q. 111, art. 4. *Sermo sapientiæ est accurata rerum divinarum notitia, cum promptitudine easdem aliis proponendi, explicandi et defendendi, per divinas et æternas causas, et per propria fidei principia.* Sermo verò scientiæ, dicitur eorumdem notitia cum promptitudine aliis eadem exponendi per effectus, exempla, et alia sensibilia; ita etiam S. Th. loco mox citato. *Gratia sanitarum, virtus est supernaturalis sanandi corpora, per quam potest quis alteri fidem specialiter persuadere.* Operatio virtutum est, quâ quis in fidei confirmationem miracula operari potest. Qualiter operatio virtutum distinguatur à gratiâ sanitarum, supra diximus. *Prophetia, ex S. Th. 2-2, q. 171, est, ea cognitio, quâ res occultæ, præsertim futuræ vel alioquî à cognitione nostrâ procul remotæ, ex divinâ revelatione cognoscuntur, ut aliis manifestari possint.* Discretio spirituum est ea gratia, per quam quis intima cordis alterius ita perscrutatur, ut discernere valeat quo spiritu moveatur ad loquendum vel operandum. Per genera linguarum intelligitur donum, quo aliquis ex speciali Dei beneficio diversis linguis uti potest, ut intelligatur ab omnibus quibus fidem annuntiat. Per interpretationem verò sermonum, intelligitur donum quo quispiam potest obscura et difficilia, præsertim quæ in Scripturis revelata sunt interpretari. Ita horumce donorum notiones tradunt SS. Patres Greg. Nazianz. orat. 44; Chrysost. homil. 29; Thomas 1-2, q. 111, et in Comment.; eodem pariter sensu eas explicant Salmaticenses, Suarez, Sylvius et alii plerique.

CONCLUSIO TERTIA. — Gratia gratum faciens perfectior est atque dignior gratiâ gratis datâ Ita S. Thomas, art. 1-2, q. 111. art. 5. et cum eo omnes theologi.

Prob. 1^o, quia postquàm Apostolus recensuit gratias gratis datas 1 Corinth. 12, ait v. 52: *Adhuc excellentiorem viam vobis demonstro, intelligens, charitatem, quæ procul dubio per-*

tinet ad gratiam gratum facientem Prob. 2^o ex SS. Patribus, præsertim S. Aug. lib. 85. Questionum, quæst. 27, ubi idipsum expressè docet. Prob. 3^o, quia gratia gratum faciens nos conjungit Deo, refertque ad finem ultimum per se et immediatè; gratia verò gratis data non item, cùm per se ordinetur duntaxat ad utilitatem proximi; ergo, etc.

Dices: Gratia quæ per se spectat bonum commune nobilior est eâ quæ ex se ordinatur ad bonum duntaxat particulare; atqui gratia gratis data per se ordinatur ad bonum commune, nempe ad bonum totius Ecclesiæ; gratia verò gratum faciens ex se tendit ad utilitatem duntaxat proprii subjecti; ergò, etc.

Respondeo distinguendo maj.: Cæteris paribus, concedo; secus, nego; porro cætera non sunt paria, gratia enim gratum faciens per se immediatè hominem conjungit Deo, gratia verò gratis data non item; ergò, etc. Adde gratiam gratum facientem referri ad bonum commune, eo ipso quo refertur ad Deum; Deus enim est fons et origo atque centrum totius bonitatis.

Quæres 1^o, an gratiæ gratis datæ sejungi possint, vel à se invicem, vel à gratiâ gratum faciente. Respondeo affirmativè. 1^o Certum est, hæc dona à se invicem separari posse, sicuti constat ex his Apost. verbis 1, ad Corinth. 12: *Alii datur per Spiritum sermo sapientiæ, alii sermo scientiæ, etc.* 2^o Certum etiam est, gratiam gratum facientem posse esse sine gratiâ gratis datâ. Ratio est, quia gratiæ gratis datæ à Deo conferuntur hominibus ad salutem proximi promovendam; atqui ad hoc opus non deputantur omnes justi. 3^o Rursus certum est, vicissim gratiam gratis datam posse esse sine gratiâ gratum faciente, dicente Christo Domino Matth. 7: *Multi dicent mihi in illâ die: Domine, Domine, nonne in nomine tuo prophetavimus.... et in nomine tuo virtutes multas fecimus? et tunc confitebor illis, quia nunquàm novi vos.*

Quæres 2^o, an et in quo dona Spiritûs sancti distinguantur à gratiis gratis datis.

Respondeo distingui in eo quòdonis homo perficiatur in ordine ad se, ad hoc nimirum ut instinctum atque motionem Spiritûs sancti promptè sequatur; at gratiæ gratis datæ hominem perficiunt ad hoc ut aliorum saluti procurandæ idoneus fiat. Rationem hanc discriminis declarat S. Thomas, 1-2, q. 68, art. 1, et quæst. 111, art. 1 et 4.

Quæres 3^o, an gratiæ gratis datæ sint habitus, an actus duntaxat, seu motiones transeuntes.

Respondeo cum Bellarmino et Sylvio, ex no-

ven gratiis gratis datis, quæ enumerantur ab Apostolo, quinque videri habitus permanentes, *fidem*, videlicet, *sapientiam*, *scientiam*, *genera linguarum*, *interpretationem sermonum*; quatuor verò reliquas, *gratiam sanitatum*, *operationem virtutum*, *prophetiam*, et *discretionem spirituum*, plerumque esse motiones transeuntes per modum actûs. Hujus responsionis ratio est, inquit prædicti auctores, quia habitibus utimur, quando volumus; atqui quinque prioribus gratiis utebantur sancti pro libito et datâ occasione, ac occurrente utilitate publicâ; è contra verò posterioribus quatuor non semper poterant uti ad nutum, sed pro loco duntaxat et tempore, prout nempe movebantur specialiter à Spiritu sancto; ergo, etc.

Quinta gratiæ divisio. Gratia gratum faciens dividitur in habitualem, et actuaalem. Habituaalis est ea quæ confertur per modum habitûs, seu qualitatis fixæ et permanentis, hominemque disponit ad vitam æternam. Hæc autem habitualis gratia triplex est, scilicet gratia sanctificans seu justificans, virtutes infusæ, et dona Spiritûs sancti. Gratia habitualis sanctificans, ea est quâ homo fit justus formaliter; ejusmodi gratia designatur his Christi verbis Joan. 14, v. 25: *Si quis diligit me, sermonem meum servabit, et Pater meus diliget eum, et ad eum veniemus, et mansionem apud eum faciemus.* Donum enim quo Deus manet in homine est aliquid permanens, fixum et stabile. Eamdem gratiam significat S. Aug. Epist. 187, aliàs 57, ad Dardanum, ubi docet in parvulis baptizatis, quantumvis id nesciant, habitare Spiritum sanctum; et concil. Viennense, in Clement. de summâ Trinit. et fide catholicâ cap. unic., asserit ejusmodi gratiam parvulis conferri juxta probabiliorem tam veterum quàm recentiorum theologorum sententiam.

Hujus habitualis gratiæ sanctificantis duplicem effectum distinguit hic S. Th. 1-2, q. 111, art. 2, unum formalem, alterum effectivum. Prior in eo est, ut hominem Deo gratum et acceptum reddat; posterior, ut eum inclinet ad opera bona; pro nativâ nimirum omnium habituum conditione, qui semper inclinant ad actus sibi consentaneos. Ratione prioris effectûs, inquit S. doctor, gratia dicitur operans; ratione posterioris, gratia cooperans.

Virtutes infusæ sunt illæ quæ propriis naturæ viribus acquiri non possunt, sed à solo Deo animæ infunduntur; dividuntur in virtutes theologicas, et morales, de quibus alibi.

Dona Spiritûs sancti sunt habitus supernatu-

rales quibus homo disponitur ut promptè moveatur à Spiritu sancto ad quasdam præstantissimas actiones eliciendas. Hujusmodi septem numerantur, videlicet, donum sapientiæ, intellectûs, scientiæ, consilii, pietatis, fortitudinis et timoris; quorum quatuor priora pertinent ad intellectum, tria verò posteriora ad voluntatem.

Gratia actualis ea est quæ per modum actûs, seu motionis Dei transeuntis conceditur; gratiam hanc exprimit Apost. ad Philip. 4, his verbis: *Vobis datum est non tantum ut in eum credatis, sed etiam ut pro illo patiamini.* De istâ præsertim gratiâ disputat S. Aug. contra Pelagianos, ejusque varios actus describit lib. de Grat. Christi. Hujusmodi gratiæ actualis auxilium necessarium est ad eas omnes exercendas operationes quæ aliquo modo naturæ vires excedunt.

Tribus autem modis, ut observat Bellarminus lib. 1 de Grat. et libero Arb. cap. 2, operatio aliqua vires naturæ excedere potest. 1^o simpliciter et absolutè, ut si operatio ex genere suo et secundum suam substantiam sit ordinis altioris, nempe supernaturalis, quales sunt actus virtutum theologicarum fidei, spei et charitatis. 2^o Non simpliciter et absolutè, sed ratione infirmitatis et peccati; quemadmodum enim ægrotus erigere se et sustentare non valet, nisi juvetur ab alio, cujus adjutorio non indigeret si sanus esset; sic etiam homo per peccatum debilitatus, plura non potest efficere sine speciali auxilio, quæ in statu innocentiae, sine tali auxilio facillè effecisset. 3^o Denique ratione vel modi, vel loci, vel temporis, vel personæ, aliarumve circumstantiarum; sæpè enim accidit ut id quod neque ex genere suo, neque ratione statûs vires naturæ excedit, eandem tamen superet ratione alicujus circumstantiæ: v. g., poterit homo sanus per se molem aliquam loco dimovere, non poterit tamen sine alterius auxilio, si manum alteram duntaxat adhibeat, aut si loco parum idoneo, vel moles ipsa, vel ipse fuerit constitutus; ita etiam poterit homo justus aliquod ex Decalogi præceptis facillè adimplere, si nulla aliunde gravis urgeat dæmonis tentatio; ipsâ verò urgente, non poterit præceptum illud adimplere absque aliquo auxilio speciali.

Sexta gratiæ divisio. Gratia actualis distribuitur in gratiam intellectûs et gratiam voluntatis. Gratia intellectûs est interna mentis illustratio quâ intellectui verum supernaturale credendum, aut bonum supernaturale peragendum

proponitur. Hæc autem interior illustratio spectari potest, vel ex parte tantum objecti quod intellectui clarius proponitur, vel ex parte ipsius intellectus, qui ad credendum divinam adjuvante gratia determinatur; hincque enascitur nova gratiæ intellectus divisio, in gratiam nimirum intellectus ex parte principii; et gratiam intellectus ex parte objecti; prior potentiam ipsam intrinsicè afficit; altera verò nihil aliud est quam objectum clarius et nitidius propositum, seu clarior, perspicacior et magis evoluta objecti representatio. Verum parum trita est et usitata, nisi apud Pelagianos, ista gratiæ intellectus subdivisio.

Gratia voluntatis est indeliberata et immediata motio seu inclinatio quam Deus in voluntate operatur, ut eam ad bonum supernaturale excitet atque provocet.

Gratia autem quæ in præsentī statu conceditur, prædictam tantum intellectus illustrationem, tum voluntatis motionem complectitur; unde à SS. Patribus vocatur Dei illuminatio, motio, inclinatio, auxilium, quo Deus intellectum veri cognitione illustrat, et voluntatem boni amore accendit; utrumque enim illud intellectus et voluntatis auxilium jam planè esse necessarium ad supernaturales omnes veræ pietatis actus eliciendos, docent Scripturæ, et constanter tradunt concilia et SS. Patres, præsertim verò concil. Araus. II, cap. 9, ubi sic pronuntiat: *Quoties bona agimus, Deus in nobis et nobiscum, ut operemur, operatur.* Et S. Aug. lib. de grat. Christi cap. 12: *Hæc gratiâ, inquit, agitur, non solum ut facienda noverimus, verum etiam ut cognita faciamus; nec solum ut diligenda credamus, verum etiam ut credita diligamus.*

Sunt qui gratiam voluntatis reponere videntur in actuali motione et affectione voluntatis, non quidem immediatè, sed mediatè duntaxat à Deo productâ. Scilicet contendunt ipsam essentialiter sitam esse in motibus illis indeliberatis qui ex supernaturali et indeliberatâ intellectus illustratione necessariò oriuntur; nec voluntas, inquit, utpote potentia cæca, aliter moveri potest, quam mediâ intellectus illustratione. Verum de eâ sententiâ, ut nobis videatur, parum tutâ, fusiùs dicemus suo loco.

Gratia porro voluntatis, prout indeliberatam, supernaturalem et immediatam intellectus illustrationem et voluntatis motionem complectitur, rursus distribuitur in operantem et cooperantem, prævenientem et subsequentem, excitantem et adjuvantem, sufficientem et efficientem, de quibus nunc agendum.

Septima gratiæ divisio. — Actualis gratia voluntatis dividitur in operantem et cooperantem. Celebris est ista gratiæ divisio, circa quam non leves, ut advertit Bellarminus lib. 1 de Grat. et lib. Arb. cap. 14, occurrunt difficultates; illas obiter distinctis quæsitis proponemus et resolvemus.

Quæres itaque 1º, an admittenda sit divisio gratiæ in operantem et cooperantem. Respondeo affirmativè. Probatur 1º ex Scripturis in quibus utriusque gratiæ mentio fit. Gratia operans commendatur Isaiæ 26, his verbis: *Omnia opera nostra operatus es in nobis, Domine*; et Philipp. 2: *Deus est qui operatur in nobis velle et perficere*; cooperans verò exprimitur Rom. 8: *Scimus quoniam diligentibus Deum omnia cooperantur in bonum*; et 1, Corinth. 15: *Non ego, sed gratia Dei mecum.*

Prob. 2º ex conciliis. Concilium Araus. II, cap. 9, jam laudato sic habet: *Quoties bona operamur, Deus in nobis atque nobiscum ut operemur, operatur*; quibus verbis, *operatur in nobis*, denotatur gratia operans; istis verò, *operatur nobiscum*, significatur gratia cooperans; et Trident. sess. 6, cap. 6, ait *Deum suâ gratiâ nos prævenire et excitare, deinde nobiscum ut ad eum convertamur, operari*; prius ad gratiam operantem, posterius ad cooperantem pertinet.

Prob. 3º ex SS. Patrib., præsertim S. Aug. qui lib. de grat. et libero arbitrio cap. 19, præfatam divisionem conceptis verbis tradit: *Deus, inquit, ut velimus operatur incipiens, qui volentibus cooperatur perficiens.* Et paulò post: *Ut ergo velimus, sine nobis operatur; cum autem volumus, et sic volumus ut faciamus, nobiscum cooperatur; tamen sine ullo vel operante ut velimus, vel cooperante cum volumus, ad bona pietatis opera nihil valemus.* Quibus S. doctoris verbis, nihil certè ad rem nostram luculentius.

Prob. 4º ex constanti theologorum doctrinâ, qui præeunte doctore Angelico 1-2, q. III, art. 2, prædictam divisionem communi consensu statuunt. Ita Alensis, Albert. S. Bonavent. Marsilius, S. Antoninus, Cajetanus, Soto, Vega, Stapleton, et alii quos vide apud Suarez lib. 3 de Auxiliis cap. 20. Idem constat ex utriusque operantis et cooperantis gratiæ notionem mox assignandâ.

Quæres 2º, quid sit gratia operans, quid cooperans. Respondeo dissentire inter se theologos circa notionem gratiæ operantis et cooperantis; *tot sunt sententiæ hæc in parte*, inquit Alvarez de Auxiliis disput. 81, *quot capita*; præcipuas

duntaxat et in scholis magis vulgatas indicabimus.

Prima sententia quæ est Gregorii Ariminensis, quem, inquit Vasquez 1-2, disput. 185, cap. 4, sequuntur complures recentiores, docet gratiam operantem apud S. Aug. eam dici, quæ primam bonam voluntatem deliberatam sola operatur in homine, qualis est conversio sive ab infidelitate ad fidem, sive ab aliis peccatis ad penitentiam.

In eâ autem sententiâ gratia operans dicitur ea quæ in nobis sola operatur primam bonam voluntatem deliberatam; non quasi homo in illam voluntatem non influat, aut eam physicè non eliciat; nullus namque vitalis actus in potentiâ vitali producit absque physico potentiæ vitalis influxu; sed ita fieri dicitur; quia gratia Dei operatur nobis ad eam habendam nihil conferentibus petendo, desiderando, pulsando, etc., atque ideò nihil boni meriti respectu illius primæ et bonæ voluntatis afferendo.

Gratia verò cooperans ea est, quæ operatur aliquid in nobis, non sola, sed nobis simul cooperantibus, non quidem per simultaneum influxum in actum, sed præviè ad istius cooperantis gratiæ effectum petendo, querendo, desiderando, etc., ita ut ad eliciendum actum, cooperentur gratia et voluntas; gratia quidem voluntatem ad eum actum movendo; voluntas verò petendo eum, desiderando, etc., vel, ut inquit S. Thomas 1-2, q. III, art. 2, ad eum semetipsam movendo. Uno verbo gratia dicitur operans, quæ nullum supponit prævium voluntatis influxum quo pulsaverimus, desideraverimus aut aliquid simile fecerimus ad actum obtinendum; cooperans verò quæ prævium hunc influxum supponit.

Sententiam hanc refert et amplectitur Bellarminus lib. 1 de Grat. et lib. Arb. cap. 14 : « Dicendum, inquit, gratiam operantem illam esse quæ efficit in homine primum actum deliberatæ voluntatis, qualis est conversio... gratiam verò cooperantem esse illam quæ efficit consequentes actus voluntatis, quales sunt... velle bona opera facere et alii similes, quos continuò sequuntur actus externi; ita ut gratia operans nihil aliud sit, nisi auxiliium speciale efficax respectu primi actus voluntatis; gratia verò cooperans sit auxiliium speciale respectu actuum subsequentium. » Ibidem exponit quo sensu S. Aug. dixerit, Deum, *ut velimus operari in nobis, sine nobis*; non quasi Deus sit sola causa efficiens

primi deliberati actus voluntatis physicè ac liberè non concurrat ad hunc actum; sed quia solus Deus est causa moralis primi illius actus voluntatis, suadendo nimirum, hortando, consulendo. Inde concludit Bellarminus, utrumque verum esse, Deum operari primum velle deliberatum sine nobis, et non operari sine nobis; operatur enim illud sine nobis, ut causa moralis; nobiscum verò ut causa efficiens illud idem operatur. « Si consideremus, » inquit, causam efficientem et physicam primi illius actus, ea non solum est Deus per auxiliium speciale, sed etiam voluntas per liberum arbitrium, et hoc modo illud velle, et Dei et nostrum, et nos cooperamur Deo, et Deus illud non operatur sine nobis... At si consideremus causam illius ejusdem actus moralem, id est, causam moventem suadendo, hortando, consulendo, ea solus est Deus; ... non enim ipsa se voluntas impellit suadendo et hortando, ut velit quod non vult; sed Deus per inspirationes suas intus animæ loquens, ei suadet et persuadet, ut velit. » Hæc Bellarminus.

Hanc autem veram esse et germanam gratiæ operantis et cooperantis notionem, probant prædictæ sententiæ patroni, tum ex laudato jam S. Augustini textu lib. de Grat. et liber. Arb. cap. 17, ubi sic loquitur S. doctor : *Ut ergo velimus sine nobis operatur* (id est sine nobis antea petentibus, desiderantibus, etc.); *cum autem volumus, et sic volumus ut faciamus, nobiscum cooperatur*; nobiscum nempe volentibus, desiderantibus et petentibus à Deo ut faciamus quidpiam, Deus ipse gratiâ cooperante facit ut illud idem faciamus. Idem colligunt ex eodem libro de Grat. et lib. Arb. cap. 5, ubi de Pauli vocatione loquens S. doctor sic habet : « Ut autem de cælo vocaretur, et tam magnâ et efficacissimâ vocatione converteretur, gratia Dei erat sola, quia merita ejus erant magna, sed mala. » Soli itaque gratiæ Pauli conversionem adscribit S. Augustinus, non quia Paulus non concurrerit liberè consentiendo, et per liberum arbitrium actum illum conversionis activè producendo; sed quia merita ejus erant magna sed mala; id est, quia non præcesserat ante conversionem ullum meritum, sive studium, aut conatus ad conversionem; seu quia ante conversionem nihil boni operatus erat, sive petendo, sive desiderando, sive aliquâ ratione merendo ut talis vocatio daretur.

Secunda sententia quæ vix distat à præce-

deni, asserit gratiam operantem eam esse quæ in nobis operatur intentionem finis ad quem à Deo solo mota est humana voluntas, et ad quem ipsa sese per præviā deliberationem nec applicat, nec movet; gratia verò dicitur cooperans, secundum quod nobiscum cooperatur rectam electionem mediorum ad quam ipsa voluntas sese per deliberationem intentionem finis supponentem sese pariter excitat et movet. Ita Cajetanus 1-2, q. III, art. 2; Dominic. Soto lib. 1 de Naturâ et Grat. cap. 16, Lemos in Panopliâ tom. 4, tract. 8, cap. 2, 3 et sequentibus, etc. *Sententiam hanc*, ait Alvarez lib. 3 de Auxiliis disput. 51, *defendunt multi Thomistæ, et videtur expressa sententia S. Thomæ 1-2, q. III, art. 2.* Ut autem isthæc sententia plenius intelligatur, inquit ibidem Alvarez, observandum 1º, cum S. Thomâ, art. 2, mox citato, « quod operatio alicujus effectus non « attribuitur mobili, sed moventi; in illo ergo « effectu in quo mens nostra est mota, et non « movens, solus autem Deus movens, operatio « Deo attribuitur: et secundum hoc gratia dicitur operans; in illo autem effectu, in quo « mens nostra et movet et movetur, operatio « non solum attribuitur Deo, sed etiam animæ, « et secundum hoc dicitur gratia cooperans. »

Observandum 2º, voluntatem posse seipsam movere dupliciter, 1º *moraliter*, cum scilicet ex præviâ volitione finis sese applicat ad electionem mediorum. 2º *Physicè*, quando nimirum liberè producit actum; etiamsi non deliberet propriè de illo. «Potest enim, inquit idem « Alvarez loco citato, aliquis actus esse liber, « etiamsi non sit deliberatus, sicuti contingit « in intentione finis. Etenim, cum quis... per « actum charitatis se convertit in Deum tantumquam in ultimum finem; certum est quod « talis actus est absolutè liber... non tamen « dicitur deliberatus, quia non præsupponit « aliquam deliberationem. Deliberatio enim « non est de fine ut finis est, sed de mediis ad « finem, atque adeò in illo non se movet voluntas moraliter, sed solum physicè. »

Observandum 3º, voluntatem in omni operatione liberâ, sive sit circa finem, sive circa media, semper se movere physicè; id enim necessariò exigit ratio actus liberi, quod scilicet procedat à principio intrinseco sese movente saltem physicè; at necesse non est quod in omni suâ operatione etiam liberâ se moveat moraliter, ut patet in intentione finis. Ratio est, inquit post S. Thomam, 1-2, q. 9, art. 5

et 4, et quest. 14, art. 4, quia ut quis se moveat moraliter, necessum est quod deliberet circa exercitium actus; porro deliberatio et consilium non est circa finem, sed solum circa media; ergo, cum quis intendit finem, ut finis est, non se movet moraliter.

Itaque, pergunt auctores hujusce sententiæ, gratia operans illa est quæ primum bonum et liberum voluntatis motum operatur, scilicet intentionem finis ad quem à Deo solo mota est humana voluntas, et ad quem ipsa sese *physicè* quidem, non verò *moraliter* movet et applicat, quia non ex aliquo priore alio motu et actu per deliberationem se ad illum excitat; gratia verò cooperans ea est quæ voluntatem movet ad operationes sequentes, primum bonum velle, et ad media eligenda, eosque actus eliciendos quibus ipsa finem jam volitum consequi possit. Dicitur autem cooperans, non quia actum simultanéè cum voluntate operatur; sed quia voluntatem ad id *physicè* movet, ad quod ipsa voluntas sese etiam per deliberationem intentionem finis supponentem *moraliter* applicat et movet; seu, est cooperans respectu determinationis voluntatis in mediorum electione quæ fit tum *physicè* à gratiâ cooperante, tum *moraliter* ab humanâ voluntate. Ita Thomistæ supra citati, et plerique alii quos vide apud Lemos, Alvarez, Joan. à S. Th., etc.

Tertia sententia est Alvarez. Citatâ disput. 81, lib. 9, de Auxiliis, duplicem distinguit gratiam operantem; aliam operantem *moraliter*, aliam operantem *physicè*. Gratia operans *moraliter*, *ea est*, inquit Alvarez, *quæ alliciendo, invitando et suadendo facit ut faciamus, et operatur ut operemur*; hæc coincidit cum gratiâ excitante seu sufficiente; gratia verò operans *physicè*, pergit ibidem Alvarez, *ea est, quæ facit ut faciamus, et operatur ut operemur, non solum suadendo, alliciendo, invitando, aut aliter etiam interiùs moraliter attrahendo; sed etiam verè, efficienter et efficaciter faciendo ipsum arbitrium operari*; hæc distinguitur à gratiâ excitante, et eadem est cum eâ quam vocant *physicè* promovente. Duplicem pariter agnoscit Alvarez gratiam cooperantem; alia est cooperans *moraliter*, et hæc eadem est, inquit, cum gratiâ excitante, ac proinde non differt à gratiâ operante *moraliter*; alia est cooperans *physicè*, et hæc distat tum à gratiâ operante et cooperante *moraliter*, uti ex dictis liquet; tum etiam à gratiâ *physicè* operante; nam, inquit ibidem Alvarez, *gratia operans physicè est, quâ Deus operatur ut operemur, prædeterminando*

voluntatem nostram ad consensum ; cooperans autem gratia illa est, quâ Deus nobiscum piam operationem operatur.

Quarta sententia aliorum est discipulorum S. Thomæ, qui docent unam et eandem entitativè gratiam dici operantem, quatenus applicat intellectum ad pias cogitationes, et voluntatem ad sanctas affectiones; cooperantem verò quatenus cum intellectu et voluntate applicatis producit vel piam cogitationem, vel sanctam affectionem. « In hâc sententiâ, » inquit Lemos in Panopl. lib. 4, part. 1, tract. 8, cap. 3, « in omni nostrâ liberâ operatione... semper « duplex gratia concurrit, et operans et cooperans... gratia operans semper movet, applicat et prædeterminat voluntatem; cooperans « gratia simul cum voluntate præmotâ omne « nostrum efficit velle liberum. »

Quinta sententia est Suarez lib. 3 de Auxiliis cap. 16, 17, 20, 21, 22, et lib. 3 Opuscul. cap. 4 et 5; Vasquez in primam secundæ disput. 153, cap. præsertim 6, 7 et 8; Mæratii de Grat. disput. 4, sect. 1 et 2; Molinæ, Valent. Lessii, etc. Horum autem doctrina circa præsentem materiam his præsertim capitibus continetur.

Docent 1^o, gratiam operantem, quemlibet esse motum tam intellectûs quàm voluntatis in nobis à Deo sine nobis liberè consentientibus productum, quo nos excitat sive ad veri cognitionem, sive ad boni prosecutionem.

Docent 2^o, eundem indeliberatum intellectûs et voluntatis motum, quatenus causa est moralis liberi consensûs, seu quatenus reverà in ipsum moraliter influit suadendo, movendo, etc., verè esse ac propriè dici gratiam *moraliter* cooperantem.

Porro (quod observa) Suarez, Vasquez, Mæratius locis citatis, non alium agnoscunt influxum gratiæ operantis in consensum nostrum liberum, quàm moralem; physicum autem rejiciunt, eâ potissimum de causâ, quia gratia operans est actus partim intellectûs, partim voluntatis, consensus verò noster liber est semper actus voluntatis, actus autem intellectûs nullam habet efficientem vim physicam in voluntatis actum, et unus actus voluntatis in alium. Molina è contra in Concord., Lessius disput. de Grat. efficaci, cap. 1, Bellarm. lib. 1 de Grat. et lib. Arbit. cap. 13, censent gratiam operantem non solum moraliter, sed etiam physicè cooperari, ita ut realem et physicum influxum in consensum et opus bonum habeat, tanquàm partialis causa, unâ cum li-

bero arbitrio; nempe ex libero arbitrio et auxilio præveniente constituitur una integra causa boni operis, ejus principalis pars sit auxilium præveniens, gratia scilicet operans, à quâ opus habet esse supernaturale; minùs principalis liberum arbitrium, à quo actus habet quòd sit actus liber et vitalis.

Docent 3^o, præter gratiam operantem et cooperantem *moraliter*, ut homo bonum supernaturale operetur necessarium esse simultaneum in ordine supernaturali concursum; hic autem simultaneus concursus, gratia *physicè* cooperans seu concomitans communiter appellatur ab his qui cum Suarez existimant gratiam operantem non *physicè*, sed *moraliter* duntaxat in opus influere. Quia et Suarez lib. 3 de Auxil. cap. 19, asserit, « Spiritum « sanctum immediatè adjuvare voluntatem ut « principale principium, proximè et *physicè* « faciens supernaturalem actum, quando sine « habitu elicitur; » huncque physicum influxum quasi medium inter gratiam cooperantem *moraliter* et concursum simultaneum, vocat etiam gratiam *physicè* cooperantem. Sicque juxta Suarez triplex est gratia concomitans: una *moraliter*, duplex *physicè*; nempe concursus simultaneus et physicus, ac specialis ille Spiritûs sancti influxus, de quo mox.

Docent 4^o, gratiam operantem unam et eandem esse naturâ et entitate gratiam cum *moraliter* cooperante, et à se invicem distingui penès duntaxat diversos respectus. « Observandum (inquit Vasquez, 1-2, disp. 185, cap. 9), eandem vocationem et cogitationem « sanctam, et primum voluntatis motum subitum dici gratiam operantem et prævenientem, « et cooperantem et comitantem; eandem, « inquam, diverso modo consideratam. Nam « quatenus consensum nostrum antecedit, est « operans et præveniens; quatenus verò permanens in nobis efficit nobiscum consensum, « est cooperans et comitans. Nam ita consensus noster à Deo, et à nobis, ut Deus non « solum immediatè *physicè* ad illum concurret, « sed etiam mediâ cogitatione illum in nobis « efficere dicatur, eo modo quo intellectus « voluntatem movet et allicit. » Idem repetit Mæratius loco mox citato, his verbis: « Eadem entitas gratiæ dici potest nunc operans, « nunc cooperans diversâ consideratione: operans quidem, quatenus est gratia quam Deus « in nobis sine nobis operatur, vim habens in « actu primo efficiendi consensum liberum « nostræ voluntatis, sive eum efficiat in actu

« secundo, sive non; cooperans verò, quatenus reipsa moraliter in eum influendo ipsum simul nostrâ cum voluntate causat et efficit. »

Etsi autem omnes mox citati auctores contendunt, quoad naturam et entitatem eandem omnino esse gratiam operantem et cooperantem *moraliter*; attamen Suarez, Vasquez, aliique qui eorum doctrinæ adhaerent, volunt gratiam cooperantem, esse ac meritò dici majorem in ratione doni et beneficii, eò quòd hæc, non altera, opportunis in circumstantiis conferatur. Eo ferè modo quo, inquit, gladius datus alicui tempore pacis et tempore belli, realiter idem gladius est; tamen in genere doni ac beneficii, majus donum ac beneficium recipit ille cui datur gladius tempore belli, quando illo uti potest in sui defensionem, quam donaretur tempore pacis quo illi gladius amplius necessarius non esset. Unde Vasquez post verba mox relata, subdit: « Ob id tamen non affirmamus gratiam cooperantem esse eandem omnino gratiam cum operante, sed dicimus esse novam et diversam à gratiâ operante et præveniente in genere gratiæ, doni et beneficii, et habere aliquid novum in genere rei, nempe effectum. »

Docent 5^o, gratiam cooperantem *physicè*, seu concomitantem, sumptam pro concursu seu influxu simultaneo, realiter et entitativè distingui à gratiâ tum operante, tum cooperante *moraliter*; et verò, inquit Mæratius, cum adest concursus simultaneus, tunc sæpè desit motus ille primus indeliberatus in quo posita est natura gratiæ operantis et cooperantis *moraliter*.

Ultima tandem sententiâ est Norisii, De Laurea, D'Aguirre, Macedo, Steyaert, Vuygers, Gamachæi, Ysambert, Du Vallii, De Lectocq, Grandin et aliorum benè multorum, quorum plerique gratiam ex sese et naturâ suâ efficacem admittunt. Asserunt 1^o, gratiam tum operantem, tum cooperantem tribus aliis nominibus insigniri solere; gratia operans, ob diversa quibus fungitur munia, dicitur præveniens, excitans et sufficiens; cooperans verò appellatur subsequens, adjuvans et efficax.

Asserunt 2^o, gratiam operantem, ex S. Aug. lib. de Grat. et libero Arb. cap. 17, eam esse, *per quam ut velimus Deus operatur incipiens*; seu, est motus indeliberatus tum intellectus, tum voluntatis, quem Deus in nobis sine nobis efficit, ut scilicet et benè velimus et benè agamus.

Iste autem motus dicitur *in nobis sine nobis fieri*; non quòd intellectus et voluntas in hunc motum nullatenus influant; namque, ut antea

observatum fuit, nullus motus vitalis in potentia vitali producit sine physico illius potentie influxu; sed is motus dicitur fieri in nobis sine nobis, quia moraliter ac liberè ad eum non concurrimus; quo sensu Rom. 7, malum concupiscentiæ quod invitus ac nolens patiebatur Apostolus, dixit non se, sed quod habitabat in illo peccatum, operatum fuisse.

Itaque omnes illi motus supernaturales, sive sint illustrationes in intellectu, sive piæ motiones in voluntate, quas Deus in nobis sine nobis liberè concurrentibus efficit, ad gratiam operantem pertinent; gratia ergo operans restringenda non est ad eam duntaxat actualem gratiam quæ primam bonam voluntatem operatur, sed potius generatim est extendenda ad omnem, quæ qualemcumque bonam voluntatem in homine operatur, sive prima sit, sive non, sive deliberata, sive indeliberata, sive debilis et infirma, sive fortis et valida. Hanc esse S. Aug. mentem, probant 1^o, quia allata mox S. doctoris definitio convenit etiam istis motibus quibus Deus hominem justum ad opera pietatis invitat; isti enim motus fiunt in nobis, etiam dum justi sumus, sine nobis concurrentibus. 2^o Quia eodem cap. S. Aug. ait universim nos sine Deo vel operante ut velimus, vel cooperante cum volumus, ad bona pietatis opera nihil valere; igitur in mente S. Aug. nullum omnino pietatis opus ab homine etiam justo fieri potest, nisi Deus operetur ut velit, et volenti cooperetur. 3^o Quia idem S. doctor lib. de Corrept. et Grat. cap. 11, ait: *esse in nobis per hanc Dei gratiam* (operantem scilicet) *in bono recipiendo et perseveranter tenendo, non solum posse quod volumus, sed etiam velle quod possumus.*

Asserunt 3^o, gratiam cooperantem, eam esse in mente S. Aug. *per quam Deus volentibus cooperatur perficiens*; sive per quam Deus cum volumus et sic volumus ut faciamus, nobiscum cooperatur. Unde sequitur, gratiam cooperantem esse concursum seu influxum Dei supernaturalem, quo ad omnes actus supernaturales et liberos concurrat, sive illi sint à voluntate vel imperante, vel exequente; sive sint ab aliis potentiis ex imperio voluntatis super naturaliter agentibus; sive adhuc sit infirma voluntas, sive fortis et valida.

Hanc esse legitimam gratiæ cooperantis notionem prob. 1^o, quia S. doctor citato cap. 17, lib. de Grat. et lib. Arb. gratiam cooperantem generatim definit, *per quam cum volumus et sic volumus ut faciamus, nobiscum Deus cooperatur*;

ergo gratia cooperans non debet ad eam duntaxat gratiam restringi per quam fortiter volumus. 2^o S. Aug. parvam illam et imperfectam voluntatem quam habebat S. Petrus dum aiebat Joann. 15 : *Animam meam pro te ponam*, gratiæ non solum operanti, sed etiam cooperanti adscribit : sic enim loquitur citato cap. : « Ipsam charitatem Apostolus Petrus nondum habuit quando Dominum timore ter negavit.... et tamen quamvis parva et imperfecta, non deerat, quando dicebat Domino : Animam meam pro te ponam.... Et quis istam etsi parvum dare cœperat charitatem, nisi ille qui præparat voluntatem, et cooperando perficit, quod operando incipit? quoniam ipse ut velimus operatur incipiens, qui vellentibus cooperatur perficiens. » Ibidem paulò post subdit S. doctor : « Sine illo vel operante ut velimus, vel cooperante cum volumus, ad bona pietatis opera nihil valet : » atqui bona voluntas, seu infirma sit seu valida, opus est pietatis; ergo ad utramque voluntatem sese extendit gratia cooperans. 3^o Eadem doctrinam exprimit concil. Araus. II, can. 9, his verbis : *Quoties bona operamur, Deus in nobis atque nobiscum ut operemur operatur*; quibus verbis, *operatur nobiscum*, denotatur gratia cooperans; hæc itaque sese extendit ad omnem deliberatam voluntatem, qualiscumque tandem illa sit. 4^o Eidem doctrinæ favet S. Th. 1, 2, q. 111, art. 2, cujus verba supra adduximus. 5^o Tandem concursus ille quo Deus ad voluntatem etiam parvam et infirmam, liberam tamen, concurrat, non potest ad gratiam operantem revocari. Namque gratia operans fit in nobis sine nobis liberè concurrentibus, sicuti constat ex jam dictis; atqui quælibet voluntas libera, tametsi parva et infirma, non fit sine nobis; ergo, etc. Hæc ultima gratiæ operantis et cooperantis notio aliundè in scholis maximè pervulgata, nobis videtur, utpote SS. Aug. et Th. doctrinæ conformior, præ cæteris amplectenda.

Itaque gratia operans rectè definitur : Subitanea mentis illustratio et indeliberata voluntatis affectio quas Deus in nobis sine nobis operatur, ut nimirum benè velimus, et benè agamus; cooperans verò, rectè definitur : Influxus seu concursus supernaturalis, quo Deus nobiscum concurrat ad omnes et singulos pietatis actus supernaturales ac liberos.

Jansenius, lib. 4 de Grat. Christi, cap. 4, docet gratiam operantem eam esse quæ efficit bonam voluntatem deliberatam, sed infirmam

ac tenuem; cooperantem verò, quæ operatur bonam voluntatem, fortem ac robustam; « Nihil evidentius, inquit, quàm gratiam operantem esse, quā cum ante nollemus, efficitur ut velimus; cooperantem, quā quando jam actu volumus, efficitur ut fortius velimus, ita ut superando quævis obstacula, etiam reipsa faciamus; illam operari ut quoquo modo voluntatem bonam seu velle quantumcumque infirmum atque imperfectum habeamus; hanc ut illa bona voluntas augeatur et roboretur; non tantum ut ex inefficaci fiat efficax, sicut nonnulli volunt, sed ita ut etiam efficax efficiatur fortior. » Sententiam hanc inter vulgatas theologorum opiniones recensere consultè prætermisimus. Tum quia, nova est et ante Jansenium prorsus inaudita; unde citato lib. 4, cap. 12, loquendo de variis gratiæ definitionibus confidenter assertit, « scholasticos, sequendo filum philosophiæ suæ; mentem Augustini ac discipulorum ejus Prosperi et Fulgentii, nullo modo assecutos fuisse. » Tum quia ex mox dictis, gratia operans ab imbellem duntaxat et invalidam bonam voluntatem restringenda non est; nec vice versâ gratia cooperans ad fortem et robustam. Tum quia in exponendâ utriusque gratiæ notione multa interserit Jansenius omninò falsa et erronea. Docet, v. g., infirmam ac tenuem voluntatem bonam ex gratiâ ortam, imparem esse, etiam mediâtè per orationem, superandâ oppositæ ardentiori cupiditati. Verum de his ubi de systemate Jans. datâ operâ agemus.

Quæres 3^o, an gratiæ divisio in operantem et cooperantem sit adæquata. Respondeo affirmativè, quia motus omnis gratiæ actualis quo Deus movet hominem ad bonum supernaturaliter, aut fit sine nobis, aut nobiscum; si primum, gratia operans dicitur; si secundum, cooperans appellatur; igitur ista divisio est adæquata.

Quæres 4^o, an gratia operans realiter distinguatur à cooperante. Respondeo gratiam operantem et cooperantem realiter ab invicem distingui. Probatur, quia gratia operans nihil aliud est quàm subitus et indeliberatus motus tum intellectus, tum voluntatis per quam excitatur ad bonum; cooperans verò est supernaturalis Dei concursus quo concurrat ad actum voluntatis liberè consentientis priori motui, sicuti constat ex dictis quæsitò 2; atqui hæc duo realiter distinguuntur ab invicem; ergo, etc. Et verò gratia operans interdum separatur à cooperante, quando nempe inspirationi Dei

homo resistit, quemadmodum ostendemus infra; ergo, etc.

Quæres 5^o, an allata gratiæ divisio extendi possit ad gratiam habitualem. Respondeo extendi posse ad gratiam habitualement; magis tamen propriè et communiter tribuitur gratiæ actuali. Prob. 1^a pars auctoritate S. Thomæ qui id ipsum expressis verbis assertit 1, 2, quæst. 111, art. 2: « Si verò, inquit, accipiatur gratia pro habituali dono, sic est duplex gratiæ effectus, sicut et cujuslibet alterius formæ, quorum primus est esse; secundus operatio:.... sic igitur habitualis gratia, in quantum animam sanat vel justificat sive gratam Deo facit, dicitur gratia operans; in quantum verò est principium operis meritorij quod ex libero arbitrio procedit, dicitur cooperans. » Prob. 2^a pars, quia S. Aug. ex quo præsertim divisionem hanc desumpsere theologi, omnino videtur loqui de gratiâ actuali; siquidem S. Aug. de eâ gratiâ sermonem instituit, de quâ ipsi lis erat cum Pelagianis; at hæc potissimum erat gratia actualis; ergo, etc.

Quæ spectant divisionem gratiæ operantis et cooperantis paulò fusiùs prosecuti sumus; tum quia quæ dicta sunt de eâ divisione, eadem fermè omnino adaptari possint sequentibus divisionibus gratiæ prævenientis et subsequæ, excitantis et adjuvantis, sufficientis et efficacis; tum quia, ut observant Lemos in Panopliâ, et Alvarez lib. 9 de Auxil., disput. 81, « gratiæ operantis et cooperantis notio valdè necessaria est ad intelligendam et explicandam naturam et proprietatem efficacis gratiæ, atque ad aperiendam mentem SS. Aug. et Thomæ circa ejusdem gratiæ virtutem, efficacitatem, et ad concordanda varia loca ejusdem Aug. quæ primo aspectu inter se videntur contraria. » Sequentes gratiæ divisiones compendiosius absolvemus.

Octava gratiæ divisio. — Gratia actualis voluntatis rursus dividitur in excitantem, et adjuvantem. Divisio hæc fundamentum habet in Scripturis. Sic Apocalypsis 3: *Ecce sto ad ostium et pulso*; et Psalm. 118: *Adjunga me, et salvus ero*. Item in orationibus Ecclesiæ: *Actiones nostras, quæsumus, Domine, aspirando præveni, et adjuvando prosequere*. Eandem gratiæ divisionem similiter commendat S. Aug. lib. 2 de peccat., meritis et remiss. cap. 18, his verbis: *Quod ad Deum nos convertimus, nisi ipso excitante atque adjuvante non possumus*. Denique concil. Trid. sess. 6, cap. 5: *Disponuntur, inquit, dum excitati divinâ gratiâ atque adjuti.... liberè mo-*

ventur in Deum. Quod autem spectat gratiæ tum excitantis, tum adjuvantis notionem, distinctionem et officia, quidquæ circa hæc sentiant theologi, ex antedictis repetendum; gratia etenim excitans eadem prorsus est cum gratiâ operante, et adjuvans eadem quoque est cum gratiâ cooperante: sed utriusque diversa sunt nomina, propter diversa eorum officia. Eadem si quidem gratia quæ dicitur operans, quia per eam Deus aliquid operatur in nobis sine nobis, dicitur etiam excitans, in quantum voluntatem velut sopitam et torpentem, à somno peccati aut negligentia bonorum operum clamore quodam sanctæ vocationis et inspirationis excitat. Similiter eadem gratia quæ cooperans dicitur, quia nostræ voluntati cooperatur, appellatur etiam adjuvans, quia nos adjuvat ad liberè consentiendum gratiæ excitanti.

Nona gratiæ divisio. — Iterum actualis gratia voluntatis dividitur in prævenientem et subsequentem. Divisionem hanc commendat Script. Psalm. 58: *Misericordia ejus præveniet me*; et ibidem: *Misericordia ejus subsequetur me*. Utriusque mentio fit in publicis Ecclesiæ orationibus, ut in collectâ Domin. 16 post Pentecost., ubi Ecclesia sic Deum deprecatur: *Tua nos quæsumus, Domine, gratia semper præveniat et sequatur*. Eandem tradunt SS. Patres, sanctus præsertim Aug. in Enchir. cap. 32: « Utrumque, inquit, legitur in sacris eloquiis, et misericordia ejus præveniet me, et misericordia ejus subsequetur me.... nolentem prævenit ut velit, volentem subsequitur ne frustra vel. »

Aut parùm aut nihil differt ista divisio à præcedentibus. Gratia enim præveniens eadem videtur esse cum gratiâ excitante et operante; subsequens verò, quæ et concomitans à nonnullis appellatur, eadem etiam est cum adjuvante et cooperante; scilicet gratia præveniens ea est quæ inspirando et excitando prævenit; subsequens verò quæ adjuvando et cooperando prosequitur, juxta mox citata Ecclesiæ orationis verba: *Quæsumus, Domine, aspirando præveni, et adjuvando prosequere*; tantumque ratione distinguitur præveniens et subsequens ab operante et cooperante, excitante et adjuvante; in quantum præveniens et subsequens designant ordinem prioris et posterioris, qui non designatur nomine gratiæ operantis et cooperantis, excitantis et adjuvantis (« Gratia quæ his vocibus (præveniens, comitans et subseq.) significatur », inquit Suarez lib. 5 de Auxil. cap. 23, in re non distinguuntur à gratiâ ex-

« citante et adjuvante, sed connotant solum
 « quasdam habitudines prioris et posterioris;
 « hæc sententia est communior theologorum
 « cum magistro in 2, dist. 27. » Itaque gratia
 operans, excitans et præveniens eadem omni-
 nò est gratia, diversà solum consideratione;
 sic etiam gratia cooperans, adjuvans et subse-
 quens, etsi re distincta à præcedentibus, eæ-
 dem sunt inter se; unde gratia operans et
 cooperans duæ sunt gratiæ species, quarum
 singule tribus nominibus solent insigniri. Cum
 ergo gratia præveniens cum operante et exci-
 tante coincidat, sicut et subsequens cum coo-
 perante et adjuvante, hinc quæ de his divi-
 sionibus supra dicta sunt, præsentidistributioni
 facilè accommodari possunt. Verùm etsi ea sit
 gratiæ prævenientis et subsequentis notio quam
 modo adduximus, nonnulli tamen sunt qui
 utriusque gratiæ naturam paulò aliter explicant.

1° Quidam relativè ad justificationem ipsam
 prævenientis et subsequentis gratiæ naturam
 exponunt; ita ut gratia præveniens in eorum
 sententiâ dicatur quæcumque præcedit ipsam
 justificationem, subsequens verò censeatur
 quælibet alia quæ homini post justificationem
 tribuitur, ut in acceptâ sanctitate et iustitiâ
 perseveret. Ita Vasquez in part. 1 disput. 88,
 cap. 10, ubi in confirmationem suæ sententiæ
 refert S. Aug. testimonium ex cap. 32, lib. de Na-
 turâ et grat.: *Misericordia Dei prævenit nos, præve-
 nit ut sanemur, et subsequitur ut sanati vegetemur.*

2° Alii divisionem gratiæ prævenientis et
 subsequentis explicant per comparisonem
 ad se invicem; ita ut gratia præveniens di-
 catur illa per quam ad bonum excitamur, sub-
 sequens verò illa quæ priorem istam gratiam
 sequitur; et hoc sensu prior omnis gratia dici
 potest præveniens, si comparetur ad postero-
 rem. Ita prævenientis gratiæ vocabulum usur-
 pàsse videtur sanctus ipse August. citato mox
 cap. 32, lib. de Nat. et grat. « Misericordia,
 « inquit, ejus prævenit nos; prævenit autem
 « ut sanemur, et subsequitur ut sanati vegete-
 « mur; prævenit ut piè vivamus, subsequitur
 « ut cum illo semper vivamus, » et lib. 4 ad
 Bonifac. cap. 4: « In omnibus, inquit, quæ
 « quisque agit secundum Deum, misericordia
 « ejus prævenit eum. » Huic interpretationi
 favet S. Th. 1-2, q. 111, art. 3, dùm ex variis
 effectibus, quorum unus est altero prior, utri-
 usque gratiæ denominationem repetendam esse
 asserit, licet alio quoque sensu supra exposito
 utramque gratiam usurpaverit sanctus doctor.

3° Denique sunt qui hanc gratiæ actualis di-

visionem in prævenientem et subsequentem
 explicent comparatè ad liberum consensum vo-
 luntatis; ita ut præveniens dicatur quæ præ-
 venit humanæ voluntatis consensum, nec
 eum ullatenus includit, subsequens verò dica-
 tur ea quæ supponit et subsequitur voluntatis
 consensum, quæque firmat voluntatem in bono
 proposito, eamque adjuvat ut illud ad execu-
 tionem perducatur. Juxta hanc expositionem con-
 sensus voluntatis non includitur in gratiâ præ-
 veniente, nec in gratiâ subsequente; quapropter
 cum actus ille voluntatis quo consentit at-
 que vult bonum, sit etiam à gratiâ Dei, omni-
 nò necesse est admittere in hujusmodi divisio-
 ne sic intellectâ, ut reddatur adæquata, ter-
 tium aliquod genus gratiæ, quæ concomitans
 dicitur, quia voluntatem comitatur et adjuvat
 ad hoc ut consentiat et velit bonum. Hæc gra-
 tia concomitans media est, sicut et ipsemet vo-
 luntatis consensus, inter gratiam prævenien-
 tem et subsequentem; hinc præcedit gratia
 præveniens; indè verò sequitur gratia sub-
 sequens.

Triplicem hanc gratiam actualem designat
 concil. Trid. sess. 6, cap. 16, ubi de influxu
 gratiæ Christi in justificatos, sic loquitur:
 « Quæ virtus (gratia scilicet) bona eorum ope-
 « ra semper antecedit, et comitatur et subse-
 « quitur. » Sed etsi tam varia sit ac multi-
 plex gratiæ prævenientis et subsequentis ac-
 ceptio, nusquam tamen eo sensu subsequens
 dicenda est, quasi conatus quosdam bonos et
 naturales exigit ut detur: vel quasi in aliquo
 supernaturali opere, aut illius parte, gratia sit
 libero arbitrio posterior: « Avertat, inquit S.
 « Aug. lib. 2 ad Bonifac. cap. 9, Deus hanc de-
 « mentiam, ut in donis ejus nos priores facia-
 « mus, posteriorem ipsum. » Et certè, quem-
 admodum suo loco ostendemus, is fuit unus
 à præcipuis Pelagianorum et Semi-Pelagia-
 norum erroribus, ut indicat S. Augustinus
 epist. 107.

Decima gratiæ divisio.— Inter omnes gratiæ
 divisiones summæ celebritatis est illa per quam
 gratia operans sive excitans, subdividitur in
 sufficientem et efficacem. Sufficiens duobus
 modis accipi potest, nempe vel generatim,
 vel speciatim. Generatim sumpta ea est omnis
 quæ veram et expeditam confert potentiam
 agendi in ordine supernaturali, sive suum as-
 sequatur effectum, sive non; quo sensu etiam
 gratia efficax dici potest sufficiens, juxta illud
 Apost. 2 ad Cor. 12: *sufficit tibi gratia mea.* Hoc
 modo intellecta gratia sufficiens habet rationem

generis respectu gratiæ tum efficacis, tum strictè sufficientis. Gratiæ speciatim et purè sufficiens, prout opponitur gratiæ efficaci, dicitur ea, quæ ad bonum supernaturale operandum et urgens præceptum adimplendum, veram, completam et expeditam, etiam relativè ad hic et nunc titillantem concupiscentiam, confert potentiam, quæ tamen nunquàm obtinet suum effectum.

Gratiæ verò efficax, ea est, quæ suum semper obtinet effectum certò et infallibiliter, sive, prout loquitur S. Aug. lib. de Corrept. et Grat. indeclinabiliter et insuperabiliter.

Dicitur autem indeclinabiliter et insuperabiliter movere voluntatem, non quod superari et declinari non possit, sed quòd nusquàm de facto superetur et declinetur; eodem planè sensu quo imperator aliquis dicitur invincibilis, non quòd non possit omninò vinci et superari, sed quia nusquàm victus sit. Circa utramque hanc gratiæ speciem variæ occurrunt difficultates multis heterodoxorum erroribus implicatæ, et gravissimis hinc indè theologorum controversiis insignitæ, quæ quidem omninò hic prætermittere satius duximus, quàm strictim et obiter ea attingere. De istis fusiùs et accuratè pro modulo nostro agemus in parte dogmaticà hujusce tractatùs.

Ultima gratiæ divisio.— Denique gratia dividitur in gratiam simpliciter, et gratiam pro gratiâ. Gratiâ simpliciter ea dicitur, quæ conceditur à Deo ex meritis Christi, absque ullo ex parte hominis præcedente merito, etiam ex gratiâ. Gratiâ verò pro gratiâ, ea est, quæ datur propter meritum præcedens, quod ex ipsâ gratiâ oritur. Talis est gloria seu vita æterna, quæ simul est et merces, et gratia; merces, quia meritis rependitur; gratia, quia merita hæc ex gratiâ profluunt.

Hujus divisionis meminit S. Aug. lib. de Grat. et libero Arb. cap. 8, ubi ait: « Si vita bona nostra nihil aliud est quàm Dei gratia, sine dubio et vita nostra æterna quæ bonæ vitæ redditur, Dei gratia est; ipsa enim gratis datur, quia gratis data est illa cui datur; sed illa cui datur tantummodo gratia est; hæc autem quæ illi datur, quoniam præmium ejus est, gratia est pro gratiâ. »

Juvat hic seriem omnium gratiæ divisionum, quas in præsentì articulo proposuimus, compendiosè attexere, necnon juxta varia theologorum placita paucis contrahere, quæcumque fusiùs dicta sunt circa celebriores gratiæ actualis operantis et cooperantis, prævenientis

et subsequentis, excitantis et adjuvantis, sufficientis et efficacis, divisiones.

Prima itaque ac capitalis gratiæ divisio est in *creatam* et *increatam*; seu, ut alii loquuntur, in gratiam ex parte Dei, et ex parte creaturæ; seu quod idem est, in gratiam ex parte principii, et ex parte subjecti. Prior, æternus est ac supernaturalis Dei erga homines amor, quo eos diligit in ordine ad vitam æternam; posterior verò ea omnia generatim sunt beneficia, quæ ex æterno illo ac supernaturali amore, ut effectus ex causâ procedunt. Ita Salmaticenses, Suarez, Sylvius, Bellarm., etc.

2º Dividitur gratia creata, in *gratiam Dei*, et *gratiam Christi*. Hæc, non autem illa confertur intuitu meritorum Christi; prior alio nomine dicitur gratia sanitatis; altera, gratia medicinalis. Ita communiter theologi qui cum S. Thomâ existimant Adamo non peccante futuram non fuisse Verbi divini incarnationem; ast qui cum Scoto pro adversâ stant sententiâ, prædictam non admittunt divisionem, sed gratiam creatam dividunt in gratiam sanitatis, seu Christi *ut capitis*; et in gratiam medicinalem, seu Christi *ut Redemptoris*. Ita Poncius, Medavilla, Frassen, etc.

3º Dividitur gratia Christi, in *gratiam externam* et *internam*; prior, extrinsecus, posterior interiùs hominem afficit; utraque suo modo ad salutem conducit.

4º Gratiâ interna distribuitur in gratiam *gratis datam*, et *gratum facientem*. Gratis data definitur, donum gratis à Deo homini concessum, per se et primariò conducens ad salutem aliorum promovendam; gratia gratum faciens, donum est gratis à Deo collatum, ad propriam et spiritualem uniuscujusque salutem primariò et per se ordinatum.

5º Gratiâ gratum faciens dividitur in *habitualement* et *actualement*. Habitualement est, quæ confertur per modum habitûs, seu qualitatis jugiter in nobis permanentis, hominemque disponit ad vitam æternam; hæc autem habitualis gratia triplex est, scilicet gratia sanctificans, seu justificans, virtutes infusæ, et dona Spiritûs sancti. Gratiâ actualis ea est, quæ per modum actûs seu motionis transeuntis conceditur.

6º Gratiâ actualis dividitur in *gratiam intellectûs*, et *gratiam voluntatis*. Gratiâ intellectûs, est interna mentis illustratio quâ intellectui verum supernaturale credendum, aut bonum supernaturale peragendum proponitur. Gratiâ voluntatis est indeliberata et immediata motio seu

inclinatio quam Deus in voluntate operatur, ut eam ad bonum supernaturale excitet ac provocet. Porro gratia quæ in præsentî naturæ lapsæ statu conceditur, utramque tum intellectûs illustrationem, tum voluntatis motionem complectitur; quod ex Scripturis, conciliis, SS. Patribus, S. potissimum Aug. alibi demonstrabimus.

7^o Rursus gratia actualis, prout illustrationem supernaturalem in intellectu et piâ affectionem similiter supernaturalem in voluntate includit, distribuitur in operantem et cooperantem, prævenientem et subsequentem, excitantem et adjuvantem. Celebriores sunt istæ gratiæ divisiones, circa quarum notionem varias in sententias abeunt theologi, quas ex antea fusiùs dictis, pressius jam ac summatim hic resumo ac colligo.

1^o Itaque censent aliqui, gratiam operantem et cooperantem, prævenientem et subsequentem, excitantem et adjuvantem seu concomitantem, unam et eandem omninò esse, diversâ solùm consideratione. Scilicet volunt ii auctores gratiam essentialiter positam esse in indeliberatis intellectûs et voluntatis motibus; porro, inquit, idem entitativè motus indeliberatus, vocatur gratia *operans*, quia Deus eum in nobis sine nobis liberè cooperantibus operatur; *excitans*, quia excitat voluntatem; *præveniens*, quia prævenit liberum nostrum consensum; itemque idem ille vitalis motus dicitur gratia *cooperans*, *subsequens*, *adjuvans*, seu *concomitans*, quatenus simul in consensum voluntatis influendo cooperatur voluntati, eamque ad consentiendum adjuvat et concomitatur. Ita Molina in Concord. quæst. 14, art. 13, disput. 4: « Ex dictis, inquit, intelligitur faciliè, unam et eandem numero gratiam, quatenus excitat, et allicit et invitat arbitrium nostrum ad actus credendi, sperandi, diligendi, appellari prævenientem ac excitantem gratiam, eaque consideratione prævenire arbitrium nostrum ad ejusmodi actus; quatenus verò consentiente jam arbitrio nostro et cooperante, actus illos ad quos incitat et allicit, ipsa quoque novo influxu et actione cooperatur eosdem actus, appellari adjuvantem et cooperantem gratiam. » Idem sæpiùs repetit eadem disput. et rursus ibid. disput. 39 et 41. Non alia est hæc in parte Vasquesii doctrina: « Eadem cogitatio sancta, inquit, et subitus voluntatis motus dicitur gratia operans et præveniens, et cooperans, et concomitans; eadem, inquam, diverso modo considerata. Nam, quatenus

« consensum nostrum antecedit, est operans et præveniens; quatenus verò permanens in nobis efficit nobiscum consensum, est cooperans et comitans. » Idem tradit Mæratius de Grat. disput. 1 sect. disput. 2, his verbis: « Eadem entitas gratiæ dici potest nunc operans, nunc cooperans diversâ consideratione; operans quidem, quatenus est gratia quam Deus in nobis sine nobis operatur... cooperans è verò, quatenus reipsâ moraliter in liberum voluntatis nostræ consensum influendo, ipsum simul nostrâ cum voluntate causat et efficit. » Itaque etiam censent Suárez, Valentia, Lessius, etc.

Porro (quod observâ) etsi omnes mox citati auctores in eo consentiant quòd existiment gratiam operantem et cooperantem eandem omninò esse quoad naturam et entitatem, in nonnullis tamen quidam ab aliis discrepant; sic Suárez, Vasquez, etc., adversus Molinam, Lessium, et alios, volunt gratiam cooperantem, esse ac meritò dici majorem in ratione doni et beneficii, quatenus hæc, non altera opportunis in circumstantiis confertur. Unde Vasquez post verba modò relata, sic subdit: « Non affirmamus tamen gratiam cooperantem esse eandem omninò gratiam cum operantè, sed dicimus esse novam et diversam à gratiâ operante et præveniente in genere gratiæ, doni et beneficii, et habere aliquid novum in genere rei, nempe effectum. » Idem declarat Suárez lib. 5 de Auxil. cap. 52.

2^o Alii volunt gratiam operantem eandem omninò esse cum præveniente et excitante; pariter, gratiam cooperantem eandem esse cum subsequente et adjuvantè seu concomitante; at iidem existimant duplicem hanc gratiæ speciem à se invicem realiter esse distinctam. Ex iis autem alii, ut Card. d'Aguirre, Laurea, Noris, Macedo, Steyaert, etc., censent gratiam cooperantem seu adjuvantem coincidere cum gratiâ ex sese efficaci; cæteri verò gratiam cooperantem videntur confundere cum concursu simultaneo. Ita Frassen, Gratin, Vuigers, etc.

3^o Alii gratiam actualem voluntatis paulò aliter distribuunt in tres species, quarum prima dicitur, gratia operans, præveniens et excitans; secunda, cooperans, concomitans et adjuvans; tertia, subsequens. Gratia operans, seu excitans et præveniens, juxta eosdem dicitur, supernaturalis à Deo immissa mentis illustratio, et indeliberata, voluntatis motu seu affectio, quâ homo vel à Deo aversus, vel in bono torpens excitatur. Gratia adjuvans seu cooperans

et concomitans, actualis est Dei influxus, quo roborata voluntas liberè consentit gratiæ excitanti. Gratia verò subsequens, est supernaturale Dei auxilium, quo firmatur voluntas in bono proposito, et adjuvatur, ut illud opere perficiat.

4° Rursus Thomistæ gratiam voluntatis aliâ ratione distribuunt. Scilicet juxta ipsos gratia actualis generatim dividitur in excitantem et adjuvantem. Excitans indeliberatos tantum actus in hominis intellectu et voluntate producit, quibus ad conversionem inducatur; adjuvans verò efficit, ut eisdem motibus indeliberatis consentiat, et conversionem de facto velit.

Porrò adjuvans subdividitur in prævenientem seu operantem physicè, et in cooperantem seu subsequentem; prior, ea est quæ in homine operatur primum liberum ac supernaturalem voluntatis motum, ad quem à Deo solo mota est humana voluntas, et ad quem ipsa sese non applicat nec movet *moraliter*, quatenus non ex aliquo priori alio motu et actu per deliberationem se ad illum excitat, uti supra ex. S. Th. 1-2, q. 8 et sequentib. exposuimus; posterior verò, eâ dicitur, quæ voluntatem subinde movet ad ea virtutis et pietatis opera quæ primum bonum et liberum velle sequuntur. Ita Lemos in Panoplia, Alvarez de Auxiliis, et alii quorum testimonia supra retulimus.

Ex iis patet, in sententiâ Thomistarum 1°, gratiam excitantem eandem esse cum sufficienti. 2° Adjuvantem, coincidere cum efficaci. 3° Tandem quamlibet actualem voluntatis gratiam esse prævenientem. Sunt et aliæ variæ expositiones gratiæ operantis et cooperantis, prævenientis et subsequentis, excitantis et adjuvantis, quas supra retulimus, quæque ex mox dictis faciliè colligi possunt.

Octava omniumque celebratissima gratiæ divisio, est in sufficientem et efficacem; circa utriusque gratiæ naturam, existentiam et proprietates, gravissimæ suboriuntur difficultates, quas in parte dogmaticâ hujusce tractatûs sedulò expendemus. Interim satis sit hic annotâsse, gratiam purè et strictè sufficientem, prout opponitur efficaci, eam esse, quæ voluntati veram et expeditam confert potentiam ad oppositam hinc et nunc titillantem concupiscentiam superandam et bonum operandum, cum quâ tamen voluntas nusquam operatur. Eaque du-

plex est pro duplici potentiâ quam confert; alia enim est immediatè sufficiens, quæ dat posse immediatè et proximè concupiscentiam vincere et præceptum adimplere; alia verò mediatè sufficiens, quæ confert duntaxat potentiam orandi ad uberius impetrandum auxilium, ut actu vincat prementem concupiscentiam, præceptumque urgens adimpleat.

Rursus utraque gratia, tum proximè, tum remotè sufficiens, juxta quosdam ita potentiam complet ut uberiori ac prævenienti non indigeat auxilio ad actum eliciendum; juxta alios verò illud requiritur uberius auxilium. Gratia verò efficax, prout sufficienti opponitur, ea dicitur, quæ suam certò ac infallibiliter semper assequitur effectum; si effectus sequatur *vi ipsius gratiæ*, dicitur ex sese et ab intrinseco efficax; si ex *congruitate circumstantiarum*, dicitur congruâ; si ex *prævisione Dei*, dicitur efficax ab eventu.

Animus erat eò loci quinque summi momenti quæstiones circa gratiæ naturam expendere. Primum an gratia ipsa sit omnipotens Dei voluntas, seu Deus ipse; an verò aliquid creatum menti impressum. Secundum, supposito quòd gratia sit quid creatum, an sit formaliter ipsa mentis actio; an aliquid prævium actui, ipsiusque causa. Tertium, dato quòd si actus, an in solâ illustratione intellectus reposita sit; an verò motionem etiam voluntatis necessariò includat. Quarum, si actum voluntatis importet, an in solo amore seu delectatione sit formaliter reponenda, ut contendit Jansenius. Quintum deniquè, an illustratio intellectus et motio voluntatis in quibus reponitur gratiæ natura, aut qui ex ipsâ fluunt motus, sint necessariò perceptibiles, necne?

Verum, re maturius perpensâ, gravia isthæc puncta ad partem dogmaticam remittere satius visum fuit; tunc enim, cum de naturâ gratiæ ex professo agemus, opportuna sese dabit occasio, cunctas de quibus hodiè disputatur quæstiones nullo intervallo sejunctas, expendendi; sic enim implicatæ illæ quæstiones sibi mutuò lucem afferent, et operosa nimis de gratiâ tractatio facilius et ex ordine enucleabitur.

Atque his instar præludiorum præmissis, jam interiora tractatûs aggrediamur.



PARS HISTORICA.

DE VARIIS CIRCA GRATIAM ERRORIBUS.

Errores circa gratiam spectant, vel necessitatem illius, vel ejus agendi modum seu efficaciam, vel denique ipsius effectus, justificationem scilicet et meritum. De his omnibus disseremus in hac parte, quam ordinis et claritatis causâ in duodecim omnino Dissertationes distribuemus.

1. Erit de Pelagianis. — 2. De Semipelagianis. — 3. De Monachis Adrumetinis. — 4. De Prædestinatis quinti seculi. — 5. De Prædestinatis noni seculi. — 6. De Wiclefitis. — 7. De Luthero. — 8. De Calvino. — 9. De Baio. — 10. De congregationibus *de auxiliis*. — 11. De Jansenio. — 12. Tandem de Jansenii discipulis.

Dissertatio prima.

DE PELAGIANIS.

Septem erunt præsentis dissertationis capita: 1^o paucis agemus de propugnatoribus hujusce hæreseos; 2^o de impugnatoribus; 3^o de erroribus Pelagianorum. 4^o An Pelagiani gratiæ alicujus interioris necessitatem aliquando tandem agnoverint. 5^o An admiserint gratiam habitualem et virtutes infusas. 6^o Quæ fuerit illa gratia de quâ tam diuturna exarsit contentio sanctum Augustinum inter et Pelagianos. 7^o Compendiosam proponemus seriem chronologicam operum quæ adversus Pelagianos exaravit sanctus Augustinus.

Historiam autem Pelagianam hic speciatim enarrare consultò prætermittimus; tum quia ex dicendis passim in integrâ Dissertatione, maxime verò capitibus 1, 2, 3 et ultimo facile erit unicuique eam colligere; tum quia plurimi singula illius capita fusiùs prosecuti sunt. Ex antiquioribus S. Hieronymus præsertim in præfationibus ad quatuor libros Commentariorum in Jeremiam; Augustinus libris de gestis Palæstinis et de hæresibus; Marius Mercator, in *Commonit.*, etc. Istud idem copiosè perfecerunt recentioribus imprimis eminentissimus cardinalis Norisius in *Historiâ Pelagianâ*; card. D'Aguirre in *Theolog. S. Anselm. tom. 3, disput. 111*; Marii Mercatoris Commentator Joannes Garnerius S. J. auctores recentioris editionis *Operum S. Aug. in præfatione tomo 10 præfixâ*; Natalis Alexan-

der in *Historiâ Eccl. 5. seculi cap. 3, art 2*; doctissimus Petavius lib. de hæresi Pelagianâ, Moraines in *Anti-Jansenio tract. 1, octo primis disputationibus*. De eodem argumento ex Heterodoxis egère Vossius, Usserius in *Hist. Pelag. et Forbesius Instit. Historic. Theolog. lib. 8*.

Jansenius Yprensis octo de hæresi Pelagianâ libros conscripsit, quorum primus hujusce hæreseos historiam complectitur.

CAPUT PRIMUM.

De primis auctoribus et præcipuis defensoribus hæresis Pelagianæ.

De hujusce hæreseos præformatoribus disserendum primò, tum de Pelagio, tandem de præcipuis Pelagii discipulis.

ARTICULUS PRIMUS.

De Pelagianorum parentibus ac magistris.

Tres præcipui fuere Pelagianæ hæresis præformatores, Origenes scilicet, Rufinus et Theodorus Mopsuestenus. De Origene id constat ex sancto Hier. epist. ad Ctesiphontem, ubi Pelagium his verbis alloquitur: *Doctrina tua, Origenis ramusculus est*. Ibidem Origenem vocat *Pelagiani erroris principem*. Rufinum quoque Pelagio prælusisse assertit ibidem sanctus Hieron. et in præfatione lib. 1 in Jeremiam, ubi Rufinum sub nomine Grunnii indicans, eum Pelagii præcursorem disertis verbis appellat: *quod non videns, inquit, præcursor ejus Grunnus olim niscus est carpere*. Idem de Rufino tradunt Anastasius epist. ad Joannem Jerosolymit. Marius Mercator in præfatione subnotationum in scripta Julani, et ipse etiam S. Aug. lib. de peccat. orig. cap. 4, ubi testatur Rufinum, Cœlestii magistrum, ipsum *docuisse negare traducem originalis peccati*.

Quis sit ille Rufinus, an ille Aquileiensis, adeò famosis propter graves ipsum inter et sanctum Hieron. contentiones; an alter natione Syrus, disputant critici. Marii Mercatoris editor Garnerius contendit, illum Rufinum Syrum fuisse, et ab alio Aquileiensi planè distinctum. Eminentissimus Card. Norisius è contra in *Hist. Pelag. lib. 1, cap. 2*; Natalis Alexander *Histor. Eccles. secul. 4, cap. 4, art. 32*; Petavius lib. de hæresi Pelag. cap. 1, n. 5, et

cæteri vulgò existimant Rufinum illum esse Aquileiensem. Quam controversiam, nos aliis dirimendam relinquimus.

Quod autem Theodorum Mospuestenum episcopum spectat, ipsum negasse peccatum originale, atque ita Pelagio prævisse, apertè testatur Marius Mercator tum loco mox laudato, tum etiam in Commonitorio, his verbis :
 « Quæstio contra catholicam fidem apud non-
 « nullos Syrorum, et præcipuè in Ciliciâ à
 « Theodoro quondam episcopo oppidi Mop-
 « suesteni jamdudum mota, nunc usque penès
 « paucos eorum occultè traditur; nec ea palàm
 « profertur, sed ab ipsis qui de eâ cornican-
 « tur, velut Catholicis, intra ecclesiam retine-
 « tur: progenitores videlicet humani generis
 « Adam et Evam mortales à Deo creatos, nec
 « quemquam posterorum suâ prævaricatione
 « transgressos læsisse, sed sibi tantum no-
 « cuisse, se mandati reos apud Deum fecisse,
 « alterum penitus nullum. »

ARTICULUS II.

De Pelagio.

Circa Pelagium sex quæri possunt: patria, professio, ingenium, scripta, mores et artes: hæc paucis hic expendemus. Ex majori Britannia, seu Angliâ ortum duxisse Pelagium, testantur S. Aug. Ep. 186 ad Paulinum aliàs 106, ubi scribit Pelagium, ut ab alio Tarentino distingueretur, Britonem fuisse cognominatum, S. Prosper initio Carminis de ingratis, à quo, Coluber Britannus dicitur. Orofius in Apologetico, et Marius Mercator in Commonitorio, eum pariter Britannum appellant. Professione monachus fuit Pelagius. Ita testatur S. Aug. lib. de hæresibus cap. 88: *Pelagianorum, inquit, est hæresis, hoc tempore omnium recentissima, à Pelagio monacho exorta.* Cùm tria monachorum genera tunc temporis distinguerentur, quorum alii in monasterio, qui cœnobitæ; alii in desertis locis, qui eremitæ; alii suis in ædibus degebant, qui apud Græcos quandoque philosophi, apud Latinos vulgò monachi, appellabantur, Pelagius ex his postremis fuisse videtur, nec usquàm ad sacros ordines promotus; unde laicus dictus est à Zozimo summo pontifice, in 2 Epistotâ ad Africanos: quicunque enim ex monachis non erant sacris ordinibus initiati, ii inter laicos recensebantur.

Ingenium accepit à naturâ fortissimum, cellerrimum et acutissimum, inquit S. Aug: lib. de Nat. et Grat. cap. 6 et 55. Non minùs litigiosum, versipelle, sinuosum, dolis ac fraudibus

deditum illius ingenium, produnt ac manifestant varii illi flexus ac doli, quibus erroris sui caput dissimulare omni arte nitebatur.

Quod spectat Pelagii opera, plures ab ipso libri scripti sunt, pluresque ad diversos epistolæ: horum catalogum ex Hier. Aug., Orosio, Mercatore et Gennadio refert doctissimus Garnerius Dissertatione primâ in primam partem operum Marii Mercatoris. Inter Pelagii scripta, hæc præcipua sunt. 1° De Trinitate libri tres. 2° De Naturâ liber unus. 3° De libero arbitrio libri quatuor. 4° Expositionum in omnes S. Pauli epistolas libri 13. 5° Ad Demetriadem de Virginis institutione liber unus. 6° Defensio fidei ad Augustinum. 7° Libellus fidei ad Innocentium. 8° Variæ ad diversos epistolæ. Ex his porrò omnibus sive libris, sive epistolis integrum nihil jam habetur, præter, libellum fidei, librum de institutione Virginis ad Demetriadem, et expositiones in Epistolas Apostoli; quæ autem nunc supersunt Pelagii opera, in unum volumen collecta, non ita pridem lucem aspexere Antuerpiæ, hæc inscriptione: *Appendix Augustiniana.*

Quod ad mores autem Pelagii attinet; eos, saltem specie tenùs, ita compositos et probatos habuit, ut pietatis laudem assecutus aliquandò fuerit, teste S. Aug. lib. de gestis Pelagii cap. 22. *Pelagii nomen, inquit, cum magnâ ejus laude cognovi,* et lib. 3 de peccat. meritis et remiss. cap. 1, ait, eum tanquàm virum sanctum habitum fuisse: *Post paucissimos dies, inquit, legi quædam Pelagii scripta, viri, ut audio, sancti et non parvo profectu christiani.*

Verùm sit de illâ pietatis ac sanctitatis famâ quâ floruit aliquando Pelagius, ab eâ certè subindè multum excidit; Orosius enim, testis cœtaneus, in Apologetico cap. 27, ipsum carpit tanquàm ministrum mensarum, itemque balneis et epulis enutritum. Nimirum, inquit Norisius Hist. Pelag. lib. 1, cap. 3, ex illis tunc temporis monachis erat Pelagius, de quibus hæc quidem lepidè scribit Hier. in Epist. ad Pammachium: « Miror, cur carni
 « detrahentes vivant carnaliter, et inimicam
 « suam foveant, et nutriant delicatè; nisi for-
 « tè implere volunt Scripturam dicentem:
 « *Amate inimicos vestros.*

Arte multiplici, variisque fraudibus hæresim suam disseminare conatus est Pelagius; hujus artem et fraudes in errore suo disseminando eleganter describit Garnerius dissertatione 1 in Marium Mercatorem. Ut autem faciliùs errores suos insinuaret Pelagius, non virorum

duntaxat, sed mulierum præsertim ministerio utebatur; quæ fraus et consuetudo omnibus ferè hæreticis communis fuit, ut observat S. Hier. ad Ctesiphont. quâ quidem fraude nihil certè periculosius; quippè cùm mulieres errorem faciliùs combibant; quia leves; celerius diffundant, quia loquaces; tardius quoque depouunt, quia ignaræ ac pertinaces.

ARTICULUS III.

De Pelagii discipulis.

Inter varios Pelagii discipulos tres præsertim extitere celebritate nominis et famâ notissimi, nimirum Cœlestius, Julianus et Anianus.

Primus ætate ac celebritate nominis discipulus Pelagii fuit Cœlestius, à quo Cœlestiani, sicut à Pelagio Pelagiani dicti sunt, teste S. Aug. lib. de hæresibus cap. 88. Quæ fuerit ejus patria, valde incertum: Campanum fuisse conjicit Marii Mercatoris Commentator. Vitam monasticam professus est, teste Gennadio lib. de Scriptoribus ecclesiasticis cap. 44. Acerrium fuisse illius ingenium testis est S. Aug. lib. 2 ad Bonif. cap. 5; inde factum est ut magistrum suum Pelagium audaciâ superaverit, ac totius exercitus ductor fuerit, ut ait S. Hier. epist. ad Ctesiphont. Cùm in concilio Carthaginensi damnatus, et idcirco à gradu sacerdotali, quem ambibat, repulsus fuisset, Africam deseruit, et in Asiam profugus, presbyteratum suffragatus est.

Julianus alter fuit Pelagianæ hæreseos sectator et defensor acerrimus. In Apuliâ natus est, ex illustri genere, patre Memore, seu Memorio, et Julianâ matre. Ad Celanensem episcopatum junior assumptus ex Mario Mercatore; fastu ac superbiâ tumens, ut sibi nomen compararet, inclinatam et afflictam Pelagianorum causam erigere conatus est. Hunc facili eloquentiâ, ingenio acri et subtili, magnâ Scripturarum sacrarum peritiâ, ac multiplici litterarum tum græcarum, tum latinarum cognitione illustrem fuisse tradit Gennadius lib. de Scriptoribus Eccles. 45. Multa adversus S. Aug. et catholicam fidem conscripsit, duodecim præsertim libros contra duos sancti Aug. de nuptiis et concupiscentiâ. Ipsum egregiè confutavit S. doctor; atque hominis fraudes hæresimque tam apertè detexit, ut episcopatu et Italiâ pulsus, Constantinopolim fugerit, Theodosii imperatoris et Cleri constantinopolitani patrociniûm imploraturus. Verùm tunc aderat Constantinopoli Marius Mercator S. Aug. amicus, qui adversus Julianum et sequaces ejus Commemoratorium obtulit imperatori, quo Juliani hæresi

detectâ; ipse et Cœlestius et alii ejusdem consortes erroris ab urbe Constantinopolitanâ pulsati sunt. Mollitus est postea Julianus, episcopatum et Ecclesiæ societatem recuperare, verùm irritò planè conatu; sanctorum etenim Sixti et Leonis pontificum operâ repressus est, teste S. Prospero in Chronico. Italiâ simul et Oriente ejectus, omnibus Ecclesiæ et imperatorum telis percussus, diu profugus, Siciliam tandem appulit; et ignobili vicò, cùm aliquandiu pueros docuisset, miserrimè obiit circa annum 455, ex episcopo factus ludimagister. Vide de Juliano quæ dicemus sub finem capitis sequentis, et ultimis Conclusionibus capitis 4 hujusce dissertationis.

Anianus patriâ, ut creditur, Italus fuit, et Ecclesiæ Celedensis diaconus; cùm latinæ et græcæ linguæ peritissimus esset, Pelagio magnam præstitit operam in detergendâ sermonis barbarie: de eo mentionem habet S. Hier. epist. ad Alipium et Augustinum cap. 2. In latinum sermonem interpretatus est Anianus octo priores homilias S. Chris. in Matth. necnon septem homilias ejusdem de laudibus S. Pauli; utrique interpretationi suam præfixit Pelagianis erroribus infectatam præfationem; prior dirigitur ad Orontium episcopum, posterior verò ad Evangelium presbyterum.

Qui historiam Cœlestii, Juliani, Aniani, quasi per annos singulos digestam legere voluerit, adeat jam appellatum Commentatorem Mercatoris dissert. 1, cap. 5, 6, 7, etc. circa verò horum scripta, consule eundem Appendice ad dissert. 6, quæ est de scriptis ab hostibus fidei pro hæresi Pelagianâ.

CAPUT II.

De Pelagianæ hæreseos impugnatoribus.

Hæresis Pelagiana debellata fuit variis conciliorum decretis; summorum pontificum constitutionibus, dogmaticis SS. Patrum scriptis; edictis imperatorum in ipsos latis; de his sigillatim hic agendum.

ARTICULUS PRIMUS.

De Conciliis in causâ Pelagianorum celebratis.

Viginti quatuor congregata sunt concilia adversus hæresim Pelagianam, ante celebrationem Ephesinæ synodi œcumenicæ. Quæ quidem concilia sigillatim retulit et doctissimis observationibus locupletavit Mercatoris Commentator Parisinus; præcipua ex ipsis ex ordine recenserebimus. Non abs re autem erit paucis antea præmittere Pelagii gesta ab exordio suæ hære-

seos ad annum usque 412, quo tempore celebratum est primum ex conciliis in causâ Pelagianorum habitis.

Cœpit hæresim suam disseminare Pelagius circa annum 405, scriptis aliquot epistolis et opusculis errorum suorum veneno conspersis; adeo tamen callidè, et tot tantisque verborum ambagibus argutisque, ut oculatissimos quosque falleret; id quod sibi ipsi penè contigisse fatetur S. Aug. lib. de grat. Christi cap. 37 : « Mihi (inquit Aug. loquens de Pelagii epist. ad Demetriadem) penè persuaserat, hanc illud gratiam, de quâ quæstio est, confiteri... sed cum in manus meas et alia venissent, quæ posterius latiusque conscripsit, vidi quemadmodum potuerit etiam illic gratiam nominare, sub ambigua generalitate quid sentiret abscondens, gratiæ tamen vocabulo frangens invidiam, offensionemque declinans. » Eadem arte paulò antea epistolam ad S. Paulinum conscripserat : « Eà (ut iactavit postmodum scribens ad S. Innocent.) nihil aliud quàm Dei gratiam et auxilium confitebatur, nosque nihil omninò boni facere posse sine Deo. » Verùm ipsam non caruisse fermento erroris ostendit S. Aug. citatò lib. de Grat. Christi, cap. 25.

Cæterum quò facilius errores suos spargeret subdolos hæresiarcha, peragratissimis multis regionibus et Ægypti monasteriis, tandem Romam venit ubi firmam sedem et domicilium sibi constituit. Ita testatur S. Aug. lib. de peccato orig. cap. 8. (Garnierius cap. 4, dissert. 1 in Mercat. censet Pelagium non ex orientalibus partibus, sed ex patriâ, Romam venisse longè ante Innocentii, Anastasiique tempora, cum teneret Sedem apostolicam Damasus, id est, ante annum 384, quo vitâ excessit S. pontifex.) Romæ substitit Pelagius, donec contigit eam circa annum 410, ab Alarico Gothorum rege invadi et devastari; tunc enim sparsis hinc inde civibus ac incolis, Pelagius cum Cœlestio fugit in Africam, et Hipponem appulit absente tunc S. Aug. ejusdem urbis episcopo : brevique inde Carthaginem se recepit, ubi semel iterumque obiter visus est à S. doctore curâ collationis mox habendæ cum Donatistis occupatissimo, nec multò post idem Pelagius in Palæstinam properavit, relicto in Africâ Cœlestio. Ista constant ex eodem S. Aug. lib. de gestis Pelagii cap. 22.

Cum autem Cœlestius in Africâ subsedisset, petentè interim Orientem Pelagio; atque ita, quemadmodum observat S. Hier. præf. lib. 4

in Jerem. quasi orbem inter se partiti essent magister et discipulus, ut hic Occidentales macularet, dum Pelagius Orientales perversis suis dogmatibus clanculùm labefactabat; Cœlestius cepit in Africâ ac præsertim Carthagine Pelagianam hæresim liberè et apertè profiteri, et ut majori cum auctoritate in eâ propagandâ incumberet, conatus est promoveri ad sacerdotium : ast ejus conatibus obstitit Paulinus diaconus, à quo delatus est ad Aurelium episcopum Carthaginensem, tanquàm hæresim docens ac spargens. Eà de re admonitus Aurelius celebravit circa annum Domini 412, concilium Carthaginense; quod primum fuit è viginti quatuor conciliis congregatis adversus hæresim Pelagianam, ante celebrationem Ephesini.

Prima itaque synodus in causâ Pelagianorum habita, celebrata fuit Carthagine anno 412, contra Cœlestium, actore Paulino S. Ambrosii diacono. Præfuit synodo Aurelius, plures adfuere episcopi. Sex errorum capita objecta sunt Cœlestio, qui convictus, anathemate damnatus est, et ab Ecclesiæ communione exclusus. Huic sententiæ non acquievit pertinax hæreticus, sed Sedem apostolicam ad declinandum synodi judicium appellavit; cæterum idem ipse mox Ephesum Asiæ urbem, neglectâ appellatione, profugit, ubi per obreptionem presbyter ordinatus est. Ista constant ex S. Aug. lib. de gestis Pelagii cap. 11, ex Mario Mercat. Commonit. cap. 1. et ex Facundo Hermian. lib. 4, cap. 3.

Secunda Synodus congregata est Jerosolymis anno 415, mense julio, à Joanne Jerosolymitano qui Pelagio favebat. Cogendæ synodo occasionem dedit Pelagius, qui cum toto jam ferè triennio Jerosolymis versatus esset, nonnullos de clero, et ipsum inprimis Joannem episcopum, solitis artibus suas in partes adduxerat. Inde presbyteros inter orta dissensio, aliis Pelagio faventibus, duce Joanne Jerosolymitano; aliis contra pugnantibus, duce S. Hier. qui perversam subdoli hæresiarchæ doctrinam diligentius perspexerat; hinc graves utrinque animorum motus et discordiæ, quas ut Joannes, non sedaret quidem, sed Pelagio nocere prohiberet, conventu presbyterorum convocato, tentavit, si quâ posset ratione partibus silentium imponere.

Huic synodo interfuit Paulus Orosius, celebris ex Hispaniâ presbyter, à S. Aug. missus ad S. Hier. in Palæstinam, ut de origine animarum doceretur. Narravit ille hoc in con-

ventu ea quæ anno 412 in Africâ gesta fuerant super hæresi Pelagianâ, atque testatus est se duo à Pelagio audivisse : unum, *hominem posse esse sine peccato, si velit*; alterum, *hominem posse faciliè mandata Dei custodire*, utrumque ab Africanis damnatum. Pelagius, quem inter presbyteros, laicum licet, sedere Joannes jussit, respondit, non dicere se *id posse fieri sine adjutorio Dei*; exceptionem Pelagii libenter admisit Joannes Pelagio favens, eamque Scripturæ testimoniis confirmavit. Sed altercatione factâ, multisque causantibus eundem non posse esse Pelagii patronum ac judicem, causamque ortam inter Latinos à latinis iudicibus disceptari debere, totius negotii iudicium ad R. pontificem Innocent. I delatum est, imposito interim utrique parti silentio. Ita colligitur ex Orosii Apologetico cap. 3 et 4, in quibus hujus synodi acta accuratè referuntur.

Non est autem quòd Jansenius lib. 1 de hæresi Pelagianâ, contendat, hanc synodum Jerosolymitanam commentitiâ esse, et antiquis incognitam : si quidem hujus synodi meminit S. Aug. lib. de gestis Pelagii cap. 11, 14 et 16, ubi narrat, Joannem in synodo diospolitânâ rogatum, retulisse quid coram se in illo conventu Jerosolimitano gestum fuisset.

Tertia synodus adversus Pelagium collecta fuit mense decembri ejusdem anni 415, Liddæ, quæ est Diospolis, urbs Palæstinæ. Huic præfuit Eulogius, metropolitanus Cæsariensis; adfuere 14 episcopi. Eâ in synodo hæresis postulatus est Pelagius à duobus episcopis Gallicanis, Erote videlicet Arelatensi, et Lazaro Aquensi, non per sequidem et verbo, cùm propter unius ægritudinem ad synodum pervenire non potuerint, ut refert S. Aug. lib. de gestis Pelagii cap. 35, sed misso ad Eulogium Cæsariensem accusationis suæ libello. Libellus ille *Erotis* et *Lazari* duo continebat objectionum capita, unum adversus Pelagium, alterum contra Cœlestium, ex illorum libris excerpta, pluribusque erroribus constantia. Singulos recenset S. Aug. citato cap. 35, lib. de gest. Palæst. Interrogatus autem Pelagius, ut erat mirus fallendi artifex, objecta sibi capita, tum dubiâ et anticipi responsione, tum turpi æquivocatione, nomine scilicet adjutorii Dei intelligendo naturam, liberum arbitrium, legem, etc., Patribus Palæstinis illisit; idque eò facilius, quòd ipse latinè loquens Græcis, ab illis non intelligebatur nisi interpretis beneficio, qui ejus verba aut fideliter non reddebat, aut ejus favebat personæ. Quapropter, illi episcopi, inquit sanctus Aug.

epist. 177, aliàs 95, ad Innoc. S. pontif. ut erant simplices, nihil fraudis subesse suspicati, atque nomine gratiæ quam admittebat Pelagius eam intelligentes quam doctrina catholica solet intelligere, Pelagium, errore facti, Catholicum pronuntiavere; eaque de causâ synodum Diospolitânâ, *miserabilem* appellat sanctus Hier. epist. 79.

Etsi autem Palæstina synodus, errore facti decepta, Pelagium orthodoxum judicaverit, Pelagii tamen hæresim non approbavit, imò damnavit; quod quidem constat ex S. Aug. lib. de gestis Pelagii, cap. 35, ubi sanctus doctor ex actis ipsius synodi refert, Diospolitânos Patres, lectis articulis Pelagio objectis, dixisse: *Quid ad hæc quæ lecta sunt capitula, dicit præsens Pelagius monachus? hæc enim reprobant sancta synodus, et Dei catholica Ecclesia*. Idem colligitur ex Innocent. 1º in epist. ad quinque Africanos antistites, quàm S. Aug. laudat lib. de peccat. orig. cap. 9, et ex S. Prospero Carm. de Ingratis cap. 2. Falsò itaque, ut notat S. Aug. cap. 32, citati libri de gestis Pelag. scribebat Pelagius ad amicos, anno sequenti, sententiam suam 14 episcoporum suffragiis fuisse comprobata.

Si quis verò plenius cognoscere velit quænam capita fuerint objecta Pelagio in synodo Diospolitânâ, et ejus responsiones sive potiùs effugia, adeat sanctum Augustinum lib. de gestis Pelagii, ubi fusè cuncta describit quæ à nobis brevitati consulentibus omittuntur.

Quarta synodus, quæ est secunda Carthaginensis, in causâ Pelagianorum, convocata est ab Aurelio Carthaginensi anno 416, circa tempus autumnii; adfuere 68 episcopi, quorum nomina recensentur in Synodicâ ad Innocent. Huic repente ex Oriente interfuit Orosius, qui litteras Gallicanorum episcoporum Erotis et Lazari Pelagii accusatorum Patribus Carthaginensibus obtulit narravitque ea quæ in synodis Jerosolimitânâ et Diospolitânâ gesta fuerant; lectis litteris, et Palæstinorum gestorum auditâ relatione, recensita sunt quæ ante quinquennium in causâ Cœlestii gesta fuerant in priori synodo Carthaginensi. In ipsum, ejusque magistrum Pelagium lata est sententia, quâ Patres *communi deliberatione censuerunt, hujusmodi persuasionis auctores* (Pelagius et Cœlestius) *nisi hæc apertissimè anathematizaverint, ipsos anathematizari oportere*. Hanc videlicet severitatem existimantes necessariam sanandis ingeniis multorum, quos illi vel jam corruperant, vel etiam in posterum poterant corrumpere; atque ut huic imminenti malo omni ex parte obviam iret

Carthaginense concilium, rem quoque iudicavit ad Innocentium papam deferri oportere. *quò scilicet eorum decretis etiam apostolicæ Sedis adhiberetur auctoritas.* Ita Patres Carthaginenses in Epist. synodicâ ad Innocent. S. pontificem.

Quinta synodus contra Pelagianos celebrata fuit Milevi Numidiæ urbe, eodem anno 416, circa finem octobris. Præfuit Sylvanus provinciæ senior, eoque jure primas, et concilii præses; adfuere 61 episcopi, quos inter eximii tres extiterunt, Augustinus, Alipius et Possidius. Epistolam ad Innocent. scripsere concilii Patres, quâ posteaquàm ei posuerunt ob oculos, quàm perniciosam esset hæresis Pelagiana, ipsum rogant atque obtestantur *ut si minùs Pelagii ac Cælestii saluti consulere valeret, eos à nefariis suis placitis avocando, saltem eosdem condemnando aliis proficeret.* Hæc, ut et Carthaginensis synodi Epistola, manu ipsius S. Aug. exarata fuit.

Eodem anno circa finem eademque de causâ, præter synodicas conciliorum Carthaginensis et Milevitani epistolas, præsules quinque Africani, scilicet Aurelius, Alipius, Augustinus, Evodius ac Possidius; aliam communi nomine eidem scripsere Innocentio epistolam, quâ totam Pelagii causam uberiùs et enucleatiùs exponebant; docebant etiam, ipsius Innocentii præsertim interesse, huic tanto malo mederi: « propterea quòd, inquit illi Antistites, si cognoverint dogmatis Pelagiani sectatores eundem Pelagii librum quem illius vel putant esse vel nòrunt, episcoporum catholicorum auctoritate, et maximè sanctitatis tuæ, quam apud eum esse majoris ponderis minime dubitamus, ab eodem ipso anathematizatum atque damnatum, non eos existimamus ulterius ausuros pectora fidelia, et simpliciter christiana turbare. » Hunc quinque episcoporum conventum Carthagine, loco sextæ synodi in causâ Pelagianorum meritò reponi probat doctissimus Garnerius, tum auctoritate Marii Mercat. in Commonit. cap. 13, n. 13, tum quia conventus ille constabat præstantissimis totius Africæ, imò et Ecclesiæ occidentalis Patribus, Aurelio præsertim et Augustino, quorum ille dux, iste ingenium conciliorum à sancto Prospero Carmine de Ingrat. cap. 2, dictus est.

Tres itaque juxta Marii Commentatorem celebratæ sunt synodi anno 416 contra Pelagianos: prima Carthagine circa tempus autumnii, altera Milevi circa finem octobris, tertia tan-

dem iterum Carthagine sub finem ejusdem anni.

Tribus memoratis Africanorum præsulum epistolis, Innocentius papa totidem alias rescripsit anno 417, eadem januarii die consignatas; quæ à Julio episcopo in Africam omnes allatæ sunt. His in epistolis sanctus pontifex, 1º palmares duos Pelagianorum errores proscribit, duoque catholica dogmata his opposita definit; alterum de necessitate gratiæ, alterum de infantium Baptismo propter peccatum originale; 2º pronuntiat anathema in errorum auctores et sectatores; 3º resipiscentibus apostolicæ charitatis sinum aperit. In rescripto ad Milevitane synodi Patres, post damnatam, juxta Africanarum synodorum relationem, perversam Pelagii et Cælestii doctrinam, hæc habet Innocentius: « Quare inventores vocum novarum (Pelagium et Cælestium) Ecclesiasticâ communione privari, apostolici vigoris auctoritate censemus, donec resipiscant à diaboli laqueis.... simul autem præcipimus, ut quicumque id pertinaciâ simili defensare nituntur, par eos vindicta constringat... Hæc igitur in supradictos maneat fixa sententia.... jubemus tamen si unquàm sani, deposito pravi dogmatis errore, resipuerint, damnârintque ea, quorum se ipsi prævaricatione damnârunt, eis medicinam solitam, id est, receptaculum suum ab Ecclesiâ non negari. »

Existimant plurimi, cum Marii Mercat. Commentatore Garnerio dissert. 2 de Conciliis in causâ Pelag. habitis, prædictas Innocentii ad Africanos præsules epistolas, nonnisi in coactâ synodo fuisse perscriptas; quia, inquit, apud pontifices romanos tunc temporis non erat in more positum, ut de rebus tanti momenti scriberent, nisi prius convocato concilio. Ita Syricius Himerio Tarraconensi, de non rebaptizandis Arianis. Ita Anastasius Joanni Jerosolymitano, de Origenis erroribus. Ita Zozimus universis episcopis, de condemnatione Pelagii et Cælestii. Ita Cælestinus Cyrillo et aliis de Nestorii impietate. Ita Leo Magnus Flaviano, adversus Eutychen, etc. Censet autem ibidem Garnerius, synodum hanc Romanam ex quâ ad Patres Africanos rescripsit Innocentius, septimam esse ex iis quæ adversus Pelagianos celebratæ sunt.

Ad hanc Innocentii primi sententiam contra Pelagianam hæresim pertinet quod scripsit sanctus Prosper Carm. de Ingratis.

Pestem subeuntem prima recidit
Sedes Roma Petri.

Primas partes in damnatione Pelagianorum Sedi romanæ dedit S. Prosper, quia præcedentia concilia, aut Pelagium et Cælestium non damnauerant, aut ultimum causæ integræ iudicium detulerant ad Innocentium papam; et licet hæresim delestata fuissent, ac proscribendam iudicassent, apostolicæ tamen auctoritatis iudicio sententiam suam muniri ac confirmari enixè postulaverant.

Pelagius ac Cælestius ubi damnatosse ab apostolicâ Sede, totâque simul Ecclesiâ Africanâ audivère, actum esse de suâ ipsorum causâ, si damnatio illa vim obtineret, probè intellexerunt: undè, ut hanc à se damnationis sententiam averterent, oblati romano pontifici simulatis ac captiosis fidei suæ libellis, ipsi fucum facere omni arte conati sunt. Et quidem Cælestius relictâ Epheso Constantinopolim profectus, hæc in urbe, uti olim in Africâ fecerat, impietatis suæ dogmata disseminare aggressus est. Id ubi primùm cognovit Atticus, ejusdem civitatis episcopus, eum inde magno studio ac diligentia expulit, missis adversus ipsum litteris ad episcopos in Asiam, Thessalonicam et Carthaginem; de quo meminit S. Aug. lib. 3 contra Julian. cap. 1, et Marius Mercator in Commonit. cap. 1, n. 4, credit Atticum ex auctoritate concilii eam in rem coacti hoc ipsum præstitisse; neque enim eâ tempestate moris erat, mitti dogmaticas epistolas ab ullo episcopo ad majores Sedes integrasque dioceses, cujusmodi erant Asia, Macedonia et Africa, nisi ex concilio; quod variis exemplis, ex Lucâ Holstenio desumptis in notis ad synodum Rom. sub Bonifacio II, colligit Marii Commentator Parisinus loco antea citato; hancque synodum anno 417 celebratam, octavam esse ex iis quæ contra Pelagianos habitæ sunt, existimat eruditus ille auctor. Eodem anno Pelagius in synodo Antiochenâ à Theodoto illius urbis episcopo damnatus est, et Jerusalemis ejectus, ut testatur Marius Mercator Commonit. cap. 3. Hæc synodus nona numeranda est in causâ Pelagianâ.

Porro Cælestius Constantinopoli pulsus, hoc ipso anno 417, *Romam totâ festinatione perrexit*, ut loquitur Marius Mercator, atque Zozimo qui Innocentio successerat, querimonias detulit contra Erotam et Lazarum, suos ac Pelagii accusatores, et contra synodorum Africanarum iudicium, ipsique libellum fidei obtulit. Eâ de causâ Zozimus circa finem augusti, aut initium septembris ejusdem anni 417, congregavit synodum, quæ est altera Romana, et decima ex iis quæ in negotio Pelagianorum celebratæ

sunt; quidquid ad eam usque diem actum in Cælestii causâ fuerat, illic excussum est.

Cælestium diligenter interrogavit Zozimus, ipsique suavit ut ea quæ sibi à Paulino Diacono objecta fuerant, damnares, ac decretis Innocentii prædecessoris sui præberet assensum: « At ille, inquit S. Aug. lib. de peccat. originali cap. 7, noluit quidem Diaconi objecta « damnare, sed beati papæ Innocentii litteris « non est ausus obistere; imò se omnia quæ « Sedes illa damnares, damnaturum esse promisit. » Quin etiam, ut refert idem S. doct. lib. 2 contra duas epist. Pelagianorum cap. 4, absolutè ac simpliciter « professus est, se beati « papæ Innocentii litteris consentire..... et « omnia sibi objecta damnare secundum sententiam beatæ memoriæ Innocentii. » Isti tam sinceræ, ut videbatur, professioni, credens Zozimus, libellum Cælestii catholicum declaravit; non quod, inquit Doctissimi Benedict. in suâ præfatione n. 14, *quæ dogmata Cælestii continebat, ipse approbaret, sed quòd apostolicæ Sedis iudicium amplecti, paratissimum se iste prædicaret*; sen, ut docet Natalis Alex. Hist. Eccles. dissert. 3 seculi, Cælestii libellus à Zozimo declaratus est catholicus; non quidem habitâ ratione propositionum et dogmatum quæ continebat, sed habitâ ratione mentis et affectus quem enuntiabat Cælestinus, quia nimirum sententiam suam Sedis apostolicæ iudicio corrigendam subjecerat, et Inn. I decretis assentiri se fuerat professus; unde non tam in ipsum libellum, quàm in ejus auctorem, catholici nominis cadebat appellatio à Zozimo data. Ita clarè colligitur ex S. Aug. citato lib. 2 contra duas epist. Pelag. cap. 3: « In homine « æcerrimi ingenii, inquit, qui profectò, si corripigeretur, plurimis profuisset, voluntas emendationis, non falsitas dogmatum approbata est: « et propterea libellus ejus catholicus dictus est, quia et hoc catholicæ mentis est, si quæ « fortè aliter sapit, quàm veritas exigit, non ea « certissimè definire, sed detecta ac demonstrata respuere... hoc in illo factum esse putabatur, quando se litteris beatæ memoriæ « papæ Innocentii, quibus de hæc re dubitatio « tota sublata est, consentire respondit. » Neque tamen, ut observat idem S. Aug. lib. de peccat. origin., cap. 7, « à vinculis ex communicationis « nondum est creditus esse solvendus (Cælestius) sed interposito duorum mensium tempore, donec rescriberetur ex Africâ, ubi ejus « calliditas aliquantò evidentius innotuerat, resipiscendi ei locus sub quâdam medicinali sen-

« tentiæ lenitate concessus est; quoniam reverâ,
 « si depositâ perviciaciæ vanitate, quod promi-
 « serat, vellet attendere, et easdem litteras,
 « quibus se consensurum esse responderat,
 « diligenter legeret, sanaretur. »

His erga Cœlestium ita constitutis ad Aure-
 lium cæterosque Africanos antistites litteras
 dedit Zozimus, quibus eos de rebus cum Cœle-
 stio gestis certiores faceret; eos insuper quod
 solis Erotis et Lazari exauctoratorum et absen-
 tium episcoporum accusationibus tantam fidem
 in re tantî momentî adhibuissent, subirato
 animo perstringit; tandem, Cœlestium præ-
 sentem se tueri, fidem suam exponere, accu-
 satoresque suos provocare: « Quare, inquit S.
 « pontifex, intra secundum mensem aut ve-
 « niant, qui præsentem redarguant, aliter sen-
 « tiæ, quàm libellis et confessione contextuit;
 « aut nihil, post hæc tam aperta et manifesta
 « quæ protulit, dubii sanctitas vestra resedis-
 « cognoscat. » Quæ de Cœlestio narravimus,
 partim ex prioribus Zozimi litteris ad Africa-
 nos constant, partim ex Aug. lib. 2 ad Bonifac.
 cap. 3, 4; Mario Mercatore Commonit. cap. 1,
 2, et aliis ejusdem ævi scriptoribus.

Quod autem Pelagium spectat, postquàm in
 Africam pro Cœlestio scripserat Zozimus, lit-
 teras à Praylio accepit Jerosolymitano post
 Joannem episcopo, quibus causæ Pelagii enixius
 adstipulator interveniebat, ut loquitur idem Zo-
 zimus in posterioribus ad Africanos epistolis.
 Pelagius ipse suam quoque epistolam, quâ hæ-
 resis crimen ab se depelleret addiderat; ad-
 junctâ et fidei professione, in quâ sincerè, quid
 crederet, quidve respuerit, declarare se testa-
 batur. Utramque dirigebat ad Innocentium,
 utpote quas obitu ejusdem pontificis nondum
 audito scripserat; verum cum in illius locum
 jam successisset Zozimus, hinc utique red-
 ditæ sunt. Ita observat S. Aug. lib. de Grat.
 Christi cap. 30, et lib. de peccat. origin.
 cap. 17.

Accepta Pelagii scripta Zozimus in consessu
 publico recitari jussit; in iis quæcumque ab
 Africanis episcopis damnata fuerant, callidè
 reticuerat versipellis hæresiarcha, suamque fi-
 dei professionem, coronide admodum catholi-
 câ, si ea sincera fuisset, clauderebat: « Hæc est
 « fides, papa beatissime, inquebat, quam in
 « Ecclesiâ catholicâ didicimus... in quâ si mi-
 « nus peritè, aut parum cautè aliquid fortè
 « positum est, emendari cupimus à te, qui Pe-
 « tri et fidem et Sedem tenes. » Ex his, liquidò
 purgare se Pelagium, ac fidem suam tantâ

perspicuitate exponere, ut locum malignis in-
 terpretationibus nullum relinqueret, judicavit
 Zozimus. Ita testatur S. pontifex in posteriori-
 bus suis litteris ad Aurelium aliosque Afros
 antistites super eâ re datis XI Kal. octobris
 ejusdem anni 417: « Utinam, inquit, ullus,
 « vestrum recitationi litterarum interesse po-
 « tuisset! Quod sanctorum virorum qui ade-
 « rant, gaudium fuit? Vix fletu quidam se et
 « lacrymis temperabant, tales etiam absolutæ
 « fidei infamari potuisse. Estne unus locus in
 « quo Dei gratia vel adjutorium prætermis-
 « sit? Quid quisquis potest præterea dicere,
 « vel mente concipere? » Acceptis quas Zozi-
 mus papa miserat in Cœlestii favorem epistolis,
 Aurelius Carthaginensis episcopus, et totius
 Africæ primas, synodum coegit incunte novem-
 bri ejusdem anni 417, ex variis Africæ provin-
 ciis. Eo in concilio Africani præsules, 1º lit-
 teras ad Zozimum dedere, quibus ipsum
 obtestabantur, ut nihil de sententiâ in Pela-
 gium et Cœlestium ab Innocentio prædecessore
 suo ad relationem Africanarum synodorum
 latâ immutaret, sed in eo quo erant statu cun-
 cta relinqueret, donec è suis aliquem Romam
 mitterent cum idoneis causæ instrumentis,
 quibus hæreticorum artes aperirentur, palam-
 que fieret quàm legitimè et canonicè fuissent
 damnati. Hæ litteræ initio concilii Zozimo con-
 festim scriptæ, ut Romam ipsæ, si fieri posset,
 ante pervenirent, quàm concessi ab illo duo
 menses essent exacti. 2º Aliquantò post idem
 Africani Patres maturâ deliberatione præhabi-
 tâ, Marcellinum subdiaconum ad Zozimum
 direxere cum prolixioribus litteris pontifici tra-
 dendis, quibus quidquid apud ipsos super Cœ-
 lestii causâ factum antea fuerat, exponebant,
 simulque Pelagii et Cœlestii errores, dolos,
 fallacias et cavillationes aperiebant. 3º Inno-
 centii I sententiâ in Pelagium et Cœlestium
 lata, in eodem concilio acceptata fuit: « Con-
 « stituimus (inquiunt Patres in Epist. synodicâ
 « ad Zozimum) in Pelagium atque Cœlestium
 « per venerabilem episcopum Innocentium de
 « Beatissimi Apostoli Petri Sede prolatam ma-
 « nere sententiam, donec apertissimâ confes-
 « sione fateantur, gratiâ Dei per Dominum
 « nostrum Jesum Christum... nos per singulos
 « actus adjuvari, ita ut nihil sine illâ nihil veræ
 « sanctæque pietatis habere, cogitare, dicere,
 « agere valeamus. » 4º Tandem canones octo
 (alii novem numerant) de gratiâ Dei adversus
 Pelagianos conditi sunt et litteris ad Zozimum
 additi.

Hoc ipsum concilium, undecimum est ex iis quæ adversus Pelagianos coacta fuere; Carthagine quidem habitum est, sed Africanum vocare solet Augustinus; sic epist. 215, n. 2, lib. de peccat. origin. cap. 7, 8 et 21, eò forsitan quòd è pluribus quidem provinciis constabat, licet non ex omnibus, quo id ab insequentis anni concilio plenario ac generali distinguit.

Anno sequenti 418, Kal. maii, Carthagine celebrata est duodecima contra-Pelagianos synodus. Ad hanc ex omnibus Africæ provinciis episcopi ab Aurelio vocati convenerunt; unde, licet à loco Carthaginensis vulgò dicatur, à sancto tamen Augustino epist. 215, aliàs 47, ad Valentinum, Africana nominatur; estque prima totius Africæ in causâ hæresis Pelagianæ. Huic adfuerunt 214 episcopi, teste S. Prospero in chronico ad annum 418; Photius in Bibliothecâ codice 33, ducentos viginti quatuor præter Aurelium et Donatianum numerat. In illâ synodo totius Africæ plenariâ, Pelagianam hæresim repetitis anathematibus confoderunt præsules Africani, canonesque octo in priori synodo conditos confirmârunt ac promulgârunt. Synodum hanc à priori disertè distinguit S. Aug. citatâ epist. 215, his verbis: « Item quod papæ « Zozimo de Africano concilio scriptum est, « ejusque rescriptum ad universos totius orbis « episcopos missum; et quod posteriori concilio plenario totius Africæ contrâ ipsum errorem breviter constituimus,.... hæc omnia « misimus vobis. » De utroque hoc Africano concilio mentionem habet S. Prosper Carmine de Ingrat. cap. 2.

Zozimus acceptis à priori synodo Africanâ rescriptis gestisque omnibus quæ Pelagianam causam et Pelagii Cœlestiique damnationem in prioribus synodis factam spectabant, fraudes hæreticorum exploratas et perspectas habuit, Cœlestiumque ex Africani concilii monitis iterum examinare decrevit. Coactâ igitur Romæ synodo, diem dixit Cœlestio, ut huic adesset, atque in eâ hæretici dogmatis capita ab Africanis missa palam et absque furo et tergiversatione damnaret; at ille artes et dolos in hæresi suâ occultandâ detectos videns, se *substravit examini*, et Româ fugit. Id habemus ex S. Aug. lib. 2 ad Bonif. cap. 3. Quamobrem Zozimus eâ in synodo Africani concilii decreta probavit, roboravitque, ac prædecessoris sui iudicium secutus, Pelagium et Cœlestium, et hæretica ipsorum dogmata *repetitâ auctoritate* damnavit, atque tractoriam eâ de re ad omnes

totius orbis Christiani episcopos dedit epistolam, quæ per totum orbem missa fuit, et ab omnibus catholicis antistitibus subscripta. Ista constant ex S. Aug. loco mox citato, tum lib. 1 contra Julianum cap. 4, et lib. 6, cap. 12; S. Prospero lib. contra collatorem et in Chronico; Mario Mercat., etc. De tractoriâ Zozimi dicemus art. sequenti.

Synodus illa à Zozimo coacta, tertia est Romana, et decima tertia earum quæ in causâ Pelagianorum habitæ sunt; ea ipsa est, quam S. Aug. lib. 2 ad Bonifac. cap. 3, appellat, *apostolicæ Sedis examen et iudicium*; S. Prosper lib. contrâ Collat. cap. 41, et in Carm. de Ingratis, *Concilium cunctorum sacerdotum, mundi manu subscriptum*; Marius Mercator Commonit. cap. 4, *audientiam pleniorum*. Inter Africanum anni 417 concilium et plenarium anni 418 reponenda est ista synodus, quod non obscurè colligitur ex citatâ mox epistolâ 125 S. Aug. ad Valentinum. Quo autem præcisè mense habitâ fuerit, incertum; conjicit sæpius citatus Marii Mercat. Commentator, statim post absolutos dies festos Paschales anni 418 habitam fuisse, id est, die 15 aprilis, gestisque ad Honorium delatis, editam pridie Kalendas maii solemnem hujusce imperatoris contra Pelagianos sanctionem.

Eodem anno 418, autumnali tempore, rursus celebrata est Carthagine altera plenaria totius Africæ synodus; hæc tertia est Africana, et decima quarta contra Pelagianos. In eâ Zozimi papæ epistolæ ad Afros, et tractoria ad totius orbis episcopos perlectæ sunt, et summo Patrum plausu exceptæ, qui datis ad pontificem litteris, ipsi de Pelagianorum damnatione, quemadmodum par erat, gratulati sunt. Istud colligitur ex S. Prospero lib. contra Collatorem cap. 10, et ex auctore collectionis Capitulorum de grat. adnexæ epistolæ Cœlestini I ad episcopos Galliæ cap. 8.

Varia subindè variis in regionibus celebrata sunt concilia. Verum cum plurimi spretis his conciliorum et summorum Pontificum decretis, tum errores, tum personas Pelagii et Cœlestii defenderent, inter quos erant decem et octo episcopi, ut colligitur ex S. Aug. lib. 1 ad Bonifac. cap. 1, auctoritate tum pontificiâ, tum imperiali, jussi sunt omnes, non modo episcopi, presbyteri et clerici, sed et ipsimet laici subscribere damnationi, non solum doctrinæ, sed etiam personarum.

Frustra autem conquesti sunt Pelagiani, particularia duntaxat fuisset concilia à quibus

damnati fuerant; tantique momenti negotium, nonnisi universalis concilii iudicio esse definiendum; frustra causati sunt, *simplicibus episcopis, sine congregatione synodi in locis suis sedentibus, extortam fuisse subscriptionem*, frustra ex illis decem et octo episcopi, ut observat S. Aug. ad œcumenicam synodum provocationem suam interponunt; vanas ac futiles hasce Pelagianorum quærimoniae egregiè refellit S. Aug. variis in locis, præsertim verò citato lib. 4 ad Bonif. cap. ultimo: « Aut verò, inquit, congregatione synodi opus erat, ut aperta perniciès damnetur, quasi nulla hæresis aliquando nisi synodi congregatione damnata sit; cum potiùs rarissimè inveniantur, propter quas damnandas necessitas talis extiterit; multòque sint atque incomparabiliter plures, quæ ubi extiterunt, illic improbari damnarique meruerunt, atque inde per cæteras terras devitandæ innotescere potuerunt. Verùm istorum superbia, quæ tantum se extollit adversus Deum, ut non in illo velit, sed potiùs in libero arbitrio gloriari, hanc etiam gloriam captare intelligitur, ut propter illos Orientis et Occidentis synodus congregetur, orbem quippè catholicum, quoniam Domino eis resistente pervertere nequeunt, saltem commovere conantur; cum potiùs vigilantia et diligentia pastoralis, post factum illis competens sufficiensque iudicium, ubicumque isti lupi apparuerint, conterendi sunt, sive ut sanentur atque mutantur, sive ut ab aliorum salute, atque integritate vitentur. » Et lib. 3 contra Julian. cap. 3: « Vestra, inquit S. D. apud competens iudicium communium episcoporum modò causa finita est; nec amplius vobiscum agendum est, quantum ad jus examinis pertinet, nisi ut prolatam hæc de re sententiam cum pace sequamini; quòd si nolueritis, à turbulenta vel insidiosâ inquietudine cohibeamini. » Et rursus lib. 1 Operis imperf. contra Julian. cap. 10, Pelagianis sic respondet idem S. D.: « Absit à christianis potestatibus terrene rei publicæ, ut de antiquâ catholicâ fide dubitent, et ob hoc oppugnatoribus ejus locum et tempus examinis præbeant; ac non potiùs in eâ certi atque fundati, talibus, quales vos estis, inimicis ejus disciplinam coercitionis imponant. » Verùm nec Pelagianorum damnationi tandem defuit œcumenica synodus; Ephesina etenim anno 431, contra Nestorium congregata, actione 5 et 7, Cœlestii et Pelagii errores anathemate rursus confixit. Ita colli-

TH. X.

gitur ex Epist. synodicâ ejusdem concilii ad S. Cœlestinum papam, et ex S. Prosp. in epiphlio hæresis Nestorianæ et Pelagianæ.

Juvat nunc paucis hic exhibere distinctam synodorum synopsis, quæ contra Pelagianos celebratæ sunt; tum earum quæ hucusque memoratæ sunt, tum nonnullarum quæ prætermisimus, quasque refert Marii Mercatoris Commentator Parisinus.

Prima. Synodus celebrata fuit anno 412, Carthagine, in causâ Cœlestii. Secunda. Jerusalem sub Joanne episcopo, anno 415, mense julio, in causâ Pelagii. Tertia. Diospoli eodem anno mense decembri. Quarta. Carthagine anno 416, circa tempus autumnii. Quinta. Milevi eodem anno circa finem octobris. Sexta iterum Carthagine sub finem ejusdem anni à 5 episcopis. Septima. Synodus Romana prima sub innocent. anno 417. Octava. Synodus constantinopolitana sub Attico contra Cœlestium eodem anno. Nona. Synodus Antiochena sub Theodoto contra Pelagium eodem tempore. Decima. Synodus Romana secunda sub Zozimo in causâ Cœlestii, circa initium septembris ejusdem anni 417. Undecima. Synodus Africana prima contra Pelagianos tempore Zozimi, ineunte novembri ejusdem anni 417. Duodecima. Synodus Romana tertia sub Zozimo, circa medium aprilis 418. Decima tertia, Synodus Africana secunda Kalendis maii ejusdem anni 418. Decima quarta. Synodus Africana tertia eodem anno, autumnali tempore. Decima quinta. Synodus quarta Africana anno 419. Decima sexta. Synodus in Ciliciâ adversus Julianum anno 425. Decima septima synodus Constantinopolitana, in causâ episcoporum ex Italiâ ejectorum propter hæresim Pelagianam, anno 424. Decima octava. Synodus Romana quarta sub S. Cœlestino anno 425. Decima nona. Synodus Africana quinta, in causâ Leporii, eodem anno. Vigesima. Gallicana, cujus tempus, locus et præses incerti; eam Arelate præside Patroelo Arelatensi episcopo habitam fuisse circa annum 427, conjicit Marii Mercatoris interpres. Vigesima prima. Anglicana Verolamii anno 429, quâ in synodo sanctissimi duo antistites Galli Germanus Autissiodorensis et Lupus Trecentis, Pelagianos qui ad finem impugnandam convenerant, debellârunt atque convicerunt. Vigesima secunda. Synodus Romana quinta sub S. Cœlestino circa annum 430. Vigesima tertia. Synodus Ephesina generalis anno 431.

Ex iis patet quàm numerosa sit series conciliorum.

hiorum quæ annorum novemdecim spatio habita sunt.

ARTICULUS II.

De Constitutionibus summorum pontificum contra Pelagianos.

Plurimi summi pontifices Pelagianam hæresim suis Constitutionibus profligavere; præcipui sunt SS. Innocentius, Zozimus, Bonifacius, Cælestinus, Sixtus et Leo Magnus, de quibus hæc habet Gelasius ad Honorium Dalmatice episcopum: « An fortè nescitis hanc hæresim (Pelagianam) ab apostolicâ dudum Sede per beatæ memoriæ Innocentium, ac deinde Zozimum, Bonifacium, Cælestinum, Sixtum, Leonem continuus et incessabilibus sententiis fuisse prostratam? » De præcipuis horum pontificum decretis jam paucis dicendum.

1^o Innocentius papa, ut supra observavimus, acceptis tribus epistolis concilii Carthaginensis, concilii Milevitani, et quinque episcoporum, totidem ex synodo romanâ ad Africanos præsules ipso anno 417, mense januario rescripsit dogmaticas epistolas; in his damnatâ hæresi Pelagianâ, anathemate percussi sunt illius auctores ac sectatores.

Circa istud apostolicæ Sedis iudicium, omitti certè non debent præclara hæc S. Aug. verba: Jam, ait S. doctor serm. 431 de verbis Apost. n. 10, de hac causâ duo concilia missa sunt ad Sedem apostolicam; inde etiam rescripta venerunt; causa finita est; « utinam aliquando finiatur error. » Concio hæc, ut observant Doctiss. Benedictini in præfatione tomi 10 Operum S. Aug. habita est paucis à lato Innocentii decreto mensibus, nono scilicet Kalendas octobris die Dominico, qui dies in annum 417 incidebat. Hoc S. pontificis decreto, sæpius in Julianum utitur S. Aug. Sic lib. 3 contra Julianum n. 5: « Vestra verò, inquit, apud competens iudicium communi episcoporum modò causa finita est; nec amplius agendum, nisi ut prolatam hæc de re sententiam cum pace sequamini, quod si nolueritis, à turbulentâ inquietudine cohibeamini. » Idem repetit S. doctor lib. 4 contra Julianum cap. ultimo.

2^o Zozimus, Innocentii successor, anno 418, eosdem Pelagianos decretoriâ tandem sententiâ damnat. Circa hanc Zozimi sententiam, quam tractoriam vocant, nonnulla hic veniunt observanda. Primum, tractoriam hanc prolixam fuisse epistolam, quæ totam Pelagii, Cælestiique causam, excerptasque ex ipsorum libris sententias contineret, atque in eâ Pelagiana

dogmata cum suis auctoribus damnabantur. Id habemus ex S. Aug. lib. de peccat. orig. cap. 21, et ex epist. 190, aliâs 137. Secundum, eandem tractoriam ad omnes totius christiani orbis episcopos missam fuisse, et ab iisdem subscriptam. Ita testantur plerique 3 seculi scriptores. S. Aug. epist. 190 ad Optatum, aliâs 137: « Hæresis novæ, inquit, vel auctores, vel certè acerrimi, notissimique suasores, cum Pelagius et Cælestius extitissent, conciliorum Episcopaliū vigilantia, in adiutorio Salvatoris, qui suam tuetur Ecclesiam, etiam à duobus venerabilibus antistitibus Apostolicæ Sedis, papâ Innocentio et papâ Zozimo, nisi correcti etiam egerint poenitentiam, toto christiano orbe damnati sunt, de quibus exempla recentium scripturarum, sive quæ specialiter ad Afros, sive quæ universaliter ad omnes episcopos de memoratâ Sede manarunt, ne fortè ad vestram fraternitatem nondum pervenerint, vobis curavimus mitti. » Et epist. 215, aliâs 57, ad Valentinum: « Item quod Zozimo de Africano concilio scriptum est, ejusque rescriptum ad universos totius orbis episcopos missum. » S. Prosper lib. contra Collatorem cap. 1: « Catholica acies, inquit, non patitur respirare quos vicit, et in quorum excidium unam cunctorum sacerdotum manu sententiam scripsit. » Ibidem cap. 21: « Africanorum conciliorum decretis papa Zozimus sententiæ suæ robur annexuit, et ad impiorum de truncationem gladio Petri dextras omnium armavit antistitum. » Et Carmine de Ingratis, cap. 9:

... Nempè hæc damnata fateris
Conciliis, mundique manu.

Auctor appendicis ad epistolam S. Cælestini ad episcopos Galliæ: « In quam nos sententiam dirigit beatæ recordationis papæ Zozimi regularis auctoritas, cum scribens ad totius orbis Episcopos ait: *Vos autem instantu Dei*, » etc.

Marius Mercator in Commonit. ad Theodosium cap. 1. « A prædicto Zozimo, inquit, scriptis amplissimis vel longissimis prædamatus est (Cælestius), in quibus et ipsa capitula, de quibus accusatus fuerat, continentur, et omnis causa, tam de Cælestio, quàm de Pelagio videtur esse narrata, quorum scriptorum et nos hic habemus exemplaria, et ad orientales Ecclesias, Ægypti diæcesim, et Constantinopolim, et Thesalonicensem, et Jerosolimam, similia eadem-

« que scripta ad episcopos transmissa esse suggerimus. » Ibidem cap. 5: « Quæ omnia supra scripta capitula continet illa beata memoria episcopi Zozimi epistola, quæ tractoria dicitur, quâ Cælestius Pelagiusque damnati sunt, quæ et Constantinopolim, et per totum orbem missa, subscriptionibus SS. Patrum est roborata, » etc.

Tertium prædicto Zozimi decreto, episcopi omnes, exceptis octodecim, quorum dux erat Julianus, subscripsere, qui idcirco depositi sunt. Ita declarat Marius Mercator citato cap. 5. Commonit., ubi post verba mox relata statim subiungit: « Cui (tractorix) Julianus et reliqui complices ejus subscribere detrectantes, contentiososque se nolentes iisdem patribus facere, non solum imperialibus legibus, sed et sacerdotalibus statutis depositi, atque exautorati, ex omni Italiâ deturbati sunt. » Idem habetur ex S. Prospero lib. contra Collatorem cap. 1, his verbis: « Catholica acies non patitur respirare quos vicit... pulsi pontificio et communione privati, querantur de felicitate nostræ victoriæ, et arment in nos linguas suas, qui exulare à veritate, quam cives esse Ecclesiæ maluerunt. »

Existimant nonnulli cum Norisio lib. 1 hist. Pelag. cap. 11, tractoriam Zozimi à decreto Innocentii in eo tantum fuisse diversam, quod istud pressius, illa latius doctrinam catholicam contineret. « Innocentius papa, inquit Gennadius lib. de scriptoribus ecclesiasticis cap. 43; scripsit decretum occidentalium et orientalium ecclesiarum adversus Pelagianos datum, quod postea successor ejus Zozimus latius promulgavit. » Idem indicant SS. Aug. lib. de peccat. orig. cap. 7, et Prosper contra Collatorem cap. 10.

3^o Bonifacius papa infensissimus fuit hæresis Pelagianæ hostis, et acerrimus fidei catholicæ propugnator, de quo S. Prosper lib. contra Collat. ita scribit: « Sanctæ memoriæ Bonifacius.... contra inimicos gratiæ Dei, non solum apostolicis, sed etiam regis utebatur edictis; et quando idem cum esset doctissimus, adversus libros Pelagianorum beati Augustini episcopi responsa poscebat. »

4^o Idem de Cælestino papâ testatur S. Prosper citato libro contra Collat. cap. 41, ubi de sanctissimo pontifice sic loquitur: « Per hunc virum etiam orientales Ecclesiæ geminâ peste purgatae sunt, quando Cyrillo Alexandrinæ urbis antistiti, gloriosissimo fidei catholicæ defensori, ad execrandam Nestorianam im-

« pietatem apostolico auxiliatus est gladio, quo etiam Pelagiani, dum cognatis confederantur erroribus, iterum prosternerentur. »

5^o Sixtus, qui in sede apostolicâ S. Cælestino successit, pariter adversus Pelagianos causam catholicam egregie propugnavit; in Julianum, Pelagianum, qui ad Eclanensem episcopum, ex quo fuerat olim dejectus, et in Romanæ Ecclesiæ communionem, simulatâ penitentia irrepere tentabat, constanter rejecit. Ita declarat S. Prosper in Chronico.

7^o Tandem S. Leo Epist. ad episcopum Aquileiensem 6, aliâs 86, quæ est de Pelagianis, hæresim hanc iterato anathemate confodit, atque Pelagianos in communionem recipiendos non esse declarat, nisi prius erroris et auctorum ipsius damnationi expressè subscriperint: « Damnent, inquit, apertis professionibus sui superbi erroris auctores, et quidquid in doctrinâ eorum universalis Ecclesiæ exhorruit, detestentur; omniaque decreta synodalia quæ ad excisionem hujusce hæreseosque apostolicæ sedis confirmavit auctoritas, amplecti se et in omnibus approbare, plenè et apertè, ac propriâ manu subscriptis protestationibus eloquantur. Nihil in verbis eorum obscurum, nihil inveniatur ambiguum. » Rursus ibidem: « omnes, sive presbyteri, sive diaconi, sive cujuscumque Ordinis Clerici, qui de Pelagianorum Cælestinianorumque consortio.... quorum si quisquam salubribus præceptis obedire detrectarit, sive ille clericus, sive sit laicus, ab Ecclesiæ societate pellatur, ne perditior animæ suæ, salutis insidiatur alienæ. »

Et in Epist. ad Septimum 7, aliâs 85: « Saluberrimum est, inquit et spiritualis medicinæ utilitate plenissimum, ut sive presbyteri, sive diaconi, sive alii cujuslibet ordinis clerici qui se correctos videri volunt, errorem suum, et ipsos erroris auctores damnari à se sine ambiguitate fateantur. »

ARTICULUS III.

De dogmaticis SS. Patrum libris adversus Pelagianos.

Celebriores fidei catholicæ adversus hæresim Pelagianam defensores sunt, SS. Hieronymus et Augustinus; Orosius, Sixtus et Marius Mercator; nam Prosper et Hilarius contra solos ferè Semipelagianos scripsere. Juvat hic paucis texere catalogum præcipuorum operum quæ quatuor ex his fidei vindicibus adversus Pelagianos edidère, rejectâ ad calcem totius dis-

sertationis exactâ et chronologicâ operum S. Aug. contra eosdem hæreticos analysi; hæc enim, utpote gravioris momenti, fusiorem postulat styli.

§ 1. *De scriptis S. Hieronymi contra Pelagianos.*

Primus fidei contra Pelagianos defensor laudandus venit S. Hieronymus. Scripsit autem contra Pelagianos, 1^o epistolam ad Marcellinum de origine animarum, versûs annum 411. In eâ porrò quinque referuntur opiniones circa originem animarum, nempe quòd vel in corpora labantur è cœlo, ubi præexisterint; vel ex divinâ substantiâ tanquàm particulæ defluant, vel à Deo quotidie fiant, vel sint ex traduce. Priores duas explodit ut hæreticas, tertiam rejicit tanquàm *ecclesiasticorum nonnullorum stultam persuasionem*; quartam amplectitur ut suam; quintam *maximæ parti Occidentalium tribuit*.

2^o Scripsit S. Hier. contra Pelagianos epistolam ad Ctesiphontem anno circiter 415. In hac epistolâ disputat S. doctor adversûs librum Pelagii *de Naturâ*, ejusque has potissimum sententias impugnat, quibus ille pronuntiabat, *posse hominem sine peccato esse, si velit*; deinde, *liberum destrui arbitrium, si alterius ope indiget*; postremò, *facilia Dei esse mandata*. Sub finem ejusdem epistolæ Pelagium hortatur Hieronymus, ut publicè prædicet quod secretò discipulis loquitur: *Nam Ecclesiæ victoria est, inquit, vos apertè dicere quod sentitis*.

3^o Idem S. doctor anno 415, tres dialogorum libros conscripsit contra Pelagianos. In iis Atticum et Critobulum inducit secum invicem disceptantes; hic Pelagianam hæresim propugnat, ille catholicæ fidei causam tuetur. Præcipuus S. doctoris scopus in hisce libris in eo versatur, ut τῆς ἀπάδειας, id est, imperturbationem Pelagianorum impugnet, et divinæ gratiæ necessitatem commendet.

4^o Scripsit insuper de re Pelagianâ præfationes quatuor ad libros suos Commentariorum in Jeremiam; hæ præfationes plurimum continent historiæ, atque ex his facile est intelligere, quis fuerit causæ Pelagianæ status in Palæstinâ ab adventu Pelagii ad synodum Diospolitanam.

5^o Tandem tres alias epistolas de causâ Pelagianâ edidit S. Hier.: prima ad Alypium et Aug. 202, paulò ante mortem S. Hier. scripta est, nimirum anno 419, sub finem; altera, 195, ad Aug.; tertia, ad eundem Aug. 123. Tres illæ epistolæ declarant rei Pelagianæ in

Palæstinâ statum à synodo Diospolitanâ usque ad annum 419.

§ 2. *De Orosii scriptis adversûs Pelagianos.*

Paulus Orosius celebris Hispaniarum presbyter SS. Hieronymo et Aug. amicissimus, post Hierosolymitanam synodum, in quâ Pelagianum dogma strenuè confutavit, agentibus iisdem Pelagianis à Joanne Hierosolymitano malè exceptus est, et Ecclesiâ ad quam propter Encæniorum solemnitate advenerat expulsus, quasi per summam blasphemiam asseruisset, *hominem nequidem cum Dei adjutorio, posse esse sine peccato, et mandata Dei observare*. Ut hanc à se calumniam propulsaret Orosius, Apologiam edidit quæ inscribitur: *Apologeticus contra Pelagium de arbitrii libertate*.

In duas porrò distribuitur partes, altera historica, altera dogmatica. Illa res gestas in conventu Jerosolymitano refert, et scribendi causam; ista Pelagianos errores egregiè confutat, nec immeritò videri potest, quoddam quasi compendium doctrinæ ab Hier. et Aug. traditæ. Hanc conscripsit Apologiam Orosius anno Christi 415, ante synodum Diospolitanam.

Sunt qui cum Jansenio prædictam Orosio abjudicent epistolam; verum ii non satis advertunt Apologeticum hunc magnam habere ab Aug. auctoritatem, certamque fidem. Legantur quæ habet S. doctor de gestis Palæstinis cap. 11, 14 et 16. Vide etiam Commentatorem Marii dissert. 6, cap. 3, et Natalem Alexand. Hist. Eccles. secul. 5, cap. 3, art. 6, parag. 2.

§ 3. *De Sixto, presbytero romano.*

Sixtus, illustris romanæ Ecclesiæ presbyter, qui Cœlestino I in Sede upostolicâ successit, inter eos etiam aumeratur qui adversûs Pelagianam hæresim scripsere. Ipsi sex hypognosticon, id est, subnotationum libros adscribit eruditus Marii Mercatoris interpret Garnerius. Id variis momentis conjicit prædictus auctor, quæ apud eundem videri possunt dissert. 6 de scriptis adversûs hæresim Pelagianam cap. 4.

§ 4. *De Mario Mercatore.*

Fortissimum illum fuisse fidei catholicæ adversûs Pelagianos vindicem, demonstrant quæ nunc supersunt ejusdem opera; ea in unum collegit ac doctissimis dissertationibus adornavit eruditus Garnerius. Duo celebriora sunt ipsius opera, *Commonitorium* scilicet Theodosio imperatori oblatum anno circiter

429 et liber *Subnotationum* in postremos Juliani libros, qui probabilius creditur scriptus sub finem anni 451, quo tempore celebrata fuit Ephesina synodus. Utrumque opus plurima sanè eximia complectitur, tum ad historiam, tum ad dogmata Pelagii et Cœlestii penitus dignoscenda.

Commonitorii quinque sunt partes. Prima complectitur causam Cœlestii, ibique refert quomodo acta fuerit Carthagine, Constantino-poli et Romæ; in secundâ ex indubitatis Pelagii libris dogmata Pelagiana deteguntur; in tertiâ Pelagii et Cœlestii condemnatio recense-tur, sive quæ à duobus summis Pontificibus Innocentio et Zozimo, sive quæ à Patribus Diospolitanis lata est; in quartâ declaratur eandem fuisse utriusque hæretici sententiam, atque ita unius condemnationem ad alterum pertinere; in quintâ denique convenitur Julianus, nimirum ut resipiscendum exemplo ad Ecclesiam rediret.

Liber *Subnotationum* in duas partes distri-buitur: prima nomen Commonitorii ad lecto-rem accepit, quia præfationis loco est; altera *Subnotationum* ad verba Juliani, estque ip-summet opus. Prima complectitur potissimum quæ ad historiam spectant; secunda quæ ad dogmata.

Eidem Mercatori libros hypnognosticon ad-scribunt nonnulli; verum immeritò; multa ete-nim contrarium suadent, stylus præsertim et dicendi ratio, quæ in hypnognostico diversa est ab eâ quæ in aliis Mercatoris indubitatis opus-culis deprehenditur. Hujus incerta est patria.

In iis quæ ad hæresim Pelagianam spectant, summi profectò ponderis unicuique cordato haberi debet Mercatoris testimonium; nam, inquit laudatus mox ipsius Commentator, quæ tria solent fidem auctoribus conciliare, ea mi-rum in modum ipsum commendant. 1^o Scrip-sit de Pelagio, Cœlestio et Juliano, quæ partim vidit, partim etiam gessit. 2^o Scripta edidit eo tempore, quo poterat ab omnibus fal-sitatis argui, si quid alienum à vero retulisset. 3^o Quæ scripsit probatoribus veterum monu-mentis omninò sunt consona.

His adde, quod ad commendationem Merca-toris plurimum conducit, de quæstione difficil-limâ ab ipso se doceri postulat ipsemet Augus-tinus citato libro de octo quæst. : « Quod at-tinet, inquit, quæst. 3, ad quæstionem « resurrectionis.... inquisitio diligentior ad-« hibenda est; et si quid absolutum ac defini-« tum excogitare potueris, peto mihi mittere

« non graveris; ego enim plus amo discere, « quam docere, etc. »

ARTICULUS IV.

De imperatorum edictis adversus Pelagianos.

Non solum synodorum decretis, Constitutio-nibus summorum pontificum, ac dogmaticis sanctorum Patrum scriptis prostrati sunt Pela-giani, verum etiam christianorum imperato-rum legibus. Ita testantur S. Aug. lib. de pec-cato orig. cap. 17 : « In auctores, inquit, ne-« fandi erroris episcopalia concilia, et aposto-« lica Sedes, universaque romana Ecclesia, « romanumque imperium, quod Deo propitio « christianum est, rectissimè fuit commotum, « donec resipiscant de diaboli laqueis. » S. Prosper lib. contra Collatorem : « Sanctæ mc-« moriæ Bonifacius, inquit, piissimorum im-« peratorum catholicâ devotione gaudebat, et « contra inimicos gratiæ Dei, non solum « apostolicis, sed etiam regiis utebatur edictis. » Idem testatur Marius Mercator in Commonit. cap. 3.

Quinque autem potissimum fuere imperato-rum adversus Pelagianos Constitutiones, seu edicta, quæ quidem, ut observat Possidius in vitâ sancti Aug., *Ecclesiæ Dei catholicæ judi-cium secuta sunt*. Prima adversus Pelagianos Constitutio Ravennæ data est ab Honorio im-peratore anno 418, die 30 aprilis. Hâc lege im-perator statuit Pelagium et Cœlestium ex urbe pellendos, eorum verò sectatores ubicumque et à quocumque sive clerico, sive laico, legiti-mè accusatos et convictos, facultatum spoli-atione, perpetuoque exilio mulctandos esse. Ad Constitutionis hujusce executionem præ-fecti prætorio, Junius quartus, Palladius Orientis, Monaxius Occidentis, Agricola Gal-liarum, jussionem dederunt in singulis suarum præfecturarum diocesisibus unâ cum lege prin-cipis promulgandam.

Imperatoriam hanc legem propriè Rescrip-tum esse, non nudam Constitutionem minimè postulatam, intelligitur ex his S. Aug. verbis lib. 3, contra Julianum cap. 1^o : *Sanè, ut di-cis, si pro vobis potius ab imperatore responsum est*. Id certum; à quo autem petita fuerit illa, non ita constat; eam rogante Zozimo datam, viri quidam eruditi opiniuntur; alii verò exis-timant illam Africanorum precibus fuisse concessam, antequàm Pelagianos damnaret Zozi-mus, idque declarare videtur antiquus codex canonum Ecclesiæ romanæ hæc inscriptione : *Sacrum rescriptum acceptis synodi superscriptæ*

gestis. Præcedit autem illic synodus Carthaginensis anni 418, quæ quidem cum die primâ maii celebrata sit, uno die posterior est Rescripto; verum, uti observant doctiss. Benedictini n. 48, citatæ præfationis, facili errore synodus anni 418 cum eâ quæ anno 417 habita erat, confundi potuit.

Altera adversus Pelagianos ab eodem Honorio imperatore data est Constitutio anno 419, 5 Idus junii. In eâ primò confirmat Honorius latam à se Constitutionem anno superiore contra Pelagium et Cœlestium. 2^o Statuit, quisquis ut eos, ibicumque terrarum agerent, sciens non denuntiaret aut expelleret, ipsemet in exilium pelleretur. 3^o Decernit, juxtâ Zozimi Tractoriam, ut Pelagii atque Cœlestii damnationi omnes subscriberent episcopi, sub iis pœnis, ut recusantes dignitate suâ exuantur, expellantur è suis urbibus, et à communione in perpetuum resecantur. Ita piissimus imperator pontificum et conciliorum decreta observari curabat.

An autem posterior hæc Honorii Constitutio Valerii Comitis instantiæ, promoventibus Alypio et S. Augustino, referenda sit; an potius curis ac precibus Bonifacii romani jam episcopi, certò definiri non potest. Hanc diligentie Zozimi adscribendam probabile iudicant eruditi auctores laudatæ mox præfationis n. 21, idque innuere videtur S. Prosper lib. contra Collatorem cap. 21, ubi asserit, Zozimum summo studio gratiæ Christi adversarios, cum auctoritate suâ apostolicâ, tum edictis imperatorum, debellasse.

Novam in Pelagianos Constitutionem anno 421 tulit Constantius, sub idem tempus ab Honorio in consortium imperii vocatus. Eâ in Constitutione, Cœlestium, aliosque Pelagianos, qui sese urbi denuò insinuaverant, rursus Româ expelli mandavit, ita ut ne intra centesimum quidem ab urbe lapidem commorari sinerentur. Edictum illud non ad annum 420, ut volunt Baronius, et Usserius, referendum esse, sed ad annum 421, rectè demonstrant Norisius lib. 1 Hist. Pelag. cap. 20, et Garnerius part. 1 Marii Mercat. dissert. 3.

Quartam contra eosdem Pelagianos Constitutionem edidit Valentinianus III, anno 425. Huic ferendæ legi occasionem dedere tumultuantes in Gallicanis regionibus Pelagiani; jubet imperator episcopos Pelagiana dogmata sequentes per Patroclum Arelatensem episcopum conveniri, « et nisi intra viginti dies ex conventionis tempore...errata correxerint, Gallicanis regionibus expelli, atque in eorum

« locum sacerdotium fideiis subrogari; » id est, catholicos subrogari antistites.

Tandem anno 430, Theodosius junior Orientis imperator, cui paulò ante Marius Mercator Commonitorium contra Pelagianos obtulerat, Honorii, Constantii et Valentiniani imperatorum Occidentis zelum ac exemplum secutus, Cœlestium, Julianum, cæterosque Pelagianos regiâ urbe ejecit. Ita testatur idem Marius in titulo Commonit. De his Constitutionibus imperatoriis hæc habet Gelasius epist. 7: *Pelagium, Cælestium, Julianum, cæterosque complures oratoriæ facundiæ viros, cæterosque (Pelagianos)...probatum fuisse convictos, et tam ecclesiasticis constitutis, quàm imperialibus percussos fuisse præceptis.*

ARTICULUS V.

De subscriptionibus in causâ Pelagianorum exactis.

Ex dictis hucusque patet, in Pelagiani erroris excidium supremas duas potestates, ecclesiasticam et imperatoriam conspirasse, illam in synodorum et summorum pontificum decretis, istam in sanctionibus Ecclesiæ iudicium secutis. Porro, ad efficaciter obtinendum quod utrâque potestate fuerat constitutum, imperata est, testibus SS. Aug. et Prospero, Possidio, Mercat. etc., subscriptio Ecclesiæ decretis Pelagium et Cœlestium, eorumque sequaces damnantis. De hisce subscriptionibus præstat nonnulla paucis inquirere, ex quibus tum dictis, tum dicendis in præsentî causâ non modica lux effulgebit.

Quæres itaque 1^o, quæ fuerit, et à quo præscripta formula fidei, cui subscribendum foret in causâ Pelagianorum.—Respondeo formulam illam fuisse Zozimi Tractoriam ad universos totius orbis episcopos directam. Ita declarant SS. Aug. et Prosper, Mercator, et alii supra art. 2 citati. Quemadmodum ergo in Eutychianâ causâ non alia fuit formula fidei, quàm Epistola S. Leonis ad Flavianum de incarnatione, ita nec in Pelagianâ fuit alia subscribenda præter Zozimi Tractoriam, quæ idcirco in append. ad Epist. ad episcopos Galliæ, appellatur *regularis auctoritas*.

Quæres 2^o, an tantum dogmatum, an etiam auctorum damnatio exacta sit in hac causâ.—Respondeo certum esse, non solum dogmatum, sed etiam auctorum Pelagii, Cœlestique damnationem subscribendam fuisse. Ita communi consensu testantur SS. Aug. et Prosper, Mercator, alique omnes seculi quinti auctores, qui

de causâ Pelagianâ scripserunt. Augustini, Prosperi et Mercatoris testimonia hanc in rem retulimus citato mox articulo 2 hujusce capituli : cætera videri possunt apud Parisinum Marii Commentatorem primâ parte dissert. 4, cap. 4.

Porrò (quod observâ, id quod olim dicebatur, subscribere damnationi dogmatum et auctorum, nihil aliud fuit, quàm propositiones damnare in eo ipso sensu, quo à suis auctoribus assertæ sunt, id est, in sensu obvio, proprio et naturali, aut, ut aiunt, Ecclesiæ in iisdem propositionibus connexa duo, quæ *jus* et *factum* vocant, dampnanti consentire.

Quæres 3°, quibus imperata sit subscriptio, an solis episcopis, an etiam aliis de clero, imò et aliquando laicis.—Respondeo 1°, imperatam fuisse episcopis ; ita testantur Julianus apud S. Aug. lib. 4 ad Bonif. cap. ultimo ; *De simplicibus episcopis, sine congregatione synodi, in locis suis sedentibus extorta subscriptio est* ; Honorius imperator in edicto ad aurelium, *ad quorundam episcoporum pertinaciam*, etc. Marius Mercat. in Commonit. *Julianus et reliqui complices*, etc.

Respondeo 2°, imperatam quoque fuisse presbyteris, cæterisque de clero. Id manifestè probat exprobatio romanis clericis à Juliano facta nomine octodecim episcoporum, cujus meminit S. Aug. lib. 2 ad Bonifac. cap. 3, his verbis : « Quin etiam romanos clericos arguunt, scribentes eos jussionis terrore perculsos non erubuisse crimen prævaricationis admittere, ut contra priorem sententiam, quæ gestis catholico dogmati affuerant, postea pronuntiarent, malam esse hominis naturam. » Jussio porrò illa, uti non obscurè indicant sanctus Prosper, Possidius et Marius antea citati, ipsissima fuit Zozimi Tractoria, per quam subscriptionem omnibus imperabat, per se quidem episcopis majorum sedium, per ipsos verò, minoribus, et per minores toti singularum Ecclesiarum clero.

Respondeo 3°, laicis pariter imperatam fuisse subscriptionem probatur, ex eo quòd excommunicationis pœna statuta sit in laicos qui subscribere detrectarent, uti constat ex testimoniis Patrum Ephesinorum et S. Leonis, sequenti quæsito referendis. Idem colligitur ex isto celebri sancti Prosperi pronuntiato Carmine de ingratis cap. 7 :

.... Nempè hæc damnata fateris
Conciliis, mundique manu.

Quæres 4°, quæ pœna imposita fuerit subscribere detrectantibus,—Respondeo 1°, epis-

copis, presbyteris, cæterisque clericis subscribere recusantibus, impositam fuisse pœnam depositionis, expulsionis è suis civitatibus, imò et excommunicationis. Istud constat 1°, ex canonibus 1, 2 et 4 concilii Ephes. act. 7, in quibus prædictæ pœnæ statuuntur, et in præfatione horumque canonum, sic habent Patres Ephesini : « Qui Nestorii et Cælestii sequi sententias, ex eo manifestè sunt deprehensi, quòd Nestorium nobiscum condemnare noluerunt ; quos sancta Synodus communi de cælo ab omni ecclesiastica communione alienos esse statuit, et omnem sacerdotii sanctionem illis ademit, per quam aliquibus vel nocere, vel prodesse poterunt. » Constat 2° ex Epist. S. Cælestini ad Nestorium rescribentis : « Hos quoque hæreticos, de quibus nos, velut eorum, quæ gesta sunt, nescius consuleré voluisti, sedibus suis iniusta dicentes expulit justa damnatio. » Constat 3° ex Epist. S. Leonis ad Nicetam episcopum Aquileiensem 6, alias 56, et ex Commonit. Marii, etc., quæ testimonia consule art. 2 hujusce capituli.

Respondeo 3° laicis subscribere recusantibus statutam fuisse excommunicationis pœnam. Ita declarant Patres Ephesini act. 7, can. 7, his verbis : « Sancta Synodus decrevit. (Nestorianos aut Pelagianos) si quidem episcopi aut clerici fuerint, eos omninò à proprio cadere gradu ; si verò laici, excommunicatos esse. » Idem statuit S. Leo citatâ mox Epist. 6 ad episcopum Aquileiensem.

Quæres 5°, quâ auctoritate sancita fuerit lex subscribendi, an sacerdotali solâ, an etiam imperiali.—Respondeo subscribendi legem utrâque auctoritate, sacerdotali primùm, deindè imperiali sancitam fuisse. Prima pars constat ex dictis : Zozimus enim, ut antea vidimus, decretoriâ suâ epistolâ in Pelagianos ab universis episcopis non modò ut Pelagiana dogmata cum suis auctoribus dampnarent, petebat, sed etiam ut eorum proscriptionem subscriptionibus ipsi suis comprobarent. Idem etiam postea edixit Honorius imperator datâ ad Aurelium Carthaginensem episcopum Constitutione, cujus verba paulò ante art. 4 retulimus.

Secunda verò pars, nimirum sacerdotali primùm auctoritate sancitam fuisse subscribendi legem, clarè colligitur 1° ex Possidio qui id disertè docet in vitâ S. Aug. cap. 18, his verbis : « illi tantæ Sedis antistites (Innocentius et Zozimus) suis diversis temporibus eosdem (Pelagianos) notantes, atque à membris Ecclesiæ præcidentes, datis litteris ad Africanas,

« Orientisque et Occidentis Ecclesias, eos anathematizandos et devitandos ab omnibus Catholicis censuerunt, et hoc tale de illis Ecclesiae Dei catholicae prolatum iudicium etiam piissimus imperator Honorius audiens ac sequens, eos legibus damnatos inter hæreticos haberi debere constituit. » 2° Idem testantur ejusdem ævi scriptores, S. Prosper lib. contra Collator. cap. 41; Marius Mercat. in Commonit. parte 2; S. Cælestinus epist. ad Patres Ephesinos, quæ refertur 3 part. concilii Ephes. cap. 20; Gelasius epist. 5 ad Honorium Dalmatiæ episcopum, et epist. 7. 3° Edictum Honorii imperatoris ad Aurelium Carthaginensem, quo primum subscriptiones exegit, plusquam anno integro posterius est Zozimi Tractoriæ, quæ, ut loquitur Mercator, per totum orbem missa subscriptionibus SS. Patrum est roborata; hæc enim mense aprili an. 418 à Zozimo lata est, Honorii verò ad Aurelium Constitutio data fuit 5 Idus junii anno 419. Monaxio et Plintà Coss.

CAPUT III.

De erroribus Pelagianorum.

Ad tria potissimum capita revocari possunt Pelagianorum errores. Primum spectat peccatum originale; secundum, liberi arbitrii vires; tertium tandem, gratiæ naturam, existentiam ac necessitatem.

Errores Pelagianorum circa peccatum originale. — Hi præcipuè fuere Pelagianorum errores circa præsens caput. Primum ac capitale ipsorum dogma, et veluti cæterorum omnium basis, testibus S. Prospero Carm. de Ingrat. et Mario Mercat. in Commonit. istud fuit, *Adamum mortalem factum fuisse, qui sive peccaret, sive non peccaret, moriturus esset.* Secundum, *peccatum Adami ipsum solum læsisse, et non genus humanum.... Et illum reum et obnoxium fieri, qui hunc propriâ voluntate, non nascendo, sed peccando fuerit imitatus.* Tertium, *infantes qui nunc nascuntur, in eo statu esse, in quo fuit Adam ante prævaricationem.* Quartum, *infantes, etiamsi non baptizentur, habere vitam æternam.* Quintum, *concupiscentiam et libidinem (etiam in præsentî hypothesi) non esse malas; ignorantiam et difficultatem, sine quibus nullus homo nascitur, mortem, cæterasque humanæ vitæ miseras, non esse pœnam peccati; primordia, non supplicia, jam esse naturæ.* Sextum, *Baptismum non esse necessarium parvulis ad peccati remissionem, et ad vitam æternam, sed ut sanctificarentur in Christo, ut adoptarentur in filios, ut regni cœ-*

lestis hæredes fierent. Scilicet Pelagiani victi hæc Christi sententiâ Joan. 3 : *Nisi quis renatus fuerit ex aquâ et Spiritu sancto non potest introire in regnum Dei*, distinguere inter regnum cœlorum et vitam æternam; hanc parvulis sine Baptismo decedentibus promittebant; illud verò, non nisi baptizatis tribui fatebantur.

De his Pelagii et Cælestii erroribus testantur S. Prosper et Marius Mercator locis mox citatis, necnon S. Aug. lib. de Peccat. origin. cap. 2, 3, etc.; lib. de gestis Pelagii, cap. 34, 35, et passim lib. contra Julianum.

Quâ porro ratione ex illo primo Pelagii errore de Adami mortalitate, tanquam ex unâ tenui radice reliqui omnes originem duxerint, doctè ac solidè explicat Marii Commentator dissert. 7, cap. 1, 2, etc., idque ex SS. Aug. et Prospero, Mario Mercat., etc., confirmat.

Errores Pelagianorum circa vires liberi arbitrii. — 1° In eo errârunt quòd liberum arbitrium æquè sanum, æquè validum, æquè perfectum ad bonum operandum, in Adami posteris propugnarent, ac in Adamo ipso. Hinc Julianus apud S. Aug. lib. de Naturâ et grat. cap. 19, asserebat, *ad operandum justitiam liberum arbitrium et post peccata tam plenum esse, quàm fuit ante peccata.* 2° Contendebant hominem propriis liberi arbitrii viribus ad eam justitiæ perfectionem pervenire posse, ut absque inordinatis passionum motibus, et sine ullo prorsus peccato viveret. Ita colligitur ex SS. Hieron. dialogo adversus Pelagianos, et Aug. lib. 2 de Peccat. meritis. 3° Propugnabat Julianus absque gratiâ in Infidelibus propriis naturæ viribus haberi posse virtutes perfectè ac simpliciter veras, imò et virtutum abundantiam, quibus nempe Infideles simpliciter ac perfectè boni et justi sint ac dicantur. Errores hos sæpius Juliano exprobrat S. Aug. præsertim, lib. 4 contra ipsum cap. 3. Sunt et alii circa vires liberi arbitrii Pelagianorum errores qui ad recensitos commodè reduci possunt.

Errâsse Pelagianos in exponendâ libertatis naturâ, cum eam in activâ voluntatis indifferentiâ reponerent, affirmat Jans. lib. 2 de hæres. Pelag. cap. 1. Verùm in eo turpiter hallucinatur: nusquam enim Pelagianos damnat S. Aug. quòd indifferentiam libertati essentiallem assererent; imò eorum dogma de naturâ liberi arbitrii catholicum esse disertè agnoscit S. doctor lib. 2 de nupt. et concup. cap. 13, his verbis: « Liberum itaque in hominibus esse arbitrium.... utique dicimus; non hinc estis Cælestiani et Pelagiani; liberum autem

« esse quemquam ad agendum bonum sine adiutorio Dei... hoc vos dicitis; hinc estis Cælestiani et Pelagiani. » Non ergo errabant Pelagiani, quod indifferentiam ad utrumlibet libertati essentiali esse sentirent; imò, quemadmodum observat Natalis Alexand. Hist. Eccles. sec. 3, cap. 3, art. 3, « error est asserere, quod erraverint Pelagiani libertatem arbitrii in indifferentiâ ad utrumlibet constituentes. » Verùm de his ex professo suo loco.

Errores Pelagianorum circa gratiam. Cùm primum hæresim promulgavit Pelagius, nullam omnino gratiam admisit, sed naturam solum, et ingenitas liberi arbitrii vires sufficere propugnavit ad omnia Dei mandata observanda, tentationes superandas, pravæ extirpandas consuetudines, et ad quamdam imperturbationem, seu, ut vocant, passionum impassibilitatem et impeccantiam, ad ipsam denique vitam æternam assequendam. Ita sensit Pelagium in primordiis suæ hæreseos constat ex S. Hier. epist. ad Ctesiph. Orosio in Apologiâ, et S. Aug. passim in primis operibus adversus Pelagianos conscriptis. Ad hæc doctrinæ monstra exhorruere Catholici, quemadmodum testatur S. Aug. serm. 26, aliàs 11, de verbis Apost. cap. 7, his verbis: « Disputantes (Pelagiani) contra gratiam Dei pro libero arbitrio fecerunt auribus piis et catholicis offensionem. Cœperunt horreri, cœperunt ut certa perniciēs devitari. » Ut autem publicam hanc invidiam et offensionem Catholicorum declinarent, variis subterfugiis et æquivocationibus errorem suum dissimulare tentârunt, quod ibidem observat S. D. Verùm hujusce erroris arcana propius exploranti manifestum videbitur, idem perversum dogma ab ipsis constanter retentum fuisse ad Julianum usque, qui errorem Pelagianorum aliquatenus temperare visus est. Præstat impræsentiarum paucis resensere varia hæc effugia quibus Catholicis illudere conati sunt Pelagiani.

Primum effugium. 1^o igitur cùm Pelagiani omnium Catholicorum invidiam et offensionem in se concitassent, eò quod assererent hominem absque gratiæ adiutorio esse posse sine peccato, statim reposuere se nullatenus negare necessitatem gratiæ; verùm gratiæ nomine subdoli intelligebant ipsam naturam et liberum arbitrium, seu boni malique facultatem, quam homo absque ullis suis meritis à Deo in creatione gratis à Deo accepit, et pro quâ gratias ipsi referre tenetur. Quâ de re S. Aug. citato serm. 11 de verbis Apost. Pelagium sic ra-

tiocinantem inducit: « Hoc ipso quia liberum hominis arbitrium defendo... contra gratiam Dei non disputo... Hominem quis creavit? Deus. Quis ei liberum arbitrium dedit? Deus. Si ergo Deus hominem creavit, et homini Deus liberum donavit arbitrium, quidquid potest homo de libero arbitrio, cujus gratiæ debetur, nisi ejus qui eum condidit cum libero arbitrio? » Ad quæ festivè regerebat S. Aug.: « Videte, fratres mei, quomodò illam generalem Dei gratiam prædicant quâ creatus est homo... Videte acumen, sed vitium; quasi lucet vanitate, sed frangitur veritate. »

Pari fraude ac subterfugio possibilitatem non peccandi gratiæ adscribebat Pelagius, naturam ipsam nomine gratiæ subdolè intelligens. Ita disertè testatur S. Aug. lib. de nat. et grat. cap. 51: « Ipsa non peccandi possibilitas, inquit, non tam in arbitrii potestate, quam in naturæ necessitate est. Quidquid in naturæ necessitate positum est, ad naturæ pertinere non dubitatur auctorem, utique Deum. Quomodò ergo absque Dei gratiâ dici existimatur, quod ad Deum propriè pertinere monstratur? » Ad quæ reponit S. Aug.: « Expressa est sententia quæ latebat, non est quemadmodum posset abscondi. Ideò gratiæ Dei tribuit non peccandi possibilitatem, quia ejus naturæ Deus est auctor, cui possibilitatem non peccandi inseparabiliter insitam dicit. »

Secundum Effugium. 2^o Cùm vehementius Pelagiani à Catholicis urgerentur, ut gratiam à naturâ et libero arbitrio distinctam agnoscerent, non recusârunt, sed nomine gratiæ, *legem atque doctrinam* subdolè ac fallaciter intelligebant. Ita etiam testatur S. Aug. lib. de spiritu et litt. cap. 2, his verbis: « Cùm urgeri cœperint, quomodò id præsumant asserere fieri sine ope divinâ, reprimunt se, nec hanc vocem audent emittere, quoniam vident quàm sit impia et non ferenda. Sed aiunt, ideò ista sine ope divinâ non fieri, quia et hominem Deus creavit cum libero voluntatis arbitrio, et dando præcepta ipse docet quemadmodum homini sit vivendum; et in eo utique adjuvat, quod docendo aufert ignorantiam, ut sciat homo in operibus suis quid evitare, et quid appetere debeat. » Hanc Pelagianorum fraudem ac versutiam sæpius memorat ac ipsis objicit S. Aug. præsertim verò integro fermè libro de Grat. Christi.

Unum hic observandum, nimirum præsentem Pelagianorum hæresim, in eo præcisè po-

sitam fuisse, quòd hanc solam et nudam legis doctrinam existimarent veram esse Christi gratiam, eamque ex sese sufficere homini tum ut declinet à malo, tum ut faciat bonum. At non in eo errabant, uti perperam contendit Jansenius lib. 5 de hæresi Pelag. cap. 5, quòd assererent legem eo consilio datam fuisse, non tantum ut proderetur peccatum, sed etiam ut caveretur; hoc posterius tanquam erroneum in Pelagianis criminatur Jansenius citato loco, et fusiùs lib. 4 de Grat. Christi à cap. 8 usque ad 16; et lib. 3, cap. 5, 6 et 7, ubi docet legem eo fine Judæis à Deo datam fuisse, non ut faciliùs peccata vitarent, vel ut adjuvante gratiâ eam servarent, sed ut peccata multiplicarentur, atque suâ multitudine et magnitudine humanam frangerent superbiam; *lex enim, inquit, reddit justitiam difficiliorem, et quasi muro interposito impossibilem*. Verum quantum hæc doctrina Scripturæ et traditioni adversetur, atque à divinâ bonitate et æquitate legis divinæ aliena sit, demonstrabimus ubi de gratiâ sufficienti.

Tertium effugium. Cum rursus Pelagiani premerentur à Catholicis hanc legis et doctrinæ gratiam non sufficere, atque exinde sequi inutilem fuisse ac otiosam Christi mortem, quod multis probat S. Aug. lib. de Naturâ et Grat. cap. 2, 40, 53, etc., et lib. de Grat. Christi cap. 3 et 10, ut telum istud declinarent, tertium gratiæ genus excogitaverunt, nimirum *Christi Domini exemplum et imitationem*, afferentes quòd sicuti Adamus primus obfuit nobis exemplo malo; ita Christus Adamus secundus profuit nobis exemplo bono. Ita refert S. Aug. lib. de Grat. Christi cap. 2: « Solent, inquit, dicere nobis in eo Christum ad non peccandum præbuisse adjutorium, quia piè ipse justèque vivendo reliquit exemplum. » Et cap. 14: « Gratiam Christi constituit Pelagius, non in virtutis ejus auxilio, sed in imitationis exemplo; » quod ibidem reprehendit ac insectatur S. doctor. Undè lib. 2 Operis imperfect. cap. 146, sic habet: « Hoc est occultum et horrendum virus hæresis vestræ, ut velitis gratiam Christi in exemplo ejus esse, non in dono ejus; dicentes quia per ejus imitationem fiunt justi, non per subministrationem Spiritus sancti. »

In hac exemplorum Christi gratiâ, mirum quantam vim et efficaciam ad operandum bonum collocarent Pelagiani, quantumque ex eâ præsidii ad errores suos occultandos repeterent. Hujusce gratiæ prætextu, incunctanter pro-

nuntiabant, teste S. Aug. lib. de Grat. Christi citato mox cap. 2, « per singula momenta, per singulos actus necessariam nobis esse hujusmodi gratiam, id est, ut in omni conversatione nostrâ intueamur divinæ conversationis exemplum. » Istam porro exemplorum Christi gratiam, reipsa à lege et doctrinâ non esse distinctam ibidem demonstrat, cap. 41, S. Aug.

Quartum effugium. — Cum autem suam adhuc sententiam ab orthodoxis improbari cernerent Pelagiani, præter liberum arbitrium, legem seu doctrinam, ac exemplum Christi, aliud commenti sunt gratiæ genus, nempe *gratiam remissionis peccatorum*, ut in plerisque locis testis est S. Aug. præsertim verò lib. de Grat. et lib. Arbit. cap. 13: « Dicunt enim, inquit, gratiam Dei quæ data est per fidem Jesu Christi, quæ neque est lex, neque natura, ad hoc tantum valere, ut peccata præterita dimittantur, non ut futura vitentur, vel repugnantia superentur. » Hanc porro solam gratuitam esse, nec meritis retribuï affirmabant Pelagiani, teste S. Aug. eodem in libro cap. 6: « Dicunt hanc esse solam non secundum merita nostra gratiam, quâ homini peccata dimittuntur; illam verò, quæ datur in fine, id est æternam vitam, meritis nostris præcedentibus reddi. » Quonam autem sensu remissionem peccatorum gratuitam existimaverint Pelagiani, non adeò est exploratum; nam contrarium potius docuisse videntur; siquidem palmare istud erat eorum pronuntiatum, *gratiam secundum merita dari*, ne alioqui injustus et personarum acceptor Deus haberetur; præterea peccatorum remissionem non gratis tribui, sed ex meritis, disertè affirmavit Pelagius, quod in concilio Diospolitano ex ipsius libris ei objectum est ultimo et duodecimo loco. Existimat Petavius lib. de hæres. Pelag. cap. 3, idcirco remissionem peccatorum sine meritis dari asseruisse Pelagium, non quòd nulla eam præcederent liberi arbitrii merita, sed quòd ista ipsa merita, si deesset fides, quam naturalibus viribus propositâ sibi evangelicâ doctrinâ præbere hominem Pelagius censebat, remissionem illam assequi non possent. Itaque in sententiâ Pelagianorum, remissio peccatorum et ex meritis et sine meritis obvenire dici potuit. Ex meritis quidem, quatenus concedebatur remissio propriis viribus credenti et resipiscenti; absque meritis autem, quatenus fides cujus merito remissio peccatorum retribuitur, necessariò supponit tum liberum arbitrium, quod gratuitum est Dei beneficium, tum

legem et doctrinam evangelicam quæ per se nullo nostro prævio merito divinitus est constituta.

An verò illa gratia remissionis peccatorum juxta Pelagium posita esset in nudâ peccatorum condonatione, an autem in aliquâ gratiâ propriè dictâ et interiori, atque hominem interius sanctificante, constabit ex dicendis postmodum cap. 5°. Porrò Pelagiani contendebant gratiam remissionis peccatorum valere duntaxat adversus præcedentia peccata; exemplum verò Christi adversus futura; et utrumque fructum esse passionis ac meritorum Christi contendebant. Id totum constat ex laudatis antea S. Aug. testimoniis.

Quintum effugium.—Tandem Pelagius præter naturam et liberum arbitrium, legem ac doctrinam forinsecus insonantem, exemplum Christi, ac demum remissionem peccatorum, admisit interiorum illustrationis et illuminationis gratiam. Ita Card. d'Aguirre, Salmaticenses, Petavius, Frassen, alique passim theologi locis cap. sequenti citandis. Id certum videtur 1° verbis ipsiusmet Pelagii apud S. Aug. lib. de Grat. Christi cap. 7: « Quam gratiam, inquebat hæresiarcha, « non ut tu putas, in lege tantummodo, sed et « in Dei adjutorio confitemur... Adjuvat enim « nos Deus per doctrinam et revelationem « suam, dum cordis nostri oculos aperit; dum « nobis ne præsentibus occupemur, futura de- « monstrat; dum diaboli pandit insidias; dum « nos multiformi et ineffabili dono gratiæ cœ- « lestis illuminat. » Et cap. 10, sic iterum Pelagius inducitur loquens: « Operatur Deus in « nobis velle quod bonum est, velle quod san- « ctum est, dum nos terrenis cupiditatibus « deditos, et mutorum more animalium præ- « sentia tantummodò diligentes, futuræ gloriæ « magnitudine et præmiorum pollicitatione « succendit, dum revelatione sapientiæ, in de- « siderium Dei stupentem suscitât voluntatem, « dum nobis suadet omne quod bonum est. » Quibus verbis clarè ostenditur Pelagium interiorem illustrationis gratiam agnovisse; namque aperire cordis oculos, multiplici et ineffabili dono gratiæ cœlestis illuminare, sapientiam revelare, etc., haud dubiè interiorem illustrationem indignant; atqui Pelagius hujusmodi gratiam admisit; ergo, etc. 2° Eodem in lib., cap. 24, manifestè supponit S. Aug. Pelagianos libenter agnovisse revelationes à Deo in cordibus productas: « Fateantur, inquit S. D. non in « lege atque doctrinâ insonante forinsecus, sed « internâ et occultâ, mirabili ac ineffabili po-

« testate operari Deum in cordibus hominum, « non solum veras revelationes (quas nempe « ultrò admisisse Pelagianos indicat S. Aug.) « sed etiam bonas voluntates. » 5° Ibidem cap. 41, de Pelagio ita loquitur S. doctor: « Ipsas « quoque orationes ad nihil aliud adhibendas « opinatur, nisi ut nobis doctrina etiam divinâ « revelatione aperiatur, non ut adjuvetur mens « hominis, ut id quod faciendum esse didicerit, « etiam dilectione et actione perficiat. » Audis Pelagium agnovisse legem ac doctrinam revelatione aperiiri; porrò revelatio hujusmodi interior est profectò illustrationis Gratia; ergo, etc.

Porrò (quod observa), gratia interioris illuminationis seu illustrationis duobus modis spectari potest: vel ex parte objecti duntaxat quod intellectui clariùs proponitur solis suis propriis viribus credendum; vel ex parte ipsiusmet intellectus, qui ad credendum divinâ opitulante et adjuvante gratiâ determinatur. Pelagium priori saltem sensu admisisse gratiam interioris illustrationis evidenter demonstrant adducta mox S. Aug. testimonia, vixque de eo potest esse ulla inter theologos difficultas. « Nemo negat, inquit Suarez tract. de Gratiâ « prolegom. 5, cap. 3, admisisse Pelagium re- « velationem divinam fidei, tam externam quàm « internam, quatenus se tenet ex parte obje- « cti. » An autem Pelagius etiam internam ex parte potentiæ gratiam illustrationis admisierit, quæ scilicet intellectum juvaret ac corroboraret ad credendum, dicemus cap. sequenti.

Dices: S. Aug. lib. de Grat. Christi cap. 7, relatis mox adductis Pelagii verbis, quibus gratiæ necessitatem magnificè videbatur commendare, statim subjungit S. D.: « In his omnibus « non recessit Pelagius à commendatione legis « et doctrinæ. » Et cap. 10: « Quid manife- « stiùs, nihil aliud eum dicere gratiam, quâ « Deus operatur in nobis velle quod bonum « est, quàm legem atque doctrinam? » Falsum est ergo Pelagium, præter externam legis et doctrinæ propositionem, admisisse interiorem illustrationis gratiam. Respondeo negando conseq.; neque enim locis citatis inficiatur S. Aug. Pelagium admisisse interiorem, saltem ex parte objecti, illustrationis gratiam; sed hoc unum vult, gratiam illam Pelagianam ad legem et doctrinam meritò revocari, quod verissimum est. Namque munus et officium legis et doctrinæ est docere, illuminare, ostendere quid faciendum sit; non autem vires subministrare ad illud perficiendum, ut fusè prose-

quitur S. Aug. toto lib. de Grat. Christi; atqui revelatio interior ex parte duntaxat objecti quod intellectui propriis viribus relicto clarius proponitur, tantummodò docet, illuminat, ostendit, non autem spiritum et virtutem infundit, seu minimè juvat et corroborat intellectum ad assentiendum; ergo interior hujusmodi illustratio rectè revocatur ad legem et doctrinam; ac proindè etsi Pelagius talem gratiam admiserit, meritò tamen asseruit S. Aug. ipsum non recessisse à commendatione legis et doctrinæ.

Hanc esse S. Aug. mentem manifestè colligitur ex citato cap. 10 lib. de Grat. Christi, ubi post verba in object. citata, sic statim subjungit: « In lege namque et doctrinà futuræ gloriæ atque præmiorum promittitur magnitudo. Ad doctrinam pertinet etiam quòd sapientia revelatur.

CAPUT IV.

Utrum Pelagius veram et internam voluntatis gratiam aliquandò tandem agnoverit?

Celebrior est præsens quæstio, idèoque paulò fusiùs pertractanda.

Observandum 1^o duplicem distinguendam esse gratiam interiorem. Una ad intellectum, altera ad voluntatem pertinet. Prior est mentis illustratio seu illuminatio, per quam interiùs menti proponuntur ac revelantur quæ credenda sunt fidei nostræ mysteria. Hæcque, uti antea observavimus, spectari potest, vel ex parte tantum objecti quod intellectui clarius proponitur solis suis propriis viribus credendum; vel ex parte ipsius intellectûs, qui ad credendum divinâ opitulante et adjuvante gratiâ determinatur. Posterior est motio seu excitatio Dei, quâ elevatur voluntas ac corroboratur, atque ad actus veræ pietatis incitatur.

Utramque hanc illustrationis et voluntatis gratiam ad omne bonum ac salutiferum opus, planè necessariam esse docet fides catholica; unde S. Aug. lib. de Grat. Christi cap. 12: « Quâ gratiâ agitur, inquit, non solum ut faciendi noverimus, verum etiam ut cognita faciamus; nec solum ut diligenda credamus verum etiam ut credita diligamus. »

Observandum 2^o, cum eodem S. Aug. lib. de gratia Christi cap. 3, 4, 5, etc., Pelagium ut majori arte errorem suum involveret, ac Catholicis fucum faceret, tria hæc sedulò distinxisse: nimirum possibilitatem, voluntatem et actionem. Audiatur S. doctor: « Cum tria dis-

tinguat (inquit cap. 5.) possibilitatem, voluntatem et actionem; possibilitatem scilicet, quâ potest homo esse justus; voluntatem, quâ vult esse justus; actionem, quâ justus est; horum trium primum, id est possibilitatem, datam confitetur à Creatore naturæ, nec esse in nostrâ potestate, sed etiam nos habere etiam si nolumus; duo verò reliqua, id est, voluntatem et actionem, nostra esse asserit, atque ita nobis tribuit, ut non nisi à nobis esse contendat. » Idem repetit cap. 4 et 5.

Observandum 3^o, Pelagium iterum distinxisse inter possibilitatem, et adjutorium possibilitatis. *Possibilitatem* in naturâ, adjutorium verò possibilitatis in lege et doctrinâ reponebat. Audiatur idem S. doctor cap. 4, Pelagii verba exscribens: « Nos tria ista distinguimus.... Primo loco posse statuimus, secundo velle, tertio esse. Posse in naturâ, velle in arbitrio, esse in affectu locamus. Primum illud, id est posse, ad Deum propriè pertinet, qui illud creaturæ suæ contulit; duo verò reliqua, hoc est velle et esse, ad hominem referenda sunt, quia de arbitrii fonte descendunt. Ergo in voluntate et opere bono laus hominis est; imò et hominis, et Dei, qui ipsius operis possibilitatem dedit, quique ipsam possibilitatem gratiæ suæ semper adjuvat auxilio. »

Observandum 4^o, adjutorium illud possibilitatis, qualecumque sit, non fuisse in mente Pelagii, absolutè ac simpliciter necessarium, sed tantum secundum quid, et ad faciliùs duntaxat agendum. Ita testatur S. Aug. lib. de grat. Christi cap. 26: « Gratiam Dei, inquit, sic confiteatur, qui vult veraciter confiteri, ut omninò nihil boni sine illâ, quod ad pietatem pertinet, veramque justitiam, fieri posse non dubitet. Non quomodò iste (Pelagius) qui cum dicit, propterea dari gratiam, ut quod à Deo præcipitur FACILIUS impleatur; quid de illâ sentiat satis ostendit, scilicet, quòd etiam sine illâ, etsi minùs facilè, fieri tamen, quod divinitus præcipitur, potest. » Idem refert S. D. cap. 2 et 29 ejusdem libri.

Observandum 5^o, Pelagium, quodcumque tandem gratiæ auxilium admiserit, docuisse illud gratuitum non esse, sed humanis meritis rependi. *Quamlibet sentiat gratiam*, inquit S. Aug. lib. de grat. Christi cap. 31, *ipsis Christianis secundum merita dari dicit.*

Observandum ultimò, duo hic, cum Jansenio lib. 5 de hæres. Pelag. cap. 29, sedulò consideranda esse tempora: primum ante condemnationem hæreseos Pelagianæ sub Zozimo anno 418; alterum à damnatione deinceps, usque ad

Semipelagianismi exordia. Has epochas accurate secernendas diximus, ex illâ quippe distinctione dicendis non modica lux affluebit.

Status questionis.— Quatuor hic potissimum quærentur, 1° an veram et internam voluntatis gratiam admiserint Pelagiani. 2° Supposito quòd aliquando tandem eam confessi fuerint, quo demùm tempore id contigerit. 3° ad quæ opera eam necessariam existimaverint, an ad perfectionem duntaxat, an etiam ad initium bonorum operum. 4° Quæ esset hujus gratiæ vis et efficacia.

Opiniones.—Prima est Jansenii lib. 5 de hæresi Pelagianâ, cujus doctrina circa præsentem controversiam adhæc quinque capita revocari potest.

Docet 1°, quinque primis capitibus libri citati à Pelagio solam naturam initio fuisse prædicatam absque ullâ gratiâ saltem internâ. Docet 2°, quinque sequentibus capitibus, præsertim nono et decimo, interiorem illuminationis seu illustrationis gratiam ab eo deinceps fuisse admissam. Docet 3°, ibidem capitibus 11, 12, et potissimum 28, et initio 29, etiam ante factam sub Zozimo condemnationem insuper agnovisse Pelagianos internum et actuale voluntatis auxilium, libero tamen arbitrio permissum; id est, pias indeliberatas ac versatiles voluntatis motiones, actui libero prævias, in quibus auxilium actuale ex parte voluntatis constituunt nonnulli Theologi. « Hactenus declaratum est (inquit Jansenius citato cap. 29), « omne genus adjutorii possibilitatis, sive externum, sive internum, sive respectu intellectûs, sive voluntatis Pelagianos agnovisse. « Nam.... illuminationes illustrationesque internas Dei, et concursum generalem, et gratiam habituales, et motus bonos seu desideria quædam bona indeliberata, salvâ tamem illâ indifferente arbitrii potestate confessi sunt. » Docet 4°, Pelagianos nullo modo dubitasse quin hisce indeliberatis motibus divinitus immissis plerumque quateretur voluntas; at existimasse iisdem etiam absentibus, satis virum esse in voluntate ad quoslibet veræ pietatis et justitiæ actus exercendos. Unde, juxta Jansenium, eos admittebant quoad substantiam duntaxat, non verò quoad necessitatem. Docet 5°, indeliberatos hosce voluntatis motus, utpote libero arbitrio permissos, fuisse duntaxat merum possibilitatis adjutorium, non autem veram ac internam gratiam Christi Salvatoris, cujus eximus ac proprius character, ut placet Jansenio, in eo positus est, ut volun-

tatem indeclinabili ac relativâ necessitate voluntatem ad agendum determinet. Docet 6°, veram hanc internam et actualem voluntatis gratiam constanter negavisse Pelagianos usque ad condemnationem sub Zozimo. Hinc patet quâ ratione caput. 28, et initio 29, asserat Jansenius, Pelagianos agnovisse omne genus adjutorii possibilitatis internum, motus bonos, desideria bona indeliberata; et tamen eod. cap. 29, absolute pronuntiet ante damnationem Zozimi ipsos nusquam gratiam illam actualem (voluntatis) quam juxta sacrarum Scripturarum fidem Augustinus prædicavit, verè sincerèque confessos esse. Quid ita? quia scilicet juxta Jans. sola gratia indeclinabiliter et necessariò relativè determinans voluntatem, vera est ac propriè dicta Christi Salvatoris gratia; ast talem gratiam ante factam sub Zozimo condemnationem constanter negavisse Pelagianos ibidem tradit. Docet 7°, capitibus 1, 2 et 3 libri 6, post Zozimi decretum, Pelagianos Catholicorum argumentis victos à priori suâ sententiâ aliquantulum recessisse, atque tandem admisisse veram, internam et actualem voluntatis gratiam, quâ voluntas ad bonum hic et nunc necessariò ageretur, sed triplici errore infectam; 1° quòd non ad fidem et justitiam inchoandam, sed ad perficiendam duntaxat dicerent illam esse necessariam; 2° quòd juxta illos non esset absolute necessaria, sed ad faciliorem tantum justitiæ perfectionem; 3° quòd daretur secundum merita merè humana; illa autem merita, erant prima boni cupiditas, fides, oratio propriis ac solis liberi arbitrii viribus elicitæ. Quantum à veritate aliena sit prædicta Jansenii doctrina ex dicendis patebit.

Secunda sententia est Lemos, tract. 1 de Pelagii erroribus, cap. 9, 10 et sequent. Alvares lib. 1 de auxil. disp. 1, Salmaticens. 1, 2, quæst. 109, disput. 1, cap. 4, paragraph. 4, et aliorum quorum doctrina ad hæc capita revocatur. 1° Pelagium initio suæ hæreseos omne prorsus internum gratiæ auxilium repudiâsse. 2° Ipsum deinceps internas ac supernaturales revelationes, seu interiorem illustrationis gratiam admisisse, sed necessariam duntaxat ad facilius operandum. 3° Eandem agnovisse postmodum simpliciter necessariam ad opus perficiendum. 4° Pelagium internam ex parte voluntatis gratiam tandem confessum fuisse; at duplici infectam vitio. Scilicet sentiebat primò eam dari ex meritis; secundò ipsam non esse necessariam simpliciter, sed tantum ad facilius. 5° Præfati auctores contendunt, Pelagii dis-

cupulos Cælestium præsertim ac Julianum, Magistri errorem utcumque temperasse, atque eò tandem devenisse ut internam voluntatis gratiam, non quidem ad initium, sed ad consummationem duntaxat bonorum operum simpliciter necessariam esse faterentur.

Addunt iidem auctores, falsissimum esse, quod confidenter asserit Jans. citato lib. 6 de hæres. Pelag. cap. 1, Pelagianos tandem post Zozimi decretum gratiam ex sese efficacem agnovisse. « Evidentissimum est, inquit Lemos Panopliæ tom. 1, tract. 1, de Pelagii erroribus, cap. 6, « illam gratiam efficacem, « quæ facit verè et propriè nos facere, nusquam (Pelagium) admisisse, quia per eam tolli arbitrii libertatem... semper publicabat. » Ibidem tract. 3, cap. 2: « Circa auxilia gratiæ « concludebat Julianus, nullam dari prævenientem, quâ Deus efficaciter faceret homines facere, et benè operari; imò hanc fatem appellabat, et fatalem inducere necessitatem dicebat cum Pelagio et aliis decem et octo Pelagianis episcopis sui erroris consortibus. » Idem tradunt Alvares, Joan. à sancto Th., d'Aguires, Laurea, etc.

Tertia sententia eorum est qui asserunt, 1^o Pelagianos ante Zozimi decretum admisisse interiorē illustrationis gratiam, non quidem ut simpliciter necessariam, sed ad maiorem duntaxat boni operandi facilitatem; nusquam verò confessos fuisse veram voluntatis gratiam, quæ scilicet proximè ac per se voluntatem moveat, eique vires subministret ad opera pietatis exercenda. 2^o Post damnatam à Zozimo hæresim, eosdem Pelagianos, quorum dux erat Julianus, ad Semipelagianismum deflexisse, atque voluntatis gratiam ad perficiendum bonum opus, saltem secundum quid, seu ad *facilius* necessariam statuuisse. 3^o Certissimum esse ipsos nusquam agnovisse gratiam ex sese efficacem, nequidem ut facilius obtineatur perfectio et salus, sed eam gratiam tanquam noxiam libertati constanter aversatos fuisse. Ita fermè Card. d'Aguires tom. 3 Theol. sancti Anselmi disput. 112, sect. 4; Gonzales p. 1, disput. 68, q. 1 et 2; Joan. à sancto Thomâ tract. de volunt. Dei disput. 3; Natal. Alexander Hist. quinti seculi cap. 3, art. parag. 8, 9, et plerique alii.

Quarta sententia est Petavii lib. de hæres. Pelag. cap. 9; Frassen. tract. 2, disput. 3, art. 1, sect. 1, parag. 10; Martinon. de hæres. Pelag. disput. 7, sect. 4, aliorumque quamplurium, qui existimant Pelagium tandem interiorē

gratiam propugnasse, verum triplici corruptam vitio; 1^o gratia hæc interior, erat intellectus duntaxat, non voluntatis; 2^o ad facilius tantum, non autem simpliciter necessaria; 3^o humanam merita sequebatur, eorumque merces erat.

Quinta denique sententia est Snaresii prolegom. 5 de Grat. cap. 3; Vasquez, Bellarm., etc., quibus consonat Card. Noris. lib. 1 historiæ Pelag. cap. 15. Censent prædicti auctores Pelagium nusquam veram et internam tum voluntatis, tum etiam illustrationis, saltem ex parte intellectus, gratiam agnovisse.

Quid in hæc opinionum diversitate sentiamus sequentibus conclusionibus aperiemus.

CONCLUSIO PRIMA. — Pelagius tandem aliquando agnovit veram et internam revelationis gratiam, tum ex parte objecti melius propositi, tum ex parte potentiae, seu intellectus ad credendum divinitus adjuti.

Probat ex his omnibus sancti Augustini testimoniis quæ circa finem capituli præcedentis retulimus, recensendo quintum Pelagii effugium circa gratiam; et ex his quæ mox referemus ad probandam sequentem Conclusionem; ex iis enim patet, Pelagium admisisse, 1^o *revelationes à lege et doctrinâ distinctas*, lib. de Grat. Christi cap. 7. 2^o *Revelationes veras et internas*, ibidem cap. 11 et 14. 3^o *Revelationes supernaturales ac divinas*, quibus scilicet à Spiritu sancto lex atque doctrina revelatur. 4^o *Denique revelationes quibus Deus cordis nostri oculos aperit, nosque multiformi ac ineffabili dono gratiæ cælestis illuminat*. Atqui hæc omnia designant veram et internam illustrationis gratiam, tum ex parte objecti, tum etiam ex parte potentiae; ergo Pelagius admisit, etc.

Duo autem circa illas revelationes sunt annotanda. Primum, quod Pelagius eas non admisit ut verè ac simpliciter necessarias, sed ut necessarias secundum quid duntaxat. Ita sensisse Pelagium testatur sanctus Augustinus lib. de Grat. Christi cap. 40, ubi de ipso loquens, sic habet: « Manifestum est, ita eum velle nos « adjuvari gratiâ Spiritus sancti, non quia sine « illo non possumus resistere tentatori, sed ut « *FACILIUS* resistamus. » Et cap. 41: « Quamvis « et ipsam viam contendat etiam solâ inveniri « posse naturâ, sed *FACILIUS*, si adjuvet gratia. » Idem sæpius repetit S. doctor eodem in libro cap. 26, 27, 28, et præsertim 29, ubi adductis hisce Pelagii verbis: « Ut quod per « liberum, homines facere jubentur arbitrium, « *facilius* possint implere per gratiam; » statim subiungit: « *Tolle FACILIUS*, et non solum ple-

« nus, verum etiam sanus est sensus. » Secundum, quod cum prae dictae revelationes juxta Pelagium vires non subministrarent voluntati, sed merae legis munia obirent, hinc de illis inquebat S. Aug. lib. de Gratia Christi cap. 7: *In his omnibus non recessit à commendatione legis atque doctrinae.*

CONCLUSIO SECUNDA. — Pelagius ante condemnationem suae hae reos factam sub Zozimo, veram et internam voluntatis gratiam nusquam admisit ad bonum opus, sive inchoandum, sive etiam complendum ac perficiendum.

Probatur 1^o disertissimis sancti Aug. testimoniis depromptis ex lib. de Grat. Christi, qui liber à S. doctore exaratus fuit anno 418, quo tempore Pelagiana hae res à Zozimo decretorie proscripta fuit. Cap. 3, de Pelagio verba faciens sic habet S. D... « Gratiam Dei, et adjutorium quo adjuvamus ad non peccandum, aut in naturam et libero ponit arbitrio, aut in lege atque doctrinam: ut videlicet, cum adjuvat Deus hominem, ut declinet à malo et faciat bonum, revelando et ostendendo quid fieri debeat, adjuvare credatur; non etiam cooperando et dilectionem inspirando, ut id quod faciendum esse cognoverit, faciat. » Ipso ergo iudice S. Aug. Pelagius ante decretum Zozimi, doctrinae duntaxat ac illustrationis adjutorium agnovit, non autem veram et internam voluntatis gratiam, cujus eximius character est per se et immediate praevinire, movere, ac juvare voluntatem. Et cap. 7, postquam Pelagii verba retulit, quibus tam magnifice gratiam Christi extollere et commendare videbatur: « Quam nos, inquebat Pelagius, non in lege tantummodo esse confitemur; adjuvat enim nos per doctrinam et revelationem suam, dum cordis nostri oculos aperit... dum diaboli pandit insidias, dum nos multififormi dono gratiae coelestis illuminat; » subdit S. Aug.: « In his omnibus non recessit à commendatione legis et doctrinae; » et statim cap. 8, haec addit: « Hinc itaque apparet, hanc eum gratiam confiteri, quam demonstrat et revelat Deus quid agere debeamus; non quam donat atque adjuvat ut agamus. » Et cap. 24, antea citato, de Pelagianis loquens ait: « Legant ergo atque intelligant, intueantur atque fateantur, non lege atque doctrinam insonante forinsecus, sed internam atque occultam, mirabili atque ineffabili potestate, operari Deum in cordibus hominum, non solum veras revelationes, sed etiam bonas voluntates. » Rursus cap. 30, aperte declarat

S. D. se veram Christi gratiam in scriptis Pelagii, quaecumque legerat, nusquam invenisse: « Istam, inquit, gratiam... in Pelagii scriptis, quaecumque legere potui, nusquam eos inveniri, quemadmodum confitenda est confiteri... possitis advertere, non eum ponere Dei gratiam quam juvamus, vel ad declinandum à malo, vel ad faciendum bonum, nisi in lege atque doctrinam; ita ut ipsas quoque orationes ad hoc asserat necessarias, ut ostendatur homini, quid concupiscat et diligat. » Denique ut plura alia sancti doctoris testimonia praetermittam, rem nostram plane conficit cap. 41 ejusdem libri, ubi de Pelagianis haec habet: « Nullum auxilium gratiae credunt, quam naturae possibilitas adjuvetur, nisi in lege atque doctrinam, ita ut ipsas quoque orationes, ut in scriptis suis apertissime affirmat, ad nihil adhibendas opinetur, nisi ut nobis doctrina etiam divina revelatione aperiat, non ut adjuvetur mens hominis, ut id quod faciendum esse didicerit, etiam dilectione et actione perficiat. »

Nihil luculentius desiderari potest hisce testimoniis, in quibus expressè affirmat S. Aug. nullam aliam Pelagianos gratiam confiteri quam legem, doctrinam atque revelationem quam bonum agendum proponitur, adeoque eos respuere omnem gratiam quam voluntas movetur, adjuvatur ac corroboratur ad bonum peragendum.

Probatur 2^o. Eam rejiciebat Pelagius gratiam, de qua tam gravis ac diuturna ipsum inter et S. Aug. exarsit controversia, quamque ab ipso ex publicâ Ecclesiae fide exigebat sanctus Augustinus; atqui tota ista contentio unice spectabat gratiam voluntatis et actionis, istam ab ipso ex Ecclesiae fide Aug. exigebat, quemadmodum infra, cap. 6, demonstrabimus; ergo, etc. « Nos (inquebat S. D. premens Pelagium lib. de Gratia Christi, cap. 10) volumus eam gratiam, iste aliquando fateatur, quam futurae gloriae magnitudo non solum promittitur, verum etiam creditur et speratur; nec solum revelatur sapientia, verum et amatur... hanc debet Pelagius gratiam confiteri, si vult non solum vocari, verum etiam esse Christianus. »

Probatur 3^o, ex ipsismet Pelagiani systematis visceribus. Scilicet, quemadmodum testatur sanctus Aug. lib. de gestis Pelag. cap. ultimo, praecipuum ac palmare Pelagianorum dogma, et caeterorum omnium quasi basis ac fundamentum, istud erat, *Adam et Evam mortales à*

Deo creatos esse, nec quemquam posteriorum suâ prævaricatione læsisse, sed sibi tantum nocuisse. Hinc autem inferebant, 1° nullum dari peccatum originale; 2° nullam proinde in voluntate relictam ex peccato originali infirmitatem; 3° liberum arbitrium æquè sanum, æquè validum, æquè perfectum in Adami posteris, ac in Adamo ipso. Ex his manifestè sequitur, necessum non esse ut voluntas per gratiam in se receptam, ad bonum operandum moveretur ac corroboraretur, sed sufficere, sicuti et in Adamo, meram illustrationem intellectûs. Rationem hanc attingit S. Aug. lib. de gratiâ Christi cap. 28, et alibi passim.

Probatur 4° ex hoc gravissimo et altius infixio præjudicio, quo, teste S. Aug. loco mox citato, et lib. de peccat. orig. cap. 11, laborabat Pelagius, *non esse liberum arbitrium, si Dei indiget auxilio, quoniam in propriâ voluntate cujusque est facere aliquid vel non facere.* Scilicet, concipere ille non poterat, quâ ratione stare posset libertas cum necessitate illius gratiæ quæ voluntatem prævenit, et sine quâ voluntas nihil potest. Veram ergo et internam voluntatis gratiam non admiserunt Pelagiani.

CONCLUSIO TERTIA. — Post decretum Zozimi Julianus hæresim Pelagianam utcumque temperavit, internam voluntatis gratiam admit- tendo, at triplici infectam vitio.

Probatur prima pars, scilicet Julianum post damnationem hæresis Pelagianæ factam sub Zozimo, gratiam voluntatis tandem admisisse. 1° Id constat ex libris ad Bonifacium qui primi sunt adversus Julianum exarati anno circiter 420; scilicet tum in his libris, tum in posterioribus suis lucubrationibus adversus Pelagianos, totus in eo versatur S. Aug. ut adstruat, non quidem existentiam et necessitatem gratiæ voluntatis præcisè, quod perpetuò antea inculcaverat in prioribus suis contra Pelagium operibus, sed necessitatem gratiæ, quæ omnia merita, et ipsum initium bonorum operum præveniat, quæque proinde secundum merita nostra non detur. Sic lib. 1 ad Bonif. cap. 14, lib. 2, cap. 5 et 6, lib. 4, cap. 6 et cap. 11. ubi sic loquitur S. doctor: « Dicunt Pelagiani ab homine incipere meritum per liberum arbitrium, cui Deus subsequens gratiæ retribuatur adjumentum. » Atque hinc toties Juliano exprobrat, hanc pelagi ipositionem in concilio Palæstino damnatam, ab ipso renovari, nempe *gratiam Dei secundum merita nostra dari.* Hæc sanè tam diversa agendi ratio S. Aug. aperto indicio est, cum Juliano controversiam fuisse,

non circa naturam et substantiam gratiæ, sed circa ejus duntaxat gratuitatem, atque ad initium bonorum operum necessitatem.

2° Idem clariùs colligitur ex S. Aug. lib. de grat. et lib. arbit. cap. 14, ubi perspicuè significat Pelagianos disputando depulsos fuisse à gratiâ legis et doctrinæ quam tantoperè prædicaverant, convictosque ut veram Christi gratiam admitterent. En sancti doctoris verba quæ ex integro duximus exhibenda, adeò egregia sunt et præsentî nostro instituto accommodata; sic ergo loquitur: « Sed cum fuerint convicti non defensores, sed inflatores et præcipitatores liberi arbitrii, quia neque scientia divinæ legis, neque natura, neque sola remissio peccatorum est illa gratia, quæ per Jesum Christum Dominum nostrum datur, sed ipsa facit ut lex impleatur, ut natura liberetur, ne peccatum dominetur, cum ergo in his convicti fuerint, ad hoc se convertunt, ut quocumque modo conentur ostendere gratiam Dei secundum merita nostra dari. Dicunt enim: Etsi non datur secundum merita bonorum operum; quia per ipsam benè operamur; tamen secundum merita bonæ voluntatis datur, quia bona voluntas, inquit, præcedit orantis, quam præcessit voluntas credentis, ut secundum hæc merita gratia sequatur exaudientis Dei. » Nihil certè luculentius. Enimverò, gratia per quam benè operamur, per quam lex impletur, natura, liberatur, per quam fit ut peccatum non dominetur, profectò vera est ac propriè dicta gratia voluntatis: atqui Pelagiani tandem hujusmodi gratiam compulsi sunt; ergo, etc.; undè citato loco S. Aug. potissimum incumbit in debellando isto Juliani aliorumque Pelagianorum perfugio, *gratiam secundum merita dari.*

3° Eamdem veritatem non minùs apertè innuit S. Aug. lib. de dono perseverant. cap. 2, ubi recensens ea quæ contra Pelagianos catholica Ecclesia propugnabat, nihil aliud circa gratiam commemorat, quàm quod ipsa necessaria sit, et non detur secundum merita: « Nam tria sunt, inquit S. doctor. quæ maximè adversus eos catholica defendit Ecclesia: quorum est unum, gratiam non secundum merita nostra dari... alterum est, sine qua libuscumque peccatis in hoc corruptibili corpore neminem vivere; tertium est obnoxium nasci hominem peccato primi hominis. » Cum ergo ex tribus capitibus ad quæ errores omnes circa gratiam revocantur, ipsius scilicet

natura, necessitas et gratuitas, circa duo duntaxat posteriora Pelagianos errasse observet S. Aug., hinc meritò colligitur ipsos tunc rectè sensisse circa substantiam gratiæ, ac proinde verum et internum voluntatis auxilium agnovisse.

4^o Idem rursus evincitur, eò quòd omnia argumenta quibus contra gratiam militabat Julianus, non substantiam et naturam gratiæ, sed solam ipsius gratuitatem et necessitatem oppeterent. Momenta illa infra, cap. 6, proponemus et exponemus.

3^o Momenta quibus ex S. Aug. probare conantur adversarii Pelagianos gratiam voluntatis nusquam admisisse, infirma sunt et minùs ad rem apposita; omnia enim fermè desumuntur aut ex libris initio hæreseos exaratis, aut ex libris de grat. Christi et de peccat. orig. editis ab Aug. an. 413. tempore latè à Zozimo decreti; at hæc non demonstrant, quod unum hic contendimus, Julianum deinceps magistri errorem paululùm temperasse admittendo gratiam voluntatis.

Probatur secunda pars, nempe gratiam voluntatis à Juliano admissam multiplici vitio infectam fuisse. Primum vitium istud erat, quòd gratiam illam, non quidem ad inchoanda, sed ad complenda duntaxat et perficienda bona opera, necessariam judicaret. Hanc fuisse Juliani aliorumque Pelagianorum mentem, testis est S. Aug. lib. 2 ad Bonifacium, cap. 8: « Isti volunt, in homine ab ipso homine incipere cupiditatem boni, ut hujus cœpti meritum etiam perficiendi gratiâ consequatur. » Et lib. 4 contra Julian. cap. 50: « Cùm ergo divinitus adjuvatur homo, non tantùm ad capessendam perfectionem adjuvatur, quod ipse posuisti, utique volens intelligi, eum per se incipere sine gratiâ, quod perficit gratiâ. » Clara sunt hæc et aperta; in mente Juliani, teste S. Aug. *homo per se incipit sine gratiâ; in homine ab ipso homine incipit boni cupiditas*. Non ergo ad initium boni operis gratiam necessariam esse existimabat Julianus. Alterum vitium: gratia voluntatis quam Julianus aliique Pelagiani admittebant, secundùm quid duntaxat seu ad faciilius, non autem simpliciter et absolutè necessaria erat ad perficienda bona opera. Equidem lib. 2 ad Bonifac. cap. 8, dubius et anceps videtur S. August. an Julianus, aliique recentiores Pelagiani ita senserint: « Fortassis ergo, inquit, ipsi eo modo saltem servans locum gratiæ, ut sine illâ putent hominem posse habere boni, sed imperfecti cupiditatem;

« perfecti autem non faciilius per illam posse, sed nisi per illam omninò non posse. » At deinceps affirmatè loquitur, huncque errorem Juliani non semel exprobrat S. doctor: « Vestrum autem dogma, » ait lib. 6 contra Julianum cap. 24, « id persuadere conatur... ut etsi opus sit, necesse tamen non sit ad Christum pro æternâ salute transire; eò quòd... commodior via sit, non quòd alia esse non possit. » Et lib. 2 Operis imperfecti, cap. 198: « Querentibus à vobis, quare mortuus sit Christus, si natura vel lex efficit justos; respondetis, ut hoc ipsum faciilius fieret; quasi posset, quamvis difficilius, fieri tamen, sive per naturam, sive per legem. » Tertium tandem vitium gratiæ recentiorum Pelagianorum, in eo erat, quòd assererent eam secundùm merita nostra dari, quod testatur S. Aug. lib. 1 contra Julian. cap. 3, 4, 19, et alibi sæpissimè: « Hæc est quippe, inquit, intentio quâ gratiam destruere moliantur, ut eam dari secundùm merita nostra contendant. »

Solvuntur objectiones. — Objicies 1^o contra secundam Conclusionem: Pelagius conceptis verbis asseverat voluntatem à Deo succendi, suscitari, etc.; sic ipsum loquentem inducit S. Aug. lib. de gratiâ Christi cap. 10: « Operatur in nobis velle quod bonum est, dùm nos... præmiorum pollicitatione succendit, dùm revelatione sapientiæ in desiderium Dei stupentem suscitât voluntatem, dùm nobis suadet omne quod bonum est. » Undè sic licet argumentari: Gratia quæ operatur in nobis velle quod bonum est, quæ stupentem suscitât voluntatem, eamque in desiderium Dei succendit, quæ nobis suadet omne quod bonum est, vera est profectò voluntatis gratia; atqui Pelagius admisit gratiam hujusmodi; ergo, etc. Respondeo dist. maj. : Gratia quæ stupentem suscitât voluntatem, eamque succendit, etc., propriè, immediatè et efficienter, Deo per se producente in voluntate motum aliquem indeliberatum, aliquam excitationem et succensionem sine quâ voluntas bonum operari nequeat, concedo; metaphoricè duntaxat, mediatè et objectivè, per propositionem scilicet objecti cujus occasione voluntas seipsam suscitât et succendit, nego. Porrò hoc tantùm posteriori sensu per gratiam succendi ac suscitari voluntatem agnovit Pelagius, ut invictè probant ea quæ post citata in object. verba, confestim subdit S. Aug. « Quid manifestius, inquit, eum nihil aliud dicere gratiam quâ Deus operatur velle quod bonum est, quam legem atque

« doctrinam ? » Addo illud idem argumentum Jansenio esse solvendum ; namque ut ipse ait lib. de Grat. primi hominis, cap. 12, gratia ex sese efficax significantioribus verbis exprimi non potest, quàm nominibus *succensionis, suscitationis*, etc. ; atqui tamen, fatente ipsomet Jansenio, cum hæc scriberet Pelagius veram, internam et ex sese efficacem voluntatis gratiam nondum admittebat ; hanc enim juxta eundem Jansenium confessi sunt post condemnationem duntaxat factam sub Zozimo ; ergo, etc.

Objicies 2^o : S. Aug. lib. de Gratiâ Christi cap. 29, recitatis his Pelagii verbis, *Ut quod per liberum homines facere jubentur arbitrium, facilius possint implere per gratiam* ; continuo addit : *Tolle facilius, et non solum plenus, verum etiam sanus est sensus*. Porro, nisi Pelagius gratiam voluntatis admisisset, profectò etiam sublatâ voce, *facilius*, non fuisset sanus et plenus Pelagianæ propositionis sensus ; ergo, etc. Respondeo 1^o, uti jam dictum, illud argumentum ipsimet Jansenio esse solvendum ; exinde enim sequeretur Pelagianos, etiam ante Juliani tempora, gratiam ex sese efficacem, non solum ad perfectionem, sed etiam ad initium bonorum operum agnovisse ; quod utrumque falsum esse, non solum confitetur, sed et multis probat Jansenius locis antea citatis. Respondeo 2^o, S. Aug. loco in object. citato recensentem verba Pelagii meritò asserere : *Tolle facilius, et non solum plenus, sed et sanus est sensus* ; quia scilicet semel admissâ absolutâ necessitate gratiæ intellectûs, facili consecutione adduci potuisset Pelagius, ut necessitatem quoque gratiæ voluntatis agnosceret ; pares enim utrinque occurrunt rationes ; nec magis, in mente Pelagii, læsus fuit homo in intellectu quàm in voluntate. Respondeo 3^o, distinguendo et exponendo textum S. Aug. : *Tolle facilius, et sanus est sensus*, quantum ad necessitatem gratiæ, ad quam unicè tunc respiciebat S. Aug., concedo ; quantum ad naturam et substantiam gratiæ, nego. Itaque errabat Pelagius tum circa naturam gratiæ, tum circa ipsius necessitatem ; primum erroris caput abundè confutaverat S. doctor, 25 primis capitibus citati libri de gratiâ ; hic unam vindicat ipsius necessitatem, quam solam directè impugnabat Pelagius verbis adductis, quæ reverâ ex se, sublatâ voce *facilius*, sanum et orthodoxum sensum referebant. Eadem est responsio ad ea quæ ex cap. 26, 27, 28, objici possunt.

Objicies 3^o : Ex dictis Conclusionem primâ

Pelagius admisit interiorem illustrationis gratiam ; atqui ex interiori intellectûs illustratione necessariò oriuntur in voluntate motus indeliberati, qui nihil aliud sunt quàm gratia voluntatis ; ergo, etc. Etverò quosdam oriri in voluntate indeliberatos motus ex illustratione intellectûs, apertè agnovit Pelagius apud S. Aug. citatis antea verbis lib. de grat. cap. 10 : « Operatur in nobis velle quod bonum est, dum... præmiorum pollicitatione succedit, dum revelatione sapientiæ... stupentem suscitât voluntatem. » Respondeo 1^o, verba Pelagii faciliè intelligi posse de motibus deliberatis, eo videlicet sensu quòd voluntas occasione illustrationis intellectûs seipsam liberè excitet, et succendat ad bonum ; adeò ut, quemadmodum in Adamo, positâ solâ interiori invitatione per intellectum factâ, illicò voluntas ipsius seipsam liberè flectebat ad hoc vel illud objectum, sicque veluti præoccupabat omnes indeliberatos affectus qui in ipsâ suboriri poterant ; ita etiam in nobis contingit, in quibus, juxta Pelagium, æquè plenum est et perfectum liberum arbitrium ac in primo parente. Respondeo 2^o, equidem ex illustratione intellectûs necessariò oriri in voluntate motus indeliberatos ; verum hi motus non sunt formaliter ipsa gratia voluntatis ; ipsa siquidem essentialiter posita est in motibus quibusdam per se et immediatè in voluntate divinitus excitatis, quibus movetur, excitatur et corroboratur voluntas, fitque par actibus supernaturalibus eliciendis. Respondeo 3^o, distinguendo : Agnovit Pelagius motus indeliberatos merè naturales ex ipsâ naturali voluntatis rectitudine prosilientes, occasione representationis intellectûs, concedo ; motus supernaturales à divinâ gratiâ promanantes, quibus voluntas infirma ad bonum operandum corroboranda sit, nego. Motus merè naturales ex ipsâ voluntatis rectitudine pullulantes occasione illustrationis intellectûs, quique voluntatem ipsam nullatenus corroborant, non possunt dici vera voluntatis gratia ; porro Pelagius admittebat duntaxat motus hujusmodi ; ergo, etc. Hanc solutionem nobis subministrat Jansenius lib. 2 de hæresi Pelag. cap. 5, ubi ad citata Pelagii verba observat, nullam ab ipso agnosci gratiam, nisi promissionis et revelationis, per quam animus naturaliter bonus, et semina naturalia virtutum in desiderium Dei per seipsa suscitantur. Addit ibidem, hæc boni desideria, semina virtutum, ex ipso naturali fundo prosilire, sicuti voluntatis nutus. Idem tradit lib. 5, cap. ultimo.

Obijcies 4^o: S. Aug. passim libris quatuor ad Bonifacium, sex contra Julianum, de Grat. et libero Arb., de Corrept. et Grat., de Prædest. SS., etc., apertè indicat Pelagianos veram et internam voluntatis gratiam agnovisse; namque his in libris totus in illà gratiâ asserendâ tuendâque versatur S. doct. quæ omninò gratuita sit, et etiam ad initium bonorum operum simpliciter necessaria; errabant ergo illi non circa naturam seu substantiam gratiæ, sed unicè circa ipsius gratuitatem et necessitatem.

Respondeo libros ad Bonif. contra Julianum, et alios in object. citatos, à S. Aug. exaratos fuisse multò post latum à Zozimo decretum; quo tempore Pelagianos gratiam voluntatis tandem confessos fuisse, supra probavimus Conclus. tertiâ; perperam ergo nobis hic obijcerentur testimonia ex prædictis aut aliis posterioribus ejusdem sancti doctoris libris deprompta.

Obijcies 5^o: Ultrò concedebant Pelagiani possibilitatem boni, seu potestatem benè agendi esse à divinâ gratiâ; agnoscebant quoque adiutorium complens ac corroborans ipsam potentiam boni; id manifestè patet ex cap. 3, 7, 10 et sequentibus libri de Grat. Christi; atqui possibilitas illa Pelagiana, aut saltem adiutorium hujusce possibilitatis, profectò veram et internam voluntatis gratiam complectebatur, quâ Deus potestatem benè agendi largiatur, compleat et adjuvet. Respondeo negando min. Namque 1^o, Pelagius per illam possibilitatem, quam dicebat esse à Deo, non intelligebat potentiam benè agendi, quæ proficiscitur et exurgit ex gratiâ voluntati superadditâ, sed solum et nudum liberum arbitrium. Ita disertè testatur S. Aug. in testimoniis capite præcedenti adductis recensendo primum Pelagianorum effugium. 2^o Adiutorium possibilitatis à Pelagio exeogitatum, solam legem et doctrinam, aut ad summum illustrationis gratiam complectebatur, minimè verò gratiam voluntatis. Id conceptis verbis declarat S. Aug. lib. de Gratiâ Christi cap. 41: « Nullum auxilium, *inquit*, « gratiæ credunt (Pelagiani), quâ naturæ possibilitas adjuvetur, nisi in lege atque doctrinâ. » Et paulò post: « Ipsum verò auxilium quo possibilitatem perhibet adjuvari, « in lege constituit atque doctrinâ. » Consule quæ dicta sunt ad secundum Pelagii effugium loco mox laudato.

Quæres hic, utrum Pelagius rejecerit omnem concursum, sive prævium, sive simultaneum, ad actiones tum naturales, tum super-

naturales. De concursu prævio nulla difficultas; latentur siquidem omnes hunc à Pelagio non fuisse admissum; at circa concursum simultaneum dissentiant theologi. Alii affirmant admisisse. Ita Alvarez disput. 1 de Auxil. n. 21; Salmaticenses tract. de Grat. disput. 1, cap. 4; Vasquez 1, 2, disp. 109, cap. 7, etc. Alii negant. Ita Abulensis Matth. 49, quæst. 178, ad sextum; Bellarm. lib. 4 de Grat. et lib. Arb. cap. 4; d'Aguirre Theol. sancti Anselmi disp. 118, sect. sextâ; Suarez, Lessius, etc. Alii cum distinctione respondent. Volunt scilicet Pelagium admisisse concursum simultaneum circa actiones supernaturales; hunc verò rejecisse pro actionibus merè naturalibus. Ita Gonet. disput. 1 de Grat. art. 3, conclus. 4.

Ex his opinionibus secunda nobis videtur probabilior.

Probatur 1^o ex S. Hieron. epist. ad Ctesiphontem, in quâ Pelagium sic loquentem inducit: « Si voluero curvare digitum, movere « manum, sedere, stare, ambulare... semper « mihi auxilium Dei necessarium erit? » Et lib. 1 adversus Pelagium, ista ipsius verba refert: « Si in singulis rebus quas gerimus, Dei « utendum est adiutorio.... ergo loqui, ambulare, flere, ridere, et cætera hujusmodi, « nisi Deus juverit, non poterimus? » Cui respondet S. doctor: « Audi, ingrate, imò sacrilege... ipsum liberum, ut dicimus, arbitrium « Dei innititur auxilio, illiusque per singula « ope indiget; sed id vultis, ut qui semel habet liberum arbitrium, Deo adiutore non « egeat; » ergo, etc.

2^o Idem evincitur ex S. Aug. lib. de Gestis Pelagii cap. 18, ubi ista Pelagii verba refert: « Non est liberum arbitrium, si Dei indiget « auxilio, quoniam in propriâ voluntate habet unusquisque aut facere aliquid, aut non « facere. » Ideò ergo, ut videbatur Pelagio, non indiget liberum arbitrium Dei auxilio, quia habet absolutè in suâ potestate facere aut non facere; ergo, etc.

3^o Tandem idem colligitur ex citato sæpius palmari Pelagianorum principio: Liberum non est arbitrium, si Dei indiget auxilio; atqui supposito quovis concursu liberum arbitrium Dei indigeret auxilio; ergo, etc. Porro, si generatim concursum rejiciebat Pelagius, eum sanè non admittebat pro actionibus supernaturalibus. Et verò concursus ille vera est voluntatis gratia; at supra probavimus nusquam Pelagium agnovisse necessitatem gratiæ

voluntatis; ergo, etc. Tandem quæ probant momenta Pelagium non admisisse gratiam voluntatis, demonstrant pariter ipsum non agnovisse necessitatem concursus etiam simultanei.

Lemos in Panopliâ, tom. 1, tract. 1, cap. 4, contendit Pelagium præcipuè negâsse concursum prævium, et ob id damnatum fuisse à Patribus: « Imò, *inquit loco citato*, negavit Pelagius illum prævium concursum, et de hoc potissimum fuit damnatus et à SS. DD. convictus. Quod ex eo fit manifestum, quia Pelagius illud auxilium, sive concursum negavit, quòd sibi videbatur tollere libertatem.... sed concursus simultaneus et indifferens voluntati oblatus, ut ipsa pro suâ innatâ libertate, vel agat, vel non agat, nullâ apparenti ratione poterat judicari quòd libertatem destrueret. Igitur non loquebatur de isto concursu simultaneo Pelagius, quando dixit quòd non est liberum arbitrium, si tali indiget auxilio. » Idem fermè docet Gonzalez de Leon controvers. 4. Verùm quàm falsa sit ista sententia patebit ex dicendis cap. 6, ubi probabimus S. Aug. cum Pelagianis disputâsse, non de auxilio physicè præmovente, seu de concursu prævio, sed unicè de verâ et internâ voluntatis gratiâ. Unum hic interim annotare juvat infirmum omninò Lemos argumentum, cujus falsitas manifestè patet ex adductis probationibus; neque enim juxta Pelagium concursus censebatur liberum adimere arbitrium, ex eo quòd præveniret aut determinaret voluntatem, sed ex eo quòd nulla est libertas ubi non est ex se sibi sufficiens potestas ad utrumlibet. « Frustra (*inquit Pelagius citatâ ad Ctesiphont. epist.*) dedit arbitrii potestatem, quam implere non possum, nisi ipse me semper adjuverit; destruit enim voluntas quæ alterius ope indiget. »

CAPUT V.

Utrum Pelagiani admiserint gratiam habitualement et virtutes infusas?

Affirmat Jansenius lib. 5 de hæresi Pelag. cap. 22 et sequentibus. Negant alii cum Suarez prolegomen. 5, de Grat. cap. 2, Vegâ, Stapleton. d'Aguirre, Petavio, etc. Alii distinguunt inter gratiam habitualement et virtutes infusas. Ista quidem à Pelagianis fuisse rejectas, non verò gratiam habitualement per quam peccata delentur. Ita Martinonus in Antijansenio disput. 7 de hæresi Pelag. sect. 15.

CONCLUSIO. — Pelagiani nec gratiam interiùs

sanctificantem seu habitualement, nec virtutes supernaturales infusas agnovère.

Prob. 1^o ex S. Aug. lib. de Grat. Christi cap. 50: « Istam, *inquit*, gratiam, quâ justificamur, id est, quâ charitas Dei diffunditur in cordibus nostris per Spiritum sanctum qui datus est nobis, in Pelagii et Cœlestii scriptis, quæcumque legere potui, nusquàm eos inveni, quemadmodum confitenda est confiteri. Prorsus nusquàm eos adverti, sicut agnoscendi sunt, agnoscere filios promissionis, de quibus dicit Apostolus: *Non ii qui filii carnis, hi filii Dei.* » Unde sic arguo: Gratia per quam filii Dei, et filii promissionis constituimur, est gratia habitualis: filii enim Dei finis et justis, *per occultissimam*, ut loquitur S. Aug. lib. 1 de peccat. meritis et remiss. cap. 9, *Spiritus sui gratiam, quam latenter infundit et parvulis.* Atqui talem gratiam nusquàm admisit Pelagius; ergo, etc.

2^o Non semel advertit S. Aug. Pelagianos contendisse *remissionis gratiam ad hoc tantum valere, ut peccata præterita dimittantur, non ut futura præcaveantur*; quæ quidem propositio damnata est in concilio Milevit. can. 5; et cap. 2 lib. de Gratiâ Christi testatur idem S. doctor, Pelagianos coactos agnoscere gratiam ad præcavenda peccata, eam in recordatione remissionis peccatorum et exempli Christi consideratione reposuisse, non in aliquâ subministratione virtutis. Ex quibus ista colligo: Si Pelagiani veram habitualement gratiam admisissent, hæc, utpote habitus interior et permanens, ad præcavenda peccata valuisset, nec in solâ exteriori consideratione et recordatione fuisset posita; atqui contrarium asseruère Pelagiani; ergo veram gratiam habitualement non admiserunt.

3^o Quemadmodum ratiocinatur Suarez loco mox citato, gratia habitualis et dona infusa conferuntur propter actus supernaturales, sicut virtutes et habitus naturales dantur propter operationes naturales; atqui Pelagius non agnovit actus supernaturales; siquidem omnes virtutum actus asseruit fieri posse per vires proprias liberi arbitrii; ergo, etc. Etverò in Adamo innocente nullum supernaturale donum agnovit Pelagius: ergo verisimile idem sensisse de Adæ filiis. Denique nusquàm admisit actualement internam voluntatis gratiam, uti antea probavimus; ergo nec habitualement.

Dices 1^o: Pelagiani omnes effectus tribuerunt gratiæ Christi quos in gratiam habitualement refundimus. 1^o Ipsam desiderabant ad abs-

tertionem et remissionem peccatorum. Lib. de Gratia Christi et alibi sæpè. 2º Ad naturæ instaurationem, innovationem, restaurationem. Ita Pelagius in Epist. ad Demetriadem. 3º Ad justificationem et sanctificationem in Christo; aiebat enim Pelagius, *non idcirco parvulos baptizari, ut remissionem accipiant peccatorum, sed ut sanctificentur in Christo*. Ita se Carthagine audivisse testatur S. Aug. lib. de peccat. meritis et remiss. cap. 6. 4º Ad adoptionem; hinc S. Aug. lib. 2 ad Bonifacium cap. 6, Pelagianos sic alloquitur: *Regenerationis lavaero adoptari ex filiis hominum in filios Dei non negatis, imò etiam prædicatis*. 5º Ut templum Dei homines fierent, et hæredes regni cœlestis. *Ideo parvuli baptizantur*, inquit Pelagius apud S. Aug. lib. 1 de Peccat. meritis et remiss. cap. 10, *ut creentur in Christo, et ipsius regni cœlorum participes fiant eo modo filii et hæredes Dei, cohæredes autem Christi*. Atqui insignes illi multiplicesque effectus apertè demonstrant Pelagianos gratiam habitualement divinitus infusam agnovisse: ergo, etc. Respondeo isthæc quidem verba sensum catholicum præ se ferre, sed apud fraudulentos hæreticos Pelagianos, gravissimā latentis erroris suspitione laborare. Scilicet asserebant peccata dimitti, homines instaurari, renovari, adoptari in filios Dei, hæredes fieri regni Dei, etc., non quidem per infusionem charitatis et aliorum donorum supernaturalium, sed per simplicem et externam peccatorum non imputationem seu condonationem, per simplicem et externum Dei favorem, quo ad regnum cœlorum destinantur: eo ferè modo quo solā principis voluntate seu destinatione, nonnulli ad certa quædam officia deputantur, absque ullā ipsis intus communicatā virtute. Fallaciam hanc detegit S. Aug. citato cap. 38 libri de Grat. Christi; relatis enim hisce Pelagii verbis, *nos instaurari per Christi gratiam, et in meliorem hominem renasci*; subjungit S. doctor: « Videte quemadmodum et hic aliis quidem verbis, sed tamen in remissione peccatorum et in exemplo Christi adiutorium gratiæ constituerit. » Et lib. 6 contra Julianum cap. 23. « Tu, inquit, à vestro dogmate non recedis, sic putatis gratiam Dei per Jesum Christum sic in solā peccatorum remissione versari, ut non adjuves ad vitanda peccata... diffundendo charitatem in cordibus nostris per Spiritum sanctum qui ab illo datus est nobis. »

Cæterum quæ diximus, Pelagianos non ad-

misisse gratiam habitualement, intelligenda sunt duntaxat de Pelagio ejusque discipulis ad tempora usque lati sub Zozimo decreti; neque enim ita clarè liquet quid censuerit Julianus circa præsentem quæstionem, atque hinc adversum nos nullatenus militant Jansenii argumenta ex libris S. Aug. contra Julianum editis, aliisque posterioribus deprompta.

CAPUT VI.

De quâ gratiæ speciei contentio fuerit sanctum Augustinum inter et Pelagianos.

Jansenius, lib. 5 de hæresi Pelagianâ, cap. 11, 12 et sequentibus, contendit eam gratiam quam negabant Pelagiani, et pro quâ tam strenuè pugnabat S. Aug., esse gratiam voluntatis et actionis, quæ virtute suâ invictâ, indeclinabili et insuperabili, voluntatem ad bonum operandum necessariò hic et nunc applicat ac determinat.

Lemos in Panopliâ, Alvarez de Auxiliis, Salmaticenses disput. præviâ de Grat. cap. 4, parag. 6, aliq̃ue præsertim è Thomistis existimant gratiam de quâ inter S. Aug. et Pelagianos tam diuturna exarsit controversia, fuisse gratiam per se efficacem aut physicè præmotentem.

Thomassinus, tom. 5 Theologicorum Dogmatum et in commentariis de Grat. gallice editis, aliq̃ue numero longè pauciores de gratiâ habituali certatum fuisse docent. Cæteri volunt de necessitate et gratuitate actualis et prævenientis gratiæ voluntatis disputatum fuisse; de modo autem quo illa gratia operatur nullam fuisse controversiam. Ita Gamachœus, Ysambert, Suarez, Bellarmin, Petavius, de Lectocq, Frassen, etc.

Sunt qui distinguunt, et asserunt equidem S. Aug. ex fide Ecclesiæ, ipsiusque partes agentem, unicè à Pelagianis exegisse gratiam voluntatis necessariam et gratuitam; at ut privatum doctorem et ex propriâ sententiâ gratiam ex sese efficacem admisisse. Ita Natalis Alex. Hist. Eccl. seculi 5 cap. 3, parag. 13. In hanc sententiam facillè adduci possunt plures ex iis qui pro secundâ laudari solent. Quid sentiamus sequentes aperient Conclusiones.

CONCLUSIO PRIMA. — Gratia quam popugnavit S. Aug. contra Pelagianos, ea non est quæ virtute suâ invictâ, insuperabili et indeclinabili voluntatem ad bonum necessariò determinat et applicat, ad sensum Jansenii. Probat. Quia ea gratia non fuit ab Augustino

contra Pelagianos propugnata, quæ jam ab Ecclesiâ damnatur, et semper damnata est ut noxia libertati; atqui talis est gratia necessitans, quam perpetuò obtrudit Jansenius, ut ex professo infra ostendemus; ergo, etc.

CONCLUSIO SECUNDA. — Gratia de quâ potissimum contra Pelagianos agebat S. Aug. non erat habitualis, sed actualis.

Probatur. Gratia quæ requiritur ad singulos pietatis actus, etiam justificationi prævios; quæ homini perfectissimè justificato necessaria est ut possit rectè vivere, sicut candor lucis oculo plenissimè sano necessarius est ut possit videre; quæ præter baptismatis gratiam datur ut quotidianum Dei adiutorium, ad superandas diaboli insidias et carnis concupiscentias necessarium, non est gratia habitualis, sed actualis; talis autem est gratia de quâ potissimum disputatum fuit Augustinum inter et Pelagianos, quod ex disertis S. D. textibus manifestum fit. « Eâ gratiâ, inquit lib. de Grat. Christi cap. 19, « necessarium est ut adjuvetur homo, sine quâ « boni aliquid facere non potest. » Lib. de Nat. et Grat. cap. 26 : « Sicut oculus plenissimè « sanus, nisi candore lucis adjutus non potest « cernere, sic homo etiam perfectissimè justificatus, nisi æternâ luce justitiæ divinitus « adjuvetur, rectè non potest vivere. » Et sanctus Cœlestinus in epist. ad episcopos Galliæ cap. 7 : « Nemo, ait, nisi baptismatis « gratiâ renovatus idoneus est ad superandas « diaboli insidias, et vincendas carnis concupiscentias, nisi per quotidianum Dei adiutorium perseverantiam bonæ conversationis « accipiat. » Ergo de gratiâ actuali potissimum agebatur contra Pelagianos.

Et verò ideò contendit Thomassinus S. Aug. disputasse contra Pelagianos de gratiâ habituali, quia agit adversus ipsos de gratiâ quâ justificamur et sanctificamur, quæ quidem est gratia habitualis; at hæc ratio omninò infirma est et inefficax. Triplici enim modo, ut observat Angelicus doctor, homo dici potest justificari, 1° *dispositivè*, cum tendit et præparat se ad justitiam; 2° *formaliter*, cum in justitiâ et sanctitate habituali actu constituitur; 3° *effectivè*, cum ex justitiâ agit, seu fructus justitiæ operatur. Sanctificatio dispositiva effectus est gratiæ actualis; formalis est effectus habitualis; effectiva tandem, et actualis gratiæ est et habitualis. Sanctus porrò Aug. loquitur non tantum de gratiâ, quâ formaliter, sed potissimum de illâ, quâ dispositivè et effectivè justificamur, proindeque de gratiâ actuali disputavit contra

Pelagianos; quod constat ex dictis, et ampliùs constabit ex dicendis.

CONCLUSIO TERTIA. — Gratia de quâ tam gravis ac diuturna exarsit contentio, sanctum Augustinum inter et Pelagianos, non est gratia ex se efficax, sed generatim actualis gratia voluntatis necessaria et gratuita.

Primum argumentum sic proponitur. Gratia quam S. Aug. Ecclesiæ partes agens adversus Pelagianos propugnavit, et ipsum dogma fidei quod adversus eodem hæreticos definiit Ecclesia; atqui sola gratia voluntatis præveniens, necessaria et gratuita, dogma est quod adversus Pelagianos ab Ecclesiâ definitum est, non autem gratia per se efficax; ergo, etc.

Major propositio constat 1° pluribus summorum Pontificum testimoniis, qui scripta S. Aug. consulenda proponunt, ut vera Ecclesiæ fides circa gratiam dignoscatur. 2° Innocent. I, in epist. supra citatâ ad Patres Carthaginenses, inter Augustinianas 181, aliàs 91, scribit, *qui hujusmodi gratiam rejiciunt, se inimicos catholicæ fidei et beneficiis Dei ingratos profiteri*. 3° S. August. loquens de gratiâ quam à Pelagio exigebat, asserit eam esse, quæ ad fidem Ecclesiæ pertinet, lib. de Grat. Christi cap. 2, quam tenebatur confiteri Pelagius, *si vult non solum vocari, verum etiam esse Christianus*, ibidem cap. 10 : *Quæ secundum sanam doctrinam debet intelligi.... quam si Pelagius admitteret, non abhorreret à doctrinâ catholicâ*, ibid. cap. 14, 15, 24, etc. 4° Idem evincitur constanti omnium theologorum suffragio. Consentit Jansenius, qui exinde colligit suam gratiam necessariò et relativè victricem ex fide admittendam esse.

Minor autem propositio probatur 1° ex omnibus conciliis celebratis adversus Pelagianos, maximè verò Carthaginensi et Milevitano an. 416, et altero Carthaginensi totius Africæ plenario an. 418, in quibus nihil aliud definitur, nisi quòd gratia voluntatis sit ad omnes pietatis actus simpliciter necessaria. Ita præsertim can. 4, 5 et 6 : « Placuit, inquit Patres can. 5, « ut quicumque dixerit ideò nobis gratiam dari, « ut quod facere per liberum jubemur arbitrium, faciliùs implere possimus per gratiam, tanquàm, etiamsi gratia non daretur, « non quidem facilè, sed tamen possimus « etiam sine illâ implere divina mandata, ana- « thema sit. »

2° Ex conciliis celebratis in causâ Semipelagianorum; his siquidem asseritur sola necessitas gratiæ voluntatis ad initium fidei; mini-

mè verò damnantur eò quòd non admitterent gratiam per se efficacem. Ita concil. Araus. II, can. 6 : « Si quis sine gratiâ Dei, inquit
« Patres can. 6, credentibus, volentibus....
« misericordiam Dei dicit conferri divinitus....
« et obedientie humane subjungit gratiæ adju-
« torium, nec ut obedientes simus ipsius gratiæ
« donum esse consentit, resistit Apostolo di-
« centi : *Quid habes quod non accepisti?* » Porro non alia asserta fuit gratia contra Pelagianos ad omne pietatis opus, quàm quæ definita fuit necessaria ad initium fidei contra Semipelagianos; ergo, etc.

5° Ex summis pontificibus qui Pelagianam hæresim confixere; ii omnes in eo præcise dogma constituunt, quòd admittenda sit voluntatis gratia præveniens et simpliciter necessaria. Ita Innocent. I, in rescriptis ad Patres Africanos expressè asserit, *anathematizandos esse qui contendunt aliquod veræ pietatis opus fieri posse sine gratiâ*. Pariter Zozimus in celebri Tractoriâ an. 418, urget solam gratiæ voluntatis necessitatem quæ præveniat omnia merita. Sanctus Cælestinus in epist. ad episcopos Galliæ, adductis variis conciliorum et Patrum sententiis in quibus nuda stabilitur gratiæ necessitas, hæc addit maximè observanda : « Pro-
« fundiores verò difficiliioresque partes incur-
« rentium quæstionum, quas latius pertracta-
« runt qui hæreticis resisterunt, sicut non
« audemus contemnere, ita non necesse habemus astruere. »

4° Idem evincitur ex S. Aug. qui explicans quænam sint dogmata quorum confessio exigenda sit à Pelagianis ut sint catholici, solam commemorat necessitatem gratiæ voluntatis, gratiam verò ex sese efficacem omninò silet. Id inprimis adverti potest epist. 186, aliàs 106, ubi prolatis articulis quos Pelagius anathematizare compulsus fuerat, iis opponit hos articulos catholicos : « Fateatur gratiam Dei et
« adjutorium ad singulos actus dari, eamque
« non dari secundum merita nostra.... fateatur
« et liberum arbitrium, etiamsi divino indiget
« auxilio.... fateatur, quando contra tentatio-
« nes dimicamus, ex adjutorio Dei nostram
« provenire victoriam. »

5° Tandem eadem minor propositio, hoc invicto adstruitur ratiocinio : Quod olim ab Ecclesiâ adversus Pelagianos definitum fuit tanquàm de fide, etiam nunc debet esse dogma fidei : fides enim omninò est immutabilis, invariabilis, nec obliterari potest. Equidem fieri potest ut quæ antea non fuerant proposita ut

explicitè credenda, postea sic proponantur ; sed Ecclesiæ firmitas et immobilitas in suis decretis non patitur ut aliquandò exegerit fidem alicujus mysterii, et contra sentientes è sinu suo tanquàm hæreticos expulerit ; postea verò eandem fidem obliterari permittat. Porro nunc sola gratiæ voluntatis necessitas et gratuita fide divinâ credenda est, non autem ipsius ex se efficax operandi modus ; siquidem multi sunt qui gratiam illam ex sese efficacem rejiciunt, quos tamen ut Catholicos habet Ecclesia, prohibetque ullâ hæreseos vel erroris notâ insinulari ; ergo, etc.

Secundum argumentum. Eam à Pelagio gratiam exigebat S. Aug. quam ab ipso postulaverant Patres Diospolitani, quamque etsi subdolè confitendo fulmen declinavit ; at Patres illi Græcorum principiis imbuti, gratiam non exigebant quæ esset adjutorium *quo*, hoc enim, teste Jans. lib. 1 de hæres. Pelag. ignorabant ; imò nondum hanc duplicis adjutorii divisionem exposuerat S. doctor, quæ tamen clavis est ad dogma gratiæ ex se efficaciis ; ergo, cum S. Aug. postularet gratiam quam Pelagius professus est in concilio Diospolitano ne damnaretur, solam sanè postulabat gratiam voluntatis.

Tertium argumentum. S. Aug. Ecclesiæ partes agens id unum postulat à Pelagio, ut confiteatur gratiam quæ det ipsum posse, ita ut sine illâ voluntas propter virium infirmitatem nihil boni quod ad salutem conducat valeat operari ; quæ voluntatem præveniat et adjuvet, quæque secundum merita non detur ; atqui prædicti characteres soli prævenienti voluntatis gratiæ competunt ; ergo. Minor ex sese patet ; si enim absque gratiâ efficaci voluntas non posset bonum operari, gravis sequeretur error quem suo loco refutabimus, videlicet absente gratiâ efficaci homini non suppetere media verè sufficientia ut salutem possit operari ; adeoque justis urgente præcepto quandoque mandata esse impossibilia. Major verò probatur pluribus S. Aug. textibus, Epist. 181, aliàs 106 : « Gratia, inquit, quam fides vera
« et catholica tenet semper Ecclesia.... sic ad-
« juvat, ut nisi adjuvet, nihil pietatis atque
« justitiæ, sive in opere, sive etiam in ipsâ vo-
« luntate, habere possimus. » Et lib. de Grat. Christi, cap. 47 : « Si ergo consenserit nobis
« (Pelagius).... etiam ipsam voluntatem et
« actionem divinitus adjuvari, et sic adjuvari,
« ut sine illo adjutorio nihil benè velimus et
« agamus, eamque esse gratiam Dei per Jesum

« Christum.... nihil de adjutorio gratiæ, quantum arbitror, intra nos controversiæ relinquitur. » Et lib. 4 ad Bonif. cap. 6, id unum carpit in Pelagianis, quod negarent bonam voluntatem à gratiâ præparari seu præveniri : « Si autem, inquit, sic intelligerent, quod dictum est, si volueritis, ut etiam bonam voluntatem illum præparare confiterentur, de quo scrip- tum est : *Præparatur voluntas à Domino*, tantum est : *Præparatur voluntas à Domino*, tantum quam catholici uterentur hoc testimonio. » Ergo gratia ejus confessionem à Pelagio requirebat S. Aug. erat tantum gratia voluntatis præveniens, necessaria et gratuita. Hinc quoties dogmaticam Ecclesiæ definitionem tradit S. doctor, hoc unum inculcare nititur ; nempe quod præveniat et præparet voluntatem, quod sit talis ut sine ipsâ nihil boni possit fieri ; et quod secundum merita non detur ; ergo, etc.

Quartum argumentum. Catholicè omninò sensissent Semipelagiani circa gratiam, si quam ad bona opera admittebant, eandem ad initium fidei necessariam agnovissent ; atqui Semipelagiani ad bona opera necessariam asseriebant gratiam, non ex sese efficacem, sed generatim gratiam quæ præveniret voluntatem, ipsamque adjuvaret ; ergo, si ejusdem gratiæ necessitatem quoad initium fidei agnovissent, catholicè censuissent, eosque ex hæc parte velut orthodoxos suscepisset S. Aug., ac proinde gratia quam idem S. doctor Pelagianos debellans, ab ipsis exigebat, sola erat necessitas gratiæ voluntatis, quæ tum opera, tum initium bonorum operum præveniret. Major constat ex S. Aug. loco citato, et lib. de dono Persev. cap. 17 : « Sicut ergo, inquit, ipsi hortantur ad castitatem, charitatem, pietatem, et cætera quæ Dei dona esse confitentur ; sic videant nec ad fidem, nec ad perseverantiam impediri exhortationes suas, si et ipsa Dei dona esse dicantur. » Minor certa est unanimi theologorum consensu, eamque contra Jan- senium adstruimus, ubi de Semipelagianis.

Quintum argumentum. S. Aug. exigit unicè à Pelagio ut confiteatur gratiam volitionis et actionis ; sed gratia quæcumque præveniens voluntatis, est gratia volitionis et actionis. Namque 1^o gratia volitionis et actionis, est gratia quam opponit S. doctor directè et immediatè gratiæ possibilitatis à Pelagio admixtæ, quæque ex dictis erat duntaxat gratia intellectus ; atqui gratia quæcumque voluntatis directè et immediatè opponitur gratiæ intellectus ; ergo, etc. 2^o Gratia quæ adjuvat ut velimus et agamus, est gratia volitionis et actionis ex S.

Aug. *Dat Deus quod jubet*, inquit S. D. lib. de grat. et lib. arbit. cap. 15, *quando adjuvat, ut faciat cui jubet*. Sed gratia voluntatis adjuvat ut velimus et agamus ; movet enim quælibet gratia voluntatis et excitat ad actionem in quam influit, quamque nobiscum producit dum agimus ; ergo, etc. 3^o Agnoscitur gratia volitionis et actionis eo ipso quo defenditur hominem nihil benè velle aut agere sine divino adjutorio. Ita docet S. Aug. lib. de Grat. Christi cap. 25, his verbis : *Velle et operari, operatur in nobis ; non quia nos non volumus, sed quia sine ipsius adjutorio, nec volumus aliquid boni, nec agimus*. Atqui positâ necessitate cujuslibet gratiæ voluntatis, homo nihil vult aut agit sine divino adjutorio quod faciat velle aut agere ; ergo, etc. Et verò, quando duæ causæ concurrunt ad unum et eundem effectum, non uni duntaxat sed utrique causæ tribui debet effectus, præsertim verò nobiliori et primariæ ; porro gratia, utpote ordinis supernaturalis, causa nobilior est ipsâ voluntate ; et quatenus eam prævenit, et excitat, primaria est ; ergo gratiæ voluntati potissimum, adscribenda actio ; ergo meritò dicitur gratia volitionis et actionis. Conferantur textus S. Aug. lib. de Grat. Christi cap. 47, probatione 3, relati cum his tribus punctis, et hæc iterum evincunt.

Solvuntur objectiones. — Obijcies 1^o : S. Aug. passim apertè declarat se à Pelagio postulare gratiam ex sese efficacem : postulat enim gratiam quæ « futuræ gloriæ magnitudo non solum promittitur, verum etiam creditur et speratur ; nec solum revelatur sapientia, verum etiam amatur ; nec suadetur solum omne quod bonum est, verum etiam persuadetur ; » lib. de Grat. Christi cap. 10 ; « quæ Deus non ostendat tantummodò veritatem, verum etiam impertiat charitatem.... simul donans et quid agant scire, et quod sciunt agere ; » ibidem, cap. 13 : quæ « non solum Deus posse nostrum donat atque adjuvat, sed etiam velle et operari operatur in nobis... occultâ, mirabili et ineffabili potestate, » ibidem, cap. 24, 25 ; quæ « volentes ex nolentibus fiant occultissimâ et efficacissimâ potestate, » lib. 1 ad Bonif., cap. 18 et 20 ; « quæ Deus facit ut faciamus præbendo vires efficacissimas voluntati, » lib. de Grat. et lib. Arb., cap. 16 ; « quæ subventum est infirmitati voluntatis humanæ, ut indeclinabiliter et insuperabiliter ageretur, et ideò quamvis infirma non tamen deficeret, neque adversitate aliquâ vinceretur, » lib. de Corrept. et Grat., cap. 12 ; « quæ

« Deus habet humanórum cordium, quò placet, « inclinandorum omnipotentissimam potestatem.... Et magis habet in potestate voluntates, quàm ipsi suas, » ibidem, cap. 14; quæ denique « à nullo duro corde respuitur; « ideò quippè tribuitur, ut cordis duritia primitus auferatur, » lib. de Prædest. SS., cap. 8. Atqui hæc et alia plurima quæ multis in locis reperit S. Aug. quæque hic recensere longius esset, haud dubiè exprimunt gratiam ex sese efficacem, seu naturà suà infallibiliter determinantem ad operandum; ergo, etc. Respondeo 1º, istud argumentum, si nimium urgeretur, nimis probare, ipsisque adversariis esse solvendum; libro enim de Grat. Christi, cap. 10, post citata in objectione verba, subiungit S. doctor: « Hanc debet Pelagius gratiam confiteri, si vult non solum vocari, « verum etiam dici Christianus. » An verò dicent adversarii, nomine christiano donandum non esse ex S. Aug. qui gratiam ex sese efficacem negaret? Certè, teste Jansenio, ut antea diximus, Patres Palæstini quibus ambiguitate vocis turpiter illudit Pelagius, gratiam, quæ esset adjutorium *quo*, seu ex sese efficacem ignorabant, et tamen eos catholicos præsules appellat S. August., epist. 177, aliàs 95, ubi de iis sic loquitur: « Iis auditis verbis, catholici antistites, nullam aliam Dei gratiam intelligere « potuerunt, nisi quam in libris Dei legere, et « populis Dei prædicare consueverunt; « id est ut exponit lib. de gestis Pelagii, cap. 14, « quæ « subministratione sancti Spiritus datur, ut ad « nostros actus singulos adjuvemur. » Itaque licet ex adductis testimoniis probaretur S. Aug. admisisse gratiam ex sese efficacem, de quo suo loco disputabimus, non tamen inde elici posset, eam esse tanquam de fide admittendam; nemo enim non videt quantum sit discriminis, inter gratiam ex se efficacem admittere, dogma fidei contra Pelagianos stabiliendo, et eam exigere velut dogma fidei. Esto prius præstiterit S. Aug. de quo suo loco disputabimus; neutiquam certè posterius.

Respondeo 2º, idem argumentum alià de causâ Jansenio esse solvendum. Contendit enim et multis probat lib. 6 de Hæres. Pelag., cap. 1, 2, etc., Pelagianos post solemne Zozimi decretum an. 418, *verissimam, purissimam, catholicamque gratiam*, id est, ut ipse interpretatur, ex sese, relativè et necessariò victricem, tandem confessos fuisse; quanquàm errarent in eo quòd ex meritis et ad facilius duntaxat eam dari statuerint; porro plurima ex adductis in objec-

tione testimoniis eruantur ex operibus S. Aug. longe post annum 418 exaratis. Ita libri ad Bonifac., libri de Grat. et lib. Arbit., de Corrept. et Grat., de Prædest. SS. de dono Perseverantiæ, etc.; ergo, etc.

Respondeo 3º, non de modo agendi gratiæ disputasse S. Aug., sed de illius necessitate et gratuitate. Scilicet in systemate gratiæ ex sese efficacis tria sedulò sunt distinguenda: nempe necessitas, gratuitas, et illius efficacia, seu potius efficaciarum modus. Duo priora nomine Ecclesiæ exigit S. Aug. à Pelagio ut esset catholicus; tertium verò caput, si illud agnovit (quod hic non inquirimus), ex propriâ sententiâ propugnavit S. doctor, non tamen proposuit ut fidei dogma; nec Pelagianos hæreticorum numero habuisset, si internam voluntatis gratiam ad singulos actus, ac ad ipsum boni cuiusvis operis ac fidei initium omninò necessariam, eamque non secundum merita nostra dari professi essent, quamvis ipsam esse ex se efficacem negassent. Solutionem hanc nobis subministrat Natalis Alex., in Synopsi hist. seculi 5, cap. 3, parag. 15.

Respondent denique qui gratiam ex se efficacem non admittunt, negando minorem propositionem. Aliud enim est, inquit, generatim exigere gratiam quamlibet efficacem seu efficientem, aliud expostulare gratiam à se et ab intrinseco efficacem. De priori loquitur S. Aug., non de posteriori, quod ut planius intelligatur, observandum ex supra dictis 1º, duplicem distinguendam esse gratiam interiorē; una ad intellectum, altera ad voluntatem pertinet. 2º In eo positum fuisse Pelagii errorem, quòd nullam admitteret gratiam voluntatis, sed solam gratiam intellectus. 3º Id proprium esse gratiæ intellectus, ut se habeat tantum instar conditionis ad ipsam operationem voluntatis, nec possit propriè dici ejus causa, cum ostendat tantum et proponat voluntati quid sit agendum; neque interiùs eam afficiat, moveat et adjuvet ad operandum. E contra verò gratia voluntatis cum interiùs voluntatem moveat et excitet, simulque corroboret et compleat in ratione principii supernaturalis, se habet ut primaria et præcipua causa cujuscumque boni operis pertinentis ad vitam æternam.

Iis præsuppositis, plana est et aperta S. doct. mens atque doctrina. Scilicet, pergunt iidem, locis citatis refellit gratiam Pelagianam quæ cum ad solum intellectum pertineret, se habebat ad nostræ voluntatis operationes, duntaxat veluti conditio ostendens et proponens voluntati

quid sit agendum, non verò ut causa intus eam afficiens, movens et adjuvans ad operandum. S. Aug. in nefarium illud dogma insurgens gratiam exigit, quæ voluntatem interius moveat et excitet, corroboret atque compleat; ac proinde quæ sit primaria ac præcipua causa cujuscumque boni operis; porro gratia cui hæc competunt est simplex gratia voluntatis, ad quam ut ad præcipuam causam referri possunt et debent omnia pietatis opera quæ elicimus; hanc ergo unicè exigit abstrahendo à modo quo ipsa operatur.

De illâ rectè exponuntur quæcumque in objectione proposita sunt, præsertim si hæc duo attendantur, 1^o sanctum D. gratiam potissimum spectare in prædestinatis; 2^o eam considerare in statu perfectissimo. Primum constat ex lib. de Corrept. et Grat., cap. 13: *De his loquor, inquit, qui prædestinati sunt in regnum Dei*. Secundum, dum præcipuos ejus characteres et effectus ipsi soli proprios sigillatim recenset, ut nempe Pelagii fastum reprimeret, qui suæ gratiæ effectus mirificè extollebat, lib. de Grat. Christi, cap. 10. Hanc quippe superbiam ut contunderet S. D. Pelagianam gratiam denudat, eamque in lege et doctrinâ consistere tradit; huic autem catholicam gratiam, illiusque effectus opponit, quam proinde effectui conjungere debet, certissimam illius efficientiam adstruendo, quocumque tandem modo effectum suum illa operetur, quod ibi non expendit S. Aug. Hinc de illâ catholicâ gratiâ loquens, simpliciter affirmat, eâ gratiâ fieri, « non solum ut facienda noverimus, verum etiam ut cognita faciamus.... non ostendere tantum modò veritatem; verum etiam impertire charitatem.... occultâ, mirabili, ac ineffabili potestate operari in cordibus hominum, non solum veras revelationes, sed etiam bonas voluntates; » aliaque mira in objectione proposita. Lege si vacat Patrem Josephum Tricassinum disput. theolog. de Prædestinat. hominum, parte 2, sect. 2, par. 16 et sequentibus.

Ad hanc responsionem revocatur quæ à quibusdam aliis affertur solutio, distinguendo maj. et min. objectionis propositæ: Gratia quâ semper et absolutè in quibuscumque circumstantiis creditur, speratur, amatur, persuadetur, etc., est gratia à se et ab intrinseco efficax, concedo; gratia quâ hypotheticè duntaxat creditur, speratur, etc., seu ex hypothesi quòd ipsi consensum præbeamus, nego. Porro gratia quam à Pelagio nomine Ecclesiæ postulat strenuus gratiæ vindex Aug. non est gratia quâ semper

credatur et ametur; sed est gratia quæ, ex hypothesi quòd credamus, speremus, amemus, etc., sit causa nostræ fidei, spei, amoris, aliorumque hujusmodi piorum actuum, qualis est generatim quælibet gratia voluntatis. Solutio patet ex dictis, et ampliùs constabit ex dicendis obiect. 5, ubi ostendemus quamlibet gratiam voluntatis, meritò dici gratiam volitionis et actionis.

Objicies 2^o: Eam à Pelagio gratiam postulat S. Aug. lib. de Grat. Christi cap. 14, quâ Deus docet non per legis litteram, sed per Spiritûs gratiam; porro gratia hujusmodi est sola efficax. Namque 1^o Deus eâ ita docet, ut quod quisque didicerit, non tantum cognoscendo videat, sed etiam volendo appetat, agendoque perficiat. 2^o Qui eam habet, venit; qui non venit, non habet: *Omnis qui didicit, venit; quisquis non venit, profectò nec didicit*, ibidem cap. 14. 3^o Gratia est cujus indicium certissimum est, si homo faciat quod didicit; et vicissim si non fecerit quod didicerit, signum est certissimum, eam non adfuisse, ibidem cap. 13, atqui talis est sola gratia efficax; ergo, etc. — Respondeo 1^o, tres priores adductas mox responsiones hic recurrere; quibus adde falsum esse in doctrinâ S. August. gratiam semper cum effectu conjungi. Id apertè constabit ex dicendis, ubi gratiæ sufficientis existentiam adstruimus. Respondeo 2^o nulli congruere systemati doctrinam in objectione propositam. Gratia enim quæ hic petitur à Pelagio, talis est ut habeat plenum ac perfectum effectum: *Omnis qui didicit à Patre, non solum potest venire, sed venit; ubi jam et possibilitatis profectus, et voluntatis affectus et actionis effectus est*, cap. 14: cum ergo in quolibet systemate gratiæ agnoscantur quæ pleno, perfecto et exteriori effectu privantur; ruunt omnia systemata, aut dicendum erit S. Aug. non excludere gratiam distinctam ab efficaci. Respondeo 3^o, apud S. Aug. istas locutiones *audire à Patre, et ab illo doceri, ac discere*, non significare simplicem gratiæ acceptionem, sed docilem ejus acceptionem, conjunctam nempe cum consensu voluntatis. Patet veritas solutionis 1^o ex contextu S. Aug.; nusquam enim simpliciter, ait S. D.: *Omnis qui audivit, venit*, sed hæc duo conjungit: *Omnis qui audivit et didicit, venit*. 2^o Ita seipsum interpretatur S. doctor: *Aures audiendi*, inquit lib. de dono Persev. cap. 14, *ipsum est donum obediendi*. 3^o Prædicta expositio perfectè consentit cum ipsius instituto: namque prosequitur hoc in loco oppositionem gratiæ Christi cum gratiâ Pelagianâ; hancque ex eo refellit,

quòd cùm se teneat tantùm ex parte intellectûs, nihil aliud operetur nisi scientiam agendorum, etiam in iis qui proprium ejus effectum non impediunt; è contra gratia voluntatis, in iisdem circumstantiis posita influit in ipsum bonum opus; proindeque fieri non potest ut quia discat secundùm posteriorem hanc gratiam, seu cum docilitate eam suscipiat, nisi veniat ad Christum et bonum operetur. En proprium discrimen utriusque gratiæ quod sollicitè inculcat S. Aug. loco citato; de connexionem verò absolutà et ex naturà rei inter gratiam et ejus effectum nullomodò cogitat.

Obijcies 5^o: De eà gratiâ contentio fuit sanctum Aug. inter et Pelagianos, quam solam illi hæretici argumentis suis oppugnare; atqui argumenta et rationes Pelagianorum unam duntaxat impugnant gratiam invincibiter aut necessariò determinantem; ergo, etc. Major certa est, minor autem probatur percurrèdo tantùm Pelagii, tantùm Juliani argumenta, variasque eorum querelas et expostulationes. 1^o Tria potissimùm erant pelagii argumenta adversùs gratiæ necessitatem. Primum ac fundamentale spectabat libertatis excidium: *Non est*, inquit Pelagius apud S. Hier. citatà ad Ctesiphont. epistolà, *liberum arbitrium, si Dei indiget auxilio*. Idem testatur S. Aug. lib. de gest. Pelagii, cap. 18. Ex hoc palmari Pelagianorum principio, tanquàm ex fonte et radice omnes aliæ eorum expostulationes derivantur. Secundum Pelagianorum argumentum istud erat, per gratiam auferri omnem voluntatis actionem; ita observat S. Aug. sermone 156, aliàs 15, de verbis Apost., ubi ex gratiæ necessitate sibi objicit: *Dicit mihi aliquis: ergo agimur, et non agimus?* Tertium præcedentibus persimile est et germanum. Scilicet conquerebantur dogmate catholico de necessitate gratiæ omne meritum subverti; hanc Pelagianorum querelam recenset et refellit S. Aug. lib. de Grat. et libero Arb. cap. 5 et 7. 2^o Tria etiam fuere Juliani argumenta: 1^o omne studium virtutis auferri; 2^o fatalem induci necessitatem; 3^o imò et coactionem voluntati inferri. Tres illas Juliani calumnias refert S. Aug. lib. 2 ad Bonifac. cap. 5, his verbis: *« Sub nomine gratiæ, ita fatum asserunt ut dicant, quia nisi Deus invito et reluctanti homini inspiraverit boni cupiditatem, nec à malo declinare, nec bonum posset facere. »* Unde hi hæretici sanctum D. et alios Catholicos tanquàm manichæismi reos sæpiùs traducebant. Porrò incredibile omninò est viros ingeniosos, quales erant Pelagius,

Cœlestius, Julianus, aliique Pelagiani, sibi in animum induxisse quòd ista incommoda sequerentur ex simplici necessitate gratiæ cui homo pro suo arbitrio posset consentire vel non consentire. Hæc et alia Pelagianorum argumenta, variasque eorum querimonias et expostulationes fusiori stylo prosequitur Jansenius lib. 5 de Hæres. Pelag. cap. 12, 13, 14, 15, 16, et lib. 2. de Grat. Christi, cap. 11, 12, etc.

Respondeo 1^o, hic iterùm recurrere tres priores solutiones supra allatas ad primam objectionem. Respondeo 2^o, ad primum, momenta et rationes quibus Pelagiani doctrinam S. Aug. oppugnabant, præcipuè ac directè impetere necessitatem gratiæ interioris. Constat id 1^o ex ipsismet allatis querimoniis: *non est liberum arbitrium*, inquebant Cœlestius et Pelagius, *si Dei indiget auxilio*; non aiunt, si Dei indiget auxilio efficaci; sed simpliciter, *si Dei indiget auxilio*; quæ verba apertè demonstrant, Pelagianam expostulationem fundari in unâ interioris gratiæ necessitate. Hinc S. Aug. epist. 194, aliàs 105, de Pelagianis ait: *« Putant autem ferri sibi arbitrium liberum, si nec ipsam bonam voluntatem sine adjutorio Dei hominibus habere consenserint. »* Constat 2^o, quia ut eas querimonias diluat S. D. in eo totus est ut ostendat necessitatem gratiæ nullatenus officere humanæ libertati; querimoniæ ergo illæ substantiam ac necessitatem gratiæ unicè spectabant, non ipsius agendi modum. Hinc lib. 2 de Nuptiis et Concupiscentiâ, Pelagianorum expostulationi respondens, sic occurrit: *« Liberum in hominibus esse arbitrium.... utrique dicimus. Non hinc estis Cœlestiani et Pelagiani. Sed si quis ad colendum rectè Deum, sine ipsius adjutorio, dicit in hominibus esse liberum arbitrium.... ipse Cœlestianus et Pelagianus vocatur. »* Constat 3^o, quia Pelagiani imbuti, ut antea vidimus ex SS. Hier. et Aug. falso ac erroneo principio, hominem non esse liberum, si Dei indiget auxilio; existimabant quamlibet gratiam interiorem, quæ voluntatem prævenit et excitat, ejus destruere libertatem, adeoque esse rejiciendam: scilicet ipsi essentiam libertatis constituebant in naturali potestate boni et mali, ex quo consequi putabant tolli libertatem, si id quod necessarium est ad bonum agendum non sit naturale.

Ad secundum: Momenta et rationes Juliani potissimùm impetunt necessitatem gratiæ ad initium bonorum operum; et quod opponebant Pelagiani generatim contra necessitatem

cujuslibet gratiæ prævenientis voluntatem, objiciebat ille contra necessitatem gratiæ prævenientis voluntatem ad initium bonorum operum; unde S. August. lib. 2 ad Bonifac. cap. 8, commemorans has Juliani querimonias, istud affert illius fundamentum: « Isti enim in homine volunt ab ipso homine incipere boni cupiditatem. » Et cap. 10.: « Hoc quippe ita dicunt, velut homo à seipso sine adjutorio Dei habeat propositum bonum studiumque virtutis. » Ex his liquidò apparet, quàm immeritò asserat Jansenius expostulationum Juliani fundamentum fuisse invincibilem gratiæ efficacitatem, cum directè sequantur ex rejectâ simplici ejus gratuitate, quâ sit ut omnia merita præveniat; atque hinc est quòd ad retundenda Juliani argumenta, totus versatur S. doctor, ut observat ipsemet Jans. in asserendâ gratiâ quæ omnia prorsus merita præveniat, quæque primam boni cupiditatem inspiret.

CAPUT SEPTIMUM.

Compendiosa proponitur series chronologica operum S. Aug. adversus hæresim Pelagianam.

Catholicum adversus Pelagianos bellum duce potissimum S. Aug. confectum est; teste S. Prospero lib. contra Collatorem cap. 10: *Viginti amplius annis, inquit, contra inimicos gratiæ Dei catholica acies hujus viri (Augustini) ductu pugnat et vincit.* Hinc Hormisdas de S.D. loquens, sic habet: *Quid romana asseverat Ecclesia de libero arbitrio et gratiâ Dei, ex variis Augustini libris, et maxime ad Hilarium et Prosperum cognosci potest.* Juvat ergo ad Pelagianos errores detegendos, et catholica dogmata ipsis opposita penitus scrutanda, paulò diligentius in opera S. doctoris adversus hanc hæresim exarata inquirere.

Primum quod adversus Pelagianos exaravit opus, fuere libri tres ad Marcellinum, *de peccatorum meritis et remissione*, anno 412 editi. Libro 1, Adamum, nisi peccasset, non fuisse moriturum, ejusque posteros reos nasci peccati originalis, et ad ejus remissionem baptizari demonstrat. Lib. 2, probat, nullum prorsus, excepto uno mediatore Christo, et B. M. Virgine (eam quippe excipit S. D. lib. de Naturâ et Grat. cap. 56), vel esse, vel fuisse, vel futurum hominem ab omni peccato immunem. In 3, Pelagii argumenta contra peccatum originale refellit. Eodem anno 412, aliud opus contra Pelagianos *de spiritu et litterâ* itidem Marcellino nuncupavit. Eo in libro, 1^o osten-

dit innumera, quæ nusquam extitère, tamen maxime esse possibile; legem sine gratiâ ad peccata vitanda non sufficere, quod probat his Apostoli verbis: *Littera occidit, spiritus autem vivificat*; quæ ibidem exponit, et sæpius urget; cæque de causâ huic libro *de spiritu et litterâ* titulum fecit S. doctor. 5^o Tandem gratiæ divinæ fidem esse deputandam. Ad eundem annum referenda est epist. ad Honoratum de grat. novi Testamenti.

Anno 413, S. Aug. adversus Pelagianos sermonem habuit, qui inter ipsius de verbis Apostoli sermones decimus quartus numeratur. In eo de baptismo parvulorum et peccato originali disserit, Pelagianorum effugia et cavillationes circa utrumque caput, excutit ac redarguit.

Anno 414, edidit librum *de perfectione justitiæ*. In eo docet perfectionem illam, plenitudinemque justitiæ, quâ homo sine ullo prorsus peccato sit, nec sine gratiâ possibilem per vires naturæ, nec usquàm esse præsentis hujus vitæ. Dissolvit ibidem brevibus responsis, quæ in contrarium opponebantur in libro, qui dicebatur esse Cælestii, ad se misso ab Eutropio et Paulo episcopis Hispanis. De quo vide Marii interpretem Garnerium dissert. 6, cap. 2, in primam partem ejusdem Marii.

Anno 415, Timasius et Jacobus nobiles adolescentes Pelagianis dogmatibus studiosissimè addicti, Pelagii librum quo naturam hominis contra gratiam Dei defendebat, ad S. Aug. transmiserunt, cui S. doctor respondit edito libro *de naturâ et gratiâ* ad eosdem nuncupato. Eo in libro primum statuit quid de naturâ et gratiâ certum sit et exploratum; naturam scilicet inculpabilem et sanam primitus conditam, Adæ prævaricationis peccato infectam fuisse, eamque gratiæ adjutorio à lege et libero arbitrio prorsus distincto indigere, quo et ab irâ Dei redimatur, et ad opera pietatis perficienda idonea reddatur; tum Pelagii naturæ vires plus æquo extollentis librum, datis ad singula capita responsis, confutat; demùm respondet SS. Patrum sententiis, quibus ad errorum suorum patrocinium abutebatur Pelagius. Eodem anno S. doct. duas scripsit ad S. Hieron. epistolas; alteram (166) de origine animarum, alteram (167) de textu Jacobi: *Qui offenderit in uno, factus est omnium reus.*

Anno 416, dedit S. Aug. epistolam ad Joannem Jerosolymitanum, ipsum monens fraternâ charitate, ne permetteret sibi à Pelagio illud: deinde suum offerens librum *de naturâ et gratiâ*

ipsum rogat ut gesta synodi Diospolitane in Africam transmitteret. Extat inter Augustinianas epistolas 179.

Anno 417, librum de gestis Pelagii ad Aurelium Carthaginensem conscripsit S. doctor. In eo synodi Diospolitane gesta recenset; ostendit Pelagium Patribus Palæstinis turpiter illuisse; tandem demonstrat synodi sententiâ sic fuisse absolutum, ut ipsa hæresis propter quam in iudicium vocatus est, incunctanter damnata fuerit. Liber ille scriptus fuit ab Aug. sub initium huiusce anni; et circa finem ejusdem anni, damnatâ jam ab Innocentio hæresi Pelagianâ, sermonem secundum nunc 151 de verbis Apostoli habuit, de quo diximus supra.

Anno 418, duos ad Albinum, Pinianum et Melaniam contra Pelagium et Cælestium libros edidit S. doctor. unum de *grat. Christi*, alterum de *peccato originali*. In primo, Pelagium gratiæ confessione fucum facere ostendit, ipsiusque varias artes ac dolos aperit. Probat 1^o, Pelagium gratiam Christi nomine tenens adstruere, cum illam à libero arbitrio, lege aut doctrinâ evangelicâ, et exemplo Christi minime distinguat. 2^o Juxta eundem gratiam secundum merita hominum dari. 3^o Ad id solum juvare ut præcepta facilius possint impleri. In secundo libro ostendit S. D. Pelagium in quæstione de peccato originali eadem sentire cum Cælestio, qui Carthagine primum, deinde Romæ episcopalibus judiciis damnatus est; quæstionem hanc, non de earum numero esse, ut effutiebant Pelagiani, in quibus præter fidei periculum errare contingit; tandem confutat eos qui originalis peccati dogmate nuptiarum bonitati detrahi, Deoque ipsi injuriam fieri contendebant.

Eodem anno scripsit S. doctor, 1^o duas ad Sixtum romanum presbyterum, et postea summum pontificem, de re Pelagianâ epistolas; prima 191, brevior est; altera 194, aliâs 105, prolixior, et totius doctrinæ catholicæ adversus Pelagianos veluti compendium. 2^o Epistolam ad Paulinum Nolæ episcopum 186; in eâ multa et præclara de prædestinatione disputat. 3^o Epistolam 190, ad Optatum de *origine animarum*.

Anno 419, circa initium, librum primum de *nuptiis et concupiscentiâ* scripsit ad Valerium comitem. In eo bonitatem nuptiarum defendit; explicat quomodo concupiscentia in baptizatis maneat actu, non reatu; Pelagianos, carnis concupiscentiam, velut naturale bonum laudantes, SS. Patrum auctoritate refellit.

Anno 420, S. Aug. Juliani argutias et vituperationes adversus priorem suum librum de nuptiis et concupiscentiâ, quatuor libris comprehensas, edito altero ejusdem argumenti libro confutavit. Catholicum dogma de originali peccato ab impiâ Manichæorum doctrinâ toto celo distare demonstrat. Eodem anno S. D. quatuor libris ad papam Bonifacium scriptis, refellit duas Pelagianorum epistolas. Prima est Cælestii ad clericos Romæ posita; secunda est Juliani nomine octodecim episcoporum ad Rufum Thessalonicensem missa. Illa primo libro, ista reliquis tribus confutatur. His in libris objecta Pelagianorum, eorumque in Ecclesiæ doctrinam calumnias refellit, catholica de originali reatu et gratiâ Christi dogmata propugnat, Ecclesiam, Manichæos inter et Pelagianos, mediâ viâ incedere ostendit. Ad eundem annum referendi sunt quatuor libri S. Aug. de *origine animarum*, in quibus Vincentii Victoris circa animarum originem placita et paradoxa confutat, eaque ad undecim errorum capita revocat. Eo tandem anno scripta juxta Garnerium epist. ad Vitalem 218, aliâs 107. In eâ gratiæ necessitatem et gratuitatem fortiter vindicat, atque duodecim regulas ad fidem Ecclesiæ pertinentes circa quæstionem de gratiâ proponit.

Anno 421, sex contra Julianum libros edidit S. doctor. Duo priores libri positi sunt in retundendâ Juliani calumniâ Catholicos Manichæismi incusantis; posteriores quatuor totidem Juliani libris adversus primum Augustini, de *nuptiis et concupiscentiâ*, respondent. Tanto studio, tantâque diligentia elucubrat isti libri, ut modestissimus juxta et doctissimus auctor illos recensens lib. 2 *Retractationum* cap. 6, vocet *magnum atque elaboratum opus*. Ad eundem annum pertinet liber de *fide, spe et charitate*, seu *Enchiridion* ad Laurentium; appellatur à nonnullis, *Augustinianæ doctrinæ specimen*; in eo extant nonnulla exquisita et luculentissima adversus Pelagianos. In tres dividuntur partes. Prima, quæ credenda sunt docet, servato symboli ordine. Secunda tractat de iis quæ pertinent ad spem. Tertia agit de charitate.

Anno 424, editus est ab Augustino liber de *gratiâ et libero arbitrio*, ad componendas controversias Adrumeti motas, de quibus alibi. Eo in libro sanctus doctor gratiæ et liberi arbitrii concordiam exponit, gratiamque nec ex meritis bonorum operum, nec ex meritis bonæ voluntatis dari demonstrat. Duas simul cum

libro misit epistolas 214 et 215 ad Valentinum Monasterii Abbatem.

Anno 425, occasione libri *de gratiâ et libero arbitrio*, elucubravit sanctus doctor librum *de corrept. et grat.*; quanti fieri debeat opus istud, ostendit argumenti dignitas. Primum aperit quanam sit catholica fides de gratiâ; tum ostendit usum ac necessitatem præcepti, correctionis et orationis; exindè perseverantiam in bono magnum esse Dei munus demonstrat, eosque divinâ in æternum damnatione dignos esse, qui ex bonâ in malam vitam suâ voluntate mutati sunt; *quoniam*, inquit, *dici potest, homo, in eo quod audieras et teneras, in eo perseverares si velles*; postea prolixè ac luculentissimè explicat discrimen quod gratiam inter Angelis et Adamo innocenti concessam, ac medicinale Christi hujusce statûs intercedit; ad extremum concludit, nec gratiâ prohiberi correctionem, nec correptione negari gratiam.

Anno 426 aut 27, duos Retractationum libros edidit S. doctor. In primo retractantur libri quos scripsit nondum episcopus. In secundo retractantur libri quos post episcopatum conscripsit.

Anno 428, scripti sunt contra secundam Juliani responsionem libri sex vulgò dicti *Opus imperfectum*, quia nimirum ex octo libris quibus constabat secunda hæc Juliani responsio, sex duntaxat primis respondet S. D., scilicet idem opus morte occupatus imperfectum relinquere coactus est, quemadmodum tradunt Possidius Indicis sui cap. 4, et Prosper in Chronico. Singuli sex hujus operis libri singulos sex priores Juliani libros, cum Augustini ad loca singula responsis ob oculos ponunt. In his minutatim excutit ac confutat quacumque Julianus *vagabundâ loquacitate* octo libris opposuerat adversus unum posteriorem S. Aug. librum *de nuptiis et concupiscentiâ*.

Anno 429, de Semipelagianorum erroribus per epistolas SS. Prosperi et Hilarii certior factus S. Augustinus duobus libris eisdem Prospero et Hilario inscriptis prædictos errores confutavit, scilicet libro *de prædestinatione Sanctorum et de dono perseverantiæ*. In iis potissimum docet, non solum incrementum, sed ipsum quoque initium fidei, ac in eâ perseverantiam donum Dei esse.

Eodem anno liber de hæresibus ad Quodvultdeum Carthaginensem diaconum elaboratus est. Circa istum librum istud venit diligenter annotandum, eo in opere omnium Augustini postremo, sanctum doctorem Pelagii errores

ad ista quinque capita revocasse. Nempe 1º, gratiam Dei, sine quâ fieri non possunt mandata, à naturâ, lege atque doctrinâ non esse diversam; 2º eam ex meritis dari, et ad facilius agendum; 3º hominem posse ad tantum perfectionis gradum in vitâ mortali pervenire, ut non indigeat dicere Deo : *Dimitte nobis debita nostra*; 4º parvulos non baptizari ad tollendum peccatum originale; 5º Adamum sive peccasset, sive non peccasset, fuisse mortuum. Ex hæc observatione constat his quinque capitibus contineri totum Pelagianismum, à quo proinde, vel ipso iudice S. Aug. immunis censendus est, quisquis errores hos proscripserit, et opposita quinque dogmata propugnaverit.

Atque hæc de Augustini libris, compendiosius quidem, quàm fortè nonnulli exoptarent, sed satis copiosè, ut nobis videtur, pro loco et tempore. Qui plura volet adeat Garnierum primâ parte Marii dissert. 6, cap. 2., ubi ordinem chronologicum operum S. Aug. fusiùs prosequitur; Patres Benedict. in suâ eruditâ editione operum sancti Augustini tom. 10, tum in præfatione, tum initio cujusque libri; Natalem Alex. in Synopsis hist. seculi 5 cap. 3, art. 6, paragrapho 3, et alios.

Dissertatio secunda.

DE SEMIPELAGIANIS.

Tria hic occurrunt inquirenda. Primum, qui fuerint Semipelagiani. Secundum à quibus fuere impugnati. Tertium, de præcipuis eorum erroribus. Hæc tria totidem exponenda titulis.

CAPUT PRIMUM

Qui fuerint Semipelagiani.

Perlatis in Galliam exaratis à S. Aug. adversus Pelagianos libris, ac præsertim epist. ad Sixtum, lib. de Grat. et Lib. Arb., libro de Corrupt. et Gratiâ, commoti fuere, teste S. Prospero epist. ad S. Aug.: Galli quidam episcopi et presbyteri in Lugdunensi et Arelatensi potissimum provinciâ, atque in errores Pelagianis affines impeerunt; undè dicti sunt Semipelagiani, quasi à partito ac dimidiato, quem propugnabant, Pelagii errore; dicti etiam reliquæ Pelagianorum quòd ex eorum cineribus excitati, partem aliquam jam prostrati erroris superstitem facerent; dicti quoque Massilienses, ab urbe Massiliensi, ubi frequentiores consistebant.

Semipelagiani habiti non sunt ut hæretici ante synodum Arausic. secundam sub Felice IV. celebratam anno 529; imò ante illud tempus ipsos tanquam viros egregios auduisse, pietatis, eruditionis, ac ingenii laude conspicuos testantur SS. Aug. et Prosper. S. Aug. lib. de dono Persever. cap. ultimo et lib. de Prædest. SS. cap. 1, eos, *fratres ac dilectores suos et Pelagianæ hæreseos impugnatores* appellat. S. Prosper. epist. ad S. Aug. et lib. contra Collatorem eos vocat, *Catholicos, sanctos spectandæ auctoritatis viros*.

Inter Semipelagianos præcipui fuere: 1^o Joannes Cassianus Massiliensium Semipelagianorum faciliè princeps. Is à S. Chrysostomo diaconus olim ordinatus, post ejus obitum Massiliensis presbyter factus est; quâ in urbe extructo cœnobio, maximam sibi tum pietate tum eruditione famam comparavit. Collectiones Patrum, unde à Prospero Collator dictus, evulgavit; collatione 15, Semipelagianos errores disertè tradit. Obiit magnâ cum opinione sanctitatis, unde à S. Greg. lib. 6, epist. 12, sanctus appellatur, et Urbanus V, Cassiani caput argenteâ thecâ inclusum, hæc epigraphæ ornari voluit, *Caput S. Cassiani*. Denique illius memoria Massiliæ colitur die 25 Julii. 2^o Faustus ex abbate Lirinensi factus episcopus Regiensis in Galliâ, Semipelagianorum propugnator fuit acerrimus; duos edidit de Grat. et Libero Arbit. libros in quibus eorum dogmata palam profitetur. Suis tamen non obstantibus erroribus, ipso vivente ab Ecclesiâ non damnatis, in Ecclesiâ Regiensi colitur, ejusque nomen sacris Gallicanæ Ecclesiæ fastis est adscriptum, ut observat Baronius ad annum 490, n. 42. 3^o Hilarius Arelatensem episcopum Semipelagianorum errorum fuligine infectum fuisse, testis est S. Prosper epist. ad S. Aug. Is porro Hilarius, alter est, ut ostendimus cap. sequenti, ab eo qui cum S. Prospero scripsit ad S. Aug. 4^o Gennadium Massiliensem presbyterum Semipelagianis pariter erroribus addictum fuisse, exinde constat, quòd S. Aug. ejusque fidelissimum discipulum S. Prosperum, velut reos erroris insectetur; Cassianum verò et Faustum Semipelagianorum duces summis laudibus extollat, lib. de viris illustr. cap. 84. 5^o Vincentium quemdam Semipelagianis partibus adhæsisse, constat ex S. Prospero lib. cui titulus: *Ad capitula objectionum Vincentianarum responsiones*. Quis autem fuerit ille Vincentius controvertitur; Baronius ad annum Christi 451, n. 188, et in notis ad

Martyrologium die 24 Maii, existimat eum distinguendum esse à Lirinensi celeberrimi Commonitorii scriptore; card. Norisius lib. 2 hist. Pelag. cap. 11, quem sequitur Natalis Alexander, et alii nonnulli contendunt Vincentium illum esse ipsissimum Lirinensem quem Semipelagianâ fuligine tinctum fuisse censent.

Sed nec à Massiliensibus presbyteris Semipelagianorum error initium duxit; Vitalis enim Carthaginensis ante illos eundem errorem professus est, ut constat ex epist. 217 inter Augustinianas; quin et ipsemet S. Aug. ante episcopatum tali fuit imbutus errore. Ita de se fatetur S. D. lib. de prædest. SS. cap. 3, idque constat ex ipsius expositione quarumdam propositionum epistolæ ad Romanos, propositione 62.

Iis addendi sunt, si fides Jansenio, S. Ilier. et nonnulli SS. Patres, præsertim Græci, qui studiosissimè Origenis Pelagianorum antesignani lucubrationes triverant.... ex quo profectum est, subdit episcopus Yprensis lib. 7 de hæresi Pelag. cap. 4, *ut eos*, Massilienses scilicet, *divi Augustini doctrina velut nova non parùm offenderet, quòd et præcedentium Patrum auctoritas, et sensus ecclesiasticus repugnare viderentur*. Quo sanè unico verbo, dùm traditionis auctoritatem enervare conatur, quam S. Aug. tradit doctrinam, arguit, ejusque novitatem prædicando, falsitatem demonstrat.

CAPUT II.

De præcipuis Semipelagianorum debellatoribus.

Primum Semipelagianos impugnavit S. Aug. scilicet de ipsorum erroribus per Prosperi et Hilarii epistolas anno 429, certior factus, eosdem debellavit editis duobus libris de *prædestinatione SS. et de perseverantiæ dono*. 2^o Mortuo S. Aug. Cælestinus I, romanus pontifex, promoventibus Prospero et Hilario, S. Aug. doctrinam adversus Semipelagianorum calumnias vindicavit; datâ anno 432 celeberrimâ ad Gallicanos episcopos epistolâ. 3^o S. Prosper doctrinæ S. Aug. in Galliis defensor fuit acerrimus; enimverò omnes sancti illius doctoris obrectatores invictissimè repressit, variis contra ipsos editis operibus in quibus genuina Augustini doctrina evolvitur, et validissimis argumentis stabilitur.

Anno 453, Semipelagianos errores quos Cassianus collatione 15 propinaverat, edito libro cui titulus *Contra Collatorem*, confutavit. Circa idem tempus tria edidit opuscula sub his titulis: *Responsiones ad Capitula Gallorum*,...

Ad Capitula objectionum Vincentianarum responsiones :.... *Ad Excerpta Gemensium responsiones*. In his varias adversus doctrinam S. Aug. intentatas criminationes egregie propulsat. Eodem fermè tempore scripsit Carmen adversus Semipelagianos, cui titulum fecit : *De Ingratis*. Ante hæc idem sanctus D. præclaram contra Semipelagianos de Grat. et Libero Arbitrio scripserat epistolam ad Rullinum, in quâ nequissimum illud ac capitale dogma refellit, quo asseritur *gratiam Dei secundum hominis meritum dari*.

4^o Semipelagianos debellavit auctor duorum librorum de vocatione gentium, quisquis ille sit. Plures cum Bellarmino libros illos S. Prospero adjudicant; eos sancto Leoni tribuit Quenellius in suâ editione operum sancti doctoris; nonnulli Juliano Pomerio, etc.

5^o S. Hilarius fuit etiam Semipelagianorum debellator acerrimus, et S. Aug. doctrinæ addictissimus; id constat ex ipsius ad sanctum Aug. epistolâ. Quidam hunc Hilarium cum episcopo Arelatensi insecutè confundunt. Namque 1^o Hilarium Arelatensem sententiam Augustini *in questionem traxisse*, testatur S. Prosper ad S. Aug. scribens; at Hilarius alter ad S. doctorem ita scribit : *Nolo autem sanctitas tua sic me arbitretur hæc scribere, quasi de his quæ nunc edidisti, ego dubitem*. 2^o Hilarius, qui ad S. Aug. scripsit, n. 10 epistolæ apertè testatur se laicum fuisse : *Sunt ex parte tales personæ (de Semipelagianis Massiliensibus loquitur) ut his consuetudine ecclesiasticâ laicos summam reverentiam necesse sit exhibere; quod quidem ita curavimus servare, ut cum opus fuit, non taceremus*. 3^o Denique Augustinum appellat patrem; à quo vicissim lib. de Prædest. SS. cap. 1 filius nuncupatur; quæ sanè omnia Arelatensem episcopum non designant.

6^o Anno 494, Gelasius S. pontifex in synodo Romanâ Cassiani, Faustique libros damnavit, SS. verò Aug. et Prosperi opera commendavit.

7^o S. Fulgentius Afer et Ruspensis in provinciâ Bizacenâ episcopus, alter fuit Augustinianæ doctrinæ strenuus propugnator et vindex; tria potissimum de Gratiâ conscripsit opera, in quibus Semipelagianorum errores refellit. Primum est *de Incarnat. et Gratiâ* quod rogantibus aliis episcopis Bizacenæ provinciæ cum quibus in Sardinia exul erat, exaravit circa annum 520, suo et cæterarum Confessorum nomine; eo in libro Fausti errorem de initio fidei et naturæ viribus refellit, ipsius

tamen tacito nomine. Non multò post, scilicet anno 522 aut 525, iidem sanctissimi antistites in Sardinia exules, libros Fausti ut hæreticos proscripserunt, et S. Fulgentio contra Fausti errores scribendi provinciam imposuerunt; quibus ille morem gerens libros septem *de grat. et libero arbitrio* contra duos Fausti elucubravit, quorum cum laude meminit S. Isidorus Hispalensis lib. de Scriptoribus Eccles. cap. 14. Eodem fermè tempore ab exilio revocati sunt Africani præsules. Redux itaque in Ecclesiam suam S. Fulgentius tertium opus contra sectatores conscripsit, nimirum tres libros *de veritate predestinationis et gratiæ*. De his S. Fulgentii lucubrationibus perhonorificè loquuntur præfati præsules in synodicâ ad Scythas monachos epist. tom. 4^o concil. pag. 1591.

His SS. Augustini, Prosp. et Fulgent. scriptis, veritas quidem confirmata fuit, sed, ut moris est, erroris defensorum os non fuit oclusum; serpebat per Gallias lues tanta, donec in concilio Araus. II, sub Felice IV, et à Bonifacio II confirmato, anguis illius caput elisum fuit.

Eo in concilio, cujus apud omnes Orthodoxos indubitata est auctoritas, 25 Capitula sive canones promulgati sunt circa gratiam et liberum arbitrium, omnes ex variis S. Aug. scriptis deprompti; non fuerunt à Patribus Arausicanis conditi primùm isti canones, sed Româ transmissi à Felice IV, ad S. Cæsarium Arelatensem, qui romani pontificis auctoritatem contra Pelagianos imploraverat.

CAPUT III.

De Semipelagianorum erroribus.

Observandum 1^o, omnes Semipelagianos agnovisse lapsum Adami, existentiam peccati originalis, debilitatas voluntatis vires, prostratosque nunc homines. Hoc primum constat ex epist. S. Hilarii ad St. Aug.

Observandum 2^o, varia ista distinxisse Semipelagianos. 1^o velle credere, seu pium credulitatis affectum, et initium fidei, quod appellabant fidem inchoatam, sub quo comprehendebant etiam generalem quamdam voluntatem, generale quoddam desiderium salutis et bonorum operum. 2^o ipsummet credere, seu fidem perfectam; 3^o perseverantiam in fide; 4^o specialem voluntatem ac speciale desiderium hujus vel illius actûs; seu velle hic et nunc in particulari bene agere, in quo propriè consistit bonorum operum initium. 5^o bonum

opus. 6^o Denique perseverantiam in bonis operibus. Id colligitur ex epistolis SS. Hilarii et Prosperi, necnon ex S. Aug. lib. de Prædest. SS. cap. 1.

Observandum 3^o, in sententiâ Semipelagianorum omnium hæc tria constare, 1. ad initium fidei et in eâ perseverantiam, interiori gratiam non esse necessariam; 2. hujusmodi gratiam simpliciter esse necessariam ad bona opera perficienda; 3. velint nolint, gratiam quæ requiritur ad opera perficienda, secundum merita nostra dari. Ita sensisse Semipelagianos omnes constat ex citatis epistolis SS. Hilarii et Prosperi ad S. Aug. et ex libris ejusdem S. D. adversus istas Pelagianorum reliquias. Porro licet in his tribus consentirent Semipelagiani, non tamen omnes erant inter se concordēs in explicando quibus humanis meritis rependeretur gratia. Alii quippe magis, alii verò minùs à Pelagianis semitis declinabant, quemadmodum omninò constare debet ex citatâ epist. S. Prosperi ad S. Aug.

In duas generatim classes distribui possunt. Prima eorum est qui licet gratiam interdum dari faterentur absque ullis præcedentibus meritis, eam tamen sæpiùs cadere sub meritum existimabant; hæc sententia videtur fuisse Cassiani, estque ipsi specialis. Altera verò eorum est qui gratiam semper, nec nisi propter aliqua merita præcedentia dari volebant; horum præsertim meminit S. Prosper citatâ mox epist. Rursus ex his alii erant strictiores qui à Pelagianis placitis longiùs distabant; hi solâ sibi reservatâ voluntate credendi, sive, ut aiebant, initio fidei et pio credulitatis affectu, cætera omnia gratiæ adscribebant. Contendebant autem primâ illâ credendi voluntate hominem mereri, sibi que comparare gratiam tum ad inchoanda, tum ad perficienda bona opera, simpliciter necessariam. Alii laxiores à Pelagianis minùs declinantes asserebant, non solum voluntatem credendi seu initium fidei, sed ipsam insuper cupiditatem et voluntatem boni seu initium bonorum operum esse à nobis. Hi, uno excepto peccato originali, vix distabant à sententiâ Juliani, ut supra observavimus.

Duas illas Semipelagianorum divisiones admittendas esse, non obscurè indicant Prosper et Hilarius suis operibus, et S. Aug. libris de Prædest. SS. et de dono perseverantiæ.

Observandum 4^o, eosdem Semipelagianos asseruisse gratiam secundum merita dari, duobus potissimum innixos momenti, quæ ipsis communia erant cum Pelagio et Juliano. Pri-

imum erat, funditus perimî liberum arbitrium si Dei adjutorio prorsus gratuito esset præveniendum. Concipere enim illi nusquam potuerunt quâ ratione stare posset humana libertas cum necessitate gratiæ prævenientis omninò gratuitæ; indè est quòd, teste S. Prospero, quæcumque Pelagiani opponebant contra gratiam simpliciter necessariam ad omnem pietatis actum, isti Semipelagiani sua fecerint, ac pariter objecerint contra necessitatem gratiæ interioris prævenientis initium fidei. Secundum momentum erat, quòd Deus foret iniquus aut personarum acceptor, si gratiam suam absque ullis meritis præcedentibus tribueret; iniquus, quia illam daret peccantibus et indignis; personarum acceptor, quia eam ad libitum uni conferret, alteri denegaret.

Observandum 5^o, nonnullos Semipelagianorum Pelagianis insistentes semitis, eorumque æquivocationibus turpiter laborantes, naturali facultati, libero arbitrio, legi atque doctrinæ, gratiæ nomen dedisse. Ita expressè docet S. Prosper, epist. ad S. Aug. 22^o, atque hinc triplicem distinguere gratiam, *initialem*, naturam scilicet et liberum arbitrium; *vocantem*, quæ in lege sive naturali sive scriptâ consistebat, et *salvantem*, quæ est gratia Christi, quâ hominem justificari agnoscebant, quamque ad omne opus bonum requiri non negabant.

Observandum 6^o, dùm de Semipelagianorum sententiâ agimus, non ex eorum scriptis unicè aut potissimum judicandum esse credimus; constat enim ex S. Hilario ipsos mutasse sententiam et opiniones, easque æquivocis verbis quandoque involvisse; sed colligenda eorum dogmata, ut notat Jans. lib. 7 de hæresi Pelagianâ cap. 3, præsertim ex scriptis SS. Prosperi et Hilarii; quibus addi debet et ipse sanctus Augustinus.

Observandum 7^o, ex dictis facilè patere, quænam fuerint convenientia et discrimina Semipelagianorum à Pelagio et Juliano. 1^o Semipelagiani in duobus potissimum conveniebant cum Pelagio et Juliano. Primum est, quòd cum utroque existimarent initium salutis esse à nobis, et non à Deo. Secundum, quòd iidem Semipelagiani ut assererent gratiam secundum merita dari, duabus innitebantur Pelagii et Juliani rationibus. Prima erat, quòd aliàs destrueretur liberum arbitrium; altera, quòd Deus esset injustus aut acceptor personarum. 2^o Semipelagiani etiam in duobus potissimum discrepabant à Pelagio et Juliano. Primum circa existentiam peccati originalis quod negabatur à Pelagio et

Juliano, agnoscebatur verò ab omnibus Semipelagianis. Secundum discrimen est circa necessitatem gratiæ; namque ex antedictis constat Pelagium nusquam admisisse veram voluntatis gratiam; quod autem Julianum spectat, eam quidem agnovit, sed ad facilius duntaxat operandum; è contra verò Semipelagiani omnes fatebantur ejusmodi gratiam esse simpliciter necessariam ad bonum operandum. Tertium discrimen spectat strictiores Semipelagianos: hi initium duntaxat fidei, seu pium credulitatis affectum à nobis esse contendebant; Julianus verò non solum fidei, sed et honorum operum initium adjudicabat arbitrio.

Status questionis.— Hic duo quæri possunt, unum de facto, aliud de jure. Primum, utrum Semipelagiani vel saltem eorum aliqui existimaverint prævenientem gratiam anteriorem esse necessariam ad initium fidei et in illà perseverantiam. Secundum, num ex hypothesi quòd talem admiserint gratiam, in eo fuerint hæretici quòd eam vellent talem esse cui posset humana voluntas resistere vel obtemperare. De hocce postremo disserendi opportunior erit locus in parte dogmaticà, ubi de naturà et efficacità gratiæ. Circa primum autem, de quo nunc agendum, varii occurrunt et errores, necnon periculosæ quædam opiniones.

Errores et opiniones. — 1^o Contendit Jansenius Semipelagianos agnovisse necessitatem interioris gratiæ voluntatis ad initium fidei et perseverantiam in illà; atque in eo errasse, quòd vellent hanc gratiam talem esse cui posset humana voluntas resistere vel obtemperare. Audiatur ipsemet Jansenius, lib. 8 de Hæresi Pelag. cap. 6: « Itaque Massiliensium opinionibus, inquit, et Augustini doctrinà quàm diligentissimè ponderatà certum esse, et indubitatum esse debere sentio, quòd Massilienses præter prædicationem atque naturam, veram etiam et internam et actualem gratiam ad ipsam etiam fidem, quam humanæ libertatis et voluntatis adscribunt viribus, necessariam esse fateantur. » Et infra: « In hoc ergò propriè Massiliensium error situs est, quòd aliquid primævæ libertatis reliquum putant, quo sicut Adam, si voluisset, poterat perseveranter operari bonum, ita lapsus homo saltem credere posset si vellet; neuter tamen absque interioris gratiæ adjutorio, ejus usus vel abusus relictus esset in uniuscujusque arbitrio et potestate. » Idem sæpius inculcat Yprensus, lib. 2 de Grat. Christi cap. 12 lib. 3, cap. 1, et præsertim in Parallelo

erroris Massiliensium et opinionis quorundam recentiorum, cap. 42. Ex his manifestum est, doctrinam Jansenii hæc in parte fuisse ritè expositam in quartà propositione inter quinque famosas: « Semipelagiani admittebant prævenientis gratiæ interioris necessitatem ad singulos actus, etiam ad initium fidei; et in hoc erant hæretici, quòd vellent eam gratiam talem esse, cui posset humana voluntas resistere vel obtemperare; » quæ quidem propositio uti falsa et hæretica damnata est. Nota falsitatis cadit in priorem partem propositionis, quæ est facti, nota verò hæreseos, cadit in alteram partem quæ est juris.

2^o Alii duos distinguunt Semipelagianorum ordines et docent quosdam omnem prorsus interiorem gratiam ab initio fidei removisse; cæteros verò eam admisisse. Ita Franciscus Macedo, in opusculo cui titulus: *Mens divinitus inspirata.... Innocentio X super quinque propositiones Jansenii*; Gonetus tract. de Gratià disput. 2, de hæresi Semipelag. cap. 3 editionis an. 1669. Secunda hæc opinio temeritatis incusatur à Natali Alex. in Synopsi hist. quinti seculi cap. 3, art. 8, nec immeritò; nullatenus quippe distat à damnatà doctrinà prioris partis quartæ propositionis; Jansenius enim lib. 7 de hæresi Pelag. cap. 2, duos Semipelagianorum ordines disertè distinguit, et de altero solum asserit ipsos gratiæ interioris prævenientis necessitatem ad initium fidei admisisse. Gonetus re maturius expensà sententiam hanc emendavit in appendice ad tractatum de Gratià editionis Lugdunensis an. 1681. Sic enim habet: « Dico omnes Semipelagianos gratiæ prævenientis internæ necessitatem ad initium fidei constantissimè negavisse. »

3^o Communis ac constans theologorum sententia est, Semipelagianos omnes gratiæ interioris prævenientis necessitatem ad initium fidei et perseverantiam in illà constantissimè negavisse; quæ autem ad id demonstrandum adducuntur momenta adeò certa sunt et aperta, ut nonnulli vel ex ipsismet ardentioribus Jansenii defensoribus, ab illo, quantum ad istud punctum hodiè recedant. Sic nuperus auctor libri cui titulus, *Réponse aux Avertissements de M. l'Évêque de Soissons*, part. 8, cap. 3, n. 9: « La grâce versatile, inquit ille, prévient intérieurement la volonté, au lieu que, selon les Demi-Pélagiens, la volonté, même dans cet état-ci, prévient la grâce intérieure. » Et rursùm: « Voici donc en peu de mots le sentiment des Demi-Pélagiens: Ils

« avouaient que Dieu commençait l'ouvrage de
« notre salut, en nous donnant quelque occa-
« sion favorable, comme une predication tou-
« chante, un miracle éclatant, une affliction
« sensible; que c'était à nous à embrasser
« cette occasion extérieure par un commence-
« ment de bonne volonté, et qu'en conséquen-
« ce Dieu nous donnait la grâce. » His ita ob-
servatis, sit

CONCLUSIO PRIMA. — Semipelagiani omnes
gratiæ interioris prævenientis necessitatem ad
initium fidei constantissimè negaverunt.

Probatur pluribus argumentis. Primum ar-
gumentum petitur ex S. Aug. lib. de Prædest.
SS. in quo totus est ut probet Semipelagianos
negasse initium fidei donum Dei esse. Sic ha-
bet cap. 2 : « Nunc eis respondendum esse vi-
« deo, qui divina testimonia, quæ de hac re
« adhibuimus, ad hoc dicunt valere, ut nove-
« rimus ex nobis quidem nos habere ipsam fi-
« dem, sed incrementum ejus ex Deo; tan-
« quàm fides non ab ipso donetur nobis, sed
« ab ipso tantum augeatur in nobis, eo merito
« quo cepit à nobis. » Pergit S. D. : « Non
« ergò receditur ab eâ sententiâ, quam Pela-
« gius ipse in judicio Palæstino damnare com-
« pulsus est (gratiam Dei secundum merita
« nostra dari), si non pertinet ad Dei gratiam
« quòd credere cœpimus; ac per hoc initium
« fidei nostræ priores damus Deo, ut retribu-
« tur nobis. » Et num. 3, laudatis Apostoli
verbis : *Non sumus sufficientes*, etc., subdit :
« Attendant hic et verba ista perpendant, qui
« putant ex nobis esse fidei cœptum, et ex
« Deo fidei supplementum. » Ex his sic arguo :
Illi negabant necessitatem gratiæ interioris ad
initium fidei, qui asserebant 1° initium fidei
non esse à Deo, sed à nobis ipsis; 2° gratiam
quæ dat incrementum fidei, ob merita præce-
dentis bonæ voluntatis concedi; 3° in negotiis
salutis priores partes non gratiæ sed libero
arbitrio adscribendas esse. Atqui ita est de
Semipelagianis, iudice ipsomet S. Aug. locis
citatis; ergò, etc. Atque hinc est quòd S. D.
ibidem asserat Semipelagianos non recedere à
damnata Pelagii doctrinâ, *gratiam secundum
merita dari*; quod etiam advertit, ipsique ex-
probat S. Prosper lib. contra Collatorem cap. 3.

Nec juvat adversarios si dicant his et aliis
tum S. Aug. tum SS. Prosperi et Hilarii testi-
moniis hoc unum effici, à Massiliensibus re-
pudiata esse gratiam victricem seu ex se ef-
ficacem, quæ necessaria est ut Deo adscriba-
tur bona actio; non autem gratiam versatilem

et libero arbitrio permissam, quæ sæpe naturæ
nomine designatur. Ita sæpius Aprensis lib.
præsertim 2 de Grat. Christi cap. 12 et 13, id-
que ibidem confirmat exemplo Angelorum et
Adami innocentis, qui proprio libero arbitrio
stetisse vel cecidisse dicuntur, quod versatili-
lem duntaxat gratiam habuerint.

Retellitur ista responsio, aut potius evasio.
1° S. doctor citato cap. 2 de Prædest. SS. Mas-
siliensium errorem confutat his Scripturæ tes-
timoniis quæ generatim designant necessitatem
gratiæ cujuslibet interioris; ita est istud se-
cundæ Cor. 3 : *Non quod sufficientes simus cogi-
tare aliquid ex nobis.... sed sufficientia nostra ex
Deo est*; ergo, etc. 2° Idem S. D. cap. 3, tes-
tatur se aliquando versatum fuisse in errore Se-
mipelagianorum, atque perspicue declarat se
in eâ tunc fuisse sententiâ, fidem nullâ aliâ gra-
tiâ præveniri nisi *præconio veritatis*, hoc est,
forinsecus tantum insonante Evangelii prædi-
catione : *neque enim*, inquit, *putabam fidem
Dei gratiâ præveniri.... nisi quia credere non
possemus, si non præcederet præconium veritatis*.
Ibidem cap. 3 et 4, ex hac Semipelagianorum
doctrinâ, *fides non est donum Dei*, arguit S. D.
sequi propositionem Pelagii, quam in synodo
Palæstinâ damnare coactus est, nempe, *gra-
tiam secundum merita nostra dari*; at si Semi-
pelagiani gratiam interiorem admisissent ad
initium fidei, perperam concluderet ex ipso-
rum sententiâ S. Aug. gratiam dari secundum
merita, quia gratia, licet versatile, omne me-
ritum antevertisset, cujus fuisset principium.
4° Non obscure hic innuit S. doctor, quod et
disertiùs tradit epist. 217, aliàs 107, ad Vitalem
Carthagin. Massilienses idem sensisse circa ini-
tium fidei, quod Pelagiani circa bona opera;
ast Pelagiani, ut supra probavimus, nusquam
admisere necessitatem gratiæ interioris volun-
tatem prævenientis; idque candidè fatetur
Jans. lib. 5 de hæres. Pelag. cap. ultimo;
ergo, etc. 5° Eisdem Massilienses cap. 5 ejus-
dem libri de Prædest. refellit S. Aug. tanquam
existimantes posse hominem naturali aliquo
munere se disponere ad salutem. « In hac »,
« inquit, evidentissimâ Apostoli intentione
« quâ contra humanam superbiam loquitur, ne
« quisquam in homine, sed in Domino glo-
« rietur, dona Dei naturalia suspicari.... sive
« vitiatæ naturæ qualescumque reliquias, ni-
« mis, quantum existimo, absurdum est. »
Non ergo gratiam internam ad initium fidei
necessariam censebant Semipelagiani. 6° S.
Prosper lib. contra Collatorem cap. 3, de Se-

semipelagianis loquens ait, « ipsos laudabiles
« motus appetitusque virtutum, remotâ gratiâ
« Dei, nudæ libertati adscripsisse; » ergo, si
nuda libertas, nulla gratia. 7^o Semipelagiani
negabant ad fidei et salutis initium eam gratiam
esse necessariam cujus necessitatem agnoscebant
ad opera quælibet incipiendam et perficiendam;
porrò gratia quam Semipelagiani admittebant
ad bona opera non erat ex sese efficax, sed
versatilis duntaxat, quod constat unanimi
theologorum consensu contra Jansenium; ergo, etc.

Exemplum autem Angelorum et primi hominis,
ad quod toties recurrit Jansenius, appositum
non esse ad ejus causam, constabit ex dicendis
ubi de statu naturæ innocentis. Interim
observare liceat, aliud esse velle bonum
per liberum arbitrium, aliud id velle per
solum liberum arbitrium. Primum asserit S. Aug.
pro statu naturæ innocentis; non verò secundum,
quod, teste S. Prospero, admittebant pro
initio fidei.

Secundum argumentum ducitur ex S. Prospero,
qui epist. 225 ad S. Aug. doctrinam Semipelagianam
datâ operâ exponens, expressè asserit in eorum
mente initium fidei et salutis esse à viribus
liberi arbitrii, à naturali possibilitate, à naturâ
ipsâ; atque affectum credendi priorem esse
gratiâ. En verba S. doctoris: « Ad hanc gratiam
quâ in Christo renascimur volunt unumquemque
pervenire per naturalem facultatem, petendo,
querendo, pulsando, ut ideò accipiat, ideò
inveniat, ideò introeat, quia bono naturæ
benè usus, ad istam salvantem gratiam
initialis gratiæ ope meruerit pervenire. »
Per initialem gratiam intelligebant Semipelagiani
naturalem liberi arbitrii facultatem, quæ ab
initio et in ipsâ creatione gratis à Deo
concessa est, quod paulò ante verba citata
clarè indicat S. Prosperus, his verbis: « Ad
conditionem hanc volunt uniuscujusque hominis
pertinere, in quâ eum nihil priùs merentem,
quia nec existentem, liberi arbitrii et
rationalem gratia Creatoris instituat. »
Et infra sic pergit S. D. « Itaque quantum
ad Deum pertinet, omnibus paratam vitam
æternam... ab his autem eam apprehendi,
qui Deo spontè crediderint, et auxilium
gratiæ merito credulitatis acceperint... ac
sic cum duo sint quæ humanam operentur
salutem, Dei scilicet gratia, et hominis
obedientia; priorem volunt obedientiam
esse quàm gratiam, ut initium salutis ex
eo qui salvatur, non ex eo credendum

« sit stare qui salvat; et voluntas hominis
« vinæ gratiæ sibi pariat opem, non gratia
« sibi humanam subiciat voluntatem. » Ex
his liquet, teste S. Prospero, sensisse
Semipelagianos, 1^o hominem *per naturalem
liberi arbitrii facultatem, bono naturæ
benè utendo pervenire ad salvantem
gratiam*; 2^o gratiam merito credulitatis
retribui; sicque non gratiam bonæ
voluntati, sed bonam voluntatem
gratiæ præire; 3^o priorem esse
hominis obedientiam quàm gratiam,
adeòque initium salutis non ex Deo
esse, sed ex homine. Non ergo agnoscebant
illi necessitatem gratiæ interioris
prævenientis ad primum fidei et salutis
desiderium.

Tertium argumentum desumitur ex S. Hilario,
qui pariter Semipelagianorum dogmata ad
S. Aug. referens, observat ipsos, ad omne
quidem bonum opus seu incipiendum seu
perficiendum gratiam absolutè necessariam
confessos fuisse, non verò ad fidei initium
et salutis desiderium; quòd nempè ejusmodi
initium ac desiderium salutis, inter vera
opera non putarent esse recensendum: « Hæc
sunt itaque, inquit S. D., quæ Massiliæ, vel
aliis etiam in locis in Galliâ ventilantur...
Consentiant omnem hominem in Adam
periisse... id conveniens asserunt
veritati, vel congruum prædicationi, ut
eum prostratis, et nunquam suis viribus
surrecturis annuntietur obtinendæ salutis
ocasio, eo merito quo voluerint et
crediderint à suo morbo se posse sanari,
et ipsius fidei augmentum, et totius
sanitatis suæ consequantur effectum. Cæterum
ad nullum opus bonum vel incipiendum,
necdum perficiendum, quemquam sibi
sufficere posse consentiunt; neque enim
alicui operi curationis eorum annumerandum
putant, exterritâ et supplici voluntate
unumquemque ægrotum velle sanari. »
Ibidem postquàm dixit juxta ipsos à
voluntate conditoris id concessum esse,
ut natura medicum quærat, « nullamque
ita depravatam esse vel extinctam, ut
non debeat vel possit se velle sanari, »
sic pergit: « Illa testimonia, ut est
illud: *Sicut unicuique partitus est
mensuram fidei*, et similia ad id volunt
valere, ut juvenatur qui cœperit velle,
non ut etiam donetur ut velit; nec
negari gratiam, si præcedere dicatur
talís voluntas, quæ tantum medicum
quærat, non autem quidquam ipsa jam
valeat. » Ex his omninò manifestum fit in
mente Semipelagianorum, primam illam
voluntatem quâ quis vult credere, non à
gratiâ, sed à solâ naturâ proficisci;
quemadmodum desiderium

obtinendæ sanitatis, non à medico, sed à solâ aegroti voluntate procedit.

Quantum argumentum nobis suppeditat sanctus Fulgentius lib. de Incarnat. et gratiâ cap. 18 : « Si ergo, inquit, secundum opinionem eorum (nempe Semipelagianorum) necessarium est velle credere, priusquàm Dei gratia nos incipiat adjuvare; dicitur injustè gratia, quia non datur gratis homini, sed bonæ retribuitur voluntati. » Nihil certè expressius exoptari potest.

Quantum argumentum colligitur ex concilio Araus. II, in quo Semipelagiana dogmata damnantur, et ad hoc potissimum revocantur, quòd ipsi initium fidei ad solas naturæ vires referrent; quasi nempe aliquod naturale credendi desiderium antecedit omnem gratiæ motum. Ita conceptis verbis can. 3, 4, 5, 6, neque proferri potest ullus canon quo Semipelagiani damnentur tanquàm admittentes aliquam interiorem gratiam præviam affectui credendi, cujus usus ab indifferenti voluntatis libertate dependeat.

Sextum argumentum eruitur ex momentis quibus S. Aug. Semipelagianum dogma impugnat; hæc enim omnia vel frustra sunt, vel eò tendunt unicè, nimirum admittendam esse gratiam interiorem necessariam ad initium fidei, quod negabant Massilienses. Ista sunt Scripturæ testimonia quæ adducit S. D. Rom. 11 : *Quis prior dedit illi, et retribuetur illi?* Primæ Coriath. 4 : *Quid habes quod non accepisti?* Secundæ Corinth. 5 : *Non sumus sufficientes aliquid cogitare quasi ex nobis, sed sufficientia nostra ex Deo est.* Hæc certè testimonia necessitatem gratiæ, non ipsius naturam et agendi modum evincunt.

Septimum argumentum colligimus ex damnatione quartæ propositionis Jansenii superius allatæ; hujus quippe propositionis prima pars damnata fuit ut falsa, in quantum scilicet asserit Jansenius Semipelagianos admisisse necessitatem gratiæ interioris prævenientis ad initium fidei; ergo, judice Ecclesiâ, Semipelagiani rejiciebant ab initio fidei gratiam interiorem prævenientem.

Et verò Massiliensium error potissimum erat circa initium fidei, testibus SS. Aug. Prospero, et Hilario, ac proindè quicumque eorum doctrinam sequuntur post concilium Araus. secundum, ii sunt verè hæretici; sed qui interiorem voluntatis gratiam, etsi minimè ex se efficacem, exigunt ad initium fidei, ii non sunt hæretici, eosque in sinu suo commorantes vi-

det et foveat pia mater Ecclesia; restat ergo ut error Massiliensium consistat non in naturâ gratiæ prævenientis ab iis requisitæ ad initium fidei, in quantum scilicet eam agnoscerent merè versatilem, sed in eo quòd ab hac fide omnem prorsus gratiam interiorem velut necessariam rejiciant atque respuant; ergo, etc.

Præterea omnes Semipelagiani errabant circa initium fidei; porrò, vel omnes erant hæretici negando necessitatem gratiæ interioris ad illud initium fidei, vel quidam illorum inter hæreticos recensebantur eam admittendo versatilem duntaxat; non secundum ex dictis, ergo primum.

Denique damnata est illa quarta propositio in sensu Jansenii qui duos Semipelagianorum ordines distinguit, et de altero solùm asserit, ipsos gratiæ interioris necessitatem, etiam ad initium fidei admisisse; ergo damnata propositio de omnibus intelligi debet Semipelagianis; ita ut sensus sit nullos ex ipsis necessariam agnovisse gratiam interiorem ad primum fidei initium.

CONCLUSIO SECUNDA.— Semipelagiani nullam admisissent necessitatem gratiæ interioris ad perseverandum in fide.

Probatur 1^o omnibus argumentis superiori Conclusionem adductis; cùm enim in confesso sit apud omnes, fatente Jansenio lib. 8 de hæresi Pelag. cap. 14, eandem fuisse Massiliensium sententiam circa perseverantiam in fide, ac circa initium ejusdem fidei; profectò quæ evincunt ipsos negasse gratiam interiorem ad initium fidei, simul idem demonstrant de perseverantiâ in fide. Probatur 2^o ex SS. Prospero et Hilario in suis ad S. Aug. epistolis; necnon ex S. Aug. lib. de Prædest. SS. in quo, ut agnoscit Jans. citato loco, sæpissimè insinuat S. D. et nonnunquàm apertè docet, perseverantiam in fide, secundum Massilienses, non esse donum Dei, sed à nobis ipsis. Probatur 3^o Ratio à priori cur Semipelagiani negaverint gratiam necessariam ad perseverandum in fide ea fuit, quia cùm faterentur perseverantiam in bonis operibus esse donum Dei, voluerunt illud donum obtineri posse meritis perseverantiæ in fide quæ non esset donum Dei; neque enim, suis circa libertatem imbuti præjudiciis, concipere poterant quomodò perseverantiæ donum non noceret libertati, nisi illud penderet à meritis nostris naturalibus et sine gratiâ elicitis.

Solvuntur objectiones. — Objicies 1^o, contra primam Conclusionem. Existimaverunt Semipelagiani superstites aliquas primævi liberta-

tis reliquias in homine lapsa remansisse, quibus sicut Adam poterat velle bonum quodlibet, ita lapsus homo potest velle credere. Istud constat ex S. Hilario citatâ jam epistolâ ad S. Aug. ubi de Semipelagianis hæc habet: « In hoc solo volunt à primo homine omnium distare naturam, ut illum integris viribus voluntatis juvaret gratia volentem, sine quâ perseverare non poterat; hos autem amissis et perditis viribus credentes tantum, non solum erigat prostratos, verum etiam suffulciat ambulantes. » Atqui superstites illæ reliquæ non excludunt, imò supponunt interiorem gratiam; neque enim Adamus poterat velle ullum bonum ad vitam æternam pertinens sine præcedentis gratiæ actualis auxilio; ergo neque etiam lapsus homo potest in sententiâ Semipelagianorum velle credere, absque aliquo prævenientis gratiæ interioris adiutorio.

Resp. negando min., et ad prob. dist. Non poterat Adamus ullum bonum ad vitam æternam pertinens sine aliquo gratiæ interioris auxilio, secundum rei veritatem, concedo; in mente Semipelagianorum, nego. Equidem in rei veritate non poterat Adamus velle aut facere bonum salutiferum sine verâ et interiori gratiâ. Ita docet concil. Araus. can. 19, his verbis: « Natura humana, etiamsi in illâ integritate in quâ est condita permaneret, nullo modo seipsam, Creatore non adjuvante, servaret. » At Semipelagiani veritatem hanc negavere; scilicet existimârunt gratiam primo parenti fuisse necessariam ad bene operandum; at negârunt ipsi fuisse necessariam ad voluntatem bene operandi. Ita autem sensisse Massilienses plurima suadent. 1º Id non obscure innuit S. Hilarii textus in object. adductus, cujus hic videtur esse germanus sensus, quod primi hominis natura integris viribus voluntatis bonum velle posset, gratia verò postmodum juvaret voluntatem; nunc autem læsa et vitiatâ voluntas possit tantum velle credere, credentem verò gratia Dei erigat atque sustentet. Unde verba ista citat textus, ut illum juvaret gratia volentem, distortè omnino exponit Yprensis de gratiâ ad volendum concessâ: cum è contra intelligenda sint de gratiâ quæ Adamum jam propriis viribus volentem, ipsum deinceps adjuvaret. 2º Idem indicat S. Aug. lib. de Prædest. citato cap. 5, ubi loquens de donis quibus unus ab alio discernitur, sic habet: « Dona Dei naturalia suspicari, sive ipsam totam perfectamque naturam, qualis in primâ conditione donata est, sive vitiatæ naturæ qualescumque reli-

quæ, nimis, quantum existimo, absurdum est. » Quibus verbis innuere videtur, Massilienses, quos ibi perstringit, existimâsse hominem tum in naturâ innocenti, tum in præsentî statu potuisse per aliquod naturale donum se discernere; adeoque primum saltem fidei et salutis desiderium propriis viribus concipere. 3º Cum Massilienses in præsentî naturæ lapsæ statu gratiam non agnoverint necessariam ad initium fidei; multò minùs eam requirebant in homine sano et innocenti.

Et verò, ratio conservandæ libertatis, quæ Semipelagianos potissimum impulit ut negarent homini lapsa necessariam esse gratiam interiorem prævenientem, locum habebat, nec minùs premebat in statu naturæ innocentis. Ut ergo cohærenter loquerentur, necesse fuit eos ab utroque naturæ innocentis et lapsæ statu exclusisse necessitatem gratiæ cujuslibet interioris prævenientis initium fidei et salutis.

Instabis: Massilienses quoddam statuebant discrimen, statum innocentie inter et præsentem statum; id apertè indicant relata mox Hilarii verba; porrò penitus evertitur istud discrimen si valeat adducta responsio; sicut enim non admittebant in hoc statu gratiam ad initium salutis, sed tantum ad subsequentes actus, ita nihil insuper pro statu innocentie exigebant; ergo, etc. Respondeo, secundum Massilienses in utroque statu, divino adiutorio præire debebat bona voluntas, ipsiusque merito retribui; at in tribus juxta ipsos latum erat discrimen. Primum, homo innocens integris viribus voluntatis poterat velle operari quodcumque bonum opus, ipsumque jam volentem gratia postmodum juvabat; nunc autem læsa et vitiatâ voluntas potest duntaxat velle credere. Secundum, homo sanus sicuti sine gratiâ poterat velle bene operari, ita et velle perseverare in quibuscumque bonis operibus; nunc autem gratia homini necessaria est ut velit perseverare, non quidem in fide, sed in bonis operibus. Tertium discrimen spectat naturam gratiæ ad bona opera requisitæ; hæc enim in statu naturæ innocentis erat duntaxat gratia intellectûs; at in statu naturæ lapsæ agnoscebant Massilienses necessitatem gratiæ voluntatis, quam rectè exprimunt in laudato Hilarii textu, his verbis, *erigat prostratos, et suffulciat ambulantes*; hæc enim movendo et excitando voluntatem, eamque roborando et confortando, meritò dicitur, *erigere prostratos, et suffulcire ambulantes*.

Objicies 2º: Ex epist. Hilarii supra citatâ

Massilienses docebant, *ad nullum opus incipendum, nedum perficiendum, quemquam sibi sufficere posse*; atqui actus fidei haud dubiè est bonum opus; ergo, etc. Resp. dist. min.: Actus fidei est bonum opus, in rei veritate, concedo; in doctrinâ et mente Semipelagianorum, nego; ut enim non cogerentur fateri gratiam esse necessariam ad fidem, istam fidem ac salutis desiderium inter opera non computabant. « Neque enim, ait S. Hilar., alicui operis curationis eorum annumerandum putant, extermitatè, et supplicii voluntate unumquemque ægrotum velle sanari. »

Objicies 3^o: S. Prosper citatâ ad S. Aug. epistolâ testatur Semipelagianos docuisse, « *Deum eos prædestinare in regnum suum quos gratis vocatos, dignos futuros electione, et de hac vitâ bono fine excessuros esse præviderit.* » Ergo admittebant illi gratuitam esse vocationem. Resp. dist. consequ., gratuitam esse vocationem externam, id est, Evangelii prædicationem, concedo; vocationem internam, id est, interioram gratiam quæ ad fidem nos moveat et excitet, nego. Volebant enim illi proposito Evangelio nostrum esse credere vel non credere *per naturalem facultatem*, ut ibidem testatur S. Prosper.

Objicies 4^o: Idem S. doctor loco citato, ex doctrinâ Massiliensium colligit eos, « *gratiam Dei, quam comitem, non præviâ humanorum volunt esse meritum, etiam illis voluntatibus subdere, quas ab eâ, secundum suam phantasiam, non negant esse præventas*; » admiserunt ergo Semipelagiani gratiam prævenientem. Respondeo, dist. consequent.: Semipelagiani admiserunt gratiam prævenientem secundum suam phantasiam, concedo; verè et propriè prævenientem, nego. Unde ibidem S. doctor, *Gratiam, inquit, comitem, non præviâ volunt humanorum esse meritum.*

Atque ut meliùs percipiatur adducta responsio simulque penitus inspicatur Semipelagianorum doctrina, notandum est ipsos apud S. Prosperum epist. citatâ affirmare, « ante mundi constitutionem Deum præcivisse, qui (viribus liberi arbitrii) credituri sunt, qui ve in eâ fide, quæ deinceps per gratiam sit juvanda, mansuri sunt; et eos prædestinasse in regnum suum, quos gratis vocatos, (externâ Evangelii propositione) dignos futuros electione, et de hac vitâ bono fine excessuros esse præviderit. » Cum autem ipsis objiceretur exemplum parvulorum qui nullam habentes voluntatem, nullam propriam

actionem, non sine iudicio Dei scecrumur, « ita ut ante discretionem boni et mali, alii per regenerationem inter cœlestis regni assumantur hæredes; alii sine baptismo inter mortis perpetuæ transeant debitores; » huic objectioni respondebant Semipelagiani, « tales perdi, talesque salvari, quales futuros illos in annis majoribus, si ad activam servarentur ætatem, scientia divina præviderit. » In mente itaque ipsorum merita quandoque nusquam futura præveniebant Dei voluntatem, eamque movebant ut aliquibus gratiam baptismi procuraret; quam quidem insulam opinionem explodit S. D. tum adductis in object. verbis, *nec considerant se*, etc., tum his quæ immediate sequuntur, « sed in tantum quibuscumque commentitiis meritis electionem Dei subiiciunt, ut quia præterita non extant, futura quæ non sint futura conflingant; novoque apud illos absurditatis genere, et non agenda præscita sint, et præscita non acta sint. »

Ex iis omnibus patet Semipelagianos ita admisisse aliquos actus præveniri gratiâ, ut tamen in præscientiâ Dei humana merita seu voluntates hominum præcederent ipsam gratiam. Namque in eorum sententiâ idcirco Deus adultos vocabat ad fidem quæ deinceps per gratiam sit juvanda, quia eos credituros, sicque ipsos futuros dignos electione præciverat; similiter futura merita, sub conditione longioris vitæ comminiscabantur in parvulis, quorum intuitu Deus illos ad gratiam baptismi vocasset secundum quod habituri erant bona aut mala merita. Unde, inquit S. Prosper, non considerant gratiam illam quam imaginantur esse prævenientem, tamen reipsâ voluntatibus hominum subdi, seu posteriorem esse, in quantum nempe fatebantur eam in præscientiâ Dei subsequi hominum voluntates et merita, quæ causa erant et motivum cur Deus gratiam hanc in tempore largiretur.

Objicies 5^o: S. Aug., lib. de Prædest. SS., cap. 4, loquens de Massiliensibus, sic habet: « Pervenerunt isti fratres nostri.... ut præveniri voluntates hominum Dei gratiâ fateantur, atque ad nullum bonum opus vel incipendum, vel perficiendum sibi quemquam sufficere posse consentiant. » Admisere ergo Massilienses gratiam interioram quæ præveniat affectum seu voluntatem credendi. Respondeo dist., et expono sensum verborum S. Aug.: *Pervenerunt (Massilienses) ut fateantur Dei gratiâ præveniri voluntates hominum*, quoad bona opera, concedo; quoad initium fidei, id est.

affectum seu voluntatem credendi, nego. Istam exceptionem à Massiliensibus adhibitam fuisse, apertè declarat S. D. cap. 2, 3, 5, etc., ejusdem libri, ubi adversus ipsos probat fidem non esse à nobis ipsis, sed à Deo, quæ S. D. testimonia exscripsimus probatione primâ.

Objicies 6^o : S. Aug., lib. de Prædest. SS., cap. 5, fatetur se ante episcopatum suum errori Semipelagianorum adhæsisse; atqui tamen in libris quos tunc scripsit, admisit gratiam interiorem et propriè dictam veluti necessariam, non solum ad fidem, sed etiam ad fidei initium. Id variis S. Aug. testimoniis probat Jans., lib. 8 de hæresi Pelag., cap. 6, 7, 8, etc., quæ ad hæc quatuor revocari possunt. Primum petitur ex lib. 85 Quæstionum, quæst. 68. Secundum, lib. de Quantitate animæ, cap. 28. Tertium, lib. de beatâ Vitâ, prope finem. Quartum, lib. 1 Soliloq., cap. 1 et 6; ergo, etc. Resp. 1^o, citatis in objectione testimoniis clarè non exprimi gratiam interiorem; eaque commodè exponi possunt de adjutorio exteriori, ut patebit textus illos attentè expendenti; nihil ergo Jansenius ex illis eruere potest. Resp. 2^o, quidquid sit de sensu verborum S. D. locis in object. adductis, etiamsi diceretur eum prædictis locis admisisse necessitatem gratiæ interioris initium fidei; hoc unum inde meritò colligi posset, nempe, S. Aug. non in omnibus, quod fatemur, sed in aliquibus duntaxat, quos ante episcopatum scripsit, libris Semipelagianum errorem expressisse.

Neque verò diffiteri potest ipsemet Jansenius, S. Aug. in omnibus ante suum episcopatum libris Semipelagianum errorem non docuisse. Namque à S. doctore adornata est expositio epistolæ ad Galatas antequam episcopus esset; at illa expositio Semipelagianismum non continet; imò, si fides sit Jansenio, lib. 4 de Grat. Christi, cap. 6, luculenter exprimit Augustinianam doctrinam de necessitate delectationis relativè victricis.

Objicies 7^o : Duo fuere Semipelagianorum ordines; alii laxiores, à Pelagianis semitis minùs declinantes; alii strictiores ab iisdem magis declinantes. Ita disertè testatur S. Prosper in suâ ad S. Aug. epistolâ. Hæc factâ distinctione, fatetur equidem Jans., lib. 7 de hæres. Pelag., cap. 2, priores Semipelagianos negavisse gratiam interiorem prævenientem ad initium fidei; neque id mirum, inquit; illi siquidem hæretici quoad gratiam à Pelagianis non discrepabant; asserebant enim, teste S. Prosp. citatâ ad S. August. epist. « quantum quisque ad malum, tantum

« habere facultatis ad bonum, parique momento animum se vel ad vitia vel ad virtutes « movere. » At non ita est de aliis Semipelagianis, quos negavisse gratiam interiorem ad initium fidei nullo certo argumento evinci posse contendit ibidem Yprensis. Respondeo 1^o, uno excepto S. Prosperi testimonio ex sæpiùs laudatâ S. Aug. epistolâ deducto, alia omnia quæ protulimus ad probandam nostram Conclusionem testimonia generalia esse, et de omnibus Semipelagianis etiam strictioribus, ipso fatente Jansenio intelligi debere; atqui illa testimonia, quantumvis reclamet idem Jansenius, clarè demonstrant Semipelagianos negasse gratiam interiorem ad initium fidei; ergo certis argumentis evincitur à Semipelagianis etiam strictioribus qui à Pelagianis semitis magis distabant, negatam fuisse gratiam interiorem voluntatis ad initium fidei. Respondeo 2^o falsissimum esse quod contendit objectio post Jansenium, nimirum laxiores Semipelagianos quoad gratiam à Pelagianis nullatenus discrepasse, atque cum ipsis gratiam interiorem ad quælibet bona opera exclusisse. Namque, si quo argumento id confici posset, maximè his S. Prosperi verbis quæ in objectione relata sunt, in quibus vim potissimum facit Jansenius, *et quantum quisque ad malum, etc.*; atqui ista verba minimè probant id quod intendit Jansenius. Neque enim debent intelligi sensu Pelagiano, de bono tum inchoando, tum perficiendo, sed tantum de primâ boni cupiditate, seu de speciali desiderio, speciali voluntate hujus vel illius actûs virtuosus hic et nunc eliciendi, in quo initium bonorum operum à Semipelagianis positum fuisse supra observavimus; adeoque hoc unum significant adducta ex S. Prospero verba, unumquemque hominem, juxta laxiores Semipelagianos, tantum habere facultatis ad primum cujuslibet boni appetitum, desiderium ac voluntatem, quàm ad malum; et æquè facile posse ad virtutes sese primò movere quàm ad vitia, licet ad bona opera actu exequenda et perficienda gratiam interiorem necessariam judicarent. Hanc esse genuinam textûs S. Prosperi interpretationem liquet ex his verbis immediatè sequentibus, *quem bona appetentem gratia Dei foveat, etc.*, quæ manifestè ostendunt hosce Semipelagianos post primum boni appetitum et speciale ipsius voluntatem, admisisse gratiam adjuvantem et foverentem, seu corroborantem ad cætera complenda. Respondeo 3^o, etiamsi verum esset, quod contendit Jansenius, laxiores Semipelagianos omnem gratiam etiam

ad opera bona respuisse, indè non sequeretur ab ipsis gratiam voluntatis negatam fuisse: quin inde potius inferendum esset omnes Semipelagianos talem gratiam negavisse, et in eoduntaxat inter eos discrimen fuisse, quòd alii solum fidei initium, alii perfectam etiam justitiam absque gratiæ voluntatis beneficio obtineri asseverarent.

Et verò reipsà S. Prosper in citatâ epist. errorem hunc Semipelagianis etiam strictioribus non obscure tribuit, de illis enim loquens initio epistolæ hæc habet: « Hæc ipsorum de finitio ac professio est... universis hominibus propitiationem quæ est in Sacramento sanguinis Christi, sine exceptione esse positam, ut quicumque ad fidem et ad baptismum accedere voluerint salvi esse possint; qui autem credituri sunt, quive in eâ fide, quæ deinceps per Dei gratiam sit juvanda, mansuri sunt, præscisse ante mundi constitutionem Deum, et eos prædestinasse in regnum suum, quos gratis vocatos (nempe per Evangelii prædicationem) dignos futuros electione, et de hac vitâ bono fine excessuros esse præviderit. » Quo in loco habemus 1°, hosce strictiores Semipelagianos, ab homine accedente ad fidem et ad baptismum nihil aliud postulasse, nisi ut vellet accedere, nullâ factâ gratiæ mentione. 2° In eorundem sententiâ, fidem semel acquisitam nonnisi deinceps juvari per gratiam; quod satis apertè significat, fidem primò acquiri sine gratiâ, et postea tantùm adjuvari per gratiam ad bona opera. 3° Eosdem respectu fidei non admisisse prædestinationem, sed solam præscientiam; porrò, ut manifestum est ex S. Aug. lib. de Prædest. SS. cap. 17 et 19, præscientia sola sine prædestinatione, gratiam omnem excludit; ergo, etc.

Denique ibidem monet S. Prosper eosdem Semipelagianos nullum assignare potuisse ex præcedentibus Patribus qui eorum sententiæ prævisset. *Cumque*, inquit, *ut ea ipsi exponant secundum quorum velint sensa deposcimus; nihil se profitentur invenisse quod placeat.* Ast si Semipelagiani illi aliquam ad initium fidei voluntatis gratiam prævenientem admisissent, facilè apud veteres Patres invenire potuissent suæ opinionis præcursores; multos siquidem antiquiores Ecclesiæ doctores in eâ versatos fuisse sententiâ, nec ipse diffitetur Jansenius; Semipelagiani ergo etiam strictiores nullam prorsus gratiam voluntatis admisere.

Objicies 8°: Joannes Cassianus, Faustus Re-

giensis, Gennadius, primarii fuere Semipelagianorum erroris propugnatores; atqui tamen hi omnes gratiam Dei admisere quæ semper invitaret, præcederet et adjuvaret voluntatem nostram. Ita Cassianus collat. 15; Gennadius lib. de Eccles. dogmatibus cap. 21; Faustus, teste eodem Gennadio lib. de Viris illustribus; ergo Semipelagiani non negabant gratiam interiorem prævenientem etiam initium fidei. Respondeo 1°, ex dictis inter prænotata, non ex solis Fausto et Cassiano judicandum esse de statu erroris Semipelagianorum, sed ex scriptis Prosperi et Hilarii, et præsertim S. Aug. Porrò evidentibus horum SS. Patrum testimoniis supra demonstravimus Semipelagianos non existimasse gratiam interiorem necessariam ad initium fidei. Respondeo 2°, nostrum non esse discordes hæreticos inter se conciliare. Cassianus, teste S. Prospero lib. contra collat. cap. 4, in hoc erravit, quòd existimaret « inesse homini naturaliter virtutum semina beneficio Creatoris inserta... ipsos laudabiles motus, appetitusque virtutum esse à nobis, sine gratiâ... bonos salubresque conatus, posse in nobis, etiamsi à Deo non inspирentur, incipere. » Faustus lib. 1 de Grat. et lib. Arb. ait, *fidem omnibus naturaliter insertam esse.* Quod Gennadium spectat, aut fuit Semipelagianus factione duntaxat, non dogmate, ut opinantur nonnulli; aut jam ex errore Semipelagiano revocatus fuit cùm librum de dogmatibus ecclesiasticis conscripsit; hic enim liber à nemine veterum erroris notatus fuit contra gratiam; et loco in object. laudato dogma catholicum exprimere videtur eodem sensu, iisdemque fermè verbis, ac synodus Araus. II. can. 25.

Respondeo 3°, testimonia Cassiani, Fausti, et aliorum Semipelagianorum facilè solvi posse adhibitâ distinctione: Semipelagiani admiserrunt gratiam prævenientem, externam, positam scilicet in prædicatione Evangelii, concedo; internam, subdist.: Quandoque, et uti minimè necessariam, concedo; semper, et tanquàm absolutè necessariam, iterùm subdist. Quoad incrementum fidei et perfectionem, imò et initium bonorum operum, concedo; quoad initium fidei, nego. Quidem enim inter opera non recensebant, quemadmodum supra suo loco declaratum est.

Objicies 9°: SS. Aug., Prosper et alii Semipelagianorum debellatores non semel asserunt veram fuisse Semipelagianorum sententiam in statu innocentie: atqui vera non fuisset, nisi

admisissent gratiam voluntatis prævenientem ad initium fidei et salutis; hæc enim Adamo innocenti perinde ac homini lapso necessaria fuit ad quemlibet bonum ac salutiferum voluntatis motum; ergo, etc. Argumentum istud sæpius urget Jans. præsertim lib. 8 de hæresi Pelag. cap. 6. Respondeo 1^o, istud argumentum Jansenio esse solvendum. Namque in iis S. Aug. testimoniis quæ objicit, loquitur S. doctor non præcisè de initio fidei et salutis, sed de resistentiâ tentationibus et bonis quibuslibet operibus; porrò, si Jansenio fides, Semipelagiani admiserunt gratiam ex sese efficacem ad opera bona perficienda; hanc autem Adamo ullatenus fuisse necessariam negat Yprensus; ergo, etc. Respondeo 2^o, quidquid sit de majore, de quâ non ita liquidò constat, negando minorem; sicut enim Massilienses dicebant nos per vires liberi arbitrii in creatione accepti sine gratiâ præveniente posse saltem habere fidem et in eâ perseverare; ita etiam fatebatur S. Aug. Adamum propriâ libertate (quæ gratiam habitualement simul cum illustratione intellectus complectebatur), in creatione acceptâ absque ullo gratiæ voluntatis prævenientis auxilio potuisse non solum credere, sed etiam sperare, diligere et exercere alios actus habituum quos in suâ creatione acceperat. Verùm de hoc argumento uberius et ex professo disputabimus, ubi de statu innocentiae.

Objicies 10: Semipelagiani hanc duntaxat rejiciebant gratiam ad initium fidei, quæ videtur perimere libertatem, fatalem inducere necessitatem, in desperationem, desidiâ ac torporem homines impellere; ut patet ex Prosperi et Hilarii ad S. Aug. epistolis; atqui talis non est quælibet gratia præveniens versatilis ac libero voluntatis arbitrio permissa, sed sola victrix ac ex sese efficax; ergo, etc. Ita Jans. lib. 7 de hæresi Pelag. cap. 48. Resp. dist. min.: Talis non est gratia præveniens versatilis, in rei veritate, concedo; in mente Semipelagianorum, nego. Quod Pelagiani dicebant contra necessitatem gratiæ ad quodcumque bonum, hoc ipsum contorquebant Semipelagiani adversus necessitatem gratiæ prævenientis initium fidei; et quemadmodum falsò sibi persuaserant Pelagiani, ut supra vidimus ex SS. Hier. et Aug. non esse liberum arbitrium nisi plenam ex se potestatem haberent homines tam ad bonum quàm ad malum; similiter etiam Semipelagiani existimabant liberum arbitrium penitus extingui, si saltem ex se non posset inci-

pere, id est credere aut velle credere; unde, ut homo censeretur liber in negotio salutis, aliquid initiale circa salutem prorsus à gratiâ independens admittendum esse contendebant; nempe initium fidei, seu pium credulitatis affectum.

Omnia itaque momenta et expostulationes Semipelagianorum adversus S. Aug. non oppugnabant naturam et agendi modum gratiæ quam propugnabat S. D. sed ipsius duntaxat gratuitatem, et necessariam, ut ita dicam, præventionem ad primum etiam salutis desiderium et initium. En fons et origo omnium expostulationum et conviciorum quibus Massilienses S. Aug. doctrinam infamabant; id manifestum fit solâ inspectione epistolarum SS. Prosperi et Hilarii ad S. Aug. necnon librorum de Prædest. SS. et de Dono persever. quos eâ occasione exaravit S. doctor.

Quæres 1^o, an Semipelagiani erraverint circa scientiam conditionatorum, quæ est in Deo, et à nonnullis media nuncupatur. Respondeo illos quidem errasse, quòd tali scientiâ abusi fuerint, non verò præcisè quòd eam admiserint. In his autem quinque potissimum aberrabant circa scientiam conditionatorum, 1^o in eo quòd vellent per illam Deum cognoscere quinam ex solo naturæ affectu benè dispositi forent ad fidem suscipiendam, quique *solis* liberi arbitrii viribus credituri essent, si ipsis veritas Evangelii annuntiaretur; quod certè erroneum esse nemo non videt; fidem enim Dei donum esse, sæpius et clarissimè inculcant Scripturæ, quemadmodum contra Semipelagianos tradit S. Aug. lib. de Prædest. et de Dono persever. 2^o Errabant etiam quòd assererent, pium illum ac naturalem credulitatis affectum quem Deus prævidebat ex hypothesi prædicationis Evangelii, primam esse radicem et causam vocationis ad fidem; ita ut eâ ratione eoque motivo Deus certò moveretur ad mittendos prædicatores qui veritates evangelicas annuntiarent; unde consequens erat gratiam vocationis gratuitam non esse, sed dari secundum merita. Etenim cum ab illis quærebat quare Evangelii fides aliquibus, potiusquam aliis prædicaretur, respondebant, teste S. Prosp. epist. ad S. Aug. « dispensasse Deum tempora, et ministeria prout prævidit Deus credituros, et exortura erat bonorum credulitas voluntatum. » Idem refert S. Hilarius in epist. ad S. Aug. 3^o Adhuc abutebantur Semipelagiani scientiâ conditionatorum, quòd vellent futurum voluntatis sub conditione gratiæ confe-

rendæ consensum à Deo prævisum, esse causam, regulam et motivum ejusdem gratiæ conferendæ; ex quo consequabatur scientiam conditionatorum non tantum esse causam directivam decretorum Dei circa bona opera, sed etiam motivam, impulsivam et certò determinativam; quod planè absurdum esse et erroneum, vel ex uno Tyrionum et Sidoniorum exemplo demonstratur, apud quos patrata non fuere miracula, etsi prævidisset Deus, futurum ut ipsi crederent, et dignos pœnitentiæ fructus agerent, si apud eos factæ fuissent virtutes, quæ in Corosaitis et Bethsaitidis factæ fuerant; quo exemplo Semipelagianos urget S. Aug. lib. de Prædest. Sanctorum. 4^o Quod ex præcedentibus consequitur, juxta Semipelagianos scientia conditionatorum convertebatur in absolutam independentem à decreto, saltem tantquam à primâ et præcipuâ causâ. Scilicet volebant rem aliquam primùm conditionatè duntaxat futuram, non fieri postmodum futuram absolutè præcisè propter decretum, seu prædestinationem Dei ad gratiam; quinimò prædestinationem illam ideirco esse in Deo, quòd prævidisset rem sub conditione futuram; quod figmentum sæpiùs refellit S. Aug. præsertim lib. de Dono persever. cap. 19: « Quandò, inquit, legimus Dei præscientiam, et agitur de vocatione electorum, eandem prædestinationem intelligere oportet. » 5^o Abutebantur etiam scientiâ conditionatorum erga parvulos. Cum enim S. Aug. contra ipsos probaret gratuitam planè esse prædestinationem ad gratiam, exemplo duorum parvulorum quorum unus ante susceptum baptisma è vivis excedebat, alter verò nonnisi post susceptum illud sacramentum; respondebant ideirco uni ex illis concessam esse præ alio gratiam baptismatis, quòd Deus prævidisset ipsum, si ad adultam ætatem pervenisset, benè usurum esse suo libero arbitrio, alterum verò non item; atque ita parvulorum prædestinationem aut reprobationem fundebant in præscientiâ bonorum vel malorum operum, quæ nunquam absolutè futura erant, sed quæ tamen futura fuissent, si parvuli illi ad adultam ætatem pervenissent: « Tales aiunt perdi, talesque salvari, » inquit S. Prosper in epist. ad S. Aug., « quales futuros illos in annis majoribus, si ad activam servarentur ætatem, scientia divina prævidet; » quam quidem absurdam et erroneam sententiam ibidem explodit S. D. cujus verba supra retulimus. Eandem opinionem refellit et irridet S. Aug. multisque confutat argumentis.

isto imprimis, nempe quòd nullus præmio vel supplicio allici debeat propter ea bona vel mala quæ factururus fuisset, sed tantum propter ea quæ reipsâ fecit. « Nullus mortuus, » inquit lib. de Dono persever. cap. 9, « judicatur ex bonis seu malis quæ fuerat, si non moreretur, acturus; alioquin Tyrri et Sydonii non secundum ea quæ gesserunt, pœnas luerent; sed potius secundum ea quæ gesturi fuerant, si in eis illæ virtutes evangelicæ factæ fuissent, per grandem pœnitentiam, et per Christi fidem consequerentur salutem. »

Ast ab his erroribus longissimè distat doctrina scientiæ mediæ, prout nunc à nonnullis Theologis defenditur. Namque 1^o asserunt ad omnia opera bona, ipsumque primum fidei et salutis initium, gratiam voluntatis prævenientem necessariam esse, adeò ut nec futura bona opera, nec plus credulitatis affectus prævideantur à Deo, nisi sub conditione gratiæ concedendæ. 2^o Negant gratiæ tum baptismi, tum vocationis, tum etiam efficacis conferendæ motivum et causam esse consensum voluntatis prævisum sub conditione; nullus enim est ita pessimus, qui non prævideatur à Deo convertendus et salvandus, si talis vel talis gratia quam Deus benè novit ipsi concederetur, et quæ nihilominus ipsi denegatur; motivum ergo illius gratiæ concedendæ, sola est, in eorum mente, specialis Dei misericordia. Ratio à priori est, quia, juxta scientiæ mediæ patronos, scientia conditionatorum est causa directiva duntaxat decretorum Dei, non impulsiva et determinativa. Nempè posito quòd Deus velit voluntate absolutâ et efficaci aliquem ad se convertere, videt per scientiam conditionatorum, an huic vel illi gratiæ sit consensurus ex hypothesi quòd ei concedatur, atque ex purâ suâ misericordiâ, ex purè gratuito decreto hanc illi gratiam decernit, qui videt ipsum in talibus circumstantiis consensurum. 3^o Juxta eosdem theologos, scientia conditionatorum non transit in absolutam, nisi mediante absoluto, efficaci et purè gratuito Dei decreto, quod quidem prima est futuritionis absolutæ rerum causa.

Ex quibus omnibus patet, doctrinam scientiæ mediæ prout à nonnullis theologis propugnatur, nihil commune habere cum Pelagianorum et Semipelagianorum erroribus. Audiatur hanc in rem illustrissimus Bossuetius secundo Documento Pastoralis adversus Juræum pag. 140, ubi sic loquitur: « Pour récriminer, M. Jurieu nous objecte que nos Molinistes sont Demi-Pélagiens, et que l'Église romaine tolère un

« Pelagianisme tout pur et tout crû. Pour ce
 « qui regarde les Molinistes, s'il en avait ou-
 « vert seulement les livres, il aurait appris
 « qu'ils reconnaissent pour tous les élus une
 « préférence gratuite de la divine miséricorde;
 « une grâce toujours prévenante, toujours né-
 « cessaire pour toutes les œuvres de piété; et
 « dans tous ceux qui les pratiquent, une con-
 « duite spéciale qui les y conduit. » Idem con-
 ceptis verbis docet Natalis Alexand. ad sec. V.
 Hist. Eccles. cap. 5, art. 8, ubi de Semipelagianorum erroribus agens, hæc habet : « Ca-
 « vendum ne recentioribus quibusdam theolo-
 « gis, qui... scientiam quamdam mediam
 « propugnant, Semipelagiani erroris nota inu-
 « ratur, quod imprudenter et temerè novi qui-
 « dam auctores fecerunt, vel Semipelagiano-
 « rum dogmatum ignari, vel studio partium
 « in transversum acti; magnum est enim quan-
 « tum ad hoc utrumque dogma, inter Semi-
 « pelagianos et theologos illos discrimen. »
 Idem tradunt Hyacinthus Serri in opere cui
 titulus : *Schola Thomistica vindicata*, pag. 8;
 Hyacinthus Amat de Graveson, tertiâ parte
 epistolarum in quibus doctrina Thomistica as-
 seritur ac vindicatur, epist. primâ. Ante eos
 idem etiam docuerant Alvares, Joann. à S. Th.
 Ledesma, etc.

Quæres 2°, an Semipelagiani erraverint circa
 voluntatem Dei salvandi omnes homines. Res-
 pondeo ipsos circa voluntatem Dei errasse in
 quatuor præsertim capitibus, de quo vide quæ
 dicta sunt tract. de Attributis quæst. 8, ubi Se-
 mipelagianorum errores circa voluntatem Dei
 salvandi omnes homines retulimus.

Quæres 3°, an iidem erraverint circa divi-
 nam prædestinationem. Respondeo in multis
 aberrasse. 1° Errabant circa prædestinationem
 parvulorum, quos dicebant ad gloriam eligi
 propter merita nunquam futura, sed quæ fuis-
 sent posita, si diutius parvuli in vitâ perseve-
 rassent. 2° Errabant etiam circa adultorum
 prædestinationem, quia asserebant Deum con-
 ditionatè omnium hominum velle salutem, si
 nimirum ipsi vellent credere, vel se ad fidem
 præparare per solas naturæ vires, ita ut pro-
 pter illud initium fidei naturale concederen-
 tur media ad salutem necessaria. Vide quæ
 diximus quæsito 1, circa conditionatorum scientiam.

Verum, quemadmodum observat Natal. Alex.
 loco citato, alique auctores mox laudati, erro-
 ribus illis nullatenus inficitur horumce theo-
 logorum doctrina, qui prædestinationem ex

prævisis meritis fieri propugnant. Nam 1°,
 admittunt quidem illi theologi generalem et
 conditionatam in Deo de salute omnium homi-
 num voluntatem, si nimirum omnes ipsi velint
 salvari, sed illa conditio, quòd homines velint
 salvari, gratiam supponit, quia nullus potest
 quidquam velle aut operari ad æternam vitam
 conducens, nec ipsum salutis desiderium con-
 cipere sine præveniente gratiâ voluntatis. 2°
 Respectu eorum omnium qui salvantur, sive
 sint adulti, sive parvuli, specialem agnoscunt
 prædilectionem Dei, per quam ipsis merè gra-
 tuitò specialia auxilia decreta sint, quibus fac-
 tum est ut salvarentur. 3° Semipelagianorum
 figmentum circa prædestinationem parvulorum
 explodunt; quòd enim aliqui parvuli non mo-
 riantur nisi suscepto baptismo, illud putant
 ex solâ Dei benignitate esse repetendum,
 quamvis existiment infantes illos efficaciter ad
 gloriam non eligi, nisi ex præviâ applicatione
 meritorum Christi quæ fit per baptismum.

Dissertatio tertia.

DE MONACHIS ADRUMETINIS.

Aliquantò post damnatos à Zozimo summo
 pontifice, postque ejectos Occidente Pelagianos,
 exorta sunt inter monachos Adrumetinos dis-
 sidia super quæstione de gratiâ et libero arbi-
 trio; de quibus duo hic paucis inquirenda sunt,
 occasio scilicet, et materia horumce dissidio-
 rum; seu historia dissidii, et in quo positus
 fuerit monachorum error.

ARTICULUS PRIMUS.

Compendiosa hujusce dissidii delineatio.

Adrumetum civitas erat in Byzacenâ Africæ
 provinciâ celebris. Hanc prope urbem cœno-
 bium incolebatur à monachis sub Valentini ab-
 batis regimine, inter quos Florus quidam pa-
 triâ Uzalensis numerabatur. Hic cum in patriam
 iter suscepisset, ibi celeberrimam S. Aug.
 epistolam ad Sixtum exscripsit, et Adrumetum
 ad fratres suos transmisit; hanc Adru-
 metini monachi perlegerunt; sed cum eorum
 quinque vel non multò plures illius sensum non
 assequerentur, graves in cœnobio contentio-
 nes et dissidia excitavere, contententes vide-
 licet, ab aliis, qui doctrinam hanc rectius in-
 telligebant, ita defendi gratiam, ut liberum
 abolerent arbitrium, negarentque Deum in die
 judicii redditurum unicuique secundum
 opera sua.

Valentinus monasterii abbas his tumultibus incassum mederi conatus, consensit tandem duos monachos Cresconium et Felicem Hipponem proficisci ut S. Aug. adirent ac consulerent. Hi contentionis statum, quâ turbatum fuerat monasterium perturbatè omnino ac perversè S. D. exposuerunt; ipsi quippe objectiones, calumnias, accusationes intentatas adversus Florum, aliosque qui genuinam S. Aug. sententiam tuebantur, velut propriam Flori, aliorumque doctrinam proposuere. Docuit monachos Augustinus, eisque suam ad Sixtum epistolam exposuit; scripsit etiam de eodem argumento duplicem ad Valentinum epistolam 214 et 215, in quarum postremâ Valentinum rogabat, Florum ad se mitteret, id scilicet animo conjectans, quod res erat, adversus illum ideò tumultuari alios, quòd non assequerentur quæ diceret. Librum insuper conscripsit ad eundem Valentinum et cum illo monachos, *de gratiâ et libero arbitrio*, in quo gratiæ et liberi arbitrii concordiam exponit, gratiamque non ex meritis dari demonstrat.

Istius lectio voluminis novo dedit occasionem errori; cum enim omnia bona opera Dei dona esse in eo sæpius inculcet S. Aug., quidam monachus id legens in eam prolapsus est absurditatem, ut dixerit neminem esse corripiendum si præcepta non facit, sed duntaxat pro illo ut faciat Deum esse orandum. Id S. D. Valentinus nuntiavit per Florum, cujus probatâ fide, lib. *de corrept. et gratiâ*, quo plenius Adrumetinos monachos instrueret, elucubrauit: in eo utilitatem ac necessitatem correptionis ostendit. His historicè prænotatis, jam de errore horumce monachorum investigandum.

ARTICULUS II.

Quis fuerit Adrumetinorum monachorum error.

Nonnulli cum Sirmundo in suâ Hist. Prædestinantiâ docent præfatos monachos, fuisse præformatores hæresis Prædestinatarum, seu eorum qui, ut gratiam defenderent, liberum arbitrium è medio tollebant; alii verò cum card. Norisio lib. 1 Hist. Pelagianæ cap. 15, contendunt illos è contra Pelagianâ fulgine tinctos fuisse, atque ut liberum arbitrium tuebantur gratiam impugnasse.

CONCLUSIO. Adrumetini monachi Prædestinantiæ hæreseos auctores, vel præformatores non fuere, sed Pelagianâ potiùs labe infecti. Probatur 1º ex diserto S. Aug. testimonio lib. 2 retractat. cap. 66 : « Propter eos, inquit, qui.... sic defendunt liberum arbitrium, ut

« negent Dei gratiam, asserentes eam secundum merita nostra dari; scripsi librum, cui « titulus est : *De gratiâ et libero arbitrio*. Ad eos « autem scripsi monachos Adrumetinos, in « quorum monasterio de hac re cœperat esse « contentio. » Adrumetini ergo non prædestinantiæ, sed Pelagianæ hæreseos labe infecti fuere. Probatur 2º ex S. Prospero epist. ad S. Aug. ubi sic loquitur : « Evenit ex dispositione « misericordiæ Dei, ut cum quosdam intra « Africam (monachos scilicet Adrumetinos) « similia movissent, librum de Corrept. et « Grat. plenum divinæ auctoritatis emitteres. » Similia ergo moverunt Adrumetini illi et Massilienses; porro nemo dixerit Massilienses errori Prædestinatio fuisse, à quo tanto perè abhorrebant, ut non aliâ de causâ doctrinam S. Aug. acrius insectarentur, quàm quòd eam huic errori omnino conformem esse sibi falsò persuasissent; ergo, etc. Probatur 4º Vel illi erant Prædestinatio qui Floro resistebant, vel ipse Florus; sed neutrum dici potest. Non primum. Nam ii fuere commoti lectione epistolæ ad Sixtum, quæ gratiam negat secundum merita dari; ii sunt quos docet ac præmunit S. Aug. contra errores Pelagii; ii tandem sunt qui Florum accusabant, quasi liberum negaret arbitrium, epist. 214; quæ omnia apertè demonstrant ipsos fuisse non Prædestinatio, sed meros Pelagianos. Non secundum. Equidem Florus de illo errore accusatus fuit, sed ab iis qui prorsus doctrinam Pelagii sectabantur, ut docent eorum verba, quæ sibi ut objectiones proponit S. Aug. Fuit accusatus, sed hæc non erat illius fides : *Servitui Flori hæc fides est, pater, non sicut fratres isti sunt locuti*, ait Valentinus abbas epist. 216. Fuit accusatus, sed suspicabatur S. D. eos qui accusabant Florum ipsum non intelligere, epist. 214 : « Melius tamen facietis, inquit, « quod multum rogo, si ipsum, à quo dicunt « se fuisse turbatos, ad me mittere non grave « mini; aut enim non intelligit librum meum, « aut fortè ipse non intelligitur. » Fuit accusatus, sed post audientiam recessit justificatus : « Hanc fidem quæ sine dubio vera et prophetica et apostolica et catholica fides est; eam « in fratre nostro Floro invenisse me gaudeo, « unde hi potiùs corrigendi sunt.... qui eum « non intelligebant. » Ita S. Aug. lib. de Corrept. et Grat. cap. 1. Hæc adeò firma sunt ut et alia adijcere supervacaneum esset.

Dices : S. Aug. lib. de Grat. et lib. Arb. cap. 1, in quo totius libri scopus habetur, sic

loquitur: « Quoniam sunt quidam, qui sic gratiam Dei defendunt, ut negent hominis liberum Arbitrium, » ubi manifestè supponit, quosdam è monachis Adrumetinis negasse liberum arbitrium, ac proinde erroribus Prædestinationis adhæsisse. Idem apertè declarat epist. 214. Respondeo, cùm hæc scriberet S. D. deceptum fuisse falsâ relatione Cresconii et Felicis, qui ex simplicitate vel imperitiâ perversè omninò et perturbatè dissentionis causam narraverant. Ii nempe, ut antea observavimus, objectiones et calumnias quibus nonnulli è monachis doctrinam Flori diffamabant, veluti propriam ipsius sententiam exposuere; ast ubi semel Florum audivit, illius fidem laudavit, ut constat ex citato cap. 2, lib. de Corrept. et Gratiâ: imò et antequàm Florus ipsum adiret, jam suspicabatur S. D. calumniam, unde lib. de Grat. et lib. Arb. cap. 1, post verba objecta continuò addit: *Aut quando gratia defenditur, negari existimant liberum arbitrium*: Denique, quod litem omnem dirimit, lib. 2 Retract. cap. 66, asserit S. D. exarasse librum de Grat. et lib. Arb. adversus eos qui ita defendunt liberum arbitrium, ut negent Dei gratiam; ibidem declarat se eundem librum ad monachos Adrumetinos direxisse; nulli ergo fuere Prædestinatiani in monasterio Adrumetino, benè tamen nonnulli Pelagianâ fulgine tincti.

Dissertatio quarta.

DE PRÆDESTINATIONIS QUINTI SEculi.

Dictum est hucusque de illis qui errârunt circa gratiæ naturam, necessitatem et gratuitatem; nunc de iis tractandum qui errârunt circa ipsius agendi modum.

Observandum itaque 1^o, Prædestinianos, seu, ut alii dicunt, Prædestinatos, in oppositum Pelagii errorem lapsos fuisse. Pelagianium extollentes liberum arbitrium, gratiæ necessitatem negavere; Prædestinatiani è contra gratiæ plus æquo tribuentes, libertatem arbitrii interemerunt. Prædestinatione, tanquàm à parte magis conspicuâ et insigni errorum quos profitebantur, dicti sunt Prædestinatiani.

Observandum 2^o, varios et multiplices fuisse Prædestinatorum errores. Ad istos potissimum revocari possunt. Primus ac palmaris, ex quo cæteri omnes derivantur, iste est, videlicet quosdam esse homines, decreto absoluto et omnem demeritorum prævisionem antecedenti,

ad mortem seu damnationem æternam prædestinatos. Secundus, Deum prædestinare ad media quæ deducunt ad interitum, nempe ad malam vitam, ad vitium, atque adeò ad malum culpæ et peccatum. Tertius, Deum non velle omnes homines salvos fieri, sed tantum eos qui salvantur. Quartus, Christum Dominum, pro solis electis et prædestinatis mortuum fuisse, ac pro iis solis sanguinis sui pretium Deo Patri obtulisse. Quintus, post primi hominis lapsum ex toto liberum voluntatis arbitrium extinctum esse. Sextus, Sacramenta in iis otiosa esse et sterilia; hoc est, nec peccatum iis dimittere, nec gratiam conferre, qui sunt ad mortem prædestinati.

Hæc et alia fuisse Prædestinatorum commenta constat ex Epistolis Fausti et Lucidi, aliisque auctoribus infra recensendis.

Observandum 3^o, circa præsentem controversiam non unam esse omnium sententiam. Jansenius lib. 8 de hæresi Pelagianâ cap. ultimo, existimat nusquàm ante Lutherum et Calvinum extitisse in rerum naturâ Prædestinationam hæresim, eamque nihil aliud esse quàm meras objectiones et calumnias quibus Massilienses S. Aug. et discipulorum ejus doctrinam diffamare conabantur; seu S. D. doctrinam ab illis invidiosè propositam ac deformatam. Quæcumque autem in hujus suæ sententiæ confirmationem profert, non ipse primus excogitavit, sed ea omnia à Jacobo Usserio inter Calvinistas notissimo expilavit ac deprompsit ex libro quem anno 1631 Dublini edidit sub hoc titulo: *Gotescalci et Prædestinationis controversiæ ab eo motæ historia*. De synodis Arelatensi et Lugdunensi omninò silet Jansenius (quamvis earum historiam legisset apud Baronium cujus ipse locum indicat), quia nimirum nondum prodierat in lucem alter ejusdem Usserii liber, Dublini pariter editus anno 1639, hoc est, uno post mortem Jansenii anno. Eo in libro quem inscripsit: *Britannicarum Ecclesiarum antiquitates*, prædictarum synodorum auctoritatem ac veritatem exsufflat Usserius; unde Jansenii discipuli avidè arripuerunt quidquid ad eandem synodos elevandas, subinde sexcenties recoxerunt.

Jansenio et Usserio hæc in parte suffragatur Gilbertus Mauguinus in supremâ Parisiensi Monetarum curiâ præses. Is seculo proximè elapso Gotescalci defensionem suscepit, et Prædestinationam hæresim pro fabulâ adversus Augustinianæ doctrinæ propugnatores conficiâ traduxit; hunc confutavit Cellotius Societatis

Jesu theologus, libro cui titulus : *Historia Gotescalci Prædestinatiani* ; Parisiis an. 1635.

Doctissimus Sirmundus in suâ Historiâ Prædestinatianâ ex adverso docet 1^o, hæresim illam anno circiter 424 in Africâ natam fuisse apud monachos Adrumetinos. 2^o SS. Prosperum et Hilarium contra eandem hæresim per Gallias grassantem S. Augustini opem implorâsse, quibus morem gessit S. D. editis contra Prædestinianos libris de Prædest. SS. et de Dono persever. 3^o Post Aug. obitum memoratos Prosperum et Hilarium, Romam ad Cœlestinum confugisse, à quo gravissimum contra Prædestinianos rescriptum ad episcopos Galliæ datum impetrârunt. 4^o Eundem errorem à Lucido presbytero propugnatum et retractatum fuisse versûs finem quinti seculi. 5^o Tandem Gotescaleum illius hæresis instauratorem fuisse nono seculo.

Inter hanc utramque extremam sententiam medius occurrit eminentiss. card. Norisius lib. 2 Hist. Pelag. cap. 15. Contra Jansenium et Mauguinum docet, Prædestinatianam hæresim non omninò fictam et commentitiam fuisse, sed veram, à Lucido præsertim presbytero, aliisque nonnullis obscuri nominis propugnatam ; ast contra Sirmundum contendit, eam nec in monasterio Adrumetino natam, nec à SS. Prosp. et Hilar. impugnata, nec à S. Cœlestino damnatam fuisse. Quid de totâ istâ controversiâ sentiamus, patebit sequentibus Conclusionibus.

CONCLUSIO PRIMA. — Prædestinatiana hæresis exorta non est in Africâ in monasterio Adrumetino.

Hujus conclusionis veritas aperta est et explorata ex dictis dissert. præcedenti, in quâ ostendimus, monachos Adrumetinos, ut liberum tuerentur arbitrium, adversûs gratiæ necessitatem dimicasse.

CONCLUSIO SECUNDA. — Prædestinatiana hæresis non emersit in Galliis Cœlestino I summo pontifice ; neque adversûs eam SS. Augustini aut Cœlestini opem imploravêre Prosper et Hilarius.

Probatur : Nam quos impugnâvêre SS. Prosper et Hilarius in suis operibus, et S. Cœlestinus in suo celebri ad episcopos Galliæ rescripto, ubique exhibentur tanquàm S. Aug. hostes infensissimi ; sancto doctori perpetuò obloquebantur, immania errorum portenta ipsi affingebant, mira ejus scripta infamabant, effutientes ipsum sub gratiæ nomine fatalem inducere necessitatem ; porrò qui ita sanctissimi

præsulis nomen et doctrinam proscindebant, potius Pelagianorum erant reliquæ, quàm Prædestinatiani qui S. Aug. ipsiusque doctrinam impensè laudabant, eamque se profiteri, etsi falsò gloriabantur

CONCLUSIO TERTIA. — Prædestinatiana hæresis non est figmentum, neque mera calumnia quâ Massilienses S. Augustinum ejusque discipulos infamare studuerunt, uti placet Jansenio et ejus Apologistis ; sed vera et realis hæresis in Galliis quinto seculo à Lucido quodam presbytero, Monimo, et aliis nonnullis propugnata.

Probatur 1^o ex epist. Fausti ad Lucidum, in quâ sex mox recensita Prædestinatianorum dogmata ipsi damnanda proponit, quæ nisi ipse anathemate confixerit, atque subscripserit epistolæ, ipsum ad synodum delaturum comminatur : « Quòd si eam, inquit (epistolam), « subscriptam, ut dixi, transmittere nolueris, « apertè adhuc te in errore persistere ipso silentio comprobabis ; ac proinde mihi jam « necessitatem facies ad personam tuam publicis conventibus exponendam. » Extat prædicta epistola tom. 4 conciliorum Labb. pag. 1042, et Biblioth. edit. Lugd. tom. 8, pag. 524.

Probatur 2^o ex libello emendationis Lucidi ad episcopos Gallicanos, quo prava sua dogmata ejurat his verbis : « Correctio vestra, inquit, salus publica, et sententia vestra medicinalis est ; unde et ego summum remedium duco, ut præteritos errores accusando, excusem, et salutiferâ confessione meâ diluam. Proinde juxta prædicandi recentia statuta concilii, damno vobiscum sensum illum qui dicit : 1^o Humanæ obedientiæ laborem divinæ gratiæ non esse jungendum ; 2^o qui dicit post primi hominis lapsum ex toto arbitrium voluntatis extinctum ; 3^o qui dicit quòd Christus et Salvator noster mortem non pro omnium salute suscepit ; 4^o qui dicit quòd præscientia Dei hominem violenter compellat ad mortem, vel quòd cum Dei peccant voluntate, qui pereunt ; 5^o qui dicit quòd post acceptum legitime baptismum, in Adam moriatur, quicumque deliquerit ; 6^o qui dicit, alios deputatos ad mortem, alios ad vitam prædestinatos, etc. »

Et postea sic pergit Lucidus : *Hæc omnia quasi impia et sacrilegiis plena condemno. Ex quibus patet Lucidum Prædestinatianis erroribus infectum fuisse, quos subinde urgente Fausto ejuravit. Refertur præfatus emendationis libellus, collectionibus mox laudatis.*

Probatur 3^o ex duobus conciliis Arelatensi

et Lugdunensi, circa annum Christi 475, ut verisimilius videtur, celebratis: in quibus, 1° errores Lucidi fuere damnati; 2° patrum suffragiis ac subscriptionibus approbata Fausti ad Lucidum epistola; 3° ipsi Fausto hos errores confutandi provincia demandata. Ita constat ex præfatione librorum Fausti ad Leontium Arelatensem episcopum: « Quod, inquit, pro sollicitudine pastorali, beate papa, Leonti, in condemnando prædestinationis errore concilium summorum antistitum congregastis, universis Galliarum Ecclesiis præstitistis; quod verò ad ordinanda quæ collatione publicâ doctissimè protulistis, operam infirmis humeris curamque mandastis, parùm sanctæ existimationi vestræ consuluit; » et in fine præfationis: « In quo quidem opusculo, post Arelatensis concilii subscriptionem, novis erroribus deprehensis, adjici aliqua synodus Lugdunensis exegit. » Lucidus quoque meminit synodi Arelatensis in suo mox citato Retractionis libello. Quæ ad elevandam harumce synodorum veritatem et auctoritatem opponunt adversarii, solvemus in responsione objectionum.

Probatur 4° antiquorum scriptorum auctoritate. Prosper Tyro in Chronico; auctor libri antiquissimi, quem primus edidit Sirmundus sub nomine *Prædestinati*; Arnobius Junior qui vixit Ecclesiæ seculo V; Ennodius Ticinensis ejusdem ævi nobilis scriptor; Hincmarus in epist. ad Nicolaum papam; Rabanus in epistolis ad Hincmarum; Trithemius, Flodoardus, Sigebertus, etc. Hi omnes scriptores loquuntur de Prædestinarianis hæreticis, quos seculo V Ecclesiam infestasse testantur.

Probatur 5° ex constanti theologorum doctrinâ, qui summo consensu fatentur extitisse antiquitùs Prædestinarianam hæresim Pelagianæ ex adverso repugnantem; idque novatoribus Lutheranis et Calvinistis exprobrant, quòd eam fulminibus ecclesiasticis toties percussam excusitaverint. Ita disertè testantur Thomas Valdensis in eximio illo opere quod inscripsit *Doctrinale fidei antiquæ*, lib. 1, art. 1, cap. 22; Didacus Alvarez de origine Pelag. hæreseos cap. 30; Claudius Sanctesius episcopus Ebroicensis in Atheismis Calvini; Baronius, Binius, Bellarminus, Alphonsus à Castro, Maldonat., alique. Verbo dicam, ex theologis orthodoxis ante Jansenium plurimi Prædestinianos antiquitùs extitisse expressis verbis fassi sunt; cæteri non exigente scopo siluere; verùm nullus est qui hanc hæresim quasi meram fabulam et

anile commentum ex Semipelagianorum officinâ profectum exploserit. Primus omnium Yprensis criticas Usserii conjecturas et hallucinationes sequi maluit, quàm orthodoxorum vestigiis insistere.

Unum est hoc loco minimè prætermittendum celebre testimonium Petri Aurelii, qui apertè profitetur olim extitisse Prædestinationis hæreticos, tomo scilicet 1, in responsione ad quædam causam spongiæ præambulam pro sacrâ theologiæ Facultate Parisiensi pag. 197: « Ex antiquis quidem temporibus, inquit, quibus eam (Galliam) monstros caruisse constat, nulla exhiberi mirum non est. Subeuntibus postea sensim in hanc quoque messem zizaniis, Gotescaleum provinciæ Rhemensis monachum, antiquos Prædestinarianorum errores renovantem damnarunt primò Germani episcopi auctore Rabano, tum Galliæ antistites auctore Hincmaro. » Si antiqui et renovati à Gotescalco Prædestinarianorum errores, ergo ante illum extitere, ac proinde seculo quinto.

Solvuntur objectiones. — Objicies 1°, contra tertiam Conclusionem: Quæ dicuntur Prædestinarianorum dogmata, ipsissimæ sunt objectiones, calumniæ et accusationes quibus Semipelagiani S. Augustini doctrinam infamabant; vera ergo non est, sed fictitia hæresis Prædestinarianæ. Ita Jansenius citato lib. 8 de Hæresi Pelagianâ. Respondeo concessio antecedente negando consequentiam: etsi enim, quod libenter fatemur, Prædestinarianorum dogmata omninò convenient cum objectionibus et calumniis quibus Massilienses S. Aug. doctrinam onerabant; inde tamen perperam infert Yprensis, fictitiam fuisse et commentitiam Prædestinarianam hæresim. Ut enim, non fictitia, sed vera et realis dici possit aliqua hæresis duo requiruntur et sufficiunt; videlicet, primò ut sit perversum dogma, et ut sint hujusce perversi dogmatis defensores; porro utrumque hic reperitur. Et 1° quidem, in iis dogmatibus quæ Prædestinarianorum fuisse dicuntur, hæresim apertam contineri, patet si revocentur hic in memoriam quæ mox recensuimus præcipua doctrinæ Prædestinarianæ placita; unde in iis dogmatibus à S. Aug. propulsandis tam strenuè laborarunt SS. Prosper et Fulgentius, ut scilicet evincerent, « talem sensum scriptis catholicis non inesse doctoris, qualem eum, qui frustra calumniantur, ostendant. » 2° Extitisse aliquos qui prædicta dogmata tanquàm vera et Augustini doctrinæ consentanea

propugnauerint, constat ex probationibus. Et verò, cum habeamus accusatorem Faustum, et Lucidum reum confitentem, et iudices episcopos in duobus conciliis Arelatensi et Lugdunensi congregatos: quid efficacius desiderari potest ut ostendatur aliquos fuisse hæresis Prædestinarianæ assertores?

Obijcies 2^o: Concilia Arelatense et Lugdunense, in quibus approbatam contendimus Fausti ad Lucidum epistolam, ficta fuere et supposita à Fausto Semipelagianorum antesignano, ut scilicet sententiæ suæ auctoritatem, et S. Aug. discipulis invidiam ejusmodi fraude conflaret; siquidem istorum conciliorum nullus quinto Ecclesiæ seculo nec tribus proximè sequentibus meminit præter Faustum; neque etiam posterioribus seculis Hincmarum, à quibus recentiores mutuati sunt quidquid de istis conciliis scripsere; ergo, etc. Ita Manguinus in Hist. Gotescalci. Respondeo 1^o, qui cum Manguino contendunt prædicta concilia à Fausto Semipelagiano ficta fuisse, Usserii temeritatem longè superare; neque enim Calvinista istarum synodorum veritatem elevat, sed hoc unum vult deceptos fuisse à Fausto Arelatenses Patres: id unum velle Usserium constat ex libro cui titulus: *Britannicarum Ecclesiarum Antiquitates*, cujus verba mox referemus. Respondeo 2^o, cum card. Noris. lib. 2 Hist. Pelag. cap. 15, immeritò prorsus ac sine ullo fundamento Faustum à Manguino tanquam insigne impostorem hic traduci; quomodo enim in re adeò clarà et omnibus perspectà, voluisset aut potuisset, doctissimo metropolitæ Leontio, universis Galliæ episcopis, imò et toti Ecclesiæ illudere? Calumniam hanc egregiè repellit loco citato eminentiss. card. his verbis: « Quis enim, *inquit*, de Fausto tantos dolos sibi persuadeat, qui coram universis Galliarum episcopis tantorum mendaciorum architectum se sistere non extimuerit? Quo animo Leontio metropolitæ doctissimo imponere ausus fuisset, quasi de remotissimis Asiæ rebus perscriberet, non verò de iis, quæ in duabus nobilissimis urbibus nudius tertius gesta fuerant? Opponit Manguinus (pergit Noris.), nusquam præter quàm in Fausti libris illarum synodorum mentionem fieri; at hoc negantis argumenti genus lubricum est. Scimus Leontium Arelatensem ex Hilarii decreto synodos Gallicanas quottannis coegisse, quarum tamen nusquam memoria extat. » Hæc eminentissimus auctor, quibus doctè ac solidè sugillat et explodit

quæ ad evincendam prædictarum synodorum Arelat. et Lugd. suppositionem congerit Manguinus.

Unum hic addo quòd etsi Faustus fuerit Semipelagianus quando suam de gestis in causà Lucidi conscripsit epistolam, non ideo fides ei deroganda sit circa factum de quo scribit ad illos qui plurimam in eà partem habuerunt; nec minùs ipsi credendum, quàm Eusebio Ariano, et Socrati Novatiano, de quorum fide in factis historicis quæ palam et apertè nemine contradicente conscripsere, nullus ambigit. Etverò, si, ut placet Manguino, tota illa historia à Fausto conficta fuisset, haud dubiè confestim in ipsum insurrexissent ac falsi accusassent ejus hostes et æmuli quos plurimos expertus est.

Obijcies 3^o: Esto præfata concilia Arelatense et Lugdunense, à Fausto supposita et ficta non fuerint, saltem negari non potest, ipsa mera fuisse Semipelagianorum conventicula, quæ proinde nullius sunt in præsentì causà auctoritatis. Ita auctor Apologiarum pro Jans. apolog. primà, pag. 197, his verbis: « Ce concile (d'Arles), ne peut avoir été qu'une assemblée de Semipélagiens, ou d'évêques trompés par un Semipélagien. » Ibid. pag. 204: « C'a été un concile de Semipélagiens. » Proband autem Jansenii Apologistæ, harumque synodorum antistites Semipelagianà hæresin contaminatos fuisse, quòd Fausti libros de Grat. et libero Arbit. Pelagianis erroribus refertos, approbaverint; idque colligunt ex posterioribus verbis epistolæ nuncupatoriæ, quâ hosce libros Leontio Faustus obtulit: « In quo quidem opusculo, *inquit*, post Arelatensis concilii subscriptionem, novis erroribus deprehensis, adjici aliqua, synodus Lugdunensis exegit. » Audis, ipsomet Fausto testante, ipsius opusculum, id est, libros de Grat. et lib. Arb. à concilio Arelat. fuisse approbatos.

Respondeo 1^o, vel ipsummet Usserium longè moderatiorem fuisse in concilia Arelatense et Lugdunense citatis Jansenii Apologistis. Namque Usserius equidem concedit, deceptos fuisse à Fausto concilii Arelatensis Patres; negat tamen illos episcopos fuisse Semipelagianos; de iis enim ita loquitur citato lib. de Antiquitatibus Britannicis, pag. 426: « Interim tamen in tot doctrinà et pietate præstantes viros, ita injuriosos esse nos non decet, ut unius versipellis vulpeculæ (Fausti videlicet) auctoritate freti, reliquiarum Pelagianæ hæreseos patronos eos fuisse credamus. » Quod ausus non est Usserius, ausi sunt Jansenii Apo-

logistæ ; nec, ut ille, religioni duxerunt, sanctum Pragmatium Augustodunensem episcopum, sanctum Patientem Lugdunensem, sanctum Claudium Bisuntinum, aliosque doctrinâ et pietate præstantes episcopos, quos huic concilio interfuisse testatur Baronius ad annum 490, Semipelagianismi insimulare.

Respondeo 2^o, cum card. Norisio loco mox laudato, non sine gravi temeritate, atque insigni calumniâ Semipelagianismi notam injuri celeberrimis episcopis quos sanctitate ac doctrinâ illustres fuisse constat. « Jansenii Apologistæ, ait eminentissimus auctor, utramque synodum habitam fuisse concedunt ; addunt tamen eas conflatas ex episcopis partim Semipelagianis, partim à Semipelagiano Fausto deceptis ; sed sine testibus hanc injuriam doctissimis ac sapientissimis Patribus inungere non ausim. Illud verisimile videtur Faustum mandati limites excessisse, dum non modò quorundam Prædestinatorum errores, ut injunctum fuerat, confutavit, verum etiam ex occasione S. Aug. de gratiâ prædestinatione doctrinam subruere conatus fuit. » Hæc Norisius.

Quod autem addunt Jansenii Apologistæ ex epistolâ nuncupatoriâ Fausti ad Leontium, nullatenus probat Semipelagianos Fausti libros de gratiâ, à Patribus Arelatensibus fuisse commendatos ; neque enim Arelatensis concilii subscriptio, de quâ hic loquitur Faustus, pertinet ad Semipelagianos ejusdem Fausti libros de gratiâ, sed ad ipsius contra errores Lucidi epistolam omninò catholicam. Ita objecta epistolæ nuncupatoriæ verba exponit card. Baronius loco mox citato : « At quænam, inquit, ita subscriptio Arelatensis concilii ? Numquid episcoporum concilium Fausti Commentarium illum (libros de grat. et libero arbitrio) subscriptione firmavit ? minimè gentium ; verum subscripsit synodus Fausti illi tantum epistolæ, quam dedit ad Lucidum presbyterum, ut hominem in errores lapsum revocaret ad catholicam fidem. » Idem tradit Binius in notis ad concil. Arelat. Et vero ex illâ ipsâ Fausti epistolâ ad Leontium, liquidò constat Fausti libros de gratiâ et libero arbitrio post synodum Arelatensem, postulante eodem Leontio, elaboratos fuisse ; nimirum, ut, quæ in illâ synodo sancita fuerant, uberiùs exponere, adeoque prædicti libri præsulum Arelatensium suscriptione comprobari non potuerunt. En verba epistolæ : « Quòd pro sollicitudine pastorali, beate papa Leonti, in con-

« demnando prædestinationis errore concilium
« summorum antistitum congregastis, univer-
« sis Galliarum Ecclesiis præstitistis. Quòd verò
« ad ordinanda ea quæ collatione publicâ doctissimè protulistis, operam infirmis humeris, curamque mandastis, parum, ut reor, tanto negotio, parum sanctæ existimationi vestræ consulistis. » Pergit ibidem Faustus : « In quo quidem opusculo (de grat. et libero Arb.), post Arelatensis concilii suscriptionem, novis erroribus deprehensus, adjici aliqua, synodus Lugdunensis exegit. » Ex quibus liquet Fausti opus post concilium Arelatense fuisse inchoatum, nec nisi post Lugdunense consummatum, ac proinde à nostro approbatum.

Attamen Faustus, ut auctoritatem operi suo conciliaret, duas epistolas, nimirum suam ad Lucidum, et Lucidi revocatoriam ambas orthodoxas et eo nomine approbatas libris suis affixit, atque etiam præfationi ad Leontium ambigua verba quæ referuntur in objectione inseruit, quibus incauti adducerentur in eam persuasionem, ut crederent ejus libros à synodo Arelatensi fuisse approbatos.

Objicies 4^o : Fausti ad Lucidum epistola, quâ damnatur Prædestinatiana hæresis, Lucidi verò libellus quo eandem hæresim dicitur ejurare, Semipelagianis erroribus scatent ; neutri ergo adhibenda est fides ; adeoque nec ex iis asserenda videtur Prædestinatianæ hæresis existentia. Respondeo negando ant. Illas enim tam Fausti ad Lucidum quàm Lucidi ad Patres Arelatensis synodi epistolas sanas esse et verè catholicas, atque duarum synodorum subscriptione probatas fuisse, testantur card. Baronius ad an. 490 ; Severinus Binius in notis ad concilium tertium Arelat. : Didacus Alvares hæresis Pelag. cap. 23 ; Malderus Antuerpiensis episcopus Anti-Syn. cap. 4, necnon Joannes Brascuellanus sacri Palatii magister in eâ ipsius censurâ quæ jam Fausti opusculo præfixa est.

Et verò quæ Yprensii Apologistæ in illis epistolis criminantur, nihil nisi specie tenus Semipelagianismi redolent, uti fusè prosequitur Antonius Deschamps lib. 2 de hæresi Jansen. disput. septimâ, cap. 4, n. 12 et sequentibus.

1^o In epistolâ Fausti anathema illud vellent : *Anathema illi, qui dicit hominem solemniter baptizatum..... et postmodum per diversa hujus mundi oblectamenta prolapsus, in Adam et originale peccatum periisse* ; quibus verbis peccati originalis existentiam, aut catholicam S. Aug. de prædestinatione gratiâ doctrinam à

Fausto percelli concludunt adversarii. Verum quam distorta sit et obliqua ista consecutio, nemo non videt; prædictum anathema, nec dogma peccati originalis, nec gratuitam prædestinationem perstringit, sed unum ex Prædestinationum articulis, quo contendebant, uti supra notavimus, in iis qui ad vitam non erant destinati, originale peccatum per baptismum deleri, unde dicebant eum qui post baptismum deliquerit, in Adam perire, et propter originis peccatum non deletum damnari; quia nempe, juxta Prædestinianos, sacramenta non prædestinatis minimè prosunt. Hic error à Gotescaleo postea renovatus fuit, teste Amolone Lugdunensi in epist. ad eundem Gotescaleum datà; et in Calvinistis tandem damnatus est à synodo Trid. sess. 6. can. 17, his verbis: « Si quis justificationis gratiam non nisi prædestinatis ad vitam contingere dixerit; reliquos verò omnes qui vocantur, vocari quidem, sed gratiam non accipere, utpote divinâ potestate prædestinatos ad malum, anathema sit. »

2. In epistolâ Lucidi hunc præsertim articulum tanquam Pelagianum traducunt: « Damno sensum illum, qui dicit, ab Adam usque ad Christum, nullos ex gentibus per primam Dei gratiam, id est, per legem naturæ, in adventum Christi fuisse salvatos, eò quòd liberum arbitrium in primo homine perderint. » Verum ista Pelagianismi nota facili negotio dissolvitur, dicendo cum Alvares, Baronio, Binio et aliis auctoribus antea citatis per *primam Dei gratiam* hic non intelligi legem naturæ præcisè sumptam, sed legem naturæ junctam cum gratiâ, quæ ex futuro Christi adventu in eam redundabat, ope cujus ante datam Moysis legem nonnulli Christum expectantes fuerunt salvati. Hunc sensum Lucidus statim exponit, his verbis: « Per rationem et ordinem seculorum, alios lege gratiæ, alios lege Moysis, alios lege naturæ, quam Deus in omnium cordibus scripsit, in spe adventus Christi fuisse salvatos; tamen ab initio mundi ab originali nexu, nisi intercessionem sacri sanguinis non absolutos. » Unde in objectis Lucidi verbis, expunctâ virgulâ, hæc verba jungenda esse meritò contendunt supra citati auctores: *Per legem naturæ in adventum Christi.*

Objicies 5. Epistola Fausti ad Lucidum in Synodo Arelatensi approbata et subscripta non fuit; et quæ in vulgatis editionibus subscriptiones leguntur, meritò censentur supposititiæ et falsæ. Namque 1. Henricus Canisius

asserit se vetustissimum manuscriptum codicem illius epistolæ Fausti ad Lucidum reperisse in monasterio S. Galli, cui subscriptiones illæ episcoporum non erant annexæ.

2. Si quis ex præsulibus synodi Arelatensis huic epistolæ subscribere debuisset, maximè Leontius Arelatensis, totius concilii præses; sed ipsius nomen cum aliis subscriptis non legitur.

3. Inter subscriptiones duo reperiuntur ejusdem civitatis Augustodunensis episcopi; porro nemo nescit canonibus cautum fuisse, ne duo eidem civitati præficerentur episcopi; ergo, etc. Respondeo 1., quidquid sit de prædictis subscriptionibus, ex Lucidi libello, constat libellum hunc exaratum fuisse juxta statuta concilii Arelatensis: non diffidentur aliundè adversarii, eandem planè esse epistolæ ac libelli doctrinam; ergo doctrina epistolæ Fausti confirmata est statutis concilii Arelatensis. Respondeo 2., negando antecedens, cujus falsitas ex antedictis abundè constat. Ad primum dico 1., Canisium loqui de unico manuscripto S. Galli, eoque, ut ipse fatetur, perturbatissimo, quippe qui Fausti epistolæ nec ipsius quidem Fausti subscriptionem annexam habeat, sed multa interserit prorsus ab instituto aliena; ac demùm post paginas plus quàm centum refert Fausti subscriptionem his verbis conceptam: *Item aliâ manu, Faustus.... subscripsi.* Nulla ergo huic inordinato codici habenda fides; sed potius standum aliis codicibus, ex quibus ante Canisium, Bibliotheca Patrum editores præfatas subscriptiones descripserunt. Dico secundò, variantes codices haud ægrè ad concordiam adduci posse, asserendo nimirum cum doctissimo Norisio, epistolam illam primum à solo Fausto subscriptam fuisse et missam ad Lucidum; cum autem Lucidus Fausto rescripsisset se eandem epistolam approbare, quò ejusdem celebrior evaderet emendatio, curavit Faustus ut aliud ejusdem epistolæ exemplar (quod apud se servaverat, ut ipse in suâ epistolâ testatur) episcoporum unâ cum Lucidi subscriptione muniretur; atque inde factum est ut in aliquibus exemplaribus sola habeatur Fausti subscriptio; in aliis verò post undecim episcopos Arelatenses Lucidi nomen subscriptum legatur. Ad secundum dico 1., non mirum quòd inter memoratas subscriptiones desit Leontii Arelat. nomen, si non in ipsâ synodo Arelatensi, uti conjicit Norisius, sed absente Leontio in alio quodam privato eorumdem episcoporum pro Basilicâ dedicandâ aut alio negotio coactorum con-

gressu, facta fuerit subscriptio. Dico 2., quofato ex MS. S. Galli quod vidit Canisius, aliorum episcoporum nomina, eodem ex aliis MSS. exedit Leontii nomen; tamen idcirco in dubium revocari debet id quod tam apertè, nemine reclamante scriptum reliquit Faustus, videlicet « Leontium sollicitudine pastoralis in « condemnando prædestinationis errore concilium summorum antistitum congregasse. » Ad tertium dico inauditum non esse ut duo episcopi eandem simul rexerint Ecclesiam, seniore nimirum sibi coadjutorem adsciscente, sicut Aug. simul cum Valerio decessore suo in Hipponensi Ecclesiâ episcopus fuit.

Objicies 6. : Prosper Tyro, auctor libri qui dicitur *Prædestinatus*, Hincmarus et alii nonnulli supra citati, asserunt hæresim Prædestinationam tempore S. Aug. exortam fuisse, quam Cælestinus S. pontifex repressit, quod tamen nos antea negavimus; quare igitur iis auctoribus in uno fidem habemus, ac detrahimus in altero? Præterea synodus Araus. secunda subdubitanter de Prædestinationis loquitur; sic enim de iis habet can. 25 : *Si qui sunt (Prædestinatiani) ... cum omni detestatione illis anathema dicimus.* Denique S. Prudentius Trecensis episcopus lib. contra Joan. Erigenam cap. 4, et Lugdunensis Ecclesia lib. contra eundem cap. etiam 4, testantur se nec legisse, nec audivisse, an extiterit unquam hæresis Prædestiniana; imò addunt hos falsos hæreticos esse ipsosmet S. Aug. discipulos, quos calumniabantur Semipelagiani, quasi contenderent quosdam esse ad malum divinâ potestate prædestinatos.

Respondeo ad primum auctores citatos ex fide veterum monumentorum referre quosdam extitisse Prædestinatianos hæreticos; quare his scriptoribus fidem hæc in parte habemus; at contra fidem et auctoritatem eorundem monumentorum tradunt tempore SS. Prosperi et Hilarii extitisse hæresim Prædestinationam, unde ipsos in eo deserimus. Ad secundum, non negat Araus. synodus antea extitisse Prædestinationam hæresim; sed dubitat, et quidem meritò, utrùm eo tempore quo celebrata fuit anno 529, existerent aliqui Prædestinatiani, siquidem jam ab anno circiter 475, Lucidus errores suos deposuerat, nullusque post ipsum ante Gotescalem eadem hæresi contaminatus commemoratur; scilicet, uti observant Malderus, Baronius, Binius, aliique auctores citati, hæresis illa à paucis propugnata, brevi compressa evanuit. Ad tertium,

in rebus facti, fides potius est habenda coætaneis auctoribus, quàm iis qui longè post vixere. Porro Faustus et Lucidus ea narrant quorum oculati fuerunt testes quinto Ecclesiæ seculo; Prudentius verò et auctor qui sub nomine Ecclesiæ Lugdunensis scripsit, nono duntaxat floruere Ecclesiæ seculo. Adde quòd cum hæresis illa, ut mox diximus, brevi evanuerit, mirum videri non debet, quòd ignota nonnullis fuerit nono seculo.

Objicies ultimò cum auctore Bibliothecæ Eccles. seculo quinto ubi de Fausto : Equidem, inquit, negari non potest quin reipsâ congregatum fuerit concilium Arelatense contra Prædestinatianos, ibique approbata sit epistola Fausti, et Lucidus compulsus ad retractationem emittendam; inde tamen inferri nequaquam potest, verè extitisse Prædestinatianorum hæresim. Hoc unum duntaxat colligi potest, tunc temporis efferbuisse dissidia et contentiones de gratiâ, atque in disputationis æstu, ut fieri assolet, utramque partem nonnihil excessisse, et adversariis suis criminandi ansam præbuisse; qui enim S. Aug. dogmata propugnabant, ii non satis cautè aliquando loquebantur, sicut non sine fundamentò Prædestinianorum errores ipsis tribuebantur; alii ex adverso, cum S. Aug. doctrinam impeterent adversariorum suorum accusationibus sese objiciebant; hinc factum est, ut unaquæque dissidentium pars alteri hæresim affingeret; undè non mirum si nonnulli episcopi in synodum coacti, Lucidum tanquàm Prædestinianum ad errorem emendandum adgerint, quamvis reipsa hæreticus ille non foret. Ita fermè Bibliothecæ auctor locolaudato.

Respondeo totam hanc objectionem gratis omninò confictam, ex antedictis nullo negotio dissolvi posse; præsertim verò momentis quibus utitur Norisius citato lib. 2 de hæres. Pelag. cap. 15, quibus addo breve hoc ratiocinium : Vel Lucidus nihil affirmavit, quàm quæ dicebant cæteri qui doctrinam S. Aug. tuebantur; vel aliquid aliud asseruit et propugnavit. Prius dici non potest; quomodo enim non reclamassent veri S. Aug. discipuli, nec Lucidi patrocinium suscepissent? Posterius autem si dicatur, profectò causam obtinuimus : hoc unum siquidem volumus, nempe Lucidum ideò rectè accusatum fuisse, quia à veris S. Aug. defensoribus discesserat, atque vel ex imperitiâ, vel ex præpostero propugnandæ Augustinianæ doctrinæ studio, in Prædestinatianos errores impegerrat.

Quæres 1^o, quænam fuerit illa synodus Arelatensis quæ Fausti epistolam approbavit. Respondeo, synodum illam fuisse tertiam Arelatensem. Nimirum prima apud Arelatem synodus celebrata fuit tempore Sylvestri papæ; secunda, de cujus tempore, ut observat Sirmundus, nihil omnino exploratum est, probabiliter habita fuit sub Leone Magno anno circiter 451; certè synodum hanc antiquiorem esse illâ ætate quâ Faustus jam episcopus Regiensem administrabat Ecclesiam, constat ex canonibus 10 et 11, quibus præscribitur penitentia iis qui fidem in persecutione negabant; tertia Arelatensis synodus ea est de quâ hic agitur quæ Fausti epistolam approbavit circa annum 475.

Quæres 2^o, quæ fuerit synodus ad quam Lucidus suam scripsit epistolam revocatoriam præcedentium errorum. Respondeo synodum illam habitam fuisse Lugduni paulò post synodum Arelatensem, tempore Patientis, Lugdunensis episcopi. 1^o Sic innuit Faustus in suâ præfatione nuncupatoriâ suorum librorum ad Leontium, in quâ testatur quomodo post concilii Arelat. subscriptionem cum adornaret opusculum, in quo referenda et ordinanda susceperat quæ in Arelatensi concilio à Patribus doctissimè relata fuerant, et novi postea errores deprehensi fuissent, Lugdunensis synodus voluerit illos eodem in opusculo confutari; adeoque exegit ut opusculo huic, quod tunc ipse meditabatur, adjiceret aliqua in concilio Arelatensi minimè pertractata. 2^o Sidonius Apollinaris lib. 9, epist. 5, conceptis verbis loquitur de quâdam synodo suo tempore celebratâ in civitate Lugdunensi ad dedicandam Ecclesiam, quam de novo magnis sumptibus extruxerat S. Patiens; quâ in synodo declarat Faustum coram Patribus congregatis sacram habuisse concionem. Patet itaque post synodum Arelatensem eodem ferè tempore habitum fuisse concilium Lugdunense; quo quidem in concilio oblata, lecta et approbata fuit revocatoria Lucidi epistola, seu ipsius emendationis libellus. 3^o Leve omnino est, et nullo negotio exsufflari potest quod ad elevandam hujus synodi veritatem opponunt adversarii. Aiunt huic concilio non præfuisse Patientem Lugdunensem; præfuisset autem si in suâ civitate habita fuisset synodus. Verùm præterquàm quòd olim in subscriptionibus, ut omnes nòrunt, constanter observatus non fuit ordo sive dignitatis, sive consecrationis, Leontius qui primus nominatur in epistolâ Lucidi fuit

in Galliis sanctæ Sedis vicarius, antiquiorque metropolitano; unde non mirum si toti præfuerit concilio.

Dissertatio quinta.

DE PRÆDESTINIANIS NONI SEculi.

Ut graves de Prædestinarianis noni seculi controversiæ enucleatè ac dilucidè pertractentur, placet præsentem disputationem in quinque capita partiri; 1^o agemus de Gotescalco; 2^o de scriptoribus illius ævi in causâ ejusdem Gotescalci; 3^o speciatim de Ecclesiâ Lugdunensi; 4^o de concilio Valentino; 5^o denique, de omnibus aliis conciliis eodem nono seculo habitis.

CAPUT PRIMUM.

De Gotescalco.

Circa Gotescaleum tria inquirenda. Primum, quis fuerit Gotescaleus, seu contracta ipsius historiæ delineatio. Secundum, an sopitam Prædestinarianorum hæresim, nono seculo exsuscitaverit. Tertiò, an in errore pertinax obierit.

ARTICULUS PRIMUS.

Contracta historiæ Gotescalci delineatio.

Quæ ad historiam Gotescalci spectant præcipua capita ab anno 846 ad annum 861 concluduntur, quæ quidem hic leviori manu exhibebimus. 1^o Itaque Gotescaleus nobili apud Saxones ex stirpe oriundus, vitam monasticam professus est in Orbacensi monasterio diœcesis Suessionensis. A *Rigbordo* Rhemensi chorepiscopo præbyter ordinatus fuit versùs annum 846, idque irregulariter, inscio nimirum Rothado suæ civitatis, videlicet Suessionensis episcopo. 2^o Anno 847 Romam profectus est sancta invisurus, ut aiebat, loca; deinde pergens in Dalmatiam Pannoniamque, venit tandem apud Longobardos, ibique apud comitem Eberardum mansit. Hic de prædestinatione sive ad vitam, sive ad mortem disseruit cum Nottingo Veronensi episcopo, qui perversâ Gotescalci doctrinâ commotus, ad Rabanum Moguntinum episcopum de illâ scripsit. Contra nefandum dogma librum exaravit Rabanus, quem direxit ad Nottingum, et epistolam ad Eberardum ut Gotescaleum sciolum monachum expelleret. Scriptis Rabani adhæsit Eberardus, atque Gotescaleum domo suâ discedere coegit. 3^o Gotescaleus expulsus ex Italiâ in Germaniam pertransiens, Moguntiam audacter venit

anno 848; professionem suam edidit de geminâ prædestinatione, quam synodo circa calendas octobris ejusdem anni ibidem congregatæ obtulit, unâ cum libello in quo Rabanum velut Semipelagianum traducebat. Examinatis in synodo Gotescalei scriptis, ipse præsens auditus, convictus et damnatus tanquàm hæreticus, atque ad Hinemarum Metropolitam suum remissus est, ut in monasterio inclusus jam nullos posset pravis suis erroribus pervertere fideles. 4^o. Hinemarus Rhemorum præsul accepto Gotescalco, cum monacho egit ut cum ad sanioiorem reduceret sententiam; ast conatu frustraneo et casso; quod videns Hinemarus, illum ad concilium Carisiacum agente Carolo Calvo Francorum rege anno 849, celebratum, judicandum adduxit. Gotescalco auditus nihil dignum ratione vel dixit, vel interrogatus respondit, sed ut abreptitius in singulorum contumelias prorupit. Itaque inventus hæreticus, sicut et in Moguntinâ synodo, atque incorrigibilis, honore presbyterali abjectus est, et pro suâ irrevocabili contumaciâ secundum Agathenses canones et Regulam sancti Benedicti virgis cæsus in ergastulo monasterii Altivillarensis reclusus est. 5^o. Gotescalco in carcere recluso permisit Hinemarus, ut suam ederet fidei professionem; si fortè ad meliorem mentem reversus, ejuratis erroribus è carcere dimitti, ac communioni restitui posset. Duplicem ille confessionem edidit, breviorē unam, prolixiorē alteram; in utrâque, breviori præsertim, errorem suum obtegere ac dissimulare conatur, adhibitis quibusdam ambiguis verbis, quæ si in se simpliciter et ad corticem præcisè sumantur, nihil nisi catholicum sonare videntur. Atque hinc origo discordiarum et contentionum quæ tunc temporis in Galliis occasione Gotescalei exortæ sunt. Alii namque qui de ejus sententiâ ex fidei professionibus judicandum arbitrabantur, pro illo acriter decertabant; ita Ratramnus, Corbeiensis monachus, Prudentius, Trecentensis episcopus, Remigius Lugdunensis, etc. Alii verò quibus hominis fraudes perspectæ erant, captiosis ipsius ac ambiguis verbis minimè decepti, stylo graviore illum insectati sunt; ita Hinemarus, Sabanus, Amolo, cæterique de quibus infra.

De moribus Gotescalei multa passim occurrunt apud Rabanum, Amolonem, Nottingum, aliosque scriptores; at nihil expressius eam in rem his Hinemari verbis in epist. ad Nicolaum primum; « Habitu monachus, mente ferinus, « quietis impatiens, et vocum novitate delec-

« tans, ac inter suos mobilitate noxiâ singula-
« ris, de omnibus quæ in his regionibus per-
« versè tunc temporis sensa cognoverat, quæ-
« dam sibi elegit capitula, ut novitate vocum
« innotesci valeret; utque simplicium et de-
« ceptorum sensus pervertere, et magistri no-
« men usurpando post se discipulos trahere,
« etc... atque è monasterio irregulariter exiens,
« peragratis regionibus plurimis exitiosa se-
« mina sator pessimus seminavit. » Ili sunt
nativi colores quibus Gotescalei mores et indo-
lem graphicè depingit Hinemarus.

ARTICULUS II.

*An extinctam Prædestinationum hæresim re-
novaverit Gotescalco.*

Negant post Usserium Jansenius, Manguinus et auctor Apologiarum pro Jans. locis supra citatis. Affirmant card. Noris. lib. 2 Hist. Pelag. cap. 15 et sequent.; Mabillonius ad quartum secul. Benedict. parte secundâ pag. 31; Sirmundus de hæres. Prædest.; Natalis Alex. in Hist. Eccles. seculi noni, dissert. quartâ; Antonius Deschamps de hæres. Jansen. lib. 1, disput. 7, cap. 6, et lib. 2, disput. 7, cap. 2, alique; cum quibus sit

CONCLUSIO. Gotescalco diu sopitam Prædestinationum hæresim seculo nono, in Galliis regnante Carolo Calvo exsuscitavit.

Probatur 1^o auctoritate Rabani Moguntini archiepiscopi, cui, ut testantur Sixtus Senensis, Trithemius et alii, neminem parem eo seculo peperit Germania. In opusculo De Prædestinatione ad Nottingum, de Gotescalco loquens, hæc habet: « Convenit inter nos,
« ut è divinis Scripturis, et de orthodoxorum
« Patrum sententiis, aliquod opusculum con-
« ficerem, ad convincendum errorem eorum,
« qui de Deo bono et justo tam nequiter sen-
« tiunt, ut dicant ejus prædestinationem facere,
« quòd ne homo ad vitam prædestinatus pos-
« sit in mortem incidere, nec ad mortem præ-
« destinatus, ullo modo se possit ad vitam re-
« cuperare; cùm auctor omnium rerum et
« conditor naturarum Deus, nullius ruinæ at-
« que interitus causa sit, sed multorum origo
« salutis. » Eundem Prædestinationum erro-
rem Gotescalco exprobrat in epist. ad Eberardum comitem.

Probatur 2^o ex synodicâ concilii Moguntini ad Hinemarum Rhemensem epistolâ, cujus hic tenor est: « Notum sit dilectioni vestræ, quòd
« quidam gyrovagus monachus, nomine Go-
« tescalco, qui se assertit in vestrâ parochiâ

ordinatum, de Italiâ venit ad nos Moguntiam, noxiam doctrinam de prædestinatione Dei introducens, et populos in errorem mittens, dicens quòd prædestinatio Dei sicut in bono sit, ita et in malo; et tales sunt in hoc mundo quidam, qui propter prædestinationem Dei quæ eos cogat in mortem ire, non possunt ab errore et peccato se corrigere; quasi Deus eos fecisset ab initio incorrigibiles esse, et pænæ obnoxios in interitum ire. Hanc ergò opinionem nuper in synodo apud Moguntiam habitâ ab eo audientes, et incorrigibilem eum reperientes.... decrevimus eum cum perniciosâ suâ doctrinâ damnatum mittere ad vos, quatenus eum recludatis in vestrâ parochiâ unde primùm recessit, et non sinatis eum amplius errorem docere et seducere populum christianum. » Hucusque præsules Moguntini.

Hoc in loco habemus 1º errores Gotescalci circa prædestinationem clarè expositos. 2º Eisdem errores, non ex solo rumore, sed ex propriâ ipsius Gotescalci confessione, Patribus Moguntinis fuisse perspectos. 3º Ex his etiam constat, Gotescalcum in synodo Moguntinâ verè damnatum fuisse, non autem duntaxat repulsum, ut falsò scribit Maurinus.

Probatur 3º ex Hincmari ad Nicolaum I epistolâ, in quâ Gotescalci errores ipsi exponit his verbis: « Dicit, quod et veteres Prædestinatiani dixerunt, quoniam sicut Deus quosdam ad vitam æternam, ita quosdam prædestinavit ad mortem æternam.... Dicit, quod et veteres Prædestinatiani dixerunt, quoniam non vult Deus omnes homines salvos fieri, sed tantum eos qui salvantur.... Dicit, quod et veteres Prædestinatiani dixerunt, quòd non pro omnium salute Dominus noster J. C. sit crucifixus et mortuus, sed tantum pro his qui salvantur. » Alios Gotescalci errores ibidem prosequitur Hincmarus; ubi observanda est comparatio quam instituit Gotescalcus prædestinationis ad supplicium, cum gratuitâ electione ad vitam; ex hac enim comparatione sequitur Deum in mente Gotescalci per suam prædestinationem in reprobis, causam esse damnationis et malorum meritorum quæ ducunt ad damnationem, sicut et in electis est causa salutis et bonorum operum quæ ad beatitudinem conducunt.

Probatur 4º ex synodo Carisiacâ primo anno 849, in quâ sicut et in Moguntino concilio Gotescalcus *inventus est hæreticus et incorrigibilis,*

adque ideirò ut improbus virgis cæsus, ergastulo est reclusus. Ita summam continetur in synodicâ hujusce synodi sententiâ. Idem etiam refert Hincmarus in epist. ad Nicolaum, et lib. de Prædesti. cap. 2.

Probatur 5º ex Amolone Lugdunensi archiepiscopo, cujus in præsentî causâ auctoritas maximi est momenti; nihil quippe ipsum latebat eorum quæ in Germaniâ, atque apud Carisiacum gesta fuerant; scripta quoque Gotescalci non perfunctoriè, sed accuratè perlegerat ac discusserat, ut ipsemet disertè testatur citatâ epistolâ; porrò sanctissimus ille antistes, cui res et sensus Gotescalci adeò erant noti, conceptis verbis affirmat ipsum immaniter de prædestinatione reproborum in malum sensit: « Quarto loco, inquit, displicet nobis valdè, quia tam durè et indisciplinatè et immaniter de divinâ prædestinatione sentis et loqueris in damnatione reproborum, ut omnes illi.... ita sint divinitus ad interitum prædestinati, ut eorum prorsus nullus aliquando potuerit, nullus possit esse salvus; quod sentire et dicere, quid aliud est quàm in Deum graviter, et horribiliter blasphemare; si illis ejus prædestinatio hanc necessitatem irrevocabiliter imposuit, ut omninò quod ad salutem suam proficeret, operari non possint. » Et paulò post: « Quinto loco non minus detestamur et horremus, quòd ita exarsisti adversus eos qui æterno interitu sunt digni, ut dixeris eos tam irrevocabiliter et incommutabiliter perditioni esse prædestinatos, sicut Deus ipse incommutabilis et inconvertibilis est. » Alia quoque erroris Prædestinatiani capita Gotescalco ibidem exprobrat idem illustrissimus archipræsul, ac præsertim quòd asseruerit *sacratissima Ecclesiæ sacramenta, perfunctoriè et frustratoriè concedi omnibus, qui post perceptionem eorum pereunt.* Extat citata epistola tom. 14 Bibliothecæ Patrum edit. Lugd. et apud Sirmundum qui primùm eam edidit, tom. 2, pag. 1145.

Probatur 6º ex secundâ synodo Carisiacâ anno 853. Non satis habuit synodus illa errores Gotescalci proscribere, sed quatuor insuper edidit capitula totidem præcipuis Gotescalci erroribus directè opposita; primum spectat prædestinationem; alterum, libertatem; tertium, voluntatem Dei salvandi omnes homines; quartum, mortem Christi pro salute omnium.

Probatur 7º ex consensu catholicorum doctorum, qui ante Jansenium de Gotescalco mentionem habuerunt; ex iis nonnulli Gote-

scæci errores à Calvino excitatos queruntur ; ceteri ipsum hæreticis annumerant. Ita præter auctores jam citatos, Sigebertus in Chronico ad annum 849 ; Annales Bertiniani ad eundem annum ; Flodoardus in Hist. Ecclesiæ Rhemensis lib. 5 ; Trithemius in Chronico Hirsaug. ; Genebrardus in Chronologiâ, cum pluribus aliis antiquioribus annalium et chronorum scriptoribus ; quibus suffragantur Baronius ad annum 848 ; Severinus Binius in notis ad concil. Mogunt. II, sub Rabano ; Alvarez de Origine Pelag. hæres. cap. 30 ; Serarius lib. hist. Mogunt. cap. 33 ; Cocceius tom. 2, lib. 4, art. 5 ; Du Vallius in notis ad lib. Eccles. Lugd. contra Scotum, cum pluribus aliis quos recenset Antonius Deschamps de hæres. Jansen. lib. 2, disp. 8, cap. 2, 3, etc. Ex heterodoxis idem sentiunt Magdeburgenses centuriâ 9, cap. 5, 9, 10 ; Gerardus Vossius in hist. Pelag. lib. 7, parte 4, etc.

Contra tam constantem et apertam omnium seculorum ac testium fidem, velle cum Usserio, Jansenio et Manguino, Gotescaleum, non modò ab inustâ erroris et hæreseos notâ eximere, verùm etiam, ipsum tanquàm fidelissimum Augustinianæ doctrinæ interpretem, intrepidum gratiæ divinæ defensorem exhibere, quantæ sit temeritatis, nemo non videt.

Solvuntur objectiones. — Objicies 1^o cum Manguino : Synodus Moguntina, placitum regium potius fuit quàm vera synodus ; infirma ergo et nullius roboris probatio ex concilio Mogunt. deducta. Respondeo cum card. Norisio et Natali Alex. locis antea citatis, levem esse hanc Manguini exceptionem ; simul quippe conventus ille placitum regium, et synodus fuit ; etenim in hujusmodi conventibus, ut rectè ibidem observant prædicti auctores, juxta temporum illorum ac præcedentium morem, et de rebus religionis, et de negotiis reipublicæ decreta condebantur.

Objicies 2^o cum eodem Manguino : Scripta quæ vidit Amolo non fuere genuina, sed ab Hinemaro conficta et ad Amolonem fraudulenter missa, ut eum facilius in suas partes contra Gotescaleum adduceret ; nullius ergo roboris est probatio ex laudatâ Amolonis ad Gotescaleum epistolâ. Respondeo cum iisdem Noris. et Alex. præterquàm quòd Hinemaro tantum mendacium temerè affingitur ; disertè testatur Amolo laudatâ epistolâ, se non ab uno, sed à multis, et diversis temporibus ad se perlata fuisse varia Gotescalci scripta, perversamque ipsius doctrinam sibi innotuisse dum adhuc

esset in partibus Germaniæ ; hoc est, antequàm Gotescaleus à Rabano ad Hinemarum missus fuisset ; incredibilis ergo est illa fraus quam Hinemaro Manguinus exprobrat. Audiat Lugdunensis antistes laudatâ epistolâ : « Cum adhuc esses in partibus regni Germaniæ, audivimus... quòd novitates sereres, et « stultas ac sine disciplinâ quæstiones ventila- « res. Deinde perlata est etiam ad nos studio « ecclesiasticorum virorum quædam scriptura « tua, in quâ apertissimè... quid sentiret sive « doceres multipliciter executus es. Nunc quo- « que accepimus et alia scripta tua non parva... « in quibus de prædestinatione divinâ quid « teneas diligenter explicare curasti. Ita factum « est ut ex utrâque scripturâ tuâ, sive quam « per alios, sive quam te mittente accepimus, « plenissimè nobis cognoscere videamur in « quibus quæstionum periculis fluctuet, vel « quod nimis dolendum est, naufragetur sensus « tuus. » Hæc Amolo, quibus ista et aliæ Manguini objectiones faciliè solvi possunt.

Objicies 3^o : Non potest melius ac tutius Gotescalci mens et doctrina dignosci, quàm ex fidei confessionibus ab ipso editis ; atqui in illis confessionibus errores Prædestinationarum nullatenus docet ; neque enim affirmat Deum ita prædestinare ad poenam, ut simul ad culpam prædestinet, sed è contra asserit prædestinationem ad poenam ex præscientiâ, seu prævisione malorum meritorum ; ergo, etc. Respondeo 1^o, etsi concederetur, (quod falsum esse mox evincemus), catholicas esse fidei professiones quas urgente Hinemaro edidit Gotescaleus ; exinde hoc unum colligi posset, nimirum ipsum tandem resipuisse, non verò nusquàm fuisse Prædestinationarium ; ac proinde nihil adversus thesim. Respondeo 2^o negando maj. Namque nemo nescit hoc semper familiare fuisse hæreticis, ut ambiguas fidei professiones emitterent, quibus errores suos dissimulare, et Catholicorum censuris seipsos subtrahere conarentur. Hoc inprimis ab Arianis, Nestorianis, aliisque recentioribus hæreticis factitatum legimus ; hos imitatus Gotescaleus pari fraude usus est ; quod ex nostris probationibus constat.

Itaque melius et tutius de sententiâ Gotescalci judicandum est ex illustrissimis antistibus Rabano, Hinemaro, Amolone, etc., qui eum disputantem audierant, et varia ejus scripta accuratè perlegerant, atque ex conciliis in quibus auditus, convictus et damnatus est ; quàm ex ipsius captiosis, ambiguis et plerumque vi

extortis fidei confessionibus. Porro præsules citati et concilia Moguntinum, Carisiacum primum et secundum testantur Gotescaleum Prædestinationis erroribus fuisse infectum; ipsius autem confessiones fidei ambiguae erant et vi extortae, prima à concilio Moguntino; secunda et tertia emissae dum detineretur in carcere synodica concilii Carisiaci sententiâ; ergo, etc. Respondeo 5º negando min. Nedum et professionibus Gotescalci orthodoxa illius fides comprobari queat, quinimò contrarium planè evincitur. Dùm enim se tanquam Prædestinationis hæreseos reum traduci videret; profectò si tali errore contaminatus non fuisset, apertis ac minimè ambiguis verbis declarasset, se ad penas *duntaxat*, non ad culpam admittere prædestinationem; reprobos liberè omninò et absque ullâ necessitate peccare; Deum velle et Christum mortuum esse pro aliorum quàm prædestinatorum salute; hæc, inquam, et alia similia dixisset Gotescaleus, noverat enim se iis præsertim de causis in conciliis Moguntino et Carisiaco damnatum; atqui tamen nihil usquam ex iis asseruit, nequidem in breviori confessione in quâ errorem suum magis dissimulat; ergo, etc.

Etverò eam prædestinationem propugnabat Gotescaleus, ex quâ sequitur Deum velle solos electos salvos fieri et Christum pro iis solis mortuum esse; atqui talis prædestinatio antecedens est et necessitans ad pœnam et ad culpam. Namque si Deus nullatenus reproborum salutem velit, nec pro iis Christus sit crucifixus; divinæ gratiæ auxiliis ad salutem consequendam verè sufficientibus omninò carebunt, et ideo ad peccandum necessariò adiguntur; ergo, etc.

Ex iis patet captiosam fuisse et subdolan utramque fidei professionem quam edidit Gotescaleus; neque ex iis solis, ut vult Manguinus, de ejus doctrinâ judicandum esse.

Objicies 4º: Ille non fuit prædestinationis impietatis reus, cujus patrocinium susceperunt scriptores non pauci, pietatis et scientiæ laude conspicui; atqui talis fuit Gotescaleus; ergo, etc. Resp. dist. maj.: Si illius patrocinium ita susceperunt, ut ejus doctrinam in rei veritate propugnarent, concedo; si errore facti duntaxat, et ex solâ commiseratione, nego. Porro qui pro Gotescalco scripsêre, ii non in rei veritate ejus sententiam propugnârunt, sed dolosis illius confessionibus delusi, putârunt eum ad pœnam duntaxat ex prævisione demeritorum prædestinationem admittere; haucque ejus

opinionis partem vindicandam sibi proposuerunt. Undè mera fuit de nomine quæstio inter scriptores catholicos illius ævi. Verùm de illis auctoribus mox dicemus.

ARTICULUS III.

An errores suos tandem revocaverit Gotescaleus?

Respondeo Gotescaleum in erroribus pertinacem obiisse. Ita testatur Hincmarus lib. de non trinâ Deitate, his verbis: «Et cum jam finis ejus appropinquaret, fratribus qui aderant ut à pravo suo sensu et perversâ sententiâ se revocaret, et communionem sacram perciperet suadentibus, respondit, à suo sensu et sententiâ revocare, et communionem per auctoritatem non posse accipere, sicque indignam vitam dignâ morte finivit, et abiit in locum suum.»

CAPUT II.

De scriptoribus noni seculi in causâ Gotescalci.

Ii præcipui fuêre nono seculo scriptores in causâ Gotescalci. 1º Rabanus archiepiscopus Moguntinus.... 2º Hincmarus archiepiscopus Rhemensis.... 3º Amolo itidem Lugdunensis archiepiscopus 4º Pardulus Laudunensis episcopus, cui Carolus provinciam dedit expendendi simul cum Hincmaro libros Lupi et Ratramni.... 5º Amalarius Diaconus Trevirensis, cui eadem Lupi et Ratramni scripta refellendi curam imposuit Hincmarus.... 6º Scotus Eri-gena socius Amalarii in confutandis iisdem libris.... 7º Prudentius Trecensis episcopus.... 8º Lupus Ferrariensis, qui et Servatus nuncupatur... 9º Ratramnus Corbeiensis monachus... 10º Florus Ecclesiæ Lugdunensis diaconus.... 11º Remigius ejusdem Ecclesiæ post Amolonem successor.... 12º Haymo Halberstatensis.

Certum est sex priores auctores mox recensitos personam et doctrinam Gotescalci directè impugnasse. Id constat, tum ex adversarioum consensu; tum ex ipsâ inspectione scriptorum quæ ab ipsis eâ de causâ exarata sunt; tum denique quia prædictorum auctorum eadem est doctrina ac synodorum Carisiacarum; porro in synodis Carisiacis impugnata sunt dogmata Gotescalci, ipsiusque persona; ergo, etc.

Itaque de aliis tantum sex auctoribus quæstio hic movetur, et quæritur an faverint 1º personæ Gotescalci; 2º an ipsius etiam doctrinæ.

CONCLUSIO PRIMA.—Sex posteriores auctores errore facti nonnihil patrocinati sunt personæ Gotescalci.

Probatur. De Prudentio, Ratramno, et Lu-

po, res est extra dubium, ut constat ex eorum scriptis. Quod autem spectat Florum et Remigium, idem constat, si, ut vulgaris fert opinio, auctores sint librorum contra Scotum Erigenam, de tribus epistolis, et de tenendâ veritate, de quo quaeremus cap. sequenti; his enim in libris errore facti vindicatur persona Gotescalci. De Haymone Halberstatensi idem colligitur ex Annalibus Bertinianis, et ex Mabillonio tom. 1 Analectorum.

CONCLUSIO SECUNDA.— Prædicti sex auctores erroribus Gotescalci nequaquam favent.

Probatur 1^o quia fatentibus adversariis, non alia est horum auctorum sententia, quam Ecclesiæ Lugdunensis et synodi valentinæ; atqui ex dicendis sequentibus capitibus 3 et 4, constabit nec Ecclesiæ Lugdunensem, nec Valentinam Synodum fuisse erroribus Gotescalci, sed ipsius duntaxat personæ; ergo, etc.

Probatur 2^o ex disertis Rabani epist. ad Hincmarum, Hincmari lib. de Prædest. c. 15; Amolonis epist. ad Gotescaleum, aliorumque Gotescalci adversariorum testimoniis. Hi clarè tradunt Gotescalci patronos in eo palmari dogmate ab ipso dissensisse, quòd negarent Deum esse auctorem peccati, vel compellere seu necessitare aliquem ad peccandum. Id de Prudentio expressè testatur Rabanus epist. mox laudatâ ad Hincmarum, his verbis: «*Prudentius Tricassinæ civitatis episcopus ad vos et ad Pardulum scribens, aliquando sensui nostro concordat, ubi dicit peccati auctorem Deum non esse, nec aliquem ad peccandum compellere.*»

Audis vel ipsum Prudentium inter Gotescalci fautores ardentiorum, ab ipso discrepasse circa illud perversum prædestinationis dogma, omnium aliorum ejus errorum fons est et origo?

Probatur 3^o perspicuis prædictorum auctorum testimoniis, quæ ex ordine paucis hic referemus. Primus occurrit Prudentius Trecensis episcopus. Is de quæstionibus à Gotescalco motis varia edidit opuscula; in iis nonnullas equidem loquendi rationes Gotescalci usurpat; ast doctrina ipsius, Prædestinarianis erroribus directè adversatur; quod variis momentis evincitur. 1^o Epistolâ ad Hincmarum et Pardulum, circa annum 849 exaratâ, duplicem distinguit prædestinationem, unam electorum ad gloriam, alteram reproborum ad ignem; hancque nonnisi post prævisa demerita fieri decernit: «*Impios prædestinavit, inquit cap. 3, non ut peccarent, sed ut propter peccatum pœnis perpetuis interirent; prædestinavit...*

«*non ad culpam, sed ad pœnam; non ut malum quoddam vellent, sed ut propter malum, quod volentes facerent, eos pœna semper piternâ justè damnaret.*» 2^o Ibidem docet, aliis quàm prædestinatis gratias ad salutem, saltem mediâtè sufficientes conferri; proindeque Deum velle conditionatè eos salvos fieri.... 3^o Rursus ibidem tradit, Christum pro omnibus fidelibus mortuum esse, ipsisque fructum mortis ejus per baptismum et cætera Sacramenta applicari; porrò tria hæc toto cœlo distant à dogmate prædestinariano. 4^o Idem Prudentius anno 851 contra Scotum Erigenam librum conscripsit de *Prædestinatione*: in eo, capitibus 4, 5 et 11, errores Gotescalci execratur, quamvis, errore facti, nullam esse, nec usquàm fuisse hujusmodi hæresim contendat... 5^o Aduit anno 853 secundæ synodo Carisiacæ, ipsiusque capitulis subscripsit, teste Hincmaro lib. de Prædest. cap. 21 et 26. Ex his patet, nedum Gotescalci erroribus faverit Prudentius, imò potius ipsis adversatum fuisse.

Quæ autem de morte Christi pro solis fidelibus, et de voluntate Dei pro solis electis tradit Prudentius in appellatis opusculis, haud ægrè intelligi possunt; ut observat Nat. Alex. in Hist. Eccles. noni seculi cap. 3, art. 16, de voluntate absolutâ et consequenti, et de efficaci morte Christi. Scilicet, nonnulli auctores noni seculi, ut evincemus capite sequenti, ubi de sententiâ Ecclesiæ Lugdunensis, nomine voluntatis divinæ simpliciter et sine addito, solam intelligebant voluntatem absolutam et consequentem; in idæâ autem mortis et redemptionis Christi, iidem includebant efficacem applicationem fructus et meritorum ejusdem mortis; quæ quidem applicatio primùm fiebat per ipsum fidei donum. His duobus semel statutis, non mirum, si eorum plerique, etsi aliundè ab erroribus Gotescalci alieni, asseruerint Deum velle solos electos salvos fieri; et Christum pro solis fidelibus mortuum esse.

Eodem anno 853, paulò post subscripta capitula Carisiaca, congregatis episcopis ad electionem Aenæ Parisiensis episcopi, tractoriam misit Prudentius ad Venilonem archiepiscopum Senonensem, et coepiscopos, in quâ ex infirmitate se excusans de absentia, quatuor proponit capitula ab episcopo eligendo subscribenda, si velit suam ab ipso confirmatam et approbatam electionem videre. Primum est de necessitate gratiæ ad singulos actus bonos. Secundum, de geminâ prædestinatione. Tertium, de morte Christi pro omnibus fidelibus tan-

tum. Quartum, de voluntate Dei circa salutem electorum duntaxat. Hinc inferunt nonnulli, Prudentium tandem patrocinatum fuisse Gotescalci erroribus, atque Carisiaca capitula oppugnasse quibus paulò ante subscripserat. Verum falsa est illatio.

Duplex siquidem extat sententia circa doctrinam in his quatuor capitulis expressam. Prima est Natalis Alex. Hist. Eccl. noni seculi disput. 5. parag. 9; Antonii Deschamps de hæres. Pelag. lib. 2, disput. 7, cap. 3; Du Vallii et aliorum qui censent capitula Prudentii Carisiacis synodis, non re, sed verbo tantum adversari. Ac de primo quidem capitulo, quod est de gratiâ et lib. arb. res est per se certa: quod enim hic decernit Prudentius, iisdem penè verbis sanciverat Carisiaca synodus, ut constat ex collatione utriusque textus. Secundi capituli, quod est de geminâ prædestinatione, duplex est pars; in primâ parte omnino consentit cum Carisiacâ synodo; in postremâ, dissonantia est de verbo, non de re; neque enim Carisiaca synodus doctrinam Gotescalci impugnans, negat propriè prædestinationem ad poenam, sed duntaxat prædestinationem ad culpam. Tertium intelligendum esse de voluntate absolutâ, fateri debent adversarii, aut ipsis solvendum est; verba enim capituli generalia sunt, et perindè ad Angelos atque ad homines pertinent; adeoque si præfractè ut sonant accipiantur, Jansenium petunt, qui asserit, Deum voluisse reprobos Angelorum salutem, quam tamen non sunt adepti. Quartum de efficaciâ redemptionis Christi intelligendum est, sensu antea exposito; aliunde verò directè adversatur dogmati Prædestinatiano, juxta quod Christus, non pro omnibus fidelibus mortuus est, sed pro solis electis.

Altera sententia eorum est qui volunt Prudentium in his capitulis errasse. 1° quia si sententiam non mutasset, ut quid nova proponeret capitula, qui Carisiacis subscripserat? 2° Annales Bertiniani ad annum 861, ubi de Prudentio hæc habent: « Prudentius.... ap-
« primè litteris eruditus, qui ante aliquot
« annos Gotescalco Prædestinatiano restite-
« rat, post felle commotus contra quosdam
« episcopos secum hæretico resistentes, ipsius
« hæresis defensor acerrimus; indeque non
« modica inter se diversa et fidei adversa scrip-
« titans moritur » 3° Ipsum erroris nomine fuisse suspectum indicat vetustissimus codex libri quem adversus Scotum elucubravit; nam in aversâ tituli paginâ monitum istud legitur:

« Compositor hujus libri Prudentius, de qui-
« busdam catholicis dogmatibus non sentit ca-
« tholicè, sicut alia ejus scripta demonstrant. »

Nec obstat, inquit hujusce sententia: defensores, quòd Prudentius inter sanctos numeretur, cujus festum Trevis celebratur, ejusque virtus ac sanctitas commendantur in Martyrologio Gallic. 6. Aprilis; siquidem exinde colligi non potest eum in nullo errasse; namque Faustus alique non Pauci, quorum non minùs certa est sanctitas, in varios errores impegerunt. Itaque error, si nondum sit ab Ecclesiâ proscriptus, ac desit pertinacia, cum sanctitate conciliari potest.

Nunc verò, si quæretur, quæ præ alterâ tenenda sit sententia, prior nobis videtur probabilior: cæterum quidquid sit, nemo est, ut annotat loco mox citato Antonius Descamps, « qui Prudentium Carisiacensibus capitulis in
« conventu episcoporum subscribentem, Pru-
« dentio privatâ auctoritate epistolam scribenti
« jure ac meritò præferendum esse non judi-
« cet. » Et verò, quid ex illis capitulis erui potest? nisi ad summum, Prudentium variasse, contra semetipsum militare, ac proinde illius auctoritatem, quam adeò extollunt adversarii, non esse tanti faciendam.

Secundus auctor, qui, si novatoribus fides, favit Prædestinatianis erroribus, est Lupus Abbas Ferrariensis, qui et Servatus nuncupatur; ille, jubente Carolo Calvo, de quæstionibus à Gotescalco motis scripsit anno 850. Catholicè sentit cum Hincmaro; id constat ex libro de tribus quæstionibus quem Carolo nuncupavit. In eo 1° hominem cum gratiâ ad opera pietatis liberum esse confitetur. 2° Negat prædestinationem ad culpam, 3° De voluntate salvandi homines, eodem modo loquitur ac Prudentius, eadem proindè ratione exponendus; scilicet, de voluntate simpliciter et sine addito, id est, absolutâ et consequenti. 4° Quod spectat mortem Christi, significat quidem se magis propendere in eam opinionem quæ negat Christum mortuum esse pro omnibus; verum de efficaciâ illius mortis intelligendus est, juxta plurimum hujus ævi auctorum mentem. Cæterum docet ibidem Lupus, Christum pro omnibus fidelibus, etiam reprobis, mortuum esse; quod dogmati Prædestinatiano capitaliter repugnat. Atque hinc ipsemet Gotescalcus epist. ad Ratramnum candidè agnoscit, suarum omnino partium non esse Lupum.

Tertius, eodem penè tempore Ratramnus Corbeiensis monachus duos de prædestina-

tione libros ejusdem Caroli jussu scripsit. In iis silet de voluntate Dei et morte Christi; circa verò liberum arbitrium, gratiæ necessitatem, et duplicem prædestinationem idem tenet ac Lupus; prædestinationem quippe impiorum ad pœnas fusè demonstrat; sed simul inculcat, nullam dari prædestinationem ad peccata.

Quartus, Florus Ecclesiæ Lugdunensis diaconus. Scilicet suadentibus Hincmaro Rhemensi, et Pardulo Laudunensi, anno 851 scripsere Amalarius et Joannes Scotus Eriгена; varias Scoti propositiones edito libro confutavit, ut vulgaris fert opinio, Florus ejusdem Ecclesiæ Lugdunensis nomine. Eo in libro Prædestinationam hæresim execratur, etsi errore facti incertum habeat, an à Gotescalco hæresis illa asserta fuerit: « Si ita hoc dicit Gotescalcus, inquit cap. 4, quasi prædestinationis vim et necessitatem imponat ad malum... hoc omnino alienum est à fide catholicâ. » Eisdem Prædestinationum errores amplius execratur Florus in sermone quem operi suo de Prædestinatione præmittit Hincmarus.

Quintus, est auctor libri de tribus epistolis; qui vulgò creditur Remigius. Scilicet anno 852, ad Amolonem scripsere Hincmarus et Pardulus Laudunensis, et epistolam Rabani ad Nottin-gum suis adjungere. Tribus illis epistolis in Conventu Ecclesiæ Lugdunensis expositis, Remigius, Amolonis in sede Lugdunensi successor, ejusdem Ecclesiæ nomine respondit, edito libro de tribus Epistolis. Quantum iste auctor abhorreat ab erroribus Prædestinationis, ostendemus capite sequenti.

Unus superest Haymo Halberstatensis, quem Gotescalci erroribus non adhæsisse inde certò colligitur, quòd concilio Moguntino contra Gotescalcum interfuerit, ipsique subscripserit. Nihil est in ejus scriptis quod vel minimum dogmata Prædestinationaria redoleat; de quo consuli potest Mabillon. tom. 1 Analect. et tom. 3 Annal. Benedict.

CAPUT III.

De Ecclesiâ Lugdunensi.

Duo circumferuntur libri sub nomine Ecclesiæ Lugdunensis; utrùm genuinum sint illius opus, expendemus ad calcem capitis; interim exponendo illorum doctrinam, eos ipsi tribuemus. Certum est 1º, Ecclesiam Lugdunensem favisse personæ Gotescalci. Namque in libro de tribus Epistolis cap. 21, errores Gotescalco adjudicat, atque asserit se nec legisse, nec audivisse, an usquàm extiterit hæresis Prædesti-

natiana: « Hoc genus erroris, inquit, nec apud hæreticos, nec apud quemquam Catholico-rum nos cognovisse, vel audivisse memini-mus. » Idem docet in libro de tenendâ veritate. Certum est 2º, eandem Ecclesiam non impugnasse capitula Carisiaca in citato libro de tribus Epistolis; siquidem concilium Carisicum in quo quatuor capitula condita fuerunt, nonnisi versùs finem anni 853 celebratum fuit; liber autem de tribus Epistolis anno 852 editus est. Certum est 3º, auctorem libri de tenendâ veritate, prædicta capitula vellicare et perstringere; verùm rem proprius inspicienti planum erit, illum in solo loquendo modi ab iis recedere, ut constabit ex mox dicendis.

Tota ergo quæstio movetur de doctrinâ horum librorum, an scilicet adversetur prædictis capitulis, et faveat erroribus Prædestinationum.

CONCLUSIO. — Ecclesia Lugdunensis nec reipsâ adversatur capitulis Carisiacis, nec Gotescalci, aliorumque Prædestinationum erroribus adhæsit.

Probatur analysi utriusque libri *de tribus Epistolis*, et *de tenendâ veritate*.

Analysis libri *de tribus Epistolis*. — Liber ille in tres partes distribuitur. Prima 38 capitibus extenditur, et respondet Epistolæ Hincmari. Secunda duobus capitibus epistolam Parduli expendit. Tertia, octo sequentibus capitibus Rabani epistolam discutit. Porro in duabus posterioribus partibus nihil novi pertractatur; satis ergo erit hic seriem primæ exponere.

1º Decem primis capitibus, quæstionem de præscientiâ et prædestinatione divinâ explicandam sibi sumit; quod ut facilius exequatur, septem statuit regulas. Regulâ quartâ, de malis operibus ita decernit: « Mala opera creaturæ, quia ipsius tantummodò sunt, et ex ejus vitio, non ex Dei voluntate vel operatione procedunt, præscita à Deo dici possunt, prædestinata non possunt. » Regulâ quintâ subdit: « Deum prædestinatione suâ nulli necessitatem imponere. » Et regulâ septimâ statuitur, « neque de electis ullum perire.... neque de reprobis aliquem salvari; non quia non possunt homines de malo ad bonum commutari, et de malis et pravis, boni ac recti fieri; sed quia in melius mutari noluerunt, et in pessimis operibus usque in finem perseverare voluerunt; » quæ profectò priori capitulo Carisiaco omnino

consona sunt; atque geminam Gotescalci prædestinationem directè petunt.

2^o Quæstionem alteram de divinâ salutis hominum voluntate, tribus sequentibus capitibus expendit Ecclesia Lugdunensis. Cap. 11, celebrem Apostoli locum: *Qui vult omnes homines salvos fieri*; quatuor modis in Scriptis SS. Patrum explanatum asserit; atque tres priores expositiones eodem in capite refert. Prima est, ut vox ista, *omnes*, per distributionem accommodam negativam intelligatur hoc sensu, quòd nullus salvetur nisi per divinam voluntatem. Secunda est, ut vox, *omnes*, per distributionem accommodam affirmantem intelligatur de generibus singulorum, non de singulis generum. Tertia expositio est, quòd sanctos suos per Spiritum suum velle faciat Deus ut omnes salventur; sicut de Spiritu sancto dicitur: *Spiritus postulat pro nobis gemitibus inenarrabilibus*, id est, postulare facit. Tres illæ expositiones à S. Aug. adversus Pelagianos sæpius usurpatæ, de voluntate efficaci intelligendæ sunt, et ad solos electos restringendæ. Cap. 12, quartam addit interpretationem de voluntate universali erga omnium omnino hominum salutem, his verbis: « Quarto modo ita à sanctis Patribus intellectum invenitur quod dictum est, QUI VULT OMNES HOMINES SALVOS FIERI, ut simpliciter accipiatur hoc de omnibus hominibus, quantum in ipso est Deum velle, eo quòd omnes salvare velit BONITATE CREATORIS. » Et paulò post: « Ita fit: etiamsi secundum pium quorundam Patrum piorum sensum, Deus vult omnes homines salvos fieri BONITATE CREATORIS, quâ creaturam suam benè à se conditam perire non vult; idipsum iterùm nolit JUDICIS ÆQUITATE, quâ eandem creaturam suam vel originali, vel etiam actuali peccato nequiter inquinatam et vitiatam, impunitam esse non sinit. » Quam hic bonitatem Creatoris appellat Ecclesia Lugdunensis, theologi ex sancto Joanne Damasceno antecedentem et conditionatam vocant.

Cap. 13, quatuor illis expositionibus recensitis, de tribus prioribus asserit illas certas esse ac indubitatas; circa quartam verò, observat 1^o, eam non posse accipi sensu Pelagiano, quasi nempe Deus expectet voluntates hominum; ita ut et ipsi propriâ arbitrii libertate salvi esse velint. Observat 2^o, non posse etiam accipi sensu derogante divinæ omnipotentiae; hoc est, ut ait ibidem, quasi hanc voluntatem bonitatis suæ erga salutem hominum, obsistente

humanâ iniquitate implere non possit. Observat 3^o, duobus his erroribus sepositis, præfatam expositionem fideliter posse recipi, eam ultrò se amplecti, atque à SS. Patribus fuisse probatam.

En integer textus: « In tribus itaque prioribus modis intelligentiæ eorum verborum: « *Qui vult omnes homines salvos fieri, et ad agnitionem veritatis venire*; nulla absurditas, nulla repugnantia fidei invenitur, in quarto autem modo illud sine dubio cavendum, quia et occasionem Pelagianæ pravitatì præbet; quòd Deum, ut salvet homines, humanas expectare asserit voluntates (sese propriis viribus disponentes). Contra quem errorem ita in antiquis conciliis definitum legitur... Præparatur voluntas à Domino... Quod autem ibi simpliciter intelligitur Deum omnes homines velle salvos fieri, bonitate scilicet Creatoris (ita ut putamus) fideliter potest recipi, si hanc voluntatem bonitatis suæ erga salutem hominum non credatur, humanâ obsistente voluntate implere non posse, sed obsistente humanâ iniquitate implere nolle. » Demùm hanc quæstionem concludit, concordiae viam aperiendo versùs finem ejusdem cap. 15, his verbis: « Quæ omnia cum tam obscura sint et tam profunda atque perplexa, nollemus inter fratres et charissimos nostros aliquid de his contentiosè ventilari, vel temerè definiri; sed potius quod in eis certum est, sine dubitatione defendi; quod autem etiam inter magnos diverso modo, sed non diversâ pietate sentientes ambiguum atque incertum remansit, etiam apud nos et reverenter honorari, quia neutrum eorum videtur esse falsum, vel fidei contrarium. » Totum istud resumit ac paucis complectitur cap. 24 ejusdem libri, dicens utramque expositionem, seu de voluntate efficaci ad aliquos duntaxat homines pertinente, sive de voluntate universali, (antecedenti et conditionatâ) honorandam esse et à veritate non abhorrere: « Utrorumque, inquit, sententia fuerat honoranda, nec, ut jam superius dictum est, una pro alterâ damnanda; quia et illa ex divinâ auctoritate vera esse monstratur, et ista quâdam piâ ratione non abhorrere à veritate fideliter creditur. »

Ex his patet, in mente Ecclesiæ Lugdunensis sententiam quâ asseritur Deum velle omnes homines salvos fieri bonitate Creatoris, id est, voluntate antecedenti et conditionatâ, 1^o fideliter recipi posse; 2^o piam esse, veram et hono-

randam sententiam; 3^o à SS. Patribus fuisse probatam. Quæ tria directâ fronte adversantur Gotescalco, aliisque recentioribus ejus patronis.

3^o Quod attinet ad mortem Christi pro omnibus, eam controversiam attingit auctor à cap. 14 ad 20 inclusivè.

Cap. 14 et 15, quatuor hominum ordines distinguit. Primus est electorum. Secundus fidelium, sed qui gratiam fidei postea amissuri sunt et in malis perseveraturi. Tertius Infidelium, sed qui deinceps per gratiam Dei vocandi sunt quorum alii perseveraturi sunt, alii non perseveraturi in gratiâ Christi. Quartus denique eorum est qui sive ante, sive post Christi mortem in infidelitate positi, nec habuerunt, nec usquam habituri sunt fidei donum.

Cap. 16, pro tribus prioribus ordinibus Christum venisse ut eos salvaret ac redimeret, tanquàm certissimum fidei dogma proponit : « pro illi tribus ordinibus, inquit, Dominum Jesum Christum et venisse ut eos salvaret, et crucifixum esse ut eos redimeret.... fideliter credendum tenemus : et hoc non solum ex divinis scripturis, sed etiam ex SS. Patrum fide et doctrinâ evidenter cognoscimus. »

Cap. 17, et potissimum 18, pro quarti ordinis hominibus Christum nullatenus passum esse, expressè asserit : « Unum est quod et nos fidelissimè credimus, et verissimè novimus, quia pro illâ innumerabili et infinitâ multitudinem impiorum, qui ab exordio mundi usque ad passionem Domini in suâ impietate sunt mortui, et apud inferos æternâ perditione damnati, nusquàm Dominus passus, nusquàm mortuus est, nec ad illos salvandos ullatenus venit, nec pro iis pretiosum sanguinem fudit. » Idem clarè tradit de impiis et infidelibus post passionem Christi usque ad mundi terminum in suâ infidelitate mortuis aut morituris. Verùm quòd hic sermo sit de applicatione meritorum Christi, non autem de sufficientiâ voluntatis, patebit ex objectionum solutione. Idem etiam declarat series analysis ejusdem libri.

Cap. etenim 19, adducit et adoptat famosum S. Leonis textum, in quo de proditore Judâ, hæc habet : « Ad hanc indulgentiam traditor Judas pervenire non potuit ; quoniam perditionis filius, priùs in desperationem transiit, quàm sacramentum generalis redemptionis impleveret. Nam mortuo pro omnibus impiis Domino, potuisset fortè etiam hic consequi

« remedium, si non festinâset ad laqueum. » Existimat ergo Ecclesia Lugdunensis Christum pro omnibus impiis mortuum fuisse.

Denique, quod decretorium est, cap. 20, expressè asserit, sibi multum placere sententiam quæ docet Christum pro omnibus etiam impiis et infidelibus in suâ impietate permansuris, mortuum esse; eamque auctoritate patrum esse firmatam : « Si autem placet, inquit, sicut et nobis multum placet, ut etiam istorum sententia ex pietate veniens, propter pacem et venerabilem pietatem beatissimorum Patrum non renuatur ; nullâ ergo contentione pro aliis adversus alios litigetur ; non una sententia pro alterâ damnetur. » Idem clarissimè declarat cap. 24 et 28.

Ex his sic arguo : Ille non favit Gotescalco, qui fundatissimum esse fidei dogma contendit, Christum pro omnibus fidelibus mortuum esse ; Gotescalcus enim cum cæteris Prædestinatio nis mortem Christi ad solos electos restringebat ; atqui Ecclesia Lugdunensis ita docet cap. 16 ; ergo, etc. Præterea ille non favit Gotescalco, qui asserit Christum mortuum esse pro omnibus etiam impiis et infidelibus in suâ impietate permansuris ; atqui ita Ecclesia Lugdunensis cap. 19 et 20 ; ergo, etc. Deinde ille non favit Gotescalco, qui utramque hanc sententiam, videlicet, Christum mortuum esse pro omnibus sufficienter, et pro solis electis efficaciter, asserit esse piam, veram, honorandam, à SS. Patribus probatam, neque unam pro alterâ esse damnandam ; atque ita Eccl. Lugd., cap. 24 et 28 ; ergo, etc.

Quartam tandem quæstionem de lib. arbit. à cap. 21 ad 38 usque tractat. auctor. Doctrinam Gotescalei eâ de re improbat ac rejicit, tametsi eam huic monacho adjudicet. Quod verò, inquit, dixisse firmatur, ad malum tantummodo agendum liberum nos habere arbitrium, ad bonè verò agendum non habere, si verè ita sensit et dixit, hoc verè non est ex divinâ auctoritate sumptum... sed « apertè ex proprio errore prolatum. »

Concludit auctor librum, improbando prætensam crudelitatem quâ sævierant episcopi adversus Gotescalcum, quem tamen justè damnatum agnoscit propter pertinacem loquacitatem. Generatim auctor insurgit adversus Hincmarum, salvâ tamen semper fide catholicâ ; eum refellit potius in modo loquendi quàm in doctrinâ ; improbat in factis, sed doctrina auctoris ultra metas fidei catholicæ non progreditur.

Analysis libri *de tenendâ veritate*. — Liber sub nomine Ecclesiæ Lugdunensis, *de tenendâ veritate*, quindecim omninò capitibus absolvitur. Eo in libro quatuor Carisiacæ synodi capitula discutiuntur, multaque in eis tanquàm reprehensione digna impugnantur; verùm propius inspicienti manifestum est controversiam hanc modum loquendi potius spectare quàm doctrinam.

1^o Decem primis capitibus perstringitur primum capitulum Carisiacum quod est de prædestinatione. In eo postquàm levia quædam reprehendit auctor quæ ad rem præsentem non pertinent, quæque si paulò attentius excutiantur, nihil nisi sanum exprimunt; tandem cap. 3 expendit quæ spectant prædestinationem reproborum ad pœnas, arguitque capitulum quòd asserat Deum præscisse perituros, non autem eos ut perirent prædestinasse. Ast tota erat de nomine disceptatio; quippe Patres Carisiacenses negabant duntaxat Deum reprobos *prædestinasse ut perirent*, quasi prædestinatio esset causa perditionis et necessitatem peccandi ac damnationis invehere, sicut contendebat Gotescalcus; quem sensum ut excluderet Hincmarus, dicere maluit reprobis prædestinatas esse pœnas, quàm illos prædestinatos esse pœnis; è contra verò Lugdunensis Ecclesia statuit reprobos prædestinatos esse perditioni, sed simul excludit perversum Gotescalci sensum qui Patribus Carisiacensibus meritò displicebat.

Id ita esse manifestissimè patet ex citato cap. 5 ejusdem libri, ubi de prædestinatione loquens, hæc habet: « Non est violenta, quia nullum compellit ut malus sit, et aliud esse non possit; non est injusta, quia illos tantummodò, qui suo vitio in malis perseveraverint, punit; non est præjudiciaria, quia non præjudicat aliquem, ut quasi ejus sententiâ, et non suo merito pereat. Quid in eâ reprehenditur, vel quasi blasphemum putatur, in quâ sola æquitas, sola justitia invenitur? » Et quibusdam interjectis, sic concludit: « Qui fideliter confitetur, et præscientiam, et prædestinationem æternam esse apud Deum; nec tamen per hæc aliquem ad malum cogi, sed tantummodò qualis quisque futurus sit præsciri, et prout gesserit, judicari, iste prorsùs catholicè sentit. »

2^o Alterum Carisiacum capitulum carpit et vellicat Ecclesia Lugdunensis capitibus 11 et 12. In eo arguit hanc propositionem: *Libertatem arbitrii in primo homine perdidimus*; et contra

ostendit in nobis remanere liberum arbitrium, licet infirmum, et sine Christo ad opera pietatis invalidum. Porro alius non est sensus prædicti capituli Carisiaci; manifestè enim loquitur de libero arbitrio ad bonum supernaturale, quod sine gratiâ Christi nullum esse, S. Augustinus ubique docet, et Ecclesia contra Pelagianos definivit.

3^o Ad finem ejusdem capitis 12, paucis excutit controversiam circa voluntatem salvandi omnes homines, cujus fusiores explicationem allatam fuisse annotat superiori libro *de tribus Epistolis* ad quem hic remittit. Doctrinam tertii capituli non reprobat, imò catholicam agnoscit; sed id unum displicere significat, quòd eo in capitulo generalis voluntas salutis omnium proponatur tanquàm unica interpretatio orthodoxa verborum Apostoli: *Qui vult omnes homines salvos fieri*; quasi excludenda esset expositio plurimorum SS. Patrum de voluntate efficaci ad aliquos duntaxat homines sese extendente. Itaque utramque textûs Apostolici expositionem, tum de voluntate generali, tum de voluntate speciali et efficaci ad aliquos duntaxat sese extendente, simul admittendam esse contendit, nec alteram pro aliâ damnandam, quod sanè verissimum est, et doctrinæ capituli Carisiaci omninò consonum, erroribus autem Gotescalci penitus adversum. « Sit ergo, inquit, inter nos etiam de hac re istiusmodi pia cautela ac moderatio, quatenus et SS. Patribus debitus servetur honos, et quolibet quisque acquiescat modo ex illis sensibus, qui de hac sententiâ ab illis positi sunt, non judicemus esse hæreticum. »

4^o Tribus ultimis capitibus ultimum executi capitulum Carisiacum, in eoque reprehendit hanc propositionem: *Quòd nullus hominum fuit, est, vel erit, pro quo Christus passus non fuerit*. Porro verum et à Patribus Carisiaci intentum prædictæ propositionis sensum non impugnat Ecclesia Lugdunensis, sed alienum prorsùs et erroneum, de redemptione scilicet efficaci respectu hominum damnatorum; quem absurdum sensum errore facti Patribus Carisiacensibus affingit, uti mox dicemus in solutione objectionum.

Solvuntur objectiones. Objicies 1^o: Ecclesia Lugdunensis in utroque libro *de Tribus Epistolis, et de tenendâ veritate*, tres supra adductas ex S. Aug. expositiones, quæ textum Apostoli: *Qui vult omnes homines salvos fieri*, ad solos electos restringunt, tanquàm certas et indubitatas admittit; quartam verò quæ divinam vo-

luntatem ad omnium salutem extendit, omnino improbat. Prædicta autem Apost. verba ad solos electos accommodat, juxta illud Scripturæ, quod sæpius inculcat : *Omnia quæcumque voluit Dominus fecit*; unde ita ferè semper argumentatur : *Quid ergo restat nisi ut ille, qui omnia quæcumque voluit fecit, ideò hoc non faciat, quia nolit*. Et rursus : *Sicut verè omnia quæ voluit fecit, ita verè nolit, quæ non fecit*. Ecclesia ergo Lugdunensis adversatur capitulis Carisiacis, atque doctrinæ Gotescalci favit.

Respondeo 1º, istud argumentum adversarii esse solvendum. Namque Ecclesia Lugdunensis, (quod apprime observandum) nullo pacto sententiam suam restringit ad solos homines hujus statûs, sed indefinitè loquitur tam de Angelis et homine innocente, quàm de homine lapsò; generale quippe est et peræquè ad Angelos, atque ad homines pertinet istud momentum : *Omnia quæcumque voluit fecit*; atqui tamen concedunt adversarii, idemque clarè confitetur Jansenius lib. 10 de Gratiâ Christi cap. 1, agnoscendam esse respectu Angelorum et hominis innocentis, voluntatem universalem conditionatam et antecedentem; ergo solvenda manet adversarii præsens objectio.

Respondeo 2º : Dist. anteced. : Improbatur voluntatem generalem pravo sensu intellectam, concedo, genuino et catholico sensu acceptam, nego. 1º Excludit Ecclesia Lugdunensis generalem sensu Pelagiano aut Semipelagiano voluntatem salvandi omnes homines; si nempe ipsi velint propriis liberi arbitrii viribus, sine ullâ gratiæ voluntatis necessitate. « In quarto autem modo, inquit, illud sine dubio cavendum, quia et occasionem Pelagianæ pravitati præbet, quòd Deum, ut salves homines, humanas expectare asserit voluntates. » 2º Excludit voluntatem generalem quæ omnipotentiae divinæ derogaret : « Quasi nempe credatur salutem hominum humanâ obsistente iniquitate implere non posse; non autem obsistente humanâ iniquitate implere nolle; » quem errorem Pelagianis exprobrat S. August. lib. 4 contra Julianum cap. 8. 3º Rejicit etiam voluntatem generalem, quâ Deus diceretur velle omnes salvos fieri indiscretè, indifferenter et æqualiter; ita ut nulla major sit Dei erga electos quàm reprobos prædilectio, et omnes æqualibus afficiat gratiæ beneficiis; quod in Semipelagianis plerumque carpit S. Augustinus. 4º Improbatur sententiam quæ ita extendit textum Apostoli ad omnes universim homines, ut aliæ excludantur interpretationes, juxta

quas ad solos electos prædictum textum restringit sanctus Aug. Utramque enim expositionem, tam generalem, quàm specialem, quasi fidei consentaneam approbat Ecclesia Lugdunensis, atque id unum cavet, ut propter alteram altera non rejiciatur. « Nec propter istam, inquit cap. 26 lib. de tribus Epistolis (interpretationem), illa damnetur, sed potius utriusque propter veracem et piam patrum auctoritatem fideliter obediatur. »

Atque hinc patet vera Ecclesiæ Lugdunensis circa præsentem controversiam mens atque doctrina; scilicet, tanquàm veram, catholicam, à Patribus probatam agnoscit sententiam quæ voluntatem Dei ad omnium omnino hominum salutem extendit; dummodò tamen quatuor mox recensiti sensus excludantur.

Respondeo 3º aliter distinguendo ant. : Quatam improbat expositionem intellectam de voluntate strictè, simpliciter et sine addito sumptâ, concedo; intellectam de vero, reali et actuoso affectu in Deo, nego. Nomine voluntatis divinæ strictè et simpliciter dictæ, intelligebat Ecclesia Lugdunensis, eam, et quidem solam, quæ est efficax. Ratio ipsi erat, quia quotiescumque voluntas divina enuntiatur in Scripturis simpliciter et sine addito; toties exhibetur velut efficacissima, juxta illud Scripturæ : *Omnia quæcumque voluit fecit*; et rursus : *Voluntati ejus qui resistit*? Hinc Gotescalci æmulos velicet ac pertringit Ecclesia Lugdunensis, quòd scilicet divinam voluntatem ad omnium hominum salutem extenderent; ast cum expressè negaret perversum Gotescalci dogma, nempe reprobos necessitari ad peccandum, planè necesse erat ut admitteret verum et realem in Deo affectum, quo hominibus etiam reprobis decerneret media ad non peccandum et ad salutem assequendam verè sufficientia. Quapropter quæ tunc occurrebat controversia, de nomine potius quàm de re ipsâ fuit; utrùm scilicet is rerum et realis Dei affectus erga salutem reprobos deberet dici simpliciter et sine addito voluntas, necne; prius contendebant hostes Gotescalci, posterius asserebant illius patroni.

Quinimò etiam nunc pauci quidem theologi existimant omnem veram et beneplacitam voluntatem in Deo semper esse efficacem; neque tamen, ut observationis ubi de Attributis, hî ab aliis dissident, in eo quo præcipuum est ac capitale circa voluntatem salvandi omnes homines; quia nempe iidem verum ac realem in Deo agnoscent affectum, vi cujus justis confè-

runtur, aliis autem saltem præparantur media relativè sufficientia ad salutem. Ita proportionem servatâ idem dicendum de dissidio quod exarsit Ecclesiam Lugdunensem inter et Carisiacos Patres circa eandem salutis omnium voluntatem.

Respondeo 4^o negando antecedens; postquam enim citato libro *de tribus Epistolis* cap. 11, tres prædictas ex S. Aug. expositiones protulit Ecclesia Lugdunensis, quartam tandem, quam propugnamus, de voluntate generali, antecedente et conditionatâ, refert et amplectitur cap. 12 et 15 ejusdem libri, eamque interpretationem piam, veram et à SS. Patribus probatam disertè declarat, ut constat ex iis quæ supra in analysi exscripsimus.

His omnibus addunt nonnulli, Ecclesiam Lugdunensem locis objectis, non in generalem salutis omnium voluntatem insurgere; sed conqueritur quòd hæc voluntas fuerit de fide definita ab æmulis Gotescalci; quam quidem definitionem perperam et immeritò fuisse latam existimabat. Neque enim omnis doctrina, etiamsi aliundè omninò constans et certa, tanquam de fide catholica proponi potest; requiritur insuper, ut illa sit in se revelata, et ab Ecclesiâ proposita; quorum si alterum desit, non est fide divinâ catholica credenda. Ita observant Walenburgenses, de Controvers. fidei; atque hinc illustriss. Bossuet in lib. inscripto : *Justification des Réflex.* paragr. 16, postquam asseruit divinam salutis omnium justificatorum voluntatem agnoscendam esse tanquam de fide, utpote expressè definitam ab Ecclesiâ catholica, de voluntate generali, subdit : « Il ne faut point faire un point de foi également décidé de la volonté générale étendue à tous, puis-que même il a été permis à Vasquez d'enseigner que les enfants décédés sans baptême ne sont pas compris dans cette parole : DIEU VEUT QUE TOUS LES HOMMES SOIENT SAUVÉS..... quoique la volonté de Dieu et de J.-C. prise dans une entière universalité, paraisse plus digne de la bonté de Dieu, plus conforme aux expressions de l'Écriture, et plus propre à la piété et à la consolation des fidèles. »

Inst. 1^o : Ille favit errori prædestinatiano, qui istam propositionem : *Deus vult solos electos salvos fieri*; tanquam innoxiam approbavit; atqui Ecclesia Lugdunensis libris citatis prædictam propositionem approbat; ergo, etc. — Respondeo dist. maj., si aliundè excludat omnem aliam voluntatem et affectum, vi cujus iustis conferantur auxilia relativè sufficientia ad salu-

tem, aliis autem saltem præparentur, concedo; si talem voluntatem et affectum agnoscat, nego. Porro ita est de Ecclesiâ Lugdunensi, ut constat ex dictis; ergo, etc.

Inst. 2^o : Ille favit erroribus Prædestinatorum, qui recensitis duabus opinionibus, quarum altera Apostoli verba ad solos prædestinatos restringit, altera verò ad omnes prorsus homines ea extendit; liberum relinquit unicuique quam voluerit amplecti; atqui ita Ecclesia Lugdunensis; ergo, etc. — Respondeo distinguendo : Unicuique liberum relinquit quam voluerit amplecti, si sermo sit de voluntate simpliciter et sine addito sumptâ, concedo; si sermo sit de vero et reali Dei affectu, subdist. : Liberum relinquit, quatenus opinionem hanc nondum definitam judicabat, concedo; quasi eam non admitteret, nego. Solutio ex mox dictis liquet.

Instabis 3^o : Ecclesia Lugdunensis in libro *de tenendâ veritate* cap. præsertim 12, vellicat tertium capitulum Carisiacum de generali salutis omnium voluntate, atque ibidem approbat circa idem caput Gotescalci doctrinam, quam certè noverat per tres epistolas eâ de re ab Hincmaro ad se transmissas, ergo, etc. — Respondeo ad primum : Vellicat tertium Carisiacum capitulum, quoad nomen duntaxat, concedo; in rei veritate et quoad doctrinam, nego. Ad secundum similiter distinguendo : Approbat doctrinam Gotescalci errore facti, concedo; reipsâ, nego. Utraque solutio liquet ex supra dictis.

Objicies 2^o : Circa mortem Christi Ecclesia Lugdunensis in libro *de tribus Epistolis*, quatuor hominum ordines distinguit. Primus est prædestinatorum; secundus fidelium qui non sunt perseveraturi; tertius Infidelium aliquandò baptizandorum, sive sint perseveraturi, sive non; quartus eos omnes complectitur infideles, qui sive ante sive post Christum, in infidelitate mortui sunt vel morituri. Pro trium priorum ordinum hominibus mortuum esse Christum tradit Ecclesia Lugdunensis cap. 16; pro quarto autem ordine, nullomodò passum esse disertè docet cap. 18, his verbis : « Unum est quod et nos fidelissimè credimus et verissimè novimus, quia pro illâ innumerabili et infinitâ multitudine impiorum qui ab exordio mundi usque ad Passionem Domini in suâ impietate sunt mortui..... nunquam Dominus passus, nusquam mortuus est, nec ad illos salvandos ulla tenens venit, nec pro iis pretiosum sanguinem dedit. » Idem omninò asserit

de Infidelibus qui à morte Christi extitèrunt, et futuri sunt. Ex his sic arguo : Ille favit doctrinæ Gotescalci, qui asserit Christum mortuum non esse pro impiis et infidelibus qui ab exordio mundi ad Christum usque extiterunt, et à Christo usque ad consummationem mundi futuri sunt; atqui ita Ecclesia Lugdunensis; ergo, etc.—Respondeo 1º, mirum profectò videri Jansenium ejusque Apologistas nobis opponere auctoritatem Ecclesiæ Lugdunensis, quæ ipsis directâ fronte adversatur; disertissimè siquidem docet, idque tanquàm certissimum fidei dogma, Christum pro omnibus omninò fidelibus mortuum fuisse. « Fide-
« liter credendum est, inquit citato libro de
« tribus epistolis cap. 16, et hoc non solum
« ex divinis Scripturis, sed etiam ex SS. Pa-
« trum fide et doctrinâ evidenter agnoscimus,
« pro illis tribus ordinibus ad Christi gratiam
« et societatem fidelium pertinentibus, Domi-
« num Jesum Christum et venisse ut eos salva-
« ret, et crucifixum esse ut eos redimeret. » Et
lib. de tenendâ veritate cap. 14 : « Fides ca-
« tholica tenet, et Scripturæ sanctæ veritas
« docet, quòd pro omnibus credentibus....
« verè Dominus et Salvator noster sit passus. »
Nihil certè expressius desiderari potest; ac
proinde nego maj. Præcipuus enim hæc in
parte Prædestinationum error in eo positus
est, quòd assererent Christum pro solis electis
mortuum fuisse; atqui istud tanquam hæreti-
cum impugnât Ecclesia Lugdunensis locis mox
citatis; ergo, etc.

Respondeo 2º distinguendo min.: Ecclesia
Lugdunensis negat Christum pro impiis et in-
fidelibus in suâ infidelitate mortuis aut mori-
turi, ullatenus passum fuisse, efficaciter
concedo; sufficienter, sufficientiâ nempe tum
pretii, tum voluntatis offerentis, nego. Infi-
delium in suâ impietate perseverantium duos
ordines distinguit Ecclesia Lugdunensis. Pri-
mus eorum est qui ab exordio mundi ad Chris-
tum usque extitèrunt; alter verò eorum, qui à
Christo usque ad finem mundi fuerunt aut fu-
turi sunt; pro illis duobus Infidelium ordini-
bus non negat Christum mortem suam Patri
æterno obtulisse; sed hoc unum vult, Passio-
nem Christi illis non fuisse efficaciter applica-
tam. Hanc esse hujusce Ecclesiæ mentem ultrò
confitebitur quisquis illius scopum et verba pe-
nitiùs scrutatus fuerit.

Et quidem 1º, quod spectat Infideles qui
ante Passionem Christi in suâ infidelitate mor-
tui sunt, cum ait, *pro iis Christum non esse*

*passum, nec ad eos salvandos venisse, nec pro
iis sanguinem fudisse*, sensus est Christum non
venisse, nec mortuum fuisse, ut eos ab infe-
ris eriperet, sicut justos ex limbo eduxit. Sen-
sum hunc clarè demonstrant quæ in objec-
tione ommissa sunt, quæque immediatè sequun-
tur: « Quoniam illos solos ex his qui ab exordio
« mundi usque ad passionem ejus extiterunt,
« eadem passione suâ redemisse, et salvasse,
« atque ab INFERNI CLAUSTRIS EDUXISSE CREDEN-
« DUS EST, qui et fideliter eum speraverunt
« venturum, et fideliter per eum redemptio-
« nem, et liberationem ad salutem se acceptu-
« ros esse crediderunt; SS. videlicet Patriar-
« chas et Prophetas, et cæteros justos quibus
« etiam per Osee Prophetam ante promiserat
« dicens: *De manu mortis liberabo eos, de mor-
« te redimam eos; ero mors tua; ò mors, ero
« morsus tuus, inferne.* » Hoc ergo unum inten-
dit Ecclesia Lugdunensis, Christum non esse
passum, nec redemisse impios illos, eo modo
quo justos Patriarchas et Prophetas redemit et li-
beravit, scilicet eos ex inferni claustris educendo.

Eundem sensum omni depulsâ caligine ex-
primit lib. de tenendâ veritate, toto cap. 14,
ubi postquàm probavit Christum pro illis im-
piis non esse mortuum; quia *irrevocabitè divi-
no judicio jam erant pænis perpetuis condemnati*;
sic totam suam concludit ratiocinationem :
« Quod totum quomodò fideliter et catholicè
« intelligendum sit exponit mirificè B. Greg.
« dicens (Homil. 22 in Evang.): Quod ante passio-
« nem dixit, in resurrectione suâ suam Domi-
« nus implevit: *Si exaltatus fuero à terrâ, om-
« nia traham ad me.* Omnia enim traxit, qui
« de electis suis apud inferos nullum reliquit.
« Omnia abstulit, utique electa. Neque enim
« infideles quosque et pro suis criminibus æter-
« nis suppliciis deditos, ad veniam Dominus
« resurgendo reparavit; sed illos ex inferni
« claustris rapuit, quos in fide et actibus reco-
« gnovit. Unde rectè etiam per Oseam dicit :
« *Ero mors tua, ò mors; ero morsus tuus, in-
« ferne.* Id namque quod occidimus, agimus
« ut penitus non sit; ex eo etenim quod mor-
« demus partem abstrahimus, partemque re-
« linquimus. Quia ergo in electis suis funditus
« occidit mortem, mors mortis extitit; quia
« verò ex inferno partem abstulit, et partem
« reliquit, non occidit funditus, sed momor-
« dit infernum. » Hæc omnia verba, præser-
tim S. Greg. testimonium quod suum fecit Ec-
clesia Lugdunensis, ipsius mentem, veramque
sententiam superiùs explanatam dilucidè expri-

munt et luculentissimè produnt ac manifestant.

Hic ergo perstringit duntaxat Ecclesia Lugdunensis, errores quorundam hæreticorum, quorum alii, teste S. Aug. lib. 21 de Civit. Dei cap. 17, contendebant *Christum ex proposito Patris etiam pro diabolis à damnatione liberandis passum esse*. Alii, teste eodem S. Aug. hæresi 79, asserebant *descendente ad inferos Christo credidisse incredulos, et omnes exinde liberatos*; et ut ait Greg. Magnus Homil. 22 in Evangelia, *morte Christi exinanitus fuisse inferos*. Alii tandem asfirmabant, *Christum morte sua omnium hominum peccata delevisse*; nec reprobos damnari propter sua peccata, utpote à Christo expiata, sed *propter solam incredulitatem*, quâ initam semel cum Deo amicitiam de nuò rescindunt. Quæ commenta ex Origene fluxêre; eaque egregiè confutârunt SS. Epiphanius Epist. ad Joan. Jerosolymyt.; Aug. lib. 1, de Civit. Dei cap. 17 et 23; Hier. in cap. 3 Jonæ; Greg. Magnus lib. 9 Moralium cap. 43 et 46, et Venerabilis Beda in priorem Epist. S. Petri, ubi observat prædictas has omnes opiniones fidei directè esse contrarias: *Catholica fides habet, quia descendens ad inferna Dominus non incredulos inde, sed solummodò suos educens ad cœlestia regna secum perduxerit*.

Quod autem spectat ad alteram partem Infidelium qui à Passione Christi ad finem usque mundi in suâ infidelitate permansuri sunt; cùm Christum pro iis mortuum non fuisse asserit Ecclesia Lugdunensis; id de redemptione efficaci unicè intelligendum est; de actuali scilicet applicatione redemptionis Christi per gratiam fidei, aut habitualement sanctificantem. In eo quippe prædictos Infideles secernit à fidelibus, quòd hi per baptismum regenerati fuerint et Ecclesiæ incorporati, atque saltem in hac parte redemptionis efficaciæ participes fuerint; nec verè possunt redimi, è contra verò Infideles absque baptismo morituri talem effectum redemptionis efficaciæ non sint habituri.

Hanc esse Ecclesiæ Lugdunensis mentem non obscure colligitur ex citato libro de tenendâ veritate, cap. 15: « Ex his, inquit, manifestissimè ostenditur, et omnibus infidelibus nullam esse redemptionem in Christo, et omnes fideles qui fideliter accedunt ad fidem, et gratiam regenerationis; ibi accipiunt veram redemptionem, ubi accipiunt veram regenerationem. Quia nec verè possunt regenerari, nisi eos, et à potestate diaboli, et à servitute peccati verè constet redimi; nec verè possunt redimi nisi lavacro

« indulgentiæ expiati, et à reatu delicti, et à dominatione principis mundi efficiantur absoluti. »

Vides quænam sit illa redemptio quam ab Infidelibus excludit Ecclesia Lugdunensis, quamque omnibus et solis fidelibus propriam esse existimat; eam videlicet per quam fideles donum fidei accipiunt, per quam regenerantur, atque à potestate diaboli et servitute peccati liberantur; porrò talis redemptio haud dubiè est efficax; ergo, etc. Hinc paulò post sibi objiciens illud Deuteronomii testimonium: *Et erit vita tua pendens ante oculos tuos, et non credis vitæ tuæ*, sic loquitur: « Tanquàm ipsi incredulo et infideli populo in suâ incredulitate et infidelitate permanenti, Dominus Jesus Christus, qui ante eorum oculos in cruce pependit, dicatur vitâ, cùm utique eis non dederit vitam... quasi Dominus etiam eorum, qui non credunt, nec unquam ejus fide vivificantur, possit dici vitâ... quasi propter eundem populum in suâ incredulitate perdurantem, et ejus causâ crucis sustinuerit passionem. » Habes hic iterum quid sit in mente Ecclesiæ Lugdunensis Christum pro aliquibus mortuum esse; nempe significat Christum in cruce pendentem eorum fuisse vitam, atque eis postea dedisse vitam fidei; unde quibusdam interjectis respondet, Christum eorum duntaxat in cruce vitam fuisse, « quos postea fide suâ vivificaturus erat, sicut scriptum est: *Justus autem ex fide vivit*. »

Ex his omnibus colligitur 1^o (quod etiam antea observavimus) juxta mentem Ecclesiæ Lugdunensis, in ideâ redemptionis includi non tantum sufficientiam pretii et voluntatis offerentis, sed etiam actualem et efficacem applicationem meritorum Passionis Christi, et præcipuorum ipsius fructum, gloriæ scilicet, gratiæ sanctificantis, aut saltem gratiæ fidei; unde cohærenter ad hanc, quam sibi efformarat redemptionis ideam, perpetuò negat Christum mortuum fuisse aut Passione suâ redemisse Infideles in suâ infidelitate decedentes. Colligitur 2^o Ecclesiam Lugdunensem alienum sensum et erroneum affinxisse quarto capitulo Carisiaco; at verum ejus sensum non impugnâsse, qui in eo positus est ut Christus sufficienter, sufficientiâ pretii ex sincerâ voluntate Deo Patri oblatus, pro omnibus hominibus mortuus credatur, « licet non omnes Passionis ejus mysterio redimantur. Quod ideò contingit, inquit, quia poculum humanæ salutis, quod confectum est humilitate nostrâ et veritate divinâ, habet quidem in se ut omnibus pro-

« sit ; sed si non bibitur , non medetur. »

Casterum Christum sufficienter sufficientiam pretii , tum voluntatis pro omnibus mortuum fuisse , agnovit Ecclesia Lugdunensis , quod constat 1^o ex dictis expendendo ipsius mentem circa divinam salutis omnium voluntatem. Namque Christus pro iis sufficienter mortuus est , quos Deus vult salvare voluntate antecedente et bonitate Creatoris ; atqui Ecclesia Lugdunensis talem in Deo agnoscit voluntatem pro salute omnium ; ergo , etc. 2^o Idem constat ex dictis in analysi utriusque libri de tribus Epistolis , et de tenenda veritate ; multa enim ibi exscripsimus testimonia , quæ id quod intendimus aperte demonstrant. 3^o Lib. de tribus Epistolis , cap. 20 , 24 , 26 , 28 , et lib. de tenenda veritate , cap. 12 , 14 , 15 , sollicitè inculcat « pium esse et honorandum , et non « abnuendum eorum sensum qui asserunt gloriosum mortis Christi pretium etiam pro « nunquam credituris , et in suâ impietate perituris datum esse , modò tamen non una sententia pro alterâ damnetur. »

Instabis 1^o : In mente Ecclesiæ Lugdunensis Christus nequidem eo sensu mortuus est pro Infidelibus in suâ infidelitate perseverantibus , quo mortuus est pro iis fidelibus qui à fide et charitate excidunt , atque in malis perseverant ; porro Christus mortuus non est efficaciter , sed sufficienter duntaxat pro huiusmodi fidelibus , ut ex sese patet ; ergo , etc. — Respondeo dist. min. : Christus non est mortuus efficaciter perfectè et adequatè pro his fidelibus qui à fide et charitate deficiunt , concedo ; non est mortuus efficaciter inadæquatè , nego ; et nego conseq. Christus mortuus est efficaciter perfectè et adæquatè pro iis duntaxat quibus nobiliores redemptionis effectus applicantur , scilicet regeneratio , incorporatio Ecclesiæ et glorificatio ; ast soli prædestinati participes sunt horum omnium effectuum , proindeque pro illis solis mortuus est efficaciter perfectè et adæquatè : attamen alio sensu rectè dicitur Christus mortuus efficaciter pro iis fidelibus qui à fide postmodum defecturi sunt ; scilicet efficaciter inadæquatè , ratione nimirum regenerationis et incorporationis corpori mystico Ecclesiæ.

Instabis 2^o : Si existimasset Ecclesia Lugdunensis Christum esse mortuum efficaciter saltem inadæquatè pro iis omnibus qui incorporari sunt Ecclesiæ , universaliter et absque restrictione negare non debuisset Christum mortuum fuisse pro impiis ante ejus Passionem in suâ

impietate defunctis ; quippe dubium non est quin nonnulli ex iis fuerint Judei qui Ecclesiæ tunc esistenti incorporati erant , et quibus relaxatum fuerat peccatum originale ; atqui tamen universaliter negat Christum mortuum fuisse pro huiusmodi impiis ; ergo , etc. Respondeo , negando maj. Namque Ecclesia Lugdunensis in iis impiis et infidelibus qui ante Christum in suâ impietate et infidelitate mortui sunt , non spectat tempus vitæ ipsorum , nec auxilia vel beneficia redemptionis quibus in vitâ politii sunt ; sed attendit ad illorum statum post mortem , seu eos considerat *quatenus irrevocabiliter damnatos* , ut patet ex solâ inspectione verborum quæ eâ de re supra recitavimus ; è contra verò in iis qui post Christum vixerunt , ipsum vitæ præsentis tempus et beneficia eo tempore accepta , et ex redemptione Christi promanantia considerat , ut constat ex testimoniis paulò ante exscriptis.

Instabis 3^o : Citato libro de tenenda veritate , manifestè supponit Ecclesia Lugdunensis , Christum ne quidem sufficienter mortuum esse pro Infidelibus ; namque cap. 14 , ut demonstret Christum pro omnibus fidelibus mortuum esse , ita ferè ratiocinatur : *Pro iis omnibus et solis Christus mortuus est , pro quibus Ecclesia offert sacrificium ; atqui Ecclesia pro omnibus et solis fidelibus offert sacrificium ; ergo , etc.* Porro istud ratiocinium supponit Christum nullatenus mortuum esse pro Infidelibus ; nam si pro ipsis mortuus esset Christus , nihil obstaret quominus pro iis in sacrificio oraret Ecclesia. Respondeo hoc ratiocinium supponere tantum quod supra diximus , nempe Christum non mortuum esse efficaciter pro Infidelibus , quo modo mortuus est pro omnibus fidelibus quos regeneravit et Ecclesiæ corpori coadunavit. Hic namque est sensus Ecclesiæ Lugdunensis : Pro iis omnibus et solis sacrificium offertur , qui efficaci Christi redemptioni aliquo modo participant ; atqui pro omnibus et solis fidelibus sacrificium offert Ecclesia ; ergo omnes et soli fideles efficacis redemptionis sunt participes.

Hanc esse genuinam illius mentem liquidò constat ex ejus verbis : « Ex his , inquit , manifestatissimè docemur , ut pro his tantum , qui « baptismo Christi regenerati incorporantur « Ecclesiæ , quæ est corpus Christi , corpus « Christi debeat offerri ; et quisquis pro eis qui « minimè sunt regenerati , nec corpus Christi « effecti , dicit illud sacrificium offerendum , « censet eos esse corpus Christi , qui nunquam

« incorporati sunt membris Christi. » Apertè docet eò loci Ecclesia Lugdunensis, pro iis duntaxat offerendum esse sacrificium, qui regenerati sunt et incorporati Ecclesiae; quique proinde participes sunt redemptionis efficacis; unde, quando negat pro Infidelibus offerendum esse sacrificium, non ideo assertit Christum nullatenus pro ipsis fuisse mortuum; sed negat tantum eos efficaciter fuisse redemptos.

Instabis 4^o: Ecclesia Lugdunensis eam ipsam redemptionem restringit ad solos fideles, quam Patres Carisiaci ad omnes homines extendebant; atqui Patres Carisiaci redemptionem efficacem, etiam inadæquatam, ad omnes homines non extendebant, sed duntaxat redemptionem pro omnibus sufficienter oblatam; ergo, etc. Respondeo dist. maj.: Quam Patres Carisiaci, juxta falsam et distortam Ecclesiae Lugdunensis interpretationem, ad omnes homines extendebant, concedo; quam in rei veritate ad omnes homines extendebant, nego. Porro, tametsi ex ipsâ lectione Capituli quarti manifestum esset, ut supra ostendimus, redemptionem efficacem à Patribus Carisiacis non extendi ad omnes homines; nihilominus auctor libelli sub nomine Ecclesiae Lugdunensis ita interpretatus est Canonem illum, quasi in eo redemptio efficax omnibus hominibus adscriberetur. Scilicet cum auctor ille, ut ex totius libri serie liquet, capitula Carisiaca refellenda suscepisset, quoquo modo id fieri posset intactâ fide; cumque aliunde constet nihil in illis capitulis contineri quod, quantum ad doctrinæ substantiam meritò reprehendi posset, nihil aliud præstare potuit, quàm ut verba quædam, quæ ipsi videbantur minis castigata perstringeret, et quasdam propositiones quæ, prout à subsequentibus et antecedentibus divellebantur, falsæ erant, refelleret. Sic in singulis capitulis discutiendis se gerit censor ille plus æquo austerus ac rigidus; ita præsertim capituli quarti confutationem prosequitur. Nam cum hæc illius verba: *Nullus est, fuit, vel erit homo pro quo passus non fuerit Christus*, verissima essent, conjuncta cum his sequentibus: *Licet non omnes Passionis ejus mysterio redimantur*; quæ excludunt redemptionem efficacem ab omnibus hominibus; idcirco præfatus auctor initio capitis 14 propositionem generatim spectat seorsim à restrictione sibi adjunctâ; eamque sic universaliter sumptam et intellectam de morte Christi efficaciter pro omnibus hominibus oblatâ refellit in locis supra relatis.

Instabis ultimò: Ecclesia Lugdunensis Go-

tescalci doctrinam circa Christi mortem approbat; ait enim lib. de Tribus Epistolis cap. 24, Gotescalci eâ de re sententiam, *beatissimorum Patrum fuisse doctrinam*; atqui Gotescalcus, ut antea vidimus, assererat pro solis prædestinati mortuum fuisse Christum, pro aliis nequiquam; ergo, etc. Respondeo, errore facti Ecclesiam Lugdunensem approbâsse doctrinam Gotescalci circa mortem Christi. Scilicet Gotescalcus docebat Christum nullomodo passum esse pro omnibus, neque sufficienter, neque efficaciter; at Ecclesia Lugdunensis factum illud ignorans, et existimans Gotescalcum solum docere Christum non esse mortuum efficaciter pro omnibus, seu non applicare omnibus fructum mortis suæ, ipsius doctrinam sic intellectam errore facti orthodoxam judicavit. Et verò, in libris Ecclesiae Lugdun. De tenendâ veritate et de Tribus Epistolis, errores Gotescalci disertè fuisse confutatos abundè constat ex dictis supra in analysi utriusque libri.

Paulò fusiùs immorati sumus in exponendâ verâ et genuinâ Ecclesiae Lugdunensis mente circa voluntatem Dei et mortem Christi pro salute omnium hominum; tum quia hujusce Ecclesiae auctoritate potissimum gloriantur novatores, variisque loquendi rationibus ab ipsâ innoxie usurpatis abutuntur ad suos errores propugnandos; tum quia quæ hic dicta sunt facili ac meritò adaptari possunt ad illustranda et exponenda duriora quædam circa præsentem controversiam, quæ opponi solent ex Prudentio, Lupo, Ratramno, aliisque nonnullis noni seculi scriptoribus qui visi sunt Gotescalco favere; cum enim, fatentibus adversariis, horum auctorum eadem prorsus sit doctrina ac Ecclesiae Lugdunensis, eadem etiam ratione solvenda sunt quæ ex ipsis objiciuntur.

Consultò hic nonnulla prætermisimus quæ dicta sunt in tractatu de Attributis, ubi de divinâ salutis omnium voluntate et morte Christi pro omnibus. Consule si vacat. Unum superest quod hic expendendum remisimus; cujusnam auctoris sint libri *de Tribus Epistolis* et *de tenendâ veritate* sub nomine Ecclesiae Lugdunensis vulgati; an genuinum sunt illius Ecclesiae opus necne?

Diversæ sunt eâ de re sententiæ. Alii enim Ecclesiae Lugdunensi, aut Remigio; alii Floro, alii Ecclesiae Laudunensi, alii Ebboni Gratianopolitano antistiti; alii denique incerto auctori illos tribuunt.

Refellitur prima sententia. 1^o Silent MSS. codices; nullus est qui libros illos Remigio aut

Ecclesiæ Lugdunensi adjudicent. 2° Silent quotquot à seculo nono auctorum ecclesiasticorum catalogum texuere; nullus omninò est ante annum 1566, qui libros illos sub nomine Remigii aut Ecclesiæ Lugdunensis vulgaverit. 5° Hincmarus Epistolâ dedicatoriâ ad Carolum regem de prædictis libris loquens: « Quis verò, » inquit, sit istorum capitulorum compositor « cui cogimur respondere, ipse se prodet..... » Operator tenebrosorum operum, odit lucem, « et non venit ad lucem ut non arguantur opera ejus. » Et rursus: « Sine nomine auctoris quisque fuerit, quidam delirus... » capitula à nobis excerpta reprehendit et damnat. » An ita locutus fuisset Hincmarus; si libros illos approbasset Ecclesia Lugdunensis, eorumque auctor fuisset Remigius? 4° Soli editores ex proprio delectu eos primùm Ecclesiæ Lugdunensis nomine donarunt, hæc innixi parenthesi quæ initio solius libri de tribus Epistolis legitur, *ad nos, id est, Ecclesiam Lugdunensem*. Verùm præterquàm quòd hæc loquendi ratio aspera est et insolita; characteribus italicis exprimitur, quò indicatur eam fuisse postmodum assutam; aliunde, si temporibus Hincmari inserta fuisset hæc parenthesis, à quibus exarati fuissent libri non ignorasset.

Refellitur secunda sententia, quia obiit Florus ante Amolonem qui decessit ante annum 853, ut constat ex Mabillon. tom. 4 Analect. Ergo injustè tribuuntur Floro prædicti libri. Et verò in libro *de tenendâ veritate* impugnantur capitula synodi Carisiacæ; hæc autem synodus certè celebrata non fuit ante annum 853.

Refellitur tertia sententia. Nam Hincmarus Laudunensis nonnisi anno 859 creatus fuit episcopus; sed libri jam erant exarati anno 856; constat enim ex citatâ Hincmari ad Carolum regem Epistolâ, illos jam tunc ipsi Hincmaro oblatos fuisse ut iis responderet.

Ex his patet prædictos libros adscribendos esse Ebboni Gratianopolitano, aut quibusdam Ecclesiæ Lugdunensis clericis privato et suppresso nomine scribentibus. Primum conjiciunt nonnulli, tum quia Ebbo, teste Hincmaro loco citato, prædicta opuscula primus vulgavit, eaque Carolo regi obtulit anno 856, tum quia idem Hincmarus lib. de Prædest. cap. 51, pro certo habet, eundem esse auctorem opusculorum et canonum tertii concilii Valentini; porrò constat ex præfatione ejusdem concilii, Ebbonem Gratianopolitanum in condendis Valentiniis canonibus præcipuam navasse operam. Tum denique quia canonum et opusculorum eadem est

omninò doctrina, eadem loquendi rationes; verisimile est ergo prædicta opuscula ab eodem auctore, Ebbone scilicet, fuisse edita.

Alterum suspicantur quidam, ex eo quod cum in concilio apud Saponarias episcopi plures conquererentur de Remigio, Hincmarus querelas sedavit asserens Remigium, has permisisse disputationes ad majorem quæstionum dilucidationem, Epist. 2 dedicatoriâ. Idem colligitur ex cap. 25 et 51 libri de Prædestinatione ejusdem Hincmari. Itaque horum librorum auctores, inquit illi, fuere quidam clerici Ecclesiæ Lugdunensis, qui, ut arderent Ebboni infenso Hincmaro, adversus illum stylum acuerunt.

Atque hinc concludendum est tantam non esse illorum librorum auctoritatem, ut etiamsi adversarentur capitulis Carisiacis (quod falsum esse antea probavimus) eo ipso statim hæc capitula essent rejicienda, quemadmodum contendunt adversarii. Qui circa historicam hanc quæstionem plura volet adeat Cellotium de Historiâ Gotescalci lib. 2, cap. 24, lib. 3, cap. 15, lib. 4, cap. 14, Mabillonium, Sirmundum et ex recentioribus Pâtre Duchesne in suâ de Prædestinationismo historiâ.

CAPUT IV.

De concilio Valentino.

Dùm motæ à Gotescalco quæstiones summâ utrinque contentione agitentur, Lotharii imperatoris jussu trium provinciarum, Lugdunensis, Viennensis et Arelatensis præsules, circa annum 855, Valentiam convenerunt, ut civitatis illius episcopi, qui ob varia crimina pessimè audiebat, causam discuterent. Eâ cognitâ ac finitâ, statuendum sibi aliquid judicârunt de illis controversiis, quibus tot jam annis turbabantur Galliæ; sex eâ de re sanciti sunt canones. Quæritur an iis faverit prædicta synodus erroribus Gotescalci, et impugnârit capitula Carisiaca.

CONCLUSIO PRIMA.— Synodus Valentina favit personæ Gotescalci, non autem ipsius doctrinæ.

Probatur prima pars: Ex canonibus 3 et 4 clarè colligitur Valentinos præsules errore facti sensuisse Gotescalcum immunem fuisse ab errore tum circa prædestinationem, tum circa mortem Christi. Id patebit ex dicendis mox expendendo prædictos canones. Probatur secunda pars, quia, ut ostendemus conclusione sequenti, synodus Valentina à doctrinâ Cari-

siacorum capitulorum reverà non discenti ; ergo, etc.

CONCLUSIO SECUNDA. — Synodus Valentina non in rei substantià, sed in quibusdam duntaxat loquendi modis recessit à doctrinà capitulorum Carisiensium.

Probatur recensendo et expendendo sex hujusce synodi canones qui præsentem controversiam spectant. Primus universè præscribit vocum novitates omni studio devitandas esse ; atque Joannem Scotum sive Erigenam impetit, qui contra geminam Gotescalci prædestinationem librum ediderat erroribus et profanà vocum novitate scatentem. Secundus decernit, *nec prorsus ulli malo præscientiam Dei imposuisse necessitatem, ut aliud esse non possit* ; adeoque Gotescalci errorem synodis Moguntinà et Carisiacà pridem confixum, iterùm damnat. Tertius canon his verbis conceptus est : *Fidenter fatemur prædestinationem electorum ad vitam et prædestinationem impiorum ad mortem*. Priora hæc verba in speciem videntur favere Gotescalco, qui contra Patres Carisiacos geminam prædestinationem propugnabat ; verùm quæ immediatè sequuntur, ipsi directè adversantur, atque penitus, consentiunt cum doctrinà capituli Carisiaci : « In electione tamen salvandorum, » inquit Patres Valentini, misericordia Dei « præcedit meritum bonum ; in damnatione « autem periturorum meritum malum præcedit justum Dei judicium. » Et paulò post : « Verùm aliquos ad malum prædestinatos esse « divinà potestate, videlicet ut quasi aliud esse « non possint, non solum non credimus, sed « etiamsi sunt, qui tantum malum credere velint, « cum omni detestatione, sicut Arausicana synodus, illis anathema dicimus. » Nihil profecto aliud voluit capitulum Carisiacum.

Quartus agit de redemptione sanguinis Christi. « Item, inquit, de redemptione sanguinis « Christi, propter nimium errorem qui de hæc « causà exortus est, ita ut quidam, sicut eorum scripta indicant, etiam pro illis impiis, « qui à mundi exordio usque ad Passionem « Domini in suà impietate mortui æternà damnatione puniti sunt, effusum eum definiant, « contra illud propheticum : *Ero mors tua, ô mors ; ero morsus tuus, inferne*. Illud nobis « simpliciter ac fideliter tenendum ac docendum placet juxta evangelicam et apostolicam « veritatem, quòd pro illis hoc datum pretium « teneamus, de quibus Dominus ipse noster « dicit : Sicut Moyses exaltavit serpentem in « deserto, ita exaltari oportet filium hominis,

« ut omnis qui credit in ipso non pereat, sed « habeat vitam æternam. »

His verbis Patres Valentini eorum duntaxat errorem proscribunt, qui, teste S. Aug. hæresi 79, dicunt, *descendente ad inferos Christo, credidisse incredulos, et omnes exinde liberatos*. Et, ut loquitur Greg. Mag. Homil. 22 in Evangelia, *morte Christi exinanitos fuisse inferos*. Appositè duntaxat ad hanc erroneam sententiam, perperam et errore facti capitulo Carisiaco affixam (ut pluribus et manifestè probat Hincmarus opuscul. de Prædest. cap. 27, ac præsertim ex eo quòd postquam edixerunt Patres Carisiaci, *nullum esse pro quo Christus mortuus non fuerit*, statim adjecere : *Licet non omnes passionis ejus mysterio redimantur*) ; asserunt Patres Valentini, « erroneum esse affirmare Christum pro impiis qui à mundi « exordio usque ad Passionem Domini in suà « impietate mortui sunt, sanguinem suum effuisse. »

Hunc tantùm errorem proscribere voluisse Patres Valentinos, nequaquam verò negasse Christum mortuum fuisse sufficienter pro omnibus, tum sufficientià pretii, tum sufficientià voluntatis, varia demonstrant. Constat id 1º ex mox dictis circa Ecclesiam Lugdunensem. Etenim idem planè contractiùs exprimunt Patres Valentini in suis canonibus, quod Ecclesia Lugdunensis uberius probat et evolvit in suis libris de tribus Epist. et de tenendâ veritate ; id factentur adversarii, et manifestè liquet ex collatione utriusque textûs : atqui, uti probavimus, Ecclesia Lugdunensis non negat mortem Christi pro omnibus sufficienter, sed efficaciter duntaxat oblatam ; ergo, etc. Constat 2º, quia in citato canone ad doctrinæ suæ confirmationem laudant Osee testimonium : *Ero mors tua, ô mors ; ero morsus tuus, inferne*. Quo eodem testimonio usus est Greg. laudatâ Homil. 22, ad refellendos hæreticos qui volebant *Christo descendente ad inferos, exinde eductos fuisse impios, et ad cælestia regna perductos*. Constat 3º ex comparatione quâ utuntur, serpentis ænæi à Moyse in deserto exaltati ; sicut enim serpens æneus illos tantùm salvabat qui oculos in eum convertebant ; ita Christus illos tantùm efficaciter et reipsà redimit, qui in eum credentes, oculos fidei in ipsum dirigunt ; sed quemadmodùm Moyses serpentem æneum extulerat ad salutem omnium qui à serpentibus essent vulnerati, ac proinde pro iis etiam qui suâ pervaciâ malent mori quàm in eum oculum conjicere ; ita et Christus exaltatus est in cruce pro salute

omnium quos serpentis tartarei virus afflavit, ac proinde etiam pro reprobis qui tanto remedio uti noluerunt, quemadmodum exponit S. Aug. tract. 12 in Joan. Constat 4^o, quia Patres Valentini qui Carisiacos canones rigorose ac veluti hostiliter discusserunt, nihilominus tertium hunc canonem de voluntate salutis omnium: *Deus omnipotens omnes homines sine exceptione vult salvos fieri, licet non omnes salventur*: ne levissimam quidem censuram notaverunt, sed illum intactum silentio præterierunt. An ita sese gessissent, si asserere Christum pro omnibus mortuum fuisse, erroneum iudicassent? Sanè cum sententia de divinam voluntate salutis omnium, radix sit et origo alterius quæ mortem Christi pro omnibus sufficienter oblatam asserit, si posteriorem hanc erroneam existimassent Patres Valentini, profectò in priorem tertio canone Carisiaco expressim, censuræ aculeum haud dubiè distrinxissent; sicque canonem hunc tertium alio edito canone ipsi adverso impugnare non omisissent. Hæc qui apud se attentè perpendet, non dubitabit profectò quin Valentina synodus silentio suo Carisiacum illud edictum comprobaverit. Constat 5^o, quia synodus Valentina sæpius indicat sese præter redemptionem efficacem, quæ homines electi de facto salvantur, aliam quoque admittere sufficientem quæ reprobi potuerunt salvari. Sic Can. 2: « Nec ipsi mali, inquit, ideò pereunt, quia boni esse non potuerunt, sed quia boni esse noluerunt. » Et adhuc expressius can. 5 docet, ex ipsa multitudine fidelium et redemptorum, alios salvari æternam salutem; quia per gratiam Dei in redemptione suâ fideliter permanent; alios, quia noluerunt permanere in salute fidei quam initio acceperunt... ad plenitudinem salutis, et ad perceptionem æternæ beatitudinis nullomodo pervenire. » Reprobi ergo in mente synodi Valentinae pereunt, non quia non possunt, sed quia nolunt salvari; adeoque à sufficienti redemptione non sunt exclusi.

Constat denique, ut alia plurima præmittam, quia synodorum Carisiacæ et Valentinae præsules in synodo Tullensi apud Saponarias anno 859 congregati iudicârunt, ut postea dicemus, Carisiacos canones, nec Valentinis canonibus, doctrinæ S. Aug. adversari.

Quintus canon statuit, quòd omnes regenerati à peccatis abluti sint; sicque illum Gotescalci errorem perstringit, quo, teste Amolone et Hincmaro, assererat solos prædestinatos in baptismo gratiam consequi.

Sextus est de libero arbitrio, nec à Carisiensibus vel minimè abludit.

Ex his patet Valentina synodus à doctrinâ capitulorum Carisiacorum in rei substantiâ non recessisse; quamvis nonnullas loquendi rationes Hincmari et coepiscoporum à quibus condita fuerant prædicta capitula, non approbaverit. Discordiam hanc inde ortam conjiciunt nonnulli, quòd cum antistites diversis regibus parerent, facile in contraria studia scissi sunt. Scilicet capitula Carisiaca ab episcopis regni Caroli Calvi sancita sunt, Valentini verò canones ab episcopis regni Lotharii conditi.

Dices: Synodus Valentina tanquam erronea damnat capitula Carisiaca; ergo in rei veritate ab eorum doctrinâ longius distabat. Antecedens constat ex can. 4 Valentino in quo post verba superius recitata, hæc leguntur: « Porro capitula quatuor (id est, Carisiaca) quæ à concilio Fratrum nostrorum minùs prospectè suscepta sunt, propter inutilitatem, vel etiam noxietatem, et errorem contrarium veritati; sed et alia 19 syllogismis ineptissimè (à Joanne Scoto) conclusa... à pio auditu fidelium penitus explodimus. »

Respondeo 1^o: Damnant capitula Carisiaca, alieno et perverso sensu intellecta, concedo; legitimo ac germano sensu exposita, nego. Nam propter occultas similitudines, de quibus mox dicemus, factum est, ut sicut ab Ecclesiâ Lugdunensi, ita et à concilio Valentino Carisiaca capitula inimicè omnino explicata, atque in sensus extraneos detorta fuerint, et iuxta illos sensus publicè proscripta. Id perspicuum est, velex ipso citati canonis exordio, ubi Patribus Carisiacis tacito nomine tribuitur error de quo nequidem cogitârunt; videlicet, Christum mortuum esse ut damnatos ab inferis extraheret.

Respondeo 2^o, hæc verba: *Porro capitula quatuor, etc. usque ad clausulam, sed et alia 19 syllogismis, etc.*, Valentino canonici inserta fuisse ab Ebbone Gratianopolitano, insciis concilii Patribus. Id constat, quia ii ipsi præsules qui Valentinae synodo interfuerant, postea anno 859 ad synodum Lingonensem et Tullensem convenientes, decreta Valentina ita probaverunt, ut prædicta verba expungi voluerint, iisque prætermisissis, in capitula Joannis Scoti totum censuræ aculeum distrinxerint: *Porro, inquit, capitula 19 syllogismis ineptissimè quodam Scoto conclusa, etc.*

Quòd autem ab Ebbone canonem Valentino inserta fuerit capitulorum Carisiacorum censura,

inde fit verisimile, quòd Valentinis canonibus condendis præcipuam navaverit operam, ut scribit Hincmarus in priore ad Carolum Calvum Epistolâ, et ut colligi potest ex ipsâ ejusdem concilii præfatione, in qua post archiepiscopos, solus ex episcopis Ebbo nominatur cum hoc elogio : *collaborante eis quàm maximè venerabili Ebbone Gratianopolitano episcopo*. Hic porro occultas cum Hincmaro similitates gerebat, eò quòd ex sorore nepos esset alterius Ebbonis qui adversus Ludovicum Pium conjuraverat, quique eam ob rem exactoratus, et Rhemensis pulsus archiepiscopatu, suam in Sedem suffectum Hincmarum gravissimè tolerat. Igitur avunculi sui dolorem ulturus Ebbo Gratianopolitanus, Hincmaro et Carisiaco capitulis liberius obtrecebat; cùmque in Valentinâ synodo plurimum posset, recitata in objectione verba : *Porrò capitula quatuor, etc.*, quibus Carisiacorum capitulorum censura continetur, quarto canoni inseruisse non immeritò conjicitur. Cæterum, quidquid sit de hæcce conjecturâ, si agentibus Patribus prædicta verba apposita fuerunt, ipsis auctoribus suppressa quoque fuere; nihil ergo præstant adversus capitula Carisiaca. Quâ tandem ratione compositum fuerit totum istud dissidium, patebit ex dicendis cap. sequenti.

CAPUT V.

De aliis synodis in causâ Gotescalci habitis.

Præter synodos Carisiacam et Valentinam, de quibus jam diximus, tres aliæ celebratæ sunt in præsentî causâ Gotescalci.

Prima est synodus Lingonensis à Patribus Valentinis habita anno 859, dùm ad concilium Tullense apud Saponarias pergebant. Hæc in synodo lecti canones Valentini, suppressaque fuit clausula contra quatuor capitula Carisiaca; ita ut illius clausulæ nulla jam habeatur mentio, tum in sequentibus, tum in præsentî synodo. Secunda est Tullensis prima apud Saponarias post 13 dies à synodo Lingonensi celebrata; adfuere episcopi 12 Provinciarum. A Patribus Valentinis oblata fuere canones synodi Valentini, ut ab universo concilio approbarentur; verùm illorum lectione commoti fuere plures episcopi; quod ubi vidit synodus statuit, « ut in proximo concilio quisque cum scriptis SS. Patrum adesset, et rebus examinatis quod rectum videretur omnes tenerent; » hæc habet Hincmarus opusculo de Prædestinationat. cui consonat canon 10, his verbis : « Relecta sunt in eadem synodo quædam capitula

« (Valentina scilicet), super quibus quorundam fratrum sensus dissentire probantur. Unde convenit inter episcopos ut Deo favente pace ac tranquillitate recuperatâ simul conveniant, et prolatis SS. Scripturarum atque catholicorum doctorum sententiis, quæ saniora sunt concordi unanimitate sequantur. » Non ergo in hoc concilio approbati fuerunt canones Valentini. Tertia synodus est Tullensis, secunda apud Villam Tusiacum anno 860 habita ab episcopis Carisiacis, Valentinis et cæterarum provinciarum Galliæ. Hoc in concilio siluerunt Patres de capitulis Carisiacis et canonibus Valentinis, ne hos vel illa approbando; animos adhuc commoverent; sed in Epist. synodali quod rectum ipsis videbatur communiter fuit prolatum. Quatuor quæstionum hoc ipsorum fuit iudicium.

1^o De geminâ vel unicâ prædestinatione siluerunt; sed prædestinationem electorum propugnârunt. 2^o Liberum arbitrium agnoscitur in homine post Adæ peccatum, sed ad bonum gratiâ debet sanari. 3^o De voluntate Dei hæc habentur : « Nihil in cælo vel in terrâ fit; nisi quod ipse aut propitius facit, aut fieri justè permittit, qui vult omnes homines salvos fieri, et neminem vult perire. Sed justus Dominus justitiam diligens, iniquitatem non volens, eis quos ad imaginem et similitudinem suam fecit, nec post primi hominis casum vult tollere violentè suæ voluntatis arbitrium liberum, quibus reddere paratum est meritum, » etc. Ergo agnoscitur voluntas generalis salvandi omnes homines. 4^o De morte Christi hæc dicuntur : « Qui corporis morte in cruce pro omnibus mortis debitoribus, solus inter mortuos liber à mortis debito dormiens, prædestinatus Filius Dei... de his qui in eum credere voluerint, sive adventum ejus in carne præcesserint, sive etiam forent secuti... ædificaturus erat Ecclesiam aperto lanceâ latere. » Hic sanè prædicatur mors Christi pro omnibus; mortis quippe debitores sunt omnes; sicque tandem sopitæ hæc circa prædestinationem controversiæ quæ Gallicanam Ecclesiam tamdiu agitarant.

Dissertatio sexta.

DE WICLEFISTIS.

Paucis agemus 1^o de Wiclefo ejusque defensoribus; 2^o de ipsius erroribus, 3^o de hæreseos Wiclefi damnatione.

CAPUT PRIMUM.

De Wiclefo ejusque defensoribus.

Wiclefo praelusit (ut opinantur multi) Thomas Bradwardinus; illius patrocinium suscepere praesertim Joannes Hus et Hieronymus de Pragâ; singulorum notitia exhibenda est.

1^o Thomas Bradwardinus, natione Anglus, professione monachus ordinis Minorum, Oxoniensis doctor cognomine *profundus*, in eadem Universitate professor et cancellarius; posthâc regis Eduardi III confessarius, semel et iterum in archiepiscopum Cantuariensem electus; tandem inauguratus, quadragesimo post inaugurationem die mortuus, floruit decimo quarto seculo. Vir erat eruditione, sed sine criticâ, ingenio acri, sed audaci praeditus; imaginationis phantasmatibus plurimum delusus, *totum penè mundum post Pelagium abiisse* assererat, quem ut à tam nefando revocaret errore, librum edidit *de causâ Dei*, quem tamen iudicio sanctae romanae Sedis suaeque cætera opera subiecit.

2^o Wiclefus et ipse quoque Anglus, doctor et Oxoniensis professor, deinde de Lutterwold diœcesis Lincolnensis rector; posthâc collegii Cantuariensis Oxonii praefecturam suscepit, à quâ tum archiepiscopus, tum Urbanus V, quem appellaverat, eum ejecerunt; hinc odii in Ecclesiam et errorum origo. Hæresi grassanti obstitit romanus Pontifex, et illius jussu synodus Londinensis Wiclefi errores damnavit: ipse hoc in concilio cantavit palinodiam, cujus ope suam repetiit ecclesiam, in quâ supremum obiit diem anno 1387, vel, ut alii volunt, 1384.

3^o Mortuo Wiclefo, non ideò sopitus error; sed utrâque potestate adversum illius discipulos insurgente, ipsi per Angliam latitârunt, aut ex eâ aufugerunt; ex his unus cum magistri libris Bohemos petiit, illisque pessimum virus propinare coepit. Tunc temporis florebat Joannes Hus eloquentiâ et moribus compositis celebris; primum errorem impugnavit, verum paulò post miserrimè deceptus, quos igne cremandos censuerat libros, postea acriter defendit et explicuit. Censuris irretitus ab archiepiscopo, sanctam Sedem appellavit; confirmatâ à romano pontifice proprii praelati sententiâ, novo instrumento ad concilium œcumenicum provocavit, talique innixus appellatione censuras et latam interdicti sententiam sprevit.

In his temporum circumstantiis habitum fuit conc. Constantiense; illud audacter adiit Joannes Hus, doctrinam agnovit, eam contendit

sanam, instructionem efflagitavit ut locum disputationi daret, obsequium promisit nusquam, nec animum retractationi paratum ostendit; unde convictus, et pertinax, iudici seculari derelictus, pertinaciam et errores flammis expiavit.

Eodem prorsus modo vitæ cursum consummavit Hieronymus de Pragâ, fidus Joannis Hus discipulus; accersitus quippe à concilio Constantiensi, errores quos tuebatur ejuravit primum, sed ad vomitum rediens, et in secundo lapsu pertinax, igne concrematus obiit.

Utroque Wiclefianæ hæreseos duce interempto, in varias discipuli divisi sunt sectas; tandemque Lutheranis et Calvinistis conjuncti, evanuit Wiclefistarum seu Hussitarum Ecclesia.

CAPUT II.

De Wiclefi erroribus.

Erravit Wiclefus contra Deum et Christum, contra Ecclesiam variosque illius ordines ac membra, contra sacramenta; omnium denique veterum et rigidiorum Prædestinatianorum impia dogmata renovavit, novisque blasphemiiis cumulavit. Hoc ultimum errorum hujusce hæresiarchæ caput, quod præsentem materiam spectat, hic prosequemur; nonnulla tamen adjiciemus ut plenior habeatur notitia integri ipsius systematis; ex eo enim fonte hauserunt quotquot postmodum subsecuti sunt hæresiarchæ ac novatores.

Docet 1^o, Deum prædestinare singulas creaturas intellectuales ad quemlibet actum suum, etiam peccaminosum. 2^o Prædestinatione suâ necessitatem suam absolutam ipsis inferre, sive ad bonum, sive ad malum. 3^o Eas tamen liberas esse; tum quia spontaneè agunt; tum quia possent non agere si vellent, sed aliter velle non possunt. 4^o Sicut prædestinatus non potest à gratiâ excidere; sic præscius (id est reprobus) non potest in illâ perseverare. 5^o Deum non potuisse primi hominis peccatum prohibere. 6^o Verbum divinum necessariò carnem assumpsisse, satisfecisse, ac mortuum fuisse pro nobis. 7^o Quod priorum fons est et origo, Deum actu et necessariò producere, tum ad intra, tum ad extra, quidquid potest producere. 8^o Mundum proinde, et quidquid in mundo existit, necessitate absolutâ existere; quidquid autem non existit, omninò esse impossibile; Deumque fore aut impotentem aut invidum, si id quod producere potest, minimè produceret. 9^o Quemadmodum Deus necessariò producit quidquid producere

potest, ita etiam nihil annihilare potest. 10^o Quanquàm Deus necessariò producat quidquid producit, ipsum tamen liberum esse; eà fermè ratione quâ Deus liber est in generatione Filii sui quem Deus necessariò ab æterno generat. Unde legitima harum omnium assertionum consequentia est, omnia prorsus, tam ex parte Dei quàm ex parte creaturæ, fatali quâdam ac absolutâ necessitate evenire.

Hæc omnia errorum portenta docuisse Wiclefum constat ex variis ejus scriptis, præsertim verò ex præcipuo ipsius opere *Trialogo* inscripto lib. 1, cap. 1, 10, 11, 15, et lib. 3, cap. 7. Idem tradunt Thomas Valdensis lib. 1, cap. 1 et sequent.; Joannes Cochleus lib. 3 Hist. Hussitarum, et illustrissimus Bossuet lib. 11 Variationum, n. 152.

Ex his patet, uti annotat illustrissimus Bossuet, lib. 11 Variationum, n. 152, absurda perinde ac impia Wiclefi dogmata ad hæc duo summam capita revocari posse. Primum, durâ ac fatali quâdam necessitate Deum perpetuò agi; secundum, quod ex altero sequitur, Deum causam esse et auctorem omnium criminum. Unde prædicti hæresiarchæ doctrina eò tandem tendit, ut talem introducat Deum, qualem vel ipsi athei meritò negarent; atque adeò insignis hujusce reformatoris religio ipsomet atheismo deterior est.

CAPUT III.

De hæreseos Wiclefi damnatione.

Wiclefi errores variis censuris confixi sunt. 1^o Judicio doctrinali Universitatum Pragensis, Oxoniensis et Parisiensis. Ita colligitur ex Cochleæ lib. 1 Hist. Hussitarum, et ex conc. Constant. sess. 8, quo autem præcisè anno non omninò constat. 2^o Eà de causâ tria habita sunt concilia; duo priora Londini annis 1582 et 1596; tertium verò Oxonii an. 1408; in iis synodicis decretis plures et præcipuè damnati sunt Wiclefiani errores. Tres istæ synodi extant tom. 11 parte 2 concil. edit. Labb. 5^o Joannes XXIII dogmata Wiclefi damnavit, librosque prohibuit anno 1415; synodale decretum reperire est in collect. concil. Labb. loco mox laudato. 4^o Denique, ultimo ictu confossa est Wiclefiana hæresis in concilio Constantiensi sess. 8. Ibi sancta synodus articulos 45 Wiclefi damnat, *plures ut notoriè hæreticos.... alios non catholicos, sed erroneos; alios scandalosos et blasphemos; quosdam piarum aurium offensivos; nonnullos eorum temerarios et seditiosos.*

Ducentos etiam sexaginta articulos à doctoribus Oxoniensibus notatos eadem sancta synodus ibidem proscripsit; imò habito prius accurato examine, latâ sententiâ declaravit eundem Wiclefum fuisse notorium hæreticum, pertinacem et in hæresi decessisse; ejusque dudum vitâ functi memoriam damnavit, atque illius ossa exhumari et extra Ecclesiam projici decrevit.

His omnibus censuris præverat pontificum Greg. XI judicium an. 1377, quo transmissis ad se 19 errorum Wiclefi capitibus, pontifex ipsos ex cardinalium consilio damnavit, litterasque dedit ad Angliæ regem, Londinensem episcopum et Oxoniensem academiam, quibus eos excitat ut omni quo possent studio emergentem hæresim profligarent. Extant hæ pontificis litteræ in Labbeanâ collect. Concil. loco antea citato.

Dissertatio septima.

DE LUTHERANIS.

Dicemus 1^o de Luthero ejusque præcipuis defensoribus. 2^o De ipsius erroribus; 3^o de multiplici Lutheranæ hæreseos damnatione.

CAPUT PRIMUM.

De Luthero ejusque discipulis.

1^o Anno 1483 Islebii in Saxonîa plebeis parentibus natus est Martinus Lutherus; humanioribus litteris imbutus, Erfordiam se contulit, ubi ordinem Eremitarum S. Aug. professus est. Inde Wittembergam translatus, post actus academicos lauream doctoralem consecutus est, ac theologiæ professor creatus anno 1415, ætatis verò suæ 35.

2^o Anno 1517, cùm ab Alberto sanctæ romanæ Ecclesiæ cardinali et Moguntino archiepiscopo, Dominicani præ Augustinianis provincia demandata fuisset promulgandi novas indulgentias, occasione imminenti Turcarum in Germaniam irruptionis, à Leone X concessas; id ægrè admodum ferens Lutherus, primum adversus indulgentiarum duntaxat abusum debacchari cœpit; deinde contra ipsarum substantiam; tum adversus justificationem, sacramentorum efficaciam, aliaque plurima fidei dogmata. Interim litteras dedit ad S. Pontificem eximæ humilitatis ac modestiæ speciem præ se ferentes; sic enim ipsum aloquitur: « Beatissime Pater, prostratum me pedibus « tuæ B. offero cum omnibus quæ sum et ha-

« beo.... approba, reproba, ut placuerit, vocem tuam, vocem Christi, in te præsidentis et loquentis agnoscam. »

3^o Anno 1518, in jus vocatus à cardinali Cajetano summi pontificis in Germaniâ legato, Augustam venit hæresiarcha; cùmque ipsi in erroribus pertinaci censuras minaretur legatus, ad pontificem appellavit, clamque se Augustâ subduxit; ac postea cùm audiret processum suum Romæ continuandum fore; à summo pontifice ad futurum concilium generale appellavit, præmissâ in appellationis instrumento solenni hæc protestatione : « Contra unam, sanctam et catholicam et apostolicam Ecclesiam, quam totius orbis esse magistram et obtinere primatum non ambigo, sanctæque Sedis apostolicæ auctoritatem, ac sanctissimi Domini nostri papæ benè consulti potestatem nihil dicere intendo. »

4^o Anno 1519, publicæ per multos dies Lipsiæ habitæ sunt concertationes Lutherum inter et celeberrimum Ekium, præsentem Georgio Saxonie principe, constitutisque scribis ex utrâque parte qui dicta exciperent. In his disputationibus Ekius egregiam de Luthero victoriam repertavit, qui multoties inter disputandum obmutuit. Hoc ipso anno Facultates Coloniensis et Lovaniensis quæ pro Ekii parte judicium tulerant, censuram edidère in plura Lutheri dogmata; in hos aliosque sibi adversantes catholicos doctores, variis et editis mordacibus libellis, acerrimè insurrexit Lutherus. Etiam hoc anno cum expressâ perfectæ submissionis attestatione ad Leonem X, scripsit : « Paternas, *inquit*, ac verè Christi vicarias aures huic oviculæ tuæ interim clementissimè accomodare dignetur Beatitudo tua.... Coram Deo et totâ creaturâ suâ testor, me neque voluisse, neque hodiè velle, Ecclesiæ romanæ, ac Beatitudinis tuæ potestatem ullo modo tangere; quin plenissimè confiteor hujus Ecclesiæ potestatem esse super omnia, nec eî præferendum quidquam sive in cœlo, sive in terrâ, præter unum Jesum Christum Dominum omnium. »

5^o Anno 1520, Ekius Romam perrexit ad Leonem pontificem; ipsique significavit quanta Ecclesiæ imminerent pericula, si grassantibus in Germaniâ Lutheri erroribus non occurreretur. Quamobrem pontifex bullam edidit 17 Kalend. julii ejusdem anni, in quâ quadraginta et unus ex ejus erroribus respectivè damnantur *tanquàm respectivè hæretici, aut scandalosi, aut falsi, aut piarum aurium offensivi*, etc. Pon-

tificio fulmine percussus se sentiens hæresiarcha, furore actus, à pontifice ut ab Antichristo provocavit ad concilium generale; libros omnes Juris canonici cum hæc Leonis bullâ incendit, libellumque apologeticum evulgavit atrocissimis calumniis refertum; nec destitit postea furens, variis scriptis in pontificem, cardinales, episcopos; cæterosque catholicos doctores furenter debacchari. Inter hujusmodi scripta eminet liber de captivitate Babylonica. Qui accuratam desiderat operum Lutheri indicem, consulat Cochlæum ad calcem operis ejusdem Cochlei, *de actis et scriptis Lutheri*.

Quamplures sibi sectarios adscivit Lutherus, quos *Evangelicos* dici voluit, quique subinde in varias sectas divisi, in quinque classes posunt distribui.

Prima est Lutheranorum rigidiorum qui pura Lutheri sectantur dogmata. Horum Antesignanus meritò recensetur Matthias Flaccus Illyricus, centuriarum Magdeburgensium præcipuus editor. Inter rigidiores Lutheranos numerari possunt Osiander, Brentius, Callixtus et alii.

Secunda est molliorum Lutheranorum, hoc est, eorum qui Lutheri placita in nonnullis emollire conati sunt. Horum dux est Melancthon qui Confessionem Augustanam composuit anno 1530, unde Confessionistæ et molles Lutherani dicti sunt qui eam sequuntur. Confessio hæc Augustana nihil aliud est, quàm fidei professio à Luthero primùm 27 articulis proposita, deinde à Melancthone 11 articulis emollita, amplificata et meliorem in formam redacta, sicque Carolo Quinto imperatori in comitiis Augustanis oblata à Germaniæ principibus, aliisque istis adhærentibus. Hi superiore anno 1529, in generalibus Spiræ comitiis, contra decretum quo præcipiebatur catholicæ religionis professio protestati fuerant; unde et primùm Protestantes dicti, et cæteri deinceps eis adhærentes.

Tertia est Sacramentariorum, qui à doctrinâ Lutheri circa Eucharistiam recedentes, profitentur in Eucharistiâ Christi corpus non esse nisi in signo. Horum primus creditur Carlostadius, diaconus Wittembergensis, cui sese adjunxere Zuinglius, Oecolampadius. Hi Calvinianam hæresim præformaverunt, de quâ postmodum.

Quarta est Anabaptistarum, qui præter cætera Lutheri dogmata, docent baptismum parvulis nihil prodesse, eosque proinde si bapti-

zati fuerint, iterum esse baptizandos, quando ad adultam ætatem pervenire. Hujus sectæ, in varias postea divisæ, auctor est anno 1522 Balthazar Pacimontanus, vel, ut probabilius credunt alii, Nicolaus Storkius.

Quinta tandem eorum est qui Adiaphoristæ, seu Indifferentes dicuntur, quales fuere de molliorum Confessionistarum classe Wittembergenses et Lipsenses theologi, qui nedum Ecclesiæ cæremonias, conciliorum constitutiones, sed etiam et *Sacramenta omnia ad salutem indifferentia esse* contendebant, ita ut unicuique liberum esset pro bono pacis illis uti vel non uti.

CAPUT II.

De erroribus Lutheri.

Non statim suos omnes errores evomit Lutherus, sed successione quâdam, prout data est occasio illos publicandi. Ad quinque præsertim capita revocari possunt, 1° circa prædestinationem; 2° circa substantiam gratiæ; 3° circa ipsius agendi modum; 4° circa liberum arbitrium; 5° denique circa justificationem.

§ 1. *Erroris Lutheri circa prædestinationem.*

Assertit Deum decreto antecedenti, positivo, immutabili ac necessitate imponente, alios prædestinare ad vitam, tum primam, tum secundam, id est, tum fidem justificantem, tum gloriam; alios verò prædestinare ad mortem, tum primam, tum secundam, id est, peccatum et pœnas æternas. Ex hoc autem irrevocabili decreto

Sequitur 1° Deum velle solos electos salvos fieri; 2° pro ipsis solis mortuum esse Christum; 3° Deum esse causam et auctorem peccati.

Hos errores passim docet Lutherus, in primis lib. de servo Arbitrio, et in assert. trigésimi sexti art. Ex quo constat Prædestinationum errores ab ipso renovatos esse.

§ 2. *Erroris circa substantiam gratiæ.*

Contendit Lutherus gratiam sanctificationem aliaque dona primo homini in statu innocentiae concessa, ipsi fuisse propriè et strictè naturalia, eo videlicet sensu, quòd ipsi debita fuerint ratione justitiæ et misericordiæ divini, sintque partes, appendices naturæ et primordia naturalia. Ita Lutherus in cap. 3 Genes.: « Statuamus, inquit, justitiam non fuisse quoddam donum, quod ab extra accederet, separatum à naturâ hominis, sed

« fuisse verè naturalem; ut natura Adæ esset « diligere Deum, credere Deo, agnoscere « Deum. Hæc tam naturalia fuere in Adamo, « quàm naturale est quòd oculi lumen recipiunt. » Ex hoc autem palmari principio, plurima sequuntur erronea consectaria, quæ ultrò agnoscit Lutherus.

Sequitur 1° hominem læsum fuisse in donis naturalibus: « Hæc probant, inquit loco citato, originalem justitiam esse de naturâ hominis; eâ autem per peccatum amissâ, non mansisse integra naturalia, ut scholastici delirant. » 2° Hominem naturaliter, intrinsicè et substantialiter immutatum fuisse, atque ex justo, innocenti, sano et integro, per peccatum evasisse reum, infirmum, corruptum; ita ut nihil sit aliud nisi miseria, corruptio et peccatum. Ita Matth. Illiric. lib. de essent. imag. Dei. Quod illustrat exemplo corporis viventis et mortui: Quemadmodum enim, inquit, ubi primum anima separatur à corpore, nihil aliud remanet nisi turpe ac foetidum cadaver; ita anima post peccatum intrinsicè et substantialiter corruptio est duntaxat et peccatum. 3° Concupiscentiam ipsosque concupiscentiæ motus, reipsâ esse peccata; idque non solum in non regeneratis, sed etiam in renatis. Ita Luther. in Assert. art. 2, 3, 26, 27. 4° Quemlibet justum in quibuscumque suis operibus, etiam ex objecto et ex fine bonis, semper et necessariò peccare; tum quia in iis semper aliquid concupiscentiæ immiscetur, quæ ex dictis peccatum est; tum quia procedunt ab homine jam vitio et corrupto per peccatum, ac proinde semper vitiosa sunt; eo ferè modo, inquit Lutherus locis citatis, quo quilibet tibix curvæ aut equi tripedis motus semper vitiosus est. 5° Omnia peccata ex naturâ suâ mortalia esse, ac proinde pœnis æternis digna; esse autem venialia ex benignitate duntaxat et misericordiâ Dei; quatenus scilicet justis non imputantur. Ita Luther. in Assert. art. 27.

§ 3. *Erroris circa modum agendi gratiæ.*

His capitibus continetur error Lutheri circa modum agendi, seu vim et efficaciam gratiæ. Docet 1°, per gratiam, voluntati necessitatem inferri, non eam quidem quæ coactionis ac violentiæ dicitur, sed eam quæ simplex vocatur; quâ nempe voluntas ita ad unum invincibiliter et insuperabiliter determinatur, ut actus contrarius amplius non sit in ejus potestate; « Sequitur, inquit lib. de servo Arbi-

« trio, nos necessariò operari... necessariò
 « verò dico, non coactè, necessitate immu-
 « tabilitatis, non coactionis. Hoc est, homo
 « cùm vacat Spiritu Dei, non quidem violenti-
 « tià, velut raptus obtorto collo, nolens fa-
 « cit malum; sed sponte et lubenti voluntate
 « facit. Hoc vocamus modo necessitatem im-
 « mutabilitatis, quòd voluntas sese mutare,
 « et aliò vertere non possit. Rursùs ex alterà
 « parte, si Deus in nobis operatur, mutata et
 « blandè assibilata per Spiritum Dei voluntas,
 « iterùm merà lubentià et pronitate, ac sponte
 « suà vult et facit, non coactè, pro naturà
 « voluntatis, quæ si cogeretur, voluntas non
 « esset: nam coactio potius est, ut sic dicam,
 « noluntas. » Nihil his verbis clarius exoptari
 potest. Atque hinc Bucerus insignis Luthera-
 nus lib. de Concordià meritò scribit: *Pax*
est Lutheranos inter et Catholicos, si sola coac-
tio libertati repugnat.

Docet 2º, sub gratiæ impulsu voluntatem,
 utpote facultatem vitalem, vitaliter agere; nec
 instar lapidis se merè passivè habere ad bo-
 num materialiter sumptum, id est, ad phy-
 sicum actûs. Ita colligitur ex mox citatis Lu-
 theri verbis: Ait enim voluntatem, « Deo in
 « nobis operante, non cogi, sed velle et fa-
 « cere, et amare bonum merà lubentià et
 « pronitate ac sponte suà; etc. » Unde Kemni-
 tius conqueritur oppositam sententiam Luthero
 falsò imponi: « Exagitant illud, inquit parte
 « primà Examinis concil. Trid. ad sess. 6,
 « quòd Lutherus dicit hominem ad conversio-
 « nem habere se merè passivè.... quasi planè
 « otiosa sit et iners voluntas, et tanquam brutà
 « agitatione percellatur, quod Luthero nun-
 « quàm venit in mentem.... Non docuit sine
 « cogitatione mentis, et consensu voluntatis
 « fieri conversionem, sed hoc unum voluit,
 « Deum, eos quos convertit, trahere volunta-
 « tibus quas in ipsis operatus est, sicut Au-
 « gustinus loquitur. » Itaque (quod observan-
 dum) Lutherus non præcisè voluntati denegat
 actionem, determinationem et electionem; sed
 eam duntaxat quatenùs ex activà indifferentià
 nulli necessitati obnoxia proficisceretur.

Docet 3º, voluntatem Deo moventi et exci-
 tanti assentiendo, nihil vi proprià et partiali
 virtute, quantumvis per gratiam elevatà, coo-
 perari respectu boni *formaliter* sumpti, quate-
 nùs nempe bonum est, sed circa illud merè
 passivè se habere; seu agi, non agere; quan-
 doquidem Deus tanquàm totalis et adæquata
 causa, in ipsà et per ipsam voluntatem, to-

tum quòd bonum est operatur. Cujus quidem
 sententiæ ratio et causa à priori hæc est, quòd
 in principiis Lutheri, ut antea observavimus,
 optima quæque viri etiam sanctissimi opera,
 inficiantur aliquà peccati labe; nempe propter
 vitium concupiscentiæ, quod semper optimis
 actionibus humanis adhærescit. Quapropter
 merito synodus Trid. sess. 6, can. 4, anathema
 istud pronuntiat: « Si quis dixerit liberum ho-
 « minis arbitrium à Deo motum et excitatum,
 « nihil cooperari assentiendo Deo excitanti at-
 « que vocanti.... neque posse dissentire, si
 « velit; sed velut inanime quoddam nihil om-
 « ninò agere, merèque passivè se habere, ana-
 « thema sit. »

Docet 4º, vim et energiam gratiæ, ex vic-
 trice, superiori ac necessitante delectatione
 desumi; quod variis locis tradit hæresiarcha,
 ac præsertim citato mox lib. de servo Arbi-
 trio: « Si Deus, inquit, in nobis operatur,
 « mutata et blandè assibilata per Spiritum Dei
 « voluntas, iterùm merà lubentià et pronitate,
 « ac sponte suà vult et facit, non coactè. »

Docet 5º, non aliam in præsentì statu gra-
 tiam admittendam esse, quàm efficacem, in-
 vincibilem et insuperabilem, cui voluntas re-
 luctari non possit; verè ergo et propriè suffi-
 cientem, cui resistitur, omninò repudiat ille
 ac rejicit.

Dixi *verè et propriè sufficientem*: Lutherus
 enim perinde ac cæteri Protestantes, non ne-
 gant motus supernaturales distinctos à gratià
 efficaci; verùm motus illi debiles sunt et bonis
 operibus perficiendis impares. « Reformati, in-
 « quit Ludovicus le Blanc in Thesibus Sedanens.
 « pag. 548, qui negant omnes qui non conver-
 « tuntur, gratiam ad conversionem sufficien-
 « tem habere; non negant tamen quin aliquò
 « usque gratia Dei operetur in multis qui sese
 « in peccatis obfirmant, nec ad Deum per fi-
 « dem et resipiscentiam accedunt. » Gratiam
 porrò illam, interiorem esse, ibidem tum suo,
 tum aliorum, quos appellat, testimonio probat
 prædictus auctor.

§ 4. Errores circa liberum arbitrium.

Ex dictis facilè colligitur quæ sint Lutheri er-
 rores circa liberum arbitrium. Censet 1º, per
 peccatum voluntatem amisisse activam indif-
 ferentiam flectendi se ad partem alterutram;
 adeoque jam non esse in homine liberum arbi-
 trium, sed esse duntaxat vacuum sine re titu-
 lum. *Liberum arbitrium post peccatum, est res de*
solo titulo, ait Lutherus in art. 33. Idem docet

in Assert. ejusdem articuli. Censet 2^o, non dari in arbitrio libertatem à necessitate, sed tantum à coactione. Ita citato lib. de servo Arbitrio. Censet 3^o, necessitatem impositam voluntati esse invariabilem. eo sensu quod à voluntate mutari non possit; sed de facto esse mutabilem et variabilem, ita ut voluntas subiciatur modò gratiæ, modò concupiscentiæ. Ita ibidem. Censet 4^o, voluntatem merè passivè se habere, respectu boni *formaliter* sumpti, sensu antea exposito; imò et idem asserit certò quodam sensu, respectu boni materialiter spectati; quatenus nempe ad illud non liberè et cum indifferentiâ seipsam determinat, sed invincibiliter et necessariò determinatur; ita ut movente Deo ad opus bonum, in potestate non habeat voluntas humana, ut ab eo abstinere possit. Sic gratia præveniens vulgò dicitur, *motus qui fit in nobis sine nobis*, non quidem sine nobis vitaliter et activè concurrentibus, sed sine nobis liberè et ex indifferentiâ operantibus. Ita etiam dicebat Apostolus, se non operari motus indeliberatos concupiscentiæ; quia quamvis eos sufficienter produceret, liberè tamen non producebat.

Lutherum hoc unum velle asserendo voluntatem se habere merè passivè, constat 1^o ex citato antea textu libri de servo Arb. in quo expressè testatur voluntatem *velle, et voluntariè velle, agere, operari*. 2^o Ex Melanethone, Kemnitio, Zanchio, aliisque Lutheranis, qui id disertè asserunt; unde rigidam illam ac severam loquendi rationem abjecerunt, et confessi sunt hominem non passivè tantum se habere. Verba Kemnitii antea laudavimus. 3^o Idem tradit Calvinus lib. 1 in Pighium, ubi asserit falsò imponi. *Luthero liberum hominis arbitrium passivè, duntaxat se habere*. 4 Card. Osius, Bellarm. Stapleton, alique Controversistæ eodem sensu verba Lutheri exponunt. 5^o Denique id clarè colligitur vel ex uno Dordracenæ synodi decreto, in quo sic decernitur: « Ad hoc ipsum quod opus regenerationis habet se homo passivè, neque est in potestate voluntatis humanæ impedire Deum sic immediatè regenerantem. » En quid sibi velint hæretici, dum merè passivè se habere voluntatem asserunt; nempe, Dei regenerantis operationem non posse impedire; unde concil. Trid. sess. 6, cap. 3, hæreticorum eâ de re doctrinam referens ac damnans, sic habet: « Ita ut tangente Deo cor hominis per Spiritûs sancti illuminationem, neque homo ipse nihil omnino agat, inspirationem ipsam recipiens, quippe

« qui et illam abicere potest, » etc. Ubi probant Patres Trid. hominem non se habere merè passivè, quia inspirationem ita recipit, ut abicere possit.

Censet 5^o, hominem liberum esse quoad officia societatis civilis. Hinc art. 18 Confessionis Augustanæ conceptis verbis declaratur, *voluntatem habere libertatem ad efficiendam civilem justitiam, et diligendas res rationi subjectas*. Addebat Melanethon in Apologiâ ejusdem confessionis, *ad opera externa legis divinæ*.

§ 5. Errores circa justificationem.

Istud est præcipuum errorum Lutheranorum caput, de quo fusiùs suo loco; impræsentiarum ista annotasse satis sit. 1^o Triplicis generis fidem distinguunt, nempe fidem historicam, fidem miraculorum, et fidem promissionum. Fidem historicam eam dicunt, quâ firmiter credimus vera esse quæ in Scripturis continentur; de quâ Hebr. 11: *Fide credimus aptata esse secula verbo Dei*. Fidem miraculorum vocant, quâ fiunt miracula; de quâ primæ Corinth. 11: *Si habuero omnem fidem, ita ut montes transferam*, etc. Fidem promissionum, quæ versatur circa promissiones divinas de remissione peccatorum, et justitiâ per Christum consequendâ, qualis est illa, Marci ultimo: *Qui crediderit et baptizatus fuerit, salvus erit*. Rursus fides promissionum, alia generalis, quâ credimus promissam esse omnibus credentibus salutem; altera specialis, quâ unusquisque promissionem divinam sibi applicans credit, sive potius certò confidit peccata omnia per Christum sibi esse dimissa. In hac firmâ persuasionem et fiduciâ putant Lutherani consistere veram fidem christianam, theologicam, justificantem, ita ut utraque alia fides propriè appellari non debeat fides. *Fides*, inquit Luther. serm. Dom. 1 quadrag. *est certa, altissimèque insidens divinæ bonitatis et gratiæ, .. fiducia*. Hinc Centuriatores, cum tradunt communem doctrinam suæ sectæ cent. 1, lib. 1, cap. 4, ita fidem definiunt: *fides est fiducia misericordiæ, propter Christum*.

Asserunt 2^o, per hanc fidem, seu firmam specialis misericordiæ fiduciam, et quidem *solan*, hominem justificari. *Fides*, inquit Luther in cap. 2. ad Galat. *est formalis justitia propter quam homo justificatur, non propter charitatem*. Et rursus ibid.: *Fides sine et ante charitatem justificat*. Idem etiam docet Melanethon in locis communibus.

Asserunt 3^o, justificationem soli fidei esse adscribendam; non quidem per modum causæ

formalis, aut efficientis physicae vel meritoriae, quasi aut ipsa sit justitia, aut eam impetrare vel promereri possit, sed solum relativè; quia videlicet credendo aut potius confidendo accipit, quod Deus promittendo offert. Ita Kemnitius in Examine concilii Trid. sess. 6. Hinc Illyriciani et Wittembergenses in colloquio Altemburgensi convenerunt in eo, *quòd fides non sit dicenda causa, sed merum organum justificationis*. Ex quo intelligitur Lutheranos, qui gloriantur se omnia soli fidei adscribere, reipsa nihil omnino ei tribuere.

Asserunt 4°, formalem nostrae justificationis causam, non esse aliquid intrinsecum et nobis realiter inhærens; sed eam formaliter consistere vel in imputatione justitiæ Christi, ita Illyricus et plerique alii; vel in ipsa essentiali Dei justitiâ nos inhabitante, ita Osiander; vel in solâ remissione, id est, non imputatione peccatorum, ita quidem alii cum Calvino lib. 3 Institut. cap. 11. Ili omnes errores damnantur à patribus Trid. sess. 6, de justif. can. 11, his verbis: « Si quis dixerit homines justificari.... « exclusâ gratiâ et charitate, quæ in cordibus « eorum per Spiritum sanctum diffundatur, « quæ illis inhæreat..., anathema sit. »

Asserunt 5°, unumquemque posse ac debere certum esse certitudine fidei divinæ, sibi remissa esse peccata, ac poinde verè justum esse. Ita Lutherus art. 11, Melancthon, Bucerus et alii. Quem errorem anathemate percellit synodus Trid. citatâ sess. 6, can. 13: « Si quis « dixerit omni homini ad remissionem peccatorum assequendam necessarium esse, ut « credat certò, et absque ullâ hæsitacione « propriæ infirmitatis et indispositionis peccata « sibi esse remissa, anathema sit. »

Asserunt 6°, justificatos omnes æqualiter esse justos; cujus quidem erroris fundamentum est, quòd unâ et eadem Christi justitiâ fide apprehensâ, atque à Deo imputatâ omnes justificari doceant.

Asserunt 7°, opera bona ad salutem necessaria non esse. *Bona opera*, inquit Luth. lib. de Libert. christianâ, *non faciunt bonum virum, nec malum mala*. Et lib. de Captivit. Babyl.: *Nulla peccata possunt fidelem damnare, nisi sola incredulitas*. Eamdem operum necessitatem communibus votis negârunt Lutherani in Colloquio Vormatiensi, ubi, teste Melanct. lib. 1, epist. 70, improbata fuit ista propositio: *Bona opera necessaria sunt ad salutem*. Hinc celebre istud apud Lutheranos pronuntiatum; videlicet, *solâ fide justificari et salvari ho-*

Sunt inter ipsos qui dicant falsò accusari suos, quòd bonorum operum necessitatem negent. Ita Brentius, Kemnitius et alii. Quin et in Colloquio Altemburgensi, non solum Saxonicis, sed etiam Wittembergenses electorales in eo convenerunt, bona opera esse ad salutem necessaria, non quidem *necessitate efficientiæ*, ut ipsi loquuntur, quasi ipsa sint aut dici possint justificationis causa; sed *necessitate presentie*, vel ut signa fidei, vel aliis de causis.

Cæterum, quidquid sit de variis Lutheranorum loquendi rationibus, cum propius excutiuntur ipsorum principia, et pleraque scripta Lutheri, aliorumque insigniorum Lutheranorum, videntur omnino existimare, posse hominem salvari, etiamsi nulla bona opera faciat, nec divina mandata custodiat. Enimverò, uti antea annotavimus, perfectiora justorum opera, in Lutheranorum sententiâ, nonnisi nomine et secundum quid bona sunt, reipsa verò et simpliciter sunt peccata mortalia; ast quis dixerit opera quæ totidem sunt peccata ex naturâ suâ mortalia, ad salutem prorsus esse necessaria? Præterea, si bona opera sunt peccata mortalia, et tamen propter fidem non imputantur; certè poterunt etiam mala opera propter fidem non imputari, ac per hoc non nocere; atque istud non obscurè docet Luther. lib. de Captivit. Babyl. ubi ait, *omnia peccata in momento à fide absorberi*.

Asserunt 8°, mandata Dei esse planè impossibilia homini, etiam justificato, quantalibet gratiâ instructo; atque inde colligunt, nullam esse in nobis veram actualem justitiam, sed omnia justorum opera esse peccata mortalia ex naturâ suâ. Ita Luther. in Assert. art. 2, 31, 32 et 36. Idem apertè scribit Melanct. in locis comm. tit. de peccato: *Consequitur itaque, inquit, omnia hominum quantumvis laudabilia opera, planè vitiosa esse, et morte digna peccata*.

Asserunt denique 9°, bona justorum opera nullatenus esse meritoria vitæ et salutis æternæ. Addunt tamen ipsa placere Deo, atque quorundam præmiorum temporalium et spiritualium in hac et alterâ vitâ meritoria esse; non quidem ex propriâ dignitate, quasi reipsa sint justa et legi satisfaciant, sed ex fide et indulgentiâ Dei, quia nimirum Deus iis, qui credunt sibi remissa esse peccata, indulgentiâ suâ tegit operum fœditatem, et sic accipit, quasi justa essent. Ita Confessio August. et Apo'log. art. 20.

CAPUT III.

De multiplici Lutheranae hæreseos damnatione.

Anno 1520, 17. Kalend. julii, Leo X, S. pontifex, apostolico dogmate 53, Lutheri propositiones proscripsit *tanquam respectivè hæreticas, aut scandalosas, aut falsas, aut piarum aurium offensivas*. Eodem anno in Comitibus Wormatiensibus, promovente nuntio apostolico, Cæsar edictum tulit de consensu omnium sacri imperii principum, ordinum et statuum, quo Lutherum obstinatum schismaticum et hæreticum habendum esse declaravit, denuntiatis gravissimis pœnis in eos qui dicto aut facto hæresiarcham fovere præsumerent. Hæc narrat card. Palavicinus lib. 1, Hist. concil. Trid. cap. 27 et 28.

Anno 1528, duæ in Galliis celebratæ sunt synodi in causâ Lutheranae hæreseos; videlicet, Senonensis, præside cardinali de Prato; et Bituricensis, præside Francisco Turnonio archiepiscopo; in iis Lutherana hæresis confixa est, variis de fide editis decretis. Damnati sunt etiam ac vetiti Lutheri et Lutheranorum libri.

Anno 1542, die 10 martii, sacra Facultas Parisiensis 53 articulos Lutheranae et Calvinianæ hæresibus oppositos, quasi formulam catholicæ doctrinæ edidit, omnesque sui ordinis Doctores et Baccalaureos ad subscribendum iis adstrinxit. De his synodus Narbonensis, habita an. 1551, sic statuit: « In lucem edita sunt à dominis doctoribus Facultatis Sorbonæ Parisiensis christianæ legis axiomata die 10 martii an. 1542..... quæ tanquam vera, orthodoxa et Christianæ religioni consona recipimus; eaque prædicari, et palam exponi in sacrificio Missæ faciendo, et concionibus habendis, exactè jubemus. » Longe antea, an. scilicet 1521, die 15 aprilis, sacra Facultas Lutheri assertiones prædamnaverat, « tanquam simplicis populi seductrices, potestati Ecclesiæ et ordini hierarchico impiè derogantes, in Spiritum sanctum blasphemias, apertè schismaticas et hæreticas. »

Anno 1545, Theologica Facultas Lovaniensis triginta duos edidit articulos contra Lutheranam hæresim, quos imperator Carolus V in omnibus inferioris Germaniæ provinciis promulgari curavit.

Denique œcumenica synodus Trid. cœpta die 13 decembris an. 1545, et absoluta die 4 decembris an. 1563, Lutheranam et Calvi-

nianam hæresim solemniter et decretorio iudicio iterum confixit, habitis eâ de re 25 sessionibus.

Varii etiam in eadem Lutheranorum causâ, habiti principum imperii conventus, in quibus proscriptus est Lutherus, variisque modis cautum ne latius diffunderetur impia hæresis. Ita inprimis comitia Wormaticense an. 1521; Norembergense an. 1525; Ratisponense an. 1524; Spirense an. 1529; Augustanum an. 1530. In iis comitiis principes Protestantes fidei suæ Confessionem à Melancthone exarata, Augustanam vulgò dictam, imperatori obtulerunt.

Ad compendiosam, quam in istâ dissertatione proposuimus exhibere Lutheranismi synopsis, tria supersunt observanda. Primum. Inter misso ob varias temporis injuriâ concilii Trid. progressu, celebrata fuisse à Carolo V imperatore Augustæ comitia an. 1548. Iis in comitiis libellum promulgavit imperator, *Interim* nuncupatum, quod formulam doctrinæ et ceremoniarum in Germaniâ tenendam interim præscriberet, donec de iis omnibus in concilio œcumenico pronuntiatum fuisset. Complectebatur hic libellus præcipua controversiarum capita, quæ tunc temporis agitantur, viginti sex articulis distributa. Catholicis periinde ac Protestantibus plerisque displicuit infaustus libellus; hunc improbavit S. pontifex; eundem à Catholicis confutârunt Hosius card. Lindanus; ex hæreticis Philippus Melancthon, Joannes Calvinus.

Alterum hic annotandum, istud est; nempe, varias variis temporibus à Lutheranis editas fuisse fidei confessiones. Quatuor præcipuæ sunt: Augustana videlicet, Saxonica, Wittembergica, Bohemica. Confessio Augustana omnium Confessionum fidei Lutheranorum celeberrima est. Complectitur unum supra viginti articulos de ipsorum fide, septem verò de prætensis Ecclesiæ Romanæ abusibus; à Melancthone exarata fuit, qui postea ipsius apologiam edidit. In comitiis Augustæ Vindelicorum habitis an. 1530, ab aliquot Germaniæ principibus Carolo V oblata fuit. Sæpius recognita fuit et emendata; diversæ extant illius editiones, Lipsiæ, Wittembergæ, etc. quæ in nonnullis sibi invicem omninò adversantur. Saxonica etiam à Melancthone exarata fuit an. 1531, eo scilicet fine, teste Sleidan. lib. 22, ut synodo Tridentinæ exhiberetur; huic, tanquam Augustanæ Confessioni repetitæ, subscripserunt pastores et doctores Ecce-

siarum Saxonie, Pomeranie, Polonie, etc. Viginti constat articulis. Wittembergica, teste eodem Sleidan., adornata est anno 1505, à Brentio Lutheranorum post Melanthonem doctissimo, per legatos Christophori ducis Wittembergensis synodo Tridentinæ exhibenda. Hæc sicut et Saxonica Confessio, dicitur mera Augustanæ repetitio; ast in utrâque plurima continentur Augustanæ Confessioni directè adversa. Triginta duobus digesta est articulis. Bohemica Confessio, quæ et Valdensium Confessio nuncupatur, à ministris Bohemice et Moravice circa annum Christi 1531 exarata fuit, atque à Luthero, Melanthane et Academiâ Wittembergensi comprobata; tandem anno 1535, Ferdinando regi oblata à nobilibus regni Bohemice. 20 constat articulis.

Extant hæ omnes fidei Confessiones in libro Genevæ edito sub hoc titulo: *Corpus et syntagma Confessionum fidei*, etc.

Tertium hic observandum. Cum inter Lutheranos gravissima ferverent dissidia, circa plurima Confessionis Augustanæ capita; de necessitate videlicet bonorum operum ad salutem, de viribus liberi arbitrii, ac præsertim de Eucharistiâ; ad has lites componendas varii habiti sunt conventus, Bergæ primum, deinde Torgæ; tandem Septemviri Saxonie jussu, à sex præcipuis Lutheranæ factionis theologis, formula concordie in conventu Torgensi adornata est anno 1577, quæ formula *Liber concordie* solet appellari. Eo in libro, qui monumenta apud Lutheranos maximè authentica complectitur, omnes qui aliter sentirent, quàm in eo præscriptum erat, pro hæreticis habendos esse decernitur. Huic subscripserunt Saxo et Brandebursensis Septemviri, principes, comites et civitates pleræque Augustanæ Confessionis, ut constat ex catalogo, initio libri affixo. Multis tamen subinde scriptis, animadversionibus, censuris impugnatus est liber ille, non modò à Catholicis, verùm etiam ab hæreticis, ut legere est apud Hospinianum, lib. cui titulus: *Concordia discors*, cap. 27, 28, etc.; è Catholicis librum concordie confutârunt Osius card. Lindanus, et Bellarminus in judicio de libro concordie Lutheranorum, quod legitur ad calcem tomi tertii Controvers. ejusd. card.

Dissertatio octava.

DE CALVINO.

Eundem fermè in istâ ac in præcedenti dissertatione ordinem sectabimur. Dicemus obiter 1° de Calvino; 2° de Calvini erroribus; 3° de Calvinistarum dissidiis; 4° de colloquiis et synodis in causâ Calvinianæ hæreseos habitis.

CAPUT I.

De Calvino.

1° Joannes Calvinus, à quo Calvinistæ, post Lutherum, omnium ætatis suæ hæresiarcharum facilè princeps, Novioduni anno 1509, parentibus catholicis natus est.

2° Lutetiam studiorum causâ missus, in Marchiano collegio primum, deinde Montisacuti gymnasio, humanioribus litteris et philosophiæ operam dedit.

3° Peracto suorum studiorum decursu in patriam reversus est. Inde paulò post, ad jurisprudentiæ studium animum applicuit Aureliæ primum, deinde Biturigi, ubi cum Wolmaro, Lutherano occulto, amicitiam iniit, à quo novæ hæreseos principia didicit.

4° Parisios rediens cum Lutheranis clandestinos conventus agentibus familiaritatem junxit, præsertim cum Nicolao Copo, Parisiensis academice rectore, novæ doctrinæ principiis afflato: cum autem Joannes Morinus rerum capitalium judex integerrimus in novatores, et inprimis in Copum, ac in Calvinum ipsum inquireret, uterque clam secedere cogitur. Hic verò, scilicet Calvinus, variis mutatis sedibus in Galliis, cum Franciscus I, rex christianissimus in Sacramentarios igne animadverteret, supplicii metu regno excessit, ac Basileam se recepit versùs annum 1535.

5° Ibi famosum perinde ac exitiosum edidit Institutionum opus, in capita primum, deinde in posterioribus editionibus in quatuor libros distributum. Opus illud ex Melanthonis, Brentii, OEccolampadii, aliorumque sectariorum libris magnâ ex parte exscriptum fuit, sed novâ methodo, ac purioris latinitatis elegantia adornatum. Deinde in Italiam profectus est; ex Italiâ citò in Galliam regressus, rebus suis omnibus compositis, Genevam pervenit circa annum 1536, ibique domicilium fixit.

6° An. 1537, à magistratu Genevensi, non concionator tantum, sed et theologiæ professor eligitur; tum plurima edidit opuscula pestife-

ris suis erroribus referta. Variis subinde exortis ac sedatis dissidiis, Bernenses inter et Genevenses, tandem anno 1541, postquam colloquio Ratisponensi interfuit, omnem sectæ suæ disciplinam Genève constituit probante senatu, legesque præscripsit, à quibus postea discedere nec ipsis ministris, nec civibus licitum esset.

7º Eodem anno 1541, edidit Catechismum gallicè et latine, in quaestiones et responsiones distributum, quem plurimum semper ferunt Calvinistæ; huic addidit precum ecclesiasticarum et administrandorum sacramentorum formulam. Anno 1542, mordaci libello quem *Antidotum* inscripsit, 25 articulos sacræ Facultatis Parisiensis contra Lutheranam hæresim confutare aggressus est. Anno 1546, alterum scripsit impium *Antidotum* adversus concilii Trid. sessiones septem jam celebratas, paulo ante virulentissima evulgaverat scholia in Pontificias litteras à Paulo III, ad Carolum V imperatorem, occasione *Interim* directas.

8º Annis 1550 et 1551, acerrima exorta est, Calvinum inter et plerosque ministros Genevenses, contentio de prædestinatione. Eâ occasione scripsit librum de æternâ Dei Prædestinatione, et libellum de scandalis. Anno 1552, Michaellem Servetum ad magistratum defert Calvinus, ac vivum cremari procuravit ob assertas in SS. Trinitatem hæreses. Anno 1554, comministris omnibus subscribentibus, Serveti errores confutavit, atque hæreticos à magistratu jure gladii comprimendos demonstravit. Anno 1558, adversus Valentinum Gentilem, Lælium Socinum, et Georgium Blandratam, Trinitatis hostes egit. Anno 1562, totius suæ sectæ nomine Confessionem fidei edidit imperatori et Germaniæ principibus, in comitiis Francofurtensibus offerendam; in eâ Confessione impiæ suæ doctrinæ virus paucis ac nitidè exponit. Tandem anno 1564, ætatis verò 54, variis gravissimisque morbis vexatus, miserrimè obiit, testibus Lindano in dubit. Dialogo 2, Sancthesio, Papirio, Bolseco et aliis.

CAPUT II.

De Calvinî erroribus.

Supra recensitos Lutheri errores docuisse Calvinum, res est certior quàm ut probatione indigeat; eos siquidem passim in suis operibus, præsertim in libris institutionum christianæ religionis (ut vocat) conceptis verbis exprimit; idque perinde confitentur tum Catholici, tum heterodoxi theologi. Legatur, si

vacat, lib 1 Instit. cap. 16, 17; lib. 2, cap. 1, 5, etc., in *Antidoto* conc. Trid. ad can. 4, sess. 6; lib. de æternâ Dei Prædest.; lib. 5 et 6 de lib. Arb. contra Pighium, etc. In iis itaque erroribus iterum recensendis non immorabimur; consulantur quæ dicta sunt præcedenti dissertatione cap. 2.

Verùm tria sunt, circa justificationis gratiam, specialia Calvinistarum dogmata, uti annotat illustr. Bossuet. lib. 9 Variat. n. 2, quæ hic, ex eodem doctiss. auctore, jam paucis sunt indicanda. Docent itaque 1º fideles omnes posse ac debere certos esse certitudine fidei divinæ, non solum de præsentî gratiâ atque justitiâ, uti censent Lutherani, sed etiam de suâ perseverantiâ, prædestinatione ac electione ad gloriam. Ita Calvin. lib. 5, cap. 2, parag. 16, ubi sic loquitur: « Verè fidelis non est, qui solidâ persuasione... divinæ erga se benevolentie promissionibus fretus, indubitam salutis expectationem præsumit. » Ita etiam in *Antidoto* concil. Trid. ad caput 15 et 14. sess. 6. Idipsum definit synodus Dordrectana, quinto doctrinæ capite de Perseverant. SS. art. 9, his verbis: « De hac electorum ad salutem custodiâ verèque fidelium in fide perseverantiâ, ipsi fideles certi esse possunt, et sunt pro mensurâ fidei, quâ certò credunt se esse et perpetuò mansuros vera et viva Ecclesiæ membra, habere remissionem peccatorum, et vitam æternam. » Ibidem inter rejectos Arminianorum errores art. 3 et 5, refertur eorum sententia qui hanc fidei certitudinem negant. Unde Calvinista juxta suæ sectæ principia, non magis de suâ æternâ salute dubitare potest, quàm Lutheranus de suâ præsentî justificatione. Et reipsâ in celebri Confess. Frederici III, electoris Palatini, quæ refertur secundâ parte collectionis confessionum fidei Eccles. Reformat. sic legitur pag. 149: « De catholicâ Christi Ecclesiâ, credo... me ejus cœtus vivum membrum esse et perpetuò mansurum. » Et paulò post: « Credo et confiteor Deum Patrem propter plenissimam Christi Passionem, nunquàm ullorum meorum peccatorum... meminisse; ita ut Dei judicium metuere nequaquàm habeam necesse. » Et rursus: « Ego in christianâ hac meâ confessione certò scio me servatum iri, et hilari vultu antetribunal Christi compariturum. » En nativî sensus quos suoapte ingenio inspirat doctrina calviniana.

Docent 2º, fidem et justitiam propriam esse electorum, et semel verè acceptam non posse

ullâ ratione amitti ; et qui ab eâ excidere videntur, nunquàm eam reverà habuisse. « Solos electos, inquit Calvin. lib. 3 Instit. cap. 2, parag. 41, semine incorruptibili Deus in perpetuum regenerat ; ut nusquàm dispereat semen vitæ in eorum cordibus insitum. » Idem repetit ibid. paragr. 12, et in Antidoto conc. Trid. Idem etiam tradunt inter Calvinistas celeberrimi ; tandem istud controversiæ caput contra Arminianos definiit Dordrectana synodus de Persever. SS. art. 4 et 5 : « Verè fideles, inquit, in quibusdam actionibus particularibus à ductu gratiæ, suo vitio recedere, et à carnis concupiscentiis seduci, iisque obsequi possunt... et in peccata etiam gravia et atrocia abripi... talibus autem enormibus peccatis Deum valdè offendunt, reatum mortis incurrunt, conscientiam gravissimè vulnerant, sensum gratiæ nonnunquam ad tempus amittunt. » Audis verè fideles, *gravibus, atrocibus, enormibus peccatis*, non *gratiam* ipsam, sed solummodò *gratiæ sensum* amittere, idque *nonnunquam* duntaxat. Rursus ibid. art. 6, sic prosequitur synodus : « Deus ex immutabili electionis proposito, Spiritum sanctum etiam in tristibus lapsibus à suis non prorsus aufert, nec eò usque eos prolabi sinit, ut gratiæ adoptionis ac justificationis statu excident, aut peccatum ad mortem, sive in spiritum sanctum committant, et ab eo penitus deserti, in exitium æternum se præcipitent. » Vides iterum in mente synodi, verè fideles, etiam dùm *gravia enormia crimina* committunt, è *gratiâ adoptionis ac justificationis statu non excidere*. Certè significantioribus verbis componi non potest, Christus cum Belial, et gratia cum iniquitate.

De Calvinistarum doctrinâ circa præsens controversiæ caput olim strenuè disputarunt eruditi duo Facultatis Parisiensis theologi ; eorum discrepantes sententiæ ad concordiam facillè adduci posse videntur, si asseratur, Calvinianum dogma, totiusque sectæ fidem meritò censi, quod Calvinus, insigniores inter Calvinistas theologi, et synodus Dordrectana tradunt ; quamvis nonnulli ejusdem sectæ auctores ab eo dogmate recesserint ; unde in præsentī controversiâ, et in quibusdam aliis in quibus Calvinistæ et Lutherani variarunt, de ipsis meritò dici potest, quod Tertullianus lib. de Præscript. cap. 42, de hæreticis generatim scribit : « Mentior si non etiam à regulis suis variant inter se.... Idem licuit Valentiniæ quod Valentino, idem Marcionitis quod Marcioni de arbitrio suo fidem innovare. »

Et paulò post : « Denique penitus inspectæ hæreses omnes multis cum auctoribus suis dissentientes deprehenduntur. » Idem habet Vincent. Lirinensis in Commonit.

In istâ autem Calviniani dogmatis controversiâ, attendenda sunt, inquit illustr. Bossuetius loco antea laudato, duo præsertim palmaria Calvinistarum verba, *totaliter* et *finaliter*. Arminiani contendeant hominem justum posse fidem et justificationem amittere ; sive *totaliter*, hoc est è gratiâ adoptionis et justificationis statu penitus excidere ; sive *finaliter*, hoc est, in perpetuum, ita ut, ante mortem non respiscat ; synodus è contra Dordrect. Calvini principis firmiter inhærens, utrumque negat, et expressè definit justitiam semel acceptam esse prorsus inamissibilem ; atque adeò justitiam non solum esse in solis electis, sed insuper in electis esse immobiliter ; alii tandem quidam è Calvinistis, quibus prævisse videntur Petrus Martyr in caput 8 Epist. ad Rom. et Kemnitius in Examine concil. Trid. docent posse justum labi et excidere à justitiâ ; attamen fieri non posse, quin ante mortem non redeat ad fidem, seu, quod idem est, posse à justitiâ excidere *totaliter*, sed non *finaliter*.

Itaque juxta professos Calvinistas, justitia reperitur in solis electis, iisque inest immobiliter ; cum ipsa sit prorsus inamissibilis, sive *totaliter*, sive *finaliter*. Juxta paucos alios ex ipsis qui non ita tenaciter inhærent Calvini placitis, fides et justitia inest quidem solis electis, sed non immobiliter ; ac proindè ad tempus *totaliter* amitti potest, sed non *finaliter*. Juxta tandem Arminianos, qui hæc in parte Calvini sententiam prorsus deseruere, justitia reperiri potest in iis qui non sunt prædestinati, unde sive *totaliter*, sive *finaliter* amitti potest. Atque is est quintus Remonstratensium articulus, à synodo Dordrect. expressè confixus art. 4, 5, 6, antea laudatis, et insuper art. 7 et 8, in quibus loquens de gravibus et atrocibus criminibus quæ verè fideles quandoque committunt, sic habet : « In istis lapsibus conservat in illis semen illud suum immortale, ne illud pereat aut excutiat.... sed ex gratiâ Dei misericordiæ id obtinent, ut nec *TOTALITER* fide et gratiâ excident, nec *FINALITER* in lapsibus maneat aut pereant. » Nihil profectò expressius his synodis verbi.

Docuit 3^o Calvinus tanquàm manifestum justitiæ imputativæ consecrarium, baptisma non esse medium ad salutem necessarium, uti contendeant Lutherani ; fideliumque pueros sine

baptismo decedentes salvari, quod sancti sint et Ecclesiae membra, et in foederis hereditatem, statim ac geniti sunt. à Deo excipiuntur. Ita aperte tradit lib. 4. Institut. cap. 13. parag. 20 : « Quantum damni invexerit dogma illud male expositum, baptisma esse de necessitate salutis, pauci animadvertunt.... unde sequitur non ideo baptizari fidelium liberos, ut filii Dei tunc primum fiant, sed solemnè potius signo ideo recipi in Ecclesiam, quia promissionis beneficio jam ante ad Christi corpus pertinebant. » Rursus ibidem : « Infantes nostros, antequàm nascentur, se adoptare in suos pronuntiat Deus, cum se nobis in Deum fore promittit, seminique nostro post nos. » Hoc verbo continetur eorum salus. »

Atque ex eo postremo Calvini dogmate istud absurdum sequi observat illustr. Bossuet. lib. 9, Variat. n. 16, scilicet. omnes fidelis posteros, prædestinatos esse. Ratio aperta est, quia in principiis Calvini, justitia semel habita est prorsus inamissibilis, et qui eam semel habet, ab eà nec *totaliter*, nec *finaliter* exidere potest; si ergo pueri fidelium nascentur filii foederis ac gratiæ adoptionis instructi, certò perseveraturi sunt, ac consequenter sunt de numero prædestinatorum.

CAPUT III.

De Calvinistarum dissidiis.

Calviniana factio pro naturâ et conditione cujuscunque hæreseos in varias sectas scissa est, quarum tres sunt præcipuæ.

Prima eorum omnium est qui pura Calvini sectantur dogmata; quales sunt 1^o Genevenses. 2^o Reformati in Galliâ, in Palatinatu, Belgio, Helvetiâ. 3^o Presbyteriani, Puritani, Independentes in Angliâ et Scotiâ. Presbyteriani, Puritani et Independentes, non dissentiunt in Confessione fidei; ast in ecclesiastico regimine, ut ita loquar, nonnihil à se invicem dissident. Eti enim utrorumque coetus regant presbyteri, attamen Puritani, qui se Calvinistas reformatos jactitant, majorem præ se ferunt severitatem in externâ disciplinâ, atque statas et solemnes Ecclesiæ ceremonias pertinacius repudiant; unde ipsis Puritanorum nomen datum. Independentes verò ab utrisque dissident, quod unamquamque particularem Ecclesiam sui juris faciant, nec alii ulli subjectam aut subordinatam contendunt; cum è contra tum Presbyteriani tum Puritani, juxta ea quæ sancita sunt cap. 5 disciplinæ Eccles. reformat. art. 15, Ecclesias particulares colloquiis, collo-

quia synodis provincialibus, has synodis nationalibus subjeçant, et qui eorum decreta obtemperare renuunt, ex Ecclesiâ ejiciendos pronuntiant.

Secunda est Anglo-Calvinianorum; nec enim Lutherani sunt nec Calviniani; sed hi præcipue dicuntur qui adhærent congeriei errorum quos Cramner Lutheranus, dux Somerset Zuinglianus, regina Elizabeth Calvinismo favens, saluti Henrici VIII addidit, servatis semper nonnullis ad hierarchiam pertinentibus; unde dicti sunt Episcopales. A Presbyterianis, Puritanis, cæterisque reformatis differunt tum in quibusdam dogmatibus, tum in disciplinâ; siquidem episcopos agnoscunt non solum ordine, sed et jurisdictione presbyteris jure divino superiores; crucem non modò honorant, sed ejus signum sacramentis et inprimis baptismo adhibent; quæ certè à doctrinâ et praxi Puritanorum prorsus aliena sunt; summum Ecclesiæ Anglicanæ gubernatorem et caput regem agnoscunt, cui plenitudinem potestatis ecclesiasticæ inesse contendunt. De quo consuli potest illustris. Bossuet. lib. 7 et 10 Variat.

Tertia Arminianorum est; hi ortum duxerunt à Jacobo Arminio ministro Amstelodamensi, qui postea creatus fuit theologiæ professor in Academiâ Lugdunensi Batavorum. Is multa fundamentalia Calvinianæ doctrinæ capita, circa materiam de prædestinatione, de gratiâ et libero arbitrio, de justificatione, disputationibus ac scriptis confutavit. Adversarium expertus est Gommarum ejusdem academici professorem et duriorum Calvini dogmatum propugnatorem acerrimum. Uterque suos habuit sectatores; hinc Leydensium primum academia, tota deinde Batavia varia in studia, partesque scissa est. Ad hos componendos motus decreta est synodus nationalis, quæ tandem Dordrecht habita est an. 1618. In hac celeberrimâ Reformationum synodo, damnata sunt quinque famosa doctrinæ Arminianorum capita, atque in eos lata est synodica sententia his verbis : « Synodus.... prædictis citatis omnino ecclesiastico munere interdicat, eosque ab officiis suis abdicat.... donec per seriam reipiscentiam, dictis, factis, studiis contrariam abundè comprobant, Ecclesiæ satisfaciant. »

Arminiani deinceps etiam Remonstratenses appellati sunt ob libellos supplices ordinibus Hollandiæ et synodo Dordrech. oblatos, in quibus sæpe Remonstratensium nomine se indignant; dicti insuper molles Calvinistæ, ob emolitam Calvinianorum dogmatum duritiem;

Gommaristis verò ipsorum adversariis, Contra-remonstramentum et rigidiorum Calvinistarum nomen datum. Inter Arminianos eminent Arminius, Episcopus, Grotius, etc.; inter Gommaristas autem Gommar, Scultet., Breytingerus, Hermannus, Polyander, etc.

CAPUT IV.

De colloquiis, synodis, et fidei professionibus in causâ Calvinianâ habitis.

Duo habita sunt in Galliis celeberrima Colloquia, ad Calvinianos, si fieri posset, in unitatem Ecclesiæ revocandos. Primum anno 1561, Poissiaci indictum fuit ad diem 9 septembris. Huic aderant cum adolescente rege Carolo IX et reginâ matre, rege Navarræ, aliisque regii sanguinis principibus, sex cardinales, Burnonius, Turnonius, Castillionatus, Lotharingus, Arminiacus et Guisius; archiepiscopi et episcopi circiter quadraginta, selectique doctores, quos inter eminebant Claudius Espencæus et Claudius Sanctesius Parisienses theologi. Ex parte verò hæreticorum, Theodorus Beza, minister Genevensis, Petrus Vermilius, Martyr cognominatus, alique numero tredecim, cum duobus et viginti Calvinianæ factionis deputatis. Primâ sessione comministrorum nomine perorans Beza, in hanc impian blasphemiam erupit, *tantum ab Eucharistiâ distare corpus Christi, quantum supremum cælum à terra.* Ad Bezæ blasphemias præsulum cœtus cœterique omnes Catholici inhorruere; quod Turnonius card. Antistitem princeps, et Galliarum primas reginæ significavit, addens, statim à consessu discessuros fuisse, nisi eos regis reverentia continuisset. Secundâ et tertiâ sess. habitis die 16 et 24 ejusdem mensis, cardinales Turnonius, à Lotharingâ, necnon Espencæus et Sanctesius Parisienses doctores eruditè confutârunt quæcumque Beza alique Commministri de suæ doctrinæ capitibus prolixè disseruerant.

Actum deinceps, jubente reginâ, in privatis collationibus, de formulâ fidei circa Sacramentum Eucharistiæ. Post varias collationes à ministris eâ de re habitis, in hanc tandem convenire formulam, quam refert Beza lib. 4 Hist. Eccles. Reform. p. 608. Ministrorum formulam obtulit regina præsulibus Poissiaci congregatis, et hi illam doctorum Parisiensium cœtui expendendam communicavere; qui doctrinâ iudicio hanc confixerunt, non modo *tanquam insufficientem*, sed etiam *uti captiosam, hæreticam, erroresque plurimos contra SS. sacramenti Altaris institutionem continentem.* Docto-

rum censuram præsules judiciariâ auctoritate, summo consensu confirmârunt; cui iudicio subscribere pugnaciter renuerunt Beza, ipsiusque symmistæ; sicque 25 novembris solutum est colloquium, in quo veritas de hæreticorum fraudibus et insidiis victrix exitit.

Alterum colloquium ad S. Germanum in Layâ, jussu reginæ celebratum fuit; in eo selecti è sacrâ Facultate Parisiensi doctores, contra Bezam sociosque, invictis argumentis demonstrârunt, imaginum usum cultumque pium esse et omninò retinendum.

Quod spectat ad synodos in causâ Calvinianorum habitas, viginti novem nationales in Galliis à Calvinistis celebratæ sunt, quarum acta in unum collecta et ex ordine digesta fuere duobus tomis ab Aymone theologo et jurisperito Eccl. Reform. Ex his synodis celebriores videntur, 1^o Parisiensis, habitâ an. 1559, die 25 Maii. Hæc omnium prima est; in eâ quadraginta disciplinæ capita ordinata sunt, ex quibus iterum expensis, mutatis ac correctis, subinde formatus est libellus ille, cui titulus; *La discipline des Eglises Réformées de France....* 2^o Rupellensis an. 1571, cui præfuit Theodorus Beza; in eâ actum est de instaurandâ disciplinâ, ex superiorum bellorum occasione, collapsâ.... 3^o Vapincensis an. 1603; in eâ damnata fuit Piscatoris doctrina circa justificationem; conditus insuper fuit famosus ille fidei articulus, quo definiebatur papam esse Antichristum.... 4^o Rupellensis an. 1607, inquâ art. 9, expresso ac solenni omnium ministrorum consensu confirmata fuit, tanquàm verissima ac in Scripturis fundata, mox recensita definitio synodi Vapincensis circa Antichristum..... 5^o Carantoniensis an. 1620; in quâ canones Dordrect. gallicè translati fuere, atque ab omnibus imperata subscriptio in hæc verba: *Je reçois, approuve et embrasse toute la doctrine enseignée au synode de Dordrect; comme entièrement conforme à la parole de Dieu, et Confession de foi de nos Eglises....* 6^o Altera Carantoniensis an. 1631; in eâ emissum est famosum illud Decretum quo Lutherani præsentiam realem agnoscentes, ad communionem admittuntur; atque expressè declaratur nihil in eorum doctrinâ esse quod idololatriam aut superstitionem redolet. Sic loquitur synodus cap. 22, art. 1: « Attendu que les Eglises de la Confession d'Augsbourg conviennent avec les autres Réformées aux principes et points fondamentaux de la vraie religion, et qu'il n'y a en leur culte ni idolâtrie, ni superstition, pourront,

« sans faire abjuration, être reçus à la sainte Table, etc. »

Atque hæc sunt præcipuæ Calvinistarum synodi in Gallis habitæ. Quamplurimæ aliæ in cæteris regionibus celebratæ sunt, inter quas profectò celeberrima est synodus Nationalis Dordirectana. Indicta fuit anno 1618, ad dirimenda dissidia circa quinque supra memorata doctrinæ capita in Ecclesiis præsertim Belgicis controversa, Arminianos inter et Gommaristas. Prima sessio habita fuit 15 novembris; in eâ et in 30 sequentibus motæ sunt quæstiones ad disciplinam spectantes; postmodum actum de doctrinâ..... sessione 27, solemnî protestatione significârunt Arminiani, se Dordirectanam synodum pro legitimo controversiarum suarum iudice non posse agnoscere, quod iidem in eâ sederent adversarii et iudices, qui nimirum dogmata, de quibus iudicium expectabatur, pugnaciter defenderent. De hac protestatione rogatæ sunt sententiæ, ac unanimi consensu iudicatum fuit nullam illius habendam esse rationem, quod scilicet, *minor et recentior pars, numerosiori et antiquiori parti necessariò cedere deberet*; quod sanè, inquit Illustriss. Bossuet. lib. 14 Variat. n. 71. decretorium erat contra Arminianos; verum eò non minus invictè oppugnabantur Gommaristæ, cum ipsissimum esset momentum quo premebantur Protestantes, dum Trid. concilii iudicium detrectabant.... Sessione 136, quinque doctrinæ capita Remonstratensium sigillatim variis canonibus confixit synodus, atque genuinam Ecclesiarum Reformatarum doctrinam explicuit circa unumquodque ex illis doctrinæ capitibus.... Sessione 138, lata est in Armenianos synodica sententia, quâ ipsos tanquam « per vicaciæ reos et convictos ecclesiastico munere interdicit (synodus) donec Ecclesiæ satisfaciant, atque ad ejus communionem recipiantur... » Denique die 9 maii anni 1619, celebrata est ultima sessio, quæ fuit 134. Numerosissima fuit ista synodus, huicque subscripserunt quamplurium Ecclesiarum Reformatarum pastores et doctores; scilicet, ex magnâ Britannîâ, ex Palatinatu, ex Hessiâ, ex Helvetiâ, ex republicâ Genevensi, ex re publicâ Bremensi, ex Ecclesiis Belgicis, ex Hollandiâ, ex Zelandiâ, ex provinciâ Ultrajectinâ, ex Frisiâ, ex Transilvaniâ, etc. Proximè secuta synodus Nationalis Ecclesiarum Reform. Gallican. an. 1620, acta Dordirectana expressè confirmavit; adeò ut nihil apud Calvinistas, majoris momenti ac ponderis esse debeat Dordirectanâ

synodo, tot ac tantis suarum Ecclesiarum unità suffragiis.

Tandem quod spectat ad Confessiones fidei Calvinistarum, nimis longum foret eas sigillatim recensere, adeò variæ sunt ac multiplices; præcipuas duntaxat hic indicabimus. Sex omninò sunt, Helvetica, Gallicana, Angelicana, Scoticana, Belgica et Argentinensis.

Helvetica triplex est. Prima Basileæ edita anno 1532; brevior est, undecim duntaxat constans articulis. Altera Basileæ iterum edita an. 1556, paulò proluxior est, 27 constat articulis. A ministris Tigurinîs et Bernensibus exarata fuit, offerenda concilio œcumenicò quod passim affirmabatur brevi futurum. Inter ministros eminebat Bullingerus; iis sese adiunxerant Capito et Bucerus ministri Argentinenses qui Basileam recens advenerant, rogantes ut illa Confessio sic adornaretur, ut inter Ecclesias Reformatas sanciretur concordia. Tertia exarata fuit an. 1566, itidem Basileæ; longè proluxior est, et, ut ipsi loquuntur, *accuratius conscripta*. In 30 capita distribuitur.

Gallicana Confessio fidei an. 1559 in synodo nationali Parisiensi edita fuit; atque nomine Ecclesiarum Gallicæ, *Theodorus Beza* eam obtulit Carolo IX, in colloquio Poissiacensi an. 1561; confirmata fuit in synodo Rupellensi an. 1571. Summo in pretio habetur apud Calvinistas, illiusque exemplar, cui illustriores ac nobiliores hujusce sectæ in Galliis assectæ subscripserant, sedulò asservatur in archivîs Genevensibus. Quadraginta articulis digesta est.

Anglicana in synodo Londinensi edita fuit an. 1562 ad tollendam opinionum dissensionem et ad consensum in eorum religione firmandum. Quadraginta constat articulis; trigesimus septimus spectat auctoritatem ecclesiasticam, cujus plenitudinem regiæ majestati inesse contendunt. Ibidem addunt, *Romanum Pontificem nullam habere jurisdictionem in regnò Angliæ*. Hi articuli denuò confirmati fuere subscriptione episcoporum et cleri inferioris an. 1571.

Scotica duplex. Prima anno 1568 scripta fuit, et nomine ordinum regni et Parlamenti promulgata; altera exarata fuit an. 1581, sub hoc titulo: *Generalis Confessio veræ et christianæ fidei, secundum Dei verbum, et acta nostrorum Parliamentorum*.

Belgica Confessio edita an. 1561, in Belgii synodo confirmata anno 1579, in Dordirectanâ synodo recognita et iterum approbata fuit an.

1619, *uti orthodoxa et verbo Dei consentiens*. Triginta septem complectitur articulos.

Polonica in synodo Czengerinâ, uno consensu exhibita et declarata; excusa fuit anno 1570.

Argentinensis Confessio fidei, sive, ut vocant, quatuor civitatum imperii, anno 1550 scripta fuit; in Comitibus Augustanis per legatos civitatum Argentorati, Constantiæ, Memmingæ et Lindaviæ, Carolo V imperatori exhibita fuit. Viginti tribus constat articulis. Mox recensitæ fidei confessiones sigillatim et ex integro recensentur in collectione confessionum fidei Protestantium, Genevæ excusâ an. 1554, sub hoc titulo: *Corpus et syntagma Confessionum fidei*, etc.

Cæterum concilium Trid. sub Pio IV pontifice maximo absolutum, Calvinianam perinde ac Lutheranam hæresim confixit, debellavit, prostravitque, impia utriusque hæresiarchæ dogmata distinctis canonibus sigillatim et expressè anathematizando; videlicet, 53 canonibus, de justificatione; 15 de sacramentis in genere; 14 de Baptismo; 3 de Confirmatione; 11 de Eucharistiâ; 15 de Pœnitentiâ; 4 de Extremâ-Uctione; 4 de Communione sub utrâque specie; 9 de Sacrificio Missæ; 8 de Ordine; et 12 de Matrimonio.

Dissertatio nona.

DE MICHAELE BAÏO.

Quandoquidem plurimas è propositionibus Baïi à Jansenio renovatas in præsentì tractatu impugnaturi sumus, juvat quæcumque ad præsentem controversiam spectant, accuratè et breviter quantum fieri poterit, pertractare. Quod ut cum ordine exequamur, ad tria capita revocabimus, quæ hic dicenda habemus. Primum erit de Historiâ Baïi. Secundum de systemate Baïi. Tertium de Bullâ Baianâ.

CAPUT PRIMUM.

Historica causæ Baianæ synopsis.

Totius causæ Baianæ historicam synopsis tribus paragraphis absolvemus. Primus, exordium causæ Baianæ paucis exponet; secundus, progressum; tertius, exitum ejusdem controversiæ.

§ 1. *Exordium causæ Baianæ.*

Anno 1515, Michael Baius natus est Melini, quod est oppidum Belgii in territorio Atheni.

An. 1550, laureâ doctorali donatur in sacrâ

Facultate Theologicâ Lovaniensi. Eodem anno exorta est famosa illa de gratiâ concertatio, inter Petrum de Soto sacræ theologiæ professorem in Universitate Dilinganâ, et Ruardum Tapperum Universitatis Lovaniensis cancellarium. Naturam gratiæ, ipsiusque agendi modum et distributionem potissimum spectabat isthæc disputatio; et hæc fuit, ut observant nonnulli, veluti prima radix et origo controversiæ Baianæ; scilicet durioribus Soti placitis, quæ impugnaverat Tapperus, tenaciùs inhærens Baius, ea postmodum additis novis erroribus auxit. Epistolæ Petri Soto ad Tapperum et Tapperi ad Petrum Soto, extant ad calcem operum Reginaldi.

Anno 1551, sacras litteras in academiâ Lovaniensi professus est, in locum Joannis Leonardii Hasselii, qui à Carolo V ad concilium Tridentinum, hoc ipso anno in mense maio reassumptum, delegatus fuerat, cum Ricardo Tappero et Judoco Ravesteyn ejusdem Academiæ Lovaniensis doctoribus.

An 1552, mortuo Tridenti Hasselio, regius sacrarum Litterarum Professor instituitur Baius: quod munus per integros fermè quadraginta annos exercuit. Eodem anno 28 aprilis Tridentina synodus propter bellorum tumultus rursus intermissa fuisset, Ruardus Tapperus, quem magistrum habuerat Baius, et Judocus Ravesteyn è Trid. concilio Lovanium reduces, Baio ab antiquis Scholæ Lovaniensis placitis recedenti, atque nova disseminanti cum Joanne Hesselio, omnium consiliorum suorum socio ac particeps, fortiter obstiterunt.

An. 1558, cum prava sua dogmata disseminare non desisteret Baius, ipsiusque partes apertius juvaret Hesselius, doctor et professor in Facultate theologicâ Lovaniensi recens factus, eos detulit Tapperus ad sanctius Belgii consilium, et ad Granvellanum publicæ rei administratorem. Hi severè admoniti, polliciti sunt se ab antiquis Facultatis placitis minimè recessuros; verum promissis non steterunt, mortuo siquidem Tappero anno sequenti 1559, atque Rithovio et Cunero in eadem Facultate probatissimis doctoribus ad episcopatus Yprensem et Levardensem assumptis, liberius et confidentius novitates suas spargere cœperunt; sicque vires resumpsit error, atque, ut loquitur illustr. Belgii episcopus Joan. Stryen Epist. ad Lind. in dies novi errores scholam Lovanensem invasere.

An. 1560, exortâ inter Fratres Minores Belgii contentione, circa multos articulos quos

Baius docere ferebatur, duo Guardiani Minoritarum octodecim selectos ex illis articulis ad Facultatem theologicam Parisiensem miserunt, enixè rogantes ut suam de illis aperiret sententiam. Eorum votis annuit sacra Facultas, ac suâ censurâ die 27 junii an. 1560 articulos illos confixit, et plerosque tanquàm hæreticos notavit. Censuram hanc quibusdam notis dispunxit Baius: eandem adversus inanes Jansenianorum criminationes vindicat ac tuetur Stephanus Deschamps, lib. 2, disp. 1, cap. 4.

Anno 1561, multæ propositiones quæ dicebantur esse Baii oblatae sunt cardinali Granvellano archiepiscopo Mechliniensi. Ilas Baius tradidit, qui responsionem suam dicto cardinali porrexit; tunc verò jussu Pii IV summi pontificis partibus hinc et inde non sine animorum æstu dissidentibus silentium impositum est.

Anno 1562, Baius tria edidit opuscula. Primum *de libero Arbitrio*; alterum *de Charitate, Justitiâ et Justificatione*; tertium, *de Sacrificio*. His Opusculis unicè velle Protestantes debellare simulabat; reipsâ tamen in eis errorum suorum virus diffundit.

Anno 1563 ineunte, Michael Baius et Joannes Hesselius à rege Catholico delegati Tridentum petière, ibique interfuère tribus ultimis concilii Sessionibus, quod eodem anno abeunte completum est. Narrat concilii historicus Palavicinus lib. 15, cap. 7. Commendonum cardinali Mantuano concilii præsidi ad expendendum proposuisse, an expediret, ut Baius et Hesselius mitterentur ad synodum Trid. Rationibus ex utrâque parte propositis censuit Commendonus, *dandum esse operam, ut doctor uterque Tridentum pergeret; ubi legatorum solertiâ eos sibi conciliaret.*

Anno 1564, è concilio Lovanium redux Baius prædicta tria opuscula, necnon libros de Merito operum; de primâ hominis Justitiâ, et de Virtutibus impiorum; de Sacramentis in genere, ac de formâ baptismi, typis mandari curavit; inde nova dissidiorum seges.

§ 2. Progressus controversiæ Baiianæ.

Eodem anno 1564, aliqui, non ex Minoritis tantum, sed et ex ipsâ academiâ Lovaniensi, multos articulos ex libris Baii extractos denuntiârunt apud summum pontificem Pium IV. Interim è vivis excedit Pius IV, cui successit sanctus Pius V, non minus scientiâ quàm sanctitate insignis, qui per plures annos in ordine Dominicanorum doctrinâ sancti Thomæ innutri-

tus, summâ cum laude theologiam docuerat.

Circa idem tempus academiæ Hispaniarum Salmaticensis, Complutensis, etc., aliæque nonnullæ Italiæ, suis censuris quosdam novæ doctrinæ Baii articulos confixerunt: undè Morillonius ad card. Granvell. scribens die 20 junii an. 1568 liquidò affirmat, Baium non posse negare quin sua doctrina ab omnibus Universitatibus Hispanis, et à plerisque eruditis theologis Romanis damnata fuerit. En ipsissima Morillonii verba: « Je répondis audit Bay... « qu'il ne pouvait nier que sa doctrine n'eût « été censurée de ceux de Paris, de toutes les « universités d'Espagne, et de plusieurs savants personnages de Rome; et, qui plus « est, aucuns Pères, au concile de Trente, en « avaient été scandalisés, et, sans monsieur « d'Ypres, et la hâte que l'on avait de conclure « le concile, était en danger d'être condamné en sa propre personne. » Hæc et aliæ tum Morillonii, tum cardinalis Granvellani Epistolæ referuntur secundâ parte novæ edit. operum Baii.

Anno 1567, Pius V Kalendis octobris datâ solemnî Constitutione propositiones numero 76 tacito nomine Baii, *tanquàm hæreticas, erroneas, suspectas; temerarias, scandalosas, et in pias aures offensionem immittentes, respectivè damnavit.* Circa hanc Constitutionem plurima occurrunt observanda, de quibus agemus cap. 3, ubi eandem Constitutionem à cavillationibus quibus eludi solet vindicabimus.

Prædictæ bullæ executionem commisit Pontifex cardinali Granvellano qui tunc Romæ commorabatur; ipse verò ad id operis delegavit Maximilianum Morillonium, suum in diœcesi Mechliniensi vicarium generalem; simulque binas ei litteras dedit, in quibus significabat se, ut Michaelis Baii honorariæ famæ consuleret, egisse apud pontificem ut ejus nomen in bullâ non exprimeretur.

Eodem anno die 29 decembris, Morillonius bullam Pii V clarè et distinctè legit et promulgavit coram strictâ Facultate Lovaniensi, simulque duo indixit executioni mandanda. Primum, deinceps abstinendum omninò ab omnibus et singulis sententiis in bullâ damnatis, seu scripto, seu vivâ voce, clam aut publicè propugnandis. Alterum, interdicens libros ex quibus articuli dampni extracti fuerant. Bullæ obsequentissimos se fore promiserunt, quotquot cum Decano aderant doctores Lovanienses, ejus exemplar ad majorem fidem suis faciendam, sibi dari enixè postulârunt; inter-

positis etiam precibus, ne propter majoris discordiæ periculum interdicerentur libri ex quibus extracti fuerant articuli damnati. Reposuit Morillonius non posse se exemplar bullæ, quod postulabant, ipsis concedere (quod nempe rem totam brevi componendam esse ac sapiendam sperabat pontifex, ac propterea bullam suam publicam fieri volebat), satisque esse si damnatos articulos propriâ suâ manu transcriptos acciperent. Quantum verò ad interdictionem librorum, dilaturum se, donec secundò jussus differre ampliùs non posset. Ista omnia constant ex instrumento quod Jansenius facultatis decanus, postea Gandavensis episcopus eorum notario publico edidit dictâ die 29 decembris 1567.

Anno sequenti, rectores Minoritarum in suis comitiis Nivellensibus solemne decretum emisserunt, quo omnibus et singulis provinciæ Flandriæ Minoritis lex imposita fuit, ut nusquam vel unum ex damnatis in bullâ Pii articulum propugnarent.

Eodem anno 1568, die 20 julii prolixam ad Granvellanum epistolam scripsit Morillonius, in quâ inter multa à se dicta vel facta ut Baium exacerbatum deliniret et ad promptum obsequium adduceret, hoc presertim observatione dignum refert; Baium scilicet ignorare non posse doctrinam suam à facultate theologicâ Parisiensi, ab omnibus Hispaniæ academiis, et Romæ à pluribus eruditione conspicuis viris improbatam fuisse; et quod gravius longè est, eâ sic multos è Patribus Tridentinis offensos fuisse, ut nisi obstitisset dominus Yprensis et finis fuisset concilio impositus, etiam ipso (Baio) præsentem damnata fuisset. Propria Morillonii verba paulò ante exscripsimus.

Anno 1569, Baius misit apologiam suam ad Pium V, in quâ duo contendit, primum, inter damnatas sententias multas sibi falsò imputari; alterum, eas ad mentem S. Aug. veras esse. Tum pontificem suppliciter exorat, ut hæc attentius perlectâ doctrinæ suæ apologiâ, cogitet, utrum bullam ut legitimam sufficienter discussam haberi velit, an tanquam subreptitiâ rescindere. Baio rescripsit S. pontifex die 15 maii ejusdem anni, declaravitque bullam « non sine maturâ deliberatione editam fuisse; « nihilominus se, ut ipsi satisfaceret, curavisse « ut et libri, et ipsæ propositiones et scripta « apologetica novo ac maturo examine expendere-
rentur. » Quibus expensis addit S. pontifex: « Quæ super hoc ipso jam decreveramus, « nisi antea à nobis decreta fuissent, eadem, « prout facimus, de integro decernenda sta-

tuendaque esse judicavimus. Itaque tibi et « cæteris prædictarum propositionum assertoribus pro eorum assertione perpetuum silentium imponimus. »

Istud pontificis Breve Baio reddidit Morillonius eodem anno die 20 junii, atque ab eo sciscitatus est num damnatas propositiones ejurare vellet; respondit se illud facere non posse nisi haberet bullæ transumptum, eò quòd in eâ diceretur nonnullas propositiones sustineri posse in rigore et proprio verborum sensu. Reposuit Morillonius, se tale transumptum non posse concedere; ipsique apprimè notum esse, quòd cum Romam idcirco scripsisset, illud obtinere non potuerit, eò quòd sua Sanctitas rem istam silentio sopiri cuperet; tandem iterum atque iterum pulsatus, eò demum adductus est Baius, ut omnes propositiones in bullâ notatas revocaret et ejuraret. Hæc omnia enarrat testis oculatus Morillonius in litteris quas die 20 junii an. 1569 scripsit ad Granvellanum. Anno 1570, synodus nationalis Belgii Constitutionem Pii V solemniter acceptat, ipsiusque subscriptionem, favente Albanæ duce, omnibus doctoribus Lovaniensibus imperat. Scilicet eum die 11 junii ejusdem anni, Mechliniæ synodus haberetur omnium episcoporum Belgii, cui Martinus Rithovius episcopus Yprensis, cardinale Granvellano, archiepiscopo Mechliniensi absente, præerat, dux Albanæ ad eos de negotio bullæ Pii V, scripsit, urgens ut bulla hæc solemniter publicaretur Lovanii, ac ei ab omnibus subscriberetur Lovaniensis academiæ theologis doctoribus. Re missâ in deliberatione, unanimi consensu statuerunt præsules, utrumque quantocius perficiendum, eumque in finem Maximilianum Morillonium jam à card. Granvellano delegatum, iterum commiserunt, qui nomine synodi Lovanium properaret, ibique pontificis constitutionem more solemniori promulgari curaret, ac theologos ad subscribendum adduceret. Ista constant ex narrat. chron. causæ Baii an. 1570. Die 19 nov. Morillonius in executionem Decreti synodi Mechliniensis bullam Pii V ritu solemnem in scholis Lovaniensibus promulgavit, cui obsequentissimos fore; unanimi voce declararunt doctores Lovanienses. Ita ferunt acta Facultatis Lovaniensis.

Anno 1579 inchoante, cum Gregorius XIII, Pii V successor, intellexisset (teste Urbano VIII, in bullâ *In eminenti* quam anno 1611 emisit), non sine animi dolore, non deesse inter theologos Lovanienses qui articulos damnatos as-

serere et pertinaciter defendere pergerent; imò non paucis persuasum esse, prælatam bullam ab ipsâ Sede apostolicâ brevi retractandam ac revocandam fore; ad coercenda hujusmodi ingenia, simulque ad eximendam vanam illam futuræ aliquandò retractationis spem, prædictam bullam suâ quoque auctoritate confirmavit, articulosque ibidem comprehensos iteratò damnavit; misso Lovanium Francisco Toletò insigni è societate Jesu theologo, postea ad purpuram evecto, qui bullam deferret, promulgaret, et eâ quâ par erat reverentiâ recipi curaret.

Anno itaque 1560, die 21 martii, in frequentissimo totius academix consensu; jussit bullam clarâ et intelligibili voce recitari; quâ lectâ Toletus convertit se ad D. Michaëlem de Bay Universitatis cancellarium, « petiitque ex eo, anne agnosceret in bullâ multos articulos « damnari, qui in libellis quibusdam ejus prius « continerentur, etiam in eo sensu quo in bullâ « damnarentur? Quo agnoscente et respondente quòd sic, rogavit deinceps, anne eodem et reliquos ibi comprehensos et lectos « damnares? Tum ille *Damno, inquit, secundum bullæ ipsius intentionem et sicut bulla damnatur.* » Omnes quoque DD. uno ore responderunt: *Damnamus et bullam reverenter suscipimus, atque obedientiam pollicemur.* Eadem fuit omnium licentiatorum, bachelalorum et studiosorum. Hæc porrò omnia ex actis facultatis theologicæ Lovaniensis referuntur in novâ edit. operum Baii parte secundâ pag. 188 et 189.

His feliciter confectis, Toletus privatis suis cum Baio colloquiis eum adduxit, ut scripto publico ac propriâ manu subscripto, claram et apertam errorum suorum retractationem emitteret. En ipsamet retractationis verba, prout refertur citato mox loco pag. 152: « Ego Michaël de Bay.... agnosco et profiteor me ex « variis colloquiis et communicationibus habitis « cum R. P. Francisco Toletò..... super diversis sententiis et propositionibus jam olim à « SS. D. N. Pio V felicis recordationis sub datâ « Kalend. octobris 1567, et nuper à Greg. XIII. « pontifice Maximo, sub datâ quarto Kalend. « februarii an. 1569, iteratò damnatis et prohibitis, ita motum, et eò perductum esse ut « planè habeam mihi persuasum earum omnium sententiarum damnationem atque prohibitionem jure meritòque, ac nonnisi maturo judicio, ac diligentissimâ discussione « præmissis, factam atque decretam esse. Fa-

« teor insuper plurimas ex iisdem sententiis in « nonnullis libellis à me olim et ante emanata- « tam Sedis apostolicæ super eis censuram, « conscriptis et in lucem editis contineri et defendi, etiam in eo sensu in quo reprobantur. « Denique declaro me impræsentiarum ab iis « omnibus recedere, et damnationi à sanctâ « Sede factæ acquiescere, neque posthæc ullam earum docere aut defendere velle. Actum Lovanii die 24 martii an. 1580. »

In hac Baii retractatione nonnulla sunt imprimè observanda, 1. Baium disertè confiteri propositiones bullæ Pii V damnatas, iterum notas fuisse à Gregorio XIII, quod Baii discipuli postea negaverunt. 2. Apostolicæ Sedis judicium nonnisi præhabito maturo ac diligenti examine fuisse latum. 3. Plurimas è damnatis propositionibus, in libris Baii ante bullam editis contineri. 4. In proprio, obvio ac genuino auctoris sensu confixas fuisse. 5. Justam esse ac legitimam hanc condemnationem; quæ quidem hucusque obstinatè negaverat Baius.

Ad Greg. XIII scripsit Baius, cui summus pontifex rescripsit die quintâ junii ejusdem anni 1580. Breve testimoniis benevolentix ac paterni affectûs plenum est.

Anno 1585, Lovaniensis academia, promouente Vercellensi episcopo ac nuntio apostolico, jussa est non solum à damnatis articulis abstinere, sed etiam sententias singulis quoad doctrinam contradictorias definire; quarum indicem contexuit D. Lenseus, cæterique doctores unâ cum Baio probaverunt, ut constat ex actis ejusdem Facultatis ibidem relatis pag. 159 et 160. Circa præclarum istud doctrinæ Lovaniensis scholæ monumentum, observâ 1°. jussu et auctoritate nuntii apostolici ordinatum fuisse corpus illud doctrinale, quò scilicet significarent Doctores Lovanienses se ex animo reprobare articulos in Bullâ Pianâ reprobatos. Constat id ex ipsomet titulo declarationi præfixo, qui sic est: « Doctrinæ ejus quam certorum articulorum damnatio postulare visa « est, brevis, et quoad fieri potuit, ordinata et « coherens explicatio..... A venerandâ Facultate Lovan. reverendiss. illustrissimique Joannis Bonhomi, Vercellensis episcopi et apostolici per utramque Germaniam nuntii, voluntate ac jussu concepta..... » Observa 2°. juxta hanc Facultatis declarationem, omnes propositiones in bullâ expressas, damnatas esse ratione doctrinæ; adeò ut modales propositiones, qualis est ista: *Pelagius est error dicere quòd*

liberum arbitrium valet ad ultimum peccatum vitiosæ sint et falsæ, tum ratione dicti, tum ratione modi ; quod etiam censuit Facultas Duacena in libro cui titulus : Veritas et æquitas censuræ Pii V Observa 5^o, corpus illud doctrinale nuntio fuisse acceptissimum , qui et illius exemplar ad Facultatem Duacenam direxit, ipsique illa suum ultrò calculum adiecit ut, constat ex epist. Decani sacre Facult. theolog. Duac. ad Fulgent. Id, inquit, *Duaceni omnes missum ad Estium receperunt.* Itaque promovere nuntio apostolico, utraque Belgii Facultas hanc doctrinæ declarationem acceptavit, sicque sopitæ sunt et ad tempus sedatæ contentiones quæ tandiù regiones istas turbarant. Circa idem tempus quo celebris censura Lovaniensis propositionum de gratiâ, promulgata est, etiam quoque fuit prædictum corpus doctrinale quod in quatuordecim distribuitur capita, ad quæ ex ordine revocantur articuli doctrinales quos notat bulla Pii V.

Anno 1589, die 16 septemb. moritur Bains annis natus 77.

§ 3. *Exitus Baianæ controversiæ.*

Post Baii mortem non defuere identidem, tum in Belgio, tum in Galliis, qui doctrinam ejus renovare tentarent ; verum hi ecclesiasticæ et civili auctoritate feliciter debellati sunt atque prostrati ; de quò jam sigillatim dicendum.

Exitus Baianismi in Belgio.—Inter eos qui in Belgii Baii errores renovârunt, præ cæteris eminet Jansenius Yprensus. Is in grandiori volumine de gratiâ edito, quod *Augustinus* inscripsit, plurimas Baii propositiones revocat ; quâ de causâ summus pontifex Urbanus VIII, pridè nonas martii solemnî datâ Constitutione quæ incipit *in eminenti*, Pianam et Gregorianam auctoritate suâ rursus confirmat et approbat, « librumque Jansenii cui titulus *Augustinus*, articulos, opiniones et sententias in dictis Constitutionibus reprobatis atque damnatas continentem ac renovantem, damnat et prohibet. » Veritatem, æquitatem et auctoritatem hujusce Constitutionis cap. 3 vindicamus.

Non potuit Urbanus, quoad vixit, obtinere à ministris regis Catholici, ut prædicta Constitutio in Belgio solemniter promulgaretur, ob infinitas scilicet defensorum Baii et Jansenii artes et molitiones, quibus totum Belgium commovebant ac perturbabant.

Mortuo Urbano, Innocentius X summo ani-

mi ardore prædecessoris sui Constitutionis executionem urgere cœpit, ac tandem an. 1648, regis Catholici jussu ac curâ Leopoldi archiducis, Constitutio Urbani publicata et recepta fuit, impositâ etiam legeis omnibus qui ad ali-quod seu civile, seu ecclesiasticum munus promoveri cuperent, ut præfatæ Constitutioni suscriberent, ac juramento « testarentur, se obsequentes esse S. R. Ecclesiæ, et S. D. N. Innocentio X, pontifici romano, et acceptare debitâ obedientiâ Constitutionem Urbani in quâ damnatur et prohibetur liber Jansenii. » Id refert ipsemet auctor Hist. generalis Jansenismi tom. 1, pag. 219.

Hoc ipso anno 1648, die 27 Julii, academia Duacena solemnî instrumento declaravit, eos splendide nentias fuisse, qui asseruerunt doctores Duacenses non tantum aliàs, sed etiam modò pertinaciter adhærescere doctrinæ Baii et Jansenii : « E contra enim censuimus, inquit, communibus suffragiis, humillimè suam Celsitudinem rogandam, ut pergat doctrinam illam (an et Jansenii) seriò exstirpare, quâ nequaquam docetur mens beati Augustini. » Refertur ista declaratio p. 31 libri cui titulus : *Recueil des bulles.... concernant les erreurs des deux derniers siècles, etc.*

Anno 1649, eadem Universitas Duacensis celeberrimam emisit declarationem sub hoc titulo : *Veritas et æquitas censuræ Pontificiæ Pii V, etc.* ubi singuli articuli in bullâ Pianâ confixi ; refelluntur per antitheses Guillelmi Estii et Francisci Sylvii. Ita autem refelluntur, ut falsitas eorum ubique demonstratur, etiam independentè ab acerbitate censuræ quam aliqui eorum continent ; quod etiam antea observavimus in supradictâ declaratione Lovaniensi.

His adde insigne Declaratione theologicæ Duacenæ responsum, quo quærentibus quibusdam Lovaniensibus, nùm crederent *Duacenses*, omnes articulos Bullæ Pii V, tanquàm falsos esse damnatos, respondit sacra Facultas, omnes ad unum esse, tanquàm falsos in sensu ab assertoribus intento, ut vestra Facultas (Lovaniensis) fidem fecit in explicatione à vobis oblatâ. Steyaertius tom. 1 opuscul. pag. 193, narrat se vidisse prædictum responsum in celeberrimâ abbatiâ Parcensi in scripto cui titulus : *Epistola Decani pro tempore S. Theol. Facultatis Duacenæ.*

Exitus ejusdem controversiæ in Galliis.—1^o Archiepiscopus Parisiensis de Gondy anno 1643, mense decembri, decretum edidit, circa recipiendam quoad doctrinam, Bullam Urbani VIII, quâ Piana et Gregoriana renovantur et confir-

mantur. Decretum illud lectum fuit ac promulgatum die 11 januarii in publicis parochiarum praconiis.

2º Anno 1644, die 2 januarii eadem bulla ad sacram Facultatem Parisiensem regio mandato delata fuit; ac die 15 ejusdem mensis eadem Facultas suis omnibus severe injunxit *ne aliquam è damnatis à Pio V et Greg. XIII propositionibus propugnarent.*

3º Ejusdem bullae veritas ac summa quoad doctrinam auctoritas, variis in comitiis cleri Gallicani vindicatur ac commendatur. Vide quae eam in rem dicemus cap. 5.

Atque hic fuisset tum in Galliis tum apud Belgas controversiae Baianae finis, nisi renovatis circa doctrinam Jansenii altercationibus, recruidisset error utraque multoties auctoritate confossus; verùm de his ubi de Jansenio ejusque sequacibus agemus.

CAPUT II.

De systemate Baiano.

Observandum 1º, Baianum systema constare ex septuaginta sex articulis à Pio V, Greg. XIII et Urbano VIII damnatis.

Observandum 2º, erroneos illos articulos ad praesentem materiam spectantes, claritatis et methodi causâ, ad septem capita commodè revocari posse. Primum est de gratiâ Angelorum et primi hominis; seu, de statu naturæ innocentis. Secundum, de peccato originali. Tertium, de peccatis actualibus. Quartum, de libertate. Quintum, de charitate. Sextum, de justificatione. Septimum de meritis operum.

Observandum 3º, ex card. d'Aguirre tom. 5 theolog. S. Anselmi tract. 6, et Steyaert. tom. 1 opusc. p. 114 et sequent., praedictos articulos omnes fermè in opusculis Baii ante bullam Pianam Lovanii editis annis 1563 et 1566 contineri, paucissimis exceptis, qui tamen ex aliis clarè consequuntur, aut ab Hesselio, aliisque Baianistis expressè traduntur. Opuscula autem Baii ante bullam edita, ista sunt: De primâ hominis justitiâ, liber unus. De meritis operum, libri duo. De charitate, justitiâ et justificatione, libri tres. De peccato originis, liber unus. De libero arbitrio, liber unus. De virtutibus impiorum, libri duo. De Sacrificio, liber unus. Tractatus de Sacramentis in genere. Tractatus de formâ Baptismi. Tractatus de Indulgentiis. Tractatus de oratione pro defunctis. Alia nonnulla opuscula postmodum emisit Baius, quæ omnia, cum momenti omnibus ad hanc historiam pertinen-

tibus, in novâ editione anni 1690 extant collecta à Gerberonio, ejus annotationes cautè legendæ.

Observandum 4º, praefatas assertiones totius Jansenismi, ac omnium subinde errorum prima fuisse veluti incunabula. De his itaque sigillatim et accuratè pro modulo dicendum nobis est.

§ 1. *Systema Baianum circa statum naturæ innocentis.*

Doctrina Baii circa statum naturæ innocentis his quinque continetur propositionibus ita inter se concatenatis, ut una ex alterâ necessariò consequatur.

Prima propositio Deus habitâ ratione justitiæ, bonitatis ac providentiæ, non potuit ante ullum peccatum Angelum aut hominem creare absque ordinatione ad intuitivam sui visionem. Existimat siquidem Baius intuitivam hanc visionem, seu Deum ut objectum et auctorem gloriæ, intrinsecum esse, necessarium ac essentialem creaturæ rationalis finem, quo absque prævio peccato frustrari nequit, aut saltem mediis ad finem illum assequendum necessariò prerequisites. Tradit hanc doctrinam Baius lib. de primâ hominis justitiâ, per plura capita ac totum penè librum, praesertim verò cap. 8. Huc spectant septem articuli de integritate primi hominis et Angelorum in bullâ Pianâ damnati, 21, 25, 24, 26, 55, 78, 79; satis sit hic retulisse verba articuli 21: « Hu-
« manæ naturæ sublimatio et exaltatio in con-
« sortium divinæ naturæ, debita fuit integritati
« primæ conditionis, et proinde naturalis di-
« cenda est, et non supernaturalis. »

Secunda propositio ex priori consequens: Gratiae beneficia naturæ sanæ et innocenti concessa, justitiâ scilicet originalis, sanctitas, immortalitas, etc., debita ipsi fuere ac naturalia, eo saltem sensu, quòd sine iis creatura rationalis veluti manca fuisset et imperfecta, eaque proindè Deus ex justitiâ, bonitate, sapientiâ et providentiâ naturæ innocenti denegare non potuit. Hæc doctrina manifestè continetur in supra citatis Baii propositionibus. Vigesima tertia sic se habet: « Absurda est sententia eo-
« rum, qui dicunt hominem ab initio dono
« quodam supernaturali et gratuito super con-
« ditionem naturæ fuisse exaltatum, ut fide,
« spe et charitate Deum supernaturaliter co-
« leret. » Eandem doctrinam clarè tradit citato lib. de primâ hominis justitiâ cap. 4: « Non minùs, inquit, naturæ hominum quàm

« Angelorum est, quod apud eundem Psalmistam subditur : MIHI ACTEM ADILIERE DEO BONUM EST... et eadem est de reliquis primæ integritatis partibus demonstratio. » Etverò istud manifestè sequitur ex præcedenti propositione; si enim naturæ innocenti debita sit ordinatio ad visionem intuitivam, ipsi quoque debita erunt media ad eum finem obtinendum necessaria; porrò gratiæ dona primo homini concessa, media fuere necessaria ad intuitivam Dei visionem assequendam; ergo, etc.

Tertia propositio : Dona Angelis et primo homini concessa, propriè et strictè gratuita non fuere et supernaturalia. Namque quod debitum est naturæ, ita quòd ipsi ex justitiâ denegari non possit, nec gratia, nec supernaturale propriè dici potest; gratia etenim excludit omne debitum personæ, si gratia jam non ex operibus, inquit Apost. Rom. 11, v. 6, *aliòquin gratia jam non est gratia*, quantò magis excludere debet debitum naturæ, quod multò majus est? Porrò ex dictis dona primo homini et Angelis collata naturæ innocenti debita fuere; ergo, etc.; et reipsà ita conceptis verbis docent articuli 21, 27, etc., inter Baianos.

Quarta propositio : Gratia Adamo et Angelis collata non producebat merita supernaturalia ac divina, sed merè humana et naturalia. Ita clarè Baius lib. 1 de Meritis operum cap. 4, idque disertè exprimitur propositionibus 1, 7 et 9, inter Baianas. Septima sic se habet : « Primi hominis integri merita, fuerunt primæ creationis munera; sed juxta modum loquendi sacræ Scripturæ, non rectè vocantur gratia, quo fit ut tantùm merita, et non gratia debeant nuncupari. » Etverò, cùm merita sequantur ex gratiâ, si gratiæ beneficia naturæ innocenti debita fuerint ac naturalia; idem profectò dicendum de meritis ex gratiâ profluentibus.

Quinta propositio : « Et bonis Angelis, et primo homini, si in statu illo (innocentiæ) permansissent usque ad ultimum vitæ, felicitas esset merces, et non gratia. » Ipsissima sunt verba tertiæ propositionis inter Baianas; ita etiam habetur quartâ, quintâ et sextâ in quâ sic legitur : « Naturali lege constitutum fuit homini, ut si in obedientiâ perseveraret, ad eam vitam pertransiret, in quâ mori non posset. » Idem etiam tradit Baius citato lib. 1 de Meritis operum cap. 4 et 5, idque consecrarium est ex præcedentibus necessariò fluens. Merces enim ejusdem debet esse ordinis cum merito cui retribuitur; porrò ex dictis, in

statu naturæ innocentis merita fuere merè humana et naturalia; ergo in eodem statu præmium, seu felicitas æterna, mera fuisset merces, mera retributio, non vera et propriè dicta gratia.

Ex his patet Baianam circa statum naturæ innocentis doctrinam ad istud erroneum ac palmare principium ultimè revocari, nempe gratiam et gloriam naturæ innocenti debitam fuisse. Quàm futile sit istud principium, vanaque Baii, Jansenii, eorumque assecularum effugia, ostendetur in parte dogmaticâ, jamque demonstratum manet ex dictis in quæst. præcæmiali, ex quibus constat omnes ad unum theologos ante Baium, tanquàm quid certum et inconcussum statuere, omne supernaturale propriè dictum, qualis est gratia, cujuslibet naturæ vires et exigentiam superare; de quo consuli possunt card. d'Aguirre tom. 3 theol. S. Anselmi, Ripalda tom. 3 de Ente supraat. etc.

Ad perfectam doctrinæ Baianæ circa statum naturæ innocentis intelligentiam, unum superest observandum, videlicet, quemadmodum omnia gratiæ beneficia Adamo et Angelis in ortu concessa, ipsis debita erant ac connaturalia; ita etiam immunitas ab omni malo, homini innocenti debita erat ac naturalis : *Malum enim*, inquit Baius lib. de primâ hominis Justitiâ cap. 4, *nihil aliud est quàm naturalium privatio bonorum*. Hinc propositiones inter Baianas 53, 78, 79 : « Deus non potuisset ab initio talem creare hominem, qualis nunc nascitur... Immortalitas primi hominis non erat gratiæ beneficium, sed naturalis conditio... Falsa est doctorum sententia, primum hominem potuisse à Deo creari et institui sine justitiâ naturali. » Hinc etiam propositiones 72, 73, in quibus asseritur omnes omninò quorumlibet justorum afflictiones, supplicia esse et ultiones peccatorum : *Omnes ejus (B. Virginis) afflictiones in hac vitâ, sicut et aliorum justorum, fuerunt ultiones peccati actualis vel originalis*. Itaque et immunitas à quibuslibet malis, et collectio omnium bonorum quibus cumulati fuerunt primi parentes, ipsis debita erant et connaturalia, primordia et appendices statûs innocentis; verbo dicam, immobilis et constans ordo, divinâ positivâ, perinde ac naturali lege constitutus.

§ 2. Systema Baianum circa peccatum originale.

Doctrina Baii circa peccatum originale, ad hæc capita revocatur. Docet 1^o, peccatum originale formaliter consistere in concupiscentiâ

carnis seu libidine, quæ est inclinatio in bonum sensibile contra rationis præscriptum. Ita Baius lib. de Peccato orig. cap. 6 et 10. Docet 2º, concupiscentiam hanc in non renatis peccatum esse, quia dominatur illis, nec hi gerunt contrarium voluntatis arbitrium. Ita lib. citato cap. 7. Ita etiam propositionibus 48 et 49 inter Baianas: « Peccatum originis est « habituali parvuli voluntate voluntarium, et « habitualiter dominatur parvulo, eò quod « non gerit contrarium voluntatis arbitrium. » Docet 5º, eandem concupiscentiam etiam in renatis peccatum esse, ex quo iterum per relapsum iis dominatur. Ipsissima sunt verba propositionis 74: « Concupiscentia in renatis « relapsis in peccatum mortale, in quibus jam « dominatur, peccatum est, sicut et alii habitus pravi. » Docet 4º, independentem ab omni prorsus pacto, lege ac ordinatione divinã, « omne scelus ejus esse conditionis, ut suum « auctorem et omnes posteros eo modo inficere possit, quo infecit prima transgressio. » Verba sunt Baii citato libro de Pecc. orig. cap. 15, estque 52 inter Baianas propositiones. Ex hac Baii doctrinã sequitur, quoad transgressionem et communicationem noxæ originalis, nihil omninò peculiare esse Adami peccato. Docet 3º, eodem lib. de Pecc. orig. cap. 11, 15 et 16, « concupiscentiam sive legem membrorum, et prava ejus desideria, quæ inviti « sentiunt homines, veram esse legis inobedientiam. » Ipsa sunt verba propositionis 51 inter damnatas. « Prava desideria, quibus ratio non consentit, et quæ homo invitus patitur, sunt prohibita præcepto: Non concupisces. » Est 50. « Homo sentiens motus « pravos concupiscentiæ et non consentiens, « transgreditur præceptum: Non concupisces, « quamvis transgressio in peccatum non deputetur. » Est 75. « Quamdü aliquid concupiscentiæ carnalis in diligente est, non facit « præceptum: Diliges Dominum Deum tuum « ex toto corde tuo. » Est 76. Quam falsa sit, absurda, erronea, necnon Lutheranis erroribus consensiens prædicta doctrina, nemo non videt. Quemadmodum enim observant doctores Lovanienses in suã celebri jam laudatã declaratione an. 1585, cap. 12, nullo pacto vera esset renatorum justificatio, si motus ii carnis, quos inviti adversus spiritum rebellantes sentiunt justi, vera essent peccata; nihil enim damnationis est, inquit Apost. Rom. 8, in iis qui sunt Christo Jesu; nec possent tamen veram propriamque peccati rationem exuere, si

legis transgressionem et inobedientiam contingerent. Quamobrem dicendum est motus concupiscentiæ pravos, pro vitiatu hominis statu, prohibitos non esse præcepto: *Non concupisces*; hominemque eos sentientem, sed non consentientem, legis prædictæ pronuntiari non debere transgressorem; sicuti enim Deus non præcipit homini ut faciat quod facere non potest; ita neque prohibet quod vitare non valet; nec quidquam omninò sub præceptum aut prohibitionem cadit, nisi in quantum humanæ possibilitati subijcitur.

Sed et multò gravius est, inquit Steyaertius in suis ad damnatas Baii propositiones notis, quod additur propositione 75, nempe, hominem pravos concupiscentiæ motus sentientem et non consentientem, transgredi præceptum, *non concupisces*; « quamvis transgressio in peccatum non deputetur. » Hic enim loquendi modus non poterat fidelium aures non offendere, ex quo sectarii eãdem planè phrasi hæreses suas circa justorum opera exprimere consueverunt, asserendo ea omnia, quantumvis ex se virtuosa appareant, vera esse peccata, propter adhærescentem concupiscentiæ labem, neque tamen ex bonitate et misericordiã divinã in peccatum imputari.

Eãdem prorsus ratione confutatur propositio 76, de præcepto diligendi Deum ex toto corde; quasi, uti effutiant Luther. et Calvin., homo pravos concupiscentiæ motus invitus sentiens veram legis inobedientiam admitteret, quò fieret ut Deum ex toto corde non diligeret. Impediunt quidem hi motus, ne omni modo ex toto corde diligatur Deus; non tamen efficiunt, ut ea quæ de diligendo Deo lex est, non veraciter impleatur; tum quia charitas cum sit in voluntate, non adversatur ei, nisi motus voluntarii; tum quia non exigit, nisi ut amemus Deum plus quàm creaturas; tum denique quia charitas quæ secum consistere patitur indeliberata carnis desideria, idcirco etiam dicta est legis plenitudo, quòd per eam divina lex impleatur.

Totum istud paucis contraho. Error Lutheri et Calvini circa justorum opera, in eo potissimum positus est, juxta Bellarm. lib. 4 de Justif. cap. 10, quòd existiment, ne sanctis quidem possibilem esse legis impletionem, præsertim quod attinet ad illud: *Diliges Dominum Deum tuum ex toto corde tuo*; et illud: *Non concupisces*. Porro, si valeret prædicta Baii sententia, justificatis forent impossibilia Dei mandata, inprimis utrumque mox recensitum;

Diliges Dominum, etc. etc. : *Non concupisces* ; ergo, etc.

§ 3. *Systema Baium circa peccatum personale.*

Docet 1^o, *ad rationem et definitionem peccati non pertinere voluntarium*. Ipsa sunt verba propositionis 46 inter Baianas. Habet hanc doctrinam Baius lib. de Peccat. orig. cap. 7 : « Dissentes, inquit, de actu aliquo, an ex suo genere sit peccatum ; non hoc inquirere debemus, an sit à voluntate, vel à quâ sit voluntate profectum, sed an ex suo genere sit divinorum inobedientia mandatorum ; quæ peccati propria definitio est, quia quidquid ejusmodi est, undecumque sit hoc, sine ambiguitate ex suâ ratione peccatum est. » Eandem doctrinam extendit ad peccatum originale ; unde propositione 47, sic habet : « Peccatum originis verè habet rationem peccati sine ullâ ratione et respectu ad voluntatem, à quâ originem habuit. »

Docet 2^o, *nullum esse peccatum ex naturâ suâ veniale, sed omne peccatum mereri pœnam æternam*. Est propositio 20. Docet hanc Baius lib. 2 de Peccat. Meritis cap. 8, primò quasi disputando, sed in fine planè assertivè. De isto Baii errore sic pronuntiant Doctores Lovanienses in suprâ citatâ declaratione : « Quod asseritur, nullum esse peccatum naturâ suâ veniale, sed omne illud pœnam mereri æternam, non sine gravi ratione repudiandum damnandumque videtur ; neque enim, ut cæteras causas prætereamus, poterit cum eis peccatis quæ venialia dicuntur, quibusque nec sanctissimorum hominum mortalem hanc vitam agentium conversatio caret, vera consistere justitia, si omnia digna sunt morte. »

Docet 3^o, *in omnibus suis actibus peccatorem servire dominanti cupiditati*. Est 40 propositio inter Baianas. *Omne quod agit peccator, vel servus peccati, peccatum esse*. Est 35. Quis crederet, inquit Steyaert, in citatis notis ad propositiones Baianas, hanc propositionem primam è quâ altera sponte sequitur reipsâ haberi apud Baium ? Habetur tamen, et quidem totidem verbis lib. de libero Arb. cap. 6, ubi sic legitur : « Dæmones in omnibus suis actibus et desideriis miserrimi sunt suæ iniquitatis et male voluntatis, quam deponere non possunt, servi. Similiter impii homines quamdiù non sunt à peccati dominio per filium liberati, servi sunt peccati, quia in omnibus suis actibus dominanti peccato servant. » Quod quidem loco mox citato confutant doc-

tores Lovanienses, « quia, quemadmodum justus non omnia justè, nec fidelis omnia fideliter ; ita neque peccator omnia vitiosè, neque infidelis omnia infideliter operatur. »

Hunc Baii errorem antea docuerant Joannes Wicleff. et Joan. Hus. Ille quidem, sess. 15 concilii Constant. his verbis : « Ex principiis fidei est per se notum, quòd quidquid homo in peccato mortali fecerit, peccat mortaliter. » Alter verò, ibidem col. 130, n. 16 : « Si homo est vitiosus, et agat quidquam, tunc agit vitiosè ; et si est virtuosus, et agat quidquam, tunc agit virtuosè ; quia sicut vitium, quod crimen dicitur, sive peccatum mortale, inficit universaliter actus hominis vitiosi, sic virtus vivificat omnes actus hominis virtuosi. »

Illic observandum, Baium nomine peccatoris non intelligere, sicuti intelligebant Wicleff. et Jean. Hus, eum qui caret gratiâ sanctificante, seu eum in quo remissum non est peccatum ; sed eum potius qui caret charitate actuali prædominante, seu in quo non est charitas intensivè, aut saltem appetitivè perfecta, seu eum qui nondum elicit ullum charitatis actum quo deponeret habituales affectus peccati ; sensusque est hujusmodi hominem, quia nondum agit ex charitate, semper agere ex dominante cupiditate ; adeoque semper peccare. Hic sensus intimè connexus est cum aliis ejusdem auctoris propositionibus, quibus asserit nihil boni fieri posse sine charitate, nullumque dari medium inter laudabilem charitatem et vitiosam cupiditatem, uti expressè habet 38 propositio. De quo postmodum dicemus.

Quod autem citatis propositionibus 35 et 40 Baius nomine peccatoris, non eum præcisè intellexerit qui caret gratiâ sanctificante quâ mortalia peccata expunguntur, inde manifestè constat, quia censuit veram et propriè dictam, imò etiam intensivè perfectam charitatem cum peccato mortali et reatu pœnæ æternæ posse consistere. Ita expressè tradit Baius proposit. 31, 33 et 70 ; porrò certum est, etiam in mente Baii, illud opus bonum esse ac laudabile, quod ex dominante charitate intensivè aut saltem appetitivè perfectâ fit ; ergo, etc.

Docet 4^o, *omnia infidelium opera esse peccata, et philosophorum virtutes esse vitia*. Ita Baius lib. de Virt. impiorum cap. 4 et 5, estque propositio 23. De isto Baii errore, suo loco ex professo agemus : *infidelitatem purè negativam in iis ; quibus Christus non est prædicatus, esse*

peccatum; est 68. *Hominem peccare etiam damnavit in eo quod necessario facit*; est 67. Hæc duæ postremæ propositiones expressæ non habentur in libris Baii; ast ex aliis ejus placitis, tum circa concupiscentiam, tum circa libertatem manifestè sequuntur.

Docet 5º, *in peccatis duo esse, actum, et reatum; transeunte autem actu, nihil manere nisi reatum, sive obligationem ad poenam*, est 56 propositio. Additur proposit. 57 et 58: *In sacramento Baptismi, aut sacerdotis absolutione, propriè reatum peccati duntaxat tolli, et ministerium sacerdotum solum liberare à reatu*. Hos errores tradit Baius lib. de oratione pro defunctis cap. 4, in eo autem siti sunt, quòd in peccato nihil aliud agnoscat, quàm actum et reatum poenæ (nullum autem prætereà reatum seu maculam culpæ) et hunc duntaxat poenæ reatum tolli doceat ministerio sacerdotis; è contra verò concil. Trid. sess. 14, cap. 4, declarat, etiam ubi per contritionem perfectam fit reconciliatio ante sacramentum, ipsam nihilominus reconciliationem non fieri sine respectu ad sacramentum, cujus votum in contritione includitur; non ergo solus poenæ reatus, ut vult Baius, sed et peccatum ipsum remittitur sacerdotis ministerio in re vel saltem in voto. Et verò, cum sacramentis Baptismi et Pœnitentiæ verè justificentur homines, justificatio autem non sola sit peccatorum remissio, sed sanctificatio etiam renovatioque interior hominis; fieri non potest ut nuda reatus poenæ solutio baptismo sacerdotisque ministerio adscribatur.

§ 4. *Systema Baianum circa libertatem.*

Duo sunt palmares ac præcipui Baiani systematis errores circa libertatem. Primus iste est: *Sola violentia repugnat libertati hominis naturali*. Ipsa est propositio 66, quam docet Baius lib. de lib. Arb. cap. 7, in eà autem sermonem haberi de libertate ad merendum et demerendum requisitâ, ex antecedentibus et consequentibus manifestè colligitur.

Secundus est: *Liberum arbitrium sine gratiæ Dei adjutorio, nonnisi ad peccandum valet*. Ipsa est propositio 27, estque titulus capitis 8, lib. 2, de virtutibus impiorum, qui sic est, quòd *liberum arbitrium sine Dei adjutorio nonnisi ad peccandum valet*.

Ex priori errore sequitur 1º, *quod voluntariè fit, etiamsi necessario fiat, liberè tamen fit*. Est 59 propositio inter Baianas, quam non obscurè tradit Baius lib. de libero arbitrio; capite enim

cap. 4 et 5, docet, *Angelos scilicet quidam necessitate constrictos, Deum atque justitiam immobiliter diligere*; et tamen postea, cap. 6, eosdem *liberrimos vocat, etiam in eo quod justitiam diligant*. Sequitur 2º, *hominem damnavit peccare, in eo quod necessario facit*. Est 67. Sequitur 3º, *pravos et indeliberatos concupiscentiæ motus, infidelitatem merè negativam, et opera infidelium vera esse peccata; quæ totidem sunt Baii placita, uti antea observavimus*.

Ex posteriori autem errore circa vires liberi arbitrii absque gratiâ sequitur 1º, *fures esse et latrones qui... docent tentationi ulli sine gratiæ Christi adjutorio hominem posse resistere, sic ut in eam non inducatur, aut ab eà non superetur*. Verba sunt proposit. 29 et 30. Ita etiam Baius lib. 2 de virtutibus impiorum, cap. 9. Sequitur 2º, *cum Pelagio sentire, qui boni aliquid naturalis, hoc est quod ex naturæ solis viribus ortum ducit, agnoscit*. Habetur apud Baium lib. de charit. cap. 5, estque propositio 57, quæ coincidit cum 25 et 65. Sequitur 3º, *Deum posse in præsentis statu impossibilia præcipere*; quod exprimit propositio 54, hancque doctrinam tradit Baius lib. de peccat. orig. cap. 12, his verbis: « Dico igitur... quod asseritur Deum homini nihil impossibile præcepisse, de homine recto, qualis erat cum Deus ab initio mandata et præcepta illi apposuit, esse verissimum. » Et rursus: « Quod igitur consideratione primæ integritatis... verissimè dicitur, Deum homini nihil præcepisse impossibile; hoc de homine corrupto dici non potest, nisi respiciendo ad divinum auxilium, quo sanctis Dei possibile, imò facile efficitur, quod per lapsum viribus humanis factum est impossibile. » Ibid. initio capitis dixerat: « Definitiva sententia quæ D. Augustino adscribitur (Deus homini nihil impossibile præcepit) Augustini non est, sed Pelagii in epist. ad Demetriadem. »

§ 5. *Systema Baianum circa charitatem.*

Docet 1º, istudque est totius Baianæ doctrinæ præcipuum ac palmare principium: *omnem amorem creaturæ rationalis, aut vitiosam esse cupiditatem, quâ mundus diligitur, quæ à Joanne perhibetur; aut laudabilem illam charitatem, quâ per Spiritum sanctum in cordibus diffusâ, Deus amatur*; nullum proinde dari medium inter charitatem propriè et strictè sumptam et vitiosam cupiditatem. Est hæc propositio 58 inter Baianas, hancque totidem verbis tradit Baius lib. de charit. cap. 5, 6 et 9.

Porrò charitas Baio tunc demùm nuncupatur, cum dominatur supra cupiditatem non solum actualem, sed etiam habitualem, seu, quâ homo omnem peccandi affectum deponit, et finem suum ultimum tum objectivum, tum subjectivum in Deo constituit. « Patet, inquit citato lib. de charit. cap. 9, charitatem tunc nuncupari, quando Deo cooperante tantum accipit incrementum, ut et mandata Dei faciat, et cupiditates quæ prius eum in scele-ribus detinebant, vincat. »

Mirum profectò quot et quanta errorum portenta ex illo malè fœcundo Baii principio necessariò consequantur; ea sigillatim et quoad fieri poterit accuratè referemus et exponemus dissertatione duodecimâ, ubi de Jansenii discipulis: simplex horumce consecratorum expositio, plenissima erit pestilentis principii ex quo deducuntur confutatio.

Prædictum de impossibilitate amoris medii principium confutat sacra Facultas Lovanien-sis cap. 5, sæpius laudatæ declarationis anni 1585, his verbis: « Omnino hoc à vero abhor-« rere censemus, omnem creaturæ rationalis
« amorem, aut vitiosam cupiditatem esse....
« aut laudabilem illam charitatem.... Est indu-
« biè medius quidam amor, quem naturæ auc-
« tor inseruit; quo non modò beatitudinem
« experimus omnes, sed et parentes et amicos...
« Et quæcumque aliâ ratione propinquos irre-
« prehensibiliter ipsâque naturâ impellente,
« diligimus; qui etsi longè abest ab illius ex-
« cellentiâ charitatis quam Deus per Spiritum
« sanctum in eorum qui justificantur corda
« diffundit; tamen neque ita degener est, ut
« vitiosa debeat cupiditas existimari; hæc ex
« Deo non est, ille Deum habet auctorem; hæc
« damnanda atque prohibita est, illum naturæ
« lex omnisque honesti postulat ratio ac requi-
« rit; hanc charitas divinitus infusa destruit
« atque evertit, illum firmat ac perficit. »

Unum hic observo, perversa omnia quæ tra-
dit Baius dogmata circa statum naturæ inno-
centis, ex prædicto Baii principio directè se-
qui; pariter quæ tradit circa statum naturæ
lapsæ et reparatæ, ferè omnia ex eodem prin-
cipio dimanant, ut apertè patebit attendenti.
Verùm de his consecrariis ut diximus plenius
dicemus alibi.

Docet 2º, quidquid fit sine charitate, non
solum omissionis, sed et commissionis pecca-
tum esse, adeoque *non esse veram legis obedi-
entiam quæ fit sine charitate.* Est 16 proposit.
Quoad sensum habetur cap. 1 libri de libero

arbitrio: « Quæcumque, ait, sine charitate
« fiunt, etiamsi apud homines speciosa videan-
« tur, tamen apud Deum simulata tantum et
« non vera sunt legis obedientia. » Manifestè se-
quitur, ut patet, ex impossibilitate amoris medii.

Nota hic obiter, juxta Wiclef. quidquid fit
sine charitate habituali et gratiâ sanctificante
peccatum esse commissionis... Juxta Baium
etiam peccatum est quidquid fit sine charitate,
non quidem habituali, sed actuali intensivè aut
saltem appetitiivè perfectâ; seu quæ domina-
tur supra cupiditatem non solum actualem,
sed etiam habitualem. Ratio ipsius est, quia
cupiditas non potest in voluntate dominari ha-
bitu, quin et actu etiam dominetur; unde victo
ac debellato actu, habitus jacet subjectus; cu-
piditas enim habitualis, si ipsi fides, semper
moveret et excitaret voluntatem juxta omnes suos
intensionis gradus; idque pro nativâ habituum
conditione. Habitus si quidem ex naturâ suâ
est propensio; hæc propensio ex se est neces-
saria, nec liberè semetipsam suscitatur; præsen-
te ergo objecto ad illud totis conatibus tendit,
et illo frui nititur quantum potest. Ex quo ite-
rùm sequeretur in eodem Baii systemate, cha-
ritatem non posse esse appetitiivè perfectam,
quin etiam sit intensivè; porrò adducta Baii
ratio, petita ex necessariâ habituum in objectâ
suâ propensione, omnino infirma est; objectum
enim potest esse plus minùsve consonum ha-
bitui, potest ab intellectu plus minùsve ut tale
attingi; unde habitus propensio potest esse
plus minùsve vehemens. .. Plerique Baii dis-
cipuli, ac præsertim Jansenius, primâ fronte
videntur magistri sui systema hæc in parte ut-
cumque emolliisse: asserunt enim peccatum
esse quidquid sine charitate dominante supra
cupiditatem, non quidem habitualem, sed ac-
tualem duntaxat. Verùm propius inspicienti
patebit, in rei veritate ipsos à Baio nullatenus
aut vix discrepare; stando suis principiis fateri
tenentur, id quod fit ex charitate infirmâ, de-
bili ac inferiore cupiditati habituali, peccatum
esse saltem omissionis, defectu nempe, tum re-
lationis in Deum ut finem ultimum, tum obser-
vationis primi ac præcipui Dei mandati: *Dili-
ges Dominum Deum tuum, ex toto corde tuo, etc.*
Itaque, si quod sit magistrum inter et discipu-
los discrimen, in eo unicè stat, quòd Baio pec-
catum tum omissionis, tum commissionis sit,
quod fit sine charitate dominante supra cupi-
ditatem habitualem, seu appetitiivè perfectâ;
Jansenio verò, aliisque Baianistis, peccatum
omissionis duntaxat.

Docet 3^o, *charitatem veram, perfectam et sinceram, quæ est ex corde puro, conscientia bonâ et fide non fictâ, tam in catechumenis quam in pœnitentibus posse esse sine remissione peccatorum, et cum reatu æternæ damnationis.* Ita proposit. 51, 52, 70. Ita etiam Baius lib. de charit. cap. 7 et 9, ubi nullam charitatis perfectionem excipit, quæ reatum peccati mortalis et æternæ damnationis secum pati non possit. Istud sequitur ex systemate Baii circa justificationem; asserit enim, *veram justificationem posse separari remissione peccatorum!*

Docet 4^o, *per contritionem, etiam cum charitate perfectâ, et cum voto suscipiendi sacramentum conjunctam, non remitti crimen sine actuali susceptione sacramentorum.* Est proposit. 71. Excipit Baius necessitatis et martyrii casus; tunc enim, inquit, ex mero et gratuito Dei beneplacito, sine actuali sacramenti susceptione remittitur peccatum cum supradictâ contritione.

§ 6. *Systema Baiannum circa justificationem.*

Tria potissimum docet Baius circa justificationem. Primum, *justificationem impij formaliter consistere in obedientia mandatorum; non in gratiâ aliquâ animæ infusâ, quâ adoptatur homo in filium Dei, et secundum interiorem hominem renovatur, ac divinæ naturæ consors efficitur.* Ita proposit. 42 et 69 inter Baianas. Doctrinam hanc lib. penè integro de justitiâ, præsertim cap. 5, et 6, tradit Baius; quod certè mirum, cum concilium Trid. cui interfuit, contrarium disertè doceat sess. 6, can. 11, his verbis: « Si quis dixerit homines justificari vel solâ imputatione justitiæ Christi, vel solâ peccatorum remissione, exclusâ gratiâ et charitate, quæ in cordibus eorum per Spiritum sanctum diffundatur, atque illis inhæreat... anathema sit. » Et verò justitiam, per quam formaliter justi sumus, habitualement esse, non actualement, vel ex eo uno manifestè evincitur, quòd justitia quâ formaliter justificamur, non sit solum in adultis, sed etiam in parvulis baptizatis; at in parvulis nulla esse potest justitia actualis; ergò, etc.

Secundum, *in hominibus pœnitentibus ante Sacramentum absolutionis, et in catechumenis ante Baptismum, esse veram justificationem; separatam tamen à remissione peccatorum.* Hæc est propositio 43, quam tradit Baius citato lib. de justitiâ cap. 7. Hæc autem ut clariùs intelligatur propositio, sciendum est Baium docere cap. 3, *justitiam hujusvitiæ duabus consistere partibus,*

remissione videlicet peccatorum, et vitæ novitate. Addit ille cap. 6, justitiam improprie constitui per remissionem peccatorum, proprie verò per obedientiam legis seu mandatorum; ac proinde qui legi obedit, habet id quod in justificatione præcipuum est, nec tamen is simpliciter et absolute justus dici debet, nisi insuper accesserit peccatorum remissio, quam Baius vult essentialiter annexam sacramento extra casus martyrii aut extremæ necessitatis. Hinc fit 1^o catechumenos et pœnitentes posse habere justitiam, nec tamen eos esse aut dici posse justos; 2^o justitiam consistere posse cum reatu æternæ damnationis; 3^o discernendum esse inter hominem habentem gratiam quæ justificat, et hominem justum; primus servat mandata, secundus cum obsequio legis, nullius peccati reus est; 4^o formam quâ homo denominatur justus, esse remissionem peccatorum, non justitiam ipsam. Hæc autem doctrina planè est aliena à mente concilii Tridentini sessione 6, cap. 7 et can. 11, ubi non obscure declaratur justitiam per quam formaliter justi sumus, non solam peccatorum remissionem, sed etiam interiorem et permanentem hominis renovationem completi: « Si quis dixerit, inquit citato can. Patres Trident., homines justificari... solâ peccatorum remissione, exclusâ gratiâ et charitate, quæ in cordibus eorum per Spiritum sanctum diffundatur, atque illis inhæreat... anathema sit. »

Tertium, *rejiçendam esse illam distinctionem duplicis justitiæ; alterius quæ fit per spiritum charitatis inhabitantem; alterius quæ fit ex inspiratione quâdam Spiritus sancti, cor ad pœnitentiam excitantis, sed nondum inhabitantis;* est propositio 65. Item et illam distinctionem duplicis vivificationis; alterius quâ vivificatur peccator, dum ei pœnitentia et vitæ novæ propositum et inchoatio per Dei gratiam inspiratur; alterius, quâ vivificatur qui verè justificatur et palme viri in vite Christi efficitur, pariter commentitiam esse, et Scripturis minimè congruentem. Utraque propositio habetur quoad sensum apud Baium, lib. de charit. cap. 7, et lib. de Justificat. cap. 5. Utraque confutatur ex S. Aug. lib. de Naturâ et Grat. cap. 70, ubi varios charitatis gradus describens S. doctor, sic habet: « Charitas inchoata, inchoata justitia est; charitas provecta, provecta justitia est; charitas magna, magna justitia est; charitas perfecta, perfecta justitia est. » Et lib. 1 de divers. quæst. ad Simplic. quæst. 2: « Fiunt ergo inchoationes quædam fidei, conceptionibus

« similes; non tamen solum concipi, sed etiam
 « nasci opus est, ut ad vitam perveniatur æter-
 « nam. »

§ 7. *Systema Baiarum circa meritum operum.*

Suum circa meritum honorum operum syste-
 ma operosissime adstruit Baius libris de meri-
 tis operum, ac præsertim secundo. Summa in
 eo consistit, quòd ad meritum impertinens esse
 velit, quæ sit operantis dignitas, excellentia
 aut sublimitas, modò opus ipsum bonum sit et
 legi Dei conforme.

Docet itaque 1º, *Sicut opus malum ex suâ natu-
 rurâ est mortis æternæ meritorium, sic opus bo-
 num ex suâ naturâ est vitæ æternæ meritorium.*
 Est secunda inter Baianas; hanc tradit Baius
 lib. 1 de merit. operum cap. 2. In hoc primo
 Baii placito, multa occurrunt reprehendenda.
 1º Falsum est opus bonum vitæ æternæ meri-
 torium esse *ex suâ naturâ*; aliàs meritorium
 esset independenter tum ab ordinatione divinâ,
 tum à meritis Christi, tum à conditione perso-
 næ operantis; quæ tria apertè erronea docuit
 Baius, et disertè confixit concil. Trid. sess. 6,
 cap. 16, et can. 52 ejusdem sess. 2º Falsum
 pariter et erroneum, opus malum ex suâ natu-
 rurâ mortis æternæ meritorium esse; aliàs
 omne peccatum ex suâ naturâ foret mortale.
 3º Etsi esset opus malum suâ ex naturâ mortis
 æternæ meritorium, non tamen consequens foret
 vitæ æternæ præmium ex boni operis natu-
 rurâ profluere; quasi nimirum tantumdem suffi-
 ciat ad bonum ac ad malum.

Docet 2º, *quòd piè et justè in hac vitâ mortali
 usque ad finem conversati vitam consequamur
 æternam, id non propriè gratiæ Dei, sed ordina-
 tioni naturali statim ab initio creationis consti-
 tutæ justo Dei judicio deputandum esse... nec in
 hac retributione bonorum operum ad Christi me-
 ritum respicitur, sed tantum ad primam institu-
 tionem generis humani, in quâ lege naturali con-
 stitutum est, ut justo Dei judicio obedientiæ
 mandatorum vita æterna reddatur.* Ita proposi-
 tio 11 et 12; ita etiam Baius lib. 2 de merit.
 operum. Quantum utraque ista propositio in-
 iuriosa sit gratiæ, ejusque auctori Christo,
 nemo non videt; in iis siquidem conceptis
 verbis asseritur, non propriè gratiæ Dei, sed
 ordinationi naturali deputandam esse vitam
 æternam, nec in illius retributione ad Christi
 meritum respici; quod planè adversatur notis-
 simæ illi Apost. sententiæ Rom. 6: *Gratia
 Dei vita æterna in Christo Jesu Domino nostro.*

Docet 3º, *opera bona à filiis adoptionis facta,*

*non accipere rationem meriti ex eo quòd sunt per
 spiritum adoptionis inhabitantem corda filiorum
 Dei; sed tantum ex eo quòd sint conformia legi...
 rationem meriti non consistere in eo, quòd qui
 benè operatur habeat gratiam et inhabitantem
 Spiritum sanctum, sed in eo solum, quòd obedit
 divinæ legi.* Est proposit. 13 et 15. Ita Baius
 citato lib. 2 de merit. operum cap. 1 et 7,
 utramque propositionem sæpius repetit, et
 multis probat ferè toto libro. Imò cap. 4 ejus-
 dem libri pronuntiat, « cum Pelagio sentire,
 « qui dicit ad rationem meriti esse necessa-
 « rium, ut homo per gratiam adoptionis subli-
 « metur ad statum deificum. » Porro ad me-
 ritum (de condigno) non sufficere bonitatem
 operis, ac obedientiam legi divinæ, sed insuper
 requiri eam personæ dignitatem atque præ-
 stantiam, quâ per adoptionis spiritum divinæ
 naturæ consors, dignaque Deo effecta sit, de-
 clarat concilium Trid. citato cap. 16 sessio-
 nis 6.

Docet 4º, *opera catechumenorum ante remis-
 sionem peccatorum facta, esse vitæ æternæ (de
 condigno) meritoria.* Est propositio 18; hanc
 tradit Baius citato lib. cap. 3, 4 et 7, et sequi-
 tur ex ideâ meriti quod in solâ precisè obe-
 dientiâ divinæ legi constituit.

Docet 5º, quòd ex eadem meriti notione
 consequitur, *opera justitiæ et temperantiæ, quæ
 Christus fecit, ex dignitate personæ operantis
 non traxisse majorem valorem.* Est proposit. 19,
 quam tradit Baius ibidem cap. 7.

Docet 6º commentitiam esse et explodendam
 distinctionem illam quâ opus dicitur bifariam
 bonum, 1º ex objecto et circumstantiis, quod
 moraliter bonum appellari consuevit; 2º quia
 est meritorium regni æterni, eò quòd fit à vivo
 Christi membro per spiritum charitatis. Ita
 propositio 61 et 62. Ita etiam Baius lib. 2 de
 meritis operum cap. 1 et 6.

Docet 7º, *in redemptis per gratiam Christi
 nullum inveniri posse bonum meritum, quod non
 sit gratis indigno collatum.* Verba sunt propo-
 sit. 8; id habet Baius sæpius citato lib. 1 de
 merit. cap. 4, quod planè contrarium est ca-
 noni 32 sess. 6 concil. Trid. in quo sic statui-
 tur: « Si quis dixerit, hominis justificati bona
 « opera ita esse dona Dei, ut non sint etiam
 « bona ipsius justificati merita; aut ipsum jus-
 « tificatum bonis operibus... non verè mereri
 « augmentum gratiæ, vitam æternam... ana-
 « thema sit. »

Docet 8º, *nec passiones sanctorum indulgentiis
 communicatas, nec satisfactiones laboriosas justi-*

ficatorem valere de condigno expiare penam temporalem restantem post culpam condonatam... nam alioqui essemus, aliquā saltem ex parte, nostri redemptores. Ita proposit. 59 et 60, 77, 10. Has propositiones tradit Baius lib. de Indulgentiis præsertim circa finem; 59 et 60 conceptis verbis, aliās verò quoad sensum; quæ doctrina planè adversatur concilio Trid. sess. 14, cap. 8. Nec valet adducta Baii ratio; etsi enim laboriosa justificatorum opera valeant de condigno expiare pœnas pro peccatis debitas, non ideò tam justificati propriè dici possunt aliquā etiam ex parte sui redemptores, eo quòd, uti observat concil. Trid. loco citato, prædicta opera vim omnem suam ac dignitatem, non ex nobis tanquàm ex nobis, sed ex meritis duntaxat Christi mutuentur.

Docet denique, *sacrificium Missæ non aliâ ratione esse sacrificium, quàm generali illâ, quâ omne opus, quod fit, ut sanctâ societate Deo homo inhæreat.* Ipsa est proposit. 45, quæ legitur apud Baium lib. de Sacrificio cap. 2, § et 6. Directè adversatur hæc doctrina concilio Trid. sess. 22, can. 1: « Si quis dixerit, in Missâ non offerri Deo verum et proprium sacrificium... anathema sit. » Et can. 5: « Si quis dixerit Missæ sacrificium tantum esse laudis et gratiarum actionis, aut nudam commemoratio-nem sacrificii in cruce peracti..... anathema sit. »

Hunc Baii errorem doctè ac solidè perstringit sacra Facultas Lovaniensis cap. 14 supradictæ declarationis his verbis: « In Missâ propriam sacrificii rationem in oblatione Dominici corporis constitutam agnoscimus; damnantes omninò, detestantesque, si quis asserat Missæ sacrificium non aliâ ratione sacrificium esse, quàm illâ generali quâ omne opus quod fit ut sanctâ societate Deo inhæreamus. Quia, si ita sit, tunc sacerdotium speciale nullum relinquitur, quod non sit Christianis omnibus perindè commune. Si enim ideò tantum sacrificium est, quia opus bonum est, cur sacerdos quisquam est, aut quare sacrificare dicendus est, nisi quia sanctè beneque operetur? Ex quo conficitur sacerdotium novi Testamenti non quibusdam peculiariter ad hoc consecratis et inunctis esse proprium, sed bonis omnibus laicis esse commune. »

Atque hæc de præcipuis systematis Baiani erroribus, è Luthero et Calvino maximâ ex parte deductis; ex alterâ verò à Baio et Hesselio adornatis et amplificatis; in quibus, quod

certe mirum, in absurda et opposita Pelagianismi nec non Lutheranismi et Calvinismi dogmata alternatim inclinatur; adeò verum est, quod ait Apost. primæ ad Timoth. cap. 1, qui semel à veritate exciderunt, convertuntur in vaniloquium; volentes esse legis doctores, non intelligunt neque quæ loquuntur, neque de quibus affirmant. Sunt qui dogmaticum Baii systema ad tres generatim partes contractius revocant. Prima spectat quæ docet Baius circa statum naturæ innocentis; secunda, quæ tradit circa statum lapsæ; tertia complectitur ipsius placita circa statum naturæ reparatæ; verum majoris perspicuitatis gratiâ in septem paragraphos distinximus; quorum primus systema Baii circa statum naturæ innocentis exponit; tres sequentes ejusdem systema circa statum naturæ lapsæ explicant; tres verò postremi evolvunt quæ tradit circa statum naturæ reparatæ.

CAPUT III.

De bullis summorum pontificum in causâ Baii.

Tres sunt præcipuæ SS. pontificum bullæ in causâ Baii. Prima est Pii V, data anno 1567; his verbis incipit: *Ex omnibus afflictionibus.* Secunda Gregorii XIII, qui priorem confirmat et executioni mandari jubet an. 1579; incipit: *Provisionis nostræ.* Tertia Urbani VIII, qui Pianam et Gregorianam auctoritate suâ rursus confirmat et approbat anno 1641; incipit: *In eminenti.*

Nihil non tentârunt Baii ac Jansenii fautores ad eludendas hasce constitutiones apostolicas. quibus palmaria communis suæ doctrinæ placita funditus convelluntur ac radicibus excinduntur. Si ipsis fides, prædicta Pontificia de creta infinitis scatent abusibus, informia sunt, inutilia, subreptitia, à moribus nostris Gallicanis plurimùm aliena, nullius proinde apud nos momenti ac ponderis, nusquàm promulgata, nusquàm recepta: hæc et alia sunt convicia quibus novatores constitutiones apostolicas adversus Baium discerpunt ac dilaniant. Alii paulò in speciem modestiùs, præfata decreta venerari equidem profitentur eorumque auctoritatem agnoscere; ast in rei veritate eam depressimunt ac penitus enervant, dum ut sese censuræ subducant, dicta decreta ad sensus omninò alienos et distortos inflectunt.

Ut ista omnia breviter et cum ordine discutiantur, bullam Pii V, non in se præcisè duntaxat spectabimus, sed ut postremò confirmatam et promulgatam ab Urbano VIII, et de eâ sic

spectatâ istâ quæremus, 1^o an sit subreptitia; 2^o an sit lex sanctæ Sedis; 3^o an sit lex Ecclesiæ Gallicanæ; 4^o an sit lex Ecclesiæ universæ; 5^o an sit lex dogmatica; 6^o quis sit bullæ sensus, ubi de famosi commatis transpositione; 7^o tandem de nonnullis aliis externis et ascitiis ad bullam Pianam spectantibus. His autem semel discussis spontè concident probra et effugia quæ à novatoribus congeruntur in apostolicis constitutiones contra Baium.

ARTICULUS PRIMUS.

An bulla Urbani VIII sit subreptitia?

Ex bullâ Urbani altus Baianistarum et Janseniorum dolor; ipsam subreptitiam esse conclamârunt missi Romam à Lovaniensibus duo deputati, Synnichius et Papius, qui præsumptæ subreptionis causas aperirent et rationes; quàm leves sint ac infirmæ patebit ex dicendis.

CONCLUSIO. — Bulla Urbani VIII non est subreptitia.

Prob. 1^o ex Brevibus Urbani die 24 octob. an. 1643 datis ad archiep. Mechliniensem et Cameracensem, ad episcopum antuerpiensem, et ad academias Lovaniensem et Duacensem. Satis sit hic retulisse quæ habentur in Brevi ad archiepisc. Mechliniensem: « Peculiari constitutione, inquit S. Pontifex, ipsum Jansenii librum, quippe qui opiniones à Pio V et Greg. XIII damnatas continere et tueri deprehensus fuit, omninò reprobavimus pridè nonas martii an. 1641, quæ constitutio 19 junii 1643 publicata in urbe fuit... Aliqua ad falsitatem diplomatis indicandam non minùs leviter quàm impudenter obijciunt, de protractu illius publicationis, de anno in Coloniae exemplaribus immutato, ac erroribus incuriâ typographi subortis; quæ omnia quanti ponderis sint unusquisque prospicit.... Quamobrem enixè flagitamus ut intolerabilem eorum arrogantiam coerceas, ipsosque ad parendum apostolicæ sanctioni quoquo pacto compellas. » Nihil certè in rem nostram disertius. Ex his quippe perspicuum est planè nulla esse adversariorum effugia quibus contra expressam ipsiusmet summi pontificis declarationem, illius constitutionem ut supposititiam vel subreptitiam traducere non verentur.

Prob. 2^o ex decreto inquisitionis an. 1644. Nempe excipiendis ac maturè discutiendis Lovaniensium querelis, qui bullam falsi postulabant, summus pontifex Urbanus tres præfecit cardinales, Spadam, Pamphilium (qui postea

fuit Innocent. X) Falconerium. Auditis patienter Synnichio et Papio deputatis, omnibusque longo et accurato examine discussis die 24 junii ejusdem an. 1644, emissum est à sacrâ generali Inquisitione decretum in quo sic legitur: « Domini cardinales, præfatos doctores verbo et scripto multa deducentes, tum congregatim, tum privatim audiverunt, eaque omnia in universali congregatione pluries discussa SS. Domino nostro diligentissimè retulerunt. Sanctitas verò sua omnibus maturè perpensis et consideratis mandavit ex archivio ejusdem congregationis, et ex matrice actuum quæ in eodem archivio conservantur, extrahi sive transcribi, et diligenter collationari ac imprimi exemplar bullæ præfatæ, illudque sic extractum, collationatum et impressum, eisdem Synnichio et Papio per supradictos DD. cardinales consignari, ipsisque insuper Synnichio et Papio intimari et significari, suæ Sanctitatis mentem et voluntatem esse, ut eidem exemplari sic consignato fides adhibeatur, et ab omnibus Christi fidelibus bullæ hujusmodi omninò pareatur. » Nihil iterùm luculentius istâ solemnî declaratione, ad præfatæ bullæ veritatem et authenticitatem vindicandam.

Mandato pontificis obsecuta congregatio, totam rei gestæ seriem internuntio Bruxellensi per epistolam significavit: « *Ut si forsan, inquit, doctorem Synnichium... aliter scribere contingat, ac spem faciat fore ut bulla mitigetur vel revocetur, Dominatio vestra unumquemque edocere possit, nunquàm, ne per minimam quidem cogitationem SS. Domino venturum in mentem, ut bullam quâcumque demùm sui parte immutet.* »

Prob. 3^o ex Brevibus Innocentii X, an. 1645, quibus prædecessoris sui constitutionis executionem urgere cœpit, tum apud Belgii præsules, tum apud Marchionem Castri Roderici Belgii gubernatorem, tum apud facultates Duacenam, Lovaniensem et Parisiensem; ex iis non obscure colligitur præfatam bullam falsitatis expostulari non posse.

Prob. 4^o ex Alexandro VII, qui die 7 decembris 51 propositiones confixit; quarum trigesima prima sic se habet: *Bulla Urbani VIII est subreptitia; ergo, etc.*

Dices 1^o: In variis bullæ exemplaribus varius annus consignatur; nempe in quibusdam annus 1641, in aliis annus 1642; ergo, etc. Respondeo annorum diversitatem oriri ex diverso modo annos computandi. Scilicet Romani in

Bullis annos Dominicæ Incarnationis incipiunt à 25 martii; hinc in quibusdam exemplaribus secundum stylum curiæ romanæ, pridie nonas martii annus 1641 consignatus fuit; in aliis verò, nempe editionis Coloniensis, juxta popularem computandi rationem, annus 1642 appositus fuit.

Dices 2º: Etsi bulla data fuisset anno 1641 vel 1642, nihilominus illius publicatio non fuit facta nisi 19 junii an. 1643; ergo, etc. Respondeo, quòd bullæ promulgatio tamdiu prorogata fuerit, id singulari summi pontificis indulgentiâ factum est; sperabat enim pontifex futurum ut Jansenii fautores tandem obtemperarent priori suo decreto, paucis antea mensibus lato, quo liber Jansenii simpliciter prohibebatur, tanquam editus contra decreta de non scribendis operibus circa materiam de auxiliis. Ita declaravit congregatio universalis inquisitionis litteris ad eminentiss. card. Grimaldi tunc Parisiis nuntium.

Dices 3º, ab Albizio infensissimo discipulorum Jansenii hoste adulteratam fuisse Urbani constitutionem, et in eâ Jansenii nomen fraudulentè insertum fuisse, cum tamen fidem dedisset summus pontifex quòd nullus in particulari sugillaretur cum expositione nominis; sicut ab Urbano sibi dictum sub juramento affirmavit Synnichiùs coram publico notario die 22 februarii an. 1647 *Diarii de saint Amour* inter collectanea pag. 270. Resp. insignem esse Baii et Jansenii discipulorum calumniam, asserere interpolatam fuisse ab Albizio Urbanam constitutionem, et ad invidiam in eâ fraudulentè insertum fuisse Jansenii nomen; ita constat ex dictis, præsertim argumento secundo. Quapropter promissionis à summo pontifice datæ, sensus non fuit, quòd nullius nomen in bullâ appellaretur; sed quòd nulla persona appellato nomine censuræ notâ percuteretur, quod ritè in constitutione observatum fuit, in quâ liber Jansenii ita damnatus est, ut nulla ejus personæ nota inusta fuerit.

Dices 4º Bulla Urbani lata fuit re non satis expensâ; ergo est subreptitia. Resp. nego antecedens; contrarium enim constat ex tenore bullæ, in quâ summus pontifex testatur *non sine maturâ deliberatione et diligenti consideratione latam fuisse bullam*; porro S. pontifici Instrumento publico ita attestanti, profectò major fides adhibenda est quàm Patri Hilarioni, à quo hanc objectionem mutuatus est Dominus de saint Amour in suo Diario.

ARTICULUS II.

An bulla Urbani sit lex sanctæ Sedis?

CONCLUSIO. — Bulla Urbani lex est sanctæ Sedis.

Prob. Ut bulla meritò censeatur lex sanctæ Sedis, tres requiruntur et sufficiunt conditiones: nempe 1º ut sit lata de consensu cardinalium. 2º Ad universam Ecclesiam dirigatur. 3º Ut sit ritè promulgata; atqui, quidquid sit de bullâ Pianâ in se præcisè spectatâ, certè tres prædictæ conditiones competunt bullæ Urbani Pianam renovanti ac confirmandi; ergo, etc. 1º Lata est de consensu cardinalium, ut evidens est et constat ex contextu bullæ. 2º Ad omnes Ecclesias dirigitur. Namque illa fuit directa ad omnes Ecclesias, *quæ omnes cujuscunque conditionis et qualitatis sint et specialissimâ notâ et expressione dignos obligat*; atqui talis est bulla Urbani, uti in eâ expressè asseritur; ergo, etc. 3º Ritè fuit promulgata. 1º Quidem Romæ, ut disertè testatur ipse S. pontifex, Brevi ad archiepiscopum Mechliniensem, his verbis: *Quæ constitutio 19 junii 1643 publicata in Urbe fuit*. 2º In Belgio ubi natus fuerat error, quod ex dictis in synopsi historicâ constat, et ampliùs constabit ex dicendis infra art. 4; ergo, etc.

ARTICULUS III.

An bulla Urbani sit lex Ecclesiæ Gallicanæ?

Observandum 1º, duo esse accuratè secernenda in dogmaticâ summi pontificis bullâ. I Doctrinam, seu dogma quod approbat aut improbat; II formam ipsam, quæ nihil aliud est quàm modus et certæ quedam formalitates quibus bulla lata est. Duo hæc inscitè aut malâ fide confundunt nonnulli, ut nempe defectu quorundam vitiorum quæ fortè occurrunt in nudâ decreti dogmatici formâ, dogma ipsum quod tradit decretum rejiciant ac penitus evertant.

Observandum 2º, vitiosum in formâ decretum, neglectâ ac postpositâ formâ, posse acceptari quoad doctrinam. Plurima extant eâ de re exempla; duo occurrunt domestica ac præ cæteris insignia. Primum petitur ex conciliis Provincialibus habitis anno 1699, in causâ libri cui titulus: *Maximes des Saints*. His in conciliis summo plausu et maximâ cum veneratione ab episcopis Gallicanis constitutio Innocent. XII recepta fuit, et approbata, quantum ad doctrinam et censuram prædicti libri; in eâ tamen constitutione, clausula, *motu proprio*, usurpa-

tur, quæ in Galliis non admittitur; et alie nonnullæ clausulæ desiderantur, quas episcopi nostri appositas fuisse exoptassent.

Alterum exemplum desumitur ex comitiis generalibus an. 1700; his in comitiis episcopi Gallicani, neglecta et postposita ut minùs usibus nostris consentiente, decreti Innocent. XI an. 1679, sicut et alterius Alexandri VIII, an. 1695, formâ, quam exoptassent usurpatam non fuisse, doctrinam tamen horumce decretorum approbant et suam faciunt: « Utinam, aiunt, « præsules Gallicani in suâ censurâ anni 1700, « sanctissimi pontifices decretorum formulis « antiquo et nostro usu receptis, quæque ad « universas Ecclesias pertinerent, infandam « doctrinam proscripsissent; sed dùm expectamus, fore ut tantum opus, more majorem « et canonico ordine perficiant, nos interim.... « has propositiones à prædictis pontificibus, « uti memoravimus, applaudente toto orbe « christiano condemnatas... suis quasque censuris configendas esse duximus. » Decreti ergo apostolici doctrina potest approbari, non approbatâ formâ quâ latum est decretum.

His duobus tertium addi potest exemplum *ad hominem* quo idem evincitur. Quippe cum prædicto decreto anni 1679 Innocent. XI sexaginta et quinque laxioris æthicæ propositiones eo in tribunali condemnasset, cujus forma in ferendis decretis usibus Gallicanis non satis est consentiens; nihilominus tamen ipsimet Janseniani, sepositâ haud dubiè decreti formâ, ejus substantiam, seu doctrinam, velut morum regulam sequendam esse acclamârunt, propositis etiam, et simul cum decreto editis quibusdam regulis generalibus ad confirmandam dicti decreti utilitatem.

Observandum 3º, cùm hic quærimus an bulla Urbani sit lex Ecclesiæ Gallicanæ; non attendimus ad illius formam, aliaque quædam externa et ascititia, quæ moribus nostris Gallicanis non satis congruunt; sed unicè spectamus doctrinam hâc Constitutione apostolicâ, et episcoporum judicio pariter damnatam. His præmissis, sit

CONCLUSIO. — Bulla Urbani VIII, quoad doctrinam spectata, lex est Ecclesiæ Gallicanæ.

Probatur 1º insignibus eam in rem argumentis. 1º Illustriss. Parisiensis archiepiscopus de Gondy anno 1643 mense decembri, decretum tulit circa recipiendam quoad doctrinam dictam constitutionem; quod decretum die 11 Januarii lectum fuit ac promulgatum in publicis parochiarum præconiis. 2º Anno 1644,

die 2 Januarii bulla Urbani VIII ad sacram Facultatem regio mandato deferitur; ac die 15 ejusdem mensis, eadem Facultas dictam constitutionem quoad doctrinam acceptavit, ac suis omnibus severè injunxit, ne aliquam è damnatis à Pio V et Greg. XIII propositionibus propugnarent.

Ita disertè testatur Habertus unus è præcipuis à Facultate eo in negotio deputatis, qui postea fuit Vabrensis episcopus, pag. 38 Appendicis ad calcem libri cui titulus, *Defensio fidei*, etc. « Cùm allata fuisset, inquit, hæc « bulla ad sacram Facultatem Theologicam ex « parte eminent. cardinal. Nuntii Grimaldi, « consensu etiam ac jussu regis interveniente; « eâ lectâ et maturâ deliberatione habitâ censuit facultas, quoad doctrinam plenè recipiendam esse summâ cum veneratione, et « prohibendum, esse omnibus ac singulis doctoribus ac baccalaureis, ne ullam ex propositionibus in eâ bullâ notatis sustinere ac « defendere audeant. Quoad alias verò difficultates bullæ, procrastinandum esse donec « mens summi pontificis quoad prohibitionem « disputationum de gratiâ, et quoad censuras « plenius intelligatur. » Idem etiam refertur in actis S. Facult. Paris. ad ann. 1644.

Duo manifestè distinguit sacra Facultas; nempe doctrinam damnatam, et modum quo damnata est, aliasque externas clausulas. Quoad doctrinam, censet *plenè recipiendam esse summâ cum veneratione*; quantum verò ad formam et modum, nempe prohibitionem disputationum de gratiâ, censuras et alia hujusmodi, censet *procrastinandum, donec mens S. Pontificis plenius intelligatur*. Ipsissima hæc est nostra Conclusio. Cautam ac prudentem Facultatis agendi rationem laudavit ac probavit eminentiss. card. Grimaldi tunc temporis nuncius apostolicus in Galliâ, in responso dato ad dictam Facultatem Parisiensem.

3º Anno 1650, illustr. episcopus Suessoniensis, archiepiscopi Parisiensis exemplum secutus, dictam Urbani bullam à suis eâ quâ par est reverentiâ recipi curavit, edito eâ de re die 4 februarii Documento pastoralis in parochiis totius dioceseos promulgato. Idem præstiterat an. 1648 archiepiscopus Bisuntinus, ut constat ex actis synodalibus ejusdem anni editis et promulgatis, quorum fragmentum refertur tomo 3 Ripaldæ de ente supern. ad calcem.

4º Decretorium est quod hanc in rem legitur in famosâ epistolâ quam anno 1661 octoginta quinque Gallicani præsules ad Innocent. X

dedere; in eâ summo pontifici declarant præsules, motus in Ecclesiâ Gallicanâ occasione libri Jansenii Yprensensis excitatos « sedari oportuisse, tum concilii Trid. auctoritate, tum « bullæ illius quâ Urbanus VIII adversus Jansenii dogmata pronuntiavit, et decreta Pii V « ac Greg. XIII in Baium edita confirmavit; « cujus quidem bullæ veritatem ac robur novo « diplomate vindicâsti. » Nihil luculentius. Illi profectò bullam acceptare censendi sunt, qui illius veritatem ac robur agnoscunt, quique addunt ipsius auctoritate non secùs ac concilii Trid. judicio sedari oportuisse concertationes occasione Jansenii excitatas; atqui ita episcopi Gallicani; ergo, etc.

5^o Idem colligitur ex comitiis an. 1700, 1703, 1710, etc., die 10 martii an. 1710, eminentiss. card. Noallius archiepiscopus Parisiensis, sex archiepiscopi, et quinque episcopi declarârunt, tum privato nomine, tum aliorum episcoporum qui comitiis anni 1703 interfuerant, nullam conditionem necessariam deesse constitutionibus adversùs Jansenium latis, ut totam obligent Ecclesiam, idemque prorsùs sentiendum de bullis adversùs Baium, Molinosum, et librum cui titulus : *Maximes des Saints*. Censebant ergo dicti præsules, bullas adversùs Baium quantum ad doctrinam, vim et robur apud nos obtinere. En verba quæ leguntur ad calcem actorum verbalium comitiorum an. 1703, et in collect. bullarum quintæ edit. pag. 650 : « Nous, comme ayant eu part à toutes ses dé- « libérations, déclarons qu'elle (l'assemblée « de 1703) était très persuadée qu'il ne manque « aux constitutions contre Jansenius, aucune « des conditions nécessaires pour obliger toute « l'Eglise, et nous croyons qu'elle aurait eu « le même sentiment sur les bulles contre « [Baius, contre Molinos, et contre le livre in- « titulé *Maximes des Saints*, s'il en eût été « mention. »

Atque hinc est quòd an. 1711, die 28 aprilis idem eminentiss. card. Noallius eâ maximè de causâ prohibuit à suis legi ac retineri quædam mandata sub nomine illustriss. episcoporum Lucionensis et Rupellensis evulgata, quòd ipsi visa fuissent vigesimam sextam, et vigesimam octavam Baii propositiones à SS. pontificibus damnatas renovare.

6^o In comitiis anni 1713 et 1714, præsules Gallicani in egregio illo Documento pastoralis quod occasione Constitutionis Clementis XI, quæ incipit his verbis, *Unigenitus Dei Filius*, adornârunt, censuram propositionum Quesnellii

confirmant ex iteratâ sæpiùs similium Baii propositionum damnatione.

7^o Denique, ut plura alia prætermittam, in extraordinariis comitiis edicto regio habitis an. 1728, bullæ adversùs errores Baii aliis accensentur pontificiis decretis quæ procul dubiò quoad doctrinam vim legis obtinent in Galliis. Vide epistolam præsulum horumce comitiorum ad regem pag. 54 et sequent.

Ex his sic arguo : Dogmatica summi pontificis bulla quam præsules Gallicani et Facultates acceptârunt, profectò vera est quoad doctrinam Ecclesiæ Gallicanæ lex; atqui bulla Urbani VIII, etc.; ergo, etc.

Probatur 2^o. Si quid obstaret quominùs bulla Urbani esset lex Ecclesiæ Gallicanæ, maximè quia hujus forma usibus nostris contraria est; ast hæc ratio omninò nulla est. Ad hoc enim satis est ut apostolici decreti doctrina possit recipi, neglectâ ac postpositâ formâ quâ latum est decretum; porrò ita esse manifestè liquet ex dictis prænotato secundo; ergo, etc.

Et verò, uti observant Gallicani præsules occasione constitutionis Innocentii XII adversùs librum cui titulus : *Maximes des Saints*, amplum statui debet discrimen inter judicia quæ circa fidem feruntur, et statuta seu canones disciplinæ; in illis formæ, quâ res ipsa servatur, tenaciùs adhærendum; in aliis verò quæ fidem omnibus communem spectant, rei substantia, id est doctrina quæ ex Scripturis ac traditione certa est, formæ præponderare debet, eamque ad se trahit. En verba eminentiss. Card. Noallii in conventu Parisiensi occasione dictæ Constitutionis : « On doit faire une grande « différence entre les jugemens rendus sur des « matières de doctrine, et les réglemens faits « pour la discipline. A l'égard des derniers, il « est plus nécessaire de s'attacher inviolable- « ment aux formes, qui servent à conserver le « fond; mais pour les jugemens sur les mati- « res de la foi, qui doit être une dans toute l'E- « glise, quoiqu'il soit à désirer qu'ils ne se « rendent que dans les formes les plus usitées; « le fond qui est constant par l'Ecriture et par « la tradition, et qui ne peut jamais souffrir « de changement, emporte la forme. » Idem tradunt cæteri in cæteris comitiis Episcopi.

Probatur 3^o iis omnibus momentis quibus articulo sequenti evincemus dictam bullam legem esse universalis Ecclesiæ. Lex etenim universalis Ecclesiæ, profectò lex est Ecclesiæ Gallicanæ; atqui bulla Urbani quoad doctrinam, etc.; ergo, etc.

Dices : Hæc bulla 1^o munita non fuit sigillo regio ; 2^o in tabulas supremæ curiæ relata non fuit ; 3^o solemniter non est promulgata ; ergo, etc.

Respondeo 1^o, has omnes condiciones deesse decretis contra ethicæ laxioris propositiones, quæ tamen decreta quoad doctrinam vim in Galliis obtinere docent adversarii. Respondeo 2^o, hæc probare duntaxat bullam Urbani vim non habere quoad formam ; sed illæsam relinquant illius vim quoad doctrinam ; constat enim ex dictis, episcopos Gallicanos constanter agnovisse veritatem et æquitatem illius bullæ ?

ARTICULUS IV.

An bulla Urbani VIII sit lex Ecclesiæ universalis?

CONCLUSIO. — Bulla Urbani quoad doctrinam speculata, lex est Ecclesiæ universalis.

Probatur 1^o. Dogmatica sanctæ Sedis bulla, de cardinalium consensu lata, ad omnes et singulas Ecclesias sub excommunicationis pœnâ directa iis in locis expressè acceptata in quibus natus est error, cæteris tacitè consentientibus, nulloque ex adverso reclamante, bulla, inquam, his instructa characteribus, lex est profectò Ecclesiæ universalis ; atqui talis est Bulla Urbani VIII ; ergo, etc. Major propositio constans est et certissimum totius infallibilitatis Ecclesiæ principium, quo semel everso nutarent constantissimæ ejus definitiones ; v. g., constitutiones Leonis X adversus Luther. Innoc. X adversus Jans. Innoc. XI et XII adversus Molinos. et librum cui titulus : *Maximes des Saints* ; satis sit hic paucis ipsius veritatem demonstrasse.

1^o Ex illo celebri juris cononici placito quod in simili causâ sæpius versat illustriss. Bossuet. in opere cui titulus : *Defensio declarat. Cleri Gallic : Error cui non resistitur, approbatur, et veritas* (maximè impetita et lacessita) *cum non defensatur, opprimitur*. Dist. 85, cap. *Error*. « Quod juris pronuntiatum, inquit « ibid. doctissimus præsul, à Felice III in « causâ fidei primò prolatum, deinde in iisdem « causis ab ejus successoribus, et ab omnibus « doctoribus summo consensu frequentatum « fuit. » Silentium ergo episcoporum, præsertim ubi agitur de Pontificiâ constitutione acceptatâ iis in locis in quibus enatus est error, certissimum est taciti eorum consensûs indicium ; tunc enim, « connivere est, inquit « S. Cœlest. in epist. ad episc. Galliæ, tacere. « In talibus causis non caret suspitione taciturnitas, quia occurreret veritas si falsitas

« displiceret ; meritò namque causâ nos respicit, si cum silentio faveamus errori. »

2^o Idem disertè evincit egregium illud sancti Aug. epist. 55, aliàs 119 : « Ecclesiâ Dei quæ « sunt contra fidem vel bonam vitam, nec « approbat, nec tacet, nec facit. » Unde idem S. D. lib. de dono persever. cap. 16 : « Dicatur ergo verum, inquit, maximè ubi aliqua « questio ut dicatur impellit. » Hinc colligit illustr. Bossuet. citato opere lib. 1, « solere « Ecclesiam catholicam exortis erroribus statim « opponere plenam ac luculentam veritatis à « Deo revelatæ declarationem. »

3^o Idem doctiss. antistes citatâ defensione declarat. cleri Gall. lib. 3, cap. 2, rem de quâ hic agitur paucis his verbis testatur et adstruit : « Neque enim fieri potest ut Ecclesiâ « Spiritu veritatis instructa non repugnet « errori. » Rursus ibidem : « Quis nesciat, « inquit, nullis missis nuntiis, nullis perlatis « litteris de Janseniano negotio diplomata « ubique obtinere, cum neminem obstrepere « et reclamare audiamus ? » Judice ergo doctiss. auctore, non reclamatio certum est consensûs taciti argumentum.

4^o Eandem veritatem tradit ac pluribus invictè probat Petrus Aurelius adversariis profectò minimè suspectus, tom. 1, pag. 98, et præsertim 127 : « Consentiant autem (Episcopi) inquit, dum publicè laboranti atque « oppressæ veritati non succurrunt, qui debent, et qui ad hoc potissimum in Ecclesiæ « tribunalibus collocati sunt. Ergo, cum quiescunt, probant ; cum patiuntur, decernunt ; cum tacent, clamant. Nam hæresum plerumque damnationes non semper expressâ « et perscriptâ Ecclesiæ totius consensione « firmatas atque auctoratas esse supra ostendimus. » Et paulò post. « Satis consensu tacito clamat Ecclesiâ, cum reclamare debet, si dissentiret ; officio enim deesse et « veritatem prodere non potest. »

Ibidem addit insignia isthæc verba, quæ profectò demonstrant vi promissionum fieri non posse ut sileant episcopi iis in circumstantiis in quibus pontificio diplomate aut error proponeretur, aut proscriberetur veritas : « Ad tam publicam et illustrem, inquit, veritatis proculcationem Ecclesiâ catholica silere non posset. Non enim falsum unquam esse potest illud de Ecclesiâ Dei, Augustini præconium : ECCLESIA DEI QUÆ SUNT CONTRA FIDEM... NEC APPROBAT, NEC TACET. NEC verum esse non potest illud verbum Apostoli :

« *Non solum qui ista faciunt, digni sunt morte,*
« *SED ETIAM QUI CONSENTIUNT FACIENTIBUS* »

3°. Idem disertissimè declarat velipse Quesnellius lib. cui titulus : *Tradition de l'Eglise romaine*, tom. 4, pag. 217, ubi varias recensens vias finiendi fidei controversias, hæc habet certè decretoria : « Si c'est dans le « concile d'un pays particulier, comme de « l'Afrique, qu'une question est agitée, cette « Eglise propose au Saint-Siège, et par lui à « toutes les autres Eglises, ce qu'elle a trouvé « dans sa tradition; et aucune n'y contre- « disant, et témoignant au contraire par son « consentement exprès ou tacite, qu'elle a « trouvé la même chose dans la sienne, on en « demeure là et la cause est finie. » Et rursus pag. 218 : « Le reste des Eglises du monde « s'étant contentées de voir entrer en lice les « Africains et les Gaulois, et d'attendre ce « que le Saint-Siège jugeroit de leur différend; « leur silence, quand il n'y aurait rien de « plus, doit tenir lieu d'un consentement gé- « néral, lequel joint au jugement du Saint- « Siège, forme une décision qu'il n'est pas « permis de ne pas suivre. »

Atque hinc in supremi senatus Decreto, occasione bullæ adversus Placita sanctorum lato, tanquam quid certum statuitur, : « Que le con- « sentement exprès ou tacite des évêques, « imprime à une décision, vénérable par « elle-même, le sacré caractère d'un dogme « de foi. »

Vera ergo major propositio, nempe dogmaticam summi pontificis bullam acceptatam ab episcopis loci in quibus exortus est error, nullis ex adverso reclamantibus, universalis Ecclesiæ legis vim obtinere.

Minor autem per partes probatur. 1° Bullam Urbani legem esse sanctæ Sedis constat ex dictis art. 2. 2° Eandem bullam non esse meram disciplinæ legem, sed verum et propriè dictum dogmaticum Ecclesiæ decretum, constabit ex dicendis art. sequenti. 3° Latam fuisse de consensu cardinalium et ad universas Ecclesias directam, idque sub excommunicationis pœnâ; ex so'o contextûs tenore apertè liquet. 4° Quod sanè præcipuum est, eandem bullam ab episcopis Belgii acceptatam fuisse, varia demonstrant.

Constat 1° ex nationali Ecclesiarum Belgarum synodo Mechliniæ habitâ anno 1570, die 11 junii; eâ in synodo, urgente Albanæ duce, bulla Pii V, quam confirmat bulla Urbani VIII, ab omnibus Belgii episcopis acceptata fuit. Ita

colligitur ex secundâ partè novæ edit., operum Baii pag. 200 et 201... Constat 2° ex synodis diocesanis et cœtibus Decanatum in quibus an. 1645 et 1644 archiepiscopi Cameracensis et Mechliniensis, episcopi Brugensis, Audomarensis, Namurcensis, Busco-ducensis aliique Belgii episcopi bullam Urbani acceptârunt ac promulgari curârunt. Ita colligitur ex eorundem episcoporum litteris, quarum excerpta referuntur pag. 50 et 51 appendicis ad recentem historiam Baianismi..... Constat 3°, quia iidem Belgii episcopi anno 1646, editis solemnibus Mandatis ejusdem bullæ acceptionem confirmârunt. Extant eâ de re Mandata episcoporum Antuerpiensis, Namurcensis, etc., tom. 3 Rippaldæ de ente supernat. ad calcem, et in lib. cui titulus : *Triumphus veritatis*, parte tertiâ... Constat 4° ex disertâ bullæ acceptione duarum Belgii Universitatum, Lovaniensis et Duacensis. De Duacena, res est certa, tum ex lib. Facultatis theologicæ Duacensis impresso Duaci an. 1649, sub hoc titulo : *Veritas et æquitas censure pontificiæ propugnata*, etc., ubi articuli Baiani vulgò dicti refelluntur tanquam falsi per antitheses Guillelmi Estii et Francisci Sylvii; tum ex epist. ejusdem Francisci Sylvii scriptâ Duaci die 22 septembris anni 1643, ad internuntium, cui expressè testatur, *universam Facultatem Duacenam ex animo bullam Urbani VIII acceptâsse*. De Lovaniensi verò Facultate patet vel ex ipso generalis historiæ Jansenismi auctore, qui ad annum 1643, conceptis verbis declarat omnes Lovanienses doctores, uno duntaxat excepto, testatos fuisse, *se prædictam Bullam reverenter suscipere*..... Constat 5° triplici regis catholici edicto, quo statutum est ut Urbana Constitutio in Belgii solemniter promulgaretur. Primum est anni 1646, alterum an. 1647, tertium an. 1651. Edicto anni 1647, regis catholici jussu ac curâ Leopoldi archiducis, Constitutio Urbani publicata ac recepta fuit, impositâ etiam lege iis omnibus qui ad aliquod seu civile, seu ecclesiasticum munus promoveri cuperent, ut propriâ syngraphâ ac juramento testarentur, *se obsequentes esse sanctæ romanæ Ecclesiæ et S. D. N. pontifici romano, et acceptare debitâ obedientiâ Constitutionem Urbani*. Extat istud edictum in collectione historica bullarum pag. 67 edit. 5. Ex his manifestum est, episcopos Gallo-Belgiæ provinciæ in quâ natus fuerat Baianus error, bullam Urbani acceptâsse; quod expressè declarat Facultas Theolog. Duacena citato libro cui titulus : *Veritas et æquitas Constitutionis Pontificiæ*, n. 247,

pag. 159 edit. an. 1650, in quo agens de Formulario in Belgiiis subscribendo ab iis omnibus qui ad aliquod sive civile, sive ecclesiasticum munus promovendi erant, sic habet: *Compendio dicimus illud juramentum emanare ab apostolico Pronotario, de notitiâ et mandato sanctissimæ Sedis acceptatum* AB EPISCOPIS OMNIBUS GALLO-BELGIS. Idem asseritur in epist. Decani Facultatis theolog. Duacensæ ad Fulgent. n. 262, 263, 275.

5° Tandem nullos episcopos prædictæ bullæ reluctatos fuisse, extra Belgium, res est certa, neque ullum qui reclamaverit laudant adversarii; in Belgiiis autem, etsi initio nonnulli episcopi oblocuti fuerant, omnes tandem acquiescere, ut constat, tum ex mox dictis tum ex Epist. archiepiscopi Mechliniensis et episcopi Gandavensis 12 februarii anni 1657, in quâ testantur se purè et simpliciter bullæ urbane adhærere; quâ quidem purâ et simplici prædictorum episcoporum submissione, qui soli tunc in Belgiiis pontificio decreto obsistebant, prorsus sopitæ sunt iis in regionibus contentiones occasione Baianorum errorum exortæ.

Probatur 2° dogmaticum apostolicæ Sedis iudicium à nobilioribus Ecclesiis expressè et solemniter acceptatum, ab aliis verò tacitè, ita ut huic sese conforment, atque factis declarent illud tanquàm sensuum suorum regulam, vera est universalis Ecclesiæ lex; atqui talis est Urbani VIII Constitutio; ergo, etc.

Major est extra omnem controversiam; neque eam inciantur adversarii.

Minor autem ex dictis ex parte constat.

1° Quoad Italiam pro more solito Romæ promulgata fuit 19 junii 1643, Promulgationem hanc disertè testatur Urbanus Brevibus eodem an. 1643 datis ad archiepiscopum Mechliniensem et ad Franciscum *de Mello* Belgii gubernatorem. Eadem promulgata intimata fuit episcopo Antuerpiensi et Facultati Lovaniensi Brevibus anno sequenti datis die 24 octobris. Quin et ad calcem bullæ Urbani adjicitur instrumentum authenticum his verbis conceptum: « Anno 1643, die verò 19 junii, supradicta Constitutio *Affixa et publicata fuit* ad valvas Basilicæ principis Apostolorum de urbe, et cancellariæ apostolicæ, atque in acie Campi Floræ per me Joannem Riccium... sanctæ Inquisitionis cursorem. » Unde mirum profectò nonnullos ex adversariis prædictam promulgationem in dubium revocasse. 2° In Belgiiis solemniter acceptatam fuisse bullam demonstrant mox adducta, tum publica Episcoporum ha-

rumque regionum Mandata, tum Lovaniensis et Duacensæ Facultatum statuta; tum varia regis catholici eam in rem edicta. 3° Quoad doctrinam in Galliis pariter acceptatam fuisse, art. præcedenti abundè probavimus. 4° Quod spectat ad Hispaniam, in omnibus Ecclesiis quibus constat amplissimum illud regnum promulgata fuit et acceptata Urbani bulla, juxta varias formalitates iis in regionibus observari solitas. Ita colligitur, tum ex laudatis regis catholici edictis; tum ex generalis inquisitionis Hispaniarum decreto dato Madriti 12 februar. an. 1644. Refertur decretum illud apud Ripaldam tom. 3 de Ente supernat. sub finem. 5° Fuit etiam solemniter promulgata in Poloniâ; extant enim exemplaria bullæ Urbani editionis Polonicæ, in quibus aversâ chartâ publicum legitur testimonium hujusce promulgationis, his verbis: « Ego concionator regius notum facio me... hanc bullam ex mandato illustriss. nuntii apostolici publicasse in æde sacrâ parochiali sancti Joannis Varsoviæ, coram serenissimo rege et cæteris senatoribus totâque congregatione populi. Stanislaus Bzygodzki. » Habetur istud instrumentum apud Ripaldam loco mox citato.

Tandem nullibi reclamatum est adversus prædictam bullam; imò orbis catholici regna in quibus solemnî more promulgata non fuit, variis factis declarârunt se huic tanquàm iudicio dogmatico ex animo reipsâ adhærere. Ex quo enim, uti advertit Steyaërt. tom. 1 opuscul. pag. 156 et 157, articuli Baiani à summis pontificibus damnati sunt, celebriores omnium scholarum theologi contradictorios illorum articulorum tanquàm veritates catholicas suscepere, quibus nemo refragari auderet, et quibus uti liceret tanquam totidem fundamentis ad alias veritates stabiliendas; satisque fuit ad aliquam propositionem erroris aut falsitatis convincendam, demonstrare ex eâ sequi articulum à SS. pontificibus in Baio confixum. Ita se gessere Facultas Lovaniensis in suâ famosâ sæpius antea citatâ declaratione anni 1585; Facultas Duacena in lib. cui titulus: *Veritas et æquitas censure pontificiæ*, etc. an. 1649; card. d'Aguirre, Norisius, Estius, Sylvius, Steyaërt, Wiggers, Suarez, Ripalda, etc.

Atque hinc in Germaniâ cum religiosus quidam nonnullus è damnatis in bullâ Urbani articulis propugnare ausus fuisset, thesis statim suppressa et proscripta fuit ac ultricibus flammis addicta. Ita refertur appendice libri cui titulus: *Triumphus catholicæ veritatis*, pag. 412 et 413; eandem Urbani bullam in generalibus

ordinum Benedictinorum, Carmelitarum, Minimorum, Capucinatorum, etc., conventibus acceptatam fuisse declarat loco mox citato idem auctor libri cui titulus: *Triumphus veritatis*, etc.

Probatur 3^o tam Constitutio Urbani VIII dici potest lex Ecclesiae universalis, quam Constitutiones innocentii X adversus Jansenium, Innocentii XI adversus Molinos., Innocentii XII adversus auctorem libri cui titulus: *Maximes des Saints*; istae etenim perinde ac illa continent clausulas quasdam quae moribus nostris, Gallicanis non satis congruunt; pariter praedicta decreta in locis in quibus natus est error solemniter promulgata sunt, non in aliis omnibus; imò Urbani bulla in multò pluribus regionibus expressè fuit promulgata at acceptata; atqui, fatentibus etiam adversariis, praefatae Innoc. X, XI et XII. Constitutiones quoad doctrinam vera sunt universalis Ecclesiae decreta; ergo, etc.

Probatur 4^o disertis episcoporum Gallicanorum testimoniis. 1^o Praecedenti articulo retulimus quod eam in rem testantur 85 praesules Gallicani in sua famosa ad Innoc. X Epist. in eà non obscurè declarant bullam Urbani ab ipsis haberi ut universalis Ecclesiae legem, cum asserant illius perinde ac concilii Trid. auctoritate sedari oportuisse motus occasione libri Jansenii excitatos. 2^o Idem clarè colligitur ex adductà ibidem card. Noall. declaratione, in qua cum duodecim archiepiscopis et episcopis nomine comitorum anni 1705 significant, nullam conditionem necessariam deesse constitutionibus adversus Baium, Molinosum, et librum cui Gallicè titulus: *Maximes des Saints*, ut totam obligent Ecclesiam. 3^o In documento pastoralis quadraginta episcoporum comitorum an 1714, à plus quam sexaginta aliis acceptato; in explicationibus circa bullam an. 1720 subscriptis à nonaginta sex cardinalibus, archiepiscopis et episcopis; in iudicio doctrinali card. archiep. et episcoporum adversus Causidicos an. 1728, etc.; in his omnibus monumentis Urbani bulla laudatur et assumitur tanquam totius Ecclesiae lex, atque accensetur cum aliis decretis quae omnibus fatentibus in universa Ecclesia vim obtinent; qualia sunt decreta Leonis X adversus Lutherum, Innoc. X adversus Jans. Innoc. XI adversus Molinos., etc.; ergo, etc.

SOLVUNTUR OBJECTIONES. — Inter plurimos qui hanc nostram conclusionem impugnare, fusiùs et proterviùs insurrexit auctor libelli gallico idiomate exarati an. 1722, sub hoc titulo: *Sentiment des facultés de Théologie de Paris*

et de Nantes sur une Thèse soutenue à Notre-Dame-des-Ardilliers, et condamnée par un Mandement de M. l'Evêque d'Angers le 30 septembre 1718. Verum quam futilia vanaque sint illius ratiocinia paucis evincimus.

Dices itaque 1^o: Bulla Urbani multiplici defectu, vitio et abusu laborat. 1^o Iisdem defectibus ac abusibus scatet quibus bulla Pii V, quam confirmat et approbat: « De propositionibus damnatis et similibus, quoquo pacto loquendi, scribendi et disputandi facultatem quibuscumque interdicat, idque sub poenâ excommunicationis ipso facto incurrendæ, à quâ nullus romano pontifice inferior, valeat, excepto mortis articulo, liberare. Imò inobedientes omnibus dignitatibus, gradibus, honoribus, beneficiis et officiis perpetuò privat, ac etiam inhabiles decernit. » Ipsissima sunt verba bullae Pii; porro hæc omnia, inquit autor libelli citati, prorsus abusiva sunt, vimque omnem et auctoritatem bullae Pianæ apud nos penitus detrahunt. 2^o Praedictis abusibus novos adjicit bulla Urbani, praesertim verò continet clausulam, *motu proprio, ex certâ scientiâ, ac de apostolicæ potestatis plenitudine*; quae moribus nostris Gallicanis plurimùm adversatur. 3^o Nusquam solitâ formâ recepta et promulgata fuit apud nos; ergo, etc. — Respondeo: quidquid sit de praedictis abusibus, quos plurimùm amplificat auctor citatus, quosque plenius excutere non est hujus loci; ruit profectò proposita objectio. si vitiosum ex parte formæ decretum, neglectâ ac postpositâ formâ possit acceptari quoad doctrinam; atqui ita est ex dictis et probatis art. praecedenti; ergo, etc. Et verò vix extat doctrinale sanctae Sedis iudicium in quo plura occurrant usibus nostris contraria, quam in Constitutione Innocentii XII adversus librum cui titulus: *Maximes des Saints*. 1^o In eâ usurpatur clausula: *motu proprio*. 2^o Deest inscriptio ad archiepiscopos et episcopos. 3^o Data fuit in formâ duntaxat *Brevis*; hi et alii defectus notati fuere in comitiis provincialibus an. 1699, eà in causâ habitis; atqui tamen his nonobstantibus, dicta constitutio summo plausu et maximâ cum veneratione ab omnibus episcopis Gallicanis quantum ad doctrinam et libri censuram recepta fuit et approbata; ergo, etc.

Scilicet, uti antea observavimus ex card. Noallio in conventu Parisiensi an. 1699, die 13 maii: « Il faut mettre une grande différence entre les jugemens dogmatiques, et ceux qui regardent la discipline. Dans ceux-ci

« il faut s'attacher plus scrupuleusement à la
« forme, et dans ceux-là à la substance; c'est-
« à-dire que la doctrine puisée dans la tradi-
« tion et les Ecritures doit l'emporter sur les
« formalités. » Quæ quidem eminentiss. card-
inalis sententia ab his aliisque regni comitiis
eo in negotio tunc habitis, comprobata fuit;
atque hinc dicta Innocentii Constitutio regio
diplomate munita fuit et in acta supremi se-
natûs relata.

Dices 2^o: Bulla Urbani caret conditionibus
ad vera universalis Ecclesiæ judicia requisitis.
1^o Verò præcessit maturum ac juridicum exa-
men, quo scilicet episcopi ex collatione bullæ
cum immotis fidei nostræ regulis, Scripturâ et
traditione, eam acceptaverint, non meræ dun-
taxat adhæSIONIS, sed veri judicii viâ. 2^o Nulla
fuit aut esse potuit uniformitas formalis, seu
quoad sensum, S. Pontificem inter et episcopos,
habitâ præsertim ratione modi generalis et in-
determinati, quo propositiones configuntur.
3^o Deest canonicitas, hoc est, nec à S. Ponti-
fice lata, nec ab episcopis acceptata fuit in
conciliis; ergo, etc.

Respondeo ut brevi expediatur præsens ob-
jectio, dicendum cum illustriss. Bossuet, in
opere cui titulus : *Defensio Declarat. Cleri Gal-
lic. lib. 3, cap. 2* : « Quocumque modo fiat ut
« Ecclesia consentiat, transacta planè res est;
« neque enim fieri potest unquam, ut Ecclesia
« Spiritu veritatis instructa, non repugnet er-
« rori. » Scilicet uti alibi observat idem illustriss.
auctor, Spiritus sanctus qui semper adest Ec-
clesiæ, Spiritus est sapientiæ perinde ac veri-
tatis; ac proinde quemadmodum fieri non
potest ut falsò definiat Ecclesia, ita etiam nec
temerè, omissisque conditionibus ad judi-
cium canonicum necessariis, pronuntiare po-
test; qui enim promisit finem, sine dubio pro-
misit media, quæ ad eum finem obtinendum
necessaria sunt. Itaque ex definitione exteriori
certò judicandum adhibitas fuisse condiciones
necessarias; at non ex prætenso alicujus con-
ditionis defectu enervanda est hujusce defini-
tionis auctoritas; hæc enim ratiocinandi ratio,
præterquàm in se insulsa, non esset medium
breve, facile et unicuique proportionatum;
sed è contra prolixum, intricatum, periculo-
sum, imò præsertim rudioribus impossibile.
Ita card. archiepiscopi, et episcopi Gallicani in
comitiis an. 1728 : « Dès que le vrai fidèle,
« inquit in suo judicio doctrinali ad regem
« pag. 21, voit le corps des Pasteurs uni au
« chef, former une décision qui intéresse la

« foi... il ne lui en faut pas davantage : il n'exa-
« mine point comment le jugement a été formé,
« ni les différens motifs sur lesquels les Pas-
« teurs ont pu appuyer leur décision; il lui suf-
« fit qu'ils aient parlé, pour qu'il règle sa foi
« sur leur enseignement.... Il sait que celui
« qui a promis son assistance aux premiers
« pasteurs, saura les garantir, et lui avec eux,
« et que la simplicité de sa soumission sera
« toujours sa sûreté, comme la promesse de
« Jésus-Christ fait la leur. » Et rursus ibid.
pag. 25 « Pour juger de leur union ou de leur
« unanimité (des premiers Pasteurs) avec le
« Saint-Siège, la seule voie sûre est de s'atta-
« cher aux actes et aux décisions mêmes,
« comme au seul moyen par lequel les fidèles
« puissent connaître ce que l'Eglise exige de
« leur obéissance : tout autre moyen d'en juger
« est impossible et dangereux. » Verùm de his
fusiùs ubi de Ecclesiâ.

Respondeo 2^o, usum hujusmodi censuræ tam
antiquum esse et probatum in Ecclesiâ ut non-
nisi ex insigni temeritate impeti possit. Si quid,
inquit S. Augustinus epist. 54, *tota per orbem
frequenter Ecclesia.... quin sit faciendum dispu-
tare insolentissimæ insaniæ est.*

Variis autem modis in Ecclesiâ usurpatas le-
gimus censuras illas indistinctas et generales;
tribus potissimum, 1^o Generali librorum pro-
hibitione, nullis selectis et extractis proposi-
tionibus. Ita Nicæna synodus infamem Arii
Thuliam damnavit, teste Socrate lib. 1, hist.
cap. 9. Eâdem ratione libri Origenis proscripti
fuère à synodo V œcumenicâ. Eodem etiam
modo Gelasius in concilio Romano anni 494,
et Martinus primus in concilio primo Latera-
nensi an. 649, multos hæreticos, et impia eo-
rum scripta censurâ generali, nullâ proposi-
tione designatâ perstrinxère. Is damnationis
modus olim fuit longè vulgator. 2^o Damnati
nonnunquam leguntur nonnulli libri, et qui-
dam ex illis articuli, istâ duntaxat generali
notâ, *error*. Hoc modo ex consilio doctorum
Parisiensium usi fuère Guillelmus Parisiensis
episcopus an. 1240, et Stephanus item Pari-
siensis an. 1777. 3^o Jam diu invaluit usus et
consuetudo proscribendi libros et proposi-
tiones ex illis extractas, sub variis indiscrimi-
nim notis, seu, ut dicitur, *in globo*, nullâ
factâ harumce notarum unicuique propositioni
applicatione seu distributione. Quâ ratione Jo-
annes XXII quinque articulos Joannis de Poliacò
sigillatim designatos reprobavit, *tanquam fal-
sos, erroneos et à doctrinâ sanâ devios.* Eodem

modo sese gessere Sixtus IV contra Petrum de Osma; Leo X contra Lutherum, Pius V, Greg. XIII, Urbanus VIII, contra Baium, Innocentius XI contra Molinos, Innocentius XII adversus librum cui titulus: *les Maximes des Saints*; tandem Clemens XI contra Quesnellium.

Vulgatum hunc et ordinarium in Sede apostolicâ ferendæ generalis censuræ modum secutus est clerus Gallicanus. Plurimæ ab eo latæ referuntur censuræ tom. I novæ collectionis Commentariorum cleri Gallicani; hæ omnes in genere duntaxat et in globo pronuntiant ac feriunt, unâ tantum exceptâ censurâ anni 1700, quæ damnatis propositionibus singulis singulas et proprias affingit notas; quin et in eâdem censurâ propositiones 124, 125, 126, 127, in globo ac respectivè proscribuntur, his verbis: *Doctrina his propositionibus contenta, est respectivè falsa, absurda, perniciosa, erronea, probabilitatis pessimus fructus*. Eundem censuræ modum olim et nunc usurpavere nobiliores orbis catholici Academiæ, inprimis verò sacra facultas Parisiensis. Ita an. 1277, 1569, 1582, 1514 et 1525.

Denique quod certè plenè decretorium est ad vindicandam dictarum censurarum æquitatem, concilium Constantiense sess. 8, 45 articulos Wiclelli, sess. 15, 50 Joannis Hus in globo ac generatim damnâvit, nullâ ipsius sigillatim inustâ censurâ notâ. Si ergo prædictus damnationis modus vitiosus foret, vitium illud in ipsum generale concilium, hoc est universam Ecclesiam refundendum esset, quod asserere aut suspicari profectò nefas est viro catholico.

Nec valet ad infirmandam dicti argumenti vim, quod asserit anonymus, nempe theologos Constantienses, singulos articulos antequàm à synodo generatim et in globo dispungerentur, speciali et distributâ censurâ notâsse; quæ quidem censura in publicâ sess. octavâ concilii lecta fuit et approbata, uti testatur Vanderbar in novâ concilii Constantiensis historiâ. Non valet, inquam; namque ut cætera prætermittam, dicta theologorum censura spectabat duntaxat articulos 45 Wiclelli, non 50 Joannis Hus; multò minùs alios ducentos et sexaginta, quos eadem synodus generatim damnâvit. An dicent adversarii, istorum articulorum respectu, censuram concilii informem fuisse, obscuram, confusam et ambiguam? Adde censuram hanc in acta concilii relatam non fuisse, sed incognitam delituisse ad annum usque

1697, quo tenebris eruta fuit à recentiori historiæ hujus concilii auctore.

Ex iis omnibus sic arguo: Is censuræ modus nec inutilis, nec imperfectus, multò minùs noxius dici potest, qui à conciliis, SS. pontificibus, clero Gallicano, sacris facultatibus, olim et nunc usurpatus fuit; atqui modus generalis et indeterminatus damnandi propositiones, ut vocant, *in globo*; constanter usurpatus fuit à conciliis; ergo, etc.

Respondeo 3º negando min. censura enim *in globo*, generales quidem sunt, non autem vagæ, ambiguæ et æquivocæ, plenæ obscuritatis et confusionis, ut calumniatur auctor libelli supra citati; imò claræ sunt, et licet non summè, aliquâ tamen ex parte evidentes; plurimùm siquidem occurrit discriminis, ut advertit illust. Bossuet. lib. 15 Variat. n. 162, generales voces inter et vagas, ambiguas et æquivocas: « Les termes vagues, inquit loco citato, ne signifient rien; les termes ambigus signifient avec équivoque, et ne laissent dans l'esprit aucun sens précis; les termes enveloppés brouillent les idées différentes: mais quoique les termes généraux ne portent pas l'évidence jusqu'à la dernière précision, ils sont clairs néanmoins jusqu'à un certain degré. »

Ita doctissimus præsul hæreticorum querimonias retundebat, qui concilii Trid. definitiones obscuritatis et ambiguitatis carpebant, eò quòd generalibus verbis conceptæ essent, Porrò, inquit præsules Gallicani p. 35 supra citatæ Epist. ad regem an. 1728 (idem dicendum est de censuris generalibus, et *in globo*): « Ces jugemens ne sont ni vagues, ni ambigus, ni équivoques. S'ils ne portent pas l'évidence jusqu'à la dernière précision, c'est-à-dire, s'ils ne déclarent pas en détail quelle est la proposition qui est hérétique, quelle est celle qui est blasphématoire, etc..., ce jugement néanmoins est clair jusqu'à un certain degré, c'est-à-dire, il nous apprend clairement qu'il n'y a aucune des propositions condamnées qui ne soit répréhensible. »

Atque hinc etiam facilè solvitur aliud novatorum argumentum contra prædictas censuras; quasi nullum possit ipsis assignari objectum determinatum; non ita est profectò; etsi enim ex illâ generali censurâ certò discerni non possit quæ præcisè propositio hæretica sit, erronea vel tantum temeraria; duo tamen certò constant. Primum, nullam esse ex damnatis propositionibus quæ non mereatur aliquam notam, eas omnes perniciosas esse, periculo-

sas, fidei aliquo modo nocivas; alterum, nullam esse notam ex assignatis, quæ non alicui saltem competat propositioni; quæ duo sufficiunt ut quisque fidelis damnatas propositiones aversetur, et nullam ex iis admittat.

Totum istud egregiè explicant præules Gallicani loco supra citato : « Ces sortes de jugemens (*in globo*), usités dans l'Eglise, comme on l'a vu, PRÉSENTENT CLAIEMENT ET DISTINGUEMENT UNE VÉRITÉ DÉTERMINÉE, en tant qu'ils assurent les fidèles que les propositions condamnées sont dangereuses dans la foi, qu'elles renferment quelque venin, qu'elles s'écarteraient en quelque chose de la vérité catholique. Par cet endroit ces sortes de jugemens nous règlent dans l'ordre de la foi.... Il n'y a qu'à lire les Professions de foi que Martin V dressa à la fin du concile de Constance.... on y verra clairement que ce pape regardait des censures portées sous des qualifications respectives, comme appartenantes au dogme, et comme servant à diriger les fidèles dans l'ordre de la foi. » Nihil certè luculentius ad vindicandas prædictas censuras à dictæis quibus eas insimulare conantur adversarii.

Dices 5º, cum auctore citati libelli : Plurima sunt quæ longâ annorum serie ab omnibus probata et recepta fuere, quæ tamen subinde vel tanquàm falsa rejecta sunt, vel in examen iterùm adducta tanquàm dubiæ auctoritatis. Talia sunt, 1º summorum pontificum ante Siricium decretales Epistolæ, 2º Libri qui sub nomine S. Dionysii circumferuntur, qui ab eruditis inter supposititios factus jam amandantur. 3º Epistola S. Leonis ad Flavianum in concilio Chalcedonensi expensa et retractata, quanquàm jam à multitudine episcoporum approbata. Tale denique Eugenii IV decretum, seu instructio ad Armenos data, à cuius doctrinâ circa materiam sacramentorum Confirmationis et Ordinis discedere, religioni non ducunt quamplures theologi. Porro, inquit auctor citatus, melior non est conditio bullæ Urbani VIII, quàm Epistolæ S. Leonis, aut decreti Eugenii IV.

Respondeo, mirum profectò auctorem hunc non vidisse, aut dissimulasse, quantum prædicta exempla à re nostrâ præsentì remota sint et aliena. In 1º et 2º, quæstio duntaxat vertitur de authenticitate Decretalium ante Siricium, et librorum sancti Dionysii; utrum scilicet eorum essent sub quorum nominibus circumferebantur : ast quæstio nostra instituitur e auctoritate bullæ Urbani VIII, id est, bullæ

dogmaticæ ad omnes fideles directæ, et ab episcopis expressè aut tacitè acceptatæ; quantum ista distent, quis non videat?

Tertium etiam exemplum ex prætensâ retractatione dogmaticæ S. Leonis ad Flavianum Epistolæ, ab anonymo præposterè omninò apponitur. Namque 1º, ut observat Natalis Alexander dissert. 12 Hist. Eccles. seculi V, dicta Leonis Epistola à multitudine episcoporum Italiæ, Galliæ, etc., approbata, lydius veluti lapis fuit ad quam de fide pronuntiatum est; unde, cum actione primâ de fide S. Flaviani quæreretur, Paschasius Lucentius Sedis apostolicæ Legati, Maximus Antiochenus et alii dixere : « Sanctè et integrè, et catholicè exposuit beatæ recordationis Flavianus; siquidem fidei ejus expositio cum beatissimi atque apostolici viri papæ romani epistolâ concordat. » 2º Actione secundâ lectis symbolis Nicæno de Constantinopolitano, duabus S. Cyrilli synodiciis epistolis, et S. Epistolâ, hæc à synodo nominatim probata fuit his verbis : « Hæc Patrum fides; hæc Apostolorum fides.... anathema ei qui non ita credit. Petrus per Leonem locutus est. » 3º Actione quartâ, iterùm rogati Patres, quid landatâ de Epistolâ censerent, suo singuli ordine responderunt, symbolis Nicæno et Constantinopolitano consentaneam esse, nec non fidei à S. Cyrillo in Epistolis expositæ, ideòque se illi subscripsisse.

An ex istâ postremâ agendi ratione concilii et secutâ Ægyptiorum subscribendi recusatione colligeret anonymus, præfatam Leonis Epistolam in examen adductam fuisse tanquàm dubiæ adhuc auctoritatis? Verùm, si ita est, ergo dogmatica S. pontificis definitio à multitudine episcoporum Ecclesiæ dispersæ, et à Concilio œcumenico plures solemniter approbata, poterit denuò retractari, et velut dubiæ auctoritatis haberi; videat auctor num istud admittere velit? Quod autem spectat Ægyptiorum subscribendi recusationem, ex solâ actionis quartæ inspectione manifestè liquet, eam non ex oppositione sancti Leonis ac synodi doctrinæ ortam esse, sed ex quâdam erga futurum mox eligendum in locum Dioscori orthodoxum patriarcham observantiâ; nempe usitatam esse suarum regionum praxim prætendebant præules Ægyptii, ut ipsi nonnisi post post patriarcham fidei definitionibus subscriberent.

Quòd si dictis acquiescere nolit anonymus, et contendat hanc sancti Leonis Epistolam in concilio Chalcedonensi non fuisse habitam uti definitionem fidei, sed eam tanquàm dubiæ auc-

toritatis fuisse retractatam; audiat Bellarminum lib. 2 de Eccles. cap. 19 : *Sanctus Leo miserat Epistolam ad concilium, non ut ultimum et definitivam sententiam, sed ut instructionem*. Si ita sit, non ergo mirum quod iterum expensa fuerit, neque inde merito colligi potest bullam dogmaticam ad omnes fideles directam, etc., posse similiter iterum retractari, et adhuc haberi tanquam dubiæ auctoritatis. Verum de his alibi ubi de Ecclesiâ.

Denique, quod repetit auctor ab exemplo decreti Eugenii, nullatenus nocet, imò plurimum nobis favet. Nusquam enim definivit summus pontifex, unctionem in Confirmatione, et porrectionem instrumentorum in Ordinatione, esse materiam essentialem, aut solam, aut etiam partialem; sed hoc unum duntaxat, utramque materiam, sive essentialis illa sit, sive integrans tantum, aut accidentalis (quod quidem decreto suo non determinat Eugenius) necessariò usurpandas esse juxta ritum Ecclesiæ romanæ; quemadmodum ergo nullus est orthodoxus theologus qui inficiari istud merito possit; ita nec negare, damnatas merito ac damnandas esse propositiones Baii, quas confixere Pius V, Gregorius XIII et Urbanus VIII, quod unum hic contendimus. Adde istud decretum non ad universalem dirigi Ecclesiam, sed post solutam Florentinam synodum ab Eugenio latum fuisse ad instruendos Armenos, unde dici solet : *Decretum pro instructione Armenorum*; iterum ergo præsens exemplum non est ad rem.

Cætera quæ opponunt Baii patroni, levia omnino sunt ac nullius roboris, atque ex dictis aut ex mox dicendis nullo negotio dilui possunt.

ARTICULUS V.

An bulla Urbani VIII sit lex dogmatica.

Ex dictis, ubi de notis theologicis art. 1, parag. 2, quinque sunt dogmatici Ecclesiæ iudicii præcipui ac essentielles characteres. 1º Regula est assensus interni, ac proinde debet aliquid præcipere credendum... 2º Irreformabile esse debet et prorsus immutabile; definit enim veritates revelatas aut cum iis certò et indivulsè connexas... 3º Universale est; scilicet ubi semel latum est, omnia subinde loca et tempora respicit, ac proinde omnes ubique sparsos fideles obligat... 4º Habet pro objecto, non meras voces, sed ipsam dogmatis substantiam, eamque si perversa sit, sub debita notâ perstringit... 5º Iudicii dogmatici æquitas aut injustitia non aliunde probari potest, quam ex ipsius conformitate aut oppositione cum Scri-

pturis et traditione; his quinque characteribus iudicium dogmaticum essentialiter discrepat à lege disciplinæ. His positis, sit

CONCLUSIO. Bulla Urbani vera est lex dogmatica, verum est dogmaticum iudicium.

Probatur 1º. Quinque supradicti legis dogmaticæ characteres ipsi apprimè competunt. 1º Præcipit aliquid credendum, nempe nullam esse ex damnatis propositionibus quæ non mereatur aliquam notam; et vice versâ, nullam esse ex assignatis notis quæ non in aliquam saltem cadat propositionem. 2º Irreformabilis est et prorsus invariabilis; sic enim loquitur summus Pontifex : *Hæc perpetuò valiturâ Constitutione, etc.* 3º Dirigitur ad omnes Ecclesias et fideles; ut patet ex contextu : *Nulli ergo hominum liceat hanc paginam nostræ confirmationis... infringere, etc.* 4º Perversam Baii doctrinam sub iisdem notis reprobatur, quibus Pius V et Gregorius XIII eam jam antea damnaverant : *Hæc perpetuò valiturâ Constitutione*, inquit Urbanus, *prædictas Constitutiones* (Pii V et Greg. XIII) *perpetuò confirmamus et approbamus.* 5º Qui prædictam Urbani bullam propugnant, nituntur potissimum ipsius conformitate cum Scripturâ et traditione; qui verò eam impugnant, ejusdem oppositionem cum immotis fidei nostræ regulis, Scripturâ et traditione prætendunt. Ergo quinque characteres iudicio dogmatico speciales competunt bullæ Urbani VIII, ac proinde merito appellatur vera lex dogmatica.

Probatur 2º. Tam bulla Urbani nuncupari potest ac debet lex dogmatica, quam bullæ Leonis X adversus Lutherum, Innoc. XI adversus Molinos, Innoc. XII adversus librum cui titulus : *Maximes des Saints*; in istis etenim bullis, quemadmodum et in bullâ Urbani, plurimæ damnantur propositiones *in globo* sub variis respectivè notis; quin et in bullâ Innoc. XII, non apponitur nota *hæreseos*, quæ reperitur in præsentî bullâ Pii V, quam confirmat Urbanus VIII; atqui fatentibus etiam adversariis, prædictæ Leonis X, Innoc. XI et XII, bullæ vera sunt dogmatica Ecclesiæ iudicia; ergo, etc.

Probatur 3º. Si quid obstaret quin bulla Urbani esset lex dogmatica, maximè quia dogmaticum iudicium debet habere objectum determinatum; nullum autem illi assignari potest: atqui ista ratio omnino est infirma. Tum quia idem opponi potest adversus præfatas Leonis X, Innoc. XI et XII Constitutiones, quas tamen, ut diximus, veras esse leges dogmaticas, tñtro contentur adversarii; tum quia, uti antea vi-

dimus ex præsulibus Gallicanis citatâ Epist. ad regem an. 1728, hujusmodi judicia *in globo*, clarè et distinctè exhibent istam veritatem determinatam, scilicet, nullam esse è damnatis propositionibus quæ non sit in fide periculosa, aliquo pacto fidei nociva, quæ non mereatur aliquam ex assignatis in censurâ notam.

ARTICULUS VI.

Quis sit genuinus ac legitimus prædictæ bullæ sensus.

Pius V, in bullâ adversus Baium, ab Urbano VIII renovatâ et confirmatâ, post enumeratas et damnatas propositiones adjicit: « Quas quidem sententias, stricto coram nobis examine ponderatas, quanquàm nonnullæ aliquo pacto sustineri possent, in rigore ac proprio verborum sensu ab auctoribus intento hæreticas, erroneas, suspectas, temerarias, scandalosas, et in pias aures offensionem immittentes respectivè.... damnamus. » Hinc celebris exoritur quæstio de famoso commate, seu virgulâ, an scilicet et ubi collocanda sit; an post verbum istud, *possent*, an verò post verba ista, *sensu ab auctoribus intento*; ex illius enim virgulæ existentia vel suppressione, aut variâ transpositione, longè diversus exurgit bullæ sensus.

Baianistæ et Jansenistæ contendunt delendum esse comma post verbum *possent*, et adiciendum post ista alia verba, *sensu ab auctoribus intento*; nempe ut Baii propositiones censuræ subducant, innuentes eas in rigore ac proprio verborum sensu à Baio et aliis intento, sustinere posse. Cæteri verò theologi docent, virgulam apponendam esse post verbum istud, *possent*; ita ut sensus sit: quanquam nonnullæ è damnatis propositionibus aliquo pacto sustineri possent, eas tamen in rigore et proprio verborum sensu ab auctoribus intento damnamus. Juxta hanc ultimam sententiam sit

CONCLUSIO. — Famosum comma in bullâ Pii V collocari debet post verbum *possent*.

Probatur 1^o, quia in archetypis bullarum Pii V, Greg. XIII et Urbani VIII, post verbum *possent* reperitur dictum comma, ut constat ex authentico exemplari quod traditum fuit Synnichio et Papio à cardinalibus Spadâ, Pamphilio et Falconerio. Scilicet cum præfati Synnichius et Papius Lovaniensium deputati, Romæ contentiosius agerent circa bullam Pii V, Urbanus VIII, ad sedandas contentiones excitatas occasione diversitatis exemplarium dictæ

bullæ, « mandavit ex archivio supremæ et universalis congregationis, et ex matrice actuum quæ in eodem archivio conservantur, extrahi et diligenter collationari, ac imprimi exemplar bullæ præfatæ; illudque sic extractum, collationatum et impressum eisdem Synnichio et Papio per cardinales Spadam, Pamphilium et Falconerium consignari, ipsisque insuper significari suæ Sanctitatis mentem ac voluntatem esse, ut eidem exemplari sic consignato fides adhibeatur, etc. » Verba sunt decreti Congregationis generalis eâ occasione habitæ die 26 junii an. 1644; idem etiam habetur in Epist. sancti Officii ad internum Bruxellens. 5 decembris an. 1644. Porro in dicto exemplari famosum comma extat post verbum *possent*; ergo, etc. Decretum et epist. laudata referuntur in collect. historicæ bullarum pag. 49 et 53.

Probatur 2^o ex disertâ Baii confessione die 24 martii an. 1580, his verbis: « Ego Michael Baius.... agnosco et profiteor me ex variis colloquiis cum R. P. Francisco Toletò.... eò perductum esse ut planè habeam mihi persuasum, earum omnium sententiarum damnationem atque prohibitionem jure meritòque, ac nonnisi maturo judicio ac diligentissimâ discussione præmissis factam esse. Fateor insuper plurimas ex iisdem sententiis in nonnullis libellis à me olim et ante emanatam Sedis apostolicæ super iis censuram conscriptis et in lucem editis contineri et defendi etiam in eo sensu in quo reprobantur. » Audis ipso confitente Baio, *jure meritòque reprobatas fuisse propositiones*, et quidem *eo sensu quo ipse in libellis à se conscriptis olim eas defenderat*. Nil certè luculentius in rem nostram.

Probatur 3^o expressis tum Duacenæ, tum Lovaniensis Facultatum testimoniis. Duacena in citato lib. cui titulus: *Veritas et æquitas censure*, postquàm probavit nullas ex 76 propositionibus in proprio et obvio sensu esse orthodoxas, sic habet: « Intelligent anonymi sententias ex damnatis 76 nullas sustineri posse in rigore et proprio verborum sensu quem intendunt, et hoc decisum esse ab Urbano VIII. » Et rursus, post recensitam Urbani bullam: « Credimus definitum esse bullæ Pontificiæ, nullas ex his propositionibus non esse hæreticas, scandalosas, temerarias respectivè.... in rigore et proprio verborum sensu ab assertoribus intento totis libris, ac maxime obvio, quem Facultas ipsa Lovaniensis assecuta est olim luculentâ in-

« genuâque explicatione illustriss. Vercellensis
 « episcopi et apostolici per utramque Germa-
 « niam nuntii jussu ac voluntate conceptâ, et
 « hunc ipsum reprobum sensum Estius Syl-
 « viusque persecuti sunt.... Nec aliud optat
 « Sedes apostolica et rex catholicus, nisi ut
 « Universitates omnes concordî suffragio....
 « eundem sensum configant. » Affirmant doc-
 « tores Duacenses definitum esse ab Urbano
 76, notatas propositiones in rigore et proprio
 verborum sensu ab assertoribus intento sus-
 teneri non posse; censent ergo non delendum
 sed apponendum esse famosum comma post
 verbum *p essent*.

Facultas Lovaniensis idem testatur tum in
 memoratâ declaratione nuntio apostolico exhi-
 bitâ, tum in alterâ pleniori declaratione anni
 1701, his verbis: « Has propositiones (Baii)
 « à Pio V et aliis pontificibus rectè ita damna-
 « tas affirmamus, ut in rigore et proprio ver-
 « borum sensu ab assertoribus intento respec-
 « tivè sint hæreticæ, erroneæ, etc., ac omnes
 « falsæ, quod majores nostri luculentâ editâ
 « olim à se declaratione demonstrârunt, ea-
 « rumque contradictoriæ consequenter veræ;
 « ergo, etc.

Probatur 4^o, quia card. de Lugo die 26 oc-
 tobris 1644, testatus est se archetypam Pii V
 bullam et primum hujusce bullæ authogra-
 phum diligenter inspexisse, item et authenti-
 cum Francisci Toleti ejusdem bullæ exemplar;
 in iis autem deprehendisse famosum comma
 reperi post verba ista *sustineri possent*. Er-
 go, etc. Fingit editor operum Baii part. 2,
 pag. 239, « post Toleti mortem comma in au-
 « tographo ipsius ab iis insertum fuisse, quô-
 « rum intererat, ut eò loci insereretur. » Ve-
 rum gratis omninò ac sine ullo fundamento
 illud affirmat. Adde, dato quòd post Toleti mor-
 tem vitari potuerit ipsius exemplar, quâ tan-
 dem ratione in bullam archetypam et primum
 ipsius exemplar fraus irrepere potuisset?

Probatur 5^o, quia nisi dicta virgula collo-
 canda foret immediatè post verbum *possent*;
 romana censura inepta esset et absurda, in-
 justa, et contra communem ac receptum Ec-
 clesiæ usum in proscribendis propositionibus.
 1^o Inepta foret et absurda; quid enim absur-
 dius et summo pontifici injuriosum magis fingi
 potest, quàm damnare propositiones, quas
 ipsemet pontifex fatetur sustineri posse in pro-
 prio verborum sensu? 2^o Injusta; quid iniquius
 quàm sanam verborum formam, propositiones
 in se et in genuino, obvio et ab auctoribus in-

tento sensu proscribere, eò quòd vitiosus sen-
 sus malignè ac distortè iis affingi potest? Si
 ita est, nullus erit Scripturæ aut traditionis
 textus à censurâ immunis, nullus qui gravissimâ
 non possit censurâ configi. 3^o Inusitata; hic
 enim est Ecclesiæ usus, hæc praxis, à quâ
 procul dubio non recessere summi Pontifices
 Pius V, Greg. XIII et Urbanus VIII, ut cum
 aliquas propositiones simpliciter et absolutè
 damnat, non in alieno et extraneo, sed in
 proprio, naturali, obvio et ab auctoribus in-
 tento eas spectet; id exigit justitia; neque pro
 suâ summâ æquitate, sanctitate ac sapientiâ,
 sese aliter gerere potest Ecclesia jugi Spiritus
 sancti influxu instructa.

SOLVUNTUR OBJECTIONES. — Laudatus antea
 anonymus et auctor recentior libri cui titulus,
Ethica amoris, tom. I, prolegom. 6, cap. 2,
 paragr. 7, momenta ferè omnia colligunt et
 adoptant quibus hactenus usi sunt Baianistæ ut
 probarent delendum esse famosum comma post
 verbum *possent*. Momenta hæc summatis hic
 referemus et solvemus.

Dices 1^o: Card. Granvellanus epist. ad Mo-
 rillonium datâ die 13 novembris 1567, fatetur
 aliquas è damnatis propositionibus in rigore,
aliquo sensu exponi posse; ergo, etc. — Res-
 pondeo ita quidem scripsisse Granvellanum,
 sed quid indè? nihil prorsus. 1^o Non ait dictus
 cardinalis propositiones in proprio verborum
 sensu ab assertoribus intento defendi posse, de
 quo hic potissimum quæstio. 2^o Dùm hæc scri-
 beret, præ oculis certè non habebat pontificiam
 bullam; nonnulla enim addit, alia detrahit de
 textu bullæ, v. g., notas *hæreseos et temeri-
 tatis*. 3^o Bullæ exemplar quod penès erat card.
 Granvellanum, quodque postmodum Lovanium
 misit, interpunctis distinctum non erat; sci-
 licet exemplar illud extractum fuerat, non ex
 Archivis, sed ex commentariis publicis, in
 quibus, ut dicemus postea, bullæ jacebant
 absque interpunctionibus.

Dices 2^o: In Epist. Morillonii ad card. Gran-
 vellanum datâ die 20 junii an. 1569, hæc verba
 leguntur: *Nonnullas propositiones, defendi posse
 in rigore et proprio verborum sensu ab assertori-
 bus intento*; ergo, etc. — Respondeo dicta
 verba non esse Morillonii, uti callidè innuere
 videtur recentior operum Baii editor parte 2,
 pag. 236, sed ipsiusmet Baii, qui tunc tem-
 poris censuræ subscribere recusabat, cui
 deinceps sese subjecit instrumento publico
 declarans die 24 martii an. 1580, « planè per-
 « suasum habere earum omnium sententiarum

« damnationem jure meritòque factam fuisse...
 « et plurimas ex iisdem sententiis in nonnullis
 « libellis à se olim conscriptis contineri et de-
 « fendi, etiam in eo sensu in quo reprobantur.
 « tur. » Ille certè editoris fides desideratur.

Dices 5^o : Decretum academice Lovaniensis die 29, decembris anni 1567, hæc habet : « Cer-
 « tæ sententiæ respectivè damnantur tanquàm
 « erroneæ... quanquàm earum nonnullæ ali-
 « quo pacto sustineri possent in rigore et pro-
 « prio verborum sensu ab assertoribus inten-
 « to ; » ergo, etc. Respondeo 1^o, prætersum illud decretum non esse genuinum Facultatis Lovaniensis opus, sed solius Cornelii tunc Decani Facultatis et postea Gandavensis episcopi, aut ad summum quorundam duntaxat doctorum Baio faventium ; hinc dictum opus, tum in MS. tum in novâ editione à Gerberonio adornatâ, parte 2, pag. 66, non inscribitur : Decretum Facultatis Lovaniensis, sed simpliciter : *Attestatio Cornelii Jansenii Decani Facultatis Lovaniensis*. Ubi adverte, quod ex causâ Quesnellii art. 3, pag. 166, constat, ægrè tulisse Quesnellium sic inscriptum fuisse istud decretum ; unde cum postmodum præesset typis historiæ *Congregationum de Auxiliis*, primus auctor fuit, ut sub hoc specioso titulo vulgaretur : *Instrumentum authenticum Facultatis Lovaniensis*.

Respondeo 2^o : Esto dictum decretum genuinum sit Facultatis Lovaniensis fœtus, nihil exinde commodi accederet adversariis ; ipsa siquidem Facultas ab hac suâ priori sententiâ manifestè recessit, atque agnovit propositiones in proprio verborum sensu ab assertoribus intento fuisse damnatas. Ita constat, tum ex duplici hujusce Facultatis Declaratione an. 1585 et 1701, verba inter probationes retulimus ; tum ex Commentariis ejusdem Universitatis pag. 367 et 369.

Dices 4^o : Cunerus Petri, qui fuit unus ex Baii discipulis opusculo adversus eundem Baium edito, in præfatione comma refert post verba, *sensu ab assertoribus intento* ; id testatur collector operum Baii parte 2, pag. 236 : ergo, etc. Respondeo inter edita Cuneri opera non legi verba laudata ; neque ullo idoneo teste, aut authentico instrumento evincunt adversarii ita legi in manuscriptis. Equidem Gerberonius testem appellat auctorem documentorum ad historiam academice Duacensis pertinentium ; is autem Quesnellius est, qui nec testari audet à se visum illud Cuneri scriptum, quique et ipse ad Gerberonium remittit. Ita professi Baii ac Jansenii defensores, scipos mutuò in pro-

priâ causâ, et testes, et judices appellant ac laudant. Variis momentis probat auctor historiæ *Congregationis de Auxiliis*, sub nomine *Theodori Eleutherii*, laudatum Cuneri textum falsitatis ac interpolationis meritò suspectum esse. Adde Cuneri auctoritatem disertis testimoniis antea laudatis neutiquàm posse officere.

Dices 5^o : Plurima extant exemplaria et MSS. codices in quibus comma desideratur post verbum, *possent*. 1^o In ipso bullæ exemplari quod Franciscus Toletus Româ Lovanium attulit, nulla legitur interpunctio. 2^o Quinque extant codices MSS., in quibus, teste Gerberonio parte 2 operum Baii pag. 236, 237, post verba : *Ab assertoribus intento*, reperitur ; addit in uno ex illis totam clausulam, *quanquàm nonnullæ aliquo pacto*, etc. intra parentheses contineri. 3^o Dominus de Saint-Amour Diarii parte 2, pag. 64 et 65, affirmat penès se habere exemplar bullæ Urbani VIII, Romæ typis excusæ an. 1642, in quo famosum comma legitur post verba mox relata ; ergo, etc.

Respondeo 1^o, quidquid sit de laudatis MSS. et exemplaribus, totum istud dissidium circa commatis additionem jamdubi compositum esse debere postquàm jussu Urbani VIII, ut antea diximus, ad fidem autographi Vaticani descriptum fuit ac typis editum exemplar bullæ Pii V, ipsisque Sinnichio et Papio deputatis academice Lovaniensis, coram notario et testibus traditum ac consignatum fuit die 26 junii an. 1644 ; in illo siquidem exemplari comma legitur post verba : *sustineri possent*, et ante ista, *in rigore et proprio*, etc. Hæc responsione utuntur Duacenses in libro antea laudato, *Veritas et æquitas*, etc.

Respondeo 2^o sigillatim ad singula. Ad primum, falsum est nullam legi interpunctionem in exemplari quod Româ Lovanium attulit Toletus. Comma se vidisse testatur card. de Lugo ; ut antea notavimus. Idem testatur Ripalda tom. 3 de Ente supernat. disput. 1, sect. 2, his verbis : « Apud me extat Bulla originaria « Greg. XIII, impressa Romæ, 1579, tradit « card. Toletus qui ex commissione Greg. XIII, « causam Michaelis Baii conclusit... in eâ manifestum est comma post verba SUSTINERI POSSENT.... quare mirari non desino audaciam « Baianorum, qui fallere volunt in re, in quâ « apertæ falsitatis et fallaciæ convinci possunt. » Ad secundum, laudati à Gerberonio MSS. codices, utpote obscuri, incogniti, nullo publico instrumento muniti, plerisque inter se variantibus, eodem fatente Gerberonio, nullam

certè merentur fidem, neque ullatenus præponderare possunt auctoritati dicti illius authentici exemplaris, quòd jubente S. pontifice Urbano deputatis Lovaniensibus coram notario et testibus traditum fuit, in quo comma legitur post verbum, *possent*. Quod autem spectat dictam parenthesim, ibidem candidè fatetur Gerberonius, *recentiore manu videri delineatam*.

Ad tertium, fateor in exemplaribus bullæ Urbani Romæ typis excusæ an. 1642, deesse famosum omma post verbum, *possent*; verùm contendimus id dandum vitio et incuriæ typographi, quod exinde manifestè constat tum quia in exemplaribus in Belgio et deinde Colonia eodem anno excusis restitutum fuit dictum comma jussu ac voluntate Urbani qui id nuntio apostolico tunc Coloniae degenti mandaverat; tum quia an. 1644, idem S. pontifex bullam Romæ novis typis edi curavit collocato commate post verba, *sustineri possent*; hæc autem editio cæteris longè præstat, cum à sanctâ Sede declarata fuerit authentica, huicque præ aliis omnibus standum esse præscripserit.

Atque ut utrique posteriori responsioni major lux affulgeat, et adversariorum argumenta ex MSS. et exemplaribus petita dissipentur ac penitus evanescant.

Observandum, 1º, cum card. de Lugo, bullatum pontificiarum duo manuscripta Romæ asservari; primum est ipsummet authographum quod in archivii sancti Officii deponitur; alterum est exemplar autographi quod in *Regesto*, ut aiunt, summi pontificis reponitur. Autographum interpunctis distinguitur; exemplar non item, nullas habet interpunctionum notas. Porrò eodem cardinali teste, idque ex curiæ romanæ praxi constat, quotquot conceduntur et per provincias diriguntur dictarum bullarum exemplaria (nisi aliter expressè mandaverit S. pontifex), exscribuntur juxta fidem Regesti, non verò juxta autographum quod in archivii asservatur, ac proinde exemplaria illa nullas habent interpunctionum notas.

Observandum 2º, in causâ Baii quinque potissimum exemplaria bullæ Pii V Romæ Lovanium missa fuisse.

Primum anno 1567 à cardinali Granvellano ad Morillonium directum fuit; virgulis et punctis distinctum non erat, juxta morem, uti mox advertimus curiæ romanæ.

Secundum an. 1580 à Francisco Toletto pontificis legato, dein cardinali, Lovanium allatum fuit; in eo comma jacebat post verba *sustineri possent*. Ex autographo exscriptum fuerat exem-

plar illud ex speciali S. pontificis Greg. XIII. mandato, qui id ita jusserat, ut scilicet eâ ratione obviam iretur novis Baii cavillationibus, qui editis apologiis contendebat ac plerisque facultatis doctoribus persuaserat, juxta bullæ pronuntiatum, *nonnullas è damnatis propositi- nibus sustineri posse in sensu ab assertoribus ta- tento*. Jussa pontificis feliciter executus est Toletus, siquidem Baium et ipsam facultatem Lovaniensem ad puram et simplicem bullæ acceptationem adduxit. Ista constant ex publico Baii instrumento propriâ manu subscripto die 24 martii anni 1580, et ex actis Facultatis quæ retulimus cap. 1.

Tertium eodem anno 1580, promovente Toletto à Greg. XIII ad Baium et facultatem Lovaniensem missum fuit, ut in suâ priori purâ et simplici subscriptione firmarentur. Primum istud est publicum et authenticum bullæ exemplar quod in Belgio comparuit; scilicet, ex jussu S. pontificis, nec Morillonius, nec Toletus, cuiquam potestatem fecerant describendi exemplaria quæ penes se habebant.

Ita testatur Morillonius Epist. ad card. Granvellanum die 20 junii an. 1569. Idem etiam declarant relata à Gerberonio Facultatis Lovaniensis acta an. 1580: « His feliciter peractis « D. Cancellarius de copiâ bullæ, ut hic relin- « queretur, mentionem suggestit. Ad quod res- « pondit præfatus D. Franciscus Toletus, non « se habere in mandatis ut copiam ejus relin- « quat, sed acturum se apud suam sanctitatem, « mox ubi Romam redierit, ut ea transmitta- « tur. » Quod quid in executus est, ut constat ex Brevi Gregorii XIII, die 15 junii ejusdem an. 1580, in quo sic legitur: « Mittimus exem- « plum publicum litterarum sanctæ memoriæ « Pii V, quas tum per litteras, tum per dilec- « tum filium Franciscum Toletum postulasti. »

Porrò, in dicto Greg. XIII exemplari virgulæ et puncta interposita non erant quibus figeretur bullæ sensus. Constat 1º ex Macario Havermans aperto Baianistâ, qui id disertè testatur *Defensione Tyrocinii*, pag. 75: « Quan- « tum, inquit, ad originalem copiam bullæ « Romæ Lovanium transmissam, illa nulla ha- « bet commata. » 2º Idem testatur alter Baii discipulus, auctor libri cui titulus: *Via pacis*, pag. 59. 3º Idem manifestè patet ex eo quòd Facultas Lovaniensis dictum Gregorii exem- plar edi curavit; solis autem oculis opus est ut detegatur in iis nullas esse interpunctiones. Ubi obiter adverte, quòd cum Jansonius et Jansenius asserunt in illo exemplari nullum repe-

riri comma post verba, *sustineri possent*, rectè quidem affirmant; ast ex sincerà fide addere debuissent, nullas omninò in integro contextu reperiri interpunctiones.

Quartum exemplar est anni 1642, Romæ typis excusum. Istud primum est publicum et authenticum exemplar in quo reperiuntur interpunctiones. Equidem in eo desideratur comma post verbum, *possent*; verùm id errori typographi imputandum; unde, ut mox annotavimus, jubente S. pontifice, eodem anno in editione Coloniensi restitutum comma.

Quantum denique exemplar est anni 1644. Ex archiviiis juxta fidem autographi exscriptum fuit; ac coram notario et testibus traditum et consignatum deputatis Lovaniensibus à tribus cardinalibus, cum mandato apostolico ut eidem sic consignato fides adhiberetur; in eo autem constantissimæ fidei exemplari, famosum comma collocatur post verba, *sustineri possent*.

Observandum 3º, MSS, codices, exemplaria, aliaque instrumenta quæ ab adversariis, post Gerberonium secundâ parte operum Baii pag. 236 et sequent., nobis opponuntur, ea omnia ante annum 1642 fuisse exscripta. Ita liquet ex die hisce instrumentis oppositâ.

Ex his omnibus manifestè patet, adversariorum argumentum ex Mss. et exemplaribus petiitum, nullius omninò esse roboris, atque magis iis nocere quàm faveat. Enimverò MSS. exemplaria, aliaque instrumenta nobis objecta, annum 1642 antecedunt; constat id ex solâ horumce monumentorum inspectione; atqui ex dictis ante annum 1642 et 1644, nullum vulgatum fuit publicum et authenticum Bullæ exemplar interpunctionum notis distinctum; siquidem tria duntaxat recensentur ante id temporis exemplaria, Morillonii, Toleti et Greg. XIII, ad Baium; duo priora ex dictis nullatenus fuere communicata; tertium quod evasit publicum non erat interpunctis distinctum; ergo, etc.; unde præfata hæc omnia ab adversariis nobis objecta exemplaria, interpolata, apocrypha, in plerisque essentialibus discrepantia, nullius planè sunt auctoritatis. Scilicet quo tempore plurimùm poterat in academiâ Lovaniensi Baius, exscripta fuere isthæ exemplaria à privatis eidem Baio faventibus, qui pro suis præjudiciis virgulas et puncta bullæ adjecere. Quid autem mirum, si Baius ejusque assecelæ, qui bullam distortè et obliquè interpretabantur, eandem exscribendo et puncta interserendo vitiaverint?

ARTICULUS VII.

Nonnulla proponuntur et expenduntur quæsitæ ad perfectam dictarum Pii V, Gregorii XIII, Urbani VIII, bullarum intelligentiam planè necessaria.

Quæres 1º, quis sit numerus propositionum per Constitutionem Pii V damnatarum? — Respondeo eas non eodem ab omnibus numero referri. Alii 76 duntaxat numerant; ita plerique Lovanienses. Alii 79; ita Suarez, Ripalda, etc. Alii tandem 80 recensent. Verùm diversus is computandi modus bullæ substantiam minimè attingit. Ratio autem hujusce diversitatis exinde orta est, quòd in primitivis bullis Romæ Lovanium transmissis, propositiones omnes, uti antea notavimus, continentur ac junctim referantur absque ordine et ullâ interpunctionum notâ; unde, cùm postmodum à theologis transcriptæ sunt dictæ bullæ, adjecti fuere propositionibus numeri, quo commodius seorsum citari possent: quia verò à nonnullis eadem Propositio dividitur in plures, ideò in aliquibus exemplaribus major, in aliis verò minor propositionum numerus occurrit.

Quæres 2º, an omnes propositiones à Pio V damnatæ, falsæ sint in sensu obvio, proprio et naturali. — Respondeo affirmativè. Ad hoc enim satis est ut propositio in proprio et naturali sensu vera, non possit simpliciter et absolute damnari; atqui ita est, ut constat ex fusè dictis et probatis tom. 3, ubi de notis theologis pag. 367 et seq.; ergo, etc. Et verò uti ratiocinatur Steyaërtius loco ibidem indicato, eodem modo judicandum est de veritate in ordine ad censuram, ac de falsitate in ordine ad approbationem; atqui propositio in sensu proprio et naturali falsa, simpliciter et absolute approbari nequit; ergo, etc.

Quæres 3º, an omnes propositiones in bullâ comprehensæ falsæ sint, et damnatæ independentè à censuris quibus contrarias sententias notant. — Antequàm respondeam, observa 1º, in propositionibus damnantibus aliquam doctrinam duo posse distingui, scilicet, *dictum*, seu doctrina in quam censura cadit; et *modus* seu censura quâ doctrinam illam notat ac configit... Observa 2º, inter damnatas Baii propositiones plures esse quæ doctrinam aliquam non solùm rejiciunt, sed et certâ quâdam censurâ infamant; tales sunt 13, 18, 24, etc... Observa 3º, orthodoxos Theologos consentire præfatas omnes propositiones ratione *dicti* seu doctrinæ, vel saltem ratione *modi* seu censuræ,

imò et plerasque ratione utriusque, *dicti* scilicet et *modi*, vitiosas esse, falsas, ac justè meritòque damnatas; ast nonnihil dissentiunt inter se, an illem sentiendum sit de omnibus dictis propositionibus, utrum scilicet omnes vitiosæ sint et falsæ in se præcisè spectatæ, independentèr à censuris quibus oppositas sententias notant. Alii cum Ripaldâ, Steyaërt., aliisque Lovaniensibus et Duacensibus infra citandis parti affirmanti assentiuntur. Alii verò parti neganti favent; ita Suarez, Vasquez, Tolletus, Bellarminus, Norisius. Sententiam hanc avidè arripuit Jans.lib. 4 de Statu naturæ lapsæ, sed consilio planè diverso à mente dictorum auctorum, nempe ut eà viâ Baii doctrinam circa varia capita à censurâ eximeret. His positus,

Respondeo, recensitas in bullâ propositiones quæ censuram continent, non solum ratione *modi*, seu propter censuram, sed etiam ratione *dicti*, seu propter doctrinam, justè meritòque damnatas fuisse.

Prob. 1^o ex celebri supradictâ Declaratione Lovaniensi an. 1585, in quâ, ut observat Steyaërt. tom. 1^o opuscul. pag. 195, idque ex solâ inspectione patet, *sic refelluntur articuli Baii, ut falsitas eorum ubique demonstraretur*, ETIAM INDEPENDENTER AB ACERBitate CENSURÆ QUAM CONTINENT; ergo, etc.

Prob. 2^o ex simili Declaratione Facultatis Duacensis jam citatâ, in quâ propositiones omnes independentèr à censuris eisdem annexis falsæ et vitiosæ demonstrantur, ac quoad doctrinam per antitheses Guillelmi Estii et Francisci Sylvi sigillatim refelluntur.

Prob. 3^o, quia licet in quibusdam Baii propositionibus censuram continentibus, error, falsitas et vitium illicò non deprehendantur independentèr à censurâ; attamen si propius inspiciantur et conferantur cum palmaribus Baii principiis in aliis propositionibus expressis, facile erit advertere ipsas in se et præcisè ratione doctrinæ vitiosas esse ac damnabiles; ergo, etc. Sic, v. g., ex hoc uno fundamentali de duplici amore Baii principio, propositione 38 asserto: *Omnis amor creature rationalis, aut vitiosa est cupiditas... aut laudabilis illa charitas per Spiritum sanctum in corde diffusa*; ex hoc, inquam, principio non modica lux affulget ad proprium sensum et vitium nonnullarum propositionum detegendum, quarum aliunde error statim non occurrit. Etverò innumera ex dicto principio erronea consecretaria dimanare alibi indicavimus, et iterum pleniùs

postmodum indicabimus. Prob. 4, quia, ut latè probat Ripalda tom. 6 de ente supernat. disput. 1, sect. 5, propositiones inurentes censuram doctrinæ probabili, prohibere quidem, non verò damnare solet Ecclesia; nec enim ullibi videmus propositiones hujusmodi theologicâ censurâ confixas fuisse; atqui Baianæ propositiones censuram continentibus non solum prohibentur, sed etiam insuper verè ac propriè damnantur: *Quas quidem sententias, inquit S. pontifex, stricto examine ponderatas... damnamus, circumscribimus, et abolemus*, etc.; ergo, etc.

Quæres 4^o, an dictæ propositiones falsæ sint et damnatæ in sensu ab assertoribus intento. — Respondeo affirmativè. Probatur 1^o ex contextu bullæ, in quâ famosum comma collocandum est post verba, *sustineri possent*, ut art. præcedenti demonstravimus... 2^o Ex declarationibus Facultatum Lovaniens. et Duacens. ibidem relatis, in quibus expressè habetur, et asseritur *hoc decisum fuisse ab Urbano VIII...* 3^o Is est Ecclesiæ usus, ut cum aliquas libri vel auctoris propositiones condemnat, eas potissimum spectet relativè ad mentem auctoris, et sensum libri.

Quæres 3^o, unde damnatarum à Pio V propositionum genuinus ac legitimus sensus desumendus sit. — Respondeo hic tria certa esse. Primum, quod docent Suarez, Steyaërt., Ripalda, aliique, nempe, verum ac legitimum damnatarum à Pio V sensum meritò colligi posse ex libris Baii, Hesselii, et aliorum assertorum. Istud autem principium directè impetit auctorem *Æthices amoris*, Gerberonium, etc., qui ut genuinam Baii doctrinam à censurâ eximant, contendunt damnatum in Baianis propositionibus sensum non ex libris Baii aut aliorum assertorum colligendum esse, sed unicè ex propositionibus secundum se absolutè, vel relativè ad se invicem spectatis.

Probatur 1^o ex mox dictis. Scilicet, ea est perpetua ac constans Ecclesiæ praxis, ut cum extractas à libris propositiones condemnat, eas in sensu libri potissimum spectet; ergo legitimus damnatarum propositionum sensus ex assertorum libris meritò extendi potest... 2^o Ex mox dicendis patebit eundem omninò esse libri et propositionum ex eo excerptarum sensum; ergo, etc... 3^o Idem probatur ex tenore bullæ in quâ summus pontifex post enumeratas propositiones, simpliciter declarat illas esse *in rigore et proprio verborum sensu ab assertoribus intento, hæreticas, erroneas*, etc., atque ita damnari. Quæ quidem verba, si attentè expendan-

tur, inquit Suarez prolegom. 6 de Grat. cap. 2, duo indicant: unum est, assertiones illas in proprio verborum sensu recensitis in Bullâ notis *respectivè* dignas esse; alterum, sensum hunc fuisse ab assertoribus intentum. *Hic est*, inquit ibid. Suarez, *simplex et proprius illorum verborum sensus, et quicumque alius excogitetur, fructum hujus definitionis evacuat*; ergo, etc.

Secundum, quod iidem tradunt theologi, istud est, Baianarum propositionum sensum posse etiam colligi ex propositionibus in se, aut relativè ad se invicem spectatis, sine librorum ex quibus excerptæ sunt integrâ lectione, vel antecedentium ac consequentium novâ collatione.

Probatur 1°. Si genuinus ac legitimus istarum propositionum sensus ab auctore intentus et à summo pontifice damnatus non posset colligi ex propositionibus secundum se, vel relativè ad se invicem spectatis, sine librorum ex quibus extractæ sunt lectione, et antecedentium et consequentium in iisdem libris novâ collatione; interclusa nobis esset via et ratio assequendi proprium sensum ab auctore intentum et à pontifice damnatum; absurdum consequens; ergo et antecedens. Sequela maj. constat, tum quia lectio horumce librorum nobis est severè prohibita in eo ipso decreto in quo propositiones damnantur; tum quia assertores harumce propositionum nusquam nominaverunt in bullis suis summi pontifices. Minor pariter constat; istud quippe scopo et dignitati tanti decreti repugnat; nec ex illo firmum argumentum contra aliquam opinionem possemus certò desumere, etiamsi in damnatis propositionibus, et proprio earum sensu contineretur; sicque evaderet frustraneum.

Probatur 2°. Dictas propositiones utique damnavit Pius V, in sensu obvio et naturali absoluto aut relativo; alienum enim omninò est ab Ecclesiæ praxi, propositiones configere in sensu extraneo et peregrino, omisso proprio et naturali; aliàs in errorem inducerentur fideles, nec ulla esset adeò sana ac probata assertio quæ non posset censurâ configi; atqui ex contextu liquet propositiones damnatas fuisse in sensu ab assertoribus intento: ergo genuinus ac legitimus auctorum sensus, ex genuino ac proprio propositionum sensu meritò colligi potest.

Tertium, quod utriusque prioris fundamentum est, in eo stat, quòd arcta sit ac necessaria connexio inter sensum propositionum in se et ad invicem sumptarum, et sensum li-

brorum ex quibus extractæ sunt ab Ecclesiâ; liber enim non conflatur nisi ex propositionibus, et propositiones non sunt nisi compendium libri; liber non est nisi propositiones ornatae, connexæ invicem et probatae; propositiones verò non sunt nisi mera et seorsim sumpta libri principia; propositionum ergo è libris extractarum collectio, totius dictorum librorum doctrinæ summarium ac veluti compendium exhibere meritò creditur. Genuinus itaque damnatarum à Pio V propositionum sensus meritò colligi potest, vel ex libris assertorum, vel ex propositionibus in se aut relativè spectatis.

Atque hic auctoris Ethices amoris fraus tom. 1, prolegom. 6, sedulò præcavenda, quâ certè tum hujus, tum aliarum omnium Ecclesiæ definitionum, quibus propositiones in sensu auctorum vel librorum damnantur, prorsus vanæ ac inutiles redderentur. Docet 1°, in propositionibus extractis ex libris, alium esse proprium et rigorosum propositionum sensum, et alium proprium assertorum seu librorum; prior desumendus ex usu vocabulorum communiter in scholis recepto, tempore quo fertur decretum; posterior ex antecedentibus et consequentibus in libro.... Docet 2°, unum ex illis sensibus posse esse verum et tenendum, dùm alter falsus et damnabilis est.... Docet 3°, ita contingere in præsentī causâ; nempe damnatas Baii propositiones falsas esse ac vitiosas in proprio et naturali sensu quem reddunt, vel secundum se spectatæ, vel ad invicem collatæ; ast in sensu Baii et aliorum assertorum sanas esse ac orthodoxas.... Docet 4°, dictas propositiones, in illo, non in isto sensu à SS. pontificibus fuisse damnatas; et quidem justè ac meritò; imò etiam fatetur dici posse damnatas fuisse propositiones in proprio sensu ab assertoribus intento, si per sensum hunc, non is intelligatur qui ex libris eruitur, sed ille qui colligitur ex propositionibus vel in se præcisè vel relativè ad se invicem collatis. « Confundendus « non est, inquit loco laudato, proprius verborum sensus ab assertoribus intentus, cum « proprio verborum sensu ex propositionibus « ipsis colligendo.... Propositiones omnes (ob « sensum damnatæ) sunt damnatæ in sensu ab « assertoribus intento, si per sensum ab assertoribus intentum non ille intelligatur, qui « ex libris ipsorum colligendus sit, sed qui « colligendus sit ex bullâ ipsâ, sive ex propositionibus ipsis prout in bullâ exhibentur, « attento usu vocabulorum communiter in

« scholis recepto dùm bulla emanavit.... » Docet 5^o, dictæ Pii V Constitutioni omnimodam submissionem et obedientiam corde et ore præstandam esse.

Verùm quàm vanè, captiosè et noxiè excogitata sint hæc, nemo non videt. Vanè quidem, ut constat ex principiis mox allatis, præsertim tertio; captiosè verò et noxiè; tum quia si valeret ista doctrina, propositiones non fuissent damnatæ in proprio et naturali sensu quem habent in libris Baii Hesselii, aut aliorum assertorum; ex quo manifestè sequeretur, intactâ bullarum Pii V, Greg. XIII et Urbani VIII, auctoritate posse propugnari dictorum auctorum libros in sensu obvio, genuino et naturali ab omni prorsus errore immunis esse; sicque sub speciosis omnimodæ submissionis verbis tegitur error, non repudiatur, atque patentissima aperitur via ad integram Baii doctrinam denuò exsuscitandam; tum quia nulla posset quocumque tandem modo ferri definitio ab Ecclesiâ, cui turpiter simili effugio non illuderetur; v. g. quinque famosas propositiones damnatas fuisse in proprio et naturali sensu Jansenii, his vocabulis unice intelligendo proprium et naturalem sensum quem propositiones reddunt in se præcisè, aut relative ad se invicem spectatæ, non autem in obvio, proprio et naturali sensu quem habent in ipso Jansenii libro, quod tamen præcipuum est caput in quod tendunt Ecclesiæ eâ de re definitiones.

Quæres 6^o, an prædictis SS. pontificum Pii V, Greg. XIII, Urbani VIII, Constitutionibus Ecclesiæ à prisca suâ fide desciverit, aut sancti Augustini doctrinam damnaverit, uti calumniantur Leydeckerus in disputationibus Historico-theologicis de vario Jansenianorum fato, alique tam Protestantes quàm Arminiani. Respondeo hanc esse meram putidamque hæreticorum calumniam, quæ ex dictis passim in totâ istâ dissertatione abunde confutata manet. Et verò Pius V, Greg. XIII, Urbanus VIII, alique subsequentes S. pontifices Innocent. X, Alex. VII, Innoc. XII, etc., inconcussam S. Aug. doctrinam meritis laudibus commendârunt; nihil ergo citatis bullis S. doctoris doctrinæ fuit detractum.

Cæterùm hic iterùm nova fraus præcavenda; tum dicti auctoris Ethices, tum Gerberonii aliorumque qui istâ certissimâ assertionē abutuntur. Sic illi ratiocinantur: Pontificis adversus Baium decretis nullo in puncto damnata est prisca Ecclesiæ fides, aut inconcussa S. Au-

gustini doctrina; atqui talis vel talis propositio in sensu proprio et naturali antiquam Ecclesiæ et genuinam S. Aug. doctrinam exprimit; ergo in sensu proprio et naturali damnata non est, sed in alio quodam sensu, qui licet extraneus sit propositioni in se spectatæ, dicendus est tamen proprius et naturalis ab auctore intentus. Sic illi in decretis pontificiis ludunt ac cavillantur. Nullus est qui simili ratiocinio quamlibet doctrinam à censurâ non eximat; ast longè aliter cum orthodoxis discurrendum: doctrina S. Augustini à SS. pontificibus damnata non fuit; atqui talis propositio damnata, in sensu proprio talem doctrinam exprimit; ergo isthæc doctrina omninò aliena est à sententiâ sancti Augustini; vel aliter: Atqui talis propositio in sensu proprio damnata est; ergo in sensu proprio et genuino, genuinam S. Augustini doctrinam non continet. Ubi vides ex eodem inconcusso isto principio, nec avitam Ecclesiæ fidem, nec genuinam S. Augustini doctrinam damnatas fuisse ab orthodoxis, et à novatoribus contradictorias erui conclusiones.

Itaque maximè cavendum est ne pro avitâ Ecclesiæ fide, et tenendâ S. Aug. doctrinâ, præjudicatæ defendantur opiniones, et eas tantis nominibus decorando enerventur hodiernæ Ecclesiæ definitiones, uti præstant novatores. Scilicet non attendunt Ecclesiæ definitiones non posse adversari fidei antiquæ; Ecclesiæ etenim semper vivens et jugi sancti Spiritûs influxu instructa, priorum suarum definitionum sensum certò exprimit; ex ipsius igitur hodiernâ definitione potius colligenda est avita fides, quàm ex prætensâ et ad arbitrium excogitatâ antiquorum doctrinâ, ad extraneos sensus detorquere suprema Ecclesiæ judicia.

Quæres 7^o, quot censuras contineat bulla Pii, quidve significet vox *respectivè* quæ in eâdem bullâ legitur. Respondeo sex omninò continere censuras, adversus enumeratas ibidem sententias. Prima est, eas esse *hæreticas*. Secunda, esse *erroneas*. Tertia, *suspectas*. Quarta, *scandalosas*. Quinta, *temerarias*. Sexta, *in pias aures offensionem immittentes*. Quænam autem vera sit et accurata harumce censurarum notio alibi dictum est¹, ubi de notis theologicis; ibidem annotavimus particulam *respectivè*, quam ex concilio Constantiensi mutuati sunt summi pontifices, duo significare. Primum, nullam esse è recensitis in bullâ notis quæ in aliquam saltem propositionem non

cadat. Secundum, nullam pariter esse ex propositionibus quæ non mereatur aliquam ex illis notis.

Quæres 8º, ad quot capita revocari possint propositiones in bullâ notatæ. Respondeo propositiones illas sine ordine et nexu in bullâ collocari: Duacenses ad 15 capita, Lovanienses ad 14, eas revocant; commodius ad quinque reduci possunt.

Primum caput complectitur propositiones quæ versantur circa statum naturæ innocentis; quindecim omninò sũnt scilicet, 1, 3, 4, 5, 6, 7, 9, 11, 21, 25, 24, 26, 53, 78, 79. Eò tendunt istæ propositiones, ut astruant dona naturæ innocenti collata, debita fuisse integritati primæ conditionis, et proinde naturalia dicenda esse, non supernaturalia, nec gratiam propriè dictam.

Secundum, propositiones quæ spectant peccatum tum originale, tum actuale; sexdecim sunt, 2, 20, 47, 48, 49, 50, 51, 52, 55, 54, 68, 72, 73, 74, 75, 76. In his varii et gravissimi exprimuntur errores circa utriusque peccati naturam ejusque effectus.

Tertium est de libero arbitrio ejusque viribus: septemdecim complectitur propositiones, 22, 25, 27, 28, 29, 30, 34, 35, 36, 37, 39, 40, 41, 46, 65, 66, 67. In his duo palmares traduntur errores. Primus est libertatem hujus statûs ad merendum necessariam in solo voluntario sitam esse; adeòque hominem peccare etiam damnabiliter, in eo quod necessariò facit. Secundus, liberum arbitrium sine supernaturali Dei auxilio, nonnisi ad peccandum valere.

Quartum continet 28 propositiones circa charitatem, justificationem et meritum; septem circa charitatem, scilicet 16, 31, 32, 33, 38, 70, 71; septem circa justificationem, 42, 43, 44, 58, 63, 64, 69; quatuordecim circa meritum bonorum operum, 4, 5, 6, 8, 11, 12, 13, 14, 15, 17, 18, 19, 61, 62. In his docetur 1º famosum Baianistarum principium circa impossibilitatem amoris mediî vitiosam cupiditatem inter et laudabilem ac supernaturalem charitatem; 2º justificationem impij fieri formaliter per obedientiam legis; 3º omnia bona opera ex naturâ suâ meritoria esse vitæ æternæ absque ullo ordine ad merita Christi, aut dignitatem et excellentiam personæ operantis.

Quintum denique caput complectitur propositiones 10, 45, 60, quibus catholica impugnatur doctrina circa satisfactionem, indulgentias, necnon Missæ sacrificium.

Quæres 9º, an omnes in bullâ damnatæ propositiones Baii adscriptæ fuerint, et an eas omnes reipsâ docuerit. — Respondeo 1º, dictas propositiones nec Baii, nec alteri cuiquam assertori expressè ac nominatim in bullâ adscribi. Constat id 1º ex tenore bullæ, 2º ex posteriori epistolâ card. Granvelli ad Morillon. in quâ sic legitur: « L'on fit ôter le premier feuillet afin que l'on ne connût ni l'auteur du livre, ni le lieu où il fut imprimé... » Il verra (Baius) par la bulle, qu'il n'est nommé, ni son livre, etc. » 3º Idem colligitur ex his bullæ verbis, *in sensu ab assertoribus intento*, quibus patet damnatas propositiones, non uni vel alteri speciatim, sed pluribus generatim adjudicari.

Respondeo 2º, plerasque è damnatis propositionibus et quoad verba et quoad sensum; nonnullas verò quoad sensum duntaxat, in operibus Baii reperiri. Constat 1º ex citatâ Baii confessione, in quâ id disertè fatetur. Constat 2º ex ipsius apologiis in quibus idem ultrò agnoscit. Tres edidit apologias; in primâ quam ad sanctam Sedem direxit, damnatas propositiones in tres classes distribuit: 33 approbat; 22 malè extractas asserit; 21 sibi falsò imputari conqueritur. Constat 3º ex Epist. ejusdem Baii ad card. Simonetam: « In bullâ Pii V, *inquit*, damnantur 76 sententiæ, quarum priores sexaginta aut circiter tacito quidem nomine; attamen intelligentibus satis aperto, significantur expressæ ex quibusdam libellis meis, sicut etiam palam et nominatim in Congregatione Facultatis nostræ testatus est Morillonius. »

Respondeo 3º, non omnes damnatas in bullâ propositiones extare in libris Baii. Id indicant 1º citata bullæ verba, *in sensu ab assertoribus intento*. 2º Idem innuunt ista Baii verba in suâ fidei confessione quam exegit Franciscus Toleus, quamque gratam habuit S. pont. Greg. XIII. *Fateor, inquit, plurimas iisdem sententiis, in nonnullis libellis à me olim editis contineri*. 3º Idem proximè sequenti inductione patebit. Porrò, licet non omnes damnatos articulos docuerit Baius, cùm tamen longè majorem eorum numerum in suis scriptis passim expresserit, hinc articuli illi vulgò dicuntur Baiani.

Cùm in hoc præsentî tractatu frequens deinceps futurus sit sermo de Baianis propositionibus, non abs re erit illarum indicem ob oculos hic ponere; eas ordinis et claritatis causâ ad certa quædam capita mox indicata revoca-

binus, ac discernemus quæ Baii sint, assignatis simul locis unde extractæ sint.

De gratiâ primi hominis et Angelorum. — 1^o « Nec Angeli, nec primi hominis adhuc in-
« tegri merita rectè vocantur gratia. » Est
prima propositio inter Baianas; extat lib. 1 de
merit. operum cap. 4. 2^o « Primi hominis inte-
« gri merita, fuerunt prima creationis munera;
« sed juxta modum loquendi Scripturæ sacræ,
« non rectè vocantur gratia, quò fit ut tantum
« merita, non etiam gratia debeant nuncu-
« pari. » Est 7; extat ibidem. 3^o « Dona con-
« cessa homini integro et angelo, forsitan non
« improbandâ ratione dici possunt gratia;
« sed quia secundum usum sacræ Scripturæ,
« nomine gratiæ ea tantum munera intelligen-
« tur, quæ per Jesum Christum malè merenti-
« bus et indignis conferuntur; idèò neque me-
« rita, neque merces quæ illis redditur, gratia
« dici debet. » Est 9, ibidem. 4^o « Humanæ
« naturæ sublimatio et exaltatio in consortium
« divinæ naturæ, debita fuit integritati primæ
« conditionis, et proinde naturalis dicenda est,
« et non supernaturalis. » Est 21; habetur lib.
de primi hominis justitiâ, cap. 4 et 3. 5^o « Ab-
« surda est eorum sententia qui dicunt homi-
« nem ab initio dono quodam supernaturali
« et gratuito supra conditionem naturæ suæ
« fuisse exaltatum, ut fide, spe, et charitate
« Deum supernaturaliter coleret. » Est 23,
eodem in lib. cap. 7. 6^o « A vanis et otiosis
« hominibus secundum insipientiam philoso-
« phorum excogitata est sententia, hominem
« ab initio sic constitutum, ut per dona naturæ
« superaddita, fuerit largitate conditoris subli-
« matus, et in Dei filium adoptatus. » Est 24, eo-
dem lib. cap. 7 et 8. 7^o « Integritas primæ
« creationis non fuit indebita naturæ humanæ
« exaltatio, sed naturalis ejus conditio. » Est
26, eodem lib. cap. 4. 8^o « Et bonis Angelis et
« primo homini, si in statu illo perseverassent
« usque ad ultimum vitæ, felicitas esset merces
« et non gratia. » Est 3, lib. de merit. operum
cap. 4. 9^o « Vita æterna homini integro et
« Angelo promissa fuit intuitu bonorum ope-
« rum, et bona opera ex lege naturæ per se
« sufficiunt ad illam consequendam. » Est 4,
eod. lib. cap. 2. 10^o « In promissione factâ An-
« gelo et primo homini continetur naturalis
« justitiæ constitutio, quâ pro bonis operibus
« sine alio respectu vita æterna justis promit-
« titur. » Est 5 ibidem. 11^o « Naturali lege
« constitutum fuit homini, ut si in obedientiâ
« perseveraret, ad eam vitam pertransiret in

« quâ mori non posset. » Est 6, ibid. 12^o « Om-
« nes omnino justorum afflictiones sunt ultio-
« nes peccatorum ipsorum, unde Job et mar-
« tyres quæ passi sunt, propter sua peccata
« passi sunt. » Est 72.

Damnatur ista propositio, sicut et alia quæ
est n. 73, « quia in iis temerè dictum est,
« inquit Suarez de grat. prolegom. 6, cap. 2,
« omnes afflictiones justorum et martyrum, et
« ipsius etiam Job fuisse ultiones peccatorum
« suorum, quod non solum sine fundamento
« asseritur, sed etiam Scripturis repugnat....
« Nam multæ afflictiones permittuntur provi-
« dentiâ speciali, non propter peccata com-
« missa, sed ad probationem patientiæ.... vel
« propter gloriam Dei, ut, etc. » Et verò, si
omnes omnino justorum afflictiones, necessariò
sint peccatorum pœnæ, clarè sequitur impos-
sibilitas statûs naturæ puræ.

13^o « Deus non potuisset ab initio talem crea-
« re hominem, qualis nunc nascitur. » Est 55.
14^o « Immortalitas primi hominis non erat gra-
« tiæ beneficium, sed naturalis ejus conditio. »
Est 78. 15^o « Falsa est doctorum sententia,
« primum hominem potuisse à Deo creari et
« institui sine justitiâ originali. » Est 79.

Hi quatuor posteriores articuli in libris Baii
non extant quoad verba; ast quoad sensum
coincidunt cum doctrinâ undecim priorum pro-
positionum quæ expressè leguntur apud Baium.

De peccatis originali et actuali. — 1^o « Ad
« rationem et definitionem peccati non perti-
« net voluntarium; nec definitionis quæstio
« est, sed causæ et originis, utrum omne pec-
« catum debeat esse voluntarium. » Est 46;
habetur lib. de peccato originis cap. 7. 2^o
« Peccatum originis verè habet rationem pec-
« cati sine ullâ relatione ac respectu ad volun-
« tatem à quâ originem habuit. » Est 47, ibi-
dem. 3^o « Peccatum originis est habituali vo-
« luntate parvuli voluntarium, et habitualiter
« dominatur parvulo, eò quòd non gerat con-
« trarium voluntatis arbitrium. » Est 48, ibi-
dem. 4^o « Ex habituali voluntate dominante
« fit, ut parvulus decedens sine regenerationis
« Sacramento, quando usum rationis conse-
« cutus erit, actualiter Deum odio habeat,
« Deum blasphemet, et legi Dei repugnet. »
Est 49, ibidem. 5^o « Omne scelus est ejus con-
« ditionis, ut suum auctorem, et omnes pos-
« teros eo modo inficere possit, quo infecit
« prima transgressio. » Est 52, eodem libro
cap. 13. 6^o « Quantum est ex vi transgressio-
« nis, tantum meritorum malorum à generante

« contrahunt qui cum minoribus nascuntur vi-
 « tiis, quam qui cum maioribus. » Est 53, eod-
 dem lib. cap. 6. Coincidit hæc propositio cum
 eo quod ibidem asserit Baius, « peccatum ori-
 « ginis (concupiscentiam scilicet et libidinem)
 « in omnibus actu non esse æquale, sed in
 « aliis minus, in aliis majus, etsi æquale sit
 « reatu et demerito. » 7° « Nemo præter Chri-
 « stum est sine peccato originis; hinc Beata
 « Virgo mortua est propter peccatum ex Adam
 « contractum, omnesque ejus afflictiones in
 « hac vitâ sicut et aliorum justorum, fuerunt
 « ultiones peccati actualis vel originalis. » Est
 73, non legitur in libris Baii; quoad ultimam
 tamen partem ex doctrinâ ipsius circa statum
 naturæ innocentis non obscure colligitur. 8°
 « Concupiscentia, sive lex membrorum, et
 « prava ejus desideria, quæ inviti sentiunt ho-
 « mines, sunt vera legis inobedientia. » Est 51,
 lib. de peccat. orig. cap. 15 et 16. 9° « Prava
 « desideria quibus ratio non consentit, et quæ
 « homo invitus patitur sunt prohibita præcep-
 « to, non concupisces. » Est 50, ibidem. 10°
 « Motus pravi concupiscentiæ sunt pro statu
 « hominis vitiiati, prohibiti præcepto: Non
 « concupisces; undè homo eos sentiens et non
 « consentiens, transgreditur præceptum: Non
 « concupisces, quamvis transgressio in pecca-
 « tum non deputetur. » Est 75, ibidem. Notat
 Steyaërt. ad hanc propositionem eâdem omninò
 phrasi sectarios hæreses suas circa præsens ca-
 put exprimere. 11° « Concupiscentia in renatis
 « relapsis in peccatum mortale, in quibus jam
 « dominatur, peccatum est, sicut et alii habi-
 « tus pravi. » Est 74; non reperitur apud
 Baium. « Ista tamen, inquit Steyaërt. pendet
 « à superioribus. Namque si concupiscentia in
 « non renatis ideò peccatum sit, quia domina-
 « tur illis, nec hi contrarium gerunt voluntatis
 « arbitrium; jam etiam in renatis eam esse
 « peccatum oportet, ex quo iterum per relap-
 « sum iis dominatur, nec amplius ipsi contra-
 « rium habent voluntatis arbitrium. » 12°
 « Omnia opera infidelium sunt peccata, et vir-
 « tutes philosophorum sunt vitia. » Est 25,
 lib. 2 de virtutibus impiorum, præsertim cap.
 4 et 5. 13° « In omnibus suis actibus peccator
 « servit dominanti cupiditati. » Est 40; propo-
 sitionem Baio adjudicat Ripalda; ast Steyaërt.
 notâ 20, in propositiones Baianas, contrarium
 docet et probat, his verbis: « Quis crederet
 « hanc propositionem, reipsâ haberi apud
 « Baium? Habetur tamen, et quidem totidem
 « penè verbis: *Damones*, inquit lib. de lib.

« arb. cap. 6, in omnibus suis actibus et deside-
 « riis miserimè sunt suæ iniquitatis et male vo-
 « luntatis, quam deponere non possunt, servi;
 « similiter impii omnes, quandiù non sunt à
 « peccati dominio liberati, servi sunt peccati:
 « quia in omnibus suis actibus dominanti peccato
 « serviunt. » Ita Baius: « quæ quidem, pergit
 « Steyaërtius, refutatione non egent. » 14°
 « Omne quod agit peccator, vel servus peccati,
 « peccatum est. » Est 53. Hanc iterum propo-
 sitionem Baio adjudicat Ripalda; eam autem
 Baii esse contendit ibidem Steyaërt., ubi obser-
 vat doctrinam hujusce propositionis è præce-
 denti sponte ac necessariò sequi. 15° « Infide-
 « tas purè negativa in iis, quibus Christus non
 « est prædicatus, peccatum est. » Est 68; non
 reperitur apud Baium. 16° « Homo peccat etiam
 « damnabiliter in eo quod necessariò facit. »
 Est 67. Ista rursùm propositio in libris Baii non
 extat quoad verba; quoad sensum autem ma-
 nifestè videtur sequi ex ipsius circa liberum
 arb. doctrinâ; de quâ paulò post. 17° « Nullum
 « est peccatum ex suâ naturâ veniale, sed omne
 « peccatum meretur pœnam æternam. » Est
 20. Docet hanc lib. 2 de meritis operum cap.
 2. 18° « In peccato duo sunt, actus, et reatus.
 « Transeunte autem actu, nihil manet nisi
 « reatus, sive obligatio ad pœnam. » Est 56.
 Hanc tradit Baius libello de oratione pro de-
 functis cap. 4. In eo situs est ipsius error,
 quòd in peccato nihil aliud agnoscat quàm ac-
 tum, et reatum pœnæ; nullum autem præte-
 rea reatum seu maculam culpæ.

De libero arbitrio, et ejus viribus.—1° « Sola
 « violentia repugnat libertati hominis natura-
 « li. » Est 66. — 2° « Quod voluntariè fit,
 « etiamsi necessariò fiat, liberè tamen sit. » Et
 59.—3° « Is libertatis modus qui est à neces-
 « sitate, sub libertatis nomine non reperitur in
 « Scripturis, sed nomen libertatis à peccato. »
 Est 41

Has quoad sensum propositiones passim tra-
 dit Baius, lib. de libero Arb. cap. 4, dicit,
 « Angelos felici quâdam necessitate constrictos,
 « Deum atque justitiam immobiliter dili-
 « gere; » et postea cap. 6, eosdem « liberri-
 « mos (vocat), etiam in eo quòd justitiam di-
 « ligunt. » Cap. 8, hæc notanda verba addit:
 « Nam licet doctores catholici adversus hære-
 « ticos liberum arbitrium sæpius in eo intel-
 « lexerint, quòd possit omittere id quod facit,
 « hoc est, in eo quòd in suis actionibus nullâ
 « sit necessitate constrictum, sicut etiam intel-
 «lexerunt philosophi, qui posteriorem libertatis

« modum, qui nobis nonnisi per Christum con-
 « tingit, ignoraverunt; attamen Augustinus,
 « secutus Evangelium, etiam liberatum arbi-
 « trium in eo intellexit, quod nullius extraneæ
 « potestatis servituti esset obnoxium, sive in
 « potestate haberet id quod agit, omittere, sive
 « non. » Ita Baius, quibus verbis satis tradit ci-
 « tatas propositiones. — 4° « Liberum arbitrium
 « sine gratiæ Dei adjutorio, nonnisi ad pec-
 « candum valet. » Est 27; habetur lib. 2 de vir-
 « tutibus impiorum cap. 8. — 5° « Pelagianus est
 « error dicere quod liberum arbitrium valet ad
 « ullum peccatum vitandum. » Est 28, ibidem.
 — 6° « Non solum fures hi sunt et latrones,
 « qui Christum viam et ostium vitæ et verita-
 « tis negant, sed etiam quicumque aliunde,
 « quam per Christum in viam justitiæ (hoc
 « est, aliquam justitiam) conscendi posse do-
 « cent. Est 29, eod. lib. cap. 9. — 7° « Si-
 « miles hi sunt, qui dicunt, tentationi ulli sine
 « gratiæ Dei adjutorio hominem posse resis-
 « tere, sic ut in eam non inducatur, aut ab eâ
 « non superetur. » Est 30, ibidem. — 8° « Amor
 « naturalis, qui ex naturæ viribus exoritur, ex
 « solâ philosophiâ per elationem præsumptio-
 « nis humanæ, cum injuriâ crucis Christi de-
 « fenditur à nonnullis doctoribus. » Est 36, lib.
 de Charit. cap. 4 et 5. — 9° « Cum Pelagio sen-
 « tit, qui bonum aliquod naturale, hoc est,
 « quod ex naturæ solis viribus ortum ducit,
 « agnoscit. » Est 37, ibidem. — 10° « Cum Pe-
 lagio sentiunt, qui testimonium Apostoli ad
 « Rom. 2 : *Gentes quæ legem non habent, natu-
 « raliter quæ legis sunt, faciunt*; intelligunt de
 « gentibus fidei gratiam non habentibus. » Est
 22, lib. de primâ hominis justitiâ cap. 5. — 11°
 « Nonnisi Pelagiano errore admitti potest usus
 « aliquis liberi arbitrii bonus, sive non malus;
 « et gratiæ Christi injuriam facit, qui ita sen-
 « tit et docet. » Est 65; non habetur in libris
 Baii. — 12° « Definitiva hæc sententiâ, Deum
 « homini nihil impossibile præcepisse, falsò
 « tribuitur Augustino, cum sit Pelagii. » Est
 54; habet hanc Baius lib. de peccat. orig.
 cap. 12.

Tota hæc doctrina his octo posterioribus pro-
 positionibus exposita, intimè connexa est ac
 necessariò sequitur è supra recensitis. Baii
 placitis circa statum naturæ innocentis. Enim-
 verò in prædicto statu nulla alia ad bonum
 operandum et malum vitandum agnoscitur po-
 testas, adeòque nec libertas, quàm quæ habe-
 tur per gratiam et virtutes infusas naturæ
 innocenti connaturales ac debitas; porrò, per

Adami peccatum omnibus gratiæ et virtutum
 donis spoliatus est homo; amissa ergo omnis
 ad bonum libertas, ac superstes una remansit
 dura peccandi necessitas.

De charitate. — 1° Omnis amor creaturæ ra-
 « tionalis, aut vitiosa est cupiditas, quâ mundus
 « diligitur, quæ à Joanne prohibetur; aut lau-
 « dabilis illa charitas, quâ per Spiritum sanc-
 « tum in corde diffusâ, Deus amatur. » Est 38;
 hanc expressè tradit Baius lib. de Charit. cap.
 5, 6, etc.

In hac amoris mediî vitiosam cupiditatem in-
 ter et laudabilem charitatem, exclusionem imò
 et impossibilitatem, stat totius Baiani systematis
 veluti basis ac fundamentum; ex eo malè fœ-
 cundo fonte (ut attendenti patebit, et suo loco
 ex professo demonstrabimus) sponte nascun-
 tur ac necessariò dimanant omnes ferè tum
 recensiti, tum postmodum referendi errores.

2° « Distinctio illa duplicis amoris, naturalis
 « videlicet quo Deus amatur ut auctor naturæ;
 « et Gratuiti, quo Deus amatur ut beatorum,
 « vana est et commentitia, et ad illudendum
 « sacris litteris, et plurimis veterum testimo-
 « niis, excogitata. » Est 34, eod. lib. de Charit.
 cap. 4. — 3° « Non est vera legis obedientia,
 « quæ fit sine charitate. » Est 26, lib. 2 de me-
 « ritis operum cap. 1. — 4° « Charitas perfecta
 « et sincera, quæ est ex corde puro, conscien-
 « tiâ bonâ et fide non fictâ, tam in catechume-
 « nis quam in pœnitentibus potest esse sine
 « remissione peccatorum. » Est 31, citato lib.
 de Charit. cap. 7, et 8. — 5° « Charitas illa,
 « quæ est plenitudo legis, non est semper con-
 « juncta cum remissione peccatorum. » Est 32
 ibidem. — 6° « Catechumenus rectè et sanctè vi-
 « vit, et mandata observat, et legem implet per
 « charitatem, ante obtentam remissionem pec-
 « catorum, quæ in baptismi lavacro demùm
 « percipitur. » Est 33, ibidem. — 7° « Homo exi-
 « stens in peccato mortali, sive in reatu æter-
 « næ damnationis, potest habere veram chari-
 « tatem; et charitas etiam perfecta potest con-
 « sistere cum reatu æternæ damnationis. » Est
 70, ibid. — 8° « Per contritionem etiam cum
 « charitate perfectâ, et cum voto suspiciendi
 « sacramentum conjunctam, non remittitur
 « crimen extra casum necessitatis, aut martyrii
 « sine actuali susceptione sacramentorum. »
 Est 71, ibidem.

Itaque, juxta Baium, charitas tum appetiati-
 vè, tum etiam intensivè perfecta cum reatu
 æternæ damnationis consistere potest, si sacra-
 mentum, martyrium et necessitas absint. Dixi,

etiam intensivè perfecta; nec enim toto capite octavo supra laudato, ullam charitatis perfectionem excipit, quæ reatum æternæ damnationis secum pati non possit. Hæc Baii doctrina coheret cum ipsius systemate circa justificationem, de quo mox. — 9^o « Quamdiu aliquid carnalis concupiscentiæ in diligente est, non facit præceptum: *Diliges Dominum Deum tuum ex toto corde tuo.* » Est 76; non habetur in libris Baii; sectariorum hæresim ingerit circa absolutam justorum, etiam cum gratiâ, Dei mandata observandi impotentiam, ob adhærescentis nimirum noxiæ cupiditatis virus.

De justificatione. — 1^o « Justitia quâ per fidem justificatur impius, consistit formaliter in obedientiâ mandatorum, quæ est operum justitiâ, non autem in gratiâ aliquâ animæ infusâ quâ adoptatur homo in filium Dei, et secundum interiorem hominem renovatur ac divinæ naturæ consors efficitur, ut sic per Spiritum sanctum renovatus, deinceps benè vivere, et Dei mandatis obedire possit. » Est 42. Tradit hanc doctrinam Baius integro penè libro de justitiâ. Docet 1, justitiâ quâ justificatur impius, formaliter et propriè consistere in obedientiâ legis, exclusâ gratiâ animæ infusâ quâ homo adoptatur in filium Dei, ut loquitur concil. Trid. sess. 6, can. 11. Docet 2, eam impropriè et minus præcipuè positam esse in remissione peccatorum, hoc est, in remissione solius reatus pœnæ æternæ; in peccato enim, transacto actu, nullam maculam seu reatum culpæ agnoscit. Docet 3, veram et perfectam justificationem, non secus ac veram et perfectam charitatem, posse stare sine remissione peccatorum.

2^o « In hominibus pœnitentibus ante sacramentum absolutionis, et in Catechumenis ante baptismum est vera justificatio; separata tamen à remissione peccatorum. » Est 43, eodem lib. cap. 7. — 3^o « Operibus plerisque quæ à fidelibus fiunt, solùm ut mandatis Dei pareant, cujuscmodi sunt obedire parentibus, depositum reddere, etc., justificantur quidem homines, quia sunt legis obedientiæ, et veræ legis justitiæ, non tamen iis obtinent incrementa virtutum. » Est 44, citato lib. cap. 5. « Vix scias, » inquit Steyaert. in notis ad propositiones Baianas, « quid Baius ad hunc errorem moverit. Quidni verò talibus operibus etiam obtineantur incrementa virtutum. » — 4^o « Illa distinctio duplicis justitiæ, alterius quæ fit per spiritum charitatis inhabitantem; alte-

rius, quæ fit ex inspiratione quidem Spiritus sancti cor ad pœnitentiam excitantis, sed nondum cor inhabitantis, et in eo charitatem infundentis, quâ divinæ legis justificatio impletur, similiter rejicitur. » Est 65. — 5^o « Item et illa distinctio duplicis vivificationis, alterius quâ vivificatur peccator, dum ei pœnitentia, et vitæ novæ propositum per Dei gratiam inspiratur; alterius quâ vivificatur qui verè justificatur, et palme vivus in vite Christo efficitur, commentitia judicatur, et Scripturis minimè congruens. » Est 64. — Utraque ista propositio non est Baii. Et verò Baius in suâ S. pontifici Pio V oblata apologiâ ad proposit. 60 et 61, dictam duplicis vivificationis et justitiæ distinctionem disertè approbat, hancque *verissimam esse* asserit. Idem testatur in explicatione eorundem articulorum, parte 2 Operum Baii novæ edit. pag. 145.

« Cæterum, quisquis sit istarum propositionum auctor, inquit Steyaert., utraque distinctio tam acriter rejecta, non solum nullam meretur censuram, sed etiam bona est et utilis imprimis. » — 6^o « Justificatio impii fit formaliter per legis obedientiam, non autem per occultam communicationem, et inspirationem gratiæ, quæ per eam justificatos faciat implere legem. » Est 69, colligitur ex citato lib. de justitiâ cap. 5.

De bonorum operum meritis. — 1^o « Sicut opus malum ex suâ naturâ est mortis æternæ meritorium, sic opus bonum ex suâ naturâ est vitæ æternæ meritorium. » Est 2, lib. 2 de meritis operum, cap. 2. — 2^o « Quod pie et justè in hac vitâ mortali usque ad finem conversati vitam consequamur æternam, id non propriè gratiæ Dei, sed ordinationi naturali statim initio creationis constitutæ justo Dei judicio deputandum est. » Est 11; ita sparsim lib. 2 de meritis operum. — 3^o « Nec in hac retributione bonorum ad Christi meritum respicitur, sed tantum ad primam institutionem generis humani, in quâ lege naturali constitutum est, ut justo Dei judicio obedientiæ mandatorum vita æterna reddatur. » Est 12 ibidem. — 4^o « Opera bona à filiis adoptionis facta, non accipiunt rationem meriti ex eo quod fiunt per spiritum adoptionis inhabitantem corda filiorum Dei; sed tantum ex eo quod sunt conformia legi, quoddamque per ea præstatur obedientia legi. » Est 13. — 5^o « Rationem meriti in eo non consistere quod qui benè operatur habeat gratiam et inhabitantem

« Spiritum, sed in eo solum quod obedit
« divinæ legi. » Est 13; utramque proposi-
tionem sæpius repetit Baius, et multis rationi-
bus probat integro ferè citato lib. 2 de merit.
operum. — 6º « Pelagii sententia est, opus
« bonum citra gratiam adoptionis factum, non
« esse regni coelestis meritum. » Est 13,
eod. lib. cap. 4. — 7º « Cum Pelagio sentit,
« qui dicit ad rationem meriti esse necessa-
« rium, ut homo per gratiam adoptionis subli-
« metur ad statum deificum. » Est 17, ibidem.
— 8º « Opera Catechumenorum, ut fides et
« poenitentia, ante peccatorum remissionem
« facta sunt vitæ æternæ merita, quam vitam
« non consequuntur Catechumeni, nisi prius
« præcedentium delictorum impedimenta tol-
« lantur. » Est 18 ibidem. — 9º « Opera bona
« justorum non accipient in die iudicii extremi
« ampliorem mercedem, quàm justo Dei iudicio
« mereantur accipere. » Est 14, eodem lib.
cap. 9. — 10º « Opera iustitiæ et temperantiæ
« quæ Christus fecit, ex dignitate personæ
« operantis non traxerunt majorem valorem. »
Est 19, eod. lib. cap. 7. — 11º « Celebris illa
« doctorum distinctio, divinæ legis mandata
« bifariam impleri, altero modo quantum ad
« præceptorum operum substantiam tantum;
« altero quantum ad certum quemdam modum,
« videlicet, secundum quem valeant operan-
« tem perducere ad regnum æternum, hoc
« est, ad modum meritum, commentitia
« est et explodenda. » Est 61, ibid. — 12º
« Illa quoque distinctio quæ opus dicitur bifa-
« riam bonum, vel quia ex objecto et omni-
« bus circumstantiis rectum est et bonum,
« quod moraliter bonum appellari consuevit;
« vel quod est meritum regni æterni, eò
« quod fit à vivo Christi membro per spiritum
« charitatis, rejicienda est. » Est 62, eodem
libro, cap. 6.

Ex his propositionibus ad invicem conca-
tenatis patet summam systematis circa meri-
tum in eo consistere, quod operi bono ex solâ
conformitate cum lege debeat vitæ æterna
independenter ab operantis dignitate ac excel-
lentiâ; non secus ac operi malo ex solâ defor-
mitate operis mors debetur æterna.

13º « In renatis per gratiam Christi nullum
« inveniri potest bonum meritum, quod non
« sit gratis indigno collatum. » Est 8, lib. 1
de meritis operum cap. 4. Cohæret ista propo-
sitiō cum supradictis erroribus circa liberum
arbitrium.

De Sacramentis, Sacrificio, Satisfactione, et

Indulgentiis. — 1º « In Sacramento baptismi
« aut sacerdotis absolutione, propriè reatus
« peccati duntaxat tollitur; et ministerium
« sacerdotum solum liberat à reatu. » Est 57,
lib. de orat. pro defunctis. — 2º « Peccator
« poenitens non vivificatur ministerio sacer-
« dotis absolventis, sed à solo Deo, qui poeni-
« tentiam suggerens, et inspirans vivificat eum
« et resuscitat; ministerio autem sacerdotis
« solum reatus tollitur. » Est 58, ibidem. —
3º « Sacrificium Missæ non aliâ ratione est
« sacrificium, quàm generali illâ, quâ omne
« opus quod fit, ut sanctâ societate Deo homo
« inhæreat. » Est 43; collecta videtur ex
libello Baii de Sacrificio cap. 4, 5 et 6. — 4º
« Solutio pœnæ temporalis quæ peccato di-
« misso supermanet, et corporis resurrectio,
« propriè nonnisi meritis Christi adscribenda
« est. » Est 10; hanc tradit Baius lib. 1 de
merit. operum cap. 9. — 5º « Quando per
« eleemosynas aliaque pietatis opera Deo satis-
« facimus pro pœnis temporalibus, non di-
« gnus pretium Deo pro peccatis nostris offe-
« rimus; sicut quidam errantes autumant,
« nam alioqui essemus aliquâ saltem ex parte
« nostri redemptores: sed aliquid facimus,
« cujus intuitu Christi satisfactio nobis appli-
« catur, et communicatur. » Est 59; hanc
habet Baius disertè in fine libri de Indulgentiis.
— 6º « Per passiones sanctorum Indulgentiis
« communicatas non propriè redimuntur de-
« licta, sed per communionem charitatis nobis
« eorum passiones impertiuntur, ut digni
« simus, qui pretio sanguinis Christi à pœnis
« pro peccatis debitis liberemur. » Est 60,
lib. de Indulg. cap. 8. — 7º « Satisfactiones
« laboriosæ justificatorum non valent expiare
« de condigno pœnam temporalem restantem
« post culpam condonatam. » Est 77; coincidit
cum præcedentibus. Harum quatuor posterio-
rum propositionum doctrina planè adversatur,
uti advertit Steyaert. loco antea citato, iis quæ
docet concil. Trid. sess. 14, cap. 8.

Atque hæc de historiâ et systemate Baianis-
mi; qui plura volet, præter citatos auctores,
adeat Suarez de grat. prolegom. 6, cap. 2;
Turrian. opuscul. de grat. tract. speciali de
hâc materiâ; Steyaert., tom 1 opuscul. Theo-
riæ expurgatæ parte 1; Ripalda tom 3 de
ente supernat. disput. 1, et ad calcem ejus-
dem tom 3, et è recentioribus P. Duchesne,
qui de hocce argumento doctè et solidè disse-
ruit in lib. cui gallicè titulus: *Histoire du*
Baianisme.

Dissertatio decima.

DE CONGREGATIONIBUS DE ALAIUS.

Nondum quas moverat in Belgio Baius sopitæ erant controversiæ, cum graves exortæ sunt disputationes inter Patres Ordinis sancti Dominici et Societatis Jesu; illas prætermittere non sinunt, et tractatûs præsentis scopus, et exagitæ materiæ gravitas. Ast de illis vix quidquam omninò certi affirmari potest; etenim in mutuis scriptis, quæ in probationes afferuntur momenta, ea in dubium ab alterâ parte statim revocantur; sicque involuta manet gestorum veritas, quidque sit sentiendum, quidve tenendum ignorat animus veri inquisitor. Si quid tamen certi haberi potest, attentè perlectis qui ex utrâque parte parati sunt libri, illud exponemus expendendo, 1^o occasionem Congregationum; 2^o Congregationes ipsas; 3^o exitum Congregationum. De his sigillatim dicendum.

ARTICULUS I.

Occasio Congregationum.

Vix instituta erat Societas Jesu, jamque è vivis defuncto sanctissimo Fundatore sparsis per Europam illius membris, et primas in Universitatibus atque academiis cathedras occupantibus, conquesti sunt plerique Dominicani Jesuitas novam, eamque, à Pelagianismo non satis recedentem edocere doctrinam; nec minùs de Dominicanis conquerebantur Societatis Patres, quòd suo præsertim circa prædeterminationem systemate, Calvinii defensoribus faverent. Talis atque tantus fuit rumor ille, ut auctoritas pontificis summi in medium vocata accusationum veritatem dignoscere dedignata non fuerit; quomodo autem ad suum tribunal causam reservare fuerit adducta, nunc venit exponendum; recensitis primùm dissidiis tum in Belgio, tum in Hispaniâ exortis, quæ famosis de quibus nunc agitur, Congregationibus, locum dedere.

§ 1. *Controversiæ in Belgio habitæ.*

Compendiosam harumce controversiarum synopsis exhibet Habertus Vabrensis episcopus lib. cui titulus, *Defensio fidei*, cap. 14, paragr. 5. Eandem ab ovo Lovaniensem controversiam, omniaque ultrò citròque scripta, dicta, gesta, accurato Diario complexus est Lessius. Utriusque operis analysis ad hæc capita revocari potest.

1^o Damnatissimus Michaelis Baii doctoris et de-

cani Lovaniensis propositionibus, ex Italiâ Lovanium accesserunt Lessius et Hamelius celeberrimi Societatis Jesu theologi, ibique annis 1585 et 1586, publicas habuere prælectiones Theologicas de sacrâ Scripturâ, prædestinatione, gratiâ, etc.

2^o Anno 1587, instigante Baio, cui multi Lovaniensis academici doctores adhærebant, cœpit Universitas in Lessii et Hamelii scripta inquirere, atque ex iis 34 propositiones censurâ notavit. Prodiit isthæc censura die 9 septembris ejusdem anni 1587. Paulò ante exhibitæ fuerant Lessio dictæ propositiones, et ab ipso quasitum, an pro suis ea agnosceret; qui, ut ipse narrat in suâ Apologiâ, respondit, « suas esse, sed truncatas, et suis locis avulsas; ita ut qui eas lecturi essent, non facilè possent intelligere, quorsum aut quâ occasione dictæ essent. »

3^o Academia Duacensis, duce præsertim Estio, Lovaniensis academici judicium confirmavit anno 1588, latâ in Lessium censurâ longè duriori; ambæ verò conjunctim Universitates sacram Facultatem Parisiensem invitârunt ad idem præstandum, quod ipsa præcisè se facturam negavit; teste Haberto, loco mox laudato.

4^o Eodem anno, postulantibus plerisque in Belgio episcopis, exarata fuit censura Lovaniensis justificatio seu defensio, ad respondendum, ut legitur in ipsius præfatione, Lessii Apologiæ adversus dictam censuram.

5^o Circa idem tempus illustrissimi Mechliniensis et Cameracensis archiepiscopi egere inter se, et cum cæteris suarum provinciarum episcopis, ut fieret synodus, in quâ damnata à duabus Facultatibus professorum Societatis doctrina discuteretur, ac si visum fuisset synodo, passim per Belgium proscriberetur.

6^o Orta isthæc dissidia auctoritate suâ compescuit Sixtus V, S. pontifex, dato die 15 aprilis ejusdem an. 1588, Brevi ad Calatinam episcopum, suum in Belgio nuntium apostolicum, quo totius controversiæ cognitionem Romam advocat, utrique interim parti imposito silentio. Jussa pontificia partibus intimavit nuntius apostolicus, decreto eâ de re edito die 10 julii ejusdem anni, quo sub poenâ excommunicationis latæ sententiæ vetuit, ne quis alteram partem erroris damnet; atque ita nonnihil sedata est gravissima illa Lovaniensis controversia quæ universum Belgium turbabat.

Unum hic occurrit expendendum, an scilicet prædicta utriusque academici Lovaniensis et Duacensis censura, à sanctâ Sede fuerit approbata. Augustinus Leblanc lib. 1 hist. de Auxiliis cap. 9, 10, 11, contendit laudatas censuras Romæ sub Innocentio XI, et præsertim sub Innoc. XII, fuisse approbatas. Martinus Steyaërt., tom. 1 opuscul. pag. 11 et 12, fatetur quidem eas non fuisse positivè approbatas; ast easdem docet non fuisse improbatas, et quidem iis in circumstantiis in quibus improbandæ fuerant, si fuisset in iis quod jure improbaretur. « Scilicet, inquit, academia Lovaniensis ab æmulis suis novitatis ac erroris traducta, ad Sedem apostolicam recurrit, ut ei doctrinam suam exponat. Ultrò apud eamdem proficitur iis in punctis quid doceat, in quibus præ cæteris accusatur; dicit hanc suam esse doctrinam, hanc se à majoribus accepisse, hanc porro se posteris transmissuram, nisi Ecclesiæ romanæ aliter videretur; paratam se præbet ea respuere omnia, quæ prima Sedes sibi ostenderit displicere. His obtinet, ut plusquam toto bienio, nec vice simplice, tota sua doctrina severissimo examine discutiatur. Interea non desunt sibi adversarii, qui omnes nervos intendunt, ut saltem aliquod è dogmatibus istis proscribatur. Interim proscribitur nihil:.... Profectò (pergit ibidem), si adhuc error est (error nimirum damnabilis) in his quæ Ecclesia romana, sic rogata ab academicis istis, sic instigata ab adversariis, tanto spatio tantoque rigore discussa; liceat mihi dicere apostolicæ Sedi, quod olim alius Deo dixit: Si error est à te decepti sumus.... Non ergo simpliciter evasit censura nostra quam sanctæ Sedi exposuimus: evasit tunc, cum nequaquam evadere potuisset, si quid in eâ displicuisset Ecclesiæ. » Ex his liquet hoc unum contendere Steyaërt., nihil esse in laudatis censuris, quod errorem damnabilem contineat, nihil quod displiceat Ecclesiæ, nihil denique quod jure notari debeat.

Theodorus Eleutherius lib. 1 hist. de Auxiliis cap. 22, et sequentibus, tria docet. Primum, Belgicas censuras, ut censuræ sunt; hoc est, quatenus certis quibusdam notis Lessii doctrinam percellunt, à sanctâ Sede non fuisse approbatas, imò potius improbatas. Ratio est, quia Sixtus et Paulus V doctrinam hanc doceri solemnibus decretis permisierunt, eamque censurari sub gravissimis poenis prohibuerunt, ergo, etc.; neque enim ullum extat vestigium,

ultra prædecessorum suorum metas excurrere voluisse subsequentes pontifices Innoc. XI et XII. Secundum, censuras, prout præcisè continent censorum doctrinam, abstrahendo à notis quibus adversam sententiam perstringunt, nec approbatas fuisse positivè, nec improbatas; nullum quippe extat apostolicum decretum quo expressè confirmatæ fuerint aut rescissæ. Tertium quod multis probat, istud est, nempe, censuras hoc posteriori sensu acceptas nullatenus fuisse approbatas, nequidem etiam tacitè. Imò auctor libri cui titulus: *Errata de Auxiliis* pag. 62 et 63, à quo non videtur recedere Eleutherius, censet silentium Curiae romanæ in iis circumstantiis in quibus fuit observatum, tacitam fuisse doctrinæ censurarum improbationem; doctores quippe Lovanienses tunc temporis censurarum approbationem enixè postulabant; nulli erant illarum damnationem efflagitantes: ut quid ergo silebat Ecclesia romana, si innoxiam judicabat censuram?

Cæterum, quidquid sit de tacitè illà censurarum improbatione in quâ plurimum non insistit Eleutherius, profectò illarum doctrinam nequidem tacitè fuisse approbatam certum esse docet, idque variis, ut dixi, conatur ostendere momentis. Validiora hic exhibebus.

Primum petitur ex illustriss. Augustino Favovito, qui Innocentio XI à Secretis fuit; hic in epist. ad P. Christianum Lupum, datâ 25 novembris 1679, disertè negat censuram Lovaniensem à sanctâ Sede ullatenus fuisse approbatam, totumque istud negotium sub iudice versari asserit: « Legi, inquit, folium relationis à te, à D. Viane factæ excellentissimo gubernatori Belgii de rebus à vobis in urbe gestis, et ab apostolicâ Sede relatis. Omnia mihi videntur ritè procedere, præter istud, videlicet Sanctitatem suam et eminent. cardinales comprobâsse iudicium consultorum S. Officii circa censuram Lovaniensem. Cum enim nullum de hac materiâ decretum prodierit, nihil potest de eâ certi affirmari, et omnia adhuc sunt sub iudice, donec veniat plenitudo temporis controversiæ discutientiæ. »

Secundum desumitur ex eminentiss. Tanario Bruxellis antea internuntio; is Romam scripsit explorandæ veritatis gratiâ, die 18 novembris 1679, responsisque acceptis, litteras dedit die 18 januar. 1680, ad Nicolaum du Bois sacrae Scripturæ professorem, in quibus ipsi significat, sese reimpressionem censuræ prohibiturum, ne, inquit, contraveniretur menti suæ

Sanctitatis, quandoquidem nunquam, quod sciam, fuerit approbata (censura Lov.) à sanctâ Sede.

Tertium colligitur ex excerptis quibusdam registorum sancti Officii, ex quibus constat die 10 dec. 1679, prohibuisse sacram Congregationem oratoribus Lovaniensibus ne censuram prædictam typis mandarent, et latâ prohibitionem subditur: « Significet autem oratoribus (internuntius) quòd Sanctitas sua, nec sacra Congregatio unquam approbavit dictam censuram, seu ejus justificationem in materia gratiæ. » Nihil certè disertius. Extracta sunt hæc ex archivo sancti Officii, atque tradita eminent. cardinalibus hujus Congregationis ab assessore sancti Officii anno 1693, quo tempore Hennebellus causam nonnullorum Lovaniensium Romæ agebat.

Quantum eruitur ex ipsomet Innocentii XI, decreto die 2 martii 1679, quo damnatis ad instantiam deputatorum Lovaniensium 65 ethices laxioris propositionibus, continuò subditur: « Non intendens tamen sua Sanctitas per hoc decretum alias propositiones in ipso non expressas, et Sanctitati suæ quomodolibet et ex quâcumque parte exhibitas, ullatenus approbare. » Atqui deputati Lovanienses unâ cum propositionibus censurandis, varias alias propositiones libro censurarum contentas ad examen exhibuerunt; quin et circa hæc tempora, utraque Lovaniensis et Duacensis censura examinanda S. pontifici oblata fuit; ergo ex mente ac declaratione ipsius innoc. XI, censuræ et propositiones Lovanienses non fuerunt ullatenus approbatæ.

Quintum denique deducitur ex decreto Innoc. XII ad academiam Lovaniensem dato die 6 februarii 1694. Eo Brevis Belgicas censuras disertè confirmari contendit historicus Leblanc; ast infirmum omninò esse ac labile istud momentum ex eo conficit Eleutherius, quòd eo ipso in Brevis aperte significet S. pontifex nolle se profundiores difficilesque partes incurrentium in materiâ divinæ gratiæ questionum... adstruere ac definire; porrò manifestum est quæstiones de gratiæ efficacis naturâ, de modo electionis ad gloriam, aliasque hujusmodi in censuris expressas, profundiores esse difficilesque, quæ in materiâ gratiæ occurrunt, ergo, etc.; immerito ergo Breve istud apostolicum opponit Augustinus Leblanc, tanquam extremum orthodoxiæ censurarum sigillum.

Ast, inquit Aug. Leblanc, certum est censuras romano pontifici fuisse delatas an. 1679,

atque rigoroso examine à curiæ iudicibus discussas, nec tamen edito decreto proscriptas; fuerunt ergo probatæ: « Quotquot enim, pergit historicus, romanæ curiæ, ac præsertim generalis Inquisitionis praxim vel leviter norunt, certò sciunt, non aliter ab eis propositiones aut libros approbari. »

Respondet Eleutherius, simili argumento invictè ostendi Lessii et Molinæ doctrinam fuisse probatam. Scilicet, Lessii doctrina à Sixto V discussa fuit et examinata; edito autem decreto damnata non est; ergo, etc. Pariter Molinæ doctrina à Clemente VIII et Paulo V discussa est; nullo decreto ab ipsis damnata est; ergo, secundum curiæ praxim est ab ipsis approbata. Viderit adversarius nûm ista fateatur.

Addit auctor libri cui titulus, *Errata... de Auxil.* loco mox citato, statutâ historici regulâ manifestè colligi, censuras non fuisse Romæ approbatas, cum nullus fuerit tunc temporis qui dictarum censurarum examen ac damnationem urgeret, quod tamen necessum omninò foret ut silentium loco approbationis haberetur. Quin ibidem observat, ut diximus supra, iis in circumstantiis silentium potius esse argumentum tacitiæ improbationis.

§ 2. *Controversiæ in Hispaniâ habitæ.*

Orta in Belgio dissidia apostolicis Sixti V literis nonnihil sedata sunt, ut antea diximus; ast multò majora in Hispaniâ excitata sunt occasione librorum Ludovici Molinæ, quæ quidem ut plenius dignoscantur, res altius est repetenda. Itaque Lutheri et Calvini hæresi debellandæ divinitus datus S. Ignatius, prima veluti fundamenta Societatis Parisiis jecit circa annum 1540. Unum præcipuè divum Thomam doctorem Angelicum elegit, qui in Societatis scholis prælegeretur. Ita constat ex his Constitutionum verbis quartâ parte cap. 14. *In Theologiâ legetur novum Testamentum, et doctrina scholastica D. Thomæ.* Quæ quidem Constitutiones approbatæ fuerunt in primâ generali Congregatione habitâ anno 1550. E vivis excessit sanctissimus Fundator versùs annum 1556, atque in ejus locum ad supremam Societatis præfecturam communibus votis vocatus est Didacus Laynes in Congregatione generali anni 1558. Illic, si fides Augustino Leblanc, tenendæ S. Thomæ doctrinæ lex, speciosæ interpretationis obtentu penitus concussa est. Ita quippe, additâ hâc clausulâ, statutum esse contendit: « Prælegetur etiam Magister Sen-

« tentiarum; sed si videretur temporis decursu
 « alius auctor studentibus utilior futurus, ut
 « si aliqua Summa vel liber theologiæ scholas-
 « ticæ conficeretur, qui his nostris tempori-
 « bus accommodatior videretur, gravi cum
 « consilio, et rebus diligenter expensis per
 « viros qui in universâ societate aptissimi exis-
 « timentur, cumque Præpositi generalis ap-
 « probatione, prælegi poterit. »

Ast è vestigio occurrit Theodorus Eleutherius, atque lib. 1 Hist. cap. 1, declarationem illam quæ ad marginem Constitutionum habetur, ab ipsomet S. Ignatio fuisse compositam, multis probat. 1º Illa ipsa generalis Congregatio an. 1588, titulo 5, decreto 78, ita disertè testatur; quin et addit codicem *Constitutionum et declarationum* manu propriâ S. fundatoris exaratum, coram Patribus congregatis fuisse prælectum, recognitumque. 2º Idem testantur quatuor sequentes Congregationes generales. 3º Etiam nunc in Bibliothecâ Societatis inter MSS. sancti Ignatii Romæ diligenter asservatur dictum declarationum autographum. Verba itaque ista, *Prælegetur etiam*, etc., quæ Congregationi an. 1588 tribuuntur ab historico, ipsissima sunt sancti fundatoris verba.

Postea decurrente tempore exoriuntur querelæ, Jesuitas avitam relinquere doctrinam, sectari novitatem, à sancti Thomæ sententiis deflectere, De his paternè monitus à Sixto V. Claudius Aquaviva Societatis præpositus generalis, ut rumoribus in die crescentibus promptius et efficaciter occurreret, celeberrimum illum edi curavit librum, cui titulus: *Ratio et institutio studiorum Societatis Jesu*; hoc in libro agitur de *opinionum delectu*, de stabiliendis scilicet aut rejiciendis in Societate opinionibus. Arduo huic ac perdifficili adornando operi, deputavit sex lectissimos theologos, Joannem Azorium ex Hispaniâ, Gasparum Gonzales è Lusitaniâ, Jacobum Tirium è Galliâ, ex Austriâ Petrum Buzæum, è Germaniâ Antonium Guisanum, ex Italiâ Stephanum Tuccium; nonnisi biennio post, anno scilicet 1586, lucem aspexit liber ille, huncque per provincias Societatis examinandum misit Aquaviva.

In hoc tractatu, inter præscriptas theologiæ professoribus regulas, hæc ordine quarta legitur: « In theologiâ doctrinam S. Th. ut ca-
 « vetur quartâ parte Constitutionum cap. 14;
 « nostri sequantur paucis exceptis, quæ licet
 « sint, aut videri possent esse S. Thomæ,
 « etc. » Tum quæ sint pauca illa, declaratur

his verbis: « Nostri itaque non cogantur de-
 « fendere.... secundas causas esse propriè et
 « univoce instrumenta Dei; et cum operantur,
 « Deum in illas primùm influere, aut eas mo-
 « vere. » Ibidem in præfatione ita legitur:
 « Visum nobis est statuere, ut nostri in theo-
 « logicâ facultate sequantur S. Th. doctrinam..
 « sed quia durum videbatur, ita S. Thomæ
 « nostros adstringere, ut ab eo nullâ in re li-
 « ceat recedere.... placuit liberum relinquere,
 « ut alios graves doctores sequi possent, qui
 « velint, in paucis quibusdam quæstionibus
 « quæ subjecto liberarum propositionum ca-
 « talogo continentur. » In eo autem catalogo
 sexaginta circiter Angelicæ doctrinæ quæstio-
 nes recensentur, quæ privatorum opinionationi-
 bus permittuntur.

Acceptis super dicto libro singularum provinciarum judiciis, quæ communius observata fuerant emendavit Claudius Generalis, trium ex supra nominatis, eum in finem usus operâ Azorii scilicet, Gonzales et Tuccii, atque anno 1594, eundem librum rursus per provincias misit denuò examinandum.

Hæc de re iterùm actum fuit in quintâ generali Congregatione an. 1594, sicque in eâ fuit statutum can. 9: « sequantur nostri doctores
 « in scholasticâ theologiâ doctrinam D. Thomæ,
 « juxta praxim in libro de ratione studiorum
 « ponendam, et à Patre Præposito generali
 « explicandam. »

Tandem impositam sibi à generali Congregatione provinciam, de ratione studiorum exponendâ, exsecutus est Præpositus generalis Aquaviva anno 1599, ita decernens: « Nostri
 « omninò in scholasticâ theologiâ S. Th. doc-
 « trinam, eumque ut doctorem proprium ha-
 « beant; ponantque in eo omnem operam ut
 « auditores erga illum quàm optime afficiantur.
 « Non sic tamen S. Th. doctrinæ adstricti esse
 « intelligantur, ut nullâ prorsus in re ab eo
 « recedere liceat; cum illi ipsi, qui se Tho-
 « mistas maximè profitentur, aliquando ab eo
 « recedant; nec arctius nostros S. Thomæ al-
 « ligare par sit, quàm Thomistas ipsos. » Hæc Aquaviva, simillima iis quæ quintâ Congregatio decreto 56 sanciverat anno 1594. Idem postea edixit Mutius Vitellesseus anno 1617.

Iis de ratione studiorum paulò fusiùs enarratis, quoniam illa velut fontem et dissidiorum originem traducunt Molinæ adversarii, nunc quæ Hispanicæ spectant controversias, cursim exponemus.

1º Anno 1581, Prudentius de Monte Major

Societatis Jesu theologus publicis apud Salmaticenses thesibus doctrinam de scientiâ mediâ propugnavit. Erat tunc Salmanticæ Dominicus Bannes celebris ex Ordine Prædicatorum, primariæ cathedræ moderator; hic visis Prudentii thesibus, statâ die eas disputando fervidè impugnavit, et è disputatione egressus sexdecim propositiones S. Inquisitionis Hispanicæ tribunali, suo et amicorum quorundam nomine denunciavit. Has sancti Officii commissarius damnavit, inquisito prius censorio doctorum Salmaticensium judicio? sed illas Prudentio de Monte Major non tribuit Inquisitor, et ipse Prudentius eas velut sibi proprias nusquàm agnovit: *non erant hæc propositiones*, inquit Antonius de Padilla Epist. ad card. Bellarm. die 28 junii 1600, *expressè in thesibus*; nihilominus tamen eas velut legitimâ thesium consecraria impugnavit Bannesius, reclamante licet Prudentio; unde postea scientiam mediam non secus ac ante Salmanticæ propugnârunt Societatis theologi. Atque hæc fuêre initia celeberrimorum dissidiorum quæ in Hispaniâ Prædicatorum Ordinem cum Societate commiserunt.

2º Anno 1588, Ludovicus Molina, Eborensis academiæ professor, primus è societate sancti Thomæ commentator, suum celebre edidit opus de concordia liberi arbitrii cum gratiæ donis, etc. Commentarium est ad nonnullos primæ partis D. Thomæ articulos, de divinâ scilicet præscientiâ, providentiâ, prædestinatione et reprobatione. Vix lucem videbat opus à Bartholomæo Ferreyra Dominicano approbatum, et statim varios expertum est hostes, præsertimque Bannesium. Hic paulò ante 13 propositiones de gratiâ et libero arbitrio, seu genuinam professorum Societatis doctrinam exprimentes, detulerat ad sacram Castellæ Inquisitionem, cui præerat eminentiss. card. Quiroga archiepiscopus Toletanus; atque à quæsitioribus obtinuerat, ut assertiones illæ doceri prohiberentur, donec essent accuratius discussæ. Easdem assertiones ad cardinalem archiducem Albertum supremum in Lusitaniâ judicem rursus detulit Bannesius, summâ asseveratione ipsi contestans has in libro Molinæ contineri; unde jussu cardinalis Salmanticam examinandus mittitur liber; subinde Banessii et aliorum Salmaticensium in librum Molinæ trimestres observationes in Lusitaniam perferuntur, quas viris peritissimis jussit communicari archidux. Maturo super his examine præmisso, omnibusque, quæ objecta

fuerant, cum Molinæ responsionibus ritè collatis, statuerunt censores, nihil in ejus libro censurâ dignum occurrere; quapropter solemni ac contradictorio generalis Inquisitionis Lusitaniæ judicio, accedente expresso archiducis consensu, tandem absolvitur Molinæ liber de concordia, sub initium julii an. 1589, ejusque promulgatio concessa. Hæc constant ex epistolis ipsiusmet archiducis Alberti cardinalis, supremi in Lusitaniâ Inquisitoris, diebus 12 et 26 aprilis 1599, imperatricis Mariæ die 14 novembris 1598, atque tandem Domini Joannis de Borgia 8 junii 1601, quæ quidem omnes directæ sunt ad summum pontificem Clementem VIII.

3º Istud Molinæ opus è Lusitaniâ ad Hispanos delatum, faventibus supremis Castellæ et Arragoniæ consiliis, publicæ luci datus fuit, approbantibus Hispanis duobus theologis petro Lopio de Montoya et Joanne Villa ei excutiendo præfectis. Ita colligitur ex supplici Molinæ libello ad archiducem Albertum. Hinc denuò suscitata in Hispaniis dissidia.

4º Æstuantibus interim hinc et inde animis ac vehementi suscitatâ ardore, anno 1594, die 5 martii in urbe Vallisoletanâ Antonius Padilla è Societate Jesu thesibus publicis Molinæ à Dominicanis hujus urbis læsi patrocinium suscepit. Insurrexere in illum Dominicani hujus urbis, tum vivâ voce, tum thesibus publicè propositis; et eò usque prorupit altercatio, ut propositiones excerptæ è Molina à Dominicanis, et è Bannesio à Societatis Patribus sanctæ Inquisitionis Hispanicæ tribunali denuntiatae fuerint. De his motibus Clementem VIII summum Pontificem certiore fecit supremus Inquisitionis moderator.

5º Nondum lato Inquisitionis judicio, ut crescentibus in dies per totam Hispaniam dissidiis occurreret summus pontifex, totius causæ cognitionem sibi reservavit circa initium julii ejusdem anni 1594, indicto primùm utrique parti silentio; posthâc permissâ disputatione, prohibitis tamen acrioribus notis ac censuris. Ita colligitur ex litteris nuntii apostolici in Hispaniâ Camilli Cajetani ad Provinciales Dominicanorum et Societatis Jesu, Madrito die 15 augusti an. 1594.

6º Altero Brevi dato die 10 januarii 1596, Molinæ causam ad se evocat Clemens VIII. Duplex ergo hic sedulò distinguenda Dominicanorum cum Patribus societatis controversia; generalis una, in quâ scilicet universus decertabat Ordo; hæc spectabat naturam auxiliorum

sufficientis et efficacis; altera, quæ primum fuit privata et specialis Molinæ et Bannesio, qui sua scripta ad sacram Inquisitionem mutuò detulerant, quæque postea generalis et totius Ordinis evasit. Priorem ad se accivit summus pontifex mense julio an. 1594, alteram verò, nonnisi decem et octo postea mensibus, scilicet mense januar. an. 1596.

7^o Anno 1597, die 25 octobris, sacra Hispaniæ Inquisitio instrumenta authentica ad controversiam de Auxiliis spectantia, tribus tomis distincta, direxit ad summum pontificem Clementem VIII. Primus tomus scripta Dominicanorum complectebatur. Secundus continebat instrumenta quibus utebantur Patres Societatis ad adstruendam suam doctrinam adversus Dominicanos. In tertio legebantur 12 censuræ et judicia quæ ex mandato S. Inquisitionis tulerant Universitates, et quidam episcopi ac doctores particulares. Inter has censuras tres erant Universitatum, Salmaticensis scilicet, Complutensis et Siguntinæ; quinque episcoporum; Doctorum quatuor. Ex iis nonnullæ favebant Molinianæ doctrinæ aliæ, ipsi adversabantur.

His munitis instrumentis, summus pontifex litem ordinari jussit, consultoribusque designatis, celebres præcepit inchoari Congregationes de Auxiliis, de quibus jam speciatim dicendum.

ARTICULUS II.

Congregationes de Auxiliis.

Anno 1590, supremum diem obierat Sixtus V. Ejus successores Urbanus VII, Gregorius XIV et Innocent IX, citius fato functi, ad sanctam Sedem evectus est anno 1592 Clemens VIII. Is est cujus jussu habitæ sunt celebres Congregationes, quæ de Auxiliis dictæ sunt, quia in illis exagitata potissimum fuit quæstio, de auxilio divinæ gratiæ.

Sub initium Novembris 1597, designati sunt à pontifice consultores octo qui Molinæ librum seorsim per sese expenderent; tum subinde mutuò conferrent, ac de eodem libro judicium ferrent. Horum nomina fuerunt hæc. D. Fr. Propertius Resta de Talleacotio, episcopus Geruntinensis et Cariatensis. D. Fr. Julius Sanctutius à Monte Filatrone, episcopus Agathensis. Hi duo ex Ordine Franciscanorum ad episcopatum evecti fuerant. D. Lelius Landus Suessanus, episcopus Neritonensis. Fr. Henricus Sylvius, vicarius apostolicus Ordinis Carmelitarum. Fr. Franciscus Brusius, procurator generalis Ordinis S. Francisci. Fr. Joannes Baptista

Plumbinus, procurator generalis Ordinis S. Augustini. Fr. Gregorius Nunnus Coronellus, ejusdem ordinis S. theologiæ doctor. D. Ludovicus de Creil, doctor Sorbonicus.

In horum numerum postea, absentibus Enrico Sylvio et Francisco Brusio supra nominatis, cooptati sunt. Fr. Jacobus le Bossu, ordinis S. Benedicti, doctor Sorbonicus. Fr. Joannes Antonius Bovius, magister regens collegii romani Carmelitarum. Fr. Hippolytus Masserius, Ordinis Serrorum, postea ad episcopatum Mentis Pelusii assumptus.

His præfecit pontifex eminentissimos cardinales Ludovicum Madrutium episcopum Tridertinum, qui concilio Trid. interfuerat, atque in ejus condendis canonibus plurimum allaboraverat, et Pompeium Arigonium. Apud unum ex dictis cardinalibus semel quâvis hebdomadâ convenire jussi sunt consultores.

Isthæc celeberrima congregatio integris novem annis et octo mensibus perduravit; à die scilicet 2 februarii anni 1598 ad 28 augusti 1607, atque in quinque epochas claritatis gratiâ distribui potest; quid autem præcipui in his contingerit paucis exponendum.

PRIMA EPOCHÆ. — Prima epocha extenditur à 2 februarii anni 1598 ad 15 martii ejusdem anni. Undecim complectitur Congregationes habitas coram selectis censoribus, præsidentibus Ludovico Madrutio et Pompeio Arigonensi.

Prima Congregatio celebrata fuit die 2 februarii; in eâ cardinalis Madrutius summi pontificis mandatum de expendendo Molinæ libro exposuit. Secunda, die 9 januarii; in eâ actum est de Molinæ scopo et principiis. Tertia, die 16 januarii; in eâ rursus actum de Molinæ principiis. Quarta, 25 januarii; quesitum fuit de illo principio, utrum concursus Dei generalis, sit « influxus in causas secundas, an potius cum « causis in earum effectus; et qualis sit Ludovicus Molinæ de hac re sententia. « Quinta, januarii; quesitum, « utrum opinio Molinæ de « modo influendi per concursum Dei generalem « in actus liberi arbitrii, sit aliquâ censurâ digna. » Sexta, die 6 februarii; expensum fuit quid sentiret Molina de viribus liberi arbitrii cum solo concursu generali ad actus fidei, spei et charitatis. Septima, die 13 februarii, an mereatur censuram opinio Molinæ de actibus supradictis. Octava, die 20 februarii; doctrina Molinæ de dono perseverantiæ discussa fuit. Nona, die 27 februarii; ejusdem doctrina de efficaciâ gratiæ discussa fuit. Decima, die 6 martii; proposita quæstio, de opinione Molinæ

circa scientiam futurorum contingentium. Undecima, die 15 martii, de ejusdem opinione circa prædestinationem.

Posthæc, referente Augustino Leblanc, nec dissentiente Theodoro Eleutherio, decretorium consultorum judicium, his verbis pronuntiatum est: « Censemus è re catholicâ esse, ut liber « qui inscribitur *de Concordiâ liberi arbitrii cum « gratiæ donis*, etc., compositus à Ludovico « Molina et ejus doctrina omnino prohibeatur; « atque idem censemus de Commentariis ejus « in primam partem sancti Thomæ, » etc.

Circa dictum de Molinæ libro consultorum judicium, Theodorus Eleutherius observat 1^o, judicium illud non fuisse definitivum S. Inquisitionis judicium, sed meram duntaxat relationem et expositionem doctrinalem, sacro deinde sistendam tribunali, ut eâ expensâ, verorum tandem judicium suffragiis ad canonicam definitionem procederetur. Theologi enim, inquit, pro causâ Molinæ deputati, consultores, non iudices fuerunt, litemque instruere, non dirimere potuerunt... Observat 2^o, in hoc primo examine duos ex dictis consultoribus, Henricum Sylvium et Antonium Bovium Carmelitas, doctrinam Molinæ per omnia probasse... Observat 3^o, miratum pontificem tam citò de re gravissimâ dictam à consultoribus sententiam, librum maturius expendendum jussisse.

Undè in executionem decreti pontificii, versùs medium aprilis suas Congregationes resumpserunt consultores; ad 22 usque novembris singulis septimanis convenère, atque re iterùm expensâ priori suo judicio standum censuerunt, quapropter Coronello Congregationis secretario mandant ut censuram ordinet, cui postmodum die 12 martii 1599 subscripsère.

Interim 26 novembris 1598, Romam ex Hispaniâ appulerunt Ferdinandus Bastida et Christophorus Cobos Molinæ causam defensuri. Sanctitati supplicârunt Patres Societatis, ut sibi coram arbitris tantùm cum Patribus Dominicani conferre liceret, si fortè totum istud negotium amicè componi posset; votis annuit S. pontifex, iterùmque eminentissimum Madrutium disputationis moderatorem designat. Hinc novæ Congregationes quarum ordinem hic indicabimus.

SECUNDA EPOCHÆ. — Secunda epocha continet Congregationes, seu veriùs amicas collationes à die 22 februarii an. 1599 ad diem 20 aprilis 1600; octo omnino numerantur. Habitæ sunt præside primùm solo cardinali Madrutio, cui postea adjuncti sunt cardinales Asculanus et

Bellarminus, ille ex Ordine Prædicatorum, iste è Societate. Vocati sunt ex parte Dominicanorum, magister generalis Hieronymus Xavier, Didacus Alvares, Raphael à Ripà; ex parte verò patrum societatis, Præpositus generalis Claudius Aquaviva, Michael Vasquez, Petrus Arrubal.

In primâ collatione habitâ die 22 februarii an. 1599, cardinalis Madrutius brevi sermone exposuit seriò cogitare S. pontificem de componendis doctrinæ dissidiis inter utrumque ordinem; ad id opus esse, ipsum verum dissensionis cardinem clarè discernere; quare injunxit Patribus tam Dominicani quam Societatis, ut quamprimùm tria pararent scripta, quorum primo propriam sententiam dilucidè exponerent, altero aperirent quid in adversariorum sententiâ reprehenderent, postremò continerentur præcipua rationum momenta, tum ad adstruendam propriam sententiam, tum ad oppositam impugnandam. Post hæc dimissa est à cardinali prima hæc Congregatio.

In secundâ collatione die ultimâ februarii ejusdem anni 1599, apud card. Madrutium convenerunt prælaudati generales cum sociis. Sex Molinæ propositiones designavit magister generalis Prædicatorum, quas Ordinis sui theologis erroneas videri asseruit. Causam Molinæ tunc non agi reposuit Societatis præpositus, atque propositiones æquè censurâ dignas in Bannesio reperiri; subjunxit, velle ac jubere summum pontificem, ut de auxiliorum efficacîâ primùm tractetur; cæterum paratum se de Molinæ sententiâ dicere, cùm primùm de naturâ auxiliorum ipsi dixissent. Collationem absolvit card. Madrutius.

Inter hæc die 4 martii congregatis coram pontifice cardinalibus sancti Officii, Madrutius retulit quid in superioribus conventibus gestum fuisset, quidve postularent Patres Dominicani, quid verò Patres Societatis. Dedit pontifex duos alios collationis arbitros, cardinales Bernarium et Bellarminum, qui unâ cum Madrutio sequentibus colloquiis præessent, atque dissidentes partes ad unitatem et concordiam adducere conarentur.

In tertiâ collocatione habitâ die 29 martii 1599, convenerunt coram tribus cardinalibus utriusque Ordinis generales ac theologi. Card. Madrutius octo propositiones ex apologiâ Dominicanorum desumptas, utrique parti expendas proposuit, ut et doctrina Molinæ discuteretur, et quid utraque pars de gratiâ sentiret, aperiretur. Sex itidem quæstionum capita de

gratiâ et libero arbitrio proposuit Bellarminus; ast quæstionibus Bellarmini respondere detrectârunt Dominicani, quin prius Madrutii propositionibus respondissent Jesuitæ.

Novam hanc incidentem controversiam coram pontifice exposuit Madrutius in Congregatione sancti Officii ad diem 15 aprilis. Auditis omnibus, petitioni Patrum Prædicatorum annuit pontifex; jussit ergo Patres Societatis prius respondere ad quæsitâ Dominicanorum, tum ipsos Dominicanos quæsitis Patrum Societatis satisfacturos.

Itaque in quinque sequentibus collationibus, tum hoc anno 1599, tum altero 1600, usque ad 20 aprilis habitis, propositiones octo, quas Dominicani obtulerant, contradictoriè expensæ fuerunt. communicatis hinc et inde cardinali Madrutio memorialibus, à Patribus Societatis contra physicam prædeterminationem, à Dominicanis verò contra doctrinam Molinæ.

Interim moritur cardinalis Madrutius 20 aprilis 1600, sicque abruptum institutæ collationes; novumque instauratur libri Molinæ examen, seu potius primi cognitio.

TERTIA EPOCHA. — Complectitur Congregationes celebratas à die 27 aprilis an. 1600 ad 20 martii 1602: septuaginta septem habitæ sunt, præside primum Propertio Restâ, postea verò Julio Sanctutius.

Solutis morte card. Madrutii amicis partium collationibus, Gregorius Coronellus prolixior libri Molinæ *de Concordiâ* censuram à se elaboratam Clementi VIII obtulit, adversus illam quæ jubente pontifice Molinæ procuratoribus communicata fuerat. Illicò communibus libellis plurima exceperunt iidem procuratores; intercessit et præpositus generalis Societatis, supplici libello suæ Sanctitati exponens tredecim assertiones per summam injuriam Molinæ affingi, locis allegatis in quibus Molinam contrarium disertè scribere contendebat.

Talibus S. pontifex motus consuetos Molinæ censors adsciri jussit die 25 aprilis 1600, iisque tria injunxit, 1^o ut maturiori examine adornatam à Coronello Congregationis secretario censuram recognoscerent; 2^o ut eam semel cognitam, in brevior formam contraherent, propriis indicatis Molinæ verbis; 3^o ut illam, si in priori judicio persisterent, propriis nominibus subscriptam ad se deferrent.

His ita constitutis, convenère consultores die 24 aprilis, atque in 20 Congregationibus usque ad diem 5 juli habitis, præside Propertio Restâ episcopo Cariathensi, post variam censuræ re-

censionem castigationemque, eam in longe brevior formam redegerunt, quâ 20 duntaxat Molinæ propositiones notabantur, cum multò plures damnarentur in prolixâ Coronelli censurâ, scilicet 60 circiter, aut, ut aliis placet 90. Consultores, uno aut altero exceptis, censura subscripserunt die 9 septembris, eamque ad summum pontificem 12 octobris detulère. Molinæ procuratores alique ejus defensores, re comperit, rursùm conqueruntur de consultoribus, atque oblati pontifici libellis suppliciter postulant dari sibi iudices, qui suas adversus ista censorum judicia exceptiones audirent. Hinc novæ institutæ Congregationes à pontifice. A die 25 januarii anni 1601 ad 10 novembris 47, habitæ sunt, quibus primum præfuit Propertius Resta, sed post 24 morbo atque paulò post morte correptus, cæteris præfuit Julius Sanctutius de Monte Filatrano, et ipse quoque episcopus et consultor. Aduère supradicti consultores; excepto Bruso, in cujus locum subiecti sunt Joannes de Rada et Hieronymus Palenterius, ambo ex Ordine sancti Francisci. Iis in Congregationibus auditæ sunt ambæ partes ex mandato S. pontificis Clementis VIII; adfuerunt disputaturi ex parte Dominicanorum, Didacus Alvares et Thomas de Lemos; ex parte verò Societatis, Petrus Arrubal, Christophorus Cobos; et Gregorius de Valentia.

Dictam in 20 Molinæ propositiones censuram, exceptis Joanne Plumbino et Antonio Bovio, probârunt adhuc consultores; huicque subscripsère die 19 Novembris an. 1601, eamque die 5 decembris S. pontifici exhibent. Verum nec adhuc sedatæ fuerunt de consultoribus, eorumque censurâ querelæ. Iterum conquesti sunt Molinæ defensores, se nondum satis esse auditos, sufficienter examinatam non fuisse Molinæ doctrinam, genuinum ipsius sensum assecutos non fuisse censors, etc. Has et alias exceptionis causas fusè prosecuti sunt Societatis Patres in libello supplici universæ Societatis nomini Clemente VIII tunc temporis oblato. His motus pontifex petitioni annuit, atque Molinæ doctrinam ad novum examen revocari jussit. Cæterum novum istud examen coram suâ Sanctitate, auditis utriusque partis theologis, habendum esse edixit, ut scilicet rem totam per se ipse cognosceret, causâque contradictoriè discussâ, pronuntiandæ juridicæ sententiæ viam sibi pararet.

EPOCHA QUARTA. — Celeberrima est isthæc epocha; quartam complectitur causæ cognitio

nem ab anno 1602 ad 22 januarii anni 1603, coram Clemente VIII sexaginta octo congregationibus habitam.

Præfuit his congregationibus Clemens ipse papa VIII; assidebant duo eminentiss. cardinales supremi inquisitores, Camillus Burghesius, qui postea ad Petri cathedram sublimatus fuit Pauli V nomine, et Pompeius Arigonius. Sextæ et sequentibus congregationibus, præter dictos cardinales Burghesium et Arigonium, interfuere etiam cardinales Asculanus, Pinellus, Sfondratus de Avila. Hæc erat tota congregatio sancti Officii, uno excepto card. Bellarmino, qui jam antea Capuam accesserat, cui diœcesi à S. pontifice præfectus fuerat. Ad 55 Congregationem vocati sunt præterea cardinales de Givry, Taberna, de Monopoli. Ad 65 card. de Bufalo. Ad 67, card. du Perron. Ad 69, cardinales Aldobrandinus, Bellarminus, Blanchettus. Ad 82, card. Zapara.

Censores episcopi quinque adfuerunt : Lombardus archiepiscopus Armachanus, Lælius Suessanus episcopus Neritonensis, Julius Sanctutius episcopus sanctæ Agathæ, Hippolytus Masserius episcopus Montis Pelusii, Basilus Pignatellus episcopus Aquilanus. Censores theologi novem : duo doctores Sorbonici, Ludovicus de Creil, Jacobus le Bossu; duo ex ordine sancti Augustini, Joannes Plumbinus, et Greg. Coronellus; duo ex Ordine sancti Francisci, Joannes de Rada, et Hieronymus Palanterius; Anastasius Brixienus Ordinis sancti Benedicti, Antonius Bovius Carmelita, et Anselmus de Monopoli procurator Generalis Capucinatorum, postea S. R. E. cardinalis.

Ex parte Prædicatorum interfuere, Hieronymus Xaviere magister generalis Ordinis, Didacus Alvares, et Thomas de Lemos; ex parte societatis, Claudius Aquaviva, Præpositus generalis, Greg. de Valentia, Petrus Arrubal, Ferdinandus Bastida, Joannes de Salas.

Is fuit Congregationum ordo. Duodecim scripta exarari curaverat R. pontifex Clemens VIII, ad materiam Congregationibus subministrandam; discutienda Molinianæ doctrinæ capita complectebantur hæc scripta; ex iis, prout opportunum videbatur S. pontifici, expendendæ postmodum in congregationibus propositiones extrahebantur, atque à secretariis ad consultores, Ordinum generales, et theologos pro utrâque parte disputaturos, aliquot ante Congregationem diebus deferebantur. 2º Sua utrique theologi argumenta et responsa parabant, quæ designatâ die in publicis Congregationibus de

scripto recitabant; quæcumque verò in transcurso disputationis utrinque opponebantur, urgebantur aut excipiebantur, ex tempore resolvere conabantur adversæ partes. 3º. Finitâ disputatione egrediebantur foras generales cum sociis; tuncque in eadem Congregatione recensitis coram pontifice et cardinalibus Inquisitoribus Consultorum suffragiis, ferebatur censura, sud gravissimis pœnis pontifice secretum omnibus præcipiente.

Atque istud tertium ad sextam usque duntaxat Congregationem servatum fuit; namque post Congregationem sextam usque ad ultimam, unâ cum disputatione theologorum dissolvebatur tota Congregatio, dieque proximè sequenti censores designati ad censuram quæstionis die præcedenti discussæ conveniebant.

His de dignitate et ordine harumce Congregationum præmissis, jam quid præcipui in singulis actum sit, compendio hic exhibemus.

Prima Congregatio habita fuit die 20 martii 1602. In eâ 1º, expendendæ ac judicandæ causæ dignitatem exponit Clemens VIII; 2º duos instituit Congregationis Secretarios, Gregorium Coronellum Ordinis S. Augustini, et Anastasium Brixiensem Ordinis sancti benedicti; 3º disputant Alvares et Valentia. Secunda nonnisi elapsis tribus postea mensibus cum dimidio celebrata fuit, 8 julii ejusdem anni. In eâ et subsequentibus Congregationibus, loco Alvaresii accessit Thomas de Lemos disputaturus contra Valentiam, aliosque Molinæ defensores, Tertia habita fuit die 9 julii ejusdem anni 1602. Quarta, die 22 julii. Quinta, die 23 ejusdem mensis. Sexta, die 6 augusti. Septima, die 17. Octava, die 20. Nona, die 2 septembris. Decima, die 3 ejusdem mensis.

In his Congregationibus, jubente S. pontifice, doctrina Molinæ circa vires liberi arbitrii ad septem propositiones redacta, expensa fuit, et cum doctrinâ sancti Augustini collata Doctrinam Molinæ impugnavit Lemos; eam verò quoad omnia capita à censurâ saltem vindicare aggressus est Greg. de Valentia.

Circa hæc tempora contigere supremus morbus et mors Gregorii de Valentia. Quæ de potenti vertigine, quam passus fuit coram Clemente VIII ab Augustino Leblanc narrantur, veluti meram fabulam sugillat Theodorus Eleutherius, eâ præsertim de causâ, quòd Secretarii Congregationum qui minutiora quæque dicta vel facta conscripserunt, imò ne ipse quidem insignis Jesuitarum adversarius Pegna,

nihil de eo meminerunt. Valentiae suffectus est Petrus Arrubal.

Undecima Congregatio habita est die 30 septembris ejusdem anni 1602. Duodecima postridie celebrata fuit die prima octobris. Disceptationis in hac et superiori Congregatione argumentum, hoc erat : « An in libris sancti Augustini legatur constitutam esse à Deo legem infallibilem cum Christo Filio suo, ut quoties homo solis naturae viribus fecerit totum quod in se est, Deus illi tribuat gratiam. » Decima tertia habita fuit die 14 novembris 1602. Decima quarta, die 19 ejusdem mensis et anni. Decima quinta, die 9 decembris. Decima sexta, die 10 decembris. Decima septima, die 16 ejusdem mensis. Decima octava et ultima anni 1602, incidit in diem 17 decembris. Decima nona habita fuit die 20 januarii 1603. Vigesima, die 21 januarii. Vigesima prima, die 27 ejusdem mensis. Vigesima secunda, die 28. Vigesima tertia, die 17 februarii. Vigesima quarta, die 18. Vigesima quinta, die 14 aprilis. Vigesima sexta, die 13. Vigesima septima, die 5 maii. Vigesima octava, die 6.

In his sexdecim postremis Congregationibus doctrina Molinae cum Cassiani doctrinam collata fuit ; scilicet decima tertia Congregatione propositis jussu S. pontificis 14 articulis, sigillatim postmodum quaesitum fuit an in his Molina cum Cassiano conveniret.

Vigesima nona celebrata fuit die 9 junii ejusdem anni 1603. Trigesima, die 10 junii. Trigesima prima, die 25 ejusdem mensis. Trigesima secunda, die 24. Trigesima tertia, die 10 novembris 1603 ; in ea loco Arrubal disputaturus accessit Ferdinandus de Bastida. Trigesima quarta, die 11 novembris. Trigesima quinta, die 18 novembris. Trigesima sexta, die 19 novembris. Trigesima septima, die 25. Trigesima octava, die 26. Trigesima nona, die 8 decembris. Quadragesima et ultima hujus anni 1603. Congregatio celebrata fuit die 9 ejusdem mensis decembris.

Anno sequenti 1604, viginti quatuor habitae sunt Congregationes eodem praesente S. pontifice Clemente VIII et anno 1605 usque ad 22 januarii inclusive, rursus quatuor ; sicque usque ad mortem Clementis VIII, quae contigit die 4 maii ejusdem anni, universim 68 coram S. pontifice solennes celebratae sunt Congregationes ; triginta septem duntaxat numerat Theodorus Eleutherius. In decem postremis Congregationibus agitata fuit celeberrima de scientia media disputatio. Tria sigillatim excu-

tienda suscepit Ferdinandus de Bastida. Primum an omnia futura libera conditionata à Deo cognoscantur. Secundum, an cognoscantur certa et infallibili cognitione. Tertium an haec certa et infallibilis cognitio in Deo sit ante absolutum divinae voluntatis decretum. Observavit Lemos in hoc uno tertio verti cardinem difficultatis quae circa praesens caput Dominicanos cum Molinae defensoribus committit.

EPOCHA QUINTA.—Ultima haec epocha includit Congregationes sub Paulo V celebratas à die 14 septembris anni 1603 ad diem 28 augusti 1606, quo demum tempore solutae sunt famosae illae Congregationes.

Clemente VIII die 4 martii 1605 è vivis sublato, ad supremum apostolicae Sedis fastigium sublimatus fuit 1 aprilis sequentis Alexander Medicis, dictus Leo XI, isque citius diem extremum clausit, 25 ejusdem mensis.

Huic sub nomine Pauli V, proximè successit die 5 maii Camillus Burgesius, qui tot illis, quibus interfuerat, celebratis coram Clemente VIII Congregationibus, perfectam controversiae discutiendae ac definiendae cognitionem hauserat. Exploratis per quatuor ferme primos pontificatus sui menses doctorum consiliis, variisque supplicibus libellis acceptis ; tandem seriò cogitavit de resumenda causa, novisque instituendis Congregationibus. Septemdecim coram ipso habitae sunt, in quibus ex professo agitata est controversia de gratia ex sese efficaci et physicè praedeterminante.

Prima itaque Congregatio coram Paulo V celebrata fuit die 14 septembris an. 1603. In ea, 1º quae hactenus in praesenti causa gesta fuerant compendio retulit Coronellus Congregationis secretarius. 2º Actum de modo procedendi in isto negotio. 3º Decrevit pontifex agendum de scripto in 15 capita diviso, quod pro ultimae concertationis argumento partibus utrinque disputaturis communicari jusserat Clemens VIII, quodque manu propria subscripserat, in haec verba : « An ista sit doctrina sancti Augustini in materia gratiae. Clemens VIII papa pro proxima Congregatione. » Secunda habita fuit die 20 septembris ; actum de dicto scripto in 15 articulos distributo. Primus in ordine dixit Ferdinandus de Bastida ; genuinam sancti Augustini doctrinam iis 5 articulis contineri fassus est, quinto duntaxat excepto, qui sic se habet : « Haec gratia habet suam efficaciam ab omnipotentia Dei, et à domino quod sua divina Majestas habet in voluntate hominum, sicut in caetera quae sub coelo

sunt.) Bastidam excepit Thomas de Lemos, scripti auctoritatem plurimum commendavit, illudque secundum omnes articulos absolutissimum esse Augustinianæ doctrinæ compendium demonstrare aggressus est. Incubuit potissimum in quinto articulo, quem à germanâ sancti Augustini doctrinâ omnino alienum esse pronuntiaverat Bastida, propter particulam *sicut*, quæ ipsi videbatur indicare similitudinem inter modum quo Deus movet voluntatem, et modum quo movet cætera quæ sub cælo sunt. Tertia, die 21 septembris; suum de dictis articulis iudicium proferunt Consultores. Quarta, die 12 octobris in eâ generatim actum de gratiâ ex se efficaci et prædeterminante. Disputationis argumentum utriusque partis theologi transmissum, in hæc verba conceptum erat: « An Deus suâ efficaci gratiâ moveat hominis voluntatem ad actus liberos bonos, non solum interius suadendo, invitando, excitando, aut aliter moraliter attrahendo; sed etiam verè et activè propriè, salvâ tamen humanâ libertate? et an talis efficax gratia convenienter ab aliquibus scholasticis, physicè prædeterminare dicatur? » Quinta, die 15 octobris; latum de propositâ quæstione Censorum iudicium. Sexta, die 26 octobris; de gratiâ ex se efficaci speciatim agitur, et quidem ex sacris Scripturis. Septima, die 9 novembris; actum de eadem gratiâ ex se efficaci, ex mente conciliorum, ac præsertim concilii Tridentini. Octava, die 22 novembris; actum de gratiâ efficaci, ex mente sancti Augustini. Nona, die 29 novembris; de tribus superioribus disputationibus iudicium pronuntiant Consultores. Decima, et ultima hujus anni 1605, habita fuit die 14 decembris; actum fuit de gratiâ ex se efficaci, ex sanctis Patribus, tum græcis, tum latinis. Undecima, 3 januarii 1606, latum censorum iudicium. Duodecima, die 10 januarii; de gratiâ ex se efficaci cum Calvinii erroribus collatâ disputatum fuit. Decima tertia, die 25 januarii; actum de eadem gratiâ efficaci, ex rationibus theologicis. Quartadecima, 1 februarii, Censores suam dixere sententiam. Decima quinta, die 15 februarii; iterum actum de gratiâ efficaci, ex S. Thomâ. Decima sexta, die 22 ejusdem mensis; rursus de eadem, ex doctoribus scholasticis. Decima septima, die 1 martii; de duabus præcedentibus disputationibus judicant Consultores.

Hic fuit finis solemniū illarum Congregationum, in quibus Consultores auditis prius hinc et inde theologorum momentis censorium

iudicium pronuntiârunt; patet autem præter tot congressus et collationes quibus per quatuor et amplius annos absente summo pontifice ventilatæ sunt arduæ ac difficiles de auxiliis quæstiones; insuper 85 coram Clemente VIII et Paulo V solemnes ac publicas de eodem argumento celebratas fuisse Congregationes.

Quid porrò supradicti summi pontifices pronuntiaverint; quid etiam eminentiss. cardinales de re totâ judicaverint; quid senserint deputati à sanctâ Sede Consultores; in quam denique partem inclinaverint celeberrimæ orbis christiani acadiemiæ, ex dicendis articulo sequenti planum fiet.

ARTICULUS III.

Exitus Congregationum.

Absolutis disputationibus R. pontifex Paulus V voluit ut Consultores separatim, ac nulla inter sese habitâ consultatione, hæc scriptis mandarent, 1^o *quid fide in hac de libero et arbitrio ac gratiâ efficaci materiâ tenendum esset; quid damnandum, quæve ratione; quâ parte ab hæreticis Catholicis differant.* Tertium adjicit historicus Leblanc lib. 4, cap. 15, *quis modus in edendo pontificio diplomate servari posset.* Ut autem secretò omnia hæc peragerentur injunxit pontifex, ne, inquit, iudicia et vota consultorum quæ nullo modo divulganda censemus, alicui possent innotescere. In executionem pontificii mandati sex fermè menses consumpsere Consultores, ab initio scilicet martii 1606, ad finem augusti; quo tempore uniuscujusque iudicia propriis sigillis munita suæ Sanctitati data sunt. Uno excepto Antonio Bivio, cæterorum omnium concurs fuit, inquit idem historicus, de damnandis Molinæ opinionibus sententia.

Jussit posthâc S. pontifex, nequid ultra pro rei gravitate desiderari posset, pergit Augustinus Leblanc, ut Consultores convenirent simul, atque doctrinam pontificio diplomate sancientiam, quâ majori posset perspicuitate ac brevitate pararent; iisque archiepiscopi Armachani ædes designavit, ubi extremæ illæ collationes haberentur. Novies convenère integro mense, nempe à die 19 octobris ad diem 19 novembris ejusdem anni 1606, atque in eadem de damnandis propositionibus opinione firmi steterunt.

Notatas propositiones, nec satis distinctè dispositas, nec satis clarè ac breviter expressas pro bullæ pontificiæ conditione, judicavit Paulus V; eas ergo, inquit prælaudatus histo-

ricus, denuò expendi, distinctiorique methodo ordinari jussit. In id integris octo mensibus insudatum, ad finem scilicet julii anni sequentis; sicque recognitæ propositiones, jubente pontifice, cardinalibus qui Congregationibus interfuerant, exhibitæ sunt, de iis postmodum constituto tempore judicium laturi.

Iis porrò peractis, eosdem eminentissimos cardinales ad hujusce causæ cognitionem adscitos, convocavit Paulus V, die 28 augusti anni 1607, et inquisivit num expediret ultimum præsentī controversiæ finem imponere. Quid in hac omnium ultimā Congregatione actum, quidvè conclusum fuerit à pontifice et cardinalibus, servato inviolabilis silentii secreto, manet adhuc ignotum, nec ullis monumentis certò resciri potest. « Quid in hac Congregatione deliberârunt » (pontifex et Cardinales) verba sunt abbatis Leblanc, « ex Coronelli commentariis rescire non possumus... Fuêre qui dicerent pontificem et quinque cardinales pro apostolicæ definitionis promulgatione pronuntiâsse, quatuor intercessisse. Verùm quid certò rei fuerit probavit eventus; Paulus enim vocatis post diem tertium præpositis ordinem, litem omnem dato fiduciario rescripto in suspenso posuit. » Eo in decreto S. pontifex 1º utrique parti permisit propriam defendere ac propugnare sententiam; 2º prohibuit alterutram hæreseos aut alterius censuræ notâ insimulare, donec aliter à sanctâ Sede definiretur; 3º ab eodem pontifice cautum paulò post, ne circa hanc materiam ullus typis mandaretur liber absque sanctæ Sedis licentiâ. Et hic fuit Congregationum de Auxiliis exitus.

Tria gravissimi momenti occurrunt hic expendenda, quæ quidem totidem quæsitis paucis discutiemus.

Quæres itaque 1º, an finitis disputationibus de Auxiliis sancitum fuerit apostolicum judicium, atque lata in Molinæ doctrinam censura. Contendunt nonnulli cum historico Leblanc, lib. 4 de Auxil. cap. 13 et sequent., 1º absolutis die primâ martii 1606, Consultorum Congregationibus, rem totam cardinalium consilio commissam fuisse die 8 ejusdem mensis martii; num scilicet expediret ut decretorio sanctæ Sedis judicio finiretur controversia; atque à duodecim cardinalibus qui huic aderant Congregationi, decem pro ferendâ definitione pontificiâ pronuntiâsse; duos verò intercessisse, Perronium videlicet ac Bellarminum. 2º Paulum V. majoris partis cardinalium suffragia secutum, deli-

neandæ bullæ pontificiæ curam Consultoribus commississe, quam illi, ut mox notavimus, diligentī studio elaboratam S. pontifici circa finem julii anni sequent. 1607, obtulerunt; cujus transumpta ad cardinales in Congregationem Auxiliorum adscitos deferri voluit pontifex ut et ipsi constituto tempore sententiam dicerent. 3º Instructo sancitoque judicio, de solemnī promulgatione actum esse; cum in finem eosdem eminent. card. denuò convocatos fuisset die 28, augusti anni 1607. E duodecim, qui superioris anni congregationi interfuerant, novem hic aderant; quinque cum pontifice cardinales pro apostolicæ definitionis promulgatione pronuntiaverant, quatuor intercessere. Unde citato lib. de Auxiliis cap. 19, affirmatè concludit idem historicus, « diploma confectum... bullam paratam.... judicium sancitum, solemneque defuisse promulgationis sollemnitate; adeò ut profectò timendum Jesuitis sit ne ex sacris Vaticanis tabulis erutum Pauli V diploma Pontificium, successorum aliquis, nullo alio instructo examine, denuntiet. »

Alii è contra cum Theodoro Eleutherio lib. 6 de Auxil. cap. 25, docent 1º finitis de gratiæ auxiliis disputationibus, unicam tantum habitam fuisse die 28 augusti 1607, coram pontifice cardinalium Congregationem, servato inviolabilis silentii secreto.... 2º Bullam Pauli V, speciosè ab adversariis jactatam, prorsus esse mentitiā; nihil aliud esse quàm rudem adhuc et minùs digestam bullæ ideam à Consultoribus proprio Marte et absque ullo pontificis jussu efformatam.... 3º Quidquid sit de prætensâ illâ Pauli V bullâ, eam certè à pontifice et cardinalibus nusquàm fuisse admissam aut probatam, imò magis neglectam atque penitus explosam ac rejectam.

Tertium istud, quod caput est, et in quo versatur difficultatis cardo, multis probant hujusce sententiæ defensores. 1º Ex ipsis rescripti verbis, quod post diem tertium ab ultimâ cardinalium Congregatione, communicari jussit Paulus V præpositis Dominicanorum et Jesuitarum; eo in decreto nullatenus significat S. pontifex sententiam jam à se latam, iunctumque judicium, sed ait duntaxat, « se suo tempore editurum declarationem ac determinationem suam; » severè interim cavet, « ne quis partem alteram qualificare, aut censuræ rare præsumat. » Ergo, etc.

2º Ex communi Epistolâ regii Hispaniarum Oratoris, Francisci Pegna, et Th. de Lemos Romæ scriptâ die 8 januarii 1608, ad Hispa-

nos episcopos, Inquisitores, cæterosque viros religiosos. In eâ sic legitur: « Certissimum est, « circa auxiliorum controversiam, nihil à S. « D. N. definitum esse; imò post reservatam « sibi determinationem, eam etiamnum animo « meditatur et tractat. » Nihil certè disertius ut commentitia ostendatur prætensa hanc in rem Pauli V bulla. Dictam Epistolam de verbo ad verbum exscribit Aug. Leblanc lib. 4 de Auxil. cap. 20, hancque semel et iterum legisse Paulum V, et in eum quo extat modum emendasse, ibidem testatur.

3^o Quinquennio post solutas Congregationes anno 1612, Patres Dominicani pro controversiæ definitione libellum supplicem suæ Sanctitati obtulerunt; in eo altum de latâ bullâ, sancto diplomate, silentium; cum tamen circumstantiæ loci et temporis postularent, ut illius, si quod extitisset, mentio fieret.

4^o Alvares, Gonzales, Nazarius, Cabezudo, Pegna, aliique Jesuitarum æmuli, qui post finitas proximè Congregationes scripserunt, quique minutissima recensent quæ in doctrinæ Dominicanorum commendationem utumque conducere existimabant, prædictæ bullæ nullatenus meminerunt; nonnisi elapsis quadraginta et ampliùs annis de eâ mentio habita est; cum scilicet Paulus V adscitque in Congregationem Auxiliorum cardinales et Consultores omnes è vivis excessissent. Hinc certè exurgit non leve suppositionis præjudicium.

5^o Ut finitis disputationibus sancitum fuisse pontificium diploma demonstretur, non satis est ostendere Consultores ideam bullæ efformasse; ostendendum foret insuper papam et cardinales instructam hanc bullam approbasse ac confirmasse; ut enim notum est, in romanis Congregationibus Consultorum officium est litem instruere, non dirimere; vocem habent consultativam, non decisivam; consilarii sunt; non verò iudices, eo ferè modo quo in supremis curiis advocati consultores; porrò nullo authentico monumento constare potest pontificem et cardinales elaboratam à Consultoribus bullæ ideam approbasse; quid enim in ultimâ cardinalium Congregatione conclusum fuerit, servato inviolabili secreto, nulli unquam revelatum fuit, *neque id, ipso fatente abbate Leblanc, ex Coronelli commentariis rescire possumus*; ergo, etc. Et verò, ipso historico teste, voluit S. pontifex: *ut secretò omnia peragerentur, sub penâ excommunicationis*; bulla ergo, si quæ lata fuit, omninò mansit occulta; ac proinde illa quæ inter Coronelli scripta refer-

tur, tanquàm pontificium diploma immeritò obtruditur.

6^o Innocent. X solemnè decreto 1654, de quo deinceps, pronuntiat « autographo assertæ « Constitutionis Pauli V, aliisque assertis actis « Francisci Pegnæ, Fr. Thomæ de Lemos, » etc., quibus prædictæ bullæ historia superstruitur, « nullam esse omninò fidem adhibendam; » ergo, etc.

7^o Esto sancitum fuerit pontificium diploma, ast quâ tandem ratione extundi poterit, inquit Eleutherius, potius Jesuitis quàm Dominicanis fuisse adversum? Equidem præjudicium erat contra Molinam, consultorum suffragium; verùm, pergit idem historicus, 1^o præterquàm quòd de his Consultoribus multùm et pluries conquesti sunt Societatis Patres in libellis supplicibus Clementi VIII et Paulo V oblatis; promiserat S. pontifex controversiam non ex horum iudicio, sed ex supremâ Sedis apostolicæ auctoritate, auditis utrinque partibus esse finiendam. 2^o Consultorum suffragium non fuit omninò concors; sæpè à pontificibus Clemente VIII et Paulo V, ad incudem remissum, sæpè et notabiliter variatum, semper cum quâdam præproperâ festinatione latum. 3^o Favebant Jesuitis contra Dominicanos, ut mox dicemus, plerarumque academiarum Hispaniæ, Italiæ, Germaniæ, etc., sancita ac sacra Congregationi submissa iudicia.

Jam verò si tandem latum supponatur pontificium diploma, quis certò affirmare possit, Paulum V Consultorum suffragia tot celeberrimarum academiarum iudicio prætulisse? Perperam ergo assertivè pronuntiat historicus Leblanc, iudicium sancitum fuisse cui sola desit promulgatio; « adeò ut profectò timendum « Jesuitis sit, ne ex sacris Vaticani tabulis erutum, Pontificum aliquis, nullo alio instructo « examine, denuntiet. »

Quæres 2^o, in quam partem Consultores, Ordines religiosi, academiæ, cardinales et SS. pontifices inclinarent; Dominicanis an Jesuitis faverent. Respondeo 1^o in toto Congregationum decursu Consultores omnes, exceptis Henrico Sylvio, Antonio Bovio, Baptistâ Plumbino et Episcopo Aquilano, omnes in censuram constanter propensos fuisse, adeò ut si R. pontifex iudicium Consultorum sequi maluisset, profectò Molinæ librum, ejusque dogmata proscripsisset. Hoc extra dubium manere debet, in eoque consentiunt historici Leblanc et Eleutherius. Respondeo 2^o, plures ordines religiosos favisse doctrinæ Patrum

Societatis. Ita disertè testantur Patres Benedicti collegii S. Vincentii Salmanticae, in Epist. datâ 31 julii an 1600 ad Ordinissui procuratorem generalem Romæ commorantem. Hanc Epistolam et alias Augustinianorum et Franciscanorum, quibus idem evincitur, ex integro refert Eleutherius lib. 2 de Auxil. cap. 11. Idem non obscurè colligitur ex Lemos Panopl. tom. 1, tract. 6, cap. 2, ubi de Molinæ Concordiâ hæc habet: « Liber ille novam (ut videbatur) continens doctrinam à quampluribus acceptatus fuit, et ejus dogmata amplexata, ita ut in communibus disputationibus publicisque congressibus, imò et in scholis nihil aliud audires, quàm hanc Molinæ doctrinam. » Respondeo 3^o, quod spectat orbis catholici academias: 1^o Quinque celebriores sunt in Hispaniâ Universitates, Complutensis, Siguntina, Hispalensis, Vallisolenata, Salmaticensis. Duas priores Molinæ fuisse, ipse in suâ hist. lib. 1, cap. 19, non diffitetur Aug. Leblanc; Hispalensem et Vallisoletanam ipsi etiam Molinæ libro fuisse, authenticis harumce academiarum monumentis ostendit Eleutherius lib. 2, cap. 13.... Restat celeberrima Salmaticensis academia; hanc pro Dominicanis stetit contendit Aug. Leblanc; negat verò Theodorus Eleutherius; alii incertum esse illius judicium censent, probabiliusque neutri parti favere.

In Germaniâ septem Universitates, ipso fidente abbate Leblanc, pro Societatis sententiis censuras et judicia Romam miserunt, Moguntina scilicet, Herpybolensis, Ingolstadiensis, Dilingana, Viennensis, Græcensis, Trevirensis; quibus accessit Mussipontana in Lotaringiâ.

In Italiâ, nullam pro Dominicanis assertit Aug. Leblanc; juxta Eleutherium et auctorem libri cui titulus: *Questions importantes*, Bononiensis academia pro Jesuitis stabat.

In Belgio, Lovaniensis et Duacensis academîæ, si constanter adhæserunt censuris contra Lessium et Hamelium latis, infensæ sanè erant Molinæ opinionibus; certum tamen est nonnullos in illis fuisse theologos Bannesio et præmotioni adversos. Ita Duaci Westhonus Anglus et Lovanii Malderus, qui et episcopus fuit Antuerpiensis.

Quid autem censuerit celeberrima per Europam S. Facultas Parisiensis, non omnino certum. Binas quidem abbas Leblanc adducit epistolas sub nomine Duvallii 1602, quæ si genuinæ sunt, profectò evincunt Facultatem propugnâsse præmotionem physicam; sed hæ

falsi arguuntur ab Eleutherio; 1^o quia Gama-chæus 1, 2, q. 111, art. 6; Isambert. tract. de grat. cap. 7; Habert. Vabrensis episcopus theologiæ græcor. Patrum lib. 2, cap. 17, parag. 4; Hallerius, ipsemet Duvallius, cæteraque Facultatis lumina in scriptis publicè editis constanter rejiciunt et impugnant præmotiones physicas. Quin et illustriss. Habertus loco mox citato, de iis loquens ait: « Theologorum catholicorum pars longè numerosior, Sorbonica præsertim cathedra et palæstra, non aliâ graviore de causâ prædeterminationi physicæ bellum inducit, quàm metu admittendæ, per ipsius veluti porticum necessitatis. » 2^o Illustriss. Rosa Sylvanectensis episcopus dum Romæ extaret labente an. 1601, publicè et R. pontifici testatus fuit Molinæ doctrinam communiter propugnari in facultate parisiensi; imò eam ipse propugnâvit thesibus publicis in actu Resumptæ 1602. 3^o In actis Pegnæ, Lemos, Coronel. Bossutii, etc., nulla prædictarum epistolarum mentio habetur, quanquàm eas laudandi non semel occurrat occasio, maximè ad elevandam præfatam Sylvanectensis episcopi declarationem.

Respondeo 4^o, cardinales Perronium et Belarminum constanter fuisse Jesuitis. Id certum, nec diffitetur Aug. Leblanc; ast cæteros omnes ipsis fuisse adversos contendit; quod saltem de plerisque negat Eleutherius; addit, qui in ultimâ Congregatione decretoriè pronuntiaverint cardinales, « servato inviolabilis silentii secreto, nulli unquàm mortalium revelatum fuisse. »

Respondeo 5^o, initio Congregationum, fidentibus Molinæ vindicibus, Clementem VIII Moliniana dogmata improbâsse; verùm contendunt sub finem disputationum, re per sese inspectâ, animum mutâsse: idque ex eo colligunt, quòd in libro Molinæ de Concordiâ, quem paucis ante mortem mensibus à capite evolvere aggressus fuerat S. pontifex; à paginâ 17 ad pag. 184, plusquàm octoginta occurrant Molinæ textus sacrâ pontificis manu subnotati, cum notulis quibusdam marginalibus; porrò, inquit, textus illi ac notulæ eò maximè tendunt, ut ab objecto Pelagianismi errore, Molinæ doctrina vindicetur; ergo, etc. Extat in Tabulario romano Patrum Societatis dictus Molinæ codex, quo donati sunt à Clementis nepote cardinale Aldobrandino.

Quod ad Paulum V spectat, exitu constat neutram sententiam approbâsse aut improbâsse: utrique parti permisit pontifex suam tueri

sententiam, ac vetuit alterutram hæreseos insimulare, donec aliud à sanctâ Sede decerneretur; hoc certum. Universa præjudicia causæ Thomisticæ favent, si fides historico Leblanc; ast è vestigio occurrit adversæ partis historicus Eleutherius, « sanè, inquit, si de præjudiciis in hac causâ questio vertitur, potiori fortassis jure dici posset physica prædeterminatio ad tempus, donec sancta Sedes litem « diremerit, tolerata. » Nostrum autem non est tantas componere lites.

Quæres 3^o, quæ sint acta Congregationum de Auxiliis, quidve de illis judicandum. — Respondeo plurima harumce Congregationum circumferri acta aut scripta ad illas pertinentia. Præcipua sunt acta Coronelli, Bossutii, Pegnæ, Lemos, necnon autographum assertæ Constitutionis Pauli V; quid autem de illis sentendum sit, docet decretum Innocent. X, datum die 23 aprilis an. 1654, cujus hæc sunt verba : « Cæterum, cum tam Romæ, quàm alibi circumferantur quædam asserta acta MSS. et « forsitan typis excusa Congregationum habitarum coram felicis recordationis Clemente « VIII et Paulo V, super questione *de auxiliis « divinæ gratiæ*, tam sub nomine Francisci Pegnæ, olim Rotæ romanæ decani, quàm Fr. Thomæ de Lemos Ordinis Prædicatorum, « aliorumque prælatorum et theologorum, qui, « ut asseritur, prædictis interfuerunt Congregationibus; necnon quoddam autographum « seu exemplar assertæ Constitutionis ejusdem « Pauli V.... Sanctitas sua præsentì hoc suo « decreto declarat et decernit prædictis assertis Actis.... et autographo seu exemplari.... « nullam omninò esse fidem adhibendam; neque ab alterutrâ parte, seu à quocumque alio « allegari posse, vel debere. »

Clariora sunt hæc quàm ut ullâ expositione indigeant. Duo sunt quæ in hoc pontificio diplomate sancuntur; primum, *prædictis actis nullam omninò esse fidem adhibendam*; alterum, *à nemine allegari posse, vel debere*; ex quibus concludit Eleutherius, manifestum esse, ipsomet judice S. pontifice, neminem laudatis instrumentis citrà deceptionis aleam assentiri posse.

Vim argumenti elevare putat historicus Leblanc paratæ distinctionis ope. Scilicet, fatetur Pontificis decreto prædictis Actis interdictam esse fidem publicam juridicam, contentiosam, quæ nempe valere in judicio possit; ast contendit, salvâ pontificii decreti auctoritate, iisdem posse adscribi fidem humanam et historicam.

Hanc autem suam interpretationem, tum in præfatione historiæ, tum in alio deinde opusculo, cui titulus : *Réponse aux questions importantes*, pag. 433, multis confirmare conatur, præsertim verò ex decreto S. Congregationis cardinalium concilii Trid. interpretum an 1631, die 2 augusti, in quo sic statuitur : *Ex speciali S. D. N. (Urbani VIII) jussu mandat sacra Congregatio et præcipit, hujusmodi declarationibus* (quæ sub hujus S. Congregationis nomine circumferuntur) *tam impressis et imprimendis, quàm manuscriptis, nullam fidem esse in judicio et extra à quoquam adhibendam, sed illis tantum quæ in authenticâ formâ, solito sigillo... munitæ fuerint.* Quæ quidem verba ita exponenda sunt, dictas declarationes non valere ad faciendam in judicio et extra fidem certam et indubitatam, licet probabilem mereri possint. *Nullam esse fidem adhibendam; intellige*, inquit Fagnan. 1 Decret. de Constit. cap. Quoniam, *certam et indubitatam; ad minus enim probabilem fidem merentur, si à viro fide digno referantur.* Idem sentiunt Barbosa, de Luca; alique juris canonici interpretes; ergo, inquit auctor, cum verba utriusque decreti, Innocentii scilicet et Urbani, simillima sint, eodem proinde sensu sunt exponenda. En, ut videtur historico, invictum pro suâ expositione et Actorum fide adstruendâ argumentum.

Verùm huic exceptioni plurima ob stare advertit Theodorus Eleutherius. Obstant 1^o, decreti verba, quæ generalia sunt, nihilque excipiunt, *nullam omnino esse fidem adhibendam.* Et verò, verbis immediatè sequentibus, publicam juris fidem assertis actis seorsim adimit Innocent. X, *neque à quocumque alio allegari posse aut debere.* Obstat 2^o finis et scopus decreti; si enim unica duntaxat quæ in judicio valere possit juris fides exclusa dicatur Innocentii decreto, otiosum planè fuisset ac inutile; jam enim fiduciario suo decreto, Societatis de gratiâ doctrinam publicè in Ecclesiâ doceri permiserat Paulus V, et sub gravissimis poenis vetuerat, *ne quis partem suæ oppositam aut qualificaret, aut censurâ quâpiam notaret*; neque ullus exinde fuit qui ex prætensis Congregationum actis Jesuitas in judicio convenire et damnatæ doctrinæ arguere ausus fuerit. Quis credat Innocentium X id unicè suo decreto cavisse, quod, ipso etiam tacente, nemo nisi insanissimus committere potuisset? Fatendum itaque suo decreto plus aliquid voluisse S. pontificem, quàm publicam duntaxat juris fidem assertis actis adimere; nempe, ut ipsa

decreti verba sonant, omnem omnino, ac proinde sive juridicam, sive historicam fidem iis eripit. Obstant 3^o quæ supra retulimus quæsitæ 1^o, momenta ad prætensam Pauli V Constitutionem falsi ac suppositionis convincendam; pleraque enim de cæteris actis idem evincunt; id inprimis, quod nempe instrumenta illa non ante è tenebris eruta fuerint ac vulgata, quàm è vivis excessissent Paulus V, cardinales in Auxiliorum Congregationem adsciti, alique qui interpolatores redarguere potuissent. Ex his inferit Molinæ vindex, quæ circumferuntur Congregationum acta, esse « fidei ut minimum « dubiæ atque suspectæ; taliaque quibus nemo « prudens citra deceptionis aleam assentiri possit aut debeat. »

Atque hinc sponte suâ concidunt quæ in contrarium adducit abbas Leblanc, præsertim verò ex decreto Urbani VIII circa declarationes concilii Tridentini. Namque 1^o, declarationes illæ, ut mox observavimus, ante Urbani decretum fidem potuissent facere in iudicio; non verò acta Congregationum de Auxiliis ante decretum Innocentii; ergo, etc. 2^o Ut citatæ declarationes, inquit Fagnan. loco laudato, fidem mereantur, à viris fide dignis, minimèque suspectis referri debent; porrò acta de quibus agitur, ab infensis Jesuitarum adversariis pro rerum in istis Congregationibus à se gestarum vindictis fuere conscripta, atque partium studium passim spirant; ergo, etc. 3^o Uti etiam supra advertimus, circumstantiæ loci, temporis, necnon personarum à quibus vulgata sunt laudata instrumenta, dubiam saltem et incertam reddunt eorum auctoritatem; immeritò ergo contendit historicus ipsa certam atque indubitatam fidem mereri.

Et hæc quidem de Auxiliorum Congregationibus breviter attingimus, ut nihil historiæ disputationum de gratiâ deesset; qui plura exoptaret, adire poterit auctores qui de eo argumento utrinque scripsere; collegere quæ pro utrâque parte dicta sunt, pro Dominicis Augustinus Leblanc, pro Jesuitis Theodorus Eleutherius libris in dissertationis decursu multoties citatis.

Dissertatio undecima.

DE JANSENIO.

Maximam partis historicæ attingimus quæstionem, quæ quidem eò diligentius à nobis est pertractanda, quod domesticam contineat et

magno animorum æstu agitatam hæc nostrâ ætate controversiam. 1^o Igitur Jansenianæ causæ historiam delineabimus; 2^o critica hujusce historiæ puncta sigillatim discutiemus; 3^o tandem systema Jansenii evolvemus.

CAPUT PRIMUM.

Jansenianæ causæ historia.

Animus non est integram ac coherentem fusiori stylo exarare Jansenismi historiam; nec instituti nostri ratio, nec præfixi hujus tractatus limites id patiuntur; brevem ergo duntaxat illius synopsis hic exhibebimus; hancque ordinis ac claritatis gratiâ variis titulis partiemur.

Primus erit de personâ Jansenii. Secundus, de ipsius libro cui titulus, *Augustinus*. Tertius exponet ea quæ præcesserunt examen ac iudicium romanum quinque Propositionum. Quartus narrabit quæ gesta sunt pendente examine ac iudicio romano. Quintus denique complectetur quæ examen illud ac iudicium subsecuta sunt.

ARTICULUS PRIMUS.

Persona Jansenii.

Cornelius Jansenius ex catholicis parentibus in territorio Leerdamensi apud Batavos natus anno 1585, Ultrajecti litteris humanioribus, Lovanii philosophiæ et theologiæ operam dedit, tum Parisios se contulit. Paulò post cum abbate San-Cyrano cum quo Lovanii amicitiam jam contraxerat, Baionam petiit, ibique collegii primarius institutus, per 12 annos cum eodem abbate novum systema circa gratiam adumbravit, quod deinceps expressit in libro cui titulus, *Augustinus*. In patriam reversus novo sanctæ Pulcheriæ collegio præficitur.

Anno 1671, laureâ doctorali donatus est in S. facultate theologicâ Lovaniensi; subinde in eadem academiâ regius sacrarum litterarum professor institutus anno 1650. Hoc eodem anno sub ementito nomine *Alexandri Patricii Armachani*, libellum edidit cui titulus *Mars Gallicus*, in quo contra sacram regum nostrorum majestatem protervè invehitur. Anno tandem 1655, episcopus Yprensis consecratus est; et tertio ab inauguratione anno die 6 maii lue extinguitur. Morti proximus extremam et moribundam manum admovit famoso operi suo quod inscripsit *Augustinus*; illius edendi curam imposuit capellano suo, re tamen prius communicatâ cum Liberto Fromondo et Henrico Caleno.

In tabulis suæ supremæ voluntatis, cuncta sua opera Sedis apostolicæ judicio submittit Jansenius; sic enim habet exemplar testamenti quod ipsius libro præfigitur: « Si Sedes romana aliquid mutari velit, sum obediens filius, et illius Ecclesiæ, in quâ semper vixi usque ad hunc lectum mortis obediens sum. » Ita mea postrema voluntas. » Idem contestatus fuerat cap. 29 libri proœmialis: « Mihi constitutum est, eadem quam ab infantia secutus sum, sensuum meorum ad extremum spiritum usque ducem sequi romanam Ecclesiam, et beatissimi Petri in romanâ sede successorem. Super illam petram ædificatam Ecclesiam scio. Quicumque cum ipso non colligit, spargit; apud quem solum incorrupta Patrum servatur hæreditas. Quidquid ab istâ Petri cathedrâ, in cujus communione à teneris vixi, et porro vivere et mori fixum est, ab isto principis Apostolorum successore, ab isto Christi Domini nostri vicario, ab isto Ecclesiæ christianæ universæ capite, moderatore, pontifice, præscriptum fuerit, hoc teneo; quidquid improbatum improbo, damnatum damno, anathematizatum anathematizo. » Et rursus in epilogo totius operis tom. 3, pag. 343: « Nec verò, inquit, mihi ipse arrogaverim, me nullâ ex parte ab ejus (Augustini) aberrasse sententiâ. Homo sum, humanorum lapsuum periculis obnoxius; quæ sicut cavi quantum potui, ita ignoscat lector ubi non potui.... Quòd si ejus obsecritas me fefellerit, maximi beneficii loco ducam, si quis aliud ex Aug. scriptis demonstraverit. Quod donec humiliter ac desideranter expecto, quidquid de rebus tam multiplicibus et arduis, non juxta meam, sed juxta sancti Doctoris mentem pronuntiavi, EX APOSTOLICÆ SEDIS ECCLESIEQUE ROMANÆ MATRIS MEÆ JUDICIO, SENTENTIAQUE SUSPENDO, UT ILLUD JAM NUNC TENEAM SI TENENDUM, REVOCEM SI REVOCANDUM, DAMNEM ET ANATHEMATIZEM, SI DAMNANDUM ET ANATHEMATIZANDUM ESSE JUDICAVERIT. » Hactenus Jansenius.

Utinam his non contradixisset suis in privatis ad San-Cyranum epistolis! sic enim in iis de suo opere mentem candidè aperit. Epist. 115, asserit « doctrinam, quam in sancto Augustino reseravit, omnibus stuporem incusuram. » Et epist. 16: « Non audeo, inquit, dicere quid sentio de prædestinatione et gratiâ, ne fortè antequàm omnia parata sint et matura, mihi quod aliis, accidat, Romæ damnetur, sicut damnatus fuerat Baius. »

Epist. 151, ait: « se adduci non posse, ut credat opus suum à judicibus (romano nemp pontifice) approbandum unquàm fore. » Rursus epist. 16, sic scholasticos doctores perstringit: « Ut ingenuè dicam, inquit, quid sentio, existimo post hæreticos à nemine magis quàm à disputatoribus illis scholasticis adulteratam et corruptam fuisse theologiam. » Denique de Thomisticâ doctrinâ ibidem sic loquitur: « Audeo dicere, mihi comperitum esse, quòd si utraque tum Jesuitarum, tum Thomistarum schola usque ad extremum judicii diem disputatura sit, semper magis sit aberratura, cùm jam à veritate centum leucis distet. » Et paulò post: « Cùm Augustinum degusto, fastidit Thomas. »

ARTICULUS II.

De libro Jansenii cui titulus, Augustinus.

Librum suum Jansenius inscripsit *Augustinus*, quòd confidat se puram sancti Augustini doctrinam à quingentis fermè annis (ut putat lib. proœm. cap. 28 et 50, catholicis scholis ignoratam, revocare. Per viginti et duos annos, huic suo libro perficiendo totus incubuit Jansenius, atque ut Augustini mentem ac doctrinam penetraret, inquit synopsis vitæ ipsius auctor, « summo studio ac indefesso labore, decies et amplius universa opera Augustini, attentione acri, adnotatione diligenti, libros verò contra Pelagianos facillè trigesies à capite ad calcem evolvi; » et quidem labore ita improbo, ut ipsomet fatente Jansenio citato lib. proœmiali, *retroagere, retrocedere aliquando videretur Augustinus*. Ex quo hic obiter observa, Jansenii systema non eâ in Augustino emicare luce, qualem fingunt Jansenii discipuli; immeritò igitur recentiores scholasticos subannabat Yprensis, quòd in tantâ luce cæcutiissent, quandoquidem ipsemet ut Augustini doctrinam è tenebris erueret ac genuinum ipsius sensum expiscaretur, tot annis allaboravit.

Jansenii opus uno grandiori constat volumine in tres tomos distincto.

Primus octo de hæresi Pelagianâ libros complectitur. In primo, brevis textitur historia de hæresi Pelagianâ; quinque sequentibus, Pelagianorum dogmata, varique Pelagianismi status recensentur; septimo tandem et octavo speciatim agitur de Semipelagianis.

Secundus tomus quatuor continet partes. Prima unicum librum habet de ratione et auctoritate in rebus theologicis; toto illo libro

Yprensus penitus elevat theologorum scholasticorum, et exaggerat supra modum, scriptorum divi Augustini auctoritatem; quasi in difficilioribus etiam de gratiâ quæstionibus, sancti doctoris doctrina ad fidem pertineret. Secunda unicum pariter librum habet, de statu naturæ innocentis, seu de gratiâ primi hominis et Angelorum. Tertia quatuor libros de statu naturæ lapsæ; in iis tractat de peccato originali; tum de pœnis peccati originalis; demùm de viribus liberi arbitrii post peccatum. Quarta tres complectitur libros de statu naturæ puræ; in iis totus est ut probet, statum illum pugnare cum justitiâ, bonitate ac providentiâ divinâ, hominemque non potuisse aliter creari, quàm cum gratiâ et ordinatione ad fidem supernaturalem; addit contrariam sententiam unum fuisse ex palmaribus Pelagii erroribus, atque ad Manichæismum pertinere.

Tertius tomus in duas partes dividitur. In primâ sunt decem libri de gratiâ Christi Salvatoris: hæc pars videtur finis ac scopus totius operis. Libro 1^o, docet liberatricem ac medicinalem Christi gratiam, non esse naturam, neque legem aut doctrinam, sive extrinsecus propositam, sive intrinsecus inspiratam, neque ullam gratiam solius intellectûs, quocumque tandem nomine appelletur. Libro secundo contendit liberatricem hanc ac medicinalem Christi gratiam esse propriam voluntatis absolute efficacem, relativè victricem, ac necessitantem; ibidem copiosè disserit de discrimine gratiæ sanitatis et medicinalis. Libro tertio, ex principis sancti Aug. probare conatur, nullam dari in præsentî statu gratiam verè sufficientem, quin simul sit relativè victrix. Libro quarto, essentiam et varias divisiones illius gratiæ medicinalis exponit; hanc in delectatione indeliberatâ, relativâ ac necessitante positam esse, ibidem pluribus evincit. Libro quinto, tractat de variis ejus effectibus, Libro sexto et septimo, disputat de naturâ et viribus liberi arbitrii, sicque viam sibi sternit ad octavum, qui est de concordîâ gratiæ efficaciis et liberi arbitrii Tandem nono et decimo disserit de prædestinatione hominum et Angelorum, et de causis utriusque. His apponitur epilogus omnium.

In secundâ parte unicus continetur liber, qui dicitur parallelum erroris Massiliensium et opinionis quorundam recentiorum. Tria potissimum discuit: primum, quo pacto in oppugnandâ gratuitâ prædestinatione et gratiâ ex se efficaci discrepent aut conveniant; secundum,

quid discriminis inter prædestinationem et gratiam ab ipsis traditam; tertium, quibus utrique armis utantur ad prædestinationem et gratiam suam asserendam.

His tribus tomis per modum coronidis subjicitur specialis tractatu de statu parvulorum sine baptismo decedentium ex hac vitâ, adornatus à Florentio Conrio, Hiberno, ex Ordine Minorum ad archiepiscopatum Thuamensem assumpto. In eo contendit auctor dictos parvulos damni et gehennæ pœnam pati.

Quis porrò fuerit Jansenii de hac suâ lucubratione sensus, jam constat ex mox adductis epistolarum ad San-Cyranum extractis; idem etiam discimus et auctore vitæ ipsius: « Ipse, » inquit, huic operi unicè natum, et ubi ab- » solvisset, paratissimum se mori, dictitabat. » Et paulò post: « Nec alia testamenti ejus cura » sollicitior, quàm ut fideles amicos rogaret, » ne fœtus instinctu, ut credebat, divino tot » vigiliis et laboribus à se efformatus suppri- » meretur, et non veniret ad partum. » Tanta scilicet erat præconcepta de hoc inauspicato fœtu opinio, qui tot postmodum tumultus in Ecclesiâ excitavit.

ARTICULUS III.

De iis quæ præcessere judicium romanum de quinque Jansenii Propositionibus.

1^o. Vix lucem aspexit posthumus Jansenii liber, Lovanii an. 1640 editus, cum ingentes in Belgio motus excitare cœpit, nonnullis pro eo stantibus, aliis ex adverso contendentibus Bani imò et Calvinî proscripta dogmata in eo contineri; plurimi hinc et inde editi libri controversiam exaceruerunt. Re ad Sedem apostolicam delatâ, Urbanus VIII, pridie nonas martii 1642, solemni constitutione quæ incipit, *In eminenti*, hunc proscrispsit librum.

Duas censuræ causas exponit S. pontifex. Prima est, quia contra decreta pontificia de non promulgandis ullis circa materiam de auxiliis operibus, Jansenii liber editus fuisset. Altera causa hæc est, quòd plurimus contineat Bani propositiones, à Pio V et Greg. XIII prædamnatas: « Cùm autem, ipsissima sunt » bullæ verba, ex diligenti ac maturâ ejusdem » libri, cui titulus *Augustinus*, lectione com- » pertum fuerit, in eodem libro multas ex » propositionibus à prædecessoribus nostris » damnatas contineri, et magno cum Catholi- » corum scandalo, et auctoritatis S. Sedis » contemptu.... defendi; nos huic malo op-

« portunum remedium adhibere volentes....
« librum prædictum prohibemus. »

Ex hæc Urbani censurâ, altus Jansenianorum dolor, ac in bullam ipsam falsi expositio. Missi Romam à Lovaniensibus duo deputati, Synnichi et Papius, qui præsumptæ subreptionis causas aperirent; has omnes apertè falsas esse, nulliusque planè ponderis habendas, invictè constat ex dictis ubi de Baio.

2°. Dùm hæc Romæ et in Belgio agerentur; Parisiis Habertus Ecclesiæ Parisiensis theologus, postea Vabrensis episcopus, doctrinam Jansenii pari zelo et eruditione confutavit an. 1642 et 1643, tum tribus publicis concionibus, tum libro cui titulus: *Defensio fidei Ecclesiæ*. Ex alterâ parte Antonius Arnaldus, fervidus inter alios Jansenii defensor, duas pro Jansenio opposuit Apologias an. 1644 et 1645. Hoc ipso anno 1644, ut etiam loco mox citato annotavimus, Urbani Constitutio ab illustriss. Parisiensi episcopo de Gondy promulgata est, et jussu regis delata ad sacram Facultatem, quæ omnibus suis severè prohibuit ne ullas ab Urbano VIII et ejus prædecessoribus Pio V et Greg. XIII damnatas propositiones defenderent.

3°. His nonobstantibus serpebat virus ac latius diffundebatur; quare syndicus S. Facultatis Parisiensis D. Cornet die 1 julii 1649, plenè in comitiis requisivit ut quædam ab ipso oblata propositiones examinarentur et censurâ notarentur; quinque priores eæ ipsæ sunt quæ ab episcopis Gallicanis ad Innocentium X delatæ sunt. Re in deliberationem missâ, postulationi syndici annuit Facultas, ac deputatos nominavit; verùm instigante Ludovico de St. Amour, sexaginta doctores adversus dictam conclusionem provocârunt ad senatum. Senatûsconsulto die 5 octobris ejusdem an. cautum est, ne propositiones ad examen vocarentur, donec aliter provisum fuisset.

His in circumstantiis saniori doctorum parti consultius visum est rem totam ad episcoporum judicium transferre: « Ipsi verò præsides nostri, » inquit Antonius Godeau in epist. quam nomine Cleri Gallicani an. 1653 congregati, scripsit ad alios per Galliam episcopos, « propter nimiam quam perspiciebant animorum contensionem, noluerunt per seipsos primò ferre sententiam, sed rem totam judicârunt ad summum pontificem esse remitendam. » Quapropter anno 1650, episcopi octoginta quinque solemni ad Innoc. X epistolæ Haberti Vabrensis manu exaratæ subscripse-

runt, denuntiantes ipsi famosas quinque Jansenii Propositiones et solemne de iis rogantes apostolicæ Sedis judicium.

Episcopi undecim Gallicani ex adversâ parte steterunt eidem S. pontifici declarantes sibi non probari fratrum suorum reverendissimorum consilium, variis de causis, præsertim verò, « quia si propositiones illas ad examen et ad judicium vocari expediret, judiciorum ordo legitimus Ecclesiæ totius, tum maxime Gallicana consuetudo postularet, ut primùm à se majores ac difficiles quæ apud se ortæ sunt quæstiones dispicerentur. » Atque hinc nonnulli contenderunt violatas fuisse in dictâ quinque Propositionum delatione Libertates Gallicanas. Verùm immeritò.

Namque 1°, ab episcopis primam litis apud se notæ cognitionem ad romanum pontificem sponte deferri aliquando posse et expedire, ex ipso jure canonico et ecclesiasticâ consuetudine compertum est. Ita disertè testantur episcopi Gallicani Parisiis congregati an. 1633, epist. ad Innocent. X; ita etiam habetur in Relatione Jansenismi jussu comitiorum an. 1635, exaratâ, et ab omnibus horumce comitiorum episcopis approbatâ. Porro, quemadmodum observat illustriss. Venciensis episcopus epist. mox laudatâ, ut in præsentî quinque Propositionum negotio, totius hujusce causæ judicium ad sanctam Sedem deferretur, postulabat et natura exortæ controversiæ, et contententium ardor. Quæstio scilicet erat de Jansenii libro, quem Jansenius ipse morti proximam judicio R. pontificis subjecerat; de quo jam pronuntiaverat Urbanus VIII; aliunde verò periculum erat ne Janseniorum arte ac molitionibus novæ inter episcopos, quæ paulò ante inter doctores, excitarentur animorum contentiones; ergo, etc. 2° Agnovère tandem et ipsi undecim episcopi, nihil in dictâ delatione detractum fuisse juribus episcoporum; ipsi siquidem vel præsentès comitiis subscripserunt, vel absentes non improbavère quæcumque circa Jansenii causam gesta et decreta fuerant in comitiis an. 1653, 1654, 1655 et 1656. Quin et citatus mox Venciensis episcopus epist. ad D. de Valençay regis christianissimi in urbe oratorem, conceptis verbis asserit Diarii pag. 237: « Gallicanos antistites rem episcopatu dignissimam egisse, cum ad S. pontificem examen et judicium quinque Propositionum detulerunt. » 3° Denique in comitiis generalibus anni 1700, inter quatuor propositiones ad Jansenismum spectantes, hæc, quæ secundæ pars

est, simul cum aliis damnatur; « Episcopi Gallicani Libertates Ecclesiæ Gallicanæ sub earum asserendarum specie labefactarunt, super recipiendâ Constitutione Innocentii X contra Jansenium. » Legitima ergo fuit hæc quinque Propositionum ad S. pontificem per episcopos Gallicanos facta denuntiatio.

ARTICULUS IV.

De iis quæ pendente romano examine contigère.

Innocentius X, acceptis ab oratore regis christianissimi octoginta quinque præsulum Gallicanorum litteris die 12 aprilis 1651, hæc ipsâ eadem die Congregationem instituit ad examen quinque delatarum propositionum.

Constabat ista Congregatio quinque cardinalibus, longo rerum usu et experientiâ inter cæteros exercitatis. Ex his erant Julius Roma sacri collegii decanus; Bernardinus Spada, qui vivente Urbano VIII, cum Synnichio et Pappio Lovaniensium deputatis, de libro Jansenii jam pluries egerat; Fabius Chigius, qui subinde fuit Alexander VII, quique ab ipsomet de St. Amour Diarii pag. 191, plurimum commendatur. Congregationis secretarius nominatus est Albizius, assessor S. Officii; ac tredecim designati consultores; duo scilicet Dominicani, duo Augustinienses, duo Minores, duo Carmelitæ Discalceati, duo Theatini, unus Jesuita, unus Servita, et unus Capucinus.

Selecti illi cardinales per duos et ampliùs annos triginta sex celebrarunt Congregationes, quibus decem ultimis interfuit S. pontifex. In iis summâ profectò diligentia Jansenii causa ventilata fuit, quinque propositiones sigillatim discussæ, et Consultorum suffragia tum voce, tum scripto diligenter expensa; auditî sæpiùs ex utrâque parte deputati qui è Gallis venerant, sive ad tuendas, sive ad impugnandas Jansenii propositiones; lecta accuratè utriusque partis memorialia; ac tandem emissum est die ultimâ maii 1653 solemne decretum, quo quinque Propositiones his censuræ notis ab Innocentio X perstringuntur.

Prima prædictarum Propositionum sic se habet: *Aliqua Dei præcepta hominibus justis volentibus et conantibus secundum præsentis, quas habent vires, sunt impossibilia; deest quoque illis gratia quâ possibilia fiant.* Hanc declarat summus pontifex, « esse temerariam, impiam, blasphemam, anathemate damnatam et hæreticam, et uti talem damnat. » Secunda: *Interiori gratiæ in statu naturæ lapsæ nunquam*

resistitur. Hæretica declaratur, et uti talis damnatur. Tertia: *Ad merendum et demerendum in statu naturæ lapsæ, non requiritur in homine libertas à necessitate, sed sufficit libertas à coactione.* Hæretica pariter declaratur. Quarta: *Semipelagiani admittebant prævenientis gratiæ interioris necessitatem ad singulos actus, etiam ad initium fidei; et in hoc erant hæretici, quòd vellent eam gratiam talem esse, cui posset humana voluntas resistere, vel obtemperare.* Falsa et hæretica declaratur et uti talis damnatur. Quinta: *Semipelagianum est dicere, Christum pro omnibus omnino hominibus mortuum esse, aut sanguinem fuisse.* Hanc declarat S. pontifex, « falsam, temerariam, scandalosam; et intellectam eo sensu, ut Christus pro salute dumtaxat prædestinatorum mortuus sit, impiam, blasphemam, contumeliosam, divinæ pietati derogantem, et hæreticam. »

Quæ autem veritatem, æquitatem ac auctoritatem hujusce pontificii judicii spectant, subinde inter critica historiæ puneta discutiemus.

ARTICULUS V.

De iis quæ subsecuta sunt Innocentii X judicium.

Anno 1653, præsules Gallicani, præside cardinali Mazzarino Parisiis congregati, solemniter ac communi omnium plausu Innocent. Constitutionem exceperunt, datis ad pontificem litteris die 15 julii, quibus et gratias referunt, et gratulantur ipsi, quòd pro suâ auctoritate *pesti grassanti, et certissimam perniciem allaturæ obstitisset.* Tam solenni judicio cui consensit universus orbis, pressi Jansenii assectæ, ut magistri doctrinam ab errore vindicarent, eamque ex integro impunè propugnarent, novum istud effugium excogitavère. Scilicet contra apertam rei evidentiam duo ista affirmarunt, alterum, quinque damnatas propositiones non esse Jansenii; alterum, in ipsius sensu nusquam fuisse damnatas. Hinc prima origo famosæ distinctionis *juris et facti*, ad quam deinceps tanquam ad optatissimum tutissimumque portum se receperunt.

Episcopos non latuit fraus tam aperta; quotquot igitur Parisiis aderant anno 1654, simul convenerunt; placuit ut Jansenii liber excuteretur, atque cum damnatis propositionibus sedulò conferretur, quibus omnibus in decem congregationibus maturè ponderatis, communi suffragio duo declararunt, primum, *damnatas quinque propositiones reipsa extare in libro Jansenii*; alterum, *in proprio et naturali ejusdem*

Jansenii sensu fuisse damnatus. De his omnibus epistolâ datâ die 28 martii certiores fecerunt summum pontificem, qui die 29 septembris ejusdem an. 1654, rescripsit, acceptissimum sibi esse studium ac *zelum quo apostolicam Constitutionem servari ubique curabant, per quam, inquit, damnata fuerat in quinque Propositionibus Cornelii Jansenii doctrina ejus libro contenta, cui titulus, AUGUSTINUS.*

Anno sequenti 1655, die 10 maii, plenius in Comitii summo plausu exceptum fuit mox dictum Innocentii decretum. Interim eodem anno è vivis excessit Innocent. X; in ejus locum sufficitur cardinalis Chigijs, cujus in examinandis Propositionibus præcipuæ partes fuerant, quique Alexander VII appellatus est.

Huic supremam dignitatem gratulati sunt episcopi nostri per epistolam die 2 septembris 1656, simulque aperiunt novas Jansenianorum artes et cavillationes in eludendis Innocentii decretis. Respondit pontifex Constitutione datâ die 16 octobris; in quâ novatorum effugia penitus interclusit, his verbis: « Cum nonnulli iniquitatis filii prædictas quinque propositiones, vel in libro Jansenii non reperiiri, vel non in sensu ab eodem intento damnatas fuisse, asserere magno cum Christi fidelium scandalo non dubitent; nos qui omnia quæ hæc in re gesta sunt attentè perspeximus; utpote qui ejusdem Innocentii prædecessoris jussu.... omnibus illis congressibus interfuimus, in quibus apostolicâ auctoritate eadem causa discussa est eâ profectò diligentia, quâ major desiderari non posset, quaecumque dubitationem super præmissis in posterum auferre volentes.... quinque illas Propositiones in libro præmemorati Jansenii.... excerptas, ac in sensu ab eodem Cornelio intento damnatas fuisse declaramus et definimus. »

Summo iterum plausu Constitutionem hanc excepit clerus Gallicanus in comitiis anni 1657, datis ad cæteros Galliæ episcopos communibus eâ de re litteris die 17 martii; simulque formulam fidei instituit ab omnibus in signum obsequii et reverentiæ subscribendam, adjunctâ mentione Constitutionis Alexandri VII.

Præterea iisdem, in comitiis 1º præsules nostri rata habuerunt et confirmârunt quaecumque in causâ quinque Propositionum gesta fuerant annis 1653, 1654 et 1655. 2º Archiepiscopus Senonensis D. de Gondrin, qui an. 1654, declaraverat se ex reverentiâ duntaxat et ex condescensu, deliberatis à clero sub-

scripsisse, ab hac suâ priori declaratione discessit, contestans se ex conscientia teneri, verè et ex animo adhærere iis quæ in dictis Comitii deliberata fuerant circa damnationem quinque Propositionum in sensu Jansenii. 3º Tandem sacræ Facultatis Parisiensis censura adversus Arnaldum uti æquissima ibidem probata est.

Scilicet die ultimâ januarii 1656, gravi censurâ perstrinxerat S. Facultas duas propositiones extractas ex libello cui titulus: *Seconde Lettre de M. Arnaud, Docteur de Sorbonne, etc.* Prior hæc erat, « quinque Propositiones nec esse in Jansenio, nec ejus sensu damnatas fuisse; adeoque circa partem illam apostolicæ Constitutionis, sufficere religiosum silentium. » Altera hæc erat, « veritatem esse tum ex Scripturâ, tum ex SS. Patribus indubitam, atque in personâ S. Petri manifestam, gratiam scilicet, sine quâ nihil possumus, justo defuisse eâ in occasione in quâ dici non potest quòd non peccaverit. » Utramque propositionem censorio suo judicio notat S. Facultas, his verbis: « Decrevit (S. Facultas) priorem propositionem quæ est facti, esse temerariam, scandalosam, injuriosam summo pontifici et episcopis Galliæ, atque etiam præbere occasionem renovandæ ex integro post damnationem Jansenii doctrinæ.... posteriorem quæ juris dicitur, esse temerariam, impiam, blasphemam, anathemate damnatam et hæreticam. » Cum autem in errore pertinax maneret Arnaldus, ex albo doctorum expunctus fuit; hancque suam censuram jussit sacer ordo ab omnibus in posterum candidatis subscribi.

Circa hæc tempora plurimi prodierunt libelli in defensionem causæ Arnaldinæ. Tres ex illis præcipui isti fuere: 1º *Ludovici Montaltii Litteræ Provinciales.* 2º *Notæ Wendrochii in dictas epistolas.* 3º *Pauli Irenæi disquisitiones.* Tres isti libelli damnati fuere, 1º Alexandri VII decreto die 6 septembris 1657; 2º censorio judicio quatuor episcoporum et novem S. Facultatis Parisiensis doctorum, qui omnes, dictis libris jussu regis Christianissimi accuratè expensis, declarârunt die 7 septembris 1660: *Jansenianas hæreses ab Ecclesiâ damnatas in iis libellis propugnari atque defendi.... atque summo pontifici, episcopis, regi, præcipuis regni administris, sacræ Facultati, necnon religiosis familiis injuriosos esse.* 3º Secretioris consilii decreto die 23 septemb. an. 1660 atque in hujus decreti executionem Litteræ

Provinciales die 14 octobris flammis ultreicibus tradite sunt.

Anno 1661, die 1 februarii clerus Gallicanus formulam fidei quam in Comitibus an. 1657 instituerat, de novo proposuit, jussitque ab omnibus clericis subscribi; ac declaravit se in eâ non aliam fidei definitionem inseruisse, quam quæ in Constitutionibus Innocent. X et Alexandro VII continetur. In executionem hujusce decreti accessit regia auctoritas, quâ severè injunctum fuit die 15 aprilis ejusd. an. ut omnes dictæ formulæ subscriberent.

Hujusce porrò formulæ is est tenor : « Je me sou mets sincèrement à la Constitution du Pape Innocent X, du 31 mai 1655, selon son véritable sens qui a été déterminé par la Constitution de notre S. Père le pape Alexandre VII, le 16 octobre 1656. Je reconnais que je suis obligé en conscience d'obéir à ces Constitutions; et je condamne de cœur et de bouche la doctrine des cinq Propositions de Cornélius Jansénius, contenues dans son livre intitulé AUGUSTINUS, que ces deux papes et les évêques ont condamnée, laquelle doctrine n'est point celle de S. Augustin, que Jansénius a mal expliquée contre le vrai sens de ce saint docteur. »

Jussu regis Christianissimi ad sacram Facultatem Parisiensem delata est prædicta fidei formula ab illustriss. Rhedonensi et Ruthemensi episcopis die 2 maii ejusdem anni : « Concordibus omninò suffragiis declaravit S. Facultas hanc fidei formulam et formulæ subscriptionem sibi maximè probari.... Quo circa unanimi consensu decrevit huic fidei formulæ subscribi à suis omnibus debere. » Hæc ipsa est quæ ex iis temporibus et etiamnum subscribitur ab his qui ad aliquem in S. Facultate gradum admittuntur.

Eodem anno 1661, cum vicarii generales cardinalis de Retz, archiepiscopi Parisiensis in publico Mandato die 8 junii non obscurè insinuassent, circa attributionem quinque Propositionum libro Jansenii silentium religiosum sufficere; episcopi jussu regis Fonti-Bellaqueo extraordinariè congregati, suum de isto Mandato judicium his verbis declararunt : « Qu'il étoit manifestement contraire aux deux bulles et décisions de foi d'Innocent X et d'Alexandre VII, en ce qu'elles (ces bulles) condamnent d'hérésie les opinions et la doctrine de Jansénius contenues en abrégé dans les cinq Propositions, et plus amplement expliquées

« par cet auteur dans son livre. » Quin et Alexander VII, Brevi ad eosdem vicarios generales dato die 1 augusti severà objurigatione illos increpat, *velut temerarios, mendaces, malorum zizaniorum in agro Dominico seminatores, Ecclesie catholice perturbatores, etc.* Quapropter die ultimâ octobris ejusd. anni prius suum Mandatum revocare et emendare compulsi sunt, novumque condere quo puram et simplicem subscriptionem postulabant, et declarabant *certissimum esse tempore Innocentii X quinque Propositiones ex libro Jansenii cui titulus, AUGUSTINUS, extractas ac discussas fuisse, atque in ejus sensu damnatas.*

Hoc ipso anno supra memoratus archiepiscopus Senonensis D. de Gondrin purè et simpliciter subscripsit formulæ cleri Gallicani; atque etiam die 18 junii publicum edidit Mandatum in quo absque ullâ limitatione aut distinctione declarat *quinque Propositiones damnatas esse et hæreticas in sensu Jansenii, huncque sensum discrepare à sensu sancti Augustini.*

Anno 1665, cum illustrissimus Convennarum postea Tornacensis episcopus à rege Christianissimo in mandatis habuisset, ut pro suâ industriâ viam aliquam aperiret quâ exortæ inter theologos lites componerentur, rem proposuit nonnullis quos noverat Jansenii partibus addictissimos; hi statim condendis quinque doctrinæ articulis, qui totidem Jansenii propositionibus respondebant, incubuerunt. Doctrinales illi articuli à DD. de la Lane et Girard cæterorum nomine subscripti oblati sunt episcopo Convennarum die 24 januarii; ut verò firmior esset pax, præstitit dictus episcopus ut DD. de la Lane et Girard simul cum Patre Ferrier, et postea cum Patre Annat, convenirent de quinque articulis collocuturi, si fortè ad concordiam omnes adduci possent. Et reipsâ quinque eo fine habitæ sunt collationes, à die 25 januarii ad 18 februarii, ast sine fructu; singuli etenim in suâ priori sententiâ firmi ac stabiles, re infectâ discesserunt.

Paulò post dicti DD. de la Lane et Girard episcopo Convennarum denuò obtulerunt die 7 junii eosdem doctrinales articulos S. pontifici transmittendos, cum declaratione quâ profitebantur nomine sociorum, suam quinque illis articulis doctrinam contineri, *sequè paratos esse Constitutionibus apostolicis eam observantiam impendere, aliæque omnia præstare, quæ ab ipsis exigere voluerit S. pontifex.* Hoc

Jansenianorum instrumentum simul cum quinque articulis ad S. pontificem misit episcopus Convennarum die 19 junii.

Respondit Alexander VII Brevi dato 29 julii ad episcopos Gallicanos, in quo gratulatur ipsis quòd eorum operâ *multi in Galliis ad sanio-rem doctrinam inducti fuerint*. Inde colligunt Janseniani dictos articulos à S. pontifice fuisse comprobatos; ast immeritò prorsus. Nulla siquidem quinque articulorum mentio fit in Brevi; verbis autem adductis, duntaxat attendit S. pontifex ad recensitam Jansenianorum declarationem, quâ contestabantur se *paratos esse.... omnia præstare quæ ab ipsis exigere voluerit sancta Sedes*. Verùm de his infra discutiendo critica historiæ puncta.

Fidem Sedi apostolicæ datam ut implerent, à Jansenianis postulavit rex Christianissimus; eum in finem novos quinque articulos quæstionem facti spectantes ediderunt, de quibus episcopi nostri jussu regis Parisiis congregati, ita mentem suam summo pontifici aperuerunt epist. scriptâ die 2 octobris ejusdem anni 1665: « Mirifica, inquit, nostrum omnium, quotquot aderamus, in his verbis reprehendendis extitit consensio. Visa sunt enim subdola, simulatum duntaxat obsequium præ se ferentia, mente versipelli et callidâ... istud itaque scriptum rejiciendum tanquam fictum et nullatenus catholicum. »

Supradictæ fidei formulæ à clero Gallicano institutæ, multi eo prætextu subscribere recusabant, quòd dicerent talem subscriptionem sine romanæ Ecclesiæ auctoritate non potuisse imperari; quare ut omnis tergiversationi et effugio locus præcluderetur, rogatus est S. pontifex Alexander VII ejusmodi formulam mittere ab omnibus et singulis clericis subsignandam.

Anno itaque 1665, die 15 februarii Alexander VII, regis Christianissimi et episcoporum Galliæ votis annuens, Constitutionem edidit quæ incipit, *Regiminis*; in eâ autem continetur formula fidei formulario cleri Gallicani haud absimilis. Is est dictæ formulæ tenor.

« Ego N. Constitutioni apostolicæ Innoc. X datæ die 31 maii anni 1653, et Constitutioni Alex. VII, datæ die 16 octobris an. 1656, summorum pontificum, me subjecio, et quinque Propositiones ex Cornelii Jansenii libro, cui nomen AUGUSTINUS, excerptas, et in sensu ab eodem auctore intento, prout illas per dictas Constitutiones Sedes apostolica damnavit, sincero animo damno ac

« rejicio, et ita juro; sic me Deus adjuvet » et hæc sancta Evangelia. »

Hanc fidei formulam jubet pontifex, « ad quælibet effugia præcludenda, omnesque removendos obtentos, ab omnibus ecclesiasticis... necnon aliis quibuscumque ecclesiastici ordinis, tam regularibus quàm secularibus, etiam monialibus subscribi. » Pontificiæ auctoritati regia quoque accessit; mense april. ejusd. anni lata fuit celeberrima illa Declaratio in supremæ curiæ tabulis inscripta 29 ejusd. mensis, quâ cautum fuit ut subscribendæ purè et simpliciter dictæ formulæ disciplina accuratè in toto Galliæ imperio executioni mandaretur, gravissimis in refractarios pœnis impositis; præsertim verò ut eorum beneficia, dignitates, personatus et officia obtinenda aut jam obtenta, pleno jure vacantia maneat et impetrabilia.

Ita conclusis et coarctatis Jansenii defensoribus, aut subscribendum fuit, aut subeundæ pœnæ quas apostolicæ Constitutiones et regia edicta statuebant. Dnas in partes universim scissi tunc fuere circa illam quæ postulabatur formularii subscriptionem. Alii rigidiores dicti, subscriptionem omninò detrectarunt, aut saltem nonnisi cum expressâ juris à facto distinctione subscribi posse contenderunt; alii verò remissiores dicti, contendebant simpliciter et absolutè subscribi posse nullâ factâ tali distinctione seu limitatione; atque isti varia excogitaverunt effugia, ut in subscribendo se immunes à perjurio exhiberent, licet Jansenii sensum animo retinerent. Effugia hæc alibi commodiùs recensebimus.

Molliorem hanc et laxiorem nonnullorum è suis opinionem summo zelo impugnavit Arnaldus quartâ parte Apologiæ monialium Portûs Regii cap. 2, 3, etc., quam sententiam dicit mendaciis, æquivocationibus ac perjuriis patentissimum aditum aperire. Et meritò quidem. Quis enim non videat ex intentione Ecclesiæ exigi ab eo qui dictæ formulæ subscribit, ut corde credat et ore confiteatur Jansenii sensum damnum esse? Quomodò igitur simpliciter subscribendo, absque perjurio poterit eundem sensum intus et ex animo sanum ac orthodoxum habere?

Hæc inter Jansenii discipulos circa formularii subscriptionem extitit pugna, usque ad prætensam illam pacem quam à Clemente IX redditam arbitrantur. Invaluit siquidem ab hoc tempore, alia apud ipsos sententia, exploratum scilicet omnibus esse, Ecclesiam jam

nonnihil remisisse de illo intimo, puro ac simplici, quod hactenus postulaverat, subscribentis obsequio et consensu; quatenus nempe interiorem illum mentis consensum exigit duntaxat circa quæstionem juris, seu damnationem propositionum in se: quantum verò ad quæstionem facti, seu attributionem sensus quinque Propositionum libro Jansenii, silentium religiosum tanquàm sufficiens approbat. Hujusce opinionis fundamentum ex Brevibus Clementis IX et Innoc. XII repetunt; verùm quàm temerè et immeritò sequenti cap. demonstrabimus. Interim historiæ series resumenda.

Itaque dictæ fidei formulæ ab Alexand. XII præscriptæ, singuli in suis diocesisibus subscribentibus episcopi, atque à suis subscribi curabant; et quidem sine limitatione et restrictione, aut juris et facti distinctione. Quatuor ex ipsis, scilicet Nicolaus Pavillon episcopus Alecensis, Franciscus Caulet episc. Apamiensis, Nicolaus Chouart de Buzenval episc. Bellovacensis, Henricus Arnauld episc. Andegavensis, in suis pro dictâ subscriptione publicis Mandatis, mensibus junii et julii ejusdem anni 1663 promulgatis, factum à jure distinxerunt, asserentes quæstioni juris internum fidei assensum deberi; pro facto verò quo damnatæ Propositiones libro Jansenii tribuuntur, solam exigì posse silentii reverentiam. Ea Mandata regio placito reprobata sunt die 20 julii, postea jussu Alexandri VII, inter libros prohibitos rejecta fuere.

Quatuor illi episcopi ad postulationem regis Christianissimi illicò in jus vocati sunt ab Alexandro VII, sed eo defuncto ante causæ definitionem, variisque subinde accessoriis enascentibus controversiis, de negotio amicè componendo actum est an. 1667, sub Clemente IX, Alexandri successore. Volebat pontifex, ut quatuor episcopi sua dicta Mandata expressè revocarent; recusabant verò illi, ne quid fortè suæ auctoritati apud suos inde decederet. Medius occurrit episcopus Laudunensis, postea eminentiss. cardinalis Estræus, cum archiepiscopo Senonensi D. de Gondrin, et episcopo Catalaunensi D. Vialart.

Hanc pro suâ sagacitate illustriss. Laudunensis episcopus aperuit ineundæ concordiæ viam, « quæ supplere retractationem aliquo modo « posset; nempe, ut priori illâ subscriptione « formularii, quam vulgaverant illi episcopi « in suis diocesisibus, insufficiente judicatâ, « novam præstarent et exigèrent; sicque novâ

« et accuratori hâc subscriptione, priorem « ejus nulla haberetur ratio, quasi abolitam « et irritam remansuram esse... In id tandem « consenserunt quatuor episcopi, et convocatis « suis diocesisis synodis, novam subscrip- « tionem imperârunt formulæ Alexandri VII, « statimque Clementi IX per litteras propriâ « manu subsignatas (die 4 septembris 1668), « testati sunt se sincerè et absque ullâ excep- « tione aut restrictione dictæ formulæ sub- « scripsisse. » Ita compositum fuisse difficile istud ac implicatum negotium, narrabat coram Innoc. XII die 4 junii an. 1693, eminentiss. Estræus pacifici consilii auctor; quique addebat, « se unum omnium optimè commemorare « posse quod gestum fuerat, cùm essem unus « ex iis tribus qui inter pontificem Cleme- « tem IX et quatuor dictos episcopos media- « toris partes agebam, simul cum archiepi- « scopo Senonensi et episcopo Catalaunensi. »

His peractis, tres pacis mediatores tum litteris pariter datis ad pontificem, tum etiam publico instrumento die 4 decembris ejusd. anni 1668, testati sunt quatuor illos episcopos, « optimâ fide egisse... eos damnasce et à suis « damnari jussisse quinque Propositiones sin- « cero prorsus animo, absque ullâ exceptione « aut restrictione qualicumque, in eo omni « sensu quo sunt ab Ecclesiâ damnatæ. » Idipsum testatus est et ipsemet rex Christianissimus epist. ad Clement. IX. His et aliis testimoniis monitus S. pontifex, suam quatuor episcopis benevolentiam ac paternum affectum restituit, Brevi ad ipsos dato die 19 januarii an. 1669, quòd didicisset, inquit, ipsos tandem meliora secutos consilia, « juxta præscriptum « litterarum apostolicarum... sincerè subscri- « psisse et subscribi fecisse formulario. Nam « (pergit ibidem), prædecessorum nostrorum « Constitutionibus firmissimè inhærentes, nul- « lam circa illud exceptionem aut restrictionem « admissuri unquàm fuisset. »

Mirum profectò, quantum hâc quatuor episcoporum reconciliatione abusi fuerint Janseniani in patrocinium religiosi, ut vocant, silentii. Asservère passim, in novâ subscriptione, prout in actis verbalibus synodorum Diocesanarum continebatur, insertam fuisse restrictionem, limitationem ac distinctionem juris et facti, atque huic postremo silentii duntaxat reverentiam promississe; quod Clementi IX ignotum non fuit; cùm igitur ad pacem admissi fuerint quatuor episcopi, concludunt solemniter à pontifice approbatam fuisse suam

de silentio religioso sententiam. Verum immerito prorsus id ab ipsis conclamatum fuit ; certum quippe est ex publicis instrumentis mox indicatis, eâ duntaxat conditione paci restitutos fuisse quatuor episcopos (quidquid tandem in privatis eorum actis verbalibus expressum sit), quod *purè et sincerè absque ullâ exceptione aut limitatione* subscripserint. Sed de toto isto negotio fusiùs et datâ operâ postmodum agemus expendendo critica historię puncta.

Anno 1692, subortis in Belgio novis circa subscriptionem formularii contentionibus, visum est Belgii episcopis eidem formulario aliquid addere ad omnes novatorum fraudes et cavillationes declinandas. Conquesti sunt apud S. pontificem, tunc Innoc. XII, nonnulli doctores Lovanienses de hac additione ; missus Romam H. nnebelan. 1693, qui h. rum querimonias S. pontifici aperiret. Breve scripsit pontifex die 6 januarii 1694, in quo post confirmatas Innoc. X et Alex. VII Constitutiones, addit, ab omnibus quidem exigendum esse ut subscribant *sincerè*, absque ullâ distinctione, *restrictione*, seu expositione, damnando propositiones ex libro Jansenii excerptas, in *sensu* obvio quem ipsamet propositionum *verba* præ se ferunt ; nihil tamen sub quocumque prætextu addendum formulario. Cum autem ex his decreti verbis, *in sensu obvio quem verba ipsa præ se ferunt*, inferrent novatores, id unum jam ab Innocent. XII exigí, ut quinque Propositiones in seipsis duntaxat damnerentur, nullâ omninò mentione factâ sensus Jansenii, altero Brevi ad eosdem Belgii episcopos dato 24 novemb. 1696, significavit S. pontifex se Brevi præcedenti, nullatenus derogasse prædecessorum suorum constitutionibus, sed ipsis potiùs firmiter inhæsisse. Verum de his iterum in punctis criticis.

Anno 1700, in comitiis generalibus cleri Gallicani, præside Eminentiss. card. de Noailles, quatuor propositiones circa Jansenismum excerptæ ex libro cui titulus, *Augustiniana Ecclesiæ Romanæ doctrina*, etc., damnatæ sunt, tanquàm *falsæ, temerariæ, contumeliosæ* in *clerum Gallicanum, summos pontifices, et in universam Ecclesiam, schismaticæ, et erroribus condemnatis faventes.* Ex his Propositionibus, prima sic se habet : *Phantasma Jansenismi quæsitum ubique, sed nusquàm repertum, præterquàm in laboranti quorundam phantasiâ.*

Circa annum 1702, novos conatus edidère

Janseniani ut penè attritum silentii religiosi figmentum excitarent. Prodiit ex eorum officinâ libellus in quo clericus quidam inducitur, cui sacramentalis absolutio denegata fuerat, eò quòd declarasset, *se reverà quinque Propositiones simpliciter et absolutè damnare, ac formulæ Alexandri VII subscripsisse quidem; nihilominus quantum ad quæstionem facti, seu attributionem illarum quinque Propositionum libro Jansenii, existimare se religiosum sufficere silentium.* Hic celebris est conscientię casus, circa quem quadraginta doctores Parisienses responderunt, his verbis : *Doctores infra scripti, visâ casus expositione, censent, hujus ecclesiastici viri sententiam, nec novam esse, nec singularem, nec ab Ecclesiâ damnatam; neque talem ut confesarius possit ipsi sacramentalem denegare absolutionem nisi eam retractaverit. Responsionem hanc illicò damnavit S. pontifex Clemens XI, triplici decreto : primum ad perpetuam rei memoriam, latum fuit die 12 januarii 1703, secundum et tertium die 13 ejusdem mensis et anni, directa fuere ad regem Christianissimum, et eminent. card. Noallium.*

Eundem casum censorio judicio perstrinxère plerique episcopi Gallicani, præsertim eminentiss. card. Parisiensis archiepiscopus, documento Pastoralis eâ de re edito 22 februarii ejusd. an. 1703. Doctores verò qui dictum conscientię casum approbaverant, revocatâ priori suâ sententiâ resipuerunt, uno excepto qui pro suâ contumaci resistantiâ ex albo Doctorum expunctus est judicio ac sententiâ S. Facultatis.

Die scilicet 1 septembris 1704, syndicus de laudatâ casus responsione conquestus, communibus votis sic censuit S. Facultas : *Primò, dictam propositionem (il lui suffit d'avoir une soumission de respect et de silence, pour ce que l'Eglise a décidé sur le fait de Jansénius) adversari censuræ sacræ Facultatis latæ die ultimâ jan. anni 1656, in epist. Antonii Arnaldi, et decreto ejusdem super formulâ fidei, dato die 2 maii 1661... Secundò, inhærendo prædictæ censuræ adversus epistolam Antonii Arnaldi, præfatam propositionem damnandam esse, et ut ipsam damnatisdem notis quibus in prædictâ censurâ proscripta est; nempe, ut temerariam, scandalosam, injuriosam SS. pontificibus et episcopis Gallicæ, atque etiam ut præbentem occasionem renovandæ ex integro, post damnationem, Jansenii doctrinæ; et in quan-*

« tùm eadẽ præfatâ propositione dicitur,
 « illud obsequium reverentiæ et silentiï sulli-
 « cere, etiam iis qui subscribunt formulæ fidei
 « quæ adjunctum habet iuramentum ex san-
 « ctione Alexandri VII ; prædictis notis hanc
 « etiam esse adjiciendam, nempe, quòd faveat
 « mendacio et perjurio... Denique, ut omnibus
 « magis ac magis innotescat, sacram Facul-
 « tem in docendâ sanâ doctrinâ, et asserendâ
 « Ecclesiæ auctoritate, constare sibi semper,
 « typis mandanda esse latino ac vernaculo
 « idiomate, præsentem Conclusionem, censu-
 « ram adversus libellum, *Seconde lettre de*
 « *M. Arnauld*, latam ultimâ januarii 1656, et
 « decretum super formulâ fidei, datum 2 maii
 « anni 1661. » Ita S. Facultas Parisiensis.

Ne quid autem effugii superesset Jansenianis
 inobsequiosis silentio, sollemnis accessit Clemen-
 tis XI Constitutio data die 16 juli 1705, quæ
 incipit his verbis, *Vineam Domini Sabaoth*. In
 eâ S. pontifex postquàm Innoc. X et Alexand.
 VII Constitutiones confirmavit, Clementis verò
 IX et Innoc. XII Brevia seu Epistolas à pravis
 Jansenianorum exceptionibus et interpretatio-
 nibus vindicavit, declarat « hâc perpetuò vali-
 « turâ Constitutione, obedientiæ, quæ præ-
 « sertis Constitutionibus debetur, obsequioso
 « illo silentio minimè satisfieri ; sed damnatum
 « in præfatis quinque Propositionibus Jansenii
 « libri sensum, quem illarum verba præ se
 « ferunt, ut præfertur, ab omnibus Christi
 « fidelibus ut hæreticum, non ore solùm, sed
 « et corde rejici ac damnari debere ; nec aliâ
 « mente, animo aut credulitate supradictæ
 « formulæ licitè subscribi posse. »

Huic Constitutioni unanimis accessit Eccle-
 siæ universæ consensus, inprimis verò cleri
 Gallicani qui in comitiis generalibus anni 1705
 congregatus, hanc sollemniter acceptavit, datis
 tum ad pontificem gratulatoriis, tum ad cæteros
 Galliæ episcopos encyclicis litteris, qui eandem
 pariter, singuli in suis diocesisbus exceperunt
 ac promulgârunt. Quapropter jam causa finita
 est.

Fallimur, infinitæ sunt novatorum fraudes,
 vitiligationes, effugia ; ex iis nonnulli dictæ
 Constitutioni directâ fronte obstrepere ausi
 sunt, atque inter alios vir projectæ audaciæ
 feralè scriptum emisit calend. junii 1709, quo
 Clementis XI bullam toti Ecclesiæ denuntiat,
 « tanquàm subvertentem doctrinam *gratiæ quâ*
 « *Christiani sumus*, tanquàm resuscitantem Pe-
 « lagium cum suis asseclis, tanquàm objic'en-
 « tem Ecclesiæ extraneorum scandalo, » uno

verbo, dignam cui Antichristus adveniens co-
 ronam imponat ; cæteri verò protervi minis,
 versipelles magis, cùm prædictæ Constitutionis
 supremam vim ac auctoritatem in dubium re-
 vocare non audeant, eam saltem falsis, obliquis,
 ac distortis interpretationibus infirmare ac ele-
 vare conantur. Verùm de his ex professo art.
 5 capitis sequentis.

CAPUT II.

Discutiuntur critica historiæ puncta.

Præcipua de quibus controversia movetur
 puncta sunt : 1° Bulla Urbani, an sit authen-
 tica, dogmatica, ac supremam in universâ Ec-
 clesiâ auctoritatem habeat ; 1° quinque Propo-
 sitionum ad Innoc. X delatio, an fuerit legitima ;
 nec libertatibus nostris adversa ; 3° bulla Inno-
 cent. X ; 4° quinque articuli ; 5° dicta Clemen-
 tis IX pax ; 6° Brevia Innocentii XII ; 7° bulla
Vineam Clementis XI. Primum ex his jam
 abundè tractavimus dissert. de Baio cap. 3 ; de
 altero pariter diximus in decursu historiæ art.
 3 ; cætera nunc veniunt expendenda.

ARTICULUS PRIMUS.

De Innocentii X bullâ.

Celebratis, ut antea notavimus, duorum an-
 norum spatio triginta et sex Congregationibus,
 tandem ultima maii anni 1653, Constitutionem
 edidit Innocent. X, in quâ quinque Jansenii
 Propositiones variis sigillatim affectas censuræ
 notis damnavit. Nihil non moliti sunt Jansenii
 sectatores ut fulmen istud Vaticanum aut infir-
 marent aut saltem declinarent : dixere *in ab-*
stracto duntaxat, *sicut jacent*, et prout præ-
 scindunt à quocumque auctore discussas ac
 damnatas fuisse quinque Propositiones ; variis
 insuper adversus pontificium decretum insur-
 rexere querimoniis. Tria itaque nobis præ-
 standa sunt : 1° ostendendum quinque propo-
 sitiones in Jansenii sensu, et sensum Jansenii
 in quinque Propositionibus discussum et dam-
 natum fuisse ; 2° æquitas illius examinis et
 judicii contra obtrectatores vindicandâ ; 3°
 summa et irrefragabilis hujusce apostolici de-
 creti auctoritas demonstranda ; hæc sequenti-
 bus quinque Conclusionibus conficiemus.

CONCLUSIO PRIMA. — Quinque Propositione
 in romano examine discussæ sunt in sensu
 Jansenii.

Probatur 1° ex octoginta quinque Gallicanis
 episcopis qui romanum de quinque Propositioni-
 bus iudicium postulant. Ii enim, in suâ ad
 Innocent. X epistolâ, denuntiant propositiones

non in abstracto, et sine ullo ad auctorem respectu, sed ut propositiones libri Jansenii, adversus quem Urbanus VIII jam pronuntiaverat, et propter quem vehementissimis turbis agitata esse Galliam asserunt; si igitur dictorum præsumptum votis annuit S. pontifex (ut reipsa ipsum annuisse declarant gratulatoriæ post acceptam Constitutionem litteræ), profectò propositiones in sensu Jansenii examinandas curavit.

Etverò eà ipsâ ratione propositiones delatæ et discussæ sunt, quâ fuerant Facultati Parisiensi oblatæ ut discuterentur; ast certum est ex ipsismet Jansenistis, oblatas illas fuisse tantquam extractas ex Jansenio, ejusque sensu damnandas. Sic enim loquuntur illi in famoso scripto quod *In nomine Domini* inscribitur, quodque exaratum fuit dum deputati à sacrâ Facultate doctores, propositiones examinabant: « Cum norint omnes magistros egregios delictos esse ad thesim propositam, non ut per se sonat, sed ut jacet in Jansenio accuratiùs examinandam; videant sedulò ne quid durius in eam pronuntient, quòd hâc in parte sanissimam Jansenii theologiam notet aut perstringat. » His concepit libellus cui titulus, *Quinque Propositionum de gratiâ vera et catholica expositio*, in Collectan. de St. Amour pag. 50 et 51.

Probatur 2º ex memorialibus seu scriptis ex utrâque parte exaratis dum Romæ quinque Propositiones excuterentur. Narrat Dominus de St. Amour, Jansenianæ causæ propugnator acerrimus, Diarii parte 5, cap. 9, se vidisse et transcripsisse scriptum D. Hallier Jansenii accusatoris, cui titulus erat: *Damnatio quinque Propositionum ex Jansenii libris extractarum*; et parte 6, cap. 5, aliud ejusdem scriptum refert in quo demonstrabatur quinque Propositiones ex libro Jansenii extractas esse, designatis et indicatis locis unde excerptæ sunt. Plura alia narrat idem de St. Amour pag. 150, 151, 159, 161, 168, 188, 209, 262, etc. quæ clarissimè efficiunt actum esse Romæ de quinque Propositionibus in sensu Jansenii notandis.

Quancquàm verò deputati pro Jansenio ipsum appellare rariùs auderent, ejus tamen doctrinam tueri se, tacito Jansenii nomine, apertè profitebantur. Quid enim aliud indicat titulus primæ Propositionis, in scripto trium columnarum sic præfixus: *Prima Propositio à loco suo dolosè avulsa*? Unde, quæso, avulsa, nisi à Jansenii libro? Quapropter Wadinghus in suâ brevi Relatione loquens de quinque Propositio-

num patronis, hæc habet: « Die 19 maii anni 1653, introducti sunt quinque presbyteri Galli Sorbonici qui partes Jansenii tuebantur. »

Probatur 3º ex Consultoribus ad examen Propositionum deputatis; ii enim, tribus duntaxat exceptis Præposito scilicet generali Augustinianorum magistro sacri Palatii, et commissario sancti Officii, tum primùm de propositionibus in sensu Jansenii vota tulere; quin et hi tres laudati, licet in primis Congregationibus de sensu Jansenii minimè locuti fuissent, in posterioribus subinde habitis coram R. pontifice suffragium pronuntiârunt in ordine ad Jansenium, saltem de quibusdam propositionibus. Hæc omnia discimus ex Wadingho et ex Jansenii historiæ scriptore, utroque Jansenianis non suspecto. Iidem testantur magistrum sacri Palatii in vigesimâ septimâ Congregatione et in trigesimâ primâ genu flexo perorasse ut ostenderet eandem esse Jansenii et sancti Aug. ac Dominicanorum doctrinam; ergo Consultores agebant de sensu Jansenii.

Probatur 4º ex judicio Alexandri VII, qui oculatus testis et particeps fuerat eorum omnium quæ in causâ quinque Propositionum gesta fuerant. Summus ille pontifex Brevi ad vicarios generales archiepiscopi Parisiensis dato die 1 augusti 1661, graviter ipsos increpat, quòd in Mandato publico ausi fuissent asserere, quinque Propositiones sub Innocent. X in Jansenii sensu non fuisse discussas. En verba Alexand. VII: « In quo sanè (Mandato) inprimis, non minùs temerariâ quàm mendaci narratione profertur, tempore Innoc. X non aliud factum, quàm inquisitionem, an Propositiones illæ quinque de gratiâ, veræ ac catholicæ, an potius falsæ et hæreticæ censendæ forent; cum eo planè tempore (ait pontifex), nedùm de propositionibus ipsis cognitio habita fuerit, verùm quòd è Jansenii libro *Augustinus* nuncupato extractæ essent, et ita in sensu ab eodem Jansenio intellectæ, damnatæ, ut nos ipsi Constitutione nostrâ 17 Kalend. novembris 1656, luculenter expressè declaravimus; » ergo, etc.

Quanti porrò ponderis sit expressum hoc Alexandri VII testimonium, nemo non intelligit. Namque (ut rectè observat auctor libelli cui titulus: *Epistola Theologi Leodiensis*, licet aliunde in Jansenianos propensus) « non erat is Alex. VII, qui seipsum existimatione apud homines ultrò spoliare voluisset, quod

« profectò fecisset, si quidpiam à verò alienum
 « splendide affirmasset; dùm ergo rem enar-
 « rat paucis ab annis Romæ gestam, interve-
 « nientibus pluribus cardinalibus, præsulibus
 « ac theologis, censendus est retulisse uti res
 « se habebat: post diuturnam igitur et gravem
 « discussionem, præsules et theologi judica-
 « verunt sensum quinque Propositionum in
 « Jansenio extare. » Hactenus auctor laudatus
 circa medium suæ epistolæ.

Probatur 5º invicto hoc ratiocinio: Quinque Propositionum in romano examine discussio facta fuit vel sensu Jansenii, vel sensu Calvinii, qualis in primâ columnâ scripti de distinctione sensuum exhibetur; at istud postremum quod contendunt Janseniani, tam absurdum est, ut nihil magis, 1º quia propositiones ab Episcopis Gallicanis delatæ fuerant, sensu Jansenii expendendæ, non sensu Calvinii, de quo nulla prorsus fuit tunc temporis excitata quæstio; 2º prorsus ridiculum est asserere per duos et amplius annos tam sollicitè, tam operose, tam longo ac molesto examine de sensu illo inquisitum ac controversum fuisse, qui, si Jansenianis fides, obviis est ac naturalis propositionum sensus; quique dudum à concilio Trid. sufficienter proscriptus fuerat; 3º denique, quia de illo agebatur sensu, qui, fatentibus Jansenianis, nonnisi à viris in theologiâ versatissimis dignosci potest; de quo necesse erat publicâ disceptatione audiri partes dissidentes; qui cum dogmatæ gratiæ à se efficacis, aliisque Thomisticæ scholæ placitis intimè conjunctus est; qui ut apprimè notari posset, censuerat in primâ Congregatione cardinalis Spada, lustranda esse quæcumque sub Pio V et Greg. XIII, in causâ Baii, et sub Urbano VIII, in causâ Jansenii, acta fuerant; quem denique nonnulli è Consultoribus à censurâ eximere conabantur; porrò manifestissimum est isthæc omnia in sensum Calvinianum neutiquam cadere posse; ergo, etc.

CONCLUSIO SECUNDA. — Quinque Propositiones ab Innocent X in sensu Jansenii damnatæ fuerunt.

Probatur 1º ex ipsâ Innoc. X Constitutione die 31 maii anni 1653, quæ non obscure indicat quinque Propositiones ad Jansenii mentem damnari. Quippe ita loquitur S. pontifex: « Cum occasione impressionis libri cui titulus: *Augustinus Cornelii Jansenii Yprensis episcopi*, inter alias ejus opiniones orta fuerit præsertim in Galliis, controversia super quinque ex illis; complures Galliarum episcopi apud

« nos institerunt, ut easdem propositiones
 « nobis oblatas expenderemus, ac de unaquâ-
 « que earum certam ac perspicuam ferremus
 « sententiam: » postea verò quinque illas Propositiones quas Jansenii esse dixerat, Innocentius recenset et hæreticas esse declarat, ac tandem ista adjungit: « Non intendentes
 « tamen per hanc declarationem et definitio-
 « nem super prædictis quinque Propositioni-
 « bus factam, approbare ullatenus alias opi-
 « niones, quæ continentur in prædicto libro
 « Cornelii Jansenii. » Hæc distinctio quinque Propositionum ab aliis opinionibus quæ in libro Jansenii continentur, manifestè innuit quinque Propositiones similiter in eodem libro contineri, et ut ejusdem libri opiniones damnari.

Non nostra est ista observatio, sed ipsiusmet S. pontificis Innocent. X, qui alloquens episcopum Lodevensem, sic ipse mentem suam exposuit: « Nonne observasti, inquebat, hanc
 « Constitutionis clausulam; non intendentes,
 « etc., sanè cum alias opiniones in libro Jan-
 « senii contentas nos non approbare dixerimus; ergo intelligimus propositiones damna-
 « tas in eodem libro contineri. » Ita rem narravit ipse episcopus Lodevensis in comitiis anni 1656, ut videre est in Actis verbalibus horumce comitorum pag. 307. Nihil certè disertius hoc testimonio exoptari potest; atque hic desideranda fides Domini de St. Amour in suâ secundâ ad Diarium additione pag. 378, ubi narrationem dicti Lodevensis episcopi truncatam et mutilatam reddidit, prætermisissimis nempe decretoris verbis mox adductis.

Idem disertissimè testatus est Innocent. X Brevi ad Galliæ episcopos dato 29 septembris 1654, in quo ipsis summopere gratulatur, quòd prædictam Constitutionem ubique servari curarent, per quam, inquit, *damnavimus in quinque propositionibus Cornelii Jansenii doctrinam ejus libro contentam, cui titulus Augustinus*.

Probatur 2º ex solemnî Alexand. VII bullâ editâ die 16 octobris anni 1656, quæ quinque Propositionum damnationem in sensu Jansenii factam fuisse conceptis verbis declarat: « Cum
 « autem, inquit S. pontifex, nonnulli iniqui-
 « tatis filii prædictas quinque Propositiones
 « vel in libro prædicto ejusdem Cornelii Jan-
 « senii non reperiri... vel non in sensu ab eo-
 « dem intento damnatas fuisse asserere magno
 « cum Christi fidelium scandalo non reformi-
 « dent: Nos qui omnia quæ hæc in re gesta

« sunt, sufficienter et attentè perspeximus,
 « utpote qui.... omnibus illis Congregationibus
 « interfuimus, in quibus apostolicà auctoritate
 « eadem causa discussa est eà profectò dili-
 « gentià, quà major desiderari non posset,
 « quancumque dubitationem super præmissis
 « in posterum auferre volentes.... quinque il-
 « las Propositiones ex libro præmemorati Jan-
 « senii episcopi Yprensii, cui titulus *Augusti-*
 « *mus*, excerptas, ac in sensu ab eodem Corne-
 « lio intento damnatas fuisse declaramus et
 « desinimus; et uti tales, inustà scilicet eadem
 « singulis notà, quæ in prædictà declaratione
 « et definitione (Innocentii X) unicuique il-
 « lurmsigillatiminuritur, iterùm damnamus. »
 Nihil sanè expressius exoptari potest.

Probatur 3^o ex clero Gallicano. In comitiis generalibus anni 1654, agnoscunt præsules nostri ex ipsis Innocent. X verbis invictè demonstrari quinque propositionum damnationem in sensu Jansenii factam; etenim in epist. encyclicà ad omnes regni episcopos, postquàm observavère res duas vanas omninò et inanes à à novatoribus affirmari; alteram quinque Propositiones non esse Jansenii; alteram damnatas esse eo in sensu qui ad Jansenium nihil pertineat, istud effugium sic occludunt: « Potest ne
 « enim quidquam esse absurdius, quàm tueri
 « id velle, cui refellendo revincendoque nihil
 « opus sit rationibus, nihil disquisitione etiam
 « mediocri, aut levi, sed solà pontificiæ Con-
 « stitutionis quæ per se ipsam rem totam
 « apertè dirimit, lectione? » Et postea hæc addunt iidem præsules, « solam per se sufficere
 « Innocentii Constitutionem, ut perspectum
 « fiat illas quinque Propositiones verè esse
 « Jansenii, et damnatas esse in vero ac pro-
 « prio verborum sensu, et eo planè quo à
 « Jansenio traduntur et explicantur. » Idem declarent comitia an. 1655, 1656, 1657, 1660, 1661, etc.

Probatur 4^o, testimonio eminentiss. card. d'Aguirre, cujus auctoritatem maximè commendârunt Janseniani. Hic scilicet declaravit factum Jansenii, id est, quæstionem de Jansenii sensu, tempore Innoc. X et Alex. VII diligentissimè discussam fuisse, atque ab iisdem pontificibus post maturum examen clarè definitam. Primum testatur D. de Vaucelle, aliàs Valloni, vir Jansenianis minimè suspectus, in epist. scriptà die 5 julii an. 1690, causæ Quesnellianæ pag. 224; utrumque verò tradit ipsemet d'Aguirre tom. 3 Theolog. S. Anselm. disput. 416, sect. 4.

Probatur 5^o ex retractationibus Lucæ Wadinghi, abbatis de Bourzeis et Patris Thomassini. Ita loquitur Wadinghus in suâ brevi Relatione de gestis in causâ Jansenistarum :
 « Quòd si aliquis ante hanc definitionem (In-
 « nocentii X) aliter senserit, quibuscumque
 « rationibus, vel quorumcumque doctorum
 « auctoritati innixus, nunc captivare debet in-
 « tellectum in obsequium fidei, sicut suadet
 « Apostolus. Id ipsum ego toto corde me fa-
 « cere profiteor, omnesque illas propositiones
 « supradictas in omnibus et singulis sensibus,
 « quibus eas condemnatas voluit SS. Inno-
 « cent. X condemno et anathematizo; quan-
 « tumvis ante hanc definitionem in aliquibus
 « sensibus eas sustineri posse judicaverim, si-
 « cut in suprascriptis meis votis explicavi. »

Ex his Wadinghi verbis sic licet arguere : Sensus quem ante dictam Constitutionem propugnabat Wadinghus erat ipse Jansenii sensus, fatentibus quippe Jansenianis, fervidus fuit ante Constitutionem Jansenii defensor; et reipsà eum in Congregationibus conatus est absolvere, atque primam propositionem ad unum legitimum sensum revocavit; porrò verbis citatis testatur idem Wadinghus, ab Innoc. X confixum fuisse hunc ipsum sensum quem ante Constitutionem propugnaverat; atque adeò disertè profitetur *se propter auctoritatem bullæ* (Innoc. X) *captivare intellectum in obsequium fidei*; ut quid autem captivasset intellectum, si nihil retractandum et emendandum habuisset, si solus damnatus fuisset Calvinii sensus, quem ipse semper detestatus fuerat? ergo, etc. Idem planè argumentum erui potest ex similibus retractationibus abbatis de Bourzeis et Patris Thomassini, circa quas consulenda est historia quinque Propositionum lib. 1, necnon defensio ejusdem historiæ pag. 490 et sequentibus. Dictam Wadinghi Relationem edidit Quesnellius lib. cui titulus : *Défense de l'Église R. contre Leydeker*, pag. 429, atque ibidem testatur ex totâ istâ Relatione verum Constitutionis Innoc. sensum innotescere.

Probatur 6^o Eo sensu judicium tulit Innoc. X de quinque Propositionibus, quo ipsi delatæ fuerunt ab octoginta quinque episcopis Gallicanis; quo in romano examine à Consultoribus expensæ ac discussæ; quo denique pendente examine à partibus æmulis hinc et inde impugnatæ ac propugnatæ; atqui, ex dictis ac probatis superiori Conclusionem, quinque Propositiones non Calvinii sed Jansenii sensu delatæ fuere, discussæ, atque à partibus con-

tendentibus utrinque impugnatae ac propugnatae; ergo, etc.

Probat 7^o brevi isto ratiocinio : Damnatæ sunt quinque Propositiones in sensu proprio, naturali et obvio; atqui proprius, naturalis et obviis quinque Propositionum sensus, ipse est Jansenii sensus; ergo, etc. Major constat ex ipsismet Jansenistis qui id sæpius confessi sunt; ita præsertim Quesnellius citato lib. Defensionis Ecclesiæ romanæ adversus Leydeker. Etverò, uti alibi dictum est, censura quæ pronuntiatur absque ullâ sensuum distinctione, eo ipso intelligitur proprium et naturalem propositionis sensum afficere; porro censura in quinque Propositiones lata, absoluta est, pura ac simplex; ergo, etc. Minor autem certissima est, atque invictè probari potest, 1^o quàmpluribus Jansenii textibus qui proprium et naturalem quinque Propositionum sensum clarè exhibent; 2^o ex ipsâ Jansenistarum agendi ratione; 3^o ex eorumdem scriptis ante Constitutionem editis. Has omnes probationes Conclusionem quintâ prosequemur; im præsentiarum satis sit observasse, in scripto *Trium columnarum*, sensum secundæ columnæ, qui erat juxta Jansenianos sancti Aug. ac proinde Jansenii sensus, dictum fuisse verum, germanum ac legitimum propositionum sensum; sensus verò primæ columnæ seu Calvinii, ab iisdem dictus est alienus et extraneus, qui nonnisi malignè propositioni affingi potest; porro manifestissimum est germanum ac legitimum propositionis sensum, prout opponitur alieno et extraneo, ipissimum esse proprium, naturalem et obviis sensum; ergo, etc.

His omnibus addi possunt, 1^o discreta testimonia Jansenianis minimè suspecta. Auctor defensionis theologorum adversus Documentum Pastorale illustriss. Carnutensis episcopi, art. 7, pag. 245, sic loquitur : « On ne peut nier que le pape Innocent X n'ait insinué dans sa Constitution contre les cinq Propositions, qu'elles renfermaient la doctrine de Jansénius. » Auctor historiæ generalis Jansenismi, tom. 2, pag. 158, idipsum clariùs tradit his verbis : « Le cardinal Pimantel parlant au pape, et le priant de ne rien précipiter, de crainte que la doctrine de S. Augustin et de S. Thomas ne reçût quelque atteinte, Sa Sainteté lui répondit que la chose avait été soigneusement examinée en sa présence; et qu'on avait trouvé qu'il n'était question ni de S. Augustin, ni de S. Thomas, ni de leur doctrine, et qu'il était nécessaire

« de faire quelque chose contre le livre de Jansénius; le pape était si prévenu contre ce livre, disait ce cardinal, qu'il voulait qu'on le rejetât et qu'on l'abolît. » Idem multoties narrat in *Diario Dominus* de St. Amour, parte 6, cap. 25 : « Le pape dit qu'il n'était question ni de S. Augustin, ni de S. Thomas, ni de leur doctrine, et qu'il était nécessaire de faire quelque chose contre Jansénius. » Et cap. 27 : « Sur ce que nous dimes au cardinal Pimantel, qu'on embrouillait encore toute l'affaire tant qu'on pouvait, sous le nom de Jansénius qui était devenu si odieux; il nous dit que le pape était aussi persuadé qu'il fallait perdre et abolir l'ouvrage de ce prélat. Les termes dont usa ce cardinal pour nous dire la disposition où était le pape sur cet auteur, furent ceux-ci, que, selon la pensée de Sa Sainteté, JANSÉNIUS EST REVOCANDUS, JANSÉNIUS EST REJICIENDUS. » Ex his testibus Jansenianis minimè suspectis apertum est Innocentium X quinque Propositiones in sensu Jansenii damnare voluisse et reipsâ damnasse; hæc Jansenianorum testimonia sufficiant, plura adderemus si esset necessum, sed foret supervacaneum.

2^o. Quod multò gravius est, idipsum constantissimè docuerunt celebriores orthodoxi auctores qui de isto argumento egère; satis sit hic appellasse illustriss. Bossuet. Intégrâ ad moniales Portûs Regii epistolâ nedum docet quinque Propositiones in sensu Jansenii damnatas fuisse, sed et totus est ut probet canonicum esse, supremum ac irrefragabile, tam circa factum quàm circa jus, hujusmodi iudicium. Num. 6, sic habet : « Je ne pense pas qu'il soit beaucoup nécessaire de s'étendre ici sur la validité de ce jugement. Il est rendu sur une matière qui appartient au tribunal de l'Église; il est rendu par le S.-Siège; il est rendu avec connaissance, et le pape Alexandre VII a déclaré à toute l'Église l'examen exact qu'a fait son prédécesseur, non seulement du droit, mais du fait. » Et paulò post : « Mais enfin voici ce qui résout la difficulté. Aucun ne révoque en doute, que la condamnation des cinq Propositions ne soit canonique; or est-il qu'on ne peut douter que ce qui touche le livre de Jansénius ne le soit également, puisque l'on y voit concourir la même puissance, les mêmes formes, le même examen, la même acceptation, et le consentement unanime de tous les évêques. » Et rursus ibidem : « Il est certain qu'il y a un jugement ecclésiastique, même sur le fait

« contesté; il est certain qu'il est souverain et universel, puisqu'il est du S. Siège, et accepté unanimement par tous les évêques. »
 Atque hinc illustriss. Mirapincensis episcopus D. de la Broûe in epist. ad eminentiss. card. de Bissy die 5 martii 1711, testatur citatum doctissimum Bossuet, sensisse ac è sacro suggestu dixisse, integrum Jansenii opus quinque famosius constare Propositionibus. En verba :
 « Vous prouvez parfaitement que les cinq Propositions sont dans le livre de Jansenius; feu M. l'évêque de Meaux, votre prédécesseur, avait dit en chaire qu'elles étaient tout le livre. »

3°. Quod cumulum addit ac omninò decretorium est, quotquot celebrata sunt Cleri Gallicani comitia in quibus de causâ Jansenianâ actum est, in iis approbatum fuit ac confirmatum quod in comitiis an. 1634 definitum fuisse antea diximus, scilicet quinque Propositiones verè esse Jansenii, et damnatas esse in proprio verborum sensu; et eo planè quo à Jansenio traduntur. Pariter quotquot à damnatione quinque Propositionum extiterè summi pontifices, ii prædecessorum suorum Innoc. X et Alex. VII vestigiis firmissimè inhærentes, eorundem prædecessorum Constitutiones quibus definitum fuerat quinque Propositiones extare in Jansenio, atque in sensu ab eodem intento fuisse damnatas, confirmârunt ac innovârunt. Ita præsertim Clemens IX, Innoc. XII, Clemens XI, ut constabit ex dicendis articulis 3, 4 et 5.

Etverò manifestissimum est dictos præsules ac SS. pontifices constantissimè docuisse, Jansenismum non esse merum phantasma, sed veram ac realem hæresim Ecclesiæ fulminibus multoties et meritò prostritam; porrò ita sentire et loqui, apertè confiteri est quinque Propositiones in proprio, naturali et obvio Jansenii sensu justè et meritò fuisse damnatas; ergo, etc.

Dices itaque 1°, contra primam Conclusionem : Romanus pontifex, narrante D. de St. Amour in Diario, sæpè testatus est, *nolle se omninò ut de Jansenio mentio fieret*; ergo, etc. Resp. dist. ant. : Nolle se ut mentio haberetur de Jansenio, nempe ut liber illius ab Urbano VIII damnatus vindicaretur ab errore, sicut eum vindicare tentaverant Janseniani, concedo; aliter, nego. Namque fatentibus Jansenianis, in primis Congregationibus exploratum fuit utrum Propositiones in sensu Jansenii expendendæ essent, necne; plurimi Consul-

tores de sensu Jansenii disseruerunt; volebat contra Jansenium agere S. pontifex; et reipsâ in suâ Constitutione ipsum nominatim appellavit; ergo, etc.

Dices 2° : Card. Spada declaravit dominis de la Lane et de St. Amour, *propositiones in Congregationibus considerari precisè secundum seipsas, abstrahendo à sensu unius vel alterius*; ergo, etc.

Resp., quandò hæc dixit card. Spada, non excluderat profectò sensum Jansenii de quo unicè tunc agebatur, teste Alexand. VII Brevi ad vicarios generales archiepiscopi parisiensis; sed varios duntaxat removet sensus Calvinii, gratiæ efficacis Thomisticæ vel Molinianæ, quos Jansenii discipuli in dictis propositionibus distinguendos putabant; quibus tamen sepositis rectè ostendebat Hallerius in scripto paucis ante mensibus cardinalibus oblato, quinque Propositiones censuram mereri, ob eum naturalem et obviu sensum, quem habent in libro Jansenii. Scriptum illud refert de St. Amour Diarii parte 5, cap. 8.

Dices 3° : Vincentius de Pratis, commissarius sancti Officii, suffragium ferens circa primam Propositionem, asseruit eam propositam fuisse in abstracto, ut præscindit ab omni proferente. Idem de cunctis propositionibus dixit Wadinghus in suâ brevi Relatione; ergo. — Respondeo 1°, Vincentii de Pratis et Lucæ Wadinghi auctoritatem prævalere non posse tot certissimis quæ prolata sunt testimoniis. . . . 2° Idem sensus est Vincentii de Pratis et Wadinghi, ac cardinalis Spada; etverò, teste Wadingho in citatâ Relatione, commissarius S. Officii coram pontifice suffragium tulit genuflexo, totoque sui sermonis decursu probare voluit eandem esse Jansenii et Dominicanorum doctrinam; et ipsemet Wadinghus ibidem refert se non semel Jansenii defensionem suscepisse; ergo, etc. . . . 5° Obvius et naturalis quinque Propositionum sensus, reverà ipse est Jansenii sensus, ut postea ostendemus; ergo.

Dices 4° : In Diario sæpiùs citato circa primam Propositionem unicum profertur iudicium in quo mentio habeatur sensus Jansenii; ergo, etc. — Respondeo 1°, saltem circa alias propositiones sensum illum ut plurimùm commemorari; 2° testatus est Dominus Vizzani sancti Officii assessor verba hæc, *in sensu Jansenii*, in sex suffragiis circa primam propositionem extare in ipso autographo dictorum suffragiorum; 3° tametsi in primâ suffragiorum declaratione solus Pater Tartaglia primam propo-

sitionem in sensu Jansenii notandam dixerit, tamen in revisione suffragiorum quæ facta est die 3 februarii anni 1653, quinque alii Consultores in suis votis hæc verba addiderunt, in sensu Jansenii. Hæc discimus ex Wadingho in dictâ Relatione.

Dices 3^o, contra secundam Conclusionem: Innoc. X dicit de primâ propositione, quod fuerat jam anathemate damnata; et octoginta quinque episcopi asserunt *motus illos* (circa quinque Propositiones) *sedari oportuisse concilii Trid., auctoritate*; sed hæc non possunt intelligi nisi de propositionibus in sensu Calvinii; ergo, etc. Et verò, Innoc. X in bullâ ait, *declaramus*; unde non novum jus definit, sed antiquam censuram confirmat; ita D. de St. Amour in Diario.

Respondeo: Apagæ nænias; meritò in suâ Constitutione dicit Innoc. X primam Propositionem anathemate jam fuisse damnatam, in Baio videlicet et in Calvino; in Baio quidem eo ipso sensu quem Jansenius renovavit, sed qui in bullis Pii V, Greg. XIII et Urbani VIII, nullâ speciatim notâ percussus fuerat; in Calvino etiam prædamnata fuit. Duo siquidem docuit hæresiarcha, primum, aliqua Dei præcepta quibusdam justis verè quandoque esse impossibilia, propter defectum gratiæ hic et nunc sufficientis; alterum, omnia generatim mandata omnibus justis etiam cum gratiâ maximè efficaci semper esse impossibilia, propter necessariò adhærescentem omnibus hominis lapsi actionibus concupiscentiæ labem. Utrumque distinctis anathematibus damnatum fuit in concil. Trid. sess. 6, cap. 11, et can. 4 ejusd. sessionis; primum docuit Jansenius, non secundum.

Quod autem spectat ad verbum, *declaramus*; supina est rerum theologicarum ignorantia nescire Ecclesiam nova dogmata non constituere, sed duntaxat quæ revelata sunt juridicè declarare. Adde S. pontificem in Constitutione multoties uti verbo, *definimus, damnamus*.

CONCLUSIO TERTIA. — Canonicum fuit et æquissimum Innocentii X de quinque Propositionibus in sensu Jansenii iudicium.

Probat: Iudicium à legitimo iudice latum secundum juris formas, præhabito maturo ac diligenti examine, canonicum certè est ac æquissimum; atqui tale est Innocentii X iudicium de quinque Propositionibus in sensu Jansenii; 1^o latum fuit à S. pontifice, cujus præcipuæ sunt in quæstionibus fidei dirimendis partes, et ejus definitionem circa sensum Jansenii rogaverant episcopi Gallicani..... 2^o Ob-

servatæ fuerunt juris formulæ; neque enim Romæ aliter solent excitatæ de religione quæstiones discuti, quàm per cardinales et consultores, quorum auditis ac ponderatis suffragiis, pontifex ex alto petita auctoritate pronuntiat. Ita porro se gessit Innoc., atque eos præsertim delegit cardinales et Consultores huic officio maximè idoneos, quique Jansenianis suspecti esse non debebant: « Delectorum cardinalium « eximia merita Romæ omnium ore prædicaban- « tur, » inquit ipsemet de St. Amour Diarii parte 4, cap. 4; de Consultoribus verò ibidem cap. 6, testatur, « neque se, neque suos de « illorum fide, solertiâ et eruditione dubitasse, « imò, non sine læto animi sensu, ac gratiis « Deo redditis, intellexisse illos omnes in doc- « trinam sancti Augustini benè affectos ac pro- « pensos esse..... » 3^o Maturum fuisse illud iudicium constat ex eo quod non fuerit latum nisi post adhibitam diligentiam quâ major desiderari non potest, ut disertè asserit testis omni exceptione major, Alexand. VII, supra relatus; ergo, etc.

Et verò, uti ratiocinatur illustriss. Bossuet, epistolâ jam citatâ, tam certa est ac indubitata canonicitas Constitutionis Innocentii circa factum quam circa jus, circa sensum Jansenii quàm circa damnationem propositionum; utrinque enim intervenit eadem auctoritas, eadem forma, idem examen, eadem acceptatio et unanimis episcoporum consensus; atqui, fatentibus omnibus, canonica est quinque Propositionum in se sumptarum censura; ergo et in sensu Jansenii. Vide quæ diximus Conclusionem præced. ad finem septimæ probationis.

Tandem vel ipsæ Jansenianorum expostulationes adversus romanum de quinque Propositionibus iudicium, ipsius æquitatem nedum infirmant, imò potiùs adstruunt ac vindicant, adeò leves sunt. Non pigebit eas in unum hic colligere, et paucis confutare.

Prima: Congregatio non respondebat nec rei gravitati, nec dignitati eorum qui ad summum pontificem confugerant, Diarii parte 6, cap. 8. Quasi quinque ex selectis sacri collegii cardinalibus, quibus præerat S. pontifex, ac tredecim inter doctissimos romanos theologos, discutendæ rei theologiæ à nonnullis episcopis propositæ minùs idonei fuissent.

Secunda est de formâ Congregationum; postulabant Janseniani coram adversariis audiri et publicè disputare. Verùm, quàm parùm æqua fuerit hæc querimonia, constat, tum quia de lite dirimendâ nullatenus hic quæstio erat, pro-

quâ necesse foret adversas partes audiri, sed de solis notandis propositionibus; tum quia tam multa hinc et inde circa dictas propositiones scripta fuerant et cardinalibus ac Consultoribus communicata, ut vix aliquid novi in medium adduci potuisset.

Tertia spectat negatam in examine romano quinque Propositionum, distinctionem sensuum in quos inflecti illæ possunt. Quam intempestiva fuerit hæc expostulatio, constat, tum quia de solo obvio et naturali propositionum sensu agebatur, qui ipsis-imus est Jansenii sensus; tum quia à suis æmulis totum id habebant quod ex distinctione sensuum prætereundum poterant, nempe efficacem à se gratiam illæsam remanere; id enim centies Hallerius cum suis et voce et scriptis contestatus fuerat; quin et D. de St. Amour Diarii parte 5, cap. 8, refert scriptum ab Hallerio exaratum et cardinalibus oblatum circa medium an. 1652, in quo demonstrat Hallerius, seposito sensu gratiæ efficacis quam ipsemet propriâ sententiâ tuebatur, quinque Propositiones meritò damnari ob eum naturalem et obivum sensum quem habent in libro Jansenii; tum denique quia faciente anonymo illo scholæ Thomisticæ theologo, cujus observationes in suffragia Consultorum edidit de St. Amour inter Collectanea pag. 173, omnes penè Consultores doctrinam gratiæ per se efficacis, « quæ maximè scholæ Thomisticæ propria est, omnibus locis catholicam, orthodoxam et veram esse profitebantur. »

Quarta ipsam summi pontificis personam respicit: Theologus, inquit, non erat, et aliunde præ senectute admodum provec-ta, omninò impar sustinendo rei intricatissimæ tam arduo ac molesto examini. Verùm 1º, an adeò implicatus erat Calvinus sensus, quem unum damnatum postea dixerunt Janseniani, ut difficile fuerit eum dignoscere ac notare? 2º In pontificibus cum de fide pronuntiant, non personales animi dotes, sed ipsa potissimum Sedis dignitas, atque Spiritus sancti assistentia attendenda: « Nihil adversi ex Congregatione pertimesco, (aiebat Sambovius Diarii parte 6, cap. 17), cum oculis convertor ad vim veritatis, assistentem pontifici spiritum sanctum, et pontificis ipsius ingenii magnitudinem. » 3º Novum non erat huic S. pontifici Jansenii negotium; jam antea sub Urbano VIII, simul cum deputatis Lovaniensibus Synnichio et Papio, in discutiendo Jansenii libro diuturnam operam collocaverat. Atque hic mirum certè videri debet divinæ providentiæ

consilium in iis pontificibus quos profligandæ Jansenianæ hæresi destinavit Pius V, qui in Baio præformatam Jansenii doctrinam primus contexit, omnium judicio doctissimus fuit ex Ordine Prædicatorum theologus, doctrinæ Thomisticæ per plures annos summâ cum laude professor; Urbanus VIII, à quo liber Jansenii nominatim damnatus fuit, in omni scientiarum genere versatissimus extitit; Innoc. verò X et Alex. VII, à quibus Janseniana dogmata distinctius notata sunt, maximam per seipsos, antequam ad supremum pontificatûs apicem promoti fuissent, in eâ discutiendâ operam collocarant; primus, *Pamphilius* dictus sub Urbano VIII, alter, *Chigi* sub Innoc. X.

Quinta demùm expostulatio est de firmitate latæ definitionis; sed nonne firma est, quæ à romano pontifice fertur postulantibus ac applaudentibus episcopis loci in quibus viget error, et à cæteris expressè aut tacitè confirmatur? atqui talis est innoc. X Constitutio, ut patebit ex dicendis sequenti Conclusionè; ergo, etc.

CONCLUSIO QUARTA. — Summa est et irrefragabilis Constitutionis Innoc. X auctoritas.

Probatur: dogmatica apostolicæ Sedis definitio ab omnibus Christi Ecclesiis acceptata, præsertim verò ab eâ in quâ excitata est controversia, summæ est profectò ac irretractabilis auctoritatis, Idipsum disertè docent vel ipsi Janseniani: Quenellius in opusculo cui titulus: *Lettre d'un évêque à un évêque*, et in lib. qui inscribitur: *Tradition de l'Eglise romaine*, tom. 1, in Admonitione præliminari, tom. 3, pag. 330; auctor libri: *Justification du silence respectueux*, tom. 1, pag. 246. et tom 3, pag. 875 et 876. Atqui Innocentii X Constitutio circa quinque Propositiones per omnes Christi Ecclesias acceptata fuit, maximè verò à Gallicanis præsulibus apud quos exorta fuerat controversia; ut constat tum ex d.serto ejusd. S. pontificis Innoc. episcopum Ledovensem alloquentis testimonio, quod refertur in actis verbalibus comitiorum an. 1655 et 1656, pag. 305 et sequent., tum ex gratulatoriâ præsulum Gallicanorum ad Innoc. X epistolâ die 15 julii 1653, in quâ asseritur dictam Constitutionem « divinâ æquè ac summâ per universam Ecclesiam auctoritate niti, cui Christiani omnes ex officio, ipsius quoque mentis obsequium præstare tenentur: » tum denique ex simplici rerum gestarum narratione, quam art. 5 capitis 1 hujusce Dissertationis prosecuti sumus. Atque hinc illustrissimus Bossuet, citatâ

ad moniales Portus Regii epistolâ, ita statuit : « Il est certain qu'il y a un jugement ecclésiastique, même sur le fait, contesté de Jansenius ; il est constant qu'il est souverain et universel, puisqu'il est du S.-Siege, et accepté unanimement par tous les évêques. »

Neque istud negare ausi sunt Janseniani, quinimò libentissimè agnoverunt ; atque idcirco contestati sunt nullum esse inter ipsos qui sincerè et ex animo Constitutioni Innocentii statim non obtemperaverit. Ita D. de St-Amour Diarii parte 6. cap. 21 ; Montaltius epist. ad Provinc. ; Quesnell. lib. cui titulus : *Défense de l'Eglise romaine*, pag. 450, in observatione ad Relationem Wadingh. Verùm fallacem esse et fuci ac doli plenam hujusmodi declarationem, manifestè ostendunt varia quæ ab ipsis subinde excogitata sunt effugia ad vim hujusce bullæ declinandam ; quæ quidem eò demùm tendunt ut contendat summum pontificem in proprio, naturali, et legitimo Jansenii sensu investigando deceptum fuisse, et peperam libro Jansenii affinxisse doctrinam quinque Propositionum, atque Ecclesiam ipsam in hoc facti genere falli posse ; verùm sepositâ hic infallibili Ecclesiæ in factis dogmaticis auctoritate, de quâ suus erit alibi dicendi locus, ad præoccupanda prædicta adversariorum diverticula, quintam adjicimus Conclusionem.

CONCLUSIO QUINTA. — Decreto suo authentico et summæ auctoritatis assecutus est romanus pontifex et proscripsit proprium, naturalem et legitimum libri Jansenii sensum.

Probat 1 ex sanctitate Ecclesiæ fatentibus Orthodoxis omnibus ita sancta est infallibilis Ecclesia in fide, moribus et disciplinâ generali, ut quod ipsis adversetur, nec decernere, nec à fidelibus tenendum, exequendumve exigere valeat : « Ecclesia Dei (inquit S. Aug. epist. 55, aliàs 119), quæ sunt contra fidem vel bonam vitam, nec approbat, nec tacet, nec facit. » Et epist. 54, olim 118 : « Si quid totaper orbem frequentat Ecclesia, quin ita faciendum sit disputare, apertissimè insanire esse. » Hinc sacra Facultas Parisiensis in suâ censurâ anni 1644, adversus librum Theophili Brachet, « declarat temerarium esse atque erroneum et hæreticum, damnare disciplinam et consuetudinem ecclesiasticam, ab omnibus catholicæ communionis Ecclesiis receptam. » Id ipsum ultrò agnoscunt Jansenii fautores, ipse præsertim auctor libri cui titulus : *Justification du silence respectueux*, pag. 117, 119, 112, 115, 1165, 1166, etc.

III. X.

Ast nullâ ratione stare posset, in adversariorum sententiâ, ista Ecclesiæ sanctitas et infallibilitas. Namque nihil iniquius certè ac bonis moribus oppositum magis, quàm sani et orthodoxi textus damnationem juridicè imperare, ejusque subscriptionem ab omnibus Christi fidelibus interposito juramento exigere, et quidem intentâ in reluctantes gravissimâ excommunicationis poenâ ; porro hujusce iniquitatis, injustitiæ, imò tyrannidis, manifestè ream esse Ecclesiam necessariò confitendum erit, si, ut volunt adversarii, orthodoxa esset libri Jansenii doctrina, ejusque proprium, naturalem ac legitimum sensum apostolico suo decreto assecutus non fuisset Innoc. X, siquidem Ecclesia exigens formularii subscriptionem juridicè postulat assensum huic Innocentii decreto ; sicque catholicum, ut aiunt, libri Jansenii sensum, tanquàm hæreticum damnari, suoque judicio subscribi ab omnibus fidelibus exigat, atque renuentes anathemate percutit.

Nec vim argumenti elevat quòd reponunt nonnulli, 1^o non ipsam Ecclesiam esse quæ dictam subscriptionem exigat ; 2^o saltem quoad jus duntaxat, non quoad factum postulari ; 3^o exigi quoad sensum, non quidem expressum in libro Jansenii, sed quem in mente habuit Ecclesia dùm librum illum proscripsit, seu, ut loquitur auctor Casus conscient. tom. 7, pag. 40, quoad sensum *putativum*, non autem quoad *verum* Jansenii sensum, quem errore facti assecuta non est.

Quàm hæc vana sint et gratis conficta, alibi ex professò demonstrabimus ; interim satis sit impræsentiarum annotâsse, ad primum, subscriptionis legem tulisse romanos pontifices ; eadem promoventibus Gallicanis præsulibus, cæteris verò tacitè consentientibus, executioni demandata est : episcopi autem cum romano pontifice, ipsa sunt Ecclesia docens. Adde, etsi daretur, quod vel ipsâ experientiâ falsissimum esse constat, Ecclesiam subscriptionem non urgere ; certè negari non potest quin palam ac publicè in sinu suo à primis pastoribus exigat approbet, aut saltem circa illud taceat ; at, ut mox ex S. Aug. vidimus, in his quæ sunt contra fidem aut bonos mores *nec approbat, nec tacet, nec facit Ecclesia*. Ac secundum, Ecclesia formularii subscriptionem exigens, juridicè postulat assensum Innocentii decreto ; isto autem decreto factum perinde ac jus definitum fuit, idque docet ac probat illustriss. Bossuet, citatâ ad moniales Portus Regii epistolâ ; « Il est certain, inquit, qu'il y a un jugement ecclé.

11

« siastique, même sur le fait contesté ; il est
 « certain qu'il est souverain et universel, puis-
 « qu'il est du S. Siège, et accepté unanime-
 « ment par tous les évêques. » Et rursus : « Au-
 « cum ne révoque en doute, que la condamna-
 « tion des cinq Propositions ne soit canonique :
 « or est-il qu'on ne peut douter, que ce qui
 « touche le livre de Jansénius ne le soit égale-
 « ment ; puisque l'on y voit concourir la même
 « puissance, les mêmes formes, le même exa-
 « men, la même acceptation et consentement
 « unanime de tous les évêques » Ad terti-
 um, ubi agitur de textu dogmatico, absurda,
 illusoria, noxia, et in ecclesiam plurimum con-
 tumeliosa est ista *putativi à vero et proprio* sen-
 su distinctio ex quâ sequeretur, Ecclesiam dum
 rectè sentit posse malè loqui ac perversè do-
 cere, sicque in sentiendo, non in docendo in-
 fallibilem esse. Verùm, ut jam notavi, de his
 alibi plenius.

Totum istud ratiocinium paucis contraho :
 Ecclesia nec facit, nec approbat, nec tacet quæ
 sunt contra bonos mores; porro subscriptionem
 formularii exigit, approbat, aut saltem ta-
 cet; hæc autem subscriptio iniqua foret et in-
 justa, si catholica esset Jansenii doctrina,
 ejusque proprium sensum assecuti non essent
 summi pontifices, ipsaque Ecclesia; ergo, etc.

Probatur 2^o ex superiori Ecclesiæ sapientiâ;
 Solemni Innocent. decreto circa quinque Pro-
 positionum in sensu Jansenii damnationem,
 ipsius successores Alexander VII, Innoc. XII,
 Clemens XI, etc., cardinales, archiepiscopi,
 episcopi, celeberrimæ orbis catholici Universi-
 tates, doctores constanter acquievère, quid-
 quid in contrarium conclamârunt et opposue-
 rint Jansenii fautores; porro intolerandæ pro-
 fectò est temeritatis ac superbiæ, proprium
 ac privatum judicium tantæ auctoritati, tan-
 tisque luminibus antepone, ac de se ipso ita
 benè sentire, ut quis credat dogmatici alicujus
 libri sensum se melius esse assecutum, quàm
 summi pontifices, episcopi, universaque Ec-
 clesia assecuta fuerit.

Frustra prætentam catholicitatis textûs Jan-
 seniani evidentiam obtenderent adversarii;
 namque ubi est supremum Ecclesiæ judicium,
 quæcumque in contrarium fulgere videatur
 evidentia, cuilibet fidei nonnisi illusoria, fu-
 cata et falsa evidentia meritò reputari debet,
 eaque superiori intelligentiæ quâ in suis judi-
 ciis ducitur Ecclesia omninò postponenda est.
 Ita illustris. Bossuet., in suâ ad Moniales Por-
 tûs Regii epistolâ; ita etiam eminentiss. card.

Noallius in suo contra Casum conscientiæ Do-
 cumento Pastoralî 22 februarii anni 1770, his
 verbis: « Quelque lumière que l'on ait, il est
 « certain que celles de l'Eglise sont toujours
 « au-dessus de celles des particuliers, et qu'il
 « n'y a que cette science qui enlève qui puisse
 « faire croire qu'on voit mieux qu'elle. »

Elverò, proprium, naturalem et legitimum
 libri Jansenii sensum suo decreto assecutus est
 et proscripsit Innoc. X, vel dicendum Eccle-
 siam universam quæ jamdiù decretum illud
 amplexa est, à tot annis nondum detexisse
 proprium illum et germanum Jansenii sensum,
 sed loco illius subrogasse Calvinianum sensum
 in scripto Trium columnarum expressum; at-
 qui hoc postremum adeò evidenter falsum est
 et absurdum, ut nihil magis. Quis enim sanæ
 mentis seriò unquam dixerit, ipsammet Eccle-
 siam nondum detegere potuisse sensum in Jan-
 senii libro, fatentibus Jansenianis, evidentissi-
 mâ luce fulgentem, quemque ipsi vel ab ini-
 tiodisputationum clarè perspexisse gloriantur?
 An ipsis solis datum est sapere et intelligere,
 cæteri verò mortalium, et ipsamet Ecclesia
 sancta hæc Christi sponsa planè cæcutit?
 Nonne apertissimum est integram Jansenii doc-
 trinam ad unum utriusque delectationis inde-
 liberatæ systema revocari, quarum superior
 hic et nunc necessariò voluntatis consensum
 obtinet? Nonne catholici theologi istud sæpis-
 simè observârunt, indicatis etiam locis in qui-
 bus dictum systema clarè exprimitur, ac re-
 moventur absurdi illi sensus Calviniani, quos
 ab Ecclesiâ damnatos et libro Jansenii ad-
 scriptos fingunt adversarii? Quis credat inte-
 gram Christi Ecclesiam verum Jansenii sensum,
 tum ex sese, tum ex variis æmularum partium
 observationibus, radiis solaribus, ut aiunt
 Jansenistæ, clariorem, hucusque introspicere
 non potuisse? Apage nœnias, anilesque fa-
 bulas.

Vim istius argumenti sensit nec dissimulavit
 auctor Apologet. pro Jans. parte 2, cap. 40,
 cujus textum infra adducemus ubi de constitut.
 Clement. XI: *Vineam Domini*. Quin et ipsemet
 auctor libri cui titulus: *Justification du silence*
respectueux, tom. 1, pag. 182, candidè fate-
 tur, nullam in libro Jansenii vocem usurpari,
 quæ ad legitimum sensum innumeris limitatio-
 nibus evidentissimis non restringatur; addit-
 que in eodem libro integra extare capita ipsi
 radiis solaribus clariora adversus Calvinianum
 sensum in libro Trium columnarum repræsen-
 tatum; ergo, etc.

Probatur 3^o ex supremâ Ecclesiæ auctoritate ; scilicet divina Ecclesiæ auctoritas , supremumque ipsius iudicium cuiuslibet privati quantumcumque eruditi sensibus multum præponderare debet , ipsumque ad verum , internum et absolutum mentis assensum determinare ; id planè exigit promptissima in iis quæ ad religionem pertinent , Ecclesiæ et superioribus ecclesiasticis debita obedientia , atque præsumptio in eorum gratiam. Certè , ut passim indicant SS. Patres , præsertim verò sanctus Bernardus lib. de Dispensat. cap. 12, « obedientia quæ majoribus præbatur , Deo exhibetur : quidquid ergo vice Dei præcipit homo , quod non sit tamen certum displicere Deo , haud secus omninò accipiendum quàm si præcipiat Deus. » Si quod motivum hominem ab hoc integro et absoluto obsequio eximere posset , sola sanè esset , quam putaret se habere , evidentia ; verùm præter illa quæ mox diximus de legitimâ in dubium revocandi hanc evidentiam ratione , dùm scilicet supremam Ecclesiæ intelligentiam , summamque auctoritatem experitur in contrarium militantes.

Audiat hanc in rem illustriss. archiepisc. Rhemensis Le Tellier in suo pro acceptatione bullæ *Vineam Domini* Documenti Pastoralis , in quo sic loquitur : « Sa Sainteté n'a pas voulu souffrir qu'on répandit parmi les Fidèles des maximes , qui restreignent l'étendue de l'obéissance due à l'Eglise , en altèrent aussi la sincérité. Telle est la maxime qui borne au seul silence respectueux la soumission qu'on doit aux décrets de l'Eglise les plus solennels pour la condamnation des livres ; à la faveur de ce principe , chaque particulier se mettrait en droit de préférer son sentiment à celui de l'Eglise , et se croirait , par l'effet d'une présomption insupportable , l'arbitre souverain du sens des livres et des écrits en matière de religion.... Son autorité et ses lumières (de l'Eglise) n'ont-elles pas assez de force pour déterminer à la soumission intérieure , même les plus savants théologiens ? »

His unum addo : Proprius et naturalis libri Jansenii sensus , vel est clarus et apertus ; vel obscurus et intricatus. Si primum , ergo acquiescendum Ecclesiæ iudicio , quo definit sensum hunc hæreticum esse ; in factis siquidem claris , fatente ipsomet auctore Apologie monialium Portûs Regii parte 4 , Ecclesiæ decretoriè pronuntianti , necessariò obsequendum ; si secundum , ergo iterum acquiescendum.

Namque , ut constat ex textibus mox adductis , et ratio ipsa indicat , in quæstionibus huiusmodi præsertim præsumptio est in gratiam superiorum ; et quæcumque in contrarium fulgere videatur claritas , hæc ut vera evidentia nec haberi potest , nec mentem pacatam in suo assensu , militante contra Ecclesiæ iudicio , reddere valet.

Allatas hactenus probationes sic paucis contrahere licet : Si Ecclesia erravit definiendo factum Jansenii , vel ex defectu attentionis , vel ex defectu intelligentiæ , vel ex defectu sinceritatis ; quilibet enim erroris et perversæ definitionis fontes ad hæc tria capita revocari possunt et debent. Primum dici nequit , neque enim potuit præceps sententiam ferre , quæ ex divini assistentiæ Spiritûs sapiens est et prudens in omnibus suis iudiciis Ecclesia. Neque secundum , sensus enim clarus et apertus , ut ipsi fatentur , superiorem Ecclesiæ intelligentiam latere nequit. Non tertium , illud enim de Ecclesiâ columnâ et veritatis firmamento vel minimùm suspicari summum nefas ; ergo.

Probatur 4^o. Si orthodoxa sit Jansenii doctrina , ejusque proprium et naturalem sensum in quinque Propositionibus nec fuerit assecutus nec proscripserit Innoc. X , manifestè sequitur Jansenismum merum esse phantasma , nullamque veram esse ac realem Jansenianam hæresim ; atqui consequens istud falsissimum est , et maxime contumeliosum in clerum Gallicanum , summos pontifices , universam demùm Ecclesiam , quæ ab octoginta et amplius annis Jansenii doctrinam repetitis anathematibus damnavit ; ergo , etc. Atque hinc in comitiis anni 1700 , damnata est ista propositio : *Phantasma Jansenii quæsitum ubique , sed nusquam repertum , præter quàm in laboranti quorundam phantasiâ*.

Probatur 5^o ex celeberrimâ , de quâ antea diximus , sacræ Facultatis Pariensis censurâ in secundam Arnaldi epistolam. Duæ in eâ notantur propositiones , quarum prior hæc erat , *quinque Propositiones nec esse in Jansenio , nec ejus sensu damnatas fuisse*. Aequissimam hanc censuram summâ cum laude commemoravit clerus Gallicanus in comitiis generalibus anni 1656 ; eandem communibus omnium votis sæpius confirmavit sacra Facultas , eique constanter ab omnibus suis subseribi jussit , et etiamnum subseribitur ; porrò , si proprium et legitimum Jansenii sensum in suo decreto assecutus non fuisset S. pontifex , nedum æquissima , sed è contra temeraria , iniqua , tyran-

nica dicenda foret hæc censura; ergo, etc.

Probatur 6^o Apostolico suo decreto assecutus est Innocent. X ac meritò proscripsit proprium et naturalem quinque Propositionum sensum; atqui proprius et naturalis quinque Propositionum sensus, ipsissimus est totius libri Jansenii sensus; ergo, etc. Major certissimè constat ex unanimi adversariorum consensu: « Proprius et naturalis quinque Propositionum sensus, » inquit Montalt. de S. Amour, Quesnell. locis antea citatis, « alienus est à sensu gratiæ ex se efficacia Augustinianæ, atque idcirco pontifex eas propositiones damnavit, istique damnationi omnes acquievère. » Etverò, ut alibi dictum, et ex sese patet, censura quæ pronuntiatur absque ullâ sensuum distinctione, eo ipso intelligitur afficere proprium, naturalem et obivium propositionis sensum; porrò censura in quinque Propositionibus absoluta est, pura ac simplex; ergo, etc. Minor autem triplici momento demonstratur. 1^o Ex Jansenianorum agendi ratione, quâ constat ipsos pro certo habuisse, eundem esse proprium et legitimum quinque Propositionum et libri Jansenii sensum. Vix etenim sacræ Facultati oblatæ fuerunt quinque Propositiones ut discuterentur et censurâ configerentur, cum statim summo zelo contra examen illud insurrexerunt fautores Jansenii, asserentes, rem planè inquam tentari ab iis qui *sanctissimas et inconcussas de gratiâ Christi sententias examini et censuræ subicere conabantur*; ita lib. cui titulus: *Considération sur l'entreprise de M. Cornet*, pag. 58, et in præfat. Apolog. SS. Patrum; similiter eum postea eadem propositiones Romam delatæ essent ut summi pontificis judicio controversia dirimeretur, nihil non moliti sunt iidem Janseniani ut examen ac futurum iudicium averterent. Ut quid porrò tot molitiones totque machinationes ad removendam quinque Propositionum censuram, si eas tunc temporis in sensu proprio, naturali et obvio non tuebantur, sed ut falsas potius et hæreticas repudiabant Janseniani? Ut quid tandem tantis laudibus exornârunt et tanquàm suos habuerunt quatuor Consultores qui propositiones in sensu proprio et nativo excusârunt in suis suffragiis; è contra verò Consultores ac cardinales iisdem propositionibus adversantes, nec non summum pontificem et datam Constitutionem in scriptis suis lacerare et dente maligno arrodere non dubitârunt? non aliâ certè de causâ, quàm quia hæc falsâ opinione occupati erant, sensum naturalem et obivium damnatarum propositio-

nem ipsum esse S. Augustini et Jansenii sensum.

2^o Idem evincitur ex Jansenianorum scriptis ante Constitutionem; in iis siquidem quinque Propositiones in sensu proprio et naturali passim propugnârunt, atque in libro Jansenii contineri ultrò agnoverunt. Prolioxiores essemus si omnia eorum eam in rem expressa testimonia producere vellemus; consulatur hist. quinque Propositionum tomo tertio elucidatione primâ, et defensio hujus historiæ pag. 181 et sequentibus, nobis unum aut alterum Jansenianorum scriptum laudâsse satis erit.

In libello cui titulus: *Quæ sit sancti Augustini auctoritas*, edito an. 1650, pag. 117, hæc habentur: « Paucis abhinc mensibus propositiones vero per se ac catholico sensu præditæ. » (notanda sunt hæc verba) sed quæ pravâ interpretatione aliò deflecti possent, quarum aliquas constabat esse sancti Augustini, examinandas suffligendasque proposuit Facultatis syndicus. Quis non videt, si probatissima quæque et antiquissima Ecclesiæ dogmata ad amussim hanc redigantur, nulla fore tam certa quæ vitiose accipi nequeant, nulla quæ non jam à perversis ingeniis in perversos distracta sint sensus? » Paulò ante dixerat idem auctor: « Quis verò fando audivit fuisse unquàm hunc in Ecclesiâ morem, ut propositiones per se veræ; et idoneâ auctoritate nixæ, atque ita semper in Ecclesiâ susceptæ, censuræ ideò subjicerentur, quòd post multa secula à nonnullis in alienos sensus deduci essent cœptæ? » Igitur in mente illius auctoris quinque Propositiones orthodoxum et catholicum sensum præ se ferunt, et nonnisi pravâ ac vitiosâ interpretatione ad sensus perversos distrahi possunt.

Auctor libelli qui dicitur: *In nomine Domini*, quinque Propositiones sigillatim excutit, easque in sensu proprio et naturali Jansenio adscribit, citatis etiam libris in quibus exprimuntur. De primâ propositione sic loquitur: « Habetur apud hunc auctorem lib. 3 de Grat. Christi cap. 13, ubi qui eam non iniquis oculis aspexerit, solidissimis argumentis, sanissimo sensu adductam intelliget. » Deinde eum sensum Jansenio tribuit qui est ipse naturalis sensus quem Catholici omnes primæ propositioni semper adscripserunt: « Aliud est, inquit, asserere universali sensu, justificato legem impossibilem esse; aliud sensu particulari et cum additamento, justo volenti et conanti juxta præsentés quas habet vires, mandat

« aliquid non esse possibile; illud ut falsum
 « Jansenius cum Trid. synodo, istud ut verum
 « Jansenius cum Augustino docet. » Eodem
 modo circa alias propositiones disserit idem
 auctor, ex quibus liquet Jansenianos ante In-
 nocent. X Constitutionem, quinque Proposi-
 tiones in proprio ac naturali earum sensu pro-
 pugnâsse, quem etiam verum ac legitimum esse
 Jansenii sensum ultrò fatebantur.

Denique, ut cætera prætermittam, idem di-
 sertè testantur Janseniani in suo famoso Trium
 columnarum scripto. Enimverò, tametsi (nar-
 rante Domino de St. Amour Diarii parte 8,
 cap. 21, pag. 458), nonnulli ex ipsis existima-
 verint primæ columnæ, id est, Calvinii sensum
 appellandum esse germanum et legitimum, sen-
 sum verò secundæ columnæ, seu, ut dicebant
 S. Augustini et Jansenii, alienum et extra-
 neum, qui nonnisi malignè propositioni affingi
 posset; alii tamen, quorum sententia præva-
 luit, voluerunt ut in dicto scripto sensus Cal-
 vini alienus inscriberetur; sensus verò secundæ
 columnæ, id est, ut ipsis videbatur, S. Au-
 gustini et Jansenii, germanus et legitimus di-
 ceretur, qui ab ipsis defendebatur, et de quo
 perspicuum judicium expectabant. Hinc in præ-
 ambulo, seu in oratione præviâ ad distinctio-
 nem sensuum, sic summum pontificem allo-
 quuntur: « De propositionibus non in sensu
 « alieno ad quem trahi possent, quique à nobis
 « respuitur, sed in sensu legitimo qui à nobis
 « defenditur,.... distinctum ac perspicuum ju-
 « dicium expectamus. Ne igitur ullus pateat
 « æquivocationi locus, veros et germanos pro-
 « positionum sensus quos sustinemus, quàm
 « brevissimè ac dilucidissimè fieri potest, ex-
 « ponimus. » Subinde in decursu hujus scripti,
 in fronte primæ columnæ seu sensus Calvi-
 niani, sic reponunt: « Sensus hæreticus qui
 « propositioni malignè affingi posset, quem
 « tamen legitime sumpta non habet; » in fronte
 verò secundæ columnæ, sic legitur: « Propo-
 « sitio prout à nobis intelligitur ac defenditur. »
 Ita et sentiebant et loquebantur Janseniani in
 celeberrimo illo scripto nomine præsulum Gal-
 licanorum Jansenio faventium, paucis ante la-
 tam Constitutionem diebus pontifici oblato, ut
 ipsi brevissimè et dilucidissimè mentem suam
 circa quinque Propositiones exponerent; ex
 quibus manifestum est, tunc temporis Jansenii
 doctrinam ipsis fuisse legitimum et germanum
 propositionum sensum.

Unum hic sedulò observandum, Dionysium
 Raymundum, Paulum Irenæum, D. de St.

Amour, etc., distinguere sensum proprium, na-
 turalem et obvium propositionum, à sensu
 vero, germano et legitimo. Hæc posita distin-
 ctione, aiunt 1º sensum primæ columnæ seu
 Calvinii, fuisse proprium, naturalem et obvium;
 sensum verò secundæ columnæ fuisse verum,
 legitimum et germanum earundem propositionum
 sensum. Aiunt 2º, damnatas fuisse quin-
 que Propositiones in sensu proprio et naturali,
 non autem in vero et germano earum sensu.
 Aiunt 3º, dictæ distinctionis ope, clarum esse,
 sine ullâ contradictione aut variatione ab ipsis
 jam dici posse sensum Calvinii esse proprium et
 naturalem propositionum sensum, quamvis in
 scripto Trium columnarum asseruerint sensum
 illum, alienum esse et extraneum.

Verùm præposterè omninò ac seriùs excogi-
 tata distinctio hæc, et ab usu loquendi prorsus
 aliena. Namque 1º, nulli unquàm venit in men-
 tem proprium et naturalem sensum distinguere
 à germano et legitimo. 2º Sensus proprius et
 naturalis nonnisi ex tribus repeti potest, nimi-
 rum ex propriâ verborum significatione se-
 cundum consuetum usum, ex notâ auctoris inten-
 tione, et ex antecedentibus et consequentibus;
 sed sensus germanus et legitimus nonnisi ex
 illo triplici fonte dimanare valet; ergo unum
 et eundem efformant sensum. 3º Etiam si da-
 retur dictam distinctionem quandoque locum
 habere posse; ea sanè adaptari non posset lau-
 datis verbis scripti Trium columnarum. Nam-
 que auctores hujus scripti, non modò sensum
 secundæ columnæ, id est, Jansenii, nuncupa-
 verunt sensum germanum, verum et legiti-
 mum; sed etiam alium sensum, nempe Calvi-
 nianum qui in primâ exhibebatur columnâ,
 dixerunt alienum esse, extraneum et malignè
 affixum: atqui sensus germanus et legitimus
 prout opponitur alieno et malignè affixo, haud
 dubiè est proprius et naturalis; quis enim
 dixerit sensum germanum et legitimum oppo-
 situm alieno, esse improprium, extraneum
 verò, alienum et malignè affixum, esse pro-
 prium et naturalem sensum? Quænam, quæso,
 malignitas affingere propositionibus sensum
 illum qui proprius eis est, obvius et naturalis?

3º Tandem sensus proprius, naturalis et
 obvius quinque Propositionum vel est sensus
 Calvinianus, prout exprimitur in dicto Trium
 columnarum scripto; vel sensus Jansenii,
 prout ibidem in secundâ columnâ exhibetur;
 atqui sensus proprius et naturalis proposi-
 tionum, non est Calvinianus ille sensus citato
 libro representatus; ergo, etc. Major ultrò

latentibus Jansenianis constat; minor autem clarè liquet discurrendo per singulas sigillatim propositiones; satis sit hic primam et tertiam in medium adducere.

Prima propositio quæ, ut notant adversarii, cæterarum radix est et origo, sic se habet: *Aliqua Dei præcepta hominibus justis volentibus et conantibus secundum præsentem quas habent vires sunt impossibilia; deest quoque iis gratia quâ possibilia fiant*; sensus verò Calvinianus, quem ante Constitutionem malignè afflixum huic propositioni agnoscebant Jansenii fautores, post Constitutionem autem, ut proprium et naturalem exhibuerunt, sic exprimitur in laudato Trium columnarum scripto: « Justis omnibus, quantumlibet volentibus et conantibus secundum præsentem quantascumque vires quæ à gratiâ magnâ et efficace habentur, mandata Dei sunt impossibilia; deest quoque illis semper et quamdiù vivunt gratia quâ possint vel unum ex mandatis Dei sine peccato adimplere. »

Quæro jam à quovis homine præjudiciis minimè occupato, an hujusmodi sensum ex adductâ propositione nudè spectatâ extundi, vel quod amplius est, ut proprium, naturalem et obvium obtrudi posse unquam suspicatus fuisset? imò vel leviter attendenti patebit, sensum hunc primæ propositioni in multis capitaliter adversari; 1^o propositio expressè de quibusdam duntaxat præceptis loquitur; expositio autem adducta de omnibus indiscriminatim mandatis. 2^o Propositio agit de hominibus justis volentibus et conantibus secundum præsentem quas habent vires; in expositione autem id extenditur ad justos omnes quantumlibet volentes et conantes secundum præsentem quantascumque vires quæ à gratiâ magnâ et efficacissimâ habentur. 3^o Propositio dùm asserit, *deest quoque iis* (justis conantibus secundum præsentem, etc.) *gratia quâ possibilia fiant*; manifestè indicat, quæ quandoque in justis occurrit observandi mandata impossibilitas, fixam non esse et permanentem, sed fluentem duntaxat et transitoriam, quæ scilicet oritur ex defectu delectationis relativè victricis; juxta autem sensum Calvinianum scripti Trium columnarum, prædicta impossibilitas perpetua est et permanens, ex adhærescente concupiscentiæ labe orta; deestque illis semper et quamdiù vivunt gratia quâ possint vel unum ex mandatis Dei sine peccato adimplere. Ergo prima propositio non nisi per vim ad Calvinianum primæ columnæ sensum de-

torqueri potest; ac proinde sensus ille, proprius, naturalis et obvius primæ propositionis sensus esse nequit. Verbo dicam, juxta Calvinianum primæ columnæ sensum, impossibilitas est omnium mandatorum, respectu cujuslibet justi quantumlibet volentis, in qualibet occasione et secundum quantascumque gratiæ etiam efficacissimæ vires; ast hiene est obvius et naturalis primæ propositionis sensus?

Non minùs certum est Calvinianum sensum non esse proprium, naturalem et obvium tertiæ propositionis sensum. Namque nihil directiùs systemati Calviniano opponitur, quàm ipsa meriti ratio; ipse siquidem Calvinus tanquàm palmare principium statuit, omnia etiam justorum opera totidem esse lethalia peccata; atqui tertia propositio conceptis verbis nomen et rationem meriti agnoscit, tametsi circa libertatem ad meritum requisitam capitaliter erret, ergo, etc.

Probatur 7^o Eum assecutus est et damnavit sensum Innoc. X, de quo solo controversia movebatur, quique ipso coram clarè exponebatur ab utriusque partis æmulis; de quo tandem perspicuum judicium proximè expectabatur; atqui ille sensus est ipsemet Jansenii sensus in scripto Trium columnarum expressus columnâ secundâ. *De propositionibus*, inquit Janseniani in præfatione dicti scripti, *non in sensu alieno ad quem trahi possunt, quique à nobis respuitur, sed in sensu legitimo* (id est in sensu secundæ columnæ) *qui à nobis defenditur, controversia est, deque iis sic sumptis distinctum ac perspicuum judicium expectatur*; ergo, etc. Vide quæ supra diximus Conclus. secundâ.

Probatur ultimò quàmplurimis Jansenii textibus qui proprium, naturalem et obvium quinque Propositionum sensum clarissimè exhibent; in hunc autem proprium et naturalem propositionum sensum, ultrò concedentibus Jansenistis, cadit Innocent. X censura; ergo hæc eadem censurâ proprius, naturalis et legitimus sensus libri Jansenii proscriptus est. Testimonia hæc infra, cap. 3, referemus, Jansenianum systema evolvendo; ubi etiam sigillatim ostendemus quinque Propositiones è Jansenii libro legitimè esse extractas, atque totidem esse necessaria relativæ ad ipsius sensum delectationis consecutaria.

His omnibus adde: 1^o quotiescumque Janseniani conquesti sunt summos pontifices Yprensis mentem non fuisse assecutos, hi protinus confossi fuere; ita constat in causâ

quinque Articulorum, pacis Clementinæ et famosi conscientiarum Casus. 2^o Quotiescumque ostenderunt dogmata Jansenii circa materiam quinque Propositionum, toties pariter damnati sunt, velut renovantes hæreticam quinque Propositionum doctrinam; ita SS. pontifices, Gallicani antistites, doctores S. Facult. Parisiensis, quorum alii propositiones damnarunt, alii libros et scripta, alii palinodiam cantare coegerunt eos qui talia propugnabant dogmata. Et verò, non aliâ certè de causâ confixi sunt libri Arnaldi, Pauli Irenæi, Wendrochii secunda ejusd. Arnaldi epistola, Expositio fidei circa gratiam, etc., quam quòd palmare Janseniani systematis principium de duplici delectatione relativè victrici et necessariò voluntatem determinante defenderent. 3^o Idem est proprius, naturalis et obviu, tum propositionum, tum libri Jansenii sensus: ita constat ex Innoc. X Brevibus an. 1694 et 1696; idem tradunt præsules Gallicani an 1654, in encyclicâ ad cæteros regni episcopos, his verbis: « Les cinq Propositions sont vraiment de Jansenius, et elles sont condamnées dans le propre sens des paroles qui les composent; le quel sens est celui-là même auquel cet auteur les enseigne, et dans lequel il les explique; » atqui non diffidentur adversarii, SS. pontifices rectè assecutos fuisse et meritò proscripsisse proprium et naturalem quinque Propositionum sensum; ergo, etc.

Ex dictis in toto isto articulo, sequitur 1^o, quinque Propositiones delatas, discussas ac damnatas fuisse in vero, proprio, naturali, germano ac legitimo Jansenii sensu.

Sequitur 2^o, Jansenianos Constitutioni Innoc. X nusquam sincerè obsecutos fuisse, sive quoad questionem, ut aiunt, *facti*; sive quoad questionem *juris*. Quoad questionem *facti*, ex sese patet; quoad questionem verò *juris*, sic probatur: Qui verum et proprium sensum, veram et propriam doctrinam in quinque Propositionibus ab Innoc. X proscriptam pertinaciter defendere non cessarunt, ii profectò non sincerè, sed simulatè duntaxat et verbo tenus Constitutioni Innoc. X obsecuti sunt; atqui tales fuerunt Janseniani; illi siquidem semper propugnârunt doctrinam Jansenii, verum Jansenii sensum, qui, ut Concl. 2 et 3 demonstravimus, reverà proprius est, naturalis, obviu, germanus ac legitimus damnatarum propositionum sensus; ergo, etc.

Sequitur 3^o, Jansenianos stando suis principiis, nec potuisse, nec posse Constitutioni

Innocent. sincerum exhibere obsequium; namque ii persuasum habent doctrinam Jansenii sanam esse et orthodoxam, ac ipsiusmet Augustini, imò et Ecclesiæ totius circa gratiam Christi doctrinam continere.

Istâ cohærente ratione innixus inter illos recentior projectæ quidem vir audaciæ, sed animi candidioris, in lib. cui titulus: *Augustinus Yprensis vindicatus*, seu, *Apologeticus Jansenii*, parte 2. cap. 4. conqueritur adversus confratres suos Jansenianos, quod apertâ fronte Constitutioni Innocentii non obstitissent, sed præpostere dissimulassent: « Hinc, » inquit, prima mali labes, hinc omnia in pejus ruere... Invieta agitur fortitudine propugnanda erat sancti Augustini doctrina sub velo quinque propositionum evidentissimè impetitâ; et pro salutaris gratiæ dogmate, in iisdem abundè satis conspicuo, certandum erat usque ad mortem, pulso omni metu temporalis et ecclesiasticæ potestatis. » Iisdem principiis insistens, Constitutionem Clementis XI, *Vineam Domini*, quâ Constitutiones Innoc. X et Alexand. VII renovantur et confirmantur, toti Ecclesiæ ferali scripto denuntiavit *tanquam evertentem doctrinam gratiæ quâ Christiani sumus, tanquam exsuscitantem Pelagium cum suis asseclis*, etc. Nihil recentior ille scripsit, quod cæteri omnes Janseniani ambabus ulnis assequi non debeant, ut demonstrat illustriss. archiepiscopus Cameracensis in epist. ad Quesnell. scriptâ.

Sequitur 4^o, Jansenismum non esse merum phantasma, sed veram ac realem hæresim, ab iis scilicet propugnatam, qui integram Jansenii de gratiâ doctrinam sanam et orthodoxam esse contendunt.

Sequitur 5^o, quod et conceptis verbis declarat clerus Gallicanus in Comitibus anni 1661, art. 3, ex iis quindecim quos ad instantiam regis edixit, eos habendos esse tanquam hæreticos, qui quinque propositiones in sensu Jansenii hæreticas esse negant. En verba: « L'assemblée declare qu'elle n'a mis dans sa formule pour la décision de foi, que la même décision qui est contenue dans la Constitution d'Innocent X et en celle d'Alexandre VII, savoir que les cinq Propositions qui ont été tirées du livre de Jansenius, intitulé, *Augustinus*, sont condamnées d'hérésie, au sens que cet auteur les a enseignées; en sorte que les contredisants et rebelles seront tenus pour hérétiques, et châtiés des peines portées par lesdites Constitutions. »

Duobus quippe modis negari potest doctrinam Jansenii in quinque Propositionibus expressam hæreticam esse; vel præcisè quia negat quis talem doctrinam, v. g., delectationis relativè necessitantis, esse doctrinam in libro Jansenii expressam; vel quia licet fateatur contineri, negat tamen hanc esse hæreticam. Si primum, hæreticus est duntaxat præsumptivè; si secundum, hæreticus est etiam formaliter. Ratio à priori est, quia in primo casu factum duntaxat negatur; in altero autem non merum factum, sed et jus ipsum respuitur.

Porrò qui à Constitutione Innocent. X doctrinam Yprensensis callentes negant quinque Propositiones damnatas esse in illius sensu, de doctrinà in libro expressà reipsà consentiunt; contendunt autem eam esse orthodoxam; unde, cùm fatentur quinque Propositiones esse hæreticas, eas in alienos et extraneos sensus detorquent.

Sequitur 6^o, ante Constitutionem Innocent. X, controversiam fuisse de jure, non de facto. Scilicet partes æmule consentiebant de sensu propositionum, sed de sensù orthodoxià litigabant; Jansenistæ (saltem ii quorum sententia, teste de St. Amour in Diario, prævaluit) propositiones in sensu proprio, germano ac legitimo orthodoxas esse contendebant; alii è contra cum octoginta quinque episcopis eas uti hæreticas insectabantur.

Latà autem Constitutione totam controversiam ad meram facti quæstionem deducere conati sunt; atque asseruerunt 1^o, quinque Propositiones non esse Jansenii, easque damnatas fuisse in sensu qui ad Jansenium nihil pertineat. 2^o Postquàm Alex. VII declaravit quinque Propositiones in sensu Jansenii damnatas fuisse præfractè affirmârunt summum pontificem in sensu Jansenii investigando deceptum fuisse. 3^o, Addiderunt Ecclesiam ipsam in hoc facti genere falli posse. Sic Janseniani pro diversis occasionibus diversas facies induerunt.

Sequitur 7^o, rem penitiùs introspicendo certum esse, etiamnum controversiam jus ipsum potissimùm spectare, uti mox diximus. Id ipsum clarè testatur illustriss. Convennarum postea Tornacensis episcopus Jansenianis minimè suspectus, in epist. ad Innoc. XI, in quâ conceptis verbis asserit, « arcanum hujusce controversiæ usque ad illud tempus omninò ignotum fuisse, atque orbem christianum in eo deceptum fuisse, quòd existimaverit circa merum factum quæstionem versari. » Idip-

sum pluries ibidem repetit illustriss. præsul; addit mirum profectò videri, quâ ratione plerisque persuadere potuerint Jansenistæ de mero facto controversiam moveri, cùm de jure reipsà quæstio sit; ostendit postea idem episcopus, quomodò iste error ex fautorum Jansenii dissimulatione ortus fuerit; simulque ipse candidè agnoscit, quinque Propositiones, si non de verbo ad verbum, saltem quoad voces æquivalentes in libro Jansenii reperiri. Circa hoc disertissimum testimonium consule opusculum illustriss. archiepiscopi Cameracensis, cui titulus gallicè: *Autre lettre au Père Quesnel, etc.*, pag. 212, 213 et sequent. Subjungit ibidem doctiss. archipræsul eam in rem auctoritatem cardinalis Rospigliosi in suâ Relatione circa Jansenismum n. 156 et 157, ubi pariter asserit ac multis probat, in Janseniorum negotio, non de mero facto, sed de ipso jure quæstionem haberi.

ARTICULUS II.

De quinque Jansenianorum articulis.

Magna in præsentì negotio, quinque articulorum celebritas. Horum duo genera statim distingui debent, ne fortè, ut sæpè fit, confundantur. Alii quippe doctrinales fuere; hoc est, ad exponendam prætensorum Augustinianorum doctrinam destinati; alii spectabant quæstionem facti; hoc est, naturam reverentiæ et obedientiæ quæ debetur definitionibus Ecclesiæ circa facta. Horumce omnium articulorum historiam cap. præced. texuimus.

Jam investigandum est, num reverà à S. pontifice approbati fuerint quinque articuli doctrinales, sicut præfidentius jactitârunt Janseniani. De solis autem doctrinalibus articulis instituitur quæstio; certum quippe est articulos facti quæstionem spectantes nusquàm fuisse approbatos, imò ubi primùm jussu regis episcopis Gallicanis oblati fuerunt, ab iis graviter fuerunt improbat, ut constat ex eorum epist. ad Alex. VII die 2 octobris anni 1663: « Mirifica, inquit, nostrum omnium, quot-
« quot aderamus, in his verbis reprehendendis
« extitit consensio. Visa sunt enim subdola, si-
« mulacrum duntaxat obsequium præ se feren-
« tia, mente versipelli et callidà concinnata,
« eoque periculosiora, quòd formulæ, etc.....
« Istud itaque scriptum rejiciendum censui-
« mus, tanquàm fictum et nullatenus catholi-
« cum. » Ita judicant præsules nostri de quinque Jansenianorum articulis facti quæstionem spectantibus. His præmissis, sit

CONCLUSIO. — Fictitia est quam venditant Janseniani quinque articulorum approbatio.

Probatur 1°. Ratio ipsa temporis quo et dicti articuli Romam transmissi, et Breve summi pontificis ad Gallias delatum est, prætenste approbationi omnino repugnare videtur. Scilicet epistola episcopi Convennarum quâ dictos quinque articulos ad Alex. VII transmisit, scripta est die 19 junii anni 1663. Breve autem summi pontificis quo dicuntur approbati illi articuli, scriptum est die 29 julii ejusd. anni; an porro verisimile videtur intra tam exiguum temporis intervallum. Parisiis transmissos Romam articulos; indictam à S. pontifice cardinalium et Consultorum congregationem; singulos quâ par fuit curâ et diligentia ab ipsis discussos fuisse; ac denique S. pontificem rogatis et inspectis Consultorum suffragiis judicium pronuntiâsse? id profectò non patitur quæ omnibus nota est Romanorum in hisce rebus lenta, matura et gravius agendi ratio. Quòd si Janseniani invidiosè olim conquesti sunt quinque Jansenii famosas Propositiones, breves quidem et simplices, non satis maturo, tametsi per duos integros et ampliùs annos examine discussas fuisse, an non ipsi hodiè lepidi sunt qui suos articulos longè magis et prolixos et implicatos, intra spatium 10, aut 12 dierum romano examine ac judicio discussos ac probatos ventitare nobis et obtrudere non erubescunt? Quàm parùm hæc secum invicem coherant!

Probatur 2°. Si quid probaret hos articulos ab Alex. VII ut orthodoxos fuisse admissos, maximè ista Brevis verba à Jansenianis toties prædicata et ventilata: « Illud autem non meo dioceri gaudio animum nostrum perfudit, quòd litteris ex Galliâ recens allatis, accepimus illorum in dies crescere numerum, qui recta sapiunt, præfatis Constitutionibus sese ultrò subjicientes; illorum verò decrescere, qui à veritate auditum avertunt, et variis inanum interpretationum argumentis decepti, decretis apostolicis refragantur. Is fuit egregius sanè laborum vestrorum fructus, ut multi, iique cæterorum nomine primarii, exemplo vestro, consilio et operâ ad savio-rem doctrinam inducti, eâ quâ par est, ut credimus, animi demissione sese paratissimos exhibuerint ad illa omnia præstanda, quæ ipsis à Sede apostolicâ præscribentur. » Ast in his verbis ne unum quidem apicem de approbatione quinque articulorum reperiri posse, imò nec ad illos ullatenus respexisse

summum pontificem cùm hæc scriberet, facile est demonstrare. Namque 1°, si dictos articulos præhabito examine probâisset pontifex, illos procul dubio expressè appellâisset; de iis autem silet; ergo, etc... 2° Eorum qui recta sapiunt numerum crescere non aliunde probat pontifex, quàm ex litteris episcoporum Galliæ recens acceptis; at si quinque articulos orthodoxos judicâisset, longè meliùs per seipsum, ex lectione illorum articulorum istud asseruisset.... 3° Declarat quæ sit sanior illa doctrina ad quam multi sunt inducti; videlicet quòd ipsi, eâ quâ par est, ut putabat, animi demissione sese paratissimos exhibuerint ad illa omnia præstanda, quæ ipsis à Sede apostolicâ præscribentur; quibus verbis manifestè alludebat, non ad quinque articulos, sed ad publicum instrumentum quod Janseniani episcopo Convennarum dederant Romam transmittendum simul cum quinque articulis, in quo quidem instrumento profitebantur Janseniani, se paratos esse Constitutionibus apostolicis eam reverentiam et ob-servantiam, quam Sedis apostolicæ majestas et summa ejus auctoritas exigit, impendere; et eaque alia omnia præstituros, quæ ab ipsis S. pontifex exigere voluerit.... 4° In eodem Brevi Gallicanos antistites hortatur Alexand. VII operi ultimam manum admove-re, et procurare impensè, et ut omnes præfatis Constitutionibus apostolicis se, ut par est, subjiciant, et quinque Propositiones ex Jansenii libro excerptas, et in sensu ab eodem auctore intento, sincero animo rejiciant et damnent; porro, si judicâisset pontifex, sicut supponunt Janseniani, puram ac sanam esse articulorum illorum doctrinam, quid rursus necesse fuisset ab eorum auctoribus exigere ut quinque Propositiones Jansenii sincero animo rejicerent et damnarent? Meritò tamen id ab ipsis postulavit Alexander, quia dictos articulos suspectos habebat, atque eos planè insufficientes intelligebat ad orthodoxam fidem exprimendam..... 5° Tandem, si illi articuli ab Alex. VII approbati sunt; cur ergo, cùm illos articulos Alex. VIII, anno 1689, iterùm obtulerunt, atque ad Innoc. XII, anno 1693, solemniter quosdam è suis miserunt, approbationem quam exposulabant obtinere non potuerunt?

Probatur 3°. Cùm Alex. VII transmissos ad se Jansenianorum articulos recepit, jam antea nonnulla Arnaldi in defensionem suæ famosæ propositionis opuscula damnaverant, in quibus illi ipsi scholasticorum, inprimis verò Thomistarum loquendi modi usurpantur, qui, fa-

tente ipsomet Quesnellio parte 2 recentioris libelli, cui gallicè titulus : *Explication Apologétique*, pag. 55, doctrinam quinque articulorum ab omni erroris suspicionem liberam reddere debent; quis porro sibi facile persuadeat, cautum et sapientem pontificem propter involutas hujusmodi loquendi formulas voluisse doctrinam quinque articulorum sanam declarare, qui Arnaldi opuscula in quibus eadem planè insidiosæ locutiones continentur, jam prædamnaverant?

Probatur 4^o ex ipsismet celebrioribus Jansenistis, quibus prætensa quinque articulorum approbatio visa est gratis conficta. Arnaldus epist. 101 ad D. de la Lane de dicto Brevi sic loquitur : « Le seul avantage réel est celui que nous pourrions prendre en faveur de nos articles ; réservons-le pour nous défendre ou pour quelqu'autre occasion. Mais je trouve très dangereux de le faire valoir présentement, parce qu'il sera facile aux Jésuites de nous l'arracher des mains, en tirant quelque déclaration qu'on n'y a point eu d'égard, ou se portant même à y faire donner quelque atteinte. » Dixerat antea : « Ils disent déjà que le pape n'a point examiné nos articles, et qu'il n'y a aucun égard ; mais qu'il s'est seulement arrêté à la soumission qu'on lui a faite, et qu'ayant supposé qu'elle était sincère, pleine et entière, il avait dû tenir pour des personnes qui se départaient de leurs erreurs, ceux qui lui témoignaient être prêts de faire tout ce qu'il leur ordonnerait ; et que l'on ne peut pas conclure de là, que nos articles soient sans erreur, quand même le pape les aurait lus, CE QU'ILS NIENT SANS QUE NOUS LE PUISSIONS PROUVER. » Ibidem de eodem Brevi mentem suam candidè aperit Arnaldus, his verbis : « Le meilleur eût été d'éclater dès que ce Bref a paru ; de le décrier comme l'effet d'une insigne fourberie, et ayant été apparemment envoyé de Paris, selon ce que feu M. de Toulouse (M. de Marca) en envoya un tout dressé sur une semblable affaire..... de le regarder comme nul et subreptice, vu l'injure qui y est faite à la dignité épiscopale en la personne de M. de Cominges, et de le porter à s'en plaindre hautement au roi. »

Ex his tria constant : Primum, quæ fuerit vera Arnaldi mens de isto Brevi, de quo postmodum tantoperè gloriati sunt Janseniani ; illud scilicet tanquàm irritum, subreptitum, ac nonnisi insigni fraude fabricatum statim explo-

dendum fuisse ; secundum, sincerâ fide non egisse Arnaldum ; ipse enim vivente Alex. VII, gemebat de tali Brevi, quasi veritati maximè adverso ; sed vix mortuo romano pontifice trophæa canere cœpit, et in variis scriptis probare aggressus est Alex. VII, in suo Brevi approbasse quinque articulos, quos tamen ne quidem legisse romanum pontificem probari poterat ipso teste, ipso fatente Arnaldo ; tertium, Catholicos statim post acceptum Breve illud exposuisse de protestatione, nec potuisse unquàm Jansenianos probare illud intelligendum de articulis ; quin et iis temporibus periculosum judicabat Arnaldus de Brevi nimium jactitare, quòd nimirum facile fuisset Molinistis, prætensam illam articulorum approbationem, editis in contrarium à pontifice declarationibus infirmare, ac falsam et supposititiam manifestare.

Quesnellius ipsemet in Monito quod præfixit secundæ parti suæ Apologet. explicationis, 1^o fatetur Augustinianos asserere, non tam positivè quàm negativè dictos illos articulos probatos fuisse ; quo ferè modo, inquit ille, actore non probante reus absolvitur. Cum hæc in eo Monito quod operi jam absoluto præfixum est, scribebat Quesnellius, procul dubio immemor erat dixisse se in operis discursu articulos illos expressè ac formaliter approbatos fuisse ; vel potius censendus est dictum hoc suum emendare voluisse, solâ negativâ approbatione contentus.

2^o Nequidem affirmatè asserere audet etiam negativè probatos fuisse articulos ; ait enim tantum ibidem, Augustinianos existimasse sufficiens habere fundamentum asserendi eos negativè fuisse probatos ; at in rei veritate nullum prorsus est approbationis ejusmodi fundamentum. Negativa quippe illa approbatio, judice Quesnellio, similis est illi quæ reus accusatus et non convictus absolvitur ; atqui nullus tunc temporis authenticè dictos illos articulos apud pontificem accusavit ; non profectò episcopus Convennarum qui eos velut orthodoxos transmiserat, et apud pontificem laudaverat ; nullum de eisdem præmissum examen ; ergo nulla nequidem negativa illorum approbatio, nisi fortè contendat Quesnellius, eo ipso librum aliquem ad S. pontificem transmissum negativè probari, quo ab ipso non damnatur ; si ita est, liber cardinalis Sfondrati, de quo nonnulli Gallicani presules apud S. pontificem conquesti sunt, dicendus erit negativè probatus, quia non scriptus.

5° Allata à Quesnellio distinctio interpositivam et negativam approbationem, quinque articulis obest potius quam prosit. Namque si liber censuræ aculeis objectus, censeatur negativè approbatus, eo ipso quo non proscribitur; profectò scriptum approbationis obtinendæ gratiâ S. pontifici exhibitum, debet censeri negativè condemnatum, quandò positivè approbatum non fuit; cùm igitur, ut vidimus, quinque articuli à Jansenianis ad S. pontificem missi fuerint ut approbarentur, nullamque positivam approbationem consequi potuerint, concludendum est juxta Quesnellii principia, eos negativè potius condemnatos fuisse quam negativè approbatos.

Probatur 5° auctoritate illustrissimorum episcoporum, imprimis verò Carnutensis, Noviomensis, Meldensis, etc., qui in suis Pastoralibus Documentis adversus theologicas Juenini Institutiones, quinque articulorum approbationem omnino fictitiam et commentitiam esse demonstrarunt. Idipsum jam anno 1684 præstiterat auctor libri cui titulus gallicè: *Observations sur la nouvelle défense de la version française du N. T. imprimé à Mons*, qui quidem liber in lucem prodiiit sub auspiciis illustriss. Harlæi archiepisc. Parisiensis.

Unum hic addo. Vel doctrina quinque articulorum eadem est cum doctrinâ quinque Propositionum in sensu Jansenii intellectarum; vel non. Si secundum, ergo ex articulorum approbatione suam ab errore non eximunt adversarii doctrinam; si primum, ergo approbavit Alexander VII doctrinam tum à se, tum à suis prædecessoribus variis in Brevis et Constitutionibus solemniter exploratam; quod quàm sit et in se incredibile et summo pontifici injuriosum, nemo non videt.

Dices 1°: Janseniani in tertio è quinque articulis ad factum pertinentibus non obscurè asserunt suos articulos doctrinales à S. pontifice probatos fuisse in dicto ad episcopos Gallicanos Brevis; atqui tamen ista pontificii Brevis interpretatio à clero Gallicano non fuit reprobata; ergo, etc. — Respondeo 1°, Jansenianos non auros fuisse id affirmatè asserere, sed quasi subdubitando; sic enim habent: *Il paraît par quelques termes dudit Bref, que sa Sainteté en a été satisfaite*. Respondeo 2°, hanc Brevis interpretationem satis reprobam censeri à clero Gallicano, eo ipso quo ab eodem clero, ut supra vidimus, quinque articuli facti quæstionem spectantes, bancque interpreta-

tionem continentes, tam graviter reprehensi et notati fuerunt.

Dices 2°: Generales cleri Gallicani procuratores in eâ quam ad singulos episcopos scripsere epistolâ die 20 octobris 1665, expressis verbis significant laudatum Breve Alex. VII esse responsionem ad quinque articulos doctrinales; ergo quæ in isto Brevis habentur de saniori Jansenianorum doctrinâ non possunt nisi ad illos articulos referri. Ita sibi plaudens objicit Quesnellius parte secundâ supra citati libri pag. 48. — Respondeo Quesnellium, ut vanum sibi erigeret triumphum, citatæ epistolæ verba truncasse, quæ si integra retulisset, nullus superesset objectioni locus; sic enim loquuntur dicti generales procuratores: « Les « pièces que nous vous envoyons par l'ordre « de messeigneurs les prélats, vous appren- « dront le sujet de leur assemblée extraordi- « naire, et leurs résolutions sur le sujet du « Bref de N. S. P. le pape, qui est une réponse « à certains articles qui ont été envoyés ci- « devant à sa Sainteté, pour se soumettre sous « des conditions aux Constitutions de nos SS. « PP. les papes Innoc. X et Alex. VII, qui « condamnent les cinq Propositions de Cornel. « Jansénius. » Breve igitur Alex. VII ad Episcopos Gallicanos responsio est ad quosdam articulos quibus sub certis conditionibus Janseniani obsequium et obedientiam promittebant se exhibituros Constitutionibus apostolicis; atqui in doctrinalibus articulis ne vel minimum vocabulum de obedientiâ; ergo ad illos articulos non attendebant præfati procuratores, sed ad instrumentum illud seu scriptum publicum sæpius commemoratum, simul cum articulis doctrinalibus Romam transmissum, quo Janseniani sese ad obsequium exhibendum obstrinxerant.

Et verò, inter illa instrumenta quæ generales procuratores ad episcopos absentes transmiserunt, ut eos de rebus in comitiis anni 1663 gestis certiores facerent, extat promissi obsequii declaratio, prætermittuntur autem quinque doctrinales articuli; an verò illos omisissent, si existimassent de iis in Brevis suo agere summum pontificem? Unum hic apprimè observandum, prædictam declarationem absque quinque articulis doctrinalibus typis edi et ad episcopos transmitti curasse dictos Procuratores; non aliâ certè de causâ, quàm quòd ipsis persuasum foret, Breve summi pontificis ad illos quinque articulos non respicere, sed ad solam declarationem seu procuracionem laudatam.

Dices 3° : Damnatuſ Romæ fuit atque in Indicem rejectus libelluſ quidam contra quinque articuloſ edituſ ſub hoc titulo : *Fraus quinque articulorum* ; ergo , etc. — Reſpondeo non idcirco damnatum fuiſſe hunc libellum quod quinque impugnaret articuloſ ; tunc etenim et monitum doctoriſ Pariſienſiſ contra eodem articuloſ Romam tranſmiſſum eſt , et obſervationeſ alteriuſ magiſtri et profeſſoriſ Sorbonici in lucem abſque ullâ reprehentione editæ fuerunt , imò ſignificavit S. pontifex , D. Pariſienſiſ monitum ſibi gratiſſimum et acceptiſſimum fuiſſe ; quin et ipſe Clemens XI Documenta Paſtoralia epiſcoporum Carnutenſiſ et Meldenſiſ , ubi prætenſa quinque articuloſ à Sede apoſtolica approbatio exploditur , ipſique articuli omnino rejiciuntur , non ſolum non improbavit , ſed etiam debitiſ laudibuſ extulit in tribuſ ad ipſoſ Brevibuſ. Quæ autem vera cauſa ſit cur proſcriptuſ fuerit libelluſ citatuſ noſ latet.

Diceſ 4° : Epiſcopuſ Convennarum in ſua ad regem Chriſtianiſſimuſ epiſtolâ ſupra citatâ non obſcurè aſſerit quinque articuloſ ab Alex. VII approbatoſ fuiſſe , et reiſpâ eſſe orthodoxoſ. 2° Idem aſſerit epiſcopuſ Alecteniſ in epiſt. ad illuſtriſſ. archiepiſc. Pariſienſem de Prefixe ſcriptâ , die 7 novembris anni 1667. 3° Card. d'Aguirre tum in epiſtolâ ad D. Hennebel , tum Theolog. S. Anſelm. Proleg. 5 , illoſ articuloſ tanquàm ſanoſ approbare videtur. Denique multi celebres Thomiſtæ , quos inter Gonetuſ , eodem articuloſ probaverunt ; ergo , etc. — Reſpondeo ad primum et ſecundum , vel ipſo iudice Queſnellio nimum probant illuſtriſſimi Alecteniſ et Convennarum epiſcopi ; volunt ſiquidem dictoſ quinque articuloſ poſitive ab Alexand. VII fuiſſe probatoſ , quos ipſe Queſnelliuſ loco antea citato fatetur negativè duntaxat fuiſſe approbatoſ. Præterea dictiſ epiſcopiſ opponimuſ Carnutenſem , Meldenſem , Noviomenſem alioſque plureſ , qui prætenſam quinque articulorum approbationem explodunt.

Ad tertium : 1° In nullo ex citatiſ à Queſnellio lociſ aſſerit card. d'Aguirre , imò ne vel minimum quidem innuit dictoſ articuloſ ab Alexand. VII vel VIII probatoſ fuiſſe ; tametiſ gesta ſub Alex. VII facilè reſcire poſſet , et interfuiſſet Congregationibuſ ſub Alex. VIII habitiſ , quando Janseniani ab eo poſtularunt ut declararet ſanam eſſe et à Jansenianâ longè remotam quinque articulorum doctrinam. 2° Idem eminentiſſ. card. citato Prolog. 5 ,

unde Queſnelliuſ arguit , iſtud quinque articulorum auctoriſ crimini vertit , quod in illiſ ne verbulo quidem ſignificent ſe doctrinam Jansenii rejicere ac damnare. 3° Ibidem candidè fatetur , lectiſ duntaxat Jansenianorum pro deſenſione quinque articulorum libriſ ſe in eorum gratiam propenſum aliquando fuiſſe ; verum addit , viſiſ poſtmodum et expenſiſ aliorum reſponſiſ , maxime verò iſiſ quæ dicta et gesta fuerant in famoſiſ Collationibuſ circa illoſ articuloſ habitiſ cum Patre Ferrerio , ſe iſiſ plurimum commotum fuiſſe , ſuumque ſuſpenſiſſe iudiciuſ , nec etiamnum proferre eò quod Innoc. XI decreto cautum eſſet , ne quiſ propoſitioneſ aut opiniononeſ aliquas circa gratiam notaret , antequàm Sedes apoſtolica ſuum de illiſ protuliſſet iudiciuſ ; an quæſo hæc ſunt hominiſ dictoſ articuloſ probantiſ , aut à SS. pontificibuſ approbatoſ fuiſſe exiſtimanſiſ ? Atque hæc card. d'Aguirre in eo ipſo Prolog. 5 , quæ pro ſua fide ac candore ſuppreſſit Queſnelliuſ.

Ad poſtremum reſp. illoſ Thomiſtaſ deceptoſ fuiſſe ambiguiſ nonnulliſ verbis quæ Thomiſticam doctrinam in ſpeciem referre videntur , ſed quæ reiſpâ Jansenianum occultant errorem ; nihil quippe , fatentiſſiſ ipſiſmet Janseniſtiſ , in hiſ articuliſ continetur quod cum ſyſtemate Janseniano appriſe non cohæreat. Mirum porro eſt P. Gonet. in Galliâ ſcribentem tam aſſermatè aſſeruiſſe dictoſ illoſ quinque articuloſ ab Alex. VII probatoſ fuiſſe , cum ipſe P. Maſſoulier alter Dominicanuſ qui Romæ ſcripſit , nunquam tale quid aſſerere auſuſ fuerit.

Diceſ 5° : Doctrina quinque articulorum alia planè eſt à Jansenianâ. Iſtiuſ quippe fundamentum , ut dicimuſ cap. ſequenti , eſt delectatio relativè victrix ad ſenſum Jansenii ; atqui in quinque articuliſ ne verbum quidem de illâ delectatione ; ergo , etc. — Reſpondeo 1° , ſi quinque articulorum doctrina diſtat à Jansenianâ , ex prætenſâ horumce articulorum approbatione nihil in ſuæ doctrinæ gratiam inferre poſſunt Janseniani ; 2° ſemper conſteſtati ſunt Jansenii diſcipuli , ſe nuſquam à doctrinâ quinque articulorum reſceſſiſſe ; 3° ſive illorum articulorum auctoreſ ſpectentur , ſive eorum libri in quibuſ eadem uſurpantur loquendi rationeſ ; ſive denique verba ipſa ex quibuſ illi conſtant , planum omnino erit hiſce articuliſ Jansenianum dogma exprimi , DD. Girard et Nicole inter præcipuoſ et fervidioreſ Jansenii deſenſoreſ , illorum articulorum pa-

rentes fuere, uti refert auctor libelli cui titulus : *La paix de Clément IX*; quidquid in speciem magis catholicum in dictis articulis exprimitur, de verbo ad verbum representatur in Disquisitionibus Pauli Irenæi, Elucidatione Dionysii Raymundi, Expositione fidei circa gratiam; citius verò omnes oceani aquas exhausteris, quam hæc scripta ab erroribus Jansenii purgaveris. Quòd si ad ipsum contextum verborum horumce articulorum attenderimus, tametsi verbis valdè ambiguis concinnati, varios in sensus distrahi possint, attamen rem penitus introspectanti, apertum erit in illis contineri præcipuam Jansenistarum fallaciam, de distinctione scilicet potentiae absolutæ et relativæ, in quâ ultimæ veluti Jansenismi fibræ reconduntur, et cujus ope in æquivoco perpetuò luserunt Jansenii defensores, tum in quinque articulis, tum in suis cum Patre Ferrerio Collationibus.

Callidè porrò et ad fucum faciendum, de delectatione relativè victrici siluerunt quinque articulorum auctores, ut nempe tutius se Thomistas fingere possent, quos notum est vim gratiæ efficacis non ex delectatione per gradus victrici, sed ex efficacissimâ et omnipotentissimâ Dei voluntate repetere, attamen nihil in his suis articulis asserunt Janseniani, quod cum doctrinâ delectationis relativè superioris optimè non cohæreat. Imò, cum in famosis de dictis articulis congressibus, maximam argumentorum suorum vim ex modo agendi delectationis per gradus seu relativè victricis adversus Jansenianos contorqueret Ferrerius, isti libenter admissio delectationis hujus principio, quæ inde absurda et erronea necessariò sequi demonstrabat Ferrerius, non aliter eludebant, quam famosâ æquivocatione supradictæ distinctionis potentiae absolutæ aut relativæ de quâ ex professò agemus, ubi de systemate doctrinæ Jansenii.

ARTICULUS III.

De pace Clementis IX.

Mirum profectò quantum Janseniani eâ quatuor episcoporum cum Clemente IX reconciliatione, quam superbo nimis titulo, Ecclesiæ pacem nuncupavere, abusi fuerint in patrocinium religiosi, ut vocant, silentii, quod unice circa factum Jansenii Constitutionibus apostolicis deberi affirmant.

Duo scilicet dixere, primum, quatuor episcopos in novâ subscriptione quæ refertur in actis Verbalibus synodorum diœcesanarum,

rursus inseruisse distinctionem juris et facti; atque illi internum et absolutum mentis assensum, huic autem reverentiam duntaxat silentii promississe; alterum, S. pontificem Clementem IX, quatuor Episcopos ad pacem, seu ad communionem suam recepisse, quanquàm non ignoraret dictam subscriptionis ab ipsis factæ distinctionem seu limitationem; unde jactantius prædicarunt approbatam à Clemente IX fuisse suam de religioso silentio opinionem. Ita Janseniani in omnibus ferè scriptis ab hoc tempore exaratis, ac præsertim in duobus operibus, quorum primum gallicè inscribitur : *La paix de Clément IX*. alterum verò duobus tomis distinctum : *Relation de la paix de Clément IX*.

Compendiosam hujusce pacis historiam alibi exhibuimus; unum hic, et quidem maximi in præsentī negotio momenti, superest investigandum, an scilicet, prætensa illa pax puræ et simplici adversetur subscriptioni formularii, faveatque religioso, ut vocant, silentio circa dogmaticum Jansenii factum. Istud pertinaciter contendunt Janseniani; cæteri verò constanter pernegant. Quidquid autem sit de privatâ quatuor episcoporum agendi ratione, quam præ reverentiâ refricare nolumus ac profundius scrutari, tria hic totidem Conclusionibus probanda suscipimus, ex quibus manifestum erit nihil omninò ex hac confidentius jactatâ Clementis IX pace colligi posse in patrocinium silentii religiosi.

Primum : Clemens IX reipsâ existimavit quatuor episcopos sincerè, purè et simpliciter subscripsisse formulario Alexandri VII. Secundum : Non potuit summus ille pontifex aliter pro suâ prudentiâ de illis quatuor episcopis suspicari. Tertium : Etsi concederetur Clementem IX (quod tamen absque summâ tanti pontificis injuriâ supponi nequit) non ignorâsse factam à quatuor episcopis juris à facto distinctionem, adhuc tamen nihil exinde colligi posset in gratiam silentii religiosi.

Et hæc quidem ex superabundanti, ut aiunt probanda aggredimur; ruit etenim penitus adversariorum sententia, si vel una ex dictis propositionibus vera demonstretur; quantò magis si omnium veritas adstruatur? Sit itaque

CONCLUSIO PRIMA. Clemens IX reipsâ existimavit quatuor episcopos purè et simpliciter subscripsisse formulario Alexandri VII.

Probatur 1º ex Brevi Clementis IX ad regem Christianissimum dato die 28 septembris 1668, in quo sic loquitur : « Cum lætitiâ cognovimus

« in purâ et simplici subscriptione formularii, « quatuor illorum Episcoporum obedientiam « et obsequium. » Ex his sic arguo : Pura et simplex subscriptio formularii, in quo subscribens jurat se sincero animo rejicere ac damnare quinque Propositiones in sensu à Jansenio intento, excludit haud dubie omnem restrictionem, limitationem ac distinctionem respectu sensûs Janseniani; atqui, quam præstiterunt episcopi subscriptionem formulario, in quo subscribens jurat, etc., eam Clemens IX existimavit puram et simplicem; ergo, etc.

Probatur 2^o ex Brevi ad episcopos pacis mediatores dato die 19 januarii 1669 : « Non « sine lætitiæ sensu, inquit, pervidimus ex lit- « teris fraternitatem vestrarum.... de perfectâ « et integrâ obedientiâ nobis et apostolicæ Sedi « præstitâ per episcopos Andegavensem, Bel- « lovacensem, Apamiensem et Alecensem, « subscriptione formularii sincero animo et « juxta præscriptum litterarum apostolicarum « ab eis factâ. » Quid luculentius? Perfecta et integra obedientia Sedi apostolicæ præstita, subscriptio formularii juxta præscriptum Constitutionum Innoc. X et Alex. VII, non patitur distinctionem juris à facto, nec admittit restrictionem ac limitationem sensûs Janseniani quem Alex. VII expressè damnandum declaravit; porrò Clemens IX talem fuisse existimavit quatuor episcoporum obedientiam et subscriptionem; ergo, etc.

Probatur 3^o ex Brevi ad illos quatuor episcopos eodem anno et die : « Cum ingenti, in- « quit, obsequii nobis et huic sanctæ sedi per « vos debiti testatione significabatis (in epistolâ « nimirum quam scripserant ad S. pontificem) « vos juxta præscriptum litterarum apostoli- « carum Innoc. X et Alex. VI sincerè sub- « scripsisse et subscribi fecisse formulario in « ejusdem Alex. VII litteris edito.... Nam præ- « decessorum nostrorum Constitutionibus fir- « missimè inhærentes, nullam circa illud ex- « ceptionem aut restrictionem admissuri un- « quàm fuissetis; in præsens tamen cum « nova et gravia isthinc accepimus documenta « veræ et totalis obedientiæ vestræ, quâ et « formulario sincerè subscripsistis, damnatis « absque ullâ exceptione aut restrictione quin- « que Propositionibus in omnibus sensibus, in « quibus à Sede apostolicâ damnatæ fuerunt... « tribuere vobis volumus hoc paternæ bene- « volentiæ nostræ argumentum. » Quid iterum disertius? Vera, perfectâ, integra ac totalis obedientia quâ formulario absque ullâ excep-

tione aut restrictione sincerè subscribitur, et damnantur quinque Propositiones absque ullâ pariter exceptione aut restrictione, in omnibus sensibus in quibus à Sede apostolicâ damnatæ fuerunt, manifestè excludi ac directè opponitur partiali huic obedientiæ et limitatæ subscriptioni quam in suis Mandatis dicti quatuor episcopi præstiterant; quæ in eo posita erat, quòd respectu solius juris internam adhæSIONem, et respectu facti solum silentium religiosum exhibendum esse significarent; atqui Clemens IX existimavit quatuor episcoporum obedientiam fuisse veram integram, totalem, etc.; ergo, etc.

Probatur 4^o disertissimo testimonio cardinalis Rospigliosi Clementis IX nepote, in suâ totius hujusce negotii historicâ Relatione, in quâ sic loquitur n. 161 : « Sin verò asseruis- « sent episcopi nolle se pro hæreticis agnos- « cere quinque Propositiones in sensu Jansenii, « quemadmodum ab apostolicâ Sede fuerant « damnatæ, id sanè nullatenus ferre, neque in « re tanti momenti quidquam connivere, quin- « imò acerrimè obviâ ire statuerat. » Audis summum pontificem firmiter adhæsisse suo proposito nullam ineundi concordiam, nisi quatuor episcopi damnarent quinque propositiones in sensu Jansenii, seu quod idem est, nisi sincero animo acquiescerent definitioni pontificiæ circa dogmaticum Jansenii factum; cum ergo quatuor episcopos ad pacem admisit Clemens IX, ignoravit profectò ab iis fuisse factam juris à facto distinctionem.

Probatur 5^o omni exceptione majori teste Clementi XI in solemnî Constitutione *Vineam Domini*, etc., anno 1705 datâ, in quâ prædecessoris sui Clementis IX exponens mentem, eos severe perstringit qui illius litteras in erroris sui patrocinium advocare temerario ausu non erubescunt : « Perinde ac si, inquit, memora- « tus Clemens prædecessor, qui eisdem suis « litteris se Innoc. X et Alex. VII prædecesso- « rum Constitutionibus firmissimè inhære- « re, ac à dictis quatuor episcopis veram et totalem « obedientiam, adeoque formulæ à præfato « Alex. editæ, sincerè per eos subscribi voluisse « declaravit, aliquam in tam gravi negotio ex- « ceptionem seu restrictionem, quam nullam « prorsus se unquàm admissurum fuisse pro- « testatus fuit, reipsâ admisisset. » Clara sunt hæc, nec ullâ interpretatione indigent.

Ex iis autem quæ hactenus dicta sunt, apertè constat quæ fuerit mens R. pontificis, et quo sensu scripta Romam è Galliis missa intellexe-

rit. Neque enim aliunde melius ac tutius judicari potest quid in præsentī negotio senserit Clemens IX quàm ex iis publicis ac authenticis quæ in responsum dedit monumentis, aut ex personis quibus ipsius mens aperta fuit; atqui tum ex publicis in responsum datis scriptis, scilicet ex Brevibus ad regem Christianiss. ad episcopos pacis mediatores, et ad ipsosmet quatuor episcopos; tum ex personis quibus melius nota esse potuit Clementis IX mens, scilicet ex card. nepote Rospigliosi, et ex Clemente XI manifestè patet S. pontifici ignotam fuisse factam à quatuor episcopis juris et facti distinctionem, imò existimasse ipsos purè ac simpliciter subscripsisse; ergo, etc.

Quid ad hæc evidentissima momenta Janseniani? inania prorsus ac futilia. Aiunt 1º, Breve ad regem Christianissimum diu occultatum fuisse non absque mysterio, ne scilicet deprehenderetur falsum esse quod in eo assertitur de purà et simplici quatuor episcoporum subscriptione. Ita auctor anonymus apologet. præfat. ad Relationem pacis Clemens IX.

Refellitur: 1º Diù latuerunt verbalia quatuor episcoporum acta; an indè eorum veritatem in dubium adduci paterentur Janseniani? 2º non negamus falsum esse quod in Brevi dicitur de pura et simplici quatuor episcoporum subscriptione; at nobis sufficit quòd id verum putaverit Clemens IX, sicut reverà ipsum existimasse ex Brevi clarum est et manifestum. 3º Teste auctore mox citato, ideò suppressum fuit istud Breve in Galliis, ne scilicet crederent quatuor episcopi apud Romanos vigere hanc opinionem, ipsos sine sæpiùs dictà distinctione subscripsisse; ergo eà prætentà ratione quæ ad Breve occultandum movit, constat Clementem IX existimasse quatuor episcopos sine distinctione subscripsisse.

Aiunt 2º hæc verba, *in purà et simplici subscriptione*, inimicà manu fuisse Brevi adjecta; hujusce fraudis architectum esse card. Albizium, omninò verisimile conjicit auctor libri cui gallicè titulus: *La paix de Clément IX*, pag. 119.

Refellitur: 1º Putidum istud est commentum, insulsaque evasio, quæ sicut nullo nititur momento, nullà quoque ratione solvi debet. 2º Quàm temeraria sit et Sedi apostolicæ injuriosa hujusmodi cavillatio nemo non videt; quasi verò S. pontifex, atque inprimis Clemens IX, quem ipsimet Janseniani summis laudibus extollunt, passus unquàm fuisset aliquid in suis Brevibus contra veritatem ac sinceritatem in-

terseri, ne aliquà ex parte de suo remisisse videretur; quis talemde tanto pontifice calumniam patienter ferat? 3º Quæ ex aliis Brevibus à nobis adducta sunt de subscriptione sincerà et absque ullà restrictione ac limitatione, puram ac simplicem perinde adstruunt subscriptionem.

Aiunt 3º, tunc præstitam quatuor Episcoporum subscriptionem dici posse *puram et simplicem*, quia ipsi in subscribendo, purè et simpliciter nomen apposuerant suum, nec addiderant clausulam: *Ego N. dogmatibus fidem, facto reverentiam promitto*. Ita præfatus auctor p. 120.

Refellitur 1º: Cur ergo dicta verba ab Albizio inserta? Cur suppressio Brevis? Siccine sibi stat auctor? 2º Nonne in actis verbalibus expressa erat mox dicta clausula? Quis autem dixerit eum purè ac simpliciter subscribere, qui in ipso instrumento publicè testatur, se non purè subscripturum? Hæcne usquàm fuit puræ ac simplicis subscriptionis idea? Apagè nugas.

Aiunt 4º, *sinceram* subscriptionem cum *purà et simplici* minimè esse confundendam; namque subscriptio non pura, sed limitata, et cum distinctione data, sincera est et minimè simulata; qui enim ita subscribunt, candidè et ingenuè mentem suam aperiunt. Ita auctor citatæ præfationis apologet. pag. 74 et 75.

Refellitur: Omninò ludica est et illusoria ista responsio; etenim 1º, ex aliis verbis Brevis supra recitatis, inprimis verò ex istis: *Nam prædecessorum nostrorum vestigiis firmisimè inhaerentes, nullam circa illud exceptionem aut restrictionem admissuri unquàm fuissetus*; ex istis, inquam verbis, quæ callidè dissimulat auctor anonymus, planum est summum pontificem nomine *sinceræ* subscriptionis quam à quatuor episcopis exegit, quamque ab ipsis præstitam existimavit, intellexisse puram, simplicem et sine restrictione datam subscriptionem; aliàs enim recessisset pontifex à firmo suo proposito. 2º Sincera quam laudat Clemens IX quatuor episcoporum subscriptio, perfecta dicitur, integra et totalis, atque opponitur priori eorum subscriptioni in Mandatis expressæ, et cum restrictione ac limitatione datæ; porro sincera subscriptio, quæ perfecta est, integra et totalis, quæque opponitur limitatæ ac restrictæ subscriptioni, haud dubiè pura et simplex esse debet; ergo, etc. 3º Quidquid sit de dictà distinctione, certè in præsentī negotio locum habere nequit. Cum enim exigitur ut quis purè et simpliciter subscribat, sincera

non potest esse subscriptio, quin sit pura et simplex; atqui exigebatur à quatuor episcopis ut purè et simpliciter subscriberent, quod hucusque perficere recusaverant; ergo, etc.

Aiunt 5°, citata verba, *nullam circa illud exceptionem*, etc., non referri ad subscriptionem formularii, sed tantum ad damnationem quinque Propositionum prout in se spectantur.

Refellitur: Noverat Clemens IX Jansenianos statim post emissam Constitutionem Innocent. X, contestatos fuisse se damnare quinque Propositiones in se spectatas, sine ullà exceptione aut restrictione; ergo novum istud obsequium absque exceptione et restrictione, quod tandiù expectatum, tandem exhibitum fuisse confidebat S. pontifex, et quod ad impetrandam pacem exigebat, non potest ad propositiones in se præcisè spectatas duntaxat referri. Præterea, fatentibus vel ipsis Jansenii discipulis, prædicta verba referuntur ad ea quæ sequuntur in eodem Brevi; atqui in verbis sequentibus statim mentio fit subscriptionis formularii; ergo, etc. Tandem, ibidem disertè testantur quatuor illi episcopi, se damnare quinque Propositiones in omnibus sensibus in quibus à Sede apostolicà damnatæ sunt; in illis autem sensibus quos proscripsit Sedes apostolica procul dubio includitur sensus Jansenii, uti ex apostolicarum Constitutionum contextu clarè liquet, et antea probavimus; ergo, etc.

Aiunt 6°, aliud est subscribere cum *distinctione et explicatione*, et aliud cum *exceptione et restrictione*; primum, peregerunt quatuor episcopi, non secundum. Effugium istud proponunt anonymi citati.

Refellitur futilis rursus nova isthæc distinctio: 1° Cur tentabatur depositio quatuor episcoporum, nisi propter factam exceptionem et restrictionem? Sed quid minùs peregerunt illi episcopi in actis verbalibus, quàm antea in publicis Mandatis? 2° Quid paulò ante prætensæ pacis consummationem ferebant rumores incerti, nisi factam à quatuor episcopis distinctionem? hæc autem erat exceptio in mente R. pontificis, quâ detinebatur ne illis pristinam restitueret benevolentiam. 3° Dictam distinctionem ut veram exceptionem rejicit Clemens XI, in solemni bullâ *Vineam Domini*, etc. Tandem audiat Arnaldus ad moniales Portus Regalis anxias et renuentes subscribere juxta tenorem Verbalium, tom. 2, epist. 156: « C'est une vérité également reconnue de tout le monde et par vos ennemis mêmes, que ce

« n'est point signer simplement le formulaire « tout tel qu'il est, que de le signer, expliqué, « modifié, restreint par l'acte même en vertu « duquel on le signe. » Quibus verbis manifestè patet, teste ipsomet Arnaldo, expressam in Verbalibus quatuor episcoporum distinctionem et explicationem, veram fuisse exceptionem et restrictionem.

Aiunt 7°, quam in probationem adducimus cardinalis Rospigliosi Relationem, nullius prorsus esse momenti an fidei. Ita citatæ præfationis auctor pag. 642 et sequentibus, qui in omne latus se vertit ut dictæ Relationi, tanquàm supposititiæ aut saltem valdè suspectæ, omnem auctoritatem detrahat, ac ipsius fidem elevet.

Refellitur: Vel ipsi Janseniani priores adducere aliquod ex dictâ relatione extractum; quid et ipsemet Quesnellus in lib. Defensionis Ecclesiæ adversus Leydeker pag. 602 et sequentibus, datâ operâ probat extractum illud authenticum esse: et ut talem susceptum fuisse ab eminentissimis Congregationis S. Officii cardinalibus; porrò approbare et laudare tanquàm authenticum aliquod testimonium, profectò agnoscere est authenticitatem scripti unde excerptum fuit; ergo, vel ipsi Janseniani, si suis stent principiis, debent ut genuinam agnoscere card. Rospigliosi Relationem.

Non me latet Jansenianos reponere testimonium illud à suis laudatum fuisse, tanquàm excerptum ex registro cardinalis Rospigliosi, atque ab eo registro translatum fuisse in Relationem quæ falsò eidem card. tribuitur.

Verùm 1°, gratis et absque ullâ vel levissimâ probatione supponunt hanc ejusdem textûs transmissionem ex registro in Relationem. 2° D. Hennebel qui primus istud testimonium laudavit coram eminentiss. cardinalibus in suâ tertiâ declaratione, manifestè alludit non ad registrum, sed ad Relationem; laudat etenim numerum 165, qui est ipse Relationis locus in quo extat præfatum testimonium. Præterea opus illud, de quo loquitur, vocat librum manuscriptum à se relectum, et cardinalibus notissimum, seu, ut aiunt, per manus communicatum; atqui hæc omnia manifestè indignant Relationem breviorē, minimè verò registrum; quis enim credat integrum registrum in quo continentur plurima acta, memorialia, epistolæ, aliaque monumenta ad præsens negotium minimè pertinentia, omnibus cardinalibus Congregationis per manus communicatum? ergo dicendum est, scriptum cardinalibus notissimum et ab ipsis approbatum, esse ipsamet

Relationem de quâ litigamus. 3^o Excepto præfationis apoget. auctore, alii scriptores Janseniani eandem Relationem ut indubitata fidei monumentum, et tanquam germanum cardinalis factum laudârunt; inprimis passim conceptis verbis istud asserit auctor libelli cui titulus: *Lettre à Monseigneur l'archev. de Cambrai au sujet de sa réponse à la seconde Lettre de monseigneur l'évêque de S. Pons*; 1709, pag. 16, 17, 18, etc.

CONCLUSIO SECUNDA. — Clemens IX, pro suâ prudentiâ, aliud suspicari non potuit, quàm quod reverâ pro certo habuit, nimirum quatuor episcopos purè ac simpliciter subscripsisse.

Probatur Conclusio variis iisque decretoriis momentis.

Primum petitur ex Ludovici XIV ad Clement. IX epistolâ, in quâ rex Christianissimus, ex acceptis communibus quatuor episcoporum litteris, certior fecerat S. pontificem de purâ et simplici ipsorum subscriptione. Id clarè colligitur ex citato Clement. IX Brevi; in eo etenim postquam meminit purâ ac simplicis quatuor episcoporum subscriptionis, continuò subdit: « Quare majestatis tuæ in eâ re statim « nuntiandâ, et insigni gratulatione prosequendâ, studium et amorem incomparabili « cum gaudio pervidimus. » Quâ autem ratione S. pontifex à rege Christianissimo certior factus de purâ ac simplici quatuor episcoporum subscriptione, suspicari potuisset ipsos non nisi cum restrictione aut juris à facto distinctione perinde ac antea subscripsisse?

Secundum momentum desumitur ex ipsâ quatuor episcoporum ad Clement. IX epistolâ die 1 septembris 1668, in quâ post egregia in apostolicam Sedem observantiæ testimonia, sic loquuntur: « Cum in exequendâ decessoris « vestri de subscribendâ fidei formulâ Constitutione, Gallicani episcopi nobiscum sensibus « conjunctissimi, eam disciplinæ formam amplexi sint, quam Sanctitati vestræ acceptior « rem fuisse intelleximus; nos quibus nihil est « antiquius, quàm paci et unitati consulere, et « nostram erga Sedem apostolicam reverentiam « testificari, non piguit eorum institutum « imitari. Quamobrem congregatâ, sicut illi, « diœcesanâ synodo, et imperatâ novâ subscriptione, nos etiam subscripsimus; quæ « suis ipsi clericis tradiderunt, nostris tradidimus; quod in apostolicas Constitutiones injunxerunt, injunximus, prorsusque nos ipsi, ut pridem doctrinâ, ita nunc in hac « disciplinæ formâ conjunximus. Arduum id

« nobis ac perdifficile fuisse non dissitemur; non « ignavis quot malevolorum voculas excire « posset hæc disciplinæ mutatio: sed cum collegæ quidam nostri ecclesiasticæ concordiæ « studiosissimi, hoc et ad Ecclesiæ pacem opportunum, et in Sanctitatem vestram honorificum, atque ipsi gratius fore significassent, « quid non illi à nobis, his rationum momentis impetrassent? » Ex his verbis clarè liquet non potuisse S. pontificem aliud judicare de quatuor episcopis (nisi eos æquivocationis, et insignis in re maximi momenti fraudis reos habuisset), quàm ipsos purè ac simpliciter subscripsisse, conformiter ad ea quæ de ipsis jam renuntiaverat rex Christianissimus.

Namque 1^o, testantur hic quatuor episcopi, se aliorum Galliæ episcoporum formam et disciplinam imitatos fuisse; atqui alii episcopi, sincerè absque ullâ limitatione et restrictione subscriptionem in suis Mandatis imperaverant, et ipsi exhibuerant. Solus episcopus Noviomensis distinctionem juris à facto proposuerat; verùm ubi mentem suam exposuit, et dixit se voluisse duntaxat excludere fidem divinam pro facto, nihil tentatum est; ergo ex citatis verbis intelligere debebat Clemens IX quatuor episcopos sincerè et absque ullâ limitatione subscripsisse.

2^o Addunt ibidem, novam hanc subscriptionem arduam ipsis fuisse ac perdifficilem; unde porrò Clemens IX, cui ne verbalia communicarentur summâ diligentia curabant Janseniani, unde, inquam, summus ille pontifex subodorari potuisset ortam illam difficultatem, nisi ex mutatione prioris eorum sententiæ, ac limitatâ subscriptionis? numquid adeò arduum erat ac per difficile, ut quod in publicis docuerant Mandatis, illud rursus in secretis actis verbalibus referrent?

3^o Cum nihil fraudis ac doli in quatuor episcopis suspicaretur Clemens IX, sed ipsos candidè et sincerè loqui existimaret, dùm asserunt subscriptionem quam jam exhibuerant novam esse, ac suæ Sanctitati acceptiorem; non aliud profectò judicare potuit S. pontifex, quàm ipsos novâ suâ subscriptione correxisse, quod tum in suis publicis Mandatis circa subscriptionem formularii, tum in suâ anni superioris circa eandem subscriptionem epistolâ sanctæ Sedi displicuerat; porrò distinctio juris à facto et sufficientiâ silentii religiosi, idipsum est quod in his scriptis potissimum improbaverat sancta Sedes; ergo, etc.

4^o Nova hæc subscriptio ab iisdem episcopis

exhibetur velut sanctæ Sedi plurimum honorifica, et tanquam eximium suæ in apostolicam Sedem observantiæ testimonium. Ast id quidem verissimum, si de purâ et simplici subscriptione intelligantur adducta quatuor episcoporum verba; sin autem de restrictâ et limitatâ subscriptione exponantur, falsissimum. Quid enim honoris S. pontifici et sanctæ Sedi, imò potius quantum ipsis contumeliæ accedere poterat ex eo subscribendi genere quod hactenus recusaverant SS. pontifices, nec ab iis poterat approbari, quin erroris, injustitiæ ac tyrannidis accusarentur in purâ ac simplici subscriptione exigendâ quæ hucusque imperata fuerat et exacta?

His adde dictam epistolam quatuor episcoporum agendi rationem clarè non exhibuisse, sed ad minimùm, obscuram, ambiguum et æquivocam fuisse; unde vix ad eî subscribendum adduci potuit episcopus Alectensis; triplex eâ de re ad ipsum cursor dirigendus fuit, quemadmodum refert auctor Relationis pacis Clem. IX, tom. 2, pag. 174; cùmque ad subscribendum instantius urgeretur, narrante altero anonymo auctore libri cui titulus: *Pax Clement. IX*, pag. 108, in hæc verba gemens prorupit dictus antistes: « Qu'il ne convenait pas à son âge, non plus « qu'à son caractère, de ne pas parler clairement dans l'occasion présente, si importante « à l'Eglise. » Cessit equidem postmodum, ac repetitis amicorum precibus commotus tandem acquievit et subscripsit epistolæ; verùm quasi invitatus ac contra propriam conscientiam; ita testatur D. de Vaucelle epist. scriptâ die 27 martii an. 1700, his verbis: « M. d'Aleth crut, « par un sentiment d'humilité, devoir se sou- « mettre au sentiment des autres, et signer la « Lettre au pape comme elle était, quoique ce « fût avec répugnance, et contre son propre « sentiment; prévoyant bien qu'on ne manque- « rait pas de leur reprocher, qu'ils avaient « trompé le pape par des expressions ambiguës, « ou du moins qui n'étaient pas assez nettes, « ni assez claires. » Iis ergo in circumstantiis, in quibus, acceptis regis Christianiss. et episcopi Laudunensis litteris, nihil fraudis, artificii à quatuor episcopis suspicabatur S. pontifex, imò existimabat, mutatâ agendi ratione, ut ipsi cæterique omnes prædicabant, eos sincerè, purè ac simpliciter subscripsisse; si quæ minùs clara reperiuntur epistolæ verba, æ benigno sensu interpretari ac intelligere debuit.

Litem hic movent adversarii circa priora laudatæ epistolæ verba; aiunt nempe non le-

gendum esse indefinitè sicut retulimus: *Gallicani Episcopi*, etc., sed (*multi Gallicani Episcopi*, etc., unde concludunt dicta verba, non ad omnes indiscriminatim Gallicanos præsules esse referenda, sed ad eos duntaxat qui in privatis actis verbalibus, ut ipsi prætendunt, distinctionem juris et facti adhibuerant. Ita sæpè citatus præfationis apologet. auctor pag. 58 ubi candidè fatetur (quod sanè observandum) suppressâ semel voce, *multi*, cætera epistolæ verba de purâ et simplici subscriptione legitimè exponi posse; en verba: « Le retranchement « de ce mot, *multi*, brouillait tout, en donnant lieu de croire que ceux dont ces prélats « voulaient imiter la discipline, étaient en général les évêques de France (ou la plupart) « qui avaient fait signer purement et simplement le formulaire. »

Ad istud Jansenianorum effugium difficilis non est nec multum operosa responsio. Namque 1^o, tametsi vox, *multi*, extiterit in primâ epistolæ ideâ, eamque suis in editionibus non omiserint Jansenii discipuli, ea tamen, agente S. pontificis nuntio, postmodum expuncta est, nec extabat in authentico exemplari quod Romam transmissum est. Id certò compertum est tum ex ipsomet nuntio qui ita sæpenumerò declaravit testibus fide dignissimis; tum ex variis exemplaribus è nuntii registro fideliter transcriptis, in quibus dicta particula non extat; tale est in primis accuratissimum exemplar quod asservatur in bibliothecâ San-Sulpicianâ; tum ex alio MS. ibidem asservato, quod Romæ ex archivis sancti Officii fideliter exprimi curavit eminentiss. card. Jansonius, in eo pariter vox, *multi*, non habetur; denique auctor anonymus loco mox citato, post multa hinc et inde prolata, tandem non obscurè innuit vocem, *multi*, prætermisam fuisse in eo exemplari quod Romam transmissum est, siquidem eo teste ibidem pag. 57, autographas quatuor episcoporum litteras Romam non transmisit nuntius, quin et scalpello eas dilaceravit, propter insertam hanc vocem, *multi*, quam æquivocam et odiosam pontifici conjiciebat; quis ergo crediderit in exemplari quod ad S. pontificem eò direxit, ipsum fatalem hanc apposuisse vocem?

Gratis dato, quod falsum esse jam demonstravimus, vocabulum controversum extitisse in exemplari Romam misso, non propterea debuisse Clemens IX, verba citata restringere ad paucos episcopos, qui, ut contendunt Janseniani, cum limitatione expressâ in secretis

Verbalibus, huic S. pontifici ignotis, subscripserat, præsertim cum alia ejusdem epistolæ adjuncta verba nihil nisi sincerum in Sedis apotolicæ edicta obsequium viderentur spirare, et aliunde jam idem S. pontifex summæ fidei acceperat testimonia sinceræ et puræ quatuor episcoporum subscriptionis. Et sanè illustriss. Laudunensis episcopus è mediatori- bus unus, postea cardinalis Estreus, non obstante præfato vocabulo, laudatæ epistolæ textum intellexit, non de quibusdam episcopis Gallicanis qui cum distinctione et restrictione subscripserant, sed de aliis universim Galliæ præsulibus; sic enim loquitur in suâ ad S. pontificem epist. scriptâ die 22 septembris an. 1668: « Novâ necnon sincerâ subscriptione, « aliis episcopis consentiunt illustrissimi Alec- « tensis, Avamiensis, Andegavensis et Bello- « vacensis episcopi, à quibus in subscribendâ « fidei formulâ aliquatenus recesserant. Illud « in omnini ad Beatitudinem vestram epis- « tolâ... disertis verbis professi sunt. » Quid porro hic designant ista verba sine restrictione posita, aliis episcopis, nisi cæteros Galliæ epis- copos universim et indiscriminatim sumptos? ergo, judice eminentiss. Estreo, quatuor epis- copi in suâ ad S. pontificem epistolâ significa- verant se consensisse cæteris universim Galli- canis antistitibus; quomodo igitur non eadem ratione quatuor episcoporum mentem intel- lexisset S. pontifex, qui utramque epistolam, tum illorum episcoporum, tum card. Estrei, eodem fermè tempore acceperat?

3^o Dato iterum et non concesso, potuisse summum pontificem intelligere, quatuor epis- copos in suâ epistolâ respexisse ad epistolam novemdecim episcoporum, uti contendunt Jan- seniani, nihil adhuc ipsis proficeret; in eâ si- quidem novemdecim episcoporum epist. nil oc- currit quod prudenter non potuerit idem pon- tifex benigno ac minimè suspecto sensu inter- pretari, uti postea demonstrabimus.

Tertium argumentum depromitur ex publico quod quatuor episcopi dederunt suæ sinceræ subscriptionis testimonio. Scilicet cum illo- rum episcoporum subscriptionem nonnulli su- spectam reddidissent, petiit, expressitque ab iisdem pontifex, novam testificationem eorum autographo, signoque munitam, quâ fidem fa- cerent se sincerè prorsus et ad sensum in Con- « stitutionibus Innoc. X et Alex. VII expres- « sum, formulæ subscripsisse, utque eidem sub- « scriberetur curasse;» ita rem totidem verbis narrat card. Rospigliosi n. 149 suæ Relationis.

Ex hoc quatuor episcoporum testimonio, sinceram illorum subscriptionem certò com- probari existimavit Clemens IX; atqui, ut su- pra ostendimus, sinceræ subscriptionis nomine intelligebat S. ille pontifex puram ac simpli- cem subscriptionem; quam silicet hactenùs postulaverat decessorum suorum Constitutioni- bus inhærendo, quamque Janseniani hucusque pertinaciter recusaverant; ergo, etc. Elverò, nisi expressè præmonitus fuisset Clemens IX, quomodo inducere sibi potuisset in animum, sinceram vocari eam subscriptionem quæ facta fuisset cum limitatione et exceptione hujus præcisè sensûs, qui discertè exprimitur in for- mulario propter quem damnandum instructum fuerat formularium, quemque qui huic sub- scribit, sincero animo damnare ac rejicere, solemniter interposito juramento, publicè testa- tur? Numquid S. pontifex adeò sollicitus fuis- set et anxius de subscriptione sincerâ eo dun- taxat sensu quem fingunt adversarii? Nonne probè noverat Jansenianos omnes libentissimè formulam fidei subsignaturos, si modò Janse- nii sensus à censurâ eximeretur? Quin et ipsi- met Janseniani ad hæc usque tempora since- ram subscriptionem cum nudâ et simplici con- fundebant. Non aliâ quippè de causâ sinceram subscriptionem tam ardentè expetebant Ca- tholici, Janseniani verò tam pertinaciter recu- sabant, nisi quia utrique hanc eodem loco cum nudâ et simplici habebant. Hinc cum an. 1663, archiepiscopus Parisiensis Perfixius, necnon episcopi Convennarum et Laudunensis Janse- nianis declarationem proposuissent in quâ sin- cerum promittebatur obsequium erga defini- tionem Innoc. X et Alex. VII circa factum Jansenii, huic declarationi subscribere om- ninò recusarunt Jansenii discipuli, de quo consuli potest historia quinque Proposit. lib. 5, pag. 274 et seq.

Quartum argumentum nobis subministrat ipsa episcopi Catalaunensis declaratio, quæ die 4 decembris anni 1668 Romam missa fuit ad depellendas novas suspiciones adversus quatuor episcopos conceptas. In hac declara- tione testatur illustriss. præsul., 1^o quatuor episcopos *optimâ fide egisse*. 2^o Eos damnasse et à suis damnari curavisse quinque proposi- tiones *cum omni sinceritate, absque ullâ prorsus exceptione seu restrictione*. 3^o Demùm easdem damnasse *in eo omni sensu quo sunt ab Ecclesiâ damnatæ*; atqui damnatio quinque Propositio- num sincera, absque ullâ prorsus exceptione aut restrictione, et eo omni sensu quo ab Ec-

« *clesiâ proscriptæ sunt, haud dubiè includit Janseniani sensû damnationem, de quo potissimum movebatur controversia, quemque solemniter proscriptum fuisse toties declaraverat Sedes apostolica; ergo, etc.*

Quintum argumentum quo præcedens confirmatur, colligitur ex illustriss. Harlæi archiepiscopi Rothomagensis ad card. nepotem epist. in qua ex mox citatis declarationis verbis isto fermè ratiocinio demonstrat doctissimus præsul, quatuor episcopos damnare quinque Propositiones in sensu Jansenii : Duplex potest esse damnandi sensû Janseniani modus : nimirum vel explicitè, ipsis terminis sensum illum appellando; vel implicitè, aliis æquivalentibus verbis eum exprimendo : hunc autem posteriorem modum amplexi sunt quatuor episcopi. Enimverò, tacito Jansenii sensû nomine, quibusnam expressioribus et significantioribus verbis proscribi poterat idem ipse sensus, quàm absque ullâ exceptione et restrictione damnando quinque Propositiones in omni sensu in quo ab Ecclesiâ damnantur, cùm de Jansenii sensu unicè quæstio esset? Ita ferè illustriss. Harlæus, qui et ibidem plurimum laudat præfatam declarationem, asseritque se attonitum demirari Jansenii discipulos hucusque fuisse progressos; stupendum omninò id esse, ac instar miraculi habendum; manifestissimum est autem hæc omnia locum habere non posse, nisi supponatur Jansenianos eò fuisse adductos, ut Propositiones in proprio et naturali Jansenii sensu interiùs et ex animo damnarent; constans enim est apud omnes, ipsos hunc duntaxat assensum hætenùs denegasse, semperque obtulisse silentium obsequiosum pro facto dogmatico; ergo, etc.

Juvat hic doctissimi hujusce præsulis verba exscribere, prout referuntur ab auctore libri cui titulus : *Relation de la paix de Clément IX*, pag. 516 et seq. : « Je l'ai lue et relue plusieurs fois (la déclaration signée de M. l'évêque de Châlons et de M. Arnauld), et je vous avoue, monseigneur, qu'elle m'a donné non seulement de la joie, mais encore de l'étonnement et de l'admiration. En effet, jamais le parti des Jansénistes n'en était venu jusque-là, et je n'ai pu m'empêcher de dire à M. de Lionne, en présence de monseigneur le nonce.... *que c'est une espèce de miracle de les avoir menés aussi avant.... ce qui encore une fois me paraît une chose incompréhensible.... Et certes, puisque ces messieurs condamnent précisément sans*

« distinction ni restriction quelconque les cinq Propositions dans tous les sens que l'Eglise les a condamnées, il n'y a plus de matière de dispute sur le sens même de Jansénius, qui a fait toute la question de la controverse présente, puisqu'ils le comprennent sans le nommer dans la règle générale, où ils se soumettent de n'excepter aucun sens particulier de cette condamnation.

« Et en effet, on peut condamner le sens de Jansénius en deux façons, où en le disant en ces propres termes, ou le disant en des termes aussi forts et aussi équivalents. Or, où trouvera-t-on des termes plus forts et plus équivalents pour dire que l'on condamne le sens de Jansénius, en ne le disant pas en propres termes, que d'assurer que l'on condamne les cinq Propositions dans tous les sens que l'Eglise les a condamnées, sans exception ou restriction à aucun sens particulier? » Hactenùs illustriss. Harlæus; non poterat sanè luculentioribus verbis asserere, ex verbis declarationis clarò colligi quatuor episcopos reipsà damnasse quinque Propositiones in sensu Jansenii.

Hæc autem illustriss. archipræsulis epistola, ut testantur ipsimet Janseniani, unâ cum dictâ episcopi Catalaunensis declaratione Romam missa et discussa fuit; debuit igitur pro suâ prudentiâ et æquitate S. pontifex ex utriusque scripti collatione intelligere quatuor episcopos sensum Jansenii sincerè proscripsisse. Neque enim fidem denegare potuit illustriss. archiepiscopo, quem utpote à Jansenianâ factione maximè alienum, sine adulatione vel simulatione loqui pro certo comperto habebat, et reipsà testatur cardinalis Rospigliosi n. 163 suæ Relationis, summum pontificem Rothomagensis archiepiscopi testimonio tanquàm validissimo innixum, Breve tandem suum ad quatuor episcopos direxisse.

Ex his et aliis momentis in solutione objectionum attingendis, perspicuum est Clementem IX in præsentî negotio prudenter omninò se gessisse, nihilque de obsequio Constitutionibus apostolicis debito remisisse, quod disertè testatur Clemens XI Constitutione *Vineam Domini*, cujus verba antea laudavimus.

CONCLUSIO TERTIA. — Etsi daretur adversariis (quod tamen falsum esse jam demonstravimus) Clementem IX non ignorasse factam à quatuor episcopis juris à facto distinctionem, nihil tamen exinde colligi posset in gratiam silentii religiosi.

Probatum Conclusio triplici potissimum momento. Primum sic proponitur : Ubi agitur de solemnî judicio, de publicâ pace, de mutuo contractu, solis instrumentis publicis et authenticis conditionem judicii, pacis et contractûs enuntiantibus fides adhibenda est, quidquid sit de privatâ judicis, contrahentiumve sententiâ; nisi enim ita esset, nihil foret in civili societate ratum et fixum, omniaque judicia et fœdera nutarent atque funditus ruerent; atqui in omnibus publicis et authenticis quibus pax firmata est monumentis, speciatim verò in ipsomet ad quatuor episcopos Brevi, disertè testatus est Clemens IX, se non aliis conditionibus pacem et communionem ipsis restituisset, quàm quia solemniter significassent se juxta præscriptum Constitutionum apostolicarum Alex. VII et Innoc. X, *sincerè subscripsisse et subscribi fecisse formulario ejusdem Alex. VII*. Declarat ibidem S. pontifex, prædecessoris sui de purâ et simplici subscriptione legem firmam et inviolabilem tunc et in posterum remansuram : « Nam, inquit, prædecessorum nostrorum Constitutionibus firmissimè inhærentes, nullam circa illud exceptionem aut restrictionem admissuri unquàm fuimus, etc. » Porro adversus hæc apostolica Brevia nusquàm reclamârunt quatuor episcopi, nec ullatenus conquesti sunt verba quibus suum expresserant obsequium à S. pontifice perperam fuisse exposita et intellecta; ergo, quidquid sit tum de privatâ Clementis IX sententiâ, tum de privatâ quatuor episcoporum agendi ratione, eorumque occultis Verbalibus, nihil exinde inferri potest in gratiam religiosi, ut vocant, silentii.

Totum istud ratiocinium egregiè prosecuti sunt cardinales, archiep. et episcopi, in suâ ad regem epistolâ an. 1728, his verbis : « Le pape Clément IX, successeur d'Alex. VII, en rendant ses bontés paternelles aux quatre évêques, a maintenu cette foi dans toute sa force; les actes émanés de sa Sainteté le prouvent évidemment. » Recensitis ibidem quibusdam extractis ex Brevibus sive ad regem, sive ad episcopos pacis mediatores, sive ad ipsosmet quatuor episcopos, sic pergunt : « Les quatre évêques n'ont pas réclamé contre ces Brefs, et ils ne se sont jamais plaints du sens dans lequel le pape avait pris les expressions qu'ils avaient employées pour marquer leur soumission. » Et paulò post : « C'est des actes respectifs de ceux qui ont concouru à la paix; c'est de leurs lettres mutuelles qu'on

« doit apprendre les conditions de la réconciliation. Si les quatre prélats énoncèrent autre chose dans des procès-verbaux qu'ils déposèrent en leurs greffes et qu'ils tinrent secrets; si cette souscription que le pape, sur la parole de ces prélats, et sur leurs lettres, crut être sincère et sans restriction, est exprimée dans ces procès-verbaux avec des réserves dont ils ne parlèrent point au pape, et dont le pape déclarait qu'il ne se serait pas contenté; ces actes, si opposés à la bonne foi, ces actes, que leurs auteurs cachèrent eux-mêmes aussi long-temps qu'ils crurent avoir quelque orage à craindre, ne pourraient être nommés les conditions de la paix. Il n'y a de condition dans une paix, que ce qui se trouve consenti par les actes mutuellement communiqués de ceux qui la contractent. » Hæc præsules nostri quibus manifestè tradunt et probant prætensâ Clementis IX pace, nihil omninò detractum esse de inviolabili puræ ac simplicis subscriptionis lege; atque hujusce pacis conditiones, non aliunde quàm ex publicis actis quibus enuntiata est et firmata, esse repetendas.

Secundum sic se habet : Puræ ac simplicis subscriptionis lex ab Alex. VII solemniter lata, ab episcopis Gallicanis expressè, à cæteris verò tacitè acceptata fuerat, huicque regia accesserat auctoritas variis edictis, præsertim edicto anni 1665, 15 februarii; quod quidem edictum omnium quod in hanc rem ferri poterat expressius est et apertius, atque in supremi senatûs tabulas relatum fuit die 29 aprilis ejusdem anni 1665. Non ergo tam sanctam ac solemnem totius Ecclesiæ legem, nullâ promulgatâ Constitutione, veris conditionibus obvelatis, privatâ auctoritate, absque manifestæ ac multiplicis et quidem insignis prævaricationis notâ immutare, infringere ac violare potuit Clemens IX, idque si attentâset, quod asseverant Janseniani, temeritatis ac injustitiæ incusandus foret; et consequenter nihil exinde commodi causæ suæ accederet, nec excusanda esset quatuor episcoporum agendi ratio; aperta etenim superioris prævaricatio in probationem iniqui facti adduci nequit.

Et verò quo tandem fato fieri dicent adversarii, ut soli Clementi IX, nec solemnibus certè nec ubique promulgatis Constitutionibus, silentium religiosum, ut ipsi volunt, approbanti, major debeatur reverentia ac obedientia, quàm Innoc. X, Alex. VII, aliisque quotquot præter Clem. IX floruerunt pontificibus, qui va-

riis ac solemnibus Decretis et Constitutionibus ubique notis, ubique expressè aut tacitè acceptatis, idem silentium improbârunt ac confixerunt? Quæ, rogo, ista agendi ratio? Quàm varia, quàm incerta, quàm parùm sibi constans! An fortè errori obnoxia apostolica Sedes, quoties Jansenianis adversatur, infallibilis verò si iisdem favere videatur?

Hanc iterùm rationem indicant præsules loco mox citato, his verbis: « D'ailleurs, pour « restreindre la signature du formulaire, et « pour changer la loi prescrite par les Décrets « authentiques et solennels d'Innocent X et « d'Alexandre VII, il fallait des monuments « aussi authentiques, aussi solennels et revêtus « de la même autorité. Des actes secrets, des « titres qu'une des parties se fait à elle-même, « sans les communiquer à l'autre partie, des « restrictions que le pape exclut expressément « dans les monuments même de la réconciliation, peuvent-ils être regardés comme contenant les vraies conditions de la paix, « comme abolissant une loi commune, que « toute l'Église avait adoptée, une loi dont le « S.-Siège n'a jamais prétendu se départir? »

Tertium momentum colligitur ex solemnī Clementis XI bullā *Vineam Domini*; quam quidem bullam authenticum esse et irrefragabile totius Ecclesiæ iudicium certò constat, neque id diffidentur vel ipsimet Janseniani; hoc autem irrefragabile Ecclesiæ iudiciò silentium religiosum, necnon restrictam ac limitatam subscriptionem improbari ac damnari ex ipso contextu apertè liquet. Verùm de hoc argumento ex professo et datà operatà integro cap. 5 sequenti.

SOLVUNTUR OBJECTIONES. — Objicies 1^o adversus primam et secundam Conclus.: Non potuit ignorare Clemens IX, quod in solemnī ad ipsum datà epistolā publicè testati sunt quatuor episcopi; atqui, in suā ad Clement. IX epistolā, clarè et apertè declarant quatuor episcopi, se cum distinctione juris à facto subscripsisse; juri fidem, facto meram silentii reverentiam promississe; eos tamen nihilominus ad pacem admisit S. pontifex; ergo, etc. En verba: « Nemini, Beatissime Pater, ignotum « est duplicem in hac causā verti quæstionem; « alteram, utrum propositiones ipsæ earum- « que sensus ab Ecclesiā damnatus, verè hæ- « reticus sit; alteram, utrum prædictus sensus « reipsā apud Jansenium extet... nec minùs « certum, harum quæstionum tantùm alteram « ab alterā distare, quantum cælum à terrā,

« divina fides ab humanis experimentis, anti- « qua veritas à recentioribus factis. Atque « hinc consecrarium illud persequè omnes eli- « ciunt, nupera illa facta, nec divinitus reve- « lata, infallibili prorsus iudicio ab Ecclesiā « minimè definiri, adeoque ab iis qui bonā « fide in iis hærent, nihil præter silentium « exigi posse, etc. »

Respondeo: Dist. min.: Apertè declarant quatuor episcopi se, etc... in primā ad Clem. IX epistolā, concedo; in alterā ad eumd. pontificem epistolā, nego. Scilicet binæ hic sedulò distinguendæ sunt quatuor episcoporum ad Clement. IX litteræ; prior epistola scripta fuit die 28 augusti anni 1667; altera verò die 1 septembris anni sequentis 1668. In primā, ex quā desumuntur verba in objectione laudata, sufficientiam silentii religiosi, suaque Mandata antea, tum Romæ, tum etiam Parisiis sanctioris consilii decreto proscripta 20 julii anni 1665, comprobare conabantur. Hæc epistola plurimùm displicuit Clementi IX, qui prædecessoris sui vestigiis insistens, dictos quatuor episcopos in jus vocare decrevit, factā eam in rem episcopis delegatis amplissimā potestate; nec prius ab eo destitit proposito, quàm iidem episcopi novas ad eum et obsequii plenas direxerint litteras, in quibus, ut antea vidimus, cum summā animi demissione testabantur se mutatā priori agendi ratione, alios episcopos Gallicanos in subscribendo imitatos fuisse.

Atque hic obiter notanda anonymi auctoris libri cui titulus: *La paix de Clément IX*, fraus, qui in catalogo monumentorum ad Clementinam pacem spectantium, primam duntaxat quatuor episcoporum ad Clement. IX epistolam recenset, ut scilicet ita subindicet hanc pacis motivum ac fundamentum fuisse; cùm è contra ex antedictis constet ipsam plenum molestiarum ac periculi negotium illis episcopis creasse, quod nonnisi post novas eorundem episcoporum an. 1668 ad Clem. IX litteras compositum fuit.

Objicies 2^o: Novemdecim Gallicani episcopi in suā ad Clementem IX epistolā manifestè adoptant doctrinam in quatuor episcoporum Mandatis expressam, atque solum silentium religiosum circa factum sufficere asseverant; atqui tamen contra hanc novemdecim episcoporum doctrinam nihil pronuntiaverit S. pontifex; ergo falsum est quòd eandem sententiam à quatuor episcopis retractari voluerit, et eā duntaxat conditione eos ad pacem admisit.

Minor certa est; major autem constat ex his epistolæ verbis : « Quid in illis Mandatis (quatuor episcoporum) quod vel à catholice doctrinæ normâ, vel à romanæ Sedis reverentiâ tantillùm deflectat? Novum et inauditum apud nos nonnulli dogma protulerunt; Ecclesiæ nempe decretis, quibus quotidiana, nec revelata divinitus facta deciduntur, certam et infallibilem constare veritatem, adeoque ipsa non minùs quàm revelata in Scripturis et traditione dogmata, fide esse tenenda. Hoc verò dogma, Beatissime Pater, quod ab omnibus antiquis recentibusque theologis peræquè damnatum est, ex decessoris vestri Constitutionibus, iidem qui illud invexerunt, temerè stabilire nitebantur. Huic malo ut occurrerent prædicti episcopi, oppositam huic manifestissimo errori doctrinam communissimam simul ac certissimam, in Mandatis suis exposuerunt; humana nimis nec divinitus revelata facta non omnimodâ et infallibili certitudine ab Ecclesiâ definiri, adeoque in ejusmodi rebus nihil aliud ipsam à fidelibus exigere, quàm ut sua decreta reverenter, ut par est habeant. »

Addunt novemdecim presules, hanc doctrinam à cardinalibus Baronio, Bellarmino et Palavicino assertam et traditam fuisse; tum hæc subjungunt : « Ita sentire si criminis existimetur, non hoc proprium ipsorum, sed omnium nostrum, imò totius Ecclesiæ crimen fuerit. » Clara sunt hæc et aperta, ex quibus constat non potuisse ignorare Clementem IX, genuinam quatuor episcoporum doctrinam circa sufficientiam religiosi silentii : attamen eos ad pacem et communionem admisit; ergo, etc. Respondeo 1^o, dictam epistolam immeritò nobis opponi, 1^o quia tum Romæ, tum in Galliis improbata fuit; Romæ quidem, ad hanc enim nihil rescipit S. pontifex, atque ubi primùm eam accepit, nova direxit Brevia ad ordinandam et perficiendam quatuor episcoporum litem; pariter in Galliis promovente regio oratore D. Talon, supremi senatûs edicto 19 martii 1668, suppressa fuit simillima quam iidem novemdecim episcopi ad regem direxerant epistola.... 2^o Motivum et fundamentum pacis non fuit illa epistola, imò potius suasio novarum procellarum, uti constat ex mox dictis.... 3^o Non hic potissimùm inquiritur quid reverà verbis laudatis expresserint aut exprimere voluerint novemdecim episcopi; sed quid in iis expressum intellexerit S. pontifex; quidve se iis intellexisse publicè significaverit; porro,

quidquid sit de legitimo hujusce epistolæ sensu, certum est ipsum verba adducta non intellexisse de religiosi silentii sufficientiâ respectu damnati sensûs Janseniani, uti mox demonstrabimus; et etiamsi ita intellexisset, privatam suam mentem nusquàm authenticè declaravit; ergo.

Respondeo 2^o, novemdecim episcopos laudatâ epistolâ loqui de factis merè historicis et personalibus; facta et enim de quibus loquuntur, vocant *quotidianâ* ac *merè humana*; aiunt opinionem de infallibilitate Ecclesiæ in hujusmodi factis esse *novum et inauditum dogma*, ab omnibus antiquis recentibusque theologis peræquè damnatum; denique eandem sententiam veluti manifestissimum errorem exhibent, cui *universa contradicit Ecclesia*; atqui hæc omnia secundum naturalem et obvium sensum duntaxat referuntur ad facta merè historica et personalia, non autem ad facta propriè dogmatica; ergo, etc. Elverò, quis in animum inducere potuisset, novemdecim episcopos in supplici et obsequiosâ ad S. pontificem epistolâ ausos fuisse tam atris coloribus depingere opinionem infallibilitatis Ecclesiæ in factis dogmaticis, quam ignorare non poterant à plerisque episcopis Gallicanis, à cardinalibus et theologis Congregationum romanorum, ab ipso denique S. pontifice ejusque decessoribus Innoc. X et Alex. VII disertè fuisse propugnatam?

Respondeo 3^o, novemdecim episcopos quæstionem non movere de assensu debito factis dogmaticis ab Ecclesiâ definitis, sed de motivo illius assensûs; utrum scilicet fide divinâ debeat quisque intellectum hisce definitionibus subjicere. Patet autem hunc fuisse novemdecim episcoporum scopum, 1^o ex ipso epistolæ contextu; adeoque ipsa (facta) non minùs quàm revelata in Scripturis et traditione dogmata, fide esse tenenda. Quid clarius? loquuntur de factis perinde credendis ac revelata in Scripturis et traditione dogmata; atqui fides hujusmodi procul dubio divina est; ergo, etc.... 2^o Ex subjectâ materiâ. Scilicet manifestè hic respiciunt novemdecim episcopi ad theses paucas antea annis Parisiis publicè propugnatas die 12 decembris 1661, de dogmatico Jansenii facto fide divinâ credendo, adversus quam doctrinam veluti hæreticam, impiam, ac totius religionis eversivam statim insurrexerant Janseniani.... 3^o Idem variis in locis disertè testatus est D. de Mont-Gallard episcopus S. Pontii, solus ex illis novemdecim superstes hujusce seculi initio, cum quæstio denuò fuit agitata, qui proinde

solus potuit eorum mentem legitimumque epistolæ sensum explanare ; sic autem loquitur epistolâ scriptâ anno 1706 ad illustrissimum archiepiscopum Cameracensem quæ refertur tom. 5 Casûs conscientiæ , pag. 294 : « Les vingt-trois évêques crurent que des faits non révélés ne pouvaient pas appartenir à la foi, et qu'on n'était pas obligé de les croire avec la même certitude que les dogmes..... Ce fut là, monseigneur, notre unique vue. » Ibidem pag. 324 : « Les vingt-trois évêques n'avaient d'autre intention précise dans tout ce qu'ils ont fait et écrit là-dessus, que d'exclure la nécessité de la foi divine pour les décisions de l'Eglise sur les faits non révélés, qui étaient alors le système de M. de Marca. » Rursus pag. 348 : « M. de Péréfixe ayant déclaré, comme il avait fait dans son Mandement avant que nous écrivissions nos lettres au pape et au roi, qu'on ne devait avoir qu'une foi humaine et ecclésiastique sur le fait de Jansenius, nous n'avions garde de parler de sa doctrine ; aussi, loin que l'on puisse trouver un mot dans tout ce que nous avons écrit, qui la combatte, les quatre évêques déclarèrent dans leur lettre au pape, qu'on la soutenait par de bonnes raisons. » Ex iis clarè liquet id unum intendisse novemdecim episcopos, nempe ut eam exploderent doctrinam quæ divinam pro factis perindè ac pro jure fidem exigeret.

Respondeo 4^o, quidquid sit de genuino ac legitimo hujusce epistolæ sensu, summum pontificem spectatâ præcedenti novemdecim episcoporum loquendi et agendi ratione, non debuisse judicare ipsos internam circa factum Jansenii adhæSIONem impugnare voluisse. Namque 1^o, illustriss. de Gondrin archiepiscopus Senonensis qui novemdecim episcoporum agmen ducebat, egregia dederat anno 1656, ut antea vidimus, interni ac sinceri obsequii circa definitionem facti testimonia ; quin et anno 1661, sua faciens ipsissima formularii cleri Gallicani verba in Mandato die 18 junii dato declaraverat : « que les cinq Propositions sont hérétiques et condamnées dans le sens de Jansenius, et que ce sens n'est pas celui de S. Augustin. » Hæc autem publica sinceri obsequii testimonia nota profectò et explorata erant S. pontifici ; hincque haud ægrè consensit ipsum unum esse ex pacis mediatoribus..... 2^o Plerique omnes è novemdecim episcopis adfuerant ac subscripserant comitiis cleri Gallicani, in quibus definitum est quinque Propositiones esse damnatas

in sensu Jansenii, et à quocumque in eo sensu esse damnandas ; formulam iis in comitiis institutam promulgaverant, ipsiusque puram ac simplicem subscriptionem Mandatis publicis imperaverant..... 3^o Nullus eorum in novis pro subscriptione formularii Alex. VII Mandatis in lucem editis . restrictionis vel distinctiois usum approbaverat ; porro, vel ipsis latentibus Jansenianis, præsertim in lib. cui titulus : *De la signature du Formulaire*, subscriptio simpliciter exhibita et imperata, secum trahit obligationem ad internum assensum circa factum in formulario contentum ; ergo, etc.

Cùm ergo in suâ epistolâ disertè testantur novemdecim episcopi, se in eadem sententiâ versari quam quatuor episcopi in suis publicis Mandatis docuerant, spectatâ priori agendi et loquendi ratione, cui etiamnum se firmiter inhærere significabant dicti novemdecim episcopi ; prudenter existimare debuit S. pontifex, aut ipsos non probè assecutos fuisse mentem quatuor episcoporum, aut benignâ et benevolâ interpretatione ipsorum Mandata ad rectum sensum adducere conatos fuisse, ea explicando vel de factis merè personalibus, vel de factis dogmaticis fide divinâ credendis ; quam divinam fidem viginti tres episcopos duntaxat excludere voluisse, testatur multoties episcopus S. Pontii locis antea laudatis.

Objicies 5^o : Motivum ac fundamentum pacis quatuor episcopis concessæ, fuit episcopi Catalaunensis declaratio die 4 decembris anni 1668 ; porro, declaratio illa contracta est et accurata expositio doctrinæ in actis verbalibus quatuor episcoporum contentæ. Tres sunt veluti partes hujusce declarationis ; in priori, exprimitur sincerum obsequium quod quatuor episcopi definitioni juris exhibuerunt ; in alterâ, clarè ac dilucidè exponitur eorum doctrina circa sufficientiam religiosi silentii ; in tertiâ tandem, ex perfectâ doctrinæ verbalium notitiâ testatur illustriss. Catalaunensis episcopus, expressam in verbalibus doctrinam omninò conformem esse, tum præsentis declarationis, tum novemdecim episcoporum doctrinæ ; non potuit ergo Clemens IX, post acceptam hanc declarationem, ignorare veram quatuor episcoporum mentem in eorum actis verbalibus expressam.

Hæc sunt propria declarationis verba : « Ils ont condamné et fait condamner les cinq Propositions avec toute sorte de sincérité, sans exception ni restriction quelconque, dans tous les sens que l'Eglise les a condamnées.... et quant à l'attribution de ces propo-

« sitions au livre de Jansenius, évêque d'Ypres,
 « ils ont encore (les quatre évêques) rendu,
 « et fait rendre au S.-Siège toute la déférence
 « et l'obéissance qui lui est due, comme tous
 « les théologiens conviennent qu'il la faut ren-
 « dre au regard des livres condamnés, selon la
 « doctrine catholique soutenue dans tous les
 « siècles par tous les docteurs, et même en ces
 « derniers temps par les plus grands défenseurs
 « de l'autorité du S.-Siège, tels qu'ont été les
 « cardinaux Baronius, Bellarmin, Richelieu,
 « Pallavicin, et les Pères Petau et Sirmond, et
 « même conformément à l'esprit des Bulles
 « apostoliques, qui est de ne dire, ni écrire,
 « ni enseigner rien de contraire à ce qui a été
 « décidé par les papes sur ce sujet. » Denique
 « sit concludit dictus Catalaunensis præsul :
 « Nous déclarons et certifions, qu'ayant eu
 « communication et connaissance particulière
 « des sentiments des quatre évêques, et de ce
 « qui est contenu dans leurs procès-verbaux,
 « la doctrine qui est contenue dans cet écrit
 « est entièrement conforme à celle desdits pro-
 « cès-verbaux, et qu'ils ne contiennent rien de
 « contraire à cette doctrine. C'est aussi ma
 « croyance et celle des dix-neuf évêques qui
 « ont écrit à sa Sainteté. » Hanc autem decla-
 « rationem per tres hebdomades in congregatio-
 « ne speciali à S. pontifice eum in finem indic-
 « tâ, maturè expensam fuisse, observant anony-
 « mi sæpius citati; ita requirente Andegavensium
 « episcopo, disertè testatus est Catalaunensis epis-
 « copus anno 1674, die 15 decembris; ergo, etc.

Respondeo 1^o, eodem prorsus modò expo-
 « nendam esse declarationem episcopi Catalau-
 « nensis et novemdecim episcoporum epistolam;
 « ita ultrò fatentur Janseniani, idque ex poste-
 « rioribus declarationis verbis modò adductis
 « apertè colligitur; atqui novemdecim episcopo-
 « rum ad S. pontificem epistola de factis merè
 « personalibus intelligenda est, aut de factis dog-
 « maticis fide divinâ credendis, uti mox demons-
 « travimus; ergo, etc.

Respondeo 2^o, non hic quæstionem esse de
 « proprio ac naturali laudatæ declarationis sensu;
 « sed quæritur quomodò eam intellexerit aut in-
 « telligere debuerit S. pontifex, præcipuè quoad
 « secundam partem, quæ est de attributione
 « quinque propositionum libri Jansenii; porro
 « contendimus S. pontificem dicta verba intelli-
 « gere debuisse de attributione quinque Propo-
 « sitionum libri Jansenii, non quidem quoad
 « sensum, quasi existimaverit quatuor episcopos
 « noluisse pro hæreticis agnoscere quinque Pro-

positiones in sensu Jansenii; sed duntaxat de
 « attributione quoad verba grammaticalia omninò
 « eadem vel synonyma, vel quoad internum Jan-
 « senii sensum, etc., uti exponit card. Rospig-
 « gliosus; ita autem sensisse Clementem IX va-
 « ria demonstrant.

1^o Id colligitur ex primâ parte declarationis,
 « in quâ expressè habetur quatuor episcopos
 « damnasse quinque Propositiones *cum omni sin-
 « ceritate, absque ullâ exceptione aut restrictione,
 « in omnibus sensibus in quibus ab Ecclesiâ dam-
 « nantur*; atqui in solo sensu Jansenii eas dam-
 « naverat Ecclesia, de illo solo quæstio moveba-
 « tur; ergo, nisi aliquid fraudis artificie in
 « quatuor episcopis et tribus pacis mediatoribus
 « suspicatus fuisset Clemens IX, non potuit quin
 « posteriora declarationis verba benigno sensu
 « interpretaretur de merâ attributione quoad
 « verba, vel quoad internum animi sensum. Et
 « verò, quo jure adversarii primam declaratio-
 « nis partem ex secundâ exponere conantur; ita
 « et nos, et quidem meliori jure, secundam ex
 « primâ exponimus, uti ampliùs constabit ex
 « dicendis.

2^o Idem eruitur ex Relatione card. Rospig-
 « gliosi n. 161, ubi sic loquitur: « curæ erat in
 « summâ pontifici ritè cognoscere, quid tan-
 « dem continerent declarationes illæ actis ver-
 « balibus additæ. Si enim nihil ibi affirmatum
 « fuisset præter quàm posse pontificem falli in
 « quæstionibus de facto, prout supra n. 153,
 « explicavimus (id est, de facto merè personali,
 « vel grammaticali, ut postea ostendemus),
 « prudenti rem dissimulatione suppressendam
 « existimabat; sin verò asseruissent episcopi
 « nolle se pro hæreticis agnoscere quinque
 « Propositiones in sensu Jansenii, quemadmo-
 « dum ab apostolicâ Sede fuerant damnatæ;
 « id sanè nullatenùs ferre, neque in re tanti
 « momenti quidquam connivere, quinimò
 « acerrimè obviàm ire statuerat. » Teste igitur
 « cardinale Rospigliosi, nusquàm quatuor epis-
 « copos ad pacem admisisset Clemens IX, si in-
 « tellexisset eos nolle pro hæreticis habere quin-
 « que Propositiones in sensu Jansenii; cùm igitur
 « ad pacem eos admisisset; necessariò dicen-
 « dum est eum ex declaratione non intellexisse,
 « quatuor episcopos noluisse pro hæreticis agnos-
 « cere quinque Propositiones in sensu Jansenii.

3^o Romæ nomine facti nihil aliud intelligeba-
 « tur quàm factum personale. Clarissimè id const-
 « tat ex numeris 155, 154, 155, etc., citatæ
 « Relationis card. Rospigliosi: « Tres omninò
 « quæstiones, inquit, de Jansenii in quinque

« Propositionibus sensu incidere poterant.
 « Prima, quænam illius occulta mens et cogi-
 « tatio fuisset, quibusque signatè verbis quin-
 « que Propositiones ille expressisset. . . . hæc
 « quæstio intra facti limites se tenet; quam
 « doctiores propterea negant definitionibus fi-
 « dei divinæ subjectam. . . . Secunda quæstio
 « esse posset, quid tandem ex nativâ suâ vi et
 « proprietate significant verba Jansenii in suo
 « *Augustino*? quæ. . . . continet controversiam
 « non merè de facto, at de jure. » Addit
 n. 57 et 58, tertiam institui posse, utrùm
 nempe doctrina Jansenii sit hæretica vel ca-
 tholica; hancque etiam quæstionem ad jus non
 ad factum evidentissimè referri, ibidem ob-
 servat.

Ex hæc quæstionum distinctione et exposi-
 tionem manifestum est Romæ tunc temporis no-
 mine facti intellectum fuisse factum personale,
 prout exponitur in primâ quæstione; factum
 verò doctrinale, in quo agitur de sensu textûs
 dogmatici, ipsiusque orthodoxiâ aut hæretici-
 tate, ad jus revocatum fuisse; non mirum ita-
 que si Clemens IX, juxta morem tunc Romæ
 receptum, episcopi Catalaunensis declaratio-
 nem interpretatus fuerit de factis merè perso-
 nalibus, non verò de factis dogmaticis quæ ad
 jus à Romanis revocabantur.

Adeò certum est distinctionem juris à facto
 fuisse intellectam de facto personali aut gram-
 maticali, ut Pater Liberius de Jesu, carmelita
 Discalceatus Romæ theologiæ professor in col-
 legio de *Fide propugnandâ* studiorum modera-
 tor, à Quesnell. laudatus epistolâ episcopi ad
 episcopum, notionem hanc tanquàm indubiam
 obtrudat tom. 1 operis cui titulus: *Controversiæ
 dogmaticæ adversus hæreses*. Eo in libro Protes-
 tanti Jansenianorum reluctance obijcitur,
 sic respondet: « Theologi qui Jansenistæ dicun-
 « tur, cum omni humilitate subijciunt se R.
 « pontifici in damnatione quinque Propositio-
 « num, prout sonant, et secundum quæstio-
 « nem juris, sed audiri postulant in quæstione
 « facti; an videlicet illa reperiantur in libro
 « Jansenii de verbo ad verbum, et an in eo
 « sensu intellexerit Jansenius: porro, in quæ-
 « stione facti apostolica Sedes non admittitur
 « infallibilis iudex. » Ita hic theologus apud
 Quesnell., ubi attributio quinque Propositioni-
 num libro Jansenii quoad verba omninò eadem,
 aut quoad intentionem personalem, quæstio
 facti nuncupatur.

4º Non alia fuit celeberrimorum cleri Galli-
 cani comitiorum in causâ Jansenii, facti notio;

attributio quinque Propositionum quoad sen-
 sum et doctrinam in iis expressam libro Janse-
 nii, ab iis comitiis non ut mera facti, sed ut
 vera juris quæstio constanter habita est.

In comitiis anni 1634, sic loquuntur præsu-
 les nostri in suâ ad Innocent. X epist. 28 mar-
 tii: « E veteri fidei deposito, cujus custodia
 « cathedræ Petri à Christo concedita est, par-
 « tem adimere tentant. . . . quinque etenim
 « Propositiones decretò illo proscriptas, dam-
 « nare se quoque profitentur, sed alio planè
 « sensu quàm qui à Jansenio traditus et expli-
 « catus est. » In Comitibus anni 1656, in epist.
 ad Alex. VII, de Jansenianis quinque Propo-
 sitiones Jansenii libro abjudicantibus, sic ite-
 rum loquuntur præsules Gallicani: « Ad facti
 « quæstionem controversiam deducere nitun-
 « tur, quas ingeniorum versutias verâ pruden-
 « tique verborum complexione infregit Breve
 « apostolicum; quod tricus illis syllabarum ad
 « umbrabiles scholarum disputationes relegatis,
 « decisionisque auctoritate ad juris quæstionem
 « restrictâ, doctrinam Jansenii, quam opere
 « suo explicuit, in propositionum confixarum
 « materiâ, pontificiâ Constitutione damnatam
 « fuisse declarat. » Audis tricas syllabarum
 quæstionem facti appellari, juris verò quæstio-
 nem restringi ad damnationem doctrinæ quam
 Jansenius in opere suo explicuit. Eandem om-
 ninò juris et facti notionem tradunt comitia an-
 1660, 1661, 1663, etc.

Hinc celeberrima Jansenismi Relatio jussu
 comitiorum anni 1656 edita, ab his et sequen-
 tibus comitiis solemniter approbata, de Con-
 stitutione Innocentii X loquens, sic habet:
 « Les termes (de cette Constitution) sont con-
 « çus en telle sorte, qu'ils font voir que la
 « force des décisions tombe sur la question de
 « droit, c'est-à-dire, sur la condamnation des
 « opinions que cet auteur enseigne dans son
 « livre intitulé *Augustinus*, sur la matière con-
 « tenue dans les cinq Propositions, » etc. Cum
 ergo hæc esset tum Romæ, tum in Galliis facti
 et juris notio, non mirum si R. pontifex de-
 clarationem exposuit de attributione quinque
 Propositionum, non quidem quoad sensum et
 doctrinam, sed quoad verba duntaxat aut in-
 tentionem personalem.

5º Reipsâ Janseniani, ut mox ex Gallicanis
 præsulibus audivimus, ad tricas syllabarum
 controversiam deducere conabantur, hoc est,
 an verba, aut eadem omninò, aut planè syno-
 nima extarent apud Jansenium; hinc Pascalius
 epist. 17, ait *questionem hanc solis oculis dirimi*

posse, eos solos iudices esse debere, atque ipsos convincendos esse, ostendendo in libro Jansenii verba quæ in eo extare dicuntur; quin et ipse jam citatus Præfationis apologetice auctor pag. 86 et 87, contendit, juxta definitionem summorum pontificum quinque Propositiones dicendas esse extare in libro Jansenii quoad ipsa verba, et secundum eandem grammaticalem significationem. Sic ille ratiocinatur: « Le formulaire d'Alexandre VII dit positivement « 1^o, que les cinq Propositions condamnées « par Innocent X sont extraites du livre; c'est « le sujet de la première décision; et 2^o, que « ces propositions extraites sont condamnées « dans le sens de l'auteur; ce qui fait la matière de la seconde décision; or, il est évident que la première est inutile, si ce pape « n'a pas voulu dire que les propositions ne « sont pas grammaticalement dans le livre; la « seconde suffisait, s'il a seulement voulu marquer que le sens des propositions y est, et « que c'est celui qui est condamné par Innocent X. Le pape a donc voulu dire l'un et « l'autre. » Et paulò post: « Que l'on tourne « et retourne tant que l'on voudra ces paroles, « on ne pourra jamais empêcher qu'elles ne signifient que les cinq Propositions sont en « propres termes dans Jansénius, d'où l'on dit « qu'elles ont été extraites, qu'elles ont le « même sens dans les cinq Propositions et dans « le livre, et que les paroles qui sont les mêmes, « ont et présentent aussi le même sens. C'est « tout cela qui a été défini par Alexandre VII. » Prudenter ergo existimare potuit Clemens IX, quatuor episcopos locutos fuisse de hujusmodi attributione quoad verba, vel eadem, vel synonyma.

Jam verò attributio propositionum quoad verba omninò eadem, vel synonyma seu grammaticaliter æquipollentia, plurimùm differt ab attributione quantum ad sensum duntaxat, quam solam definivit Ecclesia. Ad priorem requireretur ut verba ipsa propositionum, aut alia planè idem significantia in libro Jansenii continerentur; eo modo quo ista propositio: *Interior gratiæ Christi nunquam resistitur*, in hâc propositione continetur: *Interior Christi gratia suo nusquàm frustratur effectu*; ad posteriorem verò attributionem sufficit quòd ex variis libri principiis ac propositionibus idem dogma eliciatur; sicuti dicta propositio: *Interior gratiæ Christi nunquam resistitur*, colligitur ex his Jansenii principiis: *Nulla est propter dicta Christi gratia, nisi delectatio cœlestis*;

modus agendi delectationis relativus est, seu per gradus; delectatio superior necessariò vincit inferiorem. Respectu prioris attributionis, circa quam nihil pronuntiavit Ecclesia, religiosum duntaxat silentium à quatuor episcopis exhiberi consensit S. pontifex; nusquàm verò respectu posterioris.

6^o In hâc benignâ doctrinæ quatuor episcoporum expositione firmabatur Clemens IX, tum ex posteriori agendi et loquendi ratione horumce quatuor episcoporum de quo diximus inter probationes... tum ex ultimis citatæ declarationis verbis, in quibus episcopus Catalaunensis cujus fides suspecta non erat S. pontifici, quique purè ac simpliciter subscripserat formulario cleri Gallicani, disertè asserit se idem sentire cum quatuor episcopis... tum maximè ex epistolâ illustriss. Harlæi, quâ potissimùm motus fuit ad pacem concedendam, teste card. Rospigliosi in Relatione.

Et verò declaratio simul cum epistolâ illustriss. Harlæi præponderabant in mente R. pontificis rumoribus divulgatis, juxta ipsummet fragmentum Relationis à Quesnellio laudatum; sed rumores divulgati non erant nisi de factâ distinctione juris à facto dogmatico; ergo videbantur R. pontifici declaratio et epistola exsufflare hos rumores.

Robur istius argumenti sensit D. du Vaucel, unde Quesnellio suadebat ut supprimeret articulum istum Relationis cardinalis nepotis quam laudaverat; verùm præterquam quòd jam res infecta esse non poterat, extabat aliunde Breve ad quatuor episcopos idem significans, alioquin nec probare potuissent Clementem IX vidisse hanc declarationem.

7^o Denique, quod ritè observandum, in secundâ declarationis parte, de quâ hic quæstio, mentio non fit de attributione quinque hæresum, nec sensus quinque Propositionum, nec etiam facti in formulario expressi, quemadmodum in verbalibus quatuor episcoporum actis legebatur, sed purè ac simpliciter de attributione quinque Propositionum libro Jansenii; porrò hæc loquendi ratio suapte naturâ congruentius significare videtur, propositiones quoad ipsissima verba, aut saltem æquivalentia ac synonyma, eo in libro reperi.

Ex his omnibus manifestè patet, debuisse aut saltem prudenter potuisse S. pontificem secundam declarationis partem, de facto merè personali interpretari; idque sive habeatur ratio contextûs ipsiusmet declarationis; sive recepta tunc temporis Romæ et Parisiis facti

notio, sive demum extrinseca spectentur card. Rospigliosi, illustriss. Harleii, aliorumque testimonio.

Respondeo 5^o, hic recurrere supra adductas solutiones. 1^o Clemens IX, pacem concedendo quatuor episcopis, puram ac simplicem subscriptionem ab ipsis exhibitam fuisse, in authenticis pacis instrumentis clarè significat; nec alià ratione pacem fuisse concessurum ibidem declarat; utrumque apprimè noverunt quatuor episcopi, nec tamen ullatenus reclamârunt; ergo, etc... 2^o Hypothesis adversariorum ipsis omninò inutilis, Clementi autem IX meritissimo pontifici plurimum injuriosa; tum quia splendidi mendacii reus constitueretur: publicè enim et in facie Ecclesiæ, idque in re gravissimi momenti, testatus fuisset, cujus scriptarum pro certo tenebat; tum quia totius Ecclesiæ legem, cujus executionem urgere debuisset, infringere attentasset... 3^o Quidquid sit, Clemens XI. applaudente universali Ecclesiâ, religiosi silentii sufficientiam, solemnî Decreto *Vineam Domini*, etc. an. 1705, confixit. Verùm de his consule quæ supra dicta sunt conclus. tertiâ.

His addunt nonnulli cum illustriss. S. Pontii episcopo antea citato, quatuor episcopos secundâ declarationis parte merum eatenus silentium obtulisse, quòd nollent facta etiam dogmatica in articulos fidei ab Ecclesiâ erigi posse; non autem quòd Jansenii factum inficiarentur, ipsique quaecumque, etiam ecclesiasticam fidem denegandam esse contenderent; vide quæ diximus responsione tertiâ ad secundam objectionem.

Instabis 1^o: Publica quatuor episcoporum Mandata, aliaque plurima Jansenianorum scripta Romæ expensa ac damnata, distinctè quæstionem facti exprimebant, eamque restringebant ad attributionem hæretici sensûs Jansenii libri; nec id potuit ignorare S. pontifex; non debuit ergo nec prudenter potuit secundam declarationis partem de facto merè personali interpretari.

Respondeo negando conseq. Namque 1^o, plerumque etiam nomine facti, Janseniani factum merè personale intellexerant, ut supra ostendimus; quin et eo sensu in præsentî controversiâ accipi, disertè testati fuerant præsules Gallicani tum epist. ad Alex. VII, anno 1656, tum in suâ Relatione antea laudatâ. 2^o Gravissima momenta superiùs adducta summo pontifici persuadebant, quidquid antea dixissent, quatuor episcopi, tandem eò adductos

fuisse, ut factum Jansenii circâ quod silentium religiosum sufficere contendebant, restringerent ad factum merè personale.

Instabis 2^o: Censura librorum haud dubiè revocatur ad factum doctrinale; atqui in dictâ declaratione debitum Ecclesiæ circa libros pronuntianti obsequium, ad merum silentium restringitur, ut scilicet nihil scribatur, doceaturve adversum; hancque esse cardinalium Bellarmini, Baronii, Richelii et Palavicini ibidem assertitur, quos quidem cardinales circa facta dogmatica unicè silentium exigere, duodecim ab hinc annis perpetuò clamitabant Janseniani; ergo, etc. — Respondeo 1^o, recurrere mox adductas solutiones; 2^o censura librorum ut plurimum fit cum appellatione auctorum, vel cum attributione quarundam propositionum libris damnatis, adeoque factum personale includit: ergo nihil obstat quominus hæc declarationis verba, de factis personalibus intelligeret Clemens IX.

Quod additur ex cardinalibus Bellarmino, Baronio, etc., magis nocet adversariis quàm ipsis faveat; tum quia de solis personalibus factis locutos fuisse, alibi demonstrabimus; tum quia, quod in præsentiarum sufficit, teste card. Rospigliosi citatæ Relationis n. 155, certum est Romæ horumce cardinalium doctrinam de hujusmodi factis expositam fuisse.

Instabis 3^o: Si acta verbalia quatuor episcoporum vidisset Clemens IX, hosque nihilominus episcopos ad pacem admisisset, procul dubio eo ipso religiosum silentium approbâsse censendus fuisset; atqui, in declaratione silentium illud non minùs disertè exprimitur quàm in verbalibus; ergo, etc. — Respondeo negando min.; plurima enim sunt verbalia inter et declarationem discrimina, quæ benignam de factis personalibus interpretationem à verbalibus penitus excluderent. 1^o In his postquàm quatuor episcopi declarârunt quinque Propositiones damnandas esse in eo omni sensu quem Ecclesia proscripsit, mox excipiunt sensum illum quem vocant *doctrinam SS. Augustini et Thomæ de gratiâ ex sese efficaci*; atqui notum erat sensum illum in stylo Jansenianorum, ipsummet esse Jansenii sensum de gratiâ relativè per gradus necessariò victrici; ergo, etc... 2^o In iisdem verbalibus factum ad quod refertur silentium religiosum, non vocatur simpliciter factum, vel attributio propositionum libro Jansenii, sed nuncupatur, *factum in formulario*; porrò factum quod in formulario expressit et ab omnibus subsignari voluit Clemens IX, non

est factum personale, sed dogmaticum ; nempe attributio hæretici sensûs quinque Propositionum libro Jansenii... 3^o In verbali episcopi Alecensis id expressè legitur, quo uno integrum silentii religiosi systema stat, nempe, *neminem vi solius auctoritatis judiciorum Ecclesiæ teneri ad assensum circa facta quæ respiciunt sensum auctorum aut eorum librorum* ; at nihil tale habetur in declaratione ; ergo, etc.

Præterea, si Verbalia vidisset Clemens IX, ex iis intellexisset novam quatuor episcoporum subscriptionem non fuisse puram et simplicem, sed relativam ad distinctionem in actis verbalibus expressam ; proindeque restrictam ac limitatam ; in his etenim primùm legebatur dicta juris à facto distinctio ; postea exseribebatur formularium ; demùm subjiciebantur subscriptiones ; ast ex solâ declaratione rem ita habere non potuit dignoscere S. pontifex.

Potuit ergò Clemens IX arbitrari quatuor episcopos primò subscriptionem puram et simplicem exhibuisse ; postea verò mentem suam in actis verbalibus fusiùs declarasse ; et reipsâ rem ita gestam fuisse narrabant epistolæ tunc temporis Româ scriptæ, uti refertur pag. 81 Apologet. Præfationis jam citatæ ; hic autem posterior subscriptionis modus S. pontificem multò magis ad pacem inducere debuit, quàm prior in actis verbalibus renovatus, quemque idecirco quatuor episcopi omni curâ occultârunt.

Objicies 4^o : Illustrissimus Harlæus Rothomagensis, postea Parisiensis archiepiscopus, in suâ ad card. Rospigliosi epistolâ superiùs citatâ, clarissimè exponit ac approbat quatuor episcoporum doctrinam in eorum verbalibus expressam. Asserit 1^o, quatuor episcopos purè ac simpliciter non subscripsisse. 2^o Ecclesiam non esse infallibilem in damnatione librorum ; cùm sæpiùs diversis temporibus proscripti fuerint, postmodum verò approbati. 3^o Ecclesiam non posse hâc in parte aliud obsequium exigere, quàm quod exhibuerant quatuor episcopi, unicùm nempe religiosum silentium ; manifestissimè itaque cognovit card. Rospigliosi et per eum Clemens IX, genuinam ac legitimam dictorum episcoporum doctrinam.

En epistolæ verba : « A moins de signer le formulaire purement et simplement et en aveugle, il ne se peut rien ajouter à la soumission qui est rendue par là au S. Siège (par les quatre évêques). » Et paulò post : « Hors de souscrire purement et simplement le formulaire d'Alex. VII, comme nous avons

« toujours fait ; pour peu que l'on vienne à expliquer ce que l'on entend par cette signature qui est ordonnée, je ne vois pas que dans les maximes de la plus sévère théologie l'on puisse exiger plus de croyance ni plus de soumission d'un évêque ou d'un autre docteur catholique.

« D'autant plus que selon la pensée des plus habiles théologiens de l'Eglise, et des plus illustres défenseurs du S.-Siège, tels qu'ont été les cardinaux Baronius, Bellarmin, du Perron, Richelieu et... les Pères Petau et Sirmond, l'Eglise n'a jamais cru que ses jugements soient infallibles sur la condamnation des livres, qui souvent ont été anathématisés dans un siècle où ils faisaient du bruit, et justifiés dans d'autres où ils étaient étouffés ; ergo etc.

Respondeo, mirum profectò quòd Janseniani hanc epistolam in medium producere ausi fuerint, quæ ipsis apertè adversatur, ut constat ex ante dictis inter probationes ; quæ autem è dictâ epistolâ opponuntur, de factis personalibus, aut etiam dogmaticis fide divinâ credendis, exponenda sunt ; neque illa, quod capitale est, pro suâ æquitate ac prudentiâ aliter interpretari potuit Clemens IX. Namque 1^o, ex professo ibidem docet et probat illustrissimus archipræsul, stando verbis declarationis dubitari non posse quin quatuor episcopi sincerè damnaverint sensum Jansenii ; atqui sincerè damnare Jansenii sensum, haud dubiè est interiùs adhærere definitioni circa dogmaticum Jansenii factum ; ergo, etc... 2^o Miratur Harlæus hucusque progressos fuisse Jansenianos, stupendum id vocat, atque instar miraculi ; existimabat ergo eò tandem adductos fuisse, ut dogmatico Jansenii facto verum et internum exhibuissent assensum ; si enim de uno duntaxat religioso silentio agatur, nec admirationi, nec jactitando miraculo locus fuisset ; ut enim observat Quesnell. libro cui titulus : *Relation de la paix de Clém. IX*, tom. 2, pag. 518, *ce miracle n'étoit pas nouveau, et on avoit cent fois offert cette même déclaration, ou d'autres équivalentes....* 3^o Probè noverat Clemens IX, illustrissimum Harlæum semper fuisse à Jansenianorum placitis maximè alienum ; noverat ipsum interfuisse et simpliciter subscripsisse comitiis 1660, 1661, etc., in quibus pluries statutum fuerat unumquemque teneri ex animo damnare in sensu Jansenii, etc. ; ergo.

Cum ergo asserit illustriss. Harlæus, quatuor episcopos non subscripsisse purè et simpliciter,

ita loquitur per exclusionem cujuscumque explicationis aut exceptionis circa facta, non quidem dogmatica, sed personalia duntaxat, circa quæ unicè cadere expositiones quatuor episcoporum existimabat illustriss. archipræsul; similiter cùm addit, Ecclesiam non esse infallibilem in censurâ librorum, ac proinde non posse hæc in parte aliud obsequium exigere præter silentium; id intelligendum de damnatione librorum in ordine ad internam auctorum mentem, aliasque merè historicas et personales librorum vel auctorum quæstiones. Verùm de his alibi fusiùs.

Objicies 5^o : Archiepiscopus Parisiensis Harduinus de Péréfixe, moniales Portûs Regii ad participationem Sacramentorum admisit mense februario anni 1669, factâ subscriptione juxta declarationem episcopi Catalaunensis; porrò jam ab anno 1665, à Sacramentis illas excluserat idem archipræsul, ob detrectatam puram et simplicem Alex. VII formulario subscriptionem; ergo, etc. Respondeo 1^o, quid, quæso, hæc ad mentem Clementis IX? quid hæc ad pacem jam factam et ratam? 2^o In ipso restitutionis Mandato revocat illustriss. archipræsul quæ supra expendimus Clementis IX verba : *Dictorum Innoc. X et Alex. VII Constitutionibus firmissimè inhærentes, nullam exceptionem aut restrictionem admissuri unquam fuisset*; existimavit ergo silentium quod promittebatur, non in dogmaticum factum ab Alex. VII expressè definitum, sed in personalem Jansenii sensum unicè cadere.

Eadem responsio adhibenda simili restitutioni D. Dorat doctoris Parisiensis peractæ mense februario ejusdem anni; necnon subscriptioni quam anno 1675 exhibuit D. Vibet, quamque præsentè et urgente archiepiscopo Parisiensi ratam et acceptam habuit Constantiensis episcopus.

Objicies 6^o, numisma jussu Regio insculptum ut in Luparæ fundamentis includeretur, quo constat Parisiis cognitum fuisse quid contineretur in verbalibus; ergo. Respondeo 1^o, quæstionem non esse quid cognitum fuerit Lutetiæ, sed quid Romæ. 2^o Quid ex illo numismate extundi potest? nihil certè, nisi regem voluisse quatuor episcopos in gratiam apud R. Pontificem restituere; uti constat ex inscriptione numismatis. 3^o Tandem et rex ipse tale improbavit numisma; ita testatur auctor historiæ quinque Propositionum.

Objicies 7^o : Edictum Ludovici Magni datum die 30 maii anni 1676, in Castris propè Nini-

vam Flandrorum, in quo sic legitur : « La con-
« descendance que le S.-Siège a eue avec beau-
« coup de prudence, en admettant quelques
« signatures du formulaire avec quelques ex-
« plications plus étendues, en faveur de quel-
« ques particuliers seulement, et pour les met-
« tre à couvert de leurs scrupules, et des
« peines portées par les Constitutions, » etc. Porrò condescensus ille seu indulgentia S. pontificis, de quâ loquitur edictum regium, non respicit factum merè personale; de hoc etenim ante et post pacem, unicuique licuit et etiam nunc licitum est quod voluerit opinari; non respicit etiam jus ipsum, cui sincerè et ex animo adherere constanter professi sunt quatuor episcopi; restat ergo ut versetur circa factum doctrinale, seu attributionem sensûs hæretici quinque Propositionum libri Jansenii, quatenus scilicet quatuor episcopis permisit ut inter subscribendum secernerent jus à facto, huicque merum silentium exhiberent.

Respondeo, imprudenter sanè Jansenianos hocce regis edictum nobis opponere, cùm ipsis directè adversetur. Namque 1^o, in eo irritum fit, prorsusque abolitur Mandatum episcopi Andegavensis datum die 6 maii ejusdem anni 1676, in quo conceptis verbis asserbatur sufficere silentium religiosum circa factum dogmaticum Jansenii, hancque fuisse Clementis IX mentem; rescinditur autem Mandatum illud, tanquàm adversum Constitutionibus apostolicis receptis et approbatis. 2^o Inobedientiæ arguitur præsul ille ac violatæ pacis; eaque abuti asseritur, dùm contendit hanc in distinctione juris à facto fundatam fuisse. 3^o Tandem jubetur ut nullâ hujusce Mandati habitâ ratione, puram ac simplicem formularii subscriptionem exigeret Cancellarius Universitatis Andegavensis.

Hinc Quesnellus epist. ad amicum an. 1697, quam legere est in Biblioth. Regiâ, *funestum* vocat illud regis decretum, *quo durè admodum vexatur episcopus, cujus unicum crimen erat solam disciplinæ subjectionem exigere pro facto Jansenii*; addit insuper, *in eo distinctionem juris à facto contrariam dici Constitutionibus apostolicis, comitiis cleri, Declarationibus regis, atque haberi velut audax ac perniciosum facinus*; demùm concludit, *hanc pacem funditus ruere, tum hocce sanctioris consilii decreto, tum ex praxi quâ ubique fermè exigitur subscriptio pura et simplex*.

Porrò R. Pontificis condescensus cujus meminit edictum, non versatur, uti contendunt adversarii, circa factum dogmaticum, seu at-

tributionem sensûs hæretici propositionum libri Jansenii, sed si gestis in causâ quatuor episcoporum et terminis citati edicti inhæreamus, videtur intelligendus de tolerantia quâ permisit pontifex quatuor episcopos subscribere cum expositione diffusâ, promittendo duntaxat silentium obsequiosum pro facto, in mente Clementis IX personali vel grammaticali; dissimulare quippe circa hæc volebat R. pontifex; at circa factum dogmaticum ferre non poterat, sed obviam ire firmiter statuerat, ut antea ex card. Nepote audivimus.

Neque valet quod additur in objectione, liberum semper cuilibet fuisse de merè personali aut grammaticali Jansenii facto pro nutu suo opinari; neque circa istud quidquam à summis pontificibus fuisse usquàm definitum. Namque 1º, aliud est pro libitu suo opinari circa factum merè personale; aliud distinctionem et explicationem inter subscribendum inserere: esto quòd prius licitum fuerit, certè non posterius; hæc etenim cum distinctione subscribendi licentia, plurimùm habet periculi; inde non pauci sensum Jansenii censuræ subducere tentarent, quod contigit temporibus dicti Andegavensis episcopi. 2º Quando certus quidam sensus ex libri totius consilio et serie colligitur, meritò præsumitur hunc fuisse internum auctoris sensum, nisi supponatur auctor aut ignarus, aut malignus, qui receptam verborum significationem vel ignorat, vel aliò inflectit; atqui Janseniani profectò nec inscitæ, multò minus malæ fidei Jansenium incusarent; ergo, etc., ac proinde non levis erat R. pontificis erga quatuor episcopos indulgentia, quòd subscribere permisisset declarando se nec personalem Jansenii sensum attingere, nec teneri quemquam ad credendum quinque Propositiones quoad verba omninò eadem aut grammaticaliter æquivalentia in Jansenii libro extare. Adde simili declaratione non obscurè innui, dubium saltem esse num personale factum definire vulerint summi pontifices, quod certè ab ipsorum mente omninò alienum fuit.

Objicies ultimò: Verisimile non est, imò impossibile unum Clementem IX ignorasse quod omnibus notum et perspectum erat; atqui jam ante completam pacem publicè evulgatum fuerat quatuor episcopos in secretis verbalibus jus inter et factum distinxisse, eosque respectu facti, unam religiosi silentii observantiam præstitisse et à suis postulasse. Ita ferebant disseminati nuntii Amstelodamenses ad diem 1 novembris 1668; ita quoque expressè declarave-

rant canonici Apamienses in contestatâ denuntiatione factâ die 22 septembris ejusdem anni; denique hoc ipsum haud dubiè ubique enarrarunt sexcenti circiter viri ecclesiastici qui synodis quatuor episcoporum adfuere, et quibus nullum eâ de re secretum injunctum fuerat; ergo, etc. Ita anonymi antea citati.

Respondeo: Equidem publici rumores ferebant quatuor episcopos distinxisse jus inter et factum: verùm præterquàm quòd ex illis rumoribus certò dignosci non poterat, quid illi nomine facti intellexissent, non debuit S. pontifex in re tanti momenti extrinsecis illis relationibus fidem adhibere, nec incæptum pacis negotium abrumpere; ad summum novas inquisitiones, novasque declarationes exigere debuit ab iis qui negotium illud tractabant, idque revera præstitit, et obtinuit testimonia quatuor episcoporum supra memorata, quibus postea accessit declaratio episcopi Catalaunensis, necnon illustriss. Harlæi epistola; ex his authenticis instrumentis judicavit Clemens IX, non autem ex incertis illis nuntiis, quibus ab omnibus levissima habetur fides.

Huic nostræ responsioni omninò consentit cardinalis nepotis Relatio numeris 149, 150, imprimis 163, ubi conceptis verbis asserit, «visum fuisse pontifici, ex declaratione episcopi Catalaunensis.... ex legitimâ fide quam quatuor episcopi fecerant nuntio, suæ in sancientiâ adjectis nominibus formulâ sinceritatis; èque luculentis D. Lionæi, et archiepiscopi Rothomagensis, aliorumque testimoniis argumentum constari longè usquequaque validius contrario quovis rumore, quem de actis verbalibus incerti libelli et privatæ dissipatione paverant litteræ. Quapropter tum regiæ vocis pondere subnixum, tum prædictorum auctorum perquàm gravibus et repetitis testificationibus inductum non potuisse jam diutius ambigere de plenâ episcoporum obedientiâ et sincero in admittendâ formulâ animo, eosque ideò in suam gratiam restituendos duxisse.»

Leve est quod in objectione additur de canonicorum Apamiensium protestatione; namque fatetur ipsemet auctor apologet. Præfat. pag. 66 et 67, non ab omnibus, sed à quatuor duntaxat Apamiensibus canonicis factam fuisse; additque, neque ex hoc scripto, neque ex ullo alio instrumento probari posse hanc Romæ denuntiatam fuisse.

Quod spectat ad alios viros ecclesiasticos qui synodis adfuerant, 1º cùm nullum exemplar

actorum verbalium habuerint, sed post simplicem eorum lectionem subscripserint, vix illi accuratè ac distinctè referre poterant ea quæ in actis illis continebantur; aut saltem gravis esse poterat suspicio, eos verum et germanum sensum non omninò assecutos fuisse; 2^o prorsus falsum est quod fert objectio, nullum ipsius secretum injunctum fuisse; si enim ita esset, quid tot susceptæ molitiones ne verbalia cuiquam communicarentur? Ut quid quatuor episcopi tantâ curâ effecissent ut ad synodos non vocarentur ii quorum fides ipsis suspecta videbatur? Ut quid denique episcopus Alec-tensis epist. ad D. de S. Laurens datâ die 14 octobris 1668, adeò sollicitè sese purgat ab eo quod ipsi impositum fuerat, nempe quòd evulgari permisisset quæ in suâ synodo gesta fuerant? Hæc latè prosequitur auctor historiæ quinque Propositionum tom. 2 recentioris editionis pag. 186, 187 et sequentibus.

Cæterum quanquàm evidentissima sint quæ hucusque adduximus ad demonstrandum cognitam non fuisse à Clemente IX clandestinam quatuor episcoporum in suis verbalibus juris à facto distinctionem; atque adeò nullatenus à pontifice approbatum fuisse religiosum, ut vocant, silentium; aliud tamen, et quidem urgentius ad hominem hic occurrit argumentum desumptum nempe ex præcipuorum Jansenistarum consensu, qui in suis privatis ad amicos colloquiis et epistolis candidè confessi sunt, nihil incertum ac dubium magis quàm quod ipsi palàm, velut certissimum et indubitatum nobis perpetuò obtrudunt.

Eam in rem instar omnium audiatur D. du Vaucel aliàs Valloni, Romæ Jansenianorum actor, cui proinde ipsorum sensa apprimè nota erant; in hæc verba scribit ad Quesnell, die 2 junii 1696: « Tout ce qu'on allègue de la paix « telle quelle, faite en 1668, ne conclut rien, « qu'en supposant qu'on a su à Rome, que la « distinction du droit et du fait était dans les « procès-verbaux des quatre évêques, de la « même manière qu'elle était dans leurs Mandemens condamnés à Rome, et pour lesquels « on voulait procéder à leur déposition: OR « C'EST CE QUE LES ACTES QUE L'ON RAPPORTE NE « PROUVENT PAS; surtout l'extrait du card. Rospigliosi prouve plutôt le contraire. » Nihil certè luculentius; loquitur autem fervidus ille Jansenii defensor de eo ipso Relationis extracto quod uti maximè authentico inseruerat Quesnellius pag. 604 suæ Defensionis Ecclesiæ romanæ adversus Leydeker.

Pergit ibidem Valloni, et probat ratione quam antea attingimus, extractum illud ostendere potius notam non fuisse juris à facto distinctionem in verbalibus expressam: « Les « certificats qu'on dit dans cet extrait devoir « l'emporter sur des mémoires et les bruits particuliers, donnent l'idée que Clément IX et « SON CONSEIL N'ONT POINT SU AU VRAI CE QUE « CONTENAIENT LES PROCÈS-VERBAUX, ou du moins « qu'ils ont fait semblant de ne le point savoir; « et que quand on dit dans cet extrait et dans « la lettre du pape aux quatre évêques, qu'ils « ont signé sincèrement le formulaire, l'on « entend qu'ils ont signé sans la distinction « marquée dans leurs Mandemens. » Nihil iterum luculentius disertâ hâc Vallonii confessione, quam ab ipso sola veritatis evidentia extorquere potuit.

Addit hanc esse non suam duntaxat, sed et aliorum sociorum mentem; demùm suadet Quesnellio ut supprimeret extractum, sicque concludit: « Cette réflexion a paru bien solide à « M. Alberti et à Dom Luigi; et ayant lu cet extrait du card. Rospigliosi, ils seraient d'avis « que vous l'ôtassiez en faisant un carton, si « vous êtes encore à temps pour cela. » Et in aliâ ad eundem Quesnell, epist. mense julio ejusdem anni 1696, sic rursus mentem suam aperit: « Il restera toujours quelque obscurité « et quelque embarras, pour la paix de 1668, « parce qu'il ne paraît pas assez clairement « qu'on ait fait entendre à Clément IX, que « les quatre évêques ne changeaient point dans « leurs procès-verbaux la substance de leurs « Mandemens condamnés à Rome. » Narrat ibidem, quàm difficile fuerit Alec-tensem episcopum adducere ad subscribendum epistolæ Romanæ missæ, quòd scilicet prævideret futurum ut postmodum fraudis, artificive arguerentur quatuor episcopi, quòdque perplexis et ambiguis loquendi rationibus S. pontificem decepissent; verba alibi laudavimus.

Ex his clarissimè liquet, ipsismet fatentibus Jansenianis, probari non posse notum Romano pontifici fuisse verbalium tenorem; imò potius contrarium evinci; ergo, etc.. Atque hinc alter Jansenianus scriptor epist. ad archiepiscopum pag. 17, postquàm multis ostendere conatus fuit, nequidem cum expositionibus et interpretationibus constitutionem *Unigenitus* acceptandam esse, sic demùm concludit: « Ce « serait le second tome des procès-verbaux de- « meurés cachés dans les greffes des quatre « évêques, qui n'ont pas empêché que leur

« signature n'ait été regardée depuis comme
« pure et simple. Il n'est rien tel pour des
« évêques, et dans les matières de foi, que de
« marcher droit. »

Juvat hic audire quid de toto hocce negotio
liberius quidem, sed ingenuè ac sincèrè scripserit Jansenii panegyrista in apologiâ suâ panegyreo pag. 12. Ait 1°, se desiderâsse totam negotiationem istam, propter honorem virorum inclytorum, qui in illâ partem habuere, urbano silentio sepelire; dein ostendit negari non posse quin quatuor episcopi nudam et simplicem formularii subscriptionem dederint, aut saltem dedisse significaverint: postea quibusdam interjectis probat præmissam episcopi Catalaunensis declarationem omnino ambiguum, non potuisse impedire quominus subscriptio formularii habenda esset pro clarâ et evidenti affirmatione facti: « Ad hæc, inquit, « dùm tali declarationi immediatè subjicitur « formula ab Alexand. VII concinnata, quæ « nullis unquàm machinis evidentissimam FACTI « assertionem à se excutiet, eidemque formulæ « NUDÈ SUBSCRIBITUR; quid aliud agitur quàm « vel declarationem ambiguum ad claram FACTI « affirmationem reducere; vel si quam aliam « vim habebat, contrariâ subscriptione velut « convulsam, irritam ac cassam reddere? Utor « ampliti hâc enuntiandi periodo; quia reverâ « declaratio per se considerata, facti veritatem « non ita inficiat. »

Demum sic concludit: « Non est itaque cur « nos jam tanta occupet admiratio, quòd pontifex in Brevisuo gratulatorio ad episcopos « memoratos rescribat: CUM NOVA ET GRAVIA « ISTHINC ACCEPTIMUS DOCUMENTA VERÈ AC TOTALIS « OBEDIENTIÆ VESTRÆ, QUÆ ET FORMULARIO SINCERÈ SUBSCRIPSISTIS, ET DAMNATIS ABSQUE ULLA « EXCEPTIONE AUT RESTRICTIONE QUINQUE PROPOSITIONIBUS, IN OMNIBUS SENSIBUS IN QUIBUS A « SEDE APOSTOLICA DAMNATÆ FUERANT, ETC. At « quis non obstupescat congratulationem talem « à viris illustribus silente submissione recipi, « si, ut par est credere, nullam facto Janseniano fidem et assensionem in animo impressam « gesserint? Sane quidem qui IN OMNIBUS SENSIBUS, IN QUIBUS A SEDE APOSTOLICA DAMNATÆ FUERANT, propositiones damnat, ille utique « et illas damnat in ipso puro puto sensu à Jansenio scribente intento; nam is hætenus « solus et unicus solenni eloquio pontificio « profligatus est. » Hætenus professus ille Jansenista, hæc in parte perfectè consentiens cum D. du Vaucel, quòd scilicet ex actis Romæ

missis, speciatim verò ex celebri declaratione, notum esse non potuerit R. pontifici quatuor episcopos jus à facto distinxisse, huicque unam silentiū reverentiam exhibuisse.

Ante quàm huic controversiæ finem imponamus, non abs re erit colligere, atque servatâ chronologicâ notâ ex ordine recensere varia quæ huc usque adduximus momenta ad causam quatuor episcoporum utrumque spectantia; ex his non modica lux præsentī argumento affulgebit.

1° Itaque anno 1665, die 15 februarii, edita fuit ab Alex. VII Constitutio in quâ continetur formula fidei circâ quinque Jansenii Propositiones subscribenda. 2° Eodem anno, mense aprili, in hujusce Constitutionis executionem lata est regis Christianissimi Declaratio, quæ 29 ejusdem mensis requirente oratore regio D. Talon, in supremæ curiæ tabulas perscripta est. 3° Dictæ Constitutioni purè ac simpliciter subscripsere Præsules omnes Gallicani, quatuor duntaxat exceptis, Alecensi scilicet, Bellovacensi, Andegavensi et Apamiensi, qui in suis publicis Mandatis jus à facto distinxere. 4° Secretioris concilii decreto rescissa fuere dicta Mandata die 20 julii; simul et Romæ in librorum prohibitorum indicem relata. 5° Die 28 augusti 1667, prima quatuor episcoporum ad Clementem IX dirigitur epistola, in quâ post gratulatam ipsi supremam dignitatem, suorum Mandatorum doctrinam vindicare conantur. 6° Epistola novemdecim episcoporum ad S. pontificem scripta die 1 decembris ejusdem anni in gratiam quatuor episcoporum. 7° Eodem tempore simillima ab iisdem novemdecim episcopis ad regem Christianissimum directa epistola; hæc supremi senatûs judicio suppressa fuit die 19 martii 1668. 8° Die 25 aprilis 1668, quatuor episcopi encyclicam ad cæteros Galliæ episcopos scripsere epistolam, in quâ ipsos hortabantur ut suæ causæ patrocinium susciperent; hæc 4 julii ejusdem anni sanctionis consilii placito abolita fuit. 9° Die 1 septembris ejusdem anni, secunda quatuor episcoporum ad Clementem IX epistola; in eâ testantur se in exequendâ Alex. VII Constitutione, usos fuisse novâ subscriptione, quod ipsis arduum fuisse ac perdifficile declarant. 10° Synodi quatuor episcoporum in quibus edita fuere verbalia et præstita subscriptio; synodus Bellovacensis celebrata fuit die 14 septembris; Andegavensis die 15; Alecensis et Apamiensis die 18 ejusdem mensis; quid discriminis occurrat in his verbalibus alibi annotavimus.

Unum hic observandum, quatuor episcoporum epistolæ diem antiquiorem appositam fuisse quam verbalibus, etsi tamen de his mentio fiat in epistolâ.

11^o Die 22 ejusdem mensis et anni, illustrissimi Laudunensis postea eminentiss. Estræi, tum ad R. pontificem, tum ad card. nepotem epistola, circa quatuor episcoporum subscriptionem. Eodem die, canonicorum Apamiensium denuntiatio adversus novam formularii subscriptionem. 12^o Die 28 Breve Clementis IX ad regem Christianissimum circa reconciliationem quatuor episcoporum. 13^o Die 23 octobris, Placitum regium ad componendam controversiam, et intentatam in quatuor episcopos litem dirimendam. 14^o Die 27 ejusdem mensis, regis ad quatuor episcopos epistola. 15^o Mense novembri, quatuor episcoporum testimonia de suâ omnimodâ in subscribendo sinceritate. 16^o Die 3, juxta alios 4, decembris, declaratio nomine Mediatorum formata et Romam missa, de doctrinâ in verbalibus expressâ.

17^o Die 5 ejusdem mensis, illustrissimi Harlæi ad S. pontificem de eodem argumento epistola. 18^o Die 19 Januarii anni 1669, Breve Clementis IX ad quatuor episcopos pro reconciliatione. 19^o Eodem die et anno, aliud Breve ad tres pacis mediatores. 20^o Mense februario ejusdem anni, illustriss. de Perefixe archiepiscopi Parisiensis Documentum Pastorale in gratiam monialium Portûs Regii. 21^o Mense martio, D. Dorat doctor Sorbonicus, parochus de Massy, oblato supplici libello quo testabatur se in omnibus adhærere supradictæ declarationi, ab eodem archiepiscopo ad pacem admissus est. 22^o Anno 1674, die 13 decembris, litteris consignata testificatio illust. episcopi Catalaunensis circa dictam nomine mediatorum declarationem. 23^o Anno 1675, mense maio, D. Vibet pastor Normannus ab episcopo Constantiensi coram Parisiensi archiepiscopo ad pacem admissus est iisdem conditionibus ac paulò antea D. Dorat. 24^o Anno 1676, die 6 maii, Mandatum Andegavensis episcopi de non subscribendo absque præmissâ juris et facti distinctione. 25^o Decretum Ludovici Magni die 30 maii ejusdem anni, quo dictum Andegavensis episcopi Mandatum rescissum fuit.

Quæ hic ex ordine recensuimus, ex parte extracta sunt ex collectione jussu Andegavensis episcopi adornatâ an. 1677, cui titulus : *Recueil des pièces qui justifient la vérité de ce qui s'est passé dans la paix qui a été donnée.... par*

Clement IX en 1668. Hæc autem collectio ab eodem episcopo Andegavensi Romam transmissa est circa an. 1678, cum prolixâ ad Innoc. XI epistolâ, sub hoc titulo : *Epistola illustriss. Andegavensis episcopi ad SS. D. Innocent. XI, pontificem maximum, pro CLEMENTINÆ PACIS AC SUBSCRIPTIONIS EXPLICATIONE AC DEFENSIONE.*

ARTICULUS IV.

De Brevibus Innocentii XII.

Cùm Belgarum episcopi quedam adjecissent verba formulario ut clariùs adhuc determinaretur sensus prædictæ formulæ, conquerentibus multis de tali additamento, missi ex utraque parte fuerunt ad Innoc. XII deputati. Duo scripsit Brevia S. pontifex; primum die 6 februarii anni 1694; alterum, die 24 novembris 1696. Trophæa statim decantârunt Janseniani, præsertim de primo Brevi; jure an immeritò nunc expendendum.

CONCLUSIO. — Ex Brevibus Innocentii XII ad Belgii episcopos scriptis nihil prorsus colligi potest in gratiam silentii religiosi circa factum Jansenii.

Probatur 1^o ex priori Brevis in quo sic legitur : « Constitutionibus Innoc. X et Alexand. VII, exemplo prædecessorum nostrorum firmiter in hærentes, easque in suo robore fuisse et esse declarantes, fraternitatibus vestris mandamus, ut contra omnes et quoscunque cujuslibet statûs, gradûs et conditionis existant, qui ausu temerario prædictas quinque Propositiones sic damnatas in Constitutionibus Innoc. X et Alex. VII, publicè vel privatim.... defendere præsumperint, procedatis. » Et paulò post : « Quare præcipimus, ut, quemadmodum ii qui ad juramentum adigendi sunt, illud præstare debeant sincerè, absque ullâ distinctione, restrictione, seu expositione; damnando eas propositiones ex libro Jansenii excerptas, in sensu obvio quem verba ipsa præ se ferunt, prout sensum illum damnârunt SS. pontifices prædecessores nostri », etc. Ex his sic arguo : Ille profectò sensum Jansenii à censurâ non eximit, imò potiùs ipsum specificè damnat, qui assertit 1^o, se firmiter in hærenter Constitutionibus Innoc. X et Alex. VII, easque in suo robore fuisse et esse; 2^o quinque Propositiones ex libro Cornelii Jansenii fuisse excerptas, sicque damnatas; 3^o juramentum in formulario expressum fieri debere absque ullâ distinctione, restrictione vel expositione; atqui ita disertis

verbis declarat Innoc. XII, in dicto Brevi; ergo, etc.

Probatur 2^o ex altero Brevi ad eosdem episcopos dato 24 novembris 1696 : « Non sine admiratione intelleximus, inquit S. Pontifex, nonnullos in istis diæcesibus reperiri, qui verbis et calamo ausi fuerint affirmare, supradicto nostro Brevi alteratam seu reformatam esse Constitutionem Alex. VII, 16 octobris anni 1656 editam, necnon formularium ab ipsomet pronuntiatum; cum dicto Brevi utrumque specificè confirmetur, et omninò intenderimus et intendamus iisdem adherere, et nequaquam sinere ut aliquid addatur vel dematur à prædicto formulario, illud quovis modo alterando in aliquâ ejus minimâ parte, sed quod in omnibus et singulis ejusdem partibus uti mandavimus, mandamus etiam ad amussim observari. » Ex iis sic : Qui Alex. VII Constitutionem circa quinque Propositiones in sensu Jansenii damnandas specificè confirmat, necnon formularium ab eodem pronuntiatum, in quo qui subscribit, interposito juramento declarat se quinque Propositiones ex Jansenii libro excerptas et in sensu ab eodem auctore intento, sincero animo damnare ac rejicere; qui, inquam, dictam Constitutionem et formularium confirmat, ille certè Jansenii sensum sub anathemate concludit, nec proinde ullatenùs favet silentio religioso : atqui ita Innocent. X, in hoc postremo brevi; ergo, etc.

Non potuère Janseniani non fateri posteriori hocce Brevi funditùs everti quidquid præsidii ac commodi ex priori speraverant; hinc ista eorum propositio n. 3, inter 127, à clero Gallicano in comitiis anni 1700, proscripta : « aliam quam huic malo medicinam attulisse videbatur Innoc. XII in Brevi suo 6 feb. 1694..... Verùm mitigationem illam præsumptam non parùm extenuavit Brevi 24 novembris 1696, ubi pontifex disertè negat Constitutionem aut formularium Alex. VII Brevi sua alterata aut reformata in aliquâ ejus minimâ parte. »

Probatur 3^o ex Clemente XI, qui in suâ Constitutione *Vineam Domini*, etc., graviter perstringit eos qui dicta Innoc. XII Brevia in erroris sui patrocinium, (silentii scilicet religiosi) advocare, temerario planè ausu, non erubescunt : obvium autem quinque Propositionum sensum, in quo damnatas fuisse propositiones significat Innoc. XII, ibidem interpretatur Clemens XI, de ipsomet obvio sensu, quem in Jansenii libro

habent, quive ab eodem Jansenio intentus, ac à prædecessoribus Innoc. X et Alex. VII damnatus fuit; ergo, etc.

Probatur 4^o ex eminentiss. de Laureâ, quem summopere laudant, atque etiam inter suos numerare non dubitant Janseniani. Is Consultoris partes egit, cum quæstio juris et facti sub Alex. VII et Clemente IX Romæ expendebatur, et deinceps ejusdem causæ explicator fuit sub Innoc. XII. In suo autem Voto Mechliniæ typis dato anno 1697, tria docet doctissimus ille cardinalis, 1^o sensum quem exprimit liber Jansenii esse objectum definitionis pontificiæ : « Alexander VII, inquit, definivit dogma quod exprimunt et significant verba illa quæ dicit Jansenius. » 2^o Docet sensum hunc esse dogma seu veram juris quæstionem : « Definitio Alex. VII, ait ibidem, damnans propositiones in sensu Jansenii, reipsa est juris quæstio. » 3^o Idipsum probat isto ratiocinio : « Tunc dicitur quæstio aliqua juris, quando judicatur per conformitatem aut difformitatem cum jure : ast definitio Alex. VII, damnans propositiones in sensu Jansenii talis fuit; quia scilicet sensus earum contrarius est juri divino in sacrâ Scripturâ expresso; ergo pertinet ad quæstionem juris. »

Cum ergo eminentiss. ille auctor, cui, fatentibus etiam Jansenistis, optimè perspectus erat utriusque supradicti Brevis sensus, in-eâ fuerit sententiâ, dicendum profectò nihil penitus erui posse ex illis Innoc. XII decretis in gratiam religiosi, ut vocant, silentii; imò potiùs validè impugnatur mox indicato doctissimi cardinalis ratiocinio : Merum silentium certè non sufficit circa dogma, circa veram juris quæstionem; atqui sensus quem exprimit et significat textus Jansenii, vera est juris quæstio, verum dogma; ergo, etc.

Probatur 5^o ex vanitate momentorum quæ in contrarium opponunt adversarii; hæc etenim futilia omninò sunt ac nullius roboris, uti vel leviter attendenti patebit.

Aiunt 1^o : Prohibuit R. Pontifex additiones archiepiscopi Mechliniensis quæ determinabant damnationem ad sensum Jansenii. — Refellitur : Quid in gratiam sui exinde eruere possint Janseniani, non video. Prohibitionis siquidem causam exponit Innoc. XII, in priori Brevi, his verbis : « Cum ad summum pontificem duntaxat pertineat sensum, quem in his propositionibus damnaverit, et ut damnatum à fidelibus credi censuerit, declarare. »

Aiunt 2^o : In priori Brevi simpliciter præci-

pitur ut damnentur propositiones in sensu obvio, quem ipsamet propositionum verba præ se ferunt; ergo sensus à Jansenio intentus, in mente RR. pontificum est ipse sensus propositionum obvius, sive Jansenius eas sic intellexerit, sive non. — Refellitur: 1° mutilatur textus, sic enim legitur: « Damandas esse propositiones ex libro Jansenii excerptas in sensu obvio, quem ipsamet propositionum verba præ se ferunt, prout sensum illum damnaverunt SS. pontifices prædecessores nostri; » Innoc. scilicet X et Alex. VII. 2° In utroque Brevi disertè testatur Innoc. XII, se firmiter inhærere Innoc. X et Alex. VII Constitutionibus, easque in robore fuisse et semper esse; in posteriori verò declarat, se nullatenus velle minuire vel in minimâ parte formularium, quod integrum semper et firmum debet permanere. 3° Dicit sensum obviu[m] propositionum esse relativum ad sensum obviu[m] formularii; sed sensus obvius formularii est sensus à Jansenio intentus; ergo, etc.

Itaque cum Innocent. X quinque Propositiones in sensu obvio, quem ipsamet propositionum verba præ se ferunt, damnatas esse pronuntiavit; id intelligendum de ipsomet obvio sensu quem in Jansenii libro habent, quem homini intelligenti, spontè et naturaliter exhibet dictus Jansenii liber, quive ab eodem Jansenio intentus meritò præsumitur; sicque significat Innoc. XII obviu[m] quinque Propositionum in se sumptarum sensum, esse ipsummet libri Jansenii sensum quem damnavit Alex. VII. Hanc fuisse legitimam Innoc. XII mentem expressè declarat Clemens XI, Constitutione *Vineam Domini*, etc.; cujus verba paulò antè retulimus.

Aiunt 3°: In priori Brevi prohibetur ne ullâ ratione quisquam vagâ istâ accusatione et invidioso nomine *Jansenismi* traducatur; in posteriori verò jugiter Jansenistæ dicuntur *prætensi*; quasi nulli sint, ita duntaxat dicantur. — Refellitur: Ad primum, dico detrahi posteriora Brevis verba, quæ si restituantur, nedum evanescit difficultas, sed etiam ex eo urgentur adversarii: sic enim protinus subjicitur, *Nisi prius suspectum esse constituerit aliquam ex his (Jansenii) propositionibus docuisse aut tenuisse*. Ad secundum, vox ista, *prætensi*, hic non significat fictos Jansenistas, sed eos qui ut tales prætenduntur; hoc est, denuntiantur, declarantur, deferuntur; hunc esse verum sensum, manifestè patet ex distinctione quam pontifex adducit Jansenistarum in internos seu

occultos, qui nullo actu externo se manifestant, et in externos; utrosque pontifex *prætensos* appellat; an verò externos illos, qui, ut ibidem loquitur Innoc. XII, *voce aut scriptis edunt proprios sensus apostolicarum Constitutionum sensui dissentaneos*, prætensos, id est, fictos seu falsos appellaret, quos tamen jubet ad rigorem juris puniri? Quis tam insulsam contradictionem in uno et eodem loco pontifici tribuere ausus fuerit?

Quæcumque hic diximus de utroque Breve Innoc. XII, non illibenter admittit et amplectitur Jansenii panegyrista: « Audio, » inquit in Prologo galeato Panegyreos Jansenianæ pag. 58, « plures existere qui ut sese laqueis periculose jurationis expediant, eo temporis articulo quo formularium sine restrictione ullâ jurejurando firmant, per reservationem mentalem apud animum suum mussitent, Juxta mentem Pontificis, hoc est, juro in formulario juxta mentem Innoc. XII, qui..... Alexandrinæ bullæ, ac formularii inde promanati duritiem, quâ parte factum continet, mitigavit. Sed jam supra ostensum est prætextus illos speciosos per Breve 24 novembris 1696, subsecutum non obscurè rescissos esse et vanos redditos. Etenim Breve illud distinctissimè bina imperat: nimirum et DAMNARI QUINQUE PROPOSITIONES IN SENSU OBVIO; et damnari easdem habito respectu obviu[m] sensus dicti formularii; qui postremus certè obvius sensus, nisi omnium oculos configere velis, juxta receptum à totâ hominum societate loquendi morem, factum ipsum verbis vehementissimis ac splendidissimis ingerit. » Et paulò post sic prosequitur: « Atque ut omnino sincerè ac liberaliter agam, fateri compellor nequidem placuisse mihi unquam opinionem istam, quæ vel ex ipso primo Breve 6 febr. 1694 edito..... aliquid mitigationis circa factum exsculpere tentavit; semperque apud me existimavi, illud ipsum Breve facto Janseniano stabiliendo potius quam diruendo favere. » Idem tradit et dilucidè ac invictè demonstrat in apologiâ dictæ Panegyreos pluribus in locis, ac tandem pag. 19 sic concludit: « Fixum igitur invictumque maneat, Janseniani factâ assertionem tum Constitutione tum formulario Alexand. VII clarissimè ac validissimè contineri. Æquè fixum invictumque maneat, eandem Constitutionem ac formularium ab Innoc. XII SPECIFICÈ CONFIRMARI, NEQUE REFORMARI AUT ALTERARI IN ALIQUA VEL MINIMA EJUS PARTE;

« id quippe manifesta verba Brevium disertè
« ferunt. »

ARTICULUS V.

De Clementis XI bullâ Vineam Domini, etc.

Ut vis argumentorum quæ adversus sufficientiam silentii religiosi ex istâ bullâ deducuntur, clariùs pateat; nonnulla ex antedictis paucis hic sunt recolenda.

1^o. Anno 1701, prodit percelebris conscientie Casus, cujus hic erat primus articulus: « Virum quemdam ecclesiasticum damnare
« quinque Propositiones purè et simpliciter in
« omnibus sensibus in quibus ab Ecclesiâ pro-
« scriptæ sunt, etiam et in sensu Jansenii eo
« quo Innoc. XII reposuit modo, Brevibus datis
« ad Belgarum episcopos; » ast quantum ad quæstionem facti, seu attributionem illarum quinque Propositionum libro Jansenii, eundem virum existimare, « meram silentii et reverentiæ subjectionem sufficere. » En ipsissima verba: « Il croit qu'il lui suffit d'avoir
« une soumission de respect et de silence à ce
« que l'Eglise a décidé sur ce fait. » Responsum dederunt quadraginta doctores Parisienses, « hujus ecclesiastici viri sententiam talem non
« esse, ut Confessarius possit ei denegare sacramentalem absolutionem nisi eam retractaverit. »

2^o. Triplici decreto dictam Casûs responsionem damnavit Clemens XI. Primum, *Ad perpetuam rei memoriam*, latum fuit die 12 febr. anni 1703; alterum ad regem directum fuit; tertium ad eminentiss. card. Noallium die 13 ejusdem mensis et anni.

3^o. Benè multi Galliarum episcopi publicis Mandatis ac Documentis Pastoralibus adversus eandem Casûs responsionem insurrexere, præsertimque eminentiss. Noallium die 22 februarii ejusdem anni, quo agente omnes, uno excepto, doctores quam dederant responsionem scripto revocarunt.

4^o Non episcopi modò, sed et theologicæ Facultates styllum suum exacuere adversus dicti Casûs doctrinam. Ita facultas Lovaniensis iudicio doctrinali dato die 10 martii 1703, Facultas Duacena in suo itidem iudicio doctrinali die 10 feb. 1704, ipsa denique Facultas Parisiensis die 1 septembris anni 1704, censuit, dictam Casûs propositionem, *qu'il suffit d'avoir une soumission de silence, pour ce que l'Eglise a décidé sur le fait de Jansénius*, adversari censuræ sacræ Facultatis latæ die ultimâ Januarii anni 1656, eamque damnaudam esse, nempe *ut te-*

merariam, scandalosam, injuriosam summis pontificibus et episcopis Galliæ, atque etiam ut præbentem occasionem renovandæ ex integro Jansenii doctrinæ; etc.

5^o Tot universitatum judiciis, episcoporum decretis, necnon pontificiis diplomatibus, finiri profectò debuissent controversiæ; verùm non quievère Jansenii patroni; adversus pontificia præsertim decreta reclamârunt, quòd moribus nostris non satis essent accommodata; hinc plurimi Gallicani antistites rege favente summum pontificem rogârunt, ut pro eâ quâ pollet auctoritate, serpens virus reprimeret, decretoriè ac solemniter pronuntiando circa religiosi silentii insufficientiam; votis annuit Clemens XI, datâ celebri Constitutione *Vineam Domini*.

Hæc autem Constitutio dogmaticum est, supremum et irrefragabile totius Ecclesiæ iudicium. Ita expressè statutum variis in comitiis cleri Gallicani; id etiam sæpiùs declaravit rex Christianissimus, speciatim verò in responso ad postulata comitorum cleri anni 1725, hoc certum, hoc inconcussum manere debet; ita cuncti docent episcopi qui constitutionem hanc expressè aut tacitè acceptârunt nullo prorsus reclamante: ita tenent omnes fideles; ita prædicant vel ipsimet ardentiores Jansenii sectatores, unum si excipias, feralis libelli auctorem, qui ausu nefando supremum hoc ecclesiæ iudicium, huic eidem Ecclesiæ denuntiare veritus non est.

Agnoscent itaque Janseniani bullam *Vineam Domini*, etc. velut regulam certam, infallibilem cui omnes fideles sincerum cordis et mentis obsequium præstare tenentur; ast de illius sensu, de definitionis mente disputant; voluntque indamnatum adhuc remanere religiosum pro dogmatico Jansenii facto silentium. Hæc ergo sola manet quæstio tractanda, utrum nempe præfatâ bullâ merum silentium circa dogmaticum factum uti insufficiens reprobatum fuerit; seu utrum fidelis possit adhuc innoxie existimare, hæreticum esse proprium ac naturale libri Jansenii sensum.

Ex unius hujusce quæstionis solutione religiosa pendet tota de Jansenismo controversia; cùm enim dicta Constitutio dogmaticum sit ecclesiæ iudicium, si hoece decreto obsequiosum silentium, insufficiens pronuntiatum fuerit; ergo, aut homo Ecclesiæ jugum excutiat necessum est, aut corde et animo damnet ipsum Janseniani libri sensum, sique iudicio sæpiùs lato causa finita erit; ut ergo isthæc gravissimi momenti solvatur quæstio; sit

CONCLUSIO. — Bulla *Vineam Domini* decretoriè pronuntiat ac definit expressè, silentium, ut vocant, religiosum, prorsus insufficiens esse circa dogmaticum Jansenii factum.

Palmarem istam Conclusionem efficacissimis quinque argumentis demonstrabimus. Primum desumitur ex scopo et occasione bullæ. Secundum ex ipsius tenore ac contextu. Tertium, ex judicio Gallicanorum præsulorum dictam bullam acceperunt. Quartum, ex querelis defensorum Jansenii. Quintum tandem, ex vanitate effugiorum quibus nituntur ostendere se nullatenus hæc Constitutione fuisse damnatos.

PRIMUM MOMENTUM. — Clemens XI bullâ *Vineam Domini* solemniter perstringit ac damnat obsequiosum silentium in dicto conscientie Casu expositum ac approbatum; atqui manifestissimum est silentium illud unicè circa ipsummet dogmaticum Jansenii factum versari; ergo, etc.

Minor omninò constat; tum ex ipsissimis ejusdem Casûs verbis paulò antea recensitis; tum ex disertâ adversariorum confessione; ita passim testatur auctor historiæ Casûs, præsertim tom. 1 et 6. Hinc D. du Vaucel, epist. ad Quesnell. 5 febr. 1703, asserit *subsistente conscientie Casu evanescere Jansenismum, merumque evadere phantasma*; addit verò Quesnell. epistolâ ad eminent. Noallium quæ refertur Causâ Quesnell. pag. 412, *eodem Casu damnato, illustrem Clementis IX pacem funditus rueri*; ex quibus patet dicto Casu adstrui sufficientiam silentii circa factum, quod solum admittere profitebantur Janseniani, quodque à Clemente IX probatum fuisse prædicabant; ergo.

Major verò in quâ solâ cavillantur adversarii, pariter certissima est, multisque modis invictè demonstratur 1^o ex dictis initio hujusce articuli, quibus liquet Casûs conscientie resolutionem propriè dictum fuisse et unicum ferendæ bullæ motivum, unicam occasionem; 2^o ex fine et concilio eorum qui romanum pontificem ad ferendam bullam induxerunt; eorum mens fuit, ut dictus conscientie Casus, variis summi pontificis Brevibus et episcoporum Mandatis jam confixus, tandem solemnî Constitutione decretoriè damnaretur; ita delarat mox citatus auctor anonymus tom. 6, parag. 27, his verbis: « Ils avaient principalement en vue de faire flétrir la suffisance du silence respectueux. . . . Ils crurent donc qu'il était nécessaire de solliciter une Constitution qui fût revêtue de toutes les formes d'une décision solennelle, qui pût être acceptée et publiée

« dans le royaume, et qui autorisât enfin la condamnation que plusieurs évêques avaient déjà faite des principes établis dans le Cas de conscience touchant la soumission due aux faits décidés par l'Eglise. »

Eum in finem, pergit anonymus, agentibus Gallie episcopis Romam missæ sunt duæ propositiones, quarum prima sic erat: « Ad obedientiam sedi apostolicæ debitam non requiritur ut quis sensum libri Jansenii, in quinque famosis Propositionibus interius ut hæreticum damnet; sed satis est, si eâ de re obsequiosum silentium teneat. » Altera verò: « Formulæ ab alex. VII præscriptæ licitè subscribere potest, qui interius non judicat Jansenii libro hæreticam doctrinam contineri. » Duæ autem istæ propositiones, doctrinam Casûs manifestè exprimunt, eamque sanè illis exprimi curaverant harum denuntiatores viri aliquin sagaces nec obtusi ingenii: ergo, cum easdem proscribat propositiones Clemens XI, universâ ipsi applaudente Ecclesiâ, sequitur damnatam manere supremo et infallibili judicio, silentii obsequiosi sufficientiam circa factum Jansenii.

3^o Idem constat ex iis quæ Romæ gesta sunt, dum prædictarum pendebat examen propositionum. Nempe properantibus ad judicium censoribus, Arnaldus Deschamps, Lovaniensis Baccalaureus, tam suo quàm D. Hennebel, aliorumque plurium Lovaniensium doctorum nomine, duplex congregationi obtulit memoriale, utrunque autem habetur apud eundem anonymum loco mox citato. In primo hæc leguntur: « Consonum haudquaquam videretur, si inauditis D. Hennebel et theologis Lovanensibus, quorum causa in harum propositionum examine agitur, à sanctâ Sede ad petitionem episcoporum Gallie, dictæ propositiones damnarentur; » in altero autem, nihil non molitur orator Lovaniensis ut duarum damnationem propositionum avertat, quia, ipso fatente, eodem judicio proscripta manere debebant et doctrina et scripta horum Lovaniensium theologorum; sed hi pro solâ militabant sufficientiâ silentii obsequiosi circa factum Jansenii, hæc unica doctrinæ Harum summa; ergo, cum nonobstantibus memorialibus damnatæ fuerint propositiones Constitutione *Vineam Domini*; damnata quoque fuit, ipso fatente Jansenianorum oratore, sufficientia silentii religiosi pro facto Jansenii.

4^o Idem rursus constat ex ipsis bullæ verbis, in quibus habentur et occasio et scopus defini-

tionis; sic autem utrumque exprimitur: « cùm
« inquieti homines.... docere non sunt veriti,
« ad obedientiam Constitutionibus apostolicis
« (Innoc. X et Alex. VII) debitam, non re-
« quiri ut quis Janseniani libri sensum in
« quinque propositionibus damnatum, interiùs
« ut hæreticum damnet; sed satis esse, si eà
« de re obsequiosum (ut ipsi vocant) silen-
« tium teneatur.... hinc est quòd nos ad op-
« portunum et efficax tam exitiali morbo re-
« medium adhibendum excitati, » etc. Ille
sanè alludit R. pontifex ad Casus conscientie
resolutionem; perstringit ergo Clemens XI silen-
tium in dicto casu expositum et probatum.

5º Tandem id clarè colligitur ex ipsà præ-
sentis controversie naturâ. De eo siquidem
silentio loquitur S. pontifex, ac circa illud pro-
nuntiat, de quo unicè tunc temporis moveba-
tur quæstio; ast tunc quæstio erat duntaxat de
obsequioso circa Jansenii factum silentio; istud
à Jansenianis summo ardore propugnabatur,
ab eorum verò æmulis impugnabatur; theolo-
gicis censuris, episcopalibus decretis; necnon
pontificiis diplomatibus sæpiùs conflatum fue-
rat; verùm his nonobstantibus, variis effugiis
isthæc decreta eludere conabantur; adeoque
ad summum pontificem delata fuerat contro-
versia ut eam decretoriè dirimeret; ergo, etc.

Et certè non frustra feruntur decreta Ec-
clesiæ, loquitur illa et definit non incassum
et ex quâdam suas definitiones multiplicandi
prurigne, sed necessitate cogente, ad coer-
cendas hæreses, ad sedandos tumultus novis
excitatos opinionibus. Sed quæ novæ sparge-
bantur opiniones? Quæ hæresim sapiebant aut
favebant ipsi? nulla potest assignari doctrina
his insignita characteribus quam suâ Constitu-
tione voluerit damnare romanus pontifex,
præter solam de sufficientiâ silentii obsequiosi
pro facto Jansenii sententiam; hæc unica oc-
currit in toto christiano orbe tunc temporis
disseminata doctrina, quæ possit haberi velut
bullæ objectum; hæc ergo unica de religioso
silentio circa Jansenii factum doctrina subdi-
tur præsentis fulmine Vaticano totiusque Ecce-
lesiæ. Totum istud ratiocinium versant ac fusiùs
prosequuntur card. archiep. et episcopi Gal-
licani Parisiis anno 1728, congregati in suâ ad
regem epistolâ pag. 76 et sequent.

SECUNDUM MONUMENTUM. Monumentum istud,
quòd quidem capitale est, ex ipsomet bullæ
tenore eruitur, pluraque complectitur. 1º Qui-
dem Clemens XI, disertè negat approbasse
Clementem IX distinctionem juris à facto;

quin et addit ipsum *veram et totalem obedientiam*, sinceram absque ullâ exceptione et restric-
tione subscriptionem à quatuor episcopis exe-
gisse. Unde sic arguo: illam hæc Constitutione
stabilit Clemens XI doctrinam, quam tri-
buit Clementi IX, et cujus contrariam ab ipso
removet; atqui insufficientiam silentii obse-
quiosi circa Jansenii factum ipsi attribuit, doc-
trinam verò sufficientiæ ejusdem silentii ab eo
removet; ergo, etc.

2º Testatur Clemens ibidem, « non defuisse,
« nec adhuc desse homines veritati non acquie-
« scentes, qui variis distinctionibus seu potiùs
« effugiis Ecclesiam turbantes, tum Clemen-
« tis IX, tum Innoc. X Brevia in erroris sui
« patrocinium advocare, temerario planè ausu
« non erubescant. » Adversus tales viros in-
surgit pontifex vehementi oratione, horum se
docet velle occludere effugia, convellere er-
rores, vanas exsufflare distinctiones; sed qui-
nam sunt illi qui Brevia Clementis IX et In-
noc. XII, in suarum probationem distinctionum
afferunt? nullos sanè reperire est, præter illos
qui sufficientiam silentii obsequiosi pro facto
Jansenii ex illis Brevibus nituntur propu-
gnare; ergo hanc sufficientiam reprobat Cle-
mens XI.

Ibidem asserit Innocentium XII, nomine
sensûs obvii quinque Propositionum, intelle-
xisse sensum quem in Jansenii libro habent
propositiones, quive ab eodem Jansenio in-
tentus, ac ab Innoc. X et Alex. VII damnatus
fuit; porrò hæc interpretatio directè adver-
satur, ut patet, doctrinæ silentii religiosi
circa factum Jansenii; ergo, etc.

3º Ex integro recensitis Innoc. X et Alex.
VII Constitutionibus, hæc habet Clemens XI:
« Primò præinsertas Innoc. X et Alex. VII præ-
« decessorum Constitutiones, omniaque et
« singula in eis contenta auctoritate apostolicâ
« tenore præsentium confirmamus, approba-
« mus et innovamus; » sed constat præfatos
pontifices damnasse et voluisse à singulis fide-
libus damnari quinque Propositiones in sensu
Jansenii; ita enim eas ab Ecclesiâ damnatas
fuisse, disertè testatur in suâ priori Constitu-
tione anni 1656 Alex. VII, et in posteriori
anni 1665, promulgatum fuit formularium,
imperataque illius subscriptio, quâ quisque
interposito solemni juramento quinque Propo-
sitiones uti hæreticas in sensu Jansenii purè
ac simpliciter damnat ac rejicit; ergo reno-
vando prædecessorum suorum Constitutiones,
Clemens XI vult ut omnes fideles damnent

corde et animo ipsum Jansenii sensum; ac proinde insufficiens judicavit silentium religiosum circa dogmaticum Jansenii factum.

4° Non solum renovat idem pontifex predecessorum suorum Constitutiones, verum etiam ipsas à variis adversariorum distinctionibus seu potius effugiis vindicat; ac postmodum sic decernit: « Ille nostrà perpetuò valiturà Constitutione, obedientiæ, quæ præ insertis apostolicis Constitutionibus debetur, obsequioso illo silentio minimè satisfieri; sed damnatum in quinque præfatis propositionibus Janseniani libri sensum, quem illarum verba præ se ferunt, ut præfertur, ab omnibus Christi fidelibus ut hæreticum, non ore solum, sed et corde rejici, ac damnari debere..... declaramus, decernimus, statuimus et ordinamus. » Non potuit certè pontifex prætersam religiosi silentii sufficientiam significantioribus verbis explodere. Scilicet expressè declarat hanc suà perpetuò valiturà Constitutione, ad veram christiani hominis obedientiam constitutionibus apostolicis debitam, necessariò requiri, ut ille non ore solum, sed et corde rejiciat ac damnet ut hæreticum Janseniani libri sensum; ergo, vi illius definitionis, tenetur quisque fidelis ad credendum, hæreticum esse Jansenii sensum; ac proinde, etc.

5° Ibidem decretoriè pronuntiat Clemens XI, « non alià mente, animo aut credulitate formulario subscribi licitè posse, nisi damnatus in quinque propositionibus Janseniani libri sensus, non solum ore, sed et corde rejiciatur ac damnetur; » ex hac autem definitione hoc invictum exurgit argumentum: Ecclesia præcipit vi bullæ Alexandrinæ, ut omnes quicumque illi sint fidelium magistri subscribant formulæ prædictæ; nempe ut pia mater certa de fide magistrorum, certa quoque sit de discipulorum fide; atqui Clemens XI expressè pronuntiat neminem posse subscribere formulæ, nisi corde et animo credat sensum libri Jansenii esse hæreticum; ergo omnes credere debent sensum ipsum libri Jansenii esse hæreticum; et istud definit Clemens XI, universà approbante Ecclesiâ.

TERTIUM MOMENTUM. — Tertium momentum deducitur ex acceptatione præsentis bullæ factâ à clero Gallicano in comitiis generalibus anni 1705; tunc enim conditum fuit instrumentum Pastorale ad Constitutionis prædictæ acceptationem, quod suum fecere plerique Gallicanarum episcopi; hæc autem leguntur in præ-

fato instrumento: « Nous avons vu avec une véritable douleur les efforts que des esprits inquiets ont fait depuis quelques années pour renouveler les contestations sur le Jansénisme, et pour affaiblir par des écrits remplis de fausses et dangereuses maximes, l'autorité des Constitutions des souverains pontifes.... Il est vrai qu'on ne vit pas plutôt paraître ces nouveaux écrits dans le diocèse de Paris, qu'ils y furent en même temps condamnés, et ensuite dans quelques autres diocèses. Mais pour ôter toute occasion de rappeler les erreurs proscrites par l'Eglise..... il fallait que la même autorité qui avait condamné dans la naissance des contestations les cinq Propositions extraites du livre de Jansénius, condamnât encore aujourd'hui les détours et les subtilités que l'on avait inventées pour mettre la doctrine de ce livre à couvert des censures de l'Eglise. Pierre a donc parlé par la bouche de son digne successeur..... sa Sainteté prononce en termes exprès, QUE NE PAS CONDAMNER INTÉRIEUREMENT COMME HÉRÉTIQUE LE SENS DU LIVRE DE JANSÉNIUS, CONDAMNÉ DANS LES CINQ PROPOSITIONS, MAIS PRÉTENDRE QUE LE SILENCE RESPECTUEUX SUFFIT, CE N'EST PAS RENONCER À L'ERREUR, MAIS LA CACHER; CE N'EST PAS OBÉIR À L'ÉGLISE, MAIS S'EN MOQUER..... A ces causes..... nous déclarons que l'on ne satisfait point par le silence respectueux à l'obéissance qui est due aux Constitutions des souverains pontifes Innoc. X et Alexandre VII; qu'IL FAUT S'Y SOUMETTRE INTÉRIEUREMENT, REJETER NON-SEULEMENT DE BOUCHE, MAIS MÊME DE CŒUR, ET CONDAMNER COMME HÉRÉTIQUE LE SENS DU LIVRE DE JANSÉNIUS, CONDAMNÉ DANS LES CINQ PROPOSITIONS. »

Ex his clarè constat, quodnam sit, iudiciis Gallicanis præsulibus, objectum silentii illius obsequiosi, quod velut insufficiens rejicitur à Clemente XI. Non aliud sanè reperiri potest præter factum Jansenii; siquidem non aliud noverant episcopi in Galliis prædicari, non aliud damnaverant eminentiss. Parisiorum antistes, non aliud proscripserant alii episcopi in suis diocesisibus; atqui illud idem est ex præsulibus Gallicanis, quod respuit velut sufficiens Clemens XI, illud idem cum ipso respuunt et illi; ergo, si mens et sensus bullæ ab episcopis efflagitata, ab ipsis repeti debent, ut de facto repetenda sunt, damnata est hæc solemnè Constitutione silentii obsequiosi sufficientia; atque hinc in illius Mandati iudicato conceptis verbis pronuntiant præsules nostri, *non ore solum, sed*

et corde rejiciendum ac dammandum ut hæreticum sensum libri Jansenii, in quinque Propositionibus damnatum. Videantur adhuc epistola encyclica comitiſſorum ad Galliarum episcopos, et epistola ad S. pontificem, in quibus clarius, si tamen fieri potest, eandem adstruunt veritatem. Utraque hæc epistola habetur in novâ collectione Commentariorum cleri Gallicani tom. 4, pag. 598.

Nonnulli fuère episcopi qui aut huic laudato Pastoralis instrumento quædam addidère, aut novum ipsi ediderunt; omnes autem idem prorsus testantur: quædam ex illis excerpta hic retulisse satis sit. Eminentissimus Noallius Mandato encyclico addidit hæc verba: « C'est la doctrine que nous avons déjà enseignée par notre ordonnance du 22 février 1705, et nous avons la consolation de la voir en tout conforme à la Constitution de notre S. Père le pape. » Docuerat autem ille insufficiens prorsus esse silentium obsequiosum pro facto Jansenii; ergo, etc. Ita disertè testatur Jansenianis minimè suspectus auctor in historiâ Casûs conscientiæ tom. 8, observatione duodecimâ in Mandatum ejusdem cardinalis pro acceptione Constitutionis *Vineam Domini*: « M. le cardinal, inquiet, est allé plus loin que le pape. Car en supposant même que le pape impose l'obligation de croire le fait, du moins il est toujours constant qu'il se renferme dans ce fait, et qu'il n'établit aucune maxime générale qui puisse être tirée à conséquence à l'égard des autres faits. Mais M. le cardinal ne se resserre point dans le simple fait de Jansénius: il embrasse tous les faits, et décide, que l'Eglise a droit d'exiger que l'on croie tout ce qu'elle peut décider en matière de faits. »

Illustrissimus le Tellier archiepiscopus Rhemensis idem expressius tradit, his verbis: « La maxime qui borne au seul silence la soumission que l'on doit aux décrets de l'Eglise les plus solennels pour la condamnation des livres..... restreint l'étendue de l'obéissance due à l'Eglise, et en altère la sincérité; à la faveur de ce principe, chaque particulier se mettrait en droit de préférer son sentiment à celui de l'Eglise, et se croirait par l'effet d'une présomption insupportable, l'arbitre souverain du sens des livres et des écrits en matière de religion; avec les déguisements de cette trompeuse doctrine, bien loin de renoncer à l'erreur, on la cacherait; on couvrirait le mal, et on ne le guérirait point; on se jouerait enfin de l'Eglise au lieu de lui

« obéir. Son autorité et ses lumières n'ont-elles pas assez de force pour déterminer à la soumission intérieure même les plus savants Theologiens? » Hactenus illustriss. archiepiscopus, quibus non modò docet damnatum fuisse à Clemente XI obsequiosum silentium circa factum Jansenii, sed et invictè confutantur quæ speciosa magis in illius patrocinium ab adversariis allegantur; deinde totidem verbis concludit, corde et animo dammandum esse ut hæreticum libri Jansenii sensum, quem quidem sensum ipsamet quinque Propositionum verba præseferunt.

Illustrissimus Castrensis in judicato sui Mandati sic pronuntiat: « Nous déclarons que pour satisfaire à l'obéissance qui est due aux Constitutions des souverains pontifes Innoc. X et Alex. VII, il ne suffit pas de s'y soumettre seulement pour ce qui regarde le dogme, en gardant un silence respectueux sur le fait de Jansénius, mais qu'il faut rejeter de cœur comme de bouche, et condamner comme hérétique le propre sens de cet auteur, qui a été condamné dans les cinq Propositions, sans recourir à cette fameuse distinction du fait et du droit, qui n'avait été inventée que pour éluder la force des Constitutions, et qui, si elle avait lieu, pourrait servir de prétexte pour défendre les plus mauvais livres. » Non poterat clariùs ille præsul figere objectum silentii obsequiosi quod hæc Constitutione insufficiens declaratur.

Mons Pessulanus et Sanitiensis episcopi idem declarant in suis Mandatis pro acceptione dictæ bullæ *Vineam Domini*: in his leguntur decretoria hæc verba: « Nous déclarons que l'on ne satisfait point par le silence respectueux à l'obéissance qui est due aux Constitutions des souverains pontifes Innoc. X et Alex. VII; qu'il faut rejeter non seulement de bouche, mais même de cœur, ET CONDAMNER COMME HÉRÉTIQUE LE SENS DU LIVRE DE JANSÉNIUS CONDAMNÉ DANS LES CINQ PROPOSITIONS. »

Tandem, ut cæteros omittam, episcopus S. Pontii, unus ex novemdecim tempore quatuor episcoporum et Clementis IX, solus ex illis superstes, sic suam absolvit instructionem præsentis bullæ occasione datam: « Je suis persuadé que les vingt-deux évêques étaient... si remplis de respect pour le S.-Siège, que s'ils étaient en vie, ils recevraient aussi bien que moi la bulle de N. S. P. le pape, où il

« ne s'agit d'aucun dogme, mais seulement du
« fait de Jansenius. Je reçois donc, » etc. Sic
ille dum vult bullâ *Vineam Domini*, non fuisse
generatim definitum quo motivo teneantur fi-
deles assentiri definitionibus Ecclesiæ circa
facta, agnoscit tamen expressè ab illâ exigi
internum mentis assensum pro facto Jansenii.

QUARTUM MOMENTUM. — Quartum istud mo-
mentum repetitur ex querelis defensorum Jan-
senii; ubi enim pervulgata fuit bulla, eam dic-
teris lacessere, ac cavillationibus variisque
effugiis eludere conati sunt; ut quid autem
ista agendi ratio? an ita reclamassent, nisi
ipsis persuasum fuisset dictâ Constitutione
obsequiosum silentium circa Jansenii factum
specificè damnari.

Has omnes Janseniorum querelas et expo-
sitiones disseminavit in suâ Casûs conscien-
tiæ historiâ, præsertimque tom. 6 anonymus
auctor jam multoties appellatus. Sic paragr.
27: « Il est certain que sous un autre pape
« moins prévenu et moins partial pour les Jé-
« suites, les choses se seraient passées ainsi; »
id est, non fuisset lata Constitutio. Paragr.
28: « La bulle ayant été envoyée en France,
« ... on ne parut convenir que d'une seule
« chose, c'est qu'elle était obscure et ambiguë,
« et que depuis le commencement jusqu'à la
« fin, on y voyait des marques de la préven-
« tion et de la passion des Molinistes qui l'a-
« vaient sollicitée; » et infra, n. 50: « On
« ne voyait dans cette nouvelle Constitution
« aucune ombre d'un jugement canonique; il
« n'y paraissait point qu'on eût écouté per-
« sonne, qu'on eût rien examiné, qu'on eût
« rien éclairci. On y voyait seulement beau-
« coup d'injures et de malédictions prononcées
« en l'air contre des personnes qu'on n'avait
« convaincues d'aucune erreur.... Une autre
« réflexion était que la bulle renfermait plu-
« sieurs clauses insolites et contraires à la doc-
« trine de l'Eglise de France, etc. » Hæc ille,
sicque mentitur iniquitas sibi; etenim se sub-
dit suosque exhibet subditos Constitutioni la-
tæ, violatis omnibus canonum legibus ac for-
mis, læsis Ecclesiæ Gallicanæ juribus, læsâ et
illius libertate. Verùm si lex est informis et
iniqua, cur ei se subdunt? si justa, si verita-
tem docet, cur conqueruntur?

Deinde contestantur latam fuisse bullam ab
homine Jesuitis prorsus devoto, illam ab ini-
tio ad calcem se prodere velut apertum Molinistæ
factionis fortum; ergo damnat velut in-
sufficiens silentium obsequiosum pro facto

Jansenii; hæc enim damnatio votorum summa
erat Jesuitis et episcopis quod sub nomine
Molinistarum traducere non dedignatur anony-
mus auctor; ac proinde et ipsi Janseniani,
ipsismet fatentibus, ore, corde et animo tenen-
tur damnare Jansenii librum. Sic sibi contra-
dicunt, dum obsequium pollicentur, et legis
æquitatem vellicant; scilicet lege latâ in illam
insurgere timuerunt, nec cordis dolorem, et
ex eo profluentes gemitus abscondere value-
runt; hinc querelæ sociantur obsequio, obse-
quium fundatur variis in effugiis genuinum
bullæ sensum omninò evertentibus.

Multò candidiùs locutus est auctor anonymus
antea citatus, libro cui titulus: *Apologeticus
Jansenii*, parte 2, cap. 10. De istâ Clementis
XI bullâ agens, sic contubernalia suos Janse-
nianos compellat: « Ne, quæso, claudamus
« oculos ad perspicuam lucem; ne cavillemur
« vitiligationibus insulsis ac frigidis; fateamur
« mala gentis nostræ; et quoniam vulnus ca-
« pitis, erumpente per omnes fascias sanguine,
« diutius celari non potest, missis ambagi-
« bus dicamus ingenuè quod habet res... Quid
« æmulatorum nostrorum victorias extenuare
« nitimur... nobis per rancida et obsoleta
« diverticula inutiliter oblectantibus?... Pro-
« fectò cuncta hætenùs ad votum adversario-
« rum nostrorum succedere; et Molinæ eve-
« hendo, deprimendoque Augustino, extre-
« mam quasi manum hæc Clementis XI, Con-
« stitutione appositam esse, maturus harum
« disceptionum arbiter satis superque capiet. »
Sic ille; subinde adductis disertissimis Clemen-
tiæ Constitutionis verbis probat, genuinum
Jansenii sensum hæc bullâ, confixum fuisse;
et paucis interjectis, sic pergit: « Si ergo per-
« petuemus adhuc tricari, quis sit ille damna-
« tus propositionum sensus, et illius clario-
« rem explanationem à Romanâ curiâ postu-
« lare; nonne jure meritissimo, ut importuni
« arcendi sumus? nimirum qui jamdudum
« quæsitus est sensus, in ipso libro ad quem
« mittimur, omnibus qui tantum latinè cal-
« lent, instar jubaris meridiani splendet et
« radiat. »

Denique cap. 7, sub finem, sic rursùm de
Clementis XI Constitutione loquitur: « Sed
« quid ego hisce argumentationibus legentium
« aures lasso, cum jam denique Clementem
« XI expressè ac dilucidè declarantem habea-
« mus, propositiones IN IPSOMET OBVIO SENSU,
« QUEM IN JANSENI LIBRO HABENT, fuisse à suis
« prædecessoribus condemnatas? Neque enim

« certior nobis alius in orbe christiano testis
« adiri potest, per quem eorundem præde-
« cessorum vera mens Ecclesie catholice in-
« notescat. » Non potuit auctor ille clarius ac
vehementius genuinum Constitutionis Clemen-
tis XI sensum demonstrare contra vanas Jan-
senianorum cavillationes.

Atque hinc idem, aut si quis alius e Jansenianis procacissimus scriptor dictam Constitutionem toti Ecclesie denunciare veritus non est, quod nempe per eam omnia suorum propugnacula funditus everti clare ac perspicue cernebat; sic enim loquitur in proteivo illo scripto cui titulus : *Denuntiatio solennis bullæ Clementinæ*, etc. : « Clementina Constitutio, « Alexandrinam definitionem renovans, simul « vias omnes intercipit, et effugia obstruit, « quibus Ypresium antistitis patroni hactenus, « sive ipsam Alexandri bullam in mitius tra-
« here, sive gratiam divinam virtute sua QUÆ-
« CUMQUE VOLUERIT efficientem, à damnatione « pontificiâ eripere satagerunt... FACTI ET JU-
« RIS quæstio, quâ viri celebres doctrinam sa-
« nam hactenus servabant incolumem, per « Clementem rejecta, abolita, exsufflata est; « silentium obsequiosum æterno silentio sepe-
« liendum, concertatio de sensu obvio, quem « ipsamet propositionum verba præ se ferunt, « evanuit, excessit, evasit. Ipsemet individuis « Janseniani libri sensus interno abnuit ut « hæreticus proscribendus est, nec ore solum, « sed corde dammandus; et qui aliâ persua-
« sione famosæ formulæ licite subscribi posse « autumat, impudentiâ teter, naturali hones-
« tate orbis, et christianâ sinceritate exutus, « te, ô sancta mater ! jurejurando decipit ac « deludit. » Vides quàm rectè ostendat auctor Clementinâ Constitutione genuinum ac legitimum Jansenii sensum damnatum fuisse, omniaque diverticula quibus elabi conantur Jansenianis fuisse prærepta. Consuli potest erudita epistola quam circa hanc denuntiationem ad Quesnell. scripsit illustriss. archiepisc. Cameracensis.

QUINTUM MOMENTUM. — Quintum et ultimum momentum desumitur ex effugiis quibus Janseniani nituntur ostendere se nullatenus hanc Constitutione fuisse damnatos; sed quàm fuit tam frustraneos esse eorum conatus in promptu est ostendere. Omnes horum argutias summo collegit studio anonymus pluries citatus tom. 6 Historiæ Casus paragr. 28; præcipuas ac speciosas magis hic referemus ac solvemus.

Aiunt 1^o, quosdam in Galliis extitisse qui eos Romæ denuntiaverint, velut renuentes damnare errores ab Ecclesia in quinque Propositionibus proscriptos; silentium ergo, quod reprobat Clemens XI, non merum factum, sed jus ipsum spectat. Respondeo : Constat tempore late Constitutionis Clementinæ, à quinquaginta annis aut circiter Jansenianos semper prædicasse se damnare cunctos errores ab Ecclesia proscriptos in quinque propositionibus; hoc omnibus notum erat; nullus ergo asserere potuit eos nullatenus rejicere errores quinque Propositionum, nec ipsis fidem adhibuisset romanus pontifex; nulla insuper auctoritate evincere valent adversarii hoc Romæ fuisse nuntiatum; et sicut gratis figmenta sua produnt, ita hæc gratis respuuntur. Cæterum etsi prætenderent Jansenii defensores, se sincerè damnare errores in quinque Propositionibus confixos; cum tamen Ecclesia iterato multoties judicio reipsâ damnaverit in quinque Propositionibus genuinam Jansenii doctrinam, hancque proscribere detrectarent Janseniani, meritò ad S. pontificem deferri potuerunt veluti renuentes rejicere errores præcisè ab Ecclesia proscriptos, nec injusta tunc haberi potest accusatio.

Aiunt 2^o, silentium quod à Clemente XI rejicitur, illud est quo mediante non deponitur error, sed absconditur; vulnus tegitur, non curatur; Ecclesie illuditur, non paretur; atqui tale non est silentium quod pollicentur Jansenii defensores, illud siquidem conjungitur cum sincerâ damnatione cunctorum errorum ab Ecclesia rejectorum; ergo, etc. Respondeo negando min.; cum enim Ecclesie definitiones ad sensus alienos detorquentur, subtrahiturque ille solus qui est objectum definitionis; quidquid in contrarium clamitent talis sensus defensores, silentium, non internum mentis assensum promittentes, silentio justè dicuntur errorem tegere non deponere, nec cum sincerâ erroris damnatione conjungitur tale silentium; atqui sic se habet obsequiosum silentium quod circa dogmaticum Jansenii factum prætendunt adversarii; ergo, etc. Colligitur isthæc responsio ex Mandato Pastoralis archiepiscopi Rhemensis pro acceptione bullæ *Vinam Domini*; verba antea laudavimus argumento tertio.

Etverò, si, ut definit Ecclesia, verè hæreticus est proprius Jansenii sensus; qui renuit illum damnare, solumque pollicetur silentium, is verè non deponit errorem, sed silentii pallio

velat et abscondit ; hinc post verba bullæ obiecta , immediatè subjicitur : « Et lata demùm « filiis inobedientiæ via sternitur ad fovendam « silentio hæresim , dùm ipsam Jansenii doc- « trinam , quam ab apostolicâ Sede damnatam « Ecclesia universalis exhorruit , adhuc inte- « rius abjicere , et corde improbare detrectant. » Ex his manifestè patet , silentium quo absconditur ac fovetur error et hæresis , quodque à Clemente XI rejicitur , illud esse quo quis *ipsam Jansenii doctrinam interius abjicere et corde improbare detrectat* ; atqui hujusmodi silentium , ipsissimum est quod obsequiosum ventitant Janseniani ; ergo , etc.

Aiunt 3^o : Eo tandem reducitur romani pontificis Constitutio , ut definiat *ad exhibendam viri orthodoxi obedientiam Constitutionibus apostolicis debitam non sufficere silentium obsequiosum* ; ast hoc ipsum fatentur et agnoscunt Janseniani. Scilicet , inquit illi , Constitutiones apostolicæ duo includunt , jus et factum ; silentium autem pro jure non sufficit , requiritur quippe internus mentis assensus , dogmatibusque definitis fides debetur ; ergo , etc. — Respondeo : Duo quidem includunt Constitutiones apostolicæ , jus scilicet et factum ; juri , non facto debitum esse internum mentis assensum contendunt Janseniani ; Clemens autem XI ipsum etiam factum debere esse objectum hujusce assensus disertè declarat loco citato , his verbis : « Obedientiæ quæ Constitutionibus apostolicis debetur , obsequioso silentio minimè « satisfieri ; sed damnatum in quinquæ Propositionibus Jansenii libri sensum... ab omnibus Christi fidelibus ut hæreticum , non « ore solum , sed et corde rejici , ac damnari « debere ; » ergo Janseniani libri sensus , in quo quæstionem facti reponunt adversarii , ut hæreticus corde damnari debet. Scilicet consentiebant omnes , quinque Propositiones esse hæreticas , supervacaneaque extitisset Ecclesiæ definitio circa istud punctum ; tota quæstio erat , an essent hæreticæ in sensu Jansenii ; negabant Yprensis sectatores ; contendebant cæteri ; hanc dirimere controversiam prædictâ Constitutione intendit R. pontifex. Finitam fuisse litem hoc Ecclesiæ romanæ judicio , intellexerunt episcopi Gallicani , idque constat ex solâ terminorum inspectione , cùm illorum vi teneatur quilibet damnare et corde rejicere sensum Janseniani libri ; ergo definitio cadit in factum , non quòd jus excludat , sed quia de illo consentire videbantur omnes , et tota altercatio movebatur circa dictum Jansenii sensum.

Aiunt 4^o Clementem XI unum definire , alterum verò supponere. 1^o Definit propositiones esse damnandas in sensu quem verba præseferunt ; 2^o supponit sensum propositionum obvium esse Jansenii sensum , quod ante ipsum supposuerant Innoc. X et Alex. VII ; nihil ergo Clementis bulla decretoriè pronuntiat circa factum. — Respondeo , merum istud esse ac vanum effugium ad vim bullæ *Vineam Domini* elevandam propositum. Audiantur cardinales , archiep. et episcopi Gallicani in præfatâ ad regem epistolâ anni 1728 : « Ce n'est point par « supposition que les bulles ont parlé du fait ; « ce n'est point par une simple supposition « qu'elles énoncent que les cinq Propositions « sont tirées du livre de Jansénius , et con- « damnées au sens de son livre. » Idque confirmant ex disertissimo illustriss. Bossuetii testimonio antea laudato , ex epistolâ ad moniales Portus Regii in quâ conceptis verbis asserit : « Alexandre VII a déclaré à toute l'Eglise l'exa- « men exact qu'a fait son prédécesseur Inno- « cent X non seulement du droit , mais du « fait. » Demùm sic concludunt præsules nostri : « C'est cette loi que Clément XI renouvella « par sa bulle de 1705 , et dont il ordonna « l'exécution. Est-il permis de réduire à une « simple supposition , ce qui est l'objet précis « de la loi ? » Nihil certè expressius.

Et verò , Clemens XI hæc ipsâ suâ bullâ totus est ut apostolicas Innoc. X et Alex. VII Constitutiones ex integro confirmet ac renovet ; vult ut formula ab Alex. præscripta purè ac simpliciter subscribatur ; expressè pronuntiat juxta Innoc. XII , propositiones *de ipsomet obvio sensu , quem in Jansenii libro habent* , esse exponendas ; hæcque occasione datâ operâ suggillat distinctionem duplicis ac diversi sensus obvii , unus qui esset relativus ad ipsa propositionum verba , alter verò ad Jansenii librum ; perperam ergo fingunt adversarii , ex merâ suppositione pronuntiâsse Clementem XI , obvium ac damnatum quinque Propositionum sensum , ipsissimum esse Janseniani libri sensum.

Aiunt tandem 5^o , proprium Jansenii sensum cautè discernendum esse à sensu quem putat S. pontifex esse Jansenio proprium ; quem tribuit Augustino Yprensi Clemens XI sensum , ille est hæreticus ; qui genuinus est Jansenii sensus , ille est catholicus , orthodoxus et jugiter extitit intactus , cùm sit ipsemet Augustini sensus , solamque sonet gratiam à se efficacem et prædestinationis gratuitæ doctrinam. Ita subtiliores Jansenistæ. Effugium

istud refert et approbat auctor anonymus Historiæ Casus conscientiæ tom. 7, pag. 40. his verbis : « Équivoque triviale DE SENS DE JANSENII, dont on demande l'éclaircissement depuis soixante ans.... Si on entend la proposition du SENS PUTATIF de Jansenius, elle est fautive, hérétique, et bien condamnée. Si on l'entend du VRAI SENS de Jansenius, elle est plus que probablement vraie, et on ne peut la condamner sans condamner la doctrine de la grâce efficace par elle-même. »

Respondeo 1^o : Protervæ subtilitatis factus est hæc distinctio, *sensus putativi*, et *sensus proprii* : quem putat Ecclesia esse sensum Jansenii, ille reipsâ ipsius est, ut demonstravimus supra, art. 1 hujusce capituli, et ampliùs constabit ex dicendis sequenti capite. 2^o Oculioresne sunt Yprensis sectatores ipsâmet Ecclesiâ, aut ipsine inest ardentior veritatis zelus, probatioque cordis fides? Jam ab octoginta et ampliùs annis conqueruntur Ecclesiam non intellexisse Jansenii librum, et pia mater, sedula veritatis indagatrix, anathemata ingeminat, in eos velut in rebelles insurgit; potestne iterata vibrare fulmina nullâ præviâ veritatis inquisitione? aut ipsam non valetne detegere? absit à quolibet sincero fideli tanta in optimam matrem injuria. 3^o Quoties genuinus ille Jansenii sensus propugnatus fuit, toties fulmine percussus abiit; illum exposuit Baius, et triplici bullâ damnatus fuit; exposuere illum Quesnellius, Arnaldus, Gerberonius et alii plures quos damnârunt episcopi; nusquàm ab Ecclesiâ approbatus, multoties ab episcopis rejectus, is est Jansenii sensus quem ut purum, ut orthodoxum propinant adhuc ejus defensores, qui per fas et nefas eum Ecclesiæ definitionibus, levioribus argutiis subducere conantur. 4^o Summa erat Clementis XI tempore facilitas verum Jansenii sensum dignoscendi; viam paraverat Baius; multiplicatis Ecclesiæ Romanæ definitionibus ac prævio examine latis facilius ad veritatem patebat aditus; eam cuilibet obviam præstabant Jansenii defensores innumeris libellis; ipsa Gallicanos præsertim episcopos, quorum manibus prædicti terebantur libelli, latere non poterat; ipsi tamen cum R. pontifice exigunt ut proprius damnetur Jansenii sensus; ergo, etc. 5^o Tandem duplici duntaxat prætextu niti potest *putativi* à *vero et proprio* Jansenii sensu distinctio; vel non intellectum à summis pontificibus, vel nec adhuc lectum Jansenii librum; at utrumque absurdum perinde est ac

injuriosum meritissimis pontificibus totique Ecclesiæ : quod ex sese patet, invictèque demonstrat auctor anonymus Apologetici pro Jansenio parte 2, cap. 10. Hujus ratiocinium, quod sanè decretorium omninò est, adductis propriis ipsius verbis hic exhibeo : « De priori effugio, inquit, ad librum provoco; qui tantâ perspicuitate, et tam crebrâ dogmatum tradendorum repetitione, denique et tam indissolubili universæ doctrinæ concatenatione conscriptus est, ut illius doctrina hominem sanæ mentis, et tantilli ingenii, nisi quâdam magicâ fascinatione perstrictus sit, haud queat fugere. Quis ergo crediderit, pontificem, (Clementem XI), qui politioris litteraturæ cultor et amator audit, potuisse cæcutire in hauriendo significato libri, qui cunctis obvis, disertus et clarus est? »

Pergit anonymus : « An ergo posteriorem evadendi viam captabimus, ac dicemus ipsum librum Jansenianum à Clemente propriis oculis non inspectum?... Verùm; ut post tot annorum dissidia, post incensam per annos 70 rempublicam christianam, post tam acres conflictationes in hac causâ initas, post millenas scriptiones pro Jansenii innocentia exaratas, post infinitas preces, postulationes, obtestationes, querimonias ad tribunal pontificium de eadem innocentia interjectas, Clemens XI.... Jansenii librum, iis saltem non adeò prolixis locis, quibus de quinque Propositionibus ex professo tractat, nec adhuc legerit ut inspexerit; tam est prodigio et monstrum simile, ut nemo posterorum nobis, non aio id affirmantibus, sed vel jurantibus, crediturus sit. Quis enim benè mentis compos in animum inducere queat suum, ut judex ecclesiasticus, primæ Sedis antistites, supremus inter præsules controversiarum arbiter, post acerrimas 70 annorum lites, de damnato quinque Propositionum sensu.... ad sopiendam momentissimam controversiam illam prosiliat, et illum ipsum non alium quàm Janseniani libri esse definiat, Jansenio non inspecto? »

Et paulò post, utrumque simul effugium impugnans, scitè observat quòd si valerent dicta effugia, « planè nutarent ac labarent omnia, quæ quondam à romanis pontificibus, et quibuscumque præpositis ecclesiasticis, adversus errores planissimos, vel auctores manifestò heterodoxos constituta sunt, aut imposterum statuenda. Quia semper (inquit) valebit exceptio, quòd errores vel scriptores

« illos propriâ indagine non cognoverint , sed
 « mendaci æmulatorum accusatione delatos ,
 « nullâ præviâ examinatione proscripserint...
 « Quid hoc est aliud , quàm universam præci-
 « piendi et obediendi normam , in regno Christi,
 « succisis nervis evertere ac profligare ? » De-
 mum sic concludit : « Exsullemus illa vana
 « effugia ; et pro comperto ponamus , quòd
 « Constitutiones pontificum eâ vi et auctoritate
 « polleant , quâ testimoniis publicis insignita
 « veniunt ; et nisi maturè ut spurie , suppo-
 « sititiæ , vel confictæ publicis vicissim decla-
 « rationibus revocentur , veluti profectæ ab iis ,
 « quorum titulos gestant , existimandæ sint ;
 « nec nisi post diligentem operam , in causâ
 « controversâ adhibitam , fuisse conditæ et
 « evulgatæ . »

Istud Janseniani scriptoris argumentum vali-
 dissimè probat , non sine maximâ absurditate
 negari posse quin Clemens XI legerit et probè
 intellexerit Jansenii librum ; nec proinde quin
 idem pontifex (cum universâ Ecclesiâ quæ ejus
 et præcedentium SS. pontificum circa Janse-
 nismum Constitutiones approbavit) nomine
 sensûs Janseniani verum ac germanum Ypren-
 sis sensum proscripserit.

Ubi obiter observa , non valere Jansenianos
 proprium ac legitimum Jansenii sensum à dam-
 natione eximere , nisi tribuant SS. pontifici-
 bus , cunctisque episcopis , aut stupendam cul-
 pabilemque inertiam , aut sensus planè obtutos
 qui verum Yprensis sensum luce evidentissimâ
 conspicuum deprehendere non potuerunt ; sic-
 que sanctis Dei ministris per totum orbem dif-
 fusis , aut crimen aut crassam ignorantiam
 exprobrant ; nec enim tueri se valent , nisi
 augusto primorum pastorum collegio se vel
 sanctiores vel doctiores exhibeant.

Duo supersunt Jansenianorum effugia quæ
 retulisse , refutasse est. Primum istud est :
 Clemens XI bullâ *Vineam Domini* solemnem
 Clementis IX pacem neutiquàm rescindit aut
 delet , imò potiùs eam renovat ac confirmat ;
 atqui præcipuum Clementinæ pacis fundamen-
 tum fuit distinctio juris à facto , atque reli-
 giosi silentii sufficientia ; ergo , etc. Verùm 1º
 mera est petitio principii , sique in adversa-
 rios retorqueri potest : Illud non approbavit
 silentium Clemens IX , quod improbat Cle-
 mens XI ; atqui , etc. ; ergo. 2º Falsum ex an-
 teditis Clementem IX approbasse merum si-
 lentium circa dogmaticum Jansenii factum.
 3º Si pax Clementina et bulla *Vineam* sibi invi-
 cem adversarentur , deserenda sanè potiùs esset

pax illa , et adhærendum bullæ , quæ , fatentibus
 adversariis , manifesta est totius Ecclesiæ lex.

Secundum sic est : Clemens XI bullâ *Vineam
 Domini* nihil pronuntiat circa infallibilitatem
 Ecclesiæ in factis dogmaticis ; atqui assensus
 interior prudenter exhiberi nequit hujusmodi
 factis absque dictâ infallibilitate ; ergo , etc.
 Verùm quid indè ? Agebatur tunc temporis de
 assensu debito dogmatico Jansenii facto , non
 de motivo hujus assensûs ; non mirum ergo si
 istâ quæstione prætermisâ , priorem duntaxat
 definierit Clemens XI. 2º Vel potest exhiberi
 assensus internus dogmatico facto absque auc-
 toritate infallibili proponente , vel non ; quid-
 quid dixerint , premuntur adversarii. Si pri-
 mum , ergo falsa minor argumenti propositi ;
 si secundum , ergo , cum directè pronuntia-
 verit pontifex , Janseniani libri sensum ab om-
 nibus Christi fidelibus ut hæreticum rejici ac
 damnari debere , exinde sequitur saltem indi-
 rectè pronuntiassè circa Ecclesiæ infallibilita-
 tem in factis dogmaticis. 3º In hujusmodi factis
 dogmaticis cujus subscriptionem exigit Ecce-
 sia , ut in facto Jansenii , tria sunt sedulò dis-
 tinguenda , 1º dogmatici textûs interpretatio ;
 2º ipsius qualificatio ; 3º ejusdem textûs à fi-
 delibus , etiam sub juramento , damnandi aut
 approbandi propositio. Etsi autem absolutè
 supponeretur fallibilis Ecclesia (quod certè
 dici non potest) circa duo priora , nusquàm
 tamen providente Spiritu sancto ullatenùs er-
 rare posset circa tertium ; capitaliter enim Ec-
 clesiæ sanctitati repugnat , quòd possit sub
 anathematis poenâ universos adigere fideles ad
 damnandum , interposito insuper juramento ,
 textum qui foret orthodoxus , aut vice versâ
 approbandum qui foret hæreticus. Verùm de
 his in tract. de Ecclesiâ , ubi de factis dogmaticis.

Cætèrùm , antequàm præsentem absolvamus
 controversiam , observa 1º , definitionem de
 insufficientiâ silentii religiosi circa proprium
 ac naturalem Janseniani libri sensum , esse pro-
 priè dictum judicium dogmaticum , circa veram
 juris quæstionem , circa quam neutiquàm errare
 posse Ecclesiam , concors est orthodoxorum
 doctrina.

Observe 2º , quas tradiderant regulas Alex.
 VII et Innoc. XII , ad discernendum proprium
 ac genuinum quinque Propositionum sensum
 ab Ecclesiâ damnatum , paucis his verbis in suâ
 Constitutione complexum fuisse Clementem XI.
 Asserit 1º , quinque Propositiones ex memorato
 libro Jansenii excerptas , in sensu obvio , quem
 ipsamet propositionum verba exhibent , ac præ se

ferunt, damnatas fuisse; en regula ab Alex. VII proposita in utrâque suâ Constitutione annor. 1656 et 1665. Assertit 2^o, obvium illum propositionum sensum intelligendum esse, *de ipso-met obvio sensu, quem in Jansenii libro habent, quive ab eodem Jansenio intentus, ac à præfatis Innoc. X et Alex. VII damnatus fuit*; en altera regula ab Innoc. XII tradita in Brevibus annor. 1694 et 1696, de quibus antea diximus.

Observa 3^o, ex his sequi, iudice ipsâmet magistrâ veritatis Ecclesiâ quæ Clementis XI Constitutionem approbavit, proprium ac naturalem quinque Propositionum sensum, reipsâ eundem omninò esse cum proprio et naturali Janseniani libri sensu, seu doctrinâ in eo expressâ.

Jam quæ in hocce articulo paulò uberius dicta sunt, sic paucis contraho.

Bullâ *Vineam Domini* iudicium est irreformabile, dogmaticum, supremum totius Ecclesiæ, ab illius capite et centro dimanatum, cunctorum orbis episcoporum consensu probatum et firmatum; hoc certum, hoc inconcussum manere debet; ita cuncti docent episcopi: ita tenent omnes fideles; ita prædicant ardentiores etiam Jansenii sectatores. Atqui hæc bullâ definitum est insufficiens esse silentium obsequiosum pro dogmatico Jansenii facto, et quemlibet fidelem teneri ad corde rejiciendum libri Janseniani sensum; istud demonstravimus toto præsentis articuli decursu: 1^o ex scopo et occasione bullæ; 2^o ex ipsius tenore ac contextu; 3^o ex iudicio Gallicanorum præsumptam dictam bullam acceperant; 4^o ex querelis ac dictariis quibus eam impetere ac lacessere non cessârunt; 5^o ex vanitate effugiorum quæ ipsi excogitarunt ut prætensum eidem bullæ obsequium suæ possent conjungere doctrinæ; ergo, aut exeundum de Ecclesiâ, aut corde et animo damnandus proprius et naturalis libri Jansenii sensus; sicque vel unico hocce pontificio diplomate finita est controversia quæ tamdiu Gallicanam divexat Ecclesiam.

CAPUT III.

De systemate Jansenii.

Integrum hic Jansenii systema exhibere, nec exigit scopus, nec vult animus, nec sinit nimia jam præsentis voluminis moles. Illud coniderabimus duntaxat relativè ad famosos quinque Propositiones, exponemusque 1^o, principia hujusce systematis; 2^o agemus de illius consecrariis, seu de famosis quinque Propositionibus; 3^o discrimina systematis Jansenii a cæteris sys-

tematibus paucis aperiemus. Cæterùm quæ hic prætermittere cogunt præfixi hujusce historiciæ partis limites, suis deinceps locis expendemus in dogmaticâ parte, præsertim ubi de gratiâ ex sese efficaci.

ARTICULUS PRIMUS.

De principiis systematis Jansenii.

Universam Jansenii doctrinam circa gratiam, ad unum delectationis relativè victricis caput, revocandam esse, res est certissima, idque constanter affirmârunt quotquot hætenus extitêre Jansenii sectatores; hoc unum ipsi palmare dogma est, cum quo cætera nexu indissolubili cohererent ac connectuntur; quo stante, stant; quo everso, evertuntur. Capitale istud principium nunc operosius expendendum occurrit ac enucleatius evolvendum; quod ut certo ordine perficiatur, plurima nobis sunt investiganda.

Inquiremus itaque 1^o, quid sit in mente Jansenii delectatio; 2^o quotuplex sit; 3^o quænam ejus necessitas; 4^o quæ sit ipsius virtus ac modus agendi; 5^o quæ vires voluntatis sub delectatione relativè victrici; seu de famosâ Jansenianorum distinctione potentiæ in absolutam et relativam; 6^o an delectatio victrix ac superior totius Janseniani systematis basis sit ac fundamentum; 7^o tandem, quod ex præcedentibus colligetur, contractam ejusdem systematis delineationem exhibebimus. Singula distinctis titulis prosequemur.

§ 1. *Natura delectationis.*

Delectatio ex Jansenio lib. 4 de gratiâ cap. 2, est vitalis et indeliberatus animi motus, quo voluntas fertur in aliquod objectum tanquàm sibi conveniens ac jucundum. Ita totidem fermè verbis loco mox citato: « Delectatio cælestis, » inquit, secundum Augustini mentem, est « actus vitalis et indeliberatus animæ, et quidem amoris ac desiderii, præcedentis consensum ac delectationem illam quæ et quies animi et gaudium dicitur. »

§ 2. *Divisio delectationis.*

Delectatio generatim dividitur 1^o in indeliberatam et deliberatam. Indeliberata, ea est quæ rationis advertentiam et consensum voluntatis antevertit; deliberata verò illa dicitur, quæ utrumque includit aut sequitur. Scilicet, juxta Jansenium cap. 11, libri 4, de gratiâ, indeliberati primùm motus in bonum jucundum, qui sunt ipsissima indeliberata delectatio, deliberatos subinde produciunt, in quibus delectationem deliberatam sitam esse contem-

dit. Dividitur 2^o in cœlestem et terrenam; illa ad bonum trahit ac sollicitat; ista verò ad malum. Dividitur 3^o in victricem, quæ plenum ac perfectum voluntatis consensum exprimit; et victam, quæ consensu illo pleno ac perfecto privatur, licet deliberatum quidem sed imperfectum semper obtineat. Dividitur 4^o in victricem absolutè; quæ consensum voluntatis ex naturâ suâ miris et ineffabilibus modis obtinet (hæc autem non arridet Jansenio); et victricem relativè, quæ eundem obtinet præcisè obgraduum superioritatem. Dividitur 5^o in delectationem intellectualem, et sensibilem. Intellectualis seu spiritualis, est motus animi indeliberatus in objectum sibi conveniens, quatenus solâ perceptione attingitur; eaque delectatio in superiori duntaxat animæ parte residet. Sensibilis verò, ipse est indeliberatus motus in objectum sibi conveniens, prout quâdam saltem ratione sensibile exhibetur; isque motus in solâ inferiori parte jacet, in eaque vires suas exerit.

Circa capitalem hanc in systemate Janseniano delectationis divisionem, adverte 1^o, motum indeliberatum in objectum conveniens solâ pereceptione apprehensum, esse quid omninò idem cum amore indeliberato; isque dicitur delectatio, quòd facillimè moveatur voluntas circa ea objecta in quæ motibus indeliberatis fertur; de illâ intellectuali ac spirituali delectatione exponunt Janseniani celeberrimum istud S. Augustini pronuntiatum, in caput 5 Epistolæ ad Galat.: *Quod amplius nos delectat, secundum id opemur necessum est.*

Adverte 2^o, declarationem intellectualem re distinguì, et posse imò et quandoque reipsâ separari à delectatione sensibili; quod constat, tum experientiâ justorum, in quibus ardentissimus officii amor sæpè conjungitur cum ariditate, summoque tædio; sic Apost. de seipso loquens, 2 Cor. 1, sic habet: *Supra modum gravati sumus supra virtutem, ita ut tæderet nos etiam vivere....* Tum quia vividior est aliquando amor et motus indeliberatus in objectum conveniens, quàm sensibilis delectatio ex eo percepta.... Tum denique quia vel intellectualis et sensibilis delectatio sunt duæ distinctæ ac disparatæ modificationes; vel sensibilis est modificatio delectationis intellectualis. Si primum, possunt esse sine se invicem, ac proinde re distinguuntur; si secundum, cum res modificata possit esse absque modo, intellectualis delectatio poterit esse absque sensibili; ac consequenter rursùm ab ipsâ distinguitur.

Adverte 3^o, in cœlestem cum spirituali, nec terrenam cum sensibili delectatione esse promiscuè sumendam. Cœlestis delectatio, est supernaturalis et indeliberatus boni et recti amor; is autem intellectualis est et spiritualis ut plurimum delectatio; ast quandoque etiam sensibilis est, juxta illud Psalmi 83: *Cor meum et caro mea exultaverunt in Deum vivum.* Terrestris similiter delectatio, inordinatus est et indeliberatus creaturæ amor; is autem, etsi ut plurimum sensibilis, quandoque tamen potest esse spiritualis; talis fuit, juxta Jansenium lib. de Grat. primi hominis et Angelorum, tentatio quâ primus homo et Angeli ex nimia propriæ excellentiæ complacentiâ peccarunt. Etverò delectationem cœlestem quandoque etiam sensibilem esse, clarè docet Jansenius lib. 6, cap. 5, his verbis: « Indeliberati illi (cœlestis et carnalis delectationis), motus, secundum Augustini mentem, non in ipso mentis apice qui illis supereminet, sed in inferiori ejus quâdam parte tumultuantur, ipsumque voluntatis apicem ad se, sive in malo sive in bono blandiendo, aut aliter afficiendo trahunt, aut retrahunt. »

Supra adductas delectationis divisiones sæpius inculcat Yprensus libris de Gratiâ Christi, præsertim libro 4, De indeliberatâ sive cœlesti, sive terrenâ delectatione hic duntaxat sermo; dicturi postmodum ex professo de delectatione deliberatâ in secundâ parte hujusce tractatûs.

§ 3. *Necessitas delectationis.*

Circa necessitatem delectationis tria docet Yprensus. Docet 1^o, voluntatem humanam per primum Adami peccatum amisisse activas liberi arbitrii vires, quibus pro nutu suo ad alterutram partem circa actiones moraliter bonas aut malas (nam respectu actionum merè naturalium, uti pedem vel manum movere, activam indifferentiam agnoscere videtur lib. de Grat. primi hominis et Angel. cap. 9) sese flectere ac determinare possit. Istud est palmare Jansenii principium, quod passim inculcat, in primis lib. 2 de Grat. Christi cap. 3, ubi sic loquitur: « Unde liquet quamdiu Angeli et primus homo in illâ felici arbitrii libertate steterunt, penès ipsorum arbitrium fuisse nutum illum supremum quo voluntas in hanc vel illam partem, sive benè, sive malè volendo flecteretur; nutus enim ille liberrimus erat voluntati. » Et paulò post: « Hic nutus, hic flectus, seu ista suprema nuendi flectendique potestas, quâ sese utrinque in bonum

« aut malum humanâ libertate ac dominatione
« librabit, supplicio non minus cadentium
« quam stantium renumeratione pro suis amissa
« est. » Ibidem cap. 12 : *Vultus*, inquit, *in*
ipsis volendi cardinalibus inflictum est; idem re-
petit lib. 5, cap. 2, lib. 7, cap. 2, etc.

Et certe, lib. 4 de Grat. Christi, cap. 7, contendit Jansenius Adamum peccavisse absque ulla præviâ delectatione indehberatâ; nos verò non posse peccare, nisi tali delectatione provocemur ad peccatum; atqui ad hanc absurditatem non aliâ ratione ductus fuit novus ille gratiæ doctor, quam quia arbitrabatur voluntatem in præsentî statu in poenam peccati originalis orbatam fuisse virtute sese flectendi ad oppositâ; ergo, etc.

Docet 2°, in locum liberi arbitrii successisse duplicem delectationem, terrenam scilicet, et cœlestem, quæ pro diversis gradibus suis, voluntati conferunt diversos gradus potentiæ ut sese flectat ac determinet; adeo ut præsentè debili duntaxat et infirmâ delectatione, aliquam sed debilem habeat voluntas virtutem sese determinandi, quæ necessario vincitur nisi ope delectationis superioris invicta et insuperabilis evadat; secundum hoc doctrinæ Jansenianæ caput manifestè constabit ex testimoniis paragrapho sequenti referendis.

Docet 3°, tantæ nunc necessitatis esse victricem delectationem, ut absque illâ voluntas veluti torpens et mortua nihil omnino sive boni sive mali amplecti possit. Istud ex primo Jansenii principio mox exposito, clare sequitur; idque infinitis propemodum locis tradit Yprensis: « Ex quo fit, inquit lib. 4 de Grat. cap. 7, « ut si illa desit, voluntas veluti torpens ac « mortua nihil omninò boni amplecti possit; « quemadmodum etiam è contrario, nihil in « carnalibus diligendis prosequi potest, nisi « quod eam antea delectaverit. » Et paulò post: « Delectatio illa est animo instar olei aut « pinguedinis ejusdam, sine quâ cardo vo- « luntatis torqueri aut moveri nullo pacto ad « bonum potest. »

Plura in re apud Jansenianos certâ et constanti, quam eorum nullus negavit, referre testimonio planè superfluum foret.

Quæres quas in mente Jansenii vires per peccatum amiserit voluntas: quasve ex delectatione recuperet ac mutuetur. Antequam respondeam, adverte 1°, variis modis sumi posse voluntatis vires. 1° pro merâ duntaxat ac passivâ in utramque partem flexibilitate, qualis est bilancis flexibilitas, quæ in eam semper ac

necessariò inclinatur partem in quâ majus aggravat pondus; 2° pro viribus activis vitalibus physicis ac merè mechanicis; seu, ut loquitur Jansenius loco mox citato, pro viribus torpore quodam et languore otiosis ac veluti mortuis, nec ad actum, ut ita dicam, applicabilibus nisi virtute superioris delectationis; 3° pro viribus activis formaliter sumptis, hoc est ad actum applicabilibus absolute duntaxat, nullo scilicet præsertim ex adverso titillantî hic et nunc majoris delectationis; 4° pro viribus illis activis formaliter sumptis, et ad actum applicabilibus etiam relative ad circumstantias et ad oppositam actualem hic et nunc prementem delectationem; 5° sumi potest pro viribus activis formaliter simul et electivis; seu, pro virtute activâ, incompletâ tamen in actu primo, quâ voluntas ad alterutram partem sese flectere, movere ac determinare potest; talis est facultas amandi vel non amandi Deum ut auctorem gratiæ in homine nondum gratiâ instructo; hæcque coincidere videtur cum potentiâ obedientiali activâ; 6° sumi iterum potest pro eadem facultate electivâ in actu primo completâ, uti facultas amandi vel non amandi Deum in voluntate, cum illa gratiâ sufficienti donatur; 7° tandem pro facultate electivâ tum in actu primo, tum in actu secundo completâ; sicuti potentia ad eundem amorem, in homine gratiâ efficaci instructo.

Adverte 2°, duplicis generis esse delectationem, nempe superiorem seu magnam; et inferiorem seu parvam.

Adverte 3°, duplicis generis distinguendam esse potentiam, absolutam scilicet et relativam; utriusque notionem ex professo dabimus paragr. 5. His positâ,

Respondeo 1°, Jansenium in præsentî statu ultro agnoscere vires independentes à delectatione primo et secundo sensu. Respondeo 2°, non admittere, nec in suo systemate agnoscere posse vires activas tertio et quarto sensu independentes à delectatione. Respondeo 3°, eo in systemate voluntatem ex delectatione mutare vires formaliter activas; absolutas quidem ex delectatione inferiori; relativas verò ex relativè et per gradus superiori; ast vires vere et proprie electivæ, seu activæ ac relative flexibiles in utramque partem extinctæ omninò fuere in systemate Jansenii; neque illas ex delectationibus repetere potest voluntas; namque potentia relativa, ut mox dicemus, semper et necessariò est cum actu conjuncta; et omni

potentia quæ non est cum actu conjuncta, nequidem cum ipso conjungi potest.

Constant hæc ex dictis, et ampliùs patebunt ex dicendis præsertim paragr. 5.

Unum hic superest observandum, non ita sibi constare Jansenium, unde repetenda sit utriusque delectationis necessitas. Lib. 4 de Grat. Christi, cap. 9, ex professo docet et probat, eam non ex naturâ voluntatis, sed ex ejus peccato proficisci; verùm sui immemor, lib. 7, cap. 2 et 5, contrarium tradit; docet si quidem illud quo volitiones sunt in nostrâ potestate, esse quid voluntati superadditum: « Nam si nihil aliud est (ait citato cap. 2), præter ipsam potentiam voluntatis, nulla ratio est cur beati Angeli, et (quod absit) Deus ipse jam peccare non possit.... Dico igitur, aliquid omninò esse præter nudam facultatem voluntatis; quod eam facit velle vel nolle, quo omninò absente fit impotens, præsentè potens, sive ad bonum, sive ad malum. » Quid sit autem illud voluntati superadditum, statim aperit Yprensensis sequenti cap. 5, his verbis: « Nihil aliud existimamus quam.... delectationem, seu delectabilem objecti complacentiam, esse id quod tantam potestatem in liberum arbitrium habet, ut cum faciat velle vel nolle, seu, ut eâ præsentè actus volendi sit reipsâ in ejus potestate, absente non sit. » Cæterum, quidquid sit de illius sententiâ, sufficit ut in præsentî rerum infelici conditione utramque delectationem ut absolutè necessariam eligat.

§ 4. Virtus et modus agendi delectationum.

Modus agendi delectationis in systemate Jansenii relativus est et quasi mechanicus; unde 1º, voluntas semper sequitur majoris delectationis impulsus; 2º necessariò illum sequitur; 3º necessitas illa non est absoluta, sed merè relativa.

Primum expressè docet Jansenius lib. 8 de Grat. Christi cap. 2: « Delectatio victrix, inquit, quæ Augustino est efficax adjutorium, relativa est. Tunc enim est victrix quando alteram superat: quòd si contingat alteram ardentiorè esse, in solis inefficacibus desideriis hærebit animus, nec efficaciter unquam volet quod volendum est. » Dixerat superiùs lib. 4, cap. 10: « Cum nulla sit gratia operandi præter istam suavitatem Dei, nisi ista tanta fuerit, ut ei delectationes rerum creaturarum cesserint, vel peccabitur, vel alternante delectationum fluctu, in medio

remanebitur; sin autem ista superaverit, jam sine dubio benè voluntas operabitur. »

Secundum non minus constanter tradit: « Quando, inquit lib. 4 de Grat. cap. 6, cum terrenarum rerum tentationibus ac delectationibus dimicamus, nisi major fuerit delectatio cœlestis quam terrena.... fieri non potest quin propriæ voluntatis infirmitate vincamur. » Et cap. 9: « Conflictus ille delectationum sopiri non potest, nisi altera alteram delectando superaverit... Quod enim ampliùs delectat, secundum id operemur necesse est; vigente enim delectatione carnali, impossibile est ut virtutis ac honestatis consideratio prævaleat. » Similia repetit infinitis aliis in locis.

Observanda hic manet relativa delectationum mechanica, quæ superior trahit et quidem necessariò voluntatem, quæ inferior inefficacia tantum elicit desideria, ut ait citato lib. 8, cap. 2, quòd si æqualibus militent viribus, jam in medio hæret animus in neutram partem inclinatus. Bilancem diceres stateram, modò declinantem, modò assurgentem, aut utroque latere æquè suspensam, juxta cæcas mechanicasve staticæ leges, pro auctis vel imminutis respectivis ponderum viribus.

Tertium, nempe necessitatem quam imponit delectatio non esse absolutam sed relativam, constat tum ex modo agendi delectationis, qui juxta Jansenium relativus est; tum ex jam dicendis de potentiâ absolutâ et relativâ.

§ 5. De potentiâ absolutâ et relativâ.

In hac famosâ distinctione totius Janseniani systematis quasi medulla et ultimæ veluti fibræ reconduntur; hæc fecundissima radix æquivocationum omnium, quibus catholicorum argumenta declinare, ac Ecclesiæ censuris subducere se, verbis in speciem catholicis, conati sunt Jansenii defensores: juvat ergo de hæcæ distinctione paulò uberius pertractare.

Observandum itaque 1º, in systemate Jansenii duplicem sedulò distinguendam esse, sive ad bonum, sive ad malum, potentiam; absolutam scilicet, et relativam. Potentia absoluta est ea quæ delectationi competit attentâ ejus naturâ, et præcisè subjecti circumstantiis, maximè gradibus adversantis hic et nunc alterius delectationis; seu ea est quæ voluntas actum in se præcisè spectatum potest operari. Potentia relativa ea est quæ competit delectationi, etiam habito respectu ad alteram

hic et nunc ex adverso militantem ; seu est ea quâ voluntas potest actum hic et nunc operari.

Observandum 2^o, potentiam absolutam semper esse ab actu sejunctam, imò nec cum eo hic et nunc conjungi posse ; tum quia gratia quâ datur absoluta illa potentia, à voluntate Dei antecedente procedit, quæ totaliter abstrahit à circumstantiis ; tum quia ex delectatione inferiori oritur, quæ superiorem vincere non potest. E contra verò ex lege contrariorum, potentia relativa semper et necessario cum actu conjungitur ; ipsa siquidem ex voluntate consequente procedit, et ex delectatione superiori quæ inferiorem sibi necessario subijcit.

Observandum 3^o, in eodem Jansenii systemate, superiorem delectationem, eamque solam, veram ac relativam conferre potentiam ad agendum. Hinc 1^o, implicant simul et ex utrâque parte vires relativæ, 2^o in conflictu duarum delectionum æqualium, stat ad utrumque potentia absoluta, nulla relativa ; 3^o illud solum possumus verè quod agimus, et omnis vera potentia est semper cum actu conjuncta ; unde Jansenius promiscuè sumit, simulque confundit hæc verba, *dat posse, dat velle, dat agere*.

Observandum 4^o, multiplici sensu illusorio potentiam dici posse relativam, 1^o in ordine ad præsentem statum naturæ lapsæ ;.... 2^o in ordine ad concupiscentiam generatim sumptam ;.... 3^o in ordine ad concupiscentiam hic et nunc vigentem, quatenus scilicet inferior delectatio cœlestis stat sub ardentissimâ concupiscentiâ, ipsamque suo modo oppugnat, nec inde suarum aliquid virium deperdit ;.... 4^o dici etiam potest relativa in ordine ad vincendam eandem urgentem hic et nunc concupiscentiam, sed remotè tantum et inchoatè ; quatenus scilicet tres gradus gratiæ, v. g., potentiam inchoatè conferunt ad vincendos quinque concupiscentiæ gradus. Hi omnes sensus abusivi prorsus sunt, illusorii ac insufficientes ; nemo enim non videt potentiam merè absolutam, his omnibus sensibus dici posse relativam, vel potentiam his duntaxat sensibus relativam, omnino cum absolutâ coincidere.... 5^o denique multò magis abusivè à nonnullis appellatur potentia relativa, ipsa passiva voluntatis in utramque partem flexibilitas ; vel capacitas boni infiniti eidem insita, quâ fit ut solo bono infinito satiari possit ; vel mera recipiendæ majoris ac superioris delectationis facultas.

Observa 5^a, Jansenianos variis nominibus ac speciosis titulis suam absolutam potentiam insignire ; quæ, ne fraudi sint, pauca ex his, cæteris idem planè significantibus, hic indico. Appellant 1^o, potentiam antecedentem, quia præscindit à circumstantiis subjecti ; 2^o potentiam in sensu diviso, nempe circumstantiarum subjecti ; 3^o potentiam à delectatione inseparabilem ; 4^o potentiam ex se completam, quæ in actum erumperet, nisi opposita concupiscentia fortius obsisteret ; 5^o ut cætera omittam, potentiam expeditissimam, perfectissimam, sufficientissimam, etc., absolutè scilicet non relativè ; ex lege verò oppositorum, potentiam relativam contrariis planè nominibus designant.

His præsuppositis, duo summi momenti occurrunt expendenda, primum, an Jansenius sub inferiori delectatione cœlesti, v. g., absolutam ad opus bonum potentiam agnoverit ; secundum, an etiam admiserit relativam. Hæc ut enucleatius discutiantur, ea sigillatim discutietur.

Utrum Jansenius admiserit potentiam absolutam. — Qui Innocentii X et Alex. VII Constitutionibus debitam præstitisse obedientiam videri volunt, nec tamen à Jansenii systemate quali modò exposuimus recedere, ii potentiam absolutam à Jansenio agnitam fuisse constanter negant ; eo nempe consilio ut ipsi hanc duntaxat potentiam (quæ delectationis relativè victicis systemati neutiquàm adversatur, imò ipsi essentialis est) admittant, eoque nomine à Janseniano systemate alienos sese exhibeant ; contra illos sit

CONCLUSIO. — Jansenius in voluntate inferiori delectatione, v. g., cœlesti instructâ ultrò agnovit absolutam, sensu mox exposito, ad opus bonum potentiam.

Probatur 1^o Conclusio ex ipsomet Jansenio variis in locis. 1^o Disertè assertit lib. 2 de Gratia Christi, cap. 27, « multos divinitus mente collustrari, imò verò et in ipsâ voluntate motibus divinæ gratiæ percelli, qui tamen ab ejus internâ suasionem et inclinationem dissentiant ; » audis voluntatem ex Jansenio dissentire suasioni et inclinationi gratiæ parvæ ; ipsa ergo confert absolutam ad opus bonum potentiam. 2^o Lib. 3, cap. 13, ex quo de verbo ad verbum desumpta est prima propositio damnata, manifestè agnoscit Yprensis potentiâ duntaxat relativâ carere justos de quibus loquitur ; quid enim sibi volunt voces istæ, *justis volentibus et conantibus secundum præsentem quas habent vires ; aliqua Dei mandata sunt im-*

possibilia? nisi illos justos destitui gratiâ quâ præcepta Dei relativè ad concupiscentiam hic et nunc prementem, *possibilia* fiant; etsi in se absolutè eisdem *possibilia* sint vi gratiæ cum quâ adversus oppositam delectationem hic et nunc volunt et conantur. 3^o Idem clarè colligitur ex citato lib 8, cap. 2: « Delectatio victrix, inquit, quæ Augustino est efficax adiutorium, relativa est; tunc enim est victrix quando alteram superat. Quòd si contingat alteram ardentiorē esse, in solis inefficacibus desideriis hærebit animus. » Ergo gratia parva ex naturâ suâ tendit ad uberiores effectum quem haberet, nisi obstaret superior hic et nunc urgens concupiscentia; proindeque per illam verè confertur potentia absoluta. Etverò, quid sunt inefficacia ista desideria? nisi potentia quædam absoluta, quæ propter dominantem oppositam delectationem plenum ac deliberatum obtinere nequit consensum ad quem ex sese tendit ac ordinatur. 4^o Expressè fatetur Jansenius lib. 8, cap. 20, voluntatem superiori instructam delectatione contrarium opus efficere posse: « Quemadmodum, inquit, operatur, simul etiam peccare potest; ita quoque è contrario, qui istâ gratiâ destituitur, et peccandi tentationibus quatitur, potest benè facere. » Ibidem paulò autea dixerat, « perfectissimam peccandi potestatem voluntati inesse, non solum quandò gratiæ delectatione caret, sed etiam quandò intimâ ejus suavitate efficaciter trahitur. » Ex his sic Potentia quâ voluntas superiori instructa delectatione contrarium opus efficere potest, vel est absoluta, vel relativa; nullum datur medium; porrò non est relativa, etiam juxta adversarios; ergo restat ut sit absoluta. 5^o Passim inculcat Yprensus se gratiam parvam admittere; et lib. 3 de gratiâ Christi, cap. 1, Thomisticam gratiam sufficientem admitti posse confitetur; ibidem cap. 3, Molinianam solam aut congruam Suaresianam directè et expressè explodit; ergo, etc.

Probat 2^o ex celebrioribus Jansenii discipulis. Arnaldus in suâ dissert. de Gratiâ efficaci parte 2, art. 4: « Si de aliquo justo, inquit, cui gratia efficax in aliquâ tentatione desit, queratur an sine gratiâ efficaci ad vincendam tentationem necessariâ, quam supponimus ipsi defuisse, tentationem vincere potuerit; tunc ex communi omnium loquendi ratione respondebitur, non quidem absolutè, sed in illâ hypothēsi, sine hac gratiâ non po-

tuisset. » Audis justum illum potuisse absolute tentationem superare, ast non potuisse in illâ hypothēsi, hoc est, relativè ad superiorem concupiscentiæ delectationem.

Utrumque ibidem parte 3, art. 5, illustrat familiari ignis exemplo: « Quemadmodum, inquit, omnis ignis urendi vim et potestatem habet, non tamen quidvis urendi, v. g., auri liquefaciendi, vel lapidis in calcem redigendi; ita ut si de igne generatim quæretur, an possit urere, absolutè respondendum sit posse; sed si quæretur utrum exiguus ignis possit lapidem in calcem redigere, vulgò non posse respondebunt; sic omnis charitas vel exigua, potestas est bonorum operum; et si quæretur, utrum qui bonam voluntatem habet, possit benè agere, posse procul dubio respondendum est; non tamen omnis bona voluntas ad quidvis efficiendum sufficit, ut non aliquando pleniorē voluntatem requirat. » Nihil clarius ac disertius proferri potest ad exprimendam simul potentiam absolutam cum impotentia relativâ.

Paulus Irenæus potentiam illam absolutam disertissimè exponit variis in locis. Disquisit. 2, art. 5: « Quamobrem, inquit, ne quis mihi de illâ negotium facessat, profiteor illam me locare in summo gradu, dummodò nunquàm ex illo gradu in actum ullum prodeat sine efficaci Dei auxilio. » Disquisit. 3, art. 22, asserit eam esse *sufficientem, sufficientissimam, completam, completissimam, plenam, plenissimam, expeditam, expeditissimam*. Et Disquisit. 4, art. 5, Annatum alloquens, sic habet: « Cùm expeditissimas, completissimas, sufficientissimas, proximas potentias, sine efficaci auxilio nunquàm in actum suum prodeuntes plenis manibus in sinum tuum congerebam, nemo Augustinianorum reclamavit, aut me questus est liberaliorem esse quàm par erat. » Magnificis his titulis quibus exornat potentiam quam confert gratia parva, significat Paulus Irenæus, potentiam non quidem relativam, quæ Janseniano systemati capitaliter adversatur, sed unam duntaxat potentiam absolutam et abstractam.

Dionysius Raimundus eamdem potentiam agnoscit et commendat in libro cui titulus: *Elucidatio circa factum et sensum Jansenii*. Quartâ parte cap. 2, art. 4, asserit 1^o, gratias illas parvas ad opus perfectum ordinari ex voluntate Dei, non quidem absolutâ et consequente, sed antecedenti quæ abstrahit à circumstantiis; 2^o illas semper ex se tendere ad id quod bo-

num est; 5^o continere in se omnem vim activam, seu principium boni operis effectivum; quod reipsâ perficerent, si minor foret oppositæ cupiditatis resistentia. Quæ tria potentiam absolutam manifestè designant.

In Relatione colloquiorum an. 1663, à Jansenianis editâ, sic legitur: « In doctrinâ Jansenii, voluntatem quidem majori delectationi necessariò cedere: sed nequiquâm inde consequens esse, tolli dissentiendi potentiam; quia ut illam potentiam voluntas habeat, sufficit ut dùm concupiscentiæ allicienti actu obsequitur, auxilium habeat ex se sufficiens ad actum contrarium. » Cæcus sit qui hic non deprehendat potestatem absolutam.

Denique, ut cæteros omittam, Sambovius qui, teste Paulo Irenæo, *enucleatius sensum Augustinianorum aperuit*, tractatu de gratiâ disput. 5, ait facile intelligi posse, quâ ratione gratiæ resistitur vel non resistitur, si tria supponantur 1^o *Quòd omnis gratia voluntatis est delectatio victrix*; 2^o *quòd non est victrix nisi comparatè*; 3^o *quòd eodem modo de hac re philosophandum sit, quo physici de actione et reactione*. Nihil luculentius.

Probatur 3^o ex ipsismet Janseniani systematis visceribus. 1^o Eam certè admisit Jansenius in gratiâ parvâ potentiam, quam natura ipsa, notio et idea gratiæ necessariò includit ac importat; atqui idea gratiæ, etc. Quid enim est gratia? nisi cœlestis motio, impulsio, excitatio, auxilium, adjutorium voluntatis ad bonum; an verò concipi istud potest absque illâ absolutâ quam continet ac confert ad opus bonum potentiâ? ergo, etc. 2^o Eam agnovit potentiam quæ tam intima est et essentialis Janseniano systemati, ut eo stante nullâ omninò ratione negari possit; ast talis est potentia absoluta. Namque in eo systemate gratiæ delectatio ex se et ex naturâ suâ nec victrix est nec victa; sed victrix est aut victa pro majori vel minori numero graduum, adeò ut solâ decrescente oppositâ delectatione, quæ victa fuerat, victrix evadat, nullâ ex parte suâ factâ mutatione; hoc autem nec esse nec concipi potest, quin in delectatione inferiori admittatur potentia absoluta, par actui efficiendo; ergo, etc. 3^o Gratia quæ ex naturâ suâ et ex voluntate Dei antecedente tendit et ordinatur ad opus perfectum, quæ in se continet omnem vim activam boni operis quod reipsâ perficeret nisi major obsisteret opposita concupiscentiæ delectatio; quæ initia bonæ voluntatis, seu actus de- liberatos imperfectos semper in nobis producit,

ea certè gratia quamdam benè agendi potentiam et virtutem, saltem absolutam, largitur; atqui talis est ex Arnaldo, Dionysio Raimundo, Sambovio, etc., locis mox citatis, cœlestis delectatio inferior, seu parva Jansenii gratia; ergo, etc.

Dices 1^o: Sæpius docet Jansenius 1^o, delectationem relative victricem esse unicum pondus quo voluntas nunc sive ad bonum sive ad malum determinari possit; 2^o sub dominante delectatione veram esse in voluntate ad actum oppositum impotentiam; 3^o in conflictu duarum delectationum voluntatem necessariò sequi majorem ac victricem; ita lib. 4 de gratia Christi cap. 7, 9, 10; lib. 7, cap. 3, etc.; ergo absente delectatione superiori, nequidem absolutam agnovit Jansenius ad agendum potentiam. — Respondeo has omnes Yprensus loquendi rationes exponendas esse de impotentia aut necessitate, non quidem absolutâ, ut abundè constat ex dictis: sed relativâ, uti mox exponemus; unde isthæc omnia sequentem nostram Conclusionem adstruunt, præsentem verò nequiquâm infirmant.

Dices 2^o: Jansenius lib. 2 de gratiâ Christi, cap. 2, et lib. 3, cap. 15, contendit sine delectatione superiori, « tam impossibile esse voluntati ut benè velit et operetur, quàm homini cæco ut videat, vel surdo ut audiat, vel tibiis fracto ut rectè gradiatur, vel avi ut volet sine alis. » Quæ profectò comparationes eò tendunt, ut à voluntate quamcumque excludant benè agendi facultatem, absente gratiâ efficaci; ergo, etc. — Respondeo adductas comparationes in eo duntaxat valere, quatenus excludunt actum secundum, aut etiam actum primum seu potentiam relativam ad actualem hic et nunc vigentem oppositam delectationem; ast absolutam nullatenus removent potentiam. Ita discipuli magistrum interpretantur; audiat Paulus Irenæus Disquisit. 2, art. 3: « In omni comparatione, inquit, non omnia similia sunt; sufficit ut illa inter se conveniant, quæ inter se comparantur. Jam verò justus cum cæco gratiâ efficaci destituito dupliciter potest comparari. Primò si spectentur potentiæ in actu primo: sic nulla inter utrosque similitudo.... cæcus enim caret intertâ videndi virtute; justus pollet interiori facultate boni agendi (absolutâ scilicet, non autem relativâ), etiam actuali, si vult et conatur. At si spectentur istæ potentiæ in actu secundo, tunc in eo planè conveniunt, quòd sicut cæcus videre actu et effectivè non

« potest, ita justus bene agere sine efficaci gratiâ actu et effectivè non potest. » Deinde probat ex Jansenio allatas comparationes spectare potentiam duntaxat in actu secundo, non in actu primo. Paulo Irenæo concinit Dionysius Raimundus primâ parte, cap. 1, art. 6.

Dices : 5^o : Jansenius omnem omninò respuit gratiam purè sufficientem, eamque lib. 3 de Gratiâ Christi, cap. 5, revocat ad gratiam Pelagianam; inde est quòd multi ex nostris dùm Jansenium refellunt, eum accusare videantur, quasi omnem penitus negaverit in justo, absente gratiâ efficaci, potentiam ad observandum mandatum; ergo, etc. — Respondeo 1^o, Jansenium loco citato solam Molinianam, ut vocant, seu versatilem directè explodere gratiam sufficientem; imò, cap. 1 ejusdem libri 3; loquens de gratiâ sensu Thomistico sufficienti, proficitur quòd *Augustinus fortassè talem gratiam non difficulter admitteret*; 2^o negari non potest quin gratiam aliquam parvam admiserit quæ de se est principium boni operis, ac semper efficax alicujus parvi et imperfecti effectûs; idipsum clarè ostendit vel ipse primæ propositionis contextus, ibi enim loquens de justis dùm peccant, supponit eos velle et conari; velleitates autem illæ et debiles conatus, nonnisi ex gratiâ parvâ proficisci possunt. 3^o Potentia quæ relativa non est, sed merè absoluta et abstracta à præsentibus subjecti circumstantiis, nihil ad usum et exercitium boni operis conferre potest, ac proinde perinde est ac si quælibet potentia negaretur; non mirum ergo si nonnulli è nostris Jansenium confutaverint quasi omnem prorsus potentiam è voluntate rejecerit absente delectatione superiori, omnemque pariter gratiam distinctam à gratiâ actionis et ex sese efficaci.

Utrum Jansenius admiserit potentiam relativam. — Sunt qui ut Jansenium à censurâ eximant, asserere non dubitant ipsum in justis dùm peccant, agnovisse veram et expeditam etiam relativè ad præceptum adimplendum potentiam, saltem remotam; contra quos sit

CONCLUSIO. — Jansenius in ipsâ voluntate inferiori duntaxat delectatione instructâ nec agnovit, nec in suo systemate agnoscere potuit veram ac relativam, sensu antea exposito, ad opus bonum potentiam.

Probatur 1^o disertis Jansenii testimoniis. Lib. 2 de Gratiâ Christi, cap. 4, de delectatione superiori loquens, sic habet : « Tantæ necessitatis est, ut sine illâ non possit effectus fieri, tantæque efficacæ, ut hoc ipso quo datur,

« continuò fiat. Dat enim simul et posse et operari. » Undè sic : Qui docet delectationem superiorem tantæ necessitatis esse ut sine illâ effectus fieri non possit, tantæque efficacæ ut eo ipso quo datur continuò effectus fiat; qui insuper addit, illam dare simul et posse et operari, ille certè nec agnoscit nec agnoscere potest veram ac relativam ad operandum potentiam in voluntate destitutâ delectatione superiori; atqui conceptis verbis tradit Jansenius, etc.; ergo. Lib. 3 de Gratiâ Christi, cap. 15 : « Est enim, ait Jansenius, paradoxum in principis sancti Augustini, quòd charitas quamvis minima sufficiat ad quacumque tentationem superandam, vel quacumque præcepta sine transgressione servanda; » ergo ex Jansenio, voluntas hominis justî sub actuali ardentiore concupiscentiâ absente gratiâ efficaci, hic et nunc, seu relativè expedita non est, ut possit tentationem superare et observare mandatum; ac vicissim sub motione gratiæ victricis, expedita non est relativè ad malum. Lib. 4, cap. 9 : « Conflictus ille delectationum, inquit, sopiri non potest, nisi altera alteram delectando superaverit, et eò totum animæ pondus vergat. QUOD ENIM AMPLIUS DELECTAT, SECUNDUM ID OPEREMUR NECESSE EST. Vigente enim delectatione carnali, impossibile est ut virtutis ac honestatis consideratio prævaleat. » Audis vigente carnali delectatione impossibile esse ut virtutis et honestatis consideratio prævaleat; non ergo tunc stat relativa ad opus bonum potentia; idem porro dicendum sub dominante cœlesti delectatione, non stare scilicet expeditam ac relativam ad opus malum facultatem; et verò, prævenientem ac indeliberatam majorem delectationem necessariò sequitur voluntas; quod enim amplius delectat, secundum id operemur necessum est. Lib. 7, cap. 5, idem luculentius inculcat his verbis : « Justitiæ vel peccati delectatio est illud vinculum quo liberum arbitrium in justitiâ vel peccato ita firmiter ligatur et retinetur, ut quamdiù isto stabiliter possidetur et constringitur, ac tus oppositus sit extra ejus potestatem, ita videlicet ut arbitrium non liberatum eum velle non possit. » Non potuit certè significantioribus verbis, sub dominante delectatione, relativam ad oppositum potentiam excludere. »

Denique, ut infinita hujusmodi prætermittam, lib. 8, cap. 3, de superiori delectatione sic habet : « Adjutorium illud cœlestis delectionis.... facit ut velis, et sine illâ velle non

« possis ; facit etiam ut ardentius velis, et sine
 « illâ ardentius velle non possis ; facit tamenque
 « ut necesse sit animum istud sequi, et secun-
 « dùm illud operari quod amplius delectave-
 « rit. » Superfluum foret alia hic coacervare
 testimonia ; nihil his clariùs exoptari potest.
 Consuli possunt quæ antea retulimus paragr.
 3 et 4 et quæ postmodùm referemus paragra-
 pho sequenti.

Probatur 2^o ex præcipuis Jansenii defensoribus ; consule Arnaldi, Pauli Irenæi, Dionysii Raimundi, etc., testimonia Conclusionem superiori adducta, quibus addi possunt 1^o auctor scripti quod dicitur *In nomine Domini*, pag. 20, sic habet : « Existimo duplicem esse necessi-
 « tatem, conditionatam alteram, alteram abso-
 « lutam. Conditionata est quæ ad bonum de-
 « terminat, per inconstantem et amissibilem
 « gratiam, ut in fidelibus sanctis ; absoluta est
 « quæ ad bonum determinat, per immortalem
 « et inamissibilem gratiam, ut in Angelis et
 « Beatis. Prior dicitur conditionata, quòd gra-
 « tiâ adsistente vel absistente bonum vel
 « malum possimus simpliciter velle ; posito
 « tamen quòd absit gratia, jam non possimus
 « nisi bonum velle. » Vides, præsentem gratiâ,
 voluntatem simpliciter quidem seu absolute
 posse malum operari ; at relative non posse ;
 similiter absente gratiâ efficaci, absolute et
 simpliciter posse ex gratiâ parvâ bonum ope-
 rari ; sed relative ad majores cupiditatis vires
 non posse. 2^o Auctor libri cui titulus : *Confor-
 mité de Jansénius avec les Thomistes*, parte 2,
 pag. 20 : « Dominante, inquit cælesti gratiâ et
 « de cupiditate victrice ; cupiditas satis virium
 « non habet (relative scilicet) ut voluntatem
 « ad illicita pertrahat, quanquàm eam possit
 « pertrahere (absolute). » Unde planè conse-
 quens, est, vice versâ sub dominio cupiditatis,
 gratiam parvam non satis virium habere ut
 majorem hic et nunc titillantem concupiscen-
 tiam vincat, licet eam vincere possit : nempe
 absolute et factâ præcisione majoris illius res-
 sistentiæ. 3^o Samborius unus ex præcipuis
 Jansenii patronis citatâ jam disput. 3, tractat.
 de gratiâ, *Major enim est*, inquit, *resistentia
 concupiscentiæ quàm virtus gratiæ parvæ* ; dixe-
 rat ibidem loquens de relativâ agendi gratiæ
 et concupiscentiæ virtute, *eodem modo de hac
 re philosophandum esse, quo physici de actione et
 reactione* ; ergo delectatio quasi ex mechanicâ
 lege voluntatem movet ac rapit sive ad bonum,
 sive ad malum, prout cælestis vel terrenæ præ-
 ponderat ; ac proinde relativam ad oppositum

potentiam excludit ; et verò, ut advertit alter
 delectationis relative victricis vindex acerrimus,
 « hæc est in omni statu, immobilis divi-
 « næ providentiæ lex constituta, ut actio ex
 « propositione majoris inæqualitatis oriatur,
 « quâ agens sibi subjiciat passum, et major
 « vis vincat minorem. »

Probatur 3^o variis momentis theologicis ex
 ipsismet Janseniani systematis visceribus de-
 promptis.

Primum : Potentia relativa capitaliter re-
 pugnat Janseniano systemati, hæcque præcisè
 positâ, totum ruit ac funditus subvertitur.
 Namque 1^o, in systemate Janseniano, voluntas
 omnes vires suas (hic loquimur de viribus ac-
 tivis formaliter sumptis, hoc est, ad actum ap-
 plicabilibus) mutuatur à delectatione ; ita col-
 ligitur ex dictis tertio paragrafo.... 2^o In
 eodem sytemate vires delectationis desumuntur
 ex gradibus, pro majori enim vel minori nu-
 mero graduum, delectatio victrix est aut victa,
 superior vel inferior : ita constat ex quarto
 Paragrapho... 3^o Quod exinde sequitur, delec-
 tatio gradibus inferior, viribus quoque inferior
 dicenda est : ac proinde majorem oppositam
 delectationem superare nequit : paradoxum
 est enim in eo systemate, in quo vis agendi
 utriusque delectationis relativa est et quasi
 mechanica, ut minor vis vincat majorem. Ex
 iis evidens est voluntatem superiori instructam
 delectatione non habere potentiam relative ex-
 peditam ad oppositum, seu non posse non ope-
 rari id ad quod majori illâ delectatione incli-
 natur. Ratio est aperta : voluntas siquidem in
 præsentem statu omnes vires suas desumit ex
 delectatione ; porrò, ex dictis superior delectatio
 sibi necessariò subjicit inferiorem, nec minor
 vincere potest majorem ; ergo voluntas supe-
 riori instructa delectatione, non potest relative,
 etc. Atque hinc Jansenius citato cap. 5 libri 7
 de Gratiâ Christi, loquens de delectatione su-
 periori, ait : *Quamdîu isto vinculo constringitur
 (voluntas), actus oppositus est extra ejus potes-
 tatem.*

Secundum, quo præcedens confirmatur, sic
 proponitur : In sytemate Janseniano, utraque
 delectatio, ex quâ jam voluntas omnes vires
 suas mutuatur, agit ex virtute relativâ quasi
 mechanicè, et de eâ ratiocinandum est, sicuti
 de actione et reactione in physicis ; atqui, in tali
 profectò systemate voluntas inferiori duntaxat
 instructa delectatione impar est superiori de-
 bellandæ ; ergo, etc. Elvero, si in dictâ hypo-
 thesi, voluntas foret ad utrumque relative ex-

pedita, vel ex sese et independenter à delectatione vires illas activas et electivas haberet; vel eas mutaretur à minori delectatione; primum repugnat primo et capitali Jansenii principio, uti vidimus supra, paragr. 5; alterum ex Jansenio paradoxum est: in principiis etenim sancti Augustini, inquit, nec fieri nec concipi potest quòd minor delectatio satis virium habeat ad majorem hic et nunc vincendam.

Tertium: Omnis potentia relativa in systemate Janseniano, est semper et necessariò juncta cum actu; atqui implicat in terminis dari potentiam ad opposita ex utrâque parte semper et necessariò juncta cum actu; ergo, etc. Minor patet; major autem certa est quoad utramque partem. 1º Potentia relativa semper est juncta cum actu, in systemate Jansenii, quia procedit ex voluntate Dei consequente, cujus est attendere ad circumstantias; hæc autem voluntas, omnibus fatentibus, semper est efficax. 2º Non solum semper, sed et necessariò actui conjuncta est potentia relativa, utpote cum oriatur à delectatione superiori, quæ docente Jansenio, *tantæ necessitatis est, ut sine illâ effectus fieri non possit; tantæque efficacæ ut.... det simul et posse et operari*; ergo, etc.

Quartum: In systemate superioris delectationis Jansenianæ, ubi militant delectationes viribus inæqualibus, cœlestis, v. g., cum duobus gradibus; carnalis verò cum quinque; voluntas sub hac duplici et inæquali motione posita, se habet, quasi nulla esset delectatio cœlestis, solâque impelleretur carnali delectatione in ipsam cum tribus gradibus agente; atqui voluntas tribus excitata concupiscentiæ gradibus, omnique ex adverso destituta cœlesti delectatione, nullatenus bonum operari potest, mulò minùs relativè; est enim delectatio, juxta Jansenium citato sæpiùs lib. 4, cap. 7, 9, 10, etc., unicum pondus quo voluntas nunc, sive ad bonum sive ad malum inclinari potest; ergo, etc.

Quintum tandem sic proponitur: Ille non admisit in voluntate vires relativas ex gratiâ parvâ seu delectatione inferiori, qui docet nullam dari gratiam verè et merè sufficientem, *sed eam esse vel efficacem, vel ita inefficacem; ex quâ operatio nequidem sequi possit*; atqui ita conceptis verbis Jansenius lib. 4 de gratiâ Christi, cap. 10; ergo, etc. Lux et robur accedent huic argumento ex dicendis paragrapho sequenti.

Dices 1º: Jansenius et Janseniani locis antea citatis sæpiùs profitentur sub motione superioris

delectationis cœlestis, v. g., completissimam, expeditissimam perfectissimam inesse voluntati peccandi potestatem; et vice versâ, titillante concupiscentiâ ardentissimâ, voluntatem gratiâ parvâ instructam, retinere perfectissimam ad bonum agendum potentiam, et quidem in summo gradu, dummodò nunquàm ex illo gradu in actum ullum prodeat sine efficaci Dei auxilio; ergo, etc. — Respondeo. Facilis est solutio ex antedictis: quippe, ut demonstravimus, magnificis illis ac speciosis verbis solam obtrudunt Janseniani potentiam absolutam à circumstantiis oppositæ actualis majoris delectationis abstrahentem; quæ quidem potentia in quocumque gradu reponatur vana est, inutilis, et ad salvandum in homine liberum arbitrium prorsus inutilis, cum præceptum non extet de actione in abstracto, sed de actione hic et nunc et in præsentibus circumstantiis ponendâ.

Dices 2º: Ex Jansenio homo gratiâ parvâ instructus certissimè bonum operaretur *si vellet, ac plenè et fortiter vellet*; ergo talis gratia verè relativam confert ad opus bonum potentiam. — Respondeo, ridiculè prorsus ac illusoriè istud opponi. Equidem bonum operaretur voluntas si fortiter vellet; ast in iis circumstantiis in quibus domiatur concupiscentia, plenè ac fortiter velle non potest; delectatio siquidem superior, inquit Jansenius citato lib. 8 de gratiâ Christi, cap. 3, *facit ut velis, et sine illâ velle non possis; facit ut ardentius velis, et sine illâ ardentius velle non possis*. Magistrum sequuntur discipuli Arnaldus, Paulus Irenæus, Dionysius Raimundus, etc., pressius verò Abbas de Bourzeis in epist. ad episcopum scriptâ pag. 68, *dicens, gratiam eo sensu rejici posse, quoniam abiceremus si vellemus; non posse verò, quoniam velle non possemus*; et verò: si voluntas fortiter vellet, jam non ipsa concupiscentia, sed gratia superior foret, quod est contra hypothesim.

Dices 3º: Gratia parva ex Jansenio lib. 2, de gratiâ Christi cap. 27, *est majoris gratiæ provocativa*; ergo verè est ac relativè sufficiens saltem mediâtè. — Respondeo merum esse effugium præcedenti consimile. Quomodò enim gratia parva dici posset majoris gratiæ provocativa? An propter debiles et imperfectos voluntatis motus quos producit? verum illos motus semper operatur, nec tamen gratiam magnam semper advocat. An quòd majorem gratiam obtineret, nisi voluntas contumaciùs obsisteret? Ita est, sed voluntas propter ardentiorē concupiscentiam non potest tunc non

resistere ; adeoque in illis circumstantiis gratia parva non potest majorem provocare.

Dices 4^o : Gratia parva Jansenii nullâ factâ ex parte sui intrinsecâ mutatione , aut novâ additione , per solam oppositâ concupiscentiæ imminutionem potest fieri efficax ; non ita gratia sufficiens Thomistica ; ergo , etc. — Respondeo negando consequ. ; gratia quippe sufficiens Thomistica , veram et expeditam , saltem mediatam , confert potentiam , ad vincendam quaecumque actu prementem concupiscentiam : *Minima gratia* , ait S. Thomas , parte 5. quæst. 70. art. 4 in corp. , *potest resistere cuilibet concupiscentiæ , et vitare omne peccatum mortale* ; ast istud in principiis S. Augustini paradoxum videtur Jansenio lib. 5 de Gratiâ Christi cap. 15. atque hinc patet disparitas.

Dices 5^o : Gratia parva in se continet omnem vim activam seu principium effectivum boni operis ; quodque illud non producat , non oritur ex defectu virtutis effectivæ , sed ex librâ subjecti resistentiâ ; ergo , etc. — Respondeo ad primum , dist. : In se continet principium effectivum boni operis , absolutè et abstrahendo à circumstantiis , concedo ; relativè ad pulsantem hic et nunc actualem concupiscentiam , nego..... Ad secundum pariter dist. : Quod gratia parva opus non producat non oritur ex defectu virtutis sufficientis , absolutè , concedo ; relativè , nego : ubi enim modus agendi relativus est ac quasi mechanicus , minor delectatio majorem superare nequit... Ad tertium dico dominante cupiditate resistentiam gratiæ parvæ liberam non esse , sed relativè necessariam. Ubi advertit , aliud esse servare potentiam in aliquibus circumstantiis , et debellandæ præsentî generatim concupiscentiæ ; aliud verò servare potentiam relativè ad circumstantias et in ordine ad actualem hic et nunc tot gradibus pulsantem concupiscentiam : prius convenire potest abstracte et absolute potentiæ , posterius verò non nisi relativæ.

Ex dictis in toto isto paragrapho sequitur 1^o , errorem Jansenianum minimè consistere in negandâ absolutâ ad observandum mandatum potentiâ , in justis solâ gratiâ parvâ instructis , absente efficaci ; imò , se idem hæc in parte cum Thomistis et sentire et loqui profitentur Janseniani omnes. Sequitur 2^o , ad errorem declinandum necessum esse fateri , homini justo , absente gratiâ efficaci , inesse ex sufficienti gratiâ , potentiam relativè proportionatam ad actualem ejus concupiscentiam , ut eam nempe superare possit. In eo enim præcise positus est

error Jansenii et discipulorum ejus , quod negent talem potentiam relativam ; nisi etenim in eo reponatur Jansenianus error , dicendum profectò , quod in comitiis anni 1700 damnatum fuit , Jansenismum merum esse ac evanidum phantasma. Sequitur 3^o , hanc unam absolutam et relativæ potentiæ distinctionem , communem esse veluti clavim quâ aditus ad intimos Jansenismi recessus aperitur , filum sine quo è labyrintho effugorum et fallaciarum quibus Janseniani pontificias de quinque Propositionibus censuras eludere conantur , extricare se nemo unquam poterit. Hæc etenim unice distinctionis æquivocatione sese involventes , audacter et jactantiùs quinque damnatas Propositiones verbo damnant , ac reipsâ tuentur. Asserunt 1^o , justis non esse impossibilia Dei mandata , impossibilitate scilicet absolutâ , non autem relativâ ; 2^o Gratiæ interiori resisti , nempe quoad effectum perfectum quem habere potest absolutè , at non relativè ; 3^o à libertate excludi necessitatem , nimirum absolutam , non relativam , etc. Ita Janseniani vel unius vocis æquivocatione Ecclesiæ decreta elevant.

§ 6. An delectatio superior Janseniani systematis basis sit ac fundamentum.

CONCLUSIO. — Delectatio superior seu relativè victrix , prout hactenus exposita fuit , Janseniani systematis basis est ac fundamentum.

Probatur 1^o. Ex Jansenio delectatio superior seu relativè victrix , gratia victrix , gratia medicinalis , adjutorium *quo* , idem omninò significant ; ita ex professo docet et probat lib. 4 de Gratiâ Christi , cap. 4 et sequentibus ; atqui , ex eodem Jansenio , necessitas adjutorii *quo* in præsentî statu , ejusque distinctio ab adjutorio *sine quo* , est fundamentum totius doctrinæ Augustinianæ ; ergo , etc.

Minor certa est quàmpiurimis ejusdem auctoris testimoniis. Lib. de gratiâ primi hominis et Angelorum cap. 17 : « hæc est , inquit , (distinctio adjutorii *quo* et *sine quo*) vera clavis , quâ aditus in scripta sancti Augustini aperiendus est , sine quâ qui ea molitur ingredi , velut cæcus palpabit in meridie..... qui verò jacto isto fundamento , distinctionem illam velut filum in labyrintho scriptorum ejus secutus fuerit , mirabilis ei occurrit contextus rerum ; respondet extrema primis , media utrisque , omnia omnibus. » Similia repetit lib. 2 de Gratiâ Christi , cap. 9 , et lib. 7 , cap. 6. Hinc auctor Synopsos vite Jansenii refert eum dicere solitum , « omnia pendere ab uno primo

« principio, unde tota doctrinæ Augustini de
« gratiæ catena devincta esset; et hinc factum,
« ut qui eò aberrant, extra viam et spem inve-
« niendæ veritatis vagentur. Unde subridebat
« potius, non mirabatur quòd contrariarum et
« diversissimarum opinionum scholastici, om-
« nes tamen Augustinum ad se traherent, quia
« unus hunc, alter istum anulum medium
« catenæ arriperent, nemo teneret primum
« illum et capitalem; » hic autem primus et
« capitalis annulus, in mente Jansenii, ipsa est
« profectò delectatio relativè victrix, quam variis
« nominibus, gratiæ medicinalis, adjutorii quo,
« adjutorii actionis, etc., insignitam exhibet et
« inculcat in singulis fermè operis sui paginis.

Probatur 2^o ex perfectâ omnium Jansenista-
rum hanc in rem consensione: nullum etenim
ex his qui pro defensione Jansenii scrip-
serunt, reperiens, qui pro illâ superiori delec-
tatione tanquàm basi ac fundamento totius ma-
gistri sui systematis, strenuè non decertârit.
Constat id ex pluribus testimoniis inferiùs re-
citandis; unum hic abbatis de Bourzeis pro-
tulisse satis sit: « Nobis sufficit, inquit, collat.
« 4, cap. 30, quòd hæc sola veritas nobis con-
« cedatur; nimirum quoties gratiæ Dei con-
« sentimus, id oriri semper ex eo quòd rectus
« amor quem Deus nobis inspirat, viribus su-
« perior est perverso amor; et quia viribus
« superior est, idcirco eum certissimè supera-
« re. » En palmaris veritas Jansenianis omni-
bus gratissima, quam in suis scriptis millies re-
petunt, et ad cujus defensionem omnia studia
sua viresque convertunt, quòd scilicet probè
noverint primum hunc esse capitalem anulum
ex quo cætera dependant.

Probatur 3^o ex dictis in præsentî articulo,
præsertim ex paragraphis tertio et quarto, in
quibus de necessitate et agendi modo delecta-
tionis actum est, et ex dicendis postmodum;
quæ quidem fermè omnia eò collimant ut de-
monstrent relativam delectationem totius Jan-
seniani systematis basim esse ac fundamentum.
Verùm quid plura? ex solâ Jansenii libri ins-
pectione, ubi singulis paginis delectationem vic-
tricem ad nauseam usque celebrat, clarè pa-
tet, quanti illam faciat, eamque ab ipso habi-
tam et esse de facto totius sui systematis basim
ac fundamentum.

§ 7. Janseniani systematis contracta delineatio.

Ex adductis aliisque similibus Jansenii ac
discipulorum ipsius testimoniis genuinam ejus
doctrinam colligere operosum non erit.

Docet 1^o, voluntatem per peccatum primi
parentis liberum amisisse arbitrium, id est, vim
sese flectendi pro nutu suo ad opposita; 2^o de-
lectationem unicuique esse pondus quo jam ad
agendum applicari ac determinari potest vo-
luntas; 3^o duplicis duntaxat speciei esse de-
lectationes, terrenam scilicet, quæ ad malum,
et celestem, quæ ad bonum impellit; 4^o illas
delectationes agere per gradus in invicem, ita
ut superior semper vincat minorem; 5^o volun-
tatem non solum semper sed et necessariò se-
qui majoris delectationis impulsus; juxta illud
sancti Augustini à Jansenio ejusque assecris
toties decantatum: *secundum id operemur ne-
cesse est, quod amplius nos delectat*: 6^o neces-
sitatem illam non esse absolutam, sed relativam,
id est, in præsentibus circumstantiis, seu do-
minante ad unum delectatione, voluntatem
non posse hic et nunc aliter agere, licet possit
in aliis circumstantiis, si nimirum, aut ista im-
minueretur, aut altera augetur delectatio,
sicque quæ antea erat inferior evaderet supe-
rior, et vice versâ; 7^o quamlibet delectatio-
nem aliquem semper obtinere effectum delibe-
ratum; perfectum quidem, si sit superior;
imperfectum verò, si inferior; unde omnis
delectatio efficax est, licet non omnis sit victrix.

Atque ita in illo systemate, voluntas se habet
instar bilancis, delectationes verò instar pon-
derum; etenim vis utriusque delectationis tota
relativa est, et quasi ex mechanicâ lege volun-
tatem movet ac rapit, sive ad bonum, sive ad
malum; si major fuerit vis gratiæ, quàm con-
cupiscentiæ: necesse erit bene voluntatem
operari; è contra male, si viribus prævaluerit
concupiscentia: *Tunc enim major est concupiscentiæ
resistentia*, inquit unus ex præcipuis Janse-
nii defensoribus, *quàm virtus gratiæ parvæ*; at-
que hæc est, ait alter Jansenianis non suspectus,
*in omni statu, immobilis divinæ providentiæ lex
constituta, ut actio ex proportionem majoris inæ-
qualitatis oriatur, quâ agens sibi subjiciat pas-
sum, et major vis vincat minorem*; sicque non
voluntas delectationibus, ut in systematibus
Catholicorum, sed delectationes voluntati do-
minantur, atque de obtinendo voluntatis con-
sensu in se invicem decertant, eumque ob
graduum seu virium præpollentiam necessariò
eliciunt ac consequuntur.

ARTICULUS II.

De consecrariis Janseniani systematis.

Duo expendemus in hoc articulo, primum,
quodnam sit principium ex quo sponte ac neces-

gariò fluant quinque Propositiones; secundum, de iisdem sigillatim Propositionibus agemus.

§ 1. *An delectatio superior, seu relativè victrix Janseniana, basis sit, fundamentum ac principium ex quo quinque Propositiones necessariò fluant.*

Quam delectationem ultrò agnoscunt Yprensensis sectatores, velut systematis magistri basim, eandem esse principium ex quo sponte fluant quinque propositiones obfirmatè negant; hinc demonstrandum hic speciatim suscipimus, unum et idem esse Propositionum et systematis fundamentum, ac proinde quas assertiones admittunt ut hæreticas, eas ut totidem consectoria ex primis Jansenii principiis necessariò profluentia rejicere debere. Sit itaque

CONCLUSIO. — Delectatio superior, seu relativè victrix Janseniana, fons est, radix et origo ex quâ quinque Propositiones necessariò dimanant.

Probatur 1°. Delectatio relativè victrix est basis et fundamentum totius libri ac systematis Janseniani, ut constat ex dictis paragrapho 6 superioris articuli; atqui quinque Propositiones sunt primariæ assertiones quas stabilendas toto libro suscipit Jansenius, ut mox evincemus probatione secundâ, et ampliùs constabit ex dicendis circa unamquamque Propositionem; imò et sunt totus Jansenii liber, ut tradit illustrissimus Bossuet., teste Mirapincensi episcopo D. de la Broue, epist. ad eminent. Card. de Bissy, die 5 martii anni 1711; verba antea laudavimus; ergo, etc.

Probatur 2°, quia quinque famosæ Propositiones, cæteraque omnia quæ in suo grandiori volumine circa gratiam docuit Yprensensis, ad hæc duo universim capita revocari possunt, nempe, exclusionem gratiæ verè et merè sufficientis, et necessitatem benè agendi sub motione gratiæ victricis; atqui hæc duo à delectatione superiori spontè ac necessariò fluunt, ut probabimus argumento tertio, eaque ex eâdem delectatione superiori et relativâ, tanquàm ex nativo principio, datâ operâ deduxit Jansenius.

Primum quidem lib. 4 de Gratiâ Christi cap. 10, his verbis: « Hinc etiam claret, cur Augustinus omnem omninò gratiam purè sufficientem, sive ante fidem, sive etiam post fidem auferat. » En corollarium ejus principium statim assignat Yprensensis: « Ratio perspicua est, inquit, quia cum ei (Augustino) nulla sit gratia operandi præter istam suavitatem Dei, nisi ista tanta fuerit, ut ei delec-

« tationes rerum creaturarum cesserint, vel peccabitur, vel alternante delectationum fluctu, in medio remanebitur: sin autem ista superaverit, jam sine dubio benè voluntas operabitur: quod enim ampliùs nos delectat, secundum id operemur necesse est; sed utrumlibet fiat, non erit sufficiens gratia, sed vel efficax, vel ita inefficax, ex quâ operatio nequidem sequi possit, nisi ejus inefficacia per aliam suppleatur. »

Secundum, nempe necessitatem operandi bonum sub motione gratiæ victricis; ex eâdem superiori delectatione colligit Yprensensis, jugiter abutendo his sancti Augustini verbis: *Quod enim ampliùs nos delectat, secundum id operemur necesse est*; id videre est in testimonio mox allato, et aliis sexcentis locis; unde lib. 7 de Gratiâ Christi cap. 5: « Justitiæ vel peccati delectatio, inquit, est illud vinculum quo liberum arbitrium in justitiâ vel peccato ita firmiter ligatur; ut quamdiù isto stabiliter constringitur, actus oppositus est extra ejus potestatem; ergo, etc.

Probatur 3°, invicto isto ratiocinio ad geometricam methodum redacto. Scilicet 1°, proponemus principia seu axiomata; exinde quasdam propositiones tanquàm geometrica theoremata demonstrabimus; demùm famosas quinque Propositiones velut totidem corollaria inde necessariò sequi planum efficiemus.

Principia.— Primum: Omnes voluntatis vires activæ simul et electivæ, seu vires sese flectendi ac determinandi sive ad bonum sive ad malum, in præsentī statu nonnisi ex delectationibus oriuntur. Secundum: Vis agendi delectationum relativæ est, seu repetitur à superioritate graduum; adeò ut delectatio gradibus superior, viribus quoque superior dicenda sit. Tertium: Delectatio superior inferiorem necessariò vincit, et inferior non habet satis virium, nec vim agendi relativè proportionatam alteri debellandæ.

Ista constant ex dictis superiori articulo paragraphis 3, 4 et 5.

Theoremata.—Primum: Gratia efficax seu victrix Janseniana infert necessitatem ad bonum.

Probatur: Gratia efficax seu victrix est delectatio superior cœlestis; atqui talis delectatio infert necessitatem. Namque ex principio seu axioma primo, voluntas nunc omnes vires suas electivas sive ad bonum sive ad malum, nonnisi à delectationibus mutuatur: ex principio autem secundo et tertio delectatio inferior non habet vires sufficientes vincendæ de-

lectationi superiori, imò potius ab illà necessariò vincitur; ergo, etc.

Secundum: Concupiscentia superior infert necessitatem ad malum.

Probatur adductà mox ratione: Concupiscentia superior est delectatio terrena superior; atqui ex dictis delectatio superior infert necessitatem; ergo, etc.

Tertium: Nulla datur gratia verrè sufficiens distincta à victrici.

Probatur: Gratia verè sufficiens ea est quæ dat potentiam relativam; atqui, in systemate Janseniano, nulla datur gratia distincta à victrici quæ conferat potentiam relativam. Quippe gratiæ delectatio vel est superior terrena delectatione, vel inferior. Si primum, necessariò rapit plenum ac perfectum voluntatis consensum, ex theoremate primo; sicque victrix est et efficax: si secundum, nequidem eum hic et nunc obtinere potest, cum non habeat satis virium ad debellandam superiorem oppositam concupiscentiam, ex principio secundo et tertio, sicque non erit verè sufficiens; ergo, etc.

Ex his tribus theorematibus quinque Propositiones uti totidem consecutaria facili negotio deduci possunt.

Corollaria. — Primum corollarium: *Aliqua Dei præcepta hominibus justis volentibus et conantibus secundum præsentem quas habent vires, sunt impossibilia, deest quoque illis gratia quæ possibilia fiant.*

Probatur: Mandata iis sunt impossibilia, secundum præsentem quas habent vires, quibus deest gratia verè ac relativè sufficiens; atqui justis nonnunquam, tametsi velint et conentur, deest gratia verè et relativè sufficiens. Nam justi illi quandoque peccant; atque adeò tunc carent gratiâ efficaci: porro ex theoremate tertio nulla datur verè sufficiens ab efficaci seu victrici distincta; ergo, etc.

Secundum: *Interiori gratiæ in statu naturæ lapsæ nunquàm resistitur.*

Probatur: Resistere gratiæ est eam frustrare effectum quem possit habere iis in circumstantiis in quibus datur; hæc est resistentiæ propriè dictæ vera notio, hic est receptus loquendi modus, quidquid contra garriant Janseniani; vanas eorum adversus hoc principium evasiones postea excutimus; atqui ejusmodi effectui privari nequit gratia. Vel enim est inferior, vel superior, vel æqualis... Si primum, necessariò habet effectum ex theoremate primo.... si secundum, caret profectò effectui, sed quem tunc non potest habere, reluctante nimirum concu-

piscentiâ superiori, quæ voluntatem ad malum necessitat, ex theoremate secundo... si tertium, nempe si gratia est æqualis concupiscentiæ, alternante delectationum fluctu, in medio remanebitur, ait Jansenius supra citatus; neque usquam voluntas ad unam partem sese inclinare poterit, defectu nimirum superioris delectationis; ergo, etc.

Tertium: *Ad merendum vel demerendum in statu naturæ lapsæ non requiritur in homine libertas à necessitate, sed sufficit libertas à coactione.*

Probatur: Homo in statu naturæ lapsæ per majorem gratiæ delectationem necessitatur ad bonum, et per ardentiorem concupiscentiæ delectationem necessitatur ad malum, ex theoremate primo et secundo; atqui homo operando bonum (si ceteræ ad meritum adsint requisitæ conditiones), meretur; demeretur verò operando malum; ergo, ad merendum et demerendum in statu naturæ lapsæ, non requiritur libertas à necessitate, quod erat demonstrandum.

Quantum: *Semipelagiani admittebant prævenientis gratiæ interioris necessitatem ad initium fidei; et in hoc erant hæretici, quòd assererent eam gratiam talem esse cui posset humana voluntas resistere vel obtemperare.*

Probatur: Semipelagiani in eo erant hæretici, quòd ad initium fidei negarent veram Christi gratiam; atqui nulla est vera Christi gratia, præter illam cui voluntas non possit resistere, seu quæ necessitet. Namque nulla est vera Christi gratia, nisi quæ verè sufficiat ad bonum; nulla est verè sufficiens, nisi sit efficax, ex theoremate tertio; denique nulla gratia est efficax, nisi necessitet, ex theoremate primo; ergo nulla est vera Christi gratia nisi quæ necessitet; cum ergò in eo hæretici fuerint Semipelagiani, quòd negarent veram Christi gratiam, sequitur ipsos in eo fuisse hæreticos, quòd assererent gratiam talem esse cui voluntas posset resistere vel obtemperare; quod erat probandum.

Quantum: *Semipelagianum est dicere Christum pro omnibus mortuum esse aut sanguinem fudisse.*

Probatur: Semipelagianum est asserere veram Christi gratiam talem esse cui voluntas possit resistere vel obtemperare, ex collatorio præcedenti; porro, qui asserunt Christum pro omnibus mortuum fuisse, ii necessariò admittunt veras Christi gratias quibus voluntas possit resistere, imò quibus plerique de facto re-

sistunt; siquidem contendunt Christum morte suâ omnibus promeruisse gratias vere sufficientes cum quibus tamen multi damnantur; ergo, etc.

Dices: Nonnulli è recentioribus systema delectationis relativè victricis propugnant, qui tamen in suspicionem Jansenismi venire neutiquàm possunt, quem datâ operâ refellunt, atque quinque Propositiones in sensu obvio et naturali tanquàm hæreticas rejiciunt ac damnant; ergo systema delectationis superioris distat à Janseniano systemate, nec ex eo necessariò dimanant quinque famosæ Propositiones. — Respondeo: Recentiores illi qui nobis opponuntur, vel purum Jansenii systema hactenùs expositum propugnant, vel illud utcumque emollire ac temperare conantur. Si primum, ab errore Janseniano excusari non possunt, quantumcumque quinque Propositiones rejicere se ac damnare contestentur. Ratio est, quia cùm aliqua conclusio per necessariam et intimam connexionem ex principio deducitur, vel deserendum principium, vel admittenda conclusio; et qui priori retento istam negat, sibi ipsi apertè contradicit, ac re ipsâ admittit quod verbis rejicere videtur: porrò, ex modò demonstratis, doctrina quinque Propositionum necessariò fluit ex principio delectationis superioris Jansenianæ; idque candidè fassus est ipsemet systematis parens Yprensis, qui easdem propositiones tanquàm totidem conclusiones ex illo principio deduxit, uti constat ex dictis, et rursùs postea evincemus; ergo, etc.

Si secundum, 1^o assignent prætensas discriminis rationes; videant autem ne in quibusdam duntaxat vocibus positæ sint, aut in rejiciendis tantùm durioribus quibusdam loquendi rationibus Janseniano systemati minimè essentialibus, quibus etiam sublatis totum nihilominùs systema integrum perseverat..... 2^o docent prædicti auctores, tunc gratiam esse insuperabiliter efficacem, quando viribus superior est concupiscentiâ, et quia viribus est superior, idcirco certissimè superare; atqui hæc est ipsa doctrina pro quâ, omnibus aliis neglectis, tanquàm pro aris et focis semper decertârunt omnes quotquot hactenùs extiterunt Jansenii patрони: « Nobis enim sufficit, » inquit abbas de Bourzeis antea citatus in lib. cui titulus: *St. Augustin victorieux*, etc., collat. 4, cap. 30, « quòd hæc sola veritas nobis concedatur, nimirum quoties gratiæ Dei consentimus, id oriri semper ex eo quòd

« rectus amor quem Deus nobis inspirat, viribus superior est perverso amor; et quia viribus superior est, idcirco cum certissimè superare; » hoc uno retento principio testatur ibidem memoratus abbas, se cum Congruistis admissurum quancumque voluerint potentiam resistendi gratiæ victrici; ergo, etc... 3^o gratia certò et infallibiliter efficax ex virium superioritate, seu ob virium præpollentiam, quocumque tandem modo exponatur, non potest non esse necessitans, siquidem supponit in voluntate vires inferiores, ac proinde veram resistendi impotentiam. Etenim omninò repugnat ac physicè impossibile est, ut vires superiores quæ agunt ut superiores vincantur ab inferioribus; alias necesse foret ut inferiores agerent ultra suæ activitatis gradus; atqui, in dicto recentiorum systemate, vires gratiæ relativè victricis agunt in voluntatem ut superiores, cùm gratia illa per ipsam virium superioritatem invincibiliter voluntatem determinet; ergo, etc.

Et verò, discrimem quod proponunt dicti recentiores suum inter et Jansenii systema futile omninò est ac infirmum; in hoc nempe situm est, quòd nunc in voluntate vires activas independentes à delectatione sese admittere profiteantur, cum quibus iis junctis quas à delectatione inferiori mutuatur, potest voluntas, etiam potentiâ relativâ vincere majorem delectationem, licet id nusquàm accidat; è contra verò in systemate Jansenii amissa est in præsentī statu per primum Adami peccatum omnis activa voluntatis indifferentia, et paradoxum planè est ut voluntas minori instructa delectatione majorem superet; discrimen istud, ut dixi, infirmum omninò est.

Namque 1^o, vires illæ quas admittere se profitentur, passivæ tantùm dici debent; non autem formaliter et ad utrumlibet activè ac relativè flexibiles; namque independentes à delectatione vires hujusmodi electivæ et sui ipsius determinatrices (quales tamen ad veram libertatem requiruntur), agnosci non possunt in dicto novatorum systemate, in quo omnis electio et determinatio à majori oritur delectatione.

2^o. Vires illæ quæ supponuntur residuæ in voluntate, admitti tantùm possunt respectu mali aut respectu boni ordinis duntaxat naturalis; quis enim citra Pelagianismi notam dicere ausit, voluntatem in præsentī statu propriè activas ac electivas vires habere ad bonum supernaturale independentes à gratiâ? Igitur

quod spectat bonum supernaturale, de quo præcipua hic movetur quaestio, nihil distat systema istud à systemate Jansenii.

3°. Sed supponantur vires illæ et activæ simul et electivæ in ordine ad bonum supernaturale, idem recurret argumentum quod contra Jansenium alibi protulimus. Vel enim vires illæ junctæ cum minori delectatione, æquales sunt viribus majoris delectationis, vel inferiores, vel superiores. Si primum, nihil ergo agi poterit; si secundum, necessariò majori adharebitur delectationi; si tertium, minor delectatio effectum necessariò obtinebit.

4°. Non potest Deus in illo systemate certò cognoscere certitudine metaphysicâ futuras ac liberas humanæ voluntatis actiones. In quo enim eas certò cognosceret? non in scientiâ mediâ, nihil enim est à quo magis abhorreant dicti systematis defensores, quam ab usu hujusce scientiæ; non in naturâ delectationis, delectatio etenim ex naturâ suâ certam non habet connexionem cum effectu certissimè obtinendo; non in ipsâ tandem ejusdem delectationis superioritate, si enim aliunde quàm ex delectatione vires habeat voluntas, supponi potest præsentē delectatione superiori adesse in voluntate virium æqualitatem ad resistendum, ac proinde meritò pariter supponi poterit, delectationem superiorem aliquando privari suo effectu; ergo, etc.

5°. Multi extant Jansenianorum libri, in quibus ea ipsa quæ mox recensuimus, superioris delectationis consecratia negantur, qui tamen damnati sunt, eâ certè de causâ quòd systema delectationis relativè per gradus victricis contineant, quo retento, dicta consecratia, verbo tenùs rejici possunt; tales sunt libri Pauli Irenæi, Dyonisii Raimundi, Wendrokii, etc. Nullus autem est è Jansenistis qui vires volendi præcisè et quasi materialiter sumptas, à delectationibus independentes, ac de se sufficientes et proportionatas quibuslibet tentationibus vincendis, non admittat, dummodò vires illæ dicantur otiosæ ac steriles, nec ad actum applicabiles nisi virtute superioris delectationis; imò ipsemet Jansenius hujusmodi vires disertè agnoscit testimoniis antea adductis, aliisque multis similibus, in quibus impotentia voluntatis non repetitur à virium omnium defectu, sed ex infirmitate et impedimentis quæ obstant quominus voluntas omnes vires suas exerat, donec per delectationem liberetur; ita lib. 4, cap. 7 et 9, et lib. 7, cap. 2, etc.

Cæterum, de delectationis relativè victricis

emollito systemate dicitur secundâ parte, ubi de variis circa naturam et modum agendi gratiæ efficacis systematibus.

§ 2. De quinque Propositionibus.

Quinque Propositiones in sensu obvio, proprio et naturali hæreticas esse et legitimè fuisse damnatas fatentur omnes; ast quis sit ille sensus, et utrum eas in illo sensu docuerit Jansenius, negant ipsius sectatores, reclamantibus cæteris omnibus. Posset uno verbo dirimi ista quaestio ex antedictis capite 2, paragr. 2, conclus. 2, 3 et 4. Scilicet ibi demonstratum est summâ et irrefragabili Ecclesiæ auctoritate quinque Propositiones in sensu Jansenii, et sensum Jansenii in quinque Propositionibus damnatum fuisse; quinque ergo Propositiones extant in libro Jansenii quoad sensum proprium ab Ecclesiâ damnatum, nec fieri omninò potest ut à Jansenianâ doctrinâ diversus sit ille sensus, quem ut propriam et germanam Jansenii doctrinam proscripsit Ecclesia; unde, *causa finita est*, inquit, præsules Gallicani in epistolâ encyclicâ an. 1665, die 2 octobris, *nihil deliberandum super est circa sensum quinque Propositionum ex Jansenii libro extractarum, cum illæ à romano pontifice et Galliæ episcopis, cæterisque aliarum regionum antistitibus proscriptæ fuerint in sensu Jansenii.*

Verùm ut novæ sententiæ patronos quaquaversum revincamus, aliis momentis rem eandem nunc probandam aggredimur, abstrahendo à mox dictâ Ecclesiæ definitione; idque ut efficaciter conficiamus, eâ ipsâ methodo quam in præsentī negotio usurpari volunt Paulus Irenæus, Dionysius Raimundus, alique Janseniani; tria hic inquirenda suscipimus agendo de singulis sigillatim propositionibus.

Primum, quis sit proprius et naturalis uniuscujusque propositionis sensus. Secundum, utrum eam docuerit Jansenius. Tertium, dogma catholicum errori damnato oppositum.

PRIMA PROPOSITIO.—*Aliqua Dei præcepta hominibus justis volentibus et conantibus secundùm præsentēs quas habent vires, sunt impossibilia; deest quoque illis gratia quâ possibilia fiant.*

Quæres 1°, quis sit proprius ac naturalis primæ hujusce Propositionis sensus.—Respondeo proprium sensum hunc esse: Aliqua Dei mandata justis volentibus et conantibus secundùm præsentēs quas habent *ex gratiâ parvâ* vires, sunt impossibilia, *comparatè ac relativè ad eorum majorem hic et nunc titillantem concupiscentiam*; deest quoque illis gratia, sive ac-

tionis quâ possibilia fiant *immediatè*, sive orationis quâ possibilia fiant *saltem mediatè*.

Sensus autem alieni, huic propositioni malignè allixi, hi sunt : 1^o justis omnibus quantumlibet volentibus et conantibus secundum præsentēs quantascunque vires quæ à gratiâ magnâ et efficace habentur, mandata Dei sunt impossibilia..... 2^o Deest justis semper et quamdî vivunt, gratia quâ possint vel unum ex Dei mandatis sine peccato adimplere... 3^o Justis deest gratia quâ absolutè et seorsim à tali gradu concupiscentiæ possibilia sint Dei mandata.

Hos autem posteriores sensus esse reipsò extraneos, priorem verò à nobis allatum proprium esse, constat 1^o ex ipso propositionis contextu ; singulis enim vocibus manifestè determinatur prima Propositio ad hunc, quem indicavimus, particularem, atque impossibilitatis duntaxat relativæ sensum. Nam 1^o, hi duo termini, *hominibus justis*, ad aliquos justos necessariò restringuntur ; tum istis vocibus, *aliqua Dei præcepta* ; tum his verbis, *volentibus et conantibus* ; neque enim omnes justī volunt et conantur..... 2^o, quod maximè observandum est, vox, *impossibilia*, de relativâ duntaxat impossibilitate exponenda est, quod colligitur, tum quia immediatè præcedit hæc restringens particula, *secundum præsentēs quas habent vires* ; id est, *hic et nunc* ; quod sanè non obscurè indicat, non impossibilia fore mandata in aliis occasionibus in quibus justorum illorum vires auferentur ; tum quia statim additur hæc rursus altera particula limitativa *deest quoque illis gratia quâ possibilia fiant*.

Constat 2^o ex ipsismet jansenianis : abbas de Bourzeis in scripto quod dicitur, *In nomine Domini*, de primâ Propositione verba faciens, sic loquitur : « Aliud est asserere universali sensu justificato legem impossibilem esse ; aliud sensu particulari et cum additamento justo volenti et conanti, juxta præsentēs quas habet vires, mandatum aliquod non esse possibile ; illud ut falsum Jansenius cum trid. synodo negat ; istud ut verum, Jansenius cum Augustino docet. » Inde est quòd auctor libri cui titulus : *Chimère du Jansénisme*, pag. 155, 182, disertè agnoscit, « naturalem primæ propositionis sensum ab Ecclesiâ damnatum restringi ad quosdam justos..... nec usquam à Jansenio assertum fuisse Calvinianum sensum necessitatis peccandi in omnibus actionibus. » Idem clarè colligitur ex famoso Trium columnarum scripto, de quo vide quæ

diximus cap. 2 præsentis Dissertationis, art. 1. conclus. 5, argumento 6.

Constat 3^o ex scripto D. Hallerii relato Diarii pag. 284 et seq., in quo prima Propositio disertè explicatur sensu antea exposito, his verbis : « Sensus est, mandata Dei hominibus justis qui præcepta divina transgrediuntur, esse impossibilia defectu auxilii sufficientis quo possint eandem adimplere, vel necessariam ad ea implenda gratiam impetrare. »

Quæres 2^o, an Jansenius primam Propositionem reipsâ docuerit. — Respondeo affirmativè. Probatur : Est t. totidem verbis expressa apud Jansenium lib. 5 de Gratiâ Christi, cap. 13, ubi sic habet : « Hæc igitur omnia plenissimè plenisimèque demonstrant, nihil esse in sancti Augustini doctrinâ certius ac fundatius, quàm esse præcepta quædam, quæ hominibus non tantum infidelibus, exæcatis, obduratis, sed et fidelibus quoque et justis, volentibus ac conantibus secundum præsentēs quas habent vires, sunt impossibilia deesse quoque gratiam quâ possibilia fiant. »

Falsò autem ac immeritò obtendunt Janseniani, primam illam Propositionem à loco suo dolosè avulsam ac exhibitam fuisse, aliumque in Jansenii textu habere sensum ab eo quem inde extracta præ se ferre videtur. Namque, ut jam probavimus, proprius propositionis sensus est, justis aliquibus secundum præsentēs quas habent vires, id est, relativè ad majorem concupiscentiæ delectationem quâ premuntur, impossibilia esse Dei mandata defectu gratiæ verè hic et nunc sufficientis ; hunc porrò sensum proprium esse ac naturalem libri Jansenii, manifestè liquet, 1^o ex antecedentibus et consequentibus. Ante citata propositionis verba dixerat Jansenius : « Ex hac indubitatâ doctrinâ quædam non parvi momenti ad hanc rem spectantia inferuntur et clarescunt. Primum quidem, esse quædam homini præcepta secundum statum et vires in quibus constitutus est, impossibilia..... Secundum, non adesse semper gratiam quâ possimus, hoc est, quâ eadem illa præcepta implere sufficiamus..... Tertium, hanc impotentiam reperiri non solum in exæcatis et obduratis et infidelibus, sed etiam in fidelibus et justis, qui fidem Christi, et justitiæ charitatem suscepērunt.... Quartum, hanc impossibilitatem fidelibus accidere, non tantum quando nolunt præcepta facere, sed etiam quando volunt ; » quæ quatuor capita postquam fusè prosecutus est Yprensis, tanquam consecutionem col-

ligens, addit citata primæ Propositionis verba ; quibus statim subiungit : « hoc enim sancti Petri exemplo, aliisque multis quotidie manifestum esse, qui tentantur ultra quàm possint sustinere. » Et versis finem ejusdem capituli, totus est ut ostendat quandoque deesse justis ipsis gratiam orationis quâ uberius auxilium ad mandatum observandum necessarium impetrari possint ; ac demùm concludit, « non aliter verum esse, quòd Deus non jubeat impossibile, nisi quia quæcumque jubet, hominis voluntate per omnipotentem Dei gratiam adjutâ fieri possunt. » Vides quàm benè cohæreat mox expositus primæ Propositionis sensus cum iis quæ antecedunt et sequuntur in laudato Jansenii textu, hæcque esse firmam ac constantem ipsius doctrinam, aliquibus justis, secundum præsentem quas habent vires, id est, relativè ad præsentem gratiæ vires, impossibilia esse quædam Dei mandata.

2º Idem colligitur ex præcipuis Jansenii defensoribus qui dictum sensum Jansenio disertè ascribunt ; vide scriptum quod dicitur : *In nomine Domini*, scriptum *Trium columnarum*, etc. ; verba mox retulimus.

3º Istud idem rursus eruitur ex ipsis Janseniani systematis visceribus. Nam justis de quibus hic agitur, ii sunt qui volentes et conantes secundum præsentem quas habent vires servare mandata, illa tamen transgrediuntur ; atqui justis illis, Jansenii principiis stando, mandata hæc relativè sunt impossibilia, et deest gratia quâ ita possibilia fiant. 1º Ipsi sunt relativè impossibilia ; nequeunt enim ipsis eâ ratione possibilia fieri, nisi ex superiori delectatione cælesti, ex dictis paragr. 3. 4 et 5, superioris articuli ; atqui delectatio superior in illis justis cælestis non est, sed carnalis, quâ alliciuntur ad transgrediendum præceptum ; ergo, etc. 2º Deest illis gratia quâ præcepta fiant hic et nunc possibilia ; eam quippe non habent ex dictis ; nec possunt eam accersere per orationem, volunt enim et conantur, ac proinde orant, secundum præsentem quashabent vires ; atqui tamen gratiam non obtinent, cum transgrediuntur mandatum ; ergo quam habent gratiam, ea non dat vires orandi sicut oportet, et Deus *ipsis subtrahit auxilium suum*, inquit Jansenius, *sinens eos cadere*. Denique ex dictis et probatis loco mox citato, Jansenius justis gratiâ efficaci destitutis denegat potentiam relativam adimplendi præcepta, omnemque aliam potentiam in quocumque gradu in ipsis libentissimè admittit : porro, ex istâ doctrinâ mani-

festissime sequitur, justis quoties divina mandata transgrediuntur, ea ipsis verè esse impossibilia secundum præsentem quas habent vires, defectu scilicet gratiæ relativè victricis, quæ sola in systemate Janseniano relativam ad opus bonum confert potentiam ; ergo, etc. ; atque ex his constat Jansenium non solum docuisse primam Propositionem, sed nec aliam doctrinam suis stando principiis tradere potuisse.

Omnes quæ hic proponi possent objectiones maximâ ex parte jam dissolutæ sunt loco mox citato ; quæ enim asserunt Janseniani ut probent magistrum suum non negavisse possibilitatem mandatorum Dei, ac proinde primam non admisisse Propositionem, ea nihil aliud efficiunt nisi possibilitatem abstractam et absolutam ab eo admissam fuisse ; quæ verò ostendere videntur omnem omnino possibilitatem ab ipso fuisse rejectam, illa solam potentiæ relativæ exclusionem demonstrant ; atque inde non parùm corroboratur nostra responsio, quòd nimirum eâ positâ in sensu Janseniano omnia plana sint et facilia, atque ex seipsis corrumpantur quæcumque objici possent. Si quod tamen supersit quod novâ elucidatione illustrari queat, postea expendemus, præsertim ad Propositionem tertiam.

Unum hic prætermittere non possumus palmare Jansenianorum effugium quod perpetuò obtrudunt, ut evincant Jansenium primam non docuisse Propositionem : Justis, inquit, dum peccant, fatente Jansenio, citato cap. 15 libri 5 de Gratiâ, possent servare mandata *si velint*, nec ea transgrediuntur nisi quia volunt ; ergo impotentia quam in illis agnoscit Jansenius, est voluntaria, moralis et mera difficultas, non impotentia verè et propriè dicta, physica et involuntaria. — Respondeo, equidem justos illos posse servare mandata *si plenè perfectèque velint* ; verùm ista velle non possunt. Audiatur Jansenius eodem capite : « Non est satis velle vel nolle, ut magna quædam præcepta impleantur, tentationesque superentur, sed..... opus est, ut ardentè et fortiter velit, quod non est semper in hominis potestate. Talis enim ardor vel fortitudo voluntatis, non ex solâ libertate hominis proficiscitur, aut haberi potest, sed ex delectationis magnitudine, quæ ideò cælitus inspirari debet. » Ludunt itaque et Jansenius et illius defensores, dum asserunt justos illos posse mandata servare *si velint*, eorumque proindè impotentiam merè esse voluntariam. Namque 1º, si Angelis et Adamo defuisset *adjutorium sine quo*, non uti-

que suâ culpâ cecidissen. ex S. Aug. et ipsomet Jansenio; atque tamen verè de iis diceretur ex eodem Jansenio, possent perseverare *si vellet*; ergo, etc..... 2^o Pari ratione dici posset, ut Jansenii exemplis utar, demones et damnatos posse Deum diligere *si velint*, posse beatos Angelos, et (quod absit) Deum ipsum peccare *si velint*; at quàm hæc absurda sint nemo non videt..... 3^o Si valeat Janseniana cavillatio, expressioribus conciliorum circa libertatem definitionibus facile illuditur; etenim Manichæi, Wiclefite, Lutherani, Calvinistæ, aliique infensissimi libertatis adversarii, licet à suis interioribus non recederent principiis, libentissimè tamen exterioribus confiterentur, hominem posse semper bonum agere *si velit*..... 4^o passim præfatâ voluntariæ impotentiae notione abusi sunt hæretici. Ita Wiclef. teste Valdensi lib. 1 doctrinalis art. 1. cap. 15, cui titulus est: *Contra subterfugium illud Wicleffi: Potest Deus si velit*. Eodem cavillo utitur Lutherus lib. de servo arbitrio; necnon et ipse Calvinus in caput 12 Ezechiel. Audiatur insignis inter Calvinistas Moses Amyraldus in defens. opinionis Calvini de reprob. pag. 215, ibi ex Calvino exponens quomodò mandata Dei sunt impossibilia, sic habet: « Qui Romanam Ecclesiam sequuntur, solent non tam refellere, quàm calumniari nostram opinionem; sic enim eam interpretantur, quasi statueremus peccatoribus impossibile esse Deo obedire, eadè impossibilitate quâ non possunt cælum sistere, terram movere, aut per aera volare. » Atque ubi impiam hanc expositionem à Deo amoliri conatus est, sic respondet: « Qui alas non habet, volare non potest, etiamsi maximè vellet; et qui Alpes aut Pyræneos montes loco movere conaretur, etsi omnes corporis nervos intenderet, et omnibus voluntatis viribus conniteretur, non posset; at si peccatores fortiter obedire Evangelio vellet, jam fecissent..... Quamobrem impotentia volandi per aera in iis in quibus natura alas negavit, oritur ex defectu facultatis naturalis, sine quâ id fieri non potest; at impotentia Christo obediendi in peccatoribus, ex malâ voluntate oritur. » Subinde docet, illam non istam impotentiam à peccato excusare; tum diserta hanc in rem Calvini verba allegat in citatum caput 12 Ezechielis.... 5^o Tandem, quod non est possibile nisi sub conditione impossibili, absolutè dici non potest possibile; istud ex sese patet, atque ita post S. Aug. expressè tradit S. Thom. quest. 16 de malo art. 5; atqui,

juxta Jansenium, justî, dum peccant, hic et nunc non possunt plenè ac perfectè velle, ob præponderantem scilicet carnalem delectationem; ergo, etc.

Impotentia ergo quam Jansenius admittit in justis qui peccant (quam tum ipse, tum ejus discipuli appellant *voluntariam, moralem, conditionatam, consequentem, mutabilem, relativam, partialem, inadæquatam*, quandoque etiam meram difficultatem), hæc, inquam, impotentia, verè involuntaria est, utpotè quæ prævertat omnem rationis consensum; physica est, *ex defectu virium promanans*, ut ipse docet Yprensis toto hic citato cap. 150, absoluta, demùm antecedens, immutabilis, totalis, adæquata, propria, vera et realis meritò dici potest, quia oritur ex præviâ ac indeliberatâ delectatione superiori, quæ, ut loquitur Jansenius, non est in potestate voluntatis, ut eam nempe habeat vel rejiciat; et quæ deliberatum ac perfectum voluntatis actum necessariò producit, cum necesse sit ex Jansenio, voluntatem secundùm id operari quod eam magis delectat.

Atque hinc patet impotentiae voluntariæ definitionem, quam millies asserunt Jansenius et ipsius discipuli; scilicet: *L'impuissance volontaire consiste à ne pouvoir faire une chose, parce qu'on ne veut pas la faire*, etc., tanquàm absurdam, illusoriam, cunctisque circa libertatem renovandis erroribus aptissimam, omninò rejiciendam esse.

Quæres 3^o, quis sit sensus catholicus errori primæ Propositionis oppositus. — Respondeo, ex dictis facilè colligi sensum hunc esse, justis volentibus et conantibus secundùm præsentés quas habent ex gratiâ vires, mandata Dei non sunt impossibilia, nec deest illis saltem gratia orationis quâ possint uberius impetrare auxilium, ut mandata hic et nunc adimplere valeant; seu, quod in idem recidit, justî, urgente præcepto, eâ instructi sunt gratiâ, quâ relativè ad actualem hic et nunc titillantem concupiscentiam, illorum voluntas potest et istam superare, et mandatum observare; aut ad utrumque præstandum auxilium impetrare.

Expressa est Apostoli doctrina 1 Corinth. 10: *Fidelis est Deus*, inquit, *qui non patietur vos tentari supra id quod potestis, sed faciet etiam cum tentatione proventum ut possitis sustinere*. Hæc etiam est doctrina concilii Trid. sess. 6, cap. 11: *Deus impossibilia non jubet, sed jubendo monet, et facere quod possis, et petere quod non*

possis, et adjuvat ut possis. Idem docet S. Augustinus pluribus in locis, præsertim lib. de Naturâ et Gratiâ cap. 69: Eo ipso, inquit, quo firmissimè creditur, Deum justum et bonum impossibilia non potuisse præcipere, hinc admone-mur, et in facilibus quid agamus, et in difficilibus quid petamus.

Cùm ergo alibi tradit S. doctor, gratiam par-vam imparem esse debellandæ validiori concu-piscentiæ, sensus ejus non est, gratiam illam nullatenus posse fortiori superare concupi-scentiam; sed tantum eam non posse immediatè ac proximè, licet possit orando impetrare adju-torium, ut actu illam vincat.

SECUNDA PROPOSITIO. — *Interiori gratiæ in statu naturæ lapsæ nunquàm resistitur.*

Quæres 1^o, quis sit proprius secundæ Propo-sitionis sensus. — Respondeo sensum hunc esse, nullam dari in præsentī statu interiorē Christi gratiam, quæ privetur eo effectu quem habere potest relativè ad concupiscentiam hic et nunc titillantem.

Huic expositioni favet ipse propositionis con-textus. Namque juxta communem et ab omni-bus receptum loquendi morem, resistere alicui (cùm agitur de actibus humanis ac liberis) non significat tantum non agere id ad quod alius nos movet et excitat; sed ita hoc non agere, ut verè istud hic et nunc operari possimus rela-tivè ad ingruentes his in circumstantiis difficul-tates; neque enim quispiam dixerit amicum amico aliquid efflagitanti, et subditum prælato aliquid imperanti, resistere, quando rem ipsam petitam vel præscriptam, ideò tantum non exequuntur, quòd eam in illis in quibus versantur rerum adjunctis, peragere non va-leant; atque ille profectò iniquus foret, qui in viros tali impotentiâ laborantes inveheretur, quasi infidelitatis vel inobedientiæ rei existe-rent; ergo resistere gratiæ, juxta vim vocis, propriè significat eam privare effectu quem hic et nunc habere potest. Eidem expositioni præ-lusit Hallerius in scripto sæpius laudato, his verbis: « Sensus (secundæ Propositionis) est, « in statu naturæ lapsæ nullam esse gratiam « Christi actualem internam in voluntate resi- « dentem, cui voluntas humana de facto dis- « sentiat. »

Proprius itaque dictæ propositionis sensus non est, 1^o « interiori gratiæ in statu naturæ « lapsæ eatenus nunquàm resisti, quatenus vo- « luntas hominis respectu gratiæ merè passivè

« se habet, et velut inanime quoddam nihil « omninò agit, nec cooperatur. » Sensum hunc nonnisi malignè attingi posse secundæ Propo-sitioni ultrò confitentur Janseniani in suo Trium columnarum scripto. 2^o Sensus non est, quòd concupiscentia semper oppugnet gratiam, eique reluctetur; eà etenim ratione, gratiæ quantumcumque victrici et efficaci etiam re-sistitur; siquidem concupiscentia carnis semper luctatur cum spiritu, ac sub quolibet gratiæ etiam efficacissimæ motu dantur renitentes cu-piditatis motus. 3^o Sensus etiam non est, quòd gratia eum omnem semper assequatur effectum ad quem movet et ex propriâ suâ naturâ ten-dit, quemque absolutè operari potest; potest enim, ex dictis in systemate Jansenii, gratia parva ad opus bonum movere, illudque ex sese operari posse, quod tamen nusquàm obtinet ob validiorem ex adverso repugnantem concupis-centiam.

Quæres 2^o, utrum hanc secundam Proposi-tionem docuerit Yprensis. — Respondeo, eam reipsà multoties docuisse, quod quidem proba-tur 1^o plurimis Jansenii testimoniis; lib. 2 de Gratiâ Christi cap. 24, lib. 3, cap. 5 et 17, lib. 4, cap. 7 et 10, et lib. 10, cap. 7; at nullibi eam doctrinam apertius tradit quàm citato lib. 2 de Gratiâ Christi, cap. 25, cujus titulus est, *Efficacissima ejus (gratiæ scilicet) natura decla-ratur, ex eo quòd nulla prorsus effectu caret, sed eum in omnibus quibus datur infallibiliter operatur.* Quod idem repetit initio capituli, et paulò post addit: « Apud Augustinum gratia et opus bo- « num ita reciprocantur, ut quemadmodum ex « gratiâ datâ mox effectum operis subsecutum « inferre solet; ita vice versâ, ex defectu ope- « ris, gratiam non esse datam. Quo ratioci- « nandi modo indicatur gratiam tanquàm cau- « sam, et operationem voluntatis bonam, velut « effectum, esse, ut philosophi loquuntur, « convertibiles, et à se mutuò inseparabiles. » Et rursus quibusdam interjectis: « Sicut signi- « ficat Augustinus, hoc ipso, quo data est ho- « mini gratia, mox effectum sequi; sic è con- « trario negativè subinde ratiocinando docet, « hoc ipso quo effectu homo destituitur, nul- « lam ei gratiam collatam esse, sed solo Pela- « gianæ gratiæ adjutorio, hoc est, lege, doctri- « nâque ad operationis præceptæ justitiam « niti. » Ex his perspicuum est, omnem Christi gratiam in sententiâ Jansenii esse prorsus in-separabilem à suo effectu, et consequenter nulli gratiæ resisti, seu nunquàm impediri à pro-ductione sui effectus; porrò ex dictis et pro-

batis ubi de potentiâ absolutâ et relativâ, ista intelligi nequeunt de effectu quem gratia potest absolutè habere; ergo necessariò debent intelligi de effectu quem producere valeat relativè ad actuales concupiscentiæ gradus.

Probatur 2^o ex unanimi discipulorum Yprensîs doctrinâ, qui dicto sensu secundam Propositionem interpretantur, hancque expositionem magistro suo constanter attribuunt. Recole quæ superiori articulo paragrapho 5, laudavimus eorum verba; unum aut alterum testimonium hic addidisse sufficiat. Arnaldus, Apologiâ 1^a pro Jansenio sic habet pag. 87: « La grâce efficace est la seule que saint Augustin recon- naisse après la chute d'Adam. » In eundem sensum loquitur auctor libri cui titulus: *Réponse d'un docteur à M. Chamillart*; sic loquitur pag. 13: « C'est une grande injustice d'obliger M. Arnauld pour être catholique de tenir pour une vérité indubitable, qu'on résiste véritablement à la grâce de Dieu..... Saint Augustin a réfuté cela comme une erreur au livre de la correction et de la grâce, où il enseigne, que toutes les fois que Dieu touche le cœur de l'homme pour lui faire produire quelque bonne action, l'homme la produit infailliblement. » Idem passim tradunt alii Jansenii asseclæ.

Probatur 3^o. Non solum docuit Yprensîs secundam Propositionem, sed nec aliam doctrinam tradere potuit suis stando principiis. Etenim resistere gratiæ, est eam privare eo effectu quem habere potest relativè ad circumstantias in quibus datur; atqui nulla est in systemate Jansenii gratia quæ eo privetur effectu. Nam hic recurrit argumentum quod sæpiùs proposuimus; scilicet, vel motus delectationis cœlestis superior est motui delectationis carnalis, vel inferior, vel æqualis; porro utrumlibet ex his asseratur, etc., ergo.

Dices: Jansenius præter gratiam efficacem sæpiùs agnoscit gratiam quam parvam appellat; atqui parvæ illi gratiæ ab efficaci distinctæ, profectò resistitur; ergo, etc. Respondeo nego min., quippe parva Jansenii gratia eum semper effectum obtinet quem habere potest relativè ad præsentes subjecti dispositiones; cum enim ipsa sit concupiscentiâ inferior, non potest plenum ac perfectum voluntatis consensum hic et nunc elicere, sed imperfectum tantum; hunc autem imperfectum consensum parva gratia semper elicit, fatente Jansenio lib. 2 de Gratiâ Christi cap. 27; postquam enim sibi objecit, « multos divinitus mente collustrari,

« et in ipsâ voluntate motibus divinæ gratiæ percelli, qui tamen ab ejus internâ suasionem et inclinationem dissentiant; » sic respondet: « Considerandum est, multiplices esse divinæ gratiæ effectus, quemadmodum et voluntatis; est enim velle perfectum, quod Augustinus posse vocat; est et imperfectum, quod velleitatem appellare solent: et hoc ipsum diversos gradus habet, donec ad ipsam primam tenuissimamque boni complacentiam veniatur. Hæc ergo primus est cœlestis illius roris effectus, quem ut minimum in omnibus operatur, quibus eum infundit Deus. » Postea asserit Yprensîs gratiam illam parvam per quam velleitates excitantur, *nullo modo sufficere ut homo Dei mandatum operetur, ut Deum super omnia diligat, ut speret, ut oret, ut credat*; ergo putat ipsam quidem eo effectu vacuum esse quem non potest hic et nunc habere, licet eum omnem semper obtineat quem sortiri potest relativè ad præsentes subjecti dispositiones.

Ex his patet (quod observa), in systemate Jansenii, omnem gratiam semper esse efficacem, utpote quæ semper operetur effectum quem hic et nunc operari potest; at omnis non est victrix, quia omnis non superat actuale oppositum concupiscentiam.

Quæres 3^o, quis sit sensus catholicus errori secundæ Propositionis oppositus. Respondeo: Ex genuino ac erroneo secundæ Propositionis Jansenianæ sensu facilè colligitur, hunc esse oppositum ac catholicum sensum, nempe, in statu naturæ lapsæ, quamlibet gratiam interioriorem non eum omnem semper obtinere effectum, cujus capax est relativè ad oppositam concupiscentiæ delectationem; quod quidem dogma pluribus demonstrabitur, ubi de naturâ et existentiâ gratiæ sufficientis.

Dices: Omnis gratia interior semper illustrat intellectum ac movet voluntatem; ergo suum semper obtinet effectum, ac proinde ipsi nusquam planè resistitur. Respondeo 1^o, in sententiâ eorum qui dicunt gratiam formaliter et essentialiter esse illustrationem mentis et voluntatis motionem, nego consequens: sic enim illustratio et motio non sunt effectus gratiæ, sed ipsamet ejus natura; ita sentiunt Suarez, Bellarminus, Meratius et alii plerique. 2^o In sententiâ illorum qui cum Lemosio, Alvare, etc., existimant, « gratiam formaliter non esse actum vitalem indeliberatum, sed motionem Dei ordine causalitatis antecedentem actum nostrum vitalem ordinis supernaturæ

« lis; » distinguo consequens: gratia aliquem effectum saltem indeliberatum semper operatur, concedo; effectum deliberatum, ad quem ultimatè ordinatur et ad quem relativam conferre potestatem, neg.; ac proinde quandoque propriè resistitur gratiæ. *Gratia sufficiens*, ait Alvares lib. 8 de Auxil. disput. 76, n. 6, *est quidem sufficiens comparatione conversionis perfectæ, licet sit semper efficax respectu alienius effectus*, indeliberati scilicet, ut tradit idem Alvares n. 5, disput. 80.

TERTIA PROPOSITIO. — *Ad merendum et demerendum in statu naturæ lapsæ, non requiritur in homine libertas à necessitate, sed sufficit libertas à coactione.*

Quæres 1^o, quis sit proprius ac naturalis tertiæ Propositionis sensus. — Antequàm respondeam, observandum 1^o, quid et quotuplex sit libertas. Libertas generatim idem est ac immunitas. Triplex autem vulgò distinguitur immunitas; hinc et triplex libertas. Prima, à peccato et miseriâ. Secunda, à coactione. Tertia, à necessitate. De primâ nulla hic difficultas. Secunda est immunitas à vi externâ contra voluntatis propensionem; dicitur libertas spontaneitatis. Tertia est immunitas ab omni necessariâ ad unum determinationem; dicitur libertas indifferentiæ; hæcque accuratè definitur, vis electiva, vel, facultas suorum actuum domina, vel, facultas quæ positis omnibus ad agendum prærequisitis potest agere vel non agere, relativè et in sensu composito eorum omnium quæ se tenent ex parte actûs primi.

Rursus hæc indifferentiæ libertas duas quasi species sub se continet; altera dicitur libertas contradictionis seu exercitii, quæ est facultas activè indifferens ad ea quæ sunt contradictoriè opposita, qualia sunt agere vel non agere; altera contrarietatis seu specificationis, quæ est ad duo contraria, v. g., ad amorem et odium. Addunt nonnulli tertium libertatis membrum, quod diversitatis seu disparitatis vocant; eaque libertas est facultas sese determinandi ad varios actus intra eandem speciem, scilicet ad hoc vel illud bonum; ad hoc vel illud malum.

Observandum 2^o, quid et quotuplex necessitas. Necessitas hic, nihil aliud est quàm determinatio ad unum. Triplex potissimum distinguitur, una coactionis, altera naturalis, tertia simplex. Necessitas coactionis seu violentiæ, fit à principio extrinseco, reluctantè

passo. Necessitas naturalis est essentialis ad unum determinatio orta ex principio intrinseco naturali, qualis est necessitas in omni ente intellectuali amandi beatitudinem in genere. Denique necessitas simplex, est invincibilis et insuperabilis determinatio ad unum, orta ex principio extrinseco, qualis est necessitas agendi sub delectatione superiori in systemate Jansenii. Dicitur à Jansenianis, voluntaria; quia voluntas tali determinationi spontè obsequitur, tametsi necessariò.

Hæc autem necessitas alia est immutabilis, permanens et invariabilis, qualis est in Beatis ut Deum ament; alia mutabilis et transiens, qualis est ea de quâ potissimum agitur in tertiâ Propositione Jansenii. Rursus necessitas simplex, mutabilis, alia est absoluta, quæ qualemcumque etiam absolutam ad oppositum potentiam excludit; alia relativa, quæ relativam duntaxat resistendi potestatem removel; tandem alia est specificationis ut ad bonum vel malum in genere; vel exercitii ut ad hoc bonum vel hoc malum. His præmissis,

Respondeo, proprium et naturalem tertiæ Propositionis sensum hunc esse; videlicet, ad merendum et demerendum in statu naturæ lapsæ non requiri immunitatem à necessitate, saltem simplici, voluntariâ, mutabili ac relativâ; sed sufficere libertatem à coactione.

Probatur: Quando terminus aliquis generalis est ac indefinitus, tunc accipi debet pro omnibus speciebus sub ipso contentis, si nullâ aliâ voce restringatur: atqui in dictâ propositione, vox ista, *necessitas*, est terminus generalis qui in se complectitur omnes species necessitatis propriè dictæ, ac proinde etiam Jansenianam necessitatem simplicem et mutabilem, quæ veram et relativam ad oppositum potestatem excludit: aliunde verò nulla est ratio cur terminus ille restringatur ad unam duntaxat naturalem, aut simplicem ac immutabilem necessitatem, cum sola coactio in allatâ propositione restringatur; ergo, etc., ac proinde proprius tertiæ Propositionis sensus est, libertatem requisitam in præsentī statu ad merendum et demerendum, non exigere immunitatem à necessitate saltem simplici, mutabili ac relativâ.

Confirmatur nostra interpretatio ex sæpius laudato Hallerii scripto, in quo sic habetur: « Tertia Propositio: *Ad demerendum*, etc..... » Sensus est, ut actio quæ meritoria vel demeritoria est libera censeatur, non requiritur « ut fiat cum indifferentiâ, sed sufficit modò

« voluntariè et sine coactione fiat. Hæc autem
« sententia (pergit Hallerius) eadem est ac Cal-
« vini, qui nunquam eo sensu negavit liberum
« arbitrium, quasi actiones nostræ voluntatis
« non essent voluntariæ; sed eo sensu, quod
« negaret nobis inesse indifferentiam ad utrum-
« libet. »

His verbis errorem tertiæ Propositionis in eo
collocat Hallerius, quod ad meritum vel demeritum necessariam neget activam indifferentiam; porro activæ indifferentiæ nomine ex omnibus orthodoxis nihil aliud significatur quam potestas agendi vel non agendi hic et nunc expedita, seu immunis ab omni necessitate, etiam mutabili et relativâ; ergo, etc.

Proprius itaque tertiæ Propositionis sensus non est, solam necessitatem naturalem, qualis est necessitas in omni ente intellectuali amandi beatitudinem in genere; vel solam necessitatem involuntariam, qualem experimur in motibus primò primis et indeliberatis; vel solam voluntariam simul et perpetuam ac immutabilem, qualis est in Beatis amandi Deum; vel solam antecedentem, hoc est, quæ antecedit et rationis advertentiam et gradum superiorem actualis concupiscentiæ; vel solam absolutam, hoc est, quæ qualemcumque etiam abstractam ad oppositum potentiam excludit, proprius, inquam, sensus non est, has duntaxat necessitatis species officere libertati ac merito hominis lapsi, et in quibusdam hujusce status meritorii aut demeritoriis actionibus reperiri; hi omnes sensus prorsus alieni sunt et extranei, atque ad eximendam à censurâ tertiæ Propositionis Jansenii doctrinam gratis excogitati; certum etenim est dictas necessitatis species à Jansenio disertis verbis excludi tanquam alienas à libertate, ut nunc est; solamque ab ipso admitti necessitatem simplicem, mutabilem et relativam, ut mox evincemus.

Quæres 2^o, an tertiam Propositionem docuerit Jansenius. Antequàm respondeam nonnulla sunt in antecessum præmittenda ad perfectam Janseniani de libertate systematis intelligentiam planè necessaria. Observandum itaque 1^o, distinguendum esse, ex Jansenio, inter essentialiam libertatis, et statum ipsius; seu inter libertatem genericè sumptam, prout nempe communis est Deo, Angelis, et homini tum lapso, tum innocenti; et libertatem specificè, seu quatenus propria est hominis lapsi et viatoris: « Inter actum liberum et statum libertatis, » inquit lib. 6 De gratiâ Christi, cap. 34, « permagna differentia est; aliter Deus,

« aliter Beati, aliter Angeli viatores, et primus
« homo, aliter homines reparandi, aliter Christus Dominus in viâ constitutus liber fuit. »

Observandum 2^o, essentialiam libertatis ex Jansenio, in uno voluntario, tametsi necessario, consistere, nec aliud essentialiter postulare. Passim et apertissime istud tradit lib. 6 de Gratiâ Christi cap. 5, 4, 5, etc. « Voluntas seu volitio (inquit cap. 5) et libera voluntas idem sunt, sicut velle et libere velle; et impossibile est, ut velle non sit liberum. » Et rursus: « Libera est voluntas, hoc est volitio, ratione sui, quia est essentialiter libera; implicat enim contradictionem ut voluntas non sit libera, sicut implicat ut volendo non velimus. » Ratio est, quia in mente Jansenii actus formaliter constituitur liber, quia est in nostrâ potestate, quod fit cum volumus, et cum nolumus non fit; hinc ibidem cap. 4, relatis pluribus S. Augustini locis, hæc habet: « Quapropter ex hæc doctrinâ toties iteratâ patet, ut cognoscamus utrum aliquid in nostrâ potestate, seu liberum nobis sit, hoc intuendum esse, utrum fiat quando volumus: si enim fiat quandocumque volumus, et non fiat quando nolumus, liberum est; si verò cum volumus, non fiat, vel si nolumus, fiat, certissimum est, non esse nobis liberum, quia non est in nostrâ potestate. »

Voluntarium porro illud in quo essentialiam libertatis reponit Yprensus, debet esse deliberatum, hoc est, ex advertentiâ rationis, et cum inclinatione ac complacentiâ voluntatis; deliberatio enim in mente Jansenii, meram duntaxat objecti cognitionem ac complacentiam importat; unde determinationem tametsi necessariam, modò ex præviâ cognitione fiat, liberam esse contendit. Ita clarè mentem suam explicat lib. 7 de gratiâ Christi, cap. 3: « Lustratis diligenter fundamentis Augustini, inquit, quibus tota doctrina de arbitrii libertate nititur, nihil aliud existimamus quàm cognitionem ac delectationem, seu delectabilem objecti complacentiam esse id quod tantam potestatem in liberum arbitrium habet, ut eam faciat velle vel nolle; seu, ut eâ præsentem actus volendi sit reipsâ in ejus potestate, absente non sit. » Hinc cap. 36 libri 6 de Gratiâ, docet improvisos voluntatis motus esse voluntarios, nec tamen esse liberos: « Deest quippe illis, inquit, id quod præcipuum est, quia non sunt in potestate hominis, non sumus eorum domini, fiunt sine plenâ rationis advertentiâ, profluunt invitâ repugnanteque

« voluntate; quæ singula essentialiter reputantur quant libertati. » Ex his liquet, libertatem et deliberationem ex Jansenio nihil aliud essentialiter postulare, quam advertentiam ex parte intellectûs, et inclinationem ac complacentiam ex parte voluntatis.

Observandum 3^o, ex dictis manifestè sequitur 1^o, in systemate Jansenii uniformem esse in omni agente libero formalem ac essentialem rationem libertatis, diversum verò ipsius statum; ipsissima sunt Jansenii verba lib. 6 de Gratiâ Christi cap. 34: « Liberum arbitrium, » inquit, in omnibus sive beatis sive damnatis, « sive viatoribus, sive Deo, sive creaturâ, uniformem libertatis rationem obtinet, etsi differentem statum. » Scilicet essentialis ratio libertatis, juxta Jansenium, consistit, ut mox vidimus, in voluntario deliberato, tametsi necessario; hæc autem necessitas varia est pro vario statu agentis liberi; immutabilis et perpetua ad bonum in Deo, in Christo, in Beatis; perpetua et invariabilis ad malum in damnatis; in hominibus autem viatoribus, nec perpetua nec immutabilis est, sed variabilis et quodammodo flexibilis ad bonum et malum: « Hominum viatorum, inquit loco mox citato, non solum coactionis expertem esse libertatem, sed etiam necessitatis immutabilis voluntariæ; hoc est, eam ad utrumque esse indifferentem (id est flexibilem) fatemur perlibenter. »

Sequitur 2^o, solam coactionem (sub cujus nomine, ut advertit Paulus Irenæus, comprehenditur etiam naturalis illa necessitas quæ omnem rationis advertentiam excluderet), essentialem libertatem perimere. Stat ergo, ex Jansenio, integra libertatis essentia cum necessitate simplici, etiam immutabili et absolutâ; id disertis verbis tradit cap. 38 lib. 6 de Gratiâ Christi: « Non obstante immutabili necessitate, » inquit, posuerunt (antiqui Scholastici et scriptores usque ad Augustinum) omnem omnino « rationalem voluntatem (hoc est voluntatis motum) et liberam et electivam objecti sui, solâ exclusâ violentiæ coactionisque necessitate. »

Sequitur 3^o, generationem Filii in divinis, processionem Spiritûs sancti, amorem beatificum, omnem denique actum ex rationis advertentiâ et voluntatis inclinatione elicatum, quantumque necessitate aliunde fiat, eo ipso voluntarium, deliberatum ac liberrimum esse; illius domini sumus; est in potestate nostrâ; fit cum volumus, et si nollemus non fieret; omnes è contra actus qui prævertunt rationis

consensum et advertentiam, non sunt liberi; nobis quippe invitis, aut saltem non volentibus fiunt; tales sunt motus primò primi.

His præsuppositis, jam ut præcedenti quæsito fiat satis,

Respondeo 1^o, Jansenium in præsentī statu naturæ lapsæ admisisse immunitatem à necessitate tum coactionis, tum naturæ, tum etiam à necessitate simplici, perpetuâ ac immutabili. Ita totidem penè verbis docet Jansenius citato cap. 34 lib. 6 de Gratiâ Christi. Et verò, cum delectationum conflictum admittat, negat consequenter necessitatem immutabilem et invariabilem, et quamdam agnoscit indifferentiam, seu flexibilitatem ad bonum et malum, sed non immunem à vi ad unum invincibiliter hic et nunc determinante, ut jam dicturi sumus.

Respondeo 2^o, Jansenium in præsentī naturæ lapsæ statu non admisisse immunitatem à necessitate simplici mutabili et relativâ. Namque ille non admisit immunitatem à necessitate simplici, mutabili et relativâ, qui sub delectatione superiori ad unum, nonnisi absolutam ad oppositum potentiam agnovit, nec stando suis principiis relativam agnoscere potuit; atqui ita docuit Jansenius, ut abundè constat ex dictis ubi de potentiâ absolutâ et relativâ; ergo, etc.

Respondeo 3^o, Jansenium docuisse, libertatem hujus status ad merendum vel demerendum necessariam, unam duntaxat excludere coactionem aut naturalem necessitatem, non verò simplicem necessitatem, saltem mutabilem ac relativam. Hoc unico puncto tota stat Jansenii de libertate doctrina, ideòque paulò fusiùs istud demonstrandum.

Probatur itaque 1^o disertis Jansenii testimoniis. Primum petitur ex lib. 6 de gratiâ Christi cap. 24, ubi suam sub nomine sancti Thomæ sententiam profert Yprensis, his comprehensam capitulis: « Clarissimis verbis multisque modis docuit S. Thomas 1^o, arbitrium hominis dictum esse liberum, quia non cogitur... 2^o « Necessitatem simplicem voluntatis non reputare libertati; hancque S. Augustini sententiam esse tradit... 3^o Sæpè docet arbitrium liberum idcirco non esse amissum per peccatum, quia remansit liberum à coactione, quamvis sit peccati servum... 4^o Docet Magistrum Sententiarum et S. Bernardum, « quando necessitatem remouet à libero arbitrio, de necessitate coactionis loqui... 5^o Opus esselaude vel vituperio dignum, meritorium vel demeritorium, ex hoc quòd est voluntarium,

« spontaneum, non coactum, tametsi determinatum ad unum. » Ille sanè loquitur Jansenius de præsentì statu, cum loquatur de libero arbitrio post peccatum Adami; atqui vult eò loci liberum illud arbitrium, et consistere in solo voluntario, et sufficere ad meritum et demeritum; ergo, etc.

Secundum eruitur ex cap. 34 ejusdem libri: « Neque enim, inquit, quisquam spero, ita desipuerit, ut hominem etiam viatorem libertatem amissurum putaret, si liberrimam et liberatrice charitate in humanum liberetur et firmaretur arbitrium, ut quod Beatis jam in præmium retributum est, in hac vitâ constitutus amplius jam peccare non posset. » Apertè hic loquitur Jansenius de libertate hujusce statûs, seu de libertate hominis viatoris, quam contendit integram fore et ad merendum sufficientem, etiamsi amplius, sicut Beati in cælo, peccare homo non posset, nec à bono agendo cessare.

Tertium desumitur ex lib. 8 cap. 15: « Quæ manifestissimè clamant, inquit, gratiam quæcumque efficacem, etiam talem qualis in cælo cum summâ delectatione dabitur, nullo modo tollere libertatem, quia non tollit voluntatem, hoc ipso videlicet quo eam non cogit aut invitam rapit; sic enim diligit Deum, ut velit se diligere, et ideò in actu volendi seipsum movet et sibi dominatur, et pro tanto dicitur liberum. » Pressius idem repetit cap. 17: « Si etiam in hac vitâ Dei inspiratio tam stabiliter ac delectabiliter Deo operante inhæreret voluntati, ut eam non posset abjicere, felicissimum, fortissimum, liberrimumque meritò diceretur atque esset arbitrium. » Cæcutiat necesse est qui non videat Jansenium hic loqui de libertate sicut et de gratiâ præsentis statûs. Pervolvantur libri 6 et 7 de Gratiâ Christi et liber 8 à capite 5 usque ad calcem, et planè cæcus sit oportet, quicumque singulis fermè paginis eandem hanc expressam non inveniet doctrinam.

Unum hic luculentum ejusdem auctoris testimonium prætermitti non debet, lib. 4, de statu naturæ lapsæ, cap. 24: « Sic ergo, inquit, etiamsi et hic (hoc est in præsentì vitâ) ille perversus amor sui, in quem ex Dei dilectione creatura rationalis lapsa est, et in quo ex justissimâ Dei damnatione per severat, et ex quo omnis actus vel omissio damnatæ voluntatis fluit, firmissimè adhæreat voluntati, imò etiamsi non solùm specificatione, ut nunc est, sed etiam exercitio,

« quemadmodum amor beatificus esset necessarius, non tamen ex Augustino desineret esse liber. » Notanda sunt ista verba, *etiamsi et hic*, et ista alia, *ut nunc est*, quibus manifestè ostendit Jansenius, se de libertate hominis lapsi loqui.

Ut vim horum textuum elevent Paulus Irenæus Disquis. 6, art. 3, Dionysius Raimundus parte 1, cap. 4, alique Jansenii defensores, reponunt Jansenium in dictis locis loqui non de libertate hujus statûs ad merendum et demerendum necessariam, sed de libertate duntaxat genericè et essentialiter sumptâ. Verùm 1º, reclamant ipsissima textuum laudatorum verba.... 2º De hac ipsâ profectò libertate egit Jansenius, quam Manichæi nimium deprimebant, Pelagiani verò plus æquo extollebant, quam egregiè sanctus Augustinus adversus primos vindicavit, et adversus alios intra debitos fines compescuit; quam denique Jansenius ipse ex SS. Augustino et Thomâ, cum gratuitâ prædestinatione et efficaci gratiâ conciliare conatus est; atqui nemo non videt isthæc omnia pertinere ad libertatem propriam hujus statûs, non verò tantum ad libertatem universim ac genericè sumptam; ergo.... 3º Quis faciliè sibi persuadeat, Jansenium unicè de libertate generatim et abstractè sumptâ, quæ parùm vel nihil ad institutum suum conducebat, egisse; non verò de libertate hujus statûs ad merendum et demerendum necessariam, de quâ potissimum, sen potiùs unicè erat quæstio, ex quâ laus et vituperium actionum nostrarum pendet? ergo.

Probatur 2º ex præcipuis Jansenii discipulis qui eandem magistro suo doctrinam adscribunt. Auctor solemnìs scripti, *In nomine Domini*, pag. 24, sic habet: « Quoad Yprensis hæc in parte (circa tertiam Propositionem) sententiam, vide ab ipso Augustini, aliorumque Patrum omnis ætatis, tum præcipuorum theologorum congesta loca innumera, quibus evincit invictissimè solam libertatem à coactione ad veram libertatem, et proinde ad meritum necessariam esse. » Arnaldus Apologiâ pro sanctis Patribus pag. 1044: « Depuis la désobéissance criminelle, qui a perdu toute la nature, afin que les hommes soient coupables en se laissant aller aux tentations, qui les portent à violer la loi de Dieu, il suffit qu'ils ne s'y laissent aller que par leur propre volonté sans que personne les y contraigne. » Paulus Irenæus Disquisit. 6, pag. 254: « Hoc tantum docuit Jansenius, inquit, 1º, libertatē in genere solam

« repugnare coactionem, quatenus hæc etiam
« comprehenditur necessitas naturalis. » Idem
tradunt Dionysius Raimundus, Samboyus et
alii passim Jansenii patroni.

Probatum 3^o variis momentis theologicis :
1^o Manifestè sequitur ex primâ Jansenii Propo-
sitione, ipsum censuisse ad merendum et de-
merendum non requiri immunitatem à neces-
sitate mutabili et relativâ. Docet siquidem
justis quibusdam secundum præsentem quas hic
et nunc habent vires, mandata verè esse im-
possibilia, et tamen eos peccando demereri;
coherenter ergo affirmare debuit, ad deme-
rendum non requiri immunitatem à necessitate
mutabili et relativâ : porro ex eodem Jansenio

b. 4 de statu naturæ lapsæ, cap. 24, eadem
rursus est, quantum ad libertatem, ratio
riti et demeriti; ergo, etc. 2^o Apertè col-
ligitur eadem doctrina ex systemate delectatio-
nis relativè victricis ad sensum Jansenii; hæc
etenim infert necessitatem relativam, cum ex
Jansenio lib. 7 de Gratiâ Christi cap. 3, po-
sitâ delectatione superiori actus oppositus sit
extra hominis potestatem, ita videlicet ut eum
hic et nunc velle non possit; atqui tamen ho-
mo obsequium præstans delectationi victrici
meretur aut demeretur, non diffitente eodem
Jansenio; ergo. 3^o Triplex est tantum indiffe-
rentia, nempe contrarietatis seu specificationis,
contradictionis seu exercitii, et denique dis-
paritatis seu diversitatis: atqui nullam ex his
admisit aut admittere potuit Jansenius in suo
systemate. Namque quælibet indifferentia es-
sentialiter pugnat cum eo systemate, in quo
voluntas invincibiliter ac necessariò sequitur
impulsum majoris delectationis indeliberatæ;
atqui ita est in Janseniano systemate, in eo
etenim necessum est ut secundum id operemur
quod ampliùs delectat; et paradoxum est quòd
minor delectatio vincat majorem oppositam;
ergo, etc. Nulla ergo in systemate Jansenii
vera occurrit necessitas, nulla proinde vera ac
propriè dicta indifferentia; ac per consequens
homo meretur vel demeretur per actus immu-
nes tantum à coactione.

Ex his sequitur, Jansenium docuisse tertiam
Propositionem. Namque ex dictis, proprius ac
naturalis tertiæ Propositionis sensus est, ad
merendum et demerendum non requiri immu-
nitatem à necessitate saltem simplici, muta-
bili ac relativâ; atqui iterum ex dictis, istam
tradidit doctrinam Yprensis, nec aliud stando
suis principiis docere potuit; ergo, etc.

Dices 1^o, cum Paulo Irenæo, Dionysio Rai-

mundo et aliis Jansenii apologistis: Locis ci-
tatis Jansenius agit non de libertate hujusce
status, sed tantum de libertate generatim con-
sideratâ; ergo nihil ex iis concludi potest. Sic
ratiocinium istud premit Paulus Irenæus Dis-
quisit. 9, art. 4: « Genus enim, inquit, præ-
« scindit quidem à speciebus, sed tamen in
« speciebus est.... Generica illa libertas quam
« tractat et evolvit Jansenius, ut in Deo et in
« Beatis, sic etiam in homine lapsò est, nec
« involvit etiam in homine lapsò indifferentiam
« quatenus libertas est, sed illam aliunde in-
« dividuo nexu habet adjunctam, quatenus
« libertas est hominis lapsi et viatoris; sicut
« sentiens cum non involvat in se rationem,
« eam tamen quatenus in homine est, indivi-
« duo nexu habet annexam. » — Respondeo
negando ant.; loquitur Jansenius de libertate
tum genericè, tum specificè spectatâ, uti
abundè probavimus; et ab ipsâ sub hoc utro-
que respectu veram excludit indifferentiam;
unde otiosum planè est ac futile Pauli Irenæi
ratiocinium. Falsò supponit nos idcirco con-
cludere Jansenium è libertate hujus status ex-
clusisse indifferentiam, quia illam excludit à
libertate genericè spectatâ; non ita est, sed
ex ipsis Jansenii verbis et principiis demon-
stramus, eum reipsâ ex libertate hujus status
activam exclusisse indifferentiam seu immuni-
tatem à necessitate.

Dices 2^o: Ex iis ipsis Jansenii testimoniis
quæ laudavimus, consat eum loqui ex hypo-
thesi metaphysicâ non existente; semper enim
usurpat particulas conditionales *si, etiamsi,*
licet; porro, inquit loco citato Paulus Irenæus,
à vero prorsus alienum est, SS. pontifices vo-
luisse tertiam Propositionem hoc sensu, et in
eâ suppositione metaphysicâ damnare; hæc
enim quæstio sic spectata, pergit ibidem, *phi-*
losophica potius est quàm theologica, et nominis
plus fortassè quàm rei; ergo, etc. — Respon-
deo, equidem hypothesim ex quâ Jansenius
loquitur, metaphysicam esse nec existentem,
quâ parte supponit quòd homo mereretur in
præsenti vitâ, etiamsi necessitate immutabili
laboraret; verum aliâ ex parte quâ supponit
liberum hominis viatoris arbitrium mutabili
duntaxat ac relativâ necessitate constrictum,
adhuc posse mereri vel demereri, non meta-
physica est, sed vera et realis Jansenii hypo-
thesis ac doctrina, ejus palmare principium
est, necessum esse operari secundum id quod
ampliùs indeliberatè delectat.

Dices 3^o: Multoties agnoscit Jansenius in

presenti statu extare non solum libertatem à coactione et à necessitate immutabili atque invariabili, sed insuper agnoscit indifferentiam tum specificationis, tum exercitû. Sic lib. 6 de Gratiâ Christi, cap. 51: « Hominum viatorum, inquit, non solum coactionis experientem esse libertatem, sed etiam necessitatis immutabilis voluntaræ, hoc est, eam ad utrumque indifferentem esse, fatemur perlibenter. » Idem expressius tradit lib. 8, cap. 20, his verbis: « Liberum arbitrium ante gratiam, quemadmodum etiam sub gratiâ, indifferentiam contrarietatis et contradictionis habet; » ergo, etc.

Respondeo, indifferentiam illam quam lubens admittit episcopus Yprensis, non esse veram ac propriè dictam indifferentiam, facultatem scilicet activè et relativè expeditam ad agendum et non agendum, quo sensu ab Orthodoxis intelligitur (hæc enim indifferentia ex antedictis capitaliter multisque modis pugnat cum Janseniano systemate); sed esse meram quamdam flexibilitatem, seu capacitatem varias subeundi delectationes, aut absolutam duntaxat ad utrumlibet potentiam; non alio sensu indifferentiam à Jansenio admitti, constat vel ex ipsis locis quæ nobis opponunt adversarii.

In priori loco non dicit simpliciter voluntatem esse immunem à necessitate, sed à necessitate immutabili; hincque colligit voluntatem esse indifferentem, quo clarè indicat Yprensis, indifferentiam hujus status in hoc duntaxat positam esse, quòd voluntas nostra modò ad bonum, modò ad malum flecti possit: Item apertius declarat verbis immediatè sequentibus: « Eadem quippe est, inquit, ratio libertatis in omnibus istis actionum et cessationum generibus, sive voluntas ita in alterutram partem fixa sit, ut non possit velle nisi vel tantum bonum, vel tantum malum; vel ita indifferentis, ut adhuc in utramque partem flecti queat. »

Idem docet in posteriori loco, ubi probat nobis semper inesse perfectissimam peccandi potentiam, quia quamdiù hic vivimus auferri non potest ex nobis concupiscentia quâ animus mutari potest et flecti ad malum: « Hoc ergo modo, inquit, sentit Augustinus, sub gratiâ manere peccandi potestatem, quia præter naturalem flexibilitatem ad malum, manet etiam concupiscentia, per cujus tentationes animus mutari potest. » Et paucis interjectis addit, semper remanere potentiam benè agendi, quantacumque voluptate trahatur voluntas,

quia nempe manet in arbitrio, non solum fides et habitus boni in fidelibus; sed in infidelibus etiam illa saltem naturalis flexibilitas seu capacitas, quâ liberum arbitrium credere, sperare, ac Deum diligere potest. »

Hæc omnia clarè demonstrant indifferentiam à Jansenio admissam nihil aliud esse quàm naturalem flexibilitatem voluntatis ad bonum et malum, aut absolutam duntaxat ad utrumlibet potentiam quæ in actum hic et nunc erumpere nequit; hæc autem indifferentia nihil certè juvat ad salvandam libertatem; quid enim prodest homini, si absolutè duntaxat, non in præsentibus circumstantiis mandatum observare possit.

Dices 4º: Jansenius non negavit indifferentiam judicii; siquidem docet, etiam positâ delectatione superiori ad aliquod objectum prosequendum determinante, subesse semper in illo objecto varias species mali ab ipsius prosecutione de se retrahentes, ad quas intellectus non solum potest attendere, sed etiam actu et de facto aliquando attendit; quod quidem sufficit ad indifferentiam judicii; atqui ubi adest indifferentia judicii, ibi necessariò occurrit libertas; est enim hæc judicii indifferentia radix libertatis; ergo. — Respondeo 1º, negando Jansenium admisisse indifferentiam judicii. Nam per judicium indifferens intelligitur judicium proponens objectum, non ut necessariò amandum aut fugiendum, sed ut indifferenter eligibile: porrò, licet subsint in objecto species illæ mali de se retrahentes ab ipsius prosecutione ad quas actu attendit intellectus, non tamen propterea formatur judicium proponens objectum ut indifferenter eligibile, sed intellectus determinatur ad judicandum objectum esse necessariò prosequendum; delectatio enim superior indeliberata, ex Jansenio lib. 6 de Gratiâ Christi, cap. 53, veluti quodam vinculo in objectum amandum ita figit animum, ut ne ad momentum quidem ab eo separari velit, neque rationibus retrahentibus ullatenus afficiatur; nulla ergo in systemate Jansenii vera reperitur judicii indifferentia. Respondeo 2º, indifferentiam judicii ex Jansenio radicem non esse libertatis. Equidem in systemate Thomistico illa judicii indifferentia radix est libertatis; ast longè aliter sentiendum in systemate Jansenii, in quo voluntas ita parùm subjacet judicio intellectus, ut etiam positâ visione beatificâ peccare posse, imò peccaturum Beatum asserat Jansenius, si voluntas Beati terrenâ delectatione titilaretur: *Qui diligentis impetus,*

inquit lib. 4 de Gratia Christi cap. 8, *si adultérine cujusdam delectationis permixtione laxaretur, mens illa beata iterum refrigerando tenebresceret et peccaret*. Unde eodem libro cap. 8 et 9, coherenter negat Beatorum impeccabilitatem oriri ex visione beatificâ.

Dices 5° : Amplitudo et universalitas voluntatis quâ fit ut nullo prorsus creato objecto plenè satiari possit, altera est libertatis radix ; atqui hanc amplitudinem nec negavit, nec negare potuit Yprensus ; nullum etenim est objectum ad quod voluntas feratur, quòd ita vires ejus exhauriat, ut non supersit aliqua, ut ita dicam, voluntatis pars, quâ se ad aliud objectum convertere valeat ; ergo, etc. — Respondeo 1°, dictam voluntatis amplitudinem quâ fit ut nullum objectum creatum capacitatem ejus exhaurire possit, non esse in mente Jansenii, radicem libertatis ; ipse siquidem lib. 7 de Gratia Christi cap. ultimo, multis impugnat eorum sententiam qui ex tali amplitudine, liberi arbitrii libertatem repetunt : « At verò, » inquit, quòd Augustinus docere velit in illâ « formalitate amplitudinis, universalitatis, infinitatis, sitam esse arbitrii libertatem.... infinitas ire nequeo, ita mihi novum visum esse, » ut octodecim circiter annorum labores, quibus Augustini scripta volvo et revolo ad « veram notitiam libertatis assequendam, nusquam mihi in mentem venerit hujusmodi « aliquid Augustinum indicare potuisse. » Respondeo 2°, equidem voluntatem non totam et totaliter per delectationem superiorem rapi, sed majorem duntaxat ipsius partem ; ast istud sufficit ut juxta cæcas necessariasve staticæ leges, in eo systemate pondus animæ in eam necessariò partem vergat, in quam major ac abundantior præponderat delectatio.

Dices 6° : Jansenius ejusque discipuli agnoscunt in ipsâ voluntate vires quodammodò infinitas ; porrò, quantumcumque sit in hac vitâ gratiæ aut concupiscentiæ delectatio, semper finita est, nec proponit nobis objecta nisi finito modo ; unde fit ut nulla hujus vitæ delectatio, totam voluntatis capacitatem implere valeat, sed partem duntaxat, et consequenter activam ac infinitam semper ad alia objecta potentiam relinquat ; quippe finiti potentiæ gradus detracti ex potentiâ infinitâ, hanc relinquunt semper infinitam ; ergo nulla vera ac propriè dicta occurrit necessitas in systemate Janseniano. Ita passim auctor scripti cui titulus : *De l'injuste accusation du Jansénisme*, præsertim pag. 189 et sequentibus ; ita pariter auctor Theologiæ

cui titulus : *Æthica amoris*, tom. 2, pag. 452, 453, aliique passim posteriores Janseniani. — Respondeo distinguo antec. : Agnoscunt vires quodammodò infinitas, vires, inquam, planè otiosas, steriles et veluti passivas ; quæ nihil aliud sunt quàm vires volendi quasi materialiter sumptæ, et quæ non valeant sese in actum exercere nisi ope delectationum, concedo ; vires activas, electivas et sui ipsius determinatrices, quales ad veram libertatem necessariò requiruntur, nego.

Scilicet, juxta mox citatum auctorem *De l'injuste accusation*, etc., duo sunt accuratè discernenda ; nempe amor boni generatim, et vis quâ flectitur ac inclinatur ille amor ab uno objecto ad aliud. Amor boni generatim independens est à delectationibus, et præsentè quâcumque delectatione retinet activitatem quamdam aliquo sensu infinitam ad alia objecta ; at vis flectendi illum amorem ab uno objecto ad aliud valdè finita est, neque excedit vires delectationum à quibus omninò pendet ; unde fit ut ubi occurrit inferior delectatio, ibi virtus flectendi amorem sit quoque inferior, ac relativè insufficientis ; et è contra, ubi delectatio est superior, ibi amor invincibiliter determinatur ad objectum quod delectat. Hæc unâ distinctione deteguntur ac præcaventur novæ molitiones Jansenianorum qui præfati auctoris explicationem ut plurimum amplectuntur, et cum ipso asserunt se admittere veram, realem, et quodam sensu relativam benè agendi potentiam, etiam sine gratiâ ; hancque potentiam omnibus hominibus communem esse, et essentialem, idque ad fidem pertinere.

Dices 7° : Necessitas quam inducit delectatio superior, non est physica, antecedens, involuntaria, absoluta et totalis ; sed moralis duntaxat, consequens, voluntaria, relativa et partialis : porrò necessitas hujusmodi neutiquàm officit libertati ; ergo, etc. — Respondeo : Quidquid sit de nomine quo insigniri debet ista necessitas, dicatur physica vel moralis, antecedens vel consequens, etc., pro diversitate sensuum quibus voces illæ usurpantur ; semper stat, quod caput est, necessitatem illam veram et realem esse. Ea etenim necessitas vera est, realis ac propriè dicta, quæ oritur ex delectatione præviâ indeliberatâ, quæ non est in potestate voluntatis, ut eam nempe habeat vel rejiciat, et quæ actum voluntatis deliberatum necessariò producit, ita ut eâ positâ actus oppositus hic et nunc sit extra hominis potestatem ; porrò talis est necessitas quam infert

delectatio relativè victrix ad sensum Jansenii; ergo, etc. Verùm exactè loquendo, necessitas illa antecedens est physica, et involuntaria, ut patet ex dictis; nec nisi abusivè à Jansenianis appellatur consequens, voluntaria et moralis.

Ex his quæ hucusque circa tertiam Propositionem dicta sunt, facilè colligitur totam Jansenii de libertate doctrinam ad hæc tria generatim capita revocari posse, quæ semel rectè perspecta, statim evanescent varia adversariorum effugia. Docet 1º, essentialiter libertatis in uno voluntario consistere; unde in Jansenii systemate, id omne quod voluntariè fit, hoc est cum advertentiâ rationis et inclinatione voluntatis, essentialiter est liberum. Docet 2º, hominem in præsentis naturæ lapsæ statu immunem esse à necessitate coactionis, à necessitate naturali, et etiam à necessitate simplici, immutabili et absolutâ; non autem à necessitate simplici voluntariâ, mutabili ac relativâ; hoc est, vis quæ nunc dominatur voluntati non est unica, sed alteram experitur contrariam, quo fit ut voluntas flecti possit modò in bonam modò in malam partem pro vario delectationum conflictu; hinc amor quo constanter prosequimur nostram beatitudinem, etsi essentialiter liber, propriâ ad statum nostræ libertatis conditione caret.

Docet 3º, immunitatem ac indifferentiam quam admittit, qualiscumque illa sit, merè esse accidentalem merito et demerito hujus statûs, et solam rationem genericam libertatis in nudo voluntario positam requiri et sufficere ut mereri possimus; unde lib. 7 de Gratiâ Christi, cap. 9, conceptis verbis affirmat, *non solum in explicandâ majori libertate Beatorum, sed etiam quâcumque præsentis vitæ* (ac proinde etiam libertate hujus statûs ad meritum et demeritum requisitâ), *non esse vestigium ullum, quòd unquam Augustinus de indifferentiæ libertate ad eligendum hoc vel illud bonum cogitasse videatur.*

Hinc ex hypothesi quâdam metaphysicâ et non existente, si homo in hac vitâ, ex tali gratiâ qualis in cœlo dabitur, jam amplius peccare non posset, et ad Deum amandum necessitaretur, adhuc tamen daretur locus merito; unde in Yprensis doctrinâ, Beati sufficienti ad merendum libertate gaudent, damnati verò sufficienti ad demerendum; ac reipsâ mereantur illi, demerentur isti, nisi obstaret quòd in termino positi sunt extra viam.

Primum Jansenianæ doctrinæ caput, utrum nempe generica libertatis ratio in uno voluntario sita sit, an insuper postulet indifferentiam;

esto dici possit philosophica potius quàm theologica quæstio; hæc enim in parte nonnulli orthodoxi theologi, inter quos et ipsemet Scotus in 2, dist. 6, quæst. 2, Jansenio consentiunt.

Duo verò posteriora Jansenii dogmata, totidem continent præcipuos ac capitales errores. Error est, isque palmaris, asserere voluntatem in præsentis statu immunem non esse à vi modò ad unum, modò ad aliud invincibiliter ac necessariò hic et nunc determinante; error itidem est asserere talem immunitatem in præsentis statu non requiri ad merendum et demerendum; ac proinde licet necessitatem mutabilem et relativam à præsentis statu excluderet Jansenius, quod falsum esse satis superque probatum est, non idcirco à tertiæ Propositionis censurâ eximi posset, cum talem necessitatem crediderit cum merito et demerito in præsentis statu naturæ lapsæ componi posse.

Quæres 3º, quis sit sensus catholicus errori tertiæ Propositionis oppositus. Respondeo: Cum error tertiæ Propositionis in eo sit, hominem in præsentis statu liberum non esse à necessitate simplici, voluntariâ, mutabili ac relativâ; nec ad merendum et demerendum in statu naturæ lapsæ requiri talem libertatem; consequenter veritas catholica huic errori opposita hæc est, hominem in præsentis statu immunem esse à dictâ necessitate simplici, mutabili ac relativâ; eamque immunitatem ad merendum et demerendum in præsentis naturæ lapsæ statu necessariam esse.

QUARTA PROPOSITIO. — *Semipelagiani admittunt prævenientis gratiæ interioris necessitatem, etiam ad initium fidei; et in hoc erant hæretici, quòd vellent eam gratiam talem esse, cui posset humana voluntas resistere vel obtemperare.*

Quæres 1º, quis sit proprius ac naturalis hujusce propositionis sensus. Respondeo proprium sensum hunc esse: Semipelagiani admiserunt prævenientis gratiæ interioris necessitatem, etiam ad initium fidei; et in hoc erant hæretici, quòd rejectâ Christi gratiâ efficaci, hoc est, delectatione relativè victrici, assererent gratiam talem esse, ut voluntas sub illius motione servaret veram indifferentiam activam, seu potestatem consentiendi ac dissentienti gratiæ, immunem ab omni necessitate antecedenti, etiam simplici, voluntariâ, mutabili ac relativâ. Hunc esse naturalem ac legitimum quartæ Propositionis sensum, facilè colligitur ex dictis exponendo secundam et tertiam Propositionem.

Hunc profectò sensum exponit Hallerius in scripto sæpius laudato, cùm quartam explanans Propositionem, sic habet : « Queritur utrum « gratia in statu naturæ corruptæ talis sit, ut « necessitatem inferat voluntati, adeò ut ei non « possit dissentire; quod nullus Catholicus un- « quàm admisit.... Hæc propositio, supposità « aliarum falsitate, necessariò debet falsa ju- « dicari. Nam 1º, si impossibilia nunquàm sunt « Dei mandata justis defectu gratiæ sufficien- « tis cui actu resistunt, sequitur gratiæ posse « resisti; nam ab actu ad posse valet conse- « quentia. 2º Si certum sit ad meritum requiri « indifferentiam; cùm actio quâ gratiæ con- « sentimus, sit meritoria; sequitur consensum « ei præberi cum indifferentiâ; ac proinde « cum potentiâ dissentiendi. »

Quæres 2º, utrum quartam Propositionem docuerit Jansenius. Respondeo utramque quartæ Propositionis partem docuisse Jansenium. 1º Jansenium priorem quartæ Propositionis partem docuisse, constat variis Jansenii textibus. Lib. 8 de hæresi Pelagianâ cap. 6, sic habet : « Indubitatum esse debere sentio, quòd « Massilienses præter prædicationem, atque « naturam, veram etiam et internam et ac- « tualem gratiam, ad ipsam etiam fidem (seu, « ut dixerat cap. ultimo libri 7, ad primas « credendi, sperandi, diligendique volunta- « tes) necessariam esse fateantur. » Et lib. 2 de Gratiâ Christi cap. 15 : « Prior (Massilien- « sium) error erat, quòd initium fidei, oratio- « nem, gemitus ac desideria et hujusmodi ex « nobis, hoc est, ex libero arbitrio prosilire « censerent; et tamen gratiam etiam actua- « lem in eorum opinione fuisse ad istos actus « necessariam, cujus influxus in eorum li- « bero relinqueretur arbitrio; et hoc eos aper- « tissimè docuisse, jam supra latè patefecim- « us. » Citat ad marginem caput 12 ejusdem libri, et librum 8 de hæresi Pelagianâ cap. 6, 7, etc.; clara sunt hæc, nec ullâ explicatione indigent. 2º Alteram quartæ Propositionis partem pariter tradidisse Jansenium, plurima evincunt ejusdem auctoris testimonia. Citato mox cap. 6 lib. 8, de hæresi Pelagianâ, sic loquitur : « In hoc igitur propriè Massi- « liensium error situs est, quòd aliquid pri- « mævæ libertatis reliquum putant, quo sicut « Adam, si voluisset, poterat perseveranter « operari bonum, ita lapsus homo saltem « credere posset si vellet; neuter tamen « absque interioris gratiæ adiutorio, cujus « usus vel abusus relictus esset in unius-

« ejusque arbitrio et potestate. » His planè similia docet notâ 42 Paralleli et alibi sæpè.

Hanc esse constantem Yprensis doctrinam clarè colligitur ex lato illo discrimine quod statuit gratiam sanitatis inter et medicinalem; in eo scilicet « quòd gratia sanæ voluntatis in « ejus libero relinqueretur arbitrio, ut eam si « vellet desereret, aut si vellet, uteretur; « gratia verò lapsæ ægrotæque voluntatis « nullo modo in ejus relinqueretur arbitrio. » Ita totidem verbis lib. 2 de Gratiâ Christi cap. 4, unde addit ibidem, « tante necessitatis esse « (gratiam medicinalem) ut sine illâ non pos- « sit effectus fieri; tantæque efficacæ, ut hoc « ipso quo datur, continuò fiat; dat enim si- « mul et posse et operari. »

Etverò, postquàm asseruit Jansenius, Semi- pelagianos agnovisse necessitatem gratiæ ad initium fidei, debuit quoque docere hanc quartam Propositionem; errabant enim Semipelagiani circa gratiam necessariam ad initium fidei; ergo semel posito quòd ad illud gratiam interiorem exigent, in eo tantùm errare poterant quòd eam libero permitterent arbitrio; agnitâ quippe semel illius necessitate, solus restat illius operandi modus circa quem error versari potest.

Quæres 3º, quis sit sensus catholicus errori quartæ Propositionis oppositus. Respondeo, catholicum sensum, hunc esse : Semipelagiani non admittebant prævenientis gratiæ interioris necessitatem ad singulos actus, etiam ad initium fidei; et in hoc non fuerunt hæretici, quòd vellent eam gratiam talem esse, cui posset humana voluntas resistere vel obtemperare. Probatur, quia sensus ille contradictoriè est oppositus sensui erroneo quartæ Propositionis: ergo est catholicus.

QUINTA PROPOSITIO. — *Semipelagianum est dicere Christum pro omnibus omninò hominibus mortuum esse, aut sanguinem fuisse.*

Quæres 1º, quis sit proprius ac naturalis quintæ Propositionis sensus. Ut huic quæsito fiat satis, referenda sunt Hallerii in præsentī negotio verba : « Duo quærentur circa hanc « propositionem, » inquit in suo scripto Diar. pag. 285, « 1º, quid de eâ sentiendum, quate- « nus notam hæresis affingit communi catho- « licorum theologorum sententiæ, quæ asse- « rit Christum pro omnibus omninò mortuum « esse : » quam propositionis partem, Ecclesia declarat *esse falsam, temerariam, scandalosam*; « 2º Quatenus ex mente Jansenii Christus non « pro omnibus, sed pro prædestinatorum sa-

« lute tantum mortuus est ; ita ut omnibus
« reprobis negata sint auxilia sufficientia qui-
« bus possint salvari ; » cujus propositionis
partem intellectam eo sensu, ut Christus pro sa-
lute duntaxat prædestinatorum mortuus sit, Ec-
clesia declarat impiam, blasphemam, contumelio-
sam, divinæ pietati derogantem, et hæreticam.

Proprius itaque et naturalis sensus hujus Pro-
positionis quoad utramque partem spectatæ
iste est, nempe, Semipelagianum est dicere,
Christum mortuum fuisse eâ intentione ut om-
nibus omnino hominibus gratias verè sufficien-
tes, quibus hic et nunc salvari possint, pro-
mereretur ; ac Christus pro salute solum
prædestinatorum mortuus est, ita ut omnibus
reprobis negata sint auxilia verè et relativè
sufficientia ad salutem obtinendam. Sensus
hunc clarè ac nitidè repræsentant, tum ipse
propositionis contextus, tum Hallerii verba hic
descripta, ad quæ manifestè alludit Innoc. X,
in suâ Constitutione ; tum denique series pro-
positionum ad invicem spectatarum. Namque
supposito semel quòd interiori gratiæ in præ-
senti naturæ lapsæ statu nusquam resistatur,
ut fert secunda Propositio ; vel si error Semi-
pelagianus in eo situs est, quòd assererent ta-
lem esse gratiam cui voluntas posset obtempe-
rare vel resistere ; si, inquam, ita sit, manifestè
sequitur, Semipelagianum esse asserere, aliis
quàm prædestinatis concedi gratias verè suffi-
cientes ad salutem ; ac per consequens pro sa-
lute, non omnium omnino hominum, sed solo-
rum prædestinatorum mortuum esse Christum.

Tricantur hic Janseniani circa verba quibus
utitur S. pontifex in suâ Constitutione. Aiunt
scilicet particulam *duntaxat* referri non debere
ad vocem, *prædestinatorum*, sed ad præceden-
tia vocabula, *pro salute* ; adeoque propositionis
sensus non eum esse quem dicimus, nempe
Christum pro solum prædestinatorum salute
mortuum esse ; sed potius Christum non pro
aliâ re mortuum esse quàm pro salute prædes-
tinatorum, qui posterior sensus, inquiunt, hæ-
reticus est, et meritò proscriptus, quia signifi-
cat Christum nequidem mortuum esse pro tem-
poralibus gratiæ donis quibus nonnulli reprobi
in hac vitâ exornantur.

Verùm puerilis est et insulsa nimis ista argu-
tiola. Namque ab omni prorsus ratione alienum
est fingere, quòd Innoc. X, in suâ Constitutio-
ne, damnatum exhibuerit sensum de quo nulla
erat quæstio ; sensum jampridem decretorio
judicio confossum ; sensum denique à Jansenio
ejusque discipulis manifestissimè rejectum ;

hec tamen dicenda forent si vera esset Janse-
nianorum suppositio. Ille etenim sensus quem ut
proprium et à S. pontifice damnatum obtru-
dunt, ipsa est mera Calvini hæresis, nimirum
pro solâ salute prædestinatorum mortuum es-
se Christum, adeoque solos prædestinatos verâ
fide et justitiâ exornari ; porro sensus ille à nul-
lo in controversiam adductus legitur tempore
Innoc. X ; jamdudum in Calvinistis profligatus
fuerat à concilio Trid. ; demum à Jansenio sæ-
pius reprobat disertis et expressis verbis ;
eundem apertissimè rejiciebant Jansenii de-
fensores variis in locis, præsertim scriptis *Trium
columnarum* et *In nomine Domini* ; ergo, etc.

Et verò eum ipsum sensum in suâ Constitutio-
ne damnat Innoc. X, quem expendendum et
proscribendum, tanquam Jansenianam opinio-
nem, proposuerat Hallerius ; ad illius enim
verba manifestè respicit S. pontifex in censurâ
quintæ Propositionis ; sensum quem ut catho-
licum propugnabant Jansenii discipuli, ut he-
terodoxum verò impugnabant eorum æmuli ;
atqui ista apprime conveniunt sensui quem
mox exhibuimus, neutiquam autem cadere
possunt in eum quem repræsentant Jansenia-
ni, ut ex sese patet ; ergo, etc. Certè Jansenia-
na expositio apertè continet sensum planè dis-
tinctum ab eo quem dictus Hallerius repræ-
sentat, ut liquet ex ejus verbis supra adductis,
in quibus non exprobrat Jansenio quòd repro-
bis denegat justitiam temporalem, et gratiæ
dona ad quædam bona opera perficienda, sed
quòd illis denegat mediâ verè et relativè suffi-
cientia quibus possint salvari ; ergo.

Denique infirmum omnino est ac nullius ro-
boris quod opponunt adversarii ut suam ad-
struant expositionem ; juxta vim sermonis la-
tini, inquiunt, vox exclusiva, *duntaxat*, afficit
verbum quod antecedit, non illud quod sequi-
tur. Infirmum, inquam, illud est ; etenim par-
ticulam, *duntaxat*, antecedentia verba plerum-
que spectare, variis exemplis unicuique obviis
facilè constat. Unum hic referre sufficiat : sic,
v. g., de homine in regiones externas transmis-
so ut solos Galliæ captivos redimat ; ex usu
consueto dici potest : Iste pro redemptione
duntaxat captivorum Gallorum missus est ; ne-
que tamen ista loquendi ratio significabit ho-
minem ita missum fuisse pro redemptione cap-
tivorum, ut pro nullâ aliâ re missus fuerit, sed
potius sensus erit eum pro solis Gallis, et non
pro aliis captivis redimendis deputatum fuisse ;
quo exemplo manifestum est, particulam ex-
clusivam *duntaxat*, in verba subsequencia ali-

quando cadere; cum ergo dicta particula, modo antecedentia, modo subsequenter verba afficiat, nihil profecto certi ex usu latini sermonis colligi potest.

Ex aliis itaque certis ac indubitatis regulis dijudicandum ad quid referri debeant voces illæ exclusivæ. Philosophi et theologi tres eâ de re communi consensu tradunt regulas, quibus usi fuere SS. Patres ad vindicanda religionis nostræ mysteria adversus hæreticorum cavillationes et effugia.

Prima regula est: Cum particula exclusiva afficit subjectum, tunc modificat totam propositionem, eamque reddit absolutè exclusivam, hoc est, excludit omnia alia subjecta à participatione prædicati talis propositionis; v. g., quando dicitur: *Duntaxat Deus est æternus*; *duntaxat homo est rationalis*, sensus harum propositionum est, æternitatem Deo soli, rationalitatem verò homini soli competere.

Secunda regula: Quando particula exclusiva afficit prædicatum, excludit omnia alia prædicata à subjecto: v. g., si diceretur: *Deus est duntaxat æternus*, sensus esset, nullum aliud attributum Deo competere præter æternitatem; pariter, si diceretur: *Homo est duntaxat rationalis*, sensus esset, hominem esse rationalem, ita ut nullum aliud attributum ei competeret. Ubi adverte, particulas exclusivas, sive afficiant subjectum, sive afficiant prædicatum, nusquam excludere ea quæ essentialia sunt vel necessariò connexa cum prædicato aut subjecto; sic in his propositionibus: *Tantum diligo salutem*, non excluduntur media ad salutem assequendam necessaria; *Deus est æternus tantum*, minimè excluduntur ea attributa, ex perfectiones quæ Deo quatenus æterno competunt.

Tertia regula: In unaquâque propositione, quâcumque tandem ratione termini disponantur, id de quo dicitur aliud, semper appellatur subjectum propositionis; illud verò quod dicitur de alio, attributi rationem semper obtinet; sic in istâ propositione, inquit auctor libri *De l'art de penser*, part. 2, cap. 9: *Turpe est obedire libidini*; turpe, est id quod dicitur de alio, quodque ideò attributum est propositionis, etsi habitâ duntaxat ratione dispositionis terminorum, videatur esse illius subjectum. Similiter in quintâ Propositione Jansenii: *Christus pro salute duntaxat prædestinatorum mortuus est*; mors Christi est id quod dicitur de alio, ac proinde est attributum propositionis; cætera autem propositionis verba sunt illius

subjectum, cum sint id de quo affirmetur mors Christi. Prædictas regulas referunt et explicant S. Thomas, part. 1, quæst. 31, art. 5, ad secundum, et art. 4, in corp.; Salmaticenses de Trinit. ad dictam S. Thomæ quæst.; Natalis Alex. Hist. Eccles. seculi 14, dissert. 12; Complut. Institut. ad Logicam lib. 3, cap. 10; auctor libri cui titulus: *L'art de penser*, parte 2, cap. 8.

His præsuppositis, facile est demonstrare proprium quintæ Propositionis sensum ab Innoc. X damnatum, hunc esse quem supra retulimus; scilicet, Christum mortuum esse pro salute solorum prædestinatorum. Nam ex primâ regulâ mox assignatâ, quando particula exclusiva *duntaxat* afficit subjectum, tunc modificat totam propositionem, eamque reddit absolutè exclusivam, hoc est, excludit omnia alia subjecta à participatione attributi propositionis; atqui in dictâ propositione: *Christus pro salute duntaxat prædestinatorum mortuus est*, vox exclusiva *duntaxat* afficit hæc verba: *Christus pro salute prædestinatorum*, quæ verba ex tertiâ regulâ sunt subjectum propositionis, quia sunt id de quo affirmatur mors Christi; ergo, juxta vim regulæ, omnia alia subjecta, præter solam prædestinatorum salutem, debent excludi à participatione mortis Christi, quæ est attributum dictæ propositionis; ac per consequens pro nullius reprobis salute mortuus est Christus; et iste est sensus quem tanquam hæreticum à summis pontificibus confixum fuisse, supra ostendimus.

Perperam ergo contendunt adversarii, in memoratâ propositione vocem *duntaxat*, referendam esse ad verbum quod antecedit, *salute*, non ad illud quod sequitur, *prædestinatorum*; perperam, inquam, ita pertendunt; tum quia gratis imò et falsò id ab ipsis dictum, ut probavimus; tum quia, ut patet ex mox dictis, non ex eo desumenda est vera vocis exclusivæ significatio, sed ex variâ ipsius dispositione, prout nempe subjectum aut prædicatum afficit.

Ex his sequitur, varias istas propositiones, *Duntaxat Christus pro salute prædestinatorum mortuus est*; vel: *Christus duntaxat pro salute prædestinatorum mortuus est*; vel: *Christus pro salute duntaxat prædestinatorum mortuus est*; vel: *Christus pro salute prædestinatorum duntaxat mortuus est*; eundem omninò habere sensum, ac perinde vitiosas esse; in iis enim omnibus, vox exclusiva se tenet ex parte subjecti; ac proinde quorumlibet aliorum salutem præter prædestinatorum salutem excludit à

participatione mortis Christi; quæ in iis propositionibus attributi rationem obtinet. Ex lege contrariorum idem proportione servatâ dicendum de his propositionibus: *Christus mortuus est duntaxat pro salute prædestinatorum*; vel: *Pro salute duntaxat prædestinatorum*; vel: *Pro salute prædestinatorum duntaxat*; in his enim propositionibus particula exclusiva, utpote cùm afficiat attributum, excludit à subjecto omnia alia attributa præter istud, quòd scilicet sit mortuus pro salute solum prædestinatorum, quod profectò est hæreticum.

Regerunt adversarii: Præfatæ propositionis ab Innoc. damnatæ, triplex omninò legitur gallica versio ab episcopis nostris elaborata; prima anno 1655, statim à bullâ latâ; in eâ versione verba ista: *Christus pro salute duntaxat prædestinatorum mortuus sit*, sic gallicè reddita fuere: *Et étant entendue en ce sens que J.-C. soit mort pour le salut seulement des prédestinés*. Eandem versionem, suam fecere præsules Gallicani an. 1656, occasione bullæ *Ad Sacram*. Alex. VII, et an. 1705, occasione bullæ *Vineam Domini* Clementis XI. Secunda versio est eorundem episcoporum an. 1656, in epistolâ ad reginam; quintam Propositionem Jansenii sic interpretantur: *Ce serait une impiété et une hérésie de dire, que J.-C. n'ait donné son sang que pour le salut des seuls prédestinés*. Tertia tandem habetur in actis verbalibus comitorum anni 1715 et 1714; in his sic legitur: *Dire que J.-C. n'est mort pour le salut que des seuls prédestinés, c'est précisément le sens hérétique condamné dans la cinquième Proposition de Jansénius*.

Ex variis his versionibus duo colligunt Jansenii defensores, primum, duas priores sibi omninò favere; in iis enim, inquit, non obscurè indicatur, particulam *duntaxat*, unicè cadere in vocem quæ antecedit, *salute*; adeoque sensum propositionis hunc esse, Christum pro nullâ aliâ re mortuum fuisse quàm pro salute prædestinatorum; quem sensum uti hæreticum ultrò rejiciunt Janseniani. Secundum, fatentur equidem tertiam interpretationem sibi adversari, ast nihil exinde contra ipsos erui posse contendunt, cùm dicta interpretatio duabus prioribus et antiquioribus præsulum Gallicanorum interpretationibus directè adversetur; in his enim, ut diximus, particula exclusiva afficit vocem hanc *salute*; in illâ verò cadit in istam aliam vocem, *prædestinatorum*; ergo, etc. Ita inter alios auctor *Examinis theologicæ*, tom. 3, pag. 522 et 523.

Respondeo tres illas interpretationes, etsi ordine et dispositione verborum à se invicem nonnihil dissimiles, reipsâ tamen eundem omninò sensum reddere, et ex adverso pugnare cum Jansenianâ expositione; quod ut pateat, adverte in dictis præsulum nostrorum interpretationibus, verba ista: *Christus pro salute duntaxat prædestinatorum*, subjectum esse propositionis, verba autem quæ sequuntur, scilicet *mortuus est*, illius esse prædicatum; quia mors, est id quod de Christo affirmatur respectu salutis prædestinatorum; ut ergo termini harumce interpretationum in ordine naturali restituantur et subjectum ante prædicatum collocetur, sic essent reddendæ propositiones: *Jésus-Christ pour le salut seulement des prédestinés est mort; c'est une impiété de dire que Jésus-Christ n'ait que pour le salut des seuls prédestinés donné son sang; c'est une hérésie de dire que Jésus-Christ pour le salut des seuls prédestinés n'est mort*. Verùm quia hæ loquendi rationes duriores sunt, nec satis fluentes; ideò nativo ac congruentiori modo juxta vim gallici sermonis, pro positiones sic reddiderunt præsules nostri: *Jésus-Christ est mort pour le salut seulement des prédestinés; Jésus-Christ n'est mort que pour le salut des seuls prédestinés; Jésus-Christ n'est mort pour le salut que des seuls prédestinés*.

Ex his liquet tres memoratas interpretationes quoad sensum simillimas esse, et errori Janseniano directè adversas. Ad hoc enim satis est, quòd in illis omnibus vox exclusiva, *duntaxat*, se teneat ex parte subjecti; sicque ex primâ regulâ totas modificet propositiones, easque absolutè reddat exclusivas, ac proinde salus omnium aliorum quàm prædestinatorum removeatur à participatione mortis Christi, quæ est attributum propositionis; atqui ita se res habet, ut manifestè colligitur ex regulis et annotationibus antea præmissis; ergò, etc.

Quæ hucusque retulimus ad vindicandas præsulum Gallicanorum interpretationes mirum in modum confirmantur, ex iisquæ antea diximus, præsertim ex comitiis an. 1653, 1655, 1656, 1657, 1660, 1661, etc., ad demonstrandum quinque Propositiones in proprio et naturali sensu fuisse damnatas, eumque ipsissimum esse genuinum Jansenii sensum.

Innumera porrò alia effugia, tricas, vitiligationes circa quintam hanc Propositionem à Jansenianis excogitata, abundè expendimus ac discussimus in tract. de attributis, ubi de voluntate Dei et morte Christi pro salute omnium, Consule.

Quæres 2^o, an quintam propositionem docuerit Jansenius. — Respondeo affirmativè. Totus quippe est lib. 5 de Grat. Christi, cap. 21, ut eam inculcet: mortem enim Christi sibi objicit velut fontem gratiæ sufficientis omnibus concessæ: huic autem objectioni ut faciat satis, triplicem affert responsionem. Prima est, idem argumentum ad nauseam usque à Pelagianis, præsertimque Massiliensibus, fuisse inculcatum; secunda est, ut ait, sancti Prosperi, admittitque mortuum fuisse Christum pro omnibus *sufficienter*, quia pretium oblatum et solutum fuit sufficiens ad redimendos omnes; non *efficienter*, quasi omnibus gratias promeruerit. Verùm, cum posita hâc responsione, Christus dici possit mortuus pro diabolo, eam minùs probat Ypensis, et tertiam affert S. Augustini S. Prosperi doctioris et antiquioris, juxta quam Christus dicitur mortuus, non quidem pro omnibus nullo prorsus excepto, sed pro *omnibus*, id est, *electis*; aut pro omnibus hominum generibus, quia ex singulis generibus quidam sunt electi; vel tandem pro *omnibus*, quia ii pro quibus sanguinem fudit, per cunctas nationes et universum terrarum orbem sunt diffusi; hæc totius præfati capitis summa manifestè evincit Jansenium hanc quintam docuisse Propositionem.

Hinc ibidem quintam Propositionem totidem penè verbis tradit: « Nec enim, inquit, juxta doctrinam antiquorum pro omnibus omnino Christus passus aut mortuus est, cum hoc potius tanquam errorem à fide catholica abhorrentem doceant esse respuendum. » Et rursus, in fine ejusdem capitis: « Nam illa ex- tensio tam vaga modernorum scriptorum, non alio ex capite, quàm ex istà generali et indifferenti voluntate Dei erga salutem omnium, et ex illà sufficientis gratiæ omnibus conferendæ præparatione fluxit; quorum utrumque Prosper, Augustinus, Fulgentius et antiqua Ecclesia, velut machinam à Semipelagianis introductam repudiavit. » His testimoniis, imò et integro capite quod fuisset exscribendum, clarè tradit Ypensis, Semipelagianum esse dicere Christum pro omnium et singulorum salute sanguinem fudisse.

Non minùs perspicuè docet eodem capite, Christum pro æternâ solum prædestinatorum salute mortuum fuisse: « Quæ sanè, inquit, cum in Augustini doctrinâ perspicua, certa- que sint, nullo modo principiis ejus consentaneum est, ut Christus Dominus, vel pro infidelium in infidelitate morientium, vel pro

justorum non perseverantium æternâ salute mortuus esse, sanguinem fudisse, semetipsum redemptionem dedisse, Patrem orasse sentiat. Scivit enim quo quisque jam ab æterno prædestinatus erat, scivit hoc decretum neque ullius pretii oblatione mutandum esse, nec seipsum velle mutare. Ex quo factum est ut juxta S. doctorem, non magis Patrem pro æternâ liberatione ipsorum, quàm pro diaboli deprecatus fuerit. » Nihil certè expressius hanc in rem proferri aut expectari potest.

Etverò, suis stando principiis, aliter docere non potuit Ypensis. Etenim pro quorum salute mortuus est Christus, iis conferuntur gratiæ verè sufficientes ad salutem obtinendam; sed in systemate Jansenii nullæ sunt gratiæ verè sufficientes, nisi victrices ac efficaces, ex multis dictis; idque conceptis verbis tradit lib. 4, cap. 10, et si tales agnoscerentur sufficientes gratiæ, cum non omnes salventur, illis humana voluntas posset resistere vel obtemperare ad nutum, quod Semipelagianum est ex quartâ Propositione; ergo, etc. « Omnibus verò illis, inquit, citato cap., pro quibus sanguinem fudit, et quatenus pro eis fudit, etiam sufficiens auxilium donat, quo non solum possint, sed etiam reipsâ velint et faciant, id quod ab eis volendum et faciendum esse docuit. »

Cæterum, etsi constantissimè neget Ypensis Christum pro aliorum quàm prædestinatorum æternâ salute mortuum fuisse, non diffidet tamen Christum morte suâ quibusdam reprobis promeruisse temporaneas quasdam gratias, quibus ad temporalem fidem et justificationem pervenirent: « Pro his, inquit citato capite, Qui à fide et charitate deficientes in iniquitate moriuntur, in tantum mortuus est, et in tantum rogavit Patrem, in quantum temporalibus quibusdam divinæ gratiæ effectibus exorandi sunt. » Et paulò post: « Sed si quid pro illis (qui fidem sine charitate, vel charitatem sine perseverantiâ recipiunt) rogavit Patrem, pro temporalibus quibusdam justitiæ effectibus rogavit, et pro iisdem obtinendis obtulit pretium, fuditque sanguinem suum. »

Quæres 3^o, quis sit sensus catholicus errori quintæ Propositionis oppositus. — Respondeo, ex dictis circa hanc propositionem facillè colligi, sensum hunc esse, 1^o *falsum esse, temerarium ac scandalosum dicere, Semipelagianum esse, dicere quòd Christus eâ intentione mortuus sit, ut omnibus omnino hominibus promeretur gratias quibus salutem verè possint*

operari; 2^o *impium, blasphemum, contumeliosum, divinæ pietati derogans, et hæreticum esse* affirmare Christum pro æternâ solorum præ-

destinatorum salute sanguinem fudisse, ita ut omnibus omnino reprobis negata sint auxilia quibus vere possint salvari.

Hic explicat editio 1735; quæ sequuntur ex editionibus 1748 et 1755 deprompta sunt.

De discrimine systematis Janseniani à systematibus præmotionis physicæ, et delectationis absolutè victricis. — Solent Jansenii sectatores, ut omnem à se erroris suspicionem amoveant, Thomisticæ, ut aiunt, aut Augustinianæ Scholæ discipulos se profiteri; ac constanter affirmare Yprensis systema à catholicis harumce Scholarum systematibus nullatenus differre: quantum autem præsens hæc assertio sit à veritate aliena, paucis hic conabimur evincere.

CONCLUSIO PRIMA. Jansenii systema à Thomistico longè lateque distat. Probatur plurima recensendo discrimina quæ claritatis causâ ad varias classes reducemus.

Primum discrimen. — Primum discrimen petitur ex generalibus quibusdam momentis. 1^o, ipsemet Jansenius pluribus in locis, præsertim lib. 8. de gratiâ Christi, cap. 2 « varia discrimina profert inter adiutorium Dei medicinale, et prædeterminationem physicam, prout à defensoribus ejus traditur. » Hic est capitis titulus; quo semel posito, pergit, et octo recenset atque assignat discrimina: undè concludit defensores præmotionis physicæ, se magis Aristotelicos quàm Augustinianos demonstrare: « Nam, inquit, prædeterminatio sic asserta... « universam ejus, (S. Aug.) doctrinam inexplicabili confusione perturbat. » 2^o, celebriores Jansenii discipuli id ipsum candidè professi sunt. Ita Arnaldus in falsâ defensione Constitutionis Innoc. X. D. de S. Amour in Diario, parte 6, cap. 15, pag. 418. Quin et ipse auctor Generalis historiæ Jansenismi, tom. 1, pag. 504, testatur unionem sæpius tentatam fuisse Thomistas inter et Jansenianos, verùm infelici exitu; utpote *cùm placitis et loquendi rationibus à se invicem dissiderent*. 3^o, Schola Thomistica à Jansenianis erroribus alienam se semper exhibuit: Cajetanus enim, Ledesma, Lemos, Alvares, Joannes à S. Thomâ, etc., gratiam suam physicè præmoventem ex parte actûs secundi tenere se constanter asseverant, quo uno à Jansenii placitis in immensum distant:

huic plurimi ex Thomistis discrimen quod occurrit Thomisticum inter et Jansenianum systema ostenderunt; ita Guyartius, Gonetius, etc., editis hanc in rem dissertationibus.

Secundum discrimen. — Secundum istud discrimen eruitur ex parte gratiæ sufficientis. 1^o, Thomistæ nomen gratiæ sufficientis tanquam sensu theologico proprium, imò post enatas Lutheri et Calvini hæreses necessarium amplectuntur: non ita profectò Jansenistæ: hinc procax illa dicacitas, quâ et nomen gratiæ sufficientis et rem nomine significatam respuunt. Ita Arnaldus epist. 1, pro Jansenio, et Montalt. epist. 2, ad Provincialem. 2^o, Thomistæ gratiam sufficientem admittunt ac necessariò admittendam decernunt, ut justis possibilia sint Dei mandata, et ut explicetur quomodo rei sint qui ea transgrediuntur; è contra verò Janseniani, non aliâ de causâ gratiam suam parvam agnoscunt, quàm ut assignent aliquod principium debilius illorum conatuum ad bonum, qui in his ipsis qui malè agunt, deprehenduntur; minimè verò eam necessariam esse ad explicandam possibilitatem mandatorum Dei. Ita Arnaldus in defens. Constit. Innoc. X. pag. 105; auctor recentior libri cui titulus: *De l'injuste accusation du Jansénisme*, pag. 38, 39, etc., et alii passim. 3^o, gratia parva Jansenii formaliter consistit in illustratione intellectûs, et indeliberatâ motionem voluntatis; gratia verò sufficiens Thomistica non est formaliter actus indeliberatus, sed quid ipsi prævium ejusque causa. 4^o, gratia parva Jansenii semper producit deliberatos quosdam actus imperfectos, velitates scilicet, infirma desideria, etc.; gratia verò sufficiens Thomistarum, non ita: de quo consule Alvares lib. 8, de Auxil. lib. 8, disp. 71, et Dionys. Raimund. 1 parte cap. 3, art. 4. 5^o, præcipua ac planè decretoria discriminis ratio, ea est, quòd gratia parva Jansenianorum non confert potentiam expeditam relativè ad majorem actualem oppositam concupiscentiæ delectationem; è contra verò, juxtâ Thomis-

tas, auxilium sufficiens confert voluntati vires relativè expeditas ad vincendam quaecumque concupiscentiam et ad bonum perficiendum.

Primum hujus discriminis partem latè prosecuti sumus, ubi de potentiâ relativâ. Etverò conceptis verbis tradit Yprensus citato lib. 3, de gratiâ Christi cap. 15, « paradoxum esse in « principiis S. Aug. quòd charitas quamvis minima sufficiat ad quaecumque tentationem « superandam. »

Secunda verò pars quæ ad Thomistas attinet, variis demonstratur argumentis. Primum desumitur ex isto S. Thomæ principio 3 parte quæst. 62, art. 6 ad 5, et quæst. 70, art. 4 : « Minima gratia potest resistere cuilibet concupiscentiæ ; » palmari autem huic principio, cui omnes ad unum subscribunt Thomistæ, agentes de gratiâ actuali, invictè adstruunt relativâ gratiæ sufficientis Thomisticæ potentia. Secundum sic conficitur : Gratia sufficiens, docentibus Thomistis Cajetano, Medina, Alvares, etc., confert potentiam ad vincendas quascumque etiam gravissimas tentationes, proindeque ad resistendum terrenæ cuilibet delectationi quantumcumque præpollenti : porro potentia par ac proportionata vincendæ cuilibet tentationi, cuilibet terrenæ delectationi, eo ipso verè ac propriè est relativa ; ergo, etc. Tertium sic est : Gratia efficax ac physicè præmovens, ut mox dicemus ex Thomistis, nec diffitetur Jansenius, se tenet ex parte actûs secundi, ac proinde supponit potentiam omninò completam in ratione potentiae ; ast si ita sit, manifestè sequitur, gratiam sufficientem Thomisticam, completam ac relativam ad opus bonum conferre potentiam. Etverò gratia sufficiens Thomistica, nullâ factâ ex parte sui mutatione, exerit in actum per solam præmotionis physicæ accessionem, quæ nihil immutat in ipsâ potentiâ ; ergo.

Tertium discrimen. — Discrimen istud spectat gratiam efficacem. Namque 1º, præmotio physica, quæ Thomistis est gratia efficax, se habet, fatente ipsomet Jansenio, instar concursûs cujusdam generalis in ordine supernaturali. Unde 1º, datur ad exigentiam creaturæ ; 2º, se tenet ex parte actûs secundi ; 3º, eâ accedente nulla fit ex parte potentiae mutatio : hæc autem omnia omninò diversa sunt in systemate Janseniano. Nam primò, delectatio relativè victrix non datur ad exigentiam creaturæ : justis enim etiam volentibus plerumque denegatur ; secundò, se tenet ex parte actûs secundi, dat simul posse et agere ; tertio, eâ

accedente fit ex parte potentiae mutatio : de non expeditâ evadit expedita ac relativè proportionata.

2º, Præmotio physica Thomistarum supponit indifferentiam voluntatis ; datur enim ad illam tollendam ; delectatio autem victrix Janseniana, eam excludit : « Tantum abest, inquit « Yprensus citato cap. 2, lib. 8, de gratiâ « Christi, gratiam Christi propter indifferen- « tiam voluntatis esse necessariam, ut potius « propter amissam indifferentiam ejus et prop- « ter servitutem ac depressionem ejus sub libi- « dinibus necessaria sit. »

3º, Præmotio physica, juxta eosdem Thomistas, in quibuscumque circumstantiis est efficax, nec à superioritate, aut inferioritate virium, ejus pendet efficacia ; è contra « de- « lectatio victrix, inquit Jansenius, relativa « est ; tunc enim est victrix quando alteram « superat ; quòd si contingat alteram arden- « tiorem esse, etc. »

Quantum discrimen. — Tria potissimum complectitur. Primum est fundamentum ex quo repetitur necessitas præmotionis physicæ. Ratio enim est quia Deus est prima causa, primus motor ; prima causa debet influere in omnes causarum secundarum actus, nec sinit illius dignitas ut subsequatur determinationem creaturæ ; restat ergo ut eam determinet ; primus motor debet quod est indifferens ad actum determinare et movere ; nihil enim secundum movetur et movet, nisi ab alio motum ; at delectatio victrix necessaria est, non ex causæ primæ et primi motoris ratione, sed ex infirmitate creaturæ ; ergo, etc. Secundum sunt principia : nam stantibus Jansenii principiis, eorumque suppositâ veritate, sponte ac necessario fluunt quinque Propositiones ; è contra suppositâ veritate principiorum Thomistarum sponte ruunt ; unde eas respuere nequeunt Janseniani nisi sua quoque respuant principia ; ast eas admittere non valent Thomistæ, nisi suis contradicendo principiis ; nec ipsi erroris convinci possunt, nisi priùs ea evertantur, ac minùs fundata, falsa imò et prorsus impossibilia demonstrantur. Tertium sunt consecutaria : fluunt enim quinque Propositiones è principiis Jansenii, ut jam manet demonstratum : quin et propositiones illæ non sunt mera Jansenianæ doctrinæ consecutaria, sed totus Jansenii liber, ut tradit illustriss. Bossuet, ipsiusque integrum systema constituunt, ad cujus substantiam essentialiter pertinent.

E contra verò quinque propositiones 1º, ad

substantiam systematis Thomistici minimè pertinent; imò mox statuta principia iis directà fronte adversantur, easque omninò excludunt; 2°, neque etiam sunt ejusdem systematis consecutaria. De mollioribus quidem Thomistis, qui existimant per non resistentiam advocari gratiam præmoventem, res videtur explorata; de aliis autem idem facilè evincitur: atque ut brevitati consulamus, id ostendemus de primà propositione cui cæteræ necessariò conjunguntur. Homo ille qui vult et conatur, habet gratiam juxta quam vult; ergo mandata non sunt illi impossibilia, nec deest gratia quâ possibilia fiant; quia quantulumcumque sit hæc gratia, voluntatem reddit potentem ad mandatum etiam relativè ad præsentem concupiscentiam contrà quam pugnat non ratione graduum, sed ratione naturæ suæ, et vel minoris entitatis; ergo consecutaria systematis Janseniani è Thomistico non fluunt; 3°, Thomistæ omnes unanimi consensu negant quinque propositiones, etiam de merâ impossibilitate relativâ intellectas, è suo systemate sequi; imò potentiam relativam per solam gratiam sufficientem conferri, essentielle esse asserere in suis principiis contendunt; ergo, etc.

Quintum discrimen. — Quintum discrimen extrinsecum vocari potest, et in eo consistit quòd systema Jansenii circa gratiam repetitis censuris proscriptum fuerit. Namque quinque propositiones damnatæ sunt in sensu Jansenii; atque plurimi alii libri hoc unum systema spirantes, hoc ipso præcisè confixi fuere; non ita est profectò de systemate Thomistico; longa est ætas ex quâ spectante Ecclesiâ publicè propugnatur: Lemos et Alvares in publicis congregationibus de *Auxiliis* coram SS. pontificibus nomine totius suæ scholæ, illius patrocinium susceperunt; denique iidem Pontifices sedulò prohibuerunt ne ulla ipsi nota inureretur; ergo, etc.

Et hæc sunt quæ Thomistarum inter et Jansenistarum doctrinam discrimina vulgò afferuntur; ex quibus videre est quàm falsò de Thomistica communione gloriantur Janseniani.

CONCLUSIO II. Jansenii systema plurimùm differt à systemate Augustinianorum qui gratiæ efficaciam in delectatione simpliciter et absolute victrici constituunt. Probat: Huc enim redeunt omnia fermè Jansenianum systema interet Thomisticum mox assignata discrimina. Tria hic paucis indico.

Primum; Omninò negatur à Catholicis de-

lectationis simpliciter victricis defensoribus palmare illud Jansenii principium: vires scilicet electivas per peccatum primi parentis penitus esse amissas, illisque successisse duplicem delectationem ex quâ voluntas omnes vires suas mutuatur: asserunt nempe vim electivam, sive ad bonum, sive ad malum expeditam, non repeti à graduâli delectationum intensione; sed respectu mali naturaliter completam esse et perfectam, ad bonum autem supernaturale perfici et compleri gratiæ sufficientis virtute omninò independente à gradibus delectationum; quare juxta illud systema, ex eo quòd ad aliquod objectum prosequendum voluntas vel nullâ, vel minus intensâ delectatione moveatur, non sequitur, sicut in systemate Janseniano, quòd inferiorem habeat vim electivam circa illud objectum. Secundum: Gratiam efficacem in delectatione non relativè, sed absolute duntaxat victrici reponunt, cui ab humanâ voluntate verè resisti potest, sicut et præmotioni physicæ. Tertium: Præter gratiam efficacem alia ab ipsis admittitur, scilicet sufficiens, quæ veram confert potentiam et relativam ad quamlibet concupiscentiam hic et nunc urgentem.

Solvuntur Objectiones.

Dices 1°, contra primam conclusionem: Actus essentialiter conjungitur cum præmotione; ergo positâ præmotione ad amorem, v. g., non stat potentia ad non amandum relativa ad illam præmotionem.

Respondeo 1°, difficultatem illam nullam omninò esse in systemate molliorum Thomistarum de quo alibi; clarum enim est in eorum doctrinâ necessitatem à præmotione inductam consequentem tantum esse et voluntariam, quæ, fatentibus omnibus, libertatem non lædit. Respondeo 2°, præmotionem physicam spectari posse, vel ut est entitas quædam physica, vel ut est instrumentum Dei. Priori sensu non est essentialiter connexa cum actu; imò fatentibus Thomistis possibile est non actum cum ipsâ componi: « Liberum arbitrium, inquit Alvares « disp. 95, de Aux. n. 3, majorem habet virtutem quâcumque motione in se receptâ, si « consideretur illa motio secundum suam entitatem, præscindendo à decreto voluntatis « divinæ ejus est instrumentum. » Idem tradunt Cajetanus, Lemos, Ledesma, Joannes à S. Th. et alii. Non ita certè in systemate Janseniano, in quo vis gratiæ et concupiscentiæ relativa est et quasi mechanica; delectatio

enim superior à suâ physicâ entitate habet ut invincibiliter ponat effectum suum propter superioritatem graduum relativè ad oppositam hic et nunc occurrentem delectationem.

Si autem spectetur præmotio ut est instrumentum Dei, sic distinguendum antecedens : actus simul cum potentiâ ad oppositum essentialiter conjungitur cum præmotione, concedo; actus solus, nego. Scilicet præmotio est instrumentum voluntatis divinæ quatenus omnipotens est; quò autem potentior est causa, uti observat S. Th. 1, p. q. 19, art. 6, eò magis effectus conformatur illius voluntati; ergo effectus fit prorsus per præmotionem eo modo quo Deus vult illum fieri: sed vult ut creatura rationalis præmota agat liberè, et ita ponat actum ut possit illum non ponere; ergo ita fit actus sub præmotione, ut remaneat vera potentia ad oppositum; quia præmotio attingit et substantiam et modum actûs: neque enim solum fit actus, sed etiam eo prorsus modo quo Deus vult eum fieri; vult autem fieri liberè, cum creaturas moveat, teste S. Th. ibidem, necessarias necessariò, liberas liberè; ergo, etc.

Etverò in systemate Thomistico, ante præmotionem ad unum, potentia ad oppositum supponitur expedita et completa in ratione potentiæ; ut ergo ei noceat adveniens præmotio, debet vel illam auferre vel illam ligare; sed neutrum præstat. Non auferit, nihil enim ex creaturâ auferit præmotio: non ligat quoque, præmotio enim quæ ex parte Dei est voluntas omnipotens, ex parte creaturæ reipsâ nihil ponit in animâ præter actum; sed actus non ligat potentiam ad oppositum, nemine diffligente; ergo, etc.

Respondeo 3^o, ad veram libertatem requiri potentiam expeditam relativè ad ea quæ se tenent ex parte actûs primi; aliàs non satis conciperetur indifferentia electiva libertati essentialis: atverò necessum non est ut potentia sit relativa ad ea quæ se tenent ex parte actûs secundi; sic posito concursu simultaneo non est potentia ad non agendum, etc. Porro gratia physicè præmovens se tenet ex parte actûs secundi; è contra verò delectatio relativè victrix se tenet ex parte actûs primi; ergo, etc. Et certè ut vera sit ac relativa agendi potentia, non necesse est ut vincere possit id quod sibi nullatenus opponitur: atqui in sententiâ Thomistarum præmotio ad unum minimè opponitur potentiæ ad oppositum, sed è contra istam potentiam propriâ suâ virtute et efficaciâ illæsam servat, ipsa siquidem, ex Thomistis,

non agit nisi virtute voluntatis Dei efficacissimæ, quæ ita attingit voluntatis determinationem, ut simul attingat ejus modum seu libertatem, quatenus nimirum Deus vult hæc duo stare simul cum præmotione physicâ, nempe actionem talem, et veram potentiam ad oppositum. Ita Lemos et Alvares locis mox citatis. E contra verò in systemate Jansenii, cum delectatio cœlestis et terrena sint duæ potentiæ sibi perpetuò repugnantes, perspicuum est virtutem gratiæ et potentiam malè agendi, ex mente Jansenii, sibi è diametro adversari; atque adeò potestatem voluntatis ad malum, ut vera sit, debere esse proportionatam superandæ gratiæ victricis delectationis.

Dices 2^o, præmotio physica Thomistarum sicut et delectatio victrix Jansenii, se tenet ex parte actûs primi. Namque 1^o, à Thomistis sæpius dicitur complementum potentiæ; 2^o, non est actus secundus, sed ipsius causa; 3^o denique est auxilium medicinale, ac proindè vires infirmas supponit; ergo, etc.

Respondeo nego ant. cujus falsitas ex dictis patet. Ad primum: potentia tendit ad actum et per illum completur: meritò ergo præmotio physica quæ potentiam ad actum certò applicat, potentiæ complementum dicitur. Ita Lemos et Alvares. Ad secundum: illud enim dici potest se tenere ex parte actûs secundi, quod supponit potentiam completam: porro licet præmotio physica sit causa actûs, supponit potentiam completam; ergo, etc. Ita iidem. Ad tertium dico 1^o, præmotionem physicam in systemate Thomistarum non esse propriè auxilium Christi medicinale; cum non minus in statu innocentie, quàm in præsentī statu necessaria fuerit. Ita communiter Thomistæ; 2^o, distinguo: Auxilium est medicinale, quatenus est principium effectivum in actu secundo, supponens tamen potentiam completissimam in actu primo, concedo: secus, id est, quasi ipsa necessaria sit ut voluntas habeat vires relativè proportionatas operi exequendo, nego. Ita Cajetanus, Alvares, et ipsemet Massoulié, quæst. 3, de discrimine doctrinæ Thomist. à Janseniano systemate; 3^o, addi potest præmotionem physicam dari quidem titulo infirmitatis, sed non solam; eodem quippè titulo datur et gratia sufficiens. Scilicet infirmitas potentiæ duplex concipi potest et est: prima ratione potentiæ, quatenus est in se infirma et impotens: secunda ratione actûs, quatenus nempe potentia jam quidem potens, sed adhuc, ut ita dicam, convalescens, imbecillis est ad actum, ad cujus

productionem magnas deberet exercere vires, quas etsi habeat, tamen nusquam, saltem constanter ac per diuturnum tempus, nisi fortius corroboretur, expensura est; porro gratia sufficiens primam supplet infirmitatem; secundam verò gratia efficax. Ita ferè Cajetanus 1, 2, q. 109, art. 9; Alvares disp. 88, n. 10, et alii.

Dices 5°, ea facultas non intelligitur libera et inexcusabilis, quæ neque habet omnia necessaria ad actum secundum, neque potest ea accersere; sed absente præmotione physicâ, voluntas nec habet, nec accersere potest præmotionem ad agendum necessariam. Per quid enim eam advocaret? non per actum, cum nullus sit actus sine præmotione; non per non actum: non actus enim nihil est, et per nihil Deus non determinatur. Aliundè non actus erit, quoties non erit præmotio ad malum, ac proindè Deus daret præmotionem ad bonum quoties non daret præmotionem ad malum: quid porro absurdum magis excogitari potest? ergo, etc.

Respondeo 1°, argumentum illud, eorum omnium quæ adversus Thomistas proponuntur gravissimum, nullum omninò esse in laudato molliorum Thomistarum systemate: juxta enim illos perspicuum est neminem carere præmotione physicâ absque suâ culpâ. Respondeo 2°, retorqueri posse adversus Congruistas et etiam Molinistas: quotiescumque enim justus præceptum non implet, caret gratiâ congruâ aut concursu simultaneo, quæ sunt absolutè necessaria ad agendum: nec potest reponi penes hominem esse sibi utrumque advocare seipsum determinando; ad illam enim determinationem requiritur gratia congrua aut concursus simultaneus. Respondeo 3°, juxta Thomistas, hominem, dum peccat, intelligi sufficienter liberum et inexcusabilem: tum quia non caret aliquo necessario ex parte potentiæ, quam completam ac relativè expeditam confert gratia sufficiens; tum quia gratiâ præmovente non caret absque suâ culpâ, quæ quidem culpa est primò, peccatum originale, quod quidem locum habet in iis duntaxat in quibus per baptismum dimissum non fuit. Ita S. Aug. epist. 105, et 106, et S. Th. 2, quæst. 2, art. 5 ad 1.

Secundò, peccata actualia præcedentia, et ipsa hominum ad gratiam sese non præparantium negligentia. Ita S. Th. quæst. 3, de malo art. 1, his verbis: « Ex indispositione hominis » provenit ut motio primi moventis non sit » perfecta, ita ut perfectam operationem producat; quæ indispositio, vel est præcedens

« peccatum, vel error, ignorantia, vel saltem inadvertentia; propter quorum aliquid » motio primi moventis sufficienter ad bonum » non sit ita efficax, ut perfectam in homine » operationem producat; quæ omnia relata ex » culpâ sunt hominis. » Quibus verbis nihil clarius dici potuit. Idem docet S. Doctor quæst. 24, de verit., art. 14 ad 2. Tertiò, denique ipsummet peccatum quod actu committitur, impedimentum est gratiæ receptione. Hoc autem ut intelligatur, observant Thomistæ:

1°, Deum esse primam causam efficientem; hominem verò primam causam deficientem. 2°, In omni opere sive bono, sive malo, aliquid ex parte Dei, et aliquid ex parte hominis reperiri: scilicet in opere bono, ex parte Dei reperitur gratia; ex parte hominis, consensus gratiæ: in opere malo, ex parte Dei voluntas denegandæ gratiæ præmoventis; ex parte hominis, mala peccandi voluntas, ipsumque actuale peccatum. 3°, Id omne quod in opere bono ex parte Dei reperitur, prius esse et causam ejus quod ex parte hominis adest in eodem opere; è contra in opere malo, quod ex parte hominis adest, eo prius est et causam ejus quod ex parte Dei contingit.

Ex quibus principiis colligunt, licèt in eodem instanti sit in homine voluntas peccandi, et in Deo voluntas denegandæ gratiæ, malam tamen hominis voluntatem præire justæ voluntati Dei, eumque impedire ne efficacem gratiam infundat: ita ut ideò sequatur gratiæ defectus, quia homo à recto præcepto deficere intendit: quod variis S. Thomæ testimoniis confirmant; idque etiam ad Adamum innocentem extendunt. 1, 2, q. 111, art. 3: « De » fectus gratiæ, inquit Doctor Angelicus, pri » ma causa est in nobis; sed collationis prima » causa est in Deo, secundum illud Osee 13: » PERDITIO TUA EX TE ISRAEL, TANTUMMODò IN ME » AUXILIUM TUUM. » In primum sentent. dist. 40, p. 4, art. 2: « Hominem carere gratiâ ex duobus contingit: tum quia iste non vult accipere; tum quia Deus non vult infundere; horum autem duorum talis est ordo, ut secundum non sit nisi ex suppositione primi. » Et in secundum dist. 28, quæst. 1, art. 4: « Quòd aliquis non habeat gratiam, inquit, » non est ex hoc quòd Deus non velit eam » dare, sed quia homo non vult eam accipere. »

Hic addo: hoc unum certum habemus, quod ultrò agnoscunt Thomistæ omnes, videlicet ad libertatem hominis et ipsius inexcusabilitatem, requiri veram indifferentiam ad utrumque.

seu duplicem agendi potentiam et non agendi, quarum unaqueque sit viribus proportionata cum eâ quæ sibi adversatur, et cum omnibus se tenentibus ex parte potentiae; illud verò quod additur in objectione tanquam necessarium ad libertatem et ut homo inexcusabilis sit, tametsi certissimum videatur, nondum tamen ab Ecclesiâ definitum est.

Cæterum, licet adductæ hucusque Thomistarum responsiones difficultatem non absumerent; sufficere nihilominus possunt ut ostendatur quam sincerè illi agant in propugnandâ gratiâ ex se efficaci, et quantum abhorreant ab eo omni quod videri potest libertati detrimentum inferre. Atque hæc ad qualemcumque systematis Thomistici intelligentiam impræsentiarum sufficient; neque enim Thomistica doctrinæ secreta, intimosque recessus profundius scrutari hic expedit: fusiores hanc expositionem ad secundam dissertationem de gratiâ partem remittere satius erit. Quæ autem dicta sunt ad diluendas objectiones contra systema Thomisticum, hæc à fortiori valent in gratiam systematis delectationis simpliciter et absolutè victricis; neque enim ipsius defensores præmotionem physicam, aut antecedentem efficacem determinationem requirunt etiam ad materiale peccati: hinc homo donatur delectatione victrici, quoties peccato non repugnat gratiæ sufficienti.

DISPUTATIO DUODECIMA.

De Quesnello.

Ad tria generatim capita, majoris perspicuitatis causâ revocabimus quæcumque in præsentī negotio dicenda nobis sunt. 1^o, Historicam causæ Quesnellianæ texemus synopsis. 2^o, Iudicii contra Quesnelli librum lati, seu, Constitutionis *Unigenit*. quâ 101 Quesnellianæ damnantur propositiones, *naturam*, *æquitatem* et *auctoritatem* astruimus ac vindicabimus. 3^o, Doctrinæ dictis 101 propositionibus expressæ systema delineabimus; strictim refellemus; ejusque omnimodam cum Baianis et Jansenianis placitis consensionem exhibebimus: unde liquidò constabit, Baium et Jansenium in Quesnello fuisse redivivos. His, instar appendicis, subjungemus nonnulla de Synodis Romanâ, Avenionensi, et Ebreduncensi, in causâ Quesnelli habitis. Atque hæc quidem singula, jam appositè ad præsens nostrum institutum, summam et obiter exequi conabimur: de iisdem uberius dicturi deinceps in historicis de gratiâ dissertationibus.

ARTICULUS PRIMUS.

Historica causæ Quesnellianæ synopsis. — Exponemus primùm, ea quæ spectant ipsam Quesnelli personam: tum, quæ famosum ipsius librum cui titulus: *Le Nouveau Testament en français, avec des Réflexions morales*, etc. demùm, quæ præfati libri damnationem subsequuta sunt.

§ 1. *Persona Quesnelli.* — Paschasius Quesnellus anno 1634, die 14 Julii nascitur Parisiis. Anno 1657, Congregationi Oratorii à Cardinale Berullo in Galliis institutæ nomen dedit. Anno 1675, edidit opera S. Leonis Papæ, unâ cum scholiis et dissertationibus, quæ 22 Junii 1676, Romæ graviter prohibitæ fuere. Anno 1678, 26 Septembris, decretum fuit in generalibus Oratorii Gallicani Comitibus, certam formulam ab omnibus et singulis ejusdem Congregationis fore subscribendam adversus Baii Janseniique doctrinam. Renuit illi formulæ subscribere Quesnellus; nec usquam Superiorum mandatis, etiam accedente Regis Christianissimi imperio, ad saniores mentes revocari potuit. Hinc Parisiis excedere cogitur, Aureliamque se recepit. Ita de seipso testatur Quesnellus in suâ ad Noris. Epistolâ, cujus extractum legitur, *Causæ Quesnell.* pag. 8 et 9.

Anno 1685, pœnarum metu Gallias deseruit; inde migravit in Belgium, et Bruxellas se contulit ad Arnaldum ibi profugum et latitantem, junctisque cum illo pro disseminandâ Jansenii doctrinâ studiis, ac sparsis hunc in finem innumeris procacibus opusculis, libellis, tractatibus, etc. per totum Belgium novitatum pestem, simul et dissidiorum faciem intulit. Ita *Causæ Quesnell.* pag. 2, 3, etc., et rursus ibidem in verificat. art. 20, 21, 28. Anno 1690, Quesnellus et Arnaldus Bruxellis exire simul ambo compulsi, Delphos in Hollandiâ petierunt; inde in tractum Leodiensem concesserunt, ac post tres menses Bruxellas rediêre. Anno 1694, mortuo Arnaldo, pergit Quesnellus in eadem urbe, mutatis veste et nomine, delitescere: tunc in Arnaldi locum suffectus, totius Janseniani agminis dux et antesignanus electus fuit, et Pater Prior (*le Père Prieur*), Præpositus Augustinianorum (*le Provincial des Augustins*), etc., appellatus. Exindè venenata è latebris suis jugiter edendo ac publicando opuscula, totus incubuit in subruendis omnibus Romanorum Pontificum, aliorumque Ecclesiæ Præsulum, necnon etiam Christianissimi et Catholici Regum contra novam sectam conatibus ac decretis. Ista constant, tum ex

Decreto citatorio archiepiscopi Mechliniensis, art. 1, 2, 5, 14; tùm ex *instrumentis* relatis in verificat. eorundem articulorum; tùm denique ex *sententiâ* archiepiscopali in Quesnell. latâ: quæ omnia monumenta extant, *Causæ Quesnell.* pag. 1, 2, etc., item pag. 542, 545, et seqq.

Cùm autem ejusmodi scriptis novaturientibus ac perniciosis, Quesnellus, ejusque assecke, totum in dies Belgium, magis magisque interturbare non desisterent, ac penitus commovere: tandem, anno 1705, ut zizania illa libellorum Ecclesiæ perindè ac Reipublicæ summè exitium radicibus evelleretur, illustriss. Humbertus à præcipiano Mechliniensis archiepiscopus, imploratâ Regis Catholici auxiliatrice manu, Quesnellum, ejusque fidum ac individuum comitem Gerberonium, omni studio diligentiaque investigari mandavit. Eodem anno, die 30 maii, duo illi pacis turbines Quesnellus et Gerberonius, Bruxellis casu deprehensi, ad Palatium archiepiscopale deducti fuerunt, et Ecclesiastico carceri mancipati. Dein per sententiam animadversum est in Gerberonium, qui postea, promovente Cardinali Noallio, Vincennis primùm an. 1710, 18 aprilis, tùm suis restitutus in Abbatia sancti Germani Pratensis, die 30 ejusdem mensis, formulario subscriptis, erroresque suos faustè ejuravit. Extat sententia in illum lata, ad calcem processûs contra eundem instituti. Vide opus inscriptum: *Causa Gerberoniana*. Atverò Quesnellus, post tres circiter ab incarceratione menses, nocte scilicet inter 11 et 12 septembris ejusd. anni 1705, effracto amicorum artibus pariete, evadens ex carcere, in Hollandiam secessit; ibique securus asylo, nec coronis nec purpuræ parens, in causæ Jansenianæ defensionem, uti jam pridem agere instituerat, infinita propemodum scripta edere perrexit.

Quandoquidem occasione hujusce evasionis, Quesnelliani publicis scriptis Patriarcham suum ubique prædicaverint, seu alterum Paulum, LE PAUL DE NOS JOURS; et Quesnellus ipsemet in suâ ad *Vicarium generalem* Mechliniensis archiepiscopi epistolâ, se imprudentius jactitet, *Quasi ab Angelo Domini, non secus ac alterum Petrum è carcere eductum*; DIEU PAR SA MISERICORDE M'A RENDU LA LIBERTÉ... SA PROVIDENCE M'A FAIT OUVRIR UNE PORTE: non abs re erit, circumstantias apprehensionis et detentionis Quesnelli enarrare. Hinc certè patebit manifestè cœlestes ac angelicas dictorum Apostolorum è carcerationibus, violentæ effractioni Quesnel-

lianæ omninò irreligiosè comparari. Et quidem 1^a, quod spectat apprehensionis Quesnelli negotium ejusque adjuncta: rem sic commemorat curiæ Ecclesiasticæ Mechliniensis Procurator, *Causæ Quesnell.* pag. 14 et 15.

« Anno 1705, feriâ 4, post festa Pentecostes
« veniunt Ministri justitiæ tam ex parte Regis,
« quàm ex parte illustrissimi Mechliniensis archiepiscopi (*postquam Gerberonius in alia civitatis parte sub fecto nomine et laica veste latitans jam sequestro archiepiscopali mancipatus esset*)
« ad posteriorem et abditam partem refugii
« Forestensis, in quâ delituerat Quesnellus
« ultra annum: aperit ostium Brigodæus (fidelis alter Quesnelli socius). Sciscitantur
« Ministri, ubinam esset pater Quesnell.? hic
« non tantùm illud indicare renuit, verùm
« etiam dùm cogeretur cubicula pandere; tantos excitavit clamores ac vociferationes, ut
« de eo quod peragebatur, certior redditus
« Quesnellus fugam arripuerit malè sibi conscius, ac sub favore vestis laicæ et insolitæ viæ
« fuerit elapsus, carnificè conscientia cauteriatæ ipsum persequente. » Subdit promotor:
« Hinc ut ex suppellectili suâ litterariâ, si possibile foret, efferret quædam tenebrarum opera, quibus gravium modò excessuum et errorum vincitur, justitiæ Ministros ratus
« abiisse, dùm Brigodæus jam ad palatium archiepiscopale deducebatur, fisis fortè etiam
« vesti suæ laicæ et anteriori latitationi, ob quam ignotus hic erat, revertitur ad refugii
« suprâ nominati insolitam viam; at ibi præter
« expectationem suam incurrit in manus Ministrorum curiæ Ecclesiasticæ, qui illic
« permanserant: introductus in cubiculum
« mirâ anxietate nunc huc pellitur, nunc illuc,
« locumque sollicitat, in quo se posset subducere justitiæ, et lucis timidus tandem in angulo aliquo retrò venti-repagulum ad quoddam dolium sese abdit. » Pergit ibidem:
« Postquam per cubiculum hic atque illic in ipsum perquisitum fuisset, reperitur Quesnellus; et jussus ut rhedam introiret, quâ
« ducendus erat ad Palatium archiepiscopale, omnem in partem sese vertere cœpit; ac
« dein interrogatus, an ipse non esset PÈRE
« QUESNEL; reposuit se vocari M. REBECK;
« et quidquid premeretur, ut verum suum patetaceret nomen, non aliud quàm fictum illud, sub quo in hoc latibulo delitescebat, oggessit nomen. » Hæc de apprehensione Quesnelli »

De illius verò dolosâ et per vim evasione è

carcere, ita subjungit idem Procurator Mechliniensis : « Nec certè majora dedit Quesnellus in sequestro suo generosæ et securæ mentis indicia : illic statim fenestris plumbum abstrixit , et qui calamo ad persequendum membra Christi mystici, et Ecclesiæ Principes toties malè usus fuerat , jam (prout asolet ante responsionem personalem) eo frustratus , stylum sibi ex plumbo illo confecit , quo in mala consilia, atque in carceris effractionem cum amicis suis conspiraret : » Schedulis scilicet, dicto stylo clanculum exaratis, furtimque immissis. Una ex illis sic erat inscripta : *Pour M. Ernest, Chanoine de Sainte-Gudule* : « Ne soyez pas en peine de moi. Je suis logé en bel air sur la cour des écuries. Une fenêtre regarde sur le jardin d'une hôtellerie ou auberge qui est entre l'Archevêché et les Dominicains. Voilà tout ce que je puis vous dire, n'ayant ni plume, ni papier. Tout à vous , etc. »

Schedula hæc , in archiepiscopali palatio Mechliniensi adhuc servatur , fuitque reperta à Ministris Archiepiscopatus , in Quesnelli linteaminibus studiosè implicata : « At præsumendum certissimè est, inquit citato loco Promotor, quòd similia adhuc plumbeo suo stylo exaraverit, cum in tabernà illà memoratà, *l'hôtellerie ou auberge qui est entre l'Archevêché et les Dominicains*, negotium effractionis peractum fuerit. » Nam, continenter addit, *conducti aliqui viri non uno hoc excessu insignes, nocte inter 11 et 12 septembris 1705*, « perforare cœperunt parietem palatii archiepiscopalis, sacrilegum hoc opus, posterà nocte ad effectum perducentes ; foramine autem ad tale spatium perducto, ut Quesnellus vir modicæ staturæ per illud pertrahi potuerit , scivit sese pertrahi, et ita erupit ac evasit circà horam primam dictæ noctis. » Hæc, tametsi prolixiora, ex authentico curiæ Ecclesiasticæ Mechliniensis instrumento, describere non piguit : ex quibus liquidò constat, ignominiosam et violentam Quesnelli è carcere evasionem, inverecundè non minùs acirreligiosè, conferri miris ac cœlestibus ereptionibus ; speciatim verò illi quâ S. Petrus è carcere per Angelum liberatus est.

Porrò ista sunt præcipua capita de quibus Quesnellus fugitivus, coram illustrissimo Mechliniensium Archipræsule accusatus fuit et juridicè convictus :

« 1° Quòd postquam an. 1678, in comitiis Oratorii Berulliani omnibus et singulis ejusdem Congregationis junctum fuisset sub-

scribere formulæ rejiciendi in scholis hæresim Jansenianam , et ipse pertinaciter recusasset subscribere, Galliam deseruerit, et, quamvis presbyter, latitaverit in Belgio Catholico sub veste laicà. 2° Quòd ibidem et in vicinis provinciis plures turbas et dissidia excitaverit, presbyteros commoverit adversus proprios episcopos, Clerum Batavicum impulerit adversùs Summum Pontificem. 3° Quòd damnatam in Michaelæ Baio doctrinam renovaverit, atque laudaverit novam operum ejusdem Baii editionem. 4° Quòd proscriptam Jansenii doctrinam extulerit passim, et propugnaverit, et damnatas Jansenii hæreses suis passim scriptis inseruerit. 5° Quòd Pontificis decretis, in causà Jansenii latis, liberaliter detraxerit, quasi iisdem aliquid per fraudem, et citrà Pontificum voluntatem fuisset insertum. 6° Quòd scripserit esse sacrilegum, et toti Ecclesiæ injuriosum exigere subscriptionem et juramentum facti, ut aiunt Janseniani, quod formulario Alexandri VII continetur. 7° Quòd pertinaciter adhæserit factioni eorum, qui adversùs Ecclesiæ decreta, et adversùs edicta Principum conjurârunt, librum et doctrinam Jansenii tueri : quòd illa factio latè per Galliam, Belgium, et Hollandiam sit diffusa, et à factiosis appelletur Ordo : quòd illa factio habeat suas, uti vocant, Abbatias, Priores, Collegia, Domos, Hospitia et Eremos : quòd illa factio plures complectatur secularis et regulares, quorum alios Visitatores, alios Priores, alios simpliciter Patres, alios Fratres appellant : quòd à morte D. Arnaldi, quem Patrem Abbatem nuncupabant, Pater Quesnel factionem hanc consiliis suis rexit sub titulo *Patris Prioris* : quòd varias instituerit visitationes, exigens à præcipuis, ut ad ipsum referrent quæcumque possent promovere dictam factionem : quòd ad eum effectum procuraverit distributiones pecuniarum, quibus Procuratores factionis tam Romæ quàm Parisiis, et alibi existentes possent causas factionis sustinere. 8° Quòd in litteris factionem concernentibus passim usus fuerit citrà fictorum nominum, ne celata mysteria et conspirationes possent, eveniente casu interceptione litterarum, detegi. 9° Quòd tam scripserit, quàm ab intimis suis receperit litteras, Regi Christianissimo, Regi Catholico, et præcipuis utriusque Regis Ministris ; imò et Summis Pontificibus, cardinalibus et Episcopis gra-

« viter obtrectantes; quòdque illos, à quibus
 « hujusmodi litteras recepit, continuaverit
 « colere uti intimos. 10^o Quòd in hoc Belgio
 « reimprimi et distrahi curaverit varia scripta
 « jam ante à Sede Apostolicà prohibita, ac
 « ediderit plurima anonyma..... quòdque
 « ob scandala inde orta, et errores, falsitates
 « ac injurias in illis contentas, jam nunc ali-
 « qua ex dictis, scriptis, decretis Sedis Apo-
 « stolicæ fuerint condemnatae, et etiam in
 « Belgio manu tortoris combusta. 11^o Quòd
 « etiam præparaverit compilationem centum
 « quinquaginta sex opusculorum, à natà hæresi
 « Jansenianà editorum, quorum etiam plu-
 « rima à sanctà sede sunt damnata. 12^o. Quòd
 « secretò administraverit Arnaldo ultima Sa-
 « cramenta. Item, quòd ausus fuerit in ædibus
 « suis privatà suà auctoritate erigere oratorium
 « domesticum et in eo dicere Sacrum. »

Hæc et alia pleraque criminationis capita
 fusè deducta reperire est in juridico Quesnellianæ
 instrumento, quod typis editum est
 Bruxellis, sub hoc titulo : *Causa Quesnelliana*,
 sive *Motivum juris pro Procuratore, curiæ Ec-
 clesiast. Mechliniensis actore contra Paschas. Quesn.*
citatum, fugitivum, etc. Iis autem accu-
 sationis capitibus ritè probatis, omnibusque
 maturè consideratis, sententia ab illustrissimo
 archiepiscopo Mechliniensi in Quesnellum lata
 est die 10 novembris an. 1704, in hunc mo-
 dum : « Declaramus citatum (Quesnell.) uti de
 « Jansenismo et Baianismo, aliisque excessibus
 « suprâ memoratis convictum, incidisse in ex-
 « communicationem, aliasque pœnas per Bul-
 « las Apostolicas in ejusmodi delinquentes la-
 « tas : monentes omnes et singulos Christi
 « fideles, ut ipsum uti talem habeant, et evi-
 « tent; injungentes citato, ut se recipiat in
 « monasterium aliquod in patriâ catholicâ si-
 « tum, ibidemque per integrum ab adventu
 « suo mensem exercitia spiritualia obeat, ac
 « dein in spiritu pœnitentiæ ibidem sequestra-
 « tus maneat, legendo singulis diebus septem
 « psalmos pœnitentiales, ac jejunando diebus
 « Veneris in aquâ tristitiæ et pane doloris,
 « donec Summo Pontifici quoad doctrinam
 « suam fecerit satis, ac absolutionem ab ex-
 « communicatione obtinuerit.... Ita sententia-
 « mus. Datum Bruxellis in Palatio nostro archi-
 « episcopali, die 10 novembris 1704. »

Damnatorium istud judicium floccifecit Quesnellus
 et statim protrusit ubique infamibus li-
 bellis, in ejus auctorem impotenter et inve-
 recunde desævit; mirisque illius sententiam

proscindendo calumniis, totum adversus vigi-
 lantissimum præsulem Belgium concitare mo-
 litus est. Sed et longè graviore adhuc contra
 Ecclesiam excivit tumultus occasione libri dam-
 nati, cui titulus : *Le nouveau Testament en fran-
 çais, avec des reflexions morales*, etc. Proscrip-
 tum pluries librum, excerptasque ex eo confixas
 propositiones ad mortem usque pertinaciter
 defendit : quo de libro, mox dicendum. Indo-
 mitum, et in omnes suis novitatibus adversantes
 furens Quesnelli ingenium, vix alibi magis
 emicat, quàm in prætensâ suâ Romanæ Ec-
 clesiæ et summorum Pontificum contra Ley-
 deckereum Ultrajectens. defensione, necnon,
 in notis adversus decretum sacre Congregatio-
 nis Indexis, quo dissertationes ejus in S. Leonis
 opera proscribuntur. Exitiosa hæc scripta, ani-
 mum irreverentem, in contumelias pronum, ac
 prorsus schismaticum planè demonstrant : quod
 pluribus exinde inter Batavicas paludes editis
 evulgatisque ab eodem Quesnello contra Con-
 stitutionem *Unig.* famosæ ac virulentis libellis,
 plus satis confirmatum est.

Obiit pertinax variis et quidem gravissimis
 irretitus pontificiis censuris Quesnellus, Amste-
 lodami die 2 decembris an. 1719, ætatis 85.

§ 2. De Quesnelli libro cui titulus : LE NOUVEAU
 TESTAMENT EN FRANÇAIS, AVEC DES RÉFLEXIONS
 MORALES, ETC.

Inter cæteras Quesnelli lucubrationes, nomi-
 natissimus est liber Gallico idiomate impressus,
 sub hoc titulo : *Le Nouveau Testament avec des
 Réflexions morales*, etc., vel aliter : *Abrégé de
 la morale de l'Évangile*, etc. Infausti hujus
 operis origo, progressus, exitus, variaque tan-
 dem sors ac fortuna, etc. impræsentiarum sunt
 aperienda.

Quæres itaque 1^o, quæ fuerit prima libri
Observationum moralium origo ? Respondeo :
 Anno 1671, in Galliis adhuc degens Quesnellus,
 opusculum edidit unico volumine in 12 com-
 plectens quatuor duntaxat Evangeliorum ver-
 sionem Gallicam, quæ eadem fermè ac Monten-
 sis, cum brevioribus quibusdam *Reflexionibus
 moralibus*. (Pleræque illæ Reflexiones extractæ
 erant ex contractâ quâdam verborum Christi
 collectione latinè editâ à R. P. Jourdain, Insti-
 tutionis Oratorii Parisiensis primo superiore.)
 Illustrissimus Felix Vialard Catalaunensium
 episcopus, istud Quesnelli opusculum probavit,
 mandato mense Novembri ejusdem anni 1671
 dato. En famosissimi *Reflexionum moralium* libri
 origo, primumque exordium. Ita Quesnel. in

suo Apologet. primâ parte pag. 19, et 20, ubi dicti operis occasionem, progressum et exitum fusiùs enarrat. Eadem refert Hexaplar. auctor, *Histor. Reflex. moral.* parte 1, pag. 5 et seq.

Quæres 2^o, quis fuerit præfati operis progressus, quæve ipsi subindè accesserint additamenta? Respondeo præfatum Quesnelli opus, nonnisi paulatim et quasi per gradus ad eum tandem in quo nunc extat perductum fuisse statum. Namque 1^o, sexdecim à priori mox dictâ editione annis, scilicet an. 1687, prolixiorrem vulgavit ejusdem operis editionem: additis uti priùs in quatuor Evangelia, ita in reliquos pariter novi Testamenti libros observationibus moralibus. Ista editio tribus brevioribus in-12. constabat voluminibus. 2^o, Idem opus iterùm incudi reddidit Quesnellus; variis et gravioribus amplificavit additamentis; ac demùm perfecit, absolvitque anno 1693; tunc quatuor grandioribus in-8^o distinctum tomis prodiit Parisiis. 3^o, Immensæ deinceps vulgatæ sunt dicti operis editiones, inter quas eminent præ cæteris, tùm ea quæ prodiit an. 1693, quamque card. Noallius, tunc Catalaunensium Episcopus, (postulatis priùs quibusdam in editione Quesnellianâ an. 1693 levioribus correctionibus, nonnullisque verborum mitigationibus) probavit documento pastorali die 23 junii ejusd. an. 1693; tùm altera, quæ eodem promovente cardinali excusa fuit an. 1699. Hæc posterior editio, occurrentibus quibusdam casibus, ac Eminentiss. Noallio novo pastorali Mandato probata non fuit, uti eam approbare antea videbatur instituisse. De utrâque hæc an. 1693 et an. 1699 editione, infrâ sese dabît dicendi occasio. Circà varias *Observationum moralium* editiones, nonnulla præstat hic breviter animadvertere.

Primum: Tot præcisè annis insudâsse Quesnellum in suo conficiendo ac limando dictarum *Observationum* libro, quot insumpsit Jansenius in suo, cui titulus, *Augustinus*, perficiendo: quippè, ut suprâ notavimus, per integros viginti et duos annos, huic suo libro perficiendo totus incubuit Jansenius: ita eundem planè annorum numerum adhibuit Quesnellus in suis recognoscendis ac perpoliendis *moralibus Observationibus*: ab anno scilicet 1671, quo breviores in quatuor Evangelia gallicè reddita considerationes primùm conscripsit Quesnellus, ad annum 1693 quo ultimam iisdem observationibus manum apposuit, anni omninò viginti et duo effluerunt, nec plures nec pauciores.

Alterum hic notandum istud est: integrum id 22 annorum spatium fuisse impensum à Quesnello in exornandis quidem ac limandis totius operis stylo, sermone, phrasibus; non autem in emendandis, tollendisve erroribus: imò novos perpetuò adjecit. In primâ siquidem anni 1671 editione, quinque tantùm reperiuntur è damnatis postmodum centum et unâ propositionibus; scilicet XII. XIII. XXX. LXII. LXV. In secundâ an. 1687, fatente ipsomet Hexaplarum Quesnelliano scriptore tom. I. pag. 6, jacent quadraginta octo propositiones è damnatis, præter quinque quæ extabant in priori editione. In tertiâ an. 1693, et sequentibus editionibus, omnes et singulæ, et quidem sæpiùs, nonnullis tamen quandoque mutatis vocibus, deprehenduntur 101 proscriptæ per Constitutionem *Unig.* propositiones. Ubi sanè non prætermittendum, damnatas has propositiones de verbo ad verbum extractas fuisse ex editionibus annorum 1693, 1694, 1699, in Bullâ citatis.

Tertium denique observandum, peculiariter spectat hanc anni 1693, et sequentes *Reflexionum moral.* editiones. In illis certè mirari subit editionibus, quòd liber tunc, utpote longè duplo auctor, novo Regis privilegio, novisque approbationibus opus habuerit; et tamen publici juris factus est cum iisdem planè approbationibus longè antea datis, ac præsertim cum mandato Felicis de Vialard Catalaunensis episcopi qui opusculum duntaxat approbaverat an 1671 editum, nec sequentes *Reflexionum* editiones viderat; siquidem fatente ipsomet Hexaplar. auctore, illustriss. Vialard mortuus est anno 1680, eique eodem anno successus est Antonius de Noailles, postea cardinalis et archiepiscopus Parisiensis.

Quæres 3^o, quid sentiendum sit de prætersâ illâ generali, quam auctor *Epistolæ sub nomine septem Episcoporum. ad Innocent. XIII.* n^o 5, pag. 23, necnon auctor *Respons. ad primum Document. Pastoral. Suessionensis Episcopi*, parte 1, pag. 27, aliique celebriores Quesnellistæ, ubique jactantiùs venditant libri *Reflexionum moralium* per 40 annos approbatione: ab anno scilicet 1671 ad annum 1711, quo opus ad Romanum Pontificem solemniter delatum fuit. Respondeo immeritò planè ac præposterè ostentari à Quesnellistis adeò generalem ac diuturnam dicti libri approbationem. Namque ex illis 40 annis quibus liber *Reflexionum* generalliter dicitur approbatus, omninò subducendi sunt sexdecim anni qui effluxerunt ab anno 1671,

quo primum prodiit opus, uti modò observatum est, unico breviori volumine in 12, ad annum usque 1687, quo prodiit idem opus fusiùs editum tribus tomis pariter in-12; hoc enim temporis spatio, fatentibus ipsomet Quesnello in Apologet. pag. 19, necnon auctore Hexaplar. histor. constitut. primâ parte pag. 44, brevissimæ in quatuor tantùm Evangelia observationes contracto volumine comprehensæ, libellum duntaxat conficiebant, nec erant nisi *adumbratio*, rudisque ac *inchoata forma* Reflexionum moralium subindè anno 1693 à Quesnello editarum. Et reipsa in brevioribus illis anni 1671 observationibus, quinque tantùm, ut antè diximus, extant è damnatis propositionibus. Imò et iisdem prætensæ approbationis annis, sex alii prætereà demendi sunt qui effluxere ab editione 1687 ad editionem 1693. Illa enim editio anni 1687, etsi priori auctor, plus duplo minor est editione 1693, in eâque desunt complurimæ è damnatis propositionibus, neque in illâ inculcatur systema auctoris, ut in editione 1693 integrum et absolutum opus complectente quod tot expostulationibus et querelis locum exindè præbuit.

Quid itaque reliquo tempore, octodecim scilicet sequentibus annis, à 1693 ad solemnem usque totius causæ delationem ad Romanum Pontificem peractum sit, superest expendendum. Equidem ubi ad exitum opus perductum, statim à studiosis Quesnelli defensoribus undique magnificis laudibus celebratum fuit et ad cœlos usque elatum; at peritiores in Jansenianis versutiis dignoscendis malum non latuit: pestilens hæreseos venenum sub politioris sermonis illecebris et affectatæ ubique pietatis specie delitescens ab ipsis agnitum est, et continuò adversùs exitiosum opus vehementer reclamatum. Id ita esse sequentibus momentis manifestè constat.

I° D. Fromageau insignis Doctor et Socius Sorbonicus, vel ab ipso completam *Observationum moralium* editionem proximè sequenti anno. Id est, an. 1694 propositiones centum nonaginta novem, velut *erroneas et censurâ dignas*, ex Quesnelli opere collegit. Ita inter plerosque alios fide dignissimos, apertè testatur illustrissimus Suessionensis, postea Senonensium archiepiscopus, quintâ Pastoralis Epistolâ part. 4, n. 124, diversis his verbis: « On a en-
« core le Mémoire des deux cents Propositions
« à retrancher ou à corriger, dressé par Mon-
« sieur Fromageau, Docteur de la Maison de
« Sorbonne, célèbre par sa doctrine, et par

« ses réponses aux consultations qu'il reçoit de
« toutes les Provinces. » LAT: cœ ille ex Quesnellianis *Observationibus moralibus* vitiosæ propositiones jam dudùm vulgatæ fuere, et publici juris factæ.

II°. Vallonius (du Vaucel), Romæ Jansenistarum partes agens, ita ad Quesnell. scribebat an. 1697 (*Causæ Quesnellianæ* pag. 184.) « Il
« y a des gens qui ont lu la Morale abrégée du
« R. P. Quesnel, et qui prétendent y avoir
« trouvé des erreurs. » Paria narrat Germanus de Champenel (ipse est Willartus) in suâ ad eundem Quesnellum Epistolâ 12 aprilis ejusd. anni 1697, exponit postea Willartus Quesnello, varias in *quatuor fratres* (id est, in quatuor *Observat. moralium* tomos) expostulationum et querelarum causas: paucisque interpositis concludit: « Quamobrem videretur necessarium,
« UT OPERI DENUO MANUS ADMOVERETUR.... Tol-
« lendum ex illo id omne quod RELIGIOSORUM,
« aut SCIORUM, aut PREOCCUPATORUM querelis,
« aut CONSCIENTIÆ ANXIETATI locum ullum præ-
« bere possit. » Pergit: « Optandum foret ut
« quatuor fratrum parens (Quesnell.) in eo se
« facilem præberet, et libenti animo concedere-
« ret, ut mutationes illæ fierent temperatæ,
« elegantes, scitæ, felices, quas unus ante om-
« nes Dom. Bevilaqueus explicare potest. » Eadem variis in Epistolis ad Quesnell. datis, pluries ac disertè repetit Willartus. Hæc sanè, à duobus Jansenianarum partium coryphæis familiariter et amicè dicta Quesnello, de variis adversùs *Reflexionum moralium* librum *expostulationibus*, *querelis*, *motibus*, *necessariisque* in eo opere *mutationibus*; hæc, inquam, generalis ejusdem libri jactatæ approbationis insulsa-tem planè demonstrant.

III°. Illustrissimus Bossuetius, cujus patrocini-
nio in favorem libri *Observationum* tantoperè glorian-
tury Jansenistæ, ipsis è diametro adversatur: ut ex professo sequenti quæsito demonstrabitur.

IV°. Illustrissimus Godet des Marais, Carnotensis Episcopus, vel ab ipso an. 1699 adversùs *Observationum* librum, uti summè perniciosum, insurrexit. Testis est, unus ex fidis Quesnelli amicis (D. le Noir) ficto nomine *P. Bruleur*, ad Quesnellum scribens 2. Novembris an. 1699, his verbis: « Episcopus Carnotensis cùm heb-
« domadâ præteritâ S. Ursulæ Piscianenses
« Moniales inviseret, iis prohibuit Observatio-
« nes in novum Testamentum; » mox ingemendo addit: « Illud profectò molestissimum
« est, quòd tam malè mereantur de Ecclesiâ

« vel ipsi Principes... dicere plura non audeo,
 « etc. » Sic ille. Alter Quesnelli assecla Wil-
 lart. epist. ad ipsum datâ 23 januarii 1700, de
 eodem vigilantissimo Præsule, deque ejus ani-
 mo erga Observationes quas ipse nomine *qua-*
tuor fratrum designare solet, hæc habet : « Exe-
 « eratur et horret ac blasphematur doctrinam
 « quam scilicet ignorat, nec ullo modo discere
 « cogitat. Idem ille quatuor fratribus (quatuor
 « sunt Observationum moralium volumina :
 « ex clavi Jansenianâ; Causæ Quesnell. pag.
 « 524.) adversatur. » Et paucis interjectis,
 subdit : « Sed hoc certum est, diabolus nemi-
 « pe fructus, ac progressus quatuor fratrum
 « tantò ægrius ferre, quantò longius latiusque
 « hi fructus in omnem partem permanent. »
 Hinc sanè, illustrissimi Carnotensis, aliorum-
 que Præsulum, ardens studium, in proscri-
 bendis quas ubique disseminabant Quesnellis-
 tæ *Observationibus moralibus*, facile est col-
 ligere.

Vº. Eamdemsollicitudinem, idemquestudium
 in removendis à lectione illius libri fidelibus,
 plurimi alii circà ea tempora exercuere Præ-
 sules Gallicani. Ita in suis pro publicandâ Con-
 stitutione *Unig.* mandatis, non obscurè decla-
 rarunt Archiepiscopi Lugdunensis, Viennensis,
 Narbonensis, necnon Episcopi Ambianensis,
 Massiliensis, Valentini, Biterrensis, Castren-
 sis, Lexoviensis, etc. En Illustrissimi Lugdu-
 nens. archiepiscopi, de Quesnellianis *Observa-*
tionibus, verba : Mandato Pastoralî 14 april.
 1714, pag. 3 : « Depuis que ce livre si captieux
 « a paru dans l'Eglise, on n'a pas cessé d'ex-
 « horter les Fidèles à se tenir sur leurs gardes;
 « et suivant l'avertissement du Sauveur du
 « monde, à imiter la prudence du serpent, en
 « fermant les oreilles pour ne point entendre
 « la voix de cet enchanteur si habile dans l'art
 « de séduire... et en fuyant ces raffinemens si
 « dangereux en matière de foi, dont cet ou-
 « vrage est rempli. » Simillima habent Narbo-
 nensis, Albiensis, etc. archiepiscopi, necnon
 Biterrensis, Lexoviensis, etc. Episcopi, in
 publicis eod. an. 1714 super publicatione et
 acceptatione Constitutionis *Unig.* editis manda-
 tis. Documenta hæc adunata reperire est in
 collectione hoc anno Parisiis jussu Cleri vul-
 gatâ. Quin et archiepiscopus Turonensis, D.
 d'Hervau, Constitutioni licèt aliundè adversus,
 expressè ait in mandato anni 1714, *se jam ab*
anno 1698 incœpisse Fideles sibi commissos à le-
ctione dicti libri REFLEXIONEM MORALIUM revocare.
 Unde non mirum quòd omnes episcopi qui

anno 1714 Constitutionem *Unigenit.* acceptare
 recusarunt, uno excepto Mirapicensi, Mandatis
 Pastoralibus tunc temporis librum *Reflexionum*
moralium prohibuerint ac damnaverint. Diserta
 horumce mandatorum excerpta art. sequenti,
 paragrapho 1 exhibebimus.

VIº. Eundem Quesnelli librum publicis Man-
 datis proscripserunt episcopi Aptensis an. 1705;
 Vapincensis an. 1704, Nivernensis an. 1707.
 Eodem anno archiepiscopus *Bisuntinus* præfa-
 tum opus Documento Pastoralî interdixit, gra-
 viterque notavit.

VIIº. His undique clamoribus excitus S. Pon-
 tifex, accuratori *Observationum* librum examini
 subjecit, quo peracto, omnes ad examen de-
 putati Consultores et cardinales, *unanimi sen-*
tentiâ judicârunt, librum esse perniciosum,
 atque erroribus gravissimis, etiam hæresim
 sapientibus scatentem, proindeque manibus
 Fidelium subducendum esse, atque anathemate
 feriendum : quod quidem præstitum est spe-
 ciali decreto in formâ Brevis, die 13 julii an.
 1708, in quo sic de libro declaratur : « Sacrum
 « ipsum novi Testamenti textum exhibet dam-
 « nabiliter, nec sine ausu temerario vitiatum,
 « et alteri versioni Gallicæ, dudum à fel. rec.
 « Clemente Papâ IX, prædecessore nostro, per
 « quasdam suas in simili formâ Brevis die 20
 « aprilis 1668 expeditas litteras damnatæ, in
 « multis conformem; à vulgatâ verò editione,
 « quæ tot seculorum usu in Ecclesiâ probata
 « est, atque ab orthodoxis omnibus, pro au-
 « thenticâ haberi debet, multipliciter discre-
 « pantem et aberrantem : notas insuper et
 « Observationes continet habentes quidem spe-
 « ciem pietatis; sed ad virtutem ejus abnegan-
 « dam subdolè deducentes; in quibus passim
 « occurrunt doctrinæ et propositiones seditio-
 « sæ, temerariæ, perniciosæ, erroneæ, aliàs
 « damnatæ, et Jansenianam hæresim mani-
 « festè sapientes. »

VIIIº. Prodiere paulò post contra eundem
 librum Censuræ episcoporum Lucionensis
 et Rupellensis : ii scilicet Præsules communi
 consilio Documentum Pastorale ediderunt
 anno 1710, in cujus primâ parte, « doctrinæ
 « quam Quesnellus suis in novum Testamentum
 « *OBSERVATIONIBUS* tradidit, omnimoda cum Jan-
 « senianis erroribus consonantia demonstra-
 « tur; » in secundâ, « Quesnellianæ et Janse-
 « nianæ doctrinæ cum Augustinianâ ostenditur
 « oppositio. » Idem fermè præstitit anno se-
 quenti 1711 Vapincensis episcopus. Tandem cum
 dicti libri occasione novi in dies recrudescere-

rent tumultus, ad Pontificem à Rege et ab episcopis recursum, ut suâ auctoritate motus compesceret: quorum votis annuens Clemens XI, diligentissimo per biennium fermè integrum, ut ipse testatur, præhabito examine, solemnem demùm emisit Constitutionem quæ incipit, *Unig. Dei filius*, etc., in quâ Quesnelli librum, et extractas ex ipso 101 propositiones damnat, variisque censuræ notis respectivè afficit. De quo plura postmodum. Ex his omnibus momentis hactenus deductis, certissimum manet et exploratum, quàm imprudenter ac inconsultè effutiant Quesnellistæ, ubi primùm prodiere *Observationes morales*, illas statim ac deinceps, communi et constanti calculo fuisse probatas. At de his iterùm occurret dicendi locus art. seq. citato jam paragrapho primo.

Quæres 4^o, quid pronuntiandum de jactatâ adeò à Quesnellistis libri *Observationum* justificatione, sub nomine illustriss. Bossuetii Meldensium episcopi post mortem ejus editâ? Respondeo mirum planè Quesnelli asseclas, in gratiam *Observationum* libri, perpetuò et tam confidenter jactitare illustriss. Bossuetii auctoritatem; siquidem certissimis momentis plenissimè constat, doctissimum præsulem dictis *Observationibus* prorsus fuisse adversum. Scilicet, excitatis undique, occasione contentiosi *Observationum* libri, Catholicorum querelis et expostulationibus occurrendi causâ, Quesnelli fautores illustrissimi Bossuetii magnum nomen interponere tentârunt, ut eo liber munitus præsidio, innoxius videretur: annuit quidem, at nonnisi certis conditionibus, doctissimus præsul: de facto monitum adornavit in capite libri apponendum, quo primùm correctis et mutatis 120 propositionibus, aliæ duriores, quæ superessent, benignum in sensum exponerentur; sed cùm vidisset absque prærequisitis emendationibus, quas omninò necessarias judicabat, novam curari editionem anni 1699, tunc ab incepto labore destitit, et monitum suum luci committere recusavit; ipsasque inemendatas *Observationes*, uti erroribus scatentes, constanter expolit. Monitum istud à Bossuetio in gratiam *Observationum* adornatum, subindè pluribus à morte præsulis illustrissimi annis, sub infido *Justificationis Reflexionum moralium* nomine, edi curaverunt Quesnellistæ. Invictis et ad hominem, ut aiunt, testimoniis patent ista.

Et quidem 1^o, nonnulla in *Observationum* libro mutanda Bossuetium judicasse, fatetur ipse: nullus in præfatione scripti, cui

titulus: *Justification des Réflexions sur le nouveau Testament*, etc., ubi sic loquitur pag. 14: « La bonne foi oblige d'avertir, que M. de Meaux, exact jusqu'au-delà du nécessaire, avait marqué quelques endroits des Réflexions qui pouvaient être changés, et qui néanmoins ne l'ont pas été. »

II^o, eundem præsulem Quesnelli libro fuisse adversatum, pluriesque testatum fuisse hunc esse maxime perniciosum, in eoque hæresim quinque propositionum passim contineri, vel ex ipsâ Quesnellistarum disertissimâ confessione, certissimum est. Anno 1699, 27 martii ad Quesnellum notus ejus assecla Willartus sic scribit: « Quædam suspicio est P. du Perron huic libro (*Observationum moralium*) adversari. » Nomine du Perron illustriss. Bossuet. significari, constat ex Jansenianorum clavi exhibitâ in *Causâ Quesnellianâ* pag. 323. Idem rursus an. 1700, die 30 januarii ad eundem: « Nihil, inquit, novi scio de tumultu quem excitant quatuor fratres, præter hoc unum, quòd etiam D. du Perron iis adversetur. Sed istud tantum heri reseivi. » Quatuor fratres esse quatuor tomos *Observationum moralium*, jam notatum est, eademque nobis aperit clavis, pag. 324. Hoc ipso anno 1700, dùm Clerus Gallicanus sua Parisiis comitia haberet, Abbas Dambes (sub quâ appellatione in clavi citatâ indicatur Abbas Couët) epistolam dedit anonymam ad ipsum Meldensem antistitem, quâ ei inter cætera exprobrat minimè honorificum de *Observationibus moralibus* judicium: « Multos novimus, inquit Abbas, quibus dixisti, quæque illas propositiones (Jansenii hæreticas) in libro Patris Quesnelli reperiri. » Tum addit: « Nec è memoriâ tuâ fortassè excidit, Præsul illustrissime, te nuper fassum esse cuidam in Comitii Archiepiscopo, PUROS ET APERTOS JANSENII ERRORES HOC IN LIBRO CONTINERI. » Hæc in *Causâ Quesnellianâ* jussu archiepiscopi Mechliniensis editâ anno 1704. Jam verò post testimonia tam clara, tam aperta, præsertim à duobus addictissimis partibus jansenianis deprompta; quis non mirabitur frontem aut inscitiam hominum illorum, qui doctissimi Bossuetii auctoritatem in gratiam *Observationum* asseverare obtendunt, atque prædicare non dubitant: « Illustrissimum Meldensem episcopum, istas in novum Testamentum *Observationes* semper magni fecisse? » Isne scilicet magni facit lucubrationem, qui huic adversatur, in eâque affirmat *puros et apertos Jansenii errores contineri*? Quod utrum-

que, citatis in locis Bossuetio disertè tribuunt insignes Quesnelli sectatores.

III°. Hoc idem, in suo Pastoralis Documento anni 1711, fusè ac solidè demonstrant Lucionensis et Rupellensis episcopi: tum ex modò citatis Quesnellistarum textibus; tum ex viri clarissimi in supremà Parisiensi curià quondam primi Præsidis (D. le Pelletier) testimonio: « Asserit Senator ille integerrimus, inquit dicti præsules, SEPENUMERO SE AUDIVISSE ab illustrissimo episcopo Meldensi, cùm diceret Observationes P. Quesnelli ESSE PERNICIOSAS, APERTOS JANSENI ERRORES IIS CONTINERI, nec eas debere legi ab iis qui Christianam pietatem profiterentur; » tum denique ex accuratà totius hujusce facti (prætensæ justificationis *Observationum*, scriptæ ab illustriss. Bossuet.) historicà narratione, quam se ex testibus fide dignissimis, et antistiti Meldensi, arctissimà necessitudine conjunctis accepisse declarant. Ac dein, adversus audaciam ac pessimam Quesnellistarum fidem, ita exclamant illustrissimi duo Bossuetii vindices, pag. 3: « Hoc verò longè magis mirum videtur, aut potius fidem omnem superat, quod quamvis testimonium illud adeò expressum, (citata mox epistola Abbatis Dambes ad illustriss. Bossuet. an. 1700.) multis abhinc annis cum auctoritate editum fuerit, nec ullus unquam repertus sit, qui epistolam ex quâ excerptum est recusare auderet; Janseniani tamen non vereantur hodiernà die suam malam fidem quasi testatam facere, ac publicis monumentis consignare, dùm illustrissimum præsulem *OBSERVATIONES SEMPER APPROBASSE* asserunt, licet ceter contrarium ipsi asseruerint, et quidem eo scripto, quod inficiari non audent, et quod præ manibus nostris esse certò sciunt. Sic sæpè divina permittit providentia, ut hæretici infamix notam ultrò sibi inurant, et quasi dedità operà id agant, ut homines perditì, atque impudentes ab omnibus habeantur. » Hæc dicti Præsules.

IV°. Non minùs luculenter Meldensem episcopum à jactatà Quesnellianarum *Observationum* approbatione vindicat illustrissimus Senonensium præsul, in egregià quam olim Suessionensis episcopus ad Clerum suum quintà dedit epistolà: ubi parte 1 à numero 117 ad numer. 123, de hoc negotio accuratè disserens, uno præ cæteris momento totam rem confirmat et conficit: petitur illud argumentum ex testimonio abbatis, pietate perindè ac eruditione conspicui, D. de S. André, Meldensis

archidiaconi, qui fuerat illustriss. Bossuetii vicarius generalis, necnon consiliorum omnium particeps: abbas ille in præsentì causà testis locupletissimus, epistolà quam ipso permittente, publici juris fecit ibidem archiepiscopus Senonensis, quinque disertè asseverat, prætensæ *Observationum* approbationi, directè adversa. Asserit 1° scriptum illustrissimi Bossuetii, *infidà manu* insignitum fuisse nomine *defensionis Observationum*: quippè quod adnotatum fuerat *instar moniti* in capite novæ editionis an. 1699 apponendi. Ita ex ipsà autographi inspectione constare, testificatur abbas meritissimus. Asserit 2° se ex Bossuetio eisdem verbis accepisse, *nusquam ab eo probatas morales Quesnelli Observationes*: has longius esse arcessitas, nec ex sacro contextu nativè fluere. Asserit 3° se à pluribus omni fide dignissimis accepisse, doctissimum præsulem dixisse, *plus quàm centum*, eo in opere *Observationum moralium*, occurrere *emendandas propositiones*. Asserit 4°, se rescivisse à Domino le Dieu, qui erat illustrissimo Bossuetio à secretis, Quesnellum *detractasse propositas adhibere emendationes*: eaque de causà Meldensem episcopum opus suum *suppressisse*, *illudque deinceps typis mandari constanter recusasse*. Asserit 5°, eundem D. le Dieu, manuscriptum codicem concradidisse Domino le Brun, Tornacensi Decano, tunc exuli in diocesi Meldensi: dicti verò operis exemplar contra fidem datam ab isto descriptum, illudque dein ab eodem in patriam reduce edi curatum Tornaci, sub adulterino *defensionis Observationum* titulo. Quid ad tam apertum, tantique omni ex parte ponderis momentum, reponere possint adversarii, omninò non videmus. Extant hæc clarissimi abbatis litteræ ex integro transcriptæ, in quintà Pastoralis Epistolà illustrissimi Suessionensis, postea Senonensium archiepiscopi, citatà parte 1, n. 19.

V°. Denique, eminentissimus cardinalis de Bissy, qui illustrissimum Bossuetium in sede Meldensi proximè excepit, hactenùs dicta de ementità *Observationum moralium* approbatione mirum in modum confirmat, in mandato publico 25 aprilis, an. 1704: « Entre tous les écrits, inquit, qui ont été publiés sur ce sujet (pour la défense du livre des Réflexions morales) il y en a un qui a pu faire beaucoup plus d'impression que tous les autres, par le mérite éclatant de feu M. Bossuet notre prédécesseur immédiat, sous le nom duquel il a paru. Comme la mémoire

« et les sentimens de ce digne Prélat nous
 « doivent être respectables, nous ne pouvons
 « nous dispenser de vous dire qu'il avait cru
 « d'abord pouvoir justifier en plusieurs en-
 « droits le Nouveau Testament de Quesnel,
 « mais qu'après en avoir fait un examen plus
 « exact, il reconnut et déclara que cet ou-
 « vrage étoit si rempli d'erreurs, qu'il n'é-
 « toit pas possible de le corriger, et qu'il
 « falloit le refondre d'un bout à l'autre. Ce
 « sont ses expressions. » Pergit Eminentiss.
 præsul : « Nous le savons par le témoignage
 « de personnes exemptes de soupçon, et di-
 « gnes de toute vénération, qui vivent enco-
 « re, et qui nous en ont assurés plus d'une
 « fois. Nous le savons des Jansénistes mêmes,
 « par les reproches piquants qu'ils firent dans
 « le tems de l'assemblée de 1700 à feu M. de
 « Meaux dans leurs lettres qu'on conserve en-
 « core en original. » Moxque addit : « De là
 « naissent naturellement deux réflexions pro-
 « pres à dissiper les vains triomphes de l'au-
 « teur du livre condamné et de ses partisans :
 « l'une que M. Bossuet aurait sans doute en-
 « tièrement supprimé le manuscrit de sa dé-
 « fense faite pour Quesnel, s'il eût pu deviner
 « qu'après sa mort on l'eût mis au jour, et
 « sous son nom ; l'autre, que ses efforts re-
 « connus par lui-même inutiles, pour excuser
 « le N. Testament de Quesnel, condamnent
 « davantage ce mauvais livre, que si feu M. de
 « Meaux l'eût condamné en effet sans avoir
 « essayé de le défendre. »

Ex tot, tamque apertis hactenus recensitis
 testimoniis colligere est, quanta sit Quesnelli,
 ejusque asseclarum sinceritas, ne dicam per-
 fidia, qui scriptum D. Bossueti, quod ob de-
 tractatas emendationes in *Observationum* libro
 requisitas, emittere recusaverat ipsi tamen
 post ejus mortem, sub infido justificationis
Observationum titulo, publicæ luci committere
 non erubuerunt ; atque eo utuntur ut osten-
 dant Quesnelli librum, quem inemendabilem
 judicabat illustrissimus auctor, ab ipso eodem
 fuisse perpurgatum et justificatum. Disce hinc
 Quesnellianam fidem ! His omnibus adde doc-
 trinam scripti sub ementito *Justificationis Re-
 flex. moral.* nomine, esse omnino adversam
 doctrinæ centum et unâ propositionibus ex-
 pressæ ; adeo ut jactata illa *justificatio*, vel
 ipsa sola sufficiat debellandis revincendisque
 præfatis propositionibus : quod tam evidenter
 pluribus in locis ab illustrissimo Senonensi
 præsule, præsertim Epistolâ quintâ modo lau-

datâ demonstratum est, ut ipsimet Quesnelli
 Apologistæ insignem Bossueti de ejusmodi
 controversiis auctoritatem rejicere, aut ad ab-
 sonos prorsus ac planè distortos sensus ejus
 testimonia perpetuò inflectere coacti fuerint.
 Hanc in rem consulere est doctissimum præ-
 sulem, citatâ Epistolâ, parte 1, n. 120 et se-
 quentibus. Idem ex dicendis in decursu partis
 dogmaticæ hujusce tractatus, non semel ma-
 nifestum fiet.

Quæres 5^a, quis demùm fuerit dicti libri
 exitus, sors ac fortuna. Respondeo : Liqueat
 ex dictis hactenus, *Reflexionum moralium* opus
 quod nonnisi an. 1693 perfectum fuit et abso-
 lutum, statim in multorum suspicionem et cen-
 suram incurrisse ; à Theologis primum, tum
 iteratis plurium episcoporum censuris explo-
 sum fuisse ac proscriptum, imò à S. Pontifice
 Clemente XI damnatum dato in formâ Brevis
 decreto an. 1708, denique Lucionensem et
 Rupellensem episcopos communi Mandato præ-
 fatum opus confutasse et proscriptis an. 1710,
 uti Jansenianam hæresim renovans, idemque
 fermè ac ipso an. 1711 præstitisse Vapincensem
 Episcopum. Jam verò ut extremus inauspicati
 hujusce operis innotescat exitus, nonnulla hic
 sunt adjicienda.

I^o. Præfata trium præsulum Pastoralia Man-
 data, cum Lutetiæ præsertim divulgata forent,
 Eminentissimo Noallio suaserunt nonnulli ini-
 quum esse ac injuriosum, quòd ipso incio Pa-
 risiis spargerentur mandata, quæ operi ejus
 nomine et auctoritate munito, hæreseos notam
 inurebant : indè factum est ut ipse dicta man-
 data, quasi *supposititia* ; *proscriptis jam errori-
 bus fauentia* ; *ab inimicis Episcopatus, laxiorisque
 moralis defensoribus elaborata*, damnaverit die
 28 aprilis 1711.

II^o. De injuriâ mandatis suis illatâ coram
 Rege expostulârunt Lucionensis et Rupellensis
 episcopi ; variisque hinc et indè enascentibus
 dissidiorum causis, statutum est breviorē
 ac magis canonicam litis finiendæ viam fore,
 si de contentioso Quesnelli libro solemne roga-
 retur Sedis Apostolicæ judicium. Quapropter
 Rex Christianissimus, consentientibus ac re-
 quirentibus compluribus episcopis, ipso præ-
 sertim card. Noallio (ut ex ejus ad Aginnensem
 episcopum litteris 20 decembris 1711, pag. 11,
 constat), precibus sæpè iteratis Pontificem
 sollicitavit, ut novum contentiosi libri examen
 institueret, quo articuli censurâ digni excer-
 perentur, solemni que configerentur Constitu-
 tione.

III°. Pius ac sæpius etiam repetitis Regis Christianissimi et episcoporum votis ac precibus annuit Clemens XI, integro fermè biennio coram duobus primùm cardinalibus, deindè coram scipso, aliorum plurium cardinalium, ut in præfatione Constitutionis disertè testatur, adhibito consilio, à compluribus in sacrâ theologiâ Magistris, librum Quesnelli juxta editiones anni 1695, 1694, 1699, et plurimas ex eo extractas propositiones, quàm maximâ diligentia ac maturitate, pluries iteratis Congregationibus, expendi et examinari mandavit. Ac tandem 8 septembris 1713, solemnem emisit Constitutionem, quæ incipit: *Unigenit. Dei Filius*: in quâ librum ipsum, et extractas ex ipso 101 propositiones sub variis censuræ notis respectivè damnavit. Hæc sunt ipsissima Decreti verba, quæ juvat eò loci exhibere: « Auditis itaque, inquit S. Pontifex, tum voce, tum scripto nobis exhibitis præfatorum cardinalium, aliorumque theologorum suffragiis, divinique inprimis Luminis, privatis ad eum finem, publicisque etiam indictis precibus, implorato præsidio; omnes, et singulas propositiones præinsertas, tanquàm falsas, capciosas, male sonantes, piarum aurium offensivas, scandalosas, perniciosas, temerarias, Ecclesie et ejus praxi injuriosas, neque in Ecclesiam solum, sed etiam in potestates seculi contumeliosas, seditiosas, impias, blasphemias, suspectas de hæresi, ac hæresim ipsam sapientes, necnon hæreticis et hæresibus, ac etiam schismati faventes, erroneas, hæresi proximas, pluries damnatas; ac demùm etiam hæreticas, variasque hæreses, et potissimùm illas, quæ in famosis Jansenii propositionibus, et quidem in eo sensu, in quo hæc damnatæ fuerunt, acceptis, continentur, manifestè innovantes, respectivè, hæc nostrâ perpetuò valiturâ Constitutione declaramus, damnamus et reprobamus. » Itaque S. Pontifex omnes et singulas 101 extractas ex Quesnelli libro propositiones, sub præfatis respectivè notis confixit, uti jam pridem in similibus fieri consueverat. Ad hujus autem censuræ æquitatem sufficit, quemadmodum tradunt præsules Gallicani, in suo adversus 50 causidicos Parisienses Doctrinali Judicio, pag. 34, 35, etc. ut « nulla sit ex confixis propositionibus, quæ non mereatur aliquam ex latis in censurâ notis; » et vicissim, « ut nulla sit nota quæ non conveniat alicui ex propositionibus. »

« Cæterùm, ait S. Pontifex post citata mox Decreti verba, per expressam præfatarum

« propositionum reprobationem, alia in eodem libro contenta, nullatenus approbare intendimus: cùm præsertim in decursu examinationis plures alias in eo deprehenderimus propositiones illis, quæ, ut supra, damnatæ fuerunt, consimiles et affines, iisdemque erroribus imbutas:.... ac demùm, quod intolerabilius est, sacrum ipsum novi Testamenti textum damnabiliter vitiatum comparavimus, et alteri dudum reprobatæ (per Clementem IX et Innocent. XI) versioni Gallicæ Montensi in multis conformem... pluriesque in alienos, exoticos, ac sæpè noxios sensus, non sine maximâ perversione detortum. » Is ergo fuit infastus *Observationum moralium* libri extrema fors, novissimusque exitus: variis primùm theologorum expostulationibus ac querelis impetitus: pluribus exindè præsulum censuris confixus: solemni tandem Sedis Apostolicæ judicio damnatus ac reprobatus fuit: quod quidem judicium, irretractabili Corporis Episcopalis assensu firmatum est, uti ex dicendis mox, et sequenti præsertim articulo, manifestum fiet.

§ 5. *De iis quæ subsecuta sunt Clementis XI damnatorium de Quesnelli libro Judicium.* — Hanc tertiam historicæ nostræ synopsis partem, ad tres epochas, majoris ordinis ac distinctionis gratiâ, revocabimus. Prima exponet ea quæ gesta sunt à Constitutione *Unig.* usque ad interjectam à quatuor Episcopis an. 1717 appellationem. Secunda narrabit quæ à dictâ appellatione acta fuere ad concilium usque Ebredunense an. 1727 habitum. Tertia denique complectetur præcipua quæ ab Ebredunensi synodo ad nostra usque tempora contigere.

EPOCHÆ PRIMÆ. *De iis quæ à Constitutione Unig. ad appellationem usque quatuor Episcoporum gesta sunt.* — Rex Christianissimus, acceptâ à Nuntio Apostolico, nomine Clementis XI, Pontificiâ Constitutione, ut maturiùs ad hanc bullam solemniter recipiendam et promulgandam procederetur, datâ ad Generales Cleri Gallicani Procuratores Epistolâ, comitia die 16 octobris 1713 celebranda indixit. His initio præfuit Eminentissimus Noallius, qui statim rogatus est ut vellet episcopos delegare qui collationibus, super acceptance Constitutionis, primùm inter se habitis, de hoc postea negotio plenis in Comitibus referrent. Sex eum in finem selecti sunt; scilicet cardinalis de Rohan, Argentinensis Episcopus, Archiepiscopi Auxensis et Burgidalensis Desmarests et de Bezons, cum Episcopis Meldensi, Blesensi

et Suessionensi, de Berthier, de Sillery et de Bissy. Re ab ipsis per tres propinadum menses accuratissimè discussà, Eminētissimus de Rohan relationem aggressus est die 15 januarii 1714, et sex integris sessionibus in frequenti Episcoporum conventu, clarè et invitè demonstravit, ut expressè tradunt acta deliberationis : « Nullam esse inter damnatas à Clemente XI propositiones, quæ non mereatur salt in aliquam è Censuræ notis quæ in bullâ exprimentur ; et vice versâ, nullam esse in bullâ censuræ notam, quæ non cadat in aliquam è damnatis propositionibus. » En ipsissima perscriptorum actorum 1714 verba, pag. 14 et 15 : « Monseigneur le cardinal de Rohan a fini le rapport, dont la solidité, qu'aussi bien que la netteté et la précision, ont découvert et mis en évidence les erreurs et le venin des propositions condamnées, et d'un livre, qui sous les apparences de la piété et de la vérité, est capable de corrompre les cœurs : et par le même rapport il a été prouvé clairement qu'il n'y avait aucune des propositions condamnées, qui ne méritât au moins quelques-unes des qualifications portées dans la Constitution ; et qu'il n'y avait aussi aucune des qualifications qui ne dût être appliquée à quelques-unes des propositions. »

Absolutâ Eminētissimi de Rohan eximiâ relatione, edita est, divini Luminis implorato præsidio, comitiorum declaratio, die 25 januarii ejusd. anni 1714. Juvat Gallica ejus verba exscribere, adeò dis-erta sunt, et accommodata ad dissolvendas novatorum tricas circa restrictam et limitatam, quam solam comitiis affingunt, Constitutionis acceptionem. Sic in verbis legitur pag. 55 et 54 : « L'assemblée, le S. nom de Dieu invoqué, a déclaré : 1^o Qu'elle a reconnu avec une extrême joie dans la constitution de notre S. Père le Pape Clément XI, la doctrine de l'Eglise. 2^o Qu'elle accepte avec soumission et avec respect la même constitution de Notre S. Père le Pape *Unigenit. Dei filius*, etc., qui condamne le livre intitulé *le Nouveau Testament en français avec des réflexions morales*, etc., et les cent une propositions qui en ont été extraites. 3^o Qu'elle condamne ce même livre et aussi les cent une propositions, qui en ont été tirées, de la même manière et avec les mêmes qualifications, que le Pape les a condamnées. 4^o Qu'il sera fait et arrêté par l'assemblée, avant sa séparation, un modèle d'Instruction Pastorale, que tous les évêques

qui la composent feront publier dans leurs diocèses, avec la Constitution traduite en français ; afin qu'étant tous unis à la Chaire de S. Pierre, c'est-à-dire, au centre de l'unité par l'uniformité des mêmes sentimens et des mêmes expressions, on puisse non seulement étouffer les erreurs qui viennent d'être condamnées, mais encore prévenir les nouvelles disputes et prévenir contre les mauvaises interprétations des personnes mal intentionnées. 5^o Qu'elle écrira à tous messeigneurs les archevêques et évêques absens qui sont sous la domination du Roi, et qu'elle leur enverra la Constitution, un extrait de la délibération de l'Assemblée, et un exemplaire de l'Instruction Pastorale ; qu'elle les exhortera de s'y conformer et de défendre à tous les fidèles de leurs diocèses de lire, retenir ou débiter le livre des *Réflexions morales* et tous les écrits faits pour sa défense, sous les peines portées par la Constitution ; et après que la Constitution aura été publiée, la faire enregistrer au greffe de leur Oficialité, pour y avoir recours et être procédé par les voies de droit contre les contrevenans. »

Quis cordatus et prudens in tam disertis ad urgendam Constitutionis acceptionem statutis, nonnisi conditionatam et restrictam illius acceptionem inspexit ? His porrò deliberationis capitibus, summo consensu subscripserunt hæc in sessione 25 januarii quadraginta omninò comitiorum præsules, quorum hæc sunt nomina :

Cardinalis de Rohan, archiepisc. Bituricens. ; de Gesvres, archiepisc. Rhemens. ; de Mailly, archiepisc. Bardigalens. ; de Bezons, archiepisc. Rotomag. ; d'Aubigné, archiepisc. Aquens. ; du Luc, archiepisc. Tolosan. ; de Beauveau, archiepisc. Auxens. ; Desmaretz, episcop. Constantiens. ; Loménie de Brienne, episcop. Tutelens. ; Ancelin, episcop. Suessionens. ; de Sillery, episcop. Venetens. ; d'Argouges, episcop. Meldens. ; de Bissy, episcop. Claramont. ; Bochart, episcop. Cadurcens. ; de la Luzerne, episcop. Vivariens. ; de Ratabon, episcop. Lingonens. ; de Clermont-Tonnerre, episcop. Blesens. ; de Berthier, episcop. Vinciens. ; de Crillon, episcop. Trecent. ; de Savigny, episcop. Aurelianens. ; Fleuriat, episcop. Altissiodor. ; de Caylus, episcop. Tullensis. ; de Camilly, episcop. Nivernens. ; de Berghé, episcop. Andegavens. ; Poncet, episcop. Ambianens. ; Sabatier, episcop. Aréthusens. ;

de Grammont, episcop. Novomiens.; de Rochebonne, episcop. Carnotens.; de Merinville, episcop. Sagens.; Turgot, episcop. Ebroicens.; le Normant, episcop. Augustodunens.; d'Hallencourt, episcop. Santonens.; le Pilleur, episcop. Rhedouens.; de Sanzay, episcop. Cenomanens.; de Crevi, episcop. Alesiens.; d'Hennin, episcop. Bellovacens.; de Saint Aignan, episcop. Pontipolens.; de Grillon, episcop. Vabrens.; de Malezieux, episcop. Regiens.; Phelipeaux.

Octo alii in eadem sessione, duce Cardinali Noallio, sua de toto hoc negotio suffragia contulerunt: iique paucis abhinc diebus, scilicet die primâ Februarii, obtenderunt circa nonnullas è damnatis propositionibus aliquid sibi difficultatis inesse, cujus elucidationem à S. Pontifice requirendam esse censuerunt. Nomina autem horum episcoporum qui ab acceptandâ Constitutione abstinuerunt, quique illi ad S. Pontificem recursus viâ insistendum iudicârunt, ista sunt: Cardinalis de Noailles; archiepiscopus Turonens., d'Hervaut; episcopi Verodunensis, de Béthune; Laudunensis, Clermont de Lhaste; Catalaunensis, Gaston de Noailles; Senensis, Soanen; Bononiensis, de l'Angle; Macloviensis, Desmaretz; Baiouensis, Dreuillet. Haud multò post Laudunensis episcopus, relictis contradicentium episcoporum partibus, ad sententiam 40 acceptantium accessit, dato eâ de re publico instrumento, quod refertur ad calcem authenticæ horum comitiorum relationis. Eadem die primâ februarii 1714, præfati 40 episcopi subscriptione sua synodicè confirmârunt ea omnia quæ hactenùs pro Constitutionis acceptatione peracta fuerant. Lecta insuper fuit Instructio Pastor. ab iisdemque unanimiter approbata. Ludovicus XIV de acceptâ in comitiis Clementinâ Constitutione, certior factus; ad episcoporum postulationem diploma concessit die 14 ejusdem mensis februarii, ut præfata Constitutio per totum Galliæ regnum promulganda executioni mandaretur: illudque diploma in omnibus supremis curiis inscriptum fuit: in tabulas verò supremi Senatûs Parisiensis relatum est, die 15 dicti mensis. Nondum solutis comitiis, data est 5 februarii gratulatoria comitiorum nomine ad S. Pontificem epistola: in hac testantur præsules: « Majorum suorum vestigiis inhærentes, editam nuper à sede Apostolicâ Constitutionem suscepisse, summoque etiam gaudio amplexos fuisse, nec minori studio ac diligentia pro muneris

« debito curaturos, ut ab omnibus regimini suo commissis, pari animo ac fide inviolatè servetur. » Rescripsit S. Pontifex die 17 Martii illis gratulans « de constanti eorum vigiliantia in eradicandis ex agro Dominico damnatis erroribus, » necnon « de studio conciliandæ Ecclesiasticæ pacis, ac luerandi, si fieri posset; nonnullos ex fratribus in spiritu mansuetudinis et diligentia charitatis. Atque utinam, addit, *reipsâ id assequi licuisset!* Non enim nos, non Gallia, non Ecclesia ingemisceret, paucos ex vobis à reliquo cœtu divulsos, debitæ nobis obedientiæ, sub inani prætextu quærendi novas declarationes, interminatis intendendo questionibus, moras interponere; quod utique sine maximo paterni cordis nostri dolore referre non possumus. » Encyclica ad omnes Galliæ episcopos jussu comitiorum directâ est epistola simul et Mandatum Pastorale, aliæque omnia acta quæ Parisiis in præsentibus comitiis constituta fuerant: quibus adhærentes episcopi (paucis, sex scilicet aut septem, exceptis) Constitutionem *Unig.* eâ quâ par est reverentiâ, susceperunt et promulgârunt, gravissimis hanc in rem editis mandatis, quæ plusquàm 110 unò volumine compacta, Parisiis impressa sunt an. 1715, curâ et impensis Cleri Gallicani tunc congregati. Cæteri Bullæ adversantes episcopi, sua quoque emiservunt Mandata: hique omnes, uno excepto Mirapicensi, de la Broûe, lectionem et retentionem libri *Quesnellii* sub pœnis à jure statutis prohibuerunt; at verò Clementinæ Bullæ receptionem ablegabant, usque dum Pontifex illius interpretationem, quam recusabat, concessisset: indè factum est, ut eorum documenta Romæ fuerint confixa et damnata. 26 martii et 2 maii 1714.

Ad sacram Facultatem Parisiensem jussu Regis allata est Constitutio die 1 martii 1714, et die 5 ejusdem mensis, maximo suffragiorum numero in tabulas relata est, decretâ exclusionis pœnâ ipso facto incurrendâ, adversus eos qui dictæ Bullæ adversarentur. Hæc sunt sacræ Facultatis verba, in comitiis die lunæ quintâ martii habitis: « Sacra Facultas iisdem inhærendo quæ acta et decreta sunt in recipiendâ Bullâ, *Vineam Domini sabaoth* sic censuit: »

« 1^o Constitutionem summi Pontificis Clementis XI Papæ, quæ incipit, *Unig. Dei Filius*, summâ cum reverentiâ atque obsequio recepit et amplexa est. 2^o. Præfata Consti-

« tutionem jussit unâ cum Litteris Regis suos
« in commentarios referri. 3^o. Omnibus et
« singulis Magistris, Doctoribus, Baccalaureis
« et Candidatis præcepit, ut pari etiam obse-
« quio dictam Bullam seu Constitutionem colant
« et observent : prohibuitque sub pœnâ ipso
« facto incurrendâ exclusionis ab omni gradu
« et spæ magisterii, ne quis scripto factove,
« definitis in dictâ Bullâ ullatenus adver-
« setur. »

Hæc omnia lecta et confirmata fuere, nullo contradicente, in comitiis die 10 ejusdem mensis habitis : eademque nomine S. Facultatis coram Rege testati sunt deputati, die 14 dicti mensis. Tam splendida acceptationis testimonia deinceps elevare conati sunt Quesnellistæ : quâ de re in epochâ tertiâ. Ad exemplum sacri Ordinis, Bullam summâ cum reverentiâ atque obsequio susceperunt aliæ Regni Facultates, *Duacensis, Andegavensis, Nannetensis*, etc. Idem præstitere cæteræ omnes per orbem sparsæ Academiæ, *Lovaniensis, Complutensis*, sed præsertim *Salmanticensis* : hæc indignè ferens immanem novatorum calumniam quâ ubique spargebant, Bullæ Clementinæ refragari Salmanticenses; putidum mendacium, datis 12 augusti 1716 ad S. Pontificem et ad quosdam Galliæ cardinales et episcopos epistolis, propulsavit.

Extincto die 1 septemb. 1715 Ludovico XIV religione non minùs quàm potentiâ et armis Rege verè maximo, virulentis in Pontificiam et Regiam auctoritatem scriptis regnum opplevit Quesnelli defensores, conclamaveruntque undique, ab episcopis mox retractandam esse Constitutionis acceptationem, quam per vim factam esse effutiebant. Verùm spe citò dejecti : in comitiis quippe generalibus, episcopi mense octobre eodem anno congregati, ut ora obstruerent loquentium iniqua, ex innumeris contra Constitutionem sparsis libellis, duos præ aliis summè perniciosos damnarunt : alterum, qui inscribitur : *Les Hexaples ou les six colonnes sur la Constitution UNIG.* ; alterum cui titulus : *Du témoignage de la vérité dans l'Eglise*.

Hæc sunt verba censuræ prioris libri : « Nos
« archiepiscopi, episcopi, cæterique ecclesias-
« tici viri delegati ad hæc comitia generalia
« Cleri Gallicani, pronuntiamus libro cui titu-
« lus : *Les Hexaples ou les six Colonnes sur la*
« *Constitution Unig.* etc. renovari errores sæpiùs
« à sanctâ Sede, nominatim Constitutione UNIG.
« et ab episcopis condemnatos, eoque contineri

« doctrinam injuriosam sanctæ Sedi et episco-
« pis, scandalosam, erroneam, hæreticam, et
« creberrima, è Scripturâ sacrâ, Conciliis et
« Patribus, falsata testimonia. » Posterioris
autem censuræ hic tenor est : « Nos... invo-
« cato priùs Christi nomine, et cœlesti implo-
« rato auxilio, pronuntiamus doctrinam in libro
« qui inscribitur, *du Témoignage de la Vérité*
« *dans l'Eglise*, etc., edito sine nomine aucto-
« ris et typographi an. 1714 contentam, toto-
« que passim opere disseminatam, esse sedi-
« tiosam, temerariam, scandalosam; eâque
« subverti ordinem à Christo Domino in Eccle-
« siâ regendâ institutum, eandemque injurio-
« sam sanctæ Sedi Apostolicæ et episcopis,
« falsam, erroneam, schismaticam et hæreti-
« cam, atque à cunctis Fidelibus rejiciendam. »

Utraque hæc censura extat in actis verbalibus comitiorum an. 1715 pag. 320 et 341, atque paulò post à plerisque Galliæ episcopis, datis eam in rem mandatis, promulgata est. Anno 1716, pro reducendis ad unitatem episcopis, varii amicè habiti sunt cœtus, variæ collationes, quarum pleræque coram supremo Regni Moderatore Aurelianensium Duce celebratæ sunt : at frustra! nullus enim alius exindè consecutus est fructus, quàm ut magis ac magis manifesta fieret acceptantium episcoporum recta intentio, ardensque pacis ac veritatis studium; quod quidem sæpiùs commendavit æquissimus Princeps. Mira inter hæc extitit Clementis XI longanimitas : nullam lenitatis viam reliquit intentatam; nulla benignitatis ac verè paterni animi prætermissa testimonia, quò dissidentes ad unitatis et pacis cōsilia, saniolemque doctrinam revocaret : flecti non potuit reluctantium obstinata mens. Ad appellationes itumescit, et ad Concilium œcumenicum exemplo hactenùs, in materiâ doctrinali apud Orthodoxos inusitato, certatim provocatum est. De quo jam epochâ sequenti dicendum.

EPOCHÂ SECUNDA. *De iis quæ ab interjectâ appellatione 1717 ad Concilium usque Ebreduense 1727 contigere.*— Die 4, martii 1717, quatuor episcopi : Mirapicensis, de la Brouë; Mompessulanus, Colbert de Croissi; Boloniensis, de l'Angle; Senecensis, Soanen, in publicis Sacræ Facultatis Parisiensis comitiis eâdem die habitis, palàm fecerunt instrumentum interjectæ à se appellationis, à Constitutione Clementis XI quæ incipit Unig. ad concilium œcumenicum liberè ac legitimè congregandum. Iis paulò post se adjunxerunt 12 circiter alii epis-

copi : ita quidem ut appellantium episcoporum numerus, duodevicesimum Pelagianorum duce Juliano provocantium numerum nusquam attigerit, nedum excesserit : lique in solâ Galliâ. Huc usque inaudita fuerat apud Catholicos, à dogmaticâ Summi Pontificis Constitutione ab episcopis loci in quo natus fuerat error expressè recepta cæteris tacentibus, ad futurum Concilium provocatio : nulla, in totâ retrò antiquitate, similis appellationis ab Orthodoxis interpositæ exempla reperire est. Non mirum ergo si talis provocatio ab utrâque potestate vehementer fuerit improbatâ ; audacem hanc molitionem variis ac gravibus decretis confixit auctoritas Ecclesiastica : plurimum etiam Regiæ Majestati displicuit, hinc datis ad quatuor episcopos litteris sigillo Regio obsignatis, Parisios confestim deserere jussi sunt, et in suas diœceses se recipere. Librorum intereâ et scriptorum quodam veluti diluvio Galliæ opplebantur, quibus ac contumaciam, rebellionem ac independentiam, inferiores adversus superiores provocabantur. Ut tot malorum ingruentium gravitati, quantum rerum et temporum conditio pateretur, præsules nostri occurrerent : 28 cardinales, archiepiscopi et episcopi, duo gravissima Aurelianensium duci obtulerunt memorialia, opem à Regiâ ejus Celsitudine efflagitantes contra dictos libellos, et contra quasdam Facultates, capitula, et quosdam Clericos qui ab ordine defeecerant : in 2^o, ex his memorialibus, insignem novatorum calumniam, quâ impudenter prædicabant, nullam, in conventu episcoporum ubi Constitutio fuerat acceptata, exitisse libertatem ; sic egregiè propulsant : « Oui, nous étions libres alors, in-
« quient episcopi, et c'est encore librement
« que nous le déclarons aujourd'hui. Louis XIV
« n'abusa point de sa puissance, et nous ne
« fûmes point prévaricateurs ; la majesté de ce
« prince et ses pieuses intentions ne gênèrent
« pas plus nos délibérations que la présence de
« Constantin et la protection qu'il accordait aux
« évêques, n'imposèrent au Concile de Nicée. »

Non multò post, mense scilicet julio ejusd. an. 1717, promovente supremo Regni gubernatore, revocata sunt colloquia ad conciliandos episcopos, flectendamque, si fieri posset, Appellantium pervicaciam : verum ista prioribus superiori anno celebratis colloquiis, feliciorum non habuere exitum : quippè habitæ an. 1716 cum episcopis dissidentibus collationes, ad ipsam, ut diximus, quatuor episcoporum provocationem terminatæ sunt : ita et istorum

an. 1717 colloquiorum finis fuit, nova Card. Noallii appellatio, quæ primùm furtim ipsoque inscio, hoc eodem anno emissâ ; tum anno sequenti 1718 die 14 septembris ejus nomine publici juris facta est. Anno 1718, omnia quatuor episcoporum et Card. Noallii appellationis instrumenta variis decretis Romæ confixa fuerunt : præsertim decreto sancti Officii coram S. Pontifice habito die 8 februarii. Eodem etiam anno editæ 28 augusti, quæ incipiunt, pastoralis officii litteræ. Circa finem ejusd. anni, 50 circiter Gallicani præsules, duce Eminentissimo de Rohan, uniformi documento pastorali, omnibus suis diœcesanis præceperunt, ut præfatæ Constitutioni Unig. corde et animo seipsos subicerent : « quippe quæ, in-
« quunt, universalis est Ecclesiæ judicium
« dogmaticum, à quo omnis appellatio nulla
« est, frivola, illusoria, temeraria, scandalosa,
« sanctæ Sedi et episcopali Corpori injuriosa,
« auctoritati Ecclesiæ contraria, schismatica,
« et eò tendens ut damnati errores renouentur
« et foveantur. » Dictorum præsulum nomina extant ad calcem Pastoralis Mandati Cardinalis de Bissy an. 1722. Anno 1720, Eminentissimus Noallius, documento die 2 augusti edito, exhibuit explicationes in Bullam : « unicè propo-
« sitas, inquit, ut excluderentur falsæ et dis-
« tortæ interpretationes, quæ Bullæ possent
« malignè affingi. » His expositionibus, 97 præsules Gallicani declarârunt nihil contineri
« quod non sit consentaneum doctrinæ Eccle-
« siæ ; genuino Constitutionis sensui ; et prin-
« cipii quæ posita sunt in Mandato Pastoralis
« 40 episcoporum, qui an. 1714 Constitutionem
« acceptârunt. » Ita testantur dicti præsules epistolâ ad celsissimum Aurelianensium ducem datâ, 13 martii 1720. Atque ut undequaque magis ac magis firmaretur dictæ Constitutionis auctoritas ; Rex Christianissimus Ludovicus XV, atavi sui gloriosissimæ memoriæ vestigiis insistens, Regium emisit diploma die 4 augusti, per quod renovatis et confirmatis Ludovici XIV pro eâdem Constitutione promulgandâ litteris : 1^o, jubet Constitutionem Unig. in toto Regno executioni demandari, utpotè quæ vim legis jam obtineat ; 2^o, prohibet ne quid adversus eam directè vel indirectè dicatur, scribatur, aut doceatur ; neve ad futurum Concilium sub ullo prætextu ab eâ provocetur ; 3^o, declarat appellationes in præsentî causâ esse nullas et nullius effectûs, ac abusivè interpositas.

Anno 1721, Clemens XI, pontifex verèxma-

ximus et sanctissimus, humanis rebus eximitur, mense martio die sacrâ sancto Josepho, quem singulari devotionis affectu prosequetur. Ejus in locum suffectus est die 8 maii, Cardinalis Conti qui Innocentius XIII appellatus est. Ad eum ausi sunt 7 Gallicani præsules, mense junio, litteras, propriis nominibus subscriptas, dirigere, in quibus Clementis XI famâ et memoriâ sempiternis laudibus dignâ, inverecundè proscindebatur, Apostolica Constitutio calumniose traducebatur pag. 33, 81, 87, velut *iniqua, nefandis erroribus referta*, verbo dixerim, uti *abnorme judicium, quod nec Roma ethnica tulisset*. Quin et ad temeritatis culum, suam Sanctitatem enixiùs rogare non erubuerunt, ut subreptitiam pronuntiet Bullam : « Solemniter declarando, inquit, abus, nullitates et vitia ejus Constitutionis, quâ Patrum omnium locutiones, Conciliorum generalium decreta, ac perpetua Ecclesiæ Romanæ traditio damnantur. » His excessibus graviter commotus Innocent XIII. decessoris sui vestigia premens, decreto Romæ promulgato die 8 januarii 1722, Bullam confirmat dictamque Epistolam auctoritate Apostolicâ meritis censuris confixit atque damnavit : « Tanquàm continenter multas propositiones episcopis Catholicis, præsertim Gallicanis, memoriæ Clementis XI Apostolicæ sedi injurias omnino, schismaticas et hæretico spiritu plenas. » Accessit in Galliis auctoritas Regia quæ sanctioris Concilii decreto, die 19 aprilis ejusd. an. 1722, eandem epistolam declaravit esse « temerariam, calumniosam, memoriæ Clementis XI, sanctæ Sedi, Episcopi et Ecclesiæ Gallicanæ injuriosam, paci Ecclesiæ, et declarationibus Regiis anteriorum 1714 et 1720 contrariam in auctoritatem Regis sese efferentem et seditiosam. » Jussit insuper Rex Christianissimus, ut extraordinariè secundum constitutiones canonicas, et Regni leges, procederetur, tam contra eos qui dictam epistolam composuerant aut subscripserant, quàm contra eos à quibus impressa aut vulgata fuerat. Anno 1723, cardinales, archiepiscopi et episcopi Gallicani, in comitiis generalibus Parisiis congregati, agnoscunt ac solemniter declarant, Constitutiones, *Vineam Domini Sabasth, et Unig. Dei Filius*, à Clemente XI latas, veras esse Regni perindè ac Ecclesiæ leges : non secus ac Innocentii X et Alexandri VII adversus quinque Jansenii propositiones. Ita in actis verbalibus horum comitiorum, in collectione instrumentorum ad eadem comitia pertinentium, pag. 161 et 162,

etc. Hoc ipsum ibidem conceptis verbis testatur et asserit Ludovicus XV, in responsione ad secundum articulum esse septemdecim hic oblati, Regiâ auctoritate confirmandis : sic etenim habet, de quatuor mox recensitis Bullis : « Ces quatre Constitutions ayant été revêtues de Lettres Patentes vérifiées dans toutes les Cours, personne ne peut douter qu'elles fassent loi dans l'Etat comme dans l'Eglise : Le Roi s'en est suffisamment expliqué par sa Declaration du 4 Août 1720, et par l'Arrêt de son Conseil rendu pour la condamnation de la Lettre des sept Evêques, etc. »

Anno 1724, die 7 martii, moritur Innocent XIII : successit die 29 maii Benedictus XIII, pontifex longævâ eximiâque sanctitate venerandus, atque in B. Dominici familiâ S. Thomæ doctrinæ lacte enutritus. Blandiebantur sibi refractarii Constitutioni Clementinæ, aliquid favoris ac præsidii, causæ suæ jampridem desperatæ, sub tanto Pontifice accessurum : vana eos fœtilli spes ? Ad Apostolicam sedem perfidia non habuit accessum. Sanctissimus hic Pontifex firmissimæ adhesionis Constitutioni *Unigenit.* insignia exhibuit testimonia ; tum in *Bullâ Jubilæi*, 10 junii 1724, tum in *Brevi* ad Eminentiss. Noallium 24 augusti ejusd. an., tum maxime in litteris *in formâ Brevis* ad universos fratres Ordinis Prædicatorum professores datis die novembris eod. an. 1724, his in litteris apertè proficitur Benedictus XIII, « errores à fel. recordat. Clemente XI, per Constitutionem, quæ incipit : Unig. Dei filius, saluberrimo et sapientissimo judicio rejectos damnatosque fuisse. » Anno 1725, hic idem pontifex, plus aliquid præstitit ad commendandam et confirmandam dictæ Constitutionis auctoritatem : Romæ indixit Concilium die 15 aprilis celebrandum, ad quod præter S. R. Ecclesiæ cardinales, ingentem episcoporum numerum convocavit : hoc in concilio, præside Summo Pontifice, toti Sacro cardinalium Collegio, episcopis suburbicariis, maximoque aliorum præsulum numero : Constitutionis *Unig.* observantia commendatur, titulo 1 cap. 2, his verbis : « Cum ad fidei Catholicæ professionem integre, inviolatæque retinendam et custodiendam necessarium summopere sit, ut succedentes per hæc recentia tempora circa eandem fidem errores, à Sede Apostolicâ damnatos, fideles omnes vigilantî studio præcaveant et abominentur ; ideo ab omnibus episcopis et animarum Pastoribus, totâ, ut hactenus, sollicitudine curandum est,

« ut Constitutio à sanctæ memoriæ Clemente XI edita, quæ incipit *Unig.* ab omnibus ejusdemque conditionis et gradûs, omnimoda ac debita obedientia, et executione observetur. » Pergit Synodus : « Si quem itaque cognoverint in suis Diœcesibus permanentem, de Constitutione prædictâ non benè sentire, aut malè loqui, in eum pro suâ pastorali potestate, et jurisdictione procedere, et animadvertere non negligent, et ubi remediis efficacioribus opus esse senserint ad Sedem Apostolicam pervicaces tales et Ecclesiæ rebus belles deferant. » Hæc plus quàm satis ad refragantium calumniam ac temeritatem retundendam, qui Benedictum XIII in tutelam ac præsidium suæ perversitatis vocare, eumque suis stetisse partibus, jactitare non verentur.

Eodem anno 1725, præsules Gallicani in comitiis generalibus tunc congregati, cohærenter ad ea quæ in superioribus comitiis statuta fuerant, declarant in 2^o ex septemdecim circa jurisdictionem articulis Regi exhibitis : Constitutiones, *Vineam Domini* et *Unig. Dei Filii* Regni ac Ecclesiæ leges esse ; quemadmodum et Bullas Innocentii X et Alexandri VII contra famosas Jansenii propositiones : idem expressè ibid. statuit rex christianissimus in responsione ad dictum articulum, his verbis : « Sa Majesté a répondu que ces quatre Constitutions faisaient loi dans l'état comme dans l'Eglise, et qu'elle enverrait de nouveaux Ordres à ses Procureurs Généraux dans toutes les Cours pour autoriser les refus qui seront faits par l'évêque du Visa ou Institution Canonique à ceux qui dans les examens qu'ils auront subis, auront montré des sentimens contraires à ces Constitutions. » Sub idem ferè tempus, duodecim famosi Doctrinales articuli mirâ arte conficti, ab Appellantibus Romæ vulgati sunt : horum articulorum, vel aliarum quarundam similium propositionum approbatio à S. Sede postulabatur, tanquam prævia aut certè necessaria ad Constitutionis acceptationem conditio : non est hujus loci dictos articulos operosiùs excutere : satis fuerit generatim adnotasse, illos summa fidei christianæ capita complexos fuisse ; scilicet in iis agebatur : « 1^o, de necessitate, potentiâ ac gratuitâ dispensatione fidei in Christum, gratiæ Salvatoris Jesu, ipsiusque ac Dei voluntate circa salutem omnium hominum ; 2^o, de necessitate et observatione primi præcepti ; 3^o, de vi ac discrimine utriusque legis ac fœderis ; 4^o, de regulis in administratione sacra-

menti Pœnitentiæ observandis ; 5^o, de lectione Scripturæ sacræ, prærequisitisque ad illam dispositionibus. » Ejusmodi Articulos approbare constanter renuit Benedictus XIII et quidem meritò, ut deinceps ostendetur : nihilominus tamen eosdem Parisiis sub nomine Romani Pontificis disseminare veriti non sunt Appellantes ; additis itidem notis ex prætenso Corpore Doctrinali sacræ Facultatis Parisiensis, ut jactitabant, excerptis ; horum audaciam coercuit Rex Christianissimus, Decreto sanctoris Consilii dato 2 junii ejusdem an. 1725. En Regii Placiti verba : « Le Roi ayant été informé qu'il aurait été répandu dans le public un écrit imprimé sous le titre d'*Explication de N. S. P. le Pape Benoît XIII envoyé en France au mois de mars 1725, sur la Bulle Unig.*, etc. ; Sa Majesté étant bien instruite que les propositions contenues en cet écrit n'ont été autorisées par aucun acte de Sa Sainteté, et voulant réprimer la témérité de ceux qui non seulement ont osé les faire imprimer, mais même y ajouter de leur chef des notes pleines d'artifice, qu'ils ont appuyées sur un prétendu Corps de Doctrine de la Faculté de Théologie de Paris, qui n'a jamais été reconnu pour l'ouvrage de cette Faculté, ni revêtu d'aucune sorte d'autorité. Oui le rapport, Sa Majesté a ordonné et ordonne que ledit écrit imprimé sous le titre d'*Explications de N. S. P. Benoît XIII envoyées en France, etc.*, sera et demeurera supprimé, etc. »

Versus mensem octobris ejusdem anni 1725, Romæ divulgata fuit Epistola sub nomine trium Gallican. cardinalium de Rohan, de Bissy, de Fleury : hæc in Epistolâ, novam acceptandæ Constitutionis *Unig.* sub conditione Pontificiæ Approbationis 12 articulorum, formulam, à Card. Noallio propositam ; sic insectantur dicti cardinales, pag. 2 : « Mirum sanè videbitur, receptâ ubique Constitutione (*Unig.*) deliberari adhuc de modo illius acceptandæ, novamque hodiè à communi discrepantem proponi acceptationis formulam. Etsi enim nec canone, nec ullâ lege præscripta sint verba, quibus præstatur Ecclesiasticis circa dogmata Sanctionibus obsequium ; attendendum tamen maximè, singularem formulam semper periculosam esse et ipsâ singularitate suspectam, cum ex adverso professionum uniformitas, fidei unitatem tueatur et nutriat. » Rursus, de variis ejusd. conditionatæ acceptationis incommodis, mentem suam Benedicto XIII aperientes, ejus agendi rationem in

denegandâ 12 articulorum approbatione vindicant, his verbis : « Dedeet exigere, ut ad « explicandam Constitutionem *Unig.* Aposto- « lico iudicio approbentur articuli, quorum « alii ad ipsam Constitutionem nullatenus per- « tinere dignoscuntur, alii certum et à nemine « impugnatum dogma exprimunt, alii propter « argumenti invisiâ in medium adduci non « possunt absque periculo novarum disputa- « tionum ac litium, quibus jam addimus evul- « gatis illis in Gallis, sparsâque voce postu- « latae super his Apostolicæ declarationis, « exarsisse in animis sermonibusque rixas, « dissidia et tumultus, quos Regio Edicto « (hujus mox verba exhibuimus) reprimi oportuit. » Hæc, Gallicani cardinales adversus novam hanc conditionatam, de quâ tunc Romæ agebatur, Card. Noalli Constitutionis acceptationem. In eundem sensum, paucis antea mensibus, 16. scilicet martii, ad S. Pontificem Benedictum XIII litteras dedit Cardinalis d'Alsace de Bossu, archiepiscopus Mechliniensis. Non multò post, præfatum scriptum regiâ auctoritate jam suppressum, proscripserunt nonnulli præsules Gallicani; inprimis Santonensis, mandato die 26 novembris 1727, lato : Massiliensis, 14 januarii anni sequentis. Cardinalis autem Paulucci, Papæ à secretioribus consiliis, ad Pontificum Parisiis Legatum, de illo Santonensis episcopi mandato, sic scribit 26 decembris : « C'a été un fort bon dessein « que celui que Monseigneur l'Evêque de Saintes a pris de publier un mandement pour « démentir l'artificieuse calomnie des réfrac- « taires sur les 12 articles connus. Votre Sei- « gneurie illustriss. ne manquera pas de lui « témoigner l'agrément et l'approbation qu'on « a donnée ici à la nouvelle marque que ce « prélat a donnée de sa piété et de son zèle pour « la saine doctrine. »

Hoc ipso eodem anno 1725. præsules Comitatus Avenionensis, Concilium celebrârunt Avenione, die vigesimâ octavâ mensis octobris: hæc in synodo, ad exemplar Concilii, sex antea mensibus, sub Benedicto XIII Romæ congregati, Bulla *Unig.* debitis laudibus cummulata fuit, ipsiusque observantia atque obedientia summopere commendata : « Omni diligentia « et sedulitate, inquit Synodus tit. 2, pag. 15, « seriò invigiletur, ne quis è Provinciæ Cle- « ro... ad Ordines sacros, ad Beneficia, ma- « ximè curam animarum habentia, et ad Sa- « crorum quorumcumque administrationem « admittatur, quin de ejus sincerâ supradictæ

« Bullæ *Unig.* acceptatione, de debitâ et omni- « modâ obedientiâ, legitimis, pro episcoporum « conscientiâ, et iudicio, constiterit argumen- « tis. » Anno sequenti 1726, Gallicani epis- « copi jussu regio Parisiis congregati, priorum comitiõrum vestigiis inherentes, Constitutio- « nem *Unig.* constantem esse Ecclesiæ et Regni « legem declarant : ipsique proinde debitam esse « veram ac sinceram obedientiam, non secus ac « Innoc. X et Alex. VII Constitutionibus circa Jan- « senii Propositiones. Vide acta verbalia horumce « comitiõrum, præsertim in collectione instru- « mentorum, pag. 234.

Tot ac tantis quibus undique Bullæ aucto- « ritas muniebatur testimoniis, inflecti non po- « tuit obfirmatus contradicentium animus, pro- « cacibus libellis in Decretum Apostolicum etiam « tum impotentiùs debacchari non destiterunt : « horum, variis sanctionis consilii Decretis, « compressa est petulantia : inprimis, die 4 maii « an. 1727, 14 junii et 11 octobris ejusd. an. his « in Regiis placitis, Bulla *Unig.* uti *judicium Ec- « clesiæ et lex Regni*, disertè prædicatur. Quod « quidem iterùm luculenter statuitur in Concilio « Ebredunensi, utriusque potestatis auctoritate « confirmato, de quo jam epocha sequenti.

ÈPOCHA TERTIA. *De iis quæ ab indictâ Ebredunensi Synodo, et deinceps ab nostra usque tempora subsecuta sunt.* — Ex iis quæ à convocatione Ebredunensis Synodi ad nos usque, in præsentì Quesnellistarum causâ peracta sunt, præcipua duntaxat, eaque chronologicè et summatim, coherentè ad scopum nostrum, attingemus. Anno itaque 1727 archiepiscopus Ebredunensis, (annuente, pro suo fovendæ atque promovendæ religionis studio, Rege Christianissimo), litteris ad suos Provinciales episcopos datis die 15 mensis junii, Concilium Provinciale in Ecclesiâ suâ Metropolitanâ, ad diem 16 mensis augusti ejusd. an. 1727 habendum et inchoandum indixit.

Dictâ die 16 habita est prima Concilii Congregatio, et duobus postea diebus, 18 augusti, altera celebrata est, in quâ præfatus Ebredunensis archiepiscopus, ex Promotoris requisitionibus, nomine Concilii, interpellavit Seneensem episcopum, ut diceret et apertè declararet, an à se auctore prodissset Documentum pastorale gallico sermone typiseditum, cui titulus : *Instruction pastorale de Monseigneur l'Evêque de Senez, dans laquelle, à l'occasion des bruits qui se sont répandus de sa mort, il rend son Clergé et son peuple dépositaires de ses derniers sentimens, sur les contestations qui agitent l'Eglise.* Ad-

scriptâ die 28 augusti anni 1726, cum hac subscriptione : *Jean, Evêque de Sévres*. Quod Documentum, si suum agnosceret, factam declarationem chyrographo muniret. Ad hac, disertè respondit verbis episcopus Senecensis suum hoc agnoscere et adoptare mandatum Pastorale : jussu suo promulgatum fuisse ; ejusque defensionem se suscipere, donec invictis argumentis ostenderetur sibi, errores in illo reperiri ; præsensque responsum dictavit ipsemet, eâdemque in congregatione subscripsit. Hâc semel emissâ clarâ et authenticâ Senecensis episcopi declaratione : discussa deinceps fuere et explosa in Concilio, varia recusationis capita ab eodem proposita ; ac tandem, præhabitis tribus Canonicis monitionibus, definitiva in Instructionem Pastoralem, personamque episcopi Senecensis, lata est sententia, die 20 septembris dicti anni 1727. Instructio Pastoralis unanimi calculo confixa fuit : tanquam « temeraria, scandalosa, seditiosa, « Ecclesiæ, episcopis, et auctoritati regie injuriosa, schismatica, hæretico spiritu plena, « erroribus referta, et hæreses fovens : » in his præcipuè quibus adversatur puræ et simplici subscriptioni, formulario Alexandri VII, cui *vexationis nomen* adscribit : tum in iis, quæ falsò et injuriosè profert in Constitutionem *Unig.* affirmando Constitutionem hanc, *dogma, mores, disciplinam, ipsamque Ecclesiasticam Hierarchiam*, funditus evertere. Velitum insuper, sub poenâ excommunicationis ipso facto incurrendæ, Ordinario reservatæ, dictam instructionem legere, aut in vulgus spargere. Quod autem spectat personam Senecensis episcopi, statuit Synodus, « ut dictus episcopus, qui, « nonobstantibus monitionibus Canonicis eidem factis, ut excessus suos retractaret, per- « vicaciter in eis perseveravit, *sit et maneat « suspensus ab omni officio et jurisdictione Episcopali, et ab omni exercitio Ordinis tum Episcopalis, tum Sacerdotalis.* » Omnes constitutos à dicto Senecensi episcopo Officiarios Ecclesiasticos exauctoravit : elegitque ad regendam, in locum suspensi et interdicti episcopi, diœcesim Senecensem, D. de Saleon, nunc illustriss. Viennensem archiepiscopum.

Sequenti die 21 septembris, prædicta sententia, requisitis Patrum votis, iterùm probata fuit et promulgata : insimul hic et seq. sess. 5 publicata fuere Decreta de *Constitutionibus Apostolicis*, quorum primum respicit Bullam *Unig.* hisque concepitur verbis : « *Con-*
« titutio *Unigenitus* quâ centum t una Ques-

« nelli propositiones damnatæ sunt, cui suffra-
« gata est universalis Ecclesia, est dogmaticum,
« definitivum et irretractabile judicium illius
« Ecclesiæ, de quâ divino ore dictum est :
Portæ inferi non prævaldebunt adversus eam : si
« quis igitur eidem Constitutioni corde et
« animo non acquiescit, aut veram et sinceram
« obedientiam non præstat, inter eos habea-
« tur, qui *circa fidem naufragaverunt*, etc. »
Provocatio verò à dictâ Constitutione, ibidem declaratur : « ipso jure irrita, scandalosa, schis-
« matica, jam damnatis erroribus favens, Sedi
« Apostolicæ et Ecclesiæ injuriosa. » Sancta
Sedes, quæcumque in præfatâ Ebredunensi
Synodo gesta fuerant Apostolicâ auctoritate confirmavit, dato ad episcopos in provinciali
Concilio Ebreduni congregatos splendido Brevi,
17 decembris ejusdem anni 1727 : « Quæ ad
« nos misistis Concilii Decreta, inquit S. Pon-
« tifex Benedict. XIII, maturè à nobis expensa,
« præsertim verò de contumaci Episcopo pro-
« vidum consilium, libenti animo collaudamus
« et comprobamus, nostræque auctoritatis
» subsidium ac robur adjicientes, *plenissimè
« confirmamus.* » Demùm, ut præfatæ Synodi
omni ex parte muniretur auctoritas, Rex Chris-
tianissimus illius patrocinium suscepit ac obfir-
matè professus est, datâ ad illustriss. Ebredunensem, nunc cardinalem et Lugdunensem
archiepiscopum epistolâ, 28 decembris an.
1727, in quâ dictum archiepiscopum sic allo-
quitur : « Après la lecture, qui a été faite par
« mes ordres, et le compte qui m'a été rendu
« des actes du Concile d'Embrun, auquel
« vous avez présidé, je n'ai pas voulu différer
« de vous marquer la satisfaction que j'ai de
« la conduite de cette assemblée..... je suis
« bien aise de vous dire en même temps que
« dans toutes les occasions, qui le requerront,
« j'emploierai volontiers mon autorité pour
« soutenir les décisions et les décrets de ce
« Concile : de quoi je désire que vous assuriez
« de ma part les évêques qui y ont assisté avec
« vous. » Eadem iterantur in alterâ jussu regio ad eundem scriptâ à D. le Blanc Regi à
sanctoribus Consiliis epistolâ, 28 martii 1728.

Quesnellistæ, damnatorio episcopi Senecensis judicio, ad extremas redacti angustias, incerti tandem quò pedem figerent, causidicorum Parisiensium patrocinium implorârunt ; isti verò, præfati Consilii judicium infirmare ac elevare, totumque intentatæ contra partium coryphæum litis seriem ac processus delere, funditusque evertere, omni curâ ac studio co-

nati sunt ; editâ hæc in rem famosâ Consulta-
tione , à 30 parisiensibus patronis subscriptâ ,
30 octobris 1727. in ea de Concilio Pontificâ
auctoritate confirmato, regiisque suffulto præ-
sidiis, sic inconsulte omninò proloquantur pag.
2 : « Toutes les démarches qui ont été faites
« dans la tenue du Concile d'Embrun, ne sont
« qu'un tissu d'irrégularités dont il y a peu
« d'exemples dans l'antiquité, et que la poste-
« rité aura peine à croire. » Multisque ibidem ,
ad infringendam Synodi sententiam, congestis
præpostere auctorum textibus , objectisque
quampluribus querimoniis, ita demùm conclu-
dunt, pag. 30, et 31 : « De toutes ces réflexions
« naissent deux conséquences victorieuses en
« faveur de M. l'évêque de Sénez. L'une que ce
« jugement... ne peut être considéré que com-
« me un tissu d'abus et d'injustices que les
« deux puissances ont un égal intérêt d'écarter,
« tir, etc. »

Ad quosdam etiam suarum partium episco-
pos confugerunt Quesnellistæ : duodecim præ-
sules Constitutioni *Unig.* notoriè obsistentes,
adeoque in eodem cum Senecensi Episcopo
consortes delicto, ejusdem Senecensis patroci-
nium palam susceperunt , nondumque visis
dictæ Synodi actis , necdum vulgatis , eandem
tamen Synodum elevare ac inflamare conati
sunt datâ ad Regem epistolâ, 28 octobris 1727,
in quâ de sententiâ in Senecensem episcopum
latâ acriter expostulant. Epistolam hanc vehe-
menter imp obavit Rex Christianissimus : ip-
sique , eâ occasione , Ebredunensis Synodi
Patribus, regium, ad vindicanda et asserenda
Concilii suâ auctoritate coacti decreta, præsi-
dium , rursus affirmatissimè pollicitus est.
Utrumque constat ex litteris ad eosdem 12
episcopos Versalis jussu regio directis, ab uno
è quatuor sanctioris Consilii amanuensibus ,
19 martii 1728

Cardinales, archiepiscopi et episcopi, Pari-
siis tunc versantes, extraordinariis in Comitibus
jubente rege congregati sunt de præfata Cau-
sidicorum consultatione sententiam laturi : ii,
maturè diligenterque dicto opere discusso,
suum de eo dogmaticam judicium in hæc ver-
ba pronuntiârunt, epistola ad Regem inscriptâ,
3 maii 1728 : « Nous déclarons à Votre Majesté,
« que les auteurs de la Consultation se sont
« égarés dans des points très importants. Qu'ils
« ont avancé, insinué, favorisé, sur l'Eglise ,
« sur les Conciles, sur le Pape et les évêques,
« sur l'autorité et la forme de leur jugement ,
« sur la Bulle *Unig.* sur l'appel au futur Concile,

« et sur la signature du formulaire, des maxi-
« mes et des propositions téméraires , fausses ,
« tendantes au schisme, et dont la plupart ont
« été déjà justement prosrites, comme inju-
« rieuses à l'Eglise, destructives de la Hiarar-
« chie, suspects d'hérésie, et même hérési-
« ques. » Hæc generatim, de dogmaticis in
Consultatione protrusis capitibus. De jactatis
verò, in Concilium Ebredunense, speciatim in
latam contra Senecensem episcopum senten-
tiam, dictæ ac querimoniis ; ita prosequuntur
iidem cardinales et episcopi : « Ils ont atta-
« qué le Concile d'Embrun témérairement ,
« injustement , et au prejudice de l'autorité
« royale, et du respect, qui est dû à un nombre
« considérable de prélats, et au Pape même. »
Plus quàm triginta cardinales, archiepiscopi et
episcopi, huic epistolæ et judicio subscripse-
runt. Ad hæc coherenter, Rex Consultationis
abolitionem imperavit , gravissimis insuper
inustis , Sanctioris Concilii Decreto, 3 juli
ejusd. anni 1728 lato.

Caterùm, Causidicorum adversus Ebredun-
ensem Synodum expostulationes, non est hu-
jus loci persequi ac sigillatim diluere : has
summatim cardinales, archiepiscopi et episco-
pi egregie propulsant in suo mox citato ad Re-
gem doctrinali Judicio pag. 84, 85 ; juvat ipsi-
sima eorum verba hic exscribere : « Nous savons
« que le Concile d'Embrun a été convoqué lé-
« gitimement, qu'il ne l'a été que par la permis-
« sion de Votre Majesté, que M. de Sénez l'a
« reconnu ; qu'il y a avoué son Instruction
« Pastorale, dénoncée par le Promoteur ; qu'il
« a récuse tous ses juges, et qu'il a refusé de
« donner la preuve des moyens de ses récusa-
« tions ; que lorsqu'il a été question de procé-
« der contre sa personne, le Concile a délibéré
« d'appeller des évêques des provinces voi-
« sines ; qu'interpellé s'il avait des reproches à
« faire contre aucun d'eux, il s'est abstenu de
« répondre ; qu'on lui a fait les monitions pre-
« scrites par les Canons ; qu'on a eu inutilement
« avec lui des conférences fréquentes et charita-
« bles pour l'engager à rétracter sa doctrine :
« qu'enfin tous les jugemens rendus par le Con-
« cile ont été entièrement unanimes. » Per-
gunt iidem præsules : « Nous savons encore
« que le souverain Pontife a examiné et fait exa-
« miner les Decrets du Concile d'Embrun et
« nommément la sentence rendue contre M. de
« Sénez, et qu'il les a authentiquement con-
« firmés par son Bref du 17 décembre 1727.
« Nous savons enfin que V. M. s'étant fait

« rendre compte des actes de ce Concile par des
 « personnes de son Conseil de différens Or-
 « dres, non-seulement elle a bien voulu, sur
 « le rapport qui lui en a été fait, marquer la
 « satisfaction qu'elle avait de cette assemblée,
 « et promettre qu'elle emploierait son autorité
 « pour en soutenir les jugemens ; mais encore,
 « qu'en permettant l'impression de ces actes,
 « du Bref qui les approuve, et de la lettre, que
 « le Métropolitain a écrite en réponse à Sa
 « Sainteté, Votre Majesté a mis, pour ainsi dire,
 « à cette affaire le sceau de l'autorité royale. »
 Moxque addunt : « Quels plus puissans motifs
 « pour croire que la conduite des Evêques as-
 « semblés à Embrun a été régulière et cano-
 « nique ? » Hæc sæpè, ad Causidicorum, alio-
 rumque Quesnellist. rum, in Ebredunensem Syn-
 odum, dissipandas expositulaciones, dissolven-
 dasque vitiligationes, luculentissima. Eamdem
 Causidicorum Consultationem egregiè confuta-
 vit illustrissimus Ebroidensis episcopus le Nor-
 mand Mandato Pastoralis dato 5 augusti 1728,
 et altero fusiori die 15 novembris 1750 lato :
 hoc in documento, singula à Parisiensibus pa-
 tronis contra Synodum Ebredunens. jactata
 argumenta elevat, productaque testimonia in-
 firmat ac diluit eruditus præsul. Ad eximium
 hoc scriptum, nihil habuère quod reponerent
 adversarii et reipsà invictum est et inexpug-
 nabile.

Hoc eodem anno 1728, Eminentissimus Noal-
 lius solemnè edito Mandato interpositam à se
 appellationem rescidit ; puramque ac simplicem
 emisit Bullæ acceptationem, ut ex ipsis modò
 recensendis mandati verbis, planè constabit.
 Interim non abs re fuerit hic paucis exponere,
 quid in toto isto Constitutionis negotio egerit
 Card. Noallius, qui tamdiù obsistentium dux
 fuit et caput. Id, vel ex solis Mandatorum
 Pastoral. titulis eâ de re vulgatis, pronum est
 intelligere ; hæc autem ex ordine ista sunt.
 Primum itaque Mandatum edidit 28 septembris
 1715. In hoc Mandato, datam libro *Reflexio-
 num moralium* approbationem rescidit ac revo-
 cat ; dictum librum damnat, ipsiusque lectio-
 nem cunctis diocesis suæ Fidelibus prohibet :
 « Nous ne pouvons souffrir, inquit, que notre
 « nom paraisse davantage à la tête d'un Ou-
 « vrage que Sa Sainteté condamne... ; ainsi
 « nous ne voulons pas perdre un moment à
 « révoquer l'approbation que nous lui avons
 « donnée dans un autre diocèse. » Moxque in
 judicio sic pronuntiat : « A ces causes, nous
 avons révoqué et révoquons l'approbation

« que nous avons donnée audit livre, le con-
 « dammons, et défendons à tous nos diocésains
 « de le lire et de le garder, etc. » Alterum
 Mandatum datum fuit 25 februarii 1714. In hoc
 præfatam *Reflexionum moralium* prohibitionem
 ac damnationem renovat : insuper omnibus
 diocesis suæ Communitatibus, sive regulari-
 bus, sive secularibus, vetat et prohibet sub
 pœnâ suspensionis ipso facto incurrendæ, ne
 quis Constitutionem *Unig.* promulget aut reci-
 piat, citra auctoritati sibi à Deo tributæ sub-
 jectionem. Tertium Mandatum datum est 3
 aprilis 1717, quo à dictâ Constitutione ad Pa-
 pam meliùs consultum, et ad Concilium gene-
 rale, appellationem interjecit. Instrumentum
 illud initio habuit occultum Card. Noallius,
 nec ejus nomine vulgatum fuit nisi 24 septem-
 bris anni sequentis 1718. Quartum Mandatum
 latum est 5 octobris 1718. Quo publicat alteram
 appellationem, quam à litteris *Pastoralis Offi-
 cii* pariter interjecit ad futurum Concilium ge-
 nerale. Quintum est famosa *Instructio Pastora-
 lis*, quam die 14 januarii 1719 inscripsit diœ-
 cesis suæ Clero seculari et regulari. In hæc
 probare tentat, Constitutionem *Unig.* non va-
 lere quoad materiam, quia damnat sententias
 nullâ notâ dignas : nec etiam valere quoad for-
 mam, quòd scilicet centum et unam proposi-
 tiones proscribat *in globo*, non distinguendo
 censuras quæ cuicque propositioni competant.
 Undè infert, dictam Constitutionem nec regu-
 lam fidei esse posse, nec judicium dogmaticum.

Ex his Mandatis, tertium et quartum Romæ
 damnata fuère, an. 1718, uti referta « propo-
 « sitionibus falsis, temerariis, scandalosis,
 « injuriis summo Pontifici, erroneis, schis-
 « maticis et hæresi proximis. » Iisdem planè
 censuris 5 augusti 1719, Romæ pariter pro-
 scripta fuit *Instructio Pastoralis* : additâ priori-
 bus qualificationibus *hæresis* notâ. Perstitit in
 suâ Bullæ intercessione ad annum usque 1728.
 Eminentissimus Noallius ; tunc prægravis an-
 nis, accessuque, ut inquiebat, æternitatis
 territus ; in hæc verba summo Pontifici Bene-
 dicto XIV, scripsit, 19 julii ejusd. anni : « Je
 « vous atteste en présence de J. C. que je me
 « soumetts entièrement à la Bulle *Unig.* ; que je
 « condamne le livre des *Reflexions morales*, et
 « les cent une propositions qui en ont été ex-
 « traites ; de la même manière qu'elles sont
 « condamnées par la Constitution ; et que je
 « révoque mon *Instruction Pastorale* de 1719,
 « avec tout ce qui a paru sous mon nom contre
 « ladite Bulle. » Concludensque epistolam ad-

dit : « Je dois avouer ici à Votre Sainteté ,
« depuis que par la grâce de Dieu j'ai pris cette
« résolution , je me sens infiniment soulagé ;
« les jours sont devenus pour moi plus sereins ;
« et mon âme jouit d'une paix et d'une tran-
« quillité que je ne goûtais plus depuis long-
« temps. »

Summus Pontifex cum summâ amoris ac lætitiæ declaratione Cardinali rescripsit 21 augusti , ipsum adhortans ut quantocius sanctum ac tandiù exoptatum perficeret opus , polliciti in suâ epistolâ promulgatione mandati : promissis stetit Eminentiss. Noallius , ac tandem 11 octobris dicti an. 1723 , appositè ad ea quæ Pontifici pollicitus fuerat , Pastorale , absque ullâ restrictione aut limitatione , emisit documentum , quo Constitutionem *Unig.* acceptat purè et simpliciter sine verborum ambagibus et involueris : simulque revocat ac retractat instructionem suam Pastoralem anni 1719 , cæteraquæ omnia præfatæ Bullæ adversa quæ sub suo nomine vulgata fuerant. En ipsa mandati verba : « A ces causes , tout considéré et le S. « nom de Dieu invoqué , nous acceptons avec « un respect et une soumission très sincère la « Constitution *Unig. Dei Filius* , en date du 8 « septembre 1713 ; condamnons tant le livre des « *Réflexions morales* , que les cent une propo- « sitions qui en ont été extraites , de la même « manière et avec les mêmes qualifications que le « Pape les a condamnées. Avertissons tous les « Fidèles de notre diocèse de l'un et de l'autre « sexe, qu'il n'est pas permis d'avoir des sen- « timens contraires à ce qui a été défini par « ladite Constitution *Unig.* » Et paucis interpositis subdit : « Et pour donner de plus en « plus des preuves de la sincérité de notre sou- « mission au S. Siège , nous révoquons de cœur « et d'esprit , tant notre instruction du 14 janvier « 1719 , que tout ce qui a été publié en notre nom « de contraire à notre présente acceptation , etc. »

Tria hic disertè fatetur Cardinalis Noallius , quæ restrictam ac limitatam Constitutionis acceptationem penitus excludunt : 1^o , damnat *Reflexionum moralium* librum et 101 ex eo extractas propositiones , eodem modo , et sub iisdem notis in Bullâ usurpatis ; 2^o , dictis propositionibus et libro , notatos à S. Pontifice errores attribuit ; 3^o , Mandatum Pastorale an. 1719 cæteraquæ huicce opposita acceptationi (adeoque interpositas antea adversus Bullam *Unig.* appellationes) revocat ac rescindit.

Improvisò hoc eventu prostrati Quesnellistæ , undique mendaces ac contumeliosi statim sparsi

hanc in rem ac disseminati rumores : at frustrâ. Inanes illos ac commentitios rumores diffilavit ac penitus disiecit Card. Noallius , tum communi ad Episcopos Regni inscriptâ epistolâ ; tum maxime litteris 14 martii 1729 ad S. Pontificem datis , in quibus suum mox citatum Pastorale Documentum 11 octobris latum expressè commemorat ac confirmat : ipsiusque executionem sedulò curaturum , Benedicto XIV certissime pollicetur. Extant diserta harumcè litterarum extracta , in epistolâ à vicariis generalibus Parisiens. ad Eminentissimum de Fleury 3 julii 1729 , paucis post Card. Noalli obitum mensibus , datâ. Eadem in epistolâ , præfati vicarii generales pluribus ac invictis testimoniis ostendunt , integrum prorsùs subsistere , dicti Mandati ab Eminentissimo Noallio 11 octobris lati , vim ac robur : illudque nullatenus infirmari prætensis duabus tunc temporis sub nomine ejusdem Cardinalis vulgatis declarationibus : « Prétendre , inquit illi , que malgré tant de « témoignages réitérés , Monseigneur le Cardinal de Noailles condamnait dans son cœur ce « qu'il paraissait approuver extérieurement ; « qu'il pensait à anéantir par des protestations « secrètes ce qu'il avait solennellement publié , « et ce qu'il paraissait s'applaudir d'avoir fait ; « qu'il a porté l'artifice et la dissimulation jusqu'à persuader à tous ceux qui l'approchaient « qu'il était content , dans le temps même qu'il « se repentait intérieurement , c'est supposer « qu'un Prélat d'une vertu si éloignée de toute « hypocrisie , a voulu dans un acte important « pour la Religion , tromper le Pape , le Roi , « les Evêques de France , son Diocèse , et l'Eglise entière. » Moxque subdunt : « Si ceux qui « ne cherchent qu'à déshonorer Monseigneur « le Cardinal de Noailles , parce qu'il est de « leur intérêt de détruire sa réputation , osent « lui imputer une telle imposture , à qui peuvent-ils se flatter de persuader qu'un homme « infirme et languissant ait pu soutenir tous les « jours pendant long-temps et jusqu'à la mort « un tel personnage , sans que les vrais sentimens de son cœur aient été aperçus par « ceux mêmes qui le voyaient le plus intimement ? Si de telles idées peuvent imposer à « ceux qui n'ont ni vu ni connu Monseigneur « le Cardinal de Noailles , elles ne sont propres qu'à exciter l'indignation de ceux qui ont « eu l'avantage de vivre avec lui. » Tandem ex his , aliisque indubitatis momentis , dictam epistolam sic concludunt iidem , Eminentissimum de Fleury alloquentes : « Sur l'autorité de ces

« faits constans , dont nous venons de rendre
« compte à Votre Eminence , toutes les per-
« sonnes équitables jugeront que le Mandement
« du 11 octobre subsiste dans toute sa force ,
« et que les deux prétendues déclarations ,
« dont on voudrait se servir pour y donner
« atteinte , ne méritent aucune croyance. »
Deinde subjungitur sententia Officialis Parisiensis lata adversus dictas declarationes die 1 septembris 1729.

Sex circiter mensibus post editum 11 octobris Mandatum , obiit Eminentissimus Noallius : ipsum in Archiepiscopatu Parisiensi proximè excepit Aquisiens archiepiscopus (D. du Luc de Ventimille. Is paulò post suscepta Ecclesiæ Parisiensis gubernacula , egregium edidit Documentum Pastorale , 29 septembris ejusd. an. 1729 , in quo adversus obtreptantium artes et calumnias , Apostolici Decreti doctrinam et auctoritatem , luculenter tuetur ac vindicat. Tuncque quamplures è dissentientibus ad unitatem et obsequium Bullæ *Unig.* debitum feliciter rediére. Circa hæc tempora , insigne imprimis Ecclesiæ Metropolitanae Capitulum , acceptationi Cardinalis Noallii recens deuncti solemniter adhæsit : quo etiam illustri exemplo , plurimi ad sanio rem doctrinam , debitamque Ecclesiæ obedientiam salubriter adducti fuère. Eodem anno 1729 , die 15 decembris , latum est celeberrimum sacræ Facultatis Parisiensis Decretum , quo communibus suffragiis tria imprimis statuit sacer Ordo : 1º, Decretum de acceptandâ Constitutione *Unig.* diebus quintâ et decimâ martii 1714 pronuntiatum , verum esse ac genuinum ; illudque iterum et de novo suum facit ; 2º rursus amplectitur eandem Constitutionem *Unig.* tanquam universalis Ecclesiæ dogmaticum Judicium ; 3º, decernit in refractarios exclusionis è suo sinu pœnam *ipso facto* incurrendam. Præstat celeberrimi hujusce Decreti , quod exindè pluries ac disertissimè confirmavit sacræ Facultas , ipsissima hic exhibere verba : « Sacra Facultas.... auditâ relatione
« factâ nomine deputatorum declarat :

« 1º, Attendendo ad gravissima rationum
« momenta quibus abundè constat Decretum
« sacri Ordinis latum diebus quintâ et decimâ
« martii 1714 verum esse ac genuinum , illud
« iterum ac de novo suum facit : agnoscit im-
« meritò prorsus fuisse declaratum falsum ,
« adulterinum , commentitium : atque idcirco
« vult.... ut quæcumque contra ipsum subindè
« tentata sunt , penitus deleantur et eradantur.
« 2º, Constitutionem *Unigenit.* summâ cum re-

« verentiâ , et integro cordis et animi obsequio
« iterum et de novo amplectitur *tanquam dog-*
« *maticum Ecclesiæ universalis judicium.* 3º,
« Provocationem seu appellationem quæ legi-
« tur et circumfertur sub nomine sacræ Facul-
« tatis à prædictâ Constitutione *Unig.* ad futu-
« rum generale Concilium die 5 martii 1717
« interjectam , præsentî conclusione , quantum
« opus est , revocat , pro nullâ haberi jubet ,
« cassat et antiquat , atque è suis commenta-
« riis vult et imperat eradi et expungi ; necnon
« omnes alios actus prædictæ Constitutioni ad-
« versantes. 4º, Magistros dissidentes prædicto
« Apostolico Decreto.... ni intra præscriptum
« temporis intervallum , S. Facultati veri obse-
« quii sui certum testimonium exhibeant , de-
« clarat , *ex nunc pro tunc* , S. Facultas tales
« Magistros quicumque fuerint , penitus et abs-
« que nullâ spe reditus exclusos ab omni aditu
« comitiorum suorum , necnon à quolibet jure
« magisterii et doctoratus. 5º, ut S. Facultas
« provideat in posterum , ne ad suos gradus
« admittantur quicumque , nisi Decretis Aposto-
« licis , nominatim verò huic quod incipit *Uni-*
« *genit.* sincerè obsequentes sint , vult et jubet
« ut quicumque deinceps accessuri sunt , aut
« Magistri ad resumptam , etc.... teneantur
« omnes et singuli declarare se corde et animo
« perfectè submissos esse supradictæ Aposto-
« licæ Constitutioni : sin minus , *ipso facto* reji-
« ciantur. »

His sane quinque capitibus , ad asserendam Constitutionis *Unig.* auctoritatem , debitamque ipsi obedientiam , nihil profectò luculentius præstare potuit sacer Ordo. Præfatum porrò gravissimum hanc in rem Decretum , pluries exindè disertissimè firmatum fuit ac roboratum.

1º quidem annis 1730 , 1731 , etc. Illud in plerisque suis generalibus comitiis apertissimè ac plenissimè confirmavit sacræ Facultas , præsertim verò in comitiis habitis die 2 Januarii 1730 , diebus primâ februarii , martii , junii , julii , augusti , septembris ; necnon quartâ novembris , secundâ decembris ejusd. anni. Horumce comitiorum acta reperire est in collectione jussu S. Facultatis adornatâ an. 1730 , sub hoc titulo : Acta et Decreta S. Facultatis Parisiens. super constitutione quæ incipit *Unig.* observandâ et executioni demandandâ.

2º Illud idem Decretum diei 15 decembris 1729 , cæterasque conclusiones subsequentes pro eodem negotio latas probavit ingens admodum numerus Magistrorum Parisiensium , quos

officiorum necessitas, aut alie extraneae causae, procul ab urbe et comitiis sacrae Facultatis dissitos retinet (hos inter quamplures erant Ecclesiae Principes). Ista colliguntur ex scriptis eorum testimoniis ad S. Facultatem transmissis, quaeque publicis in comitiis recitata fuere. His autem scriptis instrumentis certatim testabantur, tum illustrissimi Ecclesiae Principes, tum et ceteri magistri, « libenter adhærere se supradictis Decreto et Actibus S. Facultatis, actumque suae adhaesionis postulare. » Vide laudat. mox collect. imprimis comitia die primâ junii et julii celebrata. Quantus verò fuerit ille Magistrorum dictis decretis adhaerentium numerus, vel exinde colligi potest, quòd his jam subscripserant plus quàm sexcenti Magistri initio septembris anni 1750. Dehinc verò in subsequentibus comitiis hoc et sequenti anno, quamplures alii scriptis epistolis ex variis locis frequentes accesserint ad illud idem roborandum Decretum. Ita declarat S. Facultas Parisiensis, encyclicâ ad extraneas studiorum Universitates epistolâ : « adeò ut, » inquit, exceptis adhuc nonnullis numero « paucis, et de sua nuditate confusis, qui suis « privatis opinionibus abrepti à cæteris dissident, atque idcirco tanquam viri turbulentissimi jussi sunt à comitiis nostris abstinere, affirmare meritò jam possumus, utendo verbis « Eutyhii Constantinopolitani in sua, nomine « quinti Concilii ad Vigilium Papam epistolâ « *submotâ confusione discordiae, pacem reformâsse* « *Deum in ordine nostro, et collectos in unum Magistros unum idemque sapere in rectâ fidei confessione* ; quod sanè catholicè sentientibus « gratissimum esse debet et multum laetare in « se non medioeris solatii. » Ita in actis citatis part. 2, pag. 205 et 204.

3°. Tam domesticæ quàm exteræ Universitates ac S. Facultates theologicæ, ad quas datâ an. 1750 encyclicâ epistolâ, Facultas Parisiensis transmisit sua Acta et Decreta super Constitutione *Unig.* Hæc, inquam, omnes Universitates et Facultates, acta hujusmodi lætanti animo et summâ cum gratulatione exceperunt, atque appositè ad famosum diei 15 decembris 1729 Decretum, testantur se ultrò agnoscere Constitut. *Unig. tanquam dogmaticum Ecclesiae universalis judicium.* Id manifestum, ex ipsis harumce Facultatum ad S. Facultatem Parisiensem responsis, quæ referuntur in laudat. Decretis, parte 2. à pag. 185 ac pag. 227. Ex domesticis Regni Universitatibus et Facultatibus satis erit hîc in medium proferre, quæ hanc

in rem habet Universitas Cadomensis, responsoriâ ad S. Facultatem Parisiensem epistolâ die 7 julii 1750 : « Latè excepimus, inquit, et « summâ cum gratulatione legimus quaecumque Decreta elapsis proximè mensibus tam « sapienter tulistis..... Apostolicam Constitutionem *Unig.* acceptam esse tanquam dogmaticum universalis Ecclesiae Judicium, et vim « legis, tum in Ecclesiâ, tum in Regno habere, « adeo constanter cunctis, ut nullus non assensu tiri debeat, nisi mediâ luce cæcutire, et reperto « lumini oculos omnino velit occludere. » In eundem sensum, S. Facultas Rhemensis rescribit 15 julii 1750, ad S. Facultatem Parisiensem, his verbis : « Nous nous faisons gloire d'imiter « votre zèle pour l'acceptation de la Constitution *Unig.* nous sommes résolus de combattre « constamment tous les sentimens contraires à « la Bulle, que nous regardons comme une décision de l'Eglise universelle, et une loi de l'Etat. » Paria conceptis verbis asserunt Facultates Tolosana, Mompessulana, Perpignanensis, etc. » Quod autem spectat extraneas orbis catholici Universitates et Facultates, dubium non est, quin Apostolicum Constitut. *Unig.* Decretum, ab iis omnibus cum omni reverentiâ et animi obsequio colatur et agnoscat. *Tanquam dogmaticum universalis Ecclesiae judicium.* Ita imprimis Universitates et Facultates Complutensis, Connimbricensis, Cracoviensis, Duacensis, Pragensis, Lovaniensis, Coloniensis, etc. consule sæpius citata S. Facultatis Parisiensis edita decreta, parte 2, à pag. 207 ad pag. 228.

4°. Eadem S. Facultatis Parisiensis Decreta summo consensu probavere episcopi et cardinales Gallicani : constat 1°, ex egregiis ac quampluribus horumce præsulum eâ de re testimoniis ac subscriptionibus, quæ extant in præfatis actis. Vide ibid. in Comitiis S. Facultatis an. 1750, primâ junii, julii, necnon quartâ novembris, et secundâ decembris, etc. 2°, ex perhonorificâ archiepiscopi Parisiensis, nomine totius Cleri tunc Parisiis congregati, responsione ad V. D. Decanum, nomine S. Facultatis augustissimo Clero Acta ejusd. Facultatis recens edita offerentem : « Neminem latet, » inquit illustriss. Archiepis. totius conventus « præses, quanto studio Theologi Parisienses « per multa retrò secula in propugnandis fidei « dogmatibus operam impenderint. Nec vos à « Majorum gloriâ degeneres probatis..... susceptum opus promovebunt sanè saluberrima « Decreta, quibus sacra Facultas non modò « suum erga Constitutionem omnium ferè

« mundi præsulum suffragio probatam, obse-
 « quium testatur; at etiam dissidentes filios,
 « si tante auctoritati prætactæ resisterint, è
 « sinu suo ejectionem se pronuntiat. » Hæc la-
 tius deducta in citatâ collectione part. 2. pag.
 89. 3°. idem constans Cleri Gallicani consensus
 liquidò patet ex egregiis cardinalium de Rohan,
 de Bissy, de Fleury testimonis, quibus in gra-
 tiam et favorem dictorum Decretorum, hono-
 rificentius nihil proferri potest : « Legimus
 « summâ cum animi voluptate, inquit Emi-
 « nentiss. cardinales de Fleury et de Bissy, acta
 « (Comitiarum an. 1729, et 1750) quæ nobis
 « obtulistis : impensè laudamus et approbamus
 « consilium vestrum plenum catholici roboris
 « et sapientiæ.... prudentissimè pronuntastis,
 « Constitutionem *Unig.* à Clemente XI latam,
 « ac omnium fermè orbis catholici Antistitum
 « suffragio comprobata, *judicium esse dogma-
 « ticum universæ Ecclesiæ, cui Fideles omnes
 « sincerum cordis et oris præbere tenentur obse-
 « quium, etc.* »

Paria tradit Eminentissimus Card. de Rohan :
 insuper et Decretum sacri Ordinis latum die 5
 martii 1714 verum esse ac genuinum, testis lo-
 cupletissimus luculenter astruit, scriptâ ad D.
 de Romigny S. Facult. Syndicum die 2 octob.
 1750 epistolâ ; en verba : « J'ai reçu pendant
 « que j'étais au Conclave, Monsieur, les der-
 « nières délibérations de notre Faculté, au
 « sujet de la Constitution *Unigenit...* Le prin-
 « cipal article qui est traité dans ces actes,
 « concerne la conclusion du 5 mars 1714, ar-
 « ticle dont je puis rendre compte, comme
 « ayant eu grande part aux circonstances qui
 « l'ont précédé ou suivi ; » moxque totius rei
 gestæ narrata serie addit : « Le doyen pro-
 « nonça, sans aucune opposition, que la Fa-
 « culté recevait avec respect la Constitution
 « *Unig.*, et qu'elle ordonnait qu'elle fût enre-
 « gistrée avec la lettre du roi (c'étaient les ter-
 « mes dans lesquels la Faculté avait reçu la
 « Bulle *Vineam Domini*). Après cette assemblée,
 « plusieurs docteurs qui y avaient assisté, vin-
 « rent m'assurer que tel avait été le sentiment
 « du plus grand nombre. Les six anciens et
 « M. le syndic que la Faculté me fit l'honneur
 « de me députer, me donnèrent les mêmes
 « assurances, et me montrèrent leur conclu-
 « sion, telle qu'elle avait été prononcée par
 « le doyen. » Et paucis interpositis : « Les dé-
 « putés qui avaient été nommés pour rendre
 « au roi de très humbles actions de grâce de
 « l'honneur qu'il avait fait à la Faculté, en lui

« envoyant la Bulle, eurent audience le 14
 « mars. Plusieurs docteurs s'étaient joints à
 « eux ; je les accompagnai dans le cabinet du
 « roi : ils remirent la conclusion du 5 mars,
 « conçue dans les termes et en la forme qu'elle
 « a paru imprimée depuis, et je fus témoin
 « que celui qui portait la parole, assura Sa
 « Majesté, que la Faculté avait reçu la Consti-
 « tution avec respect, et qu'elle veillerait avec
 « soin à ce qu'il ne fut rien avancé de contraire
 « à ce qui y était contenu. »

Ad calcem ejusdem epistolæ adjicit Eminen-
 tiss. Cardinalis : « Je ne puis assez louer le zèle
 « qu'elle (la Faculté) a fait paraître en cette
 « occasion, ni trop applaudir à la généreuse
 « déclaration qu'elle a publiée. Non contente
 « de rendre à son premier décret son ancienne
 « autorité, et d'aneantir tout ce qui y a été
 « fait de contraire, elle reçoit de nouveau la
 « Constitution, comme un jugement dogmatique
 « de l'Eglise universelle, ce qui est la véritable
 « et la juste idée qu'on en doit avoir, la seule
 « capable de prévenir toutes les fausses subti-
 « lites, par lesquelles on cherchait à en éluder
 « la force, la seule qu'on puisse s'en former,
 « si on ne veut pas donner atteinte aux prin-
 « cipes les mieux établis, sur les caractères
 « auxquels on doit reconnaître les jugemens
 « de cette nature. » Eximia hæc Eminentissi-
 morum Cardinalium testimonia, in suis com-
 mentariis inscribenda censuit sacra Facultas.
 Ea reperire est secunda parte citatæ collect.
 pag. 115, 114, etc., et 125, 124, etc.

3°. Denique in ulteriorem eorundem sacræ
 Facultatis Decretorum confirmationem, accessit
 ad eundem, *Breve Apostolicum* ab ipso summo
 Pontifice Clemente XII, in signum suæ erga
 S. Ordinem benevolentæ, ac paternæ chari-
 tatis, latum die 16 januarii 1751, hoc in
Brevi, quæcumque pro tuenda catholica veri-
 tate tunc gessit sacra Facultas, quæque in actis
 suis an. 1750 et 1751, typis editis referuntur,
 Pontificiâ auctoritate plane confirmantur ; sed
 et inprimis commendatur *pius ille religionis
 ardor, quo S. Ordo acta perversa (injuriosam
 scilicet appellationem) abolere ; debitamque
 Apostolicis Constitutionibus obedientiam salutari
 ac filiali alacritate exhibere, omni studio ac
 diligentia curavit.* Hæc, ad asserendam et vin-
 dicandam dictorum S. Facultatis Decretorum
 auctoritatem, instar omnium sunt, omnique
 exceptione majora. His ita compositis, ipsaque
 summo consensu agnitâ Constitut. *Unig.* auc-
 toritate : Ludovicus XV pro eximio suo erga

religionem studio, ad ea firmitus stabilienda quæ hactenus pro Ecclesiasticâ pace sancita fuerant, sedens in tribunali suo omni circumdatus regie Majestatis apparatu, solemne hoc an. 1750 tulit Edictum, quo præfatam Constitutionem *Unig.* constantem Ecclesiæ pariter et regni legem esse splendide agnovit. Novo isto monumento, eoque validiori quo solemnius magis enituit, manifestissime declaravit Rex Christianissimus, perstans ac invictum in corde suo ad defensionem Ecclesiæ vigere præsidium. Regii hujusce Edicti, ad cujus normam composita sunt cætera quæ exinde hanc in rem prodiere regia diplomata, operæ pretium erit summaria hic describere capita. In primo itaque articulo, sic loquitur Regia Majestas : « Re-nouvelant en tant que besoin serait par ces « présentes signées de notre main les Edits et « Déclarations du feu Roi notre très honoré « Seigneur et bisaïeul sur la condamnation des « cinq propositions de Jansénius et sur la si-gnature du Formulaire, et en particulier « l'Edit du mois d'avril 1665 et les Lettres Pa-tescentes du dernier jour d'août 1705. Ordon-nons que les Bulles d'Innocent X, Alexan-dre VII et Clément XI, sur lesdites proposi-tions et sur la signature du Formulaire, « seront observées et exécutées selon leur for-me et teneur ; voulons en conséquence que « personne ne puisse être promu aux ordres « sacrés ou pourvu de quelque bénéfice que ce « soit, ni même en requérir aucun, sans avoir « auparavant signé le Formulaire....., de la-« quelle signature il sera fait mention dans « l'acte de réquisition, et pareillement dans « l'acte de prise de possession de chaque béné-ficé ; le tout à peine de nullité desdits actes. « Ordonnons en outre, suivant ledit Edit 1665, « que les ecclésiastiques qui, n'ayant pas en-core signé le Formulaire, refuseront de le « faire, à l'occasion du *visa* ou de l'institution « aux bénéfices dont ils demanderont à être « pourvus, soient déclarés incapables de les pos-séder, et que tous ceux dont lesdits ecclé-siastiques pourraient avoir été précédemment « pourvus, demeureront vacans et impétrables « de plein droit, sans qu'il soit besoin, à cet « effet, d'aucune sentence ni déclaration judi-ciaire, ainsi qu'il est porté par ledit Edit du « mois d'avril 1665. » In secundo, sic statui-tur : « Voulons, conformément au m^e Edit, « que lesdites signatures du Formulaire soient « pures et simples, sans aucune distinction, « interprétation ou restriction qui déroge di-

rectement ou indirectement auxdites Consti-tutions des Papes Innocent X, Alexandre VII et Clément XI, déclarant que ceux qui se serviraient dans leurs signatures desdites dis-tinctions, interprétations ou restrictions, ou qui signeraient un Formulaire différent de celui dont la signature a été ordonnée par ledit Edit du mois d'avril 1665, seront sujets aux peines portées par ledit Edit. »

In tertio subditur : « Confirmant en tant « que besoin seroit les Lettres-Patentes du 14 « Février 1714, et notre Déclaration du 4 Août « 1720, registrées dans toutes nos Cours de « Parlement, ordonnons que la Constitution « *Unigenitus*, soit inviolablement observée se-lon sa forme et teneur dans tous les Etats, « Pays et terres de notre obéissance, et qu'étant « une loi de l'Eglise par l'acceptation qui en a « été faite, elle soit aussi regardée comme une « loi de notre Royaume. Voulons que tous nos « Sujets, de quelque état et condition qu'ils « soient, aient pour ladite Bulle le respect « et la soumission qui sont dus au jugement « de l'Eglise universelle en matière de doc-trine. »

Tribus sequentibus articulis, pleraque in declaratione anni 1720, speciatim adversus Appellantes à Constitutione *Unigenit.* jam statuta renovantur ac corroborantur : ac tandem articulo 7 gravissimæ decernuntur pœnæ in auctores, venditores, typographos, quorumcumque scriptorum adversus præfatas summorum Pontificum Constitutiones, nominatim verò contra constitutionem *Unig.* horumque omnium accuratam sedulamque executionem suis supremis Parlamentorum curiis, aliisque judiciis committit ac mandat. Hæc Ludovicus XV, majorum suorum, inprimis Ludovici XIV nomine minùs ac titulo quàm re ac studio Regis Christianissimi, egregius æmulator. Regia ista declaratio, ad promovendam Ecclesiæ pacem et tranquillitatem, compescendosque turbulētissimos motus, emissa est die 24 martii 1750. hæcque, sedente in judiciario tribunali suo Ludovico XV, in supremi Senatûs Parisiensis tabulas relata est die 3 augusti ejusdem anni : in cæteris omnibus supremis Regni curiis pariter inscripta fuit. Nihil illi proinde deest ex his quæ ad supremam regni legem desiderari possunt. Et quidem variis exinde datâ occasione firmata fuit ac roborata, regis tûm epistolis, tûm Decretis et Diplomatis. Inprimis verò, vel ipso proximè sequenti anno 1751, in encyclicâ ad episcopos epistolâ, jussu Regis à

majorum sigillorum Custode scriptâ Font-Bellaqueo 22 julii, ubi sic legitur : « Le Roi « est persuadé que vous redoublez d'attention « pour faire en sorte que dans votre Diocèse, « on rende à la Constitution *Unig.* la soumission entière et parfaite qui lui est due, non « comme à une simple loi de police, mais comme « à un jugement dogmatique de l'Eglise universelle ; ou comme le Roi s'est expliqué dans « sa Déclaration du 24 mars 1750, à un jugement de l'Eglise universelle en matière de doctrine. » Pluribus etiam aliis regiis Statutis renovata est percelebris ista Declaratio : nuperimè tandem ac disertissimè, Sanctoris Consilii Decreto die 21 februarii hujusce anni 1747 lato, in quo asseritur, *Constitutionem Unig. dogmaticum esse universalis Ecclesiae judicium*; moxque subditur : « Ce sont des termes consacrés par l'usage que Sa Majesté en a fait, « soit dans sa Déclaration du 24 mars 1750, « enregistrée en sa présence au Parlement de « Paris, et ensuite dans tous les autres parlemens de son Royaume, soit dans les arrêts « qu'elle a rendus depuis cette déclaration. » Ibid. in pronuntiatio ita loquitur Regia Majestas : « Ordonne Sa Majesté que la Déclaration « du 24 mars 1750, ensemble les Arrêts rendus par Sa Majesté au sujet de l'autorité de « la Constitution *Unig.* soient exécutés selon « leur forme et teneur ; et en conséquence « veut et entend que ladite Constitution soit « observée dans tous ses Etats, avec le respect « et la soumission qui sont dûs à un jugement de « l'Eglise universelle en matière de doctrine. » Est ergo Regium istud an. 1750 edictum apud nos, circa totum præsens Quesnellismi negotium, ultima, constans et suprema Regni lex ac regula, juxta quam exortæ aut exorituræ hoc in negotio lites dirimi possint ac debeant.

Hoc eodem an. 1750, Benedictus XIII qui sex circiter annis Apostolicam Sedem gloriose obtinuerat, annos natus magis octoginta, clarus meritis ac bonis operibus, sanctam v. tam morte peregit die 21 februarii : in ipsius locum successit, sub nomine Clementis XII Cardinalis *Corsini*, eximie virtutis Pontifex : huncque proximè excepit Benedictus XIV qui jam munus Apostolicum tantâ cum laude tuetur ac sustinet. Illi tres summi Pontifices, antecessorum suorum Innocentii XIII et Clementis XI judicia circa Constitutionem *Unig.* passim confirmarunt, nullique occasione deerunt, ut disseminatas adversus Apostolicum hoc Decretum calumnias obtererent. Atque hic gradum

sistemus, nostramque concludemus historicam synopsis.

Scimus porro impræsentiarum de prætensis Appellantium miraculis, necnon de insolitis et inverecundis Convulsionariorum motibus anno 1751, et deinceps, tanto cum fastu jactatis : hæc enim, causam quam nunc tractamus, propriè non spectant ; de hisque opportunior erit alibi dicendi locus. At undè, pluribus præsum Documentis, et Theologorum scriptis confutata sunt, imprimis vero Illustriss. Parisiensis archiepiscopi Mandatis egregiè falsi convicta fuere, 15 julii 1751, 30 januarii 1752, 8 novembris 1755. Et certè, falsa sint, vera sint, quæ venditantur miracula, stupentesve nervorum distentiones ac contractiones, vana sunt omnia, quæcumque adversus *supremam*, quæ in orbe conspicua sit, *auctoritatem* adversus *Ecclesiam Catholicam* sensum ac doctrinam, adversus *Corpus episcopale* suo *Capiti dogmaticè definienti* adhærens, uti in præsentî casu, confidentiùs proferuntur. Stabant hæc, cætera in fumos ibunt. Ita firmè S. Aug. olim similem planè *Dynatistarum* jactantiam præclarè omninò confutans, lib. de Unit. Ecc.es. cap. 49. Non abs re erit eò loci adicere acta et Decreta præclaræ Artium Facultatis Parisiensis, tam super revocatione appellatois à Constitutione *Unig.* quàm super obsequio eidem Constitutioni exhibendo : Academiæ Parisiensis Rectore serenissimo Principe de Rohan-Ventadour, posthac Coadjutore Argentoratensi, necnon Eminētissimo sanctæ R. Eccles. cardinali. Itaque anno 1759. Armandus Princeps de Rohan Ventadour, Rector Universitatis Parisiensis, in comitiis generatibus die 11 mensis maii, ex factâ et, ad se scripto dilatâ à pluribus singularem Nationum Magistris postulatione, rem, præhabita eleganti oratione, in deliberationem vocavit, auditisque conclusionibus super hoc negotio per ornatissimos Nationum Procuratores relatis, sic totidem verbis pronuntiavit.

« Omnes Nationes, 1°, censent immeritò moveri difficultates adversus Constitutionem « *Unig.* à Corpore episcoporum acceptatam, « auctoritate regiâ munitam et in Regno promulgatam, quasi contraria foret Juribus « Regni, Ecclesiæque Gallicanæ libertatibus, « quibus profitentur se esse ac semper fore « addictissimos. 2°, censent revocandam esse « provocationem nomine Universitatis interjectam die 5, octobris 1718, à Constitutione « *Unig.* ad futurum generale Concilium, ac « reipsâ revocant, tam provocationem illam

« nomine Universitatis communem, pro suâ
 « singularum parte, quàm specialem suo sin-
 « gularum nomine ante institutam. » Præterea
 « censent ac volunt cancellari omnia acta ad
 « illam provocationem pertinentia, quæ in suis
 « Commentariis continentur, tum quæ prædi-
 « ctam provocationem antecesserant, quàm ea
 « quæ subsequuta sunt : postulant autem ut in
 « commentariis Universitatis, ad marginem
 « provocationis totius Academiæ nomine in-
 « terjectæ, apponatur à Scribâ fidelissimo nota,
 « quæ admoneat hanc ipsam provocationem
 « fuisse à Nationibus, pro suâ singularum parte
 « revocatam. »

5º, Eadem Nationes declarant ac profitentur
 se corde et animo amplecti Constitutionem
Unigenit. tanquàm judicium Ecclesiæ universalis
dogmaticum ac Regni legem.

Subdit Serenissimus Princeps : « Et ita vo-
 « biscum concludo : *Armandus Princeps de*
 « *Rohan Ventadour, Rector.* »

Hæc, exscripta ex actis præclaræ Artium
 Facultatis Parisiensis an. 1759, editis, pag.
 33, 34, etc.

In sequentibus comitiis die 23 junii habitis,
 jussit amplissimus D. Rector legi ab Universi-
 tatis Scribâ Decretum postremis in comitiis,
 hoc est, die 11 maii proximè elapsi, latum, ut
 Nationes singulæ suas sententias conclusiones-
 que recognoscerent. His aliisque in deliberationem
 missis, Nationes per ornatissimos Procuratores
 retulerunt.

« 1º, se rata et gratissima habere quæcum-
 « que gessit amplissimus Rector... et nomina-
 « tim Decretum die 11 factum, et à Scribâ his
 « in Comitiis lectum, in quo se singulas suas
 « conclusiones recognoscere, et, quantum opus
 « est, confirmare. 2º, postulare, ut supra me-
 « moratum Decretum, cum omnibus actis ad
 « illud pertinentibus, quamprimum typis man-
 « detur latinè et gallicè ejusque exempla, qui-
 « bus decuerit offerantur. »

3º, ut occurratur turbarum seminibus, quæ
 « ex animorum dissensione oriri solent, paxque
 « et concordia in præclarâ Artium Facultate
 « servantur, censere se ac statuere, neminem
 « deinceps in gremium Nationum esse admit-
 « tendum, nisi prius coram Natione vivâ voce
 « dicat, se adherere Decreto præclaræ Artium
 « Facultatis, die 11 maii 1759, lato. » Ejus-
 modi Statuta præclaræ Artium Facultatis,
 simillima sunt suprâ memorato sacræ Faculta-
 tis Parisiensis circâ idem negotium Decreto,
 decem circiter annis antea lato, die scilicet 15

decembris 1729, adeoque Theologica Facultas
 præclaræ Artium Facultati multis nominibus
 conjuncta, ipsi prætulit faciem, quodque iter
 ingrediendum esset, dux præmonstravit.

Ex dictis hactenus in totâ hæc nostrâ Ques-
 nellismi historica narratione planè constat,
 Constitutioni *Unig.* spiritualement perinde ac
 temporalem potestatem apertè patrocinari, at-
 que in eo utramque ex æquo consentire, ut
 suo quæque modo Decretum illud Apostolicum
 tueantur ac vindicent. Quod quidem ex dicen-
 dis articulo sequenti, iterum manifestius fiet
 ac evidentius.

His de causâ Quesnelli historice præmissis,
 judicii contra ejus librum lati, auctoritas et
 æquitas jam vindicanda est.

ARTICULUS II.

*Bulle UNIGENIT. auctoritas, æquitas geminusque
 character statuitur ac vindicatur.*

Vix apud posteros fidem inveniet, quò tan-
 dem proruperit Novatorum in impugnandâ nu-
 perâ Constitutione, temeritas et protervia. Si
 Quesnello fides : Bulla ferit 101 veritates qua-
 rum pleræque religioni sunt essentielles : ipsa
 legibus omnibus divinis et humanis adversatur :
 nequit recipi quin doctrinæ catholicæ, pietati,
 conscientiarum et Regnorum quieti, gravissi-
 mum inferatur detrimentum : imò, *ipsa* (hor-
 resco referens) *futurarum Antichristi tentatio-*
num, specimen est atque præludium. Ita sæpius
 in suis adversus Constitutionem libellis, audax
 ac temerarius Quesnellus. Audiatur in præfixâ
 Memoriali tertio admonitione, pag. 13 : « A la
 « vue de 101 vérités frappées d'un seul coup,
 « comment la foi des Fidèles ne serait-elle point
 « émue ? Plusieurs sont essentielles à la Reli-
 « gion. » Ibid. pag. 14 et 15 : « On ne peut
 « pas les nier sans renoncer à la foi. » Et pag.
 74 : « Mes propositions ne présentent point
 « d'autre sens que celui de sa doctrine (de S.
 « Augustin) : Qui peut dire par quels artifices
 « ils (les Molinistes) ont surpris la crédulité des
 « Consultants, et par eux la religion de S. S.
 « pour l'engager à proscrire une doctrine si
 « bien appuyée ? » Rursus, præfatione in septi-
 mum Memoriali, pag. 99 : « Tout cela, inquit,
 « ne prouve-t-il pas plus que suffisamment que
 « la Constitution a des défauts criants, surtout
 « en ce qui regarde la doctrine, qui ne per-
 « mettent pas qu'elle soit ni reçue, ni tolérée
 « dans l'Eglise. » Et epistolâ ad unum ex Præ-
 sultibus Comitiorum an. 1744 : « La foi, la
 « morale, la discipline, tout cela se trouve

« mortellement blessé par la condamnation
« étonnante des 101 propositions.... C'est (la
« Bulle UNIG.) un essai des tentations de l'Ante-
« christ. »

Non minus procaciter ac contumeliosè Bullam traducunt Quesnelli assecke. Auctor Instrumenti Appellationis quatuor Episcoporum an. 1717 : « Nous mettons en avant et offrons de
« prouver, que par la censure de quelques-
« unes des propositions comprises dans la Bulle,
« les fondemens de la Hiérarchie Ecclésiastique
« sont ébranlés... que la Constitution renverse
« de fond en comble les fondemens les plus as-
« surés de la morale chrétienne et le grand
« précepte de la charité... que diverses propo-
« sitions condamnées par la Constitution, n'ex-
« priment autre chose, que les sentimens des
« Prophètes, des Apôtres et des SS. Pères,
« sur la différence des deux Alliances : les au-
« tres n'enseignent que ce qui est compris,
« suivant S. Augustin, dans le premier article
« du Symbole ; d'autres enfin... sont exprimées
« dans les propres termes de l'Ecriture, des
« Conciles, des Papes et des SS. Pères. »

Auctor Epistolæ sub nomine septem Episcoporum ad Innocentium Papam XIII an. 1721, de Constitutionis UNIG. negotio agens : « Tout
« est frappant, inquit pag. 7, dans cette af-
« faire, soit pour le fond, soit pour la forme. » Tum de primo capite sic loquitur : « La Reli-
« gion attaquée dans ses dogmes ; la Hiérarchie
« dans ses droits ; la Morale de J.-C. dans ce
« qui en est la base et l'esprit ; les règles de
« la Pénitence renversées ; l'ancienne et la
« nouvelle Alliance confondues dans le point
« capital où elles sont distinguées ; la toute-
« puissance de Dieu soumise au libre arbitre de
« l'homme, et suspendue selon son caprice ;
« plusieurs autres vérités en péril ; le langage
« de l'Ecriture et de la tradition proscrit :
« voilà le sujet de nos plaintes. » Hæc de Bullæ doctrinâ. Pergit exindè, de ipsius formâ ac ratione, pag. 45 : « Dans cette malheureuse
« affaire la forme répond au fond. Un aussi
« étonnant Décret n'a pu être produit que par
« une forme non moins étonnante, et ce pro-
« cédé irrégulier, qui n'a point d'exemple dans
« les siècles passés, en laisserait un, s'il était
« autorisé, qui serait pernicieux pour l'avenir. » Quin et eò procedit personati hujus auctoris procacitas, ut non vereatur asserere, Bullam UNIG. abnorme esse judicium quod nec Roma ethnica tulisset : « L'Eglise Romaine voudrait-elle, in-
« quit pag. 55, approuver un aussi étrange ju-

gement? Rome païenne n'eût pu le souffrir. »

Insignis apud Quesnellistas Scriptor libri cui titulus : *Renversement des libertés de l'Eglise Gallicane*, tom. 2, pag. 550 : *Cet affreux Décret (la Bulle UNIG.) renverse la religion tout entière ; (en condamnant tout ce que J.-C. est venu enseigner, et enseignant tout ce que J.-C. a condamné). Dénoncer au concile cette Constitution, c'est sauver la foi, la morale et la discipline.* Illustris alter Quesnellistarum dux ac magister, in Scripto, cui titulus ; *Réponse au premier avertissement de M. l'Evêque de Soissons*, partie 6, pag. 250, inflicta per Bullam, ut effutit, Ecclesiæ in suis dogmatibus vulnera, sic describit : « La Bulle, prise comme on doit l'entendre
« de bonne foi, dans son sens propre, simple,
« naturel et littéral, donne atteinte à la doc-
« trine et à la discipline de l'Eglise ; elle con-
« fond toutes les idées de la Religion Chrétienne
« sur la différence des deux Alliances, sur la
« toute-puissance que Dieu exerce sur le cœur
« de l'homme sans blesser sa liberté, sur la
« prédestination et la grace, sur la nécessité de
« la charité et l'insuffisance de la crainte, sur
« les dispositions requises pour être justifié dans
« le Sacrement de Pénitence, sur la conduite
« que doivent tenir les Ministres de ce Sacre-
« ment, sur la lecture de l'Ecriture-Sainte, et
« sur plusieurs autres points de la même im-
« portance. » Mox addit : « La Bulle accable
« de malédictions non seulement l'auteur du
« livre qui n'a parlé que le langage de l'Ecri-
« ture et des Pères ; mais elle rend suspect et
« elle décrie ce langage même de la piété chré-
« tienne, et les expressions les plus saintes et
« les plus autorisées sous lesquelles la doctrine
« de l'Eglise a été transmise d'âge en âge jus-
« qu'à nous. » Et postea pag. 281 : « On ne
« peut recevoir la Bulle dans le sens naturel
« des propositions ; c'est renverser la foi : on
« ne peut la recevoir en s'écartant du sens na-
« turel des propositions ; c'est renverser la
« raison. Par conséquent la raison et la foi
« concourent également à nous faire rejeter
« une Bulle qui offense l'une et l'autre. »

Auctor libelli cui titulus : *Du Témoignage de la Vérité*, fervidus Quesnelli defensor, similia habet paragraph. 10 et 11 : « La Constitution
« ébranle les fondemens les plus solides de la
« religion... elle mérite l'anathème. » Ibid. pa-
« ragraph. 12 : « Elle choque les vérités les plus
« communes de la Religion. » Paria, imò et adhuc petulantiora, de Constitutione creberimè pronuntiant plerique alii ardentes Ques-

nellistæ : « C'est (quæ exscribere refugit amicus) le signal d'une affreuse conjuration contre la foi qui va s'étendre. — C'est la ruine du Symbole des Apôtres, de la prière que J.-C. lui-même nous a mise dans la bouche, et du Decalogue. — C'est l'abolition des divines Ecritures : l'abomination de la desolation dans le lieu saint : Le renouvellement de la passion du Sauveur, qui est de nouveau condamné et excommunié dans sa vérité, comme il l'a été dans sa personne par la sentence de Cuius. » Ita fanatici auctores libellorum, J.-C. sous l'anathème, passim : *La Constitution Unig. avec des remarques et des notes*, pag. 209 ; *Pratiques pour les amis de la vérité*, pag. 2 ; *Observations sur les propositions censurées*, etc. Hæc omnia citati auctores, etsi non singula singuli. Quid plura ? « C'est un véritable Décret d'apostasie ; c'est une apostasie complète et si manifeste qu'on cesse d'être Chrétien, lorsqu'on est assez malheureux pour s'y soumettre ; » ita in Scriptis : *Entretiens d'un Jésuite et d'une Dame*, pag. 605 : *Suite des lettres à un Magistrat*, pag. 59 : « C'est un Décret tel que Rome paenne n'eût pu le souffrir. » Ita auctor Epistolæ ad Innocent XIII sub nomine illustrissimi de Colbert, Montis-Pessulani episcopi, pag. 20. Non absimilia habet anonymus scriptor Epistolæ ad Benedict. XIII pag. 47, etc. Denique, quod cuncta ab infrunitis, venenatisque calamis adversus præfatam Constitutionem inverecundè prolata, paucis complectitur : *C'est l'ouvrage du Diable*. Ita furens auctor Epistolæ quæ asservatur in Bibliothecâ regiâ, sub hoc titulo : *Lettre de Dom Thierry, en date du 18 Février 1725*.

Jam verò, hæc atque alia, Quesnelli ejusque assecrarum nefaria circa Constitutionem *Unig.* convicia, ut ex ordine refellamus, tria quæ fert præsentis articuli titulus, triplici exequemur paragrapho, adversus falsa totidem et erronea dissidentium placita. I°. Æquitatem seu canonicitatem Bullæ *Unig.* demonstrabimus. II°. Inconcessam ejusdem stabilieimus auctoritatem. III°. Naturam, genuinumque ipsius characterem aperiemus. Tribus his rite ac firmiter statutis, nonnulla gravissimi momenti, quæ exindè sponte fluunt, eruentur consecraria : sit itaque

§ PRIMUM. Bullæ UNIGENIT. asseritur æquitas ac canonicitas. Decreti alicujus æquitas seu canonicitas, triplici intelligi potest et adstrui ratione ac methodo. Primò : demonstrando juxta omnes præscriptas à jure regulas, latum fuisse

Decretum. Secundò : ostendendo Decretum illud, dogmaticum esse universalis Ecclesiæ judicium : quis enim iniquum ausus fuerit pronuntiare, in materiâ præsertim doctrinali, totius Ecclesiæ judicium ? Tertio : theologice probando, hoc est, ex Scripturis et traditione evincendo, sancitam per Decretum doctrinam, recte et catholicæ fidei congruere : proscripta verò dogmata, eidem fidei repugnare, eique plusvè, minusvè adversari. Nunc in asserendâ Constitutionis *Unig.* æquitatē, priori hærebimus methodo : ex dicendis verò sequentibus paragraphis, necnon articulo tertio, facillimum erit duplici posteriori methodo, ejusdem Apostolici Decreti æquitatem clare colligere.

CONSENSIO. Æquissima est et canonica Clementis XI. Constitutio, quæ incipit *Unigenit.*

Probatur 1º, his omnibus momentis quibus supra disputat. de Baio, et disputat. de Janzenio, evicimus, Bullas Urbani VIII *In Eminentî* adversus Baium, et Innoc. X. *Cum occasione* adversus Jansenium, æquissimas fuisse ac canonicas : hæc enim omnia, quod vel leviter attendenti manifeste patebit, Constitutionis *Unig.* æquitatem ac canonicitatem perinde adstruunt. Probatur 2º, illa profectò æquissima est et canonicè lata definitio, quæ data fuit à sanctâ Sede, post maturum examen, ad instantiam episcoporum ; et quâ exitialis ac perniciosus proscribitur liber, servatis ad amissum debitis formalitatibus : atqui sic se habet Constitutio *Unig.* ; ergo. Major ex sese, et ex omnium consensu certissima est. Minor verò per partes demonstratur.

Iº quidem, data fuit à sanctâ Sede, veraque est ipsius lex : namque primò, à summo pontifice Petri successore, Christique in terris vicario, lata est, de consensu cardinalium ; secundò, ad cunctas directæ Ecclesias ; tertio, rite promulgata ; primò Romæ, tum in Galliis ubi natus fuerat error. Quæ tria, ex *tenore* bullæ, et ex dictis in *Synopsi historica* constant. Verum est ergo bulla *Unig.* sanctæ Sedis judicium, veraque lex.

IIº, nonnisi post maturum examen lata fuit : præterquam quòd enim jam accurate Romæ perpensus fuerat *Reflexionum moralium* liber, cum à Clemente XI proscriptus est speciali Decreto die 15 julii an. 1708, maturiori adhuc examine discussus fuit, antequam solemniter adversus ipsum daretur Constitutio *Unig.* uti disertè testatur in eadem constitutione S. pontifex : ibi enim de præstitâ à se in eo novo examine perficiendo, quàm maximâ curâ ac

diligentiâ sic habet: « Hinc adspirante Domino, ejusque celesti ope confisi, salutare opus sedulo diligenterque, ut rei magnitudo postulabat, aggressi sumus, ac plurimas ex prædicto libro, juxta suprà recensitas respectivè editiones fideliter extractas, et tum gallico, tum latino idiomate expressas propositiones à compluribus in sacrâ theologiâ magistris, primò quidem coram duobus ex venerabilibus fratribus nostris sanctæ Romanæ Ecclesiæ cardinalibus (Ferrari è sacrâ Dominicanorum Familiâ et Fabroni è Clero) accuratè discuti: deinde verò coram nobis, adhibito etiam aliorum plurium cardinalium (Spada, Casini et Tolomei) consilio, quàm maximâ diligentia ac maturitate singularum insuper propositionum cum ipsomet libri textu exactissimâ collatione, pluries iteratis congregationibus, expendi et examinari curavimus. » Et reipsâ, totum illud examinis negotium tantâ curâ peragi voluit S. pontifex Clemens XI, ut congregationibus non interfuerit modò, summâque præfuerit attentione, sed et à se compositis, et propriâ manu conscriptis animadversionibus, disertè Consultorum expenderit suffragia, suamque quoad propositiones singulas distinctè ac dilucidè enuntiaverit sententiam. Perduravit autem examen illud plus quam annum integrum. Si talis inquisitio, talisque diligentia, ad accuratam discussionem non sufficiat, quod unquam sufficere valeat omninò non intelligitur.

IIIº insuper, præfata Constitutio ad instantiam episcoporum, necnon ad repetitam regis Christianissimi efflagitationem data est, ad compescendo nimirum emergentes in Galliis, occasione libri *Reflexionum moral.* motus: utrumque ibid. clarè significat S. pontifex: « Frequentibus orthodoxæ fidei zelatorum querelis, inquit, MAXIMÈ VERÒ COMPLURIUM VENERABILIUM FRATRUM, PRÆSERTIM GALLIÆ EPISCOPORUM, LITTERIS AC PRECIBUS EXCITATI, gliscenti morbo (editâ Constitutione) obviam ire decrevimus. » Et paulò post: « Non modò præfati episcopi, sed et ipse inprimis charissimus in Christo filius noster Ludovicus Francorum rex Christianissimus.... sæpius nobis est contestatus, repetitis proptereâ verè piis et Christianissimo rege dignis officiis, atque ardentibus votis à nobis efflagitans, ut instanti animarum necessitati, prolatâ quantociùs Apostolici censurâ judicii, consuleremus. » Scilicet, ut supra notavimus, occasione Quesnelliani libri graves inter epi-

scopos excitatæ fuerant contentiones. ut autem illa componerentur dissidia, apostolice Sedis judicium ab episcopis imploratum fuit, præcibusque sæpius iteratis pontificem sollicitavit rex Christianissimus ut imminenti malo, solemni editâ Constitutione, occurreret. Hæc porrò episcoporum, regisque Christianissimi agendi ratio omninò erat canonica; ut enim ex constanti praxi et Ecclesiæ canonibus probat Petrus Aurelius, auctor adversariis minimè suspectus, in octo causas spongiæ præambulas, pag. 210, tunc ad Sedis apostolicæ judicium necessariò recurrendum est, cùm causa ita obscura est et perplexa, ut de illâ propter deceptionem consentire non possint episcopi: « Cùm enim, inquit ille, tunc nihil liqueat de quo judicetur, necesse est consilium peti à majoribus, controversiamque eorum judicio reservari. » Mox addit: « Ita passim Patres de causis omnibus majoribus statuunt. »

IVº. Liber *Observationum moralium* Constitutione *Unig.* proscriptus, omninò perniciosus est.

Constat 1º, quia id fassi sunt vel ipsimet episcopi qui dictæ Constitutioni obstituerunt: ii enim omnes, uno excepto Mirapicensi, libri illius lectionem prohibuerunt, et in suis Mandatis eundem proscripserunt, veluti *renovantem errores Jansenismi*; veluti *erroribus jam damnatis faventem*; veluti *inducentem fideles in errorem, præcipuè circa propositiones Jansenii*: ita archiepiscopi Parisiensis et Turonensis, episcopi Bayonensis, Virodunensis, Catalaunensis, Macloviensis, in suis Pastoralibus Documentis, an. 1714, diserta eâ de re cardinalis Noallii testimonia supra exscripsimus: præstat hic Bayonensis episcopi verba referre: « Tous les évêques, inquit 22 martii ejusdem anni, animés d'un zèle égal contre le jansénisme, et contre les ouvrages qui pouvaient en renouveler les erreurs.... n'ont pas balancé à proscrire celui-ci. » Quod isti suis Mandatis seorsim pronuntiârunt episcopi, id conjunctim testati sunt in instrumento denuntiationis ab ipsis constituto, die 12 januarii 1714, sic in eo declarant: « Nous sommes très éloignés de vouloir favoriser le livre des *Réflexions*, ni l'auteur: nous reconnaissons que ce livre doit être ôté des mains des fidèles; nous sommes résolus de le condamner et de le défendre dans nos diocèses. » Notanda maximè his in textibus, verba ista, *condamner*, *proscrire*: quæ non de merâ libri Quesnelli prohibitione aut interdictione œconomicâ sunt intelligenda; sed de verâ damnatione: hæc autem cùm sit

nota theologica, iudiciumque dogmaticum, perversam habet pro objecto immediato libri proscripti doctrinam.

Constat 2^o dicti libri perversitas, quia Quesnellus, ejusque consiliorum omnium participes ac socii, non dissimularunt eo fuisse *Observationes morales* in novum Testamentum conclusas fuisse, ut Jansenianæ sectæ dogmata magis ac magis stabilirentur, utque Ecclesia pastoribus, quasi veritatis vexatoribus, exprobraretur præ-tensa persecutio in Jansenii discipulos. Ita apertè declarant Dominus Isle (ipse est in clavi Quesnellianà, D. du Guel) epistolà ad Quesnellum datà die 15 martii an. 1690. Villartus epistolà ad eundem 12 aprilis 1697. Idem fatetur et clarè tradit ipsemet Quesnellus in suà ad eundem Villartum responsorià epistolà die 19 aprilis ejusdem anni 1697; harum omnium litterarum authentica et disertissima exhibent testimonia extracta eminentiss. de Bissy, in theologico quem suum fecit Tract. tom. 2, pag. cxlvj et cxlvij, illustriss. Senonens. archiepiscop. quintæ suæ Pastoral. Epistolæ part. 4, pag. 670 et 671, necnon Lucionensis et Ruppellensis episcopi Documento Pastoralis an. 1711. Eadem refert auctor libri Bruxellis editi an. 1703, cui titulus *le P. Quesnel séditieux dans ses Réflexions sur le N. Testament*, pag. 67, 68, etc., nec usquam reclamant Quesnell. aut ejus discipuli. Ex quibus liquidò patet, hanc fuisse Quesnellii in conscribendis moralibus Reflexionibus mentem, ut ne parceret iis quos ipse appellat *vexatores veritatis*; quàm nimirum appellatione summum pontificem intelligit, et episcopos eos qui Jansenianam doctrinam damnarunt. Satis fuerit impræsentiarum ipsa Quesnelli verba referre: Villartus ad Quesnellum scripserat, nimiam in libro Reflexionum moralium affectationem, nimisque studium videri, in iis notandis et arguendis, qui prætenso Augustini discipulos vexabant ac persequabantur; sic autem citatà mox epistolà rescribit Quesnellus: « Mais cela paraît trop affecté ? Tant mieux ; il y a une bonne affectation : qu'on dise un jour que le livre en question a été fait durant la persecution, on ne se trompera pas : si les persecuteurs le prennent pour eux ; c'est ce qu'on désire ; qu'ils en soient touchés. » Nihil disertius.

Hic fatetur ultrò Quesnellus, « se in mente et votis habuisse, ut vexatores id quod ipse scripserat sibi dictum putarent ; » fatetur verè deinceps dictum iri, « fuisse suum opus vexationis ac persecutionis tempore conscriptum ;

« imò expedire ut id dicatur ; » fatetur id se consecutum sedulò fuisse, ut Scripturæ loca ad vexatores transferret ; sed nimirum addit « hanc bonam esse probandamque affectationem, et sancti Augustini exemplo, » qui ad Donatistas, Arianos, Pelagianos aliosque sui temporis hæreticos, ea de quibus ad populum verba faciebat, solebat accommodare, *id à se factitatum esse*, ibi-dem contendit. Quæ quidem aperta ac multiplex Quesnelli confessio, ipsum erroris ac rebellionis spiritu ductum fuisse in suo componendo opere, prodit ac manifestat, adeoque dictum opus meritò reprobandum ac proscribendum.

Constat 3^o ejusdem Quesnelliani libri nequitia, quia præfato libro, præsertim verò damnatis 101, propositionibus, integra renovatur, et ad amussim continetur genuina Jansenii doctrina: id ultrò confitentur ac constanter tradunt, imò in eo jactantiùs gloriantur Quesnellus, ejusque celebriores assecræ; de quo videri possunt citata initio hujusce paragraphi expressa eorum testimonia: necnon *Caus. Quesnell.* pag. 167, et seqq. hincque non ignobilis apud Quesnellistas auctor libelli cui titulus: *Quatrième Gémissement de Port Royal*, ita scribebat: « Les 101 propositions condamnées renferment justement toutes les vérités différentes que les disciples de S. Augustin, ont toujours soutenues depuis 70 ans. » Jam verò ex abundè dictis et probatis canonico et irretractabili judicio damnata fuit genuina Jansenii doctrina; jure ergo ac meritò proscriptus quoque fuit tot nominibus exitiosus *Reflexionum moral.* liber, hæreticam Jansenii doctrinam restaurans, totque ac tam perversas continens, apertèque tradens propositiones.

Constat 4^o quia ex *moralibus Reflexionibus* extractæ et per Bullam *Unig.* damnatæ 101 propositiones censurâ dignissimæ sunt, ut ex brevi earum instituendâ sequenti articulo analysi, planum fiet; ergo. His adjici potest, concors omnium cujuscumque regionis episcoporum et cardinalium, necnon quinque continenter Romanorum Pontificum suffragium, in reprobandis Quesnelli libro et 101 propositionibus: is sanè constans et unanimis consensus; nefariæ libri et propositionum doctrinæ, apertissimum est et certissimum argumentum. Consule sequenti paragrapho dicenda.

5^o denique, dicta Constitutio præfatum librum, extractasque ex eo damnans propositiones, servatis ad amussim formalitatibus lata est, nullisque scatet abusibus aut defectibus:

nulli in ipsius formâ, aut in modo et ratione quâ data est, occurrunt reprehendendi abusus, nullaque clausula moribus et usibus nostris repugnantes: in toto siquidem hoc negotio, ad declinandas dissidentium vitiligationes, sedulò omissæ sunt loquendi rationes, cæteraque externa et ascititia quæ usibus nostris Gallicanis non satis congruunt. Ita vel ex ipsâ solâ contextûs Bullæ inspectione; necnon ex præmissi modi quo Bulla lata est, historicâ narratione manifestè patet. Atque hinc regius in supremo Senatu procurator D. de Fleuri, in suâ an. 1714, ad supremam curiam Oratione pro regii Diplomatis super promulgatione Constitutionis *Unig.* in Acta relatione, de istâ Bullâ sic habet: « On ne trouvera point dans la forme extérieure de cette Constitution (*Unigenit.*) ni la cause du propre mouvement du Pape, ni les autres clauses ordinaires contre lesquelles notre ministère nous a souvent obligés de nous élever..... On y fait même une mention honorable des instances réitérées du Roi qui ont donné lieu à la constitution. » Hæc, ex dicendis mox, et in solutione objectionum, iterum illustrabuntur. Est ergo Constitutio *Unig.* post maturum examen, ad instantiam episcoporum à sanctâ Sede, servatis exactè formalitatibus data; est, inquam, omni ex parte legitima, nihilque ipsius æquitati ac canonicitati deest.

Probatur 3^o: cunctis contententibus Orthodoxis, dogmaticum universalis Ecclesiæ iudicium erroris, aut iniustitiæ incusari nequit; neque defectu formalitatum hujusmodi iudicio detrectari potest obedientia: aliàs de Ecclesiæ infallibilitate ac Sanctitate prorsus foret conclamatum; atqui ex demonstrandis duobus sequentibus paragraphis, Bulla *Unig.* dogmaticum est totius Ecclesiæ iudicium; ergo. Vel hoc unicum argumentum invictum omninò est ac decretorium. Unum hic addo: cunctis, quas ex defectu formalitatum undequaque congerunt adversarii, dissolvendis querelis et expostulationibus ex se planè sufficiens: scilicet, vitiosum ex parte formæ decretum; neglectis ac posthabitis formalitatibus acceptari potest ac debet quoad doctrinam auctoritate legitimâ proscriptam: formalitates enim assertæ veritati cedere debent; hæcque illis prævalere. Ita disertè præsules Gallicani, in comitiis Provincialibus an. 1699 habitis, occasione Constitutionis Innocent. XII adversus librum *De Placitis Sanctorum*; inprimis verò Cardinalis Noallius in Conventu Parisiensi ejusd. anni

1699. Vide suprâ, ubi de Baïo. Quidquid itaque sit de prætensis adversus Constitutionem *Unig.* ex defectu formalitatum improprietatis abusus, eo præcisè ipso quòd, uti sequentibus demonstrabitur paragraphis, dogmatica sit universalis Ecclesiæ lex, vim habet ineluctabilis definitionis, cui Fideles omnes interno mentis assensu acquiescere tenentur. Verùm, ut Apostolici hujus Decreti magis ac magis firmetur ac innotescat æquitas ac canonicitas,

Solvuntur Objectiones. — Quæ ad labefactandam Constitutionem *Unig.* ipsiusque æquitatem ac canonicitatem proscindendam, expostulationes et convicia passim protrudunt Quesnellus, ejusque sequaces: alia spectant personam Quesnelli; alia librum ipsius; alia doctrinam in 101 propositionibus proscriptam; alia modum configendi dictas propositiones; alia libertates nostras, quas Clementinâ Constitutione funditus eversas, præfidentiùs jactitant. Juvat ea sigillatim referre, ac paucis confutare.

Dices 1^o. Quesnellus non est auditus antequàm damnaretur; ergo non fuit canonica illius damnatio; imò, *vel ipsa* damnatorio hujusmodi iudicio, *humanitatis et Gentium jura violantur, quibus sacratissimè cavetur ne quis inauditus damnetur et indefensus.* Ita sæpiùs Quesnellus in suis *Apologeticis et Memorialibus*: ita etiam Quesnelli defensor in *Hexapl.* an. 1714. præfat. pag. 39 et 42. auctor respons. sub nomine sex Episcop. ad Documentum Pastorale Eminentiss. de Bissy an. 1722. cap. 1, pag. 3 et 4, necnon scriptor libelli cui titulus: *La Vérité rendue sensible*, art. 5 sect. 1, pag. 189, aliique. Respondeo: ubi de libro, vel textu aliquo damnando agitur, necesse non est ut auctor audiatur; liber enim ipse pro se testimonium perhibet: porrò Constitutio *Unig.* versatur circâ librum proscribendum, et configendas ex eo extractas propositiones, quarum doctrina et sensus obviis discuti faciliè potuit absque auctoris præsentia: non debuit ergo audiri Quesnellus. Ita fermè in simili occasione respondet illustriss. Bossuet. scribens ad Moniales Portûs Regii: « Je ne m'arrêterai point, » inquit pag. 10, à ce que l'on objecte, que le « Pape n'a entendu qu'une des parties avant de « condamner les propositions et le livre même « de Jansénius. Car... il suffit de dire en un « mot... que dans un tel examen, un livre est « lui-même son accusateur, et lui-même son « défenseur.... et à parler proprement, il n'y « a point d'autre partie à entendre que le livre « même. » Idem doctissimus præsul simillima

tradit in causâ illustrissimi Cameracensis Archiepiscopi : « La seule pièce nécessaire , inquit , in notis super Responsione ad narrationem Quietismi art. 14, pag. 200, au jugement que l'on attend avec respect ; c'est le « livre des *Maximes des Saints* en original et « bien distingué de sa version infidèle , et de « ses interprétations captieuses et après coup. » Inaudito ergo auctore , imò nec lectis in defensionem libri scriptis , jure ac meritò liber proscribi potest. Ad id quod additur, *Jura sacratissimè cavere ne quis inauditus damnetur* : effatum , ut verba ipsa indicant , de *personali* , non de *dogmatico* exponendum judicio ; hoc est , de *personâ* , non de *libro* auctoris intelligendum. Scilicet , secundùm Ecclesiæ Canones (idque naturali consentaneum est æquitati) , nemo propter assertos errores personaliter damnatur , nisi priùs ipse auditus , aut saltem citatus sit , constetque ipsum dictos errores reipsâ propugnasse , hisque pertinaciter adhærere : sic Quesnellus ab archiepiscopo Mechliniensi juridicè citatus est , antequam ut contumax et fugitivus damnaretur ; sic etiam paulò ante auditus fuerat Petrus Codæus Romæ citatus ob Jansenismi suspicionem , et ab Apostolico per Belgium Vicariatu idcirco depositus. Verùm , uti jam dictum , in Constitutione *Unig.* non de *personali causâ* Quesnelli actitatum fuit , sed quæstio ibi mota de *dogmaticâ causâ* , hoc est , de libro *Reflexionum moralium* , et propositionibus ex illo extractis : de quibus , quemadmodum asserit doctiss. Bossuet. mox citatus , ex solâ textûs inspectione absque ullâ auctoris interpretatione , pronuntiare licet. Hinc , uti supra notavimus , omnes episcopi dissidentes , uno fermè excepto Mirapicensi D. de la Broue , publicis instrumentis *Reflexionum moral.* librum prohibuerunt ac damnaverunt , ipso tamen *personaliter* inaudito Quesnello : quin et octo ex ipsis , duce Eminentiss. Card. Noallio , in contestatâ denuntiatione 12 januarii 1714 , conjunctim latâ , suum de libro Quesnelli quem in propriâ personâ nondum audiverant , judicium ita aperiunt : « Les cardinaux , archevêques et « évêques soussignés déclarent... qu'étant très « éloignés de vouloir favoriser le livre des Ré- « flexions , ni l'auteur , ils reconnaissent que « ce livre doit être ôté des mains des Fidèles , « et ils ont résolu de le condamner et d'en dé- « fendre la lecture dans leurs diocèses. » Ipsemet Quesnelli Apologista qui objectionem proponit , denuntiationem hanc laudat pag. 51 et 52 , huicque , subscripsère duo illustriss. de Cay-

lus Altissiodor , et de l'Angle Boloniens. episcopi , ex præsulibus quorum nomine scripta est citata ad dictum Documentum Eminentiss. de Bissy Responsio , in quâ eadem etiam fit objectio. Atque hæc semper fuit constans Ecclesiæ praxis , ut libri et scripta inauditis auctoribus plerumque proscriberentur. Sic tria famosa capitula in Concilio V œcumenico fuere damnata quorum auctores pluribus antea sæculis è vivis excesserant : sic etiam in eodem Concilio , proscripta Origenis tribus antea sæculis demortui doctrina. Quin et S. Pontifex Theodorus ad Paulum Constantinopolitanum Patriarcham scribens , declarat , in Pyrrhum licet absentem , inquiri posse , ipsiusque litem ordinari ac deponi ; quòd scilicet extarent ipsius scripta veritati apertè adversa , notoriiq. forent ejusdem excessus : « Non enim , inquit t. 5, Concil. pag. 1777 , præsentia ejus necessaria est , « ubi excessus ejus et scripta veritati reputantia præsto sunt. » Quantò potiori jure idem dici potest in præsentî Quesnelli Causâ !

Dices 2°. Damdari non potuit , nec debuit , liber qui diutissimè à fidelibus non innoxie tantum legebatur , sed etiam cum spiritali quamplurimum profectu , idque nemine contradicente , imò plurimum approbantibus plerisque doctrinâ ac pietate eximiis præsulibus : atqui sic est de Quesnelli libro : à 40 prope modum annis fructuosè lectitatus fuerat , generaliter approbatus in Ecclesiâ ; ergo , etc. Ita Quesnelli defensor , *Hexapl.* auctor Tom. 1. Paragraph. 1 , pag. 6, 7 et seqq. , ubi prætentam hanc generalem libri *Observat. moral.* approbationem fusè prosequitur. Respondeo 1°, negando maj. constat enim pluribus exemplis , plerosque exitiales libros nonnisi multò post ab ipsorum editione proscriptos fuisse ab Ecclesiâ : namque Origenes famosum suum *de principiis* opus scripsit circa an. 217 , nec tamen damnatum fuit à sanctâ Sede , nisi circa annum 400 , Anastasio S. Pontifice ; ipsaque universa Ecclesia idem opus non proscripsit nisi an. 553 , in concilio quinto œcumenico , hoc est , tribus plusquam sæculis à morte auctoris. Pariter scripta Theodori Mopsuesteni edita quarto sæculo , non fuerunt tamen confixa nisi circa medium sexti sæculi , in eodem V Concilio generali. Innoxium ergo non ex eo præcisè dijudicandum opus , quod diù in Ecclesiâ indemnatum permanserit. Respondeo 2°, negando min. siquidem ex dictis in historicâ causâ Quesnellianæ synopsi planè liquet , librum Quesnelli ubi sufficienter innotuit , à plu-

ribus statim Doctoribus et Episcopis fuisse impugnatum et damnatum. Vide supra art. 1 paragraph. 2, quæ s. 5 et 4. Falsum est ergo quod ejusd. libri acerrimi defensores arrogantius jactant, 40 annis publicâ laude ac constanti pace potitum fuisse *Reflex. moral.* librum.

Dices 5^o. Libertates nostras læd. aut etiam destruit constitutio *Unig.*; numquid enim Gallicanis stando libertatibus, causa libri Quesnelli prius judicari debuisset in Galliis ubi controversiæ enatæ fuerant, quam Romæ; ergo. Istud ex eversis, ut jactant, per Clementinam constitutionem nostris libertatibus, indesinenter obtrudunt Quesnellistæ. Ita auctores omnes citati initio hujusce paragraph. inprimis anonymus scriptor libri cui titulus: *Renversement des libertés de l'Eglise Gallic.* etc. Respondeo quod hic perpetuò opponunt adversarii, inane prorsus esse tericulum, merumque effugium ad eundas tenebras, fucumque incautis aut imperitis faciendum. Enimverò quorumnam, queso, est scire nùm Pontificio aliquo decreto violentur Ecclesiæ Gallicanæ et regni libertates ac jura? an privatorum quorundam variis partium studiis ac præjudiciis abreptorum? an regis ipsiusmet, supremorum magistratum, ac maximè episcoporum, quibus præ cæteris incumbit quæ sint Ecclesiarum suarum libertates agnoscere, easque tueri? Porro, quidquid sit de pauculis nonnullis Quesnellianarum partium studiis; certè Regia Majestas, supremi magistratus, ipsique præsules nostri, nequiquam judicant libertates Gallicanas, juraque regni constitutione *Unig.* labefactari. Et quidem 1^o, regni ac regiæ suæ auctoritatis jura, dictâ constitutione minimè violari judicavit Ludovicus XIV. Is enim hujus Bullæ promulgationem et executionem omni studio curavit datis hanc in rem 14, februar 1714, Regiis litteris. Augusti decessoris sui vestigiis firmiter insistens Ludovic. XV, idem non minori studio variis decretis ac diplomatibus firmavit Ludovicus XV, præfatamque Bullam in universo suo regno vim legis obtinere disertè declaravit, præsertim Edictis 1720 et 1730, necnon decreto sanctioris Consilii 21 februar. an 1747, in quo sic legitur: « Il semble qu'on n'ait cherché qu'à faire valoir encore le vain prétexte de la conservation des Maximes du Royaume: prétexte dont les ennemis de la constitution ont si souvent abusé pour faire croire au Public qu'ils étaient les seuls défenseurs de ces Maximes, dont sa Majesté a été et sera toujours le protecteur. » Eadem quoque Constitutione, li-

bertates Ecclesiæ Gallicanæ nullatenus lædi, nedùm judicârunt, sed et invictè demonstrârunt præsules nostri, tum in eximio pastoralis documento an. 1714, tum in duobus an. 1717 ad Aurelianensium ducem, supremum tunc regni moderatorem, memorialibus; tum in doctrinali suo, super consultatione causidicorum Parisiensium, judicio an. 1728, regio jussu lato: istud idem, cardinales, archiepiscopi et episcopi, pluribus aliis publicis instrumentis, conjunctim separatimve pro datâ occasione, luculenter declarârunt: hincque omnes, paucissimis exceptis, dictam Constitutionem, tum in frequentibus Cleri comitiis, tum in privatis suis sedibus, omni obsequio ac veneratione exceperunt. Denique in supremarum omnium curiarum Tabulas inscripta fuere regia pro Constitutionis *Unig.* executione diplomata: atque unus è præcipuis Magistratibus (D. de Fleuri), expressè de illâ Bullâ asseruit: « On ne trouve point dans sa forme extérieure les clauses ordinaires contre lesquelles leur Ministère les a souvent obligés de s'élever. »

His certè omnibus Ecclesiæ et Regni libertatum locupletissimis testibus planè constat, nec Gallicanæ Ecclesiæ libertates, nec Regni jura Clementinâ Constitutione ullatenus violari. Etverò, Ecclesiæ Gallicanæ libertates, ex illustrissimis Bossuet et Marcâ, generatim ac potissimum consistunt in jure insistendi antiquis Canonibus et usibus *Apostolicæ Sedis et Ecclesiarum consensione* firmatis, novosque quos sibi expedire judicaverit inducendi; modò *nec fidei, nec moribus, nec receptis per totam Ecclesiam consuetudinibus* adversentur: atqui prædictis Canonibus et usibus, ut per se patet, ne vel minimùm obsistit aut reluctatur Clementina Constitutio: nimirum post maturum ac diligens examen data fuit ad instantiam Episcoporum qui Sedem Apostolicam, ut in causis majoribus fieri solet, consuluerant: novam ipsam non infert disciplinam, sed perniciosam in libro Quesnelli contentam proscribit doctrinam: ipsa demum, ut ex dictis et probatis liquet, servatis ad amussim debitis formalitatibus, promulgata fuit, uti jam ostensum est; ergo præfata Clementis XI Constitutio Gallicanis libertatibus nequiquam adversatur. Ad id quod in confirmationem propositæ objectionis opponitur: scilicet, juxtâ laudabiles Ecclesiæ Gallicanæ libertates, prius causam libri Quesnelli indicari debuisset in Galliis ubi exortæ fuerant controversiæ: respondeo nodum hunc liquidò expeditum fuisse et abundè solutum,

diluendo suprà simile prorsus adversus canonicitatem damnationis Jansenii argumentum : vide supra. Adde , disertam hanc fuisse ac unanimem Cleri Gallicani in varias comitiis sententiam ; dogmaticas fidei causas , illæsis episcoporum juribus , ab Apostolicâ Sede discutî ac dijudicari posse , ante latum episcoporum apud quos motæ fuerunt controversiæ judicium. Ita eminentiss. Noallius , prout refertur in Actis verbalibus comitorum generalium an. 1700 : pag. 286 : « Souvent les causes de la foi ont été portées immédiatement « au S. Siège , surtout lorsque les erreurs « étaient soutenues par les évêques. » Ibidem, archiepiscop. Rhemens. et Turonens. pag. 504 et 599 : « Ce serait une ignorance grossière , « de prétendre que les questions de la foi doivent toujours aller par degrés.... On a commencé par le jugement du Supérieur , quand « on l'a jugé nécessaire , comme le plus propre « et le plus efficace. » His consentaneè D. d'Aguesseau , Franciæ Cancellarius , in egregiâ quam habuit ad supremum Senatum Parisiensem Oratione , pro perscriptione Bullæ Innocent. XII adversus librum : *De Placitis Sanctorum* , sic habet : « La forme de la décision peut « être différente , quand il ne s'agit que de « censurer la doctrine , et non pas de condamner la personne de son auteur : et quoique « la vigilance du Saint-Siège préviene celle « des autres Églises , le droit des évêques demeure le même inviolablement. » Porro in præsentî negotio , non de personali Quesnelli causâ , sed de proscribendo dogmatico ejus libro agebatur : minimè ergo labefactatæ libertates Ecclesiæ Gallicanæ , latâ primùm Romæ in librum Quesnelli censurâ.

Dices 4^o. Nonnullis ex propositionibus damnatis , præsertim ex 91 circâ excommunicationem , quæ sic ait : « La crainte d'une excommunication injuste ne nous doit jamais empêcher de faire notre devoir ; » inferri omninò potest aliquid Regni usibus et Regum nostrorum auctoritati contrarium : hinc in ipsâ regii Diplomatis relatione in acta supremæ Parisiensis curiæ , inserta exceptio , his verbis : « Sans que la condamnation des propositions « qui regardent la matière de l'excommunication puissent donner atteinte aux maximes « et usages du royaume , etc. » ergo. Respondedo distortè omninò ac nequiter contra obvium Constitutionis sensum à malignis hominibus ad conflandam Decreto Apostolico invidiam , istas Regni et Regum nostrorum juribus ad-

versas ex Clementinâ Constitutione erui conclusiones : nihil simile ex tali Decreto sequi , apertissimè demonstrant præsidens nostri in eximio suo an. 1714 Documento , tum ex propriis citatæ propositionis verbis ; tum ex subjectâ materiâ ; tum ex variis auctoris , loci et temporis circumstantiis. Describendum hic , tametsi prolixius , doctissimorum Præsulum testimonium , adeò egregium est , et præsentî nostræ causæ accommodatum. Exscriptâ 91 propositione : *La crainte d'une excommunication injuste ne nous doit jamais empêcher de faire notre devoir ;* sic inquit illustriss. antistes : « Si l'injustice de l'excommunication est constante , si le devoir est un devoir réel et véritable , la proposition renferme une vérité « à laquelle il est impossible de se refuser ; « mais si l'excommunication n'est injuste que « dans l'idée de celui qui en est frappé ; si le « devoir est un faux devoir ; s'il y a même « de l'incertitude sur l'injustice de l'excommunication et sur la réalité du devoir , la « proposition est fautive.... C'est au tribunal « de leur conscience qu'ils s'en rapportent « pour décider de la justice , ou de l'injustice « de l'excommunication ; ils la trouveront certainement injuste : et elle ne les empêchera « pas de faire ce qu'ils appellent leur devoir. » Perguat : « La circonstance des temps et des « erreurs , qui affligent l'Église ; la nature de « l'ouvrage , la situation de son auteur , tout « sembloit exiger que dans une matière aussi « délicate , on s'expliquât clairement et sans « ambiguïté ; et tout détermine au mauvais « sens , quand le vrai sens n'est pas mis en « évidence. Pour en être convaincu , il n'y a « qu'à lire les écrits , qui depuis près de 60 « ans , qu'on a commencé à demander la signature du Formulaire , ont été répandus « dans le Public. Ils enseignent qu'une excommunication injuste ne doit jamais empêcher « de faire son devoir ; mais ils décident en « même temps , que le refus de la signature « du Formulaire est un vrai devoir ; et que « l'excommunication attachée au refus de cette « signature , est une excommunication injuste.... Par là un prêtre attaché à leur doctrine , s'autorise à ne pas signer le Formulaire , et à dire la Messe , quoiqu'il soit interdit ; un laïque à faire ses prières , quoiqu'il « soit excommunié.

« Reconnaissez , mes chers frères , les justes « raisons , qui ont porté le souverain Pontife « à condamner cette proposition ; reconnais-

« sez aussi (notanda verba) l'artifice avec lequel on a publié que l'esprit de la Constitution étoit, qu'on déférât à toutes sortes d'excommunications, sans excepter même celles, qui seraient lancées pour nous faire agir contre des devoirs essentiels et invariables, afin d'alarmer par cette supposition les Fidèles de tous les états, et les magistrats en particulier. » Puisque interpositis, concludunt : « Il aurait donc fallu, si l'on voulait parler de l'excommunication injuste, distinguer les différentes sortes d'excommunications injustes, et les différentes espèces de devoirs : il aurait fallu observer que celles, qui sont à jure, c'est-à-dire qui sont fondées sur les anciens Canons et sur les décisions reçues généralement dans l'Eglise, ne sont jamais injustes ; quoique celles, qui sont ab homine, c'est-à-dire, qui partent de quelque Puissance Ecclesiastique, puissent être injustes quelquefois. Il aurait fallu enseigner que chaque particulier n'est pas Juge de la justice ou de l'injustice de l'excommunication contre lui ; que dans le doute, la présomption est toujours pour les Supérieurs, et que les inférieurs doivent obéir jusqu'à ce que le doute soit levé par un jugement juridique. Il aurait fallu distinguer les devoirs de la loi naturelle et divine, qui sont immuables, tels que sont le culte de Dieu, la fidélité qu'on doit à son Prince et à sa Patrie ; et les devoirs, qui changent quelquefois, et dont on doit s'abstenir dans certaines circonstances, tels que sont les exercices extérieurs de la religion, dans le cas des excommunications, auxquelles on doit déférer. Après avoir distingué ces différents devoirs, il aurait été encore nécessaire d'expliquer que dans le doute, un particulier ne doit pas s'en rapporter à lui-même pour décider, si ce qu'il croit devoir, est véritablement devoir. C'étoit là les règles que l'on devoit suivre, si on avoit eu pour objet d'instruire les Fidèles des véritables maximes sur l'excommunication ; mais on n'a cherché qu'à rassurer contre les foudres de l'Eglise, ceux, qui par la crainte des censures, pourroient être engagés à se soumettre aux Constitutions des souverains Pontifes Innoc. X et Alex. VII et à signer le Formulaire. » Illec in rem nostram planè decretoria ; cardinales, archiepiscopi et episcopi Parisiis an. 1714 congregati. Itaque sedulo distinguendum inter varias injustæ excommuni-

cationis species : distinguendum pariter inter varia officiorum genera : alia scilicet sunt necessaria prorsus et immutabilia, qualia sunt ea ad quæ jure naturali aut jure divino tenemur, alia sunt mutationi obnoxia, et à quibus quandoque possumus, imò et tenemur abstinere ; talia sunt illa ad quæ jure duntaxat ecclesiastico adstringimur : item distinguendum inter officia quæ falsò talia putantur, et ea quæ de facto talia sunt. De quibus omnibus diversimodè omnino pronuntiandum. Cum ergo nonagesima-prima, de quâ hic agitur, Quesnelli propositio, utpote *indefinita, negans et in materiâ doctrinali*, æquivalet (ex Dialecticæ regulis, necnon ex effato theologico) propositioni universali ; ac proinde debeat intelligi de quâcumque injustâ excommunicatione, et de quocumque officio, sive immutabili et necessario, sive mutationi et relaxationi obnoxio ; hoc profectò sensu, ut ex sese patet, indubiè falsa est, necnon *scandalosa*, et auctoritati Ecclesiasticæ *injuriosa* : ex communi enim juris axioma : *sententia injusta, si modò nulla non est, timenda est, et servanda* ; illaque nos debet impedire ab implendo officio *non essentiali et dispensabili*. Quin et habitâ ratione circumstantiarum, loci, temporis, ac maximè aliorum ejusd. Quesnelli scriptorum, aliis etiam titulis, præsertim ut *schismatica et perniciosa*, damnanda est præfata propositio, ut ibidem observant dicti Præsules : namque, suum, suorumque debitum ac officium, nihil aliud est juxta Quesnellum, quàm retinere ac defendere Baii ac Jansenii doctrinam, tanquam Augustinianam, quantumcumque à Sede Apostolicâ condemnatam : scilicet contra hanc, in Quesnelli adhærentium systemate, quodlibet vibratum anathema necessariò illegitimum est, injustum, nulliusque roboris, utpotè proveniens ex errore intolerabili Scripturis sacris, et traditioni (ut ipsi aiunt) omnino contrario ; nullis proinde moventur Pontificiis censuris, totique sunt in suis adversus earum metum obfirmendis asseclis ; ut ex Gerberonii, Arnaldi, ipsiusque Quesnelli libris contra Pii V, Gregorii XIII, Urbani VIII, Alexandri VII, Clement. XI Decreta fit manifestum.

Instar omnium satis sit hic referre, quæ ex Quesnello passim narrantur in *Causâ Quesnellianâ* : ibi pag. 140, inter vera officia computat, *arctam*, ut loquitur, *obligationem* non subscribendi Formulaire, tametsi illa subscriptio sub excommunicationis poenâ præcipiatur. Ibid. pag. 141, definit archiepiscopum

Sebastenum desistere non debere ab exercendis Vicarij Apostolici muneribus, licet id illi fuisset à summo Pontifice interdictum. Imò, eo usque procacitatis progressus est, ut veritus non fuerit scribere, « esse sacrilegum, et toti « Ecclesiæ injuriosum exigere subscriptionem, « et juramentum facti (ut aiunt), Janseniani, « quod Formulario Alexandri VII continetur. » Ibid. pag. 498 et seqq. Genuina hæc circa excommunicationem placita à præsulis Gallicis dilucide exposita, contradicentium tricas et effugia penitus ocludunt; ipsamque 91 Quesnelli propositionem multiplici ex capite dammandam esse clarissime ostendunt. His præsulum, qui interfuerant comitiis an. 1714 super excommunicatione principiis, adhaerere cæteri firmè omnes per totum Regnum dispersi episcopi, qui præfatum Pastorale Documentum suum fecerunt. Iisdem insistendo placitis, in Corpore Doctrinali Eminentiss. Card. Noallii an. 1720 tradita fuit et exposita, art. 7, pag. 51 et 52, tenenda de excommunicatione doctrina, speciatim proscripta 91 Quesnelli propositio. Eadem plane ratione, propositam objectionem clare diluunt, dictæque Quesnelli propositionis virus multiplexque vitium aperte detegunt Eminentiss. de Bissy, in exquisito suo an. 1722 Mandato, pag. 51, necnon illustriss. Suessionensis, postea Senonensium archiepiscopus, primo Pastoralis Documento, pag. 17, n. 15, alique.

Cæterum quod spectat citata in object. verba, inserta à supremâ Parisiensi Curia in Decreto perscriptionis regii Diplomatis pro Constitutionis promulgatione: « Sans que la « condamnation des propositions qui regardent la matière de l'excommunication puissent donner atteinte, etc. » respondeo, clausulam hanc nullatenus infirmare Quesnellianæ propositionis dogmaticam damnationem; quia de facto nonspectavit S. Pontifex ut vellet metu excommunicationis injustæ abstinendum esse ab officio adimplendo, quod lege naturali vel divinâ evidentè præscribitur; sed esse quædam officia, vel *prætensa et minimè realia, vel duntaxat juris positivi*, à quibus excommunicationis etiam injustæ metus debeat impedire. Itaque prædicta clausula non est proprie restrictiva aut limitativa, uti jugiter ac præposterè contendunt adversarii: sed mere explicativa est ac declarativa: estque prudens ac provida cautio ad præcavendos abusos, atque ad removendas pravas et distortas contra genuinum sensum, à dolosis et malignis homini-

bus deducendas conclusiones. Undè supremæ Curiae magistratus videntur hæc in parte sectati exempla præsulum in comitiis Cleri an. 1714, qui, 25 januarii ejusdem anni acceptatâ purè ac simpliciter Constitutione, Instructionem Pastoralem postmodum ediderunt: « Ahn qu'é tant tous unis, iniquient Acta « verbalia horumce comitiatorum, pag. 54, à la « Chaire de saint Pierre, c'est-à-dire, au « centre de l'unité, par l'uniformité des mêmes « sentimens et des mêmes expressions, on « puisse non seulement étouffer les erreurs qui « viennent d'être condamnées, mais encore « prévenir les nouvelles disputes, et prévenir « contre les mauvaises interprétations des personnes mal intentionnées, dont on a déjà « vu les effets, par les écrits qu'ils ont répandus dans le public, depuis le commencement de l'Assemblée. » In eundem sensum exponenda mox dicta magistratuum clausula in Decreto inscriptionis regii diplomatis apposita.

Ita colligitur, tum ex ipsismet citati Decreti verbis, tum ex Regionum Virorum oratione eidem Decreto præviâ: quod utrumque scitâ urget Eminentiss. Card. de Bissy laudato mox an. 1722 Mandato: ibique pag. 51 et 52, datam nostram solutionem pluribus astruit et confirmat: juvat doctissimi Card. verba exscribere: « C'est dans ce même esprit (de l'Assemblée de 1714), qu'au temps de l'enregistrement de la Bulle au Parlement, Messieurs les Gens du Roi ont remontré: que « l'objet le plus important qui devoit exciter principalement l'attention de ce Corps, étoit la « condamnation des propositions qui regardent « les excommunications, et l'abus qu'en pourroient faire ceux, qui sous ce prétexte voudroient « soutenir que les menaces d'une injuste censure « pourroient suspendre l'accomplissement des devoirs les plus essentiels; et qu'il falloit empêcher que sous prétexte de la condamnation des « propositions qui regardent cette matière, on ne « puisse jamais prétendre que lorsqu'il s'agit de « la fidélité et de l'obéissance due au Roi, de la « conservation des loix de l'Etat, la crainte d'une « excommunication injuste puisse empêcher les « Sujets du Roi de les remplir. » Subdit Eminentiss. auctor: « L'Arrêt d'enregistrement « du parlement est entièrement conforme aux « demandes et aux réquisitions de Messieurs les Gens du Roi. » Hincque infer: « Que « conclure de tout cela, à moins de vouloir se « tromper ou tromper les autres; sinon qu'on

« doit regarder ce que l'Assemblée de 1714 a fait la première en recevant la Bulle, et le Parlement ensuite en l'enregistrant, non comme une restriction mise à la censure de la proposition 91; mais comme une sage précaution prise afin d'empêcher qu'on n'en abusât par une interprétation contraire à son vrai sens, pour pouvoir dire qu'elle donne atteinte à la fidélité qu'on doit au Prince et à la Patrie. » Haetenus Eminentiss. Cardinalis.

Notandum porro, Mandatum hoc Pastorale à duobus anonymis procaciter fuisse delatum an. 1725, ad Regni Præsules, et Regios in supremis curiis Procuratores, uti iuribus Regni et Ecclesiae libertatibus adversum: inter varia criminationis capita, unum istud erat, quòd scilicet Eminentiss. auctor asseruisset, à supremo Senatu minimè appositae fuisse *veras et propriè dictas* restrictiones ac limitationes, in ipsâ regii diplomatis perscriptione. Rex autem Christianissimus, Sanctioris Consilii placito die 23 maii ejusd. an. lato, auditis priùs regiis hujus causæ cognitoribus, præfatum pastorale Documentum ab impactis notis plenè perpurgavit: en regii Decreti verba: « Le Roi étant informé qu'il s'est répandu dans le public deux Ecrits anonymes... dans lesquels Ecrits ce Cardinal (*de Bissy*) est accusé d'avoir en plusieurs endroits de ladite Instruction (1722) donné atteinte aux droits les plus sacrés de la Couronne, et établi des maximes contraires aux libertés de l'Eglise de France, Sa Majesté auroit jugé à propos de prendre connoissance par elle-même d'une matière aussi importante, et auroit fait pour cet effet choix de personnes les plus éclairées, tant du Clergé, que de son Conseil, pour, après avoir examiné avec tout le soin et l'application nécessaire lesdits deux Ecrits, et lu avec la même attention ladite Instruction Pastorale, en faire leur rapport, et en donner leurs avis à Sa Majesté; à quoi lesdits Commissaires ayant vaqué pendant plusieurs Séances, ils auroient en conséquence fait leur rapport, et donné leurs avis à Sa Majesté, non seulement sur tous les chefs d'accusation renfermés dans les deux dits écrits; mais encore sur tout le contenu en ladite Instruction Pastorale par rapport au droit de la Couronne, et aux libertés du Royaume: lequel avis Sa Majesté s'étant fait représenter en son Conseil, elle auroit reconnu que *lesdits deux Ecrits anonymes ne sont qu'un tissu de calomnies et de mensonges*, et ne contiennent que des déclamations injurieuses, non-seulement à

la personne dudit sieur Cardinal de Bissy, mais au saint Siège, et à l'Ordre épiscopal... et que bien loin que ladite Instruction Pastorale contienne rien qui puisse donner le moindre fondement aux accusations formées par lesdits Ecrits, elle s'explique au contraire en plusieurs endroits très clairement pour les maximes les plus conformes au droit de la Couronne, et aux libertés de l'Eglise de France. » Hincque, Regia Majestas dictos libellos graviter proscribit, uti *criminosissimos, calumniosos, seditiosos*, etc.

Authentico isto ac illustri testimonio, dictam Eminentiss. de Bissy Instructionem tam splendide vindicantis, liquet quod ex ipsâ asseruimus; appositam scilicet à supremâ Curia in Decreto pro inscriptione Constitutionis *Unig.* clausulam, non fuisse restrictivam ac propriè limitativam, sed meram ac providam ad prævertendos abusos cautionem. Accedit ad idem evincendum, breve istud ac efficax ratiocinium: Restrictio ac limitatio *strictè ac propriè dicta*, ipsissima est exclusio genuini cujusdam ac legitimi sensus definitionis de quâ agitur: atqui genuinus ac legimus Bullæ *Unig.* sensus non est, « metum injustæ excommunicationis debere nos impedire ab implendis officiis *immutabilibus, invariabilibus*, qualia sunt officia legis naturalis et divinæ; » videlicet, « cultus Dei, fides debita Principi ac patriæ, etc. » neque id dici potest, quin gravissima, ut manifestum est, S. Pontifici et episcopis inferatur injuria; ergo. Præcipua hallucinationis causa dissidentium, hæc fuisse videtur, quòd insectè aut dolosè duo sedulò distinguenda confundant. Nimirum plura ad approbandam, quam ad improbandam propositionem requiruntur; ex axiomatico enim, *Bonum ex integrâ causâ, malum ex quolibet defectu*; hinc essentielle inter utrumque discrimen: ad approbandum textum, necesse est ut omni ex parte purus sit et integer; ad illum verò improbandum sufficit, præsertim *in materiâ doctrinali*, ut aliquâ ex parte pravus sit et vitiosus: porro, ex suprâ narratis, nonagesima prima propositio Quesnelliana, utpotè *negans, universalis, et in materiâ doctrinali*, multiplici ex parte prava est et vitiosa: multiplicem, ut liquet, nec diffiteri valent adversarii, apertè vitiosum exprimit sensum; ergo, etc. In dissolvendo isto Quesnellistarum effugio, paulò diutius hæsimus; quòd infirmum prorsus licet et imbelles, illud tamen uti invictum et Achillæum jugiter ac confidentius jactitent.

Dices 5°. *Explicationes* circa Bullam toties

et tam anxie postulatae, quibus in tuto statueretur depositum fidei sanæque Doctrinae, atque illas remanerent scholarum opiniones, à Romanâ Sede constanter recusatae sunt. Inprimis verò an. 1725. Romæ vulgati duodecim famosi articuli, capita duodecim christianæ Religionis complectentes, quæ Constitutione *Unig.* apertè violata plerisque videbantur. Horum articulorum approbatio à S. Sede enixè efflagitata fuit, datâ ab Appellantibus fide, futurum ut, obtentâ semel hac approbatione, ipsi continuò Bullæ acquiescerent : at postulatis assentiri obstinatè negavit Sedes Apostolica : id autem bonitati perindè ac æquitati videtur repugnans; ergo. Ita præ cæteris duo insignes Appellantium duces, episcopi Monspeulan. pluribus in locis, necnon Senecensis Documento Pastoralis an. 1726, die 26 augusti; ubi 12 articulos sigillatim excutit, effusèque laudat et approbat.

Respondeo : *explicationes* non sine doli ac cavillationis suspicione à plerisque fuisse petitas, ut scilicet vitii aut saltem obscuritatis argueretur Constitutio; sicque occurreretur puræ ac simplici Bullæ acceptationi; quod quidem Quesnellistarum consilium ex compluribus eorum Scriptis manifestum est, inprimis ex libello cui titulus, *La vérité rendue sensible*, art. 1. sect. 2, pag. 11, et seqq. aliundè verò requisitæ elucidationes novis, si datæ fuissent, patuissent cavillationibus : meritò ergo perseveranter negatæ. Et quidem quod spectat 12 articulos, quorum approbatio tam anxie efflagitabatur; quàm prudenter à S. Sede fuerit recusata, sequentia demonstrant :

1º, quia nonnulli ex illis articulis, utpotè ambiguis et æquivocis concepti verbis, legitimè erant errore suspecti; habitâ præsertim ratione ad auctorum mentem, et ad finem, quem sibi præfixerant, explicandi per eos Bullam *Unig.* simili de causâ, S. Hormisdas Papa, nunquam adduci potuit, ut approbaret hanc propositionem cæteroquin in se veram : *Unus de Trinitate est Christus crucifixus*; quòd scilicet à suspectis Eutychianismi proponebatur approbanda. Nimirum, ut scitè notat S. Leo Magnus : « Novatores omnibus factis et dictis nostris insidiantur, ut, si ullam illis vel tenuem occasionem demus, nos, Nestoriano (jam Baiano, Janseniano vel Quesnelliano) sensui etiam congruere mentiantur. »

2º, ex dictis articulis; alii, « ad ipsam Constitutionem nullatenus pertinee dignoscun-

« tur : » alii, « certum et à nemine impugnatum « dogma exprimunt : » alii, « liberis et in utram- « que partem in scholis agitari solitis opinio- « nibus, obstant et vim faciunt : » alii, « propter « argumenti invidiam in medium adduci non « possunt absque periculo novarum disputatio- « num ac litium : » alii denique, « verbis inde- « finitis ac negativis expressi, propter nimiam « terminorum extensionem, absolutè in se « falsi sunt et errori obnoxii. » Ita colligitur è Litteris ad Benedict. XIII directis sub nomine Cardinalium Gallican. mense octobri 1725, pag. 5 et 6, et ex Epist. Card. le Bossu, Mechliniensis archiepisc. ad eund. Benedict. XIII, die 16 martii dicti anni 1725, pag. 24 et seqq. (Idem constabit ex dicendis infra art. 5. ubi de præfatis 12 Articulis nonnulla adjicientur.) Ast nemo non videt, quantum dedecet exigere, ut ad explicandam et acceptandam Constitutionem *Unigenitus*, Apostolico judicio approbentur articuli, qui tot ac tantis obnoxii sunt incommodis.

3º. Conjuncta cum duodecim articulorum approbatione, aut quâcumque aliâ declaratione, Bullæ acceptatio, aiunt ibid. dicti Cardinales, pactum redolet et indigitat : porrò nescit Ecclesia in suis definitionibus pacisci, vel quidquam remittere de obedientiâ et obsequio, quod ipsi debetur. Sedes Apostolica, scribebat Benedictus XIII Cardinali Noallio, « sicut docili- « bus et modestè consulentibus non deest, « ita contumaces et obsequium certis sub « conditionibus paciscentes, » fastidit et respuit.

4º. Quælibet Bullæ dogmaticæ ubique receptæ (qualis est Constitutio *Unig.*), conditionata acceptatio; hoc ipso inusitata est et singularis, injuriosa Bullæ, totique noxia Ecclesiæ : primò, inaudita est et singularis, ipsâque suâ singularitate suspecta. Secundò, injuriosa Bullæ, hinc iterum supponitur, christianæ fidei capita (ut improbis clamoribus mentiuntur re fractarii) per Apostolicam hanc Constitutionem, impetita aut obscurata fuisse : eamque adeo non posse tutò suscipi, nisi juridicâ interpretatione, aut aliâ quâdam ratione, ad certos et catholicos sensus determinetur. Tertiò, toti noxia est Ecclesiæ : universa siquidem disciplina religioque decideret, si contra sacræ antiquitatis mores et Ecclesiasticas præscriptiones, prædicta conditionatæ acceptationis obtineret ratio : sic namque non Pastores Fidelibus, sed Fideles Pastoribus legem imponerent, istique illis obedire censendi forent : aliundè

verò emergentium denuò dubiorum propositione, novarumque elucidationum postulatione, Pastores in perpetuas ac interminabiles deducerentur quæstiones.

5º. Denique, quod in præsentì Bullæ *Unig.* causâ omninò decretorium videtur, petita ac prærequisita ad acceptandam Bullam explicationes, uti dictâ Epist. pag. 53. et 54. ratiocinatur Eminentiſſ. Card. le Bossu, vel sensum obviũ et naturalem Bullæ exhibebunt, vel non : si primum, rejiciuntur illæ, nisi novæ accedant elucidationes, prout rejecta fuit ipsa Constitutio : et istæ iterũ, simili de causâ, explodentur expositiones ; sicque nullus dabitur explicationum finis : si secundum, hoc est, si obviũ et naturalem sensum non exhibeant, sed aliquid ab ipso diversum ; hoc casu inclamabunt refractarii, quòd jam à S. Sede deserratur Constitutio veluti vitiosa, quòd sensui naturali et obvio substituatur alius sensus ; et consequenter, quòd sancta Sedes Apostolica non constet sibi, quòd variaverit, quòd alia atque alia tradiderit. Hincque inferent prætereà, quod quidem à natâ Constitutione effutire non cessant, explicationes esse necessarias *Ecclesie paci, veritati Cathedræ auctoritati simul et ipsius sanctæ Sedis intentioni* : quandoquidem longo post tempore tandem concessæ : scandala verò, turbas omnes ascribent prætensæ obscuritati, aliisque vitiis Constitutionis, omneque malum refundent in diuturnam illam recusationem nitidæ explicationis sensuum damnatorum. Verbo dixerim, non tantũ se vicisse gloriabuntur ; jactabunt insuper Romanam Sedem tandem agnovisse necessitatem explicationum, simul et Bullæ obscuritatem ac ambiguitatem : sicque remedium ipsum erit morbo longè gravius. His addo : tametsi prætensam duodecim articulorum approbationem obtinuissent Appellantes : non inde contentionum ac discordiarum finis : imò novæ hinc, et quidem acerbiores, exortæ rixæ, circa germanum præsertim et nativum dictorum articulorum sensum : moxque quemadmodũ anteà, *nitidam sensuum damnatarum propositionum explanationem* ; ita et jam, *nitidam sensuum articulorum approbatorum explicationem* postulassent refractarii. Quin et circa pleraque alia Bullæ capita ad quæ non ita directè spectant 12 articuli, altercari non destitissent : hoc ipsum temerè non conjicimus : ita disertè affirmat unus ex præservidis Quesnelli defensoribus, D. Soanen Senecensis Episcopus, in Scripto cui titulus : *Histoire de la condamnation de M. de Senex*, pag. 28, col.

1, his verbis : « Qu'aurez-vous fait, inquit ille præsul, en recevant les 12 articles ? Vous aurez contredit la bulle sur 12 chefs : mais que fera-t-on du reste ? » Subdit : « Pour ce qui est du corps de doctrine, Dieu me garde de m'en servir jamais pour couvrir la Bulle : il a été retouché et altéré par vingt mains différentes, et d'ailleurs le Corps de doctrine le plus exact, opposé à la Bulle, serait un vase de terre contre un pot de fer. » Paucisque interjectis addit : « Quand le Concile d'Embrun et dix autres Conciles semblables, voudraient se mêler de commenter la Bulle, ce ne serait qu'un grain de sable opposé au torrent de la Constitution. » Rursus ibidem, sic concludit : « Il n'y a dans cette affaire, de paix à attendre que par le Concile général, ou par d'autre voies que Dieu connaît. »

Paria significantius exprimit in libello sic inscripto : *Mémoire abrégé où l'on montre l'incompétence du Concile d'Embrun pour juger M. de Senex* : in ipsâ memoriali præfixâ admonitione legitur, Scriptum hoc ab ipsomet Senecensi episcopo in suæ causæ defensionem fuisse compositum, versùs initium septembris an. 1727 ; ibi porrò pag. 3, stupendam hanc et exoticam intrepidè statuit propositionem : « Notre appel subsiste et est légitime, quand il serait vrai que l'Eglise aurait parlé dans le jugement rendu sur les cent une propositions. » Neque hic sistit dictus præsul : audet asserere, inauditam hanc ac prorsus intolerandam doctrinam, innumeris è constanti traditione petitis momentis, invictè astrui : en ipsius verba : « Tant d'autorités, inquit ibidem, pag. 7, qui marquent la foi et l'esprit de l'Eglise, ses usages et ses maximes constantes, montrent avec tant d'évidence que notre appel au Concile général est légitime, qu'il faut vouloir contredire ouvertement la foi et la bonne foi pour ne se pas rendre. Il ne s'agit pas dans tous ces exemples des Constitutions des Papes, reçues et approuvées par un grand nombre d'évêques ; mais il s'agit de Constitutions reçues et approuvées par toute l'Eglise, et de jugemens rendus par les Conciles généraux, dans la forme la plus canonique, sur des livres, des écrits et des propositions des auteurs. » Obfirmatè mox addit : « c'est de tous ces jugemens que, en suivant l'esprit de l'Eglise, on a souvent appelé et dont on peut appeler. »

Audis ex Appellantium Coryphæo, juxta sacræ antiquitatis mores et Ecclesiasticas præ-

scriptiones, jure ac meritò provocari posse, à legitimis maximeque canonicis, etiam Conciliorum œcumenicorum, totiusque Ecclesiæ definitionibus, circà libros, scripta et propositiones: perperam ergo et illusoriè 12 articulorum approbationem, aut aliam quamlibet *nitidam* sensuum damnatorum explanationem, tam enixè postulabant Appellantes: iis enim obtentis, perindè stando suis principiis, valida esset et legitima remaneret eorum appellatio: ac consequenter cautè omninò abstinuit Benedictus XIII à concedendis prædictis elucidationibus.

Dices 6°. Bulla Clement XI propositiones 101 *in globo* damnat: viginti *qualificationes* propositionibus istis *respectivè* (ut vocant) reperiuntur inustæ: nec ulla sigillatim applicatur ulli propositioni censuræ nota: quid igitur discent Fideles ex eâ Bullâ, in quâ omnia confusa sunt et incerta? Unde sic: Illa definitio legitima non est, nec finiendis controversiis idonea, quæ nihil habet fixum, nihil habet determinatum: atqui censuræ *in globo*, certum nil habent, nihilque determinatum: in iis si quidem non figitur unicuique propositioni nota et qualificatio: adeoque sciri non potest quænam censuræ nota singulis competat: quodque uni scandalosum duntaxat erit aut temerarium, alteri omninò hæreticum videbitur: inutilis ergo, nec proinde æquissima ac canonicè lata talis definitio. Ita creberrimè Quesnellii vindices. Inprimis, *Renversement des libertés de l'Eglise Gallic.* t. 1, pag. 472, *Observez, sur le deuxième avertissement de M. de Soissons*, pag. 59. *Déclarat. de l'Université de Paris*, pag. 15, etc.

Respondeo 1°, novam non esse, quam adversus censuras generales et *in globo* expositionem hic instituunt Quesnellii defensores. Lutherus in concertatione habitâ Lipsiæ an. 1549, *iniquam appellat viam plures dictiones acervatim reprehendendi, non assignatâ ejusque effati notâ seu ratione censurae*. Antonius de Dominis Lib. 1 *de Republ. Christianâ*, cap. 12, eâ potissimum de causâ censuram articulorum Joannis Hus à Concilio Constantiensi factam arguit ac vellicat, « quia eorum singulorum examen non apparet: sed in confuso simul cum multis aliis sunt in sententiâ contra Joannem Hus, sub hujusmodi censurâ notati. » Idem etiam de censurâ Leonis X, adversus Lutheri articulos dictum à Petro Suavi seu *Frapaolo*, quem egregiè reprimiit Card. Palavicinus Historiæ Concilii Trid. lib. 1, cap. 21. Tales ductores sequuntur, qui generales et indistinctas censuras sigillant ac

reprehendunt. Resp. 2°, *usum* hujusmodi censurarum adeò antiquum esse ac constanter probatum in Ecclesiâ, ut illius æquitas à viro orthodoxo, nec impeti, nec in dubiam revocari queat. *Si quid tota per orbem frequentat Ecclesia*, inquit S. Aug. Epist. 54, alias 148, *quin ita faciendum sit disputare, insolentissima insania est*. Hunc ferendæ generalis censuræ modum, velut communem et ordinarium in Sede Apostolica retinuerè ac secuti sunt Sixtus IV, an. 1478, contra Petrum de Osma; Leo X, an. 1520, contra Lutherum; Pius V, 1567; Greg. XIII, 1679; Urbanus VIII, an. 1644. contra Baium. Iisdem vestigiis institère Innocentius XI, an. 1687, adversus 69 pseudomysticas Michaëlis de Molinos propositiones; Innocentius XII, an. 1699. adversus viginti tres, ex Libro cui titulus: *Maximes des Saints*, excerptas propositiones; ac tandem Clemens XI, an. 1713, solemnè contra 101 Quesnellii propositiones Constitutione; quæ quidem eâ de causâ non magis arguenda est Constitutio, quàm tot alia hujuscemodi Summorum Pontificum decreta. Accedit et ipse usus ac consuetudo Cleri Gallicani. Inter multas illius censuras quæ referuntur tom. 1. novæ collectionis Memorialium Cleri Gallic. una duntaxat reperitur lata an. 1700, quæ damnatis propositionibus singulis singulas et proprias affligat censuræ notas. Idem censuræ modus passim usurpatus legitur à sacrâ Facultate Parisiensi, uti videre est in novâ Judiciorum ejusdem facultatis collectione; ita inprimis ad 1277, 1582, 1514, 1525, etc. Denique censurarum *in globo* æquitas, vel unâ auctoritate atque exemplo planè decretorio Concilii generalis Constantiensis apertissime demonstratur: namque præfatum Concilium, sess. 8. quadraginta quinque Wicleffii articulos, et sess. 15, triginta Joannis Hus damnavit generatim duntaxat, nullâque ipsis sigillatim inustâ censuræ notâ. Quin et in eod. Concilio jussit S. Pontifex Martinus V eos, qui suspecti forent, interrogari, nùm crederent articulos illos meritò fuisse proscriptos. Undè, si prædictus indistinctæ et generalis censuræ modus, vitium habet, vitium illud in ipsam Synodum œcumenicam, proindèque in Ecclesiam redundat, quòd, vel etiam suspicari, nefas. Resp. 3°, vi generalium hujusmodi censurarum duo inprimis innotescere fidelibus, quæ ipsos scire plurimi interest: primum, inter damnatas propositiones nullam esse quæ non mereatur saltem aliquam è censuræ notis quæ in decreto exprimuntur; alte-

rum, vice versâ nullam esse in decreto censuræ notam quæ in alijum e damnatis propositionibus jure meritissimo non erat. Ita totidem verbis in actis verbalibus comitorum an. 1714, pag. 15. Ita etiam cardinales, archiepiscopi, episcopi jussu regio Parisiis congregati an. 1728, in suâ ad Regem, circa Causidicorum Parisiensium de Ebreduensi Concilio deliberationem, dogmaticâ Epistolâ, pag. 55 et 56. Itaque ad argumentum propositum, sic in formâ respondeo: Censuræ *in globo*, certum nihil habent, nihilque determinatum, *quantum ad peculiarem notarum attributionem quæ singulis propositionibus sigillatim non applicatur*, concedo: *quantum ad perversitatem ac malitiam propositionum quas Ecclesia declarat non esse orthodoxas*, nego. In hujusmodi censuris aliquid occurrit fixum ac determinatum: illud nempe de quo Ecclesia vult nos certos fieri, et quod credit ad fidem tuendam satis esse; scilicet propositiones illas quas damnat, *perniciosas esse si tradantur, periculosas si credantur: ideoque non posse ab ullo Catholico defendi*; undè per talem Ecclesiæ definitionem fixum manet propositiones damnatas esse rejiciendas, utpotè cum ex ipsis quædam sint *hæreticæ*, quædam *erroneæ*, quædam *scandalosæ*, etc. et in id fertur assensus auctoritati debitus. Quænam verò singulis censuræ nota conveniat, Doctoribus inquirendum et assignandum relinquitur, donec ab Ecclesiâ specialius id fuerit determinatum. Ita clarè colligitur ex citatis sess. 8, 15, 45 Concilii Constantiens.; ita etiam Palavicinus lib. 1 hist. Concil. Trid. cap. 21 Frapaolum confutatus: necnon Ekius in collat. Lipsiensi adversus Lutherum. At de censuris *in globo*, jam suprà, et iterum plura deinceps paragraph. 3 sequenti.

Dices 7^o. Non potuerunt legitime damnari propositiones, quæ ex Scripturâ, SS. Patribus, Augustino præsertim, Leone, Prospero, Gregorio, etc., de verbo ad verbum excerptæ sunt: atqui ita est de 101, damnatis per Constitutionem propositionibus: hæc ad verbum penè omnes ex Scripturis, sancto Augustino, aliisque patribus depromptæ sunt; quod accuratâ textuum collatione demonstrârunt Quesnellus in suis memorialibus, *Hexaplarum* auctor, in vasto suo in quatuor grandiores tomos distributo opere, aliique quamplures: ergo.

Respondeo 1^o: Novatoribus semper id fuisse familiare, ut in suis erroribus asserendis variâ passim oggerant Scripturæ sacræ et SS. Patrum testimonia. Sic Arius his abutebatur

Christi verbis *Pater major me est*. Eutychiani: contendeabant se non posse damnari, quin S. Cyrillus, ejus verba perpetuò laudabant, damnaretur. Facundus Hermianensis, ut tria capitula per quintam Synodum OEcumenicam proscripta, ostenderet esse orthodoxa, plura collegit SS. Athanasii, Basilii, utriusque Gregorii, Chrysostomi, aliorumque testimonia, notatis illis capitulis, omninò, ut jactabat, consimilia. Idem à subsequentibus Hæresiar-chis, Wicleff, Luthero, Calvino, constanter actitatum. Notum est famosum illud Ca'vini pronuntiatum: *Totus meus est Augustinus*: eundem S. Doctorem Baius et Jansenius ad omnem ferè periodum appellant: nihilominus horum omnium doctrina meritò per Ecclesiam proscripta est; idem de Quesnellianis propositionibus dicendum. Ad hæc omninò appositè in causâ illustrissimi Cameracens. Archiepiscopi, quamplurima in gratiam libri de *Placitis Sanctorum* congerentis testimonia, doctissimus Bossuet lib. cui titulus: *Les Passages éclaircis*, etc. sic observat: « Les doctes savent « que les Ariens avoient des passages des siè- « cles précédant le Concile de Nicée contre la « Divinité du Fils de Dieu, aussi apparens et « en aussi grand nombre que ceux que l'on « nous objecte. Mais sans s'étonner ni de leurs « expressions, ni de leur sainteté, ni de leur « nombre, l'Eglise a su distinguer le fond qui « a toujours été constant d'avec les expressions « qui n'ont pas toujours été également pré- « cautionnées..... Avant les disputes on peut « être beaucoup moins précautionné que de- « puis qu'elles sont émues. » Frustrâ ergo in prolixiori *Hexaplarum* opere laboratum est, in congerendis ad defensionem *Reflexionum* Quesnellianarum innumeris malè ac distortè consarcinatis Scripturarum et SS. Patrum textibus: hinc dictum opus minimè perpurgari apertum est. Et verò, ex solis Scripturæ, Patrumve verbis, truncatisque eorum textibus, Theologia facilè concinnari posset, quæ à capite usque ad calcem, sola hæreticorum dogmata exprimeret, Calviniana v. g. aut saltem Lutherana. Certè ex verbis *Virgilianis Cento* factus est Christianus: quidni ex verbis *Augustinianis Cento* fieri possit hæreticus?

Respondeo 2^o, quod spectat propositiones ex Scripturis aut SS. Patribus excerptas: an proscribi, interdici possint, necne, hæc paucis accipe. 1^o, quantum ad propositiones ex Scripturâ sacrâ extractas: dico illas, si referantur prout in eadem Scripturâ leguntur totidem

verbis, aut omninò synonymis, aut quoad sensum æquivalentibus, neque mutilentur ac depraventur; dico, inquam, illas damnari non debere: id per se manifestum: hæc quippe debetur reverentia consecratis afflatu Dei verbis, ut illa nempe semper illæsa remaneant. Attamen Ecclesia quandoque prohibere potest ne à Fidelibus usurpentur Scripturæ verba absque aliquâ exceptione quâ eliminetur sensus perversus quem illis affingunt hæretici. Sic fervente Arianorum hæresi, nolebat S. Hilarius has Scripturæ phrases usurpari: *Christus natus ex Mariâ Virgine*: et *Pater major me est*: nisi adhibitis quibusdam modificationibus, virus Arianum excludentibus. 2º quod diximus de propositionibus ex Scripturâ desumptis, idem pronuntiandum de illis quæ constanti SS. Patrum usu consecratæ sunt, et quarum ope depositum fidei ad nos usque transmiserunt: ex iis siquidem propositionibus, venerandæ, parisque cum scripto Dei verbo, auctoritatis exsurgit traditio. 3º, quantum verò ad propositiones quæ rarò et in paucis occurrunt Patribus: concorditer tradunt Theologi, post SS. Hilar. Hieron. Augustin. lib. 1 contra Julian. cap. 6, etc. id quod à paucis illis Patribus *simpliciter et securius* scriberetur nondum exortis erroribus: quodque proinde in illis excusari debet, *reprehendi tamen et damnari*, præsertim in auctoribus aliunde suspectis. Ex his patet prætensam, (quam falsò jactat *Hexaplarum* auctor) Quesnellianarum propositionum consonantiam cum disertis quorundam SS. Patrum sententiis, non posse dictas propositiones à censurâ eximere.

Respondeo 3º, negando ullam esse ex damnatis Quesnelli propositionibus, quæ reverà eadem sit, idemque significet cum iis quæ ex Script. SS. Patribus, ipsoque imprimis Augustino, proferri possunt. Equidem Quesnellus in suis *Considerationibus moralibus*, sanctorum Patrum verbis, textibusque, aliquando usus est; at *mutilis* tantum è loco suo *avulsis, corruptis*, et contra *Patrum mentem* adhibitis. Quamobrem S. Pontifex *Reflexionum* opus, extractasque ex eo propositiones damnando, SS. Patrum doctrinam minimè proscrispit, sed sensum perversum ad quem Patrum verba, citatosque eorum textus, perperam ac malignè detorquebantur: quâ in re valet istud sancti Augustini sic de Juliano loquentis lib. 2 de *Nuptiis et Concupisc.* cap. 4: « Quæ veraciter et catholicè dicta sunt, imò quæ in divinis Litteris veraciter scripta sunt, non ab isto catholicè

dicta sunt, quia non intentione catholici peccatoris dicta sunt: » pergit: « Jam propter quod ea dicit, *Pelagiana et cælestina* hæresis incipit introduci. » Paria dicenda sunt adversus *Hexaplarum* consarcinatorem: is ad purgandas Patriarchæ sui Quesnelli damnatas propositiones, atque ad prædicandam has inter et SS. Patrum textus aliqualem consonantiam, innumera Patrum testimonia proluxiori suo in opere truncavit, mutilavit, atque à propriis locis avulsa, in alienos et erroneos sensus detorsit: quod luculenter demonstratum fuit in Tractatu Theolog. jussu eminentissimi Card. de Bissy an. 1721 edito, aliisque in operibus. Ut autem pateat, quæ, celebratissimo huic inter Quesnellistas *Hexaplarum* scriptori fides sit adhibenda; non abs re fuerit nonnulla testimoniorum quæ deformavit ac falsavit exempla proferre, ex quibus de cæteris æstimari poterit. Pag. 62, laudat textum sancti August. ex *Enchirid. ad Laurent.* cap. 8: « Jam de amore quid dicam, sine quo fides nihil prodest. » Sic autem hunc interpretatur textum: « Que dirai-je maintenant de l'amour de Dieu, sans lequel on ne peut pas dire qu'il y ait de foi véritable. » Ubi per se patet quàm infida sit versio: non enim ait S. Doctor, quemadmodum ipsi fraudulenter affingit *Hexaplar.* auctor; *sine amore* (hoc est, in phrasi Quesnellianâ, absque charitate) *veram non esse fidem*; quod scripturæ, SS. Patribus, ipsique speciatim S. Augustino directè adversatur; et à Concil. Trid. Sess. 6, can. 28, disertè damnatum fuit, ut alibi demonstrabitur; sed tantum asserit, *sine amore fidem nihil prodesse*: hoc est, *ad æternam vitam esse inutilem, ut potè mortuam*. Pag. 296, ut vigesimam octavam magistri sui ab errore absolvat propositionem, quæ sic se habet: « *Prima* gratia quam Deus concedit peccatori, est peccatorum remissio; » profert textum hunc sancti Fulgent. tanquàm ex lib. 1 de remiss. peccator. , cap. 5, depromptum: « La rémission des péchés est le premier et le principal bienfait de la vocation à la pénitence. » Latine apud S. Fulgentium sic legitur: « Vocationis autem hujus ad poenitentiam principale est beneficium, gratuita remissio peccatorum. » Quo in loco manifestè se prodit pessima interpretis fides: capitalis enim vox illa, *le premier*, quæ excusandæ Quesnellianæ propositioni necessaria est, quamque ideò majusculis litteris inscripsit Quesnelli defensor, in genuino mox allato sancti Fulgent. Latino textu non reperitur: hancque peritidè sancti Doctoris adulter-

rando textum, de suo adjicit *Hexaplar*. auctor. Pag. 152, quod scribit Apostolus Galat. 3, v. 19: *Quid ergo lex? propter transgressionem posita est*, sic vertit: « La loi a été établie, pour faire des prévaricateurs. » Ubi ad nefandos suos errores probandos, vel ipsum scripturæ sacræ textum vitare ac corrumpere non veretur apologistæ: neque enim ad augendas ac multiplicandas transgressionem, legem à Deo Judæis datam fuisse tradit Apostolus, uti hic, post Jansenium lib. 3, de gratiâ cap. 5 et seq. ipsi inverecondè affingitur: sed potius docet impositam fuisse ad prævaricationem terrore et minis coercendas: vel, ad easdem declarandas; ut nimirum iis cognitis, Judaicus populus ad Mediatorem ardentius confugeret, ipsiusque gratiam sollicitius imploraret. Ita interpretes sacri imprimis SS. Chrysost. et Aug. in hunc locum.

Quamplurima alia prætermitto testimonia quæ infidus ille scriptor accisis aut detractis verbis protervè falsavit, truncavit, deformavit: quòd quidem ex accurato examine compertum fuit Gallicanis præsulibus uti testantur in egregiâ illâ quam de dicto libro censurâ ediderunt in comitiis generalibus an. 1715: « Cum accepissemus, inquit, spargi in vulgus librum cui titulus: *les Hexaples*, ou *les six colonnes sur la Constitution Univ.* diligenti discussione præviâ, nostri muneris esse duximus adhibere conatus omnes ad hunc librum tam noxium fidelibus excutiendum de manibus: in eo scriptor renovat errores è libro nuncupato: *Réflexions Morales*, etc., justissimè à sanctissimo R. Eccles. Pontifice Clemente XI, Constitutione *Unig.* et ab episcopis proscriptos... Quinimò multa passim testimonia ex iis (Scripturæ sacræ) veri lucisque hausta fontibus vitare atque adulterare, ausu planè temerario non est veritus. » Moxque gravissimis notis dictum opus configunt, his verbis: « Pronuntiamus, libro cui titulus: *les Hexaples*, etc., renovari errores sæpius à S. Sede, nominatim Constitutione *Unig.* et ab episcopis condemnatos, eoque contineri doctrinam injuriosam S. Sedi et episcopis, scandalosam, erroneam, hæreticam, et *creberrima* è scripturâ sacrâ, Conciliis et Patribus *falsata testimonia*. » Hæc præsules nostri; quæ leguntur in actis verbalibus comitiorum ejusd. an. 1715, pag. 520, 521, et 538.

Quî præfati *Hexaplarum* operis firmam ac solidam confutationem exquiri, adeat laudatum Tractatum Theolog. jussu eminentiss. de Bissy

editum, necnon librum cui titulus: *Les Anti-Hexaples*, etc. ac eruditum in quatuor volumina distributum opus inscriptum: *Constitutio Univ. theologicè propugnata*.

§ 2. *Statuitur ac vindicatur certa et inconcussa Constitutionis Univ. auctoritas.* — Tam constans est et operta Constitutionis *Unig.* firmissimo et irretractabili omnium penè orbis Catholici episcoporum suo capiti adhærentium suffragio munita auctoritas; vix ut credi queat quosdam opinione officii, debitam huic decreto obedientiam exhibere, hactenus reluctatos fuisse: ita tamen est in præsentî discordiâ: quin et ex dissidentibus plerique suis delusi et in transversum acti propriis præjudiciis dictæ Constitutionis eliminandæ causâ, eò temeritatis et audaciæ processerunt, ut non modò regiminis Ecclesiastici ab ipso Christo instituti fundamenta labefactârint; sed etiam judiciorum Ecclesiasticorum in materiis doctrinalibus formam funditus everterint: adeò ut nisi sanctæ Sedis Apostolicæ et Concilii œcumenici veneranda nomina cum laude identidem suis in scriptis appellarent, ea è provocaci Protestantium officinâ prodiisse, quivis facillè judicaret. Ita imprimis auctores *Hexaplarum*, et de *Testimonio veritatis in Ecclesiâ*, etc., testibus Gallicanis præsulibus, in laudatis adversus hos libellos censuris. Ita etiam alii quamplures recensiti initio hujusce articuli. Ut adversus hos omnes stabilietur ac firmetur orthodoxa veritas: sit

CONCLUSIO. Constitutio Clementis XI, quæ incipit *Unigenit*. certissimum est universalis Ecclesiæ judicium, cui omnes et singuli fideles corde et animo adhærere tenentur. Quamplurima sunt, tum externa, tum ex rei visceribus petita momenta, quæ gravissimam hanc invictè adstruunt conclusionem. Hæc è multis pauca jam sufficiant.

Probatur itaque primò: iis omnibus generatim momentis quibus hic et alibi evicimus Bullas Urbani VIII adversus Baium et Innocentii X adversus Jansenium, certissima esse universalis Ecclesiæ judicia: ista namque momenta, ut ex sese patebit attendenti, non minùs efficacia, imò urgentiora sunt ad ipsam Bullæ *Unig.* auctoritatem et œcumenicitatem asserendam. Probatur secundò: brevi isto ac decretorio ratiocinio: Solemnis ac publica S. Pontificis dogmatica Constitutio, cui pars Ecclesiæ notabilis adhæret, cæteris per orbem tacitè consentientibus, censetur esse, et est reipsâ judicium Ecclesiæ universalis, cui omnes et singuli corde et animo adhærere tenentur: atqui sic se

habet constitutio *Unig.* ergo. Major propositio, præterquam quòd certissima est iis omnibus argumentis quibus Ecclesiæ, sive dispersæ, sive congregatæ, demonstratur auctoritas : constat iterum hæc, tum ex S. Aug. tum ex insigniorum auctorum, ipsorumque etiam adversariorum disertâ confessione : tum denique multiplicitate invictâ ratione.

Et quidem 1^o. S. Augustinus agens de damnatoriâ erga Pelagianos sententiâ sub Innocent. I latâ, sic habet Serm. 131, aliâs 2, de verbis Apost. cap. 10 : « Jam de hac causâ duo Concilia (Africana, Milevitanum videlicet ac Carthaginense) missa sunt ad Sedem Apostolicam, inde etiam rescripta venerunt. Causa finita est : utinam aliquandò finiatur error ! » Huic Africanorum judicio per Sedem Apostolicam firmatâ tacitè duntaxat, hoc est, non reclamando consentiebant cæteræ per orbem Ecclesiæ ; et tamen S. Doctor affirmatè pronuntiat *causam finitam esse*, hoc est, supremâ et irretractabili auctoritate definitam. Undè lib. 3 contra Julianum cap. 1, n. 5, disertè asserit, competens sufficiensque judicium fuisse quo Pelagiani damnati erant, licet reclamarent 18 episcopi et ad Concilium œcumenicum provocarent : rursùmque addit, causam fuisse finitam, omnemque de eo negotio dubitationem sublatam : « Vestra, inquit, apud competens judicium communium episcoporum modò causa finita est : nec ampliùs vobiscum agendum est, quantum ad jus examinis pertinet, nisi ut prolatam de hac re sententiam cum pace sequamini : quòd si nolueritis, à turbulentâ vel insidiosâ inquietudine cohibeamini. » Paria repetit, lib. 2 ad Bonifac. cap. 3, et lib. 4, cap. ultimo n. 34, etc. Cur autem tacitus ille consensus sufficiat, hæc in mente S. Augustini ratio est : « quia, inquit Epist. 55 ad Januar. aliâs 119, Ecclesia Dei quæ sunt contra fidem vel bonam vitam, nec approbat, nec tacet, nec facit. » Hinc celebre illud sancti Coelest. : « Timeo, ait epist. ad Episcopos Galliæ, ne connivere sit hoc tacere... in talibus causis non caret suspitione taciturnitas, quia occurreret veritas si falsitas displiceret : meritò namque causa nos respicit, si *silentio faveamus errori*. » Atque, ut loquitur Felix tertius cujus pronuntiatum in jure relatum est dist. 83, cap. *Error*. et à suis deindè successoribus sæpiùs usurpatum : *Error cui non resistitur, approbatur ; et veritas cum non defensatur, opprimitur*. Undè consequens est, ab Ecclesiâ quæ est columna et firmamentum veritatis, adversùs quam portæ

inferi nunquam prævalebunt, illud censi silentio approbatum, quod ipsâ sciente nec improbante, per R. Pontificem solenni judicio definitur : neque tunc potest illi judicio error subesse, quia ipsam in Ecclesiam redundaret.

2^o. Idipsum clare tradit ac egregie explicat doctissimus Bossuet. in opere cui titulus : *Defensio declarat. Cleri Gallic.* lib. 3, cap. 2, ubi de expresso et tacito consensu verba faciens, sic ait : « Denique quocumque modo fiat, ut Ecclesia consentiat, transacta planè res est. Neque enim fieri potest unquam ut Ecclesia spiritu veritatis instructa, non repugnet errori. » Rursus ibidem, omninò appositè ad rem nostram addit : « Et nunc satis liquet de Decretis Pontificiis nullam dubitationem esse posse, receptane sint an non ? Quis enim nesciat nullis missis nuntiis, nullis perlatis litteris, de Janseniano negotio diplomata ubique obtinere : cum neminem obstrepere et reclamare audiamus. » Judice ergo illustrissimo perinde ac eruditissimo præsule, non reclamatio, ubi agitur de decreto Pontificio, certissimum est consensùs taciti argumentum. Hincque iterum subdit : « Sic enim suâ spontè per pronos animos, ab altâ sede Petri vera doctrina prolabitur : ac Romano Pontifice omnium explicante doctrinam et sententiam, nihil necesse est ut congregatâ Synodo per se tota quid censeat, Ecclesia eloquatur. » Similia docent Melchior Can. 1. 5. cap. 4. Thomassin. dissertat. in Concil. pag. 69. aliique : imprimis verò, illustriss. de Marca in scripto quod asservatur in Regiâ Bibliothecâ, sub hoc titulo : *Mémoire de M. de Marca, contenant l'examen d'une Thèse soutenue au Collège de Clermont en 1661*. Hoc in Memoriali doctissimus præsul disertissimè tradit, non secùs ac illustriss. Bossuet. mox laudatus, silentium seu non reclamationem, ubi agitur de *dogmatico S. Pontificis decreto*, certissimum esse consensùs taciti argumentum.

3^o. In eundem sensum, Petrus Aurelius (Abbas San-Cyranus) auctor Quesnellistis minimè suspectus, naturam, vim, signumque taciti Episcoporum consensùs exprimit et urget in defensione censuræ quâ clerus Gallicanus nonnullos libros sacris Episcoporum juribus adversos notaverat an. 1631 : « Hæresibus, inquit tom. 1, pag. 98, non paucis contigit, ut nimirum ab unius provinciæ aut regni episcopis damnatæ sint, cæteris consensu solum tacito, non Synodali Decretorum auctoritate suffragantibus. » Ibid. pag. 127, sic pergit « Ad tam publicam et illustrem veritatis proculcationem

(qualis fieret episcopali iudicio errorem solemniter proponente.) Ecclesia Catholica, .. silere non posset. Non enim falsum esse unquam potest illud de Ecclesiâ Dei, Augustini præconium : *Ecclesia Dei quæ sunt contra fidem, vel bonam vitam, nec approbat, nec tacet, nec facit. Nec verum esse non potest illud verbum Apostoli; non solum qui ista faciunt digni sunt morte, sed etiam qui consentiunt facientibus.* Consentiant autem dum publicè laboranti atque oppressæ veritati non succurrunt, qui debent, et qui ad hoc potissimum in Ecclesiæ tribunalibus collocati sunt. » Ergo, infert Aurelius, *cum quiescunt, probant; cum patiuntur, decernunt; cum tacent, clamant.* Moxque subiungit : « nam hæresum plerarumque damnationes non semper expressâ et præscriptâ Ecclesiæ totius consensione firmatas atque auctoratas fuisse suprâ ostendimus... Satis consensu tacito clamat Ecclesia, cum reclamare deberet, si dissentiret. Officio enim deesse et veritatem prodere universa non potest. » Hæc petrus Aurelius, quæ sanè liquidò demonstrant, vi promissionum Christi neutiquam fieri posse, in mente Aurelii, ut silant episcopi, præsertim ubi pontificio Diplomate aut error proponeretur aut procriberetur veritas : eorum proindè iis in circumstantiis silentium esse certissimum veritatis argumentum.

4°. Idem principium uti indubitatum creberrimè ac disertissimè declarat vel ipsemet Quesnell. lib. cui titulus : *Tradit. de l'Église Rom.* tom. 1, pag. 217 et 218, sic ait : « Si c'est dans le concile d'un pays particulier, comme de l'Afrique, cette Église propose au saint Siège, et par lui à toutes les autres Églises, ce qu'elle a trouvé dans sa tradition, et aucune n'y contredisant, et témoignant au contraire par son consentement, ou exprès ou tacite, qu'elle a trouvé la même chose dans la sienne, on en demeure là, et la cause est finie. » Ibid. tom. 3, p. 330, sic habet : « Le reste des Églises du monde s'étant contentées de voir entrer en lice les Africains et les Gaulois, et d'attendre ce que le saint Siège jugerait de leur différend : leur silence, quand il n'y aurait rien de plus, doit tenir lieu d'un consentement général, lequel, joint au jugement du saint Siège, forme une décision qu'il n'est pas permis de ne pas suivre. » Hæc, in rem nostram, planè decretoria. In eâ de consensu tacito veritate asserendâ, ad annum usque 1714 concorditer conspirârunt Jansenistæ. Hinc celebris apud ipsos anctor libri inscripti :

Justificat. du silence respect. tom. 1, pag. 246 : « M. de Cambrai, inquit, observe que S. Léon regarde comme décidé par l'Église universelle tout ce qui est compris dans les décrets des conciles particuliers que l'autorité du saint Siège avait confirmés. On n'a garde de douter d'une vérité si certaine. C'est une chose que les théologiens Augustiniens ont remarqué souvent, en parlant du II concile d'Orange; » et tom. 2, pag. 875 et 876, subdit : « On ne peut nier que dans le langage de S. Augustin, dire qu'une cause est finie, et dire que l'Église a prononcé un jugement infallible et irrévocable, c'est précisément la même chose..... C'est le jugement du concile confirmé par celui du premier Siège et applaudi de toutes parts, qu'il regarde comme un jugement final, suprême et irrévocable, qui ne laisse aucune ressource à l'hérésie Pélagienne. » Hæc porrò concilia, quorum definitiones prædictus auctor hic exhibet veluti totidem universalis Ecclesiæ decreta, nonnisi à nonnullis expressè, cæteris tacentibus, acceptata fuère. Id non minùs disertè exprimit alter recentior Quesnelli assella, auctor Epistolæ ad Archiepiscopum, pag. 17, ubi sic loquitur : « Suivant le raisonnement qui a été déjà fait plus d'une fois, dès que l'Église Gallicane ou quelque autre Église a accepté une décision de Rome, et que les autres Églises ne réclament point, mais demeurent dans le silence, cette décision devient infallible, comme si c'était celle d'un concile général. » Ad usque ergo bullæ Unig. tempora constans erat apud Jansenistas, dogmaticam S. pontificis Constitutionem cui notabilis Ecclesiæ pars consentit, aliis per orbem non reclamantibus, hoc ipso censi universalis Ecclesiæ iudicium; eamque infallibilis esse auctoritatis, perinde ac si à concilio œcumenico lata fuisset.

5°. In ejusdem inconcussi dogmatis confirmationem, multiplex eaque peremptoria accedit ratio : satis fuerit impræsentarium hanc indicasse quam ex laudatis sanctorum Cœlest. et August. testibus, citato mox loco colligit Petrus Aurelius : sic proponi potest : Fieri nequit, Deo ita dirigente ac providente, ut Ecclesia suo desit officio; veritatem prodât; erroremque approbet ac proponat : ita tradunt Orthodoxi omnes; idque apertissimum est prudentiæ, sapientiæ et infallibilitatis, divinitus Ecclesiæ collatæ, consecrarium : porrò, reipsâ suo deesset officio, erroremque censeretur approbare, ex hypothese quod non reclamaret adversus errorem

qui publico ac solemnī S. pontificis iudicio fidelibus ad credendum proponeretur. *Error quippe cui non resistitur, approbatur*: (ait Felix III, dist. 85, cap. *Error*) *et veritas cum non defensatur, opprimitur*: ex ipsismet ergo promissis à Christo Ecclesiæ factis, futurum ut cum ipsa sit omnibus diebus usque ad consummationem sæculi, Matth. 28, v. 20, fieri non potest, ut ex hypothesi dogmatici et erronei S. pontificis iudicii, Catholica sileat Ecclesia: hæc si quidem suā non reclamatione, seu silentio erroneum illud iudicium approbare censeretur: quod in Ecclesiam cadere nequit: hinc egregium illud antea laudatum S. Aug. pronuntiatum: « Ecclesia Dei, ea quæ sunt contra fidem vel bonam vitam non approbat, nec tacet, nec facit. » Eiverò auctoritas illa taciti episcoporum consensūs impugnari vix potest, quin saltem per latus simul impetatur infallibilitas et inerrantia Ecclesiæ dispersæ: episcopi siquidem silentio suo propositum errorem approbando, se errori obnoxios esse, eo ipso declararent: nondum tamen eo devenerunt adversarii, ut ausi fuerint apertè negare Ecclesiam dispersam in fide et moribus errare non posse; ergo, etc.

Atque hinc cum clerus Gallicanus in generalibus comitiis an. 1705, bullam *Vineam Domini* communi consensu acceptasset; nonnullique occasione quorundam verborum quibus concepta erat acceptationis formula, contendissent mentem præsulum nostrorum his in comitiis fuisse, dogmaticas summorum pontificum Constitutiones, ut vim obtineant, indigere publicà expressâ et solemnī corporis episcoporum acceptatione: falsos hos rumores propulsarunt undecim tam archiepiscopi quàm episcopi unâ cum eminentissimo card. Noallio, datâ nomine comitiorum an. 1705, quibus hi omnes interfuerant elucidatione, in hæc verba: « Cum clerus Gallicanus dixit, Constitutiones summorum pontificum à corpore episcoporum acceptatas totam Ecclesiam obligare, mens ejus non fuit, necessariam esse ejusmodi acceptationis solemnitatem ad hoc ut illa tanquam regula credendi et loquendi ab omnibus haberi debeat, licet aliquando illa solemnitas non mediocris possit esse utilitatis ubi natus est error. » Addunt: « nullam ex conditionibus necessariis ad obligandam totam Ecclesiam deesse conditionibus adversus Jansenium, Baium et Molinosum (Idem de bullâ *Unig.* dicendum) latis. » Extat hæc elucidatio in actis verbalibus comitiorum an. 1705, tom. 1, in Collect. actorum ad hæc comitia pertinentium:

extat etiam in Epistolâ card. Noallii an. 1711 ad Clement. XI datâ. Ad hæc omnino appositè in supremi Senatūs decreto, occasione bullæ adversus librum *de placitis Sanctorum* lato: tanquam quid certum et constans apud Orthodoxos à regio oratore statuitur: « que le consentement exprès ou tacite des évêques imprime à une décision, venerable par elle-même, le sacré caractère d'un dogme de foi. » Unum adijcere liceat: quæ de tacito episcoporum consensu hactenus dicta sunt, à nullo unquam, alicujus nominis theologo, ante natas occasione bullæ *Unig.* discordias, nedum negata, sed nec in dubium revocata fuisse, adeò certa erant et apud omnes explorata. De quo testes sunt vel ipsimet auctores Jansenistæ paulò antè citati qui taciti consensūs, hoc est, non reclamationis et silentii, de quo hic agitur, vim et auctoritatem, uti indubitatum, supponunt. Vera ergo et certissima major propositio præsentis hujusce argumenti: « solemnem scilicet et dogmaticam S. pontificis Constitutionem cui pars Ecclesiæ notabilis adhæret, cæteris per orbem non reclamantibus, seu tacitè consentientibus; censi et reipsâ esse iudicium Ecclesiæ universalis; cui omnes et singuli fideles adhærere tenentur. »

In adstruendâ Majori hæc propositione paulò diutius hæsimus, quòd eâ semel demonstratâ sponte fluat Minoris probatio. Minor itaque: nempe, « Bullam *Unig.* publicam, solemnem « ac dogmaticam esse S. Pontificis Constitutionem, cui Ecclesiæ pars notabilis positivè « consentit, cæteris per orbem tacitè, seu silentio consentientibus: » Minor, inquam, illa propositio, per se clara est, et ex dictis mox in probatione Majoris apertissimè sequitur. Et verò Constitutio *Unig.* à summo Pontifice de consensu cardinalium solemniter emissa, per Ecclesiam Gallicanam positivè acceptata fuit: ipsa enim in frequenti præsulum nostrorum cœtu anno 1714 recepta, à 110 et amplius episcopis qui certè Ecclesiam Gallicanam abundè representant promulgata est gravissimis hanc in rem editis mandatis, quæ uno volumine simul excusa prodire jussu et impensis Cleri Gallicani an. 1715. In his insuper ejusd. anni, et omnibus exindè subsequentibus comitiis, suum erga eandem Bullam sincerum obsequium, debitamque obedientiam constanter ac solemniter testati sunt dicti præsules. Accessit etiam tacitus aliarum Ecclesiarum consensus: quippè negari non potest, quin Bulla prædicta ante annos 53 data, ad omnium per

orbem episcoporum notitiam pervenerit : nullus tamen extra Galliam ex omnibus orbis Catholici partibus proferri potest episcopus qui contra eam reclamaverit . ergo tacite fuit ab omnibus acceptata constitutio *Unig.* eademque est , vel ipsis stando dissidentium placitis , illius auctoritas , ac si per Concilium œcumenicum esset lata : proindeque omnes et singuli fideles debent ei sincere obsequi . Atque hæc quidem ad invictam probationem planè sufficerent : verum ad contundendam adversariorum pervicaciam , nonnullasque eorum præcavendas cavillationes , diligentius expendenda , ac per partes probanda eadem propositio .

1^o Itaque Bulla *Unig.* sollemnis est et publica summi Pontificis lex et constitutio : namque publica et sollemnis summi Pontificis , sanctæque Sedis lex dicenda est Constitutio illa , quæ lata est : 1^o , de consensu cardinalium : 2^o , ad cunctas directæ Ecclesias : 3^o , ritè ac debite Romæ promulgata : atqui sic est de Clementinâ Constitutione quæ incipit *Unig.* uti ex Bullæ tenore ac contextu , necnon ex dictis in *historiâ synopsi* manifestum est : ergo .

2^o Non mera est politiæ , œconomix aut disciplinæ lex ; sed verâ ac propriè dicta dogmatica Constitutio : si quidem proponit aliquid credendum ; nempè , singulas propositiones aliquam mereri ex assignatis notam , atque ex notis nullam esse quæ alicui propositioni non competat : deindè alii qui iudicio assignantur dogmatico characteres , illudque constituunt , iidem huic competunt Constitutioni : quæ quidem vel ex ipsâ Bullæ inspectione liquent : hæcque iterum ex principiis sive patrocinantium sive adversantium Constitutioni *Unig.* paragraph. sequenti ex professo demonstrabuntur : ergo .

3^o Expressè acceptata fuit ab Ecclesiâ Romanâ : quod certè patet , primò , quia Bullæ Clementinæ nullus contradixit , quando Romæ solemniter promulgata est . Secundò , sacrum Cardinalium Collegium multiplex ac publicum obediendiæ suæ dictæ Constitutioni testimonium dedit , præsertim in celebri Epist. ad Card. Noallium scriptâ die 16 nov. 1716 ; extat hæc Epistola initio Collectionis monumentorum Mechliniensis Archiepiscopi editæ pro adstruendâ acceptatione Bullæ *Unig.* Tertiò , omnia Ecclesiæ Romanæ membra à plusquam 53 annis in eadem submissione firmiter ac constanter perseverant . Quartò , Clementi undecimo quatuor deinceps successère summi Pontifices : omnes antecessoris sui iudicium

confirmârunt , et ipsius vestigia secuti , nulli occasione defuerunt , ut disseminatas adversus Constitutiones calumnias obtinerent : speciatim verò , uti suprâ dictis vidimus , Innocentius XIII , qui in Sede Apostolicâ proximè excepit *Clement.* XI septem Episcoporum Epistolam , idcirco *schismaticam* atque *hæretico spiritu plenam* declaravit 8 januar. 1722 , quòd Clementinæ Bullæ revocationem à S. Sede postularent . Quintò denique , Ecclesiæ Romanæ erga Constitutionem *Unig.* reverentiâ præsertim enituit in Concilio Romano 1725 , præside sanctissimo Pontifice Benedict. XIII ; aderant 30 cardinales , 8 archiepiscopi , 40 episcopi , complures abbates , 33 procuratores cardinalium , episcoporum , etc . In hac autem venerandâ Synodo , egregiè commendata est ac confirmata debita præfatæ Constitutioni obedientia ; imprimis tit. 1 cap. 2 verba superius descripsimus quæ , si libet , consule . Quæ porrò quantaque sit in huiusmodi causis Ecclesiæ Romanæ auctoritas , omnibus Catholicis ex totâ traditione compertum est ac exploratum : « Ad hanc Ecclesiam , inquit S. Iren. lib. 3 de hæres. cap. 3 : Propter potiorem principalitatem necesse est omnem convenire Ecclesiam . » Addit ibid. illius indicatâ traditione , *confundi omnes eos* (Hæreticos et Schismaticos) *qui quomodo..... præter quàm oportet colligunt.* Passim dicitur et reverà est , *radix , fons et origo Traditionis Apostolicæ..... necessarium unitatis et communionis Catholicæ centrum..... Petra supra quam fundata est Ecclesia , extra cuius communionem et fidem , nemo Christi est , sed potius Anti-Christi :* ita SS. Cyp. lib. de unit. Optatus lib. 2 . adversus Parmenian . Hier. Epist. 16 ad Damas. *In ipsâ , ex S. Aug. Epist. 63 aliàs 162 : semper viguit Apostolicæ Cathedræ principatus.* Pluries in Concil. Trid. necnon in profess. fidei Pii IV , *Romana Ecclesia* disertè prædicatur à Fidelibus agnoscenda , uti *omnium Ecclesiarum Mater ac Magistra.* Pontificis in eâ Cathedrâ sedentis , *præcipuæ sunt partes ,* juxta Cleri Gallicani declarat. an. 1682 , *in fidei questionibus , ejusque decreta ad omnes et singulas Ecclesias pertinent :* atque , ut in generalibus ejusdem anni comitiis perorabat doctiss. Bossuet . « Hæc est Ecclesia quæ à beato Petro ejusque successoribus edocta hæresim non novit : ipsa semper est virgo : fides Romana semper est fides Ecclesiæ : Petrus juxta verbum Christi , semper in suis successoribus fundamentum manet Fidelium . » Juvat Gallica illustrissimi præsulis exhibere verba : « Ainsi fut

fixée à Rome, inquit, la Chaire éternelle; c'est cette Eglise Romaine qui enseignée par S. Pierre et par ses successeurs ne connaît point d'hérésie..... L'Eglise Romaine est toujours vierge: la foi Romaine est toujours la foi de l'Eglise..... Pierre demeure dans ses successeurs le fondement de l'Eglise. C'est J. C. qui l'a dit; le Ciel et la terre passeront plutôt que ces paroles. » Ipsa denique vel ex fervidissimis etiam libertatum nostrarum defensoribus, à *verâ fide nunquam deficere potest, et hæresim sequi nequit*, quamvis ejus episcopus in errorem laberetur: ita Petrus de Alliaco apud Gerson. tom. 1, pag. 710. Launoïus epistolâ ad Varillaum parte 5 epist. tom. V. Simon Vigor de infallibilit. pag. 49. Dupin de antiquâ Eccles. discipl. diss. 5, pag. 370. Nicolius exposition. in Symbol. tom. 2, pag. 415, et seq. Satis fuerit impræsentiarum Nicol. verba exscribere: « *l'Eglise de Rome*, inquit loco citato, *ne peut devenir hérétique* comme les Eglises de Constantinople, d'Antioche et d'Alexandrie lesont devenues..... *Dieu ne permettra jamais que le S. Siège, ou l'Eglise de Rome, tombe dans aucune erreur qui lui fasse perdre la foi*, et qui la fasse retrancher de la communion de l'Eglise. La raison en est que l'Eglise devant toujours avoir un chef, et n'en pouvant avoir d'autre que le S. Siège, elle ne sera jamais dans un état qu'il ne puisse plus être reconnu pour chef. »

Hoc certè uno perpetuo ac constanti totius Ecclesiæ Romanæ erga Bullam *Unig.* obsequio, omnimodâque reverentiâ, atteruntur penitus atque ad nihilum recidunt procaces illæ calumniæ, nefariaque probra ac convicia quibus præfatam bullam infamare ac proscindere veriti non fuère Quesnellistæ: quasi per illam « *impugnata apertè Religio in suis dogmatibus; hierarchia in suis juribus; Christiana morum disciplina in eo quo tanquam basi et animâ nititur; deletæ funditùs poenitentiae leges et regulæ; veteris et novi fœderis inducta confusio in eo capite quo præsertim à se invicem distinguuntur; primum Symboli caput, ipsumque divini amoris maximum mandatum, aliaque complura Christianæ doctrinæ capita labefactata, etc.* » quæ in Clement. Constitutionem probra, citatis adversariorum ipsissimis verbis initio hujusce tituli recensuimus: hæc porro nullatenùs stare posse cum eximiis illis dotibus ac prærogativis quas in Romanâ Ecclesiâ, tota agnoscit ac veneratur traditio, nemo non intelligit. Etverò, Ecclesia ad quam *propter potiorem principalitatem necessum est omnem conve-*

*nire Ecclesiam: cujus traditione et doctrinâ cuncti confunduntur hæretici: Ecclesia quæ fons est et origo traditionis apostolicæ; unitatis et communionis catholicæ centrum; omnium aliarum Ecclesiarum mater ac magistra; cujus fides semper est fides Ecclesiæ; quæ à beato Petro ejusque successoribus edocta hæresim non novit; quæ denique à verâ fide deficere et hæresim sequi nequit; illa profectò Ecclesia suscipere nequit ac acceptare, positivè ac constanter, Bullam dogmaticam quâ apertè Religio in suis dogmatibus: hierarchia in juribus: Christiana morum disciplina in fundamentalibus labefactantur ac funditùs convelluntur: apertior est ista propositio quàm ut indigeat probatione. Atqui ex laudatis modò sanctorum Patrum, nec non auctorum Gallicanis libertatibus addictissimorum disertis textibus, Romana Ecclesia præfatis gaudet dotibus ac proprietatibus: aliundè verò ipsa positivè et constanter adhæret Constitutioni *Unig.* neque enim ab annis plus quàm 33 suam erga Apostolicum illud decretum reverentiam, debitumque obsequium, egregiis, iteratisque testificationibus declarare usquam destitit; uti recensito quintuplici momento; imprimis Romani sub Benedicto XIII celebratione Concilii, planè constat; ergo.*

4^o. Gallicana Ecclesia in quâ præsertim contentio excitata fuit, cujus proindè post Romanam Ecclesiam in præsentî negotio potissimum spectanda est acceptatio ac auctoritas; suam erga præfatam Constitutionem pluribus invictis momentis expressè ac solemniter testata est adhæsiorem.

Namque primò uti suprâ in primâ *historicæ synopsis* parte, ex ipsismet comitiorum verbis, probavimus; statim ab anno 1714 in frequenti Antistitum nostrorum conventu, cum omni obsequio ac reverentiâ excepta fuit *Clementina Constitutio*; atque anno seq. 1715, à plus quàm 110 gravissimis pastoralibus documentis promulgata.

Secundò: decem exindè celebrata sunt generalia Cleri Gallicani comitia: in his, præsertim in comitiis an. 1723, 1726, 1730, renovata fuit ac firmata Bullæ acceptatio; agnitumque decretum illud, uti vera *Regni perindè ac Ecclesiæ lex*.

Tertiò: iterùm confirmata dictæ Constitutionis auctoritas, ipsique ab omnibus fidelibus debita obedientia egregiè commendata; tum an. 1717, in duplici memoriali à 28 cardinalibus, archiepiscopis et episcopis Gallicanis celsissimo Aurelianensium duci Regni tunc

moderatori oblato, adversus Bullæ *Unig.* obtretractores : tum an. 1718, in publicis Mandatis contra provocationem ab eadem Bullâ emissis à plus quàm 50 titidem cardinalibus, archiep. et episcop. tum an. 1720, in celebri Epistolâ, occasione Corporis doctrinalis Eminentiss. Noallii, ad eundem Aurelianensium ducem, Regni gubernatorem, à 97 præsulibus nostris directa. Quartò : in Ebredunensi Synodo quindecim Gallicani præsules, unanimi consensu declarârunt : « Constitutionem *Unig.* quâ 101 « Quesnelli propositiones damnantur : dogma- « ticum esse et irretractabile universalis Ec- « clesie judicium ; » quæ Synodus, ut dictum est Pontificiâ Benedict. XIII. auctoritate disertè confirmata fuit, Regioque munita diplomate.

Quintò : In totâ Galliâ, imo in universo orbe Catholico Universitas nulla est, nulla sacra Facultas quæ exhibendo huic Constitut. obsequio defuerit : ipsa inprimis theologica Facultas Paris. celeberrimo die 15 Decembris 1729 lato decreto, splendide agnoscit et amplectitur *Constitutionem Unig. tanquàm universalis Ecclesie judicium dogmaticum*. Jam verò tam externæ quàm domesticæ Universitates ad quas S. Facultatis Parisiens. acta transmissa sunt, ea summis plausibus exceperunt, seque idem sentire testatæ sunt. His accedit auctoritas Regis quæ sæpius expressè ac solemniter agnovit Constitutionem *Unig.* esse decretum quod generaliter in Ecclesiâ receptum est : illudque in toto regno observandum sancit. Ita Regia majestas edictis an. 1720 et 1750 utrumque in omnium Parlamentorum tabulas relatis ; necnon in respons. ad articulos Cleri Gallic. an. 1725, 1725, 1726, ubi conceptis verbis asserit : Constitutionem *Unig. Regni pariter ac Ecclesie legem esse*. Undè sic : Ea Ecclesia positivè adhæret constitutioni, quæ primum illam cum omni reverentiâ suscepti frequentibus in comitiis : quæ in omnibus exindè generalibus habitis cœtibus eandem acceptationem renovavit : quæ illius executionem sedulò promovit, interjectamque ab eâ Bullâ provocationem, nullam, *illusoriam- sanctæ sedi et episcopali Corpori injuriosam* declaravit : in quâ numerosa Synodus utrâque munita et roborata auctoritate defini- vit Constitutionem *Unig.* esse judicium universalis Ecclesie : in quâ denique pro ejusdem decreti executione : Regia Sacerdotali accessit auctoritas ; adeò ut non minùs Regni sit lex quàm Ecclesie : atqui sic est de Ecclesiâ Gallicanâ : ergo.

5°. Acceptata etiam fuit Constitutio *Unig.*

ab omnibus aliarum Ecclesiarum episcopis : quod quidem constat, tum ex eorum silentio ; tum ex variis eâ de re conflictis adversariorum systematibus ; tum ex quampluribus expressis, omnique exceptione majoribus testimoniis ac monumentis.

Constat itaque 1°, *ex ipsomet episcoporum silentio* : quippè negari non potest quin Clementina Bulla cujus occasione tot ac tanti à Quesnellistis excitati fuere clamores, quæque ante 55 annos data fuit ; negari, inquam, non potest, quin ad omnium per orbem episcoporum cognitionem pervenerit : attamen, paucis admodum intra Gallias exceptis, nullus omninò inventus est apud exterarum nationes, quæ Catholicam fidem profitentur, qui contra eam Bullam reclamaverit ; etsi summâ ope moliti fuerint dissidentes, ut eos ad reclamationem pertraherent : tacitè ergo ab iis omnibus fuit acceptata. Etverò, solemnibus ac dogmatica summi Pontificis Constitutio cui positivè consentit pars Ecclesie notabilis, cæteris per orbem tacitè, seu non reclamando, consentientibus ; censetur esse, et reipsâ existit universalis Ecclesie judicium : tunc qui non reclamant episcopi, censentur consentire : *Cum quiescunt, probant*, inquit Aurelius supra laudatus, *cum patiuntur, decernunt : cum tacent, clamant* ; nullusque, confidenter affirmo, ante natas occasione Bullæ *Unig.* discordias, proferri potest orthodoxus Theologus qui usquam inficiari ausus fuerit, Episcoporum in prædictis circumstantiis silentium, non esse apertissimum ac certissimum consensus taciti argumentum : (vide quæ in Majoris probationem superiùs adducta sunt) : atqui Clementina Bulla *Unig.* solemnibus est S. Pontificis Constitutio, cui pars Ecclesie notabilis positivè consensit, etc. Romæ siquidem, in Galliis, expressè et solemniter acceptata fuit : nullusque omninò extra Ecclesiam repertus est qui reclamârit ; ergo, etc. Ratio autem à priori cur episcoporum silentium, ubi agitur de solemnibus ac dogmaticis S. Pontificis Constitutione à parte notabili Ecclesie positivè acceptatâ, loco approbationis habeatur ; ratio, inquam, illa fundatur in palmari ac præcipuo Ecclesie caractere, *unitate* videlicet : hæc namque essentialis Ecclesie unitas potissimum sita est, uti post Card. Hosium et Bellarmin. notat eminentiss. Perronius in suâ ad Regem Britannie respons. pag. 549, *in externâ unitis et ejusdem fidei professione* : solveretur porrò, ut manifestum est, ea professionis fidei unitas, in hypothesi adversariorum : quod

nempè, summus Pontifex plaudente notabili Episcoporum parte, certa quadam doctrinæ capata tanquàm erronea et hæretica palam ac solenniter proscriberet; ceteri omnes Episcopi intus ac tacitè eadem puncta, veluti orthodoxa et ad depositum fidei pertinentia, retinerent ac approbarent. Quàm hæc aliena sint ab illà perfectà et omnimodà fidei unitate, quam in Ecclesià agnoscent ac commendant SS. Irenæus, Optatus, Aug. aliique Patres, nemo non videt.

Constat 2º, generalis episcoporum cæterarum Ecclesiarum acceptatio, *ex variis excogitatis occasione Bullæ à Quesnellistis systematibus* : initio quidem præfatæ Bullæ acceptionem negarunt Quesnel i asseclæ ; at exindè evidentiâ rei superati, hanc palam et apertè confessi sunt. Audiatur auctor libelli cui titulus : *Entretiens sur la Constitut.* pag. 44 : « Tout le monde, inquit, se range aujourd'hui du côté de la Bulle... Dieu par un terrible jugement a permis que le Pape Clément XI ait donné sa Constitution, et que les évêques en punition de leur peu de zèle pour les intérêts de Dieu, n'aient pas eu, les uns assez de lumière, et les autres assez de courage pour la rejeter » Addit, hæc in rem nostram decretoria verba : « Les évêques étrangers l'ont recue.... En France le courage a manqué aux évêques. » Ad hæc appositè, auctores scriptorum : *Reflex. succinctes sur la Constit.* pag. 69, et *Pratiq. pour les amis de la vérité* pag. 3, exclamant : « Le nombre des acceptans est si grand qu'il y a lieu de trembler et de craindre à la vue de la séduction générale qui s'opère aujourd'hui. » Quam hic *generalem* appellant *seductionem*, ipsa est, in eorum mente, *generalis Bullæ acceptatio*. Paria tradunt vel ipsi Appellantium duces, Senecensis et Monspensulani episcopi : ille quidem, in Epist. die 6 mart. 1754, ad periodicum nuntiorum Ecclesiast. scriptorem, his verbis : « Les funestes nouveautés qu'on veut introduire à toutes forces dans l'Eglise de Dieu, ne trouvent presque plus de défenseurs de la vérité qui osent les proscrire publiquement. » Hinc in suo, die 28 ejusd. mensis et an. Testamento spirituali, quasi divino afflatus spiritu Deum deprecatur : « d'accélérer cet heureux temps où l'on verra l'accomplissement des promesses pour la délivrance de l'Eglise, pour le triomphe de la vérité, et pour le salut d'un peuple qui profitera de l'infidélité et de l'ingratitude de celui qui a été mis à sa place. » Simillima pluries inculcat Monspensulan. episcopus lo-

cis mox citandis, præsertim Epist. 2, et 4, ad illustriss. Suessionens. præsulem, circa *promissa Ecclesiæ*. Quæ certè testimonia, generalem Bullæ acceptionem planè adstruunt.

Cæterum ut ab admittendâ hæc etiâ ubique receptâ Constitutione, sese eximere possent Quesnellistæ : ad varia erronea et apud Orthodoxos hætenus inaudita, quin et ipsismet stabilitis ab eorum ducibus *Aurelio*, *Jansenio*, ipsoque ante Bullam latam *Quesnello*, principiis omninò adversa confugerunt systemata. Mirum sanè quàm variaverint in fingendis neotericis illis et heterodoxis systematibus : ex iis alia spectant *infallibilitatis objectum* ; alia *subjectum infallibilis auctoritatis* ; alia *formam, modum, conditiones*, exercendæ infallibilitatis in Ecclesià : illustriss. Suessionensis, postea Senonens. archiepiscopus jam an. 1718 undecim recensebat in tertio suo commonitorio, quæ quidem egregiè ibidem explodit : plura exindè alia aliis magis ac magis exitiosa adjecta sunt. Horum insulstatem perspicaciores ex Quesnellistis omninò non latuit : quare incerti ubi pedem figerent, nova quæsière diverticula : aliquando *novissimorum temporum prædictiones*, interdum *miracula et convulsiones* ; ac tandem *Etiam* ipsum appellârunt, illumque advenisse jam, aut proximè venturum prænuntiârunt. Non est hujus loci præfata Quesnellistarum systemata refellere : satis fuerit impræsentiarum excogitata de novo dicta effugia summatim persequi, eaque ad Bullæ quam ubique viderant receptæ declinandam acceptionem conficta fuisse, monstrare. Itaque ad ipsas futuræ in novissimis temporibus quasi generalis, ut jactant, à fide defectionis minas ac prædictiones, primùm confugerunt Quesnelli asseclæ. Sic auctores Colloquiorum du *Prêtre Eusèbe et de l'Avocat Théophile* pag. 58, et d'un *Jésuite avec une Dame* pag. 101 : « Jamais le danger de la séduction ne fut plus grand pour les fidèles qu'il l'est aujourd'hui.... Danger du côté des séducteurs parce qu'ils sont en grand nombre : » addit iste : « Si l'on jette les yeux sur les pays que l'Eglise occupe, comme l'Italie, l'Allemagne, la Pologne, l'Espagne, le Portugal, la France et quelques États voisins, il s'élève de toute part des voix pour la bulle : très peu contre. Le parti des Opposans, des hommes fidèles à suivre la doctrine enseignée et crue avant la fatale Bulle, se trouve réduit à une poignée. » Et paulò post : « La Bulle établit et canonise l'incrédulité des Juifs ; donc voilà leur apostasie parmi nous. Nous voilà donc au terme

marqué par S. Paul..... Voilà cette mort qui a gagné presque le monde entier. » Non absimilia habent, auctor epist. ad Magistrat. pag. 83 et 84 : *Troisième vie de M. Pâris* pag. 52 et 61; *les Hexaples, la vérité rendue sensible*, etc., aliique. At audiendi præ ceteris Appellantium duces Senecensis et Monspeulanus episcopi, qui rem adhuc disertius exprimunt : « Si les prédictions de Jésus-Christi pour les derniers temps, inquit iste in suâ ad Regem Epistolâ an. 1729, pag. 8 et 9, ne donnent aucune atteinte à l'étendue et à la vérité des promesses, les promesses de leur côté ne peuvent infirmer la certitude des prédictions. » Subdit : « mais si en vertu des promesses la totalité des premiers pasteurs doit toujours être assez fidèle pour enseigner la saine doctrine, que deviendront les prédictions ? Plus de scandale à craindre. » Et in epist. Pastoralî an. 1730, pag. 22 : « Y a-t-il à craindre que la séduction puisse être portée jusqu'à entraîner les élus même s'il était possible, quand la totalité morale des premiers Pasteurs, le Pape à la tête, enseigne la vérité. » Paria ex professo tradit, pluribusque probare tentat alter acerrimus Appellantium vindex D. de Soanen, Senecensis præsul, imprimis in famoso suo an. 1728 Documento : « On ne doit point, inquit part. 4, art. 8, n. 1, diviser ce qui est vrai dans le plan de la Religion : et pour se former une juste idée de l'état de l'Eglise, il faut rapprocher sous un seul point de vue les promesses et les prédictions, comparer ensemble ces divers oracles, et ne point douter qu'ils n'aient tous un parfait accomplissement. Cette comparaison nous ouvre la véritable route pour entrer dans la question du grand ou du petit nombre. » Postea n. 2, et 3, de promissis et prædictionibus sigillatim disserit : ac deinde n. 4 addit : « Le même texte de l'Evangile qui nous assure que les portes de l'enfer ne prévaudront point contre l'Eglise, nous laisse entrevoir toute la violence des combats, qu'elle aura à soutenir.... Rien n'est plus digne d'attention, que ce que dit celui même qui a fait cette magnifique promesse ; qu'il y aura dans ce Royaume des occasions de chute et de scandale, et qu'un jour la tentation ira jusqu'à séduire même, s'il était possible, les élus. »

Tum infert : « Une telle séduction serait-elle possible dans le système que nous réfutons ? Et comment arriverait-elle en effet ? Est-ce que le très grand nombre des évêques avec le Pape manquerait d'avertir et de réclamer ? Mais on

prétend que ce très-grand nombre réclamera toujours. » Paucisque interjectis : « Supposé, que le Pape et le très-grand nombre des évêques eût toujours soin de découvrir hautement le prestige, on sent assez combien cette réclamation solennelle diminuerait la séduction.... La défection et l'apostasie dont parle l'Apôtre seraient impossibles. » Idipsum hoc et sequentibus articulis, pluries repetit Senecensis præsul.

Hæc porro, quæ duo illi celeberrimi dissidentium coryphæi creberrimè inculcant, haud obscurè indicant, ipsos ultrò confiteri, totalitatem moralem primorum pastorum, in præsentî Constitutionis negotio, Appellantibus planè adversari. Etverò, uti scitè observat illustrius Pastoralî Epist. recitata dictorum Præsulum loca expendens. n. 9 : « Pourquoi recourir à cette ressource devenue commune aujourd'hui dans le parti des Appelés ? (*les scandales qui sont prédits pour la fin du monde, le dépérissement qui doit arriver dans la foi, et la séduction générale qui, selon eux, doit envelopper alors le S. Siège, et le plus grand nombre des évêques*) ? Pourquoi établir avec tant de soin par de si longs écrits, que la totalité morale des premiers Pasteurs peut dans les derniers jours être enveloppée dans l'obscurcissement de l'erreur : que sans cet obscurcissement les prédictions ne pourraient s'accomplir ?.... On sent aisément que rien n'est plus déplacé que ce raisonnement, si aujourd'hui les Appelés n'ont point à combattre contre la totalité morale des Pasteurs, présidée par leur Chef. Si le corps des premiers pasteurs n'était pas réuni pour la défense du Décret Apostolique, et pour la condamnation de ceux qui s'y opposent, il était tout naturel de le dire. Il n'y avait qu'à nommer le pays où la Bulle n'est pas reçue, les Eglises qui la rejettent, les Prélats qui la combattent, les Papes qui la révoquent, les Conciles qui la méprisent : mais cela ne se peut. Or la marque la plus sensible que cela ne se peut, c'est que les prélats eux-mêmes ont recours aux prédictions, et ils s'efforcent de prouver que le Pape avec la totalité morale des premiers pasteurs peut s'égarer dans la foi, et qu'il le peut sans préjudice des promesses que J. C. leur a faites. » Subdit : « Nous verrons dans la suite que c'est là, non pas expliquer, mais abolir cette promesse divine : c'est assez maintenant de remarquer dans ce raisonnement, la preuve claire et évi-

dente de ce fait si long-temps contesté, que la totalité morale des premiers pasteurs, ayant le Vicaire de J. C. à sa tête et marchant sur sa conduite adopte le décret Apostolique et condamne le parti des Appelans. » Haecenus doctissimus præsul, quæ sanè, à nobis modò dicta mirum in modum confirmant. Istud Quesnellistarum in præsentì acceptationis Bullæ negotio effugium, eorumque latens in illo excogitando consilium, manifestè aperit celeberrimus inter Appelantes auctor quatuor Epistolarum ad illustriss. Suessionens. episcopum, circa promissa Ecclesiæ : « Les menaces contenues dans la parole de Dieu, inquit ille Epist. 4, pag. 13, ne permettent pas de croire que les promesses faites à l'Eglise, se vérifient toutes... dans le grand nombre et même dans la totalité morale de son corps. » Et pag. 15 : « Il est prédit qu'il y aura une apostasie qui peut être appelée générale en comparaison de celles qui auront précédé... l'Eglise ne périra pas cependant tout entière, les vrais disciples de J. C. seront tourmentés et hais de toutes les nations à cause de son nom : il y en aura donc ; mais il y en aura peu. » Ibid. pag. 26 et 27, subdit : « Dans les temps les plus fâcheux Dieu réserve à son Eglise une semence précieuse de restes favoris... restes qui peuvent ne faire qu'une très petite partie de l'Eglise ; et qui se réduisent à un nombre d'autant plus petit, qu'on approche davantage de la consommation du mystère d'iniquité. »

Clara sunt hæc et aperta : jam periculosis his in temporibus, ex citato auctore versamur, in quibus occasione acceptationis Bullæ, mysterium iniquitatis peragi incipit : quod apertiùs ibid. pag. 17, declarat his verbis : « Cependant tout nous avertit de craindre l'accomplissement total des menaces comme tout en avertissoit les Juifs du tems de J. C. et des Apôtres. Le vrai esprit de la loi étoit prêt à se perdre, parce que les Pharisiens s'étoient rendus arbitres de la doctrine et de la religion.... Tels étoient les maux qui préparoient chez les Juifs à une ruine totale : et tels sont, pour ne rien dissimuler, ceux qui doivent nous effrayer aujourd'hui.... Pouvons-nous dissimuler que des vices et des erreurs semblables ne soient aujourd'hui plus que jamais répandues dans le sein même de l'Eglise. » Nihil certè alienum magis ab Orthodoxis circa Ecclesiæ naturam principiis, eà quam hic exhibet anonymus Ecclesiæ imagine ; ac repià ipsissimum est perniciosum dogma quod Protestantibus exprobrat, in ipsisque damnat

illustrissimus Bossuet. 15 lib. variat. n. 10 et 11 : « Selon eux (les protestans), inquit doctiss. præsul, l'Eglise peut être réduite à un petit nombre, mais enfin il y a toujours un reste de Fidèles, dont la voix se fait entendre sur la terre.... et il peut arriver dans l'Eglise, comme dans les états politiques que le plus grand nombre l'emporte sur le meilleur. » Præfatum anonymum opus, summarium est, ac synopsis quædam principiorum quæ in prolixiori Senecensis episcopi Mandato 1728 stabilita fuère, atque à nonnullis illustriss. de Colbert Monspensul. præsuli adjudicatur. Verùm cùm illæ novissimorum temporum minæ ac prædictiones, à Protestantibus sæpiùs objectæ et à Doctoribus orthodoxis toties enucleatæ, minus viderentur efficaces ad suos in oppositione Bullæ generaliter acceptatæ firmandos perspicere dissidentium duces : novum speciosum magis, magisque sensus perstringens adhibuère subterfugium ; prætensa scilicet miracula, insolitasque membrorum distensiones. Id insigniorum Quesnellistarum testimoniis jam obiter est firmandum : ex innumeris hic sufficiant citati duo dissidentium coryphæi, Senecensis et Monspensulanus præsules. Episcopus Senecensis prætensa Appellantium miracula, summæ Acceptantium auctoritati, ingentique eorum numero opponens, indè Bullam nedùm acceptatam, imò nec usquam suscipi posse disertè colligit : ita præsertim in celebri quam an. 1736 inscripsit de *Neotericorum erroribus* Epistolâ : juvat ipsa auctoris verba inscribere : « On peut demander, inquit pag. 39, s'il est du moins permis de recevoir la Bulle, ou s'il est important, et même nécessaire de la recevoir. » Sic respondet : « Cette question sera bientôt résolue, si l'on fait attention à la nature et à l'état de la dispute qui partage les esprits dans le sein de la communion de l'Eglise Catholique. D'un côté se présente une décision émanée du Chef du Collège apostolique, publiée dans presque tous les Diocèses de l'Eglise Gallicane, où la dispute avoit commencé, revêtue d'une acceptation apparente du grand nombre des évêques, dont la démarche est appuyée presque partout de la puissance séculière. De l'autre côté se trouve un petit nombre d'évêques, de prêtres, de laïcs épars en France et ailleurs, qui accusent cette décision de combattre dans son sens naturel le premier article du Symbole et le premier commandement du Décalogue, et qui accusent en conséquence les Acceptans de donner des armes au parti de l'erreur en autori-

sant par leur acceptation un décret qui le favorise.

« En pareilles circonstances (notanda verba) il faut avouer qu'au cas que l'acceptation de la Bulle soit une chose permise et indifférente, le petit nombre d'opposans est coupable devant Dieu et devant les hommes, soit de former une accusation atroce et calomnieuse contre un jugement du Souverain Pontife; accusation qui retomberait plus ou moins sur la personne même du Pape et de tous les Evêques adhérens; soit d'entretenir dans l'Eglise et dans l'État une funeste division, en se distinguant du reste du monde pour une chose qui n'intéresserait ni la foi ni la conscience. »

Pergit : « Cependant M. de Paris, non seulement persévère pendant sa vie dans une opposition connue contre la Bulle, mais il signale ses derniers momens par une déclaration de son adhésion à tous nos actes : et il meurt dans la confiance que son appel servira à lui faire trouver grâce au tribunal du souverain Juge. Si la Bulle est recevable, comment justifier un refus obstiné jusqu'aux derniers soupirs, de céder au plus grand nombre des Pasteurs Catholiques dans une chose indifférente ? Certainement M. de Paris n'eût été ni pendant sa vie, ni à sa mort, un enfant de paix ; mais de trouble et de dissension : il ne pourrait être compté parmi ces bienheureux pacifiques qui posséderont la terre des vivans. »

Moxque : « mais si Dieu en a jugé autrement : s'il a daigné manifester aux hommes qu'un Appelant bien décidé étoit entré dans la paix et dans la joie de son Seigneur : dès lors les miracles de l'Appelant deviennent une preuve décisive, que les principes de l'appel sont des principes Catholiques; que l'accusation intentée contre la Bulle est bien fondée et qu'il est nécessaire de s'y opposer. »

Paucisque interjectis, concludit : « Les miracles de ce tems sont donc un témoignage clair et divin de l'injustice de la censure et de l'obligation de réclamer, selon ses forces, pour les vérités qu'elle flétrit ou qu'elle affaiblit. » Et rursus : « Dieu parle, il sort de son secret, sa voix éclatante se fait entendre : cette voix doit être écoutée préférablement aux cris confus d'une multitude qui ne s'entend pas elle-même, qui ne peut se fixer sur ce qu'on doit croire ou rejeter, qui ne parle que d'une foi implicite pour des vérités indéterminées, qui ne forme enfin que des sons inarticulés et vides de sens où l'on ne distingue que ces mots : Acceptez,

soumettez-vous. » Nihil sanè in rem nostram expressius locupletissimo isto Patriarchæ Appellantium testimonio, quod ideò tametsi prolixius ex toto describendum duximus.

Præsul Monspensulan. (D. De Colbert) alter Appellantium dux, miracula pariter et convulsiones perpetuò jactat : iisque se suosque tueri ac munire tentat adversus Apostolicum Decretum utrâque firmatum auctoritate : « Que Dieu est admirable dans ses voies ! inquit Mandato Pastoralis an. 1753, p. 18, il s'agit d'abord de faire comprendre que ceux qui souffrent pour ne vouloir pas se soumettre à la Bulle, souffrent pour la justice, que quoiqu'ils soient le petit nombre, ils ont pour eux la vérité, et que la multitude qui s'élève contre eux ne mérite pas de croyance. » Audis, ex ipso met Appellantium duce, multitudinem stare ex parte Acceptantium, ipsosque auctoritate suâ dissidentium paucitati plurimum prævalere. Hinc ibidem pag. 9, idem præsul, Bullæ processus deplorans, ait : « Lorsqu'une mauvaise cause soutenue par les plus redoutables appuis fait d'immenses progrès... qu'on proscrie, qu'on tourmente, ils ont tout en œuvre pour détruire sans ressource la cause de la vérité ; est-il surprenant que Dieu éclate par des miracles ?.... Voilà la cause de cette multitude de prodiges qui s'opèrent aujourd'hui. » Et paulò post : « Le progrès (de la Bulle) est immense. Elle a pour elle les plus redoutables appuis, et les Appellans ont toutes les Puissances contre eux. » Nihil certè locupletius ad ostendendum à maximâ episcoporum multitudine, etiam ex adversariis, Bullam fuisse acceptatam. Idem non minùs luculenter significat in Pastoral. an. 1754 documento, pag. 13, his verbis : « Quand on a pour soi l'Écriture et la Tradition d'une part, et les miracles de l'autre, être insulté parce qu'on paraît abandonné du grand nombre, c'est un titre pour espérer un prompt secours.... Cette poignée d'Appellans qui osait encore résister, allait être anéantie. » Per exiguam Appellantium manum, hic disertè declarat acerrimus ipsorum defensor : tametsi ad fucum faciendum scripturam, traditionem et miracula ostentat : ad eaque contra auctoritatem præposterè provocat. Rursus idem candidè fatetur pag. 24 : « Le Pape à la tête d'un grand nombre de Pasteurs se déclare pour la Bulle, et paraît au moins par cet endroit autoriser les erreurs qu'elle enseigne. » Addit abnormia hæc verba : « Plus les Fidèles ont de respect pour l'autorité, plus ils cou-

rent risque de *tomber dans l'erreur....* mais quelle autorité retiendra les simples ? Je n'en vois point de plus efficace que celle des miracles. » Sed ille, contra analogiam fidei : « Non ex auctoritate de miraculis ; sed per miracula de auctoritate , » dijudicandum pronuntiat. Quod in Protestantibus Walenburgens. Stapleton, aliique explodunt : ipseque speciatim illustriss. Bossuet. hist. variat. lib. 15, n. 40, illud idem in Pelagianis damnat et Donatistis sæpius invictè confutat S. August. libris contra Julian. et de Baptism. et unit. Eccles. contra Donatistas. Vide imprimis tract. 13, in Joan. n. 17.

Ultimum tandem commentum quod ad infirmam, si fieri posset, generalem Bullæ acceptionem finxerunt Appellantes, ii præsertim qui apud ipsos *Figuristæ* nuncupantur, commentum, inquam, illud prorsus fanaticum est : spectat scilicet Eliam ipsum quem advenisse jam, aut certè brevi venturum, sæpius medios inter et insolitos membrorum motus per fanaticum furorem vaticinati sunt. Hinc frequens apud ipsos ista, quæ abutuntur, Christi sententia : *Elias cum venerit primò, restituet omnia* : existimant nempe ministerio Eliæ proximè venturi, ad christianam fidem Judæos esse adducendos ; hæcque populi Judaici conversione, resarcienda esse damna quæ per publicam ac quasi generalem Bullæ acceptionem passa est Ecclesia. Ita testatur ipsemet Dom. Thierry de Viaixnez Epist. ad D. Petit-pied 25 april. 1728, his verbis : « La venue d'Elie, aussi bien que la conversion des Juifs, fait leur espérance (des Appelans Figuristes) parce que les Juifs convertis mettront ordre à tout, et qu'Elie rétablira tout. » Et postea : « La séduction étant si générale, la venue d'Elie, disent-ils, n'en est que plus proche, et dans peu ce Prophète, miraculeusement de retour pour combattre l'Ante-Christ, rétablira toutes choses. » Hæc Dom. Viaixnez. Epistola deposita asservatur in regiâ Bibliothecâ. Desperatissimo hoc effugio anonymi duntaxat auctores primùm usi sunt : at illud, quod mirandum, postea usurpârunt vel ipsi Appellantium Patriarchæ, illustriss. Senecens. et Mompessul. episcopi ; ille quidem citatâ mox Epist. pag. 43 et seq., alter verò sextâ ad archiepiscop. Senonens. Epist. n. 15, his verbis : « Il y a des Appelans qui, touchés des maux de l'Eglise, regardent la venue d'Elie et la conversion du Peuple Juif comme une ressource que Dieu a préparée pour faire reflourir

l'Eglise, et renouveler sa jeunesse comme celle de l'aigle. Cette pensée qui n'a rien que de conforme à l'Ecriture et à la Tradition, devient pour vous un sujet de nous insulter.... S. Paul nous apprend que le retour des Juifs produira dans le monde une résurrection, *vita ex mortuis*. Il fait envisager la miséricorde que Dieu fera aux restes bénits de ce peuple, comme devant être encore plus avantageuse à l'Eglise que ne fut leur réprobation en ce qu'elle a donné lieu à la conversion des Gentils. Où est donc le sujet de railler ?.... Peut-on se cacher que les maux de l'Eglise sont très-grands, etc. ? » At de isto, aliisque Quesnellistarum effugiis alibi plenius : hoc unum jam interest in rem nostram observandum : excogitatis his diverticulis, nedum infirmari, imò potius, ut ex dictis liquet, adstrui ac corroborari generalem Bullæ acceptionem.

Constat 3^o, et quidem invictissimè, eadem generalis Bullæ acceptatio, *ex plurimis expressis, omnique exceptione superioribus testimoniis ac monumentis*. Petuntur hæc authentica instrumenta ex publicis ac solemnibus omnium fermè orbis Catholici Metropolitanorum testificationibus, quibus asseveranter ac disertissimè declarant : « se suosque Suffraganeos dicte Constitutioni *Unig.* constanter adhærere : eamque pro ratâ ac sanctâ lege tenere, cui omnes Fideles integrum mentis obsequium exhibere tenentur. » Luculentissima hæc Testimonia, clarissimo Aurelianiensium Duci primùm oblata, Ludovici XV jussu in Regiâ Bibliothecâ asservantur : ea edi curavit Eminentissimus Cardinalis et Archiepiscopus Mechliniensis in volumine inscripto : *Témoignage de l'Eglise universelle en faveur de la Bulle Unig.* ; pleraque exhibent Card. de Bissy in suo an. 1722 circa Constitutionem Pastoralî Mandato, primâ part. pag. 42, 43, etc. edit. 1728, necnon illustriss. Suessionensis, postea Senonensium archiepiscopus, secundo suo Documento Pastoralî pag. 6, 7, etc. ex quibus pauca hæc in præsentî negotio efficacissima, excerptemus.

De sparsis per Italiam Ecclesiis. — Ita imprimis testantur : *sacrum Cardinalium Collegium*, Epist. ad Eminentiss. Card. Noallium 16 novemb. 1716, ubi de Bullâ *Unig.* sic habet : « Le sens de la Bulle est clair : elle est une censure expresse des erreurs anciennes ou nouvelles : bien loin de combattre aucune vérité, elle ne donne aucune atteinte aux sentimens qu'il est permis de soutenir. » Addit : « Ce n'est que par la plus atroce calomnie,

que des enfans de perdition ont pu répandre , que la Bulle affoiblit les points capitaux de la Religion , et les plus louables pratiques de la discipline. » Moxque exclamant Eminentiss. cardinales : « C'est ainsi que les méchans en ont agi dans tous les temps contre le Saint-Siège. » Demum , notandis his verbis , suam concludunt Epistolam : « Que l'Eglise sache que *tous* les cardinaux de la sainte Eglise Romaine attachés au S. Siège par les liens les plus étroits persévèrent à son égard dans une soumission à toute épreuve. » Cardinalis Bologniensis archiepiscopus, Epist. ad Nemausensem episcopum : « J'atteste en termes précis , que je tiens les 101 propositions tirées du livre du P. Quesnel et condamnées dans la Constitution *Unig.* pour entièrement contraires à la Tradition Apostolique et Ecclesiastique , opposée à la doctrine des Pères et des Conciles , et dignes des censures dont elles ont été frappées dans ladite Constitution. » Illud idem de Provinciæ suæ episcopis ibidem significat, his verbis : « Les évêques de ma Province assurent sincèrement la même chose : et si ceux qui en France les accusent là-dessus d'indifférence , les consultent , ils en recevront la correction que mérite leur impudence. » Patriarcha Venetiarum Epist. ad Eminentiss. Card. de Bissy : « Tout ce qu'il y a d'évêques , inquit , dans notre République , adhèrent constamment à la Constitution *Unig.* et la tiennent pour une loi définitivement et irrévocablement établie. » Cardinalis et Archiepiscopus Mediolanensis , Epist. ad eundem Eminentiss. de Bissy : « J'atteste avoir reçu la Bulle *Unig.* et que les évêques Suffragans de cette Métropole , aussi-bien que toutes les Universités et autres semblables Corps de la Province et du Diocèse , l'ont reçue pareillement , comme un jugement dogmatique embrassé de toute l'Eglise , auquel les Fidèles sont obligés de se conformer , et dont ils ne peuvent s'écarter , sans être absolument indignes du nom de Chrétien. » Cardinalis Archiepiscopus Genuensis, Epist. ad Nemausensem Episcopum : « La Constitution *Unig.* ayant été publiée dans tout l'État de la République , elle y a été , par la grâce de Dieu , universellement reçue. »

Paria de se sibi subditis episcopis testantur archiepiscopi Ravennatensis , Florentinus , Senensis , Pisanus , etc. Epist. ad Eminentiss. de Bissy.

De Ecclesiis Hispaniæ. — De unanimi Ecclesiarum Hispaniæ in acceptandâ Constitutione *Unig.* consensu , omnino liquet , non solum

ex Mandato Cardinalis supremi tunc in illo Regno Inquisitoris , per quod ubique Constitutio promulgata est , sed etiam ex variis præsulum inclytæ illius Ecclesiæ responsionibus quæ Novatores pro meritis excipiunt. Archiepiscopus Cæsar-Augustanus (Sarragosse) in Epist. ad Nemausensem episcop. testatur et fidem facit in toto Aragoniæ Regno , aliisque Hispaniæ Provinciis omnes ad unum episcopos ; omnes Academias , omnes religiosos Ordines , omnes cujuscunque conditionis homines , summâ cum veneratione purè et simpliciter acceptavisse prædictam Constitutionem : en ipsissima verba : « Quant à ce qui regarde notre Espagne , nous attestons très affirmativement de certaine science , et nous faisons foi et nous engageons même notre foi , que dans ce Royaume d'Aragon et dans les autres Provinces d'Espagne , *tous les évêques sans exception , toutes les Eglises , toutes les Universités , tous les Ordres religieux* , toutes personnes de quelque condition qu'elles soient , ont accepté avec une souveraine vénération purement et simplement ladite Constitution , de manière que personne n'en a retranché un seul iota , ou un seul point , et n'a cru qu'aucun Catholique pût le retrancher. » Postea splendide mentiri eos asserit qui calumniantur Hispaniæ episcopos quasi summi Pontificis Constitutiones non legerent , dum eas recipiunt : ibidem refert ac sugillat fabellam eorum qui spargunt in vulgus Constitutionem ab Inquisitione , insciis et minimè consentientibus Episcopis fuisse promulgatam. Archiepiscopus Burgensis (de Burgos) Epist. ad eund. Nemausensem episcopum 1 septemb. 1717 : « Nous protestons que nos Confrères dans l'Episcopat , *et tout ce qu'il y a de Prélats dans l'Eglise d'Espagne* , le pensent et le disent uniformément avec nous.... Nous avons vu la Constitution de Clément XI , et nous l'avons reçue dans son sens naturel : et nous l'embrassons de tout notre cœur , comme nous découvrait un venin caché , et perçant l'abcès du Jansénisme pour le guérir.... La Constitution est acceptée par l'Eglise. »

Paulò post addit , hæc sanè in præsentî negotio peremptoria : « Qu'on assemble le Concile général auquel ils appellent , nous voici présens , nous qui formerions le Concile. Alors , on n'aurait nul égard pour ce petit nombre d'évêques opposés à tous les autres , qui auraient le Pape à leur tête. On n'en aurait pas davantage pour un amas de gens sans titre , quelque multitude qu'ils formassent. Il n'y a

donc nul égard à avoir maintenant pour des gens de cette espèce. » Peremptoria prorsus adversus Appellantes hæc illustriss. præsulis animadversio. Archiepiscopus Toletanus Epistolâ ad S. Pontificem datâ 1 octobris 1717, ita scribit : « Votre Sainteté ayant porté, il n'y a pas long-temps, la célèbre Constitution *Unig.* où elle condamne 101 propositions extraites des Ouvrages de Quesnel, et où elle les frappe très justement du glaive de l'autorité Apostolique ; aussitôt que les évêques d'Espagne en ont été informés, ils ont reçu cette Constitution de toute l'étendue de leur cœur. C'est pourquoi quiconque croira pouvoir donner quelque atteinte à la censure portée par la Bulle, ou qui permettra qu'on le fasse, qu'il soit un exécrationnable anathème. Voilà, très saint Père, le témoignage que nous rendons, et que nous voulons être connu des Français et du peuple Chrétien de toute la terre. » Denique ut omittam archiepiscopos Hispanensem, Tarracensem, Compostellanum, aliosque plures qui pariter testantur ac declarant, « in universis Hispaniæ Provinciis, omnes omnino episcopos, omnes Universitates, summâ cum reverentiâ ac veneratione Constitutionem *Unig.* excipere. » Granatensis archiepiscopus in Epist. ad Nemausens. episcop. 1 septembr. 1717, gravi simul ac nervoso stylo eorum calumnias confutat qui Hispaniæ episcopis impropere quod Constitutiones Pontificias non legant, et absque suo consensu ab Inquisitoribus promulgari sinant : appellationem ad futurum Concilium, ut frivolum explodit, ac de suis Suffraganeis fidem facit, quod omnia approbant quæ in suâ continentur Epistolâ.

De Ecclesiis Lusitanæ. — Quale sit Ecclesiarum Lusitanæ in præfatam Constitutionem suffragium, patet ex Epistolâ Patriarchæ Lisbonensis ad Nemausens. episcop. 28 sept. 1717, his verbis : « Notre sentiment et celui des Evêques de notre Province, ou plutôt de tout le Portugal, est que la Constitution *Unig.* contient la saine doctrine et la tradition de l'Eglise. » Addit : « Nous avons souvent examiné avec la dernière exactitude les 101 propositions, et nous sommes toujours convenus qu'elles étaient hérétiques, suspectes, erronées, scandaleuses, etc. » Illustriss. idem præsul in Epist. ad Eminentiss. Card. de Bissy 20 mart. 1718 : « Nous et tous les Evêques de ce Royaume, n'avons qu'une voix unanime, et un sentiment invariable sur la Constitution *Unig.* savoir que c'est une loi du saint Siège,

qu'il la faut regarder comme une loi fixe et certaine, aussi bien que les autres loix de l'Eglise et les Canons. » Pausisque interpositis, subdit : « Tous les Docteurs et les Théologiens de ce Royaume croient et soutiennent la même chose. » Capitulum Ecclesiæ Metropolitanæ Eboracensis, sede vacante in Epist. ad Nemausens. episcop. 2 octobr. 1717, eadem significat : « Nous attestons, inquit, que nous et tous les Evêques de notre Province avons accepté la Constitution *Unig.* sans le moindre doute, et sans la moindre contestation, et qu'après l'avoir lue et relue de nouveau, nous y avons reconnu la saine doctrine et la véritable tradition de l'Eglise, ainsi que tous les Ecclésiastiques, prêtres et Docteurs de ce Royaume. » Speciatim ibi prædicant omnimodam florentissimæ suæ Conimbricensis Academiæ erga dictam Constitutionem obedientiam.

De Catholicis Belgii Ecclesiis. — De Belgio Catholico exstant Pastoralia Mandata episcoporum Namurcensis, Gandavensis, Ruremundensis, Antuerpiensis, Tornacensis, et aliorum inter quos primas tenet archiepiscopus Mechliniensis, postea S. R. Ecclesiæ Cardinalis : in Documento Pastoralis dato 17 decembris 1717, solemniter declarat : « Que la Constitution *Unig.* a été admise par tous les Evêques des Pays-Bas Autrichiens, et qu'il unit son sentiment aux Eglises Belges. » Huc in ejusdem rei fidem proferri possunt celeberrimæ istarum partium theologicæ Facultates. Duacena in comitiis die 3 et 17 augusti an. 1714 habitis : « significarunt, inquit, ac professi sunt omnes unanimiter et apertè se Constitutionem Apostolicam quæ incipit *Unig.* recipere purè simpliciter, sine ullâ distinctione, expositione, seu interpretatione... se et reliquos Fideles obligari in conscientia, et sub gravissimo schismatis aut hæresis peccato, ad hanc fidei consensionem. »

Lovaniensis die 8 julii an. 1715, ad propulsandas quorundam in sacrum Ordinem calumnias : « Post maturam deliberationem, inquit, ex unanimi suffragio conclusum fuit., respondendum esse, quod agnoscamus et sincerè sentiamus omnia et singula, ritè, legitime, ac juris ordine peracta fuisse in negotio concernente librum (Quesnelli).... palamque profitemur omnes et singulas propositiones per præfatam Bullam *Unig.* damnatas, fuisse verè damnabiles et verè rectè damnatas fuisse. »

De Germaniæ Ecclesiis. — Pro Germaniæ Ecclesiis hæc retulisse sufficiat. Archiepiscopus

et Elector Moguntinus ad Card. de Bissy ita scribit 14 mart. 1718 : « Je certifie à votre Eminence, que la Constitution *Unig.* a été publiée, il y a quelques années, dans mon Archevêché, aussi bien que dans mon Evêché de Bamberg, et qu'elle y a été reçue en tous ses points, de tout le monde avec l'obéissance qui est due au saint Siège, comme la doctrine de l'Eglise. » Addit : « Je ne connois point d'autres sentimens aux Evêques Suffragans de ma Métropole. Archiepiscopus et Elector Trevirensis in Mandato 22 junii 1717, uti *Ecclesiæ et pacis perturbatores* reprobat eos qui à Clementinâ Bullâ ad futurum Concilium provocant ; atque specialiter declarat neminem posthâc ad ullum admissum iri ministerium Ecclesiasticum, « nisi... declarando se dictam Bullam, eâ quâ par est integritate et devotione recipere, ejusque tenorem quoad omnia sequi, nec eidem in minimo directè vel indirectè contraire velle. » Archiepiscopus Elector Coloniensis qui simul est Leodiensis et Ratisbonensis episcopus, solemni Mandato die 29 januar. 1715, Constitutionem *Unig.* promulgavit, « eosque nomine Catholico indignos pronuntiat qui debitam dictæ Constitutioni obedientiam detractent. » Is quosdam postea inobedientes in diœcesi Leodiensi presbyteros canonicè suspendit. Archiepiscopus Salzburgensis Germaniæ primas ad Card. de Bissy scribens testatur, se et Episcopos Austriæ ac Baviaræ sibi Suffraganeos, Constitutionem *Unig.* pro justissimâ habere atque totâ amplecti veneratione : « Il est très certain, inquit Epist. die 21 octob. 1717, que les Evêques mes comp provinciaux (ce sont ceux d'Autriche, de Bavière, du Tyrol) tiennent à mon exemple la Constitution *Unig.* pour très équitable, et ils y adhèrent avec la plus profonde vénération. » Subdit : « L'Université qui m'est soumise dans cette Ville de Saltzbourg, aussi bien que celle de Gratz, n'ont pas seulement reconnu par une acclamation unanime ladite Constitution pour infaillible et dogmatique, mais elles ont aussi publiquement déclaré qu'elles s'appliqueroient et travailleroient toujours de toutes leurs forces à en soutenir la vérité. »

De Hungariæ et Bohemiæ Ecclesiis. — *Testes* sunt locupletissimi. Cardinalis à Saxonîâ, archiepiscopus Strigoniens. totiusque Hungariæ Primas : is in Epist. ad S. pontificem datâ 27 junii 1717, insignem propulsans calumniam quâ nonnulli in Galliis spargere ausi fuerant, ipsum et Hungariæ clerum Constitutioni *Unig.* obse-

quium et obedientiam denegâsse ; firmissimè asseverat « se et omnes in eo regno à tali sensu penitus esse alienos, et nuperæ Constitution esse addictissimos. » Idem in Epist. ad eminentiss. de Bissy datâ 19 juli 1717 : « Si nous autres évêques, inquit, nous savions qu'il y eût un seul docteur ou théologien parmi ceux qui nous sont soumis, lequel parût attaché à cette secte (Jansénienne) dans le moindre point, il en porterait assurément la peine... Cela étant ainsi, que V. E. nous fasse donc la grâce d'en conclure, qu'il n'y a qu'impostures, calomnies, outrages, dans ce qu'on divulgue très injustement sur le clergé de Hongrie. » Archiepiscopus Pragensis Bohemiæ Primas, Epist. ad eundem card. de Bissy, 18 decemb. 1717, sic habet : « Les évêques de ces États-ci, et nommément les évêques de Bohême, tiennent la Constitution *Unig.* pour une loi dogmatique... Les docteurs et les théologiens de nos universités adhèrent avec respect à la même Constitution. » Ibid. addit : « J'ai défendu et pros crit par un Mandement (11 mars 1715) publié dans l'étendue de mon diocèse le livre de Pasquier Quesnel. »

De Ecclesiis Poloniæ. — Testatur archiepiscopus Guesnensis, Poloniæ et Lithuanæ Primas, in Epist. 27 juli 1717, ad eund. card. his verbis : « Il y a long-temps que nous avons eu une pleine connaissance de la Constitution *Unig.* Les évêques de nos provinces adhèrent fermement à ladite Constitution, et la tiennent pour une loi définitivement et irrévocablement établie. Enfin les docteurs et les théologiens de nos universités jugent que ce serait être criminel que d'avoir et d'enseigner d'autres sentimens que ce qui a été défini par ladite Constitution. » Eadem affirmatissimè testantur Cracoviensis et Posnaniensis episcopi in suis ad R. pontificem datis eod. an. 1717, Epistolis.

De Ecclesiis Dalmatiæ, Illyrici, Albanæ, etc. — Bullam *Unig.* in his omnibus Ecclesiis acceptatam fuisse, apertam fidem faciunt archiepiscopi Spalatensis, Primas Dalmatiæ, Croatiae et Scavoniæ : Jadrensis (de Zara), pontificius legatus in Serviâ, Albanîâ, Bulgariâ, etc. Coreyrensis (de Corfou) : necnon episcopi Ragusiensis, Stagnensis, etc. Satis fuerit Spalatensis et Coreyrens. archiepiscop. verba describere. Sic habet Spalatensis Epist. ad card. de Bissy, 5 septemb. 1721 : « Je soutiens que les 101 propositions qui font partie de l'hérésie Jansénienne, et que le saint Siège apostolique vient de condamner, doivent être abhorrées et

rejetées de tout le monde.... Tous les évêques d'Illyrie, d'Istrie, etc., n'ont point d'autres dispositions à l'égard de la vérité qui se découvre si manifestement à toute âme fidèle dans les Décrets apostoliques.... Il n'y a point à douter qu'ils n'aient tous sur ladite bulle *Unig.* les mêmes sentimens que les autres prélats catholiques, qui vivent en paix sous le gouvernement de la sérénissime république de Venise. » Archevêque. Corcyrensis. Epist. ad Nemausensem episcop. 42 decemb. 1721 : « C'est une odieuse calomnie, inquit, que nous font ces novateurs, lorsqu'ils osent avancer qu'excepté le clergé de France, les évêques des autres Églises n'ont pas même lu la Constitution, et que si quelques uns l'ont lue, ils ne l'ont point examinée avec l'attention qu'il fallait; parce que croyant, pour la plupart, que le pape est infaillible, ils ne se donnent pas même la peine de lire ses décrets. » Quam quidem calumniam ibidem strenuè retundit, his verbis : « Il n'y a que l'ivresse de l'iniquité et du mensonge qui puisse vomir de telles accusations. Nous avons lu la Constitution, et nous l'avons examinée avec soin... Nous avons reconnu que cette bulle est établie sur la fermeté inébranlable de la foi, qu'elle brille de l'éclat que lui donne le témoignage de la doctrine apostolique... Nous réprouvons *Jansénius* et *Quesnel*, nous détestons leurs sectateurs... nous acceptons la Constitution *Unigenit.* avec la plus grande vénération qu'il nous est possible. Anathème à ceux qui sont d'un sentiment contraire. » Recensita hactenus, plurimaque alia cæterarum Ecclesiarum disertissima testimonia, celsissimo Aurelianiensium duci supremo regni moderatori primùm oblata fuère, uti supra notavimus; horumque autographa jussu Ludovici XV deposita in regiâ Bibliothecâ: unde instrumenta hæc maximè authentica sunt, certissimâque fide digna. Ex his porrò tot tantisque luculentis testimoniis, efficacissimum et ineluctabile colligitur argumentum ad astruendam generalem in omnibus Ecclesiis Bullæ *Unig.* acceptationem : in his namque testimoniis, metropolitani Ecclesiarum Italiæ, Hispaniæ, Lusitaniæ, Siciliæ, Germaniæ, Poloniæ, Dalmatiæ, Illyrici, etc., palàm ac solemniter profitentur : « se, suosque suffraganeos dictæ Constitutioni *Unig.* constanter adhærere eamque pro ratâ ac sancitâ universalis Ecclesiæ lege firmiter tenere. » Quis enim de tot ac tantis præsulibus sibi persuadeat, alios tam publicè et asseverantè ejusmodi factum ausos

fuisse testari; cæteros vero, ne uno quidem reclamante, illud idem affirmari patienter tulisse, nisi res certa fuisset et constans? Sanè si facti tam firmiter rationibus comprobati, nutaret certitudo, vacillarent omnia, foretque totius historiæ conclamata veritas. Laudatis præsulum testificationibus adjungendus est unanimitas omnium orbis catholici academiæ in rem eandem consensus. Hæc namque omnes episcoporum vestigiis inbærentes, concorditer et apertè declarant, « se apostolicam Constitutionem *Unig.* summâ cum reverentiâ amplecti, debitoque obsequio suscipere, » uti certissimum Ecclesiæ judicium, et regulam dogmaticam omninò immobilem. Ita universitas Salmaticensis, omnium Hispaniæ academiæ facilè princeps, Epist. ad S. pontificem 19 augusti 1716; et in Epistolâ ad Sorbonam iisd. die et anno datâ. Ita etiam universitas Conimbricensis omnium Lusitaniæ celeberrima, in Epist. ad S. pontificem die 5 februarii 1717 : sic etiam universitates Complutensis, Cracoviensis, Salzbürgensis, sacræ facultates Pragensis, Coloniensis, Argentoratensis, Lovaniensis, Duacena, Mussi-Pontanea, etc., quorum expressa in præsentî negotio testimonia typis excusa jussu eminentiss. Mechliniensium archiepiscopi legere est in citato volumine inscripto: *Le Témoignage de l'Eglise universelle*, etc. His adjicere liceat conspirans omnium regni S. facultatum mens ac doctrina : inprimis laudatum S. facultatis Parisiensis insigne decretum die 15 decemb. 1729, latum, quo « Constitutionem *Unig.* summâ cum reverentiâ, et integro cordis et animi obsequio iterùm et de novo amplectitur tanquàm dogmaticum Ecclesiæ universalis judicium. » Atque expositâ jam densissimâ tot tantorumque testium nube; eodem fermè impeti possunt ac urgeri ratiocinio Quesnellistæ, quo Julianum olim premebat S. Augustinus quampluribus productis ipsi adversantium doctorum Ecclesiæ testimoniis : « Sanè non habes omninò quod dicas, ait lib. 2 contra Julian. cap. 10, n. 57, si episcopalis synodus ex toto orbe congregaretur, mirum si tales possint illic facile tot (Judices) sedere.... Hos itaque de aliis, atque aliis temporibus atque regionibus, ab Oriente et Occidente congregatos vides, non in locum quo navigare cogantur homines, sed in librum qui navigare possit ad homines. Quanto tibi essent isti judices optabiliores, si teneres Catholicam fidem, tantò sunt tibi terribiliores, quia oppugnas Catholicam fidem. »

Propositum hucusque paulò fusiùs palmare

istud argumentum graviter ac nervose paucioribus complectitur illustriss. Parisiensis archiepiscopus de Vintimille in egregio suo 29 sept. 1729 Pastoralis Documento, pag. 15 et 14. Ipsissima juvat hic verba exscribere : « Le Décret du S. Siège est devenu, par l'acceptation du Corps des premiers pasteurs, la loi de toute l'Eglise ; et il n'est permis, ni d'y soupçonner des erreurs, ni de refuser de s'y soumettre. Pierre a parlé par la bouche de trois souverains Pontifes ; tous les Evêques de France, à l'exception d'un très-petit nombre, ont déclaré expressément qu'ils reconnaissent dans la décision du S. Siège la doctrine de l'Eglise ; les Evêques étrangers rendent à l'envi le même témoignage, sans qu'il soit possible aux Opposans, dont on connaît le zèle pour accroître et fortifier leur parti, de trouver hors du Royaume un seul suffrage en leur faveur. »

Pergit illustriss. archipræsul : « Nous disons la vérité en J. C., mes très-chers frères, en assurant ces faits ; et ils sont confirmés par les Actes de cinq assemblées du Clergé, par les Mandemens publiés au sujet de la Bulle, en France et dans les Etats voisins, par les déclarations des Primats et des Métropolitains des autres Eglises, qui tous attestent avec plusieurs de leurs Suffragans, qu'eux et tous les évêques de leurs Provinces, reçoivent avec la soumission la plus parfaite, le Décret du S. Siège : déclarations d'autant plus décisives, qu'aucun de ces Evêques ne contredit, ni ne désavoue le témoignage de son Métropolitain ; et que parmi les partisans du Livre proscrit, personne, depuis tant d'années qu'elles sont dans les mains du Public, n'a entrepris de les faire soupçonner de supposition ou d'imposture. Nous pouvons même avancer avec confiance, que les preuves positives de l'approbation générale donnée à la Constitution *Unig.* sont plus fortes et en plus grand nombre, que celles qu'on peut produire en faveur de la plupart des autres Constitutions, que tout Catholique révère comme reçues par l'Eglise universelle. »

Mox addit : « A l'éclat d'une telle lumière, les nuages et les fantômes doivent disparaître.... En effet, que peut-on opposer à cette multitude de témoins et de juges, qui déposent et qui prononcent en faveur du Décret qui a proscrit les 101 Propositions ? Comment méconnaître dans ce concert si parfait des évêques avec leur Chef la voix de l'autorité, à qui il appartient de décider souverainement toutes les contestations sur la doctrine, qui naissent parmi

les fidèles. » Atque ad illa apposite omnino ac coherentement, serenissimus Princeps de Rohan-Ventarour Universitatis Parisiensis olim Rector, jam Eminentissimus S. R. E. Cardinalis, necnon Argentoratensis Coadjutor, in sua, super obsequio Constitutioni *Unig.* exhibendo, præclarâ oratione habitâ die 11 maii 1759, sic eleganter perorabat : « Vingt et amplius anni (ab ipsâ provocatione quam an. 1718 Academia interposuerat à Constit. *Unig.*) intercesserunt : quid autem attulit illa temporum series ? Clementi XI tres deinceps summi Pontifices successère. Omnes antecessoris sui judicium confirmârunt, et ipsi vestigia secuti, nulli occasione defuerunt, ut disseminatas adversus Constitutionem calumnias obtinerent. » Et paulô post : « Quenam fuit episcoporum de Apostolicâ Constitutione sententia, quis animus ? Nullus omnino inventus est apud exterâs Nationes, quæ Catholicâ fide continentur, qui non Decretum illud Fidelium obsequio et obedientiâ colendum esse crediderit. Galliæ, ubi natus est error, Præsules præter admodum paucos, in eo consenserunt, ut in Diplomate Pontificio sanam Ecclesiæ doctrinam agnoscerent. In hoc tanto, tam venerabili, tam valido et efficaci suffragiorum consensu, quis Ecclesiæ vocem non agnoverit ? Petri Successores, Episcoporum Corpus, quibus fidei depositum creditum est, quibus ut omnes docerent Gentes Christus ipse mandavit, quibus dicto nos audientes esse jussit, quibus denique omnibus diebus ad consummationem sæculi affuturum pollicitus est, ii sententiam dixerunt, debitam communi ipsorum voci obedientiam denegare, quam perversæ, quam præcipitis esset audaciæ. »

Probatur tertiò. Ea Constitutio certissimè habenda est Universalis Ecclesiæ lex ac definitio, quam uti talem constanter, publicè et solemniter agnoscunt ac prædicant ; 1º, quinque continenter summi Pontifices : 2º, sacrum Cardinalium Collegium, et quidem sæpius ac sine exceptione : 3º, tria à Romanis Pontificibus approbata Concilia, quorum uni, quampluribus cardinalibus, archiepiscopis et episcopis adstantibus, præfuit ipsemet Benedictus XIII, eximie sanctitatis Pontifex, in scholâ Doctoris Angelici thomisticis innutritus principiis : 4º, Ecclesia Gallicana in quâ natus fuerat error ; tum statim an. 1714, in frequenti Antistitum conventu ; tum an. 1714, plus quam 110 gravissimis Gallicanorum præsulum Pastoralibus Mandatis eâ de re promulgatis ; tum novem omnino exindè subsequentibus generalibus Comitibus.

5^o, omnes orbis Catholici Metropolitanì, idque disertissimis ac frequenter repetitis testimoniis, suo, suorumque suffraganeorum nomine, ne uno quidem ab annis plus quàm 53 invento apud exteris nationes, qui non decretum illud fidelium obsequio et obedientia colendum esse crediderit : plaudentibus insuper ac suffragantibus omnibus ad unum, tum domesticis, tum extraneis Academiis ac sacris Facultatibus. Quis enim verò, extra immanem superbiam ac temeritatem, tanto, tam venerabili, tam valido et unanimi suffragiorum consensui, conferre, imò et præferre ausit proprium iudicium? Certe hic dicere licet cum S. Augustino lib. *de utilitat. credendi* cap. 17: « Nolle (tantæ auctoritati) primas dare, summæ profectò impietatis est, vel præcipitis arrogantiae. » Atqui sic se habet Constitutio *Unig.*; hanc ut universalis Ecclesiæ legem ac definitionem, constanter, publicè et solemniter agnoscunt ac prædicant : 1^o, quinque continenter summi Pontifices. 2^o, Sacrum Cardinalium Collegium, etc., quod quidem, ex dictis in Synopsi historicâ, et expositis modò superiori argumento aptè liquet. Ergo Constitutio *Unig.* tenenda est tanquam universalis Ecclesiæ lex ac iudicium, cui idcirco fideles omnes submittere se ac obedire tenentur.

Et verò, in his quæ ad Religionem spectant, *Majori adhærendum auctoritati definienti* : ita disertissimè ac creberrimè S. Augustinus, in primis libris *de utilitat. credendi et contra Epist. fundam.* ita etiam Card. Hosius, Walenburgens. Perronius, Bossuet, Nicolius, etc. qui in eâ *majori auctoritati mentis adhæsiōne*, saniorē rationis usum constituunt : testimonia hæc, utpotè unicuique obvia, ab ipsisque etiam Appellantium ducibus, Senecensi et Monspessulano præsulibus passim laudata, superfluum foret hic exseribere. Porro auctoritas Romanorum quinque Pontificum sibi ex ordine succedentium, totius sacri Cardinalium Collegii, plurium Synodorum quæ à S. Sede probatæ sunt, regioque munitæ præsidio ; Cleri Gallici, tum dispersi, tum in frequentibus Comitibus generalibus congregati ; Metropolitanorum ac Suffraganeorum cæterarum Ecclesiarum, qui plaudentibus omnibus sacris Facultatibus et Academiis, ut snprâ vidimus, constanter ac publicè declarant doctrinam Quesnelli centum et unâ Bullæ Propositionibus expressam, omninò alienam esse à mente et doctrinâ S. Augustini, meritòque fuisse proscriptam : hæc, inquam, tam constans et unanimis suffragiorum auctoritas, certè longè maxima est : dis-

sidentium verò auctoritas, nec major profectò, nec æqualis, omnibus fatentibus ; imò nec ipsi ullatenus comparari aut exæquari potest. Aliundè, quòd erronea sit Quesnelli doctrina, meritòque 101 propositionibus damnata, res sanè est, ad Religionem pertinens ; ergo, etc. Scilicet, juxta Catholicorum doctrinam, duæ sunt in Christi Ecclesiâ viæ quibus ad veritatem pertingi queat : altera *examinis* ac *discussionis* : altera *auctoritatis* ac *præscriptionis* : neutra benè ordinata alteri adversa : at in concursu, et in casu apparentis oppositionis, non de istâ per illam, sed ex adverso de illâ per istam dijudicandum : atque ita *auctoritatis* viâ viæ *examinis* in rebus religionis prævalere debet (præsertim cum viâ isthæc posterior hominibus *rudibus* et *idiotis* nullomodo accommodata sit, sed prorsus *impossibilis*, cæteris, quantumvis *eruditis*, magistra *dissensionis* et *erroris* ut plurimum fit, materque *tolerantiæ universalis*, uti omnium seculorum experimento nimium constat, alibique etiam probabimus) : atqui in præsentî Consultationis *Unig.* negotio, viâ *auctoritatis* omninò stat ex parte Acceptorum : neque istorum auctoritati, uti manifestissimum est, nec dissiteri possunt adversarii, ullatenus conferri potest Dissidentium auctoritas ; ergo, istud ex *auctoritate* ac *præscriptione*, seu ex conspirantibus primorum pastorum in acceptandâ Clementinâ Constitutione votis ac suffragiis, petitur argumentum, prorsus ineluctabile est ac planè decretorium : illudque solidorum plus quàm triginta-trium annorum temporis tractu, factum est, fitque in dies validius ac urgentius.

Hactenus dictis addo breve, expeditum, et efficacissimum hocce ratiocinium : Tam Bulla *Unig.* potest ac debet universalis Ecclesiæ dici lex ac iudicium, quàm Bullæ *Leonis X.*, adversus Lutherum, *Innocentii XI.*, adversus Molinosum, *Innocentii XII.*, contra librum *de placitis Sanctorum*, etc. neque enim minora, imò multò plura occurrunt testimonia ac monumenta, ad illius quàm ad istarum ostendendam œcumenicitatem, ut ex jam dictis abundè liquet : aliundè verò nihil omninò in Bullam *Unig.* opponi potest, quod continuò in prædictas Bullas opponi non possit ; quemadmodum ex objectionum solutione modò patebit : atque nemo Catholicus inficiatur istas Leonis X., Innocentii XI., etc. Bullas reipsâ esse veras Ecclesiæ universalis leges ac definitiones : idque non dissidentur vel ipsimet Quesnellistæ ; ergo, etc.

Solvuntur Objectiones.

Innumeris undequaque congestis tricis ac cavillationibus, auctoritatem, et œcumenicitatem Bullæ Unig. deprimere ac eludere conantur Quesnellistæ. Abnormes ex parte materiæ ipsi allingunt errores : incusant ex parte formæ defectum *examinis*, *libertatis*, *unanimitatis*, etc. necnon latam ex præjudicatâ infallibilitatis Pontificiæ opinione sententiam. Ita passim insigniores ex Appellantibus ; inprimis Senecens. et Monspensul. Episcopi, tum in Memoriali super appellatione an. 1719, tum in Epist. ad Innocent. XIII, an. 1721, tum in suâ an. 1725 cum aliis quinque Præsulibus ad Instruct. Pastoral. Eminentiss. Card. de Bissy responsione. Vel unâ constanti ac inconcussâ Ecclesiæ auctoritate, quâ, sicuti liquet ex dictis, recepta et confirmata Constitutio fuit, evanescent ac dissipantur omnes illæ adversariorum in præfatam Constitutionem argutiolæ ac tergiversationes. Enimverò quemadmodum adversus Protestantes observant Polemici, vi promissionum Christi, utpotè cùm *perpetuæ* sint, *absolutæ*, et *independentes*, fieri nunquam potest, ut Ecclesia erroneam quoquo modo acceptet et approbet sententiam. Semper ergo ac firmiter standum primorum Pastorum voci ac definitioni, atque supponendum, certòque tenendum providisse Christum, ne ulla deesset ex requisitis conditio, ad firmam, certam, et inconcussam definitionem. Non itaque ex prætenso quarumdam conditionum defectu impeti potest, uti præposterè effutunt Quesnellistæ, lata à primis Pastoribus definitio ; sed è contrario ex ipsâ Corporis episcopalis definitione judicandum ac indubitanter pronuntiandum, aut eas non defuisse conditiones, aut illas ad iudicii firmitatem non fuisse necessarias. Capitalem hanc doctrinam quæ diluendis in præsentia negotio omnibus dissidentium querelis ac cavillis planè sufficit, præclarè explicant ac dilucidè evolvunt Cardinales, Archiepiscopi et Episcopi, jussu regio Parisiis an. 1728, congregati, suum de Causidicorum Parisiensium circa Concilium Ebredunense consultatione laturi iudicium : « Rien n'est plus dangereux, inquiunt dicti Præsules in suâ ad Regem Epistolâ, pag. 19, que ce qui est établi par les auteurs de la Consultation, sur la forme et les conditions des Jugemens de l'Eglise ; ils présentent aux Fidèles des prétextes pour refuser leur soumission à ces Jugemens, et fournissent aux novateurs les moyens d'en éluder l'auto-

rité. » Moxque stabilita à præfatis Causidicis placita recensentes, sic pergunt : « Selon les Avocats, un jugement dogmatique du Pape ne peut acquérir le caractère de règle de foi, que par l'acceptation claire, libre, unanime, décisive, que l'Eglise en fait par les Pasteurs. Cette acceptation ne doit être faite que par la voie de jugement : on ne peut faire usage du suffrage des Evêques qui sont du sentiment de l'infaillibilité du Pape.... On ne doit faire aucun cas d'une acceptation dont le principe secret a été la persuasion de cette infallibilité. Il ne peut y avoir de véritable Jugement, lorsqu'il n'a point été précédé d'un examen juridique. Il faut même prouver la réalité de cet examen et de ce jugement. »

Tum manantia ex his placitis consecutaria exhibent his verbis : « De ces principes réunis, il s'ensuit qu'un Décret du S. Siège, quoique suivi de l'acceptation du Corps des Pasteurs, n'oblige point les Fidèles, à moins que cette acceptation ne leur paraisse claire, unanime, libre, décisive ; qu'on ne leur ait même prouvé qu'elle a été faite par voie de Jugement, et que ce Jugement n'a été rendu qu'après un examen juridique, examen qui d'ailleurs ne peut être juridique sans beaucoup de formalités et de précautions ; qu'enfin ils ne soient assurés que les Pasteurs qui ont adhéré à la décision du Pape, n'étaient point dans le sentiment de l'infaillibilité, ou qu'ils n'ont pas agi par le motif secret de cette persuasion : jusque là nulle obligation de se soumettre au Jugement, nulle loi qui impose au novateur la nécessité d'y acquiescer. »

Demùm adversam his Causidicorum principiis orthodoxam doctrinam, sic ibid. pag. 20 et 21, luculenter aperiunt ac declarant illustriss. Præsules : « Nous sommes bien éloignés de penser et de dire que pour porter ou pour accepter un Jugement sur la foi, nous n'avons besoin ni d'examen, ni de discussion, ni de liberté ; mais nous disons, et nous le disons en nous appuyant sur les promesses de J. C. que quand le Corps des Pasteurs a prononcé, il n'est jamais permis au Fidèle de refuser sa soumission ou d'hésiter à la donner, parce qu'il est promis que les portes de l'enfer ne prévauront point ; par conséquent elles ne prévauront ni par la violence, ni par la négligence, ni par la séduction. En vain alléguera-t-on qu'on n'a pas examiné ou qu'on n'a pas assez examiné, ou qu'on a manqué de liberté, ou qu'on a été entraîné par des intérêts humains. J. C. est avec

le Corps des Pasteurs; il est la sagesse du Père, comme il est la vérité éternelle; il est donc avec eux *en tant que sagesse pour leur faire prendre les moyens assurés de connaître ce qu'il leur a enseigné*, en même temps qu'il est avec eux *en tant que vérité, pour empêcher qu'ils ne s'égarent.* » Et postea : « Dès que le vrai Fidèle voit le Corps des Pasteurs uni au Chef, former une décision qui intéresse la foi; dès qu'il voit ce Corps respectable, qui parle au nom de Dieu, et qui est assisté d'en haut, exiger la soumission et prescrire l'obéissance, il ne balance point; on a beau lui dire : Une partie de ces Pasteurs n'a pas prononcé par voie de Jugement; les autres ne sont pas unanimes dans le motif de leur décision; c'est l'infailibilité du Pape qui a déterminé uniquement ceux-ci; l'examen de ceux-là n'a pas été suffisant, ou il n'a pas été juridique; il est à craindre que leur décision par l'obscurité des propositions qu'ils censurent, ne donne lieu de confondre la vérité avec l'erreur : tous ces discours n'ébranlent pas sa foi et n'affaiblissent pas la confiance qu'il a dans la promesse de J. C. Il voit l'unité dans le Corps des Pasteurs, et le point qui les réunit est celui qui fixe sa croyance; il sait que c'est à cette vérité qu'il est dit : *Celui qui vous écoute, m'écoute*, etc.; il ne lui en faut pas davantage; il n'examine point comment le Jugement a été formé, ni les différens motifs sur lesquels les Pasteurs ont pu appuyer leur décision; il lui suffit qu'ils aient parlé pour qu'il règle sa foi sur leurs enseignemens; il ne s'alarme point des périls qu'on veut lui faire envisager; il sait que celui qui a promis son assistance aux premiers Pasteurs, saura les garantir et lui avec eux; et que la simplicité de sa soumission fera toujours sa sûreté, comme la promesse de J. C. fait la leur. » Haneque in rem laudatis dissertissimis Bossuetii testimoniis, subdunt : « Les véritables principes qu'on doit avoir sur les Jugemens Ecclésiastiques, et qui ne peuvent être sujets à aucune équivoque ni à de fausses applications, c'est 1^o, qu'il est impossible que la multitude des Pasteurs ou plutôt que tous les Pasteurs, à l'exception d'un petit nombre, s'unissent au Chef de l'Eglise pour souscrire à un Décret erroné; ce principe est de foi, et il n'a pas besoin de preuves; il est renfermé dans la promesse. 2^o, que pour juger de leur union ou de leur unanimité avec le S. Siège, la seule voie sûre est de s'attacher aux actes ou aux décisions mêmes, comme au seul moyen par le-

quel les Fideles puissent connaître ce que l'Eglise exige de leur obéissance. Toute autre manière d'en juger est impossible et dangereuse : impossible, parce qu'il faudrait pour cela non seulement que tout Fidèle fût Théologien, mais que tout Fidèle pût sonder le cœur et l'esprit de chaque Pasteur, pour y découvrir les motifs de sa décision ou de son consentement : *dangereuse*, parce qu'il n'y a point de décision qu'on ne puisse éluder ou même anéantir, s'il est permis d'entrer dans la discussion des raisons qui ont porté chaque Evêque à y consentir. L'Eglise assemblée dans un Concile général, ne serait pas plus à couvert d'une critique si téméraire, que l'Eglise dispersée. *C'est la loi qui oblige et non pas les raisons de la loi, encore moins les motifs imaginaires qu'on se donne la liberté d'attribuer au Législateur.* L'une et l'autre Jurisprudence, c'est-à-dire, le droit Séculier comme le droit Ecclésiastique, reconnaissent également la vérité de cette maxime. »

Et rursus : « C'est donc en vain qu'on veut retrancher du nombre des Evêques qui se sont déclarés en faveur de la Bulle *Unig.* ceux dont on suppose que le consentement est fondé sur l'opinion qu'ils ont de l'infailibilité du Pape; si ce raisonnement avait lieu, il n'y aurait plus de Concile général, dont on ne pût attaquer les Decrets, lorsqu'ils auraient été proposés par le Pape, parce qu'on dirait toujours que plusieurs Evêques, en y souscrivant, n'ont fait que se soumettre à une autorité qu'ils regardaient comme infailible. » Et iterum : « J.-C. a prévu sans doute, qu'il y aurait des Evêques qui entreraient dans ce sentiment (de l'infailibilité du Pape). Il n'en a pas moins assuré les Apôtres et leurs successeurs, qu'il serait avec eux jusqu'à la consommation des siècles. Donc les décisions du Corps des Pasteurs seront toujours la règle de notre foi, quelque opinion que plusieurs d'entre eux puissent avoir sur l'autorité du Pape, autrement il faudrait dire que l'Eglise est devenue faillible, contre les promesses de J.-C. ou du moins, qu'on ne peut plus avoir aucune certitude de son infailibilité, parce qu'une partie des premiers Pasteurs attribue la même infailibilité aux décisions du Pape. » Ac tandem ex fundatissimis hisce principiis, ita concludunt : « En suivant ces principes, tout ce que les Avocats (*idem de cæteris Quesnelli defensoribus pronuntiandum*) opposent contre l'acceptation de la Bulle *Unig.* tombe de soi-même : cette Constitution a pour

elle le suffrage de presque tous les Evêques du monde chrétien : les Ordonnances des Evêques de France, les Mandemens et les Certificats des Archevêques des Eglises étrangères en font foi : tous les Evêques sont unis dans les points essentiels, qui sont de reconnaître la doctrine de l'Eglise dans ce Décret, de condamner le livre des *Réflexions morales*, et les 101 Propositions qui en ont été extraites, et de condamner ces propositions avec les mêmes qualifications que le Pape a prononcées. Les mêmes actes qui prouvent le suffrage du Corps des Pasteurs, prouvent leur unanimité dans tous ces points. »

Hactenus doctissimi Præsules : quæ quidem, tametsi prolixiora, ex integro describenda operæ pretium duximus, utpote cum cunctas adversariorum tricas ad liquidum expediant, totamque rem nostram plenissimè exhauriant. Atque hic sistere et ab ulteriori objectionum solutione supersedere liceret. Verùm ne quid impræsentiari desit, laudata mox præsulum nostrorum placita, jam ordinis et claritatis gratiâ, necnon appositè ad scopum nostrum, variis adversariorum querelis ac cavillationibus adaptanda : tum ex his placitis dictæ dissidentium querimoniarum ac cavillationes obiter ac sigillatim dissolvendæ. Dices itaque 1°. Ad validam ac canonicam Pontificii Decreti acceptationem requiritur prævium ex parte Episcoporum examen, illudque pro dignitate ac gravitate rei de quâ agitur, diligens ac maturum : atqui nihil tale occurrit in præsentî negotio : Episcopi enim extra Galliam absque examine prævio, et ex cæcâ erga Pontificiam infallibilitatem observantiâ, Bullam *Unig.* receperunt : in Galliis verò, Præsules nostri leviter duntaxat ac perfunctoriè, non autem attentè ac consideratè, prout postulabat rei gravitas, dictam Constitutionem perpenderunt : hanc enim (quod certè in re præsentî, ubi de præceptis fidei capitibus agitur, exequi debuissent) minimè contulerunt cum Scripturis et constanti Ecclesiæ universalis traditione, quæ in Scriptis sanctorum Patrum et definitionibus Conciliorum habetur ; nec etiam cum privatâ suarum Ecclesiarum traditione, quæ in *Ritualibus*, *Missalibus*, *Catechismis*, aliisque usualibus diœceseon libris, necnon in Mandatis et Documentis Pastoralibus, atque in opinionibus in scholis Catholicis tradi solitis, continetur ; à quibus omnibus, ut patet, planè abhorret præfata Constitutio : nullius ergo momenti est hæc in parte Episcoporum suffragium ; insufficiensque

ac invalida ab iisdem habita Bullæ *Unig.* acceptatio. Ita auctores scriptorum : *Vérité rendue sensible*, pag. 292. *De la nécessité de l'appel*, pag. 34. *Système des nouveaux Mandemens*, pag. 86. *Observat. sur le 2 Avertiss. de M. de Soiss.* pag. 148, etc. ; inprimis verò auctor Documenti Pastoralis sub nomine Eminentiss. Card. de Noail. 1719, pag. 37, 88, 89, etc.

Respondeo 1°. Istud, ex prætenso examinis defectu, ob latam ex præjudicatâ Pontificiæ infallibilitatis opinionem sententiam, petitum argumentum, nimium probare : hinc etenim Bullæ adversus Lutherum, Baium, Jansenium, Molinosum, aliæque omnes SS. Pontificum Constitutiones ab Episcopis, ex quo apud plerosque obtinuit Pontificiæ infallibilitatis opinio, receptæ, vacillarent omnino ac nutarent, imò nulla foret earum habenda ratio, etiamsi Episcopi in Concilio œcumenico legitime congregati, easdem positivè acceptarent : quia nempe ad Synodum vocati, præconceptam de Pontificiâ infallibilitate opinionem non deponerent : ex quo iterum ob eandem rationem planè esset consequens cuilibet Fideli, in principis adversariorum, licere dogmaticis Concilii Trid. Decretis reluctari : atque ex eâ Synodo, in quâ Præsulum ultramontanis placitis addictorum numerus prævaluit, ad aliud verè œcumenicum provocare concilium, in quo Episcoporum dictis placitis adversantium numerus vinceret. Porro ex apertâ horumce consecratorum insulsiatate ac nequitia, cuique faciliè innoscit principii ex quo spontè fluunt virus ac perversitas : necnon argutiarum quæ ad ea stabilienda usurpantur, infirmitas et falsitas. Hicque, quod de Eutychianis aiebat S. Leo Epist. 78 jam de Quesnellistarum tricis dicere licet : « Jactent se in sui eloquii vanitate, et de argumentationum suarum versutiâ, quæ inimica est fidei, glorientur. Nobis placet Apostolicis obedire præceptis dicentibus : Videte ne quis vos decipiat per Philosophiam et inanem fallaciam. »

Respondeo 2°. Falsissimum esse ab Episcopis absque præviâ lectione et absque ullo examine Bullam fuisse receptam. Et quidem primò, quod spectat Præsules Gallicanos : quàm maturum ac diligens examen ab ipsis fuerit exhibitum in acceptandâ Constitutione, manifestè patet ex abundè dictis in Synopsi historicâ : idque Acta verbalia Comitiorum Cleri Gallicani an. 1713 et 1714. disertissimè testantur. Quod verò ad externos Episcopos attinet : ex quampluribus et apertissimis eorum inter probationes relatis testimoniis constat etiam ab illis Præs-

libus absque præviâ lectione et examine Bullam non fuisse acceptatam. Instar omnium satis tuerit impræsentiarum locupletissimum Patriarchæ Ulyssipponensis (*Lisbonne*) testimonium exhibere, Epistolâ ad Nemausens. Episcopum, 28 Septembr. 1717 : « Illud miramur magis, inquit illustriss. Præsul, quòd scilicet eò pervenerit superborum hominum insolentia, ut omni aliâ Nationi, præter Galliam, notam audeant inurere fœdissimæ ignorantia, vel stupiditatis, vel conniventia, vel ad minimum vilissimæ omissionis, dum nimirum effluunt, excepto Clero Gallicano, vix ullum esse Episcopum, ac ne vix quidem qui Constitutionem *Unig.* fortè legerit, aut si legit, intellexerit : ab inquisitione fuisse quidem alicubi promulgatam ; sed sine consensu et scientiâ Episcoporum : à quibusdam fuisse acceptatam, ex solâ tamen (quam credunt) infallibilitate Pontificis, quin curarent definitiones inspicere. » Quæ omnia, uti totidem insignes calumnias explodit idem Antistes, quibus confirmatur, inquit, effatum apud Gallos tritissimum : *Nemo Jansenistis mendacior.* Addit : « Noster ergo et nostræ Provinciæ (imò et totius Lusitaniae) Episcoporum sensus et mens est, in præfatâ Constitutione sanam Ecclesiæ doctrinam et traditionem contineri. Itaque, captivamus intellectum in obsequium definitionis Ecclesiæ, quam ex promulgatione (quæcumque tandem illa sit) scimus Pontificiam esse definitionem et Ecclesiæ : non cæcâ quidem ducti infallibilitatis fide, ut nobis impingunt hæretici ; sed maturè hinc indè perpensis Scripturæ, Conciliorum, Doctorum fundamentis, rationes definitionum curamus diligenter inspicere. »

Hæc Ulyssipponensis Patriarcha, quæ falsam adversariorum criminationem, de neglecto ab Episcopis extraneis quolibet circa Constitutionem examine, penitus obterunt atque contundunt. Eandem calumniam non minùs strenuè propulsant Archiepiscopi Cæsar-Augustanus, Burgensis, Granatensis, Turriassonnensis, etc. in suis an. 1717 ad Eminentiss. de Bissy, et illustriss. Nemausens. Episcopum Epistolis. Horum verba antea laudavimus. Itaque Episcopi Pontificiæ infallibilitatis opinione inbuti, objectum nihilominus et materiam Pontificiarum definitionum expendunt : non quidem examine procedente ex dubio *affectivo*, sed *methodico* duntaxat : scilicet hinc et inde *perpendendo*, quemadmodum mox audivimus ex Ulyssipponensi Patriarchâ, *Scripturæ, Conciliorum, Doctorum fundamenta, variasque definitionum*

rationes. Sic sese gesserunt in Trid. Concilio Episcopi, quibus tamen plerisque de summi Pontificis infallibilitate persuasissimum erat. Porro ita maturè ac diligenter rationes et motiva definitionum expendendo : certissimè, ex hypothesi occurrentis in definitione Pontificiâ erroris, *vi promissionum Christi*, obsisterent Episcopi : atque ex *methodico* ad *effectivum* dubium procederent ; aut suam de Pontificis infallibilitate opinionem deponendo sententiam ; aut judicando his in circumstantiis, *ex Cathedrâ* locutum non fuisse S. Pontificem. Hoc ipsum fateri tenentur dissidentes : aliàs de activâ Ecclesiæ infallibilitate omninò foret conclamatum : atque ex ipsis jam, et quotiescumque lata esset erronea Pontificis definitio, necessariò in Ecclesiâ prævaleret error. Et reipsâ laudatam mox expositionem juxta quam, etiam Præsules illi qui S. Pontificem judicant esse infallibilem, nihilominus tamen Pontificiarum definitionum objectum *methodicè* expendunt ; hanc, inquam, expositionem proponit ac latè explicat auctor Quesnellistis minimè suspectus Scripti cui titulus : *Lettre d'un Théologien à M. le Card. de Bissy au sujet de son Instruction Pastorale* (1722) *sur la Bulle Unig.* pag. præsertim 8, 9, et 10, eandemque velint nolint, tenentur admittere adversarii : aliàs in fundamentali capite (explosæ scilicet infallibilitatis Ecclesiæ) cum Protestantibus planè consentirent.

Respondeo 3^o. Quidquid sit de examine et motivo Episcoporum in acceptandâ Constitutione : hoc statuimus et contendimus, quòd verissimum est et indubitatum : legem publicâ et legitimâ auctoritate latam, firmam ex sese ac inconcussam esse debere, nec privato cuicumque, ut eam infirmet, fas esse inquirere in examen, modum et motivum quo lata est. « Si semel, ait Melchior Canus, loc. Theol. lib. 5. cap. 5. Novatoribus hanc licentiam permittimus, ut in quæstionem vocent, nùm Ecclesiæ Judices eam diligentiam et curam exhibuerint, quâ opus erat, ut quæstio finiretur, equis adeò cæcus est, qui non videat omnia mox Pontificum Conciliorumque judicia labefactari. » Jam verò Constitutionem *Unig.* publicâ et legitimâ auctoritate latam fuisse, certum omninò est ac exploratum : hanc scilicet tulit Apostolica Sedes, summo consensu Apostolicæ Sedi adhæsit maxima multitudo Episcoporum, ne uno quidem in exteris Regionibus dissentiente ; in unâ duntaxat Galliâ reluctati sunt numero admodum pauci ; ergo.

Respondeo 4^o. Propositam hic, cæterasque

omnes ex defectu requisitarum conditionum, petitas adversus Constitutionem objectiones, facile expediri, funditusque disjici; hoc uno inconcusso ac fundamentalis principio: scilicet, Ecclesiæ, seu Corpori Pastorum, facta à Christo promissa, *perpetua* sunt et *absoluta*: *absoluta*, inquam, non quidem eo sensu, quod nullæ ex parte Pastorum in ferendo aut in acceptando iudicio requisitæ sint conditiones: sed quia necessarias omnes semper adhibitas fuisse, certò tenendum, quoties lata est aut acceptata à Corpore primorum Pastorum definitio. *Vobiscum sum omnibus diebus, usque ad consummationem seculi*, ait Christus Matth. 28, alloquens Apostolos, eorumque successores Episcopos. Ibidem 16, v. 18: *Portæ inferi non prævalebunt*. Porro prævalerent, si Corpus episcopale ob neglectas necessarias conditiones errorem approbaret. *Perpetua* hæc, *absoluta*, et à conditionibus *minimè suspensa*, Ecclesiæ facta à Christo promissa, egregiè statuit ac vindicat Illustriss. Bossuet: « C'est un attentat manifeste, inquit Commonitor. 3, n. 19, de donner des restrictions à la promesse de J. C. *qui est absolue*... Les promesses de cette assistance n'ont point de restriction, car J. C. n'en apporte aucune. » Et in scripto, cui Gallicè titulus: *Réflexion sur un écrit au sujet de la conférence avec le Ministre Claude*, pag. 256, Calvinianum Ministrum premens, sic habet: « Il faut être fondé sur une promesse absolue de Dieu: sur une promesse qui nous assure même contre les infidélités des hommes. Telle que J. C. l'a faite à son Eglise, lorsqu'il l'assure *absolument et indéfiniment*, que les portes de l'enfer ne prévaudront point contre elle. » Etverò, quemadmodum alio in loco notat idem doctiss. Præsul: Christus Dominus Corpori Pastorum jugiter assistens, sapientia Patris est, simul et æterna veritas: *quatenus veritas*, præstò est ut ipsos ab erroribus amoveat: *quatenus sapientia*, præluet iisdem, ut quæ docuit, certà viã assequantur, ac adhibitis omnibus necessariis mediis tutò definiant, eaque credenda Fidelibus indubitanter proponant.

Simillima de perpetuis et absolutis divinitus factis Ecclesiæ promissis, adversus Protestantes docent et inculcant celebriores Theologi et Controversistæ. Walenburgens. lib. 3. de Unit. Eccles. cap. 9, tom. 2, pag. 715: « Promissio (particularibus facta), inquirunt, est dependens à conditione; non enim absolutè Christus dicit se semper futurum cum particularibus, sed cum congregatis in suo nomine; particu-

lares verò Fideles possunt non congregari in nomine Christi. Verùm Doctoribus Ecclesiæ absolutè promisit Christus, se iis affuturum usque ad consummationem seculi. »

Stapleton Tom. 1, Controvers. 4, lib. 8, cap. 14, pestiferam Sectariorum circa Judicem Controversiarum fidei debellans doctrinam, dogmaticis Ecclesiæ iudiciis, hæc habet: « Excipiendi locus non datur aut dubitandi, inquit, rectène an secus definierint (Ecclesiæ Pastores) studiumque et industriam quam oportebat impenderint. » Invictam hanc subministrat rationem: « Deus enim qui gubernat omnia fortiter, et disponit omnia suaviter, *dans ipsum finem, dat etiam media ad finem necessaria*: conservatque à mediis per quæ à fine possent excidere.... Sic promissiones à Christo Ecclesiæ factæ, et ejus providentiæ effectus est: *Non solum ut in veritatem omnem inducantur ejus Pastores, sed etiam ut ea media illis conferantur, quibus hanc veritatem consequantur, et ab aliis mediis arceantur per quæ à veritate possent excidere et aberrare.* » Et paucis interpositis: « Quæ cum ita sint, bonus Ecclesiæ filius, docentem Ecclesiam securus et tutò audiat; fretus promissione Christi et divinâ Providentiâ: nec sollicitè laborans (quia de hoc judicare suum non est) an idonea media ad sanam doctrinam tradendam elegerit Ecclesia: nec curiosè inquirens (quia hoc sui muneris non est) an in debitis mediis debitam diligentiam impenderit. » Melchior Canus citato libro 5, de locis Theolog. cap. 5: « Facile comprehenditur, ait, cum spiritum veritatis Christus Apostolis, eorumque successoribus in fidei iudicio promiserit: nihil omninò eis defuturum, quod fidei controversiis definiendis fuerit necessarium. » Paria tradunt Card. Hosius, Roffensis, Bellarm. Perron. alique Polemici.

Ex hoc autem circa *perpetua et absoluta* Ecclesiæ facta à Christo promissa, palmari ac fundatissimo principio, sequitur 1º. Corpus Pastorum Capiti adhærens, quocumque tempore, quocumque statu, quibuscumque in circumstantiis semper esse *vi promissionum Christi*, in acceptando aut proponendo dogmate, prorsus infallibile: nec usquam invalescat tanta pestis, ut seu vi, seu negligentia, seu fraude, seu qualicumque aliâ viã ac ratione, portæ inferi adversus Episcopale Corpus definiens, seu Ecclesiam docentem, prævaleant. Hinc Bossuet. expendens Christi verba Matth. 16: *Portæ inferi non prævalebunt adversus eam*, sic habet in 2 circa promissa Ecclesiæ documento, n. 4 :

« Ces portes de l'enfer signifient naturellement la puissance du démon. Tout le monde l'entend ainsi, Catholiques et Protestans : et c'est ainsi que J. C. a voulu affermir son Eglise, non seulement contre la mort, mais contre toute sorte de violence et de séduction. » Ineluctabile est et ex absolutis Christi promissionibus sponte ac necessario fluens consecrarium istud. Sequitur 2^o. Quodcumque supponatur fuisse legis motivum : quæcumque ferendi aut acceptandi dogmatici Decreti ratio : nunquam *vi eandem Christi promissionum*, fieri posse ut Ecclesia *vel etiam merè exterioris* erroneum acceptet aut proponat Decretum. « *Quocumque modo*, inquit illustriss. Bossuet. Defens. Declarat. Cleri Gall. lib. 5, cap. 2, fiat ut Ecclesia consentiat, *transacta planè res est* : neque enim fieri potest unquam, ut Ecclesia Spiritu veritatis instructa, non repugnet errori. » Ibidem. lib. 14, cap. 1 : « Semel constituto hoc certo dogmate, vim illam ineluctabilem (definitionem Ecclesiæ) unitate et consensione constare, id quoque valere, *quocumque modo se illa consensio declaraverit*, sive Concilia congregentur, sive non congregentur. » Et rursus in 2 Pastoral. Documento circa Ecclesiæ promissa : « Dieu sait, ait n. 28, tellement se saisir des cœurs, que la saine doctrine prévaut toujours dans la communion visible et perpétuelle des successeurs des Apôtres. » Ad quæ appositè Card. Hosius lib. 1, de legitimis Eccles. iudiciis, pag. 462 : « Nulla potest esse, inquit, tanta Pontificum improbitas, quæ impedire queat, quinimò vera sit illa Dei promissio : *Qui indicabunt tibi Judicii veritatem*. » Sequitur 3^o. Exteriori Corporis episcopalis acceptationi, ipsiusque legis litteræ, quæ sola subsistit ac vim habet, jugiter ac firmiter standum esse, et pro certissimo tenendum providisse Christum, ne ulla ex requisitis deesset conditio, ad firmam, certam et inconcussam definitionem. Itaque ubi primum de ipso præcisè Ordinis Episcopalis consensu et acceptatione exteriori constat, hoc ipso *transacta planè res est*, et immotè firmiterque acquiescendum : neque tunc incusandus venit examinis aut cujuslibet alterius conditionis defectus : imò ex ipsâ exteriori acceptatione certò colligendum et indubitanter tenendum, omnes adfuisse debitas conditiones : adeoque, si quæ defuerit, hanc non fuisse *hic et nunc* necessariam. Atque ita, exterior Corporis episcopalis (seu primorum Pastorum suo Capiti, Romano scilicet Pontifici, adhæren-

tium) definitio *ex sese*, seu independentè à discussione motivorum aliarumque conditionum, *certissima est regula*, à Christo Domino instituta, ad nostram firmandam constabiliendamque fidem : *ut jam non simus parvuli fluctuantes et circumferamur omni vento doctrinæ*. Hæc apertissime declarant laudatæ Scripturæ testimonia : *Portæ inferi non prævalebunt; Ecce ego vobiscum sum omnibus diebus*. Quibus adde Lucæ 10 : *qui vos audit me audit*. Matth. 18 : *Die Ecclesiæ : si Ecclesiam non audierit, sit tibi sicut Ethnicus et Publicanus*. Matth. 28 : *Euntes ergo docete omnes gentes*. His in textibus, regulam fidei perspicuè indignantibus, nonnisi exterior deprimitur definitio : hæc enim sola est, quam audiri possint Fideles, quæque credendas veritates ipsis aperiat ac manifestet. Idem, uti perpenderit patebit, clarissimè adstruunt citati mox Walenburg. Staplet. inprimis Hosii et Bossuet. textus. Denique idipsum evincit ratio : enimverò, quemadmodum medium cognoscendi veritates revelatas, debet esse, ex omnibus Controversistis, *breve, expeditum, et cuique*, etiam rudiori, *proportionatum*; ita pariter et medium cognoscendi definitiones Ecclesiæ, cujus est veritates revelatas proponere : jam verò decisio *exterior* in se spectata, medium est hujusmodi, *breve, facile et cuique accommodatum* : spectatâ verò prout habitâ ratione discussionis *motivorum prævi examinis*, aliarumque conditionum quas exigunt adversarii, nedum indoctis et imperitis, ut patet, sed et doctioribus omninò impervia est; ergo. Respondeo 5^o. Pressius ac contractius. Quotiescumque adest exterior Corporis episcopalis definitio, toties *vi promissionum Christi* (utpote cum *perpetuæ sint, absolutæ, et independentes*, uti ex his dictis superiori responsione constat) certissimum est adesse omnes ad firmam et inconcussam definitionem necessarias conditiones; illas proindè quæ desunt hic et nunc, ad ratam definitionis auctoritatem minimè esse requisitas. Ita ex prætenso *examinis motivorum*, aliarumque conditionum defectu petitæ dissidentium objectiones, brevi præciduntur, nulloque negotio expediuntur. Unum addo : *examinaverintne Episcopi acceptantes necne* (quamquam ex dictis inepta sit et præpostera dubitatio) fuerintne innixi principio *Pontificiæ infallibilitatis* necne, non curamus hic; nihil ad præsentem causam interest : *perpetui sunt et absoluta Christi promissa : exteriori primorum Pastorum definitioni et iudicio*, non definiendi aut sentiendi *rationibus*, infallibilitatis privi-

legium Christus annexuit; ergo. Hocque uno (quod diligenter observandum) stabilito semel, de *perpetuis et absolutis* à Christo tactis Ecclesiæ promissis, inconcusso principio: ipsaque proinde *exteriori* Corporis episcopalis definitione et acceptatione, uti constanti ac certissimâ credendi regulâ divinitus institutâ: evanescent omnes, quemadmodum jam supra advertimus, et ex sese manifestum est, adversariorum argutiæ et cavillationes. Hinc cætera ipsorum trice strictim duntaxat attingendæ.

Dices 2^a. Ad firmam et inconcussam definitionis dogmaticæ auctoritatem, requiritur *unanimitas*: atqui Constitutio *Unig.* unanimiter recepta non fuit: plerique enim episcopi huic obstiterunt et etiamnum obsistunt Decreto; ergo. Ita Senecens. Præsul in suo an. 1728, circa *dogmaticorum Ecclesiæ Judiciorum characteres* Pastoralis Mandato, parte 4, art. 8. Ita etiam Monspensulan. alique dissidentes Episcopi passim: inprimis auctor citatus Pastoralis circa Bullam *Unig.* Documenti an. 1719, sub nomine Eminentiss. Card. Noall. proposit. 2, cap. 3, paragraph. 1, et seq.

Respondeo: quæcumque tandem ad robur et firmitatem dogmaticæ definitionis requisita sit unanimitas, de quo plenius alibi; certè eunctis fatentibus Orthodoxis, necessaria non est physica et absoluta unanimitas, sufficitque moralis, quæ ex longè majori Episcoporum summo Pontifici adhærentium numero, paucis ex adverso reclamantibus, coalescit: atqui Clementinæ Constitutioni adhæret maxima multitudo Episcoporum, ne uno quidem in exteris Regionibus dissentiente: in unâ Galliâ reluctati sunt numero admodum pauci: quæ qui dem ex adductis probationibus, præsertim argumento 2 abundè constant; ergo, etc. Etverò si paucorum quorundam Episcoporum resistentia posset impedire quominus dogmatica Sedis Apostolicæ Constitutio, cui cæteri per orbem subscribunt Episcopi, vim legis obtineret; vix ulla foret irreformabilis Ecclesiæ definitio: pauci enim admodum reperiuntur Ecclesiastica Judicia, quibus quidem non contradixerint Episcopi. Sic Pelagii partes amplexi sunt et Zozimi Decreto obstiterunt 18 Episcopi duce Juliano ad œcumenicam Synodum provocationem interponentes. Sic Ephesini Concilii statutis contra Nestorium 30 Episcopi præeunte Joanne Antiocheno et Concilii chalcedonensis contra Eutychem definitionibus multò plures restiterunt. Sic denique, ne ad longiores ætates, remotioraque loca recurramus, in Galliis

nostris plus quàm 40 Præsules Calvinii partes adjuvârunt. Horum tamen et aliorum errores defectu *sufficientis unanimittatis*, irreformabili judicio damnatos non fuisse nemo dixerit: quia scilicet multò major primorum Pastorum multitudo Capiti suo R. Pontifici adhærens præfatos errores proscripsit. Idem de Quesnelliano libro, et damnatis ex eo per Constitutionem propositionibus dici debet. Itaque pauci illi Episcopi, alique doctores, Presbyteri et Laici dissidentes, qui à longè majori numero segregati contra summi Pontificis et Episcoporum Judicium insurgunt, spectari debent, *veluti pars quæ contra totum dimicat*, cujus idcirco *nulla est habenda ratio*. Ut enim præclare tradit Vincent. Lirinens. Commonit. cap. 38: « Si quando pars contra universitatem; novitas contra vetustatem; unius vel paucorum dissensio contra omnium vel certè multò plurium Catholicorum consensionem rebellaverit: præferas partis corruptioni, universitatis integritatem.»

Dices 3^a. Ad validam, legitimamque Constitutionis dogmaticæ acceptationem, requiritur *uniformitas*, non *materialis* duntaxat externa et *quoad meras voces*; sed insuper et maximè, *formalis, interna, quoad sensum*: atqui Bulla *Unig.* non ita fuit uniformiter acceptata: longè enim aliter illam acceptârunt Italiæ, Hispaniarum, Germaniæ, Galliarum Præsules; ergo. Ita creberrimè, Mémoire des 4 Evêques, an. 1719: *La vérité rendue sensible*, art. 7, q. 1. *Mémoire où l'on examine si l'Appel interjeté par 4 Evêques est légitime*, pag. 80, 81. *Observat. sur la Lettre circulaire de M. le Card. de Bissy*, pag. 68, 69, alique jam citati.

Respondeo negando minorem: licet enim extra Galliam eadem in acceptandâ Constitutione observatæ non fuerint formalitates quæ apud nos usurpantur à tempore hæreseos Jansenianæ; attamen, quod caput est, omnes acceptantes Episcopi inter se ubique consentiunt circa acceptationis substantiam: nempe profitentur omnes, 1^o « se in Constitutione *Unig.* doctrinam Ecclesiæ agnoscere; 2^o, se illam cum obsequio et reverentiâ acceptare; 3^o se librum Quesnelli et extractas ex eo 101 Propositiones eodem modo proscribere, ac cum iisdem qualificationibus quibus à summo Pontifice damnatæ sunt.» Quæ quidem ex Actis verbalibus Comitiorum an. 1714 supra in Synopsi historicâ laudatis; necnon ex publicis exterorum Præsulum instrumentis inter probationes modò relatis, planè constant. Un-

dè si quid Gallicanos inter et externos Præsules hic occurrit discriminis, id spectat solas formalitates, quæ variæ esse possunt pro variis locorum et temporum circumstantiis; non verò essentialem, acceptationis formam ac substantiam quæ eadem ubique esse debet. Et certè solemnitas acceptationis necessaria non est ut Constitutiones Apostolicæ tanquam regulæ credendi et loquendi à Catholicis omnibus haberi debeant, licèt aliquando ista solemnitas non mediocris esse possit utilitatis ubi natus est error. Ita, Card. Noallio Præsidente, expressè tradunt undecim Archiepiscopi et Episcopi Gallicani in Declaratione ad summum Pontificem missâ an. 1710 (refertur hæc Declaratio in Collectione Actorum ad Comititia 1705 pertinentium, circâ finem pag. 112); ergo licèt solemnitates ab Episcopis Gallicanis in acceptandis Pontificiis Constitutionibus observari solitas, non usurpârint aliarum Gentium Episcopi, non ideo minùs cum illis in ipsâ acceptationis substantiâ consentire dicendi sunt: cum præsertim in tribus proximè recensitis essentialibus acceptationis capitibus maximè conveniant. Præterea eodem sese gesserunt modo Episcopi in acceptandâ Constitutione *Unig.* quo antea in acceptandis aliis Constitutionibus Apostolicis, quales sunt eæ quæ contra Molinos, et librum cui titulus: *Les maximes des Saints*, editæ sunt: atqui, fatentibus ipsismet adversariis, Constitutiones illæ vera sunt totius Ecclesiæ iudicia: neque prætenso uniformitatis defectu, harumce definitionum incusari possunt auctoritas et œcumenicitas; ergo. Denique si quid obstaret quominùs Bulla *Unig.* dici posset *uniformiter* acceptata, maximè quòd ipsa censura generalis duntaxat, et ut aiunt *in globo*, quæ nihil habet fixum, nihil determinatum; et vi cuius nemo certus esse potest de consensu Episcoporum, non *in verbis tantum*, sed et *in sensu ipsius censure*: atqui hæc ratio prorsùs infirma est et nulla: vi enim harumce generalium censurarum duo præsertim constant, in quo omninò consentiunt acceptantes Episcopi; nempe 1º *nullam esse inter damnatas Propositiones, quæ non mereatur saltem aliquam è notis quæ in Bullâ exprimuntur*; 2º *nullam esse in Bullâ censure notam, quæ non cadat in aliquam è damnatis Propositionibus*. Ita Præsules nostri in Comititiis an. 1714 super acceptatione Constitutionis, et in Comititiis an. 1728 in suo ad Regem contra Causidicorum Parisiens. pastoralis Iudicio: vide supradicta et infra paragraph. seq. in respons. ad object.

Instabis: Gallicani Præsules, nonnisi relativè ad explicationes quæ in Pastoralis an. 1714 Instructione continentur Constitutionem *Unig.* acceptârunt: Episcopi verò extra Galliam purè et simpliciter eidem Constitutioni adhæserunt; ergo non sunt inter se uniformes. Relativa siquidem acceptatio prorsùs differt ab acceptatione purâ et simplici.

Respondeo falsissimum esse, Gallicanos Præsules nonnisi relativè ad suas an. 1714, explicationes, Bullam *Unig.* acceptâsse: namque præfata Bulla non fuit recepta relativè ad eam instructionem quæ non extabat cum facta fuit ab Episcopis acceptatio: atqui Pastoralis an. 1714 Instructio non extabat quando Episcopi synodicè Bullam acceptârunt: Instructio enim illa prodit duntaxat die primâ Februarii 1714, quo primum tempore in frequenti Episcoporum consensu lecta est et approbata: porrò Bulla jam synodicè recepta fuerat die 23 Januarii post relationem Eminentissimi Card. de Rohan, qui, ut expressè habetur in Actis deliberationis dictorum Comitiorum an. 1714 luculenter demonstravit, « nullam esse inter damnatas à Clemente XI Quesnelli Propositiones, quæ non mereretur saltem aliquam è censure notis, quæ in Bullâ exprimuntur: et pariter, nullam esse in Bullâ censure notam, quæ in aliquas è damnatis Propositionibus non caderet; ergo. » Equidem Præsules nostri, quando acceptârunt Constitutionem, simul statuerunt Pastoralis Instructionis exemplum subindè esse conficiendum, cum quo Bulla gallicè versa promulgaretur: verùm id præstiterunt, non ut dictæ Constitutioni restrictionem aut modificationem aliquam afferrent, sed ut *adversùs novas concertationes malignasque malevolorum interpretationes suos præmuni*rent. Ita totidem verbis legitur in præfatis an. 1714 Comititiis. Undè quas hi ediderunt explicationes, elidendis malignantium ac invidorum calumniis unicè destinatæ fuerunt; adeòque puræ ac simplici Bullæ acceptationi minimè obstant. Cæterùm ne quis hic hallucinationi pateat locus, nonnullisque aliundè occurratur adversariorum cavillationibus, duplex sedulò distinguenda relativa acceptatio: alia est *restrictiva*, *conditionalis*, ac *limitativa*, quâ restringitur, circumscribitur, immutatur proprius ac naturalis latæ definitionis sensus: talis esset acceptatio illa quâ diceretur propositiones confixas, v. g. Quesnellianas, in tali tantummodò sensu damnari, et non in alio; vel, damnari duntaxat in quantum et quatenus; seu *ex hypothesi*

quod expressos in Pastoralis Instructione errores contineant. Alia est relativa acceptatio *merè explicativa, interpretativa ac declarativa*; ad præcavendas scilicet ac removendas infidas improborum ac versutorum interpretationes unicè ordinata : hæcque proprium ac naturalem definitionis sensum nullatenus immutat aut restringit, imò potius statuit ac firmat : acceptatio priori sensu relativa differt à purâ et simplici acceptatione ; at huic non adversatur, ut jam notavimus, acceptatio illa quæ hoc tantum secundo sensu relativa est. Porro eâ duntaxat posteriori ratione dici potest, Gallicanos Præsules in Comitibus an. 1714 recepisse Bullam relativè ad explicationes quæ in Instructione Pastoralis tunc editâ continentur. Hoc est, eam acceptârunt relatione *merè explicativâ*, non autem relatione *verè restrictivâ ac limitativâ*. Quod quidem constat, 1^o, quia disertè testantur, *se doctrinam Ecclesiæ in Constitutione agnovisse*; 2^o, *se librum Quesnelli et extractas ex eo 101 Propositiones eo modo damnare et cum iisdem qualificationibus, quibus à summo Pontifice damnatæ sunt*; 3^o, *declariant promulgandam esse Pastoralem instructionem, ut omnes concordibus animis et vocum expressionibus Cathedræ Petri unitatis centro conjuncti, errores in 101 Propositionibus damnati facilius extinguere valerent, et adversus disputationes, pravasque interpretationes, Fideles præcaveri*. Vide suprà initio Synopsis historicæ. Non ergo datæ sunt à Gallicanis Præsulibus explicationes ad restringendam corrigendamve Bullam, sed ad illam à perversis ac distortis dissidentium, aliorumve malevolorum interpretationibus vindicandam : undè suâ ad dictas explicationes relativâ acceptatione, Præsules nostri nedum Bullæ auctoritatem imminuerunt, ejusque proprium ac naturalem sensum immutârunt aut restrinxerunt ; imò potius utrumque novo præsidio confirmârunt. Atque de acceptatione hoc posteriori sensu relativâ, hoc est, *merè explicativâ ac declarativâ*, intelligendi sunt Præsules 18 Gallicani qui an. 1716, ad supremum tunc Regni Moderatorem Aurelianensium Ducem feruntur, si Jansenianis fides, scripsisse, Bullam *nonnisi relativè* ad explicationes quæ in Instructione Pastoralis continentur, à se fuisse acceptatam. Quod si iidem alique pauci Episcopi ulterius progressi, de acceptatione *conditionali ac verè restrictivâ* locuti fuerint ; ii certè deserendi sunt ac dimittendi : iique exoticâ suâ Bullæ acceptatione, à longè majori Episcoporum summo Pontifici adhærentium

numero dissidentes, spectari debent, uti *pars à toto avulsa*, quæ hâc ipsâ suâ divisione seipsam improbat ac damnat. Ita Eminentissimi Cardinales de Rohan et de Bissy : ille quidem in Mandato Pastoralis an. 1718, 17 Junii, necnon Epist. ad illustriss. Archiepiscop. Arelatensem, quæ extat ad calcem secundi Communitarii Pastoralis Illustriss. Suessionensis, postea Senonensium Archiepiscopi ; iste verò in suo an. 1722 erudito Documento part. 1, pag. 195, 196, et seqq. Rem totam dilucidè aperit illustriss. mox appellatus Senonensium Archiepiscopus, citato mox loco his verbis : « Mais que quelques Evêques (de France) aient dit ou non, que leur acceptation était relative, s'ensuit-il de là que l'acceptation ne soit pas la même dans toute l'Eglise ? Quelques Evêques de France sont-ils l'Eglise entière de J.-C. ? L'acceptation de tous les autres Evêques Catholiques en est-elle pour cela moins entière et moins uniforme ? La singularité de quelques-uns ne sert qu'à manifester plus clairement l'uniformité et la concorde de tous les autres Evêques. »

Pergit : « Cependant la vérité m'oblige à ne vous pas même accorder qu'il y ait eu entre les Evêques de France cette division que vous faites tant valoir, et qui au fond ne vous servirait de rien. Ceux qui ont pu dire qu'ils recevaient relativement, et ceux qui ont dit qu'ils recevaient purement et simplement, ne différaient entre eux que dans les termes : ils convenaient des mêmes principes, et ils avaient les mêmes vues. » Hancque in rem laudatâ Eminentissimi Card. de Rohan modò citatâ Epistolâ, subdit : « Je me borne à dire ici en deux mots, que les Evêques qui ont pu dire avoir reçu *relativement*, n'ont point prétendu qu'ils eussent modifié et restreint la Bulle en la recevant ; et ceux qui ont aimé à dire que l'acceptation était *pure et simple*, n'avaient d'autre vue que d'exclure l'idée d'une acceptation modificative et restrictive. Ainsi les uns et les autres raisonnant sur un même principe, avaient les mêmes vues et les mêmes intentions, et sous des noms différens convenaient de la même chose. Les uns et les autres convenaient : 1^o, que la Bulle était bonne et conforme à la Tradition ; 2^o, que le sens qu'ils y ont montré était le vrai sens, le sens naturel de cette Bulle ; 3^o, que l'explication qu'ils en ont faite n'était point une restriction de la Bulle, et une détermination à un bon sens, comme si elle en eût eu naturellement un

autre qui ne le fût pas ; 4°, qu'il était nécessaire de joindre l'explication à la Bulle, en la présentant aux Fidèles, à cause des préventions que l'on avait déjà inspirées au Peuple par les libelles ; 5°, qu'en recevant et en expliquant, ils n'agissaient point en simples exécuteurs des Décrets du S. Père, mais qu'ils joignaient, avec toute la maturité convenable, leur jugement à celui du premier Siège, et qu'ils remplissaient ainsi le droit que le Saint Esprit leur a donné de juger de la doctrine. C'est dans ces vues et dans ces principes, que sont encore réunis ceux que vous voulez vainement opposer les uns aux autres. Voilà ce qu'ils ont prétendu, et ils n'ont prétendu que cela : nommez maintenant leur acceptation comme vous voudrez, je ne dispute point des mots, et ils n'en disputent point non plus. »

Demum sic concludit : « Si néanmoins il se trouvait parmi nos confrères, quelques-uns qui soutinssent que leur acceptation a été relative, et s'ils entendaient dire par-là, que leur acceptation restreignait ou modifiait la Bulle, et que ce Décret dangereux et équivoque en soi avait besoin de cette détermination pour être recevable, nous vous les abandonnons sans peine..... Grossissez votre parti de ce petit nombre d'Evêques que vous avez gagnés, l'Eglise de J.-C. n'en sera ni moins forte, ni moins infaillible ; et votre confédération n'en sera pas moins une société sans chef, sans autorité et sans étendue ; et par conséquent, comme le disait feu M. de Meaux, *une parcelle détachée du tout*, qui se condamne elle-même par sa division. »

Hactenus doctissimus Præsul : hisque dilucidé non minùs ac solidè, cunctæ adversariorum circa *puram* et *simplicem*, necnon quorundam *relativam* Bullæ acceptationem vitiligationes, expediuntur ac penitus dissolvuntur. Mirum porro omninò est, prætensam inter acceptantes Episcopos dissensionem opponi ab adversariis, cum ipsimet circa Bullæ repudiationem, aliaque ad eandem Bullam spectantia, in tot tamque discrepantia inter sese secti sint ac divisi placita. Plurimi cum Quesnello, uti ex dictis initio præsentis Articuli constat, non verentur asserere, *damnatæ 101 Propositiones esse totidem catholicas veritates, quarum pleræque essentielles sunt religioni* : alii econtra fatentur, plures ex damnatis his Propositionibus, *scatere, aut saltem favere Jansenianis erroribus*. Nonnulli Bullam vocitant, *horrendum Decretum per quod* « primum Symboli caput, divini

amoris primum et maximum Mandatum, tota denique Religio apertè concutitur, convellitur, funditus subruit ac evertitur : » alii duntaxat causati sunt, « ipsam obscuritate suâ quibusdam abusibus locum dare ; hancque idcirco quibusdam indigere elucidationibus. » Inter Appellantes non pauci contendunt, *Bullam, quâcumque datâ explicatione, non posse recipi* : alii sæpius contestati sunt, *se ad eam cum explicationibus recipiendam paratos esse*. Atque hæc de adversariorum circa Bullæ repudiationem dissidiis. Non minor est eorumdem, circa Pastoralem Comitiorum an. 1714 Instructionem, dissensio. Plures ex non Acceptantibus sæpè confessi sunt, etiam in publicis Mandatis, *eos à quibus Instructio Pastoralis edita est et adoptata à veritate non decessisse* ; ita Card. Noall. in suo an. 1714, die 25 Februar. Mandato, ita etiam eidem Cardinali adhærentes octo Præsules, in suâ ejud. an. contestatâ denuntiatione suprâ laudatâ : Quesnellus autem passim, maximè in septimo suo Memoriali asseverat, *errores capitales ad fidem pertinentes in eâ instructione reperiri*. Paria asserunt non ignobiles Quesnelli asseclæ, inprimis ipsius defensor Hexaplar. auctor, præfat. in-4° pag. 51. Dissentiunt pariter circa Bullas contra Baium et Jansenium hactenus emissas : alii enim mitiores dicti, profitentur se earum auctoritatem agnoscere ac venerari, iis non exceptis quæ Formularii subscriptionem impetrant ; quanquam, ut in suis perstent erroribus, Decreta hæc Apostolica, in extraneos et prorsus alienos sensus detorqueant : alii rigidiores, apertè ac procaciter easdem Bullas proscindunt, et tanquam nullas aut etiam iniquas rejiciunt. At maxima omnium inter ipsos Appellantes discordia, ipsam spectat naturam, formam et characteres Judiciorum Ecclesiasticorum : circa quæ immane prorsus in quot iterum varias scindantur partes : de quo suus erit alibi dicendi locus. Interim consule laudatum jam illustriss. Senonens. Archiepiscop. in 3 Commonitor. à n. 16, ad n. 77. Quamobrem hic contra repugnantes Constitutioni intorqueri potest, quod adversus Donatistas notat, iisdemque objicit S. Aug. Serm. 4, de Script. n. 51 : « Videte illos qui se ab unitate præciderunt, in quot frustra divisi sunt : » scilicet, quemadmodum in Protestantes scitè advertit illustriss. Bossuet. in primo *circa promissa Ecclesiæ* Mandato, n. 19, excusso semel salubri auctoritatis Ecclesiæ jugo, necesse est perpetuas et interminabiles enasci scissuras ac dys-

sensiones : « Le principe d'union une fois perdu en se séparant d'avec celle (l'Eglise) où tout était un auparavant, a tout mis en division; les schismes se sont multipliés, et n'ont pas eu de remède.... Ainsi s'étaient divisées toutes les sectes : l'Arianisme, le Pélagianisme, l'Eutychianisme, avaient enfanté les Demi-Ariens, les Demi-Pélagiens, les Demi-Eutychiens de plus d'une sorte, et ainsi des autres. On n'a plus rien de certain, quand on a une fois rejeté le joug salutaire de l'autorité de l'Eglise. » Hæc egregiè doctissimus Præsul.

Dices 4°. Canonica non fuit Bullæ acceptatio, nec *juridicè* data : namque canonica ac juridica Bullæ acceptatio fieri debet in Conciliis : maximè si quæstio sit de propositionibus obscuris, intricatis, et in globo damnandis : quandoque enim necessaria est Conciliorum celebratio; tuncque inprimis, ad detegendum scilicet, ac certò figendum proprium ac naturalem damnandarum propositionum sensum : atqui in præsentī Bullæ Unig. negotio, ubi de proscribendis in globo quampluribus obscuris admodum ac valdè intricatis propositionibus agitur, certum omninò est et exploratum, nec in Galliis, nec apud exteras nationes catholicas, celebrata fuisse Concilia; ergo, etc. proindeque inutilis ac nullius ponderis, jactata à nostris, cæterisque Præsulibus, prætensa constitutionis acceptatio. Ita apertè plerique ex Quesnellistis, inprimis verò insignis apud ipsos auctor libri cui titulus, *De la nécessité de l'Appel*, pag. 607, ubi sic habet : « Une condition essentielle pour un jugement de l'Eglise universelle, est qu'il soit reçu dans les formes canoniques, c'est-à-dire, par les Evêques assemblés dans des Conciles particuliers qui examinent mûrement la matière : et les jugemens de foi ne doivent être prononcés que dans les Conciles.... Or la prétendue acceptation de la Bulle Unig. par l'Eglise Gallicane s'est faite sans Conciles.... la Bulle n'a donc pas été reçue dans un ordre canonique. » Consimilia eisdem fermè verbis tradit Pastorale an. 1719 Documentum sub nomine Eminentiss. Noallii proposit. 2, cap. 1, paragraph. 12, et cap. 2, paragraph. 5, etc.

Respondeo 1°. recurrere hic ex integro propositas ac primam objectionem solutiones : hisque præsens liquidò expeditur nodus : consule. Respondeo 2°. Quæ jam ex defectu cœcumenicitatis et celebrationis Conciliorum, opponunt adversarii, merè sunt criminationes, quas communes habent cum iis omnibus qui

causâ ceciderunt : imò iniquæ calumniæ sunt, nefariæque convicia, quæ in dedecus et opprobrium primorum Pastorum Capiti suo adhærentium, à quibus certè, ut ex dictis patet, acceptata fuit Constitutio, directè recidunt ac relabuntur. Nec Pelagianis olim similia in primos Pastores probra minimè defuerunt : *Quid est ergo quod dicunt*, inquit S. Aug. Pelagianorum in orthodoxos Episcopos expostulationum causas referens, lib. 4 ad Bonifac. cap. 12, n. 54, « simplicibus Episcopis, sine congregatione Synodi in locis suis sedentibus, extorta subscriptio est. » Quam quidem futilem querimoniam ibidem nervosè confutat S. Doctor : verba modò laudabimus. Respondeo 3° nihil exitiosius sanè, ac in fide periculosum magis, generali isto quod hic Quesnelli assecræ præfractè statuunt principio : scilicet, *ad vera et canonica Ecclesiæ universalis judicia essentialiter requiri, ut ab Episcopis in Conciliis lata sint aut acceptata*. Perindè id Scripturis, Traditioni, ac multiplici palmari fidei placito capitaliter adversatur. Primò. Privilegium inerrantiæ à Christo universim Ecclesiæ promissum fuit : *Vobiscum sum omnibus diebus*, Matth. 28. *Portæ inferi non prævalebunt adversus eam*, ibid. 16, *Ecclesia Dei vivi, columna et firmamentum veritatis*, I ad Timoth. 3. ergo Ecclesiæ dispersæ et extra Concilia, non minùs quàm in Conciliis congregatæ, competit inerrantiæ donum. Imò, si fas est dicere, potiori ratione dispersæ, quàm collectæ in Conciliis : quia isti eo duntaxat nomine ac titulo competit, quòd sit Ecclesiæ totius imago, seu repræsentatio; Ecclesia verò dispersa non tantùm imago ac repræsentatio, sed est ipsamet Ecclesia. Infallibilia ergo sunt ac proindè verè canonica, Ecclesiæ Judicia lata etiam extra Concilia. Et verò, uti vidimus supra, promissa à Christo facta Ecclesiæ, *perpetua sunt, absoluta ac independentia* : ac per consequens non congregatam modò, sed et dispersam respiciunt Ecclesiam : necnon cuncta utriusque, de rebus ad religionem spectantibus, lata Judicia. Secundò, SS. Patres, inprimis Irenæus, Cyprianus, Optatus, etc. ad Ecclesias ubique terrarum dispersas passim provocant, non ad Concilia duntaxat, ut vera fidei regula figatur ac dignoscatur : *Judicibus ergo iis Ecclesiæ doctoribus, consensus et definitio dispersarum Ecclesiarum, independentè à Conciliis, certum est ac invictum veritatis argumentum*. Nec proindè ad vim et robur Ecclesiastici judicii necessum est, ut in Conciliis latum fuerit aut acceptatum. Tertiò, ex totâ traditione constat

aut nulla, aut paucissima primis Ecclesiæ sæculis celebrata fuisse Concilia : attamen ex eadem Traditione itidem constat, his etiam temporibus, plurimas hæreses, definitionibus Ecclesiæ, utique iuridicis ac canonicis, damnatas et attritas fuisse. Fatetur istud S. Augustinus citato lib. 4 ad Bonifacium cap. ultimo, ubi Pelagianis tumultuantibus ac Concilium postulantis respondet his verbis : « Aut verò congregatione Synodi opus erat ut aperta perniciēs damnaretur : quasi nulla hæresis aliquando nisi Synodi congregatione damnata sit : cum potius rarissimè inveniantur, propter quas damnandas necessitas talis extiterit ; multoque sint atque incomparabiliter plures, quæ ubi extiterunt, illic improbari damnarique meruerunt, atque inde per cæteras terras devitandæ innotescere potuerunt. » Mox addit : « Verùm istorum superbia.... hanc etiam gloriam captare intelligitur, ut propter illos Orientis et Occidentis Synodus congregetur. Orbem quippè catholicum, quoniam Domino eis resistente pervertere nequeunt saltem commovere conantur. Cum potius vigilantia et diligentia pastorali post factum de illis competens sufficiensque iudicium ubicumque isti lupi apparuerint, conterendi sunt, sivè ut sanentur atque mutantur, sivè ut ab aliorum salute atque integritate vitentur. » Quapropter idem S. Doctor lib. 3 contra Julian. cap. 1, n. 5 : « Vestra, inquebat, apud competens iudicium communium Episcoporum modò causa finita est : nec amplius vobiscum agendum est, quantum ad ius examinis pertinet, nisi ut prolatam de hac re sententiam cum pace sequamini : quòd si nolueritis, à turbulentà vel insidiosà inquietudine cohibeamini. » Similia habet. Serm. 151, aliàs 2, de verbis Apost. cap. 10. Hæc ad dissipandam præsentem Quesnellistarum vitiligationem, peremptoria. Hinc etenim ex antiquâ constantique Ecclesiæ praxi liquet, teste ipsomet S. Augustino, absque Conciliis, ultimo ac supremo (iuridico proinde ac canonico) Ecclesiæ dispersæ Iudicio, causas fidei finitas fuisse. Quod locis citatis generatim expressit. S. Augustinus, per plures hæreses decurrendo probat Eusebius, multas sigillatim ab Episcopis, seu Ecclesiâ dispersâ damnatas fuisse sine Conciliis. Ita lib. 3, Hist. Eccles. cap. 26, et seqq. lib. 4, cap. 7, lib. 5, cap. 16, etc. Quartò. Sacra Facultas Parisiensis, his ex S. Aug. imbuta documentis, Decreto an. 1665 lato, declarat : « necessarium non esse absolutè Concilium generale ad extirpanda quælibet schismata et quaslibet hæreses, v. g.

Pelagianam et Jansenianam, quas constat sufficienter extinctas absque Concilio generali, quod tantum in aliquibus casibus dici potest absolutè necessarium. » Quod eò loci de generali Concilio tradit sacer Ordo, id de particularibus Conciliis à fortiori dici debet : illa scilicet semper necessaria non esse ad extirpandas hæreses ; quod et ex constanti priorum Ecclesiæ sæculorum usu, et praxi manifestius patet ; absque quibuslibet ergo Conciliis, canonica ac decretoria haberi possunt universalis Ecclesiæ iudicia. Quintò. Bullæ Innocentii X adversus Jansenium, et Innocentii XII, adversus librum cui titulus, *Maximes des Saints*, etc. canonicæ sunt, et ut tales agnoscuntur ab adversariis : atqui Apostolica illa iudicia absque præviis Conciliis lata fuere ; ergo. Sextò. Dogmatica S. Pontificis Constitutio, accedente expresso aut tacito primorum Pastorum consensu, hoc ipso evadit irreformabile universalis Ecclesiæ Iudicium. Vel ipsimet insigniores dissidentium coryphæi, non fatentur modò, sed et expressè statuunt palmare istud Ecclesiasticarum definitionum principium. Ita illustriss. Senecens. et Monspessulan. Soanen et de Colbert, cum aliis quatuor Præsulibus, in communi suâ ad Pastorem an. 1722 Card. de Bissy Instructionem responsione, pag. 141. et seqq. Ita etiam Eminentiss. Noallius, tum in Pastoralis an. 1719. Mandato, pag. 125, 124, etc., tum in suâ ad S. Pontificem datâ an. 1711 Epistolâ, tum in authentica, suo et decem aliorum Archiepiscoporum et Episcoporum nomine, subscriptâ et Romam missâ an. 1710 declaratione : extat hæc ad calcem Actorum verbalium 1705. Porro fundamentali huic principio directè adversatur proposita Quesnellistarum objectio : enimverò si valeat, jam Decreta Apostolica, ut universalis Ecclesiæ Iudicii vim et auctoritatem obtineant, necessum est ut ab Episcopis *synodicè congregatis* acceptentur : proindeque *tacitus Episcoporum consensus* nusquam sufficit, sed *expressus* requiritur ac *solemnis*, ut præfatis Decretis suprema accedat auctoritas. Quod citatis locis disertè reprobant Appellati mox dissidentium duces ; ergo. Septimò. Denique, et hoc quidem uno, opposita funditus subruitur difficultas, ipsique adjuncta exceptio : scilicet, de œcumenicorum aut particularium Conciliorum necessitate, quidquid tandem sit, nusquam sanè necessaria sunt, ubi « multitudo Episcoporum summo Pontifici *definienti* adhæret, paucis admodum ex adverso reclamantibus. » Ita constanter ac disertissimè tradunt Ortho-

doxi omnes : inprimis illustrissimi de Marca et Bossuet, hic quidem in defens. declarat. Cleri Gallic. tom. 1, lib. 5, cap. 2; alter verò, in citato suprâ Memoriali circa Pontificium infallibilitatem an. 1661 edito, et in regiâ Bibliothecâ asservato. Errorque contrarius in *Donatistis, Luciferianis, Pelagianis*, jam pridem à SS. Patribus Optato, Hieron. et Aug. obtritus fuit : necnon in Pseudo-Ministris Voëtio, Claudio, Jurieo, Basnagio, iterùm nunc explosus à Cardinalibus Rosio, Bellarm. Perron. aliisque Polemicis tractatoribus. Jam verò in præsentî Constitutionis negotio, summo consensu, ut ex dictis patet, Apostolicæ Sedi adheret maxima multitudo Episcoporum, ne uno quidem in exteris Regionibus dissentiente. In unâ Galliâ reluctati sunt numero admodum pauci, vixque nunc reluctatur unus aut alter; ergo.

Dices 5°. *Libera non fuit Bullæ acceptatio : in Galliis siquidem regiâ potestate et terroribus res tota acta est : in exteris verò Regionibus, inquisitio quæ multis in locis viget, jus et auctoritatem examinandi ac judicandi, Episcopis non relinquit. Invalida ergo ac de jure nulla, præfata acceptatio. Ita La vérité rendue sensible art. 7, q. 2, pag. 299. Observat. sur le 2 Avertiss. de M. de Soiss. p. 24. De la nécessité de l'appel. pag. 605, etc. aliique.*

Respondeo 1°, hic iterùm recurrere quæcumque ad primam objectionem diluendam adducta sunt momenta. Consule. Respondeo 2°, Pelagianos similem olim in Catholicos instituisse querimoniam : « Simplicibus, aiebant citato lib. 4 ad Bonifac. cap. 12, Episcopis, sine Congregatione Synodi in locis suis sedentibus, extorta subscriptio est, » et lib. 5, Oper. imperf. contra Julian. cap. 2 : « Si in his qui Sacerdotii munere funguntur, libera stetisset et virilis auctoritas : Traducianorum (sic dicti à Pelagianis Catholici, propter peccatum quod generatione traditum est) commenta, ut invicta ratio prarait, ita publica contrivisset assensio. » Respondeo 3°, quod spectat acceptationem à Gallicanis Præsulibus factam : absque insigni calumniâ dici nequit, metu et terroribus auctoritate regiâ incussis, rem totam actam fuisse : præterquamquod enim vis illata Episcopis probari non potest, ipsemet Hexaplar. auctor. in præfat. edit. 1714, pag. 43, refert Epistolam nomine Regis ab illustrissimo Galliarum Cancellario ad Eminentiss. Card. Noallium scriptam, in quâ ait, velle Regem ut Episcopi conventui intersint, cum plenâ et integrâ libertate sensus suos exponendi, et

pag. 56, eundem Cardinalem sic loquentem inducit : « Que Sa Majesté étoit très-éloignée de vouloir prévenir leurs suffrages, et qu'elle leur laissait une entière liberté. » Certè si metus incussus fuisset Episcopis Comitiorum an. 1714, paucissimi illi Præsules qui post acceptatam à se Constitutionem ab eâ provocaverunt ad Concilium generale, mutatæ agendi rationis motivum hoc projectò protulissent : attamen nullas ad id confugit ; ergo. Insulsum porrò ac ridiculum, quod ad probandum in Comitii 1714 libertatis defectum objiciunt adversarii, *Episcopos scilicet non acceptantes Litteris regis ad suas diœceses fuisse remissos* : namque nonnisi post acceptam synodicè à 40 Episcopis Constitutionem, ad proprias diœceses redire compulsi sunt Episcopi non acceptantes. Deinde, quis dixerit, jussionem redeundi in propriam diœcesim haberi posse ab Episcopo, instar violentiæ quæ viro constanti possit metum gravem incutere. Denique tametsi daretur liberam non fuisse Parisiis factam ab Episcopis an. 1714 Bullæ receptionem, non idcirco de jure nulla probaretur : ut enim statuit Clemens III cap. cum virum de Regularib. Ratificatione subsecuta quod gestum fuerat roboratur : porrò Episcopi ratam habuerunt Constitutionis acceptationem eo ipso tempore, quo de eorum libertate dubitari non potuerat : 1°, ratam eam habuerunt in Mandatis quæ singuli in suis diœcesibus existentes postea promulgârunt ; 2°, ratam habuerunt in Comitiiis generalibus an. 1713, in quibus post mortem Ludovici XIV, duos præ cæteris exitiosos libellos confixerunt tanquam Constitutioni receptæ contrarios ; 3°, ratam habuerunt in scriptis memorialibus an. 1717 Aurelianensium duci supremo tunc Regni moderatori oblati adversus obsistentes dictæ Constitutioni ; 4°, ratam habuerunt in mandato uniformi quo 50 circiter Episcopi declarârunt an. 1718 Constitutionem *Unig.* dogmaticum esse Ecclesiæ universalis judicium, à quo omnis appellatio nulla est, temeraria, schismatica, etc. 5°, ratam habuerunt in subsequentibus Comitiiis, in quibus plerisque omnibus, dicta Constitutio constanter prædicatur *Ecclesiæ et Regni lex*. Verbo dixerim, Præsules Gallicani ab annis plus quàm 55 in suâ acceptatione, firmiter perstant, quidquid ad eos à sententiâ dimovendos ab adversariis præstari potuerit ; ergo.

Respondeo 4°, quod spectat factam ab exteris Episcopis Bullæ acceptationem, insulse

pariter ac calumniosè asseritur, his Præsulibus, metu tremendi Tribunalis Inquisitionis examinandi ac judicandi auctoritatem fuisse ademptam: proindeque nullam esse de jure eorum acceptationem. Namque 1º, in Germaniâ, Hungariâ, Poloniâ, Belgio catholico, etc., inquisitio non viget: harum autem Regionum Episcopi expressa Constitutioni dederunt suffragia, et eam habent pro irreformabili Ecclesiæ Judicio. 2º. In illis ipsis Regionibus ubi viget Inquisitio, jure suo non frustrantur Episcopi: quia Sedem habent in Inquisitionis Tribunali, atque iis videntibus, expendentibus, plaudentibus, consentientibus, Apostolicæ Constitutiones promulgantur, uti disertè testantur Archiepiscopi Cæsar-Augustanus, Burgenensis, aliique quamplures suprâ relati. 3º. Iterum hùc redit invictum argumentum ductum ab acceptatione omnium aliarum Constitutionum à tempore Concilii Trid. quæ, si valeat objectio, nulla censenda est: imò nec usquam, eadem de causâ, valitura erit Ecclesiæ dispersæ acceptatio, quantumcumque unanimis et expressa esse possit: quod quidem omnimodam Ecclesiæ auctoritatem et infallibilitatem radicatus convellit. Respondeo 5º, hocque uno tota absolvitur difficultas, *vi promissionum*, nusquam contingere potest, ut seu violentiâ, seu negligentia, seu fraude, portæ inferi prævaleant adversus Ecclesiam. Obligatam habemus hanc in rem Christi fidem: *Ecce ego vobiscum sum omnibus diebus*, Matth. 28. *Portæ inferi non prævalebunt adversus eam*, ibid. 16; porro prævalerent, si Inquisitionis metu, aut alio quocumque motivo Ecclesia dispersa erroneæ S. Pontificis definitioni adhæreret; ergo, etc. Vide dicta in resp. ad primam object.

Dices 6º. Canonica Pontificii Decreti acceptatio exigit *expressum* Corporis Episcopalis *consensus*, authenticis notum instrumentis, aut saltem publicis *sermonibus*, *usibus*, *factis*; adeo ut omninò constet Pontificem et Episcopos unanimiter et uniformiter sentire: nec ullatenus sufficit consensus ex solo innotescens *silentio*: aliàs quælibet opinionum monstra jam faciliè velut Ecclesiæ placita stabiliri poterunt: atqui in præsentì Constitutionis *Unig.* negotio, ex consensu potissimum tacito, seu ex solo Episcoporum *silentio* colligitur dictæ Constitutionis acceptatio: hincque inprimis petita nostræ conclusionis secunda probatio; ergo. Etverò, ex *silentio* cujus tot aliæ externæ causæ ab illo prætenso tacito consensu distinctæ pro-

ferri possunt, certò inferri non potest tacitus hic consensus, tacita hæc approbatio: atqui *silentii* Episcoporum circa dogmatica summorum Pontificum Decreta, speciatimque circa Constitutionem *Unig.* multæ causæ externæ proferri possunt à prætenso consensu tacito distinctæ, v. g. plerique *silent* Episcopi, vel propter præconceptam Pontificiæ infallibilitatis opinionem; vel ob metum Tribunalis Inquisitionis, aut spem injectam gratiæ alicujus à S. Sede obtinendæ; vel denique, quòd res definita involuta sit et intricata, nolintque maturam ac diligentem, quæ tamen necessaria foret, adhibere disquisitionem; ergo non ex solo *silentio*, sed ex aliis supradictis notis colligendus tacitus Episcoporum consensus, tacitæque eorum approbatio. Ita passim insigniores ex Appellantibus; inprimis citati sæpius sex Præsules in respons. ad Pastoralem an. 1722 Card. de Bissy Instructionem, cap. 23. Ibi pluribus congestis, ad confutandam petitam ex *silentio* consensus taciti notam: « Jusqu'ici, inquit n. 2, on avait cru que l'infailibilité sur la doctrine, étoit attachée au Corps des Pasteurs quand ils parlent; mais c'est à leur silence que M. le Card. de Bissy veut l'attacher, comme à la preuve ordinaire, et la seule nécessaire. » Ad hæc oppositè Senecensis Præsul in suo circa auctoritatem et characteres judiciorum Ecclesiæ Pastoralì Mandato, part. 4, art. 14, n. 7, sic habet: « Qui dit *acceptation tacite*, dit deux choses: *acceptation et acceptation tacite*.... Comme *tacite*, cette acceptation ne renferme point certaines formes parlantes, et certains actes authentiques. Mais comme *acceptation*, elle exige essentiellement une *conformité de jugemens, de doctrine, de prédication et d'usage*. On parle, on instruit, on agit conformément à un Decret. » Subdit: « Ce n'est pas même assez pour l'acceptation d'un Decret, que la Doctrine qu'il renferme soit conforme à celle qu'on enseigne.... il faut de plus qu'il soit évident par les faits mêmes et par l'usage, que toute l'Église a reconnu sa doctrine dans ce Decret. » Similia tradit Eminentiss. Noallius, Instruct. Pastoral. an. 1719, cap. 3, paragraph. 5: « L'acceptation tacite, aussi bien que l'acceptation solennelle, inquit, suppose toujours une conformité de jugement sur un même objet entre le Pape et les Evêques, par lequel ceux-ci font connaître que la décision du Pape est conforme à la doctrine de leur Eglise; condition si essentielle, que si les Evêques n'avaient point jugé, on ne pourrait point dire

qu'ils eussent accepté. » Moxque addit : « Il y a seulement cette différence , que le jugement que les Evêques prononcent dans l'acceptation expresse , se fait avec solennité , et qu'il est exprimé par des Actes publics... au lieu que dans l'acceptation tacite , le jugement des Evêques rendu sans solennité , est prouvé par des faits , sans être exprimé par des paroles. » Pergit : « C'est par cette raison que l'acceptation expresse est facile à connaître , et que l'on en est assuré aussitôt qu'elle a été faite , au lieu que l'acceptation tacite est plus difficile à discerner , et qu'il faut ordinairement un temps considérable pour s'en assurer. » Eadem habent plerique alii dissidentes.

Respondeo 1^o, nihil hic objici , quod in Bullas adversus Molinosum et librum de placitis Sanctorum , etc. , pariter , imò à fortiori , opponi non possit : longè plura enim , eaque splendidiore , ut constat ex probationibus , in gratiam Constitutionis Unig. quàm pro dictis Decretis occurrunt expressæ acceptationis testimonia : atqui præfatæ adversus Molinos. et placita Sanctorum Bullæ , ne ipsis quidem diffidentibus adversariis , vera sunt ac canonica universalis Ecclesiæ judicia ; ergo. Undè argumentum istud , nimium adeoque nihil probat ; ipsisque etiam à quibus proponitur , solvendum est. Respondeo 2^o, quæ eò loci opponuntur , deprompta ex insufficientiâ silentii Episcoporum ad declarandam tacitam eorum approbationem , immeritò prorsus ac præposterè objectari adversus Constitutionem Unig. quæ , postulantis Episcopis , ab Apostolicâ Sede profecta est ; et tam expressè ac solemniter in Galliis , totoque Orbe catholico acceptata : quemadmodum abundè liquet ex adductis probationibus ; necnon ex innumeris ac disertissimis nostrorum , extraneorumque Præsulum laudatis testimoniis. Respondeo 3^o. Ecclesia Dei inter multam paleam , multa que zizania constituta , multa tolerat , « et tamen quæ sunt contra fidem , vel bonam vitam , non approbat , nec tacet , nec facit ; » ita S. August. Epist. 35 , olim 149 , cap. 10 , n. 55 ; paria tradunt Cardinales Hosius et Bellarm. necnon Melchior Canus , Thomassin , ipsique etiam Petrus Aurelius et Quesnell. , ut supra dictis videre est. Nullatenus ergò metuendum ne prævaleant esse opinionum ac errorum monstra , si talis acceptatio sufficit , ut nempe silentium Episcoporum pro tacitâ illorum approbatione haberi debeat. Non dormitabit neque dormiet , (Psalm. 120) qui custodit Israël. Quòd

si vigilantes tacuerint , lapides clamabunt. Respondeo 4^o , certum esse , regulam obsequii quod legi ac Legislatori debetur , non esse motivum legis , sed legem ipsam , ad quam unicè attendi debet : aliàs , pro vario , quod sibi quilibet ad arbitrium effingeret , legis motivo , obsequium suum daret , vel recusaret : quo nihil periculosius ac exitiosum magis. Quæcumque ergo fingi et excogitari possint adscititiæ , seu externæ silentii Episcoporum causæ ac rationes , semper istud ratum ac firmum stabit : Spiritum veritatis nusquam permissurum esse , ut aliquem , in his quæ fidem aut mores spectant , errorem Ecclesia quoquo modo approbet. Quocumque modo (ac proinde etiam silendo ac tacendo) fiat ut Ecclesia consentiat ; inquit Bossuet. laudato lib. 3 , defens. declarat. Cleri Gallic. cap. 2 , transacta planè res est : neque enim fieri potest unquam , ut Ecclesia Spiritu veritatis instructa , non repugnet errori. Respondeo denique 5^o , certissimum , facillimum , necnon apud Orthodoxos vulgatissimum esse , quod ex silentio Episcoporum eruitur dignoscendi consensus taciti argumentum : ita apertè S. Aug. aliique auctores mox citati. Vide hanc in rem copiosè dicta supra probat. 2 ; è contra quos adversarii in locum dicti silentii sufficiunt ex usibus , uniformique doctrinâ , necnon ex præviis ac debitis examine , motivis , judicio , etc. petiti characteres , novi omninò sunt et inauditi ; à dissidentibus ad infirmendam , si fieri posset , canonicam Bullæ acceptationem , unicè ac recter excogitati ; atque nedum rudioribus , ut patet , sed et doctioribus impervii : neque enim quisquam valet hos omnes confictos characteres , utpotè cùm plerique ex internis animi sensibus suspensi maneant , certò perspicere ac perscrutari ; ergo , etc.

Instabis : Clerus Gallicanus in celebri suâ an. 1700 censurâ , graviter perstrinxit duas propositiones in quibus , cohærenter ad ea quæ modò diximus , silentium Episcoporum circa doctrinam , loco approbationis habendum esse asseveratur. « Opinio debet censi probabilis , ait propositio 130 , dùm non constet rejectam esse à Sede Apostolicâ tanquam improbabilem. » Et proposit. 121 , sic habet : « Non sunt scandalosæ aut erroneæ opiniones , quas Ecclesia non corrigit. » Has verò propositiones ita notant Comitia : « Hæ propositiones , quæ nûs silentium et tolerantiam pro Ecclesiæ vel Sedis Apostolicæ approbatione statuunt , falsæ sunt , scandalosæ , salutis animarum noxiæ , patrocinant pessimis opinionibus quæ identidem

obtruduntur, atque ad Evangelicam veritatem iniquis præjudiciis opprimendam viam parant. Ex hac autem censurâ colligunt adversarii, erroneum esse, et à Clero Gallicano explosum placitum illud quo statuimus, silentium, seu meram non reclamationem Episcoporum, certissimum esse tacitæ eorum approbationis argumentum. Ita citati mox Præsules, locis indicatis: necnon Auctor Scripti cui titulus: *Justification du droit et de la canonicité de l'ap-pel*, pag. 51, 52.

Respondeo, incauté prorsus ac præposterè nobis hic opponi Cleri Gallicani censuram: apertum siquidem ac latissimum discrimen occurrit inter sententiam quam damnat Clerus Gallicanus et nostram. In præfatâ censurâ agitur de lib. Auctoris alicujus junioris seu moderni, cujus doctrina eo ipso probabilis asseritur, quòd non sit à Sede Apostolicâ apertè rejecta tanquam improbabilis: « *Si liber sit alicujus junioris ac moderni*, ipsissima sunt proposit. 30 verba, debet opinio censi probabilis, dum non constet rejectam esse à Sede Apostolicâ, tanquam improbabilem: quæ certè generalis et illimitata assertio, manifestè falsa est, et multiplici ex capite meritò proscripta. Ex solo quippe silentio circa doctrinam privatam alicujus præsertim Junioris seu moderni auctoris *vix cognitam*, obscuram et nondum satis evolutam, vel incertam et in scholis controversam, perperam omninò infertur, illam probatam esse: neque enim, uti evidens est, tenetur Ecclesia aut Sedes Apostolica, singulos indiscriminatim, qui in dies prodeunt, recentiorum libros excutere, sententiam eorum rimari, errores, si qui sint, proscribere ac damnare, ex quibus nullum vel scandalum vel periculum timetur. *Dicatur verum*, inquit S. Aug. lib. 2, de dono persever. cap. 16, *ubi aliqua questio, ut dicatur impellit*. Si ergo (quemadmodum in proposito moderni auctoris casu, aliisve similibus) nulla questio seu causa impellit, silentium Episcoporum tunc loco approbationis haberi non debet. Nihil porrò commune habet hæc Cleri censura cum proposito nostro. Namque loquimur de Clementinâ Constitutione *Unig.* quæ ex dictis et stabilitis inter probationes, publica est et sollemnis Sedis Apostolicæ lex et regula ad omnes Fideles directa, à Præsulibus Gallicanis, (apud quos enatus fuerat Quesnellianus error) aliisque quampluribus exterarum Orbis catholici partium Episcopis expresso consensu recepta; nullis omninò (præter admodum paucos in

unâ Galliâ) reluctantibus: his certè in circumstantiis ad quas neutiquam respicit censura, et à casu ibidem proposito, toto cœlo distantibus, tenerentur illi reclamare: et reipsâ, vi promissionum Christi, reclamarent, si errorem contineret propositio illa: aliàs actum esset de Ecclesiæ infallibilitate, prorsusque foret conclamata ipsius indefectibilitas. Ergo tunc silentium Episcoporum non reclamantium approbationis et consensûs loco habendum est. Responsionem hanc, propositamque discriminis rationem, inter sententiam nostram et illam quam damnat Clerus Gallicanus, pluribus in locis aperiunt et evolvunt Præsules Gallicani, imprimis Eminentiss. Card. de Bissy, et Archiepiscop. Senecens. « Autre chose est de dire, ait Eminentiss. ille Card. Documento Pastor. an. 1722, part. 1, pag. 790, que le silence de l'Eglise sur une opinion particulière est une marque de son consentement, et autre chose de soutenir que son silence sur une décision du Saint-Siège adressée aux Fidèles, est une marque de son approbation. Nous convenons que l'Assemblée de 1700 a condamné le premier de ces deux sentimens, et nous souscrivons de très bon cœur à sa censure. Mais cela empêche-t-il qu'avec les Evêques acceptans nous ne soutenions après les Pères, que l'Eglise ne peut pas tolérer une fausse règle de croyance proposée aux Fidèles? »

Et in Mandato an. 1725, pag. 205, rursus sic habet idem doctissimus præsul: « Il faut bien distinguer entre une simple opinion de l'Ecole, soutenue dans l'Eglise par des particuliers, et une décision faite par le S. Père, adressée aux Fidèles pour leur servir de règle, et formellement adoptée par une grande partie des Evêques. Nous soutenons que dans le dernier cas, le silence des Evêques qui n'ont pas accepté la Bulle d'une manière expresse, est une marque de leur consentement tacite. Mais à l'égard de ces opinions, qu'on soutient dans les Ecoles, et que l'Eglise tolère, nous avons prouvé par des raisons solides, que la non-reclamation des Evêques n'est point un signe de leur acceptation. Par là nous nous sommes conformés à la censure, que l'Assemblée du Clergé a faite en 1700; nous avons dit, et nous le disons encore, que le silence du très grand nombre des Evêques, sur ces opinions tolérées dans les Ecoles, n'est pas une preuve de leur consentement à les reconnaître pour bonnes. » Hæc Eminentiss. auctor, quæ Gallicanam censuram, statuto à nobis circa signum

consensûs taciti principio, neutiquam adversari, clarissimè ostendunt. Cæterùm, ut faciliùs plerisque aliis occurratur cavillationibus, quæ in præsentî negotio contra præfati silentii vim et auctoritatem proponuntur ab adversariis: observandum, silentium seu non reclamationem Episcoporum tacitam eorum approbationem importare; *tunc maximè* ubi sequentes adsunt conditiones. Prima: cùm dogmatica S. Pontificis Constitutio ad omnes Fideles tanquam norma et regula dirigitur ab his qui sunt in auctoritate constituti. Secunda: cùm res controversa à quampluribus Episcopis, iisque præsertim apud quos controversia nata est, discussa fuit, ac lata definitio expresso consensu recepta et probata. Tertia: cùm pauci admodum ex adverso reclamant, atque à latâ definitione satis temporis effluxit, ut præsumi meritò possit eam ad Episcoporum notitiam pervenisse. His præsertim in circumstantiis, silentium tacitam Episcoporum approbationem indubitanter importat: atque tunc ex eo silentio certissimè constat, Pontificias definitiones vim et auctoritatem infallibilem habere. Idipsum ex omnibus intrinsecis et extrinsecis loco mox indicato adductis momentis clarissimè constat: quibus istud addo: Cùm quis potest et strictissimè tenetur loqui, tunc maximè, aut certè nusquam locum habet depromptum ex jure effatum: *Qui tacet, consentire videtur*: silentium proinde tunc certum est consensûs taciti signum: atqui in prædictis circumstantiis, quando scilicet tres occurrunt suprâ memoratæ conditiones, ex hypothesi quòd erronea foret Pontificia definitio, reclamare teneantur Episcopi; utpotè cùm in summo versaretur discrimine fides: imò *vi promissionum* procul dubio reclamarent: aliàs actum esset de externâ fidei professione, prævalerentque adversus Ecclesiam inferi portæ: Pastoribus omnibus, aut Decretis ac Mandatis, aut silentio ac non reclamatione fidem prodentibus; ergo, etc., ac proindè silentium Episcoporum, ubi præsertim tres adsunt supradictæ circumstantiæ, certissimum est tacitæ eorum approbationis argumentum. Dixi silentium Episcoporum tacitam eorum approbationem importare, *tunc maximè* cùm tres modò recensitæ occurrunt conditiones: quia scilicet id jam sufficit ad præsens nostrum institutum, vindicandæ nimirum auctoritatis et œcumenicitatis Bullæ *Unig.* neque diffitemur silentium illud certum esse taciti consensûs signum, etiam in quibusdam aliis circumstantiis, de quibus ap-

tior erit alibi dicendi locus. Itaque ut hæcenus dicta circa tacitum Episcoporum consensum, paucis complectar: hæc ad tria puncta revoco.

Primum: Silentium, seu non reclamatio Episcoporum, semper et in quibuscumque circumstantiis, certum non est tacitæ eorum approbationis argumentum: præsertim ubi agitur de doctrinâ *privatâ* alicujus *junioris* seu *moderni* Auctoris *obscurâ*, vel in *scholis controversâ*: eòque unice aut potissimum respicit laudatâ paulò ante Cleri Gallic. censura. Secundum: Silentium, seu non reclamatio Episcoporum, certissimum est tacitæ approbationis, taciti consensûs signum; imprimis quando tres memoratæ adsunt conditiones: ubi nempe (sicuti contingit in præsentî Constitutionis *Unig.* negotio) *solemnis ac dogmatica S. Pontificis Constitutio* ad omnes et singulos *juridicè directâ*; ab *Episcopis loci in quo natus est error*, aliisque *quampluribus*, *expresso consensu recepta fuit et probata*; *nullis aut paucis admodum ex adverso reclamantibus*. His profectò in circumstantiis, ex silentio Episcoporum certò colligitur tacita eorum approbatio: nullusque ante natus de Quesnellismo controversias, uti suprâ, secundâ hujusce conclus. probatione, ex Abbate San-Cyrano, aliisque in hac causâ minimè suspectis Auctoribus, evicimus, principium istud in dubium vocavit. Tertium: Sunt etiam alii quidam casus, in quibus silentium Episcoporum tacitam eorum approbationem importat. Verùm hos assignare, non est hujus loci: de hoc argumento videri possunt Melch. Canus lib. 5, de loc. Theol. cap. 4, Thomassin. dissert. in Concil. pag. 96, etc. Atque his sedulò notatis, cæteræ quas congerunt adversarii tricæ ac vitiligationes ad impugnandam petitam ex Episcoporum silentio consensûs taciti notam, evanescent, nulloque negotio dissolvuntur. Quæ enim in contrarium opponuntur Apostolica Decreta: vel dogmatica non sunt, sed ad meram politiam pertinent: vel canonicè promulgata non fuere, ab iis qui sunt in auctoritate constituti: vel denique, multas habuere numero ac dignitate illustres Ecclesias sibi contrarias et adversantes. Quapropter exempla illa præsentî nostro instituto non sunt accommodata. Nec laudant, nec usquam in medium adducere poterunt adversarii exemplum: *Constitutionis dogmaticæ, ab iis apud quos nata est controversia, Episcopis, expresso consensu receptæ, cæteris minimè reclamantibus*: quæ uti universalis Ecclesiæ judicium habita non fuerit. At de consensu tacito, jam satis: de quo ube-

rius disputandi, aptior alibi sese dabit occasio. Consule Eminentiss. Card. de Bissy in Documentis Pastoralibus an. 1722 et 1723, necnon illustriss. Suession. postea Senonens. Archiepisc. in 2 et 5 Commonit. ubi argumentum istud eruditè versant.

Dices 7°. Ultima ac præcipua ex essentialibus ad universalis Ecclesiæ judicium conditionibus, ipsa est *notorietas*; hæcque in cæteros omnes definitionis characteres necessariò cadere debet: adeo ut certò et indubitanter constet de prævio adhibito examine, eoque maturo, diligenti, ab omni præjudicatâ opinione libero: tum de definitionis acceptione *unanimiti*, *liberâ*, *uniformi*, *canonicâ*, etc. horum omnium firmam ac indubitam notitiam necessariò exigit, universalis Ecclesiæ circa fidem judiciorum firmitas ac certitudo, quæ dubium omne etiam speculativum, excludit ac removet: atqui in prætensâ Gallicanæ, cæterarumque Ecclesiarum Bullæ *Unig.* acceptione, nullatenus occurrit, nec occurrere potest, prætensa circa prævium ac competens *examen*, *uniformitatem*, *canonicitatem*, etc. *notorietas*: neque enim illa stare potest cum gravissimis quæ in contrarium ab adversariis proponuntur momentis; ergo. Ita auctores scriptorum: *Mémoire sur l'appel interjeté par 4 Evêques*, 2 édit. pag. 156. *Réfutat. d'un libelle qui a pour titre: Cas de conscience*, pag. 24, 29, 45. *Appel des 4 Evêques* 1719, etc. imprimis verò auctor Instruct. Pastor. Eminentiss. Noall. 1719 Propos. 2 pag. 85, his verbis: « Un dernier caractère du jugement de l'Eglise universelle en matière de foi, est qu'il soit si notoirement et si certainement accepté par le Corps des Pasteurs unis à leur Chef, qu'il ne puisse y avoir aucun juste sujet d'en douter. La fermeté de la foi exige nécessairement que le fondement sur lequel elle est appuyée, soit d'une certitude qui exclue tout doute.... Il ne suffit donc pas que le principe en vertu duquel on exige la soumission, soit vrai; il faut que sa vérité et son autorité soient incontestablement reconnues. C'est par cette maxime si évidente en elle-même, que S. Augustin en condamnant l'opinion de S. Cyprien, justifie sa conduite. » Et postea: principium istud Bullæ *Unig.* accommodans, sic pergit pag. 109: « Le cinquième caractère d'un jugement de l'Eglise universelle en matière de foi est la certitude et la notoriété, qui ne laisse aux Fidèles aucun lieu de douter de la Décision: toutes les réflexions que nous avons faites détruisent cette notoriété

si essentielle, et font naître des doutes que l'on ne saurait dissiper... Point de certitude sur la conformité qui devrait se trouver entre le jugement et celui des Evêques (de France). Certitude au contraire, que sur plusieurs points le Pape et les Evêques ont jugé très-différemment des 101 Propositions. Point de certitude sur l'unanimité morale... Enfin il est évident que la réception de cette Bulle n'a point été faite selon l'ordre canonique; l'acceptation de la Bulle n'a donc point ces caractères de certitude et de notoriété en vertu desquels on puisse exiger des Fidèles qu'ils se soumettent à la Bulle comme à la décision de l'Eglise. » Similia inculcant illustriss. Soanen et de Colbert; alii-que dissidentium duces.

Respondeo 1°, nullam hactenus extitisse, aut unquam futuram esse canonicam, proindeque infallibilem, Ecclesiæ dispersæ definitionem, si valeat proposita objectio. Certò etenim et indubitanter scribi nequit, nequidem à perspicacioribus, adhibitum fuisse ab omnibus Episcopis, præviè ad definitionem, examen, illudque maturum, diligens et ab omni præconceptâ opinione vacuum: pariter nec de *unanimiti*, *canonicâ*, *uniformi*, ad sensum adversariorum definitionis acceptione usquam indubitâtè, ut patet, constare potest. Respondeo 2°, iisdem de causis, dogmatica Conciliorum etiam maximè œcumenicorum nutarent judicia, proindeque vel ipsis Concilii Trid. dogmaticis Decretis obloqui liceret: antecedenter siquidem ad obsequium expendenda forent certòque et indubitanter dignoscenda Præsulum in ferendis definitionibus *motiva*, *sufficiens examen*, cæteraque quorum pleraque omninò sunt impervia. Relictâ itaque Orthodoxorum auctoritatis viâ, ad examinis et discussionis viam cuncta reducenda forent, exigendaque fidei capita: in quo præcisè situs est palmaris Protestantium error. Horumce consecratorum insulitas ac nequitia, principiorum ex quibus spontè fluunt virus ac pravtatem apertè declarant. Respondeo 3°, cuncta in objectione proposita similiter opponi posse in Bullas Leonis X, adversus Lutherum, Pii V. Greg. XIII. et Urbani VIII adversus Baium; Innoc. X adversus Jansenium, quin etiam in ipsâ contra Molinosum et librum de *placitis Sanctorum* Pontificia Decreta, quæ tamen canonica esse non diffitentur adversarii: ab ipsis ergo primùm solvenda objectio. Respondeo 4°, plurimùm nocere Quesnellistis quod hic objicitur: hinc etenim liquidò demonstratur, excludendos esse

recenter ab ipsis excogitatos canonicorum Ecclesiae iudiciorum inauditos characteres : namque ex omnibus Polemicis adversus Protestantes, medium dignoscendi veram Ecclesiam, veraque ipsius ac canonica iudicia, debet esse breve, facile, omnibusque etiam rudioribus proportionatum : atqui assignati à dissidentibus characteres non sunt medium huiusmodi : imo iis semel positus, canonicorum Ecclesiae iudiciorum notitia evaderet ipsis etiam doctioribus prorsus impervia, ut ex mox allatis solutionibus, ipsaque solà horum characterum inspectione liquet ; ergo. Respondeo 5º, tum intrinsecis, tum extrinsecis momentis omninò constare Bullam *Unig.* canonicam esse universalis Ecclesiae definitionem.

Primò quidem intrinsecis momentis : namque Bulla Pontificia, ad omnes Fideles directa tanquam norma ac regula ; cui positivè consentit pars Ecclesiae notabilis cæteris per Orbem tacitè consentientibus, canonicum est universalis Ecclesiae iudicium : atqui sic se habet Bulla *Unig.* imò nedùm tacitè, seu non reclamando, sed etiam positivo consensu ab omnibus per Orbem sparsis Ecclesiis recepta fuit ; ut ex publicis monumentis suprà relatis manifestum est ; ergo.

Secundò. Idem extrinsecis momentis constat : lœcupletissimis scilicet omnique exceptione ac probatione majoribus, quinque Romanorum Pontificum ; totius sacri Cardinalium Collegii ; trium Conciliorum quorum uni præfuit Benedictus XIII, omnium fermè Orbis Catholici Metropolitanorum ; Præsulum Gallicanorum tum in publicis Mandatis, tum in plus quàm decem Comitibus generalibus ; authenticis testimoniis : quæ omnia legere est, aut in collectione Celsissimo Aurelianiensium Duci, Regni Moderatori, primùm oblatà, typis postea excusà jussu Eminentissimi Mechliniensium Archiepiscopi : aut in Pastoralibus Documentis Card. de Bissy 1722, et illustriss. Suessionensis, postea Senonens. Archiepiscop. 1718. Pleraque ex his testimoniis protulimus in *Synopsi histor.* et inter conclusionis probationes.

Tertiò. Rursus idem colligitur ex insulsis ac inauditis characteribus à Quesnellistis ad canonicitatem Ecclesiae iudiciorum recenter excogitatis : hi enim ad elevandam Clementinæ Bullæ œcumenicitatem unicè conficti, manifestè ostendunt genuinos et proprios ipsi competere iudiciorum Ecclesiasticorum characteres, novosque ad ipsius vim et auctoritatem infirmandos fuisse adinventos. Hincque fidenter asseri potest, vix ullum extitisse hactenus, nec

fortè extitutum usquam dogmaticum Ecclesiae iudicium, quod tot ac tanta ad sui commendationem vindicet testimonia, quàm præfata *Unig.* Bulla. Ita notant Cardinales et Archiep. mox citati, locis indicatis. Falluntur itaque aut fallunt adversarii, cum ex prætensis à se de novo excogitatis, aut aliò traductis, iudiciorum Ecclesiae characteribus, præposterè colligunt, Clementinæ Bullæ ad canonicam Ecclesiae definitionem, notorietatem requisitam deesse. Scilicet, non ex prætensis illis characteribus dijudicandum de veritate aut canonicitate decisionis exterioris Episcoporum S. Pontifici adhærentium : sed è contra ex ipsâ exteriori definitione certò pronuntiandum, requisitos omnes characteres huic decisioni de facto competere : illosque proinde de quibus controversatur, aut in definitionem actu cadere ; aut illos ad ipsius canonicitatem hic et nunc minime esse necesarios. Verbo dixerim : non de decisione exteriori per conditiones, sed de conditionibus per exteriorem decisionem dijudicandum ac certò pronuntiandum. Capitale istud principium, in Scripturis et SS. Patribus fundatissimum, necnon à Polemicis Scriptoribus, nominatim Hosio, Perronio, Walenburg. Bossuet. etc. sæpius inculcatum, egregiè statuunt ac evolvunt Præsules nostri in suâ ad Regem, circa Causidicorum Parisiensem consultationem, Epistolâ an. 1728. Verba latè suprà exscriptimus : impræsentiarum ista retulisse sufficiat : « Nous disons, inquit illustriss. Præsules, pag. 20 et 21, et nous le disons en nous appuyant sur les promesses de J. C... dès que le vrai Fidèle voit le Corps des Pasteurs uni au Chef former une décision qui intéresse la foi ; dès qu'il voit ce Corps respectable... exiger la soumission et prescrire l'obéissance, il ne balance point ; on a beau lui dire, une partie de ces Pasteurs n'a pas prononcé par voie de jugement ; les autres ne sont pas unanimes dans le motif de leur décision ; c'est l'infaillibilité du Pape qui a déterminé uniquement ceux-ci ; l'examen de ceux-là n'a pas été suffisant, ou il n'a pas été juridique tous ces discours n'ébranlent pas sa foi et n'affaiblissent pas la confiance qu'il a dans la promesse de J. C. Il voit l'unité dans le Corps des Pasteurs ; il sait que c'est à cette unité qu'il est dit : *Celui qui vous écoute m'écoute*, etc. Il ne lui en faut pas davantage : il n'examine point comment le jugement a été formé, ni les différens motifs sur lesquels les Pasteurs ont pu appuyer leur décision ; il lui suffit qu'ils aient parlé, pour

qu'il règle sa foi sur leurs enseignemens.... Il sait que celui qui a promis son assistance aux premiers Pasteurs saura les garantir, et lui avec eux ; et que la simplicité de sa soumission fera toujours sa sûreté, comme la promesse de J. C. fait la leur. » Hancque in rem duo præclara laudant Bossuet. testimonia. Consule superiùs in respons. ad primam objectionem. Ad constantem hanc Præsulum nostrorum doctrinam omninò apposité, Armandus Princeps de Rohan-Vendour, Universitatis Parisiensis olim Rector, nunc S. R. E. Eminentiss. Cardinalis, in eloquenti ac nervosâ Oratione habitâ die 11 Maii 1759, hæc habet, quæ cùm hactenùs dicta mirum in modum confirmant, transcribere juvat: « Neque nobis, inquit, quisquam responderit, dogmatico sanctæ Sedis Apostolicæ Decreto non teneri Fideles, nisi ab universo Episcopali Ordine, *clarè, libère, unanimi consensu, nullâ relictâ dubitandi ratione*, acceptum fuerit; *nisi prævio iudicio*, re etiam atque etiam ad normam juris inquisitâ, ita ut non ex præjudicatis opinionibus, sed ex naturâ rei, certisque et indubitatis principiis sententia feratur. » En summation omnia dissidentium adversùs Clementinam Bullam objecta: quæ quidem dilucidè solvit Eminentiss. Cardinalis, simulque præfatum palmare principium luculenter firmat his verbis: « Absit quidem ut quisquam sentiat aut dicere audeat, ad ferendum de iis quæ pertinent ad fidem iudicium, nullam inquisitionem, considerationem, libertatemque requiri. *Sed Christi promissis freti*, ita sentire, ita dicere debemus, si quid Episcopalis Ordinis voce sancitum est, id respuere auribus Fideli cuilibet omninò fas non esse. Sic fore promissum est, ut portæ inferi nusquam prævalerent; *numquàm ergo invalescet tanta pestis, ut seu vi, seu negligentia, seu fraude prævaleant*. Episcoporum Corpori Christus adest, Christus sapientia Patris, Christus æterna veritas: quatenùs veritas, præsto est ut ab erroribus amoveat; quatenùs sapientia, *præluceat ipsis, ut quæ docuit certâ viâ consequantur*. » Subdit: « *Statim atque episcopalis Ordo cum Capite conjunctus aliquid circa fidem decrevit*, statim atque sacrum illud Corpus, interpretes divinæ vocis ac cœlesti Spiritu afflatum, obedientiam postulat, *tum veri fideles nihil dubitant*: in Episcopali Corpore unitatem vident: in quo Episcopi consentiunt, dissentire nefas putant; sciunt quippè ad Episcopos pertinere has voces: *Qui vos audit, me audit*; sciunt eum qui Corpori Episcoporum opem suam

pollicitus est, neque Episcopis, neque sibi, si Episcoporum vestigiis insistant, defuturum; atque ut Pastoribus in Christi promissis tutissimum est semper præsidium, ita sibi in fidei simplicitate arcem fore inexpugnabilem. » Mox Bossuet. verba subiungens, addit: « *Quocumque modo*, aiebat Bossuetius, *fiat ut Ecclesia consentiat, transacta planè res est: neque enim fieri potest unquàm, ut Ecclesia Spiritu veritatis instructa, non repugnet errori*. Deus, inquit alio in loco, ita versat animos, ita in eis dominatur, ut in aspectabili et perpetuâ Successorum Apostolicorum communione, sana et incorrupta doctrina semper victrix evadat. » Hæc Eminentiss. Præsul, ad dissipandas quaslibet adversariorum tricas, sanè efficacissima.

Dices ultimò: Deus ipsemet innumera prope edidit prodigia et operationes sanitarum, in gratiam et ad invocationem eorum à quibus interposita fuit appellatio à Constitutione *Unig.* ad futurum Concilium œcumenicum: ita constat ex plerisque divulgatis collectionibus miraculorum et prodigiorum, quæ ad tumultus D. Rousse, præsertimque D. Paris Diaconi Parisini patrata sunt: porrò tot tamque frequentibus miraculis, apertè commendata videtur, ac quasi divinitus obsignata Appellantium doctrina; qui ergo Clementina Bulla tutò recipi queat, quæ doctrinam hanc gravissimis notis contigit ac damnat? Ita variis in Scriptis Quæsnellistæ: illudque, editis etiam eâ de re Pastoralibus Mandatis, sæpiùs ac fusiùs prosequuntur illustriss. Soanen et de Colbert.

Respondeo, extremum istud esse ac miserimum effugium quod in suâ prorsus deploratæ causæ præsidium advocant Appellantes. Verùm inani ac planè irritò conatu: quod quidem sequentia manifestè ostendunt. Namque 1º, neminem latet omnium sæculorum hæreticos ementita miracula in sui erroris patrocinium jugiter jactitasse: atque ex præteritis his ac temerè vulgatis miraculis, minùs cautos decipere; ignaram, credulamque plebem pervertere; sibi, suarumque partium pertinacissimis sequacibus gloriam sanctitatis adscribere conati sunt. Ita notant, ipsisque exprobant S. Iren. lib. 2 de hæres. Tertull. lib. de præscript. cap. 44, inprimis S. Aug. qui in improbam ac maxime exitiosam hanc Sectariorum agendi rationem, tum in Concionibus, tum in Scriptis vehementer invehitur, præsertim Tract. 15 in Joan. n. 17, et lib. de unit. Eccles. n. 28, et 29. Fidem certè omnem exsuperant fallaciarum, deceptionumque atrocitas et multitudo, quas moli-

tur ardens partium studium. Infamem *Priscillanum* et furiosum *Dioscorum*, tanquam Sanctos, illorum sectatores post obitum venerati sunt, et ipsis attribuire miracula non sunt veriti. *Hussita* Joannem Hus œcumenicæ Synodi sententiâ confixum paribus honoribus exornârunt. Ipsaque quò graviora Ecclesiæ in hæreticos damnatoria, judicia eò videntur enixius movere discipulos, ut suos impensius colant Magistros. Insignia ac frequentia veritatis hujus omnium temporum hæreses suppeditant argumenta. Incaute igitur omninò ac præposterè Quesnelli defensores præcedentium Novatorum vestigiis insistentes, ad e mentita confugerunt miracula, ut ea divinæ primorum Pastorum, à quibus damnantur, auctoritati opponant, sicque se, suamque doctrinam gravissimis Ecclesiæ Decretis ac censuris subducant.

2°. Asserta S. Medardi Diacono, aliisque Appellantibus miracula, nec vera censi possunt, nec certa, nec divina; imò ficta sunt, dubia, absona, ab omni fide prorsus abhorrentia: id egregiè ostendit ac juridicè declarat Illustriss. Parisiens. Archiepisc. D. de Vintimille latis die 15 Julii 1731, et die 8 Novembris an. 1735, hanc in rem Mandatis. Hoc idem invictis adstruunt momentis Ebredunensis olim, postea Lugdunensis Archiepiscopus, et Eminentiss. Card. de Tencin, necnon illustriss. Senonensis et Cameracensis Archiepiscopi, quorum luculenta eo de argumento Documenta consuli possunt. Et verò, inter prætensa ab Appellantibus adeo venditata miracula principem certè locum obtinent quatuor illa quæ 23 Parochi Parisienses, uti *evidenter probata*, obtulerunt Archiepiscopo Parisiensi, dato supplici libello die 13 Augusti 1731, ut juridicam de iis sumeret inquisitionem: oblatis simul circa eadem miracula Actis verbalibus, quæ ut dictitabant, jussu et auctoritate Eminentiss. Noallii fuerant composita. Jam verò, his omnibus ex juris præscripto maturè ac diligenter discussis, solemnî Mandato die 8 Novembris 1735, pronuntiavit illustriss. Archiepiscopus, prædicta Acta verbalia, *ipso jure radicitus irrita* esse, nulliusque prorsus ponderis ac auctoritatis; eaque *sive rem spectes, sive formam* et rationem omninò vitiosa esse; multisque titulis *abusiva, informia, inutilia*: quoad miracula verò, declarantur *temerè et contra leges evulgata* characteribus ad vera miracula requisitis *planè destituta*; talia denique, *ut omni fide careant*. En illustriss. Archiepisc. verba, cit. Mandat. pag. 75, et 76: « Par l'examen que nous avons fait des motifs expo-

sés dans la Requête que notre Promoteur nous a présentée, nous avons reconnu 1°, que ces Procès verbaux sont *multis dans leur origine*, parce qu'ils ont été dressés, ou sans commission, ou en vertu d'une commission *surprise et obreptice*; 2°, que, quand dans leur origine ils auraient été revêtus des formes les plus solennelles, l'état dans lequel ils nous ont été présentés, doit nous les faire regarder comme des pièces qui ne méritent aucun égard... Ce sont des Actes *sans force, sans autorité, inutiles, anéantis*, pour ainsi dire, ... 3°, non seulement ces procédures sont *défectueuses dans la forme*, mais elles sont encore *insuffisantes dans le fond*, pour établir la vérité des guérisons miraculeuses, auxquelles on dit qu'il ne manque que notre autorité, pour les publier solennellement aux Peuples. » Et in Mandati judicato, sic statuit idem Illustriss. Archipræsul: « Nous déclarons les Procès verbaux dressés en 1728, *informes et sans autorité*: et les miracles dont il a été informé, *témérement publiés, destitués de preuves, et indignes de toute croyance.* »

Porrò, si præfata miracula à quampluribus Parochis Parisiensibus Archiepiscopo suo solemniter ac confidentius oblata, veluti *summè authenticis*, ut jactabant, testificata Instrumentis, et *locupletissimis* firmata testimoniis: si, inquam, miracula illa, perpensa postmodum secundum accuratorem Juris normam, deprehensa fuerint ac juridicè declarata; *temerè asserta ac vulgata*; idoneis destituta testimoniis ac probationibus; atque ab omni prorsus fide abhorrentia: quantò potiori jure de cæteris quæ exindè divulgata sunt, quæque longè levioribus magisque suspectis nituntur testibus et probationibus, idem pronuntiandum sit, nemo non videt? Hoc ipsum scitè notat et urget laudatus Archipræsul, ibid. pag. 79, ubi ex prædictis miraculis, de reliquis de quibus pleræque circumferebantur relationes ad libitum confictæ, à levibus passim aut seductis mulierculis assertæ dijudicandum asseverans; sic habet: « Mais si les miracles qu'ils (les 23 Curés) nous ont présentés comme prouvés avec évidence; si ceux qu'ils assurent avoir paru à M. le Card. de Noailles, mériter une information juridique; si ceux enfin qu'ils prétendent devoir servir de *préjugés pour tous les autres*, portent sur l'illusion, ou sur le mensonge; que devez-vous penser, mes très chers frères, de ces faits qui ne sont appuyés que sur des bruits populaires, ou sur des relations dressées par des personnes sans autorité, sans caractère, et obstinées,

malgré nos défenses, à faire valoir une dévotion de parti ? » Accedit ad idem adstruendum invictum ex defectu requisitarum ad miracula conditionum depromptum argumentum. Scilicet, ut curationes à morbis et infirmitatibus inter vera recenseantur miracula, plura concurrere debent. Primum est, ut morbus sit gravis, et vel impossibilis, vel curatu difficilis : secundum, quod sanatio sit subita et instantanea ; aut saltem iis quas operatur natura longè promptior ac celerior : tertium, ut sanatio sit perfecta ; non manca aut concisa : quartum, ut sit permanens, hoc est, iteratus non contingat in morbum lapsus : quintum, quod absque remediis naturalibus procurata fuerit, hoc est, ut nulla adhibita fuerint medicamenta, vel si adhibita fuerint, certum sit ea non profuisse ; sextum, ut morbus qui depellitur non sit in ultimâ parte status ; ita ut non multò post declinare debeat ; septimum, ut nulla notatu digna evacuatio, seu crisis præcedat temporibus debitis ; si enim ita accidat, tunc verè miraculosa sanatio dicenda non erit. Ita Rouee Apostolici Sacramenti Præfectus, et Consultor Congregationis sacrarum Rituum, in suo *de Canonisat. Sanctorum* Tractatu, cap. 25. *Zachias* lib. 4, de *Miraculis* titul. 1, quæst. 3, etc. Atqui curationes omnes ab adversariis adeò venditæ, cunctis vel plerisque ex his characteribus omninò sunt destitutæ : quod quidem vel ex ipsismet harum curationum procursu collectionibus clarè ostendunt Archiepiscopi supra laudati. Imprimis verò Illustriss. Parisiens. Archiepiscopus citat. mox Mandat. pag. 76 et 77. idipsum luculenter et distinctè probat de miraculosis illis sanationibus, libello supplicii sibi à Parochis Parisiensibus exhibitus ut de iis inquireret, et ex quibus, testibus iisdem Parochis, de cæteris omnibus iudicium ferendum est ; ergo.

3° Quæ per Appellantes fieri dicuntur miracula, nedum dubia sunt et incerta, divinisque characteribus destituta, ut modò vidimus : verum insuper Deo sunt prorsus indigna : undè non in Deum Auctorem refundenda ; sed à dæmone suadente, aut etiam operante (si causam superiorem postulant) profecta et perpetrata dici debent. Namque, prætensa illa prodigia ac miracula ad tres generatim revocari possunt classes. Prima nudas complectitur *convulsiones*, membrorum distentiones contractionesque, absque ullâ præviâ aut subsequutâ curatione. Secunda curationes *convulsionibus* annexas continet, hoc est, morborum sanationes, aut ex convulsionibus progenitas, aut

convulsiones postmodum procurantes. Uno verbo, curationes quæ sint causa aut effectus convulsionum. Tertia spectat miraculosas, ut jactant, curationes ad tumulum aut invocationem Appellantium patratas absque comitibus præviis aut subsequentibus convulsionibus. Triplex istud prodigiorum aut miraculorum genus passim venditant Appellantes variis eâ de re editis collectionibus ac voluminibus : de quibus copiosè disserit Illustriss. Senonensis Archiepiscopus. in suâ eruditâ circa prætensa quæ S. Medardi Diacono tribuuntur miracula, Pastoralis an. 1734 Instructione. Jam verò nulla ex jactatis hisce prodigiis ac miraculis Deo adscribi posse, aut in Deum refundi : eaque omnia ad tumulos aut invocationem Appellantium perpetrata prodigia, Deo esse prorsus indigna, haud difficili negotio demonstrari potest. Et quidem quod spectat *nudas et meras* convulsiones, hoc est, stupentes ac insolitos Convulsionariorum motus, absque ullâ tamen præviâ, comite aut subsequente membrorum sanatione excitos : motus, inquam, illos à plerisque Appellantibus tanto cum fastu ostentatos, à Deo supernaturaliter ac miraculosè operante minimè proficisci, exquisitè ac eruditè probat insignis *Litterarum Theol. super miraculis* auctor ; idque compluribus momentis manifestè patet. Namque 1° Deus miracula non operatur vilia, ridicula et inutilia, juxta doctrinam sancti Bonaventuræ, Gersonis, Medicinæ, etc. hoc ipsum fusè ostendit laudatus Auctor in suâ Epist. 15, paragraph. 42 et sequentibus, necnon Epist. 2, per totam : quod quidem ipsa Entis supremi ac summè sapientis idea clarè adstruit. At certè nihil vilius ac ridiculum magis excogitari potest, absonis illis et inverecundis Convulsionariorum motibus ac saltibus qui vel in ipsis eorum Collectionibus narrantur. Ex innumeris sit in exemplum quod cuidam Monacho contigisse describit auctor ipsemet *Nuntiorum Ecclesiasticorum* die 7 Februarii 1734, his verbis : « Des efforts, des frémissemens, des agitations, des roidissemens étonnans de tous les membres, les talons et les bras retournés en devant ; le visage derrière le dos, le col plié : il s'élevoit de tems en tems à la hauteur de trois ou quatre pieds, et demeuroit ainsi suspendu en l'air sans point d'appui l'espace de dix minutes, quelquefois plus.... Il se donnoit de grands coups de poing, il demandoit avec instance qu'on le frappât rudement, ce qu'on ne manquoit pas de faire. » Quid irreligiosius, quàm incompo-

sitos et inordinatissimos illos motus Deo, et quidem supernaturaliter operanti, adjudicare? Ad hanc Quesnelliani Scriptoris narrationem, apte omnino sic habet Illustriss. Senonensium Archiepiscopus laudato Documento part. 2, n. 5 : « Voilà un étrange miracle : un miracle qui consiste à tordre le col à un malade, pour le guérir d'une maladie qu'il n'avoit plus. Jusqu'ici on n'avoit vu au tombeau des Saints de pareilles fureurs, que dans les Démoniaques : les Saints guérissent ces accidens funestes, et le nouveau Saint les donne : il les donne sans nécessité et sans utilité pour le malade ; car on assure que celui-ci étoit guéri dès le premier jour, et cependant ces horribles convulsions le reprennent chaque jour de la Neuvaïne. » Præterea à Deo procedere nequeunt prodigia indecentia vel in se, vel in suis effectibus : imò, uti citatis locis argutè notat, et ex SS. Hilario, Paulino, Sulpicio, etc., evincit laudatus Theolog. Epistol. auctor, plerumque Deus insignia operatus est miracula, ut obsœnitates et spurcicias à diabolicis averteret præstigiis : atqui obsœnitius nihil ac turpius toto convulsionum opere, illarum etiam ex quibus enatas curationes prædicant, quasque idcirco ut divinas agnoscunt ipsimet mitiores Convulsionistæ, dicti *Discernentes* et *Miscellanei* (*Discernans* et *Mélangistes*) hoc est, discretionis et permixtionis in convulsionibus auctores. Comperta sunt ista et explorata ex accurato convulsionum Diario, sciente et approbante celebri Abbate *Duquet* exarato, quod instar appendicis ad suum circa miracula Documentum denuò edi curavit laudatus Senonens. Archipræsul. Adversus Diarium illud nonnisi in pauculis ac levioribus quibusdam reclamatum fuit ab adversariis : quapropter cætera quæ in eo narrantur longè graviora et numerosiora facta exinde certiora magisque indubitata evasere. Ita in præfat. ad Diarium, appellatus mox Archipræsul. Denique, quemadmodum prædictarum Epistolarum ratiocinatur auctor pereruditus Epist. 15, n. 56, et seqq. à divinâ sapientiâ prorsus alienum est, Deum ad arcanas suas voluntates declarandas, aut ad patranda miracula, delirantes ac mente alienatos seligere. Multò adhuc magis Deum dedeceret, si rationis usu privaret, quos et consiliorum suorum participes ac præcones, necnon omnipotentiae suæ Ministros vellet efficere. Constans est et certissimum istud placitum : tum quia, nec in antiquâ lege ullus unquam, dum divino concitaretur Spiritu, men-

tem perturbatam habuit ; nec in novâ lege, dum ægros sanabat, Fideles edocebat, futura vaticinabatur, mentis corporisve perturbatione fuit agitatus ; tum quia à promulgato Evangelio, si dum insaniret quis ac fureret, eventura pronuntiavit, aut stupendum aliquod simile operatus est, ab Ecclesiâ tanquam Dei Minister, veritatisque nuntius, nusquam est habitus ; tum quia in eandem doctrinam collimat unanimis Patrum doctrina, ita SS. Athanas. Tract. 3 contra Arian. Chrysost. Homil. 29, in 12 cap. 1 Epist. ad Corinth. Epiphani. hæres. 48. Hier. Prolog. in Isai. August. lib. 1, contra Academic. cap. 6, etc. Idem disertè tradunt Doctores Scholastici, Card. Cajetan, Estius, Sylvius, alique præeunte divo Thomâ 2-2, q. 171, art. 2, et ibid. q. 173, art. 3, in corp. : « Talis alienato à sensibus, inquit S. Doctor, non fit in Prophetis cum aliquâ ordinatione naturæ, sicut in arreptitiis aut furiosis, sed per aliquam causam ordinatam, vel naturalem, sic per somnium ; vel spiritualem, sicut per contemplationis vehementiam, sicut de Petro legitur, Act. 10, quòd cum oraret factus est in excessu mentis. » Ibid. ad 4 addit : « Spiritus Prophetarum dicuntur esse subjecti Prophetis, quantum ad propheticam enuntiationem, de quâ ibi loquitur Apostolus : quia scilicet ex proprio sensu loquuntur ea quæ viderunt, non mente perturbata, sicut arreptitii, ut dixerunt Priscilla et Montanus. » Certum est itaque et indubitatum, Deo prorsus indignum esse, ad suam manifestandam voluntatem, aut ad patranda miracula, delirantes homines adhibere ; vel ad hoc, quod magis est, sanos homines insanos reddere. Porro, non minus certum est, mentis abalienationem passos fuisse viros ac mulieres convulsionum motibus agitados, dum sublimes illos, toties ab insulsi operis Præconibus jactitatos, sermones habuere ; dum res occultas detexere, futura prædixere, morbos curavere, cæteraque tam audacter vulgata miracula patravere. Sexcentiis id testati sunt ipsimet Convulsionariorum duces ac magistri : imò, quod certè extremæ est cumulatæque cæcitatæ ac insanix, eò progressi sunt, ut ex illâ, his in circumstantiis, mentis alienatione ac delirio, divinæ virtutis in Convulsionistis miraculosè agentis argumenta duxerint. De quo sæpius insigniores apud ipsos convulsionum defensores, imprimis auctores libellorum : *Plan général sur l'œuvre des convulsions* ; et *Coup-d'œil sur l'œuvre des convuls.*, etc., ergo.

Convulsionum turpitudinem, dedecus et ignominiam palam fecere, ipsisque earum defensoribus acriter ac strenuè exprobravere plerique etiam ex Appellantibus : præ cæteris verò, triginta Doctores celeberrimæ, circa infustum istud opus, Consultationis an. 1755 auctores; ibi variis sibi propositis super toto isto negotio quæstionibus, perpensis ac maturè discussis, sic generatim de Convulsionibus mentem suam aperiunt, pag. 24 : « Il est honteux qu'on ait été obligé de montrer, que des contorsions effroyables, des grimacés affreuses, des culbutes indécentes, des attitudes malhonnêtes, et qui blessent la pudeur, des extravagances qui tiennent d'une sorte de fureur, ne peuvent avoir Dieu pour auteur dans l'ordre des miracles. » Pergunt : « Comment donc pourrait-on s'imaginer que Dieu fasse servir ou concourir ces mêmes convulsions pour opérer des guérisons que l'on croit miraculeuses ? *Tout réclame, et surtout la Religion, contre une imagination si bizarre, et qui retombe sur Dieu même qu'elle déshonore.* » Paucis interpositis addunt : « Ainsi il ne reste plus par rapport à ces prétendues guérisons que l'on fait valoir en faveur des convulsions, *si elles sont réelles*, ou que d'en chercher le principe dans la nature, quelque singulières qu'elles paraissent, ou si on les croit d'un ordre supérieur, de recourir à un agent fort distingué de Dieu. » Ubi prætensas supernaturales convulsionibus annexas morborum curationes, ex hypothesi quod reipsâ extiterint, in dæmonem refundendas esse judicant præfati Appellantium Magistri. Tum iterum rejectis convulsionibus, hisque adjunctis jactatis curationibus, tandem concludunt, pag. 29 : « Il est évident que l'on n'a plus rien à attendre pour juger des convulsions. Quand on y réfléchit sérieusement, on ne peut demeurer en suspens. *Tout réclame contre.* La Majesté de Dieu, la sainteté de son culte, l'honneur de l'Eglise, la pureté des mœurs, l'honnêteté publique, le bon ordre, le maintien des règles exigent de tous ceux qui s'intéressent au bien de la Religion, qu'ils concourent avec zèle, autant qu'il est en eux, à faire cesser un scandale qui a duré trop long-temps, et une illusion qui ne peut avoir que des suites funestes. » Ets rursus ibid. « Les convulsions ne sont point l'œuvre de Dieu : et ce prodige de nos jours, autorisé par une admiration mal placée, doit être livré à tout le mépris qu'il mérite. Puisse-t-il être à jamais oublié ! »

Hæc insigniores 50 ex Appellantibus Doctores, de toto convulsionum negotio, idque post maturum ac diligens, ut ipsi testantur, omnium operis characterum ac circumstantiarum examen, accuratamque discussionem. Ex quibus liquet non posse, absque insigni in Deum contumeliâ, nefandum Convulsionum opus divino Numini adscribi, ipsasque proinde, ut patet supernaturales, si quæ sint, his convulsionibus annexas curationes, *in auctorem à Deo prorsus distinctum*, uti loquuntur Doctores (dæmonem scilicet), *esse referendas*. Porro, explosis semel convulsionibus, uti planè absonis, ac divinâ omninò indignis majestate, iisque diabolicæ virtuti adjudicatis, explodenda pariter et dæmoni adscribenda cætera Appellantium miracula : nempè non modò jactatæ tantoperè morborum sanationes, ope convulsionum, sed etiam aliæ omnes absque convulsionibus, occasione ejusdem cultûs ac invocationis perpetratæ. Scilicet, quemadmodum notant et invictè adstruunt modò laudati Præsules : tria illa ab Appellantibus venditata prodigiorum genera : 1^o *convulsiones* ; 2^o *progenitæ ex convulsionibus curationes* ; 3^o, *sanationes* absque ullis convulsionibus : tria, inquam, illa ita arctè ac indivulsè inter sese connexa sunt et concatenata (utpote iisdem *origine, cultu ac fine* innixa, nempè ad eundem tumulum, ex eadem invocatione nata, atque ad favendum appellationi pariter destinata) ut ea proinde omnia admitenda sint tanquam vera miracula ; aut ex æquo rejicienda, ut meræ fraudes ac præstigiæ. His ergo invictis omnibus momentis, quibus Convulsiones Deo auctori assignari non posse demonstrant celebres præfatæ consultationis auctores, iisdem etiam clarè ac ineluctabiliter conficitur, quas prædicant adversarii miraculosas morborum sanationes, in Deum minimè refundi posse : atque adeo, si verè supernaturales sint, soli dæmoni tanquam auctori esse adscribendas. Præstat banc in rem audire illustriss. Parisiensem Archiepiscopum laudato Pastoralis Documento an. 1755 edito, occasione *miraculorum quæ ad tumulum et invocationem Diaconi S. Medardi patrata narrabantur* : hoc in Documento, insultate et infamiâ fanatici Convulsionum operis latè deductis, sic habet pag. 86 : « Arrêtons-nous, mes très-chers frères, n'entrons pas dans un plus grand détail des misères et des horreurs dont cette œuvre fanatique (les convulsions) est souillée et composée : le bruit public vous a assez instruits, et peut-être n'en avez-vous que trop appris par

vous-mêmes. Mais de ces faits certains ne conclurez-vous pas avec nous, que *ce serait blasphémer contre Dieu*, que de lui attribuer une œuvre qui porte de tels caractères ? » Tum recitatis modò adductis triginta Doctorum textibus, arctam et indissolubilem convulsionum cum jactatis quibuslibet dissidentium miraculis, egregiè statuit his verbis : « On ne peut regarder Dieu comme auteur de l'œuvre des convulsions. Or cette indigne œuvre tient inséparablement à celle des nouveaux miracles.... Cette liaison est trop sensible, pour qu'après de sérieuses réflexions, on puisse la contester de bonne foi. » Pergit : « Les convulsions n'ont-elles pas la même origine que les miracles ? Ne sont-elles pas nées comme de leur sein ? N'en ont-elles pas, dit-on, produit à leur tour un grand nombre ? Ne sont-elles pas le fruit d'un même culte ? Ne tendent-elles pas à la même fin ? N'ont-elles pas eu les mêmes suites, et occasionné les mêmes effets ? » Moxque concludit : « Les convulsions étant donc jugées indignes de la main de Dieu, n'hésitons pas à prononcer qu'on ne peut lui attribuer les guérisons que l'on dit être arrivées, ou par des convulsions, ou sans convulsions, à l'occasion du même culte. » Ita pressè quidem, at invictè, arctissimam convulsionum cum prætensis Appellantium miraculis cognationem ostendit Illustrissimus Archipræsul. Et verò, quemadmodum ibid. ratiocinatur, prædicta miraculorum cum ipsismet convulsionibus admittenda est connexio : aut cum adversariis agnoscenda distinctio duplicis generis miraculorum, quorum scilicet alia verè divina sunt, alia falsa et dæmoni adscribenda : quamquam utraque perindè perpetrata, ad eundem tumulum (Diaconi scilicet S. Medardi), ex eodem cultu et invocatione, eundemque in finem ordinata : atqui absona prorsùs, necnon fidei et rationis placitis è diametro adversa, ipsique supremo Enti summè injuriosa talis distinctio : hæc enim posità, alternis et quasi invicem, ad eundem tumulum, eodemque fine, Deum et Dæmonem prodigia operari dicendum foret : quo nihil certè insulsius ac irreligiosum magis ; ergo.

Audiatur iterùm laudatus Archipræsul, momentum istud luculenter versans ac evolvens, citato Pastoral. Documento, pag. 88 : « Observez, mes très-chers frères, que pour nier la liaison des miracles avec les convulsions, il faut, dans le sentiment de ceux que nous combattons, soutenir la distinction de deux sortes de miracles arrivés au tombeau du sieur Paris,

les uns divins, les autres diaboliques. Etrange extrémité ! Dieu et le démon régneraient donc, pour ainsi dire, sur le même trône ? ils feraient tour à tour des merveilles qui concourraient au même objet et à la même fin ? une même invocation attirerait de la part de Dieu, et de celle du Prince des ténèbres, des effets extraordinaires ; et l'on serait exposé à tous momens à confondre l'œuvre divine avec l'opération de Satan ? Conséquences qui répugnent à tous les principes de la religion. » Hæc decretoria sanè in præsentî causâ. Paria tradunt paulo antè laudati Archipræsules : imprimis Senonens. Archiepisc. suo *super miraculis et convuls.* Pastoralî Mandato an. 1734, part. 1 et 2. Tria ergo ab Appellantibus jactitata prodigiorum genera : convulsiones videlicet, morborumque sanationes, ope convulsionum, aut absque convulsionibus perpetrata : tria, inquam, ista prodigia Majestate ac virtute divinâ prorsùs indigna sunt : ac si quid humanas vires superans in eis agendum sit, totum istud in dæmonem ipsum, uti auctorem, est referendum.

4°. Famosus S. Medardi Diaconus D. Paris, cujus præsertim ope patrata feruntur Appellantium miracula, is non fuit qui pro Sancto, nedùm pro *Thaumaturgo* haberi possit, si vel iis ipsis fides habeatur qui vitam ejus conscripserunt. 1°. Quia constanter exhibetur uti Jansenianæ doctrinæ, toties ab Ecclesiâ proscriptæ, pertinaciter addictus, atque ad extremum usque spiritum inverecundè non minùs ac irreligiosè debacchans in æquissimam Formularii legem, utraqûe firmatam auctoritate, necnon adversùs dogmaticam universalis Ecclesiæ Constitutionem *Unig.* Ita auctor libelli cui titulus, *Vie de M. de Paris Diacre*, Edit. de Bruxell. pag. 151, 161, 170, prætensas dicti Diaconi virtutes celebrans, sic habet : « Il donnait à son livre (au livre de Jansénius) le premier rang après les livres de S. Augustin,... il regardait la loi du Formulaire comme une cause de trouble, et une occasion de persécuter ce qu'il y a de gens le plus attachés à la vérité... il croyait voir dans toute l'œuvre de la Constitution, l'*Apostasie prédite par S. Paul* et figurée dans les anciens livres. Toute sa consolation était dans l'attente d'un renouvellement du monde entier, auquel préparait selon lui un mal si extrême. » Pergit Diaconi præco : « L'Eglise lui paraissait dans un état horrible ; telle que cette Sion autrefois remplie, riche, maîtresse des Nations, dans la gloire et dans l'éclat, et depuis déserte, appau-

vrie, foulée aux pieds de tous les passans, et enfin asservie à la tyrannie de Babylone. » Ad quæ abnormia verba illustriss. Parisiens. Archiepisc. exclamat : « Affreux langage, mes très-chers frères, qui vous rappelle sans doute celui des furieux Sectaires des temps de Luther et de Calvin ! » 2^o In Ultrajectensem Ecclesiam, refractariosque illuc profugos, summè propensus exhibetur : aretâque junctus communione, præsertim cum Pseudo-Archiepiscopo Ultrajectensi publicè ac notoriè intruso, schismatico, ideòque per Apostolicam Sedem juridicè ac nominatim excommunicato, quòd absque electione et institutione canonicâ contra Ecclesiæ leges per unum duntaxat Episcopum itidem notoriè excommunicatum consecratus fuisset ; ast qui Schismaticorum communionem ineunt et affectant, schismatis hoc ipso participes fiunt, et unitatem dividunt ; adeoque, nonnisi apud Schmaticos, pro Sanctis haberi possunt. « L'Eglise de Hollande entre toutes les autres, inquit Domini de Paris laudator, loco mox citato, pag. 162 et 163, l'occupait beaucoup, et il avait une affection très-intime pour les illustres témoins qui s'y sont réfugiés. » Et in alterâ edit. pag. 98 : « On sait qu'il avait fait le projet de partir à pied de Paris, pour aller visiter cette Eglise devenue l'asile d'un grand nombre de serviteurs de J. C. » 3^o. Ibid. pag. 63, et 80, in vitâ D. Paris tanquàm nobile ac præclarum facinus commendatur quòd perdiu, exceptis diebus Dominicis et Festivis, abstinerit ab ingressu Ecclesiæ, ipsâque sacris Mysteriis præsentia ; imò, quod certè multò gravius est, veluti heroicum quid ac penè divinum commemoratur, quòd ipse ex falsâ humilitatis et abnegationis persuasione per biennium, etiam in Paschate prætermiserit sacram Communionem. ad quam tamen ex Ecclesiæ præcepto unusquisque Fidelis sub gravissimâ poenâ accedere tenetur : « Après avoir passé près de deux ans, ait prétensè abnegationis et humilitatis celebrator, loin des autels, privé des Sacremens, son inclination, s'il lui avait été possible de la suivre, aurait poussé peut-être (cette privation) jusqu'à la mort. » Addit : « Dans tout ce temps ceux qui le conduisaient n'avaient pu le forcer à communier. » Id verò offensionem est et scandalo, præbens plerisque speciem et occasionem non curandi de adimplendo annuæ Communionis præcepto : obtendentes scilicet istud quod in prætenso Sancto commendatur exemplum : causantes aliundè se à tanti viri sanctitate plurimùm abesse. Hincque appositè omni-

nò Parisiensis Archiepiscopus loco mox citato, pag. 12 : « Quel scandale de louer un Diacre, dont on nous donne la vie comme celle d'un parfait Ecclesiastique, de s'être éloigné pendant un si long temps de la sainte Table, et d'avoir transgressé jusqu'à deux fois un précepte qui oblige même les Laïques sous les plus terribles peines ? Quelle source d'abus et de prétextes, pour abolir la fréquentation des Sacremens, que de prétendre que l'amour de l'humiliation et l'esprit de pénitence aient pu justifier cette disposition et cette conduite ? » Quis ad hæc maturè ac pro debito attendens, prædictum Diaconum, tantæ, tamque contumacis et obfirmatæ, tum in fide, tum in moribus defectionis ac inobedientiæ, necnon aretissimæ cum schismaticâ Ecclesiâ communionis, vel ex ipsius laudatore ac præcone reum atque convictum ; quis, inquam, virum hujusmodi inter colendos Cœlites adscribere, atque miraculorum effectorem ac Thaumaturgum prædicare non erubuerit ?

5^o. Miracula, ut fidem faciant, à primis Pastoribus præviè discuti debent et probari : *Ipse enim Satanas*, ex Apost. II. Corinth. 11, v. 14, *transfigurat se in Angelum lucis*. Monet quoque Christus venturos aliquando Pseudo-Prophetas ad seducendos jactatis signis et prodigiis, si fieri potest, etiam electos : *Surgent*, inquit Matth. 24, v. 24, *Pseudo-Christi et Pseudo-Prophetæ, et dabunt signa magna, et prodigia, ita ut in errorem inducantur (si fieri potest) etiam electi*. Et 2 Thessalon. 2, v. 9, notat S. Paulus adventum Pseudo-Prophetarum futurum esse : secundum operationem Satanæ, *in omni virtute, et signis et prodigiis mendacibus*, et in omni seductione iniquitatis. Hincque, ut cautiore nos reddat Christus Dominus, de Pseudo-Prophetis, falsisque eorum portentis, sermonem habens, perpetuò nos admonet his verbis : *Attendite ; cavete ; nolite credere*. Ne quis autem tot ac tantis seducatur fraudibus et portentis, declarat Apostolus ad Ephes. 4, v. 11, et seqq. datos à Christo in Ecclesiâ pastores et doctores..... *ut jam non simus parvuli fluctuantes, et circumferamur omni vento doctrinæ in nequitia hominum, in astutiâ ad circumventionem erroris*. Idipsum, divino hoc oraculo, clarissimè tradit S. Joan. I Epist. cap. 4, v. 6 : Qui novit Deum, audit nos : Qui non est ex Deo, non audit nos : *in hoc cognoscimus spiritum veritatis, et spiritum erroris*. Ad pastores ergo spectat probare spiritus utrùm ex Deo sint, ita ut quod bonum pronuntiaverint, tenendum ;

quod reprobaverint damnandum. Hæcque generalis est et innotata regula ad errores declinandos, præcavendasque deceptiones, coelitus data, quemadmodum in citatos SS. Pauli et Joannis textus, constanter ac disertissimè docent SS. Patres. Unde et concilium Trid. sess. 25, decernit nulla admittenda esse miracula nisi approbante episcopo : en ipsa concilii verba, dictà sess. 25, Decreto de invocat. veneratione, et reliquiis sanctorum : « Statuit sancta synodus nulla etiam admittenda esse nova miracula, nec novas reliquias suscipiendas, nisi eodem recognoscente et approbante episcopo, qui simul atque de iis aliquid compertum habuerit, adhibitis in concilium theologis et aliis piis viris, ea faciat, quæ veritati et pietati consentanea esse judicaverit. » Hæc synodi œcumenicæ lex renovata fuit in statutis Parisiensibus ab eminentiss. Noallio, in suâ synodo diœcesanâ an. 1697 promulgatis ; in his sic legitur art. 50 : « On ne pourra déclarer, faire imprimer ou publier aucuns miracles nouveaux, que de notre autorité, et après que, par un examen canonique, nous en aurons reconnu et déclaré juridiquement la vérité, sans quoi nous défendons, sous les peines de droit, de reconnaître et d'autoriser aucun miracle, sous quelque prétexte de notoriété que ce puisse être. » Atque hæc quidem disciplinæ lex meritò ac prudenter omninò statuta est, ad versutas nimirum impostorum fraudes, necnon ad incautæ ac nimium credulæ plebis deceptiones præcavendas. Porrò vulgata à dissidentibus miracula nedùm à primis pastoribus probata fuere ; imò potiùs ab ipso summo pontifice et aliis per orbem episcopis, explosa, reprobata, vel ipso indigna examine habita fuerunt atque ut abominandus et execrandus juridicè declaratus est ac proscriptus illius cultus cujus ope perpetrata referuntur : hoc ipsum ex pluribus pontificiis et episcopalibus Decretis constat. Ita Clem. XII, suprâ memoratum libellum : *Vie de M. de Paris*, etc., hujusce diaconi cultum ac miracula, jactantiùs celebrantem, gravissimè proscripsit die 22 augusti 1731, tanquàm continentem propositiones scandalosas..... auctoritati tum S. Sedis apostolicæ, summiq[ue] pontificis, tum Ecclesiæ et episcoporum, præsertim Gallicanorum, injurias, temerarias, impias, hæreticis faventes, erroneas, atque etiam schismaticas, et hæreticas, et hæretico spiritu plenas. Consimili censurâ per *Litteras apostolicas in formâ Breves* die 19 junii 1734 confixum fuit Mandatum Antissiodorensis epi-

scopi referens et approbans quoddam assertum miraculum, quod in suâ diœcesi patratum dicebatur ad deprecationem prælati diaconi D. Paris. Eundem diaconi cultum severè interdixit, ac vulgata ab Appellantibus miracula, præhabito maturo examine, temerè asserta, falsa, Deo indigna, pluries ac juridicè declaravit illustriss. Parisiensis archiepis. laudatis supra Mandatis die 15 julii 1731, 30 januar. 1732, 5 novembr. 1735, etc. quin et prætensa miracula, utpote auctoritati et definitioni Ecclesiæ adversa, vel ipso examine prorsus indigna judicavit, uti colligitur ex prudentissimâ ipsius an. 1731 responsione ad supplices sibi exhibitas preces, ut juridicam de prædictis miraculis institueret inquisitionem : his concepta est verbis dicta responsio :

« M. Prouvez-moi en bonne forme que le sieur Paris n'est pas mort dans l'adhésion à son appel de la Constitution *Unig.*, ou qu'un appel de ce Décret n'est pas une entreprise schismatique contre l'autorité visible établie par J. C., sinon cessez de m'importuner pour la vérification et la publication des prétendus miracles faits par l'intercession et au tombeau de ce diacre : tandis qu'il constatera par votre aveu, qu'il n'a pas révoqué son appel, et par les règles incontestables de la foi, qu'un homme mort dans la révolte contre les décisions de l'Eglise, est mort schismatique ; ne vous flattez pas que je permette, ou même que je tolère volontairement qu'on l'honore dans mon diocèse comme un saint. Ne croyez pas non plus que j'entre jamais dans l'examen de vos prétendus miracles. Il ne s'en fait point et il ne s'en peut point faire par un tel sujet et pour une telle cause. Je suis, etc. »

Hæc cautè omninò ac eximiè Parisiensis archipræsul ; tametsi postmodum ex condescensu et ex prudenti œconomiâ, ad frangendam scilicet, si fieri posset, dissidentium pervicaciam juridicum de prædictis miraculis habuerit examen : ex quo quidem examine, ut supra notavimus, dictorum miraculorum falsitas magis ac magis firmata fuit ac juridicè declarata. Hunc etiam diaconi Paris cultum, prætensaque miracula egregiè confutârunt quamplures alii præsules, inter quos principem locum obtinent antea laudati Ebredunensis nunc eminentiss. Lugdunensis, Senonensis, et Cameracensis archipræsules. Demùm rex Christianissimus avitâ succensus religione, ad ea firmiùs confirmanda, quæ pro recto ordine et ecclesiasticâ disciplinâ, ab archiepiscopo Parisiensi sancita

fuert, cœmeterium S. Medardi, ubi scenicæ illæ ac scandalosæ convulsiones exortæ, nec non horrendæ agitationes quas novi Sancti Cultores ad ejus tumulum, reliquias et invocationem experti sunt, claudi jussit, solemnibus Edictis die 27 januarii 1733, et die 17 februarii 1733. Immeritò ergo ac præposterè ad vindicandam et firmandam suam fidem, prædicta miracula venditant Appellantes. Miracula enim, quemadmodum notatum fuit et probatum, ut fidem faciant, debent per primos pastores probari : jactitata autem ab adversariis prodigia, nedùm à primis pastoribus probata fuere, imò potiùs à S. pontifice, atisque quampluribus præsulibus expressè reprobata, explosa, omnique indigna fide, solemniter declarata.

6º. His accedit victrix istud ratiocinium, quo uno ad liquidum expeditur tota ex prætensis miraculis petita difficultas. *Constitutà* semel ac *stabilità* Ecclesiæ auctoritate, nulla in præjudicium in ejusdem auctoritatis audiri debent miracula, neque eorum ulla tunc habenda ratio : miracula enim, præsertim primi ordinis, signa quidem sunt certissimæ veritatis; at datæ à Christo regulæ fidei, hoc est, *constanti* et *stabilitæ* auctoritati Ecclesiæ subordinata... Undè supposità contradictione et repugnantia auctoritatem inter et miraculum, seu ex hypothesi (possibili aut impossibili, de quo hì non questio) concursus auctoritatis ex unâ parte, et miraculis, etiam veri ac propriè dicti, ex alterâ, non miraculum auctoritati, sed miraculo auctoritas, prævalere ac præponderare deberet, huicque priores deferendæ forent partes. Omni argumentorum genere certissimè constat fundamentalis ista veritas.

Constat 1º, his omnibus Scripturæ textibus, quibus Ecclesia commendatur fidei custos ac vindex, quarumlibet controversiarum quibus illa impetitur, *perpetuus, universalis, supremus* ac *infallibilis* Judex : Matth. 16 : *Portæ inferi non prævalebunt adversus eam.* Ibid. 18 : *Dic Ecclesiæ : Si autem Ecclesiam non audierit, sit tibi Ethnicus et Publicanus.* Ibid. 28 : *Ecce Ego vobiscum sum omnibus diebus.* Lucæ 10 : *Qui vos audit, me audit.* Ephes. 4 : *Dedit* (Christus) *Pastores. . . . ut jam non simus parvuli fluctuantes, et circumferamur omni vento doctrinæ, etc.* I ad Timoth. 3 : *Ecclesia Dei vivi, columna et firmamentum veritatis*, non minùs expressa sunt ac disserta cætera Ecclesiæ facta à Christo promissa : cuncta perindè sunt *perpetua, absoluta*, ab omni prorsus loci, tempo-

ris, aut aliarum circumstantiarum exceptione aut limitatione libera ac independentia. Ecclesia ergo, vel ipsomet Christo pronuntiante Dux est ac Magistra, quam semper audire ac sequi tenemur : regula viva ac spirans cœlitus data, ad quam cæteræ omnes enatæ de religione, ac etiam de miraculis controversiæ exigì, atque ultimo ac decretorio judicio finiri debent : ipsa igitur, utpote Judex, regula, dux ac magistra, miraculis præferri debet, non huic miracula (in hypothesi concursus) anteponenda. Hinc stupenda hæc Apostoli verba, ad Galat. 1, v. 8 : *Sed licet. . . . Angelus de Cælo evangelizet vobis præterquam quod evangelizavimus vobis, anathema sit.* Nullum sanè mirandum magis ac insolens portentum, visibili Angeli Cœlestis adventu ac prædicatione : huic tamen, teste Apostolo, pluris faciendâ, firma ac immobilis Ecclesiæ auctoritas. His persimilia sunt, quæ habet dilectus Apostolus, I suæ Epist. cap. 4, v. 6, ubi ad discernendum errorem à veritate, falsosque à veris Prophetis, miram hanc ac divinam regulam statuit : Qui novit Deum, audit nos : qui non est ex Deo, non audit nos : *in hoc cognoscimus Spiritum veritatis et spiritum erroris.* En perpetua, universalis, certa, brevis ac compendiosa secernendi veras à falsis doctrinas, via : non miracula ; sed prona ac simplex Apostolis, eorumque successoribus, primis Pastoribus, obedientia : *In hoc cognoscimus Spiritum veritatis et spiritum erroris.* Palmaris ista utriusque Apostoli regula, prorsus congruit his Christi verbis, Lucæ 10 : *Qui vos audit, me audit;* et Matth. 18 : *Si Ecclesiam non audierit, sit tibi sicut Ethnicus et Publicanus.*

Constat 2º, ex SS. Patribus quorum unanimis vox est et doctrina, auctoritatem scilicet Ecclesiæ, esse veram ac generalem à Christo fixam ac constitutam fidei regulam : adeoque priores auctoritati dandas esse partes super miraculis : istaque adversus illam minimè esse audienda. Ita SS. Iren. lib. imprimis 3. *adversus hæreses* cap. 2 et 3. Cyp. lib. *de Unit. Eccles.* et in Epist. *ad Pupian.* Hieron. Dialog. *contra Luciferian.* August. Optat. alique. Satis fuerit impræsentiarum referre S. Augustinum, qui hoc ipsum ereberrimè ac disertissimè tradit. Lib. de Unit. Eccles. cap. 19. *Donatistarum* jactantiam ex prætensis quæ venditabant miraculis, sic ex ipsâ Ecclesiæ ubique dispersæ auctoritate egregiè confutat S. Doctor : « Omnis ergo istis, inquit, morarum tendiculis, ostendat Ecclesiam vel in solâ Africâ, perditis

tot Gentibus retinendam, vel ex Africâ in omnibus Gentibus reparandam atque adimplendam : et sic ostendat ut non dicat.... Ideo verum est, quia illa et illa mirabilia fecit Donatus vel Pontius, vel quilibet alius, aut quia homines ad memorias mortuorum nostrorum orant, et exaudiuntur, aut quia illa et illa ibi contingunt; aut quia ille frater noster, aut illa soror nostra tale visum vigilans vidit, vel tale visum dormiens somniavit. » En ipsissima fermè omnia, quæ ab adversariis, convulsionum et miraculorum Præconibus, hic nobis obijciuntur.

Hæc verò plenissimè diffilat S. Doctor; iis quæ ibid. mox subjungit : « *Removeantur ista; vel figmenta mendacium hominum, vel portenta fallacium spirituum.* Aut enim non sunt vera quæ dicuntur, aut si hæreticorum aliqua mira facta sunt, magis cavere debemus : quòd cùm dixisset Dominus quosdam futuros esse fallaces, qui nonnulla signa faciendo, etiam electos, si fieri posset, fallerent, adjicit vehementer commendans, et ait, *Ecce prædixi vobis.* Undè et Apostolus admonens, *Spiritus*, inquit, manifestè dicit, quia in novissimis temporibus recedent quidam à fide, intendentes spiritibus seductoribus, et doctrinis dæmoniorum. » Pergit : « Porro si aliquis in hæreticorum memoriis orans exauditur, non pro merito loci, sed pro merito desiderii sui recipit sive bonum, sive malum... et multi irato Deo exaudiuntur, de quibus dicit Apostolus, *Tradidit illos Deus in concupiscentias illorum.* Et multis propitius Deus non tribuit quod volunt, ut quod utile est tribuat... Nonne legimus ab ipso Domino Deo nonnullos exauditos in excelsis montibus Judææ quæ tamen excelsa ita displicebant Deo, ut et Reges qui ea non everterent, culparentur, et qui everterent, laudarentur. »

Et paucis interpositis : « De viris autem fallacibus legant quæ scripta sunt, et quia ipse Satanas transfigurat se tanquam Angelum lucis, et quia multos seduxerunt somnia sua. Audiant etiam quæ narrant Pagani de Templis et Diis suis mirabiliter vel facta, vel visa;... exaudiuntur ergo multi, et multis modis (stupendis ac miraculosis) non solum Christiani Catholici, sed et Pagani, et Judæi, et Hæretici, variis erroribus et superstitionibus dediti. Exaudiuntur autem vel ab spiritibus seductoribus, qui tamen nihil faciunt, nisi permittantur Deo sublimiter atque ineffabiliter judicante quid cuique tribuendum sit : sive ab ipso Deo, vel ad penam malitiæ, vel ad solatium mi-

seriæ, vel ad admonitionem quærendæ salutis æternæ. »

Describendum duximus, tametsi prolixius, istud S. Doctoris testimonium, adeò egregium est, et præsentì nostræ causæ accommodatum. Hæc simplex et unica, absque prætensorum miraculorum discussione, cuilibet Fideli sufficere debet præjudicata responsio et regula, quâ adversus Donatistas utitur hic S. Augustinus : « Removeantur ista, vel figmenta mendacium hominum, vel portenta fallacium spirituum. » Aut *falluntur*, aut *fallunt* : neque adversus supremam quæ in Orbe conspicua sit auctoritatem, jactata quantocumque fastu miracula, minimè audienda. In eundem sensum, Tract. 13, in Joan. n. 17, de prætensis Sectoriorum miraculis disserens strenuus idem Ecclesiæ vindex : « Nemo, inquit, vobis fabulas vendat : Et Pontius facit miraculum; et Donatus oravit, et respondit ei Deus de Cælo. Primò, aut *falluntur* aut *fallunt* : postremò, fac illos montes transferre : charitatem autem, inquit, non habeant, nihil sunt. Videamus autem utrùm habuerint charitatem : crederem, si non divisissent unitatem (reluctando nimirum supremæ primorum Pastorum auctoritati). Nam et contra istos, ut sic loquar, mirabiliarios cautum me fecit Deus meus dicens : *In novissimis temporibus exurgent Pseudo-Prophætæ facientes signa et portenta ut in errorem inducant, si fieri potest, etiam electos : ecce prædixi vobis.* » Mox infert : « Ergo cautos nos fecit Sponsus, quia et miraculis decipi non debemus. Teneamus ergo unitatem, fratres mei : præter unitatem et qui facit miracula nihil est. » Ex quo iterum textu manifestè habes, venditata adversus supremam Ecclesiæ auctoritatem miracula quælibet esse floccifacienda. Hinc citato de unit. Eccl. libro n. 50, idem S. Doctor : « Quæcumque, inquit, talia (miracula) in Catholicâ fiunt, ideò sunt approbanda, quia in Catholicâ fiunt; non ideò ipsa manifestatur Catholica, quia hæc in eâ fiunt : » quæ quidem, auctoritatem Ecclesiæ esse miraculis anteponendam, planè demonstrant. Scilicet ad fundandam primitus et veluti in incunabulis Ecclesiam, necessaria fuere miracula : at constitutâ semel et firmiter stabilitâ ipsius auctoritate, tametsi in Catholicâ quâ latè patet Ecclesiâ, semper vigeat miraculorum donum : attamen non de Ecclesiâ aut ejus doctrinâ ex miraculis; sed è contra, juxta S. Augustinum loco citato, de doctrinâ quibuslibetve miraculis, etiam iis quæ in Catholicâ fiunt, per Ecclesiam jam ex prioribus mi-

raculis, prophetiis, aliisque credibilitatis moti-
vis, solidè fundatam, evidentè credibilem
factam, pronuntiandum est. « Hæc sunt, in-
quit ibid. S. Doctor, causæ nostræ documenta,
hæc fundamenta, hæc firmamenta. » Et rursus
lib. 15 contra Faustum, ex auctoritate petito
argumento, jactantes miracula Manichæos
debellans : « Miracula, inquit, non facitis :
quæ si faceretis, etiam ipsa in vobis cavere-
mus ; instruente nos Domino et dicente : *Ex-
surgent multi Pseudo-Christi et Pseudo-Pro-
phetæ ; et facient signa et prodigia multa ut
fallant, si fieri potest, etiam electos : ecce præ-
dixi vobis* : Usque adeò nihil credi voluit ad-
versus confirmatam Scripturarum auctori-
tatem. » Quod hic profert S. Augustinus, non
esse attendenda adversus Scripturæ auctori-
tatem, miracula ; hoc ipsum de catholicâ pro-
nuntiandum Ecclesiâ : *quam sine ambiguitate
Scriptura sacra demonstrat*. Ita idem S. Doctor,
libro 1 contra Crescon. cap. 33. Itaque in
conflictu (si possibilis sit) *veri miraculi* cum
Ecclesiæ auctoritate, spernendum illud foret
ac prætermittendum ; huicque tanquàm certæ
et immobili fidei regulæ à Christo constitutæ,
juxta inconcussam sancti Augustini aliorum-
que SS. Patrum doctrinam, firmiter adhæ-
rendum.

Atque hinc Tertull. lib. 3 contra Marcion.
cap. 5, præstitam à portentis hæreticorum fi-
dem, appellat, *temerariam signorum et porten-
torum fidem* : asseritque spernenda esse, ipso-
met præmonente Christo, cuncta ab ipsis jac-
tata miracula, prætensas etiam mortuorum
resurrectiones : « Adjicient prætereâ, inquit
lib. de præscript. cap. 44, multa de auctoritate
cujusque Doctoris hæretici, illos maximè doc-
trinæ suæ fidem confirmasse, *mortuos susci-
tasse*, debiles refôrmasse, futura significasse,
uti meritò Apostoli crederentur : *quasi nec hoc
scriptum sit*, venturos multos, qui etiam vir-
tutes maximas ederent, ad fallaciam munien-
dam corruptæ prædicationis. » Hincque etiam,
de venditatis à novatoribus in suorum erro-
rum confirmationem signis ac portentis, sic
generaliter pronuntiat S. Greg. lib. 20 Moral.
in cap. 30 Job. n. 16 : « Sancta universalis
Ecclesia cuncta eorum (Hæreticorum) opera
despicit, quæ ex auctoritate fidei non prodire
perpendit. » Addit : « Etiam si qua fiant Hære-
ticorum miracula. » Quòd scilicet, uti jam
dictum, miracula sint primorum Pastorum
auctoritati subordinata, proindeque minimè
audienda in concursu et oppositione cum hu-

jusmodi Pastorum auctoritate, quæ tanquàm
suprema, universalis et perpetua veritatis regula,
ad quælibet fidem et salutem animarum spec-
tantia, ideòque ipsa etiam miracula, secer-
nenda, ac probanda aut improbanda, à Christo
constituta est. Jam verò minor propositio,
quòd scilicet, primorum Pastorum longè ma-
jor auctoritas, et quidem (quod observa) juri-
dicè pronuntians ac definiens, manifestè stat
ex parte Constitutionis *Unig.* apertissimè li-
quet, tum ex solemnè ac expresso quinque
continenter summorum Pontificum, integri
Cardinalium Collegii, plerumque omnium Me-
tropolitanorum ac Præsulum in acceptandâ
dictâ Constitutione consensu ; cæteris omnibus
(paucissimis in unâ duntaxat Galliâ exceptis)
tacitè consentientibus : tum ex disertâ hanc
in rem insigniorum Appellantium confessione,
variisque ad hujusce acceptationis et auctori-
tatis pondus ac robur declinandum excogi-
tatis systematibus : tum ex frequentissimis,
omni exceptione majoribus eo in negotio
testimoniis ac momentis. De quibus vide co-
piosè dicta inter probationes jam superius ad-
ductas.

Jactitata ergo in præsentî causâ miracula,
nullius sunt ponderis ac momenti. Etiam si vera
forent (quod pernegamus) : hoc ipso quo sta-
bilitat à Christo Pastorum auctoritati sunt ad-
versa, explodenda sunt, minimèque audienda.
Deus Apos. olo teste, II ad Timoth. 2, *negare
se ipsum non potest* ; et qui dixit se cum primis
Pastoribus, cum docerent, *futurum omnibus die-
bus usque ad consummationem seculi*, Matth. 28,
nusquam à partibus eorum stabit, qui sibi in
primis Pastoribus, per quos loquitur, et quos
loco sui audiri jubet, contradicunt. Vel hoc
unicum, ex majori Pastorum auctoritate cui
opponuntur prætensa miracula, petitum mo-
mentum, prorsus decretorium est ; atque ad
elidendas quaslibet adversariorum in præsentî
causâ vitiligationes, planè sufficit. Hæcque sim-
plex, facilis, expedita, ipsisque etiam rudio-
ribus proportionata responsio, sola absque præ-
tensorum miraculorum discussione cuilibet fi-
deli sufficere debet : eâque passim adversus Do-
natistas utitur sanctus Augustinus, in primis lib.
de Unit. Eccles. n. 48, 49, 50. et Tract. 13 in
Joan. n. 17 et 18 ; verba paulò antè laudavimus.

7°. Accedit et aliud, ad explodenda præ-
tensa miracula, peremptorium pariter, et ut
aiunt, *ad hominem* ineluctabile momentum ;
sic potest proponi : Arcissima est convulsio-
nes inter et jactata miracula connexio ; adeò-

que utraque ex æquo suscipienda, tanquam à Deo profecta; aut ex æquo rejicienda ac explodenda, uti Deo prorsus indigna, eaque in ipsammet naturam, vel in meram fraudem, aut in demonem ipsum referenda: atqui ex dictis et abundè probatis suprà, præsertim n. 5, respondendæ omninò sunt ac explodendæ convulsiones: neque citra insigne in Deum contumeliam, insultum ac ridiculum istud opus Deo adscribi potest; ergo. Major propositiò, aretissimam scilicet occurrere convulsiones inter et prætensa miracula connexionem, jam ex dictis hic n. 5, apertè constat. Idque insuper insigniores Convulsionum defensores sæpiùs ac invictè statuunt. Hincque, fâmosos triginta ex numero Appellantium Doctores, consultationis super Convulsionum opere auctores, debellant ac revincunt.

Audiat auctor scripti cui titulus: *Plan de plusieurs questions*, etc. Sparsis futuræ mox consultationis primis rumoribus, sic pag. 6, aiebat: « La consultation, à coup sûr, donnera les convulsions au démon. Comment répondra-t-elle aux objections des Convulsionnistes? La liaison et physique et morale des miracles avec les Convulsions, la naissance au tombeau, sont-ce des difficultés si frivoles? Il faut, d'ailleurs, répondre aux miracles opérés par les ministres des Convulsionnaires, et dans le sein des Convulsions: les attribuera-t-on au diable, comme quelques-uns l'ont fait? Comment parera-t-on aux conséquences de M. de Sens? Quel embarras où l'on s'est jeté! Comment s'en tirera-t-on? » Hincque ingemiscens exclamait: « Quel triomphe pour la Bulle! Quelle victoire pour M. Languet! Quel coup porté à l'appel, aux miracles! Quelle honte pour les Appelans! » Alter aut idem scriptor: *Nouveau plan de Réflex.*, pag. 4 et 5, urgentiùs adhuc instat ac premit Consultores his verbis: « La naissance des Convulsions au tombeau (Diaconi S. Medardi), par la vertu du tombeau et du sein des miracles, est assurément un caractère d'une grande force en faveur des Convulsions. Les Anti-Convulsionnaires l'ont bien senti. Quels efforts n'ont-ils pas faits pour éluder ce caractère? » Et paucis interjectis: « Dans une œuvre aussi étonnante que celle des Convulsions, est-il rien de plus important, de plus décisif que de remonter à la source? Où cet événement est-il né? En quelles circonstances, à quelle occasion? Cela décide. M. de Sens et Dom la Taste se servent de l'origine des Convulsions au tombeau pour en conclure contre

le tombeau lui-même. Les Consultants n'issent leurs cris à celui de ces deux auteurs, et ils n'osent dire un mot du tombeau... En adoptant le principe de M. Languet, ils semblent lui dire d'une voix tonnante par leur silence même, qu'ils lui passent toutes ses conséquences. » Subdit: « La liaison des Convulsions et des miracles est un nouveau caractère dont on sent aisément toute la force.... Des miracles sans nombre ont été opérés sur des Convulsionnaires par le moyen des Convulsions, ou par le ministère des Convulsionnaires sur les malades. » Ita, ex unitate ejusdem originis, cultus, finis, necnon eorumdem effectuum, aretam miraculorum et convulsionum connexionem, clarè adstruit prædictus auctor.

Rem disertius statuit ac firmat illustris apud convulsionum vindices auctor Scripti sub hoc titulo: *Exposition du sentiment des Théologiens défenseurs de l'œuvre des Convulsions*. Is triginta Consultores validissimè exagitant, ait pag. 7: « Leur Consultation ôte toute force (aux miracles). Il faut de toute nécessité qu'ils renoncent aux miracles ou à leur principe. La preuve en est évidente. Point de mélange dans les œuvres divines et surnaturelles, au moins dans les extraordinaires: c'est le principe. Or les Convulsions forment un tout, une même œuvre avec les miracles opérés sur le tombeau de M. de Paris. D'une autre part, les Convulsions, selon le sentiment des Docteurs (consultans), sont indignes de Dieu. Donc les miracles le sont aussi, et on doit les attribuer à l'imposture, ou les regarder comme des prestiges du démon. » Sic Consultores ex ipsismet eorum principiis ac verbis urget Convulsionum assertor: additque continuè: « Tel est l'argument invincible dont M. de Sens s'est déjà servi, et qu'il fera valoir dans toute sa force, contre ceux qui prétendent retenir les miracles en abandonnant les convulsions. » Et reipsâ ineluctabile istud est ratiocinium, quo illustrissimus Senonensium Archiepiscopus, in suis super miraculis Instructionibus, Appellantes debellavit ac convicit. Instat Convulsionum defensor, indissolubilem convulsionum cum miraculis connexionem ibidem clarissimè demonstrans: « En vain, inquit, les Docteurs (consultati auctores) nieront-ils cette liaison des miracles aux Convulsions. On leur répondra qu'elle est évidente, et que toute la terre la voit, excepté eux. On leur dira qu'ils l'ont vue eux-mêmes, avec tous les autres, dans le commencement,

On leur fera remarquer, que les Convulsions sortent du même tombeau, de l'application des mêmes Reliques, de la même invocation, d'où sont nés et sortis les miracles.

On leur soutiendra que plusieurs d'entre ces miracles, et peut-être le plus grand nombre, ont été accompagnés, précédés ou suivis de Convulsions; et que très-souvent les convulsions ont influé directement dans les miracles mêmes.

On ajoutera que de très-grands miracles ont été opérés sous la main de personnes en convulsion, après même avoir été annoncés et prédits; que les Convulsionnaires se sont chargés des maux de plusieurs malades d'une manière qui tient visiblement du miracle, et qu'en conséquence ces malades ont été guéris.

Et rursus, paucis ista omnia complectens: « Ce qui forme vraiment la liaison de deux choses, inquit pag. 8, c'est l'unité de principe et d'origine. *L'origine, le berceau des convulsions est le même que celui des miracles: c'est le tombeau et l'invocation de M. de Paris. Cela est certain:* » paulò antea dixerat: « *Cela est évident: tout le monde le voit, etc.* » subdit: « Mais non-seulement les Convulsions sont liées aux miracles par une origine commune: on voit sortir plusieurs grands miracles des Convulsions mêmes. » Paria tradunt illustriores Appellantium scriptores, inprimis auctor *Observat. sur l'origine et le progrès des Convulsions*, pag. 5, etc. Hæc sanè, ad mutuam et ætissimam Convulsionum et miraculorum connexionem declarandam, apertissimæ totidem sunt ac inexpugnabiles probationes. Hincque laudatòs suprà illustriss. Parisiensis archiepiscopus, Mandato Pastoralis super prætensis Diatoni S. Medardi miraculis, vel ex ipsamet insigniorum Appellantium narratione, de præfatà connexionè sic habet pag. 87: « Cette liaison est trop sensible, pour qu'après de sérieuses réflexions, on puisse la contester de bonne foi. Les Convulsions n'ont-elles pas la même origine que les miracles? Ne sont-elles pas nées comme de leur sein? N'en ont-elles pas, dit-on, produit à leur tour un grand nombre? Ne sont-elles pas le fruit d'un même culte? Ne tendent-elles pas à la même fin? N'ont-elles pas eu les mêmes suites et occasionné les mêmes effets? »

Vera itaque ac indubitata, vel ex ipsismet Appellantium coriphæis, major propositio: ætissimam scilicet esse convulsiones inter

et prætensa miracula connexionem: utraque proinde aut ex æquo suscipienda, tanquam à Deo profecta; aut ex æquo rejicienda ac explodenda, uti Deo prorsus indigna; eaque ipsi meræ naturæ, vel fraudi, vel dæmoni adscribenda. Minor verò argumenti propositi, nempe convulsiones omninò explodendas esse, neque citrà insignem contumeliam Deo adscribi posse, clarè liquet ex dictis suprà citato n. 3, idque evidentissimè adstruunt, omnique argumentorum genere confirmant celeberrimi ex Appellantibus triginta Doctores consultationis super convulsionibus auctores; undè pag. 29, sic suum concludunt opus: « Après ce que nous venons de dire, il est évident que l'on n'a plus rien à attendre pour juger des Convulsions. *Tout réclame contre.* La majesté de Dieu, la sainteté de son culte, l'honneur de l'Eglise, la pureté des mœurs, l'honnêteté publique, le bon ordre, le maintien des règles, exigent de tous ceux qui s'intéressent au bien de la Religion, qu'ils concourent avec zèle, autant qu'il est en eux, à faire cesser un scandale qui a duré trop long-temps, et une illusion qui ne peut avoir que des suites funestes.... *Les Convulsions ne sont point l'œuvre de Dieu: et ce prodige de nos jours, autorisé par une admiration mal placée, doit être livré à tout le mépris qu'il mérite.* Puisse-t-il être à jamais oublié! » Ergo, cum ex unâ parte, juxta demonstrativa Convulsionistarum Doctorum adversus Consultores momenta, ætissima sit et indissolubilis convulsiones inter et miracula connexio: ex alterâ verò parte, consultationis auctoribus adversus Convulsionistas pariter demonstrantibus, convulsiones prorsus explodendæ sint, nec citrà impietatem, Deo supernaturaliter operanti, adscribi possint: inde necessariò ac apertissimè consequens explodenda quoque esse miracula, neque ea in Deum auctorem ullatenus posse refundi. Sicque in sese divisi Appellantes, semelipsos mutuò confodiunt ac jugulant, propriisque armis atque principiis à se invicem invictè stabilitis expugnantur pariter ac debellantur. *Regnum in se divisum*, pronuntiantie Christo, non stabit.

Ex dictis huc usque in solutione præsentis argumenti, manifestè liquet, venditatas intollerantiùs convulsiones, ipsaque tantopère jactata miracula, nullius omninò momenti esse ad inconcessam Clementinæ Constitutionis auctoritatem infirmandam, aut ad Appellantium causam ullatenus juvandam. Quin addo;

vel hoc etiam unico, magis ac magis clarescit Bullæ auctoritas; funditus disjicitur provocationis causa, ipsique prosternuntur, contunduntur, ac penitus atteruntur Appellantes. Ratio est apertissima: enimverò, falsa dicenda est et exitiosa causa illa quæ diabolicis fulcitur, fovetur, commendatur prodigiis ac portentis; vera autem et salutifera, quæ iisdem impugnatur: certior est ista propositio, quàm ut probatione indigeat. Atqui jactata ab Appellantibus convulsiones et miracula, ad detrahendum auctoritati Bullæ, et ad promovendam ac disseminandam ab ipsâ provocationem fiunt: uti ex origine et centro ad tumulum et invocationem Appellantis clarè liquet, et fatentur adversarii: aliunde convulsiones, ut patet ex 30 Consultoribus, utpotè Deo prorsus indignæ, si supernaturales, dæmoni adscribendæ: proindeque et ipsa etiam cætera Appellantium miracula: cùm, ex Convulsionistarum Doctoribus, et insuper ex apertè probatis suprâ, hæc inter et convulsiones arctissima sit connexio. Splendescit ergo ac emicat Bullæ auctoritas: ipsi proteruntur Appellantes, eorumque causa ab imis subruitur fundamentis: idque vel ex ipsismet portentis ac prodigiis in quibus novissimam desperatæ causæ spem collocant.

Hoc ipsum significantioribus verbis describit, ac dolenter ingemiscendo advertit, insignis auctor citatus: *Exposition du sentiment des Théologiens sur l'œuvre des Convuls.* Sic habet pag. 10: « Qu'on y fasse donc attention, et qu'on remarque avec étonnement la voie que tracent ici les Docteurs (consultationis auctores) à M. de Sens pour se débarrasser de tous les miracles.... *Il fera voir sans peine* que les miracles que nous défendons, et qui ont été opérés par les convulsions, sont aussi certains et aussi grands que ceux que les Docteurs reconnaissent avoir été opérés sans convulsion; et il montrera que, si les Docteurs (Consultans) sont en droit de rejeter les uns, parce qu'ils sont liés aux convulsions, il n'est pas moins en droit de rejeter les autres, parce qu'ils sont liés à la cause de l'appel. » Exclamant: « Est-ce injustement que nous accuserons ici nos confrères d'avoir livré imprudemment à l'ennemi la cause commune, la cause de la vérité? » Et pag. 11, triginta Doctorum, dæmoni convulsiones, si vires naturæ superent, adscribentium doctrinam confutans: « C'est précisément, inquit, le raisonnement que fait M. l'Archevêque de Sens contre les miracles, et il n'a pas

moins de force dans sa bouche contre tous les miracles qu'il attaque, qu'il n'en a dans celle des Docteurs contre les miracles opérés par les Convulsions, ou par les Convulsionnaires. Comment donc seront-ils en état de lui répondre, et de prendre contre lui la défense des miracles? » Et rursus expressissimè pag. 13 et 14: « Les XXX Docteurs, au lieu de se mettre en état de défendre solidement les miracles contre M. de Sens, lui fournissent partout des armes, et se livrent à lui sans s'en apercevoir, par les préventions où ils sont contre les convulsions. Ils rejettent, et ils apprennent à rejeter par principe les miracles opérés par les convulsions ou par les convulsionnaires, parce qu'ils sentent bien la liaison indissoluble de ces miracles avec les convulsions. » Addit: « Mais les autres miracles ne sont pas plus grands que ceux-ci, et ne sont pas moins liés en général avec l'œuvre des convulsions, qui fait une portion considérable de l'œuvre même de S. Médard. Pourquoi donc, en suivant les mêmes principes, ne rejetterait-on pas tous les miracles de S. Médard, à cause des convulsions qui y sont liées, et qui sont un signe, dira-t-on, pour discerner ces guérisons des véritables miracles? M. l'Archevêque de Sens donnera des convulsions l'idée que s'en forment les XXX Docteurs: il s'appuiera sur la consultation comme sur un fondement inébranlable, qui ne doit pas être suspect, dira-t-il aux Appelans: et de là il triomphera, il les confondra, il se vantera de les avoir écrasés. » Hæc improvidè omninò præfatus auctor, quibus et ipse causam suam apertè prodit: eamque pariter à suis palàm desertam fuisse ac proditam, aperit et manifestat. Atque hic mirari subit arcana et altissima divinæ Sapientiæ consilia, investigabilesque vias ejus. Prætensa Appellantium miracula, totaque eorum causa, quasi abolita est et extincta, eoque ipso in tumulo condita, in quo firmissimum et invictum toti huic suæ causæ præsidium ipsimet reposuerant Appellantes; indeque magis magisque enituit resplenduitque Bullæ auctoritas. Sanè *digitus Dei est hic*. Lux è tenebris orta est: salus ex inimicis nostris. *Dixit Deus de tenebris lumen resplendescere*. Consule illustriss. Senonens. Archiepiscopum hoc de argumento egregiè disserentem in suo præsertim an. 1734 *super miraculis* Pastoralis Documento, necnon in adjectis instar appendicis ad Documentum illud observationibus.

Unum jam superest minimè prætermittendum, quod secundâ parte præfati documenti

advertit laudatus mox doctissimus Archipræsul: nimirum enatas videri Convulsiones, Deo ita permittente, in vindictam obfirmatæ adversus Episcopalia Mandata contumaciæ. Scilicet ex quo per Ecclesiam Præsules, imprimis ab illustriss. Parisien i Archiepiscopo interdictus fuit solenni Mandato die 13 julii 1751, cultus Diaconi S. Medardi D. *Paris*: qui detrectatâ pertinaciter obedientiâ, cultui illi obstinatè adhæsere, in reprobum traditi sensum; laxatque demoni habenæ. Hinc stupendæ ac tanto numero exortæ convulsiones: hinc fanaticæ illæ prophetiæ in nocturnis conventibus Convulsionariorum, nugis, fabulis, ipsis etiam convitiis, obscœnitatibus, blasphemis, impietatibus refertæ ab arreptitiis viris et mulieribus emisse: hinc tandem Babelica illa confusio quæ ipsos Appellantes inter se commisit, hostilesque in se invicem discordias concitavit. Alij *rigidiores*, cunctas indiscriminatim, uti supernaturales ac divinas suscipiunt ac prædicant convulsiones; alij *mitiores* dicti, discernendum putant, easque duntaxat convulsiones Deo auctori esse adscribendas, in quibus nihil communibus ac consuetis regulis occurrit adversum: alij *Naturalistæ* nuncupati, volunt convulsiones omnes, jactatasque morborum curationes, uni naturæ esse tribuendas. Alii candidiores inter ipsos ac prudentiores disertè confitentur convulsiones, si supernaturales sint, in dæmonem ipsum esse referendas. De his meritò dixeris cum S. Augustino: *Videte in quot frusta divisi*. Horum discordias et dissidia latè recensent, eorumque insulsa placita doctè exagitant præfatus Senonens. Archipræsul, locis modò laudatis, necnon laudatus suprâ Epistolarum Theologiarum auctor. Ut dicta hactenus de æquitate et auctoritate Bullæ, nobili coronide absolvamus, egregium Eminentissimi Cardinalis Lambertini (SS. Pontificis Benedicti XIV) testimonium, ex præclaro æquè ac pererudito *super canonizatione Sanctorum* opere depromptum, duximus hic adiciendum. Scilicet, tomo 4, cap. 7, narrat, datâ occasione scenicas planè convulsiones in cœmeterio S. Medardi civitatis Parisiensis, ad tumultum Diaconi D. *Paris* habitas; pluries interpositas ab eodem Diacono Bullæ *Unig.* ad generale Concilium provocaciones; necnon prætensa ad prædictum tumultum ejus invocatione patrata miracula: tum varia Episcoporum ac summorum Pontificum hæc in re gesta et statuta refert: imprimis latum die 22 Augusti 1751

Decretum, quo à Clemente XII, prævio consilio Congregationis sacræ Inquisitionis, libellus inscriptus: *Vie de M. de Paris, Diacre*, etc., proscribitur tanquàm continens propositiones et assertiones falsas, piarum aurium offensivas, scandalosas, auctoritatibus sanctæ Sedis Apostolicæ, summique Pontificis, tum Ecclesiæ et Episcoporum, præsertim Gallicanorum, injurias, temerarias, impias, hæreticis faventes, erroneas, atque etiam schismaticas et hæreticas, et hæretico spiritu plenas. His porrò latè deductis, sic demùm concludit: « Totus et universus (prædicti libelli: *Vie de M. de Paris*, etc.) contextus eo unicè collimabat, ut homo Apostolicæ Sedi refragans, *schismaticus hæreticus*, acerrimus impugnator Constitutionis, quæ incipit *Unig.* pertinax Jansenistarum assecla, falsis ipsi attributis miraculis, imaginem solidæ virtutis et sanctitatis præ se ferret. Sanctè ergo et prudentissimè suprâ memorati Episcopi Gallicani abstinuerunt à sumendis informationibus juridicis: et sanctè ac prudentissimè, insano, scandaloso et temerario cultui obstituerunt. » Non minùs diserta hanc in rem ac luculenta sæpius alibi statuit, præsertim Epistolâ Ebredunensis Synodi commendatitiâ, ad Illustriss. Ebredunensem, nunc Eminentiss. Cardinalem et Archiepiscopum Lugdunensem datâ 31 octobris 1751, quæ quidem omnia à nobis huc usque asserta circa æquitatem, canonicitatem et auctoritatem Bullæ *Unig.* necnon circa vulgata ab Appellantibus miracula, mirum in modum confirmant.

§ 3. *Aperitur Bullæ Unig. natura genuinusque character.* — Tametsi plures insigniores Quesnelli Sectatores, judicii dogmatici nomen et characterem, minimè denegent Constitutioni *Unig.*, nonnulli tamen sunt apud ipsos, etiam non ignobiles, qui dictæ Bullæ titulum hunc adscribere præfractè detractent: quòd scilicet, nullum dogma distinctè definiat, nullumve errorem clarè proscribat; quod cuilibet veri nominis dogmatico judicio essentialè esse prætendunt. Undè, inquirunt, præcipuè hujus ac maximè necessariæ conditionis defectu, Bulla nec est, nec usquam evadere potest dogmaticum Ecclesiæ judicium accedente etiam expressâ Corporis Episcopalis acceptatione. Ita celebris ex Quesnellistis auctor libri cui titulus: *La vérité rendue sensible*, art. 7, q. 3, necnon *Recueil des difficultés des Théolog. de France sur la Constit.* pag. 376, 2 édit. 1726. *Mémoire où l'on examine si l'appel interjeté par 4 Evêques est légitime*, pag. 86. 87. etc. Hincque iidem

Quesnelli assecræ Bullam ablegant ad meram disciplinæ, politiæ, cautionis, æconomix legem ac regulam, quæ nil creandum proscribendumve proponit aut exigit; nec perversam propositionum doctrinam respicit, sed illarum duntaxat usum, quem propter imminentes jam abusus, aut ne novi motus et dissensiones exoriantur, ad tempus prohibet: hisque cessantibus abusibus, sedatis motibus, animisque pacatis, easdem, juxta ipsos, licebit propositiones defendere, iisque uti.

Ad hanc Quesnellistarum doctrinam proximè accedunt molliores quidam acceptantes, meliùs dixeris verè dissidentes, qui Bullæ *Unig.* uti meræ legi disciplinæ adhærent. Ii certè debitum Apostolico huic Decreto interiorum assensum recusant; ac proindè Decretum illud interiùs et reipsà explodunt, dùm exteriùs ei adhærere profitentur. Hoc ipsum notat vel ipsemet auctor Responsi ad primum Pastorale Illustrissimi Suessionens. Episcopi Documentum, parte 4, cap. 7, ubi hanc prætensorum Acceptantium doctrinam multis improbat, tanquàm christianæ sinceritati, nativæ Propositionum Quesnelli sensui planè adversam; ac demùm n. 13 concludit his verbis: « Il est clair que certains Acceptans mitigés, qui, sentant bien qu'on ne peut condamner ces Propositions (de Quesnel) dans le fond, se retranchent à dire que la Bulle n'est sur ce point qu'une loi de langage; s'écartent entièrement de l'esprit et de la lettre de la Bulle, et lui donnent contre l'évidence et la bonne foi un sens tout contraire à celui qu'elle doit avoir naturellement; quand on la prend simplement, de bonne foi, et par opposition au vrai sens du livre et des Propositions du P. Quesnel. » Ut autem hanc Quesnellistarum, et prætensorum molliorum Acceptantium doctrinam refellamus, genuinamque Bullæ naturam, propriumque ipsius characterem statuamus, sit

CONCLUSIO. Bulla *Unig.* non est mera disciplinæ, politiæ ac cautionis lex; sed verum ac propriè dictum iudicium dogmaticum. Manifestissimè constat conclusio, omnimodis tùm intrinsecis, tùm extrinsecis momentis: atque ut in ingenti eorum, quæ sese certatim offerunt ad gravissimum istud caput demonstrandum copiâ, brevitati simul et perspicuitati studeamus, illustriora duntaxat seligemus momenta, eaque summatim attingemus.

Probatum itaque 1º ex luculentissimis, omnique exceptione majoribus, suprâ recensitis eâ de re momentis. Primò, quinque

Romanorum Pontificum sibi ex ordine in Sede Apostolicâ succedentium. Secundò, sacri totius Cardinalium Collegii. Tertiò, trium Synodorum in causâ Quesnelli habitatum; Romanæ præsertim Synodi, cui præsidente Benedicto XIII, frequentissimus adfuit Præsulum numerus. Quartò, Gallicanorum Præsulum in plerisque Comitibus, Mandatis ac Documentis Pastoralibus. Quintò, Orbis catholici Metropolitanorum et Episcoporum, quorum omnium quamplurima, totâ passim istâ disputatione, laudavimus testimonia: ex quibus clarissimè liquet Bullam *Unig.* non ut meram politiæ et disciplinæ legem, sed veri nominis *dogmaticum iudicium*, à summis Pontificibus, Cardinalibus et Episcopis, publicè agnitam fuisse ac solemniter declaratam.

His cohærenter sacra Facultas Parisiensis, solemnè suo an. 1729 super acceptance Constitutionis *Unig.* Decreto, die 15 decembris lato, conceptis verbis pronuntiat: « Constitutionem sanctissimi Domini nostri Clementis Papæ XI, datam die 8 septembris an. 1713, quæ incipit *Unig. Dei Filius*, summâ cum reverentiâ, et integro cordis et animi obsequio, se iterum et de novo amplecti tanquàm *dogmaticum Ecclesiæ universalis iudicium*. » Ac dein in refractarios decernit exclusionis è suo sinu pœnam *ipso facto* incurrendam. Solemne verò istud ac gravissimum Decretum pluries exindè à sacro Ordine firmatum, summis plausibus exceptum fuit et probatum ab omnibus tam domesticis, quàm exteris Universitatibus et sacris Facultatibus ad quas directum fuit: illud etiam summo consensu probavère *Episcopi, Archiepiscopi et Cardinales* Gallicani. Accessit et ad cumulum Apostolica *Clementis XII* approbatio, *Brevi* 16 januar. 1731 ad S. Facultatem Parisiensem dato. Quæ omnia adductis suprâ expressis testimoniis evicimus. Ex his sic potest colligi: Ea Constitutio habenda est *dogmatica Ecclesiæ lex* ac definitio, quam uti talem constanter agnoscunt ac prædicant SS. Pontifices, Cardinales, Synodi eâ de re habitæ, Gallicani Præsules variis in Comitibus et Mandatis Pastoralibus, denique orbis catholici Metropolitanis suis expressè aut tacitè consentientibus Suffraganeis: plaudentibus insuper tam domesticis, quàm exteris sacris Facultatibus. Certa est et indubitata ista propositio: tantæ siquidem SS. Pontificum, Cardinalium, Synodorum, Præsulum auctoritati et Decretis; necnon tot celeberrimarum S. Facultatum doctrinali iudicio, suum in re ad Religionem pertinente, exæquare,

imò et anteponere privatum iudicium, *apertissime* profectò foret insaniæ, vel intollerandæ temeritatis ac præcipitis arrogantiae. Atqui ex dictis, Bulla *Unig.* non ut mera disciplinæ lex, sed ut *dogmatica* definitio, à summis Pontificibus, Cardinalibus, Synodis, Præsulibus, agnita fuit ac declarata: plaudentibus insuper et suffragantibus tum domesticis, tum extraneis Academicis et sacris Facultatibus; ergo. Vel hoc unum momentum invictè adstruit, Bullam *Unig.* non esse *meram disciplinæ legem*, sed veri nominis *dogmaticam* Constitutionem. Vide suprâ propositum ex auctoritate et præscriptione argumentum, quod ad præsens nostrum institutum referri faciliè potest et accommodari.

Probatur 2º, ex scopo, contextu et notis seu qualificationibus quibus in pronuntiato Bullæ configuntur propositiones. Et quidem primò, scopus exprimitur his verbis, quibus S. Pontifex de perniciosâ libri *Reflexionum moralium* doctrinâ loquens sic habet: « Ad ipsam ingruentis mali causam providæ nostræ considerationis intuitum convertentes,..... nihil opportunius aut salubrius præstari à nobis posse arbitrati sumus, quàm si *fallacem libri doctrinam* generatim solummodò à nobis hæcenus indicatam, *pluribus singillatim, ex eo excerptis Propositionibus, distinctius et apertius explicaremus*, atque universis Christi Fidelibus *noxiâ zizaniorum semina* è medio tritici, quo tegebantur, educta, velut ob oculos exponeremus: » Subdit: « Ita nimirum desudatis, et quasi in propatulo positis, non uno quidem, aut altero, *sed plurimis, gravissimisque, tum pridem damnatis, tum etiam novè adimpletis erroribus*, planè confidimus, benedicente Domino, fore ut omnes tandem *APERTÆ JAM MANIFESTÆQUE VERITATI CEDERE COMPELLANTUR.* » En summi Pontificis in ferendâ Bullâ scopus; « fallacem, scilicet, libri *Reflex. moral. doctrinam*, pluribus singillatim ex eo excerptis propositionibus, *distinctius et apertius* explicare » ac configere; atqui Bulla quâ fallax libri doctrina distinctius explicatur ac configitur, nonnisi insulsè diceretur *meræ disciplinæ lex*; ergo.

2º Bullæ contextus non minùs clarè ostendit Constitutionem hanc verè esse dogmaticam; ex ipsâ enim damnatarum Propositionum inspectione cuique manifestum est, illas ad dogmatis substantiam maximè pertinere: agitur siquidem in iis, ut in suâ ad *Benedict. XIII* pro obtinendâ 12 *Articulorum* approbatione Epistolâ, agebat Eminentissimus Noallius, « de ne-

cessitate fidei in Mediatorem Christum; de Christi morte, ac Dei voluntate pro salute omnium hominum; de necessitate, potentiâ ac gratuitâ dispensatione Salvatoris Jesu: quid denique de regulis observandis in administratione Sacramenti Penitentiae sentiendum sit tenendumve. » Quæ quidem omnia summa fidei christianæ capita medullitùs spectare, nemo non videt. 3º Ipsum etiam Bullæ scitum seu iudicatum, notasque et qualificationes ibidem usurpatas, luculenter ostendunt, ad veram disciplinæ aut œconomiae legem, Bullam minimè posse ablegari: « Omnes et singulas Propositiones præinsertas tanquàm *falsas, captiosas, malè sonantes, piarum aurium offensivas, scandalosas, perniciosas, temerarias, Ecclesiæ et ejus praxi injurias*, neque in Ecclesiam solùm, sed et in Potestates seculi *contumeliosas, seditiosas, impias, blasphemias, suspectas de hæresi ac hæresim ipsam sapientes, necnon hæreticis et hæresibus faventes, erroneas, hæresi proximas, pluries damnatas*, ac demùm etiam *hæreticas*, variasque hæreses, et potissimum illas, quæ in famosis Jansenii Propositionibus, et quidem in eo sensu, in quo hæc damnatæ fuerunt, acceptis, continentur, manifestè innovantes, respectivè hæc nostrâ *perpetuò valiturâ* Constitutione declaramus, damnamus, reprobamus. » Tot ac tam graves notæ, inprimis *erroris et hæreseos*, dogmaticam Bullam apertè indignant; neque in meram cautionis et œconomiae legem hujusmodi qualificationes ullatenùs cadere possunt. Sive ergo Bullæ præcæmum spectes, sive contextum ejus, ipsasque damnatas Propositiones; sive denique modum, seu notas sub quibus in iudicato configuntur dictæ Propositiones, nemo inficiari potest, dogmatici Decreti titulum Constitutioni *Unigenit.* propriè esse adscribendum.

Probatur 3º ex genuinis iudicii dogmatici characteribus, qui omnes Constitutioni *Unig.* apprinhè conveniunt. 1º Aliquid credendum proponit: nempe, « nullam esse ex damnatis Propositionibus, quæ non mereatur saltem aliquam è censuræ notis quæ in Bullâ exprimuntur; » et vice versâ, « ex assignatis nullam esse, quæ ad minimum alicui non competat propositioni. » Vide suprâ, hanc in rem Comitiorum 1713 verba. 2º Judicium est prorsus inviolabile: *hæc nostrâ perpetuò valiturâ* Constitutione, inquit Clemens XI, idque ex priori spontè fluit. 3º Judicium est universale ad omnes directum Ecclesias et Fideles; liquet ex ipsâmet Bullæ inscriptione: *Universis Christi*

Fidelibus, etc., necnon ex his iudicati verbis : *Mandantes omnibus utriusque sexus Christi Fidelibus, etc.*

1^o Habet pro objecto, non meras voces, sed perversam Quesnelli doctrinam : hancque in 101 Propositionibus ex *Reflex. moral.* libro excerptis contentam, sub gravissimis censuris damnat ac reprobat. « Omnes et singulas Propositiones præinsertas, inquit S. Pontifex, ex prædicto libro (*Reflex. moral.*) excerptas, tanquam falsas... erroneas, hæresi proximas, pluries damnatas; ac demùm etiam hæreticas... hæc nostrâ perpetuò valiturâ Constitutione declaramus, damnamus, reprobamus. » Quis ita cæcutierit ut vel in hoc uno caractere, naturam iudicii dogmatici non inspiciat? 5^o Iudicii dogmatici veritas propugnari nequit aut impugnari, nisi ad Scripturam, Traditionem, aut ad ea quæ cum iis necessariò connexa sunt recurrendo; atque, discussionis aut præscriptionis viâ, ostendendo Decretum illud prædictis regulis adversari aut consentire : porro qui præfatam Bullam propugnant, nituntur ipsius consensione cum Scripturâ et Traditione : qui verò eam impugnant, ejusdem oppositionem cum immotis hisce fidei nostræ regulis prætendunt : quemadmodùm ex Documentis Pastoralibus, Mandatis, aliisque quampluribus scriptis ex utrâque parte editis, manifestum est : ergo. Quinque ergo characteres qui iudicio assignantur dogmatico illudque constituunt, iidem Constitutioni *Unig.* competunt : ipsa proinde vera est lex dogmatica, verum iudicium dogmaticum.

Probatur 4^o ex disertissimâ ipsorummet insigniorum Appellantium eâ de re consensione. Ita significantioribus verbis ipsemet Appellantium dux ac coryphæus Quesnellus pluribus in locis; quatuor *Episcopi* in suo primæ an. 1717 et iteratæ an 1720 provocationis instrumento : *septem Præsules* Epist. ad Innoc. XIII an. 1721; ita etiam celeberrimi apud Quesnellistas auctores scriptorum quibus tituli : *Renversement de l'Église de France : Réponse au Premier avertissement de M. l'Evêque de Soissons : Du Témoignage de la vérité*; aliique plures, quorum testimonia suprâ latè exscripsimus. Hi autem textus nullo certè effugio, nullâve tergiversatione eludi possunt aut obscurari, adeò clari sunt in rem nostram et aperti. In his totidem verbis asseritur, *per eam*, (*Bullam Unig.*) *primum Symboli de omnipotente Dei voluntate dogma; primum et maximum amoris Dei Mandatum destrui fidem, morum principia, disciplinam labefactari Ecclesiasticæ Hierarchiæ fundamenta,*

sacrosancta Episcoporum jura convelli, sacrosanctum Scripturæ et Traditionis sermonem proscribi totam denique everti ac funditus subruï Religionem. Quæ quidem, uti manifestissimum est, erroneum quidem, at propriè dictum, et veri nominis iudicium dogmaticum clarè significant : neque in meram disciplinæ, politiæ, æconomix, cautionis, legem ac regulam, quæ nihil ad credendum proscribendumve proponit aut exigit, nec perversam Propositionum doctrinam respicit, sed illarum duntaxat usum ad tempus prohibet, ullatenus cadere possunt. Hinc inter Appellantium Magistros percelebris (D. Petit-pied) auctor laudati mox responsi ad primum illustrissimi Suessionensium Episcopi, parte 4, cap. ultimo, n. 4 et seq. ex professo docet ac luculenter probat, Bullam *Unig.* non nisi inscitè ac abusivè spectari posse ut meram disciplinæ, locutionis et æconomix legem : famosi hujus Doctoris verba, cum rem nostram planè conficiant, transcribere juvat.

« La Bulle, inquit citato loco, ne peut jamais être réduite de bonne foi à une simple loi de discipline. Les termes mêmes de la Bulle, et les qualifications que le Pape y emploie dans la censure des 101 Propositions, sont entièrement incompatibles avec l'idée qu'on s'efforcerait en vain d'en donner, comme d'une simple règle de langage. Le Pape y déclare nettement qu'il s'agit de Propositions *hérétiques, impies, blasphématoires, de doctrine artificieuse et fausse, de dogmes dangereux, de maximes séduisantes et contagieuses, d'erreurs pernicieuses, dont les unes sont déjà condamnées, les autres inventées depuis peu.* » Mox addit notanda hæc verba : « Il faudrait avoir perdu l'esprit pour s'exprimer de la sorte, si on n'avait prétendu faire qu'une règle de discipline, et une simple loi de langage. » Infert ibidem : C'est donc éluder la Bulle, et non l'accepter ; c'est l'expliquer de mauvaise foi, contre l'intention du Législateur et contre les termes de la loi ; en un mot, *c'est se moquer du Pape, et non le respecter, que de vouloir, en réduisant la Bulle à une simple loi de discipline, y donner un sens si évidemment contraire à celui que les paroles présentent à l'esprit.* » Pergit : « Joignez à cela toutes les circonstances de l'affaire présente, l'état des disputes qui partagent les Théologiens et des contestations qui troublent l'Église ; le caractère des propositions condamnées, les explications qu'on y donne, les erreurs qu'on prétend être l'objet de la censure du Pape : il est aisé de voir qu'il ne s'agit point simplement de mots, d'expressions, de locutions

dogmatiques; mais du fond même de la doctrine dans des points très-importans. Et quoique les erreurs sur lesquelles, en expliquant la Bulle, on tâche de faire tomber la censure soient pour la plupart des erreurs chimériques que personne ne soutient, cependant cette attention même injuste qu'on a, et la peine ridicule qu'on se donne pour imaginer dans les 101 Propositions des erreurs qui regardent le fond du dogme, font assez voir qu'on ne prétend point faire passer la Bulle pour une simple loi de discipline, mais pour une règle de doctrine. » Paucis interjectis, concludit : « Mais la Bulle sera toujours ce qu'elle est, ce sera toujours un Décret dogmatique, mais un Décret faux et trompeur qui ne peut que conduire à l'erreur quand on le prend dans son sens propre et naturel. » Ita insignis ille Quesnellistarum magister : ubi congestis momentis, ex constitutionis scopo, contextu, naturâ propositionum damnatarum, ipsisque quibus configuntur propositiones qualificationibus; necnon ex statu controversiæ, atque ex variis Appellantium, Acceptantiumve motivis ac expositionibus; paucis quidem, at nervosè demonstrat, non de meris vocibus ac locutionibus moveri controversiam in Bullâ, sed de ipsâmet, et quidem in punctis capitalibus, dogmatis substantiâ : adeoque Bullam hanc verè esse dogmaticam; nec nisi insulsè ac ineptè ad meram disciplinæ et locutionis legem ablegari : « Il faudrait avoir perdu l'esprit, inquit, pour s'exprimer de la sorte (uti Pontifex in Bullâ), si on n'avait prétendu faire qu'une règle de discipline et une simple loi de langage. C'est éluder la Bulle et non l'accepter; c'est se moquer du Pape et non le respecter, que de parler ainsi. » Et rursus : iudicii dogmatici titulum Bullæ invictè asserit idem auctor, ex his S. Pontificis in pronuntiato verbis : « Mandantes omnibus utriusque sexûs Christi fidelibus ne dictis propositionibus sentire, docere, prædicare alter præsumant quàm in hâc eadem nostrâ constitutione continetur; ita ut quicumque, » etc. In quæ Bullæ verba sic habet ibid. n° 5° : « Enfin le Pape défend, vers la fin de sa Bulle, de penser, d'enseigner, de prêcher autrement qu'il n'est porté par la Constitution. Il s'y agit donc de sentimens, d'enseignemens, d'instructions, et, par conséquent, de propositions dogmatiques, et non pas de régler simplement l'usage de certaines expressions Théologiques. » Decretoria sanè hæc probatio : enimverò, lex sentiendi verum est, ex omnibus, dogmaticum decretum : atqui Constitutio Unig. lex est et

regula sentiendi : respicit enim interiores animi sensus, vetatque omnibus Christi fidelibus ne aliter sentire præsumant, quàm in hâc eadem Constitutione continetur; ergò, etc. Percelebris hujusce Appellantis (D. Petit-pied) proluxorem textum exscripsimus; quod scilicet ibi Bullam Unig. verum esse dogmaticum iudicium egregiè statuât ac firmet. Plurimum porrò ad veritatem conducit, vel ipsis adversariorum armis hanc tueri ac munire.

Probatur denique 5°. Tam Bulla Unig. nuncupari potest ac debet lex dogmatica, quàm decreta Concilii Constantiens. adversus Wicleff. et Joan. Hus, Bullæ Leonis X. adversus Lutherum, Pii V. Greg. XIII. Urbani VIII. adversus Baium, Innocentii XI. adversus Molinos. Innocentii XII. adversus librum cui titulus : *Maximes des Saints*, etc. In istis etenim Decretis et Bullis quemadmodum et in Bullâ Unig. plurimæ damnantur propositiones in globo, ut aiunt, sub variis respectivè notis : quin et in Bullâ Innocent. XII non apponitur hæreseos nota, quæ cum aliis qualificationibus in præsentî contra *Reflex. moral.* Bullâ reperitur : atqui fatentibus etiam adversariis, prædicta Concilii Constant. Decreta, nec non Leonis X, Innocent. XI et XII Bullæ, vera sunt dogmatica Ecclesiæ judicia : idque speciatim de Bullis adversus Baium supra dictis argumentis probatum est; ergo. Et verò, quæ ad labefactandam Bullæ naturam, ipsique detractandum iudicii dogmatici titulum ac characterem opponunt adversarii Quesnellistæ, infirma omninò sunt ac nullius roboris; eaque omnia aut nihil aut nimium apertè probant : uti ex objectionum solutione strictim hic jam instituendâ, manifestè patebit; ergo, etc.

Solvuntur Objectiones. — Dices 1° : Illæ censuræ non sunt judicia dogmatica, quæ nihil habent fixum, nihil determinatum : atqui censuræ in globo, quibus sua non figitur unicuique propositioni nota et qualificatio, certum nihil habent; nilque determinatum : quod enim uni captiosum duntaxat erit aut scandalosum, alteri omninò hære ticum videbitur : ergo censuræ in globo, qualis est Bulla Unig. non sunt judicia dogmatica, leges dogmaticæ. Ita inde siuenter Quesnellistæ : in primis Senecensis et Monspeulan. Præsules in plerisque pastoralibus mandatis, nec non sex Episcopi in suâ ad Instruct. Eminentissimi Card. de Bissy an. 1722 respons. cap. 19 et 25. Respondeo 1°, simili prorsus argumento adversus censuras in globo insurrexisse Lutherum in concertatione cum

Eckio habitâ Lipsiæ an. 1519. Apostatam Antonium de Dominis lib. 1 de Republ. Christianâ cap. 12. Frapaolo hist. Concil. Trid. lib. 1, cap. 21, quorum temeritatem pro merito castigant ac egregiè explodunt Eckius et Palavicinus; ille quidem in opusc. disput. 6 Julii: iste verò, in suâ Concilii Trid. historiâ lib. 1, cap. 21. Vide de notis Theolog. ubi integrum Palavicini textum, censurarum in Globo naturam, proprietates et commoda clarè evolvendam, latè deduximus. Respondeo 2º, idem opponi posse adversùs decreta Concilii Constantiensis, necnon adversùs præfatas Leonis X, Innocent. XI et XII Bullas: quæ tamen Concilii et SS. Pontificum Decreta, uti antea notavimus, verà esse dogmatica judicia, nec inficiantur, nec inficari possunt Quesnelli asseclæ. Respondeo 3º: Dist. min. Nihil habent determinatum, quantum ad notarum attributionem quæ singulis propositionibus sigillatim non applicatur, concedo: quantum ad malitiam propositionum quas Ecclesia declarat non esse orthodoxas, nego. Constat ex dictis supra. Atque ut quas adversarii sæpius ac confidentius in præsentî negotio obtrudunt vitiligationes evanescant ac penitus dissipentur, tria in Constitutione Unig. sicut et in quâlibet aliâ generall et in globo censurâ, sunt sedulò distinguenda. Nempe 1º, qualificationes propositionum; 2º, gradum ejusmodi qualificationum; 3º, earumdem applicationem unicuique propositioni. Circa primum, omnes per orbem dispersi Præsules disertè consentiunt cum Romano Pontifice, atque illud unanimiter ac distinctè proponunt Fidelibus tenendum: cunctas scilicet Quesnellianas Propositiones esse rejiciendas, quia eorum nulla gravis alicujus censuræ notam non meretur. Qui ergo contendunt omnes illas Propositiones esse totidem fundamentales religionis Christianæ veritates; vel etiam quotquot dogmata iis contenta, ut verà posse interius retineri, velit's duntaxat ad tempus earum usu, aut modo quo expressæ sunt; ii totius Ecclesiæ de re doctrinali Fideles solemnî definitione instruentis auctoritatem spernunt. Circa secundum, unanimis est etiam Episcoporum suo Capiti adhaerentium definitio: etenim inter varias Quesnelli propositionibus inustas notas, nullam esse, quæ hujusmodi Propositionibus quibusdam non competat, omnes uno ore declarant. Illorum igitur, etiam in hoc capite, documentis interius adhaereant Fideles: Qui vos audit, me audit, Luc. 10. Si quis Ecclesiam non audierit, sit tibi sicut Ethnicus, etc. Matth.

18. Circa duo hæc priora, omnes per orbem dispersos Præsules consentire cum R. Pontifice abundè liquet ex dictis superiori paragrapho; speciatim verò de Gallicanis Episcopis id patet, ex ipsomet Pastoralis Documenti Comitiorum 1713 et 1714 pronuntiato; quod quidem Documentum, suum fecèrè cæteri plerique omnes Gallicani Præsules. Quod ad tertium attinet, nempe qualificationum singularum singulis propositionibus applicationem, nihil de eo vi præcisè definitionis in globo credere tenentur Fideles, quia de eo nihil ejusmodi definitione pronuntiatum: unde, v. g. ut certò cognoscatur quænam quilibet ex 101 Propositionibus nota affici debeat, sola omninò non sufficit Constitutio Unig., sed inspicendum aliundè ac investigandum quænam earum propositionum doctrinæ ab Ecclesiâ ad credendum fide divinâ clarè propositæ, magis aut minùs directè ac immediatè adversetur. Quod Theologorum studio ac diligentia relinquitur, quousque quidquam de eo ab Ecclesiâ fuerit statutum. Quancumque plurimum ad id etiam subsidii ex Bullæ verbis erui possit, quibus declaratur plerasque ex confixis Propositionibus, pluries jam damnatas fuisse variasque hæreses, et potissimum illas, quæ in famosis Jansenii Propositionibus, et quidem eo sensu in quo hæc damnatæ fuerunt acceptis, continentur, manifestè innovare. Jam verò, ut judicium Ecclesiæ meritò appelletur dogmaticum, satis est quòd dogma respiciat, quidquamve de illo interius credendum proponat: certas videlicet propositiones, ut censuris Theologicis dignas ex animo rejiciendas proscribat: quod quidem præstat Constitutio Unig. dum statuit, « nullam esse è 101 propositionibus, quæ non mereatur saltem aliquam è censuræ notis in pronuntiato expressis: » et vice versâ, « nullam esse notam quæ in aliquam è damnatis propositionibus meritò non cadat. » Neque ullatenus necesse est, ut applicationem qualificationum ulterius determinet: quemadmodum ex ipsâ judicii dogmatici naturâ et caracteribus, necnon ex dictis inter probationes, et alibi etiam, præsertim ubi de notis Theologicis clarè liquet; ergo.

Cæterum unum hic diligenter observandum adjiciam: explosas sapissimè Quesnellitarum de judicii in globo tricas, nullum prorsus habere locum, quantum ad illud primum de quo modò agebamus; nempe, quoad qualificationes in se et abstrahendo ab eorumdem diversis gradibus spectatas. Nam ejusmodi objectum, an scilicet centum et una propositiones veræ sint

au faulx ; au censuris quibusdam Theologicis singulæ efficiendæ , et ideo à cunctis Fidelibus rejiciendæ ; illud, inquam, objectum ita fixum est in se et determinatum, ut nihil fixum magis ac determinatum dari possit. Fateantur ergo adversarii, universos per orbem dispersos Episcopos, in eo saltem secum invicem consentire, gravi quâdam Theologicâ censurâ unamquamque Quesnelli propositionem configendam ; ac proindè fixum quidquam ac determinatum, quod intus et ex animo, ut dogma perversum, Fideles rejiciant, esse Constitutione *Unig.* propositum. Quòd si illud primum, quod præcipuum est, ab iis semel admitteretur, aliud ad quod omnes eorum cavillationes spectant, inter varias scilicet qualificationum species in Bullâ enuntiatas nullam dari quæ uni saltem à 101 Propositionibus inuri non debeat, haud difficile etiam concederent. Rem totam præclarè ac luculenter evolvunt et illustrent Gallicani Præsules an. 1728, in suâ celebri ad Regem Epistolâ, in quâ 50 Parisiensium Causidicorum adversus censuras *in globo* diacritates et dictoria sic exhibent : « Ils ont osé dire (les Avocats) sur ces censures (in globo), qu'au lieu de terminer les disputes, elles font naître mille et mille questions. Ils nomment la soumission que l'Eglise exige pour ces sortes de jugemens, un *joug honteux, qui ne présente que ténèbres et que confusion* ; et après avoir rapporté quelques extraits de la Bulle *Unig.* et d'une instruction faite par un d'entre nous sur cette matière, ils disent avec mépris : *Voilà, il faut en convenir, un fidèle bien éclairé.* » Hæc propositæ quam jam solvimus objectioni simillima : quæ quidem pro merito graviter castigant ac explodunt illustriss. Præsules his verbis : « Ce que les Avocats méprisent est cependant un effet de la sagesse de l'Eglise : quand elle en use ainsi, elle évite des discussions qui pourraient faire naître des disputes embarrassantes et nuisibles aux Fidèles ; mais qui est en droit de blâmer sa conduite, d'exiger d'elle qu'elle se prête à l'inquiétude et à la curiosité, et de lui demander de qualifier des propositions en particulier, quand elle juge que ce détail n'est ni nécessaire ni convenable à la conservation du dépôt, et à l'édification des Peuples ? » Quam in rem laudant sancti Augustini verba, Epist. 54 ad Januar. cap. 5, Edit. Benedict. : *C'est une folie et une témérité de disputer contre des usages que toute l'Eglise a consacrés.* Subdunt : « Les décisions du Concile de Constance contre Wicleff et Jean Hus, la Constitution de Pie V contre Baïus, confirmée

par plusieurs Papes, la Bulle contre Molinos, et le Bref contre le livre des *Maximes des Saints* nous fournissent des exemples authentiques de cette dernière espèce de condamnation (*in globo*) : pourquoy reprochera-t-on aujourd'hui au souverain Pontife un usage qui est autorisé par l'exemple d'un Concile œcuménique, et par la pratique de tant de siècles ? Oserait-on dire sur ces jugemens : *Voilà un fidèle bien éclairé ?* » Moxque egregium doctissimi Bossuetii textum è libro 15 Variat. n. 158, depromptum, ita referunt : « *Il faut souvent*, disait M. Bossuet, *s'en tenir à des expressions générales pour demeurer dans cette mesure de sagesse tant louée par S. Paul, et n'être pas contre son précepte, plus savant qu'il ne faut.* » Pergunt : « *Il faut* (idem doctissimus Bossuet. ibid. n. 162) *se bien garder de confondre les termes généraux avec les termes vagues et enveloppés, et avec les termes ambigus : les termes vagues ne signifient rien, les termes ambigus signifient avec équivoque, et ne laissent dans l'esprit aucun sens précis ; les termes enveloppés brouillent les idées différentes : mais quoique les termes généraux ne portent pas l'évidence jusqu'à la dernière précision, ils sont clairs néanmoins jusqu'à un certain degré.* » Unde in hunc modum concludunt eodem in loco præfati Præsules illustrissimi : « Ainsi M. Bossuet répondait-il aux plaintes des Hérétiques contre les décisions du Concile de Trente, qu'ils accusaient d'être obscures et ambiguës, parce qu'elles étaient conçues en des termes généraux : Nous sommes en droit de donner la même réponse au reproche qu'on fait aujourd'hui contre la censure générale et les qualifications respectives employées par la bulle, et de dire : Ce jugement n'est ni vague, ni ambigu, ni équivoque ; s'il ne porte pas l'évidence jusqu'à la dernière précision, c'est-à-dire, s'il ne déclare pas en détail quelle est la proposition qui est hérétique, quelle est celle qui est blasphématoire, etc., *cé jugement néanmoins est clair jusqu'à un certain degré, c'est-à-dire, il nous apprend clairement qu'il n'y a aucune des propositions condamnées qui ne soit répréhensible.* » Et paulò post : « Ces sortes de jugemens usités dans l'Eglise, comme on l'a vu, *présentent clairement et distinctement une vérité déterminée*, en tant qu'ils assurent les Fidèles que les propositions condamnées sont dangereuses dans la foi, qu'elles renferment quelque venin, qu'elles s'écartent en quelque chose de la vérité catholique. » Persimilia tradunt Præsules Gallicani in Comitibus an. 1715 et 1714. Vide suprâ. Hæc preemtorla sanè ad vindicandam

inconcussam censurarum *in globo* æquitatem : simulque demonstrandum , hujusmodi censuris , *clarè ac distinctè* exhiberi *fixam* quandam ac *determinatam* veritatem ; scilicet , *nullam esse è damnatis Propositionibus , quæ aliquà ex parte vitiosa non sit et reprehensibilis* ; quæque idcirco *Theologicam* quandam notam non mereatur ; hoc autem semel concesso , spontè fluit , ut antea notavimus , nulloque negotio demonstrari potest , nullam esse in Bullâ notam quæ in aliquam è confixis Propositionibus meritò non cadat . Ex dicendis paulò post ista iterùm dilucidabuntur .

Dices 2^o : Ille modus damnandi propositiones non est legitimus , multòque minùs dogmaticus , finiendisque controversiis idoneus , per quem nec constat , nec constare potest de censurâ confixarum propositionum : atqui per generalem hunc modum damnandi propositiones *in globo* , uti fit in Constitutione *Uniq.* nec constat , nec constare potest de confixarum propositionum censurâ : enimverò , de eo constare nequit , quin certò sciatur Episcopos , non *materialiter* duntaxat et quoad meras voces , sed etiam *formaliter* seu quoad proprium ac genuinum sensum , circa Propositionum damnationem consensisse : atqui per generalem et *in globo* Propositionum condemnationem , certò constare nequit de Episcoporum consensu , non in verbis tantùm , sed et in sensu ipsius censuræ : Episcopi siquidem non solùm in verbis , sed et in sensu consentire non possunt , quin eandem propositionem , eandem in propositione doctrinam , iisdem intendant qualificationibus et notis configere : atqui per censuram *in globo* , de iis minimè constare potest ; ergo . Et verò una propositio non est hæretica (idem proportionem servatâ de cæteris dicendum notis) nisi quia de illius hæreticitate convenit major ac potior Episcoporum pars : atqui constare non potest utrùm major ac potior Episcoporum pars consentiat in damnatione alicujus propositionis ut hæreticæ : illud enim innotescere nequit , nisi per eorum verba : at verba indicant tantùm eos consentire circa damnationem Propositionum generatim , non verò circa uniuscujusque propositionis damnationem in particulari ; ergo . Verbo dixerim : Ubi agitur de censurâ *in globo* , constare nequit de *gradu* qualificationis , nisi itidem constet de ejusdem applicatione huic aut alteri propositioni : Episcopi namque dùm plures *in globo* propositiones *respectivè* damnant , alias ut captiosas , alias ut erroneas , alias ut hæreticas , etc. , in genuino censuræ objecto con-

sentire debent , ac proindè easdem propositiones , eundemque in iis sensum , iisdem notis qualificare : atqui ex dictis , idque ex sese patet , vi censurarum *in globo* , de qualificationum singularum singulis propositionibus nullatenus constat : unde nihil de eo credere tenentur Fideles ; ergo , etc.

En palmaris difficultas quam sexcentis modis volvunt ac versant adversarii . Ita in primis sex Præsules in citatâ ad Eminentiss. Card. de Bissy Responsione . Ita pariter Senecensis Episcopus Instructione 1728 , part. 4 , art. 4 et seqq. : *Mémoire où l'on examine si l'appel des 4 Evêques est légitime* , pag. 87 ; *Renversement des libertés de l'Eglise Gallic.* Tom. 1 , pag. 471 et seq. aliique è celebrioribus Appellantibus quàmplures .

Respondeo 1^o , datas ad superiorem objectionem solutiones , ad præsentem facillè accommodari posse difficultatem : hancque , ut attendenti patebit , apertè enodant , penitusque dissolvunt : consule . Respondeo 2^o : Quæ hic opponuntur ex necessariâ inter Episcopos in judiciis canonicis *formali* seu *quoad genuinum definitionis sensum* uniformitate de quâ , juxta adversarios , constare non potest , ubi agitur de censuris *in globo* : hæc , inquam , aut nihil probant , aut dispersæ Ecclesiæ infallibilitatem fundit us evertent . Namque non aliundè constat dispersos Episcopos dogmatico judicio uniformiter quoad eundem sensum eandemque doctrinam adhærere , quàm quòd purè et simpliciter illud acceptent : atqui eadem ratione generalis et *in globo* censura ab eisdem acceptari potest : et reipsâ ita acceptatæ fuerunt Bullæ Leonis X adversus Lutherum , SS. Pontificum Pii V , Greg. XIII , Urbani VIII , adversus Baium , Innocent. XI et XII , adversus Molinos . et librum *de placitis Sanctorum* ; quæ Bullæ sunt generales duntaxat et *in globo* censuræ ; ergo . Ita in Comitiiis an. 1728 , Gallicani Præsules in suo circa Parisiensium Causidicorum consultationem dogmatico judicio Vide supra . Respondeo 3^o : Episcopi , dùm plures *in globo* propositiones *respectivè* proscribunt , in eo certissimè conveniunt , singulas propositiones damnatas reprehensibiles esse ac vitiosas , atque à catholicâ veritate plus minùsve recedere . Idque abundè sufficit , ut quilibet Catholicus dictas propositiones proscriptas intus et ex animo explodere ac rejicere teneatur . Ita conceptis verbis laudati Præsules Comitiorum an. 1728 , in suâ ad Regem Epist. pag. 35 , ubi de judiciis *in globo* sic habent : « S'ils ne

portent pas l'évidence jusqu'à la dernière précision, c'est-à-dire, s'ils ne déclarent pas en détail quelle est la proposition qui est hérétique, quelle est celle qui est blasphématoire, etc., *ce jugement néanmoins est clair jusqu'à un certain degré, c'est-à-dire, ils nous apprennent clairement qu'il n'y a aucune des propositions condamnées, qui ne soit répréhensible....* Ces jugemens présentent clairement et distinctement une vérité déterminée, en tant qu'ils assurent les Fidèles que les Propositions condamnées sont dangereuses dans la foi, qu'elles renferment quelque venin, qu'elles s'écartent en quelque chose de la vérité catholique. » Addunt ibidem : « Cette lumière est suffisante pour le Chrétien qui est docile : quod disertissimo sancti Aug. textu ex cap. 88 lib. de hæres. deprompto, sic comprobant doctiss. Præsules : « C'est la pensée de S. Augustin ; c'est beaucoup pour un cœur fidèle, disait ce S. Docteur, de connaître ce qu'il ne doit pas croire, et quoique ces connaissances ne le mettent pas en état de pouvoir réfuter l'erreur, il est assez instruit, quand il sait ce que l'Eglise rejette, et ce que tout Catholique doit rejeter avec elle » : Pergunt : « C'est là ce que fait l'Eglise, quand elle censure plusieurs propositions sous des qualifications respectives ; elle indique au Fidèle ce qu'il doit rejeter pour éviter l'erreur. Pénétrer plus avant avec curiosité ; demander aux Pasteurs, qui ont prononcé que ces Propositions sont condamnables, qu'ils aillent plus loin, et qu'ils déclarent en quoi, jusqu'où et pourquoi ils les jugent répréhensibles, c'est une demande superflue, pour nous servir de l'expression de S. Augustin, parce qu'il suffit qu'on sache que l'Eglise les a condamnées, et qu'après cette condamnation personne ne doit les admettre. » Hæc Præsules illustrissimi, quæ sinuosos adversariorum hanc in rem flexus, implexosque nodos clarè extricant, totamque præsentem difficultatem planè exhauriunt. Reole dicta ad tertiam responsionem superioris objectionis. Respondeo 4^o : In præfatâ hypothési censuræ in globo latæ aut acceptatæ ab Episcopis, temerè ab adversariis asseri, Episcopos à se invicem dissentire, nec easdem propositiones intendere interius iisdem qualificare censuris. Neque enim impossibile est, ut, quantum opus est, inter se consentiant : cum propositionum natura, earum veritas et falsitas, Scripturæ et Traditioni conformitas vel difformitas, antecederet ad Constitutionem latam determinatæ sint, atque horum omnium cognoscendi via una et eadem

cunctis præstò sit Episcopis, nempe ejusmodi propositionum cum Scripturâ et Traditione, Ecclesiæque definitionibus antea promulgatis accurata collatio. Hæc viâ usunt plures Theologi à quibus uniuscujusque hujusmodi propositionum virus proditum est, et censura singulis affixa : si quantum ad rem ipsam, etsi non communicatis consiliis, non deprehensi sunt dissentire. Quidni ergo Episcopis eadem viâ diceretur interclusa ? Quòd si is Episcoporum in qualificandis propositionibus possibilis interior consensus, reipsaque ejusmodi consensus in Theologis existat, ac sæpè aliis in casibus extiterit ex solâ propositionum cum Scripturis et Ecclesiæ definitionibus collatione : quantum magis dicendum in præsentî causâ, quantum satis est, inter se intus consentire Episcopos, præsertim si attendantur, uti maximè attendi debent, divina Ecclesiæ privilegia, eximique promissâ ipsi à Christo facta ? Unimverò, ipso met pollicite Christo, Joan. 14 et 16, Episcopi à Spiritu S. edocendi sunt omnem veritatem : ipsisque docentibus primis Pastoribus, affuturum se promisit Christus Dominus, Matth. 28, v. 20. Porrò, cum plures in globo propositiones proscribunt Episcopi, procul dubio docent, ut ex dictis inter probationes patet ; ipsis ergo tunc adest et subvenit Christus : proindeque, quin easdem interius, quantum necesse est, singulis propositionibus qualificationes et notas affligant, nonnisi inconsultè ac temerè negari potest. Respondeo 5^o : Etsi diversæ illæ earundem propositionum qualificationes in mente Episcoporum delitescerent aliquatenus à se invicem discrepant, attamen nihil inde vitii accederet eorum definitioni, intactaque maneret Ecclesiæ docentis auctoritas et infallibilitas. Modò enim Episcopi, quos Pastores et Doctores Christus dedit Ecclesiæ, invigilent conservationi depositi ; nosque quantum satis est edoceant, ut non simus sicut parvuli fluctuantes, et circumferamur omni vento doctrinæ, salvæ profectò remanent Ecclesiæ auctoritas et infallibilitas : atqui, dum Episcopi plures in globo respectivè proscribunt propositiones, licèt qualificationes quibus singulas interius afficiunt, possent esse quadamtenus diversæ, invigilant tamen, quantum satis est conservationi depositi, nosque sufficienter edocent ; ergo. Et quidem illibatum, integrumque servatur fidei depositum : siquidem in eo tunc consentiunt omnes, quòd « in quemcumque ordinem redegeris Propositiones illas in globo respectivè damnatas, non possint dici christianissimæ et

evangelicæ : Ideoque à quolibet bono Christiano pro condemnatis et reprobatis habendas esse. » Ita doctiss. Eekius disput. 6 Julii adversus Luther.

Etverò, ex diversis illis earumdem Propositionum qualificationibus in mentibus Episcoporum delitescenibus, nihil commodi pro partibus Hæreticorum accidere potest. Quippe ad conservationem depositi, requiritur et sufficit ut *devitentur profanæ vocum novitates, et oppositiones falsi nominis scientiæ*, I ad Timoth. 6, v. 20. Atqui per censuram propositionum in globo, devitantur *profanæ vocum novitates, et oppositiones falsi nominis scientiæ*, quamvis interius Episcopi diversas iisdem propositionibus applicent qualificationes. Tunc enim vi censuræ constat damnatas propositiones *verè reprehensibiles esse*, atque à *veritate catholicâ* quadamtenus recedere; uti loquuntur supra laudati Comitiorum anni 1728 Præsules; ergo. Aliundè, in proposito casu, sufficienter nos edocent Episcopi *ut non simus sicut parvuli fluctuantes et circumferamur omni vento doctrinæ*: cognoscimus enim, uti scienter notat Palavicin. lib. 3 Hist. Trid. cap. 21, omnes illas in globo proscriptas Propositiones, *periculosas esse, si tradantur; periculosas, si credantur*. Cognoscimus inter damnatas Propositiones, *nullam esse quæ non mereatur aliquam saltem è censuræ notis quibus proscribuntur*: et vice versâ, *nullam esse in Decreto censuræ notam quæ non possit in aliquam è damnatis Propositionibus cadere*, quemadmodum totidem verbis tradunt Galliani Præsules, locis supra laudatis: idque satis est, non modò simplicibus et rudioribus Fidelibus, sed etiam, juxta Concilium Constantiense, ipsismet hominibus litteratis; ergo. Respondeo denique 6^o, hocque uno: Brevi præcidentur propositus nodus cæteræque in præsentī negotio reluctantium triæ, ut legitimum sit et dogmaticum Ecclesiæ judicium, auctoritatemque obligandi Fideles ad assensum internum obtineat; vel requiritur ut Episcopi eandem propositionem iisdem intendant qualificationibus et notis configere; vel non: si primum, vi exterioris acceptationis certò tenendum in colligendis iisdem cuilibet propositioni qualificationibus ipsos, *quantum satis est*, consentire; etenim ex abundè dictis et probatis supra, exterior Corporis Episcopalis acceptatio aut definitio, *ex sese* certissima est à Christo constituta lex ac regula ad nostram de rebus ad salutem attinentibus, firmandam stabiliendamque fidem; atque ubi primum de illâ exteriori acce-

ptione constat, certò et indubitanter tenendum, omnes adfuisse debitas conditiones; adeoque, si quæ abfuerit, aut nullatenus, aut his in circumstantiis non fuisse necessariam. Ita disertis verbis Præsules nostri in laudatâ an. 1728 ad Regem Epistolâ pag. 21, 22, etc. Vide supra. Porro, si secundum, nulla planè, ac prorsus præpostera objectio.

Corollaria. — Ex dictis hactenus tribus superioribus paragraphis, nonnulla gravissimi momenti spontè fluunt consecutaria: hæc porro ita secum invicem connexa sunt ac concatenata, ut uno semel admissio, cætera quoque admitti prorsus necesse sit: quod vel tahtisper attendenti clarè patebit: itaque

Sequitur 1^o, quod totidem verbis statuunt mox laudati Præsules, Bullam *Unig.* esse *judicium irreformabile*. Namque dogmaticum Corporis Episcop. Capiti suo adhærentis judicium est infallibile, proindeque *immutabile, irretractabile, irreformabile*: id ex apertis Christi promissis, ex disertissimis SS. PP. et Conciliorum testimoniis, ac perpetuâ et constantissimâ totius Ecclesiæ praxi ac doctrinâ certissimum est ac indubitatum: atqui ex dictis et probatis hactenus, Bulla *Unig.* dogmaticum est summî Pontificis et omnium Ecclesiæ universæ Episcoporum judicium; ergo. Ita expressè habent Cardin. Archiep. et Episcopi Galliæ. an. 1728, jussu regio super hac rê congregati in Epist. ad Regem p. 50.

Sequitur 2^o, *interiorem, integrum et absolutum* eidem Bullæ deberi assensum: omnibus siquidem adversus Sectarios confitentibus Orthodoxis, assensus hujusmodi *interiôr, integer et absolutus* debetur *dogmatico et irreformabili* universalis Ecclesiæ judicio: atqui Bulla *Unig.* dogmaticum est et irreformabile, etc.; ergo. Quicumque ergo omnes aut quasdam è damnatis Propositionibus intus et ex animo non respuit, legitimè, et ut par est, dictæ Constitutioni non adhæret. Et verò sincerè et ex animo obtemperandum visibili Pastorum Corpori, in his quæ ad doctrinam pertinent: hinc ipsemet Quesnellus in caput 23 S. Matth. sic loquitur: « La seule voie sûre pour la foi et la doctrine, c'est de suivre toujours le Corps visible des Pasteurs. » Et in caput 20 S. Joan.: « Il n'y a point de salut, à moins de se tenir inséparablement attaché au Corps des Pasteurs de l'Eglise. » Istud idem pro certissimo passim statuit Nicolius, quando ait in controversiis circa religionem excitatis majori adherendum esse visibili auctoritati: « La vraie règle de la foi,

inquit Ess. de morale Evang. du Mardi de la deuxième semaine de Carême, *c'est de s'arrêter à la plus grande autorité.* » Multò autem et incomparabiliter major est Episcoporum acceptantium, et adhærendum Constitutioni pronuntiantium auctoritas; tique Capiti suo Pontifici Romano coadunati, visibile Pastorum Corpus præcui dubio constituunt; ergo.

Sequitur III^o, omnem à Constitutione *Unig.* provocationem esse nullam, illusoriam, temerariam, scandalosam, sanctæ Sedi, Corpori Pastorum, totique Ecclesiæ adversam, ac summe injuriosam, etc. Ità cōceptis verbis quinquaginta et amplius Præsules Gallicani an. 1718, uniformi Mandato declarant: « Ordonnons, inquit in ipso judicato, à tous les Fidèles de notre Diocèse de se soumettre à la susdite Constitution *Unig.* comme étant un jugement dogmatique de l'Eglise universelle, duquel tout appel est nul, frivole, illusoire, téméraire, scandaleux, injurieux au Saint-Siège et au Corps des Evêques, contraire à l'autorité de l'Eglise, schismatique, et tendant à renouveler et à fomenter des erreurs condamnées. » Gravissimas hæc notas, appellationi interpositæ à dogmatica et irreformabili totius Ecclesiæ Constitutione, qualis est ex dictis Bulla *Unig.* meritissimo jure intelligi, nemo sanè in dubium revocaverit.

Sequitur IV^o, eandem *Unig.* Bullam esse veram Ecclesiæ et Regni legem: ita à præsulis Gallicanis in pluribus Comitibus generalibus solemniter declaratum, variisque Edictis ac Responsis Regiis disertissime agnitum et firmatum. De quo aperta vide testimonia suprâ. Etverò, dogmaticum universalis Ecclesiæ judicium, 1^o, munitum sigillo Regio, 2^o, in Tabulas supremarum Regni Curiarum relatum, 3^o, solemniter et juxta consuetos Regni mores promulgatum, merito dicendum est, reipsaque existit verâ ac propriè dicta Ecclesiæ et Regni lex: atqui Bulla *Unig.* ex probatis duobus superioribus paragraphis dogmaticum est universalis Ecclesiæ Judicium: aliunde, munita fuit ac consignata sigillo regio, in supremas Regni Curias relata; solemniter et ex more promulgata; uti ex dictis in Synopsi historica paragrapho 3 manifestum est ac exploratum: vide suprâ; ergo, etc.

Sequitur V^o, hanc, uti jam innuimus, questionem, an Constitutio *Unig.* sit regula fidei, leviolem esse apud Acceptantes, et quasi de inero nomine controversiam: quo quidem in prætenso dissidio quoddam provocationi suæ præsidium inaniter quærunt Appellantes. Nam-

que concordibus animis fatentur ac docent cuncti Acceptantes Constitutione *Unig.* respici dogma, atque, quod capitale est, interiùs credendum Quesnellianas 101 Propositiones merito esse damnatas, quia singulæ aliquam merentur notam, et præterea unamquamque è notis Bullæ expressis cadere in aliquam è damnatis illis Propositionibus: omnes etiam consentiunt Bullæ *Unig.* nihil determinati fide divinâ credendum proponi. Tota igitur apud eos mota quæstio in eo sita videtur, an regula fidei appellari possit omne judicium quo de rebus fidei aut ad fidem habentibus connexionem, etiam merè generatim ac indeterminatè interior præscribitur assensus: an verò illud idem vocabulum soli illi potius adscribendum sit judicio quo dogma revelatum, fide divinâ speciatim ac determinatè credendum proponitur. Ergo non tam de re ipsâ quàm de nomine extitit illa quæstio, nec in eâ quidquam occurrat quo tueri se possint dissidentes, cum ab ipsis unum et idem omnes semper postulaverint Acceptantes; nimirum ut interiùs et ex animo sese subicerent Constitutioni *Unig.* tanquam dogmatico Ecclesiæ universalis judicio, atque 101 Propositiones ut merito illâ Constitutione proscriptas damarent, iisdem qualificationibus adhibitis, quibus dicta Constitutio utitur. Hæc porrò eadem de ipsâ regula fidei denominatione quæstio. Acceptantes inter et Appellantes spectata, jam non meri nominis dicenda, imò dogmatica planè est ac gravissimi momenti controversia: neque enim aliâ de causâ Bullæ *Unig.* nomen regulæ fidei detrectant adversarii, quàm quòd Bullam hanc negent esse judicium dogmaticum quod internum et absolutum exigat mentis assensum: ipsi siquidem promiscuè sumunt, et pro uno eodemque habent regulam fidei, et dogmaticum ac irreformabile universalis Ecclesiæ judicium: id ipsum non fatentur modò, sed et datâ operâ passim adstruere conantur Appellantes, inprimis sex Præsules citatâ ad Instructionem Eminentissimi Card. de Bissy. Respons. Auctor Pastoralis Documenti an. 1719, Eminentiss. Noallii, primâ Propositione pag. 13, 14, etc. Adèquè eo ipso quo à prædictâ Bullâ titulum regulæ fidei remouent, eandem judicium esse dogmaticum inficari censendi sunt. Ità scitè notat ac sæpius laudatâ an. 1722 Pastoralî Instruct. part. 4, pag. 344, 345, etc. Ibid. perversam eâ de re dissidentium doctrinam pluribus perstringit ac confutat doctiss. Card. Idem graviter ac

dilucidè evolvunt ac explodunt plerique Galliani Præsules, suis ad Regem an. 1728, et 34 Epistolis.

Sequitur VI^o, illicitum esse statum indifferentiæ et indeterminationis circa præfatam Constitutionem intus et ex animo suscipiendam : quippè de suscipiendo iudicio Ecclesiæ universalis dogmatico et irreformabili nemini unquam cunctari ac mores gerere fas fuerit : atqui ex superioribus Corollariis et ex demonstratis paragraphis 2 et 3, Constitutio *Unig.* iudicium esse universalis Ecclesiæ dogmaticum, etc. ; ergo.

Elterò, *natura, multitudo, diversitas* dogmatum de quibus agitur in dictà Constitutione, apertè ostendunt illicitum prorsus esse ac criminisum in præsentì negotio hunc indifferentiæ ac suspensionis animum : etenim, vel ipsis met contententibus adversariis, quæstio movetur de summis fidei, morum, ac christianæ disciplinæ capitibus, quæ, si dissidentibus fides, præfato Decreto labefactantur ac funditus convelluntur : eò tendunt illustriorum Appellantium indesinentes in Bullam *Unig.* querelæ et expostulationes : « atque ita, *sanctissime Pater*, inquit in suâ an. 1721 ad Innocent. Papam XIII Epistolâ septem Præsules, impugnata apertè religio in suis dogmatibus ; Hierarchia in suis iuribus ; Christianorum disciplina in eo quo tanquam basi et animâ nititur ; deletæ funditus pœnitentiæ leges et regulæ ; veteris et novi fœderis inducta confusio in eo capite, quo præsertim à se invicem distinguuntur ; omnipotentia Dei subjecta libero hominis arbitrio, et ad ejus notum suspensa ; complures alii doctrinæ Christianæ articuli in summum discrimen adducti, sacer Scripturæ et Traditionis sermo proscriptus : en *sanctissime Pater*, quæ sit nostrarum (in Bullam) et causa et materies querelarum. » Paria tradunt sæpius citati sex Episcopi, suâ ad Pastoralem Eminentissimi Cardinalis de Bissy Instructionem Responsione, cap. 26 et seqq., item quatuor Episcopi in interpositis à se appellationum instrumentis die 4 Martii 1717, et mense April. anni 1719, necnon in proluxiori ad vindicandas hasce provocationes, tunc edito Memoriali. His porrò in circumstantiis, in quibus de tot ac adeò capitalibus fidei dogmatibus instituitur controversia, manifestissimum est nemini liberum esse orthodoxo, suspensum se servare ac prorsus indifferentem : inprimis si sanctæ sedis præverit iudicium, cui, ut in præsentì causâ, consensus Episcoporum accesserit. Tunc profectò, aut

certè nusquam, locum habet illud Christi Luc. 11, v. 25 : *Qui non est mecum contra me est.* Idipsum non minùs perspicuè declarant gravissimæ dissidentium adversùs neutralitatis partes intentæ sæpius criminationes : « La neutralité, inquit unus ex illis, auctor Epistolæ ad Monialium gubernatricem pag. 80, et 81, est un crime, et ne point prendre parti pour la foi dans l'occasion présente, c'est être infidèle. Un Chrétien dès son baptême a pris parti contre la Constitution ; il en a appelé sur les sacrés fonts, et il renouvelle son appel toutes les fois qu'il recite son *Credo*. Dire qu'on ne prend point de parti, c'est renoncer à la foi. » Idem frequenter inculcant plerique alii Quesnellianarum partium auctores : idque ex principiis ab ipsis passim stabilitis sponte fluit ac necessariò sequitur. Vide supr. dicta et mox pag. 139. tertio ubi de naturâ Constitutionis *Unig.* inter probationes.

Sequitur denique VII^o, istudque capitale est, diligenterque observandum : Quæcumque adversùs Constitutionem *Unig.* congeruntur probra, tricæ, vitiligationes, tum ex prætenso in ferendâ aut acceptandâ hæc Constitutione *conditionum defectu* ; tum ex prætensâ damnatarum propositionum *cum Scripturis et traditione consonantiâ* : tum ex prætensis dissidentium *numero, doctrinâ, motibus et dictamine conscientiæ, sanctitate, miraculis, etc.* ; ea, inquam, omnia, vel unâ Ecclesiæ, sex primorum pastorum suo capiti adhærentium auctoritate, exteriorique acceptance, quâ recepta et confirmata fuit dicta Constitutio, evanescent ac dissipantur. *Ecce ego vobiscum sum omnibus diebus usque ad consummationem seculi*, inquit Christus Dominus Matth. 28, alloquens Apostolos, eorumque successores Episcopos. Ibid. 16, v. 18 : *Portæ inferi non prævalebunt adversus eam.* Luc. 10, v. 16 : *Qui vos audit, me audit, etc.* Perpetua sunt et absoluta isthæc divina promissa : « Nusquam ergo, quemadmodum egregiè notant præsules Gallicani supra laudati, tanta invalescet pestis, seu vi, seu negligentia, seu fraude, seu quâcumque aliâ ratione, ut portæ inferi adversùs Ecclesiam, eaque, quæ ab Episcopali ordine sancita fuerint, prævaleant. » Æternùm stabunt Christi verba ; cætera quæ opponuntur, præteribunt et ad nihilum recedent. Itaque, quodcumque supponatur fuisse definitionis motivum (idem de cæteris definitionum conditionibus, aliisque quæ obijciuntur, pronuntiantur) fieri nunquam potest, vi promissionum

Christi, ut Corpus episcopale erroneam acceptet et approbet sententiam; ergo *definitionis litteræ*, seu *ipsi*, independentes à discussionem motivorum, *exteriori definitioni*, quæ sola subsistit ac vim habet, *standum est*, ac supponendum providisse Christum, ne ulla deesset ex requisitis conditio, ad firmam, certam, et inconcussam definitionem. Ita totidem fermè verbis, *acta S. Facultatis Parisiensis, super Constitutione observandâ et executioni demandandâ*, an. 1729, pag. 40. Atque hæc quidem auctoritatis et præscriptionis methodus, ad cunctas Quesnellistarum dissolvendas objectiones, via brevis, expedita, ipsis etiam rudioribus proportionata: hocque unum, omnibus, quas cum dissidentibus habemus dirimendis ac finiendis controversiis sufficere deberet. Eò tendit S. Hier. disputans adversus Luciferianos: « Poteram, inquiebat, omnes propositionum rivulos uno Ecclesiæ (definientis) sole siccare. » Ipseque S. Augustinus lib. de quant. animæ cap. 7, n. 1: « auctoritati credere, magnum compendium est, ac nullus labor. » Unde appositè omninò doctiss. Bossuet. Instruct. 1, circa Ecclesiæ promissa sic habet: « Les promesses dont il s'agit sont conques, comme on a vu, en termes simples et très clairs. On doit donc se déterminer à y croire: et cette croyance enferme une claire décision de toutes les controverses. Car si une fois il est certain que la vérité domine toujours dans l'Eglise, tous les doutes sont résolus: il n'y a qu'à croire, et tout est certain. » Ibid. pag. 176: « Jésus-Christ a tout réduit à un seul point, c'est-à-dire à bien connaître l'Eglise où l'on trouve tout d'un coup toute vérité autant qu'il est nécessaire pour être sauvé. Tout consiste à bien concevoir six lignes de l'Evangile où J.-C. a promis en termes simples, précis et aussi clairs que le soleil, d'être toujours avec les Pasteurs de son Eglise jusqu'à la fin des siècles. Il n'y a point là d'examen pénible à l'esprit humain. » Et rursus secundâ de eod. argumento instructione, pag. 12 et seqq.: « La sagesse de J.-C. a renfermé en six lignes de quoi trancher tous les doutes, et régler la décision de toutes les controverses, par un principe commun et universel. » Quæ quidem illustrissimi Præsulis doctrina ad nostrum præsens institutum apprime congruit. Habemus siquidem in unâ primorum Pastorum suo Capiti adhærentium auctoritate, quâ recepta et confirmata fuit Constitutio *Unig.* quasi contractam compendio, sed promptam, facilem,

ac planè decretoriam, adversus omnes dissidentium difficultates, solutionem. Vide plura hanc in rem superiori paragraph.

ARTICULUS III.

De systemate Quesnelliano.

Quem in Bati et Jansenii aperiendo systemate secuti sumus ordinem, eundem in Quesnelliani systematis expositione consecrari animus fuerat: nempe 1^o, *systematis principia paulo accuratius evolvere*; 2^o, *de illius disserere consecrariis*, seu, *de 401 propositionibus*; 3^o tandem *Quesnellianâ systematis à cæteris catholicarum scholarum systematibus discrimina*, ipsiusque *omnimodam cum Baianis et Jansenianis placitis consensionem*, aperire ac declarare: verùm premente nimîa jam hujus voluminis mole, in opportunum magis locum et tempus horum uberior revocabitur disputatio. Interim hæc summatim perstringere, eorumque omnium compendiosam exhibere ideam, abs re non erit, nec fortè inutile: *plerisque enim hæresibus usu venit*, quemadmodum scitè notant SS. Patres, *ut eas exposuisse quodammodo refutasse sit.*

Principia sytematis Quesnelliani. — Tria sunt præcipua ac capitalia Quesnelliani systematis principia. Primum: Duplex in præsentî naturæ lapsæ statu agnoscenda delectatio indeliberata: una cœlestis, quæ ad bonum; altera terrena, quæ ad malum inclinât et trahit. Utraque unicū est pondus, quo voluntas nunc, sive ad bonum, sive ad malum inclinatur. Utraque quasi ex mechanicâ lege voluntatem movet ac rapit, sive ad bonum sive ad malum, prout cœlestis vel terrena præponderat. Utraque proindè, prout gradibus superior est aut inferior, necessariò *relative*, seu necessitate *relativâ* victrix est aut victa. En famosum duarum delectationum indeliberatarum principium, quod ex Jansenio depromptum centies in suis *memorialibus* et *apologeticis* scriptis obtrudit Quesnellus, inconsultè omninò ac præposterè usurpando celeberrima sancti Aug. verba: *Quod enim amplius nos delectat, secundum id operemur necesse est.* Hoc utriusque indeliberatæ ac relative victricis delectationis principio, veluti præcipuo cardine integrum movetur ac volvitur Quesnellianum proinde ac Jansenianum systema. De duabus indeliberatis delectationibus oppositis, vide plura superius et mox ubi de consecrariis Quesnelliani systematis.

Secundum: nullus datur (nec quoad habitum, nec quoad actum) amor medius, *viciosam cupi-*

ditatem inter et laudabilem ac supernaturalem charitatem, quâ Deus *gratis* et *propter se* diligitur. Hinc absque aliquali charitatis saltem *actualis imperfectæ et initialis* influxu, quælibet actio vitiosa est et culpabilis, non *in subjecto dumtaxat* et *ratione omissionis* ulterioris, scilicet relationis ad Deum; sed etiam *in se intrinsecè* et *ratione sui*: tunc enim actio illa non nisi ex vitiosa cupiditate procedit, ad vitiosam cupiditatem tendit et ordinatur: adeoque ex parte principii et finis, necnon *in se et in propriâ substantiâ*, damnabilis est et peccaminosa. Istud est capitale alterum Quesnelliani systematis principium, variis in libris et propositionibus creberrimè ac expressissimè à Quesnello inculcatum: imprimis inter 401 à Clemente XI damnatas proposit. 44, his verbis: « Non sunt nisi duo amores, unde volitiones et actiones omnes nostræ nascuntur; amor Dei, qui omnia agit propter Deum, quemque Deus remuneratur; et amor quo nos ipsos, ac mundum diligimus, qui, quod ad Deum referendum est, non refert, et propter hoc ipsum fit malus. » Fundamentale istud placitum ex suis antecessoribus ac magistris Baio et Jansenio hausit Quesnellus: « Omnis amor creaturæ rationalis, inquit 38 damnata Baii Propositio, aut vitiosa est cupiditas, aut laudabilis illa charitas, quâ per Spiritum sanctum diffusâ, Deus amatur. »

Eandem doctrinam in ipsis S. Augustini operibus fundatissimam esse audacter pronuntiat Jansenius lib. de Grat. Christi cap. 6: « Non enim, inquit, agnoscit sanctissimus doctor (S. Aug.) in universis operibus suis nisi duos amores, Creatoris et creaturæ, ex quorum alterutro necesse est ut quæcumque actio voluntatis oriatur. Ille charitas est, iste cupiditas; quarum illa de cælo est, Deo plantante; ista ex mundo, diabolo seminante. » Quod idem hic, et libris de statu naturæ puræ et lapsæ, sæpius repetit Ypensis. Quot ex nefario illo principio sequantur exitiosa consecratoria, patet ex dictis superius ubi de Baiano systemate et de consecratoriis ejus fusè diximus, et amplius constabit ex dicendis secundâ parte, quæstione 2, art. 2, paragraph. 4.

Tertium systematis Quesnelliani principium, ex priori consequens, quodque totam ex integro renovat perversam Richerii doctrinam, à duobus conciliis Senonensi et Aquensi proscriptam, disertè exprimitur nonagesimâ inter confixas Quesnelli Propositiones: « Ecclesia, inquit, auctoritatem excommunicandi habet, ut eam exerceat per primos pastores, de con-

sensu, saltem præsumpto, totius corporis. » In hanc Quesnelli Propositionem, sic egregie pronuntiant Gallicani præsules, in suo an. 1714, Pastoralis Documento: « Les défenseurs de Jansénius, qui se sont révoltés contre l'Eglise, et qui craignent avec raison les censures et les excommunications, font tous leurs efforts pour s'en garantir. Ils établissent, dans tous leurs écrits, que le pouvoir d'excommunier est donné à l'Eglise pour y être exercé par les premiers pasteurs, du consentement au moins de tout le corps, c'est-à-dire du consentement de tous les fidèles. Ils se croient partie de l'Eglise, et peut-être même la portion la plus pure: ils ne consentiront point aux censures portées contre eux; c'est une raison de les mépriser. Une excommunication injuste, disent-ils, ne doit jamais empêcher qu'on ne fasse son devoir: mais c'est au tribunal de leur conscience qu'ils s'en rapportent pour décider de la justice ou de l'injustice de l'excommunication. Ils la trouveront certainement injuste, et elle ne les empêchera pas de faire ce qu'ils appellent leur devoir. » Ita cardinales, archiepiscopi, et episcopi in generalibus an. 1714 comitiis: quæ fundamentalis istius propositionis virus ac latens venenum luculenter aperiunt ac manifestant. Tribus his principiis tota stat Quesnelliani systematis moles: atque ita inter sese connexa sunt et arctè colligata, ut istud ex altero, utrumque verò ex primo spontè fluant ac necessariò consequantur. De quo plenius alibi. De triplici porrò mox recensito principio, jure ac meritò dici potest, quod de distinctione adjutorii *quo et sine quo*, in ordine ad ipsam S. Augustini doctrinam aiebat Jansenius lib. de Grat. primi hominis et Angelorum cap. 17: « Hæc est vera clavis, quâ aditus aperitur in scripta ejus (Quesnelli): aperiendus est..... Qui verò præfata principia, velut filum in labyrintho scriptorum ejus secutus fuerit, mirabilis ei occurrit contextus rerum: respondent extrema primis, media utrisque, omnia omnibus. » Totaque clarissimè ac plenissimè patebit Quesnelliana doctrina, verusque ac genuinus damnatarum 401 Propositionum sensus. Et verò ea potissimum fuit Clementis XI in ferendâ Constitutione, mens ac intentio, denuò scilicet damnare Baianismum, Jansenismum, et Richerismum, centum et unâ Propositionibus, nunc clariùs, nunc obscuriùs, instauratos. Id S. pontifici fuisse propositum, hæc verba manifestè demonstrant: « Omnes et singulas Propositiones præinsertas, tanquàm falsas, captiosas, malè

sonantes..... *pluries damnatas*, ac demum etiam hæreticas, variasque hæreses, *et potissimum illas, quæ in famosis Jansenii Propositionibus, et quidem in eo sensu, in quo hæc damnatæ fuerunt, acceptis, continentur, manifestè innovantes*, respective hæc nostrâ perpetuò valiturâ Constitutione declaramus, damnamus et reprobamus. Qui ergo semel probè novit, quid olim in Baio, Richerio, Jansenioque damnatum fuerit, nullo negotio intelligit, quid Clementinâ Constitutione *Unig.* confixum fuerit ac damnatum.

De consecrariis Quesnelliani systematis. — Tria mox proposita principia totius systematis Quesnelliani basis sunt ac fundamentum; atque ex iis velut à fonte ac radice centum et una Propositiones, quasi totidem consecraria, fluunt ac consequuntur. Patet id manifestè vel ex ipsâ libri ac propositionum inspectione, mutuâque ad se invicem collatione; idque ipsimet ultrò continentur fidelissimi Quesnelli assecke: quamobrem plura in re apud Quesnellistas certâ et constanti, quam eorum nullus negaverit, referre planè superfluum foret. Quin et dictis 101 damnatis propositionibus continetur accurata totius Quesnellianæ doctrinæ summa et analysis: atque ad illas commodè revocantur quæcumque in suo fusiori *Réflex. moral.* Opere, cæterisque suis scriptis docet Quesnellus. Quodque de quinque famosis Propositionibus, teste Mirapincensi Episcopo D. de la Brouë supra citato, olim aiebat doctissimus Bossuet., *illas totum esse librum*; idem dicendum de 101 Propositionibus, in ordine ad *Réflex. moral.* cæterasque Quesnelli elucubrationes. Harum omnium summa sunt et synopsis centum et una famosæ Propositiones. De singulis porrò sigillatim pertractare 101 Propositionibus, nec exigit seopus, nec sinunt præfixi hujus operis limites. Unum duntaxat adjiciam, ut methodo faciliori de Quesnelli sensu possit inquiri; nempe, 101 Propositiones ad tres classes aptè ac commodè revocari posse. Prima classis complectitur priores numero 49 Propositiones: ex duplicis delectationis indeliberatæ, ac necessitate relativâ victricis principio dimanant. De hoc principio abundè dictum suprâ, ubi de Janseniano systemate. Secunda classis sequentes 45 Propositiones continet. Erroneum duorum amorum, seu duarum delectationum deliberatarum antea jam expositum principium exhibent: vel ejus sunt totidem necessariae appendices. Tertia classis reliquas omnes comprehendit. Spectant datam à Christo Apostolis, eorumque succes-

soribus, excommunicandi auctoritatem, disciplinam et politiam Ecclesiæ; et pleræque Richerismum referunt ac renovant. Qui perspecta habuerit tria superius proposita Quesnelliani systematis principia, de quibus plura jam dicta, et inferius iterum non semel agetur, quique Baïi, Jansenii et Richerii errores, in Quesnelli Propositionibus, nunc clariùs, nunc obscuriùs instauratos, probe attenderit; proprium ac geminum 101 damnatarum à Clemente XI Propositionum sensum, certò et faciliè colliget. Enimverò, quod in Baio et Jansenio præsertim, jam damnarat Ecclesia, illud idem in Quesnello eorum discipulo reprobatum: uti modò, vel ex ipsis Baïke verbis evicimus.

Discrimina Quesnelliani systematis, à cæteris Orthodoxis systematibus, ejusdemque cum Jansenianis et Baianis placitis, omnimoda consensio. — Duo fert sigillatim expendenda præsens iste titulus. Primum: quæ sint Quesnellianæ doctrinæ, à cæteris catholicarum scholarum placitis, discrimina. Alterum: quæ et quanta hujus doctrinæ cum proscriptis Baïi et Jansenii dogmatibus, consensio. Quoad primum, respondeo plurima esse, et quidem gravissima, Quesnelliani systematis à cæteris orthodoxarum scholarum placitis discrimina. Et quidem, ne nimium excurrat ista disputatio, satis habebimus præcipua hæc discrimina strictim indicare, designatis locis ex quibus uberius eorum expositio et confutatio colligi poterit.

Primum petitur ex parte duplicis delectationis indeliberatæ relativâ necessitate victricis, quæ, uti diximus, Quesnelliani systematis primum ac præcipuum fundamentum est: ab illâ autem indeliberatâ ac relativè victrici deliberatione, immane prorsus, quantum abhorreant orthodoxarum omnium scholarum placita. De quo vide sup. ubi de Jans. systemate tractavimus. Secundum desumitur ex parte duplicis delectationis deliberatæ, seu impossibilitate amoris medi, vitiosam cupiditatem inter et laudabilem ac supernaturalem charitatem; quod, ex dictis, alterum est capitale Quesnelliani systematis fundamentum. Ast quàm exitiosum sit, et ab omnibus Orthodoxis alienum, pestiferum istud dogma, manifestè colligitur ex innumeris errorum portentis quæ ex malè fecundo principio scaturiunt ac necessariò dimanant. Vide sup. disput. 6, art. 2, ubi de Baiano systemate, et in secundâ parte, quæst. 2, art. 2, paragraph. 4, ubi evoluitur ac copiosè expiunditur. Tertium eruitur ex innumeris con-

sectariis quæ spontè ac necessariò fluunt de impossibilitate amoris mediî, *viciosam cupiditatem* inter et *supernaturalem* charitatem; ex quo præcipuè sequitur, intrinsecè et naturâ suâ quocumque in statu malum esse actum quemlibet à charitate supernaturali distinctum; hæc enim consecutaria, totidem sunt Quesnellianæ doctrinæ, quæ involvuntur, à Catholicorum ea explodentium systematibus insignia discrimina. De quo vide loca proximè citata, præsertim laudati mox paragraphi quarti conclus. probat. 6.

Quoad alterum caput, scilicet quæ et quanta sit Quesnellianæ doctrinæ, cum Baianis et Jansenianis placitis consensio, respondeo, omninodam esse, in præcipuis et essentialibus capitibus, *Quesnellianæ* cum *Baianâ* et *Jansenianâ* consensionem; neque in eo probando diutius immorabimur.

Constat enim id 1^o, vel ex ipsomet Quesnello, qui Baium, ipsumque præsertim Jansenium, uti insignes ac fidelissimos sancti Augustini discipulos, ejusque doctrinæ acerrimos vindices extollit ac commendat; eosdemque ut suos magistros agnoscit ac veneratur. Ita manifestè colligitur ex *causâ Quesnell.* in *verificut.* art. 3 et 4, pag. 67 et seqq.

Constat 2^o ex unanimi Quesnellistarum confessione: ii consonantiam illam Quesnellianæ doctrinæ cum Baii et Jansenii placitis, nedum inficiuntur, imò jactant, in eoque gloriantur. Hinc Quesnellianus auctor supra citatus: *quatrième Gémissement. de Port-Royal*, sic ait: *Les 101 Propositions condamnées renferment justement toutes les vérités différentes que les disciples de S. Augustin ont toujours soutenues depuis 70 ans.* Ita damnatas propositiones, totius Augustinianæ doctrinæ, hoc est (in ejus mente), *Baianæ* et *Jansenianæ*, summarium esse ac synopsis, clarè prædicat. Constat 3^o ex ipsismet Quesnelliani systematis visceribus. Enim-

verò, tota Baii et Jansenii doctrina, velut in radice comprehenditur duplici inprimis fundamento: 1^o, utriusque indeliberatæ delectationis *relativè* necessitatis; 2^o, utriusque delectationis deliberatæ, seu impossibilitate amoris mediî *viciosam cupiditatem* inter et *supernaturalem* charitatem: idipsum apertè liquet ex abundè dictis, ubi de *Baio* et *Jansenio*: atqui ex probatis modò, duo ista totidem sunt capitalia Quesnellianæ doctrinæ principia; ergo. His adde, ex illustriss. Bossuet, quinque propositiones (*Jansenii*) in libro *Réflex. moral.* reperiri: at ex eod. doctissimo præsule, quinque propositiones, *ipsæ sunt totus Jansenii liber*; ergo, etc.

Ex hætenus dictis clarissimè liquet et apertissimè sequitur, Baium et Jansenium in Quesnello fuisse redivivos, huncque integram illorum (in præcipuis et essentialibus capitibus) doctrinam, nunc clariùs, nunc obscuriùs instaurasse, eamque, adjectis novis erroribus, denno revocasse. Quod quidem non obscurè indicat Clemens XI, laudatis paulò antea verbis, ubi recitatis 101 propositionibus addit: « Omnes et singulas propositiones præinsertas, tanquàm falsas... *pluries damnatas*; ac demum etiam hæreticas, *variasque hæreses* et *potissimum* illas, quæ in famosis *Jansenii* propositionibus, et quidem in eo sensu, in quo hæc damnatæ fuerunt, acceptis, continentur, manifestè innovantes, respectivè, hæc nostrâ perpetuò valiturâ constitutione, declaramus, damnamus et reprobamus. » Cæcutiat oportet, qui non viderit, proscriptam fuisse Jansenianam (proindeque et Baianam) doctrinam à Quesnello in 101 propositionibus renovatam. Necesse porrò minime est agere hic de Synodis Romanâ, Avenionensi et Ebreduensi, in causâ Quesnelli habitis: de his enim, in rem nostram satis copiosè dictum in Synopsi historicâ.

CLERICI A BELLIBERONE VITA.

Nicolaus Franciscus à Belliberone è vico Meray, non procul à Conlato ad Nerallum, diœcesi Bajocensi oriundus, anno Domini 1740, natus est. Peractis splendidissimè humanioribus litteris, Theologiæ tantâ laude indulsit, ut vix infulâ insignitus licentiæ, ad iustituendas

in præclarâ Universitate Cadomensi lectiones theologicas, omnium sensu fuerit designatus. Singulare munus erat, sed muneri non impar accedebat ingenio singularis et ipse professor. Clericus enim scientiâ non ætate provectus, cui non minor idearum nitor, quàm verborum

facilitas fuit, veteres ita sibi familiares fecerat, qui latino feliciter quam gallico uteretur sermone. Mathematicarum peritus, in doctrinâ sanctorum Patrum versatus, opera inprimis Divi Augustini, cujus fertur sententias omnes memoriâ tenuisse, usque adeo pervolverat, ut interroganti et caput et paginam ex tempore diceret. Disputator subtilis disputationibus tamen nunquam se immixtum voluit. Quod si, pro re natâ, ad hoc digladiandi genus accinctus semel videtur, meminisse juvet nihil ei, singulariter à sophismatibus abhorrenti, in animo fuisse, nisi de componendâ lite, in materiâ nimio perê exagitâ. Vir itaque apud omnes optimi nominis plurimisque affectus honoribus, Decanus scilicet Facultatis Theologiæ in Universitate Cadomensi, in quâ lectiones theologicas per novem et quadraginta annos enucleavit, bis rector ejusdem Universitatis cujus et principem faciliè dixeris, officialis demùm abbatiæ S. Stephani Cadomensis ac Rothomagensis Ecclesiæ Cathedrali canonicus, ingenio necnon utilitatis privatæ oblivione omnibus hisce muniis dignum sese præbuit. Vitâ tandem functus viro christiano et sacerdote Christi verissimè dignâ, obiit Cadomi plenus dierum, quartâ die decembris, anno 1790, septuaginta et sex annos natus.

Tractatus varios complevit, nempe de *Pœnitentiâ*, de *Matrimonio*, de *Ecclesiâ*, de *Legibus* et de *Restitutione*. Nonnulla scripsit et com-

mentari in Scripturam sacram, quæ, forsannimis desideranda, maximâ ex parte temporum atrocitate deleta sunt. Edidit insuper et percelebrem tractatum, primâ vice typis mandatum Luxemburgi, anno 1777, cui titulus: *Tractatus theologico-dogmaticus de homine lapsa et reparato*, quem denuò typis dandum statuimus. Huic operi sors fuit eximio, sicut et cæteris operibus ejusdem momenti: alii effusè laudârunt, iniquè roserunt alii. Sed exsufflatis adversariorum objectunculis, à Pio VI, pontifice maximo, qui manu propriâ ad auctorem Breve gratulatorium direxit, de inbelli quorundam invidiolâ plenius æquo vindicatus est.

Clericus suoptè ingenio candidus, à mendaciis abhorrens, soliusque veritatis amans, in cæteris omnibus mendacium minimè excogitabat; unde famigatoribus fidem præstans simpliciorum ab invidentibus rudis quandoque, quin et stolidus iniquè dictus est. Quod si quibusdam aures dederis, exceptâ theologiæ sapientiâ, nullam habuit scientiam. Id autem usque adeo verum est, ut mathematicarum peritus, ut jam dixi, luculenta Maronis, Flaccique carmina ferè ex integro memoriter tenuerit. In accusationem æquius venit inanis gloriæ. Ipse verò, sicut *justus accusator sui*, indolem confessione agnoscens, humilitate ingemuit vitiosam. In sole, lector, inventæ sunt labeculæ; quid, si fragilis interdum nubilet humanitas?

TRACTATUS DE GRATIA.

Pars Dogmatica.

DE HOMINE LAPSO ET REPARATO,

SIVE DE TERRESTRIS ADAM CULPA ET DE COELESTIS ADAM GRATIA.

PRÆFATIO.

Multos, eosque ingenio non parùm valentes, viros, ubi de arduis argumentis disserere aggrediuntur, terrere solent aliorum de eisdem argumentis disceptationes, cum inprimis eruditione conditæ sunt et inspersæ. Utquid enim, inquiunt pavidî illi homines, eas rursus attrahere quæstiones, quas doctæ manus toties contrectaverunt? Verùm alios sensus grandî et

generoso animo olim volvebat Augustinus, vanamque illam formidinem longius propulsabat. « Cum enim, inquebat, eadem multipliciter varièque versantur atque tractantur, ipsos quoque capaciore intelligentiâ præditos adjuvant, et ad facilitatem discendi, et ad copiam disserendi. »

Ea scilicet est arduorum argumentorum na-

tiva quasi indoles, ut quantumcumque discussa sint, in eis tamen plura remaneant obscura et incognita, quæ periculum est ne, ab indoctis præsertim, habeantur pro cognitis et certis, quod sedulò cavendum esse sapientissimè monet Tullius, lib. de Officiis, n. 18.

Hæc profectò salebrosæ de primigenio Adæ peccato et Christi gratiâ controversiæ, toties ab eruditis viris expensæ, præ omnibus aliis congruunt. Quemadmodùm enim nulla est in totâ sacrâ disciplinâ magis obscura, et quæ majores exhibeat difficultates, ita nulla est, in quâ errare et facilius, et periculosius, et frequentius sit.

Errorum istorum, in quos non ignari tantùm, sed et nonnulli, etiam non indocti homines, nostris temporibus impeerunt, copia et varietas hoc opus veluti peperit, et foras emisit. Enimverò, non paucos, ex iis etiam qui sacrum decurrebant stadium, quinimò doctoris officio in obscuris scholis fungebantur, dogma ab opinione, ubi potissimùm de peccato originali et gratiâ Christi res erat, discriminandi arte non satis pòllere longâ experientiâ didiceram. Quæ quidem, ne longior sim, quibusdam exemplis confirmasse satis erit.

Ac primò notum est, Yprensem sententiam Guillelmi Estii de peccati originalis transmissione ad suum de concupiscentiâ systema corroborandum impensè extulisse. Quid pseudotheologi nostri? Utramque sententiam omnibus concordare modis, et idcirco eodem configendam esse verum. Idem proferebant judicium de opinione parvulò sine sacrìs undis ex hæc vitâ migrantes poenâ sensus, quanquam mitissimâ, afficiente. Hæc nimirum opinio, magnis licet et religiosis dogmaticorum Ecclesiæ judiciorum cultoribus probata viris, ipsis omni execratione digna videbatur, vel eo solo nomine quòd Yprensis ejusque defensores eam cum summo ardore defendant, ut probent Deum sine injustitiâ posse adultos homines in præsentì rerum ordine æternis addicere suppliciis propter peccata nonnisi in Adamo liberè commissa. Quod docuerunt Gregorius Ariminensis, cardinalis Norisius, Aliique insignes theologi, statum naturæ puræ possibilèm esse inspectâ Dei omnipotentîâ, impossibilèm è converso consideratâ ejus justitiâ, bonitate, sapientiâ, etc. Constitutionibus latè adversus Baium ejusque asseclas expressè damnatum esse proclamabant; nec minùs malè apud ipsos audiebat opinio ejusdem statûs possibilitatem *quoad*

terminum improbens, quia possibilitati hujus statûs et *quoad terminum* et *quoad viam* æqualem inserebant certitudinem. Sententia eorundem theologorum super morali actuum humanorum bonitate, quæ sine Christi gratiâ à charitatis gratiâ distincta vigere nequit, in rebus etiam facilibus, eorum judicio ea ipsa erat, quam Baius propositione vigesimâ sextâ expresserat. Tandem systema duarum delectationum *relative*, et non *simpliciter* vitricium, à Gregorio Ariminensi, Norisio et omni ferè celeberrimâ Augustinianorum scholâ propugnatum, in Jansenio prorsus proscriptum esse pronuntiare audebant; unde inferebant ejus defensores habendos esse velut hæreticos, etiamsi delectationem Jansenii *necessitantem* amandarent, etc.

Diu profectò tot fanaticis assertionibus genuimus, quæ Ecclesiæ catholice pacem funestum in modum poterant perturbare, quæ paternum Benedicti XIV animum ingenti mœrore affecerant, quæ erroris patronos magis ac magis in furorem adigebant, eisque adversus Catholicos arma ministrabant, sicque desiderandum eorum in Ecclesiæ sinum reditum impediabant, etc.; donec tandem sapientum virorum consiliis excitatus, quinque ab hinc annis propositum inivi tractatum de originali peccato et Christi gratiâ concinnandi, in quo quid super his definitum esset, aut non definitum, sedulò assignarem, idque juxta sapientiæ et pacis documenta in Brevi Benedicti XIV in gratiam operum Norisii delineata. Hoc autem consilium cò libentiùs arripui, quòd nonnulli recentiores, insigni aliunde eruditione conspicui, plurima super his in suis elucubrationibus desideranda reliquerint, nullâ videlicet habitâ notitiâ Brevis Benedicti XIV in favorem cardinalis Norisii, et famosæ retractationis, quam P. Chiggi Romæ emittere compulsus est. Illic ex causâ hoc opus inscripsi: *Tractatus dogmaticus de homine lapso et reparato*, qui titulus, ut patet, totam de primævo Adæ delicto et Christi gratiâ materiem continet et complectitur. Etenim per primum terreni Adæ peccatum homo lapsus est, et per gratiam cœlestis Adæ erigitur.

Primæva autem noxa, et Christi gratia secum invicem intimè connexæ sunt in præsentì statu, et una alteram commonstrat. Utriusque verò notitiâ ad veram solidamque sapientiam mortales quasi manu deducit. Tota nimirum sapientiæ nostræ summa duabus constat partibus, Dei cognitione et nostri. Unde istud ora-

culum : nosse te, consummata justitia est; et scire justitiam, et virtutem tuam, radix est immortalitatis, Sapient. 15; et istud Joan. 17 : *Hæc est vita æterna, ut cognoscant te, Deum verum, et quem misisti Jesum Christum.* Quare Augustinus hoc Platonis dictum cum encomio celebrat, lib. 8 de Civit. Dei, cap. 5 : *Dei imitator, cœquator, et amator est sapiens, cujus participatione fit beatus.* Deinde lib. 3 de Ordine, cap. 2, dixit : *Scipsam intelligit sapiens;* et præmio lib. 4 de Trinitate, cap. 1 : *Scientiâ cæteris præstans est nosse seipsum;* porro attentâ primigeniæ sordis et gratiæ Christi consideratio duplicem illam cognitionem humanis mentibus quasi illicò instillat. Enimverò quis admirabilem gratiæ Christi vim et virtutem ipsa corda scelus anhelantia ad Deum aliquando protinus convertentem recogitando infinitam Dei potentiam et misericordiam statim non cognoscit? Quis melle et favo dulciorem sacri hujus doni suavitatem degustando jucundissimam illius Auctoris bonitatem continuò non apprehendit? Quis effasam in omnes et singulos homines divini illius beneficii copiam longè latèque circumspeciendo beneficentissimæ supremi Numinis providentiæ admiratione et amore è vestigio non percelsit et accenditur? Quis efficacissimam cœlestis hujus subsidii motionem sese mirandum in modum liberis hominum voluntatibus inserentem ponderando à fine ad finem fortiter attingentem, et miracula in morali non minùs quàm in physico ordine perpetuò patrantem Dei sapientiam sine morâ non intelligit? Quis, ut in tantâ dicendi ubertate modum faciam, quis impunè non elisam superni illius jaculi aciem inspicendo infinitam Dei justitiam statim non intuetur et reformidat? etc.

Neque sacri hujus adminiculi contemplatio hominem in sui agnitione minùs adjuvat; mirabiles enim illius dotes, flammeus vigor, fortis ac dulcis illustrandi et movendi modus, felix necessitas, etc., generis humani tenuitatem, ignorantiam, infirmitatem, pravitatem, uno verbo stupendam ad omne opus bonum, saltem æternam salutem spectans, inhabilitatem per primi hominis defectionem invecum splendide patefaciunt et retegunt; hæc indubiè considerans Apostolus exclamavit 1 Cor. 15 : *Gratiâ Dei sum id quod sum; non sumus sufficientes cogitare aliquid à nobis quasi ex nobis, sed sufficientia nostra ex Deo est,* 2 Cor. 3. Et D. Augustinus, lib. 2 Conf. c. 7 : *Gratiæ tuæ debito, quòd peccata mea tanquàm glaci-*

solvesti; gratiæ tuæ debito quæcumque non feci mala, etc.

Peccati igitur originalis et gratiæ Christi cognitio et meditatio est velut refulgens speculum, in quo Deum et nos intuemur, à quo idcirco oculi nunquàm deflectendi sunt, ut propriæ miseriæ et infirmitatis, et infinitæ Dei potentie et misericordiæ conscii et memores ingentem et in animi medullis perpetuò prurientem superbiam retundamus, justitiam nostram in justitiæ Sole quæramus, nos nisi Deo confortante nihil posse confitemur, et si gloriamur, in eo tantum gloriemur. Quoniam autem à bonis, quæ guttatim è cœlo ad nos continuò stillant, tanquàm a rivulis ad fontem deducimur; quoniam, ut dicitur, Psalmo 67, per pluviam vitalem infirmæ hæreditatis suæ virtutem perficere non desinit Deus, in tantum muneris largitorem oculos attollamus, et totam mentis cogitationem erigamus, Christum Dominum, qui *chirographum mortis nostræ cruci affigens*, illud pretioso sanguine delevit, et cœlestium bonorum infinitatem nobis promeritus est, in quo cœlestis Pater *omnia nobis donavit*, Rom. 8, ne in poenam prodigiosæ ingrati tudinis divino illo rore deinceps non in-
spergamur.

Jam verò satis innotescit præsens argumentum admodum difficile et perplexum esse; quinimò ipsi Apostolo creatæ intelligentiæ acumen, præsertim in efficaciâ et distributione gratiæ, omninò transcendere visum est; unde Augustinus epist. 140, aliàs 120, cap. 26, dixit : *In profunditate gratuiæ gratiæ multorum ingenia conteruntur, id investigare conantia, ut ad extremum eis dicatur, ô homo, tu quis es qui respondeas Deo,* Rom. 9.... Luminis igitur Patrem, qui revelat profunda et abscondita, qui ex nihilo res exire, ex tenebris lucem splendescere facit, piè et enixè rogemus, ut mentes nostras illuminet. quò tam altum sacramentum, quantum humana patitur imbecillitas, scrutari valeamus.

Neque hic Deistæ, aliive divinæ providentiæ impugnatores, aut calumniatores, arripiant quod vel cavillentur, vel subsannent. An enim humana intelligentia, quæ in ipsis rebus naturalibus plerumque caligat, in divinæ sapientiæ arcana introspicere poterit? An divinum acumen humano latius non patet? Nonne ipsa suggerit ratio altiore esse divinam sapientiam quàm ut vel humano modo metienda sit, vel ingenii humani tenuitate possit comprehendi? Quare ventosos illos homines irridere juvat, iis

ipsis verbis, quibus usus est Calvinus ad invdiam à detestabili suo positivæ reprobationis ex mero Dei beneplacito systemate deprecandam: « Quinam estis qui ad eam legem redigere vultis Dei judicia et decreta, ut simul ac eorum ratio non constiterit, improbare audeatis? Vultisne ut divina potentia sic limitata sit, ut ne quid plus ad agendum valeat quam mentes vestræ capiant? Deo accusationem intentatis? Et ideo intentatis quia decretorum suorum altitudinem ad ruditatem vestram non attemperat? Quasi verò ideo perversa sint quia carni sunt occulta? Scitis illa decreta vocari profundam abyssum; nunc ingenii vestri angustias consulite, an quod decrevit Deus apud se capiant? Quid ergò juvat vesanâ inquisitione vos demergere in abyssum, quam vobis exitialem fore ratio ipsa dicat? » etc., lib. 5 Inst. c. 23, n. 5. Juvat eos cum Augustino, sermone 27 de versiculis Psalmi 95, aliàs de verbis Apostoli 20, cap. 5, n. 6 et 7, sic compellare: « Expectas à me, ô homo, ut dicam tibi, quare *cui vult miseretur, et quem vult indurat*? (Rom. 9). Et ego sum homo; itaque ambo audiamus dicentem, *ô homo tu quis es?* (Rom. 9.) Melior est enim fidelis ignorantia quam temeraria scientia.... Quare huic subvenit, et huic non,.... Petrus negat, Iatro credit, ô altitudo!.... Quæris tu rationem, ego expavescam altitudinem.... Tu ratiocinare, ego mirabor; tu disputa, ego credam; altitudinem video, ad profundum non pervenio, ô altitudo!... Requievit Paulus quia admirationem invenit... Ille dicit, *inscrutabilia sunt judicia ejus*, et tu scrutari venisti? Ille dicit, *investigabiles sunt viæ ejus*, et tu investigare venisti! » etc.

Ad obscurum istud argumentum quàm fieri poterat illustrandum, divinâ ordinante providentiâ, plurimùm contulerunt hæreses pelagiana et semipelagiana; *prosunt enim*, inquit Augustinus lib. de verâ Religione cap. 8, *Ecclesiæ hæreses, non verum docendo quod nesciunt, sed ad verum querendum Catholicos excitando*; unde cum Christus Ecclesiæ, cujus caput est, commodis et utilitati semper prospiciat, tunc eximios excitat doctores, in quorum oribus sua vox personet ad erroris extinctionem, et dogmatis catholici firmamentum; inter eos autem, quos Pelagii ævo suscitavit, eminuit D. Augustinus, vir acerrimi ingenii, exquisitæ eruditionis, summæ et suavis pietatis, laboris amans et patientissimus, in sui temporis novatoribus revincendis et ad Ecclesiæ gremium reducendis promptus, alacer, industrius, et

felicissimus; uno verbo, vir omni laude major; nihil quippe, aut saltem ferè nihil adversus Pelagianos et Semipelagianos sancivit Ecclesia quod ex Augustini libris non expresserit; conciliorum definitiones, et summorum pontificum decreta, quibus quasi totidem fulminibus prostrati sunt et contriti, ex Augustini elucubrationibus adornata sunt, S. Augustini doctrinam spirant, S. Augustini verbis enuntiantur. Ex quibus elucescit maximam esse S. Augustini auctoritatem, præsertim in controversiis de peccato originali et gratiâ Christi.

Illic tamen summâ cautione declinanda sunt duo vitia, in quæ irruerunt ex unâ parte novatores, et ex alterâ nonnulli theologi, zelo quidem Dei gloriæ, sed non secundum scientiam, ut videtur, accensi. Enimverò illi cò audaciæ proruperunt, ut cum magistro suo Yprensi totam traditionem in solo Augustino, reclamante licet concilio Tridentino, collocare viderentur, totamque ejus doctrinam ceu revelatam defenderent; quò collimabat hæc eorum assertio 50^a, inter triginta et unam ab Alexandro VIII, die 7 decembris anni 1690 damnatas: *Ubi quis invenerit doctrinam in Augustino clarè fundatam, illam absolutè potest tenere, non respiciendo ad ullam pontificis bullam*; ipse scilicet S. doctor in ipso libro de dono perseverantiæ cap. 21, licet adversus Semipelagianos scripto anno 428, aut 429 (id est uno aut duobus annis ante mortem) dixit, se Retractionum libros concinnare ut ostendat, *seipsum se in omnibus secutum non fuisse*; quibus verbis fateri videtur, se sibi semper non constituisse. Constat aliunde quemlibet sanctorum, his duntaxat exceptis qui libros canonicos ediderunt, vel fortè converterunt, spiritu humano locutum esse. Præterea notum est S. doctorem adversus coetaneos hæreticos innumerabilia propemodùm scripta quasi currendo emisisse, quæ ad incudem revocare non potuit, in quibus diversi generis argumenta, et quidquid non eruditio tantùm, sed et incredibili zelo effervescens imaginandi vis illicò suggerebat sparsit, continuis aliunde sacri ministerii muniis obeundis assiduus et intentus. Hinc autem evenit (quod certè evenire necesse fuit), ut Augustini libri numeris omnibus non sint absoluti, sed magis minùsve solidis ratiocinationibus repleantur, frequentibus onerentur repetitionibus, plus aliquando enuntient quàm intendit Augustinus, et densâ interdùm interspergantur caligine (unde deceptus videtur Canus cum asseruit, lib. 10 de locis, cap. 5,

quempiam Augustino clariorem non fuisse, quod et evincit exemplum Yprensis, qui decies et amplius universa Augustini opera acri cum attentione legit, libros verò contra Pelagianos trigesies, nec tamen eorum sensum assecutus est).

Ex hac autem Augustini operum conditione contigit, ut cum omnes quinti seculi hæretici Augustinum detestarentur, cuncti è converso decimi sexti et decimi septimi seculi novatores ipsum sacrilego thure coluerint; illius quippe librorum arcem ingressi sunt, cujus lateribus, tanquam totidem aggeribus, circumsepi jacula in Catholicos eò facilius et securius, quod Augustini tela memorarentur, vibrarunt, et contorserunt. Hoc Protestantes, hoc inprimis egit Jansenius in suo Augustino ad quinque propositionum virus instillandum, et disseminandum. Quamobrem Augustino evenit quod indubiè sibi eventurum esse non prævidebat cum libro de catechizandis rudibus cap. 8, dicebat, nonnullos Catholicos *scriptoribus quibusdam fuisse occasione ad hæresim moliendam*; id autem toto terrarum orbe longè latèque coruscanti Augustini nomini et gloriæ vel levissimam labem inurere non potest; ipsorum scilicet Apostolorum oraculis malè intellectis, et incongruè adhibitis, cujuslibet ævi hæretici, ut ibidem observat S. doctor, suos errores defendere conati sunt.

Neque commemorati novatores cum Jansenio reponant, antiquam Ecclesiam omnia Augustini opera approbasse; ita quidem, sed hæc approbatio (si quod adversus Pelagianos et Semipelagianos definitum est excipias) fuit generalis, significans nihil esse in Augustini operibus quod illæsâ fide propugnari non posset, quamdiù saltem aliter non statuisset Ecclesia catholica, quæ est *columna et firmamentum veritatis*; non autem specialis, sive singulas Augustini librorum assertiones in dogmata fidei erigens; hæc enim approbatio, quæ accuratum examen exegisset, per ducentos etiam annos ab Ecclesiâ, etiam congregatâ, impendi non potuisset.

Cave tamen ne quibusdam, scientiâ et pietate aliàs maximè conspicuis viris (quales, v. g., Dionysius Petavius, Stephanus Deschamps, etc., et hoc est alterum vitium, quod sollicitè declinandum esse monuimus), cave, inquam, ne iis morem geras, qui Augustinum veluti ferulæ suæ subicientes de ejus doctrinâ liberius judicium proferre audent, quin et quosdam errores in iis etiam, quæ fidem et mores

attingunt, ipsi adscribere, puta Eucharistiam parvulis non minùs necessariam fuisse quàm Baptismum, etc. Norisius enim, P. Alexander, et alii eruditi viri illos nævos, quibus Dallæus Minister libro *de vero Patrum usu* Augustinum inficere conatus est, non infeliciter detergunt. Augustini scilicet auctoritas in omnibus, etiam ab Ecclesiâ speciatim non approbata, multi facienda est, ut cum insignibus viris lubenter dicerem, *unus pro multis mihi semper erit Augustinus*; sed præsertim in controversiis de peccato originali, gratiâ, et prædestinatione, in quibus cæteros inter Ecclesiæ doctores non Secus ac sol inter alia minora sidera præfulget. scilicet adversus gratiæ interioris dogma sacris in Litteris, præsertim D. Pauli Epistolis consignatum, et Ecclesiæ visceribus quasi in sculptum, nemo ante Pelagium nefarias crexerat manus; hinc contigit (quod Augustino referente D. Chrysostomo in questione de avità maculâ priùs evenerat), ut qui ante Augustinum rebus divinis insudaverant de gratiâ Dei breviter et transeunter disseruerint, intenti potissimum in refellendis existentibus Ecclesiæ hostibus, et plebis sibi commissæ animis christianis virtutibus informandis. Hæc testatur Augustinus libro de Prædestinatione sanctorum cap. 14, quem paulò ante mortem edidit. Unde elucet in controversiâ de peccato originali et gratiâ Christi, quam ex professo tractavit D. Augustinus, alii è converso Patres leviter et perfunctoriè, potius standum esse Augustini quàm anteriorum Patrum sententiæ; non nostra tantum hæc est, sed et ipsius doctissimi Petavii, imò, omnium theologorum, opinio, cujus celebre testimonium, ut penitus obstruatur os minas adversus nos hic demurmurantium, adducere juvat: « Cum de gratiâ, inquit tom. 1 Theol. dogm. lib. 9, cap. 6, n. 7, vel electione, vel prædestinatione disputandum est, minor haberi solet antiquorum Patrum ratio, qui ante pelagianam ortam hæresim extiterunt, quàm eorum qui postea secuti sunt; Latinorum verò multò major quàm Græcorum etiam hæresi illâ posteriorum; propterea quòd magis aliquantò latinam Ecclesiam quàm orientalem exercuit hæresis pelagiana, quæ iis de rebus altercandi occasionem præbuit: sic ut Græci plerique intima Pelagianorum dogmata vel ignoraverint funditus, vel minùs accuratè perspexerint; omnium verò Latinorum, quorum in hac causâ majorem dixi auctoritatem esse, princeps est consensu theologorum (hæc nota) Augustinus, cujus de

gratiâ sententiam quotquot deinceps secuti sunt Patres et doctores, tum verò Ecclesiæ romanæ præsules, præsulumque conventus aliorum, ratam et catholicam esse iudicârunt, ut hoc satis magnum putarent veritatis argumentum, quòd ab Augustino positum ac decretum esse constaret. Quare quod commemorati Augustini censores obtendere solent, ex summo pontifice Cœlestino epistolâ ad episcopos Gallicanos (scripta est versùs annum 452) *profundiores difficilioreque questiones* ab Augustino (adversùs hæreticos decertante occasione gratiæ dogmatis) *tractatas et solutas ita non esse contemnendas, ut eas adstruendi nulla adsit necessitas*, eorum causam certò non adjuvat; hanc enim observationem genuinum Cœlestini opus non esse sentiunt plurimi eruditi, inter quos Baronius, Surius, Vossius (Gerardus), Suaresius, Sirmondus, Norisius, etc.; contendunt enim hanc epistolam his capitibus secundi verbis terminari: *Deus vos incolumes custodiat, fratres charissimi*; decem verò capita sequentia, in quibus commemorata observatio reperitur, à Cœlestino non esse exarata.

Quidquid sit ex dictis cum doctissimo Petavio cluere amplectendam esse D. Augustini de gratiâ doctrinam quoties clarè innotescit; enimverò non est, ut observavimus, aliquando perspicua; ex hâc videlicet obscuritate, velut ex profundâ scaturigine, ebullierunt varia eirca gratiam et prædestinationem scholæ systemata, quæ, utpote ab Ecclesiâ hætenus non improbata, erroris temerè et imprudenter insimularentur; *arguendi enim sunt*, inquit Canus, lib. 8 de Locis c. 4, *nonnulli theologi qui ex opinionum, quas in scholâ acceperunt, præjudiciis viros aliàs catholicos notis gravioribus inurunt, idque tantâ facilitate, ut meritò rideantur*; qui v. g. theologos prædestinationem ad gloriam ex intuitu gratiæ meritorum fieri sentientes, et scientiam quamdam mediam propugnantes Semipelagianis inscriberet, ut Jansenio ejusque discipulis gentile est, se vel Semipelagianorum dogmatum ignarum, vel studio partium in transversum actum ostenderet, inquit P. Alexander in hist. 5 sæculi, vir maximè eruditus, sic hic non suspectus, utpote qui Molinianum systema, quoties sese dat occasio, acri et vivido modo impugnat et refellit.

Diversa illa systemata exacuendis quidem ingeniis, et nonnullis fortè Scripturæ et Patrum testimoniis enucleandis, aut diluendis adversùs dogma catholicum ex rationis armamentario desumptis argumentis utilia sunt; sed homi-

num pravitate, aut levitate, hætenus plus rei catholice amplificandæ nocuisse videntur, quàm profecisse; ex iis enim Ecclesiæ inimici ipsi protervius insultandi ansam arripuerunt, et aliunde eorum defensores non rarò studio partium magis quàm investigandæ et detegendæ veritatis desiderio accensi videntur; cum igitur intra majoris duntaxat minorisve probabilitatis cancellos consistent, idcirco nullum ex iis amplectemur (licet in Augustinum, utpote Augustino, nostro iudicio, consonum magis propendeamus). In hoc autem Bossuetii et aliorum sapientissimorum vestigiis insistemus, qui fidei adversùs hæreticos vindicandæ et stabilicandæ incumbere satis habuerunt; « ubi scilicet, inquit Canus, lib. 8 de Locis, cap. 4, sunt doctissimorum hominum variæ discrepantesque sententiæ Academicorum temperamentum imitari, et à rebus incertis certam assensionem cohibere debemus; quid aliundè, inquit Cicero, tam temerarium tamque indignum sapientis gravitate atque constantiâ quàm quod non satis exploratè cognitum est, id sine ullâ dubitatione defendere? »

Cæterum, recentiores hæreticos, quorum dogmata refellemus, suo plerumque nomine non appellabimus, illorum non texemus historiam, et nullis prorsus conviciis et probris impetemus, ut nonnulli è nostris consueverunt. Etsi enim, Augustino dicente Tractatu undecimo in caput tertium Evangelii Joannis, *reges christiani, qui in hoc regnant ut Dei gloriæ serviant, rebelles hæreticos pœnis afficere debent*, hoc tamen Ecclesiæ doctoribus non licet. Debent enim, ut passim docet idem Augustinus, inprimis sermone 337 de laude pacis, aliàs 33, « hæreticis litigantibus et conviciantibus christianam exhibere mansuetudinem, quâ de toto terrarum orbe triumphavit Christus, et sese non ad jurgia (ut illi) sed ad preces convertere, quia hæretici etiam fratres sunt, et licet in Ecclesiam blasphemias evomant rogat Ecclesia ut ferantur. » *Convicium audis, addit ibidem, tolera, dissimula, præteri*; unde et præclarum illius effatum lib. de catechizandis rudibus cap. 28, *bonos imitare, malos tolera, omnes ama*. Et verò dolendi magis sunt hæretici quàm detestandi, cum Apostolo dicente (2 ad Thess. cap. 3): *non omnium sit fides; omni ergo opere, omni sudore, pio ad Deum affectu laborandum est, ut ad Ecclesiæ unitatem redeant; quemodò enim, addit tandem S. doctor lib. de Utilitate jejunii cap. 9, tu solves glaciem iniquitatis (eorum) si non ardeas flammâ charitatis?*

Toto igitur animi ardore, Christiane lector,

hunc excipe Tractatum, per quem Dei et tui notitiam adipisci poteris, cœli thesauros, et auro pretiosiores divinæ bonitatis divitias mirâ cum jucunditate contempleris. Novatorum perversa dogmata, tortuosum ingenium, fraudes, technas, cavillationes deteges, sideribus vividius scintillantem in effusione et subtractione robustioris gratiæ Dei misericordiam et justitiam cum gaudio et tremore videbis, undarum effluvium è fontibus Salvatoris irrigatâ

terra superficie in æternam vitam mirabiliter scaturiens cum novo stupore et admiratione suspicies, per quem demum, quod non pauci inter ipsos doctores apprimè non noverunt, in hac salebrosâ controversiâ dogma ab opinione optimè secernere poteris, sicque Deo dante Ecclesiæ pacem et unitatem integram servabis, et hæreticos, dissipatis eorum præjudiciis, in sanctæ Matris gremium reduces. Fiat, fiat.

DE HOMINE LAPSO ET REPARATO.

Tractatus iste theologicos inter cùm difficultate, tum excellentiâ et utilitate suâ principem locum sibi meritò vindicat. Enimverò totius religionis christianæ summam complectitur et exhibet. « In causâ duorum hominum, inquit D. Augustinus, libr. de peccato originali contra Pelagium et Coelestium, cap. 24, n. 28, quorum per unum venundati sumus sub peccato, per alterum redimimur à peccatis (Adami et Christi), propriè fides christiana consistit. » Idem habet Epist. 190, aliàs 157, cap. 4, n. 5.

Celebris ista dissertatio duabus, ut ipse clamat titulus, constabit partibus. Prima grande primi Adam delictum commonstrabit, ejusque naturam quantum humana patietur imbecillitas scrutabitur, et è tenebris in lucem educet. Secunda pretiosos medicæ et reparatrici secundi Adam gratiæ thesauros investigabit et quoad fieri poterit patefaciet.

Pars prima.

DE PRIMI PARENTIS, SIVE ADÆ, PECCATO.

Nonnullæ hoc super argumento, ut et super aliis apud D. Thomaam, etiam in Summâ, 1-2, q. 71 et seq., et insignes tum veteres cùm recentiores scholæ doctores, qui commentarios ediderunt in ejus opera, nonnullæ, inquam, occurrunt quæstiones ad acuendam potiùs quàm erudiendam ingenii aciem excogitatæ, quas ideirò solidæ et salubris instructionis studiosi silebimus, vel levissimè perstringemus. Meritò quippè Melchior Canus, insignis 16 sæculi theologus, eas in scholam invecas esse passim conquerebatur, lib. 9 de Locis, cap. 7, ac eliminari exoptabat, quòd plus obscuritatis quàm utilitatis complecterentur.

Etsi primigenium delictum noxa est singularis cujusdam speciei, tamen peccati universim considerati notitia in illius cognitionem aliquatenus ducit et dirigit. Hoc ideò argumentum duobus ventilabimus libris, quorum prior de peccato universè spectato, posterior de paternâ labe disseret.

Libet primus.

DE PECCATO GENERATIM INSPECTO.

Quanquàm ex peccati definitione illicò cognosci posse videtur, an peccatum sit quid positivum, an quid privativum, ut aiunt, duo tamen majoris claritatis causâ seorsim indagabimus, unum, quenam sit legitima peccati definitio, alterum, an peccati essentia repouenda sit in privatione, vel non.

CAPUT PRIMUM.

Quid sit peccatum generatim acceptum?

Vox peccatum varium sortitur sensum sacris in Litteris et Patrum operibus. Aliquando enim significat hostiam, sive victimam pro peccati expiatione mactatam, puta Osee 4, ubi sacerdotes dicuntur *peccata populi comedere*, id est, hostiam, quâ vulgi delicta abstergantur, et 2 Cor. c. 5, ubi Christus refertur *pro nobis peccatum factus*, hoc est, immolatus non pro fidelium duntaxat, sed etiam pro omnium et singulorum hominum peccatis.... Alibi designat peccati causam sive occasionem, v. g., Deuteronomii 9, v. 21, vitulus aureus Israelitarum *peccatum*, id est, causa peccati, dicitur.... Interdum peccati pœnam sive effectum indicat. Sic Levitici 20, v. 17, nonnulli sontes referuntur *iniquitatem suam*, id est, pœnam iniquitatis, cruentâ morte *portare*, sive sustinere ... Nonnunquàm et causam et effectum peccati exhi-

bet, ut Rom. 7, v. 21, ubi concupiscentia vocatur *peccatum* quia ex peccato oritur, et ad peccatum impellit.... Tandem sæpius connotat quemlibet actum à regulâ suâ aberrantem, velut in his Christi verbis, *quis ex vobis arguet me de peccato?* (Joannis 8), id est, de actione legi non consonâ. In moralibus igitur actus à morum regulis deficientes *peccata* vocantur, quemadmodum in naturalibus monstra dicuntur *peccata naturæ*, et in artificialibus adulterina opera artis *peccata*. Atque hic quasi per transennam observa, has et similes ambiguitates, quarum pleni sunt sacri codices, simplicibus et in pietate parùm obfirmatis hominibus præposteris periculosasque cogitationes posse suggerere, et ideo immeritò dixisse Quesnellum, Propositionibus 80 et 81, non Scripturam, sed *Scripturæ lectionem esse pro omnibus, et obscuritatem verbi Dei non esse laicis rationem dispensandi seipsum ab ejus lectione*. Peccatum in præsens ultimo sensu accipitur, id est pro actu in genere moris vitioso, et unicè quæritur, utrum vera peccati in genere afferri possit definitio, quæ ideo illi omni congruat quod verè peccatum est, qualis est originis labes, quale delictum mortale actuale, veniale, quale peccatum commissionis, omissionis, etc.

Ilæ quæstio eò majoris est momenti quòd intimo nexu conjuncta sit cum pestifero recentiorum novatorum systemate, quo ad verum peccatum in homine lapsu libertatem non necessitatis, sed coactionis duntaxat, sive violentiæ expertem exigunt. Quod nefarium et in fatalem desperationem mortales præcipitans dogma ut vellicetur, sit

CONCLUSIO. Peccatum strictè acceptum, præsertim actuale, sive personale, meritò definitur: Actus liber, id est, non coactionis tantum, sed etiam cujuslibet veræ necessitatis, etiam alternantis et relativæ expers, deflectens à lege æternâ.

Prob. 1^o auctoritate. Ilæ peccati definitio Patribus et theologis catholicis est accepta; ergo admitti debet. Prob. antecedens. D. Augustinus, lib. 22 adversus Faustum, cap. 27, de vero peccato disserens ait: *Peccatum est factum, vel dictum, vel concupitum, contra æternam legem*; deinde addit: « Lex æterna est ratio divina, vel voluntas Dei, ordinem naturalem conservari jubens, perturbari vetans. » Utramque illam definitionem cum encomio referunt theologi et accuratas esse agnoscunt, primam inprimis, quam impensè laudat D. Thomas 4-2, q. 71, art. 6, in corp. Si igitur nostra de-

finitio verbis, et non re ab Augustinianâ peccati definitione discrepat, adversariis, qui solius Augustini et ejus discipulorum auctoritate tanguntur, non displicere, sed perquam placere debet; at nihil aliud discriminis inter eas inveniri potest; etenim Augustiniana peccatum omissionis sufficienter exprimit, *cum scilicet*, inquit D. Thomas loco citato, in resp. ad primum, *affirmatio et negatio reducantur ad idem genus* (id est, qui non facit quod facere tenetur, agere censeatur) S. Augustinus pro eodem accepit dictum et non dictum, factum et non factum, etc. Pariter libertatem ad veri peccati rationem prorsus necessariam, quam cuilibet exploratam esse asserit S. doctor in libro de duabus animabus, et innumeris rationum momentis adversus Manichæos vindicaverat, non minùs sufficienter enuntiat; lex nimirum, quam per dictum, factum, aut concupitum violari dicit, utpote essentialiter obligativa, nonnisi liberis creaturis imponi potest.

Cum Augustinâ et ideo nostrâ reapse concordant sequentes definitiones, quæ in Patrum operibus, catechismis, et philosophorum etiam scriptis reperiuntur: *peccatum est prævaricatio legis divinæ* (Amb. lib. de paradiso, cap. 8), vis scilicet obligandi legibus humanis insita à divinâ voluntate, sive æternâ lege, mediâtè oritur, et ideo in eâ definitione lex divina ipsam legem humanam connotat.... *Peccatum est actus humanus malus* (D. Thomas, 1-2, q. 71, a. 7, in C.). Actus nimirum, quatenus humanus est essentialiter liber, et quatenus malus contra æternam legem necessariè militat; unde et ista definitio et libertatem legum et æternam legem indicat. Idem iisdem ex causis dicendum de istâ communi theologorum et Catechismorum definitione, *peccatum est transgressio legis libera*, aut de istâ philosophorum, *peccatum est id quod fit aut non fit contra imperium rationis*; notum quippe est legis nomine omnes intelligi leges, præsertim æternam, quæ est lex *per essentiam*; cum cætera sint leges *per participationem*; non minùs est exploratum id quod fit aut non fit contra rationis dictamen esse peccatum theologicum, sive actum divinam Majestatem offendentem, cum ratio, sive lex naturalis, sit æternæ legis adumbratio et imago.

Ex his elucescit commemoratam peccati definitionem non solius D. Augustini, sed etiam aliorum Patrum, vel theologorum, et ipsorummet philosophorum auctoritate inniti.

Prob. 2^o ratione, sive ex dotibus legitimæ definitionis, quibus nostra refulget. Etenim ge-

nus exhibet, sive id, per quod peccatum convenit cum actione vel omissione humanâ, quæ non est peccatum. Voces videlicet, *actus deflectens à lege* comprehendunt etiam actus necessariè elicitos, quales edunt infantes, amentes, etc., et voces *actus liber* actus bonos, etc.

Item offert primariam et proximam peccati differentiam, id est, illud per quod peccatum ab omni actu qui vitiosus non est, primariò et proximè secernitur. Enimverò formalis peccati ratio, sive id per quod peccatum *in esse*, ut loquuntur, peccati constituitur, oritur ex declinatione à lege æternâ imperante, vel prohibente; lex nimirum æterna est omnium actuum humanorum regula, et ideò quod ad illius legis amussim non fit, peccatum illicò concipitur.

Item soli peccato convenit; omnis enim et solus actus contra æternam legem liberè productus peccatum est (unde ipsæ adversus fidem cogitationes, vel motus carnis etiam ad seminis effusionem insurgentes, nisi accesserit liber voluntatis consensus, non sunt peccata, ut docet D. Aug. lib. de verâ religione, cap. 44, n. 27, et lib. 2 de duabus animabus cap. 11, n. 15).

Item omne veri nominis peccatum comprehendit; scilicet ipsum originale, quod in Adam perfectè liberum fuit, et in ejus nepotibus est etiam suo modo liberum, ut postea cum D. Augustino ostendemus..... Peccatum *commissionis*, id est contra legem æternam prohibentem, et *omissionis*, id est adversus eandem legem præcipientem; nemo enim non videt utrumque delictum nomine *actus deflectentis à lege* perspicuè connotari.... Peccatum *mortale*, ut omnes consentiunt, ac etiam *veniale*; equidem Magister Sententiarum ac ipso duce D. Thomas, 1-2, q. 88, art. 1, ad primum, asserunt peccatum veniale non esse *contra legem*, sed *præter legem*. Verùm adversam sententiam propugnant Estius in 2 Sententiarum distinct. 35, parag. 2; Sylvius in 1-2, q. 71, art. 6, et alii illustriores Angelici doctoris expositores. Hæc quippe est doctrina D. Augustini variis in locis, maxime lib. 2 de peccatorum meritis et remissione, cap. 16, ubi de peccatis disserens hæc pronuntiat: *Nec peccatum erit, si quid erit, si non divinitus jubetur ut non sit*. Omne igitur peccatum seu mortale seu veniale æternâ lege prohibetur; sed hoc inter utrumque discriminis intercedit, quòd mortale hominem spoliât gratiâ justificante, eumque æternæ poenæ debitorem facit, et idcirco *finem legis, qui charitas est* (1 ad Tim. 1), evertit; veniale è converso finem illum non

destruit, cum charitatem non tollat, sed immi-
nuat duntaxat, et ideò non sit omnimodè ad-
versum finem legis, licet à lege vetetur; atque id
fortassis intendit D. Thomas loco indicato;
antea enim, 1-2, q. 74, art. 10, ad primum,
dixerat, *peccatum quod est contra rationes æter-
nas* (id est contra legem æternam), *etsi sit
peccatum mortale ex genere, posse tamen esse
peccatum veniale propter imperfectionem actus
subiti*.... Peccatum denique *habituale*, quod est
habitus quidam perversus animæ ex commissio-
ne antea peccato inherens. Habitus enim ille non
est vitiosus et Deo invisus, nisi quia exhibet
aut supponit præteritam declinationem libe-
ram à lege æternâ. Est quippe peccatum ha-
bituale peccatum prius commissum, non qui-
dem actu existens, sed moraliter perseverans,
quo homo peccator denominatur.

Demùm nihil in eâ redundat; peccatum enim
est essentialiter liber à lege æternâ deflectus....
Nihil desideratur; lex quippe æterna est om-
nium legum radix et principium; unde omnes
leges veluti in gremio complectitur; naturalem,
sive rationem, quæ se habet ut echo dictans
homini quod lex æterna dicat..... Positivam
divinam, quam Deus ex intuitu supremæ ra-
tionis præscribit.... Positivam humanam, quæ
quidquid habet recti ab æternâ lege accipit, et
fertur à potestatibus, quibus lex æterna obe-
dire jubet. Unde omnia et singula peccata
æternam legem, mediâtè saltem, violant. Ver-
bo dicam, lex quælibet fit lex per suam cum
æternâ lege conformitatem, et ideò declinatio
à lege æternâ omnia omninò peccata importat
et inducit. Hinc nostra definitio secum trahit
cuncta peccatorum genera, cordis, oris et ope-
ris, quæ gratiæ doctor expressit per *dictum,
factum, vel concupitum*.

COROLLARIA. — Primum. Peccatum, vitium,
et malitia, quæ sæpè univoce usurpantur, à
sese invicem reapse distinguuntur. Scilicet
peccatum est libera declinatio à lege æternâ
imperante, aut prohibente, et ideò est actus, vel
actualis, et *liberè volita*, ut aiunt, omissio ac-
tûs, qui hic et nunc elici deberet; ad vitium
non est actus, vel actualis omissio actûs, sed
habitus inclinans ad malum; unde opponitur
habitu virtutis, qui ad actus bonos excitat et
impellit. Item malitia, præcisè ut malitia, solam
inducit actûs aut omissionis inordinationem, et
ideò adversatur bonitati actûs virtuosius; pecca-
tum è converso præter illam deformitatem ac-
tum vel omissionem actûs includit, et idcirco
repugnat actui virtutis.

Secundum. Peccatum quod adversatur legi naturali, sive rationi, legem etiam æternam contravenit, et ideo vera est Dei offensæ; dictamen videlicet rectæ rationis est intimatio legis æternæ, quæ necessariè vetat quidquid dedecet naturam rationalem, et præcipit quidquid eidem congruit naturæ. Aliunde nemo sui compos, si advertere voluerit, non detegit quod repugnat naturali rationi, repugnare etiam supremæ rationi. Hinc Alexander VIII decreto dato 24 augusti anno 1690 adversus duas novatorum propositiones hanc numero secundam meritò damnavit: *Peccatum philosophicum seu morale est actus humanus disconveniens naturæ rationali et rationi. Theologicum verò mortale est transgressio libera divine legis. Philosophicum quantumvis grave in illo qui Deum vel ignorat, vel de eo actu non cogitat, est grave peccatum, sed non est offensæ Dei, neque peccatum mortale dissolvens amicitiam Dei, neque æternæ penæ dignum.* Hæc assertio, quæ etiam inter 127 proscriptas à clero Gallicano anno 1700 n. 115 reperitur, tanquàm scandalosa, temeraria, piarum aurium offensiva et erronea confixa est.

Tertium. Aliquid existit bonum vel malum in seipso ex naturâ rei, et independentè à ratione et voluntate divinâ. Tale est, v. g., mendacium quod, inquit D. Augustinus lib. 5 Questionum in Leviticum, *quia injustum erat, ideo prohibitum est* (positivâ lege Dei) *non quia prohibitum ideo factum est injustum.* Enimverò est aliquid quod divina ratio necessariè approbat ut conveniens, et necessariè improbat ut disconveniens. Item est aliquid quod divina voluntas necessariè præcipit tanquàm bonum naturæ rationali, et necessariè vetat tanquàm malum eidem naturæ. Quare in instanti rationis præcedente actum divini intellectûs et voluntatis concipitur aliquid conveniens et non conveniens, aliquid bonum et malum. Hinc per legem æternam non solum intelligendus est actus Dei intellectûs et voluntatis, sed etiam necessaria rerum convenientia aut disconvenientia, id est, æternæ et immutabiles regulæ practicæ, quæ, ut loquitur Augustinus, *in Dei sapientiâ vivunt.* Lex nempe æterna *subjectivè non objectivè* spectata actum ex parte Dei importat. Hinc, si per impossibile non existeret Deus, homo sese ad rationis ductum applicans boni malique rationem metiri sive æstimare non posset ex suo commodo, aut incommodo, ut artificiosè innuit sive subasseruit Joannes Martinus de Prades in pestiferâ suâ Thesi in Sorbonâ propugnata,

quam utpote tartaream et religionem à fundamentis evertentem diris devovit sacer Ordo Parisiensis; unde non omne utile foret licitum; scilicet hæc etiam in hypothesis ratio aliquid præciperet tanquàm necessariè bonum, et aliquid prohiberet tanquàm necessariè malum, sive ratio judicaret de rebus ex æternis et incommutabilibus regulis practicis, et ideo licitum non foret nisi quod licitum est rationaliter. Ex quibus colliges Deum esse distinctum ab ordine et veritate æternâ, sive à necessariâ rerum convenientiâ, aut disconvenientiâ.

Quartum. Idem actus multiplicem habere potest malitiam; potest videlicet multiplici lege prohiberi, ex cujus violatione multiplicem contrahit deformitatem; etsi autem unicâ tantum lege interdiceretur, ratione objecti, finis et circumstantiarum magis aut minus perversus esse potest.

Quintum. Totâ formalis peccatimalitia ex eo actu tanquàm ex fonte scaturit, qui in se et formaliter est liber, cum peccatum sit libera à lege aberratio; talis autem est actus internus voluntatis, non externus, qui non nisi denominativè liber nuncupatur, quatenus scilicet à potentiâ liberâ sive voluntate imperatur. *Nimirum de corde,* inquit Christus Matthæi 15, *exeunt cogitationes malæ, homicidia, etc., hæc coinquinant hominem.* Concinit D. Augustinus lib. de Continentiâ, cap. 2, n. 3: *Homines, inquit, nihil agunt corporis opere, quod non prius dixerint corde.* Hinc si adulterium, v. g., exterius non committendo illud eodem omninò actu interno volueris ac si illud exterius commisisses, æqualis peccati coram Deo reus eris, et ideo, si actus interni facientis aut non facientis externum peccati actum sint æquales, æquale erit demeritum. Hinc Abraham tantum meriti et mercedis coram Deo, qui cor intuetur, filium non mactando retulit, quantum si ipsum reipsâ mactasset. Id ex processo demonstrat D. Augustinus ibid. n. 4 et sequentibus. Non rarò tamen contingit ut cum externus peccati actus poni potest, et non ponitur, voluntas minori ardore feratur versùs peccatum, et ideo minus peccet; sæpius etiam in actu et exercitio irritatur et accenditur voluntatis cupiditas; quâ ex causâ actum peccati externum produciens vulgò magis peccat quàm qui non producit. Verùm major ille malitiæ gradus non oritur nisi ab actu interiore, sive consensu, qui solus, inquit D. Augustinus, loco citato, *inquinat hominem.*

Ultimum. Ad peccandum, sive ut legis actu obligantis violatio sit culpabilis, duæ requiruntur conditiones, rationis advertentia, et voluntatis consensus. Rationis quidem advertentia, non quæ comitetur duntaxat actionem (quotidiè enim peccant qui dum agunt quam eliciunt actionismalitiâ non attendunt), sed quæ præcesserit, vel ex culpabili negligentia non præcesserit actionem; tunc enim omissio advertentiae est voluntaria. Ratio patet. Scilicet omne peccatum est essentialiter voluntarium; voluntarium autem existere nequit absque intellectus cognitione. Hinc ignorantia invincibilis, non vincibilis, vel metus aut passio antecedens, quæ tollit rationis usum, non consequens, quæ usum rationis non impedit, à peccato excusat. Hinc calumnia reos se faciunt hæretici dum obgannunt sentire doctores catholicos *non peccari mortaliter nisi actionis malitiâ acta attendatur*. Hinc motus indeliberati, qui dicuntur *primò primi*, non sunt propriè et formaliter peccata. Hinc qui sine suâ culpâ cum advertentia facit quod lege prohibetur, v. g. Cadomi per aliquod tempus commorans carnes comedit eo die, qui in patria suâ non est jejunii, aut abstinentiæ dies, et ideò non advertit esse diem jejunii, non peccat. Hinc si ita affectus sis, ut si scires aut scire posses talem hominem esse sacerdotem cum non occideres, ipsum interficiendo non sis reus duplicis peccati, sacrilegii et injustitiæ, quamvis actio materialis utrumque importet... Voluntatis consensus, quo scilicet voluntas sine ullâ antecedente absolutâ, aut relativâ, necessitate feratur in objectum malum ab intellectu propositum; est enim peccatum libera, id est ab omni necessitate soluta declinatio à lege, ideòque peccatum esse non potest ubi adest vera necessitas quæcumque illa sit: *Peccati*, inquit D. Augustinus lib. 2 de duabus animabus cap. 12, n. 17, *reum tenere quemlibet, quia non fecit quod facere non potuit, summæ iniquitatis est et insanivæ*. Porro, ut consensus ille peccatum pariat, haud necesse est ut sit directus, id est, ut voluntas malum ab intellectu sibi propositum expressè et immediatè intendat, sed sufficit ut sit indirectus, hoc est, ut voluntas malum sibi ab intellectu propositum velit in alio, ex quo scilicet velut ex causâ illud secuturum esse prævidet, vel prævidere potest, et debet. Sic qui vino nimis indulget prævidens ex istâ intemperantiâ in fornicationem se esse prolapsurum, reus est peccati fornicationis, etsi reverà non fornicetur, quia huiusmodi prævisione illud voluit in alio sicut

in causâ quam liberè posuit. Igituretotes violatio legis actu obligantis peccatum est quoties voluntas ex sufficiente rationis advertentiâ consentit, ideòque non est peccatum cum deest liber voluntatis consensus. Unde quidquid tollit voluntarium et liberum excusat à peccato, quidquid verò auget, vel minuit liberum, cæteris paribus, auget vel minuit peccatum.

PRINCIPIA SOLUTIONEM. — Primum. Definitio nostra tangit primariò peccatum personale, et ideò difficultati de prætenso defectu libertatis in avito delicto non est obnoxia. Secundum. Tartareum Jansenii et Protestantium systema de libertatis in præsentia ordine ruinâ et excidio in quarto de gratiâ Christi libro in pulverem comminetur. Tertium. Nostra definitio veniali maculæ convenit, etsi illa noxa fini legis, qui est charitas, omnimodè non adversetur; prohibetur nempe æternâ lege saltem ut ex se charitatem imminuens. Quartum. Totum discrimen, quod nostram inter et Augustini definitionem occurrit, in eo consistit, quòd nostra expressè, Augustiniana verò implicite duntaxat libertatem ad peccatum necessariam exprimat. Quintum. Definitiones S. Ambrosii, D. Thomæ, catechismorum, philosophorum, legitime licet, non sunt tamen tam accuratæ quàm nostra; ista quippe legem æternam omnium legum fontem expressè designat; illæ verò legem æternam non nisi per ejus effectus indicant, legem scilicet naturalem, divinam positivam, et humanam. Sextum. Augustinus lib. de perfectione justitiæ cap. 2, Coelestio Pelagiano meritò reponit *peccatum actum dici et esse, non rem*. Est autem actus positivus et directus in noxâ commissionis, sive contra legem prohibentem, actus verò saltem indirectus et extrinsecus in peccato omissionis sive adversus legem imperantem; et ideò in quolibet delicto actus reperitur.

CAPUT II.

Utrum ratio formalis, sive natura peccati quatenus peccati, in positivo, vel in privativo, sit collocanda?

QUESTIONIS SENSUS ET STATUS. — 1º In memoriam revoca peccatum aliud esse *commissionis*, aliud *omissionis*. Primum est violatio legis negativæ sive prohibentis, alterum violatio legis affirmativæ sive præcipientis; qui v. g., mentitur, reus est peccati *commissionis*, quia violat legem istam negativam, *non mentieris*; qui verò

non producit actum amoris Dei eo tempore, quo potest et debet, reus est peccati *omissionis*, quia offendit istam legem affirmativam, *diliges Dominum Deum*, etc. Tempore quo obligat in peccato *commissionis*, semper reperitur actus positivus contra legem, ut patet. At D. Thomas docet, 1-2, q. 71, art. 5, peccatum *omissionis* esse aliquando cum actu interiori, ut si die dominicâ positivè nolueris ad sacram ædem adire; aliquando è converso existere sine omni actu, sive exteriori, sive interiori, velut si eâ horâ, quâ teneris ire ad sacrum templum, nihil de ad illud eundo vel non eundo cogitaveris. Quamobrem in mente S. doctoris omissionis delictum non quidem directè et immediatè, sed indirectè et mediatè saltem et extrinsecus aliquem actum positivum essentialiter includit, vel importat, qui scilicet ejus causa sit vel occasio. Sic non desinis velle aut cogitare quod velle aut cogitare tenebaris, nisi quia aliud vis, aut cogitas. « Quòd, inquit D. Thomas, aliquis declinet ad non faciendum illud quod potest facere et non facere, non est nisi ex aliquâ causâ, vel occasione conjunctâ vel præcedente, et si illa causa non sit in potestate hominis, ommissio non habet rationem peccati, sicut cùm aliquis ob infirmitatem prætermittit ire ad Ecclesiam; si verò causa vel occasio subiaceat voluntati, ommissio habet rationem peccati. » Igitur utrumvis peccatum actum realem suo modo refert, et ideò quæstio de utroque institui potest.

2º Duo in peccato sedulò considera, substantiam, sive materiam, consistentem in actione physicâ, quæ ut materia cunctis corporibus, sic bono et malo communis est, et rationem sive formam, vel differentiam, per quam, ut formâ corpora, sic peccatum in *esse peccati* constituitur. Quæstio non respicit peccati materiam, quam liquet esse quid positivum et reale, sed solam peccati formam, sive id solum quod actum facit esse peccatum, utrum nempe sit aliquid positivum, an quid merè privativum.

3º Certum est actum aliquem peccatum evadere per suam æternæ legi oppositionem. At res possunt sibi invicem opponi duobus modis, contrariè, et privativè; contrariè per naturam sive formam diversam, ut ignis et aqua, frigus et calor, etc... Privativè per carentiam formæ oppositæ rei, ut tenebræ et lumen, cæcitas et visio, etc.

Quæritur præcisè an peccatum oppositum sit æternæ legi per modum contrarietatis, et ideò an peccatum more contrariorum formaliter

aliquid positivum sit, an è converso sit æternæ legi oppositum per modum meræ privationis, sive dissonantiæ, et ideò an sit formaliter aliquid privativum.

OPINIONES. — Consentiunt theologi quodlibet peccatum importare privationem gratiæ, conversionis ad Deum, et conformitatis cum lege. Verùm dissentiunt, an defectus conformitatis cum lege constituat peccatum in *esse peccati*.

Prima opinio formalem peccati rationem collocat in merâ privatione rectitudinis actui morali debitæ, et ideò asserit actum idecirco præcisè esse formaliter malum, quia destituitur aliquo ex iis quæ ad actûs bonitatem ex æternâ lege requiruntur, ex axioma scilicet, *bonum ex integrâ causâ, malum ex quolibet defectu*.

Altera opinio, quæ nonnullis recentioribus arrisit, cujus inter Christianos initio 16 seculi auctorem fuisse ferunt celebrem Cajetanum, eandem peccati rationem reponit in relatione sive tendentiâ positivâ et reali, quæ insidet actui humano, ad objectum æternæ legi repugnans. Isti theologi, quorum mentem clarè vix exposueris, quam nec ipsi fortassis benè intelligunt, duplicem peccati malitiam distinguere videntur, positivam unam, quæ consistit in commemoratâ relatione sive tendentiâ, privativam alteram, quæ defectus est rectitudinis moralis; prior, ipsis dicentibus, est interna, sive essentialis peccato, quod formaliter constituit; posterior peccato est extrinseca, et prioris veluti effectus necessarius. Doctissimus Petavius accuratè expensâ traditione super celebri istâ quæstione in aureis præsertim Patrum operibus consignatâ, lib. 6 de Deo et divinis Attributis, cap. 4, n. 9, hæc pronuntiare non dubitavit: « Ex hac constanti et consentiente Patrum de mali et peccati naturâ sententiâ licet concludere quàm longè sit ab usu scholarum ac theologiæ finibus arcenda proscribendaque illa opinio quorundam, qui malum, etiam quâ malum est, rem esse aliquam, et positivum quiddam sentiunt, quibus cùm veterum Patrum concors illa, et sine ullâ varietate conveniens auctoritas opponitur, plerique fateri non dubitant, in eo se dissentire ab illis quidem, sed hoc necessariâ se inductos ratione facere, quòd quædam perplexa sint et explicatu difficilia, quibus se aliter expedire nequeant. » Deinde addit: « Quidvis perpeti satius esse, ac vel inscitiam in eo dissolvendo quod contraponitur fateri suam, quàm ab antiquitatis tramite ultrò et contententem recedere. »

Ab istâ regulâ, utpote veteribus conciliis, et speciatim Tridentino sessione quartâ, sancitâ vel latum unguem recedere nefas duceremus. Quare sit

CONCLUSIO. — Peccati naturam, sive malitiam moralem, in privatione conformitatis cum æternâ lege consistere sententia est quæ sacris Litteris et traditioni magis est consona.

Prob. Illa sententia Scripturæ et traditioni magis est consona, in quâ Scripturæ et traditionis de malo morali oracula feliciter exponuntur, et verum, obvium, et apertum habent sensum: sic se habent Scripturæ et traditionis de peccato effata in sententiâ quæ mali moralis rationem in privatione constituit; ergo. — Major elucet ex D. Augustini regulâ, quâ Scriptura sensu obvio et litterali intelligenda dicitur, quoties nihil docere videtur fidei, bonis moribus, aut rationi adversum.

Probatur minor. Sacri codices malum morale exhibent tanquàm nihil aut vanum quiddam, eo quòd scilicet non est aliquid à parte rei reale et positivum, sive non habet esse substantiale aut modale; innumera inter testimonia hæc sufficiant, filii hominum... ut quid diligitis vanitatem, et queritis mendacium? Psalmo 4; Amos 6, superbi dicuntur latari in nihilo; sine ipso (Verbo) factum est nihil quod factum est, Joannis cap. 1; quæ verba D. August. tractatu 1 in Joannem n. 13, de peccato intelligit: Nolite, inquit, putare aliquid esse nihil; peccatum non per ipsum factum est, et manifestum est quia peccatum nihil est... Rationem passim affert eadem Scriptura, peccatum scilicet quatenus peccatum est declinatio, deviatio, aversio à lege; averterunt se et non servaverunt pactum, Psalmo 77; peccatum est iniquitas, græcè ἀνομία, id est, illegalitas, sive aberratio à lege, 1 Joannis cap. 3, etc. Concinunt Patres eadem ratione innixi, D. Athanasius oratione contra gentes, « ea, inquit, quæ sunt, appello bona, quæ non sunt, mala; quæ sunt bona, quoniam à Deo, qui est essentia ipsa exemplar trahunt, quæ non sunt mala, quia nullâ essentiâ subsistunt... » D. Basilii in homiliâ, quòd Deus non est auctor mali, ait, malum est boni privatio... D. Ambrosius lib. de fugâ seculi, cap. 4, observat Joannis cap. 14, v. 30, loco verborum, et in me non habet quidquam, multos legere, non inveniet in me nihil, deinde addit: Hoc est, non inveniet in me malitiam, quia malitia nihil est... D. Augustinus enarratione in Psalmum 18, n. 13: Si, inquit, videntur tenebræ, intelliguntur delicta; at tenebræ fiunt tenebræ per meram lucis absentiam...

TH. X.

Idem S. doctor lib. 12 Confessionum cap. 11, n. 11, Deum sic alloquitur (quod sedulò observanda utpote decretorium): Hoc solum à te non est quod non est, motusque voluntatis à te, qui es, ad id quod minus est, quia talis motus delictum ut peccatum est; tandem lib. 1 contra Julianum cap. 9, n. 4, hæc egerit: Quid est malitia nisi boni indigentia? Non sunt mala nisi quæ privantur bonis, quia indigentia boni radix malitiæ est... D. Fulgentius lib. de Fide ad Petrum diaconum cap. 21, dicit: Malum nihil aliud est nisi boni privatio... Sanctus Joannes Damascenus lib. 2 orthodoxæ Fidei cap. 4: Neque aliud, inquit, quidquam est malum quàm boni privatio; haud secus ac tenebræ aliud nihil sunt quàm luminis orbitas... Demùm, ut alios præteream, idem passim decantat D. Thomas, ut fusè ostendit Sylvius in 1-2, q. 7, art. 6. Ex pluribus testimoniis hæc sufficiant. p. 1, q. 48, art. 1, in corp., sic arguit: « Unum oppositorum cognoscitur per alterum, sicut per lucem tenebræ; unde et quid sit malum, oportet ex ratione boni accipere... Non potest esse quòd malum significet quoddam esse, aut quamdam formam, seu naturam. Relinquitur ergo quòd nomine mali significetur quædam absentia boni, et pro tanto dicitur quòd malum neque est existens, neque bonum. » Idem repetit art. 2, in corp.: Remotio, inquit, boni privativè accepta malum dicitur, sicut privatio visus cæcitas dicitur. Idem citatis in locis primæ secundæ docere intendit, cum nempe dixit peccatum esse actum humanam malum; nam voces, actus humanus, designant materiale peccati; hæc verò, malus, ejusdem peccati formale sive formalem et completivam peccati rationem, quam S. doctor reponit in aversione à bono incommutabili, sive in privatione consonantiæ cum æternâ lege.

Concinunt tandem ipsi philosophi divinatorum dogmatum vel ignari, vel inimici; Plato, Aristoteles, Plotinus, Procles, Sallustius, etc., ut ostendit Petavius loco commemorato, n. ult.

Jam verò, si præclara illa testimonia, et comparationes, quas includunt, ad vivum discutuntur, et æquâ trutinâ ponderentur, nemo, opinor, præjudiciorum expertus negaverit iis longè magis stabiliri opinionem peccati essentiam in privatione reponentem, quàm opinionem eam in aliquo positivo collocantem. Imò huic opinioni accommodari nequeunt nisi per contortas et à longinquo advocatas explanationes, quæ naturalem et obvium eorum sensum evertunt. Hinc nostra sententia Theologorum animis tam altè infixâ fuit, ut omissionis pecca-

tum in solâ privatione consistere supposuerint, atque præsentem questionem post Cajetani tempus de solo *commissionis* peccato instituerint, quemadmodum non dilitentur ipsimet positivæ peccati naturæ defensores.

Nihil non tentaverunt quidam recentiores realis mali moralis naturæ architecti ut commemorata oracula cluderent, quemadmodum evincunt hæc ipsorum responsa sive argumenta.

Obijciunt 1^o : Laudati textus tangunt primitivam malitiam quæ peccato ab extrinseco accedit, non positivam sive internam malitiam quæ peccatum formaliter constituit, et privativam malitiam necessariè parit; ergo. — Resp. Adversarios gratis, et per *petitionem principii*, ut loquuntur logici, obtendere privationem non primariò et formaliter, sed secundariò et extrinsecè malum constituere, siquæ intelligendos esse Scripturam et Patres cum de malo disserunt. Enimverò, aut Scriptura et Patres peccati naturam nullibi attigerunt, aut eam in mera privatione reposuerunt, cum semper et ubique peccatum *nihilum*, *privationem*, *defectum* renuntiant; at primum indubiè absurdum, siquidem nihil fingi potest ejus sordida natura magis esset patefacienda; aliunde modus quo enuntiantur commemorata oracula, formalem peccati rationem commonstrat; sunt enim exclusiva, *malum nihil aliud est quàm boni privatio*, *quàm absentia boni debiti*, etc., peccati radicem reserant mali essentiam non minus attingunt quàm naturam tenebrarum, cæcitatatis, etc.; ergo.

Obijciunt 2^o : Plures Patres unicè intendunt peccatum esse nihil prout opponitur substantiæ malæ per se subsistenti, quam fabricaverant Manichæi, non autem prout opponitur positivæ tendentiæ voluntatis in objectum legi contrarium; ergo. — Resp. Nugari velle qui hæc obijciunt. Ex dictis enim ita exprimuntur Patrum dicta, ut à malo omnem omninò eliminant existentiam, sive sit substantialis, sive modalis tantum; enimverò, si Patres vocem *nihil* acceperint quatenus adversatur substantiæ, sive enti, non autem entis actui, sive modificationi, suum adversus Manichæos scopum non attigissent; Deus quippe in ipsorum systemate causa fuisset peccati non solum quoad substantiam sive materiam, verum etiam quoad deformitatem moralem, sive illius formam; nullum enim est ens, nullus realis entis modus, ejus Deus non sit prima causa efficiens.

Obijciunt 3^o : Scriptura et Patres, cum peccatum nihil reputant, designare volunt terri-

biles peccati effectus, quibus homo totum animæ decorem amittit, bestiis, quibus non est intellectus, similis fit, à Dei filii dignitate deijcitur, et quasi nihil evadit in Dei conspectu, juxta illud Psalmi 14 : *Ad nihilumeductus est in conspectu ejus malignus*; ergo. — Resp. Hæc equidem omnia mala irruere in hominem per mortiferum delictum; sed cur? nisi quia *latatur in nihilo*, *sese fert ad id quod minus est*, *sese à Deo avertit*, etc., ut loquuntur Scriptura et Patres; unde infanda tot malorum colluvies nostram sententiam stabilis et confirmat; tantum abest ut illam concutiat et infirmet.

Obijciunt 4^o : Scriptura et Patres exhibent malum in genere et in abstracto, quod nullum habet subjectum, id est quod ab illâ aut illâ voluntate non oritur, non autem in *malum peccati*, sive prout à peccante emanat, et consideratur in concreto; ergo, etc. — Resp. Et antecedens, et etiam consequens manifestam spirare falsitatem; antecedens quidem, Scriptura enim et Patres verba faciunt de delicto, de peccato, de iniquitate, quæ dubio procul iniquè agentem supponunt et arguunt. Deinde SS. Ambrosius et Augustinus locis indicatis expressam mentionem faciunt subjecti peccati... Consequens autem; peccatum scilicet in quantum peccatum est malum; si ergo formalis mali in genere ratio consistit in privativo, formalis etiam peccati ratio in privativo consistet.

Obijciunt 5^o : Si quæ peccatum *nihil* esse enuntiant Scripturæ et Patrum oracula stricto sensu essent intelligenda, dicendum foret sacerdotes absolvere à *nihilo*, Deum propter *nihil* fontes æternis condemnare suppliciis, etc.; insulsum consequens; ergo. — Resp. Non advertere qui hæc proponunt Patres in antecessum hujusmodi cavillationes amandasse. Asserunt enim, per *tenebras*, per *cæcitatem* illicò concipi delicta, etc. Jam verò, quis hanc eructet argutiolum? « Si tenebræ forent mera lucis absentia, aut cæcitas visus privatio, dicendum esset Deum cum initio mundi tenebras à facie abyssi lucis creatione discussit, *nihil* discussisse, aut Christum cum visum cæcis restituit, *nihil* eis restituisse. » Quid adversarii? Ventosum nugatorem profectò irriderent; ergo et ipsi irrideri debent. Igitur nego majorem; commemorata enim oracula non significant, peccatum esse purum nihil, qualis est chimæra, aut puræ negationes, sed ipsum esse *nihil*, prout nihil opponitur positivo enti, vel entis modificationi, quia peccatum, qua-

tenens peccatum est carentia sive absentia boni, quod adesse deberet, sicut cæcitas visus, et tenebræ sunt lucis privatio. Unde, cum à parte rei existat subjectum, quod debitâ rectitudine caret, nimirum voluntas, sive actus voluntatis, peccatum sub isto respectu dici potest, et vulgò dicitur *existere*, ad eum modum quo quis dicitur cæcus, et Genesis I dicuntur *tenebræ fuisse super faciem abyssi*. Hinc sacerdotes à peccatis absolventes à puro nihilo non absolvunt, quia maculam per peccatum animæ inustam detergunt, sive efficiunt ut anima gratiâ sanctificante destituta illâ exornetur, quia contractam pœnæ æternæ vel temporalis obligationem dissolvunt, quia saluberrimo ipsorum ministerio animæ, quæ per actus præposteros Deo displiceret, jam ipsi non displicet. Pariter Deus sotes pœnis afficiens eos propter purum nihil non muletat, quia eos plectit propter debitum habendi quod peccando habere noluerunt; unde castigantur propter peccatum non *abstractivè* duntaxat, sed et *concretivè* consideratum, quatenus scilicet est actus debito ordine carens. Illud totum luculenter exponit et illustrat doctor Seraphicus, in 2, sent. dist. 34, art. ultimo, « Etsi, inquit, peccatum nihil est in recto, est tamen in obliquo alienius entis ut oppositi, et alienius ut subjecti, circa quod relinquit debitum respectu boni privati. Igitur peccatum est meritum pœnæ, non solum ratione privationis, sed ratione debiti relictî et boni privati. Unde non est homo dignus puniri solum quia bono caret, sed quia caret et debet habere; et licet carentia illa nihil sit, debitum tamen aliquid habendi aliquid est, et ideò ex hoc non sequitur quòd Deus puniat hominem pro nihilo, quàmvis peccatum nihil sit. »

Confirmatur. Deus, adversariis non dissentientibus, hominem punit propter omissionis peccata; hæc, inquit Christus, oportuit facere, et illa non omittere; at docet D. Thomas omissionis delictum posse esse absque omni actu non solum exteriori, sed etiam interiori, ut supra diximus; ergo.

Obijciunt 6^o: Laudati Patres, præsertim Augustinus et Thomas, agnoscunt peccatum esse actum; ergo. — Resp. Et nos cum eximîs illis doctoribus agnoscere peccatum *physicè* spectatum esse actum, non autem *formaliter* et in genere moris consideratum. Id suggerit ipse Augustinus, ubi ait lib. 12 Confessionum cap. 11, *motum voluntatis*, id est substantiam actûs, esse à Deo, non verò quod non

est, hoc est absentiam consonantiæ cum lege, quæ reperitur in motu voluntatis, sive in actu vitioso.

Obijciunt 7^o: Ipsâ ratione deprehenditur peccatum, quatenus peccatum, primariò non consistere in privatione. Etenim concipitur tendentia positiva in objectum legi dissonum, quæ est radix omnis defectûs peccato insiti, ante illam privationem: ideò videlicet actus malus rectitudine sibi debitâ destitui intelligitur quia voluntas cum eliciendo tendit in objectum in quod tendere non deberet; sicut ergo extensio actualis non constituit materiæ essentiam, quia aliquid in materiâ ante istam extensionem intelligitur, nimirum extensio radicalis, ita et privatio rectitudinis, etc. Argumentum istud esse insolubile nonnulli gloriantur recentiores. — Resp. Non attendere qui hæc ostentant se questionem supponere, et dum inextricabilem difficultatem nobis procreare aggrediuntur, insolubilem sibi ipsis facessere. Enimverò libera illa voluntatis in malum objectum tendentia est peccatum; atqui non est peccatum quatenus præcisè est actus voluntatis, sive est ens physicum aut morale, cum omnis rei aut modi veri ac positivi Deus sit prima causa; ergo peccatum fit per debitæ rectitudinis carentiam. Etenim D. Thomas locis in probatione citatis ratione demonstrat peccatum ut peccatum in privatione boni consistere. Idem ostendunt Augustinus et Damascenus dicendo ex conceptione tenebrarum concipi naturam peccati. Demùm, quemadmodum actio moralis, quando id totum habet quod moraliter habere debet secundum rectam rationem bona est et bona esse concipitur, ita et actio moralis, quando caret aliquo ex iis quæ secundum rectam rationem habere debet mala est et mala esse concipitur. Igitur in omni peccato quod primum concipitur est privatio debitæ rectitudinis.

Obijciunt 8^o: In nostrâ sententiâ Deus esset auctor peccati. Etenim actus malus à Deo oriretur non solum ut est actus simpliciter, sed etiam ut necessariè importat privationem; privatio quippe illa necessariè erumpit ex positione actûs, et ideò quicumque actum ponit illam ponere censetur. — Resp. Hanc objectionem positivæ peccati naturæ defensoribus longè potiori ratione esse deglutendam; est scilicet Deus cujuslibet entis aut realis entis modi auctor; unde Deus in nostrâ sententiâ esset ad summum peccati auctor *indirectè et*

consequenter, quatenus nempe ex positione ejus actûs exurgeret peccatum, sive privatio rectitudinis; in adversariorum verò systemate est *formaliter* et *directè* peccati causa, quia id facit quod formaliter peccatum est. Neminem igitur movere deberet istud argumentum, etsi solvi non posset; argueret tantum mentis humanæ limites, et quotidie fit contra immediatum Dei concursum, concessam à Deo homini libertatem, aliaque similia quæ ab omnibus aut fere omnibus admittuntur. Nego igitur minorem, et dico Deum, utpote causam primam et universalem, ponere cum creaturâ materiale peccati, ex quo nascitur formale, sed formale peccati soli imputandum esse creatæ voluntati, quæ liberè elegit materiale ex quo exurgebat malum, sive quæ determinavit Deum ad ponendum secum peccati actum.

Obijciunt ultimò diversa argumenta ex ratione emergentia. Malum bono contrariè opponitur; sed duo contraria sunt aliquid positivum; ergo. — Resp. Malum *concretè*, id est quatenus est actus debito ordine destitutus, bono, contrariè, *abstractè* verò, sive quatenus est præcisè defectus requisitæ rectitudinis, sumptum, bono privatè opponi, ut ex dictis satis superque liquet.

Item. Nonnulli actus, velut odium Dei, etc., intrinsicè mali sunt; sed tales necessariè evadunt per aliquid reale; privativum scilicet in rei naturâ non recipitur; ergo. — Resp. Actus intrinsicè malos eos dici et esse quibus deformitas, id est privatio requisiti ordinis, in omni prorsus circumstantiâ essentialiter illigata est; unde non sunt intrinsicè perversi ratione materiæ, sive entitatis physicæ, *etiamsi modalis sit*, siquidem quicquid est reale essentialiter bonum est, et ideò discrimen quod occurrit inter rem intrinsicè, et rem non intrinsicè malam, oritur non ex parte modi realis utriusque proprii, sed ex parte formæ, sive privationis recti ordinis sine quâ illa nunquam, hæc autem aliquando esse potest.

Item. Peccati iterata commissio gignit peccati habitum; sed mera privatio non potest producere aliquid positivum; ergo. — Resp. Habitum illum oriri ex solo peccato *concretè* accepto, sive quatenus est actus præposterus; habitus enim non acquiritur nisi per actuum repetitionem.

Item. Actus fit malus per suam cum objecto suo relationem; sed illa relatio est realis, cum ejus extrema sint realia; ergo. — Resp. Actum vitiosum non effici quatenus præcisè suum

respicit objectum, sed unicè quatenus ad illud objectum indebito modo refertur, sive quatenus privationem includit.

Item. Si boni privatio peccati formam constitueret operans illam secundum se intendere deberet, siquidem peccatum est essentialiter voluntarium; falsum consequens; ergo. — Resp. Peccati formale, sive inordinationem à voluntate posse intendi vel directè et per se, vel indirectè et per accidens; ut peccatum reputetur voluntarium haud directè et formaliter intendi debet, sed satis est illud indirectè appeti et ratione alterius, nimirum ad vitandum aliquod malum, aut consequendum aliquod bonum; porro, evidens est quemlibet liberè peccantem peccati deformitatem non prosequi quatenus est in se et absolutè deformitas, sed unicè quatenus habet rationem boni relativi; voluntas enim, ut aiunt philosophi, non potest diligere malum quâ malum.

Item. Si forma peccati in boni privatione esset reponenda, unum peccatum alio majus esse non posset; una quippe privatio aliâ major non est; falsum consequens; ergo. — Resp. Privationem mali propriam majus aut minus recipere; scilicet non est privatio, quæ totam prorsus oppositam formam dealeat, qualis est, v. g., mors quæ totam tollit vitam; sed est privatio quæ ita formam oppositam, id est boni rationem derimit, ut aliquid illius relinquat. Hinc peccatum majus illud est quod magis recedit à regulâ morum, sive quod objectum suum attingit modo magis indebito, et ideò majorem inducit boni privationem.

Item. Genus est de intrinsicâ ratione rei quæ definitur; sed actus est genus in definitione peccati, et actus est quid reale; ergo. — Resp. Actum esse *materiale* non *formale* peccati. Hic autem quæstio movetur de formâ quæ rei, id est peccato *esse* infundit; quanquàm nihil vetat dicere cum nonnullis actum in peccati definitione non esse genus, sed se habere instar generis; in his quippe moralibus accuratæ definitiones non sunt exquirendæ, et aliunde malum quâ malum in privatione consistit.

Denique in peccato reperitur non solum aversio à bono incommutabili, sive declinatio ab æternâ ratione, sed etiam conversio voluntatis ad bonum commutabile, quæ conversio D. Thomæ judicio peccatum constituit in hæc vel illâ determinatâ peccati specie; sed illa conversio est quid positivum; ergo. — Resp. cum D. Bonaventurâ in 2 Sent. dist. 42,

art. 5. q. 1, aversionem à bono incommutabili, sive aeternā lege, efficere ut conversio, quæ in eodem peccato reperitur, sit peccatum; conversionem verò, quæ eidem peccato inest, efficere ut aversio sit tale peccatum. Privatio scilicet boni in genere est id solum quod constituit peccatum in genere peccati, illudque discernit ab omnibus, quæ non sunt peccata. Verùm peccatum in specie talis peccati constituitur per determinatam istam privationem quæ inducitur per talem vel talem inordinatum actum, sive conversionem ad bonum commutabile. Hinc concipimus quidem peccatum in genere consistere in merā privatione absque ullo actu, sed non concipimus peccatum in hac vel illā specie constitui posse absque hoc vel illo voluntatis actu, cum hæc vel illa privatio induci nequeat sine tali vel tali voluntatis motu. Quamobrem conversio ad bonum commutabile secundum se non est mala, sed solum secundum boni privationem ipsi necessariè annexam, ad eum ferè modum quo locus, qui secundum se tenebrosus non est, ob lucis absentiam dicitur et est tenebrosus.

PRINCIPIA SOLUTIONUM. — Primum. Diximus duntaxat sententiam peccati naturam in privatione reponentem sacrorum codicum et SS. Patrum de peccato oraculis esse magis consentaneam. Hinc cuncta argumenta quæ assertionem sub alio respectu impetunt sunt peregrina et non ferunt. Secundum. Quæstionem istam fusè ventilavimus, tum quia exploratam facit peccati naturam, tum quia essentialiam habet cum veri Dei existentia et sanctitate connexionem. Tertium. Positiva voluntatis tendentia in objectum legi dissonum, in quā peccati formale constituunt nonnulli recentiores, nihil aliud est quàm motus voluntatis ad id quod minus est, sive ad malum; sed Augustino dicente lib. 12 Confessionum cap. 11, hic *motus est à Deo*. Quartum. Omnia ferè in nostram assertionem argumenta unicā distinctione peccati *concretè*, sive prout importat actum cum quodam defectu, et *abstractè*, sive formaliter sumpti, id est prout est præcisè peccatum, liquescunt et diluuntur.

Liber secundus.

DE AVITA MACULA.

Celeberrimam de originis delicto disputationem quinque capitibus absolvemus. Primum ejus existentiam vindicabit.... Secundum illius

naturam quantum fieri poterit reteget.... Tertium modum quo transmittitur investigabit.... Quantum expendet ad quos traducatur.... Quintum ejus effectus assignabit....

CAPUT PRIMUM

De originis delicti existentia.

QUESTIONIS SENSUS ET STATUS. — Deus Adæ, statim à creatione, de *omni ligno* paradisi edere permisit, fructus verò unius arboris esum sub gravi penā vetuit, Genesis 2. Arbor illa *scientiæ boni et mali* fuit nuncupata, non ratione sui, quasi istam scientiam potuisset infundere, sed ratione experientiæ, sive eventus. Nimirum, inquit D. Augustinus lib. 2 de peccatorum meritis et remissione, cap. 21, n. 55, *Adam et Eva quid boni custoditā, et quid mali transgressā Dei prohibitionē sensuri erant*. Hinc ejusdem S. doctoris judicio (ibidem), si nulla fuisset Dei prohibitio circa istius arboris fructus esum, potuisset Adam illum ut alios fructus comedere; quamobrem, addit ibidem, *quod mali passi sunt arborem tangendo ipsis non intulit esus fructus arboris, sed sola obedientia violata*. Deus igitur Adæ non dedit præceptum de re per legem naturæ vetitā aut præscriptā, id est intrinsecè bonā aut malā, sed de re indifferente, ut ostenderet quantum bonum sit obedientia, et quantum malum inobedientia.

Deus permisit Adam et Evam à dæmone tentari Genesis 3, licet consensuros esse prævideret, eo quòd *magnæ laudis non fuissent si propterea benè vixissent quia nemo malè vivere suasisset*, inquit D. Augustinus lib. de Genesi ad litteram, cap. 4, n. 6.

Eva ex dæmonis seductione, et Adam ex Evæ consilio vetitum fructum comedendo peccaverunt Genesis 3. Multiplex fuit in Evæ peccato peccatum: inobedientiæ scilicet, quā Dei præceptum violavit.... Gulæ, quā cibi suavitate ad edendum fuit impulsus.... Infidelitatis, dum verbis diaboli adversus Deum loquentis credidit.... Curiositatis, quā scientiam ultra terminos sibi præfixos concupivit.... Scandali, quo virum suum ad peccatum induxit. Horum etiam peccatorum reum se constituit Adam, dum ex præpostero erga uxorem suam amore maluit Deo displicere quàm uxorem contristare. Verùm præcipuum Adæ et Evæ peccatum fuit superbia, quā uterque propriā virtute boni malique scientiam consequi audebat, siquæ Deo similis fieri. Hinc Tobie 4 dicitur: *In superbiā initium sumpsit omnis perditio*. Hinc id inculcat D. Aug. lib. 14 de Civitate Dei cap. 14 et 15,

citato libro 41 de Genesi ad litteram, cap. 5 et 50, n. 59. Enchiridion cap. 45, recensens varias species, quæ in uno Adæ peccato fuerunt, ait: *superbia est illic, quia homo in sua potius esse quam in Dei potestate dilexit*. Etverò, cum in statu innocentie pars animæ inferior superiori perfectè fuerit subdita, prima inordinatio appetitûs humani versari non potuit circa aliquod bonum sensibile. Versata igitur est circa aliquod bonum spirituale quod supra modum sibi à Deo præscriptum appetit homo, quod est superbiæ proprium.

Adæ peccatum maximè liberum fuit; alias nec Adæ nec ejus posteris potuisset imputari. Hanc libertatem in Adam ubique agnoscit S. Aug. v. g. lib. 6 Operis Imperfecti adversus Julianum, n. 46: *Meis, inquit, rationibus ostenditur, Adam non solum potuisse non peccare, si nollet, sed nec mori, si peccare noluisse*. Hæc ex ratione capite 13 commemorati libri 14 de Civitate Dei, colligit maximum fuisse peccatum Adæ, cui tanta inerat non peccandi facilitas.

Licet præceptum non edendi fructum arboris scientiæ boni et mali ad Evam non minùs quàm ad Adam pertinuerit, ex solo tamen Adæ peccato utriusque posteri peccatum originale contraxerunt, ut docet D. Thomas 1-2, q. 81, art. 3. Scilicet præceptum illud pertinuit ad Evam quatenùs fuit persona singularis; ad Adam verò quatenùs fuit caput totius generis humani. Hinc istud oraculum Ecclesiastici 25: *A muliere factum est initium peccati, et per illam omnes morimur*, hunc habet sensum, morimur per Evam mediàtè quia Evæ peccatum causa fuit vel occasio Adæ peccati, quo solo inficimur.

Quæritur præcisè, an Adæ nepotes in suo conceptu maculam contrahant, quâ fiant iræ filii et Dei inimici. An, inquam, istam contrahant maculam quia sunt Adæ nepotes, id est de vitio ejus semine nascuntur, ita ut simul cum illo per primum ejus peccatum justitiam originalem et omnes ejus dotes amiserint; an è converso primum Adæ peccatum ipsi soli, non ejus nepotibus nocuerit, et idcirco ad eos non fuerit transmissum.

Errores. — Pelagius, et insignes ejus sectatores, Cœlestius, Julianus, etc., censuerunt Adæ peccatum ipsi, non ejus nepotibus obfuisse.... Adam moriturum fuisse quamvis non peccasset, etc. Ex palmaribus illis principiis inferrebant Adæ nepotes nulum ex ipso contrahere peccatum, ipsos in præsentì statu, ut

et ipsum Adam, non culpæ merito, sed conditione naturæ interire; illos tales nunc nasci qualis ante peccatum fuit Adam, nempe sine virtute et sine vitio, et ideo baptizari non ut à peccato expurgentur, sed ut à bono ordine in meliorem, quem *regnum Dei* vocabant, transferantur; unde sine baptismo morientibus promittebant extra regnum Dei æternam quandam et beatam vitam. Hæc refert D. Aug. libro de hæresibus, hæresi 83; Catholicorum armis adorsus Pelagius effugium (ut solent hæretici) in verbis aucupatus est. Mentem suam subdolè reticens confessus est, Adæ delictum ejus nepotibus nocuisse (intelligebat exemplo, non propagatione)... Infantes tales nunc non nasci qualis fuit Adam ante lapsum (intelligebat infantes libero arbitrio non potiri ad eum modum quo illo in ortu primo potitus est Adam), etc.

Diu stare non potuit supinum Pelagii systema. Illius discipuli aliud eodem jure excogitaverunt, scilicet corporis mortem et alias hujus vitæ miseras ex Adamo in præsentì ordine oriri, non peccatum quod est mors animæ. Testis iterùm est D. Aug. lib 4 contra duas epistolas Pelagianorum, cap. 4, n. 6.

Illi hæretici Augustino exprobrabant quòd nuptias exploderet, Manichæismum renovaret, Dei opera subsannaret, etc. Sic hodiè Jansenius et ejus defensores Catholicis Semipelagianismi crimen impingunt.

Pelagii errorem recoxerunt Albanenses circa annum 769, Albigenes anno 1178, Anabaptistæ anno 1540, hodiè Sociniani et Deistæ.

Alii novatores obgannierunt, peccati originalis nomine non culpam designari, quâ inquinentur Adæ posterì, sed pœnæ duntaxat reatum; alii solum significari actuale Adæ peccatum, quod parvulis est externum, non internum, etc.; quæ opiniones à Pelagii errore voce tenùs duntaxat discrepant; è medio scilicet tollunt peccatum originale quo infantes per generationem naturalem coinquinantur, et æternà pœnà digni sunt.

Adversus illos hæreticos sic ex pretiosis sacrorum codicum et traditionis monumentis primigeniæ maculæ, quam quisque Adæ nepos ipso conceptûs sui instanti contrahat, existentiam vindicabimus, ut incredulorum rationibus refellendis diligentiorè impendamus operam; admissà scilicet Scripturæ et traditionis auctoritate, originalis noxa insulsè negaretur; unde obstupescbat Augustinus quòd viri christiani hunc errorem seriò defenderent. Aliunde hæresis pelagiana à longo tem-

pore extincta est et solùm spirat in Anabaptistis in quibusdam Germaniæ angulis delitescentibus.

ARTICULUS PRIMUS.

Avitam delictam ex sacris tabulis eruitur.

Plura in utroque fœdere affulgent oracula, quibus D. Augustinus et theologi hereditariam noxam feliciter retexerunt. Præcipua hæc sunt. Job. 14. v. 4, in Vulgatâ legitur: *Quis potest facere mundum de immundo conceptum semine, nomen tu qui solus es?* In editione 70 habetur: *Nemo mundus à sorde, ne infans quidem cuius est unius diei vita super terram.* Is, de quo hic sermo, est immundus, cum mundus ab ipso Deo mundari nequeat, et quidem ab ipso conceptu, de quo hic aperta mentio; sed is immundus non est corporis immunditiâ, aliâ ab homine posset mundari, non à solo Deo, ut asserit textus; ergo immundus est animi immunditiâ sive peccato; ergo est peccatum quo homini ab ipso conceptu inhæret, et ideò peccatum originale, cum talis homo actuali peccato contaminari non possit; tale autem peccatum non potest esse externum, in quod non cadit propriè dicta mundatio, de quâ sacer contextus. 2 Cor. 5, arguit Apostolus: *Si unus pro omnibus mortuus est, ergo omnes mortui sunt, et pro omnibus mortuus est Christus.* Hæc ratiocinatio omnes et singulos sive infantes sive adultos mortuos esse ostendit; aliâ conclusio ex præmissis non scaturiret. Jam verò disserit Apostolus de morte spirituali, id est de morte animæ per peccatum; ubique enim clamat Scriptura Christum non venisse vocare justos sed peccatores, Christum pro impiis, pro injustis esse mortuum; infantes igitur mortem spiritualem incurrunt; sed mors illa non oritur ex peccato actuali, cuius non sunt capaces; ergo oritur ex peccato primi parentis. Ita D. Aug. lib. 6 contra Julianum cap. 5, n. 14: « Quo ore, inquit, quâ fronte parvulos mortuos negatis, pro quibus Christum mortuum non negatis? tu negas, si audes, natum mortuum pro quo Christum non negas mortuum »

Omissis aliis oraculis, prodeat illud quod D. Aug. adversus Pelagianos urget ad avitam maculam comprobendam, et ejus vestigiis insistens S. synodus Trid. sess. 5, canone 2. Consignatur Rom. 5, his verbis: *Per unum hominem peccatum in hunc mundum intravit, et per peccatum mors, et ita in omnes homines mors pertransiit; in quo omnes peccaverunt... sicut per inobedientiam unius hominis peccatores constituti sunt multi, ita et per unius obedientiam justi*

constituentur multi. Ex his sic arguimus: Peccatum originale illud est quod omnes et singulos homines ex Adam satus inficit et inficiendo morti obnoxios efficit; at commemoratum oraculum talem maculam commonstrat; exhibet nimirum Adamum, omnes et singulos homines, et ideò ipsos parvulos, peccati actualis nescios, et tandem verum peccatum, et quidem non imitatione (ut reponebant Pelagiani), sed propagatione reapse contractum: etenim vocis, *per unum hominem*, Adamum representant; versu quippe 14, expressa mentio fit Adam, et 1 Cor. 15, expressè dicit Apostolus *omnes mori in Adam*. Deinde homo per quem peccatum intravit in mundum et in quo omnes peccaverunt, non est Eva, cum genus masculinum feminam non connotet; ergo est Adam. Demùm ad evincendam peccati originalis veritatem probâsse sufficeret omnes homines in uno peccasse. Item vox, *omnes*, omnes et singulos homines designat, tum quia ex se hanc habet communicationem, tum quia eos depingit, qui morti obnoxii facti sunt, quales indubiè sunt omnes et singuli homines. Item vox, *peccatum*, veri nominis peccatum exprimit, non effectum peccati, qualis est propensio in peccatum, aliâve id genus æruginæ; enuntiat enim peccatum per quod omnes reverà peccaverunt; sed non peccant per effectum peccati; aliâs immeritò dixisset Apostolus Rom. 8, *nihil esse damnationis iis qui sunt in Christo Jesu*, id est qui baptizati sunt. Deinde Paulus ibi clarè distinguit *peccatum et effectum peccati*; dicit enim per peccatum mortem intrasse in mundum, et ideò docet primi hominis peccatum esse causam mortis et aliarum hujus vitæ miseriarum; certè Deus Adæ dixerat, *quâcumque die comederis de ligno (vetito) morte morieris*, et Apostolus cap. sequenti ait, *mortem esse stipendium peccati*. Item verba, *peccatum, et peccaverunt*, denotant peccatum, quod non imitatione, sed propagatione contrahitur. Etverò, peccatum, de quo disserit Apostolus, est peccatum quo inquinati sunt ipsi parvuli; sed parvuli peccare non possunt per imitationem, sed solùm naturali origine. Hinc, etsi loco verborum, *in quo omnes peccaverunt*, esset legendum, *quatenus omnes, etc.*, ut nonnullis placuit, causam non obtinerent adversarii.

Confirmatur. Hæc locutio, *in quo omnes peccaverunt*, manifestè significat, omnes in Adam tanquàm principio et radice generis humani peccasse, sive, ut loquitur D. Aug. lib. 1 de peccatorum meritis et remissione cap. 9, n. 10:

Adam occultâ tabe carnalis concupiscentiæ suæ tabificasse in se omnes de suâ stirpe venientes. Nam relativum, *in quo*, non tangit peccatum, quod in græco est generis femini, et etiamsi illud tangeret, significaret *omnes in peccato Adam peccasse*, id est esse reos peccati adamici; mortem etiam non refert, siquidem *omnes in morte non peccant*, licet plurimi in peccato moriantur; solum ergo Adamum exhibet. Jam verò qui alicujus peccatum imitantur in ipso peccare dici nequeunt. Sic, ut arguit D. Aug. lib. 1 de peccatorum meritis, etc., cap. 10, nullibi dicitur in Scripturis, iniquos peccasse vel peccare in diabolo, quamvis *in-pii omnes eum imitentur*; sic nullus, pergit ibidem S. doctor, dicitur justificatus in Petro aut Paulo (sed in solo Christo), licet nonnulli eorum sanctitatem imitentur. Deinde totus Apostoli contextus inane illud effugium explodit; etenim Paulus comparisonem instituit Adamum inter et Christum; sed Christus justitiam non imitatione sed regeneratione diffundit; ergo et Adam peccatum non imitatione sed generatione transmisit.... Addit per Adæ *inobedientiam multos constitutos fuisse peccatores*; at particula, *per*, manifestè ostendit Adæ inobedientiam non occasionem, sed veram causam fuisse hæreditariæ Adæ nepotum maculæ.... Idem evincit particula, *ex*, versu 6: *Judicium fuit ex uno in condemnationem*... Demùm id evincit pronuntiatum istud ad Ephes. 2: *Naturâ filii iræ sumus*; vox enim, *naturâ*, non imitationem, sed originem adumbrat.

Ex his elucet argumentum ex Apostoli oraculo Rom. 5, pro peccati originalis existentia deductum, nullâ arte eludi posse. Hinc D. Augustinus, postquàm lib. 1 de peccatorum meritis, etc., cap. 9, Apostoli verba protulit, ovans addidit: « Hoc si ego dicerem, resisterent isti (Pelagiani), meque non rectè dicere, non rectè sentire clamarent; nullam quippe in his verbis intelligerent sententiam cujuslibet hominis, nisi istam quam in Apostolo intelligere nolunt; sed quia ejus verba sunt, ejus auctoritati doctrinæque succumbunt, nobis obijciunt intelligendi tarditatem, cum ea quæ tam perspicuè dicta sunt, in nescio quid detorquere volunt. »

1º Pelagiani in omne latus se verterunt ut apostolici oraculi Rom. 5 vim et robur ab Augustino singulari ingenii acumine et nervoso ratiocinio patefactum debilitarent. Rom. 5, iniquiebant, dicitur, *unius delicto multos mortuos esse*, v. 13.... *gratiam Dei* (per Christum) in

plures abundasse, ibidem.... Per Adam multos constitutos esse peccatores, sicut per Christi obedientiam justii constituantur multi, v. 19, etc. Sed hæc Adami delicti ad omnes et singulos illius nepotes transmissionem elevant; omnes quippe et singuli homines per Christum non justificantur, et etiamsi justificarentur, per Adam non perirent; cum gratia Dei per Christum in plures abundaverit quàm Adæ delictum. — Resp. Nego minorem. Apostolus enim v. 15 et 19, dixit multos in Adam periisse, v. 12, et 18, omnes in Adam peccasse et condemnatos fuisse, et ideò omnes et multos Adæ delicto mortuos esse. Quâ autem ex causâ hæc locutione usus est? Ut ostenderet, omnes ferè homines, qui sunt multi, id est in numero maximo, sive propemodum infinito, in Adam peccasse, non autem omnes omnino, sive nullo excepto; Eva quippe, Christus et Virgo Maria, licet ex Adam orti, in ipso non peccaverunt. Unde apostolica efflata his prorsus similia sunt: *Diluvii tempore omnes homines corruerant vias suas; diluvii tempore multi corruerant vias suas*; qui enim luctuosus illis diebus in delictorum gurgitem præcipientes irruerant, multi erant, hoc est in numero ferè infinito, sed non omnes absolutè et nullo excepto, siquidem Noe et ejus familia Deo addicti remanserant.... Porro, si vox, *plures*, v. 15, comparativo sensu est accipienda, indicat duntaxat gratiam Christi pluribus illapsam esse quàm originalem sordem; stillavit enim cœlestis ille ros in Adam, Evam et Mariam, qui hæc lue in origine non sunt contaminati. Si verò vox, *plures*, non comparatè, sed positivè et absolutè usurpata est et ideò significet omnes, sive multos, ut citatis versibus indicavit Paulus gratiam Dei per Christum abundasse in omnes sive multos, quemadmodum Adæ peccatum ad omnes sive multos transmissum est. Cæterùm, intendit Apostolus ostendere Christum plus profuisse per gratiarum copiam ex infiniti pretii meritis suis emanantem quàm Adam per delictum suum nocuerit; gratia enim Christi delevit primigeniam et sordidissimam peccatorum actualium colluviem.

Urgebant Pelagiani: Versus 12, *Per unum hominem.... in quo omnes peccaverunt*, solum actuale peccatum refert; eundem enim exhibet sensum ac versus immediatè sequens cum quo jungitur per particulam, *enim*; at iste versus actuale delictum deinceat; sic enim se habet: *Usque ad legem enim peccatum erat in mundo; peccatum autem non imputabatur, cum lex non*

esset. At desiperet qui hæc verba non actuali, sed originali delicto accommodaret, quod utpote propriè dictum peccatum quolibet ævo hominibus imputavit Deus. — Resp. 1^o Estium et alios celebres interpretes versusum 15 aptasse actuali macule, cui ante Moysis tempus pœna à publico magistratu non infligebatur, cum tunc nec lex (Mosaica) nec publicus vindex sceleris existeret; neque hæc expositio argumento vacillat; potuit enim Apostolus peccati originalis extantiam educere ex peccatis actualibus in quæ Adæ nepotes irruerant, cum ista delicta eruperint ex concupiscentiâ, quam idem Apostolus in eadem Epistolâ peccatum dicit, quia oritur ex Adæ peccato, et ad peccatum inclinat. — Resp. 2^o Alios, fortassis probabilius, autumare eundem versusum ipsum etiam avitum delictum exprimere, et ideò hunc ingerere sensum: « Peccatum originale exitit quidem usque ad legem, sed tamen non fuit imputatum ab hominibus, qui illud ante legem Mosaicam confusè duntaxat cognoscebant. » « Erat, inquit D. Aug. lib. 6 adversus Julianum, cap. 4, n. 9, peccatum (originale) sed non deputabatur, quia non cognoscebatur; per legem enim, sicut in alio loco dicit, cognitio peccati (actualis et originalis). » Et verò versus 14 ostendit, peccatum quod ex versu 15 in mundo vigeat, et non imputabant mortales, à Deo fuisse imputatum etiam parvulis qui non peccaverant in similitudinem prævaricationis Adæ, id est qui propriâ voluntate, ut Adam, non peccaverant. Ibi scilicet legitur: *Mors ab Adam regnavit usque ad Moysen etiam in eos qui non peccaverunt in similitudinem prævaricationis Adæ.* At mors, ut ait idem Apostolus, *est stipendium peccati*, et ideò parvulis à Deo infligi non potuit, nisi Deus ipsis peccatum imputaverit.

2^o Idem Pelagiani peccatum originale sacris aliis oraculis auferre aggrediebantur. Ezechielis cap. 18, sancit Deus: *Filius non portabit iniquitatem patris*; quod, inquiebat, in peccati originalis dogmate prorsus falsum esset. — Resp. Sacrum Vatem per *patrem* primum parentem adumbrasse vel non; si istud, evanescit difficultas; si illud, duo reponit D. Aug. lib. 6 contra Julianum cap. 25, n. 82, primum, Prophetam annuntiare Adæ posteros in novo Fodere per suam in novum Adam regenerationem non ampliùs patris iniquitate esse onerandos (quod et prædixit Jeremias cap. 31, v. 29 et sequentibus)... Alterum (ibidem cap. 40, n. 28, filios Adæ, etiam ante regenera-

tionem, non portare iniquitatem primi parentis sed suam; *peccatum enim Adæ originale est Adami proprietate actionis, sed nostrum est contagione propagationis*, inquit S. doctor, id est, peccatum Adæ hoc ipso nostrum est quòd in eo et cum eo illud simul commiserimus. Utraque responsio difficultatem diluit; priorem tamen menti et verbis Ezechielis magis accommodatam esse crediderim; videtur enim nihil aliud prædicere voluisse quàm quod prædixit Jeremias loco citato; idem quippe proverbium affert, et iisdem ferè verbis utitur; at certum est istum Prophetam commendare mirabilem novi Fœderis baptismi efficaciam et virtutem.

Cæterùm fateantur oportet adversarii filium, qui etiam paternæ iniquitatis non particeps est, justè ob illud alienum scelus aliquo temporali damno, ac ipsâ morte affici posse; quod inter alia exempla satis superque ostendit interitus filii quem David ex Uriæ uxore primitus genuerat.

5^o Idem Pelagiani sibi vindicabant apostolicum effatum Rom. 4: *Ubi non est lex nec prævaricatio*; parvuli scilicet legis sunt incapaces, ergo et peccati. — Resp. Apostolo dicente Rom. 5: *Omnes*, et ideò ipsos parvulos, *in Adamo peccasse* ob rationem postea deducendam, et ideò ipsis in primo parente legem esse impositam.

4^o Idem novatores obtrudebant hoc pronuntiatum 2 Corinth. 5: *Omnes nos manifestari oportet ante tribunal Christi, ut referat unusquisque propria corporis prout gessit sive bonum sive malum*; inde enim elucescit quemcumque propter solum proprium peccatum damnari posse. — Resp. Cum D. Augustino lib. 6 contra Julianum cap. 10, n. 29, ibi sermonem esse vel de solis adultis, vel de quibuslibet mortalibus; si primum, ruit argumentum; si alterum, parvuli nihil quidem mali propriâ voluntate gesserunt, non ita alienâ voluntate; quemadmodum igitur ubi baptismo renascuntur referunt bonum quod per paternos egerunt, id est fidei meritum, ita ubi sine baptismo obeunt, referunt malum quod per alium gesserunt, Adam scilicet in quo *omnes peccaverunt*.

ARTICULUS II.

Primigenii delicti existentia constanti Ecclesiæ traditione et praxi evincitur.

Peccati originalis dogma velut canonicis tabulis insculptum et ab Apostolis promulgatum amplexi sunt, et quoties protervis linguis fuit vellicatum, totis viribus tutati sunt nascentis

et adolescentis Ecclesiæ Christiani ad hæc usque tempora; ergo.

Probat aut. Ac primò quidem nascentis Ecclesiæ fideles ad quintum usque seculum, quo exorta est hæresis pelagiana, peccati originalis dogma velut certum habuerunt. Hujus facti testem damus D. Augustinum et probitate et eruditione celeberrimum. Lib. 3 de peccatorum meritis et remissione cap. 6, n. 12, miratur quòd suo ævo nonnulli avitam maculam majorum visceribus insculptam inficiari ausi sint. Deinde, prolato D. Hieronymi super caput tertium Jonæ de peccato originali testimonio, addit: « Hunc doctissimum virum si facillè interrogare possemus, quàm multos utriusque linguæ... scriptores commemoraret qui non aliud, ex quo Christi Ecclesia constituta est, senserunt, non aliud à majoribus acceperunt, non aliud posteris tradiderunt? Ego quidem, quamvis pauciora legerim, non memini me aliud audivisse à Christianis, qui utrumque accipiunt Testamentum, non solum in catholice Ecclesiæ, verum etiam in quâlibet hæresi vel schismate constitutis, non memini me aliud legisse apud eos quos de his rebus aliquid scribentes legere potui. » Lib. 1 contra Julianum, cap. 3, n. 5 et seq., postquàm dixit, in re tam apertâ et tam certâ inutile esse omnium antiquiorum Patrum sententias commemorare, adducit testimonia Irenæi Lugdunensis episcopi, Cypriani Carthaginensis præsulis, Reticii ab Augustoduno pontificis, et Olympii Hispani episcopi, duorum veterum Patrum, quorum opera non extant, Hilarii et Ambrosii... Ibidem cap. 4, n. 13, inducit Julianum provocantem ad episcopos orientales, et respondet, « eam partem orbis sulcicare debere, in quâ primum Apostolorum suorum voluit Dominus gloriosissimo martyrio conorare, ac Innocentium primum, et Zozinum hujus Ecclesiæ præsides ab ipso audiendos esse, cum docere non potuerint nisi quod antiquitùs apostolica Sedes et romana cum cæteris tenet perseveranter Ecclesia. » Ubi obiter observa quantum hallucinantur qui negant aut Petrum Romæ mortuum esse, et primatûs dignitatem ad romanos episcopos transmisisse, aut Ecclesiam romanam à fide desciscere posse. Deinde, cap. 5 et sequentibus, et toto libro secundo refert, Gregorium Nazianzenum, Basilium, Chrysostomum, Hieronymum, etc.

Peccati originalis fides ante Pelagium mortali animis tam altè infixâ fuit, ut nullus hæreticus vel schismaticus eam labefactare ausus

fuerit. Testis iterum est D. Aug. citato libro 3 de peccatorum meritis et remissione; inò ipsimet hæretici, quorum intererat illud dogma negare, vel in dubium vocare, in hanc audaciam non proruperunt. Enimverò S. doctor commemorato lib. 3, cap. 7, n. 13, refert ipsius Joviniani, qui nuptias monialibus suadebat asserendo eas apud Deum conjugatis nihil ampliùs meritorum consequi, in mentem nunquàm venisse affirmare absque peccato originali nasci hominum filios, quamvis ad nubendum procliviores fuissent feminae, si se foetus mundissimos parituras esse credidissent. Hinc eodem Augustino testante lib. 1 contra Julianum cap. 5, n. 19, synodus Dispolitana, aut Diospolitana, in Oriente ex quatuordecim episcopis conflata, « Pelagium damnavisset nisi ipse damnavisset eos, qui dicunt, quòd peccatum Adæ ipsum solum læserit, et non genus humanum, et quòd infantes nuper nati in eo statim sint, in quo Adam fuit ante peccatum, et infantes, etiamsi non baptizentur, habere vitam æternam. » Idem Augustinus perpetuam de peccato originali traditionem delineat, quoties hoc dogma specialiter propugnat, nempe in tribus libris de peccatorum meritis et remissione, uno de peccato originali contra Pelagium et Cœlestium, duobus de nuptiis et concupiscentiâ, sex adversus Julianum, et quatuor contra duas epistolas Pelagianorum ad Bonifacium.

Item quoties peccati originalis dogma fuit impugnatum, toties reclamavit Ecclesia. Hanc reclamationem exploratam faciunt varia concilia Orientis et Occidentis quibus pelagiana hæresis de peccato originali velut in ortu suo præfocata fuit. Ea referunt historiæ ecclesiasticæ scriptores. Obstupuit Ecclesia cum hæresim istam tot fulminibus prostratam renovaverunt 16 seculo Anabaptistæ, et alii quidam ex Protestantium grege fanatici homines. Unde synodus Tridentina eam anathemate rursus ferire coacta fuit sessione 5, canone 2, his verbis: « Si quis Adæ prævaricationem sibi soli, non ejus propagini asserit nocuisse, et acceptam à Deo sanctitatem et justitiam, quam perdidit, sibi soli et non nobis etiam perdidisse, aut inquinatum illum per inobedientiæ peccatum mortem et pœnas corporis tantum, in omne genus humanum transfudisse, non autem et peccatum, quod mors est animæ, anathema sit, cum contradicat Apostolo dicenti, *per unum hominem*, etc. » Hæc concilii verba ex antiquissimæ præsertim synodi Arausicanæ II,

canone 2, deprompta sunt; adeò verum est Ecclesiam Romanam novitatem nescire, et apostolicæ doctrinæ esse tenacissimam. Denique totius Ecclesiæ sententiâ circa peccatum originale mirificè patefacit baptismi administratio; constat scilicet (neque id unquam negare ausi sunt Pelagiani), constat, inquam, baptismum quolibet seculo, infantibus, quoties periculum imminabat, ne eâ in ætate morerentur, fuisse administratum. Elverò, quomodò id neglexisset Ecclesia cum Christus absolute dixerit Joannis cap. 3: *Nisi quis renatus fuerit ex aquâ et Spiritu sancto, non potest intrare in regnum Dei?* at Ecclesia iis parvulis baptismum administravit, ut eos è potestate dæmonis eriperet, et ipsi peccati remissionem perciperent. Ubi obiter nota Pelagianos eò insanix et temeritatis tunc non prorupisse, quò proruperunt 16 seculo Protestantes, et nostris diebus novatores, nimirum ut totius Ecclesiæ usum floccifacerent, et subsannarent.

Probatur minor. Ecclesia aliâ ex causâ baptismum illis infantibus conferre non potuit. Etenim ex Christi institutione baptismus peccatum delet; institutus quippe est ut per gratiam renascamur; sed nemo renasci potest per gratiam nisi peccato mortuus fuerit; institutus est ut moriamur peccato et justitiæ resurgamus, Rom. 6; sed nullus potest mori peccato et justitiæ resurgere, nisi peccato coinquinetur, et ejus remissionem consequatur; institutus est ut per *verbum vitæ* aquæ applicatum, id est per formam baptismi, mundemur, lavemur, renascamur, regeneremur, Actuum 22, ad Ephesios 5, ad Titum 3; sed hæc necessariè maculas arguunt quæ detergantur; ergo. — Item Ecclesia aliâ ex causâ non voluit baptismum iis parvulis impertire quàm ut ipsos ex peccato et dæmonis servitute eximeret, et servos faceret justitiæ. Enimverò, id oculis ipsis subjiciunt cæremoniæ quas velut ab incunabulis suis in solemnî baptismi administratione adhibuit; illæ enim sunt exorcismi, exsufflationes et preces, etc., quibus ab infantibus spiritum immundum, sive diabolum abigit, et à Deo ejici rogat; quod profectò non fecisset nisi illos sub dæmonis jugo captivos detineri et vero inquinari peccato pro certo habuisset. Jam verò infantes, qui baptizantur ut à dæmonis servitute eripiantur, et peccati remissionem obtineant, mundari nequeunt à peccatis actualibus quorum non sunt capaces; ergo mundantur à peccato originali, id est in eis regeneratione mundatur quod generatione contraxerunt.

Hoc argumentum ventilans D. Aug. libro tertio Operis Imperfecti adversus Julianum, hanc hæreticum sic subsannat: « Cur exsufflet baptizandos parvulos Ecclesia Christi ostende, si potes, aut eos exsufflandos non esse contende, si potes, aut obmutesce, si non potes; inò obmutesce quia non potes. » Idem S. doctor lib. 5, n. 9, eundem Julianum reponentem parvulos per baptismum non mori peccato, sed renasci duntaxat ut meliores fiant et filii Dei adoptivi, sic compellat: « Catholica Ecclesia in parvulis exsufflat et exorcizat, utique potestatem diaboli, non imaginem Dei.... Tu magnus mirabilarius, dicis sanguinem Christi etiam pro parvulis fundi, et negas eis per illum peccata ulla dimitti! Dicis lavandos, et negas ablucendos! Dicis innovandos, et negas à vetustate mundandos! Dicis per Salvatorem adoptandos, et negas esse salvandos! » etc. Hic sanè ridendi sunt Protestantes qui commemoratas baptismi cæremonias sive ritus, quos retinuit Ecclesia romana, vituperant. Quid de illis sentiret Augustinus si hodiè viveret? Quid ipse Julianus? Non minùs ridendi sunt novi Pelagiani, id est Anabaptistæ, Sociniani, Deistæ, et aliæ hujusmodi pestes, qui D. Augustinum, ubi peccatum originale prædicavit, novatorem fuisse obganniant; reclamat enim non solum sacra Scriptura et constans Patrum et Ecclesiæ traditio et usus; ut diximus, sed etiam ipsi lapides; Romæ scilicet in Constantinianâ basilicâ leguntur ista carmina à Sixto III elaborata, et ipso jubente insculpta lapidi super sacrum fontem:

Mergere, peccator, sacro purgande fluento;

Quem veterem accipiet, proferet unda novum.

Insans esse volens, isto mundare lavacro.

Nulla renascentum est distantia: quos facit unum

Unus fons, unus spiritus, una fides.

Objici potest 1^o: Clemens Alexandrinus, qui exeunte seculo 2 floruit, lib. 3 Stromatum, Basilidianos et alios nuptiarum hostes revincens originalis peccati in Adæ nepotes transfusionem apertè explodit; ait scilicet: « Dicant ergo nobis ubi fornicatus est infans natus? vel quomodò sub Adæ cecidit execrationem qui nihil est operatus? Restat ergo eis, ut videtur, consequenter ut dicant malam esse generationem, non solum eam quæ est corporis, sed etiam quæ est animæ, propter quam etiam corpus. » Porro, si infans non cadit sub Adæ execrationem, indubiè avitæ maculæ expers est; ergo. — Resp. 1^o censere nonnullos peccatum originis Clementi non fuisse omninò exploratum,

alios è converso commemorata verba Clementis textui pelagianâ manu fuisse inserta. Etenim, inquit, nonnihil impeditum exhibent; et Baronio dicente post Rufinum ad annum 446, quaedam Clementis opera ab hæreticis reipsa sunt corrupta, et hæc ex causâ à Gelasio papâ apocrypha declarata. Hæc conjectura ex agendi ratione Juliani aliquatenus etiam erni posset; ille quippe novator, qui D. Chrysostomum Augustino opposuerat (lib. 1 S. doctoris adversus Julianum cap. 6), pro immensâ suâ eruditione et sagacitate testimonium sibi tantoperè favens clausum non retinisset si suo tempore apud Clementem extitisset. — Resp. 2º, P. Alexandrum in historiâ secundisæculi dissertatione 8, reponere 1º, Clementem ibi de originali peccato non disserere, sed unicè de hæreticorum systemate, qui innixi illo Psalmi 50: *In iniquitatibus conceptus sum*, etc., actum generandi malum, sive execrandum, esse gariebant. Eos autem refellit ostendendo infantes *non cadere sub Adæ execrationem*, id est non contrahere peccatum originale, per actum generandi qui sit peccatum, sed per aliud medium. Favent ipsa objecta verba; ex adversariorum enim systemate concludit, *malam esse generationem non solum corporis sed etiam animæ*; et post objectas voces fatetur, infantem *sic in peccatis esse conceptum ut non sit ipse peccatum*, id est peccatum comitari quidem conceptum sive generationem, sed conceptum sive generationem non esse formaliter peccatum.... 2º, Clementem probasse adversus Basilidianos, qui, ut refert lib. 1 Stromatum, docebant animas antequàm corporibus unirentur conditas actu peccasse; probare, inquam, adversus illos hæreticos infantes, cum nascuntur, actuali illo peccato non esse contaminatos; favent rursus citata verba: *Dicant nobis ubi fornicatus est infans natus, vel quomodo sub Adæ cecidit execrationem qui nihil est operatus?* etc.

Has responsiones confirmat eruditus historicus ibidem variis rationibus; cum scilicet D. Athanasius, patriarcha Alexandrinus, sermone in hæc Christi verba: *Omnia mihi tradita sunt à Patre meo*, testetur peccati originalis fidem intimis Ecclesiæ Alexandrinæ visceribus fuisse inscriptam (idem testatur Origenes Clementis discipulus); quis autem existinaverit pium et doctissimum hujus Ecclesiæ presbyterum Clementem ab illâ fide vel tantillam recedere voluisse, aut etiam potuisse? Deinde Clemens, libro 1 Pædagogi cap. 6, docuit per baptismum qui semper infantibus in vitæ saltem discri-

mine constitutis fuit impertitus, peccata deleri, et ideo in illis parvulis peccatum alienâ voluntate commissum agnovit. « Tincti, inquit, illuminamur; illuminati in finis adoptamur; adoptati perficimur; perfecti immortales reddimur; multis autem modis vocatur hoc opus, gratia, illuminatio, perfectum, et lavaerum; lavaerum quidem, per quod peccata abstergimus; gratia autem, quâ remittuntur pœnæ quæ peccatis debentur; illuminatio autem, per quam sanctam illam et salutarem lucem intuemur, hoc est per quam id quod est divinum perspicimus; perfectum autem dicimus cui nihil deest.... »

Objici etiam posset Tertullianus apud Alex. in hist. seculi 5, diss. primâ, qui lib. de baptismo cap. 18, baptismum parvulorum differendum esse inter alia probat, quod *fieri debent Christiani cum Christum nosse potuerint, et incassum festinaret innocens ætas ad remissionem peccatorum*. Verùm lectori illicò compertum fit virum eximium hæc protulisse ut privatam suam sententiam de baptismo infantium differendo (quam Ecclesia Africana S. Cypriano in epistolâ ad Fidum referente in numerosâ synodo improbavit) utcumque suaderet; parvuli scilicet rationis compotes facti fidem per se profiteri poterant, et onera sibi per baptismi receptionem imposita modo perfectiori cognoscere, et aliunde peccatorum actualium remissionem impetrare, ut mox commemoratis verbis significat, in quibus, non *peccati* singulari, sed *peccatorum* plurali numero mentionem facit. Etverò, vel in ipso loco objecto agnoscit parvulos à nativitate recenter baptizari solitos fuisse, eodemque in libro cap. 1, per *sacramentum aquæ à pristinâ cæcitate hominem liberari, et in Dei similitudinem restitui*; quin peccatum ab Adam in omnes ejus nepotes diffundi expressè docet lib. de Animâ, cap. 40. « Omnis, inquit, anima eò usque in Adam censetur, donec in Christo recenseatur; tandiù immunda quamdiù recenseatur. Peccatrix autem quia immunda recipiens ignominiam ex carnis societate. »

Cæterùm, hæc arguendi ratio, *innocentes sunt infantes, non indigent peccatorum remissione*, etc., peculiaris non fuit Tertulliano; quidam alii doctores negaverunt, *infantes esse peccatores*, id est propriâ voluntate peccasse.

Objiciebat 3º Julianus (et cum ipso novi Pelagiani) apud Aug. lib. 1, cap. 6, n. 21, D. Chrysostomum homiliâ ad Neophytos dicentem: « Infantes baptizamus, cum non sint

coinquinati peccato, ut eis addatur sanctitas, iustitia, adoptio, hereditas, fraternitas Christi, ut ejus membra sint; » ergo. — Resp. cum D. Aug. ibidem 1^o, n. 25, unum doctorem, quantalibet eruditione et pietate refulserit, ubi cum aliis non concinit, non esse audiendum. « Si, inquit S. doctor Joannem Chrysostomum alloquens, quod Julianus sentit te sentire claruisset, nunquàm te unum, pace tuâ dixerim, tot ac talibus præferre possemus in eâ causâ, de quâ nunquàm fides christiana et Ecclesia catholica variavit. » Quid post hæc sentiendum de istâ Jansenianorum generali propositione, si quis invenerit doctrinam benè fundatam in Augustino; potest illam sustinere contra omnes pontificis bullas? Quid de Jansenii temeritate ad unum Augustinum semper provocantis et Patres græcos sæpius contemnentes?... 2^o, n. 24 et seq., Chrysostomum, si originale peccatum negaverit, in apertam contradictionem esse prolapsum; varia ibi adducit S. doctoris testimonia in gratiam peccati originalis. Istud sufficiat, ab Augustino licet non commemoratum: homiliâ 40 in priorem ad Corinthios præclare ait: « Deus in regenerationis lavacro mentem gratiâ tangit, radicale peccatum (à radice nempe sive ab Adamo tractum) evellit, et ut tu aurum ferrumve recoquendo purum novumque facis, sic Spiritus ille sanctus in baptismo velut in fornace recoquit ipsam, et peccatum consumendo quolibet auro puriorem facit... » 3^o, n. 22, non legi apud Chrysostomum, *cum non sint inquinati peccato*, sed *cum peccata non habentes*, propria nempe, inquit S. doctor, sive *personalia*. Alii ejusdem homiliæ codices, quorum meminit Sylvius, habent, *ut non sint inquinati peccato*. Alii eandem homiliam à Chrysostomo abjudicant; quidquid autem sit, agnovit hujus homiliæ auctor peccatum originale; hæc enim habet: « Venit semel Christus, invenit nostrum chiographum paternum, quod scripsit Adam. Ille initium induxit debiti, nos fœnus auximus posterioribus peccatis. » Vox, scilicet, *nostrum*, ostendit illud chiographum ad nos pertinuisse antequàm fœnus posterioribus peccatis augeremus.

Obijciunt 4^o novi Pelagiani plurima alia D. Chrysostomi testimonia. Homiliâ X in epistolam ad Romanos Apostoli verba, *in quo omnes peccaverunt, unius inobedientiâ peccatores*, etc., exponit de morte, non de peccato, et expressè negat unius inobedientiâ homines peccatores potuisse constitui, etc. — Resp. Ibi docere Chrysostomum homines per Adam morti

fuisse obnoxios, sive, ut loquitur, *supplicio obnoxios esse et ad mortem damnatos*; sed mors supponit meritum mortis et supplicium culpam; unde ibi designavit per mortem et supplicium peccatum originale, sicut causa interdum designatur per effectum. Negat autem unius inobedientiâ alterum propriâ voluntate peccatorem constitui potuisse, quia nempe ridiculum est ut quis propriâ voluntate peccet quia alter propriâ voluntate peccavit; sed non dicit ridiculum esse asserere homines fuisse in Adamo peccatores quatenus geniti sunt cum peccatum in eo per modum habitus remanebat; quinimò id agnoscit, cum asserat eos Adæ inobedientiâ supplicio et morti obnoxios factos fuisse: illud nimirum non fuisset justum si Adæ peccatum ipsorum non fuisset peccatum.

Quamquàm reponi potest Chrysostomum negare duntaxat homines per Adam peccatores evasisse modo irreparabili, aut cum Sylvio et Patre Alexandro, in hist. 5^o seculi, dissertat, primâ, hæc illius verba, *quòd Adæ inobedientiâ alter peccator fiat, quam consequentiam habet?* ab ipso proponi per modum objectionis, quam deinde diluit dicendo homines inobedientiâ Adæ, utpote primi omnium parentis supplicio et morti fuisse subditos. Etverò, hæc in ipsâ homiliâ X passim peccatum originale prædicat, ut videre est apud D. Aug. et P. Alexandrum locis commemoratis.

Item homiliâ 17 in epist. 1 ad Corinthios peccatores exitium suum in Adam rejicientes sic revincit: « Quid faciam? inquit, propter « Adam pereo? Minimè propter Adam, neque « enim tu sine peccato permansisti. Quòd si « non idem peccatum, aliud tamen commisi « sti, » etc. — Resp. ex ipsis objectis verbis manifestum esse adultos depingi quibus originis delictum per baptismum est remissum; at nemo ibit inficias tales homines propter peccata personalia perire. Quamobrem tantum abest ut illud testimonium paternæ maculæ existentiam tollat, quinimò illam supponit, et ostendit.

Item homiliâ 39 in eandem epistolam 1 ad Corinth. negat, *omnes in Adam mortuos esse morte peccati*. — Resp. ex contextu elucescere S. doctorem edisserere, non quamlibet peccati mortem, sed solam mortem æternam et irreparabilem; continuo scilicet addit: *Noe, Abraham, Job in generatione suâ* (id est vel in suâ posteritate, vel in vitæ curriculo, per æternam fidei in venturum Messiam professionem) *justi fuerunt*. Unde sensus est: *Omnes in*

Adam mortui non sunt peccati morte, ex quâ nūquam eximendi forent; aliis nemo justus fuisset. Equidem Chrysostomus cō loci, hæc Apostoli verba: Omnes in Adam moriuntur, exponit de morte et resurrectione corporis: verum quâ ex causâ? Ut revineat Manichæos, qui de spiritali resurrectione, id est à peccati solutione, exponebant quæcumque Apostolus ad Corinthios scribens de resurrectione dixit; at mortem animæ haudquaquam excludere voluit; eam enim alibi passim ex corporis morte, quam dicit esse supplicium et pœnam, eruit et colligit.

Item homiliâ 24 in Epistolam ad Ephesios hæc habet: « In corpus quidem nostrum cadit corruptio, sed in animam non cadit. Num autem ipsam quoque corrumpimus? hoc fecit prius peccatum. Quod est autem post lavacrum, potest etiam animam corrumpere, et efficere ut facile capi possit à verme mortali. » Igitur peccatum Adæ corruptit solum corpus, peccata è converso personalia corrumpunt etiam animam, et ideò non existit peccatum quod per generationem animam inficiat. — Resp. ex sermonis serie et antithesi hunc elucescere sensum. Baptizati etiam post baptismum ex patrio crimine corpus habent corruptioni obnoxium; sed eorum mens, sive anima, per baptismum regenerata est omnino incorruptibilis, si baptismi gratiam retinere voluerint, ac ideò sola peccata mortalia post baptismum commissa, cum in eis vita finitur, eorum animas perpetuæ corruptioni subicere possunt. In his autem nihil deprehenditur quod peccati originalis dogmati nocere valeat.

Cæterum, quòd Chrysostomus suam de peccato originali mentem aliquandò clarè non expresserit mirum videri non debet. « Disputans scilicet, inquit D. Aug. Juliani objectionem diluens, in Ecclesiâ catholicâ non aliter se intelligi arbitrabatur; tali quæstione nullus pulsabatur, vobis nondum litigantibus securius loquebatur. » Idem profectò de aliis Patribus, qui ante pelagianam hæresim floruerunt, dicendum; idem reponendum Jansenio ejusque discipulis qui D. Aug. auctoritatem adversus Ecclesiæ catholicæ definitiones obtrudere non desinunt.

Obijciunt 5^o Theodoretus sententiam qui lib. 5 hæreticarum fabularum cap. 18, dicit, *infantes peccatum non gustasse*. Exponens caput quintum Epistolæ ad Romanos asserit, Adæ posteros ex occasione peccati primi parentis in peccata lapsos esse. Alibi docet, mortem ex Adæ pec-

cato ad nos transiisse, et propter proprium unumquemque mortem subire; ergo. — Resp. hæc testimonia nullam, aut levem procreare posse difficultatem. In primo nimirum actuale peccatum depingitur; in secundo, paterni criminis existentia vindicatur; ideò enim peccamus quia naturam corruptam et vitiatam ex Adamo trahimus. In tertio meritò dicitur nos propter proprium peccatum mori, cum Adæ peccatum nostrum omnium sit. Consuli poterit eruditus Pater Garnerius è societate Jesu, qui accuratam Theodoretus editionem in lucem emisit anno 1684, et quædam obscura illius loca illustravit.

Obijciunt 6^o D. Ambrosium commentario in caput 5 Epistolæ ad Romanos, Arnobium juniorem in Psalmum 50, et Lactantium, qui vixerunt initio quarti seculi. — Resp. illos commentarios opus non esse D. Ambrosii, sed Hilarii Sardi Ecclesiæ romanæ diaconi, quem pelagianæ hæreseos accusat Jansenius Ypresensis aliis contradicentibus. Vide Patrem Alexandrum in historiâ seculi quarti. Quidquid sit, docet dumtaxat nos peccato Adæ præcisè non pati gehennam, sed ejus occasione propriis delictis nos illo condemnari supplicio: quæ si non sunt vera (non enim consona videntur Scripturæ, D. Aug. et quorundam aliorum Patrum dictis), existentie tamen peccati originalis nullum inferunt præjudicium.... Arnobius qui obijcitur non is est Arnobius Lactantii præceptor, qui septem libros adversus Gentes edidit, de quo Baronius ad annum 202, sed auctor multò recentior, qui pelagianâ hæresi fuit imbutus. Cæterum objecto loco in parvulis excludit peccatum actuale, non originale... Denique Lactantii opera multis erroribus conspersa sunt, ut ostendit Baronius ad eundem annum.

Obijciunt 7^o S. Gregorium Nyssenum, qui in oratione de infantibus præmaturâ morte raptis dicit: *Infans simplex omnique malitiæ expers... sanitate, quæ per purgationem contingit, non indiget*; ergo. — Resp. Gregorium disserere de infantibus baptizatis, qui non indigent sanitate quæ per ignem purgatorium acquiritur; libro quippe de vitâ Moysis, tradit naturam nostram in peccatum lapsam esse.

Obijciunt ultimò D. Optatum Milevitanum, qui in fine 4 seculi, lib. 7 adversus Parmenianum, asserit non pertinuisse ad Seth Adæ filium patris admissum. Resp. 1^o, eruditos, inter quos P. Alexander in Synopsi seculi 4, inter se non convenire an liber ille septimus genuinus sit Op-

tati Milevitani fœtus. Resp. 2º, notum esse Optatum ibi refellere Donatistas, qui prætendebant imputari majorum crimina qui sacros codices certò tradiderant; quod ut obtineat, adducit Scripturæ testimonia, quæ enuntiant, *animam quæ peccaverit solam esse puniendam*. Cùm igitur illa sacrorum librorum traditio fuerit actuale peccatum, et commemorata oracula idem peccatum connotent, evidens est Optatum solum actuale et personale delictum ibi adducere, et ideò unicè intendere non pertenuisse ad Seth Adæ peccatum quatenus erat personale, sed quatenus erat peccatum naturæ in Adamo totius generis humani capite vitiatæ. Etverò agnoscit lib. 2 et 4, per baptismum ab homine abigi *spiritum immundum*, eundemque hominem *spiritualiter Deo renasci*.

PRINCIPIA SOLUTIONUM. — Primum. Ex his elucet permulta existere Scripturæ et Patrum oracula, quæ pelagianæ hæresi de peccato originali favere videbantur. Istud tamen dogma et Scripturis et traditione extra quamlibet dubitationem innuitur. Non ergo movearis cùm videris Boli, Jansenii, etc., sectatores in hexaplis et aliis pestiferis ejusmodi operibus immensam testimoniorum copiam, quorum nonnulla etiam prava ipsorum dogmata interdum fulcire videntur, ostentantes.

Secundum. Clemens Alexandrinus, et quidam alii Patres, sacra oracula, quibus peccatum originale asseritur, de isto delicto aliquando non intellexerunt, magis scilicet hæreticis, quos impugnabant, refellendis quàm illis oraculis exponendis intenti. Eorum vestigiis inter alios D. Aug. insistens celebre Apostoli testimonium 1 ad Tim. 2 : *Deus vult omnes homines salvos fieri*, etc., non excluso obvio illius sensu alienis exposuit sensibus ut adversarios in majores conjiceret angustias.

Terium. Cuncta ferè ex Patrum dictis adversus peccati originalis sacramentum contorta argumenta concidunt attendendo ea dicta spectare vel peccatum proprium et personale, cujus incapaces sunt infantes, non originale sive alienâ voluntate commissum, vel baptizatos homines nullo indubiè peccato contaminatos, etc.

Quartum. Patres qui homines morti obnoxios et ad peccandum proclives agnoscunt inter peccati originalis dogmatis defensores recenseri debent, cùm mors et propensio in peccatum in præsentì ordine avitum delictum prænuntient.

ARTICULUS III.

Utrum peccati originalis dogma rationi repugnet?

1º. In memoriam revoca peccatum originale verum esse peccatum, non actuale quidem, sed habituale, quod omnes ab Adam naturali propagatione descendentes in primo existentiae suæ instanti ex æquo intrinsecè contrahunt, quodque eos Deo invisos efficit, et æternâ pœnâ dignos. sive, ut loquitur Apostolus ad Ephesios 2, *iræ filios* constituit. Quæritur an hujus peccati existentia rationi adversetur.

2º. Observa cum D. Aug. nec Scripturam et traditionem divinam rationi, nec rationem Scripturæ et traditioni divinæ repugnare posse. « Si, inquit S. doctor epist. 143, aliàs 7, n. 7, ratio contra Scripturæ divinæ auctoritatem redditur, quàmlibet acuta sit, fallit verisimilitudine, nam vera esse non potest. Rursus, si manifestissimæ et certæ rationi Scripturæ divinæ objicitur auctoritas, non intelligit qui hoc facit, et non Scripturæ sensum, ad quem penetrare non potuit, sed suum potius objicit veritati, nec quod in eâ, sed quod in seipso invenit opponit. » Porro originalis peccati existentia Scripturâ et traditione constat; nulla igitur adversus eam invicta ratio objici potest.

Tertiò. *Mirò prorsus modo fit, ut quod dimissum est in parente trahatur in prole*, inquit D. Aug., et ideò istud dogma argumentis ex ratione desumptis positivè demonstrari non potest, cùm humane mentis, non secus ac eæt ra christianæ religionis mysteria, captum longius exsuperet. Hinc quæritur præcisè, an peccati originalis dogma nonnullis rationis momentis utcumque suaderi possit, et an argumenta rationis quibus impugnari potest, verè demonstrativa cordato viro videri debeant; quæ duo seorsim expendemus.

§ 1. *An ex rationis luce aliquatenus erui possit peccatum originale?*

Negabant, ut diximus, Pelagiani, et hodiè inficiantur Anabaptistæ, Sociniani et Deistæ.

Conclusio. — Ratio nonnulla suggerit momenta quæ peccati originalis existentiae famulari videntur.

Primum illud est quod centies adversus Pelagianos adhibet D. Aug. Exurgit ex vehementissimâ concupiscentiâ, quâ in malum nitimur, ex dirâ morte, ex immensâ miseriarum cohorte, quibus, ne ipsis quidem infantibus exceptis, hæc in vitâ obruimur, id est, ut

omnia compendiosè dicam, ex *gra i jugo*, quod, ut refertur Ecclesiastici 40, constringit colla filiorum Adæ à *die exitus de ventre matris eorum usque in diem sepulture*; at tot et tante miseriæ, quas ipsi patiuntur infantes, suadere videntur eos non nasci innocentes; nequaquam enim concipi potest quomodo omnipotens, summè providus, sapiens et justus Deus, insontes creaturas tantoperè torqueret, vel torqueri sinere posset. Quare nonnulli veteres sapientes id seriò secum recogitantes, primævam quoddam peccatum in naturâ præcessisse conjecerunt et suspicati sunt. Non nostrum est hoc ratiocinium, sed celeberrimi gratiæ vindicis frequens argumentatio. « Si, inquit lib. 1 Operis Imperfecti adversus Julianum, tibi placet innocenti parvulorum, remove ab eis, si potes, grave jugum... quis non videat, si habent innocentiam, in gravi jugo eorum non esse Dei justitiam?... nisi fortè dicas voluisse quidem Deum eis subvenire, quia justus est, sed non potuisse, quia omnipotens non est... Deus igitur tuus in tot et tantis malis, quæ parvuli patiuntur, aut justitiam, aut omnipotentiam, aut ipsam curam rerum humanarum est perditurus. » Hæc ratione S. doctor sibi impactum de principio increato malo Manichæorum errorem in Julianum retorquebat.

Scio quidem nonnullos recentiores reponere Augustinum ideò duntaxat hæc argumentatione usum fuisse, quia antea peccatum originale ex sacris Litteris, quas admittebant Pelagiani, evicerat. At præterquam quòd Julianus et alii Pelagiani non ex Scripturis tantum, sed sæpius ex ratione istud dogma impugnabant, qui ideò per rationem erant refellendi, certè hujus exceptionis auctores se augustinianæ doctrinæ penitus ignaros, aut saltem eà parùm admodum imbutos produnt. Enimverò S. doctor, qui in libris de Civitate Dei se paganos confutare intendisse refert lib. 2 Retractationum cap. 43, lib. 22 de Civitate cap. 22, idem impendit argumentum. Neque reponant hanc ratiocinationem naturæ puræ possibilitatem vellicare; Sedes enim apostolica nunquam definivit, justum Deum potuisse insontem hominem creare cum concupiscentiâ et aliis miseriis *quoad gradum* prorsus æqualibus iis quas in præsentī ordine experimur, ut postea ostendemus. Cæterum D. Thomas, lib. 4 contra Gentes, cap. 52, initio D. Augustini ratiocinium probavit, et suum fecit.

Secundum adversus Pelagianos passim con-

cinat idem Augustinus. Erumpit ex intimo naturalis pudoris sensu, quem ex inordinatis exæstuantis concupiscentiæ ardoribus cuncti illicò percipiunt mortales. Bonus scilicet et justus Deus non potest hominem condere hujusmodi pudori obnoxium, sive cum pudore qui ex inhonestâ illâ concupiscentiæ libidine exoritur. Sed audiamus eximium doctorem suum hoc argumentum cum nervoso vigore et robore proponentem. Dixerant Pelagiani, *motum genitalium, id est ipsam virilitatem sine quâ non potest esse commixtio, à Deo esse institutam*. Quid Augustinus? Reponit lib. 1 ad Bonifacium, sive contra duas epistolas Pelagianorum, cap. 43, n. 31, Deum *sic primitus instituisse motum genitalium, ut nihil haberet pudendum, quia fas non fuit ut erubesceret creatura de sui opere Creatoris*. Deinde cap. 16, n. 33, postquam exposuit hominis in præsentī statu generationis operi vacantis erubescendi necessitatem, concludit ipsi persuasum esse debere illam oriri ex suâ culpâ, non ex naturali constitutione, de quâ non licet pudore affici. « Itaque, inquit, suâ culpâ sibi accidens malum natura humana permittatur agnoscere, ne cogatur, aut quod est impudentissimum, de his suis motibus non erubescere, aut quod est ingratissimum, de sui Creatoris operibus erubescere. » Tandem cap. 17, n. 35, mentem suam penitus aperiens ait: « Qualis nunc sit (in generationis actu libido) profectò omnium sensus mortalium, etsi cum verecundiâ confitetur; quia et castos etiam nolentes, eamque per temperantiam castigantes, inquietudine inordinatâ importunâque sollicitat, et plerumque sese volentibus subtrahit, nolentibus ingerit: ut nihil aliud inobedientiâ suâ, quàm illius priscæ inobedientiæ pœnam se esse testetur. Unde meritò de illâ et tunc primi homines, quando pudenda texerunt, et nunc qui se utcumque hominem esse considerat, omnis pudens, impudensque confunditur, absit ut de opere Dei, sed de pœnâ primi veterisque peccati. »

Ex his, ni fallor, evidens est Augustinum existimâsse, imò velut certum habuisse, hominem non solum non creatum fuisse (ut somniabant Pelagiani), verum etiam creari non potuisse cum commemoratâ sentiendi libidine; aliàs homo de *Dei opere*, sive de imperfectione etiam naturali, erubescere potuisset, quod negat S. doctor. Etverò, si talis imperfectio homini pudorem potuisset ingerere, reposuissent Pelagiani pudorem illum ex naturæ defectu dimanare, non ex peccato, et ideò irri-

tum fuisset et prorsus inanē Augustini argumentum. Igitur in puræ naturæ ordine vel præfata in generationis actu libido non extitisset, vel si extitisset, de eâ non erubuisse homo; quorum primum S. Augustini doctrinæ et argumentationi longè magis est consonum.

§ 2. *Utrum rationis argumenta ab incredulis adversus peccatum originale vibrata cordato viro demonstrativa videri possint?*

CONCLUSIO. — Rationis momenta, quibus avitæ maculæ dogma impugnari solet, invicta et verè demonstrativa reputari non debent ab iis præsertim qui partium studio non abripiuntur, vel præjudiciis non obcæcantur.

Priusquàm hæc argumenta profero, nonnullas præmittam annotationes, quæ eorum vigorem multum sanè enervant, et sunt veluti principia ad illa diluenda necessaria.

Observa 1^o, transmissionem habitualis Adæ peccati ad omnes et singulos ejus nepotes præcipuè oriri ex occulto quidem, sed indubiè justissimo consilio, quo sancivit Deus ut Adam totius generis humani personam gereret, cum ipsi præceptum dedit de non comedendo fructu arboris scientiæ boni et mali, et ideò ut ipso peccante ejus delictum omnes ejus posteros inficeret, et è converso non peccante, justitia eum quâ fuerat creatus, ad cunctos ejus nepotes effunderetur. Summè scilicet providus et beneficus Deus, cujus oculis omnia nuda et aperta sunt, sapientissimâ illâ ordinatione efficere voluit ut sicut in primo, sive terrestri Adam per illius peccatum omnes erant morituri, ita in secundo, sive cœlesti Adam, id est Christo, omnes essent vivificandi, ut passim in Epistolis suis, præsertim ad Romanos et Hebræos, docet profundorum Dei consiliorum adorator Apostolus. Incredulis igitur probandum incumbit hoc supremi Numinis consilium injustitiam spirare.

Observa 2^o, commemoratum Dei placitum, quo Adam omnium mortalium caput morale constituit, relativè ad jacturam aut conservationem justitiæ originalis, solitariè non esse considerandum, sed cum omnibus adjunctis, quæ Deus sapientissimo suo animoolvebat cum illud efformavit, inprimis, ut mox diximus, cum beneficentissimo consilio totum genus humanum è ruinâ educendi, si Adam peccaret, per sublimiorem et divinâ Majestate digniorem rationem, et cunctis Adæ nepotibus efficacissimum medium illud excidium reparandi sive per se sive per alios subministrandi.

Observa 3^o, idem Dei placitum, non inficiantibus ipsis incredulis, justum fuisse respectu justitiæ primigeniæ, ad omnes, Adamo non peccante, transmittendæ; oportet ergo ut causam assignent propter quam justum non fuisset respectu justitiæ ad eosdem non transmittendæ, Adamo Deo non obtemperante.

Observa 4^o, incredulos, vel si rumpantur, eò superbiæ devenire non posse ut asserant id omne quod supremum Numen justè facere potest, homini esse exploratum; etsi igitur non concipiunt quomodò commemoratum Dei consilium sit justum, ideò illud esse injustum, nisi irrideri velint, pronuntiare non debent.

Observa 5^o, præfatum Dei propositum omnibus et singulis Adæ posteris, acceptissimum fuisse futurum, si physicè extitissent, cum emissum fuit, et ius fuisset notum, cum præsertim attendissent sive recogitassent moralem peccandi impossibilitatem, quâ tunc feliciter irretiebatur Adam; adeò verum est illud nullam prorsus anhelasse ex parte Dei injustitiam.

Observa 6^o cum D. Augustino argumenta ex ratione erumpentia adversus peccati originalis dogma ita non posse liquescere ut omnis omnino evanescat difficultas; verum id profectò mirum videri non debet, quinimò si non contingeret, prorsus mirum esset, siquidem id evenit in naturæ sacramentis, quæ tamen humanæ mentis acumini ex se sunt accommodata, cum è converso paternæ maculæ mysterium, ut et cætera revelatæ religionis sacramenta humanæ mentis captum longius exsuperent.

Observa 7^o, non esse quidem de divinis per humana omnimodè judicandum, sed nihilominus, ut intelligentia humana in enarrati consilii æquitatis notitiâ aliquatenus adjuvetur, exemplum adduci posse terræ regum, quos excitavit Deus ut in eis divina sua majestas et potestas quodammodò reluceret. Supponamus igitur unum è mundi principibus sese, quantum potuerit, gerere erga unum è subditis suis, ejusque stirpem, quemadmodum se gessit Deus erga Adamum, ejusque posteros; ne unus quidem dubio procul subditi illius nepos inveniretur, si inprimis, ut diximus observatione secundâ, memori et attento animo revolveret felicem primi parentis sui statum, et insignia tum in illum cum in se regis illius beneficia; ne unus quidem, inquam, reperiretur subditi illius nepos qui de illo principe

conquereretur, aut saltem justè conqueri posset.

Observa 8^o, tela quæ è rationis armamentario adversus peccatum originale contorquent novi Pelagiani, id est Sociniani, Deistæ, alique increduli, ea ipsa esse quæ veteres Pelagiani, præsertim industrius et sagax Julianus, in idem dogma vibraverunt, et à D. Augustino, aliisque doctoribus, si non penitus contrita, saltem multùm obtusa sunt. Quare hujus seculi eruditù et sapientes viri malis hisce diebus adversus Christum ejusque Ecclesiam nefariè conjurati meri sunt compilatores, et nihil novi in innumerabilibus scriptis, quibus locustarum ad instar terræ faciem cooperiunt, præter concisum, elegantem et facetum stylum eructant.

His in antecessum emissis, prodeant incredulorum momenta.

Primum sic se habet. Quodlibet peccatum est essentialiter voluntarium et liberum; sed in parvulis nascentibus nulla reperitur libertas, imò nulla cognitio; ergo. — Resp. 1^o argumentum concidere aut labefactari, illud applicando justitiæ originali, sive habituali, cum quâ nati fuissent infantes, si Adam non peccasset. Quælibet justitia, sive quodlibet meritum est essentialiter voluntarium et liberum; sed in infantibus nulla invenitur libertas, imò nulla cognitio; ergo justitiam in Adamo mereri, et ideò in mundum prodeundo habere non potuerunt Adæ posterì. Ex hac argumentatione nunquàm sese expedient increduli nisi dixerint Adæ nepotes justitiam Adæ nunquàm potuisse in origine consequi per *modum meriti*. — Resp. 2^o ex commemoratâ retorsione elucere argumenti inanitatem; scilicet quodlibet peccatum, sive demeritum est essentialiter voluntarium et liberum, aut alienâ, aut propriâ voluntate, sicut quodlibet meritum est necessariè voluntarium et liberum vel alienâ vel propriâ voluntate; demeritum videlicet habituale, sive quod homini inest per modum habitûs, potest esse voluntarium et liberum alterius duntaxat voluntate, puta Adæ, sicut meritum habituale, sive quod habitûs ad instar homini inhæret (qualis fuisset Adamo non peccante in ejus nepotibus justitia originalis), potuisset esse voluntarium et liberum alterius tantùm voluntate, Adæ nimirum; at peccatum actuale et personale, qualis fuit in Adam manducatio fructûs vetiti, et qualia sunt adulterorum delicta, est essentialiter voluntarium et liberum propriâ cujuslibet peccantis voluntate; porro peccatum originale in Adæ

posteris est duntaxat peccatum, sive demeritum habituale, non actuale, ad eum modum quo seclusâ Adæ inobedientiâ justitia, sive meritum originale, fuisset in eis tantùm justitia, sive meritum habituale, non actuale; quare hic supponunt increduli quod est in quæstione, nempe ad peccatum originale ut originale non suffecisse ut esset liberum in Adam. Ostendant ergo consilium, quo Deus voluit ut Adamo peccante omnes ejus nepotes in ipso peccarent, esse injustum (quod ipsis probandum unicè incumbit).

Sed, inquit, peccatum habituale necessariè oritur ex peccato actuali propriâ voluntate commisso, aliàs verum non esset peccatum, et justè puniri non posset; at hujus speciei non est peccatum originale; oritur enim ex *actuali* Adæ delicto, quod *moraliter* duntaxat nostrum fuit, et ideò non ex propriâ nostrâ voluntate, et tamen tanquàm propriè dicta noxa æternâ plectitur penâ.

Verùm, licet peccatum originale nobis inhæreat ex actuali peccato, et ideò ex voluntate Adæ, propter quam causam specie differt à peccatis habitualibus quæ propriâ nostrâ voluntate contrahimus, et in nobis longè minùs est liberum quàm ista peccata, tamen verum peccatum esse, et ut tale puniri potest, sicut justitia originalis remoto Adæ peccato verum meritum esse, et ut talis remunerari potuisset; alioqui Dei consilium, quo Adam omnium ipsius posterorum morale caput constituit, injustitiæ esset arguendum, quod gratis et absque probatione obganniant increduli. Cæterùm, cùm peccatum originale minùs voluntarium in nobis fuerit, quàm cætera peccata, Deus efficacissimum, et non laboriosum, illius remissioni obtinendæ remedium destinavit: et si propter illud penâ sensûs afficit, mitiorem sine dubio imponit; quod attinet ad penam damni, illam sine injustitiâ huic peccato infligit, cùm nemini supernaturalem beatitudinem, sive intuitivam sui visionem, debeat.

Secundum istud est. Peccatum originale transmittitur per generationem; ideò quippe Adæ nepotes hâc inficiuntur maculâ quia ex ejus semine nascuntur; sed inde elucet generationem, et ideò nuptias, esse malam; quod enim vera est et realis formalis peccati causa indubiè malum est; ergo. — Resp. generationem, sive conjunctionem maris et feminae, esse unicè et præcisè causam actualis hominis existentia, Adæ verò inobedientiam esse unicè et præcisè causam maculæ, quâ homo ille nas-

cendo maculatur. Scilicet decipiuntur increduli non attendendo ad reale discrimen quod causam inter et *conditionem sine quâ non* intercedit. Generatio nimirum, quæ producit hominem, in quo est peccatum, est duntaxat conditio sine quâ in homine non extitisset peccatum, quia sine ipsâ non extitisset homo, ad eum modum quo generatio quæ, si Adam non peccasset, produxisset hominem, in quo fuisset justitia, fuisset tantum conditio sine quâ in homine illo non extitisset justitia, quia sine ipsâ homo ille non extitisset. Unde peccatum in Adæ posteris oritur ex causâ generationi extrinsecâ, quanquàm cum eâ necessariò conjunctâ; causa autem illa est delictum primi hominis quo ii omnes, qui in ejus lumbis continebantur, cum illo commiserunt, sicut causa justitiæ originalis fuisset ejusdem hominis obedientia, quam ii omnes, qui in ejus lumbis erant inclusi, cum illo præstitissent.

At, inquit, hæc solutio parentes generationi operam dantes à peccato eximere non potest. Etenim non ignorant actui generationis, cui liberè vacant, et quem scientes et volentes eliciunt, necessariò annexum esse peccatum, quanquàm per accidens, et ideò *consequenter* volunt et intendunt peccatum.

Verum quàm imbellis est et præpostera hæc exceptio! An, enim, quæso, qui bona sua repetit ab eo quem hæc repetitione in iram prorupturum esse certò novit, peccat? Igitur quicumque elicit actum in se bonum, quem eliciendi jus habet, nullius peccati reus est, etiamsi ab illo actu possit abstinere, et non ignoret ex eo malum in alium esse redundaturum; sed actus conjugalis ex se bonus est, utpote qui genus humanum propaget; illum eliciendi jus habent conjuges, cum ad multiplicandum et conservandum genus humanum eos secum invicem uniri voluerit summè bonus et providus Deus; ergo.

Sed, rursus regerunt: Si ex præterito Adæ peccato evenit, ut quicumque nascitur peccati reus sit, Adam continuò peccat; absurdum consequens, ergo. — Resp.: Nego majorem; ad peccandum enim propriâ saltem voluntate requiritur libertas; sed Adam qui peccatum suum per poenitentiam expunxit non potest impedire quominus ex eo maculentur sui posterii; est enim consecutio justi consilii quo Deus omnium nostrum voluntates in ipsius voluntate incluserat.

Tertium sic proponunt. Peccati originalis dogma Manichæismum renovat et confirmat.

Enimverò, si homines mali nascuntur, diabolus eorum erit conditor; bonus quippe Deus velle non potest ut suæ creaturæ diaboli potestati subjiciantur; deinde peccatum originale est peccatum *naturale*, cum *naturâ filii iræ simus*, et peccatum illud per generationem trahatur; Deus igitur illius peccati est auctor, cum sit auctor naturæ; ab illo igitur peccato liberari non possumus, cum natura, quantumlibet expellatur, semper recurat. — Resp. incredulos monstra suscitare ut ea debellant. Scilicet ideò homines mali nascuntur et diaboli imperio subditi, quia Adam peccavit, et in eo omnes peccaverunt. Unde *antecedenter* ad Adæ peccatum noluit Deus ut servi essent diaboli, quamvis id voluerit *consequenter*, sive supposito Adæ peccato. Etverò vitium hominis oriri non potest à Deo, qui initio naturam bonam condidit, et quidquid in eâ bonum est propagat; ergo emanat ex aliâ causâ, nempe ex Adæ peccato.... Ad confirmationem. Peccatum originale eo sensu est naturale et originale quo in statu naturæ integræ justitia fuisset originalis et naturalis; sed justitia illa fuisset originalis et naturalis non quòd fuisset pars naturæ, siquidem fuisset supernaturalis et gratia, non quòd à naturâ non separari non potuisset, siquidem in nobis à naturâ nostrâ reipsâ separatur, sed præcisè quòd à nativitate fuisset habita, et perfectio naturæ potius quàm personæ extitisset; ergo à pari, etc.

Quantum hunc in modum adornant. Adæ peccatum non existerat cum filios procreavit; parentes sæpius justi sunt cum filios generant; ergo nec Adam, nec illi conjuges peccatum in liberos traducere possunt; ex axioma quippe nemo tradere potest quod non habet. — Resp. 1º, non deesse similitudines quibus speciosum hoc argumentum concutitur. Eas passim profert D. Aug.; scilicet quotidie nascuntur filii cum oculis et integris membris ex parentibus oculis et membris orbatis; triticum paleâ expurgatum paleam cum fructu producit; vir, cujus præputium fuit præcisum, gignit hominem cum præputio, et christianus non christianum; oleaster oleæ insitus fit olea, et tamen ex ejus semine non olea nascitur, sed oleaster, etc. Consuli poterit D. Aug. lib. 3 de peccatorum meritis et remissione, cap. 8 et 9, vel lib. 6 contra Julianum, cap. 6, etc. Hæc et similia naturæ phenomena, sive miracula, impugnent vel explicent increduli, et tunc translationem peccati originalis impugnare ipsi licebit, vel ea ipsis exponi poterit. — Resp.

2^o cum eodem S. doctore lib. 4 de nuptiis et concupiscentiâ cap. 49, miris quidem modis fieri ut quod dimissum est in parente trabatur in prole, sed tamen fieri. Multa nimirum in ipsâ rerum naturâ eveniunt quæ tamen miro modo contingunt; quantò magis in cælestium et divinarum rerum ordine! « Mirum est, addit S. doctor, quemadmodum à peccati vinculo per gratiam liberati gignant tamen eodem vinculo obstrictos, quos eodem modo oporteat liberari: fatemur, mirum est; sed quòd lateret fetus oleastrorum etiam in seminibus olearum, quando et hoc crederetur, nisi experientiâ probaretur? Proinde sicut gignitur ex oleastri semine oleaster, et ex oleæ semine nonnisi oleaster, cum inter oleastrum et oleam plurimum distet, ita gignitur et de carne peccatoris, et de carne justi uterque peccator, quamvis inter peccatorem et justum plurimum distet. » Resp. 3^o cum recentioribus, sacrum hoc ænigma ratione utcumque elucidari posse. Parentes videlicet justi peccatum in liberos transmittere non possunt, si eos procreent quatenus in Christo regenerari, sive justi sunt, seu si eos gignant secundum spiritum; non ita si eos gignant quatenus præcisè homines sunt, sive secundum carnem duntaxat; duplex nimirum quasi substantia in homine justo generante distinguenda est, humana, quæ est homo, et divina, per quam homo justus evadit; non generat quatenus justus est, sed quatenus homo præcisè, et ideò eam impertit carnem quæ per primum parentem corrupta est. Et verò, homo generat hominem sibi similem *in specie*, non *in individuo*, id est communicat filio quæ toti naturæ humanæ communia sunt, non ea quæ sibi ut tali personæ conveniunt; sed justitia convenit homini ut talis est persona, cum sit accidens personale; ergo communicat tantum naturam qualis est in se post peccatum; ea autem est vitata. Ita ferè Bellarminus lib. 4, cap. 10.

Quintum sic efficiunt. Peccati originalis defensores concedunt justitiam Christi iis non prodesse qui non credunt; ergo nec Adæ peccatum iis nocere potest qui actu non peccant. — Resp. 1^o antecedens non esse omni ex parte verum; Christi enim merita, sive gratia, ipsis infidelibus prodest, ut in secundâ hujus tractatus parte ostendemus. Resp. 2^o justitiam Christi iis quidem qui nec in suâ nec in alienâ personâ credunt non proficere, sed nihilominus illis aliquando prodesse qui non per se, sed per alios tantum suam profitentur fidem.

Scilicet, quemadmodum Christi justitia infunditur parvulis dum baptizantur, etsi non per se, sed per paternos credant, ita iisdem detrimentum infert Adæ peccatum, quamvis non per propriam, sed per illius solius voluntatem peccaverint. Unde istud oraculum: *Sicut in Adam omnes moriuntur, ita et in Christo omnes vivificabuntur.* 1 Cor. 15.

PRINCIPIA SOLUTIONUM. — Præter observationes initio delineatas, quibus nimium luxuriantis et sibi non explorata subsannantis incredulorum rationis tela retunduntur, hæc addi possunt. Primum. Humana ratio dicat Deum facere posse quod homo non potest intelligere, et ideò id omne quod justè facere potest Deus homini non esse exploratum. Ad hunc scopulum appulsa incredulorum momenta penitus confringuntur. Secundum. Aliud est argumentum esse verè demonstrativum, aliud illud omnino solvi non posse; primum enim evidentiam connotat, alterum finitæ mentis limites. Hinc, etsi dilui non possent incredulorum argumenta, non ideò reapse essent demonstrativa. Tertium. Generatio præcisè efficit ut existat homo, Adæ verò delictum ut existat homo peccator. Hinc generatio non est causa efficiens peccati originalis, sed duntaxat conditio sine quâ non existeret illud peccatum. Quartum. Homo hominem generat quatenus est homo, sive secundum carnem tantum, non quatenus est justus, sive secundum spiritum. Quintum. Adorandum consilium, quo Deus Adam totius generis humani caput constituit in ordine ad felicem, aut infelicem sortem, fuit tantum *conditio sine quâ non* infelicitis illius sortis, non causa efficiens, quæ sola fuit prava Adæ voluntas. Sextum. Peccatum actuale Adæ in ejus nepotibus et proprium et alienum fuit; proprium, quia illud moraliter in Adam suo capite morali commiserunt; alienum, quia illud per propriam, sive physicè existentem, voluntatem non perpetraverunt. Hinc inscitè et ineptè increduli contradictionis arguerent D. Augustinum, et alios qui peccatum Adæ in ipsis posteris *proprium et alienum esse* dicunt. Septimum. Mali angeli ex uno angelici generis capite quo peccante peccaverint nati non sunt, secus homines. Hinc illi ob propria duntaxat peccata damnati sunt, isti è converso etiam ob alienum delictum. Octavum. Augustiniana definitio, *peccatum est factum, vel dictum, vel concupitum contra legem æternam*, convenit soli peccato actuali, non habituali, id est reatui, et maculæ, quæ transeunte actu remanet. Hinc non probat verò

peccato non coinquinari infantes Adæ nepotes, in quibus non est actus peccati, sed reatus et macula.

CAPUT II.

De naturâ peccati originalis.

Nihil, inquit D. Aug. lib. 1 de Moribus Ecclesiæ cap. 22, *peccato originali ad prædicandum notius, nihil ad intelligendum secretius*. Optandum igitur fuisset, ut stabilitâ peccati originalis extantiâ, quæ veluti fundamentale est christianæ religionis dogma, ejus natura, quæ certò retegí nequit, non fuisset investigata. Id à theologis fidei defensionis semper invigilantibus extorsit recentiorum hæreticorum prava et procax de peccati originalis naturâ loquacitas. Necesse igitur est ut exhibeamus quid hæc in quæstione à fide catholicâ alienum sit, deinde quid in eâ tutò teneri possit. Ut primum exequamur, hæreticorum errores referemus, et refellemus; ut alterum, Catholicorum opiniones adducemus.

Cæterum, cum, ut diximus, peccatum originale non sit actus, sed labes sive macula, animæ inhærens, quâ mortis rei, Deo invisí, et æternâ pœnâ digni facti sumus, hic præcisè quæritur quid sit illa labes, sive macula.

ARTICULUS PRIMUS.

Præcipui circa peccati originalis naturam errores referuntur et exsufflantur.

Primum invexit Matthias Illyricus è grege Lutheranorum. Sui, ut magister, impos, et quodam insanix turbine abreptus, finxit peccatum originale non esse accidens, sed quamdam substantiam à dæmone creatam, et dæmonis vivam et essentialem imaginem, quæ per Adæ delictum animæ cujuslibet illius nepotis impressa eam in diaboli formam transmutavit, et ideò totam substantialiter immutavit, ut, inquebat, *cum ex vino fit acetum*. Sacros codices non legerat, aut non intelligebat. Referunt enim omnia per Deum facta esse Joannis 1. Et omnem Dei creaturam esse bonam 1 ad Timoth. 4.... D. Augustinum, et cum eo universam Ecclesiam, quæ Manichæorum hæresim execrata est, et innumeris rationum momentis contrivit, aut non evolverat, aut multum contemnebat. Asserebant enim illi hæretici, aliquam existere creaturam per se malam ratione suæ entitatis.... Christum, qui quidquid nostræ naturæ proprium est assumpsit, peccatum assumpsisse fateretur necesse erat.... Metaphysicos omnes, apud quos eas convertitur cum

bono, irrideret oportebat.... Tandem omnem indubiè vim et efficaciam baptismo auferebat, cum hominis substantia eadem post baptismum remaneat. Hinc Illyricus velut somniator à suis derelictus est et subsannatus. Igitur in Scripturis peccatores dicuntur *filiî diaboli, semen serpentis, genimina viperarum*, etc., non ratione substantiæ, sed ratione imitationis, quia scilicet diabolum imitantur; imitatio autem modus est substantiæ, non substantia.

Secundus asserit, concupiscentiam, id est naturæ corruptionem et pravitatem per Adæ peccatum inveciam, sive ignorantiam, propensionem in malum, etc., constituere peccatum originale, et ideò esse *per se* et ex naturâ suâ malam, etiam in baptizatis, quamvis credentibus, sive prædestinatis, à Deo misericorde in peccatum non imputetur. Ita multis in locis Lutherus. Ita Calvinus lib. 2 Institutionis cap. 1, n. 8, ubi postquàm dixit, « peccatum originale esse hæreditariam naturæ nostræ pravitatem, in omnes animæ partes diffusam, quæ primum facit reos iræ Dei, tum etiam opera in nobis profert, quæ Scriptura vocat opera carnis, » continuò addit : « Id est propriè quod à Paulo sæpiùs peccatum nominatur. » Illis in verbis ipsius doctrinæ venenum continetur; significant enim, naturæ corruptionem esse verum ac propriè dictum peccatum, etiam postquàm præcipua ejus pars, id est aversio mentis à Deo, sublata est. Unde lib. 3, cap. 3, numeris 10 et 11, dicit, *fideles, qui carnis concupiscentiis obnoxii sunt, peccati esse reos*; et lib. 4, cap. 13, n. 10, negat *per baptismum solvi nos et eximî à peccato originali*.

Cornelius Jansenius lib. 1 de statu naturæ lapsæ, cap. 1, docet, *concupiscentiam esse materiale peccati originalis, concupiscentiæ verò reatum ejusdem peccati formale*. Ibidem dicit, Augustinum concupiscentiæ nomine intellexisse omnes omninò cupiditates animi, quibus homo ad peccata propellitur, et provocatur, sive illa carne, sive solo animo peragantur; cap. 3 addit S. doctorem nomine reatûs indicasse subjectionem mentis sub pondere et iugo concupiscentiæ per quod à Deo aversa est, mortua, iniqua, injusta, tenebrosa. Unde ibidem docet, homines à maculâ originali expurgari cum eis infunditur dominatrix delectatio, id est gratia cœlestis, quæ penitus solvat libidinosum animi vinculum, et animum convertat in Deum, tandiù verò peccato infici, quamdiù in eis dominatur concupiscentia, etiam habitualis, quæ nempe necessariò eorum mentem avertat à Deo, Operantur, inquit ibidem (in-

fantes) *ex habituali animi constitutione in qua nati sunt, quam quis dubitet esse pessimam, cum eos ad omnia vitia, quorum ætas ista capax fuerit, instigando compellat*;... infra: *Mens nullo modo iniqua, injusta, etc. fieret, nisi cum libidine, sive cum concupiscentiâ animum sibi subditum possidente nasceretur*... Et paulò inferiùs: *Nulla rima patet, per quam peccatum, hoc est aversio parvulorum à Deo Creatore suo, ex parentibus, sive proximis, sive primis, in prolem serperet, si proles sine concupiscentiâ mentem rationalem possidente, depressamque retinente nasceretur*.

Ex his colligit 1° eodem libro cap. 14, concupiscentiam habitualement, cui omnes obnoxii sumus, esse verum peccatum; citato enim Apostoli testimonio Rom. 6: *Non ergo regnet peccatum in corpore vestro mortali, ut obediat concupiscentiis ejus*, addit, *hoc est, desideriiis ac motibus, quos illud peccatum (concupiscentia habitualis) suscitât*. Uni bona ejus fides desideratur, debuisset scilicet dicere cum Patribus Tridentinis illud peccatum esse improprie peccatum, quod, ut sua cohereret doctrina, industriè omisit. Enimverò, si, ut perpetuò decantat, aversio à Deo est necessariò annexa concupiscentiæ habituali, oportet ut illa verum sit peccatum.

Colligit 2° eodem libro cap. 23, sive ultimo, *parvulorum voluntatem, cum ad usum rationis venerunt, ita se motitare incipere, prout ante non actu, sed statu (seu permanente quâdam habituali constitutione) sive charitati, sive cupiditati possidenti subiacebat*; id est infantes, simul ac ratio præluere cœperit, si baptizati non sunt, non possunt nisi *terrenæ dilectionis actus* elicere, quia viget in eis concupiscentia, sive peccatum originale, seu, ut loquitur (ibidem) *concupiscentia terrenarum rerum eorum animæ et voluntati non actione, sed permanenti constitutione incumbit ac dominatur*, et ideò præpotenti pondere avertit à Deo, et convertit ad creaturas.... si verò baptizati sunt, non possunt nisi justitiæ fructus producere, quia in eis dominatur charitas, quæ mentem eorum, id est *voluntatis apicem, pondere suo avertit à creaturis, et retorquet in Deum*, ut loquitur cap. 3.

Jansenii doctrinæ venenum in eo non consistit, quòd concupiscentiam faciat veluti *materiale* peccati originalis, et concupiscentiæ *reatum ejus formale*; quicumque enim SS. Aug. et Thomæ opera vel leviter delibaverunt, illos doctores idem dixisse noverunt; sed in eo consistit quòd asserat concupiscentiam habi-

tualement, quæ nempe *inordinatos motus suscitât*, et ad peccata compellit, esse pessimam, necessariò avertere à Deo, et convertere ad creaturas, et ideò ex naturâ suâ excludere gratiam in infantibus; ipsam, cum præponderat, necessariò abripere in peccatum, sicuti gratia, cum prævalet, necessariò rapit in bonum, etc.... Infantes non esse justificatos, cum rationis compotes facti feruntur versùs res terrenas, ac idcirco opera externa certam esse regulam, quâ dignosci possit, an infans charitati, aut cupiditati possidenti subiaceat, sive utrum remissum sit peccatum originale, vel non, cujus reatus consistit in *dominatu cupiditatis possidentis*; ex his videlicet liquet concupiscentiam ex naturâ suâ esse malam, inanem, saltem aliquandò, esse baptismi virtutem, cum habitualement concupiscentiam semper non dealeat; aut saltem baptismo non remitti quidquid habet rationem veri peccati, libertatem ad peccandum requisitam posse subsistere cum necessitate relativâ, etc.... Unde Jansenii sententia hoc in puncto parùm differt à Calvini commento. Vult scilicet Calvinus peccatum originale per baptismum nunquàm reipsâ deleri, et concupiscentiam, etiam debilem, sive gratiæ inferiorem verum esse peccatum; Jansenius verò docet avitam maculam per baptismum aliquando detergi, cum scilicet, ut diximus, gratiam infundit habituali concupiscentiâ fortiorem, et concupiscentiam gratiâ minorem non esse verum peccatum.

CONCLUSIO. — Concupiscentia, quatenus importat ignorantiam, propensionem in malum, et excitationem, etiam vehementissimam ad peccatum, verum non est peccatum, et ideò peccatum originale formaliter non constituit. Est de fide.

Prob. 1° Scripturâ: Si concupiscentia, prout est propensio in malum, etiam vehemens, peccatum originale formaliter constitueret, ubi esset hæc propensio, ibi esset peccatum originale formaliter, adeoque peccatum æternâ pœnâ dignum; Scripturæ manifestè adversum consequens; ergo, etc. — Prob. minor variis testimoniis quæ inter unum aut alterum seligo. Romanorum cap. 8, dicit Apostolus: *Nihil ergo damnationis est iis, qui sunt in Christo Jesu*, id est (ut ipsi fatentur hæretici) qui renati sunt in Christo per baptismum. Ibi particula, ergo, evincit hanc sententiam deduci ex antecedentibus verbis. Antea autem dixerat Paulus, in se et in baptizatis remanere concupiscentiam, quam modò peccatum appellat, quia ex peccato

est, et ad peccatum inclinat, modò *legem membrorum*, ejus rebellionem invitus sentiebat; ex quibus infert, nullam prorsus esse condemnationem, sive nullam causam damnationis ob involuntarios illos motus iis qui sunt justificati, id est justificatis nihil omninò timendum esse ex illis concupiscentiæ motibus, qui utpote involuntarii, sive in nobis sine nobis, vera non sunt peccata, nec à justo Deo imputari possunt; at ista argumentatio demonstrat, concupiscentiam, quæ tam vehemens erat in Apostolo, et in baptizatis omnibus experienciâ teste remanet, etiam cùm movet ad peccatum, et à fortiori cùm ad illud inclinat, non esse peccatum æternâ poenâ dignum.

Idem evincunt hæc ejusdem Apostoli verba ejusdem Epistolæ cap. 6: *Mortui sumus peccato (per baptismum), in novitate vite ambulamus, vetus homo noster crucifigitur, vivimus Deo in Christo Jesu Domino nostro, justificamur à peccato*, etc.; ostendunt enim peccatum originale non solum occultari et abscondi per baptismum, ut hæreticis placet, sed et funditus obliterari et deleri.

Hinc meritò conc. Trid. sessione 5, can. 5, adversus novatores hæc sancivit: « Si quis per J. C. Domini nostri gratiam, quæ in baptismo confertur, reatum peccati originalis remitti negat, aut etiam asserit non tolli totum id quod veram et propriam peccati rationem habet, sed illud dicit tantum radi, aut non imputari, anathema sit; in renatis enim nihil odit Deus, quia nihil est damnationis in iis, qui verè consepulti sunt in Christo per baptismum in mortem, etc.; manere autem in baptizatis concupiscentiam vel fomitem, hæc sancta synodus fatetur et sentit; quæ cùm ad agnitionem sit, nocere non consentientibus, sed viriliter per J. C. gratiam repugnantibus non potest, quinimò qui legitime certaverit, coronabitur. Hanc concupiscentiam, quam aliquando Apostolus peccatum appellat, sancta synodus declarat Ecclesiam catholicam nunquam intellexisse peccatum appellari, quòd verè et propriè peccatum sit, sed quia ex peccato est, et ad peccatum inclinat. »

Adversarii argumentum ex commemoratis testimoniis deductum sequentibus momentis sic impugnant.

1^o Concupiscentia, quæ remanet in baptizatis, potest esse verum peccatum æternâ morte dignum, licet nihil damnationis sit in renatis; potest scilicet Deus baptizatis illam

in peccatum non imputare, id est ejus reatum per baptismum dimittere, quamvis in se remaneat res sempiternâ damnatione digna; ergo. — Resp. effugium istud repugnare 1^o contextui et fini Apostoli. Enimverò, ex eo quòd involuntarii concupiscentiæ motus non sint peccata, nec imputari possint, concludit nihil damnationis iis esse qui sunt in Christo Jesu; at inde elucescit nullam in eis esse causam, nullum fundamentum damnationis, et ideò concupiscentiam in eis remanentem non esse verum peccatum..... 2^o Toti Scripturæ asserenti, Deum nunquàm remittere reatum, dùm manet ejus fundamentum, id est *judicium Dei secundum veritatem esse*, ut dicitur Rom. 2, sive, ut traditur Ezechielis 18, Deum manente iniquitate punire, eâ sublatâ ignoscere..... 3^o Rationi. Si enim reatus per baptismum dimittitur, non potest in baptizatis verum vigere peccatum; solus enim reatus peccatum est, sive peccatum in eo non est qui peccati reus non est.

2^o Apostolus, Rom. 8, concupiscentiam vocat *peccatum*. Sed nisi ea sit propriè peccatum, perpetua erit hoc in capite nominis æquivocatio; peccatum enim ibi multoties propriè sumitur. — Resp. Ex dictis initio tractatûs constare peccati nomen in Scripturis variè accipi. Ibi autem concupiscentiam impropriè duntaxat peccatum dici, quòd nempe causa sit peccati, si ei consentiatur, vel effectus peccati, constat ex Scripturis. Asserunt quippe cuncta peccata propriè dicta in justificatione verè tolli, nec tamen concupiscentiam in justificatione auferri. Porrò mirum est adversarios diversam ejusdem nominis acceptionem in eodem capite hic seriò objecisse. Noverant enim eam esse admittendam non tantum in eodem capite sed etiam in eodem versu; v. g., in isto 21 capitis quinti epist. posterioris ad Corinthios, *cùm, qui non noverat peccatum, pro nobis peccatum fecit*. Igitur variè hoc in capite accipitur peccati nomen; sed diversa hæc significatio non est vera æquivocatio, quia nullam inducit obscuritatem, et ideò non est vitium, sed ornamentum.

3^o Rom. 6 dicitur: *Non regnet peccatum in vestro mortali corpore ad obediendum concupiscentiis ejus*. Voces, *concupiscentiis ejus*, evincunt ibi agi de concupiscentiâ: non dixit autem Apostolus: non sit, sed, *non regnet*; supponit ergo concupiscentiam semper in nobis esse peccatum, licet non semper regnet. — Resp. Apostolum supponere concupiscentiam semper in nobis esse peccatum impropriè, non autem propriè dictum. Patet ex vocibus in *ve*

stro mortali corpore; peccatum scilicet propriè dictum non habitat in carne, sed in solâ mente, quæ sola ut justitiæ sic injustitiæ sedes est. Sensus igitur est: *Non dominetur in vobis concupiscentia*, sive carni adversus spiritum concupiscenti non consentite.

4^o Cap. 6, 7 et 8 Epistolæ ad Romanos concupiscentia dicitur: *Non bonum, malum crucifigendum, morbus miserum faciens*; sed hi sunt characteres peccati propriè dicti; ergo. — Resp. Neg. min. Cum enim concupiscentia quædam sit naturæ corruptio sæpè incitans ad malum, hæc de eâ dici possunt. Etverò hæc convenient tentationibus, et habitibus pravis, quæ etiam post pœnitentiam supersunt, et ideo non sunt peccati propriè dicta.

5^o Rom. 7, dicit Apostolus se non cognovisse peccatum nisi per legem, *quia concupiscentiam nesciebat nisi lex diceret: non concupisces*; ergo concupiscentia est peccatum, et quidem propriè, cum prohibeatur per præceptum, *non concupisces*. — Resp. Dist. conseq. Ergo concupiscentia accepta pro consensu interno, quo quis proximi bona concupiscit est peccatum propriè dictum vetitum hoc præcepto, *non concupisces*, conc. Accepta pro fomite, sive inclinatione ad malum est verum peccatum prohibitum lege, *non concupisces*, nego conseq. Apostolus ibi quidem disserit de vero peccato, id est de verâ legis prævaricatione; verum concupiscentiam priore duntaxat sensu sumit, adeò ut intendat tantum interna rei illicitæ desideria vera esse peccata. Id sanè evincit 1^o Apostoli finis. Vult enim explodere errorem Phariseorum, qui, ut referunt rerum judaicarum scriptores, Josephus et alii, obganniebant interna rei illicitæ desideria non esse mala nisi exterius erumpant. Eundem errorem exsufflaverat Christus his verbis Matthæi 5: *Audistis quia dictum est antiquis: Non mœchaberis, ego autem dico vobis, quia omnis qui videbit mulierem ad concupiscendum eam, jam mœchatus est eam in corde suo.....* Evincit 2^o præceptum decalogi, *non concupisces*, quod adducit Apostolus: illo nimirum non motus indeliberati, sed sola rei illicitæ desideria aliè dicuntur. Probat enim Paulus legem non esse peccatum, id est causam peccati, sed causam cognitionis peccati, eò quòd non cognoscerent homines actus interiores, velut desideria rei alienæ, esse peccata, nisi lex dixisset, *non concupisces*. Equidem D. Augustinus aliquando dixit, hoc præceptum complecti etiam indeliberatos concupiscentiæ motus; at intendit

unicè illos motus cadere *sub finem non sub medium* præcepti, ut sensus esset, fortiter esse resistendum concupiscentiæ motibus, *quò in beatâ immortalitate*, ut loquitur lib. 1 de Nuptiis et Concupiscentiâ, cap. 20, n. 32, *ab iis immunes simus, vel eos speciali Dei gratiâ in hac vitâ non sentiamus*. Docet enim ubique, id quod non est voluntarium et liberum, et ideo est in nobis sine nobis, non esse peccatum, ac proinde lege prohiberi non posse.

Probatur 2^o Patrum suffragio. Ac primò quidem Calvinus nobis concedit omnes, etiam antiquos, Patres, imò ipsum Augustinum. Neque, inquit lib. 3 Institutionis cap. 3, n. 10, « opus est multum investigando hic laborare quid hic veteres senserint, quando unus Augustinus sufficere ad id potest, qui fideliter magnâque diligentia omnium sententias collegit. Ex illo igitur sumant lectores, si quid de sensu antiquitatis habere certi velint. Porro, inter illum et nos hoc discriminis videri potest interesse, quòd ipse quidem cum fideles concedat, quamdiu in corpore mortali habitant, sic illigatos teneri concupiscentiis, ut non possint non concupiscere, eum tamen morbum peccatum vocare non audent, sed ad illum designandum infirmitatis nomine contentus, tunc demum fieri peccatum docet, ubi vel opus vel consensus ad conceptionem vel apprehensionem accedit, hoc est quando primæ appetitioni cedit voluntas. Nos autem illud ipsum pro peccato habemus, quòd aliquâ omninò cupiditate contra legem Dei homo titillatur. »

Cum autem repugnet Jansenius Calvinum hæc in parte malâ fide superans, inter aperta, eaque innumera S. doctoris testimonia, hæc sufficiant. Lib. 1 de Nuptiis et Concupiscentiâ cap. 25, n. 25, hæc habet: « Concupiscentia non est peccatum (in regeneratis), quando illi ad illicita opera non consentitur... quodam modo loquendi peccatum vocatur, quia et peccato facta est, et peccatum si vicerit facit. » Quid adversariorum systemati magis adversum? Agnoscit in baptizatis concupiscentiam, et eam in eis negat esse verum peccatum ergo concupiscentia non est ex naturâ suâ mala, aliàs nunquam desineret esse peccatum, sicut mendacium non potest non esse peccatum..... Agnoscit concupiscentiam eo duntaxat sensu peccatum esse *quòd peccato facta sit, et peccatum, si vicerit, faciat*; ergo meritò conc. Trid. declaravit eam esse peccatum, *quia ex peccato est et ad peccatum inclina.*

Lib. 1 contra duas epistolas Pelagianorum

sive ad Bonifacium, cap. 15, n. 26, rursus ait: « Dicimus baptismum dare omnium indulgentiam peccatorum, et auferre crimina, non *radere*... Concupiscentia vocatur peccatum, non utique quia peccatum est, sed quia peccato facta est, sic vocatur... Nec propter concupiscentiam dicunt in oratione baptizati: *Dimitte nobis debita nostra*... sed propter peccata quæ fiunt cum ipsi consentitur. » Ubi hic futile novatorum effugium, *concupiscentiam esse malum in se, sed à Deo non imputari*?

Lib. 20 de Civitate Dei cap. 26, eadem decantat: « Ex quo, inquit, commissæ prævaricationis causâ ex paradiso dimissi sunt primi parentes, atque humana in eis natura damnata est, excepto uno Mediatore, et post lavaerum regenerationis quibusque adhuc parvulis, nemo mundus à sorde. » Concupiscentia igitur in baptizatis, qui velut Christi ad instar mundi sunt, non est sordes.

Objiciunt 1^o: Aug. commemorato lib. 1 de Nuptiis et Concupiscentiâ cap. 25 et 26, numeris 28 et 29, dicit, *reatum concupiscentiæ remitti in baptismo*, et ideò concupiscentiam *præterire reatu, non actu* (cum in baptizatis remaneat) *sicut reatus adulterii indulgentiâ, sive pœnitentiâ remittitur*. Ex quibus concludit, concupiscentiam esse *peccatum*, in non baptizatis, secus in renatis, et ideò illam esse *expiandam baptismo*, illam *reos facere infantes*, cum *ejus reatus regeneratione non solvitur*, illam *tenere in morte, et pertrahere in mortem, nisi ejus vinculum baptismo solvatur*; at desipiet profectò qui negaverit talem concupiscentiam ex naturâ suâ esse peccatum; quod enim reatum habet annexum haud dubiè verum est peccatum, si- cut adulterium ex se malum est quia reatum producit in animâ. Intendit ergo S. doctor, peccatum baptismo remitti non eo sensu quòd in baptizatis non remaneat, sed eo sensu quòd ipsis non imputetur, cum in ipsis remaneat concupiscentia quæ verum est peccatum.

Resp. quidquid *reatis* nomine intellexerit D. Augustinus (de quo postea disseremus), Calvinum et Jansenium à S. doctoris mente multum esse alienos. Enimverò intendit vir eximius, reatum concupiscentiæ esse illegitimum eo præsertim sensu quòd in præsentì ordine conjuncta est cum reatu quamdiù baptismo non remittitur, non eo sensu quòd reatus ab ipsâ oriatur et in ipsâ fundetur, quasi aliquis reus fieret per ipsam præcisè concupiscentiam. Docet nimirum, et quidem meritò, concupiscentiam, cui, si Adam non peccasset, obno-

xii non fuisset, in nobis supponere, et veluti commonstrare latens aliquod peccatum, quamdiù baptizati non sumus, quia in nobis est pœna propriè dicta, et talis pœna à justo Deo absque peccato imponi non potest; ex quibus elucet concupiscentiam *ratione sui* præcisè non esse verum peccatum sed *ratione alterius*, id est macule originalis cui annectitur, et quam supponit. Hoc autem evincitur 1^o ex objecto testimonio, et constanti Augustini doctrinâ; dicit enim, et alibi centies repetit, *concupiscentiam antè baptismum esse peccatum, post baptismum non esse peccatum*; quod sanè pronuntiatum nemo intelligeret si concupiscentia *per se* verum esset peccatum, aut *prima radix ex quâ necessariò*, et nullo alio addito, *peccatum serperet* in animam... 2^o Ex eodem S. doctore dicente, concupiscentiam esse peccati originalis pœnam. « Quòd, inquit lib. de Continentiâ, cap. 8, caro concupiscit adversus spiritum... quòd lex in membris nostris repugnet legi mentis, non est duarum naturarum ex contrariis principiis facta commixtio, sed unius adversus seipsam propter peccati meritum facta divisio... non est ista prior vita creati hominis, sed posterior pœna damnati. » Idem alibi millies inculcat. Porro, quod est pœna peccati non est ipsius causa... 3^o Ex eodem Augustino qui lib. 1 de Nuptiis et Concupiscentiâ cap. 26, n. 29, ait: *Hoc est non habere peccatum, reum non esse peccati*; quæ indubiè verba explodunt effugium, quo evadere conantur adversarii dicendo *concupiscentiam non esse peccatum post baptismum quia à Deo non imputatur*; si quippe concupiscentia verum esset peccatum, cum post baptismum remaneat, baptizatum reipsâ faceret *peccati reum*... 4^o Ex D. Thomâ. Etenim 1-2, q. 82, art. 5, in corp. explicans quomodò *concupiscentia sit reatus* peccati originalis dicit, privationem originalis justitiæ *per quam voluntas subdebatur Deo*, esse *formale* in peccato originali, *inordinationem verò potentiarum animæ*, sive concupiscentiam, *se habere in peccato originali sicut quoddam materiale*; at hæc sententia veri peccati rationem concupiscentiæ eripit, cum peccati originalis specificam rationem in privatione originalis justitiæ constituat.

Verum, inquit, Augustinus commemorato lib. 1 de Nuptiis et Concupiscentiâ, cap. 25 et 26, reatum, qui concupiscentiæ inest, comparat cum reatu qui adulterio annectitur; sed reatus adulterio inhaeret *ratione sui*, sive essentialiter; ergo. Resp. hanc comparationem, ut

vulgari adagio proditum est, non ex omni, sed aliquā duntaxat ex parte stare, in hoc scilicet, quod sicut *reatus* separatur ab adulterio, quod transit *actu* et manet *reatu*, ita *reatus* sejungitur à concupiscentiā, quæ manet in baptizatis, non manente originali maculā, cui coniungitur, et ex quā in nostro statu oritur; aliās pugnantia, ut diximus, ederet S. doctor.

Obijciunt 2^o: Augustinus lib. 1 contra duas epistolas Pelagianorum cap. 13, n. 27, dicit, concupiscentiam esse peccatum hoc etiam sensu, quod *peccandi delectatione moveatur, etsi ei vincente delectatione iustitiæ non consentiatur*; ergo concupiscentia verum est peccatum, præcisè quia insurgit adversus legem et præceptum. Resp. nego conseq. Aug. enim verbis commemoratis concupiscentiam *peccatum* dicit *impropiè, non propriè*. Et verò S. doctor et hic, et lib. 1 de Nuptiis et Concupiscentiā, cap. 25 et 26, et alibi passim concupiscentiam variis ex causis *peccatum* nuncupat, quamvis ex se non sit peccatum. 1^o Enim eam in non regeneratis peccatum dicit propter *reatum* adjunctum, ut ex dictis elucet..., 2^o Illam peccatum vocat *qui peccato facta est, eo, inquit, modo quo scriptura dicitur manus, quia manus facit scripturam, vel quia defectione consentientis est causa peccati, sicut frigus vocatur pigrum, quia pigros facit....* 3^o Eam peccatum appellat, *quia peccandi delectatione movetur, ut loquitur loco objecto, id est quia ipsi inest inobedientia contra dominatum, sive intellectum mentis*; Hæc autem verba de peccato *materiali*, non formali intelligenda esse ex contextu ita liquet, ut mirum sit adversarios ea seriò objecisse; ibi quippe expressè dicit Augustinus, *concupiscentiam in renatis vocari peccatum, non utique quia peccatum est, sed quia est causa aut pœna peccati, aut quia peccandi delectatione movetur, quod non esset verum si verum foret peccatum, quia peccandi delectatione movetur*; deinde addit: *Non propter concupiscentiam, cujus reatus lavacro regenerationis dimissus est, dicunt in oratione dominicā baptizati: Dimitte nobis debita nostra, sed propter peccata quæ fiunt in ejus consensionibus, sive cum per ignorantiam peccatur; ex quibus iterum elucescit, concupiscentiam non esse peccatum propriè dictum, quia peccandi delectatione movetur, cum propter eam remanentem et reluctantem legi mentis non dicant baptizati: Dimitte nobis debita nostra.*

Probatur 3^o variis rationibus theologicis, quas in expositione præcedentium argumen-

torum retulimus, et sic breviter resumimus.

Si concupiscentia esset peccatum originale *formaliter*, aut prima radix, ex quā necessariò erumpit, sive si concupiscentia, quatenus motus versùs creaturas, seu res sensibiles suscitatur, quibus mens resistit, verum esset peccatum, ut placet Calvino et Jansenio, dicendum foret 1^o, concupiscentiam ex se malam esse, et ideò hominem ab initio creati non potuisse obnoxium concupiscentiæ, etiam quoad speciem consideratæ.... 2^o Peccatum in aliquo positivo consistere, cum motus illi sint aliquid positivum, reale et physicum... 3^o Concupiscentiam, etiam ubi non adest consensus, esse verum peccatum in vigilantibus, dormientibus, amen- tibus, sanctissimis hominibus, etc.... 4^o Hominem posse vero coinquinari peccato, et non esse reum coram Deo.... 5^o Christum non verè, sed imputativè tantum homines à peccatis redemisse, etc. At hæc consecutaria indubiè de- testatus est D. Augustinus, et quilibet alius catholicus execrari debet; ergo.

PRINCIPIA SOLUTIONUM. — Primum. Jansenius concupiscentiam habitualement, sive ipsam post Adæ peccatum naturæ corruptionem, verum peccatum fecit, tum ut elevaret possibilitatem naturæ puræ suo systemati capitaliter adversam, tum ut palmare principium suum de duabus delectationibus, sive amore terreno et cœlesti, stabiliret; censet nimirum hominem esse justum cum amor cœlestis, sive charitas habitualis, amorem terrenum, sive cupiditatem habitualement, gradibus superat, et è converso injustum cum cupiditas habitualis charitatem habitualement intensione vincit: unde baptismus infantem reipsa non justificat cum in ipso relinquit cupiditatem charitate fortio- rem; quod cognoscitur per impetum, quo infans rationis compos factus sese fert ad malum, et ideò iste parvulus per baptismum vel nullatenus justificatur à parte rei, sive interiùs, sed tantum per non imputationem, sive exteriùs, ut placuit Calvino.

Secundum. Concupiscentia in regeneratis nec est, nec esse potest verum peccatum, nisi cum ipsi liberè consentitur, juxta celebre istud Augustini effatum, *peccatum si vicerit facit*.

Tertium. Nullà ratione evinci potest concupiscentiam in baptizato potiùs esse verum peccatum quàm pravi habitus qui in homine etiam justificato non rarò remanent.

Quartum. Reatus annectitur concupiscentiæ non ratione sui præcisè, sicut adulterio, sed præcipuè ratione alterius, privationis scilicet,

sive potius jacturæ justitiæ originalis, cum quâ in non baptizatis reperitur. Sic intelligendum esse videtur famosum D. Augustini pronuntiatum, quod abutuntur Calvinus, et Jansenius: *Concupiscentia in renatis transit reatu, manet actu.*

Quintum. Concupiscentia (quoad speciem accepta) non *materialiter* duntaxat, sed et *formaliter*, id est non solum quatenus est appetitus boni sensibilis, sed etiam quatenus est appetitus aliquando insurgens in rationem, oritur ex naturali constitutione hominis, qui est animal rationale, et ideo ex se non potest esse *malum* moris, sed *entis* tantum, sive imperfectio naturalis.

Sextum. Apostolus, et ipso duce Augustinus, concupiscentiam, quoad speciem et gradum, qualis est in præsenti ordine, in ipsis regeneratis *malum, peccatum*, etc., dicit, quia Adæ peccati effectus est, et actualium delictorum radix et origo; quanquam Augustinus potuit, imò debuit, aliquando saltem, illam vocare *vitium*, sive *veram naturæ depravationem*, quia, ut ostendimus, sensit hominem creari à Deo non potuisse cum concupiscentiâ quoad gradum simili illius quâ continuo torquemur.

ARTICULUS II.

Præcipuæ theologorum catholicorum de peccati originalis naturâ sententiæ produntur.

PRIMA OPINIO — Fingit peccatum originale esse ipsam actualem Adami inobedientiam, quam Deus omnibus Adæ nepotibus in peccatum imputat. Unde Adæ posterius nullum ex eo peccatum *intrinsecè et formaliter* contrahunt, sed *effectivè* duntaxat quatenus luunt pœnas paterni sceleris ad eum modum, quo filii nobilium virorum, qui in regem et patriam conjuraverunt, paterni criminis supplicium subire solent. Ita Albertus Pighius, insignis aliunde theologus et mathematicus, Ultrajecti mortuus anno 1545; ita Ambrosius Politus, Catharinus dictus, Dominicanus, qui conc. Trid. interfuit, vir summis adversus sui temporis hæreticos laboribus felicissimè perfunctus, sed singularibus parumque communibus opinionibus impensius addictus.

Hæc opinio doctioribus theologis non probatur, et meritò quidem. Etenim conc. Trid. sess. 5, can. 3 et 5, præcuntibus antiquis synodis, Arausicanâ secundâ. Milevitanâ, etc., definit, peccatum originale *origine unum esse et propagatione, unicuique proprium esse, per baptismum non tantum radi, aut non imputari, sed etiam tolli, sive deleri*, etc. At hæc doctrina

non cohæret cum opinione commemoratâ; quod enim in homine non nisi per imputationem existit remittitur per solam non imputationem, sive ex homine non deletur, cum ipsi *intrinsecè* non sit insitum; quod *intrinsecè et formaliter* non est in Adæ nepotibus, sed *extrinsecè* duntaxat, unicuique proprium non est, sed omnibus commune. Et verò verè et formaliter justificamus in Christo; ergo verè et formaliter peccavimus in Adamo, sive ex Adam unicuique nostrum inhæret aliquid quod veram habet peccati rationem; *sicut* enim, inquit Apostolus, *in Adam omnes moriuntur, ita et in Christo omnes vivificabuntur.*

OPINIO SECUNDA — Tradit peccatum originale consistere in morbidâ et vitiosâ mentis qualitate, id est animæ concupiscentiâ prava desideria perpetuò excitante, quæ ex corruptione sive morbidâ qualitate carnis in animam carni unitam derivatur. Ita visum fuit undecimo seculo Petro Lombardo in secundo Sententiarum libro; quam sententiam, utpote Augustinianæ doctrinæ (ut opinabantur) consonam, non pauci postea propugnaverunt.

Hæc opinio præstantioribus theologis non arridet, et ideo hodiè vulgò rejicitur, et quidem justis ex causis; 1º enim si peccatum originale est qualitas vitiosa, sive concupiscentia, quâ anima propensa est ad bona sensibilia contra rationis ordinem appetenda, ut dicunt hujus opinionis patroni, peccatum originale (quamvis negent et ideo non errent) *formaliter* post baptismum remanebit; languor enim iste et propensio ad peccatum in baptizatis viget... 2º Si, ut iisdem theologis videtur, commemorata animæ concupiscentia, quæ peccatum originale formaliter constituit, est qualitas *positiva*, Deus videbitur esse peccati auctor; est enim cujuslibet rei positivæ prima causa... 3º Etsi fortassis concupiscentia, qualis in carne ex Adamo tractâ residet, in se sit vitiosa, tamen, non admissâ justitiæ originalis jacturâ, impossibile prorsus est, ut animam in instanti, quo carni illi unitur, propriè dicto peccato inficiat, quemadmodum postea ostendemus.... Neque movere debent quæ congerunt isti theologi testimonia ad probandum peccatum originale *formaliter* consistere in præfatâ pravâ qualitate, sive concupiscentiâ animæ; si enim probant concupiscentiam carni Adæ insitam esse vitiosam qualitatem, certè non probant formalem peccati originalis rationem in illâ concupiscentiâ esse reponendam, cum illa concupiscentia, ut ostendimus, non sit formaliter

peccatum, et commemorata animæ concupiscentia in baptizatis supersit, ut iterum diximus.

TERTIA OPINIO. — Reponit formalem peccati originalis rationem in jacturâ justitiæ, sive gratiæ, originalis, illatâ per Adæ inobedientiam, quæ nostra est *moraliter*. Quæ sententia ut intelligatur,

Observe 1^o, justitiam originalem, cum quâ creatus est Adam, complexam fuisse gratiam sanctificantem, quâ Adami mens erat Deo omnimodè subdita, pars inferior, sive, ut aiunt, *sensualitas*, superiori, sive rationalitati, perfectè subjecta, et corpus omnis læsionis et corruptionis expers, ita ut sensus rationi, et ratio supremo Conditori in omnibus subiceretur, et ideò homo ad supernaturalem dignitatis gradum erectus esset impassibilis, immortalis, etc. Jactura hujus justitiæ, in quâ originalis maculæ essentiam collocant hujus opinionis defensores, sumitur quoad primum duntaxat effectum, non quoad secundum, id est quatenus importat rationis Deo subjectionem, per immunitatem saltem à peccatis mortalibus, non quatenus importat, sive includit, perfectam submissionem sensûs rationi, immunitatem à doloribus, morte, etc. Scilicet quoad istum effectum jactura justitiæ originalis remanet in regeneratis, in quibus non remanet peccatum originale. Hunc sensum apertè indicat D. Thomas 1-2, q. 82, a. 3.

Observe 2^o, eosdem theologos reponere peccati originalis *formale* in jacturâ justitiæ originalis exposito sensu sumptæ, non in ejus *carentiâ*; aliud scilicet hic est jactura justitiæ originalis, aliud ejus *carentia*. In jacturâ justitiæ originalis consistit peccati originalis essentia, non in ejus carentiâ præcisè, quia in præsentī statu omnes in Adamo ad justitiam originalem destinati sumus, quo proinde peccante omnes cum ipso peccavimus, id est justitiam originalem sibi amittente et nos nobis ipsis amisimus. Unde peccato originali non inficimur præcisè quia caremus justitiâ originali (câ enim caruissemus in statu naturæ puræ absque peccato), sed quia eam habere deberemus in Adamo, et cum Adamo, et illam non habemus, sed cum ipso et in ipso amisimus.

Observe 3^o, eosdem theologos dicere illam justitiæ originalis jacturam Adæ peccato fuisse illatam. Jactura videlicet originalis justitiæ causam requirit, quæ alia esse nequit quàm peccatum alienâ voluntate commissum; non

enim amittitur justitia originalis nisi per id quod eam expellit; id autem quod justitiam expellit solum est peccatum; at istud peccatum in infantibus sine justitiâ originali nascentibus non est peccatum proprium, sive propriâ voluntate commissum; ergo est alienum, seu alienâ voluntate factum.

Observe 4^o, eosdem doctores asserere peccatum, quod fuit causa jacturæ justitiæ originalis, *esse moraliter nostrum*, quia vi decreti, quo Deus Adam totius generis humani caput constituerat, omnes in Adamo et cum Adamo peccavimus. Et verò, cum omne peccatum essentialiter sit voluntarium, parvuli rei et peccatores esse non possunt nisi verè in Adamo et cum Adamo peccaverint.

Observe 5^o, perfectam mentis Deo subjectionem per immunitatem saltem à delictis mortalibus, in cujus jacturâ, ex observatione primâ, peccati originalis essentiam ponunt commemorati theologi, esse habituales, non actuales subjectionem. Enimverò, si in actualis illius subjectionis jacturâ consisteret peccati originalis essentia, baptismus, qui peccatum originale delet, actuales illam subjectionem in infantibus produceret (homo enim peccati originalis remissionem consequitur per reparationem justitiæ originalis, sive mentis Deo subjectionis), quod sanè falsum est, siquidem actualis Deo subjectionis capaces non sunt parvuli; ipsis ergo infunditur duntaxat habitus illius subjectionis per charitatem habituales, seu gratiam sanctificantem, et ideò peccati originalis essentia consistit in habitualis illius subjectionis jacturâ.

Observe 6^o, eosdem theologos peccatum originale hic non sumere pro liberâ præcepti transgressionem, sive pro actu pugnante cum lege. Hoc quippe sensu accepta fuit prima inobedientia, quam Adam, et nos cum ipso, liberè commisit; illud ergo sumunt pro eo quod in Adamo post primam inobedientiam extitit, et ideò in omnibus, qui ex eo nascuntur, quo et ipse et ipsi non *peccantes*, sed peccatores evaserunt, sive pro habituali voluntatis aversione à Deo, seu maculâ mentem Deo invisam reddente. Totum illud elucescit ex eo quòd dicant, *jacturam justitiæ originalis, in quâ peccati originalis formale constituunt, oriri ex primâ Adæ inobedientiâ, quæ moraliter fuit nostra*. Duplicem istam peccati originalis acceptionem designavit Apostolus, Rom. 5, dicendo, *in Adam omnes peccasse, et per Adam peccatores constitutos esse multos*.

His præmissis originalis maculæ *formale*, quatenus fuit in Adam post actuale peccatum, et est in infantibus ex eo nascentibus, consistere in prædictâ jacturâ subjectionis mentis divinæ voluntati, probare aggrediuntur commemorati theologi sequentibus argumentis.

ARGUMENTUM PRIMUM. — In sententiâ peccatum originale constituitur in jacturâ justitiæ originalis quoad primarium suum effectum, qui erat voluntatem Deo subicere per supernaturalia dona, melius et facilius exponuntur, Scripturæ, Patrum et conciliorum oracula de peccato originali; imò in adversâ opinione plura saltem nequaquam explicari possunt; illa ergo sententiâ cæteris est præhabenda. — Probant ant. hunc in modum. Sacri codices, Patres, concilia, dicunt, *peccatum originale esse mortem animæ, feditatem, injustitiam*, etc. Vi illius peccati infantem *verè et propriè esse peccatorem, peccatum illud esse peccatum Adæ, quod propagatione ad omnes est transmissum, quod unicuique inest, quod est unicuique proprium, quod verè et propriè tollitur per baptismum*, etc. Hæc omnia docet synodus Tridentina sessione V, de peccato originali, *secuta*, ut loquitur, *sacrarum Scripturarum, probatissimorum conciliorum, et sanctorum Patrum testimonia*, imprimis S. Augustini, cujus verba sæpius in fidei tesseram erexit, et tandem *Ecclesiæ judicium et consensum*; at hæc in relatâ sententiâ optimè explicantur, et in aliâ, saltem omnia, non possunt explicari; ergo. — Minorem per partes sic probant. 1° Sicut gratia sanctificans est vita, decor, bonitas, et justitia hominis, sic è converso privatio gratiæ sanctificantis est mors animæ, fœditas, injustitia, etc. 2° Per solam privationem gratiæ sanctificantis homo dicitur habitualiter peccator; neque enim dicitur peccator præcisè quia peccavit, cum ipsi justificati peccaverint, nec dicantur peccatores; dicitur ergo et est habitualiter peccator quia habitualiter privatur justitiâ, sive gratiâ sanctificante. 3° Illa privatio propagatione transfunditur, et eâ transfusâ transfunditur ipsum Adæ peccatum, sicut si Adamus stetisset in justitiâ, propagatione transmissa fuisset justitia originalis. 4° Unicuique tam inest, et unicuique tam proprium peccatum originale quàm unicuique fuisset insita, et unicuique propria originalis justitia. 5° Per baptismum verè diffunditur in animam gratia sanctificans; ergo per baptismum verè et propriè tollitur privatio gratiæ originalis, et ideo peccatum originale.

Hæc autem, addunt iidem theologi, in aliâ

sententiâ feliciter explicari non posse satis superque jam et; quomodo enim in adversâ opinione infantes non peccantes sed peccatores essent? Quomodo peccatum originale esset fœditas, malitia, injustitia, etc.?

ARGUMENTUM SEDUNDUM. — In eo reponenda est peccati originalis natura in quo eam reposuit D. Aug., cujus doctrinam de peccato, præsertim originali, et gratiæ necessitate specialiter approbavit Ecclesia; at Aug. *peccati originalis naturam collocavit in concupiscentiæ reatu*, id est habituali voluntatis aversione à Deo, sive in privatione gratiæ originalis quatenus voluntas per eam Deo subiciebatur; id enim unicè probant propè innumeri textus D. Augustini, quos adducit Jansenius toto libro 1 de statu naturæ lapsæ. Et verò S. doctor ait lib. 1 Retractionum cap. 15, n. 2, *reatum concupiscentiæ in baptismo solvi...* Lib. 1 de Nuptiis et Concupiscentiâ cap. 22, n. 25, *concupiscentiam sacramento regenerationis expiari...* Lib. 2 contra Julianum cap. 3, n. 5, *concupiscentiam remitti in reatu, manere in actu*, etc. — Hunc D. Aug. sensum esse censuit D. Thomas 1-2, q. 82, art. 5, et ex unâ Augustini auctoritate in hanc sententiam inductus videtur.

His ponderatis, D. Anselmus, lib. de conceptu virginali, cap. 26, exclamavit: « Hoc peccatum, quod originale dico, aliud intelligere nequeo in ipsis infantibus, nisi ipsam, quam supra posui, factam per inobedientiam Adæ justitiæ debite nuditatem. »

Neque iidem theologi moventur argutiis, quas novissimis hinc temporibus in aleam miserunt quidam (inter quos Coletus) positivæ peccati naturæ defensores. Etenim recentiores illi sic arguunt: Privatio justitiæ originalis est effectus peccati; ideo enim Adam et nos justitiæ expertes nascimur, quia cum ipso et in ipso peccavimus; ergo non est peccati originalis formalis ratio.

Verum, inquirunt illi doctores, isti recentiores non intelligunt sententiam quam impugnant. Privatio scilicet justitiæ est simul effectus peccati et peccatum sub diverso respectu. Est effectus actualis Adæ peccati præteriti, quod nostrum est, quia illud in Adam omnes commisimus; est autem verè et propriè in nobis, et fuit in Adamo, peccatum habituale ad eum modum, quo præterito peccati actu, v. g., adulterii, stabiliter remanet intus in homine peccatum veri nominis, sive macula, propter quod dicitur *peccator*; neque enim aliquid concipit potest quod stabiliter inhæret homini, et

habeat veri peccati rationem, postquam transiit peccati actus, præter privationem gratiæ sanctificantis. Equidem D. Thomas citato loco et 1-2, q. 83, a. 5, dicit *subtractionem justitiæ originalis habere rationem pænæ, sicut etiam subtractionem gratiæ* (in peccatore); at immerito inde inferunt privationem justitiæ originalis esse tantum effectum, sive pœnam peccati originalis, non ejus *formale*; discrimen enim est inter *privationem* justitiæ originalis, et ejus *subtractionem*, de quâ solâ ibi loquitur D. Thomas; subtractio videlicet gratiæ originalis, reverâ est pœna peccati in primo parente admissi, et ideò fit à solo Deo; privatio è converso illius in nostro statu verè peccatum est, quatenus est voluntarius et liber defectus justitiæ quæ ex divinâ ordinatione homini in suâ creatione inesse debebat, ut docet S. doctor loco citato, et Sylvius in eundem locum.

Iidem theologi mirantur quòd isti recentiores citata Scripturæ et Patrum oracula eludere conentur reponendo ea esse intelligenda de *primario peccati effectu*, qui *notior est*, et consistit in privatione justitiæ, non de *ratione* ejus *constitutivâ*; quid enim, inquiunt, talibus argutiis eludi non posset? Dicunt Patres peccatum originale consistere in *privatione* gratiæ originalis, in *reatu concupiscentiæ*, imò in alio consistere non posse; quæ profectò, si *formale* peccati originalis non tangunt, evertenda erit vocum et rerum ubique recepta notio.

Iidem commemorati theologi pluris non faciunt hanc eorundem recentiorum cavillationem: « Si peccatum originale formaliter consisteret in privatione justitiæ originalis, nullum esset discrimen inter peccatum originale, et peccatum mortale actuale; cum istud privet etiam hominem gratiâ sanctificante, et habituali subiectione Deo... » Notum quippe est peccatum mortale actuale propriâ, originale verò alienâ voluntate contrahi, et ideò istud essentialiter referri ad primum parentem, qui ex divinâ ordinatione erat caput generis humani.

Iidem positivæ peccati naturæ patroni præfatis theologis opponunt ipsos in suâ sententiâ explicare non posse quod statuit conc. Trid. sessione 5: *Peccatum originale esse unum origine et propagatione, non imitatione transfusum omnibus, et unicuique proprium inesse...* Sed plumbeum illud argumentum flocci faciunt: vel enim, inquiunt, loquitur sancta synodus de actuali Adæ peccato, vel de habituali maculâ, quâ Adam coinquinatus fuit post suam inobedientiam, vel de utroque peccato. Si primum,

significavit actuale Adæ peccatum esse unum in nobis et Adamo quatenus illud cum ipso et in ipso commisimus... Si secundum, indicavit habituale peccatum quod Adæ præteritâ actuali ejus inobedientiâ inhæsit, nobis etiam cum ex eo nascimur inhærere... Si tertium, intendit, actuale et habituale Adæ delictum unum in Adam et in nobis esse, quia primum in illo commisimus, et altero ex eo originem ducendo inficimur, sicque *unicuique nostrum proprium inest*; quæ profectò, addunt, nostræ sententiæ non nocent.

Opponitur tandem iisdem theologis, *concupiscentiam*, cum sit effectus peccati originalis, non posse esse *materiale* peccati originalis, siquidem *materiale* peccati originalis est quid primum in peccato originali, quod concipitur ante ipsius *formale*, nec *concupiscentiæ* reatum esse posse peccati originalis *formale*, cum *concupiscentia* subsequatur peccatum originale, non ipsum præcedat, vel comitetur, sive ejus essentiam non constituat.

Verum respondent argumentum eò collimare ut erroris insimulentur SS. Aug. et Thomas; docet enim uterque, *formale* in peccato originali esse privationem justitiæ originalis per quam voluntas subiciebatur Deo, *materiale* verò in eodem peccato consistere in inordinatione appetitus inferioris, quæ remanet in baptizatis, et ideò rationem non habet veri peccati. Hæc, ut dictum est, expressisse videtur D. Augustinus, dicendo, *concupiscentiam* in baptismo *remitti reatu* (quia per eum mens per habitus supernaturales habitualiter convertitur ad Deum) *remanere verò actu* (quia rebellio partis inferioris adversus superiorem manet in baptizatis, in quibus nihil est damnationis). Porro mentem SS. Augustini et Thomæ assecuti non sunt commemorati argumenti architecti. Non enim intendunt *concupiscentiæ actum*, sive inordinationem appetitus inferioris, esse in peccato originali aliquid *materiale* eo sensu quo materia est quid primum in corpore, sed eo sensu quòd sicut *materiale*, sive *physicum* peccati, non est peccatum, ita inordinatio appetitus inferioris non est verum peccatum, quia se habet in peccato originali ut materia sive *physicum* in peccato; unde non ait D. Thomas inordinationem illam esse *materiam peccati originalis*, sed in eo esse sicut quiddam *materiale*. Quanquàm reponi posset, hoc sensu in mente SS. doctorum, *concupiscentiam* esse *materiale* peccati originalis, *formale* verò ejus reatum, sive privationem gratiæ sanctificantis

quòd Deus, qui nostram naturam in Adamo à concupiscentiâ fecit immunem, decrevit, ut gratia sua sanctificans non habitaret in animâ concupiscentiæ obnoxia, nisi ipse huic decreto in Christo renuntiaret.

Unde, cùm concupiscentia transit ad posteror Adam, gratia sanctificans expellitur, non ex naturâ concupiscentiæ, ut contendit Jansenius, sed ex consilio Dei ita libere decernentis. Hâc autem admissâ hypothesi, concupiscentia est materia peccati originalis, ejus autem forma privatio gratiæ sanctificantis. Et verò prius concipitur concupiscentia, quàm peccati originalis forma, quæ ex ipsâ sequitur, etsi privatio gratiæ sanctificantis, ubi adest concupiscentia, ex Dei consilio primitus oriatur. Quare, pergunt iidem auctores, si adversarii attendere voluissent ad statum præsentis quæstionis, illicò intellexissent, concupiscentiam in hoc ordine esse effectum actualis Adæ peccati, non habitualis, sive originalis, quo ex eo nascendo inficimur. Eò tendit quod aiunt Patres, *animam in corpore tanquàm in vase vitiato corrumpi*, id est animam carni concupiscentiæ obnoxie unitam statim in præsentī ordine contrahere privationem gratiæ sanctificantis, et ideò peccatum originale.

Quid sentiendum de ultimâ opinionē modò expositâ? — Si in re tam obscurâ opinionem amplecti sapientis esset, huic profectò sententiæ primas daremus, quia videtur esse opinio D. Thomæ loco citato, quia per eam minori cum difficultate exponitur celebre D. Augustini effatum, *concupiscentia in regeneratis transit reatu, manet actu*, quia per eam haud difficilè explicatur transmissio peccati originalis, quia demùm quod diximus de essentiâ peccati universim accepti, ipsum scilicet consistere in privatione, videtur exigere, ut essentia peccati originalis constituatur in privatione justitiæ, cum quâ creatus est Adam.

Nihilominus cum peccatum originale sit peccatum singularis cujusdam speciei, non audemus commemoratam sententiam propugnare, aut certam esse pronuntiare; illam enim ignorâsse videntur SS. Augustinus, et Hieronymus. Ille videlicet citato libro de moribus Ecclesiæ, cap. 22, asserit, *nihil esse peccato originali ad intelligendum secretius*; quod verum non videtur in hoc systemate. Deinde sæpius declaravit se nullatenus explicare posse peccati originalis traductionem, et ideò hâc super difficultate consuluit, ut postea ostendemus, D. Hieronymum, qui in isto nodo solvendo

non fuit felicior; sed in commemorato systemate illa transmissio haud difficilè exponitur. Jam verò quero, an certum, aut etiam probabile sit, quosdam recentiores, doctissimos licet, in intelligendâ peccati originalis naturâ acutiores fuisse duobus illis eximiiis doctoribus, quos suscitavit Deus ad refellendum Pelagianorum errorem? Et ideò an hoc in puncto probabilis videri debeat opinio quam ipsi penitus ignoraverunt? Quod certè non existimamus, præsertim cùm divina traditio circa peccatum originale eorum ætate minùs fuerit obscura quàm hisce temporibus.

CAPUT III.

De modo quo traducitur peccatum originale.

Divus Augustinus hoc Pelagianorum argumento pressus, *si anima ab Adamo non trahitur, sed à Deo creetur, et singulis infunditur, peccatum originale, quod in animâ sedem habet, non potest ab Adamo trahi*. hoc, inquam, dilemmate pressus, incertus quid responderet, D. Hieronymum epist. olim 29, nunc 167, et aliis consuluit, à quo indubiè solidam non accepit solutionem; dubitavit enim ad mortem usque, utrum anima esset *ex traduce*, an singulæ ex nihilo à Deo perpetuò crearentur.

Quamobrem, ut idem argumentum à novis Pelagianis, Socinianis, Deistis, ad nauseam usque propositum pro modulo nostro diluamus, cum doctissimo Bellarmino expendemus 1^o, quænam sit animæ origo... 2^o Quomodò anima per suam cum carne unionem vitietur,

ARTICULUS PRIMUS.

Quænam sit animæ origo?

Varia super animæ origine systemata, quorum pleraque absurda sunt, satis ostendunt quot et quanta figmenta pariat, aut parere possit ingenium humanum. Præcipua sic breviter referemus et refellemus, ut commune et certum stabiliamus.

PRIMUM SYSTEMA. — Animas quasdam divinæ substantiæ particulas effecit, quæ idcirco nec propriè crearentur, nec ex parentibus traducerentur, sed miro modo à Deo inspirarentur. Ita visum fuit primò Stoicis, deinde Gnosticis, Manichæis, et Priscillianistis, ut refert D. Aug. libro de hæresibus, hæresi 6, 46 et 70... Scripturæ, traditioni, et rationi manifestè repugnat, ex quibus constat quidquid Deo intrinsecum est esse Deum ipsum, et animam per peccatum maculari posse, quod divinæ sub-

stantiæ accidere nequit. Unde ut hæreticum et insulsum fuit eliminatum.

SECUNDUM SYSTEMA. — Animas cum Angelis à Deo primitus ex nihilo creatas esse asseruit, ac deinde ob delicta ab ipsis eo in statu commissa ab eodem Deo in corpora veluti in carceres ad peccata expianda fuisse detrusas et amandas. Duos maximos antiquitatis viros sibi vindicat, Platonem qui illud excogitavit, ac Origenem qui postea illud propugnavit. Nihilominus falsissimum est, utpotè sacris Litteris manifestè adversum. Etenim, ut alia præteream, Apostolus clamat, *electum fuisse Jacob, et non electum Esau antequàm quidquam boni aut mali egissent, et unumquemque* in ultimo iudicio *ante tribunal Christi* aut puniendum aut remunerandum esse *propter opera sive bona, sive mala, quæ gessit* dùm esset in corpore; quæ sanè evincunt Jacob et Esau priusquàm nati essent, sive ex animâ et corpore coalescerent, *nihil boni aut mali egisse*, et Deum in hominibus vel bonum aut malum non esse reputaturum nisi quod dùm viverent, id est corpore et animâ compingerentur, reipsâ egerunt.

TERTIUM SYSTEMA. — Finxit, animas cum Angelis initio conditas, et peccati puras, in corpora nascentium vel divinitus mitti, vel sponte suâ labi. D. Aug. lib. 3 de libero Arbitrio, capitibus 20 et 21, inter quatuor animarum incarnationis modos duplicem hanc animæ cum corpore unionem recenset.... Stultam sanè primâ fronte se prodit; videtur enim omninò absurdum fingere à summè sapiente Numine unam hominis partem initio mundi conditam fuisse, alteram ejusdem hominis partem post multa secula creari.

QUARTUM SYSTEMA. — Animas ex *traduce* oriri docuit, id est ex animâ patris fieri animam filii per emissionem incorporei seminis, sicut ex corpore patris fit corpus filii per emissionem corporei seminis. Hoc est systema quod, aliis rejectis, unâ cum illo quod animas in singulorum conceptione à Deo creari dicebat, in Ecclesiâ celebrius evasit. Pluribus olim placuit, Augustino verò, post exortam pelagianam hæresim, eâ potissimum ex causâ quòd diluendis eorundem Pelagianorum adversùs peccatum originale argumentis magis idoneum videretur. Etenim S. doctor inter opinionem de animarum traductione per mirabilem infusionem spiritualis seminis, et opinionem de quotidianâ et momentaneâ animarum creatione, ad finem usque vitæ dubius et anceps hæsit; id enim testatur D. Fulgentius. « Quæ-

stionis, » inquit lib. 3 de Veritate prædestinationis et gratiæ cap. 18 (de origine animæ), « profunditatem sibi imperscrutabilem cernens, nullam voluit hujus rei definitam proferre sententiam : incongruum prorsus existimans, aliquid affirmare sine dubitatione velle, quod alter posset contrariâ responsione convellere; ejus tam in decimo libro de Genes ad litteram, quàm in libris ad Vincentium Victorem de origine animæ, necnon in libro primo ex duobus, quos ad S. Hieronymum scripsit; in tribus quoque epistolis, quas ad Optatum episcopum de hac quæstione composuit, disputatione refulget non minùs copiosâ quàm profundâ, et eo magis laudabili, quia congruâ temperie moderatâ; ubi quidquid ingenii acumine, quidquid ratiocinationis ordine, quidquid auctoritatis pondere inquirendum discutiendumque conspexit, et inquisivit singulariter, et discussit. Consensus tamen ab utrâque definitione continuit, ne laborem tantæ disputationis inani ter susciperet, quem cujuslibet sententiæ temeraria definitio vacuaret. » Prolixus ille textus eximios gratiæ præconis sensus et singularem sapientiam patefacit, et eorum ora obstruit qui hanc dubitationem Augustino crimini vertere ausi sunt; et verò, si in hoc culpandus esset S. doctor, culpandi forent et Patres et doctores quos in eâdem dubitatione ad undecimum usque seculum versatos fuisse ritè ostendit Norisius vindic. cap. 4, paragrapho 3. Neque obtendas cum iisdem censoribus evidens fuisse animam spirituales et immortales non potuisse esse ex *traduce*, et ideò illi Augustini perplexitati nullum fuisse locum; hæc enim perplexitas respexit non semen corporeum animæ, sed *incorporeum semen*, an nempe suâ quâdam occultâ et invisibili vi seorsum ex patre currat in matrem cum fit conceptus in feminâ, ut ipse ait epist. 190 ad Optatum, aliàs 157, cap. 4, n. 15; opinio autem affirmans nihil absurdi involvit, cum S. Bonaventura et multi alii Scholastici admittant materiam spirituales non esse impossibilem, inquit Norisius loco citato; hac quippe spirituali animæ materiâ admissâ haud difficile erit propugnare animarum educationem secundum formam ex eadem materiâ spirituali. Demum Augustini hac super quæstione dubitatio defensore non indiget; ipse enim eam tuitus est dùm ostendit illum prudentissimum esse reputandum qui in difficillimâ quæstione iudicium suspendit, cum nihil certi ab Ecclesiâ definitum esse cognoscit,

Ubi, inquit lib. 2 de peccatorum meritis et remissione cap. 56, n. 59, questionem de animæ origine versans, de re obscurissimâ disputatur, non adjuvantibus divinarum Scripturarum certis clarisque documentis, cohibere se debet humana præsumptio, nihil faciens in partem alteram declinando

Quamquam autem Augustini dubitatio per longam annorum seriem pluribus Patribus placuit, præsens tamen systema per modum etiam hypothesis hodie propugnare non liceret, ut mox dicturi sumus. Et verò, fatente ipso Norisio loco citato, *animarum creatio in Ecclesiâ orientali communiter fuit credita*. Præterea, istud systema incorporeum semen in animâ admittens nequaquam potest intelligi, et omninò periculosum videtur propter admissionem partium etiam spiritualium in animâ. Tandem hujus systematis patroni, sive materiæ spiritualis animæ defensores, inter se non consentiunt circa modum quo anima ex illâ materiâ educitur, sive egreditur, quinimò sese invicem acerrimè oppugnant. Alii enim animam ex semine spirituali efformari volunt, sicut corpus ex semine corporeo producit; alii (ut Alipius Roylof Augustinianus apud Norisium loco citato) eo sensu animarum traducem possibilem defendunt, quòd anima ut Dei instrumentum alteram animam potest creare, *quam virtutem, inquit, creaturæ communicari posse nobiles scholastici existimârunt*.

QUINTUM SYSTEMA — Tradit omnes animas simul cum animâ Adæ creatas ab eo in nepotes suos, non ut partem seminis, sed unâ cum semine esse transmittendas. Hoc fortassis systema tetigit Augustinum, cum proximè citatâ epist. 190 ad Optatum cap. 4, n. 15, quæsit, *an semen incorporeum animæ in semine corporis lateret*. Istud profectò systema *incredibile esse* ibidem meritò pronuntiat S. doctor. Unde S. Leo epistolâ ad Turibium episcopum Austriensem cap. 10, Origenis sententiam de antiquâ ac simultaneâ animarum creatione refellens dixit: «*Catholica fides eos Origenistas à corpore sue unitatis absceidit, constanter prædicans atque veraciter, quòd animæ hominum priusquam suis inspirarentur corporibus non fuere, nec ab alio incorporentur, nisi ab opifice Deo, qui et ipsarum est creator et corporum...*» Hæc aliunde sententia peccati originalis transmissionis nodum non solvit. Si enim immensa animarum multitudo in Adæ animæ veluti visceribus inclusa Adamo peccante peccavit, verum non erit quod ait Apost. Rom. 5, *regnasse*

mertem etiam in eos qui non peccaverunt in similitudinem pravaricationis Adæ (omnes enim propriâ voluntate ut Adamus peccassent) si e converso non peccavit, unde evenit, ut animæ à Deo creatæ, quæ per se nunquam peccaverunt, peccato inficiantur?

SIXTUM SYSTEMA — Animæ originem, ita, Deo volente, humanæ menti imperviam fecit, ut de eâ aliquid certi pronuntiare velle, temeritatis, quin et erroris sit non ferendi. Hæc in sententiâ ad mortem usque versatus fuit D. Augustinus, ut dictum est in expositione quarti systematis, quod et confirmat ista ipsius declaratio lib. 1 Retract. cap. 1, n. 5: «*Quod attinet ad animæ originem, utrum de illo uno sit, qui primùm creatus est, quando factus est homo in animam vivam, an similiter ita fiant singulis singuli, nec tunc sciebam, nec adhuc scio.*» Hanc Augustini sententiam amplexi sunt sexto seculo episcopi in Sardinia exules, septimo SS. Gregorius Magnus, et Isidorus Hispalensis, nono S. Prudentius Tricassinus episcopus, duodecimo Hugo Victorinus apud Norisium loco citato. — Præ cæteris observatione digna sunt, et D. Augustino gloriosa SS. Gregorii et Isidori pronuntiata, quæ idcirco oculis subjiciemus. Ille, apud Norisium vindic. cap. 4, paragrapho 3, lib. 7, epist. 53, ad Secundinum ait: «*De origine animæ inter sanctos Patres requisitio non parvaversata est; sed utrum ipsa ab Adam descenderit, an certè singulis detur, incertum remansit, eamque in hæc vitâ insolubilem fassi sunt questionem; gravis enim quæstio est, nec valet ab homine comprehendi...*» Iste apud eundem Norisium ibidem lib. 2 Officior. Ecclesiasticæ cap. 25, inter sententias, quas *de fide* tenendas proponit, hanc recenset, *quòd incerta sit animæ origo*.

ULTIMUM SYSTEMA — Admittit et propugnat quotidianam animarum à Deo creationem, earumque corporibus, cum in uteris matrum ad animationem præparata sunt, infusionem. Pro isto sit

CONCLUSIO. — Animæ non sunt ex traduce, etiam per semen spirituale, sed per creationem singulis à Deo infunduntur: magno Theologorum, qui à quingentis annis floruerunt, consensu corroboratur.

Hanc sententiam probare solent multi theologi, etiam insignes, his Scripturæ oraculis, *qui finxit sigillatim corda*, id est, animas eorum, Psalmo 52; *Revertatur pulvis in terram undè erat, et spiritus redeat ad Deum qui dedit illum*, Ecclesiastæ ultimo: *Fingens spiritum homi-*

nis in eo, Zachariae cap. 12 ;.... Parentes patres carnis, Deus Pater spirituum, Epist. ad Hebræos cap. 12, etc.

Verum D. Augustinus epistolâ nunc 166, aliâs 28, cap. 8, n. 26, monet D. Hieronymum hæc testimonia non esse invicti roboris, nec vult opinionem de quotidianâ animarum creatione illis sibi probari, quia ita assertunt animarum omnium conditorem esse Deum, ut non indicent modum, quo à Deo sint conditæ, an per creationem ex nihilo, an per propagationem ex animâ primi parentis. Igitur aliæ adducendæ sunt probationes.

Verum hic sedulò observandum est (quod nonnulli recentiores vel incautè, vel inscitè, satis non attenderunt), duos ex præstantissimis doctoribus qui novissimis hisce temporibus Ecclesiam illustrârunt scilicet doctissimos cardinales Robertum Bellarminum, et Henricum Norisium à sese invicem graviter dissentire circa istam quæstionem, utrum *sententia de quotidianâ animarum à Deo creatione traditione ecclesiasticâ certa sit, vel non*; affirmaverat Bellarminus lib. 4 de amissione gratiæ et statu peccati cap. 11 et in suæ assertionis patrocinium adduxerat plurimos Patres tum græcos, cum latinos, scilicet inter primos D. Chrysostomum homiliâ 25 in varia loca Matthæi dicentem : *Anima nec generat, nec generatur, nec ullum agnoscit patrem, præter eum cujus voluntate creata est....* S. Cyrillum Alex. lib. 1 in Joannem cap. 9.... Gregorium Nyssenum lib. de animâ cap. 6, Theodoretum lib. 5 ad Græcos.... Inter Latinos autem : S. Hilarius lib. 10 de Trinitate ante libri medium, ubi ait : *Anima hominis opus est Dei, carnis verò generatio semper ex carne est....* D. Ambrosium lib. de arcâ et Noe cap. 4, dicentem : *Ex nullo homine generantur animæ....* D. Hieronymum in caput ultimum Ecclesiastæ asserentem, *ridendos esse eos, qui putant animas ex corporibus seri, et non à Deo, sed à corporum parentibus generari, et epistolâ ad Pammachium, ante medium, ecclesiasticum dogma esse, ut Deus quotidie animas fabricetur.....* S. Leonem epistolâ ad Turibium cap. 10, cujus verba relata sunt, et epistolâ 11 ad Julianum docentem, eo modo nobis animas inspirari, quo fuit inspirata Christo, et ideò ex parentibus non propagari; quin et ipsum S. Augustinum commemoratâ epistolâ 190 ad Optatum dicentem, *propaginem animarum inconsideratâ temeritate defendunt*, ac deinde aientem de sententiâ Tertulliani, qui proponebat traductionem animarum, *quo quid perversius dici potest?*

ex quibus inferunt nonnulli (non Bellarminus) meritò D. Thomam 1 p., q. 118, a. 2, opinionem de traductione animarum *hereticam* pronuntiasse.

At cum recentiores quidam his Patrum testimoniis moti D. Augustini de animarum origine dubitationem *erroris* arguerent, Norisius in vindiciis suis c. 4, paragrapho 3, *animarum creationem Ecclesiæ traditione certam non esse*, et ideò deceptum esse Bellarminum, probare aggressus est. Hinc citata Hieronymi, Leonis, Augustini, et Thomæ testimonia seorsim expendit, et perperam allegari prætendit. Et enim, ipso dicente, Hieronymus risum, de quo commentario in caput ultimum Ecclesiastæ, lectis D. Augustini epistolis, deposuit epist. 172, aliâs 30 apud Augustinum, in quâ Augustini dubitationem impensè laudat, et in hac quæstione *unumquemque in suo sensu abundare* permittit; quod atinet ad ejus dictum epistolâ ad Pammachium reponit non legi apud S. doctorem, *ecclesiasticum dogma* (ut citat Bellarminus), sed cum parenthesi (*quod ecclesiasticum est secundum eloquia Salvatoris*), ut sensus sit, sententiam de animarum creatione in mente illius assertorum esse consonam *eloquiis Salvatoris*. Et verò, Hieronymus, referente ipso Bellarmino loco citato, *ad quartam sententiam*, epistolâ ad Marcellinum, etc., *opinionem de traductione in Ecclesiâ occidentali prævaluisse* asserit.... D. Leo, addit idem theologus, epist. ad Turibium, cap. 10, solùm (ut ex contextu elucescit) refellere intendit sententiam Origenis de antiquâ ac simultaneâ omnium animarum creatione. Idem sibi proponit epist. 11 ad Julianum, in quâ improbat opinionem Eutychetis cum Origene concinentis, ut iterum probat epistolæ tenor. Unde *principium* apud S. Leonem significat non principium animæ productivum, de quo nulla erat cum Eutychete controversia, sed principium sive initium durationis, quod idem fuit in Christo ac in nobis, nempe initium vivendi in corpore, non in cœlis ante corporis formationem.... Augustinus verò, pergit celeberrimus auctor, in epistolâ ad Optatum *inconsideratæ temeritatis* insinuat propaginis animarum assertores, non quòd illam sententiam *falsam* esse sentiret, sed quòd incertam illam opinionem ut veram mordicè et audacter defenderent, ut patet ex eadem epistolâ (unde adversæ sententiæ defensores eodem modo increpâset, si se eodem modo gessissent). Pariter Tertulliani sententiam de traductione animarum *perversissimam* dixit,

non quia animarum traducem præcisè adstruebat, sed quia illam stabiliebat per emissionem corporei seminis, ut iterum evincit contextus. Etverò, S. doctor in eadem epistolâ, ut dictum est, de animarum origine dubitat, et in scriptis quæ post illam edidit, puta in libris de origine animæ, etc., eadem laborat anxietate.... Tandem D. Thomas *hæreticum esse* dixit asserere animam traduci cum semine, non incorporeo, sed *corporeo*, ut ipse loco objecto probat, et antea probaverat Augustinus tum citatâ epistolâ ad Optatum, cum libro 1 de Genesi cap. 23, n. 41.

Quancumque, ut olim aiebat D. Hieronymus apud Augustinum epistolâ nunc 198, aliâs 79, *periculosum est de tantorum magistrorum judicare sententiis, et alterum alteri præferre*, nihilo tamen minus sententiam de animarum creatione traditione ecclesiasticâ certam non fuisse, septimo saltem seculo, inter alia demonstrant, ni fallor, antea adducta SS. Gregorii Magni et Isidori Hispalensis testimonia.

His in antecessum emissis, ne ignoraret lector litem inter duos eximios viros exortam, et existimaret in errore fidei catholicæ adverso versatos fuisse quotquot præteritis seculis quotidianam animarum à Deo creationem non propugnabant, nunc ab initio proposita assertio pro virili parte est comprobanda.

Illa sententia est amplectenda quam Ecclesiæ orientalis, sive græcæ, doctores maximâ saltem ex parte propugnaverunt, quam nonnulli Ecclesiæ occidentalis, sive latinæ, Patres defenderunt aliis eam non impugnantibus, quam theologorum et communis fidelium sensus commendat et veluti consecrat, quæ demum rationibus ex fidei principiis erumpentibus innititur; at sic se habet sententia ferens animas ex primo parente per infusionem seminis, etiam incorporei, non traduci, sed à Deo immediatè creari, et singulis inspirari; ergo.

Prob. minor per partes. 1^o Huic sententiæ suffragatur major Græcorum numerus. Jam adduximus D. Chrysostomum, S. Cyrillum Alex., S. Gregorium Nyssenum, Theodoretum, etc., quibus adjungi potest S. Joannes Damascenus lib. 2 de Fide orthodoxâ cap. 12, ubi non solum opinionem Origenis de antiquâ et simultaneâ animarum creatione sugillat, sed etiam agnoscit, *animam et quod est et quod hâc naturâ est à Deo accepisse*, immediatè scilicet. Aliunde hanc esse Græcorum sententiam non diffitentur ipsi Augustinianæ de animarum origine dubitationis apologistæ; ait enim No-

risius loco pluries adducto: *apud Græcos in orientali Ecclesiâ creatio animarum communiter tenebatur*. 2^o Quidam Ecclesiæ latinæ Patres eadem sententiæ adhæserunt, quam alii non rejecerunt, saltem *expressè et directè*. Etverò protulimus testimonia S. Hilarii, et D. Ambrosii, quos Bellarmino eripere aggressus non est Norisius vindic. cap. 4, paragrapho 3. Suffragium profectò duorum illorum eximiorum doctorum, qui ante pelagianam hæresim floruerunt, ostendere videtur cæteros omnes ejusdem Ecclesiæ Patres in eandem sententiam toto animi impetu fuisse conspiraturos, nisi Pelagianorum adversus peccatum originale ejusque traductionem argumenta confirmare, aut corroborare pertinuissent. Suae quippe hæc super re anxietatis non aliam, ut diximus, prodiderunt rationem. 3^o Eandem sententiam communis theologorum et fidelium consensus erigit et stabilit. Hoc scholasticorum suffragium edit Norisius mox citato loco. « Magister, inquit, Sententiarum, 2 sent. distinct. 19, dixit, Ecclesiam Catholicam docere animas non esse ex traduce, quâ sententiâ ab scholasticis receptâ animarum creatio asserta est. » Certè Hugo à S. Victore paulò ante, id est anno 1109, lib. 1 de Sacramentis, parte 7, cap. 30, dixerat: « Fides catholica magis credendum elegit animas quotidie corporibus vivificandis sociandas de nihilo fieri, quàm secundum corporis naturam et carnis humanæ proprietatem de traduce propagari. » Non minus certus est super animarum perpetuâ à Deo creatione plebis christianæ consensus; si quis enim in ejus aures insusurraret, animas ex semine, etiam spirituali, ut corpus ex semine corporeo, oriri, non solum maximo afficeretur scandalo, sed etiam hunc nebulonem novatorem illicò renuntiaret. Hæc autem sensa, sive scholasticorum, sive populorum fidelium animis indita sunt, aut continuâ traditione per opera Patrum transmissa, aut, quod fortassis verius est, traditione orali, quæ in Ecclesiâ semper viguit, et ad mundi finem vigeat. 4^o Eadem sententia rationibus ex rebus revelatis scaturientibus suffulta est. Plures adduxit Hugo Victorinus loco supra indicato, et qui eum subsecuti sunt nobiles theologi, Magister Sententiarum in 2 libro, Estius in eundem librum distinct. 17, X, 15, Bellarminus lib. 4 de amissione gratiæ et statu peccati cap. 11, etc. — Brevitatis studiosi hanc unam eligimus et urgemus.

Animæ per creationem à Deo factam singulis quotidie infunduntur si non sunt ex traduce,

sive si à parentibus non trahuntur; alii enim traductionis modi supra sunt eliminati; at animæ à parentibus non trahuntur; si quippe animæ à parentibus traherentur, eo indubiè sensu quòd pater cum semine corporis transfunderet semen incorporeum, sive spirituale animæ in uterum matris; hic enim est sensus quo defensores traductionis animarum eam propugnabant, ut refert D. Aug. lib. 10 de Genesi ad litteram, cap. 20, n. 36; atqui modus animam traducendi, aut prorsus concipi non potest, aut apertè falsus est; si enim semen, quod est in animâ patris, transit ex animâ patris cum semine corporis in uterum matris, oportet ut semen illud unum totum efficiat cum animâ patris, à quo dividi possit, et reipsâ dividatur, ad eum modum, quo semen corporis, quod est in corpore patris, unum totum facit cum corpore patris, à quo dividi potest et reipsâ dividitur, cum migrat in ventrem matris; neque enim illud alio modo sub sensus nostros cadit; atqui apertè falsum est esse in animâ patris aliquid quod ab eâ non solum separatur, sed etiam separari queat; nam apertè falsum est, aut saltem fidei catholice apertè adversum est, animam hominis non esse spirituales et immortales (concilium enim generale Viennense in Galliâ sub Clemente V, animæ spiritualitatem et immortalitatem vindicavit, quam aliunde insignes philosophi ex rationis lumine quotidie evincunt); sed si esset in hominis animâ aliquid quod ab eâ aut separaretur, aut etiam separari posset, anima humana non esset spiritualis et immortalis; si enim aliquid hujusmodi in ejus substantiâ reperiretur, anima esset divisibilis, sive in animâ esset pars, et pars; atqui quod est divisibile, sive id in quo invenitur pars et pars non est spirituale et immortale, sed materiale et mortale; ideò quippe corpus humanum materiale est et mortale, quia est divisibile, sive in eo existit pars et pars, seu quia semen ab eo separari potest, et reipsâ separatur in generationis actu; ergo à pari, etc.

Atque hinc inferes materiam spirituales, ex quâ animam humanam compingi voluerunt nonnulli antiqui scholastici et medici, de quibus Norisius loco supra commemorato, esse verum figmentum et commentum, hancque opinionem, quam traducis animarum patroni excogitaverunt, ut suum systema utcumque defenderent, quæque animæ spiritualitatem et immortalitatem radicibus evellit, è scholis catholicis omnino expellendam esse et eliminandam.

Hinc D. Augustinus, remotâ peccati originalis transmissione, sententiam enuntiantem *singulas animas novas nascentibus fieri*, veram esse existimavit, ut patet ex ejus jam laudatâ epist. 166, aliâs 28, ad Hieronymum. Aliunde, lib. 10 de Genesi ad litteram, cap. 24, n. 40, p. 272, traducis defensores monet ne *animas corpora esse credant*.

Objiciunt 1^o varia Scripturæ oracula. Genesis cap. 1 et 2 refertur, Deum sex primis diebus totum creationis opus absolvisse, et die septimo *ab universo opere suo quiescere*; animæ igitur quotidie non creantur, sed per *rationes seminales* creaturis insitas producantur. — Resp. : Nego conseq. Deus enim hoc sensu omnia sex primis diebus fecit, et die septimo ab opere cessavit, quòd omnes et singulas rerum species creaverit, sicque totam instituerit naturam, et nihil postea fecerit, id est, nullam novam rerum speciem creaverit, sed gubernaverit duntaxat, et multiplicaverit; at hoc non impedit quominus animas, ubi corpora, quæ informare, sive vivificare debent, sunt sufficienter præparata, ex nihilo educat; tunc enim speciem ab eâ, quam initio efformaverat, diversam non concinnat, imò conservatio et multiplicatio speciei humanæ exigit ut animas continuo creet et infundat, cum aliâ ratione ipsi prospicere non possit. Hæc solutio eò majoris est ponderis quòd ipsissima est quam affert D. Aug. lib. 10 de Genesi ad litteram, cap. 3, n. 5 et 6.

Genesis 5, dicitur *Adam genuisse filium ad imaginem et similitudinem suam*, sed filius est imago patris præsertim secundum animam; ergo. — Resp. illud effatum, quod protulit Spiritus sanctus ut sese usitatæ inter homines loquendi rationi accommodaret, unice significare Adam hominem genuisse sibi homini similem, quod certè non exprimit Adam id genuisse per quod ille homo sibi homini potissimum similis erat. Quotidie nempe dicunt homines *patrem suum similem generasse*, licet non ignorent, imò firmissimè credant patrem filii sui animam non generasse.

Genesis 46 ait Moyses, *cunctas animas, quæ egressæ sunt de femore Jacob, fuisse sexaginta sex*; sed nihil egreditur de femore patris nisi per traductionem seminis; ergo. Resp. animas eo loco, pro Scripturæ more, persynecdochen, quâ pars ponitur pro toto, accipi pro homine, ut sensus sit 66 homines egressos fuisse de femore Jacob. Sic Jeremiæ cap. 40, v. 15, anima interfici dicitur dum homo occiditur. Totus au-

tem homo dicitur egredi de femore patris non quòd illius quaelibet pars ex parentis lumbis exeat, et per virtutem seminis producatur, sed quòd virtus seminis de femore egredientis materiam praearet et disponat ad unionem cum animà, ex quà unione fit homo. Et verò Moyses dictum simile prorsus est, ut jam observavimus, quotidianis dictis hominum, quibus tamen persuasum est animas à Deo perpetuò creari.

Leviticus cap. 17, legitur : *Anima omnis carnis in sanguine est*; sed sanguis cum semine traducitur; ergo. — Resp. cum D. Aug. q. 57 in Leviticum, animam ibi significare vitam animalem, quæ oritur ex unione animæ cum corpore. Dicitur autem *esse in sanguine*, quia per sanguinis dispositionem vita in animali fovetur et conservatur. Cæterum ex contextu liquet Moysen non de homine, sed de brutis animalibus præcipuè saltem ibi disserere.

Epist. ad Hebræos cap. 7, Apostolus probat sacerdotium Melchisedech, et ideò Christi, levitico longè antecellere; quia Melchisedech, et ideò Christus, *decimavit* Levi, filium Abrahæ, qui existebat in lumbis hujus patriarchæ, cum ille decimas impertivit Melchisedech; sed si semen animæ Levi insitum non fuit Abrahæ lumbis, nullius planè roboris erit apostolicum argumentum; Christus enim, utpote Abrahæ filius secundum carnem, non minùs extitit in Abrahæ lumbis, quàm Levi, et ideò non minùs *decimatus fuit* in Abraham quàm Levi; ergo. — Hoc argumentum proponit et expendit D. Augustinus lib. 10 de Genesi ad litteram cap. 19, n. 54 et sequentibus, et quia inter utramque opinionem de *traduce* et creatione animarum dubius et anceps hærebat, juxta utriusque sententiæ principia solvit et exponit. — Resp. per fidei de Christo principiorum, ex quibus arguit Apostolus, flammeum fulgorem hanc liquescere difficultatem. Enimverò Christus, utpote ex Marià Virgine per Spiritùs sancti obumbrantis virtutem conceptus, matrem ex Abraham habuit, non patrem; Levi è converso et patrem et matrem ex Abrahæ semine satus sortitus est. Hinc in Abrahæ lumbis aliter extitit Levi corpus, aliter corpus Christi. Corpus quippe Levi fuit in illius patriarchæ femore ratione feminei seminis et ratione seminis virilis; corpus è contra Christi fuit in ejusdem Abrahæ lumbis ratione feminei duntaxat seminis. At muliebre semen, consentientibus etiam celebrioribus medicis et physicis, est materia iners et merè passiva, ex quà in generatione formatur et compingitur

humana caro; semen verò virile est materia activa et animosa, quæ femineo semini incubans carnem humanam efformat, digerit, componit. Unde semen virile hominem verè et propriè generat; cum igitur Christus in Abraham non fuerit ratione illius seminis, sed ratione tantum seminis matris suæ Mariæ, in eo propriè non fuit quatenus homo, sive etiam quatenus habuit humanam carnem (cum ejus corpus sine semine virili propriè effingi non potuerit), et ideò peccatum originale contrahere non debuit, et in Abraham non fuit decimatus; cum verò Levi in Abraham extiterit secundum utrumque semen, et avito peccato, et decimationi fuit obnoxius.

Hanc responsionem solidè et eruditè suo more protulit et confirmavit D. Augustinus proximè citato lib. 10 de Genesi ad litteram, cap. 20, n. 55 : « Secundum, inquit, rationem seminalem ibi (in Abrahæ lumbis) fuit Levi quà ratione per concubitus venturus erat in matrem, secundum quam rationem non ibi erat Christi caro, quamvis secundum ipsam ibi fuerit Mariæ caro; quapropter nec Levi, nec Christus in lumbis Abrahæ secundum animam; secundum carnem verò et Levi, et Christus; sed Levi secundum concupiscentiam carnalem, Christus autem secundum solam substantiam corporalem; cum enim sit in semine et visibilis corpulentia, et invisibilis ratio, utrumque cucurrit ex Abraham, vel etiam ex ipso Adam usque ad corpus Mariæ, quia et ipsum eo modo conceptum et exortum est; Christus autem visibilem carnis substantiam de carne Virginis sumpsit, ratio verò conceptionis ejus non à semine virili, sed longè aliter ac desuper venit... Ille igitur (n. 56) est decimatus in Abraham, quicquid secundum carnem tantum, sic tamen fuit in lumbis ejus, quemadmodum in sui patris etiam ipse Abraham, id est qui sic est natus de patre Abraham, quemadmodum de suo patre natus est Abraham, per legem scilicet in membris repugnantem legi mentis, et invisibilem concupiscentiam.... non autem et ille ibi decimatus est, cujus caro inde non fervorem vulneris, sed materiam medicaminis traxit, » etc.

Objiciunt 2º varia ex ratione momenta. Primum. Si Deus omnium et singulorum hominum, qui generantur, animas creet, cooperabitur stupris et adulteriis, ex quibus prodeunt homines; absurdum et impium consequens; ergo. — Hoc Apollinaris argumentum, si non insolubile, saltem solutu difficilimum olim judica-

vit S. Gregorius Nysenus lib. de animâ, cap. 6.
— Respondeo cum D. Hieronymo lib. 5 Apologiae adversus Rufinum, et ipso duce S. Augustino epistolâ nunc 166, aliâs 28, ad Hieronymum, cap. 5, n. 15, Deum animas à se immediatè creatas infundendo corporibus ex stupro et adulterio efformatis non magis culpandum esse quàm agricolam qui in agro suo triticum furto ablatum sernerit; quemadmodum enim in hoc casu vitium stat ex parte furis, non *sementis*, ita et in altero culpa inest adulteris coeuntibus, non Deo animarum conditori, et inspiratori. Hæc responsio multum non discrepat à tritâ istâ theologorum et philosophorum christianorum solutione, nimirum supremum Numen animas uniendo fœtui ex stupro vel adulterio sato cooperari quidem *materiali*, sive physico stupri vel adulterii, id est actui naturali generationis humanæ, qui sine ipsius concursu existere non posset, sed nullatenus cooperari *formali* sive malo morali stupri vel adulterii, id est actui hominis quatenus in generatione militat adversus legem; hujus quippe deformitatis sola causa est voluntas creata deficiens, ut diximus ubi de peccati universim considerati naturâ disseruimus.

Secundum. Si anima à patre non traducitur, homo animam non generabit, sed solam carnem; ergo verè dici non poterit hominis parens. — Resp. Argumentum istud nimis probare; evinceret enim hominem ipsius carnis parentem verè cognominari non posse; scilicet carnem non procreat absque influxu Dei et quidem tanquàm universalis et principalis causæ, in quâ vivimus, movemur, et sumus, et sine quâ nihil prorsus physici agere possumus. Quemadmodum igitur homo dicitur et est carnis humanæ parens quia sese determinando ad emittendum semen movet et excitat primum et necessarium motorem ad subministrandum suum concursum, ita idem homo dicitur et est totius hominis genitor quia vi activâ sui seminis materiam, sive femineum semen, in formam corporis humani redigendo, causa est essentialium hominis partium, id est facit ut Deus ex suo decreto animam materiæ, sive semini sic præparato infundat, sicut ex ante dictis elucescit.

Tertium. Bruta, plantæ, etc., animas suas producant, sensitivam scilicet et vegetativam; cur homo, qui præstantioris est conditionis, animam suam non posset parere? — Resp. adversarios non attendere vim generativam homini à supremo Creatore insitam longè ex-

cellentiorem esse vi generativâ animantibus et plantis ab eodem Conditorè inditâ; ex vi enim generativâ hominis necessariò, ut diximus, erumpit animæ rationalis productio; è converso, ex vi generativâ animantium aut plantarum effluit generatio animarum longè inferioris ordinis. Cæterum, etsi homo nullatenus suam animam posset producere, inde ipsius mirè commendaretur dignitas, utpote qui præditus esset animâ ad quam producendam nulla naturæ vis posset attingere.

Quartum. Vir innatâ seminis sui vi et virtute in filio producit animam vegetativam et sensitivam, quæ in eodem simul est intellectiva; quidni et eandem produceret quatenus est intellectiva? — Resp. de obscuris per obscuriora non esse judicandum. Utrum autem vis sensitiva et vegetativa, quæ inest homini, unum quid sit cum animâ ipsius rationali vel non, acerrimè disputatur inter theologos et philosophos. Censet D. Thomas, animam vegetativam et sensitivam, ad quam pertingit vis hominis generantis, adveniente animâ intellectivâ à Deo creatâ evanescere et perire; at ideò animam rationalem utriusque munia, sive agendi virtutem, obire, vel suscipere; negat celebris Scotus, et cum eo plures, quibus placet, diversas illas animas in homine remanere, et inter se reipsâ distingui. Quidquid sit, si ultima sententia, quæ sola adversariis favere videtur, vera est, anima vegetativa et sensitiva virtute seminis virilis traducetur, non anima rationalis; priusquàm enim accedat et illuceat anima rationalis fœtus est purum animal, non homo. Scio quidem plures medicos et physicos, et quidem non infimi nominis, existimare animam rationalem fœtui inesse à primo sui exordio, sive in virili semine existere quidquid deinceps hominem vivificat (ex quâ opinione nonnulli Embrionistæ non ita pridem judicaverunt baptizandum esse fœtum humanum, ubi animatus est, sive ubi ipsum moveri deprehendi potest, etiam antequàm ex utero matris naturali modo egressus fuerit), sed simul scio typis excusum hâc super re opus missum ad episcopos Gallicanos, et varios tum sacros cum salubres regni Ordines, singulatim Cadomenses, absque responso mansisse, quod non leve est argumentum illud ipsis non arrisisse.

Quintum. Si Deus singulas animas quotidie creat in ipso creationis instanti bonæ erunt, et peccati originalis expertes, siquidem Deus animam peccato infectam creare non potest;

dogmati catholico adversum consequens; ergo. — Resp. animam quoad substantiam esse à Deo, et proinde bonam, cum *omnis creatura Dei bona sit*. Unde quòd ipso creationis momento peccato coinquinetur à Deo non oritur, sed ab alià causà, ut postea ostendemus.

Ultimum. Homo hominem sibi similem secundum speciem parit; sed humana species per animam rationalem præcipuè constituitur; ergo anima ab homine generante oritur. — Resp. hominem generare hominem quantum ad animam præcisè quatenus illius seminis virtute disponitur materia, sive semen femineum ad susceptionem animæ, sive formæ, ut diximus.

PRINCIPIA SOLUTIONUM. — Primum. Animæ traductio per *seminalem rationem*, id est per semen etiam spirituale et incorporeum, animam facere videtur corpoream, et ideò, licet conducere videretur ad explicationem, sive intelligentiam, transmissionis peccati originalis in principiis etiam D. Augustini et aliorum Patrum qui Tertullianum et nonnullos alios veteres increpârunt quòd *animam corpus esse* dixerant, est rejicienda.

Secundum. Anima hoc sensu ex hominis semine oritur quòd virtus seminis ordinet et efformet corpus humanum, sicque determinet Deum ad animam ipsi infundendam cum illud debito modo dispositum est, sive concinnatum.

Tertium. Scripturæ mos est partem accipere pro toto, v. g., corpus, aut animam hominis pro homine. Hoc sensu homo alterum hominem generare dicitur, quia generat corpus.

Quartum. In generatione fœmina subministrat materiam corporis, non vim activam viri seminis propriam, quæ efformat corpus. Unde fœmina gignit *passivè*, vir *activè*. Hinc Christus, cujus corpus ex carne matris coaluit, non ex semine viri, peccatum originale ex Adæ seminatione exoriens, non contraxit, nec decimatus fuit in Abraham.

Quintum. Etsi plures hic occurrunt difficultates solutu arduæ, aut etiam impossibiles, non ideò nostra nutabit assertio, quia negandum non est quod certum est eo quòd explicari nequit quod est obscurum. Desiperet, v. g., qui materiam extensam esse inficiaretur, quia explicari non potest, an sit divisibilis in infinitum, vel non.

Sextum. Quod obtrudere consueverunt nostrates increduli, animam humanam non minùs traduci posse vi seminis viri, quàm animam bestiarum vi ipsarum seminis, cum inprimis anima bestiarum in pluribus saltem operatio-

nibus cum animâ humanâ concordet, hoc, inquam, hominem cordatum movere non debet; 1^o enim ingenii acumine indubie non superant Augustinum et alios veteres, qui animam humanam vi seminis corporei seri non posse absque ullâ dubitatione asseruerunt. 2^o Acutiores etiam non sunt Cartesio et præstantissimis aliis philosophis, qui vel in animantibus animas non agnoverunt, vel eas ab animâ excellentiâ longè discrepare affirmaverunt. 3^o Quidquid effluat de præstantiâ animarum bestiarum, nunquàm evincere poterunt nullum existere medium inter materiam et spiritum, et idecirò animam bestiarum, si non est corporea, esse ad instar animæ humanæ spiritum.

ARTICULUS II.

Quomodò vitietur anima humana per suam cum corpore unionem?

Quoniam vera non est sententia quæ asserit animam simul cum corpore per generationem ex parentibus traduci, oportet ut anima, quam Deus immediatè corpori infundit, cum à Deo peccatum non habeat, per suam cum carne quæ à parentibus trahitur, conjunctionem peccatum contrahat. Unde præclarum istud D. Augustini pronuntiatum lib. 5 contra Julianum cap. 4, n. 17: *Profectò aut utrumque (corpus et anima) ex homine trahitur, aut alterum in altero tanquàm in vitiato vase corrumpitur*.

Cum autem variis modis corrumpi possit anima ex parte corporis, cui infunditur, idecirò multiplices sunt super salebrosâ istâ quæstione opiniones seorsim sedulò discutiendæ.

§ 1. Prima opinio refertur et rejicitur.

Hæc sententia omnes Adæ nepotes primi ipsius peccati reos exhibet, quia si Adæ ævo physicè extitissent velut Adam peccassent, quemadmodum si Adam non peccasset, et ipsi etiam non peccassent. Quamobrem in Adam peccaverunt, quia suas voluntates Adamo commisisse censentur.

Istud systema paucos habuit defensores, et contemptu magis quàm seriâ refutatione dignum est. Enimverò prætensa illa voluntatum ex parte omnium Adæ nepotum commissio meram refolet fabulam, et nullum prorsus in verbo Dei, sive scripto sive tradito, fundamentum habet. Nihil quidem prohibet ad excusandam primam Dei ordinationem, quâ Adam totius generis humani caput morale constituit, in ordine ad justitiæ originalis conservationem, aut amis-

sionem (quam criminari solent novatores) dicere cunctos Adæ posteros, si tunc physicè extitissent, huic ordini sese lubentissimè, et etiam cum gaudio, subjecturos fuisse; verùm asserere illos moraliter etiam commisisse suas voluntates Adæ merum est commentum, sive mera conjectura. Deinde in isto systemate, peccatum originale, quod ex fide catholicà realiter et intrinsecè contrahitur, moraliter duntaxat ad Adæ nepotes fuisset transmissum. Denique idem systema ignotum indubiè fuit D. Augustino. Etenim aureo libro de prædestinatione Sanctorum cap. 12, n. 24, obstupescit S. doctor, quòd nonnulli suo tempore dicere fuissent, ideò ex infantibus alios cum baptismo ausi ex hac vità migrare, alios sine baptismo interire, *quia præscita sunt futura eorum bona, vel mala opera*. Rationem ibidem affert; Deus nimirum remunerat, aut punit, quod *de facto* egimus bonum, aut malum, non illud quod acturi essemus, si vixissemus juxta istud Apostoli oraculum 2 ad Corinth. cap. 5: *Omnes nos manifestari oportet ante tribunal Christi ut referat quisque propria corporis, prout gessit sive bonum, sive malum*. Porro in commemorato systemate supplicio afficerentur Adæ nepotes propter delictum quod reverà non commisisissent, sed commissuri tantùm fuissent, si tempore Adam physicè extitissent.

§ 2. *Opinio secunda exponitur cum rationibus pro ipsà militantibus.*

Secundum systema tradit, peccatum originale propagari virtute præcepti Adamo, ut totius generis humani capiti, divinitus impositi, quo ipsi fuerat injunctum non solùm immortalitatem, immunitatem à concupiscentià, gratiam sanctificantem, etc., sibi servare, sed etiam in nepotes suos transmittere. Hæc scilicet fuit prima institutio, ut Adamo omnium hominum parente justitiam, quàm in origine suâ fuerat exornatus, servante, eandem Deus cunctis ejus posteris in suâ cuique origine esset impertiturus; illo è converso justitiam abjiciente, Deus quidem non desineret condere animam in posteris ex eo nascituris, sed tamen non esset illi infusus justitiam, quam Adam pro se et totâ stirpe suâ acceptam contempsisset. Hinc cum anima corpori ex Adam per naturalem generationem sato infunditur, fit pars hominis nascentis ex Adam, et ideò expers est justitiæ, quam ille sibi et suis amisit, quâ ex causâ peccato originali inficitur, quod nempe in illius justitiæ privatione *formaliter consistit*.

Hoc systema tueri visi sunt D. Anselmus (1) in fine undecimi seculi lib. de conceptu virginali cap. 7 et 10, et de libero arbitrio cap. 22, et D. Thomas 1-2, q. 81, a. 1, in c. (neque enim expressam divini decreti mentionem faciunt), illud certè totis ulnis amplexus est, totisque viribus adstruit Bellarminus lib. 4 de amissione gratiæ et statu peccati cap. 12; et major cum ipso theologorum numerus. Illa est sententia quæ, ut diximus, refellendis Socinianorum, Deistarum, et aliorum Novatorum adversus peccatum originale argutiis magis est idonea, quam idcirco vulgò admittit hodierni christianæ religionis Apologistæ.

Igitur istud systema statuit peccatum originale transmitti vi præcepti, quo Deus voluit ut omnes et singuli Adami nepotes unam cum ipso veluti personam efficerent in ordine ad justitiæ originalis conservationem, vel privationem. Unde ad contrahendum peccatum originale requiritur et sufficit ut quis ex Adam per naturalem generationem nascatur. Porro his innititur momentis.

MOMENTUM PRIMUM. — *Ex Scripturis*. Rom. 5 legitur: *Per unum hominem peccatum in hunc mundum intravit.... in quo omnes peccaverunt... per inobedientiam unius hominis peccatores constituti sunt multi*. Ex his sic argui potest: Ideò omnes Adæ nepotes nascendo peccati rei sunt, quia omnes in Adam extiterunt, sive eo peccante peccaverunt, in quo, inquit Apostolus, omnes peccaverunt; sed fieri non potuit, ut Adæ posterì, qui eo peccante physicè non existerent, in ipso extiterint, et illo peccante peccaverint, nisi unam cum ipso, utpote totius humani generis capite, personam moraliter effecerint, et ideò omnes eorum voluntates in ipsius voluntate quodammodò fuerint inclusæ, ad eum ferè modum, quo subditorum voluntates in principis voluntate, et omnes corporis membrorum motus voluntarii in ipsâ animæ voluntate continentur; ejus idcirco capitis voluntas fuerit moraliter voluntas omnium hominum, id est ejus posterorum. Porro id in ordine moris, sive relativè ad justitiæ originalis transmissionem, vel privationem, locum habere non potuit, nisi intercesserit divina ordinatio, sive constitutio.

MOMENTUM SECUNDUM. — *Ex SS. Patribus*, S. inprimis Augustino. D. Aug. lib. 1 de peccatorum meritis et remissione, cap. 10, n. 11, hæc

(1) Apud Bell. lib. 4 de amissione gratiæ et statu peccati cap. 12, vel Estium in 2 Sent. dist. 51, 11, ubi ponit Ans. lib. de conc. virg. cap. 5.

habet : « Alia sunt propria cuique peccata , in quibus hi tantum peccant , quorum peccata sunt , aliud hoc unum , in quo omnes peccaverunt , quando omnes ille unus homo fuerunt . » Idem repetit lib. 5, cap. 7, n. 44. Epist. 98, ad Bonifacium n. 4, ait : « Traxit ergo reatum , quia unus erat cum illo , et in illo , à quo traxit , quando quod traxit admissum est . » Lib. 16 de Civitate Dei cap. 27, versum primum capitis 17 Geneseos sic explicat : « Intelligenda sunt hæc divina verba , tanquam dictum sit , qui non fuerit regeneratus , interibit anima illa de populo ejus , quia testamentum Dei dissipavit , quando in Adam cum omnibus etiam ipse peccavit . »

Concinnat D. Ambrosius lib. 7. in Lucam cap. 13, his verbis : Fuit Adam , et in illo omnes fuimus , periit Adam , et in illo omnes perierunt ; et alii , etc.

Ex his testimoniis , inquirunt , elucet 1^o, D. Augustinum , et alios Patres agnovisse pactum , sive *testamentum* , cum Adamo initum , quo fuerat sancitum , ut quâ die fructum vetitum ederet , ipse , et tota ejus posteritas morti foret obnoxia... 2^o Eos omnes , qui ex Adam nascuntur , pactum illud transgredi , et ideò peccatum nascendo contrahere , quia *omnes in Adam fuerunt , et omnes ille unus fuerunt* , quando peccavit ; sed non possunt ejus incurrere peccato , si *in eo* fuerint , et *unus homo cum illo* , eo præcisè sensu quòd in ejus lumbis extiterint , sive carnem ex eo acceperint ; aliàs dicendum foret cum Jansenio peccata proximorum parentum transmitti debere ad filios . Igitur præter naturalem ab Adamo propagationem admittenda est quædam Dei constitutio , quâ Adæ nepotes unam moraliter cum ipso personam effecerint in ordine ab bonam aut infelicem conditionem , sique ejus peccati rei fuerint sicut ejus justitiæ fuissent participes .

MOMENTUM TERTIUM.—*Ex communi theologorum suffragio*. D. Thomas , cum us sententiam hæc super quæstione amplexi sunt plures ipsius expositores , 1-2 , q. 81 , a. in c. improbatis , aut saltem parvipensis aliis peccatum originale traducendi modis ait : « Aliâ viâ procedendum dicendo , quòd omnes homines , qui nascuntur ex Adam , possunt considerari ut unus homo in quantum conveniunt in naturâ , quam à primo parente accipiunt , secundum quod in civilibus omnes homines , qui sunt unius communitalis , reputantur quasi unum corpus , et tota communitas quasi unus homo.... sic igitur inordinatio , quæ est in isto homine ex Adam generato , non est voluntaria voluntate ipsius ,

sed voluntate primi parentis , qui movet motione generationis omnes , qui ex ejus origine derivantur , sicut voluntas animæ movet omnia membra . »

Jansenius , lib. 1 de statu naturæ lapsæ capite 5 et sequentibus commemoratum pactum , sive Dei *constitutionem* , quod attribuit Vasquesio , Bellarmino , et aliis recentioribus scholasticis , totis viribus impugnât , ut supra contritum suum de concupiscentiæ dominatu , dogma , in quo formaliter consistit peccatum originale , stabiliat ; unde contendit prætersum illud pactum omninò repugnare Augustini doctrinæ , omnibusque ejus principiis , quin et totius antiquæ Ecclesiæ placitis ; addit hoc systema eò collimare , « ut purgentur parentes , et culpetur Deus , qui peccatores propriâ voluntate constituat , et ideò nulli ante temporas scholasticorum in mentem venisse , licet et facillimum , et cuilibet obvium esset , et ad medendum tantis angustiis peridoneum . »

Verum priusquam Jansenii argumenta refero , observare operæ pretium est Yprensem , qui hic commemoratum pactum Vasquesio , Bellarmino et aliis recentioribus scholasticis adscribit , non inscitè quidem , sed malignè siluisse sententiam Guillelmi Estii qui illud pactum ex parte saltem ad explicandam peccati originalis transmissionem omninò necessarium esse fateatur , ut postea ostendemus ; scilicet Estium , ubi suo systemati favet , impensè extollit , non ita ubi placencia non cruat . Itaque

Objicit primò Yprensis lib. 1 de statu naturæ lapsæ , cap. 8 : « Augustinus , quoties Pelagiani quæsierunt , quomodò peccatum originale à sanctificationis parentibus transeat ad filios , nunquàm confugit ad pactum cum Adamo initum , aut ad nudam propagationem ex Adam , sive parentes cum libidine , sive sine libidine genuerint , licet iste modus intellectu esset facilis , et ad rem præcipuè pertinere , sed ad solam concupiscentiam , quæ per baptismum non tollitur ; doctrina ergo ista mera est fabula , et posteriorum scholasticorum infirmum et inane commentum . »—Resp. falli aut fallere velle Jansenium ; Augustinus enim commemoratis locis , in quibus adversus Pelagianos disserit , pacti alicujus , quod cum Adamo violaverunt ejus nepotes , meminit . In ipsis testimoniis , quæ adducit Jansenius , mentionem facit propagationis ex Adam , quæ supponit pactum de dandâ justitiâ originali si non peccasset Adam , de illâ autem non dandâ , si peccasset ; neque enim fieri potuit , ut ex naturâ rei , indepen-

denter à quolibet pacto, quidquid obligant Jansenius, Adam gigneret filios justitiâ originali destitutos, vel exornatos. Quòd si ad concupiscentiam sapius quàm ad pactum, aut propagationem ex Adam, recurrit S. Doctor, ratio fuit, quòd Pelagiani negare non possent existere in Adæ posteris concupiscentiam, quæ in præsentī statu effectus est Adamici delicti, et propter quam statuit Deus hominem spoliare gratiâ, quam in primo ortu habuit Adam; unde illa est, ut docet D. Thomas, veluti materiale peccati originalis.... E converso potuissent negare pactum cum Adamo initum, quod nonnisi per argumentationem ex sacris Litteris deducitur, et nodum ita non solvit, quin maximis implexum remaneat difficultatibus.

Neque, addunt iidem Theologi, reponat Jansenius Augustinum docere, *animum tanquam in vitiato vase corrumpi*, quod evincit peccatum originale per germen concupiscentiæ physicæ transmitti; hoc enim effatum unicè significat peccatum originale reipsâ contrahi per unionem animæ cum carne ex Adamo tractâ, quatenus illa unio efficit hominem, qui filius est Adæ, et ideò cum ipso et in ipso peccavit.

Objicit 2º Jansenius eodem libro, in fine capitis duodecimi, pactum hic effingere nihil est aliud quàm à parentibus culpam amovere ut redundet, sive resiliat in Deum, qui sontes propriâ voluntate efficiat. Etenim simili pacto, addit cap. 15, parvuli jam nati ex patris iniquitate reatum contrahere possent, aut saltem simili pacto omnes in toto mundo homines ex cujushbet peccato possent constitui peccatores. Tandem, si ex hypothesi quòd extitissemus, illi pacto absque injustitiâ consentire non potuissemus, Deus nostras voluntates in Adæ voluntate aliquatenus inclusas esse injustè decrevisset; at si extitissemus, huic pacto absque injustitiâ consentire non potuissemus; tunc enim consensissemus peccato ex hypothesi quòd illud voluisset Adam, aut, si voveris, nos libenter objecissemus peccandi periculo, quod dubio procul non licet; ergo.—Respondent 1º mirum esse Jansenium, hic cap. 8 et 12, dicere commemoratum pactum *esse intellectus facillimum*; asserit enim cap. 15, versùs medium, *illud intelligi non posse*.

Reponunt 1º, nullam ex illo pacto injustitiam in Deum redundare; se enim gessit Deus, cum illud sancivit, velut superior qui capiti totam communitatem repræsentanti præceptum imponit justum et facile eâ intentione ut im-

pleatur.. Quamobrem sicut ille superior nullius injustitiæ esset reus, nec præcepti illius violationis causa, sed is solus qui illud violasset, ita et Deus in præsentī ordine. Porro constat omnes parentes esse *purgandos* præter Adamum qui solus effecit ut proles cum peccato nascatur.

Quod attinet ad relatas argumenti confirmationes, respondent illas omnes facili negotio dilui. Prima quidem seipsâ ruit. Nihil enim impedire videtur quominus parvuli jam nati ex parentis delicto peccatum contrahant interveniente cœlesti pacto, si illud pactum omninò simile fuerit pacti cum Adamo inito; ut enim in isto pacto nulla ostendi potest injustitia, ita nec in illo.... Secunda autem rei non est accommodata, sive præsentī ordini. Homines scilicet toto mundo dispersi libero gaudent arbitrio, et ideò sui domini sunt et arbitri; sed talium voluntates in alterius voluntate non debent includi, cum digni sint, quibus sua committatur salus, et liberum habentes arbitrium alienâ voluntate peccare non possint....Tertia tandem speciosa magis quàm solida est. Enimverò quomodò, si extitissemus, non consensissemus conditioni, ex quâ innumera bona in nos redundare potuissent, et ex quâ nihil omninò ex parte Dei nobis fuisset pertimescendum, imò nec ex parte ipsius Adami, quem præceptum tam facile, tam utile, tam salutare, violaturum esse nunquàm conjecissemus? Quare qui huic conditioni consensissent Adami duntaxat sapientiâ et prudentiâ innixi fuissent ad eum modum quo rex legis probatæ peritiæ et probitatis res suas committit nullatenus intendens malum quod præ humanâ defectibilitate agere possunt. Unde præfatæ conditioni consentiendo non proximo, sed remoto tantum, imò ferè impossibili peccandi periculo sese objecissent, sicut rex præfatus vix ac ne vix quidem timere potest ne aliquid iniquum à legis suis peragatur.

Objicitur 3º: Augustinus, Enchiridion cap. 46, ait: «Parentum quoque peccatis parvulos obligari, non solum primorum hominum, sed etiam suorum, de quibus nati sunt, non improbabiler dicitur.» Igitur parvuli non ab Adamo solo, sed etiam à proximis parentibus culpam modò majorem modò minorem trahunt, ut docet Jansenius lib. 1 de statu naturæ lapsæ, cap. 22.

Reponunt cum D. Thomâ 1-2, q. 81 a. 2 in corp. «Augustinum questionem illam ibidem insolutam relinquere.» Capite nimirum se-

quenti, sive 47, dicit, « se temerè affirmare non audere quid hæc de re tenendum sit. » Verùm « si quis, inquit ibidem Angelicus doctor, diligenter attendat, impossibile est, quòd aliqua peccata proximorum parentum, vel etiam primi parentis, præter primum, per originem traducantur; ejus ratio est, pergit S. doctor, quia justitia originalis erat quoddam donum gratiæ toti naturæ humanæ divinitus collatum in primo parente (quod primus homo amisit) per solum primum peccatum; ex quo sequitur primum Adæ peccatum fuisse peccatum totius naturæ, et ideò debuisse traduci cum naturâ ad omnes Adæ posteros, sicut originalis justitia simul cum naturâ traducta fuisset in omnes Adæ posteros; cæterâ verò peccata, sive Adami, sive parentum proximorum, fuisse merè personalia, et ideò traduci non potuisse, sicut grammaticæ non traducit in filium scientiam grammaticæ, quia merè personalis est, seu pertinet ad individuum, non ad naturam speciei. »

Neque D. Thomas, addunt iidem theologi, id inconsultè aut temerè dixit; ipse quippe D. Augustinus idem docuisse videtur lib. 4 de peccatorum meritis et remissione cap. 41, n. 15, ubi ait: « Omnes peccatum originale traxerunt ab Adam, qui est forma futuri (Adæ), quia in illo constituta est forma condemnationis futuris posteris qui ejus propagine crearentur, ut ex uno omnes in condemnationem nascerentur, ex quâ non liberat nisi gratia Salvatoris » (id est secundi Adæ). Hæc indubiè, arguunt iidem doctores, noverat Jansenius, et quia suum concutit systema, industriè siluit.

Objeit 4^o Jansenius citato libro primo de statu naturæ lapsæ variis in locis: Scriptura et Patres passim asserunt, *carnem, quæ trahitur ex Adam, esse fædam, immundam, vitiosam*; notum sanè est præclarum istud D. Augustini pronuntiatum lib. 2 de peccatorum meritis et remissione cap. 24, n. 38: *Quod* (de B. Virgine) *assumpsit* (Christus) *id profectò aut suscipiendum mundavit, aut suscipiendo mundavit*. Illa fœditas et immunditia carnis indubiè est concupiscentia carni à peccato Adamico inhærens, sive libido, per quam, Augustino aliisque Ecclesiæ doctoribus passim intonantibus, propagatur peccatum originale, non *tanquàm argumentum corruptionis* (ut reponere solent pacti inventores) sed *tanquàm veram causam transfusionis*; peccatum ergo originale non ex pacto sed ex naturâ rei, sive ex concupiscentiâ oritur in Adæ nepotibus.

Respondent pacti defensores illa Scripturæ et Patrum oracula esse intelligenda de fœditate et immunditiâ *impropiè*, sive *privatè*, non *propiè*, sive *positivè* acceptâ, quasi carni ex Adam tractæ inesset qualitas aliqua eam realiter et physicè inficiens (homo enim post peccatum in naturalibus suis mansit); unde significant duntaxat, carnem per Adæ peccatum à perfectione et integritate, quam primitus habuit, excidisse, et concupiscentiæ, quæ in præsentì ordine certum est peccati argumentum, factam fuisse obnoxiam. Cum autem concupiscentia naturaliter sive physicè propagetur, inde evenit, ut Scriptura et Patres, inprimis D. Augustinus, dixerint peccatum originale per concupiscentiam, quæ in præsentì statu certò commonstrat naturam corruptam, transfundi. Fieri scilicet non potest, ut sit in carne positivâ qualitas mala; quidquid enim in naturâ physicum est, et ideò positivum, bonum est et Deum habet auctorem. Aliunde, nullatenus concipi potest quomodò per illam corporis qualitatem anima vero inquinari posset peccato, quale est originale peccatum. Porro, meritò dixit D. Augustinus carnem B. Virginis, ex quâ formata est Christi caro, à Christo priùs fuisse mundatam, cum B. Virginem ab initio conceptus gratiâ cumulaverit, in eâ concupiscentiæ fontem aut ligaverit, aut extinxerit, vel saltem eam carnem, cum eam suscepit, ab eo fuisse sanctificatam, et ab omni sorde expurgatam; quæstio enim illa tempore S. doctoris nondum erat eliquata.

§ 5. *Opinio tertia discutitur,*

Hoc systemate peccatum originale « nullo ex pacto, sed ex naturâ rei, per libidinem, sive concupiscentiam generantium, quæ carnem inficit (à parentibus ad filios) traducitur, ad eum modum, quo podagra transit à parente ad filium, aut qualitas venenosa à viperâ ad viperam. Scilicet Adam peccator, sive concupiscentiâ infectus, necessariò genuit prolem peccatricem (id est) libidine imbutam, nec aliam ullo modo gignere potuit, nisi Deus leges naturæ, quas animalium propagationi statuit, perturbaret, sicut Æthiops Æthiopem necessariò gignit. » Ita visum est Luthero et Calvino. Ita expressis terminis docet Jansenius lib. 4 de statu naturæ lapsæ, cap. 3, cap. 6, etc. Peccato nimirum Adæ, « quod in naturam quodammodò versum est; Adæ anima penetrata est sui amore, cupiditate generali, et cæterarum omnium cupiditatum radice. Unde juxta leges animalium propagationi constitutas

seminavit animam imbutam, et penetratam defectivo illo amore ad bona temporalia. Porro ille amor ingenuus et physicè transmissus per generationem deprimit voluntatis apicem versus temporalia, et deprimendo inficit, sive peccatricem facit : » et idè physicè et *per leges naturæ* traducitur peccatum originale. Idem repetit eodem libro capitibus 15, 16 et 17.

Ex illo systemate plura pullulant corollaria, quæ ipse ratiocinio potens eruit Jansenius. Primò, si Adam (idem dicendum de proximis aliis parentibus) concupiscentiam benè vivendo extirpare potuisset, nullum peccatum propagasset in posteros, capite 21 versus finem... 2º Si Deus utriusque sexus corrupta semina sine congressu conjugum omnipotentiae suæ virtute misceret, proles peccatum originale contraheret, capite 20 sub finem... 3º Sola impia nonnunquam prægnantis imaginatio, vel cupiditas, in causâ est, cur proles ad furta, ad lasciviam, ad homicidia, ita prona nascat, ut nullis nec honestatis retinaculis, nec supplicii minis ab illis vitiis coerceri queat, cap. 19 versus medium (ex his inferri posse videtur à matre magis quàm à patre traduci peccatum originale)... 4º Non corporis ægri-tudines tantum, sed et acquisitæ pravitates animi, sive propensiones ad malum, quas parentes malè vivendo sibi pepererunt, in prolem propagantur, initio capitis 22 (unde concludere pronum est peccatum originale non esse in omnibus æquale).

Totam istam doctrinam commendat Yprensis tanquam *veritatem catholicam, tanquam olim probatissimam per universam Ecclesiam* usque ad ætatem scholasticorum, capitibus 15 et 25.

His et similibus documentis fortassis exprimere, aut adstruere voluit Jansenius magistri sui vel amici sui Baii propositionem 73 (apud Patrem Duchesne 74) : « Nemo præter Christum est absque peccato originali. Hinc beata Virgo mortua est propter peccatum ex Adam contractum, omnesque ejus afflictiones in hac vitâ sicut et aliorum justorum, fuerunt ultiones peccati actualis, vel originalis (reipsâ contracti). Ex matre nimirum non minùs quàm ex patre oritur peccatum originale.

Ex modò delineato systemate hanc assertionem protulerunt Janseniani Lovanienses numero 24 inter 51 damnatas ab Alexandro VIII, anno 1690 : « Oblatio in templo, quæ fiebat à B. Virgine Mariâ in die purificationis suæ per duos pullos columbarum, unum in holocaustum, et alterum pro peccatis, sufficienter te-

statur, quòd indignerit purificatione, et quòd Filius, qui offerebatur, etiam maculâ Matris maculatus esset, secundum verba legis. »

Guillelmus Estius, celebris theologus Duacensis Universitatis, qui obiit 20 septembris anni 1615, in 2 Sent. distinct. 51, 81, propendit in opinionem quæ cum modò relatâ aliquatenus convenit. « Vitiatur, inquit, anima à corpore (ex Adam tracto) tanquam vase corrupto et vitiato, sicut contingit pomum, vel florem, infici tetro odore ejus corporis, quo continetur, in quo si natum sit, jam ab ipsâ origine tetrum odorem contraxit. » Deinde rem sic explicat : « Sciendum est mutuum esse, eamque naturalem, sympathiam, id est passionum et affectionum communicationem inter corpus et animam, tanquam in idem compositum naturale concurrentes partes substantiales. Unde fieri videmus, ut corpore malè affecto anima doleat, et vicissim ex animi hilaritate corpus recreetur. Cum igitur anima à Deo neque justa fiat, neque injusta, neque ante suam cum corpore conjunctionem existat, corpus autem ante animæ infusionem ex carne peccati seminatum nondum quidem peccatum habeat, sed tamen occultam quamdam ad peccatum dispositionem, fit ut anima, quæ in corpore nascitur, velut flos in fœtido loco, simul ex corpore trahat vitium quoddam habituale, atque culpabile; sicut enim si infunderetur anima corpori vulnerato, vel posito in igne, mox in eo corpore doleret, ita, dum infunditur corpori ad peccatum disposito, mox in eo habitualiter quodammodò peccat.

Idem theologus sic expositam sententiam probare aggreditur, 1º Scripturâ. Scilicet Levitici cap. 15, semen humanum appellatur *fedus humor*, et menstrua mulieris reputantur *summa immunditia* : è converso semen tritici, vel aliarum rerum nusquam habetur velut immundum. Item Job 14 dicitur : *Quis potest facere mundum de immundo conceptum semine, nonne tu qui solus es?* Ubi, ut peccati originalis existentiam vindicando ostendimus, evidenter depingitur ipsa interna immunditia, cum substantia creata immunditiam sive sordem extrinsecus inhærentem delere possit. Item contrahitur immunditia (Levitici cap. 15) ex fluxu seminis et menstrui, non ex fluxu sanguinis, aut pituitæ, neque aliorum humorum, imò neque ex fluxu excrementorum fœtidissimorum, sive dysenteria, vel fluxu urinæ... 2º Auctoritate S. Augustini, qui passim Adæ semen vocat *semen vitiosum, immundum, peccati*, et lib. 2 de pec-

catorum meritis et remissione cap. 24, n. 58 jam citato, de ipsâ B. Virgine ait: *quod assumpsit Christus id profectò, aut suscipiendum mundavit, aut suscipiendo mundavit*. Pariter lib. 5 contra Julianum cap. 5, n. 8, dicit: « concupiscentiam carnis, adversus quam bonus concupiscit spiritus, et peccatum esse, quia inest illi inobedientia contra dominatum mentis, et poenam peccati esse, quia reddita est meritis inobedientis, et causam peccati esse, defectione consentientis, vel contagione nascentis.... » 5^o Auctoritate Magistri Sententiarum distinct. 50 et 51, et doctissimi papæ Innocentii III, in expositione Psalmi 50, ad illud: *Ecce in iniquitatibus conceptus sum*. Ubi dicit: « Quis nesciat concubitum, etiam conjugalem, nunquam omninò committi sine pruritu carnis, ac sine fervore ac fœtore concupiscentiæ, unde semina concepta fœdantur, et corruptuntur, propter quod alibi dicitur: *Quis potest facere mundum de immundo conceptum semine* (Job. 14)? Ex seminibus ergo fœdatis atque corruptis concipitur corpus corruptum pariter et fœdatum, cui anima tandem infusa corrumpitur, et fœdatur, non ab integritate vel munditiâ quam habuit, sed ab integritate vel munditiâ, quam haberet si non uniretur fœdato corpori et corrupto; quoniam et creando infunditur, et infundendo creatur; sicut enim ex vase corrupto liquor infusus corrumpitur, et pollutum contingens ex ipso contactu polluitur, sic ex contagio corporis anima corrumpitur, et fœdatur.... Ex concupiscentiâ procedit pruritus circa janua humanæ propagationis, per quam transfunditur originalis causa peccati. » Non minùs apertè in eadem Psalmi 50 verba loquitur Pontifex Maximus Urbanus VI, etc.

Vir tamen sagax et eruditus facilè detexit in isto systemate concipi non posse quomodò anima in instanti unionis suæ cum corpore peccato propriè dicto coinquinetur. Hinc illud conjungi voluit cum systemate docente peccati originalis *formale* consistere in carentiâ, sive potiùs jacturâ justitiæ originalis, quâ anima, ubi infunditur corpori, destituitur. « Videtur, inquit, omninò agnoscendum aliquid in semine parentis, vel carne nascentis, ex quo anima infusa corruptionem et peccatum contrahat juxta superiorem modum (paulò ante expositum), quem proindè, ut plenè et sufficienter dicta peccati (originalis) propagatio explicetur, cum hoc posteriore (jacturam justitiæ originalis exigente) putamus esse conjungendum. »

Commemoratum systema ab Estio expositum catholicum profectò est, sive ab Ecclesiâ nunquam fuit damnatum. Hinc in eo non erravit Jansenius quòd dixerit, peccatum originale à parente in filium physicè transmitti. Plura quippe apud Augustinum et alios Patres occurrunt testimonia quæ illam assertionem confirmare videntur. Verùm culpandus, imò detestandus est Jansenius 1^o, quòd asseruerit *naturæ corruptionem*, sive propensionem in malum ex se verum esse peccatum, ut antea ostendimus.... 2^o Quòd constituerit peccatum originale, non in *reatu concupiscentiæ*, qui deletur per baptismum (ut D. Augustinus) sed in *dominatu* ejusdem concupiscentiæ; inde enim, ut iterùm ostendimus, inferri posse videtur baptismum aliquando non delere peccatum originale, siquidem in regeneratis concupiscentia habitualis charitatem habitualement gradibus interdum superat.... 3^o Quòd ex illo systemate plura, ut rursus observavimus, corollaria deduxerit Jansenius, quæ Ecclesiæ, speciatim concilii Tridentini, de peccato originali decretis, non sunt consona.... 4^o Quòd idem Yprensensis arroganter pronuntiaverit suum systema de physicâ peccati originalis transmissione hujus maculæ transfusionem *sufficienter* explicare; at hæc omnia improbat Estius, et ex suo systemate physicam peccati originalis traductionem minimè scaturire autumavit; ergo.

Nunc prodeant rationum momenta, quibus pacti, sive moralis peccati originalis traductionis, defensores impugnant specialiter physicum illius noxæ transitum, cum solutionibus, quibus argumenta isti transfusioni patrocinantia diluere consueverunt alii theologi.

Specialia pacti defensorum argumenta adversus physicam avitæ maculæ traductionem. — Primum. Certum est actuale Adæ peccatum esse peccati originalis causam efficientem; id quippe docet Apostolus ad Rom. 5, et D. Augustinus lib. 2 de Nuptiis et Concupiscentiâ, cap. 26, n. 43: *Voluntarium*, inquit, *peccatum hominis primi, originalis est causa delicti*; atqui actuale Adæ peccatum non est causa physica et realis peccati originalis; actuale enim Adæ delictum fuit actus voluntatis Adæ, qui subitò evanuit et physicè existere desiit; sed actus, qui physicè non existit, non potest peccatum originale physicè efficere, prius enim est physicè existere quàm aliquid physicè producere, cum physica productio emanet ex physicâ naturâ; ergo.... Præterea, ut in præmio diximus, physicum,

sive materiale peccati essentialiter bonum est, sicut ejus formale essentialiter malum; sed formale peccati nihil est, et ideo physicè aliquid producere non potest.

Verùm reponunt adversæ sententiæ defensores imbellè esse istud argumentum, et rem non attingere. Actuale scilicet Adæ peccatum in ipso produxit germen concupiscentiæ, per quam physicè propagatur peccatum originale, siquæ actuale Adæ delictum fuit causa remota et mediata peccati originalis, non propinqua et immediata, de quâ solâ hic agitur; unde probandum foret Apostolum et Augustinum disserere de istâ causâ.

Secundum. Eo modo peccatum originale ad Adæ posteros traducitur quo ad eosdem traducenda fuisset justitia originalis, si Adam non peccasset, ut innuit Apostolus; at avita justitia physicè non fuisset transmittenda, sed moraliter tantum; ergo etc. Sed adversi auctores majorem negant, quam, ut ipsis videtur, nulli insinuat Apostolus qui docet duntaxat peccatum Adæ transmitti ad ejus nepotes, ut transmissa fuisset, ipso non peccante, justitia originalis, modum transmissionis non assignando. Etverò, inquit, peccatum originale per concupiscentiam transfunditur.

Tertium. Illud solum quod materiale est et corporeum propagatur, et naturæ legibus subjacet; tale autem non est peccatum; ergo. At iidem indubiè reponent, concupiscentiam, quæ est *veluti materiale* peccati originalis, junctam saltem cum jacturâ justitiæ originalis, quæ est illius formale, transmittere illud peccatum.

Quartum deducitur ex iis, quæ fatente ipso Jansenio, ex isto systemate pullulant, consecrariis. Etenim sequitur, peccata parentum ad filios æquè transire ac Adæ peccatum, ac ideo peccatum originale in omnibus æquale non esse. At hoc corollarium contradicit Apostolo docenti, *unius delicto omnes mortuos esse, in uno omnes peccasse, ex uno delicto in omnes homines esse condemnationem....* Patribus, quos supra laudavimus, et D. Thomæ 1-2, q. 82, a. 4, ubi dicit, *peccatum originale æquale esse in omnibus*, et q. 81, a. 2, in c., ubi docet solum primum Adæ peccatum tradi in posteros, et a. 5 ejusdem quæstionis, ubi tradit, ex Adæ, non ex Evæ peccato oriri peccatum originale.... Item sequitur eos, qui viâ naturali ex Adam non nascerentur, peccatum originale esse contracturos, modò adfuisset concupiscentia. Opponitur Apostolo dicenti, *omnes in uno peccasse*, quia ni-

mirum in ejus lumbis erant, ut loquuntur Patres, et concilio Trident. docenti sess. 6, cap. 3, *homines non nasci injustos nisi quia ex semine Adæ nascuntur....* Tandem sequitur peccatum originale tradi independentè à jacturâ justitiæ originalis, et ideo concupiscentiam ex se et naturâ suâ verum esse peccatum, quod Jansenii systema est planè hæreticum.

Physicæ peccati originalis traductionis argumenta prout à pacti defensoribus diluuntur. — Jansenius, lib. 1 de Statu naturæ lapsæ, à cap. 6 ad 7, plura D. Augustini testimonia profert quibus probare conatur peccatum originale per concupiscentiam trajici eo modo quo cuncta generantia similem sibi fœtum procreant. Ea brevitate causâ quoad substantiam duntaxat et summam referemus.

1º Yprensis, à cap. 6 ad 12, varios S. doctoris textus exhibet enuntiantes peccatum Adæ transmitti per concupiscentiam, seu libidinem, eodem peccato in naturâ humanâ productam, quæ concupiscentia est causa propinqua propagationis peccati originalis. Unde parentes baptizati illud peccatum trajiciunt, quia servant concupiscentiam, per quam generant filios; at parentes physicè transmittunt concupiscentiam; ergo. — Reponunt S. Augustinum his in locis intendere tantum concupiscentiam, cui parentes, etiam regenerati, sunt obnoxii, esse causam moralem, ac veluti materiam, peccati originalis. Ideò enim, ut dictum est, Adæ nepotes gratiâ sanctificante in ortu suo destituuntur, quia Deus, cum Adam creavit, decreverat, ut concupiscentia in homine non remaneret, sive non vigeret, cum gratiâ sanctificante, cui ordinationi Deus non renuntiavit nisi in Christo per baptismum. Addunt hoc sensu concupiscentiam potuisse dici causam peccati originalis, quòd illius traductionis certum esset signum et indicium, quatenus scilicet in præsentì ordine est pœna peccati. Notum videlicet est, Augustinum peccati originalis existentiam quasi perpetuò adversus Pelagianos evincere, ex miseriis, concupiscentiâ præsertim, quibus obruuntur Adæ nepotes. Hinc particulæ, *quia, ex, per*, aut vox, *causa*, quibus utitur S. doctor, non strictè, sed latè sunt accipiendæ. Porrò Augustinus, inquit, alio sensu intelligi nequit; ubique enim docet concupiscentiam in regeneratis non esse verum peccatum, et ideo per eam peccatum originale physicè non posse trajici.

2º Idem Yprensis ibidem plures D. Augustini textus producit, quibus asserit peccatum ori-

ginale à parente in filium projici per concupiscentiam, sive vitium naturæ, sicut podagra, etc., à patre ad filium transit; at consentientibus physicis et medicis podagra physice trajicitur; ergo. — Respondent Augustinum his et similibus comparationibus unice intendere peccatum originale reipsa transire in Adæ filios, ut podagra reipsa transmittitur à parente in filium. Unde comparatio stat ex parte realis traductionis avitæ macule, non ex parte modi illius traductionis. Enimverò obstinata Pelagianorum in negandâ peccati originalis existentia, ejusque transfusione pertinacia coegit S. doctorem illas similitudines, licet à longinquo petitas, adducere, ut ostenderet mirum non esse si in cœlestibus contingeret quod in physicis et naturalibus quotidie contingere constat.

3º Jansenius, cap. 9 et 25, profert D. Augustini testimonium, quibus asseverat, Christum ob solius carnis concupiscentiæ præsentiam ex commixtione maris et fœminæ procreari noluisse, ne in ipsum, sicut in alios Adæ nepotes, originalis culpa serperet. Hinc tota ratio eximie Christi animæ puritatis ex eo emanavit quòd carne peccati, cui anima ipsius infunderetur, caruerit. — Reponunt hanc Yprensio doctrinam, Augustini testimonio, quæ ibi commemorat, non exprimi. Ea enim ponderanti facili innotescet iis significari duntaxat Christum, qui concupiscentiâ caruit, non habuisse peccatum originale, è converso eos omnes, qui concupiscentiam habent et viâ ordinariâ generantur, hujus peccati esse reos; quod quidem verissimum est; concupiscentia quippe in nobis est pœna peccati, et ideò certum est peccati contracti signum et indicium. Enimverò, quod hic ait Jansenius de Christo, supponit concupiscentiam ex sese peccatum esse, et à peccato absolutè separari non posse, quod passim refellit D. Augustinus; quin enuntiat animam Christi non magis mundam fuisse, quàm Adæ animam; cum initio carni peccati mixta non fuerit Adæ anima; at ista blasphemia nunquam profectò in Augustini mentem venit; ergo.

Eodem modo exponunt ea Patrum, summorum pontificum, et theologorum testimonia, quæ paulò ante adducebat Estius, et refert Jansenius toto capite 15.

§ 4. *Quid sentiendum de duabus ultimò commemoratis opinionibus, id est de relictis Estii et Bellarmini sententiis?*

1º. Concilia adversus Pelagianos celebrata unice deünierunt existentiam peccati origina-

lis, et ideò nulla sententia de ejus naturâ, aut traductionis modo ad fidem pertinet. 2º. D. Augustinus privatam suam de peccati originalis naturâ, et modo transfusionis, sententiam, si quam habuit, velut certam nec habuit, nec haberi voluit; enixè enim, ut diximus, hac super re D. Hieronymum consuluit, et dixit, *peccato originali nihil esse ad intelligendum secretius*. 3º. Qui studio partium, aut vertiginoso hæresis spiritu non adiguntur et dementantur, fateri debent Augustinum negare, concupiscentiam in renatis verum esse peccatum, et ideò non potuisse docere peccatum originale præcisè consistere in naturâ hominis vitiatâ, quâ propagatâ formaliter et necessario propagaretur idem peccatum. 4º. Pactum admittens sententia videtur magis idonea explicandæ peccati originalis transmissioni, et revincendis incredulorum adversus istud sacramentum cavillationibus, et ideò illam opinionem physicam avitæ labis traductionem propugnanti, lubenter præhaberemus, et eò quidem magis quòd, ipso fatente Estio, posterior ista sententia non conjuncta cum priore est prorsus insufficiens ad Adamici delicti trajectionem explicandam. Nihilo tamen minùs illam propugnare non audemus, tum quia, quemadmodum, ubi de peccati originalis naturâ, observavimus, Hieronymus et Augustinus illam ignorasse videntur, tum quia non minoribus difficultatibus obnoxia est quàm altera, ut satis superque produnt quæ ex utrâque parte afferri solent illarum difficultatum enodationes; antequàm autem maximè reconditæ ac, si quæ unquàm fuit, intricatæ controversiæ ultima admoveatur manus, duo paucis expendenda sunt eruditorum sanè attentione digna.

Primum. An istud pronuntiatum circa D. Augustini dubitationem de animæ origine, sitne scilicet ex *traduce* vel ex *creatione*, quod reperitur versùs finem capitis undecimi libri quarti de Statu peccati et gratiæ amissione apud Bellarminum: *Certè S. Augustinus, si nunc inter homines viveret, non solum faveret, sed etiam gratias ageret iis, qui nostram hanc sententiam (de creatione) tuerentur; an inquam, istud pronuntiatum sit probandum vel non.*

Affirmant nonnulli recentiores gratiæ vinctis gloriæ parùm studiosi, et insignium rationum, quæ ipsum in hanc dubitationem induxerunt, ignari; negant quotquot S. doctori impensè, ut decet, addicti sunt, et acerrimum ipsius ingenium, ut et strenuum catholici fidei defendendæ et promovendæ ardorem

noverunt. Si sanè Ecclesia catholica, ejus auctoritatem cum encomio ubique celebrat S. doctor tanquàm errori nunquàm obnoxiam, sententiam de animæ creatione aliquo decreto consecrasset, plaudendum foret commemoratæ Bellarmini assertioni; verùm, si nihil hujusmodi pronuntiavit Ecclesia, saltem velut inconsiderata habenda est; omnia enim gravissima momenta, quæ Augustinum in hanc perplexitatem immergebant, sese magno ejus animo iterum sisterent, et ideò ipsum acerrimè utrinque torquerent. Etenim, si *hodiè viveret* Augustinus, sententiam de animarum creatione non magis Scripturis consonam inveniret quàm olim; recentiores quippe in ejus sensu detegendo feliciores dubio procul non fuerunt quàm veteres.... Item scholasticorum auctoritate non moveretur præ tot Patribus qui hoc in puncto hæserunt.... Item eorundem scholasticorum adversus traducem rationes ipsius anxietatem non dissiparent; eas enim materiæ spiritualis architecti, inter quos multi scholastici, se facillè solvere præterdunt, et aliunde ad summum S. doctorem ab amplectendo traduce averterent, non ad admittendam sententiam de creatione animarum, quæ ipsi, hodiè etiam multis hirsuta difficultatibus videretur, cùm inprimis attenderet scholasticos hujus sententiæ defensores in explicandâ peccati originalis transmissione (quæ difficultas in hac opinione S. doctori gravissima semper visa fuit), non solum inter se non consentire, sed etiam sese invicem acerrimè impeter; quare *si viveret Augustinus* in suspenso maneret, et gratias non ageret recentioribus, nisi cùm in suâ de animarum creatione sententiâ felicissimè et evidentissimè peccati originalis propagationem exposuissent.

Secundum. « Cur D. Augustinus reatum concupiscentiæ, et quidem ut adulterio, in præsentī statu semper illigaverit in non baptizatis, nunquàm verò mortalitati, vel corruptibilitati, cùm inprimis in communi systemate hæc miseræ non minùs conjunctæ fuerint cum privatione justitiæ originalis, quàm concupiscentia? » Nonnulli eruditi viri, quos super hac quæstione consulimus, autumaverunt Augustinum concupiscentiæ nomine his in locis designasse totam naturæ corruptionem, et ideò non solum concupiscentiam prout distinguitur à mortalitate et corruptibilitate. Verùm, pace ipsorum dixerim, hæc solutio vera non videtur; enimverò, si Augustinus concupiscentiæ nomine æquè indicasset cæteras mise-

rias ac concupiscentiam, reatus his miseriis non minùs annexus fuisset quàm concupiscentiæ, et ideò Christus ipse, qui fuit obnoxius non concupiscentiæ, sed pluribus ex illis miseriis (per omnia enim nobis similis factus est absque peccato), habuisset *reatum*, quod dictu nefas. Videtur igitur per concupiscentiam depinxisse concupiscentiam qualis est in nostro statu, id est, ut diximus, quoad gradum similem illi quam experimur, quæ est vera naturæ depravatio, cum quâ ideò creari non potest homo, sive quæ est, ut antea dicebat Estius, *occulta quædam ad peccatum dispositio, facitque ut anima unita corpori, hac dispositione affecto, mox in eo habitualiter quodammodo peccet*; hæc enim in sententiâ concipitur quomodo reatus concupiscentiæ sicut adulterio per se etiam non formaliter sed dispositivè et præparatoriè annectitur.

CAPUT QUARTUM.

De peccati originalis subjecto.

Duo hic in controversiam veniunt, primum, an B. Virgo Maria sine peccato originali sit concepta; alterum, an filii Christianorum peccatum originale contrahant.

ARTICULUS PRIMUS.

Utrum B. Virgo in suo conceptu à peccato originali fuerit immunis?

Figitur quæstionis sensus et status.— 1º Duplex quasi conceptio, prima, et secunda; prior est formatio corporis in utero matris ex semine humano; posterior infusio animæ corpori sufficienter disposito sive formato. De istâ duntaxat conceptione quæstio movetur; constat enim, B. Virginis carnem, ut aiunt Patres, fuisse *carnem peccati*, et aliundè verum peccatum non posse residere in carne. 2º Non quæritur an B. Maria in nativitate, et ante nativitatem fuerit sancta; cùm enim hæc prærogativâ insignitus sit Joannes Baptista, et, ut non paucis placet, Jeremias Propheta, haud dubium quin eadem prærogativa Mariæ, *propter honorem Domini*, ut loquitur Augustinus, fuerit concessa. 3º Non quæritur, an B. Virgo in primo animationis instanti ab avitâ maculâ eximi potuerit. Deus enim miseretur cujus vult misereri. Hinc, si Deus solum Mariam illius noxæ puram esse voluerit, ejus circa peccati originalis traductionem ordinatio, antea delineata, fuit absoluta relativè ad cæteros Adæ nepotes, non relativè ad Mariam. 4º Ex dictis peccatum originale est mortiferum peccatum habituale, hominem Deo

invisum efficiens, et dæmonis servum reddens. Hinc, cum præsens quæstio attingat primum instans, quo anima B. Virginis corpori in utero B. Annæ infusa est, præcisè quaeritur, utrum eo momento B. Virgo fuerit exosa Deo, æternæ damnationis rea, et ideo dæmonis imperio mancipata.

OPINIONES. — Prima Mariam peccato originali commemorato instanti reipsâ coinquinatam fuisse docet. Hanc sententiam exosculati sunt multi insignes Dominicani, qui D. Thomæ suffragio gloriantur. Eandem propugnaverunt Protestantes, quibus patrocinari videtur Jansenius lib. 3 de Statu naturæ puræ cap. 9 et sequentibus; ibi nimirum contendit mortem corporis, ejus corruptibilitatem, aliasque hujusmodi miseras, in quâcumque hypothese à Deo rationali creaturæ sine culpâ præcedente non posse imponi; quod sanè principium alicui peccato subijcere videtur B. Virginem, quæ illis miseriis fuit obnoxia. Hoc tamen occurrit discriminis Thomistas inter et Protestantes, quod illi sententiam de intemerato Virginis conceptu nullâ configant censurâ, licet illam Scripturæ et traditioni minùs consonam existiment; isti è converso eam *erroneam* vel *hæreticam* pronuntient. Hæreticis rursus manum tendere videtur Yprensis eodem lib. 3 de Statu naturæ puræ, cap. 15, ubi probare aggreditur, « palpabilium malorum in quolibet statu absque præeunte delicto impositionem ducere ad diversas impietates, ad blasphemiam in Deum, ad Manichæismum, » etc.

Secunda vult intemeratum, aut temeratum B. Virginis conceptum nullo modo in Scripturâ et traditione consignari, et ideo ab Ecclesiâ catholicâ velut dogma ad fidem pertinens definiri non posse. Hæc fuit singularis opinio Melchioris Cani, eruditi ex nobilissimâ Dominicanorum familiâ theologi. « B. Virginem, inquit lib. 7 de Locis, cap. 3, à peccato originali fuisse penitus liberam, è libris sacris juxta germanum litteræ sensum nusquam habetur... nec per traditionem Apostolorum in Ecclesiam descendit... opposita etiam assertio... non est in numero dogmatum catholicorum (utpotè in verbo Dei scripto aut tradito non contenta). Neutram ergo ex illis opinionibus potuerunt tanquam dogma catholicum approbare (Patres Tridentini). Ita is erravit qui asseruit erroneum esse aliquem præter Christum à lege originalis peccati liberare. Erravit ac multò etiam magis Basileense concilium, cum definiit doctrinam illam, quæ docet... Mariam

nunquam originali subjaenisse peccato, tanquam consonam Scripturæ sacre ac fidei catholicæ amplectendam fore (nullique de cætero licitum) esse contrarium docere. In pari quippe errore versantur, qui alteram partem ad catholicam fidem attingere posse credunt. »

Tertia B. Virginem originalis maculæ et quoad actum et quoad debitum omnino expertem fuisse asserit. Hujus opinionis defensores, qui pauci sunt, duas in classes dividuntur. Alii Mariam eximunt à debito duntaxat proximo peccatum originale contrahendi, et ideo opinantur eam non fuisse comprehensam in pacto quod Deus cum Adamo inivit. Ita inter alios Gorgius de Rhodes, tom. 2, disputatione unicâ, de Deiparâ Virgine Mariâ, n. 4, sec. 2; auctor et dicendi perspicuitate, et objectionum, ex ratione præsertim depromptarum, solutione commendabilis.... Alii Mariam debito etiam remoto primigeniam labem contrahendi caruisse censent, quia nimirum non exiitisset, si Adam non peccavisset, et ideo in pacto cum Adamo inito comprehendi non debuit, quamvis apta fuerit ut in illo pacto includeretur, sicque sufficienter à Christo fuerit redempta. Ita P. Salazar, è Societate Jesu, in opere de conceptione.

Quarta docet B. Virginem peccatum originale *de facto* non contraxisse, sed habuisse *debitum* illius contrahendi, sive, quod idem sonat, Mariam peccatum originale *quoad debitum* contraxisse, non *quoad actum*. Hæc sententia pluribus probatur. Solent theologi, ut tam celebrem quæstionem cum ordine et perspicuitate tractent seorsim expendere 1º, an Virgo Deipara in primo conceptus instanti ab originali labe fuerit immunis.... 2º An illam noxam contrahendi *debitum* habuerit.

Verùm quæ in primi articuli discussione dicturi sumus non exigunt ut secundum speciatim proponamus. Quare sit

PARAGRAPHUS UNICUS. *Utrum B. Virgo absque originali maculâ concepta fuerit?*

CONCLUSIO. — B. Virgo peccati originalis contagio nunquam fuit inquinata, et ideo nunquam fuit Dei inimica, nunquam dæmonis potestati subdita.

Non est de fide; sed pia est, Scripturæ et traditioni minimè contraria, imò si communis fidelium sensus, et eorum qui ab Ecclesiâ hæc super re præscripta sunt, ratio habeatur (ut indubiè haberi debet plus quam probabilis esse videtur.

D. Thomas, § 5 parte, q. 27, a. 1, in c., dicit, de sanctificatione B. Mariæ in utero nihil in Scripturâ canonica tradi, scilicet juxta germanum litteræ, ex quo solo (nisi constet spiritualem sensum à Spiritu sancto specialiter intentum fuisse) firmum et efficax eruitur argumentum. Hinc B. Virginem, in nativitate, et ante nativitatem, immaculatam fuisse, probat S. doctor traditione, Ecclesiæ auctoritate, et congruentiæ rationibus, id est, ex iis quæ sive in scripto, sive in tradito Dei verbo de B. Mariâ traduntur, decerptis. Tam eximii ducis vestigiis insistentes eundem disserendi modum, quem, si hodie viveret, in hujus assertionis probatione usurparet, adhibebimus.

MOMENTUM PRIMUM. — *Ex Patribus.* — Priusquam illud expono argumentum, observa illud magni roboris futurum iri, etiamsi non pauci veteres B. Mariam ab originali peccato in primo conceptûs momento immunem fuisse negaverint, aut negari visi fuerint, modò plurimi hanc in B. Virgine prærogativam agnoverint; nemo enim negaverit Verbi divini cum Patre consubstantialitatem ex Patrum traditione constare, licet nonnulli Antenicæni doctores aut eam impugnaverint, aut saltem impugnasse videantur... Dogma de æternâ beatitate justis, quibus nihil luendum superest, illicò à morte repetendâ, ex iisdem Patribus satis comprobari, etsi plures ex veteribus illud non docuerint, aut saltem non docuisse videantur... Matrimonii rati, et non consummati, vinculum per solemnem in religione approbatâ professionem, invito etiam altero conjuge, dissolvi, ut definivit conc. Tridentinum, quamvis illud ex Scripturâ et traditione vix ac ne vix quidem probari possit, etc.

His præmissis, Patres purissimo Virginis conceptui faventes duas in classes divido.

PRIMA CLASSIS. — Patres mox adducendi non expressè quidem, sed tamen non obscure Virginis conceptum absque maculâ extitisse tradiderunt.

Divus Andreas Apostolus. Etenim presbyteri Achaïæ in opere de ejus passione, quod genuinum esse probant Baronius ad annum Christi 69, et P. Alexander in historiâ primi seculi, referunt eum dixisse: *Sicut de terrâ immaculatâ factus fuerat homo primus, ita necesse erat ut de immaculatâ Virgine Christus nasceretur.* Sanè comparatio, quam inducit Apostolus, ostendit ipsum sensisse Christum nasci debuisse de Virgine omnis maledictionis, et ideò omnis peccati experte, sive de Virgine

Adami instar factâ de terrâ immaculatâ, seu non maledictâ, id est, veri peccati contagio non infectâ.

D. Hieronymus in Psalmum 77, aut potius auctor commentariorum in Psalmos (eruditi enim inter quos Desiderius Erasmus in editione operum Hieronymi anni 1546, et P. Alexander in historiâ quarti seculi, etc., contendunt hos Commentarios non esse Hieronymi, sed auctoris qui vivebat versûs annum 479, licet Bellarminus aliter sensisse videatur), auctor, inquam, Commentarii in Psalmum 77 exponens versum, *deduxit eos in nube diei, illum Mariæ accommodat; pulchrè, inquit, dixit diei, quia nubes illa non fuit in tenebris, sed semper in luce.* Sanè vox, semper, ipsum evidenter explodit peccatum originale, quod deusas Mariæ animæ in primo conceptu offudisset tenebras. Equidem iste auctor, quem Bellarminus lib. 4 de Amissione gratiæ et Statu peccati, cap. 15, immeritò dicit esse Hieronymum, prædictum versiculum malè fortassis Mariæ inserit, sed nihilominus inde elucet antiquissimo illi scriptori persuasum fuisse B. Virginem avitæ maculæ caligine in ortûs sui principio non fuisse offuscatam, quod unicè intendimus.

D. Ambrosius sermone 22 in Psalmum 118 Christum inducit dicentem: « Suscipe me non ex Sarâ, sed ex Mariâ, ut incorrupta sit Virgo. sed Virgo per gratiam ab omni integra labe peccati. » Verba, *incorrupta, ab omni integra labe peccati, corruptionem quolibet peccato in vectam excludunt*: evidentiùs adhuc eam exsufflant voces, *non ex Sarâ, sed ex Mariâ*; Salvatore scilicet non magis honorificum fuisset ex Mariâ originem ducere quàm ex Sarâ, si Maria in Adamo ut Sara cecidisset.

D. Augustinus libro de Naturâ et Gratiâ, cap. 56, n. 22, hæc habet: « Exceptâ itaque S. Virgine Mariâ, de quâ propter honorem Domini, nullam prorsûs, cùm de peccatis agitur, haberi volo quæstionem; inde enim scimus, quòd ei plus gratiæ collatum fuerit ad vincendum omni ex parte peccatum, quæ concipere et parere meruit eum, quem constat nullum habuisse peccatum. » Hoc in testimonio singulæ voces clamare videntur S. doctorem non minùs disserere de originali quàm de actuali peccato. Immunitas enim B. Matris ab originali peccato, utpote necessariò mortali, magis honorifica fuit Domino, quàm immunitas à peccato actuali, quod veniale esse potuit. Verùm, esto, Augustinus disputet de solo actuali peccato, eo ipso

amovet à B. Virgine peccatum originale. Constante enim docet, peccata actualia ab originali tanquam à radice oriri.

Præterea legimus lib. 4 Operis Imperfecti cap. 122. Julianum exprobrasse Augustino, quod peior esset Joviniano, qui *Virginitatem Mariæ partus conditione dissolvit, cum Augustinus ipsam Mariam diabolo nascendi conditione transcriberet*. Quid ad hæc S. doctor? Mariam à communi conditione non fuisse immunem? Minime. Quid ergo? *Mariam à Catholicis diabolo non transcribi conditione nascendi, quia ipsa conditio solvitur gratiâ renascendi*, id est, quia Deus impedivit quominus in originis peccatum incideret. *Gratia* quippe *renascendi*, ibi non sumitur pro externo signo fidei in Messiam venturum, et ideo pro contracti peccati originalis remissione, sed pro contrahenda avitæ maculæ, nisi misericors subveniret Deus, condonatione; in stylo scilicet Augustini, præservatio à peccato est peccati dimissio, ut patet ex lib. 2 Confessionum cap. 7, n. 15, ubi ait: *Omnia mihi dimissa esse fateor, et quæ meâ sponte feci mala, et quæ te duce non feci*.

Infinitus sim si enumerarem eos omnes qui vocant B. Virginem *immaculatam, incontaminatam, intemeratam, nunquam maledictam, totam pulchram, totam sine maculâ, ab omni contagione liberam, ab omni labe peccati integram et alienissimam*, etc. — *Ingressus est*, inquit Sophronius, patriarcha Hierosolymitanus in epistolâ ad Sergium Constantinopolitanum præsulem, quæ, Baronio teste ad annum 681, n. 15, lecta fuit in sextâ synodo generali actione 11, *utrum Mariæ sanctæ, et ab omni contagione liberatæ et corporis et animæ*.

Hæc et similia effata, quæ in veterum Patrum operibus passim occurrunt, eò collimant ut Christum inter et ejus Matrem quædam inducatur sanctitatis similitudo et quasi consonantia, quæ tota profectò evanesceret si Maria vel uno instanti tartareis compedibus fuisset constrieta.

SECUNDA CLASSIS. — Patres mox laudandi clariùs, sive minùs obscurè, purissimum Virginis conceptum prædicaverunt.

S. Ildephonsus episcopus Toletanus, mortuus anno 667, sermone de Assumptione B. Virginis, apud Petavium lib. 14 de Incarnatione cap. 2, n. 5 (auctorem hæc in parte minime suspectum), ait: *Caro Virginis ex Adam assumpta maculas Adæ non admisit*. Certè Adæ maculæ sunt et peccata actualia, et præsertim peccatum originale, quibus S. Præsul Mariam obnoxiam

non fuisse asserere non dubitat. Hinc falli videtur Petavius dum loco citato conjicit Ildephonsum *non loqui de originali maculâ, sed de vitiis quæ Adæ posteros inficiunt*. B. Virginis apparitione honoratus fuerat, ut ostendunt Baronius ad annum 652, et P. Alexander in historiâ septimi seculi.

D. Joannes Damascenus, qui floruit initio seculi octavi, oratione primâ de nativitate B. Mariæ exclamat: « Natura gratiæ factum antevertere minimè ausa est: verum tantisper expectavit, donec gratia fructum suum produxisset... O beatos Joachim lumbos, ex quibus prorsus immaculatum semen fluxit! O præclaram Annæ vulvam, in quâ tacitis incrementis ex eâ auctus atque formatus fuit fœtus sanctissimus! O beatum ventrem, qui vivum cælum cœlis ipsis latius peperit! » Amputatæ dextræ per calumniam Leonis Isaurici restitutionem ferventibus orationibus à B. Virgine obtinuit, si Baronio fides ad annum 728, et P. Alexandro in historiâ seculi octavi. Porro singula ferè vocabula peccatum originale à B. Virgine arcent. Si quippe corrupta Adæ natura gratiæ fœtum antevertere non est ausa, anima Mariæ per eam nullo instanti fuit infecta; si ex Joachim lumbis prorsus intemeratum semen effluxit, concupiscentia peccati vinculum in Mariam projicere non potuit, ut Jansenii verbis utar, etc.

Paschasius Ratbertus, abbas Corbeiensis anno 844, quem inter recentiores impensè extollit doctissimus Pater Mabillonius, in elogio ejus historico, in libello de Partu B. Mariæ Virginis, dicit: « Eximie pietatis est beatissimæ Virginis pudicitiam prædicare incorruptam et incontaminatam, et ab omni contagione primæ originis confiteri alienam. »

Antiquus auctor, cognomento Idiota, qui juxta Bellarminum lib. 4 de Amissione gratiæ et Statu peccati, cap. 15, vixit post annum 800, in contemplatione B. Virginis cap. 2, exclamat: *Tota pulchra es, Virgo gloriosissima, non in parte, sed in toto, et macula peccati, sive mortalis, sive venialis, sive originalis, non est in te*. Idem tradit cap. 6.

S. Petrus Damianus, vel Damiani, innumeris laudibus à summis pontificibus cumulatus, qui obiit anno 1072, sermone de natali S. Joannis Baptistæ, docet B. Virginem perfectiore modo à peccato originali mundatam fuisse, quàm Joannem et Jeremiam; qui modus repetendus videtur à primo instanti conceptus B. Virginis, cum sequentibus momentis Joannes in utero matris sanctificatus fuerit. Hinc sanctissimi

virī mentem assecutus non est. Petavius cū loco commemorato adducens opusculum sextum, cap. 19, inter sexaginta, ubi dicit Petrus, *Carnem Virginis de peccato esse conceptam*, cū, inquam, hunc afferens textum ait : *Manifestè Petrus hoc loco B. Virginem originali affectam vitio fatetur*. Verba quippe illa unicè ostendunt, quod omnes ferè intemerati conceptūs fatentur assertores, carnem Mariæ concupiscentiæ germinē pollutam fuisse, et ideò animam ipsi unitam remoto cœlesti auxilio reipsā peccatum originale fuisse contracturam.

S. Bruno, Carthusianorum institutor, qui in cœlum evolavit anno millesimo et uno, versum 20 Psalmi 101 : *Dominus de cœlo in terram aspexit*, exponens hæc habet : « Dominus de cœlo in terram aspexit, dū de regalibus sedibus in uterum Virginis venit. Hæc est incorrupta terra illi cui benedixit Dominus, ab omni propterea peccati contagione libera. » Ubi voces, *incorrupta, ab omni peccati contagione*, quodlibet propriè dictum peccatum et contagium excludunt.

D. Anselmus, archiepiscopus Cantuariensis, qui in libris, *cur Deus homo*, quos juxta P. Alexandrum in hist. undecimi seculi perfecit anno 1098, docuerat B. Virginem cum originali peccato fuisse conceptam (nempe lib. 11, cap. 16 et 17), hanc opinionem postea deposuisse videtur. Enimverò, libro de conceptu virginali, quem anno sequenti scripsit, cap. 18, ait : « Decebat ut Christi conceptio de Matre purissimā fieret; nempe decens erat, ut eā puritate, quā major sub Deo nequit intelligi, Virgo illa niteret, » etc. Nemo autem non videt majorem, *etiam sub Deo*, concipi posse puritatem, si Maria vel unico momento peccati labe fuisset dispersa; Angeli nimirum sub Deo puritate refulgent, qui tamen nullā unquam noxā fuerunt conspurcati.

Fullbertus Carnotensis, mortuus anno 1028, *sapientissimus et incomparabilis episcopus* dictus, in gravi morbo ob insignem pietatem sacris B. Virginis uberibus lactatus, si quæ refert P. Alexander in historiā XI seculi vera sunt, sermone secundo de nativitate B. Mariæ hæc asserere non dubitavit : *In hujus conceptione haud dubium quin utrumque parentem vivificus et ardens spiritus singulari munere repleverit*. Hæc profectò significare videntur B. Virginem absque concupiscentiā, ac proinde sine peccato originali conceptam fuisse.

S. Yvo, Carnotensis præsul, qui obiit anno 1115, inter sermones 24 hæc protulit sermone

de natali Domini : « Quomodo Matrem carnis suæ sanctificaverit, audiamus, ut inde lætetur catholicus, et hæreticus confundatur; omnem quippe nævum tam originalis, quam actualis culpæ in eā delevit, sicque carnem de ejus carne sumens in divinam munditiā transformavit. » Certè nulla foret Catholicis lætitiæ, et hæreticis confusionis causa, si Christus Mariam ut Joannem Baptistam et Jeremiam sanctificasset.

Hildebertus, archiepiscopus Turonensis, anno 1125, quem D. Bernardus *Ecclesiæ columnam* appellavit, sermone de assumptione dicit : « Non de ardore libidinis concepit, nec peccato originali, sicut aliæ solent, deturpavit Filium, sed immaculata, et intacta, et immunis ab omni peccato Sanctum sanctorum edidit. »

Rupertus Tuitiensis abbas initio 12 seculi, quem P. Alexander refert B. Virginis, in quam piè affectus erat, intercessione Scripturæ sacræ intelligentiam obtinuisse, septem librorum in Cantica 5, cap. 5. B. Virginem sic loquentem inducit : *Nullus est qui non veraciter dicat, ecce in iniquitatibus, etc., præter me, et hunc unum et unicum, quem sine iniquitate concepi*. Maria igitur quasi Christi adinstar sine peccato fuit concepta.

Guerrius Cisterciensis, defunctus anno 1157, pietate et eruditione clarissimus, in piissimis et elegantissimis sermonibus, v. g. 13, qui est de verbis Domini ista consignavit : « Non est in filiis hominum, magnus, vel parvus, tantā præditus sanctitate..... qui non fuerit in peccatis conceptus, præter Matrem immaculati peccatum non facientis. »

Arnoldus Bonnævallis abbas prope Carnutum in libro de cardinalibus Christi operibus ad summum pontificem Adrianum IV hæc scripsit : « Innoxiam affligi non decuit, non sustinebat justitia ut illud vas electionis communibus lacesseretur injuriis, quoniam plurimum à cæteris differens naturā communicabat, non culpā. »

Jacobus de Voragine, vir sanctimoniā vitæ et doctrinā conspicuus, Genuensis archipræsul, qui è vitā excessit anno 1298, in *Mariali*, id est, libro de laudibus *Deiparæ Virginis*, sic explicat istud Canticorum, *tota pulchra es, amica mea, et macula non est in te* : « Ipsa enim pulchra fuit, quia sine peccato originali; » quæ haud dubiè primum etiam Mariæ conceptus momentum tangunt.

Georgius de Rhodes disputatione unicā de

Virgine Mariâ , q. 4 , sectione 2 , 15^o , hæc habet : « Nemo mentem suam explicâsse videtur clariùs (circa immaculatum Mariæ conceptum) quàm S. Dominicus, in mirabili eo libro, ejus veritas et auctoritas ignes divinitus superavit, ut testantur S. Antonius 5 p. tit. 19, c. 1, 11, Vincentius Bellovacensis in speculo historico lib. 29, c. 49, Pelbartus, Canisius, Coecius; sic autem loquitur: Sicut primus Adam fuit ex terrâ virgine, et nunquàm maledictâ formatus, ita decuit in secundo Adam fieri, id est, Christo; ejus Mater Virgo nunquàm fuit maledicta, quibus verbis apertius explicari non potuit pia sententia, ut meritò sanctum Patrem, ex eâ nobilissimâ familiâ (Dominicanorum) secuti sint doctissimi theologi supra quadraginta, quorum catalogum dabit præter cæteros Christophorus Vega pakestra 3, certam. 3. »

Notum, est Seraphicam scholam, id est, Fratres Minores, piæ huic sententiæ à longo tempore impensè addictos esse. Verbo dicam, piissima de purissimo Mariæ conceptu opinio à quadringentis annis principatum in scholis obtinet. Testis est Petrus de Alliaco apud P. Alexandrum in hist. 14 seculi ad annum 1587. Insignis ille vir ad Cameracensem episcopatum et cardinalitias infulas ob eximiam eruditionem: eVectus sacræ Facultatis Parisiensis censuram ejusdem sacri Ordinis nomine defendens adversùs Joannem de Montesono Dominicanum, qui inter alias hanc protulerat assertionem: *non omnem hominem præter Christum contraxisse peccatum originale, est expressè contra fidem*, illam, inquam, censuram vindicans, dixit: « Multi sancti et doctores catholici, multi summi pontifices, et sanctæ romanæ Ecclesiæ cardinales, et alii majores prælati, et plures particulares Ecclesiæ, imò ferè universalis Ecclesia, aut ejus major et sanior pars, asserunt et publicè dogmatizant, B. Virginem sine peccato originali fuisse conceptam. » Hinc concilium Basileense sess. 36, anno 1439, declaravit doctrinam de intemerato Mariæ conceptu tanquàm piam, et consonam cultui ecclesiastico, fidei catholicæ, rectæ rationi, et sacræ Scripturæ, ab omnibus Catholicis, approbandam fore, tenendam, et amplectendam. Hanc declarationem avidè amplexa est sacra Facultas Parisiensis; anno 1497, solemne edidit decretum, quo cavit ne ad ullos gradus scholasticos admitteretur, qui priùs non juraret se defensurum B. Virginem ab originali noxâ. Decretum exhibet P. Alexander in historiâ 14 seculi,

ubi Joannis-Duns, id est, Scoti historiam textit.

Idem historicus dissertatione octavâ in 15 seculum, cap. 5, agnoscit, « pium et salubre esse de immaculatâ B. Virginis conceptione concilii Basileensis decretum, quod observari statuit concilium Avenionense anno 1437, licet synodi Basileensis judicio in dogma fidei non evaserit, et sacram Facultatem Parisiensem in hanc doctrinam meritò conspirasse; » quod adversùs quosdam Dominicanos piæ huic sententiæ non addictos observandum est.

Intemerati B. Virginis conceptus veritas tam altè Gallicanorum præsulum animis erat infixata, ut Spondanus Appamiarum in Galliâ Narbonensi episcopus, et Baronii continuator, hæc ad annum 1550, n. 24, super eâ proferre operæ pretium duxerit. « Nos sanè pro assertionem immaculatissimæ conceptionis Deiparæ Virginis, ejusque propugnatione, parati essemus toties vitam profundere, quoties contingeret eam in dubium vocari. Idque toto animo scribimus, et profitemur, in ipsissimâ ejus festività anno 1632. »

Refert idem historicus ad annum 1587, n. 8, quemdam Dominicanum theologum publicè Rothomagi declaravisse se assertiones Joannis de Montesono adversùs intemeratam B. Virginis conceptionem esse evicturum, quod nisi præstaret, se velle vocari, *Huetum*, id est, *virum diabolicum*; quæ conditio cum non sine risu à populo accepta fuisset, *nec ille potuisset satisfacere*, ipsum et Dominicanos, *ubivis res audita est*, nuncupari coepisse *Huetos*, atque exinde Rothomagi natam fuisse solemnem præmiorum distributionem in honorem Conceptionis B. Virginis (saltem ut nonnulli existimant). Eadem consuetudo quotannis ab antiquis temporibus in Neustriacâ Universitate viget et religiosè servatur; quæ retuli ut eximii erga Deiparam Virginem nostræ gentis sensus magis ac magis, si fieri posset, explorati fierent.

Objiciunt 1^o Scripturæ auctoritatem. Quoties de primigenio delicto disserit, toties declarat, *omnes in Adam peccasse, omnes in Adam esse mortuos*, quia Christus pro omnibus mortuus est, etc. Sed hæc evincunt B. Virginem paternâ labe fuisse infectam. Hoc argumentum velut Achillæum ostentare solent adversarii. — Resp. 1^o istud argumentum retorsione plumbeum fieri et planè evanidum. Etenim sacri Codices passim renuntiant; *non esse hominem qui non peccet, in multis omnes offendere, Deum à nemine vivente unquàm visum fuisse, sed nec videri posse*, etc. Sed hæc evincunt B. Virginem peccato

actuali necessariò fuisse coinquinatam, et sententiam asserentem Deum à Moyse, aut Paulo, dùm viverent, visum fuisse, sacris Litteris repugnare. Quis istas ferat consecutiones? Meritò igitur Canus, doctissimus ex nobilissimâ Dominicanorum familiâ Theologus, lib. 7 de Locis, cap. 5, hunc in modum arguit: « Assertionem, quæ dicit B. Virginem peccatum originale contraxisse, non esse in numero dogmatum catholicorum, manifestissimè colligitur ex eo quòd à lege universali per singulare privilegium unam Dei Matrem excipere, sacrarum Litterarum fidei nullo pacto adversum est; alioqui cùm sacræ Litteræ in universum clament: *Non videbit me homo, et vivet, Deum nemo vidit unquam*, qui Paulum aut Moysen exceperet, sacras Litteras contrapugnasset. » — Resp. 2º, nego minorem. Nam 1º, ex generalibus Scripturæ, aut Patrum, de peccato originali ab omnibus contracto effatis nihil ampliùs colligi potest, quàm ex generalibus ejusdem Scripturæ, vel Patrum locutionibus de peccato actuali, cui omnes obnoxii sunt... 2º, Conc. Trid. sessione 5, declarando *suæ intentionis non esse D. Virginem comprehendere in generali suo de peccato originali decreto*, consequenter declaravit non esse suæ intentionis eam comprehendere in generalibus sive Scripturæ, sive Patrum de peccato originali oraculis... 3º Divina ordinatio circa peccati originalis transmissionem Deo non abstulit facultatem quos voluisset ab illâ lege eximendi. Unde generales illæ locutiones semper intelligendæ sunt hypotheticè, id est, ex hypothesi quòd Deus per singulare privilegium aliquem non exemerit à peccato originali. Porro voluit Deus *propter honorem Domini*, ut lex, quæ erat pro omnibus, non esset pro Mariâ, ad eum ferè modum quo lex Assueri erat pro omnibus, non pro Esther... 4º Generales illæ locutiones rectè intelliguntur de B. Virgine, quamvis cùm existere cœpit, justificationis gratiâ fuerit exornata; expriment enim omnes, qui fuerunt in lumbis Adæ, in eo peccasse, et peccatum, secluso speciali privilegio reipsâ in primo existentie suæ instanti contrahere debuisset, quo sensu, ut postea dicemus, B. Virgo in Adam peccavit, et mortua est.

Instant, et cœlesti oraculo, *si unus pro omnibus mortuus est, ergo omnes mortui sunt, et pro omnibus mortuus est Christus*, innixi arguunt: li omnes pro quibus reverà mortuus est Christus, reverà mortui sunt in Adam: sed Christus reapse mortuus est pro Mariâ; ergo Maria reapse mortua est in Adam; si autem reapse mor-

tua est in Adam, reapse contraxit peccatum originale; ergo. — Resp. Mariam, utpote ex Adam generatione naturali cum concupiscentiæ fervore prognatam, Adam actu peccante cum ipso et in ipso actu peccasse, et hoc sensu in Adam reipsâ mortuam esse; unde cùm Mariæ anima creata est, et carni ex Adam tractæ unita, debuisset peccatum habituale Adæ contrahere, et illud reverà contraxisset, nisi Deus meritorum Christi intuitu actualem illam corruptionem impedivisset; tota igitur Mariæ sanctitas et gloria ex Christo ejus Redemptore oritur; quòd enim in primo conceptûs instanti, peccato, ut ipsius exigebat natura et conditio, non sit infecta, unici effecerunt Christi merita. Quare Christus per gratiam suam realem Mariæ depravationem arcendo non minùs ejus Salvator fuit quàm si Mariam per eandem gratiam ex reali corruptione extraxisset, ad eum ferè modum quo vir, qui centum nummos præstaret, ut alicujus criminis rei realis amoveretur condemnatio, æquè foret ejus redemptor ac si ipsum per centum nummorum donationem à realis condemnationis effectu liberasset. Unde Augustinus, ut antea ostendimus, agnovit *sibi dimissa esse* à Deo et quæ reverà commiserat, et quæ cœlestis gratiæ protectione non commiserat peccata.

At, iterùm arguunt, si commemorata oracula intelligenda sunt de iis, qui *actu* aut debito mortui sunt in Adam, plures alii pari distinctione à peccati originalis reatu liberari poterunt, sique tandem hujus delicti existentia è medio tolli; absurdum consequens; ergo. — Resp. commemoratam distinctionem iis duntaxat convenire posse, in quos Scriptura, aut traditio, Ecclesiæ catholicæ judicio eam cadere asserit; talis autem est sola Deipara Virgo. Quod enim quidam dixerunt, B. Joseph, et nonnullos alios eximie sanctitatis homines, maculæ originalis puros et expertes fuisse, omni destitutum est fundamento. Hinc Sylvius in 4-2, q. 81, a. 2, conclusione quartâ hæc meritò statuit: « Temerarium est, quin de hæresi suspectum, aliquem ex Adam seminaliter descendentem, præter Deiparam, à peccato originali eximere, etiamsi hoc ex speciali privilegio factum diceretur, quia esset facere exceptionem à regulâ absque fundamento, et contra omnium orthodoxorum sententiam. »

Obtundunt tandem, Apostolum ad Ephesios 2 docere omnes, qui naturam ex Adam trahunt, esse *filios iræ*; sed Maria est filia Adæ; ergo, etc. — Resp. Mariam vi naturalis suæ ex

Adam generationis cum libidine *dispositivè*, ut aiunt, et *inchoativè*, sive, ut antea loquebatur Estius, *quodammodo habitualiter*, fuisse *filiam iræ*, seu peccasse, licet interveniente, *propter honorem Domini*, Dei auxilio cum primùm existere incipit ejus anima, non fuerit *formaliter* et *consummativè* *filia iræ*, sive peccatrix. Porro evidens est D. Paulum loco objecto disserere de se et *cæteris*, quibus speciale privilegium, ut Mariæ, non est concessum.

Obijciunt 2^o auctoritatem veterum Patrum, quos plures in classes dividunt.

Prima classis ex iis coalescit qui asserunt omnes homines vulgari utriusque parentis propagatos salu peccatum originale contraxisse, et ideò solum Christum ab eo fuisse immunem. Ita D. Augustinus pluribus in locis, et alii non pauci, quorum testimonia exhibet Petavius lib. 14 de Incarnatione cap. 2. — Resp. simili argumento adversarios, si libuerit, probare posse quæcumque immortalitatem, immunitatem à peccato, bonitatem, sanctitatem, soli Deo convenire posse; Scriptura enim et Patrum opera affluunt testimoniis, quæ asserunt ea solius Dei esse propria. Quid ergo intenderunt Patres? Hoc unum, omnes homines vi generationis suæ in concupiscentiâ et naturâ suâ contrahere debuisse peccatum originale, quod soli Christo, qui Deus est, et de *Spiritu sancto* conceptus fuit, convenire non potuit; unde illa oracula præsentem quæstionem non tangunt, cum B. Virgo non ex se aut per se à peccato originali fuerit exempta. Etverò, qui vel tantisper attenderit ad commemorata testimonia, is illicò agnoscat hunc esse germanum eorum sensum.

Secunda classis ex iis compingitur, quibus visum fuit B. Mariæ *carnem fuisse carnem peccati*, *carnem Mariæ in iniquitatibus fuisse conceptam*, *carnem Mariæ habuisse in se peccatum*, *carnem Mariæ vitiatæ originis contagium contraxisse*, etc. Ita apud Petavium citato lib. 14 de Incarnatione, cap. 2, numeris 5 et sequentibus plures ex illis, quos in sententiæ nostræ patrocinium protulimus, D. Augustinus, lib. 10 de Genesi ad litteram, cap. 18 et 20, S. Fulgentius, lib. de Incarnatione cap. 6, Ferrandus diaconus, Fulgentii discipulus, S. Ildephonsus Toletanus, lib. de perpetuâ virginitate B. Mariæ, Petrus Damiani opusculo 6, cap. 19, Rupertus, lib. 1 Commentariorum in Cantica sub initium, Hugo Victorinus, Petrus Lombardus, etc. — Resp. ea testimonia, ut illa consideranti illicò apparet, unicè evincere B. Mariæ, quæ naturali modo ex Adam per

concupiscentiam genita fuit, carnem ex corrupto Adæ semine oriri, et ideò esse carnem peccati; at id concedunt omnes ferè intemerati conceptus defensores, et quidem sine ullo prorsus suæ sententiæ detrimento; hæc enim non probant B. Virginis animam eo instanti, quo carnem primùm informare cepit, in peccatum fuisse immersam, sed solùm, nisi impedivisset Deus, immergi debuisse. Porro fomes, sive concupiscentia, carnem inficiens hic vocatur *peccatum* non propriè sed impropriè dictum. Aserunt autem commemorati doctores Mariam ab omni maculâ, et contagione peccati originalis per Spiritum sanctum mundatam fuisse, quia ille fomes qui carni Mariæ inerat per gratiam omnimodè extinctus est, sive in ejus conceptione, seu animatione, ut placet multis recentioribus, sive in momento annuntiationis, cum eam affatus est Gabriel, et Filium Dei concepit, ut opinantur SS. Thomas et Bonaventura, et multis antiquis visum est.

Obijciunt 3^o auctoritatem D. Bernardi, qui Ecclesiam Gallicanam illustrare desiit anno 1153, ut Beatorum numerum in cælo augeret, et eximio in B. Virginem affectu et pietate fuit conspicuus. Variis in operibus conceptum B. Virginis minimè culpæ originalis expertem fuisse non solùm asseveravit, sed etiam festum ejus diem celebrantes canonicos Lugdunenses severe increpavit epistolâ 174. Ita Petavius lib. 14 de Incarnatione cap. 2, n. 7, qui et hic citat sermonem 78 in Cantica, et cap. 1, n. 15, sermonem secundum de assumptione, ubi mellifluus doctor disertè asserit B. Virginem peccatum originale contraxisse, à quo ante nativitatem mundata fuit, et solum Christum huic noxæ non fuisse obnoxium; ergo. — Resp. 1^o, verum esse D. Bernardum citatâ epist. 174 increpasse canonicos Lugdunenses, quòd solemne Conceptionis festum instituissent anno 1136. Verùm hujusmodi objurgationem non emisit ob ipsam præcisè intemerati Mariæ conceptus assertionem, sed ob illius festi institutionem inconsultâ Sede apostolicâ, *ad cuius incudem*, inquit Baronius hoc factum expendens ad annum 1136, *quæque à quolibet verè catholico probanda sunt, antequàm recipiantur in usum*. Quare lubenter existimarem cum erudito Annalium parente, et P. Alexandro in historiâ duodecimi seculi, ubi disserit de S. Bernardo, S. doctorem inter utramque opinionem hæc in epistolâ incertum et suspensum vacillasse nihil de alterutrâ judicando, et ideò summo ardore Ecclesiæ romanæ cæterarum omnium matris et magistræ hæc

super questione decretum, sive sanctionem, expectavisse. Quam quidem responsionem eò avidius amplecterer, quòd S. doctor suam epistolam his claudat verbis quæ illam suggerunt: « Quæ autem dixi absque præjudicio sanè dicta sint sanius sapientis. Romanæ præsertim Ecclesiæ auctoritati atque examini totum hoc sicut et cætera, quæ ejusmodi sunt, universa reservo; ipsius, si quid aliter sapit, paratus judicio emendare. » — Resp. 2^o fortè D. Bernardum in hac epistolâ et aliis operibus objectis, loqui intendisse de primâ Virginis conceptione, qualem supra delineavimus, quæ *in iniquitate facta est*, aut de liberatione ipsius post animationem, à peccato improprie dicto, id est, à concupiscentiâ, quæ post animæ infusionem in eâ aut ligata fuit, aut extincta, ut diximus. Sanè argumenta, quibus Lugdunenses canonicos premit, has expositiones suadere videntur; eò enim summatim rediguntur: *Non potuit sancta esse antequàm nasceretur... Inter maritales amplexus sanctitas et Spiritus sanctus se non immiscuit... Non est concepta de Spiritu sancto*, etc. — Cæterum, cum S. doctor canonicorum Lugdunensium temeritate vehementer offensus sancto zelo ardentius commoveretur, nimis urgendæ non sunt quædam ipsius super hoc propositiones, sed benignum in sensum interpretandæ.

Objiciunt 4^o: D. Thomas 3 p., q. 27, n. 2, in c., docet *B. Mariam nonnisi post animationem sanctificatam fuisse*, et, responsione ad 2, adversam opinionem derogare dignitati Christi, secundum quam est universalis omnium Salvator, etc. Eadem docuit D. Bonaventura in 3 Sententiarum. Præverant Hugo Victorinus Sentent. tractatu 1, c. 16, et Petrus Lombardus, lib. 3 Sent. distinct. 3, 11, etc., ubi dicunt, Mariam angelicæ Salutationis tempore *per Spiritum sanctum à peccato prorsus purgatam fuisse, et à fomite etiam peccati liberatam*, quæ etiam tradunt DD. Thomas 3 p., q. 27, a. 33, et Bonaventura in 3 Sent. dist. 3; ergo. — Resp. certum videri D. Thomam, cum scriberet in lib. 1 Sent. dist. 44, q. 1, a. 3, ad 3, et etiam Commentariis, in Epistolas D. Pauli, et opusculo 4 in Salutationem angelicam; docuisse, *B. Virginem immunem fuisse à peccato originali et actuali*. Etenim, referente Patre Alexandro dissertatione 6 in 14 seculum, articulo 12, doctissimi Scotistæ omni argumentorum genere adversus Thomistas pro intemerato Virginis conceptu decertantes commemoratos D. Thomæ textus ipsis constanter objecerunt,

Quid eruditi Dominicani adversæ opinioni addictissimi? D. Thomam illis in operibus hanc doctrinam non consignasse? Minimè; quid ergo? S. doctorem tertiam partem adornando hanc deposuisse opinionem; hoc autem factum in dubium vocari posse probare videntur nonnulla in ipsâ tertiâ parte adpersa, ex quibus ratiocinando colligi potest ipsum aut sententiam non mutasse, aut saltem mutare non debuisse. Etenim 3 p., q. 27, a. 1, in c., ait: « Rationabiliter creditur, quòd illa quæ genuit Unigenitum à Patre, plenum gratiæ et veritatis, præ omnibus aliis majora gratiæ beneficia acceperit; unde Angelus (Lucæ 1) ei dixit: *Ave, gratiâ plena*. » Majus igitur privilegium à Deo accepit Maria, quàm Joannes Baptista et Jeremias, quos tamen in utero sanctificatos fuisse ibidem asserit S. doctor.

Item 3 p., q. 27, a. 2, B. Virginem post animationem fuisse sanctificatam hac ratione ostendit, quòd à Christo redimi non potuerit nisi maculam originalem reipsâ contraxerit; at istam rationem exsufflaverat et priusquàm tertiam partem concinnaret, nimirum 2-2, q. 106, a. 2, in c., ubi docet, innocentem, cui Deus gratias infudit (ad non peccandum), gratias Deo rependere teneri..... et postquàm eandem partem emisit, scilicet in supplemento 3 partis q. 78, vel 80, a. 1 ad 3, ubi tradit, aliquem duplici modo per Christum à malo liberari, cum nempe in illud malum reverà immersus est, aut illius debitum incurrit. Cum igitur B. Virgo debitum habuerit peccatum originale contrahendi, potuit à Christo redimi, etsi illâ maculâ reipsâ non fuerit conspersa. Etverò, quomodò D. Thomas, qui ante citatum caput septimum libri 2 Confessionum D. Augustini apprimè noverat, hujus doctrinæ vindex non fuisset?

Item 3 p., q. 27, a. 2, in c., colligit Mariam post animationem fuisse sanctificatam ex eo quòd ante animationem sanctificari non potuerit; at istud ratiocinium tanto doctore dignum non videtur; datur enim medium inter instans animationem præcedens, et instans animationem subsequens, ipsum scilicet animationis momentum.

His et aliis causis adducti conjiciunt nonnulli eruditi adulterâ manu corruptam fuisse tertiam partem D. Thomæ, et supplementi locum ubi dicit, neminem præter Christum originalis noxæ expertem esse potuisse, si tamen supplementi auctor est S. Doctor. Conjecturæ quædam inspergunt probabilitatem, quædam vetera

Summæ exemplaria, in quibus (ut ferunt) non inveniuntur quæ adversus intemperatum B. Virginis conceptum militant; imò legitur ipsam in sui animatione fuisse sanctificatam. Unum, inquit, extat in Cœnobio Carmelitarum discalceatorum ad muros Hispanenses, alterum Massiliæ apud FF. Dominicanos, tertium in bibliothecâ Capucinorum Aurelianensium. — Resp. 2°, quidquid sit de doctrinâ in tertiâ parte Summæ D. Thomæ contentâ, illam nullum prorsus piæ de purissimo B. Virginis conceptu opinioni præjudicium inferre posse, etiamsi illi adversaretur. Etenim S. doctor Viaticum recipiendo hæc catholico viro digna verba protulit: « Ego de sanctissimo Corpore D. N. J. C. et aliis Sacramentis multa docui, multa scripsi in fide J. C. et sanctæ romanæ Ecclesiæ, cujus correctioni cuncta subicio, cuncta suppono. » Aliunde S. Thomæ doctrina non est usquequaque probanda, quia in eâ multæ contrarietates et repugnantie continentur, ut plurimis exemplis demonstrare curavit Petrus de Alliaco, insignis Parisiensis academix theologus in erudito suo Tractatu adversus 14 propositiones Joannis de Montersono Dominicani à sacro Ordine Parisiensi proscriptas anno 1587, qui extat ad calcem Magistri Sententiarum; quin P. Alexander, dissertatione 6 in 15 seculum articulo 16, hunc Tractatum non sine encomio refert.

Quod attinet ad S. Bonaventuram, ejus super istâ quæstione sententia non est pluris faciendâ quàm D. Thomæ opinio. Pater Frassen, doctissimus è familiâ Franciscanorum theologus, qui circa hujus seculi initium è vivis excessit, contendit et probare aggreditur festum Conceptionis B. Virginis in Ordinem D. Francisci introductum fuisse jussu capituli generalis, cui præerat D. Bonaventura. Unde inferri potest S. doctorem circa vitæ finem à veteri opinione fortè recessisse.

Aliorum scholasticorum, qui nobis contradicunt, dicta morari non debent; quid enim duce suo principe (ut putabant) D. Thomâ non dixissent? Quibus nituntur rationibus? Unicâ, quâ innixus dicitur S. Thomas, et nullius, ut ostendimus, est ponderis. Demùm opinionem, quæ uno tempore probabili est, altero non probabilem esse posse, re diligentius excussâ, et accedente Ecclesiæ catholicæ suffragio, abundè demonstrat infelix controversia de Probabilismo.

MOMENTUM SECUNDUM. — *Ex Ecclesiæ catholicæ auctoritate.* — D. Thomas, 3 p., q. 27, a. 1,

in argumento, *sed contra*, B. Virginis nativitatem sanctam fuisse sic probat: « Ecclesia celebrat nativitatem B. Virginis; non celebratur festum in Ecclesiâ nisi pro aliquo sancto. Ergo B. Virgo in ipsâ suâ nativitate fuit sancta. »

Simili prorsus argumento purissimam fuisse B. Virginis conceptionem probamus: Ecclesia celebrat B. Virginis conceptum, id est, ipsum instans, quo anima Mariæ creata et corpori infusa speciali Dei gratiâ ab originali labe fuit præservata; ergo conceptio Mariæ sic intellecta fuit sancta.

Prob. ant. Sixtus IV, ad avertendam pestem Romæ grassantem, et propagandum B. Virginis cultum, anno 1476 edidit Constitutionem, quâ omnibus immaculatam Mariæ Conceptionem devotè celebrantibus, et missæ atque ejus officio assistantibus eas impertiit indulgentias, quas Urbanus IV concesserat anno 1262 in Corporis Christi solemnitate. Cum autem nonnulli suis in concionibus et scriptis hæreseos notam, non obstante illâ Constitutione, ei sententiæ inurerent, ac officium intemerati Conceptûs celebrantes graviter peccare assererent, idem S. pontifex, septimo post anno, id est, anno 1483, aliam emisit Constitutionem, quâ illos declamatores damnavit, et in hâc sententiâ pertinaciter perseverantes excommunicatione percussit, ut et illos qui adversam sententiam, quamdiù quæstio à Sede apostolicâ non fuisset definita, peccati pariter mortalis aut hæresis accusarent. Has Constitutiones approbavit concilium Tridentinum sessione 5, ubi declarat, « suæ intentionis non esse comprehendere in decreto de peccato originali beatam et immaculatam Dei genitricem Mariam, sed observandas esse Constitutiones Sixti papæ quarti sub pœnis in eis contentis, quas innovat. » Porro conceptio his in Constitutionibus evidenter accipitur pro instanti, quo anima Mariæ fuit creata et corpori unita; quæstio scilicet de alio instanti nunquàm fuit proposita, et commemorati auctores, ut et omnes theologi catholici, fatebantur Mariam ante nativitatem fuisse sanctificatam.

Sixti IV Constitutiones à concilio Trid. confirmatas renovavit S. Pius V ex Ordine Dominicanorum, anno 1570, et Paulus V anno 1616. Primus tamen non vetuit ne, secluso scandali loco, hæc ageretur controversia. Alter verò prohibuit ne in quibuscumque publicis actibus aliquis B. Virginem in peccato originali conceptam esse asserere auderet, licet id privatim sentire non vetuerit.

Gregorius XV, Pauli V successor, prædecessoris Constitutionem ampliavit anno 1622, vetuit sub gravissimis censuris ne in ipsis actibus privatis aliquis B. Virginem originali maculâ infectam fuisse affirmaret, et de hac assertionem ullo modo tractaret. Jussit insuper ut in festo Conceptionis nulli omnino in Officio et Missâ tam publicè quàm privatim alio quàm *Conceptionis nomine* uterentur. Permisit tamen Dominicanis inter se solùm de eâ quæstione discutere.

Alexander VII prædecessorum Constitutiones renovavit anno 1662; prioribus pœnis in delinquentes sanctis novas addidit, prohibendo ne quis sub quovis prætextu, et quovis excogitabili modo, sive directè, sive indirectè contra illibatam Mariæ conceptionem scripto aut voce loqueretur. Hâc in bullâ idem pontifex expressè dicit, Ecclesiam credere B. Virginis animam in primo instanti creationis, et infusionis in corpus, fuisse Dei gratiâ, intuitu Christi meritorum, à maculâ peccati originis præservatam.

Igitur objectum festi Conceptionis, quod celebrat Ecclesia, est primum instans unionis ejus animæ cum corpore.

Accedit communis fidelium sensus, qui, ut in suâ Constitutione observat Alexander VII, firmiter credunt B. Virginis animam in primo creationis instanti à peccati originalis maculâ immunem fuisse, et graviter offenderentur si quis aliam insurraret doctrinam. Hinc Paulus V in suâ Constitutione observat, ex occasione assertionis, quod B. Virgo cum peccato originali concepta sit, oriri in populo christiano scandala, jurgia, dissensiones, etc. Hinc imperator apud Innocentium X graviter conquestus est contra decretum à Magistro sacri Palatii promulgatum, quo illibata Virginis conceptio deflorari videbatur. Hinc rex Catholicus cum omnibus ferè episcopis et capitulis Hispaniarum, misso ad Alexandrum VII legato, querimonias detulit adversus eos qui vellicabant festum intemeratæ B. Virginis Conceptionis. Hinc summi pontifices, Julius II, Leo X et Alexander VI, religionem quamdam sub nomine *Immaculatæ Conceptionis* institutam confirmaverunt, ejus tertia regula fert, *animam B. Virginis à primo creationis instanti fuisse sanctam*.

Obijciunt festum conceptionis divi Joannis Baptistæ celebrari in Ecclesiâ græcâ 24 septembris, ut et in nonnullis Ecclesiis latinis, inter quas, ut ferunt, reperitur Melitensis; ergo festum Conceptionis non probat B. Vir-

ginem in primo existentie suæ momento fuisse sanctam. — Resp. : Nego consequ. Summi scilicet pontifices declaraverunt, ut diximus, objectum festi Conceptionis B. Virginis respicere primum illius instans, quod nunquàm de B. Joannis conceptione dixerunt.

MOMENTUM TERTIUM. — *Ex congruentie rationibus*. — Quatuordecim adducit Suarez, quinquaginta P. Salazar; sequentes adducimus.

Prima hæc est. Rationes, quibus D. Thomas 3 p., q. 27, a. 4, in c., B. Virginem peccati actualis puram fuisse probat, istæ sunt : « Idonea non fuisset Mater Dei, si aliquando peccasset; ut enim gloria filiorum patres eorum, Proverbiorum cap. 17, sic ignominia matris in filium redundasset... » Item : « Singularem habuit cum Christo affinitatem, qui ex eâ carnem accepit; *nulla autem conventio Christi ad Belial*, 2, c. 6... » Item : « Singularem modo Dei Filius, qui est Dei Sapientia, in ipsâ habitavit non solùm in animâ, sed etiam in utero; at Sapientie cap. 1, dicitur : *In malevolam animam non introibit sapientia, nec habitabit in corpore subdito peccatis*, et sic debuit in eâ impleri quod Canticorum 4 habetur : *Tota pulchra es, amica mea, et macula non est in te*. At evidens est istas rationes aut nihil probare, aut ostendere B. Virginem non ab actuali tantùm, sed et ab originali peccato eximi debuisset, cum peccatum originale necessariò sit mortale; si autem D. Thomas nihil hic probavit, et nihil probavit Augustinus cum lib. de Naturâ et Gratiâ, cap. 36, dixit, *propter honorem Domini Mariam à peccatis fuisse immunem*.

Secunda sic se habet : Nemo negaverit B. Virgini ad summum dignitatis fastigium evectæ, et omnibus creaturis, etiam Angelicis, præstanti, concessum fuisse privilegium, aut donum, quod alicui creaturæ fuit collatum, si ejus dignitati non repugnaret; at primi parentes gratiâ sanctificante in creatione suâ sunt ornati, et sancti Angeli eadem gratiâ insigniti nullo unquàm peccato polluti sunt; quæ profectò privilegia B. Virginis conditioni non repugnant.

Tertia sic conficitur : Maria, ut docet D. Thomas cum pluribus, non fuit obnoxia corporis corruptioni, indeliberatis concupiscentiæ motibus, etc., ob honorem Domini, sive divinam maternitatem; quantò minùs ob eandem rationem originali peccato contaminari debuit? Certè, si B. Virgini opto data fuisset, maluisset carere peccato originali quàm iis donari privilegiis.

Quarta ista est : Sicut primus homo, qui figura fuit secundi, ex terrâ nunquam maledictâ formatus est, ita decessit ut secundus homo, ex terrâ non maledictâ, id est, ex Virgine omninô purâ, formaretur. Item sicut mater omnium viventium vitâ animali sine peccato fuit condita, ita congruum erat ut mater omnium viventium vitâ spirituali sine peccato conciperetur, cum inprimis Eva figura fuerit Mariæ, et res figurata re ipsam figurante perfectior esse debeat.

Quinta sic redigitur : Si quod in Canticis legitur, *sicut lilium inter spinas, etc.*; *tota pulchra es, etc.*; *hortus conclusus, etc.*, de B. Virgine, ut multis Patribus placuit, sunt intelligenda, ex his confici poterit Mariam sine peccato fuisse conceptam.

Ultima efflorescit ex miraculis, quibus nonnulli graves auctores asserunt Deum piam hanc sententiam quasi confirmasse. Etenim Spondanus ad annum 1530 refert, quemdam monachum, Paulum nomine, qui Cracoviæ in sacrâ ad populum concione ausus fuerat dicere, Deiparam Virginem in peccato originali fuisse conceptam, subito cecidisse et expiravisse, quod multis eâdem de materiâ disputantibus grandem incussit timorem. Idem auctor ad annum 1459 asserit gravissimam pestem, quæ Basileæ grassabatur, immediatè post Patrum de immaculatâ Conceptione decretum cessavisse, etc.

COROLLARIUM PRIMUM. — Etsi insultare his non soleo, quorum ingenia et eruditionem miror, tamen modum, quo purissimum B. Virginis conceptum vindicat Petavius lib. 14 de Incarnatione cap. 2, non improbare non possum. Etenim n. 8, dicit *opinionem* (de temeratâ Mariæ conceptione) *antiquioribus placuisse*, et n. 10 se in contrariam sententiam ire *ob romanorum pontificum, Tridentinæ synodi auctoritatem, ac communem maxime sensum fidelium omnium*; fatetur aliunde hanc sententiam sacris Litteris minimè comprobari posse. Jam verò ex his principiis colligi, ni meus me fallit animus, posse videtur, Ecclesiam commendare posse dogma neque in sacris codicibus, neque in *antiquioribus Patribus* consignatum, et ideò illud dogma vel à novâ revelatione, vel ab *orali* traditione tenere : primum sanè falsum est : alterum verò traditionem oralem, communemve sensum fidelium, in contradictionem cum traditione scriptâ, sive *antiquiorum Patrum* scriptis immergeret, quod profectò absurdum est. Et verò, traditio oralis, et communis fide-

lium sensus circa purissimum Mariæ conceptum, antiquioribus Patribus vel erat exploratus, vel non ; si exploratus, nihil ipsi adversum protulissent ; si ignotus, qui id contingere potuit, cum inprimis eorum quàm præsentî ætate clarior fuerit traditio ? Qui eodem tempore traditio scripta, id est, certâ fidei regula, cum traditione orali, id est, alterâ certâ fidei regulâ coherere non potuit ? Apage figmenta.

COROLLARIUM SECUNDUM. — B. Virgo debitum habuit peccatum originale contrahendi. Ex dictis enim elucescit verbum divinum seu scriptum, seu traditum enuntiare omnes homines per naturalem generationem ab Adamo descendentes in Adam peccasse. Adamo ergo peccante peccavit Mariâ, ut et cæteri Adæ nepotes, quatenus scilicet illius, ut et aliorum hominum, caput morale fuit, quamvis cum physicè existere incorpuit, peccatum ex speciali privilegio non contraxerit. Etverò constat Christum B. Virginis Salvatorem fuisse, quod ipsa agnoscit in suo Cantico : *Exultavit*, inquit, *spiritus meus in Deo salutari meo*, Lucæ 1. Unde Alexander VII, mox laudatus, dixit, Mariam à peccato originali *ex Christi meritis* præservatam fuisse ; at Christus non est Salvator hominum nisi quia homines à peccato vel contracto vel saltem contrahendo eximit.... Item B. Augustinus et alii Patres clamant carnem B. Virginis *fuisse carnem peccati*, ipsam morti, et aliis ærumnis, quæ in præsentî ordine pœnæ sunt peccati, fuisse subditam ; quæ vera esse nequeunt nisi in Adamo peccaverit, et ideò peccati in origine contrahendi debitum habuerit.... Denique qui B. Virginem isti debito subtrahunt, vulgò docent Verbi incarnationem et Mariæ matris existentiam decretas fuisse ante prævisum Adæ peccatum, quod D. Thomæ et communi sententiæ repugnat, cum Christus venerit *populum suum salvum facere à peccatis eorum*, Matthæi 1. Hinc Bellarminus et plures alii eximiâ in B. Virginem pietate flagrantès adversam opinionem *periculosam, et fidei minùs consonam esse* asserere non dubitaverunt ; sicut error esset B. Virginis meritis, imò et Christi dignitati derogans affirmare Mariam absolutè, et absque speciali Christi gratiâ peccare non potuisse.

Neque obtendas cum nonnullis, qui sese in Mariam piissimè affectos prætendunt, et iustos ipsi debitæ pietatis limites ignorant, semper præhabendam esse opinionem quæ præstantiorem B. Virgini honorem defert. Cum generalem istam præscribunt regulam, ad so-

brietatem non sapiunt. « Eorum, inquit Petavius lib. 14 de Incarnatione cap. 8, Gersonio præeunte, immoderata licentia intra modum sobriæ et robustæ pietatis coercenda est; monendi sunt ut veris contenti solidisque præconiis ficta et commentitia repudiant, suæ in B. Virginem devotioni nimium non indulgeant, absterneant ab hujusmodi regulis, quæ multum abhorrent ab theologiæ, id est, cælestis sapientiæ, gravitate, quam nihil sentire, aut asseverare par est, nisi quodam certam et exactam (Scripturæ et traditionis) regulam sit exactum. » Enimverò, admissâ hujusmodi regulâ, sentiendum foret B. Virginem non debuisse peccatum originale contrahere (nonnulli enim hanc opinionem amplexi sunt)... Christum eidem Virgini plenam et liquidam rerum, quæ utrique eventuræ erant, notitiam impertire debuisse, cum hæc scientia Dei genitricem docere videretur..., Mariam à primo creationis instanti intuitivâ Dei visione donatam fuisse, cum eo privilegio insigniri potuerit, ipsi convenire videretur.... Mariam nunquam somniâsse, aut in omni somno actu Deum per mortalis vitæ curriculum fuisse contemplatam, etc. Quæ omnia aut falsa sunt, aut saltem Scripturâ et traditione probari nequeunt, quod sufficit ut B. Virgini certò affingi non possint. Hinc meritò D. Bernardus epist. 174 dicit: *Valde honoranda est, inquis, Mater Domini* (quæ Christianorum omnium in D. Joannis personâ ab ipso Christo Mater constituta fuit, Joannis 19), *benè admones: sed honor reginæ judicium diligit. Virgo regia falso* (in Scripturâ et traditione non delineato) *non eget honore, veris cumulata honorum titulis, infulis dignitatum.* Non nostro quippe, sed divino arbitrio metienda sunt tum Dei dona, tum quis honor illis respondeat.

PRINCIPIA SOLUTIONUM. — Primum. Non te moveat quòd de purissimo Mariæ conceptu nihil in Scripturâ literalis sensu affulgeat: nihil videlicet offert de Mariæ sanctificatione in utero, nihil de ejus nativitatæ sanctitate, nihil de illius à peccato actuali immunitate, nihil de perpetuâ ipsius Virginitate, quæ tamen fide constant.

Secundum. Sedulò distingue primum Virginitatis conceptum à secundo, id est, formationem corporis Mariæ in Annæ utero ab instanti unionis ejus animæ cum corpore; iste enim, non ille, fuit intemeratus.

Tertium. Si dies sacer et festivus virginitatis conceptus certò attingeret primum instans

infusionis animæ in corpus Mariæ, omnis de hujus conceptus puritate, dubitatio illicò evanesceret.

Quartum. Cuncta ferè sive Scripturæ sive Patrum oracula adversus intemeratum Mariæ conceptum unicâ distinctione culpæ originalis contractionis quoad *actum et debitum* exponuntur et robur amittunt.

Quintum. Quòd purus Mariæ conceptus Scripturæ et plurium etiam Patrum testimoniis niti non videatur, nullum inde ipsi accedit præjudicium. Quot enim sunt dogmata sic se habentia, quæ tamen reapse illis testimoniis non sunt contraria?

Sextum. Nec antiquiorum Patrum traditio communi fidelium sensui, nec communis fidelium sensus antiquiorum Patrum traditioni repugnare potest, et ideò, si uni conformis est purus Virginis conceptus, et alteri erit conformis.

Ultimum. Unicè legitimus B. Virginem honorandi modus est eam honorare modo à Dei verbo præscripto.

ARTICULUS II.

Utrum filii fidelium peccatum originale contrahant?

Hanc quæstionem veluti excitavit singularis Joannis Calvini doctrina. Lib. 4 institutionis cap. 16, sectione 24 et seq., asserit Christianorum liberos, etiam ante Baptismum, novi fœderis esse participes. *Qui, inquit, à Christianis originem ducunt infantes, in fœderis hæreditatem statim ac nati sunt à Deo excipiuntur.*

A Calvini sententiâ multum alienus non est Yprensis, cujus systema super avitæ maculæ naturâ antea delineavimus. Ipso nempe dicente, contingere potest ut aliqui ex Adam naturali generatione sati primigeniâ noxâ non inficiantur, si videlicet *concupiscentiam benè vivendo*, ut loquitur, *exuerint*; è converso potest fieri, ut nonnulli, ex Adam etiam seminaliter non geniti, originali delicto coinquantur, puta si *Deus omnipotentis suæ virtute sine congressu conjugum corrupta utriusque sexus semina misceret*, ut rursus loquitur idem Yprensis; hâc enim in hypothesi vigeret concupiscentia, in quâ juxta Jansenium consistit formale peccati originalis.

CONCLUSIO. — Fidelium liberi vi naturalis suæ ex Adam generationis peccatum originale contrahunt, ut alii, et ideò salutem assequi non possunt, nisi baptizati fuerint.

Ita definiit conc. Trid. sessione 5, canone 4,

ubi Calvinus errorem his verbis perstrinxit : « Si quis parvulos recentes ab uteris matrum baptizandos negat, etiamsi fuerint à baptizatis parentibus orti, aut dicit in remissionem quidem peccatorum eos baptizari, sed nihil ex Adam trahere originalis peccati, quod regenerationis lavacro necesse sit expiari ad vitam æternam consequendam; unde fit consequens, ut in eis forma baptismatis, in remissionem peccatorum, non vera, sed falsa, intelligatur, anathema sit. » Probatur 1^o ex Scripturâ, cujus ante adducta oracula evincunt eos omnes, qui naturali generationis viâ ab Adam oriuntur, originali peccato esse coinquinatos. Apostolus indubiè non minùs disserit de fidelium quàm de infidelium filiis, cum Rom. 5, dicit, *omnes in Adam peccasse*, et ad Ephesios cap. 2 addit : *Eramus et nos naturâ filii iræ sicut et cæteri*; hæc enim verba specialiter tangunt fidelium natos; Paulus videlicet ad Philippenses cap. 3, refert se oriundum esse ex tribu Benjamin. 2^o Ex Patrum suffragio, quod exhibet Bellarminus lib. 4 de Amissione gratiæ et statu peccati, cap. 14. Unus sufficiat Augustinus, lib. de peccato originali cap. 40, n. 45, hæc habet : « Regeneratus non regenerat filios carnis, sed generat... sive reus infidelis, sive absolutus fidelis, non generat absolutos uterque, sed reos. » Hæc dubio procul commentario non indigent. Notum est istud Tertulliani et Hieronymi effatum : *Christiani non nascuntur, sed fiunt*; quod falsum esset si, ut mentiuntur Protestantes, filii fidelium nascerentur sancti et Ecclesiæ membra.

3^o Ex antiquâ et nunquàm interruptâ Ecclesiæ praxi, et communi fidelium sensu. Ad illos sensus Julianum provocat D. Aug. lib. 6, cap. 5, n. 11 : « Verum est, inquit, quod antiquitus veraci fide catholicâ prædicatur, et creditur per Ecclesiam totam, quæ filios fidelium nec exorcizaret, nec exsufflaret, si non eos de potestate tenebrarum, et à principe mortis erueret. » Eadem habet epistolâ 166 ad Hieronymum cap. 7, n. 21, his verbis : « Quisquis ait quòd in Christo vivificabuntur etiam parvuli, qui sine Sacramenti ejus participatione de vitâ exeunt, hic profectò et contra apostolicam prædicationem venit, et totam condemnat Ecclesiam; ubi propterea cum baptizandis parvulis festinatur et curritur, quia sine dubio creditur aliter eos in Christo vivificari omninò non posse. »

Atque ex his abundè refelluntur et cor-

ruunt duæ commemoratæ Yprensii hypotheses. Clamante enim Apostolo, et Augustino ad peccatum originale reipsâ contrahendum requiritur et sufficit naturali generatione ex Adam descendere.

Objicit Calvinus citatis libro et capite : Genesis 17 refertur, Deum cum Abraham et cunctis ejus nepotibus fœdus inivisse, quo hunc patriarcham et omnem ipsius prosapiam sibi semper acceptissimos esse futuros pollicitus est; at filii Christianorum sunt filii Abraham; ergo pertinent ad populum Dei, et ideo aut peccatum originâe non contrahunt, aut saltem illa macula ipsis non imputatur. — Resp. : Dist. min. Filii Christianorum sunt Abraham filii secundum fidem, per baptismum scilicet, in cujus susceptione Abraham et parentum suorum fidem imitari incipiunt, conc. Ante baptismi receptionem, nego min. et consequ. Promissio nimirum Abraham facta, quatenus erat spiritualis, et ad vitam æternam pertinebat, facta fuit Abraham filiis secundum spiritum et fidem, ut passim docet Apostolus; at infantes non fiunt Abraham filii secundum spiritum et fidem nisi per baptismum, sicut apud Judæos non fiebant Abraham liberi secundum spiritum nisi per signum quoddam externum suæ fidei in Messiam venturum, quod baptismi vices gerebat. Hinc D. Aug. lib. 1 de peccatorum meritis et remissione cap. 27, n. 40, exclamabat : « Quis nesciat credere esse infantibus baptizari, non credere non baptizari?... quia ergo de ovibus ejus non esse incipiunt parvuli nisi per baptismum, profectò si hoc non recipiunt peribunt. »

Objicit iterum Calvinus ibidem : 1 ad Corinthios cap. 7, v. 14, *filii* (fidelium) dicuntur *sancti*; unde Rom. cap. 11, v. 16, legitur : *Si radix sancta, et rami*; ergo. — Resp. cum Estio in hæc loca ibi delineari sanctitatem non *formalem* (de quâ solâ est quæstio), sed *præparatoriam* repositam in piâ et sanctâ educatione quâ verisimile erat informandos esse liberos ex sanctis parentibus ortos. Scilicet Apostolus 1 ad Corinthios cap. 7, excitat mulierem fidelem ad non deserendum virum infidelem, et vicissim, duabus ex causis, 1^o, quia *vir infidelis per mulierem fidelem sanctificabitur*, id est, ad veram religionem, sive veri Dei cultum, adducetur, et vice versâ.... 2^o Quia filii jam prognati, cum mulier fidelis virum infidelem deseruerit, *imundi fient*, id est, patris exemplo in idololatriam, et peccata adversus naturam immergentur, à quibus, si illa mulier cum viro re-

manserit, fidem retrahentur, et baptismo sancti fient.... Idem intendit in epist. ad Romanos; in eâ enim probat Judeos gratiæ Dei potiori ratione participes fieri posse quàm gentiles, quia nati sunt ex patribus quibus factæ sunt divinæ promissiones, et qui Deo erant accepti. Scilicet per institutionem plerumque fit, ut posterij majorum suorum religionem et pietatem accipiant et retineant, et ideò congruebat, ut judæicus populus sanctitatem quasi hæreditariam haberet. Igitur Apostolus judæicam gentem *sanctam* vocat, non quòd sanctitatem ratione nativitatis habuerit, sed quòd ex nativitate habuerit unde sanctificaretur, tanquàm rami ex radice, ita ut sancta dici potuerit veluti in quâdam præparatione, quam Scriptura non rarò *sanctificationem* appellat.

PRINCIPIA SOLUTIONUM. — Primum. Sancti filios generant *sanctos dispositivè et præparatoriè*, non *efficienter*, et *formaliter*.

Secundum. Christiani sunt Abrahæ filii non *secundum carnem*, ut Judæi, sed *secundum fidem et spiritum*, quâ eximiâ dote non insigniuntur nisi per baptismum.

Tertium. Ad peccatum originale reipsà contrahendum, secluso speciali Dei privilegio, absolute requiritur et sufficit naturali *seminatione* ab Adam oriri et descendere.

CAPUT V.

De præcipuis peccati originalis effectibus.

EFFECTUS peccati originalis alii ad præsentem, alii ad futuram vitam pertinent.

ARTICULUS PRIMUS.

De pænis peccati originalis in præsentî vitâ.

Coneilium Tridentinum præeunte D. Augustino, et veteribus synodis adversus Pelagianos et Semipelagianos habitis, præsertim Arausicanis, definivit sess. 5, can. 1, *totum Adam per primæ prævaricationis offensam secundum corpus et animam in deterius commutatum fuisse.*

Quomodo stupendæ hujus commutationis in animâ radix fuerit et origo amissio justitiæ originalis, in quâ consistit peccati originalis *formale*, exponere aggreditur D. Thomas 1-2, q. 85, a. 3, hoc venerabilis Bedæ in caput 1 Lucæ dictum, *homo* (per peccatum) *spoliatus est gratuitis, et vulneratus in naturalibus*, suum faciens, rem sic explicat: « Justitia originalis (id est, cum quâ creatus est Adam) subtracta est per peccatum primi parentis, et ideò omnes vires animæ remanent quodammodo destitutæ

proprio ordine, quo naturaliter ordinantur ad virtutem, et ipsa destitutio dicitur vulneratio naturæ. Sunt autem quatuor potentie animæ, quæ possunt esse subjecta virtutum, scilicet ratio, in quâ est prudentia, voluntas, in quâ est justitia, appetitus irascibilis, in quo est fortitudo (unde dicitur quasi *nervus animi* fortitudinem, constantiam ac robur ad res bonæ et suo ordine gerendas subministrans, et datus est ut imperanti rationi tanquàm miles obediat), et concupiscibilis, in quo est temperantia. In quantum ergo ratio destituitur suo ordine ad verum, est vulnus ignorantie; in quantum verò voluntas destituitur ordine ad bonum, est vulnus malitiæ; in quantum verò irascibilis destituitur suo ordine ad arduum, est vulnus infirmitatis; in quantum verò concupiscibilis destituitur ordine ad delectabile moderatum ratione, est vulnus concupiscentiæ. Sic igitur ista quatuor sunt inflicta toti naturæ humanæ ex peccato primi parentis.... ut etiam sint ex peccatis actualibus consequentia; in quantum scilicet per peccatum (actuale) et ratio hebetatur (præcipuè in agendis) et voluntas induratur ad bonum, et major difficultas bonæ agendi accrescit, et concupiscentia magis exardescit. »

Hunc D. Thomæ textum expendens Philippus Gamachæus, eruditus doctor et professor Sorbonicus, illum sic exponit: « Quatuor istis modis natura humana læsa fuit per peccatum (non quidem intrinsecus) vulnere aliquo positivo, sed extrinsecus, quia per prævaricationem Adæ privati sumus donis gratuitis, nobisque quodammodo derelicti. Hinc igitur infirmitas ad laudabiles et arduas actiones; hinc ignorantia ad multa cognoscenda, quæ sine ullo labore in statu innocentie cognita fuissent, quæque ad virtutem spectant; hinc malitia, quatenus voluntas spontè adhæret peccato; denique et concupiscentia satis omnibus nota ex parte inferioris appetitus, qui per justitiam originalem alioqui fuisset in omnibus rationi obediens, nunc autem ei sæpius relucatur. »

Ex hac Gamachæi explanatione illius patroni colligunt 1^o, naturam humanam *extrinsecus* duntaxat fuisse vitiatam. Ipsi scilicet in primâ origine inerat justitia velut forma quædam supernaturalis, quâ perficiebatur in ordine ad Deum; unde illâ formâ per peccatum destructâ corrupta fuit natura humana, id est, spoliata qualitate inherente, per quam ex Dei liberalitate speciali modo ad Deum dirigebatur; sicut si alicui hodiè eandem justitiam infunderet

Deus, et ipse eam suâ culpâ amitteret, corruptus diceretur, hoc est privatus formâ ipsi prius ex Dei munificentia insitâ. Quamobrem homo hujus justitiæ expers sibi derelictus est, id est, in suis naturalibus mansit, et ideò defectibus, sive imperfectionibus ipsius naturæ propriis, obnoxias, qui defectus in eo nunc vulnera dicuntur; quia supposito præsentî rerum ordine in homine non sunt ex conditione naturæ, sed ex Adæ peccato, et ideò habent rationem pœnæ et vindictæ.... 2^o *Malitiam*, quam Adæ peccatum in voluntate produxit, sive per quam, inquit S. Thomas, *voluntas spontè adhaeret peccato*, utpote humanæ naturæ appendicem, non consistere in aliquo actu vel habitu vitioso, sed in privatione felicitis propensionis, quâ hominis voluntas vi originalis justitiæ speciali modo ad Deum ordinabatur, ita ut peccato, quantumvis eam delectaret, spontè non adhereret.

Qui censent Deum posse creare hominem eum iisdem omninò sive animi sive corporis miseriis, quibus in præsentî statu obnoxii sumus, ii lubenter agnoscunt naturam humanam per Adæ peccatum non intrinsecus sed extrinsecus fuisse corruptam; verùm qui existimant Deum non potuisse condere hominem cum miseriis (non quoad speciem quidem) sed *quoad gradum* nostris similibus (quæ sententia, ut supra diximus, videtur fuisse sententia D. Augustini et multorum aliorum Patrum), ii contendunt naturam humanam per primigeniam maculam non extrinsecus tantùm sed etiam intrinsecus vitiatam fuisse.

Præter enumerata animæ mala, quæ subindicavit D. Thomas, et invexit peccatum originale, alia sunt ad corpus pertinentia, quod justitiâ originali ab omni corruptione et læsione eximebatur, et per Adæ noxam non minùs quàm anima in deterius commutatum est. Tales dolores et ærumnæ, talia innumera morborum genera, talis brevis vita, imò ipsorum cervorum et cornicum vitâ brevior, talis continuus mortis timor, talis mors, etc., et alia quibus humanum corpus subjacet. Consuli poterit Scriptura Genesis 2, v. 17, 3, v. 19, Job. 5, v. 7, Rom. 5, etc.

Commemorata mala vulgò à theologis *interna* dicuntur, quia sunt in ipso homine, id est, in animâ et corpore. Alia sunt extra hominem, quæ ideò ab eisdem theologis *externa* vocantur. Scilicet post Adæ peccatum ipse beneficentissimus hominis Conditor ejus inimicus factus est, quem ideò in ipso ortus principio velut *iræ filium* habet.... Diabolus intolerabi-

lem in mortales exercet tyrannidem, quosdam invadit et miserum in modum torquet, omnium mentes ad peccatum diversi generis tentationes suggerendo, et insidias tendendo titillat et allicit, perpetuò *tanquàm leo rugiens circuit querens quem devoret*.... Ipse homo hominis opes et sanguinem sitit, et quorum debuisset esse cor unum et anima una, ii quasi perpetuis à sese invicem dissident odiis, ut *nilhil in terris* (quod olim sapientissimè observavit Diogenes) *frequentius et rarius sit homine*.... Bestiæ terræ, cœli volatilia, pisces maris, etc., quibus Deus hominem præfecit (Genesis 1) regem et dominum non agnoscunt, quin in eum insurgunt, et contempti Dei vindices illum non rarò puniunt, et enecant.... Demùm, cœlum, tellus, mare, tota rerum universitas stare non videtur nisi ad hominem terrendum, affligendum, destruendum, etc.

Hæc omnia mala solidè et eleganter describit D. Aug. lib. 22 de Civitate Dei cap. 22, n. 1 et seq.... Deinde cap. 25 ostendit, concupiscentiam à quâ hâc in vitâ perfectè liberari non possumus, justis, sive iis, qui ipsi non consentiunt, sed per J. C. gratiam viriliter resistunt, labores quidem multos facessere, sed præmiorum ac meritum fontem esse ac originem, quod postea definivit conc. Trid. sess. 5, can. 5..... Denique cap. 24, n. 2 et seq., demonstrat innumerabiles hujus vitæ ærumnas singulari divinæ misericordiæ beneficio inflictas fuisse, ut intelligerent propriâ experientiâ quanto ardore, quanto studio fugiendum esset peccatum tot malorum in præsentî vitâ principium, et graviorum post mortem origo futurum.... Miseriam generis humani, in quâ laudatur justitia punientis, et à divinâ bonitate multis conditam esse bonis; indita nimirum terræ et hominibus fœcunditas post Adæ peccatum remansit; in homine penitus extincta non est quædam velut scintilla rationis, quâ factus est ad imaginem Dei, ut splendide commonstrant tot opera laude digna, quæ sive per se sive cum gratiâ Dei producit, et tot mirabillum rerum inventiones; idem pariter remansit humani corporis situs et conformatio interna. Demùm damnati hominis exilium, id est, aspectabilis iste mundus incredibili refulcet pulchritudine, hominem in admirationem et delectationem suavissimè immergens, vitæ miserias et tædia blandè temperat et solatur, Deique flammeam notitiam et amorem perpetuò instillat, ut S. Augustino duce feliciter et jucundè demonstravit unus ex viris litteratis re-

giæ academiæ Massiliensis in aureo poemate non ita pridem edito, cui gallicè titulus: *Les grandeurs de Dieu dans les merveilles de la nature*. Si hæc D. Augustini et Ecclesiæ catholici documenta attentè et seriò, ut decet, recogitentur et perpendantur, quàm dulcem, quàm amplam dicendi segetem celestis verbi præconibus suggerent! Quàm affluentem, quàm copiosam, subministrabunt ansam miseros mortales solandi, et ab infandorum vitiorum barathro et gurgite ereptos in saluberrima virtutum omnium pascua deducendi! Quàm efficax, quàm nervosum christianæ religionis apologetis et defensoribus ingerent argumentum ad hujus temporis incredulorum adversus miseram mortalium conditionem declamationes sedandas, et querimonias, quibus supremi Numinis justitiæ proterviùs insultant, reprimendas, etc.!

Hucusque recensita præsentis vitæ mala, consentientibus Catholicis, et recentioribus vulgò novatoribus, ex peccato originali scaturiunt. At isti ex eadem maculâ alia dimanare mala obgannierunt. Etenim Calvinus lib. 2 Institutionis cap. 21 (cui vulgò adstipulantur Protestantes), docuit naturam humanam per avitum delictum à propriâ intrinsicâ perfectione hoc sensu excidisse, quòd liberum ejus arbitrium eodem peccato non læsum tantùm fuerit, sed etiam penitus extinctum. Hinc ibidem assertit hominem lapsum liberam non habere boni et mali electionem, et ideò quidquid benè aut malè operatur, illud necessariò, quamvis non coactè, sed spontè, agere; quin naturæ corruptionem tantam esse vult, ut non possit homo, etiam justificatus, non semper peccare; unde in ejus systemate inter prædestinatum et reprobum, sontem et insontem, hoc duntaxat intercedit discrimen, quòd Deus isti non illi peccata imputet; ex quibus colligit ignorantiam invincibilem legis divinæ non excusare à peccato.

Yprensus Protestantium systema quoad substantiam retinuit: docuit enim nullam esse in statu naturæ lapsæ immunitatem à necessitate relativâ, et ideò delectationem celestem, aut terrestrem, prout una prævalet, modò ad bonum, modò ad malum necessariò rapere; quâ ex causâ asseruit ad merendum, aut demerendum in præsentī ordine sufficere *libertatem à coactione*; reprobis tamen gratias temporales à Deo impetiri confessus est, quibus adjuti bona opera eliciunt, et ideò hominem non semper peccare asseruit.

Controversiam de liberò arbitrio ventilabimus in tertio libro de hominē reparato. Quare eam solam, quæ ignorantiam spectat attingemus.

PARAGRAPHUS UNICUS. *Utrum ignorantia invincibilis excuset à peccato?*

ERRORES. — Lutherus in caput 12 Geneseos scholasticis crimini vertit, quòd dixerint, ignorantiam invincibilem à peccato excusare. Hæc sententiâ everti *Scripturam sacram*, et è medio tolli *Christum justitiæ solem*, pro solitâ suâ impudentiâ affirmavit. Subsecutus est Calvinus tum in caput 12 Lucæ, tum lib. 2 Institut. cap. 2, etc., ubi *D. Augustinum suum esse renuntiat*. Acceptam à magistris opinionem fusè pertracavit Hieronymus Zanchius lib. 1, tract. theolog. cap. 12, de ignoratione Dei, thesi 1, et, ut ipsi, de D. Augustini suffragio gloriatus est. *Est*, inquit, *Augustinus Patrum omnium nomine patromus noster in hæc causâ*.

Jansenius Yprensus cæcos illos et impudentes duces sequi operæ pretium duxit indubiè ut suum de libertate naturæ lapsæ propriâ stabiliret, aut corroboraret systema. Lib. 2 de Statu naturæ lapsæ, capiti 2, hunc præfixit titulum: *Ignorantia, etiam quæ necessitatis est, non voluntatis, hoc est invincibilis, non caret peccato, ut dogma fidei ab antiquis traditum*. Initio capitis refert « generale scholasticorum pronuntiatum esse, quòd quidquid ex invincibili fit ignorantia, hoc ipso culpâ vacat. » Ibidem dicit, « hanc doctrinam, quamvis humanæ rationi, quâ nititur, valdè plausibilis esse videatur, cum Augustini doctrinâ difficilè conciliari posse. » In fine capitis 4, concludit, « ignorantiam invincibilem et incavibilem, in quâ nati sumus, nullo modo excusare peccatum, licet ab eo excusasset primum hominem, si Deus eum cum eâ condidisset; » deinde addit: « Hoc si lector capit, gratuletur sibi; si non capit, adhuc difficilius captu et cautu esse cogitet originale peccatum; sed quia utrumque fide facile est, tribuamus utrumque arcanis tremendisquæ judiciis Dei, ne contra res in antiquâ Ecclesiâ certas, quantum judicare licet, argutis humanis disputando, non scientiæ veritatem capiamus, sed ignorantie pœnam augeamus. » Cap. 5, triplicem distinguit ignorantiam insuperabilem *juris naturalis, juris divini positivi, et facti*, sive factorum. Concedit ignorantiam juris divini positivi, et facti, si insuperabilis est, excusare à toto peccato, secus

ignorantiam invincibilem juris naturalis. Hujus disparitatis, sive, ut loquitur, *arcanæ lajus doctrinæ*, radicem indagat cap. 6, eamque pullulare facit ex naturâ illorum jurium et factorum ignorantia, sive potius diversæ scientiæ; *scientia* scilicet, inquit, *juris naturalis humanæ naturæ connaturalis est; scientia verò juris divini positivi, et factorum nullo modo*; id est homo sine lege naturali non potest vitam homine dignam ducere, et ideò sine juris naturalis scientiâ creari nequit; è converso homo vivere potest sine scientiâ factorum, *quæ singularia sunt, et sine fine variari possunt*, aut juris divini positivi, quod à liberâ Dei voluntate pendet, et ideò sine tali scientiâ condi potest.

Igitur ante peccatum ignorantia juris divini positivi, aut factorum, non juris naturalis, potuit existere; cum verò peccatum præcessit, ignorantia ista in poenam delicti potest infligi, sicque voluntaria est in causâ, nec ideò sine tali scientiâ condi potest.

CONCLUSIO. — Ignorantia invincibilis, quæ scilicet, quidquid agatur, expelli non potest, etiam juris naturalis, si detur, ab omni peccato eximit. Cuilibet catholico probata esse debet, præsertim post censuram contradictoriæ sententiæ.

Probatur. 1º, auctoritate D. Augustini, quâ gloriatur Yprensus. Lib. 3 de libero Arbitrio cap. 18, n. 50, ait S. doctor: « Si laboriosum est omnia mandare memoriæ, hoc brevissimum tene: Quæcumque ista causa est voluntatis, si non ei potest resisti sine peccato, ei ceditur: si autem potest, non ei ceditur, et non peccabitur; an tanta fallacia est, ut caveri omnino non possit? Si ita est, nulla peccata sunt; quis enim peccat in eo, quod nullo modo caveri potest? Peccatur autem, caveri igitur potest. » Eodem libro cap. 19, n. 53, hanc objectionem: *Si Adam et Eva peccaverunt, quid nos miseri fecimus, ut cum ignorantia cæcitate... nasceremur*; sic solvit: « Non tibi deputatur ad culpam quod invitus ignoras, sed quòd negligis quærere quod ignoras; » deinde, n. 54, expressè assertit, ea, quæ fiunt ex ignorantia invincibili, esse *peccata* eo modo quo *sermo dicitur lingua*, id est improprie tantum. Libro de verâ religione cap. 14, n. 27, hæc habet: « Usque adeò peccatum voluntarium est malum, ut nullo modo sit peccatum, si non sit voluntarium; et hoc quidem ita manifestum est, ut nulla hinc doctorum paucitas, nulla indoctorum turba dissentiat.... Servos suos meliores esse Deus judicavit, si ei servirent liberaliter (id est libere); quod nullo

modo fieri posset, si non voluntate, sed necessitate servirent. » Idem assertit lib. de duabus animabus cap. 11, n. 13: « Peccatum, inquit, est voluntas retinendi, vel conservandi quod justitia vetat, et unde liberum est abstinere. » Idem adstruit in decursu capituli.

Istorum testimoniorum vim et efficaciam subodoratus Yprensus (quod enim ex insuperabili sit ignorantia nullatenus caveri potest, et nequidem est voluntarium cum ad rationem voluntarii requiratur cognitio intellectus, et ideò non potest esse formale peccatum), horum, inquam, textuum nervoso robore commotus Jansenius tria citato lib. 2 de Statu naturæ lapsæ, cap. 4, reponit. 1º Respondet, humanâ ratione concipi non posse « quomodo homo in eo peccet quod neque scit neque scire potuit, id esse nodum insolubilem, sed tamen ab Augustino et antiquâ Ecclesiâ ut in Scripturis consignatum constanter fuisse traditum; quâ de causâ illud firmissimè credendum est, catholica enim doctrina non Aristotelicis argumentis et argutiis nititur, sed Scripturâ et traditione. » Igitur concedit rationem ab Augustino allatam demonstrare actus ex ignorantia invincibili elicitos non posse esse vera peccata. Undè 2º respondet Augustinum, cum adversus Pelagianos decertavit, sententiam mutasse, et ideò docuisse, ignorantiam invincibilem juris naturalis, quæ in nobis est ex originali peccato, *peccandi necessitatem inducere, etsi nullum sit personalis voluntatis voluntarium*; quæ responsio præterquam quòd D. Augustino injuria est, quem in apertam secum contradictionem præcipitat, manifestis S. doctoris adversus ipsos Pelagianos dictis refellitur.

Libro de naturâ et gratiâ cap. 67, Pelagius Augustino objicit verba supra relata lib. 3 de libero Arbitrio cap. 18. Quid S. doctor? Hoc: *potest peccatum vitari, sed opitulante illo qui non potest fulli*. Ibi ergo existimavit illud verum non esse peccatum quod nullo modo vitari potest. Lib. 1 Retractionum, cap. 9, n. 3, citatum libri 3 de libero Arbitrio locum commemorat, et dicit, se hoc testimonio ita liberi arbitrii existentiam vindicavisse, ut gratiæ necessitatem non excluderet.

In his profectò locis suam adversus Manichæos peccati definitionem emendare debuisset D. Augustinus, si emendandam esse credidisset, et observare ad peccatum, saltem aliquando, voluntarium non requiri; cum ignorantia invincibilis, quæ est poena peccati Adæ, verum

sit peccatum, sive potius actus ex eâ malè elicitus ; de quo tamen siluit.

3^o Reponit, commemoratam D. Augustini peccati definitionem de eo duntaxat peccato, ipso S. doctore interprete, esse intelligendam quod primus parens in paradiso summâ voluntatis libertate perpetravit. Duplex enim peccatum distinguit Augustinus, aliud quod *peccatum est*; aliud quod ita *peccatum est ut sit etiam pœna peccati*. Illud ita est in motu voluntatis, ut ab eo abstinere liberum sit; hoc liberum est eo sensu quòd ex voluntate liberè peccante (Adæ nempe) proficiscatur, sed pœnâ ex iudicio Dei sontem premente et puniente necessarium. Unde ad istud peccatum non requiritur voluntarium et liberum; cum ergo quod ex insuperabili ignorantia juris naturæ committitur sit *peccatum et pœna peccati*, quia hæc ignorantia in pœnam peccati originalis est inflicta, illi non convenit ut sit voluntarium, et possit caveri.

Hæc responsio ex Calvino excerpta est. Calvinus, inquit Bellarminus lib. 5 de Gratia et libero Arbitrio, cap. 27, « ad alterum perflugium se conferens dicit, Augustinum loqui de peccato primi hominis, quod verè non necessitate, sed voluntate commissum est. Id autem probat ex lib. 1 Retractationum cap. 13, et lib. 1 Retractationum cap. 9; » at duo ista testimonia, in gratiam suæ opinionis adducit Jansenius lib. 2 de Statu naturæ lapsæ, cap. 4, etc.

Bellarminus autem ibidem fusè ostendit Calvinum ab Augustini mente alienissimum esse. Etenim 1^o S. doctor nihil antiquius habet in tribus libris de libero arbitrio quàm ut probet hominem post Adæ lapsum libero pollere arbitrio; debuisset igitur in Retractationibus suis in illis libris pronuntiata non explicare, sed abjurare.... 2^o Cum suas libertatis definitiones adversus Manichæos de statu naturæ integræ in Retractationibus, vel operibus contra Pelagianos, intelligendas esse dixit, læsum duntaxat, non extinctum in homine post lapsum liberum arbitrium connotare intendit. Obtrudebant scilicet Pelagiani libertatem, quâ homo post Adæ lapsum erat præditus, eam ipsam esse quâ insignitus erat insons Adam, ad quod evincendum obtendebant D. Augustini assertiones in libris de libero arbitrio. Quid doctor sagacissimus? Adæ libertatem ante lapsum nostrâ pluribus ex titulis fuisse robustiorem; insontis nimirum Adæ libertas nullâ partis inferioris rebellione debilitabatur; aliunde libertas nostra per peccatum vulnerata ten-

tationibus sine speciali Dei adiutorio resistere non potest, quod absque isto auxilio, saltem tam potenti, poterat Adam sano et forti libero arbitrio pollens. Non igitur mirum si Augustinus dixerit suas libertatis definitiones contra Manichæos, secundum totam suam extensionem, soli naturæ integræ ordini competere, cum in eo solo perfecta fuerit hominis libertas..... 3^o Cum lib. 1 Retractationum cap. 13 dixit Augustinus suam definitionem lib. de verâ Religione cap. 14 consignatam commonstrare peccatum quod *tantummodò fuit peccatum* (quale fuit delictum quod Adam et nos in ipso et cum ipso commisimus), non *peccatum quod peccatum est et pœna peccati* (quale est peccatum originale, et peccata ex cupiditate aut ignorantia in præsentistatu facta), cum, inquam, hoc dixit S. doctor, intendit rationem voluntarii et liberi *perfectissimè et plenissimè* non convenire nisi soli primi parentis peccato, quod ideirò *perfectissimè et plenissimè* fuit peccatum; unde peccata ex cupiditate, vel ignorantia orta, et ideò ex Adamico delicto, haud sunt tam voluntaria et libera quàm peccatum primi parentis, quâ ex causâ multò minùs gravia sunt; quæ tamen fiunt ex dominante concupiscentiâ possunt vitari cum Dei auxilio, in quo omnia possumus, et ideò absolutè et simpliciter peccata meritò reputantur. Verùm quæ ex insuperabili ignorantia committuntur, improprie duntaxat sunt voluntaria, id est voluntaria *voluntate facti*, non *voluntate peccati*; qui scilicet ex invincibili ignorantia peccat facit quod facit, sed si sciret esse peccatum nec vellet facere nec faceret; unde sunt improprie tantum peccata.

Hanc Bellarmini solutionem, quam ob oculos habebat Yprensis indubiè non improbavit nisi quia cum suo systemate cohærere non poterat. Etverò noverat Estium, quem sæpiùs impensè commendat, in 2 Sent. distinct. 24, paragrapho 10 et seq. asserere commemorata Augustini loca ad naturam etiam corruptam pertinere.

Probatur 2^o auctoritate Ecclesiæ, *cujus doctrina*, inquit D. Augustinus lib. 6 contra Julianum cap. 5, n. 11, *tenenda est, etiamsi nec ratione indagari, nec sermone explicari possit*. Concilium Trid. sessione 6, can. 6, anathema denuntiat iis qui negaverint *esse in hominis potestate vias suas malas facere*. Ejusdem sessionis cap. 11, præeunte D. Augustino dicit, *Deum impossibilia non jubere*; at, etsi daremus Yprensi, voluntarium sufficere ad peccatum, et ideò id esse liberum quod fit à voluntate cum plenâ

advertentiâ rationis, sive à principio intrinseco cum cognitione, scholasticorum de insuperabili ignorantia pronuntiatum his decretis vindicaretur; quod enim ex eâ ignorantia fit malum esse funditus ignoratur; peccatum ergo esse non potest.

Inter 79, aut octoginta (juxta P. Duchesne) Baii propositiones à Pio V anno 1566, Gregorio XIII anno 1579, Urbano VIII anno 1641 proscriptas, hæc numero 67, vel 68 (apud P. Duchesne) invenitur: *Homo peccat etiam damnaviliter in eo quod necessario facit*; sed quod fit ex ignorantia insuperabili fit necessario; ergo. Ex triginta et una Jansenianorum propositionibus ab Alexandro VIII damnatis anno 1690, hæc numero 1 et 2 sunt proscriptæ. *In statu naturæ lapsæ ad peccatum mortale et demeritum sufficit illa libertas, quâ voluntarium ac liberum fuit in causâ suâ, peccato originali, et voluntate Adami peccantis.*—*Tametsi detur ignorantia invincibilis juris naturæ, hæc in statu naturæ lapsæ operantem ex eâ non excusat à peccato formali, etc.,*

Probatum 5º unanimi doctorum catholicorum consensu. Hoc suffragium, ut diximus, non inficiatur Jansenius, sed Lutheri et Calvinii sententiæ inherens floccifacit. Certè Lutherus hæreticorum omnium impudentissimus in cap. 42 Geneseos dixerat: «Scholastici invincibilem ignorantiam dixerunt excusabilem, quæ simpliciter à toto excuset, id est peccatum prorsus tollat; tanta cæcitas est in papæ scholis et Ecclesiis!»

Ipsius physicæ prædeterminationis patroni, quos Jansenii defensores perperam et incassum sibi arrogare consueverunt, hæreticorum de invincibili ignorantia dogma apertè rejiciunt et irrident. Generaliter dixerat D. Thomas 1-2, q. 76, a. 5, in fine corporis: «Si verò talis sit ignorantia, quæ omninò sit involuntaria (sive quia est invincibilis, sive quia est ejus quod quis scire non tenetur), talis ignorantia omninò excusat à peccato.» Hanc sententiam avidè amplexi sunt insigniores Thomistæ, Dominicus Bannes, Petrus Ledesma, Didacus Alvares, Gregorius Martines, et alii qui uno ore asserunt, certum esse secundum fidem, omne peccatum esse voluntarium, et neminem peccare in eo quod nullo modo vitare potest.

Nihilosecius Jansenii defensores magistro audaciores Guillelmum Estium tot theologorum choro opposuerunt. Etenim, inquit, in 2 Sentent. distinct. 22, paragrapho 15, *expedens quænam juris ignorantia excuset*, annotat,

constare invincibilem ignorantiam facti, aut juris positivi divini vel humani à peccato excusare, sed id non constare de ignorantia juris naturalis; quidam enim (inter quos recenset cardinalem Cajetanum, et ipsum Adrianum VI) existimant *ignorantiam juris naturalis neminem prorsus excusare*, etiamsi invincibilis sit. Scilicet, inquit vir eruditus, «ignorantia facti, vel juris positivi, si invincibilis sit, reddit actum involuntarium quoad rationem peccati; nam qui eum facit nescit eum esse prohibitum; non est autem hujusmodi actus peccatum, nisi quatenus prohibitus est, et ideò si ignorantia quâ ignorat esse prohibitum, sit prorsus involuntaria, erit et actus ipse secundum rationem peccati prorsus involuntarius; at ignorantia juris naturalis nunquam facit actum prorsus involuntarium, etiam quâ ratione peccatum est, quia non facit, ut malum prorsus ignoretur, sed semper permittit ipsum aliquo modo fieri. » Actus nimirum ille non est malus quia prohibitus est, sed potius prohibitus est quia malus est, et ideò qui ignorat actum illum esse prohibitum fertur nihilominus in malum; quod ratiocinium sic illustrare et confirmare aggreditur. «Exempli causâ, inquit, qui mentitur officiosè, putans tale mendacium esse licitum, is quidem nescit tale mendacium pertinere ad genus peccati, ideòque putat non esse peccatum; scit tamen se mentiri, et proinde actum, qui essentialiter malus est, voluntariè committit.»

Porrò ex his, inquit Yprensii sectatores, evidenter colligitur ignorantiam, etiam insuperabilem juris naturæ, à peccato non excusare, et meritò prorsus Jansenium hanc virtutem inseruisse invincibili ignorantie juris positivi, et factorum, non juris naturalis; ergo. — Resp. 1º, Jansenii defensores sese hic magistro industriores et sagaciores ostentare; Yprensii enim, qui Estium, ubi sibi favet, laudare solet, hunc theologum hæc in controversiâ non adduxit, indubiè quia ejus doctrinam suæ causæ patrocinari non censuit; in quo eruditionis suæ specimen exhibuit. Etenim Estius in 2 Sent. distinct. 24, paragrapho decimo, celebre Augustini adversus Manichæos effatum, *quidquid non est voluntarium et liberum non potest esse verum peccatum*, naturam etiam corruptam spectare asserit, ut observavimus, quod suum de ignorantia invincibili systema evertere credidit Jansenius, ut iterum diximus. Item Estius quæ dixit loco objecto de ignorantia invincibili juris naturæ non minùs de ia-

turâ integrâ quàm de vitiâ intelliigi voluit; quam enim ibidem affert ratio utramque naturam pariter spectat, ut ad eam vel tantisper attendenti illicò videbitur; è converso et Yprensis, et omnes ejus discipuli ignorantiam invincibilem juris naturalis nonnisi in naturâ corruptâ à peccato non excusare contendunt. Item Estius loco proposito suam de invincibili ignorantia legis naturalis sententiam non ut certam, sed velut problematicam representat, siquidem varias super hoc opiniones refert; è converso et Jansenius et cuncti ejus patroni suam de eâdem ignorantia opinionem velut dogma fidei ab antiquâ Ecclesiâ traditum traducunt, etc. — Resp. 2^o, ex adductâ Estii argumentatione manifestum fieri ipsum censuisse actum in se prorsus involuntarium, id est actum qui propriâ voluntate non est volitus, non posse esse verum peccatum (personale nempe de quo solo hic est quaestio); quæ sententia prorsus adversatur systemati Jansenii et ejus sectatorum, qui contendunt in presenti statu ad verum peccatum sufficere ut actus non propriâ voluntate, sed alienâ, Adami scilicet, sit volitus; unde in eo duntaxat deceptus fuit vir eximius (si de ignorantia omninò insuperabili juris naturæ disseruit), quod in transgressione legis naturalis *voluntatem peccati cum voluntate facti* necessariò conjunctam esse crediderit, id est quod existimaverit materialem juris naturæ violationem semper importare voluntatem ponendi actum prohibitum; qui quidem facti error excusatione dignus est in viro cui explorata non erant decreta Sedis apostolicæ adversus Baium, in primis citata definitio Alexandri VIII anni 1690.

Quod attinet ad Adrianum VI, et Cajetanum, quos Estius laudat, Jansenii sententiæ nullatenus favent. Ille enim (quodlibeto 4) expressè asserit, *ignorantiam legis naturæ, si sit invincibilis, omninò excusare à peccato*; iste in 1-2, q. 76, a. 3 et 4, probat D. Thomæ de ignorantia insuperabili doctrinam Yprensis systemati, ut ostendimus, omninò adversam. Cæterum, super his consuli poterit Stephanus Deschamps de hæresi Jansenianâ, lib. 2, disp. 5, cap. 6.

Probatur 4^o, ratione quæ plura nobis suggerit argumenta adversus Jansenium. Etenim 1^o, dicente Augustino libro de verâ Religione cap. 14, totus orbis hoc resonat effato, *quod non est voluntarium verum peccatum esse non potest*; at quod ex insuperabili ignorantia fit nul-

latus est voluntarium; nam totus iterum orbis per *voluntarium* id intelligit quod fit à principio cognoscente actum bonum aut malum esse, quæ cognitio conjungi nequit cum invincibili ignorantia. 2^o Si quod fit ex insuperabili legis naturæ ignorantia, quamvis in se involuntarium, est verum peccatum, quia voluntarium est in causâ, id est in Adæ peccato, ut placet adversariis, homo poterit in iis versari circumstantiis, in quibus, quidquid molitur, necessariò peccabit, vel de commisso peccato non poterit dolere, aut propositum de non peccando in posterum non elicere; at ista absurda, divinæ bonitati et justitiæ contraria sunt, et divinis cohortationibus, quibus in sacris Commentariis fontes ad meliorem frugem invitat Deus, apertè repugnant; ergo. Probatur major. Sit homo qui invincibiliter credat sibi præceptum esse furari, aut mentiri ad egeno asservandam vitam, aut parenti vitæ in discrimine constituto subveniendum. Hæc hypothesis in principiis Jansenii non repugnat; at iste homo, quidquid agat, peccabit, sive furetur, aut mentiatur, sive non; si enim furatur, aut mentitur, peccabit adversus legem naturæ, cujus insuperabilis ignorantia non excusat à peccato; si non furatur, aut non mentitur, aget contra conscientiam invincibiliter errantem, quam tunc audire et sequi præcipit lex naturæ. Jam verò, quomodò iste homo, si furatus fuerit, de peccato contra legem naturæ commisso dolere poterit? Dolor enim, ut hic sumitur, est detestatio malitiæ et perversæ voluntatis; non fuit autem in isto homine malitia et perversa voluntas, sicut nec in eo qui præceptum violat positivum ex invincibili illius ignorantia; quomodò eliciet propositum non peccandi de cætero? cùm in ipsius potestate non sit postea non agendi ex insuperabili legis naturæ ignorantia. 3^o Palmare adversariorum principium fert, invincibilem juris naturæ ignorantiam ideò non excusare à peccato quia est *pœna peccati originalis*; si ergo insuperabilis juris positivi ignorantia, v. g., legis evangelicæ, sit etiam pœna peccati originalis, à peccato non magis excusare poterit quàm ignorantia invincibilis juris naturæ; utraque enim ex hypothesis æquè libera erit in Adamo; at invincibilis juris positivi ignorantia est pœna peccati originalis; « Si, inquit D. Thomas 2-2, q. 10, a. 1, in c., infidelitas accipiat secundum negationem puram, sicut in illis qui nihil audierunt de fide, non habet rationem peccati, sed

magis pœnæ, quia talis ignorantio divinorum ex peccato primi parentis consecuta est; unde Dominus dicit (Joannis cap. 15) : *Si non venissem, et locutus eis non fuisset, peccatum non haberent* (infidelitatis in Christum); *nunc autem excusationem non habent de peccato suo.* » Hoc Christi oraculum expendens D. Augustinus tractatu 89 in Joannem n. 1 et seq. docet, Judæos peccatum infidelitatis in Christum habituros non fuisse si non venisset Christus, et *infideles negativos*, qui scilicet nihil unquam audierunt de Evangelio, *habere excusationem non de omni peccato suo, sed de hoc peccato, quo in Christum non crediderunt.*

Obijcit 1^o Jansenius lib. 2 de Statu naturæ lapsæ, cap. 2 : D. Augustinus libro de gestis Pelagii, cap. 18, n. 42, refert in synodo Palæstinâ damnatam fuisse hanc Pelagianorum propositionem excerptam ex septimo Cœlestii capitulo : « Oblivio et ignorantia non subjacent peccato, quoniam non secundum voluntatem eveniunt, sed secundum necessitatem. » At synodus Pelagianorum propositionem intellexit de solâ ignorantia juris naturæ, quæ erat invincibilis, utpote quæ non secundum voluntatem, sed secundum necessitatem esset; ergo. — Resp. : Nego minorem. Si Yprensus quæ ibidem post commemorata verba immèdiatè addit Augustinus proferre voluisset, evanisset difficultas; « cum, inquit S. doctor rationem censure adducens, David dicat (Psalmo 24) : *Delicta juventutis meæ, et ignorantias meas ne memineris*; et in lege (Levitici 4) sacrificia pro ignorantia sicut pro peccato offerantur; » at certum est ignorantia peccatum, pro quo sacrificium in Levitico præcipitur, esse ignorantiam juris positivi. Etenim cap. 5 sacrificium imperatur pro homine qui aliquid immundum tangit per ignorantiam : et cap. 22, pro homine qui de sanctificatis per ignorantiam comedit. Pariter textus Davidis potest intelligi de peccatis quæ David sciens et volens commisit, ac deinde oblitus est, id est de peccatis ex ignorantia vincibili factis. Constat etiam SS. Hieronymum et Augustinum alibi adversus Pelagianos synodi Palæstinæ censuram defendendo adduxisse exempla tum juris positivi cum factorum; v. g., Jonathæ qui lib. 1 Regum cap. 4, mel contra patris imperium ignorans gustavit, et viri qui occidit hominem putans esse feram. Synodus igitur Palæstina Cœlestinianam assertionem de ignorantia etiam juris positivi et factorum intellexit. Præterea damnata Pelagianorum propo-

sitio non disserit de iis quæ fiunt ex oblivione et ignorantia, sed de oblivione et ignorantia. Unde synodus edixit tantum, oblivionem et ignorantiam, quam inviti patimur, *subjacere peccato*, id est esse ex peccato, sive ponam peccati, quomodo concupiscentia dicitur ab Apostolo peccatum.

Verum, arguit Yprensus ibidem, Pelagiani fatebantur, ignorantiam, quæ ex voluntatis negligentia nascitur, esse culpabilem; cum igitur dicebant, *ignorantiam non subjacere peccato*, loquebantur de ignorantia invincibili; ergo synodus definiit ignorantiam invincibilem *subjacere peccato*, alioqui Pelagianorum propositionem sensu ab eis intento non damnasset. — Resp. 1^o Jansenium fortè non attendisse hoc ratiocinium nimis probare; probaret enim ipsam invincibilem juris positivi, aut facti ignorantiam non excusare à peccato. — Resp. 2^o Pelagianos, etsi, D. Hieronymo epistolâ ad Ctesiphontem referente, *quid sentirent apertè non dicerent*, et ideò difficillimum sit eorum sensu certò figere, videri tamen duplicem habuisse opinionem circa ignorantiam; etenim D. Augustinus passim asserit, eos *sensisse difficultatem et ignorantiam esse primordia, non supplicia naturæ*; quem errorem ut eliminaret synodus Palæstina, definiit *ignorantiam subjacere peccato*, id est, ut diximus, in nostro statu Adæ peccati esse effectum... Item videntur existimasse ea, quæ fiunt ex ignorantia, quam homo olim potuit et debuit vincere, sed quam eo instanti, quo agit, vincere non potest, non esse peccata, quia *illa eveniunt non secundum voluntatem* (actualement nempè), sed *secundum necessitatem*; hunc iterum errorem proscribere potuit definiendo, ea, quæ ex tali ignorantia fiunt, esse peccata, quia illa ignorantia vinci potuit, et quam includit necessitas non antecedens, sed consequens est.

At reluctatur Yprensus ibidem. Augustinus, inquit, lib. de Naturâ et Gratiâ cap. 17, n. 19, hæc Pelagii verba refert : « Homo prævigilare debet ne ignoret, ideòque est culpanda ignorantia, quâ id homo nescit negligentia suâ, quod adhibitâ diligentia scire debuisset. » Item S. doctor lib. 6 contra Julianum cap. 1, n. 2, Julianum sic affatur : *Ecce meritò reprehendisti eos qui supersederunt scienda cognoscere*; sed hæc evincunt Pelagianos docuisse ignorantiam vincibilem non esse culpæ expertem; cum ergo synodus Palæstina, et S. Augustinus de eorum ignorantia opinionem damnaverunt, ignorantiam invincibilem peccato subjacere

asseruerunt.—Resp. 1^o ut supra, argumentum probare insuperabilem ipsam juris positivi, aut factorum ignorantiam non excusare à peccato, et ideò Jansenio esse solvendum. — Resp. 2^o, facile contingere potuisse, ut Pelagiani pro hæreticorum more revocaverint quod antea asseruerant; quòd si Yprensis pertinaciter contenderit eos constanter docuisse ignorantiam vincibilem peccato subiacere, multum non repugnabimus; verum reponemus Pelagianos hoc uno nomine damnatos fuisse à synodo et S. Augustino quòd assererent ignorantiam in nostro statu non arguere peccatum primi parentis, sive vitiatam naturam. Etverò, in objectis locis relatis Pelagii et Juliani verbis statim concludit, ignorantiam ostendere humanam originem vitiatam, massam damnatam, etc.

Obijcit 2^o Jansenius eodem libro cap. 3 diversa Augustini testimonia. Enarratione in Psalmum 35, n. 3 et seq., eos qui dolose quærent iniquitatem suam ab iis qui illam sincerè scrutantur hanc regulà discerni vult: « Cum viderit, quia peccatum est, et destiterit facere ipsum peccatum, quod ideò faciebat, quia ignorabat, verè sic voluit nòsse iniquitatem, ut inveniret, et odisset; » ergo quis ex ignorantia peccare potest. — Resp. 1^o textum istum ipsi Jansenio esse explicandum; in eo scilicet nulla prorsus occurrit mentio juris naturalis; generalis est, et ideò ipsis factis et juri positivo convenit. Enimverò applicari potest Abimelech, qui Genes. 20 dicitur peccasse quando ex ignorantia Saram Abrahamæ uxorem ducere statuit, et errore cognito eam statim remisit. 2^o Dist. conseq.: Ergo quis ex ignorantia peccare potest improprie, sive *materialiter*, ut aiunt, conc. *Formaliter*, subd.: Si ignorantia sit vincibilis, conc. Si sit invincibilis, nego conseq. Augustinum ibi disserere vel de peccato duntaxat materiali, sive de actione contra legem factà, vel de ignorantia vincibili demonstrat contextus. Ibi enim delineat hominem, qui potest *querere iniquitatem suam, et timet illam invenire*; aliunde adducit illud Psalmi 24: *Delicta juventutis mee, et ignorantias meas ne memineris*. Epistola 194, aliàs 105, n. 26, legitur: « Humana superbia tanquam præsumens de viribus liberi arbitrii excusata se putat, quando ignorantie, non voluntatis videtur esse quòd peccat..... » N. 27: « Inexcusabilis est omnis peccator, vel reatu originis, vel additamento etiam propriæ voluntatis, sive qui novit, sive qui ignorat, sive qui iudicat, sive qui non iudicat, quia et ipsa ignorantia in eis, qui intelligere noluerunt,

sine dubitatione peccatum est, in eis autem, qui non potuerunt, pœna peccati; ergo in utrisque non est justa excusatio, sed justa damnatio. » Ibi sermo de ignorantia sive vincibili, sive invincibili. Asserit autem S. doctor *inexcusabilem e-se omnem peccatorem, sive peccaverit quia noluit scire quod lex jubebat, sive quia scire non potuit*, quod de Gentilibus Dei lege et cognitione, et ideò orationis etiam subsidio, destitutis, præcipuè intelligit. — Resp. ex contextu manifestum esse Augustinum Evangelii ignorantiam ventilare; numero enim 26 hoc Christi oraculum adducit Joannis cap. 15: *Si non venissem, et locutus fuisset eis, peccatum non haberent: nunc autem excusationem non habent de peccato suo*: quo adducto observat verba, *peccatum non habent*, non significare Judæos nullum habuisse peccatum (pleni enim, inquit, erant magnis et multis peccatis) sed, si non venisset Christus, *non habituros fuisse peccatum*, quo, cum audissent eum, non crediderunt in eum. Disserit ergo S. doctor de infidelitatis peccato. Igitur quando, postquam dixit Judæos de illo peccato excusationem non habere, immediatè addit: *Humana quippe superbia, etc.*, et hæc conjungit per particulam *quippe*, loqui pergit de ignorantia legis evangelicæ, sive potius ostendere vult, ignorantiam vincibilem, qualis fuit in Judæis circa Christi Divinitatem, eos excusare non posse. Equidem n. 27 dicit inexcusabiles esse infideles qui non audierunt legem evangelicam. Verum quid his intendit? Ignorantiam legis evangelicæ ipsis in peccatum esse imputandam? Minimè profectò; si enim imputata non fuisset Judæis, certè nec Gentilibus. Quid ergo intendit? Refellere Pelagianos, qui contendeant infideles esse excusandos ab omnibus illis peccatis, quæ non commisissent si evangelicà doctrinà non fuissent imbuti, quia, inquebant, quòd *peccent non audito Evangelio ignorantie est, non voluntatis*; hoc autem systema evertit Augustinus ostendendo illos infideles excusandos quidem esse à peccato infidelitatis in Christum, si de eo nihil audierunt, sed nihilosecius jure esse damnandos, aut propter reatum originis, aut propter peccata proprià voluntate addita, quamvis ea non commisissent, si Evangelium ipsis fuisset annuntiatum. Ignorantia nimirum legis evangelicæ eos excusare non potest; vel enim potuerunt hanc legem intelligere, et noluerunt, et tunc illius ignorantia in eis verum est peccatum; vel non potuerunt eam cognoscere, quia non audierunt, et tunc illius ignorantia est pœna peccati propter

quod justè damnantur; ergo, sive potuerint intelligere Evangelium, sive non potuerint, justè damnantur.

Libro de Gratia et libero Arbitrio, cap. 5, n. 5, habetur: « Gravius peccat homo legi nesciens, quàm nesciens; nec tamen ideò confugiendum est ad ignorantia tenebras ut in eis quisque requirat excusationem; aliud enim est nescisse, aliud scire noluisse: voluntas quippe in eo arguitur, de quo dicitur, noluit intelligere ut bene ageret: sed et illa ignorantia, quæ non est eorum, qui scire nolunt, sed eorum qui tanquàm simpliciter nesciunt, neminem sic excusat, ut sempiterno igne non ardeat, si propterea non credidit, quia non audit omnino quid crederet, sed fortassè ut mitius ardeat; non enim sine causâ dictum est: *Effunde iram in gentes, quæ te non noverunt* (Psalm. 78), et illud quod ait Apostolus (epist. 9 ad Thessalonicenses cap. 1.): *Cum venerit in flammâ ignis dare vindictam in eos qui ignorant Deum.* » Ex his elucet juxta D. Augustinum *simplicem nescientiam*, id est ignorantiam, quæ voluntatem conjunctam non habet, esse peccatum, siquidem non impedit quominus aliquis *sempiterno igne ardeat*; ergo. — Resp., Jansenio rursus solvendum esse istud pronuntiatum: in eo enim D. Aug. verba facit de ignorantia juris divini positivi. Id quippe demonstrant verba, *si propterea non credidit, quia non audit omnino quid crederet*; demonstrant adducti Scripturæ textus; gentes enim Deum ignorant, quia fide destitutæ non cognoscunt Deum quomodò vult ab hominibus cognosci. Porro Augustinus evidenter loquitur de infidelibus qui aliquid de evangelicâ lege audierunt, quam ideò invincibiliter omnino non ignorant, unde ait: *Qui tanquàm simpliciter nesciunt*, et eos distinguit ab illis qui *scire nolunt cum possunt*; docet autem tales infideles ignorantia, seu *nescientia suâ*, non sic excusandos esse, *ut non ardeant, sed fortassè ut mitius ardeant*; ubi adverbium, *fortassè*, ostendit Augustinum à Janseniano systemate fuisse maxime alienum; demonstrat enim ipsum dubitasse de eorum sorte qui evangelicam legem omnino invincibiliter non ignoraverunt. Etverò, si Augustinus de simpliciter invincibili ignorantia fuisset locutus, duas particulas, sive adverbia, *tanquàm, fortassis*, non adhibuisset.

Epistolâ 47, n. 4, aliàs 154, hæc reperitur: « Si quis bonum putaverit esse, quod malum est, et fecerit, hoc putando utique peccat, et ea sunt omnia peccata ignorantia

quando quisque bene fieri putat, quod malè fit. » *Ibi*, inquit Jansenius in fine tertii capitis, *generalis et decisiva sententia de ignorantia, quod nempe non excusat à peccato.* — Resp. Augustinum, ut ex solâ lectione cognoscitur, loqui de esu carnum idolis immolarum, et ideò de ignorantia vincibili. Etverò fatetur Jansenius ibi agi de *homine de rei bonitate ac malitiâ dubitante*, quod demonstrant verba, *putaverit, putando*, quibus utitur Augustinus; putare enim est cum oppositi formidine credere. Præterea, in Jansenii etiam systemate non potuit Augustinus *generalem et decisivam de ignorantia, quod nempe à peccato non excuset, ferre sententiam*, cum ignorantia invincibilis juris positivi et factorum non sit culpabilis.

Objiciunt ultimò Jansenii discipuli. Si insuperabilis juris naturæ ignorantia excuset à peccato, dabitur peccatum philosophicum; absurdum consequens; ergo. — Resp.: Nego majorem. Peccatum scilicet philosophicum est peccatum propriè dictum contra conscientiam factum, ideò *philosophicum* dictum, quia licet conscientia et rationis dictamini adversetur, Deum tamen non offendit; at si invincibilis juris naturæ ignorantia à peccato excusat, actus qui ex insuperabili ignorantia fit contra legem naturalem, non est verum peccatum; ergo non est peccatum philosophicum, quod, ut diximus, propriè dictum est peccatum, cum fiat contra conscientiam. Etverò fatentur adversarii actionem, quæ fit ex ignorantia invincibili contra legem divinam positivam, Deum non offendere, nec peccatum esse philosophicum, quia non est verè peccatum; ergo à parî actio, quæ ex eadem ignorantia fiet contra legem naturalem, Deum non offendet, nec erit peccatum philosophicum, quia non potest esse propriè dictum peccatum. Quamobrem actus, qui ex invincibili ignorantia elicitur contra æternam legem, *materialiter*, non *formaliter* militat adversus illam legem: lex enim æterna per se et immediatè non obligat, sed mediante duntaxat conscientia, per quam homini promulgatur; unde D. Thomas docet legem æternam esse remotam actuum humanorum regulam, proximam verò eorundem actuum regulam, esse conscientiam, quam idcirco agens consulere debet; at evidens est actionem, quæ ex ignorantia invincibili fit contra legem æternam et naturalem, non esse contra conscientiam, imò fieri juxta conscientiam, cum tunc dictet conscientia legem æternam nihil præcipere aut vetare; ergo illa actio, etsi

legi naturali et aeternae repugnet *materialiter*, sive ratione sui praecise, tamen ei non repugnat *formaliter*, et ideo non est verè et propriè peccatum, nec proinde peccatum philosophicum.

Verùm, inquit, supponamus Deum ab aliquo invincibiliter ignorari. Iste agendo contra conscientiam Deum non offendet, et tamen verum committet peccatum; ergo in nostris principiis dabitur peccatum philosophicum. — Resp. fieri non posse ut Deus ab homine rationis compote invincibiliter ignoretur; sua scilicet existentia et aliarum rerum, Entis supremi extantiam ipsi necessariò instillat. Verùm, esto, Deus ab aliquo sic ignorari possit, actio, quam contra conscientiam eliciet, vera erit Dei offensa, quia invincibilis Dei ignorantia in isto agente non impedit quominus Deus puniat, aut detestetur actionem contra conscientiam elicitam, sive quominus Deus necessariò vetet agere contra conscientiam; unde Deus in talem hominem iram suam meritò effundere potest; quanquàm nondum definitum est in hac hypothesi non dari peccatum philosophicum.

PRINCIPIA SOLUTIONUM. — Primum. Ut Jansenius et ejus sectatores suum de invincibili ignorantia systema stabiliant, tria ostendere debent. 1° Textum, quem assumunt, respicere ignorantiam juris naturalis.... 2° Eundem textum arguere ignorantiam invincibilem... 3° Textum exprimere peccatum formale. Si vel unum ex istis tribus defecerit, inane prorsus et plumbeum erit eorum argumentum.

Secundum. Memoratum Yprensis super ignorantia systema secum non cohaerere videtur, et virum alti consilii, et ratiocinii non decere; quidquid enim proponit ut illud confirmet, in ipsum retorqueri potest, siquidem concedit ignorantiam invincibilem juris positivi, et factorum excusare à peccato.

Tertium. Omnia ferè testimonia quae adversus catholicam sententiam hic objici possunt, aut ignorantiam vincibilem tangunt, aut unicè significant ignorantiam invincibilem esse peccatum *effectivè*, id est pœnam seu effectum peccati, non formaliter.

Quartum. Prae oculis habe singulare Pelagianorum super ignorantia systema, ut argumenta, ex D. Augustino praesertim, adversus nostram sententiam desumpta in fumos abeant.

ARTICULUS SEUNDUS.

De effectibus peccati originalis in futurà vità.

Præcipua, quæ sese hic offert questio et

difficultas spectat parvulos sine baptismo ex mortali vità, et ideo cum solo peccati originalis reatu, migrantes, utrum nempe aliquo afficiantur supplicio, et quodnam illud sit. Quid in celeberrimà istà quæstione certum sit primum exhibebimus; quid in eà problematis sit postea assignaturi.

§ 1. *Errores circa parvulorum absque baptismo perentiam sortem referuntur, et exploduntur.*

Primus error commemoratos parvulos, peccato licet originali coinquinatos, regni cœlorum cum sanctis participes fecit. Ita olim, referente D. Augustino lib. 1 de Animà et ejus Origine cap. 9, n. 10, visum fuit cuidam Vincentio, quem ibidem refellit S. doctor, et lib. 3, cap. 9, n. 12, ubi ait: *Noli hoc credere, nec dicere, nec docere, si vis esse Catholicus.* Eundem errorem 16 seculo recoxit inter Protestantes Zuinglius, et respectu fidelium Calvinus ut articulo præcedente diximus.

Ad istum errorem revocari debet, aut saltem revocari potest, singulare Pelagii systema, qui, D. Augustino teste, illis parvulis non equidem *regnum cœlorum* concedebat (Christi verbis Joannis cap. 3, *nisi quis renatus fuerit* etc., indubiè perterritus) sed tamen *aeternam et beatam vitam* promittebat. Etenim in Scripturis, et quidem in ipso capite tertio Joannis, regnum cœlorum et vita aeterna idem sonant. Christus quippe v. 16 *regnum cœlorum aeternam vitam* nuncupat: *ut, inquit, omnis, qui credit in illum, non pereat, sed habeat vitam aeternam.* Quare hæc distinctio miserum fuit delirantis hæreseos effugium.

Ab isto errore multum discrepare non videtur Ambrosii Catharini in libro de *Statu puerorum sine baptismo decedentium*, et quorundam aliorum systema, quod ineunte præsentī seculo amplexus est, et illustrare conatus est in *suo Nodo prædestinationis dissoluto* cardinalis Sfondratus ob id à cardinali Noallio, et quinque Galliarum episcopis Innocentio XII denuntiatus. Isti nempe docuerunt commemoratos infantes supernaturali quidem privandos esse beatitudine, id est intuitivà Dei visione, sed naturali tamen felicitate esse donandos, saltem post extremum judicium, et eos in quodam velut paradiso terrestri perpetuò et feliciter victuros esse, virtutibus moralibus instructos, imò Angelorum consortio et revelationibus honoratos, etc. Hoc, inquam, systema proximè accedere videtur ad errorem Pelagianorum; etsi enim difficillimum est determinare quid Pelagiani intelligerent per vitam aeternam,

quam parvulis extra regnum cœlorum concedebant, ex D. Augustino tamen non obscure colligi potest. Etenim lib. 5 contra Julianum cap. 11, n. 44, dicit à Pelagianis *infantes alienatos fuisse à vitâ Dei, et regno Dei*. At vitâ Dei et visio Dei unum et idem sunt; ergo ipsis promittebant beatitudinem ab intuitivâ Dei visione distinctam, quæ alia esse non potuit quàm beatitudo naturalis. Unde in lib. de Hæresibus refert Pelagianos non æternam vitam simpliciter, sed *quandam æternam vitam* infantibus non baptizatis pollicitos fuisse. Sit igitur.

CONCLUSIO. — Parvuli sine baptismo pereuntes omni beatitudine, sive supernaturali, sive etiam naturali privantur. Est de fide quoad primam partem, et quoad secundam ad fidem proximè saltem accedere videtur.

Probatur prima pars assertionis, id est infantes absque baptismo pereuntes omni beatitudine supernaturali privandos esse. Christus Joannis cap. 5 clamat: *Nisi quis renatus fuerit ex aquâ et Spiritu sancto non potest introire in regnum Dei...* Apocalypsis cap. 21 dicitur: *Nihil coinquinatum in civitatem sanctam*, id est in regnum cœlorum, *intrabit*, etc. At supernaturalis beatitudo æterna, et regnum cœlorum in Scripturis, ubi de præmio et felicitate post hanc vitam res est, idem omninò significant, ut diximus... Item Patres infra referendi commemoratos parvulos non solum felicitate supernaturali destituunt, sed etiam in infernum amandant et detrudunt... Hinc synodus Florentina in decreto unionis Latinorum et Græcorum anno 1459, canone 4, definivit, *eorum animas, qui in actuali mortali peccato, vel solo originali, decedunt, mox in infernum descendere, pœnis tamen disparibus puniendas*.

Probatur secunda conclusionis pars, sive parvulos sine baptismo intereuntes nullâ beatitudine, etiam naturali, potiri; probatur, inquam, ex Scripturis docentibus, eos, qui naturali generatione ex Adam oriuntur, quamdiu baptizati non sunt, esse *filios iræ*, esse *in condemnatione*, *in morte*, nullam aliam esse beatitudinem in præsentī statu præter eam quæ consistit in clarâ Dei visione, etc... Ex exsufflationibus, exorcismis, precibus in solemnī baptismi administratione ab Ecclesiâ semper adhibitis, ut parvulos à diaboli potestate erueret, etc... Ex Patribus dicentibus, parvulos sine baptismo morientes *perire*, *damnari*, *in infernum descendere*, *nullum misericordiæ locum invenire*, cum tempus mortem subsequens sit iustitiæ, non indulgentiæ tempus, etc. At ex his

manifestum est præfatos infantes naturali beatitudine non donari, etiam post generalis iudicii diem, ut somniavit Catharinus; ergo. Certè pudere debuisset viros catholicos illud recedere systema, quod in Pelagianis universa execrata est Ecclesia. « Novellus, inquit D. Augustinus lib. 2 de Animâ et ejus origine, cap. 12, n. 17, hæreticos Pelagianos justissimè conciliorum catholicorum, et sedis apostolicæ damnavit auctoritatis, eò quòd ausi fuerint non baptizatis parvulis dare quietis et salutis locum, etiam præter regnum cœlorum. »

§ 2. *Opiniones de sorte parvulorum sine baptismo morientium adducuntur, et una eligitur.*

Tres de sorte commemoratorum infantium Scholasticorum sententias recenset Bellarminus lib. 6 de Amissione gratiæ et statu peccati, cap. 1.

Prima parvulos cum solo originali peccato è vitâ migrantes nulli ex damnatione, sive cœlestis gloriæ privatione, dolori sive interno sive externo subicit. Ita D. Thomas in 2 Sentent. distinct. 35, a. 4, ubi in fine corporis ait: « Parvuli sine baptismo decedentes pœnâ sensibili non puniuntur, sed solâ carentiâ visionis divinæ; » idem docuit q. 5 de malo a. 2 et 3. Ita D. Bonaventura et alii plures è scholasticis.

Secunda eosdem infantes igneam combustionem experiri negat; eos tamen interno quodam dolore ex amissione cœlestis beatitudinis, quæ est pœna damni, torqueri asserit. Ita Petrus Lombardus lib. 2 Sent. distinct. 35, litterâ E, et alii, quibus adhaesit Bellarminus loco citato cap. 6.

Tertia eosdem parvulos flammeâ concrematione, mitissimâ licet, cruciari docet. Ita celebris nominis auctores, Gregorius Ariminensis in 2 Sent. distinct. 35, q. 5; Joannes Driedo lib. 1 de Gratiâ et libero Arbitrio, tract. 5, cap. 2; Sylvius in 1-2, q. 85, a. 6; Dionysius Petavius, lib. 9 de Deo et ejus Attributis, qui est de prædestinatione cap. 10, n. 10 et seq.; Henricus Norisius in Vindiciis cap. 3, paragrapho 5, etc. Eadem sententiâ multis ex Protestantibus arridet. Jansenius etiam et eruditi illius sectatores, inter quos auctor tractatus de Statu parvulorum sine baptismo decedentium, qui reperitur ad calcem Augustini Ypensis, eandem opinionem (quam ut dogma catholicum habent), totis ulnis amplexi sunt. Illa nimirum sententiâ ipsis perquam idonea visa est ad stabilendum palmare principium, quo obtrudunt, libertatem ad merendum aut demerendum in

statu naturæ lapsæ requisitam, stare cum necessitate relativâ ad bonum aut malum, et ideo aliquem posse à Deo justo æternis addici flammis propter peccatum à quo (propriâ voluntate) abstinere non potuit.

His opinionibus alia adjungi posset, in quam olim propenderamus, quia imprimis nonnullis Augustini testimoniis innixa videtur, ea scilicet quæ prædictorum parvulorum sortem respectu pænæ sensûs, Deo volente, omnino occultam et incertam esse, et idcirco à Ecclesiâ definiri non posse tradit, ad eum ferè modum quo censuit Melchior Canus intemeratum B. Virginis conceptum ex Scripturis aut traditione certò colligi non posse.

Etsi tertia opinio hæreticis perquam accepta est, tamen improbabilis æstimanda non est si aliunde verbo Dei scripto et tradito magis consona apparet; quemadmodum enim non sunt facienda mala ut eveniant bona, ita ut error eliminetur, veritas non est impugnanda. Porro omnibus ritè perpensis existimamus hanc sententiam, non quidem certam esse quasi opposita erronea foret (ut falsò prætendunt novatores), sed Scripturæ et traditioni magis conformem, et Jansenii patronis Augustini et ejus discipulorum pronuntiatis addictissimis ab obstinatissimâ suâ adversus Ecclesiæ Constitutiones pertinaciâ abducendis longè magis aptam. Hinc eam primùm adstruere aggrediemur, subinde ostensuri eam à Jansenii defensoribus in perversi sui dogmatis confirmationem immeritò adduci.

Probabilis est parvulos sine baptismo è seculo raptos non damni tantum, sed et sensûs penam, mitissimam tamen, subire. — Prob. Ea sententia viro theologo probabilior videri debet quæ argumentis ex omnibus fontibus theologicis erumpentibus solidatur, quibus ex adversâ parte minùs solidæ responsiones inducuntur; sic se habet commemorata assertio; ergo, etc. Probatur minor inductione.

PRIMUM MOMENTUM. — *Ex Scripturis.* — Sacri codices plurima offerunt testimonia in hujus assertionis commendationem, quibus D. Augustinus adversus Pelagianos pueros sacris aquis inexpressos decedentes non in *quamdam æternam vitam*, sed in *gehennam ignis* mitti solidè et nervosè demonstravit.

Primum testimonium extat Matthæi cap. 23, ubi refertur Christum in universali judicio prædestinatos à dextris suis, reprobos verò à sinistris esse collocaturum, et illos sic esse compellaturum: *Possidete paratum vobis regnùm à*

constitutione mundi, istos è converso sic: *Discedite in ignem æternum.* Non nostrum, sed S. Augustini super hoc adsit ratiocinium: « Venturus Dominus, inquit sermone 294, aliàs 14 de verbis Apostoli, cap. 3, n. 3, et judicaturus de vivis et mortuis... duas partes facturûs est, dextram, et sinistram. Sinistris dicturus: *Ite in ignem æternum*.... dextris dicturus: *Percipite regnùm*, etc. Hanc regnùm nominat, hanc cum diabolo damnationem. Nullus relictus est medius locus, ubi ponere queas infantes. De vivis et mortuis judicabitur; alii erunt ad dextram, alii ad sinistram, non novi aliud... Si ergo dextra erit, et sinistra, et nullum medium locum in Evangelio novimus, ecce in dextrâ regnùm cælorum est... qui ibi non est, in sinistrâ est. Quid erit in sinistrâ? *Ite in ignem æternum.* In dextrâ ad regnùm, utique æternum; in sinistrâ, in ignem æternum. Qui non in dextrâ, procul dubio in sinistrâ; ergo qui non in regno, procul dubio in igne æterno. »

Hæc publicè protulit S. doctor Carthagine perorans coram Aurelio Africæ primate anno 415, ut tradunt Patres Benedictini, et elucet ex libro de gestis Pelagii cap. 11, imò ex ipso isto sermone cap. 20, n. 19, ubi concionem finiens ait: « Rogo vos, ut paululùm adquiescatis. Lego tantùm. Sanctus Cyprianus est, quem in manus sumpsi, antiquus episcopus Sedis hujus. » Porro S. doctor sententiam de sensibili puerorum pœnâ fidelibus publicè annuntiabat non tanquàm dubiam, sed tanquàm certam et indubitam; qui, inquit, *non in regno, procul dubio in igne æterno.* Neque Augustinus hoc cursim, vel in uno alterove opere, sed constanter et in cunctis adversus Pelagianos scriptis protulit, v. g., lib. 1 de peccatorum meritis et remissione, cap. 28, n. 55, etc.

Adversarii incerti quid reponant in varias abeunt solutiones, sive potiùs conjecturas. Celebris Catharinus, opusculo de Statu parvulorum confidenter asserit parvulos extremo judicio non esse adfuturos. Aliis videtur puerorum judicio præsentiam non esse certam, aut saltem non constare utrum infantes in eo, ut judicentur, sint comparituri; aliis tandem placet eosdem parvulos in judicio fortè non in sinistrâ, sed in medio quodam loco esse collocandos. Eruditus Bellarminus lib. 6 de Amissione gratiæ et Statu peccati, cap. 5, hoc expendens argumentum ad nullam ex istis responsionibus confugit, et meritò quidem; etenim concilium Africanum ex 214 episcopis conflatum apud

Carthaginem anno 418 adversus Pelagianos habitum canone 2 definiit non baptizatos parvulos Christi Iudicis sinistram esse occupaturos. Idem sancivit S. Gelasius papa in epistolâ ad episcopos per Picenum contra Senecam Pelagianum; scio quidem hunc canonem à nonnullis concilio Africano abjudicari; sed scio etiam Augustinum passim inter Pelagianorum errores hunc annumerare quòd illis pueris *quasi medium locum* destinaverint inter tartari supplicium, et regni celestis præmium; unde colligebant eos à Christi sinistrâ non esse futuros. Jam verò quæro an probabile sit Patres Africanos ad perstringendos omnes et singulos Pelagianorum errores congregatos hunc intactum relinquere voluisse? Verùm utquid hæc? Adversarii huic responsioni firmiter inhærere non poterunt nisi Augustinum intolerandæ temeritatis et impudentiæ insinulaverint. Scilicet in celebri epistolâ 217, quæ est ad Vitalem, aliâs 107, cap. 5, n. 46, duodecim figit sententias adversus Pelagianos (quas omnes ibidem cap. 6, n. 24, p. 807, *ad fidem catholicam pertinere* dicit), quarum septima et octava ferunt commemoratos parvulos à Christo iudice *esse condemnandos*.

His indubiè alto animo perpensis Bellarminus aliam loco citato excogitavit et edidit solutionem; scilicet omnes prorsus homines extremo iudicio ad futuros esse, siquidem erit universale, sed Matthæi 25 solam tangi iudicii tormam Ecclesiæ membra spectantem, et ideò hunc textum parvulis, de quibus res est, adaptari non posse; unde colligit Augustinum locis in probatione adductis per ignem æternum, in quem illos parvulos ituros esse dicit, designasse infernum, *ubi est ignis æternus*, sive *damnationem* in genere, non *certain pœnæ speciem*, sive *qualitatem*, cum præsertim lib. 5 adversus Julianum cap. 41, edicat, se definire non audere *qualis et quanta futura sit pœna*, quâ illi parvuli mulctabuntur. Verùm salvâ, quæ eruditissimo christianæ religionis dogmatum vindici debetur, reverentiâ, hæc responsio non solida, quinimò periculosa videtur; eâ enim admissâ, quis insulsam iudicet evasionem Origenistarum circa pœnarum æternitatem, nempe reprobos ituros esse in infernum, *ubi est ignis æternus*, non in ignem æternum? vel ignem, in quem ibunt impii, æternum esse respectu durationis, non respectu impiorum combustionis? Quis absurdum Pelagiani alicujus effugium, scilicet infantes sacris undis non ablutos descensuros esse in infernum, *ubi est ignis æternus*, sed ibi non ignis ustionem, at cujusdam æternæ

vite dulcedinem esse experturos? etc. Deinde quàm aliena est hæc responsio à constanti doctrinâ Augustini, qui ubique, et speciatim in cap. 5 modò laudatæ epist. 217 ad Vitalem, asserit in extremo iudicio judicandos esse parvulos quatenus in baptismi receptione vel non receptione, non per se sed per alios crediderunt, vel non crediderunt? « Scimus, inquit, quòd omnes adstabimus ante tribunal Christi, ut ferat unusquisque secundum ea, quæ per corpus gessit... sive bonum sive malum... Scimus parvulos, si in illâ parvâ ætate moriuntur, utique secundum ea quæ per corpus gesserunt, id est tempore, quo in corpore fuerunt, quando per corda, et ora gestantium crediderunt vel non crediderunt, quando baptizati, vel non baptizati sunt, etc... judicari, » etc. Tandem quid intendit S. doctor lib. 5 contra Julianum cap. 41? Hoc unum, « se non dicere parvulos sine Christi baptismo morientes tantâ pœnâ esse plectendos, ut eis non nasci potius expediret, cum hoc Dominus non de quibuslibet peccatoribus, sed de scelestissimis et impiissimis dixerit; » quæ sedulò observanda sunt, cum ibidem inter peccatores, de quibus Christus id non protulit, ipsos recenscat Sodomitas, qui sanè æterno comburentur igne: ex quibus ibidem concludit, « parvulos, qui solum habent originale peccatum, nec ullis propriis aggravantur, in damnatione omnium levissimâ esse futuros; qualis autem et quanta erit, » illa levissima damnatio, pro suâ sapientiâ declarat « se definire non posse » (quia illud soli Deo exploratum est) sed interim « se non audere dicere quòd parvulis illis ut nulli essent quàm ut ibi essent potius expediret, » cum Christo dicente id ipsis Sodomitis non congruat. Augustinus igitur incertus fuit de damnatione parvulorum non quoad speciem (sciebat enim eam, *levissimam* licet, consistere in ignis combustionem) sed quoad gradum duntaxat; quod aliunde ostendit ejus dubitatio circa *qualitatem* pœnæ Sodomitarum et aliorum peccatorum de quibus ibidem mentionem facit. Cæterum, priusquàm alia profero oracula, nota adversarios, ipsumque Bellarminum, quoties obijciuntur testimonia enuntiata omnes ante Christum iudicem comparituros esse, in ignem æternum mittendos, toties ad relatam distinctionem de *loco inferni*, *ubi est ignis æternus*, non de *igne æterno*, veluti ad anchoram confugere; unde cum ista anchora lanæ sit, non ferrea, in naufragium perpetuò incurrunt.

Alterum Scripturæ oraculum ex variis coa-

lescit textibus qui omnium et singulorum Adæ nepotum sub dæmone servitute prædicant. Extant imprimis Matthæi 12, v. 29, Marci 3, v. 27, Lucæ 11, v. 21, Joannis 12, v. 31, 2 Petri 2, v. 19, etc. Eòdem recidunt quæ docet Apostolus epist. ad Rom. cap. 9, eosdem scilicet Adæ posteros, quamdiu sacris undis abluti non sunt, esse *vasa iræ et contumeliæ* in domo dæmonis; ipsos enim infantes inter illa vasa ab Apostolo annumeratos fuisse asserit D. Augustinus lib. 1 Operis Imperfecti contra Julianum cap. 141 : « Nos, inquit, Deum quidem parvulorum opificem prædicamus; sed ex eàdem massâ medium locum vasis, ubi nec in honorem fiant, nec in contumeliâ, quem non dedit Apostolus, non damus. »

Non nostrum iterum, sed eruditissimi gratiæ vindicis super divinum hoc pronuntiatum subministrabimus commentarium : « Tu, inquit Julianum alloquens et ipsi commemoratos textus objiciens, lib. 3 Operis Imperfecti cap. 199, qui eam negas (imaginem Dei) à diabolo possideri, procul dubio negas à potestate erui tenebrarum, cum in Christi regnum regeneratione transfertur, et accusas universam catholicam Ecclesiam (quæ in exorcismo exsufflat parvulos priusquam baptizentur) magno crimine Majestatis... Exsuffletur itaque Juliani amentia, ne majestatis rea in parvulorum mundatione et exsufflatione dicatur Ecclesia. Si autem non eruitur (parvulus sine baptismo mortuus), à potestate tenebrarum, et illic remanet, quid miraris in igne æterno cum diabolo futurum, cui in Dei regnum intrare non sinitur? » Parvuli igitur sine baptismo pereuntes dæmonis servituti addicti manent et idcò æterno igne cum diabolo comburentur.

Idem S. doctor ex eo quòd infantes sine baptismo è vitâ exeuntes vasa sint *iræ et contumeliæ*, passim colligit eos obnoxios esse *mortis secundæ*, quæ consistit in combustione æternâ corporis et animæ, juxta istud oraculum Apocalypsis cap. 20, v. 14 : *Et infernus et mors missi sunt in stagnum ignis. Hæc est mors secunda.* « Si, inquit lib. 1 ad Bonifacium cap. 22, n. 40, evangelicis vocibus cogimini confiteri (Pelagianos affatur), nec vitam salutemque posse habere parvulos de corpore exeuntes, nisi fuerint baptizati, quaerite cur compellantur non baptizati secundæ mortis subire supplicium, etc. »

Theologi adversæ partis pœnam sensûs et immanem diaboli tyrannidem infantibus surripientes in hoc argumento diluendo, sive elu-

dendo, mirum in modum laborant, et seipsos mutuo refellunt.

Reponunt nonnulli, iique non infimi nominis, pueros, peccato licet originali coinquinatos, dæmonis servituti non addici, quia pœna illa illi delicto non debetur. Verum hæc responsio ipsius Juliani nefariam exprimit sententiam : « asseritis, inquit D. Augustinus Julianum alloquens lib. 6 Operis Imperfecti cap. 20, parvulos non esse sub potestate diaboli... dicit Jesus, qui secundum hoc nomen suum salvum facit populum suum à peccatis eorum : *Nemo intrat in domum fortis ut vasa ejus eripiat, nisi prius alligaverit fortem* (Matthæi cap. 12, v. 29), et vos in hoc populo Christi, quem salvum facit à peccatis eorum, parvulos non esse contenditis, quos ut propriis, ita nec originalibus vultis obstrictos esse peccatis, et cum fallaci vestro sermone minuitis vires ejus, quem dixit *Veritas fortem...* » Eadem responsio omnibus Patribus exsufflatur, ut ostendit Bellarminus lib. 6 de Amissione gratiæ et Statu peccati cap. 2; et tandem anathemate percussa est à conc. Trid. sess. 5, can. 1, ubi decernit, « Adam incurrisse cum morte captivitatem sub ejus potestate qui mortis deinde habuit imperium, hoc est diaboli. »

Respondent quidam alii cum audaci Catharino in commemorato opusculo, dæmonem in pueros primigeniâ licet maculâ fœdatos elapso extremi judicii die nihil juris esse habiturum, quia pro illis etiam Christus diabolum foras eiecit. Sed ista solutio, Bellarmini etiam judicio loco citato, hæresim spirat; indicat enim commemoratos parvulos post judicii diem à paternâ noxâ esse eximendos, licet baptizati non fuerint; quod fidei catholicæ repugnat; *fides* scilicet *christiana*, inquit D. Augustinus lib. 1 de Nuptiis et concupiscentiâ cap. 20.... *non dubitat eos... qui lavacro regenerationis nondum redempti sunt, etiam parvulos, sub diaboli esse potestate captivos, nisi et ipsi eàdem Christi gratiâ redimantur*; saltem significat eosdem parvulos, originali licet peccato coinquinatos, è dæmonis servitute esse eripiendos; quod iterum errorem propinat ex dictis nimirum stante vel non stante Adamico peccato, stat vel non stat dæmonis in homines etiam rationis non compotes immane jus et imperium.

Alii obtundunt pueros eo duntaxat sensu dæmonis servituti addici, quòd in Adam peccaverint; sed non attendunt hoc responsum nequaquam coherere cum Scripturæ et Pa-

trum oraculis enuntiantibus Adæ nepotes factos fuisse diaboli captivos, quia Adamo peccante peccaverunt; hæc enim loquendi ratio evincit Adæ posterorum captivitatem ortam esse ex delicto quod in Adamo et cum Adamo commiserunt, et ideò illam servitutem non minùs discrepare à maculâ, quæ eos fontes effecit, quàm effectum à causâ. Sanè eodem ratiocinio probare possent captivitatem Judæorum sub Assyriis nihil aliud fuisse, quàm peccata quibus iidem Hebræi Deum offenderant.

Aliis placet ideò mortalium genus dæmon subditum dici quia dæmon ex peccato originali jus et potestatem obtinuit homines tentandi et sic in infernum præcipitandi. Quæ profectò solutio cæteris non præstat. An enim, quæso, diabolus parvulos rationis usu destitutos potest tentare? An dæmon Adamum ante peccatum tentare non potuit, imò reverà non tentavit? Qui tentari possunt captivi quidem esse possunt; sed suntne reapse captivi? Porro parvuli non solum esse possunt sed et reverà sunt dæmonis servi, aliàs reverà per baptismum à dæmonis captivitate non eruerentur, ut arguunt sancti Patres, imprimis Zozimus papa, apud D. Augustinum epist. cxc, aliàs 157, cap. 6: *Nullus, inquit, ... redemptus dici potest, nisi qui verè per peccatum fuerit ante captivus*. Cæterum falluntur quidam hujus solutionis amatores, dum fingunt hominem per peccatum originale eodem prorsus modo fieri dæmonis captivum ac per peccatum actuale. Scilicet exorcismi, et exsufflationes, quibus ab Apostolicis temporibus utitur Ecclesia ad spiritum immundum à non baptizatis abigendum, demonstrant eos verè et intùs à dæmone possideri, et ideò illos esse veluti propria ejus mancipia; quos ritus non impendit eadem Ecclesia ubi vel insigniores peccatores Deo reconciliat, nisi sint energumeni. Præterea D. Augustinus, *cujus doctrinam*, inquit P. Alexander, super his sequitur *Ecclesia*, epist. 217, ad Vitalem, aliàs 107, cap. 3, numeris præsertim 10 et 11, dæmonis in infideles, sive non baptizatos, singulare dominium refert et graphicè describit.

Ex his, nî fallor, probatum manet pueros sine baptismo mortuos futuros esse crudelissimi tyranni potestati subditos, et ideò pœnis sensibilibus ab ipso infligendis obnoxios.

MOMENTUM SECUNDUM.—*Ex sanctis Patribus.*—Oleum sanè operamque perderemus, si D. Augustinum hic adduceremus, cujus tot decretoria testimonia hactenus attulimus, et postea producemus. Aliunde adversarii non pauci S.

doctorem *excessis* hæc in parte insimulare aucti sunt, quos pro suâ eruditione, æquitate, et pietate revocit ipse Bellarminus. *Augustinus*, inquit lib. 6 de Amissione gratiæ et statu peccati, cap. 3, *aliquid humani passus esse, aut excessisse hoc in dogmate censendus non est; sed illi planè humanum aliquid patiuntur, et excedunt* (plures scholasticos perstringit), *qui parvulos in superiore parte terræ, quasi in terrestri paradiso collocant, eosque beatos ac felices dicunt.*

D. Hieronymus, ut notum est, tres dialogos adversus Pelagium exaravit, in quibus sub nomine Critoboli Pelagium, sub nomine verò Attici virum catholicum mutuis colloquiis sese compellantes introducit. Critobolus autem versus finem tertii dialogi, p. 102, c. 1, litt. C, hæc quærit: « Oro te, quid infantuli peccavere? Nec conscientia eis delicti imputari potest, nec ignorantia, qui juxta Jonam Prophetam manum dexteram nesciunt et sinistram. Peccare non possunt, et possunt perire, genua labant, vagitus verba non explicant, balbutiens lingua ridetur, et *æternæ miseræ cruciatus miseris preparantur!* » Quid ad hanc Pelagii interrogationem sive objectionem Hieronymus? *Æternæ miseræ cruciatus* in alterâ vitâ non subire infantulos? (hoc sanè reponere debuisset in adversariorum sententiâ.) Minimè. Quid ergo? Hoc unum, infantulos illos ex Apostolo Rom. cap. 5 peccato originali coinquinari, cui illi cruciatus debentur.

Idem dubio procul senserunt antiqui quibus probatum fuit istud D. Augustini pronuntiatum epist. supra citatâ 294, cap. 3, n. 3, aliàs 14 de verbis Apostoli, et alibi passim (quod verum esse fatetur ipse Bellarminus lib. 6 de Amissione gratiæ et Statu peccati, cap. 3) « Medium locum inter gehennæ supplicium, et regnum cœlorum pueris assignare error est pelagianus; » inter quos plurimi sanè extiterunt, v. g., omni laude major pontifex ad apostolicam Sedem ex Africâ evectus anno 491 Gelasius; in epistolâ quippe, quam ad episcopos per Picenum adversus Senecam delirum senem Pelagianorum direxit, hæc habet: « Tollant de medio (Pelagiani) nescio quem tertium, quem decipiendis parvulis faciunt, locum; et quia nonnisi dexteram partem legimus, et sinistram, non illos faciant in sinistrâ regione sine baptismo permanere, sed baptizatos sinant ad dexteram salutarem sacrâ regeneratione transferri. » Enimverò dicente Bellarmino loco mox citato, « theologi scholastici, qui docent parvulos sine baptismo decedentes

non pati poenam sensibilem ignis corporalis, propter Augustinianum effatum docent parvulos illos esse in inferno, et poenam damni perpetuò luere, et ideò non assignant eis medium locum inter gehennae supplicium, et caelorum regnum, sed in ipsà gehennà mitiorem poenà quàm ceteros puniendos esse confirmant. »

Quòd si scholastici illi per mitiorem poenam intelligerent mitissimam ignis exustionem, ipsam D. Augustini sententiam exprimerent; verùm, cùm per has voces designare velint meram beatificæ visionis privationem, aut saltem quemdam dolorem internum ex eà orientem, toto cælo recedunt ab Augustino, Gelasio, et aliis, qui asserunt commemoratos parvulos ideò futuros esse in inferno, et à sinistrâ supremi Judicis quia « ibunt in supplicium gehennæ, in combustionem æternam, in ignem sempiternum, in locum ubi torquetur dæmon, qui suam in eos tyrannidem exercebit, » etc. Et verò utquid illi parvuli in infernum descendunt? Nonne ut æternum supplicium cum aliis reprobis subeant?

Augustinus sanè et alii litem super hoc Pelagianis nunquàm fortè movisset, si in tertio quem lingebant loco concessissent infantes non solùm quâlibet æternâ vitâ privari, sed etiam supplicio quoad speciem æquali supplicio aliorum reproborum affici. Quamobrem præfati theologi verbis duntaxat, non re cum Augustino consentiunt, et si nos *tortores parvulorum* vocare pergant, eos *puerum deceptores* cum S. Gelasio appellabimus.

S. Avitus Viennensis in Galliâ præsul, « vir, inquit, Baronius, pietate, eloquentiâ, et præclaris adversus sui temporis hæreticos scriptis apud antiquos scriptores et tabulas ecclesiasticas celeberrimus, qui concilio Epaunensi 24 episcoporum alisque præfuit, » D. Augustini de parvulis doctrinam in carmine ad Fuscinae sororem his verbis consignavit :

Omnibus id verò gravius, si fortè lavacri
Divini expertem tenerum mors invida natum
Præcipitat, durâ generatum sorte gehennæ.
Qui mox ut matris cessavit filius esse,
Perditionis erit; tristes tunc edita nolunt,
Quæ flammis tantùm genuerunt pignora matres.

Eodem seculo quindecim episcopi Byzacenæ provinciæ in Africâ doctissimi ac sanctissimi exules in Sardiniam jussu Trasamundi regis Vandalorum Ariani deportati, eandem sententiam consecraverunt. Scilicet cùm Petrus diaconus et alii monachorum Seytharum ora-

tores Romam missi ad componendas quasdam de celestis gratiâ quæstiones in Oriente agitatae de Africanorum præsulum in Sardinia exulum eruditione certi facti fuissent, libellum de incarnatione et gratiâ Christi à seipsis exaratum ad eos miserunt expendendum et approbandum, si operæ pretium ducerent. Re in deliberationem missâ, Byzaceni præsules provinciam demandaverunt Fulgentio episcopo Ruspensi decreta sua litteris consignandi et ad commemoratos monachos dirigendi; hic Patribus sese morigerum præbens illicò ejusdem argumenti librum suo et fratrum suorum nomine scripsit, nimirum de incarnatione et gratiâ. In eo autem opere Augustinianum de parvulorum supplicis pronuntiatum tam clarè expressit ut nullâ tergiversatione eludi possit. Hæc quippè reperiuntur cap. 14 : « Quæ justitia est, ut imago Dei, quæ nihil potuit per seipsam delinquere, si non redimatur sanguine Filii Dei, in regnum Dei non permittatur intrare? quò utique quisquis non ingreditur, interminabilibus ignis æterni cruciabitur pœnis..... Si ergo nolunt in ipsius Dei contumeliam mortiferâ impietate versari, fateantur hominem primum in omnes homines cum morte transmisisse peccatum. » Similia repetit cap. 50. Istum autem librum à Patribus Byzacenis fuisse approbatum evincit caput primum, quod sic incipit : « Dilectissimis, et in Christi fide atque gratiâ plurimum amplectendis sanctis Fratribus Petro diacono, Joanni Leontio, et alii Joanni, cæterisque Fratribus quos unâ vobiscum in causâ fidei directos Romæ litteris intimâtis (monachis Seythis de quibus supra) Dacianus, Fortunatus, Boethus, Victor, Scholasticus, Horontius, Vindicianus, Victor, Januarius, Victorianus, Photinus. Quod vult Deus, Fulgentius, Felix, et Januarius in Domino saltem (quindecim episcopi Africani). » Hæc videlicet ostendunt ista omnium Patrum Byzacenorum nomine à B. Fulgentio esse conscripta, qui eorum *lingua erat et ingenium*, ut loquitur Ferrandus in ejus vitâ, cap. 20.

Igitur episcopi in Sardiniam pro fide orthodoxâ amandati in suâ ad Petrum diaconum et alios monachos Seythas responsione parvulos cum peccato originali è vitâ migrantes poenâ sensû affici autumaverunt. Eandem sententiam in eximiis aliis suis operibus non solùm ut probabiliorem (quod nobis sufficeret) verùm etiam ut certissimam, quâ quasi fidei dogma proposuit, aut saltem proposuisse videtur B. Fulgentius. Enimverò, cùm Petrus diaconus

cum aliis monachis Seythis Româ in Orientem reversurus esset, per litteras rogavit S. Fulgentium ut compendiosam fidei catholicæ regulam ad se mitteret quò facilius à grassantibus in Oriente hæresibus sibi caveret. Ruspensis præsul ejus precibus annuens librum, cui titulus : *De fide ad Petrum*, composuit, et ad eum misit. Eo autem in opere cap. 27, hæc præscribit : « Firmissimè tene, et nullatenus dubites, non solum homines jam ratione utentes, verum etiam parvulos, qui sive in uteris matrum, sive eum de matribus nati sine sacramento sancti baptismatis.... de hoc seculo transeunt, ignis æterni supplicio puriendos, quia etsi propriæ actionis peccatum nullum habuerunt, originalis tamen peccati damnationem carnali conceptione, et natiuitate traxerunt. » Hoc unum est è quadraginta dogmatibus, sive, ut loquitur, *capitulis*, de quibus capite 44 hæc pronuntiat : « Hæc interim quadraginta capitula ad regulam veræ fidei firmissimè pertinentia fideliter crede, fortiter tene, veraciter patienterque defende. Et si quem contraria his dogmatizare cognoveris, tanquam pestem fuge, et tanquam hæreticum abjice. »

Scio quidem multos eruditos, inprimis recentiores, reponere Fulgentium inter fidei dogmata hæc retulisse sententiam asserentem parvulos sine baptismo morientes æternam pœnam subire, quæ peccato originali debita est, non eam quæ eos æterni ignis supplicio addicit, quamvis istam amplexus fuerit, quia ejus propositio, unica licet apparenter, duplici tamen æquivalet; verum esto; nihilominus certum erit S. doctorem hanc sententiam tenuisse et propugnasse, et quidem *firmissimè*, quod sanè cum tanto ardore non defendisset, nisi persuasum ipsi fuisset ita ab antiquis diebus sentire Ecclesiam Africanam, in quâ juxta plures extabant 566 Cathedræ episcopales; deinde, si Fulgentius nonnisi damni pœnam hæc inter fidei dogmata recensere voluisset, Petrum diaconum, virum licet eruditissimum, erroris periculo exposuisset; multi enim, etiam doctissimi viri, id in ejus loquendi et scribendi ratione non deprehendunt.

Idem S. doctor non in uno alterove loco pœnam ignis peccato originali deberi asseruit, sed constantissimè et quasi in omnibus scriptis suis. Id enim inculcat in libris de veritate prædestinationis et gratiæ ad Joannem presbyterum et Archimandritam, et Venerium diaconum, quos à variis Patribus et conciliis inprimis ab episcopis Africanis impensè com-

mendatos esse refert P. Alexander in hist. seculi 6. « Nulla est, inquit lib. 1, cap. 42, causæ diversitas in infantibus, quæ faciat unum eligi, alterum reprobari. Si verò parentum consideretur voluntas, illi qui christiani sunt, ut eorum filius baptizaretur sollicitè voluerunt,.... quorum tamen filius, antequàm baptizaretur, morte præventus æternis est ignibus deputatus, » etc. Et cap. 44 : « Causa majorum atque minorum, qui sine baptismo cursum vitæ presentis in infidelitate consummant, quantum attinet ad communionem originalis peccati, una est; ex hæc utrique ibunt in ignem æternum.... quia in eis chirographum, quo sibi eos deceptoris nequitia subdidit, Salvatoris gratia non delevit.... Majores verò (qui cum peccato originali et actualibus peccatis moriuntur) non solum pro originali peccato æternis ignibus ardebunt (quibus arsurus sine baptismo morientes etiam parvuli, qui nihil boni aut mali egerunt) sed etiam pro suâ voluntate malâ tantò deterius torquebuntur, quanto amplius propriæ iniquitatis adjecerunt. »

Non me latet nonnullos adversæ sententiæ defensores, qui sese consuetis distinctionibus et argutiis ex his testimoniis expedire non possunt, D. Fulgentii hæc in causâ auctoritatem parvipendere, ipsumque præpostero Augustinianæ doctrinæ studio et amore delusum lapsus et excessus accusare; sed quàm immeritò norunt eruditi; etenim, ut modò observabat Ferrandus, B. Fulgentius suo tempore Ecclesiæ Africanæ lumen fuit et decus, et ille contemni vel erroris reus traduci nequit, quin in eundem contemptum et errorem incurrant *sexaginta et amplius Africæ episcopi*, quos tunc *catena ligabat exilii*, siquidem *eorum lingua fuit et ingenium*. Præterea quibusvis doctis viris indubiè acceptum est quod dixit P. Alexander in historiâ seculi 6, scilicet « Fulgentium in Scripturâ sacrâ, et in doctrinâ SS. Patrum, et præsertim S. Augustini versatissimum, verbo et scriptis hæreses debellasse, ædificasse Ecclesiam, fidelium mores informasse. » Præierrat enim Baronius ad annum 559, ubi postquam mirè commendavit sanctitatem et eruditionem Fulgentii, addit : « Quæ extant ejus lucubrationes majori faciunt eas quæ exciderunt dolore percipere. Planè contigit morte Fulgentii, tanquam fulgentis sideris radiis ad occasum dilapsi, universam Africanam provinciam tetrâ noctis caligine remansisse perfusam. Etenim nullus post Fulgentium tanti fulgoris posterioribus seculis illuxisse visus est

doctrinæ et sanctitatis claritudine conspicuus Africanus antistes. » Venerentur saltem iudicium S. Isidori de Script. ecclesiasticis cap. 14, ubi his de Fulgentio dictis, fuit in confessione fidei clarus, in Scripturis divinis copiosè eruditus, in loquendo dulcis, in docendo ac disserendo subtilis. » Varia ejus opera sibi nota cum encomio enumerat.

Eodem seculo 6 exeunte, D. Gregorius Magnus pueros sine sacris undis è vitâ abeuntes *sempiternis tormentis* cruciari censuit. Etenim lib. 9 Moralium in Job cap. 16 (qui libri omnibus fatentibus in Oriente à S. Gregorio conscripti sunt), exponens hæc Job verba: *Multiplicavit vulnera mea etiam sine causâ*, ait: « Nonnulli etenim priùs à præsent luce subtrahuntur, quàm ad proferenda bona, malave merita activæ vitæ perveniant. Quos quia à culpâ originis sacramenta salutis non liberant, ethic ex proprio nihil egerunt, et illuc ad tormenta perveniunt. Quibus unum vulnus est, corruptibiliter nasci, aliud carnaliter emori. Sed quia post mortem quoque æterna mors sequitur, occulto eis, justoque iudicio etiam sine causâ vulnera multiplicantur. Perpetua quippè tormenta percipiunt qui nihil ex propriâ voluntate peccaverunt.... districtus iudex quâ eos animadversione trucidat, si et illos in æternum percutit, quos reatus arbitrii non addicit? » Hæc, ni fallor, commentario non indigent, et adversariorum fauces ita comprimunt ut S. Gregorium illa non ex Ecclesiæ visceribus, sed ex suo cerebro excerptisse aliquando asserere ausi fuerint.

Septimo incunte seculo, D. Gregorii, ex cujus Moralibus tribus suis sententiarum libris multa inseruit, de parvulis sententiam secutus est S. Isidorus Hispalensis. Libro quippe 2 Differentiarum n. 26, hæc habet: « Illud tamen tenendum est, parvulorum animas nexu peccati originalis esse adstrictas, quæ nisi percipiant baptismatis sacramentum, regni cœlestis participes esse non possunt, sed cum carne et commune habebunt peccatum, et pari iudicio *damnabuntur in ignem æternum*. » Similia tradit lib. 1 sententiarum cap. 22: *Pro solo originali reatu*, inquit, *luunt in inferno nuper nati infanti pœnas*.

Neque aliquis hic Isidoro inconsiderantiæ, aut partium studii labem inspergat; ejus enim laudes sic celebrat concilium octavum Toletanum cap. 2: « Nostri seculi doctor egregius, Ecclesiæ catholicæ novissimum decus; præcedentibus ætate postremus, doctrinæ compa-

ratione non infimus, atque quod majus est, jam finitorum seculorum doctissimus, cum reverentiâ nominandus Isidorus. »

S. Prudentius Treccensis episcopus, qui obiit anno 861, D. Augustini doctrinam de sorte parvulorum velut certam tradidit. Enimverò, libro de prædestinatione cap. 16 ait: « Punitio in gehennâ tam primæ prævaricationis merito quàm aliorum multiplicitate criminum libidinosâ perversitate contractorum acquisita est. » Ibidem de parvulis hæc pronuntiat: « Extra baptismi gratiam morientes, non suo, sed protoplasti peccato *perpetuâ plexione* damnantur. » Etverò, quomodò S. pontifex aliter sentire potuisset qui D. Augustini documenta impensè, ut par est, extollit? « S. Augustini, inquit in epistolâ ad Hincmarum et Pardulum episcopos, doctrina sanctarum Scripturarum auctoritati in omnibus concordissima est: quarum abstrusa nullus doctorum scrupulosius rimatus diligentius exquisierit, verius invenerit, veracius protulerit, luculentius enodaverit, fidelius tenuerit, robustius defenderit, effusius disseminaverit: » postea commemoratos præsules enixè rogat ut eam impugnari non sinant, « cum, inquit, eam et apostolicæ Sedis sublimitas, et totius Ecclesiæ catholicæ unitas auctoritate concordissimâ approbârint ac roborârint.

Neque S. Prudentii nomini invidia accedere potest quòd nonnulli eum velut Gotthescalci errorum fautorem traducant, et hodiè Janseniani ejus auctoritate immaniter abutantur. Utrosque enim solidè suo more revincit tum in Synopsi hist. sec. 9 et 10, cum dissertatione 5 in eadem secula P. Alexander.

Prodeat alter eruditissimus Augustinianæ doctrinæ sceptor et vindex D. Anselmus Cantuariensis mortuus anno 1109. Lib. de conceptu virginali et peccato originali cap. 22, hæc docuit: « Cum nemo dubitet, quia par pœna non sequetur imparia peccata, in hoc tamen similis est et personalis et originalis peccati damnatio, quia nullus admittitur ad regnum Dei, ad quod factus est homo, nisi per mortem Christi, sine quo non redditur quod pro Adæ peccato debetur, quamvis non omnes pariter in inferno torqueri mereantur. Nam post diem iudicii nullus erit Angelus, aut homo, *nisi in regno Dei, aut in inferno*. » Ecce Augustini placita tum de mitissimâ ignis pœnâ soli originali peccato infligendâ, cum de chimérico loco inter regnum Dei et infernum medio post iudicii diem.

Accedat tandem B. Ælredus Cisterciensis monachus, abbas Rievallensis in Eboracensi diocesi, pietate, doctrinâ, mellifluo stylo Bernardus alter, qui ad cælum raptus est anno 1166. Inter eximia alia opera Speculi charitatis tres composuit libros, in quorum primo cap. 13 huic objectioni, *parvulos quæ ratio addicit damnationi, quos nec creatio malos, nec propria voluntas fecit injustos?* sic respondet: « Quid enim? Injustum æstimas, ut lignum inutile, et infructuosum ignis depascat? Cogita, quæso, totum humanum genus quasi lignum aridum, lignum infructuosum, lignum in ipsâ radice vitiatum, utpote veneno antiqui serpentis inficiatum, justissimè addictum *flammis, igni* destinatum, adjudicatum damnationi. « Quid ergo? ingratum te præbes, ô lignum inutile, quòd quidam ramusculi à tuâ præmortuâ præcisi radice eripiuntur incendio, quatenus stipti cuidam fructuoso inserti pristinæ libertati donentur. »

En Ecclesiæ latinæ doctores qui sensibiles parvulorum sine baptismo mortuorum pœnas prædicaverunt. Hanc sententiam, non ut dubiam, sed ut in Ecclesiis suis certam tradiderunt, quemadmodum eorum evincunt testimonia. Proferant adversarii vel unum ejusdem Ecclesiæ Patrem ad 12 usque seculum qui controversiâ istâ à se ex professo examinatâ contrarium docuerit, et eorum eruditioni impensè gratulabimur.

Obijciunt 1^o, cum Bellarmino, lib. 6 de Amissione gratiæ et Statu peccati cap. 4: D. Augustinus, libro 3 de libero Arbitrio, cap. 25, n. 66, de parvulis disserens ait: « Non metuentum est ne vita esse potuerit media quædam inter rectè factum atque peccatum, et sententia judicis media esse non possit inter præmium atque supplicium. » Ibi, ut arguit Bellarminus, Augustinus docet fieri posse ut parvuli non quidem occupent locum medium inter cælum et infernum, sed ut subeant sententiam mediam inter præmium actuali bono destinatum, et supplicium actuali peccato debitum, ideòque dubitavit an parvuli illi pœnam ignis experiantur vel non; *musquàm autem id retractavit S. doctor, etsi pluries sese obtulerit occasio.*

Eadem dubitatione angitur in libris ipsis adversus Pelagianos; v. g., lib. 5 contra Julianum cap. 11, n. 44, ubi ait « se non dicere parvulos sine Christi baptismo morientes tantâ pœnâ esse plectendos, ut eis non nasci potiùs expediret, et se definire non posse quæ, qualis, et quanta erit eorum pœna; » item lib. 6, cap.

10, n. 52, ubi profitetur se ignorare *ubilibet et quomodolibet* sint illi infantes. — Resp. nos in expositione primi momenti assignasse germinum duorum ultimorum testimoniorum sensum. Ipse Bellarminus, et alii, ultimum textum solvere debent; fatentur quippe certum esse, etiam ex Augustino, commemoratos infantes futuros esse *in inferno*, ut ex dictis elucescit, et in ipsâ objectione observat Bellarminus. Quod attinet ad primum testimonium, certè unus textus obscurus omnium optimæ criticæ peritorum iudicio proferri non potest adversus sexcentos alios longè minùs obscuros. Porro S. doctor sexcentis in locis clarè asserit infantes sine baptismo è vitâ migrantes ire *in mortem secundam, in ignem æternum, in combustionem et supplicium sempiternum*, propter solum peccatum originale quo sunt coinquinati, ut ex adductis probationibus abundè constat. Juvat tamen primum illud testimonium profundius discutere. Unde

Resp. 1^o, Massilienses eundem textum Augustino objecisse ad probandum ipsum antea dubitasse de pœnis parvulorum. Igaur adversarii ipsi Semipelagianorum armis sese defendere aggrediuntur. Patet ex epistolâ Hilarii ad Augustinum, inter Augustinianas 226, quæ reperitur ante librum de Prædestinatione Sanctorum. « Parvulorum causam, inquit Hilarius n. 8, ad exemplum majorum non patiuntur afferri (Massilienses) quam et tuam sanctitatem dicunt eatenus attingisse, ut incertum esse volueris, aut potiùs de eorum pœnis malueris dubitari; quod in libro tertio de libero arbitrio (cap. 25) ita positum meministi, ut hanc eis occasionem potuerit exhibere. » Quid ad hæc Augustinus? Duo: unum, se, etiamsi tunc dubitasset, non ideò postea dubitare debuisse; alterum, se etiam tunc temporis reverà non dubitasse; quæ indubiè penitus exsufflant Bellarmini, Goneti, et aliorum observationes. « Si, inquit libro de dono perseverantiæ cap. 12, n. 50, quando libros de libero arbitrio laicus (Romæ) cœpi, presbyter (in Africa) explicavi, adhuc de damnatione infantium non renascentium, et de renascentium liberatione dubitarem, nemo, ut opinor, esset tam injustus atque injudus, qui me proficere prohiberet, atque in hæc dubitatione remanendum mihi esse judicaret. » Deinde dicit non oportere credi se eâ dere dubitasse, sed quòd Manichæi, quidquid esset de parvulorum pœnis, essent refellendi, *ne duarum naturarum, scilicet boni malique, permixtio, crederetur*: et demùm sic pronuntiat:

« Absit ut causam parvulorum sic relinquamus, ut esse nobis dicamus incertum, utrum in Christo regenerati, si moriantur parvuli, transeant in aeternam salutem; non regenerati autem transeant in mortem secundam, » etc. Idem longè ante, nempe anno 415, D. Hieronymo declaraverat, scilicet epistolâ ad ipsum nunc inter alias epistolas 166, olim 28, cap. 7, n. 20 : « De baptismo, inquit, parvulorum in eodem libro (tertio de libero Arbitrio cap. 25) non quidem sufficienter, sed quantum illi operi satis esse videbatur, utcumque respondi, quod etiam nescientibus, et fidem suam non habentibus prodest; non tamen de damnatione eorum parvulorum qui sine illo (baptismo) ex hac vitâ emigrant, tunc aliquid dicendum putavi, quia non quod nunc agitur agebatur. » Disputabat scilicet tunc temporis de pœnis quibus in hac vitâ obnoxii sunt parvuli.

R. 2°, Augustinum citato cap. 25, lib. 5 de libero Arbitrio, solvere objectionem quâ nonnulli imperiti effutiebant opus non fuisse ut nascerentur parvuli, qui neque inter justos esse potuerunt, quoniam nihil rectè fecerunt, neque inter malos, quoniam nihil peccaverunt. Respondet autem *superflue queri qualis in futuro judicio futurus sit qui nihil boni aut mali fecit, et ideo nihil meruit*, siquidem in hac hypothese potuit esse aliqua vita media inter rectè factum atque peccatum, et ideo media Dei sententia illi vitæ accommodata. Ubi vides S. doctorem non dicere vel vitam vel sententiam aliquam esse mediam (ut arguunt Bellarminus et alii) sed esse posse, nempe in chimericâ et calumniosâ imperitorum illorum objectione sive sententiâ.

Obijciunt 2°, cum eodem Bellarmino, loco citato, sequentes Patres. D. Gregorius Nazianzenus oratione in S. lavacrum, ante medium, dicit : « pueros, nec cœlesti gloriâ, nec suppliciis à justo iudice affici, utpote qui licet baptismo consignati non fuerint, improbitate tamen careant, atque hanc jacturam passi potius fuerint quàm fecerint; » ergo. Resp. verum Gregorii sensum ex contextu subelucere. Tres nempe hominum sine baptismo pereuntium ordines enumerat; primum illorum qui baptismum nihili fecerunt; secundum illorum qui eum ex negligentia non receperunt; tertium eorum qui illum nec contempserunt nec neglexerunt. Comparationem inter illorum omnium pœnas inducit, et asserit baptismi contemptores graviter puniri, neglectores verò minùs graviter, illius tandem nec contemptores nec neglectores relativè ad alios *nec cœlesti gloriâ,*

nec suppliciis affici; quod profectò certissimum est, cum isti nullius actualis peccati rei sint; si tamen Nazianzenus inter postremos non comprehendat etiam adultos qui nec contempserunt, nec neglexerunt baptismum, sed sine illo subito et improvise casu mortui sint; eos enim ab ipso sub istorum nomine etiam, imò præcipuè fuisse designatos probabilius videtur. Id enim suggerunt quas adducit rationes; *utpote qui*, inquit, *licet signati non fuerint, improbitate tamen careant*, id est improbitatis puri sunt quantum ab baptismi omissionem, quæ sine eorum culpâ contigit; item, addit, *hanc jacturam potius passi sunt quàm fecerunt*; hoc est baptismi omissionem potius passi sunt quàm fecerunt, quod si de parvulis dictum esset, adverbium *potius* fuisset auferendum. Equidem adulti illi in isto necessitatis casu cum voto baptismi aeternam vitam consequi potuissent; at votum illud conjunctum esse debet cum sincero dolore de peccatis, quod non semper accidit. Demùm, quomodo Bellarminus, qui pueros ex damni pœnâ internum dolorem experiri censet, non animadvertit Gregorium sibi non favere?

D. Ambrosius in cap. 5 epist. ad Romanos ait : « Est et alia mors, quæ secunda dicitur, quam non peccato Adæ patimur, sed ejus occasione propriis peccatis acquiritur; » sed mors secunda est gehennæ supplicium; ergo. Resp. ipsum Bellarminum citato libro 6, cap. 4, meritò suspicari Ambrosium non esse auctorem commentariorum in epistolas D. Pauli; *Ambrosio enim, inquit P. Alexander in hist. seculi 4, ab eruditis omnibus abjudicantur*. Non pauci, reclamante tamen erudito Petavio lib. 1 de ecclesiasticâ Hierarchiâ cap. 12, eos adscribunt Hilario Sardo romanæ Ecclesiæ diacono, quem D. Hieronymus dialogo adversus Luciferianos *Deucalionem orbis* nuncupavit, eo quod esset Luciferianorum antesignanus, et Rebaptizantium errore imbutus. D. tamen Augustinus ipsum *sanctum* vocat, quia Sedi apostolicæ reconciliatus in Ecclesiæ unitate obiit, laudatque ejus commentarium in caput 5 ad Romanos super existentia peccati originalis, sed non super pœnâ ipsi destinatâ. Jansenius Yprensis lib. 7 de hæresi pelagianâ, cap. 4, cui plures eruditi assentiuntur, inter quos Conrius et Norisius Vindic. cap. 3, paragrapho 5, sentiunt et probare aggrediuntur, præfatos commentarios Pelagianorum sententiis passim inspersos esse; qui aliter sentiunt, ut P. Alexander et alii, fatentur aliqua in iis esse dicta paulò durius, et

quæ, si per se sola spectentur, hanc ingenerare suspicionem possunt, quæ idèò volunt benignâ interpretatione mollienda esse, quemadmodum molliiri solent in D. Chrysostomo, et quibusdam aliis patribus græcis, qui antè pelagianam hæresim scripserunt. Quidquid sit, quod iste auctor hic dicit pœnam sensûs à Deo peccato originali non rependi, hæreticum non est et pelagianum (nisi intenderit mortem secundam, quæ est in gehennâ, à primo parente in posteros non traduci, sive pœnam gehennæ non esse in præsentī statu effectum Adæ peccati), sed non est verum, ut abunde constat ex dictis, talisque viri auctoritas nullam ipsi probabilitatem inducere potest.

Gregorius Nyssenus oratione 1, dicit parvulos sine baptismo mortuos neque in doloribus ac mœstitiâ esse; ergo. — Resp. 1^o hoc adversariis ipsis exponendum esse qui, ut diximus, sentiunt illos pueros interno dolore ac tristitiâ affici. — Resp. 2^o D. Gregorium huic sententiæ tam parùm patrocinari, ut subtilis Bellarminus eum pro suâ opinione non protulerit. Etverò, S. doctor in hac oratione ingenuè fatetur controversiam de illis parvulis sibi videri *difficilem ac perplexam*, et quædam ibidem inducit dubia quæ manifestè ostendunt ipsum in eâ parùm omninò versatum esse; declarat enim se nescire, an *illa quæque anima* (parvulorum) *iudicem visura sit, et tribunali cum aliis sistenda sit* ? etc.

Innocentius III, doctissimus pontifex, lib. 5 Decretalium, titulo de baptismo, cap. *Majores*, scribit: *Pœna originalis peccati est carentia visionis Dei; actualis verò pœna peccati est gehennæ perpetuæ cruciatus*; ibi per *gehennæ cruciatum* intelligit S. P. pœnam sensibilem quæ opponitur pœnæ damni, idèòque non originali, sed actuali tantùm peccato debetur pœna sensûs. — Resp. adversarios inaniter exultare in objiciendâ tanti pontificis auctoritate. Etenim sermone 1 de omnibus Sanctis, cujus fragmentum refert Sylvius in 1-2, q. 85, a. 6, quæsito 2, recensens tria loca, in quibus sunt homines post hanc vitam, *supremum nempe, sive coelum, in quo sunt summè boni, et infimum, sive infernum, in quo sunt summè mali, id est damnati, et medium, sive purgatorium*, addit: *Qui sunt in inferno* (damnati nempe)..... *pertinent ad exercitum diaboli, quibus tandem dicitur: Ite in ignem æternum, qui paratus est diabolo*, etc. Ex quibus hoc scaturit argumentum: Quicumque peccato originali, etiam solo, coinquinati moriuntur, sunt in inferno; damnati enim sunt,

et juxta pontificem omnes damnati sunt in inferno; at omnes qui sunt in inferno, sunt in igne; nam dicente Innocentio, *pertinent ad exercitum diaboli*, et ipsis dicitur: *Ite in ignem æternum*, etc. ergo, etc. — Quamobrem sicut pontifex dicendo *actualis culpæ pœnam esse gehennæ cruciatum in inferno*, non exclusit pœnam damni, quia non adhibuit particulam exclusivam, *tantum, solum*, ita dicendo pœnam originalis peccati esse carentiam visionis Dei, non exclusit pœnam sensûs, quia eandem particulam exclusivam non inseruit. Vult scilicet S. P. peccato originali, utpote peccato per quod homo non propriâ voluntate, sed alienâ nascitur aversus à Deo, præcipuè et directè deberi carentiam visionis Dei; actuali è converso culpæ, per quam homo propriâ voluntate recessit à Deo, directè et præcipuè convenire sensûs pœnam. Cæterùm non audiendus est Bellarminus cùm hic dicit, Patres, ubi asserunt *parvulos æternis pœnis in gehennâ torqueri, gehennæ cruciatum accepisse pro genere infernorum pœnarum*, ita ut de solâ damni pœnâ locuti sint, aut saltem loqui potuerint; constat enim ex dictis Patres per hunc cruciatum intellexisse pœnam sensûs, cùm expressè dicant parvulos esse *in igne æterno, per ignem comburi*, etc.

Hic autem obiter observa quòd etiamsi Gregorius Nazianzenus, Nyssenus, aut alii quidam Græci, vel etiam Latini ante exortam pelagianam hæresim adversariorum sententiæ favissent, nostra nullum inde detrimentum pati posset; respondere nimirùm nihil vetaret quod olim respondit D. Aug. Massiliensibus, qui prætendebant antiquos Patres alios ab Augustino circa hominum prædestinationem sensus animo volvisse; *quid*, inquit lib. de prædestinatione Sanctorum, cap. 14, n. 27, *opus est ut eorum scrutemur opuscula, qui priusquàm ista hæresis nasceretur, non habuerunt necessitatem in hac difficili ad solvendum questione versari? Quod procul dubio facerent* (Massilienses) *si respondere talibus cogerentur. Unde factum est ut de gratiâ Dei* (diceremus de infantium pœnis) *quid sentirent, breviter quibusdam scriptorum suorum locis et transeunter attingerent; immorarentur verò in eis, quæ adversus inimicos Ecclesiæ disputabant.*

Objiciunt 3^o alii (hæc enim proponere erubisset eruditus Bellarminus) mox adducendos doctores. D. Ambrosius lib. 2 de Abraham cap. ultimo de infantibus sine baptismo morientibus hæc habet: *Habeant tamen illam opertam pœnarum immunitatem, nescio an habeant regni hono-*

rem; ergo. — Resp. : Nego consequ. 1^o Enim loquitur Ambrosius de *opertâ*, sive occultâ, *pœnarum immunitate*, quod evincit ipsum nescivisse quamnam pœnarum immunitatem habeant. 2^o Verbum, *habeant*, significat hæc dicere S. doctorem per modum puræ concessionis non assertionis. 3^o Verba, *nescio an habeant regni honorem*, si ad litteram sumerentur, ostenderent in dubium vocari posse Christi oraculum Joannis cap. 3 : *Nisi quis renatus fuerit*, etc. quod ipso loco obiecto negat S. doctor : *nisi*, inquit, *quis renatus fuerit ex aquâ et Spiritu sancto, non potest introire in regnum Dei*; atque nullum excipit, non infantem, non aliquâ præventum necessitate. 4^o Ex mox citatis verbis elucet Ambrosium loqui non solum de infantibus, sed etiam de adultis qui per necessitatem baptismo non abluuntur; at nemo dixerit eos habere pœnarum immunitatem; sensus igitur Ambrosianæ propositionis iste est : *Etsi concederetur tales* (infantes et aliquâ præventos necessitate) *habere opertam aliquam pœnarum immunitatem, non tamen assero illos habere regni honorem*; noluit nempe iterum asserere quod ibidem asseruerat : *Nemo ascendit in regnum cœlorum nisi per sacramentum baptismi*.

D. Gregorius Magnus lib. 15 Moralium, cap. 21, innuit pœnam originalis peccati esse *speciem Creatoris non videre, priorum verò actuum pœnam supplicium pati*. — Resp. ex contextu evidens esse Gregorium disserere de veteris fœderis sanctis, qui in pœnam peccati originalis, etiamsi ejus remissionem obtinuissent, in inferno detinebantur, nec ideò speciem Creatoris videre poterant, quod tedium ipsis afferebat, quamvis *ex propriis actibus supplicium non haberent*, quia nempe justi erant. Quid autem illud habet connexionis cum præsentis controversiâ in quâ agitur de peccato originali non remisso, quod *perpetuis tormentis obnoxium* asserit lib. 9 Moralium, cap. 16, ut ostendimus.

D. Bernardus sermone 3 de resurrectione Domini litt. B, c. 4, ait : *Cesset voluntas propria, et infernus non erit. In quem enim ignis ille deserviet, nisi in propriam voluntatem?* At parvuli propriâ voluntate non peccaverunt; ergo. — Resp. 1^o inde inferri posse parvulos nullâ prorsus pœnâ puniri; ibidem enim dicit : *Quid odit aut punit Deus præter propriam voluntatem?* Neque eos esse damnandos, sive in inferno esse futuros; *cesset propria voluntas, et infernus non erit*; falsum consequ. ergo. Resp. 2^o manifestum esse ex toto sermonis tenore S. doctorem allo-

qui adultos baptizatos, quos in infernum nihil præcipitare nequit nisi culpa propria, id est personali voluntate commissa. Resp. 3^o Bernardum ibidem explicare quid intelligat per *voluntatem propriam*, eam scilicet, *quæ non est communis cum Deo et hominibus, sed nostra tantum, quando quod volumus non ad honorem Dei facimus.... cui contraria est charitas*. Porro, licet pueri nihil personali voluntate fecerint, aliquid tamen fecerunt voluntate propriâ, id est Deo et charitati oppositâ, cum in Adam peccaverint.

MOMENTUM TERTIUM. — *Ex Ecclesiæ sensu in conciliis manifestato*. — Nemo negaverit concilium Diospolitanum habitum anno 415, et varias synodos Africæ, nempe duas Carthaginenses, Milevitana, etc., et S. P. Innocentium I, Pelagianos asserentes pueros baptizatos non regeneratos, si è vitâ exirent, vitam æternam extra regnum cœlorum consequi, anathemate confixisse; præterquàm quòd enim id ex ecclesiasticis annalibus constat, hæc invenire est apud D. Augustinum epistolis nunc 175, aliàs 90, 176, aliàs 92, 177, aliàs 95, etc.

Unde sic arguimus : Si Pelagiani per æternam vitam, quam illis pueris pollicebantur extra regnum cœlorum, claram Dei visionem non intellexerunt, sed secundum quamdam felicitatem minorem eâ quâ potiebantur sancti in regno cœlorum, per quam infantes per totam æternitatem à cruciatibus immunes essent futuri, Ecclesia definiit illos parvulos fructuos non esse felicitate æternorum cruciatuum experte; damnavit enim pelagianum dogma; atque Pelagiani per æternam vitam suam secundam istam felicitatem intellexerunt; enimverò per æternam vitam eam intellexerunt vitam quæ opponitur morti secundæ, id est, inquit D. Fulgentius lib. 1 ad Monimum cap. 6, post D. Augustinum, morti quæ consistit in *æternâ cruciatione animæ et corporis*, sed vita æterna isti morti opposita, est vita expers cruciatuum animæ et corporis; ergo. — Probat major 1^o ex D. Augustino, qui epistolâ 186 ad Paulinum, aliàs 106, cap. 8, n. 30, ex Pelagianorum sententiâ pueris non regeneratis vitam negante concludit eos æternâ pœnâ puniri : *Quis, inquit, negat aut dubitat parvulos non acceptâ gratiâ regenerationis... non habere in se vitam, ac per hoc sempiternæ pœnæ esse obnoxios?* Idem lib. 2 Operis Imperfecti, cap. 115, dicit Pelagianos *facere duas æternas felicitates, unam quæ sit in regno Dei, alteram, quæ sit extra regnum Dei*; sed felicitas regni Dei indubiè erat intuitiva

Dei visio; ergo felicitas extra Dei regnum erat alterius generis felicitas, ea nempe quam descripsimus;... 2° Ex eodem Augustino variisque conciliis, ex quibus constat Pelagianos admisisse medium quemdam locum, inter regnum cælorum et infernum, in quo beatè viverent infantes, et ob id damnatos fuisse; at felicitas mediæ illius loci erat felicitas expers felicitatis *regni Dei*, et pœnarum inferni, quod aliunde satis indicant voces, *regnum Dei*; significant enim eos quibus sese intimè inserit Deus, et qui *vident Deum sicuti est*; ergo.

His conciliis adjungimus concilium Florentinum, quod, inquit P. Alexander in hist. 15 sæculi, *ratione saltem dogmatum ab eo finitorum, æcumenicum totius Ecclesiæ catholicæ consensu prædicatur*. In decreto unionis Latinorum et Græcorum, edito 6 Julii anni 1459, utriusque Ecclesiæ præsules can. 4, definierunt, *illorum animas, qui in actuali mortali peccato, vel solo originali decedunt, mox in infernum descendere, pœnis tamen disparibus puniendas*. Porro, ut optimè arguit doctissimus Petavius lib. 9 de Prædestinatione cap. 10, n. 12, concilium hic definit, eorum animas, qui cum solo peccato originali pereunt, iisdem in inferno addici pœnis quibus eorum animæ, qui cum actuali peccato moriuntur in eodem inferno plectuntur, et ideò eadem ignis combustionem, quoad speciem, sive naturam et qualitatem, etsi non eadem quoad gradum, sive intensiorem. Enimverò *disparitas pœnarum*, de quâ S. synodus, est disparitas gradus, sive intensiorem, non speciei. Sicut enim concilium, cum ibidem finit inter Beatos alium alio pro meritum diversitate Deum clariùs videre, intendit tamen omnes Deum videre quoad speciem, ita cum statuit decedentes in actuali, aut solo originali peccato in inferno disparibus pœnis affici, vult tamen eos iisdem concremationis pœnis quoad speciem affici; vocem enim, *disparibus*, non adhibuit nisi ut quod antea de Beatis dixerat, nempe illos alium alio perfectiùs, sive intensiùs, Deum videre, non repeteret.

MOMENTUM QUARTUM. — *Ex theologorum suffragiis*. — Theologi parvulos sine baptismo mortuos sensus pœnæ non subicientes omnes ferè scholasticos, qui à duodecimo sæculo floruerunt, non sine ostentatione obijciunt, et adversarios irridunt, quòd obsoletam opinionem in vigorem reducere aggrediantur. Verùm quæ dicturi sumus eorum risum omninò sardonium esse reputandum patefacient. Etenim

1° Ex theologorum, quos hic obijciunt, albo

expungendi sanè sunt quotquot inter eos pueros in superiore terræ parte, quasi in terrestri paradiso collocaverunt, ut loquitur antea citatus Bellarminus, eosque felices ac beatos esse futuros cum Pelagianis obgannierunt. At multi inter antiquos, ac etiam nonnulli inter recentiores hoc errore inbuti sunt, ut non diffictum ipse Bellarminus.

2° Ejusdem Bellarmini loco citato, nempe lib. 6 de Amissione gratiæ et Statu peccati, cap. 5, iudicio pluris faciendi non sunt scholastici qui D. Augustinum hoc in dogmate *erroris et excessus* accusare ausi sunt. Sed plurimos recentiores hanc in accusationem prorupisse exploratum est; quinimò non pauci veteres, v. g. Scotus, Richardus, Major, Capreolus, hanc præmiserant cantilenam; notum etiam est ipsum S. Bonaventuram occasione hujus D. Augustini placiti dixisse, *plus dixit minus volens intelligi*, quod pronuntiatum velut oraculum evulgaverunt quicumque ex recentioribus in D. Augustinum ejusque doctrinam parùm pro-pensi sunt.

3° Contemnendi veniunt apud omnes sapientes et cordatos viros quicumque hoc celebris Vasquesii placitum colunt et mirantur: *Negare non possumus prædictam opinionem* (de sensibilibus parvulorum pœnis) *fuisse Augustini et Fulgentii, à quâ non multum abhorret Gregorius Magnus*. Etenim Bellarminus mox laudatus concedit illam sententiam, si fuit Augustini, veram esse et propugnandam, et aliunde quis theologicis imbutus principiis istorum recentiorum opinionem præhabuerit sententiæ D. Augustini et aliorum quos excitavit Deus ad veram doctrinam de peccato originali et gratiâ exponendam, et vindicandam?

4° Si ipsorum Patrum suffragium sentiendi necessitatem non inducit nisi quando est unanime, à fortiori theologorum consensus multi roboris non erit nisi quando concors erit et constans; at quantæ circa præsentem controversiam inter scholasticos lites et discordiæ? Alii pueros eximunt ab omni dolore, etiam interno, alii eos huic mœrori subijciunt, alii eos naturali quâdam felicitate donant, alii illos eâ beatitudine destituunt, alii eos in inferno collocant, alii eos extra infernum reponunt, alii D. Augustini tribunal in hac causâ agnoscunt, alii illud rejiciunt, etc. Igitur inter ingentem scholasticorum cohortem, qui parvulos sacris aquis non ablutos ante mortem pœnâ sensus affici inciantur, permulti non sunt qui hanc sententiam sub eodem respectu

defendant, v. g., eo sensu quo à Bellarmino probabilior existimatur; è converso theologi qui adversam opinionem tuerentur, secum invicem omninò consentiunt, et scholasticos ex adverso decertantes eodem modo, et iisdem armis, numero, et fortassis eruditione, indubiè superant. Plures sanè magni nominis et in lectione S. Augustini versatissimos, cujuslibet scholæ ordines recenset Norisius Vindic. cap. 5, paragrapho 5, in 4^o argumento, et Sylvius in 1-2, q. 85, a. 5, quæsito 2. His addi possunt inter antiquos Guillelmus Estius, ejus nota est eruditio, in 2 Sententiarum, distinctione 55, paragrapho 8, ubi rationes pro utrâque opinione militantes ita librat, ut non obscure innuat standum esse D. Augustini sententiæ, etc. Inter recentiores Franciscus Sylvius loco citato ubi doctè et solidè Augustinianam sententiam vindicat, Dionysius Petavius lib. 9 de Prædestinatione cap. 10, n. 7 et seq., ubi eandem sententiam non solum Augustino et aliis Patribus, sed etiam ipsi concilio Florentino adscribit, ut diximus, Gaspardus Jueninus, etc. Verùm, demus adversum dogma æquali, aut etiam majori theologorum calculo comprobari, non idcirco nostrum minus probabile censendum erit. Etenim « theologorum scholasticorum, inquit Melchior Canus, lib. 8 de Locis cap. 4, etiam multorum suffragium, si alii contra pugnant viri docti, non plus valet ad faciendam fidem, quàm vel ratio ipsorum, vel gravior etiam auctoritas comprobabit. Videlicet in scholasticâ disputatione plurium auctoritas theologum obruere non debet; sed si paucos viros modò graves secum habet, poterit sanè adversus plurimos stare; non enim hæc numero judicantur, sed pondere. » Porro nemo, opinor, negaverit in præsentì controversiâ doctos viros pugnare contra multos. Istorum ergo auctoritas non plus valet quàm ratio ipsorum, aut gravior auctoritas quam opponunt; at graviorem sanè non opponunt auctoritatem, cum sacris Scripturis, D. Augustino, et veterum conciliorum, et etiam recentiorum oraculis contradicere videantur, ut ostendimus, nec maximi roboris rationibus nituntur, ut mox probabimus; ergo.

Hic fortassis quæret quis cur tanta scholasticorum multitudo à duodecimo seculo, id est veluti ab initio scholæ, in commemoratam opinionem, quæ Scripturæ et Patribus tam adversa videtur, ierit? Reponit Norisius loco citato id contigisse ex eo quòd « veteres illi summa ingenia scholæ subtilitatibus devove-

rant, plusque studii et laboris in explicando Aristotele impenderant, quàm in Patrum et synodorum voluminibus evolvendis; » ego verò, etsi hanc rationem non improbo, quam aliunde confirmat P. Alexander in Hist. ecclesiasticâ, ubi ostendit ipsum scholæ principem Patrum opera parùm legisse, censeo tamen hanc sentiendi rationem oriri potuisse tum ex doctrinâ vetusti auctoris Commentariorum in epistolas D. Pauli, quem illi D. Ambrosium esse existimabant, tum ex clementiæ erga parvulos, qui nihil propriâ voluntate peccaverant, affectu et propensione, cum demùm ex argumentis quæ in gratiam hujus opinionis suppeditare videbatur ratio. Quidquid sit, D. Thomas qui eandem sententiam junior amplexus fuerat in 2 Sent. distinct. 35, a. 4, eam senior in Summâ non confirmavit, nempe ubi de peccato originali disseruit 1-2, q. 81 et seq.; quod probare videtur ipsum tandem detexisse illam Scripturæ et Patribus repugnare.

MOMENTUM QUINTUM. — *Ex rationibus theologis.* — Prima. Peccatum originale invexit in pueros immensam illam miseriarum cohortem quam à die ortus sui ad mortem usque patiuntur; quinimò iidem pueri dæmonis furori et tyrannidi non rarò subduntur, et ab eo stupendum ad mortem usque torquentur; quæ omnia indicavit Spiritus sanctus sub nomine *jugi gravis, quod incubat super filios Adam à die exitus de ventre matris eorum usque in diem sepulture*, Ecclesiastici cap. 40; ergo idem peccatum, quamdiù durabit, easdem poenas sensibiles in eosdem pueros transmittet. Patet antecedens. Prob. consequ., tum quia pœnæ illæ annexæ sunt peccato originali, tum quia per illas, quantelibet sint, non potest expiari per vitæ mortalis curriculum originalis peccati labes.

Adversarii vulgò reponunt miserias peccato originali in statu præsentì per accidens tantùm esse annexas; justitiâ nempe originali, quæ hominem ab illis miseriis ex nativâ ipsius constitutione fluentibus eximebat, per peccatum originale sublatâ, homo illis factus est obnoxius. At 1^o, quæro an tormenta, quibus infantes à dæmone affliguntur, proveniat ex eorum naturâ? 2^o Duce D. Augustino, supra ostendimus Deum creare non potuisse hominem cum præsentis statûs miseriis non quidem quoad speciem (exceptis tamen eis quæ à dæmone inferuntur), sed quoad gradum consideratis. 3^o Si miseriæ justitiæ originalis privationem in præsentì vitâ consequuntur, cur

in alterâ eadem miseriæ ejusdem innocentie privationem per accidens non comitentur, cum præsertim Deus in futurâ vitâ peccatum severius puniat quàm in præsentî? 4^o Deum propter solum originale peccatum æternas pœnas ab infantibus justò repetere posse evincit hypothesis in quâ solum Adam à morte exemptisset, eumque cum nepotibus æternum miseris obnoxium vivere voluisset.

Secunda. Apostolo dicente ad Ephesios 2, pueri vitâ maculâ contaminati sunt *iræ filii*, et ideò Deus illis iratus est et eos odio habet; sed tales pœnis etiam sensû justò addicere potest Deus: *si enim*, inquit D. Augustinus tractatu 44 in Joannem n. 4, *filii iræ, filii vindictæ, filii pœnæ, filii gehennæ*; ergo. — Respondere solent pueros esse filios *iræ, vindictæ, pœnæ*, etc. ratione pœnæ damni, quâ æternum afficientur, non pœnæ sensû quæ solum debetur peccato actuali, cujus illi rei non sunt, cum actuale Adæ peccatum in eis tantum sit habituale. Verum multa istam solutionem infirmare videntur. 1^o Enim clamante Apostolo Rom. 5: *Omnes peccaverunt in Adam*, et ideò illud idem peccatum quod commisit reipsâ commiserunt: unde D. Augustinus Pelagianis quærentibus quomodò Adæ peccatum ad ejus posteros transire potuerit, nil aliud offert quàm apostolicum oraculum, ex quo constat eos cum Adam et in Adam peccasse. At peccatum Adæ pœnam sensû subiit; ergo et in ejus posteris, originale licet, sive habituale, eandem pœnam subire potuit. 2^o Ex D. Thomâ 1-2, q. 81, a. 2, ad 4, « pœnâ corporali interdum iudicio divino, vel humano puniuntur filii pro parentibus, in quantum filius est aliquid patris secundum corpus. » Etverò filium David, licet ejus delicti non reum, ob adulterium patris rapuit Deus, qui alibi passim dicitur *visitare iniquitatem patrum in filios in tertiam et quartam generationem*; at exinde elucet à fortiori Deum posse justè infligere pœnam sensibilem parvulis primorum parentum peccato reapse coinquinatis.

Tertia. Parvuli electi propter cœlestis Adæ, sive Christi, merita in alterâ vitâ gloriosis corporis dotibus exornabuntur: ergo parvuli reprobi ob terrestres Adæ demerita in aliâ vitâ malis corporis subjiciuntur; quæ paritas eò majoris est ponderis quòd, ut arguit D. August. adversus Julianum lib. 6, cap. 10, n. 29, quemadmodum *parvuli de alieno rectò facto reportant bonum* (cum in baptismo credunt per alterum), ita *de alieno peccato reportant malum*. Nihilominus paritatem elevare conantur,

quia summè bonus Deus potest corporis bona iis impertire qui per corporis ministerium iis obtinendis operam non impenderunt; è converso, non potest sine injustitiâ mala corporis iis rependere qui per idem corpus nunquam peccaverunt. cum imprimis pœna sensû ad corporis vitiosas delectationes præcipue referatur. Verum hæc solutio facile exsufflatur. Nam, licet pueri corpore non peccaverint, possunt tamen non secus ac dæmones, qui hoc modo non deliquerunt, sensibili pœnâ affici, idque eò magis quòd omni ex parte incurrerint reatum Adæ peccati cui, ubi pœnam comedit, annexa fuit sensû delectatio. Deinde, quis non videt Deum in alterâ vitâ habere ut filios diaboli qui sine baptismo, ut filios è converso Christi qui cum baptismo è vitâ exierunt, et ideò velle ut illi sub diabolo mala corporis experiantur, quemadmodum isti sub Christo bona corporis recipiunt?

Objiciunt 1^o, cum Bellarmino. Peccatum originis non aufert ordinem naturalem, sed supernaturalem, id est conversionem habituales ad Deum per donum gratiæ sanctificantis, cum peccatum illud nihil aliud sit quàm privatio originalis justitiæ; pœna ergo ipsi debita nihil aliud esse potest quàm privatio boni supernaturalis, qualis est carentia Dei visionis, non illatio pœnæ sensibilis, quæ ipsam vulnerat naturam. — Resp. 1^o: Retorqueo argum. Peccatum actuale non tollit ordinem naturæ, sed spoliât duntaxat gratiâ sanctificante; ergo pœna sensû ipsi infligi non debet. Resp. 2^o mirum esse adversarios, qui D. Thomam hic suum esse gloriantur, ipsum tam citò deserere. Docet enim 1-2, q. 71, a. 6, ad 4, et alibi, quodlibet verum peccatum esse *contra naturam*, quia inordinationem essentialiter involvit. Deinde peccatum originale, ut diximus, hominem diaboli servum facit; an talis servitus ordinem naturalem non tollit? Præterea certum non est, ut antea ostendimus, peccatum originale consistere in unicâ privatione justitiæ originalis, et aliunde quomodò privatio gratiæ potest esse pœna peccati? Pœna enim peccati oritur à Deo, non peccatum, quod adversarii formaliter constituunt in privatione gratiæ. Tandem per peccatum Deus, cujus majestas est infinita, offenditur; sed ad reparationem talis injuriæ non sufficit privatio doni olim liberaliter collati, sed alia quoque pœna requiritur; ut demonstrat exemplum regis adversus quem conjuraverunt subditi.

Objiciunt 2^o, cum eodem. Qui habitualiter

caret virtutibus, et proclivis est ad vitia, puniri nequit poenâ sensûs ; an enim puniuntur à magistratibus qui habitûs justitiæ sunt expertes, vel proni sunt ad homicidia, etc., si nullum crimen reipsâ committant ? Sed parvulorum peccatum est duntaxat habituale, et habitualiter tantum proni sunt ad concupiscendum. — Resp. 1^o argumentum nimis probare ; magistratus enim dispositiones ad vitia, etiam voluntarias, nullâ prorsus poenâ mulcant. Resp. 2^o : Neg. majorem ; dispositiones enim ad vitia, et habitualis carentia virtutum, si voluntariæ sint, et ideò propriè dicta peccata, merentur etiam poenam sensibilem ex parte Dei cujus oculis omnia nuda sunt et aperta, quique corda scrutatur ; pueri autem in Adamo hæc voluerunt, cum in eo verè peccaverint, et ad verum peccatum voluntarium essentialiter requiratur. Quod attinet ad magistratus, judicant duntaxat de externis, et ideò poenas hujusmodi dispositionibus, etiam liberè volitis, inferre non possunt. Respondeo tandem peccatum originale involvere non tantum carentiam virtutum et pronitatem ad vitia, sed insuper aversionem habitualement à Deo, eamque voluntariam, quæ eos Dei inimicos efficit et ideò poenâ sensûs dignos.

Objiciunt 3^o, eum eodem. Baptizandis ob avitum delictum nulla præcipitur satisfactio, nullus de illo peccato dolor ; cur, nisi quia ut peccata actualia poenâ sensibili dignum non est ? Resp. 1^o plurimos ex adversariis, et speciatim Bellarminum, fateri parvulos ex amissione cœlestis beatudinis internum animi dolorem percipere ; argumentum igitur nimis probat. Resp. 2^o : Esto ant., nego consequ. Innumeræ scilicet præsentis vitæ miseriæ oriuntur ex originali peccato, et cum divinâ opitulante gratiâ pro illo delicto sint sustinendæ, frustra sanè altera poena hominibus hujus maculæ reis infligeretur. Resp. 3^o adversarios dum à baptizandis omnem poenitentiae et doloris sensum ob peccatum originale amoveant, sese in Augustini lectione parum versatos prodere. Et enim hunc dolorem propter illud peccatum passim inspirare nititur. *Corripiatur*, inquit lib. de Correctione et gratiâ cap. 6, n. 9 (ubi ostendit quomodo peccatum originale alienum sit et nostrum) *origo damnabilis, ut ex dolore correctionis voluntas regenerationis oriatur*, etc. Idem ante docuerat lib. 1 de peccat. meritibus et remissione cap. 19, n. 25, ubi tradit infantes ut *fideles ita et poenitentes* nuncupari ; quantò magis adultis ad baptismum accedentibus poenitentia conveniet !

Objiciunt 4^o : Divinæ bonitati minimè congruit, ut parvuli qui non propriâ sed alienâ voluntate peccaverunt, æternam ignis combustionem patiantur ; ergo. — Resp. 1^o argumentum nimis probare ; suaderet enim æternis poenis addici non posse hominem ob unicum perversum desiderium quod illicò dissipatum est ; hoc enim divinam bonitatem decere non videtur ; consequens fidei catholicæ repugnat ; ergo. Resp. 2^o Julianum similem objectionem proposuisse D. Augustino lib. 5 Operis Imperfecti cap. 13, cui reponit S. doctor audiendas hic non esse *humanas ratiocinationes*, et aliunde ipsum et Pelagianos multa alia credere et fateri cogi quæ dura videntur, et divinæ bonitati contraria. Et verò hæc et similia argumenta eò tendunt ut elevetur peccatum originale, et ideò corrumpunt solutionibus quibus incredulorum momenta supra amovimus.

Objiciunt 5^o, cum Vasquesio, Gonet, etc. : Poena irrogari non debet nisi peccato vituperatione ac reprehensione digno ; at tale non est peccatum originale ; illud enim solum peccatum vituperio ac reprehensione dignum est quod vitari potuit, ex Aristotele, et etiam D. Augustino lib. citato de duabus animabus cap. undecimo ; sed Adæ posterius peccatum originis vitare non potuerunt ; ergo. — Resp. mirum profectò videri debere Vasquesium, Gonetum aliosque viros eruditos, et catholicæ fidei observantissimos, hic recurrere ad argumentum olim Augustino objectum ab infensissimis peccati originalis et gratiæ hostibus, et hodiè adversus idem dogma ab incredulis contorquetur, quod aliunde solvit S. Aug. mox citato libro de Correp. et Gratiâ, cap. 6. Cæterum docet fides Deum pueris, cum nascuntur, iratum esse, eosdem pueros esse *vasa contumeliæ*, etc. Et ideò eos esse dignos vituperio et reprehensione ob peccatum quod in primo parente commiserunt, quodque, ut diximus, suo modo liberum fuit.

PRINCIPIA SOLUTIONUM. — Primum. Poena puerorum in inferno erit, ut loquitur D. Aug. Enchiridion cap. 95, *omnium mitissima*, et ideò ignis tartareus eos quâdam afficiet molestiâ, sed non comburet.

Secundum. Intolerabilis videtur nobilissimorum scholasticorum opinio omnem tristitiam à pueris ex damni poenâ enascentem removens ; vel etiam omnem ipsis gloriæ æternæ notitiam eripiens. Pelagianos quippe hæc sentientes, primum præsertim, durè increpavit D. Aug. ut fusè et eruditè probat Norisius,

Vind. cap. 5, paragrapho 5. Unde Bellarminus et multi recentiores hanc improbaverunt opinionem.

Tertium. *Humanae ratiocinationes*, ut iterum Augustini verbis utar, hic audiendæ non sunt; è medio quippe tollerent, aut saltem multum labefactarent peccati originalis dogma, et ideò viros catholicæ fidei cultores omninò dedecent.

Quartum. Præ oculis habe ingenuam tum Bellarmini confessionem, hæc in causâ Augustinum *excessis* accusari non posse, sed potius scholasticos, qui hoc crimen Augustino impeerunt, cum Vasquesii, Augustinum, Fulgentium, Gregorium Magnum reipsâ stare pro sensibili puerorum penâ; exinde enim duo insignes viri in discordiam abeunt, et magnam nostræ sententiæ probabilitatem accersunt.

Quintum. Quilibet æquus æstimator sibi facile persuadebit hæc in controversiâ iis potius inhærendum esse Patribus qui ex professo adversus Pelagianos eam tractaverunt (quales sunt S. Augustinus et alii quos laudavimus), quàm illis qui illam obiter et transitoriè et ante exortam pelagianam hæresim delibaverunt (quales sunt adversariorum doctores).

Sextum. Consuetæ adversariorum responsiones, *infantes multi in ignem æternum hoc sensu quod detrudantur in locum ubi erit ignis æternus*, Origenistis circa poenarum æternitatem auxiliarem ferunt opem.... Item *Patres dicendo pueros in ignem ituros esse, genericam, non specificam, eorum poenam tetigisse, etc.*, ignis inferni, aut purgatorii, realitatem tollunt, aut conentiant, etc.

Septimum. Patres qui pueros *penâ damni* afficiunt non excludunt poenam ignis, cum in præsentî statu qui non ibunt in *regnum cælorum* ituri sint in *ignem æternum*.

Sententia de sensibili puerorum sine baptismo morientium poenâ perverso Jansenii systemati non favet. — Jansenius in suo Augustino, ejusque pestiferi dogmatis assertores, in suis scriptis sententiam de puerorum sine baptismo decedentium sensibilibus suppliciis ventitant et ostentant, ut evincant Deum justè infligere posse ignis poenam adultis pro peccatis ab ipsis necessariè commissis. Distinguunt scilicet duplex peccatum, unum quod est *peccatum tantum*, sive *simpliciter* (quale fuit actuale Adæ peccatum in paradiso); alterum quod est *peccatum*

simul et poenâ peccati (quale fuit actuale peccatum Adæ è paradiso expulsi; qualia sunt actualia delicta præsentis statûs). Primum fuisse liberrimum et ideò nullâ prorsùs verâ et simplice necessitate commissum fuisse, vel committi potuisse utrò latentur; non ita secundum quod liberum est non in se quidem (in theologorum sensu), sed in Adamo, in quo omnes peccaverunt, et ideò quidquid Adæ peccato inductum est liberè voluerunt, ac proinde relativam necessitatem ad bonum aut malum prout delectatio cælestis aut terrestris præponderat; cum autem catholici theologi ipsis exprobrant Deum in hoc systemate injustum esse futurum, utpote qui adultos æternis suppliciis pro peccatis necessariè commissis condemnaret, ut hanc objectionem utcumque diluant, adducunt exemplum puerorum qui pro originali peccato in Adam necessariè patrato sempiterni ignis supplicio à Deo justè damnantur; hoc autem paritatis argumentum vanum esse et caducum sic ostendimus.

1º Jansenius et ejus sectatores negare non possunt adultos baptizatos vel in uno peccato mortali vitam finientes gravem ignis æterni combustionem subire; è converso, D. Augustinus docet, et quidem constanter, infantulos è seculo sine sacris undis migrantes *omnium mitissimam poenam* experiri, ut diximus, non aliâ indubiè ex causâ quàm quòd peccatum quod in Adam commiserunt, non fuit tam liberum quàm actuale adultorum peccatum.

2º Constat peccatum originale per baptismum adultis remissum esse; non minùs certum est in eis per Adæ crimen non periisse liberum arbitrium, ut in secundâ parte demonstrabimus, licet *attenuatum* fuerit et *inclinat*, ut definiit concilium Tridentinum; at inde elucescit peccatum adultorum, ita esse *peccatum et poenam peccati*, ut nullâ prorsùs necessitate fiat, et peccatum originale non posse, saltem ratione culpæ, in eorundem adultorum damnationem influere, et ideò Deum justum non posse eosdem æterno ignis supplicio addicere pro peccatis quæ necessariè commisissent.

3º Peccatum personale necessariè liberum est in se vel in causâ *propriâ voluntate volitâ*, aliàs non esset personale, sive personæ sui juris; sed adultorum peccata sunt personalia, ut passim clamat D. Augustinus; ergo.

Pars secunda.

IDE COELESTIS ADAM, SIVE CHRISTI, GRATIA.

GENERALIS PARTITIO.

Ut eliminentur fastidiosæ retractationes, quibus doctorum scholasticorum, etiam recentiorum, de gratiâ disputationes vulgò onerantur, hic Tractatus quatuor absolvetur libris. Primus disseret de gratiæ necessitate, et ideò extantiâ (si enim gratia homini necessaria est indubiè existit).... Secundus de gratiâ sufficiente.... Tertius de gratiâ efficaci.... Quartus de præcipuis gratiæ effectibus.

Quoniam autem, quod à Platone priùs, et Aristotele, traditum præcipit Cicero, omnem institutionem, quæ de re quâcumque suscipitur, debere à definitione proficisci, ut intelligatur quid sit id de quo disseritur, idcirco priusquàm primum librum inchoo, duas de essentiâ gratiæ è vulgatis ejus divisionibus quæstionem præmittam.

Quæstio proœmialis prima.

DE GRATIÆ ESSENTIA.

Gratia, inquit D. Aug. lib. de Naturâ et Gratiâ cap. 4, n. 4, Apostolo præeunte (Rom. cap. 11, v. 6), *gratia nominatur quia gratis datur*. Gratis autem dari censetur quod datur citra dantis debitum, et jus accipientis.

Spiritus sanctus gratiæ nomen multiplici sensu suis in oraculis usurpavit, licet prævideret Pelagium et alios hujus vocabuli latibula dolosè ingressuros esse ad erroris sui venenum obtegendum et faciliùs propinandum. Etenim accipitur pro amore et benevolentia, qui fons est et origo bonorum quibus Deus justos homines cumulare dignatur, Genesis cap. 6, v. 8, Lucæ 1, v. 30... Item pro beneficio ex amore gratis impenso, Joannis 1, v. 16, etiamsi illud beneficium naturalis sit ordinis. Rationem affert D. Aug. epist. 177, aliàs 95, ad Innocentium, n. 7; hæc enim bona non præcedentium aliorum bonorum operum meritis, sed gratuita Dei bonitate donata sunt. Talia sunt dona creationis, corporis et animæ dotes, etc.... Item pro grati animi testificatione in beneficii largitorem, lib. 2 Regum cap. 2, v. 6.... Demùm

pro dono naturæ gratis adveniente, quod ad æternam salutem per se pertinet, et conducit, Rom. cap. 5, v. 24, et alibi passim.

Gratiæ nomen ultimo sensu, qui solus strictus est et proprius, in toto hoc tractatu accipiemus. Nunc quæritur quænam legitima sit gratiæ sic inspectæ definitio, sive potius descriptio.

CONCLUSIO. — Gratia stricto sumpta sensu, id est quatenus denotat beneficium supernaturale gratuitum, abstrahendo an oriatur ex Christi meritis vel non, definienda, sive describenda est : *Donum supernaturale creatum creaturæ intellectuali gratis à Deo imperitum propter æternam salutem*; si verò Christi meritorum ratio habeatur, et ideò gratia spectetur quatenus gratia Salvatoris, erit describenda : *Donum supernaturale creatum naturæ rationali gratis à Deo infusum intuitu meritorum Christi propter æternam salutem*.

Probatur et explicatur definitio. — 1^o Dicitur, *donum*, quod nomen genus exprimit quo supernaturalis gratia convenit cum gratiâ naturalis ordinis. Etverò, gratia supernaturalis passim in Scripturis dicitur, *adjutorium, auxilium, donum*, etc. In ipso solo capite 5 Epistolæ ad Rom. ter *donum* appellatur. 2^o Dicitur, *donum supernaturale*, quidquid tandem hæc voce præcisè significetur, quod satis exploratè cognitum non est; illud tamen satis elucescere videtur ex cognitione naturalis doni. Istud scilicet *donum naturale* dicitur, quia creatura ex nativâ conditione illud exigit; è converso igitur *donum*, quod creatura ex naturâ suâ non exigit, non naturale, sed supra naturam, et ideò supernaturale erit; at talis est gratia, de quâ hic sermo, quæ idcirco creaturæ gratuitâ Dei bonitate accedit; unde patet gratiam hæc voce à donis naturalibus discriminari. 3^o Vocatur *donum creatum*, ad majorem explicationem, id est à Deo distinctum. Discrimen scilicet est inter dantem, et datum à dante, sive *donum dantis*; sed gratia est *donum Dei*; ergo.

Aliunde, gratia non est aliquid merè privativum, ut peccatum formaliter sumptum, sed aliquid reale et positivum animam illius, cui

conceditur, afficiens; enimverò passim referunt Scripturæ, Deum homini *dare gratiam, gratiam diffundi in cordibus hominum, per gratiam homines ad Deum converti, per gratiam auferri cor lapideum, et dari cor carneum, homines adjuvari, ad vitam æternam deduci, omnia aggredi posse, etc.*; quæ sanè aliquid animæ reipsâ intrinsicè inhærens, non aliquid merè privativum, aut animæ extrinsecum important et arguunt. Cæterum, cum Dei donum à Deo secernatur, et ideò creatum sit, hanc vocem adhibuimus ut eliminaretur error novatorum obgannientium gratiam nihil aliud esse quàm *omnipotentissimam Dei voluntatem*. 4° Dicitur, datum *creaturæ intellectuali*, quia subjectum gratiæ capax sola est creatura intellectualis, scilicet Angelus et homo.

5° Dicitur *gratis impertitum*; ubi adverbium, *gratis*, explodit 1° omne debitum ex parte dantis, sive Dei; Deus enim gratiam instillat quia vult, et ideò ad eam infundendam absolute non adstringitur: *cujus vult miseretur*, inquit Apostolus Rom. cap. 9... 2° Explodit debitum etiam ex parte accipientis; debitum enim ex parte accipientis exurgeret aut ex meritis accipientis (et tunc esset debitum quod dici solet personæ), aut ex nativâ conditione et exigentiâ naturæ accipientis (et tunc debitum foret quod vulgò nuncupatur *naturæ*). At duplex illud debitum arcet gratia; primum quidem Apostolo dicente Rom. cap. 11: *Si gratia, jam non ex operibus; alioquin gratia jam non est gratia*; secundum verò, quia si gratia naturali hominis conditioni debita foret, non minùs homini naturalis dici posset, quàm ratiocinandi aut liberè agendi facultas, adeòque homo innocens creari non posset sine gratiâ, quod Baii et ejus defensorum dogma meritò proscripsit Ecclesia, ut postea ostendemus. 6° Dicitur, à Deo *infusum propter æternam vitam*; quæ voces indicant 1°, causam gratiæ efficientem, scilicet Deum, et ideò specialiter designant gratiam Angelis, et Adamo et Evæ primitùs concessam sine ullâ Christi meritum consideratione; 2° finalem gratiæ causam, nimirum vitam æternam ex intuitivâ Dei visione exorientem, ad quam Angelos et primos parentes insigni dilectione destinaverat Deus. Ultimò additur, *donum intuitu Christi meritum propter æternam salutem collatum*; quibus verbis depingitur gratia hominis lapsi propria, et ejus causa meritoria, scilicet Christus mediator, in quo et per quem *gratia et vita æterna*, Rom. cap. 6. v. ult.

Hæc gratiæ descriptio convenit gratiæ tum habituali, cum actuali, de quibus postea disseremus: imò supernaturalibus donis externis ad æternam salutem conferentibus, v. g., incarnationi Verbi, Christi passioni, Evangelii prædicationi, sacramentorum institutioni, etc. Hæc enim totidem sunt insignia divinæ bonitatis dona, et præclara specialis illius in homines dilectionis effecta et specimina.

De gratiâ Christi, quæ dicitur *medicinalis*, quia sanat, aut sanare potest omnes infirmitates nostras, hoc in tractatu potissimum disseremus.

COROLLARIUM PRIMUM. — Cum gratia sit donum Dei supernaturale creatum, et Thomâ dicente 1-2, q. 110, a. 2, in c., cum insignioribus ipsius expositoribus, *gratuiæ Dei voluntatis effectus*, describi nequit *omnipotens Dei voluntas*, etsi ratione principii, sive causæ efficientis, spectata, sic nuncupari potest, sicut ratione finis, sive objecti ad quod proximè conducit, dici posset *vita*, sive *beatitudo æterna*. Quamobrem, cum D. Prosper in poemate de ingratia cap. 15, et nonnulli alii Patres gratiam omnipotentem Dei voluntatem, sive dilectionem, dixerunt, causam gratiam producentem delineaverunt, Apostoli vestigiis insistentes, qui Epist. ad Ephesios cap. 1, v. 6, et alibi, Dei bonitatem, sive benevolentiam, *gratiam* appellavit. Etverò, relata gratiæ in seipsâ descriptio adversa est 1° Scripturæ asserenti gratiæ resisti, Actuum cap. 7, etc., et tamen omnipotenti Dei voluntati creaturam nunquàm resistere, Rom. cap. 9, v. 19, imò resistere non posse, Esther cap. 15, v. 9; item *gratiam esse donum, lumen, auxilium, etc.*, quo Deus movet et flectit mortalium voluntates; sed adjutorium Dei moventis et flectentis insulsè diceretur *Deus*, sive *omnipotens Dei voluntas*, sicut vis à movente corpori moto impressa insulsè diceretur *movens*... 2° D. Augustino dicenti sermone 144 de verbis Evangelii Joannis, aliàs 61 de verbis Domini, cap. 1, n. 1, *gratiam Dei domum Dei esse*... 3° Theologis, qui duce D. Thomâ 1-2, q. 115, art. 1, docent gratiam esse quid creatum in animâ realiter existens... 4° Rationi ex principiis fidei emergenti. Scilicet fide constat dari gratiam purè sufficientem; sed si gratia etiam ex parte principii spectata esset Dei voluntas *quantenus omnipotens*, exsufflaretur gratia purè sufficiens; voluntas enim Dei, quatenus omnipotens, summæ efficacæ ideam suggerit, saltem in mente novatorum; et ideò sola gratia

summè efficax sibi gratiæ rationem vindicaret; at gratia purè sufficiens non est summè efficax, cùm sola gratia efficax effectum sortiatur. Hinc Ecclesia veru suo meritò confixit hanc inter centum et unam propositionem 11: *Gratia non est aliud quàm voluntas omnipotentis Dei iubentis, et facientis quod jubet....* Item 19: *Dei gratia nihil est aliud quàm ejus omnipotens voluntas; hæc est idea quæ Deus nobis tradidit in omnibus suis Scripturis*; tandem 21, quæ idem enuntiat. Istarum assertionum auctor Jansenii doctrinæ impensè addictus eas emisit, ut probaret in statu naturæ lapsæ gratiæ interiori nunquàm resisti, imò nec resisti posse, ut ferunt Yprensæ propositiones 2 et 4, et idcirco in eodem statu nullum dari adiutorium verè sufficiens, quin simul sit efficax, ut passim loquitur idem Jansenius. Idem auctor, ut veritatis impugnatoribus gentile est, hic sibi non constat; gratiam enim vocat *lumen*, propositione 14, *unctionem*, 15, *illecebras*, 16, *vocem*, 17; sed hæc indubiè non sunt ipse Deus, sive ipsa Dei voluntas, entitativè, ut aiunt, spectata. Porro lumine considerationis gratiæ ex parte principii, ex parte termini, et in seipsà præcisè (de quâ duntaxat hic est sermo), liquescent omnes adversariorum objectiones.

COROLLARIUM II. Cùm gratia sive habitualis, sive actualis donum sit supernaturale homini ex speciali Dei amore reipsà inditum ob æternam vitam, donum illud ab extrinsecâ Spiritûs sancti erga hominem dilectione tanquàm effectus à causâ distinguitur, et ubi de habituali, sive justificante gratiâ res est, donum illud est quid fixum et permanens, ab actu distinctum, intrinsecè et realiter animæ inhærens, quidquid tandem illud sit, sive qualitas habitusve propriè dictus, sive non, quod hactenus non definivit Ecclesia, et nos ignorare proflitemur. Unde homo non fit formaliter justus extrinsecâ tantum denominatione, sive per solam externam imputationem justitiæ Christi, aut per solam peccatorum remissionem, nullo gratuito dono ipsi infuso, quo sanetur et exornetur, ut asseruerunt Protestantes in hoc Pelagianos imitati qui nullam specialem Dei gratiam agnoscebant nisi peccatorum remissionem. Istud dogma, quod sancivit concilium Trid. canone 11, quodque vindicaturi sumus quarto hujus operis libro, sic summam adstrui potest. Scripturæ testantur *Deum in justis mansionem facere*, Joannis cap. 14, v. 23, *charitatem diffundi in cordibus*, Rom. cap. 5, v.

5, *gratiam esse in nobis*, 1 ad Tim. cap. 4, v. 14, 2 ad Tim. cap. 1, v. 6, etc. *Semen Dei*, id est gratiam manere in nobis, 1 Joann. cap. 3, v. 9, etc.; quæ propriè intellecta, ut dubio procul intelligi debent, aliquid fixum et animæ intrinsecè adhærens denotant. Unde Ecclesia, cujus est judicare de vero Scripturarum sensu, in concilio Trid. citato canone, hæc oracula de gratiâ animæ inhærente intellexit.

Nihilò tamen minù incertum est an illa gratia verus sit habitus, vel qualitas philosophorum sensu animum informans, et ipsi permanentè impressus, an habitus aut qualitas alterius naturæ. Etenim Melchior Canus, lib. 7 de Locis, cap. 2, et plures alii eruditi, existimant Scripturæ testimonia de primi generis qualitatibus non esse intelligenda. Aliunde parvuli, seclusâ christianâ institutione, cùm usum rationis attigerunt per habitualement baptismi gratiam in divinas et supernaturales actiones non erumpunt, quod tamen evenire deberet, si gratia illa esset propriè dictus habitus. Porro evanescent Calvini et aliorum Protestantium argumenta, si attendatur 1º, in Scripturis Christi justitiâ dici *causam nostræ justificationis efficientem et meritoriam*, non *formalem*, quia scilicet Christus promeritus est gratiam sanctificantem, quâ formaliter justii evadimus... 2º In iisdem Scripturis peccata sic *tecta et non imputata* dici, ut tamen *delegantur*, et ideò non ampliù appareant; ait enim Psalmista Psalmo 50: *Iniquitates meas dele...* 3º in Scripturis *hominem* dici *non justificari in conspectu Dei* (v. g. Psalmo 142), non *absolutè*, sed *comparatè* ad Dei justitiâ; ait enim David Psalmo 7: *Judica me secundum justitiâ meam...* 4º Auctores quidem profanos justificationis nomine intellexisse innocentie declarationem, sed auctores sacros, quibus standum est, hoc nomine intellexisse interiorem hominis per inhabitantem Spiritum sanctum renovationem. Unde D. Aug. lib. de spiritu et litterâ, cap. 9, hæc observavit: *Non dixit justitia hominis (Rom. cap. 3) manifestata est, sed justitia Dei, non quâ justus est, sed quâ induit hominem, cùm justificat impium.*

COROLLARIUM III. — Cùm gratia sit donum supernaturale animæ à Deo impressum, ut in *esse divino* constituta, et divinæ naturæ suo modo consors facta, Deo sit accepta, et supernaturales actus elicere valeat, gratia quatenùs actualis et excitans non solum in intellectûs collustratione, ut censuit Vasquez, sed etiam in voluntatis motione collocanda est. Patet 1º ex Scripturis, Psalmo 118: *Inclina cor meum*

in testimonia tua, Deus operatur in nobis velle et perficere, Epist. ad Philippenses, cap. 2; hæc enim passim intelligit D. Aug. de immediatâ per gratiam voluntatis inclinatione... 2^o Ex Patribus, inprimis Augustino, qui lib. 4 contra duas epistolas Pelagianorum cap. 5, n. 10, asserit, *gratiam propriè esse inspirationem dilectionis*; sed dilectio est proprius voluntatis actus; alibi passim dicit, *voluntates, corda hominum per gratiam trahi*... 5^o Ex argumentis è fidei principiis deductis; gratia quippe nostri statûs propria medetur infirmitati nostræ, quæ præcipuè residet in voluntate, et ideò voluntas cœlesti indiget motione ut feratur in Deum; deinde auxilium naturæ lapsæ non est auxilium *sine quo*, ut adjutorium Adæ, sed *auxilium quo*, ut loquitur D. Augustinus, sed *auxilium quo* voluntatem immediatè afficit. Porro adversariorum momenta coincident, si recogites intellectum esse quidem facem voluntatis, quæ suapte naturâ cæca est, sed non ideò, ubi de opere salutis est sermo, objecti exhibitionem intellectûs ministerio factam sufficere ut voluntas feratur in objectum, cum insuper requiratur ut à cœlesti Patre tracta ad illud tendat.

COROLLARIUM IV. Cùm gratia donum sit supernaturale à Deo animæ instillatum, ut per actus bonos æternam adipisci possit salutem, gratia illa, quatenus præveniens et excitans in deliberatâ animæ actione non est reponenda. Aliter passim in operibus suis censuit Antonius Arnaldus, qui prodigiosè eruditus causam catholicam egregiis operibus adversus Protestantes feliciter promovit; utinam illi idem præstitisset auxilium adversus Jansenium Yprensem et ejus sectatores! Enimverò epistolâ 598 ad dom. du Vaucel de commemoratâ gratiâ ait: *On ne voit point dans tout cela* (in Augustini testimoniis) *ni de qualitas fluens, ni d'actus indeliberatus, dans lequel M. d'Ypres a fait consister sa délection victorieuse* (lib. 4 de Gratiâ Salvatoris cap. 11), *en quoi certainement il s'est trompé*. Verum ipse deceptus est vir doctissimus, dùm gratiam excitantem ipsam liberam voluntatis actionem fecit. Etenim concilium Trid. sessione 6, can. 4, docet aut supponit hominem ope gratiæ excitantis eidem gratiæ liberè consentiendo se ad justificationem disponere; at hoc documentum, si gratia præveniens esset ipse liber voluntatis consensus, insulsum hunc exhiberet sensum: *homo libero suo gratiæ consensui liberè consentiendo se disponit ad justificationem*.

Deinde, Augustinus adversus Pelagianos decertando gratiam secernit à consensu, docetque ipsam bonam voluntatem gratiam non esse, sed illius inspirationem et præparationem: *Est*, inquit, apud ipsum Arnaldum citatâ epistolâ, *inspiratio dilectionis*; quod evincit S. doctorem spectasse deliberatam voluntatis actionem non ut gratiam, sed ut gratiæ effectum.

Tandem fide constat, eam esse naturæ gratiam, ut homo *possit ei dissentire si velit*, quemadmodum definit concilium ibidem; sed si gratia esset actio libera, nunquàm homo, etiamsi vellet, posset ei dissentire, cùm consensus et dissensus simul existere nequeant. Porro contra militantiâ momenta illicò conterentur si in hanc intuearis distinctionem, *gratia est deliberata voluntatis actio causaliter, non formaliter*.

COROLLARIUM V.—Cùm gratia donum sit supernaturale à Deo homini infusum in ordine ad vitam æternam, vera Christi gratia non est sola charitas propriè dicta, aut illius inspiratio; unde errant Michaelis Baii et Yprensis defensores, ubi cum magistris decantant, omnem voluntatis actionem, quæ non oritur ex propriè dictâ charitate, hoc ipso oriri ex vitiosâ cupiditate, quæ creaturæ tanquàm fini ultimo inhæret. Scilicet actus veræ fidei, et spei possunt absque charitate elici, ut definit concilium Trid. sess. 6, can. 28, et tamen non sunt vitiosi, imò à Spiritu sancto excitantur, ut postea ostendemus. Neque hic cum adversariis obtendas obsistere D. Augustinum, qui passim, inprimis libro de Gratiâ Christi, contra Pelagium et Cœlestium, cap. 33, n. 38, gratiam Christi definit, *inspirationem flagrantissimæ et luminosissimæ charitatis*; præterquàm quòd enim hæc expendere hujus loci non est, istud testimonium, si strictè sumeretur, etiam in mente Baianistarum nimis probaret. Etenim S. doctor lib. de Naturâ et Gratiâ contra Pelagium cap. ultimo, n. 84, agnoscit ipsam inchoatam charitatem à Deo inspirari: *Charitas*, inquit, *inchoata, inchoata justitia est...* *charitas propecta, propecta justitia est...* *charitas perfecta, perfecta justitia est*. Ergo gratia non est inspiratio solius *flagrantissimæ*, sive *inter-sissimæ charitatis*. Deinde, cùm Augustinus fatente Cano lib. 12 de Locis cap. 12, quæ *adversus hæreticos disseruit, invenerit acutius, et dixerit subtilius quàm ut quivis ea possit agnoscere*, nemo citra omnem dubitationis aleam asseruerit. S. doctorem ibi etiam charitatis nomine specialem charitatis strict

sumptæ virtutem depinxisse. Notum quippe est ipsum sæpius quancumque bonam voluntatem *charitatem* appellare; quid, inquit, charitas nisi bona voluntas? Notum etiam est ipsum per charitatem aliquando intelligere complexionem omnium virtutum, adeò ut sensus sit, per gratiam inspirari omnes virtutes christianas, adeoque ipsam etiam fidem, aut spem à charitate seunctam. Et verò ignorare non potuit quod dixit Apostolus 1 Cor. cap. 12, neminem *ipsum Jesu nomen* pronuntiare posse nisi in *Spiritu sancto*.

COROLLARIUM VI. Cùm gratia sit supernaturale Dei donum animam intrinsecè afficiens, quod ad finem supernaturalem, qui ex intuitivâ Dei visione oritur, ex naturâ suâ tendit, ejus natura homini omninò explorata esse nequit. Unde tot varia et omninò discrepantia systemata tum circa gratiæ supernaturalitatis rationem, cùm circa gratiæ sanctificantis, sive habitualis, et actualis, præsertim excitantis primæ, notionem, quæ videre est apud D. Thomæ commentatores, et recentiores theologos. Hæc sanè systemata quemadmodum non vituperamus, ita prorsus approbare non possumus. Et verò, præterquàm quòd eorum auctores, ut in aliâ causâ meritò observavit Canus, *fortassis non intelligunt quod dicunt*, certè per se obscuram gratiæ naturam obscurant, nedùm elucidant, cùm inprimis ipsi fatentibus suis in placitis aliquid semper occurrat quod nec intelligi nec explicari potest. Aliunde Augustino indubiè non acutiores cur intelligere et exponere tentant quod S. doctor morti etiam proximus se intelligere unquam potuisse confessus est? *Gratia*, inquit lib. de Prædestinatione Sanctorum, cap. 8, n. 13, *quæ occultè humanis cordibus divinâ largitate tribuitur, nemiùm est secreta, et à sensibus remota*. Unde, cum Pelagianis super gratiæ necessitate disputando nunquàm gratiæ labyrinthum ingressus est nisi quando sese in eo occultaverant adversarii. Quibus autem armis tunc eos oppressit? His: *Negandum non est quod est apertum* (gratiæ interioris necessitas in Scripturâ et traditione manifesta) *quia comprehendì non potest quod est occultum* (gratiæ natura et distributio) lib. de Dono perseverantiæ, cap. 14, n. 37... His: *Altiora te ne quæsieris...* *In pluribus operibus Dei ne fueris curiosus...* *Plurima super sensum hominis ostensa sunt tibi*, Ecclesiastici cap. 3... His: *O altitudo!* etc., Rom. cap. 11... Iisdem armis debellari possunt nostrates increduli, qui gratiæ mysterium ut et cætera reve-

latæ religionis sacramenta subsannare solent. In aspectabili hoc mundo, sive in ordine naturali, imò in seipsis mirabilia et incomprehensa conspiciere coguntur, et nulla in ordine morali, sive supernaturali conspiciere dignabuntur! Ipsi arridet Neutonianum systema totum in occultissimâ attractionis qualitate corporibus mirabiliter insitâ fundatum, et sive permanens gratiæ habitualis, sive citò effluens gratiæ actualis qualitas animæ cœlitus indita ipsis displicebit! Materiæ, luminis, colorum, imò, omnium ferè rerum physicarum naturam, creatæ licet intelligentiæ accommodatam, penetrare non possunt, et cœlestis luminis et pluvie essentiam penetrare volent, vel si non penetraverint, irridebunt! Quid sit motus, quid ejus acceleratio, quomodò unum corpus alterum moveat, etc., concipere nequeunt; et quomodò supremum Numen per gratiam actualem hominum voluntates moveat concipere volunt! In his ergo, ut ait Augustinus, *melior est fidelis ignorantia quàm temeraria scientia*.

Quæstio proœmialis secunda.

DE VULGATIS GRATIÆ DISTRIBUTIONIBUS.

Varia gratiæ antea delineatæ consideratio varias illius peperit divisiones. Quæstiones super his nonnullorum disserendi pruriginis subortas, utpote inutiles, aut parùm utiles silebimus: « ridiculum enim est, inquit Canus lib. 12 de Locis, cap. 5, nervos omnes corporis et animi intendere in eâ quæstione solvendâ, cujus inscientia nihil periculi habet, error nihil habet criminis. Theologia, addit ibidem, inutilia non colligit, quin super fidei fundamentum, aurum, argentum, lapides pretiosos superædificat. » Porro, cunctas istas divisiones ad strictam divisionis amussim confictas esse asserere nobis non est animus.

PARTITIO PRIMA. — Gratia alia increata, quæ est æterna et supernaturalis Dei in homines dilectio ab ipso Deo non distincta, quâ eos relativè ad vitam æternam amat... Alia creata consistens in collatione omnium beneficiorum ex commemorato divini Numinis amore velut ex causâ scaturientium. Ex relatâ gratiæ descriptione satis cognoscitur.

PARTITIO II. — Gratia creata, de quâ hic inprimis controversia, alia *Dei*, quæ et *sanitatis* dici solet, Christi meritorum contemplatione non collata (in eorum sententiâ qui cum Tho-

mistis censent Adamicum delictum Verbi incarnationis causam fuisse)... Alia *Christi*, quæ et *medicinalis* nuncupatur, quia Christi meritum intuitu infusa animi morbis medetur. E converso, Scotistæ, qui Adamo etiam non peccante futuram fuisse incarnationem autumant, gratiam creatam dividunt in gratiam *sanitatis*, sive *Christi ut Capitis*, et in gratiam *medicinalem*, sive *Christi ut Redemptoris*. Hæc iterum ex dictis elucescunt.

PARTITIO III. — Gratia Christi, de quâ potissimum quæstio, alia externa, quæ extrinsecus, alia interna, quæ intrinsecus homini advenit. Utraque suo modo hominis salutem promovet.

PARTITIO IV. — Gratia interna alia *gratis data*, alia *gratum faciens*. Prior vulgò describitur: Donum supernaturale gratuitum, non in *propriam recipientis* (ut gratia gratum faciens), sed in proximi sanctificationem primariò et per se ordinatum. Depingitur 1 Petri cap. 4, v. 10, et 1 Corinth. cap. 12, his verbis: *Unicuique datur manifestatio Spiritus ad utilitatem*. Ibidem à versu 8 ad 11, recensentur novem hujus gratiæ species... Posterior, id est gratia *gratum faciens*, vulgò dicitur: *Donum supernaturale gratuito à Deo inspiratum ad propriam uniuscujusque salutem per se et primariò destinatum*. Hæc gratia in Scripturis passim delineatur, v. g., Epist. ad Ephesios cap. 1, v. 7: *Habemus (in Christo) redemptionem... secundum divitias gratiæ ejus*.

Dixi in utrâque descriptione, *per se et primariò*, quia *secundariò et per accidens* gratia *gratum faciens* aliorum utilitatem promovere potest, Epist. Jacobi cap. 5, v. 16, 1 Joannis cap. 5, v. 21 et 22, etc. E vice versâ gratia *gratis data* illius, cui conceditur, salutem potest provehere, si eâ ut par est usus fuerit, Matthæi cap. 25, v. 21. Porrò, relata descriptio gratiæ *gratum facientis*, quæ Deo immediatè unit, et idcirco dignior est gratiâ datâ, quæ Deo *præparatoriè* duntaxat, et *mediatè* conjungit, relata, inquam, delineatio *gratiæ gratum facientis* convenit tum habituali cum actuali gratiæ, diverso licet modo; utraque enim animam efficit sanctam *formaliter* nimirum, si sit gratia habitualis sanctificans, efficienter verò, si sit gratia actualis, aliquo saltem ex his tribus modis, videlicet aut *dispositivè*, disponendo ad sanctitatem, vel *conservativè*, sanctitatem conservando, vel *directivè*, dirigendo ad opera salutis meritoria. Quod attinet ad unionem gratiarum *gratis datarum* vel *secum invicem*, vel cum

gratiâ *gratum faciente*, vel *gratiæ gratum facientis* cum *gratis gratis datis*, docet Apostolus citato loco unam gratiam *gratis datam* uni competere, alii alteram, et ideò illas gratias à se invicem sejungi posse. Item docet Christus Matthæi cap. 7, v. 21, gratiam *gratis datam* existere posse sine gratiâ *gratum faciente*. Item constat gratiam *gratum facientem* non esse semper gratiæ *gratis datæ* comitem; justî enim ad aliorum salutem promovendam non semper à Deo mittuntur; quinimò, in ipso Ecclesiæ exordio, omnibus fidelibus non inerat gratia *gratis data*.

PARTITIO V. — Gratia *gratum faciens* alia habitualis, alia actualis. Habitualis ea dicitur, quæ impertitur per modum habitûs, sive qualitatis permanentis, et hominem ad vitam æternam disponit et dirigit. Triplex vulgò secernitur, nimirum gratia sanctificans, sive justum reddens, virtutes infusæ, et dona Spiritûs sancti. Gratia habitualis justificans ea est quâ homo *formaliter* justus evadit, dùm ei quoddam *esse divinum* communicatur, et suo modo divinæ fit particeps naturæ. Designatur Joannis cap. 14, v. 25, 2 Petri cap. 1, v. 4, etc.

Virtutes infusæ illæ sunt quæ propriis naturæ viribus obtineri nequeunt, sed à solo Deo animæ instillantur. Distribuuntur in theologicas, quæ sunt fides, spes, charitas, de quibus Apostolus 1 Cor. cap. 13, v. ultimo, et morales infusas, quas inter quatuor eminent, ideò cardinales nuncupatæ, scilicet justitia, prudentia, fortitudo, temperantia.

Dona Spiritûs sancti sunt habitus supernaturales, quibus homo propriè præparatur, ut à Spiritu sancto impellatur ad quædam heroica facinora producenda. Septem vulgò computantur, nempe donum sapientiæ, intellectûs, scientiæ, consilii, pietatis, fortitudinis, et timoris.

Quatuor prima intellectum afficiunt, tria posteriora voluntatem.

Gratia actualis, quæ et *auxilium* dici solet, ea est quæ per modum actûs, sive motionis transeuntis, qualitatisve effluentis infunditur. Anima scilicet per habituales gratias, et alios supernaturales habitus infusos potens quidem *lit in actu primo*, ut aiunt, ad supernaturales actus eliciendos, sed ut actu illos eliciat, sive de illâ potentiâ in actum secundum transeat, indiget auxilio speciali ipsam movente ad agendum, et cum ipsâ operante; quod exemplo actuum naturalium aliquatenus illustrari potest; quemadmodum enim causæ secundæ,

sive naturales, quæ in Dei substantiâ ubique mirabiliter diffusâ veluti immerguntur, nullum actum naturalis ordinis edere possunt absque generali concursu immediato, aut saltem mediato, quo suprema causa eas de potentiâ ad actum reducat, et eundem actum cum illis saltem mediâtè eliciat; ita multò magis homo non poterit edere actum supernaturalem sine auxilio supernaturali et actuali gratiæ, quo Deus veluti *actuet* liberam ejus voluntatem, faciatque ut supernaturale bonum velit et perficiat, licet ipsi indiderit gratiam sanctificantem, sive quamdam fixam formam supernaturalem per quam id possit.

Quid autem sit transiens gratiæ actualis motio, an ipse formaliter vitalis actus indeliberatus, quem excitante Deo anima eliciat, an quid ipsi prævium, quod illius actûs causa sit, ut censent Thomistæ, nos prorsus ignorare fateamur; neque enim obscura per obscuriora explicare nobis est animus. Porro, D. Aug. de gratiâ præsertim actuali, quæ ubique in Scripturis depingitur, adversus Pelagianos disserit, eamque ad omnes edendas actiones quæ ad salutem remotè etiâ conducunt prorsus necessariam esse ex professo ostendit libris de gratiâ Christi.

Non attulimus distinctionem gratiæ habitualis in *primam et secundam*, quia ex se satis innoscit. Gratia scilicet habitualis prima ea est quæ animam de injustâ justam formaliter efficit... *Habitualis secunda* quæ animam de justâ justiore formaliter reddit, per augmentum videlicet gratiæ sanctificantis. Rursûm non expendimus cur Deus, qui ut Ens simplicissimum decet semper agit simplicissimo modo animæ gratiam habitualement infundere voluerit (ipsi enim ad supernaturaliter agendum actualis sufficisset gratia). Præterquàm quòd enim id ex dictis satis elucescit, rationem affert D. Thomas 1-2, q. 110, a. 2, in c.: « Habitualement donum, inquit, à Deo animæ infunditur, quia non est conveniens ut Deus minùs provideat eis quos diligit ad supernaturale bonum habendum quàm creaturis quas diligit ad bonum naturale habendum. Creaturis autem naturalibus sic providet ut non solum moveat eas ad actus naturales, sed etiam largiatur eis formas et virtutes quasdam, quæ sunt principia actuum ut secundum seipsas inclinentur ad ejusmodi actus, et sic motus, quibus à Deo moventur fiunt creaturis connaturales et faciles secundum illud Sapientiæ cap. 8: *Disponit omnia suaviter*. Multò igitur magis illis quos Deus

moveat ad consequendum bonum æternum, infundit aliquas formas, seu qualitates supernaturales, secundum quas suaviter et promptè ab ipso moventur ad bonum æternum consequendum, et sic donum gratiæ (habitualis) qualitas quædam est (fixa et permanens). »

PARTITIO VI. — Gratia actualis alia intellectûs, alia voluntatis. Prior consistit in internâ mentis illustratione, quâ Deus intellectui veritates supernaturales credendas, vel supernaturalia bona patranda offert et repræsentat.... Posterior in indeliberatâ et immediatâ motione, sive inclinatione, quam Deus in voluntate producit, ut eam ad bonum supernaturale diligendum excitet et accendat. Utraque statûs naturæ lapsæ propria est, ut docet D. Augustinus, et concilium Tridentinum ex constanti traditione sess. 6, cap. 5, et canone 3, ubi ait, *Deum tangere cor hominis per Spiritûs sancti illuminationem*, et neminem justificari posse sine *Spiritûs sancti inspiratione et adjutorio*; *illuminatio* enim ut et *inspiratio* intellectûs collustrationem, et *tactus cordis* ut et *adjutorium* voluntatis motionem designat.

PARTITIO VII. — Gratia actualis sive intellectûs sive voluntatis, mox descripta, generatim distribuitur in *antecedentem, comitantem, et subsequenter*. Hanc quippe distributionem tradit synodus Tridentina sess. 6, cap. 16, his verbis: « Christus tanquàm caput in membra, et tanquàm vitis in palmites, in ipsos justificados jugiter virtutem influit, quæ virtus bona eorum opera semper antecedit, et comitatur, et subsequitur, et sine quâ nullo pacto Deo grata et meritoria esse possent. »

Ad gratiam antecedentem pertinet, aut saltem pertinere potest, gratia quæ dicitur *præveniens, excitans, vocans, inspirans*, imò et *operans*; hæc enim gratia describi potest: *Momentanea illustratio intellectûs, et motio voluntatis, quas Deus in nobis sine nobis efficit, ut scilicet benè velimus, et benè agamus*. Etenim D. Aug. concione 1 in Psalmum 58, n. 19, prævenientem gratiam vocat *excitantem*: Deus meus, inquit, misericordia ejus præveniet me; *non enim prior ad te exsurrexi, sed tu ad me excitandum venisti*; et libro de Gratia et libero Arbitrio cap. 17, n. 33, dicit, gratiam operantem eam esse per quam Deus ut *velimus operatur incipiens, et ut velimus sine nobis operatur*. Dixi, *quas Deus in nobis sine nobis efficit*; quæ non significant Deum se solo hos producere motus quasi nullo modo activè concurramus; quis enim nesciat actum vitalem, qualis est illustra-

tio intellectûs, et inclinatio voluntatis, a propriâ vitali potentiâ necessarie elici? Sensus ergo est, hæc in nobis fieri sine nobis liberè concurrentibus, quia isti motus, sive actus, sunt indeliberati. Dixi etiam, *ut benè velimus, et benè agamus*, quia D. Augustinus dicendo universim, Deum per gratiam operantem *efficere ut velimus*, videtur gratiam operantem non restrinxisse ad solam primam bonam voluntatem, id est conversionis desiderium, sed eam quoque extendisse ad eam actualem gratiam, quâ movemur ad perseverandum in gratiâ jam acceptâ, cum in primis libro de Correctione et gratiâ, cap. 11, doceat esse in nobis per gratiam operantem *non solum posse quod volumus, sed etiam velle quod possumus*.

Ad gratiam concomitantem revocatur, aut revocari potest, gratia dicta *cooperans, dirigens, gubernans, protegens, adjuvans*; hæc enim describi potest: *Inspiratio, sive concursus supernaturalis, quo Deus nobiscum concurrit ad omnes et singulos actus supernaturales ac liberos*. Etenim D. Aug. citato capite 17 libri de Gratiâ et libero Arbitrio dicit, gratiam cooperantem eam esse gratiam, *per quam Deus volentibus cooperatur perficiens*; quod sanè idem est ac si dixisset, *per quam Deus cum volumus, et sic volumus ut faciamus nobiscum cooperatur*. Et verò, hæc tradit Apostolus 1 Cor. cap. 13, v. 10, quem textum expendens D. Aug. lib. de Gratiâ et libero Arbitrio cap. 5, n. 12, dixit: *Ne ipsa voluntas sine gratiâ Dei putetur aliquid posse, continuò cum dixisset, gratia ejus in me vacua non fuit, sed plus omnibus illis laboravi, subjunxit: Non ego autem, sed gratia Dei mecum, id est non solus, sed gratia Dei mecum, ac per hoc nec gratia Dei sola, nec ipse solus, sed gratia Dei cum illo*.

Dixi, *ad omnes et singulos actus*; nullus enim excipiendus est actus supernaturalis liber, nequidem parva et invalida voluntas, quam nonnulli immeritò excipiunt. Scilicet D. Augustinus gratiam cooperantem firmæ duntaxat voluntati non illigavit; quinimò eam cuilibet bonæ voluntati supernaturali liberæ annexuit. Ad gratiam subsequentem reducitur, aut reduci potest, gratia nuncupata *confirmans et consummans*; etenim describi potest: *influxus, sive concursus supernaturalis, quo Deus voluntatem prævenienti, sive excitanti gratiæ cum Dei auxilio jam consentientem corroborat, ut in bono proposito permaneat, et fortius in actus, quibus perficiatur, erumpat*. Etenim hæc ex Scripturis passim tradere videntur Patres: *prævenit Deus,*

inquit D. Augustinus libro de Naturâ et Gratiâ, cap. 51, n. 55, *ut rocemur, subsequatur ut glorificemur, prævenit ut piè vivamus, subsequatur ut cum illo semper vivamus, quia sine illo nihil possumus facere*.

Magistrum sequitur Fulgentius. « *Prævenit* (Deus) inquit lib. 4 ad Monimum cap. 11, *impium, ut fiat justus, subsequitur justum ne fiat impius. Prævenit cecum, ut lumen.... donet, subsequitur videntem, ut lumen quod contulit servet. Prævenit elisum ut surgat, subsequitur elevatum ne cadat. Prævenit donans.... bonam voluntatem, subsequitur benè volentem operando in illo boni operis facultatem*. » Concinit D. Gregorius Magnus homiliâ 9 super Ezechielem in hæc verba (cap. 2 Prophetæ): *Ingressus est in me Spiritus*: « *Mala nostra, inquit, solummodò nostra sunt; bona autem nostra, et omnipotentis Dei sunt, et nostra, quia ipse inspirando nos prævenit ut velimus, qui adjuvando subsequitur, ne inaniter velimus, sed possumus implere quæ volumus. Præveniente ergo gratiâ, et bonâ voluntate subsequente, hoc quod omnipotentis Dei donum est, fit meritum nostrum*. » Cæterum, omnes illæ gratiæ actualis distinctiones ad duas universim revocari possunt, nimirum ad operantem vel cooperantem; omnis enim inspiratio, quâ Deus nos ad supernaturale bonum movet, aut est *in nobis sine nobis*, et sic est gratia *operans*, aut in nobis et nobiscum, et sic est gratia *cooperans*.

Enumeratas gratiæ divisiones vulgò admittunt theologi; at circa earum notionem mirè inter se dissident; quâ ex causâ quidquid modò diximus de gratiâ operante, cooperante et subsequente, per modum dubitationis proposuimus, nullam prorsus amplectendo sententiam. Etenim Thomistæ universim partiuntur gratiam voluntatis in *excitantem* et *adjuvantem*. Utraque semper prævenit voluntatem; excitans enim, quæ eadem est ac *sufficiens*, unicè destinatur ad suscitandos in intellectu et voluntate indeliberatos actus, quibus homo ad conversionem allicitur... Adjuvans, quæ non differt ab efficaci, facit ut voluntas indeliberatis illis motibus sese morigeram præstet, et conversionem reipsâ appetat. Idem Thomistæ gratiam adjuvantem subdividunt in *operantem* et *cooperantem*; operans producit primum liberum ac supernaturalem voluntatis motum, ad quem voluntas sese moraliter non inflectit, sive per prævium motum deliberatum, sed à solo Deo impulsâ est; quod illustrari dicunt exemplo

Sauli, qui liberum suum Christo obediendi actum primum emisit his verbis : *Domine, quid me vis facere?* Actuum cap. 9... Cooperans, quam et subsequentem suo sensu nuncupant, est illa quæ voluntatem postea impellit ad pietatis opera, quæ primum bonum, et liberum voluntatis actum sequuntur, v. g., ad eximios pietatis actus quos Saulus post primum suum obedientiæ actum edidit.

Celebris Norisius, et alii nonnulli, autumant gratiam operantem et cooperantem naturâ quidem inter se distingui, sed gratiam operantem reipsâ non differre à præveniente, excitante et sufficiente, et cooperantem à subsequente, adjuvante, et efficaci, quia duæ illæ gratiæ species his donantur nominibus ob variam ingenitam vim et virtutem.

Gamacheus et alii censent 1^o, gratiam operantem, prævenientem, et excitantem, eandem naturâ gratiam esse, indeliberatam scilicet mentis illustrationem et voluntatis motionem. 2^o Gratiam cooperantem, subsequentem et adjuvantem, eandem omninò esse gratiam, concursum nimirum supernaturalem, quo Deus cum homine agit. Unde in hoc cum Norisio et aliis commemoratis auctoribus consentiunt, quòd gratia operans et gratia cooperans duæ sint gratiæ species realiter distinctæ. Verùm in eo discrepant, quòd velint solam gratiam operantem subdividendam esse in sufficientem et efficacem.

Alii gratiam voluntatis dividunt in tres species, quarum prima vocatur gratia operans, præveniens et excitans..... Secunda cooperans, concomitans, et adjuvans.... Tertia, subsequens. Hanc opinionem exposuimus.

Ludovicus Molina et ejus vulgò sectatores gratiam operantem, prævenientem, excitantem, cooperantem, concomitantem, et subsequentem, et ideò ipsam sufficientem et efficacem inter se, non entitate, sed solâ consideratione discrepare sentiunt. Scilicet opinantur gratiam essentialiter consistere in indeliberatis intellectûs et voluntatis affectionibus. Unde idem entitativè motus indeliberatus dicitur, gratia operans, quia Deus illum in nobis liberè cooperantibus producit, præveniens, quia liberum voluntatis consensum præcedit, excitans, quia suaviùs allicit voluntatem, sufficiens, quia voluntas cum illo potest agere vel non agere. Pariter idem ille indeliberatus motus, qui, ut diximus, est vitalis animæ actus, vocatur gratia cooperans, concomitans, subsequens, et efficax, quia suo in liberum voluntatis consensum influxu cooperatur voluntati, et ipsam ad consentiendum mora-

liter inflectit. Nonnulli tamen cum Suaresio hoc systema ingeniosè emollire et restringere conati sunt dicendo, gratiam efficacem eandem quidem naturâ esse cum sufficiente, sed nihilominus efficacem præstare ratione doni et beneficii, gratiæ merè operanti et sufficienti, quatenus scilicet efficax, non sufficiens, opportunis in circumstantiis infunditur.

PARTITIO VIII.—Gratia antecedens, sive præveniens, operans, sive excitans, alia sufficiens, alia efficax. Hæc est insignior partitio, cujus occasione tot in scholâ exorta sunt dissidia. De utrâque gratiâ in secundo et tertio libris disseremus.

Illic observâsse sufficiat gratiam purè et strictè sufficientem, quatenus nempe adversa est efficaci, illam esse quæ realem et expeditam impertit voluntati potentiam ad adversam hic et nunc stimulantem concupiscentiam vincendam et bonum supernaturale agendum, cum quâ tamen voluntas non operatur. E conversò, gratia efficax, quatenus sufficienti contraria est, ea reputatur quæ suum effectum certò et infallibiliter semper obtinet. Si effectus semper et certò oritur ex ingenitâ ipsius gratiæ virtute, vocatur ex sese et ab intrinseco efficax; si ex convenientiâ circumstantiarum, dicitur congrua; si ex prævisione Dei, appellatur efficax ab eventu.

Gratia efficax iterum distribuitur in efficacem in actu primo, et efficacem in actu secundo; item sufficiens in proximè et remotè duntaxat sufficientem. Verùm de his postea fusiùs.

PARTITIO ULTIMA. — D. Aug. libro de Gratiâ et libero Arbitrio cap. 8, n. 20, gratiam partitus est in gratiam tantummodò, sive unicè, et gratiam pro gratiâ; ibidem enim ait : « Si vita nostra nihil aliud est quàm Dei gratia, sine dubio et vita æterna, quæ bonæ vitæ redditur, Dei gratia est, et ipsa enim gratis datur, quia gratis data est illa cui datur sed illa cui datur tantummodò gratia est; hæc autem quæ illi datur, quoniam præmium ejus est, gratia est pro gratiâ, tanquàm merces pro justitiâ. « Igitur gratia tantummodò sive simpliciter ea est quam Deus ex Christi meritis confert, sine ullo ex parte hominum prævio merito, etiam ex gratiâ... Grata verò pro gratiâ ea est quæ conceditur propter meritum antecedens, quod ex ipsâ gratiâ exurgit; talis celestis gloria, sive, ut loquitur S. doctor, vita æterna, quæ simul est præmium sive merces, et gratia, quia merces meritis redditur, gratia quia illa merita ex gratiâ emanant. Hinc D. Aug. epist. 194 ad Sixtum, aliàs 105, cap. 5,

n. 19, dixit: « Cùm Deus coronat merita nostra, nihil aliud coronat quàm munera sua. »

Illis ad rerum tractandarum notitiam delibatis, sit

Liber primus.

DE GRATIÆ NECESSITATE.

Exponendum utrum gratia necessaria sit in diversis hominis statibus. Ideò sequentia recogita.

Status, ut hic sumitur, est certa quædam hominis sors relativè ad finem ultimum. Alius *termini*, proprius patriæ incolarum, alius *vivæ*, proprius mortalium ad terminum aspirantium; alius qui extitit, status scilicet Adæ, sive naturæ innocentis, et status naturæ lapsæ et reparate, in quo versamur; alius merè possibilis, ut status naturæ integræ, in quo homo sine peccato et gratiâ dirigente ad finem supernaturalem cum quodam subsidio naturalis ordinis, indebito tamen exigentiæ naturæ, immunis fuisset ab insultu appetitûs sensitivi adversùs rationem.... Item status naturæ puræ, et status naturæ lapsæ, et nullo remedio à Deo reparate.

Qui in merè possibilem regionem evolant, in fragili conjecturarum nido requiescere solent. Idecirco certi et veri amore accensi brevem de necessitate gratiæ in statu tantùm naturæ innocentis, et naturæ lapsæ et reparate instituemus sermonem.

CAPUT PRIMUM.

De necessitate gratiæ in statu naturæ innocentis.

Tria præsertim hic sese offerunt; an Adam primitus justitiam et dona ipsi annexa acceperit.... An hæc beneficia insonti homini essent debita.... An et quâ gratiâ indiguerit insons Adam ad benè agendum et perseverandum.

ARTICULUS PRIMUS.

Utrum Adam cum justitiâ originali, et donis et affixis creatus fuerit?

Infiati sunt olim Pelagiani, et hodiè inficiantur Sociniani, etc., prætendentes hominem jam nasci qualis initio creatus fuerat, sine peccato et gratiâ.

CONCLUSIO. — Adam originali justitiâ fuit exornatus, saltem ante peccatum.

Est de fide, ut patet ex concilio Tridentino sess. 5, de peccato originali can. 1. Ibi enim

definit Adam ante peccatum justitiam habuisse; sed fidem non tangit, quatenus innuit aut supponit Adam ab initio creationis justitiâ supernaturali refulsisse; nonnulli enim theologi censent ipsum primitus fuisse efformatum cum rectitudine merè naturali.

Probatur. Præcipuæ justitiæ originalis dotes erant, gratia sanctificans, sufficiens rerum notitia, appetitûs submissio, corporis immortalitas, etc. At his donatus fuit Adam; ergo.

Prob. minor per partes. 1^o Gratiâ sanctificante decoratus est; eum enim Deus *rectum* fecit, ut dicitur Ecclesiaste cap. 7; sed hæc rectitudo fuit supernaturalis; id enim suggerere videtur Apostolus, cùm Epistolâ ad Ephesios cap. 4, v. 24, eam comparat cum ipsâ justitiâ et sanctitate quæ per Christi merita acquiritur. Aliunde, D. Augustinus id adversus Pelagianos passim asserit. Saltem aureo libro de *Correptione* et gratiâ cap. 6, n. 9, locum Ecclesiasticis de gratiâ sanctificante exponit. 2^o Sufficienti rerum notitiâ fuit informatus, Ecclesiastici cap. 17, v. 5 et 6. Unde D. Aug. lib. 5 *Operis Imperfecti* contra Julianum, cap. 1, dicit in Adam *excellentissimam fuisse sapientiam*. 3^o Appetitûs inferioris adversùs rationem impetum nunquàm expertus est, imò ejus corpus animæ perfectè famulabatur, ut passim tradit D. Augustinus. 4^o Corporis immortalitate gaudebat, et morborum aliarumque molestiarum omninò expers fuit, Genesis cap. 2, v. 17, Sapientiæ cap. 2, v. 24, Rom. cap. 5, v. 12; quæ loca sic intellexit conc. Trid. sess. 5, can. 1 et 2, post antiqua concilia adversus Pelagianos et Semipelagianos habita. Ea etiam sic exposuit D. Aug. v. 9, lib. 6 de Genesi ad litteram, cap. 25, n. 56, ubi ait Adam *mortalem fuisse conditione corporis animalis, immortalem autem beneficio Conditoris*, et Deum istud *beneficium ipsi contulisse per lignum vitæ, non per constitutionem naturæ*. Licet autem in libris de Genesi ad litteram *plura quæsierit, quàm invenerit*, ut ipse loquitur in *Retractionibus*, in libris tamen sub vitæ finem conscriptis idem repetit, v. g., lib. de *Civitate Dei* cap. 26; quo in capite insignes et mirabiles Adæ in paradiso prærogativas luculentissimè refert et describit.

D. Augustinus censuisse videtur, Adam prius creatum fuisse *ad imaginem Dei secundum naturalia*, subinde *ad similitudinem Dei secundum supernaturalia*. Verùm, si hæc commemoratis theologis favent (possunt enim exponi de *prioritate* rationis, originis, ac naturæ, non de *prioritate* temporis), saltem hæreticis non favent,

ARTICULUS II.

An justitia originalis, et dona ipsi affixa insonti homini debita fuerint, et ideò ejus naturæ appendices sint reputanda?

Hæc quæstio, si non est eadem, saltem intimè connexa est cum quæstione de possibilitate statûs naturæ puræ. Majoris tamen claritatis causâ eas seorsim tractabimus.

§ 1. *Utrum justitia originalis, et alia dona recensita Adæ innocenti debita fuerint, et ideò naturalia reputanda sint?*

QUESTIONIS SENSUS ET CARDIO. — Non queritur utrum beneficia Adæ primitus collata naturalia dici possint hoc sensu quòd illa vel ab ortu habuerit, vel ejus naturam perfecerint, vel suppositâ gratuitâ Dei voluntate ejus naturæ sint impressa; quis enim hæc in dubium revocet?

Non queritur etiam utrum Deus illa dona impertiverit ex convenientiâ, vel decentiâ, etiam ex attributis suis oriente; hanc enim opinionem vulgò tuerent Augustiniani, inprimis doctissimus cardinalis Norisius. « Hæc duo distinguenda sunt, inquit, Vindiciarum cap. 3, paragrapho 2, concupiscentiæ subjectionem datam (esse) primo homini ex exigentiâ rei create, vel ex purâ putâ decentiâ; primum enim negatur, alterum à nobis assertitur; et hoc patet ex Augustino scribente lib. 3 contra Julianum cap. 11: *In naturâ hominis ante peccatum pacem decebat esse, non bellum.* » Hanc autem nobilissimæ scholæ sententiam censurâ adversus Baium latâ fuisse proscriptam asserere non minùs falsum foret quàm temerarium, ut ex dicendis elucescet.

Queritur ergo præcisè, an Deus illa dona concedere debuerit, aut quia id absolutè exigebant attributa sua, aut quia fluebant ex naturæ humanæ principiis, vel ex necessariâ naturæ exigentiâ.

ERRORES. — Lutherus in caput 3 Geneseos, cui favit Calvinus lib. 4 Instit. cap. 15, docuit, « justitiam originalem tam fuisse Adæ naturalem quàm usum visûs, et ideò eâ per peccatum deperditâ non mansisse integra naturalia, ut delirant Scholastici. »

Michael Baius, doctor Lovaniensis, commemoratam Lutheri doctrinam (ut suum de strictè dictâ charitate, qui solus est rectus creaturæ rationalis amor, et ipsâ concupiscentiæ substantiâ, seu specie, quæ essentialiter vitiosa est, staret systema), relatam, inquam, Lutheri doctrinam expressit, vel saltem ab eâ multum non

recessit propositionibus 22, 24, 25, 27, 79 et 80, inter proscriptas à Pio V, anno 1567, Gregorio XIII, anno 1579, et Urbano VIII anno 1641, reduci possunt ad vigesimam septimam, quæ sic se habet (in historiâ Baianismi P. Duchesne Duaci typis mandatâ anno 1731, quam solam citabimus): *Integritas primæ creationis non fuit indebita naturæ humanæ exaltatio, sed naturalis ejus conditio.*

Jansenius Yprensis commemoratum Baii systema ut ingeniosius et solertius defenderet docuit justitiam originalem dici posse *supernaturalem, et naturalem, indebitam, et debitam*, sub diverso respectu; *supernaturalem et indebitam*, quia non erat debita personæ, sive meritis Adæ; *naturalem et debitam*, quia erat debita naturæ, sive exigentiæ naturæ Adæ. Hæc consignavit lib. 1 de Statu naturæ puræ, capitibus præsertim 17, 18, et ultimo. Unde in mente Jansenii relatæ Baii assertiones ideò tantum damnatæ sunt, quia videbantur enuntiare justitiam originalem debitam fuisse *personæ Adæ*, et hoc sensu non fuisse supernaturalem. Verum deceptus fuit, si non decipere voluit vir eruditus et sagacissimus. Baius enim per gratiam, sive supernaturale et indebitum donum, cum theologorum choro intellexit donum non solum *debitum personæ*, sed etiam omne debitum, omnem *exigentiam* naturæ excludens.

Auctor centum et unius propositionum ab universâ Ecclesiâ proscriptarum Baii et Yprensis systematis maximè retinens illud consignavit in suis observationibus moralibus. *Gratia Adami*, inquit propositione 34, *non producebat nisi merita humana*; iterum propositione 35, *Gratia Adami est sequela creationis, et erat debita naturæ sanæ et integræ.*

Concinunt inter Baii et Yprensis sectatores quotquot eorum systema optimè intelligunt.

CONCLUSIO. — Justitia originalis et ipsi annexa dona Adæ primitus impertita verè supernaturalia fuerunt, et ideò citra necessariam saltem naturæ sanæ et integræ exigentiam.

Prob. 1^o ex Scripturâ et Patribus, Augustino præsertim ad ejus tribunal provocant adversarii. Justitia originalis, ut diximus, complectebatur gratias sanctificantem, concupiscentiæ carentiam, corporis immortalitatem, etc. Sed hæc singula verè fuerunt supernaturalia bona naturali hominis constitutioni prorsus indebita. Enimverò, quid, quæso, gratia sanctificans Adæ et nobis in præsentî ordine concessa? Quinam mirabiles ejus effectus, sive dotes? Augustinus, Enchiridion cap. 95, n. 24, asse-

rit, sanctos in aeternâ vitâ plenius cognituros esse quid boni eis (in terris) contulerit gratia. Interea docet Scriptura eam hominem reipsâ efficere filium Dei, 1 Joannis cap. 5, et quodammodò divina consortem naturâ 2 Petri cap. 1. Unde D. Augustinus, libro de Gratiâ Christi contra Pelagium, cap. 12, n. 15, dicit hominem per gratiam ad summam perfectionem glorificationemque perducî. Sed donum tam sublimis ordinis, tantæque efficaciae evidenter superat exigentiam et debitum creaturæ rationalis. Unde Scriptura, ipso citato Joannis loco, et Patres illud exhibent velut *maximum et pretiosum*, et velut *immensam* ex parte Dei *charitatem*. Deinde Scriptura et Patres beneficium Adæ à Deo in ortu præstitum vocant *gratiam*. Sed, inquit Aug. sermone 26 de verbis Psalmi 94 et Apostoli, aliàs de verbis Apostoli 11, cap. 15, n. 14, *non gratis datur quod ex debito redditur*; quâ ex causâ D. Thomas ante laudatus 1-2, q. 110, a. 2, in c., quem Yprensus velut *Augustinum magnâ ex parte contractum* commendat, dicit gratiam esse *gratuitâ Dei voluntatis effectum*.... Item concupiscentiæ subjectio, quâ in creatione potius est Adam, ejus naturæ debita non fuit. Etenim Aug. lib. 2 de peccat. meritis et remissione cap. 25, n. 57, dicit obedientiam appetitûs sensitivi rationi *primum fuisse justitiæ Adam effectum*, et lib. 4 contra Julianum cap. ultimo, n. 82, eandem obedientiam, sive subjectionem, vocat *magnam gratiam*; sed *primus effectus* gratiæ sanctificantis non minùs est supernaturalis quàm gratia sanctificans, et *magna gratia* non potest dici homini *debita* et *connaturalis*. Præterea, quis genuinam Augustini super hoc sententiam melius cognovit quàm Henricus Norisius, quem Yprensus defensores impensè (et meritò quidem) extollere consueverunt? At hic loco ante adducto rationem censuræ 27 Baii propositionis afferens explodit vanam distinctionem Yprensus, *debiti nempe personæ*, et *debiti naturæ*. « Scio, inquit, Augustinum lib. 2 de peccatorum meritis et remissione cap. 22 (n. 56), hæc scribere de primis parentibus: Quamvis corpus animale gestarent, nihil inobediens in illo adversum se moveri sentiebant. Faciebat quippe hoc ordo justitiæ, ut quia eorum anima famulum corpus à Domino acceperat, sicut ipsa eidem Domino suo, ita illi corpus obediret, atque exhiberet vitæ illi congruum sine ullâ resistentiâ famulatum. Ubi nomine justitiæ non rigorosum debitum in naturâ humanâ fundatum intellexit

(Augustinus) sed ex decentiâ solius Creatoris derivatum. » Denique D. Thomas 1 p., q. 95, a. 1, in c., novatorum dogma refellit: « manifestum est, inquit (nota illam vocem) subjectionem corporis (Adæ) ad animam.... non fuisse naturalem, alioquin post peccatum mansisset, cum etiam in demonibus dona naturalia post peccatum permanserint... » Item corporis Adæ immortalitas ipsius naturæ appendix non fuit: « Adam enim (ut ante dicebat Augustinus) mortalis fuit conditione corporis animalis, immortalis beneficio Conditoris. » Idem dicendum de defectu aliorum malorum corporis Adæ; innocentem enim eis obnoxium esse posse ostendunt exempla Christi, et B. Virginis. Hinc meritò damnata est hæc Baii assertio numero 79: « Immortalitas primi hominis non erat gratiæ beneficium, sed naturalis ejus conditio; » item ejusdem propositiones 75 et 74, quæ ferunt solum sontem affligi posse; ac tandem ista 70 inter centum et unam: « Nunquàm Deus affligit innocentes, et afflictiones semper serviunt vel ad puniendum peccatum, vel ad purificandum peccatorem. »

Probatur 2^o ex universæ Ecclesiæ judicio adversus commemoratas Baii et auctoris centum et unius propositionum assertiones. Ubi notandum est Ecclesiam damnando propositiones 34 et 35 ultimi auctoris, consequenter damnasse distinctionem *debiti personæ* et *debiti naturæ*, quâ Yprensus eludere conatus est censuram Pii V adversus Baium. Ultimus enim ille auctor Yprensus sensum indubiè expressit.

Jansenius suum de justitiæ originalis *connaturalitate* systema isto stabilire nititur principio, charitatem strictè dictam solam esse virtutem, etiam naturalem, et ideo quemlibet creaturæ rationalis amorem ab illâ charitate diversum essentialiter esse vitiosum, proindeque nullam creaturam rationalem ab omnipotente Deo sine charitatis amore condi posse; quod principium postea confutabimus. Quare hic sufficiat quædam in antecessum emittere solutionum principia, tum ut Janseniani dogmatis latibula magis rescerentur, cum ut illius fundamenta concutiantur.

PRINCIPIA SOLUTIONUM. — Primum. Gratia strictè sumpta, quæ Jansenio dicente sola est charitas propriè dicta, aut illius inspiratio, ex parte Dei excludit debitum *absolutum*, non *hypotheticum*, cum Deus decretis et promissis stare teneatur. Hoc autem Yprensus non favet; gratiæ enim originalis *debitum* et *connaturalitatem* deducit, non ex solis Dei attributis,

sed ex naturæ humanæ exigentiâ, et integritate. Unde vult illius justitiæ privatione naturam vitari sicut vitatur corpus incompositâ membrorum concinnatione.

Secundum. Creatura rationalis condi non potest sine aliquo Dei amore. Verum amor ille non est amor castus et supernaturalis; ipso enim dicente Yprensi, fundatur *in integritate et exigentiâ naturæ*; quod verò est verè supernaturale totius naturæ vires et exigentiam superat. Quamobrem Augustini testimonia quæ coarcevat Yprensis ut probet illum amorem esse *castum et supernaturalem*, ejus systemati non favent. Disserit enim S. doctor de præsentis statûs amore ex cujus *supernaturalitate* crui nequit supernaturalitas alterius statûs.

Tertium. Hoc est in præsentî quæstione Yprensis principium: *Amor naturæ innocentis castus fuit et supernaturalis quia licet non excluderet debitum naturæ, tamen exclusit debitum personæ*. At principium istud aut intelligi non potest, aut secum non cohæret; quomodo enim quod naturæ debetur, quod est integralis naturæ perfectio potest efficere amorem supernaturalem? etc.

Quartum. Frequens D. Augustini effatum, *charitatis defectus vitium est naturæ*, Yprensi non favet; verum quippe est 1^o, si *charitas* idem sonat ac *rectus et honestus amor*; amor enim iste est naturale animæ bonum, cujus ideò, aut saltem ad illud obtinendum mediî privatio, esset naturæ vitium. Hoc sensu charitatem interdum accepisse S. doctorem infra probabimus... 2^o Si *charitas* significat *castum et supernaturalem amorem*, verum est relativè ad præsentem statum, in quo suppositâ gratuitâ Dei ordinatione natura illo amore accendi debet; falsum è converso relativè ad naturam innocentem fini supernaturali non destinatam. Notum autem est D. Augustinum plerumque charitatem spectasse sub primo respectu, et nunquam intendisse defectum amoris *casti* vitiare posse naturam innocentem ad finem supernaturalem non elevatam, cum passim doceat justitiam originalem Adæ concessam insigne fuisse Creatôris beneficium.

Quintum. Famosum Augustini testimonium lib. 3 contra Julianum cap. 11, n. 25: *In naturâ hominis ante peccatum pacem decebat esse, non bellum*, quod in suæ opinionis patrociniûm adducit Norisius, potest significare decentiam emanantem ex decreto Dei de manifestando in primo homine quid posset liberum arbitriûm. Quidquid sit, textus ille Yprensi

non favet, ut et opinio Norisii; omne enim quod decere videtur agere non tenetur Deus, et aliunde celebris iste theologus magis loquitur de decentiâ oriente ex divinis attributis, quàm ex naturali hominis constitutione super quam Jansenius suum dogma fundare nititur.

Sextum. Citatum Augustini pronuntiatum lib. 2 de peccatorum meritis et remissione, cap. 22, n. 36, *justitiæ ordinem* effecisse ut primus homo sine concupiscentiâ conderetur, quod exponit Norisius de debito *decentiæ ex parte solius Creatoris*, non autem necessitatis ex parte naturæ humanæ, hoc, inquam, pronuntiatum, videtur intelligendum, non de debito rigoroso, aut etiam decenti in naturâ humanâ divinise attributis fundato, sed de ordine justitiæ originalis, quâ Deus insigni benevolentia primos parentes donaverat; id enim ex contextu Augustini videtur elucere, in quo describit justitiæ originalis effectus et ordinem.

§ 2. Quid sentiendum de statu qui dicitur naturæ puræ?

Status naturæ puræ is est, in quo homo nullo dono supernaturali insignitus, nullo coinquinatus peccato, cum propriis naturæ perfectionibus et imperfectionibus crearetur, subditus idcirco ignorantia, concupiscentiæ, morbis, morti, etc. Pelagium et ejus asseclas hujus statûs extantiam propugnantes confutavit Augustinus in operibus præsertim adversus Julianum. Unde quæritur tantum an sit possibilis.

ERRORES. — Retulimus errores Lutheri, Baii, Yprensis, et observationum moralium in novum Testamentum architecti circa justitiæ originalis *naturalitatem*. Illi ideò totis viribus impugnaverunt statûs naturæ puræ possibilitatem. Deus, inquit Baius propositione 56, *non potuisset ab initio talem creare hominem qualis nunc nascitur*. Verum Jansenius Yprensis hujus statûs possibilitatem præ cæteris impetivit editis in eam tribus integris libris, et quidem prolixioribus. Censuit scilicet vir acutus ab istâ quæstione quasi à radice et fundamento pendere suum de concupiscentiâ, sive terrenâ delectatione relativè victrici, et peccati originalis essentiam constituyente, systema.

OPINIONES. — Nonnulli theologi statûs naturæ puræ possibilitati *quoad viam*, ut à summis pontificibus statutum est, addicti, illum *quoad terminum per accidens* possibilem non

esse existimant, quia naturalis beatitudo ipsis non videtur vera beatitudo. Hæc opinio, quam, pro nostro instituto, intactam relinquimus, fortassis conducere potest ad diluenda argumenta quibus Yprensis in libris de statu naturæ puræ ex Augustino probare aggreditur hominem in quocumque statu nonnisi ad supernaturalem felicitatem posse destinari.

Doctissimus cardinalis Norisius Vindiciarum cap. 5, postquam dixit paragrapho secundo « falsum esse subjectionem concupiscentiæ non fuisse ex dono Creatoris, sed ex exigentiâ naturali humanæ substantiæ, » paragrapho tertio expendens censuram 56 propositionis Baii cum Gregorio Ariminensi hæc reponit: « Deus non potest de iustitiâ quæ potest de potentiâ: ita nulla est impossibilitas Judam in cælum trahi, sed id contra iustitiam Dei est; quare licet sit possibile potentiæ, non est possibile iustitiæ talem condi hominem, qualis modò nascitur; in priori verò tantum sensu qui negat cum damnatâ Baii propositione sentit. » Paulò ante dixerat: *Quod ex amore erga homines, et suâ ipsius bonitate nunquam Deum facturum esse* (nempe hominis creationem cum tantis miseriis quibus obnoxii sumus) *Bellarminus docuit* (lib. 6 de Amissione gratiæ et Statu peccati, cap. 15); *id Augustinus cum tot Patribus* (quos ante citaverat) *ex Dei iustitiâ fieri non posse affirmavit.*

Ex his patet existimâsse Norisium statum naturæ puræ ex parte Dei bonitatis, sapientiæ, iustitiæ, etc., repugnare, licet non repugnet ex parte Dei potentiæ absolutè et solitariè consideratæ. Concinnunt vulgò alii Augustiniani; P. Bernenc, doctor Sorbonicus, in opere Lugduni impresso anno 1768, duobus tomis in octavo comprehenso cui titulus: *Systema Augustinianum de divinâ gratiâ excerptum ex operibus R. R. P. P. Fulgentii Bellelli, et Laurentii Berti Ordinis Eremitarum S. Augustini*, tom. 1, q. 10, hæc habet: « Statum naturæ puræ, quem de facto existentem dogmatizabant Pelagiani, plurimi scholastici possibilem affirmant, tametsi de facto existentem negent. Contendimus nos (Augustiniani) impossibilem esse, non quidem absolutè in se, et ratione omnipotentiae divinæ, sed ex quâdam decentiâ, quatenus infinitæ Dei bonitati, iustitiæ et sapientiæ minùs congruit. »

Hæc opinio, quæ magis subtiliter, quàm scitè excogitata videtur, hucusque ab Ecclesiâ damnata non fuit saltem *expressè et formaliter*. Hoc autem præ adversâ habet commodum

quòd ipsâ peccati originalis adversùs incredulos dogma ex ratione feliciter comprobatur. Cæterum, videtur auxiliarem opem ferre Yprensi qui libenter fatebitur statum naturæ puræ esse possibilem ex parte omnipotentiae Dei, si sit impossibili sex parte ejus sapientiæ et iustitiæ. Quare sit

CONCLUSIO. — Status naturæ puræ possibilis est saltem quoad viam.

Ita ferunt commemoratæ Constitutiones Pii V, Gregorii XIII, et Urbani VIII, quibus inter alias relata propositio 56 Baii fuit damnata.

Jansenius, lib. 3 de Statu naturæ puræ, cap. 22, Constitutiones Pii V et Gregorii XIII sibi objiciens exclamat: *Hæreo, fateor, quia apostolicæ Sedis auctoritas Catholicis omnibus tanquàm obedientiæ filiis* (hæc apprime observa) *veneranda est.* Deinde confugit ad consuetam responsionem, *oppositam scilicet Augustini doctrinam ab eâdem Sede per plura secula approbatam esse.* Ut ergo sancta Sedes secum consentiat, reponit præfatam Baii assertionem, ut et alias, proscriptam tantum esse ut *turbas excitantem.* Verùm vir eruditus ibidem satis innuit hanc solutionem potiùs esse effugium quàm solutionem, *cùm aliam quærere permittat*, ut mirum sit eam de novo ab ejus sectatoribus obtrusam fuisse.

Iis perpensis, quæ de originalis iustitiæ supernaturalitate diximus assertio nostra probata manet et stabilita; eam nihilominus novis, quantum fieri poterit, astruamus momentis, quia Yprensis illam specialiter impugnavit.

MOMENTUM PRIMUM. — *Ex D. Augustino.* — D. Augustinus censuisse videtur hominem talem omninò condi non potuisse qualis nunc nascitur; aliàs ejus argumenta pro asserendâ avità maculâ adversùs Pelagianos ex nostris miseriis et Dei in iis infligendis injustitiâ petita manifestâ principii petitione laborarent, quemadmodum in primâ parte ostendimus. Hinc in censurâ commemoratâ 56 Baii propositionis vox *qualis* non omnimodam, sive gradualem, sed specificam duntaxat sive substantialem qualitatem videtur denotare. Cùm S. doctor perquam sollicitus fuerit de refellendis Pelagianis qui initio saltem effutiebant præsentem statum esse ipsum naturæ puræ statum, mirum sanè non est quòd pauca admodum de istius statûs possibilitate dixerit, et quòd tam multa ipsis in speciem opposita protulerit; quinimò, id, si non contigisset mirum profectò esset, cùm inprimis S. doctori res esset cum viris, Julia-

no præsertim, acris ingenii, et subtilioris dialecticæ, quibus aliquid concedere fuisset periculosum. Ad hæc attendere voluisset Yprensus, naturæ puræ possibilitatem inter dogmata pelagiana fortassis non recensuisset. Nihilominus S. doctor, ubi exigit institutum, hanc possibilitatem non obscurè asseruit. Etenim 1^o justitiam originalem (id est gratiam sanctificantem, immunitatem à concupiscentiâ, morte, morbis, et aliis miseriis) quâ initio donatus fuit Adam, vocat *magnam gratiam*, ut in præcedentis quæstionis discussione ostendimus; has ergo dotes eidem Adæ indebitas fuisse credidit, etiam quatenus fuit homo; insulsa quippe est Yprensus exceptio; illas nimirum dotes fuisse debitas non quidem *Adæ meritis*, sed *ejus naturæ*, quasi Adam in ipso creationis suæ momento mereri potuisset! 2^o S. doctor supponit, in ipsis libris quos sub vitæ finem adversus Pelagianos edidit, Deum potuisse hominem in eo constituere statim, in quo supernaturali gratiâ non indiguisset, sed naturali tantum. Etenim libro de Correctione et Gratiâ, cap. 11, n. 32, hæc habet: « Si hoc adjutorium (sine quo) vel Angelo, vel homini, cum primum facti sunt, defuisset, quoniam non talis facta erat natura ut sine divino adjutorio posset manere si vellet, non utique suâ culpâ cecidissent; adjutorium quippe defuisset sine quo manere non possent. » Hæc sanè observatio, *quoniam non talis facta erat natura ut sine divino adjutorio posset manere si vellet*, insulsa foret, vel inconcinna et præpostera, si in quolibet statu possibili gratia supernaturalis homini ut Deo inhærere posset, fuisset necessaria. 3^o Licet doctissimus cardinalis Norisius Vindiciarum capite 3, paragrapho secundo, P. Bernenc citato opere tom. 1, q. 10, p. 405 et 406, et alii vulgò Augustiniani, quò relatum suum de statu naturæ puræ systema saluum maneat et incolume, quibus inter alios Thomistas assentitur eruditus P. Alexander in historiam seculi quinti, dissertatione primâ, quæ est de peccato originali contra Pelagianos, licet, inquam, docti illi viri cum Yprensi lib. 3 de statu naturæ puræ, cap. 20, contendat D. Aug., ubi lib. 3 de lib. Arbitrio, cap. 20, 22 et 23, tradit Deum condere potuisse hominem, cui concupiscentia et ignorantia essent naturales, Manichæos revincere *argumento ad hominem*, et ex *hypothesi impossibili*, tamen celeberrimum illud S. doctoris testimonium non quidem tanquàm invicti roboris, sed tanquàm valdè probabile argumentum in gratiam possibilitatis naturæ puræ adduci potest. Et verò, ipse Janse-

nus lib. 3 de Statu naturæ puræ, cap. 17 et 19, ingenuè fatetur illud *procreare difficultatem magnam quâ magnoperè arctatur*; quod certè non evenisset, si existimasset D. Augustinum hic ex *impossibili* argumentatum fuisse. Itaque

D. Augustinus rationis ope (Manichæi enim nisi quæ sibi favebant Scripturas admittebant) solvere aggrediens argumentum quo illi hæretici mundi Creatorem ob ignorantiam et benè agendi difficultatem, quâ angimur, velut mali auctorem traducebant, quatuor possibles incarnationis animarum modos proposuit lib. 3 de libero Arbitrio, capite vigesimo, n. 56. Secundum autem modum producens hæc habet: « Si sigillatim fiunt (id est si singulæ animæ singulis corporibus per creationem uniuntur), non est perversum, imò convenientissimum, et ordinatissimum apparet, ut malum meritum prioris naturæ sequentis sit, et bonum meritum sequentis naturæ prioris sit. Quid enim indignum, si etiam sic voluit Creator ostendere usque ad eò excellere creaturis corporeis animæ dignitatem ut ab eo gradu possit esse ortus alterius, ad quem alterius perductus est occasus? Nam cum ad ignorantiam difficultatemque pervenerit illa peccatrix, ideò pœna rectè dicitur, quia melior ante hanc pœnam fuit. Si ergo altera (anima) talis esse cœpit, non solum ante peccatum, sed ante omnem vitam suam qualis alia post vitam culpabilem facta est, non parvum bonum habet unde Conditori suo gratias agat, quia ipse ortus ejus, et inchoatio quovis perfecto opere est melior; non enim mediocria bona sunt non solum quòd anima est, quâ naturâ jam omne corpus præcedit, sed etiam quòd facultatem habet ut adjuvante Creatore seipsam excolat, et pio studio possit omnes acquirere et capere virtutes, per quas et à difficultate cruciante, et ab ignorantia cæcante liberetur; quod si ita est, non erit nascentibus animis ignorantia et difficultas supplicium peccati, sed proficiendi admonitio et perfectionis exordium; non enim ante omne meritum boni operis parum est accepisse naturale iudicium, quò sapientiam præponat errori, et quietem difficultati, ut ad hæc non nascendo, sed studendo perveniat. »

Idem repetit S. doctor ejusdem libri cap. 22, n. 61, et cap. 23, n. 68; hæc autem non per transennam et in æstu disputationis, sed constanter cum maturâ deliberatione ad mortem usque tradidit; ea enim confirmat lib. 1 Retractationum cap. 9, n. 6, imò et libro de

dono perseverantiæ, cap. 11, n. 27; primo loco hæc profert: « Quamvis ignorantia et difficultas (orta ex concupiscentiâ) essent primordia naturalia, nec sic culpandus sed laudandus esset Deus, sicut in eodem tertio libro (de libero Arbitrio cap. 20, 22, etc.), disputavimus: quæ disputatio contra Manichæos habenda est, qui non recipiunt Scripturas sanctas veteris Instrumenti (et etiam novi), in quibus peccatum originale narratur;... contra Pelagianos autem hoc defendendum est quod Scriptura commendat, quam se accipere profitentur. »

Fatemur illud testimonium in aliquibus esse involutum, et unam ex illis argumentationibus exhibere quas S. doctor *subtilius invenit et acutius disseruit ut quilibet eas intelligere possit*. Nihilominus tamen minus liquidò apparet Augustinum disserere de animâ, quæ in ortu exordio nullum commisisset peccatum; *ante peccatum*, inquit, *et omnem vitam suam*, in quâ ignorantia et difficultas non esset pœna, sive *supplicium peccati* (siquidem nullum commisit), *sed proficiendi admonitio, et perfectionis exordium, quæ Deo adjuvante virtutes acquirere posset*, etc., auxilio scilicet naturalis ordinis; *per naturale enim iudicium*, inquit, *sapientiam præponeret errori*, etc. Sed talis animæ status esset evidenter status naturæ puræ; cum igitur dicat Augustinus hæc in hypothesi *Deum non culpandum sed laudandum esse futurum*, credidit illum statum esse possibilem.

Novum isti argumento accedet robor et splendor ex solutionibus objectionum Jansenii. Iste, ut diximus, etsi fateatur relatum Augustini pronuntiatum *magnum procreare difficultatem*, tamen lib. 5 de Statu naturæ puræ, cap. 17, contendit illud nequaquam favere possibilitati status naturæ puræ. Verum, priusquam ejus rationes profero, quis, quæso, existimaverit ipsum in detegendo Augustini sensu feliciorum fuisse, quàm Pium V, Gregorium XIII, imò totam Ecclesiam, quæ D. etiam Augustini auctoritate mota relatum Baii 56 assertionem confixit, et sanxit laudandum fore Deum, si hominem qualis nunc nascitur (eo quo diximus sensu) crearet. Optandum igitur ut hic omnino alienus fuerit à Pelagianis de quibus dixerat lib. 6 de hæresi Pelagianâ cap. 25: *Magnum Sedis apostolicæ præferebant reverentiam, et omnia romani pontificis iudicio se submittere simulabant*. Itaque Yprensis citato libro. Reponit 1º, capite 17, Augustinum in hac hypothesi supponere *peccatum*; patet ex istâ Manichæo-

rum objectione, quam refert Augustinus lib. 3 de libero Arbitrio, cap. 19: *Si Adam et Eva peccaverunt, quid nos miseri fecimus, ut cum ignorantia cæcitate et difficultatis cruciatibus nasceremur? Idem evincunt voces commemorati testimonii, malum meritum prioris naturæ sit sequentis; sed puræ naturæ status præcedens peccatum nescit: ergo.*

Respondeo Augustinum supponere peccatum præcessisse in primo duntaxat homine, non in subsequentibus hominibus, sive animabus; ait enim ibidem, sive cap. 20, ut in probatione observavimus, *ante peccatum, et ignorantia et difficultas non erit supplicium peccati*. Quod attinet ad voces, *malum meritum prioris naturæ sit sequentis*, significant ignorantiam et concupiscentiam, quæ in unâ animâ est malum meritum, sive pœna præcedentis peccati, in aliâ animâ esse naturalem, ut multum non repugnat ipse Jansenius, et satis aliunde ostendunt voces, *malum meritum*.

Reponit 2º in commemoratâ hypothesi Augustinum agnoscere *gratiam, quâ adjuvante Deo, inquit ad beatitudinem perveniat*, etc. At puræ naturæ status gratiam et beatitudinem excludit; ergo. — Resp. ex contextu elucescere gratiam et beatitudinem illam esse naturalis ordinis, designatam nempe per *naturale iudicium*, ut iterum in probatione observavimus,

Reponit 3º, capite 19, Augustinum *senem et peritum* dimicando contra Pelagianos *puræ naturæ architectos emendasse quod contra Manichæos fuderat*. « Quomodò, inquit, in fine vitæ repetit Augustinus (lib. 1 Retractationum cap. 9, et libro de Dono perseverantiæ cap. undecimo), quod libro 3 de libero Arbitrio dixerat contra Manichæos? Arctat, fateor, magnoperè me difficultas ista, ut nisi audaciùs aliquid asserendi Augustinus aperuisset viam, penè succumberem.... Igitur ipse Augustinus animadvertit hallucinationem suam.... Accipe ingeniam ejus confessionem ad Hieronymum (epistolâ olim 28, nunc 169, cap. 6, n. 16); nam propositâ illâ sententiâ quæ singulas animas à Deo recentes condi et corporibus infundi statuit, ex quibus una fuerat juxta quam ignorantiam et difficultatem docuerat esse posse naturalem, jam pressus à Pelagianis, qui sententiam illam arripuerant » fatetur 4º, se cum ad pœnam parvulorum ventum est, quid respondeat prorsus non invenire; 2º, « quod dixerat citato lib. 3 de libero Arbitrio de pœnis parvulorum (ignorantiâ inprimis et concupiscentiâ) esse insufficiens in quæstione con-

tra Pelagianos ; » ergo. — Resp. 1^o, Augustinum *senem et peritum* reipsâ de novo docuisse civitatis lib. 1 Retractionum cap. 9, et libro de Dono perseverantiæ capite undecimo, quod libro 3 de libero Arbitrio dixerat contra Manichæos, ut supra ostendimus. Illa quippe duo opera emisit post citatam epistolam ad Hieronymum, quam scripsit anno 415, cum duos ultimos libros ediderit anno 427 et 428, aut 429. — Resp. 2^o, Augustinum dixisse, *se quid Pelagianis responderet prorsus non invenire, et esse insufficiens adversus illos hæreticos*, hæc ex causâ reposuerat Manichæis lib. 3 de libero Arbitrio, cap. 25, n. 68, in hypothesi quòd ignorantia, concupiscentia, cæteræque hujus vitæ miseriæ essent primordia hominis naturalia, has misérias infantibus eas non merentibus justè infligi potuisse *ob bonam compensationem ipsis à Deo in secreto judiciorum suorum destinatam*, ita ut ad id explicandum necesse non esset admittere peccatum originale. Hanc responsionem sagaces Pelagiani arripuerunt, et ideò reposuerunt Augustino parvulos justè affligi, etsi nullius peccati reos ob aliquid bonæ compensationis ipsis à Deo in alterâ vitâ reservatum, atque ideò ipsum immeritò asserere istos parvulos sine baptismo morientes æternæ damnationi subijci. Hæc est retorsio quæ Augustinum in tantas adigebat angustias, non autem ejus argumentatio contra Manichæos, quam usque in vitæ finem adversus eos et eorum principia firmam et validam esse sensit ; cum enim isti peccatum originale negarent, nec Scripturas admitterent, et misérias, quibus parvuli nascendo sine ullâ præviâ culpâ obnoxii sunt, in principium malum rejicerent, Augustinus ratione adversus eos disputans ipsis reponebat istas misérias à bono Deo justè infligi posse propter aliquod bonum quod ipsis reservabat, quæ reservatio à Manichæis Scripturam non admittentibus falsitatis argui non poterat, non ita à Pelagianis qui per Scripturam et veterem et novam, quæ ipsis accepta erat, probassent infantes sine baptismo è vitâ migrantes damnari. Quamobrem coactus est S. doctor Manichæos ex ratione et ipsorum principiiis revincere, Pelagianos verò ex Scripturis quæ has generis humani misérias ex primi parentis peccato in præsentī statu dimanare docent.

Reponit 4^o, capite vigesimo, Augustinum ibi Manichæos revincere argumento, ut aiunt, *ad hominem*, et ex hypothesi impossibili, petito scilicet ex Manichæorum principiiis sive asser-

tionibus, quas tamen falsas et impossibiles judicabat, in hunc modum : « Contenditis hominem cum concupiscentiâ, quæ est in se malum, creatum fuisse, et sine illâ nequaquam creari potuisse ; et ideò hominis Creatorem esse malum et culpandum ; ego è converso contendo Creatorem hominis in vestrâ etiam sententiâ non esse malum et culpandum, sed potiùs laudandum ; si quippe Creator hominis non potuit hominem creare sine concupiscentiâ nullam prorsus culpam commisit illum cum concupiscentiâ creando, et ideò in vestris principiiis erit laudandus. »

Quòd autem sic arguat Augustinus probat 1^o ex eo quòd hic arguendi modus adversus Manichæos et Pelagianos Augustino maximè familiaris est ; in ipso quippe libro 3 de libero Arbitrio, cap. 16, n. 46, probat Creatorem esse laudandum, etiamsi, ut obganniebant Manichæi, homo necessitaretur ad peccandum : « vel enim, inquit, defendi potest peccator, vel non ; si justè defenditur, non est peccator, lauda ergo Creatorem ; si defendi non potest, in tantum peccator est, in quantum se à Creatore avertit, lauda ergò Creatorem ; omninò igitur non invenio.... quomodò tribuantur peccata nostra Creatori nostro Deo... » 2^o ex eo quòd contextus Augustini id evincit... 3^o ex eo quòd adversus Pelagianos præfatam hypothesim falsam et impossibilem agnoscit dicendo injustum fore Deum si hominem creasset cum concupiscentiâ, ignorantia, etc. Hanc Jansenii responsionem propugnant Norisius et P. Bernenc, ut supra diximus.

Resp. Augustinum hæreticos aliquando premere argumento *ad hominem*, et ideò ex ipsorum placitis, falsis licet et impossibilibus, ut reipsâ fecit cap. 16 libri tertii de libero Arbitrio. Verùm S. Doctorem hic illo arguendi modo non uti multa evincere videntur, 1^o ejus scopus. Manichæos scilicet Scripturas, ut diximus, non recipientes, et ignorantiam ac difficultatem benè agendi, quam experimur, non nisi à malo principio oriri posse mordicus affirmantes, ex ratione refellere voluit variis incarnationis animarum modis, in quibus ignorantia et rectè agendi difficultas animabus sic esset naturalis, ut illæ de Creatore conqueri non possent, « quinimò ipsi gratias agere deberent, cum inprimis ipso adjuvante virtutes acquirere possent quibus ab ignorantia illâ et difficultate liberarentur ; » at talis argumentatio non solum ex Manichæorum principiiis non erumpebat, sed ipsis etiam erat admodum ad-

versa, cum illi hæretici animas ab illâ ignorantia et difficultate Creatoris adjutorio eximi posse pertinaciter negarent... 2º Modus quo S. doctor illam proponit argumentationem, absolute scilicet et nullâ habitâ ratione falsorum principiorum Manichæorum asserit non solum non perversum, sed etiam convenientissimum et ordinatissimum fuisse ut ignorantia et difficultas, quas dicit malum meritum animæ peccatricis, sint natura sequentis, additque in eâ hypothesi ignorantiam et difficultatem futuram esse proficiendi admonitionem et perfectionis exordium... 3º Constans S. doctoris in illo rationio adversus Manichæos urgendo ad mortem usque propositum; illud enim, ut diximus, lib. 1 Retractationum cap. 9, et ipso libro de Dono perseverantiæ post Retractationes conscripto impensè laudat et commendat. An, quæso, merum argumentum *ad hominem et ab impossibili*, tot ac tantis encomiis extollere potuisset, cum inprimis ex impossibili reipsa non sequatur nisi impossibile? 4º Ratio quâ lib. 1 Retractationum cap. 9, refert argumentum contra Manichæos lib. 3 de libero Arbitrio adhibitum; dicit enim illud non esse minoris roboris quàm argumentum adversus Pelagianos adornatum; at istud certè non erat ad hominem et ex falsis Pelagianorum placitis... 5º Infelix et malè procedens, quâ adversus Manichæos usus esset, disputatio; quomodo enim systema Manichæorum ignorantiam et difficultatem rectè agendi à malo principio necessariè prodire propugnantium diluisset? in mente quippe Yprensensis, Norisii, etc., sentiebat Augustinus Creatorem non potuisse condere hominem cum ignorantia et rectè agendi difficultate nisi agendo contra suam sapientiam, bonitatem et justitiam. Jam verò Manichæis objiciebat, non culpandum, sed laudandum futurum esse Deum qui hominem condidisset cum ignorantia et concupiscentiâ, etiamsi hæ miseræ essent primordia hominis naturalia. Quid ad hæc Manichæi? Nonne statim reposuissent, quinimò maximè culpandum esse illum Deum utpote qui juxta Augustinum talem hominem creando violasset jurasapientiæ, bonitatis et justitiæ? Pariter, juxta Norisium et P. Bernen, Manichæi in suo systemate fateri tenebantur Creatorem non esse culpandum, sed laudandum, necessariè creando hominem cum concupiscentiâ ex se malâ, *quia nulla ipsius culpa fuisset facere quod aliter fieri non poterat*; at è converso, respondissent Manichæi talem Creatorem eo ipso quòd ex naturâ suâ talem conderet hominem tanquàm neces-

sarium principium omnis mali omni prorsus detestatione esse dignum. Tandem, si tam clarum est Augustinum hic arguere *ad hominem*, et ex falsis Manichæorum principiis, cur Jansenius fatetur se istâ difficultate magnoperè arctari?

Igitur nec modus arguendi ad hominem, quem nonnunquam adhibet Augustinus, nec Augustini contextus vigesimo capite libri tertii de libero arbitrio evincit S. doctorem vigesimo illo capite Manichæos confutavisse ex hypothesi impossibili, et non ex suâ, sed ex ipsorum sententiâ. Quod attinet ad ejus pronuntiatum adversus Pelagianos, *injustus foret Deus si hominem crearet cum concupiscentiâ, ignorantia, etc.*, illud est intelligendum aut de injustitiâ hypotheticâ, sive relativâ ad decretum de condendo homine sine illis miseriis, aut potius de gradu, sive intensione et gravitate, non de specie, sive substantiâ illius ignorantie, sive concupiscentie, etc.; hominem enim cum tot ac tantis miseriis, quibus obnoxii sumus absque injustitiâ à Deo absolute creari non potuisse censuisse videtur S. doctor, ut diximus.

Idem Jansenius, libris 2 et 3 de Statu naturæ puræ, ex Augustini doctrinâ de hominis beatitudine, sive ordine ad finem ultimum, de concupiscentiâ, de mortalitate, et aliis hujus vitæ miseriis, statum naturæ puræ impugnat. Illius argumenta seorsim confusionis declinandæ causâ expendimus.

Argumenta ex parte beatitudinis. — Augustinus, inquit Yprensensis lib. 2, cap. 3, centies Pelagianis objicit supernaturalem felicitatem in quocumque statu homini innocenti absque injustitiâ à Deo denegari non posse. Ex millibus testimoniis istud sufficiat. *Responde*, inquit Julianum alloquens lib. 1 contra ipsum cap. 7, n. 32, *utrum Deus justus nulli obnoxiam peccato imaginem suam privare vitâ possit æternâ?* — Resp. : Neg. ant. De quâcumque hypothesi adversus Pelagianos hic non disserit Augustinus, sed de solo præsentis statu, in quo homo ex beneficiâ Dei ordinatione ad finem supernaturalem evectus est, quâ semel à Deo decretâ Deus qui *seipsum negare non potest* (2 ad Tim. cap. 2), sine injustitiæ labe insonti homini beatitudinem supernaturalem non potest eripere. Id declarant singula penè propositi textûs verba, quæ hominem exhibent ad imaginem et similitudinem Dei conditum, sive nulli, sive proprio, sive alieno obnoxium peccato, etc. Idem elucescit vel ex solo intuitu testimoniorum, quæ toto cap. 3 congerit Yprensensis, ut planè non intelligam quomodo vir artis dissolvendi tam

peritus ea pro hac causâ adducere potuerit.

Neque reponas hanc solutionem Augustinum in vitium principii petitionis præcipitare; vitium enim illud detergitur cum suppositum ante probatum fuit. At Augustinus ex sacris Scripturæ et traditionis monumentis supernaturalem statûs nostri ordinationem relucere fecerat.

Eâdem distinctione in fumos abeunt quæ Yprensis tum toto lib. 4 de Statu naturæ puræ cum cap. 4 secundi libri ex Scripturis et Augustino ostentat; scilicet sine supernaturali Dei dilectione in quolibet rerum ordine creaturam rationalem quâcumque beatificâ visione potiri non posse; Scripturæ videlicet, ut et Augustinus qui eas profert, dilectionem et beatificam fruitionem naturæ elevatæ delineant, non naturæ puræ et sibi derelictæ, in quâ homo ante mortem Deum tanquam principium et finem naturæ per auxilium naturæ suæ accommodatum diligeret, post mortem verò per auxilium singulare, ejusdem tamen ordinis, Deo suo modo frueretur, eique amore ejusdem generis suaviter, et sine ullâ animi anxietate et perturbatione insereretur, si tamen, quod definire non intendimus, Deus ex merâ liberalitate visionem beatificam sive supernaturalem illi non impertiret.

Argumenta ex parte concupiscentiæ. — Argumenta ista cætera difficultate superant tum ex se, cum ex obscuris quibusdam ad juliana ratiocinia Augustini responsis. Hinc, ut nostræ solutiones facilius intelligantur, finiendum quid sit concupiscentia, et sub quibus respectibus considerari possit et debeat.

Concupiscentia hic in actu primo, ut aiunt, est homini innata vis, sive potentia sese ferendi versûs bonum sensibile; in actu secundo actualis hujus potentiæ motus versûs bonum sensibile. Scilicet naturale est homini quatenus est animal concupiscere bonum sensibile, sicut, quatenus est rationalis, ipsi est naturale appetere bonum spirituale. Concupiscentia descripta est sub duplici respectu consideranda, materialiter, et tunc est præcisè propensio in bonum sensibile, et formaliter, et tunc est inclinatio in bonum sensibile, quatenus præcisè in appetitum rationalem insurgit et erumpit. Ista, non illa depingitur Rom. cap. 7, à versu 15 ad 25, 2 Corinth. cap. 12, v. 7, 1 Joannis cap. 2, v. 10.

D. Augustinus lib. 4 contra Julianum, cap. 14, n. 65, quatuor in concupiscentiâ secernit, « vivacitatem sentiendi, quâ alius magis, alius

minus in rebus corporeis pro earum modo et naturâ quod verum est percipit, et à falso magis minusve discernit... Utilitatem sentiendi, quâ corpori et vitæ ad aliquid approbandum, vel improbandum, sumendum, vel rejiciendum, appetendum, vitandumve consulimus.... Necessitatem sentiendi, quando sensibus nostris etiam quæ nolumus ingeruntur... Libidinem sentiendi, quæ nos ad sentiendum sive consentientes mente, sive repugnantes, appetitu carnalis voluptatis impellit; hæc est contraria dilectioni sapientiæ, hæc virtutibus inimica; » deinde addit adversûs Julianum: « Hanc libidinem si voluisses, vel valuisses à sentiendi vivacitate, utilitate, et necessitate discernere, videres quàm superfluo tam multa dixisses; » quibus significat se in concupiscentiâ unicè improbare libidinem sentiendi. His prænotatis, Augustini doctrinam de concupiscentiâ scrutemur.

1º Augustinus, inquit Yprensis lib. 2, cap. 14, 15 et seq., in duodecim libris adversûs Julianum concupiscentiam esse malam mordicis contendit. Ipsum modò audivimus dicentem, concupiscentiam propter libidinem adjunctam contrariam esse dilectioni sapientiæ virtutibus inimicam, etc.; ergo.

Ut adducenda hujus argumenti solutio magis eluceat, observa appetitum sensitivum homini, quatenus est animal, naturalem, in desiderium boni delectabilis, quod ipsi per sensus offertur, utpote principium necessarium suorum actuum, nisi à causâ exteriore coerceatur, necessariè erumpere; unde, suppositâ hominis constitutione, fieri non potest, ut appetitus inferior, sive sensibilis adversûs superiorem, sive rationalem interdum non insurgat; impossibile enim est ut inter tot objecta delectabilia, quæ sensibus sese offerunt, non reperiatur multa bono spirituali adversa. Hinc concupiscentia etiam formaliter, sive quatenus pugnat contra rationem, non potest esse malum morale, sive culpæ; sed malum duntaxat pœnale, aut physicum, exurgens ex naturali hominis imperfectione. Hinc D. Augustinus istam concupiscentiam tanquam veri nominis peccatum in quâcumque hypothesi vituperare non potuit.

Observe iterum ex D. Augustino peccatum originale in nostro statu ad Adæ nepotes transmitti per concupiscentiam eo quo in primâ parte diximus sensu; unde frequens S. doctoris effatum, concupiscentia in baptizatis manet actu, transit reatu, significat concupiscentiam in regeneratis remanere sine gratiæ sanctificantis

privatione, in quâ potissimum consistit ipsius reatus, non autem concupiscentiam saltem quoad speciem sive substantiam, spectatam ex se esse intrinsicè et moraliter malam, cum in baptizatis, in quibus nihil est damnationis, sub isto respectu supersit.

Ex his proposita evanescit difficultas. Itaque ad argumentum, resp. : Dist. ant. : Augustinus docet concupiscentiam in presenti ordine esse malam improprie, concedo; proprie, iterum distingo : Si de non baptizatis agitur, conc.; si de baptizatis ipsi non consentientibus res est, neg. ant. et conseq. Solutio ex dictis elucescit; duplici enim ex causâ dixit Augustinus concupiscentiam in statu naturæ lapsæ (de quo solo, aut saltem præcipue cum Juliano et Pelagianis disputat) *esse malam*; scilicet, quemadmodum observatum est ubi de peccato originali disseruimus, concupiscentia in mente Augustini mala est *origine et effectu*, quia nempe, ut loquebatur S. doctor, *peccato facta est, et peccatum si vicerit facit, et libidine sentiendi*, ut modò arguebat S. doctor, per quam libidinem intellexit vel negationem moderationis in appetitu sensitivo, vel defectum virtutis in animâ ad cohibendum appetitus sensitivi æstum; quæ duo licet in nostro statu invexerit peccatum originale, tamen ex ipsâ hominis constitutione, ex parte saltem emanant, ut diximus, et ideò mala non sunt moralia, sed naturalia duntaxat.

Instabis : Si Augustinus voluisset *concupiscentiæ libidinem*, sive concupiscentiam *formaliter* prout pugnat adversus rationem esse *malum entis et naturæ*, non *moris sive peccati*, incidisset in Juliani sententiam, tantum abest ut eam refellisset; nunquam enim negavit Julianus concupiscentiam *formaliter* sumptam esse naturæ humanæ imperfectionem, sive *malum entis*; falsum consequens; ergo. Resp. : Neg. majorem... Ad probationem dico Julianum *ipsam concupiscentiæ libidinem* bonam et laudandam existimasse, quia erat positiva naturæ humanæ qualitas auctorem habens Deum, et nullo prorsus inducta fuerat peccato. Id quippe passim docet aut supponit D. Augustinus. Etenim libro 3 contra Julianum cap. 21, n. 49, Julianum irridens ait : *Ego bello adversus malum, tu adversus bonum*, etc. Item lib. 3 Operis Imperfecti, adversus Julianum, cap. 209, hæc habet : *Apud te quando concupiscitur fornicatio, concupiscentia carnis non est mala, quia, ut dicis, bono malè utitur, qui sic utitur*. Elverò, Julianus nihil in concupiscentiâ improbat præter ejus

excessum; at per *excessum* malum concupiscentiæ usum intelligebat, qui in voluntatis consensu consistit; Augustinus videlicet Julianum sic compellat lib. 5 adversus ipsum, cap. 7, n. 29 : *Quid te adjuvat quod reprehendere videris ejus excessum, cujus approbas motum ? tunc enim excedit licitum limitem quando ejus motibus ceditur*, etc. E converso, contendebat S. doctor concupiscentiam *formaliter*, sive quoad libidinem esse naturæ qualitatem non realem et positivam, aliàs Deus ejus fuisset auctor, sed merè negativam sive privativam, cujus ideò nulla est causa efficiens, sed deficiens duntaxat, scilicet naturalis creaturæ conditio, quæ ideò sub hoc respectu mala erat, *dilectioni sapientiæ repugnans, virtutibus inimica*, et etiam quatenus in nostro statu erat peccati poena.

2º Augustinus lib. 1 contra duas epistolas Pelagianorum cap. 15, n. 31, ait *fas non esse de opere Creatoris erubescere*; at ibidem, n. 33, dicit hominem de concupiscentiâ erubescere; illa igitur Dei opus non est, et ideò necessarius est peccati effectus. Jansenius, lib. de Statu naturæ puræ, cap. 17, hoc argumentum velut *insolubile* adversus Julianum usum esse asserit. — Resp. Augustinum hoc argumento optime probare existentiam peccati originalis adversus Pelagianos qui concupiscentiam, prout etiam efficientem libidinem includebat, in presenti statu opus Dei esse contendebant, et tamen fateri cogeantur hominem de illâ erubescere. Cæterum, S. doctor censuisse videtur, ut diximus in primâ parte, ubi peccati originalis existentiam vindicavimus, commemoratam in generationis actu libidinem in alio naturæ ordine extitutam non esse, siquidem existimavit, ut iterum non semel observavimus, Deum justum non posse hominem talem omnino creare qualis nunc nascitur. Tandem nihil impediret quominus homo in statu naturæ puræ de concupiscentiâ quoad speciem consideratâ pudore afficeretur, etiam prout adversus rationem aliquando insurgit; sub hoc enim respectu est tantum privatio perfectionis ex essentiali hominis constitutione exurgens, quæ ideò non efficientem sed deficientem duntaxat causam habet, ut jam observavimus.

5º Augustinus, lib. 5 contra Julianum, cap. 16, n. 64, docet eos qui concupiscentiam aliquod malum reputant, et tamen eam à peccato oriri inficiantur, *Manichæismum* renovare; at in statu naturæ puræ concupiscentia esset aliquod malum, et à peccato non emanaret; ergo,

— Resp. concupiscentiam in statu naturæ puræ futuram esse malum naturale, non positivum, sed negativum, ut diximus; sed malum negativum non potest Deo tribui, sed soli creaturæ, ut iterum diximus; ergo status naturæ puræ Manichæismum non importat. Porro Augustinus disserit de malo positivo et reali quod si non esset à peccato, oriretur à Deo, et idecirco à malo creatore.

Argumenta ex parte miseriarum. — Ea proponit Ypensis in libro tertio de Statu naturæ puræ. Ad ista reduci possunt :

1° Augustinus cum Pelagianis disputans centies asserit hujus vitæ ærumnas peccatum originale arguere; eas ergo ut naturæ humanæ appendices non habuit. — Resp. 1° Jansenium lib. 5, cap. 49, fateri *adultos absque peccato sine Dei injustitiâ talibus ærumnis affligi posse ad promovendam propriam eorum utilitatem*; peccatum igitur necessariè non arguunt. — Resp. 2° : Dist. conseq. : Ergo cas in præsentī statu ut naturæ appendices non habuit, conc. Absolutè et in quocunque alio statu, iterum distinguo : Si quoad gradum hujus status proprium considerentur, conc. ; si quoad speciem præcisè spectentur, neg. conseq. Alibi enim fatetur illas esse posse *primordia hominis naturalia*, ut ostendimus.

Verum, inquit Ypensis defensores, Augustinus lib. 1 Operis Imperfecti, cap. 39, hæc absolutè asserit : *Neque sub Deo justo miser esse quisquam, nisi mereatur, potest*; ergo. — Resp. ut supra, Augustinum adversus Pelagianos disserere de præsentis status miseriarum intensione, quæ *sub Deo justo* aliâ ex causâ quàm ex peccato oriri non potest. Unde miseriam *pœnalem* non naturalem describit.

2° Augustinus lib. 4 contra Julianum, cap. ultimo, n. 83, dicit, gentiliū philosophos ex miseriarum nostrarum contemplatione primævum peccatum cognovisse; ergo suggerit ratio illas misérias necessariam habere cum peccato connexionem. — Resp. peccatum originale certò etiam in Augustini mente deduci posse ex hujus vitæ miseriis, quæ longè vehementiores sunt quàm forent in statu naturæ puræ; cum illis enim hominem à Deo creari non posse censuit, ut ostendimus. Unde hanc philosophorum notitiā ut certum etiam argumentum Juliano objicere potuit; illam enim ex ipso lumine naturali haurire potuerunt illi philosophi, si eam non acceperunt ex lectione sacerorum voluminum (quod negare videtur Augustinus lib. 8 de Civitate Dei cap. undecimo), aut ex

commercio cum Judæis. At non ideò ex illis miseriis quoad speciem tantum in mente S. doctoris primigenium delictum erui potest cum agnoscat, illas esse potuisse *primordia hominis naturalia*.

MOMENTUM SECUNDUM. — *Ex auctoritate theologorum.* — Jansenio dicente lib. 1 de puræ naturæ Statu, cap. 1, « plerique scholasticæ doctrinæ professores.... in asserendo puræ naturæ statu à principiis Augustini adversus Pelagianos et Manichæos (ut ipsi videtur) recesserunt. » Idem ante supposuerat Michael Baius propositione octogesimâ : *Falsa est doctorum sententia, primum hominem potuisse à Deo creari sine justitiâ originali*. Accedit censura sacri Normanniæ Ordinis lata 24 februarii anni 1740, in assertiones Falesiæ publicè propugnatas in abbatiâ D. Joannis ejusdem urbis, quæ Baii et Jansenii doctrinam de statu naturæ puræ repugnantia subdole et artificiosè renovabant, quod quidem judicium à S. P. Benedicto XIV, sacra Facultate Parisiensi, cæterisque totius regni sacris Ordinibus summo plausu exceptum est, ut fidem faciant ipsorum epistolæ publicis ejusdem sacrae Facultatis tabulis inscriptæ. Prodeat ergo solus scholæ princeps D. Thomas, quem non deserunt aut saltem deserere non debent Ypensis sectatores. Magister enim lib. procemiali de ratione et auctoritate, cap. 22, eum vocat *magnâ ex parte contractum Augustinum*.

Docet 1°, duplicem esse ultimum finem, unum homini connaturalem, Deum nempe quatenus est principium et finis naturæ, qui per auxilia naturalis ordinis impetrari potest.... Alterum naturâ sublimiorem, Deum scilicet intuitivè videndum, qui per gratiam potest obtineri, et ideò, ut alibi dixit, carentiam divinæ visionis non esse pœnam, sed defectum consequentem naturam creatam, 1-2, q. 109, a. 3 ad 1, et ibidem artic. 5, ad 3.... 2° Hominem innocentem manifestè condi potuisse cum concupiscentiâ etiam formaliter sumptâ, 1 p., q. 95, a. 1; verba supra protulimus.... 3° Immunitatem à miseriis et ipsâ morte non esse naturale sed supernaturale donum, 1-2, q. 85, a. 5 et 6; sed hæc naturæ puræ possibilitatem evincunt; ergo.

Reponere solent adversarii D. Thomæ multis in locis asserere hominem appetitu necessario et innato ferri in finem supernaturalem, visionem nimirum intuitivam. Homo ergo creari non potuit sine ordinatione ad illum finem. — Resp. hoc divi Thomæ effatum tangere Dei vi-

sionem non quatenus est finis speciatim et in particulari consideratus, sed præcisè quatenus est finis confusè inclusus in beatitudine in communi, quam naturaliter desiderat. Scipsum enim sic exponit S. doctor, v. g. in 4 Sent. distinct. 49, art. 5, ad 3, ubi docet hominem appetitu naturæ insito desiderare beatitudinem in communi, id est in genere tantum, non in particulari, id est Dei visionem. Aliunde insigniores S. doctoris commentatores obscura ejus testimonia per clariora, ut æquum est, explicantes, ipsum hoc modo cum ipso conciliant. Sic etiam intelligendus est D. Augustinus qui pluries dicit, naturā Dei visionem nos appetere; suppositā quippe divinā revelatione natura desiderando beatitudinem in communi desiderat Dei visionem quam per illam revelationem cognoscit.

Scio adversarios cum Yprensi lib. 1 de Statu puræ naturæ, cap. 15, objicere Scotum et plures ejus scholæ theologos admittere innatum sive naturalem appetitum beatitudinis supernaturalis; sed simul scio novissimis hisce temporibus Patrem Frassen, doctissimum ejusdem Seraphici Ordinis theologum, genuinum Scoti et aliorum sensum retexisse, et ostendisse ipsos per illum appetitum non actum, sed meram passivam capacitatem, sive potentiam passivam recipiendæ beatitudinis, designasse (quemadmodum non omnino diffitetur ipse Jansenius loco citato).

MOMENTUM TERTIUM. — *Ex rationibus theologis.* — Prima. Non negant adversarii puræ naturæ statum, attendendo præcisè ad Dei omnipotentiam, esse possibilem; ergo videtur omnimodè possibilis, quod enim non repugnat uni Dei attributo nec aliis repugnat, et vicissim.

Secunda. Creari potuit homo 1º sine gratiā et donis ipsi annexis, cum naturæ non sint debita;... 2º sine peccato, cum condi nequeat cum peccato;... 3º sine immunitate à concupiscentiā, quæ, ut probavimus, fluit ex nativā hominis constitutione;... 4º sine immunitate à morte et aliis miseriis, cum illæ iterum ex hominis compositione quasi nascentur; ergo.

Objiciunt: Homo produci non potest cum eo quod ad peccatum inclinatur; sed concupiscentia ad peccatum inclinatur; ergo. Resp.: Dist. maj. Non potest homo creari cum eo quod per se et ex naturā suā inclinatur ad peccatum, v. g., cum vitioso habitu qui per se ad peccatum trahit, conc. Cum eo quod per accidens duntaxat ad peccatum inclinatur, qualis est, v. g.,

potentia gratiæ resistendi, cum quā primitus homo conditus est, nego majorem, et similiter distinctā minorem, neg. conseq. Concupiscentia per se inclinatur tantum ad bonum naturæ sensitivæ proprium, quod indubiè peccatum non est; per accidens verò ad malum excitatur, quatenus cum ratione conjuncta eam præveniendū ipsi interdum reluctatur, quod evenit non ex intentione Creatoris, à quo data est, non ut spiritum vincat, sed ut à spiritu vincatur, non ex ipsā concupiscentiā physicè consideratā, cum sit præcisè inclinatio in bonum sensibile, sed ex naturali hominis imperfectione, qui ex se habilis est ad percipiendam majorem impressionem ex rebus sensibilibus quàm ex spiritualibus.

Verum, inquit, si valeret ista responsio, concupiscentia physicè, sive prout unicè est inclinatio ad bonum sensibile, posset absolutè separari à concupiscentiā formaliter, sive pugnante contra rationem, cum illa sit à Deo et bonum, non ista; falsum consequens; ergo.

— Resp.: Neg. minorem. 1º Enim in primo et secundo Adam et Mariā, illa fuit, non ista. 2º Entis imperfectio, sive defectus essentialiter non sequitur ex ente, cum merè privativum essentialiter non sequatur ex positivo; sed concupiscentia formaliter est, ut diximus, imperfectio hominis sive purus defectus, consistens in negatione moderationis in appetitu sensitivo, vel in privatione virtutis in animā ad cohibendum illum appetitum, quæ negatio, ut diximus, vel privatio exurgit ex innatā hominis habilitate ad majorem impressionem recipiendam ex rebus corporeis quàm ex spiritualibus; unde concupiscentia formaliter, nisi à causā exteriore reprimatur, quasi necessariè ebullit in homine, etsi nec ex intentione Dei, nec ex naturā concupiscentiæ fluat.

Sed, rursus excipiunt, si concupiscentia formaliter, nisi à Deo coerceatur, necessariè fluit ex unionē appetitūs sensitivi cum rationali, concupiscentia formaliter oriatur à Deo, cum Deus in quocumque statu sit illius unionis auctor; falsum consequens; ergo. Resp.: Neg. maj. Neque enim concupiscentia formaliter ex unionē utriusque appetitūs tanquā ex formali, sed solū tanquā ex occasionali causā oritur. Positā scilicet illā unionē, existit homo, cui propter suam idoneitatem ad majorem impressionem recipiendam ex rebus corporeis quàm ex spiritualibus naturaliter inest negatio moderationis in appetitu sensitivo, aut privatio virtutis in animā ad reprimendum illum ap-

petitum. Unde concupiscentia *formaliter* ex utriusque appetitus unionem oritur per accidens et præterintentionem et exigentiam illius unionis; quæ ex causâ Deus non est auctor illius defectûs, cum velit tantum illam unionem et non defectum ipsi annexum, sicut architectus domûs ex vitiosis lapidibus et lignis coalescentis non est auctor defectuum illius domûs.

PRINCIPIA SOLUTIONUM. — Primum. Amor creaturæ in naturâ purâ, naturalis licet, verus esset, quia tenderet ad Deum qui ut principium et finis naturæ super omnia diligeretur.

Secundum. Amor castus, sive charitas tendens ad Deum ut est objectum beatitudinis supernaturalis gratiam exigit; amor verò naturalis tendens ad Deum ut finem ultimum naturæ exigit auxilium merè naturale, sive naturæ proportionatum.

Tertium. Sublatâ revelatione beatitudo supernaturalis cognosci nequit, et ideò non datur innatum ipsius desiderium. Natura tamen aliquatenus dici potest illam appetere, sive quia per revelationem ipsi innotescit, sive quia beatitudinem genericè appetendo in id omne, quod ipsam beare potest, sive cognitum, sive incognitum, fertur.

Quartum. Quidquid requiritur ad beatitudinem naturæ puræ propriam sine gratiâ propriè dictâ, consequeretur homo per auxilium speciale naturalis ordinis, nisi dicas Deum ex merâ liberalitate intuitivam sui visionem in hoc statu esse concessurum.

Quintum. Concupiscentiam *materialiter* ex *entitativè*, sive quatenus est inclinatio in bonum sensibile, est verum bonum, *formaliter*, sive quatenus avocatur à spiritali bono, malum est naturale, seu carentia perfectionis naturalis; malum verò morale fit per solum liberum voluntatis consensum.

Sextum. Quidquid dixerunt Augustinus, alii Patres et concilia de hominis beatitudine, de ejus concupiscentiâ, de illius miseriis, etc., illud dixerunt relativè ad præsentem naturæ lapsæ statum, de quo solo eos inter et Pelagianos erat controversia, non absolutè et relativè ad alium statum possibilem. Quare argumenta Yprensis et aliorum adversariorum non sunt ad rem, et hæc distinctione planè concidunt.

Septimum. Adeò verum est hominem ex se dolori et aliis miseriis obnoxium esse, ut faciente ipso domino Nicole in Symbolo vix intelligi possit quomodò Deus Adam in paradiso à dolore exemerit: id enim contigit aut quia Deus speciali providentiâ omnes doloris causas

amovit, aut quia, si illas agere permisit, impedivit ne Adam doloris sensum experiretur.

Octavum. Quanquam Yprensis lib. 3 de Statu naturæ puræ, cap. 16, meritò probare aggreditur initio sermonis Augustini in Psalmum 70, legendum esse: *Quis Deo diceret: quid fecisti, si damnaret injustum? quanta ergo misericordia si justificet injustum!* Ibidem tamen fatetur Augustinum potuisse scribere, *si damnaret justum*, cum editis S. doctoris manuscriptis; quomodò autem hæc in hypothesi asserere potuit in Augustini mente miseriæ inflectionem absque prævio peccato à Deo oriri non posse?

ARTICULUS III.

An, et quâ gratiâ indigerit insons Adam ad bene agendum et perseverandum.

Gratia innocenti Adæ, ut in suâ integritate maneret fuit necessaria. Id enim apertè docet D. Augustinus pluribus in locis. Jam protulimus celebre ejus testimonium in libro de Correctione et Gratiâ cap. 11, n. 32. Idem rursus docet Enchiridion, cap. 106, n. 28: *Sine gratiâ, inquit, nec tunc ullum meritum esse potuisset.* Hinc concilium Arausicanum secundum illud definiit can. 19 his verbis ex Augustini epist. 186, aliàs 116 desumptis: « Natura humana, etiamsi in illâ integritate, in quâ est condita, permaneret, nullo modo seipsam Creatore suo non adjuvante servaret. »

Hæc, cum apud recentiores hæreticos, tum apud orthodoxos theologos sunt extra controversiam. Verum utrique plurimum inter se dissentiunt circa hujus adjutorii naturam, et ideò discrepantiam ab auxilio naturæ lapsæ proprio, quam designavit Augustinus lib. de Correctione et Gratiâ cap. 12. Quare referemus novatorum errores, subinde theologorum opiniones adducturi.

§ 1. *Referuntur novatorum placita circa naturæ innocentis et lapsæ auxiliorum discrimen.*

Lutherus et Calvinus, ille præsertim libro de servo Arbitrio, hic lib. 2 Institutionis cap. 5, etc., docent Adæ insontis libertatem ipsius peccato prorsus extinctam fuisse, et ideò in hoc differre gratiam statûs innocentie à gratiâ statûs naturæ lapsæ quòd illam liber et potens Adam pro libito inflecteret, hæc è converso infirmum et virium omninò expertem Adam, ejusque posteros necessitate absolutâ et immutabili agat et determinet.

Jausenius Yprensis, frequenti operum D. Au-

gustini imprimis adversus Pelagianos lectione infelicitèr deceptus, censuit commemoratum Calvinii systema ab Ecclesiâ quoad substantiam non fuisse improbatum, sed quoad modum, id est quoad necessitatem absolutam et immutabilem, quam ille ex Augustino, cujus mentem ex parte tantum assecutus erat, in homine lapso collocaverat. Hinc asseruit ex Augustini principis gratiam liberationis, sive medicinalem, non absolutam et invariabilem, sed relativam et alternantem necessitatem homini lapso imponere, et ideò gratiam sanitatis, sive statûs innocentiae, in eo à gratiâ naturae lapsae discrepare, quòd prima nullam prorsus libertatē hominis voluntati necessitatem incuteret, altera verò infirmissimae hominis lapsi voluntati realem quidem, sed tamen variabilem incutiat necessitatem.

Hoc discrimen stabilire aggressus est vir acutus celebri imprimis distinctione *adjutorii sine quo non*, et *adjutorii quo* quam ad utriusque statûs gratiam discriminandam Augustinus morti proximus attulit libro de Correctione et Gratiâ cap. 12. Scilicet, Jansenii judicio, *adjutorium sine quo*, seu sufficiens, quod solum in innocentiae statu ita viguit ut ad naturae lapsae ordinem non transierit, fuit quodlibet auxilium, etiam voluntatis, cujus usus vel non usus à voluntatis arbitrio pendebat, quod ideò ita dabat *posse benè agere*, ut *ipsum benè agere* non daret, et ideò ferebat efficax vel non efficax per consensum vel dissensum voluntatis... *Adjutorium è converso quo*, sive efficax, quod in homine lapso solummodò reperitur, illud est quod non pendet à voluntatis arbitrio, quod ita dat *posse operari* ut simul det *necessariè ipsum operari*; cui ideò voluntas saltem relativè non possit resistere.

Hanc *adjutorii sine quo non*, et *adjutorii quo* notionem consignavit Yprensus lib. de Gratiâ primi hominis, cap. 14 et sequentibus, et libro 2 de Gratiâ Christi, cap. 1 et sequentibus, imò eam inculcare non desinit, eo quòd, inquit in fine capitis 17 libri de gratiâ primi hominis, *est clavis quâ aditus in Augustini scripta aperiendus est, et sine quâ qui ea molitur ingredi velut cæcus palpabit in meridie.*

Ex eadem Jansenii *adjutorii sine quo et quo*, notione, evidens est quinque famosas ejus propositiones, uno verbo totum ipsius systema erumpere, ut postea ostendemus, ubi de sufficiente, et præsertim de efficaci gratiâ disseremus. Satis sit hic observasse Jansenium, lib. 8 de Gratiâ Christi, cap. 1 et 2, asserere Tho-

mistas, qui *adjutoria sine quo et quo*, in prædeterminatione physicâ constituunt, totam *basin doctrinæ Augustinianæ vellicare*. Unde Thomistæ, quibus aridet Jansenianum systema, quive illius censuram suo systemati præjudicium intulisse autumant, si qui sunt, sui ipsius inimici sunt, aut suam produnt insecitiam.

§ 2. *Recensentur theologorum opiniones de gratiæ sanitatis et liberationis discrimine.*

Quoniam illæ opiniones satis exploratæ sunt, et in operis decursu de illis disserendi occurrit occasio, eas ideò perstringemus duntaxat.

1^o Thomistæ multum laborant in isto assignando discrimine. Gratiâ scilicet physicè præmoventem obtitulum summæ dependentiæ creaturæ à Creatore in statu etiam innocentiae admittere coguntur. Nonnulli illam differentiam ex gratiâ sufficiente oriri censent, quæ nimirum in innocente homine sola fuit intellectûs illustratio, in lapso autem simul est illustratio et motio voluntatis... Alii eandem differentiam in eo constituunt quòd in statu innocentiae præmotio physica minùs fuerit virtuosa quàm in nostro... Alii tandem eam reponunt in diverso modo quo eadem gratia præmovens in utroque statu fuit necessaria. In insonte scilicet Adam fuit necessaria titulo tantum dependentiæ, in sonte verò titulo simul dependentiæ et infirmitatis, ut nempe voluntas continuo nitens in vetitum, bonum constanter et infallibiliter ageret.

2^o Alii gratiam intellectûs et voluntatis in utroque statu exigentes censent voluntatem in nostro ope sufficientes gratiæ posse verè et relativè bonum agere, quod tamen de facto sine gratiæ efficacis adjutorio nunquam ager, quâ gratiâ efficaci opus non habuit innocens Adam.

3^o Alii autumat in statu naturæ innocentis solam extitisse gratiam sufficientem, sive, ut aiunt, *auxilium sine quo*; in statu verò naturæ lapsæ, præter gratiam sufficientem, existere etiam gratiam efficacem, sive *adjutorium quo*, maxime ad perseverantiam; sed per gratiam efficacem non intelligunt specialem aliquam gratiam, sed copiam gratiarum cujuslibet generis, quas Deus electis largitur, ut omnes tentationes vincant, et ad mortem usque in justitiâ permaneant.

4^o Alii credunt Adam gratiâ sanctificante jam exornatum cum solâ mentis illustratione potuisse bonum agere, in præsentī verò ordine præter gratiam intellectûs necessariam esse gratiam voluntatem moventem et prævenien-

tem, sive ex naturâ sit efficax, sive non. Vulgo tamen ad primum bonum actum Adæ et Angelorum requirunt gratiam voluntatis, non autem ad actus sequentes.

5^o Alii conjiciunt hominem innocentem nullam habuisse gratiam prævenientem, etiam intellectûs, sentem verò gratiâ actuali præveniente indigere. Edocti ab Augustino *periculosum esse de magistrorum judicare sententiis, et alterum alteri præferre* epistolâ nunc 198, n. 7, nullum in re tam obscurâ et incertâ amplectemur systema, cum aliunde illud exigat nostrum propositum.

Nihilo tamen minùs secunda opinio magis consona videretur doctrinæ D. Augustini, libro de Correptione et gratiâ cap. 11 et 12. Ibi enim 1^o, per adjutorium *sine quo* Angelis et Adæ primitus concessum intelligit auxilium et quo sic adjuvabantur, ut sine illo in bono non manerent, sed hoc auxilium si vellent desererent, non quo fieret ut perseverarent, sed sine quo per liberum arbitrium perseverare non possent; et tale auxilium nihil aliud fuisse videtur quàm gratia sufficiens quæ promptam et expeditam benè agendi potentiam subministrabat, et fiebat efficax aut inefficax per assensum vel dissensum voluntatis... 2^o Per *adjutorium quo* sonti Adæ et ejus posteris datum illud non designat *sine quo aliquid non fit* (est enim adjutorium *sine quo non*, et aliunde expressè distinguit adjutorium *sine quo* ab adjutorio *quo*, et gratiam quâ boni Angeli per assensum perseveraverunt nunquàm vocavit adjutorium *quo*), sed illud indicat *quo aliquid fit, certò nempe et infallibiliter*; atqui talis gratia est gratia efficax; neque dicas prætensam illam Augustini sententiam commemorato Jansenii systemati favere; istud quippe systema excludit à statu naturæ lapsæ gratiam verè et relativè sufficientem, quam in eo admittit Augustinus, ut postea ostendemus.

CAPUT II.

De gratiæ necessitate in statu naturæ lapsæ.

Quid sit status naturæ lapsæ ex dictis, ubi de statu innocentiae et naturæ puræ verba fecimus, satis exploratum est. Hominem hoc in ordine sic regenerari voluit Christus, ut tamen concupiscentiæ et aliis animæ et corporis miseriis obnoxius esse non desineret, quo adjuvante gratiâ per continua certamina, per patientiam, et omnimodam divinæ voluntati submissionem majus meritum consequeretur, quemadmodum docet Apostolus 2 Cor. cap. 12, et ubique D. Augustinus.

Antequam progrediar ad majorem rerum discutiendarum intelligentiam, quædam de hæresi pelagianâ et semipelagianâ illiusque historicis præmittam.

Cornelius Jansenius historiam pelagianæ et semipelagianæ hærescos libris octo primum contextuit, ut quæ postea impugnaturus erat dogmata, libro scilicet proemiali de ratione et auctoritate, libro de gratiâ primi hominis et Angelorum, libris quatuor de statu naturæ lapsæ, tribus de statu naturæ puræ, et decem de gratiâ Christi Salvatoris, ab illis hæreticis prius propugnata fuisse, et ideo veteris Ecclesiæ sensis repugnare quantum fieri poterat evinceret. Hinc inter illa dogmata recensuit liberi arbitrii indifferentiam, naturæ puræ possibilitatem, potentiam resistendi gratiæ interiori, mortem Christi pro omnium et singulorum hominum salute, uno verbo omne systema suo adversum. Suae sanè saluti minimè consulere qui aquas ex fonte tam luculento salientes combibere vellet.

Henricus Norisius, vir exquisitâ eruditione et pietate conspicuus, eandem historiam memoriæ consecravimus duobus libris, quos censurâ configi vetuit Benedictus XIV, ut postea ostendemus, sed sine ab Yprensis fine omninò diverso, scilicet ut catholicum Augustinianorum systema, quod adequatè spectatum cæteris fortassis præhabendum est, adversus Molinistas et alios firmitus stabiliret.

De eadem historiâ unum misit librum Dionysius Petavius, qui in tertio tomo Dogmatum reperitur. Nullum alium sibi in eo finem proposuisse videtur quàm ut veritatem, discussis nebulis quibus eam inspersione novatores, pristino splendori restitueret, nulli aliunde scholæ systemati addictus, nullo partium studio abreptus, ut magnum et sapientem decet virum, et suam sententiam liberè et candidè, ubi opus est, reagens.

Ex hoc opere, et certis aliis historiæ ecclesiasticæ monumentis hæc obiter referre opera pretium duximus.

Pelagius patriâ Scotus, vel Britannus, professione monachus, ineunte seculo quinto, errores suos disseminare cœpit. Isti præcipuè fuerunt: 1^o Adam moriturus fuisset etiamsi non peccasset.... 2^o Peccatum Adæ ipsum solum læsit, non genus humanum.... 3^o Infantes recens nati in eo statu sunt in quo fuit Adam ante prævaricationem.... 4^o Per mortem et delictum Adæ non moritur genus humanum, et non resurget per Christi resurrectionem....

5^o Infantes etsi non baptizentur vitam æternam habere possunt.... 6^o Divites baptizati regnum Dei non consequentur nisi omnilas renuntient.... 7^o Gratia homini lapsa necessaria ut actus salutis meritorios possit elicere non est gratia interior saltem voluntatis, sed gratia illa vel est natura et liberum arbitrium, vel peccatorum remissio, vel lex sive prædicatio Christi ejusque exemplum, vel interior mentis illustratio, ad faciilius tantum operandum, vel adoptio ac filiorum status baptismo comparatus, vel vita æterna (unde sex gratiarum genera constituit Pelagius).... 8^o Gratia Dei meritis nostris rependitur.... 9^o Homines non possunt vocari filii Dei nisi omnimodò absque peccato fuerint, et ideò possunt, si velint, omni carere peccato.... 10^o Liberum arbitrium nomine tenus existit, si Dei auxilio indigeat, quoniam unusquisque in propria voluntate habet aliquid facere vel non facere.... 11^o Victoria nostra non est ex Dei auxilio, sed ex libero arbitrio nostro.... 12^o Petentibus venia non datur secundum gratiam et misericordiam Dei, sed secundum merita et laborem eorum qui per poenitentiam digni fuerint misericordià.... 13^o Non est jurandum.... 14^o Ecclesia militans potest esse sine maculâ et rugâ.... Tandem Nestorianâ hæresi infectus fuit Pelagius.

Pelagius præcipuos sectatores habuit Celestium qui Pelagio patriâ et professione par fuit, sed magistro libertor, inò istius sectæ fuit Antesignanus.... et Julianum in Apuliâ natum, Augustino primum amicitia conjunctum, episcopum Capuanum, aut Celianensem. Pelagii errorum non modò acerrimus fuit defensor, sed etiam iis addidit, aut ex iis ad libitum detraxit, ut non tam sectator quam novi systematis auctor habitus sit.

Ad debellandam hæresim pelagianam inprimis suscitavit Deus divum Augustinum qui illud munus gloriose et feliciter per viginti circiter annos adimplevit sequentibus operibus, tribus libris de peccatorum meritis et remissione, uno de spiritu et litterâ, uno de naturâ et gratiâ, uno de perfectione justitiæ, uno de gestis palæstinis, sive Pelagii, sermone nunc 151 de verbis Apostoli, uno libro de gratiâ Christi, uno de peccato originali, duabus epistolis ad Sixtum, duobus libris de nuptiis et concupiscentiâ, libris quatuor contra duas epistolas Pelagianorum ad Bonifacium romanum pontificem, epistolâ 217, alias 107 ad Vitalem, libris sex contra Julianum, quos in retractionibus vocat *magnum et elaboratum opus*,

uno libro de fide, spe, et charitate, sive Enchiridion ad Laurentium, quem nonnulli appellant *Augustinianæ doctrinæ specimen*, uno libro de gratiâ et libero arbitrio ad Valentinum et monachos Adrumetinos, uno libro de correptione et gratiâ, sex denique libris adversus Julianum dictis, *opus imperfectum*, quia morte præventus non respondit nisi sex octo librorum quos Julianus in secundum librum de nuptiis et concupiscentiâ ediderat.

Contrito Pelagii errore, nova exsurrexit secta, dicta *Semipelagianorum*, quia partem duntaxat Pelagii systematis conservabat, et *Massiliensium* ab urbe Massiliensi in quâ ejus defensores erant numero plures. Eorum antesignanus fuit Joannes Cassianus à D. Chrysostomo diaconus consecratus, postea apud Massilienses presbyter, cui se adjunxit Faustus ex abbate monasterii Lirinensis factus episcopus Regiensis in Galliâ. Ilæ duo potissimum propugnabant: Primum, salutis initium esse à nobis, nosquesolâ vi arbitrii posse conari, velle, ordiri; alterum, hominem nisu et conatu suo gratiam Dei mereri. Errores istos peperit malè intellecta Augustini et Ecclesiæ adversus Pelagianos doctrina. Scilicet Massilienses existimaverunt liberum arbitrium pessumdari, si divinâ præveniat gratiâ, et Deum futurum esse personarum acceptorem si præveniat, utpote qui secundum voluntatis suæ propositum *occulto judicio et opere manifesto* aliud vas conderet in honorem, et aliud in contumeliam. In errorem semipelagianum ante pontificatum impexit Augustinus, ut fatetur in libro de prædestinatione sanctorum, cap. 3.

D. Augustinus, de Semipelagianorum erroribus certior factus per Epistolas SS. Prosperi et Hilarii, illos errores duobus libris confutavit, nimirum libro de prædestinatione sanctorum, et libro de Dono perseverantiæ, in quibus potissimum ostendit, non incrementum duntaxat, sed et ipsum initium fidei, ac in eâ perseverantiam esse Dei donum.

His summatim descriptis ut errores tum Pelagianorum et Semipelagianorum, cum recentiorum hæreticorum eliminentur, quæremus 1^o, an gratia sit necessaria ad veritates supernaturales credendas; 2^o an gratia necessaria sit ad opus bonum supernaturalis ordinis peragendum.... 3^o an sine fide et charitate aliquod bonum opus elici possit; 4^o an sine gratiâ actuali possit homo aliquod bonum opus morale pericere.... 5^o an gratia sit necessaria ad perseverandam in bono.

ARTICULUS PRIMUS.

An gratia sit necessaria ad veritates supernaturales cognoscendas et credendas?

Sermo non est de notitiâ conjecturali, qualis fuit cognitio Platoniorum de Verbi divinitate, Augustino referente lib. 7 Confessionum cap. 9, sed de notitiâ erroris non obnoxia quâ mens veritatibus per revelationem cognitis firmissimè inhæreat.

Semipelagiani, ut diximus, gratiam interiori ad initium fidei, sive *pium credulitatis affectum*, non exigebant, sed tantum ad ipsius augmentum. Contra eos sit

CONCLUSIO. — Nemo consequi potest fidem theologiam, et ipsius initium quod Semipelagiani vocabant *pium credulitatis affectum*, sine gratiæ interioris adiutorio. Ita adversus Semipelagianos definiit concilium Arausicanum secundum, canone 5 et 7, quod confirmavit concilium Trid. sess. 6, can. 3.

Probatur rationibus, quas ex sacris codicibus deducit D. Aug. libro de Prædestinatione sanctorum.

Prima. *Credere nihil aliud est quàm cum assensione cogitare*. Si ergo non sumus idonei cogitare aliquid quasi ex nobis, sed sufficientia nostra ex Deo est (ut docet Apostolus epistolâ 2 ad Corinthios, cap. 3, v. 5), indubiè non erimus idonei credere aliquid quasi ex nobis, sed sufficientia nostra, quâ credere incipimus, ex Deo erit cap. 2, n. 5. Secunda. Deus *nos discernit*, et nihil habemus quod ab eo non acceperimus, Epist. 1 ad Cor. cap. 4, v. 7; ergo quam habemus, fides, aut ejus initium, in nobis est non à nobis sed à Deo, cap. 5, n. 7. Tertia. Si initium fidei ex nobis est, et ipsa fidem nobis à Deo obtinet, gratia fidei meritis naturalibus rependitur, et ideò non est gratia, cap. 2, n. 6. Quarta. Fides et ipsius exordium est fons et radix justificationis; sed origo justificationis à gratiâ oriri debet, cum non minus supernaturalis sit, quàm ipsa justificatio, et *homo prior Deo non det ut ipsi retribuatur* (Epist. ad Rom. cap. 11, v. 35) cap. 2, n. 4. Ultima. Rogatur Deus ut det quod jubet (*pium credulitatis affectum*), rogatur ut augeat fidem; rogatur ut non credentibus det fidem; ergo fides et in suis incrementis et in suis initiis est Dei donum, cap. 11, n. 22.

Antiqui et novi Semipelagiani hæc vulgò obijciunt. 1º Deus ab homine fidem exigit; ergo est in hominis potestate; ergo per naturam haberi potest. — Resp. 1º argumentum

probare ipsam fidem esse ab homine, non solum ejus initium, et ideò nimis probare. — Resp. 2º: Dist. Ant.: Deus ab homine fidem exigit seipso adjuvante, concedo; secus, neg. ant. et conseq. Deus nempe exigit ut homo celesti auxilio preventus et roboratus actus fidei eliciat, quo sensu dixit Augustinus, Deum ipsa sua dona præcipere.

2º Nonne hæretici absque interiori gratiâ plura credunt mysteria, v. g., Trinitatis, Incarnationis, etc.? ergo. — Resp. hæreticos potius non negare illa mysteria quàm ea credere; per verbum enim *credere* hic intelligitur firmissimus assensus summâ Dei revelantis veracitate innixus, qui apud hæreticos reperiri nequit; revelatio nimirum certò non innoscit nisi per infallibilem Ecclesiæ catholicæ auctoritatem quam negant hæretici. Hinc dixit Augustinus Enchiridion cap. 5, apud hæreticos nomine tenus non reverà esse Christum. Deest etiam iisdem pius erga Deum affectus qui necessarius est ad credendum sicut oportet ad salutem; unde iterum ait Augustinus sermone 71 de Verbis Evangelii Matthæi, cap. 19, n. 32: *Præcisè ab Ecclesiâ inesse potest forma pietatis, non virtus*; igitur hæretici mysteria quædam credunt non fide divinâ, de quâ hic agitur, sed humanâ tantum.

3º Fidei mysteria motivis evidenter credilibus nituntur; ergo sine gratiâ credi possunt. — Resp. fidem divinam habere pro objecto formali immediato summam Dei revelantis veracitatem; fides igitur innixa motivis credibilitatis immediatè et præcisè non est divina, sed humana, licet fidei divinæ locum præparet. Deinde motiva credibilitatis naturam mysteriorum non elucidant. Unde, ut intellectus ipsis firmissimè assentiatur, superno indiget auxilio ne apparenti eorum repugnantia dissentiât.

4º Potest quis sine gratiâ credere res falsas rationis acumen superantes, v. g., Christi corpus esse ubique; quidni et veritates supernaturales? Resp. disparitatem esse quòd veritates supernaturales credantur ex affectu erga Deum ut gloriæ auctorem; res è conversò falsæ rationis aciem fugientes ex præjudiciis et affectu erga res suas.

PRINCIPIA SOLUTIONUM. — Primum. Fides, de quâ hic agitur, ea est quâ, ut loquitur concilium Trid. *creditur sicut oportet ad salutem*, id est cum firmissimâ et omnimodâ Deo subjectione, et ideò erga ipsum affectu.

Secundum. Fides est in nostrâ potestate per

gratiam, non per naturam, et ideo eam in nobis exigit Deus *positis ponendis*.

Tertium. Fides, licet Dei donum, ex nobis est hoc sensu quod mens illius actum ex Dei gratiâ eliciat, juxta istud oraculum, *faciam ut operemini*, Ezechielis cap. 36.

Quartum. Malè cohaerebat Semipelagianorum systema; nulla enim est ratio cur gratia potius requiratur ad fidem perfectam quàm ad inchoatam; imò titulo dependentiæ creaturæ à Creatore magis necessarium videretur Dei auxilium ad fidei initium quàm ad ejus augmentum.

ARTICULUS II.

An gratia ad bonum opus supernaturale volendum et perficiendum absolutè requiratur.

CONCLUSIO. — Nemo in statu naturæ lapsæ sine speciali gratiæ interioris adjutorio absolute potest ullum opus ad salutem pertinens velle aut perficere.

Est de fide adversus Pelagianos et Semipelagianos quos confutavit Augustinus libris commemoratis. Recentiores novatores in errores è diametro oppositos impegerunt gratiæ vim nimium extollendo, et libertatem tollendo, aut saltem enormiter deprimendo.

Probatur 1° innumeris Scripturæ testimoniis, quorum præcipua extant Joannis cap. 6, v. 44, 45, v. 4 et 5, Epistolâ ad Philippenses cap. 1, v. 6, et 2, v. 13. Hæc et alia urgebat D. Augustinus, ostendendo illa saltem ad salutis opera pertinere, et non esse intelligenda aut de solâ externâ revelatione, sive de lege et doctrinâ, aut de potestate facilius tantum Dei præcepta adimplendi, aut de internâ duntaxat mentis illustratione, exclusâ inspiratione et motione voluntatis (ut ea interdum exponebant Pelagiani), sed de interno Dei auxilio, *sine quo*, ut loquitur S. doctor libro de gratiâ Christi, cap. 26, n. 27, *voluntas omnino nihil boni, quod ad pietatem pertineat veramque justitiam, facere potest*.

Probatur 2° ex conciliis adversus Pelagianos habitis, Diospolitano, sive Palæstino, anno 415, in quo Pelagius censuræ articulorum supra relatorum fallendo, ut hæreticorum moris est, subscribens absolutionem suffragatus est... Arausicano 2°, anno 529, etc., quorum sanctiones expressit et renovavit concilium Tridentinum sessione 6, can. 3, his verbis: « Si quis dixerit sine prævenientis Spiritûs sancti inspiratione, atque ejus adjutorio, hominem credere, sperare, diligere, aut penitere posse

« sicut oportet ut ei justificationis gratia conferatur, anathema sit. »

Probatur 3° rationibus theologicis, quibus D. Augustinus Pelagianos repressit. Innumerae sanè sunt, quas ad duas universim reducimus.

Prima hæc est: Christus in Evangelio orationem impensè commendat et præcipit. At, inquiebat S. doctor, *oratio est gratiæ testificatio*; fit enim præcipue ut Deus in nobis operetur velle, et perficere, sique per opera supernaturalia ad vitam perveniamus æternam; unde Ecclesia quasi continuo orat, ut Deus per merita Christi gratiæ suæ virtute nostras etiam rebelles ad se propitius compellat voluntates.

Secunda sic se habet: Ad peccato non solum hominis mens densis ignorantie tenebris obnubilata est, sed etiam voluntas multum debilitata, et ab incommutabili bono ad commutabile bonum funestâ propensione conversa (quod aliunde non recurrendo ad primigeniam maculam, quam negabant Pelagiani, experienciâ exploratum est); sed inde elucet ad pietatis opus exercendum non sufficere ut intellectus cœlesti luce perfundatur, sed et insuper requiri ut cœlesti adminiculo sublevetur voluntas, et ad supernaturale bonum appetendum occultâ et suavi virtute deducatur.

Objieiebant 1° Pelagiani: Psalmo 9, v. 11, Proverbiorum cap. 16, v. 4, Zachariæ cap. 4, v. 3, Matthæi 25, v. 15, Lucæ 11, v. 9, Rom. cap. 7, v. 18, etc., dicitur homo *querere Deum, præparare animam suam, disponere viam suam, converti ad Deum, Deum orare, salutem velle, propriâ virtute talenta accipere, etc.* ergo. — Resp. Pelagianos in his et similibus oraculis inanem triumphum aucupatos fuisse. Illi enim hominis actus ex gratiâ præveniente oriuntur. Scilicet præter gratiam quæ dat agere, sive perficere (ad Philippenses cap. 2), necessaria est gratia quæ facit velle (ibidem), et ideo quæcumque iis in textibus velle dicitur homo ex Dei auxilio vult. Porro in Scripturis pietatis actus modò homini, modò Deo tribuuntur, quia fiunt ex gratiâ cui liberè consentit homo. Non ego, inquit Apostolus 1 ad Corinth. cap. 15, sed gratia Dei mecum.

Objieiebant 2° Zachæus, Lucæ cap. 19, latro, Lucæ cap. 23, Cornelius, Actuum cap. 10, Paulus epist. 1 ad Tim. cap. 1, etc., gratiam fidei per bonos actus promeruerunt; ergo. — Resp. cum concilio Arausicano 2, canone 25, bonos illos actus à gratiâ præveniente ortos fuisse. Etverò Christus Zachæi, cujus hospitium elegerat, voluntatem ad se allexerat;

latronem efficaci gratiâ converterat; Cornelio implicitæ et inchoatæ fidei gratiam infuderat, quæ post accessum Petri explicita et perfecta evasis, ut docet D. Aug. lib. de Prædestinatione sanctorum, cap. 7, n. 12. Quod attinet ad Paulum, particula *quia*, quâ utitur, non causam formalem, sive moventem, sed objectivam duntaxat significat, ut Psalmo 40, v. 5: *Sana animam meam quia peccavi tibi*, et idè sensus est: *Gratuita Dei misericordiæ ignorantæ meæ rationem habere dignata est.*

Obijciebant 3^o: Epistolâ ad Rom. cap. 2 legitur: *Gentes, quæ legem non habent, naturaliter ea quæ legis sunt faciunt.* Ergo natura sufficit ad implendam legem. — Resp.: Nego conseq. Hæc enim aut cum Cajetano et aliis intelligenda sunt de Gentilibus à Christi fide alienis, aut cum pluribus de gentibus fide Christi imbutis; si primum, significant infideles posse fortassis solis naturæ viribus aliqua legis præcepta implere, v. g., inopi subvenire, etc. « Quod, inquit Estius in hunc locum, sanæ doctrinæ nihil habet contrarium; nam infideles posse absque gratiâ facere quædam opera moraliter bona communis est et vera theologorum sententia. » (Hæc tamen sententia, ut postea ostendemus, nequaquam certa est, quinimò Scripturæ et Patribus, Augustino inprimis repugnare videtur)... Si secundum, significant gentes per gratiam, non per legem Mosaicam, Dei præcepta exequi, et idè vox, *naturaliter*, opponitur *legi scriptæ*, non *gratiæ*, inquit ibidem Estius. Cæterum hoc testimonium accuratius postea discutiemus.

Obijciebant 4^o Semipelagiani, qui, ut elucet ex epistolâ S. Prosperi ad Augustinum, conquerebantur quòd S. doctor in gratiæ controversiâ antiquos Patres contempsisset, obijciebant, inquam, veteres doctores.

D. Justinus Apologiâ præsertim 2, Christi gratiam explodit docendo philosophiam sufficere ad salutem. D. Irenæus lib. 4 adversus hæreses cap. 72, scribit *in nobis esse operari bonum*. D. Clemens Alexandrinus in libris Stromatum quos impensè commendat D. Hieronymus epistolâ ad Magnum, docet philosophiam Græcos ad Christum duxisse; « iis, inquit libro 1, qui à philosophiâ fuere justificati, auxilium tanquam thesaurus reconditur; ea quoque consensio quæ ducit ad Dei cultum, et pietatem in Deum... quanquam per se quoque aliquando Græcos justificabat philosophia. » D. Chrysostomus initium fidei et salutis liberi arbitrii viribus adscribit: « Patriarcha, inquit hom.

42 in Genesim, (Abram) ante gratiæ tempus, et ante legem à seipso, et à scientiâ quæ naturæ insita est... pervenit in virtutis fastigium... nisi primum et ipse quod suum erat fecisset, non tanta à Domino obtinuisset; » idem habet hom. 12 in Epistolam ad Hebræos: « Nostrum est, inquit, præeligere et velle; Dei autem est perficere, et ad finem deducere. » Similia dixerat homiliâ 8 in Epistolam ad Philippenses ubi Apostoli verborum, *Deus enim est qui operatur in nobis et velle et perficere*, hunc assignat sensum: « Si volueris, tunc operabitur ut velis... etenim ubi voluerimus de cætero augebit propensionem voluntatis. » Tandem ipse Augustinus in Epistolam ad Romanos, n. 6, tradit gratiam non præire voluntatis conatibus et desideriiis, sed ea subsequi; ergo.

Neque soli Semipelagiani hanc sententiam illis Patribus affinxerunt, sed et inter Protestantes plures ex eruditissimis, v. g. Isaac Casaubonus in exercit. adversus Annales Baronii, etc.

Respondeo super his, quæ longâ indigerent disquisitione, consuli posse P. Alexandrum in hist. seculi secundi et quarti, ubi nævos à Protestantibus illis Patribus inustos feliciter detergit. Unde satis sit hæc observasse:

1^o Augustinus libro de Prædestinatione sanctorum cap. 14, n. 27, generatim tantum Semipelagianis respondit, illos Patres scripsisse *ante hæresim pelagianam*, eos in hac difficili questione versatos non fuisse, gratiam Dei breviter et transeunter attingisse, etc. Cæterum frequentem orationem consulendo quid de gratiæ necessitate sentirent, satis indicasse, etc. Si tantus doctor illorum Patrum opuscula scrutari in hac causâ necesse non judicavit, cur ea scrutari teneremur?

2^o Genuinus illorum Patrum sensus ex eorum scopo potest elucescere. D. Justinus hic et alibi intendit probare adversus gentiles christianæ doctrinæ antiquitatem; hunc in finem dicit, eos, qui ab initio rationem ducem secuti sunt, *Christianos fuisse* (imperfectè et secundum quid, ut aiunt), scilicet S. doctor ibidem declarat se per *rationem* non solum legem nostris mentibus à Creatore impressam intelligere, sed præcipuè Christi, qui Patris est ratio et Verbum, aliquam cognitionem, et huic notitiæ consonam vitam. « Christum, inquit, primogenitum Dei esse institui sumus, et rationem atque Verbum esse, cujus universum hominum genus est particeps, et quicumque cum ratione ac Verbo vivere, Christiani

sunt. Quare vult eos omnes, qui ab initio mundi unum Deum agnoverunt, et vitam laudæ cognitioni congruentem duxerunt, hæc ex illustratione rationis et Verbi, quod est Christus, fuisse consecutos, et sub eo respectu dici posse Christianos, quamvis non tam perfecte ac illi qui explicitam Christi notitiam habuerunt. Etverò, vel in ipsâ Apologiâ citatâ agnoscit absolutam baptismi necessitatem ad salutem impetrandam juxta Christi oraculum Joannis 3 : *Nisi quis renatus fuerit aquâ et Spiritu sancto, non potest introire in regnum Dei*, et gratiam ad vitam baptizato dignam ducendam requiri, ad quam obtinendam quasi continuas preces effundit Ecclesia; unde supra meritò dicebat Augustinus Patres qui ante hæresim pelagianam floruerunt orationem consulendo gratiam agnovisse et exegisse.

D. Clemens intendit præcisè philosophiam Græcis instillasse unius veri Dei cognitionem, et ab eis amovisse errorum portenta Dei notitiæ ejusque cultum impediendâ, sicque eos remotè disposuisse ad Christi agnitionem, et ideò ad justificationem; quiminò S. doctor existimavit philosophiam ad justificationem absque cœlestis gratiæ adjutorio ne remotè quidem disponere posse, ut fide et eruditè ostendit P. Alexander dissertatione 8 in secundum seculum. Unde non vult S. doctor philosophiam, bonæ opera moralia, justificationem Græcis aut ex justitiâ, aut etiam ex convenientiâ promeruisse. Etverò, quomodò D. Hieronymus, qui in epistolâ ad Ctesiphontem et alibi Pelagium et ejus asseclos *rebut sacrilegos* habuit, tantoperè extulisset Clementis Stromata si in eis Pelagianum dogma consignasset.

D. Irenæus meritò dixit *bonum operari* (non à nobis solis) sed *in nobis esse*; hæc enim docet Apostolus epist. 1 ad Corinthios cap. 15 : *Plus omnibus laboravi, non ego, sed gratia Dei mecum*; homo scilicet lapsus libero potitur arbitrio quod prævenienti et adjuvanti gratiæ consentiendo bonum opus elicit. Enimvero S. doctor in libris adversus hæreses passim agnoscit et exigit gratiam, puta lib. 4. cap. 27, ubi dicit *Christum infingere justificationes in nobis, Verbum liberare animam, etc.*, et ib. 5, cap. 49, ubi asserit *Spiritum sanctum voluntatem Patris operari in nobis, renovare nos à vetustate in novitatem Christi, nos conservare...* (Cicero) poterit P. Alexander dissert. 7 in secundum seculum.

D. Chrysostomus primo loco non excludit

gratiam prævenientem et excitantem, sed legem duntaxat evangelicam cum uberioribus suis gratis, quibus licet destitutus Abraham ante gratiæ tempus et legem, perrenit tamen in virtutis fastigium; unde S. doctor, ut patet ex ipso contextu, vult pios conatus cum auxilio præveniente elicitos majora à Deo obtinere auxilia, quod probat exemplo Abraham et aliorum justorum veterum qui Deo interiùs et exterius vocanti sese morigeros exhibendo eximiam sanctitatem adepti sunt... nihil aliud intendit duobus ultimis locis ubi sic adstruit liberum voluntatis arbitrium ut doceat nos primum gratiæ vocanti consentire debere, quò Deus postea gratiam largiatur sanctificantem, aut uberiores actuales. Enimverò, inquit P. Alexander in Synopsi historiæ seculi quarti, articulo trigesimo, « objecta Chrysostomi verba gratiæ necessitatem non magis excludunt, quàm illa Christi : *Petite et accipietis, pulsate et aperietur vobis*. Unde sicut hæc sententia, quæ solam hominum operationem innuere videtur, per aliam exponenda est, quæ Dei præveniens auxilium necessariò exigit : *Nemo potest venire ad me, nisi Pater meus traxerit eum*, ita illa quæ objiciuntur S. Joannis Chrysostomi verba, ex aliis explicantur, quæ primam salutis originem gratiæ excitanti acceptam ferunt. » Porro S. doctor in ipsâ homiliâ 12 in Epistolam ad Hebræos, hanc gratiæ excitantis necessitatem agnoscit et prædicat; etenim ibi observat cœleste, quo indigemus, auxilium nostræ libertati non nocere; « in Dei, inquit, potestate sunt omnia, sed non ita ut nostrum lædatur arbitrium. Si ergo, inquis, est in Dei potestate, cur in nos confert culpam? Propterea dixi, ita ut non lædatur nostrum liberum arbitrium; est ergo et in nostrâ et in ejus potestate; oportet enim nos primum bona eligere (ipso adjuvante) et tunc affert quæ sua sunt (gratiam fortem et efficacem) non prævenit nostras voluntates (cogendo aut necessitando) ne perdat nostrum liberum arbitrium; » quod quidem clariùs exprimit dum ibidem istud Apostoli : *Non volentis, neque currentis, sed miserentis est Dei*, ita exponit ut totum Deo in operibus bonis tribuat, quia primas et præcipuas in eis habet partes, et sine eo quod nobis confert auxilio omnes nostri conatus essent supervacanei. « *Non volentis, etc.*, inquit, hoc bonum non et prædara elicit (Apostolus); unum quidem ne effieramur, etiamsi curras, etiamsi stultum ponas, inquit, ne tuum esse existimes quod rectè gestum est. Nam nisi à

superis opem adipiscaris, frustra erunt omnia... Non dicit quòd frustra currimus, sed quòd frustra currimus, si totum nostrum existimamus, si non plus Deo tribuimus. Non enim suum esse totum voluit Deus, ne videretur nos temerè coronare; neque rursus nostrum, ne incidamus in arrogantiam. Nam si cum minore habeamus partem efferrimur, et præclarè de nobis sentimus, quid faceremus si totum esset in nostrà potestate?

Ex his patet quàm falsò et temerè Yprensus Patres græcos, imprimis Chrysostomum, inter gratiæ et liberi arbitrii hostes annumeraverit. Quid aliunde ista declamatio ingerit? Nonne Semipelagianos sibi illos Patres meritò vindicasse, et Augustinum eos immeritò excusasse?

5^o D. Augustinus, qui, ut diximus, ante pontificatum fuit Semipelagianus, revocavit libro de Prædestinatione sanctorum, cap. 3, et lib. 1 Retractionum, cap. 25, quod scripserat in Epistolam ad Romanos.

Obijciebant 5^o Pelagiani et Semipelagiani diversa ex ratione momenta. Primum. Gratiæ necessitas tollit libertatem: voluntas enim cœlesti indigens auxilio, aut gratiæ vi impulsæ desinit esse suorum actuum domina. — Resp. 1^o, idem argumentum vibrari posse adversus necessitatem concursûs immediati naturalis, aut adversus Dei præscientiam. — Resp. 2^o, cum Augustino, libro de spiritu et litterâ, cap. 30, n. 52, et 31, n. 54, *libertatem gratiâ stabiliri sicut legem per fidem*, tantùm abest ut illâ destruat; per gratiam nimirum liberi arbitrii vires peccato debilitatæ restituantur, et nulla prorsus voluntati imponitur necessitas, cum gratiæ cuilibet possit resistere.

Secundum. Ex celebri axioma: *Deus facienti quod in se est non denegat gratiam*; ergo bona voluntas gratiam præcedit. — Resp.: Neg. consequ. Illius enim effati sensus est: *Facienti quod in se est per gratiam prævenientem et excitantem Deus non denegat operantem*.

Tertium. Si Deus fidei gratiam pro libito uni daret alteri denegaret *esset personarum acceptor*; falsum ex Scripturâ consequens, Actuum cap. 10; ergo. — Resp. cum Augustino, lib. 2 contra duas Epistolas Pelagianorum cap. 7, n. 15 et seq.: Nego majorem. Acceptio enim personarum est vitium contra justitiam, quo nempe quis re sibi debitâ privatur; at Deus uni gratiam dans, alteri pro libito denegans, non peccat contra justitiam; gratiam enim, quæ purè gratuita est, nemini debet. Deus ergo in

in iis quæ justitiæ sunt erga omnes æquus est, neque personas accipit, sed unicuique reddit secundum opera sua. Verùm in donis gratiæ nemini facit injuriam si uni dat quod alteri negat.

Quantum. Si fides et ejus initium esset Dei donum, à Deo, qui omnes salvos fieri vult, omnibus daretur, et qui illud donum non recipiunt, essent *excusabiles*, cum illud habere in eorum potestate non sit; falsum consequens ergo. — Resp. 1^o, hic nobis præcisè incumbere gratiæ prævenientis et excitantis necessitatem adversus veteres et novos Pelagianos vindicare, non autem Dei judiciorum *profunditatem* sive *abyssum* reserare; porrò illam necessitatem ex Scripturis contra veteres hæreticos, et ex concursûs naturalis extantiâ pro actibus physicis contra incredulos nostros facile adstruimus. — Resp. 2^o cum Augustino, lib. de spiritu et litterâ cap. 33, n. 57, et seq. fidem non omnibus impertiri quia *multi libero arbitrio malè utentes* vocanti Deo per gratiam non obediunt. Jam verò, addit ibidem, cur illi ita *suadeatur* (fides) *ut persuadeatur*, illi verò non ita, *ò altitudo!* etc. Cui ista responsio displicet *querat doctiores*. Idem alibi reponit ad istam quæstionem, *cur è duobus impiis unus trahitur, alter relinquitur*; qui enim relinquitur justo et occulto judicio ob delicta, vel delictum relinquitur, qui eligitur ex purâ Dei misericordiâ salvatur; ex quibus concludit epistolâ, 194, aliàs 105, ad Sixtum, *sontes esse inexcusabiles vel reatu originis, vel additamento propriæ voluntatis*. Ad elucidandam istam *profunditatem*, ut loquitur idem Augustinus priore loco, addi fortassis posset cum D. Thomâ, hominem si legem naturalem (cum gratiâ quam ipsis non denegat Deus), ut oportet observaverint evangelicâ gratiâ esse illuminandos.

PRINCIPIA SOLUTIONUM. — Primum. Hæresis genius, qui maximè tortuosus est, flexibilis, industrius, singulariter potens, et potenter singularis, in Pelagio, Cœlestio, etc., sese stupendum in modum exeruit. Pelagius scilicet Patres Palæstinos decepit, Cœlestius Zozimum papam, ipse Augustinus penè existimavit Pelagium *gratiam, de qua agebatur*, agnoscere, ut candidè fatetur libro de gratiâ Christi, cap. 37, n. 4. Quid inde inferes? Hæreticis sensa sua catholicis etiam verbis exprimentibus semper non esse credendum.

Secundum. Pelagius, Augustino referente lib. de gestis Pelagii, pietatis famâ excelluit.

Non ergo te moveat morum sanctitas, quæ in hodiernis novatoribus commendatur, cum, eodem Augustino dicente, *apud hæreticos pietatis forma esse possit, non virtus.*

Tertium. Pelagius et ejus asseclæ agnoverunt gratiam esse necessariam (intelligebant naturam et liberum arbitrium).... gratiam à naturâ et libero arbitrio distinctam (intelligebant legem et doctrinam).... gratiam à lege et doctrinâ diversam (intelligebant exemplum et imitationem Christi).... gratiam ab iis omnibus discrepantem (intelligebant peccatorum remissionem).... demum gratiam illustrationis, id est revelationem divinam, si non ex parte potentie, quæ nempe intellectum intrinsecè afficeret, elevaret, et corroboraret ad credendum, saltem ex parte objecti, id est veritatis menti clariùs oblatæ. Ad quid autem tot effugia? nisi ad obscurandam, si fieri potuisset, interiorem intellectûs et voluntatis lucem in Scripturis emicantem, ejus ideò insignia fuerunt argumenta. Unde D. Hieronymus epistola ad Ctesiphontem Pelagianos sic compellabat: *Ecclesiæ victoria est vos aperte dicere quod sentitis.*

Quartum. Augustinus, lib. 2 ad Bonifacium cap. 9, n. 21, gratiæ dogma tum adversus Pelagianos cum adversus Semipelagianos sic breviter et solidè expressit: *Multa Deus facit in homine bona quæ non facit homo (indeliberatos ad pietatem motus) nulla verò facit homo quæ non facit Deus ut faciat homo; hinc enim elucescit esse in homine lapso veram, absolutam, et physicam impotentiam ad bonum saltem supernaturale sine gratiâ sive volendum sive perficiendum, et ideò omnes illius actus sive indeliberatos sive deliberatos salutem spectantes totidem esse Dei dona.*

Quintum. Cuncta Scripturæ et Patrum testimonia, quæ bonam voluntatem, bonum pietatis opus hominis tribuunt, supponunt, aut arguunt gratiam prævenientem, et liberam voluntatis gratiæ cooperationem.

Sextum. Omnia Scripturæ aut Patrum oracula quæ in operibus bonis totum Deo tribuunt (quibus abutuntur novatores), unicè significant Deum, qui hominem ad opus bonum movet et dirigit in eo primam et præcipuam habere partem. Sic cum palatium pulchrè constructum conspicimus, totum illius artificis esse dicere solemus, licet et latomi aliique operarii, ut et dominus qui materiam et impensas subministravit, ad ædis ædificationem activè etiam concurrerint.

Septimum. Ne hic objicias Origenem; judicio enim eruditorum, v. g., Yprensis, lib. 6 de hæresi pelagianâ cap. 15, cui Norisius lib. 4 de eadem hæresi, cap. 1, Huetius lib. 2 Originarianorum cap. 2, et P. Alexander in historiâ sæculi tertii, consentiunt, Pelagianorum et Semipelagianorum circa gratiam errorem præformavit.

Octavum. Virtus, ejus intuitu Deus aliquando dicitur talenta, sive gratiam, distribuere, virtus est non ex naturâ, sed ex gratiâ, et quidem nonnunquam *gratis data*, ut Matthæi cap. 25, v. 15.

Nonum. Deus ab homine conversionem exigat, non quòd in ejus sit potestate, sed quòd det, aut dare paratus sit gratiam, quâ conversionem postulemus.

Decimum. Cur non omnes ad Evangelii notitiam perveniant potest absolutè afferri ratio, quia scilicet non omnes oblata gratiæ obediunt; sed comparatè ratio reddi nequit; cur, v. g., inter eos qui vocanti Deo obluentur unus potiùs quàm alter Deum reverà sequatur, sicque unus pereat alter non pereat.

Undecimum. Gratia ad actus supernaturales eliciendos homini necessaria est gratia actualis. Eruditus tamen P. Thomassin, in suis de gratiâ Commentariis, censuit gratiam habituales ad illos actus sufficere, quia ex sese est activa. Verùm D. Augustinus et theologi vulgò hanc improbant opinionem. « Homo, inquit, S. doctor libro de naturâ et gratiâ, cap. 26, n. 29, etiam perfectissimè justificatus, nisi æternâ luce justitiæ adjuvetur, rectè non potest vivere, sicut oculus corporis etiam plenissimè sanus nisi candore lucis adjutus non potest cernere. »

Ultimum. Philosophia, sive legis naturalis ex viribus liberi arbitrii observatio (si ex solis illius viribus in statu præsentis fieri potest), non est præparatio positiva, quæ sit Deo motivum, causa, regula, vel occasio eum determinans ad conferendam gratiam (nullo enim pacto potest homo se præparare ad gratiam sine gratiâ); potest tamen dici dispositio negativa, sive removens, ad gratiam, quatenus scilicet removet prohibentia, sive peccata contra legem naturæ, modò fatearis Deum aliquando gratiam iis impertire qui hanc præparationem non adhibuerunt, et ideò ipsum nullâ prorsus lege aut promissione adstringi ad gratiam hoc modo dispositis infundendam. Sic intelligendi videntur nonnulli antiqui Patres qui dixerunt, « homines per philosophiam fieri Christianos, Deum ad bonas naturæ actiones

attendere, semina virtutum in cordibus hominum respicere, » etc. Cæterum cum ex dicendis nulla fieri possit actio omni ex parte bona etiam moraliter sine gratiâ, illæ actiones meritò dicuntur remotè disponere ad justificationem.

ARTICULUS III.

An sine fide et charitate aliquod bonum opus elici possit?

Quoniam, ut ostendemus, hodierni novatores, fidem et charitatem unam et eandem quoad speciem esse virtutem obtinent, tamen majoris claritatis causâ quaeremus an sine fide theologicâ aliquod bonum opus morale fieri possit, eandem quaestionem de charitate subinde in medium adducturi.

§ 1. *Utrum sine fide theologicâ bonum opus morale possit elici?*

Fides theologica ea est quâ Deo christianæ religionis mysteria revelanti creditur.

In opere bono moraliter duo accuratè considera, *officium*, id est objectum et materiam operis et *finem*, hoc est id propter quod fit opus. Officium et finis ad integram actionis morales bonitatem requiruntur. Rursus in actione morali duplicem distingue finem, scilicet *finem operis*, id est finem ad quem actio ex naturâ suâ refertur, puta in actu misericordiæ *afflicti sustentationem*,...et *finem operantis*, id est finem quem operans pro libito intendit, honestum vel inhonestum.

Quæritur præcisè utrùm sinè fide theologicâ nulla actio bona esse possit non ratione objecti (omnes enim fatentur inopi, v. g., subvenire in se bonum esse) sed ratione finis.

ERRORES. — Michael Baius hoc imbutus errore, *liberum arbitrium sine gratiæ Dei adiutorio* (quod sit ipsa fides et charitas propriè dicta vel illius inspirationis nisi ad peccandum valere (quem consignavit propositionibus præsertim 28, 29, 36, 37, 38, 66, etc). Hoc, inquam, obsecutus principio, asseruit propositione 26, *omnia infidelium* id est eorum qui fide et charitate theologicâ destituti sunt *opera esse peccata, et philosophorum virtutes esse vitia*.

Jansenius Yprensus magistri principium et consecrarium avidè exosculatus est. Hæc nimirum asserit lib. 3 de Statu naturæ lapsæ, cap. 20: *Augustinus tanquam verissimum docet non posse esse opus bonum* (vult opus non meritorium vitæ æternæ non esse bonum etiam moraliter, quia nullum prorsus datur bonum

opus nisi ex charitate fiat), *nisi ipsa iustitia cælestis charitate diligatur, et ad Deum ipsum veluti ultimum finem referatur, quorum neutrum sine gratiâ et fide perfici potest*.

Ex hæc Yprensus doctrinâ prodit hæc propositio inter 31 quas damnavit Alexander VIII, die 7 decembris anni 1690, numero octava: *Necesse est infidelem in omni opere peccare*. Nihilominus tamen Jansenii sectatores inter se omninò non consentiunt circa modum magistri dogma exprimendi. Alii enim docuerunt explicitam in Christum fidem prorsus esse necessariam ut homo sine propriè dicto peccato agere valeat... Alii distinguentes inter *opus infidelis*, et *infidelem operantem* asseruerunt opus infidelis bonum esse posse ex officio et fine, etsi infidelis operando semper peccati reus sit, saltem omissionis, quia videlicet actionem non refert in Deum tanquam finem ultimum ex motivo fidei et charitatis.

Auctor centum et unius propositionum, quas Clemens XI proscripsit anno 1713, cujus definitioni accessit universæ Ecclesiæ suffragium, Baii et Yprensus sententiam quantum in se fuit renovavit; eorum quippe principium de peccandi necessitate sine gratiâ Salvatoris (quæ sit fides et charitas vera, vel illius inspiratio) consecrat. *Voluntas*, inquit propositione 39, *quam gratia non prævenit, nihil habet luminis nisi ad aberrandum, ardoris, nisi ad se præcipitandum, virium, nisi ad se vulnerandum; est capax omnium mali et incapax ad bonum omne*. Idem ferunt propositiones 38 et 40. Deducit autem propositionibus præsertim 26 et 27, conclusionem ex hoc principio scaturientem, scilicet infidelem in omni opere suo necessariè peccare; in eis docet nullas dari gratias nisi per fidem, fidem esse primam gratiam, et fontem omnium aliarum, etc.

OPINIONES CATHOLICORUM. — Nonnulli existimaverunt infideles nullâ prorsus Dei notitiâ imbutos in actibus suis non semper peccare; secus infideles aliquâ Dei cognitione illustratos, quia ex malo fine (ut ipsis videtur) semper operantur. Nonnulli alii cum erudito cardinali Norisio in Vindiciis cap. 3, paragrapho 4 censent opera bona, si quæ sunt in infidelibus, cælestis gratiæ (à fide et charitate theologicâ distinctæ) beneficio esse bona.

CONCLUSIO. — Sine fide theologicâ elici possunt aliquæ actiones tum ex officio cum ex fine bonæ, sive illæ adscribendæ sint divinæ gratiæ, sive non, et idcirco omnia infidelium opera non sunt peccata.

Probatur assertio variis momentis.

MOMENTUM PRIMUM. — *Ex Scripturis.* — Sacri Codices duo inprimis argumenta hic suppeditant.

Primum efflorescit ex locis, quæ aliquibus infidelium operibus, utpote bonis et honestis, temporalem aliquam mercedem repensam fuisse referunt. Exodi cap. 4, cum obstetrices ægyptiæ ex affectu misericordiæ contra Pharaonis edictum mares Hebræorum incolumes servassent, *ipsis benefecit Deus*, v. 20, et *ædificavit eis domos*, id est earum familias liberorum et opum copiâ amplificavit, v. 21. Ezechielis cap. 29, Nabuchodonosor ob bellum adversus Tyrum, ut jusserrat Deus, gestum, Ægyptum in præmium accepit. Matthæi cap. 5, v. 46, Christus supponit ethnicos amicos diligendo ex honesto et naturali motivo temporali mercede dignos esse.

Ex his sic arguimus: Opera temporali mercede cõlitus donata indubiè bona sunt tum ex objecto cum ex fine; vera quippe peccata non benevolentiam, sed iram Dei provocant; at talia extiterunt opera commemoratorum infidelium. Ergo.

Secundum elucet ex locis, quæ in gentilibus actiones bonas et honestas agnoscent. Unum propono. Epistolâ ad Rom. cap. 4, Apostolus increpat gentiles quòd *cum Deum cognovissent non sicut Deum glorificaverunt*; at id supponit eos potuisse Deum *glorificare* et ideò aliquid boni patrare, Deo saltem adjuvante, ut ostendimus articulo 4 sequentis libri; ergo.

Plurimi hic adducunt Apostolicum textum epist. ad Rom. cap. 2, v. 14: *Gentes, quæ legem non habent, naturaliter ea quæ legis sunt faciunt.* Hoc enim oraculum, inquiunt, gentiles adumbrat fide non imbutos, legem positivam non habentes, qui aliqua opera à lege positivâ præscripta, *naturaliter*, sive naturâ duce egerunt; hanc quippe expositionem suggerunt contextus, et scopus Apostoli, Patres græci, et inter latinos S. Cyprianus lib. 3 ad Quirinum cap. 99, et D. Hieronymus epistolâ ad Algasiam quæstione 8. interpretes. imò Ecclesia catholica quæ damnavit hanc Baii propositionem numero 23: « Cum Pelagio sentiunt qui textum Apostoli Rom. cap. 2: *Gentes quæ legem non habent*, etc., intelligunt de gentibus fidei gratiam non habentibus. Verùm hoc argumentum Baio, Jansenio et auctori 101 propositionum exasperandis magis quàm convincendis idoneum esse videtur; Augustinus enim (et ipso duce SS. Fulgentius et Prosper) adversus

Pelagianos disputans hunc textum passim exponit de gentibus ad fidem conversis; alias, ut censuisse videtur S. doctor, gentiles naturaliter ea quæ totius legis sunt facere possent, quod negant ipsi adversæsententiæ doctores. Quamobrem, addunt, censura Baii propositionis cadit tum in ejus acrimoniam, cum in ejus falsitatem: qui enim Apostoli textum intelligunt de gentibus non conversis, non docent, ut Pelagiani, omnia legis naturalis præcepta solis naturæ viribus observari posse, sed quædam duntaxat faciliora. Idem dicendum, inquit, de Baii assertione 58: *Cum Pelagio sentit qui boni aliquid naturalis, hoc est quod ex naturæ solis viribus ortum ducit, agnoscit.* Hanc enim sententiam defendunt celebris Vasquez et alii insignes theologi, qui contendunt Baii censuram, non ejus assertum, esse proscriptam, ut postea fusè referemus.

Obijciunt 1º exemplum obstetricum nihil, aut nimis probare. Etenim primo Exodi cap. 1, v. 21, dicitur eas *timuisse Deum*; aliquam ergo Dei notitiam habuerunt. 2º Eodem Exodi loco refertur eas mendacio reposuisse hebræas mulieres non indigere ministerio obstetricum; Deus igitur mercedem rependisset ipsi mendacio. 3º D. Gregorius libro 18 Moralium cap. 2, versùs finem expendens factum illud ait: « Nonnulli de obstetricum fallaciâ conantur asserere hoc mendacii genus non esse peccatum... quia ædificavit illis Dominus domos; in quâ magis recompensatione cognoscitur quid mendacii culpa mereatur; nam benignitatis earum merces, quæ eis in æternâ potuit vitâ retribui, pro admissâ culpâ mendacii in terrenam est recompensationem declinata, ut in vitâ suâ quam mentiendi tueri voluerunt ea quæ fecerunt bona recipere, et ulterius quod expectarent mercedis suæ præmium non haberent. » Hoc S. doctoris testimonium referens D. Thomas 2-2, q. 110, artic. 4 ad 4, dicit « mendacio obstetricum spectato quantum ad affectum benevolentiæ in Judæos, et reverentiam divini timoris, debitam fuisse remunerationem æternam, et per mendacium illud, etiam quoad actum exterioriorem, illas non meruisse amittere remunerationem æternam quam jam ex præcedenti affectu meruerant. »

Ex his evidens fit obstetrices per suum misericordiæ actum non solum veri Dei timore percussas fuisse, sed etiam æternam vitam promeritas esse, et ideò nec infideles fuisse, nec actum moraliter duntaxat bonum elicuisse; ergo.

Resp. : Nego ant. Unde dico ad primum, Dei notitiam, quam habuerunt obstetrices, ipsis Dei amorem propter se non instillasse, ut exigunt adversarii, sed solum quendam exploratæ Dei Hebræorum potentiæ timorem, quo ad Israelitis benefaciendum impulsæ sunt. Dico ad secundum cum D. Augustino lib. contra mendacium cap. 13, n. 32, in obstetricibus *non fuisse remuneratam fallaciam, sed benevolentiam, benignitatem mentis, non iniquitatem mentientis*; unde, ut observat Jansenius in vigesimum versum capitis primi Exodi, remuneratio Dei non respexit actum mendacii obstetricum, sed ipsarum misericordiæ actum in parvulos. Dico ad tertium, genuinum SS. Gregorii et Thomæ sensum ex eorum scopo innotescere. Ille intendit adversus nonnullos mendacium obstetricum esse verum peccatum; hoc autem probat ex eo quod actus misericordiæ, quem obstetrices in Hebræorum pueros exercebant, si non fuisset conjunctus cum mendacio, *potuisset eis mercedem in æternâ vitâ mereri*, sed cum per mendacium illud fuerit quasi deturpatus, illi mercedem duntaxat temporalem rependit Deus... Iste vult probare mendacium obstetricum non fuisse peccatum mortale, quia *per illud non meruerunt amittere remunerationem æternam quam jam ex præcedenti affectu meruerant*, aut potius mereri potuerant (Gregorius enim, quem ibi citat S. doctor, non dicit obstetrices actu promeritas esse remunerationem æternam, sed tantum illam mereri *potuisse*); porro uterque loquitur de merito, non *de condigno* sive ex justitiâ, quod supponit fidem et charitatem saltem habituales, sive gratiam sanctificantem, sed de merito *de congruo*, sive ex misericordiâ, fundato in cœlesti auxilio sive gratiâ, cujus virtute obstetrices illum misericordiæ affectum conceperunt et ediderunt; actus scilicet ab ipsis infidelibus ex gratiâ elicitis remotè disponunt ad æternam vitam, ut postea ostendimus.

Objiciunt 2°. Epistolâ ad Romanos. cap. 14, ait Apostolus : *Quod non est ex fide peccatum est*, at infidelium opera nunquam sunt ex fide; ergo. — Resp. : Conc. majorem; distinguo minorem : Nunquam sunt ex fide theologicâ, conc. Ex fide practicâ sive conscientiâ, neg. minorem et conseq. Apostolum ibi disserere de solâ conscientiâ evincere videtur 1° finis Apostoli hic eos increpantis qui vescebantur cibis quos vitiosos esse existimabant; ... 2° auctoritas plurimum Patrum græcorum et latinorum apud interpretes, et speciatim Estium; ... 3° auctoritas totius Ecclesiæ in magno concilio

Lateranensi quarto, anno 1215, cap. 41, ubi hoc textu probat sine bonâ fide non valere præscriptionem tam canonicam quam civilem.

Scio quidem sanctos Augustinum, Fulgentium, Prosperum, et alios, quos adducit doctissimus Norisius in Vindiciis cap. 4, paragrapho 5, hoc oraculum de fide theologicâ intelligere videri; quod si verum esset, eorumne, quæso, auctoritas præhaberi, aut etiam adæquari posset concilio Lateranensi œcumenico? cum imprimis Augustinus contra Manichæos disputando tanti fecerit Ecclesiæ catholicæ auctoritatem, ut eâ seclusâ sese *ipsi Evangelio non esse crediturum* asserere non dubitaverit. Verum absit ut tam eximios doctores adversariis concedamus; cur enim non stant expositioni D. Thomæ circa mentem D. Augustini (quam non improbat eruditus ipse Norisius ut mox ostensuri sumus)? Etenim S. doctor 2-2, q. 10, artic. 4 ad 1, et præsertim quæstione 23, artic. 7, ad 1, ex divo Augustino docet id quod non est ex fide *contrariè*, id est quod fit contra charitatem, sive ex animo infidelitatis esse peccatum; secus quod non est ex fide *privativè*, id est ex solâ fidei absentia, cum infidelis aliquando non ex infidelitate, sed ex honesto motivo agere possit.

Objiciunt 3° : Epistolâ ad Titum cap. 1 legitur : *Infidelibus nihil est mundum*; et Epistolâ ad Hebræos cap. undecimo : *Sine fide impossibile est placere Deo*; ergo. — Resp. : Ad primum, cum Augustino, lib. 31 contra Faustum, cap. 4, loqui Apostolum de infidelibus *carналiter sapientibus*, et contra conscientiam agentibus, et ideò infideliter, et non secundum rationis et conscientiæ dictamen viventibus. — Resp. ad secundum, ibi, ut evincit contextus, sermonem esse de fide supernaturali, sive theologicâ, cujus experts opera supernaturalia vitæ æternæ meritoria elicere nequit, non opera moraliter bona, temporalis mercede digna, quam aliquando infidelibus, ut diximus, concessit Deus.

MOMENTUM SECUNDUM. — *Ex Patribus.* — D. Augustinum potissimum adducam, quem solum cum SS. Prospero et Fulgentio objicere solet Jansenius.

1° Docet infideles aliqua bona operari ex gratiæ dono. Libro de gratiâ Christi cap. 24, n. 25 ait, « Deum immutasse cor Assueri quia mirabili et ineffabili potestate operatur in cordibus hominum non solum veras revelationes, sed etiam bonas voluntates. » Norisius Vindic. cap. 4, paragrapho 5, agnoscit Augustinum ibi censuisse infideles *aliquos actus bonos elicere ad*

quos à Deo præmoveretur, qui præfecto peccata esse non possunt; idque contra Jansenium lib. 4 de Statu naturæ lapsæ, cap. 6. Epistolâ 144, aliâs 150, n. 2, de Polemone pagano, quem ex ebrioso temperantem fecerat Xenocrates hæc habet: *Hoc non humano operi tribuerim, sed divino*. Unde ipse Norisius Vindictiarum cap. 5, paragrapho 4, dicit illam continentiam non solum bonam fuisse *in se*, sed etiam *opus bonum*; idque iterum adversus Yprensem lib. 4 de Statu naturæ lapsæ, cap. 5. Libro ipso 4 contra Julianum, cap. 5, n. 16, dicit: «Quantò tolerabilius illas, quas dicis in impiis esse virtutes, divino muneri potius quam eorum tribueres tantummodò voluntati (modò scilicet confiteretur illas etiam ex fine bonas esse)?» Libro de patientiâ cap. 26, n. 27, quærit, an schismatici vel hæretici mortem pro Christo obeuntis actio esset laudanda et an, à gratiâ an à solo libero arbitrio prodiret? Cui quæstioni reponit 1º, *illam esse laudandam*... 2º, hæreticum ob illam *in alterâ vitâ fortassè mitius esse puniendum*... 3º, per illam timore æterni supplicii superari pœnam temporalem... 4º, rationem illam esse Dei donum, non hæredum, sed exhæredatorum proprium.

Quid ad ista Jansenius lib. 4 de Statu naturæ lapsæ, cap. 5, 6, etc.? Hæc, etsi ratione *finis* mala, tamen ratione *officii* esse bona, et sub hoc respectu ab Augustino dici *Dei dona*, ut ipse testatur lib. 4 contra Julianum, cap. 5, n. 22.

Verum apertè fallitur Yprensis; ibi enim dicit quidem S. doctor, *posse aliqua bona fieri non benè facientibus à quibus fiunt*, id est impios, v. g., elemosynam malè erogare posse; sed non dicit eorum actiones in hoc casu *esse Dei dona*, cum defectu finis, ex quo potissimum æstimatur actionis moralis honestas et rectitudo, vitiosæ sint.

Igitur ex his sic arguimus: Qui aliquas infidelium actiones simpliciter bonas ac Dei donum esse asserit, ille agnoscit in infidelibus opera bona non ex parte tantum objecti, sed etiam ex parte finis; sed hæc docet D. Augustinus; ergo, etc.

2º Tradit esse in infidelibus nonnulla opera laudanda, et remuneratione etiam ex parte Dei digna. Etenim libro de spiritu et litterâ, cap. 27, n. 48, ait: «Quorum etiam impiorum nec Deum verum veraciter justèque colentium, quædam tamen facta vel legimus, vel novimus, vel audimus, quæ secundum justitiæ regulam non solum vituperare non possumus, verum

etiam meritò rectèque laudamus, quanquam si discutiantur quo fine fiant vix inveniuntur quæ justitiæ debitam laudem defensionemve mereantur.» Rationem affert initio capitis 28, his verbis: «Quia non usque adeò in animâ humanâ imago Dei terrenorum affectuum labe detrita est, ut nulla in eâ velint lineamenta extrema remanserint, unde meritò dici possit in ipsâ impietate vitæ suæ facere aliqua legis, vel sapere (etsi hæc, ut ibidem observat, defectu scilicet fidei in Christum, ad salutem æternam (proximè saltem) nihil ipsis prosint.)» Libro contra mendacium cap. 15, docet, ut diximus, obstetricibus Hebræis, et Rahab meretrici Deum benefecisse ob humanitatis affectum erga Israelitas; ergo.

Ex his sic rursus argumentamur: Augustinus primo loco disserit de operibus infidelium bonis non ex parte objecti tantum, sed etiam ex parte finis; dicit enim, *si discutiantur quo fine fiant, vix inveniuntur*, etc.; ergo censet aliqua, licet rarissima infidelium, opera etiam ex parte finis esse bona. Item ibidem dicit opera illa esse laudabilia: at opus ex fine pravum, licet ex objecto bonum, non laudandum, sed damnandum est. Tandem adversariorum principium ibidem evertit dicendo liberum arbitrium non omninò in homine lapsò extinctum esse; inde enim sequitur illud saltem cum gratiâ posse non peccare. Hinc isto testimonio adeò pressus fuit Jansenius ut lib. 4 de Statu naturæ lapsæ, cap. 6, reposuerit Augustinum hic ex Pelagianorum mente loqui, aut potius particulam *vix* hic significare *non*... Item S. doctor secundo loco disserit de bonis infidelium actibus à Deo remuneratis; sed Deus non potest remunerare actiones ex objecto bonas, ex fine vero pravas, cum illa opera vera sint peccata.

3º Augustinus, ut mox ostendemus, sermone 349 admittit *charitatem humanam, propriam Paganorum, Judæorum, hæreticorum*, etc., quam asserit non solum *licitam esse*, sed etiam *præceptam*. Eandem agnoscit Gregorius Magnus homiliâ 27 in Evangelia versùs exordium.

Magistro sanè dexteras dederunt SS. Fulgentius, Prosper, et Thomas. Hic 2-2, q. 10, artic. 4, in c., ait: «Manifestum est quòd infideles non possunt operari bona opera quæ sunt ex gratiâ, scilicet opera meritoria; tamen bona opera, ad quæ sufficit bonum naturæ (quod in eis remanere paulò antè dixerat) aliquàlitter operari possunt; unde non oportet quòd in omni opere suo peccent.»

Jansenius libro inprimis quarto de statu na-

turæ lapsæ Augustini mentem circa infidelium virtutes et opera scrutatur, quæ, ut putat, inventâ et reserata, exclamat in titulo capitis 17: « Nugæ, delirium, insania, error, impietas contraria Christianorum sensui, Scripturis, et fidei, quod infidelium sit ulla vera virtus, vel opera sine peccato juxta Augustinum, et concilium Arausicanum. » In quibus etiam in styli furore Calvinum imitari voluisse videtur.

Immense foret opere Augustini testimonia hic sigillatim referre et exponere. Ea ideo ad quasdam objectionum species ex eis enascentes restringemus generatim duntaxat indicando præcipua opera in quibus reperiuntur.

Obijciunt 1^o testimonia enuntiantia *liberum arbitrium non nisi ad peccandum valere, si lateat veritatis via*, lib. de spiritu et litterâ cap. 3. n. 5. Idem alibi passim inculcat. Unde concilium Arausicanum secundum can. 22, hoc adversus Pelagianos et Semipelagianos sancivit: *Nemo de suo habet nisi mendacium et peccatum.* — Resp. hæc et similia, unicè probare posse, ut postea longâ dissertatione ostendemus, infidelium opera sine gratiæ (à fide et charitate propriè dictâ distinctæ) adjutorio bona esse non posse; quod adversus nostram assertionem non militat.

Verùm, inquit, Augustinus lib. 1 Retractationum cap. 15, n. 4, ait: *Voluntas* (sine gratiâ sive charitate) *tota est vitiosa cupiditas*; quidquid ergo etiam in ordine naturali sine gratiâ vult homo est peccatum. At id, ut modò diximus, non impugnât nostram assertionem, quæ absolutè non enuntiat hominem sine gratiâ catholico sensu acceptâ aliquid boni facere posse. Deinde voluntas, de quâ hic disserit S. doctor, non est actus, sed ipsa voluntatis potentia, ex quâ peccatum oriri ostendit S. Augustinus, non autem ex concreto principio, sive malitiâ nobis à malo Deo inditâ, ut obganiebant Manichæi quos ibi refellit. Porro peccatum oritur ex voluntate quia per Adam ipsi inditus est habitus vitiosæ cupiditatis, cui per gratiam obsistit.

Atquid inde? Voluntatem nihil omninò boni, etiam moraliter, sine charitatis habitu, aut sine gratiâ Baii et Jansenii sensu acceptâ, agere posse? Minimè; in voluntate enim charitate destitutâ cum habitu cupiditatis viget inclinatio naturalis versùs bonum; quæ non est habitus pravus, sed ipsa natura inclinata in bonum, ex quâ gratiâ saltem adjuncta potest aliquod opus prodire, quod non sit peccatum.

Ad istam testimoniorum, quæ obijciunt ad-

versarii, classem, sequentia possunt revocari: « Ante fidem nihil boni, nihil virtutis esse potest, sine fide, etiam Christi, quod videtur esse virtus peccatum est, omnis virtus in vitio est, etc. »

Hæc enim reperiuntur apud Augustinum libro de gestis Pelagii cap. 14, n. 54 et alibi passim, et ideo apud ejus discipulos Prosperum, Fulgentium, etc., apud Hieronymum in caput 3 Epistolæ ad Galatas, apud Gregorium Magnum libro 2 super Ezechielem, homiliâ 19, versùs medium, ubi ait *per fidem pertingi ad virtutes* quod probat Cornelii exemplo, etc.

Hæc autem, si de fide theologicâ, ut videtur, intelligenda sunt, de peccato et vitio latè sumpto exponi possunt; quod scilicet non habet omnem perfectionem quam habere posset (qualia sunt bona infidelium opera quæ sterilia sunt, et ad fidem et justificationem remotè etiam, nisi quando cum gratiâ facta sunt, non disponunt, sed digna tantum sunt mercede temporali, vel minori pœnâ in inferno); quod, inquam, non habet omnem perfectionem quam posset habere, dici potest et reipsâ à Patribus interdum dicitur lato modo *peccatum et vitium*. Et verò D. Augustinus ipso capite 3 libri quarti contra Julianum postquam dixit *nullas esse in infidelibus virtutes*, nulla opera bona, hanc affert rationem: « Si ad consequendam veram beatitudinem, quam fides promittit, nihil prosunt homini virtutes, nullo modo possunt esse virtutes. » Adde ex aliorum Patrum verbis, inprimis ex contextu D. Gregorii loco adducto, elucescere eos disserere de spe, charitate, aliisque Spiritus S. donis ad quæ per fidem pertingitur.

Quod attinet ad testimonia charitatem *ad benè agendum* exigentia ea in sequenti quæstione exponemus.

Obijciunt 2^o testimonia, quibus Augustinus ex professo disputans contra Pelagianos, et speciatim contra Julianum, de infidelium virtutibus assertit eas esse *vera vitia*, et eorum opera, utpote sine fide et rectâ intentione facta, vera peccata. Ita inprimis lib. 1 de Nuptiis et Concupiscentiâ, capitibus tertio et quarto, et lib. 4 contra Julianum cap. 3, n. 14, ubi resumat et confirmat quod lib. 1 de Nuptiis, etc., cap. 3, et 4, dixerat de pudicitia conjugali infidelium, et à Juliano fuerat reprehensum. Unde de Augustini mente circa infidelium opera omninò judicandum est per prolixum caput tertium libri quarti adversus Julianum.

Resp. Augustinum hæc cap. 3 libri quarti

adversus Julianum tradere : Numero 14 docet in infidelibus veram non esse pudicitiam conjugalem ut placebat Juliano, qui virtutes officiis non finibus distinguebat numero 21, quia eorum animus fornicatur à Deo, id est ex fidei fine actui conjugali operam impendit. Numero 15 ostendit gratiæ necessitatem etiam ad salutis operis inchoationem. Numero 16 Julianus objicit eximias infidelium virtutes, quibus simpliciter boni et justi essent, sique, ut saltem inferebat Augustinus, ad regnum colorum pervenire possent, quod systema refellit numero 17 et sequentibus dicendo *neminem sine fide justum esse posse quia justus ex fide vivit*, Epistola ad Romanos cap. 1..... Bonas infidelium actiones, utpote ex perversâ intentione factas, ad bonorum auctorem Deum non tetendisse, sique *vera fuisse peccata..... Infidelium virtutes naturam beatificare non potuisse*, etc. Numero trigesimo Juliano quaerenti, *si gentilis nudum operuerit, nunquid quia non ex fide peccatum est?* reponit *peccatum esse*, non ratione officii, sive objecti, quod bonum est, sed ratione finis perversi omnem ad Deum relationem excludentis. Numero 55 refert Julianum tandem concessisse bona infidelium opera esse sterilia, sive ad æternam salutem nihil proficere, et tamen semper censuisse infideles illis operibus absolutè bonos et justos esse, cujus systematis contradictionem reserat dicendo, omne bonum opus (in Juliani sensu, sive quo quis absolutè bonus et justus est), non posse esse sterile, et ideò infidelium opera, si sterilia fuerunt, ad salutem non fuisse bona. Eodem numero 55 in fine concludit, *amore Dei*, (supernaturali) *opus esse ut bonum sit beatificum et pudicitia conjugalis*, quibus significat se Juliani doctrinam de infidelium virtutibus et bonis operibus eâ præcipuè saltem ex causâ impugnasse quòd eos illis bonis ad æternam vitam pervenire posse contenderet.

Igitur D. Augustini dicta de infidelium operibus tum cap. 5 lib. 4 contra Julianum, cum alibi triplici sensu videntur intelligenda. 1º De opere infidelis, quatenus est infidelis, id est quatenus operatur ex principiis infidelitatis, superbiâ, vanâ gloriâ, inhonesto fine, etc., ut passim docet citato cap. tertio... 2º De opere infidelis absolutè bono et ad æternam salutem conducente, ut sæpè tradit eodem capite, v. g. n. 55. 3º De opere bono infidelis maximè raro et perpaucio in comparatione malorum operum; quo sensu dicere potuit nullas esse in infidelibus virtutes (*cum virtus sit habitus*

rationi consentaneus, numero 19 citati capitis tertii, et habitus frequenti actuum repetitione comparetur), nulla in iisdem infidelibus esse bona opera, non absolute (siquidem lib. de spiritu et litterâ, cap. 27, nonnulla agnoscit), sed relative ad mala, quomodo Genesis cap. 6 dicitur: *Omnis caro corruperat viam suam*, et Psalmo 15 *omnes declinaverunt*, etc. Neque dicas Augustinum numero 55 libri 4 contra Julianum, et alibi passim docere, *bonum opus intentione fieri, intentionem verò fide per dilectionem operante* (quæ non potest esse in infidelibus) *dirigi*; intendit enim eò loci opus sine fide et intentione supernaturali factum ad salutem esse inutile, licet si moraliter, sive ex officio et fine bonum. Unde D. Thomas hoc Augustini dictum expendens 2-2, q. 10, a. 4 ad 2, ait: « Fides dirigit intentionem respectu ultimi finis supernaturalis, sed lumen etiam naturalis rationis potest dirigere intentionem respectu alicujus boni connaturalis. »

Objiciunt 5º testimonia quibus Augustinus asseruit virtutes in infidelibus, si quæ sint, esse *Dei dona*, quæ infideles ad suum auctorem non referendo, hoc ipso fiunt injusti, lib. 4 contra Julianum cap. 5, etc. ergo. Resp. morales ipsorum infidelium virtutes esse *Dei dona*; eas enim exercere aut acquirere non possunt contra passionum et tentationum violentiam sine Dei gratiâ. Illæ etiam virtutes vitia evadunt et homines injustos efficiunt cum ad Deum nec *explicitè*, nec *implicitè* referuntur; tunc scilicet positivè et reapsè finem ultimum excludunt; non ita cum exercentur ex ipso præcisè motivo moralis honestatis; in hac quippe hypothese aut ab agente *implicitè* referuntur ad Deum, aut ex seipsis sese ad Deum referunt. His nova accedet lux ex dicendis in prolixa dissertatione super modo eliciendi actionem moraliter bonam.

Sed excipiunt adversarii, quibus favere videtur Norisius in Vindiciis cap. 5. paragrapho 4, actio quæ refertur ad intrinsecum virtutis finem, sive virtus quæ ob sui tantum honestatem appetitur, hoc ipso vitium fit; id enim evidentè asserit D. Augustinus lib. 4 contra Julianum cap. 5, et iterum lib. 19 de Civitate Dei cap. 25, ubi ait: « Licet à quibusdam tunc veræ et honestæ putentur esse virtutes cum ad seipsas referuntur, nec propter aliud expectantur, etiam tunc superbiæ et inflatæ sunt, et ideò non virtutes, sed vitia judicandæ sunt; » ergo. — Resp. Augustinum hos actus vitia reputare, quia, ut faciebant, et contendebant

Stoici quos hic et alibi, imprimis sermone 156, alias 15 de verbis Apostoli, cap. 7, n. 7, refellit. illi actus ad virtutis bonum, ut ad finem ultimum referebantur, et ideo qui eos eliciebant inani gloriâ intumesciebant, non ut ad finem ordinabilem ad finem ultimum, quâ in hypothesis liquet creatum bonum increato præhaberi. Id elucescit ex ipsis citatis verbis, *ne propter aliud expetuntur, superbi et inflati sunt, etc.*, et ex citato sermone 156 de verbis Apostoli, ubi S. doctor Stoicorum dogma sic refert: *Extiterunt alii superbi* (Epicureos pritis depinxerat) *quasi à carne se removens et totam spem beatitudinis suæ in animâ suâ constituentes, posuerunt summum bonum in virtute suâ*; deinde observat Apostolum Actuum cap. 17 utrosque confutavisse. Neque omnino repugnat doctissimus Norisius commemorato loco; relato enim Augustini ex Dei Civitate testimonio supra adducto ait: « Itaque cum virtus etiam ob sui tantum honestatem appetitur, facit ut illam prosequens, atque assequens sibi complacere in suo opere, ac philantiæ vitio laboret.... Augustini pronuntiatum, nempe virtutem, cum ob sui honestatem appetitur, esse superbam, ac philantiâ vitari probatur fusè ab eodem S. doctore sermone 15 de verbis Apostoli exemplo Stoicorum, qui sectabantur virtutem propter seipsam, et tamen eorum virtutes superbæ ancillabantur, » etc.

Obijciunt 4^o D. Augustini discipulos SS. Prosperum, epistolâ ad Rufinum, et in Carmine de ingratia cap. 16, Fulgentium, et alios plures apud Norisium Vindic. cap. 3, paragrapho 4, et cap. 4, paragrapho 5, asserere fidem esse fontem bonorum operum, et nulla post Adæ peccatum in animâ humanâ remansisse virtutum semina, etc.; ergo. — Resp. SS. Prosperum et Fulgentium Semipelagianos refellere qui contendebant bona naturæ opera fidem præcedentia fidem promereri, et esse semina virtutum, ut loquebatur Cassianus, quem S. Prosper refellit in libro contra Collatorem, quibus homo præparatur ad gratiam. Unde uterque intendit fidem theologiam esse fontem operum salutis æternæ meritoriorum, et ideo omnia opera ante eam elicita esse peccata vel improprie tantum, quia non sunt verè meritoria, aut proprie, quia ex perverso fine fiunt. Porro remoto hæretico Cassiani sensu verum est in animâ post Adæ peccatum remansisse semina virtutum, si his vocibus intelligatur lumen intellectus practici, et inclinatio voluntatis ad bonum appetendum et vitandum malum. Quod attinet ad Patres qui

apud Norisium locis indicatis dicere videntur omne quod non est ex fide (theologicâ) esse peccatum, germanum eorum sensum exposuimus, et infra cum ipso Norisio fusiùs exponemus.

MOMENTUM TERTIUM. — *Ex rationibus theologis.* — Prima exurgit ex principiis SS. Augustini et Thomæ asserentium per Adæ peccatum naturam humanam totaliter non fuisse corruptam, quod in fidei tesseram crexit concilium Trid. sessione 6 de justificatione, cap. 1, ubi ait Adæ delicto liberum arbitrium minime extinctum esse, viribus licet attenuatum, et inclinatum; sed inde elucet superesse hominis lapsi voluntati vim quamdam, etsi exiguam, ad bonum sibi congruum, sive naturalis ordinis, saltem cum aliquâ gratiâ, amandum, et ideo infideles posse ejusmodi bona opera aliquando elicere.

Secunda erumpit ex absurdis adversæ sententiæ. Scilicet in hoc systemate 1^o, infideles nunquam sese preparare possent ad fidem recipiendam; fides enim in eo systemate est prima gratia, et cuncta opera fidei prævia sunt vera peccata... 2^o Quoties iidem infideles adimplere vellent legem naturalem, de eleemosynâ, v. g., erogandâ, de colendis parentibus, etc., vellent nolent, peccarent; si enim non adimplerent, peccarent; si è conseruo adimplerent, etiam peccarent, tum quia actionem ad ultimum finem non referrent, cum quia gratiâ fidei et charitatis destituerentur, etc.

Tertia enascitur ex palmari principio quo adversarii prætendunt nullum dari medium inter vitiosam cupiditatem et veram charitatem; hoc autem systema mox confutabimus.

Quarta sic se habet: Si quid impediret quominus infideles quædam opera omni ex parte bona producere possent, maximè eorum infidelitas, aut defectus illorum operum relationis ad Deum; falsum consequens. Major patet ex ipso adversariorum systemate; clamant enim opera infidelium, quæ sunt ex objecto bona, necessariè esse peccata quia producuntur ab hominibus destitutis charitate quæ per dilectionem operatur et Deo propter se inhæret. Igitur probatur minor.

1^o Infidelitas necessariè non coinquinat gentiliū opera ex parte objecti bona; gentiles enim necessariè non agunt ex habitu cupiditatis sicut justus necessariè non agit ex habitu charitatis; possunt videlicet opera ex objecto bona producere aut propter intrinsecam illorum operum honestatem, vel ex innato beatitudinis in genere desiderio, vel ad Deo ut na-

turæ auctori obediendum, quæ motiva prava non sunt.

2° Defectus explicitæ relationis ad Deum non inquinat opera infidelium ratione objecti bona. Etenim præceptum de referendis actionibus ad Deum est affirmativum, et ideo *pro semper* non obligat, sed certis tantum momentis. Aliunde infideles, qui etiam Deum ignorant ut Deum, sive ut Ens supremum per quod omnia facta sunt, opera ex objecto bona faciendo propter intrinsecam eorum honestatem, æquitatem, etc., ea consequenter faciunt propter Deum, à quo illa honestas et æquitas necessariè emanat; honestas nimirum illa et æquitas per se dirigitur in Deum; quinimò illi infideles possunt etiam illam in Deum explicitè referre; Deus quippe ut justitia, veritas, sapientia, lex, etc., ab illis penitus ignorari nequit. Hæc mox confirmabimus dictis et argumentationibus ipsius domini Nicole, ubi expendemus an sine gratiâ actuali aliquod bonum opus morale fieri possit.

Obijciunt 1°, ex D. Thomâ 1-2, q. 1, a. 6 ad 5: « Virtus primæ intentionis, quæ est respectu ultimi finis, manet in quolibet appetitu cujuscunque rei, etiamsi de ultimo fine actu non cogitur, sicut non oportet quod qui vadit per viam in quolibet passu cogitet de fine; » at prima intentio infidelis est in idolum, sive in creaturam tanquam finem ultimum; ergo illa intentio semper remanet in infideli liberè agente, saltem virtualiter; ergo ille infidelis semper refert opera sua ad creaturam, et ideo semper et necessariè peccat. — Resp. 1° quosdam infideles, v. g., Ciceronem, Horatium, etc., aliquam veri Dei habuisse notitiam, et idcirco actiones suas ad idola, quæ contemnebant, non retulisse. Resp. 2° nullum esse infidelem, cui prorsus ignotus sit Deus, quatenus est justitia, æquitas, sapientia, lex, etc., ut postea dicemus cum domino Nicole, et ideo infidelem sua opera ad creaturam necessariè non dirigere. Resp. 3° Dist. minorem: Prima intentio infidelis est in idolum tanquam finem ultimum particularem, conc. Tanquam finem ultimum generalem, nego minorem et conseq. Et similiter dist. conseq.: illa intentio semper remanet virtualiter in infideli liberè agente respectu finis ultimi generalis, conc.; particularis, neg. conseq. Finis ultimus generalis est bonum perfectum et beatificum quod quilibet homo necessariè appetit; particularis res specialis, in qua bonum perfectum et beatificum constituitur. Avarus,

v. g., finem ultimum suum generalem, veli nolit, in bono perfecto collocat, finem verò particularem in possessione divitiarum, quam vult esse summum bonum beatificum. Porro, quandò aliquis opus eligit ex objecto bonum, nisi positivè veli opus istud ad finem ultimum particularem vitiosum referre, actio illa non refertur ad istum finem particularem, sed tantum ad generalem, siquidem actio illa propter intrinsecam objecti honestatem non est ad finem ultimum particularem pravam *referibilis*, benè verò ad generalem. Unde, cum præfatus avarus pauperi subvenit, nisi malum finem aliunde intendat, ejus actio non refertur ad avaritiæ affectum, sed ad primam intentionem boni perfecti et beatifici, ad quod de se tendit omne bonum et honestum. Unde D. Thomas videtur loqui de primâ intentione respectu ultimi finis generalis, non particularis, aliàs quilibet avarus, v. g., etiamsi esset fidelis, in omnibus actionibus suis necessariè peccaret, quod certè et rationi et fidei adversum est. Et verò, sicut justus, qui suas actiones ad Deum retulit, omnia opera in Deum virtualiter non tendunt, nisi ex objecto bona sint, ita infidelis, qui suas actiones in idolum retulit, omnia opera in idolum non diriguntur nisi ex objecto mala fuerint.

Obijciunt 2° nonnulli Yprensis sectatores. Quælibet actio infidelis non est peccatum, quia recta et honesta esse potest tum ex officio cum ex fine proximo; sed nihilominus quilibet infidelis in omnibus actibus suis liberis peccatum committit saltem omissionis, opus suum ad Deum ut oportet non referendo; ergo. Resp. Nego ant. quoad secundam partem. Etenim actio libera infidelis, et infidelis liberè agens unum et idem sonant, si ergo unum non est semper peccatum nec alterum, et vice versâ. Et verò hic non diffidentur adversarii ordinationem saltem explicitam ad finem ultimum non esse de intrinsecâ bonitate actionis infidelis; ergo et fateri debent infidelem non teneri ad eam cum istâ ordinatione eliciendam, siquidem præcisè adstringitur ad actionem cum debitis dotibus producendam.

MONITUM. — Ubi objectiones ex Scripturis diluimus, Apostoli oracula de omnibus operibus in Dei gloriam referendis, epist. 1 ad Corinthios cap. 10, v. 31, cap. 16, v. 14, Epist. ad Colossenses cap. 3, v. 17, etc.; his ex causis non retulimus.

1° Scotistæ, à quibus multum alieni non sunt Gamachæus in 1-2, q. 18, cap. 4, Corne-

lius à Lapide, Bellarminus lib. 5 de Gratia et libero Arbitrio cap. 10, etc., commemorata testimonia de consilio, non de præcepto intelligunt.

2° Estius, cui assentit Sylvius, etc., eosdem textus ad solos Christianos pertinere censet.

3° D. Thomas apud Estium in caput decimum prioris ad Corinthios, intelligit quidem, et non immeritò fortassis, illos textus de *præcepto*. Verùm S. doctor observat illud præceptum esse 1° negativum, sicque *semper et pro semper* obligare, id est quemlibet teneri nihil unquam agere quod gloriæ et amoris Dei adversetur, et ideò ea semper facere quæ ex se in Dei gloriam referri possint, quod idem sonat, ac actiones in Deum referri *implicitè et mediâtè*.... 2° esse affirmativum, sicque non *semper et pro semper* obligare, sed iis duntaxat momentis quibus urget præceptum diligendi Deum, et ideò non peccare qui extra illa momenta actiones suas ad Deum explicitè aut virtualiter non refert, ex motivo inprimis charitatis. Porro infideles, etiam veri Dei notitiâ non imbuti, id agendo quod ex officio et fine proximo bonum est sine ullâ prorsus intentione pravâ, nihil agunt quod amoris Dei contrarium sit, quinimò id agunt quod tendit ad Dei gloriam, cum talis actus ex se ad Deum ut totius naturæ et boni auctorem referatur. Unde tantum abest ut illud præceptum violent, quinimò illud adimplent.

4° Adversarii obtendunt iis textibus absolutam incumbere necessitatem sub pœnâ peccati saltem omissionis omnes et singulos actus suos deliberatos ad Deum referendi ex motivo propriè dictæ charitatis; quod systema mox refellemus, et tanquam falsum et erroneum explodunt insignes etiam Thomistæ, v. g., Dominicus Soto lib. 1 de naturâ et gratiâ cap. 21, Gonetius disputatione primâ de necessitate gratiæ, art. 3, paragrapho primo, ubi ait: « Falsum pariter et erroneum est nullum opus bonum fieri posse sine charitate, hoc est nisi in Deum propter se dilectum referatur, et sine tali relatione et charitatis imperio actus cæterarum virtutum esse malos, et veri peccati contaminatione pollutos; » hoc ipsum est Yprensus et ejus sectarum systema.

PRINCIPIA SOLUTIONUM. — Primum. Hic præcisè asserimus verè non peccare infideles qui opus ex objecto bonum faciunt ob illius honestatem tanquam finem proximum, non ultimum, nullo aliunde perverso fine, aut circumstantiâ ad id inducti. Hinc ad rem non sunt

Scripturæ aut Patrum testimonia quæ assertio-nem sic spectatam non impugnant.

Secundum. Illic præcisè asserimus aliqua esse infidelium opera bona moraliter, et ideò non solum ratione objecti, sed etiam ratione finis, sive solis naturæ viribus fiant, sive non. Hinc ad rem non sunt testimonia, quæ ea opera inter Dei dona numerant.

Tertium. Opus non factum ex fide *contrariè*, id est factum modo fidei et amoris Dei adverso, verum est peccatum; secus non factum ex fide *negativè*, id est factum ex solo defectu fidei, cum fide destitutus possit rem ex officio bonam ex illius honestate ad finem ultimum ex se *referibili* facere.

Quartum. Adversarii censent fieri etiam non posse ut infidelium opera vera non sint peccata, cum impossibile sit ut infidelis, quatenus infidelis, fide et charitate præditus sit. Ipsi igitur probandum incumbit Scripturam et Patres id docuisse.

Quintum. Cum bona infidelium opera, utpote sine fide et charitate facta, æternæ vitæ non sint meritoria, carent perfectione quæ sibi in ratione præcisè operum inesse posset, et hoc sensu dici possunt, et reipsâ nonnunquam à Patribus nuncupantur *mala et vitiosa*.

Sextum. Actio moralis ex officio bona, ex fine mala, verum est peccatum (*bonum enim ex integrâ causâ, malum ex quolibet defectu*), cui ideò Deus mercedem nequidem temporalem reddere potest; at Scriptura, Augustinus, et alii Patres asserunt nonnullis infidelium operibus in hac vitâ præmium temporale à Deo fuisse repensum, et in alterâ minus supplicium.

Septimum. In hoc præcipuè Pelagiani relativè ad infidelium actiones erraverunt quòd contenderent eos posse sine gratiâ universam implere legem, tentationes superare, et veram adipisci justitiam. Hinc immeritò Jansenius lib. 4 de hæresi pelagianâ cap. 8, erroris pelagiani tacitè insinuat Bellarminum, et alios quibus videtur pauca quædam opera facillima moraliter bona solis naturæ viribus ab infidelibus elici posse, idque confirmant ex capite 2 Epistolæ ad Romanos, quanquam hæc opinio fortassis vera non sit.

Octavum. Ad moralem actuum infidelium bonitatem, sufficit ut non sint contra gloriam Dei per oppositionem mali finis, et in gloriam Dei implicitè tantum tendant. Omnes enim actiones deliberatæ in materiâ virtutum moralium elicite propter propriam et objectivam ipsarum honestatem, sunt bonæ, quamvis non

dirigantur explicitè in gloriam Dei, neque imperentur ab ullo actu charitatis propriè dictæ, nec procedant ex aliquo ejus influxu actuali aut virtuali.

Nonum. Ad solvendas ex Augustino objectiones in libris præsertim adversus Julianum ad ista attende. 1^o Infideles agentes ut infideles, id est adversus rectæ rationis dictamen; semper peccant.... 2^o Infideles, etiam sapientiores, sæpius superbiâ intumescabant, sicque sæpius malè operabantur. Unde apud infideles rara admodum fuerunt opera ex recto fine facta; quo sensu ex maximâ parte omnia eorum opera fuerunt peccata.... 3^o Infideles suis virtutibus non fuerunt simpliciter boni Juliani sensu, qui eos his virtutibus justificari garriebat.... 4^o Apud infideles nec vera virtus fuit nec bona voluntas, non philosophica, sive simpliciter moralis, sed conjuncta cum charitate, aut fide.... 5^o Liberum arbitrium nihil quidquam valet Pelagianorum sensu qui ipsum nimis extollebant, et ideò aut nihil potest sine gratiâ, aut parùm potest, sicut dicitur agrotantem nihil posse.... 6^o Omnis voluntas infidelium pro potentiâ accepta, non pro volitione sive actu, utpote per Adæ peccatum vitiata, est mala.... 7^o Infidelium virtutes non fuerunt veræ, ac simpliciter bonæ, ad sensum Juliani, qui eas, licet ex officio tantum, non ex fine bonas, tamen simpliciter bonas interdum dicebat. Eadem virtutes ad regnum cælorum non fuerunt steriles in mente ejusdem Juliani, qui eas simpliciter bonas esse, iisque homines justificari asserebat, et tamen ipsas ad regnum cælorum steriles esse saltem aliquando dixit. Item eadem virtutes, etiam ratione finis bonæ, non erant bonæ relativè ad eundem Julianum, qui aliquando dixerat eas utiles esse ad vitam æternam, etc. Tot autem tergiversationes, in homine etiam eradito qualis fuit Julianus, nemini miræ videri debent; Julianus enim doctus quidem fuit, et maximè acutus, sed fuit hæreticus; hæresis autem genius, ut in fine præcedentis articuli diximus, maximè tortuosus est, et flexibilis, et ideò varias et multiplices induit formas.

Decimum. Si cui fortassis displicuerint solutiones in præcedenti principio consignatæ hanc accipiat solutionem desumptam ex Henrico Norisio, adversariis vulgò acceptissimo, quem in Augustini lectione et notiâ versatissimum fuisse fatentur omnes eruditi. « Duo, inquit in Vindiciis cap. 3, paragrapho 4, post longam meditationem asseruit Augustinus (cap.

5 libri 4 contra Julianum), primum, nullas in infidelibus ex solius liberi arbitrii viribus virtutes reperiri; alterum, si quæ in eisdem virtutes fuerint, easdem nequaquam ipsorum voluntati, sed divinæ gratiæ esse adscribendas.... » Ibidem concedit Augustinum in infidelibus unum actum bonum agnovisse sine gratiâ, illum nempe quo homo appetitu innato amat summum bonum.... Ibidem non improbat interpretationem Apostolici textus: *Omne quod non est ex fide*, etc., Rom. cap. 14 de eo qui agit non ex solâ fidei theologicæ absentia, sed modo fidei adverso.... Tandem ibidem docet sententiam Augustini contra Julianum fuisse infidelium virtutes ob intrinsecam earum honestatem in primâ sui productione factas inani gloriâ actu reflexo semper vitiari nisi divina gratia impediât ne de illis glorientur. » Porro evidens est hæc omnia nostræ assertioni nullatenus nocere, quinimò Baii et Yprensis dogmata funditus evertere, etc.; ergo.

Si tamen eximius theologus docuisset, omnem actionem quæ non supponit fidem theologicam in operante, à quâ in ultimum finem dirigatur, esse veri nominis peccatum, quia dictamen conscientiæ à fide theologicâ dirigi debet à quâ solâ opus in ultimum finem refertur (ut sensisse videtur Vindiciarum cap. 4, paragrapho 51), salvâ quæ ipsi debetur reverentiâ, ipsum desereremus quemadmodum ipse deseruisset citatum Thomam 2-2, q. 10, a. 4 ad 2, alio modo, ut diximus, apostolicum textum Rom. cap. 14 exponentem. Verum cum, ut iterum diximus, ille Vindic. cap. 3, paragrapho 4 idem testimonium de actione non factâ ex fide contrariè, non negativè intelligi posse dixerit, nullam in tanto viro contradictionem suspicari fas est.

§ 2. *Utrum sine charitate bonum opus morale produci queat.*

Charitas hic strictò sumitur, nimirum pro supernaturali amore, quod Deus ut auctor gloriæ propter se diligitur. Dividitur in habitualem et actualement; hæc autem juxta Yprensem in firmam Deum super omnia diligentem, et infirmam hunc perfectionis gradum nondum adeptam.

Canonis. — Wiclefus et Joannes Hus, quos damnavit concilium Constantiense sessione 13, docuerunt hominem peccatorem, sive charitate habituali destitutum, nullum opus bonum elicere posse, et ideò omnes ejus actiones necessariò esse vitiosas; hæc systema extenderunt Protestantes ad ipsa iustorum opera, quæ ta-

men in ipsis propter fidem in Christum peccata coram Deo non reputantur. Eos damnavit concilium Trid. sess. 6, cap. 6, et canone 7, et sess. 14, cap. 4, et can. 5.

Michael Baius docuit solâ charitate actuali (ut videtur) perfectâ sive dominante, peccati affectum extinguere, et ideò omnem actionem ex illâ charitate non elicitam verum esse peccatum. Id exhibere videntur istæ ejus propositiones, 56: *Omne quod agit peccator, vel servus peccati, peccatum est...* 41: *In omnibus suis actibus peccator (non habens charitatem dominantem) servit dominanti cupiditati...* 17: *Non est vera legis obedientia (per quam quis formaliter justus fit et meretur, ex propositionibus 14 et 16), quæ fit sine charitate...* 59, hujus et aliorum errorum radix: *Omnis amor creature rationalis aut est vitiosa cupiditas, quâ mundus diligitur, quæ à Jovine prohibetur, aut laudabilis illa charitas, quâ per Spiritum sanctum in corde diffusâ Deus amatur.* Damnatus est, ut diximus, à Pio V, Gregorio XIII et Urbano VIII, quorum Constitutionibus accessit totius Ecclesiæ suffragium.

Jansenius Yprensus relatum Baii systema paululum emolliit lib. 5 de Gratiâ Christi, cap. 7, ubi docet ad opus bonum moraliter, sive ad opus ut non sit peccatum, initium charitatis propriè dictæ, sive infirmam charitatem sufficere. Inter 51 ejussectorum propositiones damnatas ab Alexandro VIII, 7 decembris anni 1690, hæc numero 7 invenitur: *Omnis humana actio deliberata est Dei dilectio vel mundi; si Dei, charitas Patris est; si mundi, concupiscentia carnis, hoc est, mala est; idem offerunt propositiones 8, 11, etc.*

Baii et Yprensus doctrinam suam fecit auctor centum et unius propositionum à Clemente XI anno 1713, et universâ Ecclesiâ, ut non semel diximus, proscriptarum; hæc enim offert propositio 44: « Non sunt nisi duo amores, unde volitiones et actiones omnes nostræ nascuntur; amor Dei qui omnia agit propter Deum, quemque Deus remuneratur, et amor quo nos ipsos ac mundum diligimus, qui quod ad Deum referendum est non refert, et propter hoc ipsum sit malus. » Idem ferunt propositiones 45, 46, 47, 48, 49, 50, 51, etc.

Error Baii et ejus asseclarum ex parte intrinseci et proximi fundamenti nihil aut parùm differt ab errore Hussitarum et Protestantium. Cur enim, quæso, in mente Hussitarum carentia charitatis habitualis actiones sontium intrinsecè corrumpit, aut in mente Protestan-

tium ipsa justitiæ Christi imputatio non impedit quominus actiones justorum vera sint peccata, nisi quia actiones illæ concupiscentiæ, sive praviæ cupiditatis substantiâ vel excessu semper inficiuntur? Unde Norisius Vindiciarum cap. 5, paragrapho 4, versùs finem dicit, *novatores damnatos à concilio Trid. sess. 6, can. 7, sensisse omnia opera facta ab homine extra charitatem et in peccato constituto esse peccata, quod illa à conscientie reatu vitiantur; quod et enuntiare videtur auctor 101 propositionum dicendo propositione 45, carnalem cupiditatem in peccatore regnantem omnes ejus actiones corrumpere.* Unde sit

CONCLUSIO UNICA. — Homo absque charitate sive habituali, sive actuali propriè dictâ, etiam debili et infirmâ, potest bonum opus, etiam supernaturale, per actualem gratiam perficere. Quid de istâ assertionem sentiendum sit ex relatis summorum pontificum et Ecclesiæ judiciis abundè innotescit.

Probatur. Baii, Yprensus, et eorum defensorum præsertim (quos hic præcipuè refellere aggredimur) systema, hoc, ut diximus et ex relatis eorum assertionibus manifestum est, nititur principio, nullum esse posse rectum et honestum Dei amorem præter charitatem strictè dictam, et ideò actum omnem, qui non oritur ex hac charitate, oriri ex vitiosâ cupiditate, et consequenter veram Christi gratiam aut esse ipsam formaliter charitatem, aut essentialiter inspirare charitatem; at istud principium falsum esse evincunt

1^o Scripturæ. Etenim 1^o, passim excitant insignes peccatores ad justificationem per bona opera impetrandam; v. g., Danielis cap. 4: *Peccata tua, inquit Propheta Nabuchodonosori, elemosynis redime, etc.* An, quæso, illæ Nabuchodonosor elemosynæ fuissent vera peccata propter absentiam charitatis habitualis? An iste paganus eas fecisset ex dominante, aut etiam ex initiali charitate propriè dictâ? Illæ igitur elemosynæ neque exortæ essent ex vitiosâ cupiditate, neque ex verâ charitate, sed ex amore honesto inter utramque medio... 2^o Passim sontes hortantur ad timorem Dei vindicis, ut à peccatis resipiscant et salvi fiant, v. g., Exodi cap. 20, v. 20, *venit Deus, inquit Moyses, ut terror illius esset in vobis, et non peccaretis; at timor ille omne peccatum avertens non fuit timor castus, sive dilectionis, siquidem Jansenio ibidem explicante, dilectio nondùm erat in Israelitis; ergo fuit timor simpliciter servilis, qui nec ex vitiosâ cupiditate nec ex verâ charitate*

erumpit... 3^o Commendant fidem, spem et charitatem tanquam virtutes inter se specificè distinctas: *Manent fides, spes, charitas, tria hæc, major autem horum charitas*, Epist. 1 ad Corinthios cap. 13. Hæc scilicet loquendi ratio tria reipsâ naturâ diversa connotat, et aliunde concilium Trid. sessione 6, canone 28, adversus Protestantes, definitivè veram fidem absque charitate existere posse; sed in adversariorum systemate specifica illa fidei, spei, et charitatis distinctio omnino commentitia foret; clamant enim nullam esse virtutem præter charitatem; *nec Deus est, nec Religio*, inquit auctor 101 propositionum, propositione 58, *ubi non est charitas*. Etverò, si duo tantum esse possunt creaturæ rationalis actus, sive motus, unus essentialiter bonus oriens ex charitate, alter essentialiter vitiosus oriens ex cupiditate, duo etiam tantum esse possunt ejusdem creaturæ habitus, unus essentialiter bonus, alter essentialiter malus; ergo habitus fidei et spei, si ab habitu charitatis distinguantur, erunt vitiosi sive ipsa vitiosa cupiditas, quæ creaturæ positivè inhæret tanquam fini ultimo; ergo illi habitus erunt naturâ suâ mali, et ideò vitia, non virtutes; ergo actus fidei et spei ex fidei et spei habitibus elicit non extrinsecè tantum, et defectu relationis, sed et intrinsecè et naturâ suâ erunt mali.

2^o D. Augustinus, cujus præcedenti paragrapho plures adduximus textus. Unde unum tantum, eumque invictissimum hic adducam. Sermone 349, qui est de Charitate, aliàs 52, de Tempore, cap. 1, n. 1, duplicem secernit charitatem, divinam et humanam; rursus humanam partitur in licitam et illicitam: *Charitas*, inquit, *aliâ est divina, aliâ humana; aliâ est humana licita, aliâ illicita*... Cap. 2, n. 2, ait: *Non solum ita licita est charitas humana, ut concedatur, sed ita licita, ut, si defuerit, reprehendatur*. Ecce evidenter amorem humanum omnino diversum à divino (cùm diversam habeat notionem) quem Augustinus honestum et licitum, imò præceptum esse pronuntiat; ergo.

3^o Concilium Tridentinum citatis locis, maxime sess. 6, cap. 6, ubi refert plures actus prævios charitati, quibus fontes ad justificationem disponuntur, qui ideo nec sunt ipsa charitas, nec ab ipsâ emanant, et tamen recti sunt, laudabiles, imò supernaturales, cùm eis fontes ad justitiam præparentur.

4^o Theologorum suffragium. Illud non obscure exhibet Yprensis lib. 5 de Gratiâ Christi, cap. 5, ubi ait: « *Augustini doctrina (virtutem*

creaturæ rationalis non esse prorsus aliam quam amorem Dei) philosophiæ moralis Aristotelicæ sectatoribus valde caotica videbitur. Sed si ponderibus christianis trutinetur, castissima, dignissima, verissima, et ex intimis penetratilibus christianæ religionis prompta videbitur. »

Idem suffragium luculentius exhibet illustrissimus Bossuetius in fervidis suis adversus Franciscum de Salignac de la Motte, archiepiscopum Cameracensem, quem Quietismi accusaverat, concertationibus eruditè omnibus exploratis. Dixerat vir eximius et apostolicæ mansuetudinis, in pastoralis documento spem theologicam sine quodam saltem initio charitatis esse non posse; hæc reposuit Meldensis præsul libro, cui titulus: *Quietismus redivivus*: « Hoc falsissimum est, cùm omnes theologi uno ore sentiant, charitatem quidem non sine fide et spe, sed fidem ac spem sine charitate esse posse, contrariamque sententiam reputant erroneam. » Idem consensus elucet ex fidei formulâ bullæ Pii V adversus Baii articulos congruente emissâ à sacrâ Facultate Lovaniensi, quam repræsentat P. Duchesne in appendice ad historiam Baianismi; cap. 5, ait sacer Ordo:

« Omnino à vero abhorrere censemus, omnem creaturæ rationalis amorem aut vitiosam cupiditatem esse, quâ mundus diligitur... aut laudabilem illam, quâ per Spiritum S. in corde diffusâ Deus amatur, charitatem. Est indubiè medius quidam amor, quem naturæ auctor inseruit, quo non modò beatitudinem omnes expetimus, sed et parentes et amicos, liberos et conjuges, et quæcumque aliâ ratione propinquos irreprehensibiliter, ipsâque naturâ impellente diligimus, etc. » Idem historicus refert sacram Facultatem Duacenam et plures alias in eandem conspirasse sententiam.

Non potuit sanè schola hanc non amplecti sententiam quam ejus princeps eximiis suis consignavit operibus. Enimverò 2-2, q. 17, a. 8, in c., dicit, *origine spem charitate esse priorem, charitatem verò perfectione spem antecedere*. Per spem autem ibi non intelligit charitatem remissam, quasi spes et charitas per accidens tantum et secundum gradus distinguerentur, ut placet adversariis, sed virtutem specie distinctam à charitate; ibidem scilicet dicit S. doctor, hominem per charitatem *inhære Deo propter Deum*, per spem autem *Deo ut sibi bono* (id est propter retributionem ut proximum non ultimum finem), quæ duo objecta, sive motiva, *formaliter et non gradualiter* sunt diversa.

Idem clariùs exprimit ibidem q. 19, a. 6, in c. his verbis : « Amor sui tripliciter potest se habere ad charitatem ; uno enim modo contrariatur charitati, secundum quod aliquis in amore proprii boni finem constituit ; alio modo in charitate includitur, secundum quod homo se propter Deum et in Deo diligit : tertio modo à charitate quidem distinguitur, sed charitati non contrariatur, puta cum aliquis diligit seipsum secundum rationem proprii boni, ita tamen quòd in hoc proprio bono non constituat finem ; sicut etiam ad proximum potest esse aliqua specialis dilectio præter dilectionem charitatis, quæ fundatur in Deo, dum proximus diligitur ratione consanguinitatis, vel alterius conditionis humanæ, quæ tamen referibilis sit ad charitatem. » Ecce apertè amorem aliquem à charitate distinctum, charitati non solum non adversum, sed etiam intrinsecè rectum, cum ad charitatem ex se referatur ; ecce doctrinam quam D. Augustinus, dom. Bossuetius, doctores Lovanienses et Duaceni citatis locis evulgarunt ; quinimò eandem doctrinam admittere coactus est ipse cardinalis Noallius : *agnosco, inquit in responsione ad quatuor epistolas archiepiscopi Cameracensis, amorem quemdam esse naturalem, qui sit medius inter vitiosam cupiditatem et charitatem.*

5^o falsa hæc et perniciosa consecraria. Commemoratum videlicet principium suggerit et quidem necessariè gratiam Adamo innocentis impertitam ipsi fuisse debitam et connaturalem. et ideò ipsam non fuisse propriè gratiam, ipsam merita merè humana sive naturalia produxisse, adeoque vitæ æternæ retributionem insonti Adæ fuisse debitam, et impossibilem esse statum non solum naturæ puræ, sed etiam integræ... Fidem esse *primam gratiam*, cum omnis gratiæ motus sit charitas cui præire debet fides, sive supernaturalis objecti notitia, et ideò *extra Ecclesiam non concedi gratiam*, et cuncta infidelium opera esse peccata... Omnia justorum etiam opera sine charitate actuali-elici-vere esse peccata, ut et actus timoris gehennæ, fidei, spei, etc... *Soli charitati Deum loqui, solum charitatem à Deo remunerari*, unicam esse virtutem, scilicet charitatem, et ideò nullum naturalem Dei ut auctoris naturæ amorem dari, nullum actum merè moraliter bonum, nullum bonum opus sine charitate actuali.... *Liberum arbitrium sine Dei adiutorio non nisi ad peccandum valere*.... Unumquemque teneri omnes actiones suas deliberatas ad Deum referre ex motivo charitatis etiam actu et explicitè, si qui

dem quælibet gratia est charitas, aut inspiratio charitatis actualis, et ideò quælibet actio ex gratiâ elici-vere actualem spirat charitatem. Hæc equidem omnia, aut saltem ferè omnia corollaria agnoscunt adversarii, sed agnoscendo quàm nefarium sit et perniciosum principium suum de impossibilitate amoris medii cupiditatem inter et charitatem liquidò ostendunt ; ergo.

Objiciunt 1^o Protestantes, aut potius eorum antesignani. Sacri codices ipsa opera, quæ in insontibus extollunt, in sontibus ut delicta exhibent, Proverbiorum cap. 15, v. 8, *Isaia* cap. 4, v. 15, etc. ; ergo. — Resp. : Dist. ant. : Ob pravum finem et affectum sontium, conc. Ob ipsa opera à sontibus præcisè facta ex bono etiam animo et recto fine, neg. ant. et conseq. Ex ipso contextu liquet ibi sermonem esse de Judæis qui sacrificia offerendo cor habebant à Deo prorsus alienum, et existimabant sibi ipsa crimina licere modò cæremonias legales observarent.

Objiciunt 2^o fidem. Matthæi cap. 7 : *Non potest arbor mala (qualis est peccator) bonos fructus facere* ; ergo. — Resp. : Dist. ant. : Peccator, qui est arbor mala, quando agit ut peccator, sive ex malitiâ et malâ voluntate, non potest bonos fructus facere, conc. Si non agit ut peccator, sive ex malâ intentione, nego ant. et conseq. Ita ferè D. Augustinus libro 4 contra Julianum cap. 3, n. 22. Peccator scilicet non agit semper ut peccator, cum agere possit ex amore justitiæ naturalis. Addi potest ad mentem D. Augustini loco citato, peccatorem non benè, id est non meritoriè agere.

Objiciunt 3^o iidem sectarii. Joannis cap. 9, dicitur : *Deus peccatores non audit* ; ergo. — Respondet D. Augustinus Tractatu 44 in Joannem, n. 13, *non Christum, sed cæcum natum adhuc inunctum* (id est nondum plenè illuminatum) hæc protulisse ; si enim, addit, *Deus peccatores non exaudiret, Publicanus dicendo* (Lucæ 18) : *Deus propitius esto mihi peccatori, non meruisset justificationem*. Nihilominus respondeo : Dist. ant. : Deus peccatores non audit cum à Deo miracula postulant quibus suam innocentiam aut doctrinam comprobent (de his enim ibidem loquitur cæcus), conc. Cum alia postulant, subdist. : Ex pravâ intentione, esto ; secus, nego ant. et conseq. Certum scilicet est sontes et in temporalibus et in spiritualibus interdum à Deo exaudiri, et insuper Deum aliquando ipsis perversè etiam orantibus ex irâ sive vindictâ concedere quæ ex misericordiâ negaret, ut observat D. Augustinus.

Obijciunt 4^o conjunctis animis Protestantes et Bati ac Yprensis sectatores. Augustinus Enchiridion cap. 117, n. 31 ait : *Regnat carnalis cupiditas ubi non est Dei charitas*. Similia habet lib. 9 de Trinitate cap. 7 et 8, n. 15. Concidunt SS. Leo sermone 3 de jejunio septimi mensis versus finem, et Gregorius Magnus lib. 18 Moralium in fine capitis 19, etc., et alii, etc.; ergo. — Resp. 1^o Yprensem ipsum aliquod agnoscere medium inter vitiosam cupiditatem, et charitatem perfectam quæ justificat, initialem scilicet sive remissam charitatem; ergo ipsi etiam exponendi sunt illi textus, cum imprimis per charitatem Augustinus et alii non raro intelligant charitatem saltem *appretiative* summam quæ justificat. — Resp. 2^o : Dist. ant. Regnat carnalis cupiditas quoad *habitu* et ratione *subjecti* ubi non est charitas (cum homo sit justus vel non justus), conc. Regnat *quoad actum*, iterum distingo : Ordinariè (cum homo ex habitu dominante ut plurimum operetur) conc. *Absolutè et semper*, rursus distingo : Regnat cupiditas ubi non est charitas latè accepta pro aliquâ bonâ voluntate, pro aliquo recti et honesti amore, conc. Propriè sumpta, sive theologica, quæ respicit Deum propter se super omnia amatum, nego ant. et conseq. Hæc unice intendit Augustinus (ut et adducti Patres) quoties dicit *esse cupiditatem vitiosam ubi non est Dei amor*, aut quidquid non fit ex charitate peccatum esse, aut quidquid fit ab homine fieri ex charitate, vel cupiditate; rejectâ enim hæc expositione, Augustinus nec secum nec cum Ecclesiæ definitionibus, quibus obloqui nefas duxisset, unquam conciliari poterit.

Verum, instat Jansenius, et ejus discipuli : Augustinus libro de Gratiâ Christi, cap. 21, n. 22 ait : *Quasi verò aliud sit bona voluntas quam charitas !* et lib. 2 ad Bonifacium cap. 9, n. 21 : *Quid enim est boni cupiditas nisi charitas ?* Sed hinc elucet gratiam nihil aliud esse quam ipsam charitatem, aut charitatis inspirationem, et nihil omnino boni fieri posse absque charitate; ergo. — Resp. : Dist. maj. Boni cupiditas est charitas latè sumpta, sive pro quolibet recti ac honesti desiderio accepta, conc. *Strictè accepta*, id est pro amore Dei propter se, nego maj., et contra distinctâ minore, nego conseq. Yprensis defensores in iis testimoniis præsidium quærunt quibus debellantur. Evidens enim est quamlibet bonam voluntatem, sive quemlibet pium et ordinatum voluntatis motum, non posse esse Dei amorem propter se, cum amor Dei propter se per seipsum justificet, non amor

ab illo diversus, et uterque amor motivum habeat specie diversum.

Neque dicas Augustinum citatis in operibus loqui de charitate de quâ D. Joannes 1 Epist. cap. 4, siquidem illum laudat; hoc quippè oraculum unice adducit ut probet adversus Pelagianos quemlibet pium voluntatis actum ex *Deo esse*, sive ex *gratiâ*, et illos charitatis actus locum parare charitati perfectæ, quam veluti seta filum introducunt, ut alibi loquitur.

PRINCIPIA SOLUTIONUM. — Primum. Unâ et eadem assertione systema Protestantium, et Baianistarum hic eliminavimus, licet illi loquantur de habituali, isti de actuali charitate, quia Baianistæ ultimò tandem fateri debent suo in systemate sontium actus non extrinsecè tantum, sive defectu relationis in Deum, sed et intrinsecè à conscientie reatu, sive habituali aversione à Deo, vitiari, ut in fine probationis ex Scripturis ostendimus.

Secundum. Tres saltem sunt amores à laudabili charitate, et vitiosâ cupiditate essentiâ distincti; scilicet indeliberatus boni universim ac propriæ felicitatis amor.... Ordinata ac deliberata cum Dei ut auctoris naturæ, tum sui et proximi dilectio..... Amor supernaturalis spei theologicæ, quo Deus amatur ut auctor et objectum nostræ beatitudinis. Ergo, quidquid non fit ex charitate propriè dictâ, non fit ex vitiosâ cupiditate; ergo datur amor medius inter carnalem cupiditatem, et laudabilem charitatem.

Tertium. Non expendimus utrum omnis actus voluntatis oriatur ab amore, ut censuisse videntur SS. Augustinus et Thomas, sed contendimus quosdam esse voluntatis actus, qui non oriuntur ab amore vitioso cupiditatis, aut laudabili strictè dictæ charitatis dilectione.

Quartum. Actus ut et habitus inter se essentialiter distinguuntur præcipuè per objecta, motiva, et effectus; ergo actus fidei, spei realiter distinguuntur ab actu veræ charitatis.

Quintum. Yprensis systema de verâ charitate tenui et debili, quæ omnes virtutes tum theologicas cum cardinales gignit, quâ homo nondum diligit Deum *super omnia*, est systema quod 1^o implicare videtur; si enim Deus diligitur propter se, quomodo super omnia non diligi potest ?.... quod 2^o D. Thomas in Augustino non deprehendit, cum dixerit : *Minima charitas plus diligit Deum quam millia auræ et argenti.....* quod 3^o doctissimus Bossuetius antea laudatus *falsissimum esse* judicavit.

Sextum. De sincerâ mente D. Augustini circa præsentem quæstionem judicandum est per

Citatum sermonem 549, cum in eo ex professo expendat *quid sit charitas*, et D. Thomæ per laudata verba ex 2-2, q. 17, a. 8, et q. 19, a. 6, propter eandem rationem. Obscura aliunde utriusque testimonia per clariora indubiè exponenda sunt.

Septimum. Amor qui hæret in creaturâ vitiosus est cum in ipsâ hæret *positivè et exclusivè*, ita nempe ut omnem relationem in Deum, etiam implicitam, excludat, sive, ut loquitur D. Thomas, *cum hæret in creaturâ tanquam fine ultimo*; non vitiosus cum hæret in creaturâ *præcisivè tantum*, ita scilicet ut præscindat à relatione explicatâ ad Deum, non implicitâ, sive, ut ait D. Thomas, *cum hæret in creaturâ sic ut in eâ finem ultimum non constituat*. Pariter amor qui hæret in Deo per formalem et explicitam relationem ad Deum propter se dilectum, est vera charitas, et ideò perfectus amor; amor verò qui hæret in Deo propter implicitam relationem ad Deum, quatenus nempe ordinatur ad finem rectum et honestum, qui *proximè tantum* intenditur, est charitas latè sumpta, et ideò imperfectus amor; quod expressit D. Thomas dicendo esse *amorem à charitate distinctum qui non contrariatur charitati*. His observationibus in fumos abijt famosum adversariorum dilemma. *Omnis amor vel hæret in creaturâ, vel in Deo, si primum, vitiosa est cupiditas; si alterum, vera est charitas*.

Octavum. Peccator non semper agit ex dominante cupiditate sicut justus non semper agit ex dominante justitiâ; unde falsum istud effatum: *Regnat carnalis cupiditas ubi non est charitas*, si de actu sermo sit; quoad habitum enim si homo est injustus, in eo est habitualis cupiditas; si justus, habitualis charitas.

Ultimum. Distinctione *quoad habitum*, et *quoad actum*, et charitatis *strictè et latè sumptæ*, in Augustino etiam fundatissimâ, tota corrui immensa testimoniorum Augustini moles ab Yprensi coacervata.

ARTICULUS QUARTUS.

An sine gratiâ actuali possit homo aliquod opus moraliter bonum perficere?

Sensus questionis est, ut ex dictis præcedenti articulo satis elucescit, utrum absque Christi gratiâ produci possit opus bonum naturalis ordinis, non solum ratione *objecti*, sive *officii* (quod nemo inficiatur), sed etiam ratione omnium circumstantiarum, finis præsertim, sive utrum homo lapsus absque Christi gratiâ possit elicere aliquam actionem ex omni parte, sive circumstantiâ, *moraliter bonam*.

ERRONES.— Michael Baius, ut duobus præcedentibus paragraphis per antecessum observavimus propositionibus inter damnatas 23, 28, 29, 55, 57, 58, 62, 65, etc., docuit *fidem theologicam omnium gratiarum primam esse*, et sine illâ et charitate propriè dictâ nihil omninò boni moralis fieri posse, et idecirò *liberum arbitrium sine gratiâ Dei adjutorio*, id est sine charitate strictè dictâ, *non nisi ad peccandum valere*, cum Pelagio sentire qui dicit *liberum arbitrium ad ullum peccatum vitandum valere*, sive qui boni aliquid naturalis, quod ex solis naturæ viribus ortum ducit, agnoscit commentitiâ esse distinctionem amoris in naturalem, quo Deus amatur ut auctor naturæ, et gratuitum, sive supernaturalem, quo Deus diligitur ut beatorum sive auctor gratiæ et beatitudinis supernaturalis.... Item distinctionem operis in moraliter bonum, sive ex objecto et omnibus circumstantiis rectum, et æternæ vitæ meritorium, sive factum à vivo Christi membro per spiritum charitatis, cum opus sine verâ charitate, id est gratiâ, factum moraliter etiam bonum esse nequeat, et ideò verum sit peccatum.

Hæc documenta exultanti animo excepit Yprensis. Ejus testimonium ex libro 3 de Statu naturæ lapsæ, cap. 20, articulo præcedenti, paragrapho 1, retelinus. Hæc rursus habet lib. 4 de Statu naturæ lapsæ, cap. 18: *Quæ si vera sunt, sicut juxta Augustini principia vera esse dubitare non sinimur, perspicuè sequitur, omnem omninò libertatem arbitrii ad bonum morale faciendum ita periisse, ut nullum omninò opus moraliter bonum sine verâ proprièque dictâ gratiâ possit facere*. Hinc lib. 5 de Gratiâ Christi cap. 11, docet *fidem esse primam gratiam*. Ante *fidem*, inquit, Augustinus nullam omninò gratiam, sive efficacem, sive sufficientem ad quidquam bonè operandum in infidelibus novit. Infinitus essem si locos omnes, in quibus hanc doctrinam repetit et inculcat, enumerare vellem.

Eundem errorem mellitis sermonibus renovavit auctor centum et unius propositionum; etenim 1º, docet *fidem esse primam gratiam*; nullæ, inquit propositione 26, dantur gratiæ nisi per *fidem*, et propositione 27, *fides est prima gratia, et fons omnium aliarum*... 2º Tradit quidquid non sit ex fide theologicâ et charitate verâ esse non posse moraliter etiam bonum, et ideò esse necessariè peccatum à propositione 44, ad 58... 3º Assertit sine gratiâ nihil omninò boni elici posse; peccator, inquit propositione 58, *non est liber, nisi ad malum, sine gratiâ liberatoris*; propositione 59, *voluntas, quam gratia*

non prævenit, nihil habet luminis nisi ad aberrandum, ardoris nisi ad se præcipitandum, virium nisi ad se vulnerandum; est capax omnis mali, et incapax ad omne bonum; et propositione 40, sine gratiâ nihil amare possumus, nisi ad nostrum condemnationem.

Hæc documenta, quatenus enuntiant nihil boni, naturalis etiam ordinis, fieri posse sine gratiâ sumptâ pro fide supernaturali et strictè dictâ charitatē, ac illâ fide et charitate destitutos in omnibus et singulis actibus suis necessariò peccare; item opera omnia, quæ justificationem præcedunt, esse necessariò peccata propter conscientiam sive cupiditatis peccatoris reatum, etc.; hæc, inquam, dogmata, quatenus hæc enuntiant duobus præcedentibus paragraphis confutavimus. Postea ostendemus, nimirum in secundo et ultimo libro, fidem non esse primam gratiam, sed necessariò admittendas esse gratias quasdam supernaturales quæ ad fidem disponant et præparent; quod etiam innotescet ex prolixâ dissertatione, quam mox sumus adornaturi adversus quosdam nostræ et Augustinianæ doctrinæ pseudo-censores.

THEOLOGORUM PLACITA. — Modò recensitis dogmatibus tum adversus Protestantes cum adversus Baii et Yprensis sectatores in tuto collocatis theologi anxie quærent, an absque gratiâ à fide et charitate strictè dictâ diversâ) possit homo aliquod bonum opus morale in præsentī statu elicere, saltem facile, et cum nulla gravis superanda occurrit tentatio; vulgò enim consentiunt hominem lapsum non posse huiusmodi opus producere, si arduum fuerit et gravis *saltem* urgeat tentatio (nonnulli enim contendunt nequidem levem tentationem sine eadem gratiâ vinci posse, ut mox dicemus).

Circa celebrem istam quæstionem duæ generatim in scholâ vigent opiniones, quarum nullam pro nostro instituto amplectemur, sive propugnabimus, repressis tamen pro virili parte posterioris sententiæ patronorum in prioris defensores præpostero zelo et inanibus non minus quàm inconsideratis declamationibus.

OPINIO PRIMA. — Non pauci theologi, quos adducit et sequitur celebris Vasquez in 4-2, disput. 190, cap. 2, n. 10 et seq., negant liberum arbitrium solis naturæ viribus opus quod peccatum non sit elicere posse, nisi gratiâ *entitativè* quidem naturali, sed indebitâ tamen, et per Christum collatâ, et ideò extrinsecè supernaturali, præveniatur. Hoc quippe, inquit, vulnus infirmitatis per peccatum homini illatum est, ut absque gratiâ nihil prorsus

boni facere possit. Contendunt autem hanc esse doctrinam D. Augustini et aliorum Patrum qui adversus Pelagium hominem lapsum sine Christi gratiâ nonnisi peccare posse quasi perpetuò asserunt.

Concinnunt plures ex nobilissimâ Augustinianorum præsertim scholâ doctores, quorum nonnullos profert Norisius in Vindiciis cap. 3, paragrapho 4, et cap. 4, paragrapho 5. Hi sunt Gregorius Ariminensis, Basilii Poncius, Franciscus Macedo, doctissimus Gaspardus Casalius episcopus Leirensis qui concilio Tridentino interfuit, et ibi ingens volumen, de quadripartitâ justitiâ legatis sanctæ Sedis consecratum edidit, etc. — Illos equidem contemnere solent nonnulli recentiores zelo, ut putant, Dei, et ejus adversus Baium Ecclesiæ decretorum accensi, et inter infimæ notæ doctores recensere; at quàm immeritò norunt omnes eruditi; Poncius enim, inquit Norisius loco ultimò adducto, inter principes sui seculi theologos à doctis quibuscumque recensetur. Concinit P. Alexander in historiâ 16 seculi, cujus etiam judicio alii theologi commemorati rarâ admodum eruditione conspici fuerunt.

Vasquesii opinionem ex parte saltem amplexus est doctissimus cardinalis Henricus Norisius in Vindiciis cap. 5, paragrapho 4, ubi ex mente D. Augustini asserit: « virtutes, si quæ sunt in infidelibus, non nudæ eorum voluntati, sed divinæ gratiæ esse tribuendas, atque nonnisi per accidens, et ex auxilio gratiæ infideles in primâ bonorum suorum operum productione posse in seipsis non gloriari, quia tanta est hominis fragilitas, ut nisi divinitus adjuvetur illicò ab actu virtutis in vitium proruat. » Suam sententiam

Probant 1^o ex D. Augustino. Scilicet S. doctor epistolâ 157, aliâs 89 ad Hilarium, cap. 2, n. 5 ait: « Liberum arbitrium desertum à divino adjutorio quâlibet scientiâ legis excellat, nullo modo habet justitiæ soliditatem, sed inflationem et exitiosum tumorem. » Rursus sermone 26 de verbis Psalmi 94, aliâs undecimo de verbis Apostoli cap. 7, n. 8, dicit: *Liberum arbitrium sine gratiâ nihil valet*; addunt eundem S. doctorem opera ipsa facillima infidelium, v. g., actus misericordiæ et humanitatis obstetricum ægyptiarum, Rahab meretricis, Assueri, etc., inter Dei dona recensere. Testimonia præcedenti articulo, paragrapho primo retulimus. Citant etiam illud Augustini lib. de Prædestinatione sanctorum cap. 7: *Quidquid antequàm crederet in Christum (Cornelius) bonè*

operatus est, totum Deo dandum est. (Fidem tamen habebat in Deum ut ibidem docet Augustinus et D. Gregorius Magnus homiliâ 19 in Ezechielem; unde istud exemplum non appositè adduceretur pro bonis infidelium operibus.) Sed, inquit, inter bona opera Cornelii erant etiam facillima, v. g., eleemosynæ quas egenis, et subsidia quæ miseris ex affectu misericordiæ impenderat, et tamen Augustinus ea etiam Deo danda esse vult, non ut Creatori tantum, sed etiam ut Redemptori, aliàs Augustini propositio esset intelligenda de concursu naturali Dei respectu operum faciliū, de gratiâ verò respectu arduorum, quod sanè absurdum foret cū generaliter dicat, *totum Deo dandum est*, id est non minus unum quàm alterum. Adducunt quoque eundem Augustinum libro de Hæresibus, hæresi 88, dicentem Pelagianos in eo errasse quòd assererent omnia divina mandata sine gratiâ impleri posse; sed D. Thomas 1-2, q. 109, a. 4, in *argumento sed contra* id intelligit de omnibus mandatis etiam legis naturæ, à quibus Augustinus non exceptit mandata facilia. Idem demum significant hæc quæ S. doctor passim decantat effata: *Homo de suo malus, de Deo bonus; voluntate suâ cadit qui cadit, voluntate Dei stat qui stat*, etc.

Probant 2^o ex canonibus Arausicanis et Milevitanis plerumque excerptis ex D. Augustino, qui ferunt *neminem de suo habere nisi peccatum et mendacium*.

Probant 3^o ex ratione desumptâ ex concessis ab oppositæ opinionis theologis. Fatentur enim, inquit, hominem lapsum ita liberum remansisse, ut tamen ad se et sua aliaque sensibilia jugiter et fortiter inclinetur, ipsumque ut hanc propensionem excutiat speciali Dei auxilio indigere; at inclinatio illa, cū sit perpetua, vincenda est ubi etiam elicienda sunt opera moraliter bona facilia.

Idem theologi, eodem innixi principio, docent nullum omninò præceptum naturale, etiam facillimum, impleri, et nullas tentationes, etiam levissimas, sine gratiâ vinci posse. Etenim, inquit, ipse Bellarminus lib. 5 de gratiâ et libero Arbitrio cap. 7 ait: *Magis consentaneè ad Scripturas et Patres loquuntur qui dicunt nullam tentationem sine Dei auxilio vinci posse*; at, inquit, cur theologi modo Scripturis et Patribus consono loqui detrectarent, cū alio modo, si officio fungi velint, disserere nec possint nec debeant? Deinde, addunt, hæc tradit D. Augustinus libro de perfectione iustitiæ cap. ultimo, n. 44: « Quisquis, in-

quit, negat nos orare debere ne intremus in tentationem, negat autem qui contendit ad non peccandum gratiæ Dei adiutorium non esse necessarium... ore omnium anathematizandum esse non dubito. » Ubi nulla distinctio tentationis gravis et levis. Addunt rectum honestatis motivum non sufficere ut homo lapsus levem etiam vincat tentationem, etsi motivum purè humanum, v. g., vana gloria, ad gravissimam etiam tentationem superandam sufficiat, quia scilicet homo bonum morale obscurè apprehendit et frigide amat, bonum verò sensibile distinctè cognoscit, intensè prosequitur, et pro inveteratâ consuetudine in illud movetur, nisi gratiâ adjuvetur, ut passim observat D. Augustinus. « Cupiditas, inquit libro de Patientiâ, cap. 17, n. 14, mundi initium habet ex arbitrio voluntatis, progressum ex jucunditate voluptatis, firmamentum ex vinculo consuetudinis. » Similia habet lib. 2 de peccatorum meritis et remissione, cap. 17, n. 26.

Isti theologi, quod maximè observandum est, vulgò agnoscunt Deum infidelibus gratias impertiri ad benè operandum necessarias. Frustra autem ab eis quærerent adversarii quid sit illud adiutorium; reponunt enim illud in adversariorum etiam sententiâ explicari non posse (illud quippe admittunt pro operibus arduis, etc.), et D. Augustinum libro de Patientiâ cap. 28, satis habuisse dicere illud auxilium *exhæredatorum* esse proprium.

Neque isti doctores patiuntur sibi objici Norisium, et alios quorum defendunt sententiam, Baio assentire; reponunt enim S. P. Benedictum XIV in Brevi ad magnum Hispanæ Inquisitionis præsidem, dato anno 1748, vetuisse ne doctrina Norisii Baianismi argueretur. Hoc Breve ad hujus tractatûs calcem referemus.

Hæc opinio convincendis et ad Ecclesiæ gremium reducendis Baii et Yprensis sectatoribus magis apta et idonea videtur; quidquid enim egeris, nunquàm ipsis persuadere poteris hominem lapsum solis naturæ viribus opus ex omni parte bonum, vel facillimum, edere posse, cū inprimis D. Augustinus ejusmodi etiam opera gratiæ tribuere videatur, et canones Arausicani liberum arbitrium ex se nonnisi ad peccandum valere videantur docere. Verum, quomodò hæc opinio cum censurâ Baii potest conciliari? Hoc opus, hic labor. Ejus quippe 28 propositio fert « liberum arbitrium sine gratiæ Dei adiutorio nonnisi ad peccandum valere,

et 31 nullam tentationem sine gratiæ adjutorio superari posse. »

Vasquez in 1-2. disp. 490, c. 18, n. 175 et seq., Baii [propositiones circa istud argumentum] proscriptas fuisse, non ut *erroneas et falsas*, sed ut scandalosas et *fidelium offensivas*, utpote quæ intolerandâ acrimoniâ et superbiâ opinionem adversam pelagiani erroris notâ inurerent, ita ut per censuram non *assertum* sed *assertio* confixa fuerit.

Idem alii vulgò reponunt. At melius fortassis reposuissent commemoratas propositiones ideò fuisse damnatas, quia ad omne opus bonum morale exigebant gratiam à fide theologicâ et charitate strictè dictâ non distinctam, sive hanc fidem et charitatem producentem.

OPINIO SECUNDA. Tradit hominem lapsum non posse quidem omnia opera moralia elicere, et ideò omnia legis naturæ præcepta adimplere sine speciali gratiæ auxilio, sed ipsum posse sine illo per solas naturæ vires cum solo generali Dei concursu exercere quædam opera moralia faciliora, cum scilicet non occurrat gravis tentatio aliudve impedimentum ad quod superandum peculiari Dei adjutorio et protectione opus sit.

Hujus sententiæ, quam D. Thomas 1-2, q. 109, a. 2 et seq., aut saltem ejus vulgò expositores, tenuisse videntur, defensores eam probare aggrediuntur et auctoritate et ratione. Auctoritatis argumenta potissimum desumunt ex censurâ Baii propositionum, 28 præsertim, et 31, quas paulò ante retulimus, et aliunde ex testimoniis quibus supra ostendimus omnia infidelium opera non esse peccata. Quod attinet ad rationis momenta ea vulgò reducunt ad ea quæ reperiuntur apud D. Thomam citato loco in c., his verbis : « Quia natura humana per peccatum non est totaliter corrupta, ut scilicet toto bono naturæ privetur, potest... pervirtutem suæ naturæ aliquid bonum particulare agere, sicut ædificare domos, plantare vineas, et alia hujusmodi, non tamen totum bonum sibi conaturale, ita quòd in nullo deficiat, sicut homo infirmus potest per seipsum aliquem motum habere, non tamen perfectè potest moveri motu hominis sani, nisi sanetur auxilio medicinæ. Igitur virtute gratuitâ superadditâ virtuti naturæ (id est gratiâ supernaturali) indiguit homo in statu naturæ integræ (innocentis) quantum ad unum (tantum) scilicet ad operandum et volendum bonum supernaturale; sed in statu naturæ corruptæ quantum ad duo, scilicet ut sanetur, et ulterius ut bonum supernatura-

virtutis operetur, quod est meritorium; ulterius autem in utroque statu indiget homo auxilio divino, ut ab ipso moveatur ad benè agendum » (id est, inquit, concursu Dei Creatoris).

Gregorius de Valentia in hunc D. Thomæ locum hoc addit argumentum : « Quæ, inquit, difficultas, v. g., in salutando amico sine malo fine? in matrimonio contrahendo, aut in vero testimonio ferendo ad proximi utilitatem? aut in aliis similibus operibus facillimis? Sanè in iis auxilium peculiare necessarium non esse Apostolus primâ epist. ad Corinthios cap. 7 significasse videtur cum ait, eum qui matrimonio jungit virginem suam benè facere, qui non jungit secundum propositum voluntatis suæ etiam benè facere; id enim significat utrumque positum esse in hominis facultate sine peculiari auxilio quo ad id benè faciendum indigeat; quod notavit Augustinus libro de perfectione justitiæ sub finem (cap. 19, n. 41), ubi Cælestio objicienti citatum Apostoli locum contra gratiæ necessitatem respondet : *Videte, obsecro, quale sit, ideò volenti et currenti misericordiam Dei non esse necessariam, quæ etiam eum prævenit, ut curreret, quia de quodam ait Apostolus : quod vult faciat (1 Cor. 7, v. 36.)... non peccat si nubat; quasi pro magno habendum sit velle nubere, ubi adjutorio divinæ misericordiæ operosius disputatur; hoc enim significat velle nubere, quod Apostolus ait non esse peccatum, non esse tale opus, qualia sunt ea quæ requirunt Dei misericordiam et gratiam.* »

Verùm opinionis adversæ theologi reponent, Augustinum ibidem addere, *voluntarium bonum non esse aliter bonum nisi cum Deus operatur in nobis velle*, et aliunde S. doctorem noluisse hoc Apostoli oraculum ibi discutere, quod satis indicat ejus loquendi modus, *quasi pro magno*, etc., cum inprimis in eo sermo non esset de præcepti executione. Isti theologi suâ de hominis potestate aliquid opus morale naturalis ordinis absque gratiâ exequendi propositioni sententiâ anxie quærunt quodnam sit illud opus.

Ac primò quidem cum D. Thomâ citato loco articulo 3 expendunt an homo lapsus absque gratiâ possit Deum diligere *affectivè et appetitivè*; sive *per omnia* amore non supernaturali (quem sine gratiâ elici non posse docet fides), sed naturali, sive quatenus Deus est auctor naturæ. Alii affirmant cum Scoto, Durando, Cajetano, etc., suis in Magistrum Sententiarum et D. Thomam commentariis; alii negant cum D. Thomâ loco indicato in c., ejus sententiam

omnes ferè ejus expositores defendunt. Nonnulli tamen, ut Estius in cap. 1 ad Romanos, et Tornelius, etc., existimant hominem sine gratiâ posse diligere Deum ut auctorem naturæ amore *inchoato et imperfecto*, sive qui nondùm est *super omnia*. Hanc opinionem explodit Bellarminus lib. 6 de Gratiâ et libero Arbitrio cap. 7 : « Non potest, inquit, Deus sine opè ipsius diligi neque ut auctor naturæ, neque ut largitor gratiæ et gloriæ, neque perfectè, neque imperfectè ullo modo; atque hanc non dubitamus sententiâ esse S. Augustini, inò etiam Scripturarum et conciliorum, quidquid aliqui minùs consideratè in hac parte dixerint. »

Primæ opinionis defensores his præcipuè nituntur momentis. Homo naturali lumine nescit Deum esse summè amandum; cur cum naturæ viribus summè diligere non posset? Reponunt alii hominem per peccatum graviùs vulneratum fuisse in voluntate, quàm in intellectu; unde istud : *video meliora probòque*, etc... Item homo potest amicos, aut patriam super omnia diligere, cum plures pro illis mortem obierint, quidni et naturaliter Deum super omnia diligere? Respondent alii hominem per peccatum à Deo aversum fuisse, et ad creaturam conversum, et ideò faciliùs posse creaturam super omnia diligere quàm Deum.... Item *natura* dicente D. Thomâ loco citato (in responsione ad primum) *diligit Deum super omnia prout est principium et finis boni naturalis*; ergo natura sibi sufficit ad Deum amandum super omnia. At alii observant hoc D. Thomæ dictum intelligendum esse de naturâ sanâ et integrâ, non de corruptâ, aliàs non cohereret cum citato articuli tertii corpore.... Item naturalia hominis post peccatum intemèrata remanserunt; cur ergo Deum naturæ viribus appretiatiùs diligere non posset homo? Verùm reponunt alii naturalia post peccatum integra mansisse ratione facultatis naturalis, non ratione virium, juxta concilium Trid. sess. 6, cap. 1... Tandem homo naturaliter potest Deum super omnia diligere, amore spei, sive concupiscentiæ, cum talis amor ex amore sui erumpat; ergo. — Respondent alii amorem concupiscentiæ effluere ex amore sui recto et perfectè ordinato, quæ ordinatio gratiâ producitur, sive restituitur; addunt isti has argutias dialecticos decere, non theologos, quos præcipuè movere debet doctrina in Scripturis et traditione contenta.

Secundò exquirunt an homo lapsus absque gratiâ adimplere possit præcepta naturalia non *quoad modum*, id est quatenus ordinantur ad æternam vitam (fides enim docet ea sub hoc respectu sine Christi adjutorio impleri non posse), sed *quoad substantiam*, id est quoad se et ratione honestatis naturalis sive moralis. Circa hanc quæstionem gravis inter eos dissensio; alii enim, ut Dominicus Soto, Grandinus, etc., censent hominem lapsum posse *potentiâ physicâ*, id est ejus virtus activa operi exequendo ex se sufficiens est, cuncta legis naturalis præcepta tum distributiùs cum collectiùs adimplere, posse verò potentiâ morali, id est non solùm operi exequendo sufficiente, sed etiam à cunctis difficultatibus, saltem gravibus, immuni, omnia *distributiùs*, si gravis absit tentatio, sed *non collectiùs* servare.... Alii, ut Bellarminus, etc., opinantur hominem lapsum non posse potentiâ physicâ aut morali omnia legis naturalis præcepta sine gratiâ adimplere, posse tamen, si omnis absit tentatio, quædam facilia solis naturæ viribus observare.... Alii; ut Gregorius Ariminensis, Norisius, etc., contendunt, ut diximus, nullum omninò bonum opus morale sine gratiâ elici posse, nec ideò ullum præceptum servari. Quid de istis opinionibus sit sentiendum ex dictis jam liquet, et ex dicendis magis adhuc liquebit. Porrò auxilium quod exigunt primæ opinionis defensores, ut tota lex naturæ servetur *quoad modum*, id est utiliter ad salutem, est auxilium actuale supernaturale tum *quoad modum*, sive principium, id est ex parte Dei qui illud non debet, tum quoad *entitatem*, sive supernaturalem operis bonitatem, quia adversus Pelagianos definitum est nullum prorsus opus in ordine ad vitam æternam sine gratiâ elici posse; auxilium verò quod requirunt ut tota lex naturæ servetur quoad *substantiam* duntaxat, id est quoad naturalem operis bonitatem, ipsis dicentibus est auxilium supernaturale *quoad modum*, sive ratione principii, id est Dei qui illud homini non debet, sed naturale quoad substantiam, sive ratione objecti, quia hominem ordinat ad finem duntaxat naturalem; quâ ex parte videntur assentire Vasquesio qui ad omnia opera moraliter bona exigit adjutorium Dei peculiare naturalis ordinis, indebitum tamen naturæ lapsæ, quod nonnisi ex Christi meritis impertitur; at ultimæ sententiæ patroni satis habent, ut diximus, cum Augustino repcnerè gratiam ad opus moraliter bonum necessariam esse gratiam *exhæredato-*

rum, sive non Dei filiorum, propriam, cuius-que naturæ sit.

Tertiò quærent an homo lapsus ex motivo naturalis honestatis tentationes sine gratiâ superare possit; super quo in varias iterùm abeunt sententias; nonnulli enim absolutè affirmare non erubuerunt; alii distinguendo inter tentationes graves et leves. Has non illas sine gratiâ vinci posse dixerunt, quia homo per solas naturæ vires bonum aliquod morale naturalis ordinis elicere potest; addunt hanc esse Ecclesiæ sententiam quæ relata in 51 Baii propositionem super istâ questione damnavit.... Alii quibus, ut diximus, persuasum est nullum omninò opus etiam moraliter bonum sine Dei adiutorio, cuiuscumque naturæ sit, in statu naturæ produci posse, contendunt nullas prorsus tentationes sine gratiâ ex recto honestatis motivo debellari posse; quam sententiam ipse Bellarminus amplecti coactus est. Eorum rationes retulimus, et ampliores mox referemus.

His in utramque partem discussis, duo quæ dogma propiùs attingunt, expendemus; primum an gratia necessaria sit ad vitanda omnia omninò peccata; alterum an homo sine gratiâ possit se præparare ad gratiam.

Dissertationem nostram super opinionibus scholasticorum circa potentiam hominis lapsi actus moraliter bonos sine vel cum gratiâ eliciendi prout supra jacet in sacris Neustriæ scholis anno 1775 dictaveramus, cum eodem exeunte anno terribilis in nos exorta est tempestas, quæ nomen nostrum è terrâ viventium penè delevit, et discipulos nostros idem malum incurrendi metu dispersit, et scholam nostram fugere adegit. Singularis illius scenæ hæc fuit causa et occasio. Quidam clericus nostris imbutus prælectionibus interrogatus super commemoratâ quæstione relata Vasquesii et Norisii opinionem catholicam conclamavit; tum interrogator zelo *sanæ doctrinæ*, ut existimabat, vindicandæ adactus, quemdam concinnavit codicillum in quo conquestus est 1º, quòd in Vasquesii et Norisii opinionem propenderimus; ipsius enim iudicio erronea et Baiana reputari debet; ... 2º, quòd doctores eidem opinioni addictos impensè extulerimus, etsi nonnulli, qualis, v. g., Gregorius Ariminensis, his præconiis indigni forent, dùm de præclaris theologorum pro adversâ sententiâ decertantium dotibus omninò siluimus; 3º, quòd consuetum priorum doctorum responsum, sive, ut ipsi placet, effugium quo

Baii assertiones plerùmque ob censuræ acrimoniam damnatas esse prætendunt, non improbaverimus;.... 4º, quòd damnatas ejusdem Baii propositiones super istâ quæstione de gratiâ fidei theologicæ et charitatis propriè dictæ, aut saltem has virtutes importante, intelligi posse dixerimus;.... 5º demùm, quòd in Vasquesii, sive potiùs Norisii, sententiam propendendo à communiori et omninò certâ doctorum sententiâ recesserimus.

Cùm hæc publico rumore, et rapidè effluentis commemorati censoris codicilli lectionis auditione (illius enim copiam anxii precibus incassum ambivi), in meam devenissent notitiam, consilium primitus iniviram S. P. Benedicti XIV Breve tum anni 1745 cùm anni 1748 in gratiam religionis Augustinianæ, et doctissimi cardinalis Norisii fideliter exscriptum ad clarissimum denuntiatorem mittendi; recogitavram enim insignia illa rescripta, quæ præsentem controversiam omninò dirimunt, ex illius memoriâ indubiè excidisse. Spes aliunde affulgebat attentâ illarum declarationum lectione illicò sedandos esse clamores, quibus nos obruebat. At omnibus ritè perpensis existimavi viri theologi officii et muneris esse sibi impactam malè aut suspectè in fidei negotio sentiendi gravissimam accusationem amplissimo modo detergere et diluere; cùm inprimis jubeat Spiritus sanctus ut quilibet ^{pro} boni nominis studio et amore tangatur, et D. Hieronymus doctorem erroris fidei adversi insinuatam quietum ac patientem esse non sinat. Nihilo tamen minùs ut adversarios venerandæ auctoritatis suffragio ad saniorum mentem efficacius reducerem, dissertationem, de quâ lis est, accuratè exscriptam misi ad dominum sacri Ordinis Parisiensis syndicum ipsum enixè rogans ut quid de eâ sentiret sacra Facultas me certum facere dignaretur. Vir eruditissimus eâ lectâ cum censoriis Aristarchi nostri observationibus, miratus est quòd vir theologus tam falsam et præposteram denuntiationem intentasset, eamque sacri Ordinis attentione et disquisitione indignam judicans, illam quibusdam tantùm doctoribus commisit, quorum responsa cum domini syndici epistolâ postea referemus.

Cæterùm, suavi gaudio perfundor, dùm recogito hæc in disceptatione virum eximium et nos Ecclesiæ catholicæ decreta adversus Baium et ejus defensores mutuo cordis affectu colere et venerari, totamque inter nos litem et dissensionem circa genuinum illorum decretorum sensum versari; sic enim uterque violatæ, quæ

summi pontificis et majoris episcoporum partis in rebus fidei et morum definitionibus et interioribus et exterioribus debetur, obedientiæ insinulari non poterit, et pax Christi, Deo dante, in cordibus nostris permanebit.

Igitur, priusquam duas propositas quaestiones expendo, specialem paragraphum institui in quo quinque adversus nos intentate accusationis capita refellam.

§ 1. *Confutantur diversa dicteria et convicia in Vasquesianam, aut Norisianam super gratiâ ad omne opus bonum morale necessariâ contorta.*

Censoria illa dicta versantur, ut diximus, circa damnationem et falsitatem illius sententiæ, circa pravas dotes nonnullorum ipsius defensorum, circa effugia quibus Ecclesiæ definitiones eludere conantur ejusdem sententiæ patroni, circa perversam Baii propositionum interpretationem, et tandem circa istius sententiæ scholæ sensus oppositionem, quæ totidem sectionibus, ut major dicendis affulgeat splendor, ventilabimus, et in nihilum, Deo dante, redigemus.

SECTIO PRIMA. — Baianismi, patrociniive Baio et ejus asseclis impensi immeritò accusarentur doctores qui præfractè etiam asserunt hominem lapsum sine gratiâ (à charitate propriè dictâ distinctâ) nullum opus moraliter bonum, etiam non arduum, et cum nulla gravis titillat tentatio, posse elicere.

Assertio his universum innititur momentis mox singulatim exponendis. Opinio scilicet illa consona est sacris codicibus, Patrum monumentis, imprimis D. Augustini, conciliorum canonibus, Sedis apostolicæ decretis quæ eam improbare prohibuerunt; theologi insuper catholici, qui etiam pro adversâ decertant sententiâ, hanc opinionem catholicam esse unanimi suffragio profitentur; stabilitur tandem gravibus rationibus ex fidei principiis scaturientibus.

MOMENTUM PRIMUM. — *Ex sacris Litteris.* — Primò quidem commemoratam sententiam sacris in codicibus consignari asseverat pontifex omni laude major, Innocentius I. Enimverò acta Patrum Milevitanorum anni 416 adversus Pelagianos comprobans eos sic compellat: « In omnibus divinis paginis voluntati liberæ non nisi divinum adiutorium legimus esse necendum, eamque nihil posse cœlestibus præsidii destitutum. » Quid censor? Indubiè tangi opus salutis meritorium, ad quod gratiam haud necessariam esse obganniebant Pelagiani! at tum ex

voce, nihil, cum ex Pelagianorum doctrinâ manifestum sit designari et istud opus, et opus moraliter bonum. Pelagiani quippe ut evincerent posse hominem sine gratiâ benè operari, exempla infidelium producebant quos absque illâ pluribus floruisse virtutibus asserebant. *Soletis*, inquit Augustinus lib. 4 contra Julianum cap. 3, n. 14, *negantes dona Dei esse virtutes, hoc uti argumento, quòd eas nonnunquam habeant infideles*. Similia habet n. 16; Pelagiani autem non sentiebant infideles, quatenus infideles, id est quatenus gratiâ sanctificante, sive habituali jus dante ad gloriam, destitutos (quam testibus Norisio Vindic. cap. 3, paragrapho 4, et P. Alexandro in historiâ seculi 5 cum Catholicis admittebant), non sentiebant, inquam, infideles opera gloriæ meritoria posse producere, siquidem ad illa opera gratiam habitualement divinitus infusam, saltem *tanquam conditionem sine quâ non* exigebant; ergo bonitatem tantum moralem in eorum actibus agnoscebant, ideòque Innocentius et Patres Milevitani cum illorum doctrinam improbaverunt, ipsos actus moraliter duntaxat bonos sine gratiâ fieri non posse definierunt. Intendit igitur Innocentius voluntatem cœlesti auxilio spoliata nullum prorsus bonum morale, cujuscumque naturæ sit, operari posse. Quid? hunc sensum vel ipse adversarius cum suis admittere cogitur; velit enim nolit, Innocentii testimonium probat voluntate sine gratiâ nullam tentationem vincere, et nullum opus morale difficile elicere posse, cum id adversus Pelagianos sit definitum. Cum ergo summus pontifex utatur voce, *nihil*, explodit etiam opus morale facile.

Meritò sanè summus pontifex hanc sententiam sacris Tabulis ubique inscriptam asserit. Ipsa enim bona infidelium opera (quæ censor in suo libello pro se incautè adduxit), ex speciali Dei gratiâ facta sunt. Talia opera humanitatis et misericordiæ obstetricum ægyptiarum erga mares Hebræorum, Exodi cap. 4, Rahab meretricis erga exploratores Judæorum, Josue cap. 2, Assueri erga gentem Israeliticam, Esther cap. 16. Hæc scilicet etsimilia gratiæ tribuit D. Augustinus, nimirum lib. de Gratiâ Christi, cap. 24, n. 25, epistolâ 144, aliàs 130; n. 2, lib. 4 contra Julianum, cap. 3, n. 16, et 32, etc. Verba retulimus præcedenti paragrapho primo, his exceptis ultimo numero 32 contentis: « Ex quo colligitur etiam ipsa bona opera, quæ faciunt infideles, non ipsorum esse, sed illius qui benè utitur malis. »

Neque evadere poterit censor reponendo S.

doctorem verba facere de concursu naturali, non speciali, sive gratiâ; præterquàm quòd enim nullatenus constat Pelagianos rejecisse generalem concursum, ut postea ostendemus, certè Augustini verba speciale Christi auxilium apertè designant : « Conversio enim voluntatis per mirabilem et ineffabilem, occultissimam et efficacem potestatem » est interna non intellectus tantum, sed et voluntatis gratia quam nunquàm admiserunt Pelagiani. Pariter, qui legerit caput tertium libri 4 contra Julianum, aut caput vigesimum libri primi ad Bonifacium n. 58, is, nisi ad omne audendum sit projectus, non poterit non agnoscere in Augustini dictis cœlestem gratiam. Et verò gratia, quam ibi prædicat, est gratia quâ Deus *benè utitur malis*, sive peccatis impiorum et infidelium, quâ *rectè vivitur*, quâ *bonum opus elicitur*, quâ *Deus transtulit voluntatem laedendi (Assueri) in voluntatem favendi, etc.* Unde doctissimi Patres Benedictini ad marginem istorum locorum hanc meritò apposuerunt observationem : *Gratiæ vis demonstratur, Deus operatur voluntatem in cordibus hominum, occultissimâ et efficacissimâ potestate convertit voluntatem, etc.*

Tam multis Spiritus sancti oraculis adjungi potest illud Christi (Joannis 15) : *Sine me nihil potestis facere*, quod exponens eximus gratiæ vindex Tractatu 81 in Joannem dixit : *Sivè parium, sivè multum, sine illo fieri non potest, sine quo nihil fieri potest.* Sed audio adversarium clamantem tum ex præcedentibus, cum ex consequentibus elucescere loqui Christum de opere supernaturalis non naturalis ordinis. Ita quidem; sed Augustinus existimavit Christum generali hâc assertionem ipsum etiam moralis ordinis bonum expressisse; sed exemplum palmitis, quo utitur Christus, qui à vite præcisus omninò arescit, et nullum nequidem tenuem et degenerem gignere potest fructum, ostendit hominem gratiæ Christi expertem nullius planè ordinis bonum posse producere; sed si Christus loqueretur tantum de opere salutis meritorio, exinde inferri posset omne bonum morale absque Christi gratiâ elici posse.

Non minoris ponderis esse videtur istud Apostoli pronuntiatum (2 Cor. cap. 5) : *Non sufficientes sumus cogitare aliquid à nobis, quasi ex nobis, sed sufficientia nostra ex Deo est*; si enim nulla cogitatio absque Dei gratiâ potest concipi, à fortiori non potest voluntas sine gratiâ bonum aliquod moraliter bonum operari.

MOMENTUM SECUNDUM. — *Ex Patrum, inprimis D. Augustini, monumentis.* Omnium Patrum

et fidelium sensa super hâc quæstione exhibuit Innocentius 1, cum ad Patres concilii Carthaginensis anni 416 scripsit : *Sancti omnes nihil sine Dei adjutorio se agere posse testantur.* Vox enim, *Sancti*, fideles omnes adumbrat, ut patet ex D. Pauli Epistolis, qui nihil boni, etiam naturalis, absque gratiæ auxilio se, vel alios, peragere posse autumant. Id sanè suggerunt D. Cyprianus cum lib. 2 epist. 2 (apud Bellarminum lib. 5 de Gratiâ et libero Arbitrio cap. 11) dixit : *Dei est omne quod possumus*, et D. Ambrosius lib. 2 in Lucam : *Vides quòd ubique studiis humanis virtus divina cooperatur, ut nemo possit ædificare sine Domino, nemo incipere sine Domino.*

Hanc sententiam totis ulnis in suis adversus Pelagianos elucubrationibus amplexus est D. Augustinus. Opus in immensum cresceret si singula ejus testimonia referre mihi animus foret.

Primò docet liberum arbitrium sine gratiâ in philautiæ peccatum necessariè prolabi. Jam adduximus in expositione Vasquesii et Norisii opinionis peremptorium ejus testimonium epist. 157, aliàs 99 ad Hilarium cap. 2, n. 5. Ibidem cap. 3, n. 16, loquens de gratiâ Christi ait : *Libertas sine gratiâ non est libertas, sed contumacia.* Eat nunc censor, et Norisio, Ripaldæ, et aliis exprobet quòd doceant liberum arbitrium sine Christi gratiâ nonnisi superbere posse.

Secundò inculcare non desinit, liberum arbitrium « sine gratiâ nihil valere, nihil cogitare, nihil recti agere posse, nonnisi ad peccandum valere, nihil sibi esse nisi ducem in præceps, nihil posse nisi mendacium et peccatum, » etc. Etenim omisso testimonio sermonis 26 de verbis Psalmi 94, aliàs de verbis Apostoli, 11, quod referendo opinionem Vasquesii, etc., protulimus, libro de spiritu et litterâ cap. 3, n. 5 legitur : « Neque liberum arbitrium quidquam nisi ad peccandum valet, si lateat veritatis via. » Libro 1 ad Bonifacium cap. 3, n. 7, dicit : « Nec potest homo aliquid velle nisi adjuvetur ab eo qui malum non potest velle, hoc est gratiâ Dei per Jesum Christum; omne enim quod non est ex fide (theologicâ) peccatum est, epist. ad Romanos cap. 14 contrariè ut exponit Norisius Vindic. cap. 3, paragrapho 4, non *privativè*). » Eodem libro cap. ultimo, n. 42 addit : « Nemo illo (libero arbitrio) benè uti potest nisi per gratiam. » Libro 5 ad Bonifacium cap. 8, n. 24, ista inveniuntur : « Liberum arbitrium captivatum

nonnisi ad peccandum valet, ad justitiam verò nisi divinitus liberatum, adjutumque non valet. » Tractatu 5 in Joannis Evangelium ait : « Nemo habet de suo nisi mendacium et peccatum. Si quid autem homo habet veritatis atque justitiæ ab illo fonte est, quem debemus sitire in hac eremo, ut ex eo quasi guttis irrorati... non deficiamus in viâ. » Libro 4 Confessionum cap. 1, n. 1, exclamat : « Quid sum ego mihi sine te, nisi dux in præceps? aut quidsum, cum mihi bene est, nisi fugiens hac tūm aut fruens te cibo, qui non corrumpitur? » Libro 1 Retractionum, cap. 9, n. 4, hæc habet : « Quamvis et in his libris, qui non contra illos omninò (Pelagianos).... sed contra Manichæos conscripti sunt de libero arbitrio, non omni modo de istâ gratiâ reticimus.... diximus enim in secundo libro (cap. 19), non solùm magna, sed etiam minima bona non esse posse nisi ab illo, à quo sunt omnia bona, hoc est, Deo. » Deum sermone 52 in Psalmum 145, cap. 10, n. 10, ait : « Quære quid sit hominis proprium, peccatum invenies; quære quid sit hominis proprium, mendacium invenies; tolle peccatum, et quidquid consideraveris in homine, Dei est; » similia habet sermone 186, alias 10, de verbis Apostoli n. 6 : *nostrum*, inquit, *nihil nisi peccatum*.

Ilæc et similia testimonia exponere solent adversæ opinionis theologi, etiam insigniores, puta Bellarminus lib. 5 de Gratiâ et libero Arbitrio cap. 12, etc., de bono ad salutem perducente, sive æternæ vitæ merito. Verùm hæc solutio tum ex verbis Augustini, tum ex ejus adversus Pelagianos scopo, cum ex constanti ejus doctrinâ, quâ cuncta et singula bona infidelium opera gratiæ adscribit, antea explosa est.

Iidem theologi reponunt Augustinum meritò asserere « liberum arbitrium nonnisi ad peccandum valere, quia magnas vires ad peccandum habet, et ut plurimum reipsâ peccat nisi divinitus adjuvetur; pauca quippe opera quæ facere potest pro nihilo reputantur, cum nihil prosint ad salutem æternam, et obruantur multitudine peccatorum » (ita Bellarminus ibidem). At subtilis illa solutio nihil aliud suggerere videtur, quàm raram artem tot Augustini propositiones *absolutè* exclusivas convertendi in propositiones *absolutè* non exclusivas. Et verò, si sensisset Augustinus liberum arbitrium sine gratiâ opera moraliter bona facilia elicere posse, nonne sagaces Pelagiani, inprimis callidus et versutus Julianus, et ad Augustini effata

sagillanda promptissimi, tam multas ejus assertiones modo prorsus exclusivo enuntiatas irrississent? Nonne ipsi exprobrassent quòd homo lapsus, ipso non repugnante, quædam opera moraliter bona sine gratiæ adjutorio producere posset? Tandem quis non videat et ingenuè fateatur D. Augustinum, si censuisset liberum arbitrium nulla opera, naturalis etiam ordinis, sine cælesti auxilio producere posse, verbis significantioribus et expressioribus uti non potuisse?

Tertiò. Augustini mentem circa istam questionem splendide patefaciunt generalia hæc oracula, quibus illius non secus ac ejus discipulorum, imò et aliorum Patrum opera scintillant : « homo de suo malus, de Deo bonus; voluntate suâ cadit qui cadit, voluntate Dei stat qui stat, per peccatum amissâ rectitudine secutum est non posse rectè agere; per malum velle perdidit homo bonum posse, » etc. liquet nimirum in censoris mente hominem aliquando *de suo* esse bonum, aliquando *sine Dei* voluntate, *sive gratiâ*, stare, *perdidit per peccatum rectitudine non semper secutum esse non posse rectè agere*, hominem per malum velle *in omni circumstantiâ* non perdidisse bonum posse, etc.

Tot et tam insignium testimoniorum inelutabilem vim et robor tribus ejusdem S. doctoris effatis debilitare conantur.

Primum extat lib. de Perfectione justitiæ cap. 2; ad tertiam enim Cœlestii objectionem, n. 3, hæc habet : « Respondeo.... parum esse ad non peccandum voluntatis arbitrium nisi adjuta sanetur gratiâ Dei per Jesum Christum Dominum nostrum. » Similia legere est cap. 10, n. 21. Alterum affert liber primus de Nuptiis et Concupiscentiâ cap. 3, n. 3, his verbis : « Cum dona Dei esse monstrantur (de pudicitia conjugali disserit de quâ Apostolus 1 Corinth. cap. 7, v. 7) à quo petenda sint discitur si non habeantur, et cui sint agendæ gratiæ si habentur, nostrasque voluntates ad hæc expetenda, sumenda, et retinenda parum valere nisi divinitus adjuventur. » Ultimùm his terminis exhibet aureus liber de Correctione et Gratiâ cap. 11, n. 51 : « Nec ipsum (Adam insontem) Deus esse voluit sine suâ gratiâ quam reliquit in ejus arbitrio (erat enim adjutorium sine quo non ejus efficacia pendebat à libero arbitrio), quoniam liberum arbitrium ad malum sufficit, ad bonum autem parum est, nisi adjuventur ab omnipotente Bono. »

Ex his sic arguunt : « Si parum valet ad bonum, aut non peccandum, liberum arbitrium

(hominis lapsi); ergo saltem tantillum aliquid valet, seu illud bonum naturalis ordinis, quod facillimum est, sine speciali gratiæ auxilio operari potest. » — Verùm qui hæc seriò, et non jocosè proponunt, irrideri volunt. Scilicet Augustinus his omnibus in locis per *parum* manifestè intellexit *nilil*, vel *non*, quod quidem evincitur tum ex auctoritate doctissimorum Augustini editorum, cum ex S. doctoris contextu, sive, quam tractat, quæstione, ac demùm ex intimo sensu ipsorum insignium theologorum qui gratiam ad opera moraliter bona facilia non exigunt.

Etenim eruditissimi P. P. Benedictini Congregationis D. Mauri, quos novissimis hisce temporibus suscitavit Deus ad pretiosa immortalium Ecclesiæ doctorum monumenta pristino suo nitore ac puritati restituenda, isti capituli undecimi libri de Correctione et Gratiâ efflato, *liberum arbitrium ad bonum parum est, nisi adjuvetur ab omnipotente Bono*, hanc affixerunt notam: *Lovaniensis editio (fert) nihil est; editi alii et manuscripti parum est, eodem sensu, ut liquet ex libro de perfectione justitiæ cap. 10, n. 21; ergo parum est eodem sensu intelligendum est ac nihil est.* Etverò D. Augustinus apprime versatus in lectione veterum scriptorum profanorum (ut patet ex opere de Doctrinâ christianâ, et ex libris de Civitate Dei; *nemo aliunde*, si Cano fides lib. 10 de Locis cap. 5, *ipso unquam doctior fuit*), et edoctus eos nonnunquam per *parum* significasse *nilil*, vel *non*, hanc vocem hæc in quæstione hoc sensu accipere voluit, ne vocem, *nilil*, aut *non*, quam in ejusdem quæstionis discussione centies usurpaverat, semper repeteret. Id sanè demonstrat Augustini contextus, sive (ut schola loquitur) *subjecta materia* Augustini testimoniorum.

Etverò, libro de perfectione justitiæ cap. 10, n. 21, ait: *Quæ charitas* (de quâ Apostolus Epist. ad Rom. cap. 5, v. 5, et Joannes 1 epist. cap. 4, v. 18) *ut habeatur parum est nostræ voluntatis arbitrium, nisi adjuvet gratia Dei per Jesum Christum Dominum nostrum.* Quis, nisi pelagianâ vertigine dementatus, dixerit liberum arbitrium tantillum valere ad habendam charitatem, quam ideò sine speciali gratiæ actualis auxilio aliquando obtinere potest? Sensus igitur est: *Quæ charitas ut habeatur, nilil, aut non valet liberum arbitrium nisi gratiæ cooperando, sive nisi adjuvet gratia Dei.* Eodem libro cap. 2, cum dicit, *parum esse ad non peccandum voluntatis arbitrium, nisi adjuta sane-*

tur gratiâ Dei per Jesum Christum, loquitur de peccato generatim et non speciatim accepto, quod evincunt tum libri titulus, in quo aiunt celeberrimi editores: *Cælestius... perperam definit posse hominem hic sine peccato esse, cum tertia Cælestii objectio, quam hic liquescere facit Augustinus, quæ sic concipitur: potest homo sine eo esse quod vitari potest, et ideò sine peccato.* Unde in objecto textu illud *ad non peccandum* non significat *ad peccatum aliquod vitandum, sed ad vivendum sine peccato*; at nemo rursus, nisi ejus mens cælestianâ fuligine nigrescat, dixerit liberum arbitrium in præsentis statu tantillum vel aliquid valere ad vivendum sine peccato; parum igitur eò loci indicat, non vel *nilil* prodesse ad vivendum sine omni peccato liberum arbitrium nisi adjutum sanetur gratiâ Dei.

Aliud non intèndit S. doctor lib. 1 de Nuptiis et Concupiscentiâ, cap. 3; ibi enim verba facit de pudicitia conjugali, de quâ Apostolus 1 ad Corinth. cap. 7, v. 7, *quæ est Dei donum.* Deinde addit: *Ad Dei dona expetenda, sumenda, retinenda*, (notandæ sunt istæ voces) *nostræ voluntates parum valent nisi divinitus adjuventur.* Sed quis denuò Catholicus dixerit, *ad petenda, sumenda, et retinenda Dei dona liberum arbitrium sine gratiæ adjutorio aliquid valere?* Iterum igitur *parum* idem est ac *non* vel *nilil*.

Demùm, vox *parum* alium non habet sensum libro de Correctione et Gratiâ cap. undecimo. (Interim lectorem monitum velim industrius et sagaces adversæ partis theologos, ad probandum liberum arbitrium per peccatum attenuatum et inclinatum posse sine gratiâ aliquod opus moraliter bonum elicere, hic adducere exemplum sani et integri insontis Adæ liberi arbitrii.) Etenim hoc in capite loquitur Augustinus de auxilio ad perseverandum in justitiâ Adæ concesso; unde ad marginem posuerunt eruditi patres Benedictini: *Primus homo gratiam sibi ad perseverandum necessariam accepit, sed in ejus relictam arbitrio*; item in ipso capite undecimo n. 31 ait S. doctor: *Tale erat adjutorium (Adæ datum) quod desereret cum vellet, et in quo permaneret si vellet, et antea: Deseruit, et desertus est.* Sed tale adjutorium Adæ absolutè fuit necessarium, ejusque voluntas sine illo nullam prorsus habuit in bono perseverandi potentiam; ait enim S. doctor initio numeri 31 ibidem: « *Habuit gratiam (primus homo) in quâ si permanere vellet nunquam malus esset, et sine quâ etiam cum libero arbitrio bonus esse non posset, sed eam*

tamen per liberum arbitrium deserere posset ; » et numero 52 ibidem : « Natura Angeli et hominis, cum primum facti sunt, non talis facta est ut sine divino adiutorio posset manere si vellet. » Quod alibi illustrat exemplo oculi, qui licet perfectissimè sanus, si non sit candore lucis adjutus, rectè non potest cernere. « Sicut, inquit, oculus, etsi perfectissimè sanus, nisi candore lucis adjutus non potest cernere, ita homo perfectissimè justificatus, nisi divinà gratiâ adjuvetur, rectè non potest vivere. » Liberum ergo Adæ arbitrium sine Dei adiutorio nihil valebat ad perseverandum in bono ; ergo vox *parum* ibi idem designat ac *nihil* vel *non*.

Id tandem suggerunt ipsi insignes theologi qui gratiam ad opera moralia facilia non exigunt. Talis Bellarminus lib. 5 de Gratiâ et libero Arbitrio, cap. 9, ubi omnia D. Augustini testimonia ad suam opinionem comprobendam summo studio et curâ quæsivit, et protulit, et tamen ne unum quidem verbum fecit de tribus mox relatis. Hinc cardinalis Norisius, et alii eruditi, qui gratiam ad eadem opera requirunt, eadem testimonia sibi non objecerunt, quia dubio procul nullam offerebant difficultatem.

Felicius rem suam non promovent boni moralis facillimi sine gratiâ perpetrandi assertores dum famosum sermonem 349, quo Augustinus charitatem partitur in divinam et humanam, sibi favere obtendunt. Hoc (fateor) testimonio optimè refellitur hæretica et insula Baii et ejus defensorum doctrina de duplici tantum amore creature rationalis, qui sit vitiosa cupiditas, et charitas strictè dicta, quasi nullus esset amor medius inter utrumque. Verum non videmus quomodo inde possit inferri censuisse Augustinum posse hominem sine gratiâ aliquod bonum opus facile naturalis ordinis producere ; proferendum enim esset aliquod testimonium quo S. doctor assereret posse hominem sine cœlesti adiutorio ut oportet, v. g., parentes honorare, Deum colere, eleemosynam impertiri, aliaque præcepta moralia observare, quod certè à nemine peragi posse confidimus.

MOMENTUM TERTIUM. — *Ex conciliis adversus Pelagianos et Semipelagianos habitis.* — Ex synodis adversus Pelagianos et Semipelagianos habitis solam adducemus Arausicanam secundam, convocatam, ut vulgò creditur, anno 529, cujus 25 canones ex S. Augustini sententiis maximâ ex parte conflati à Bonifacio II, et Ecclesiâ catholicâ summo plausu recepti sunt, et

ideirò eum habent sensum quem ipsis affixit S. doctor.

Canone 9, aiunt Patres : « Divini muneris est cum pedes nostros ab injustitiâ detineamus... » Canone 20 : « Multa Deus facit in homine bona quæ non facit homo ; nulla verò facit homo bona quæ non Deus præstet ut faciat homo. » Hanc definitionem præformaverat D. Aug. lib. 2 ad Bonifacium cap. 9, n. 21. « Quapropter, inquit, multa Deus facit in homine bona, quæ non facit homo ; nulla verò facit homo quæ non facit Deus ut faciat homo.

Scio quidem hunc canonem primariò significare totum bonum opus divinæ gratiæ tribuendum esse, id est, initium, et progressum, et perseverantiam ; Semipelagiani scilicet, quos percellit, initium et perseverantiam in bono opere gratiæ annectere detrectabant ; sed simul scio patres Arausicanos præter hoc totum intendisse quod D. Augustinus intendit citato lib. 2 ad Bonifacium cap. 9, siquidem ejus verba exscriperunt. At S. doctor hic adversus Pelagianos intendit non solum opera ad salutem conducentia, sed etiam non ardua, gratiæ esse tribuenda, ut antea fusè probavimus.

Idem Patres humani arbitrii adversus gratiam tumorem compescuerunt et confregerunt canone 22 his verbis : *Nemo habet de suo nisi mendacium et peccatum.* Hic canon desumptus est ex citato Tractatu 5 D. Augustini in Joannem et ex ipsius verbis concinnatus. Verba autem de suo idem apud S. doctorem significabant ac ista, *sibi derelictus, ex proprio fundo, ex propriis viribus* ; id quippe apud ipsum passim connotant, v. g., in isto ejus effato, *homo de suo malus, de Deo bonus*, ideòque sensus canonis est : *Homo solis naturæ viribus instructus non nisi peccare potest, et ideò si gloriari voluerit, non in se, sed in Domino gloriari debet.*

Hæc Ecclesiæ definitio censoris auctores extremis constrinxit et implicuit angustiis. Eorum Coryphæus doctissimus Bellarminus, qui suam hic opinionem timidè et dubitanter defendit, se hære in salebrâ dissimulare non potuit. Libro 5 de Gratiâ et libero Arbitrio cap. 11, versùs finem, duas proponit responsiones. Prima fert decretum concilii conditionatè intelligendum esse in hunc modum : *Nemo habet de suo, cum adsunt tentationes, nisi mendacium et peccatum.* Altera decretum exponit de concursus generalis privatione, qui, inquit, *pariter à Pelagio negabatur*, ut sensus sit : *Nemo sibi derelictus, et ideò Dei concursu destitutus, habet nisi mendacium et peccatum.*

Istæ solutiones à viro licet doctissimo propositæ quibusdam recentioribus placuisse non videntur. Alias excogitaverunt quæ profectò fecundi Bellarmini ingeni aciem non fugerant, quas tamen in aleam mittere ausus non est. Prima docet concilii decretum connotare peccatum *latè sumptum*, id est, opus, cui non est insita virtus ducendi ad æternam vitam; unde significavit synodus hominem ex se nihil in ordine ad vitam æternam habere nisi peccatum; quidquid nimirum sine gratiæ adjutorio et ex solis naturæ viribus operatur nihil ipsi proficit ad æternam salutem. Etverò, inquit, canon iste excerptus est ex tractatu 5 Augustini in Joannem ubi dicitur: *Nemo habet de suo nisi mendacium et peccatum; si quid autem homo habet veritatis et justitiæ ab illo fonte est, quem debemus sitire in hac eremo*; at justitiæ nomine hic indubiè designatur justitià ducens ad vitam æternam... Alias voces, *de suo*, interpretatur de ignorantia, et concupiscentia; quæ sunt vitiosa radia ex quâ nihil boni oriri potest, non de intellectu et voluntate, quasi sensus esset, *homo nihil veri intelligere, et nihil boni moralis velle potest sine gratiâ*.

Quid autem tot ac tam discrepantes solutiones suggerunt? Nonne amplam portendunt victoriam primæ concilii decreti expositionis defensoribus, quorum adversarii incerti quò sese vertant retortis in se gladiis sese mutuò confodiunt? Enimverò, ubi Bellarminus verum intellexit peccatum, alii *improprium* subodorantur delictum; ubi Bellarminus voces *ex suo* exponit de propriis intellectûs aut voluntatis viribus, alii eas alio modo explicant. Nulla autem ex relatis expositionibus concilii sanctioni est accommodata. Non prima; concilii enim decretum non secûs ac Augustini testimonium tractatu 5 in Joannem absolutum est, non conditionatum, ut insipienti illic innotescit. Deinde, si referretur ad tentationes, quasnam respiceret? Levesne, an graves tantum? Non leves certè; vulgò enim sentiunt, non graves quidem, sed leves tantum tentationes ab homine propriis naturæ viribus posse superari. Graves igitur; et quomodò Augustini, vel concilii textum eas tangere probarent? Demùm quis non videat scopum concilii et Augustini eò collimare ut reprimant arrogantiam Pelagianorum qui se bonum naturæ viribus operari posse gloriabantur?

Non secunda. Primò enim haud constat Pelagianos naturalem concursum rejecisse, ut hic gratis et sine probatione sub difficultatis

pondere deficiens obtendit Bellarminus. Altum de hoc Pelagianorum errore apud eos qui illorum historiam accuratè scripserunt silentium, Baronium, Norisium, Petavium, P. Alexandrum, etc. Tres ultimi apprimè noverant Yprensem lib. 5 de historiâ pelagianâ capitibus 19, 20, 21, etc., mordicûs asseruisse hunc concursum à Pelagianis admissum fuisse etiam ad operationes voluntatis, et tamen hujus novatoris errores circa Pelagianorum historiam refellendo de isto prorsûs siluerunt: præterea naturale Dei auxilium à Pelagianis fuisse improbatum solâ Hieronymi ad Ctesiphontem epistolâ probari posse videtur; at omnibus eruditus notum est Hieronymum cum hanc emisit epistolam, parvam admodum Pelagii dogmatum habuisse notitiam, et aliunde ex obscuro ejus in eâ epistolâ testimonio nihil certi erui posse.... 2º Patres Arausici loquuntur de concursu quem delineavit Augustinus tractatu 5 in Joannem; sed iste concursus manifestè est supernaturalis: « Si quid, inquit S. doctor, homo habet veritatis et justitiæ ab illo fonte est, quem debemus sitire in hac eremo, ne deficiamus in viâ, et venire ad salutem » non possumus.

Non tertia. Etverò, synodus et Augustinus ibi accipiunt peccatum quatenus opponitur justitiæ, sicut mendacium quatenus opponitur veritati; sed quod opponitur justitiæ verum est peccatum; justitiâ enim ibi sumitur quomodò Augustinus eam sumit libro de spiritu et litterâ capitibus 27 et 28 ubi dicit, *quædam infidelium et impiorum opera esse secundum justitiæ regulam*, id est, habere moralem bonitatem; justitiâ ergo ibi significat moralem bonitatem, quemadmodum veritas ibidem significat veritatem naturalem.... Neque reponas concilium et Augustinum ibi non magis requirere gratiam ad bonum morale facilè perficiendum, sive ad non peccandum, quàm ad aliquam veritatem naturalem cognoscendam; at indubiè speciale gratiæ auxilium ad hujus veritatis notitiam non exigit. Etenim concilium et Augustinus ibi accipiunt verum naturale morale non quatenus est merè speculativum, sed quatenus est practicum, sive quatenus ordinatur ad movendum hic et nunc hominis affectum; unde intendunt neminem ex se absque speciali gratiæ auxilio cognoscere verum morale practicum. Hinc accipiunt mendacium prout opponitur efficaci notitiæ veri moralis practici, quod aliunde satis indicat vox *mendacium*.

Non quarta. Concilium quippe et S. doctor

disserunt de facultatibus, ex quibus procedunt mendacium et peccatum, quales certè sunt intellectus et voluntas. Præterea, cum ignorantia insideat intellectui, et concupiscentia voluntati, quomodo illæ duæ facultates his irretitæ laqueis possent sine gratiâ verum practicè cognoscere et bonum morale elicere? Denum quam hic comminiscuntur ignorantia et concupiscentia ab intellectu et voluntate separatio est fictitia, siquidem, ut diximus, ignorantia et concupiscentia intellectui et voluntati inhærent. Tandem Ecclesia in hymno Spiritus sancti canit, *nihil sine ejus gratiâ esse innoxium*.

MOMENTUM QUARTUM.—*Ex summis pontificibus qui sententiam de gratiæ necessitate ad opera moralia facilia velut non catholicam habere expressè prohibuerunt.*—Talis inter alios Clemens X, talis Innocentius XII. Iste eruditum Norisium, postquam accurato examine præmisso, cui Sedis apostolicæ suffragium accessit, ejus opera à sacrâ Inquisitione romanâ pluribus vicibus à Bani erroribus immunia sunt renuntiata, in præmium sanæ doctrinæ, et eximiorum in Ecclesiam meritorum, sacro cardinalium collegio inseruit.

Talis doctissimus pontifex Benedictus XIV, qui in famoso Brevi dato 31 julii anni 1748 ad magnum Hispanæ inquisitionis præsidem hæc declaravit: « Norisiana opera Baianismi, aut Jansenismi notâ carent, et carere constat post multiplicatum super eis examen in hac suprêmâ Inquisitione romanâ, cui summi pontifices pro tempore existentes præsent, quique mox recensita examina suo calculo comprobârunt. » Deinde refert atroces, et rabiose iteratas Norisii inimicorum delationes, uno verbo, totam acrimoniam quâ in ipsum et scriptis et virulentis buccis despumabant, additque *celeberrimum auctorem ex iis victorem exiisse*, cum, ut dictum est, in mercedem doctrinæ et summorum beneficiorum, quæ reipublicæ christianæ contulerat, inter primarios cardinales relatus sit. At ex dicendis elucescet. Norisium et in Vindiciis, et in Janseniani erroris calumniâ sublatâ pro commemoratâ opinione tanquàm pro aris et focis decertare.

Idem pontifex ibidem et in Brevi dato 31 maii anni 1745 in gratiam religionis Augustinianæ, et Norisii operum de Augustianâ scholâ dicit: « Augustiniani traducuntur tanquàm sectatores Bani et Jansenii. Reponunt ipsi se humanæ libertatis esse fautores, et oppositiones pro viribus eliminant, cumque eorum sententia usque adhuc à Sede apostolicâ damnata non

sit, nemo est qui non videat a *nullo Superiore ecclesiastico* prætendi posse ut à suâ sententiâ discedant. » Notum autem est celebrem Augustinianorum scholam eandem opinionem totis viribus propugnare tanquàm sinceram D. Augustini, imò et Ecclesiæ catholicæ doctrinam.

MOMENTUM QUINTUM.—*Ex ipso theologorum, qui pro adversâ opinione stant, suffragio.*—Inter theologos catholicos, quibus placet aliquod opus moraliter bonum facile sine speciali Dei gratiâ fieri posse, nullum omninò invenire potui (multos tamen evolvi) qui adversam opinionem pro catholicâ non habuerit. Hinc amplissimas censori grates rependemus, si vel unum sic sentientem nobis indicaverit. Robertus Bellarminus, vir singulari animi moderatione et eruditione cunctis scholis acceptissimus, lib. 5 de Gratiâ et libero Arbitrio cap. 4, relatis contrariis Pelagianorum et Lutheranorum erroribus ait: « Conveniunt theologî catholici omnes 1º, non posse fieri ulla opera solis naturæ viribus quæ sint meritoria gratiæ, idque contra Pelagianos; 2º, non esse peccata opera omnia quæ justificationem præcedunt; idque contra Lutheranos. Intra hos terminos disputant aliqui pro libero arbitrio fortassis liberius quàm par esset, ut Scotus, Durandus, Gabriel, etc. Alii fortassè minùs tribuunt libero arbitrio quàm oporteret, ut Gregorius Ariminensis, Capreolus, Marsilius, » etc. Ubi vides Bellarminum apprimè distinguere sententiam theologorum à sententiâ hæreticorum inter utramque Catholicorum opinionem vacillare, ut indicat vox, *fortassis*, et pro Catholicis habere qui alterutram propugnant. Eodem libro, cap. 9, dicit, « certissimum esse non esse peccata opera omnia quæ fiunt sine fide, præsertim si fiant cum auxilio Dei speciali; » ergo, si fiant sine isto auxilio, illud certum non est. Gregorius de Valentia, alter insignis Societatis Jesu theologus in 1-2, disput. 8, q. 1 de necess. gratiæ puncto 3, ait: « Quæritur, an sine ullo gratiæ auxilio possimus in hoc statu naturæ corruptæ facere aliquod opus bonum morale, quod tum ex objecto, tum ex circumstantiis sit rectum. Quâ de re quatuor sunt sententiæ; duæ extremæ hæreticorum (suprà à Bellarmino relatæ) et duæ mediæ theologorum orthodoxorum, quorum alii etsi ad omne opus bonum morale non requirant auxilium gratiæ justificantis, aut etiam fidei (in quo omnes orthodoxi consentiunt), tamen requirunt aliquod auxilium gratiæ actuale, quo scilicet homo incitetur et adjuvetur ad quodcumque bonum opus morale

exercendum. Ita Gregorius Ariminensis. « Hæc, opinor, commentario non indigent. Gregorius de Rhodes, alter ejusdem Sodalitii theologus, tom. 1, disput. 2, de gratiâ, sectione 4 de necessitate gratiæ ad opera moralia facillima, dicit: *Hæc est nobilis ima controversia quæ scholam theologicam divisit in partes.* Deinde paragrapho primo affert dissidentes opiniones.

Quoniam autem longum foret, et (ut puto) planè inutile cæteros adducere, prodeant nonnulli recentiores, quorum judicium profectò non abnuet censor.

Honoratus Tournely de Gratiâ q. 4, a. 2, relatâ Baii et Jansenii circa præsentem questionem opinione, ait: « Gabriel Vasquez plures appellat è scholâ theologos qui docent nullum opus morale ex omni circumstantiâ bonum posse fieri sine aliquo divinæ gratiæ auxilio, quam sententiam ipse sequitur... At sensu (hæc apprimè observa) à Baio et Jansenio multùm alieno; isti quippe sine fide supernaturali et charitate propriè dictâ, sive theologicâ nihil omninò boni fieri posse, et quidquid ita fit verum esse peccatum, contendunt; non ita Vasquez. » Deinde addit: « Communior scholæ sententia est S. Thomæ 1-2, q. 109, a. 2,... videtur hæc esse Bellarmini sententia lib. 5 de Gratiâ et libero Arbitrio, cap. 5 et seq. » Theologi ergo catholici, et quidem plures, sentiunt nullum prorsus opus bonum morale sine gratiâ elici posse sensu à Baii et Jansenii sensu multùm alieno, ideòque Baianismi absque injustitiâ insinulari non possunt: Communior igitur tantum scholæ opinio est D. Thomæ, etc.; contraria ergo communis est, videtur hæc esse Bellarmini sententia; ergo certum non est celebrem istum virum illam opinionem defendisse.

Concinnunt Tornelii redactores, sed non tam accuratè quàm magister; unus enim, relatâ Baii et Jansenii sententiâ, ait: *Quin et eidem (Baii et Jansenii doctrinæ) adhæsere nonnulli è Catholicis, ut cardinalis Norisius in Vindictis, etc., quæ propositio à Tornelii relatione in duobus discrepat; enuntiat enim 1º, Norisium et alios Baii et Jansenii doctrinæ circa istam quæstionem sese morigeros præstitisse, et ideò cum Baio fuisse damnatos, quod negat Tornelius... 2º. Nonnullos duntaxat Catholicos huic sententiæ adhæsisse. cum referente Vasquesio, et post eum Tornelio plures ipsi adhæserint. Idem auctor ait: Communis (non communior ut Tornelius) sententia est in præsentî statu aliquod bonum opus morale ordinis naturalis per solas naturæ vires fieri posse; ut scilicet in-*

sinnet contradictoriam opinionem non esse communem, quod falsum esse postea ostendemus.

Concinit alter doctor Parisiensis, socius Sorbonicus nuper summum sui desiderium derelinquendo è vivis excessus censori certè non posthabendus, Franciscus de la Chambre, in erudito et optimo opere quod inscripsit: *Traité historique et dogmatique sur la doctrine de Baïus, et sur l'autorité des bulles des papes qui l'ont condamnée.* Etenim in monito operi præfixo n. 3, sapientem hanc præscribit regulam, quam ob oculos habere debuisset Censor: « Lorsqu'il s'agit de fixer la doctrine et de combattre l'erreur, il faut éviter deux excès: le premier de donner pour erreur et pour condamné ce qui est laissé à la liberté des écoles (in hoc hallucinatus est censor); le second, de regarder comme opinion permise, et comme laissée à la dispute des théologiens, ce qui est réellement contraire à la foi, et réprouvé comme tel. » In illustratione super Baii tractatu n. 4, ait: « Le libre arbitre n'a point entièrement péri en Adam, quoiqu'il ait été affaibli. Voilà ce que la foi enseigne, et ce que nie Baïus... L'homme tombé, en vertu des restes et des traits de la droiture du premier état, qui n'a point été absolument détruite en lui par la désobéissance du premier père, peut-il d'un pouvoir réduit à l'acte observer quelque précepte de la loi, sans un secours actuel, distingué du don de la création et accordé en vertu des mérites de Jésus-Christ? Question laissée à la liberté des Théologiens, pourvu cependant qu'on reconnaisse que ce secours nécessaire pour pratiquer le bien est totalement différent de cet esprit de charité proprement dite que le Saint-Esprit répand dans nos cœurs. » Eadem habet in eodem tractatu, paragrapho 3, n. 5, etc.

Verùm adsit testis insignior et præstantior dominus Languet olim Suessionensium episcopus. In quintâ epistolâ pastoralî, 3 parte, n. 59 et 60, de bonis infidelium operibus hæc habet: « Les théologiens sont partagés en différentes opinions sur cette matière; opinions sur lesquelles l'Eglise leur laissant la liberté, j'ai cru devoir les abandonner à leur dispute sans m'y engager. (Hæc observatione digna sunt.) En effet, tandis qu'ils soutiennent tous, en conséquence des jugemens que l'Eglise a rendus, que les actions des infidèles ne sont pas toutes des péchés, ils se partagent en différentes classes dans l'explication de cette vérité. Quelques-uns prétendent (debuisset dicere: plures, cum postea dixerit: le plus commun sentiment, etc.) que les

actions de charité et de justice que font quelquefois les infidèles sont dirigées par une grâce générale meritée par Jésus-Christ et répandue sur tous les hommes, qui les conduit dans ces actions qui sont louables. Les autres, et c'est le plus commun sentiment, soutiennent que par la lumière naturelle que le péché n'a pas entièrement effacée, les hommes peuvent être dirigés dans quelques œuvres justes et bonnes, et les faire sans péché. Entre ceux-ci, quelques-uns croient que l'homme qui, par les lumières naturelles peut connaître l'existence d'un Dieu infini dans sa bonté, peut aussi par ses forces naturelles, aimer Dieu par dessus toutes choses d'un amour naturel. Tels Cajétan et Dominique Soto... D'autres soutiennent que cet amour naturel n'est pas possible à l'homme. Tel Bellarmin. Mais ces théologiens, en se partageant sur ces sujets de dispute, conviennent tous, » etc.

Celebriores igitur defensores religionis agnoscunt istam quæstionem, *utrum infidelium opera omni ex parte bonæ divinæ gratiæ adscribenda sint vel non*, Scholæ libertati ab Ecclesiâ relinqui, et nunquam ipsis in mentem venit opinionem affirmantem *Baianismi* aut *Jansenismi* censurâ configere, aut etiam asserere illam Baio favere.

Veneranda tamen adversus tot illustrium virorum suffragium auctoritas objici potest (quam censor in suâ dissertationiculâ non adduxit, aut quia illius oblitus fuerat, aut quia eam multi non faciunt). Censura scilicet sacri Ordinis Parisiensis lata 27 junii anni 1560 in 18 Baii propositiones, postulantis Petro de Quercu Guardiano Nivellensi et Egidio de Querceto Guardiano Athensi. Quarta hæc erat : *Liberum arbitrium ex se non potest nisi peccare, et omne opus liberi arbitrii sibi dimissi est peccatum mortale aut veniale*. Hæc autem censurâ confixa est : *Pro utràque parte est hæretica*; nemo igitur nisi hæreticus asserere potest liberum arbitrium sibi dimissum non posse nisi peccare.

Verum plurima sanè hanc censuram elidunt, atque etiam, si prout jacet et sine ullo ad Baii sensum respectu est intelligenda, penitus subruunt. Etenim primò ex sacri Ordinis Statutis et laudabili usu nulla prorsus et irrita sunt acta quæ in sequenti congregatione relata non sunt et confirmata; at, inquit socius Sorbonicus dominus de la Chambre in commemorato opere p. 124 (edit. in-12.) *On ne voit pas que la censure ait été relue et confirmée selon l'usage dans une assemblée suivante....* 2º Omnes auctores,

etiam Sorbonici, qui ab anno 1560 ad hanc usque ætatem floruerunt, pro catholicis habuerunt theologos docentes, liberum arbitrium *ex se*, id est, sine gratiâ à verâ charitate distinctâ, non posse nisi peccare, ut modò ostendimus. Illam igitur prætentam censuram nihil fecerunt.... 3º Gamachæus, Tornelius et alii cum veteres tum recentiores Sorbonici doctores, qui in confirmationem suarum opinionum doctrinalia judicia sacre Facultatis afferre consueverunt, de isto judicio in præsentem controversiâ omninò tacuerunt; quin P. Alexander in historiâ 15 et 16 seculi uno aut altero verbo de illo injecto statim et non sine encomio adducit sententiam Vasquesii ipsi, ut notum est, è diametro oppositam; ipsis igitur fuit persuasum hanc censuram aut nullius esse ponderis, aut suæ opinioni non favere. . . . 4º Illa censura, si quid unquam roboris habuit, illud totum amisit post solemne judicium Clementis X, Innocentii XII, et Benedicti XIV, totiusque sacre Inquisitionis romanæ, qui in Norisio et aliis Augustinianis orthodoxam renuntiaverunt sententiam quam hæreticam declarat... 5º Commemoratum judicium seipso ruit. Sic enim arguimus: Censura propositionis quartæ pluris faciendâ non est quàm censura propositionis 16; si quippe ultima censura malè fuit lata, quidni et altera? At nihili prorsus faciendâ est, quin potiùs omninò est improbanda censura 16 propositionis; illa enim assertio sic concipitur: *Nemo præter Christum est absque peccato originali*; hinc *B. Virgo mortua est propter peccatum quod contraxerat ex Adam*. Quid censura? *Hæc propositio est hæretica*. Quis, quæso, ferat tam inconsideratum, et tam temerarium judicium? Sixtus IV, anno 1484, sub excommunicationis penâ veterat ne opinio affirmans aut negans intemeratum B. Mariæ Conceptum hæresis notâ configeretur (quam Constitutionem confirmaverat concilium Trid. sessione 5, anno 1546, et Pius V Constitutione super speculam) et generosi censores negantem assertionem hæreticam esse conclamant, sicque Thomistas et alios excommunicatos declarando ipsi in excommunicationem incurrunt! Doctissimus Bellarminus, cui super hoc omnes eruditi assentiunt, dixit libro 4 de amissione gratiæ et statu peccati cap. 15, *impudentissimum esse mendacium* asserere ab Ecclesiâ in fidei tesseram erectam esse opinionem de immaculato Virginis Conceptu; dixit illam opinionem esse duntaxat *piam admodum et probabilem, et contrariâ longè probabiliorem, et*

doctiores censores illam sententiam inter fidei dogmata annumerare audebunt !

Doctissimi viri Vasquesius , Suaresius prolegomeno 6 de Gratiâ , cap. 2, n. 16, Lens in corpore doctrinæ Badianæ p. 172 , asserunt in bullâ Pii V Bâii propositionem 74 (in editione P. Duchesne) : *Nemo præter Christum est absque peccato originali, etc.* , propter doctrinam eâ expressam , sive nudam assertionem , de conceptione B. Virginis in originali peccato , non fuisse proscriptam (idem censuit Bellarminus qui Pii V Constitutionem ad opinionem suam de intemerato Conceptu probandam , non adduxit) , et quis illam sententiam hæreticam renuntiare non erubescet ? Idem iudicium propositiones æquivocas , sive quæ multiplicem patiuntur sensum , absque ullâ sensuum distinctione speciali notâ configit , sicque distinctionibus multiplicandis magis quàm sedandis et finiendis est idoneum , et omninò alienum à mente Pii V , qui Bâii propositiones dammando , generatim licet et respectivè , observavit tamen *nomallas aliquo pacto sustineri posse , quamvis non in rigore et sensu ab auctori-bus intento.*

Dicendum igitur omninò est commemoratam censuram aut ab initio fuisse irritam , aut tacito saltem consensu ab ipso sacro Ordine revocatam , quod profectò *perpetuo et semper viventi Galliarum concilio* , ut olim loquebatur dominus Mezerây , injuriosum non est , cùm sol ipse , qui totum terrarum orbem fulgore suo collustrat et vivificat , defectioni nonnunquàm sit obnoxius.

Nihilo tamen minùs conjicerem sacram facultatem quartam propositionem declarasse hæreticam aut quia existimavit illâ proscribi indifferentiam activam humanæ voluntatis ad bonum aut malum , sive innatam homini ac post Adæ peccatum superstitem potentiam faciendi bonum aut malum , legem implendi vel non implendi (quo certè sensu est hæretica) , aut potius quia eandem propositionem proscribere voluit relativè ad sensum Bâii , qui intendebat liberum arbitrium *ex se* , id est , sine charitate habituali aut actuali propriè dictâ (quam unicam gratiam admittebat) , nonnisi peccare posse (quo iterùm sensu propositio est hæretica). Etverò duo commemorati Guardiani prælectiones theologicas , quas sui Noviti à Bâio acceperant , in quibus iste sensus exprimebatur , ad sacrum Ordinem indubiè miserant , qui ideò tam perversam doctrinam explodere fuit sollicitus.

MOMENTUM ULTIMUM. — *Ex rationibus ex fidei principiis scaturientibus.* — Rationes illas deducemus ex doctrinâ quam ipsimet operis moraliter boni facili sine gratiâ faciendi assertores scriptis suis consignarunt. Bellarminus , lib. 5 de Gratiâ et libero Arbitrio , cap. 3, hanc ex D. Thomâ rationem affert ut probet solis naturæ viribus omnia præcepta moralia secundum substantiam operis adimpleri non posse. « Quoniam natura humana per peccatum primi parentis depravata aversa est à Deo , et conversa ad creaturas , præsertim ad se , ac proinde finem ultimum vel actu , vel habitu , vel certè propensione quâdam in creaturâ , non in Deo , constitutum habet. Quare , quando occurrunt aliqua agenda , vel evitanda , ex fine illo præconcepto quasi naturaliter inclinatur ad malum , et violenter ad bonum , et ideò necessaria est vis quædam et ut homo vigilet et præmeditetur , et contra propensionem amoris proprii pugnet , quod impossibile esse moraliter non solum ratio sed experientia docet. »

Hæc eruditi viri doctrina innititur hoc concilii Trid. decreto sessione 6 , c. 4 : *Etsi liberum arbitrium minimè extinctum sit , viribus tamen attenuatum est et inclinatum* ; inde enim elucet hominem ita liberum remansisse , ut tamen ad se et sua aliaque sensibilia jugiter et inordinatè inclinetur. Hoc sanè argumentum plus probat quàm hic probare intendit eximius ejus auctor. Evincit enim , ut vel tantisper attendenti faciliè innotescet , quotiescumque occurrunt aliqua agenda vel evitanda , cujuscumque naturæ sint , sive facilia , sive ardua , *vim quamdam* necessariam esse ut homo à se , sive inordinato sui amore et creaturâ retrahatur , et ad bonum assurgat , quæ suavis violentia nonnisi ex gratiâ oriri potest.

Idem insignis theologus ibidem sententiam suam sic probet : « Si D. Augustinus libro de Correctione et Gratiâ , cap. 12 , affirmat , ipsum etiam hominem justificatum , nisi is divinâ gratiâ indeclinabiliter et insuperabiliter (id est , infallibiliter) ageretur ob naturæ infirmitatem sine dubio casurum esse , quantò nos id majori ratione affirmare possumus de homine infideli , et qui solis nitatur viribus naturæ per peccatum corruptæ et vitiatæ ! »

Hæc iterùm ratio probat hominem *ob naturæ infirmitatem* ipsum opus moraliter bonum facile non posse elicere. Cùm enim dixit Augustinus justum esse prolapsurum si à divinâ gra-

tiā non agatur, significare voluit justum bonum supernaturale nec *collectivè*, nec *distributivè* agere posse sine gratiæ auxilio; ergo, ut valeat Bellarmini ratiocinium, oportet ut idem homo solis naturæ per peccatum corruptæ viribus bonum morale nec *collectivè* nec *distributivè* possit operari.

Doctissimus cardinalis eodem libro 5, cap. 7, ex Scripturâ et Patribus asserit nullam prorsus tentationem sine speciali Dei auxilio, id est, internâ illustratione, et motione supernaturali, ab homine posse superari; et lib. 6, cap. 7, « non posse Deum sine ipsius ope diligi neque ut auctorem naturæ, neque ut largitorem gratiæ et gloriæ, perfectè, neque imperfectè ullo modo; » deinde addit: « Atque hanc non dubitamus sententiam esse S. Augustini, imò etiam Scripturarum et conciliorum, quidquid aliqui minus consideratè in hæc parte scripserint. »

Quis autem illicò non intelligit hanc doctrinam minimè cohærere cum opinione asserente opus moraliter bonum facilè solis naturæ viribus fieri posse? An enim levis tentationis victoria majus voluntati humanæ facessit negotium quàm operis moraliter boni etiam facilis perpetratio? Si infirmus, ut utar exemplo, quod ad nauseam usque adducunt, calculum invenerit in viâ, nonne eum tam facilè amovebit quàm parvum iter perficiet, pedesve movebit? Imò prorsus impossibile est ut quis opus moraliter bonum facilè eliciat, nisi experiatur quamdam tentationem, juxta illud *utimur in vetitum semper, cupimusque negata*; et istud Jacobi, *unusquisque tentatur à concupiscentiâ suâ abstractus et illectus*. Hinc theologi Bellarmini opinioni infensi suam sententiam iisdem probant argumentis quibus ejusdem opinionis defensores hominem aliquod opus moraliter bonum solis naturæ viribus agere posse ostendere conantur.

Item perquàm facile est Deum diligere ut auctorem naturæ et beneficiorum naturalium, amore saltem imperfecto, cum inprimis, ut in Confessionibus clamat Augustinus, *cuncta*, id est, aspectabilis hic mundus, *cui libet dictare non desinant ut Deum amet*; et Apostolus Romanorum cap. 1, obstupescat quòd gentiles, cum Deum cognovissent, illum sicut Deum non glorificaverint, sive coluerint. Hinc rursus qui hic Bellarmino dexteram non porrigunt hæc facilia esse proclamant.

Palmaris ratio, quam hic ostentant, efflorescit ex conditioe liberi arbitrii, cujus vires

ad bonum, licet per peccatum plurimum immutæ, omninò tamen non fuerunt extinctæ. Hinc postquàm D. Augustinus libro de Spiritu et Litterâ, cap. 27, n. 48, dixit infideles et impios nonnulla aliquando opera elicere *secundum justitiæ regulam laudanda*, hanc cap. 28 addit rationem: *Quia usque adeò in animâ humanâ imago Dei terrenorum affectuum labe detrita non est, ut nulla in eâ velut lineamenta extrema remanserint; unde meritò dici possit etiam in ipsâ impietate vitæ suæ facere aliqua legis, vel sapere*. Istorum verborum, inquirunt, sensus est, infideles et impios notitiam boni et mali, et illud agendi potentiam per peccatum non omninò amisisse, et ideò superstitibus viribus illud aliquando operari.

At hoc argumentum plurima enervant: 1º enim ipse Bellarminus lib. 5 de Gratiâ et libero Arbitrio, cap. 9, ingenuè fatetur genuinam illius testimonii significationem sibi non esse exploratissimam; ait enim: *Quorum verborum hic esse videtur sensus*. 2º Augustinus hæc dixit *transitoriè et quasi aliud agendo*, ut patet ex contextu, et per *figuram concessionis*, ideòque de sincerâ ejus mente circa præsentem quæstionem per hunc locum judicandum non est, sicut per alia ejus opera in quibus *ex professo* hanc quæstionem tractavit, qualia sunt ea quæ in secundo argumento protulimus. 3º Quâ arte posset evinci bona operâ, de quibus hic Augustinus, non ardua, sed facilia fuisse. 4º Pauca infidelium et impiorum opera, quæ Augustino dicente, etiam ratione finis, bona fuisse leguntur, evidenter sunt regis Assueri misericordia in Judæos, obstrictum ægyptiarum in Hebræorum parvulos humanitas, continentia Polemonis, quorundam Romanorum virtutes; sed hæc ipsa Dei gratiæ tribuere S. doctorem antea ostendimus; nec ipse contradicit Bellarminus qui loco citato dicit *Romanorum virtutes Dei gratiæ tribui posse*.

Igitur Augustinus his verbis: *Imago Dei in infidelibus et impiis omninò non est deleta, qui ideò aliqua legis faciunt vel sapiunt*, significavit remanere in homine lapsò aliquam legis naturalis cognitionem, et activam indifferentiam ad bonum et malum, sive naturale, sive supernaturale, quam aliquando reducit ad actum, sive cum gratiæ auxilio, sive sine illo, quod hic ex professo non expendit. Et verò ibi dixerit Augustinus de impiis qui in impietate obdurerunt, et *lassati sunt in viâ iniquitatis*, ut Scripturæ verbis utar; sed nunquàm profectò in S. doctoris mentem venit tales homines bo-

num etiam morale sine gratiæ auxilio posse operari; quinimò passim docet, eos *bonum morale non apprehendere et prosequi, sed in malum pro inveteratâ consuetudine moveri nisi gratiâ adjuventur*. Legi poterit libro de Patientiâ cap. 7, n. 14, et lib. 2 de peccatorum meritis et remissione, cap. 17, n. 26, etc.

SECTIO II. — *Theologi pro operum moraliter bonorum sine gratiâ eliciendorum impossibilitate decertantes, ipso etiam Gregorio Ariminensi non excepto, præ aliis Theologis eorum adversariis in hac controversiâ laudandi fuerunt.*

Notum est eruditis quàm indignis modis, imprimis post exorta Janseniana dissidia, à nonnullis recentioribus tractati sint D. Augustinus et celeberrima ejus schola. Unus ex illis, eximius aliunde theologus, in Commentario capituli 8 Matthæi v. 18 in hæc audacter prorupit: « Nec enim sequenda illa opinio est, quam Tridentinum concilium nuper meritò damnavit, omnia peccatorum aut etiam infidelium opera esse peccata, quamvis maximum auctorem Augustinum lib. 4 contra Julianum cap. 3, et lib. contra duas epistolas Pelagianorum cap. 5, et Prosperum habuisse videatur. » Quis tam tetram ferat calumniam? Augustinus docuit *omnia peccatorum opera esse peccata* dum illum errorem à concilio Trid. damnatum sessione 6, can. 7, libro de Patientiâ cap. 26 et alibi passim refellit! Augustinus absolute docuit omnia infidelium opera esse peccata dum (ut ex dictis constat) illud nonnisi conditionatè tradidit, si nempe gratia non impediat ne in superbiæ peccatum actu reflexo incidant, vel eos à sui et creature inordinato amore non retrahat!

Alia convicia recoquere horreret animus. Doctissimum virum Norisium ad evulgandas Vindicias Augustinianas novissimis hisce temporibus adegerunt, quas illi recentiores torvis quidem aspexerunt oculis, sed ne extremis quidem unguculis vellicare lucusque ausi sunt.

Si igitur illis recentioribus adversi doctores suam opinionem eâ, quâ decet, modestiâ defenderunt, nullis prorsus in adversarios probris contortis, censor vel quilibet alius æquus arbiter nedùm nobis succenseat quòd illos magistros impensè extulerimus, aliorum meritis silentio prætermisissis, quinimò nobis debet summopere gratulari; at insignes illos viros in præsentî controversiâ sese sic gessisse testantur auctores fide dignissimi, quos inter solum Bellarminum, ne longior sim, adducam. Li-

bro 5 de Gratiâ et libero Arbitrio, cap. 4, relatâ opinione Gregorii Ariminensis, Capreoli, Marsili, etc., ait: « Eâ modestiâ disserunt isti, ut et parati sint iudicio Ecclesiæ semper acquiescere, et ante Ecclesiæ definitionem non audeant fratres suos damnare, neque pro hæreticis habeant qui contra sentiunt. » Ubi vides comprehendi ipsum Gregorium Ariminensem, in quem tam acriter invehitur censor. Sed, inquit (et hæc est palmaris ejus accusatio in istum theologum), « Gregorius Ariminensis impudenti et sacrilego Lutheri ore summis laudibus exornatus est quòd cuncta et singula infidelium opera defectu relationis in Deum vera esse peccata asseverâset. » Non inficior; factum enim illud referunt maximâ fide digni testes Bartholomæus Medina, Dominicus Soto, et Andreas Vega; sed quid inde? Istum theologum hæreticorum albo esse inscribendum? Quæ, Deus immortalis, consecutio! Joannes Calvinus in quatuor Institutionis libris, in Antidoto, etc., et Cornelius Jansenius in suo Yprensi D. Augustinum *totum esse suum* vociferantur; ergo D. Augustinus Calvini et Jansenii hæresi prælusit, sive illius fundamenta jecit! ergo minimè laudandus est D. Augustinus! Quis tam intolerabile pronuntiatum non execretur et exhorrescat? Itaque Gregorius Ariminensis laudatus quidem fuit à Luthero, ut Augustinus à Calvino et Jansenio, sed non idèò Lutheri errori circa infidelium opera, sicut nec Augustinus Calvini et Jansenii systemati favit. Quotquot scilicet extant insignes theologi longum latumque discrimen agnoscunt inter Lutheri et Gregorii sententiam de infidelium operibus. Supra audivimus Bellarminum dicentem: *Catholici omnes theologi* (inter quos expressè recenset Gregorium Ariminensem) *consentiunt non esse peccata opera omnia quæ justificationem præcedunt, idque contra Lutheranos*; ergo Gregorius Ariminensis Lutheri hæresi de infidelium operibus viam non stravit. Concinunt theologi antea laudati, Gregorius de Valentiâ, Georgius de Rhodes, Honoratus Tournely, Henricus Norisius, etc. Hic Vindic. cap. 4, paragrapho 3, Gregorium sic excusat: « Noster Gregorius Ariminensis in hac thesi cum Baio et Luthero neutiquàm convenit; nam licet in 2 Sententiarum distinct. 26, q. 1, dicat omnia infidelium opera esse peccata, attamen articulo tertio in responsione ad testimonia Augustini ait: Si tamen aliquod taliter factum, scilicet debito fine, et aliis debitis circumstantiis reperiat in infidelibus, dicendum est cos

fecisse non sine Dei adjutorio ; quod in responsione ad 8 de facto in obstetricibus ægyptiis factum concedit, nempe Deo specialiter adjuvante, quæ etiam ibidem probat Augustini testimonio lib. 4 contra Julianum cap. 3, ubi concedit aliqua bona opera in infidelibus ex speciali tamen Dei gratiâ derivata, et admittit insuper adjutorium Dei, seu Spiritûs nondum inhabitantis, quorum neutrum Baius assererat. » Antea, cap. 3, paragrapho 4, dixerat : « Gregorius Ariminensis concedit in Infidelibus aliqua opera bona, in primâ saltem sui productione, ex gratiâ tamen derivata. » Ex quibus patet Gregorium intendisse infideles nulla quidem bona opera non adjuvante Deo producere posse, sed tamen cum Dei adjutorio aliqua interdum ejusmodi opera elicere, quæ tamen nisi de novo subveniat Deus, brevi superbæ vitio coinquinantur; quæ certè toto cælo differunt ab hæresi Lutheri, qui docebat omnia opera facta ab homine extra charitatem, sive in peccato constituto, esse peccata, quia à conscientiæ reatu vitiantur.

Non aliam profectò Gregorii mentem fuisse satis ostendunt quibus à summis et minime suspectis viris insignitur encomia. Non solum enim à Norisio vocatur *insignis theologus*, sed et ejus laudatores esse voluerunt Stephanus Deschamps de hæresi Jansenianâ lib. 3, disput. 3, cap. 8, n. 4; Natalis Alexander in historiâ 14 seculi, ubi postquàm dixit, *ipsum nomen inter eruditos sibi peperisse*, addit : Ejus cum laude meminere Trithemius abbas, Sabellicus, Sixtus Senensis, etc. (vir insignis eruditionis et pietatis qui Pii V fuit coætaneus, et arcissimo fœdere cum ipso conjunctus).

SECTIO III. — *Consuetum Vasquesii, Norisii, et aliorum ad nonnullas Baii assertiones responsum, ipsas ob acrimoniam censuræ fuisse præscriptas, non est improbandum.*

Censor novum, ut diximus, adversus nos accusationis caput intentavit, quòd mox commemoratam theologorum responsionem non exploserimus; nos, è converso, contendimus illam rejicere temerarium esse et erudito theologo indignum. Enimverò ipsâ Pii V Constitutione innititur; illam aliunde admittunt apprimè catholici auctores, qui etiam Vasquesii et Norisii sententiam impugnant, etiam ubi agitur de propositione Baii 27 vel 28 : *Liberum arbitrium sine Dei adjutorio non nisi ad peccandum valet*, vel 26 : *Omnia infidelium opera*, etc., quibus pelagiani erroris nota expressè non infli-

gitur; tandem ipse censor eam admittere tenebitur; ergo, etc.

Ac primò quidem innititur ipsâ Pii V adversus Baium Constitutione. Etenim illa Constitutio Baii assertiones interdicat *respectivè tanquàm hæreticas, erroneas, suspectas, temerarias, scandalosas, et in pias aures offensionem innitentes*; quæ verba significant inter Baii propositiones alias esse hæreticas, alias erroneas, alias tandem simpliciter scandalosas et temerarias, et idèò nonnullas in seipsis præcisè consideratas, et abstrahendo à verbis quibus enuntiantur, circumstantiis temporis quibus proferuntur, et personis coram quibus recitantur, esse veras, et ut tales defendi posse. Scilicet, ut fert usus Romæ et inter theologos receptus, et testatur Melchior Canus lib. 12 de Locis, cap. 11 tanquàm falsæ non damnantur propositiones quæ declarantur duntaxat scandalosæ et aurium piarum offensivæ. Præterea eadem Constitutio fert, *nonnullas Baii propositiones aliquo pacto sustineri posse, licet non in rigore et proprio verborum sensu ab assertoribus intento. At Vasquez*, inquit dominus de la Chambre citati operis p. 150, *meritò asserit istud pronuntiatum permittere ut nonnullæ defendantur quantum ad doctrinam, sublatâ tamen censurâ in oppositas.*

Eadem responsio accepta est theologis catholicis qui etiam Vasquesii et Norisii sententiam improbant, ubi etiam res est de propositione 27 vel 28, *liberum arbitrium*, etc., cui pelagiani erroris nota expressè non est annexa. Illi inter alios sunt Natalis Alexander, qui in historiâ 16 seculi Vasquesii interpretationem non sine laude refert, ut dictum est. Franciscus Suarez toto terrarum orbe et eruditione et pietate celebris. Libro 1 de Necessitate gratiæ cap. 8, n. 46 dicit, Baii propositionem 26, *omnia infidelium opera*, intellectam de infidelibus Dei gratiâ destitutis (quo sensu illam catholicam declarat) damnatam fuisse ob acerbitatem censuræ ei licet non expressè affixam, quia suâ cum aliis assertionibus circa eandem materiam versantibus, quibus annectitur pelagiani erroris nota, conjunctione illam acrimoniam spirat. Concinit Vasquez in 1-2, disp. 190, cap. 18, n. 184, etc., et Norisius Vind. cap. 4, paragrapho 5, et cap. 3, paragrapho 4.

Idem Suarez ibidem numeris 45 et 46 Vasquesio præeunte eadem ex causâ idem asserit de propositione, *liberum arbitrium sine Dei adjutorio non nisi ad peccatum valet*; et Norisius

Vindicarum cap. 4, paragrapho 5, et cap. 5, paragrapho 4. Et verò propositio, *liberum arbitrium*, etc., idem quoad doctrinam exprimit ac ista immediatè sequens: « Pelagianus est error dicere, quòd liberum arbitrium valet ad ullum peccatum vitandum; » aut 38: « Cum Pelagio sentit qui boni aliquid naturalis, hoc est, quod ex naturæ solis viribus ortum ducit, agnoscit. »

Quid quòd iidem insignes viri, quibus adiungendus Henricus à sancto Ignatio Carmelita, Joannes Lens in corpore doctrinæ, etc., regulas figunt ad discernendas Baii propositiones ob censuræ acerbiteriam duntaxat proscriptas, ab aliis ob doctrinam damnatis? Consuli poterit dominus de la Chambre citato opere. Ipse Joannes Baptista Duchesne quintâ illustratione super istâ 22 vel 23 propositione: « Cum Pelagio sentiunt qui textum Apostoli Rom. 2: *Gentes quæ legem non habent*, etc., intelligunt de gentibus fidei gratiam non habentibus, » ait: « Tout le monde est d'accord que cette proposition a été condamnée à cause de la note de Pelagianisme. » Adeò verum est *Censuram* Baii, non verò assertum, non rarò ab Apostolicâ Sede fuisse damnatam.

Tandem eandem sententiam, velit nolit, exosculabitur censor. Sentit enim indubiè nullam tentationem, etiam levem, sine Dei adiutorio ab homine lapso posse superari; pro suâ scilicet pietate nefas duceret recedere à sententiâ quam Bellarminus lib. 5 de Gratiâ et libero Arbitrio, cap. 7, dicit *magis consentaneam esse Scripturæ et Patribus*; at istâ imbutus sententiâ fateatur necesse est hanc 31 Baii assertionem, *Fures sunt et latrones*, qui docent tentationi ulli sine gratiæ ipsius adiutorio *resistere hominem posse sic ut in eam non inducatur, aut ab eâ non superetur*; fateatur, inquam, oportet illam propositionem ob censuram duntaxat fuisse proscriptam. Saltem lubenter, ni fallor, concedet 74 Baii propositionem, *nemo præter Christum*, etc., sive quæ intemeratum Virginis Conceptum negat, ob duriorem tantum censuram, ipsi licet non expressè illigatam, fuisse damnatam, nisi, ut supra dictum est, Thomistas velut hæreticos traducere velit.

SECTIO IV. — *Baii propositiones, quæ liberi arbitrii vires relativè ad bonum morale tangunt, ad quod gratiam exigunt, possunt et debent intelligi de gratiâ fidei theologicæ et charitatis propriè dictæ, aut saltem hanc virtutem importante.*

Sermo hic instituitur præsertim de proposi-

tionem, *liberum arbitrium sine Dei adiutorio nisi ad peccandum valet*, et aliis quæ idem enuntiant. Censor suo more, id est, confidentissimè, asseruit vocibus, *sine Dei adiutorio*, quodlibet auxilium actuale cœlitus emissum, etiam non efficax et à verâ charitate diversum, adumbrari et ideò ex censurâ elucere liberum arbitrium sibi soli derelictum aliquando ad non peccandum valere. Nos verò dixeramus easdem voces, *sine Dei adiutorio*, fortassis designare gratiam efficacem charitatis propriè dictæ, et ideò præfatam censuram aliqua opera moraliter bona perficiendi vim libero arbitrio certissimè non attribuere; ob quam assertionem dubitanter licet prolatam adversarius censorio suo telo nos configere tentavit, sed, ut spes affulget, non magis feliciter quàm olim Saül Davidem hastâ confodere aggressus est; quàmplurima enim hujus censorii iudicii, ac fiduciæ temeritatem, ne quid ampliùs dicam, patefaciunt; quomodò scilicet vir sapiens sensum Constitutionis varias assertiones relativè tantum damnantis certò et sine ullâ dubitatione se determinare posse existimavit? Quomodò asserere ausus est relatam propositionem, et similes absque sensuum, quos plures patitur, distinctione, esse damnatam, et quidem sensu à se assignato? Quomodò eximiis viris commemoratis, speciatim Suaresio, Joanni Lens, Bellarmino, domino de la Chambre, etc., qui ex censurâ relatæ assertionis hominem aliqua opera moraliter bona sine quâcumque cœlesti gratiâ elicere posse certò concludi non posse censuerunt, et ideò ad id probandum illam censuram adducere noluerunt; quomodò, inquam, tot ac tantis viris sese sagaciorum et doctiorum existimare potuit?

Verum, ut quid generalia ista momenta, cum positivum et omni exceptione majus ex ipsiusmet Baii et ejus asseclorum doctrinæ visceribus erumpens sese offerat argumentum, à quo si censor sese prosperè expediat, eum sanè tanquam magnum, imò maximum virum habebimus?

Sic arguimus: Commemorata Baii assertio, ut et cæteræ, à Pio V damnata est *in rigore et proprio verborum sensu ab auctoribus intento*; hæc enim expressè leguntur in fine pontificiæ Constitutionis; unde P. Duchesne accuratus historiæ Baianismi scriptor in quintâ illustratione super historiâ suâ ait: *Cette proposition: Sans le secours de la grâce le libre arbitre ne peut que pécher, est réprochée dans le sens de l'auteur comme toutes les autres*; at Baius nullum

verum Christi adiutorium admisit distinctum ab adiutorio fidei theologicæ et veræ charitatis, aut saltem illam virtutem importante; notum enim est illum novatorem et ejus defensores quasi perpetuò decantare istud D. Augustini effatum: *Gratia est inspiratio flagrantissime et luminosissime charitatis* libro de Gratiâ Christi cap. 35, n. 38, notum est famosam ejus assertionem 59 ferre, *omnem amorem creaturæ rationalis aut vitiosam esse cupiditatem, aut veram charitatem*; notum ipsum docere propositionibus 23, 29, 33, 37, etc., *fidem theologicam esse omnium gratiarum primam*, et sine illâ et charitate nihil omninò boni moralis fieri posse. Hinc Jansenius, cui sanè præ cæteris exploratus fuit genuinus Baii sensus, quem ubique extollit et confirmare nititur, solam fidei et veræ charitatis gratiam admisit; nullum, inquit lib. 3 de Statu naturæ lapsæ, cap. 14, *bonum opus, nequidem moraliter, ab humano arbitrio potest fieri nisi per gratiam, non quamlibet* (hæc diligenter attende) *sed fidei liberetur*; et cap. 20, *non potest esse opus bonum* (etiam morale, nullum enim bonum opus agnoscit nisi æternæ vitæ meritorium) *nisi ipsa justitia cœlesti charitate diligatur, et ad Deum ipsum velut ultimum finem referatur, quorum neutrum sine gratiâ et fide perfici potest*. Hinc lib. 3 de Gratiâ Christi cap. 11 docet *fidem esse primam gratiam*. Tandem auctor 101 propositionum utriusque sensis optimè imbutus eandem doctrinam pro virili parte renovavit charitatis gratiam impensè commendando propositionibus 26, 27, 38, 39, 40, et à propositione 44 ad 59.

Atque exinde contigit ut omnes auctores, pontificiis etiam decretis maximè addicti, illud conspirantibus suffragiis confessi fuerint; tres quatuorve duntaxat referemus.

Illustrissimus Suessioniensium episcopus quintâ epistolâ pastorali l. p. n. 135, et 137. hæc observat: « Le système de l'auteur de l'examen théologique (illud accepit à Baio et Jansenio) est que la charité actuelle est l'unique grâce de Jesus-Christ, et qu'il n'y a point de grâces distinguées de la charité que des grâces extérieures; » quod systema refellit auctoritate cardinalis Norisii Vindic. cap. 3, paragrapho 6. Eadem epistolâ p. 3, n. 57, hæc decretoria adjicit: « Les propositions de Baius 25, 27 et 38, sur les actions des infidèles, et le libre arbitre, signifient que ces actions sont de vrais péchés, parce qu'elles ne sont pas rapportées à Dieu connu par la foi, et par le

motif propre de la charité, c'est-à-dire, l'amour de Dieu aimé pour lui-même. » Honoratus Tournely, tract. de Gratiâ, nostram interpretationem his exprimit verbis: « Baius contendit omnia infidelium opera esse peccata, nulloque opus bonum dici posse nisi quod sit ex motivo charitatis veræ et propriè dictæ, quæ actionem vel præcedat, vel comitetur. » Tandem P. Duchesne Historiæ lib. 2, ex propositione Baii 38 — hæc deducit: « Conséquemment les œuvres des infidèles sont des péchés, et les vertus des philosophes sont des vices, et tout précepte devient impossible aux infidèles qui n'ont jamais la grâce; car étant une inspiration de charité, selon ce système, elle ne peut être accordée à ceux qui n'ont pas la foi. »

Concinit dominus de la Chambre in commemorato opere.

His pro altâ mente suâ ritè ponderatis, Bellarminus censuram Baii propositionis non adduxit lib. 5 de Gratiâ et libero Arbitrio cap. 9, ut jam observavimus, ad probandum liberum arbitrium sibi derelictum aliqua opera moraliter bona elicere posse. Cur? nisi quia ipsi persuasum fuit summum pontificem definiisse duntaxat, liberum arbitrium gratiâ veræ charitatis destitutum posse aliqua bona opera producere. Nulla sanè alia hujus facti ratio potest afferri; Bellarminus enim Lovanii docuerat, et quid Baianistæ et eorum adversarii sentirent apprimè erat edoctus, ut testatur P. Duchesne lib. 5. Aliunde lib. 5 de justificatione capitibus 14 et 19, et alibi passim citat Constitutionem Pii V adversus Baium.

Igitur omnes eruditi consentiunt Baium nullam gratiam à verâ charitate diversam admisisse, et ideò in prædictâ propositione voces, *sine Dei adiutorio*, significare gratiam, fidem et charitatem inspirantem, vel eam præcedentem, comitantemve.

Verùm magna inter eos est dissensio, utrum gratia, de quâ Baius in relatâ propositione 28, sit charitas, sive gratia habitualis, an charitas sive gratia actualis. Vasquesius in 1-2. disput. 190, cap. 18, n. 184, et Norisius Vindic. cap. 4, paragrapho 5, postquàm dixerunt propositionem 26, *omnia infidelium opera*, etc. damnatam esse ob censuræ acrimoniam, quia idem exhibet quod 25, *cum Pelagio sentiunt*, etc., addunt eandem assertionem damnatam esse in sensu Baii, qui gratiam sive charitatem habitualement admittebat, non actualem, et ideò intendebat, nullos actus bonos etiam ex Dei

gratiâ fieri ab infidelibus, quia gratiâ habituali destituti nullam habent gratiam; hunc autem Baii sensum probare conantur ex propositione 36: *Omne quod agit peccator vel servus peccati peccatum est*, ejus respectu, inquit, damnata est propositio 26; inde enim sequitur infideles, qui sunt peccatores, in omnibus suis operibus peccare. Quare ille Baii propositiones meritò damnatæ sunt eûm doctrinam continerent proscriptam à concilio Trid. sessione 6, can. 7, et eadem synodus sess. 14, cap. 4, admittit *Spiritus sancti impulsus non adhuc quidem inhabitantis, sed tantum moventis*. Hæc equidem responsio Jansenio accepta est, sed non ideò, inquit, est rejicienda; quidquid enim dixit Jansenius non est falsum et erroneum.

E converso P. Duchesne in quintâ illustratione epist. 7, p. 64 et seq., Honoratus Tournely tom. 2 de Gratiâ, p. 82, et alii existimant Baium nullam admisisse gratiam habituales, sive inhærentem, ab actuali distinctam, et idcirco ipsum in relatis propositionibus intendisse, liberum arbitrium sine gratiâ, sive charitate actuali, nullum opus bonum, etiam morale, producere posse. Hæc, opinor, diversitas opinionum ex Baii doctrinæ obscuritate exorta est. Illam scilicet, ut novatoribus gentile est, densis inspersit tenebris ut facilius et securius posset defendi. Verùm, sive habituales, sive actuales gratiam, seu charitatem designaverit Baius, nihil refert; sensus enim commemoratæ propositionis iste erit: *Liberum arbitrium sine gratiâ habituali vel actuali, quæ sit vera charitas, aut illam pariat, nonnisi ad peccandum valet*; ex quibus malè inferretur liberum arbitrium sine quolibet Dei adjutorio bonum aliquod morale elicere posse. Existit enim speciale Dei adjutorium omninò distinctum ab adjutorio charitatem inspirante, quale est illud quod omnibus infidelibus et impiis à Deo concedi agnoscit Norisius Vindic. cap. 3, paragrapho 6, in fine, præeunte Augustino libro de Naturâ et Gratiâ, cap. 67, quædam scilicet mentis illustrationes, et voluntatis motiones, quibus Deus *miris modis* hominem ad bonum erigit. Hoc adjutorium Jansenio erat exploratum, qui ideò illud explosit modò citato libro 3 de Statu naturæ lapsæ, cap. 14, dicendo: *Nullum bonum opus, nequidem moraliter, ab humano arbitrio potest fieri, nisi per gratiam*, non quamlibet, sed fidei liberetur.

His, ut necesse erat, paululum fusè expositis, repeto et contraho argumentum antea de-

lineatum, et rogo censorem aliosve ipsi patrocinari ut illud diluant. Ecclesia hanc propositionem, *liberum arbitrium sine Dei adjutorio nonnisi ad peccandum valet*, eo duntaxat sensu damnavit, quòd liberum arbitrium sine gratiâ charitatem inspirante, vel charitatem comitante nonnisi ad peccandum valeret; Baii enim sensum duntaxat proscribere voluit; ergo eandem propositionem non perstrinxit eo sensu quòd liberum arbitrium sine gratiâ à charitate distinctâ nonnisi ad peccandum valeret.

Vel si censor maluerit, hoc alterum argumentum deglutendum ipsi amicè porrigimus.

Sedes apostolica, cujus est genuinum Constitutionum, quæ ab ipsâ emanarunt, sensum reterege, pluries declaravit, doctrinam celebris Augustinianorum scholæ, et speciatim cardinalis Norisii, ab adulterino Baii assertionum sensu omninò esse immunem, ut ostensum est; sed Augustiniani, et nominatim Norisius tum in Vindiciis eûm in Janseniani erroris calumniâ sublatâ, constanter et animosè docent liberum arbitrium sine gratiâ à charitate distinctâ nullum prorsus opus bonum morale, etiam facile, elicere posse, ut indubiè non negabit censor; ergo hæc sententia est prorsus aliena à Baii sensu; ergo Sedes apostolica in propositione 27 vel 28, per voces, *sine Dei adjutorio, quamlibet* Dei gratiam non intellexit, sed aliquam duntaxat à Baio nimirum requisitam, id est gratiam charitatis sive habitualis, sive actualis, ut ostendimus.

Sed exquirent fortè nonnulli, *cujus naturæ est ista gratia à charitate diversa et omnibus infidelibus et impiis concessa*? O lepidam et ingeniosi cerebri interrogationem! Clamant adversarii, et meritò quidem, cunctis infidelibus et impiis speciales gratias impertiri ad vincendas graves saltem tentationes, et opera moraliter bona producenda. Illarum gratiarum naturam reserare dignentur, et nos naturam gratiæ ad opus morale faciliè eliciendum necessariæ illicò detegemus. Consulant, si velint, Vasquesium et Dechamps, qui illorum auxiliorum essentiam aperire aggressi sunt; nos à gratiæ præcone edocti, *meliorem esse fidelem ignorantiam quàm temerariam scientiam*, cum eodem universim reponemus, illud auxilium *exheredatorum, sive non Dei filiorum esse proprium*, cujuscumque naturæ sit, libro de patientiâ, cap. 28, et *miris modis in hominum cordibus operari*, lib. 4 ad Bonifacium cap. 19, n. 37, quos ideò, ut optimè observat Norisius Vindic. cap. 3, paragrapho 6, *satius est humili*

silentio venerari quàm curiosâ disputatione perquirere.

Unde illustrissimus Bossuetius, justificationis paragrapho 17, sapientissimè dixit : *Dieu s'est réservé la connaissance de ces secours.* Nihilominus, cum nihil ordinis naturalis possit ad fidem disponere, cogitationes et motiones infidelibus à Deo immissæ videntur supernaturales, utpote indelbitæ et à Spiritu sancto ad fidem et salutem directæ.

Sed, inquiunt, liberum arbitrium illâ etiam gratiâ adjutum, in mente Norisii et aliorum morale etiam opus undequâque bonum operari non potest, cui nimirum nihil desit tum ex parte operis cum ex parte operantis. Etverò, Norisius Vindic. cap. 3, paragrapho 4, dicit velle Augustinum lib. 4 contra Julianum cap. 3, voluntatem etiam solâ fide (theologicâ) dirigî posse ad faciendum opus cum debitâ circumstantiâ relationis in Deum juxta illud Rom. 14 : *Omne quod non est ex fide peccatum est.* Censuit ergo cum Baio et Jansenio, omnes actiones morales referendas esse ad Deum, et vera esse peccata, saltem omissionis, nisi referantur ad Deum aut actu aut virtute ex motivo charitatis propriè dictæ, cujus relationis prorsus incapaces sunt infideles.

Sed hæc objectio, si Norisii sententiam ferit, nostram certè non lædit; licet enim omnes actiones morales ad Deum tanquàm finem ultimum suo modo referri debeant, attamen eorum detestatur systema qui eas ad Deum ex motivo strictè dictæ charitatis in omni circumstantiâ referendas esse contendunt. Hoc enim systema virtutes omnes ad unam reducit charitatem, illas propriis motivis et finibus spoliât, omnemque laudem et pretium ipsis suffuratur contra Apostoli oraculum 1 Cor. 13 : *Nunc manent fides, spes, charitas, etc.*; in his ergo standum est sententiæ Bellarmini cujus laudes celebrat Norisius. « Possunt, inquit lib. 5 de Gratiâ et libero Arbitrio, cap. 9, ethnici etiam sine fide cognoscere Deum esse et curam nostri gerere... proindeque poterunt operari bona moraliter, ut Deo auctori naturæ obediunt... Non est necesse omnia referre in Deum explicitè, sed satis est si opus referatur in bonum finem proximum; tunc enim per se dirigetur in Deum ut in finem ultimum; sicut enim omne agens particulare agit in virtute primi motoris, id est, Dei, sic etiam omnis bonus finis movet in virtute ultimi finis; alioqui non solum infideles, sed etiam fideles et justissimi quique semper peccarent, cum inter ope-

randum de Deo non cogitant, sed operantur quia ratio dictat esse bonum et faciendum. Itaque nisi apponatur circumstantia finis mali, omne opus bonum morale per se refertur in Deum etiamsi auctor operis id non cogitet vel intendat. » Hæc doctissimi viri assertio eò majoris est ponderis quòd Angelici doctoris verbis ex parte constet, ejusque sententiam 2-2, q. 19, a. 6, in c., apertè exprimat.

Verùm accedat vir qui Baï et Jansenii defensoribus magis arrideat dominus Nicole. Tractatu de Gratiâ generali tom. 2, p. 523, 538, etc., ait : « On dit qu'on ne saurait rapporter ses actions à Dieu sans le connaître... On répond que les païens, et même les athées, connaissent Dieu par ces grâces faibles qui produisaient ces consentements imparfaits, mais libres. Ils le pouvaient aussi connaître comme justice, comme loi, sans savoir que cette loi et cette justice fussent Dieu; et on ne voit pas que les complaisances qu'ils avaient en cette loi fussent péché, puisqu'ils l'aimaient pour elle-même. On dit qu'on ne saurait connaître Dieu sans la grâce. On répond que les idées, soit de Dieu comme Dieu, données par des grâces excitantes à la foi, soit de la justice, et de la vérité, et de la loi éternelle, étaient des espèces de grâces excitantes, et que, comme le dit l'auteur que j'ai rapporté (Huygens), et ces idées et ces complaisances, *humanâ ope obtineri non poterant.* On ne peut ici se servir de la raison qu'on allègue d'ordinaire, que ces mouvements étaient mauvais, parce qu'ils n'étaient pas rapportés à Dieu comme fin; car rapporter quelque mouvement à Dieu comme fin, n'est autre chose, selon saint Augustin, que d'aimer l'objet de ce mouvement pour lui-même, ce qui s'appelle *frui*; or, on ne voit pas que les païens n'aient pu avoir une complaisance dans la justice pour elle-même, ou pour Dieu créateur, sans la rapporter à autre chose. Ils ont pu ensuite penser que cette justice les pourrait honorer, et leur servir d'ornement, et en concevoir de la vanité; mais cela suppose toujours la première complaisance en la justice, qui est toute gratuite. Et ainsi c'était toujours une action parfaite et exempte de péché, et le rapport de cette action à une fin de vanité est une nouvelle action qui ne gâte pas la précédente. »

Neque repugnat, ut obtendit obiectio, cardinalis Norisius; ibidem enim seipsum exponit his verbis : « Scio nonnullos asserere Augustinum dixisse illa opera esse peccata quæ in Deum ultimum finem non referuntur positivè, non

autem negativè : v. g., qui continens est ut sibi vel aliis placeat gloriam apud se vel alios quærens peccat, quia inanem gloriam sibi finem illius pudicitiae destinat, et tunc positivè illud opus deviat à Deo tanquam ultimo fine. At si continentiae propositum eliciat motus honestate tantum operis, nec in eodem apud se vel alios gloriat, tunc ille actus negativè Deum non respicit tanquam ultimum finem; ex nullâ tamen parte vitiosus apparet. Hæc doctrina admitti potest (*nota*), præsertim quia S. doctor inde virtutes vitari docuit quod iidem de illis vel apud se vel apud alios gloriam quærerent.) At nemo non videt hanc sententiam à Bellarmini et Nicolii sententiâ non esse alienam, et quadrare in tritam istam scholæ solutionem : *Peccata sunt actiones quæ non sunt ex fide theologicâ contrariè, non privativè.*

Tandem nedum sententia quæ apud Baium per *Dei adiutorium* intelligit gratiam fidei et charitatis theologicæ Sedis apostolicæ adversus Baium decretis repugnet (ut quidam pusillanimes viri sibi fingunt), quinimò illas sanctiones longè feliciter promovet et obfirmat quàm opposita opinio. Etenim Baius et ejus asseclæ decantant *fidem esse primam gratiam*, et ideo omnia infidelium opera esse peccata; sed ista assertio per primam sententiam illicò concidit, cum infideles omnia bona opera sua per gratias à charitate diversas sibi à Deo concessas eliciant; non ita per alteram; posset enim contingere ut infideles nulla alia bona opera producerent quàm facilia (saltem censura propositionis Baii ad aliud credendum non adstringit); quo casu eveniret ut fides theologica prætendi posset *prima gratia*; aut saltem adversus novatores evinci non posset illam non esse primam gratiam. Adde in priori sententiâ multò melius explicari Scripturæ, S. Augustini, et conciliorum, inprimis Arausicani, oracula adversus Semipelagianos; quibus ex causis diximus eandem sententiam Baii et Jansenii sectatoribus ad Ecclesiæ gremium reducendis longè magis videri idoneam, et oppositam stupendum in modum eos exasperare, ac illis in infandâ suâ rebellionem remanendi et Ecclesiæ protervius insultandi ansam subministrare. Cum enim omne Dei auxilium ab operibus moraliter bonis facilibus excludat, et liberum arbitrium sibi derelictum sine omni speciali Dei adiutorio aliquid boni facere posse pronuntiet, illam S. Augustini et veteris Ecclesiæ sensis apertè contrariam esse conclamant, et quidquid egeris, eos ab illâ sententiâ retrahere

nunquam poteris, atque exinde ortum esse existimo istud furibundum Jansenii pronuntiatum lib. 4 de Statu naturæ lapsæ, in titulo capitis 17 : « Nugæ, delirium, insania, error, impietas, contraria Christianorum sensui, Scripturis et fidei, quod infidelium sit ulla vera virtus, vel opera sine peccato, juxta Augustinum et concilium Arausicanum. »

Tandem opera moraliter bona sine gratiâ facta viderentur meritoria *de congruo*; decet enim ut Deus iis magis moveatur quàm si essent indifferentia, sive neque bona vel mala, etc. Hinc meritò dixit dominus de la Chambre in proœmio tractatus super Baii doctrinâ : « La religion et la raison demandent qu'en combattant l'erreur on ménage ceux qui la soutiennent; qu'on ne confonde pas les opinions fausses avec ceux qui en sont les défenseurs, et qu'on ait toujours une grande attention dans le choix des expressions dont on se sert, afin de ne pas révolter ceux qu'on veut éclairer. La douceur est la voie la plus sûre pour ramener à la vérité, et l'on ne peut user de trop de modération lorsqu'on a pour but de faire avouer aux hommes qu'ils se sont trompés. » Quod sapientis viri monitum omninò consonum est consiliis quæ passim suggerit gratiæ præco. « Debent, inquit sermone 557 de laude pacis, aliàs 55, n. 4, Ecclesiæ doctores debent hæreticis litigantibus et conviciantibus christianam exhibere mansuetudinem, quâ de toto terrarum orbe triumphavit Christus, et sese non ad jurgia (ut illi) sed ad preces convertere, quia hæretici etiam fratres sunt, et licet in Ecclesiam blasphemias evomant, rogat Ecclesia ut ferantur. » Et verò dolendi magis sunt quàm detestandi hæretici, cum Apostolo dicente 2 ad Thessal. cap. 3, *non omnium sit fides*. Unde *omni ope laborandum est ut ad Ecclesiæ unitatem redeant*, inquit S. doctor lib. de Utilitate jejunii cap. 9; *quomodo enim tu solves glaciem iniquitatis eorum, si non ardeas flammâ charitatis?* Porro inter conatus, quos ibi commendat S. doctor, existimamus eum non infimum tenere locum quo hæreticis conceditur quidquid Ecclesiæ adversus eos definitiones ipsis concedere sinunt (non semel enim sic sese gessit S. doctor), et quo cum pertinaciâ non defenduntur opiniones, quæ licet catholicæ sint, et etiam communiores, tamen eosdem novatores in furorem adigere et amplius Ecclesiæ odium conjicere possent; qualis profectò est opinio relata de operum moraliter bonorum faciliū sine gratiæ auxilio productione.

SECTIO V. — *Etsi opinio asserens opus moraliter bonum facile sine gratiæ auxilio fieri posse hodiè sit communior, oppositam tamen in scholis proponere et propugnare licet.*

Censor ultimam in nos contorsit criminationem quòd in nostrâ dissertatione sententiam gratiam ad opera moraliter bona facilia exigentem, ut paucis licet probatam theologis, adversæ præhabuerimus; quæ accusatio ut exsuffletur et dispareat, ostendemus 1º, illam sententiam magno doctorum catholicorum suffragio muniri; 2º illam, etsi majori aut æquali quàm altera theologorum approbatione careret, posse tamen absque ullo erroris periculo defendi.

Sententia opera moraliter bona facilia gratiæ tribuens multorum insignium doctorum placitis est consona. — Dies sanè me deliceret si sigillatim recensere vellem magni nominis theologos qui illi sententiæ suum impenderunt patrocinium. Eruditus non latet Augustinianos pro eâ tanquàm pro aris et focus olim decertavisse, et etiam nunc decertare. Ipsis enim semper fuit persuasum hanc esse Patris sui Augustini sententiam, à quâ vel tantillum recedere nefas duxissent. Factum istud testatur Benedictus XIV in Brevi tum anni 1745 cùm anni 1748. Quis autem enumeraverit theologos quos celebris ista schola, eximiorum virorum quolibet ævo ferax, edidit? Cardinalis Norisius Vindic. cap. 5, paragrapho 4, brevitati consensens tres adducere fuit contentus, quia præ cæteris eruditione claruerunt, ut ex nostrâ dissertatione supra delineatâ constat.

Neque soli Augustiniani eidem sententiæ sese devoverunt. Dexteras in illius defensione ipsis porrexerunt quàmplurimi ex aliis Ordinibus doctissimi theologî. Istud iterùm factum refert testis omni exceptione major Benedictus XIV initio Brevis anni 1748 ad magnum Hispanæ inquisitionis præsidem. « Ex proscriptio- ne, inquit, (doctrinæ Norisii) unitas Ecclesiæ Hispaniæ scinderetur obstrepentibus Augustiniani ordinis alumnis, obstrepentibus aliis viris doctis..... partium studio non abreptis, paratisque ad assumendam auctoris defensionem non incogniti, non gregarii, sed litterarum sui temporis facilè principis, et eo solo literaturæ ecclesiasticæ et profanæ meritò sacro Cardinalium collegio adscripti. » Etverò plures protulit Vasquesius loco antea citato. Paucos tantùm referam, quorum agmen claudet et illustrabit splendidissimum Ecclesiæ gallicanæ lumen, quin et novissimis hisce temporibus totius regni decus et ornamentum

Meldensium episcopus, qui solus sufficeret ad auctoritatem isti sententiæ conciliandam.

Petrus Soto Dominicanus, insignis fuit theologus, *cujus mors* (21 aprilis anno 1502), inquit cardinalis Pallavicinus, *conjuncta cum perfecto religiosæ pietatis exemplo, summopere displicuit concilio* (Tridentino), *cui visum est relinqui in infaustâ caligine, ademptis sibi in omni genere quibusdam è suis magnis luminibus.* Is autem, fatente ipso P. Duchesne, lib. 1 Hist. p. 21, non probavit prætensam censuram Sorbonæ anni 1560 in 4 Baïi propositionem inter 18, quod sanè ejus mentem ita in præsentî quæstione patefacit, ut nullo alio testimonio opus sit.

Joannes Capreolus, Ordinis Fratrum Prædicatorum celebris theologus, *qui*, inquit P. Alexander in historiâ seculi XV, *principis Thomistarum nomen promeritus est*, in 2 Sent. distinct. 28, Bellarmino dicente lib. 5 de Gratiâ et libero Arbitrio cap. 4, *Gregorium Arminensem super istâ quæstione secutus est.*

Ambrosius Catharinus, alter Familiæ Dominicanæ doctor, et concilii Trid. theologus idem sensit, teste Gregorio de Rhodes T. 2 de necessitate gratiæ.

Marsilius d'Enghen nulli religioso Ordini, ut videtur, mancipatus, referente Bellarmino citato lib. 6 de Gratiâ et libero Arbitrio cap. 4, idem censuit.

P. Macedo ex Ordine Fratrum Minorum in Cortinâ D. Augustini q. 2 de Necessitate gratiæ, hanc defendit opinionem, et quidem *doctissimè*, inquit Norisius Vindic. cap. 3, paragrapho 4.

Eidem opinioni suffragati sunt è Molinistarum Ordine præter Vasquesium et alios, Ripalda celebris inter recentiores theologus, qui scripsit adversus Baium, et disput. 20, sectione 6, n. 25, apud Norisium ait: *Rectè dicitur voluntatem in hoc ordine providentiæ destitutam auxilio gratiæ, suisque viribus relictam, solum posse superbiam et peccatum*; deinde adducit textum Augustini supra relatam, *liberum arbitrium desertum à divino adjutorio, etc.*; quin et Franciscus Toletus inter ejusdem sententiæ patronos numerari potest; referente enim Vasquesio, *testatus est, et propriâ manu subscripsit*, plures è Baïi propositionibus *ob acerbiteriam duntaxat censuræ fuisse damnatas*, et ideò sublatâ censurâ posse quoad doctrinam propugnari.

Verùm, aliis prætermisissis, accedat doctissimus Bossuetius, qui, ut D. Augustini operum

lectioni sedulo et fructuose incubuit, ita ejus doctrinæ acerrimus fuit defensor. Is autem apud dominum Languet 3 parte 3 epist. pastorali n. 62, justificationis cap. 19, p. 78 sic loquitur : *L'homme n'a de lui qu'ignorance, mensonge, aveuglement et péché; tout ce qui est en lui, ou est cela, ou y aboutit*. Hæc sanè exprimere videntur canonem 22 concilii Arausicani *nemo habet de suo* (id est, sine gratiâ impediēte ne cū actus honestos elicit apud semetipsum inani complacentiâ turgescat), *nisi mendacium et peccatum*; aliud enim non spirant voces, *ou y aboutit*, quas addidit eruditus præsul, ut significaret infidelem qui honestè operatur, v. g., eleemosynam pauperi erogat, posse cū ejus mens aliò à novo objecto illicò trahitur apud seipsum jactantiâ per actum reflexum non titillari, quo casu ejus actus ex gratiæ tamen beneficio non est peccatum; quod cū per accidens contingat, illustrissimus vir post generalem et indefinitam assertionem, *hominem nempe sibi soli derelictum non habere nisi ignorantiam* (in moralibus saltem), *mendacium et peccatum, et quidquid in ipso est id esse exceptionem* addidit, *ou y aboutit*. Eximius videlicet pontifex Augustini sententiam, quam Norisius Vindic. cap. 3, paragrapho 4, eleganter et solidè exposuerat, patefacere voluit; docet enim passim actus bonos infidelis statim inanis complacentiæ fine vitari, nisi subveniat Deus. Quærenti, v. g., Julianò, *si gentilis nudum operuerit, numquid quia non est ex fide, peccatum est?* Respondet lib. 4, cap. 3 : *Prorsus in quantum non est ex fide* (id est, propter pravam intentionem fidei contrarium est), *peccatum est, non quia per seipsum factum, quod est nudum operire, peccatum est, sed de tali opere non in Domino gloriari solus impius negat esse peccatum*. Item docet infidelem, etiā cū actum virtutis ob solam ipsius honestatem tanquā finem proximum elicit, philautiæ vitio, quasi subito inquinari, nisi impediatur gratia. Legi possunt quæ hanc in rem præclare dixit lib. 4 contra Julianum cap. 3, lib. 19 de Civitate Dei cap. 25, etc. Hinc Norisius mox citato loco meritò dixit : *Per accidens contingit ut mens infidelis eleemosynam pauperi dantis, cujus mens subito aliò avocatur, in se non gloriatur* (id est, seipsam inordinatè non diligit); « nam agens morale debet considerare an rectè operatum sit, an optimè se habeat erga suum finem ex illà actione; quæ quidem considerans amat suum opus ac in seipso gloriatur. Censeo tamen hæc opera bona non fuisse facta ab infi-

delibus suis ipsorum viribus derelictis, sed præmotis specialibus divinæ gratiæ auxiliis, quibus fortè aliquando factum est ut bonè operantes novo proposito objecto de bono opere minimè gloriarentur. Etenim, cū adeò facilis, imò inevitabilis sit casus ab actu virtutis in philautiam, divinæ gratiæ fuit quoties infideles nullā ex opere bono superbiā intumescere. Amor quippe sui (inordinatus) virtutum omnium venenum est solius divinæ gratiæ antidoto expellendum. »

Censor in suo Codicillo unum Bossuetii testimonium in aleam misit, quod certè ad rem non pertinet; refellit enim, et quidem meritò, vir insignis Protestantes unius alteriusve theologi catholici privatam opinionem allegantes; v. g., Ambrosii Catharini circa naturam characteris baptismi in animā impressi (quem dixit denominationem duntaxat externam sicut est denominatio doctoratûs). Quid autem hæc argumentatio connexionis habet cum præsentī sententiā pro quā stant integra Augustinianorum schola, et plures alii doctissimi viri, quam non damnavit Ecclesia, imò damnari expressè prohibuit?

Hic sibi vindicare solent D. Thomam 1-2, q. 109, a. 2, in c., et alibi ubi ait : « Potest homo lapsus per virtutem naturæ aliquod bonum particulare agere, sicut ædificare domos, plantare vineas, et alia ejusmodi. » Articulo 5 : « Potest facere opera perducunt ad bonum aliquod homini connaturale, sicut laborare in agro, bibere, manducare, habere amicum, ut Augustinus dicit lib. 3 Hypognosticon, cap. 4. » At genuina D. Thomæ super hæc quæstione sententia clarè non innotescit. Non pauci enim eruditī censent S. doctorem ibi disserere de bono naturali moraliter, quam expositionem firmare videntur quæ adducit exempla, sicut ædificare domos, plantare vineas, et alia opera designata in dicto Hypognosticon libro cujus Augustinum auctorem esse falsò existimavit. Etverò, nihil aliud, inquit, docere voluit quàm quod Augustinus docuit, siquidem illum citat; at S. Augustinus omninò alienus est ab istà sententiā, ut ostendimus. Deinde, si hic opera moralia indicare voluisset, cur recensisset opera bona naturaliter, *ut ædificare domos, pecora nutrire, artes mechanicas discere, velle habere indumenta, velle manducare, bibere, cæteraque* relata cap. 4, lib. 3 Hypognosticon? Cur non dixit, *sicut honorare parentes, eleemosynam pauperi impertire, Deum ut auctorem naturæ imperfectè diligere, leves tentationes su-*

perare, et alia quæ sine gratiâ fieri posse docent adversarii? Sed quidquid sit de D. Thomæ mente, meritò dixit Jansenius *ipsum magnâ duntaxat ex parte esse contractum Augustinum*; non rarò enim à S. doctoris placitis recessit; v. g., cum docuit infantes sine baptismo morientes ignis pœnæ nullatenus esse obnoxios, indubiè quia S. Augustini sententiam non noverat; *fontes enim*, inquit P. Alexander in historiâ seculi quinti, *ob penuriam librorum consulere non potuerat*; paucos veterum Patrum codices penès se habebat, eorum testimonia excerpterat, ut plurimum, ex glossâ ordinariâ, ex Gratiani decreto, et aliis, qui ea (parùm accurate) collegerant; tanta ejus tempore erat librorum penuria ut homilias D. Chrysostomi in Matthæum dono sibi dari optaret, illudque urbe Parisiensi pluris æstimaret munus. Unde Aristotelicis libris et dialecticis rationibus concinandis pro hujus seculi genio intentus multa asseruit quæ nemo probare tenetur. Sic ergo Estius, Sylvius, et multi alii auctores, qui hic adversario favent, D. Thomam deserunt, ubi quæstio est de pœnis infantium sine baptismo defunctorum, aut etiam de sacramenti Matrimonii ministro, ita nihil vetaret hic S. doctorem deserere si nobis adversaretur.

Censor sibi vindicavit celebrem Lemos; verùm quidquid sit de ejus sententiâ, ostendere debuisset insignem illum Thomistam censuisse quam hic defendimus sententiam, *liberè in Scholis propugnari non posse, esse falsam, erroneam, Baianam*; hoc enim solum inter nos controvertitur.

Sententia opera moraliter bona facilia gratiæ tribuens, etsi majori aut æquali, quàm opposita, Theologorum approbatione careret, meritò tamen defendi posset. — « Theologorum scholasticorum, etiam multorum auctoritas, inquit Canus lib. 8, cap. 4, si alii contra pugnant viri docti, non plus valet ad faciendam fidem, quàm vel ratio ipsorum, vel gravior etiam auctoritas comprobârit; videlicet in scholasticâ disputatione plurium auctoritas Theologum obruere non debet; sed si paucos viros modò graves secum habet, poterit sanè adversus plurimos stare; non enim hæc numero judicantur sed pondere. » Ad hujus regulæ amussim si expendatur censoris argumentum quàm citò evanescet! Hic quippe docti viri pugnant contra multos; istorum ergo auctoritas non plus valet quàm ratio ipsorum, aut gravior auctoritas quam opponunt, at graviorem sanè non opponunt auctoritatem, cum Scripturæ, D. Au-

gustino, et veteris Ecclesiæ oraculis contradicere videantur; nec maximi roboris rationibus nituntur, ut ostensum est. Hinc ut in re tam certâ et perspicuâ, de quâ inter omnes convenit, alia omittam exempla, licet in scholis propugnare parvulos sine baptismo è vivis ereptos, ignis etiam supplicio affici, licet hæc opinio à D. Thomæ tempore non sit communis, et omnibus ferè catechismis adversetur. Cur? Quia viri docti, et maximè catholici, inter quos Dionysius Petavius, contra adversam sententiam militant tanquàm planè repugnantem Scripturæ sacræ, Patrum, inprimis D. Augustini et ejus discipulorum placitis, et conciliorum etiam recentiorum, v. g., Florentini, decretis, etc.

EPILOGUS.—Demonstratum, ni fallor, manet, si minùs liberum arbitrium speciali Dei auxilio destitutum aliquid boni moralis, etiam facilis, edere non posse, etiam saltem sententiam Baianismi prorsus esse puram, et omninò catholicam, et ideò in scholis liberè proponi et defendi posse. Quamobrem censorum judicium quod in eam ferretur non solum temerarium esset et inconsideratum, sed et injuriosum Sedi apostolicæ, sacræ Inquisitioni romanæ, celeberrimæ Augustinianorum scholæ, et multis præstantissimis aliorum Ordinum theologis, ut ex dictis abundè constat. Fatale insuper detrimentum inferret cœlestis scholæ libertati divinæ scientiæ matri et nutrici, *quam*, inquit Benedictus XIV in Brevi anni 1748, *perturbare nulli superiori ecclesiastico licet.*

Priusquàm autem huic dissertationi ultimam manum admoveo, quam spopondi sententiam referam nonnullorum doctorum theologorum, qui sacri Ordinis Parisiensis splendorem per totum catholicum orbem coruscantem exquisitâ eruditione, singulari pietate, et eximiis operibus suis, si non amplificaverunt, foverunt saltem et conservaverunt.

RÉPONSE DE M. LEGRAND,

Docteur de Sorbonne.

Les docteurs qui ont lu avec attention l'extrait ci-dessus des cahiers d'un professeur de théologie, avec la lettre dans laquelle M. le vicedoyen de la Faculté de théologie de Caen fait principalement deux questions. La première si le sentiment selon lequel l'homme dans l'état présent sans la grâce extrinsèquement surnaturelle, comme s'explique Vasquez, ou même sans une grâce véritablement surnaturelle ne peut vaincre des tentations, quelque légères qu'elles soient, ou faire dans les

choses les plus faciles, quelque action moralement bonne, de sorte qu'il ne commette aucun péché, même de retour sur lui-même, et d'une vaine complaisance, savoir si ce premier sentiment est condamné par l'Eglise, ou par quelque décret des souverains pontifes. La seconde, si le professeur, qui a dicté les cahiers d'où est copié l'extrait ci-dessus, qui enseigne que ce même sentiment est laissé à la liberté des écoles catholiques, et qui appelle de grands, de célèbres et de savants théologiens, plusieurs de ceux qui le soutiennent, mérite d'être repris et blâmé.

A la première de ces questions lesdits docteurs répondent que ce sentiment n'est point condamné, et qu'il faut, pour s'imaginer qu'il est condamné, interpréter d'une manière outrée et dangereuse quelque une des propositions de Baius et de Quesnel condamnées avec raison dans les bulles contre Baius et dans celle de Clément XI. Ces propositions signifient que, sans la grâce efficace, et même sans une grâce efficace qui soit une inspiration de quelque amour de charité, proprement dites, l'homme dans l'état présent ne peut que pécher. Il n'y a personne au moins qui ne doive avouer qu'il est très permis de n'entendre ces propositions de Baius et des réflexions morales que dans ce sens là, qui est véritablement celui des auteurs, et qui est clairement indiqué par d'autres de leurs propositions, auxquelles il est naturel et nécessaire d'avoir recours. Par exemple, quand il est dit que, sans la grâce du libérateur, l'homme n'est libre que pour pécher, il faut voir ce que l'auteur des propositions entend par la grâce du libérateur, ou de Jésus-Christ, et on verra par celles où il l'explique qu'il n'en reconnaît point d'autre que la grâce efficace de charité, proprement dite. On pourrait ajouter bien des raisons et des autorités pour montrer que ce sentiment est très permis. Le professeur a eu le soin de citer le Bref de Benoît XIV à l'inquisiteur d'Espagne en faveur du cardinal Noris ; mais il serait inutile de s'arrêter à prouver ce qui n'a pas besoin de preuves, et ne consiste qu'en un fait très manifeste et indubitable. Il est donc certain que ce sentiment n'a point été condamné par l'Eglise, et qu'il est laissé par la même Eglise à la liberté des écoles. En effet, les papes ont déclaré eux-mêmes que le Saint-Siège n'avait jamais voulu le condamner, nommément Clément XI, qui s'est expliqué si clairement sur la liberté laissée aux écoles catholiques d'ensei-

igner les opinions qu'elles soutenaient avant sa bulle, parmi lesquelles on doit compter ce sentiment soutenu par nombre de théologiens, même Jésuites, comme Vasquez, Ripalda, etc., qui eux-mêmes ont écrit contre Baius.

A la seconde question, le professeur n'est point blâmable ni répréhensible. Il a loué comme savants et célèbres théologiens des théologiens qui sont effectivement très-savants et très-célestes, et il a expliqué un point que plusieurs ignoraient, puisqu'il s'est sans doute trouvé des personnes qui ont trouvé à redire à ses cahiers là-dessus, et il était néanmoins très utile à ces personnes, surtout si elles sont en place, de ne pas ignorer ces sortes d'objets qui regardent ce qui est laissé ou non laissé par l'Eglise à la liberté des écoles. On sent assez combien ceux qui n'en sont pas instruits sont sujets à de fausses démarches, qui peuvent avoir quelquefois des suites fâcheuses. Délivré à Paris le 29 novembre 1773. — Signé — LEGRAND.

LETTRE de M. le syndic de la faculté de théologie de Paris à M. Le Clerc de Beauberon, vice-doyen de celle de Caen, en lui envoyant la réponse ci-dessus.

J'ai lu, Monsieur, et j'ai communiqué à quelques-uns de nos docteurs de la Faculté de théologie l'extrait des cahiers que vous m'avez adressé. Il paraît, par cet extrait, que le professeur s'est uniquement borné à exposer les différentes opinions des théologiens, sans en embrasser aucune, sur la célèbre et importante question, *an absque gratiâ elici possit bonum opus morale, saltem facile, et cum nulla gravis obstat tentatio ?*

Vous demandez d'abord, Monsieur, si le sentiment de Vasquez, qui a soutenu la négative sur cette question, a été condamné par l'Eglise, et proscrit par les bulles des souverains pontifes contre Baius et Quesnel.

La réponse à cette première question est facile. Il est certain que les papes, en condamnant les erreurs de Baius et de Quesnel, n'ont point eu intention de donner aucune atteinte aux opinions théologiques qui se soutenaient alors, et qui se sont soutenues depuis dans les écoles. Clément XI s'en est expliqué lui-même formellement. Personne n'ignore que le cardinal Noris, entre autres, a adopté l'opinion de Vasquez, ainsi qu'un grand nombre d'autres célèbres théologiens ; personne n'ignore non plus que les ouvrages de ce savant cardinal, déferés plusieurs fois à l'exa-

men du Saint-Siège, en sont toujours sortis exempts de toute censure, de toute flétrissure. On sait même que le savant pape Benoît XIV en a pris la défense dans son Bref au grand inquisiteur d'Espagne. Si l'opinion de Vasquez se trouvait proscrite par les condamnations portées contre Baius et Quesnel, comment pourrait-il se faire que la même opinion serait exempte de toute censure dans le cardinal Noris ? Ce serait donc mal interpréter les dernières décisions du Saint-Siège ; ce serait leur donner une extension qu'elles n'ont point, si parmi les erreurs qu'elles condamnent on voulait comprendre des opinions qui ont toujours été abandonnées à la libre dispute des écoles.

La seconde question que vous nous proposez, et par laquelle vous demandez si l'auteur de l'extrait ci-dessus qui a fait l'éloge de quelques théologiens qui soutiennent l'opinion de Vasquez mérite d'être blâmé et repris, n'a pas plus de difficulté. Non seulement un professeur en théologie n'est ni coupable ni répréhensible lorsqu'il expose les différentes opinions des théologiens sur une question épineuse et importante, il manquerait même à son devoir s'il omettait de le faire. Ne pas dissimuler que telle opinion a été soutenue par de savants et de graves théologiens, c'est rendre témoignage à la vérité, quand le fait est également vrai et notoire. Après que Benoît XIV a fait si hautement l'éloge du cardinal Noris dans plusieurs endroits de ses savants ouvrages, il serait aussi ridicule que peu équitable de faire un crime à un théologien parce qu'il a cru pouvoir suivre l'exemple d'un pape d'une si vaste érudition.

Voilà, Monsieur, ce que pensent les théologiens de Sorbonne, auxquels j'ai communiqué l'extrait que vous m'avez envoyé sur les deux questions que vous proposez. Il n'y a qu'un d'eux qui a mis par écrit et signé son sentiment, que je vous envoie, savoir M. Legrand. Les autres se sont contentés de me faire part de leurs avis de vive voix.

Délibéré à Paris le 14 décembre 1773. Signé RIBALLIER, Syndic de la faculté de théologie.

§ 2. *An gratia sit necessaria ad vitanda omnia omnino peccata ?*

Homo lapsus omnia peccata mortalia sine gratiâ vitare nequit. Scilicet adversus Pelagianos sancitum fuit gratiam ad omnia Dei mandata servanda, et tentationes, graves saltem, superandas esse necessariam. Idem homo sine gratiâ sanctificante per notabile tempus ab om-

ni peccato lethali cum ordinariis gratiæ auxiliis abstinere non potest, Joannis cap. 15, v. 6. Hinc Augustinus in libris de spiritu et litterâ, de gratiâ Christi, de correptione et gratiâ, etc., ad legem servandam exigit gratiam ab iniquitate liberantem, et ideò justificantem. Scilicet, ut arguunt Patres, imprimis D. Gregorius Magnus, *peccatum, quod per pœnitentiam non deletur, suo pondere ad aliud trahit, et ad resistendum concupiscentiæ et diabolo necessarium est speciale auxilium quod inimicis suis ordinariè non concedit Deus.* Verùm ab omnibus delictis, etiam venialibus, seorsim sive distributivè spectatis, cum ordinariis gratiæ auxiliis potest abstinere, aliàs ipsi in culpam immeritò imputarentur. Quamobrem quæritur duntaxat an homo lapsus, etiam justus, possit et debeat cum ordinariis gratiæ auxiliis toto vitæ curriculo ab omni peccato, etiam veniali abstinere.

Affirmaverunt Pelagiani, teste D. Hieronymo epistolâ ad Ctesiphontem, et Augustino libro de hæresibus, hæresi 88, etc. Adversus eos sit

CONCLUSIO.—Ipse justus cum ordinariis gratiæ auxiliis omnia omnino peccata, etiam venialia, quæ scilicet toto vitæ tempore occurrunt cavenda, vitare non potest. Est de fide.

Dico cum ordinariis gratiæ auxiliis ; certum nimirum est ex speciali Dei privilegio omnia peccata venialia vitari posse ; quæ prærogativa concessa fuit Dei Genitrici, ut docet concilium Trid. sessione 6, canone 23, præeunte D. Augustino libro de naturâ et gratiâ, cap. 36, n. 42 : *De sanctâ Virgine Mariâ, inquit, propter honorem Domini, nullam prorsus, cum de peccatis agitur, haberi volo questionem.*

Probatur variis Scripturæ textibus quos Augustinus Pelagianis objccit : *Non est homo qui non peccet*, 2 Paralipomenon cap. 6.... *Septies cadet justus*, id est, pluries, Proverbiorum cap. 24... *Dimitte nobis debita nostra*, Matthæi cap. 6... *Si dixerimus quoniam peccatum non habemus, ipsi nos seducimus, et veritas in nobis non est*, 1 Joannis cap. 1. Ultimum locum D. Augustinus citato libro de naturâ et gratiâ cap. 34, n. 38, de sanctis exponit, qui non ex modestiâ tantum et humilitate (ut reponebant Pelagiani), sed ex veritate se peccatores profiteri debent ; quod et definivit concilium Milevitanum canone 6 his verbis : *Placuit quod ait S. Joannes, si dixerimus quia peccatum, etc. quisquis sic accipiendum putaverit ut dicat propter humilitatem dici nos habere peccatum, non quia verè ita est, anathema sit ; hunc canonem renovavit concilium*

ium Trid. sessione 6, cap. 11, et canone 23... Accedit ratio quam asserit D. Thomas 1-2, q. 109, art. 8, deducta ex invecità per peccatum infirmitate naturæ humanæ, quæ licet cuilibet peccato veniali vitando per gratiam relativè proportionatas habeat vires, eorum tamen omnium multitudinem ob insitum torporem sine extraordinario Dei auxilio declinare nequit ad eum ferè modum quo fortissimus miles occurrenti hosti profligando par est, etsi hostium cuneo superando impar sit. Hæc ratio eò majoris est ponderis quòd affectus voluntatis ad Deum gratiâ productus, tametsi peccato veniali retardatus, cum eo tamen subsistit; inde enim elucet hominem per gratiam non ita promptum ellici ad vitanda peccata venialia, superatis eorum incitamentis, sicut ad vitanda mortalia, quæ aliunde longè pauciora sunt quàm venialia.

Objiciebant 1º Pelagiani varios Scripturæ textus. Matthæi cap. 5, ait Christus: *Estote perfecti sicut Pater vester cælestis perfectus est...* Lucæ cap. 1, Zacharias et Elisabeth dicuntur *justi... incedentes in omnibus mandatis et justificationibus sine querelâ...* 2 ad Tim. cap. 4, ait Apostolus *sibi*, utpote sine peccato, *in reliquo repositum esse justitiæ coronam....* 1 Joannis cap. 3, dicitur, *eum, qui natus est ex Deo, qualis est justus, non posse peccare*, etc.; ergo. — Resp. 1º hæc ad summum probare nonnullos ex speciali privilegio ab omni peccato veniali abstinuissse. Verùm, quoniam D. Augustinus hanc prærogativam in solâ B. Virgine agnoscit, ideò cum S. Doctore resp. 2º, Matthæi 5 præcipi homini non omne perfectionis genus, sed illud duntaxat, cujus in hæc vitâ capax est, et ideò vocem *sicut* aut adæquatè non esse sumendam, aut adumbrare alterius vitæ perfectionem.... Lucæ 1 Zachariam et Elisabeth non fuisse reipsâ et coram Deo omnis peccati puros, sed *gravis* tantùm quod in querelam venire poterat.... 2 ad Tim. 4, Apostolum rem futuram perinde ac si esset præsens commemorâsse.... 1 Joannis 3, sermonem esse aut de nativitate ex Deo perfectâ in cælesti patriâ, non de inchoatâ in hæc vitâ, aut de impotentiâ peccandi *in sensu composito*, ita ut significaverit Joannes hominem gratiâ sanctificante, quæ est semen Dei, præditum, et ex illâ operantem peccare non posse, non *in sensu diviso*, quasi justus non posset peccare et justitiam amittere. Quanquam fortassis intendit justum ob abundantem gratiam difficilè peccare.

Objiciebant 2º, D. Ambrosium in cap. 1 Lucæ dicentem posse hominem *in hæc vitâ sine peccato et querelâ vivere*. — Resp. cum Augustino libro de Gratiâ Christi cap. 48 et 49, aut Ambrosium loqui de peccato gravi, quod *in querelam* venire potest, ut diximus, aut si Zachariam et Elisabeth in hæc vitâ *perfectæ* justitiæ esse voluit, sententiam hanc correxisse cum scripsit in Isaiam, *neminem in hæc vitâ esse sine peccato*.

Præter ista Pelagianorum argumenta hæc ex ratione possunt objici. Primum. Si justiper gratiam cuncta peccata venialia vitare non possent, Deus erga eos sese durè gereret; absurdum consequens; ergo. — Resp. Nego majorem. Id enim oritur, ut diximus, ex infirmitate naturæ humanæ per peccatum inditâ; id aliunde ipsis prodest ad Dei timoris, humilitatis, et aliarum virtutum exercitium, nec multum nocet, cum illa peccata Dei amicitia non privent.

Secundum. Nonne justus gratiæ ad mendacium, v. g., vitandum, oblata ut potest consentiendo novum à Deo obtinebit auxilium ad subsequens peccatum veniale non committendum? et sic de cæteris; ergo. — Resp. justum gratiæ pro viribus consentiendo novum reipsâ à Deo accipere auxilium, nihilo tamen minus non potest sine speciali auxilio vitare omnia peccata venialia propter innatam infirmitatem; pluries nempe simul cavenda interdum occurrunt, aut sibi continuè et immediatè succedunt, et ideò specialis gratia requiritur ad impediendum justis his in circumstantiis lapsus.

Tertium. Deus præcipit ut justus omnia peccata venialia caveat; sed id in nostrâ sententiâ est impossibile; ergo. — Resp. Deum præcipere ut justus omnia peccata venialia *distributivè*, id est, singula *successivè* et in particulari vitet, non *collectivè simul*, id est, omnia omnino, aut *collectivè distributivè*, id est, singula *ad se invicem et ad totum comparata*; cum scilicet homo istud præ infirmitate non possit, Deus id pro suâ justitiâ non jubet. Quamobrem homo generali quâdam et indeterminatâ necessitate ad peccata venialia committenda adigitur, non speciali et determinatâ ad illa et illa peccata singula et in particulari agenda.

Neque reponas justum, si quodlibet peccatum *in particulari* vitare potest, id etiam posse *in communi*; non enim valet consecutio à distributivo ad collectivum, ubi impossibilitas ipsi collectioni annectitur; v. g., non valeret istud ratiocinium: Potuit Moyses occidere hunc vel

illum Ægyptium; ergo potuit omnes Ægyptios occidere; at in justo, ut diximus, impotentia omnia peccata venialia non committendi ipsi illorum peccatorum collectioni illigatur, non distributioni, cum justus ab omni peccato veniali aliquandò absteineat, et nullum indicari possit instans particulare et determinatum in quo necessariè peccet.

§ 3. *An homo sine gratiâ possit ad gratiam se præparare?*

Placuit Pelagianis, ut diximus, bonis naturæ operibus gratiam *de condigno*, id est, *ex debito*, à Deo rependi, quæ gratia ad bonum non *simpliciter*, sed *facilius* operandum necessaria foret; Semipelagianis verò et Juliano gratiam tum fidei cum justificantem piis quibusdam conatibus et studio sanitatis recuperandæ *ex congruo*, sive ex decentiâ, deberi, adeoque posse hominem per opera moraliter bona ex merito *de congruo* obtinere primam gratiam, et eo modo se ad illam præparare.

Nonnulli veteres scholastici, de quibus Estius in 2 Sent. distinct. 26, paragrapho 34, ultimam sententiam tenuisse videntur rati Patres adversus commemoratos hæreticos intendisse duntaxat gratiam bonis naturæ operibus non deberi *ex condigno*.

CONCLUSIO. — Nullo prorsus modo homo per solas naturæ vires se ad gratiam sive actualement sive habitualement præparare potest.

Hæc assertio non solum perstringit Pelagianos et Semipelagianos, sed etiam quosdam recentiores, quos clerus Gallicanus censurâ confixit anno 1700 quòd assererent axioma, *facienti quod in se est Deus non denegat gratiam*, etiam adumbrare ex parte Dei obligationem dandi gratiam facienti quod in se est viribus quoque naturæ, et illam obligationem non fundari iquidem in merito sive de condigno, sive de congruo operum moraliter bonorum, sed in pacto inter Christum et cœlestem Patrem inito dandi gratiam propter merita Christi respiciendo naturalia opera ut purum terminum, non ut meritum ullum, aut rigorosam conditionem; quæ doctrina (inquit clerus) Semipelagianismum instaurat, mutatis tantum vocibus, et pactum introducit commentitium, et Scripturæ et traditioni contrarium. » Ex quibus patet opera moralia naturalis ordinis non esse *motivum*, *causam*, vel *regulam*, vel *occasionem*, vel *conditionem*, quâ Deus ex certâ lege vel pacto ad gratiam conferendam moveatur, et excitetur, et idcirco Deum homini

hæc opera elicenti pro libito gratiam concedere vel non concedere, et celebre axioma relatum, *facienti quod in se est*, etc., intelligendum esse de eo qui facit quod in se est ex gratiæ adjutorio, non ex solis naturæ viribus.

Probatur assertio iis Scripturæ et traditionis testimoniis, quibus antea evicimus nullum prorsus opus saltem ad vitam æternam, cujus gratia semen est, conducentem, elici posse ex solis naturæ viribus, sive sine gratiâ strictè acceptâ. Accedit ratio; omnis nempe dispositio formæ, ad quam præparat, specie et proportionem par esse debet; at tales non sunt actus merè naturales respectu gratiæ, quæ est entitativè supernaturalis; ergo, etc.

Cæterum, si D. Thomas in quæstionibus de veritate, et in libros Sententiarum aliquid huic doctrinæ contrarium docere visus est, illud revocavit in Summâ: consuli poterit Estius in 2 Sent. dist. 26, paragrapho 35. Sanè, cum S. doctor in 3 dist. 25, q. 2, et quæstione 14 de Veritate art. 11 ad 1, dixit, « certissimè tenendum esse Deum homini ductum naturalis rationis sequenti in appetitu boni et fugâ malî vel per internam revelationem revelaturum esse ad credendum necessaria, vel ad eum misurum esse prædicatorem sicut misit Petrum ad Cornelium, » cum, inquam, hæc dixit, quæ in Summâ non confirmantur, vel locutus est de externâ protectionis gratiâ quam Deus isti homini liberè impendit, vel intendit Deum isti certò gratiam *ex bonitate* esse impertiturum, etsi ad id nullo prorsus modo teneatur.

ARTICULUS V.

An et quæ gratia necessaria sit ad perseverandum in justitiâ?

Perseverantiæ donum *magnum est et speciale Dei donum* sive munus, inquit concilium Trid. sess. 6, can. 16 et 22, præeunte D. Augustino lib. de Correctione et gratiâ cap. 6. Unde S. doctor specialem de illo dono instituit dissertationem, licet superflua videretur post ea quæ adversus Pelagianos de gratiâ ad omnia et singula salutis opera et divinorum mandatorum observationem necessitate disseruerat.

Perseverantia hic accipitur pro quâdam in gratiâ habituali, sive sanctificante permanentiâ.

Hæc perseverantia duplex secerni potest, una *secundum quid*, sive, ut loquitur Augustinus libro de Dono perseverantiæ cap. 1, n. 1, *alicujus temporis*, quâ quis per vitæ partem duntaxat in justitiâ permanet.... Alia *simplex*

(vitæ) *perseveratur in Christo*. Hujus perseverantiæ donum, inquit S. doctor ibidem cap. 6, n. 10, *suppliciter emereri potest* (de congruo) sed cum datum fuerit *amitti contumaciter non potest*; unde in Augustini mente vera perseverantia ea sola est ex qua homo nunquam excidit, et hæc est de qua disserit in hoc et aliis libris adversus Semipelagianos.

Perseverantia *simplex et absoluta* à recentioribus non quidem ex verbis sed ex sensu D. Augustini duplex distinguitur, *activa et afficiens*, quæ justus bona opera usque ad mortem elicit, et *merè passiva et formalis*, quæ consistit in actuali unione gratiæ sanctificantis cum morte. « Prior, inquit Estius in 2 Sent. distinct. 26, paragrapho 42, dicitur esse in actu imperfecto, posterior in actu perfecto et consummato, cum perseverantia finalis dici non possit perfecta et consummata antequam perveniatur ad finem. »

Perseverantia simplex et absoluta rursus duplici modo potest considerari: uno, cum adultus, v. g., post acceptam gratiam sanctificantem, aut infans post receptum baptismum statim moritur; altero, cum quis post adeptam gratiam habitualement aliquandiu vivit, et usque ad mortem perseverat in fide et amore Dei legem ejus implendo. De perseverantiâ sub priore respectu non disseremus; tervò manifestum est illis infantibus aut adultis nullum *intrinsicum* auxilium esse necessarium ut perseverent. Dico *intrinsicum*; iis enim, parvulis præsertim, saltem plerumque externus impenditur favor cum è vitâ eripiuntur, antequam gravis certaminis periculum subeant, ut fert oraculum istud: *Raptus est ne malitia mutaret intellectum ejus*, etc., Sapientiæ cap. 4. Agitur ergo de perseverantiâ finali sub posteriore tantum respectu acceptâ, id est, de illis qui post acceptam gratiam sanctificantem per aliquod tempus vivunt, et ideo pugnandum habent adversus dæmonem, mundum, et carnem. Queritur an istis necessarium sit speciale auxilium ut usque in finem perseverare possint *efficaciter et in actu secundo*, sive *potentiâ actu conjunctâ* (hoc enim sensu D. Augustinus perseverantiâ finalem in commemoratis libris, et concilium Trid. post ipsum intellexisse videtur), et quodnam sit illud auxilium, quæ duo obscuritatis fugiendæ causâ seorsim expendemus.

§ 1. *Utrum justificati sine speciali Dei auxilio in acceptâ justitiâ usque in finem perseverare possint?*

Affirmaverunt Pelagiani et Semipelagiani, ut

ex Augustini libris adversus eos elucet; isti enim non solum initium fidei, sed etiam finalem in fide perseverantiâ à libero arbitrio pendere asserebant, etsi ad ipsa salutis opera gratiam esse necessariam concederent. Contra

CONCLUSIO. — Justi sive electi in acceptâ justitiâ usque ad vitæ finem perseverare non possunt, saltem efficaciter, sive potentiâ cum actu conjunctâ, sine speciali Dei auxilio, quodcumque tandem illud sit. Est de fide adversus recensitos hæreticos.

Prob. 1^o sacris litteris à D. Augustino expositis toto inprimis libro de *Dono perseverantiæ*. Inter innumera quæ adducit testimonia hæc eminent: Psalmo 79: *Fiat manus tua super virum dexteræ tuæ* (Christum sive secundum Adam), *et non discedimus à te; vivificabis nos*, etc., *manus igitur Dei est ista*, inquit S. doctor cap. 1, n. 14, *non nostra ut non discedamus à Deo; manus, inquam, ejus est ista qui dixit: timorem meum dabo in cor eorum, ut à me non recedant*, Jeremiæ cap. 52. Ubi etiam observa auxilium istud non externum duntaxat esse, sed et internum, *vivificabis nos, etc.*, Matthæi cap. 6, Christus præcepit orationem quam quotidie recitant sancti, cujus omnes petitiones, hæc unâ exceptâ: *Dimitte nobis debita nostra*, ad perseverantiæ donum à Deo impetrandum tendunt, ut observat S. doctor ibidem cap. 2, n. 4 et 5, *in quâ*, inquit cap. 5, n. 9, p. 826, *sancti nihil aliud precantur quàm ut in sanctitate perseverent*. Epistolâ ad Philippenses, cap. 1: *Vobis donatum est pro Christo non solum ut in eum credatis, sed etiam ut pro illo patiamini*. Horum unum, inquit cap. 2, n. 2, *pertinet ad initium, alterum ad finem, utrumque tamen Dei donum est*; ibidem addit Apostolus: *Confidens hoc ipsum, quia qui cæpit in vobis bonum opus, perficiet usque in diem Christi Jesu*.

Jacobi cap. 1: *Omne datum optimum, et omne bonum perfectum, desursum est, descendens à Patre luminum; negare*, inquit Augustinus libro de *Correptione et Gratiâ*, cap. 6, n. 10, *non possumus etiam perseverantiâ in bono proficientem usque in finem magnum esse Dei munus, nec esse nisi ab illo de quo scriptum est Jacobi cap. 1: Omne datum optimum, etc.* Idem prolixè ostendit capitibus 7 et 8.

Prob. 2^o, cum Augustino, libro de *Dono perseverantiæ* cap. 7, n. 15, ex Ecclesiæ orationibus: *Orat*, inquit (Ecclesia) *ut increduli credant. Deus ergo convertit ad finem; orat ut increduli perseverent; Deus ergo donat perseverantiâ usque in finem*.

Prob. 3^o ex concilio Trid. sess. 6, can. 22, ubi decreta concilii Carthaginensis secundi, anni 415 in epistolâ ad Innocentium I; et Arausiacani secundi, anno 529, can. 9 et 10 adversus Pelagianos et Semipelagianos renovans, ait: *Si quis dixerit justificatum sine speciali auxilio Dei in acceptâ justitiâ perseverare posse, anathema sit.*

Probat 4^o ex suffragio D. Thomæ, 1-2, q. 109, a. 10, et omnium theologorum catholicorum.

Accedit tandem ratio quam affert D. Augustinus lib. de Correptione et Gratiâ cap. 12, n. 55; scilicet fideles non possunt perseverare nisi accipiant à Deo auxilium, quo, si permittantur tentationes, *cuncta minantia, cuncta invitantia, cuncta cruciantia superent.*

Obijciunt 1^o: Mors in gratiâ statu, et ideo ipsa perseverantia, non est speciale Dei donum; naturaliter enim fit ut hoc vel illo tempore contingat; ergo. — Resp. mortem quidem in se præcisè et simpliciter oriri ex naturâ, sed mortem in gratiâ sanctificante non ex causis naturalibus, sed ex speciali erga electos Dei dilectione proficisci, ad eum modum quo nativitas ex catholicis et piis parentibus singulare est Dei munus, etsi in se præcisè sit à naturâ. Rapit nimirum Deus electos suos ne à justitiâ excidant, Sapientiæ cap. 4. Ita etiam D. Augustinus lib. de Dono perseverantiæ, cap. 17, n. 4.

Instant: Sint duo justi, quorum unus post annum in gratiâ; alter post decem annos piè exactos in peccato mortali moriatur; at primus non per speciale perseverantiæ donum, sed fortuito et ex naturali causarum secundarum cursu è vitâ exiit, sicut alter eâdem ex causâ in lethifero peccato obiit; ergo. Resp. Nego minorem. Id quippe evenit quia Deus justo quidem sed inscrutabili judicio priori dedit finalis perseverantiæ donum, non posteriori. « Ex duobus piis, inquit Augustinus lib. de Dono perseverantiæ, cap. 9, n. 21, cur huic donetur perseverantia usque in finem, illi non donetur, inscrutabiliora sunt judicia Dei; illud autem fidelibus debet esse certissimum hunc esse ex prædestinatis, illum non esse. »

Instant: Ex responsione colligitur ultimum hominem sine suâ culpâ mori in peccato; in eo enim moritur quia à Deo non accepit perseverantiæ beneficium; falsum consequens; ergo. — Resp.: Nego majorem; colligitur quidem Deum specialem erga electos prædilectionem

habere ex quâ uni dat perseverantiam, alteri non dat; *est enim Salvator omnium maximè fidelium*, 1 ad Tim. cap. 4; quod clariùs adhuc significavit Christus Matthæi cap. 24, v. 22; sed non colligitur illum hominem sine suâ culpâ in peccato mori; potuisset enim gratiæ ordinariæ obsequendo, et frequenti oratione debito modo factâ uberiorem obtinendo acceptam justitiam servare, quod si fecisset, Deus ipsi perseverantiæ donum largitus fuisset, licet illud cui vult impertiat; *hoc scilicet donum*, inquit D. Augustinus loco antea citato, *suppliciter emereri potest*, et ut ait concilium Trid. sess. 6, cap. 11, post D. Augustinum lib. de Naturâ et Gratiâ cap. 26, « Deus suâ gratiâ semel justificados non deserit nisi prius ab ipsis deseratur; » et cap. 13: « Deus nisi ipsi illius gratiæ defuerint sicut cœpit opus bonum ita perficiet operans velle et perficere; » quare licet nulla dari possit ratio cur Deus *comparatè* et *relativè* det aut non det perseverantiam, tamen in mente etiam Augustini aliqua afferri potest cur *absolutè* eam det aut non det.

Instant iterum: Non potest justus cum ordinariis habitualis et actualis gratiæ auxiliis perseverare; ergo, cum non perseverat, prius à Deo deseritur quàm ipse Deum deserat. — Resp.: Conc. ant. nego consequ. Augustinus enim libro de Correptione et Gratiâ cap. 13, n. 42, fatetur eos qui non perseverant deserere et deseri; Deus videlicet uberiorem gratiam à justo non retrahit nisi ex ipsius parte præcesserit aliqua culpa sive ex negligentia et tepore in oratione, sive ex tacitâ quâdam et occultâ presumptione et superbiâ, quæ in rectè etiam facta facillè irrepere potest, etc. Etenim, ut postea dicturi sumus, ubi Augustinianum et Thomisticum systema à Molinistarum dicteriis vindicabimus, culpa propter quam Deus perseverantiæ donum denegat non est semper mortalis, quod demonstrare voluisse videtur Deus cum Moysi terræ promissæ ingressum ob culpam ad aquas contradictionis commissam interdixit.

Instant tandem: Si quilibet justus ex suâ culpâ perseverantiæ dono caret, quomodò Augustinus asserere potuit magnum et singulare perseverantiæ donum electorum duntaxat esse proprium? — Resp. S. doctorem id dixisse quia disseruit de perseverantiâ *in actu secundo*, sive de actuali perseverantiâ in bono usque in finem, quæ solis prædestinatis, ut patet, competit. Ideò autem perseverantia est magnum et singulare donum electorum proprium, licet

quilibet justus ex sua tantum culpa illo privari videatur, 1° quia Deus permittit justum non electum mori cum à justitia excidit, quod ex speciali providentia non permittit erga justum electum; 2° quia singulari favore ab electis justis arcet peccata quæ ipsos privarent perseverantiae dono, quam protectionem non electis justis non concedit.

Obijciunt 2°: Gratia habitualis datur ut justus cum auxiliis ordinariis et actualibus possit ab omni peccato abstinere, et quilibet vincere tentationes etiam usque ad ultimam vitae periodam; ergo speciale Dei adjutorium non est necessarium ut justus usque in finem in justitia perseveret. — Resp.: Nego ant. Ex laudato enim canone 22 concilii Trid. justus ut *possit perseverare*, indiget etiam speciali Dei auxilio actuali, quod speciatim ad *posse perseverare* detur, quod idcirco distinctum sit à gratia habituali et actualibus aliis gratiis ordinariis; sicut scilicet gratia habitualis non excludit actualem, cum non solum habitus sed et actus supernaturales à Deo immediatè oriantur, ita una gratia actualis aliam non excludit saltem potentiolem, nec idcirco inutilis erit gratia actualis ordinaria, cum ejus ope possit et debeat justus postulare donum perseverantiae, quod *suppliciter emereri potest*, inquit Augustinus.

Obijciunt 3°: Quod per Adæ delictum amiserat homo, superabundè ipsi restitutum est per Christi donum, Rom. cap. 5; sed Adam, Augustino dicente lib. de Correptione et Gratia, cap. 11 et 12, acceperat unde posset perseverare absque alio adjutorio; ergo à fortiori justus sine novo et speciali auxilio potest per Christi gratiam perseverare. — Resp. cum D. Thomà 1-2, q. 109, a. 10 ad 3, donum Christi majus esse Adæ delicto quantum ad perseverantiam; Adæ enim insontis auxilium fuit ut *perseverare posset*, non ut *de facto perseveraret*; nunc verò multi accipiunt ipsammet perseverantiam; hæc responsio Augustini doctrinæ est omnino consona. Addunt alii plus per Christum nobis datum esse quam per Adam amisimus quia ad perseverandum habuit Adam gratiam duntaxat *intellectus*, sive *cognitionis*, nobis verò gratia etiam *voluntatis* conceditur.

Cæteras hæreticorum objectiones diluimus ubi adversus eos de necessitate gratiæ ad omnia et singula salutis opera disseruimus.

§ 2. Quodnam sit speciale Dei auxilium quo indigent justus ut usque ad finem perseverare possint?

Jansenii Yprensis discipuli, inter quos ce-

lebris Antonius Arnaldus, potissimum in famosâ dissertatione de gratiâ efficaci, magistri vestigiis insistentes, asserere non dubitant, speciale perseverantiae auxilium, de quo concilium Trid. et Augustinus, esse ipsissimam delectationem relativè victricem, quæ *invictissimè, indeclinabiliter, et insuperabiliter* voluntatem ad perseverandum determinat, et ideo justis omnibus, qui reverà non perseverant, deesse gratiam quâ verè hic et nunc perseverare possint; nullam scilicet aliam agnoscunt gratiam quam efficacem. Hoc systema in sequenti libro sumus confutaturi.

Theologi catholici docent 1°, justis omnibus à Deo impertiri adjutorium proximè aut remotè sufficiens ad perseverandum... 2° Illud adjutorium esse gratiam à sanctificante distinctam, id est, gratiam actualem, quâ justus potest, *potentiâ saltem ab actu sejunctâ*, id est, ut aiunt, *in actu primo, et defectibiliter*, perseverare, et suppliciter ipsam perseverantiam actualem promereri.

Verùm iidem theologi inter se dissident circa naturam *specialis Dei auxilii*, sine quo justum perseverare non posse definivit concilium Trid. sess. 6, can. 22.

Alii cum Andréâ Vegâ, viro erudito qui concilio Trid. interfuit, sentiunt S. synodum designasse auxilia actualia et ordinaria justis omnibus collata ad præcepta quoties urgent implenda, et ideo synodum illud auxilium vocasse *speciale oppositè*, sive per oppositionem ad gratiam habitualem, non autem ad gratias actuales superadditas gratiæ habituali.

Alii è converso, cum Guillelmo Estio, Francisco Sylvio, etc., theologis etiam doctissimis, censent concilium illud adjutorium dixisse *speciale* per oppositionem non solum ad gratiam habitualem, sed etiam ad gratiam actualem sufficientem cuilibet justo urgente præcepto concessam, quia ista gratia est *communis et ordinaria*, non autem *specialis*.

Hæc opinionum diversitas magis fortassis circa *nomen* quam circa *rem* versatur. Enimverò, si S. synodus locuta est de potentiâ perseverandi *in actu primo*, id est, ab actu sejunctâ, ut sentire videntur prioris opinionis patroni, per *speciale auxilium* potuit intelligere gratiam actualem sufficientem ad præcepta observanda; multum saltem non repugnabunt alii theologi; si verò indicavit potentiam perseverandi *in actu secundo*, sive *cum actu conjunctam*, ut sentiunt, aut sentire videntur posterioris senten-

iam defensores, qui primam tuentur opinionem, fateri poterunt concilium specialis auxilii nomine intellexisse auxilium à gratiis actualibus omnibus justis impertitis distinctum. Unde quæstio eò unice recidere videtur, an concilium verba fecerit de efficaci, an de merè sufficienti perseverantiæ dono. Quidquid sit sic statuimus :

CONCLUSIO. — Speciale Dei auxilium, quod dicente D. Augustino, et concilio Tridentino, justo necessarium est ut possit in iustitiâ usque in finem perseverare, reverà distinguitur à gratiâ sanctificante, et etiam à gratiâ actuali verè et relativè sufficiente justis omnibus urgente præcepto concessâ; est certa quoad primam partem, quoad secundam verò videtur probabilior.

Probatur prima pars, 1^o ex dictis, cum scilicet ostendimus justum præter gratiam habitualement indigere actuali voluntatis adjutorio ut bonum agere possit.... 2^o ex concilio Trid. citato canone 22, ubi disserit de justificato, sive habente gratiam habitualement, qui indiget speciali auxilio; ergo istud auxilium non est gratia habitualis, neque etiam habitualis nova, quâ opus non est ad perseverandum in gratiâ habituali... 3^o ex D. Thomâ 1-2, q. 109, art. 10, in corp.

Probatur secunda pars, sive speciale auxilium justis ut possint perseverare necessarium distingui à communibus gratiis ipsis infusis. 1^o Enim quid magis absurdum quàm auxilia justis omnibus communia vocare speciale auxilium?... 2^o magnum et singulare perseverantiæ donum, de quo Augustinus adversus Semipelagianos, est auxilium ipso dicente citatis locis proprium prædestinatorum duntaxat, siquidem per ipsum usque in finem perseveratur in Christo, et cum datum fuerit contumaciter amitti non potest (quia nempe dat potentiam usque in finem perseverandi cum actu conjunctam, sive efficaciter et in actu secundo). At concilium Trid. et canone 16, et canone 22, indubiè loquitur de dono perseverandi, de quo Augustinus; definit enim quod ille tradiderat adversus Semipelagianos, et Augustini verba exseribit vocando illud donum magnum et speciale. Ergo... 3^o ita censent D. Thomas, et plures alii insignes theologi.

Dices 1^o : Augustinus ipso libro de Correptione et Gratiâ cap. 7, n. 11 ait : « Justior videtur excusatio dicentium : Non accepimus audientiam (fidei) quàm dicentium : Non accepimus perseverantiam; quoniam potest dici :

Homo, in eo quod audieras et tenueras, in eo perseverares si velles, nullo modo autem dici potest : Id quod non audieras, crederes si velles; » ergo disserit Augustinus de dono perseverantiæ relativè etiam ad non electos. — Resp. 1^o, etsi nullum præjudicium inferre volumus celebri isti testimonio, quod ex se efficacissimum est ad refellendum novatorum commentum de dono voluntatem invictissimè et ideò necessariè ad perseverandum determinante, tamen fatendum esse Augustinum hic quasi dubitanter loqui : Justior videtur, dici potest, etc., idque veluti per transennam, et ut objectionem pro modulo solveret dixisse, cum inprimis initio capitis sequentis hæc habeat : « Si à me quærat cur eis perseverantiam non dederit quibus eam quâ christianè viverent dilectionem dedit, me ignorare respondeo... agnoscens modulum meum audio : O homo! etc.; ô altitudo! Rom. cap. 9, etc. » — Resp. 2^o : Dist. conseq. Disserit de dono perseverantiæ relativè etiam ad non electos qui cum ordinariis gratiæ auxiliis non possint perseverare absque magno, speciali et efficaci auxilio, conc.; qui possint perseverare sine illo auxilio, nego conseq. Seipsum exponit S. doctor citato cap. 6 libri de Dono perseverantiæ : Hoc donum, inquit, suppliciter emereri potest, sed cum datum fuerit, contumaciter amitti non potest, id est, possunt justi cum sibi concessâ gratiâ verè sufficienti obtinere à Deo perseverantiæ donum, quo obtento poterunt perseverare potentiâ ad actum infallibiliter reducendâ.

Dices 2^o : Justum in iustitiâ perseverare posse, nihil aliud est quàm ipsum constanter posse observare mandata; ergo quilibet justus cum gratiâ actuali potest usque in finem perseverare. — Resp. : Dist. ant. Justum perseverare posse nihil aliud est quàm ipsum constanter posse observare mandata efficaciter, sive potentiâ ad actum infallibiliter usque in finem reducendâ, conc. Inefficaciter, sive sine tali potentiâ, nego ant. et conseq. Hæc quippe perseverandi potentia necessariè exigit Dei auxilium speciale, magnum, et singulare.

Quoniam autem hominis est tam eximium donum venerari, non autem quid illud sit curiosius scrutari, tamen dici posse videtur illud esse 1^o internum et maximè efficax (sive tale sit ex se, sive ex congruitate, sive etiam ex consensu voluntatis), ut electus vel à peccatis arceatur, vel à commissis delictis infallibiliter resipiscat, ac demùm non obstante voluntatis mobilitate in iustitiâ certò permaneat... 2^o ex-

ternum ut idem electus singulari Dei providentiâ et protectione sublati variis salutis impedimentis eo instanti è vitâ excedat quo gratiâ sanctificante exornatus est. Cujus quidem specialis adjutorii et favoris fons et radix est singularis Dei in electos suos prædilectio, ut passim docet D. Augustinus, in primis libro de Correptione et Gratiâ cap. 7, n. 13, et cap. 13, n. 40, ubi ait : « Numerus sanctorum per Dei gratiam Dei regno prædestinatus, donatâ sibi etiam usque in finem perseverantiâ, illuc integer perducitur, adhærente sibi misericordiâ Salvatoris sui, sive cum convertuntur, sive cum præliantur, sive cum coronantur. »

COROLLARIA. — Ex eâ quam hoc libro vindicavimus gratiæ necessitate, ad omnes et singulos saltem pietatis actus, colliges 1^o, nullum hominem, in quocumque statu sit, in seipso debere gloriari, sed in Domino solo, ut monet Apostolus Epist. 2 ad Corinthios cap. 10; scilicet *qui gloriatur*, inquit Augustinus, *quod sit bonus, in eo debet gloriari à quo factus est bonus*. Colliges 2^o, hominem in continuâ gratiarum actione Deo rependendâ pro acceptis ab eo donis versari debere. Scilicet quidquid supernaturalis cognoscit, et quidquid boni saltem ad salutem pertinentis vult et facit, illud totum divinæ gratiæ deputandum; unde Apostolus Epist. 1 ad Corinth. cap. 4 : *Quid habes quod non accepisti?*

Colliges 3^o, Dei gratiam piis et continuis precibus esse ambiendam; ipso enim fatente Norisio in Vindiciis, Deus gratiam ad orandum necessariam fidelibus semper impertit, sicque gratia ad alia opera requisita semper obtineri potest.

Colliges 4^o, hominem omni ope atque operâ curare debere ut quæ à Deo accepit, studiosiùs conservet. Unde Apostolus Epist. 1 ad Corinth. cap. 10, jubet *ut qui stat videat ne cadat*.

Colliges 5^o, hominem attendendo se sine gratiæ auxilio nihil posse potentiùs moveri ad exercendam humilitatem quæ est fundamentum christianæ perfectionis.

Liber secundus.

DE GRATIA SUFFICIENTE.

Yprensus, toto libro tertio de gratiâ Christi Salvatoris, gratiam sufficientem utpote suo systemati prorsus adversam, impugnat tanquam monstruosam, Deo indignam, Augustino ignotam, et à solo Pelagio excogitatem. Hinc sedulò et

quoad fieri poterit dilucidè vindicanda est. Quod ut assequamur, disseremus 1^o de gratiæ sufficientis essentiâ et existiâ... 2^o de gratiâ ejusdem gratiæ effusione.

CAPUT PRIMUM.

De gratiæ sufficientis essentiâ et existiâ.

ARTICULUS PRIMUS.

De gratiæ sufficientis essentiâ.

Gratia sufficiens generatim accipi potest prout non opponitur efficaci, et speciatim prout ab efficaci distinguitur. Primo sensu accepta ea est quæ tribuit potentiam agendi supernaturaliter quolibet modo, id est, *declinabiliter*, vel *infallibiliter*. Sic delineatur Epistolâ 2 ad Corinthios, cap. 12 : *Sufficit*, inquit Deus, *tibi gratia mea*. Gratia sufficiens non isto, sed ultimo duntaxat modo hic consideratur, id est, quatenus ab efficaci secer nitur, et quæritur quid sit.

Gratiæ sufficientis relato modo acceptæ natura inspicere potest vel *relativè* ad opiniones theologorum, vel *relativè* ad dogmatica Ecclesiæ adversus novatores judicia. Illam non sub primâ, sed sub secundâ tantum relatione pro instituto nostro hic consideramus.

Cum autem in sequenti libro hæreticorum systema, et diversas theologorum opiniones fusiùs simus exposaturi, idcirco hic utrorumque mentem breviter aperiemus, ut dicenda faciliùs intelligantur.

NOVATORUM SYSTEMA. — Joannes Calvinus, libro 2 Institutionis, cap. 3, paragrapho 10 et aliis in locis solum admittit auxilium *efficax et invincibile*, cui homo resistere non possit. Concinit Lutherus.

Jansenius, toto præsertim libro tertio de Gratiâ Christi, gratiam recentiorum theologorum sensu sufficientem velut *monstrum* horret et refugit, ut diximus. At vir acutus ut anathema concilii Tridentini sessione 6, canone 4, eludere posset, Lutherum et Calvinum in modo loquendi omninò imitari noluit. Ultrò nimirum admisit gratiam aliquam *sufficientem*, sive *parvam*, et *inefficacem*, quæ det potentiam agendi. Verum ille (ut et ipsius discipuli) per gratiam illam *parvam et inefficacem* eam intellexit, quæ minor est et debilior oppositâ delectatione terrestri, quâ idcirco vincitur, licet effectum, quem in hac hypothesi producere potest, necessariè operetur, scilicet *inefficacia desideria, velleitates*, etc., et effectum, quem non producit, in eadem hypothesi *ob defectum virtutum rei-*

psà producere nequeat; unde elucet potentiam, quam dat illa gratia parva et inefficax, esse potentiam merè absolutam, et abstrahentem à præsentibus subjecti circumstantiis, sive ab oppositâ fortiori concupiscentiâ, non relativam ad præsentes subjecti circumstantias, sive ad oppositam fortiolem delectationem terrestrem.

Id totum fit manifestum ex libris de gratiâ Christi. Etenim capiti primo libri tertii hunc fecit titulum: *Ostenditur nullum dari adjutorium sufficiens post lapsum quin simul efficax sit.* Ibidem: *Vocamus sufficientem gratiam, seu sufficiens adjutorium, præter quod nihil aliud ex parte Dei per modum principii necessarium est ut velit et operetur.* Ibidem capite 15: *Nondum poterat (Augustinus ante conversionem) defectu virium fortiolem concupiscentiam superare.* Item libro 2, cap. 27, sufficiens sive parva gratia non sufficit ad Dei mandatum operandum, licet aliquid faciat, nempe velletates quasdam excitet. Item libro 8, cap. 2, dicit parvam gratiam esse semper efficacem, quia producit inefficacia desideria, sive id quod tunc solum operari potest, licet non victricem, quia ardentio-rem concupiscentiam non vincit. Tandem libro 4, cap. 10: *Gratia sufficiens, sive inefficax ea est ex quâ operatio nequidem sequi potest, nisi ejus inefficacia per aliam suppleatur.*

Igitur gratia sufficiens, sive parva, ad sensum Jansenii definiri debet: Gratia quæ gradibus inferior est oppositâ concupiscentiâ actuali, quam ideò propter defectum virium vincere non potest.

THEOLOGORUM OPINIONES. — *Divisio in gratiam sufficientem et efficacem*, inquit Franciscus Cummel, disputatione 4 de Auxilio sufficiente et efficaci, sectione 1, *recepta est ab universis theologis catholicis contra hæreticos*; hoc profectò verum non esset, si gratia sufficiens in mente theologorum non daret vires relativè sufficientes. Illi tamen in diversas abeunt circa gratiæ sufficientis naturam opiniones. Enimverò Thomistæ gratiam sufficientem eam dicunt quæ ita homini hic et nunc benè agendi potestatem impertit, ut nunquàm benè operari tribuat absque efficaci et physicè prædeterminante Dei auxilio..... Augustiniani eam cum quâ homo hic et nunc benè operari potest, nunquàm verò benè operabitur nisi accesserit nova gratia, non physicè præmovens, sed ex se et absolutè moraliter victrix et efficax.

Congruistæ illam, quæ non est congrua, sive attemperata variis personæ, loci et temporis circumstantiis, et ideò suum nunquàm sortitur

effectum, licet expeditam et relativam benè operandi potestatem tribuat; in isto enim systemate gratiæ efficacia nascitur ex congruitate, et ideò gratiâ purè sufficiens est gratia non congrua..... Molinistæ illam quæ homini ita hic et nunc benè operari posse dat, ut cum eâ reipsâ sine ullo novo uberiore et præveniente auxilio pro arbitrio benè operetur, vel non operetur, quam idcirco homo efficacem vel inefficacem facit eâ benè utendo vel non utendo.

Quid gratia sufficiens ex Ecclesiæ definitionibus? — Ex dictis, tum de hæreticorum systemate cum de consensu omnium theologorum, jam innotescit quid sit illa gratia sufficiens. Verum, cum res ista gravissimi sit momenti, ut magis affulgeat, sit

CONCLUSIO. — Gratia sufficiens ex Ecclesiæ definitionibus ea est quæ non tantum absolutam (ut placet Jansenio et ejus sectatoribus), sed etiam relativam ad pietatis opus tribuit potentiam, si non proximam semper et immediatam, saltem remotam et mediatam.

Hic potentia proxima et immediata ea est quâ homo bonum illud opus agere, aut urgentem hic et nunc tentationem vincere potest proximè, sive independenter ab omni alio auxilio..... Remota et mediata ea quæ dat proximè id agere posse, quod impetretur gratia dans proximè posse facere illud vel illud bonum opus, vel urgens hic et nunc præceptum implere. Talis est oratio, quam, ut diximus, unusquisque fidelis ex sibi impertitâ gratiâ sufficiente proximè potest ut oportet emittere, sicque obtinere gratiam sufficientem, quâ proximè possit illud bonum opus edere, vel concupiscentiam actu titillantem superare.

Probatur ex censurâ primæ propositionis Jansenii: *Aliqua Dei præcepta justis volentibus et conantibus secundum præsentem quas habent vires sunt impossibilia; deest quoque illis gratia quâ possibilia fiant.* Sic enim arguimus: Ecclesia definivit gratiæ parvæ, sive sufficienti, eam inesse potentiam quam ipsi inesse negavit Jansenius (damnavit enim quinque propositiones in sensu à Jansenio intento); atqui Jansenius non negavit parvam, sive sufficientem, justorum gratiam ipsis tribuere potentiam absolutam ad præceptum implendum, sed relativum tantum, ut ostendimus, et aliunde elucet tum ex contextu propositionis, in quâ voces: *secundum præsentem quas habent vires* sunt synonymæ cum istis relativè ad præsentem quas habent vires, cum ex notione systematis Janseniani, in quo tota vis gratiæ et concupiscenti-

tiæ est relativæ. Et verò, si Ecclesia in parvâ gratiâ Jansenii requireret duntaxat potentiam *absolutam*, gratia parva Jansenii esset in Ecclesiæ sensu verè sufficiens, et ideò *Jansenismus esset merum phantasma*, quam assertionem proscripsit clerus Gallicanus in comitiis anni 1700.

Dices cum Jansenii discipulis: Voces istæ, *potentia absoluta et relativa*, novæ sunt et veteribus incognitæ; ergo. — Quemdam doctorem Yprensium doctrinæ addictum hæc seriò, dum præsideret, in sacrâ scholâ Cadomensi, objicientem non sine stupore audiivi. — Resp. eos qui hæc ostentant indubiè hujus magistri effati oblitos fuisse libro 8 de Gratiâ Christi cap. 2: *Cum, inquit, aliquid propter novas opiniones emergentes efficaciter exprimendum et ab aliis accuratè distinguendum est, rem veterem novo vocabulo insignire nihil vetat*. Et verò, voces veteribus incognitæ, *consubstantialis, ex opere operato, etc.*, in concilio Nicæno primo et Tridentino consecratæ sunt. At novum Jansenii systema de potentiâ et vi gratiæ respectu concupiscentiæ, et concupiscentiæ respectu gratiæ Catholicos impulit ad distinguendam *potentiam absolutam et relativam*: vox enim, *potentia*, simpliciter modo efficaci non expressisset systema Jansenii qui agnoscit in gratiâ parvâ cum concupiscentiâ non comparatâ potentiam ad bonum (*absolutam* nempe), et impotentiam ad bonum si cum concupiscentiâ conferatur (*relativam* scilicet ex solo defectu virium exorientem). Hinc absque subsidio duplicis illius potentiæ nunquàm eliminari potuissent effugia Jansenii discipulorum qui quinque propositiones voce improbant, reverà probant; lubenter enim dicunt, *justis Dei præcepta non esse impossibilia* (absolutè, non relativè). *Gratiæ interiori resisti* (quoad ulteriorem et perfectum effectum quem consequi potest absolutè, non relativè). *Ad libertatem requiri immunitatem à necessitate* (absolutâ, non relativâ hic et nunc). *Christum mortuum esse pro reprobis* (ob gratias quæ absolutè et ex se possunt eis salutem accersere, non comparatè ad actuales ipsorum dispositiones et tentationes); etc.

COROLLARIA. — Primum. Adversarii nihil hic proficient nisi probent gratiam parvam, sive sufficientem ex Ecclesiæ placitis non dare potentiam relativam.

Secundum. In eo præsertim gratia sufficiens ab Ecclesiâ admissa discrepat à parvâ Jansenii gratiâ quòd ista *nunquàm*, illa verò *semper* det voluntati potentiam relativam ad actualem op-

positam cupiditatem debellandam. Unde parva Jansenii gratia perfectum effectum in conflictu ardentioris cupiditatis non consequitur, aut consequi nequit, *ex solo virium defectu*; gratia è converso sufficiens Ecclesiæ, ex voluntatis hominis pravitate.

ARTICULUS SECUNDUS.

De gratiæ sufficientis existentia.

Gratia sufficiens ex dictis est gratia actualis, præveniens, et excitans, quæ expeditam, proportionatam, et relativam ad præsentis subjecti circumstantias voluntati ad bonum opus tribuit potentiam, cui tamen voluntas resistit. Quæritur præcisè an existat hujusmodi gratia.

CONCLUSIO. — Existit in statu naturæ lapsæ gratia verè et relativè sufficiens.

Est de fide adversus Jansenium et ejus sectatores.

MOMENTUM PRIMUM. — *Ex Scripturis*. — Deus passim in Scripturis conqueritur quòd ingrati et rebelles Judæi *despexerint omne consilium suum, et increpationes neglexerint* sibi non obediendo, *Spiritui sancto resistendo*, etc. Proverbiorum cap. 1, v. 24 et 25; Isaïæ cap. 5, v. 4; 63, v. 2; Matthæi cap. 11, v. 21; 23, v. 37; Actuum cap. 7, v. 51, etc... Iisdem mortem et dira supplicia comminatur nisi resipiscant, ibidem.... Sontes ad pœnitentiam passim excitat, et hortatur *ne in vacuum gratiam suam recipiant, quia suæ voluntatis non est mors impii, sed ut convertatur et vivat, et non vult aliquos perire, sed omnes ad pœnitentiam reverti*, Ezechielis cap. 18, v. 25; Matthæi cap. 3, v. 8; Actuum cap. 2, v. 38; Epist. 1 ad Thessalonicenses, cap. 5, v. 19; Epist. 2 ad Corinth. cap. 6, v. 1; Epist. 2 Petri cap. 3, v. 9, etc. Ex quibus sic argumentor: Istæ querelæ, comminationes, adhortationes, preces, sollicitationes evincere videntur, Deum Judæis rebellibus, et aliis sontibus dedisse gratias internas, quibus potuerunt pœnitentiam agere, converti, et tandem salutem assequi, quas tamen malitiâ suâ inutiles effecerunt eas destituendo effectum, quem reipsâ consequi poterant in illis circumstantiis; at tales gratiæ sunt merè et verè sufficientes; ergo. — Minor patet ex ipsâ notione gratiæ sufficientis. — Probatur major: Si Deus illis peccatoribus gratias verè et relativè sufficientes non dedisset quibus pœnitentiam hic et nunc agere potuissent, sed exteriores tantum, aut eos exterius vocando ad pœnitentiam, aut intellectum eorum simpliciter illustrando, voluntatem verò

nullatenus movendo, aut parvas tribuendo interiores gratias, quæ *inchoatas* quidem (inefficacia desideria producendo), sed non *pares* ad agenda penitentiam vires dedissent (ut respondere solent adversarii cum magistro); si, inquam, Deus illis sordibus gratias verè et relativè sufficientes non dedisset, quibus penitentiam agere potuissent, eorum salutem exterius tantum et fictè, non sincerè et interius voluisset, cum medium ex parte sui absolute necessarium ut salvari possent non solum ipsis non contulisset, sed etiam conferre positivè detrectasset; in hac sanè hypothese similis esse videretur Deus regi, aut exercitui duci milites suos, quibus arma ut hostes debellare possent, aut patriam à periculo eximere, non dedisset, increpanti quod hostes non prostrassent, et regnum non defendissent, vel eos ad id modis omnibus compellent, et nisi fecerint dura ipsis intentanti supplicia. Quis hæc cum ideâ Dei, cujus infinitam misericordiam et justitiam in aureis operibus prædicare non desinit divus Augustinus, conciliare posset? etc.

Obijciunt 1° loca quæ solam gratiam victricem commendare videntur, Ezechielis cap. 36, v. 26; Joannis cap. 6, v. 45, et cap. 10, v. 27; ad Philippenses cap. 1, v. 6, et cap. 2, v. 13. — Resp. in his et similibus locis commendari gratiam efficacem, cui, ut omnes fatentur, nulla resistit voluntas, sed non excludi sufficientem, cui voluntatem reluctari passim clamat Scriptura. Etverò, concilium Tridentinum illa oracula sic intelligit sess. 6, cap. 13 : *Deus, inquit, nisi ipsi illius gratiæ defuerint, sicut coepit opus bonum, ita perficiet* (ad Philipp. cap. 1, v. 6), *operans velle et perficere* (ad Philipp. 2, v. 13).

Obijciunt 2° : Epistolâ ad Rom. cap. 9, legitur : *Non volentis, neque currentis, sed miserentis est Dei.* Homo igitur gratiæ sufficienti obicem non ponendo non obtinet efficacem. — Resp. 1°, Estium hoc oraculum intelligere non de causâ boni operis, sed de electione hominum ad salutem sive gloriam, quæ fit non ex prævisis meritis, etiam gratiæ, sed ex solo Dei miserentis beneplacito. — Resp. 2°, sensum esse, si de gratiâ sermo sit, bonum opus *primario et præcipuè* esse à Deo miserente, sive gratiam dante sine quâ voluntas nec conari nec consentire potest, non *totaliter et adæquatè*, quasi voluntas gratiæ liberè non consentiret; ait quippe Apostolus (ut ipse fatetur Augustinus) Epistolâ 1 ad Corinthios cap. 13 : *Non ego, sed gratia Dei mecum, laboravi, etc.*

Verùm, inquit, causa gratiæ efficiens est Dei voluntas; sed *nemo Dei voluntati resistit*, Epistolâ ad Romanos cap. 9, v. 19; ergo. — Resp. 1°, hanc cavillationem ipsi Yprensi esse solvendam. *Parva* enim ipsius gratia tum ex naturâ sui cum ex antecedente Dei voluntate ad opus plenum et perfectum colligit, quod tamen in conflictu ardentioris cupiditatis nunquam obtinet. Deinde, qui adversarii omnipotentissimam Dei voluntatem, cui nemo resistere valeat ad invidiam conflandam tantoperè venditare audent? cum in eorum etiam systemate ipsi revocari restiterint mali angeli, Adamus, etc. — Resp. 2° : Distinguo minorem. Nemo resistit Dei voluntati absolutæ et consequenti, conæ. Antecedenti et conditionatæ. neg. min. et consequ. Eâ scilicet conditione gratiam sufficientem concedit Deus ut homo ipsi, ut potest, non resistat. Nihilominus etiam conditionata et antecedens hoc sensu semper impletur quod peccator, qui ab eâ recedit peccando, incidat in illius ordinem dum per ejus justitiam punitur, ut præeunte D. Augustino loquitur D. Thomas p. 4, q. 19, a. 6, in corp.

Obijciunt 3° : Homo lapsus in iis quæ salutem attingunt ab aliis se discernere non potest, dicente Apostolo Epistolâ 1 ad Corinthios cap. 4 : *Quis te discernit?* Sed si daretur gratia sufficiens, cui homo obicem non ponendo efficacem impetraret, homo se ab aliis discerneret, gratiæ scilicet illi non resistendo; ergo. — Resp. 1°, Jansenium et ejus discipulos sentire Angelis et insonti Adæ sufficiens duntaxat gratiæ auxilium fuisse collatum, cum quo boni Angeli voluntate suâ steterunt, malis malâ voluntate cadentibus; at Augustinus libro 11 ad Genesim cap. 8, n. 10, docere videtur relatum effatum ad Angelos etiam et Adam pertinuisse; solvant ergo istud argumentum. Resp. 2° : Concedo majorem, nego min. Quod enim iste gratiæ obicem non ponat non à se, sive à nudo libero arbitrio, habet, sed à gratiâ, quâ prævenitur, excitatur, et adjuvatur, et sine quâ non posset consentire; unde non per se, sed per gratiam, tanquam nobiliorem et primariam causam, ab aliis gratiæ obicem ponentibus, discernitur.

MOMENTUM SECUNDUM. — *Ex Ecclesiæ judiciis.* — Concilium Arausicanum secundum adversariis acceptissimum anno 529 canone 23 hæc pronuntiat : « Secundum fidem catholicam credimus, quod acceptâ per baptismum gratiâ omnes baptizati, Christo auxiliante et cooperante, quæ ad salutem animæ pertinent, pos-

sint et debeant, si fideliter laborare voluerint, adimplere. » Ibi manifestè gratia interior infundens baptizatis vires, quibus vere hic et nunc possint præcepta implere, et in acceptâ justitiâ permanere, si voluerint, aut petere auxilium quo impleantur, cui tamen plures reluctantur, idque secundum fidem catholicam.

Idem statuit synodus Senonensis Parisiis habita anno 1328 adversus Lutheranos parte 1, in decretis fidei, cap. 15, ubi (quod maximè observandum est) commemorata Scripturæ oracula, et alia, quæ Yprensensis cum suis omni arte eludit, et insuper textum Apocalypsis cap. 5, v. 20 et 21, quem iidem cum Guillelmo Estiò ad se trahunt, intelligit de gratiâ interiori cui voluntas resistit. Idem et concilium Coloniense anni 1536 parte 7, cap. 52, etc.

Concilium Tridentinum idem multis in locis adstruit; v. g., sess. 6, cap. 11, ait: *Deus impossibilia non jubet, sed jubendo monet et facere quod possis, et petere quod non possis, et adjuvat ut possis*; quæ tota ferè habet Augustinus libro de Naturâ et Gratiâ cap. 45, n. 50; Dei ergo præcepta cum gratiâ impleri possunt, aut immediatè, aut mediatè per orationem, et ideo qui ea non implent, aut ad ea implenda non orant, Dei gratiæ obsistunt.

Ibidem hæc declarat: *Deus suâ gratiâ semel justificatos non deserit nisi ab eis prius deseratur*, quæ iterùm excerpta sunt ex Augustino, *deserunt, inquit, et deseruntur*, ut supra observavimus; item cap. 15, modò citato, *Deus nisi ipsi illius gratiæ defuerint, sicut cæpit opus bonum, ita perficiet*, etc. Ibi profectò gratia interior, quæ deseritur, cui deest et resistit humana voluntas, etc.

Idem elucet ex Constitutionibus ab universâ Ecclesiâ receptis Innocentii X anni 1653, Alexandri VII anni 1656, Clementis XI anni 1703, etc., adversus quinque propositiones Jansenii sensu acceptas. Hinc immeritò Antonius Arnaldus dissertatione de gratiâ efficaci, parte primâ, articulo primo, obtrudit ista decreta, si gratiam sufficientem sensu modernorum theologorum adstruant (quod se non existimare fingit), cum antiquæ Ecclesiæ doctrinâ coherere non posse. Quod effugium illud ipsum est quo bullas Pii V et Gregorii XIII eludere aggreßus erat Yprensus.

Obijciunt 1º: Gratia sufficiens dat nudum posse, efficax velle et operari; sed Ecclesia orat pro istâ, non pro illâ obtinendâ; ergo efficacem admittit, non sufficientem. — Resp.: Nego minorem. Orat enim pro quolibet gratiâ indis-

criminatim ad salutem proficiente impetrandâ, sive sit merè sufficiens, sive efficax; *gratiam tuam*, inquit, *mentibus nostris infunde*, etc. Et verò, non solum orat Deum ut peccatorem convertat, sed etiam orat ipsum peccatorem ut convertatur, quod necessariè supponit ipsum habere gratiam cum quâ hic et nunc converti potest, aut non converti.

Obijciunt 2º: Concilium Tridentinum relativis verbis, *justificatos non deserit Deus nisi ab eis prius deseratur*, gratiam non actualem, sed habitualement designavit, et ideo illis gratiam sufficientem adstruere incassum nitimur. Hæc scilicet desumpsit concilium ex Augustino libro de Naturâ et Gratiâ cap. 26, n. 29, ubi ait: *Non deserit si non deseratur*, quæ D. Thomas 1-2, q. 109, a. 9, in argumento *sed contra*, et 5 p., q. 62, ad 5. et q. 70, a. 4, in c., intelligit de gratiâ habituali, cum ibi adducat textum Rom. cap. 5, v. 24: *Justificati gratis per gratiam ipsius*, etc. ergo. — Resp.: Nego ant. Augustinus enim, quem sancta synodus ibidem laudat, de gratiâ etiam actuali disserit; ibidem quippe immediatè addit: « Ut piè semper justèque vivatur: sicut enim oculus corporis, etiam plenissimè sanus nisi candore lucis adjutus non potest cernere, sic et homo, etiam perfectissimè justificatus, nisi aternâ luce justitiæ divinitus adjuvetur, rectè non potest vivere: sanat ergo Deus non solum ut deleat quod peccavimus, sed ut præstet etiam ne peccemus. » Per quid, quæso, justus piè semper justèque vivit, aut vivere potest? Per quid præstat Deus ne peccemus? Nonne per gratiam actualem? Ergo Augustinus disserit etiam de gratiâ actuali; ergo et concilium Tridentinum.

Quod attinet ad D. Thomam locis prolati Augustino adhærens, quem primo loco adducit, disserit de gratiâ habituali prout ipsi annexa est gratia actualis sine quâ in actum erumpere nequit, et idcirco celebre ejus effatum in duobus ultimis locis contentum: *Minima gratia potest resistere cuilibet concupiscentiæ, et vitare omne peccatum* (quo jugulatur totum Jansenii systema) intelligendum est de gratiâ habituali quatenus ipsi adjungitur gratia actualis; textus videlicet Apostoli Rom. cap. 5, *justificati, etc., utramque gratiam exprimit, cum Christus utramque nobis morte suâ promeruerit.*

Obijciunt 3º, cum Arnaldo loco citato: « Decretum Innocentii X, quem quantâ possumus demissione animi veneramur et amplectimur, indubie exprimit Innocentii I, Cœlestini,

Gregorii et totius traditionis consensum ; ergo intelligendum est de gratiâ efficaci sine quâ nihil boni fieri potest ; neque tentationes superari ; justi enim (addit ibidem) omnes veram et interioram habent gratiam, quâ mandata servare, et tentationes superare posse verè dicuntur ; > quæ gratia ipsa est gratia efficax. — Resp. : Nego consequ. Bonum equidem fit et tentationes superantur per gratiam efficacem, sed hæc sine illâ operari possunt justi gratiæ sufficientis, quæ ipsis non deest, ope et ministerio ; sic autem intelligendum esse Innocentii X decretum evincit ejus scopus in proseribendo Jansenii sensu quem renovare voluit Arnaldus, et utpotè Ecclesiæ et Augustini doctrinæ adversum, ut jam ostendimus, et mox ostendemus, proscripserunt Innocentius I, Cælestinus, etc.

MOMENTUM TERTIUM. — *Ex Patribus.* — Jansenius concilii Tridentini sess. 4, de Patrum auctoritate decreti parùm studiosus fuisse videtur cum in hac controversiâ et aliis solius Augustini suffragium imploravit, alios Patres aut deserens, aut saltem multi non faciens. Ut ergo *ipsi placencia* loquamur solus prodibit Augustinus, cujus egregia jam laudavimus testimonia, et qui gratiam verè et relativè sufficientem aut *expressè et formaliter*, aut *suppositivè*, *æquivalenter*, et *consequenter* passim commendat. Libro 1 de peccatorum meritis et remissione, cap. 59. n. 59, ait: *Habet* (adultus baptizatus) *concupiscentiam cum quâ pugnet, eamque, adjuvante Deo, superet, si non in vacuum gratiam ejus susceperit, et si reprobus esse noluerit*; item libro 2, cap. 17, n. 26: *Gratia Dei hominum adjuvat voluntates* (quantum in Deo est) *quâ ut non adjuventur (efficaciter) in ipsis itidem causa est, non in Deo...* Ecce gratiam interioram, sive delectationem cœlestem, terrestri, sive cupiditati superandæ aptam, quam Augustinus supponit *in vacuum* aliquando suscipi, id est, hominis malitiâ à Deo destinatum effectum non consequi... Ecce gratiam *internam*, sive *adjuvantem*, quæ ex parte Dei vires concupiscentiæ debellandæ relativè pares impertit, quam ne subsequatur gratia efficax sola impedit hominis improbitas ; sed talis gratia est merè et verè sufficiens ; ergo. — Quomodò Jansenius, vir alti judicii, insinuare potuit libro 2 de Gratiâ Christi cap 27, gratiam ab Augustino dici *in vacuum suscipi* quòd gratia illa debilior non perfectum, sed imperfectum tantum consensum, sive velleitatem (ad quem solum destinatur à Deo) impetret? An, quæso, Dei gratiam *in va-*

cuum recipere dici potest qui id omne efficit quod Deus per hanc gratiam effici vult? Deinde homo, non Deus, causa est cur gratiam, quæ ipsum adjuvat, et quam *in vacuum* suscipit non comitetur gratia efficax ; ergo Deus illam destinat ad alium effectum quàm ad *simplicem velleitatem*.

Libro de Naturâ et Gratiâ, cap. 67, n. 81, peccata excusantes sic revincit : *Non tibi deputatur ad culpam... quòd vulnerata membra non colligis, sed quòd volentem sanare contemnis.* Ecce gratiam, etiam *voluntatis*, utpote *medicinalem*, sive voluntatis infirmitati sanandæ à Deo destinam, et ideò ad vincendam hic et nunc titillantem cupiditatem idoneam, quam sotes *contemunt*, id est, effectu pravitate suâ privant.

Libro 1 Retractationum cap. 22, n. 4, ait : *In potestate hominis est mutare in melius voluntatem, sed ea potestas nulla est nisi à Deo detur, de quo dictum est : Dedit eis potestatem filios Dei fieri, Joannis cap. 1.* Unde, ut diximus, ubique docet, et speciatim citato cap. 43 libri de Naturâ et Gratiâ, Dei præcepta justis saltem non esse impossibilia, et ideò ipsis adesse gratiam, quâ ea vel *immediatè* implere possint, vel saltem *mediatè* per orationem, cui piè peragendæ per præsentem gratiam veram et relativam habent potentiam. *Restat*, inquit libro 1 ad Simplicianum, quæstione 1, n. 14, *in hac mortali vita libero arbitrio, non ut impleat homo justitiam, cum voluerit, sed ut se supplicii pietate convertat ad eum, cujus dono eam possit implere.* Porro S. doctor non disserit de solâ potestate absolutâ et abstrahente ab ardentiori concupiscentiâ (aliàs in hac hypothesi Dei præcepta essent homini *hic et nunc* impossibilia, quod, ipso dicente libro de Naturâ et Gratiâ cap. 69, n. 83, *Deus justus et bonus jubere non potest*) ; loquitur ergo de potestate etiam relativâ ad fortiorem cupiditatem quam homo sufficiente gratiâ roboratus potest vincere.

Objiciunt 1^o : Constans est D. Augustini sententia nullam in præsentî ordine *internam* esse gratiam, quæ careat effectû, sive cui non consentiat voluntas, et ideò omnem Christi gratiam esse efficacem, sive dare et posse et agere. Etenim, ut innumera ejus et ipsius discipulorum testimonia silcam, quæ passim adducit Jansenius, et dominus Arnaldus dissertatione de gratiâ efficaci, parte 1, articulo 3 et sequentibus.

Libro de Prædestinatione sanctorum, cap. 8, n. 43, expendens illud Joannis (cap. 6) :

Omnis qui audit à Patre, et didicit, venit ad me, hæc habet : Perfectò enim qui non venit, non audit à Patre, nec didicit ; nam si audisset, et didicisset, veniret, etc.

Libro de Correctione et Gratiâ cap. 11, n. 45, ait : *Volenti saluum facere nullum hominum resistit arbitrium, etc.*

Concinnant passim SS. Prosper et Fulgentius etc. : ergo, cum Deus velit saluum facere per quaecumque gratiam, nulla est gratia cui resistatur, et ideo nulla gratia purè sufficiens. — Resp. 1^o : hæc Jansenio et ejus discipulis esse solvenda ; Yprensis enim libro 2 de Gratiâ Christi, initio capitis 27, fatetur, *multos ab internâ gratiâ suasionem et inclinationem dissentire* ; aliunde passim admittit *gratiam parvam imperfectum duntaxat effectum consequentem*. Quomodo ostendere posset Jansenius Augustinum, qui ipso fatente ibi disserit *de omni et quâlibet gratiâ internâ*, loqui etiam de gratiâ imperfecti effectus efficaci, cum ex ipso contextu pateat ipsum disserere de gratiâ perfectissimum effectum producente ? Resp. 2^o Augustinum ejusque discipulos in his et similibus locis gratiam *efficacem*, sive cum *effectu conjunctam*, delineare, aliam voluntati potentiam relativam bonum operandi dantem, cui interdum resistatur, non excludendo, ut ex adductis in probatione testimoniis elucescit.

Sed, inquit, cur Augustinus gratiam Christi ferè semper jungit operi cui in nostro systemate sæpius non jungitur ? — Resp., his ex causis. 1^o De gratiæ operatione, non de possibilitate per ipsam datâ Augustino cum Pelagio, si non unicè, potissimum saltem erat controversia. Scilicet vafer ille hæresiarcha boni possibilitatem à Deo oriri fatebatur (naturalem tantum volendi facultatem subdolè intelligebat) ; operari autem nostrum duntaxat esse effutiebatur, ut elucet ex libro de Naturâ et Gratiâ cap. 42, n. 49, libro de Gratiâ Christi, cap. 5, n. 4, etc. Quod effugium explodebat S. doctor, gratiam Christi jungendo cum effectu, et ideo ostendendo Dei esse non solum quod possimus agere, sed etiam quod *velimus et agamus*.... 2^o Augustinus sæpiù disserit de gratiâ prædestinatorum propriâ, quæ effectum suum certissime assequitur, saltem in fine vitæ, ut patet ex libro de Gratiâ Christi cap. 15, n. 14, de Dono perseverantiæ cap. 23, n. 65, etc.... 3^o Pelagiani addebant gratiam *cognitionis*, sive legis et doctrinæ, quâ mens illustratur, non *voluntatis* et *actionis*, quâ id fieri posset, aut fieret quod faciendum esse cognoscitur ;

quod effugium ut iterum præcluderet Augustinus gratiam internam *voluntatis et actionis* commendabat, quæ aliquando victrix est, aliquando non, etc.

Objiciunt 2^o : Augustino dicente libro de Correctione et Gratiâ cap. 12, et alibi passim, *adjutorium sine quo non* (id est, sufficiens) proprium fuit statûs innocentie ; *adjutorium è converso quo* (id est, efficax) proprium statûs naturæ lapsæ ; ergo. Ecce aliud palmare Yprensis momentum. — Resp. *adjutorium sine quo*, si non solum intellectus, sed et voluntatis fuerit, in mente Augustini ita proprium fuisse statûs innocentie, ut etiam vigere debuerit in statu naturæ corruptæ, ad eum modum quo juxta ipsum timor servilis ita proprius fuit veteris fœderis, ut in novâ etiam lege existere debuerit. Vel S. doctorem intendere *adjutorium sine quo*, majus esse in statu naturæ corruptæ quàm in statu innocentie, qui tam forti auxilio non indigebat. Quòd si *adjutorium sine quo* in statu innocentie solius intellectus fuerit, ut nonnulli censent, intendit Augustinus *adjutorium sine quo* insonti Adæ concessum fuisse solius mentis, quia Adæ insonti *in tantâ non peccandi facilitate* ad bonum operandum cum gratiâ sanctificante sufficiebat... *Adjutorium verò quo* sonti Adæ postea datum, fuisse gratiam non solum intellectum illustrantem, sed etiam voluntatem prævenientem, excitantem et moventem, quia sons Adam tali *adjutorio* opus habuit.

Neque reponas Augustinum *adjutorium possibilitatis et sine quo non* totis viribus excludere à statu naturæ corruptæ ; id enim fecit relativè ad systema Pelagianorum qui per illud auxilium intelligebant *naturalem voluntatis facultatem*, aut *adjutorium voluntati omninò extrinsecum*, cujusmodi sunt prædicatio, lex, exempla, etc., quæ in operationem intrinsecè non influunt, et negabant *adjutorium actionis et quo*, intrinsecum nempe, et à Deo inditum, ac proximè in actionem influens.

Objiciunt 3^o : Gratia sufficiens bonis et malis communis est ; sed talem gratiam respuit Augustinus ubique ; v. g., libro de Prædestinatione sanctorum cap. 5, n. 10, quia bonos à malis non discernit ; ergo. — Resp. ex objecti loci contextu constare Augustinum loqui de gratiâ naturali, sive pelagianâ, non supernaturali, quæ bonos efficiendo ipsos à malis discernit.

MOMENTUM QUARTUM. — *Ex theologorum suffragio*. — Divus Thomas 3 p., q. 62, a. 6 ad 5, et q. 70, a. 4, in c., ait : *Minima gratia potest*

resistere cuilibet concupiscentiæ, et vitare omne peccatum. Ibi S. doctor disserit de gratiâ habituali quatenus ipsi annexa est gratia actualis, ut paulò ante ostendimus; sed gratia illa quamlibet parva confert vires relativè pares ad vincendam robustissimam etiam concupiscentiam, et tamen suo sapius privatur effectû; ergo.

Concinnant dicente supra laudato Francisco Cume*l universi theologi*, Augustini etiam doctrinæ addictissimi. Talis, v. g., Joannes Theodosius Bernenc, doctor Sorbonicus, vir qui adversariis suspectus esse non debet. In Augustiniano de divinâ gratiâ systemate nuper edito q. 8, postquam dixit cum Thomâ de Lemos nomen *gratiæ sufficientis à centum duntaxat annis* obtinuisse, addit: « Nos per gratiam sufficientem intelligimus gratiam interiorem, sive donum Spiritûs sancti voluntatem moventis, et excitantis ad bonum, quæ dat veram potentiam ad agendum, cui voluntas humana resistit, et ideò ab Augustino excitans et inefficax nuncupatur... Jansenius voluit per illam produci illum omnem effectum, ad quem ex voluntate Dei sive absolutâ, sive antecedente ordinatur... Nos illum effectum ab eâ produci volumus, ad quem ex voluntate Dei absolutâ, et consequente, non autem ex se et voluntate Dei antecedente ordinatur, et hoc sensu sentimus gratiæ interiori verè et propriè in præsentî statu resisti. » Hic autem (quod observa) Augustinianorum omnium, speciatim Fulgentii Bellelli, et Laurentii Berti, nomine loquitur. Quinimò non pauci censent celebrem Norisium tum in Vindiciis cum in Janseniani erroris calumniâ sublatâ, cap. 2, paragrapho primo, admississe in nostro statu adiutorium *sine quo non* Adæ innocenti concessum, hominis arbitrio derelictum, cum quo solo homo *facilia* opera non solum operari potest, sed etiam reipsâ operatur. Quod factum infra expendemus.

Quamobrem, si Thomas Braduardinus, Gregorius Ariminensis, et quidam alii antiqui Thomistæ et Augustiniani, quos dominus Arnaud pro se adducit in opere cui titulus *Défense de la Constitution d'Innocent X*, et in dissertatione de gratiâ efficaci p. 1, articulis 8 et 9, etc., adversam tenuerunt sententiam, excusandi sunt, cum in primis scripserint ante Constitutionem Innocentii X adversus Jansenium. Sanè Franciscus Macedo, eruditus Minorita, qui primùm Jansenii doctrinæ addictus fuerat, statim atque ab Innocentio X proscripta, eam ejuravit et impugnavit.

MOMENTUM QUINTUM. — *Ex ratione.* — Jansen-

nus, ut diximus, libro 3 de Gratiâ Christi, cap. 3, gratiam inefficacem, sive sufficientem, *ut solummodo peccatis fovendis, majorique damnationi accersendæ* servientem execratur; nos ejus systema de gratiâ interiore, cui nunquam resistitur, ut blasphemus in Deum proferendis, toti Scripturæ subsannandæ, et rationi excandæ serviens, detestamur.

Etenim si nulla in præsentî statu detur gratia, quæ voluntatis pravitate suo careat effectû, quicumque sive in antiquo sive in novo Fœdere peccaverunt, aut damnati sunt, non potuerunt non peccare, aut non damari; solius quippe gratiæ opè à peccato abstinere potuerunt, et salutem consequi, quâ, cum reipsâ peccaverint, et sint damnati, fuerunt destituti; Deus ergo exterius significavit se peccatorum et reproborum conversionem et salutem velle, quam reipsâ et interiùs volebat; Deus ergo increpavit, imò æternis addixit suppliciis homines ob delicta quæ non solum non committere non potuerunt, sed etiam quæ ab ipsius voluntate non erant aliena; homo ergo ea duntaxat bona opera elicere potest quæ actu elicit, etc. At hæc, quantum sacris Litteris, Dei bonitati et justitiæ, et rationi repugnent quilibet sapiens vir indubiè intelligit; ergo.

Obijciunt 1º cum Yprensi loco citato: Gratia sufficiens est singulare gratiæ monstrum dæmoni ut homines devoret efficacissimum subministrans auxilium. Scilicet ab initio mundi ad finem usque nullum habuit, nec habebit effectum. Ex hac argumentatione hanc assertionem eduxerunt Jansenii discipuli ab Alexandro VIII anno 1690 proscriptam: *Gratia sufficiens statui nostro non tam utilis quàm perniciosa est; sic ut meritò possimus petere, à gratiâ sufficiente: Libera nos, Domine.* — Resp. 1º, mirum videri Jansenium argumentum fabricasse omninò idoneum ad invidiam conflandam gratiæ suæ parvæ, quæ in conflictu fortioris cupiditatis nunquam obtinuit, vel obtinebit effectum ad quem ex se tendit. Resp. 2º, Thomassinum, et juxta non paucos Norisium, etc., censere gratiam sufficientem suum aliquando sortiri effectum in rebus saltem facilibus. Resp. 3º, omnes orthodoxos theologos docere gratiam sufficientem conferre veram potentiam boni hic et nunc operandi, saltem remotam et mediatam, ut diximus, et ideò ex humanæ voluntatis malitiâ, non ex Dei aut gratiæ viriû defectu oriri, quòd gratia sufficiens effectum, ad quem à Deo destinatur, non obtineat, licet gratiæ sufficienti, seu excitanti *ut sic* homo non possit actu con-

sentire sine novo gratiæ adjuvantis, vel operantis auxilio.

Obijciunt 2°: Si gratia sufficiens vires relativè pares superandæ concupiscentiæ semper voluntati tribueret, voluntatem constitueret in æquilibrio perfecto, quo ad bonum et malum æqualiter inclinaretur, nimirum per gradus gratiæ æquiponderantes gradibus concupiscentiæ; at æquilibrio illud gratiam Christi evacuare docent S. Augustinus, et Alipius epistolâ 196 ad Paulinum; unde illud rejecerunt nonaginta septem Galliarum episcopi anno 1720. Et verò, Deus in isto systemate teneretur majorem conferre gratiam impiis eâ proportionem quâ nequitiam augerent, et minorem sanctis eâ proportionem quâ in sanctitate crescerent; at hæc est præcisè impia et insulsa doctrina Juliani, ut ipsi exprobrat Augustinus libro 2 Operis imperfecti cap. 117. Ita P. Bernenc loco citato ubi catholicum Augustinianorum systema de gratiâ sufficiente sic ab errore Janseniano vindicat ut tamen Jansenii sectatoribus adversus catholicos arma subministrare videatur. — Resp. 1°, hoc æquilibrii commentum propriè inherere Janseniano systemati, in quo gratia et concupiscentia in sese invicem relativè et quasi mechanicè agunt, et ideò in æquilibrio consistunt, ubi utriusque gradus utrinque æquales sunt; ex quibus clucet eo in systemate impios ut convertantur majore, sanctos ut perseverent minore gratiâ indigere. Resp. 2°, *libram*, quæ Augustino dicente citato loco Juliani delirium, indicabat, Jansenii etiam deliramentum patefacere. Nihil enim gratiæ magis injuriosum fingi potest; quam asserere illam vincere non posse oppositam concupiscentiam nisi quando eam gradibus superat. Minima scilicet gratia tantâ virtute et energiâ pollet, ut cuilibet concupiscentiæ, etiam ardentissimæ, resistere possit, et vitare omne peccatum mortale; ut aiebat Angelicus doctor. Resp. 3°: Nego majorem; nihil enim fidei, rationi et experientiæ magis adversum quàm à Pelagianis propugnatum *propensionis*, sive *inclinationis* et *facilitatis* æquilibrio, quo voluntas sic erat libera ut in malum magis quàm in bonum non propenderet. Parieter nihil, ut modò diximus, gratiæ tam injurium quàm à Jansenio excogitatum *virium et graduum* æquilibrio, quo voluntas pari hinc et inde gratiâ et concupiscentiâ affecta in *suspensio* necessariè maneret. Unde utrumque illud æquilibrio explodimus, et detestamur, nullâ tamen delectationi relativè victrici Augustinianorum inustâ notâ, quam postea catholicam

esse dicemus. Quomodò igitur, inquires, gratia sufficiens vires dat relativè pares vincendæ concupiscentiæ? Hoc sensu quòd voluntas hæc gratiâ excitata activam retineat indifferentiam per quam immunis est à quâlibet necessitate, etiam simplici, mutabili et relativâ (ut agnoscunt Augustiniani), et sic hujus gratiæ, etiam minimæ (ubi plures sentiunt) virtute possit quamlibet concupiscentiam, si velit, vincere. Hoc est æquilibrio *potentiæ et electionis*, quo voluntas sub impulsu gratiæ, vel concupiscentiæ ab omni necessitate immunis est; hoc est æquilibrio quod admittendum esse etiam in statu naturæ lapsæ definivit Ecclesia damnamdo tertiam Jansenii propositionem.

Obijciunt 3°: Thomas de Lemos, celebris cardinalis Lauria, et alii, docent ex SS. Augustini et Thomæ principiis, et juxta *grammaticalem significationem*, gratiam sufficientem eam esse præter quam nulla alia requiritur ad benè agendum; at talis non est gratia sufficiens quam ad fidem pertinere diximus; dat enim *tantum posse benè agere*; ergo. — Resp. 1°: Quidquid sit de antiquitate nominis gratiæ sufficientis à nobis definitæ, ejusve grammaticali significatione, certum esset rem eo nomine à nobis descriptam semper creditam fuisse in Ecclesiâ, et ad fidem pertinere saltem post Constitutionem Innocentii X adversus quinque propositiones.... 2° Insigniores Thomistas et Augustinianos gratiam sufficientem agnovisse tantquam omninò necessariam ut Dei mandata hominibus non sint impossibilia, ut ostendimus.

PRINCIPIA SOLUTIONUM. — Primum. Gratia sufficiens hic præcisè spectatur relativè ad censuram Jansenii systematis, id est, prout confert voluntati vires relativè pares, ut possit oppositam concupiscentiam vincere, et ideò Dei præcepta, cum urgent, reddit ipsi relativè possibilia. Hinc ad rem non sunt argumenta gratiam sufficientem sub alio respectu impugnantia.

Secundum. Gratia sufficiens hoc sensu dat vires relativè pares ad superandam contrapugnantem concupiscentiam quòd voluntas eâ excitata ex activâ indifferentiâ possit, illam concupiscentiam vincere.

Tertium. Licet gratia excitans, seu sufficiens det voluntati veram et relativè proportionatam ad opus bonum potentiam, tamen ut voluntas bonum actu operetur insuper necessaria est gratia adjuvans et operans, seu cooperans, cui voluntas potest resistere; an autem necesse sit illam gratiam physicè vel moraliter præmo-

vere et prædeterminare voluntatem ad agendum Ecclesia non definiuit.

Quartum. Potentia ad opus bonum, quam tribuit gratia sufficiens, non est semper immediata et proxima, sed aliquando remota et mediata per orationem scilicet quâ iusti saltem possunt semper fortius Dei auxilium obtinere, ut diximus. Hinc ad rem non sunt sive Scripturæ sive Augustini testimonia quibus dicitur gratiam parvam, sive sufficientem prementi cupiditati vincendæ esse imparem.

Quintum. Jansenius, vir licet sagacissimus et ratiocinio potens, multa tamen admisit quæ suum de gratiâ interiore in præsentî statu, cui nunquàm resisti potest, systema enervant, imò pessumdant. 1º Enim dicit *multos ab internâ gratiæ suasionem et inclinationem dissentire....* 2º Fatur Adamum et angelos malos Dei voluntati restitisse; item hominem in præsentî statu non solum posse, sed etiam reipsâ resistere gratiæ Dei exteriori, internæ mentis illustrationi, et parvæ voluntatis gratiæ quæ ad opus plenum et perfectum ex se tendit.... 3º Ex nativâ ipsius systematis conditione gratia parva vincitur à cupiditate fortiore.... 4º Docet gratiam parvam effectu suo (imperfecto scilicet) nunquàm privari quando etiam oppugnatur ardentissimâ actuali concupiscentiâ; at exemplum bilancis quod adducit contrarium evincit. Corpus nempe plurimùm prægravans in unâ bilancis parte omninò impedit ne corpus in alterâ bilancis parte positum vel minimum attollatur. Certè hæc, ni fallor, non conciliabit cum his quæ ex Scripturâ et D. Augustino ad nauseam objicit, scilicet nullam esse gratiam nisi efficacem, quæ det et *posse* et *agere* bonum cui, utpote omnipotentis Dei voluntatis instrumento, obsisti non potest.

Sextum. Jansenius et ejus discipuli, ut sese eximant ab innumeris testimoniis asserentibus gratiam posse debellare cupiditatem, callidè fatentur 1º, *voluntatem cum gratiâ parvâ, sive sufficiente cupiditati posse reluctari* (intelligunt, potentiâ absolutâ ex gratiâ præcisè in se spectatâ oriente, non potentiâ relativâ oriente ex gratiâ collectante cum actuali concupiscentiâ fortiore).... 2º Gratiam parvam posse relativè vincere concupiscentiam (intelligunt concupiscentiam in genere, sive naturæ lapsæ infirmitatem, non actuale subjecti concupiscentiam). Hinc ob oculos semper habet distinctionem *potentiæ absolutæ*, et *potentiæ relativæ*, et *concupiscentiæ generalis*, et *concupiscentiæ actualis*, ut eorum laqueis non irretiaris.

Septimum. Si Norisius admisit in præsentî statu adjutorium *sine quo non*, quo interdum iusti sine gratiâ ex se efficaci actu orant *ut oportet* (ut non pauci contendunt), frustra ad Jansenium provocares, qui profectò Augustinianæ doctrinæ notitiâ magis imbutus non fuit quàm Norisius.

Octavum. Etsi liquidò explicari non possumus modum quo gratia sufficiens operatur, non ideò firmum non esset catholicum de gratiâ sufficiente dogma; in mysteriis enim aliud mysterium ipsum, aliud modus quo exponi potest, ut videre est in ipsis naturæ phenomenis.

Nonum. Augustinus in homine lapso peccandi necessitatem agnoscit vel *ante gratiam*, vel si positâ gratiâ, *generalem et indeterminatam* (cùm sine speciali privilegio à peccatis omninò abstinere nequeat), non *actualem et determinatam*, quâ *hic et nunc* præsentem gratiâ non possit non peccare.

Decimum. Scriptura, Augustinus et alii Patres gratiam efficacem sic commendant ut sufficientem non excludant.

Undecimum. Cùm Pelagiani gratiam *legis et doctrinæ*, quâ mens illustratur, admitterent, et gratiam voluntatis et actionis rejicerent, Augustinus argumento *ad hominem*, ut aiunt, eos premendo aliquando dixit, *eos qui non credunt, aut bonum non faciunt, foris tantum audire non intus, nempe in Pelagianorum sententiâ*. Hæc tamen exponi possunt de auditione efficaci, non sufficiente.

Duodecimum. Julianus et Semipelagiani sentiebant *Deum frustra hominis misereri nisi homo præmitteret affectum bonum*; quem errorem ut refelleret Augustinus reponebat, *velle nostrum non prævenire, sed sequi Dei misericordiam*.

Decimum tertium. Gratia, cujus necessitatem defendit Augustinus contra Pelagianos, fuit gratiam voluntatis et actionis, id est, ut videtur, gratia, præcipuè quidem, sed non unicè, ex se efficax.

Decimum quartum. Pelagiani admiserunt gratiam *possibilitatis*, sed quæ non esset diversa à naturâ, libero arbitrio, lege et doctrinâ. Item Semipelagiani gratiam sufficientem admiserunt sequentem naturale salutis desiderium, sive voluntatem, non prævenientem voluntatem, qualis est gratia sufficiens catholica.

Ultimum. Cùm Augustinus dixit *adjutorium sine quo non* proprium fuisse statûs innocentiae, et adjutorium quo statûs naturæ lapsæ, primum adjutorium in statu naturæ corruptæ omninò excludere noluit, sicut cùm dixit, *differentiam*

veteris et novi Testamenti fuisse timorem, et amorem, à veteri Fœdere dilectionem, et à novo timorem prorsus expellere non intendit, sed tantum, ut ipse dixit, in antiquâ lege prævaluisse metum, in novâ prævalere amorem.

CAPUT II.

De gratiâ gratiæ sufficientis effusione.

Ut Lutheri, Calvini et eorum asseclarum de gratiæ in statu naturæ lapsæ largitione doctrina ab Yprensi libro 3 de Gratiâ Christi Salvatoris cum miro artificio, fuco et solertiâ renovata eliminetur, investigabimus 1°, an gratiæ sufficientes omnibus justis, cum præceptum hic et nunc implendum est, impertiantur..... 2°, an infundantur omnibus fidelibus sotentibus, sive ut in nova peccata non prolabantur, sive ut à peccatis resurgant.... 3°, an dentur excæcatis et induratis..... 4°, an Hæbræis in antiquo fœdere illuxerint..... 5°, an tribuantur infidelibus ut evangelicæ fidei lumine collustrentur..... 6°, an in omnes infantes è cœlo stillent aliqua beneficia ad salutem sufficientia.

Plena eximiarum istarum quæstionum solutio velut rivus à fonte ebullit ex istâ, *utrum Deus in statu naturæ lapsæ, et ideò supposito peccato originali, voluntate non signi tantum et merè exteriori* (quam solam erga reprobos admittit Guillelmus Estius tum in 1 Sent. distinct. 46, paragrapho 4, cum in 1 ad Tim. cap. 2, ob hoc à Jansenio libro 3 de Gratiâ Christi cap. 20, impensè laudatus) *sed etiam voluntate internâ, sincerâ et actuosâ omnium et singulorum hominum salutem velit et desideret*; et ideò an Christus pro omnium et singulorum hominum salute sese Deo Patri in propitiationis victimam obtulerit; quæ celeberrima et prolixæ discussionis quæstio in tractatu de Deo et ejus attributis, ubi de Dei voluntate disseritur, et in opere de Incarnatione, ubi de Christi morte et ejus effectibus res est, ventilari solet, quam ideò hic profundè, ut deceret, non scrutabimur, et finiemus. Absit tamen ut hic summam non referamus quid Jansenius hâc super re senserit, et quid super eâ tenendum sit non declaremus, cum inprimis sex commemoratarum quæstionum solutio ab illâ, ut diximus, præcipue pendeat.

Quid Jansenius et ejus defensores super Dei omnes homines salvandi voluntate senserint et concesserint ? — Variis mortalibus commemoratis gratias sufficientes ad salutem, cum prædestinati non sunt, non impertiri cum pertinaciâ asserunt Lutherus, Calvinus, Jansenius et

eorum patroni; Deus scilicet, ut clamare solent, (ex quo saltem omnes homines in Adam mortui sunt) electorum duntaxat salutem verè et sincerè vult, et ideò pro eorum duntaxat salute Christus sanguinem suum reipsâ fudit. Id enuntiat ultima inter quinque famosas Jansenii propositiones proscriptas ab Innocentio X mense junio anni 1653, his circumclusa verbis: *Semipelagianum est dicere Christum pro omnibus omnino hominibus mortuum esse, aut sanguinem fudisse.*

Hæc assertio, prout jacet, damnata fuit ut *falsa, temeraria et scandalosa*; intellecta verò eo sensu, ut Christus pro salute duntaxat prædestinatorum mortuus sit, tanquàm *impia, blasphemica, contumeliosa, divinæ pietati derogans, et hæretica*. Hinc fide constat Christum pro salute unius saltem reprobis mortuum esse (ubi quippe una propositio ut hæretica damnata est, propositio contradictoria pertinet ad fidem).

Ultimum sensum intendit Jansenius. Scilicet in mente versuti viri aliud est *Christum sanguinem fudisse pro aliquo*, aliud *Christum mortuum esse pro salute alicujus*; Christum enim crucifixum esse pro aliquo, est Christum crucifixum esse ut iste gratias aliquas temporales virtute passionis Christi acciperet; Christum verò passum esse pro salute alicujus, est Christum passum esse ut iste insuper usque in finem virtute mortis Christi gratias obtineret, quibus æternam salutem certissimè et infallibiliter, imò necessariè assequeretur. Vir sagax fatetur Christum mortuum esse pro pluribus reprobis (id negaverat Calvinus, et in hoc tantum in Jansenii mente à doctrinâ Augustini in hac parte recesserat), puta iis omnibus qui baptizati sunt et in acceptâ justitiâ ad tempus perseveraverunt, quia dona temporaria à Christo obtinuerunt; negat autem et pernegat Christum mortuum esse pro salute illorum reproborum (aliàs in ejus systemate invictissimè salvi fierent, cum omnipotens Dei voluntas semper suum sortiatur effectum, et fructus mortis Christi inanis esse nequeat).

Quod attinet ad alios reprobos, qui nullis unquam mortis Christi beneficiis donati sunt, ille contendit Christum aut pro illis mortuum esse *sufficienter*, sive pretii sufficientiâ (id est Christum pretium iis redimendis par et plus quàm par Deo Patri obtulisse, quod intus et in animo ipsis applicari et prodesse noluit), aut potius pro illis nullatenus esse mortuum. « Christus, inquit capite ultimo libri 3 de Gratiâ Christi, dicitur pro omnibus mortuus

(1 ad Tim. 2, v. 6, 2 Cor. 5, v. 14 et 15, 1 Joannis 2, v. 2, etc.), hoc sensu quòd mortuus sit pro universâ Ecclesiâ toto orbe dispersâ, et consequenter pro omnibus hominum generibus (non singulis generum), regibus, privatis, nobilibus, ignobilibus, etc.; itemque pro hominibus omnium nationum, linguarum et gentium, Judæis scilicet et gentilibus, ex quibus congregatur universus populus Dei secundum illud Apoc. 5 : *Redemisti nos Deo in sanguine tuo ex omni tribu, et lingua, et populo, et natione*. Simili universalitate dicit Joannes (1 Epistolâ cap. 2) : *Ipse est propitiatio.... non pro peccatis nostris tantum, sed etiam pro totius mundi*, hoc est non pro nostris tantum, quibus istam Epistolam scribo, sed pro universo populo fidelium, seu Ecclesiâ toto mundo dispersâ.

Cum autem istam interpretationem (ut et totum Jansenii systema) funditus evertere videretur celebre Apostoli oraculum 1 ad Tim. c. 2, v. 4 : *Deus omnes homines vult salvos fieri et ad agnitionem veritatis venire* (quod ex tribus versibus antecedentibus, et versu quinto sequenti certò videtur intelligendum de singulis etiam generum) et istud Petri 2 Epistolâ cap. 3, v. 9 : *Nolens aliquos perire, sed omnes ad penitentiam reverti*, cum, inquam, duo ista oracula relatam expositionem, imò totum de duabus delectionibus necessitate relativâ victricibus systema pessumdare viderentur, primum præsertim, idcirco in illis exponendis, sive potius eludendis, totum caput vigesimum libri tertii de Gratiâ Christi impendit.

Hic scilicet triplicem potissimum commemorationis oraculi ex Augustino retulit explanationem. Prima fert Deum velle omnes homines salvos fieri, quia nullus fit salvus nisi Deo volente. Ita S. doctor epistolâ 207 ad Vitalem cap. 16, n. 19. Hanc interpretationem familiari similitudine illustrat Augustinus libro de Prædestinatione Sanctorum cap. 8, n. 14 : « Sicut, inquit, integrè loquimur cum de aliquo litterarum magistro, qui in civitate solus est, dicimus : Omnes iste hic litteras docet, non quia omnes discunt, sed quia nemo nisi ab illo discit; ita rectè dicimus : Omnes Deus docet venire ad Christum, non quia omnes veniunt, sed quia nemo aliter venit.... » Secunda vocem *omnes*, exponit non de singulis generum, sed de generibus singulorum, ita ut sensus sit, Deum velle ex omni genere et conditione Judæos aliquos, Græcos, pueros, adultos, divites et pauperes salvos fieri. Ita Augustinus Enchiridion cap. 103, n. 27, ubi primâ expositione repetitâ hanc

proponit.... Tertia dicit Deum velle omnes salvos fieri eo sensu quòd nos facit velle omnium salutem, quomodò legitur epistolâ ad Galatas, cap. 4, v. 6 : *Misit Spiritum Filii sui clamantem : Abba, Pater, id est, nos clamare facientem*. Ita idem Augustinus libro de Correptione et Gratiâ cap. 13, n. 47.

Divus Augustinus aliam apostolici oraculi expositionem assignaverat libro de spiritu et litterâ (adversus Pelagianos scripto anno 412), cap. 53, n. 58, his verbis : « Vult autem Deus omnes homines salvos fieri, et in agnitionem veritatis venire, non sic tamen ut eis adimat liberum arbitrium, quo benè vel malè utentes justissimè judicentur; quod cum fit, infideles quidem contra Dei voluntatem faciunt, cum ejus Evangelio non credunt, nec ideò tamen eam vincunt, verum seipsos fraudant magno et summo bono, malisque prenatalibus implicant, experturi in suppliciis potestatem ejus, cujus in donis misericordiam contempserunt. »

At Jansenius non ignorans quantum celebris ista interpretatio suo systemati præjudicium inferret, relato capite reponit, Augustinum hæc protulisse ex errore Semipelagianorum, quo antea imbutus fuerat, et ex objicientis et disputantis personâ, ut superius, addit, diximus (libro 2 de gratiâ Christi cap. 30). Sed reclamant Augustini contextus; reclamant insignes Augustini discipuli, venerabilis Beda (quem impensè laudat Jansenius libro 6 de gratiâ Christi cap. 14) in 1 ad Tim. cap. 2; Hincmarus Rhemensis de prædestinatione cap. 25; D. Anselmus in caput 6 Matthæi ubi docet, *duas esse in Deo voluntates, unam misericordiæ, quâ omnes homines vult salvos fieri, cui multi resistunt; alteram justitiæ, quâ vult gratiæ consentientes salvari, dissidentes damnari; cui nunquam resistunt homines, imò resistere nequeunt*, cum de eâ dictum sit : *Omnia quæcumque voluit fecit*; hæc enim coincidere videntur cum trita distinctione Dei voluntatis in antecedentem, et consequentem... Reclamant præstantissimi Thomisticæ et Augustinianæ scholæ doctores, qui relato Augustini testimonio innixi, docent Deum velle voluntate sincerâ antecedente omnes homines salvare, absolutâ et consequente solos electos. Plures Thomistas citat P. Dechamps libro 3 de hæresi Jansenianâ, disputatione 7, cap. 13. Testis verò est pro Augustiniani P. Bernenc, etc., Augustiniani systematis de gratiâ T. 3, q. 3, ubi ait : *Ex libro de spiritu et litterâ cap. 53, patet Augustinum admisisse in Deo voluntatem antecedentem sal-*

vandi omnes homines, et interpretationes ejus (tres supra recensitas) esse de voluntate Dei absolutâ et consequente salvandi electos (quam rejiciebant Pelagiani) intelligendas.

Jansenius, eodem capite vigesimo libri 3 de Gratiâ Christi, relatis tribus Augustini expositionibus, et elusâ interpretatione capituli 33 libri de Spiritu et Litterâ, D. Chrysostomum et alios Græcos deserit, « quia, inquit, ante subertas de divinâ gratiâ difficultates Commentarios suos ediderunt, nec ulli imperfectius de gratiâ quàm Græci locuti sunt, nec ulla difficultas de gratiâ magis lubrica sit quàm ista, in cujus intelligentiâ et ipse Augustinus usque ad episcopatum hallucinatus est. » Quod attinet ad Latinos Augustino priores et posteriores, et inter Græcos D. Joannem Damascenum libro 2 orthodoxæ fidei cap. 29, sub finem, declarat aut se eos non vidisse, aut opera quæ ipsis tribuuntur ab ipsis non esse conscripta, aut si ab ipsis reverâ edita sunt, eos per voluntatem antecedentem salvandi omnes homines intellexisse voluntatem quæ peccatum originale antecederet, per consequentem verò voluntatem, quâ Deus non vult omnes homines salvos fieri, indicasse voluntatem quæ peccatum originale consequeretur. Scilicet in Janseniano systemate Deus ante prævisam Adæ culpam, sive in statu innocentie, omnes et singulos salvos fieri sincerè voluit, et singulis ex illâ generali et antecedente voluntate necessaria ad salutem consequendam auxilia destinavit; sed præviso illo peccato non amplius illam omnes salvandi voluntatem habuit, sed absolutam tantum et consequentem, quâ alios reprobat, alios per invictissima gratiæ beneficia ad æternam vitam attrahit, aut si in statu naturæ lapsæ antecedens illa voluntas supponatur, in solâ mentis præcisione, et ideo nudâ quâdam velleitate nihil omnino gratiæ causante, ut loquitur, consistere poterit.

Merito sanè Jansenius Patres græcos hæc in quæstione deseruit, quinimò, si eruditionis suæ lumen sequi voluisset, Augustino et quibusdam exceptis, omnibus Latinis valedicere debuisset. Enimverò, dicente Patre Petavio, quem domini Nicole et Arnaud suis in operibus cum encomio citare consueverunt, de prædestinatione libro 10, cap. 4, n. 1: « Qui communem de omnium salute Dei voluntatem propugnant, totam pro se antiquitatem nominare possunt, Augustini ætate superiorem, et post Augustinum latinos plerosque, græcos autem Patres universos. » Ibidem vir doctissi-

mus, numeris 10 et 11, ait eos qui S. Damascenum hic exponunt modo ab aliis Græcis diverso ignorare quod dicunt aut de quo dicunt, vel potius tergiversari videri. Et verò, docet Jansenius græcos Patres verum sensum Apostolico testimonio non affixisse, sed Augustinum et Latinos ejus imbutos sententiâ; at credibile non est Joannem Damascenum, Augustinum et Latinos ipsi adductos, quos fortassè nunquàm legerat, Græcis omnibus præhabuisse.

Demum Yprensis eodem capite vigesimo istud B. Petri 2 Epistolâ cap. 3, *volens aliquos perire*, exponit de solis electis, ut et Estius in hunc locum. De quâ expositione idem dicendum est quod de eorum expositione textus: *Deus vult omnes homines salvos fieri, etc.*

Quid sentiendum sit de Dei voluntate circa hominum salutem?—Sentiendum est Deum, supposito etiam peccato originali, non tantum voluntate signi, sive externâ (quæ non nisi improprie et metaphoricè voluntas dici potest), sed et beneplaciti, sive internâ antecedente, quidquid (quod inter theologos controversatur) per voluntatem antecedentem intelligendum sit, omnium et singulorum hominum salutem velle, ita ut omnes necessariis, ut æternam salutem comparare possint, præsidii divinâ beneficentiâ suo modo instructi sint.... Deum verò voluntate speciali, absolutâ et consequente, quidquid rursus (de quo non consentiunt catholici doctores) per voluntatem consequentem significetur, electorum non reproborum salutem velle et appetere.

Utraque assertionis pars ex dictis splendide confirmatur.

Prima quidem antecedentem voluntatem spectans. Firmissimè enim tenenda est, si textui Apostoli, *Deus vult omnes homines salvos fieri*, 1 ad Tim. cap. 2, aperte conformis est; at res ita se habet; ex dictis enim elucet 1º, hunc textum tum ex præcedentibus cum ex sequentibus intelligendum esse de verâ Dei omnes omnino homines in statu præsentis salvandi voluntate.... 2º Eundem textum sic acceptum fuisse ab omnibus Patribus græcis, et plerisque latinis, paucis exceptis, qui etiam hanc acceptionem non excludunt, imò admittunt, ubi non obstat eorum adversus hæreticos scopus... 3º Idem oraculum sic intellectum esse non tantum à Molinistis, sed etiam ab omnibus ferè insignium scholarum Thomisticæ et Augustinianæ theologis. Et verò, quidquid de Deo enuntiant sacri codices, si maximè deceat Dei bonitatem, misericordiam, ac provi-

dentiam, id absque ullâ hæsitacione in Deo verè existere affirmandum est; at sacræ Litteræ referunt Deum velle omnes homines salvos fieri, idque maximè congruit Dei attributis; ergo. — Tandem antecedens Dei voluntas ex se respicit institutionem mediorum, quibus homines salvari possunt; at talis institutio est verum bonum, quod potest esse objectum voluntatis veræ et internæ; ergo voluntas antecedens non exterior tantum, sed et interior est.

Secunda ejusdem assertionis pars, quæ tangit *voluntatem consequentem*, per se elucescit, et traditur ab Augustino in tribus commemoratis expositionibus textus: *Deus vult omnes homines salvos fieri*, etc., 1 ad Tim. 2; et Matthæi cap. 20, v. 28, cap. 26, v. 28, Epistolâ ad Hebræos, cap. 9, v. 28, Apocalypsis cap. 5, v. 9, etc.

Dices 1^o: Augustinus in tribus relatis expositionibus oraculum, *Deus vult*, etc., intelligit de iis solis qui salvi fiunt; ergo.

Candidè fatetur Petavius libro 9 de Prædestinatione cap. 15, n. 2, Augustinum censuisse Deum velle verè et sincerè solos electos salvare; libro autem decimo cap. 3, n. 2, addit, *tres commemoratas Augustini interpretationes ad eludendum magis excogitatas quàm certas et solidas videri solere*; sed absit ut tantum doctorem, qui unus pro multis nobis semper erit, deseramus, et existimemus quempiam Apostoli sensum meliùs intelligere potuisse quàm ipsum. Unde resp.: Distinguo ant.: Augustinus Apostoli oraculum in tribus relatis expositionibus intelligit de solis electis, quia id exigebat ejus scopus adversus Pelagianos et Semipelagianos, conc. Quia sentiebat illud oraculum ad litteram non significare Deum alios quàm electos verè salvare velle, neg. ant. et conseq. Sentiebant Semipelagiani Deum velle *æqualiter* omnium hominum salutem, et ideò Christum pro omnibus *æqualiter* sanguinem fudisse, ita ut nulla majora prædestinatis quàm electis gratiæ beneficia impertiret; unde absolutum prædestinationis decretum, quod adstruxerat Augustinus, sive absolutam et consequentem electos salvandi Dei voluntatem rejiciebant. Item Pelagiani sentiebant Deum sic omnes homines salvos fieri velle, si naturæ viribus absque ullâ voluntatis gratiâ salutem appetent, ut Deus ipse sine personarum acceptione prævias illas dispositiones non asserentes salvare non posset. Utrique autem voluntatem Dei generalem et antecedentem omnes salvandi pravo suo sensu, id est, actuum naturalium, aut saltem

pii credulitatis affectus ex naturâ erumpentis ope, acceptam agnoscebant, et ideirco textu apostolico: *Deus vult omnes homines*, etc., generalem illam, et antecedentem voluntatem, non absolutam et consequentem erga electos adumbratam fuisse pertinaciter asserebant. Quid ad hæc sapiens et sagax doctor? 1^o potuisse Apostolum hoc textu absolutam Dei electos salvandi voluntatem delineare, et id ab ipso reipsâ non fuisse intentum evinci non posse, quod quidem tribus relatis expositionibus probavit.... 2^o posse adversarios illum illius textus interpretationem afferre si voluerint, modò omnipotenti Dei voluntati et gratiæ necessitati non deroget, ut reipsâ ipsi derogabant asserendo Deum non posse, etiamsi velit, homines salvare, *nisi velint*. Appositè igitur et ad mentem Pelagianorum commemoratas interpretationes excogitavit D. Augustinus, non verò relativè ad proprium et litteralem Apostoli sensum de generali et antecedente omnes homines salvandi voluntate, quam, ubi de absoluto electos salvandi decreto res non erat, reipsâ attulit citato libro de Spiritu et Litterâ cap. 33, et alibi passim, v. g., cùm centies asseruit Christum eâ intentione mortuum esse ut omnibus pretium mortis suæ aut præpararet aut communicaret.

Dices 2^o: Augustinus referendo citatas expositiones permittit aliam quærere, modò consistere possit cum isto oraculo, *omnia quæcumque voluit fecit in cælo et in terrâ*, Psalmo 134; at hæc conditio evincit Augustinum non agnovisse in Deo voluntatem antecedentem omnes homines salvandi, sed solam absolutam et consequentem; voluntas enim antecedens non semper impletur; ergo, etc. — Resp. 1^o, hanc exceptionem directè impugnare insulsam Pelagianorum sententiam, qui effutiebant Deum sic velle mortales salvare *si velint* ut eos aliter si vellet salvare non posset. — Resp. 2^o, Jansenium et ejus defensores risum movere dùm garriunt Deo esse injurios qui aliquam veram et beneplaciti Dei voluntatem in statu præsentis non impleri asseverant. Jansenius scilicet, libro decimo de Gratiâ Christi, cap. 1, hæc docet: « Habuit Deus generalem voluntatem benevolentis erga omnes Angelos, ex quâ, quantum in se est, omnium beatitudinem æternam voluit, omnibusque propterea beatitudinis consequendæ media sufficientissima largitus est. » Eandem voluntatem, ipso etiam fatente, habuit erga primos parentes in statu innocentis, et reipsâ habiturus fuisset erga omnes eorum

posteroribus si non peccassent. Jam verò generalis ista Dei *benevolentiae* voluntas impleta non fuit in omnibus Angelis, ut nec in primis parentibus, cum peccaverint, et tamen Deus aequè fuit omnipotens in statu innocentiae ac in praesenti ordine; ergo aliqua vera et beneplaciti Dei voluntas sine praedictio divinae omnipotentiae suum effectum non consequi potest. — Resp. 3°, hoc argumentum nos hic non impetere cum pro instituto nostro sensum voluntatis *antecedentis*, et *consequentis* non ligamus. Scilicet controvertitur inter theologos quid hic sit voluntas *antecedens* et *consequens*.

Molinistae voluntatem antecedentem eam dicunt, quā Deus ante praevisa merita, sive liberum gratiae consensum, omnibus non praeparat tantum, sed et reipsā confert media verè sufficientia, quibus, si voluerint, reipsā salvabuntur.... Consequentem et absolutam eam vocant, quae consensum illum, sive merita consequitur, quā ideò Deus aeternam vitam, sive gloriam electis impertiri vult; et hi propositam difficultatem solvere debent.

Verum relata notio displicet Thomistis et Augustinianis, qui apostolicae et Augustinianae doctrinae (ut gloriantur) studiosi scientiam mediam explodunt, et contendunt existere in Deo voluntatem absolutam aliquos salvandi ante praevisa merita, et independentem à voluntatis consensu praevisione. Unde ipsi dicentibus, voluntas antecedens connotat praeparationem mediorum tum externorum cum internorum, quibus homines ex intentione Dei ad salutem pervenire possunt; absoluta autem et consequens connotat media certissima et infallibilia quibus Deus secundum propositum voluntatis suae aliquos, sive electos suos, ad vitam aeternam perducit. Non ista autem tantum, inquit, sed et illa voluntas suum semper assequitur effectum, ut patet. Illis per modum praeludii delibatis, altissimas quaestiones supra delineatas, quantum humana patitur imbecillitas, scrutemur et exploremus.

ARTICULUS PRIMUS.

Utrum gratia sufficiens omnibus justis, cum praeeptum hic et nunc urget, impertiat?

ERRORES. — Calvinus isto imbutus principio, post Adae peccatum liberum arbitrium non tantum viribus attenuatum et inclinatum esse (sessione 6, cap. 1 concilii Tridentini), sed et amissum et extinctum esse, et ideò justos ipsos in bonis operibus sese quasi passivè habere, quin bona eorum opera, ob ipsis tenaciùs in-

hærens concupiscentiae virus, esse vera peccata, licet ipsis non imputentur ob justitiam Christi quā veluti pallio obteguntur; isto, inquam, vertiginoso systemate dementatus, libro 3 Institutionis cap. 13, paragrapho 3 et 4, ipsis justis, ubi etiam affulget gratia fortissima, prorsus impossibilia esse Dei praecepta obganivit.

Jansenius, eodem praecupatus systemate quoad extinctionem liberi arbitrii primigeniæ labe, justos, cum cadunt, eadem Dei mandata adimplendi impossibilitate, non absolutā quidem, sed relativā laborare docuit, ut suum de duabus delectationibus relativè victricibus exigebat principium, decem praesertim de gratiā Christi libris consignatum; impossibile quippe est, ut passim decantat, ut vigente cœlesti delectatione illicitum, vigente terrestri delectatione licitum praevalcat desiderium. Hinc famosa inter quinque damnatas ab Innocentio X die 31 maii, ann. 1653 propositio ipsis terminis expressa libro 3 de Gratiā Christi, cap. 13 (unde vertigo eorum qui Jansenismum phantasma, aut hæresim imaginariam esse balbutiunt): *Aliqua (dixit quedam) Dei praecepta hominibus justis volentibus et conantibus secundum praesentes quas habent vires (id est, secundum gratiam actualem debiliorem) sunt impossibilia (non absolute, sed relative; nulla enim est in Jansenii systemate impotentia nisi relativa); deest quoque gratia quā possibilia fiant (relative, non absolute; debiliior enim gratia secundum quam volunt et conantur sublatā fortiore delectatione terrestri oppositā sufficeret ut possibilia essent mandata).*

Istam assertionem Jansenii sensu et B. Petro cum Christum negavit applicatam propugnavit celebris Arnaldus. Cum autem ob id incurrisset in censuram sacri Ordinis Parisiensis die 1 februarii anni 1656, hanc impugnavit censuram in famosā dissertatione de gratiā efficaci. Exinde celebris ista quaestio celebrior evasit; res enim etiam exiles, ubi à magnis viris tractantur, magnæ fieri solent.

QUESTIONIS CARDO. — In eo praecisè vertitur, an justis urgente praeepto, nunquā denegatur gratia verè sufficiens, quā possint illud hic et nunc implere, aut saltem petere auxilium ad illud implendum necessarium, cum inprimis non ponunt obicem, sive *volunt et conantur*. Circa quod sit

CONCLUSIO. — Cum relata Jansenii propositio ut *haeretica* damnata sit, ~~inde~~ constat justis volentibus et conantibus, urgente praeepto ades-

se gratiam verè sufficientem, quâ possint actualiter hic et nunc obnitentem concupiscentiam vincere, ac præceptum exequi, aut saltem per orationem obtinere adiutorium ad illud exequendum requisitum.

MOMENTUM PRIMUM. — *Ex Scripturis.* — Cùm ista assertio justum spectet luctantem cum validiore concupiscentiâ, ubi instat præcepti observatio, ideò textus adducam ad hanc justî conditionem propiùs accedentes.

Epistolâ 1 ad Corinthios cap. 10, v. 13, legitur: *Fidelis Deus est, qui non patietur vos tentari supra id quod potestis, sed faciet etiam cum tentatione proventum, ut possitis sustinere.* Ibi sermonem esse de omnibus fidelibus Corinthiis evincit 1^o versus duodecimus, *qui se existimat stare videat ne cadat*;... 2^o scopus Apostoli, qui intendit fidelium animos in tentationum turbine obfirmare et erigere;... 3^o concilium Tridentinum quod sessione 24, can. 9, hunc textum clericis majoribus et regularibus graves adversus castitatis votum hic et nunc implendum tentationes patientibus applicat sive proponit. Omnes ergo justî prementes hic et nunc tentationes Deo adjuvante sustinere sive vincere possunt; ergo gratiam ad id aut proximè aut remotè saltem sufficientem habent.

Obijciunt 1^o Estius in hunc locum, et Jansenius libro 3 de Gratiâ Christi, cap. 13: Hic textus de solis electis intelligendus est; et ideò unicè significat, Deum non esse passurum ut electi in æternum pereant, sed facturum ut finaliter de tentatione triumphent; idem elucet ex his, *faciet cum tentatione proventum*, sive, ut constanter legit Augustinus, contra Pelagianos, *cum tentatione exitum*; proventus enim et exitus actualem de tentatione victoriam connotant; ergo. — Resp. Nego ant. Ad probationem, sensum illum explodunt verba sequentia, *ut possitis sustinere*, ut constanter legit Augustinus, et ideò dicendum est aut sensum esse, *faciet cum tentatione etiam evadendi facultatem* (ut fatente Estio exponit S. Cyprianus in testamentis ad Quirinum), aut *illud faciet provenire quod poteritis sustinere* (ut alii exponunt). Etverò si, inquit S. Ephrem tractatu de Patientiâ, *homines suis jumentis non plus oneris imponunt, quàm ferre queant, multò minùs plus tentationum nobis imponet Deus quàm ferre queamus.* Hinc dominus Arnaud in versione Montensi gallicè malè vertit: *Il vous fera sortir de la tentation avec avantage*, cùm nec græcus nec latinus textus habeat *ex tentatione*, et

ipse in titulo hujus capitis decimi dicat ibi agi *de Judæis Christianorum figuris*, et ideò non de solis electis.

Obijcit 2^o Jansenius, et ipso duce dominus Arnaud in dissertatione de gratiâ efficaci parte 1, articulo 3: Sine gratiâ efficaci nihil boni ad salutem pertinentis edere potest justus; ergo, cùm peccat, et ideò abest gratia efficax, Dei præceptum est ipsi impossibile. — Probatur ant. his præsertim textibus. Joannis cap. 6, v. 44, ait Christus: *Nemo potest venire ad me nisi fuerit ei datum à Patre meo; at trahere ad Christum, et dare venire ad Christum, indubiè proprium est gratiæ efficaciæ*; ergo. — Resp. insignes theologos, ut Bellarminum, (quem dominus Arnaud aliquando cum encomio laudat) libro 2 de Gratiâ et libero Arbitrio, cap. 12, Gregorium de Valentia q. 3, disp. 8, de divisione gratiæ, puncto 4, hos textus de gratiâ efficaci intelligere non improbando expositionem de gratiâ sufficiente, modò gratia sufficiens sola in statu præsentis non admittatur. Item alii, inter quos Suarez et P. Frassen, censent iis textibus solam adumbrari gratiam voluntatem prævenientem, et ad singula pietatis opera necessariam, quam negabant Pelagiani. Tandem alii, ut Alvares et Norisius in Janseniani erroris calumniâ sublatâ cap. 1, paragrapho 2, et initio capitis 2 putant iis ita insinuari gratiam efficacem quæ dat potentiam proximam et expeditam cum actu unitam, ut etiam asseratur gratia sufficiens, quâ justus instante præcepto habet veram illud exequendi potentiam, licet mediatam et remotam.

Jam verò variæ illæ expositiones enervant domini Arnaldi argumentum non solum ex iis textibus, sed etiam ex Augustini doctrinâ desumptum (eodem enim modo in citatâ dissertatione arguit ex innumeris S. doctoris testimoniis); quis enim, quæso, magis crediderit dominis Arnaldo et Jansenio, quàm tot eximiis doctoribus quos uterque eruditione non superat? Aliunde verbum *trahere* convenit etiam gratiæ quæ voluntatem prævenit, et Christus, v. 66, non dixit, ut prætendunt: *Nisi ei datum fuerit venire*, sed simpliciter: *Nisi ei datum fuerit*, quod congruit gratiæ prævenienti sine quâ nihil boni possumus.

Demùm dominus Arnaud defendit propositionem ab Ecclesiâ proscriptam, commemorati verò doctores eam impugnant ex auctoritate Ecclesiæ, sine quâ se ipsi Evangelio creditorum non esse adversus Manichæos professus est D. Augustinus.

Itaque sic arguimus : Christus Joannis 6 delineat vel gratiam efficacem, vel gratiam simpliciter prævenientem et sufficientem : si istud, ruit argumentum : si illud, sensus erit : Nemo potest venire ad me *potentiâ cum actu conjunctâ*, nisi per gratiam efficacem, quod non impedit quominus potentiâ remotâ quidem et mediâtâ, sed tamen verâ et relativâ, ab actu *sejunctâ*, possit venire ad Christum.

Ita sanè respondet P. Bernenè supra citatus T. 2 systematis Augustiniani q. 44, conclusione 5, non solum ad hos textus, sed etiam ad omnia Augustini testimonia quæ concervat dominus Arnaud post Jansenium ad probandum ipsos justos sine gratiâ efficaci non solum nihil boni operari, sed nec operari posse. « Augustinus, inquit, loquitur de justis qui remotam quidem habent potentiam adimplendi mandata, sed quibus deest proxima et expedita potestas; prætendimus autem nos (Augustiniani) remotam illam quam habent justî potestatem esse veram et propriè dictam (et ideò relativam) potentiam, quæ cum effectu potest conjungi, licet per accidens cum effectu non conjungatur, remorante aliquo impedimento ex parte justorum. »

MOMENTUM SECUNDUM. — *Ex conciliis* — Quoniam synodus Tridentina veluti exscripsit concilia Milevitanum secundum can. 3, et Arausicanum secundum can. 25 adversus Pelagianos habita, illam solam adducam.

Sessione 6, cap. 11, et can. 18, in fidei tesseram erigit hoc Augustini oraculum (de justificato intellectum) libro, ut supra diximus, de Naturâ et Gratiâ, cap. 43, n. 5: *Deus impossibilia non jubet, sed jubendo monet et facere quod possis, et petere quod non possis, et adjuvat ut possis*. Ultima verba subintelliguntur ab Augustino; si enim ab illo petis ut possis, ille est qui adjuvat ut possis.

Jansenius libro 3 de Gratiâ Christi, cap. 13, hæc concilii refert, sed industriè addit clausulam : *et si exaudiat*, ante *adjuvat ut possis*, ut viam sternat doctrinæ capitis 19 ejusdem libri, ferenti justum aliquando deseri à Deo priusquam delinquendo deserat Deum, imò cum etiam tentatione concussus gratiam tentationi vincendæ necessariam suppliciter à Deo petit, quia nempe non exauditor.

Sancta synodus his, *facere quod possis*, indicavit potentiam proximam faciendi præcepti, et ideò gratiam proximè et relativè sufficientem; his autem, *petere quod non possis*, potentiam remotam servandi mandati, et ideò gratiam remotè et mediâtè sufficientem; his verò, *ad-*

juvat ut possis, significavit. Deum oranti ut oportet impertire gratiam ad præceptum hic et nunc faciendum, ut agnoscit et probat Norisius Vinlæ, cap. 3, paragrapho 6, ex Augustini tractatu 35 in Joannem, n. 8, ubi ait : *Sed audiamus Dominum et præcipientem et opitulantem, et jubentem quid facere debeamus, et adjuvantem ut implere possimus*.

Ibidem synodus ex Augustino libro de Naturâ et Gratiâ cap. 26, n. 29, et alibi, ait : *Deus suâ gratiâ semel justificatos non deserit nisi ab eis prius deseratur*. Ibi non disserit de solâ subtractione gratiæ sanctificantis, quasi sensus tantum esset : *Deus Gratiam sanctificantem à justis non aufert, nisi prius ab eis per peccatum lethale deseratur* (ut reponit Yprensis libro 3 de Gratiâ Christi, cap. 19), sed etiam de subtractione, et quidem præsertim, gratiæ actualis, ut sensus sit : *Gratiam sanctificantem non solum à justo non retrahit, donec ab illo derelictus sit per peccatum mortale, sed nec gratiam actualem sine quâ peccatum vitari non potest; id enim intendit quod Augustinus citato capite, cujus verba exscribit; at Augustinus disserit de subtractione utriusque gratiæ; ait quippe ibidem: Sanat Deus non solum ut deleat quod peccavimus, sed ut præstet etiam ne peccemus, ut ostendimus præcedenti capite articulo 2; quod quidem explicat discrimine quod ibidem dicit intercedere interdum inter medicum curantem vulnera, et mediatorem Christum; ille nimirum sanatum ægrotum Deo dimittit, iste justificatum non deserit si non deseratur, ut piè semper justèque vivat*. Ibidem capite 16 ait, *Christum in justificatos virtutem jugiter influere quæ bona eorum opera semper antecedit, et comitatur, et subsequitur*; ergo, ubi instat præceptum, ipsis præstat gratiam quâ illud relativè implere inmediate vel mediâtè valeant. Accedunt commemoratæ Constitutiones Innocentii X et Alexandri VII, ab universâ Ecclesiâ receptæ, quibus relata Jansenii propositio ut hæretica in sensu à Jansenio intento damnata fuit, ut diximus; neque enim Ecclesia dispersa minus infallibilis est quam Ecclesia congregata.

Hic prodit dominus Arnaud in commemoratâ dissertatione articulo 5, prætendens concilia adversus Pelagianos habita definiisse nihil boni ab homine lapsio fieri posse sine gratiâ efficaci, et quidem ex eo quod concilium Tridentinum sessione 6, can. 22, loquatur de auxilio speciali. Verum ex scopo et verbis illorum conciliorum elucet ea duntaxat defi-

nisse adversus Pelagianos necessitatem *gratiae-voluntatis* tum ad incipiendum cum ad perficiendum pietatis opus. Quod attinet ad speciale perseverantiae adiutorium, de quo synodus Tridentina, de eo in fine primi libri disseruimus.

Ilic sufficiat observasse notitiâ hæreseos pelagianæ, et Augustini doctrinæ non minus dubio procul imbutum fuisse Norisium quam dominum Arnaud; at eruditus ille cardinalis in Janseniani erroris calumniâ sublatâ cap. 2, docet, *justum urgente præcepto posse orare Deum ut gratiam ad illius præcepti impletionem largiatur*, et ibidem paragrapho 1, *in homine lapsu aliquando ex Augustino agnoscit interiorum Dei gratiam cui reapse resistit*, id est, adiutorium sine quo non, idque ex ipso capite undecimo libri de Correctione et Gratiâ, ex quo Jansenius et dominus Arnaud contrarium colligere aggre-diuntur, cum isto capite suum de Gratiâ systema præcipuè inniti fateantur, ut diximus libro præcedenti agendo de discrimine adiutorii sine quo non ab adiutorio quo.

Hic quis fortassis objiciet Estium in 2 Sent. distinct. 26, paragrapho 44, et Sylvium in 1 partem q. 23, a. 5 ad 2, post Bartholomæum Medinam, Didacum Alvares, etc., contendere illud concilii Tridentini sess. 6, cap. 11: *Deus suâ gratiâ justificatos, etc.*, intelligendum esse de subtractione gratiæ sanctificantis per peccatum mortale in quod justis prolabantur. Verum hæc movere non debent; falluntur enim illi theologi, saltem si intendunt, ut jam diximus, concilium ibi unicè disserere de subtractione gratiæ sanctificantis. Ad summum igitur inde colligi potest certum non esse concilium eò loci definiisse justis urgente præcepto adesse gratiam sufficientem ad illud implendum necessariam, quod ultrò concedemus; at licet illud non constet, nihilominus de fide est nulla præcepta justis, cum urgent, quando volunt et conantur, esse relativè impossibilia, ut diximus, et patet ex censurâ primæ Jansenii propositionis.

MOMENTUM TERTIUM. — *Ex divo Augustino.* — Cum ex dictis conciliorum, doctrina de possibili justis mandatorum Dei observatione ipsa sit D. Augustini doctrina, pauca tantum præter adducta illius pronuntiata cavillationibus minus obnoxia hic proferam. Jansenius non ignarus fateri doctores, ipsos justos interdum carere proximâ potentiâ adimplendi præcepti, ubi etiam urget, sed eos illam consequi posse per orationem, libro 3 de Gratiâ Christi, cap. 13, hæc scripsit: « Ipsis Christianis spiritua-

libus gratia sufficiens ad id faciendum quod jubetur frequenter subtrahitur, atque ita subtrahitur, ut nec pro tali gratiâ adipiscendâ deprecandi similis sufficiens gratia habeatur. » Postea capite 15 ait: « Cum nec omnibus gratiam vel ferventer petendi, vel omnino petendi Deus largiatur, apertissimum est fidelibus multis deesse illam sufficientem gratiam. » Si ergo Augustinus docuerit justis urgente præcepto nunquam deesse gratiam quâ benè orare valeant, corruebat Jansenii pronuntiatum; at hæc docet Augustinus. Etenim tractatu 26 in Joannem, n. 2, istud Christi, Joannis cap. 5: *Nemo potest venire ad me*, exponens ait: « Semel accipe, et intellige, nondum traheris, ora ut traharis. » Libro 1 de diversis Quæstionibus ad Simplicianum, q. 1, hæc habet: « Hoc restat in istâ mortali vitâ libero arbitrio, non ut impleat homo justitiam, cum voluerit, sed ut se supplici pietate convertat ad eum, cujus dono eam possit implere. » Libro de Gratiâ et libero Arbitrio cap. 16, n. 5: « Magnum, inquit, aliquid Pelagiani se scire putant quando dicunt, non juberet Deus quod sciret non posse ab homine fieri; quis hoc nesciat? Sed ideò jubet aliqua quæ non possumus, ut noverimus quid ab illo petere debeamus. »

Infinitus essem si cuncta S. doctoris testimonia, quibus fidelibus orationem inspirat, referre foret animus. Edoctus Christum omnium ferè beneficiorum suorum collationem orationi annexuisse, ejus necessitatem et virtutem decantare non desinit. Jam verò potentia orandi de quâ S. doctor, in justo proxima debet esse et immediata; si enim illa potentia esset remota, justus nullam haberet potentiam proximam pro impetrandâ oratione, nisi, quod absurdum esset, fieret progressio in infinitum; ergo, etc.

Dominus Arnaud in commemoratâ dissertatione, articulo 6 et seq., hæc inter alia præeunte Yprensi et Augustino proponit argumenta.

1º Augustinus adversus Pelagianos non aliam prædicavit gratiam quàm gratiam efficacem sine quâ homo lapsus nihil boni non solum non operatur (quod omnes fatentur), sed nec operari potest. Etenim hoc effatum, *sine gratiâ nihil boni fieri potest*, sic intellexerunt, sic impetierunt, sic irriserunt Pelagiani, et monachi Adrumetini; sic illud ex universæ Ecclesiæ fide propugnavit Augustinus, ut ex cunctis ejus operibus contra illos hæreticos elucescit, speciatim ex lib. 2 ad Bonifacium cap. 8, n. 18,

cap. 9, n. 49 et seq., cap. 10, n. 25; at justis qui cadunt deest gratia efficax; ergo, etc. Resp.: Nego majorem; ex dictis enim, ubi de gratiâ sufficiente, Augustinus adversus Pelagianos propugnavit gratiam dantem voluntati potentiam veram et relativam bonum operandi *sine effectu*, sive *actu*, id est, sufficientem, et gratiam impertientem voluntati potentiam *cum actu*, sive efficacem: ut postea ostendemus. Utramque istam gratiam admittunt Thomistæ et Augustiniani præ cæteris Augustini doctrinæ tenaces, saltem ex quo Roma adversus Jansenium locuta est. Unde ita docent per gratiam efficacem impertiri potentiam expeditam *cum actu*, sive *effectu*, vel *profectu*, ut simul asserant per gratiam sufficientem instante præcepto cuilibet justo dari veram et relativam exequendi mandati potentiam, licet remotam et ab effectu sejunctam, ut antea diximus. Porro Augustinus locis objectis sic intelligendus est si ibi asseruit sine gratiâ efficaci nihil boni fieri posse. Quod attinet ad Pelagianos et monachos Adrumetinos, consuerunt, et quidem verè, Augustinum loqui præcipuè de gratiâ ex se efficaci, sed immeritò autumaverunt ipsum hanc sententiam ex totius Ecclesiæ fide propugnare, et hæc gratiâ tolli libertatem; si enim agnovissent gratiam Christi ad singulos actus bonos, et ad ipsum cujusvis boni operis ac fidei initium omninò necessariam esse, eamque meritis nostris non rependi, nec in lege et doctrinâ, sed in interno Spiritûs sancti auxilio consistere, licet per se efficacem negâssent, eos ut hæreticos nunquàm habuisset Augustinus.

2º Augustinus libro de Dono perseverantiæ cap. 22, n. 61, hanc propositionem: « Si qui obeditis, si prædestinati estis rejiciendi, subtrahentur obediendi vires, ut obedire cessetis, abominabilem, » dicit in secundâ personâ propter apostrophen, quâ *infirmis* auditoribus et rudi populo tantum *malum optari videtur*; secus si in tertiâ personâ exprimitur in hunc modum. « Si qui obediunt, sed in gloriam prædestinati non sunt, temporales sunt, nec usque in finem in eâdem obedientiâ permanebunt, » quia licet eadem sit sententia *quoad rem*, tamen auditores eâ non offenduntur, *nec ad se pertinere existimant, cum in ipsorum frontem compellendo non collidatur*, id est, cum ad ipsos directè non proferatur; at inde elucet justis non prædestinatis in Augustini mente subtrahi saltem in fine vitæ vires obediendi, sive gratiam verè et relativè sufficientem, etiam cum obediunt; ergo.

Reponunt nonnulli recentiores Augustinum dictam sententiam improbare non solum *quoad modum loquendi*, sed etiam *quoad rem*, sive viriâ subtractionem, tum quia hanc vocat *abominabilem*, etc., tum quia *quam substituit propositio non continet illam viriâ subtractionem*, etc. Verùm hæc solutio contextum legendo vera non videtur, et ideò novatoribus non convincendis, sed magis ac magis exasperandis idonea est. Etenim præter dicta in argumenti expositione Augustinus ibidem addit, propositionem, *si qui obeditis, etc.*, de Dei præscientiâ (quam non negabant Semipelagiani) intellectam, *verissimam esse*, sed *improbissimam, non falso eloquio, sed non salubriter valetudini humanæ infirmitatis appositò*; ergo quod est verum potest esse *improbissimum* relativè ad auditores; quidni et abominabile? Itaque.

Resp.: Concedo majorem. Distinguo minorem. Justi non electi privantur viribus obediendi sive ob *reatum originis*, id est pœnalitates primigeniæ maculæ, sive ob *additamentum propriæ voluntatis*, id est peccata personalia conc. Secus, nego minorem et conseq. Augustinus, ut vulgò censent Thomistæ et Augustiniani, quorum sententiæ novum pondus addidit Norisius Vindic. cap. 4, paragrapho 10, docuit peccatum originale esse causam radicalem et remotam reprobationis ipsorum justorum non electorum, non ratione culpæ (siquidem *in baptizatis nihil est damnationis*, ut ait concilium Tridentinum post Apostolum epistolâ ad Rom. cap. 7, et Augustinus libro 1 ad Bonifacium cap. 10), sed ratione concupiscentiæ, et aliorum effectuum illius labis qui supersunt post baptismum; unde privatio potentiae proximè expeditæ ad finaliter perseverandum, de quâ hic Augustinus, quæ in electis et reprobis cum gratiâ sanctificante reperitur, est effectus originalis delicti; sed privatio illa in electis tollitur per *speciale Dei auxilium*, quod reprobis non impertit Deus, quia non vult, nec tenetur velle. Vult nihilominus, et quidem sincerè, etiam supposito peccato originali, salutem illorum reproborum, ut iidem theologi docent post Augustinum libro de Spiritu et Litterâ, cap. 33, quia ipsis dat media relativè sufficientia quibus possint concupiscentiam vincere et non peccare. Hoc autem illustrare conantur exemplo oculi minùs sani, quem Deus verè sufficienti luminis infusione verè et relativè adjuvat ad videndum; licet non tollat nec tollere teneatur vitium impe-

diens quominus videat. Porro Augustinus ibi merito asserit reconditam illam doctrinam, quæ Semipelagianis tantopere displicuit, non esse *coram infirmis* prædicandam, saltem eam ipsi directè applicando... Alii verò insignes etiam theologi, qui relatham opinionem Augustino non allingunt, reponunt Augustinum loqui de virium subtractione ex solo præcedenti peccato personali; etenim S. doctor, inquit, libro 2 de peccatorum meritis et remissione, cap. 17, n. 26, ait: *Gratiâ ut non adjuventur (filii superbæ vel misericordiæ) in ipsis itidem causa est, non in Deo...* Neque obstat verbum, *obeditis*, vel *obediunt*; sensus enim est, si qui nunc obediunt, et non sunt prædestinati, usque in finem non obediunt, aut propter reatum originis, aut propter præcedens peccatum, ut dictum est, et probare videtur contextus.

Idem intendit Augustinus cùm libro de Correctione et Gratiâ, cap. 11, dixit: *Non autem quibus deest tale adiutorium (potentiæ expeditæ ad perseverandum) jam pœna peccati est*; et passim, in primis libris de Correctione et Gratiâ, et de Dono perseverantiæ, asserit se cum Apostolo prorsus nescire cur ex duobus justis unus perseveret, alter non perseveret; istud enim in relatâ Thomistarum et Augustinianorum sententiâ evenit justo quidem sed omninò inscrutabili Dei iudicio, fundato tamen in peccato originali eo quo expositum est sensu. In aliorum verò sententiâ, hæc non dixit Augustinus de duobus justis, quorum unus benè orando petiit et obtinuit à Deo donum perseverantiæ, non ita alter (dixit enim S. doctor *deserunt, et deseruntur*; et, *donum perseverantiæ suppliciter emereri potest*), sed de duobus justis æqualiter orare negligentibus quorum uni datur efficax orationis gratia cum quâ perseverantiæ donum impetrat, alteri verò non impetratur, aut de duobus piis, quorum unum rapit Deus, ne malitia mutet ejus intellectum, alium non rapit, etc.

Neque verò commemorati theologi, ut diximus, sufficientem orationis gratiam justis non electis demunt, quâ hic et nunc reipsâ orare possint, sicque, si non ponant obicem, efficacem orationis gratiam obtinere, et hujus ope expeditam ad orandum potentiam; licet enim Augustinus libro 1 ad Simplicianum q. 2, n. 21, dicat *ipsam iustorum orationem aliquando non solum tepidam et frigidam, sed et nudam esse*, tamen ab ipsis non arceat proximè sufficientem gratiam per quam orare possint; sed solum efficacem, per quam reipsâ *ut oportet* orent.

Deinde probandum foret Augustinum hic asserere gratiam orationis non dari cùm urget orandi præceptum, cùm de eo instanti hic agatur.

3^o Petrus fuit justus paulò antequàm Christum negaret, ut colligitur ex Joannis 13, v. 10, et docent SS. Hilarius, Basilus, et in primis Hieronymus in caput 26 Matthæi; at caruit gratiâ vel omninò vel saltem relativè sufficiente, ut violentæ mortis tentationi obsistere et Christum non negare valeret; id enim significat Christus Joannis cap. 13, his verbis: *Non potes me sequi modò, sequeris autem postea*; id apertè docent inter Patres Chrysostomus, præsertim homiliâ 31 in Epistolam ad Hebræos, et Augustinus, in primis sermone 124 de Tempore, nunc 79, in appendice tomi quinti, ubi ait: « Quid est homo sine gratiâ, nisi quod fuit Petrus cùm Christum negaret?... Ideò Petrum Dominus paululùm subdeseruit, ut in illo totum genus humanum posset agnoscere, nihil se sine gratiâ prævalere; » ergo. — Nemo nescit hanc assertionem ansam præbuisse famosæ censuræ Sorbonæ adversus dominum Arnaud, ut videre est in Causâ Arnaldinâ.

Respondeo, Petrum tunc justum fuisse vel non. Si istud, Christum illum deseruit quia de se præsumendo Christum priùs deseruerat; si illud, quæro an voluerit et conatus fuerit secundum præsentem quas ex gratiâ habebat vires, vel non; si secundum, exemplum præsentis quæstioni non est accommodatum; si primum, illi defuit gratia efficax, et etiam gratia sufficiens quâ possit proximè et immediatè tentationem vincere et Christum confiteri, non autem quâ hæc posset subsidio orationis, cujus proximam habuit potentiam. Unde auctor citati sermonis, qui non est Augustinus, dicit tantum Petrum à Christo subdesertum esse, id est, aliquatenus desertum.

Cæterum, nescio quomodò sagax et eruditus Arnaldus hoc argumentum velut invictum venditare potuerit. Etenim incertum est, an Petrus in instanti negationem immediatè præcedente justus fuerit; quod enim dixit Christus Joannis cap. 13, v. 10, præcessit Petri responsionem, Matthæi cap. 26, v. 33 et 35, quæ eum à justitiâ excidere fecit. Aliunde inter Patres alii cum laudato Hieronymo affirmant; alii cum Chrysostomo homiliâ 85 in Matthæum et Augustino passim, v. g., libro 14 de Civitate Dei, cap. 13, negant, quorum opinio videtur probabilior; Petrus enim commemoratâ responsione Christo negationem prænuntiant

non credidit, seipsum cæteris præposuit, et præsumpsit se posse viribus naturæ quod non nisi viribus gratiæ poterat. Unde amor, ex quo Hieronymus dicit Petrum respondisse, videtur fuisse amor præposterus, deordinatus, carnalis, et præsumptionis et arrogantiae plenus; sed factum incertum argumentum certum efformare nequit.

Item probari nequit Petrum tunc presentibus gratiæ viribus obicem non posuisse; quinimò Augustinus libro de Gratia et libero Arbitrio, cap. 17, n. 53, contrarium asserit; *putabat, inquit, se posse (viribus naturæ) quod se velle (viribus gratiæ) sentiebat.*

Item probari non potest Petrum tunc omni prorsus gratiæ fuisse destitutum; contrarium enim elucet ex modò laudato Augustino, qui insuper libro de unitate Ecclesiæ, cap. 9, dixerat: « Quis dubitaverit quòd Petrus, si voluisset, ter Dominum non negasset? Nam dùm se percussus (tentatione) sensit, potuit deponere mentis tumorem, et dicere ad Deum: *Adjutor meus esto; ne derelinquas me.* »

Item, etsi constaret omnem omninò gratiam tunc Petro defuisse, causam non vinceret dominus Arnaud; non enim posset evincere desertionem illam esse antecedentem, non consequentem, in penam scilicet præsumptionis et neglectæ orationis.

Cæterum, quod objicit idem dominus Arnaud ex Joannis cap. 13: *Non potes me sequi modò, etc.*, ad rem non pertinet, cùm tunc non urgeret pro Christo moriendi præceptum.

MOMENTUM QUARTUM. — *Ex clero Gallicano et theologis.* — Cardinalis Noallius explicationes ediderat in 101 propositiones quas nonaginta septem præsules Gallicani probaverunt; quæ explicationes exinde dictæ sunt, Corpus doctrinale anni 1720. In eo renovatur acceptatio censuræ 101 propositionum ab episcopis quadraginta anno 1714 edita. Idem opus rigidiorum exhibet Thomismum, nec in sequentibus comitiis cleri Gallicani videtur fuisse confirmatum. Nihilominus magni ponderis esse debet contra Ecclesiæ adversarios, et ideò illud hic adducimus.

Articulus ad gratiam et liberum arbitrium pertinens hæc inter alia continet: « Gratia ita semper adest justis qui cadunt, ut non cadant nisi suâ culpâ, absque eo quòd ipsis desit quidquam ut possint perseverare; » habent ergo justî gratiam quâ hic et nunc saltem remotè possunt perseverare, aliàs *aliquid ipsi deesset* ut id possent.

Sacer Ordo Parisiensis suâ in dominum Arnaud censurâ anno 1656 idem, ut diximus, sanciverat.

Quod attinet ad Theologos, qui floruerunt ante concilium Tridentinum, et Innocentium X, si quid censuræ in Jansenium latæ contrarium dixerunt, excusandi sunt cùm Ecclesia non fuisset locuta. Cæterum, Jansenii defensores Thomistas, ubi docent gratiam efficacem et physicè prædeterminantem in statu innocentiae locum habuisse, deserunt; quidni et nos deserere possemus quosdam Thomistas et Augustinianos, si nobis essent adversi? Tandem theologi, qui istud effatum probant, *sine gratiâ efficaci nihil boni fieri potest, de potentiâ cum actu conjunctâ* possunt intelligi. Porro Joannes Nicolai Dominicanus in censorio suo suffragio contra dominum Arnaud longâ sed eruditâ dissertatione D. Thomam ab illius sententiâ omninò alienum fuisse ostendit.

Dices: Prima Jansenii propositio fluit ex principio duarum delectationum; at illud principium est catholicum, cùm omnes Augustiniani pro eo decertent; ergo. — Respondet P. Bernene loco citato duas Augustinianorum delectationes à duabus Jansenii in his differre, 1^o quòd istæ necessitent, non illæ;... 2^o quòd *delectatio victrix* in systemate Janseniano necessaria sit, *et ad potentiâ et ad actum orandi*, in Augustiniano è converso *ad solum actum orandi*; .. 3^o quòd Augustiniani sub validiore cupiditate, aut delectatione cœlesti indeliberatâ agnoscaut veram et relativam bonum agendi vel non agendi potentiâ, quam nonnisi absolutam agnoscunt Janseniani.

MOMENTUM QUINTUM. — *Ex rationibus theologicis.* — Erumpunt istæ rationes ex his Scripturæ et Patrum oraculis: *Perditio tua ex te; nemo nisi suâ culpâ perit; voluntate suâ cadit qui cadit, etc.* Ex his enim elucet Deum justis salutem non denegare gratiam ad hic et nunc urgentia præcepta adimplenda remotè saltem sufficientem.

Ex iis tamen ne inferas cum nonnullis recentioribus, quorum zelus non videtur secundum scientiam, certum esse peccatum originale in justis non electis non posse esse causam, eò quòd dictum est, sensu ipsorum reprobationis, vel peccatum etiam veniale superbiæ aut negligentiae non posse Deum inducere ad illis denegandum auxilium proximè saltem sufficiens; reclamare enim videtur Augustinus, cujus hæc super re doctrinam tanquàm ubique receptam ipsi Societatis Jesu Patres defendere jussi sunt,

ut patet ex libro de Ratione studiorum Romæ excuso anno 1586; reclinant Thomistæ et Augustiniani, et ideò major et sanior theologorum numerus.

Obijciunt velut invictum hoc ex ratione argumentum. Gratia sufficiens est indeliberata mentis illustratio, et voluntatis motio, quæ ideò non solum est in nobis, sed etiam à nobis est; at experientia probat talem illustrationem et motionem in omnibus justis urgente præcepto non reperiri; impossibile enim est ut à nobis non sentiat quod in nobis est et à nobis, et ut actu semper bona non cogitemus et velimus, si illa gratia ea bona actu indeliberatè cogitare aut velle nos semper facit; sed experientia probat justos hæc non semper sentire, et cogitare ac velle; quinimò sæpius aut ex ignorantia, aut ex inadvertentiâ, aut ex indeliberato alicujus passionis motu peccant; ergo.

Resp. hujus argumenti solutionem pendere à solutione metaphysicæ hujus quæstionis, an quælibet animæ modificatio sui sensum et perceptionem procreet, an non; gratia enim, quæ est indeliberata animæ modificatio, erit perceptibilis in opinione affirmante, secus in negante.

Quæstio ista magno cum ardore discussa fuit inter dominos Arnaud et Nicole, et plura ex utrâque parte peperit scripta, primo affirmante, altero negante, et hucusque indecisa et prorsus incerta remanet. Quomodò igitur hoc argumentum ut Achillæum venditari potest? Longioris esset operæ tam obscuram dirimere litem. Satis sit obiter observasse hoc argumentum probare sub illustratione gratiæ mentem reipsâ attingere objectum, et sub ejus motione voluntatem objectum reipsâ velle, siquidem illa illustratio et motio sunt vitales animæ actus, licet indeliberati; at non probat animam aut aliquatenus aut saltem clarè ac distinctè percipere has modificationes in se existere. Consentiant enim philosophi, inprimis subtilis Malebranchius, distinguendum esse inter actualem animæ modificationem, et distinctam illius animæ modificationis perceptionem, cum ista non solum esse possit, sed et aliquando sine alterâ reipsâ existat. Porrò, præsentē illā gratiā sive animæ modificatione, peccat homo non attendendo et reflectendo, quia potest attendere et reflectere.

PRINCIPIA SOLUTIONUM. — Primum. Ut valeant objecta à novatoribus testimonia, debent 1º, præceptum, et quidem hic et nunc urgens, non consilium, non majorem perfectionem,

non omnium collectivè venialium peccatorum declinationem, etc., exprimere;... 2º justum, et quidem conantem modo præsentibus quas habet viribus proportionato, respicere;... 3º non efficax dumtaxat, sed et omne sufficiens, non proximè tantum et immediatè, sed etiam remotè et mediatè, auxilium clarè excludere. Si enim vel unâ ex his conditionibus, à fortiori omnibus, carnerint, ex eis desumptum argumentum illicò liquescet.

Secundum. Jansenius libro 3 de Gratiâ Christi, cap. 13 et 15, assignatis pluribus modis *præcepti possibilitatis*, in se nempe et ratione *objecti*, ratione *flexibilitatis liberi arbitrii*, *fidei*, *gratiæ habitualis justorum*, *gratiæ parvæ quam concedere potest Deus*, etc., candidè cognoscit illos omnes modos *remotissimam* tantum et merè *idealem* justis inspirare possibilitatem; unde alium proponit, *delectationem victricem*, sine quâ ipse justus non magis hic et nunc potest implere præceptum, *quàm avis hic et nunc sine alis potest volare*. Hic est proscripius sensus tam clarè à Jansenio expressus ut ab ejus defensoribus eludi non possit.

Tertium. Quæ super hoc decrevit Tridentina synodus intelligenda sunt in sensu Augustini, cujus ipsa verba exseripsit. Hinc nonnulli recentiores, dum Augustinum hic deserunt, aut sibi faventem sensum ipsi affingunt, non solum de Ecclesiâ benè non merentur, sed etiam ejus hostibus arma ministrant, eosque in suâ rebellionē obfirmant.

Quartum. Augustinus quidem adversus Pelagianos de gratiâ efficaci maxime disseruit, sed nunquam asseruit sine illâ nihil boni fieri posse potentiâ ab actu sejunctâ, ut explicare solent Thomistæ et Augustiniani.

Quintum. Augustini effatum: *Deus non deserit nisi deseratur*, ab Ecclesiâ consecratum, evincit justo, quamdiù Deum non deserit, semper adesse gratiam quâ verè et relativè possit in bono perseverare, saltem per orationem, et ideò remotè et mediatè. Sed quid illa justî à Deo aversio? Nec Augustinus nec Ecclesiâ clarè definivit; alii eam constituunt in solo peccato lethali; alii in veniali etiam præsumptionis; alii, quorum opinio probabilior et Dei bonitati magis consona videtur, censent justum in peccatum mortale lapsum ipsâ proximâ orationis gratiâ sufficiente à Deo non destitui.

Sextum. Justus saltem, ut diximus, semper habet potentiam proximam ad orandum; si enim nonnisi remotam haberet potentiam, non posset orationem impetrare, siquidem non ha-

beret potentiam proximam pro impetrandâ oratione; aliâs daretur progressus in infinitum, ut arguit Norisius... Alii tamen Augustiniani hanc potentiam solis justis obieci non ponentibus, id est, de viribus suis non præsumentibus, attribuunt, et hanc D. Augustini et Norisii mentem esse volunt. Scilicet, inquit, justus per gratiam illuminationis cognoscens præceptum, et per sanctam inspirationem desiderium habens illud implendi, naturaliter et sine ope alterius gratiæ potest et tenetur efformare judicium practicum suæ infirmitatis, sive suæ impotentiae proximæ ad præceptum implendum; quod si efformaverit, vi gratiæ præcedentis, fit proximè potens orare, sive proximè excitatur ad postulandum auxilium necessarium; secus si non efformaverit; unde, addunt, non requiritur progressus in infinitum ut homo constitutur in potentiâ proximâ ad orandum.

Verùm dominus de Tournely et ejus redactores reponunt justum per illud judicium practicum constitui non solum in potentiâ proximâ ad orandum, sed et in actuali oratione, et ideo non prærequiri illud judicium ut homo sit proximè potens ad orandum. At isti alios intelligere non videntur, affirmantes judicium illud practicum positâ gratiâ illuminationis et inspirationis solâ naturâ confici; neque enim homo in actuali oratione naturâ constituitur.

Septimum. Thomistarum et Augustinianorum in hæc ut et in aliis similibus quæstionibus responsiones eo titulo non sunt improbandæ, quòd nonnulla obscura et intellectu difficillima involvant; quinimò eo titulo sunt probandæ, cum in his similes afferat D. Augustinus, et sæpius exclamet cum Apostolo: *O altitudo!* etc.; et aliunde mysteriorum, quæ sunt argumenta non apparentium, existentia, non natura, ratione sit evincenda.

ARTICULUS II.

An fidelibus sontibus infundantur gratiæ sufficientes sive ut nova peccata non committant, sive ut commissorum veniam adipiscantur?

Sensus est, an baptizatis, qui peccata mortalia peccatis non addiderunt, sed in aliquod lapsi sunt, non singulis momentis (quibus gratia ipsis justis non adest), sed pro loco et tempore, inprimis cum urget præceptum, non offeratur tantum, sed et detur gratia verè sufficiens, non ut perseverent in bono quod deseruerunt, sed ut cum Deo reconciliari possint à novis peccatis abstinendo, et à veteribus emergendo.

Negat Jansenius in libris de gratiâ Christi, præsertim tertio, cap. 15 et 15, ubi infidelibus, fidelibus lapsis, obduratis, et justis, cum etiam urget præceptum, ipsam orandi possibilitatem aliquando denegari asserit, quia carent relativè victrici gratiæ delectatione, cum quâ solâ bonum fit et fieri potest.

CATHOLICORUM OPINIONES. — Multi, ex scholis præsertim Thomisticâ et Augustinianâ, fatentur Deum neminem deserere nisi prius ab ipso deseratur, Deum pro omnibus et singulis hominibus misericorditer remedia instituisse et præparasse, et quantum in se est conferre, nisi in eis propriæ voluntatis impedimentum, aut aliam justitissimam suæ indignationis causam invenerit, quemlibet peccatorem, quantumvis excæcatum et obduratum, vel actu recipere, vel recipere posse salutare Christi gratiæ influxus, et ideo neminem in hæc vitâ de suâ salute desperare debere; atque in hunc sensum intelligunt innumera Scripturæ testimonia quibus asserit Deus se nolle mortem impii, se nolle aliquos perire, sed omnes salvos fieri, etc., nimirum ex parte sui et quantum in se est. Verùm sentiunt Deum auxilia sufficientia, quæ omnibus et singulis præparavit, quibusvis peccatoribus non solum absque injuriâ denegare posse (cum Augustino dicente *si debitum damnationis supplicium omnibus redderetur, non injustè procul dubio redderetur*), sed etiam in penam peccati reipsâ aliquando non conferre. Atque existimant hanc fuisse sententiam concilii Tridentini cum dixit, *Deum justum non deserere nisi prius ab ipso deseratur*; (ut quid enim, inquit, hæc exceptio, si Deus deserentes se nunquam desereret?) et divi Augustini passim et ejus discipulorum; v. g., cum dixit libro de Correptione et Gratiâ cap. 11: *Nunc autem quibus deest tale adjutorium (sine quo non, sive sufficiens quale Adæ fuit concessum), jam pœna peccati est; quibus autem datur, secundum misericordiam datur*. Hæc considerans concilium Tridentinum sess. 6, cap. 11, et canone 48, satis habuit definire justis non deesse gratiam, quâ ipsis possibilia essent Dei mandata, et Innocentius X relatam Jansenii de justis sententiam proscripsit duntaxat, iis quæ de infidelibus, fidelibus lapsis, et obduratis dixerat prorsus intactis.

Alii è converso theologi, præsertim è scholâ Molinæ, censent fidelibus sontibus à Deo non solum offerri, sed etiam urgente præcepto reverà conferri auxilia remotè saltem sufficientia, quibus nova peccata vitare et à veteribus emen-

dari possint, idque ex verâ et internâ voluntate antecedente quâ eorum salutem vult.

Norisius, ex omnium etiam Jansenianorum consensu, Augustini doctrinæ notiâ excultissimus, Vindie cap. 3, paragrapho 6, expendens an S. doctor tradiderit Judæos ad legis observationem adstrictos fuisse sub peccato si deesset gratia adjuvans ad implendum præceptum (ut Augustino crimini vertebant quidam Molinistæ), reponit Augustinum censuisse Judæos urgente etiam præcepto non habuisse gratiam proximè necessariam ad illud implendum, sed habuisse gratiam *orandi Deum ut sibi daret gratiam ad mandatum adimplendum*. Idem repetit Janseniani erroris calumniæ sublatae cap. 2. Ex his sit

CONCLUSIO. — Deus baptizatis sentibus nondum obduratis actu etiam impertit gratiam saltem quâ proximè possint orare, sique obtinere gratiam, quâ in nova peccata non labantur, et à veteribus resipiscant.

Probatur 1° ex Scripturis. Inter innumera testimonia unum brevitati consulens adducam. Apocalypsis cap. 3, v. 20, ait Deus : *Pœnitentiam age. Ecce sto ad ostium et pulso*; si quis audierit vocem meam, et aperuerit *mihi januam intrabo ad illum*. Ibi agitur ex contextu de baptizato lethalis peccati reo, quem Deus non solum per externam, sed etiam per internam gratiam excitat ad orandum, ut pœnitentiam agere possit; verbum enim, *pulso*, hic alludit ad verba Christi, *pulsate et aperietur vobis*, vel *pulsanti aperietur*, in quibus *pulsate* denotat gratiam internam. Hinc concilium Senonense, anno 1528, in decretis fidei cap. 15, et Coloniense, anno 1536, cap. 52, hunc textum intellexerunt de gratiâ etiam internâ; ut et Andreas Vega qui concilio Tridentino interfuit, opusculo de justificatione q. 13, conclusione quintâ.

Dices : Cum per Molinistas in Congregationibus de auxiliis coram Paulo V citata fuisset hujus synodi Senonensis auctoritas, nemine reclamante, nequidem cardinali Perronio præsentante, omninò fuit elisa et liquidò negata eò quòd ista synodus per Sedem apostolicam non fuisset confirmata. Ergo. — Resp. : Esto ant., nego consequ. Inde enim ad summum inferri potest certum ex hac synodo argumentum erui non posse, quod ultrò fatemur; idem enim robur non habet ac particularia concilia Arausicana quæ à summo Pontifice et Ecclesiâ specialiter approbata sunt; sed ex illâ synodo admodum probabile argumentum deduci

potest, cum inprimis ejus interpretatio Scripturâ innitatur, nec unquam ab Ecclesiâ improbata sit, quod nobis sufficit.

Probatur 2° ex Augustino. Varia illius testimonia articulo præcedente adduximus, quibus justos et peccatores excitat ad orandum ut illi in justitiâ perseverent, isti verò eam recuperent; quæ certè exhortationes manifestè supponunt gratiam orationis semper adesse ipsis sentibus, aliàs illusoriæ forent. *Incumbite*, inquit sermone 135 de verbis Evangelii Joannis 9, cap. 6, n. 7, *orationibus, peccatores, orate ut peccata vestra deleantur, nolite desperare, et peccatores orate*.

Probatur 3° hac ratione. Dei bonitati et justitiæ etiam congruit ut sentem in aliquod grave peccatum ex infirmitate lapsus non derelinquat, saltem nisi postquam ipsi collata pro conversione auxilia ex obstinata malitiâ contempsit juxta illud : *Curavimus Babylonem, et non est sanata, derelinquamus eam*.

Objiciunt varia S. Augustini testimonia quibus asserit gratiam ipsam sufficientem in peccati pœnam aliquibus à Deo non concedi. Verum hæc objectio nullius sanè ponderis est. Etenim 1° potuisset Augustinus dicere gratiam sufficientem aliquibus denegari, licet sentiret eam infundi sentibus in unum alterumve peccatum mortale lapsis; denegaretur scilicet excæcatis et induratis 2° Reverà censuit Augustinus gratiam ipsam sufficientem aliquibus in pœnam peccati non concedi, ut patet ex citato libro de Correctione et Gratiâ cap. 11; at eum ibi de gratiâ ad implendum præceptum immediatè necessariâ, non de orationis gratiâ disserere cum Norisio diximus. 3° Cum Semipelagiani ostenderent gratiam sufficientem omnibus æqualiter dari, reponebat S. doctor eam non omnibus dari, nempe æqualiter, aut ob initium aliquod fidei quod esset ex solis liberi arbitrii viribus, ut obganniebant illi hæretici. Hoc sensu præsules Africani in Sardinia exules in Epistolâ synodicâ dixerunt : *De gratiâ dignè non sentit quisquis eam putat omnibus dari*.

ARTICULUS III.

An gratiæ sufficientes excæcatis et induratis concedantur ?

Excæcatio mentis, et cordis obduratio importat ex parte hominis singularem malitiam, et ex parte Dei derelictionem, sive gratiæ subtractionem; nec obdurat Deus, inquit Augustinus Epistolâ 194 ad Sixtum cap. 3, n. 14,

impertiendo malitiam, sed non impertiendo misericordiam; unde hæc passim S. doctoris effata: «Miseretur Deus gratuito dono, obdurat justissimo merito, obduratio non est nisi ex merito, non item gratia: ut magnâ bonitate miseretur Deus, ita nullâ iniquitate obdurationem cordis Deus non instigando et inspirando, sed deserendo facit,» quæ idem omnino enuntiant.

Quæritur an illis excæcatis et induratis gratiæ proximè aut remotè sufficientes impertiantur.

Jansenii sententiam, et discrepantes theologorum opiniones super hæc quæstione supra retulimus. Undè sit

CONCLUSIO. — Excæcatis et induratis aliquis sufficientis gratiæ lux et calor inspiratur, quo ex profundâ peccatorum voragine orationis beneficio sensim exire et cecitatem ac duritiam tandem deponere possunt. Est probabilior.

Probatur 1^o ex Scripturâ. Actuum cap. 7: *Spiritus sancto resistitis*; Rom. cap. 2: *Benignitas Dei ad pœnitentiam te adducit, etc.* Ex quibus sic arguimus: Stephanus et Paulus ex contextu hic alloquuntur excæcatos et induratos, sed asserere videntur eos omni prorsus gratiâ internâ non privari; id enim intendunt si de solâ externâ gratiâ legis, vocationis, etc. (ut contendunt Estius et Jansenius), non loquuntur; at de solâ istâ gratiâ ibi non disserunt, ut probavimus ubi de existentia gratiæ sufficientis disceptavimus, et aliunde evincere videtur scopus Stephani, qui præclarum illum sermonem ad Judæos non emisit, nisi ut eos ad cordis compunctionem excitaret, ut et finis Apostoli dicentis, benignitatem Dei eos ad pœnitentiam adducere; qui autem potuissent conteri et pœnitere sine ullâ gratiâ internâ saltem orationis?

Probatur 2^o ex S. Augustino et ejus discipulis. S. doctor tradit epist. 145 ad Anastasium, olim 144, n. 5, Judæos qui *vi legis* sufficientem gratiam non habebant ad præceptum implendum, eam implorando Christum venturum consequi potuisse: «Lex, inquit, docendo et jubendo quod sine gratiâ impleri non potest, homini demonstrat suam infirmitatem, ut quærat demonstrata infirmitas Salvatorem. à quo sanata voluntas possit» quod infirma non posset. Conciniunt SS. Fulgentius, libro 2 de Veritate prædestinationis, cap. 4, et auctor epistolæ ad Demetriadem; atqui tamen *plerique* Judæorum, imò si Jansenio fides, omnes erant excæcati et indurati. Ergo.

Item enarratione in Psalmum 6, n. 8, expendens istud Rom. cap. 4, v. 28: *Dedit illos in reprobum sensum*, ait: «Ea est cæcitas mentis, in quam quisque datus fuerit ab interiori Dei luce secluditur, sed nondum penitus cum in hæc vitâ est.... In die judicii penitus extra Deum erit quisque dum tempus est (in hæc vitâ) corrigi noluerit; penitus autem esse extra Deum quid est, nisi esse in summâ cæcitate? Hujus iræ inchoatio est quam in hæc vitâ patitur quisque peccator.» Excæcati ergo et indurati «ab omni penitus interiori Dei luce in hæc vitâ seclusi non sunt;» nec in hæc vitâ completa sed inchoata tantum reperitur excæcatio, etc.

Probatur 5^o ex D. Thomâ et Theologis.

Sanctus doctor, quæstione 24 de veritate, a. 11, in c., de obdurato ait: «Is est qui non de facili potest cooperari ad hoc quòd exeat de peccato; et hæc est obstinatio imperfecta, quâ aliquis potest esse obstinatus in statu viæ; cum scilicet habet aliquis ita firmatam voluntatem in peccato, quòd non surgunt motus ad bonum nisi debiles.» Ubi, observa obduratum non omnino, sed de facili tantum ex peccato exire non posse, et aliquos, licet debiles, ad bonum motus in ipso exurgere.

Eandem sententiam docuere insigniores scholæ Thomisticæ theologi, ut videre est apud P. Dechamps in libris de hæresi Jansenianâ. Unum adducam insignem scholæ Scotisticæ doctorem Andream Vegam. Opusculo de justificatione quæstione 15, conclusione 5 hæc habet: «Peccatori propter delicta præcedentia, quantumcumque sint gravia, nunquam impossibile est Dei præcepta servare; ad ostium enim nostræ voluntatis stat semper Deus, et pulsat, paratus adjuvare omnes ad suorum observantiam præceptorum.»

Probatur 4^o rationibus theologicis. Prima. Obduratio ex SS. Augustino et Thomâ in hæc vitâ non est adæquata; ergo non excludit omnem interioris gratiæ lucem. Secunda. Conversionis præceptum ipsos obduratos, in ultimâ in primis vite periodo constringit; ergo tunc possunt converti, aut illud præceptum est ipsis impossibile; si autem possunt converti, gratiam orationis habere debent. Tertia deducitur ex censurâ istius Bâii propositionis 55: *Definitiva hæc sententia, Deum homini nihil impossibile præcepisse, falsò tribuitur Augustino.*

Obijciunt 1^o: Joannis cap. 12 dicitur: *Propterea non poterant credere quia dixit Isaias (cap. 6, v. 9 et 10): Excæcavit oculos eorum,*

et induravit cor eorum, ut non videant oculis, et non intelligant corde, et convertantur et sanem eos, etc. Ibi dicuntur Judæi non potuisse credere, et ideò omni gratiâ fuisse destitutos, quia Deus induraverat corda eorum; unde impotentia illa in eis fuit effectus non ipsorum malitiæ, sed Dei eos excæcantis voluntatis, ergo.

Divus Augustinus tractatu 55 in Joannem, n. 5, agnoscit hanc difficultatem profundam esse, seque ei respondere prout potest; reponit autem 1°, hæc, non poterant credere, significare, omninò nolebant. Sicut in isto textu, Deus non potest seipsum negare (2 ad Tim. cap. 2), non potest, significat, non vult... 2° Deum malam hanc voluntatem prævidisse, et per Prophetam prænuntiâsse, et ideò Deum non esse illius causam; eam enim prævidit Deus quia futura erat... 3° Hæc, excæcavit oculos eorum, connotare effectum, sive pœnam malæ voluntatis; obdurat quippe Deus deserendo et non adjuvando, quod occulto judicio facere potest, iniquo non potest. Igitur Judæorum incredulitas ex ipsis non ex Deo orta est, et eâ prævisâ et suppositâ Deus eos induravit deserendo, sed non penitus, ut antea dicebat S. doctor.

Objiciunt 2°: Synodus Tridentina his verbis, Deus non deserit nisi prius deseratur, manifestè supponit Deum deserere eos qui ipsum deserunt; ergo. — Resp. concilium supponere istos à Deo deseri aliquo non omni modo; intendit enim quod Augustinus, cujus verba adhibet. Id nonnulli confirmant ex his sanctæ synodi sess. 6, cap. 15: *In Dei auxilio firmissimam spem collocare et reponere omnes debent*; verum certum non est hæc non esse intelligenda de justis, aut de iis qui Deum non deseruerunt, et ideò posset recurrere difficultas.

Objiciunt 3° Divum Augustinum. Citatâ epistolâ 194, dicit Deum indurare non imperiando misericordiam; ibidem cap. 6, n. 23, malos inducit dicentes: *Quid de nobis fit querela, quòd Deum offendamus, cum illius voluntati nemo possit resistere, qui nos obduravit misericordiam non præstando*? Quibus respondet: *O homo tu quis es?* Rom. cap. 9. Libro de Naturâ et Gratiâ cap. 22, ait: *Legis prævaricator luce veritatis desertus fit cæcus, sicque necesse est ut offendant*. Libro de Perfectione justitiæ cap. 6, n. 15, ad hanc Cœlestii objectionem: « Si est aliquod peccatum quod vitari non possit, quomodò justus Deus dicitur si imputare cuiquam creditur quod vitari non possit? » Sic respondet: « Peccatum est cum vel non est charitas quæ esse debet, vel minor est quàm debet, sive

hoc voluntate vitari possit, sive non possit; quia si potest, præsens voluntas hoc facit; si autem non potest, præterita voluntas hoc fecit... » Ibidem cap. 19 dicit *excæcatum omni lumine veritatis deseri*. Libro 3 de libero Arbitrio cap. 18, n. 52, ait: « Illa est peccati justissima pœna ut amittat quisque quo benè uti noluit... id est, qui rectè facere cūposset noluit amittat posse cū velit. » In Expositione in epistolam ad Romanos, dicit « Pharaoni non imputatum fuisse quòd non obtemperaret Dei præceptis, quandoquidem obdurato corde obtemperare non poterat. » Libro 1 Retractationum cap. 15, n. 5, ait: « Qui cogenti cupiditati bonâ voluntate resistere non potest, et ideò facit contra præcepta justitiæ, jam hoc ita peccatum est ut sit etiam pœna peccati. »

Ex his, inquit, elucet Augustinum nullam omninò in obduratis admisisse gratiam sufficientem, quâ possent non peccare, et tandem resipiscere; ergo. — Resp. 1° Augustinum adversus Pelagianos docuisse Deum absque injustitiâ in pœnam gravis peccati, multò magis contumacis in malo voluntatis, hominem omninò deserere, ipsique imputare peccata quæ consequenter ad illam derelictionem commissurus est, necessariè licet, utpote liberâ in causâ, sive, ut loquitur, utpote peccata et pœnam peccati; unde ejus effatum: *Nemo peccat in eo quod vitari non potest*, significat: *Nemo peccat in eo quod antecedenter vitari non potest*. Etverò, si D. Augustinus ex Scripturis docuit infantes sine baptismo morientes justè à Deo æternis addici suppliciis propter peccatum alienâ voluntate commissum, quantò magis sentire potuit sontem posse à Deo puniri ob peccatum ex alio propriâ voluntate facto necessariè fluens? Resp. 2°, Augustinum, etsi senserit obduratos justè à Deo omninò deseri potuisse, tamen eos de facto sic derelictos esse non censuisse; perfectam enim obdurationem in hac vitâ non agnovit. Unde in objectis testimoniis unicè intendit, obduratos destitui gratiâ quâ possint immediatè et de facili vitare peccata et tentationes vincere, eoque non posse benè agere impotentia consequente liberam eorum gratiæ resistentiam, non antecedente, vel in sensu composito, id est, ipsis ex excæcatione operantibus. Etverò hæc insinuat in ipsismet objectis locis. Etenim, in epistolâ 194 verba, *non imperiando misericordiam*, non absolutè, sed relativè ad justos et fideles non obduratos sunt intelligenda, et ideò de gratiâ qualis istis conceditur. In his autem etiam dicendum est: *O homo,*

etc., cū nempe ex duobus induratis Deus uni dat gratiam efficacem, aut uberiolem, non alteri. In capite 22 libri de Naturā et Gratiā ibidem immediatē addit : *Audit* (prævaricator) *vocem legis, quā admoneatur implorare gratiam Salvatoris*, quibus confirmatur quod de gratiā orationis Judæis concessā cum Norisio antea diximus; quod autem ibi dicitur (ut et cap. 18 libri terti de libero arbitrio), probat quidem peccatum obduratis imputari ratione causæ, sive prioris peccati, sed non probat illud non imputari etiam ratione sui, eò quod præsentis gratiæ ope vitari potuit. Quanquā fortē intendit S. doctor Deum posse tales omni gratiā privare, licet id de facto non velit. In capite 6 libri de Perfectione justitiæ post objecta verba addit : « Et tamen vitari potest, non quando superba voluntas laudatur, sed quando humilis adjuratur; » at hæc supponunt Dei adjutorium indurato affulgere quo remotē saltem possit peccatum vitare... Capite autem 19 *omni* non debile sed vividum excludit lumen. In Expositione in Epistolam ad Romanos 1° vult Bellarminus Augustinum postea hanc revocasse sententiam... 2° Tunc Augustinus Semipelagianorum errore erat imbutus... 3° Hæc non cohererent cum relatis testimoniis.... 4° Fortē intendit peccata indurationem sequentia Pharaoni non fuisse imputata ut peccata nullum præcedens peccatum supponentia, et nullā à Deo vindicæ poenā castigata.

In capite 15 libri 1 Retractationum, intendit induratos, quamdiū manet fortior cupiditas, ipsi resistere non posse, cū non possunt cupiditate simul et bonā voluntate moveri, non autem eos non posse cum gratiā illam exuere cupiditatem, siquidem illis necessariē non inhæret; gratia scilicet nemini deest cū urget præceptum.

Quod autem relatæ expositiones de *impotentia antecedente et consequente*, et de *sensu composito* sint ad mentem Augustini evincunt sequentia ejus effata. Relato tractatu 53 in Joannem ait : « Non poterant credere non quia mutari in melius homines non possunt, sed quamdiū talia sapiant non possunt credere. » Libro 2 de Sermone Domini in monte cap. 24, hæc habet : « Quamdiū quisque malus est, non potest facere fructus bonos; si enim bonos fructus fecerit, jam malus non erit. »

Objiciunt iterum eundem Augustinum lib. 15 Operis imperfecti dicere « diabolum non excusari à crimine etsi non possit non peccare, quia necessitas peccandi magna est in eo magni

pœna peccati » ergo. — Verū elucet disparitas diabolū inter et induratum; necessaria quippe dæmonis peccata, cū sit in termino, non augent ipsius pœnam; è converso necessaria peccata obdurati, qui est in viā, ipsius pœnam augerent, et ideo non vult Deus ut sint absolutē necessaria, aliās deterior esset in hoc obdurati conditio dæmonis conditione.

PRINCIPIA SOLUTIONUM. — Primum. Consentunt doctores peccata induratis meritō imputari, sed quā ex causā, dissentiunt. Alii eos peccare dicunt quia ubi malum actum eliciunt, habent gratiæ sufficientis ope potentiam expeditam ad actum oppositum.... Alii è converso sentiunt illos peccare, etiamsi *omni* gratiā in pœnam præcedentium delictorum destituantur. 1° Quia hæc impotentia consequens et voluntaria, non antecedens et necessaria, ex eorum culpā oritur.... 2° Quia liberè tunc peccant; possunt enim non peccare per simplicem actūs suspensionem, sive non positionem; ait enim D. Thomas q. 24 de Veritate cap. 12 : « Existens in peccato mortali potest ex naturali virtute singula peccata mortalia vitare, quamvis non omnia (sine gratiæ auxilio), et ideo non sequitur quod peccatum committendo non peccet; induratus igitur potest singula distributivè peccata mortalia *naturali virtute* vitare, et ideo non indiget gratiā ut peccata justè ipsi imputentur.... 3° Quia ad libertatem actūs mali haud necessarium est ut voluntas habeat potentiam expeditam ad actum bonum contrarium; libertas enim *contradictionis*, quā homo potest agere vel non agere, est de essentiā libertatis, non libertas *contrarietatis*; posse enim facere malum non est perfectio in libertate, sed potius imperfectio et defectus. Quamobrem modum quo peccata induratis justè imputantur hic non attingimus.

Secundum. Augustinus nullam hāc in vitā perfectam indurationem agnovisse videtur; unde libro 1 Retractationum, cap. 19, ait : *De quocumque quamvis pessimo hāc in vitā constituto non est desperandum*; quidam tamen istud effatum hoc sensu intelligunt quod Deus ex misericordiā possit pessimo cuicumque conversionis gratiam impertire, et ideo quilibet obduratus, quamdiū est in viā, possit Dei gratiam recipere, quod non possunt damnati et dæmones, utpote in termino constituti; quem sensum probare aggrediuntur ex D. Prospero in responsione ad 6 objectionem Vincentianam.

Tertium. Induratus agens ut induratus non potest benè agere; secūs si ita non operetur,

ut potest, cum cœlesti auxilio penitus non destituatur. Istius distinctionis ope, et potentia antecedentis et involuntaria, et consequentis ac voluntaria, quæ eodem recidit, concidunt omnes ferè adversariorum objectiones.

Quartum. In distributione gratiæ modum servat Deus, et ideò gradatim nascitur cordis durities. Hinc justis urgente præcepto major, fidelibus nondum obduratis minor, obduratis minima conceditur gratia, sufficiens tamen ad majorem obtinendam.

Quintum. Deus, ut exploratam faceret suam virtutem, potentiam et justitiam, potuit absque ullâ injustitiâ quibusdam magnis sordibus omnem interiorem gratiam subtrahere; unde adversariorum systema non repugnat. At *de facto* id noluit, cum ex dictis nulla sit in hæc vitâ perfecta obduratio. Hinc nonaginta septem præsules Gallicani in corpore doctrinæ anni 1720 a. 3, n. 11, aiunt: « Temerarium esset erroris notare opinionem plurium sapientum theologorum qui dicunt gratiam sufficientem negari obduratis, et non omnibus infidelibus conferri. »

ARTICULUS IV.

An Hebræis in antiquo fœdere illuxerit gratia sufficiens?

Apostolus, ut plurimos Judæos, qui etiam Christi militiæ nomen dederant, legi Mosaicæ justificandi vim superbè inserentes vinceretur, dixit legem solum subministrâsse *peccati cognitionem*, Epistolâ ad Rom. cap. 3, legem *subintrâsse ut abundaret delictum*, Rom. cap. 5, *litteram occidere*, 2 ad Corinthios cap. 3, *legem esse peccati virtutem*, 1 ad Corinthios cap. 13, *legem propter transgressionem positam esse, esse pedagogum ad Christum*, sive duxisse ad gratiam, Epistolâ ad Galatas cap. 3, etc.

Hæc et similia effata propriam legis excellentiam nullatenus vellicabant; lata quippe non fuerat ut se solâ hominem justitiâ exornaret, sed ut ostenderet quid esset faciendum, et homo suæ conscius infirmitatis, et intelligens se non posse propriis viribus præcepta exequi, Dei gratiam imploraret. Unde Apostolica illa dicta legem, ideò Judæis impositam ut fide et gratiâ Christi, quam prænuntiabat, delicta tollerentur, quâ legem unicè, sive solum ut à gratiâ distinctam, præcisè respiciebant; quo sensu verum omninò est ipsam idoneam fuisse ad fovenda et multiplicanda peccata, ad perdendos potiùs quàm ad salvandos homines, etc.

Cum autem ineunte seculo quinto relatum Judæorum errorem renovâssent Pelagiani asserendo gratiam in veteri Testamento fuisse ipsam Moysis legem, et in novo Evangelium et exemplum Christi, vir magni consilii Augustinus commemorata Apostoli oracula adversus illos hæreticos acutè contorsit passim asserendo legem sive veterem, sive etiam novam à gratiâ sejunctam, nedum homines justificet, quinimò reos tantum fecisse, et facere posse, jubendo, non adjuvando, etc.

Ex illâ gratiæ vindicis doctrinâ Jansenius, ut suum de solius gratiæ efficacis in statu naturæ lapsæ existentia et invictissimâ virtute systema obfirmaret, ansam arripuit asserendi libro 3 de gratiâ Christi cap. 5 et 7, « gratiam sufficientem lationi legis et scopo Dei capitaliter repugnare, ipsamque hominibus sub lege viventibus ad ullum præceptum observandum non adfuisse. » Magistrum expressit auctor 101 propositionum. Sexta sic se habet: « Discrimen inter fœdus judaicum et christianum est, quòd in illo Deus exigit fugam peccati, et implementum legis à peccatore, relinquendo illum in suâ impotentiâ; in isto verò Deus peccatori dat quod jubet, illum suâ gratiâ perficiendo. » Idem fert septima: « Quæ utilitas pro homine in veteri fœdere, in quo Deus illum reliquit ejus propriæ infirmitati imponendo ipsi suam legem? Quæ verò felicitas non est admitti ad fœdus, in quo Deus nobis donat quod petit à nobis? »

Contra illos sit

CONCLUSIO. — Hebræis, vigente lege Mosaicâ, non defuit gratia sufficiens, quâ Dei mandata remotè saltem observare possent.

Probatur 1º ex Scripturâ. Rarò quidem in veteri Fœdere reperiuntur testimonia quæ præstiti Judæis interni auxilii expressam faciant mentionem, sed cum carnali illi populo cœlestia bona sub terrenorum imagine pollicitus sit Deus, qui textus externa adiutoria Judæis data esse referunt; et interna oblata et etiam collata esse commemorare censentur. Tales, v. g., sunt hi Deuteronomii cap. 8: *Recorderis Domini Dei tui quòd ipse vires tibi præbuerit....* Ibidem cap. 30: *Mandatum hoc supra te non est.... Desperxistis omne consilium meum*, Proverbiorum cap. 1.... *Quid est quod debui facere vineæ meæ et non feci?* Isaïæ cap. 5: *Totâ die expandi manus meas ad populum non credentem, et contradicentem;* ibidem cap. 5... *Perditio tua, Israel*, Osee cap. 13, etc. Externa scilicet auxilia Judæis nihil profuissent

si defuissent interna, quibus Deo ad penitentiam excitanti obtemperare possent.

Probatur 2^o ex S. Augustino. Libro 3 ad Bonifacium initio capitis 4, ait: « Quis Catholicus dicat quod non dicere jactitant (Pelagiani) Spiritum S. adiutorem virtutis in veteri Testamento non fuisse? » Habuerunt igitur Judæi, etsi non vi legis quâ præcisè lex erat, ut diximus, gratiam internam quâ virtutis actus elicere possent.

Alibi passim docet legem obligare sub peccato, etsi non adsit gratia proximè sufficiens ad implendum opus imperatum (talem enim gratiam quam singulis momentis habuit insons Adam, unde eam petere non tenebatur, ex S. doctore per avitum peccatum amisimus); sed simul ibidem docet eandem legem admonere hominem ut gratiam quærat; v. g. epistolâ 143, aliâs 144, ad Anastasium. n. 3: « Lex, inquit, docendo et jubendo quod sine gratiâ impleri non potest, homini demonstrat suam infirmitatem, ut quærat.... Salvatorem à quo sanata voluntas possit quod infirma non possent. »

Concinunt S. Fulgentius libro 2 de veritate Prædestin. cap. 4: « Lex, inquit, admonet ut à quo nobis datur præceptum ab ipso petamus auxilium. » Et S. Prosper, vel auctor epistolæ 1 ad Demetriadem, ubi ait: « Nec ob aliud unquam datur præceptum nisi ut quærat præcipientis auxilium; » lex ergo Judæos ad-monebat ut gratiam implorarent; sed, ut optimè notat Norisius Vindic. cap. 3, paragrapho 6, « ex Augustino (et catholicâ fide) homo nonnisi gratiâ moveri potest ad orandum; » ergo ex Augustino Judæi sub lege internam orationis gratiam habuerunt.

Probatur 3^o ex D. Thomâ. 1-2, q. 98, a. 2 ad 4, ait: « Dicendum quòd quamvis lex vetus non sufficeret ad salvandum homines, tamen aderat aliud auxilium à Deo hominibus simul cum lege per quod salvari poterant, scilicet fides Mediatoris.... et sic Deus non deficiebat hominibus quin daret eis salutis auxilia. » Nec refragatur Norisius; agnoscit enim loco citato, « Judeos sub lege habuisse gratiam orationis. Plurimi, inquit, veteris Testamenti Patres non sub lege tantum fuere, sed sub gratiâ adjuvante, quia propriæ infirmitatis conscii ad sectanda virtutum opera divini auxilii opem implorârunt. »

Probatur 4^o rationibus theologicis. Prima. Veteris Testamenti codices affluunt exhortationibus, blanditiis, minis, etc., excitantibus

ad legem implendam: sed hæc nonnisi irrisorie proposuisset Deus, si Judæos reliquisset in omnimodâ impotentia; excitasset enim ad penitentiam quos in absolutâ penitendi impossibilitate per cujuscunque gratiæ denegationem veluti constituisset. Secunda. Yprensem Manichæorum gregi aggregasset? Tertia. Christus est *agnus occisus ab origine mundi*, Apocalypsis cap. 13; ergo Christi gratia in aliquos saltem homines ante legem et sub lege scaturivit.

Objicit 1^o Jansenius libro 5 de Gratiâ Christi, cap. 5, ex Augustino: Deus legem dedit ut Judæos ad gratiam implorandam compelleret; sed hic finis exigebat ut eos omni gratiâ nudatos viribus propriæ voluntatis relinqueret; qui enim gratiam habet gratiam petere non tenetur; ergo. — Resp.: Concedo majorem, nego minorem. Hic finis exigebat duntaxat ut Judæi gratiam non haberent quâ proximè legem implere possent, secus gratiam quâ remotè eam per orationem exequi valerent; *sine gratiâ* enim, inquit S. Prosper, *nemo currit ad gratiam*. Porro Augustinus locis citatis, et ex eo Norisius, hanc in eis gratiam admisit.

Instabis cum eo: Augustinus passim clamat Judæos *omni gratiâ adjuvante* caruisse; ergo. — Resp.: Augustinum per *adjuvantem gratiam* non præveniens et debile ad orationem excitans, sed adjuvans et robustum proximam legis præcepta implendi potestatem conferens adiutorium intellexisse; id enim in locis ab ipso Jansenio objectis et in iis quos laudavimus evidenter docet.

Objicit 2^o celebrem hominum *sub lege et sub gratiâ* partitionem ab Augustino passim usurpatam; sed per homines *sub lege* homines intelligit *omni gratiâ nudatos*; ergo. — Resp. Nego minorem. Designat homines adjuvante gratiâ modo descriptâ destitutos, non præveniente et debili quâ ad adjuvantem confugere possint. Scilicet S. doctor arguit ex hoc Apostoli epistolâ ad Romanos cap. 6, *peccatum vobis non dominabitur; non enim estis sub lege, sed sub gratiâ* (ut patet ex libro de Gratiâ et libero Arbitrio, cap. 12, n. 24). Unde per eos qui sub lege sunt eos intelligit quibus lex dominatur, sive, ut ibidem loquitur, *quos reos facit lex*, non implentes legem; per illos verò qui sunt *sub*

gratiâ illos quibus gratia dominatur, sive qui per gratiam legem implent. Porro qui legem non implet necessariè quidem efficaci gratiâ caret, sed non præveniente et sufficiente.

Objicit 5^o: In nostrâ sententiâ nullum occurreret discrimen inter legem Mosaicam et legem Evangelicam; falsum ex Augustino consequens; ergo. — Nego majorem. Magnum illud discrimen ex Apostolo passim refert D. Augustinus 1^o, quòd lex antiqua per se et ratione sui nihil ad perfectum adduxerit; lex è converso nova per se gratiam conferat;.... 2^o quòd uberior sit et potentior gratia in novâ quàm in veteri lege; 3^o quòd licet in utrâque lege sit *timor et amor*, tamen in veteri prævaluerit timor, in novâ prævaleat amor; at hæc discrimina cum nostrâ sententiâ stare patet; ergo.

Objicit tandem timorem non amorem viguisse in antiquâ lege; sed timor pœnæ ex Augustino malus est cùm peccandi affectum semper includat; ergo. — Resp. ipsum Augustinum hanc objectionem diluisse; ait enim libro de moribus Ecclesiæ cap. 28, n. 56: *In his duobus (timore et amore) Deus.... veteri et novo Testamenti disciplinæ regulam dedit; quanquam enim utrumque in utroque sit, prævalet tamen in vetere timor, amor in novo.....* Neque repugnat Norisius; loco quippe laudato in fine paragraphi sexti improbat tantum metum *purè*, id est, *serviliter servilem*.

PRINCIPIA SOLUTIONUM. — Primum. Certum est non Mosaicam tantum, sed et Evangelicam legem, si præcisè spectetur quâ lex est, non sufficere ad benè agendum. Certum insuper legem veterem ex se, et sine fide in Messiam, quem præfigurabat, non potuisse gratiam dare. Non mirum ergo si Apostolus et Augustinus tam sæpè insurrexerint in legem, quam Judæi et Pelagiani justificare obganniebant, et dixerint legem *reos fecisse* non *ex se* (erat enim *sancta*, inquit Apostolus), sed ex vitio Judæorum qui ad Christum omnis gratiæ fontem recurrere nolebant.

Secundum. Licet gratia à lege distincta sit, unâ tamen cum lege tum Judæis cùm Christianis semper data fuit aut oblata; unde istud Psalmistæ: *Benedictionem dabit Legislator*, ut notat Augustinus libro de Gratiâ et libero Arbitrio, cap. 18.

Tertium. Gratia Judæis vulgò saltem impensa ad implenda mandata fuit gratia præveniens tantum et simpliciter necessaria ad *fortem et adjuvantem* obinendam, quâ præce-

pta proximè implere possent. Unde istam solam à lege veteri excludi voluit Augustinus.

Quartum. Jansenius libro 3 de Gratiâ Christi, cap. 3, definit esse *sub lege* idem esse ac *omni gratiâ nudari*; et tamen libro 2 de Gratiâ Christi, cap. 27, dicit, « plurimos qui necdum ab immunditiis carnis se continere possunt, vehementer tamen optare continentiam, cujusmodi vota sunt gratiæ munera, et majoris gratiæ provocativa; » quomodò ista coherent, cùm illi homines utpote legem non implentes sub lege sint?

Quintum. Jansenius dùm contendit Augustinum constanter docuisse *Judeos non habuisse gratiam ad ultum præceptum observandum*, videtur dexteram porrexisse Juliano S. doctorem sic increpanti libro 3 Operis imperfecti cap. 115: « Taceo quâ rabie in totam legem fremas, quam credis ea imperâsse mortalibus, quorum apud eos nullam facultatem videret. » Non minùs S. doctori injuriæ sunt qui ipsum de veteri lege duriùs locutum esse pronuntiant; de illâ enim ut Apostolus locutus est.

ARTICULUS V.

An infidelibus dentur gratiæ sufficientes ut fidei lumine collustrari possint?

Inter infideles alii *negativi*, qui de Christo nihil unquam audierunt, alii *positivi*, qui oblato vel audito Evangelio sese immorigeros exhibuerunt. De istis potissimum res est, et quæritur an pro loco et tempore, præter externa gratiæ adjumenta ipsis dentur quædam internæ gratiæ sufficientes quibus mediâtè saltem ad finem pervenire possint, sicque gradatim æternam consequi salutem.

Jansenius, libro 3 de Gratiâ Christi, cap. 11, hæc in titulo intonat: « Infideles carent gratiâ sufficienti ad salutem tam proximâ quàm remotâ, et omnibus principiis ejus. » Norisius Vindiciarum cap. 3, paragrapho 6, et Janseniani erroris calumniæ sublata capite 1, suam super hoc sententiâ his aperit verbis: « Quamvis infideles careant auxilio sufficienti, habent tamen auxilia quædam remota; unde non patiuntur antecedentem necessitatem peccandi, quam licet humanum genus ex peccato primi parentis incurrit, Christi tamen Redemptoris beneficio sublata est. »

Vasquez, Suarez, inò et Stephanus De-champs de hæresi Jansenianâ libro 3, disputatione 8, cap. 11, n. 2, admittunt etiam in iis infidelibus auxilia saltem remota.

Verum multum laborant in assignandâ ge-

nuinā illorum auxiliorum notione. Ex dictis scilicet gratia sufficiens *mediata* tantum et *remota* baptizatis non obduratis et induratis, quin et ipsis justis urgente præcepto aliquando impertita, est gratia *proximè* sufficiens orationis, quā possunt obtinere auxilium uberius ad implendum præceptum proximè sufficiens; at ejusmodi auxilium infidelibus competere nequit, siquidem sunt infideles, et *nemo potest Deum in quem non credit invocare*, epistolā ad Romanos cap. 18. Hinc Vasquez auxilia illa remota constituit in gratiā naturalis ordinis, quā si benè utantur infideles observando legem naturalem, Deus postea ipsis confert gratiam proximè sufficientem supernaturalis ordinis, quā proximè possint ad fidem converti; sed Suarez hanc sententiam Semipelagianismi insinuat, quia initium fidei ex merito naturali scaturire facit. Hāc ex causā iste theologus docet conditionem sub quā Deus « promisit infidelibus proximum auxilium sufficiens ad fidem esse negativè intelligendam, » id est, « si homo ex parte suā impedimentum divinæ vocationi non posuerit; » sed Vasquez vice suā huic opinioni Semipelagianismi notam inserit, quia illa conditio connotat impedimentorum remotionem per vires naturæ quæ esset dispositio, licet remota, ad fidem.

Norisius loco indicato remota illa auxilia collocavit « in quibusdam bonis cogitationibus, sed adeo debilibus ut voluntatem ad virtutem non attrahant, cum longo scelerum usu obcæcata indurescat. »

Hæc profectò quæstionem obscuram et explicatu difficillimam nullatenus solvunt et elucidant; quinimò novis ambagibus et difficultatibus implicant et involvunt. Stephanus De-champs loco citato cap. 12, « gloriatur se accuratè esse explicaturum cujusmodi sit gratia infidelibus concessa. » Dicit n. 1, eam consistere « non solum in cognitione cœlitus infusa, sed etiam in pio motu voluntati à Deo impresso.... » n. 2: « Gratiam illam interiorem infidelium sæpius uniri cum exteriori aliquā; quemadmodum gratia interior, quā quis in Christum credit, cum externā prædicatione conjungitur.... » n. 3 et 4: « Gratiam illam infidelium non esse propriè Christi gratiam (talisque gratia Christi cognitionem ac fidem involvit) licet Christi meritis comparata sit (quo sensu dici potest gratia Christi vel gratia per Christum) sed gratia Dei quia imperfectam saltem Dei cognitionem inducit.... » n. 5: Generalem istam gratiam infidelibus sufficere

ut constet inexcusabiles esse reprobos et suā culpā perire, secus ut explicetur cur hi potius quàm illi ad fidem perveniant. Inter eos scilicet qui illam rejiciunt, alii per misericordiam Dei fidei luce illustrantur, quā alii per ejus justitiam privantur, et licet omnes qui primā illā gratiā generali benè utuntur ampliorem accipiant, eamque sufficientem, omnes tamen efficacem, quam Deus nemini debet, non recipiunt. » Ex his autem concludit, « gratiam infidelibus concessam verè esse supernaturalem, cum sit cogitatio cœlitus immissa, et pia voluntatis motio à Deo facta, quæ remotam salutis consequendæ potestatem tribuit, quatenus nempe illā gratiā excitantur et adjuvantur ad servandam legem naturalem, cui si consentirent infideles legem naturalem pro viribus implendo, nec graviter peccando, certissimè pro loco et tempore per Christi merita ipsis impertiretur gratia proximè sufficiens ad fidem, id est, fidei doctrinam (vel per hominum Angelorumve ministerium, vel per revelationem internam) et gratia interna, quā ad huic doctrinæ credendum excitarentur. »

Alii è converso negant auxilium illud infidelibus concessum esse supernaturale; alii mediam ineunt viam, et dicunt illud esse supernaturale *quoad modum et ratione principii*, cum sit indebitum, ex inspiratione Spiritus sancti, et ex Christi meritis; esse verò naturale *ratione objecti*, cum moveatur versùs objectum naturale, id est, legem naturalem; quod ultimum explodere conantur primæ opinionis defensores dicendo illud auxilium dirigi à Spiritu sancto ad fidem, ad quam nihil ordinis naturalis remotè etiam disponere potest.

His expositis sit

CONCLUSIO. — Gratia sufficientes ipsis infidelibus pro loco et tempore infunduntur, quibus peccata vitare possunt, sicque remotè salutem et mediatè sibi ad fidem et æternam salutem viam aperire, cujuscumque naturæ sint illa auxilia, quod certò definiri non potest.

Jansenius loco citato agnoscit ita sentire theologos. « Admittunt, inquit: (scholastici) auxilium sufficiens esse in infidelium remotā vel proximā potestate, nempe quia possunt saltem non ponere impedimentum divinæ vocationi, quod si facerent non peccando, sine dubio vocarentur ulteriùs, peccando autem reddunt se incapaces gratiæ sublimioris; tale auxilium ad non peccandum ferè omnes unanimiter adesse infidelibus volunt, utpote sine quo peccatum eis non posset ad culpam imputari. »

Probatur 1°. Rom. cap. 1, v. 20, dicitur, gentiles qui ex Dei per res creatas cognitione ipsum *sicut Deum non glorificaverunt esse inexcusabiles*; ex quibus sic arguimus: Hoc testimonium tum ex se tum ex interpretatione Patrum Augustinianæ doctrinæ peritorum et tenacium, intelligendum est non solum de gratiâ externâ cognitionis Dei per creaturas (quam admittebant Pelagiani) sed etiam de aliquâ gratiâ internâ gratiæ illius externæ sociâ quâ gentiles potuerunt glorificare sive amare et colere Deum; ergo..... Probatur aut. per partes. 1° *Ex se* sic intelligendum est. Apostolus enim hic gentiles inexcusabiles pronuntiat, quia ex Dei per creaturas notiâ potuerant Deum colere potentiâ si voluissent ad actum reducendâ, sicuti Tyrii et Sidonii, de quibus Matthæi cap. 11, ex Christi miraculis potuissent pœnitentiam agere potentiâ si voluissent ad actum reducendâ; ait enim, quia *cum cognovissent Deum, non sicut Deum glorificaverunt*; sicut Mathæi cap. 11, dicitur: *Si in Tyro et Sidone factæ fuissent virtutes quæ factæ sunt in vobis, olim in cilicio et cinere pœnitentiam egissent ubi verba, glorificaverunt, et pœnitentiam egissent*, evidenter denotant potentiam non ab actu sejunctam, sed cum actu conjunctam accedente voluntatis consensu; sed nemo nisi Pelagianus dixerit potuisse gentiles ex solâ Dei per creaturas notiâ sine ullâ prorsus gratiâ internâ colere Deum *potentiâ*, ad actum dependenter à voluntate reducendâ. Idem dicendum de Tyriis et Sidoniis; ergo.

2° Ex Patribus Augustino addictis sic est exponendum. Etenim Augustinus libro 10 Confessionum cap. 6, n. 8, ait: *Cælum et terra undique mihi dicunt ut te amem, nec cessant dicere omnibus ut sint inexcusabiles*. Notiâ igitur Dei per cælum et terram gentiles Deum non amantes *inexcusabiles* reddebat. Cur, nisi quia cum illâ notiâ aderat gratia interior, quâ si voluissent gratiam uberiorem obtinendo Deum *de facto* amavissent? Et verò Augustinus hic indubiè supponit sibi adfuisse illam gratiam; ergo et aliis omnibus.

Concinunt D. Anselmus, et Hugo à S. Victore (quos Jansenius ut præstantes Augustini discipulos impensè celebrat). Ille in caput 1 ad Romanos: *Deus manifestavit illis*, ait: « Id est non solum naturalis ratio profuit, sed Deus quotidie adjuvit, ne sola natura sufficere videretur... » Iste tractatu 1 Summæ Sent. cap. 3, eadem verba sic exponit: « Cum subjungit: *Deus illis revelavit*, ostendit quòd ratio humana

per se insufficiens esset, nisi revelatio divina illi in adjutorium adesset. » Ubi verba *adjuvit*, et *adjutorium*, connotant gratiam etiam internam infidelibus præter rationem adfuisse. Externa quippe revelatio sine interno adjutorio gentiles ad amandum Deum non magis adjuvisset quàm ratio.

Concinit D. Thomas qui, ut in præcedenti libro diximus, docet vel supponit quæstione 14 de Veritate art. 11, ad 1, et alibi, Deum internam etiam gratiam ex bonitate infidelibus dare, et *ipsorum corda movere ut loquatur* lectione 3 in caput 1 Epistolæ ad Romanos.

Probatur 2° ex D. Augustino. Libro de Naturâ et Gratiâ, cap. 67, n. 81, eos qui Adæ peccato peccata sua imputabant his reprimis verbis et erigit: « Cum Deus ubique præsens... aversum vocet... conantem adjuvet, exaudiat deprecantem, non tibi deputatur ad culpam quod invitus ignoras, sed quòd negligis quærere quod ignoras » (hæc adversus Manichæos libro 3 de libero Arbitrio cap. 19 dicta hic adversus ipsos Pelagianos confirmat), « neque illud quòd vulnerata membra non colligis, sed quòd volentem sanare contemnis. » Ex hoc testimonio meritò infert Norisius citato loco ipsis infidelibus illucere internum Dei auxilium saltem remotum; disserit enim Augustinus de omnibus et singulis hominibus, et de adjutorio inexcusabilem reddente, adjuvante, et voluntatis infirmitatem sanante, qualis est non externa tantum, sed et interna gratia.

Idem S. doctor asserit, *nullum mortalium excusare se posse de umbrâ mortis, quia et ipsam penetravit Verbi calor*, in Psalmum 18 n. 7.... *judicandos esse in pœnam qui salvari noluerunt*, tractatu 36 in Joannem n. 4.... *Homines posse si velint mandata servare quia lumen (Dei gratia) corda pascens omnem hominem illuminat*, libro 1 de Genesi ad litteram cap. 3, et libro 1 Retractionum cap. 10.

Hinc eruditus Bossuetius justificationis paginâ 70, paragrapho 17, de infidelibus negativis dixit: « Dieu met dans leurs cœurs des préparations plus éloignées (que la grâce immédiatement nécessaire à croire) dont, s'ils usaient comme ils doivent, Dieu leur trouverait dans les trésors de la science et de sa bonté des moyens capables de les amener de proche en proche à la connaissance de la vérité.... *L'auteur du livre de la vocation des gentils a bien expliqué.... non seulement cette bonté générale de Dieu, mais encore.... la secrète dispensation de sa grâce, les occultes et particulières insinua-*

tions de la vérité, que Dieu répand dans toutes les nations, par les moyens dont il s'est réservé la connaissance.

Hinc meritò Alexander VIII 7 decembris anni 1690 inter 51 Jansenianorum propositiones hanc numero quintam proscripsit : « Pagani, Judæi, hæretici, etc., nullum omninò accipiunt à J. C. influxum, adeoque hinc rectè inferes in illis esse voluntatem nudam et inermem sine omni gratiâ sufficiente, » et Clemens XI relatas inter 101, 26, 27 et 29 assertiones quæ ferunt fidem esse « primam gratiam, et extra Ecclesiam nullam concedi gratiam. »

Obijciunt 1^o : Actuum cap. 14 dicitur *Deus in præteritis generationibus dimisisse omnes gentes ingredi vias suas*; et cap. 16, Paulus et Timotheus vetantur à Spiritu sancto loqui verbum Dei in Asiâ; ergo illi populi omni gratiâ sufficiente caruerunt. — Resp. : Nego conseq. Deus equidem mirabilis est et terribilis in consiliis suis super filios hominum; sed nihilominus misericordiâ Domini plena est terra; permisit itaque, ut dicitur cap. 14, gentes errorum suorum vias ingredi, sive omnia sub peccato concludi, ut gratiæ suæ necessitas et virtus splendidiùs eluceret; sed ita non permisit ut ipsis nulla externa et etiam interna beneficia impenderit; ibidem enim v. 16, beneficia externa numerantur, et Rom. cap. 1, dicit Apostolus gentes illas potuisse glorificare Deum ex auxilio indubiè non externo tantùm sed et interno. Quod attinet ad caput 16, auctor librorum vocationis gentium, quem modò impensè laudabat Bossuetius, libro 2, cap. 1, dicit illis populis tunc negatam non fuisse gratiam, sed retardatam, cum, Hieronymo dicente, Joannes postea totas Asiæ fundaverit et rexit Ecclesias. Id etiam fortè contigit quia, eodem referente Hieronymo, tunc fames facta fuit sub Claudio, et Asiani, utpote adhuc canes, Apostolos fame devorari permisissent.

Obijciunt 2^o : Divus Augustinus 1^o docet fidem esse omnium gratiarum primam, et ideò ante fidem et sine fide nullas prorsùs gratias impertiri. Ex mille textibus unus alterve sufficiat. Libro de Prædestinatione sanctorum, cap. 7, n. 12, ait : « Fides.... ipsa prima datur, ex quâ impetrentur cætera, quæ propriè opera nuncupantur, in quibus justè vivitur. » Ibidem cap. 9, n. 16, dicit, fidem inchoatam et perfectam donum Dei esse, et hoc donum quibusdam dari, quibusdam non dari; » sed infideles fide carent; ergo. — Resp. Augusti-

num rarò, et nonnisi urgente necessitate de gratiâ fidem in Christum præcedente, sæpiùs verò de gratiâ eandem fidem inspirante, comitante et sequente verba fecisse. Scilicet cum natura auxiliorum infidelibus cœlitùs concessorum prorsùs esset recondita, vir ingenio et prudentiâ acutissimus prævidebat gratiæ Christi hostes illa auxilia, si prædicarentur, esse subsannatuos, aut exinde esse ansam arrip-turos prætendendi bona infidelium, sive naturæ opera positivè præparare ad gratiam et vitam æternam. Etverò, si Vasquez et Suarez cum illa adjutoria scrutari aggressi sunt, sese invicem Semipelagianismi accusaverunt, quantò proterviùs sagaces et feroces Pelagiani Augustino de illis disserenti insultassent? Hinc S. doctor in suis adversus eos operibus gratiam Christianorum propriam, et ad opera salutis æternæ meritoria proximè sufficientem (quod disputationis cum illis erat velut caput et summa) stabilire fuit quasi perpetuò sollicitus. Hæc ex causâ frequenter dixit, fidem in Christum (perfectam nimirum et explicitam) esse primam gratiam (non qualemcumque, sed ad justificationem proximè disponentem, cum impossibile sit sine fide placere Deo, Hebræorum cap. 11, et post Augustinum dicat concilium Tridentinum sess. 6, cap. 8, fidem esse omnis justificationis radicem)... fidem inchoatam, et perfectam esse donum Dei (cum ejus initium non minùs quàm ejus consummatio sit ex gratiâ)... fidem illam quibusdam dari, quibusdam non dari (non quoad potestatem saltem remotam, cum omnes suo modo influxum ut ad fidem perveniant à Deo accipiant); sed quoad actum (cum omnes Deo vocanti sese morigeros non præstent).

Hæc duntaxat intendisse D. Augustinum elucet 1^o ex ipsis testimoniis objectis in quibus declarat se loqui de fide ex quâ prodeunt opera quibus justè vivitur... 2^o Ex citato capite 67 libri de Naturâ et Gratiâ in quo, ipso Norisio teste, agnoscit omnibus hominibus, et ideò infidelibus dari auxilium internum saltem remotum, etc.

Igitur si fides sumatur pro fide inchoatâ et imperfectâ, id est, pro quâlibet Dei notiâ cœlitùs inspiratâ, fides erit prima gratia simpliciter et absolutè (cum nulla prorsùs cujuslibet generis sit ante eam excogitari possit). Sed si sumatur (ut eam ferè semper accipit Augustinus) pro fide in Christum perfectâ et explicitâ, sine quâ impossibile est placere Deo, erit quidem prima gratia proximè disponens ad gra-

tiam justificantem, sed non prima simpliciter et absolute, cum ante illam alia existat quæ remotè ad fidem disponit.

2º Augustinus libro de Correptione et Gratiâ cap. 6, n. 9, infideles, quorum in auribus non percrebuit evangelica tuba, conquerentes se injustè corripì et damnari, hæc unicâ ratione revincit quòd in Adamo peccaverint; quod evincit ipsum existimâsse in eos non stillâsse quasdam gratias, quibus ad fidem remotè pervenire possent. Resp. Augustinum ibi hanc rationem sic referre ut aliam non excludat, imò supponat; ait enim ibidem, *prima est causa*, et iterum: *Corrumpitur origo damnabilis* (infideles rei peccati originalis), *ut ex dolore correptionis voluntas regenerationis oriatur*. Quomodò talis voluntas sine gratiâ internâ in illis gentilibus oriri potuisset?

3º Epistolâ 194, aliâs 105, ad Sixtum, cap. 6, evertit Augustinus palmarem scholasticorum rationem, « infideles necessariè esse peccaturos, et ideò excusatione dignos, si ipsis denegaretur gratia quâ possent non peccare; » ait enim n. 29: « Si (in hæc hypothesi) excusatio justa esset, non inde jam gratia, sed justitia liberaret;... » n. 22 dixerat: « Qui se excusant, dicentes se gratiam unde benè viverent non accepisse, negare non possunt se de suo malè vivere;... » et n. 27, « ignorantia in eis qui intelligere noluerunt... peccatum est, in eis qui non potuerunt, pœna peccati, et ideò in utrisque non est justa excusatio, sed justa damnatio; » ergo.

Resp.: Nego antecedens; ibi enim Pelagianorum argumenta adversus peccatum originale et gratiæ necessitatem et gratuitatem diluens se excusantes quòd gratiam unde benè viverent non accepissent, sicque injustè damnarentur, reprimit; quod ut præstet, ostendit gratiam non justitiæ sed misericordiæ titulo infundi; potuisset enim Deus sine injustitiâ omnes è massâ perditionis non eripere, et aliunde ignorantia Adæ peccati et ejus posteriorum pœna est; sed quid inde? Illos nullam omninò ex Dei bonitate gratia accepisse quâ peccata cavere possent? Minimè sanè; hanc enim quæstionem ibi non discutit quia commemorata Pelagianorum placita ibi duntaxat refellere volebat; quin ibi de gratiâ dante benè vivere, non posse benè vivere loqui videtur, et ideò non excludit omnem gratiam salvificam.

Objeiciant 3º ex ratione 1º: Si ut non peccaret infidelis gratia posse non peccare dans esset necessaria, gratia ad peccandum requireretur, et ideò satius esset non habere gratiam quàm

habere; eâ quippe præsentè peccati reus esse posset, secus eâ absente; absurdum consequens; ergo. — Resp.: Nego majorem; quin imò gratia esset necessaria ad non peccandum, cui solus homo sibi sufficit. Equidem sine gratiâ non peccat, et cum gratiâ peccat homo; sicut et sine et cum libertate; sed non ideò ipsi magis expedit non habere quàm habere gratiam, vel liberum arbitrium, quia cum gratiâ, vel libero arbitrio cœlitus adjuto potest, si voluerit, cœlestem beatitudinem adipisci. 1º In nostrâ sententiâ infidelitas *negativa* esset peccatum imputabile, utpote voluntaria in liberâ legis naturalis violatione; absurdum consequens: ignorantia enim fidei in iis qui de Christo nihil unquàm audierunt, moraliter discuti non potuit, et ideò invincibilis est, ac proinde inculpabilis, Rom. cap. 10; ergo. — Resp.: Nego majorem; effectus enim ex liberè volito actu sequens ut voluntarius reputetur ex illo actu exoriri cognoscatur vel cognosci possit oportet; sed infideles negativi gratiâ licet ad remotè credendum excitati hanc notitiam nec habuerunt, nec habere potuerunt; ergo.

5º Cur Ecclesia orat ut infidelibus fidei gratiam inspiret Deus, si ad eam ex præsentibus auxiliis pervenire possunt? — Resp. Ut Deus eis det gratiam quâ proximè et immediatè ad fidem pervenire possint, quam ut plurimum non habent. Præterea gratia infidelibus data vel oblata est gratuita, non debita; et ideò rogandus est Deus ut eam ipsis impertire dignetur.

4º Ex dictis explicari nequit in quo præcisè reponenda sit gratia sufficiens infidelibus instillata; ergo. — Resp.: Nego consequens. « An enim negandum est, inquit Augustinus, quod est apertum, quia latet quod est occultum? »

PRINCIPIA SOLUTIONUM. — Primum. Ratio fuit cur Augustinus parcè omninò infidelium gratiam commendaret, ne videlicet Pelagianis a mai. inistraret.

Secundum. « Deus, inquit Augustinus libro 1 ad Bonifacium cap. 19, n. 36, miris modis in hominum cordibus operatur, » quos ideò satius est humili silentio venerari, quàm curiosâ disputatione perquirere. Hinc doctissimi Norisius et Bossuetius à gratiâ infidelium naturâ scrutandâ scitè abstinerunt. Nihilominus, cum nihil ordinis naturalis possit ad fidem disponere, cogitationes et motiones infidelibus negativis à Deo immissæ videntur dicendæ, *supernaturales*, utpote indebitæ et à Spiritu sancto directæ ad fidem et salutem.

Tertium. Augustini effata: *Gratia non omnibus*

datur, communis est natura, non gratia, intellige de speciali et efficaci gratiâ non solum disponente ad fidem sed et fidem operante, non de communi et sufficiente gratiâ disponente duntaxat ad fidem, vel de gratiâ sufficiente immediatè ad credendum et operandum, non sufficiente in genere potentie præsertim remotæ, vel de gratiâ semipelagiano sensu, quæ nempe omnibus æqualiter daretur, vel impertiretur ob quemdam piæ credulitatis affectum ex viribus naturæ procedentem et Deum ad gratiam dandam determinantem.

Quartum. Estius, Sylvius, etc., agnoscunt ex Dei beneficio et gratiâ in infidelibus cogitationes et animi motiones fidem ejusque initium præcedentes, et viam quamdam ad fidem sternentes, licet, addunt, non sint effectus gratiæ reparantis, nimirum secundum se, et quamdiu sunt sine ullo justitiæ et salutis initio. Ita Sylvius in 1-2, q. 111, a. 5.

Ultimum. Ut intelligas sensum hujus Patrum oraculi, *fides est prima gratia*, sedulo distingue cum P. Deschamps libro 3 disput. 8, cap. 12, n. 10, fidem *inchoatam*, vel *perfectam*, ab inspiratione fidei inchoatæ, vel perfectæ, et explicitæ, sive vocatione interiori; hæc enim credendi potestatem, illa verò credendi actum involvit. Inspiratio fidei cunctis infidelibus datur, non fides; unde inspiratio fidei est absolute prima gratia, non fides ipsa, nisi relativè ad opera justificationem proximè præcedentia. Tandem fides habitualis inter virtutes christianas dignitate prima est, quo etiam sensu potest dici *prima gratia*.

ARTICULUS VI.

An in omnes parvulos è cœlo stillent aliqua adjutoria ad salutem sufficientia?

Quæstio ista infantes non tangit, qui vel post baptismum è vitâ exeunt, vel propter Christum trucidati ipsum non loquendo sed moriendo confitentur; talium enim salutem Deum non sufficienter tantum, sed et efficaciter providisse manifestum est.

Quæstio pariter non spectat infantes qui ex parentum aut aliorum negligentia, vel malitia sine baptismo vitam finiunt; dici enim posset Deum eorum felicitati sufficienter consuluisse illis baptismum impertiendi munus aliis committendo.

Quæstio igitur præcisè respicit parvulos, quibus sive in utero sive extra uterum ex nativâ duntaxat constitutione morientibus nullo prorsus modo conferri potest baptismus; quæritur

an de hoc remedio ipsis applicando sufficienter curaverit Deus.

Negant Gregorius Ariminensis, Gabriel, Richardus, etc.; negant vulgò Augustiniani; negat Vasquez; negant Belgici ut plurimum theologi, etc. Affirmant è converso plures, in primis recentiores, qui tortuosis argumentationibus efficere conantur veram et solam causam cur illis parvulis non conferatur baptismus esse ordinem causarum secundarum quem Deus ut provisor generalis invertere non tenetur, quinimò servare debet.

Quid super salebrosâ istâ controversiâ opinemur ex sequentibus intelliges. Certum est (ipso Augustino iudice) Christum pro commemoratis etiam parvulis mortuum esse, et ideo Deum eorum salutem sincerè voluisse. Enimverò id passim asserit S. doctor libro 6 contra Julianum cap. 4, n. 8, libro 2 Operis imperfecti cap. 173, idque ex hoc Apostoli oraculo epistolâ 2 ad Corinthios cap. 5: *Si unus pro omnibus mortuus est, ergo omnes mortui sunt, et Christus pro omnibus mortuus est*; « quidquid, inquit ultimo loco Julianum alloquens, argumenteris, quidquid tergiverseris, quidquid apostolicorum verborum coneris evertere sive pervertere, à morte, quæ in peccato est, parvulos non ostendis immunes, quia et pro eis Christum mortuum esse negare non audes. »

Cum igitur ipsi parvuli, quibus ante mortem nullo modo conferri potuit baptismus, peccato originali coinquinentur, pro illis sanguinem fudit Christus, quia omnes mortui sunt pro quibus mortuus est Christus, et Christus mortuus est pro omnibus qui mortui sunt. Quomodo autem de illorum parvulorum salute curaverit Deus sacri codices non patefaciunt; sic enim sinceram Dei eos salvandi voluntatem commendant, ut cœlestis hujus providentiæ media non assignaverint.

Traditio etiam non reteggit; inter Patres enim, si Augustinum et ejus discipulos excipias, nullus aut saltem ferè nullus de hoc disseruit. Ecclesia quoque non expandit quæ nihil unquam super hoc pronuntiavit. Ratio demum non recludit quæ si causas físicas sæpissimè non detegit, quomodo cœlestes detegeret? Hinc vir theologus D. Augustini hæc de re sententiam exosculari debet, aut saltem nihil ipsi adversum sancire; hanc enim quæstionem ex professo adversus Pelagianos tractavit, et aliunde illius contra istos hæreticos elucubrationes præ cæteris approbavit Ecclesia, ex quibus insuper nihil unquam retractasse videtur. Tandem, si

Ecclesia istam quæstionem definiret, Augustini verba, ut toties fecit, indubiè exseriberet. Ut autem illam sententiam intelligas, observa ex constanti adversus Pelagianos Augustini doctrinâ pari et eadem ex causâ homines avitâ maculâ infectos Deum ab æterno salvare et reprobare decrevisse. Alios scilicet salvandi sola ipsi ratio est sua misericors voluntas à corruptâ massâ quos vult segregans; alios verò reprobandi sola ratio eadem sua voluntas, sed justa et severa eos in massâ deserens. Terribilem hanc discretionem et electionem passim probat S. doctor sacrorum codicum auctoritate, imprimis Epistolis D. Pauli, naturâ mediorum statûs naturæ lapsæ, et variis exemplis, humanitatis Christi ex nullis meritis ad unionem hypostaticam evectæ (qui quidem Christus viva est imago prædestinationis nostræ); populi Judaici nullis meritis præ cunctis aliis electi; parvulorum quorum alios rapit Deus post baptismum eandem gratiam aliis non impertiens, etc. Eadem quippe causa est prædestinationis ac reprobationis adultorum quæ parvulorum, Dei scilicet, ut dictum est, voluntas alios ex massâ educens, alios non educens. Legi poterit Petavius dogmatum libro 9 de Prædestinatione cap. 10, ubi n. 4, ait : « Grandiorum prædestinationem ad salutem ac reprobationem sine ullo respectu ad privata merita fieri (etiam ex gratiâ) parvulorum exemplo sic probat (Augustinus), ut ne mutire quidem contra tam evidentem auctoritatem liceat. » Parvulorum prædestinationem et reprobationem Juliano breviter suasit S. doctor libro 3 Operis imperfecti cap. 2, his verbis : « Agnosce parvulos in honorem per gratiam, qui assumuntur in Dei regnum, et alios parvulos, qui in illum honorem non assumuntur, vasa in contumeliam per judicium, et tandem aliquando, ne iniquum facias Deum, confitere originale peccatum. » Ex his passim concludit S. doctor præeunte Apostolo Rom. cap. 9 et 11, causam prædestinationis et reprobationis adultorum et parvulorum *profundum esse inscrutabile*, et ideò causam Dei voluntatis unum ex corruptâ massâ educentis, alium non educentis, assignari non posse, libro de Dono perseverantiæ, cap. 9, et Epistolâ 194, aliâs 103, cap. 7, n. 31, ubi ait : « Quam, quæso, allaturi sunt causam, quo alius sic gubernatur, ut baptizatus exeat, hinc alius infidelium manibus traditus, vel etiam fidelium, priusquàm ab eis baptizandus offeratur, expirat? » Item sermone 26 de verbis Psalmi 94 et Apostoli, aliâs 11, de verbis Apostoli cap.

12, n. 13 : « Sed dicis, inquit, me quare fecit in honorem, et alium in contumeliam? Quid responsurus sum? Auditurus es Augustinum, qui non audisti Apostolum (Rom. 9)? Duo parvuli nati sunt. Si debitum quæras, ambo tenent massam perditionis; sed cur mater alium portat ad gratiam, alium dormiens suffocat... habet figulus luti, etc. Rom. 9, v. 21, *ô altitudo!* etc. Rom. 11, v. 33. »

Ex his collige Augustinum non existimasse baptismum interdum non applicari parvulis propter culpam parentum, aut seriem causarum secundarum quam Deus ut provisor generalis immutare non tenetur; quin S. doctor has causas explodit citatâ epistolâ 194, aliâs 103, n. 32, et libro de Dono perseverantiæ, cap. 12, n. 31, ubi ait : « Plerumque festinantibus parentibus, et paratis ministris, ut baptismus parvulo detur, Deo tamen nolente » (non positive, sed negative parvulum è massâ non educendo, et ideò media efficacia non ministrando) « non datur. » Item libro de Naturâ et Gratiâ cap. 8, n. 9, ad causas secundas non recurrit ut explicet cur infantes sine baptismo decedentes christiani esse non potuerunt, sed « ad massam perditionis. Ego (inquit) dico parvulum in eo loco natum ubi ei non potuit per baptismum subveniri morte præventum idcirco talem fuisse, id est sine lavacro regenerationis exiisse, quia esse aliud non potuit... rectè ergo ex damnatione, quæ per universam massam currit non admittitur in regno cælorum, quamvis Christianus non fuerit, sed nec esse potuerit. » Easdem causas excludit D. Prosper Augustini doctrinæ tenacissimus, carmine de Ingratis, cap. 31, ubi derelictionis in morte causam refundit in solum peccatum originale. Quapropter, si auctor librorum de vocatione gentium libro 2, cap. 23, electionem parvulorum pendere fecit ex meritis parentum (quod negat P. Quenellius in eruditâ dissertatione 2 de auctore librorum illorum), S. Prosper eos libros non conscripsit. Aliunde, inquit P. Alexander in historiâ 5 sæculi, *quamvis illi libri* (exquisitâ licet doctrinâ in multis præcellentes) *in plerisque codicibus manuscriptis S. Prosperi tribuantur, ejus tamen eos non esse tota jam* (post eximias Vossii et Norisii dissertationes) *eruditorum hominum natio consentit.*

Sed, inquis, si res ita se habet, Deus illorum parvulorum, peccato originali supposito, salutem sincerè non voluit, siquidem nullum prorsus medium quo illam assequi possent illis contulit. Reponerent theologi, quos laudavimus,

ubi de voluntate Dei omnes homines salvandi disseruimus, sequi duntaxat Deum supposito peccato originali noluisse *voluntate absolutâ et consequente* illorum infantum salutem, non *voluntate antecedente*, quia ad voluntatem antecedentem pertinet solum institutio et præparatio mediorum, ad voluntatem verò consequentem spectat illorum applicatio; Deus autem baptismum instituit pro illis infantibus ut et pro aliis. Verum D. Augustinus celesti et sublimi Apostoli doctrinâ imbutus, ad hanc responsionem non confugit. Sensit scilicet, ut probavimus, Deum illorum parvulorum salutem verè voluisse, et Christum pro eâ ipsis impertiendâ reverâ mortuum esse, et ideò de iis salvandis sufficienter curavisse; at quodnam sit illud sufficiens remedium, arcanum esse ad altitudinem divitiarum sapientiæ et scientiæ Dei referendum, in alterâ tamen vitâ cognoscendum. « Tunc, inquit, Enchiridion cap. 93, n. 24 (in cœlo), non latebit quod nunc latet, cum de duobus parvulis unus esset assumendus per misericordiam, alius per iudicium relinquendus... cur ille potius quàm iste fuerit assumptus, cum causa una esset ambobus. » Hinc illustrissimus Bossuetius antea dicebat: « Dieu s'est réservé la connaissance de ces moyens; » et Nicolius in Symbolo: « Saint Augustin croit que Dieu a eu quelque raison secrète dans le choix qu'il a fait des uns plutôt que des autres; mais cette raison ne consiste point dans le mérite des élus au-dessus des réprouvés, puisque ces mérites sont l'effet de leur élection, et non pas le fondement. Dieu ne voit dans les hommes, avant qu'il les choisisse, que de l'indignité; et s'il les rend ensuite dignes de la gloire éternelle, c'est par une grâce qu'ils n'ont en aucune sorte méritée. »

Isti autem theologi audiendos non esse conclamant qui obtundunt hanc doctrinam in desperationem præcipitare, et incredulis ansam subministrare insultandi Deo; est enim, inquit, Augustino iudice, ipsissima D. Pauli doctrina Rom. præsertim cap. 9 et 11. Hæc aliunde et alia similia Augustino objecerunt Semipelagiani, quibus non obstantibus in suâ sententiâ constanter permansit. Quid tandem, addunt, juvant inanes incredulorum declamationes? Futuram eorum in multarum rerum physicarum causis detegendis in omnes ætates incitiam et stupendè infructuosam industriam prænuntiaverat Spiritus sanctus Ecclesiasticis cap. 3, his verbis: *Mundum tradidit disputationi* (non *inventioni* aut *comprehensionì*, inquit

Jansenius in hunc locum), *ut non inveniat homo opus quod operatus est Deus ab initio usque ad finem*. Eandem agnoverat Calvinus, dum divinæ Providentiæ impugnatoribus exprobravit eos in plurimis rebus naturalibus talpis esse cæciores. Eandem inscientiam candidè confessus dominus Cassini insignis seculi Ludovici Magni astronomus, et regiæ Scientiarum Academiæ Parisiensis decus et ornamentum, dicendo: *De plerisque phenomenis naturalibus non magis judicare possumus quàm cæci de coloribus*. Denique increduli, vel si rumpantur, fateantur necesse est regum edicta justa esse posse licet eorum æquitatis ratio ipsos non rarò lateat.

Liber tertius.

DE GRATIA EFFICACI.

Gratia efficax propriè et simpliciter (ut hic accipitur) ea est cui tanta inest virtus ut voluntati etiam reluctanti non solum *posse bonum agere* tribuat, sed etiam illud *reipsâ operari* ipsam compellat et quidem *indeclinabiliter, insuperabiliter, invictissimè*, ut loquitur D. Augustinus, id est, *certissimè et infallibiliter*; hæc enim verba (quibus abusus est Calvinus, et postea Jansenius) non adhibuit nisi ut *internam et occultam, mirabilem et ineffabilem* gratiæ efficacis vim et energiam expressiùs adumbraret.

Existere in præsentì statu hujusmodi gratiam, quæcumque tandem ex causâ ejus exoritur efficacia, dogma est catholicum, quod hodiè à nemine, etiam hæretico negatur. Illud olim adversùs Pelagianos evicit D. Augustinus 1º ex Scripturis. Ezechielis cap. 36, v. 27, Lucæ cap. 23, v. 42, Actuum cap. 9, v. 6, Rom. cap. 9, v. 16, Epistolâ ad Philippenses, cap. 2: *Deus est, inquit Apostolus, qui operatur in vobis velle et perficere*, etc... 2º Ex supremo Dei in hominum voluntates non minùs quàm in alias res creatas dominio, quo moralium corda omnipotentissimo influxu unde vult deducit, et quò vult adducit. Qui quidem influxus in ideâ omnipotentis Dei tam evidenter includitur, ut ipsos paganos non latuerit; illum enim prædicat Homerus multis in locis, et poeta Latinus his verbis:

..... Ponuntque ferocia Pæni

Corda volente Deo.

« Etiam, inquit Augustinus libro de Correptione et Gratiâ cap. 14, n. 43, de ipsis hominum voluntatibus quod vult, cum vult, facit (Deus)...

sine dubio habens humanorum cordium quò placet inclinandum omnipoten tissimam voluntatem... Si ergo cum voluerit reges in terrâ Deus constituere, magis habet in potestate voluntates hominum quàm ipsi suas; quis alius facit ut salubris sit correptio, et fiat in corde correpti correctio, ut cœlesti constituatur in regno? » ...5^o Ex precibus quibus Ecclesia Deum rogat ut *ad se rebelles etiam compellat voluntates*, etc.

Exinde prodierunt eximia ista divi Augustini efflata: « Internâ et occultâ, mirabili ac ineffabili potestate operatur Deus in cordibus hominum non solum veras revelationes, sed bonas etiam voluntates, » libro de Gratiâ Christi cap. 24 n. 23. Subventum est... infirmitati voluntatis humanæ, ut divinâ gratiâ indeclinabiliter et insuperabiliter ageretur... fortissimo (Adam) dimisit facere quod vellet; infirmis servavit ut ipso donante quod bonum est vellent, et hoc deserere invictissimè nollent, » libro de Correptione et Gratiâ, cap. 12, n. 58. « Hæc gratia, quæ occultè humanis cordibus divinâ largitate tribuitur, à nullo duro corde respuitur. Idèò quippe tribuitur, ut cordis duritia primitus auferatur, » libro de Prædestinatione sanctorum cap. 8, n. 13. « Nos volumus, sed Deus in nobis operatur et velle; nos operamur, sed Deus in nobis operatur, et operari pro bonâ voluntate, » libro de Dono perseverantiæ cap. 13, n. 53. « Tantùm præstat voluntatibus nostris gratia Salvatoris, ut non dubitet Apostolus dicere: *Quotquot Spiritu Dei aguntur, hi filii sunt Dei* (Rom. cap. 8, n. 14, » libro de gestis Pelagii cap. 3, n. 5.

Tota ergo quæ hic suboritur difficultas, modum tangit quo gratia voluntatis consensum exprimit. Quæ ut discutatur, et sana refulgeat doctrina, refellemus nupera novatorum circa gratiæ efficaci naturam, et energiam, dogmata, varia subinde theologorum systemata exposituri.

CAPUT PRIMUM.

De novatorum circa gratiæ efficaciam dogmatibus.

Calvinus liberum arbitrium, id est, activam voluntatis indifferentiam, Adæ lapsu periisse, præsertim libro 2 Institutionis obtrudit. Non negat tamen cap. 2, n. 7, hominem esse liberum hoc sensu quòd *voluntate agit, non coactione*, quam ultimam vocem Jansenius citans hunc locum libro 8 de Gratiâ Christi, cap. 21, industriè omisit. Eodem libro, cap. 5, gratiæ Dei hostes reputat qui hominem lapsum liberum esse volunt. Rationem affert cap. 3, n. 10: *Voluntatem movet*, inquit, (adjutorium quo,

sive medicinale, de quo Augustinus libro de Correptione et Gratiâ cap. 11 et 12), « non qualiter multis seculis traditum est et creditum, ut nostræ postea sit electionis motioni aut obtemperare, aut refragari... tamen fuisse hominis adhuc stantis conditionem concedimus, ut potuerit ad alterutram partem inclinare (quia habebat adjutorium tantum *sine quo non* (sed cum exemplo suo docuerit, quàm miserum sit liberum arbitrium, nisi Deus in nobis et velit et possit, quid fiet nobis si ad eum modulum suam gratiam nobis impertitur? » Eadem ratione refellere nititur quartum canonem tridentinæ synodi sessione 6 sancientem hominem *gratiæ prævenienti posse dissentire si velit*; » est enim, inquit in Antidoto, inter regenerationis gratiam, quæ nunc miseriæ nostræ subvenit et primam, quæ Adæ data fuerat, discrimen. »

Igitur homo lapsus in mente Calvini liber est à *coactione*, non *necessitate*, et gratia ipsi impertita, utpote à gratiâ Adæ diversa, illum ad bonum ineluctabili necessitate rapit. Illud Calvini systema damnavit concilium Tridentinum sessione 6: « Si quis dixerit, inquit canone 4, liberum hominis arbitrium à Deo motum, et excitatum, nihil cooperari assentiendo Deo excitanti, atque vocanti, quo ad obtinendam justificationis gratiam se disponat, atque præparet, neque posse dissentire si velit, sed veluti inanime quoddam nihil omnino agere, merèque passivè se habere, anathema sit; » et canone 5: « Si quis liberum hominis arbitrium post Adæ peccatum amissum et extinctum esse dixerit, aut rem esse de solo titulo, imò titulum sine re, figmentum denique à tantâ invectum in Ecclesiam, anathema sit. » Idem tandem decernit canone 6.

Jansenius, vir acri et sagaci ingenio, præsentens suum de gratiæ cum libero arbitrio concordia systema eruditus viris partium studio in transversum non actis Tridentino fulmine contritum esse visurum, quinque inter suum et relatum Calvini systema fabricavit discrimina libro 8 de Gratiâ Christi, cap. 21; quæ si attentè expendere, arguent duntaxat discrepantiam in verbis, quibus uterque super hoc usus est, aut quemdam animi candorem in Calvino liberum arbitrium et quoad rem et quoad nomen apertè expungente, quo se tunc affici passus non est Ypensis ut indubiè se canonibus Tridentinis subtraheret. Enimverò, tradit hominem lapsum immunem quidem esse à *coactione*, id est, à violentiâ voluntatis propensionis exterius inflicta, sed non à *necessitate*, hoc est

à necessariâ ad unum determinatione, et idcirco quemlibet actum in statu præsentis liberum esse, et consequenter meritum vel demeritum eo ipso quo voluntarius est, sive ex rationis advertentiâ et voluntatis inclinatione factus, verâ licet necessitate elicitus. Innumera ejus super hoc testimonia proferre in promptu foret. Hæc sufficiant.

Capiti 6 libri 6 de Gratiâ Christi hunc fecit titulum : *Duplex necessitas Augustino, coactionis, et simplex seu voluntaria; illa, non ista repugnat libertati*. Quod quidem ab isto capite ad 58, sive ultimum omni argumentorum genere probare aggreditur. Idem tentat libro 8 à capite 3 sic inscripto : *Conciliatio genuina gratiæ cum libero arbitrio secundum Augustini mentem, etc.*, ad 21, sive postremum. Ibi autem Jansenium de præsentis statu disserere clamant tum contextus cum constans ejus doctrina quâ in insonte Adamo nec coactionis, nec simplicem sive voluntariam admisit necessitatem. Unde cum ipso passim dicente, v. g., libro 7 de gratiâ Christi in fine capitis 14 meritum et demeritum ex arbitrii libertate quàm maximè ponderetur... quandoquidem intereunte libertate prorsus interit, evidens est ipsum docuisse ad merendum vel demerendum in statu naturæ lapsæ non requiri libertatem à necessitate, sed sufficere libertatem à coactione, ut fert tertia inter quinque.

Istud de libertate dogma, ut diximus libro 1, cap. 1, articulo 3, passim stabilit Jansenius famoso discrimine *adjutorii sine quo non*, insonti Adæ, et adjutorii *quo sonti* Adamo imputiti, de quo D. Augustinus libro de correptione et gratiâ cap. 11 et 12, quem Augustini locum, si Dechampio fides, lib. 1 disput. 3, cap. 3, septuagies supra centies in suo opere hunc in finem commemoravit. At contra fastidiosam hanc repetitionem lectores suos præmunivit cum libro de Gratiâ primi hominis in fine capitis 17 dixit, « hoc discrimen esse clavem quâ aditus in Augustini scripta aperitur, sine quâ qui ea molitur ingredi velut cæcus palpabit in meridie; » quæ libro 2 de Gratiâ Christi, cap. 4, et alibi passim repetit. « Diverso modo, inquit, operandi adjutorium utriusque statûs, velut immobili basi, tota doctrina de gratiâ et prædestinatione nititur. » Scilicet, interprete Jansenio, gratia *sanitatis*, sive adjutorium *sine quo non*, liberam agendi perinde et non agendi facultatem relinquebat; gratia è converso medicinalis, sive adjutorium *quo agendi* necessitatem invehit. « Impossibile

est, inquit libro 8 de Gratiâ Christi, in fine capitis 3, ut adjutorium quo non determinet voluntatem quia facit ut velis, et sine illo velle non possis... facit ut necesse sit animum sequi, et secundum illud operari quod amplius delectaverit. Nunc (inquit iterum libro 2 de Gratiâ Christi, cap. 21) gratia infirmam voluntatem... ad operandum rapit, tunc à forti voluntate rapiebatur, quia tunc flectebat se quoquoersum videretur, nunc amisit istum indifferentem ad utrumlibet flexum. Quidquid ferè addit libro 8 de Gratiâ Christi cap. 4, objici potest (contra adjutorium quo quasi libertatis destructivum) unicâ distinctione sensûs compositi atque divisi dissipari potest; » a leam tamen distinctionem, ipso docente ibidem cap. 5 et sequentibus, non recurrit Augustinus, « cui ad salvandam libertatem satis est quòd voluntas absque violentiâ aut coactione in actum suum volenter influat. »

Ex his colliges Jansenii de gratiæ efficaciâ et libero arbitrio systema iis inniti fundamentis quibus Calvinus de iisdem argumentis dogma, et utrumque prorsus consonare, nisi fortè quòd Calvinus *immutabilem*, Jansenius verò mutabilem sive alternantem admisit necessitatem.

Priusquàm illud systema refello, ipsum, prout à Jansenio adornatum est, ut magis intelligatur, describam.

Delectatio, sive suavitas, generatim considerata, Jansenii systematis basis est et fundamentum; ex eâ enim produrant omnes boni aut mali actus.

Quid delectatio? — Jansenio dicente lib. 4 de gratiâ Christi cap. 11: « Delectatio est actus *voluntatis*, quo in justitiam vel mendacium (id est, bonum vel malum) tanquàm sibi convenientia et jucunda movetur (sive, quod idem est) quo justitiâ vel mendacio delectatur. »

Quotplex delectatio? — Jansenius, loco citato, delectationem partitur in *deliberatam* rationis advertentiâ et voluntatis consensu procreatam, et *indeliberatam* utrique rationis et voluntatis actui præviam. Ibidem declarat se cum Augustino de istâ, non de illâ delectatione unicè disserere. Unde indeliberatâ delectatione totum innititur Jansenii systema. « Dicimus, inquit, delectationem in Augustino celebrem esse partim primum illum et indeliberatum affectum animæ, qui actualis complacentia est, partim etiam et crebrò secundum qui desiderium indeliberatum dicitur, quibus

anima ita suaviter.... in bonum appetendum rapitur, ut voluntas ei actu libero (id est, spontaneo) consentiat ac bonum diligit tantò vehementius quantò fortius illis actibus rapitur. »

2º Jansenius, eodem libro 4, capitibus 3, 4, 5, 6, et alibi passim, delectationem distribuit in cœlestem, quæ ad bonum, et terrenam quæ ad malum allicit et rapit.

3º Eodem libro, et iisdem capitibus, distinguit delectationem cœlestem, et etiam terrenam in *victricem*, et *victam*. *Victrix* plenum et perfectum voluntatis consensum obtinet. *Victa* pleno quidem illo voluntatis consensu destituitur (unde victa est et non victrix), sed nihilominus *deliberatum*, sive, ut dicit, liberum, *imperfectum* (id est, velleitatem, sive complacentiam, ad quam solam in conflictu illo à Deo datur) semper consequitur, et ideò omnis gratia semper operatur effectum propter quem infunditur. Ita ipsis ferè terminis libro 2 de Gratiâ Christi, cap. 27.

4º Jansenius delectationem *victricem* secernit in *victricem absolutè*, quæ ineffabili suavitate voluntatis consensum attrahit, et *victricem comparatè*, sive *relativè*, quæ eundem consensum excitat, quia fortior est oppositâ delectatione, scilicet propter virium sive graduum præponderantiam. Ista, non illa (licet ab Augustino commendata libro de Gratiâ Christi, cap. 24, n. 23, etc.), Jansenio accepta est. Id enim elucet ex libro 4 de Gratiâ Christi, ubi postquàm gratiæ victricis vim et energiam extulit, initio capitis 6 declarat se loqui de delectatione victricis comparatè ad oppositam; item ex libro 7, cap. 2, ubi ait : « Pravæ delectationis (dominantis) immunitas obtineri nequit nisi per præpollentem justitiæ delectationem. »

Quantæ necessitatis sit delectatio?—Jansenius, ut ostendimus, docuit activam voluntatis humanæ sese ad opposita flectendi potentiam primi parentis peccato amissam esse. Unde libro 7 de Gratiâ Christi, cap. 3, dicit *liberum esse id quod coacto opponitur*, et libro 8, initio capitis 19, istam scholasticorum definitionem : « Libertas consistit in potestate agendi vel non agendi positis omnibus ad agendum prærequisitis, Augustino fuisse notissimam, et Christi gratiæ velut capitaliter inimicam esse reprobendam. » Eadem offerunt quæ habet libro 2, cap. 3 : « Hic nutus, inquit, hic flexus (sese ad bonum aut malum determinandi in statu innocentiae), prorsus amissus est, » et ista cap. 12 : « Hic (in nostro statu) vulnus ipsis volendi cardinibus inflictum est, » et libro 7, cap.

3 : « Delectatione... præsentis actus volendi est in hominis potestate, absente non est, » etc. Hinc delectatio est unicum pondus, quo voluntas sive ad bonum, sive ad malum rapitur, tantæque est necessitatis, ut sine illâ voluntas *quasi torpens et mortua* nihil prorsus boni aut mali elicere valeat, ut docet libro 4, cap. 7. Unde in fine capitis addit : « Voluntas sine delectatione velle aut moveri... nullo pacto potest, quod sanè respectu cujuslibet operationis locum habet; unde etiam in peccatis eadem necessitas ad volendum, ac majoris delectationis ad superandam oppositam delectationem reperitur. »

Hanc delectationis necessitatem scaturire facit Jansenius libro 4, cap. 7 et 9, *non ex naturâ voluntatis, sed ex ejus pœnâ*, in quo ab Honorato Tournely et ejus redactoribus contradictionis arguitur. Etenim libro de Gratiâ primi hominis, cap. 12, reposuerat gratiam Angelorum, et insontis Adæ in delectatione, et libro 7 de Gratiâ Christi, cap. 3, tradidit *volitiones esse in nostrâ potestate per delectationem sive delectationem efficere voluntatem et libertatem, velle et liberè velle*. Verùm causa Ecclesiæ adversus Jansenium præposteris illis observationibus non indiget. Et verò, cum in Jansenii mente quælibet gratia consistat in suavitate, sive delectatione, gratia Angelorum et Adæ potuit esse delectatio; sed quæ? Sine quâ non libero arbitrio subdita, non quâ necessariè efficiens *velle*, id est, *liberè velle*, cum libertas ab Adæ peccato (juxta Jansenium) in solo spontaneo consistat; quæ delectationis species non ex naturâ voluntatis præcisè, sed ex peccato effluxit.

Quomodo agit delectatio?—Modus, quo à delectatione agitur voluntas, fit per gradus, et ideò merè relativus est et quasi mechanicus; in conflictu enim delectionum cœlestis, et terrenæ, cum hæc aut illa gradibus superior est, fortior debiliorem necessariè vincit (relativè), et ideò, si gradibus æquales sint, in suspensio remanebit voluntas, sicut in bilance majus minus pondus relativâ necessitate rapit, æqualia verò pondera in suspensio manent (utitur hoc exemplo libro 7, cap. 14). Seipsum super his tam clarè passim explicuit Jansenius, ut alius sensus nisi per summam dementia ipsi affingi non posset. Libro 4, initio capitis 6, ait : « Quando cum terrenarum rerum... delectationibus dimicamus, nisi major fuerit delectatio (cœlestis) quàm terrena... fieri non potest quin propriæ voluntatis infirmitate vincamur... ut fert clarissimus et præclarissimus Augustini locus, qui aureis meretur scribi characteribus :

Quod amplius nos delectat, secundum id operemur necesse est. » Similia habet in fine capitis 9, et fine capitis 10, ubi dicit : « Cum nulla sit gratia operandi præter istam suavitatem Dei, nisi ista tanta fuerit, ut ei delectationes rerum creatarum cesserint, vel peccabitur, vel alterante delectationum fluctu, in medio remanebitur. » Tandem, libro 8, cap. 2, hæc docet : « Delectatio victrix, quæ Augustino est efficax adjutorium, relativa est. Tunc enim est victrix, quando alteram superat; quod si contingat alteram ardentiorē esse, in solis inefficacibus desideriis hærebit animus, nec efficaciter unquam volet quod volendum est. »

Ex delectationum, cœlestis et terrenæ, in sese invicem conflictu erumpit celebris distinctio potentiae absolutæ et relativæ, in quâ velut in arce recluditur omnis Janseniani systematis armatura, cujus idcirco latibula illius systematis parens et defensores ab initio et in dies ingrediuntur, ut eorum lateribus tanquam totidem aggeribus quoquoversum circumsepti adversariis protervius insultent, eorum in quinque propositiones tela hebescere faciant, et eis propositionibus commentitiæ hæresis speciem inducant; quæ ex dictis in secundo libro de gratiâ sufficiente jam satis explorata sunt. Juvat tamen paucis aperire quid sit duplex illa potestas, et ostendere illam esse Janseniani systematis veluti propriam dotem et quasi insigne.

Quid potentia absoluta et relativa? — Duplex illa potentia illico intelligitur per relatum libæ exemplum. Sicut enim plumbea moles, quamlibet exilis, in unâ lance reposita, ex se sive nativâ gravitate, præcis gradibus gravitatis hic et nunc obnitentis similis molis, potest (absolutè) oppositam lancem attollere, non potest verò (relativè) (non præcis illis viribus alterius molis, ita delectatio cœlestis aut terrena, quamlibet debilis, ex naturâ suâ, et etiam ex antecedente Dei voluntate, quæ abstrahit ab actualibus circumstantiis, non suppositâ alterâ delectatione, potest (absolutè) voluntatem inclinare, non potest verò (relativè) suppositâ prædictâ oppositâ delectatione. Hinc potentia absoluta est ea quæ inest delectationi ex ipsius naturâ, et non consideratis gradibus contra rebellantis delectationis... Relativa quæ inest delectationi etiam consideratis ex adverso dimicantis delectationis gradibus, sive viribus; ex quibus elucet potentiam absolutam ad bonum aut malum non solum semper esse sine actu, sed etiam cum eo hic et nunc nunquam esse posse,

quia oritur ex delectatione, quæ semper hic et nunc est debilior, aut in hâc hypothesi saltem æqualis, et ideò fortiorē vel æqualem superare nequit, sicut si sint duo pondera in librâ, potentia absoluta unius non potest cum actu conjungi... è converso potentiam relativam semper et necessariò cum actu uniri, quia in pugnâ duarum delectationum æqualium existit ad bonum et malum potentia absoluta, non relativa, et ideò potentia relativa semper supponit delectationem superiorem, quæ inferiorem necessariò domat. Ex quibus patet hominem lapsum id solum verè posse quod facit, et idcirco in eo omnem realem potentiam semper cum actu connecti.

Quòd autem Jansenius potentiam absolutam et relativam commemorato sensu prædicaverit, tam clarum est, ut id inficiari, aut in dubium vocare summæ esset protervia, aut insanie, quod ut magis ac magis in propatulo collocetur, sint duæ sequentes propositiones.

Jansenius in voluntate gratiâ, sive delectatione parvâ prædictâ admisit et admittere debuit absolutam relato sensu ad opus bonum potentiam. — Patet 1^o ex variis ejus testimoniis quæ inter istud eminent, libro 8 de Gratiâ Christi, cap. 20 : « Peccandi potestas, inquit, perfectissima non solum inest voluntati quando gratiæ delectatione caret, sed etiam quando intimâ ejus suavitate efficaciter trahitur... quemadmodum igitur qui sub gratiâ ad opus bonum determinante operatur, simul etiam peccare potest, ita quoque è contrario qui istâ gratiâ destituitur... et peccandi tentationibus quatitur, potest benè facere. » Inest ergo voluntati potentia benè agendi sub fortiore concupiscentiâ, et malè agendi sub gratiâ victrice; sed illa non potest esse relativa, ut evincunt mox relata ejus verba libro 4, cap. 6, et 10. Item libro 8, cap. 2, et tandem libro 4, cap. 9, ubi ait : « Vigente delectatione carnali, impossibile est ut virtutis ac honestatis consideratio prævaleat. »

Patet 2^o ex intimâ Jansenii systematis structurâ; in eo enim delectatio cœlestis aut terrena in sese invicem pro virium, sive graduum varietate et mensurâ agunt et reagent ad instar, ut dictum est, duorum ponderum in utrâque libræ lance repositorum; inde enim elucescit spiritualement suavitatem ex naturâ suâ potentiam habere actum bonum producendi, non quidem relativam, sive spectatis ex adverso dimicantis fortioris delectationis viribus, sed absolutam, sive consideratâ innatâ ipsius vir-

tute, sicut pondus in librâ ex vi ingenitâ potest absolutè aliud pondus gravius attollere, non relativè. Unde, quemadmodum duo relata pondera non ex se præcisè, sed relativè tantum, victicia sunt aut victa, sive pro majoribus, aut minoribus virium gradibus, ita et duæ delectationes, quarum alterutra talis omninò manendo prout opposita crescit aut decrescit, vincitur aut vincit.

Jansenius equidem non rarò videtur eliminare quamlibet ad agendum potentiam remotâ fortiori delectatione. Verùm, cùm ejus discipuli vel levissimum in eo, ubi inprimis de primariis ipsius systematis principiis res est, paralogismum æquo animo indubiè non ferrent, fateantur oportet eum potentiam relativam ibi unicè explodere.

Jansenius ipsi voluntati debiliori tantum cælesti delectatione perfusæ ademit, et suo stando systemati, adimere debuit veram ac relativam commemorato sensu ad opus bonum potentiam. — Patet 1º ex citatis Jansenii effatis, in primis libro 4, cap. 9 : « Vigente carnali delectatione impossibile est ut virtutis et honestatis consideratio prævaleat.... » Item : « Quod amplius nos delectat secundum id operemur necesse est. » Quibus istud adde libro 3, cap. 15 : « Est in Augustini principiis paradoxum... quòd charitas quamvis minima sufficiat ad quaecumque tentationem superandam, vel quaecumque præcepta sine transgressione servanda. » Quis hæc auscultando, non statim intelligit minorem delectationem non dare voluntati potentiam relativam ad vincendam vigentem actualem delectationem ?

Patet 2º ex naturâ Janseniani systematis pluriès jam reserata. Relatam potentiam absolutam et relativam in Jansenii systemate inter alios insignes ejus sectatores candidè agnovit et exposuit ingenio et eruditione affluens dominus Arnaud in celebri dissertatione de gratiâ efficaci. Ejus testimonium eò lubentiùs adducam, quòd ad ora aliorum Jansenii defensorum obstruenda sit efficacissimum. « Si de aliquo justo, inquit parte 2, articulo 4, cui gratia efficax in aliquâ tentatione desit, quærat, an sine gratiâ efficaci ad vincendam tentationem necessariâ, quam supponimus ipsi defuisse, tentationem vincere potuerit, tunc ex communi omnium loquendi ratione respondebitur » (non excludit indubiè Jansenii defensores qui ab ordinario cunctorum loquendi modo recedere indecorum reputarent) « non quidem absolutè, sed in illâ hypothesi, (id est, relativè ad

fortiorem concupiscentiam) sine hac gratiâ non potuisse. » Eandem solutionem in eadem dissertatione parte 5, articulo 5, illustrare aggreditur ingenitâ ignis virtute. « Quemadmodum, inquit, omnis ignis urendi virtutem et potestatem habet, non tamen quidvis urendi, v. g., auri liquefaciendi, vel lapidis in calcem redigendi, ita ut si de igne generatim quærat, an possit urere, absolutè respondendum sit, posse; sed si quærat, utrum exiguus ignis possit lapidem in calcem redigere, vulgò non posse respondebunt. Sic omnis charitas vel exigua (id est, gratia parva sive sufficiens ex se initia bonæ voluntatis produciens, et ideò largiens quamdam bonè agendi potentiam et virtutem, ut loquitur ibidem cap. 12) potestas est bonorum operum (absoluta) et si quærat, utrum qui bonam voluntatem habet, possit bonè agere, posse (absolutè) procul dubio respondendum est. Non tamen omnis bona voluntas ad quidvis efficiendum ita sufficit, ut non aliquando plenior voluntatem requiratur. »

Atque, ubi in splendidum præclaræ illius declarationis speculum incidunt, subito affluunt et evanescent dolosis tenebris involuta ista quorundam pronuntiata : *Voluntas gratiâ movente est libera* (à vi exteriùs cogente, non interiùs relativè necessitante)... *Voluntas fortiori gratiâ acta perfectissimâ peccandi potestate gaudet* (absolutè, sive remotâ illâ delectatione, non relativè, sive ratione habitâ illius suavitatis)... *Voluntas celestis aut terrenâ delectatione titillata Dei præcepta potest adimplere vel non implere* absolutè non comparatè ad majorem vel minorem delectationem)... *Gratia exigua non ex activæ virtutis defectu, sed ex liberâ voluntatis obsistentiâ bonum non operatur* (sublato non supposito nisu et luctamine fortioris cupiditatis ad obsistendum necessitante)... *Voluntas exili suavitate perfusa bonè ageret si prorsus vellet* (sed posito vigentis concupiscentiæ conatu sic velle non potest)... *Gratia tenuis per conatus et desideria inefficacia, quæ ex voluntate educit fortiorum obtinere potest gratiam, quâ mediata saltem sufficiens evadat* (intelligunt potestatem cum actu semper et necessariè conjunctam, cùm gratia parva illa desideria semper et necessariè exprimat, et insuper sufficientiam absolutam, non relativam ad vividiorum cupiditatem)... *Gratia parva eadem remanens adversâ decrescente concupiscentiâ, potest perfectum consequi effectum* (necessariè in hac hypothesi, cùm imminutâ Deo operante concupiscentiâ gratia illa parva facta sit relativè fortior).

Jansenii scilicet amici oculos et propositum nunquam avertunt ab his magistri in decem inprimis de gratiâ Christi libris consignatis effatis : « Gratiâ Christi insuperabiliter, indeclinabiliter, potentissimè, invictissimè voluntatem ducit, agit, abripit ; voluntas præventa non tam agit, quam agitur ; » et nihil non tentant et movent ut hæc doctrina Augustini Yprensis sensu accepta salva et integra remaneat.

Quæ radix, cardo, vertex, filumve aut catena totius Jansenii systematis ? — Celebris Harduinus, vir acerrimo quidem ingenio, et prodigiosa eruditione famosus, sed magis nova quam novè dicere sollicitus, omnium hæreticorum dogmatum, præsertim Jansenii systematis, occultam radicem esse atheismum asserere non dubitavit. Si intendisset duntaxat ex novatorum dogmatibus et infandâ adversus Ecclesiam catholicam conjuratione atheismum erumpere posse, vestigiis D. Pauli et dilecti Discipuli institisset, et etiam D. Augustini quo dicente : *Christus, Deusve apud hæreticos nomine tenus, non reverà reperitur.* Verùm longiùs progressus est ; hæreticos enim, inprimis Jansenium, in suis scriptis atheismum stabilivisse existimavit. Hinc insignis illius discipulus versùs annum 1750 confecit et publici juris fecit in hac urbe Cadomensi libellum quemdam, cui gallico idiomate titulus : *Le Jansénisme dévoilé, ou Jansénius convaincu d'athéisme* ; qui cum ad varios regni episcopos et sacros Ordines missus fuisset, meritò cum contemptu exceptus est.

Enimverò quicumque Augustinum Yprensem evoluerunt, epilogum, et parallelum in fine appositum, eos omnes non latet Jansenium tam grande volumen elaborasse ex summo Augustinianæ doctrinæ quam (ut censebat) traderat Baius, vindicandæ ardore, et detestatione Moliniani præsertim et Suaresiani systematis, ipsi (ut autumavit) apertè repugnantis. Deinde sui systematis basim et catenam tam dilucidè in eodem volumine commonstrat, ut nemo eam non conspiciere possit. Scilicet annulus ille, fultura illa est delectatio superior, sive necessitate relativâ victrix, seu gratia victrix, gratia efficax, adjutorium quo (hæc enim apud Jansenium idem omninò significant). Id, ut paulò ante ostendimus, declarat Jansenius libro de Gratiâ primi hominis cap. 17, et libro 2 de Gratiâ Christi, cap. 4. Quod et repetit alibi passim ; v. g., libro 7, cap. 6, ubi ait : « Hæc est vera et genuina basis (gratia dominatrix, cœlestis Doctoris... à quâ qui tantillùm aberra-

verit, nunquàm veram intelligentiam, quam ipse in scriptis suis tradidit, assequetur. » Hinc auctor synopsis vitæ Jansenii, ipsi impensè addictus (quæ synopsis editioni Rothomagensi anni 1652 omnium accuratiori præfixa est), hæc de Jansenio refert : « Aiebat Augustinum à discipulis, non à magistris velle intelligi... addebat omnia pendere ab uno primo principio, unde tota doctrinæ ejus de gratiâ catena devincta esset, et hinc factum ut qui eò aberrant, extra viam et spem inveniendæ veritatis vagentur. Unde subridebat potiùs non mirabatur, quòd contrariarum et diversissimarum opinionum scholastici omnes tamen Augustinum ad se traherent, quia unus hunc alter istum annulum medium catenæ arriperent, nemo teneret primum illum et capitalem. »

An quinque propositiones ex victrici Jansenii delectatione necessitante velut ex fonte scatulant ? — Negaverunt Janseniani systematis defensores non ante sed post quinque propositionum censuram factam ab Innocentio X 31 maii anni 1653, ut nempe illa censura caduca fieret et evanida. Hæc quippe condemnatione veluti fulmine percussi et in transversum acti, prætenderunt quinque illas assertiones in Augustino Yprensi non contineri, et in Jansenii sensu damnatas non fuisse. Unde varios ediderunt libros *de imaginariâ Jansenii hæresi*. Cum autem Alexander VII die 16 octobris anni 1656 definiisset illas ex Jansenii libro excerptas esse, et in sensu à Jansenio intento proscriptas, idque ab omnibus et singulis clericis subscribi jussisset Constitutione latâ 15 februarii anni 1663, et Clemens XI per bullam *Vineam Domini Sabaoth*, datam 16 julii anni 1703 hæc decreta renovasset, declarando insuper relatis super hoc Constitutionibus Innocentii X et Alexandri VII obsequio silentio minimè satisfieri (quæ omnes Constitutiones ab universâ Ecclesiâ, et inprimis à clero Gallicano et Christianissimo rege receptæ sunt) ; cum, inquam, hæc cernebant iidem Jansenii defensores, Ecclesiæ infallibilitatem in judicando de germano librorum sensu è medio tollere aggressi sunt, Ecclesiæ nihilominus romanæ obedientiam exterius profitentes. Sic in se exprimere voluisse videntur quod eorum magister libro proœmiali de ratione et auctoritate cap. 6, dixerat : « Hæreticis proprium est simplici revelationis veritate nunquàm esse contentos, quorum audacia... erroribus à Deo plectitur ; » et priùs libro 1 de hæresi pelagianâ, p. 13 : « Hæretici semper solent in pejus proficere, errantes et in erro-

remittentes; » et libro 6, cap. 25 : « Ambiguis verbis dogmata exprimunt, romanæ Ecclesiæ reverentiam et in omnibus submissionem simulant. »

Igitur paucis ostendendum est quinque propositiones ex victrice gratiâ necessitante Jansenii derivari, ac deinde reipsâ in ejus Augustino quoad sensum saltem contineri.

Ostenditur quinque propositiones ex superiore Jansenii delectatione erumpere. — Quinque propositiones, si absque præjudiciis expendaris, illicè intelliges eas exprimere duntaxat exclusionem gratiæ merè sufficientis, et necessitatem bonum operandi sub motione gratiæ victricis, qui unicus est scopus et quasi medulla totius Augustini Yprensis; sed hæc duo passim eruit ipse Jansenius ex suâ delectatione victricæ; v. g., cum novem primis capitibus libri 4 de Gratiâ Christi illius gratiæ naturam, virtutem et necessitatem expendisset, inde erumpentia consecraria recensens in fine capitis decimi dicit : « Hinc claret cur Augustinus omnem omninò gratiam purè sufficientem sive ante fidem, sive etiam post fidem auferat. » Deinde principium repetit; scilicet si gratia dominatur necessariè, facit agere bonum, si non dominatur necessariè, fit malum, licet totum effectum, quem in hac hypothesi ex Dei voluntate producere poterat, reipsâ producat.

Hæc ex modò dicendis novum accipient robur et lucem.

Ostenditur quinque propositiones in Augustino Yprensi saltem quoad sensum contineri. Unde

PRIMA PROPOSITIO. — Sic jacet in Constitutione Innocentii X datâ 31 maii 1653 : *Aliqua Dei præcepta hominibus justis volentibus et conantibus secundum præsentem quas habent vires sunt impossibilia ; deest quoque illis gratia quâ possibilia fiant.* Damnata est ut temeraria, impia, blasphema, et hæretica.

Ipsis terminis, ut diximus in præcedenti libro, reperitur libro 3 de Gratiâ Christi, cap. 13, unâ exceptâ voce, aliqua ibi expressâ per vocem, *quædam*. Hæc propositio tum ex se cum ex iis quæ apud Jansenium præcedunt et sequuntur, et etiam ex totâ libri serie, hunc habet sensum : *Aliqua præcepta justis (divina mandata violantibus) volentibus et conantibus secundum præsentem quas habent (ex gratiâ debili) vires sunt impossibilia (comparatè ad majorem concupiscentiam adversam quâ hic et nunc alliciuntur) ; deest etiam illis gratia (vel actionis quâ possibilia fiant immediatè, vel orationis quâ possibilia fiant saltem mediâtè) ;*

quare volitiones et nisus hic expressi prodeunt ex gratiâ orationis parvâ, sed quæ hic et nunc sufficiens non est ad debitè orandum ; unde sensus catholicus oppositus est, justos, ubi adstringit præceptum, eâ semper adjuvari gratiâ quâ actualem hic et nunc obnitentem concupiscentiam debellare possunt, et præceptum implere, aut saltem ad illud implendum necessarium Dei adjutorium obtinere.

Jansenii amici hanc propositionem, ut censuram eluderent, in hos sensus detorserunt : « Justis conantibus ex efficacis gratiæ viribus mandata sunt impossibilia.... vel justis semper deest gratia, quâ vel unum mandatum sine peccato adimplere valeant.... vel justis, dum violant præcepta, deest gratia quâ absolutè et abstractivè à hic et nunc reluctante concupiscentiâ possibilia sint Dei mandata. » Porro Jansenius citato libro 3, cap. 13, hanc propositionem deducit ex delectatione superiore relativè.

SECUNDA PROPOSITIO. — In citatâ Constitutione sic exprimitur : *Interiori gratiæ in statu naturæ lapsæ nunquàm resistitur.* Ut hæretica proscripta est.

Hanc assertionem spirant innumera Jansenii effata, quæ ferunt omnem actualem gratiam eum semper producere effectum ad quem producendum relativè ad oppositam delectationem à Deo infunditur. Si nimirum parva fuerit, sive minor adversante hic et nunc concupiscentiâ deliberatum imperfectum semper eliciet consensum, inefficax nempe desiderium, velleitatem, etc. Si fortis, sive major actuali hic et nunc titillante concupiscentiâ deliberatum perfectum extorquebit consensum, quia in his circumstantiis ad hæc omninò et unicè à Deo inspiratur. Unde licet gratia debilior non sortiatur effectum perfectum, ad quem ex se tendit, non ideò illi resistitur, cum ad id in tali circumstantiâ à Deo non impertiatur, et gratiæ propriè resistere sit eam effectu, propter quem illam dat Deus, et quem hic et nunc habere potest, destituere. Porro, inter testimonia, quibus hæc exprimit Jansenius, præter adducta in secundo libro, istud sufficiat. « In universis, inquit libro 10 de Gratiâ Christi, cap. 7, versùs finem, operibus (Augustini) non est vestigium quòd Christi gratia cuiquam sit incongrua, sed omnis congrua est, omnis operatur ac perficit effectum ; omnis enim delectat voluntatem (ecce principium), et omnis hoc ipso ad operandum illum effectum ad quem datur trahit. »

Ex his innotesceat quisnam sit proprius et naturalis relatæ propositionis sensus tum ex se cum apud Jansenium, et quisnam sit sensus catholicus ipsi adversus; hic scilicet: « In statu naturæ lapsæ omnis gratia interior non eum semper habet effectum quem habere potest relativè ad oppositam » hic et nunc repugnantem cupiditatis delectationem; unde etiam apparet discrimen inter gratiam sufficientem Thomisticam, et parvam Jansenianam; illa scilicet semper efficax est respectu actûs indeliberati (cum semper illustret intellectum et moveat voluntatem), non autem respectu actûs deliberati perfecti vel imperfecti ad quem ex se tendit, et ad quem veram et relativam dat potentiam, secus ista quæ effectum deliberatum imperfectum, quem hic et nunc habere potest, semper obtinet.

Sensum præcipuum, quo Jansenii patroni hujus propositionis censuram eludere conantur, in secundo libro exposuimus.

TERTIA PROPOSITIO. — In relatâ Bullâ sic redigitur: *Ad merendum et demerendum in statu naturæ lapsæ non requiritur in homine libertas à necessitate, sed sufficit libertas à coactione. Hæretica declarata est.*

Hujus propositionis doctrinam tradidisse Jansenium, eamque ab ipso ex suâ delectatione victrice deductam esse initio hujus capituli ostendimus; verum, ut Jansenii sententia magis eluceat, et quorundam ejus dictorum obscuritas evanescat, ad sequentia attende.

1^o Libertas, id est, immunitas, universim ex D. Bernardo libro de Gratiâ et libero Arbitrio cap. 3, triplex distinguitur; à peccato, miseriâ et necessitate. Prima dicitur *gratiæ*, quia per gratiam, secunda *gloriæ*, quia per cœlestem gloriam datur. Tertiâ, de quâ res est, et disserit Apostolus epistolâ 1 ad Corinthios, cap. 7, v. 37, nuncupatur *naturæ*, quia tangit naturam libertatis, aut à naturâ homini inest. Ipsi opponitur quælibet necessaria ad unum determinatio (unde vocatur *libertas indifferentiæ*), et ideò est vis electiva, sive facultas, quæ positis omnibus ad agendum prærequisitis potest hic et nunc agere vel non agere (quo sensu vis illa dicitur *activa indifferentia ad contradictoria*, sive *libertas contradictionis et exercitii*) vel quæ potest eligere unum de duobus contrariis bonum vel malum (quo sensu eadem vis dicitur *activa indifferentia ad duo contraria*, sive *libertas contrarietatis seu specificationis*).

2^o Cum duplex sit necessitas *coactionis*, et

simplex, ideò libertas *naturæ*, sive indifferentiæ, alia à necessitate *coactionis*, alia à necessitate *simplici*. Prima est violenta determinatio illata à principio extrinseco *nilhil*, ut ait de Rhodens, *omniò conferente*, sed *prorsus reluctantè passo*, id est, voluntate, ideòque quod ex eâ fieret non esset voluntarium et consequenter non posset esse actio voluntatis, quæ essentialiter est voluntaria. Secunda est determinatio ad unum, cui cum cognitione intellectûs et propensione inhæret voluntas, licet necessariè. Vel oritur à principio à naturâ insito, qualis nisus cujuslibet creaturæ intellectualis in beatitudinem in genere, et tunc dicitur *naturalis*, vel à principio extrinseco, qualis victrix Jansenii delectatio, et tunc dicitur *invincibilis*, quia quidquid agatur excuti non potest. Hæc necessitas, si determinat modo immutabili et absoluto, ut facit visio beatifica in sanctis, vocatur *immutabilis et absoluta*; si modo mutabili et relativo, ut agit prædicta Jansenii suavitas, appellatur *mutabilis et relativa*.

3^o Sagax et astutus Jansenius suum de libertate systema sic concinnavit. Distinguit inter essentiam libertatis, et statum libertatis. *Neque rectè concluditur*, inquit libro 6 de Gratiâ Christi cap. 34, *actum rationalis voluntatis solius coactionis expertem non esse liberum; permagna enim est inter actum liberum* (id est, essentiam libertatis omni enti libero ex se competentem) *et statum libertatis* (id est, varios entis liberi existendi modos) *differentia; uniformis enim est in omnibus entibus liberis, sive beatis, sive damnatis, sive Deo, sive creaturâ, libertatis ratio, sive differentis status*. Hinc cum velle et liberè velle idem sint, *et impossibile sit ut velle non sit liberum* (libro 6, cap. 5), generica et formalis libertatis ratio in uno præcisè voluntario (quod nempe sit advertentiâ rationis, et ex voluntatis complacentiâ, unde motus indeliberati, actus licet voluntatis, non sunt liberi) est reponenda, etiamsi ex immutabili aut mutabili necessitate fiat, et ideò liber est Deus etiam *ad intra*, liberi sancti, liberi damnati, liberi viatores ex necessitate relativâ benè aut malè agentes; quinimò sancti sufficientem ad meritum, sicut et damnati ad demeritum libertatem habent, ex quâ reipsâ illi mererentur, isti verò demererentur, si non essent extra viam; scilicet sola ratio generica et formalis libertatis in nudo voluntario consistens ex se requiritur et sufficit ad meritum aut demeritum; unde immunitas à necessitate immutabili ac invariabili in viatore est ejus merito aut demerito omniò acciden-

talís. Hæc omnia docet Jansenius citato libro 6, cap. 54.

In his tamen usus est quibusdam vocabulis receptam de libertate doctrinam exprimentibus, quæ postea ejus defensores (dubio procul contra ejus intentionem) arripuerunt ut tertiam propositionem ipsi abjudicarent. Etenim libro 6, cap. 54, fatentur viatorum, qui statu suo meriti et demeriti capaces sunt, *libertatem esse ad agendum vel non agendum, et ad bonum et malum indifferentem*; sed quo sensu? quia à necessitate immutabili (non mutabili et transitoria) immunis ad *opposita flecti potest*, ut loquitur in fine ejusdem capituli, prout nempe major vel minor fuerit delectatio cœlestis aut terrena; quinimò, etiamsi immutabilis necessitatis expers non esset, viatores mereri aut demereri possent; in eis nimirum esset vera libertas in solo voluntario consistens, et aliunde *indifferentia ad bonum et malum est tantum libertatis indicium, non ratio*, ut ait ibidem, et ideò, ut dictum est, liber est Deus *ad intra*, liberi sancti, liberi damnati, etc. Unde viator cum necessitate transitoria meretur et demeretur, ut fert tertia propositio. Quapropter indifferentia, quam admittit Jansenius in viatorum libertate, est unicè *flexibilitas arbitrii* modò per unam modò per alteram delectationem; sive flexibilis capacitas recipiendi oppositas delectationum impulsiones.

Item Jansenius sæpius disserit de *genericâ libertatis ratione*, quam in *nudo voluntario*, ut diximus, reponit; unde ejus patroni cavillati sunt ipsum verba fecisse de libertate *genericè acceptâ*, non ad hujus statûs meritum vel demeritum necessariâ. Verùm argutiola levi flatu evanescit. In toto enim libro octavo de Gratia Christi, libertatem hujus statûs propriam cum efficaci gratiæ motione conciliare aggreditur. Aliunde, decem libros de Gratia Christi non conscripsit nisi ut D. Augustini adversus Manichæos fatum inducentes, et Pelagianos ac Semipelagianos libertatem gratiâ destrui prætendentes consilium patefaceret, et tueretur adversus adulterinas Molinistarum interpretationes, ut ipse passim profitetur; at aerem verberasset, et oleum ac operam perdidisset, si libertatem *abstractè*, non relativè ad præsentem statum attigisset. Demùm, in ipsi citatis locis, et speciatim libro 6, cap. 54, expressè dicit viatores in nostro statu posse mereri aut demereri, etiamsi immutabili necessitate constringerentur.

Item Jansenius libro 6, cap. 55, et toto pas-

sim lib. 8, expressè asserit *actum voluntatis, etsi necessarium, esse in potestate et dominio voluntatis*; ex quibus iterum nonnulli illius discipuli ex ejus libro expungere conantur tertiam propositionem. At genuinum Jansenii sensum non advertunt, aut dissimulant; unicè enim intendit actum omnem voluntarium, licet necessarium absolutè aut relativè, essentialiter esse in potestate et dominio voluntatis, quia *velle et liberè velle idem est, et est impossibile ut velle non sit liberum*, ut antea dicebat.

Ex his colliges proprium tertiæ propositionis tum in se cum in Jansenii libro sensum esse, ad merendum et demerendum in statu naturæ lapsæ non requiri libertatem à necessitate alternante et relativà ad circumstantias in quibus benè vel malè operans versatur, sed sufficere ut in iisdem circumstantiis voluntariè et non coactè operetur.... et è converso sensum catholicum esse, eundem operantem, ut possit mereri aut demereri, præter libertatem à coactione, indigere libertate ab omni necessitate, etiam voluntariâ, mutabili et relativâ.

QUARTA PROPOSITIO. — In prædicto Innocentii X decreto sic profertur: *Semipelagianii admittebant prævenientis gratiæ interioris necessitatem ad singulos actus, etiam ad initium fidei, et in hoc erant hæretici, quòd vellent eam gratiam talem esse, cui posset humana voluntas resistere, vel obtemperare. Ut falsa et hæretica proscripta est.*

Duas hujus assertionis partes, facti et juris exhibet Jansenius libro 2 de Gratia Christi cap. 15, his verbis: « Prior (Massiliensium, error erat quòd initium fidei, orationem, gemitus et desideria, ex nobis, hoc est, ex libero arbitrio, prosilire censerent, et tamen gratiam etiam actualem in eorum opinione fuisse ad istos actus necessariam, cujus influxus in eorum libero relinqueretur arbitrio, et hoc eos apertissimè docuisse jam supra latè patefecimus; » in margine reposuit caput 12 hujus libri 2 de Gratia, et librum 8 de hæresi pelagianâ cap. 6, 7, 8, etc., ubi dicit gratiam illam actualem *veram fuisse et internam*; quo capite 6 utuntur P. Alexander in historiâ quinti seculi, et alii vulgò ad ostendendum duas hujus propositionis partes reipsà à Jansenio traditas fuisse. Etverò, si Franciscus Macedo Minorita, Contensonius Dominicanus, et nonnulli alii Catholici asserere ausi sunt nonnullos Semipelagianos gratiam aliquam internam ad initium fidei admisisse, quomodò Jansenius unicè sollicitus de theologorum circa gratiam et libertatem sententiâ

Semipelagianismi labe inspergendâ id avido animo non docuisset ?

Obvius autem et naturalis illius propositionis sensus ex dictis in discussione secundæ et tertiæ propositionum abundè elucescit; hic scilicet est : « Semipelagiani gratiam prævenientem, etiam internam, ad initium fidei exege- runt, et in hoc erant hæretici, quòd vellent eam gratiam talem esse, cui relativè ad actualē hic et nunc stimulantem cupiditatem posset humana voluntas resistere ; » sensus ex ad- verso catholicus iste : « Semipelagiani non exi- gebant prævenientem gratiam internam ad singulos actus, etiam ad initium fidei, et si eam exegissent, in hoc non fuissent hæretici quòd dixissent eam gratiam talem esse cui posset hic et nunc humana voluntas resistere. » Porro evidens est hanc propositionem ex delectatione relativè victrice velut ex principio erumpere. Enimverò Jansenius libro 8 de hæresi pelagia- nâ, cap. 8, in eo propriè Massiliensium erro- rem consistere facit, quòd « Angelorum et stantis hominis adjutorium, in quo intelli- gendo et admitendo nulla penitus ipsis diffi- cultas fuit, etiam lapsis hominibus... sufficere voluerint, » et ideò improbatò auxilio invinci- biliter ad bonum determinante, aliud admise- rint qui voluntas dissentire posset.

QUINTA PROPOSITIO.—Eam sic exhibet com- memorata Constitutio : *Semipelagianum est di- cere Christum pro omnibus omninò hominibus mortuum esse, aut sanguinem fudisse. Ut jacet declarata est falsa, temeraria, scandalosa, intel- lecta autem eo sensu ut Christus pro salute duntaxat prædestinatorum mortuus sit, impia, blasphema, contumeliosa, divinæ pietati dero- gans, et hæretica.*

Istam propositionem tum quoad se tum quoad interpretationem extare in Augustino Yprensi libro præcedente initio secundi capitis ostendimus. Uno tantum testimonio id confir- mabimus. Libro 3 de Gratiâ Christi cap. ulti- mo ait : « Nec enim juxta doctrinam antiquo- rum pro omnibus omninò Christus passus aut mortuus est, aut pro omnibus omninò tam ge- neraliter sanguinem fudit, cum hoc potius tanquam errorem à fide catholice abhorentem doceant esse respuendum..... » Ibidem versùs capitis finem addit : « Quæ sanè cum in Augus- tini doctrinâ perspicua certaue sint, nullo modo principiis ejus consentaneum est ut Christus... vel pro infidelium in infidelitate morientium, vel pro justorum non perseveran- tium æternâ salute mortuum esse, sanguinem

fudisse, semetipsum redemptionem dedisse, Patrem orasse sentiatur ; seivit enim quo quis- que jam ab æterno prædestinatus erat.... ex quo factum est ut juxta sanctissimum doctorem non magis Patrem pro æternâ liberatione ip- sorum quàm pro diaboli deprecatus fuerit. »

Hæc autem docuit Jansenius ut suis staret principiis. Christus scilicet mori non potuit nisi pro eorum salute qui salvi fiunt ; fructus enim mortis Christi inanis esse nequit ; gratias ergo verè sufficientes ad vitam æternam asse- quendam non nisi prædestinatis promereri et applicari voluit ; sed ex secundâ propositione tales sunt solæ gratiæ efficaces ; gratia enim sufficiens voluntati permissa ex quartâ propo- sitione est gratia semipelagiana ; ergo ex ne- cessitate et existentia solius delectationis vic- tricis in præsentī statu evincitur Christum non esse mortuum pro salute omnium reproborum. Concedit quidem Jansenius, ut diximus, Chris- tum nonnullis reprobis *temporalem* fidei et jus- tificationis gratiam promeruisse et infudisse ; sed cum, ipso dicente, nullæ sint gratiæ verè sufficientes nisi efficaces, justificationis gratia illis reprobis etiam in Christi intentione non potest esse medium verè et relativè sufficiens ad æternam salutem obtinendam.

Propria autem istius assertionis in Jansenii sensu cum aliis Jaminatæ significatio hæc est : « Error est semipelagianus asserere Christum mortuum esse ut omnibus et singulis homini- bus gratias verè et relativè sufficientes ad æter- nam salutem promereretur ; tales gratias non aliis quàm electis reipsâ promeritus est..... » Significatio è converso catholica est ista : « (Se- mipelagianum non est dicere quòd Christus eo fine sanguinem fuderit ut cunctis mortali- bus gratias ad salutem impetrandam verè et relativè sufficientes acquireret. » Item : Hære- ticum est dicere Christum pro æternâ salute prædestinatorum duntaxat mortuum esse ita ut nullis prorsus reprobis adjutoria ad æternam vitam hic et nunc assequendam verè sufficien- tia impertiverit. »

Hæc sunt famosæ quinque propositiones in quas ultimò redigitur immensum Augustini Yprensis volumen. Spirant Lutheri et Calvini dogmata, sed nonnihil immutata, et cum miro fuco et artificio proposita. Illorum dogmatum sub novâ formâ renovationi primùm delineatæ à Michaelē Baio, cujus systema accuratè evolvit P. Duchesne in fine secundi libri historiæ Baianismi, ultimam et quasi perfectam manum admovit præstantiore ingenio et ratiocinio

pollens Jansenius, et ideo illa renovatio proprium ejus systema merito nuncupatur, licet maxima sit inter Baii et Jansenii doctrinam consensio, ut ostendit idem P. Duchesne in fine libri quarti.

Easdem quinque Yprensis assertiones, licet ab universâ Ecclesiâ jamdudum proscriptas, incunte hoc seculo excitavit vir eruditus quidam sed novitatis amans, centum et unâ propositionibus, quæ nihil aliud sunt quàm quinque explicationes, aut consecutaria sanè multò magis culpandus quàm Baius aut Jansenius; primus enim Sedis apostolicæ censuræ sese morigerum exhibuit, alter verò, saltem in extremis constitutus, suam doctrinam Ecclesiæ romanæ judicio subditam esse voluit, ut postea ostendemus. Centum autem et unam propositiones damnavit Clemens XI die 8 septembris ann. 1713, cujus Constitutioni accessit totius Ecclesiæ consensus.

Jansenii sectatores, ut quinque propositionum sensus à Jansenio intentus salvus et integer remaneret, innumerabilia excogitaverunt effugia quæ veteribus hæreticis in gratiam suorum errorum nunquàm in mentem venerant. Hic satis sit retulisse quod de illis scribit eruditus P. Alexander in eleganti suo censorio Suffragio in Sorbonâ pronuntiato 7 et 8 maii anni 1683 occasione hujus Fratris de Montesono assertionis, « ad solam Sedem apostolicam divino et immutabili privilegio spectat de controversiis fidei judicare. Jansenii (inquit) defensores Innocentio X supplicarunt, ut duplicem sensum in quinque propositionibus distingueret, hæreticum damnet, Augustinianum et Thomisticum (quem Jansenii esse prætendebant) absolveret. Tres columnas eum in finem obtulere 19 maii anni 1653. Prima sensum hæreticum Lutheri et Calvini continebat, quem se damnare profitebantur; alia sensum Molinæ, quem Pelagianum aut Semipelagianum contendebant; tertia sensum gratiæ per se efficaciæ catholicum, et ex S. Augustini doctrinâ invictè confirmatum, sed nullam hujusce postulationis rationem habuit summus pontifex. Quinque propositiones, quamvis aliquid supplendo, et sensu gratiæ per se efficaciæ orthodoxæ essent, exponere noluit, ratus si exponeret, id præsidio futurum errori, et Jansenianarum partium theologos distinctionem sensûs duplicis importunè flagitare, ut fulmen quinque Jansenii propositionibus imminens (damnatae sunt 31 maii ejusdem anni 1653) averterent, ac fucum Sedi apostoli face-

rent; (quàm meritò hæc pertinuerit abundè probat quidquid postea egerunt) sapienter autem duplicis illius sensûs distinctionem respuit Innocentius, quamvis quinque propositiones sensum Augustinianum et Thomisticum gratiæ per se efficaciæ pati possent. Patres enim, addit idem theologus ibidem, ab apostolicâ ætate ad hæc usque tempora propositiones hæreticas vel erroneas, quamvis in bonum et catholicum sensum aliquo modo flecti possent absolute et simpliciter damnandas, non exponendas censuerunt. » Caterùm quoties Ecclesia damnat aliquas propositiones nullo assignato sensu, toties eas damnat in obvio et naturali sensu quem offerunt. Proscripsit autem quinque propositiones in obvio et naturali sensu, quem habent in Jansenii libro, ut evincunt citatæ Constitutiones Innocentii X, Alexandri VII, etc.

Plures ex acutioribus quinque propositionum defensoribus seriò recogitantes earum doctrinam, orthodoxam licet, damnatam esse in Baio à D. Pio V anno 1567, Gregorio XIII anno 1579, et Urbano VII anno 1642, item in Jansenio, et auctore centum et unius propositionum, à laudatis pontificibus, et tot Constitutiones à tam longo tempore corroboratas esse, et in dies corroborari maximo episcoporum ubique dispersorum suffragio; hæc, inquam, attentâ mente reputantes, Christum dum pontificibus, cunctis futuris seculis inerrantiam pollicitus est deceptum esse autumaverunt, et ita ad revelatæ religionis hostium castra tandem confugerunt. (*Tantum inquit Melchior Canus libro 4 de Locis cap. 6, hæreticus error, et cæca pertinacia potest, ut omnem prorsus doctrinam adimat, intelligentiæ lumen extinguat, et universam ingenii retundat aciem!*) Sic Jansenismus in Deismum magnâ ex parte conversus est, et amplificatus detestabilis illius sectæ patronorum numerus qui de bono et honesto per propriam utilitatem judicantes quibus divinâ suaviter disponente Providentiâ regitur mundus pontificum et regum solia irritò planè et insulso conatu concutiant, et evertere nituntur.

His ad notitiam Janseniani systematis necessariè præmittendis expositis, ut illud dogma radicitus evellamus, disseremus 1^o de Jansenii systemate circa gratiæ efficaciæ operandi rationem et libertatem; ... 2^o de eodem systemate circa intrinsecum gratiæ efficaciæ principium. In antecessum autem cum Augustino libro de Spiritu et Litterâ cap. 7, n. 12, lubenter agnos-

cinus gratiam victricem voluntatis et libertatis reparatricem, rem esse profundam, et nimis abditam. Hinc inscrutabile illud Sacramentum prorsus venerari contenti fuissimus, si Ecclesia catholica, quæ est columna et firmamentum veritatis, nihil circa illud definiisset.

ARTICULUS PRIMUS.

Refellitur Jansenii systema circa gratiæ efficacis agendi modum, et ideò libertatem.

Paulò ante ostendimus in systemate Calviniano et Janseniano gratiam efficacem, quam solam uterque in præsentì ordine admittit, absolutam aut saltem relativam voluntati necessitatem imponere, et ideò liberum arbitrium Adæ peccato periisse. Quocirca sit

CONCLUSIO. — Gratia, quilibet polleat efficaciâ, nullâ necessitate, etiam alternante et relativâ, voluntatem in præsentì statu ad operandum adigit. Hinc liberum arbitrium in eodem statu, attenuatum licet et inclinatum, extinctum tamen non est. Est de fide.

MOMENTUM PRIMUM. — *Ex Scripturis.* — 1º Sacri codices hujus statûs libertatem, quâ sub gratiæ motione agimus et meremur, nobis exhibent tanquàm potestatem, cujus domini sumus, quâ uti vel non uti pro libito valemus, quam optare vel non optare nostrum est, cum quâ ad ignem vel aquam, bonum vel malum, manum extendere possumus, etc. Genesis cap. 4, v. 7, Ecclesiastici cap. 15, v. 17 et 18, et cap. 31, v. decimo, etc.; sed talis libertas, sive potestas, activam sub gratiâ connotat voluntatis indifferentiam, ac proinde quamlibet excludit necessitatem; ergo.

2º lidem codices voluntatem sic à gratiâ moveri referunt, ut tamen voluntas cum gratiâ laboret, consentiat, seipsam flectat et determinet, etc. Psalmo 118, v. 112; 1 ad Corinthios, cap. 15, v. 10; 1 ad Timotheum, cap. 4, v. 7; 6, v. 11 et seq.; Apocalypsis cap. 3, v. 20, etc. Sed hæc exprimunt ingenitam et omninò liberam determinationem; ergo.

Obijciunt 1º ea testimonia quibus Deus in nobis operari dicitur Ezechielis cap. 36, v. 26 et 27, Epist. ad Philippenses cap. 2, v. 13; sed talis operatio explodit liberam voluntatis determinationem; ergo. — Nego minorem; hæc quidem et similia oracula arguunt gratiæ interioris et voluntatis necessitatem, et ineffabilem virtutem; sed non excludunt, imò important liberam cooperationem nostram; unde in ipso Ezechielis textu voluntatis inflexio refertur; faciam, inquit, ut in præceptis meis ambuletis, et judicia mea custodiatis et operemini. Ita D. Au-

gustinus libro de Prædestinatione sanctorum, cap. 11, n. 22, ubi locum Ezechielis exponens ait: « Ideò hæc et nobis præcipiuntur, et dona Dei esse monstrantur, ut intelligatur quòd et nos ea facimus, et Deus facit ut illa faciamus. »

Obijciunt 2º textus enuntiantes fontes peccati esse servos, v. g., Joannis cap. 8: *Omnis qui facit peccatum servus est peccati*; sed servus liber non est; ergo. — Resp. hæc et similia importare servitutem non antecedentem, sed consequentem liberam voluntatis ad peccatum determinationem et gratiæ resistentiam.

MOMENTUM SECUNDUM. — *Ex Ecclesiæ judiciis.*

— Inter concilia solum Tridentinum adducam, quod admittit Jansenius, et vetera adversus Pelagianos habita exscribere solet. Tres ejus canones sessionis sextæ, nempe, 4, 5 et 6 supra retulimus, quibus definit in potestate hominis esse vias suas malas facere, et dissentire gratiæ, si velit. His certè eliminare voluit Lutheri et Calvinii de gratiâ dogma; sed, ut ostendimus, illud ferebat voluntatem sub gratiâ privari non physicâ actione (impossibile enim est ut voluntas non velit cum vult), sed activâ et liberè indifferente electione, etc.

Accedit totius Ecclesiæ dispersæ consensus, quæ 60 Bani propositionem: *Quod voluntariè fit, etiamsi necessariò fiat, liberè tamen fit*; et 67: *Sola violentia repugnat libertati hominis*, et relata tertiam Jansenii propositionem velut hæreticam proseripsit, sicut et hanc decimam inter 101: *Gratia est operatio manûs omnipotentis Dei, quam nihil impedire potest, aut retardare*; sensus enim est gratiæ resisti non posse. Idem offerunt inter easdem 101, 11, 12, 19, 20, 21, 22, 23, 24.

Os tandem hodiernis Jansenii patronis occludere possemus auctoritate corporis doctrinæ anni 1720, in quo nonaginta septem episcopi aiunt: « Gratiæ potentissimæ atque efficacissimæ operatio componitur cum libertate, atque potentiâ agendi vel non agendi necessariâ in hoc statu ad merendum et demerendum... Per peccatum Adæ liberum arbitrium non fuit extinctum... et ita secundum Augustinum nos adhuc habemus libertatem ad faciendum bonum et malum... Homo agit liberè Deo consentiendo vocanti vel excitanti. » Ecce sub impulsu gratiæ etiam efficacissimæ veram potentiam agendi vel non agendi bonum, malum vel bonum agendi, et ideò libertatem contradictionis et contrarietatis, quam admittunt rigidiores etiam Thomistæ, quorum sensa reddit istud doctrinæ corpus.

Dices cum Jansenio libro 6 de Gratiâ Christi cap. 35 : Istud concilii Tridentini oraculum : *Potest homo lapsus gratiæ dissentire si velit*, simile est isti propositioni : *Beatus clarè Deum videns potest eum odisse si velit* ; sed ista propositio vera est, quia est hypothetica , et absolute non enuntiat Beatum posse Deum odisse, sed solum ex hypothesi quòd velit, quæ hypothesis est impossibilis ; ergo à pari verum est Tridentinum dictum , quia est conditionale, nec fert absolute hominem gratiæ medicinali dissentire posse, sed solum ex conditione quòd velit ; quæ conditio locum habere nequit , et idcirco illud effatum feliciter coheret cum agendi necessitate quam imponit gratia medicinalis. — Resp. : Retorqueo argumentum. Dictum Tridentinum verum est quia homo ex hypothesi impossibili quòd velit gratiæ dissentire illi dissentire potest ; ergo à pari vera est ista propositio, *Deus seipsum negare potest*, quia ex hypothesi impossibili quòd velit seipsum negare, reipsa seipsum negare potest. Resp. 2^o nugatorium istud argumentum Jansenio omnino indignum esse. Etenim 1^o illud concinnavit Wicleffus, vir inepti, insulsi, et frigidi sæpius ratiocinii, ad probandum Deum non habere indifferentem ad utrumlibet voluntatem, ut ostendit Dechampsius libro 1, disputatione 5, cap. 5.... 2^o Idem argumentum aptum est ad ridicula quæque commenta stabilienda ; v. g., possibilem esse Deo omnem contradictionem, cum contradictio Deo sit possibilis si velit... 3^o Injuriosum est concilio Tridentino quòd si admitendum sit, Lutherum et Calvinum inani, absurdo, et plumbeo canone et argumentatione revincit... 4^o Non minùs injuriosum est *cœlitus inspirato* (ex Jansenio) doctori Augustino à quo concilium Tridentinum illud dictum excerptis... 5^o Dùm Jansenius ibidem dicit, theologos quando audiunt concilii dictum *putare et rectè putare* (eo) *significari libertatem* (suo sensu intellectam) aut fabulam decantare vult, aut insigni sui contemptùs exemplo theologorum omnium acumen suo posthabere... 6^o Quis non videat id quod non est possibile nisi sub conditione impossibili, absolute non esse possibile ? Unde si homo potest tantum gratiæ dissentire, si velit, et id velle non potest, non potest ei dissentire adeoque genuinus concilii Tridentini dicti sensu sest : *Homo potest gratiæ dissentire si, ut potest, velit*, sive pendet à voluntate humanà gratiæ dissentire vel non.

MOMENTUM TERTIUM. — Ex S. Augustino. — Cùm Jansenius effutiat D. Augustinum quæ de

libertate scripserat adversus Manichæos, Pelagianos et Semipelagianos refellendo emendasse, idcirco posteriora ejus opera producam. Libro de Spiritu et Litterâ, cap. 34, n. 60, ait : « Profectò et ipsum velle credere Deus operatur in homine, et in omnibus misericordia ejus prævenit nos ; consentire autem vocationi Dei, vel ab eâ dissentire, sicut dixi paulò ante, propriæ voluntatis est. » Idem innuit ipso libro de Prædestinatione Sanctorum cap. 5 : « Qui dicit, inquit, non accepi fidem, contradicit veritati, non quia credere vel non credere non est in arbitrio voluntatis, sed in electis præparatur voluntas à Domino. » Hic sermo de gratiâ voluntatem excitante ; at ex Augustino potest voluntas ipsi pro arbitrio *consentire* vel non *consentire* ; quomodò autem id posset si quilibet verâ agendi necessitate constringeretur ?

Reponit Jansenius libro 2 de gratiâ Christi, initio capitis 34, hæc unicè significare *velle et nolle, consentire ac dissentire, credere et non credere esse officia* (sive actus) *voluntatis*, sicut intelligere officium est mentis ; quam responsionem videtur hausisse à Calvinistâ Kemnitio, ut ostendit Dechampsius citato loco ; sed evidenter decipitur, aut decipere vult. Etenim Augustinus hic ob oculos habet dictum Pelagianorum : *Gratiæ interioris necessitas destruit libertatem* ; quod ut refellat, asserit gratiam sic prævenire et movere voluntatem ut ei consentire vel dissentire possit. Deinde inanis prorsus fuisset Augustini observatio, cùm Pelagiani non negarent consentire et dissentire munus esse voluntatis.

Libro 2 de peccatorum Meritis et Remissione, cap. 18, postquam, n. 28, p. 55, dixit : « Ne sic defendamus gratiam, ut liberum arbitrium auferre videamur, rursus ne liberum sic asseramus arbitrium... ut ingrati Dei gratiæ judicemur, » addit numero trigesimo : « Nisi obtineamus non solum voluntatis arbitrium, quod huc atque illuc liberum flectitur.... sed etiam voluntatem bonam.... nescio quomodò defendamus quod dictum est : *Quid habes quod non accepisti?* » Ecce liberum arbitrium (non *validum et robustum*, ut placebat Pelagianis, sed *attenuatum et inclinatum*) quod huc atque illuc *flecti potest*, et ideò ab omni veræ necessitatis vinculo expeditum, quod ad malum ex seipso sufficit, ad bonum verò si adjuvetur à Deo.

Libro 2 de Nuptiis et Concupiscentiâ, cap. 3, n. 7, objicienti Juliano ab ipso cùm gratiam defenderet, libertatem cum Manichæis tolli

reponit initio numeri octavi : « Non ita est ut loqueris ... non est ita , multum falleris vel fallere meditaris ; non liberum negamus arbitrium. » Idem habet libro 1 ad Bonifacium , cap. 2, initio numeri 5 : « Quis , inquit , nostrum dicat quod primi hominis peccato perierit liberum arbitrium... Libertas (facilitas bonum agendi) quidem periit per peccatum , sed illa quæ in paradiso fuit... propter quod natura humana indiget gratiâ (forti). » Tandem cum falsus rumor evulgatus esset monachos Aduemetinos liberum arbitrium inficiari , illius cum gratiâ existentiam evicit libro de Gratiâ et libero Arbitrio , cap. 2.

Reponit Jansenius passim in his et similibus locis Augustinum agnoscere libertatem *spontaneitatis* , non *necessitatis*. Verum ex contextu liquet Augustinum prædicare libertatem , *quæ hinc atque illuc liberè flectitur* ; libertatem quam adversus Manichæos adstruxerat ; libertatem quam admittebant Pelagiani , et cum gratiâ conciliari non posse effutiebant ; libertatem quam putaverat negari à monachis Aduemetinis , quos velut Prædestinianos traduxerant Felix et Cresconius , etc. ; sed talis libertas non fuit libertas *spontaneitatis* , sed libertas *necessitatis* ; ergo , etc.

Objicit 1° Jansenius toto passim libro 2 de Gratiâ Christi innumera Augustini testimonia ex libris præsertim de Gratiâ Christi , de Gratiâ et libero Arbitrio , de Correptione et Gratiâ , etc. , quibus S. doctor victricem cœlestis gratiæ vim impensè prædicat , et asserit « illam operari ipsum velle , facere ut velimus , largiri bonam voluntatem , dare omnia merita et virtutes , idque omnipotentissimè , invictissimè , efficacissimè , insuperabiliter , indeclinabiliter , » etc. Sed hæc penitus eliminant potentiam relativè expeditam consentiendi vel non consentiendi , etc. — Resp. 1°, Calvinum hæc ante Jansenium effutisse , ut ostendit Dechampius libro 5, disputatione 5 de gratiâ efficaci , cap. 7. Resp. 2°, theologos pro vario suo circa gratiam et ideò Augustini mentem systemate hoc argumentum variè diluere. Nos , quibus persuasum S. doctorem adversus Pelagianos de gratiâ *ab intrinseco* efficaci præcipuè disceptasse , ut postea ostendemus , reponimus ipsum his et similibus locutionibus usum non fuisse nisi ut expressiùs designaret certissimum et infallibilem gratiæ efficacis operandi modum ; 1° enim mos est Augustini , ut adversarios opprimat , singularia et significantiora adhibere vocabula. Sic , libro de Correptione et Gratiâ cap. 12 ,

n. 57, dicit *peccati merito amissam esse libertatem* , id est , non liberum arbitrium , sive relativam et activè indifferentem potestatem sese determinandi ad utrumlibet (quod non periissemò asserebat) , sed facilitatem bonum operandi quam homini inesse non minùs postquam ante peccatum Adæ somniabant Pelagiani... 2° Ipse S. doctor asserit se per media *insuperabiliter* operantia intelligere media *certissimè* liberantia. Libro quippe de Dono perseverantiæ , cap. 14, n. 55, prædestinationem sanctorum sic definit : « Est præscientia et præparatio beneficiorum quibus certissimè liberantur quicumque liberantur... » 3° Ubique docet *velle et nolle esse in hominis potestate licet Deus velle nostrum efficaciter eliciat*.

Objicit 2° Jansenius , libro 4 de Gratiâ Christi , cap. 6, imò quasi perpetuò , celebre Augustini testimonium in caput 5 Epistolæ ad Galatas supra relatum , quo velut basi totum ejus innititur systema : *Quod nos amplius delectat , secundum id operemur necesse est* ; ergo sub gratiâ victrice , sive majori delectatione , voluntas non est ad utrumlibet activè et relativè indifferens. — Resp. 1°, Augustinum , juxta Patres Benedictinos , expositionem in Galatas scripsisse anno 594, quo tempore constat ipsum Semipelagiano errore fuisse imbutum ; quomodo igitur testimonio ex hac expositione desumpto tota inniti posset Augustini doctrina ? Resp. 2°, nonnullos Augustinianos , qui gratiæ vim ex delectatione superiore , sive per gradus relativè victrice repetunt , suum etiam per illud efflatum systema probare aggredi , et ideò contendere , illud esse intelligendum de delectatione indeliberatâ et antecedente , non quidem veram et relativam necessitatem inferente (ut placuit Jansenio consequenter ad falsum suum principium de interitu libertatis) , sed voluntatem ita infallibiliter determinante , ut veram semper et relativam illi consentiendi vel dissentiendi conservet potestatem. Resp. 3°, Augustinianum efflatum intelligendum esse videri non de delectatione indeliberatâ , antecedente et invincibili , quâ scilicet ad aliquid volendum necessariè necessitate antecedente impellamur , ut Jansenio placet , sed de delectatione deliberatâ et consequente liberam voluntatis determinationem ; hunc enim sensum inspirare videntur Augustini scopus , loci contextus , et expressa S. doctoris testimonia.

1° Augustini scopus. Intendit enim exponendo versus 18, 19, 20, 21 et 22 capitis 5 epistolæ ad Galatas , inducere fideles ad non

consentiendum operibus carnis, fornicationi, immunditiis, etc. (ut faciebant qui erant sub lege), et ad sectandas virtutes, charitatem, gaudium, pacem, etc. (ut faciebant qui spiritu ducebantur, et ideo non erant sub lege). Id, inquam, intendit, ut evidens est ex numeris 47, 48 et 49; sed hic finis videtur ostendere ipsum loqui de delectatione deliberatâ et consequente, sive enascente ex libero voluntatis consensu; ergo.

2º Contextus. Numero quippe 49, explicans quomodò secundum id quod nos magis delectat operemur necesse est, post adductum illud effatum, continuò addit: « Ut, v. g., occurrit forma speciosa fœminæ, et movet ad delectationem fornicationis; sed si plus delectat pulchritudo illa intima, et sincera species castitatis per gratiam quæ est in fide Christi, secundum hanc vivimus, et secundum hanc operamur, ut non regnante in nobis peccato ad obediendum concupiscentiis ejus, sed regnante justitiâ per charitatem cum magnâ delectatione faciamus quicquid in eâ Deo placere cognoscimus, » Ibi verba, *occurrit forma*, etc. exprimunt indeliberatum impulsus tentationis, sive, si volueris, indeliberatam delectationem carnis, quæ est causa deliberatæ fornicationis delectationis, id est, liberi consensûs actui fornicationis, siquidem ista delectatio ab alterâ producitur, *movet ad delectationem carnis*, etc. Quidni et istæ voces, *si plus delectat pulchritudo castitatis*, etc. exprimerent deliberatam castitatis delectationem, sive liberam in actu castitatis complacentiam? cum ista delectatio velut à causâ oriri dicatur à delectatione cœlesti indeliberatâ, sive gratiâ, *delectat*, inquit, *pulchritudo castitatis per gratiam quæ est in fide Christi*. Deinde, in ultimis verbis, *delectatio* est manifestè delectatio deliberata, *cum magnâ delectatione faciamus*, siquidem *facit regnare justitiam in nobis* per continuum bonorum operum exercitium; cur et in prioribus verbis eundem non haberet sensum?

3º Expressa gratiæ vindicis effata. Inter plura istud sufficiat ex libro 8 Confessionum, cap. 8, n. 20 (hos libros scripsit anno 400, et ideo post expositiones in Epistolas ad Romanos et Galatas). *Non faciebam*, inquit, *quod incomparabili affectu amplius mihi placebat*. Ubi evidens est disserere Augustinum de delectatione, sive affectu indeliberato, aliâs quod sibi magis placebat fecisset.

Neque refert quòd S. doctor dicere soleat per cœlestem delectationem innotescere quod la-

tebat, et suave fieri quod non delectabat; non enim negamus delectationi deliberatæ præire gratiam, sive delectationem indeliberatam; sed opinamur Augustinum loco objecto verba facere de delectatione deliberatâ, quia ipso dicente ex ipsâ fiunt opera quæ nos in justitiâ constituunt.

Eodem sensu intelligendus est S. doctor libro 2 de peccatorum Meritis et Remissione, cap. 17, n. 26, ubi ait: « Nolunt homines facere quod justum est, sive quia latet an justum sit, sive quia non delectat; tantò enim quidque vehementius volumus, quantò certius quàm bonum sit novimus, eoque delectamur ardentius; » etenim ultima verba, quæ animosius ostentant Jansenii defensores, delectationem connotant, quæ gratiæ sive delectationis effectus est; ibidem enim Augustinus causam refert illius delectationis; « ut autem, inquit, innotescat quod latebat, et suave fiat quod non delectabat, gratiæ Dei est, quæ hominum juvat voluntates, quâ ut non adjuventur in ipsis itidem causa est, non in Deo; » non est ergo gratia, sive delectatio indeliberata. Idem evincunt quæ habet ibidem numero sequenti sive 27: « Tantò, inquit, magis delectat opus bonum, quantò magis diligitur Deus summum et incommutabile bonum... ut autem diligatur Des, charitas ejus diffusa est in cordibus nostris, non per nos, sed per Spiritum sanctum qui datus est nobis, Rom. cap. 5. » Clarum quippe est delectari in opere bono esse sibi in opere illo liberè complacere; clarum est delectationem quâ diligitur Deus virtute gratiæ actualis et habitualis esse deliberatam.

Reponunt quidem adversarii hanc expositionem istum absurdum et identicum Augustino allingere sensum: *Quilibet tantò vehementius aliquid vult quantò ardentius illud vult*; sed inani prorsus retorsione; Augustini scilicet propositio veram istam et sapientem sonat sententiam: *Quò magis voluntas sibi complacet in objecto, eò magis illud aliis præfert, et ipsi inhæret*.

Objicit 3º libro 6 de Gratiâ Christi cap. 6 et seq., alia Augustini testimonia. Libro 5 de Civitate Dei, cap. 5 ait: Si illa definitur necessitas secundum quam dicimus necesse esse ut ita sit aliquid, vel ita fiat, nescio cur timeamus ne nobis libertatem auferat voluntatis; neque enim et vitam Dei et præscientiam Dei sub necessitate ponimus si dicamus necesse esse Deum semper vivere, et cuncta præscire. » Libertas ergo coactionem non simpliciter necessitatem excludit. — Resp. Jansenium in eq

testimonio inaniter exultare; etenim ex contextu liquet Augustinum loqui de necessitate consequente, quæ supponit aut involvit liberum arbitrium. Ibi scilicet distinguit duplicem necessitatem, unam quæ non est in nostrâ potestate... sicut est necessitas mortis, et fatetur voluntates nostras, quibus rectè vel perperam vivitur, sub tali necessitate non esse... Alteram secundum quam dicimus necesse esse ut ita sit aliquid, vel ita fiat, sicut necessarium est quod à Deo præscriptum est; et hanc necessitatem, cum sit consequens tantum, et ideò liberum voluntatis exercitium includat, libertatem non auferre dicit. idque contra Ciceronem, qui ex Dei præscientiâ libertatis interitum pertimescebat, et ideò, dicente S. doctore, *ut homines faceret liberos, eos fecit sacrilegos*. Consuli poterit Bellarminus, libro 3 de Gratiâ et libero Arbitrio cap. 3, aut Dechampius lib. 3, disputatione 2 de libero Arbitrio cap. 10 et seq., ubi istud argumentum accuratè et doctè discutit et diluit.

Libro de Naturâ et Gratiâ cap. 46, n. 54, istud Pelagii dictum refellens: *Voluntatis arbitrio et deliberatione privatur quidquid naturali necessitate constringitur*, ait: « Perabsurdum est ut ideò dicamus non pertinere ad voluntatem nostram, quòd beati esse volumus, quia id omninò nolle non possumus... nec dicere audemus ideò Deum non voluntatem sed necessitatem habere justitiæ, quia non potest velle peccare; » quod ergo necessariè fit, liberè fit, contrariumque Pelagianum est. — Resp. 1º, Estium ipsum in 2 Sententiarum, distinctione 24, paragrapho 2, hoc solvisse, dicendo Augustinum non improbâsse Pelagii dictum nisi quatenus asserere videbatur id quod necessariè fit voluntate non fieri; unde ibidem dicit, *et hinc nonnulla questio est*, id est, ambigua Pelagii verba elucidanda sunt. Resp. 2º cum aliis velle Augustinum cum, qui vult beatitudinem, vinciri quidem necessitate, quoad specificationem, id est, boni beatifici speciem, quia non potest velle oppositum, sive miseriam, non ideò tamen carere libero arbitrio, quia potest quoad exercitium, sive actu non velle beatitudinem avertendo cogitationem beatitudinis... Item Deum justitiam ex necessitate velle quoad specificationem, quia non potest velle injustitiam; at non ideò destitui libero arbitrio quia potest et quoad exercitium nonnulla æqua agere et non agere, et quoad specificationem ex multis æquis unum alteri antepone, illudque eligere.

Enchiridion cap. 103, n. 28, libro 22 de Civitate Dei, cap. 50, n. 3, docet Beatos non spoliari, imò ornari perfectâ libertate quia peccare non possunt; ergo. Resp. 1º cum Estio in 2 Sententiarum distinctione 25, paragrapho 2, necessitatem non peccandi in Beatis non destruere sed perficere liberum eorum arbitrium in electione bonorum, quemadmodum in Deo necessitas non peccandi perficit liberrimam ejus ad oppositum voluntatem. Scilicet, inquit Bellarminus loco citato, « qui peccare non possunt, liberrimi sunt in eligendo bono, et possunt eligere hoc vel illud bonum; vel unum et idem eligere vel non eligere, sine ullo periculo errandi. Posse autem eligere malum non est virtus liberi arbitrii sed defectus; nihil enim aliud est nisi posse in eligendo falli et errare; unde hoc defectu remoto non perit sed fortius et liberius efficitur liberum arbitrium Beatorum. »

Enchiridion capite 50, n. 9, ait: « Libero arbitrio malè utens (Adam), et se perdidit et ipsum. » Idem alibi passim repetit; sed libertas Adæ erat libertas indifferentiæ; ergo. — Resp. Augustinum, ut ex ipsis objectis verbis et ex contextu patet, his et similibus unicè intendere Adam peccando sibi et posteris perdidisse libertatem à concupiscentiâ, ignorantia, aliisque miseriis, quâ fruebatur in paradiso; item robustam ad bonum faciendum potestatem, non autem activam ad bonum et malum indifferentiam.

Libro 11 Operis imperfecti, n. 44, hanc peccati definitionem, quam antea attulerat, et quæ placuerat Juliano: « Peccatum est voluntas admittendi vel retinendi quod justitia vetat, unde liberum est abstinere, dicit spectâsse tantum peccatum quod erat tantummodò peccatum (quale fuit Adæ peccatum) non peccatum quod peccatum est et poena peccati » (qualia sunt nostra peccata); libertas igitur indifferentiæ in præsentî statu non remanet. — Resp. velle Augustinum suam definitionem intellectam de peccato à quo plenè et perfectè liberum est abstinere tangere solum actuale Adæ peccatum, quod peccatum tantummodò fuit: secus intellectum de vero peccato à quo imperfectè et difficile est abstinere. Scilicet Julianus hâc definitione utebatur ad amovendum peccatum originale, à quo, utpote naturæ propagatione contracto, liberum non est abstinere, et ad probandum liberum arbitrium per peccatum non fuisse attenuatum. Id totum elucet ex n. 47, ubi ait: Multa sunt quæ agunt

homines mala, à quibus liberum est eis abstinere, sed nulli tam liberum est, quàm illi fuit qui Deo suo, à quo erat conditus rectus, nullo prorsus vitio depravatus adstabat. »

Eodem libro, cap. 103, Julianum sic affatur : « Multum erras qui vel necessitatem nullam putas esse peccandi, vel eam non intelligis illius peccati esse pœnam; quod nullâ necessitate commissum est. » Item libro 1 Retractionem, cap. 15, n. 3, hæc habet : « Qui cogenti cupiditati bonâ voluntate non potest resistere, et ideo facit contra præcepta justitiæ, jam hoc ita peccatum est ut sit etiam pœna peccati; » peccata igitur actualia in præsentī statu verâ necessitate fiunt. Resp. ex citato capite 103 clucere Augustinum per necessitatem peccandi quâ laboramus intelligere vehementem inclinationem ad peccandum ortam ex primi parentis delicto quam inviti patimur. Ibi enim citat istud Apostoli Rom. cap. 7: *Non quod volo facio bonum, sed quod nolo malum hoc ago*. Vehemens autem illa inclinatio, sive cupiditas infert voluntati moralem coactionem sive necessitatem, cui, nisi gratia subvenit, resistere nequit. Augustinum id unicè intendere evincunt prius citata testimonia, et istud libro 2 de peccatorum Meritis et Remissione, cap. 4, n. 4: « In grandibus baptizatis... quidquid eidem concupiscentiæ mens ad peccandum consentit propriæ voluntatis est... ad agonem manet (concupiscentia) non sibi ad illicita consentientibus nihil omninò nocitura. »

Libro 5 Operis imperfecti cap. 61 ait : « Neque fine virtute vivemus quando nobis concedetur ne à Domino aliquando recedere possimus, quoniam nec velle poterimus; » ergo absque flexibili libertate laudi, justitiæ, et virtuti locus est. — Resp. 1° Jansenium concedere Beatos et damnatos, utpote in termino, non mereri aut demereri; argumentum ergo nimis probat. Resp. 2° hæc et similia significare absque flexibili libertate circa finem, sive beatitudinem, non circa media ad finem, sive ad beatitudinem conducentia, virtuti et laudi esse locum; voluntas nempe diverso modo finem et media apprehendit; finem non coactè quidem, sed necessariè, media verò nec coactè nec necessariè, id est, cum libertate electionis et indifferentiæ ad merendum vel demerendum requisitæ.

Tandem Augustinus libertatem, quæ sit potestas agendi vel non agendi ubique in Pelagianis et Semipelagianis reprehendit; ergo. — Rep. Augustinum hanc in illis hæreticis potestatem improbare pravo tantum ipsorum sensu intel-

lectam; contendebant scilicet nostram libertatem non solum quoad essentiam, sed etiam quoad omnes qualitates sive affectiones ipsam esse libertatem cum quâ creatus est Adam, et insuper illam non indigere adiutorio ad bonum operandum, ut patet tum ex illorum objectionibus cum ex Augustini responsis.

MOMENTUM QUARTUM. — *Ex aliis Patribus.* —

Jansenius, libro 6 de Gratiâ Christi, suam hanc assertionem cap. 6, *necessitas coactionis, non simplex et voluntaria, libertati repugnat* (in statu naturæ lapsæ) cap. 12 et sequentibus probare aggressus est auctoritate Patrum qui ante et post Augustinum floruerunt, quinimò theologorum antiquorum. Ideò autem Patres ab Augustino et ejus discipulis diversos non deseruit, ut solet in aliis controversiis, quia libertatis interitus capitale ejus erat dogma quo semel stabilito sola gratia invincibiliter victrix in præsentī statu necessariè foret admittenda. Hinc nonnullos præter Augustinum Patres utriusque Ecclesiæ adducere necessarium duximus. Itaque divus Clemens Alexandrinus, libro 4 Stromatum, versùs finem, ait : « Id est in potestate nostrâ, cujus ex æquo sumus domini, et ejus quod ei adversatur ut... credere vel non credere. » Libro 1 circa medium dixerat : « Nec laudes, nec vituperationes, nec honores, nec supplicia justa sunt si anima non habeat liberam potestatem et appetendi et agnoscendi. »

Origenes, Clementis discipulus, apud Eusebium, libro 6 de Præparatione, cap. 11, ad hanc objectionem, *futurorum prænotio arbitrii nostri potestatem tollit*, respondet : « Nulla prorsus à divinâ prænotione rebus, quas prævidet, necessitas imponitur... quia quodammodò parem in utramque partem vim facultatum ostendit. » In ancipiti igitur ad utrumlibet arbitrii potestate libertas consistit, quam ideo tolleret Dei præscientia, si voluntatem uni parti illigare. Idem docet libro 3 de Principiis, cap. 1.

Divus Athanasius, oratione 4 contra Arianos, probat Deum naturâ esse bonum, non voluntate, quia si esset bonus voluntate fieri posset ut non esset bonus; *deliberare enim, eligereque in utramque partem momenta sua habet*. Ubi nota voluntatis nomen sumi pro volitione quæ à facultate ad utrumlibet indifferenter oritur, non pro volitione naturali etiam necessitate elicitâ. Item in exhortatione ad Gentes dicit : « Anima liberi arbitrii cum existat, potest ut ad bona se inclinare, ita bona quoque aversari. »

Divus Gregorius Nazianzenus in Apologetico circa initium hæc habet: « Arbitrii libertas par-
rem in utramque partem motum habet. »

Divus Gregorius Nyssenus oratione catechetica, cap. 51, dicit: « Qui in universitatem liberam habet potestatem, propter summum in homines honorem, dimisit etiam aliquid in nostrâ potestate, cujus unusquisque nostrum est dominus. Hoc autem est liberi arbitrii libera electio. » Hæc brevius expressit Eusebius, libro 6 de Præparatione, dicendo: « In nostrâ positum est potestate quod ex propriæ electionis motione fit. »

Tandem, ne longior sim, divus Joannes Damascenus, libro 2 orthodoxæ fidei cap. 25 et 26, totus est in activâ arbitrii indifferentiâ ad utrumlibet demonstrandâ. Hæc, inquit cap. 26, arbitraria ac nobis libera sunt, quæ in utramque partem æquè contingere possunt... velut mentiri vel non mentiri... cæteraque ejusmodi in quibus et virtutis et vitii munus versatur; horum enim libera penès nos est potestas.

Concinnunt Latini. Sanctus Hilarius, Commentario in Psalmum 2: « Unicuique nostrum, inquit, libertatem vitæ sensumque permisit, non necessitatem in alterutrum affligens. »

Sanctus Optatus Milevitanus, libro 7 adversus Parmenianum, in exordio, ait: « Homicida scelus potest facere, potest etiam non facere, et cætera ejusmodi in quibus liberum habetur arbitrium. »

Denique divus Bernardus, quem suas in partes trahere nititur Jansenius, libro de Gratiâ et libero Arbitrio cap 2, hæc habet: « Est ratio data voluntati ut instruat illam, non ut destruat. Destrueret autem si necessitatem ei ullam imponeret, quominus liberè pro arbitrio sese volveret, sive in malum consentiens appetitui, sive in bonum gratiam sequens. » Ibi necessitas, quæ libertati opponitur, ea ipsa dicitur quæ impedit quominus voluntas utrumlibet in partem pro arbitrio suo sese inflectat.

Jansenius commemoratam suam distinctionem duplicis necessitatis, *coactionis* et *simplicis*, quarum prima libertati nocet, secus altera eodem libro capitibus 12, 13 et seq., stabilire conatur suffragiis, ut diximus, doctorum qui ante et post gratiæ vindicem Augustinum vixerunt.

Illorum Patrum de libertate doctrinæ summa his comprehenditur effatis quibus majusculis litteris ad ostentationem millies exaratis in-

gens suum volumen adaugere voluit Ypressis: *Quidquid voluntariè fit liberè fit.... Ubi voluntas ibi libertas.... Quod non est coactum liberum est.... Libertas est consensus spontaneus.... Necessitas non tollit libertatem.*

Liberum arbitrium, inquit S. Prosper, libro adversus Collatorem, cap. 18, rei sibi placitæ spontaneus appetitus... divino justoque judicio actum, ut quæ fuit (Angelis) manendi voluntas fieret permanendi voluntaria felixque necessitas, » libro 1 de Vitâ contemplativâ.

Arbitrii libertas, inquit D. Joannes Damascenus libro 3 orthodoxæ fidei cap. 27, *nihil est aliud quàm voluntas.*

Concinit D. Bernardus libro de Gratiâ et libero Arbitrio sub initium. « Liberum arbitrium, inquit, est habitus animi liber sui, siquidem non cogitur, non extorquetur; est quippe voluntatis, non necessitatis.... Porro, ubi voluntas ibi libertas, et hoc est quod dici puto liberum arbitrium... Consensus nutus est voluntatis spontaneus, » etc.

Hæc omnia sic profert Jansenius libro 6 de Gratiâ Christi capitibus 13, 15, et 17. Verum hujus objectionis fucus brevi evanescet si sequentia ponderaveris.

1º Quemadmodum plures Patres Antenicæni, si prævidissent Arii hæresim, de Verbo non disseruissent ut disseruerunt, aut, v. g., Tertullianus si Antropomorphitarum insulsum dogma prænovisset nunquàm dixisset (dum erat Catholicus) *Deum esse corpus* (dicere voluit Deum esse substantiam sive quid reale). Ita Patres ante et post Augustinum, si sibi exploratus fuisset futurus Jansenii error, circa libertatem relatis effatis nunquàm usi fuissent.

2º Multiplici eoque vero et catholico sensu Patres libertatem finire potuerunt per *spontaneitatem*, et motum animi à coactione immunem; scilicet hæc definitio, si est inadæquata, non magis vitiosa est quàm ista imperfecta hominis definitio, *homo est animal....* Item cum coactionis nomen exprimere possit, et reipsa apud antiquos sæpius exprimat non solum violentiam ab extrinsecis causis illatam, sed etiam quamlibet veram necessitatem, quâ voluntas interiùs constringi potest, rectè hoc modo libertas dicitur *immunitas à coactione*. Tandem coactionis nomen significare potest, et reverà apud plures Patres, D. Thomam et theologos veteres significat naturalem instinctum, sive necessitatem, quò in ultimum finem rapitur voluntas, non quò media ad finem obtinendum

capessit; hæc enim media pro suo arbitrio eligit. Jam verò Jansenio et ejus discipulis probare incumbit Patres Augustino priores et posteriores accuratam libertatis definitionem afferre voluisse, aut *coactionis* vocem non relativis sensibus, sed pro solâ violentiâ exterius inflicta usurpasse; quod sanè nunquàm evincunt. Ipsi quippe objecti Patres hoc nomen sic non acceperunt. Etenim divus Prosper, libro adversus Collatorem cap. 48, disserit de libero arbitrio ante lapsum Adæ; ait enim ibidem: « Liberum arbitrium, id est, rei sibi placitæ spontaneus appetitus, ubi usum bonorum quæ acceperat (Adam) fastidivit, et vilescentibus suæ felicitatis præsidii, insanam cupiditatem et experientiam prævaricationis intendit, bibit omne vitiorum venenum, et totam naturam hominis intemperantiæ suæ ebrietate maledfecit. » At liberum arbitrium insontis Adæ ex ipso Jansenio plenissimâ ad utrumlibet indifferentiâ erat præditum, nec concupiscentiæ aut gratiæ victricis dominio erat subditum; ergo per spontaneitatem indifferentiam non exclusit S. doctor. Idem elucet ex ultimo textu, in quo agitur de Angelis planè liberis in ipso Jansenii systemate ad manendum aut non manendum in justitiâ, qui in termino constituti felici necessitate libertatem sensu antea exposito non explodente Deum diligunt. Unde Jansenii de libertate dogma his testimoniis totum pessumdatur, tantum abest ut stabilia-

Divus Joannes Damascenus meritò dixit libertatem *nihil aliud esse quàm voluntatem*, tum quia libertas residet in voluntate, tum quia voluntas stricto et usitato sensu accepta est potestas agendi vel non agendi; hunc autem sensum intendisse S. doctorem, non autem id quod voluntariè fit, etsi necessariè, fieri liberè, evidens est ex præcedente capite 26 supra citato.

Denique divus Bernardus *spontaneitatis* nomine intellexit immunitatem tum à necessitate cum à coactione; 1^o enim ibi agit de Adam quem asserit culpandum esse quia *voluntate cecidit, et peccasse quia liberum ei fuit, nec aliunde profectò liberum quàm ex libertate arbitrii*; sed, ut dictum est, Adam expers fuit et coactionis et necessitatis... 2^o Verbis in probatione citatis necessitatem à libertate amovet... 3^o Ipsum verbum, *cogere*, prout opponitur necessitati, sumi demonstrant ipsa verba objecta, *non cogitur*, etc.; est *quippe voluntatis, non necessitatis*. Unde *coactio*, de quâ S. doctor, non est

vis propriè dicta, quæ volendi facultati infligi nequit, sed necessitas simplex.

Exemplo autem demonum (quod ex Patribus objicit Jansenius) non probatur actibus necessariè elicitis peccari aut posse peccari; « tam enim Angeli sancti, inquit Bellarminus libro 3 de Gratia et libero Arbitrio cap. 44, quàm mali daemones, respectu finis ultimi, non habent liberum arbitrium à necessitate, sed solum à coactione; tamen respectu mediorum liberum arbitrium habent etiam à necessitate, quia multa faciunt quæ possunt non facere, et contra; et in hujusmodi daemones verè peccant, et boni Angeli opus verè laudabile faciunt, quamvis nec pœna, nec præmium essenziale crescere possit, cum utrique sint in termino, et omnia ipsorum opera ad exercitium damnationis vel gloriæ sempiternæ pertineant. Itaque propositio Calvinii (si viveret, adderet et Jansenii) daemones semper necessariè malè agunt, in aliquo sensu falsa est, in aliquo vera. Verum siquidem in genere, eos non posse nisi malè agere, falsum tamen est in particulari omnia mala quæ faciunt illos necessariè facere; possunt enim multa non facere quæ faciunt, et ideò non necessitate sed voluntate peccata committunt. »

MOMENTUM QUINTUM. — *Ex theologorum consensu.* — Jansenius, libro 6 de Gratia Christi, à capite 18 ad 35, plures pro se adducit theologos usque ad Gabrielem Biel, qui mortuus est anno 1495, inter quos annuere ausus est præclara theologiæ scholasticæ lumina, SS. Thomam et Bonaventuram. Igitur nobis concedit theologos omnes qui floruerunt ab anno 1495 ad suum tempus, id est, annum 1638, et ideò ipsum amicum suum Guillelmum Estium.

Longè aliter senserat doctissimus et piissimus cardinalis Robertus Bellarminus, quem, ut diximus, Henricus Norisius, ceu *egregium Ecclesiæ catholicæ lumen* colit et veneratur. Etenim libro 3 de Gratia et libero Arbitrio, cap. 5, hæc scribit: « Sequuntur Petrum Lombardum theologi scholastici omnes, ut Albertus in 2 Sententiarum, distinctione 24, Alexander, S. Bonaventura in 2 distinctione 25, S. Thomas tum alibi tum in q. 6 de Malo, quæ est de electione, articulo unico, ubi scribit hæresim esse non solum apud theologos, sed etiam apud philosophos affirmare ad liberam electionem non requiri libertatem à necessitate, sed satis esse eam, quæ est à coactione; et rectè hoc dicit; nam et Philosophus

libro 3 Ethicorum, cap. 4 et 5, distinguit voluntarium à libero, quòd ad liberum pertineat posse facere et non facere; et naturalis ratio idem ostendit.)

Ut calumnia venerando theologorum choro à Jansenio impacta evanida sit, sufficiet perfectò ostendisse eorum principes, Lombardum, et SS. Thomam et Bonaventuram, non solùm Yprensis systemati non fuisse, sed etiam illud confutasse. Theologi quippe pro singulari suà in Angelicum et Seraphicum doctorem reverentià ab utriusque doctrinà, quæ Ecclesiæ fuit accepta, recedere nefas duxissent. Itaque. Magister Sententiarum loco mox à Bellarmino citato, imò à Calvino et Jansenio objecto, hæc docet: *Liberum arbitrium est potestas libera ad utrumlibet, quia liberè potest moveri ad hoc vel illud.* Consistit ergo libertas in indifferenti voluntatis *ad utrumlibet*, sive in activà potestate agendi hoc vel illud, hoc agendi vel non agendi. Equidem ibidem ait, ut objicit Jansenius eodem libro 6, cap. 20: *Voluntas semper à necessitate libera est, et nunquàm cogi potest.* Verùm magistrum loqui non solùm de *necessitate coactionis*, ut placet Jansenio, sed etiam de necessitate simplici, sive determinatione ad unum, patet tum ex se, tum ex contextu, tum ex Estio, qui in hunc locum observat, « mirum non esse quòd Magister coactionem strictè non sumpserit, cùm de Deo dicat Ecclesia, ipsa te cogat pietas... » Pariter dicit Lombardus: « Liberum dicitur arbitrium, quantum ad voluntatem quia voluntariè movetur, et spontaneo appetitu ferri ad ea potest quæ bona vel mala judicat; » at, inquit idem Estius, spontaneum accepit « pro eo quòd ita agit ut possit non agere, utpote nec violentià nec naturali necessitate constrictum, ac determinatum in alteram partem; » quæ Jansenii amici responsio mirum in modum confirmatur ex doctrinà ejusdem distinctionis; in eà enim tradit Magister, ut modò diximus, libertatem esse *potestatem ad utrumlibet*... Liberum arbitrium non esse præsentium, vel præteritorum, sed futurorum duntaxat, quia præsentia et præterita determinata sunt ad unum.... Liberum arbitrium ad utrumlibet indeterminatum esse debere.... In Deo esse liberum arbitrium, quia licet non habeat potestatem ad opposita, sive non possit malè agere, tamen non necessitate agit quod agit, et potuisset illud non agere... Libertatem à necessitate fuisse ante peccatum, et remansisse etiam post peccatum, sed libertatem à peccato et miserià fuisse ante

peccatum, non postea, etc. Magistrum sequitur D. Thomas, cujus Sententiarum libros exposuit.

Jam dixit questione 6 de Malo, à Bellarmino laudatà, hæreticum esse asserere esse *demeritorium vel meritum quod aliquis sic ex necessitate agit ut vitare non possit*; quæ dubio procul rem evincunt. Idem docet in questionibus de veritate, de potentià, in libris Sententiarum, et etiam in Summà.

Quæstione 22 de Veritate, a. 6, in c., hæc peremptoria statuit: « Cùm autem voluntas dicatur libera, in quantum necessitatem non habet, libertas voluntatis in tribus considerabitur; scilicet quantum ad actum, in quantum potest velle vel non velle, et quantum ad objectum, in quantum potest velle hoc vel illud, et ejus oppositum, et quantum ad ordinem finis, in quantum potest velle bonum, vel malum. Quantum ad primum horum, inest libertas voluntati in quolibet statu naturæ, respectu cujuslibet objecti. Secundum verò horum est respectu quorundam objectorum, scilicet respectu eorum quæ sunt ad finem, et non ipsius finis, et etiam secundum quemlibet statum naturæ. Tertium verò non est respectu omnium objectorum, nec respectu cujuslibet statûs naturæ, sed illius tantum, in quo natura deficere potest. » Ibi à libertate non coactionem, sed necessitatem arceat. Ibi simplicem necessitatem *ab actu* removens erigit libertatem *contradictionis*, quâ potest voluntas actum elicere vel non elicere. Ibi necessitatem ab objecto excludens *impropriam contrarietatis* libertatem stabilit, quæ potest hoc vel illud objectum appetere. Ibi determinationem ratione finis *explo-*dens *propriam contrarietatis* libertatem tangit, quæ bonum inter et malum, æquali utriusque accersendi potentià, fluctuat.

Quæstione 2 de Potentià, articulo 3, dicit: « Voluntas in quantum voluntas, cùm sit libera, ad utrumlibet se habet; potest enim voluntas agere, vel non agere, sic vel sic facere, velle et non velle. » Hoc igitur sensu libera est, quòd non sit determinata ad unum, sed sese ad hoc vel illud determinet.

In 2 Sententiarum, distinctione 25, q. 1, a. 1, hæc habet: « Ad libertatem arbitrii pertinet, ut actionem aliquam facere vel non facere possit, et hoc Deo convenit; bona enim quæ facit potest non facere. » Nullus hic cavillationi locus; homo non est liberi arbitrii nisi quia potest agere vel non agere; Deus non est liber nisi quatenus bona quæ operatur potest non operari.

In Summâ p. 1, q. 19, a. 40, in c., ita sancit : « Dicendum quòd liberum arbitrium habemus respectu eorum quæ non necessario volumus, vel naturali instinctu ; non enim ad liberum arbitrium pertinet quòd volumus esse felices, sed ad naturalem instinctum ; unde et alia animalia, quæ naturali instinctu moventur ad aliquid, non dicuntur libero arbitrio moveri.

Cùm igitur Deus ex necessitate suam bonitatem velit, alia verò non ex necessitate..... respectu eorum, quæ non necessitate vult, liberum habet arbitrium. » Eat nunc Jansenius, et obganniat, amorem quo se Deus necessario diligit, vel Spiritus sancti ex Patre et Filio processionem, liberum arbitrium attingere, aut fieri non posse (ut contendit libro 7 de gratiâ Christi cap. 13) *ut eadem potentia voluntatis circa finem versetur ut natura, et in eâ quæ sunt ad finem ut potentia libera.*

Multa opponunt adversarii ex citatis D. Thomæ operibus, quæ ipsis acceptissimus Estius in 2 Sententiarum, distinctione 24, paragrapho 2, feliciter diluit, ut et Dechampius libro 3, disputatione 2, cap. 21. Satis erit hic observasse eas objectiones desumi ex locis in quibus S. doctor non de libero arbitrio, sed de aliis rebus disserit, aut libertatem nonnisi leviter attingit, etc. Itaque divus Thomas, inquit, q. 10 de Potentiâ, articulo 2, ad 5, dicit *libertatem violentiæ vel coactioni opponi.* Verùm, ibi distinguens libertatem à libero arbitrio, per libertatem intelligit *libertiam*, sive *spontaneitatem*, quam ideò coactioni, quæ sola illam destruit, opponit.

Primâ parte, q. 85, articulo 2, ad 3, ait : « Homo peccando liberum arbitrium perdidit, non quantum ad libertatem naturalem, quæ est à coactione, sed quantum ad libertatem, quæ est à culpâ et miseriâ. » Verùm ibi coactionem accipit pro necessitate, sive determinatione ad unum. Ibidem scilicet, in corpore, dixerat liberum arbitrium non esse *habitum*, sed *potentiam*, quia liberum arbitrium ad multa etiam opposita indeterminatum sive indifferens est, per habitum verò homo inflectitur ad unum.

Amicus amico, sanctus sancto, doctor doctori, Bonaventura Aquinati blanditur. In 1 Sententiarum, distinctione 38, q. 1, docet Dei præsentia pessumdandum esse liberum arbitrium si *necessitatem* imponeret. Simplex ergo necessitas libertati capitaliter infensa est. In 2 Sententiarum, distinctione 41, q. 1, ait : *Nemo etiam venialiter peccat in eo quod nullo modo potest prohibere, nec etiam potuit præcavere.*

Peccatum igitur est liberum quia vitari potest. In 3 Sententiarum, distinctione 12, q. 1, de Christo dicit : « Sic decebat hominem..... constitui ut..... haberet vertibilitatem arbitrii (flexibilitatem ad bonum et malum)..... Sed Christus habuit aliquid supra hominem ; (ideò decuit) quòd sibi fieret aliquid speciale privilegium, ut esset in eo liberalitas (libertas) obsequii sine vertibilitate arbitrii ; sicut et in divinâ voluntate videmus, quòd liberaliter (liberè) nobis bona impendit, et facit ; nullam tamen in eo est ponere vertibilitatem ; » Christus ergo, licet potestatem non habuerit ad opposita, bonum et malum, habuit tamen libertatem *exercitii*, sive *obsequii*, id est, potestatem faciendi et non faciendi, hoc vel illo modo, in quâ liberi arbitrii vis sita est ; Deus ergo, licet libertatem non habeat ad bonum et malum, sive *vertibilitatem arbitrii*, tamen sine ullâ necessitate bona nobis impendit ; sed ex Bonaventurâ in his homo Christo par est, unâ exceptâ *arbitrii vertibilitate*, id est, flexibilitate ad bonum et malum ; ergo.

Sed, inquit, Bonaventura in 2 Sententiarum, distinctione 25 ad textum, et articulo 2, q. 1, dicit : « Cùm duplex sit necessitas, videlicet coactionis et immutabilitatis, necessitas coactionis repugnat libertati arbitrii, non autem necessitas immutabilitatis ; » ergo. Resp. cum Estio hos in locos Bonaventuram liberum arbitrium sub duplici respectu hic considerare, nempe ut *liberum*, et ut *deliberans*. « Quatenus liberum est dicit illud esse posse respectu voluntarii, sicut patet in Deo et in Beatis, in quibus necessitatem quidem habet immutabilitatis, non tamen coactionis ; quatenus autem deliberans, non est nisi de contingenti, quia nemo deliberat de necessario et impossibili. » Intendit igitur S. doctor actiones necessarias in Deo et Beatis esse voluntarias et ideò immunes à coactione, et hoc sensu liberas ; actiones verò orientes ex voluntate non simplici, sed *deliberante et electivâ*, non esse necessarias, sed ita elici ut possent non elici.

Exponendi erunt alii quos objiciunt theologi eo modo quo explicuimus Petri Lombardi et SS. Thomæ et Bonaventuræ effata.

MOMENTUM ULTIMUM. *Ex rationibus theologicis.*

— Prima. Consentiant omnes homines, ipso fatente domino Nicole in Symbolo, neminem esse laudandum, vituperandumve, puniendum aut remunerandum, nisi quando ea fecit vel non fecit quæ facere aut non facere poterat. Hinc Augustinus libro de duabus Animabus

contra Manichæos, cap. 11, n. 15, dicit « ista cantare in montibus pastores, in theatris poetas, indoctos in circulis, doctos in bibliothecis, magistros in scholis, antistites in locis sacratis, et in orbe terrarum genus humanum; » quæ, utpote ex sensu intimo et omnium populorum consensu hausta ipsum revocasse, ubi Pelagianos impugnavit, dicere insulsum foret.

Secunda. Systema, in quo sine maximâ difficultate intelligitur concordia libertatis cum gratiæ motione, verum non est, tum ex Apostolo Rom. (cap. 9, et cap. 11, cum ex Augustino, libro de Gratiâ Christi, cap. 47, n. 52, ubi ait : « Ista questio de arbitrio voluntatis et Dei gratiâ ita est ad discernendum difficilis, ut quando defenditur liberum arbitrium, negari Dei gratia videatur, quando autem asseritur Dei gratia, liberum arbitrium putetur auferri; » sed concordia ista illicò intelligitur, si libertas consistat in immunitate à coactione, non necessitate; etenim sub motione gratiæ invictissimè victricis actio voluntatis est spontanea, sicut productio Spiritûs sancti, etsi maximè necessaria, est actio voluntaria Patris et Filii.

Tertia desumitur ex absurdis ex sententiâ Calvinî et Jansenii circa libertatem erumpentibus. Scilicet, si ad liberum arbitrium sufficeret libertas à coactione, infantes, insani, etc., actu essent liberi, ut et Deus in generatione Filii, et homo in actuali generali appetitu beatitudinis; illi enim omnes spontè agunt; falsum consequens; ergo.

Quarta. Systema ad liberum arbitrium immunitatem à coactione, non necessitate exigens, videtur repugnare. Etenim liberum arbitrium non est voluntas præcisè, sed voluntas quatenus est principium actionis; at licet voluntas præcisè, sive simplex, possit concipi cum immunitate à solâ coactione (talís quippe voluntas felicitatis saltem quoad specificationem), potestas tamen electiva non videtur conciliari posse cum necessitate, sive determinatione ad unum, siquidem electio est inter plura cui ideò præit consultatio.

Argumentum tandem eruunt Dechampius et ejus pedissequi Honoratus Tournely ejusque redactores ex absurdis, sive incommodis ex systemate delectationis relativè victricis erumpentibus. Verùm, cum illud argumentum non minùs impetere videatur catholicam quorundam Augustinianorum de delectatione per gradus victricis sententiam quàm relatum Jansenii systema, idcirco iis referendis supersedemus.

Objicit Jansenius, libro 7 de Gratiâ Christi,

cap. 14 et 15, plura absurda scaturire ex systemate liberum arbitrium in contradictionis indifferentiâ collocante. Hæc autem urget.

Primum. Si liberum arbitrium consisteret in indifferentiâ contradictionis, sive agendi et non agendi, gratia, concupiscentia et habitus directè repugnarent libero arbitrio; indifferentia enim illa sita est in quâdam æquali inflexione in agendum vel non agendum, quæ necessariè turbatur per inflexionem in bonum aut malum, gratiæ, concupiscentiæ et habituum propriam; insulsum consequens; ergo. — Resp. 1^o : Retorqueo argumentum. Si liberum arbitrium insontis Adæ situm fuisset in contradictionis indifferentiâ (ut constat, et docet Jansenius), gratia et habitus illius statûs è diametro repugnassent arbitrii libertati, siquidem gratia illa et illi habitus Adæ voluntatem in unam partem inflexissent; absurdum consequens; ergo. — Quam attulerit solutionem Yprensîs et nos afferemus. Resp. 2^o : Distinguo majorem : Si liberum arbitrium efficeret indifferentia contradictionis perfectum voluntatis æquilibrium importans, gratia læderet liberum arbitrium, conc.; si liberum arbitrium procrearet indifferentia contradictionis potestatem agendi vel non agendi præcisè includens, gratia violaret liberum arbitrium, nego maj.; et contra, dist. minore, nego consequentiam. Manifestum est perfectam inter utramque partem suspensionem perturbari per inclinationem in alterutram partem, gratiâ, concupiscentiâ, vel habitibus collatam, et ideò indifferentiam contradictionis sub hoc respectu consideratam tolli per propensionem in bonum aut malum, in agendum vel non agendum, quam infert gratia vel concupiscentia. Verùm indifferentia contradictionis accepta (ut hic accipitur) pro immunitate à quâcumque verâ necessitate, alterutram partem sequendi, non destruit per inflexionem in alterutram partem cœlesti vel terrenâ delectatione invecam, quia voluntas sic inclinata, utpote ab omni verâ necessitate expedita, semper potest illam inclinationem, si libuerit, excutere.

Secundum. Si indifferentia contradictionis efficeret liberum arbitrium, meritum bonum et malum eò minus esset et decoloratius quò quis in bono vel malo fortioribus habitibus esset infixus; meritum quippe ac demeritum ex libero arbitrio maximè ponderatur, et ideò cum illo æquè decrescere debet; absurdum consequens; ergo, etc. — Resp. 1^o, ut supra : Retorqueo argumentum. Si indifferentia contradictionis efformasset liberum arbitrium in statu inno-

centiæ, bonum et malum eò minus fuisset in statu illo quò quis in bono vel malo magis fuisset obfirmatus; absurdum conseq. — Quam iterum suppeditabit responsionem Jansenius, liquescere faciet argumentum. Resp. 2^o: Nego maiorem et ejus probationem. Indifferentia enim, quæ libertatis essentiam in quolibet statu constituit, de quâ solâ hic res est, utpote præcisè consistens, ut diximus, in immunitate à verâ necessitate, quæ *ut sic* crescere aut decrescere nequit, per habitus nec auferri nec extenuari potest.

Urgeri tamen potest argumentum in hunc modum: Immunitas à propensione in alterutram partem, quæ, ut dictum est, arbitrii indifferentiæ est accidentalis, meritum aut demeritum amplificat; qui enim, v. g., bonum operatur ad quod non est proclivis, magis dubio procul meretur quàm si ad illud esset proclivis, cum ejus actio maiorem importet conatum; at ex concessis per habitus illa tollitur immunitas, cum in alterutram partem inclinent; ergo imminuunt meritum aut demeritum. — Resp. 1^o, ut supra, hæc non magis spectare statum naturæ lapsæ quàm statum naturæ integræ, et ideò adversariis esse solvenda. Resp. 2^o, certum non esse commemoratam indifferentiam meritum adaugere, cum inter theologos et philosophos alii negent, alii asserunt. Resp. 3^o: Distinguo maiorem: Immunitas à propensione in alterutram partem meritum aut demeritum adauget ex aliquâ parte, esto (cum id sit controversum). Ex omni parte, nego maiorem; et concessâ minore, distingo cons. ad sensum majoris. Etenim, ut allato exemplo inhæream, qui castitatis actum exercet, ad quem parum aut nullatenus proclivis est, magis ex allatâ ratione mereri videtur, et sub hoc respectu privatio propensionis auget meritum; at si ille eundem actum exerceret ex longo habitu, majus acquireret meritum, quia per habitum diuturnâ actuum repetitione acquisitum operaretur, et sub hoc respectu immunitas proclivitatæ non auget, sed minuit meritum. Unde vulgò docent philosophi eos plus absolutè mereri qui ex inveteratâ consuetudine quàm qui sine illâ consuetudine eundem virtutis actum eliciunt. Cum autem illud verum sit tam in integrâ quàm in corruptâ naturâ, immeritò sanè Jansenius asserit, meritum eò minus esse et decoloratius quò quis in bono firmioribus habitibus radicans fuerit.

Tertium. Si liberum arbitrium contradictionis indifferentiâ constitueretur, Christus et

Beati e vi amoris beatifici omnem omninò libertatem amisissent adimplendî præcepta naturalia et positiva, quatenus præcepta sunt; absurdum consequens; ergo. — Resp. 1^o, hoc argumentum innocentie statui accommodatum ipsi Jansenio esse diluendum. Resp. 2^o, vel præcepta naturalia et divina cum motivo et omnibus adjunctis fuisse Christo ac Beatis esse absolutè et *indispensabiliter* præscripta, ita ut scilicet nulla prorsus ex illis adjunctis Christi arbitrio derelicta sint, aut voluntati Beatorum derelinquantur, vel non; si istud, planè ruit Jansenii argumentum; si illud, nulla reverà fuit in Christo, estve in Beatis, circa omnia illa libertas, cum in eis absit potestas ea ponendi, vel omittendi. Porrò theologî, ubi de his suo loco disserunt, vulgò docent Christum aut non accepisse à Patre moriendi præceptum, aut si acceperit, illud fuisse conditionatum, si nempe vellet ab eo dispensationem non petere, ipsumque in exequendis naturalibus et divinis præceptis liberum tantum fuisse circa varia adjuncta, quæ non imperabantur, et ideò adhibere vel præterire potuit. Quod attinet ad Beatos, quo sensu liberi sint supra exposuimus.

PRINCIPIA SOLUTIONUM. — Primum. Jansenius suum dogma de extinctione per avitum delictum libertatis *contradictionis* et *contrarietatis* quâ fruebatur insons Adam, et absolutâ necessitate in præsentî ordine delectationis relativè victricis voluntatem invicto modo determinantis ad bonum loco adjutorii *sine quo* innocentis Adæ libero arbitrio omnimodè derelicti, Jansenius, inquam, hoc suum dogma, utpote capitale, omni argumentorum genere probare aggressus est. Cum autem illud dogma, et omnia ferè argumenta quibus innititur, à Calvino per concilium Tridentinum damnato, acceperit, quomodò viri Ecclesiæ catholicæ amantes, et illius definitionibus addicti (quales sunt Augustiniani et Thomistæ), in Jansenianum systema propendere, illiusve momentis tangi possent?

Secundum. Cum plura Yprensis argumenta, ut commemoratum stabilit dogma, etiam ab innocentie statu removerent libertatem contradictionis et contrarietatis, ut et gratiam, cui voluntas, si vellet, dissentire poterat (quas tamen illo in statu meritò agnoscit Jansenius), illicò quis intelligit illa argumenta esse plumbea, et seipsis concidere.

Tertium. Inania effugia, quibus eludit Jansenius conciliorum et D. Augustini oracula, sive de gratiâ cui voluntas consentire vel dissentire potest si velit, sive de libertate quâ

agere vel non agere, bonum vel malum facere est in nostrâ potestate, ejus systematis absurditatem patelaciunt; quid enim magis absurdum quàm reponere, voluntatem posse dissentire gratiæ si *quod impossibile est velit ipsi dissentire?* Vel ideo ipsi consentire vel dissentire, posse, quia consentire vel dissentire, credere vel non credere, velle aut nolle, *officia sunt voluntatis*, sicut *munus intellectus est intelligere?* Quid insulsius quàm respondere esse in nostrâ potestate agere vel non agere, benè vel male facere, quia voluntas nostra *modo agit, modo non agit, modo benè, modo malè operatur?*

Quartum. Jansenius obscurorum quorundam Patrum et theologorum veterum circa libertatem et gratiæ vim effatorum latibula ingressus est, ut relatum sum systema lectorum animis instillaret. Scilicet illi libertatem finierunt *spontaneum appetitum, voluntariumve*; at statim evanescet difficultas, si attenderis definitionem illam, vel descriptionem, posse esse *partialem*... Illam posse designare spontaneitatem ipsi etiam necessitati oppositam... Illam posse connotare spontaneitatem respectu ultimi finis voluntariè sed necessariè instinctu naturali voliti, non respectu mediorum ad finem assequendum conducentium, etc. Et verò, voluntas stricto sensu accepta eos tantum comprehendit actus qui à facultate ad utrumlibet indifferente, et in utramque partem suamomenta habente, oriuntur.

Quintum. Ut ambiguam vocem, *voluntas*, Jansenii et ejus sectatorum cavillationibus subtrahas, præter mox observata attende voluntatem liberum arbitrium formaliter constituentem non esse simplicem voluntatem, quæ sit *libertatis à solâ coactione capax*, sed voluntatem quatenus est *electiva*, sive *principium electionis*, et ideo est coactionis, et cujuslibet veræ necessitatis ex se exclusiva.

Sextum. Ut eorundem argutias elimines, observa 1^o, Patres, et speciatim D. Thomam, aliquando *libertatem à libero arbitrio* distinxisse, et per illam libentiam, etiam cum necessitate subsistentem, per istud verò potentiam ad opposita se habentem, et quæ potest velle, vel non velle, intellexisse... 2^o Nos essentiam liberi arbitrii non constituere in *indifferentiâ contrarietatis*, sed in *indifferentiâ contradictionis*, cum quâ subsistere potest necessitas ad unum; Deus enim liberrimus est, et tamen peccare non potest, sive caret potestate faciendi malum, non ex *libero arbitrio* (ut obgarrit Jansenius), sed ex *naturâ suâ*. Hinc cum Julianus pugnet, *liberum non esse nisi quod duo potest velle*,

id est, *bonum et malum*, D. Augustinus sic eum revocit libro 1 Operis imperfecti (apud Jansenium libro 6 de Gratiâ Christi, cap. 7): *Liber et goDeus non est, qui malum non potest velle...* *Siccine Deum laudas, ut ei auferas libertatem?* Nihilominus fide constat hominem lapsum non solum *indifferentiâ contradictionis*, sed etiam *indifferentiâ contrarietatis* esse præditum. Quare Augustinus, Pelagianis ad liberum arbitrium *contrarietatis indifferentiam* exigentibus, ideo tantum litem intendit, quod hanc indifferetiam ad libertatis *essentiam* requirerent, sicutque illud omne libertate destituerent quod bonum et malum velle non potest, et insuper hominem in statu præsentis non magis ad malum quàm ad bonum inclinari pertinaciter assererent... 3^o Augustinum et alios Patres intelligentes per *libertatem facilitatem agendi benè*, et per *liberum arbitrium potestatem benè agendi vel non agendi*, interdum dixisse, *per Adæ peccatum periisse libertatem, non liberum arbitrium*... Item eos vehementem ad peccatum propensionem Adæ delicto invecam aliquando *peccandi necessitatem* appellasse.

Septimum. Necessitas gratiæ internæ, et admirabilis virtus quâ bonum opus à voluntate elicit, non explodit, destruitve, quinimò arguit, ipsius Augustini judicio, liberam et ab omni prorsus necessitate immunem ejusdem voluntatis cooperationem; aliàs S. doctor non tantum laborasset in conciliando libero arbitrio cum illâ gratiâ.

Octavum. Quæ adversus catholicum de libertate et gratiæ efficacîâ dogma argumenta suggerit ratio virum sapientem movere non debent; 1^o enim similia suppeditat ubi de summâ Dei immutabilitate cum summâ ejus libertate consociandâ res est... 2 Difficultates illæ quæ hucusque plenè dissipari non potuerunt, nec unquam, opinor, dissipabuntur, *fallunt*, ut olim aiebat Augustinus, *verisimilitudine*, et angustos humanæ rationis limites expromunt, non dogmatum illorum repugnantiam.

Nonum. Quam in diuturno suo cum Manichæis certamine, et frequentibus contra Stolicos, astrologos, et alios libertatis hostes velitationibus ex ipsis philosophis et communi hominum sensu arreptam concinnaverat liberi notionem (*id esse quod est in nostrâ potestate*), eximium gratiæ vindicem in postremâ cum Pelagianis concertatione abjurasse nemo nunquam ejus sapientiæ conscius et gloriæ cupidus in mentem suam induxit.

Decimum. Jansenius varia in catholicum de libertate et gratiæ efficaciam dogma absurda contorsit, et exsibilanda nobis malignè et invidiosè porrexit. Nos ista, quæ jam in ultimo momento delibavimus, in ipsius systema contorquemus, et exsibilanda ipsi benignè et amanter porrigimus. Si quod spontè, etsi necessariè fit, est liberum, et ideò omne voluntarium semper et necessariè liberum est, et *in entis potestate*. 1° Spiritus sancti productio est in Patris et Filii liberâ optione et electione; oritur enim ex voluntariâ utriusque actione.... 2° Liberum est Beatis ac in ipsorum potestate Deum amare, siquidem Deum spontè diligunt... 3° Liberum est Christo peccare; peccaret enim si vellet... 4° Justi laude digni forent etiamsi à sideribus simplicem benè operandi necessitatem exciperent; voluntariè nimirum agerent... 5° Sontes supplicio justè afficerentur, licet iisdem causis concitantibus voluntariè quidem, sed necessariò delinquerent.... 6° Dæmones etiam culpæ non essent expertes, si *naturaliter*, ut obganniabant Manichæi, malè agerent... 7° Necessitas quæ brutorum animantium appetitus in res sensibiles abripitur, non est libertati adversa, siquidem non est intrinseca coactio, et ideò in brutis illis nihil ad veram libertatem desiderandum est præter cognitionem.

Videat Yprensus utrum ista paradoxa, aut commenta, à suo systemate arcere possit, et an ea cum Augustini doctrinâ, christianâ pietate, et communi sensu (quos catholicâ sententiâ violari asserit) consociari possint.

ARTICULUS II.

De intrinseco gratiæ victricis Jansenianæ principio.

Ubi Yprensus systema delineavimus, delectationem indeliberatam in eo unicum esse pondus ac principium quo in præsentî statu voluntas ad agendum impellitur ac determinatur, et ideò totam nunc gratiæ efficaciam ex delectatione relativè sive per gradus victricis exoriri ostendimus. Hoc enim quasi perpetuò decantat, atque famosâ distinctione adjutorii *sine quo et quo*, et celebri Augustini testimonio: *Quod amplius nos delectat, secundum id operemur necesse est*, fundari prætendit, ut iterum probavimus.

Idem Jansenius, in statu præsentî, ut etiam observavimus, voluntatem sub motione delectationis indeliberatæ relativè superioris, cœlestis scilicet et terrenæ, alternantem subire ne-

cessitatem ad bonum, aut malum, atque adeò hoc duntaxat sensu ejus actus liberos esse quòd oriantur à voluntate, sive sint voluntarii, candidè fatetur et apertè docet.

Cum illud systema articulo præcedenti contritum sit, hic præcisè quæritur, an gratia efficax eo ipso quo dicitur esse formaliter delectatio victrix quatenus actuali oppositâ concupiscentiâ fortior est, eo ipso veram et relativam voluntati inferat necessitatem, et ideò sit ipsissimum Jansenii de duabus delectationibus dogma hæreticum quinque propositionum sensum necessariò complectens, aut saltem an illud dogma essentialiter involvat.

Circa hanc quæstionem, opiniones nonnullorum Catholicorum ex unâ parte, et Augustinianorum ex alterâ parte, perstringemus; deinde quid super his tenendum esse autemur, breviter retegimus.

Aperitur nonnullorum Catholicorum sententia.—Plures ex Molinistis præsertim, et novissimis hisce temporibus Honoratus Tournelius et ejus redactores, delectationis per gradus victricis systema à Jansenianâ hæresi nullâ prorsus arte expurgari posse absque ullâ dubitatione asserunt. His potissimum rationibus ducuntur: 1° Jansenius et acutissimi quique ejus sectatores, ex delectatione per gradus victricis quinque propositiones non solum deducunt, sed etiam necessariè et evidenter erumpere clamant..... 2° Vires gratiæ sive delectationis relativè victricis voluntatem *ut fortiores* determinant; voluntas enim, hanc delectatione perfusa per fortiorem ejus virtutem ad bonum infallibiliter determinatur; sed omnino impossibile est ut vires gratiæ, quæ *ut fortiores* determinant, superentur à debilioribus ad resistendum voluntatis viribus; voluntas enim in systemate gratiæ efficacis per delectationem relativè victricem ex solâ delectatione vires accipit, et ideò ex solâ delectatione terrestri oppositâ, cujus vires inferiores supponuntur. Unde delectatio relativè superior ex se veram et relativam infert necessitatem. Concedunt tamen, aut saltem non inficiantur, gratiam efficacem per delectationem *absolutè et simpliciter victricem* multum differre à gratiâ Jansenii relativè victricis, et ideò nullam inferre necessitatem.

Exponitur nonnullorum Augustinianorum sententia.—Una Augustinianorum classis censet omnes bonas aut malas voluntatis actiones oriri tanquam à principio à delectatione cœlesti aut terrenâ, et contendit hanc esse constan-

tem D. Augustini doctrinam, imprimis in celebri testimonio : *Quod amplius nos delectat, secundum id operemur necesse est*, quod, ut diximus, de delectatione indeliberatâ, non secus ac Jansenius, exponendum esse autumat. Hinc gratiæ efficaciam emanare facit ex delectatione relativè victrici, sive ex delectatione quatenus superat oppositam cupiditatem. Contendit autem delectationem relativè victricem non esse fundamentum hæresis Jansenianæ, sive quinque propositionum, sed ejus consecrarium duntaxat; fundamentum enim illius hæresis, inquit, est extinctio liberi arbitrii per peccatum ex quâ sequitur majorem delectationem, in conflictu minoris necessariò extorquere assensum liberi arbitrii, sicque ex illâ effluunt quinque propositiones. E converso, profitentur se admittere liberum arbitrium, licet attenuatum et inclinatum per peccatum, et idcirco posse etiam hic et nunc hominem, si velit, cuilibet delectationi consentire, vel dissentire, seque idcirco quinque propositiones in sensu à Jansenio intento, prout damnatæ sunt ab Innocentio X et Alexandro VII, ex corde improbare. Unde addit gratiam suam à gratiâ relativè victrici Jansenii in hoc potissimum discrepare quòd sua supponat in voluntate veram et relativam agendi vel non agendi potentiam, secus Janseniana. Quod attinet ad rationes adversariorum supra relatas, reponit 1^o, Jansenium et ejus discipulos aut malè ex delectatione relativè victrici quinque propositiones eruere, aut potiùs illos eas educere ex delectatione relativè victrici interitum liberi arbitrii supponente aut involvente..... 2^o Voluntatem, utpote activè indifferentem ad utrumlibet posse unâ cum concupiscentiâ delectationis superioris vires elidere et debellare. Addit ejusmodi rationes *fallere verisimilitudine*, ut aiebat Augustinus, et idcirco reipsâ solidas non esse.

Istud Augustinianorum systema exponit et defendit P. Bernens in fine primi tomii operis supra citati, illudque à pluribus antiquis et recentioribus theologis tum Augustinianis cum Thomistis propugnatum esse dicit, additque hanc fuisse celebris Norisii sententiam.

Quid super discrepantibus illis opinionibus tenendum sit? — Honoratus Tournely in fine tractatûs de Gratiâ hæc protulit : « Systematis duplicis delectationis relativè victricis primus... inventor est Jansenius... Novimus quidem orthodoxos theologos qui vim gratiæ efficacem colligunt... ex ipsius internâ delectatione absolute et simpliciter victrici, quique in gratiâ

sufficiente pares et æquales vires agnoscunt ad oppositam actualem concupiscentiam superandam; » verum qui gratiam velint esse victricem relativè, seu « ex superioritate graduum, quique non aliam sufficientem admittunt gratiam quàm viribus inferiore oppositæ superiori concupiscentiæ, non alios quàm Janseniani systematis defensores novimus. » Priùs dixerat : « Non desunt theologo qui vim et efficaciam gratiæ repetant ex delectatione ipsius simpliciter et absolute victrici; at nullus nisi qui Jansenii systema tueretur appellari hætenus potuit qui docuerit delectationem illam esse relativè, seu per gradus, victricem. » Rationem paulò ante attulerat, « quia ista delectatio recens excogitata est, et ex eâ quinque propositiones necessario fluxu dimanant. » Hinc unus ex ejus exscriptoribus hæc decretoriè pronuntiavit : « Ab errore Janseniano excusari nequit systema delectationis relativè sive per gradus victricis, qui ipsissimum est Jansenii systema quod hæreticum quinque propositionum sensum necessariò involvit ac complectitur. »

Hæc sanè scripsit ex vehementi suo causæ catholicæ adversus Jansenium et ejus defensores promovendæ ardore et studio vir eruditus et de Ecclesiâ benè meritus. Verum, si hisce temporibus vixisset, à tam gravis censuræ acrimoniâ profectò abstinuisset, et zelo secundum scientiam accensus catholicos tandem agnovisset delectationis gradualiter victricis patronos, eo ipso quo eam non necessitare asserunt. Etenim 1^o Benedictus XIV in Brevi suo ad supremum Hispanæ Inquisitionis præsidem in gratiam Cardinalis Norisii infra referendo, ait : « Augustiniani traducuntur tanquàm sectatores Baii et Jansenii; reponunt se humanæ libertatis esse fautores, et oppositiones pro viribus eliminant, cumque eorum sententia usque adhuc à Sede apostolicâ damnata non sit, nemo est qui non videat à nullo prætendi posse ut à suâ sententiâ discedant. » Certè Augustiniani, de quibus hic summus pontifex, non sunt Augustiniani delectationis absolute et simpliciter victricis defensores (agnoscit enim Tournely hanc delectationem Baio et Jansenio non esse acceptam, et libertatem non destruere); ergo sunt patroni et vindices delectationis relativè superioris, quæ reverà probata fuit Baio et Jansenio; ergo existunt theologo catholici qui hanc delectationem sensu à Janseniano diverso propugnant. Qui si Tournelio et ejus retractoribus ignoti fuerunt, certè Benedicto XIV

fuerunt explorati. Illorum autem Augustinianorum sententia dicente Benedicto XIV *hucusque à Sede apostolicà non est damnata* (etiam implicite), quia profitentur se humanæ libertatis fautores; ergo quinque Jansenii propositiones non sunt necessaria consecutaria delectationis relativè victricis; ergo qui admittendo illam delectationem cum eâ libertatem subsistere et interius et exterius profitentur, Janseniani erroris insinuari non possunt.

2º Cùm archiepiscopi Viennensis et Senonensis in Galliâ opera RR. Patrum Fulgentii Beelli, et Laurentii Berti velut Baianismi et Jansenismi erroribus conspersa Benedicto XIV denuntiassent, summus pontifex ea seriò examinandi provinciam demandavit cardinalibus Fortunato Tamburini, et Jacobo Bezozzi, et Patribus Antonio Bremond Dominicanorum generali, et Patri Balustraci Minoritæ Conventuali, à quibus cùm nullo errore infecta fuissent inventa, summus pontifex ea censurâ configi prohibuit; at Patres Beelli et Berti principium duplicis delectationis relativè victricis in illis operibus acerrimè propugnant; ergo.

3º Cùm R. P. Nicolaus Checzi, Societatis Jesu theologus, systema duarum delectationum ab Augustinianis propugnatum Janseniani erroris fulgine inspersisset in suis Dialogis, jubente sacrâ Congregatione Indicis anno 1754 sequentem emisit declarationem et retractationem: « Dialogo 8, lib. 2, ceu Jansenianum notare videor illorum theologorum systema qui dùm efficacitatem divinæ gratiæ in delectatione cœlesti gradibus superante terrenam constituunt, simul tamen rejiciunt quinque propositiones Jansenii; quin etiam dicere videor hujusmodi systema condemnatum expressè ab Ecclesiâ: scio adesse auctores catholicos, qui admittentes animam, non obstante quâcumque delectatione superiori, semper potiri libertate indifferentiæ, et verâ activâ potentiâ ad oppositum, ita ut justis nunquàm sint impossibilia divina præcepta, neque ipsis desit gratia per quam possibilia fiant, defendunt tanquàm catholicum supradictum systema, proindeque quidquid dixi toto illo Dialogo ad ostendendam conformitatem illius systematis cum doctrinâ Jansenii, et cum erroribus in quinque propositionibus contentis, protestor et declaro me id dixisse argumentandi gratiâ. » Manifestè loquitur P. Checzi de delectatione cœlesti relativè superiore, sive, quod idem est, gradibus superante terrenam, et agnoscit auctores catholicos

tum antiquos cùm recentiores hanc delectationem defendisse.

4º Cùm sententia delectationis relativè victricis à Benedicto XIV et sacrâ Congregatione Indicis catholica sit reputata, qui hanc sententiam ipsissimam esse Jansenismum obtundunt, amplam et legitimam Yprensus discipulis veterem suam fabellam renovandi ansam subministrant, scilicet *Jansenismum esse merum phantasma, et imaginariam hæresim*; si enim delectatio Augustinianorum per gradus superior sit catholica, et ipsum Jansenii dogma, indubiè Jansenismus fictitia est et prorsus commentitia hæresis.

5º Jansenius ideò duntaxat admittere videtur delectationem relativè victricem, quia per peccatum perit liberum arbitrium. Quamobrem duarum delectationum principium non primarium et formale, sed secundarium et accidentale ejus systematis fundamentum esse videtur. Caput enim septimum libri quarti de gratiâ Christi ita inscribit: *Delectationis necessitas oritur ex infirmitate voluntatis, quâ fit ut nihil boni amplecti possit nisi delectet*, etc.; et capite 9 ejusdem libri ait: « Necessitas delectationis cœlestis ad benè volendum et operandum, non ex naturâ voluntatis, sed ex ejus pœnâ proficiscitur. » Unde eodem capite 9 addit: « Voluntas per peccatum... in libidinum imperium præcipitata est, ex quibus fit ut in omnibus actionibus ante gratiam delectatione quâdam libidinosâ præeunte ac titillante provocetur, » etc. Unde Ecclesia quinque illius propositiones damnando, systematis duplicis delectationis relativè victricis mentionem non fecit; sed si res ita est, quod in Jansenio horruit Ecclesia, non fuit præcisè delectationis relativè superioris principium, sed extinctio liberi arbitrii.

Hinc meritò dixit P. Alexander in Historiâ seculi quinti: « Eos ferre non possum qui opiniones ab Ecclesiâ minimè damnatas, et in ejus sinu theologis impunè propugnari solitas, temerariis censuris inurunt, sicque, si veritatem (in se) non lædunt, charitatem tamen violent, et pacem Ecclesiæ perturbant. »

Ex his colliges delectationis per gradus victricis defensores habendos esse ut Catholicos eo ipso quo quinque propositiones ex eâ sequi negant, et easdem propositiones execrantur, etiamsi fortassis ex illâ reverà dimanent, eosque qui solos Jansenii discipulos delectationem relativè superiorem admisisse, aut admittere prætendunt, falli et hallucinari.

CAPUT II.

De variis circa gratiam efficacem scholæ systematibus (1).

Summè bonus et omnipotens Deus, qui in insonte quid liberum arbitrium, in sonte verò homine quid sua gratia posset exploratum facere voluit, se sine præjudicio liberi arbitrii, et ideò mirabili prorsus et ineffabili modo, in statu naturæ lapsæ per gratiam suam *velle et perficere* certò et infallibiliter *operaturum esse* variis tum in antiquo cùm in novo Fœdere oraculis declaravit. Exinde prodierunt diversa systemata ad dissipandas, quantum humana patiebatur imbecillitas, tam arcani dogmatis tenebras à theologis excogitata, laudabili quidem conatu, sed infelici admodum exitu. Enimverò systemata illa nedum inexplicabile illud sacramentum illustraverint, quinimò novis mysteriis obscuraverunt, aut præposteris explicationibus ac interpretationibus defloraverunt, atque etiam denigraverunt. Odia insuper et dissensiones in Ecclesiâ, in quâ pax et charitas vigere debent, ut et partium studium, innumerorum malorum fontem et originem, excitaverunt. Hæreticis demùm patentem aperuerunt campum perversa sua stabilendi et persuadendi dogmata, et Ecclesiæ proterviùs insultandi. Notum scilicet est, Jansenium et ejus discipulos delectatione relativè victrice, et prædeterminatione physicâ, suos errores, quos ex odio Moliniani et Suaresiani systematis conceperunt, roborare, aut colorare, atque criminari in Moliniano systemate *Semipelagianismum* ab Ecclesiâ tolerari, quod et fecit minister Juræus in suis cum domino Bossuetio disceputationibus.

Reverendus Pater Gabriel Daniel, in exiguo Tractatu de efficaciâ gratiæ, hanc controversiam ad rationis trutinam expendens, ut pluribus ejus Societatis theologis gentile fuit, cuncta super gratiæ efficaciâ systemata ad tria reduci posse docet; enimverò, ipso dicente, primum illam efficaciam reponit in agendi necessitate per gratiam voluntati impositâ (quale est systema Calvinianum et Jansenianum)... Secundum in præmotione voluntatem ad agen-

dum physicè prædeterminante (quale est systema Thomistarum, et eorum omnium qui admittunt gratiam *ex se*, id est, ex naturâ suâ, efficacem; qui enim, inquit, gratiam *moraliter* prædeterminare, aut moralem imponere necessitatem dicunt, etsi profiteantur se gratiam ex naturâ suâ efficacem admittere, illam tamen reverà non admittunt, cùm gratia moraliter tantum præmovens infallibilem cum effectu connexionem non habeat, quam è converso necessariè habet gratia ex naturâ suâ efficax)... Tertium in eâ omnimodâ infallibilitate, sive cum actione connexionem quam trahit ex Dei præscientiâ. Ad tertium illud systema reducit non solum systemata Suaresianum, sive Congruistarum, et Molinianum, sed etiam Augustinianorum, aut Thomistarum, quibus accepta est prædeterminatio *moraliter* præmovens, aut necessitas moralis, vel delectatio *moraliter* victrix, quia, ut dictum est, hujusmodi præmotio aut delectatio omnimodam infallibilitatem gratiæ non inserit.

Ex his evidens est virum acutissimum, si hæc suam sententiam clarè et candidè aperire non pertinuisset, debuisse commemorata systemata ad duo duntaxat redigere, scilicet ad Calvinianum Jansenianumque, et Suaresianum, Molinianumve; censet enim Thomistas, qui admittunt gratiam ex naturâ suâ efficacem, et *physicè* prædeterminantem, voluntatem verà et reali constringere necessitate. « Les Thomistes, inquit ibidem, disent que la grâce n'est efficace par sa nature, que parce que l'effet ou le consentement de la volonté en est inséparable; s'ils ne disaient que cela, on comprendrait aussi aisément leur pensée que celle de Jansénius ou de Calvin; car si cette liaison est infallible par la nature de la grâce même, il paraît qu'elle est absolument nécessaire; elle ne peut être nécessaire que parce que la grâce produit nécessairement son effet, et si cela est, elle nécessite la volonté; voilà une idée claire de la grâce efficace par elle-même; mais, ce qui cause ici de l'embarras, et ce qui obscurcit cette idée, c'est que les Thomistes... en nous disant que la grâce a de sa nature une liaison infallible avec son effet, nient en même temps que cette grâce nécessite la volonté à agir; c'est qu'ils disent que par sa nature elle la détermine physiquement, et cependant qu'elle ne la nécessite pas; que, quoique cette grâce par sa nature soit inséparable de son effet, cependant la volonté peut la rejeter, et qu'elle a un véritable pouvoir de n'y pas consentir.

(1) Cùm hic lacuna non nullius profectò momenti, de Congruismo scilicet, appareat, quæstionem hanc more appendix tractatam videre est ad calcem hujusce voluminis, ubi rationes utrinque propugnantes compendiosè quidem dantur, sed ob luculentiam sufficienter. Confer præterea tractatum de Deo ubi fusiùs exponuntur.

Toutes ces contradictions, au moins apparentes, n'empêchent pas de concevoir ce que ces théologiens veulent dire.... Les Thomistes diffèrent encore de Jansénius et de Calvin en ce que Jansénius et Calvin ne comprennent dans l'idée de la grâce efficace que l'illustration et l'inspiration, auxquelles ils donnent la vertu de faire agir nécessairement la volonté, au lieu que les Thomistes disent qu'avec l'illustration et l'inspiration seule, la grâce n'est point encore efficace, et qu'elle n'aura jamais son effet tandis qu'il n'y aura que cela. C'est pourquoi ils ajoutent une prédétermination, qui n'est ni lumière ni inspiration, et qui fait que cette grâce devient efficace, et qui lui donne cette inséparabilité de l'action sainte, que Dieu inspire, etc. On pourrait imaginer une troisième manière de soutenir la grâce efficace par elle-même. Ce serait, en retranchant l'incompréhensible prédétermination physique des Thomistes, de donner à l'inspiration intérieure cette inséparabilité d'avec le consentement de la volonté que ces théologiens donnent à leur prédétermination physique, et de dire de cette inspiration, comme ils disent de cette prédétermination, que, quoiqu'elle détermine, elle ne nécessite pas néanmoins; mais il paraît impossible d'admettre une inspiration qui ait ainsi une liaison inséparable et infaillible avec le consentement de la volonté, sans retomber dans les principes de Jansénius et de Calvin sur la liberté.... Et, en effet, dès qu'il y a infaillibilité, il y a nécessité, et dans ce système la nécessité venant de l'inspiration, elle serait antécédente; or, toute nécessité antécédente détruit la liberté. »

Prolixum istud testimonium evincit, ni fallor, Daniele existimasse gratiam ex naturâ suâ efficacem, et prædeterminationem physicam Thomistarum non minùs libertatem destruere quàm gratiam efficacem Jansenii et Calvinii, et ideò ipsum voce tenùs reduxisse systemata super gratiæ efficaciam ad tria relata. Thomistarum est et Augustinianorum, qui scientiam mediam eliminant, gratiam ex naturâ suâ efficacem admittunt suam vindicare causam. Eam hic generalibus duntaxat argumentis defendisse sufficiat.

1^o S. P. Benedictus XIV, si Daniele non sagacior, certè in rebus theologicis multò magis versatus, in Brevi infra referendo Danielis argumentum directè eliminare voluisse videtur; sic enim ibidem loquitur : « Thomistæ traduntur ut destructores humanæ libertatis, et

ut sectatores nedum Jansenii, sed et Calvinii; sed ipsis objectis apprimè satisfaciunt. » Etverò, tritam istam objectionem refellunt omnes Thomistæ, quos inter consuli potest Joannes Baptistæ Gonetius in erudito et optimo opere, cui titulum fecit : *Clypeus theologiæ thomisticæ*, typis primum mandato anno 1659.

2^o Infra probabimus D. Augustinum de gratiâ ex se efficaci præcipuè disputasse adversùs Pelagianos; an, quæso, gratia efficax Augustini eadem est ac Jansenii et Calvinii efficax gratia ?

3^o Cum gratiæ efficaciam in systemate Suareziano et Moliniano facilè concipiatur, istud systema essentialiter differt ab Augustini systemate, qui ubique clamat modum hujus efficaciam humanam intelligentiam penitus exsuperare, et ideò ex hac parte Thomistis invidia conflari non potest.

4^o Si de veritate dogmatum per argumenta ex ratione desumpta judicandum foret, Daniel similisve arguator, dogma, v. g., de existentia peccati originalis, ejusque ad omnes Adæ nepotes transmissione, brevi pessumdasset.

5^o Argutiæ Danielis et Molinistarum eò collimant, ut veram de gratiæ efficaciam sententiam in Ecclesiâ ante Molinam ignotam fuisse probent, ut et majorem theologorum numerum etiamnum in errore circa eandem efficaciam versari, ut postea ostendemus.

Cum igitur Thomistæ et Augustiniani negent consecraria, quæ ex eorum systematibus dimanare prætendit Daniel, ideò plus quàm duo vel tria systemata catholica circa gratiæ efficaciam distinguenda sunt. Unde quatuor vulgò recensentur, Thomistarum, Augustinianorum, Molinæ et Congruistarum, quibus novissimis hisce temporibus quintum addidit eruditus P. Thomassinus.

Longioris profectò operæ foret quidquid ferunt illa systemata, et sentiunt illorum patroni, accuratè referre. Quamobrem sic singula seorsim adducam, ut communem eorum doctrinam, præcipuè à Janseniano dogmate discrimina et quid super singulis meo judicio tenendum sit, assignem.

ARTICULUS PRIMUS.

Thomistici systematis synopsis.

Quotuplex hoc in systemate Christi, sive medicinalis, gratia ? — Duplex specie et naturâ à se invicem distincta, purè sufficiens, sive excitans, et efficax, sive adjuvans.

Gratia sufficiens in se et formaliter non est

actus indeliberatus intellectus et voluntatis (ut alii censent theologi, sed Dei motio, quam dicunt *virtuosum*, tum quia intellectum et voluntatem ad supernaturalem ordinem attollit, eos ad celestes actus indeliberate eliciendos excitando, puta pia desideria, sanctas cogitationes, etc. (sub quo respectu est semper efficax, cum illos actus semper afflet et operetur), tum quia vires ministrat ut perfectiores actus deliberari produci possint (sub quo respectu est merè sufficiens, cum sine gratiæ efficacis subsidio isti actus nunquàm prorsus fiant). Unde Alvares disputatione 8 dixit: *Omne auxilium sufficiens respectu unius actus* (deliberati qui ut elici possit antecedente Dei voluntate illud datur auxilium) *semper est efficax respectu alterius* (indeliberati), *ad quem efficiendum decreto absoluto divine voluntatis ordinatur.*

Gratia *excitans*, sive *sufficiens* solam connotat potentiam *in actu primo*, ut aiunt, id est, quatenus sejungitur ab actu; sic enim confert voluntati vires verè et relativè sufficientes, quibus velle ac operari possit, ut tamen nisi accesserit efficax gratia, nunquàm prorsus actu velit et operetur.

Gratia *efficax*, sive *adjuvans in se et formaliter* sita est in intrinsecâ et singulari istius gratiæ virtute per quam infallibilem habet cum effectu suo, id est, libero voluntatis consensu, connexionem. Illum consensum proficit, et ideò ipsum naturâ præcedit, quâ ex causâ *præmotio*, id est, *prævia motio* dicitur. Hinc vulgò describitur: *Actio sive motio Dei per quam voluntas ad actum secundum*, id est, actuale consensum, *applicatur.* Daniel citato loco dicit *intelligi non posse hanc præmotionem*; sed illius defensores reponunt tritâ istâ ratione tangi posse philosophum (qualis fuit Daniel), non theologum doctrinâ Apostoli et Augustini imbutum, qui perspicacissimus licet, nunquàm comprehendere potuit quomodò sub omnipotente Dei motione creatura bonum liberè operetur.

Quot titulis gratia præmovens, sive efficax nunc est necessaria? — Duobus, *dependentiæ et infirmitatis.* Scilicet Deus, utpote prima causa, primus motor, *in quo vivimus, movemur et sumus*, non potest, nisi *seipsum neget*, determinationem à causâ secundâ accipere, et ideò omnes creaturarum actiones sive naturales sive supernaturales excitare tenetur. Aliunde, tanta est hominis lapsi in malum propensio, totque ipsi cum mundo, carne et diabolo subeunda certamina, ut licet gratiæ sufficientis subsidio plenè possit bonum agere, et de illis hostibus

triumphare, nunquàm tamen sine gratiæ efficacis adiutorio hæc reverà assequetur et perficiet. Hinc præmotio, quæ actionibus naturalibus *prædeterminatio physica*, actionibus verò supernaturalibus affixa, gratia *ex se efficax* dicitur, quibuslibet in quocumque statu, ac proinde et ipsis Angelis, et insonti Adæ ad quascumque actiones necessaria fuit, ideòque gratia præsentis statûs quatenus efficax reverà non differt à gratiâ statûs innocentie quatenus efficaci.

Quenam sint hujus systematis consecutaria? — Ista quoad statum innocentie. Ipsa opera libera decrevit Deus efficaciter, absolutè et ante liberum hominis consensum. Hinc Deus illa opera in suis decretis præcognovit. Hinc prædestinatio fuit ante prævisa merita, et reprobatio negativa (id est, exclusio à gloriâ), ex solâ Dei voluntate et ante ulla prævisa peccata; positiva autem (id est, suppliciorum inflictio) post et ob peccata prævisa, etc.

Hæc autem quoad statum naturæ lapsæ. Deus Adam, et omnibus ejus in eo nepotibus per peccatum *in massâ perditionis* conclusis, illos (ut sine injustitiâ potuisset), æternâ pœnâ condemnare non voluit. Voluntate scilicet generali, antecedente, et beneplaciti, eorum voluit salutem, ex quâ ipsis adiutoria sufficientia per Filii sui merita impertiit, aut saltem præparavit. Verùm ex speciali misericordiâ et prædilectione, ut jure poterat, eos inter aliquos ante meritum prævisionem ad gloriam efficaciter prædestinavit, nihil tale circa alios decernendo. Unde primis gratiam efficacem, perseverantiam, et gloriam in tempore tribuit; postremis verò sufficientia tantum auxilia ad perseverandum confert. Hinc bona opera ex gratiâ elicit cognoscit *in se*, id est, per decretum absolutum, efficax et antecedens ejusdem gratiæ infundendæ; mala verò opera etiam *in se*, id est, per decretum permissivum, quo justo judicio statuit non impertire gratiam efficacem iis in circumstantiis in quibus ista gratia ad non peccandum est prorsus necessaria; idcirco *in se*, id est, in commemoratis decretis, novit quinam in bono perseveraturi sint, quinam in malo, ac illis *decreto executionis gloriæ*, his verò pœnam æternam rependit. Hinc reprobatio negativa fundatur in solâ divinâ voluntate, positiva in solo peccato. Hinc nullus labor, inquit, in intelligendo Dei in hominum voluntates omnipotentissimo influxu, et summâ divinæ scientiæ certitudine asserendâ.

An, et in quo Thomisticum systema à Janseniano differt? — In his. 1^o Thomistæ admittunt et requirunt gratiam verè et relativè sufficientem, ut bonum opus in actu primo, id est potentiâ ab actu, seu actuali libero voluntatis consensu, sejunctâ, peragi possit, secùs Jansenistæ, ut dictum et probatum est. ... 2^o Physica Thomistarum præmotio, sive gratia efficax, multùm discrepat à delectatione relativè victrix, sive efficaci, Jansenianorum. Scilicet præmotio physica necessaria est ut Deo primæ causæ, primî motoris, ratio servetur (unde datur ad exigentiam creaturæ quam Deus de indifferente ad actum movet et determinat); illa se habet ex parte actûs secundi, sive actualis liberi consensûs, nullam in potentiâ inducendo mutationem, et simpliciter et absolutè victrix est, sive efficax, nullâ habita ratione superiorum aut inferiorum ejus virium, etc. E converso, delectatio relativè victrix necessaria est ut hominis lapsi voluntas activâ indifferentiâ spoliata ab bonum rapiatur..... Ipsi justis, qui eam enixè postulant, à Deo sæpius non impertitur..... Non respicit tantùm actum secundum, siquidem tribuit simul posse et agere, ac proinde inducit mutationem in potentiâ, quam de non expeditâ facit expeditam ac relativè proportionatam.... Tandem, dicente Jansenio, relativè victrix est, et ideò dependenter à præponderantiâ virium, sive graduum.

Quibusnam rationibus probant Thomistæ voluntatem sub motione gratiæ suæ efficacis remanere liberam? — His summam. Divus Thomas 1-2, q. 10, a. 4, in c., ait: « Quia voluntas est actuum principium non determinatum ad unum, sed indifferenter se habens ad multa, sic Deus ipsam movet quod non ex necessitate ad unum determinat, sed remanet motus ejus contingens, et non necessarius, nisi in his ad quæ naturaliter movetur. » Ibidem ad 1: « Voluntas divina non solum se extendit ut aliquid fiat per rem quam movet, sed ut etiam eo modo fiat quod congruit naturæ ipsius, et ideò magis repugnaret divinæ motioni, si voluntas ex necessitate moveretur (quod suæ naturæ non competit), quàm si moveretur liberè, prout competit suæ naturæ. » Antea p. 1, q. 19, a. 8, in c., dixerat: « Hoc (distinctio contingentium à necessariis) contingit propter efficaciam divinæ voluntatis; cum enim aliqua causa efficax fuerit ad agendum, effectus consequitur causam non tantùm secundùm id quod fit, sed etiam secundùm modum fiendi vel es-

sendi... Cum igitur voluntas divina sit efficacissima, non solum sequitur quòd fiant illa quæ Deus vult fieri, sed et quòd eo modo fiant, quo Deus ea fieri vult: vult autem quedam fieri Deus necessariò, quedam contingenter. » Ex quibus ibidem ad 2, reponit: « Dicendum quòd hoc ipso quòd nihil voluntati divinæ resistit, sequitur quòd non solum fiant ea quæ Deus vult fieri, sed quòd fiant contingenter, vel necessariò quæ sic fieri vult. »

Ex his Angelici doctoris pronuntiatis sic arguunt: Si promotio physica, sive gratia efficax sit veluti fustis, aut vectis quo omnipotentissima Dei voluntas humanam movet et erigit, humana voluntas sub ejus motione remanet potens ad oppositum, sive libera; ex citatis enim effatis, « cum voluntas divina sit efficacissima, et omnipotentissima, non solum quæ fieri vult fiunt, sed etiam fiunt eo modo quo ea fieri vult, » sive efficit non solum entitatem sed et modum actûs; atqui gratia efficax Thomistica sic voluntatem movet et erigit; dicunt enim Thomistæ illam esse participationem et quasi instrumentum omnipotentissimæ et efficacissimæ Dei virtutis; ergo.

Idem S. doctor, quæstione 6 de Malo, articulo unico, ad 3, dicit: « Deus movet voluntatem immutabiliter, propter efficaciam virtutis moventis quæ deficere non potest (id est, gratia efficax voluntatem infallibiliter determinat), et tamen propter naturam voluntatis motæ, quæ indifferenter se habet ad diversa (id est, quæ est activè indifferens ad opposita, sive ad agendum et non agendum, ad faciendum bonum aut malum), non inducitur necessitas, sed manet libertas. » Gratia igitur efficax determinatè et infallibiliter movens ad unum, jungitur cum potentiâ ad opposita, et ideò cum libertate.

Ibidem et alibi S. doctor hanc concordiam evincit ex principio, sive radice libertatis. Scilicet fundamentum illud duplex est, amplitudo competens judicio rationis quo regitur voluntas, et amplitudo voluntati cœlitus indita; at utraque illa amplitudo importat activam voluntatis indifferentiam sub actione præmotionis physicæ. Etenim eo ipso instanti quo voluntas per præmotionem sive gratiam efficacem, determinata est ad unum actum et objectum, intellectus varia objecta indifferenter diligenda proponit, alia scilicet magis, alia minùs, et ideò hoc ipso momento viget et remanet indifferentia judicii et rationis; sed fieri non potest ut indifferentia ex parte judicii remaneat, nisi exi-

stat etiam ex parte voluntatis, cum intellectus sit rector et quasi navarchus voluntatis. Pariter voluntas ad summum bonum, quod solus est Deus, diligendum et possidendum facta, nullo particulari bono potest exsaturari, ac proinde ita particulare bonum prosequitur, ut aliud semper aucupari et diligere valeat.

Denique celebres Lemos et Alvares, qui Thomistarum causam in Lamosis Congregationibus de Auxiliis sub Clemente VIII et Paulo V, ab anno 1602 ad annum 1606 feliciter promoverunt, declaraverunt gratiam sufficientem absolutissimam in actu primo ad bonum opus subministrare potentiam et homini illā gratiā praevento et excitato ideò non impertiri efficacem quia illius infusioni obviam ponit quem posset non ponere; et hoc sensu indubiè intelligebant antea laudatam istud D. Augustini effatum, *quòd gratiā non adjuventur, in ipsa itidem causa est, non in Deo*; sed inde elucet hominem istā gratiā adjutum per illam, in illā, et cum illā posse resistere gratiæ efficaci: potest quippe vel illius impulsui consentire, et sic adjuvantem et efficacem illi annexam impetrare, vel illius impulsui dissentire, et sic efficacem in illā propositam et exhibitam repellere, ipsique obsistere.

Quid sentientium de Thomistico systemate? — Huic sanè systemati, ut jam observavimus, invidia accedere non debet, quòd nonnisi maximā cum difficultate in eo coelestis motionis cum libertate concordia explicari potest, quinimò viro theologo ex hac parte, si nihil aliud obstarat, quodammodò acceptum esse deberet; ait enim D. Augustinus libro 2 de peccatorum Meritis et Remissione, cap. 18, n. 28: « Laborant homines invenire in nostrā voluntate, quid boni sit nostrum, quod nobis non sit ex Deo, et quomodò inveniri possit ignoro: ait enim Apostolus 1 ad Corinthios, cap. 4: *Quid habes quod non accepisti?*... Ipsa etiam ratio, quæ de iis rebus à talibus quales sumus iniri potest quemlibet nostrum quærentem vehementer angustat, ne sic defendamus gratiam, ut liberum arbitrium auferre videamur; rursus ne liberum sic asseramus arbitrium, ut superbā impietate ingrati Dei gratiæ iudicemur. »

Verum, in isto systemate, gratia efficiens, sive prae-movens, non minùs necessaria fuit, *titulo dependentiæ*, in statu innocentiae quàm in statu præsenti; quo principio semel admissio non concuti tantum, sed et funditùs everti videtur omnibus acceptum, et à D. Augustino decan-

tatum discrimen inter adjutorium *sine quo* Angelis et insonti Adæ datum, et adjutorium *quo* nostri status proprium. Quamobrem Jansenius, libro 8 de Gratiā Christi, capitibus 1 et 2, merito videtur assensisse Thomistas, qui adjutoria *sine quo* et *quo* in prædeterminatione physicā constituunt, *totam basim doctrinæ Augustinianæ rellicare*; sed ipse vicissim omnia D. Augustini principia subvertit, cum è statu præsenti gratiam verè et relativè sufficientem expunxit, et in eo collocavit delectationem relativè victricem *sine quā*, ut loqui ausus est, *non magis homo bonum facere potest quàm avis sine alis volare*.

ARTICULUS II.

Brevis Augustiniani systematis descriptio.

Benedictus XIV, in Brevi dato 31 maii anni 1743, in gratiam religionis Augustinianæ et cardinalis Norisii, hanc scholam celebrat, « tum propter S. Augustini tutissima atque inconcussa dogmata ab illius alumnis tradita et servata, tum propter eximios viros quos edidit pietate et doctrinā præstantes; » deinde addit: « Instar omnium bonæ memoriæ (Henricus dùm vixit S. R. E. cardinalis Norisius nuncupatus)... licet quarumcunque gentium linguis celebretur, à nobis tamen sine speciali laude tanquàm romanæ Ecclesiæ splendidissimum lumen nunquàm est nominandus. » Ex his sanè elucet quàm inconsideratè et etiam iniquè se gerant qui illi scholæ infensi sunt.

Augustinianorum dogmata. — Inter Augustinianos alii, ut diximus, propugnant gratiam simpliciter et absolutè victricem sive efficacem, alii gratiam relativè et per gradus victricem.

Dogmata utrisque communia. — Utrique opera naturalia à supernaturalibus, et statum insontis naturæ à statu naturæ lapsæ secernunt.

Ut in quolibet statu liberæ creaturæ quasvis actiones naturales producant, actualem Dei concursus requirunt. Verum concursus ille prævius non est et physicè prae-movens (ut Thomisticus), sed simultaneus, ex se flexibilis, et à voluntatis nutu pendens; unde voluntas ipsum, non ipse voluntatem hic et nunc determinat.

Ut autem liberæ creaturæ in quolibet statu opera supernaturalia eliciant, speciale quoddam et supernaturale actualis gratiæ auxilium exigunt cum hoc, quantum ad statum innocentiae et statum naturæ lapsæ, discrimine.

Gratia in statu insontis naturæ non fuit ex

se, sive ex naturâ suâ efficax, sed indifferens et versatilis, sive voluntatis arbitrio derelicta. Hinc in eo statu nulla extiterunt decreta absoluta, efficacia, et libero voluntatis creatæ consensui prævia, et ideò nulla prædestinatio ad gloriam ante prævisa merita, nulla reprobatio nisi ex prævisis actualibus delictis.

Gratia è converso in statu naturæ lapsæ ex naturâ suâ efficax ad omnes et singulas actiones supernaturales ex solâ humanæ voluntatis infirmitate requiritur. Hujus gratiæ natura consistit, vulgò saltem, in *delectatione*; Augustinus enim illius gratiæ naturam ita in *suavitate et dulcedine* collocavit, ut Deum aliâ ratione sibi ignotâ homines ad se trahere posse confessus fuerit.

Gratia ista efficaciter delectans *physicè moraliter* voluntatem prævenit et præmoveret; *physicè* quidem per actionem realem et physicam voluntati impressam; *moraliter* verò per attractionem, per invitationem, etc., voluntatem ad consensum suavi et potentissimo modo alliciens, quem ideò consensum simul cum homine per gratiam adjuvantem sive cooperantem elicit Deus. Hæc enim, inquit, passim tradit D. Augustinus, v. g., libro de bono viduitatis cap. 17, n. 21, ubi ait: « Proinde arbitrium voluntatis humanæ nequaquam destruimus, quando Dei gratiam quâ ipsum adjuvatur arbitrium, non superbiâ negamus ingrâtâ, sed gratâ potius pietate prædicamus; nostrum enim est velle, sed voluntas ipsa et admonetur ut surgat, et sanatur ut valeat, et dilatatur ut capiat, et impletur ut habeat. » Hæc quippe erectio, sanatio, dilatio, etc., voluntatis actionem ex parte Dei *physicè* delectabiliter præmoventem importat, quæ tamen moraliter prævenit, quod alibi hoc exemplo illustrare conatus est S. doctor: « Ramum ostendis viridem ovi, et trahitur, nuces puero demonstrantur, et trahitur, » etc. In eodem statu naturæ lapsæ præter relata gratiam efficacem (quæ est speciale et eximium Christi adjutorium sive medicinale) alia existit dicta *sufficiens*, ex Christi etiam meritis præveniens, quæ voluntati satis virium impertit ut verè et relativè possit remotè vel proximè opera supernaturalia elicere, etsi sine gratiæ efficacia adjutorio nunquàm prorsus suum obtineat effectum. In eodem ordine prædestinatio ad gloriam est omninò gratuita, id est, fit ante quamlibet meritum prævisionem. Reprobatio autem positiva, id est, actualis et in tempore, fit propter actualia cujusque hominis delicta; negativa

verò, id est, non comprehensio in decreto, quo Deus primitus nonnullos è massâ perditionis ad gloriam prædestinare voluit, nihil tale circa alios decernendo, fit ex solâ avitæ maculæ prævisione. Hinc in statu præsentis locum habent decreta absoluta et ex se efficacia circa actus supernaturales, in quibus decretis fundatur illorum actuum præscientia. Hinc electis in fine saltem vitæ speciale et efficacissimum perseverantiæ donum tribuitur, aliis verò impertitur gratia quâ verè et relativè valeant illud promereri donum, quod tamen propter peccata (quæ Deus ex speciali providentiâ ab eis ut ab electis non avertit) nunquàm obtinebunt.

Hæc Augustinianorum placita si perpenderit, facilè intelliges ipsos in statu naturæ lapsæ Thomistis, in statu verò innocentiae Molinistis assentiri.

Placita alterutri Augustinianorum scholæ specia'ia circa gratiæ cum libertate concordiam. —

Augustiniani pro delectatione, sive gratiâ, absolutè et simpliciter efficaci decertantes, hanc delectationem cum libero arbitrio cohærere eodem ferè modo probare solent quo Thomistæ suam gratiam efficacem, sive *physicè* prædeterminantem, libertati adversam non esse suadere consueverunt. Eorum laborem, arduum licet, felicem tamen esse et fructuosum lubenter agnoscunt Tournelius et ejus redactores.

Augustiniani verò delectationi sive gratiæ relativè sive per gradus victrici addicti impactam sibi ab iisdem recentioribus Janseniani erroris notam judicio S. P. Benedicti XIV tum anni 1748, tum anni 1745 modò citato non infeliciter detergunt, ut diximus capite præcedente, articulo secundo. Isti suam mentem sic iterùm aperiunt: Peccatum originale duo in liberum arbitrium invexit mala quæ per Christi gratiam sanantur; 1° enim liberi arbitrii vires *attenuavit et inclinavit*, ut ait concilium Tridentinum sessione 6, cap. 1, quas vires restituit Christi gratia veram et propriè dictam bonum agendi potentiam voluntati impertiendo... 2° In idem liberum arbitrium invexit concupiscentiam, sive delectationem terrenam, quæ, ut loquitur eadem synodus sessione 5, canone 5, *ad peccatum inclinât*; quod malum contrario ejusdem generis bono tollit Christus, dùm voluntati inspirat delectationem coelestem, quæ ipsam allicit ad pietatis opus. Hæc positâ distinctione, inquit, intelligitur quomodò gratia Christi, sive parva sit, sive magna, veram et propriè dictam potentiam tribuat libero arbitrio; non enim gratia dicitur parva aut

magna relativè ad potentiam, quasi parvam aut magnam voluntati conferret agendi potentiam (omnis enim gratia Christi ex naturâ suâ vires liberi arbitrii attenuatas et inclinatâs per peccatum curat et resareit); sed vocatur parva relativè ad voluntatem quam aliquando parvam et invalidam efficit, aliquando verò magnam et robustam juxta istud D. Augustini effatum libro de Gratiâ et libero Arbitrio, cap. 17, n. 33: « Qui vult facere Dei mandatum, et non potest, jam quidem habet voluntatem bonam, sed adhuc parvam et invalidam, poterit autem cum magnam habuerit et robustam... » Item intelligitur quomodo delectatio relativè victrix, etiam in intensissimo gradu, non lædat libertatem, ut scilicet libertatem tolleret, non solum voluntatem, sed potentiam connotare deberet; sed talis non est delectatio relativè victrix, quæ inspiratur non ut homo possit agere (hoc enim præsupponitur), sed « ut velit, et tantum velit, tantoque ardore diligit, ut carnis voluntatem contraria concupiscentem voluntate spiritus vincat, » inquit D. Augustinus libro de Correptione et Gratiâ cap. 11, n. 51. Et verò, delectatio relativè victrix unicè facit transire voluntatem de potentiâ ad actum, et ideò illam complet et perficit, nedum illam potentiam destruat, cum inprimis quò plus aliquid est liberum, eò magis sit voluntarium, sive, ut loquitur Augustinus epistolâ 157, aliâs 89, ad Hilarium, n. 8, *voluntas tantò liberior fit quantò sanior, ... sive gratiæ subjectior*. Quare continent voluntatem sub motione gratiæ relativè victricis, sive superioris, remanere liberam, non quidem *quoad sensum*, cum in ejus potestate non sit indeliberatum illum gratiæ motum recipere vel non recipere, sed *quoad consensum*, quia positâ illâ indeliberatâ motione voluntatis, potest semper voluntas illi motioni consentire vel dissentire, si velit.

Ex his, addunt, innoscit latum intercedere discrimen inter gratiam relativè victricem Augustinianam et Jansenianam. Hæc enim absente non magis homo bonum agere potest quam avis sine alis volare, et prorsus impossibile est ut virtutis et honestatis consideratio prævalcat. E converso, illâ absente, voluntas habet veram et propriè dictam, etiam relativam, bonum agendi vel non agendi potentiam, ope scilicet gratiæ sufficientis ex se destinatæ ad illam potentiam subministrandam.

Cardinalis Norisius in Vindiciis, et præsertim Janseniani erroris Calumniæ sublata capite 2, paragrapho 1 et 2, et quidam alii insignes

Augustinianæ scholæ magistri, adversus Jansenium admittunt in præsentī statu adjutorium *sine quo non* cum adjutorio quo, cui videntur inserere notionem diversam ab eâ quam ipsi inserunt alii Augustiniani. Etenim adjutorium *sine quo non* dicente Norisio ibidem capite 2, paragrapho 1, « in statu naturæ lapsæ eandem notionem retinet, quam in naturâ integrâ habebat, atque adeò ut agat, motum voluntatis, cui idemmet cooperatur, expectat. » Hanc assertionem probat vir eruditus celebri testimonio D. Augustini libro de Correptione et Gratiâ, cap. 11, quod sic se habet: « Si hoc adjutorium vel Angelo vel homini, cum primùm facti sunt, defuisset... non utique suâ culpâ cecidissent... Nunc itaque quibus deest tale adjutorium, jam pœna peccati est, quibus autem datur secundum gratiam datur, non secundum debitum, et tantò ampliùs datur per Christum quibus id Deo dare placuit, ut non solum adsit sine quo permanere non possumus, etiamsi velimus, verum etiam tantum ac tale ut velimus. »

Ex quibus sic arguit: Evidens est adjutorium Angelo et homini primitus datum esse adjutorium *sine quo non*; at non minus evidens est idem adjutorium nunc impertiri: Nunc, inquit, quibus deest tale adjutorium, etc., quibus autem datur, etc. Cætera autem verba designant adjutorium quo, sive gratiam efficacem cum sufficiente in isto statu conjunctam. Porro, eodem dicente Norisio ibidem, adjutorio *sine quo non* movetur voluntas « ad eliciendos actus debiles, nempe desideria, conatus, orationes minus fervidas, pro adimplendis mandatis, in ordine ad quorum executionem adjutorium sine quo non est tantum auxilium remotum, impetratorium tamen auxilii quo, sive gratiæ efficacis et victricis, quâ solâ mandata reapse implentur. Hæc quippe tradit D. Augustinus libro de Gratiâ et libero Arbitrio cap. 17, n. 33, ubi ait: Qui vult ergo facere Dei mandatum, et non potest, jam quidem habet voluntatem bonam, sed adhuc parvam et invalidam, poterit autem cum magnam habuerit et robustam; quam quidem voluntatem habet per adjutorium quo. » Idem docet Augustinus supra citato libro de Naturâ et Gratiâ cap. 68, ubi cum dixisset Deum non præcipere impossibilia, addit: Hinc admonemur et in facilibus quid agamus, et in difficilibus quid petamus; ex quibus hæc infert idem Norisius: « Igitur opera facilia, seu actus bonos minus perfectos facere possumus absque eo quòd majus et ulterius auxilium à Deo postulemus,

quod tamen in actibus perfectioribus et difficilioribus suppliciter petendum est.)

Ex hæc Norisii doctrinâ, quæ certè non parùm est implicatâ inferunt, Tournelius et ejus redactores, Norisium et ejus sectatores opera facilia à difficilibus distinxisse, et pro istis gratiam à se sive ab intrinseco efficacem exegisse, pro illis verò gratiam duntaxat *versatilem*, id est, à voluntatis nutu prorsus dependentem, quæ ideò sine adjutorio *quo*, sive efficaci potest sortiri, et de facto suum aliquando sortitur effectum; hæc enim, inquit, suggerunt citata ejus verba, « adjutorium *sine quo non* in statu naturæ lapsæ eandem notionem retinet quam in integrâ naturâ habebat, atque adeò ut agat, motum voluntatis, cui idemmet cooperatur, expectat; » et iterùm ista: « Admonemur in facilibus quid agamus, in difficilibus quid petamus; opera facilia sive actus minùs perfectos facere possumus absque eo quod majus et ulterius auxilium à Deo postulemus (id est, auxilium *quo*), quod tamen in actibus perfectioribus atque difficilioribus suppliciter petendum est... »

Verùm reclamant Patres Beilelli, Berti, Bernene et alii Augustiniani delectationis relativè et per gradus victricis vindices, atque recentiores illos theologos Norisii mentem minimè assecutos esse contendunt. Etenim, inquit, Norisius ad actualem orationem, sive magis, sive minùs fervidam, ut et ad ejuscumque præcepti executionem gratiam ex se efficacem requirit; ait enim ibidem: « Oratio dependet ab actu fidei per spem orante, ac dilectione, sive desiderio implendi præcepti, qui actus ab efficaci gratiâ dependent, et sunt illustrationes intellectus, ac sanctæ inspirationes voluntatis, sine quibus, quemadmodum oratio fieri nequit, ita si eadem oratio fiat, ab iisdem tanquàm à causis principalibus dependet. » Quælibet ergo actualis oratio procedit ab actibus fidei et dilectionis qui ab efficaci gratiâ dependent; sed id fieri nequit nisi quælibet actualis oratio ab efficaci gratiâ dependeat, ut patet; ergo. — Addunt reponi non posse Norisium loqui de solâ oratione intensâ et fervidiore; ibidem enim significat se disserere de oratione etiam tenui. Jam verò, inquit ibidem, cum oratio tenuis, non autem fervens et intensa, *ex desiderio implendi præcepti* dependeat, ipsum verò desiderium sit *actus voluntatis debilis, ac invalidus ad præceptum exequendum sine ulteriori auxilio* (proximè sufficienti et efficaci) *proinde eadem oratione hoc ipsum auxilium postulatur*. Ubi vides,

dilectionem, seu desiderium implendi præcepti, quam modò exigebat ad orationem, necessariam etiam esse ad orationem *tenuem*; sed dilectio illa, et illud desiderium ex prioribus verbis dependet à gratiâ efficaci; ergo. — Quamobrem adjutorium *sine quo non*, juxta Norisium, eandem in lapsæ ac in integræ naturæ statu notionem retinet eo sensu quòd sine ipso non possit, et cum ipso verè possit voluntas bonum operari, non verò cum ipso solum bonum reapsè operetur. Quod quidem adjutorium in eodem præsentī statu ex se tendit ad accersendum auxilium *quo*, sive *gratiam efficacem et victricem quâ solâ mandata reapsè implentur*, si ipsi obex à voluntate non apponatur, quâ ratione, *ut agat, motum voluntatis, cui idemmet cooperatur, expectare dicitur*; tunc enim in nobis excitat voluntates, sive *actus parvos et debiles, nempe desideria, conatus, etc., pro adimplendis mandatis*, quæ ideò sunt dispositiones remotæ ac mediatae ad realem præceptorum executionem; unde intendit Norisius adjutorium *sine quo*, sive sufficiens, pro actibus difficilibus, esse à se efficax pro actibus facilibus, et ideò adjutorium ex se efficax pro actibus facilibus esse purè sufficiens pro difficilibus. Hinc iste est ordo gratiæ distributionis pro exequendis præceptis. Deus dat gratiam *sine quâ non*, sive purè et præcisè sufficientem ad orandum, cui si non resistitur, dat efficacem orationis gratiam, quæ obtinet auxilium proximè sufficiens ad exequendum mandatum urgente, cui si iterùm obicem non apposuerit voluntas, tribuit auxilium efficax quo reipsà adimpletur præceptum. Demùm commemorati theologī observant nullatenus esse verisimile Norisium, qui scientiam mediam cum horrore explodit, admisisse aliquam gratiam in rebus etiam facilibus versatilem et voluntatis pedissequam.

Quidquid sit, tenendum est, ut in secundo præsertim libro ostendimus, Deum gratiam proximè et relativè sufficientem orationis non solum justis volentibus et conantibus urgente præcepto, sed etiam simplicibus peccatoribus, et obduratis et excecatis impertire, cui si non resistitur, Deus illis mortalibus gratiam à se efficacem largitur; hæc enim sententia, ut ibidem probavimus, et Scripturis, et conciliis, et ipsius S. Augustini doctrinæ consona est, et aliunde gravissimis difficultatibus ex hominis *inexcusabilitate* eliminandis, ac libertati cum gratiâ, quantum humana patitur intelligentia, conciliandæ magis idonea est.

Quid sentiendum de systemate Augustiniano?

—Augustinianum systema, quatenus præsertim gratiam simpliciter et absolutè, et physicè-moraliter efficacem defendit, Thomistico, circa ea in quibus differunt, præhabendum videtur. Præterquam quòd enim omnes difficultates quæ in illo dogmate inveniuntur, et in isto occurrunt, imò graviores, certè nemo præjudiciis non excæcatus et partium studio non abreptus, non videt et intelligit longè felicius in Augustiniano quàm in Thomistico systemate explicari ab omnibus ejuscumque scholæ magistris decantatum, et fidei principiis prorsus consonum discrimen inter adjutorium *sine quo non* status innocentiae proprium, et adjutorium *quo in* præsentì statu vicens, quod piissimus et eruditissimus gratiæ præco et vindex adversus Pelagianos et Semipelagianos ex apostolicà doctrinà asseruit, et obfirmavit. Quis aliunde non fateatur vastissimam illam divi Augustini testimoniorum sylvam, quâ stupendum in modum assurgit, excrescit, et hirsutus est Augustinus Yprensis, acutioribus securibus ab Augustinianis quàm à Thomistis succidi? Quis tandem non animadvertit pestifero Janseniani erroris veneno infectos et debilitatos mortales promptius et efficacius sanandos esse et confortandos Augustinianos quàm Thomisticis poculis? cùm inprimis Jansenius et ejus discipuli prædeterminationis physicæ systema reipsà irrideant et subsannent, ut antea ostendimus.

Prinsquàm ad aliorum systematum expositionem progredior, nonnullis eruditorum virorum observationibus tum hujus temporis pseudophilosophorum adversus Augustinianum et Thomisticum systemata super concordia libertatis cum gratiâ à se efficaci dictèria, cùm prætensorum quorundam theologorum adversus eadem systemata convicia eliminare conabor.

Refelluntur hodierni pseudophilosophi prætendentes id, quod certò et infallibiliter fit, liberè non fieri.

1° Non Scriptura solùm et traditio, sed et ipsa ratio suggerit, Ens infinitè potens, qualis est Deus, ad bonum movere posse mortalium voluntates infallibiliter, et tamen liberè. Potest enim facere, quotiescumque ipsi placuerit, ut illi mortales certissimè et in omni prorsus circumstantiâ modo suæ naturæ accommodato, qui est liberè velle, operentur; sed ex hoc principio elucescit cœlestè adjutorium, quod voluntatem certò et infallibiliter agere facit,

posse efficere ut sic semper agendo possit non agere; ergo. — Hinc divus Augustinus ex ipsâ ratione cognovit, Dei determinationem, quantacumque polleat efficaciâ, libertatem non destruere, quod vir eximius confirmavit exemplo Abraham; ut enim ille patriarcha in mercedem fidei suæ numerosissimæ gentis pater fieret, Deus per efficacissimum adjutorium ita præparavit et determinavit gentium corda, ut certissimè et infallibiliter voluerint quod non velle potuissent. « Ut, inquit libro 2 Operis imperfecti, Abraham ob stipendium fidei consequeretur dilatactionem seminis, præparata est gentium voluntas à Domino, et ut vellent quod et nolle potuissent ab illo factum est qui ea quæ promisit potens est et facere. »

2° Nicolius, in Symbolo et alibi, ex iis quæ in nobis geruntur, et ex intimo omnium hominum sensu aliquatenus elucidat, quomodò infallibilis determinatio cohæreat cum potestate agendi et non agendi: « Tous les hommes conviennent, inquit, qu'on n'est digne de louange ou de blâme, de peine ou de récompense que pour les choses qu'on fait librement; or, il y a une infinité de péchés et de bonnes actions, qui font qu'on est blâmé ou loué par toutes les personnes sages, quoiqu'on ait été infalliblement déterminé à les faire. Une prostituée de profession est infalliblement déterminée à commettre le péché, quand elle est sollicitée et attirée par une récompense considérable. Ces misérables qui faisaient métier de vendre des poisons étaient infalliblement déterminés à en donner à tous ceux qui es leur achetaient aussi chèrement qu'ils voulaient. Les duellistes sont infalliblement déterminés à se battre contre tous ceux qui les auraient fait appeler, les vindicatifs à se venger, s'ils le pouvaient, de ceux qui leur auraient fait quelque affront... Une fort honnête femme, let qui a de plus un grand amour pour son mari, est infalliblement déterminée à ne se pas rendre à une sollicitation contre son devoir. Un juge d'une probité singulière est infalliblement déterminé à ne se pas laisser corrompre par des présents pour commettre une injustice. Un sujet très-affermi dans la fidélité qu'il doit à son prince est infalliblement déterminé à ne pas écouter ceux qui le porteraient à le trahir, etc. Qui pourrait dire, sans avoir perdu le sens commun, que tous ces gens ne seraient ni blâmables ni louables pour avoir fait ces péchés, ou bonnes actions, parce qu'ayant été infalliblement déterminés »

es faire, ils n'auraient pas été libres en les faisant? »

3^o Doctissimus Petavius T. 1, libro 9, cap. 7, n. 6, de *Dono perseverantiae*, electorum proprio in praesenti statu disserens ait : « Non solum dat posse, si velint, sed etiam velle quod possunt, et est tale ut eo dato nonnisi perseverantes sint, id est, ut certò et infallibiliter perseverent, tametsi liberè gratiæ illi donoque consentiant, non necessariò, sed ita ut dissentire possint si velint, quamvis ut non dissentire velint eodem illo perseverantiæ dono perficiunt. »

Convicia adversus Augustinianum et Thomisticum systemata super gratiâ et perseverantiâ eliduntur. — Nonnulli recentiores, qui se eximios prætendunt theologos, ex systematibus Augustiniano et Thomistico, super prædestinatione et gratiâ, absurda, horrenda et Deo maximè injuriosa eduxerunt consecraria, quæ priusquam referam et explodam, diversa præmittenda sunt principia omnibus scholis accepta, vel saltem quæ omnibus scholis accepta esse debent.

PRIMUM PRINCIPIUM. — *Cum omnes Adæ posterì in eo peccaverint, Deus absque injustitiâ omnibus damnationis supplicium infligere posuisset.*

Pate ex celebri isto Augustini effato : « Universa massa pœnas debet, et si debitum damnationis supplicium omnibus redderetur, non injustè procul dubio redderetur. » Ubi nota voces *procul dubi*. Idem inculcat libro de *Dono perseverantiæ* cap. 8 : « Non simus, inquit, ingrati, quòd tam multos liberat misericors Deus etiam debitâ perditione, ut si inde neminem liberaret, non esset injustus. » Hæc ponderans Bellarminus asserere non dubitavit Deum, si voluisset, sine injustitiâ cunctis hominibus auxilia ad salutem sufficientiâ deneigare potuisse. « Nulla, inquit, lib. 2 de *Gratiâ et libero Arbitrio*, cap. 4, esset in Deo iniquitas, si non solum aliquibus, sed etiam omnibus hominibus auxilium sufficiens ad salutem negaret; » quod quidem celebris ille et minimè suspectus theologus dicit *certissimum* esse apud eos omnes qui Scripturæ et D. Augustini doctrinâ super originali peccato imbuti sunt. « Hæc certissima est (assertio) apud eos qui ex divinis Litteris peccatum originale novērunt; nam, cum per peccatum primi hominis nascamur omnes filii iræ (ad Ephesios cap. 2), nihil nobis jure debetur nisi pœna. Hinc Sapientiæ cap. 12 dixit Spiritus sanctus : *Quis*

stabit contra judicium tuum? quis tibi imputabit si perierint nationes quas tu fecisti? Et Apostolus Rom. cap. 9, demonstrat esse misericordiam quâ Deus ex massâ perditionis aliqua vasa facit in honorem; unde etiam vasa misericordiæ appellat; ea causa est, ut docet Augustinus epistolâ 105 (nunc 194), cur pauci sunt qui salvantur, ut nimirum intelligamus quid omnibus deberetur. »

SECUNDUM PRINCIPIUM. — Cum Deus cunctos mortales peccato originali infectos damnationis supplicio absque injustitiâ afficere potuerit, nullis *justitiæ titulo* (non supposito decreto alio modo agendi) gratiam ad salutem necessariam impertire tenetur; et ideò eam solo misericordiæ titulo impertit; ergo potuit sine injustitiâ electione merè gratuitâ alios è massâ perditionis educere, alios in eâ derelinquere. Hæc ex præcedenti principio evidenter scaturiunt.

TERTIUM PRINCIPIUM. — Deus non solum potuit aliquos Adæ nepotes à corruptâ massâ eripere eis perseverantiæ finalis donum destinando, et alios in eâ relinquare *magnum* illud donum ipsis non destinando, sed etiam id reipsâ decrevit; unde sequitur peccatum originale esse causam *radicalem* reprobationis ipsorummet baptizatorum, qui in prædestinationis decreto non sunt comprehensi.

Petavius concedit hanc esse sententiam D. Augustini, Patrum in Sardinia exulum, SS. Prosperi, Fulgentii, etc. Capitula generalia Societatis Jesu, habita anno 1584, 1613 et 1653, agnoscunt hanc esse *constantem non scholæ solum doctrinam*, sed *etiam divi Augustini, summorum pontificum, et aliorum Patrum per annos mille et ducentos*. Suaresius ipse, Vasquesius, et Didacus Ruiz, qui Norisii judicio, *recentiorum est eruditissimus*, eandem sententiam non rejiciunt; eam probavit Norisius in *Vindiciis* cap. 3, paragrapho 10, eruditâ dissertatione quam ejus adversarii hucusque intactam reliquerunt. Porro ideò præsertim peccatum originale est causa reprobationis justorum in massâ perditionis derelictorum, quia introduxit destitutionem potentiæ proximæ in justitiâ perseverandi; quæ privatio in justis cum gratiâ sanctificante conjungitur, sed in electis tollitur per donum perseverantiæ ipsis à Deo impertitum quia *electi* sunt, sive à massâ perditionis *segregati*. Id ipsum agnoscere videtur ipse scientiæ mediæ celeberrimus patronus Suaresius libro 4 auxiliorum gratiæ cap. 18, n. 19, his verbis : « Docet divus Augustinus

Adamum recepisse auxilium proximè sufficiens ad perseverandum, si vellet, et ita sufficiens ut pro suâ libertatè et velle et perseverare cum effectu potuisset, quod est verissimum.... Hoc idem auxilium ita proximè sufficiens negat dari hominibus lapsis, qui cum effectu non perseverant, idque in pœnam primi peccati; non dicit tamen homines in præsentì statu nullum auxilium sufficiens recipere ad perseverandum; nam recipiunt saltem remotè sufficiens, quod suo modo est verè sufficiens; in eis tamen propter conditionem hujus statûs tale est, ut non sit proximè, sed remotè sufficiens, et ut nunquàm consequatur effectum. » Igitur ipsius Suaresii judicio, gratia sufficiens ad perseverandum nunquàm consequitur effectum. Cur? inquit hic theologus, exponit August. libro de Gratiâ et Correptione, cap. 13, ubi disserendo de derelictis in massâ perditionis, ait: « Aut gratiam Dei suscipiunt, sed temporales sunt nec perseverant, deserunt, et deseruntur; dimissi enim sunt libero arbitrio non accepto perseverantiæ dono, judicio Dei justo et occulto » (scilicet propter derelictionem in massâ). « Ubi, addit Suaresius, dimissi libero arbitrio significat non quocumque auxilio destituti, sed remoto tantum assistente quod sine ulteriori auxilio impetrato nunquàm consequetur effectum ad quem principaliter datur. »

QUARTUM PRINCIPIUM. — Cùm relata potuerit Deus erga electos et reprobos vi sinceræ voluntatis, quâ reproborum sive in massâ derelictorum salutem vult ipsis nonnisi gratias verè sufficientes, et non perseverantiæ finalis donum impertire tenetur. Et verò, ad gloriam prædestinando alios, et non alios, seipsum adstrinxit ad perseverantiæ donum illis concedendum, non istis. Unde dixit Augustinus derelictos in massâ, si justì sunt, non esse justos nisi *temporales*, ipsosque, si electi essent, usque ad finem perseveraturos esse; *non erant ex nobis* (electis); *nam si fuissent ex nobis, permansissent utique nobiscum*, 1 Joannis cap. 2. Hinc ipse Christus dixit Joannis cap. 10: *Vos non creditis, quia non estis ex ovibus meis*, sive ex iis quos Pater dederat Filio (æternum custodiendos). Super his consuli poterit Bellarminus libro 2 de Gratiâ et libero Arbitrio, cap. 12.

QUINTUM PRINCIPIUM. — Cùm Deus nullâ promissione seipsum adstrinxerit ad dandum perseverantiæ finalis donum, ipsi justì illud non *de condigno*, sed ad summum *de congruo* mereri possunt. Ita censent omnes theologi, ut ostendemus libro 4, cap. 2. Unde, cùm dixit

Augustinus, *hoc donum* (perseverantiæ *suppliciter emereri posse, sed cum dation fuerit, contumaciter amitti non posse*, solum *decentiæ meritum designavit*, quod aliunde indicat verbum, *potest*, et intendit duntaxat in sensu composito et non *diviso* resisti non posse dono perseverantiæ. Et verò, duæ istæ propositiones sunt *compossibiles*: *Petrus habet donum perseverantiæ; Petrus potest non perseverare si velit*; secus duæ istæ: *Petrus prædictus est dono perseverantiæ, Petrus non perseverabit*; donum scilicet perseverantiæ non auferit homini potentiam non perseverandi si velit, sed efficit duntaxat ut infallibiliter perseveret, licet possit non perseverare.

SEXTUM PRINCIPIUM. — Quodlibet systema super prædestinatione et gratiâ, in quo Deus videtur injustus, falsum est. Scilicet Apostolus, Epistolâ ad Romanos, cap. 9, propositâ secretionem aliorum ex massâ perditionis, aliorum verò in eâ derelictione, hæc illic sibi objicit: *Quid ergo dicemus, numquid iniquitas apud Deum?* etc.

SEPTIMUM PRINCIPIUM. — Cùm theologia sit scientia rerum revelatarum, theologus nec potest nec debet aliam fidei suæ regulam agnoscere quàm Scripturam et traditionem, et rationes ex illis legitimè deductas. Hinc dixit Apostolus *fidem esse argumentum non apparentium*, et *redigendum esse intellectum in obsequium Christi*; aliàs theologia non esset theologia, sed philosophia. Ad lucem istorum principiorum expendunt Augustiniani et Thomistæ varias absurditates quas ex eorum systemate de prædestinatione et gratiâ emanare contendunt ipsorum adversarii, eoque splendore feliciter dissipari gloriantur.

OBJECTIO PRIMA. — Omne systema ex quo erumpunt absurda consecutaria evidentem spirat falsitatem; talia sunt systemata Augustinianum et Thomisticum; ergo.

RESPONSIO. — Adversarii majorem propositionem condire debuissent adverbio, *reipsâ*. Etenim consecutaria quæ apparenter duntaxat ex aliquo systemate emanant, ejus falsitatem non arguunt, quinimò ejus veritatem aliquando produnt, ut dictum est principio sexto. Præterea, cùm nullum sit systema super gratiâ et prædestinatione ex quo falsæ consecutiones deduci non possint, hoc argumentum omnia prorsus super istis systemata exploderet.

OBJECTIO SECUNDA. — Consentiant omnes Thomistæ Deum interdum denegare finalis perseverantiæ donum justo qui præcedentibus

gratiis nullum apposuit obicem; sed illud pronuntiatum repugnat Scripturæ, D. Augustino et rationi; ergo.

RESPONSIO. — 1^o Thomistæ et Augustiniani non utuntur, verbo, *denegare*, sed verbis *non impertire*, quæ loquendi ratio diversa est; primum enim vocabulum importat ex parte Dei actum positivum, secundum actum purè negativum, quod expressit Augustinus citatis verbis (tertio principio) *non accepto perseverantiæ dono*. Et verò, in Augustiniano systemate, omnes homines in pœnam originalis peccati privantur proximâ perseverandi potentiâ, quâ fruebatur insons Adam, quæ privatio in ipsis justis cum gratiâ sanctificante reperitur, ut diximus tertio principio; unde sequitur illos homines non à Deo, sed à seipsis destitui illo perseverantiæ dono; peccando nimirum in et cum Adamo. Simile ferè responsum attulerat D. Augustinus Pelagianis quærentibus *quomodo pueri peccati rei esse poterant quod non commiserant*? Reposuit enim Adamo peccante illos in eo et cum eo peccasse. Igitur in commemoratis systematibus, Deus justis reprobis, sive non segregatis à massâ perditionis potentiam perseverandi in actu secundo non impertit, quod significavit Augustinus relatis verbis, *non accepto perseverantiæ dono justo Dei judicio, sed occulto*; verum nullam in hoc erga ipsos committit injustitiam, siquidem, ex omnium theologorum consensu, hoc donum justitiæ titulo nemini dare tenetur. Vide quintum principium.

2^o Augustiniani ultrò dicerent cum cardinali Norisio Deum ipsis justis à massâ non segregatis, etiamsi præcedentibus gratiis non obstitissent, perseverantiæ donum non concedere, et in hac hypothesi Deum nullatenus injustum efficerent. Etenim, juxta quintum principium, Deus nullo pacto sese adstrinxit ad perfectum perseverantiæ donum justis etiam reprobis dandum; quinimò, inter peccato originali infectos alios ad gloriam prædestinando, non alios, istis illam perseverantiam non impertire quodammodo statuit. Præterea certum est Deum perseverantiæ donum nemini debere, ut diximus, et ideò illud reprobis non dando nullius injustitiæ esse reum. Sensus, reponerent illi theologi, Augustini effati, *quod gratiâ non adjuventur, in ipsis itidem causa est, non in Deo*, esset, si de finalis perseverantiæ dono res est, illos homines destitui illo auxilio propter radicale vitium, quo contaminantur, quod scilicet consistit in defectu proximæ perseverandi potentiæ, quæ est effectus peccati originalis; quâ ex

causâ primaria ratio ipsorum damnationis ex ipsis, non ex Deo oritur; in ipsis itidem causa est, non in Deo; reponerent itidem theologi hæc Augustini non secus ac concilii Tridentini verba (ex Augustino deprompta) *deserunt et deseruntur*, idem enuntiare. Et verò, D. Augustinus dum disserit de justis reprobis, libro de Corruptione et Gratiâ, cap. 13, adhibet istas voces, *deserunt et deseruntur*, post istas, *non perseverant; temporales sunt, et non perseverant*, hæcque, *dimissi sunt libero arbitrio*, deducit ex non acceptione doni perseverantiæ, *dimissi sunt libero arbitrio, non accepto perseverantiæ dono*; cur autem hunc servavit ordinem? Nonne ut significaret desertionem, de quâ disserit, primitus oriri ex non acceptione actualis perseverantiæ finalis; hoc nempe dono destituti Deum *deserunt, et à Deo deseruntur*; ecce (adderent itidem doctores) sublimem et arcanam doctrinam quam S. Paulus penetrare non potuit, sive penitus intelligere, quamque ejus apologistæ D. Augustinus in pulpitis christianis prædicari noluit, ne sinistræ ideæ in simplicium et infirmorum fidelium mentes obreperent.

3^o Plerique Augustiniani et Thomistæ non asserunt Deum perseverantiæ donum non concedere justo qui anterioribus gratiis non est abusus; quinimò sentiunt hoc donum non concedi nisi illis justis qui eis adjutoris obstituerunt; clamat enim, inquit, Augustinus, eos qui non perseverant deserere et deseri, non perseverant, deserunt et deseruntur, quod evincere videtur neminem hoc dono privari nisi propter prævium peccatum; hoc autem peccatum, inquit, non est semper mortale, sed potest esse veniale, v. g., quædam negligentia, quidam tepor in oratione, tacita præsumptio, scintilla superbiæ, quæ in actiones humanas, etiam aliunde bonas faciliè irrepere potest, etc. Quâ ex causâ dixit Apostolus 1 ad Corinthios cap. 10: *Qui stat videat ne cadat*; D. Petrus: *Vix justus salvabitur*; D. Augustinus: *Quid est laudabilis etiam hominum vita, si remotâ misericordiâ discutias eam*? Quam sententiam in orationibus suis consecravit Ecclesia, et alii Patres: *Hominum salus filo annexa est*, etc. Quæ culpæ Origenis et Tertulliani reprobationis fons fortassis fuerunt et origo; ex quibus concludit Apostolorum princeps fideles cum metu et tremore salutem operari debere. Deus ipse, addunt, hæc suggerere voluisse videtur, dum Moysen terræ promissæ ingressu privavit ob culpam (ut videtur venialem) quam ad aquas contradictionis commiserat.

Quamvis igitur Deus pretiosum perseverantiæ finalis donum cui vult dare aut non dare possit, tamen in Thomistarum systemate, hoc donum nulli justo denegatur nisi propter præviam culpam cujuscumque naturæ sit.

OBJECTIO TERTIA. — Si, ut fatentur Thomistæ et Augustiniani, justis non electis semper inest gratia sufficiens, quæ peccata perseverantiæ finalis largitionem amovenia vitari possunt, et si, modò illi gratiæ non obstituerint, certò obtinebunt gratiam efficacem, quæ relata peccata infallibiliter non committent, ut vulgò concedunt, nihil obstat quominus supponatur illos justos toto vitæ curriculo, aut saltem in mortis articulo, aliquando illi gratiæ nullum apponere obicem, et ideò reipsà consequi donum perseverantiæ finalis, proindeque salvari, juxta illud adagium : *Possibili in actum redacto nihil sequitur absurdi*; quod tamen in Thomistico et Augustiniano systemate est prorsus impossibile.

RESPONSIO. — Omissa responsione, à *possibili ad actum concludi non posse*, reponunt Thomistæ et Augustiniani posse quidem justum non electum cum gratiis ordinariis in *particulari* obicem non apponere gratiæ sufficienti, sicque accersere gratiam efficacem cum quâ bonum opus infallibiliter eliciet, verum id in *generali* nequaquàm posse; tanta quippe est, inquit, humanæ voluntatis mobilitas et inconstantia, tanta in malum propensio, totque ingruunt salutis impedimenta, etc., ut ipsi justi sine speciali gratiâ et providentiâ gratiis sufficientibus non possint non obsistere; quod quidem peculiare adjutorium solis prædestinati impertitur Deus; quia illud nemini debet, et prædestinatorum præsertim est *Salvator*. Quæ responsio ut intelligatur,

Observant (quod jam annotavimus ubi de perseverantiæ dono egimus), donum perseverantiæ in actu suo perfecto et consummato (sub quo respectu electorum proprium est), diversos consequi effectus in iis quibus conceditur; in aliis enim mortem accelerat, *ne malitia eorum intellectus mutet, et fictio eorum animas decipiat*, ut dicitur Sapientiæ cap. 4; unde istud divi Augustini libro de Dono perseverantiæ, cap. 9: *Præscit Deus quòd si viverent esse lapsuros, et ideò antequàm peccent, aufert de hâc vitâ*. Deus hâc gratiâ justos non prædestinatos non dignatur; novit eos absque illo favore sese in medio iniquitatis esse contaminaturos, et in hoc ceno eos volvi sinit.... In aliis idem perseverantiæ donum consistit in vitæ prolongatione sive continuatione, ut electi emenden-

tur, et in copiâ actualium auxiliorum, quibus præveniuntur, et sinceram agunt poenitentiam; quæ benevolentia Augustino singulatim concessa est; Deus enim ante conversionem ipsum ex lethali morbo eripuit, et uberioribus gratiis perfudit. Deus sese sic non gerit erga eos quos in massa perditionis reliquit.... In aliis idem donum situm est in remotione gravium temptationum, quæ electorum lapsum infallibiliter accerserent, quod minus in Oratione Domini cā postulamus his verbis: *Et ne nos inducas, sive induci sinas, in temptationem*; hoc autem auxilium reprobis non impertit Deus... In aliis tandem affulget in affluentia cœlestium auxiliorum tum interiorum cum exteriorum, quibus Deus electos suos ex ingruentibus temptationibus eripit, et in justitiâ continet, quos triumphos sine illis adjutoriis generatim reportare non possent. Eò tendunt hæc Spiritus sancti oracula: *Conserva me, Domine, quoniam speravi in te*, Psalmo 43; *conserva in æternum hanc voluntatem cordis eorum, et semper in venerationem tuâ mens ista permaneat*, 1 Paralipomenon cap. 29; *faciam ut in præceptis meis ambuletis*, Ezechielis cap. 36, etc. Unde D. Augustinus, libro de Dono perseverantiæ, cap. 8, dixit: « Est Deo possibile in eorum cordibus operari ut nullis adversitatibus cedant, nec ab ipso aliquâ superati temptatione discedant; præstantissimum autem illud donum iis quos non elegit non impertitur. Cum igitur negent Thomistæ et Augustiniani justum non prædestinatum, cui Deus propter præviam culpam statuit perseverantiæ donum non concedere, posse in articulo mortis, *potentiâ ad actum reducibili* perseverare, frustra ipsis obijcitur adagium: *Possibili in actum redacto nihil sequitur absurdi*; adagium enim illud tangit potentiam quæ ad actum sine absurditate redigi potest; in casu autem præsentis potestas cum actu conjungi nequit.

ULTIMA OBJECTIO. — Deus justis non prædestinatis nunquàm concedit perseverantiæ finalis donum, in systemate Thomistico et Augustiniano, etiamsi gratiis sufficientibus, quæ præcesserant, non obstitissent; at istud apertè repugnat Scripturæ, quæ asserit Deum sincere velle omnium et singulorum salutem, divi Augustini doctrinæ et rationi; ergo.

RESPONSIO. — Reponunt Augustiniani et Thomistæ posse commemoratos justos singulis distributivè gratiis sufficientibus sibi concessis toto vitæ curriculo sine speciali Dei providentiâ obicem non ponere, sed eos sine illâ pro-

videntiâ non posse collectivè , ut dictum est ; illis autem justis nunquam impertitur perseverantiæ donum ob causas supra commemoratas ; illa autem doctrina non repugnat Scripturæ , Augustino , et rationi , ut prætenditur ; non Scripturæ ; enimverò , ut voluntas , quæ Deo (nest , omnes et singulos homines salvandi actiosa sit , et non sterilis , sufficit ut Deus omnibus gratias verè et relativè sufficientes ad salutem infundat ; sed non est necessarium ut omnibus tribuat perseverantiæ finalis donum ; talis enim voluntas esset *absoluta* , et adversa Scripturæ , quâ dicente , Deus ita vult omnium salutem ut specialiter electorum salutem velit , *Salvator omnium , maximè fidelium* , Epistolâ 1 ad Timotheum , cap. 4 , et *cujus vult miseretur* (dando perseverantiæ munus) et *quem vult indurat* (illud donum non impertiendo) , Rom. cap. 9 , etc. Quibus consona sunt quæ ait Christus Joannis cap. 6 : *Omnis qui audit à Patre , et didicit , venit ad me , vos non creditis , quia non estis ex ovibus meis* (electis) , *oves meæ vocem meam audiunt , et ego cognosco eas et sequuntur me , ego vitam æternam do eis , et non peribunt in æternum , et non rapiet eas quisquam de manu meâ* , Joannis cap. 10 , etc. — Lege Bellarminum libro 2 de Gratiâ et libero Arbitrio , cap. 12.... Item non repugnat Augustino , cujus antea expressa testimonia relata sunt ; nec rationi , quæ dictat Deum esse donorum suorum dominum , Deum posse non concedere donum quod nunquam promisit iis qui se eo in Adamo spoliaverunt , Deum deserere posse qui eum deserunt , Deum posse denegare donum quod ipsi justî titulo *justitiæ* mereri non possunt , in primis propter peccata , qualiacumque sint , ante mortem commissa , Deum tandem plus posse quàm humana mens intelligere potest , etc.

ARTICULUS III.

Molinisticum systema perstringitur.

Ludovicus Molina , à quo Molinistæ , post finitum concilium Tridentinum floruit. Divi Augustini doctrinæ , et communis , et in scholis Augustinianâ et Thomisticâ (quæ tunc solæ in Ecclesiâ vigeant) , receptæ sententiæ parum , ut videtur , sollicitus , in lucem emisit anno 1588 famosum librum , quem inscripsit , *Concordia* (melius fortè illum inscripsisset , *discordia*) ; ingentes enim , quemadmodum ubi nova ingeruntur accidere solet , excitavit turbas , ad quas sedandas habitæ sunt sub Clemente VIII anno 1602 , juxta Spondanum , ce-

lebres congregationes de Auxiliis , quibus finem imposuit Paulus V , anno 1606 , sanciendo , donec aliud decerneretur , ut litigantes partes suam sententiam modestè et absque mutuâ damnatione et censurâ tuerentur. Igitur opus illud theologis incognitam cœlestium decretorum seriem , et divinæ gratiæ cum libero arbitrio conciliandi rationem inducebat , quæ series et ratio in præsens delibandæ sunt.

Dei decretorum in Molinistico dogmate series.

— Deus scientiâ simplicis intelligentiæ res omnes possibiles , et ideò possibiles omnes status contemplatur... *Scientiâ mediâ* , sive *conditionatorum* , exploratum habet quid creata et libera voluntas cum his vel illis auxiliis sit operatura.. His cognitis , hominem primùm creare decrevit in statu innocentie , ac deinde post peccatum reparare... In primo ordine , voluit Angelos et homines salvos facere *antecedenter et conditionatè* , si nempe vellent , et proind ipsis ad id necessaria gratiæ adjutoria copiosè impertire.... Ista auxilia non fuerunt *ab intrinseco* efficacia , sed *versatilia* , id est , *ab eventu* , sive *voluntatis consensu* , efficacia. Hinc nulla tunc fuerunt decreta absoluta , ex se efficacia , et liberam voluntatis determinationem præcedentia , et ideò nulla prædestinatio nisi post prævisa merita , nulla reprobatio nisi ob peccata actualia... In secundo ordine , sive statu , decernit solum Adam et ejus progeniem salvare decreto generali , antecedente , et conditionato , si nimirum ipsi velint , aut non impediat causarum secundarum cursus , et ideò per Christum , quem ipsis omnibus et singulis reparatorem destinat , vult omnibus et singulis dare sufficientissima salutis assequendæ auxilia.... Cognito autem ope scientiæ mediæ quid cum tali vel tali gratiâ actura sit hominum voluntas in his vel illis circumstantiis , absolute statuit has vel illas gratias ipsis impertire , quas postea dat , et si aliquem efficaciter à vitio ad virtutem adducere vult , ac in virtute permanere , illi has aut illas gratias , cum quibus ipsum consensurum , et in bonis perseveraturum esse prænosci tribuere statuit.... Demùm *scientiâ visionis* decretum illud supponente , cuncta ordinis supernaturalis opera videt , et ideò quinam benè acturi et perseveraturi sint usque ad mortem , vel non , et sic primos propter prævisa merita absolute futura ad gloriam prædestinat ; alios autem propter prævisa peccata reprobat.

Porrò , cum Deus nihil absolute statuat circa liberas actiones nisi antea scrutatus fuerit quid

voluntas in his vel illis circumstantiis sub hac vel illâ gratiâ sit actura, nihil impedit dicere prædestinationem ad gloriam fieri ante vel post prævisa merita; nihil enim refert an Deus efficaciter velit gloriam ante gratiam, aut gratiam ante gloriam, vel an uno et eodem actu intendat simul gloriam et ordinem mediorum ad illam conducentium.

Ex his liquet Molinam cœlestia decreta ad humanæ mentis captum accommodare voluisse; liquet insuper ejus systema à Thomistico prorsus differre, et ab Augustiniano quantum ad statum naturæ lapsæ. Attamen ut nonnulla elucidentur, sit

Quomodo Molinisticum systema à Thomistico et Augustiniano circa gratiam discrepat? — Molinâ dicente passim in *Concordiâ*, quælibet gratia efficax fit vel inefficax per consensum vel dissentium voluntatis, ita ut divinæ gratiæ efficacia pendeat ex voluntatis nutu. Hinc gratia sufficiens non est specie et naturâ distincta ab efficaci; secus, ut diximus, in systemate Thomistico et Augustiniano, saltem in statu naturæ lapsæ. Hanc tamen assertionem emolire aggressus est Molina dicendo eam esse intelligendam de gratiâ *in actu secundo*, sive cum effectu junctâ, quæ per consensum *tantum conditionem sine quâ non fit* efficax, quomodo ferè sacramenta fiunt efficacia *in actu secundo* per dispositiones suscipientium, non *in actu primo*, quasi consensus vim aliquam tribueret gratiæ quatenus est gratia. Verum, cum ubique asserat gratiam pendere à voluntate *tantum à causâ determinante*, illam fieri efficacem *ex voluntatis consensu, per voluntatis consensum, etc.*, evidens videtur consensum illum in ejus mente *non esse simplicem conditionem sine quâ non* efficaciæ gratiæ *etiam in actu secundo*, quam videlicet gratia supponat, ideòque fallor si quod dixit intellexerit.

Idem Molina, ut servaret Deo causæ primæ et præcipuæ in quacumque actione supernaturali rationem his Apostoli verbis expressam: *Non est volentis, neque currentis, sed miserentis Dei*, duplicem, ubi voluntas gratiæ consentit, admisit physicum Dei influxum; unum quo Deus per prævenientem gratiam, id est, indeliberatum piæ cogitationis in mente, et motionis in voluntate actum, moraliter excitat et allicit ad consensum.... Alium quo per gratiam cooperantem, id est, concursum supernaturalem, efficienter operatur cum voluntate, et ipsum consensum cum eâ physicè elicit; in quibus ad Thomistas duplicem illam Dei actio-

nem admittentes reverti visus est. Verum eos inter et Molinam hoc intercedit discriminis, quòd in mente Thomistarum ultimus influxus prædeterminat voluntatem ad consensum, quem ideò naturâ et causalitate antecedit; è converso in mente Molinæ influxus ille non est naturâ et causalitate prior, sed simultaneous cum consensu sive actione voluntatis. Tot exinde lites inter Thomistas et Molinistas exortæ sunt, etc.

Quid sentiendum de Molinæ systemate? — Multa sanè, eaque gravissima, commemoratum Molinæ systema explodere videntur momenta, inter quæ ista sufficiant.

MOMENTUM PRIMUM. — Vel ipse hujus systematis parens ejus falsitatem reseravit cum in citato opere, cui titulus, *Concordia*, hæc ventosus efflavit: « Hæc nostra ratio conciliandi libertatem arbitrii cum divinâ prædestinatione à nemine quem viderim hucusque tradita fuit, quæ si data et explanata semper fuisset, neque pelagiana hæresis fuisset exorta, neque Lutherani tam impudenter arbitrii nostri libertatem fuissent ausi negare.... Neque ex Augustini opinione et concertationibus cum Pelagianis tot fideles fuissent turbati, ad Pelagianosque defecissent, facilèque reliquæ illæ Semipelagianorum in Galliis fuissent extinctæ. »

Igitur non theologi tantum, sed et Augustinus, et alii Ecclesiæ doctores, qui ante Molinam floruerunt, veram de prædestinatione et gratiæ efficaciâ, ejusque cum libertate concordiam, sententiam ignoraverunt. Igitur Deus, qui Augustinum et ejus discipulos excitaverat, ut revincerent Pelagianos et Semipelagianos, modum illos hæreticos refellendi eximios illos doctores non edocuit, quo tamen Molinam in fine decimi sexti seculi, ubi hæreses illæ erant extinctæ, instructum esse voluit; quis rebus theologicis vel levissimè imbutus intoleranda illa paradoxa non abhorreat? Quis aliunde absque indignatione auscultare valeat impudens illud pronuntiatum: Gratia Molinistica, id est, *versatilis*, sive *ab eventu efficax vel inefficax* ignota fuit Augustino? Nonne ipse et ejus schola illam admiserant in statu innocentiae, et in statu naturæ lapsæ admittendam non esse pronuntiaverant? Molina ergo suum systema ab Augustino accepit, illudque ad statum naturæ corruptæ transtulit, et ideò, si gloriari ipsi placet, de Augustini et Societatis suæ decretorum contemptu gloriatur. Scilicet liber de ratione studiorum Societatis Jesu Romæ impressus anno 1586, refert sententias, quas

Claudius Aquaviva generalis hujus Ordinis Moderator prævio sex doctissimorum ejusdem Sodalitii theologorum longo examine selegerat anno 1584, ut in cunctis Societatis scholis defenderentur. Has autem inter sententias hæc reperiuntur: « Item definitum est prædestinationis nec rationem nec conditionem esse ex parte nostrâ. Id ad pietatem parum pertinere dicet aliquis; at hanc Augustini doctrinam non modò communiter theologorum schola jam recipit, sed et Ecclesiæ Patres per mille et ducentos circiter annos, qui id contendunt probare ex Scripturis, et responsis romanorum pontificum, nempe Zozimi, Sixti, Cælestini, Leonis, Gelasii, apud quos Massilienses, Cassianus, Faustus, alique hujus prædestinationis oppugnatores malè semper audierunt.... Item definitum est reprobationis, quâ cæteri homines ab ultimo fine excidere permisi sunt, causam esse peccatum originale. »

Hæc refert Norisius Vindiciarum cap. 3, paragrapho 7, et cap. 4, paragrapho 10. Addit Tournelius tract. de Gratiâ, generalem ejusdem Societatis, nomine Picolomini, paulò ante censuram quinque propositionum anno 1653 *decretum Aquavivæ latum anno 1675 contra gratiam efficacem ex puro voluntatis consensu renovasse*; adeò verum est hoc systema nascenti Societati acceptum nonfuisse; utinam adolescenti nunquàm arrisisset, nunquàm fortè senisset. Id certè vehementer optaverunt quivis eruditi veteres hujus Societatis theologi, Henricus Henriques Suaresii magister, qui adversus Molinam tanquàm novatorem scripsit, Joannes Mariana, qui libro de Regimine Societatis Romæ tempore congregationum de Auxiliis edito irridet *hesterna Ludovici Molina commenta*, et certissimam Societati nisi inordinatum novitatis amorem amoveat vaticinatur ruinam, cardinalis Bellarminus, qui libro 1 de Gratiâ et libero Arbitrio, cap. 12, disserens de gratiâ Molinæ, id est, *ab eventu, sive assensu voluntatis efficaci, quasi in hominis potestate esset gratiam facere efficacem*, ait: *Hæc opinio aliena est omnino à sententiâ B. Augustini, et quantum ego existimo à sententiâ etiam divinarum Scripturarum.*

MOMENTUM SECUNDUM. — Varii variorum systematum, etiam Molinistici patрони, si excipias Molinam, qui, ut loquitur Henricus Henriques, *blasphemè et irreverenter bellicavit*, et paucos alios, consentiunt veram esse circa gratiæ efficaciam sententiam quam D. Augustinus ex Scripturis adversus Pelagianos et Semipela-

gianos propugnavit; ita enim declaraverunt modò citati ab Aquavivâ summi Pontifices; unde quivis illorum systematum defensores S. doctorem ad se trahere nituntur; at gratia quam D. Augustinus adversus illos hæreticos ex sacris codicibus vindicavit, fuit præcipuè gratia ex se et ab intrinseco efficax; ergo. — Minor ex citatis initio hujus libri testimoniis evidenter elucescit; enuntiant enim inesse Deo humanorum cordium, ubi voluerit, et quomodò voluerit, inclinandorum omnipotentissimam potestatem, humanas voluntates *indeclinabiliter, insuperabiliter, invictissimè à gratiâ moveri, gratiam cordis durtiam auferre, et à nullo duro corde respui, ipsum credere, ipsum velle esse Dei donum*, idque ex Scripturis, Isaïæ cap. 26, v. 12; 54, v. 13; Ezechielis cap. 36, v. 26 et 27; Lucæ cap. 23, v. 42; Joannis cap. 6, v. 45; Actuum cap. 9, v. 6; Epistolâ ad Romanos, cap. 9, v. 16; 1 ad Corinthios cap. 4, v. 7; Epistolâ ad Philippenses, cap. 2, v. 13, etc. — Qui plura alia S. doctoris effata desideraverit, consulere poterit eruditam dissertationem quam super hoc edidit P. Alexander in historiâ seculi quinti; sed hæc manifestè arguunt gratiam ex se efficacem, et in Molinæ systemate potius eluduntur quàm explicantur.

MOMENTUM TERTIUM. — Improbanda est sententia quâ semel admissâ ruit fundamentum divinæ prædestinationis ad gloriam quam S. Augustinus et ejus discipuli ex sacris codicibus solidissimè comprobaverunt; hanc enim gratuitam ad gloriam prædestinationem, quam S. doctor libro de Dono perseverantiæ, capite vigesimo, *se necessitate compulsus contra Pelagianos defendisse* asserit, non modò tenuit, ut modò dicebat Aquaviva, *communiter theologorum schola usque ad annum 1588, sed etiam Patres per mille et ducentos circiter annos, et summi pontifices apud quos Massilienses hujus prædestinationis impugnatores semper malè audierunt*. Hinc D. Fulgentius, imò cum ipso Patres synodi Sardiniensis, in epilogo libri de incarnatione et gratiâ, asserere non dubitavit, eos qui hanc prædestinationem rejiciunt non pertinere ad eorum numerum quos Deus in Christo ante mundi constitutionem elegit, et prædestinavit ad regnum. Hinc Baronius ad annum 490, eos increpans qui Calvinî hæresim detestantes in sententiam super prædestinationem Augustinianæ adversam declinabant, dixit: « Cum igitur Fausti sententiæ ubique ab Ecclesiâ fuerit contradictum; videant quanto periculo quidam ex recentioribus, dùm in novatores ex-

surgunt, ut eos confutent (quid diceret si hodiè viveret) à S. Augustini de prædestinatione sententiâ reedunt, cùm aliqui arma non desint quibus adversarii (Calvinistæ) profligentur; » at Molinæ systema circa gratiæ efficaciam hanc prædestinationem funditus evertit; illius enim prædestinationis certitudo et infallibilitas inde tota oritur quòd Deus electis efficacem gratiam præparaverit; quos enim, inquit Apostolus Epistolâ ad Romanos, cap. 8, *prædestinavit, hos et vocavit* (vocatione, ut monet Augustinus libro de Correptione et Gratiâ, cap. 7, *secundum propositum*, de quâ dictum est ibidem v. 28: *Omnia cooperantur in bonum iis qui secundum propositum vocati sunt sancti*); quos verò *vocavit* (secundum propositum), *hos et justificavit* (justificatione secundum propositum cui annexa est perseverantia usque in finem); quos verò *sic justificavit, illos et glorificavit*. Ita ferè Bellarminus libro 1 de Gratiâ et libero Arbitrio cap. 12, tempore nimirum quo hæc doctrina ubique propè erat recepta, et Molinæ Suaresiive systema timidè assurgebat, et nondum dominabatur. Etverò, pergit ibidem vir eruditus, « si vocatio efficax non penderet à proposito Dei, sed ab hominis voluntate, nullus locus relinqueretur prædestinationi, sed tantum præscientiæ (neque dixisset Apostolus Rom. cap. 9, *ut secundum electionem propositum Dei maneret*), non ex operibus, sed ex vocante dictum est, etc. » Deinde « ridiculum esset gratiam nuncupare efficacem, eamque à sufficiente secernere, si nulla omninò in ipsâ gratiâ esset diversitas, et totum discrimen ab humanâ voluntate penderet. »

Denique, cùm Molina, ut dictum est, admittat physicum influxum, quo Deus per modum causæ primæ et præcipuæ simul cum homine elicit consensum, aut videtur non intelligere quod dicit, aut agnoscit in gratiâ vim intrinsecam consensum producendi, et ideò gratiam ab *intrinseco* efficacem.

His et aliis benè multis gravissimis adversùs Molinæ systema momentis perpensis, Clementis VIII et doctissimorum consultorum celeberrimæ congregationis de Auxiliis sententia fuit, Molinam et ejus sectatores esse à S. Augustini et ejus discipulorum *doctrinâ penitus alienos*, ut refert P. Alexander citato loco; quin nonnulli referunt Clementi VIII iteratis vicibus quærenti à Molinistis ut explicarent, *quid est quod facit hominem agere*, à Bastidâ tandem et ejus sociis responsum esse Congregatione 37, *gratiam facere agere moraliter*; quo audito ex-

clamavit summus pontifex: *Hanc gratiam excitantem posuit Cassianus*; unde, inquit, si è vivis non excessisset Clemens VIII, Molinæ systema censuram non effugisset.

ARTICULUS IV.

Concisa Congruistarum systematis delineatio.

Franciscus Suarez, libro præsertim 3 de Auxiliis divinæ gratiæ, cap. 14, Henrici Henriques monitis, et Aquavivæ jussis parùm obsequens, Valquez et alii non pauci è Societate Jesu, Molinæ systema suo modo condierunt. Etenim Molinæ *mediam scientiam* servantes, et omnem gratiam *ex se et ab intrinseco* efficacem tanquàm libertati prorsus adversam eliminantes (et ideò gratiam efficacem à sufficiente naturâ et virtute non discrepare contententes), gratiæ tamen efficaciam non à *solo eventu* (ut Molina), sed à *congruitate* oriri fecerunt; gratiam proinde efficacem *congruam*, sufficientem verò non *congruam* vocaverunt; quâ ex causâ *Congruistæ* dicti sunt.

Duplicem autem distinguunt *congruitatem*, intrinsecam et extrinsecam. Intrinseca ipsa est stupenda et interna virtus quæ gratiæ inesse concipitur ante prævisum per scientiam mediam, sive conditionatorum, voluntatis consensum. Cùm gratia sic congrua non sit diversa à gratiâ *ex se et ab intrinseco* efficaci, gratiæ efficaciam in eâ non reponunt Congruistæ, ne scientiam suam mediam deserant, et in systema Thomistarum et Augustinianorum libertati (ut prætendunt) inimicum incidant... Extrinseca consistit in congruitate, sive accommodatione gratiæ cum hominis indole, et diversis loci et temporis circumstantiis, quatenus hæc omnia scientiæ mediæ subduntur. Scilicet, cùm Deus hominem vult efficaciter convertere, gratiam ejus genio et dispositionibus consonam ipsi largitur, et quidem eo loco et tempore, iisque in circumstantiis, in quibus per scientiam mediam prænoscit ipsi cum esse consensurum; et hæc est congruitas quâ gratia dicitur fieri et reipsâ fit efficax; etsi enim ex se non habet infallibilem cum effectu connexionem, tamen prout subest scientiæ mediæ illum infallibiliter est habitura.

Quisnam sit in Suaresiano systemate cælestium decretorum nexus et ordo? — Deus, cujus menti observabantur innumerabiles rerum ordines possibiles, præsentem eligere voluit. Omnes in hoc statu creaturas liberas extituras ad æternam felicitatem destinavit, illarumque ideò salutem voluntate beneplaciti antecedente et con-

ditionatâ voluit, et quidem ante Adæ delictum sub solâ istâ conditione, *si vellent*; at post illud peccatum sub istâ insuper conditione, *si non impediret causarum naturalium fluxus*, aut aliorum hominum pravitas, desidia, etc. Sic infantium sine baptismi morientium salutem sincerè voluit Deus. Vi autem hujus voluntatis omnibus auxilia ad salutem verè sufficientia destinavit; deinde ope scientiæ mediæ cognoscit quid unusquisque in singulis circumstantiis sit factururus, si hanc aut illam gratiam ipsi infuderit; quâ habitâ notiâ nonnullos pro beneplacito suo et speciali in eos dilectione assumit, sive prædestinat decreto absoluto, efficaci et antecedente (non consentiunt an prædestinatio illa sit primò ad gloriam, et subinde ad certam gratiarum congruarum largitionem et merita, an è converso primò ad gratias congruas, et bona opera, et postea ad gloriam, licet systematis parens Suarezius primam opinionem tradiderit). Hoc decretum absolutum et antecedens non admisit Molina. His porrò electis, non aliis, præparat certum illum gratiarum congruarum ordinem cum quo infallibiliter usque in finem perseveraturi sunt. Demùm per scientiam visionis, noscit quinam sint salvandi, quinam reprobandi, et illis in tempore gloriam propter bona opera rependit, istis verò poenam æternam propter malè gesta.

¶ *Quid sentiendum de Congruistarum systemate?*

—Cum Congruistæ scientiam mediam admittant, et gratiam *ex se et ab intrinseco* efficacem cum Molinistis rejiciant, patet eorum systema directè repugnare sententiæ quam, ut ante ostendimus, tum circa prædestinationem cum circa gratiæ efficaciam ex Scripturis contra Pelagianos et Semipelagianos vindicavit D. Augustinus. Porrò, « certum est, inquit nonaginta septem præsules Gallicani in Corpore doctrinæ anni 1720, auctoritatem SS. Augustini et Thomæ mereri omnibus modis magnoperè præferri. Nam Augustinus in materiis de gratiâ et prædestinatione habetur tanquàm Ecclesiæ doctor, nec potest sine periculo recedi ab ejus doctrinâ, et ad intelligendam hanc doctrinam tutius est uti S. Thomâ tanquàm doctore, qui fuit unus ex fidelioribus ejus interpretibus. » Et verò, quis ferat novitios illos doctores, dùm (quæ se scire non posse candidè professus est Augustinus) gloriantur se explicare posse, concordiam nempe libertatis cum gratiâ, vel quo in medio Deus res liberè futuras videat? Equidem Atg. istinus, libro 1 de diversis quæstionibus ad Simplicianum, quæstione 2,

n. 15, dixit: « Illi sunt electi qui congruenter vocati, illi autem qui non congruebant, neque contemperabantur vocationi, non electi, quia non secuti, quamvis vocati.... Cujus autem miseretur (Deus) sic eum vocat quomodò scit ei congruere ut vocantem non respuat. » Verùm, præterquàm quòd tres Vaticani codices legunt, *qui congruebant* (id est, non resistebant) *vocationi*, sagaces doctores accommodant *congruitati extrinsecæ*, sive desumptæ ex hominis indole, circumstantiis loci, temporis, etc., quod dixit Augustinus de congruitate gratiæ intrinsecæ, sive in ipsâmet gratiæ naturâ fundatâ; hanc enim congruitatem, sive efficaciam passim refundit in omnipotentissimam Dei voluntatem humana corda quòd vult et quomodò placet inclinantem, ut loquitur ibidem, cap. 19.Item Augustinus libro 12 de Civitate Dei, cap. 6, hypothesim instituit duorum hominum æqualiter dispositorum animo et corpore, quorum unus movetur ad illicita desideria, non alter, *cujus discriminis causa est*, inquit, *quòd unus voluit, alter noluit à castitate deficere*. Gratia ergo, inquit acuti homines, efficax, fit per voluntatis consensum, sive indolis temperamentum. At si bonæ criticæ regulas, ut et Ecclesiæ sensa edocti essent, genuinam Augustini de gratiæ efficaciâ sententiam quærent in operibus quæ sub vitæ finem adversus Pelagianos et Semipelagianos conscripsit, non in nonnullis pronuntiatis quæ ipsi exciderunt in libris quos junior et nondùm ab erroribus Semipelagianorum plenè expeditus in lucem emisit. Deinde locus ille, ut inspicienti illicò apparet, gratiæ efficaciam nullatenus tangit. Ibi enim S. doctor inquirat causam malæ voluntatis, non bonæ voluntatis, *an scilicet Deus sit causa mali*, et illam causalitatem omninò rejicit in voluntatem, sive liberum arbitrium; unde simpliciter dicit, *unum voluisse, et alterum noluisse à castitate deficere*, nullâ gratiæ factâ mentione, quia ad ejus scopum satis erat asserere eum qui à castitate deficit defecisse *quia voluit*, et eum qui non defecit non defecisse *quia noluit*, cum utrumque illorum hominum voluntatis effectus sit.

Præterea gratia ab extrinsecis circumstantiis efficax plura secum volvit et trahit absurda. Deus scilicet hominem efficaciter convertere non posset nisi converti vellet. Etenim, priusquàm hominem efficaciter convertere possit, oportet ut exploret per scientiam mediam quid iste homo, si tali vel tali modo vocetur, huic vocationi sit responsurus; unde, si cuiusque vocationi ille homo morem gerere noluerit,

Deus non poterit illum efficaciter convertere ; at hoc in systemate meritò sanè supponi potest illum hominem cuicumque gratiæ quolibet instanti consentire nolle , cum ejus voluntas sic pravè affecta supponi valeat ; sed hoc non sentit Ecclesia quæ Deum rogat *ut nostras etiam rebelles ad se propitius compellat voluntates*.... Item homo in articulo mortis non deberet postulare gratiam efficacem ; nam gratia efficax fit per circumstantias congruas ; sed homo cum sit in articulo mortis non potest constitui in aliis circumstantiis. In alio è converso systemate debet rogare Deum ut cor lapideum , quo obduruit , per omnipotentiam suam avellat , si malè vixerit , vel perseverantiam tribuat , si benè vixerit.... Item Adam in statu innocentie habuisset gratiam congruam , et ideo perseverasset ; major enim congruitas excoitari nequit quàm ea quæ hoc in statu extitit... Tandem sotes nunquàm converterentur in ipso peccandi æstu , et justi ubi gratiâ excitantur semper perseverarent ; quæ profectò falsa esse evincunt Sauli exemplum , et multorum justorum excidium , etc.

ARTICULUS V.

Nupera Thomassini opinio expenditur.

Ludovicus Thomassinus , insignis è congregatione Oratorii theologus , tantâ eruditionis et pietatis famâ excelluit , ut Ludovicus Magnus summo pontifici ipsum ad sanctam urbem accersere cupienti responderit , *se viro regni sui doctissimo privari nunquàm esse censurum*. Vir eximius , ex unâ parte considerans Pauli V in fine congregationum de Auxiliis anno 1606 indulgentiam erga novum ope scientiæ mediæ gratiæ efficaciam explicandi Molinæ systema , ex alterâ verò parte Ecclesiæ catholicæ hostes uti gratiâ Thomistarum et Augustinianorum ex se et ab intrinseco efficaci , et ideo infallibilem cum effectu connexionem habente , ad perversum suum dogma de libertatis interitu persuadendum ; hæc , inquam , secum ipse seriò recogitans , existimavit se de Ecclesiâ non esse malè meriturum , si alterum systema circa idem objectum utriusque commemorati dogmatis incommodis non obnoxium proponeret ; si videlicet summus pontifex permiserat præfata systemata in scholis liberè propugnari , multò magis permissurus erat opinionem intrinsecæ gratiæ vi et energiæ et libero voluntatis arbitrio (ut existimabat) consulentem in iisdem scholis defendi. Hinc in dogmatibus suis theologicis , gratiæ virtutem non in voluntatis

consensu , non in divinâ motione constituit , sed in congerie multorum auxiliorum tum extrinsecorum cum intrinsecorum , quibus cœlestis gratia voluntatem ita invadit et circumvenit , ut ab eâ consensum infallibiliter eliciat. Sed audiamus doctissimum virum suam mentem dilucidè expromentem : *Ineluctabilis vis , inquit , gratiæ victricis , consistit in multitudine , varietate , consonantiâ , et conspiratione plurium auxiliorum interiorum exteriorumque , quorum singula seorsim frustrari possunt , quin et frustrantur quandoque per libertatis humanæ contumacem dissensum ; at universa obstinatissimos quosque fatigant tandem , et multitudine , conspiratione , indefessâ oppugnatione suâ ad assensum tandem pertrahunt .* , *Attractio autem illa omnium cœlestium auxiliorum in mente Thomassini non est physica determinatio sive prædeterminatio , sed moralis tantum , licet non minùs infallibilis sit , imò invieta , quàm si esset physica . Unde Thomassinus non censuit (ut supra laudatus Daniel) moralem prædeterminationem infallibilem cum effectu non habere connexionem . Porro , in hoc systemate , si erudito viro fides , sua insuperabilis gratiæ vis et efficacia asseritur absque venatrice conditionatorum scientiâ ; omnipotentissimæ enim Dei sapientiæ explorata sunt innumera adjutoria quibus cum voluerit , et quoties ac quomodò voluerit mortaliū corda domare et inflectere potest . Salva etiam remanet hominis libertas . Licet enim illorum auxiliorum aggregationi , sive collectioni , resistere non possit voluntas , singulis tamen non solum potest , sed etiam aliquando reverà obsistit , ad eum ferè modum quo sots singula peccata mortalia vitare potest , non omnia , aut justus singula peccata venialia potest effugere , non omnia .*

Verùm istud systema votis et proposito eximii sui auctoris nequaquàm accommodum videtur . Admirabili enim gratiæ Christi virtuti , ut et hominis libertati , quas commendavit Augustinus , non satis prospicit . Enimverò ex relatis Thomassini verbis elucet nullum existere speciale gratiæ auxilium quod certissimè et infallibiliter sit efficax , siquidem « singula seorsim Dei auxilia non solum frustrari possunt , sed etiam quandoque per voluntatis dissensum frustrantur , » et aliunde « ineluctabilis vis gratiæ victricis oritur ex multitudine , varietate , consonantiâ , et conspiratione plurium auxiliorum . » At nihil est quod D. Augustini doctrinæ magis repugnet ; ut enim innumera

S. doctoris testimonia, quorum plura antea protulimus, omittam, docet libro de Gratia Christi, cap. 45, n. 49: Christum, cum interiore sua gratia Petrum visitavit, interioris hominis usque ad exteriores lacrymas subito movisse et produxisse affectum, et libro 1 ad Bonifacium cap. 19, n. 37, Saulum scelus anhelantem, et pestem Ecclesiae nefarie molientem, *mirabili et repentinâ Dei vocatione conversum fuisse*; an, quaeso, illa gratia non fuit singulari et maxime efficax gratiae auxilium? An in instanti stillavit in Petrum et Saulum omnium gratiarum copia? An illa gratiarum, quarum nulla ex se erat efficax, aggregatio, si in Petrum et Saulum illicò delapsa esset, in momento ita obstinatissimam utriusque voluntatem movisset et fatigasset, ut ad assensum statim attraxisset? Præterea, Ecclesia in orationibus suis Deum quasi perpetuò rogat ut efficacem illam gratiam, quam ex Apostolo prædicavit Augustinus, peccatoribus infundere dignetur. Denique fide constat voluntatem gratiae quamlibet efficaci posse resistere; si ergo gratiae efficaciam consistit in coadunatione coelestium auxiliorum, non solum singulis auxiliis seorsim sumptis reluctari poterit voluntas, sed et omnibus collectivè consideratis, quod negat Thomassinus.

Nonnulli sapientes viri, considerantes cuncta relata systemata aut Dei virtuti et omnipotentiae, aut humanae libertati, aut omnimodæ gratiae efficaciae non satis consulere, et aliunde modum, quo in præsentī statu operatur gratia, inter arcana religionis christianæ sacramenta esse numerandum, se altiora quaerere detrectant, et ideò totam gratiae vim in quâdam coelitus inditâ energiâ omninò absconditâ collocant, quæ ex infinitâ Dei virtute voluntatem liberè, sed invictè operari facit. Hæc sanè sententia commemoratis Apostoli et Augustini oraculis est prorsus consona. Verùm, quamdiù impervium illum agendi modum non assignabit, aliena quidem erit à systemate Moliniano, aut Suaresiano (quorum patroni stupendâ contradictione Jansenio vitio vertunt quòd in ejus systemate facilè concipitur concordia libertatis cum gratiae motione), sed non ab Augustiniano, aut Thomistico, in quorum idcirco alterutrum ultimò delabatur.

Liber quartus.

DE INSIGNIORIBUS GRATIAE CHRISTI BENEFICIIS.

Eximius gratiae præco et vindex in aureis operibus, Regio Propheta et Apostolo præ un-

tibus, gratiae, præsertim *gratum facientis*, quæ mortalium mentes, non secus ac sole terrarum orbis, illuminantur, et divinam accipiunt et servant vitam, mirabiles effectus impensè extollit, et quantum humana patitur imbecillitas, graphicè depingit. Tot sunt et tam reconditæ excellentiæ ut iis duntaxat qui ex hâc vitâ ad coelestem patriam enigrarunt plenè explorati sint. Scilicet tanta est hominis lapsi infirmitas, tanta in malum propensio, ut nequaquam Deo appropinquare, vel ipsi constanter inhærere possit, absque coelestis auxilii adminiculo, et omnipotentissimâ virtute. Præstans quidem illa prærogativa erat penès primum hominem cum perfectâ libertate et sanctitate conditum; sed ubi se beneficentissimo Conditori infandâ rebellione immorigerum præstitit, illâ infelicitèr spoliatus est, sicque non in se, sed in Deo solo gloriari debet. Consuli poterit S. doctor libro de Dono perseverantiæ, cap. 7, n. 13, ubi sublimem illam doctrinam egregiè et solidè exponit et expandit.

Exindè contigit ut inter scholæ doctores alii plures, alii pauciores gratiae fructus recensuerint. Multi quinque præcipuos enumeraverunt, scilicet naturæ virium sive infirmitatis sanationem, culparum detractionem, animæ justificationem, intimam cum Deo conjunctionem, et attributionem juris ad gloriam, sive vitam æternam; qui nempe vel leviter sacros codices, et pretiosa Patrum, imprimis Augustini, monumenta attigerunt, iis mirabilia illa munera ex gratiâ Christi dimanare apprime exploratum est. Verùm ipsi magistri qui quinque illa gratiae beneficia seorsim enucleant ultrò fatentur illa ferè omnia intra justificationis et meriti cancellos circumscribi, et ideò sub his capitibus appositè exponi posse. Quamobrem disseremus de primo gratiae munere, sive de justificatione, de altero ejusdem gratiae effectū, sive de merito, subinde disceptationem inituri (1).

CAPUT PRIMUM.

De primo Dei gratiae effectū, sive de hominis justificatione.

Sancta synodus Tridentina, sessione 6, catholicam de justificatione doctrinam egregiè et

(1) Multis profectò desiderandum videbitur, ob præcipuam materiei gravitatem, quòd Clericus à Belliberone gratiam justificantem, et ejus effectus, donaque ipsi adjuncta non penitus exegerit. Quæ ut omnia reparentur, ad calcem tractatūs addititium subnectimus caput, ex Haberti theologiâ depromptum, in quo res mirâ concinnitate simul ac luculentia absolvitur.

luculenter adversus Lutherum, Calvinum et eorum defensores exposuit et consecravit. Idem præstiterunt scholæ doctores qui ab illorum hæreticorum ætate mundo illuxerunt. Ut autem tam immensæ dignitatis et virtutis argumentum, quo incredibilis justorum animæ decor, et præstantiora divinæ potentiae miracula veluti humanis subjiciuntur oculis, pressius et luculentius edisseratur, et novorum commenta dispereant, disseremus 1^o de justificatione, ut loqui amant, *in fieri*, id est, de conditionibus justificationem tangentibus..... 2^o de justificatione, ut aiunt, *in facto esse*, sive de justificationis essentiâ..... 3^o de justificationis, ut rursus dicunt, *essendi modo*, sive qualitatibus seu effectibus; præmissâ tamen ad dissipandam omnem ambiguitatem, et majorem rerum dicendarum notitiam accersendam, contractâ de variis justificationis acceptionibus quæstione.

Quæstio prævia.

DE PRÆCIPUIS JUSTIFICATIONIS ACCEPTIONIBUS.

Justificatio sic dicitur à justitiâ, cujus idecirco notitia justificationis cognitionem instillat. Justitia autem universim rei sonat rectitudinem sive integritatem; dictat enim ratio id esse justum quod rectum est, sive cum ordine conspirans. Cum autem quod justum est dissimiliter rectum esse possit, hinc sacris in codicibus justitia variè delineatur. Etenim justitia interdum connotat rectitudinem per sacros libros, sive legem scriptam imperatam, Psalmo 18, v. 9, Psalmo 118, v. 5, 8, 133; Rom. cap. 2, v. 26, etc. Item justitia aliquando designat specialem virtutem quâ cuique quod suum est rependitur, Exodi capite 20, v. 15; Matthæi cap. 7, v. 12, cap. 19, v. 18.

Item justitia sæpius exprimit rectitudinem internam, sive *cordis*, quæ hominem ordinatè dirigit ad Deum et proximum, sicque æternam vitam accersit. Hæc justitia sive justificatio modò dicitur *justitia fidei*, quia à Christi fide velut à radice ramus pullulat; modò *justitia Dei*, quia insigne supremi Numinis munus est et donum. Illam tangit Apostolus Epistolâ ad Philippenses, cap. 3: *Propter Christum*, inquit, *omnia detrimentum feci, et arbitror ut stercora, ut Christum lucrificam, et inveniar in illo, non habens meam justitiam quæ ex lege est* (id est justitiam ex solâ legis notitiâ sine gratiæ adjutorio partam, de quâ gloriabantur Ju-

dæi), *sed illam quæ est ex fide Christi Jesu, quæ ex Deo est justitia in fide*. Hæc justitia, quæ homines *rectos facit corde*, et ideò Deo acceptos, in Prophetarum scriptis et novo Testamento passim commendatur. Scilicet *cum omnis Scriptura divinitus inspirata eò collimet ut perfectus sit homo Dei ad omne opus bonum instructus* (2 ad Thimotheum 3), ea præ cæteris fuit celebranda justificatio quæ bonorum omnium, sive meritoriorum operum fons est et origo.

Justitia, sive justificatio ultimo sensu accepta, quam Deus per gratiam suam in homine gratis producit (Rom. 3, v. 24), illa ipsa est de quâ cum novatoribus lis movetur, et ideò nobis instituendus est sermo; omni profectò ex parte humanâ attentione et indagatione digna est. Etenim, præterquàm quòd illa est *unum illud necessarium* quod prædicat Christus Lucæ cap. 10, certè illius causa primaria efficiens est Deus, efficiens meritoria Christi passio, efficiens per *modum instrumenti uniti* Christi humanitas, per *modum* verò instrumenti *sejuncti*, novæ legis sive Christi sacramenta, materialis sive subjectiva anima humana, formalis intrinseca gratia habitualis, et extrinseca, sive exemplaris, Christi justitia, finalis tandem gloria Dei, et vita æterna, ut ex dicendis elucescet; unde nihil nisi divinum et homini maxime salutiferum spirat et redolet.

ARTICULUS PRIMUS.

Justificatio in fieri, sive conditiones ex Dei institutione justificationi præeuntes, expenduntur.

Quæstio adultos spectat, non infantes, qui propriæ et actualis dispositionis non sunt capaces.

Consentiunt decimi sexti seculi heretici, cum quibus concertaturi sumus, quemdam fidei actum adultorum justificationi ex divinâ ordinatione præire debere. Ausi quippe non sunt præclara hæc super re Spiritûs sancti oracula, Marci ultimo, v. 16, Actuum 8, v. 37, Hebræorum cap. 11, v. 6, etc., impugnare.

Verùm quo adiguntur vertiginis spiritus illos in prodigiosos errores circa illum actum præcipitavit, nimirum circa naturam illius fidei, circa illius adjuncta, et circa modum illius concursus ad justificationem; quæ tria idecirco speciatim sunt indaganda.

§ 1. *Fides justificationem impetrans discutitur et retegitur.*

Expenditur novatorum sententia. — Fides jus-

tilicans, quam commentū sunt novatores decimū sexti seculi, omnes eorum errores peperit, nimirum circa Sacramentorum operandi vim circa corporis Christi in Eucharistiā præsentiā, circa operum satisfactoriorum inutilitatem, etc. Unde sedulò est investiganda et refellenda.

Joannes Calvinus, libro 3 Institutionis cap. 2, paragrapho numero 9, Martinus Kemnitius 1 parte Examinis concilii Tridentini, et alii vulgò insignes tum Lutherani cū Calvinistæ unicam esse piorum fidem agnoscunt et prædicant (ut loquitur Calvinus ibidem), à quā discrepat fides *historica et miraculorum*, et ideo scholasticis crimini vertunt, quòd triplicem illam fidem eandem esse somniant.

Fides historica ipsis dicentibus ea est, quā credimus esse vera quæcumque sacris Tabulis inscripta sub... Fides miraculorum illa, quā credimus ab omnipotente Deo fieri vel imperari posse miracula.

Unica autem piorum fides, quam prædicant, est fides quam vocant *divinarum promissionum*, quia respicit cœlestes promissiones de aeternā vitā et delictorum relaxatione.

Hanc promissionum fidem partiuntur in generalem et specialem. Generalem illam nuncupant, quā creditur Deum cunctis fidelibus sive electis, peccatorum veniam, et ideo salutem esse pollicitum; specialem, quā quilibet pius, sive prædestinatus, sibi cœlestem promissionem adscribens, certissimè confidit sibi per Christum remissa esse peccata.

In hac speciali promissionum fide totam salutis humanæ œconomiae anchoram reponunt. Nihilo tamen minùs non omninò consentire videntur in sincerā ejus notione figendā. Scilicet Calvinus, libro 3 Institutionis, cap. 2, in fine numeri 7, illam sic finit : « Est divinæ erga nos benevolentiae firma certaue cognitio, quæ gratuitæ in Christo promissionis veritate fundata, per Spiritum sanctum et revelatur mentibus nostris, et cordibus obsignatur. » Ubi cū solius divinæ erga nos benevolentiae facit mentionem, concordat cum Lutheranis qui fidei justificantis nullum aliud assignant objectum, quàm specialem Dei misericordiam. At fidem illam non *fiduciam* sed *cognitionem* vocans ab illis recedere videtur; insigniores enim Lutherani fidem illam non tam *notitiam* vel *assensum* quàm *fiduciam* esse obgarriunt. Illam tamen fiduciam fortassis exprimere voluit verbis, et *cordibus obsignatur*. Ibidem enim, versùs finem numeri 8, ait : *Assensio fidei cor-*

dis est magis quàm cerebri, et affectus magis quàm intelligentiæ, et numero 16 *fiduciam et expectationem promissionum Dei* impensè commendat. Quancūm notum est istud Cui libro 4 de Locis cap. 6, de Calvino effatum : Ratiocinatur ille quidem interdum argutè, sæpius eleganter, sed quandoque adeò ineptè, insulsè, frigide, ut vix eum credas, non dico eruditionem acumenve, sed aut rationem omninò ullam, aut sensum etiam communem habuisse. »

Igitur sentiunt illi hæretici fidem justificationi præviā sive juxta illos justificantem esse firmam et certam fiduciam specialis Dei misericordiae, et ideo connotare solam promissionem illius benevolentiae, illam à spe non distingui (cū fiducia Cicerone etiam teste sit spes certa); illam in voluntate residere, imò illam, si sit actus intellectus, non assensus, sed notitiæ actum esse, siquidem fidem aliquando finiunt *cognitionem* sive *notitiam*.

Declaratur Catholicorum sententia. — Orthodoxi, dū de divinā fidelium fide disserunt, fidei historicae nomen rarò usurpant, « ne, inquit Bellarminus libro 1 de justificatione cap. 4, quis in animum suum falsò inducat ipsos res sacros in Commentarios relatas credere propter solam historici auctoritatem; sed illam fidem simpliciter dicunt catholicam, » aut *dogmaticam*, quibus nominibus à pluribus antiquis *Patribus donatur*. Ultrò quidem fatentur fidem ad justificationem viam sternentem et historicam, et miraculorum, et promissorum esse; verū contendunt illam fidem ex parte *objecti formalis* reverà non distingui. Una quippe est, ut ait Apostolus Epistolā ad Ephesios, cap. 4, *fides* (formaliter) eaque catholica, quā propter summam Dei revelantis veracitatem tanquàm rationem formalem omnia quæ sacri complectuntur codices, sive historica, sive doctrinalia, sive promissa firmissimè credimus.

Quamobrem Catholici sentiunt et docent 1º fidem ad justificationem disponentem non solam specialis Dei misericordiae promissionem (ut placet novatoribus), sed et id omne quod enuntiat Dei verbum necessariè connotare.... 2º Non voluntatis (ut iidem vulgò sentiunt hæretici), sed intellectus actum esse... 3º Non notitiam (ut interdum iidem obtrudunt), sed assensum esse intellectus; Deo scilicet assentimur et assentiri tenemur, licet ea quæ revelat mentis nostræ captum superent, Epistolā, ad Hebræos cap. 11, v. 1. Cum ipsis sit

CONCLUSIO. — Fides justificationis prænuntia non est specialis promissionum fides, quā quis

sibi cœlestem promissionem applicans credit, aut certissime confidit sibi per Christum dimissa esse peccata; sed est fides catholica, id est assensus firmus et certus cunctis rebus à Deo revelatis. A theologis omni ex parte ut certa habetur.

Probatur 1^o ex sacris codicibus. Non unum, et quidem invictum, nobis suppeditant argumentum. Etenim tradunt, et quidem frequentissime, ut in articulo 5 ostendimus, commemoratam fidem, sive confidentiam, absque divinæ revelationis subsidio, ab ipsismet prædestinatis in hac vitâ nequaquam haberi posse, quinimò ipsos summopere cavere debere ne talem obrepere, multò magis invalescere persuasionem patiantur; quis autem sui compos existimaverit ad justificationem pertinere quod ipsi iusti sine extraordinario auxilio consequi non possunt?

Item expressè docent fidem ad justificationem requisitam non esse fiduciam quâ certi sumus de peccatorum remissione. Etenim Epistolâ ad Hebræos cap. 11, v. 1, fides definitur, *sperandarum substantia rerum, argumentum non apparentium*. Enimverò, si Apostolus ibi disputat de fide justificante, eamque fidem, non fiduciam in specialem Dei benevolentiam, sed certum et firmum cunctis rebus à Deo reclusis assensum pronuntiat, hoc indubiè testimonium adversariorum dogma pessumdat; at hæc eructat Apostolus. Fides enim quam v. 1 definit ipsa est fides ex quâ *justum vivere* dixerat in fine capitis 10, sive immediatè præcedentis, *sine quâ impossibile esse placere Deo* asserit versu 6 capitis 11, quâ insigniri debet qui vult *accedere ad Deum*, id est placere Deo, ibidem, per quam veteris Testamenti sancti divinas *repromissiones* et *justitiam* adepti sunt, toto decursu capitis 11, etc. Sed desperet profectò qui fidem his characteribus depictam justificantem esse inficiaretur. Pariter fidem quam ibi prædicat *argumentum* vocat Apostolus, id est *demonstrationem* et *convictionem*; argumentum enim ibi græcè sonat, *demonstratio, convictio*; unde Augustinus tractatu 79 in Joannem, n. 4, legit, aut interpretatur, *convictio rerum quæ non videntur* (mirum est Bellarminum hoc non notasse libro 1 de justificatione cap. 5). Idem evincit vox latina, *argumentum*, cum ex argumento oriatur demonstratio et convictio. Addit Apostolus, eâ fide *intelligi aptata esse secula* v. 3, *credi Deum esse*, v. 6, *metuisse Noe*, v. 7, etc. Sed hæc exsibilant confidentiam quâ adversarii volunt quemque fidelem certum esse sibi in particulari per Christum dimissa esse peccata;

convinci enim, intelligere, credere, etc., totidem sunt actus intellectus; fidentia è converso et securitas actus voluntatis, et aliunde fides Noe, si fuisset fiducia, timorem ipsi incutere non potuisset; cum confidentia timorem explodat, nedum afflet, etc. Tandem fides, quam laudat Apostolus, est *sperandarum substantia rerum*, sive, ut Augustinus loco citato legit, *sperantium*, hoc est, si homines respicit, id quo stant et vivunt iusti terrena aspernando, et cœlestia appetendo; si verò tangit res speratas, id, ut exponit Chrysostomus homiliâ 12 in Epistolam ad Hebræos, quo res speratæ, quæ, quamdiù sperantur, sive expectantur, sine substantiâ esse putantur, substantiam accipiunt, sive subsistunt in sperantis animâ, sicut eum sustentant et quasi spirare faciunt... Est argumentum sive convictio non apparentium, id est rerum cœlestium in seipsis non apparentium, sive obscurarum, quibus Deus superno lumine suo internam persuasionem operante intellectum assentiri facit; quæ nempe videntur et intelliguntur in divinam fidem non cadunt; unde Augustinus, citato tractatu 79 in Joannem n. 4, dicit Thomam cum ei dixit Christus Joannis 20 : *Quia vidisti me, credidisti, non hoc credidisse quod vidit, sed vidisse hominem credidisse Deum... Est fides quâ intelligimus aptata esse secula verbo Dei, ut ex invisibilibus visibilia fierent*, v. 5, id est non rationis, sed fidei lumine cognoscimus ex invisibilibus, sive ex iis quæ non existebant, cœlestis Verbi virtute facta esse *secula*, id est quæ videntur, sive omnia temporalia; vox enim, *secula*, significat et tempus et quæ tempore existunt (unde Plato fide destitutus censuit mundum quidem à Deo productum esse, sed ex materiâ Deo cœternâ). Sed hæc ostendunt fidem, de quâ Apostolus, esse firmum et certum rebus omnibus à Deo manifestatis assensum, non confidentiam in specialem Dei misericordiam; ex versibus enim 10, 13, 26 et 35, elucet per *res sperandas* indicasse Apostolum non præcisè et præcipuè peccatorum remissionem, sed gloriam et opes cœlestes fortiter pro fide certantibus, non nudè credentibus tantum (ut volunt adversarii), promissas; res etiam non apparentes, et ea quæ videntur et sunt manifestè non specialem tantum Dei misericordiam, sed et omnia quæ in humanum captum non cadunt et à Deo revelata sunt commonstrant; ergo.

Testimonio apostolico præ cæteris inhæsimus, quia fidei justificationem adducentis definitionem exhibet.

Innumerabilia alia sunt quæ Protestantium systema funditus evertunt, talia ista, Marci ultimo: *Qui crediderit et baptizatus fuerit, salvus erit. Quid hic crediderit? Nonne Evangelio annuntiato, et ideò cunctis veritatibus per illud revelatis? Joannis cap. 6: Verba vitæ æternæ habes, et nos credidimus, et cognovimus quia tu es Christus Filius Dei. Quid crediderant Apostoli? Sibi tantum peccata per Christum esse remissa? Minimè sanè, sed cuncta quæ sacro ore protulerat Christus, et inprimis æternam ejus et ineffabilem ex Patre generationem...* Actuum cap. 8: *Si credis ex toto corde, licet (baptizari). Quid credendum ab eunucho exigebat Philippus? Nonne omnia quæ ipsi de Christo annuntiaverat? Quæ intellexit eunuchus respondens: Credo Filium Dei esse Jesum Christum...* Rom. cap. 10: *Hoc est verbum Dei quod prædicamus, quia si confitearis in ore tuo Dominum Jesum, et in corde tuo credideris quòd Deus suscitavit illum à mortuis, salvus eris; corde enim creditur ad justitiam, ore autem confessio fit ad salutem. Fides ergo justitiam impertiens Christi resurrectionem, et ideò ejus Deitatem et omnia quæ dixit respicit et connotat, etc.*

Probatur 2º ex Patribus quos inter solum Augustinum et ejus discipulos, utpote adversariis cæteris doctoribus minùs invisos proferam. Ac primò quidem B. Augustinus ab adversariorum systemate tam alienus est, ut in cunctis operibus suis, licet prodigiòse immensis, vocem, *fiducia*, nusquam usurpaverit pro certitudine et privatà persuasione peccatorum remissionis, sed constanter pro spe quam inspirat Dei misericordia. Etverò perniciosum illud dogma, quoties sese offert occasio, irridet et refellit, asserendo fidem sanctificationi præludentem esse catholicam fidem, quâ cuncta à Deo revelata creduntur; fides enim catholica Symbolo continetur, ut docet libro de Fide et Symbolo, cap. 1, n. 1. Id autem clarè docet sequentibus operibus quæ præ aliis apud eruditos in summo pretio sunt.

Enchiridion, ubi de fide, spe et charitate ex professo disserit, cap. 3, dicit, *Deum fide, spe, et charitate coli...* Cap. 5, *mentem (ope fidei per dilectionem operantis) benè vivendo tendere ad speciem pervenire... summam felicitatem*, et cap. 7, *hominem salutem assequi credendo per fidem, et orando per spem et charitatem*, ideòque de fide justificante verba facit; at fidem hanc à spe (multa enim quæ creduntur non sperantur), et ideò à fiducia discrepare, eamque divina de Christo et ejus Ecclesiâ oracula attingere toto

capite 8 probare aggreditur, ut insipienti illicò innotesceat.

Libro 3 ad Bonifacium, cap. 5, n. 14, fidem adstruit, quâ *Apostoli et Prophetæ sancti fuerunt, quæ justos ab injustis discernit, ex quâ justus vivit, quæ peccata solvit, quæ ex eâ operantes in Christi consortium emigrare facit, etc.*; ac proinde fidem sanctificantem, sive per dilectionem operantem; sed hanc fidem expressè dicit esse catholicam fidem; nostra fides, inquit, *est catholica fides*, quod et elucet ex Apostoli textu Rom. cap. 14 quem adducit: *Omne quod non est ex fide peccatum est*; novatores enim hujus temporis fidem theologicam, sive dogmaticam, his verbis delineari contendunt. Porrò nemo non intelligit vel ex ipso nomine fidem catholicam non esse fidem specialem ei duntaxat competentem qui credit vel confidit sibi dimissa esse peccata, sed fidem universæ Ecclesiæ communem, quâ firmiter creduntur cuncta Ecclesiæ dogmata.

Duobus illis testimoniis fidem non specialem, sed catholicam, sive communem, depinxisse Augustinum ex ipsis iterum evidenter inferri potest; in primo enim opere, cap. 5, dicit apud quosdam hæreticos, qui se Christianos profitentur, *nomine tenus inveniri Christum, reverà apud eos non esse*; cur? Non indubiè quia non credunt sibi per Christum dimissa esse peccata (id enim reverà credunt aut credere possunt); ergo quia negando unum fidei articulum Christi Divinitatem inficiantur aut inficiari censentur... In secundo autem libro, in fine capitis, explicare volens *quid sit fides recta*, quæ justificationis radix est, adducit exemplum mulieris *bis nuptæ catholicæ, et professæ virginis hæreticæ*, asseritque illam *esse in Dei regno, non istam*, indubiè quia per hæresim amisit fidem rectam, quâ omnia et singula divina dogmata credi debent.

Augustini adstipulator fuit auctor librorum de vitâ contemplativâ, quos multi D. Prospero adscripserunt, sed multi tamen cum P. Alexandro in historiâ seculi quinti, Juliani Pomerii esse asserunt. Etenim libro 1, cap. 18, perstrictâ de Trinitate et Incarnatione fide, assererat capite 19 hanc fidem eam ipsam esse quæ justificationis fons est et origo: *qui, inquit, non crediderit habendo fidem, nec justitiam cordis habere poterit, nec salutem.*

Concinit B. Fulgentius in libro de Fide ad Petrum diaconum in prologo. Primum Petro gratulatur quòd « catholicam fidem edoceri postulaverit ut nullius sibi posset sensus hære-

tica subrepere falsitatis, » ac deindè ait : « Gaudeo quidem quod pro fide verà sine ullo perfidiae vitio custodiendâ sollicitudinem geris, sine quâ nulla potest prodesse, imò nec esse conversio. Apostolica quippe dicit auctoritas, quia sine fide impossibile est placere Deo (Hebraeorum cap. 11). Fides namque est honorum omnium fundamentum. Fides est salutis humanæ initium. Sine hæc fide nemo ad filiorum Dei numerum potest pervenire, quia sine ipsâ nec in hoc seculo quisquam justificationis gratiam consequitur, nec in futuro vitam possidebit æternam. »

Probatur 3^o ex perpetuâ Ecclesiæ fide et praxi. Ille usus potissimum cognoscitur per recitationem Symboli ab apostolicis temporibus ad hanc usque ætatem in Ecclesiâ factam. Apostoli scilicet Symbolum condiderunt postea fusiùs expositum in synodis generalibus Nicænâ et Constantinopolitanâ, quod, inquit Augustinus sermone 213, in traditione Symboli secundo, aliàs 119 de tempore n. 1, *est breviter complexa regula fidei, ut mentem instruat, nec oneret memoriam*. Hujus autem fidei, quæ est de Trinitate, Incarnatione, Passione et Resurrectione Christi, de Ecclesiâ, de baptismo, de vitâ æternâ (non de speciali novatorum misericordiâ) professio *cuiuslibet*, dicente S. doctore in sermonibus de traditione Symboli 1 et 3, sive 212, n. 1, et 214, n. 1, *necessaria est propter æternam salutem*, sive, ut loquitur ultimo loco, *ut salvus esse possit*. Ex quibus elucet Apostolis et toti Ecclesiæ semper persuasum fuisse fidem, quæ æternæ salutis est fundamentum, respicere res omnes à Deo revelatas. Hinc meritò concilium Tridentinum sessione 6 hæc sancit canone 12 : « Si quis dixerit fidem justificantem nihil aliud esse quàm fiduciam divinæ misericordiæ peccata remittentis propter Christum, vel eam fiduciam solam esse quâ justificamur, anathema sit. »

Et canone 13 : « Si quis dixerit omni homini ad remissionem peccatorum assequendam necessarium esse, ut credat certò et absque ullâ hæsitazione propriæ infirmitatis et indispositionis peccata sibi esse remissa, anathema sit. »

Probatur ultimò rationibus theologicis. Prima. Si fides justificans esset fides quâ quis credit sive certò confidit sibi per Christum remissa esse peccata, quicumque illâ fide esset præditus non posset justificari; falsum conseq. ; quàm multi enim eâ exultant fiduciâ qui justi non sunt ! quàm multi è converso eâ destituti qui sunt

sancti ! Nonne Phariseus, de quo Lucæ cap. 18, credebat et confidebat se per Deum à peccatis esse immunem, et Publicanus hanc non habebat fiduciam, et tamen Christi judicio, ille invisus, iste Deo acceptus fuit ? Nonne Paulus illius confidentiæ expertus erat cum exclamabat 1^a Epistolâ ad Corinthios, cap. 4 : *Nihil mihi conscius sum, sed non in hoc justificatus sum*; et ibidem cap. 9 : *Castigo corpus meum... ne fortè cum aliis prædicaverim, ipse reprobus efficiar*, et nihilominus gratiâ sanctificante erat insignitus ? Nonne eodem jubente gentium Doctore Epistolâ ad Philippenses cap. 2, fideles, quamdù in terris militant, *salutem operari debent cum metu et tremore* qui, ut diximus, ab adversariorum fiduciâ exploditur ? Nonne apud plurimos hæreticos et schismaticos non solum esse potest sed et reipsâ reperitur specialis illa fides, qui tamen habendi sunt velut ethnici et publicani, Matthæi cap. 18 ? etc. ; ergo.

Secunda. Petro dicente 2^a Epistolâ cap. 1, *fideles satagere debent ut per bona opera certam vocationem et electionem suam faciant, quia hæc facientes non peccabunt*, sive, ut fert græcus codex, *non labentur aliquando*; at studium illud, et labendi formido, stare nequit cum certâ fide de peccatorum remissione. Desiderantur quidem in textu græco, etiam regio, voces, *bona opera*; unde eas omiserunt novatores in suis versionibus, in primis in Basileensi anni 1564; verùm Æcumenius auctor græcus earum meminit, ut et versio Montensis. Beda verò censet illas voces ab interprete latino majoris lucis causâ esse additas, quia intendit Apostolus viros verâ fide semel imbutos, cum bona opera perseveranter eliciunt, suam vocationem et electionem intuentibus exploratam efficere. Deinde, his detractis vocibus, non minùs firmum esset adversùs novatores argumentum; consentiunt enim in commemoratâ versione Basileensi, quam non improbant, aut saltem non possunt improbare, legendum esse : *Studete vocationem et electionem vestram firmam efficere, hæc enim si feceritis non labemini unquam*; quod, ut diximus, non cohæret cum certâ fide de peccatorum remissione.

Tertia exhibet oppositæ sententiæ paradoxa, quæ inter hæc sufficiant. In novatorum sententiâ, quicquid Christus ad hominum salutem instituit, sacramentorum usum, mandatorum executionem, continuum orandi præceptum, etc., esset prorsus inutile. imò perniciosum; si enim certâ fide credere debeo mihi dimissa esse peccata, sicut credere teneor

Deum esse unum et trinum, Dei indulgentiam et quid ad eam tendit implorare non possum, nisi certus non sim de actuali Dei erga me indulgentiâ, imò de eâ dubitem, et ideò hoc ipso certissimam meam fidem de peccatorum remissione amittam, aut saltem certissimo illam perdendi periculo me exponam; at nihil absurdius et magis exitiale potest excogitari; ergo.

In eadem opinione Scripturæ et Patrum oracula de fiduciâ obtentæ veniæ quæ ex Dei dilectione, et justificatione velut ex fonte scaturit, quæ oracula passim reperiuntur, v. g., Psalmo 4, v. 6, Ecclesiastici cap. 2, v. 6, 2 Petri cap. 1, v. 10, etc., essent totidem paradoxa; in illo quippe systemate fiducia illa justificat, et ideò justificationem non subsequitur.

Obijciunt 1º, adversus adductum textum ex cap. 11 Epistolæ ad Hebræos, Melancthon, Kemnitius, etc. Vox, *substantia*, ibi græcè sonat, *certa expectatio promissæ misericordiæ*; fides ergo justificans, quæ ibi definitur, est expectatio, sive certa fiducia specialis Dei misericordiæ. Etverò vox, *substantia*, sive græcè, ὑπόστασις Psalmo 38 *expectationem* significat; quæ est *expectatio mea*, nonne Dominus? Et *substantia mea apud te est*; quin et cap. 3 Epist. ad Hebræos v. 14, idem exhibet: *participes Christi*, inquit Apostolus, *effecti sumus, si tamen initium substantiæ ejus usque ad finem firmum retineamus*. — Resp. 1º, Melancthonem et Kemnitium indubiè non magis callere linguam græcam quàm D. Chrysostomum, et auctorem versionis Basileensis anni 1564; at ille, ut diximus, homiliâ 12 in Epistolam ad Hebræos per vocem, *substantia*, sive ὑπόστασις, intellexit non *expectationem*, sive *fiduciam*, sed *subsistentiam* rerum speratarum in animis sperantium fide productam, cui expositioni iste assentitur vertendo: *Est fides illud quod facit ut extent quæ sperantur, et demonstrat quæ non videntur*. Resp. 2º, dato et non concesso vocem, *substantia*, ὑπόστασις, Psalmo 38 et cap. 3 ad Hebræos expectationem denotare, malè inferri ipsam idem significare cap. 11 ad Hebræos; plura enim et diversa potest connotare et reipsa connotat. Verùm iterum falluntur adversarii ipso editoris Basileensis judicio, qui nullam ibi existentiam sive substantiam mentionem facit convertendo: *Quia te, Jehova, expecto, tu respondebis, Domine Deus mi*. Equidem septuaginta Interpretes textum hebræum Psalmi 38 vertentes pro lectione hebraicâ, *expectatio mea*, transtulerunt (et cum eis vulgatus interpres):

Substantia mea apud te est, sive ὑπόστασις; sed cur? nisi quia cognoverunt ibi indicari rem speratam, quæ per fidem in sperantis animâ substantiam sive subsistentiam accipit, ut Chrysostomo duce et aliis diximus? Quod attinet ad v. 14 capitis 3 Epistolæ ad Hebræos, rursus desipiunt cum dicunt, voces, *si initium substantiæ ejus usque ad finem* etc., *commonstrare, initium fiduciæ*; indicant enim *initium novæ creaturæ*, quod primordium fides est; unde translatio Basileensis habet: *Christi participes facti sumus, si sanè primordium illud, quo sustentamur, firmum retinerimus ad finem usque*. Scilicet Christus per fidem in nobis formari incipit (ad Galatas cap. 4, v. 19), quâ ex causâ dicimur *nova creatura in Christo* (ad Galatas 6, v. 15). *Christi factura creati in illo in operibus bonis*, etc., ad Ephesios cap. 2, v. 10; etc. Resp. 3º, etsi Hebræorum cap. 11, nomine ὑπόστασις significaretur *expectatio* sive *fiducia*, non posse ex illo textu adstrui specialem adversariorum fidem. Res quippe sperandæ, et non apparentes, de quibus hic est sermo, sunt omnes divitiæ cœlestes, et æterna gloria, et ideò inprimis corporis resurrectio et vita æterna (ut exponit Chrysostomus loco citato), strenuè et constanter pro pietate dimicantibus promissæ, ut patet ex versibus 10, 13, 26, 35, etc. At expectatio, sive spes illarum rerum in adversariorum systemate non est fides justificans; hanc enim esse clamant fiduciam misericordiæ, quâ tantum actualia delicta delentur, vel deleta sunt, quæ idcirco solam præsentem cujuslibet peccatorum remissionem tangit et respicit.

Obijciunt 2º: Fides passim in Scripturis accipitur pro *fiduciâ*, quâ quis sibi specialiter peccata esse remissa credit vel confidit: ergo.

Priusquàm textus adversariorum expendo, ut discutatur fucus, et planè concedat vis argumenti, observa 1º, ex fide catholicâ, quâ cuncta à Deo revelata credimus, quæ initium est salutis, nasci fiduciam, sive spem, quâ, ut ait Tridentina synodus sessione 6, cap. 6, *confidimus Deum nobis propter Christum propitium esse futurum*, etc., sicut ex perseverantiâ in dilectione et bonis operibus oritur obtentæ veniæ fiducia, 1 Joannis cap. 2, v. 28, etc. Observa 2º, fateri adversarios fidem divinarum promissionum *universim* consideratarum non justificare, sed solùm *singulatim*, id est quatenus à singulo apprehenditur et sibi accommodatur, velut cum dixit Apostolus ad Galatas cap. 2: *Dilexit me, et tradidit semetipsum pro me*. Observa 3º, fidem *singulatim* sumptam modò de-

scriptam novatoribus non raro dicentibus ex se et absolute sic quemlibet justificare ut ipsum de sua salute sive iustitia certum efficiat, et quidem absque ullâ aliâ dispositione aut conditione: ejus enim effectus est pacem et animi tranquillitatem conferre.

His prenotatis, prodeant quos objiciunt textus. Libro 2 Paralipomenon, cap. 20. Josaphat viros Juda sic affatur: *Crede in Domino Deo vestro, et securi eritis*. Ubi verbum credere, sive fides sumitur pro *fiduciâ*, sive *securitate*. — Resp. 1^o, in editione Basileensi haberi, *et roboramini*, et ideo ibi exigitur fides firma et intensa in Deum, quæ parit fiduciam et fortitudinem, et sola Deo grata est, Matthæi cap. 6, v. 30; 14, v. 31; 16, v. 8; ad Ephesios cap. 6, v. 16; Hebræorum cap. 11; 1 Petri, cap. 5, v. 9; Jacobi cap. 1, v. 6, etc. Resp. 2^o securitatem, de quâ hic agitur, oriri ex speciali Dei revelatione; ex contextu enim elucet ibi sermonem esse de victoriâ populo judæico à Deo per Prophetam revelatâ; at ii quibus hic favor non est impensus cum metu salutem suam operari debent; unde epistolâ 1 Joannis cap. 3, dicitur: *Si cor nostrum non reprehenderit nos, fiduciam, id est spem, habemus ad Deum*, etc.

Marci cap. 11 dicitur: *Omnia quæcumque orantes petitis, credite quia accipietis, et evenient vobis*; ubi *credite* sonat *confidite*; quæcumque enim postulamus, nos esse accepturos fide theologicâ credere non tenemur, cum plurima postulemus quæ nobis non conceduntur. — Resp. quemlibet fide propriè dictâ credere teneri se quæ petit esse accepturum si suæ saluti expediant, et ea ut oportet petierit, ut tradit Jacobus cap. 4, et passim D. Augustinus.

Romanorum cap. 4 dicitur Abraham justitiam adeptum esse *credendo Deo*. Ubi credere significat non *diffidere* de *divinâ promissione*; ibi enim refertur Abraham *in spem contra spem credidisse, et non hæsitasse diffidentiâ*. — Resp. fidem, quæ Abrahæ justitiam accersivit, fuisse fidem in omnipotentem Deum, qui promiserat ipsum centum licet annos natum, filium ex novagenariâ esse suscepturum, quæ sanè fides non fiducia sed vera fides fuit. Hæc quippe v. 21 dicitur Abraham *plenissimè scivisse*, sive persuasum fuisse, *posse Deum quæcumque promisit facere*, et ideo cum versu vigesimo dicitur *non hæsitasse diffidentiâ*, sensus est, non disceptasse incredulitate, sive infidelitate, ut vertit editor Basileensis; quod et significatur v. 18, *contra spem in spem credidit*;

hæc enim exprimunt ipsum divinâ virtute et promissione innixum, non naturæ viribus, potuisse ex Sarâ filium sperare; quamquam etsi hæc fiduciam ingererent nihil proficerent adversarii; Catholici enim non negant ex fide in Deum, præsertim insigni (qualis fuit Abrahæ fides) fiduciam emanare, aut saltem oriri posse.

Eodem capite v. 16 legitur: *Idcò ex fide, ut secundum gratiam firma sit promissio* (Abrahæ filiis secundum fidem non secundum naturam tantum). Ibi fides est fiducia celestis promissionis, sive pollicite in Christo peccatorum remissionis, quæ firma fit, sive rata, id est, quæ suum sortitur effectum, sive justificat, cum homo divinam illam promissionem assentiendo exosculatur, illamque sibi accommodat.

Respondeo novatores Apostolicum non intelligere testimonium; ex eo enim versu et sequenti liquet per vocem, *promissio*, non peccatorum remissionem, sed gentium vocationem ad Christi fidem adumbrari, et ex versu 21, 23 et seq. per fidem, quæ Abraham justificavit, fidem catholicam, quâ creditur Dei omnipotentia, Christi resurrectio, etc., describi. Unde sensus est vocationem non Gentium solum sed et Judæorum esse secundum fidem, non legem, et ideo secundum gratiam per quam firmatur super universum Abrahæ semen ex Judæis et gentilibus coalescens.

Primâ epistolâ cap. 3 ait Joannes: *Hæc scribo vobis, ut sciatis quoniam vitam habetis æternam qui creditis in nomine Filii Dei*. Ubi absolute et sine conditione æterna promittitur vita ei qui crediderit, sive sibi certò persuaserit sibi per Christum remissa esse peccata. — Respondeo Apostolum unicè intendere eos qui in Christum ut oportet credunt, sive qui habent fidem catholicam per dilectionem operantem vitam æternam esse adepturos: *Qui enim non diligit manet in morte*, ibidem cap. 3. Quod si quis non crediderit, *mendacem facit Christum, ut eodem capite 5, v. 10 dicitur*, quia dogma ab eo revelatum falsitatis arguit.

Objiciunt 3^o divum Bernardum, auctorem licet undecimi seculi. Sermone 1 de Annuntiatione, postquam dixit, quemlibet credere teneri peccata nonnisi per Christum deleri posse, addit: *Hoc etiam crede quia per ipsum tibi peccata donantur; hoc est testimonium quod perhibet in corde nostro Spiritus sanctus dicens: Dimissa sunt tibi peccata tua*. — Respondeo 1^o fidem sive fiduciam, de quâ Bernardus, esse justificationi posteriorem, et ideo non forma-

lem illius causam, ut adversarii saltem aliquando contendunt. — Respondeo 2^o ex sancti doctoris textu esse manifestum persuasionem, sive fidem, de quâ loquitur, non esse simplicem et absolutam, sed conditionatam, si nempe quod ex divinâ institutione requiritur ad justificationem adhibuerimus, sinceram conversionem, bona et satisfactoria opera, etc., quæ in hac concione expressè exigit. His autem præstitis possumus credere, sive confidere nobis per Christum dimissa esse peccata, ita tamen ut nequaquam certi simus nos ea reverâ præstitisse. Unde sermone 1 in Septuagesimam dicit: *Certitudinem non habemus, sed spei fiducia consoletur nos, ne dubitationis hujus anxietate penitus cruciemur.*

Obijciunt ultimò ex ratione. Ex Scripturis fides justificat inspirando pacem, gaudium, animi tranquillitatem, etc.; sed talis fides certitudinem parere debet; ergo. — Respondeo pacem, et alia Spiritûs sancti dona justificationem subsequi, aut comitari, et in justis quandoque sui sensum excitare. Verùm, seclusâ speciali Dei revelatione, justos certos non faciunt de remissione peccatorum, et salute æternâ, ut invictè demonstrat exemplum divi Pauli, qui hac pace et consolatione fruebatur, et tamen certus non erat de suâ justificatione et prædestinatione.

PRINCIPIA SOLUTIONUM. — Primum. Fides specialis, cui absolutam et formalem justificandi vim interdum inserunt novatores, est fides quâ fidelis confidit sibi per Christum dimissa esse peccata, et de hac re ac sempiternâ salute nullâ aliâ præsuppositâ conditione certus fit, sique in perfectâ securitate constituitur. Hinc ex sacris codicibus, quibus solis inherent, probare debent talem esse fidem justificantem.

Secundum. Sedulò distingue fiduciam obtinendæ veniæ ex fide catholicâ in animo justificandi enascentem, quâ confidit Deum sibi propter Christum propitium esse futurum, à commemoratâ fiduciâ, sive certissimâ persuasionem novatorum, et ideò sacros textus fiduciam exigentes de illâ, non de istâ expone.

Tertium. Fiducia et certitudo de impetratâ veniâ iis inesse potuit, quibus Christus eam notam fecit, ut paralytico Matthæi cap. 19, v. 2; peccatrici, Lucæ cap. 7, v. 48; adulteræ, Joannis cap. 8, v. 11; Zachæo, Lucæ cap. 19, v. 9; latroni, Lucæ cap. 23, v. 43, etc.; non aliis quibus eam non revelavit.

Quartum. Pax exsuperans omnem sensum, quam interdum sentiunt sancti, non suggerit

certitudinem de justificatione et prædestinatione; tum quia *qui se existimant stare, videre debent ne cadant* (1 epistolâ ad Corinthios cap. 10, tum quia Paulus cum illo pacis sensu persuasus non fuit se esse justum, et timuit *ne reprobos fieret*; tum quia omnes sancti salutem suam cum tremore operari debent. Unde fiducia novatorum merum est figmentum.

Quintum. Quæcumque novatores obijciunt testimonia, aut non respiciunt peccatorum remissionem *in particulari*, sed et omnia quæ sunt objectum fidei dogmaticæ, aut si illam spectant, unicam exprimunt fiduciam obtinendæ non obtentæ veniæ, nisi impetratio illius veniæ sit revelata.

Sextum. Concedunt novatores fidem divinæ promissionis non *universim*, sed singulatim justificare; at plura ipsorum testimonia hanc virtutem illi non minus quàm isti fidei tribuere videntur.

§ 2. *Excutitur novatorum sententia circa fidei justificantis adjuncta, sive expenditur an sola fides justificet.*

Protestantes conspirantibus suffragiis docent nullo actu à fide diverso justificationem apprehendi, ut vulgò loquuntur, et hoc sensu solam fidem (quam, ut modò vidimus, volunt esse speciale divinarum promissionum fidem) justificare. Hanc sententiam inter alios expressit Calvinus tum in Antidoto cùm libro 3 Institutionis cap. 11, sectione 19, ubi ait: *Fide justificari hominem, quia toties in Scripturâ recurrit, negare non audent (sophistæ sive scholastici), sed cùm nusquàm exprimat (particula exclusivæ sola) hanc adjectionem fieri non sistent... non falsâ modò, sed planè ridiculâ tergiversatione in exclusivâ particulâ consistunt: annon enim satis solidè soli fidei tribuit omnia qui operibus adiungit (Paulus Rom. cap. 5, v. 21 et 24)?*

Non consentiunt tamen (ut hæreticis gentile est) sive circa necessitatem adjectionis particulæ, *sola*, sive circa genuinum sensum hujus particulæ. Etenim inter Lutheranos alii hanc particulam suppressi posse sentiunt pacis et concordie gratiâ, utpote in Scripturis non contentam, et necessariè inclusam in propositione, *fides justificat*; alii pro eâ particulâ tanquàm pro aris et focis decertant. Pariter Lutherani magistro suo impensius addicti, contendunt solam fidem justificare per exclusionem adhibitionis operum; alii converso, et quidem longè majori numero, non per exclusionem illorum operum existentie, sed per exclusio-

nem illorum tanquam meritoriorum ; quod illustrare conantur humiliter in primâ parte Examini concilii Tridentini, et Calvinus in Antidoto ; exemplo caloris solis , qui solus accendit, licet non sit solus, sed cum luce seu splendore conjunctus.

Aperitur catholica sententia. — Synodus Tridentina sessione 6, cap. 6, et cum eâ omnes orthodoxi censent, impium ad justificationem præparari actibus fidei, timoris, spei, dilectionis, poenitentiae, propositi sacramenti recipiendi, et propositi novæ vitæ, et observationis Dei mandatorum, et ideo ipsum solo fidei actu non justificari, cum quibus sit

CONCLUSIO. — Sola fides, etiam catholica, non justificat, sive præter actum fidei aliquid aliud requiritur quod ad justificationis gratiam consequendam cooperetur.

Est de fide, ut patet ex canone 9 sessionis 6 concilii Tridentini his verbis expresso : « Si quis dixerit solâ fide impium justificari, ita ut intelligat nihil aliud requiri, quod ad justificationis gratiam consequendam cooperetur, et nullâ ex parte necesse esse eum suæ voluntatis motu præparari atque disponi, anathema sit. »

Probatur 1º ex Scripturis, quibus præter fidem enumerati à concilio Tridentino virtutum actus passim requiruntur. Hi sunt actus timoris, servilis nempe, sive Dei judiciorum ; Ecclesiastici enim cap. 1, v. 16, *timor Domini dicitur initium sapientiæ*, quod ante dixerat David Psalmo 110, v. 10 ; et 102, v. 16 ; et Salomon Proverbiorum cap. 1, v. 7 ; 40, v. 27 ; 14, v. 27, ubi vocatur *fons*, sive ut habet editio Basileensis, *vena vitæ*, 19, v. 23, etc. ; qui timor sapientiam, sive sanctificationem introducens. Augustino interprete tractatu 9 in Epistolam Joannis n. 2, non filialis sed servilis est. Eodem Ecclesiastici loco, v. 27, idem timor dicitur *expellere peccatum*, ita ut qui sine ipso est non possit justificari ; quod pronuntiatum omnino simile est apostolicæ de fide assertioni Hebræorum cap. 11 : *Sine fide impossibile est placere Deo*, ideoque timor non minus ad justificationem conducere videtur quàm fides. Et verò timor, ut postea dicemus, ex fide oritur. Hinc Christus Matthæi cap. 10 timorem velut vitæ fontem (Proverbiorum cap. 14) discipulis suis studiosè commendavit. Hinc insignes peccatores ad sinceram poenitentiam timore adducti sunt, et quotidie adducuntur, Psalmo 77, v. 34 ; 82, v. 17 ; Jonæ cap. 3, etc. Hinc ipsi sancti timorem enixè postulaverunt, ut

scilicet à peccato averterentur, Psalmo 118, v. 120, juxta istud : *In omnibus operibus tuis memorare novissima tua, et in aeternum non peccabis*, Ecclesiastici cap. 7, v. ultimo.

Actus spei, sive impetrandæ indulgentiæ spes ; exigitur enim Psalmo 9 : *Speret in te qui noverunt nomen tuum*, 21 : *In te speraverunt patres nostri... et liberasti eos*, 30 : *In te speravi, non confundar... in justitiâ tuâ libera me*, 36 : *Salvabit eos qui speraverunt in eo*, etc., et alibi passim. Unde dicitur Proverbiorum cap. 28 : *Qui sperat in Domino sanabitur*, et 1 ad Timotheum cap. 6 : *Divitibus præcipe... sperare in Deo vivo* ; et 1 Petri cap. 1 : *Sperate in eam, quæ vobis offertur. gratiam*. Uno verbo, cuncta ferè testimonia, quibus adversarii specialem suam fidem seu fiduciam de peccatorum remissione astruere aggrediuntur, spem obtinendæ veniæ ad justificationem disponere unicè ostendunt.

Actus dilectionis, sive imperfectæ, quæ peccatorum remissioni tempore præeat, sive perfectæ, quæ eandem justificationem naturâ saltem præcedat, sicque ad eam disponat. Affluunt scilicet sacri codices textibus utrumque illum amorem ad sanctificationem requirentibus ; v. g., Ecclesiastici cap. 2, postquàm dixit Jesus : *Qui timetis Dominum, sperate in illum*, statim addit : *Qui timetis Dominum, diligite illum, et illuminabuntur corda vestra* ; item Christus ait Lucæ cap. 7 : *Remittuntur ei peccata multa, quoniam dilexit multum* ; et Apostolus Epistolâ ad Galatas cap. 5 : *In Christo Jesu neque circumcisio aliquid valet, neque præputium, sed fides quæ per charitatem operatur*.

Actus poenitentiae sive doloris et detestationis peccati ; illum enim ad sanctificationem in peccatore ubique prærequirit Scriptura, puta Ezechielis cap. 18 : *Cum averterit se impius ab impietate suâ... ipse animam suam vivificabit* ; Actuum cap. 2 : *Poenitentiam agite et baptizetur unusquisque vestrum... in remissionem peccatorum* ; et cap. 8, Simoni baptizato dicit Petrus : *Poenitentiam age ab hac nequitia tuâ*... Equidem prætendunt adversarii in his et similibus locis vocem, *poenitentia*, significare meram resipiscentiam, sive nudam vitæ mutationem cum proposito melioris per exclusionem doloris, et operum expiatoriorum ; sed apertè falluntur ; licet enim vox, *poenitentia*, resipiscentiam apud Græcos denotet, tamen salutifera resipiscentia hæc omnia importat ; unde Actuum cap. 2, Judæi qui Petrum audierant *compuncti erant corde*, v. 37, et ideo resipuerant, et tamen c's

dicit Petrus v. 58: *Pœnitentiam agite*, quæ ideo vox connotat etiam opera satisfactoria, et 2 ad Corinthios cap. 7, v. 10, *pœnitentia*, sive respicientia, *in salutem*, etc., vocatur *secundum Deum tristitia*, sive dolor, ut habetur in versione Basileensi.

Actus desiderii sacramentum recipiendi; hoc enim propositum modò præcipiebat Petrus Judæis conversis et non baptizatis, Actuum 2; et præcipit Philippus eunucho, Actuum cap. 8; Christus verò baptizatis lapsis injungit Joannis vigesimo, *quorum remisistis*, etc., ut suo loco ostendunt theologi.

Denique actus propositi novæ vitæ agendæ, et observationis Dei mandatorum; ait enim Ezechiel cap. 18: *Facite vobis cor novum et spiritum novum*; et Christus Matthæi cap. 19: *Si vis ad vitam ingredi, serva mandata, etc.*

Probatur 2º ex Patribus. Omnes modò recensitos actus ad justitiam obtinendam exigunt. Solum Augustinum, adversariis cæteris minùs invisum, citabo. Sanctus doctor suam mentem circa timorem Dei judiciorum clarè aperuit cum in præcedenti argumento eum audivimus dicentem, timorem servilem esse principium sapientiæ, sive sanctificationis. Quid de aliis actibus senserit ex sequentibus intelliges.

Libro de catechizandis rudibus, sive ad baptismum præparandis, cap. 4, in fine n. 8, ait: *Quidquid narras ita narra, ut ille cui loqueris audiendo credat, credendo speret, sperando amet*, etc. Ecce non solùm fidei actum, sed et actus spei et amoris ad justificationem impetrandam necessarios. Ibidem exprimit votum baptismi, et alibi passim, ubi quis est baptizatus, votum Sacramenti pœnitentiæ, sive *reconciliationis* (2 Cor. 5, v. 18) suscipiendi. Notum, v. g., hoc ejus effatum: *Si ministri desint, quantum exitum sequitur eos qui ex hoc seculo exeunt vel non regenerati vel ligati?* Non magis ignotum est istud alterum ipsius dictum (aut saltem antiqui auctoris apud ipsum): *Pœnitentiam certam non facit nisi odium peccati et amor Dei*. Tandem neminem latet ipsum insignem librum de fide et operibus edidisse ut eorum confutaret errorem qui vitam emendare et Dei mandata observare detrectantes baptizandos esse effutiebant.

Probatur 3º rationibus theologicis. Prima. Illi actus ad justificationem requiruntur, qui necessariè oriuntur ex fide catholice, sine quâ impossibile est placere Deo; sive quæ est initium, radix et fundamentum omnis justitiæ; atqui tales sunt commemorati actus. Scilicet

catholicâ fide imbutus nescit 1º, Deum justum santes, nisi ante mortem respiciant, æternis suppliciis esse condemnaturum, sicque ejus animo (ut quondam Felicis, Actuum 24) divinæ justitiæ timor ingeritur... 2º Deum esse patrem misericordiarum, qui sontibus ad ipsum reverti desiderantibus ignoscere paratus est, sicque in spem erigitur fidens Deum sibi propter Christum propitium fore, quæ spes sive fiducia statim gignit quemdam amoris motum in tam pretiosi muneris auctorem; testatur enim experientia eum qui ab altero beneficium sperat, incipere ipsum diligere tanquàm ejus boni, quod ab eo expectat, largitorem... 3º Deum veniam non promisisse nisi sontibus qui sinceram egerint pœnitentiam, qui ad se toto corde redire voluerint, et ideo mores commutare, et novam vitam ducere intenderint, cunctis Dei mandatis adimplendis perpetuò intenti, sicque fertur in odium et dolorem peccati, vitæque novæ ducendæ, et remediorum omnium, quibus Deus peccatoris justificationem illigavit (inter quæ sunt Dei mandatorum observatio, et Sacramentorum receptio), arripiendorum firmum et sincerum propositum.

Secunda. Si sola fides christianâ justificaret, fides christiana charitate destituta, non esset fides christiana, sive fides christiana charitate semper animaretur; *Deus enim Scripturâ dicente non diligit*, et ideo non justificat, *nisi diligentes se*, et intonante Apostolo epistolâ 1 ad Corinthios cap. 13, *charitatem non habens nihil est*, id est non habet esse spirituale perfectum, sive consummatum (dispositio enim, quatenus dispositio est, nisi accedat forma ad quam disponit, sive charitas, frustra est et nihil); sed fides etiam vera et christiana charitate non semper vivificatur; ait enim ibidem Apostolus: *Si habuero omnem sive totam* (ut habet editio Basileensis) *fidem, ita ut montes transferam, charitatem verò non habuero, nihil sum*; omnis quippe, sive tota, quæ absque charitate potest existere, indubiè est etiam christiana fides communis, quæ et includitur in fide per quam quis miracula operatur. Deinde, quomodò adversarii evincerent adulteros, fures, avaros, ebriosos, etc., qui juxta Apostolum 1 ad Corinthios 6, regnum Dei non possidebunt, non habuisse fidem christianam? atqui certè charitatem non habuerunt, quæ transfert de morte ad vitam, 1 Joannis cap. 5. Hinc D. Augustinus libro 15 de Civitate Dei, cap. 18, n. 32, exponens textum (1 Cor. cap. 13), meritò di-

xit : *Sine charitate fides potest quidem esse, sed non et prodesse.*

Tertia. Systema de solâ fide justificante tantam involvit caliginem, et tam apertam spirat falsitatem, ut apud omnes veritatis amatores malè omninò audire debeant qui illud excogitaverunt. Enimverò, primus illius inventor Lutherus, tum in caput 2 Epistolæ ad Galatas, cum in disputatione *utrum opera faciant ad justificationem*, hoc dogma eo intellexit sensu quòd sit totalis causa justificationis, per exclusionem nimirum non solum efficacis meriti, sed etiam ipsius præsentis aliarum virtutum; quam sententiam propugnant rigidiores ejus sectatores; sed, ut modò vidimus, et ex dicendis clarescet, nihil adinveniri poterat Scripturis magis adversum. Quapropter insigniores alii Lutherani, et Calvinus ejusque discipuli, solam fidem justificare dixerunt non *formaliter* aut *efficienter physicè*, vel *meritorie*, quasi aut esset ipsa justitia, vel initium justitiæ, aut habitâ illius ratione justitia impertiretur, sed *relative*, sive *acceptativè* duntaxat, ad eum, inquit, modum quo manus inopis, eleemosynam à divite recipientis, influit in eleemosynam, quia nempe homo justificatur per gratiam Dei peccata non imputantis, quod donum fides credendo sicut eleemosynam manus sese extendendo apprehendit. Quod spectat fidem, spem, dilectionem, et alia opera, consentiunt quidem ea activè non concurrerò ad justificationem, verum eorum existentiam, sive præsentiam exigunt vel ut veram fidem indicent, vel ut essentielles veræ fidei affectiones, sicut splendor dos est essentialis caloris solis, vel aliis ex causis (non enim super hoc inter se consentiunt). Quis autem sapiens hæc vel tantisper attendendo eorum auctores planè desipere non fatebitur? Scilicet, ut optimè argueret Lutherus, Scripturis passim dicentibus fontes *ex fide, per fidem, fide* justificari se impensè addictos profitentur, et tamen fidem in justificationem influere negant! sese soli fidei omnia tribuere gloriantur, et ipsi reapse nihil omninò tribuunt! bonorum operum existentiam ad justificationem requirunt, et hujus existentis causas aut assignare nequeunt, aut nonnisi absurdas assignant! Scilicet si vera fides sine bonis operibus existere nequit, aut cognosci, paradoxum eructarunt Paulus et Augustinus modò dicendo *fidem sine charitate esse posse, prodesse non posse*; inò paradoxum Lutherus ipse cum in caput 2 ad Galatas dixit : *Fides sine et ante charitatem justificat*. Deinde, si operum præsentia neces-

saria est ut veram fidem prodant, sive oculis subiciant, recondita sanctorum opera ad eorum justificationem nihil contulissent, quod Christum ipsum mendacii insimularet, Matthæi cap. 6.

Opponunt immensam sacrorum textuum copiam, quos singulatim excutere summe et fortassis supervacaneæ foret opera; plures enim idem omninò enuntiant.

Eos quasi conglobatos objicit Kemnitius 1 parte Examinis capitis 6 et seq. sessionis 6 concilii Tridentini his verbis : « In Paulinis Epistolis, præsertim ad Romanos et Galatas, in singulis ferme versibus, resonant illæ voces : *Homo justificatur fide, per fidem, ex fide*. Fides dicitur *imputari ad justitiam*. Vocatur *justitia fidei*, Rom. 4, v. 11. *Justitia per fidem*, Rom. 5, v. 22. *Justitia ex fide*, Rom. 10, v. 6. *Justitia in fide*, ad Philippenses 3, v. 9. *Justitia per fidem in omnes et super omnes qui credunt*, Rom. 3, v. 22. *Nos in Christo credimus, ut justificemur ex fide Christi et non ex operibus legis*, ad Galatas 2, v. 16. » Addere potuisset (quod alibi objicit), Apostolum, v. 27 capitis 3 ad Romanos, *excludere legem factorum*, sive opera, et citato v. 9 capitis 3 ad Philippenses, *justitiam ex lege*; sed hæc evincunt fidem absque operibus justificare; ergo. — Resp. 1^a hos textus, si Lutherò favent, certè non favere Calvino, Kemnitio et aliis, qui sentiunt fidem concurrere ad justificationem *ut manus concurrat ad eleemosynam*; illi enim textus veram causam exprimunt. Deinde isti ad justificationem requirunt operum præsentiam quam explodere videntur laudata testimonia. Resp. 2^a, hanc objectionem et similes aut supinam adversariorum in Scripturis imperitiam, aut insignem malitiam prodere; concidit enim ex ipsâ notitiâ argumenti Epistolarum ad Romanos et Galatas, et constantis Apostoli doctrinæ; in utrâque enim Epistolâ ostendit Judæis conversis non propter merita operum legis (ut ipsi gloriabantur) justitiam ipsis esse impertitam, sed unicè propter fidem Christi ejusque fidei opera (et ideò gratis); in primâ verò explodit etiam merita naturalia, sive nature opera, quorum virtute gentiles non sunt justificati. Igitur resp. 3^a : Distinguo minorem. Hæc evincunt fidem absque operibus legis Moisaica, sive observatione caeremoniarum legalium, vel absque operibus sine gratiâ elicitis, justificare, conc. Absque operibus ex gratiâ factis nego min. et conseq. Intendit Apostolus ut elictum est, omnes omninò nationes sine ullo operum legis aut nature merito gratias à

Deo vocatas fuisse, ut deinceps huic fidei et gratiæ Christi cooperando piè vivant ac æternam tandem consequantur vitam. Hæc ex causâ quasi perpetuò asserit homines justificari *fide, per fidem, in fide Christi*, sive eorum *justitiam esse fidei Christi justitiam; justitiam per fidem, ex fide, in fide Christi*, omnem qui credit justificari, etc.; quia nempe fides in Christum est initium, radix et fundamentum justitiæ christianæ; hæc ex causâ removet Apostolus *legem factorum*, id est præcepta legis in se præcisè et sine lege fidei gratiam ad ea implenda impetrantis spectata, *justitiam in lege, sive ex lege*, hoc est non *justitiam legis*, sive opera bona à lege præscripta (siquidem *factores legis justificabuntur*, Rom. 2, v. 13), sed justitiam partam ex solâ legis notiâ sine gratiâ fidei, quæ non interna, sed externa est, etc.

Ilanc solutionem, quam ne fortè irrideantur irrident adversarii, multa evincunt.

Scriptura scilicet, quæ justificationem fidei inserit, illam et operibus passim tribuit. Quomodò rejectâ operum legis et fidei, sive sine gratiâ et cum gratiâ factorum aut fidei imperfectè et perfectè justificantis distinctione, Scripturam cum Scripturâ conciliare poterunt adversarii?

Item doctrina concilii Tridentini sessione 6, cap. 3 et seq., de fide quæ sit initium, radix, et fundamentum justificationis, de fide ex operibus gratiæ, non ex operibus legis, aut naturæ justificante, de justificationis gratuitate, de *justitiâ legis, et justitiâ ex lege*, sive in lege, etc., excerpta est ex Patribus qui ad ætatem Apostolorum proximè accesserunt, præsertim ex D. Augustino qui et ipse eam Ecclesiæ catholicæ visceribus quasi insculptam esse observat. Etenim libro de gestis Pelagii, cap. 14, n. 34, dicit *ad fidem meritis operum perveniri non posse, cum ipsa sit initium unde bona opera incipiunt...* In Psalmum 139, n. 4, ait: *Fides est in animâ ut radix bona quæ pluviam in fructum ducit...* Libro de Prædestinatione sanctorum, cap. 7, n. 12, vocat *fidem ædificii spiritualis fundamentum...* Libro autem de Gratiâ et libero Arbitrio, cap. 8, n. 20, docet fidem sine operibus *ex nobis in nobis existentibus*, non in nobis per gratiam productis justificare, et justificationem esse gratuitam, sive *tantummodò gratiam*, quia actus etiam ex gratiâ elicit, quibus datur, ipsam non promerentur (de condigno), vitam verò æternam mercedem esse et gratiam, sive *gratiam pro gratiâ...* Tandem citato libro de Gratiâ et libero Arbi-

trio, cap. 12, n. 24 et alibi, *justitiam legis*, sive opus ex lege faciendum, distinguens à *justitiâ ex lege sive in lege*, tradit hanc esse illam, quam homo absque fidei gratiâ, solâ legis cognitione, comparare nititur. Jam verò nullus, opinor, optimæ criticæ peritus et æquus æstimator, sibi persuaserit judicium veteris Ecclesiæ, Augustini et aliorum antiquorum judicio Calvinii, Kemnitii, etc., esse posthabendum; denique quis existimaverit Deum, qui totum hominis cor, totam ejus mentem, totam ejus animam, totas vires, etc., sibi omninò devoveri præcepit, hominem unicâ ipsius persuasione de peccatorum per Christum remissione absque operibus ex auxilio etiam suo factis justificari voluisse?

Opponent iterum quosdam Patres, quos inter reperitur ipse Augustinus. Etenim libro 1 ad Bonifacium cap. 21, n. 39, ait: *Quantalibet fuisse virtutis antiquos prædices justos, non eos salvos fecit nisi fides Mediatoris.* — Resp. velle Augustinum veteres justos salutem esse adeptos fide in Mediatorem per exclusionem naturæ et legis Mosaicæ operum, non actuum ex fide et gratiâ Christi elicitorum. Ibi quippe refellit Pelagianos quibus placebat homines *ante legem salvos factos fuisse naturâ*, deinde *per legem*, postremò *per Christum*, contra apertam Apostoli doctrinam 2 Cor. cap. 4, ubi legitur *eundem spiritum fidei in veteribus fuisse qui est in nobis*; et Epistolâ 1 ad Timotheum, cap. 2, ubi dicitur *Christus unus Mediator Dei et hominum*, cujuslibet nempe temporis.

Libro de diversis quæstionibus 83, quæstione 76 hæc statuit: « Si cum crediderit, mox de hac vitâ decesserit, justificatio fidei manet cum illo, nec præcedentibus bonis operibus, quia non merito ad illam, sed gratiâ pervenit, nec consequentibus, quia in hac vitâ esse non sinitur. » Ecce hominem qui credit, et credendo sine operibus justificatur, sicque moriendo salvatur. Resp.: Distinguo ant. Ecce homo qui credendo sine operibus naturæ aut legis fidem præcedentibus justificatur, conc. Sine operibus ex fide gratiâ elicitis justificatur, nego ant. et consequ. Ibi Augustinus eos refellit qui Apostoli dictum Rom. 5: *Arbitramur justificari hominem per fidem sine operibus legis*, perversè intelligentes, prætendebant eos qui semel in Christum crediderunt, etiamsi postea malè viverent, salvos per Christum esse futuros. Ut autem eos revincat ostendit Apostolicum effatum explodere opera fidem præcedentia, non subsequencia, cum

justificatus per fidem non possit nisi justè deinceps operari, sive per fidem quæ dilectionem operatur, modò tamen immediatè post acceptam fidei justificationem è vitâ non migraverit, eùm tunc bonis operibus locus non sit; ex his autem elucet S. doctorem nullatenus intendere fidem in Christum sine ullis prorsus aliis actibus posse sonti justitiam impertire (de quo hic unicè disputatur); passim enim, ut modò vidimus, decantat, fidem solam non esse nisi *initium*, *radicem*, et *fundamentum* ædificii spiritualis, sive justificationis.

PRINCIPIA SOLUTIONUM. — Primum. Obtrudunt novatores fidem non *efficienter*, sed *apprehensivè* tantùm concurrere ad justificationem, sicut *manus ad eleemosynam* concurrit. Hinc ridiculè obijciunt justificationem fieri *per fidem, fide, ex fide, etc.*

Secundum. Exigunt novatores ad justificationem operum ex fidei gratiâ non quidem cooperativum concursus, sed præsentiam. Hinc insulsè omninò sacros ostentant textus justificandi vim fidei illis operibus destitutæ inherentes.

Tertium. Argumenta ducta ex textibus ferentibus fidem *sine operibus* justificare, fidem *justitiam impertire*, etc., liquescent unicâ distinctione *operum naturæ vel legis Mosaicæ, et fidei sive gratiæ*, atque *fidei initialiter, et consummative* justificantis.

Quartum. Scripturæ oracula enuntiantia, omnem qui credit esse natum ex Deo, esse salvandum, etc., infallibilem retinent veritatem, etsi fides sola ad salutem non sufficit. Si quippe particula, *omnis*, ad omnes et singulos credentes in iis refertur, et eos non fert sensus quos celebri textui: *Deus vult omnes homines salvos fieri*, affinxit Augustinus (quod evincere non possent adversarii), illa effata hanc involvunt conditionem, modò alia requisita apponantur, ad eum modum, quo ista: *Omnis qui petit accipit*; Lucæ cap. 11: *Omnis qui se humiliat exaltabitur*, Lucæ cap. 14, etc., in postulante aut se humiliante indubiè fidei necessitatem important.

Quintum. Novatores immeritò gloriantur de textu Lucæ 8: *Crede tantùm et salva erit*; ibi enim sermo est non de peccatoris justificatione, sed de obtentione miraculi, ad quam sola fides sufficit; cùm scilicet miraculum tendit non ad vitam ejus qui obtinet miraculum comprobendam, sed ad fidem stabiliendam; impii enim multas virtutes in nomine Christi edidisse referuntur, Matthæi cap. 7.

Sextum. Mos est Scripturæ, cùm eventus plurimis ex causis oritur, eventum illum modò uni causæ, modò alteri adaptare. Non mirum ergo, si justificandi vim aliquando fidei, aliquando timori, aliquando spei, aliquando dilectioni separatim inserat, cùm hæc singula ad justificationem concurrant.

Septimum. Oracula, quibus justificatio *gratis* fieri dicitur, excludunt quidem meritum solis naturæ viribus comparatum, ut et meritum *ex justitiâ*, sive, ut aiunt, *de condigno* (quod solum meritum propriè dici potest), sed non meritum *de congruo*, sive opus ex gratiâ ante justificationem eligitum, quòd ideò ad illam *dispositivè* concurrat.

Octavum. Oracula significantia *verbum Dei sanare et salvare* adversariis non favent. Non enim enuntiant verbum Dei *salvare* præcisè quia fide apprehenditur (ut ipsis placet), sed quia excitat ad Dei mandatorum observationem, et ideò ad opera facienda.

Ultimum. Nonnullorum Patrum de *fide* justificante effata eo quo sacra oracula exposuimus modo erunt exponenda. Speciale tamen quid aliquando intenderunt. Etenim opus *externum ab interno* interdùm distinguentes (ut Origenes in caput 3 ad Romanos, etc.), docuerunt solam fidem sine opere (externo) aliquando justificare (talís quippe fuit justificatio peccatricis, Lucæ 7, et latronis, Lucæ 23)... Item fidem catholicam adulterinæ hæreticorum fidei opposcentes, illam solam justificare tradiderunt; talis D. Leo tum epistolâ 70, cùm sermone 4 de Epiphaniâ.... Item interdùm asserunt fidem solam justificare, fidem pro fide vivâ, sive charitate formatâ, sumentes, ut D. Bernardus sermone 22 in Cantica, etc... Tandem nonnunquàm affirmaverunt *solam fidem aliquando sufficere ad salutem* (ut Bernardus epistolâ 77), per exclusionem realis baptismi susceptionis, quæ non est possibilis, aut operum externorum, cùm deest facultas aut occasio illa eliciendi, etc.

§ 3. Expenditur modus quo fides ad justificationem concurrat.

Refertur Heterodoxorum singularis opinatio. — Ex dictis censuit Lutherus fidem esse justitiæ causam, etiam formalem; i enim evincit hoc ejus in caput 2 Epistolæ ad Galatas effatum: *Fides est formalis justitia propter quam homo justificatur, non propter charitatem*. Verùm multi ejus sectatores, quibus dexteram dederunt Calvinus, et ejus asseclæ, nullam fidei in justifi-

cationis negotio activam virtutem inseruerunt, ut nimirum suis principijs starent; ipsis enim dicentibus, ne ipso quidem Luthero excepto, per Adæ delictum liberum arbitrium penitus interiit, et omnia et singula hominis lapsi, quæ pia etiam videntur opera in se, mortiferi peccati maculâ contaminantur; quâ autem ratione actus fidei à tali homine elicitus posset in justitiam influere per modum causæ efficientis, vel formalis, vel meritoriae, aut etiam propriè dictæ dispositionis et impetrationis? Hinc, ut diximus, censent fidem ad justificationem eo ipso modo concurrere quo munus ad eleemosynam concurrat, et ideò relativè tantum, sive receptivè et acceptativè, sive per modum meri organi et instrumenti, quo justificatio sive Christi justitia apprehenditur.

ORTHODOXORUM SENTENTIA. — Eam edidit concilium Tridentinum sessione 6, cap. præsertim 6, ubi docet, fidem et actus eam sequentes verè disponere ad justitiam, et ideò justificationem in Scripturis fidei tribui, quia, inquit cap. 8, *fides est humanæ salutis initium, fundamentum et radix omnis justificationis*.

CONCLUSIO. — Fides in justificationem influit, non per modum simplicis organi aut instrumenti, quo arripitur justificatio, sed per modum veræ dispositionis et impetrationis.

Probatur 1º ex Scripturis, aut potius ex ante dictis probata manet. Etenim cum sacri codices his scintillant oraculis: *Fide justificamur, per fidem justi sumus, ex fide salvi sumus, fide sancti evadimus*, quis eò dementiæ devenerit, ut iis significari asserat fidem ad justificationem se habere per modum meri organi aut instrumenti, et non per modum saltem causæ præparatoriæ et impetratoriæ?

Probatur 2º ex Patribus, sive ex D. Augustino quem in Institutionis libris totum suum esse asserere audent Calvinus, et libro 3, cap. 22, sectione 8, *cæteris melius edoctum esse* contendit. Quomodo sanè S. doctorem hic sibi vindicare possent adversarii nescio; Patres enim Tridentini suam de justificatione doctrinam magnâ ex parte ex eo exceperunt imò eam ejus expresserunt verbis; ostendimus enim S. doctorem clarè tradidisse fidem esse humanæ salutis initium, fundamentum, et radicem justificationis, quæ certè non sonant meram apprehensionem justitiæ, sed veram præparationem et dispositionem ad justitiam. His adjuuge testimonia quibus allimat fidem justificationem impetrare et in eam verè influere. Ita inprimis Epistolâ 186, aliàs 106, n. 7, ubi ait:

Hanc fidem volumus habeant, quâ impetrent charitatem, quæ sola verè benè operatur; et paulò post: Qui habent fidem quâ impetrent justificationem per Dei gratiam pervenerunt ad legem justitiæ.

Jam citatâ enarratione in Psalmum 139, n. 1, hæc habet: *Fides sic est in animâ ut radix bona quæ pluviam in fructum ducit; an, quæso, quod justificationem impetrat, quod charitatem accersit, quod ex Dei gratiâ bona opera sicut radix bona ex pluvîâ fructus producit, activè non influit in justificationem, et sese ad eam habet ut manus ad eleemosynam?*

Probatur 3º ex discordiâ quæ super hoc inter adversarios viget, et falsitate principiorum quibus innituntur; per primigenium enim delictum homo libertatem non amisit, ut suo loco ostendimus, et quælibet hominis lapsi opera non sunt mortalia peccata, ut mox ostensuri sumus.

Nihil hic objiciunt, quod sufficienter antea dilutum non fuerit, aut postea diluendum non sit.

ARTICULUS II.

De justificatione in facto esse, sive de justificationis naturâ.

Hic, ut ipse indicat titulus, quæritur quæ sit causa formalis per quam homo coram Deo justus dicitur et evadit; rei quippe natura et causa formalis idem sonant.

Etsi decimi sexti seculi novatores, ut vertiginoso spiritu adactis gentile est, in opiniones propemodum innumerabiles circa formalem justificationis causam abierunt, in eo tamen, majori saltem numero, consenserunt hominem coram Deo justum effici non intrinsecè et à parte rei, per formam scilicet internam et animæ inhærentem, sed extrinsecè tantum et reputativè, id est per meram justitiæ Christi reputationem, seu per fidei tanquàm meri instrumenti, apprehensionem; unde inferunt, in justificatione peccata verè et propriè non deleri, per interiorē nempe hominis renovationem, sed purè tegi, et non imputari, ob velamen justitiæ Christi super eâ expansum. Calvinus libro 3 Institutionis cap. 11, sectione 2, sic suam aperit mentem: «Justificatur qui non loco peccatoris, sed justi habetur, eoque nomine consistit coram Dei tribunali...quemadmodum si reus innocens ad tribunal æqui judicis adducatur, ubi secundum innocentiam ejus judicatum fuerit, justificatus apud judicem dicitur, sic apud Deum justificatur, qui nume-

ro peccatorum exemptus Deum habet suæ justitiæ testem et assertorem. Justificabitur ille fide, qui operum justitiâ exclusus, Christi justitiam per fidem apprehendit, quâ vestitus in Dei conspectu non ut peccator, sed tanquàm justus apparet; ita nos justificationem simpliciter interpretamur acceptionem, quâ nos Deus in gratiam receptos pro justis habet, eamque in peccatorum remissione ac justitiæ Christi imputatione positam esse dicimus. Idem repetit versus finem sectionis sequentis, ubi se clariùs adhuc exponens dicit, *nos pro justis in Christo censerì qui in nobis non sumus.*

Concinit Kemnitus in examine sessionis 6 concilii Tridentini, titulo *de vocabulo justificationis*, his verbis: «Hæc ostendunt judicalem esse significationem verbi *justificare* in hoc articulo, quòd scilicet peccator, lege Dei accusatus, convictus, et sententiæ æternæ damnationis subjectus, fide confugiens ad thronum gratiæ propter Christum absolvatur, justus reputetur, et pronuntietur, in gratiam recipiatur, et ad vitam æternam acceptetur.»

Ex his elucescit summam controversiæ Catholicos inter et hæreticos hic in eo consistere, utrum justificatio fiat per formam internam, et animæ insitam, ut contendunt Catholici, an è converso per solam externam justitiæ Christi imputationem fide apprehensam, ut placet hæreticis; si enim primo modo fiat, facilè concedent adversarii justificationem non importare solam peccatorum remissionem, sed et interiorem hominis renovationem, et in eâ peccata non tegi tantùm et velari per imputatam Christi justitiam, sed et verè et propriè deleri, ut docent Catholici. Unde sit

PARAGRAPHUS UNICUS. — *Utrum justificatio sita sit in formâ animæ inhærente?*

CONCLUSIO. — Unica formalis causa justificationis est Dei justitia, non quâ justus est, sed quâ nos justos facit, sive quâ interiùs renovamur, et ideò non modò reputamur, sed verè justì nominamur et sumus; unde justificatio consistit in infusione doni alicujus interni et animæ inhærentis.

Ita concilium Tridentinum sessione 6, cap. 7, et canone 14, in quo commemoratos errores perstringens hæc sancit: «Si quis dixerit homines justificari vel solâ imputatione justitiæ Christi, vel solâ peccatorum remissione, exclusâ gratiâ et charitate, quæ in cordibus eorum per Spiritum sanctum diffundatur, atque illis inhæreat, aut etiam gratiam, quâ justificamur, esse tantùm favorem Dei, anathema sit.»

Probatur 1^o ex Scripturis; plura earum oracula profert Bellarminus libro 2 de justificatione cap. 5, quæ adversarii variis effugiis eludunt, et ideò iis convincendis minùs sunt idonea. Nos illud urgemus quod Joannis cap. 14 consignatur, etsi illius non meminerit celebris ille theologus.

Joannis 14 ait Christus: *Si quis diligit me, sermonem meum servabit, et Pater meus diligit eum, et ad eum veniemus, et mansionem apud eum faciemus*; unde Epistolâ 1 ad Corinthios, cap. 5, justì dicuntur *templum Dei sanctum*; cap. 6, *templa Spiritus sancti, qui in ipsis est, quem habent à Deo*; et Epistolâ 1 Joannis, cap. 5, commendatur *charitas ipsis à Patre data per quam filii Dei nominantur et sunt*; quod et expressit Apostolus Rom. cap. 5, dicendo: *Diffusa est charitas Dei in cordibus nostris per Spiritum sanctum qui datus est nobis*; item cap. 8, et 1 ad Corinthios 15, ubi dicit justos esse *conformes imaginis Filii Dei, portare imaginem cælestis Adæ, et quidem sicut antea portaverant imaginem terreni*; item Epistolâ ad Titum, cap. 3, ubi iidem justì dicuntur *salvi facti per lavacrum regenerationis et renovationis Spiritus sancti, qui in eos effusus est abundè per Jesum Christum.*

Ex his sic arguimus: His et similibus locis hominis justificatio delineatur; quod enim Deum in homine specialiter *inhabitare* facit, quod hominem *Dei filium* efficit, quod ex homine eripit imaginem diaboli ut in eo reponat *imaginem Christi*, quod hominem salvum facit ipsum *regenerando et renovando, etc.*, illud indubiè hominem justificat; at justificatio his textibus depicta, non extrinseca, et *putativa* tantùm, sed et intrinseca est et animæ inhærens; si enim Deus apud hominem justum specialiter maneret, quia ipsum tantùm exterius justum reputat, non *apud ipsum*, sed *extra ipsum* duntaxat reipsâ *maneret*, quemadmodùm amicus qui amicitia suâ nihil in amico intrinsecùs operatur, sed eum externâ duntaxat prosequitur benevolentia, propriè dici nequit *apud amicum* manere; Deus ergo dicitur *apud justum* habitare, in ipso velut in templo esse, ipsum interioris doni infusione non solùm «peccatis expurgando, justumve habendo, sed etiam illuminando, roborando, inflammando, etc..... Item, si homo *filius Dei*, sive justus diceretur, quia, licet reipsâ injustus est, tamen exterius et *putativè*, sive per justitiæ ex parte Dei imputationem, justus est, rectiùs dæmonis quàm Dei filius appellaretur, cum quis rectiùs deno-

minetur ab eo quod est quàm ab eo quod esse putatur; homo igitur filius Dei non solum nominatur sed et est per creatam internam justitiam, quam Deus in eo producit, sive per charitatis in ejus corde infusionem..... Item, si Christi imago in justo per *imputationem* tantum refulgeret, in eo verè existeret imago diaboli, et fictè imago Christi, cum intus esset injustus, et exterius tantum justus; intendit ergo Apostolus nos justos esse debere ut Christus justus fuit, et ideò verè et propriè per inhærentem justitiam, cum imprimis justitiam nostram similem esse dicat injustitiæ nostræ quæ intrinseca nobis fuit et animæ reipsa inhærens..... Denique evidens est, regenerationem et renovationem, quâ fit, aut saltem cum quâ conjuncta est justificatio, importare aliquid internum, siquidem hominem transire facit ab uno, ut aiunt, *essendi* modo, ad alium. Quare mens Apostoli est hominem justificari formaliter per infusionem Spiritus sancti donorum, charitatem præsertim, quæ præstantissimum illius donum est, sicque intus regenerari et renovari.

Probatur 2º ex Patribus, sive ut adversariis annuamus, ex D. Augustino. Pauca tamen, et quidem ex uno tantum illius opere, testimonia referam, quia Calvinus libro 3 Institutionis cap. 11, sectione 15, ingenuè fatetur, Augustinum *gratiam ad sanctificationem referre, quâ in vitæ novitatem per Spiritum sanctum regeneramur*, et Kemnitius in primâ parte Examinis concilii Tridentini, Patribus, et ideò ipsi Augustino, hic valedicit.

Libro de Spiritu et Litterâ, qui adversus Pelagianos exaratus est, et ideò novatoribus inconcussæ veritatis videri debet, justitiam inhærentem non minùs apertè expressit, quàm si hoc tempore adversus Protestantes decertasset. Etenim capite 9, n. 15, ait: *Justitia Dei manifestata est* (Rom. cap. 10, v. 5); non dixit: *Justitia hominis..... sed justitia Dei, non quâ Deus justus est, sed quâ induit hominem, cum justificat impium*. Capite 11, n. 18, scribit: *Hæc est justitia Dei, quæ in Testamento veteri velata, in novo revelatur, quæ ideò justitia Dei dicitur, quod impertiendo eam justos facit*. Capite 17, n. 29, legem Mosaicam cum novâ comparando dicit: *Ibi lex extrinsecus posita est, quâ injusti terrentur, hic intrinsecus data est, quâ justificarentur*. Idem repetit numero 30.

Quis, nisi desipiat, non fateatur his verbis, non quâ Deus justus est, sed quâ induit hominem, justitiam Dei à justitiâ hominis distingui, et justitiam homini non extrinsecè, sed intrin-

secè insidere, cum illâ induatur, non utique in corpore, sed in animo? Quis non consentiat justitiam, quæ impertitur utique in corde (ut loquitur Apostolus Rom. 5), et non exterius, ut in veteri lege, hominem intrinsecè afficere? Quis demum attendendo legem homini, cum justificatur *intrinsecus dari*, novorum systema explodi non agnoscat?

Probatur 3º rationibus theologicis. Prima. Sacri codices inculcant 1º, in justificatione peccata non velari tantum et non imputari, quasi à parte rei remaneant, sed et penitus auferri, deleri, remitti, mundari, etc. Isaia 44, v. 22; Ezechielis 36, v. 25; Psalmio 50, v. undecimo; Joannis 1, v. 29; Luca 7, v. 48, etc. Unde Augustinus libro 1 contra duas epistolas Pelagianorum, cap. 13, n. 26: *Dicimus baptisma dare omnium indulgentiam peccatorum, et auferre crimina, non radere.....* 2º hominem renovari spiritu mentis, et induere novum hominem qui secundum Deum creatus est in justitiâ et sanctitate veritatis, ad Ephesios 4, quod et Ezechielis cap. 11, v. 19, 20, etc., fuerat pronuntiatum..... 3º Hominem divinæ naturæ consortem effici, 2 epist. Petri, cap. 1, etc.; sed hæc connotant inhærentem justitiam à Dei justitiâ diversam; quomodo enim deletur peccatum mortale habituale, quod consistit in privatione justitiæ? Nonne per infusionem justitiæ? Quomodo homo spiritu mentis renovatur, et novus fit homo? Nonne per formam quæ ipsum intrinsecè immutat? Quomodo divinæ naturæ fit particeps? Nonne per intrinsecam divinæ sanctitatis participationem, sive gratiam sanctificantem, per quam præcipuè Adam dictus est factus ad Dei similitudinem?

Secunda. Formalis mortalium justitia in aliis major, in aliis minor esse potest; fit enim per acceptionem de plenitudine Christi, Joannis cap. 1, v. 16, et secundum mensuram donationis Christi, ad Ephesios cap. 4, v. 7, etc.; at justitia Dei vel Christi major aut minor esse non potest; ergo.

Objicit 1º Calvinus libro 3 Institutionis, cap. 11, nonnulla Scripturæ testimonia. Primâ ad Corinthios cap. 1, Christus dicitur factus nobis sapientiâ à Deo, et justitiâ, et sanctificatio, et redemptio. Justificamur igitur per justitiam Christi nobis imputatam.—Resp. 1º: Retorqueo argumentum. Christus dicitur factus nobis sapientiâ, sive fides; ergo in nobis vera non est sapientiâ, sed habemus fidem, sive sapientiam per imputationem Christi sapientiæ. Resp. 2º, sensum Apostoli esse Christum sapientes,

et justos, et sanctos, et liberos nos fecisse nostram sub diaboli jugo servitutem extinguendo, et ideo Christi justitiam esse causam efficientem et meritoriam nostræ justitiæ, non formalem, cum nos justos faciat per aliquid à suâ justitiâ distinctum, sicut nos sapientes facit per aliquid à suâ sapientiâ diversum; sed, inquires, cur non dixit Paulus: Sapientes nos fecit, sed: *Factus est nobis sapientia?* Ut doni Dei affluentiam magis commendaret.

Epistolâ ad Ephesios, cap. 4, ait Apostolus: *Induite novum hominem qui secundum Deum creatus est*; sed verbum, *induite*, indicat nos justificari extrinsecè per Christi justitiam fide apprehensam, quæ turpitudinem nostram tegit et velat, et ideo non intrinsecè per justitiam creatam et nobis inhaerentem. — Resp. cum Augustino, libro 14 de Trinitate, cap. 16, n. 22, voces, *renovare, induere*, quas hic adhibet Apostolus, significare nos in justificatione accipere justitiam et veritatem, quam Adam peccando amisit, quod aliunde probant voces, *spiritu mentis vestræ*; hanc autem similitudinem adduxit Apostolus, ut indicaret justitiam animæ insidentem esse veluti quid unum cum animâ, sicut vestis, quâ tegimur, est veluti quid unum cum corpore.

Obijciunt 2^o Calvinus et alii quædam ex ratione argumenta. Systema de justitiâ per inhaerentem homini justitiam, Christi justitiam et infinita merita non elevat: ergo. — Resp.: Nego antecedens; inhaerens enim homini justitia omninò oritur à virtute meritorum Christi, qui nostra coronando merita, sua dona coronat. Aliunde systema novatorum de non imputatione peccatorum per Christi merita, non de reali eorum remissione, est Christo potiori ratione injuriosum; ostendit enim plus valuisse dæmonem ad nocendum quàm Christum ad sanandum, peccatum viribus potentius fuisse quàm gratiam, Christum suis meritis obtinere non potuisse ut peccata verè deleterentur, et vera justitia homini inhaereret.

Item systema de hominis justificatione per propriam justitiam superbiam homini instillat, aut innatam adauget; ergo. — Resp.: Nego antecedens; propria enim hominis justitia in catholico systemate, oritur ex Dei dono, et ideo illâ exornatus nonnisi in Domino gloriari debet. Certè novatorum dogma, qui se ipsam Christi justitiam per fidem apprehendere gloriantur, longè magis idoneum est nutriendæ et fovendæ superbiæ.

PRINCIPIA SOLUTIONUM. — Primum. Hæreticorum principium fert hominem per externam Christi justitiæ imputationem fide apprehensam justificari, et ideo peccata in justificatione non vere deleri, sed tantum non imputari. Oportet igitur ut id Scripturis evincant.

Secundum. Justitia creata, quâ homo fit formaliter justus, est Dei donum, sive ex Christi meritis omninò pendet, et ideo Christi gloriam commendat, et superbiam nostram retundit.

Tertium. Scripturæ oracula enuntiantia, justificationem esse justitiæ declarationem... Fidem reputari ad justitiam... Justitiam consistere in peccatorum remissione, vel non imputatione... Nos per Christi justitiam, justos constitui, etc., novatoribus non favent; declaratio enim vel reputatio justitiæ supponit, vel importat internam justitiam, sicut si quis dicatur vel reputetur virtute præditus, illa declaratio supponit aut importat internam virtutem. Pari-ter peccata per justificationem remittuntur vel non imputantur per internæ justitiæ infusionem quæ illa reipsâ delet, sive per non imputationem in re fundatam. Tandem Christi obedientia efficienter, non formaliter justos facit.

ARTICULUS III.

De justificationis essendi modo, sive de justificationis qualitatibus, effectibusve.

Ab Ecclesiæ incunabulis ad Protestantium usque ætatem creditum fuerat, neminem, absque speciali Dei revelatione, scire posse an odio an amore dignus sit, justitiam in reprobis, ad tempus tamen, ut in electis reperiri posse, et inter justos alios majori, alios minori sanctitate refulgere, etc. Verum commemorati hæretici falso suo de justificationis naturâ systemate imbuti, scilicet hominem justum fieri justitiâ Christi fide arreptâ, hæc dogmata amandare compulsi sunt. Hinc asseruerunt 1^o et quidem unanimi consensu, cunctis onus incumbere credendi fide divinâ, cui falsum subesse non potest, se esse justos, sub penâ à justitiâ ipso facto excidendi; fides scilicet sola ipsos justificat... 2^o Justitiam ita electis competere ut semel assecutam nunquàm amittere possint, ac illa nunquàm prorsus reprobis inseri possit (et hoc est speciale Calvinii dogma)... 3^o Justos omnes pari justitiâ insigniri, cum ipsâ Christi justitiâ, mutationi non obnoxia, fide arreptâ, et à cœlesti Patre imputatâ sint justis sive Deo accepti; et in hoc consentiunt omnes Lutherani.

Isti errores seorsim refellendi sunt. Unde sit
§ 1. *Utrum, demptâ speciali Dei revelatione, quis fide divinâ credere possit et teneatur se esse justum?*

CONCLUSIO. — Sublatâ speciali Dei revelatione nullus fide divinâ, cui falem subesse non potest, potest ac teneatur credere se justificationis gratiam esse adeptum (1).

MOMENTUM PRIMUM. — *Ex Scripturis.* — Ecclesiastæ cap. 9 ait Salomon : *Nescit homo utrum amore, an odio dignus sit, sed omnia in futurum servantur incerta.*

Si Calvino, cui alii vulgò suffragantur, morem gerere velis libro 3 Instit. cap. 2, sect. 58, hoc oraculum in vulgari interpretatione mendosè redditum renuntiabis, et hunc ejus reputabis sensum : *Nescit homo, utrum ab hominibus, qui amici ejus videntur, ametur, an odio habeatur.*

(1) Licet justus non possit habere certitudinem fidei se gratiam sanctificantem assecutum, attamen de eâ habere conjecturalem seu moralem certitudinem docent theologi. De hujus modi certitudine operæ pretium duximus quædam hic annotare, quæ auctor noster obiter tantum attingit. Ante omnia statuendum cum communi D. D. justos certos esse posse de suâ justificatione, certitudine morali, quæ est major vel minor juxta diversos perfectionis gradus.

« Probatur, inquit Habertus, 1^o ex Scripturâ, Rom. 8, v. 15 et 16 : *Non enim accepistis spiritum servitutis iterum in timore; sed accepistis spiritum adoptionis filiorum, in quo clamamus : Abba (Pater).* Ipse enim Spiritus testimonium reddit spiritui nostro, quòd sumus filii Dei; hoc est, Spiritus sanctus, quos inhabitat, non instar servorum solo penæ timore, sicut olim Judæos adigit ad obediendum legi; sed filialem indit indolem, quâ filiali fiducia invocant Deum et Patrem amantissimum, ex quâ justî præsentiam Spiritûs sancti in se habitantis colligere possunt, 2 Cor. 1 : *Gloria nostra hæc est, testimonium conscientiæ nostræ.* Quamvis enim Apostolus supra dixerit se hoc testimonio planè non inniti, ita ut certus esset se coram Deo justificatum; nihilominus inde reficiebatur interiorius, et inter adversa tranquillus erat et exultans, juxta illud Isaïæ cap. 52 : *Erit opus justitiæ pax.* Et Gal. 5 : *Fructus autem spiritûs est charitas, gaudium, pax, etc.* 1 Joan. 3, v. 19 : *In hoc cognoscimus (nempe quia diligimus fratres) quoniam ex veritate sumus, et in conspectu ejus suadebimus corda nostra.*

Probatur 2^o ex sanctis Patribus. S. Augustinus serm. 155, aliàs 6, de verbis Apostoli, sic loquitur : « Ecce adjuvante ipsius misericordiâ, Spiritum Christi habemus; ex ipsâ dilectione justitiæ, integrâ fide, catholicâ fide, Spiritum Dei nobis inesse cognoscimus. » S. Gregorius lib. 6, epist. 25, aliàs 187 : « Cum longâ, inquit, mœroris anxietate fuerit formido consumpta, quædam jam de præsumptione securitas nascitur. » Et S. Bernardus serm. 6 in Cant. ait : « Si hæc sensero, non ambigo

At quis, quæso, Calvinî aut Kemnitii interpretationem, B. Hieronymi versioni, quæ reperitur in Vulgatâ, præhabuerit? Quis, contextum inspicendo, statim non detegit relatum sensum cum ipso nequaquam consentire? Verba enim præcedentia : *Sunt justî atque sapientes, et opera eorum in manu Dei,* evincunt justum et ejus opera considerari coram Deo, non coram hominibus; idem evincunt sequentia, quibus Sapiens observat in hac vitâ bona aut mala æquè evenire justo et impio, et ideò neminem ex bonis à Deo acceptis certò concludere posse se à Deo diligî.

Psalmo 18 legitur : *Delicta quis intelligit? Ab occultis munda me, Domine, et ab alienis parce servo tuo.* Ipse igitur David nesciebat, aut saltem plenè non cognoscebat, an peccatorum purus esset vel non, et ideò an Deo acceptus esset vel non; neque enim reponere possunt adversarii disserere Prophetam de peccatis vespensum adesse; verbi siquidem copix sunt, et de plenitudine ejus ista accipimus...

« ... Signa (quibus justus conjicere potest se consecutum gratiam justificationis) tria numerantur à S. Thomâ, q. 112, art. 5, his verbis : « Cognoscitur aliquid conjecturaliter per aliqua signa, et hoc modo aliquis cognoscere potest se habere gratiam, in quantum scilicet percipit se delectari in Deo, et contemnere res mundanas, et in quantum homo non est sibi conscius alienius peccati mortalis. »

« Primum probatur 1^o ex Scripturâ. Psal. 96 : *Lux orta est justo, et rectis corde lætitiâ;* Gal. 5 : *Fructus autem Spiritûs est charitas, gaudium, pax.* Col. 3 : *Si con surrexistis cum Christo... quæ sursum sunt sapite, non quæ super terram.* Sensus est, si reverà à morte peccati ad vitam gratiæeducti estis, et Christo resurgenti similes effecti; cum sapore et delectatione quæ Dei sunt, cogitetis et ametis necesse est. Unde omnibus in Christo renatis dicitur 1 Petri c. 2 : *Si tamen gustastis quoniam dulcis est Dominus.* In græco legitur : *Siquidem, quandoquidem gustastis.* De iisdem etiam scribit Apostolus Heb. 6, v. 4 : *Gustaverunt etiam donum cælestè.*

« Probatur 2^o ex Patribus. Ex S. Augustino, gratia est ipsamet spiritualis delectatio, lib. de Spiritu et Litt. cap. 5 : « Necesse est, inquit, ad benè vivendum, ut homo accipiat Spiritum sanctum, quo fiat in animo ejus delectatio, dilectioque summî et incommutabilis boni. » Et in Psal. 85 : *Si nulla jucunditas, deficiamus.* Et ex hac interiori delectatione concludit, fiduciam nasci, Deum nobis esse propitium : *Brevi sermo, inquit, places tu Deo, si tibi non displicet Deus.* Idem docet S. Bernardus serm. 24 in Cant. ubi sic loquitur : *Cui placet Deus, Deo displicere non potest.*

« Probatur 3^o ratione, quia cum remissione peccatorum charitas infunditur; atqui ex 1 Joan. 4 : *Qui manet in charitate, in Deo manet, et Deus in eo.* Manet, inquam, in Deo, modo charitati proprio, nempe tanquàm amans in

nialibus, cum omnia peccata mortalia esse præstant; deinde, qui evincere possent generale hæc oraculum de solis peccatis venialibus esse exponendum? Cum imprimis D. Basilii Constitutionum monasticarum cap. 2. D. Anselmus et alii Patres sentiant Apostolum intuitu hujus testimonii exclamasse: *Nihil mihi conscius sum, sed non in hoc justificatus sum?*

amato, in quo ita delectatur saltem secundum interiorem hominem, ut non nisi Deum et divina cogitare et intendere appetat, nec aliud ei magis in votis sit, quam per omnia dilecto placere, servire, gratificari.

« Dices: Multi qui pietatem impensè colunt, ejusmodi suavitate nonnunquam privantur, vel in penam præcedentis negligentiae, et levioris peccati, vel ad profectum humilitatis, vel ad probationem virtutis. Ipsemet S. Bernardus serm. 54 in Cant. subtrahit sibi interiorem illam suavitatem plangit flebilibus his vocibus: « Superbia inventa est in me, et Dominus in irâ declinavit à servo suo. Hinc ista sterilitas animæ et devotionis inopia quam patior... Nec compungi ad lacrymas queo, tanta est duritia cordis. Non sapit Psalmus, non legere libet, non orare delectat, meditationes solitas non invenio.... Numquid qui humilibus dat gratiam, humili aucter datam? Ergo argumentum superbæ privatio est gratiæ. Quanquam tamen interdum subtrahitur gratia, sive retrahitur non pro superbiâ quæ jam est, sed quæ futura est, nisi subtrahatur. » Ergo spiritualis delectatio non est effectus inseparabilis à gratiâ sanctificante, ac proinde sive percipiatur sive non, nihil probabiliter conjici potest.

« Distinguo antecedens: Justi nonnunquam privantur spirituali delectatione in inferiori animæ parte, concedo; in superiori, nego antecedens, quia in illis angustias, quas describit S. Bernardus, Spiritus sanctus non ita se occultat, ut non possit aliquo probabili signo deprehendi, sive ab ipso met justo, sive à prudenti ejus confessorio. In illa quippe privatione aliter se gerit justus, aliter peccator; justus se habet ut infirmus, cui panis et omnia alimenta ita fastidium sunt, ut inde doleat, remedia requirat, medico obtemperet ad tollendum illud fastidium; quæ sæpè demonstrant infirmum appetitu saltem rationali alimenta concupiscere, usque mente delectari. Sic justus in illâ devotionis inopiâ et cordis duritiâ, coram Deo amplius sese deficit, conscientiam mundare satagit, in oratione, quamvis pectore frigida, ut sibi videtur, diutius perseverat. Quis autem ista in eo operatur, nisi Spiritus, de quo scriptum est: *Adjuvat infirmitatem nostram, et postulat pro nobis gemitibus inaccessabilibus?* Dicit ergo confessorius ei, qui hujusmodi est, *quoniam bene*, consoletur illum; magna enim præ se fert indicia, quòd sit Deo gratus, et misericordiam consecutus. Contra peccator in illâ tentatione Deum obliviscitur, ad terrenas consolationes se convertit, orationem et alia pietatis opera utpote sensibus inspicillâ dimittit, satisfactionem à confessorio iniquitatem peremptorie exequitur, aut etiam negligit. Hinc non infirmum, sed planè mortuum merito dixeris:

T. X.

Epistolâ 1 ad Corinthios, cap. 4, ait Paulus: *Nihil mihi conscius sum, sed non in hoc justificatus sum.* Hujus oraculi hic dubio procul est sensus: Conscientia nulla mihi exprobrat delicta, sed non ideo coram Deo justus sum, quia Deus, *qui me judicat*, fortassis in me peccata deprehendit quæ ego non deprehendo. Quis autem hæc cum decantat à novatoribus

qui enim spiritualia alimenta non solum non admittit, sed nec mente concupiscit, nullum signum præbet vivifici spiritûs.

« Secundum signum inhærentis gratiæ, et quidem magis notum quoad nos, est contemptus temporalium; quia charitas, sine quâ non habetur remissio peccatorum, et cupiditas seu amor terrenorum, non minùs inter se pugnant quàm calor et frigus, sanitas et ægrotudo. Sicut ergo eo ipso, quo calor introducit, frigus remittitur; sic ubi charitas infunditur, cupiditas necessariò minuitur, et poenitens tanquàm à lethali hydropsis morbo sanatus, liberatur à mordacibus curis ambiendi et acquirendi ea quæ vitam mortalem delectabilem efficiunt. Cum autem inchoata charitas perfecta fuerit, nulla supererit cupiditas. Ita passim Augustinus, qui hoc indicio vult deprehendi qui sint filii Dei et filii seculi, cives spiritualis Jerusalem, quibus caput Christus et lex charitas; et cives mysticæ Babylonis, quorum princeps Diabolus, et lex cupiditas. Omnes, inquit, pariter templa nostra implent, iisdem aquis baptismi, eodem poenitentiae Sacramento initiantur, sed diversimodè; quemadmodum olim ex eadem aquæ materiâ aves et pisces producti sunt, sed in diversâ specie et indole. Aves quippe mox ad superiora avolârunt, nunquàm ad inferiora reditura, nisi necessitate sedandæ famis et sitis. Pisces contra in profundo remansère; ibi delectabiliter vivunt, natant, requiescunt, nec sine violentiâ inde extrahuntur. Similiter justî in Sacramento baptismi et poenitentiae, nova creatura in Christo effecti, deinceps non quæ super terram, sed quæ sursum sunt, concupiscunt et sapiunt, ibi eorum conversatio et voluptas; sic utuntur hoc mundo tanquàm non utantur, hoc est, sine affectu, sed ex necessitate naturæ, et proprii statûs. Mali verò, post perceptum Sacramentum, eo ardore, quo priùs, terrena sitiunt, et vitæ præsentis sic addicti sunt, ut eam immortalem exoptent, dicantque apud S. Augustinum hom. 9, ex lib. 50 hom. si non motu linguæ, sætem cordis affectu: « Utinam hic mihi Deus in hoc seculo omnia bona tribuat, non ad me pertinet quod in futuro seculo de me fieri velit, ô infelix anima, » etc.

« Scio plures hanc cordis sui impietatem eo prætextu sibi dissimulare, quòd non amore præsentis vitæ, sed judiciorum Dei terrore mortem exhorreant. Verùm periculosè eos decipi vel inde patet, quòd interim omnis eorum sollicitudo sit delectabiliter hic vivere, nulla cura sibi placandi judicem, et promerendi coronam justitiæ, quam Apostolus dicit 2 Thimoth. 4, repositam iis, qui licet timeant Dei judicia, nihilominus diligunt adventum

44

de suâ justificatione justorum certitudine conciliare valeat? Nihilominus Calvinus, libro 3 Instit. cap. 17, sectione 14 (concinunt alii Protestantium antesignati), invictum hujus testimonii robur in hunc modum elidere nititur: Ubi hominum in me maledicentiam expendo, acceptam divinæ indulgentiæ innocentiam meam agnosco et prædico; sed ubi illam innocentiam coram solo Deo considero, eam in ejus conspectu nihil esse agnosco et judico; pii enim uno ore clamant: *Si iniquitates observaveris, Domine, quis sustinebit*, Psalmo 129; et: *Ne ingrediaris in iudicium cum servis tuis, quia non justificabitur in conspectu tuo omnis vivens...* Verùm hæc expositio seipsâ ruit. Scilicet Apostolus sic suam innocentiam etiam coram Deo agnovisset et non agnovisset; non agnovisset ex ultimâ interpretationis parte; agnovisset è converso ex primâ, siquidem *divinâ indulgentiâ* sibi collatam iustitiam prædicasset. Præterea, antithesis ab Apostolo apposita illam expositionem explodit; illa enim exigit ut sit oppositio inter duo assertionis membra, quæ non existeret, si in utrâque sermo esset de innocentiae prædicatione sive agnitione; non alius igitur quàm suprâ assignatus apostolico oraculo sensus attingi potest.

Plurima obtundunt novatores Scripturæ testimonia, quorum præcipua, sive majori obnoxia difficultati, exponemus. Romanorum cap. 8

ejus; quia Christus per mortem suam destruxit eum, qui habebat mortis imperium, id est, diabolum, *ut... liberaret eos, qui timore mortis per totam vitam obnoxii erant servituti*, Heb. 2, v. 14 et 15.

« Tertium indicium, illudque insigne inhærentis gratiæ habetur, cum quis offensam Dei sic timet, cavetque, ut nullius peccati mortalis conscium se sentiat, et insuper vehementer doleat, quoties ex infirmitate in leviora labitur. Quia ex ejusmodi dolore duo moraliter certa conicere licet. Primum, quod insit principium vitæ spiritualis. Secundum, quod non ex stupiditate, neque ex cordis cæcitate aut ignorantia vincibili, ut contingit in peccatoribus, sed ex sanâ conscientia nullius gravioris peccati sit conscius. Namque ut ratiocinantur S. Augustinus, et auctor l. cœlest. et Eccles. hierarchiæ, dolor non exurgit nisi ex pugna contrariorum, boni et mali; quamdiu medicus, v. g., secat quod putridum est, non sentit æger, neque dolet; at ubi attigerit quod vividum et sanum, natura refugit quod sibi noxium est, exclamat infirmus, nec præ dolore sectionem patitur. Atque hinc certò colligit membrum non esse prorsus corruptum, sed curandum quod in eo superest boni. Quidni medicus spiritualis simile iudicium ferat de eo qui Dei offensam summè exhorret, peccandi occasiones sollicitè fugit, contra ingruentes tentationes acriter pugnat, et ubi se vel le-

gitur: *Ipse Spiritus testimonium reddit spiritui nostro quod sumus filii Dei*; sed testificatio Spiritus sancti omnimodam parit certitudinem; unde ibidem dixit Apostolus: *Certus sum quia neque mors, neque vita poterit nos separare à charitate Dei*. — Resp. certitudinem, quam hic inspirare dicitur Spiritus sancti testificatio, non esse certitudinem fidei divinæ errori non obnoxiam, sed certitudinem spei, quæ, utpote cum conscientia nostræ infirmitatis et inconstantiae conjuncta, nos fallere potest. Etverò, Apostolus, ut modò diximus, fidei certitudine non sciebat se esse justificatum, et aliunde, licet ad tertium cœlum fuisset evehctus, trepidans exclamabat: *Castigo corpus meum, et in servitutem redigo, ne fortè cum aliis prædicaverim, ipse reprobis efficiar*. Neque aliud suggerunt voces, *certus sum*; loco enim, *certus sum*, habet græcus textus *πίστευνω*, quod significat *confido*, *credo*. Quomodò legit B. Hieronymus q. 4 ad Algasiam, imò et Erasmus, et Beza. Hoc sensu dixit Paulus 2 ad Tim. cap. 1, v. 5: *Recordationem accipiens ejus fidei, quæ est in te non ficta, quæ habitavit primum in aviâ tuâ Loide, et matre tuâ Eunice, certus sum autem quod et in te*. De his quippe nonnisi moralem certitudinem habuit Apostolus. Unde edocti plurimos esse vocatos, paucos verò electos, possumus quidem confidere nos electorum albo circumscribi, et ideo à charitate Christi non esse separandos,

viter vulneratum advertit, vehementi dolore pungitur? Nam præterquam quod non doleat, nisi spiritualiter viveret, ipsemet Apostolus testimonium perhibet Rom. 8, genitus illos esse effectus inhabitantis Spiritus; ac proinde, qui sic affectus dicit se conscium non esse ullius peccati mortalis, signum præbet valdè probabile gratiæ sanctificantis. Quomodò enim conscientia, quæ leviora peccata sine dolore non admittit, nec patitur, sed quamprimum rejicit, cum gravioribus quiesceret?

« Ergo conscientiae testimonium sine contemptu temporalium, et eâ, quam diximus, delectatione in Deo, non valet ad generandam fiduciam, de qua nobis est sermo; quia cum ex dicendis multiplex sit conscientia, alia simplex et recta, alia erronea et mala, valdè timendum est, ne penitens, qui delectationes terrenas sectatur, peccata venialia negligit, multiplicatque sine ullo doloris sensu, dicat ex cordis cæcitate et ignorantia vincibili, se nullius peccati mortalis esse conscium; nam ex S. Augustino, multa peccata hominum iudicio levia videntur, quæ in statera sanctuarii gravia reperiuntur. Denique qui sincerè timet Deum, nihil negligit eorum, quæ ipsi dispiciunt. »

(HABERT.) — Theol. ad usum semin. Catalaunensis.

sed de eo, seclusâ speciali Dei revelatione, absolutam certitudinem habere non possumus.

Epistolâ 1 ad Corinthios, cap. 2, ait Apostolus : *Nos non spiritum hujus mundi accepimus, sed Spiritum qui ex Deo est, ut sciamus quæ à Deo donata sunt nobis.* Quisque igitur sibi collatorum beneficiorum notitiam habet. — Resp. : Nego conseq. Ex iis enim quæ præcedunt et sequuntur elucet Apostolum loqui in personâ totius Ecclesiæ, non singulorum fidelium, et ideò de beneficiis à Deo præparatis electis suis in genere, non huic aut illi in particulari.

Epistolâ 2 ad Corinthios, cap. 13, legitur : *Vosmetipsos tentate si estis in fide... annon cognoscitis vosmetipsos, quia Christus in vobis est, nisi fortè reprobis estis?* Quilibet ergo electus cognoscit Christum in se esse, sive se esse justum. — Resp. : Nego conseq. Ex antecedentibus enim patet Apostolum disserere de Christo præsentem in Corinthiorum Ecclesiâ, non per gratiam sanctificantem, sed per miracula quæ præconis sui Pauli ministerio eadebat.

Epistolâ 1 Joannis cap. 3, habetur : *Scimus quia translati sumus de morte ad vitam, quoniam diligimus fratres.* Idem verbum, *scimus*, repetitur cap. 4, v. 14, et cap. 5, v. 20, ubi additur : *Qui credit in Filium Dei habet testimonium Dei in se.* Sciunt igitur fideles et cognoscunt se esse justos. — Resp. verba, *scimus* et *cognoscimus*, aut strictè aut latè esse accipienda; si primum, connotant tantum universim, eos qui fratres diligunt, et piè vivunt, gratiâ sanctificante insigniri, non speciatim hunc vel illum certò scire sibi hanc prærogativam competere; si secundum, non arguunt certitudinem fidei divinæ propriam, sed certitudinem cum erroris formidine conjunctam, qualis ex signis et conjuncturis enascitur. Quod attinet ad ultimum textum ex contextu tangit testimonium Christi Divinitatis quod qui credit in se recipit, non autem nostræ justificationis quasi quilibet electus ex inspiratione Spiritûs sancti sciret se esse sanctum.

MOMENTUM SECUNDUM. — *Ex patribus.* — Innumera in suis operibus sparserunt testimonia, quibus novatorum de suæ justificationis certâ notitiâ dogma exsufflatur; v. g., ubi relatum Apostoli effatum : *Nihil mihi conscius sum*, etc., expendunt, illo notitiam illam explodi asserunt, ut ostendit Bellarminus libro 3 de Justificatione cap. 5 et 7. Solo D. Augustini suffragio utpote adversariis convincendis magis idoneo, contenti erimus.

Enarratione in Psalmum 14, n. 13, ait : *Ho-*

mo licet sanctus, licet justus, licet in multis proficiens, abyssus est; quam conclusionem elicit ex Apostoli oraculo : Nihil mihi conscius sum; unde ipso interpretante omnes sancti sunt abyssus, quia eorum sanctitas non ipsis sed soli Deo est explorata. Idem antea dixerat n. 12, ponderans illud : Ad meipsum anima mea turbata est, novi quia justitia Dei mei manet, inquit, utrum mea maneant nescio; terret enim me Apostolus dicens (1 Cor. cap. 10) : Qui se putat stare, videat ne cadat. Libro de Perfectione justitiæ. cap. 13, n. 33. hæc habet : Quantalibet justitiâ sit præditus homo, cogitare debet, ne aliquid in illo, quod ipse non videt, inveniatur esse culpandum; quomodò cum istâ cogitatione stare posset adversariorum certitudo ?

Multa D. Augustini et aliorum etiam Patrum testimonia objiciunt, quæ Bellarminus, libro 3 de Justificatione, cap. 10, eruditè suo more solvit. Præcipua D. Augustini hæc sunt.

Enarratione in Psalmum 149, n. 11, ait : *Est ergo quidam modus in conscientia gloriandi, ut noveris fidem tuam esse sinceram, noveris esse spem tuam certam, noveris charitatem tuam esse sine simulatione; ergo quilibet justus cognoscit se fidem et charitatem habere.* — Resp. ex ipso numero 11 objecto elucere Augustinum disserere de gloriâ oriente ex testimonio conscientie nostræ, epistolâ 2 ad Corinthios, c. 4, quam non probat omnimodè, sed quoad « quemdam duntaxat modum; timendum enim est, inquit, ne quisque apud seipsum fiat sibi placens, et quasi superbus de conscientia suâ gloriatur; debet enim quisque cum tremore exultare. Etenim multi sunt sibi placentes, et justos se esse arbitantes; et procedit adversus illos (Sapiens Proverbiorum cap. 20) : Quis gloriabitur castum se habere cor, aut quis gloriabitur mundum se esse à peccato ? Est ergo quidam, » etc. Notitia igitur, de quâ Augustinus hoc in loco, non est certa et infallibilis; aliàs, quis posset omni modo gloriari se esse sine peccato, sed est notitia sufficiens ad habendum quemdam modum gloriandi de veritate fidei et charitatis; at notitia ad id sufficiens est notitia humana, sive moralis, cum tremore semper conjuncta.

Sermone 155, alias 6, de verbis Apostoli, n. 14, hæc habet : *Si quis Spiritum Christi non habet, hic non est ejus (ad Ephesios cap. 5);* ecce adjuvante misericordiâ Spiritum Christi habemus; ex ipsâ dilectione justitiæ, integrâ fide, catholicâ fide Spiritum Dei nobis inesse cognoscimus; » ergo. — Resp. intendere Au-

gustinum nos ex fide catholicâ, quam profite-mur, posse conicere Spiritum Dei nobis inesse, non autem nos fide catholicâ cognoscere Spiritum Dei in nobis habitare, quasi fide catholicâ credere teneremur Spiritum Dei esse in nobis, id est, in hoc vel illo homine, cum è converso timere debeamus ne in nobis non habitet. Neque dicas S. doctorem, tractatu 75 in Joannem, n. 4, asserere nos nunc credere Christum esse in nobis, et nos in illo; si enim verbum, credere, ibi accipitur pro fide catholicâ, significat Christum esse in Ecclesiâ ut caput in corpore, et Ecclesiam esse in Christo ut corpus in capite, non autem Christum esse in hoc vel illo homine; scilicet Apostolus, pro more, totius Ecclesiæ nomine loquitur.

Libro 13 de Trinitate cap. 1, n. 3, dicit, *fidem... videt quisque in corde suo esse, si credit, vel non esse, si non credit*. Antea dixerat libro 8, cap. 8, n. 12: *Diligat fratrem, et diligit eandem dilectionem; magis enim novit dilectionem quâ diligit, quàm fratrem quem diligit*. — Resp. ex ipso Augustini verborum tenore evidens esse ipsum loqui de actu quo quis credit vel diligit, quem utpote interiori apprimè cognoscit; sed non dicit cognosci modum quo fit ille actus, an debitè vel indebitè, an ex habitu vel non, etc.; quod absque revelatione cognosci nequit.

Hinc concilium Tridentinum, inspectâ constanti Scripturæ doctrinâ et Ecclesiæ traditione, meritò sess. 6, cap. 9, hæc tradidit: « Quilibet dum seipsum, suamque propriam infirmitatem et indispositionem respicit, de suâ gratiâ formidare et timere potest, cum nullus scire valeat certitudine fidei, cui falsum subesse non potest, se gratiam Dei esse consecutum. » Idem docet in fine capitis 16, et sancit canonibus 13, 14 et 15.

MOMENTUM TERTIUM. — *Ex rationibus theologis.* — Prima. Si singuli fideles possent et tenerentur fide divinâ credere se esse justificados, id in Dei verbo deprehendere possent aut immediatè aut mediatè, id est, per manifestam consecutionem; ipsis enim fatentibus adversariis, fide divinâ non est credendum nisi quod alterutro illo modo exhibet Dei verbum; at, sublatâ speciali revelatione, nullo ex iis modis id in Dei verbo potest deprehendi. Primò scilicet hanc notitiam immediatè non suggerit Dei verbum; si enim paucos excipias, quibus Christus suam justificationem notam fecit; cæteris omnibus universim et conditionatè tantum salutem et ideò justificationem pollice-

tur Dei verbum: *Quicumque invocaverit nomen Domini, salvus erit; qui crediderit et baptizatus fuerit, salvus erit; si vis ad vitam ingredi, serva mandata, etc.* Pariter idem verbum eandem notitiam mediatè non subministrat; hæc enim notitia hunc vel illum in individuo attingit; sed Dei verbum singulis fidelibus illam non instillat, cum ejus promissa, ut diximus, ubi de justificatione res est, sint generalia et conditionata. Singuli ergo fideles hanc cognitionem ex seipsis, id est, ex iis quæ geruntur in corde suo, arripere deberent; at desperet profectò qui talem notitiam in seipso scrutaretur; quis enim seipsum cognoscere potest, cum non homini sed Deo cor humanum pateat? Jeremie cap. 17, Psalmo 7 etc. Quis se sincerâ poenitentia et verâ charitate, et solidâ pietate, præditum et accensum esse certò detegere potest, cum ex Scripturis passim et ex quotidianâ experientia constet innumeros homines hæc persuasionem falsò imbutos fuisse?

Secunda. Si fideles fide divinâ credere tenerentur se esse justos, eadem certè fide credere tenerentur sibi remissa esse sua peccata; at nihil et Scripturis, et traditioni, et rationi etiam magis adversum fingi potest; Scriptura scilicet passim tradit, *hominem de propitiato peccato non debere esse sine metu, etc.* Concinit traditio, et passim historia ecclesiastica, quâ referente, sanctissimi quique homines regis Prophetæ vestigiis insistentes, enixè rogaverunt Deum per totum vitæ mortalis curriculum, ut à peccatis eos mundare dignaretur, et instante morte ne sua sibi condonata non essent peccata anxie pertinuerunt, etc. Suffragatur ratio; nihil enim homini etiam justo tantum est formidandum quàm superbæ peccatum; quâ ex causâ Christus et verbis suis et exemplo humilitatem discipulis suis perpetuò commendavit, et dixit Chrysostomus: *fundamentum christianæ religionis humilitas*; at absoluta certitudo de peccatorum remissione et propriâ justificatione, quam fidelibus inspirare nituntur adversarii, multis superbiendi occasio et causa esse potest: *In isto enim temptationum loco*, inquit Augustinus libro de Correctione et Gratiâ cap. 15, n. 40, *tanta est infirmitas, ut superbiam possit generare securitas*. Unde D. Gregorius, libro 9 Moralium, cap. 17, dixit: *Si scimus nos gratiam habere, superbumus*. Hinc pii et eruditi pastores ovibus suis præcipere non desinunt ut cum metu et tremore salutem suam operentur; sicut ergo Augustino dicente: *Deus voluit unum latere diem (judicii*

sive mortis), *ut observarentur omnes dies*, sic etiam voluit fideles ignorare se esse justos ut in eis humilitatem foveret et augetet.

Obijciunt 1^o: Hebræorum cap. 6, spes christiana dicitur *instar anchoræ firma et tuta*; at hæc spei inest firmitudo, quia fidelis quilibet certò statuere debet se æternam salutem esse assecuturum. — Resp.: Nego minorem; hæc enim indita est firmitas quia sicut anchora naves. ingruente tempestate, sistit et obfirmat, ita spes fideles mundi tentationibus concussos stabiles et constantes efficit. Hanc autem ipsis ingerit stabilitatem et constantiam ex parte fundamenti sui, id est, ex parte infallibilis certitudinis promissionum Dei quibus innititur, non ex parte applicationis illius certitudinis huic aut illi homini; quilibet enim fidelis certò non cognoscit illa promissa se spectare, cum *Deus misereatur cujus vult, et quem vult induet*, Rom. cap. 9; et: *Qui stat, videre debeat ne cadat*, 1 ad Cor. cap. 10. Nihilò tamen minùs ex nobis collatis à Deo beneficiis possumus et debemus (quanquàm non sine formidine) alia præstantiora sperare quæ nos ipsi perfectiore modo illigabunt.

Obijciunt 2^o: Insulsum est fidelibus perpetuam de suâ justificatione et æternâ salute anxietatem injicere; Deus enim noster Deus est totius consolationis; sed nostra sententia fideles hâc anxietate implicat et torquet; ergo. — Resp.: Nego minorem; illa quidem sententia areet à fidelibus inanem illam fiduciam et temerariam præsumptionem, quam ipsis inspirat novatorum dogma, et fidelibus suggerit ut salutem suam cum metu operentur, sed ipsis non eripit incredibilem pacem et consolationem quam percipiunt ex bono conscientie testimonio, ex commissorum peccatorum contritione, ex bonorum operum exercitio, ex frequenti Eucharistiæ perceptione, ex unctione Spiritûs sancti, etc. Unde sancti hâc etiam in vitâ, non rarò, ut D. Paulus, in omni tribulatione suâ suavissimo gaudio perfunduntur, et experiuntur illam Dei pacem quæ omnem sensum exsuperat. Cum autem hæc omnia Deus in sanctis suis gratiæ suæ virtute producat, ideò meritò vocatur *Deus totius consolationis*; in sententiâ è converso adversariorum, esset *Deus totius præsumptionis*.

PRINCIPIA SOLUTIONUM. — Primum. Placet novatoribus quemlibet fidelem *fide divinâ* credere debere se esse justum; Catholici è converso docent fideles absque speciali revelatione nonnisi moralem de suâ justificatione certitu-

dinem (quæ et *conjecturalis* dici potest) in hâc mortali vitâ habere posse.

Secundum. Ope distinctionis certitudinis *fidei divinæ*, et certitudinis *moralis*, plura solvantur testimonia, quibus dicitur, *Spiritum sanctum in nobis testari nos esse Dei filios, nos certos esse de nostrâ salute, nos cognoscere Christum in nobis manere*, etc.

Tertium. Aliud est dicere nos per Spiritum sanctum certos esse Deum electis impertiturum esse beneficia quibus usque in finem perseverent, aliud asserere per Spiritum Dei hunc vel illum electum *in particulari* istâ beneficentiâ instrui; primum docent sacri codices, secundum respuunt.

Quartum. Aliud est asserere fideles, qui ex fide cognoscunt Christum pro se mortuum esse, ex hâc notiâ Dei in se beneficentiâ sperare, aliud asserere eos ex fide propriam justificationem cognoscere. Primum verum, alterum falsum.

Quintum. Promissiones Dei de æternâ salute, de justificatione, etc., generales sunt et conditionatæ, non particulares, et hunc vel illum speciatim spectantes, nisi adsit revelatio.

Sextum. Certitudo ex bonis operibus oriens non est certitudo *fidei*, sed *moralis* tantum.

Septimum. Certitudo *fidei* omnem dubitationem et errandi formidinem necessariè excludit; secùs certitudo *spei* et *confidentiae*, quæ ob incertitudinem dispositionis nostræ cum timore necessariè conjuncta est.

Octavum. Verba, *credimus, scimus, cognoscimus*, in Scripturâ et Patribus non rarò sumuntur pro, *existimamus, censemus*, etc.

Nonum. Quam prædicant novatores certitudo ex parte subjecti, non ex parte objecti reperitur. Evincant ergo testimonia sua hanc exhibere certitudinem.

Decimum. Fatemur nonnullos sanctos ex speciali revelatione propriam justificationem certissimè cognovisse.

Undecimum. Ambrosius Catharinus è familiâ Dominicanorum, qui concilio Tridentino interfuit, censuit justum posse habere certitudinem fidei, etiam sine revelatione, de propriâ justificatione; non ideò tamen inter hæreticos recensendus est; non enim hanc certitudinem ad justificationem necessariam esse docuit, vel hominem fide, quâ credit se esse justum, justificari. Nihilominùs tamen illius opinionem erroneam judicat Bellarminus libro 3 de Justificatione cap. 3.

Ultimum. Errorem quo prætendunt novatores quemque fidelem fide divinâ certum esse non solum de præsentî justitiâ, sed etiam de prædestinatione suâ ad gloriam radicîtus extirpavit Apostolus Rom. cap. 11, v. 33, et egregiè sic explodit Augustinus libro 11 de Civitate Dei, cap. 12 : « Licet sancti de suâ perseverantiâ præmio certi sint, de ipsâ tamen perseverantiâ suâ reperiuntur incerti; quis enim hominum se in actione profectuque justitiæ perseveraturum usque in finem sciat? nisi aliquâ revelatione de illo fiat certus, qui de hâc re justo latentique judicio non omnes instruit, » sed neminem fallit.

§ 2. *Utrum justitia ita solis electis competat, ut eâ nunquam spoliari possint?*

CONCLUSIO. — Fides et justitia solis electis non competunt, et semel habitæ amitti possunt.

Ita definivit concilium Tridentinum Calvinum perstringens sess. 6, can. 23, his verbis : « Si quis hominem semel justificatum dixerit amplius peccare non posse, neque gratiam amittere, atque ideò eum qui labitur et peccat nunquam verè justificatum fuisse, anathema sit. »

Probatur 1^o ex Scripturis, quæ propè innumeris, iisque luculentissimis, oraculis insulsum novatorum dogma in pulverem redigunt. Hæc in re tam apertâ sufficiunt.

Ac primò quidem, ut præteream relata in Scripturis exempla virorum qui ab acceptâ justitiâ exciderunt, regis David, Salomonis, Simonis Magi, Judæ proditoris, etc., Ezechielis cap. 18 legitur : *Cum averterit se justus à justitiâ suâ, et fecerit iniquitatem... in injustitiâ, quam operatus est morietur.* Potest ergo justus justitiam (id est, ut placet adversariis, fidem quæ sola justificat) deperdere, et in iniquitate mori, et ideò solis electis, qui ex hâc vitâ in peccato mortali emigrare nequeunt, non convenit, et semel comparata potest amitti.

Luçæ cap. 8, ait Christus : *Cum audierint cum gaudio suscipiunt verbum, et hi radices non habent, sed ad tempus credunt, et in temptationis recedunt.* Ecce homines qui cum gaudio semen verbi divini deglutiunt, et credunt, et ideò in ipso adversariorum systemate justî sunt, qui tamen *ad tempus credunt*, id est, justitiam servant, sive in justitiâ non perseverant.

Epistolâ 1^a ad Corinthios, cap. 9, clamat Apostolus : *Castigo corpus meum, et in servitu-*

tem redigo, ne fortè cum aliis præcaverim, ipse reprobis efficiar. Alios sanè sensus animo volvisset si in adversariorum scholâ fuisset institutus. Illi enim sub prætextu inamissibilis justitiæ ex solâ fide exorientis cuncta satisfactoria opera expungunt.

Hebræorum cap. 6, hæc iterum decernuntur. *Impossibile est eos qui semel sunt illuminati, gustaverunt etiam donum cælestè, et participes facti sunt Spiritûs sancti... et prolapsi sunt, rursus renovari ad pœnitentiam.* Ecce homines verè justificatos, siquidem *sunt illuminati, gustaverunt donum cælestè, et participes facti sunt Spiritûs sancti*, qui prolapsi sunt, et ideò justitiam amiserunt.

Probatur 2^o auctoritate D. Augustini. Libro de Correctione et Gratiâ, cap. 13, n. 40, ait : « Credendum est quosdam de filiis perditionis, non accepto dono perseverantiæ usque in finem, in fide quæ per dilectionem operatur, incipere vivere, et aliquandiù fideliter ac justè vivere, et postea cadere. » Et verò, Jansenius fateri coactus est S. doctorem constanter tradidisse reprobos justitiam *ad tempus* habere, et ideò ab ipso vocari *temporales*. Justitia ergo ad solos electos non pertinet.

Probatur ultimò rationibus theologicis. Prima. Calvinus, Petrus Martyr, Bucerus, etc., docent filios fidelium nasci justos; at experienciâ compertum est eos inter nonnullos, cum rationis usum adepti sunt, in atrocità etiam crimina prorueri. Et verò illi hæretici Catholicos detestantur qui tamen sunt filii fidelium, saltem à principio.

Secunda. Innumeri ab Ecclesiæ incunabulis ad hoc usque tempus extiterunt hæretici, ut testatur Scriptura, et eorum indices ab Hieronymo, Augustino et aliis concinnati; sed hæretici facti sunt per jacturam fidei.

Tertia. Jovinianus, referente Augustino, libro de Hæresibus, hæresi 82, docuit non posse peccare hominem lavacro regenerationis accepto; at hæc opinio à veteri Ecclesiâ damnata, non videtur discrepare ab adversariorum sententiâ, nisi probent id non docuisse Jovinianum, quia existimabat justitiam semel acceptam non posse amitti.

Objiciunt 1^o Scripturæ oracula enuntiantia extingui non posse charitatem, et ideò fidem sine quâ charitas existere non potest. Cantico-rum cap. 8 : *Aquæ multæ* (id est, hujus vitæ tribulationes) *non potuerunt extinguere charitatem, nec flumina obruent illam.* Joannis cap. 4 :

Qui biberit ex aquâ, quam ego dabo ei, non sitiet in æternum. Romanorum cap. 8 : *Quis nos separabit à charitate Christi? Certus sum, etc.* Epistolâ 1 ad Corinthios, cap. 13 : *Charitas nunquam excidit, etc.* — Resp. hæc et similia oracula significare vel charitatem, quatenus est in totâ Ecclesiâ, non in privatis, perire non posse (privati enim eam relinquere dicuntur Apoc. cap. 2, et in mundi fine *refrigescet*, id est, extinguetur, *charitas multorum*); aut hominem, quandiu charitate exornatur, de præsentis vitæ malis facile triumphare; aut charitatem in futuro etiam seculo esse duraturam, aliis extinetis, fide scilicet et spe, qui ultimi oraculi proprius sensus esse videtur.

Obijciunt 2^o difficilem locum consignatum Epistolâ 1 Joannis cap. 5, his verbis : *Omnis qui natus est ex Deo peccatum non facit, quoniam semen illius in eo manet, nec potest peccare quoniam ex Deo natus est.* — Resp. Apostolum unice intendere proprium esse filiorum Dei ex affectu non peccare, vel peccare non posse, et è converso proprium esse filiorum diaboli peccare. Unde sensus est : Qui Dei filius est, quatenus talis, ex affectu non peccat, sive signum quo cognoscitur aliquem esse Dei filium est voluntaria à peccato abstinencia; non autem sensus esse potest eum qui semel factus est Dei filius non posse per peccatum mortale desinere esse Dei filium, aliâs D. Joannes fideles ad perseverandum in justitiâ incassum excitaret.

PRINCIPIA SOLUTIONUM. — Primum. Fides et charitas in Ecclesiâ collectivè sumptâ perire nequeunt; secus in Ecclesiâ distributivè acceptâ, sive singulis justis.

Secundum. Charitas æternum duratura est; secus fides et spes quæ præsentî vitâ finitâ evanescent.

Tertium. Tanta est charitatis virtus ut hujus vitæ malis et tentationibus extinguî non posse dicatur, quia incredibiles subministrat vires ad illa superanda.

§ 5. *Utrum omnes justi æquali exornentur sanctitate?*

CONCLUSIO. — Omnes justi pari justitiâ non sunt præditi.

Ita sancivit concilium Tridentinum adversus Lutheranos sess. 6, can. 24 : « Si quis, inquit, dixerit justitiam acceptam non conservari atque etiam augeri coram Deo per bona opera, sed opera ipsa fructus solummodò et signa esse justificationis adeptæ, non autem ipsius augendæ causam, anathema sit. »

Probatur 1^o ex Scripturis. Apoc. ultimo legitur : *Qui justus est justificetur adhuc, et sanctus sanctificetur adhuc.* Immediatè ante dicitur : *Qui in sordibus est sordescat adhuc.* Ibi justus eodem modo de novo sanctificari posse dicitur quo sordidus de novo sordescere posse refertur; at sordibus hoc sensu de novo sordescere potest quòd in sordidus crescat. Ergo.

Idem deduci potest ex pluribus aliis oraculis, v. g., ex isto Proverbiorum cap. 4 : *Justorum semita quasi lux splendens procedit, et crescit usque ad perfectum diem.* Hoc enim oraculum ostendit justitiam hominis magis ac magis amplificari donec cum Deo in cœlis regnet ad eum ferè modum quo lux auroræ ad meridiem usque magis ac magis augetur... Item ex hoc 2 ad Corinthios cap. 9 : *Augebit incrementa frugum justitiæ vestræ*; istud enim pronuntiatum falsum esset si, ut prætendunt novatores, sola Christi justitia non capax incrementi nobis inesset.

Probatur 2^o ex Patribus. Prodeat D. Augustinus. Epistolâ 167, quæ est ad Hieronymum, cap. 5, n. 13, ait : *Induti sunt justitiâ, alius magis, alius minus.* Tractatu 6 in Joannem, n. 8, hæc habet : *Non omnes (in Ecclesiâ) paria merita habent; sunt alii aliis sanctiores, sunt alii aliis meliores.* Hæc sanè commentario non indigent.

Probatur 3^o ex Ecclesiæ praxi quâ orat Deum ut justis det fidei, spei et charitatis augmentum.

Probatur ultimò rationibus ex Scripturis deductis. Prima. Passim dicentibus Scripturis, justitia nihil aliud est quàm charitas, Mathæi cap. 5, Rom. 14, 1 Joannis 3, etc. Sed iisdem dicentibus Scripturis, charitas in justis non est æqualis, sed in aliis major, in aliis minor, Lucæ cap. 7, Joannis cap. 15, 1 Joannis cap. 4, etc. Quinimò ipsi Lutherani in hoc à Joviniano discrepant quòd fateantur virtutes et charitatem in regeneratis esse majores aut minores, licet negent exinde unum alio fieri justiorem, quia nempe justus evadit Christi justitiâ fide arreptâ.

Secunda. Passim docent Scripturæ varios in cœlo esse beatitudinis gradus, v. g., Dei Genitricem omnibus sanctis gloriâ antecellere, quia ipsis meritorum excellentiâ præstitit, Joannis cap. 14, v. 2, etc. Sed ista diversitas oritur ex varietate in terrâ justitiæ et meritorum; ergo.

Cum relatus Lutheranorum error innitatur principio imputationis justitiæ Christi supra

confutato, quæ hic obijciunt diluimus ubi illud dogma refellimus.

CAPUT II.

De secundo gratiæ effectu, sive de merito.

Merita nostra ex celesti gratiâ emanant : *Quisquis enim*, inquit Augustinus Deum alloquens libro 9 Confessionum cap. 15, n. 54, *tibi enumerat vera merita sua, quid tibi enumerat nisi munera tua?*

Ut autem tanti momenti quæstio dilucidè edisseratur, sermonem instituimus 1° De meriti existentia... 2° De meriti qualitatibus et conditionibus... 3° De meriti objecto.

ARTICULUS PRIMUS.

De meriti existentia.

Meritum propriè dictum dicitur opus propter quod Deus homini præmium rependere debet.

Protestantes, ut diximus, censent hominem per Christi justitiam solâ fide apprehensam justum fieri, et cuncta ipsorum electorum sive justorum opera ob concupiscentiæ labem semper ipsis tenaciùs inhaerentem esse vitiosa, licet ob Christi justitiam, quâ obteguntur, ipsis non imputentur. Hinc ut amica illa dogmata nihil detrimenti patiantur, omnem justorum operibus, quæ bona dicimus, vitam et æternam salutem merendi vim et virtutem tollunt et eripiunt; ex quibus iterùm documentis inferunt præposterum esse et Christo injuriosum aliquam fiduciam in operibus, quæ bona reputantur, collocare, aut ea opera intuitu mercedis producere.

Quamobrem, ut tam perniciosa doctrina eliminetur, quaeremus 1° an justorum opera æternæ vitæ meritoria sint.... 2° Quo sensu fiducia in meritis reponi possit.... 3° An liceat opera edere æternæ salutis intuitu.

§ 1. *An bona justorum opera æternæ vitæ verè meritoria sint?*

CONCLUSIO. — Bona hominis justificati opera ita sunt Dei dona, ut sint etiam bona ipsius justificati merita.

Ita expressis verbis definivit concilium Tridentinum sess. 6, can. 52. Præiverat concilium Arausicanum 2, can. 18, ubi ex S. Patris Augustini doctrinâ hæc sanciverat: *Debetur merces bonis operibus si fiant, sed gratia, quæ non debetur, præcedit ut fiant.*

Probatur 1° ex Scripturis. Illis dicentibus,

vita æterna est merces bonorum operum. Etenim Mathæi cap. 5 regnum cælorum vocatur *merces* iis rependenda qui persecutionem patiuntur propter justitiam, et Mathæi 20 eadem æterna vita denario diurno operariis repenso adumbrata dicitur *merces*.

Item celestis beatitudo à Deo donanda refertur habitâ ratione non solius promissionis, beneficentiæ, vel indulgentiæ Dei (ut obtinent adversarii), sed ipsius quoque excellentiæ et efficacitæ bonorum operum, Mathæi cap. 16, v. 27, et alibi passim. Item bona opera dicuntur causa et ratio æternæ vitæ collationis, Mathæi cap. 25, v. 23 et 55; Apoc. cap. 7, v. 14, 15, etc. Item bona opera ex justitiâ remuneranda referuntur, Epistolâ 2 ad Timotheum, cap. 4, v. 8; Epistolâ ad Hebræos, cap. 6, v. 10; Jacobi cap. 1, v. 12, etc. Tandem bona opera reputantur vitâ æternâ digna, Lucæ cap. 10, v. 7; 2 ad Thessalonicenses, cap. 1, v. 5, etc.

At hæc omnia ita donum ex parte Dei connotant (ratione scilicet gratiæ ex quâ fiunt bona opera), ut etiam vera merita arguant; merces quippe merito rependitur. Pariter bonum opus, cui Deus ex solâ liberalitate beatitudinem impertit, ex se nullatenus influit in illam felicitatem, nec dici potest *causa* illius gloriæ, aut ex *æquitate* coronari, vel coronâ *dignum*.

Hoc ipsum fateri coguntur adversarii; obtendunt enim istud Apostoli Rom. cap. 8: *Non sunt condignæ passionibus hujus temporis ad futuram gloriam*, etc., ut evincant bona opera æternâ vitâ non esse digna; sed inicitè omninò; intendit enim Apostolus hujus vitæ passiones, utpote momentaneas, sive brevi tempore durantes, ex se et sine gratiâ, sive charitate ex quâ effluunt, nullam habere proportionem cum futurâ gloriâ quæ æternum durabit; sed non vult illis passionibus, habitâ ratione quâ bona opera fiunt, nullam inesse proportionem cum æternâ vitâ, siquidem Epistolâ 2 ad Corinthios, cap. 4, agnoscit eas æternæ gloriæ pondus operari in nobis, non efficienter quidem, sed meritorie.

Probatur 2° ex Patribus, sive pro more nostro, ex S. Augustino. Sanctus doctor libro 9 Confessionum cap. 13, agnoscit, ut diximus, in justis vera merita ex gratiâ elicitâ. Epistolâ 194 ad Sixtum cap. 3, n. 6, ait: « Nullane sunt merita justorum? Sunt planè quia justi sunt, sed ut justi fierent nulla merita fuerunt. » Ibidem cap. 5, n. 20: « Sicut merito peccati

tanquam stipendium redditur mors, ita merito justitiæ tanquam stipendium vita æterna. Sunt igitur in justis quatenus justis vera merita, et quidem æternæ vitæ.

Probatur ultimò ex eo quòd justorum opera ex gratiâ elicita vestiuntur omnibus conditionibus ad meritum necessariis, ut ex dicendis elucescet.

Obijciunt 1^o aliqua Scripturæ testimonia.

Isaïæ cap. 64, universæ justitiæ nostræ dicuntur *quasi pennis menstruatae*, id est, immundæ, ut præcedentia verba evincunt, *facti sumus ut immundus omnes nos*; at opera immunda indubiè non sunt meritoria; ergo. — Resp. Prophetam hic non in suâ vel justorum personâ loqui, sed impiorum qui in justitiis suis externis fiduciam collocabant, ut elucet ex his verbis sequentibus: *Iniquitates quasi ventus abstulerunt nos, non est qui invocet nomen tuum*; hæc enim Isaïæ aut justis illius temporis non conveniunt; quòd autem omnia justorum opera non sint immunda, sive peccata mortalia, ubique docet Scriptura; jubet enim Christus Matthæi cap. 5, ut justî eliciant *opera bona*; et: *Christus dedit semetipsum pro nobis, ut mundaret sibi populum acceptabilem, sectatorem bonorum operum*, Epistolâ ad Titum cap. 2.

Lucæ cap. 17, ait Christus: *Cum feceritis omnia quæ præcepta sunt, vobis, dicit: Servi inutiles sumus*; sed opera inutilia non sunt meritoria; ergo. — Resp. Christum relatis verbis servis suis, id est, iis quos pretio emerat, abjectos de se sensus, sive humilitatem instillare voluisse ipsos admonendo, ut, omnibus etiam quæ præcepta sunt adimpletis, se imperfectos adhuc et inutiles esse sentirent; qui certè animi affectus non excludit in illis bonorum operum meritum, sicut B. Pauli affectus quo se habebat velut fontium *omnium maximam justitiam* in ipso non expeditabat. Vox, *inutiles*, potest etiam referri ad Deum, qui bonorum nostrorum non indiget, non autem ad nos quasi legis observatio ut deet facta nullius nobis foret emolumenti, cum è converso dicat Christus: *Si vis vitam ingredi, serva mandata, hoc fac et vires*, etc. Tandem eadem vox significare potest bona opera, licet ex gratiâ elicita, non esse condigna ad firmandam gloriam quæ revelabitur in nobis, eo quo exposuimus sensu.

Obijciunt 2^o nonnullos Patres. Augustinus sermone 2 in Psalmum 70, n. 5, ait: *Tua peccata sunt, merita Dei sunt; supplicium tibi debetur, et cum præmium venerit, sua dona coronabit, non merita tua*; ergo vita æterna meritis

nostris non debetur, sed potius supplicium. — Resp. Augustinum unicè disserere de meritis quæ sunt *in nobis ex nobis*, et ideò sine Dei adjutorio. Id elucescit 1^o ex verbis objectis, *sua dona coronabit, non merita tua*... 2^o Ex fine numeri primi ibidem p. 754, ubi idem tractans sic loquitur: « Nullam meam agnosco, solius justitiæ tuæ memorabor; à te habeo quidquid boni habeo, quidquid autem à me habeo, mali habeo; non meritis supplicium reddidisti, sed gratiam gratis impertisti... » 3^o Ex Epistolâ 194, aliàs 105 ad Sixtum, libro de Gratiâ et libero Arbitrio, cap. 6, 8, etc., et aliis locis, ubi docet « vitam æternam stipendium esse justitiæ per gratiam acceptæ, reddi vitam æternam meritis per gratiam factis, etc. »

Divus Bernardus, sermone 1 de Annuntiatione, hæc habet: « Neque talia sunt hominum merita, ut propter ea vita æterna debeatur ex jure, aut Deus injuriam aliquam faceret, si eam non donaret; » sed si æterna vita hominum meritis *ex jure* non debetur, illa merita vitam æternam verè non merentur; ergo. — Resp. ex contextu elucere S. doctorem intendere duntaxat, vitam æternam meritis ex jure absolutè et sine conditione Dei promissionis et gratiæ collationis non deberi, quod verum est; hanc enim conditionem supponit Apostolus cum dicit: *Reposita est mihi corona justitiæ*, 2ad Thimotheum, cap. 4; et Hebræorum cap. 6: *Non est injustus Deus qui obliviscatur operis vestri et laboris*; et D. Augustinus libro de Naturâ et Gratiâ cap. 2: *Non est injustus Deus ut justos fraudet mercede justitiæ*. Et verò Bernardus, ibi semetipsum exponens, agnoscit ideò ex jure meritis non deberi vitam æternam, quia merita ex gratiâ scaturiunt.

Obijciunt 3^o dogma de veris justorum meritis Christi merita pessumdare; ergo. — Resp. miseram istam cavillum ex solâ citati dogmatis inspectione diluî; non enim commendat merita nisi ex Christi gratiâ et ideò meritis emanantia.

PRINCIPIA SOLUTIONUM. — Primum. Ut novatores enervarent Scripturæ et Patrum oracula de justorum meritis, varia commentî sunt effugia: 1^o enim diversa excogitaverunt præmia in hac et in futurâ vitâ à vitâ æternâ distincta, ut illa meritis rependi, non ista, possent reponere... 2^o Dixerunt præmium vitæ æternæ tribui meritis, non *ex justitiâ*, sed *ex misericordiâ*... 3^o Dixerunt nullam esse in operibus etiam justorum excellentiam, quinimò ea omnia esse in se peccata mortalia... 4^o Dixe-

runt mercedem sive premium reddi non propter opera, sed propter solam Dei promissionem, ea nempe opera excludentem .. 5^o Dixerunt vitam æternam rependendam esse operibus quatenus præcisè sunt signa sive effectus fidei.

Secundum. Novatorum dogma vera merita expungens eliminat dogma de futuro iudicio; *Quomodo enim*, inquit Augustinus Epistolâ 214 ad Valentinum abbatem n. 4, *judicabit Deus mundum, si nullum est meritum (ex gratiâ), vel bonum piorum, vel malum impiorum?*

Tertium. Scriptura et traditio agnoscunt in justis *meritum*, et in impiis *demeritum*; sed in istis verum est demeritum; ergo et in illis verum meritum.

Quartum. Æterna beatitudo ex parte meritorum est *merces*, sed ex parte meritorum quibus debetur est etiam effectus Dei misericordiæ, quia merita ex misericordiâ sive gratiâ emanant.

Quintum. Cum Deus coronam gloriæ meritis rependit, et justitiæ et misericordiæ actum exercet; actum justitiæ, quia debitam meritis mercedem impertit; actum misericordiæ, quia delet peccata venialia quæ bonis coronandorum operibus inesse possunt.

Sextum. Stipendium justitiæ est vita æterna sicut stipendium peccati mors; secus gratia Dei quæ gratis datur.

Septimum. Bona justorum opera Deo, qui iis non eget, utilia non sunt; secus justis. Eadem opera ex se et sine gratiâ, quæ ipsis merendi vim inserit, nullam habent cum gloriâ sempiternâ proportionem.

Octavum. Salus imperfecta hujus vitæ propria, id est, justificatio, meritis non rependitur; non ita salus perfecta, sive æterna gloria.

Nonum. Deus justorum meritis plus tribuit quàm ipsis debetur, et sub hoc respectu *corona justitiæ* potest etiam dici *corona misericordiæ*.

Decimum. Vita æterna meritis ex jure debetur hypotheticè duntaxat, id est, accedente Dei promissione et gratiâ, ex quâ fiunt illa merita, non absolutè, sive independenter ab istâ hypothesi, sive conditione.

Ultimum. Sedulo distingue merita *in nobis et ex nobis*, et merita *in nobis sine nobis*; illa enim, non ista improbant Augustinus et alii Patres.

§ 2. *An fiducia in meritis reponi possit?*

Fiducia nascitur ex spe, Job cap. 41, v. 18, et ideò juxta D. Thomam 2-2, q. 129, a. 6,

spes est fortis et valida. Queritur quo sensu fiducia in meritis collocari possit.

Pelagiani, et novissimis hisce temporibus Wicleffus, omnem in meritis fiduciam constituendam esse censuerunt; sententiam è diametro oppositam animosè propugnant Protestantes, imprimis Calvinus libro 3 Institutionis cap. 2, sectione ultimâ, et cap. 12, sectionibus 5 et 4, absurdo suo principio innixi, omnia etiam justorum opera esse peccata mortalia.

Catholici docent 1^o, ad vitandam vanæ gloriæ titillationem, tutius esse totam fiduciam in solo summè bono et misericorde Deo constituere, cum imprimis remotâ Dei revelatione omninò lateat propria justitia; hos enim animi sensus suis inspirare nititur Ecclesia dum has effundit preces: *Deus, qui conspicias quia ex nullâ nostrâ actione confidimus, etc.; ubi nulla suppetunt suffragia meritorum, tuis nobis succurre præsidiiis..... intra quorum nos consortium non æstimator meriti, sed veniæ, quæsumus, largitor admitte.....* Docent 2^o nihil obstare quominus, secluso superbiæ periculo, quædam fiducia collocetur in meritis, quorum veritas constat. Scriptura quippe et historia ecclesiastica hos animi sensus plurimorum sanctorum cum encomio referunt.... Docent 3^o non solam fidem, sed bona etiam merita in sanctis parere spem et fiduciam in Deum; quod cum irrideat Calvinus, sit

CONCLUSIO. — Fiducia in Deo ex bonis etiam meritis in sanctis oritur et viget, qui idcirco illis comparandis et augendis incumbere debent, ut illa fiducia in ipsis magis ac magis crescat et amplifictur.

Probatur 1^o ex Scripturis. Tobie cap. 4: *Fiducia magna erit coram summo Deo, elemosyna, omnibus facientibus eam.* Similia habet Job cap. 41, versibus 14, 15 et 18. Concinit Fœdus novum. Hebræorum cap. 10: *Vinctis compassi estis, et rapinam bonorum vestrorum cum gaudio suscepistis... nolite itaque amittere confidentiam vestram.....* Epistolâ 1 Joannis cap. 3: *Si cor nostrum non reprehenderit nos fiduciam habemus ad Deum, etc.*

Probatur 2^o ex S. Augustino; alios enim vulgò adversarii sibi non vindicant. Spem, et ideò fiduciam, ex bonorum aperum conscientia erumpere passim docet, v. g. libro 3 de Doctrinâ christianâ cap. 10, n. 14: *Spes, inquit, cuique est in conscientia propria, quemadmodum se sentit ad dilectionem Dei et proximi, cognitionemque proficere.*

Probatur 3^o ratione. Certitudo spei chris-

tianæ innititur Dei fidelitate, et bonis operibus nostris; ideò enim speramus coronam vitæ, quia Deus eam promisit diligentibus se, ut dicitur Jacobi cap. 4; sed inde elucet bonorum operum conscientiam spem gignere, fovere, alere et roborare, etc.

Obijciunt. Augustinus, tractatu 85 in Joannem n. 5, ait: *Potest sperare veniam qui non diligit, Apostolo dicente 1 ad Corinthios cap. 13: Manent fides, spes et charitas; spes ergo præcedit charitatem; si autem eam præcedit, quomodo ex eâ nasci potest?* — Resp. Augustinum loco citato et alios Patres ita docere spem esse charitate priorem, ut simul doceant charitatem sine spe esse non posse. Unde spes oritur ex charitate, et ex spe oritur charitas. Scilicet spes charitatem antecedens et generans est spes, quæ dicitur informis, id est, totam suam perfectionem nondum adeptâ, quæ in homine nondum justificato nihil aliud est quam desiderium adipiscendæ beatitudinis per fidem cognitæ, subsidio nempe bonorum operum ex gratiâ elicitorum (aliâ non esset spes sed præsumptio). Spes è converso ex charitate, sive meritis, enascens, spes est perfecta, quæ dicitur *fiducia*, id est, spes fortis et nervosa, quam producit bonorum operum conscientia. Hinc Augustinus loco citato dicit: *Nemo potest desperare qui diligit. Itaque ubi dilectio est ibi necessariò..... spes, id est, fiducia.*

PRINCIPIA SOLUTIONUM. — Primum. Scripturæ et Patrum oracula, quæ enuntiant spem nullatenus in meritis, etiâ gratiæ, sed in solo Deo esse reponendam, intelligenda sunt non absolutè, sed conditionatè, si nempe comperta non sint illa merita, aut adsit inanis gloriæ aut superbæ periculum.

Secundum. Sedulò distingue spem imperfectam à perfectâ, sive spem à fiducia; illa merita præcedit, hæc merita subsequitur.

Tertium. Hic asserimus duntaxat, fiduciam nasci ex meritis, non autem fiduciam ponendam esse in meritis.

§ 2. Licetne opera edere æternæ mercedis intuitu?

Concilium Tridentinum sess. 6, cap. 11, perstringens doctrinam Calvini libro 5 Institutionis cap. 16, sect. 3, et 18, sect. 2, hæc super istâ questione decernit. « Constat eos orthodoxæ religionis doctrinæ adversari qui..... statuunt in omnibus operibus justos peccare, si in illis suam ipsorum socordiam excitando, et sese ad currendum in stadio cohortando, cum hoc, ut inprimis glorificetur Deus mercede-

dem quoque intuentur æternam; et ac deinde eam. 51: « Si quis dixerit justificationem peccare dum intuitu æternæ mercedis benè operatur, anathema sit. » Hanc doctrinam refellens Calvinus in Antidoto mentitur sanctam synodum definiisse *operandum tantum esse ex affectu mercedis; quod solâ concilii verborum inspectione exploditur. Itaque sit*

CONCLUSIO. — Non peccant justî dum intuitu æternæ mercedis benè operantur.

Probatur 1^o ex Scripturis. Christus excitat discipulos ad operandum intuitu æternæ beatitudinis, imò id ipsis præcipit Mathæi cap. 4: *Pœnitentiam agite, appropinquavit enim regnum celorum*, ubi nota particulam, *enim.....* Mathæi cap. 5: *Beati pauperes spiritu, quoniam ipsorum est regnum celorum.....* Mathæi cap. 6: *Querite primum regnum Dei, et justitiam ejus, et hæc omnia adjicientur vobis, etc.*

Item Rex Propheta intuitu æternæ mercedis operatus est: *Inclinavi cor meum ad faciendas justificationes tuas propter retributionem*, Psalmo 118... Moyses, Apostolo dicente Hebræorum cap. 11, *aspexit in remunerationem;*... Ipse Paulus dicit se *ad destinatum persequi, ad bravium supernæ vocationis in Christo Jesu*, Epistolâ ad Phillippenses cap. 3.

Item Apostolus passim hortatur fideles ad sic currendum ut comprehendant, Epistolâ 1 ad Corinthios, cap. 9; ad bonum faciendum, quia tempore suo metent, ad Galatas cap. 6; ad operandum ut à Domino accipiant retributionem hereditatis, ad Colossenses, cap. 3, etc.

Probatur 2^o ex S. Augustino. Enarratione in Psalmum 120, n. 10, ait: *Quando facis bonum opus, propter vitam æternam fac... Noli facere nisi propter vitam æternam: ideò fac, et securus facies; hoc enim mandavit Deus.* Tractatu 4 in Epistolam Joannis cap. 2, n. 12 hæc habet: *Mementote, fratres, quia vitam æternam nobis promisit Christus..... Promissionem vitæ æternæ desiderate.*

Probatur 3^o rationibus theologicis. Prima. Indubiè licet operis finem cum opus sit intendere, cum opus sit medium ad finem; sed finis operum Christianorum est vita æterna, Epistolâ ad Romanos, cap. 6, v. 22; ergo. Secunda. Licet, v. g., baptismum suscipere ad impetrandam Dei gratiam; quidni et opus bonum elicere ad consequendam æternam beatitudinem, quæ est gratia perfecta? Tertia. Licet opera naturalia exercere propter finem naturalem; quidni et supernaturalia edere propter finem supernaturalem?

PRINCIPIA SOLUTIONUM. Primum. Qui propter retributionem, sive sempiternam felicitatem operatur, debet retributionem intendere, non tanquam finem ultimum, sed tanquam finem proximum duntaxat *ex se*, quandiu manet proximè tendentem ad Deum, in quo solo, et per quem solum summè beati esse possumus. Hinc Scriptura et Patres improbant amorem mercenarium, sive servilem, qui præmium aut unicè aut præcipuè respicit, ita ut si non adesset præmium, illius largitorem nullatenus diligeret.

Secundum. Amor mercedis temporalis non est comparandus cum amore æternæ mercedis; 1º enim ille plerumque vilior est ipsis quæ producit operibus, puta si quis Deo aut Ecclesiæ serviat ob temporaria commoda, non ita iste qui præmium ab ipso Deo non distinctum appetit. 2º Primus amor non raro à Deo avellit, secundus è converso Deo inherere facit; vix enim ac ne vix quidem evenire potest ut qui Deum videre impensè desiderat, Deum plusquam se non diligat. Hinc, si servile est ac turpe propter temporalem mercedem operari, servile non est ac inhonestum ob æternam beatitudinem Deo militare.

Tertium. Cum quis Deum amat propter æternam beatitudinem, primariò Deum propter ipsum amat, et secundariò propter se, et ideò ejus amor est amor non purè concupiscentiæ, sed amicitie quo Deus est prosequendus.

ARTICULUS II.

De meriti dotibus, sive conditionibus.

Duplex universim distinguitur meritum, perfectum unum, sive, ut aiunt, *de condigno*, imperfectum alterum, sive, ut loqui amant, *de congruo*; utrumque scilicet meritum passim in sacris codicibus, et sancto præsertim Augustino delineatur; primum quidem Rom. cap. 4: *Ei autem qui operatur merces non imputatur secundum gratiam, sed secundum debitum*; et. pud Augustinum, enarratione in Psalmum 85, n. 16: *Deus, inquit, donator est indulgentiæ, debitor coronæ*; et in Psalmum centesimum n. 2: *Donando delicta fecit se coronæ debitorem*.... Secundum verò Danielis, v. g., cap. 4: *Peccata tua eleemosynis redime*, etc. Unde Augustinus sermone 501, aliàs de diversis 110, cap. 3, de Nabuchodonosore et Antiocho disserens dixit: «Divino judicio, occulto procul dubio, sed tamen justo, Nabuchodonosor meruit converti, Antiochus meruit obdurari, ille invenit misericordiam, iste auxit superbiam.»

Priusquam autem utrumque meritum definio, essentielles utriusque dotes sive conditiones re-

feram sine quarum notitiâ intelligi non posset.

§ 1. *Referantur conditiones ad meritum de condigno necessaria.*

Inter illas conditiones aliæ omnibus theologis catholicis sunt acceptæ, non ita aliæ.

Conditiones ex omnium consensu merito de condigno, sive perfecto, essentielles. — Prima se tenet ex parte operantis, id est, hominis qui meretur. Exigit ut ille sit viator: *Nocte enim, id est, morte, adveniente nemo potest operari*, Joannis cap. 9, et præsentis vitæ tempus est certaminis, illam verò subsequens tempus est coronæ tempus, Epistolâ 2 ad Timotheum, cap. 4.

Secunda effluit ex parte ejusdem operantis. Præcipit ut is justus sit, id est, filius Dei factus per baptismum, aut cum Deo reconciliatus per poenitentiam sacramentum; hæc enim est consensus omnium doctorum catholicorum sententia adversus Baium, cujus propositio 18 inter damnatas à Pio V Gregorio XIII et Urbano VIII hæc fert: *Sentiunt cum Pelagio qui dicunt esse necessarium ad rationem meriti ut homo per gratiam adoptionis sublimetur ad statum deificum* Et verò, hanc conditionem passim exigunt Scripturæ, ubi, v. g., vitam æternam promittunt iis solis qui adoptionis spiritum consecuti fuerint, Rom. cap. 8, v. 15 et 17, etc.... Passim requirit D. Augustinus, puta libro 1 ad Bonifacium, cap. 2, n. 5, ubi ait: *Non vivunt bene filii hominum nisi effecti filii Dei* (scilicet per baptismum); quin Enchiridion cap. 106, n. 28 et alibi, agnoscit *nullum tunc* (in statu naturæ integræ) *sine gratiâ* (sanctificante) *meritum esse potuisse* Exigit concilium Tridentinum, sessione 6, cap. 16, ubi ait: *Vita æterna et tanquam gratia filiis Dei per Christum Jesum misericorditer promissa est, et tanquam merces ex ipsius Dei promissione bonis ipsorum operibus et meritis fideliter reddenda*. Unde ibidem, canone 32, decernit, illa opera esse meritoria quæ fiunt à justificatis per gratiam Dei, ut sunt viva Christi membra.... Evincit ratio; vita scilicet æterna res est supernaturalis ad quam merendam necessaria sunt opera supernaturalia; at nemo ejusmodi opera elicere potest, nisi divinæ consors naturæ factus sit per gratiam sanctificantem; ergo.

Tertia erumpit ex parte operis, id est, actus meritorii; desiderat illum actum esse moraliter bonum; quæ enim mala sunt non coronat, sed punit Deus.

Quarta idem opus afficit. Præcipit ut illius actus sit bonus, liber, id est, non solum coactionis, sed et omnis necessitatis, etiam simpli-

cis, mutabilis et relativæ purus et expers, ut definitum est adversus Lutherum, Calvinum, Jansenium, etc.

Quinta idem opus spectat, et sane illud non esse meritum præcisè ex eo quòd est conforme legi, sive per speciale Dei auxilium fit modo legi consono, sed etiam ex eo quòd fit ab homine justificato, ita ut si non eliceretur ab homine gratiâ sanctificante exornato, licet aliundè vera esset legis observatio, tamen non esset meritum. Damnata scilicet est hæc inter Baii propositiones numero 14 : « Opera bona à filiis adoptionis facta, non accipiunt rationem meriti ex eo quòd fiunt per spiritum adoptionis inhabitantem corda filiorum Dei, sed tantum ex eo quòd sunt conformia legi, quòdque præstatur obedientia legi. »

Conditiones ad meritum de condigno circa quas est inter theologos controversia. — Prima se habet ex parte Dei remunerantis, an scilicet ut opera bona sint æternæ vitæ meritoria *de condigno* requiratur gratuita Dei promissio, sive pactum de æternâ mercede rependendâ. Doctores non infimi ordinis, ut refert Sylvius in 1-2, q. 114, articulo 2. hoc pactum necessarium non esse autumaverunt. Verùm hæc sententia omninò rejicienda videtur. Etenim 1^o repugnare videtur his Scripturæ oraculis : *Beatus vir qui suffert tentationem, quoniam cum probatus fuerit accipiet coronam vitæ quam repromisit Deus diligentibus se*, Jacobi cap. 1.... *Imitatores eorum estote qui fide et patientiâ hereditabunt promissiones*, id est, æternam vitam promissam, Epistolâ ad Hebræos, cap. 6. Idem legitur Hebræorum cap. 10, v. 36.

2^o Videtur adversa his Augustini effatis : « Debitorem Dominus ipse se fecit (coronæ justitiæ) non accipiendo, sed promittendo... Non ei dicitur : Redde quod accepisti, sed : Redde quod promisisti, » enarratione in Psalmum 83, n. 16... « Debitor factus est non aliquid à nobis accipiendo, sed quod ei placuit promittendo, » sermone 138, aliàs 16 de verbis Apostoli, cap. 2, n. 2.

3^o Videtur contradicere concilio Tridentino citato capite 16 sessionis 6. ubi expressa mentio fit Dei promissionis, et canone 26 ejusdem sessionis ubi dicitur : « Si quis dixerit justos non debere pro bonis operibus, quæ in Deo fuerint facta, expectare et sperare æternam retributionem à Deo per ejus misericordiam, et Jesu Christi meritum, si benè agendo, et divina mandata custodiendo usque in finem perseveraverint, anathema sit. »

4^o Omninò aliena videtur à Constitutione adversus Baium, per quam Pius V et alii summi pontifices damnaverunt hanc ejus propositionem secundam : « Sicut opus malum ex naturâ suâ est mortis æternæ meritum, sic bonum opus ex naturâ suâ est vitæ æternæ meritum... » Item undecimam : « Quòd piè et justè in hac vitâ mortali usque in finem conversati vitam consequimur æternam, id non propriè gratiæ Dei, sed ordinationi naturali statim initio creationis constitutæ justo Dei judicio deputandum est... » Item duodecimam : « Neque in hac retributione bonorum ad Christi meritum respicitur, sed tantum ad primam institutionem generis humani, in quâ lege naturali constitutum est ut justo Dei judicio obedientiæ mandatorum vita æterna reddatur. » Sed harum assertionum censura evincere videtur ad æternam vitam *de condigno* merendam necessariam esse Dei promissionem Christi meritorum intuitu factam; Baius enim eis asserit vitæ æternæ retributionem operibus bonis non rependi propter Christi meritum, sed propter naturam et qualitatem illorum operum absque ullâ gratuitâ Dei promissione, quia id exigebat prima hominis creatio in justitiâ quæ fuit ipsi naturalis; unde clucet Christum nobis vitam æternam non meruisse nisi quatenus gratiam benè agendi nobis promeritus est.

5^o Explodi videtur ratio ex fidei principiis seaturiente, quam D. Augustinus locis citatis tangit. Tota bonorum operum excellentia, et æternam vitam merendi virtus, oritur ex Deo qui hæc ipsis per suam gratiam vim indidit; nemo enim, ut docet Apostolus Rom. cap. 11, *prior dedit illi, ut ipsi retribuât, sed ex ipso, per ipsum, et in ipso sunt omnia*. At æternam vitam merendi vim bonis operibus non inseruit Deus, nisi quia se sponte adstrinxit ad æternam vitam iis operibus rependendam; ratio scilicet propter quam mirabilem illam virtutem bonis operibus intudit ex eo unicè proficiscitur quòd sese prius libenter obligaverit ad æternam vitam iis operibus retribuendam; unde tota illorum operum condignitas in gratuitâ Dei promissione ultimò fundatur.

Secunda operi meritorio insidet; quænam scilicet hominis justi bona opera æternæ vitæ *de condigno* sint meritoria.

Nonnulli, etiam insignes theologi, de quibus Sylvius in 1-2, q. 114, articulo 4, quæstione 2, censuerunt justi opera, etiam moraliter bona, id est, ex motivo non supernaturaliter sed naturaliter bono, elicita, esse æternæ vitæ me-

ritoria. Ipsis scilicet placet omnia prorsus justi opera esse æternæ vitæ meritoria, vel demeritoria. Verùm hæc opinio à theologorum choro meritò rejicitur; videtur enim omninò repugnare concilio Tridentino sess. 6, cap. 16, ubi dicit, *bona justorum opera nullo pacto Deo grata et meritoria esse posse nisi Christi virtus ea antecedit, comitetur, et subsequatur*, id est, nisi ex Christi gratiâ fiant, et in Deum ut gratiæ auctorem tendant; et ejusdem sessionis can. 26, ubi ad æternæ beatitudinis meritum requirit ut eadem opera sint *in Deo facta*.

Alii existimant bona justi opera vitæ æternæ *de condigno* non esse meritoria nisi ex charitatis imperio actu vel virtute oriantur. Ita sentire videtur D. Thomas 1-2, q. 114, articulo 4, in c., ubi ait: « Meritum vitæ æternæ primò pertinet ad charitatem, ad alias autem virtutes secundariò, secundùm quod earum actus à charitate imperantur, » et in responsione ad 3: « Actus patientiæ et fortitudinis non est meritorius, nisi aliquis ex charitate hæc operetur, secundùm illud 1 Corinth. cap. 13: *Si tradidero corpus meum ita ut ardeam, charitatem autem non habuero, nihil mihi prodest.* » Concinit D. Bonaventura in 2, dist. 41, a. 1, q. 3. Concinit Bellarminus libro 5 de Justificatione cap. 15, Tannerus, et alii insignes doctores.

Alii è converso, ut Sylvius in 1-2, q. 114, articulo 4, quæstione 1, et plures alii recentiores, censent æternæ vitæ esse meritoria justorum opera, quæ ex gratiâ actuali, et ideò ex motivo supernaturali eliciuntur, etsi à charitate vel actu vel virtute non imperentur. Actus, v. g., inquit, fidei, spei, Dei invocationis, gratiarum actionis, etc., justo æternam merentur vitam, etiamsi nullus in eo præcesserit actus charitatis, qui tempore quo fiunt perduret, sive ejus virtute exerceantur. Satis enim est ut per Spiritûs sancti gratiam fiant, et ideò ex fine supernaturali. Hanc sententiam probare aggrediuntur potissimum ex Scripturis, quæ referunt regnum cælorum esse dandum propter opera misericordiæ, Mathæi cap. 25, et eos qui *bona fecerint in vitâ resurrectionem esse processuros*, Joannis cap. 5; item ex concilio Tridentino, quod locis mox commemoratis, ad justi operum meritum unicè requirere videtur ut sint *bona*, et *in Deo facta*. Hinc conjiciunt D. Thomam modò laudatum *per charitatis imperium*, quod ad actum meritorium necessarium dicit, nihil aliud intellexisse quàm actum, quo voluntas hominis justificati, sive charitate habituali præditi, per gratiam excitata

fertur in honorem Dei, qui finis est charitatis.

Utrum hæc expositio verbis et menti D. Thomæ sit consona, vel non, judicent doctores. Consultius sanè videtur huic Bellarmini loco modò citato doctrinæ inhærere: « Illa solùm opera meritoria sunt æternæ vitæ quæ ex naturâ suâ charitatem augent... omne enim meritum vitæ æternæ simul etiam incrementi charitatis meritum est; at charitas non augetur nisi per actus qui ex ipsâ procedunt; id enim omnibus habitibus commune est; igitur illa solùm opera meritoria sunt æternæ vitæ, quæ vel sunt actus charitatis elicti, vel imperati; » ex his autem, ni fallor, elucescit virum eruditum exprimere voluisse SS. Thomæ et Bonaventuræ de præsentî quæstione sententiam, et ideò non credidisse utrumque exponi posse, ut modò exposuerunt quidam recentiores. Hinc justus qui *de condigno* mereri voluerit, aut actus ex verâ charitate eliciat, aut saltem actus in quos præcedens propriè dictæ charitatis actus, virtualiter perseverans, influat.

Tertia ex parte operantis, sive merentis inspicitur, utrum nempe ad meritum *de condigno* necesse sit ut operans actum suum ad Deum referat, vel actu, vel virtute, vel saltem habitu. Super istâ quæstione facillè consentiunt theologi relationem actualem operis in Deum ut finem supernaturalem non requiri ut opus sit *de condigno* meritorium; sed non consentiunt an absolutè necessaria sit relatio virtualis, quæ nempe vera sit causa operum, quæ postea fiunt, an è converso sufficiat habitualis. Nonnulli enim sentiunt habitualement ordinationem in Deum, quam justus quilibet accipit ex habitu charitatis, qui in ipso residet, sufficere ut ejus actio referatur in Deum, et sit meritoria. At sentiendum est cum majore et saniore theologorum numero habitualement illam relationem non sufficere, sed omninò necessariam esse virtualement ut actus fiat *de condigno* æternæ vitæ meritorius. Etenim, si relatio habitualis in homine justo ex habitu charitatis enascens, sufficeret ut ejus actus essent æternæ vitæ meritorii, cuncta ejus opera necessariè in charitate vel ex charitate fierent; quamdîu scilicet justus manet charitate habituali et ideò relatione habituali in Deum destitui non potest; at quàm falsa et periculosa ex hoc principio erumperent connectaria? Utquid, v. g., tam sollicitè Apostolus justos excitaret ad omnia opera in charitate faciendâ, et in gloriam Dei referendâ, 1 ad Corinthios 10 et ultimo, si evenire non posset ut justi opera ex charitate et in charitate non

elicerentur? Deinde nulla justi opera debito fine carere possent, et ideò nulla verba vel facta otiosa in eo unquam reperirentur, siquidem ratione habitus charitatis necessariè dirigerentur in Deum, ut finem supernaturalem et summum bonum. Demùm, sicut omnia opera hominis injusti, id est, habitualiter à Deo aversi, et ad creaturam ut finem ultimum conversi, per pravam illum habitum non diriguntur in præpositum finem, sive in creaturam ut finem ultimum, nisi ex illo habitu operetur (aliàs cuncta injusti opera necessariè essent peccata mortalia); ita omnia justi opera per habitum charitatis non ordinantur in Deum ut finem ultimum, nisi ex illo habitu ea eliciat, sicque illis operibus ordinationem in illum finem inserat. Porro sedulo observa cum D. Bonaventurâ loco citato opus in Deum virtute referri non censi nisi quando opus, v. g., misericordiæ, quod postea peragendum est, actu relatum fuit in Deum; tunc enim opera in Deum virtute relata censentur, cum intentio præcedens est vera causa operum quæ postea fiunt; intendisti, v. g., infirmo propter Deum subvenire, et postea auxiliarem opem illi subministras; opus tuum in Deum virtualiter referetur, etiamsi dum illud exerceas nihil de Deo cogites; intentio enim virtualis ea dicitur quam operans nec retractavit, nec moraliter interruptit, cujus ideò vi et virtute postea agit. Igitur ut justus *de condigno* mereatur, sufficere non videtur ut anno incipiente, vel mense, vel etiam die generali intentione omnia sua opera in Deum referat.

Atque virtuale intentionem in justo, ut ex *condigno* vitam æternam promereri possit, exigunt ii ipsi doctores (saltem plures), qui ad istud meritum non requirunt ut opus fiat ex actu, vel imperio charitatis, sed sufficere autumant ut fiat in gratiâ, et ex gratiâ, et ideò ex fine æternam salutem spectante, quales sunt actus fidei, spei, misericordiæ, ut supra exposuimus.

COROLLARIUM.

Ex dictis meritum *de condigno* definiri aut describi debet: *Opus liberum*, id est, non coactionis solum, sed etiam cujuslibet necessitatis etiam simplicis et relativæ expers, *bonum ab homine viatore et justo, ex actu vel imperio charitatis factum, et ideò in Deum ut summum bonum virtualiter saltem relatum, cui ex justitiâ* (licet non rigorosâ ut aiunt) *et ex gratiâ Dei promissione vita æterna à Deo debeatur.*

§ 2. *Referuntur conditiones meriti imperfecti, sive de congruo, propriæ.*

Nulla aut parva viget apud theologos dissensio

circa dotes meriti imperfecti, sive, ut aiunt *de congruo*, seu *ex congruitate*. Etenim 1º consentiunt meritum illud non competere nisi homini viatori: quodlibet enim meritum etiam imperfectum, nonnisi in præsentî vitâ locum habet, cum altera mercedis et præmii, non meriti, sit vita. 2º Fatentur idem meritum justitiâ habituali, sive gratiâ sanctificante necessariè non inniti. Etenim per actus pietatis peccator nondum gratiâ justificante insignitus cœlesti præveniente et excitante auxilio sese ad gratiam justificationis disponit, ut docet concilium Tridentinum sess. 6, cap. 5 et 6. 3º. Concedunt idem meritum necessariè complecti sive includere actum liberum, bonum et supernaturalem. Scilicet, quidquid imperfecto etiam modo aliquid meretur, absolutè bonum et liberum esse debet. Aliunde, cum meritum *de congruo* solum disponat ad justificationis gratiam, ut modò ostendimus, necesse est ut sit supernaturale, sive ex cœlesti gratiâ oriatur; et si quis enim, inquit concilium Tridentinum sess. 6, can. 3, dixerit sine præveniente Spiritûs sancti inspiratione, atque ejus adjutorio, hominem credere, sperare, diligere, aut pœnitere posse, sicut oportet, ut ei justificationis gratia conferatur, anathema sit. 4º Assentiuntur in merito *de congruo* non requiri, sicut in merito *de condigno*, ex parte Dei promissionem; Deus quippe nullo obligationis promissionisve titulo tenetur ad præmium huic merito rependendum, quod ipsi reipsâ non impertit nisi quia decet divinam ejus bonitatem et misericordiam illud ipsi impertiri. Præterea, cum meritum illud opus supernaturale essentialiter includat, de se congruum est ad illud obtinendum quod ipsi rependi decet.

COROLLARIA. Primum. Meritum imperfectum, sive *de congruo*, definiri vel describi debet, *opus liberum, bonum à viatore ex præveniente Spiritûs sancti inspiratione et adjutorio elicitum, cui non ex injustitiâ Dei promissione, sed ex aliquâ decentiâ et congruitate rependi debet id ad quod tendit et refertur.*

Secundum. Meritum *de congruo* à merito *de condigno* in his præsertim discrepat: 1º Meritum *de condigno* est *propriè et simpliciter* meritum; è converso, meritum *de congruo* est duntaxat meritum *impropriè et secundum quid*, ut aiunt, quia non æquivalet rei quæ ipsius intuitu conceditur... 2º Meritum *de condigno* justitiâ innititur, et ideò sic merenti præmium ex justitiâ debitum est; è converso, meritum *de congruo* innititur misericordiâ et decentiâ...,

3^o Meritum *de condigno* non competit, ut diximus, nisi homini justo, et operi facto vel ex charitatis actu, vel ab ipsâ imperato; secus meritum *de congruo*, ut ostendimus.

ARTICULUS TERTIUS.

De meriti objecto, sive quasnam res attingit meritum?

Meritum perfectum, sive *de condigno*, de quo hic instituitur controversia, respicere potest primam gratiam sanctificantem, ejusve incrementum, perseverantiam usque in finem, et vitam æternam. Hæc seorsim expendimus, additâ quæstione de bonorum operum remuneratione supra condignum ut Michaelis Baii doctrina ultimò tandem dispareat.

§ 1. *Utrum prima gratia sanctificans, ejusve augmentum merito obnoxia sit?*

Quæstio proponitur de primâ gratiâ sanctificante, sive habituali, non de primâ gratiâ actuali disponente ad justificationem; constat enim neminem posse, *de congruo* mereri primam gratiam actualem; aliàs, ut arguit Apostolus, *gratia non esset gratia*, sive gratis data, et aliquis solis naturæ viribus sese ad gratiam præparare posset, et ex peccato emergere, qui error fuit Pelagianorum et Semipelagianorum. Neque dicas esse congruum ut facienti viribus liberi arbitrii bonum morale facile Deus misericordiam impendat potius quàm illi qui illud bonum non facit. Nam 1^o, certum non est hominem lapsum ejusmodi bonum sine gratiâ (à charitate distinctâ) elicere posse; imò id ipsum non posse sine illâ gratiâ probabilius est, ut antea ostendimus... 2^o Quod est congruum, non semper oritur ex merito *de congruo*; congruum est enim, v. g., divitem pauperi elemosinam impertire, etsi illam non postulet, neque *de congruo* mereatur... 3^o Solitis liberi arbitrii opera non possunt congruitatem habere ad gratiam, quæ est bonum supernaturale.... 4^o Gratia non satis esset gratia, sive gratuita, si homo per suas vires eam, etiam *de congruo* promeretur.

Prima autem gratia justificans, sive habitualis, de quâ disserimus, non ea duntaxat est quam quis primitus recepit, cum ex infideli evasit fidelis, sed etiam ea quæ justo in peccatum mortale lapso infunditur, cum per pœnitentiam cum Deo reconciliatur. His præmissis sit

CONCLUSIO. — Nemo primam gratiam sanctificantem *de condigno* promereri potest; sed potest quis eam *de congruo* mereri. Justus verò secundam gratiam sanctificantem, id est, augmentum gratiæ sanctificantis *de condigno* mereri potest.

Probatur prima pars, id est, neminem primam gratiam sanctificantem *de condigno* promereri posse; probatur, inquam, 1^o ex Apostolo Rom. cap. 5 dicente, justificari homines *gratis per gratiam*, quod in eadem Epistolâ cap. 4, 6 et 11, et alibi passim repetit et confirmat... 2^o Ex D. Augustino qui libro de Patientiâ, cap. 20, n. 17, ex effato Davidis Psalmo 53, *pro nihilo salvos facies illos*, probat gratiam nullis bonis meritis dari, sed merita dare... 3^o ex concilio Tridentino, quod sessione 6, cap. 8, dicit: *Nihil eorum quæ justificationem præcedunt, sive fides, sive opera, ipsam justificationis gratiam promeretur...* 4^o Ex ratione, sive radice meriti *de condigno*. Radix scilicet illa est prima gratia habitualis, sive sanctificans, ut ante ostendimus; sed radix meriti non cadit sub meritum: ergo.

Probatur secunda pars, id est, aliquem posse primam gratiam sanctificantem *de congruo* mereri; probatur, inquam, 1^o ex D. Augustino. Tractatu 44 in Joannem n. 13, hæc habet: « Si peccatores Deus non exaudiret, frustra ille Publicanus oculos in terram dimittens et pectus suum percutiens diceret: *Domine, propitius esto mihi peccatori*, et ista confessio meruit justificationem quomodo iste cæcus illuminationem. » Idem argumentum tractans epistolâ 194 ad Sixtum cap. 5, n. 9, ait: « Possunt quidem dicere remissionem peccatorum (quam prima gratia habitualis necessariè comitatur) esse gratiam, quæ nullis præcedentibus meritis datur; quid enim habere boni meriti (de condigno) possunt peccatores? Sed nec ipsa remissio peccatorum sine aliquo merito est (de congruo), si fides hanc impetrat; neque enim nullum est meritum fidei, quâ fide ille dicebat: *Deus propitius esto mihi peccatori*, Lucæ cap. 18, » etc. Concinit D. Ambrosius variis in locis, v. g., libro 10 in Lucam, ubi de D. Petro ait: *Lacrymæ veniam non postulant, sed merentur... et si tu vis veniam mereri, dilue lacrymis culpam tuam*. Fontes igitur fideles peccatorum remissionem et ideò justificationem merentur; sed illam non *de condigno*, cum habituali charitate sive gratiâ sanctificante, quæ fons est illius meriti, destituantur; ergo, etc. 2^o Ex ratione; nulla enim ex conditionibus ad meritum de congruo requisitis desideratur in actibus fidei, spei, pœnitentiæ, etc., quos per actualem Dei gratiam ante justificationem producit peccator, ut ad eas attendenti illicò sit exploratum.

Probatur tertia pars, id est, justum secundam gratiam sanctificantem, sive gratiæ sanctificantis augmentum, *de condigno* mereri posse;

probatur, inquam, 1^o ex D. Augustino, epistolâ 186 ad Paulinum, cap. 5, n. 10, ubi ait: « Cum fides impetrat justificationem, non gratiam Dei aliquid meriti præcedit humani: sed ipsa gratia meretur augeri, ut aucta mereatur perfici, comitante, non ducente, pedissequâ, non præviâ voluntate. » Ecce hominem justificatum, cujus gratia sanctificans meretur augeri.... 2^o Ex concilio Tridentino quod sess. 6, can. 32, definit, « justificatum bonis operibus, quæ ab eo per Dei gratiam, et Jesu Christi meritum, cujus vivum membrum est, fiunt, verè mereri augmentum gratiæ... » 5^o Ex ratione, per quam evincitur inesse posse bonis istius justi operibus cunctas de eo merito *de condigno* essentielles.

Secunda pars assertionis, quæ nonnullis theologis non intimæ notæ non est accepta, majorem quàm duæ aliæ partes patitur difficultatem, quæ difficultates ut liquescant, sint

PRINCIPIA SOLUTIONUM. — Primum. Cùm dicimus peccatorem *de congruo* mereri posse primam gratiam habitualement, non depingimus actuale auxilium, quo Deus sontem prævenit, vocat et excitat, aut collectionem omnium auxiliorum quæ à cælo in peccatorem stillant à primâ ejus vocatione usque ad justificationis impetrationem; sic enim considerata merito etiam *de congruo* non subjacet; sed delineamus gratiam habitualement, quæ eo momento instillatur quo peccator justificatur, per quam scilicet *formaliter* sanctus sive Deo gratus efficitur. Primam gratiam habitualement sub primo, non sub secundo respectu inspexit D. Augustinus cùm epistolâ 194 ad Sixtum et alibi dixit: *Ut justifient merita non fuerunt*, etc. Eodem sensu exponendus est D. Thomas 1-2, q. 114, articulo 4, ubi negat *primam gratiam cadere sub merito*.

Secundum. Solus Christus, de cujus *plenitudine nos omnes accepimus*, Joannis cap. 1, potuit primam gratiam aliis mereri *de condigno*; justus tamen potest eam alteri de congruo mereri; unde Jacobi cap. ultimo dicitur *multum valere deprecationem justii assiduam*, et Augustino dicente: *Si Stephanus non orâset, Ecclesia Paulum non haberet*. Pariter legitur in vitâ B. Monicæ ipsam impetrâsse à Deo filii sui Augustini conversionem.

§ 2. *Utrum perseverantia usque in finem merito subjaceat?*

Perseverantia, de quâ movetur quæstio, est *magnum illud et speciale Dei donum*, quo Deus efficit ut justus in justitiâ permaneat usque ad mortem.

CONCLUSIO. — Justus non potest perseverantiam *de condigno* mereri, potest tamen *de con-*

gruo, præsertim si multa et crebra pietatis opera exerceat. Prima pars cunctis theologis, et eorum principi D. Thomæ 1-2, q. 114, artic. 9, est probata. *De reparatione post lapsum*, inquit Bellarminus lib. 5 de Justificatione cap. 22, *et perseverantiâ usque in finem, concors est sententia theologorum eam non cadere sub merito de condigno*.

Probatur prima pars, sive finalem perseverantiam merito *de condigno* non subjacere; probatur, inquam, 1^o ex Scripturis. Ad meritum *de condigno* requiritur, ut diximus, ex parte Dei aliquod pactum, aliquave promissio; sed Scriptura et traditio, ubi de perseverantiâ disserunt, non solum illud pactum non referunt, sed etiam illud non existere suadent; docent quippe *beatum esse hominem qui semper est pavidus*, Proverbiorum cap. 28, et Epistolâ ad Philippenses cap. 2, v. 12, cum qui *se existimat stare, videre debere ne cadat*, Epistolâ 1 ad Corinthios cap. 10, fideles non alta sapere, sed timere debere ne Deus fortè ipsis non pareat, sicut naturalibus ramis (Judæis) non pepercit, Epistolâ ad Romanos cap. 11, etc.; et ideò Deum enixè et constanter exorandum esse *ne nos inducat in tentationem*, etc.

Possentne, quæso, fideles hos sensus animo volvere, si certi forent perseverantiæ donum ex Dei decreto operibus suis bonis infallibiliter esse impertiendum? Hæc ex causâ concilium Tridentinum sess. 6, can. 32, enumerans varia objecta meriti *de condigno*, interea non recensuit magnum usque in finem perseverantiæ donum quod agnoverat et extulerat can. 16. 2^o Ex ratione. Si perseverantia usque in finem merito *de condigno* subjaceret, justus qui piis et supplicibus votis illam perseverantiam à Deo petisset, reprobis effici non posset (ut somniaverunt Jovinianus et Calvinus); meritum enim condignum, utpote divinâ promissione et verâ justitiâ innixum, suum infallibiliter obtinet effectum; falsum et absurdum consequens; sæpè enim, ut passim observat. D. Augustinus, *stermuntur cedri Libani, et stellæ cadunt de cælo*, id est. viri pietate magni et illustres in hæresim, apostasiam, peccatum mortale proruunt, et postea in infernum præcipitantur. Ergo.

Probatur secunda pars, sive finalem perseverantiam merito *de congruo* impetrari posse; probatur, inquam, 1^o ex D. Augustino. Libro de Dono perseverantiæ cap. 6, n. 10, ait: *Hoc donum (perseverantiæ finalis) suppliciter emeri potest, sed cùm datum fuerit, contumaciter amitti non potest* (potentiâ cum actu conjunctâ; duæ scilicet istæ propositiones, ut antea ob-

servavimus, simul stare possunt : *Petrus habet donum perseverantiæ; Petrus potest non perseverare si velit*; secus istæ : *Petrus habet donum perseverantiæ; Petrus non perseverabit*; donum enim perseverantiæ homini non eripit potestatem non perseverandi si velit, sed facit duntaxat ut cum possit non perseverare, infallibiliter tamen perseveret). Porro S. doctor manifestè loquitur de merito *de condigno*, quòd nempe pro Dei beneplacito remuneretur dono perseverantiæ in justis quos Deus voluerit specialiter incitare et adjuvare ad perseverantiam; non de merito *de condigno*; aliàs nullus justus qui hoc donum à Deo postulasset et piè vixisset, à justitiâ postea excideret, quod sanè falsum est... 2º Ex Oratione Dominicâ, quâ petitur ut *Dei nomen sanctificetur, fiat ejus voluntas, et ne nos Deus inducat in tentationem*; item ex publicis Ecclesiæ precibus quibus in hunc modum oratur : *Fac nos tuis semper obedire mandatis, et à te nunquàm separari permittas*, etc. His scilicet nihil aliud efflagitur quàm perseverantia in pietatis operibus; sed ista petendi ratio non fit sine fiduciâ à Deo impetrandi quod petitur fundatâ ex parte saltem in vi et virtute obtinendi quæ orationi inest. Hæc autem vis nihil aliud est quàm meritum congruum. Hinc cum D. Thomas 1-2, q. 114, art. 9, dixit, *sub meritum non cadere quod oratione impetratur*, excludere duntaxat intendit ab oratione meritum condignum, non congruum, aliàs D. Augustino non assensisset.

Objicies 1º : Media ad finem tam merito de condigno subjacent quàm ipse finis, qui est vita æterna, ex omnium consensu subjacet merito *de condigno*, et perseverantia est medium ad illum finem; ergo — Resp. 1º, primam gratiam esse quoque medium ad finem, sive æternam vitam, et tamen non cadere sub meritum. Resp. 2º, justum aliqua media ad finem necessaria *de condigno* mereri posse, v. g., augmentum gratiæ et charitatis, quod ad perseverandum multum conducit; aliqua è converso non posse ex condigno mereri, v. g., perseverantiam usque in finem, qui illa non ista à Deo ut præmium et merces proposita sunt et promissa. Hinc licet Deus orantibus *sicut oportet* se quidquid petierint daturum esse pollicitus sit, non ideo extat aliqua, de perseverantiæ dono tanquàm præmio et mercede orantibus concedendo promissio; una enim ex bonæ orationis dotibus est ut sit constans et perseverans; at ista orationis perseverantia tanquàm merces præcedentium ora-

tionum vel operum à Deo non est promissa.

Objicies 2º : Perseverantia usque in finem est continua bonorum operum productio per gratias efficaces sibi invicem succedentes; sed justus de condigno mereri potest continuam illam auxiliorum efficacium seriem; potest enim unum de condigno mereri ad illud opus eliciendum; deinde alterum ad faciendum aliud opus, et sic de cæteris. Etverò, potest de condigno mereri augmentum gratiæ habitualis; quidni et unum auxilium actuale efficax? ergo. — Resp. : Nego minorem. Justus enim per bonum opus præteritum vel præsens nequaquàm de condigno mereri potest aliquam gratiam efficacem sequenti momento concedendam ad aliud bonum opus eliciendum. Gratia equidem, ex quâ factum est præteritum illud vel præsens bonum opus satis virium habet ad illud aliud auxilium promerendum *intrinsicè*, sed non *extrinsicè*, id est consideratâ Dei voluntate, sive ordine ab illo *volito* et constituto. Noluit nempe ut inter unum bonum opus præteritum vel præsens, et aliud futurum, sive inter actuale auxilium prius impertitum, et posterius impertiendum, esset ordo meriti ad mercedem; quod aliunde satis apparet; aliàs unico bono opere justus posset in gratiâ stabiliri, et impecabilis evadere, quod profectò falsum est et absurdum; hinc ad confirmationem argumenti elucet disparitas; sese scilicet adstrinxit Deus ad concedendum bonis justorum operibus gratiæ augmentum, non ita ad eis concedendum auxilium efficax.

PRINCIPIA SOLUTIONUM.—Primum. Ratio propter quam perseverantia usque in finem merito de condigno non subjacet, præcipuè desumitur ex defectu Dei pacti vel promissionis illud donum ex justitiâ dandi. Hujus rationis consideratione concidunt cuncta argumenta *à pari* quæ hic proponi solent.

Secundum. Quam ex congruo mereri possunt perseverantiam usque in finem certissimè obtinebunt justî, si toto vitæ curriculo toties ut oportet oraverint, quoties sibi invicem successerint præcepta adimplenda, et bona opera patranda, ita ut precibus operam semper impendant et nunquàm deficiant donec justitia cum morte conjungatur.

Tertium. Justus potest alteri impetrare perseverantiam, sive cœleste adjutorium ad perseverandum, non autem eam ipsi mereri saltem de condigno, quia impetratio misericordiâ, è converso meritum de condigno justitiâ innititur.

Quartum. Ex eo quòd impius indurationem

saltem imperfectam in peccato mereatur, ne inferas à contrario justum in bono perseverantiam posse mereri, quia homo, ut ait Augustinus, *de suo malus est, de Deo verò bonus.*

§ 5. *Utrum meritum de condigno vitam æternam attingat?*

Nonnulli theologi censent vitam æternam bonis justorum operibus ex justitiâ non deberi, sed solum ex fidelitate, et ideo Deum, si eam non rependeret illis operibus, mendacem quidem esse futurum, sed non injustum.

Alii, ut refert Bellarminus libro 5 de Justificatione, cap. 20, sentiunt vitam æternam, quoad primum gradum spectatam, id est, quoad speciem, cadere sub meritum condignum, quia sic considerata omnibus, qui Dei filii per baptismum effecti sunt, jure hæreditatis debetur, non ita quoad insigniores alios gradus qui eodem jure illis filiis non debentur.

Alii tandem, eodem referente Bellarmino ibidem, concedunt vitam æternam (quoad speciem sive primum gradum), meritis operum rependi, si dilectio Dei, quæ ultimò disponit ad justificationem, oriatur ex gratiâ justificationis, et eam sequatur; secùs si ex illâ non oriatur.

CONCLUSIO. — Vita æterna quoad insigniores etiam gradus merito de condigno subjacet.

Ita docet D. Thomas 1-2, q. 114, artic. 1; Bellarminus loco citato; Sylvius in commemoratum D. Thomæ locum, et alii vulgò theologi.

Probatur 1^o ex Scripturis. Si quædam bona opera secundum aliquem justitiæ modum remunerari debent, illa profectò opera sunt de condigno meritoria; bonum quippe opus meritorium de condigno dicitur quia illi præmium sive merces debetur ex aliquâ justitiâ; dignitas enim sive condignitas propriè importat relationem sive ordinem ad debitam mercedem; atqui bona justorum opera, quatenus ex gratiâ et charitate oriuntur, ex quâdam justitiâ vitæ æternæ retributione remunerari debent; ergo verè et propriè sunt ex condigno æternæ vitæ meritoria. Probatur minor propè innumeris testimoniis inter quæ ista sufficiant. Sapientiæ cap. 5 legitur: *Justi in perpetuum vivent, et apud Dominum est merces eorum...* Isaïæ 40: *Dominus Deus in fortitudine veniet, ... ecce merces ejus cum eo...* Matthæi cap. 5: *Gaudete et exultate, quoniam merces vestra copiosa est in cælis...* Joannis 4: *Qui metit mercedem accipit, et congregat fructum in vitam æternam...* Ad Galatas cap. 6: *Qui seminat in spiritu, de spiritu metet vitam æternam...* Epistolâ ad Colossenses

cap. 3: *Quodcumque facitis ex animo, operamini sicut Domino, et non hominibus, scientes quod à Domino recipietis retributionem hæreditatis...*

2 ad Timotheum cap. 4: *In reliquo reposita est mihi corona justitiæ...* Jacobi cap. 1: *Beatus vir qui suffert tentationem, quoniam cum probatus fuerit accipiet coronam vitæ quam repromisit Deus diligentibus se...* Apocalypsis cap. 22 sive ultimo: *Ecce venio citò, et merces mea mecum est, reddere unicuique secundum opera sua, etc.*

Hæc et similia oracula eludere conantur 1^o, reponendo vitam æternam dici coronam justitiæ eo sensu quòd Deus, qui est justus iudex, non justitiæ sed liberalitatis titulo vitam æternam tanquam coronam sit repensurus; at manifestè falluntur; Apostoli enim verba 2 ad Timotheum 4 evidenter significant Deum futurum esse justum judicem, quia vitæ æternæ coronam est redditurus. Saltem D. Augustinus ea sic intellexit tractatu 3 in Joannem n. 10: *Audi, inquit, Apostolum (2 ad Tim. 4) jam flagitantem debitum, qui primò indebitam susceperat gratiam...* ut ante susceperet gratiam, misericordem Patrem opus habebat, ut præmium gratiæ, iudicem justum... 2^o Respondendo vitam æternam lato sensu vocari mercedem; nimirum pro retributione ex beneficiâ Dei, non ex justitiæ debito emanante; sed iterum hallucinantur. Vita quippe æterna relatis in oraculis merces nuncupatur, quia à justo iudice est rependenda, quia, ut dicitur Rom. cap. 4, *ei qui operatur merces non imputatur secundum gratiam, sed secundum debitum*, quia eodem modo merces reputatur quo messoribus aut vinitoribus denarium repensum merces et præmium appellatur, etc.... 3^o Dicendo mercedem, de quâ mentio est in aliquibus saltem illis testimoniis, non esse vitam æternam; quod rursus falsum esse patet; de eâ enim mercede sermo est quæ in judicii die electis est rependenda; hæc autem merces est regnum cælorum, et ideo æterna vita, Matthæi cap. 25.... 4^o Interpretando relatos textus non de æternâ vitâ simpliciter, sed de vitæ æternæ sive gloriæ incremento, quod reipsâ est bonorum operum præmium, quæ solutio respuitur ab illis textibus in quibus ipsum vitæ æternæ augmentum proponitur ut merces bonis electorum meritis reddenda: *Qui reliquerit patrem vel matrem, centuplum accipiet, et vitam æternam possidebit*, Matthæi cap. 19; *qui parçè seminat parçè et metet*, Epistolâ 2 ad Corinthios, cap. 9, etc. Quare primus gradus æternæ vitæ, id est vita æterna simpliciter, debetur quidem filiis adop-

tionis jure hæreditatis, sed ipsorum etiam meritis titulo præmii et mercedis retribuetur; unde hoc erit discrimen, præter gloriæ amplitudinem, inter infantes cum baptismo mortuos, et adultos cum Christo regnantes, quod illi solo titulo hæreditatis, isti et titulo hæreditatis et titulo meritorum æternâ vitâ fruuntur.... Ultimò, exponendo commemoratas sententias hypotheticè sive conditionatè, si nempe merita justorum oriantur ex dilectione Dei ex gratiâ justificationis enatâ. Verùm, quid sibi velint hujus modi systemate et solutione non liquet; vel enim dilectio illa, quæ est ultima dispositio ad justificationem, præit justificationi, sive gratiæ adoptionis, vel non; si primum, non poterit *de condigno* mereri vitam æternam, cum isti merito necessariò præire debeat gratia justificans, ut antea ostendimus; si secundum, poterit æternam vitam *de condigno* mereri titulo, ut dictum est, præmii et mercedis.

Probatur 2^o ex S. Augustino, et Ecclesiæ decretis, in quæ ejus effata, sive pronuntiationa, sunt relata. Ejus testimonia in Psalmos 83 et centesimum, etc., jam adduximus, quæ ferunt Deum esse *donatorem indulgentiæ et debitorem coronæ*, donando delicta se fecisse debitorem coronæ, etc. Novum prodeat. Epistolâ 155, aliàs 52, cap. 4, n. 16 ait: « His virtutibus divinitus impertitis... et bona vita nunc agitur, et postea præmium ejus, quæ nisi æterna esse non potest, beata vita persolvitur; hic enim sunt eadem virtutes in actu, ibi in effectum, hic in opere, ibi in mercede, hic in officio, ibi in fine. » Hinc concilium Arausicum secundum hæc can. 18 sancivit: *Debetur merces bonis operibus si fiant, sed gratia, quæ non debetur, præcedit ut fiant*; quæ, ut dictum est, de novo declarata sunt in concilio Tridentino sess. 6, cap. 16, et canone 52. Quare meritò Sylvius in 1-2, q. 114, articulo 1, conclusione 2, dixit: « Sententia quæ asserit hominis (justi) ad Deum meritum verè ac propriè dictum est fide certa.... Quæ verò asserit meritum de condigno est ita certa ut ejus opposita sit multum temeraria, quia licet Scripturæ vel concilia non clarè afirment meritum cum his terminis *de condigno*, rem tamen ipsam asserunt, » eaque sic « jam olim intellexit scholasticorum usus, et consensus unanims, à quo temerarium est recedere. »

Probatur 3^o ex ratione. Nulla scilicet ex conditionibus ad meritum de condigno relatè ad vitam æternam deest bonis justorum operibus; sunt enim, ut supponitur, justii viatores, eo-

rum opera libera sunt, bona, supernaturalia à charitate nempe elicta vel imperata, et aliunde adest Dei pactum, sive promissio, quâ sese adstrinxit ad rependendam vitæ coronam diligentibus se, ut dicitur Jacobi cap. 1. Hinc Apostoli dictum Rom. cap. 8: *Non sunt condigne passionibus hujus temporis ad futuram gloriam*, etc., intelligendum est, ut antea observavimus, de passionibus ratione essentiaæ suæ, acerbitalis et durationis consideratis, non ratione gratiæ ex quâ piè à justis tolerantur, et Christi meritorum, et promissionis Dei, quibus inuituntur; sub hoc enim respectu inspectæ, earum dignitas, licet non actu, virtute tamen et potentiâ par est dignitati æternæ gloriæ, sicut *semen virtute est æquale arbori*, inquit D. Thomas 1-2, q. 114, articulo 3. ad 3. Unde Apostolus, 2 ad Thesalon censes cap. 1, v. 5, hanc bonorum justorum operum præstantiam, sive æqualitatem respectu vitæ æternæ quodammodò agnovit dicendo: *Ut digni habeamini regno Dei*.

Objiciunt 1^o: Vita æterna sæpius in Scripturis dicitur *gratia*; v. g., Psalmo 102, Rom. cap. 6, v. 11, ad Ephesios cap. 2, ad Titum cap. 3, etc.; sed gratia non est merces, et merito subjacere nequit; ergo. — Resp. 1^o vitam æternam sæpius etiam iisdem in Scripturis vocari *mercedem, præmium, coronam*, etc., ut ostendimus. Resp. 2^o vitam æternam, cum sacris in Litteris dicatur *gratia et merces*, esse reipsâ *gratiam et mercedem*; mercedem quidem ratione bonorum operum quibus tanquàm justitiæ corona rependitur, ut passim docet D. Augustinus, v. g., epistolâ 196 ad Sixtum, libro de Correptione et Gratiâ cap. 13, libro de Gratiâ et libero Arbitrio cap. 8, etc. Gratiam verò variis ex causis quas SS. Patres passim referunt 1^o, quia meritis redditur quæ sunt Dei dona, id est quæ præcipuè ex gratuito Dei auxilio oriuntur. Ita D. Augustinus locis citatis... 2^o Quia electis gratis ab æterno destinata est, licet ejus consecutio nonnisi ex meritis obtineatur. Ita D. Fulgentius libro 3 de Veritate prædestinationis, versùs exordium, etc.... 3^o Quia gratuito fuit promissa velut merces bonorum operum, sive quia gratuitum est promissum, non tamen ex misericordiâ (in tempore), sed ex justitiâ solvendum. Ita D. Bernardus in tractatu de Gratiâ et libero Arbitrio. Equidem Apostolus Rom. cap. 6, non vocavit vitam æternam *stipendium justitiæ*, quemadmodum vocavit mortem *stipendium peccati*, licet reipsâ sit justitiæ stipendium. Verùm ra-

tionem affert D. Augustinus epistolâ 196, loco antea citato, ne scilicet homo, in cuius medullis quasi perpetuò ebullit superbia, de meritis suis gloriaretur. Unde S. doctor sic eundem hominem compellat: *Si acceptarius es vitam a ternam, justitiæ quidem stipendium est, sed tibi gratia est, cui gratia est et ipsa justitia.*

Obijciunt 2^o: Meritum condignum essentialiter includit condignitatem sive dignitatis paritatem, ut ipsa vox evincit; sed nulla existere potest dignitatis sive excellentiæ paritas inter actum hominis etiam justi meritum, et vitam æternam, nisi dixeris actum finitum præstantiâ adæquare posse objectum infinitum, sive Deum qui est merces nostra magna nimis; ergo.

Resp. istud argumentum ex ante dictis ad Apostoli oraculum, *non sunt condignæ passionēs*, etc., prorsus evanescere. Ita scilicet Apostolus excellentiæ inæqualitatem inter actus justi meritorios et æternam gloriam prædicavit, Rom. cap. 8, ut tamen quamdam dignitatis paritatem eos inter agnoverit 2 ad Thessalonicenses, cap. 1, v. 5. Quare quæ diximus exponendo commemoratum oraculum, *non sunt condignæ*, etc., hic locum habent.

Alias novatorum objectiones magnâ ex parte diluimus articulo primo hujus capituli, ubi veri et propriè dicti meriti existentiam vindicavimus. His aliunde solvendis vires subministrabunt sequentiâ

PRINCIPIA SOLUTIONUM. — Primum. Bona justorum opera vitam æternam de condigno merendi virtutem habent *non ex se præcisè*, sed ex Dei remunerantis misericordiâ sive gratiâ, quatenus scilicet Deo adjuvante in charitate et ex charitate fiunt, sicque æqualitatem et proportionem acquirunt cum æternâ vitâ, id est, non cum Deo qui infinitus est, sed cum æternâ Dei fruitione, qui est actus creatus et finitus. Hinc illa opera sunt meritoria de condigno *simpliciter* tantum, ut aiunt, sive lato sensu, non rigorosè, sive stricto modo, quia meritum de condigno rigorosè acceptum perfectam operis æqualitatem et proportionem cum mercede importat independentem ab ullâ remunerantis gratiâ; quod meritum solius Christi, qui est Homo-Deus, proprium fuit.

Secundum. Licet relata justorum opera æternæ vitæ de condigno *simpliciter* sint meritoria quatenus Deo auxiliante in charitate et ex charitate facta æqualitatem et proportionem cum sempiternâ Dei fruitione obtinent, Deus tamen secluso pacto, sive liberâ suâ promissione, æternam mercedem, sive sempiternam

sui visionem, illis operibus ex justitiâ rependere non teneretur; scilicet in humanis etiam opus aliquod, etsi eximium, id est, præmium, de quo res est, æquale, non potest tamen alium obligare ex justitiâ ad præmium illud rependendum, nisi prius intervenierit promissio ex parte remunerantis; quis enim vinitori, qui non conductus per hebdomadam vineto excolendo assiduam et fructuosam impendit operam, mercedem ex justitiâ reddendi onus imposuerit? Quis in agone contendenti et victori coronam sublatâ de eâ reddendâ conventionem ex justitiâ deberi dixerit? etc. Quòd si homo homini condignum etiam meritum offerenti mercedem ex justitiâ simpliciter non debet, quantò magis Deus, qui supremus est et absolutus Dominus, cujus idcirco *omnia sunt*, nullâ ex parte sui intercedente promissione, merita etiam æqualia, sive condigna, exhibenti justo æternam vitam velut mercedem jure persolvere non tenebitur? Igitur, cum Deus promiserit vitæ æternæ coronam legitimè, id est condignè, certantibus, eam ipsis debet non ex fidelitate tantum sed etiam ex justitiâ quando condignè certaverunt, ex justitiâ, inquam, fundatâ in illorum laborum condignitate et Dei promissione. Quamobrem Augustinus supra meritò dixit, *Deum donando delicta se fecisse coronæ debitorem*, et ipso duce D. Thomas Deum nobis non esse propriè et simpliciter debitorem, sed sibi ipsi.

Tertium. Ut magis ac magis os obstruatur novatorum, qui perpetuò obtrudunt nos justitiam propriè dictam Deum inter et homines introducere reclamante Job cap. 22: *Quid prodest Deo si justus fueris? aut quid ei confers si immaculata fuerit via tua?... Reclamante Apostolo Epistolâ 1 ad Corinthios cap. 4: Quid habes quod non accepisti?... Reclamante Augustino, nil Deus in nobis præter sua dona coronat*, etc., ut, inquam, continuè illæ declamationes omninò concidant, etc., hæc tecum ipse considera et attentè recogita.

Aliquam quidem justitiam Deum inter et homines admittimus cum sacris auctoribus et Augustino supra laudatis, sed justitiam, non qualis est inter hominem et hominem, id est, illis nævis conspersam, quibus inspergitur justitia humana, sed quæ tota radicîtus, ut dictum est, ex Deo proficiscitur qui bona opera nobis dedit, et eorum præmium vitam æternam liberè promisit; at illa donatio et promissio non impedit quominus eâ suppositâ vera sit Deum inter et homines justitia etiam secundum nos-

trum concipiendi modum. Etenim justitia ex se præcisè est constans et perpetua voluntas reddendi unicuique quod suum est; quòd enim qui justitiâ inter se adstringuntur possint sese invicem cogere ad justitiæ rationem propriè non pertinet; at in hypothesi etiam quòd Deus nobis dederit omnia bona opera nostra, id est gratiam ad ea producenda, aliquid etiam ex parte nostri nostrum esse poterit; si enim, v. g., alieni dederis decem aureos, illi sanè aurei ex justitiâ ipsius erunt; ergo à pari bona opera à Deo nobis data sunt nostri, sive jure eorum sumus domini; ergo, cùm interveniente Dei promissione vitæ æternæ operibus nostris rependitur, operibus quæ ex justitiâ ad nos pertinent, redditur. Etverò Scriptura ita passim asserit Deum nobis dare ut simul etiam ei demus: *Fili, præbe mihi cor tuum; esurivi et dedistis mihi manducare*, Matthæi cap. 25, etc.; sed qui dat aliquo modo rei quam dat est dominus. Item Scriptura ubique refert Deum nobis dare; at donatio confert jus in re. Deus, factor, sibi semper retinet jus supremum; at ista retentio veram donationem non tollit, sicut rex dando agrum sibi quidem retinet jus regale in illum agrum, sed tamen illius dominium reverà transfert; aliquatenus igitur intelligitur quomodo ex aliquâ justitiâ Deus aliquid nobis debet, etiamsi omnia nobis dederit. Ita Gama-chæus in 4-2, q. 114, cap. 1.

Quantum. Vita æterna est hæreditas simul et merces. Ut hæreditas, debetur filiis adoptionis absque meritis personalibus; ut merces, meritis rependitur.

Quintum. Deus ut *Dominus absolutus* creaturam operibus bonis affluentem de potentiâ *absolutâ* sine injustitiâ vitæ æternæ destituere potest eam in nihilum reducendo, secus ut *justus iudex*, et de potentiâ *ordinariâ* et suis promissis subditâ.

Sextum. Cùm SS. Basilius in Psalmum 114, Gregorius Nyssenus libro 9 Moralium cap. 14, etc., dicunt vitam æternam tanquàm *debitum* operibus non reddi, loquuntur de operibus sine gratiâ factis.

Septimum. Cùm D. Bernardus serm. 4 de Annuntiatione scripsit vitam æternam meritis hominum *ex jure* non deberi, jus duntaxat absolutum et rigorosum explodit, non innixum Dei gratiâ et promissione.

§ 4. *Utrum Deus justorum merita supra condignum remuneret?*

Negavit Andreas Vega, celebris theologus ex Ordine Minoritarum, qui concilio Tridentino interfuit; negaverunt et alii. Verùm illa opinio

à tempore Constitutionis Pii V adversus Baium temerè omninò et inconsultò, ne quid ampliùs dicam, in scholis propugnaretur. Quare sit

Conclusio. — Deus ex merâ beneficentiâ bona electorum opera ultra condignum in alterâ vitâ remunerat. Ita fert aut ferre videtur censura adversus hanc Michaelis Baii propositionem numero 15: *Opera bona justorum non accipient in die judicii extremi ampliorem mercedem quàm justo Dei judicio mereantur accipere.*

Probatur 1^o ex sacris Litteris.

Lucæ cap. 6, Christus, prænuntians quæ in alterâ vitâ eventura sunt ait: *Date, et dabitur vobis; mensuram bonam, et confertam, et coagitatam, et superfluentem dabunt in sinum vestrum*; hujus sanè oraculi hic, ut observat Theophylactus, sensus est: « Sicut farinam mensurus accumulas, concutis, et exundare facis, siquidem parèe metiri non vis, et ita Dominus mensuram magnam, et exundantem in die judicii tibi rependet. » Matthæi cap. 20, vineæ parabola proponitur, et operariis, qui etiam integrum diem culturæ non impenderant, diurnum denarium rependitur, idque non ex justitiâ, sed ex munificentiâ, ut indicant ista Domini verba: *Volo huic dare sicut et tibi. Aut non licet mihi quod volo facere? An oculus tuus nequam est quia ego bonus sum.* Porro, ista parabola supremi Domini et judicis in mundi fine remunerandi rationem depingit et adumbrat. Lucæ cap. 19, servus fidelis qui decem mnas acquisiverat, mercedem recipit, id est imperium super decem civitates, ac insuper mnas servo ignavo et infideli ereptam; quod rursus figura est et imago mercedis ex æquitate et beneficentiâ electis à Domino in cælo conferendæ.

Probatur 2^o ex Patribus. Divus Basilius in Psalmum 114 in hæc verba, *convertere, anima mea, in requiem tuam*, hæc habet: « Proposita est æterna requies his qui legitimè in hac vitâ decertârunt... quæ juxta magnificentiam Dei his qui in ipsum speraverunt exhibetur. » Non sola igitur Dei *justitia*, sed et ejus *munificentia* in remunerandis electis refulget, et ideò non solum *juxta*, sed etiam *supra* condignum præmium ipsis rependit.

Divus Augustinus eidem sententiæ favet. Etenim tractatu 67 in Joannem, n. 2, dicit, denario à patrefamilias vineæ suæ operariis repenso vitam æternam significari, et patrefamilias illum denarium omnibus dedisse, non in eo discernendo qui minùs et qui ampliùs laboraverunt. Unde inferri potest non solum omnibus electis vitam æternam ut æternam à Deo dari, sed etiam

quemdam illius gradum iis qui minùs laboraverunt ultra meritum impertiri.

Divus Fulgentius, libro 1 ad Monimum cap. 10, eandem sententiam luculentissime confirmat. « Meritum, inquit, bonum (Deus) jugi confirmat auxilio, cui gratia glorificationis justæ reddatur in præmio. Gratia autem etiam ipsa ideò non injuste dicitur, quia non solum donis suis Deus dona sua reddit, sed quia tantum etiam ibi gratia divinæ retributionis exuberat, ut incomparabiliter atque ineffabiliter omne meritum quamvis bonæ et ex Deo date humanæ voluntatis atque operationis excedat. » Hoc profectò testimonium rem ita evincit, ut nullo indigeat commentario.

Probatur 5^o ex censurâ relatæ Bui assertio- nis, quæ si extitisset tempore Andreæ Vega et aliorum theologorum, nullus indubiè ex illis hanc assertionem defendisset.

Probatur ultimò ex communi theologorum suffragio, scilicet D. Thomæ, D. Bonaventuræ, Scoti, Durandi et aliorum in 4 Sent. dist. 46. Accedit tandem ratio efflorescens, ex credibili Dei bonitate et beneficentiâ, quâ cælum et terra plena sunt, et indubiè tanta est, ut electorum suorum merita non solum ex condigno, sed etiam ultra condignum coronet, juxta illud distichon (Sylvius illud attribuit Prospero epigrammate 71) :

Spes de promissis nihil ambigat, omne dabit rex
Quod parat, et meritis gratia major erit.

Objiciunt 1^o : Rom. cap. 2, et alibi passim dicitur, *Deum unicuique redditurum esse secundum opera*; ergo non ultra opera. — Resp. illos textus significare Deum rependere præmium *secundum merita*, quia nullum rependit quod meritis minus sit; hoc autem non impedit quominùs majus tribuat, sicut qui ex pacto dandi vinitori vel agricolæ duos nummos ipsi dat quatuor, illum sanè secundum opus remunerat, etsi illum ultra opus remuneret. Itaque redditio mercedis secundum opus non excludit redditionem mercedis ultra opus.

Objiciunt 2^o : Deus opera mala citra condignum non punit; cur opera bona ultra condignum remuneraret? — Resp. 1^o : Nego ant. Chrysostomus enim Homiliâ 57 in Genesim, et multi graves theologi huic opinioni addicti non sunt. Adde D. Augustinum libro 21 de Civitate Dei, cap. 24, n. 5, hanc quæstionem examini suo subjecisse, et in utramque partem affirmantem et negantem ita tractasse, ut asserentem Deum reproborum peccatis mitiores quam merentur penas imponere, falsam non renu-

tiaverit. Resp. 2^o : Esto ant., nego conseq. Deo enim, ut dicitur Matthæi 20, *licet quod vult facere*, et aliunde æquum est ut majus beneficiæ suæ specimen fidelibus servis suis impendat quam infidelibus qui divitias bonitatis ejus contempserunt.

Instabis : Matthæi cap. 5, dicitur : *Non exies inde donec reddas novissimum quadrantem*, et Apocalypsis cap. 18 : *Quantum glorificavit se, et in deliciis fuit, tantum date illi tormentum et luctum*; sed illa evincunt reprobos condignis sive meritis suppliciiis omninò affici; ergo. — Resp. : Nego min. 1^o Scilicet adversariis probandum incumbet Christum Matthæi cap. 5 disserere de pœnis gehennæ, non de pœnis purgatorii, ut non pauci autumant; item de pœnâ comitante sententiam supremi judicis, non de pœnâ eam non comitante; illa quippe nunquàm minuetur, ista verò demeritum non adæquabit..... 2^o Si Christus loquitur de tartareis suppliciis, intendit duntaxat, quodlibet reproborum delictum suo plectendum esse supplicio quoad speciem, non quoad omnem quem meretur gradum..... Quod attinet ad locum Apocalypsis, unicè probat majus peccatum majori, et minus peccatum minori pœnâ esse condemnandum, non autem majorem minoremve culpam condignæ sive meriti pœnæ esse subjiciendam.

Objiciunt ultimò. Si Deus electorum operibus ampliorem redderet mercedem quàm merentur, explicari posset in quo consisteret amplius illud præmium; falsum conseq.; ergo, etc. — Resp. 1^o : Nego majorem. Quot enim in Scripturâ vel traditione certa sunt quæ explicari nequeunt? — Resp. 2^o, ampliorem illam mercedem non se tenere ex parte durationis mercedis; bona enim justorum opera *ex condigno*, ut diximus, non vitam simpliciter, sed æternam vitam merentur. Unde constituenda est in ampliori visionis beatificæ gradu, sive intensione, quem Deus pro beneplacito suo distribuet, licet verisimile sit eum omnibus Beatis à Deo, qui unicuique reddit secundum opera, habitâ ratione cujuslibet meritorum liberaliter esse concedendam.

PRINCIPIA SOLUTIONEM. — Primum. Retributio præmii *secundum opus* non excludit retributionem præmii *ultra opus*.

Secundum. Deo licet quod vult facere, et ideò merita ultra condignum remunerare, demerita è converso condignè punire.

Tertium. Nunquàm ex Scripturis probari poterit Deum demerita omninò debitis suppli-

cis castigare nisi probetur illas scripturas respicere tatarum, non purgatorii penas, aut penam judicium comitantem non subsequentem.

Quartum. Quodlibet reproborum peccatum *grao*, id est cum ipso proportionem habente, supplicio quoad speciem, non quoad gradum punitur.

Quintum. Merces ultra condignum justis danda erit non quoad speciem simpliciter aeternae vitae, sed quoad ejus intensionem, et quidem relativè ad bona cujuslibet opera.

Sextum. Istud oraculum : *Judicium sine misericordiâ ei qui non fecerit misericordiam*, Jacobi cap. 2, non quamlibet explodit misericordia m, sed eam solam quæ ab aeternâ damnatione eripit.

EPILOGUS. — Hæc sunt quæ de arduo hominis lapsi et reparati argumento tum adversus Pelagianos et Semipelagianos, cum adversus Baium, Jansenium et eorum sectatores scribenda habuimus.

Ad istorum, qui super liberi arbitrii sepulcrum gratiæ Christi trophæum erexisse D. Augustinum obgarriunt, clamores reprimendos, nonnullorum recentiorum *zelo* quidem pro defendendis dogmaticis Ecclesiæ judiciis accensorum, sed qui *secundum scientiam nobis* visus non est, calamum non inflavimus, rati eum contra commemoratos novatores aut leviores, aut raucos admodum parumve salubres editurum esse sonos, sed arripuimus tubam Apostoli, et D. Augustini, ad cujus saluberrimum strepitum hujusque Ecclesiæ catholicæ hostes conterriti palluerunt, evanuerunt, expiraverunt. Scio quidem illos recentiores seu Yprensis amicos et fautores infamare solere quicumque controversias de gratiâ, prædestinatione, etc., D. Augustini incude præsertim limandas esse existimant; sed simul scio istud Jansenii pronuntiatum ipsum esse summorum pontificum, imò et totius Ecclesiæ effatum, et ob illud in omnes ætates immortalis laude dignum futurum fuisse Yprensem si adulterinam doctrinam tanto doctore non affinxisset. Scio illos declamatores parum sibi constare. Eorum enim coryphæus, doctissimus aliunde vir et de Ecclesiâ catholicâ optimè meritis, Dionysius Petavius hæc habet, tom. 1 Theolog. dogm. lib. 9, c. 6, n. 7 : « Cum de gratiâ, vel electione, ac de prædestinatione disputandum est, minor haberi solet antiquorum Patrum ratio qui ante pelagianam ortam hæresim extiterunt, quàm eorum qui postea sunt secuti; Latinorum verò multò major quàm Græcorum etiam hæresibus posteriorum; propterea quòd magis ali-

quantò latinam Ecclesiam, quàm orientalem exercuit hæresis pelagiana, quæ iis de rebus altereandi occasionem præbuit, sic ut Græci plerique intima Pelagianorum dogmata vel ignoraverint funditus, vel minus accuratè perspexerint. Omnium verò Latinorum, quorum in hac causâ majorem dixi auctoritatem esse princeps est consensu theologorum Augustinus, cujus de gratiâ sententiam quotquot deinceps consecuti sunt Patres et doctores, tum verò Ecclesiæ romanæ præsules, præsulumque conventus aliorum, ratam et catholicam esse judicaverunt, ut hoc satis magnum putarent veritatis argumentum, quod ab Augustino positum ac decretum esse constat. » Quis post hæc Petavii inconstantia et singulari sentiendi ratione non percellitur? Enimverò, postquàm fusè probavit libro 9 Dogmatum à capite 6 ad 9, ex constanti S. Augustini sententiâ electionem ad gloriam fieri ante prævisa merita, ac deinde, cap. 9 et seq., reprobationis causam esse peccatum originale, tamen libro 10, cap. 1 et seq., aliam exosculatur sententiam! In his certè non laudandus (ut reponere solent indocti Augustini adversarii), sed reprehendendus est non solum tanquàm parum sibi consentiens, sed inprimis tanquàm Societatis suæ decretorum annorum 1584, 1613 et 1653 aspernator, tanquàm summorum pontificum et Ecclesiæ oraculorum parum studiosus, et in gratiæ vindictam injuriosus; quanquàm fortè excusandus est quòd eo vixit tempore quo vigeat Molinistarum et Suaresianorum systema Societati tunc adeò acceptum ut illud à suis improbari impunè passa non fuisset. Reponunt quidem commemorati Augustini adversarii, et Petavii ejusque imitatorum apologistæ, summum pontificem Cœlestinum primum in epistolâ ad Gallicanos episcopos datâ anno 432 (ut censet P. Alexander in historiâ seculi 5) asserere *profundiores difficilioreque questionibus* ab Augustino (etiam ubi Pelagianos et Semipelagianos debellavit) *tractatas et solutas ita non esse contemnendas, ut eas adstruendi nulla adsit necessitas*. At si legisent et ponderavissent Norisii super hac epistolâ dissertationem in Vindiciis cap. 8, in hanc assertionem cum tantâ securitate non prorupissent. Ostendit enim vir eruditus, et quidem ex Surio, Baronio, Vossio, Suaresio, Sirmondo, etc., quorum eruditio nota est, et aliis argumentis, hanc Cœlestini epistolam his capitibus secundi verbis terminari : *Deus vos incolumes custodiat, fratres charissimi*; decem verò capita sequentia (in quibus reperitur textus objectus.

profundiores, etc.) non esse Celestini opus.

Ceterum, si quid fidei catholice minus consonum in tam longâ et difficili disputatione nobis excidit, illud sincero animo expunctum volumus. Hanc quippe fidei professionem Jansenii libro proœmiali de ratione et auctoritate cap. 29 (illam renovavit in fine epilogi omnium operum, et mediâ horâ ante mortem die 6 maii ann. 1658) toto cordis affectu emitimus. « Mihi constitutum est eandem, quam ab infantiâ secutus sum, sensuum meorum spiritum et ducem sequi, romanam Ecclesiam, et Beatissimi Petri in romanâ Sede successorem. Super illam petram ædificatam Ecclesiam scio. Quicumque cum ipso non colligit spargit, apud quem solum incorrupta Patrum servatur hæreditas. Quidquid ab istâ Petri cathedrâ, in cuius communione â teneris vixi, et porro vivere et mori fixum est, ab isto principis Apostolorum successore, ab isto Christi Domini Vicario, ab isto Ecclesiæ christianæ universæ capite, moderatore, pontifice præscriptum fuerit, hoc teneo, quidquid improbatum improbo, damnatum damno, anathematizatum anathematizo. » Utinam præclaros istos sensus (quatenus tamen summi pontificis ex cathedrâ loquentis inerrantiam non innuunt) omnium Janseniani erroris sectatorum cordibus potenter inspiret summè potens et misericors Deus, cujus gratiâ sumus id quod sumus, ut obsequentissimi Ecclesiæ catholice filii facti, cum ejus Sponso et Capite Christo æternum in cælis regnent!

BREVE N. S. P. BENEDICTI PAPÆ XIV.

Ad magnum Hispaniæ Inquisitorem.

VENERABILIS FRATER, SALUTEM ET APOSTOLICAM BENEDICTIONEM.— Dùm præterito mense junio, ut aere liberiore frueremur, in arce Castri Gandulphi rusticabamur, ad nos delata fuit epistola Patris Gioiæ generalis Ordinis S. Augustini in civitate Florentinâ degentis ut visitationem expleat suorum in Thuscâ Conventuum. Porro in epistolâ nos monitos fecit insertas fuisse in expurgatorio ab hispanâ Inquisitione, cui præes, edito inter libros prohibitos historiam pelagianam, et dissertationem super quintâ synodo œcumenicâ editam â claræ memoriæ Henrico cardinali Norisio, sui Ordinis religioso; cùmque nostram auctoritatem interpellâset, nedum ut vulnere suæ religioni inflicto mederemur, sed ut etiam imminetia mala et perturbationes in Hispaniâ propè diem excitandas averteremus, respondimus factum ab eo nobis expositum nobis esse

prorsus ignotum, nosque debitas super veritate facti informationes esse sumpturos; cùmque id jam præstiterimus, et nobis abundè constet factum à Patre generali nobis expositum veritate inniti, et inter libros proscriptos in expurgatorio hispano recensita cardinalis Norisii opera reperiri, cogimur abrupte silentium, teque, venerabilis Frater, fraternè interpellare, et paternè admonere ut aquam præpares quæ vastum incendium jam præparatum extinguat.

Etsi memorati Norisii opera aliquid Jansenismi aut Baianismi redolerent, prout auctor Bibliothecæ Jansenisticæ immeritò autumavit, post tot annorum lapsum, in quorum decursu ea summo plausu excepta sunt, nonne prudens œconomia ecclesiastica exigebat, ut à proscriptione abstineretur, quam unusquisque prævidere poterat multa mala esse excitaturam, unitatem Ecclesiæ Hispaniæ esse scissuram, obstrepentibus videlicet, prout unusquisque prævidere poterat, Augustiniani Ordinis alumnis et ipsorum asseclis, obstrepentibus tot aliis viris doctis in Hispaniâ degentibus, et partium studio non abreptis, paratisque ad assumendam auctoris defensionem, non incogniti, non gregarii, sed litterarum sui temporis facillè principem, et eo solo litteraturæ ecclesiasticæ et profanæ meritò sacro cardinalium Collegio adscripti?

Nota profectò tuæ eruditioni erunt, quæ prostant in ecclesiasticis historiis prudentis œconomiae exempla juxta quæ pro scandalo frenando, malisque imminentibus avertendis, nostri majores censuerunt à rigore juris recedere, etsi illi locus esse debuisset. Nos tibi tantum nonnulla certè tibi non ignota suggeremus. Tempore felicitis recordationis Clementis XI examinanda et proscribenda delata sunt celeberris Tillemontii (Ludovici Sebastiani Le Nain) opera; accusatores multa ex eis deprompserunt censurâ digna; pontifex autem silentium imposuit, ratus multa mala ex prohibitione esse derivatura; similique œconomia usus est cùm supremæ romanæ Inquisitioni exhibitæ fuerunt ab accusatoribus vitæ Sanctorum excerptæ à Bollandi (Joanne) et deinde à Papebrochio (Daniele) aliisque Societatis Jesu Patribus continuatæ, etsi multa et benè multa sagaces accusatores deprompsissent quæ theologicam censuram merebantur. Notum tibi absque dubio erit non multis obliuie annis editum, typisque impressum, quod etsi nomine auctoris careat, omnes, tamen probè sciunt esse Bossnetii epi-

scopi Meldensis, quod ipse dum viveret composuerat, ita iubente Gallorum rege Ludovico XIV, sed manuscriptum in nonnullis bibliothecis reliquerat. Totum opus versatur in asserendis propositionibus à clero Gallicano firmatis in conventu anni 1682. Difficile profectò est aliud opus reperire, quod æquè adversetur doctrinæ extra Galliam ubique receptæ de summi pontificis ex cathedrâ loquentis infallibilitate, de ejus excellentiâ supra quodcumque œcumenicum concilium, de ejus jure indirecto, si potissimum religionis et Ecclesiæ commodum exigebat, super juribus temporalibus supremorum principum. Tempore felices recordationis Clementis XII, nostri immediati prædecessoris, seriò actum est de opere proscribendo, et tandem conclusum fuit ut à proscriptione abstereretur, nedùm ob memoriam auctoris ex tot aliis capitibus de religione benè meriti, sed ob justum novorum dissidiorum timorem.

Notum denique tibi erit nomen Ludovici Antonii Muratorii (adhuc viventis) multorumque librorum communi plausu receptorum editoris. O quàm multa in eis reperiantur censurâ digna! Quot hujusce furfuris nos ipsi eos legentes offendimus! Quot nobis ab æmulis et accusatoribus oblata sunt! et nos usque adhuc abstinuimus, et abstinemus ab operum condemnatione, nostrorum prædecessorum exemplis edocti, qui pacis et concordiæ amore à proscribendis iis quæ proscriptionem merebantur cessârunt; quando videlicet censuerunt plus mali quàm boni ex proscriptione esse derivandum.

Hæc procedunt in hypothesi in quâ Norisiana opera Baianismum aut Jansenismum redolerent; quid autem dicendum erit, cum ea Baianismi aut Jansenismi notâ careant, et carere constet post multiplicatum super eis examen in hac supremâ Inquisitione romanâ, cui summi pontifices pro tempore existentes præsent, quique mox recensita examina suo calculo comprobârunt, quæ mox subdemos non ex historiis, non ex auctoribus uni vel alteri parti faventibus, sed ex monumentis, quæ ex archivo supremæ Inquisitionis ad nos deferri fecimus, deprehenduntur.

Antequàm Norisius historiam pelagianam, et dissertationem super quintâ synodâ typis ederet, rumor insurrexit Baianismi et Jansenismi, et tunc factum est ut opus extra urbem edendum, theologorum et extraneorum revisorum approbatione munitum, ante editionem

ad urbem transmissum fuerit. Novi idcirco revisores in urbe fuerunt deputati, et cum hi nihil mali, aut sanæ doctrinæ adversans in opere invenissent, auctori datum est ut suo jure uteretur, compositumque typis ederet. Opere edito novæ adversus illum excitatæ sunt controversiæ, eo potissimum sub obtentu, quòd ei furtivè additæ ferebantur nonnullæ paginae, quæ non erant in opere manuscripto, quæ idcirco non fuerant revisorum oculis subjectæ. Purgavit se ab hac calumniâ Norisius; nulla nota ejus operi inusta fuit, communisque plausus nedùm perseveraverit, sed auctus est. Degebat Norisius Florentiæ apud magnum Etruriæ ducem, et ecclesiasticæ historiæ cathedram in Universitate Pisanâ moderabatur, tanti viri fama cum ad aures Innocentii XII tunc universalem Ecclesiam gubernantis devenisset, ipsumque ad urbem evocasset, ut officio primî custodis Bibliothecæ Vaticanæ fungeretur, ejusque æmuli benè prævidissent ipsum ad urbem fuisse vocatum, ut inter cardinales mox creandos cooptaretur, pontifici Innocentio XII detulerunt Norisium esse virum doctum, sed malæ doctrinæ, et libellis in vulgus sparsis veteribus repetitis accusationibus Jansenianæ doctrinæ simul insinulaverunt. Hæsit Innocentius, et ne in sacrum cardinalium Collegium admitteret malæ aut dubiæ doctrinæ virum, octo deputavit theologos, qui à partium studio abessent, illisque mandata verè dedit, ut in Norisii opera acrius animadverterent. Theologi mandatis eâ quâ decet reverentiâ strenuè morem gesserunt; ipsorum sententiæ in Congregatione supremæ Inquisitionis, suffragantibus etiam cardinalibus eidem adscriptis, perpensæ sunt; cumque nihil anathemate vel aliâ censurâ dignum in operibus fuerit adinventum, pontifex Innocentius theologorum et cardinalium sensus facto comprobavit; consultorum quippe Inquisitionis Collegio Norisium adscripsit, quod utique non fecisset, si de ejus sanâ doctrinâ vel minimam habuisset suspicionem; æmuli etsi hoc novo fulmine percussi, nocendi animum nullatenus deposuerunt; sed ne supremæ Inquisitionis judicium ab ipso pontifice uti vidimus comprobatum directè impugnare velle viderentur, nonnullos tantum sibi scrupulos adversus Norisii doctrinam jactârunt, quos et sparsis in totum vulgus libellis ediderunt, et tunc jussu pontificis Innocentii quinque eruditissimas dissertationes Norisius elucubravit: primam de uno ex Trinitate passo;

secundam, hoc est apologiam monachorum Seythiæ ab anonymi scrupulis vindicantem; tertiam de anonymi scrupulis circa veteres Semipelagianorum sectatores; quartam quæ continet responsum ad appendicem auctoris scrupulorum; quintam denique, cui titulus: *Janseniani erroris calumnia sublata*. Prodierunt hæc disputationes Romæ anno 1696, iterumque typis impressæ sunt inter opera omnia cardinalis Norisii editionis Veronensis anno 1752. In iis celeberrimus auctor universis adversariorum petitionibus occurrit, scrupulos injectos exturbat, evellit, eradicat, et cum jure ac meritò, plaudentibus omnibus, ut victor in cardinalium Collegium fuerit ab Innocentio adscriptus, ab eodem Innocentio inter cardinales quoque supremæ romanæ Inquisitionis præsidentes relatus est; et in eâ sicut et in aliis Congregationibus, quibus adscriptus fuit, usque ad obitum strenuam et maximè utilem operam navavit.

Ex his, quæ tibi fusè, venerabilis Frater, exposuimus, colligere poteris Baianismi et Jansenismi notam Norisio impositam novam non esse, eam repetitis solemnibus romanis judiciis fuisse penitus eliminatam, nec licuisse hispanæ Inquisitioni eam iterum in controversiam vocare, multoque minùs inter proscriptos libros opera Norisiana recensere, justissimos esse clamores Ordinis Augustiniani, et aliorum ipsi adhærentium; nec nos denique, qui nedùm memores sumus eximie benevolentiae, quâ nos etsi in juvenili ætate constitutos cardinalis Norisius prosequeretur, sed ulterius vestigiis pontificum prædecessorum nostrorum inhærere tenemur, patienter esse laturos injuriam in expurgatorio hispano adversus cardinalem Norisium ex improviso et immeritò jactatam.

Te, venerabilis Frater, ex corde diligimus, nota nobis est tua eximia doctrina, noti labores pro Ecclesiâ Dei exantlati... Te meritò æstimamus, enixèque admonemus, et admonendo etiam rogamus, ut opportuna pares remedia, nec sinas dissidia inter et nos exoriri, et inter Inquisitionem romanam et hispanam.

Tu scis in celeberrimis quæstionibus de prædestinatione et gratiâ, et de modo conciliandi humanam libertatem cum omnipotentia Dei multiplices esse in scholis opiniones. Thomistæ traducuntur ut destructores humanæ libertatis, et uti sectatores nedùm Jansenii, sed Calvinii; sed cum ipsis objectis apprime satisfaciunt, nec eorum sententia fuerit un-

quàm à Sede apostolicâ reprobata, in eâ Thomistæ impune versantur, nec fas est ulli superiori ecclesiastico in præsentis statu eos à suâ sententiâ remove. Augustiniani traducuntur tanquàm sectatores Baii et Jansenii; reponunt ipsi se humanæ libertatis esse fautores, et oppositiones pro viribus eliminant, cumque eorum sententia usque adhuc à Sede apostolicâ damnata non sit, nemo est qui non videat à nullo prætendi posse ut à suâ sententiâ discedant. Sectatores Molinæ et Suarezii à suis adversariis proscribuntur perinde ac si essent veri Semipelagiani; romani pontifices de hoc Moliniano systemate usque adhuc judicium non tulerunt, et ideo in ejus tuitione libère prosequuntur et prosequi possunt. Uno verbo, episcopi, inquisitores non notas quas doctores inter se digladiantes sibi invicem opponunt, attendere debent, sed an notæ invicem oppositæ sint à Sede apostolicâ approbatæ. Hæc nullum ex propositis modis conciliandi libertatem humanam cum divinâ omnipotentia usque adhuc reprobavit; episcopi ergo et inquisitores, cum se dat occasio, eodem modo se gerant, etiamsi uti privatæ personæ unius potius quàm alterius sententiæ sint sectatores. Nos ipsi, etsi uti privati doctores in theologicis rebus uni faveamus opinioni, uti summi pontifices tamen oppositam non reprobamus, nec sinimus ab aliis reprobari.

Hi sunt animi nostri sensus, quos tibi libenter patefacimus, teque interea plenis ulnis amplectentes tibi apostolicam Benedictionem impertimur.

Datum Romæ apud S. Mariam Majorem die 31 julii ann. 1748, Pontificatus nostri anno octavo.

Hoc exemplar ex autographo ad Christianissimum regem misso, quod in Regiâ Bibliothecâ Parisiensi asservatur, verbo ad verbum transcriptum est. Ceterum, probare non intendimus, imò præsertim improbamus, quæ in hoc Brevis declarationi cleri Gallicani anni 1682 repugnant, aut repugnare possent.

Nec audiendi essent, sed potius irridendi tanquàm inane effugium eructantes qui doctissimum piissimumque pontificem Benedictum XIV hic acceptam habere Norisii historiam Pelagianam, et dissertationem super quintâ synodo, non autem Vindicias Augustinianas, in quibus Baianismum et Jansenismum apertè docet, indoctè reponerent. Præterquàm quòd enim Vindiciæ illæ ab hispanâ Inquisitione

aliæ inter libros prohibitos nunquam repositæ fuerant, et ideo earum mentionem in suo Brevi facere non debuerit summus pontifex, certe Norisius Vindicias composuerat ante quinque dissertationes, de quibus disserit Benedictus. Anonymus enim scrupulorum auctor tertiam partem accusationis suæ eduxit ex iis quæ fidei catholicæ adversa docuerat Norisius præsertim in illis Vindiciis, ut refertur initio *Janseniani erroris calumniæ sublatae*; cum igitur probet summus pontifex *Janseniani erroris calumniam sublatam*, indubiè et Vindicias probat quarum illa dissertatio est apologia. Deinde probat opera Norisii in editione Veronensi anni 1752 contenta; sed inter ea reperiuntur Vindiciæ; ergo.

Quam autem hic vindicavit et asseruit Benedictus XIV scholæ libertatem antea prædicaverat S. P. Clemens VII in suis litteris ad doctissimum et insignis modestiæ virum Ægidium

Viterbiensem ob egregia merita cardinalis infulus à Leone X insignitum, quas epistolas ex Archivio romano Ordinis Eremitarum S. Augustini refert Thomas de Herrera in suo *Alphabeto Augustiniano*, teste P. Alexandro in historia 16 seculi. « Multa, inquit summus pontifex, licet vel disputare, vel scribere quæ non alii sentiant, dummodò aliena à veritate, et sanctæ Ecclesiæ universali Traditione præve non sentiantur, atque è Scripturis sacris sensus potius fuerit relatus, quàm ablati. Nec enim respectus ullus humanus à navando Deo operam debet avocare, quin quod quis studiosè indagavit, piè ac sincerè proferat, dum probatum non contumaciter asserat, sed Ecclesiæ iudicio semper subiciat. »

Demùm eandem scholæ libertatem obfirmaverat Clemens XI, ut in commemorato responso eruditè observant doctores Sorbonici.

APPENDICES

AD TRACTATUM DE HOMINE LAPSO ET REPARATO.

Appendix prima (1).

DE GRATIA HABITUALI ET EI ANNEXIS.

Habemus ex dictis in decursu tractatûs, gratiam habitualemente esse supernaturale Dei donum animæ permanentè inhærens per modum habitûs. Donum autem illud permanens triplex est, scilicet gratia sanctificans, virtutes infuse, et dona Spiritûs sancti, de quibus hic sigillatim tractandum.

§ 1. De nomine, existentia et essentia Gratiæ sanctificantis.

Q. 1 : *Quænam sunt nomina Gratiæ sanctificantis?* — R. Vocatur 1^o Gratia sanctificans, quia effectus ejus formalis est sanctum efficere subjectum, cui inhæret, sicut calor inhærens corpori reddit illud formaliter calidum. 2^o Gratia justificans; quia sicut calor expellit frigus, ita gratia formaliter expellit peccatum, et inclinat ad omne opus bonum; justum enim dicimus eum, qui habitualiter dispositus est ad legem implendam. 3^o Adoptio; quia effectus ejus formalis est facere filios Dei adoptivos, juxta illud Rom. 8 : *Accepistis spiritum adoptionis filiorum, in quo clamamus : Abba (Pater).*

(1) Vide supra col. 1548, ad notam.

Ob eandem rationem dicitur 1 Joan. 3, v. 9, semen Dei, quatenus per illam nascuntur filii Dei, et consortes divinæ illius naturæ. 4^o *Pignus hereditatis*, Ephes. 1, v. 14; est enim titulus jus tribuens ad gloriam cœlestem : *Si... filii et hæredes; hæredes quidem Dei, cohæredes autem Christi*, Rom. 8, v. 17.

Q. 2 : *Existitne Gratia sanctificans?* — R. De Fide est existere, Rom. 5, v. 1 : *Justificati ergo ex fide, pacem habeamus ad Deum per Dominum nostrum Jesum Christum*. 1 Corinth. 6, v. 11 : *Abluti estis, sed sanctificati estis, sed justificati estis in nomine Domini nostri Jesu Christi, et in Spiritu Dei nostri*. Atqui hæc sanctificatio, seu justificatio non fit nisi per gratiam sanctificantem, quæ ex Tridentino sess. 6, c. 7, est unica causa formalis justitiæ nostræ.

Q. 3 : *Gratia sanctificans estne aliquid intrinsecè inhærens?* — R. Negant Lutherani et Calvinistæ, docentque gratiam justificantem esse extrinsecum Dei favorem condonantis peccata, et imputantis justitiam, vel quæ Deus ipse justus est, secundum Osiandrum, et nonnullos Lutheranos, vel ipsam Christi justitiam secundum Lutherum et Calvinum. Magister Sententiarum aliquâ ex parte ad hunc errorem accessit, quatenus scilicet docuit charitatem esse

ipsummet Spiritum sanctum; quanquam sanctus Thomas 2-2, q. 25, a. 2, illum benigne interpretatur de charitate principiativè sumptâ, ita ut Spiritus sanctus dicatur principium dilectionis independenter ab habitu charitatis, quem habitum idem Magister non videtur admisisse propter illud 1 Joan. 4, v. 8 : *Deus charitas est*. Contra Lutheranos et Calvinistas errores extat Canon 11, sess. 6, concilii Tridentini, his verbis conceptus : « Si quis dixerit homines justificari vel solâ imputatione justitiæ Christi, vel solâ peccatorum remissione, exclusâ gratiâ et charitate, que in cordibus eorum per Spiritum sanctum diffundatur, atque illis inhæreat : aut etiam gratiam, quâ justificamur, esse tantum favorem Dei, anathema sit. »

Respondeo itaque : De fide est gratiam sanctificantem esse quid creatum intrinsicè inhærens. Probatur 1^o ex Scripturâ; Rom. 5, v. 5 : *Charitas Dei diffusa est in cordibus nostris per Spiritum sanctum*. Si per Spiritum sanctum, ergo ab ipso distinguitur, sicut effectus à causâ, fructus ab arbore, *fructus... Spiritus est charitas*, Gal. 5. Sed magis directè confoditur novatorum error Rom. 5, ubi scribit Apostolus : *Sicut per unius delictum in omnes homines in condemnationem; sic et per unius justitiam in omnes homines in justificationem vitæ. Sicut enim per unius.... inobedientiam peccatores constituti sunt multi; ita et per unius obeditionem justi constituentur multi*. Atqui non sumus constituti formaliter peccatores per solam extrinsecam imputationem peccati primi parentis, sed per maculam interiorem, et per peccatum intrinsicè inhærens, fatentibus adversariis; ergo neque sumus formaliter justi per imputationem justitiæ, sive Dei, sive Christi, sed per veram justitiam peccatum formaliter expellentem, et intrinsicè inhærentem. Nihil clarius illo textu.

Probatur 2^o ex Traditione.

S. Chrysostomus exponens illud Ephes. 1, *Gratificavit nos in dilecto Filio suo*, sic habet : « Hoc est, non solùm liberavit à peccatis, sed etiam fecit amabiles. Quo modo enim si quis acceptum aliquem scabiosum, et peste ac morbo, senioque ac paupertate infectum, statim formosum fecerit juvenem, omnes homines pulchritudine vincentem, et postea purpurâ induerit, et omni ornatu ornaverit; ita nostram instruxit et ornavit animam, pulchramque fecit, desiderabilem, amabilem, cupiunt enim Angeli talem aspicere animam; ita etiam

nos fecit gratissimos, et sibi desiderabiles; *concupiscet enim, inquit, rex pulchritudinem tuam*. » S. Ambrosius lib. de Imitandis c. 7, sic alloquitur baptizatum : « Accepisti vestimenta candida, ut sint iudicium, quod exueris involucrium peccati, indueris innocentiae casta velamina. » S. Augustinus lib. de Spiritu et Litterâ, c. 5, sic habet : « Charitas Dei dicta est diffundi in cordibus nostris, non quâ nos ipse diligit; sed quâ nos facit dilectores suos; sicut justitia Dei, quâ justi ejus munere efficiuntur, et Domini salus, quâ nos salvos facit, et fides Domini nostri Jesu Christi, quâ nos fideles facit. » Et Enchiridii c. 52 : « Quemadmodum in illo (Christo) vera mors facta est; sic in nobis vera remissio peccatorum, et quemadmodum in illo vera resurrectio, ita in nobis vera justificatio. »

Probatur 3^o ratione duplici. Prima, per justificationem non solùm homo desinit esse malus, seu peccator, sed etiam fit bonus et justus; atqui homo non fit bonus et justus per solam remissionem peccatorum, sicut nec albus per solam expulsionem nigredinis; neque per denominationem extrinsecam, seu imputationem justitiæ alienæ, *justum, et fortem, et bonum omninò virum ob opera laudamus*, inquit Aristoteles lib. 1 Ethicorum, cap. 12. Secunda, si gratia sanctificans est ipsamet justitia Christi per fidem apprehensa et imputata, parvuli non justificantur per baptismum; quia per fidem justitiam Christi non apprehendunt, nec sibi applicant, utpote qui sint incapaces eliciendi ullius actûs. Nec dicent adversarii, justitiam Christi parvulis applicari per divinam electionem, sive promissionem; quia apud ipsos sola fides justificat, et Sacramenta eatenus prosunt, quatenus fidem excitant, et sigillant.

Q. 4 : *Gratia sanctificans estne quid permanentè animæ inhærens?* — R. Certum est inhærerere permanentè. Probatur 1^o ex Scripturâ, Joan. 14, v. 17 : *Apud vos manebit (Spiritus sanctus) et in vobis erit*; v. 16 : *Alium Paracletum dabit vobis, ut maneat vobiscum in æternum*; v. 23 : *Ad eum veniemus, et mansionem apud eum faciemus*; 1 Joan. 4, v. 16 : *Qui manet in charitate, in Deo manet, et Deus in eo*. 1 Cor. 6 : *An nescitis, quoniam membra vestra templum sunt Spiritus sancti, qui in vobis est, quem habetis à Deo, et non estis vestri?* Atqui mansio et inhabitatio significant aliquid permanens. Deus autem, cùm accedit aut recedit, non mutat locum, utpote qui sit ubique, et omnem locum repleat, contineatque; sed dicitur accedere,

cum novo modo alicubi operatur; recedere verò, cum desinit operari, quamvis semper præsentissimus adsit. Sic dicimus redire spiritum hominis, qui deliquitum passus fuerat, cum solitas operationes repetit. Deus ergo venit ad peccatorem à quo recedere non potuit, quando illum excitat, et transiit in illo operator sanctam cogitationem et pium voluntatis affectum; manet autem in justo quandiu per continuum influxum gratiam sanctificantem in illo conservat, et per illam non solum assimilat sibi in moribus et virtutibus divinis, sed etiam consortem facit naturæ divinæ, ejusdem secum animi, desiderii et affectus. Justus quoque per charitatem in Deo manet; quia gratia sanctificans seu charitas ipsum avellit à terrenis cupiditatibus, omnes ejus potentias, sensus, appetitus, amores, operationes, cogitationes, intentiones ad Deum trahit, ut non nisi Deum et divina cogitet, intendat, suspiret, nec nisi in illo quiescat.

Probat 2^o ex decretis summorum pontificum et conciliorum generalium. Innocentius III, cap. *Majores*, tit. de baptismo, refert oppositas theologorum sententias circa baptismum parvulorum; alii contendebant in parvulis originale quidem peccatum remitti, sed *fidem aut charitatem aliasque virtutes non infundi*; alii contra asserebant, *dimitti peccatum, et virtutes infundi habentibus illas quoad habitum, non quoad usum*. Cui posteriori sententiæ videtur adhærere summus pontifex. Sed clariùs concilium Viennense can. de Summâ Trinit. et Fide catholicâ, sic enim statuit: « Quântum ad effectum baptismi in parvulis, reperiuntur quidam doctores theologi opiniones contrarias habuisse. Quibusdam ex ipsis dicentibus per virtutem baptismi parvulis quidem culpam remitti, sed gratiam non conferri; aliis è contra asserentibus, quòd et culpa eisdem in baptismo remittitur, et virtutes ac gratia informans infundatur quoad habitum. Nos..... opinionem secundam, tanquàm probabiliorem, et dictis sanctorum, ac doctorum modernorum theologiæ magis consonam et concordem, sacro approbante concilio, duximus diligendam. »

Denique concilium Tridentinum sess. 5, in decreto de peccato originali, sub anathemate absolutè definit, 1^o parvulos veraciter baptizari in remissionem peccatorum, *ut in eis regeneratione mundetur, quod generatione contraxerunt*. 2^o In eisdem non solum legi, aut non imputari, sed etiam tolli totum id quod veram et propriam peccati rationem habet. 3^o Quòd

novum..... (induentes hominem) innocentes, immaculati, puri, innoxii, ac Deo dilecti effecti sunt, hæredes quidem Dei, cohæredes autem Christi. Quæ cum sine gratiâ sanctificante stare nequeant, manifestum est concilium definivisse per baptismum gratiam sanctificantem parvulis infundi quoad habitum; nam omnis actus sunt incapaces. Confirmatur: Parvuli, qui ad ætatem adultam perveniunt, per gratiam baptismalem, quæ supponitur in ipsis permanere, non aliter sunt justi et sancti, quàm alii adulti, qui per sacramentum pœnitentiæ Deo reconciliantur; ergo gratia sanctificans est in adultis æquè ac in parvulis aliquid permanens per modum habitus. Et ita refellitur sententia quorundam theologorum, ut Vasquesii, qui docent hominem justificari per justitiam actualement, seu per actus supernaturales virtutum, præsertim charitatis.

Q. 5: *Utrum sit de fide gratiam sanctificantem esse quid permanens?* — R. 1^o non fuisse ut dogma fidei receptum ante concilium Tridentinum, ut patet ex cit. cap. *Majores*, et concilio Viennensi, ubi non proseribitur opposita sententia. R. 2^o Post concilium Tridentinum theologi variè opinantur. Soto lib. 2 de Naturâ et Gratiâ c. 17 et sequentibus, Melchior Canus lib. 7 de Locis theologicis c. 2, et alii, fatentur id non sine ingenti temeritate posse negari; sed contendunt non esse contra fidem. Bellarminus lib. 1 de Gratiâ et libero Arbitrio cap. 3, Suarez, lib. 6 de Gratiâ, c. 3, n. 6, et alii, affirmant veritatem hanc esse definitam de fide à concilio Tridentino, quibus consentit Catechismus romanus, qui sic habet ubi de baptismo: « Est autem gratia, quemadmodum Tridentina synodus ab omnibus credendum pœnâ anathematis propositâ decrevit, non solum per quam peccatorum fit remissio, sed divina qualitas animæ inhærens. » Alii docent responsionem nostram ex verbis concilii elici tanquàm conclusionem; ac proinde oppositam sententiam esse erroneam; sed negant esse expressè definitam, et fide divinâ credendam.

Cartesiani philosophi, qui non admittunt accidentia realiter distincta à substantiis, sive materialibus, sive spiritualibus, tutos se putant à censuris concilii Tridentini; quia agnoscunt divinas impressiones et modificationes in animâ justi permanentes per modum habitus, qui tamen non sit qualitas, aut alia entitas realiter distincta; non enim credibile est, inquirunt, Tridentinos Patres voluisse exagitare et definire quæstionem philosophicam prorsus

inutilem in materiâ de quâ agebatur. Nimirum proscrilendum susceperant novatorum errorem, quo justificationem reponebant in externo Dei favore, et statuendum dogma catholicum, nempe justificationem perfici per internam spiritûs immutationem et renovationem; atque illa renovatio perfectius et divinius perficitur per modificationem et impressionem Spiritûs sancti inhabitantis, quàm per qualitatem realiter distinctam. Sed præterquàm quòd illa modificatio valde improprie à Patribus Tridentinis inhærens diceretur, cum non sit quid distinctum ab animâ; satis est ad nostrum institutum, quòd illa Carthesianorum sententia negans formas accidentales à substantiâ realiter distinctas non semel fuerit rejecta, ut principiis fidei dissentanea; à celeberrimis Academiis Lovaniensi anno 1662, Parisiensi anno 1624, 1671, 1691, 1695 et 1705.

Q. 6 : *Gratia sanctificans estne quid realiter à charitate distinctum?* — R. Affirmat S. Thomas, et ejus schola; quia sicut virtus naturalis hominem in esse naturali perfectum, ita virtus supernaturalis eundem in esse supernaturali constitutum supponit; atque charitas est virtus supernaturalis, gratia verò sanctificans constituit hominem in esse divino et supernaturali; ergo charitas præsupponit gratiam sanctificantem, tanquàm novam naturam, secundum quam homo dicitur regenerari, nasci filius Dei; ac proinde gratia sanctificans realiter distinguitur à charitate. Illud ipsum videtur agnoscere concilium Viennense citatâ Clementinâ de Summâ Trinitate, ubi ait in Baptismo conferri gratiam informantem et virtutes. Concilium quoque Tridentinum sess. 6, cap. 7, distinguit gratiam sanctificantem à virtutibus; docet enim ibidem justificationem fieri per susceptionem gratiæ et donorum. Contra negant Magister Sententiarum, sanctus Bonaventura, Scotus, Durandus et alii, gratiam sanctificantem à charitate realiter distingui; quia in Scripturis omnes effectus gratiæ sanctificantis tribuuntur charitati. Charitas expellit peccatum, Luc. 7 : *Remittuntur ei peccata multa, quoniam dilexit multum.* Hominem reddit Deo gratum, Joan. 14 : *Qui... diligit me, diligitur à Patre meo, et ego diligam eum.* Consortem efficit divinæ naturæ, ac proinde filium Dei adoptivum et hæredem, 1 Joan. 4 : *Qui manet in charitate, in Deo manet, et Deus in eo.* Et Jac. 1, v. 12 : *Accipiet coronam vitæ, quam repromisit Deus diligentibus se.* Denique charitas est radix omnium bonorum operum, 1 Cor. 13 : *Charitas patiens est, benigna est, etc.*

Facilis est responsio ad argumenta posterioris sententiæ, scilicet gratiæ sanctificantis effectus ideò tribui charitati quia perfecta charitas est ultima dispositio ad gratiam sanctificantem, ita ut ab eâ separari nequeat; eadem quippe solent dici de proximâ dispositione, quæ dicuntur de formâ, quam introducit, v. g., de summo calore æquè dicitur ac de igne, quòd comburat, inflamet, etc. Sed hanc controversiam scholæ dirimendam relinquimus; quia ad salutem fidelium nihil interest scire an gratia sanctificans et charitas realiter distinguantur, modò noverint dona illa simul in justificatione conferri.

Q. 7. *Quomodo definitur gratia sanctificans?*

— R. Ex præmissis responsionibus erui debet ejus definitio in hunc modum. Gratia sanctificans est supernaturale Dei donum intrinsecus inhærens per modum habitûs, quo homo formaliter redditur justus, sanctus, Deo gratus, filius Dei adoptivus, et hæres vitæ æternæ.

Dicitur 1^o *supernaturale Dei donum*; ut significetur gratiam sanctificantem non esse ipsum Spiritum sanctum, sed ab ipso emanare tanquàm effectum à causâ. Dicitur 2^o *intrinsecè inhærens*, contra Lutheranos et Calvinistas, asserentes gratiam justificantem esse extrinsecum Dei favorem, quo peccata condonant, et imputat justitiam seu merita Christi. Dicitur 3^o *per modum habitûs*, quo significatur gratiam sanctificantem esse quid permanens. Dicitur 4^o *quo homo formaliter redditur justus*; sic enim concilium Tridentinum de justificatione loquitur sess. 6, c. 7 : « Non est sola peccatorum remissio, sed et sanctificatio, et renovatio interioris hominis per voluntariam susceptionem gratiæ et donorum. Unde homo ex injusto fit justus, ex inimico amicus, ut sit hæres secundum spem vitæ æternæ. » Et infra : « Demùm unica formalis causa (justificationis) est justitia Dei, non quâ ipse justus est, sed quâ nos justos facit; quâ videlicet à Deo donati renovamur spiritu mentis nostræ; et non modò reputamur, sed verè justii nominamur, et sumus, justitiam in nobis recipientes. » At, inquires, quomodò merum accidens tantæ efficacitæ esse potest, ut omnia peccata quantumlibet enormia statim deleat, et ex impio justum et sanctum efficiat? — Respondeo : Quamvis illud sit omni admiratione dignissimum, pluribus tamen exemplis suadetur esse possibile. Namque modicum fermentum totam massam prorsus immutat, ignis præeunte calore poros ferri frigidi ingrediens, nativum ejus frigus formali,

ter expellit, ipsumque ferrum candens et guttum reddit. Sed, quod ad propositum maximè confert, lumine fidei mentem hæretici, vel etiam athei innumeris erroribus implicatam subeunte, mox ignorantiae tenebræ fugiunt, et cuncti errores evanescent. Quidni gratia sanctificans corda, in quibus diffunditur, similiter immutet et renovet, peccata, quibus non minùs contraria est quàm frigori calor, statim expellat, voluntatemque sic ad Deum convertat, et erga divinam ejus legem eliciat, ut homo omne malum summè aversetur, et ad omnia quæ Dei sunt totus propendeat?

Quòd autem gratia sanctificans cor hominis sic immutet, paginæ utriusque Testamenti apertè testantur. Jeremiæ 31, v. 33: *Dabo legem meam in visceribus eorum, et in corde eorum scribam eam.* Ezech. 41, v. 19: *Dabo eis cor unum, et spiritum novum tribuam in visceribus eorum: et auferam cor lapideum de carne eorum, et dabo eis cor carneum, ut in præceptis meis ambulent.* Nihil luculentius propheticò illo testimonio pro interiori pœnitentis renovatione, à concilio Tridentino definità. Aufertur ab eo cor lapideum, id est durum, intractabile et inexorabile; simulque confertur cor novum, carneum, molle, flexibile, et obsequens ad Dei nutum. Jam opus non est, sicut priùs, proluxa et molestà argumentationum congerie ad suadendum mundi contemptum, carnis mortificationem, et alia Evangelii præcepta; ad primam vel Pastoris vocem, vel Evangelii lectionem statim acquiescit, repugnante licet concupiscentià, divina enim illa præcepta in corde gerit inscripta non atramento, sed Spiritu Dei, non characteribus inanimis, sed vitalibus affectibus; experiturque, quàm verum sit illud Apostoli, 1 ad Timoth. cap. 4: *Lex justo non est posita*; quia etsi lege teneatur, illà tamen non premitur, non urgetur, non refrenatur; sed ei condelectatur secundum interiorem hominem.

Non inferiora testimonia ex novo Testamento proferuntur in confirmationem doctrinæ Concilii Tridentini, unum aut alterum ex benè multis seligimus, 1 Joan. 3, v. 9: *Omnis qui natus est ex Deo, peccatum non facit; quoniam semen ipsius in eo manet et non potest peccare (nisi degenerem se præbeat) quoniam ex Deo natus est.* Gratiam sanctificantem vocat Apostolus semen Dei, ut meminerimus ejus infusionem speciem habere divinæ cujusdam generationis, et nos per illam fieri consortes divinæ naturæ, ut docet Apostolorum princeps secundæ epistolæ c. 4, ubi de Christo loquens sic habet:

Per quem maxima et pretiosa nobis promissa donavit, ut per hæc efficiamini divinæ consortes naturæ. Non quidem essentialiter (quod solis tribus personis sanctissimæ Trinitatis convenit), neque hypostaticè (quod humanitati Christi proprium est), sed per gratiam sanctificantem, utpote quæ veram amicitiam inter Deum et creaturam constituat; amicitia autem perfectissima et maximè spiritualis ac divina postulat intimam Dei præsentiam in homine; ita ut si per impossibile Deus non esset ubique, præsens tamen fieret animæ gratiæ informatæ; præsens, inquam, non sicut dominus præsens est in domo, quam inhabitat; sed sicut anima in corpore, quod vivificat, seclusis tamen imperfectionibus; non enim Deus adest ut forma informans, aut pars componens, sed ut principium vitæ supernaturalis, animam movens et elevans ad statum, qui transcendit omnem ordinem etiam Angelicum, et quemlibet etiam possibilem. Unde meritò S. Petrus asserit gratiam sanctificantem esse donum pretiosum, et omnium maximum. Atque ex hac explicatione facilè intelliguntur reliquæ definitionis partes, quibus dicitur gratiam sanctificantem formaliter reddere sanctum, Deo gratum, filium Dei adoptivum, et hæredem vitæ æternæ. Namque 1º sanctitas est immunitas ab omni labe peccati, et plena firmaque adhesio cultui divino; atqui gratia ex dictis per se formaliter excludit peccatum, et inclinât hominem ad omnia, quæ Deo sunt placita; ergo sanctum formaliter reddit eum, cui confertur. 2º Quomodo non gratus esset Deo, qui divinæ ejus voluntati in omnibus est consentiens? *Non enim est justus, nisi qui gaudet justis*, ut dicitur 1 Eth. c. 8. Justus autem est Dominus, et justitiam dilexit; ergo diligit et gratos habet quotquot novit voluntati suæ conformes; in hoc quippe justitia adæquatè consistit. Unde S. Hieronymus in cap. 10 Danielis ait: *Omnis sanctus in se habens animæ pulchritudinem à Domino amatur.* Nec dicas, gratiam actualem esse gratiam gratum facientem, ac proinde non esse proprium gratiæ sanctificantis, hominem reddere Deo gratum; nam gratia actualis gratum elicit secundum quid duntaxat; quatenus nempe est principium boni operis, quod cum Deo acceptum sit, ratione illius peccator dicitur Deo gratus, quamvis secundum suam personam displiceat, et sit objectum odii divini. Sed cum per gratiam sanctificantem homo à labe peccati sit purus, et divinæ voluntati in omnibus consentiens, per illam persona ejus

simpliciter et absolute efficitur Deo grata, juxta illud Sapient. 7: *Per nationes in auras sanctas se transfert* (Sapientia); *amicos Dei et Prophetas constituit*. Hinc 3^o per gratiam sanctificantem homo fit filius Dei adoptivus, non denominatione extrinsecâ et morali tantum; quemadmodum in civilibus persona extranea ad succedendum in hereditate assumpta, dicitur in filium adoptata. Namque ex laudato capite 3, 1, Joan., gratia sanctificans est semen Dei, quo homo fit concors naturæ divinæ, eo, quo diximus modo; Christo filio Dei naturali conjungitur tanquam membrum capiti, et eodem vivens spiritu: *Videte*, inquit dilectus discipulus, primæ Epist. c. 3, v. 1, *qualem charitatem nobis dedit Pater, ut filii Dei nominemur et simus*. Unde

Ultimò sequitur quòd gratia sanctificans hominem constituat hæredem vitæ æternæ. Nam ex Apostolo Rom. 8: *Si... filii, et hæredes, hæredes quidem Dei, cohæredes autem Christi*, hoc est, ejusdem gloriæ cum Christo participes. Liceat ergo absolutum à peccatis compellare verbis S. Leonis serm. 1 de Nativit.: « Agnosce, ô Christiane, dignitatem tuam, et divinæ consors factus naturæ, noli in veterem vilitatem degeneri conversatione redire. Memento cujus capitis et corporis sis membrum. »

Verùm, pro dolor! quod hæresis Ecclesiæ eripere non potuit, ignorantia neglectum et quodammodo inutile reddit. Quis enim æstimat quod ignorat, aut expetit quod non æstimat? Atqui vulgus fidelium, ne dicam pastorum, justificationem non aliter apprehendit, quam Lutherani et Calviniani, nempe ut meram peccatorum condonationem; nulla peccatoribus cura aut cogitatio de interiori spiritus renovatione: unum à Deo precantur, scilicet peccatorum veniam, quia aliud à pastoribus non sunt edocti.

Nec dicant pastores quæ hactenus explicata sunt, sublimiora esse, quam ut à plebe percipi possint. Namque in hoc positi sunt, ut evangelizent investigabiles Dei divitias in justificatione impii, quas præparavit in laudem gloriæ gratiæ suæ, assiduis precibus sibi et subditis obtineant spiritum sapientiæ et revelationis in agnitione hujus mysterii, quod est summa doctrinæ christianæ, et sublimis gloria, quam Ecclesia habet in Christo Jesu. Hinc Apostoli toti sunt in suis Epistolis, ut tam admirabile Dei donum fidelibus commendent, refrient et inculcent. Hujus rei gratiâ gentium Apostolus scribit ad Ephesios cap. 1, se non

cessare in orationibus suis memoriam eorum facere, ut Deus, inquit, *Domini nostri Jesu Christi Pater gloriæ det vobis Spiritum sapientiæ et revelationis in agnitione ejus; illuminatos oculos cordis vestri, ut sciatis, quæ sit spes vocationis ejus, et quæ divitiæ gloriæ hereditatis ejus in sanctis, et quæ sit supereminens magnitudo virtutis ejus in nos, qui credimus secundum operationem potentiæ virtutis ejus, quam operatus est in Christo, suscitans illum à mortuis, et constituens ad dexteram suam in cælestibus*. Magnifica sunt illa Apostoli verba in laudem gratiæ sanctificantis, et omninò ponderanda. Optat discipulis Spiritum sapientiæ, id est, ampliore sapientiam, quâ mysterium gratiæ sanctificantis magis quotidie ac magis ipsis pateat; illuminatos quoque oculos cordis, ut perfectius in dies cognoscant, quæ et quanta sint bona, ad quæ vocati sunt; et quæ sit supereminens magnitudo virtutis ejus, id est, quantâ potentiâ usus fuerit Deus, ut à statu peccati ad justitiam traducerentur. Tantâ, inquit, potentiâ usus est Deus in nobis sic spiritualiter suscitandis et immutandis, quantâ usus est in Christo corporaliter à morte resuscitando, et ad dexteram suam evehendo. Similia jam scripserat ad Romanos cap. 6, et repetit in Epistolâ ad Coloss. cap. 3. Non ergo Apostoli credentibus promittebant nudam peccatorum veniam et condonationem, sed veram spiritus immutationem, quâ in novam vitam translati, expoliato vetere homine, viderentur tanquam ex mortuis viventes. Expendamus jam quæ novatores contra hanc Apostolicam doctrinam solent opponere.

Obijciunt 1^o: 1 Cor. 1, v. 30, Christus dicitur factus nobis *sapientia à Deo et justitia, et sanctificatio*. Et Rom. 5, v. 19: *Per unius obeditionem, justi constituentur multi*; ergo justificatio peccatoris perficitur per imputationem justitiæ Christi absque interiori peccatoris immutatione. — Distinguo anteced.: Christus factus est nobis justitia efficienter et meritoriè, concedo; formaliter et per solam imputationem, nego ant. Solutio evidens est in ipso textu cap. 5 ad Rom. Ibi enim Apostolus confert Adamum cum Christo, docetque, quòd sicut per primi inobedientiam peccatores constituti sunt multi, ita per secundi obedientiam Christi constituentur multi. Atqui inobedientia Adami non est causa formalis, sed efficiens peccati originalis posterorum, fatentibus ipsis adversariis, qui cum Catholicis agnoscunt (quamvis sensu hæretico) peccatum originale inesse

cuique proprium. Ergo in mente Apostoli obedientia Christi non est iustitia nostra formalis, sed est causa efficiens et meritoria, cur iustitia à Deo nobis infundatur, et inhareat.

Instant: Atqui iustitia Christi est causa formalis justificationis nostræ. Ratio enim propter quam Deus diligit justum, est sanè causa formalis justificationis ejus; quemadmodum causa formalis, propter quam proximum ex charitate diligimus, est bonitas divina in eo relucens. Atqui ratio propter quam Deus diligit justum, est Christi iustitia et meritum. Ergo causa formalis justificationis nostræ est iustitia et meritum Christi.

Confirmatur: sicut absurdè diceretur Deum parvulos nondum renatos odisse propter Adamum, cum peccatum originale in ipsis existens sit motivum et ratio formalis odii divini; ita pariter si in justis admitteretur gratia sanctificans, tanquam ratio formalis divini amoris, abusivè dicerentur à Deo diligi in Christo, vel propter Christum.

Nego subsumptum. Ad primam ejus confirmationem, respondeo negando majorem; quia aliud non est motivum, quo Deus creaturas diligit, quam ejus bonitas infinite sui communicativa; ac proinde gratia sanctificans est effectus seu terminus divini amoris, non verò causa. Homines quidem bonum supponunt in iis quos diligunt; Deus contra amando homines, ex malis bonos efficit. Dilexit nos in Christo ante mundi constitutionem; quia per Christum mediatorem nostrum voluit nos ad se adducere. Quà bonitate peccatores in tempore per Christi merita prævenit, ut justi fiant, eadem bonitate justos efficit, et eatenus novo et longè excellentiori modo illos diligit, quia nova et longè excellentiora dona in ipsis producit et conservat, nempe gratiam sanctificantem cum ejus appendicibus. Ergo gratia sanctificans, licet sit formalis causa justificationis, motivum tamen non est divini amoris, sed effectus et terminus.

Respondeo ad secundam confirmationem negando paritatem; quia latum est discrimen inter odium divinum (si tamen datur propriè in Deo) et amorem divinum; Adamum quoque inter et Christum Dominum. Odium quippe divinum, malum culpæ, quod est ejus objectum, non facit, sed supponit; amor verò divinus bonum circa quod versatur, efficit, non supponit. Deinde Adamus non est caput posterorum, eo singulari modo, quo Christus est caput renatorum; quamvis enim parvuli

ex origine per Adamum inobedientiam corrupti, trahant peccati maculam; Adamus tamen jam sanctus et beatus, illam directè non imperit; quemadmodum Christus, qui factus est nobis sanctificatio et iustitia, sanctitatem influit. Unde Deus parvulos nondum renatos odit, non propter Adamum præcisè, sed propter peccatum originale in ipsis existens. Contra verò renatos diligit in Christo, et propter Christum, qui per gratiam sanctificantem et communicationem sui spiritus in ipsis vivit et operatur, ut impleatur quod Patrem rogarat pridè passionem, Joann. 17, v. 21 et 26, *ut omnes unum sint, sicut tu Pater in me, et ego in te, ut et ipsi in nobis unum sint; ut credat mundus quia tu me misisti*; hoc est, tam illustri exemplo vitæ sanctioris mundum ad me trahant, et... dilectio, *quà dilexisti me, in ipsis sit et ego in ipsis*, utpote unum totum conficientibus conflatum ex capite et membris.

Obijciunt 2º illud Psalmi 31: *Beati quorum remissæ sunt iniquitates, et quorum tecta sunt peccata: Beatus vir, cui non imputavit Dominus peccatum*. Ergo peccata in justificatione non delentur; sed teguntur duntaxat per Christi justitiam credentibus imputatam. — Resp. 1º, opponendo alios Scripturæ textus luce clariores. Psalm. 50: *Lavabis me, et super nivem dealbabor*; nulla sanè macula in homine sic dealbato. Isaïæ 44: *Delevi ut nubem iniquitates tuas*. Rom. 8. *Nihil ergo nunc damnationis est iis, qui sunt in Christo Jesu*. 1 Corinth. 6: *Hæc quidam fuistis, sed abuti estis, sed sanctificati estis*. Ephes. 5, dicitur Christus seipsum tradidisse, *ut exhiberet ipse sibi gloriosam Ecclesiam, non habentem maculam aut rugam*. Resp. 2º, peccata in justificatione teguntur, quo modo dicimus tegi colorem album, cum superinducto colore nigro, evanescit albus. Ita hunc Psalmi locum interpretati sunt sancti Patres. S. Augustinus Enarr. in Psalm. 31, scribit: *Ne sic intelligas, quod dixit peccata cooperta, quasi ibi sint et vivant*. Quæst. 108 in Exodum, dicit fieri confessionem peccatorum, *ut per gratiam aboleantur, hoc est, tegantur*. Et lib. 1 contra duas epistolas Pelagii c. 13: *Dicimus baptismum auferre crimina, non radere*. Enimverò quis beatum dixerit hypocritam, qui oculis hominum abscondit cordis malitiam? nam oculis Dei omnia sunt pervia et manifesta. Peccata ergo Deo tegi nequeunt, nisi prorsus aboleantur.

Psalmus autem tres gradus in justificatione distinguit. 1º Deus peccata remittit, cum jam

propitius prævenit peccatorem et præteritam offensam condonat. 2^o Peccata tegit, eum justitiam et charitatem superinducit tanquam formam peccatis oppositam, et eorum expultricem. 3^o Peccata non imputat, eum insuper reatum pænæ temporalis expungit, ut in baptismo. Unde S. Basilius in hunc Psalmi locum scribit plus esse peccata tegere quam remittere; et non imputare, quam tegere. Quanquam plures interpretes existimant tria illa verba esse prorsus synonyma.

Instant ex Apostolo Gal. 3, v. 27: *Quicumque enim in Christo baptizati estis, Christum induistis*: ergo justitiâ Christi per fidem apprehensâ, circumdamur tanquam vestimento, quo teguntur corporis maculæ et deformitates. — Nego consequentiam et paritatem. Qui enim vestem assumit, non exuit maculas et deformitates corporis, sed tegit. At ex eodem Apostolo Col. 3, v. 9, qui induit Christum, exuit veterem hominem, adeo ut nihil in eo remaneat peccati et damnationis: *expoliantes vos, inquit, veterem hominem cum actibus suis, et induentes novum. Nihil ergo nunc damnationis est iis, qui sunt in Christo Jesu.* Rom. 8, et cap. 6. v. 2 et 4: *Mortui sumus peccato... ut quo modo Christus surrexit à mortuis per gloriam Patris, ita et nos in novitate vitæ ambulemus.* Atqui Christus resurgens corruptionem carnis, et mortalitatem non texit per indumentum gloriæ; sed prorsus deposuit. Ergo pariter ad mentem Apostoli ita Christum in baptismo induimus, ut omnem peccati maculam exuamus. Porro Apostolus justificationem pingit sub metaphorâ indumenti, ut ostendat eum, qui exit ex fonte baptismali, vel ex tribunali penitentiae, sicut interiùs vivit Spiritu Christi, ita debere Christum ad vivum exhibere in exteriori conversatione: quemadmodum speciem regis referret, qui regiâ veste esset indutus.

Objici possunt varii Scripturæ textus pro sententiâ quorundam Catholicorum, qui formam justificationis in actibus reponunt, Rom. 2, v. 13: *Factores legis justificabuntur*; Jac. 2: *Videtis quoniam ex operibus justificatur homo*; 1 Joan. 3: *Qui facit justitiam, justus est.* Et quidem juxta omnium hominum mentem, apud quos justum esse, nihil aliud est, quam benè operari. Ergo formalis justificatio reponenda est potiùs in actibus supernaturalibus virtutum, præsertim charitatis, quam in gratiâ habituali.

Nego conseq.; namque ex laudatis textibus colligi tantum potest, quod homo bonis operi-

bus vel disponitur ad justificationem, vel meretur in justitiâ augeri, vel probat se esse justum, juxta illud Jac. 2, v. 18: *Ego ostendam tibi ex operibus fidem meam.*

§ 2. De virtutibus infusis.

Justificatio dupliciter spectari potest, vel secundum essentiam, vel secundum partes integrantes. De illâ priori modo sumptâ tractavimus in præcedenti paragrapho, ubi ex mente concilii Tridentini totam ejus essentiam reposuimus in gratiâ habituali sanctificante; hic expendimus partes ejus integrales, nempe virtutes infusas, quæ ad perfectionem ejus integram pertinent. Enimverò modus operandi sequitur modum essendi; atqui gratia sanctificans constituit hominem in esse divino; ergo operationes divinas gratiam sanctificantem consequi necesse est. Porro, quemadmodum natura, puta hominis, ita est principium operationum sibi consentanearum, nempe rationalium, ut eas exercere non possit, nisi per potentias sibi congenitas, intellectum scilicet et voluntatem; sic gratia sanctificans, quæ accedit homini velut nova natura, comites individuas habet virtutes infusas, per quas veluti per supernaturales potentias supernaturaliter operatur. Sunt quidem et ipsæ singularia Dei dona et gratiæ habituales; quia permanentiter inhaerent, justificationemque integraliter perficiunt; sed insuper sortiuntur nomen virtutis; quia ad benè operandum proximè disponunt. Quid est enim virtus ad mentem sancti Augustini lib. 2 de lib. Arbitrio c. 48, et sancti Thomæ 1-2, quæst. 35, art. 4, nisi *qualitas mentis, quâ rectè vivitur, quâ nullus malè utitur, quam Deus in nobis sine nobis operatur*? Verum quia virtus infusa non uno modo accipitur, nec in quâlibet acceptione ad justificationem pertinet.

Q. 1: *Quotplex est virtutis infusæ acceptio?*

— R. Duplex; alia dicitur infusa quoad modum duntaxat: alia infusa quoad entitatem.

Q. 2: *Quid est virtus infusa quoad modum?*

R. Est virtus à Deo animæ indita, quamvis actuum frequentatione naturaliter acquiri possit, ut dona linguarum et notitia Scripturarum, quæ per infusionem in Apostolis existerent, licet studio et labore illa utcumque comparare potuissent. Virtutes autem ejusmodi sic divinitus concessæ, non magis specie ab acquisitis differunt, quam vita defuncto Lazaro restituta differt à vitâ quam priùs à parentibus hauerat.

Porro de virtutibus sic infusis hic non est

sermo. Constat enim apud omnes Theologos, illas in justificatione non infundi; alioquin habitus vitiosi, ex longâ peccandi consuetudine contracti, virtutibusque acquisitis formaliter oppositi, per justificationem prorsus delerentur, quod vel ipsa experientia falsum evincit. De solis itaque virtutibus quoad entitatem infusis hic agitur.

Q. 3 : *Quid est virtus infusa quoad entitatem?*

— R. Est virtus entitativè supernaturalis, et à solo Deo producibilis, ut charitas.

Q. 4 : *Quare virtus per se infusa est entitativè supernaturalis?* — R. Quia fertur in objectum lumine et motivo supernaturali, tenditque in Deum possidendum ut in se est.

Q. 5 : *Virtus per se infusa differtne essentialiter à virtute acquisitâ, v. g., temperantia infusa à temperantiâ acquisitâ?* — R. Prorsus differt. Quia secundum omnes philosophos, actus et habitus essentiam suam desumunt ab objecto formali, seu motivo, quo tendunt in objectum materiale. Hinc iustitia, misericordia et gratitudo, licet versentur circa idem objectum materiale, puta pecuniam, sunt tamen diversæ specie virtutes, qui diversæ motivo pecuniam spectant, iustitia ut debitam, misericordia ut aptam ad sublevandum proximum, gratitudo ut munus antidorale; atqui virtutes per se infusæ, ut temperantia, tendunt in objectum materiale, motivo longè diverso à motivo virtutum acquisitarum, puta temperantiæ, castitatis; nam temperantia acquisita refrenat voluptatem carnalem, quia dedecet naturam rationalem; infusa verò, quia indigna est Filio Dei, membro Christi, retardatque anhelantem ad divinum consortium. Ergo virtutes infusæ et acquisitæ, quamvis versentur circa idem objectum materiale, essentialiter differunt.

Confirmatur, simulque elucidatur nostra responsio. In homine justo triplicis generis lumen distinguitur, 1^o lumen sensuum, quod movet passiones, puta amoris, gaudii, tristitiæ, etc.; 2^o lumen rationis, quod præest liberis voluntatis affectibus, scilicet amoris, gaudii, tristitiæ, etc.; 3^o supernaturale lumen fidei, quo reguntur similes animi affectus; atqui in omnium sententiâ motus amoris, gaudii, tristitiæ, spectati ut passiones appetitûs sensitivi, essentialiter differunt à similibus motibus appetitûs rationis, propter diversum modum tendendi in objectum materiale utrique appetitui commune; ergo à fortiori iidem motus appetitûs rationalis solo rationis lumine imperati, specie distinguuntur à similibus actibus virtutum in-

fusarum; cum posteriores illi actus supernaturali lumine, et longè sublimiori motivo eliciantur.

Ergo sicut mores brutorum induit, qui non ratione, sed carnali sensu ducitur; sic Christianus à nobilitate filiorum Dei degenerat, et ad vilitatem pristinae conversationis relabitur, qui sine supernaturali lumine ducem rationem sequitur. Justus quippe transcendit humanam conditionem, sicut homo pecorinam, ut non suo, sed Spiritu Christi inhabitante regatur, juxta illud Rom. 8 : *Quicumque enim Spiritu Dei aguntur, ii sunt filii Dei.*

Q. 6 : *Quare virtus per se infusa, est à solo Deo producibilis?* — R. Quia est donum supernaturale et divinum; quemadmodum enim solus ignis ignitum reddere potest, inquit S. Thomas, ita solus Deus in ordine supernaturali et divino constituere.

Dices : De fide est hominem justum bonis operibus crescere in iustitiâ; atqui incrementum illud est nova productio gratiæ sanctificantis et virtutum infusarum; ergo. — Distinguo majorem : Justus potest crescere meritorie, et ut causa moralis, concedo; crescere ut causa physica, ita ut per actus suos supernaturales physicè producat illud augmentum gratiæ sanctificantis et virtutum infusarum, nego maj.

Instas : Actus naturales sæpius repetiti in sententiâ plurium philosophorum physicè generant habitum acquisitum; ergo à pari actus supernaturales physicè producant habitum supernaturalem. — Nego consequentiam et paritatem. Ratio disparitatis est, quòd habitus acquisiti sint formæ proportionatæ potentiis animæ, et ex illis naturaliter educantur ab agente naturali; habitus verò infusi ordinem cujusque naturæ creatæ excedant, proptereaque dicantur supernaturales, quia anima, ut eorum sit susceptiva, debet divinitus elevari et corroborari. Justus autem bonis suis meretur, ut Deus det... secundum divitias gloriæ suæ, virtute corroborari per Spiritum ejus in interiorem hominem, Ephes. 3, v. 16.

Q. 7 : *Quomodo dividuntur virtutes infusæ?* — R. Dividuntur in Theologicas et Morales.

Q. 8 : *Quid est virtus Theologica?* — R. Est virtus infusa, quæ habet Deum pro objecto materiali primario, et aliquod ejus attributum pro formali. Vocatur autem Theologica, à nomine græco Θεός, latine Deus, quia versatur circa Deum, et est regula divini cultûs.

Ergo sunt tres virtutes Theologicæ, his verbis ab Apostolo notatæ, 1 Corinth. 13, v. 13 :

Nunc autem manent Fides, Spes, Charitas, tria hæc; major autem horum est Charitas. Namque triplex est virtus Theologica, quoduplex est virtus, quæ erga Deum rectè disponit, nosque illi immediatè conjungit; atqui triplex est ejusmodi virtus. Cum enim in hæc vitâ per fidem ambulemus, et non per speciem, 1^o fide credimus Deum, et cætera quæ nobis revelavit, quia verax est, nec falli nec fallere potest; 2^o spe confidimus nos Deum tanquàm ultimum nostrum finem et beatitudinem consecuturos, tentationesque superaturos, quia est omnipotens et infinitè misericors; 3^o charitate Deum super omnia diligimus, et proximum sicut nosmetipsos propter illum; quia est summè bonus et infinitè amabilis. Ergo tres sunt reverà virtutes Theologicæ.

Q. 9 : *Quid est virtus infusa moralis?* — R. Est virtus supernaturalis, quæ Deum non habet pro objecto, definirique potest, virtus infusa, quæ in mediocritate consistens, versatur circa bonum creatum motivo supernaturali.

Q. 10 : *Quare virtus moralis infusa in mediocritate consistit?* — R. Quia objectum ejus est bonum finitum utpote creatum, ac proinde potest esse excessus in illius prosecutione; v. g. potest quis esse in cultu divino superstitiosus, nimis abstinere à cibo, nimis se dejicere. Virtutes verò Theologicæ, cum pro objecto habeant bonum infinitum, non pugnant nisi contra defectum, qui sæpius contingit; ideòque nobis semper cum Ecclesiâ congeninare incumbit, *da nobis fidei, spei et charitatis augmentum.* Et cum Apostolis Luc. 17 : *Adauge nobis fidem*, quis enim tantam fidem adhibet Deo, aut tam firmam spem in illo reponit, quantam meretur et exigunt harum virtutum motiva? Notum est sancti Bernardi effatum : Modus diligendi Deum, est amare sine modo.

Q. 11 : *Cur virtutes Theologicæ non dicuntur morales, cum longè perfectiori modo mores dirigant?* — R. Sunt quidem morales; sed proprium nomen sibi vindicant tanquàm nobilissimæ virtutum species, quemadmodum homo, licet sit et ipse animal; quia tamen habet aliquid præstantius, speciali nomine insignitur.

Q. 12 : *Quoduplex est virtus moralis?* — R. Generatim dividitur in quatuor virtutes cardinales, scilicet prudentiam, justitiam, fortitudinem et temperantiam.

Q. 13 : *Quare quatuor illæ virtutes dicuntur cardinales?* — R. Quia sunt præcipuæ virtutes inter morales, et tanquàm cardines, quibus cæteræ inniuntur. Primò namque virtus in vi-

tium vertitur, nisi dirigatur rectâ ratione, quæ est necessaria morum regula. Atqui prudentia est ipsamet recta ratio; definitur enim ab Aristotele, recta ratio agendorum; ergo omnis virtus prudentiæ inniuntur.

Dices : Fides est Christiano certa morum regula; ergo mores Christiani non inniuntur prudentiæ. — Distinguo anteced. : Est regula generalis per prudentiam infusam applicanda particularibus casibus, concedo; est regula particularis in praxi à prudentiâ independens, nego antec. Itaque, etiamsi fidelis in lege Domini apprime edoctus, noverit quid Evangelium præcipiat aut prohibeat, egregiè disserat de dilectione Dei et proximi, de contemptu rerum temporalium, de patientiâ et de singulis gradibus humilitatis; nihilominus nisi sit vir prudens et bonus, tanta scientiæ supellex in illo prorsus inanis est, et ad praxim inutilis. Quid ita? quia inordinati affectus judicium ejus corrumpunt in casibus particularibus, judicat humilitatem in iis circumstantiis fore ignaviam, ad zelum rectitudinis pertinere, si honorem sibi debitum vindicet, si impios deprimat, adeò ut nunquàm occasio sese offerat (ut retur) ad praxim redigendi, quæ alios sublimiter docet. Hinc luctuosa S. Bernardi querimonia lib. 2 de Consider. cap. 1 : *Nempe sic se habent mortuum corda; quod scimus, cum necesse non est, in necessitate nescimus*, nimirum quando natâ occasione præceptum urget. Ex quibus S. Thomas post Philosophum concludit, scientiam quidem remanere in peccatoribus, ideam de fide dicito; prudentiam verò minime, quia peccatores in praxi judicant prout affecti sunt, hoc est malè. Prudentiæ autem subserviunt, 1^o cura et sollicitudo rerum divinarum contra negligentiam; 2^o docilitas contra temeritatem et presumptionem, quæ saniora consilia nec inquirunt, nec datis acquiescit; 3^o circumspectio, quæ est attenta consideratio circumstantiarum contra animi levitatem et inconsiderationem.

Secundò, cum justitiæ officium sit omnibus reddere debitum : *Cui tributum, tributum...* cui honorem, honorem, inquit Apostolus Rom. 13, sub illâ militant religio, pietas, observantia, gratitudo, liberalitas, veracitas, affabilitas, eutrapelia; harum quippe virtutum officia alios ita spectant, ut omninò omitti non possint sine illorum offensione, ac proinde quamdam habent rationem debiti.

Tertiò, fortitudo, quæ animam firmat in periculis, labore et quibuscumque adversis, sub se continet patientiam, perseverantiam sive con-

stantiam, magnanimitatem, quæ inclinat ad actus excellentes et heroicos, arduos quidem, sed animo generoso consentaneos. Unde fortitudo definitur à S. Augustino lib. de Moribus Eccl. cap. 15, amor omnia propter Deum facile perferens.

Quartò, temperantia (quæ moderatur delectationes sensibiles, maxime gustûs et venereorum; utpote quæ vehementius contra rationem nitantur) complectitur abstinentiam, sobrietatem, castitatem, pudicitiam, quæ aversatur quodlibet incontinentiæ signum in verbis, tactibus et aliis corporis motibus; verecundiam, quæ est timor et aversio cujuscunque turpitudinis; honestatem, quæ servat morum candorem et venustatem; mansuetudinem et clementiam, quæ cohibet iræ impetum et vindictæ appetitum; humilitatem seu modestiam, quâ quis verissimâ su cognitione sibi vilescens reprimit motus animi in magna tendentis; studiositatem, quæ refrenat inordinatam sciendi libidinem.

Q. 14^o : *Omnes recensitæ virtutes infunduntur in justificatione?* — R. 1^o : Constat apud omnes Catholicos infundi fidem, spem et charitatem. Quin multi theologi, ut Vega lib. 7, cap. 24, in concilio Tridentino, Suarez lib. 3 de Gratiâ, cap. 8, et alii, docent illud esse dogma fidei in concilio Tridentino definitum.

Probatur 1^o ex Scripturâ Rom. 5, v. 5: *Charitas diffusa est in cordibus vestris per Spiritum sanctum qui datus est nobis.* Ergo et fides simul, et spes. Fides quidem, quia charitas, seu amor Dei, non potest esse sine prælucente cognitione: *per fidem autem ambulamus, et non per speciem*, 2 Cor. 5. Spes quoque, quia sine spe divini auxilii charitas non tendit in amplexus Sponsi summè delecti. Hinc Apostolus 1 Cor. cap. 13, concludit in hæc verba : *Nunc autem manent fides, spes, charitas, tria hæc.* In quibus autem manent? non in infidelibus, ut patet, neque in peccatoribus, qui charitate carent. Ergo in justis.

Probatur 2^o ex concilio Tridentino sess. 6, cap. 7, ubi sic habet : « Hanc dispositionem.... justificationis ipsa consequitur ; quæ non est sola peccatorum remissio, sed et sanctificatio et renovatio interioris hominis per voluntariam susceptionem gratiæ et donorum. » Quæ autem sunt illa dona, nisi fides, spes, et charitas ? « Hæc enim, inquit S. Augustinus Enchir. cap. 4, maxime, imò verò sola, religione sequenda sunt : » Unde Tridentini Patres citato capite sic inferunt : « In.... justificatione cum remissione peccatorum hæc omnia simul infusa ac-

cipit homo per Jesum Christum, cui inseritur, fidem, spem, et charitatem. » Ac tandem canone 11, definiunt : « Si quis dixerit, homines justificari.... solâ peccatorum remissione, exclusâ gratiâ et charitate, quæ in cordibus eorum per Spiritum sanctum diffundatur, atque illis inhæreat, anathema sit. »

Probatur 3^o ratione, quia ad suavem Dei providentiam pertinet tribuere causis secundis principium intrinsecum, suis operationibus proportionatum; sic, v. g., naturam pecorinam, quæ est prima radix sensationum, instruit sensibus, per quos proximè elicit operationes animales seu sensationes; naturæ rationali dedit intellectum et voluntatem, quæ sunt principia proxima actuum humanorum. Atqui gratia sanctificans est quædam natura supernaturalis, si ita loqui fas est, seu divinus perfectionis gradus, non solum naturam pecorinam et rationalem, sed quaecumque creabilem excedens, quæ essentialiter ordinatur ad operationes sibi consentaneas; hoc est, supernaturales et divinas; cum modus operandi sequatur modum essendi; ergo debentur illi virtutes infusæ tanquàm potentiæ similiter supernaturales et divinæ. Atque hæc ratione Theologi communiter in primâ parte agnoscunt in Beatis lumen gloriæ per modum habitûs, quo intellectus eorum intrinsecè perficitur ad eliciendam connaturaliori modo visionem Dei intuitivam. Unde confirmatur nostra responsio. Gratia sanctificans est ejusdem naturæ et essentiæ, sive in patriâ, sive in viâ; per illam Beati æquè ac viatores formaliter constituuntur sancti, amici Dei, et consortes divinæ ejus gratiæ; actus ad quos naturaliter et primariò tendit in utroque statu, sunt Dei cognitio et amor; quid enim amicitie connaturalius quàm amare, et in cognitione amati deliciarî? Atqui Beati in cognitione et amore Dei non deliciantur, nisi mediantibus habitibus luminis gloriæ et charitatis; ergo nec justî viatores, nisi mediantibus habitibus fidei, spei et charitatis, juxta illud Apostoli Rom. 1 : *Justus autem ex fide vivit*, radicaliter quidem et habitualiter ex gratiâ sanctificante, actualiter verò ex fide, non mortuâ; implicat enim animam vivere per aliquid mortuum; sed ex fide vivâ, quæ per dilectionem operatur. Fidei et charitati spes in nobis adjungitur; quia non ambulamus per speciem ad quam ultimò tendit gratia sanctificans, sed eam expectamus in spe, quæ viva esse nequit, quin admixtum gemitum habeat: teste eodem Apostolo Rom. 8 : *Nos ipsi primitias spi-*

ritus habentes... intra nos gemimus adoptionem filiorum Dei expectantes... spe enim salvi facti sumus. Et infra: Spiritus (qui datus est nobis) postulat pro nobis gemitibus inenarrabilibus. Ex quibus patet fidem, spem, et charitatem nunquam separari à gratiâ sanctificante in viatoribus justis; vitamque novam, quam peccatores in Sacramento percipiunt, in actibus harum virtutum maximè consistere.

R. 2 : Cùm concilium Tridentinum et alia præcedentia nihil expressè statuerint circa virtutes morales, controversia est inter Theologos, utrùm reverà in justificatione infundantur. Nihilominus communior et longè probabilior est affirmans sententia sancti Thomæ 1-2, quæst. 63, art. 5, et quæst. 65, art. 5, et totius ejus scholæ. Illam quoque amplexi sunt Richardus, S. Bonaventura, Vega, lib. 7 in conc. Trident. cap. 24. Catechismus romanus, qui inter effectus baptismi numerat *nobilissimum omnium virtutum comitatum, quæ in animâ simul cum gratiâ infunduntur*. Favet etiam S. Augustinus, qui in Psalmum 85 sic de virtutibus cardinalibus loquitur : *Illæ virtutes nunc in valle plorationis per gratiam Dei donantur nobis*. Id ipsum suadet ratio mox allata in confirmationem præcedentis responsionis. Namque gratia sanctificans est principium radicale et remotum omnium bonorum; constituit hominem formaliter justum, quatenus paratum illum reddit ad implendam totam legem, quæ præcipit de actibus omnium virtutum, ut dicitur 5 Ethic. cap. 1. Ergo gratiæ sanctificanti veluti novæ naturæ, debent respondere habitus omnium virtutum, tanquàm potentiæ supernaturales et principia proxima actuum supernaturalium, qui ipsi competunt; quemadmodum naturæ rationali respondent potentiæ rationales, intellectus scilicet et voluntas, quæ sunt principia proxima actuum rationalium, ad quos inclinât.

Dices 1º: Qui habet habitum virtutis, promptè et delectabiliter operatur ea quæ sunt virtutis. Atqui experienciâ constat peccatores post perceptum pœnitentiæ Sacramentum, in quo peccata per infusionem gratiæ sanctificantis remissa sunt, easdem pati difficultates, quas ante justificationem, circa materias virtutum, sive theologicarum, sive moralium; ergo nulle virtutes in justificatione infunduntur, sed acquiri debent studio et labore. — Respondeo 1º, hujusmodi experienciâ non esse universalem. Plurimi quippe, etsi post conversionem, temptationibus etiam gravibus pulsantur; mente tamen condelectantur legi Dei, et ad divina

piè se affectos sentiunt. Hujusce mutationis unus ex benè multis testis sit Augustinus, qui de se sic scribit lib. 9 Confess. cap. 2 : « Quam suave mihi subito factum est carere suavitatibus nugarum, et quas amittere metus fuerat, jam dimittere gaudium erat! Ejiciebas enim eas à me, vera et tu summa suavitas, ejiciebas, et intrabas pro eis, omni voluptate dulcior. » Quare ex quorundam experienciâ rectius concluderetur illos posuisse obicem gratiæ, nec rem Sacramenti percipisse. Respondeo 2º: Concessâ majorè, distinguendo min. : Peccatores post conversionem patiuntur easdem difficultates propter impedimenta externa, puta vitia prius contracta, quæ, quamvis per infusionem gratiæ sanctificantis lethale vulnus accipiant, ut loquitur S. Thomas, nihilominus per virtutes infusas non tolluntur, quemadmodum per acquisitas, utpote quæ illis non sunt contraria sicut istis, concedo; easdem patiuntur difficultates ex ipsâmet voluntate malè affectâ erga Deum et objecta virtutum moralium, nego min.; alioquin non essent conversi; nam vera conversio nequit esse sine odio peccati et amore justitiæ, in quibus consistit rectitudo voluntatis et essentia virtutis. Esto, contra illam rectitudinem pugnent caro et vitia contraria, quæ officium virtutis reddunt difficile; quemadmodum, inquit S. Thomas, somnolentia, quâ gravatur philosophus, impedit usum habitus, qui in ipso est, et injucundum efficit.

Instas : Ex venerabili Bedâ, sancti magis humilantur de virtutibus, quas non habent, quàm de virtutibus, quas habent, gloriantur; ergo non omnes virtutes in justificatione infunduntur. Distinguo anteced. : Quas non habent quoad actum; quia nonnunquam propter difficultates et exteriora impedimenta venialiter peccant, concedo; quas non habent quoad habitum, nego antec. Quis enim dixerit virum sanctum non habere habitum religionis aut charitatis, ex eo quòd præ infirmitate oratio ejus sit aliquando tepida, aut duriusculum verbum in proximum protulerit?

Dices 2º : Saltem prudentia in justificatione non infunditur, cùm eâ careant pueri, idiotæ et plures mulierculæ. Ergo. Distinguo antec. : prudentia, quæ unicuique ad salutem minimè sit necessaria, concedo : prudentia cuique ad salutem necessaria, nego anteced. Verum quidem est non quemlibet justum pollere eâ excellenti prudentiâ, quâ possit sibi et aliis in omnibus consulere sine sapientium auxilio. Sed quivis puer aut idiota, si verè sit justus, ha-

bet illas prudentiæ partes, sine quibus mores dirigi nequeunt, nempe curam et sollicitudinem rerum divinarum, ne in negotio salutis negligentia subrepat; docilitatem, quæ de se ipso non præsumens, consilium à sapientioribus inquirat et suscipiat; circumspectionem, quæ operis aggrediendi circumstantias perpendit, ne quid leviter et inconsideratè molitur.

Dicat ergo justificatus à peccatis: *Gaudens gaudebo in Domino, et exultabit anima mea in Deo meo; quia induit me vestimentis salutis, et indumento justitiæ circumdedit me, quasi sponsum decoratum coronâ, et quasi sponsam ornatam monilibus suis*, Isa. 16, v. 10. Non abiciat per peccatum tantam Dei gratiam; sed sicut prius exhibuerat membra sua servire iniquitati, ita nunc exhibeat illa servire justitiæ in sanctificationem, ut docet Apostolus Rom. 6.

Cum autem justus per fidem, spem et charitatem Christo sit insertus, ut loquitur concilium Tridentinum, et lumen fidei sit in ipso superadditum lumini rationis, quemadmodum ipsa ratio in homine superaddita est lumini sensuum; rectus ordo postulat, ut justus justè et supernaturaliter vivat, et ex fidei imperio rationem, sensus et omnes facultates suas dirigat ad finem, quem fides demonstrat, spes appetit, et charitas apprehendit. Unde mirum videri debet, quomodo homini christiano excidere potuerit hæc propositio, primum damnata ab Alexandro VII, deinde à clero Gallicano: « Homo nullo unquam vitæ suæ tempore teneatur elicere actum fidei, spei et charitatis, ex vi præceptorum divinatorum ad eas virtutes pertinentium. » Nam ex S. Augustino supra laudato, « hæc maximè, imò sola, in religione sequenda sunt. »

§ 5. De donis Spiritus sancti.

Q. 1: Quid est donum Spiritus sancti? —

R. Est habitus supernaturalis, quo homo disponitur ad accipiendas extraordinarias Spiritus sancti motiones ad propriam salutem.

Dicitur 1^o *habitus supernaturalis*, 1^o quia permanentè inhæret, ut habetur Isaïæ 11: *Requiescet super eum Spiritus... sapientiæ*, etc. Nam requies permanentiam significat. 2^o Ut distinguatur à virtutibus; quamvis enim ratio generica virtutis conveniat donis, cum ipsa faciant bonum habentem se et opus ejus optimum; nihilominus non solent dici virtutes simpliciter, sed dona: quia virtus pressius sumpta, regitur prudentiâ in actionibus ordinariis et medioeribus; donum verò supra prudentiam inclinatur ad actus excellentes, heroi-

cos et divinos per inspirationem et motionem Spiritus sancti. Unde virtus infusa subest prudentiæ infusæ, donum verò Spiritui sancto, tanquam proprio motori.

Dicitur 2^o, *ad recipiendas extraordinarias Spiritus sancti motiones*; quia ex S. Thomâ 1-2, q. 68, a. 1: « Omne quod movetur, necesse est proportionatum esse motori... quantum igitur movens est altior, tantò necesse est quòd mobile perfectiori dispositione ei proportionetur; sicut videmus quòd perfectius oportet esse discipulum dispositum ad hoc, quòd altiorē doctrinam capiat à doctore. Manifestum est autem, quòd virtutes humanæ perficiunt hominem, secundum quod homo natus est moveri per rationem in iis, quæ interiorius vel exteriorius agit; oportet igitur inesse homini altiores perfectiones, secundum quas sit dispositus ad hoc quòd divinitus moveatur. Et illæ perfectiones vocantur dona. »

Dicitur 3^o, *ad propriam salutem*, ut significetur donum Spiritus sancti pertinere ad gratiam gratum facientem, et distingui à gratiis gratis datis, quæ, ut observavimus, dantur ad aliorum salutem. Hinc sapientiæ et scientiæ, quæ numerantur inter gratias gratis datas, dicuntur sermo sapientiæ et scientiæ, quia sunt ad illos erudiendos in lege divinâ; sapientiæ verò et scientiæ sumptæ pro donis Spiritus sancti, perficiunt habentem se in ordine ad divinam; per sapientiā ad illa suavius et excellentius contemplanda movetur; et per scientiam ad temporalia extraordinario modo contemnenda.

Q. 2: Numquid necessaria est Spiritus sancti motio, ut habitus virtutum infusarum in actum prorumpant? — R. Procul dubio necessaria est; quia homo habitibus infusis uti non potest sine supernaturali illustratione seu cognitione, et sine piâ voluntatis affectione, quæ sunt motiones Spiritus sancti, sed longè dispares à motionibus ad usum donorum requisitis. Nam priores motiones sunt ordinariæ, et ad humanum agendi modum attemperatæ; posteriores contra excedunt communem agendi rationem, tenduntque ad actus heroicis. Unde actus illi non ita frequentes sunt in justis ac virtutum actus, v. g., oratio ad quam justus divinitus moveri necesse est, frequens est et assidua, sublimis verò contemplatio rarior et brevior.

Q. 3: Suntne admittenda dona à virtutibus distincta? — R. Negari non potest, quin homines aliquando extraordinariè à Spiritu sancto

moveantur: harum quippe motionum plura habentur exempla, tum in Scripturis, tum in traditione ecclesiastica. Samson instinctu divino columnas cœnaculi concussit, Jud. 16. Salomon judicium tulit, 3 Reg. c. 3. Eleazarus elephanti se supposuit, 2 Mach. 6. Simeon venit in templum, Luc. 2. Sancta Apollonia sponte in rogem exiit, ex S. Dionysio Alexandrino apud Eusebium lib. 6 Hist. c. 4. Rationem affert sanctus Thomas 1-2, qu. 68, art. 1, quia « sicut... vires appetitive nate sunt moveri per imperium rationis: ita omnes vires humanæ nate sunt moveri per instinctum Dei, sicut à quâdam superiori potentiâ. » Quin et ipse Aristoteles ejusmodi divinas inspirationes agnovit, lib. 7 Moral. c. 18, ejusque testimonium laudat S. Thomas art. 1, his verbis: « Philosophus etiam dicit... quod his qui moventur per instinctum divinum, non expedit consiliari secundum rationem humanam; sed quod sequantur interiorem instinctum: quia moventur à meliori principio quam sit ratio humana. »

Sed controversia est in Scholâ, num dona sint habitus à virtutibus distincti. Negant Scotus et alii non pauci, contenduntque esse actus eximios virtutum infusarum. S. verò Thomas 1-2, q. 68, et alii communiter, quibus subscribimus, docent dona esse habitus à virtutibus distinctos, 1° quia in Scripturis exprimuntur ut aliquid permanens, Isaïæ c. 11: *Requiescet super eum Spiritus Domini*. Joan. 14: *Ad eum veniemus, et mansionem apud eum faciemus*. Unde S. Gregorius lib. 2 Moral. c. 14: « In illis donis, sine quibus ad vitam perveniri non potest, Spiritus sanctus in electis omnibus semper manet; sed in aliis non semper manet. » 2° Quia dona altiori et nobiliori modo versantur circa materiam virtutum, quam ipsæ virtutes. Ergo sicut liberalitas et magnificentia, quæ versantur circa idem objectum, puta pecuniam erogandam, sunt diversi habitus, quia diversimodè largitionem respiciunt, liberalitas ut mediocrem, magnificentia ut splendidam et magnificam, quando decet, similiter dona et virtutes distinguî debent; cum dona disponant ad actus sublimiores, virtutes contra ad actus mediocres.

Q. 4: Dona suntne habitus præstantiores virtutibus? — R. Distinguendum cum S. Thomâ. Si dona conferantur cum virtutibus Theologicis, sunt inferiora; quia per virtutes Theologicas anima Deo conjungitur: per dona verò disponitur duntaxat ad suscipiendam Spiritûs

sancti motionem; atqui multò præstantius est conjungi Deo, quam disponi ad ejus inspirationem, quæ est consecrarium quoddam, et velut appendix divinæ illius unionis. Sed si dona conferantur cum aliis virtutibus, sive intellectualibus, sive moralibus, præstantiora sunt; quia disponunt ad motionem extraordinariam Spiritûs sancti, quæ superior est motione rationis, ad quam disponunt virtutes morales. « Manifestum quippe est, inquit S. doctor, quod ad altiorem motorem oportet majori perfectione mobili esse dispositum. »

Q. 5: Quot sunt dona Spiritûs sancti? — R. Septem numerantur, Isa. 11, his verbis: *Requiescet super eum Spiritus Domini, Spiritus sapientiæ et intellectus, Spiritus consilii et fortitudinis, Spiritus scientiæ et pietatis, et replebit eum Spiritus timoris Domini*. Ex his donis quatuor, scilicet sapientia, intelligentia, scientia et prudentia, seu consilium, perficiunt rationem; tria verò voluntatem, nempe pietas, fortitudo et timor.

Q. 6: Quomodo probatur septenarius ille donorum numerus? — R. Probatur 1° ipsâ Prophetæ enumeratione; 2° auctoritate sanctorum Patrum, sancti Ambrosii lib. 5 de Spiritu sancto cap. 2; Hieronymi in caput 11 Isaïæ; Augustini lib. 2 de Doctrinâ Christ. cap. 7; sancti Gregorii lib. 1 Moral. cap. 28; consensu Theologorum et totius Ecclesiæ, quæ illum numerum hactenus retinuit. Calvinus exsufflat et ridet illam auctoritatem; quia in hebræo pietas et timor pro reverentiâ sumuntur, et eodem nomine exprimuntur. Sed lugenda ejus vanitas et præsumptio, quæ se oculatiorem credit septuaginta Interpretibus et sancto Hieronymo, qui idem nomen in textu hebræo repetitum, duo significare interpretati sunt, nimirum pietatem et timorem reverentialem; quemadmodum apud Latinos timor significat et metum, et reverentiam. 3° Probatur ratione, quia dona ex dictis idia cum virtutibus habent objectum materiale, sed disponunt ad actus sublimiores circa illud eliciendos. Ergo tot admittenda sunt dona quot numerantur virtutes: atqui præter virtutes Theologicas, quas præsupponunt dona tanquam sui radices, septem numerantur virtutes, quatuor intellectuales, quæ disponunt ad actus bonos, scilicet intelligentia, sapientia, scientia et prudentia; tres in voluntate, nimirum justitia, fortitudo et temperantia. Ergo totidem admittenda sunt dona ejusmodi virtutes: intelligentia.

Q. 7: Quomodo se habet quodlibet donum ad

Virtutem cui respondet? — R. Satisfiet quæstioni, si conferatur actus cujuslibet doni cum actibus virtutis ipsi agnatæ. Itaque primò, actus virtutis intelligentiæ, quæ vulgò dicitur habitus principiorum, est cognitio primorum principiorum, v. g.: *Quod tibi non vis fieri, alteri ne feceris; totum est majus suâ parte.* In religione autem christianâ prima principia sunt propositiones fidei, ex quibus deduci, et ad quas reduci oportet omnem supernaturalem fidelium cognitionem quantumcumque sublimem; alioquin abjicienda est tanquàm à spiritu erroris inmissa, qui aliquando se transfigurat in Angelum lucis. Porro per prudentiam judicamus Deum hoc aut illud dixisse, per fidei virtutem actu et de facto idipsum judicantes credimus. En actus virtutis fidei. Nonnunquàm autem fidelis, etiam idiota, instinctu Spiritûs sancti eâ firmitate credit, et tantâ luce percipit mysterium revelatum, v. g., Filium Dei esse incarnatum, ut sibi videatur hactenus non credidisse sicut oportet. En actus doni intelligentiæ.

Secundò, per virtutem sapientiæ ratio gratiâ Dei adjuta, de rebus divinis, tanquàm de altissimis causis, et ex iis de creatis rectè judicat. Per donum verò sapientiæ justus aliquando non rationis ductu, sed Spiritûs sancti instinctu movetur ad sublimiorem cœlestium contemplationem, quam sanctus Augustinus testatur se fuisse expertum, 1. 40 Conf. c. 40: « Aliquando, inquit Deum alloquens, intromittis me in affectum multum inusitatum introrsus, ad nescio quam dulcedinem; quæ si perficiatur in me, nescio quid erit, quod vita ista non erit; sed recido, » etc. Quia brevis est et admodum rara illa beatæ vitæ prælibatio.

Tertiò, virtus scientiæ ad hoc disponit, ut ratio de temporalibus rectè judicet, nimirum non esse æstimanda aut appetenda, nisi quatenus deservire possunt ad æternam beatitudinem consequendam. At per donum scientiæ justus ulterius judicat illa esse abjicienda (quantum fieri potest), veluti onera et impedimenta, quæ retardant animam ad Deum anhelantem. Verùm quia vitæ necessitas cogit servire hujusmodi vanitatibus, donum scientiæ tantum abest ut infllet, quemadmodum scientia philosophorum, quin justum dejecit, et secundum sanctum Augustinum, naturaliter parit donum lacrymarum.

Quartò, virtutis prudentiæ proprium est in dubiis consulere secundum rectam rationem; Spiritus autem sanctus nonnunquàm justis in-

spirat consilia, quæ communem agendi rationem et humanam prudentiam superant; et ideo à prudentibus seculi temeraria et stulta facile judicantur. *Animalis homo*, inquit Apostolus 1 Cor. 2, *non percipit ea quæ sunt Spiritus Dei; stultitia enim est illi.*

Quintò, per justitiæ virtutem justus disponitur ad reddendum cuique debitum: *cui vectigal, vectigal; cui timorem, timorem; cui honorem, honorem*, Rom. 15. Per donum autem pietatis fit promptè à Spiritu sancto mobilis ad extraordinariam reverentiam, quâ Deo, personis et rebus sacris, pauperibus et omnibus hominibus, quatenus ad Christum pertinent, longè ultra debitum exhibet quod justitia, religio, et misericordia præscribunt.

Sextò, virtus fortitudinis justum in periculis, juxta dictamen rationis et communes prudentiæ regulas firmat contra inordinatos timoris et audaciæ motus. Per donum verò fortitudinis disponitur ad heroicos actus, instinctu divino eliciendos, ut videre est in laudatis exemplis Samsonis, Rasie, 2 Machab. 14, et Apolloniæ.

Septimò, per virtutem temperantiæ justus moderate utitur rebus delectabilibus. Per donum verò timoris reverentialis erga Deum, omnes delectationes, quantum potest, abjicit vitæ austerioris studio, ut animam castam et puram conservet Deo suo, qui Exod. 20, *est fortis zelotes*, et Jac. c. 4, *ad invidiam concupiscit.*

Cæterum, Theologi hic monent, heroica illa opera, præsertim quæ quarto et sexto dono tribuuntur, non esse ambienda sine speciali Spiritûs sancti instinctu, qui præsumitur in iis, quos Scriptura laudat et Ecclesiæ commendat; alioquin nec Samson, nec Rasia, nec Apollonia à gravi peccato excusari possent. Quare animarum rectores, sicut non debent agere, nisi secundum rectæ rationis et prudentiæ regulas, ita nec aliis consulere. Justi equidem sunt semper dispositi ad omnem Spiritûs sancti motum; sed supra rationem non moventur nisi extraordinariè, contra rationem verò nunquàm.

Q. 7: *Donæ sunt.æ habitus distincti à duodecim fructibus Spiritûs sancti, de quibus Galat. 5, et ab octo beatitudinibus, quæ laudantur, Matth. c. 5?* — Respondet S. Thomas, fructus et beatitudines esse ipsosmet actus virtutum et donorum. Namque fructus nomine intelligitur bonum labore et studio intentum et comparatum; v. g., ampla messis est fructus agricolæ. Si bonum illud sit ingens, dicitur beatitudo,

sive inchoata, sive perfecta; quia ejus possessio valdè delectat, et operantis desiderium quiescere facit. Si autem bonum sit exiguum aut mediocre, dicitur simpliciter fructus, non verò beatitudo; neque enim mercenarium dixeris beatum, ex eo quòd exiguum mercedem consecutus sit. Atqui bonum quod intenditur ex habitibus laudabilibus, sunt actus boni et laudabiles, v. g., cognitio rerum naturalium est bonum philosophi, et fructus habitusquem studio comparavit. Ergo actus habituum infusorum sunt delectabiles justorum fructus: *Timor Domini delectabit cor*, Eccli. 1: *Justitiae Domini recte letificantes corda*, Psalm. 17. Et S. Augustinus serm. 368, aliàs hom. 57, de actu amoris ex toto corde, ait: « Cum ad istam felicem perfectionem veneris, omnes concupiscentias hujus mundi tanquam stercora computabis, et cum Propheta poteris dicere: *Mihi adhærere Deo bonum est*, » quemadmodum parvulus ablactatus experientiâ cibi solidioris et suavioris lac nutricis fastidit. Quin et intimus dolor de peccatis est delectabilis poenitentiae fructus, juxta illud lib. de verâ et falsâ poenitentia apud sanctum Augustinum: *Sic poenitens de peccatis doleat, ut de dolore suo gaudeat*.

Ergo charitas, castitas et aliæ virtutes, quas numerat Apostolus cit. c. 5 Gal., non sumuntur pro habitibus, sed pro actibus, patetque ex ejus contextu; ibi enim opponit opera spiritus operibus carnis: *Manifesta sunt, inquit, opera carnis, quæ sunt fornicatio, immunditia, etc.* Tum subjungit de operibus bonis: *Fructus autem spiritus est charitas, gaudium, etc.* Maluit autem dicere fructus, quam opus, ut intelligeremus in illis actibus secundum se spectatis, nullum inesse laborem, aut tristitiam, quemadmodum carnales falsò arbitrantur; sed meram delectionem et pacem. *Crucem quidem vident, sed non etiam unctionem*, ait S. Bernardus serm. 1 de Dedic. Vident carnis afflictationes, sensuum mortificationes; sed non vident sancti Spiritus consolationes. Deinde Apostolus actus illos vocat fructus, non justorum, sed Spiritus sancti; quia licet justii ad illos actus vitaliter et liberè concurrant, Spiritus tamen sanctus illorum est auctor. *Deus est enim qui operatur in vobis et velle, et perficere, pro bonâ voluntate*, Philip. 2. Porrò sicut Apostolus non omnia carnis opera citato cap. numerat, sed quædam notiora duntaxat; sic non omnes fructus Spiritus, sed nobiliores comprehendit in duodenario illo numero; omnes enim actus cujuslibet habitus infusi, sive

sit virtus, sive sit donum, est fructus spiritus. Attamen fructus omnes non dicuntur beatitudines, sed soli actus donorum; quia ex dictis nomine beatitudinis intelligitur bonum insigne, in cujus possessione animus quiescit; vel plenè et perfectè, si beatitudo sit perfecta, ut visio Dei intuitiva, quæ est operatio hominis præstantissima, et ultima ejus perfectio; vel imperfectè, si beatitudo sit solum inchoata, quæ in hac vitâ exurgit ex actibus præstantioribus; operatio quippe præstantior magis perficit, et ampliùs delectat. Atqui ex dictis actus donorum sunt præstantiores actibus virtutum, utpote qui procedant à nobiliori motore: ergo beatitudines sunt propriè actus donorum.

Q. 8º: *Quomodo octo beatitudines conveniunt cuilibet dono?* — R. Alii aliter explicant. Secundum sanctum Augustinum lib. 1 de Serm. Domini in monte, prima beatitudo tribuitur timori Domini, quo justus ob Dei reverentiam seipsum deprimit, honores, et omnia temporalia contemnit: « Rectè hic intelliguntur pauperes spiritu, humiles et timentes Deum; nec aliunde omninò incipere oportuit beatitudinem; siquidem perventura est ad summam sapientiam; initium autem sapientiæ est timor Domini, quemadmodum et è contrario, initium omnis peccati superbia scribitur. Superbi autem appetunt et diligunt regna terrarum. *Beati autem pauperes spiritu, quoniam ipsorum est regnum cælorum*, » cap. 2. Secunda beatitudo tribuitur pietati: « Namque mites sunt, qui cedunt improbitatibus, et non resistunt malo, sed vincunt in bono malum (scilicet propter Dei timorem et reverentiam). Rixentur ergo immites, et dimicent pro terrenis et temporalibus rebus. *Beati mites, quoniam ipsi hereditate possidebunt terram*, de quâ pelli non possunt » c. 5; et cap. 9: « Inde venit (pauper spiritu) ad divinarum Scripturarum cognitionem, ubi oportet esse mitem pietate; ne etiam id quod imperitis videtur absurdum, vituperare audeat... mitibus hereditas data est, tanquam testamentum Patris per pietatem quærentibus. » Tertia convenit scientiæ: « In hoc gradu, in quo scientia est, lugetur amissi summi boni, quia inhæretur extremis, » c. 9; et c. 8: « Scientia congruit lugentibus, qui cognoverunt in Scripturis, quibus malis teneantur. » Quarta congruit dono fortitudinis: « In quarto gradu, inquit sanctus doctor, labor est, ubi vehementer incumbitur, ut sese animus avellat ab eis quibus pestiferâ dulcedine

dine innexus est. Hic ergo esuritur et sititur iustitiâ, et multum necessaria est fortitudo; quia non relinquitur sine dolore, quod cum delectatione retinetur. » Quinta est effectus salutaris consilii: « Hoc enim unum remedium est evadendi de istis malis, ut dimittamus, sicut nobis dimitti volumus; et adjuvemus in quo possumus alios, sicut et nos cupinus adjuvari. » Sexta respondet dono intellectûs, quo subtilius res divinæ apprehenduntur: « Quemadmodum enim lumen hoc videri non potest, nisi oculis mundis; ita nec Deus, nisi mundum sit illud, quo videri potest... mundis corde data est facultas videndi Deum, tanquam purum oculum ad intelligenda æterna gerentibus. » Septima tribuitur dono sapientiæ: « Pacificis Dei similitudo est tanquam perfectè sapientibus, formatisque ad imaginem Dei... Pacifici autem in semetipsis sunt, qui omnes animi sui motus componentes, et subicientes rationi, id est, menti et spiritui, carnalesque concupiscentias habentes edonitas, fiunt regnum Dei, in quo ita sunt ordinata omnia, ut id quod in homine præcipuum est et excellens, hoc imperet, cæteris non reluctantibus, quæ sunt nobis bestiisque communia. » In octavâ beatitudine septem dona concurrunt, adeo ut non sit novus perfectionis gradus, sed probatio et declaratio præcedentium: « Septem sunt ergo, ait S. Augustinus cap. 9, quæ perliciunt; nam octava clarificat, et quod perfectum est, demonstrat. » Enimverò omnes, tam pauperes et humiles spiritu, quam mites et alii, malè audiunt apud iniquos, linguis eorum proscinduntur, persecutionibus exagitantur; sed beati si in iis tribulationibus gloriantur; quia ipsorum est regnum cælorum.

Q. 9º: *Omnia dona infunduntur in justificatione?*—R. Affirmans S. Thomæ sententia in scholâ est communior, probaturque, quia in justificatione homo inseritur Christo tanquam membrum capiti, ut Spiritu ejus vivat et regatur: *Si quis Spiritum Christi non habet, hic non est ejus*, Rom. 8, v. 9. Ergo justus debet disponi ad excipiendas omnes motiones Spiritûs sancti; disponitur autem ad ordinarias per habitus virtutum, ad extraordinarias verò per dona, ut patet ex dictis; ergo sicut in justificatione infunduntur habitus virtutum, ita et habitus donorum: « In ordine ad finem ultimam supernaturalem, inquit S. Thomas art. 2. qu. 68, ad quem ratio movet secundum quod aqualiter et imperfectè informata per

virtutes Theologicas, non sufficit ipsa motio rationis, nisi desuper adsit instinctus et motio Spiritûs sancti secundum illud Rom. 8: *Qui Spiritu Dei aguntur, hi filii Dei sunt*. Et ideo ad illum finem consequendum necessarium est homini habere donum Spiritûs sancti. »

In his enucleandis, quæ Schola vix attingit, diutius immorati sumus, quia operæ pretium est, ut clerici plenè noverint et frequenter doceant, quam pretiosa et maxima dona conjuncta sint cum peccatorum remissione; quam divina adjumenta habeant justificati à peccato, ut relapsum caveant, et in bonis operibus abundant; denique quid in peccatore prærequiratur, ut ad tot ac tanta dona recipienda dispositus censeatur.

(HABERT), in Theologiâ ad usum seminarii Catalaunensis.

Appendix secunda.

De variis Scholæ systematibus circa gratiæ efficaciam et sufficientiam.

Omnes circa gratiæ efficaciam et sufficientiam in scholis catholicis agitatae opiniones, ad duas credimus posse revocari; unam quæ gratiæ efficaciam et sufficientiam ex ipsâ utriusque gratiæ naturâ repetit; alteram verò, quæ ex voluntatis consensu vel dissensu.

Juxta priorem sententiam, est de naturâ gratiæ efficacis ut cum illâ voluntas bonum agat, simul et possit illud non agere; de naturâ verò gratiæ sufficientis ut cum illâ voluntas bonum non faciat, et tamen possit illud facere, ita ut gratia efficax in solum cadat actum, non in potentiam, quam perfectam supponit et completam; et sufficiens è contrario solum afficiat potentiam, non actum. Gratia efficax, in hoc systemate, dicitur: *Prænotio physica*, vel etiam *Prædeterminatio physica*, eò quòd nimirum voluntatem, antecederet ad omnem ejus consensum, ad actum physicè moveat, determinet et applicet. Ita Thomistæ, sic dicti, quòd suam doctrinam esse velint ipsissimam doctrinam S. Thomæ.

Juxta alteram verò sententiam, non ex gratiæ naturâ repetendum est, quòd sit efficax vel merè sufficiens; sed ex eo quòd voluntas ei, prout voluerit, consentiat, vel dissentiat; non quidem hoc absono sensu, quòd voluntas gratia viam aliquam addat ei consentiendo, vel adimat eidem dissentiendo; sed quòd gratia suo non donetur effectui, nisi in quantum vo-

untas ejus obsequitur motioni; nec suo privetur effectu, nisi in quantum voluntas ejusdem motioni refragatur; eo ferè modo quo Sacramenta suum non operantur effectum, nisi pro suscipientium dispositionibus; quamvis illæ dispositiones efficacitæ Sacramentorum nil proprius addant vel detrahant.

Itaque Deus ope *scientiæ mediæ*, de quâ in Tract. *de Deo*, ab æterno videt ex innumeris gratiis quas in suæ misericordiæ thesauris reconditas habet, alias esse quibus Petrus certò consentiat, si ipsi dentur; alias quibus ce tò dissentiat, si eidem conferantur. Porro, si Deus ab æterno decreverit Petro dare gratiam primi generis, huic gratiæ Petrus certò consentiet; et erit gratia efficax: si secundi generis, illi Petrus certò dissentiet; et erit gratia purè sufficiens. Ita Molina, in lib. cui titulus, *de Concordiâ liberi arbitrii cum gratiæ donis*, etc., in quo suam ita fecit prædictam sententiam, ut dicta sit *Molinismus*.

Cùm autem liber ille plurium animas offendisset, et à multis fuisset de Semipelagianismo postulatus, insigniores Molinæ discipuli, Vasquesius præsertim et Suaresius, ut tantam à magistro criminationem repellerent, ipsâ servatâ substantiâ systematis, illud paulò alter adornare conati sunt.

Igitur non dixere cum Molinâ gratiam esse efficacem præcisè quia homo ei consentit; sed quia ipsa sic congruit cum omnibus circumstantiis in quibus homini datur, ut Deus, per *scientiam mediâ*, ab æterno præviderit hominem huic gratiæ certò fore consensurum, si ei talibus daretur in circumstantiis. Hinc gratia efficax apud illos dicitur gratia *congrua*, ipsi verò dicuntur *Congruistæ*. Porro, si ex tali *congruitate* habeat gratia quòd sit efficax, ex ejusdem proinde *congruitatis* defectu habebit, quòd sit duntaxat sufficiens.

Verùm cùm, ipsos juxta *Congruistas*, illa gratiæ cum hominis naturâ, indole, variisque, tum internis, tum externis dispositionibus attemperatio, verbo, *congruistas*, non sit efficax naturâ suâ; minùs videntur juxta rem ipsam, quàm juxta quosdam loquendi modos à Molinâ recedere. Si enim urgeantur, et ab illis quaeratur ultima ratio, cur una gratia sit efficax, altera purè sufficiens, non concipitur quid aliud ab ipsis possit ultimatum responderi, quàm quod ab ipso Molinâ responsum est; adeò talem gratiam esse efficacem, quia voluntas ei consentit, talem verò merè sufficientem, quia voluntas illi dissentit.

Hoc igitur præcipuum ac fundamentale discrimen est inter systema Thomistarum, et systema Molinæ vel Congruistarum, quòd, juxta Thomistas, gratia efficax ita naturâ differat à gratiâ tantum sufficienti, ut repugnet gratiam efficacem pro uno homine esse solùm sufficientem pro altero: juxta Molinam autem et Congruistas, adeò sit ejusdem naturæ hoc utrumque gratiæ genus, ut gratia efficax in uno homine possit esse purè sufficiens in alio; quinimò eadem numero gratia eodem in homine, pro variis circumstantiis, efficax esse possit, aut merè sufficiens.

Sibi verò sic opponuntur hæc duo systemata, ut arbitremur nullum inter illa medium excogitari posse; et ad alterutrum esse revocanda, quæ sub Augustinianorum et Thomassini nominibus celebrantur.

1º Quidem systema Augustinianorum ad alterutrum ex prædictis systematibus videtur reducendum. Nam Augustiniani, sic dicti, quòd Augustinum ducem et magistrum sequi gloriantur, in eo cum Jansenio consentiunt, quòd omnem gratiam reponant in cœlesti delectatione, superiori quidem et victrici, si habeat effectum; inferiori autem, si careat effectu: in hoc autem ab eodem differunt essentialiter 1º quòd dicant cœlestem delectationem non esse semper charitatem; 2º quòd velint sub illâ delectatione, si sit superior, veram et *relativam* esse peccandi potentiam; sub eadem autem, si sit inferior, nullam esse, ne *relativam* quidem peccandi necessitatem. Atqui hæc doctrina, quantum ad ipsam gratiæ efficaciam vel sufficientiam, in ipsum recidit systema Thomistarum aut Congruistarum. Hæc enim Augustinianorum delectatio, vel habet à naturâ suâ, quòd consensum voluntatis eliciat, si sit superior, et non eliciat, si sit inferior; vel neutrum habet à naturâ suâ: si prius dicatur, ipsum est systema Thomistarum: si posterius, ipsissimum est systema Molinæ vel Congruistarum. Ergo, etc.

2º Pariter systema Thomassini. Thomassinus enim, *dogm. Theol.* tom. 3, tract. 4, cap. 18, suum systema sic ipse paucis contrahit: *Ineluctabilis vis gratiæ victricis consistit in multitudine, varietate, consonantiâ, et conspiratione plurium auxiliorum interiorum exteriorumque, quorum singula seorsim frustrari possunt, quin et frustrantur quandoque per libertatis humanæ contumacem dissensum. At universa obstinatissimos quosque fatigant tandem, et multitudine, conspiratione, indefessâ oppugnatione suâ ad assensum tandem*

pertrahunt. Atqui, quantumvis existimet Thomassinus se hâc ratione median quasi viam aperuisse inter Thomistarum et Congruistarum sententias; ipse reverà in alterutram relabatur. Circa illam enim multitudinem, varietatem, consonantiam, et conspirationem plurium auxiliorum, in quibus reponit gratiam efficacem, idem instituetur dilemma, quod modò fuit circa victricem Augustinianorum delectationem institutum.

Fatemur quidem, nec ad Thomistarum, nec ad Congruistarum sententiam revocari posse systema Jansenii. Verùm cum, ex probatis, illud systema fuerit ab Ecclesiâ proscriptum; non est inter systemata catholica computandum.

Igitur eò reduci videtur tota quæstio præsens, utrùm gratia sit *ab intrinseco* efficax et sufficiens, ut volunt Thomistæ; vel *ab extrinseco* tantùm, ut contendunt Molina et Congruistæ.

Cùm autem, labente seculo XVI occasione citati libri Molinæ, *de Concordiâ*, etc., circa quæstionem illam gravissima in Hispaniis orta fuissent dissidia; Clemens VIII, S. pont., ut ea sedaret, anno 1598, indixit celebres illas Congregationes, quæ ab objecto suo dictæ sunt *de Auxiliis*; sibi que, novem et ampliùs annorum spatio, non interruptè successerunt.

In illis multùm quidem disputatum; sed nihil prorsus definitum. Ut igitur disputationibus finem imponeret Clementis VIII, post Leonem XI successor, Paulus V, mense Aug. anni 1607, rescriptum dedit, quo utrique parti sic permittit propriam tueri sententiam, ut simul utrique vetet, partem oppositam ullâ notare censurâ, vel probrosis afficere nominibus. Quinimò paulò post prohibuit idem pontifex, ne liber ullus circa hanc materiam typis mandaretur sine speciali licentiâ S. Sedis.

Si autem ipsa S. Sedes litem præsentem in suspenso reliquerit, nec eam dirimere tentabimus; nobisque sat erit, si præcipua partis utriusque momenta duplici paragrapho proferamus.

§ 1. Argumenta pro Thomistis adversus Molinam et Congruistas.

ARGUMENTUM I. — *Ex eo quòd novum sit systema Molinæ et Congruistarum.*

In his quæ spectant ad Religionem, quasi pro falsi habenda sunt quæcumque nova sunt et hactenùs inaudita. Atqui fatetur ipse Molina systema suum esse novum et incognitum PP. solumque confidit illud ab ipsis, si hujus habuissent notitiam, fuisse comprobandum.

Neque verò, inquit lib. de Concordiâ, etc., quæst. 25, art. 4, disput. 1, dubito quin ab Augustino et cæteris PP. unanimi consensu comprobata fuisset nostra de Prædestinatione sententia, ratioque conciliandi libertatem arbitrii cum divinâ gratiâ.

Respondent Congruistæ 1º, systema gratiæ congruæ non magis esse novum, quàm systema Præmotionis physici; apud veteres non legi quidem nomina gratiæ congruæ, scientiæ mediæ, et alia quibus utuntur Congruistæ; sed apud eosdem non magis istas occurrere loquendi rationes, *actus primus, actus secundus, sensus divisus, sensus compositus*, et alias quæ à Thomistis usurpantur; uno verbo, SS. PP. de solo gratiæ dogmate, non de illius operandi modo, fuisse sollicitos.

Respondent 2º systema non hoc ipso rejiciendum esse, quòd sit novum, nisi insuper alicui contradicat fidei principio. Atqui nedùm, inquit, gratiæ congruæ systema ulli fidei principio contradicat, consentit apprimè cum omnibus quæ circa gratiæ necessitatem, gratuitatem, efficaciam, etc., docet fides catholica.

ARGUMENTUM II. — *Ex eo quòd in systemate Congruistarum, non ipse Deus, sed sola hominis voluntas bonum operetur.*

Fide docemur non solam bonum operandi potentiam, sed et ipsum bonum opus à Deo provenire. *Deus est*, inquit Apost. Philip. 2, 13, *qui operatur in vobis et velle et perficere, pro bonâ voluntate.* Unde S. Aug. lib. *de Gratiâ et libero Arbitrio*, cap. 61: *Certum est nos velle cùm volumus: sed ille facit ut velimus bonum de quo dictum est... Deus est qui operatur in vobis velle et et operari: certum est nos facere cùm facimus; sed ille facit ut faciamus, præbendo vires efficacissimas voluntati, qui dixit: Faciam ut in justificationibus meis ambuletis.* Atqui tamen, si gratia per se non sit efficax et ex naturâ suâ, dabit quidem Deus boni operis possibilitatem, sed non ipsum dabit bonum opus, illudque solâ voluntas, gratiæ consentiendo, perficiet. Ergo, etc.

Respondent Congruistæ, id minimè fluere ex suo systemate. Quamvis enim, inquit, gratia congrua non à naturâ suâ habeat, ut bonum producat infallibiliter; habet tamen à suâ naturâ, ut voluntatem præveniat, excitet et elevet ad ordinem supernaturalem; in ipsiusque boni operis productionem plus influat quàm ipsa voluntas, secundùm illud Apost. 1 Cor. 15, 10: *Non ego autem, sed gratia Dei mecum.*

ARGUMENTUM III. — *Ex eo quòd in hoc systemate homo seipsum in negotio salutis ab alio discernat.*

Ad omnem hominem spectant hæc Apostoli verba 1 Cor. 5, 7 : *Quis te discernit? Quid autem habes quod non accepisti? Si autem accepisti, quid gloriaris, quasi non acceperis?* Atqui, si gratia non sit efficax ex natura sua, seu possit voluntas gratiæ consentiendo vel dissentiendo, illam pro nutu efficacem reddere vel inefficacem; qui per suum consensum eam reddet efficacem, seipsum, in ordine supernaturali, *discernet* ab eo qui per suum dissensum eandem reddet inefficacem, de illâque *discretionem*, tanquam de suo, poterit gloriari. Ergo, etc.

Respondent Congruistæ, eum qui, gratiæ consentiendo, illum reddit efficacem, non ideo seipsum ab eo *discernere*, qui gratiæ dissentiendo ipsam reddit inefficacem, seu merè sufficientem. Deus enim, pro *bonâ voluntate*, priori dedit gratiam, quâ non modo posset, sed et certò vellet bonum facere; alteri vero gratiam quâcum posset quidem, sed certissimè nollet bonum operari. Solus ergo Deus est, qui priorem hominem à posteriori *discrevit*; et quicumque sic discretus est, non in se ipso, sed in Domino de suâ *discretionem* debet gloriari. *Qui gloriatur, in Domino gloriatur* (1 Cor. 1, 31).

ARGUMENTUM IV. — *Ex eo quòd gratia congrua non sit gratuita.*

Docent enim Congruistæ Deum non decernere homini dare gratiam congruam, nisi postquam, ope *scientiæ mediæ*, certò viderit ipsum in tempore fore illi gratiæ consensurum. Atqui tali doctrinâ penitus destruitur gratiæ gratuitas. Ergo, etc.

Respondent Congruistæ, Deum quidem, priusquam decernat alicui homini dare gratiam congruam, ope *scientiæ mediæ* prævidere, ipsum isti gratiæ, si ei detur, certò fore consensurum; verum, non hæc futuri consensûs prævisione, sed solo voluntatis suæ beneplacito determinari ad talem gratiam tali homini conferendam. Spectant itaque *scientiam mediâ*, non ut motivum quo Deus ad suam gratiam, hoc potius quam illo modo, huic potius quam illi homini, dispensandam excitetur; sed ut merum medium quo in suæ gratiæ dispensatione dirigatur. Atqui tali doctrinâ Pelagianismus funditus concutitur, suaque divinis auxiliis gratuitas asseritur, non tollitur. Ergo.

ARGUMENTUM V. — *Ex eo quòd in systemate Congruistarum infallibilis non sit Dei præscientia.*

Tunc enim falli potest Dei præscientia, quando Deus ab æterno certò scire nequit, utrùm homo in tempore tali gratiæ consensu-

rus sit, aut dissensurus. Atqui, si divinorum auxiliorum efficacitas vel sufficientia, non ex illorum intrinsecâ naturâ, sed ex futuro voluntatis consensu vel dissensu depromatur, Deus ab æterno certò scire non potuit, utrùm homo in tempore tali gratiæ consentiret vel dissentiret; cùm liberi consensûs veritas in se non sit ab æterno determinata.

Respondent Congruistæ, ad hoc ut Deus infallibiliter cognoscat determinationes liberas creaturarum, sive absolutè, sive conditionatè futuras, minimè requiri, creaturis à Deo dari auxilia cum ipsarum determinationibus essentialiter connexa, quia, si ipsis fides, futuræ qualibet actiones libere, ex seipsis, ab omni-que præscindendo gratiæ operandi modo, suam veritatem determinatam habent ab æterno; sicut fusiùs exponitur in tract. *De Deo*, ubi de *Scientiâ Dei*.

ARGUMENTUM VI. — *Ex eo quòd in eodem systemate laudatur supremum Dei dominium in creatas voluntates.*

De fide est tale esse Dei dominium suæ voluntates creatas, ut nullus sit peccator, quantumvis obduratus, quem Deus non possit convertere, secundum illud August., *Enchirid.* cap. 98 : *Quis ita desipiat ut dicat Deum malas hominum voluntates, quas voluerit, quando voluerit, ubi voluerit, in bonum non posse convertere?* Atqui, si gratia ab extrinseco tantùm, ad mentem Congruistarum sit efficax, sup. oni poterit peccator sic obduratus, ut Deus illum non possit convertere. Nam peccator ille non potest à Deo converti, cui quantacumque gratia conversionis à Deo conferatur, ei certò resistet et inallibiliter. Atqui, si gratia à solo hominis consensu, habeat quòd sit efficax, et à solo dissensu quòd sit inefficax, seu purè sufficiens; sup. poni poterit peccator sic obstinatus ut quantacumque præveniatur gratiâ conversionis, contumaciter renuat ei consentire, quod sanè non eveniret, si daretur ipsi gratia per se efficax et independentem à consensu voluntatis.

Respondent Congruistæ 1º, argumentum illud esse solvendum in omni systemate catholico: cùm sit dogma fidei, à Trident. sess. 6, de *Justif.*, con. 4, confirmatum, *liberum hominis arbitrium à Deo motum et excitatum... posse dissentire, si velit.*

Respondent 2º, in præsentì quidem statu non posse supponi peccatorem sic obduratum ut cuilibet, quantumvis efficaci, conversionis gratiæ dissentiat: cùm de fide sit talem hominem hactenus à Deo non fuisse creatum, nec

unquàm ab ipso fore creandum. Sed contendunt talem hominem non esse metaphysicè impossibilem. Si enim absolutè et pro quolibet statu possibili repugnaret talis hominis suppositio, maximè quia in Deo impotentiam argueret. Atqui licet, inquit Congruistæ, supponeretur homo, qui per nullam gratiam ejus cum libertate compatibilem converti posset, non idcirco Deus minùs esset omnipotens. Hujus enim hominis conversio non idcirco foret impossibilis, quòd Deus absolutè non posset illum convertere; sed quòd eum, ex hypothesi, convertere nollet, ipsius violando libertatem; adeò ut si ejusdem libertati vim aut minimam inferre vellet, illum certò et infallibiliter converteret.

ARGUMENTUM ULTIMUM. *Ex eo quòd in systemate Molinæ et Congruistarum facilior sit, quàm par est, humanæ libertatis cum divinâ gratiâ conciliatio.*

Omnes SS. PP. ac præsertim Augustinus, maximam semper difficultatem experti sunt in conciliandâ gratiâ cum humanâ libertate. Atqui, si non ex seipsâ, sed ex solo consensu voluntatis, gratia sit efficax, nulla prorsus erit difficultas in illâ conciliandâ cum hominis libertate.

Respondent Congruistæ 1^o, argumentum adversus Thomistas retorquendo. SS. PP. maximam quidem difficultatem, sed non absolutam impossibilitatem experti sunt in conciliandâ gratiâ cum libertate. Atqui in systemate Thomistarum, non modò difficile, sed prorsus est impossibile conciliare gratiam cum libero arbitrio. Ergo, etc.

Respondent 2^o, difficultatem conciliandæ gratiæ cum libero arbitrio, non tantum ex efficacia gratiæ, sed etiam, ac præsertim ex ejus necessitate profluere: cum Pelagianî, gratiæ necessitatem adeò respuerent, quòd vellent talem necessitatem compati non posse cum humanâ libertate. Jam autem, inquit Congruistæ, non minor est gratiæ necessitas in nostro, quàm in alio quolibet systemate catholico. Ergo, etc.

Respondent 3^o, ipsam etiam gratiæ efficacitatem, in suo systemate, non ita facilitè conciliari posse cum hominis libertate. Cum enim in hoc systemate gratiæ efficacia ex divinâ præscientiâ repetatur; in eo proinde tanta est, ad minus, libertatis cum gratiæ efficaciâ, quàm cum Dei præscientiâ conciliandæ difficultas. Atqui nemo diffitebitur humanæ libertatis cum divinâ præscientiâ concordiam gravissimis obnoxiam esse difficultatibus, tantis nimirum, ut

Tullius, teste Aug. lib. 5 de Civitate Dei, cap. 9, ad servandam homini libertatem, Deo ademerit præscientiam; nosque fecerit sacrilegos, ut faceret liberos.

§ 2. Argumenta pro Molinâ et Congruistis adversus Thomistas.

ARGUMENTUM I. — *Ex verbis Christi Domini ad Corozaitas et Bethsaitas.* Christus Dominus, Matth. 11, 21, sic objurgat Corozaitas et Bethsaitas: *Væ tibi, Corozaim, væ tibi, Bethsaida, quia si in Tyro et Sidone factæ essent virtutes, quæ factæ sunt in vobis, olim in cilicio et cinere pœnitentiam egissent.* Atqui si admittatur systema Thomistarum, injusta erit hæc Christi Domini contra Corozaitas et Bethsaitas objurgatio. Corozaitas enim et Bethsaitas non nisi summâ cum injustitiâ, præ Tyriis et Sidoniis, objurgat Christus Dominus, si Tyrii et Sidonii, ex hypothesi quòd vidissent Christi miracula, conversionis gratiam habuissent intrinsecè majorem illâ, quam habuerunt Corozaitæ et Bethsaitæ, quando viderunt ejusdem miracula. Atqui reipsâ, in systemate Thomistarum, Tyrii et Sidonii, si vidissent Christi miracula, conversionis gratiam habuissent majorem illâ, etc. Tyriis enim et Sidoniis, si vidissent Christi miracula, data fuisset gratia efficax conversionis, siquidem, ex suppositione, sese realiter convertissent, atque in cilicio et cinere pœnitentiam egissent.

Corozaitis autem et Bethsaitis, ubi viderunt eadem miracula, non data fuit nisi gratia sufficiens conversionis: siquidem, ex hypothesi, non conversi sunt. Atqui principium est apud Thomistas fundamentale, gratiam efficacem, esse naturâ suâ, et abstractivè ab omni consensu voluntatis, intrinsecè majorem gratiâ merè sufficienti. Ergo, etc.

Respondent Thomistæ, totum illud argumentum adversus ipsos Congruistas posse retorqueri. Nam, inquit, ipsos juxta Congruistas, Tyriis et Sidoniis, si vidissent Christi miracula, Deus gratiam dedisset, quâ certò fuisset et infallibiliter convertendi; dùm, juxta eosdem, Corozaitis et Bethsaitis, ubi viderunt eadem miracula, Deus non dedit nisi gratiam, quâ cum certum erat ipsos non esse convertendos. Atqui hoc posito non facilius est Congruistis quàm Thomistis, prædictam objurgationem ab injustitiâ vindicare. Ergo, etc.

Reponunt Congruistæ, summam esse hæc in parte discrepantiam inter systema suum et systema Thomistarum. Cum enim, inquit,

in nostro systemate gratia efficax, non penes intrinsecam naturam, differat à sufficienti; possumus supponere gratiam conversionis concessam Corozaitis et Bethsaitis, quamvis merè sufficientem, intrinsecè tamen et independentem ab omni consensu voluntatis, non minorem, imò fuisse majorem gratiâ conversionis efficaci, quæ concessa fuisset Tyriis et Sidoniis, si vidissent Christi miracula. Atqui posito quòd gratia conversionis data Corozaitis et Bethsaitis, Christi miracula videntibus, intrinsecè, ab omni præscedendo consensu voluntatis, non minor, imò forsàn major fuerit gratiâ quâ conversi fuissent Tyrii et Sidonii, si eadem vidissent miracula; priores jam, prae posterioribus, meritò potuerunt à Christo reprehendi. Ergo, etc.

ARGUMENTUM II. — *Ex eo quòd in systemate Thomistarum non detur gratia verè sufficiens.*

Illa gratia non est verè sufficiens, quæ non dat homini veram boni faciendi potentiam. Atqui talis est gratia sufficiens Thomistarum. Si enim homini daret veram bonum operandi potentiam, vel immediatam, vel mediatam. Atqui nec, etc.

1º Quidem gratia sufficiens Thomistarum non dat homini potentiam immediatam bonum agendi. Potestas enim immediata boni faciendi, quam confert gratia sufficiens Thomistarum, juxta ipsos, talis est ut metaphysicè repugnet ipsam immediatè in actum erumpere, adeò ut, si hæc potestas in actum erumperet immediatè, destrueretur ipsa natura gratiæ sufficientis. Atqui potestas immediata cujus actus immediatus essentialiter repugnat, non est vera, sed chimerica et contradictoria potentia. Ergo, etc.

2º Nec magis dat homini potentiam mediatam bonum operandi. In tantum enim ex gratiâ sufficienti Thomistarum, homo veram haberet, saltem mediatam, boni faciendi potentiam, in quantum ope gratiæ sufficientis accersere posset præmotionem physicam quæ, docentibus Thomistis, ad cujuslibet boni productionem essentialiter requiritur. Atqui homo solà donatus gratiâ sufficienti Thomistarum, nunquàm accersere poterit præmotionem physicam. Si enim illam accerseret, vel per actum positivum, vel per actum negativum, vel denique per *non actum*. Atqui per nullum horum accersiri potest præmotio. Non per actum positivum: cum, juxta Thomistas, ad quemlibet actum positivum essentialiter ipsa

prærequiratur præmotio. Non per actum negativum; nullus enim concipitur actus voluntatis merè negativus; cum sit consensus vel dissensus. Non denique per *non actum*: siquidem nibili nulla proprietas.

Respondent quidem Thomistæ, Deum homini gratiam sufficientem habenti offerre gratiam efficacem, seu præmotionem, quam infalibiliter obtineret, si non resisteret Deo illam offerenti, hanc autem *non resistantiam* actum esse purè negativum. Verùm respondent Congruistæ, hanc voluntatis *non resistantiam* actum esse verè positivum. Nam, inquit, voluntatem humanam Deo gratiam efficacem offerenti non resistere, idem est ac ipsi consentire. Atqui consensus quilibet voluntatis actus est positivus, ad quem producendum, juxta Thomistas, absolutè requiritur præmotio.

ARGUMENTUM III. — *Ex eo quòd in eodem systemate gratia efficax sit necessitans.*

Juxta Thomistas, sic essenziale est hominem agere cum gratiâ efficaci, seu præmotione physica, ut, si cum illà non ageret, hoc ipso præmotionis essentia mutaretur. Atqui gratia, cujus ad essentiam pertinet ut cum illà voluntas agat, voluntatem profectò necessitat ad agendum. Aliàs dicendum esset hominem posse rerum essentiis refragari. Ergo, etc.

Respondent 1º Thomistæ, essenziale quidem esse ut homo agat cum præmotione; sed non minùs essenziale esse, ut cum illà possit non agere. Quemadmodum, quando Petrus liberè sedet, sic essenziale est ipsum sedere, ut non minùs essenziale sit illum posse non sedere: alioquin non sederet liberè.

Respondent Congruistæ, à contradictione non posse excusari, quicumque dixerit cum Thomistis essenziale esse ut voluntas agat sub præmotione physica, simul et ut possit sub illà non agere. Nam, inquit, contradictorium est hominem posse subvertere rerum essentias. Atqui hominem posse non agere etiam cum essenziale est ut agat, idem est ac ipsum posse rerum essentias mutare. Ergo, etc.

Ad exemplum verò Petri liberè sedentis, dicunt illam paritatem ipsis Thomistis adversari. Nam, inquit, ubi semel Petrus sese liberè determinavit ad sedendum, post hanc ejus determinationem, essenziale est, non modò ut sedeat, sed etiam ut non possit non sedere: cum contradictorium sit, eum, qui liberè sedere supponitur, post hanc ipsam suppositionem, adhuc posse non sedere. Si verò

Petrus nihilominus liberè sedeat, illud ex eo solo fit, quòd sedendi necessitas in ipso non aliam causam habeat, quàm suppositam ejus liberam determinationem. Cum igitur è contrario necessitas agendi sub præmotione physica, ex hac ipsâ præmotione, non ex liberâ determinatione voluntatis oriatur; sub tali necessitate constituta voluntas, nullo sensu libera dici potest.

Respondent 2^o Thomistæ voluntatem, non quidem *in sensu composito* præmotionis, id est, præsentis præmotione; sed tamen in ejusdem *sensu diviso*, id est, eadem absente, posse supponi bonum non agere; quod unum sufficere volunt ad salvandam libertatem.

Reponunt Congruistæ, Concil. Trid. sic decernere contra Lutherum et Calvinum, sess.6, de Justif., can.4: *Si quis dixerit liberum hominis arbitrium à Deo motum et excitatum, nihil cooperari assentiendo Deo excitanti.... Neque posse dissentire, si velit.... Anathema sit.* Quibus verbis, inquirunt, definitur hominem, etiam sub gratiâ efficaci constitutum, in ipsius proinde *sensu composito*, eidem dissentire posse, si velit.

Respondent iterùm iidem Congruistæ, tali argumento probari posse beatos fruantes in cælis visione Dei intuitivâ, liberos esse ad Deum amandum vel non amandum; hominem è catenis constrictum, liberum esse ad ambulandum. Sancti enim in cælis existentes, non *in sensu diviso*, sed duntaxat *in sensu composito* visionis intuitivæ, ad Deum amandum necessitantur: homo verò pedibus ligatus, in solo *sensu composito* compedum, necessitatur ad non ambulandum.

Respondent 3^o Thomistæ, suam præmotionem in solum actum cadere, non in potentiam, quam completam supponit et expeditam, id est, perfectè liberam ad agendum vel non agendum.

Reponunt Congruistæ, sibi contradictorium videri, præmotionem physicam in actum influere, nec ipsâ tamen affici potentiam. Juxta Thomistas enim, est de naturâ præmotionis ut actum eliciat ex potentiâ. Atqui, si fides Congruistis, præmotio physica vi naturæ suæ non potest actum elicere ex potentiâ, quin ipsam afficiat potentiam, et ita quidem ut illam ad agendum necessitet.

Ex duobus præcedentibus argumentis unum efformant Congruistæ ut probent, systemate Thomistarum prorsus perimi hominis libertatem; illudque sic proponunt: Si in systemate

Thomistarum homo liber esset; vel sub gratiâ sufficienti, vel sub gratiâ efficaci. Atqui in systemate Thomistarum, homo sub neutrà gratiâ liber esse potest: non sub gratiâ sufficienti, cum ex argumento 2, gratia sufficiens Thomistarum non det homini veram boni faciendi potentiam; non sub gratiâ efficaci, cum ex argumento 3, gratia efficax Thomistarum imponat homini veram boni faciendi necessitatem. Ergo, etc.

NOTA. Cum in Scripturis et PP. scriptis dogmata fidei, non scholarum placita consignentur; superfluum duximus afferre Scripturarum et Patrum, Augustini præsertim, testimonia, quibus hinc Thomistæ, et inde Congruistæ suam respectivè sententiam adstruere moluntur. Quæ enim à Thomistis proferuntur ad probandum gratiam esse *ab intrinseco* efficacem, id unum probant, quod fides docet, gratiæ efficaci certò et infallibiliter consentire voluntatem: quæ verò à Congruistis, ad demonstrandum gratiam esse *ab extrinseco* tantùm efficacem, id unum demonstrant, quod item docet fides catholica, sub motione gratiæ efficacis illæsam manere hominis libertatem.

Cæterùm parvi refert quænam ex duabus expositis sententiis alteri præferatur; modò pro certo habeatur, *præmotionem physicam* Thomistarum toto cælo distare à *delectatione relativè victrici* Jansenii; quod ut magis ac magis innotescat

QUÆRES an sit essenziale discrimen inter systema Thomistarum et systema Jansenii?

RESPONSIO. Essentialis est utriusque systematis differentia. Duo enim illa systemata differunt essentialiter, quorum in uno, dedita operâ, defenduntur propositiones ab Ecclesiâ damnatæ; dùm in alio conceptis verbis respuuntur eadem propositiones; ex eoque, ad summum, eruerentur per consequentias, quas hujus systematis defensores sincerè dilitentur. Atqui in systemate Jansenii, dedita operâ, etc., dùm in systemate Thomistarum conceptis verbis, etc. 1^o Quidem Jansenius apertè docet propositiones, quas proscripsit Ecclesia. Vidimus enim, in parte historicâ, totum systema *delectationis relativè victricis* ad duas istas propositiones revocari: primam in præsentis statu naturæ lapsæ nullam esse gratiam purè sufficientem; secundam in eodem statu gratiam efficacem esse necessitantem. Atqui, ex dictis in duplici præcedenti articulo, duæ illæ propositiones sunt hæreticæ, et quæ tales ab Ecclesiâ proscriptæ. Ergo 1^o, etc.

2^o Thomistæ duas illas propositiones aperte rējiciunt. Nullum enim reperias Thomistam genuinum, qui pro fidei dogmatibus hæc duo non habet: primum dari gratias merè sufficientes, quæ nempe careant effectu, ad quem producendum veram et *relativam* conferunt potestatem; secundum sub motione gratiæ efficacis completam et *relativam* ad oppositum manere potentiam.

3^o Si Thomistis objiciant Congruistæ, ex ipsorum systemate duas prædictas fluere propositiones, reponunt hanc criminationem nullo prorsus fundamento niti, nihilque non moliantur, ut ab istis consecrariis suum systema vindicent: inò palam profitentur illud à se statim esse deserendum, si sibi comprobetur ex eo fluere vel unicam è propositionibus, quas in Jansenio damnavit Ecclesia.

INDEX.

Quæstio proœmialis. De nomine, notione, ac divisione gratiæ, 11. — Art. I. De variâ nominis gratiæ acceptione, *Ibid.* — Art. II. De definitione gratiæ, 14. — Art. III. De existentia gratiæ, 50. — Art. IV. De divisione gratiæ, 51. — Concl. prima. Legitima est et adæquata divisio gratiæ, in gratiam gratis datam, et gratum facientem, 56. — Concl. secunda. Conveniens est ac legitima gratiæ gratis datæ divisio, secundum quam novem ipsius species enumerantur ab Apostolo 1 Cor. 12, nempe, fides, sermo sapientiæ, sermo scientiæ, gratia sanitarum, operatio virtutum, prophetia, discretio spirituum, genera linguarum, et interpretatio sermonum, 58. — Concl. tertia. Gratia gratum faciens perfectior est atque dignior gratiâ gratis datâ, 61.

Pars historica. De variis circa gratiam erroribus, 87. — Dissert. I. De Pelagianis, *Ibid.* — Cap. I. De primis auctoribus et præcipuis defensoribus hæresis Pelagianæ, 88. — Art. I. De Pelagianorum parentibus ac magistris, *Ibid.* — Art. II. De Pelagii discipulis, 89. — Cap. II. De Pelagianæ hæreseos impugnatoribus, 91. — Art. I. De Conciliis in causâ Pelagianorum celebratis, 92. — Art. II. De Constitutionibus SS. Pontificum contra Pelagianos, 107. — Art. III. De dogmaticis SS. Patrum libris adversus Pelagianos, 110. — Parag. I. De scriptis S. Hieronymi contra Pelagianos, 111. — Parag. II. De Orosii scriptis adversus Pelagianos, 112. — Parag. III. De Sixto, presbytero romano, *Ibid.* — Parag. IV. De Mario Mercatore, *Ibid.* — Art. IV. De imperatorum edictis adversus Pelagianos, 114. — Art. V. De subscriptionibus in causâ Pelagianorum exactis, 116. —

Cap. III. De erroribus Pelagianorum, 119. — Errores Pelagianorum circa peccatum originale, Errores Pelagianorum circa vires liberi arbitrii, Errores Pelagianorum circa gratiam, — Cap. IV. Utrum Pelagius veram et internam voluntatis gratiam aliquando tandem agnoverit, 123. — Concl. I. Pelagius tandem aliquando agnovit veram et internam revelationis gratiam, tum ex parte objecti melius propositi, tum ex parte potentæ, seu intellectûs ad credendum divinitûs adjuncti, 132. — Concl. II. Pelagius ante condemnationem suæ hæreseos sub Zozimo, veram et internam voluntatis gratiam nusquam admisit ad bonum opus, sive inchoandum, sive etiam complendum ac perficiendum, 133. — Concl. III. Post decretum Zozimi Julianus hæresim Pelagianam utcumque temperavit, internam voluntatis gratiam admittendo, at triplici infectam vitiis, 133. — Solvuntur objectiones, 138. — Cap. V. Utrum Pelagiani admiserint gratiam habitualement, et virtutes infusas, 143. — Concl. Pelagiani nec gratiam interiùs sanctificantem seu habitualement, nec virtutes supernaturales infusas agnovère, *Ibid.* — Cap. VI. De quâ gratiæ specie contentio fuerit sanctum Augustinum inter et Pelagianos, 146. — Concl. I. Gratia quam propugnavit S. Augustinus contra Pelagianos, ea non est quæ virtute suâ invictâ, insuperabili et indeclinabili, voluntatem ad bonum necessariò determinat et applicat ad sensum Jansenii, *Ibid.* — Concl. II. Gratia de quâ potissimum contra Pelagianos agebat S. Augustinus, non est habitualis, sed actualis, 147. — Concl. III. Gratia, de quâ tam gravis ac diuturna exarsit contentio sanctum Augustinum inter et Pelagianos,

non est gratia ex se efficax, sed generatim actualis gratia voluntatis necessaria et gratuita, 148. — Solvuntur objectiones, 152. — Cap. VII. Compendiosa proponitur series chronologica Operum S. Augustini adversus hæresim Pelagianam, 159. — Dissert. II. De Semipelagianis, 164. — Cap. I. Qui fuerint Semipelagiani, *Ibid.* — Cap. II. De præcipuis Semipelagianorum debellatoribus, 166. — Cap. III. De Semipelagianorum erroribus, 168. — Concl. I. Semipelagiani omnes gratiæ interioris prævenientis necessitatem ad initium fidei constantissimè negaverunt, 175. — Concl. II. Semipelagiani nullam admiserunt necessitatem gratiæ interioris ad perseverandum in fide, 178. — Solvuntur objectiones, *Ibid.* — Dissert. III. De monachis Adrumetinis, 192. — Art. I. Compendiosa hujusce dissidii delineatio, *Ibid.* — Art. II. Quis fuerit Adrumetinorum monachorum error, 195. — Concl. Adrumetini monachi Prædestinantiæ hæreseos auctores vel præformatores non fuere, sed Pelagianâ potius labe infecti, *Ibid.* — Dissert. IV. De Prædestinantis quinti seculi, 195. — Concl. I. Prædestinantiæ hæresis exorta non est in Africâ in monasterio Adrumetino, 197. — Concl. II. Prædestinantiæ hæresis non emerit in Galliis Cœlestino I summo Pontifice; neque adversus eam SS. Augustini aut Cœlestini opem imploravere Prosper et Hilarius, *Ibid.* — Concl. III. Prædestinantiæ hæresis non est figmentum, neque mera calumnia quâ Massilienses S. Augustinum ejusque discipulos infamare studuerunt, uti placet Jansenio ejusque apologistis; sed vera et realis hæresis in Galliis quinto seculo à Lucido quodam presbytero, Monimo et aliis nonnullis propugnata, 198. — Solvuntur objectiones, 200. — Dissert. V. De Prædestinantis noni seculi, 210. — Cap. I. De Gotescalco, *Ibid.* — Art. I. Contracta historiæ Gotescalci delineatio, *Ibid.* — Art. II. An extinctam Prædestinantiæ hæresim renovaverit Gotescalcus, 212. — Concl. Gotescalcus diu sopitam Prædestinantiæ hæresim seculo nono in Galliis regnante Carolo Calvo exsuscitavit, *Ibid.* — Solvuntur objectiones, 215. — Art. III. An errores suos tandem revocaverit Gotescalcus, 218. — Cap. II. De scriptoribus noni seculi in causâ Gotescalci, *Ibid.* — Concl. I. Sex posteriores auctores errore facti non nihil patrocinauti sunt personæ Gotescalci, *Ibid.* — Concl. II. Prædicti sex auctores erroribus

Gotescalci nequaquam favent, 219. — Cap. III. De Ecclesiâ Lugdunensi, 223. — Concl. Ecclesiâ Lugdunensis nec reipsâ adversatur capitulis Carisiacis, nec Gotescalci, aliorumque Prædestinantiæ erroribus adhæsit, 224. — Analysis libri *De tribus Epistolis*, *Ibid.* — Analysis libri *De tenendâ veritate*, 229. — Solvuntur objectiones. — Cap. IV. De concilio Valentino, 244. — Concl. I. Synodus Valentina favit personæ Gotescalci, non autem ipsius doctrinæ, *Ibid.* — Concl. II. Synodus Valentina non in rei substantiâ, sed in quibusdam duntaxat loquendi modis recessit à doctrinâ Capitulum Carisiensium, 245. — Cap. V. De aliis synodis in causâ Gotescalci habitis, 249. — Dissert. VI. De Wiclefistis, 250. — Cap. I. De Wiclefo ejusque defensoribus, 251. — Cap. II. De Wiclefi erroribus, 252. — Cap. III. De hæreseos Wiclefi damnatione, 253. — Dissert. VII. De Lutheranis, 254. — Cap. I. De Luthero ejusque discipulis, *Ibid.* — Cap. II. De erroribus Lutheri, 257. — Parag. I. Errores Lutheri circa prædestinationem, *Ibid.* — Parag. II. Errores circa substantiam gratiæ, *Ibid.* — Parag. III. Errores circa modum agendi gratiæ, 258. — Parag. IV. Errores circa liberum arbitrium, 260. — Parag. V. Errores circa justificationem, 262. — Cap. III. De multiplici Lutherani hæreseos damnatione, 265. — Dissert. VIII. De Calvinio, 268. — Cap. I. De Calvinio, *Ibid.* — Cap. II. De Calvinii erroribus, 270. — Cap. III. De Calvinistarum dissidiis, 273. — Cap. IV. De colloquiis, synodis, et fidei professionibus in causâ Calvinianâ habitis, 275. — Dissert. IX. De Michaeli Baio, 279. — Cap. I. Historica causæ Baianæ synopsis, *Ibid.* — Parag. I. Exordium causæ Baianæ, *Ibid.* — Parag. II. Progressus controversiæ Baianæ, 281. — Parag. III. Exitus Baianæ controversiæ, 287. — Cap. II. De systemate Baiano, 289. — Parag. I. Systema Baianum circa statum naturæ innocentis, 290. — Parag. II. Systema Baianum circa peccatum originale, 292. — Parag. III. Systema Baianum circa peccatum personale, 293. — Parag. IV. Systema Baianum circa libertatem, 297. — Parag. V. Systema Baianum circa charitatem, 298. — Parag. VI. Systema Baianum circa justificationem, 301. — Parag. VII. Systema Baianum circa meritum operum, 303. — Cap. III. De Bullis summorum Pontificum in causâ Baii, 306. — Art. I. An Bulla Urbani VIII sit subreptitia, 307. — Conc. Bulla Urbani VIII non est subreptitia, *Ibid.* — Art. II. An Bulla Urbani sit lex sanctæ Sedis, 310. — Concl. Bul-

la Urbani renovans Pianam, est lex sanctæ Sedis, *Ibid.* — Art. III. An Bulla Urbani sit lex Ecclesiæ Gallicanæ, *Ibid.* — Concl. Bulla Urbani VIII quoad doctrinam spectata, lex est Ecclesiæ Gallicanæ, 511. — Art. IV. An Bulla Urbani VIII sit lex Ecclesiæ universalis, 515. — Concl. Bulla Urbani quoad doctrinam spectata, lex est Ecclesiæ universalis, *Ibid.* — Solvuntur objectiones, 521. — Art. V. An Bulla Urbani VIII sit lex dogmatica, 529. — Concl. Bulla Urbani vera est lex dogmatica, verum est dogmaticum iudicium, 550. — Art. VI. Quis sit genuinus ac legitimus prædictæ Bullæ sensus, 551. — Concl. Famosum comma in Bullâ Pii V collocari debet post verbum *possent*, *Ibid.* — Solvuntur objectiones, 554. — Art. VII. Nonnulla proponuntur et expenduntur quæsitæ ad perfectam dictarum Pii V, Gregorii XIII et Urbani VIII Bullarum intelligentiam planè necessaria, 540. — Dissert. X. De Congregationibus de *Auxiliis*, 539. — Art. I. Occasio Congregationum, *Ibid.* — Parag. I. Controversiæ in Belgio habitæ, *Ibid.* — Parag. II. Controversiæ in Hispaniâ habitæ, 564. — Art. II. Congregationes de *Auxiliis*, 569. — Art. III. Exitus Congregationum, 580. — Dissert. XI. De Jansenio, 589. — Cap. I. Jansenianæ causæ historica, 590. — Art. I. Persona Jansenii, *Ibid.* — Art. II. Liber Jansenii cui titulus, *Augustinus*, 592. — Art. III. De iis quæ præcessere iudicium romanum de quinque Jansenii Propositionibus, 594. — Art. IV. De iis quæ pendente romano examine contigere, 597. — Art. V. De iis quæ subsecuta sunt Innocentii X iudicium, 598. — Cap. I. Discutiuntur critica historiæ puncta, 410. — Art. I. De Innocentii X Bullâ, *Ibid.* — Concl. I. Quinque Propositiones in romano examine discussæ sunt in sensu Jansenii, *Ibid.* — Concl. II. Quinque Propositiones ab Innocent. X in sensu Jansenii damnatæ fuerunt, 415. — Concl. III. Canonicum fuit et æquissimum Innocentii X de quinque Propositionibus in sensu Jansenii iudicium, 421. — Concl. IV. Summa est et irrefragabilis Constitutionis Innocentii X auctoritas, 424. — Concl. V. Decreto suo authentico et summæ auctoritatis assecutus est romanus pontifex et proscripsit proprium, naturalem et legitimum libri Jansenii sensum, 425. — Art. II. De quinque Jansenianorum articulis, 440. — Concl. Fictitia est quam venditant Janseniani quinque articulorum approbatio, 441. — Art. III. De pace Clementis IX, 449. — Concl. I. Clemens IX reipsâ existimavit quatuor episcopos purè et simpliciter subscripsisse

formulario Alexandri VII, 450. — Concl. II. Clemens IX pro suâ prudentiâ aliud suspicari non potuit, quàm quod reverà pro certo habuit, nimirum quatuor episcopos purè et simpliciter subscripsisse, 457. — Concl. III. Etsi daretur adversariis (quod tamen falsum esse jam demonstravimus) Clementem IX non ignorasse factam à quatuor episcopis juris à facto distinctionem, nihil tamen inde colligi posset in gratiam silentii religiosi, 464. — Solvuntur objectiones, 467. — Art. IV. De Brevibus Innoc. XII, 492. — Concl. Ex Brevibus Innocentii XII ad Belgii episcopos scriptis nihil prorsus colligi potest in gratiam silentii religiosi circa factum Jansenii, *Ibid.* — Art. V. De Clementis XI Bullâ *VINEAM DOMINI*, etc., 497. — Concl. Bulla *Vineam Domini* decretoriè pronuntiat ac definit expressè, silentium, ut vocant, religiosum, prorsus insufficiens esse circa dogmaticum Jansenii factum, 499. — Cap. III. De systemate Jansenii, 517. — Art. I. De principiis systematis Jansenii, 518. — Parag. I. Natura delectationis, *Ibid.* — Parag. II. Divisio delectationis, *Ibid.* — Parag. III. Necessitas delectationis, 520. — Parag. IV. Virtus et modus agendi delectationum, 525. — Parag. V. De potentiâ absolutâ et relativâ, 524. — Utrum Jansenius admiserit potentiam absolutam, 526. — Concl. Jansenius in voluntate inferiori delectatione, v. g., cœlesti instructâ ultrò agnovit absolutam, sensu mox exposito, ad opus bonum potentiam, *Ibid.* — Utrum Jansenius admiserit potentiam relativam, 531. — Concl. Jansenius in ipsâ voluntate inferiori duntaxat delectatione instructâ nec agnovit, nec in suo systemate agnoscere potuit veram ac relativam, sensu antea exposito, ad opus bonum potentiam, *Ibid.* — Parag. VI. An delectatio superior Janseniani systematis basis sit ac fundamentum, 538. — Concl. Delectatio superior seu relativè victrix, prout hactenus exposita fuit, Janseniani systematis basis est ac fundamentum, *Ibid.* — Parag. VII. Janseniani systematis contracta delineatio, 539. — Art. II. De consecrariis Janseniani systematis, 540. — Parag. I. An delectatio superior, seu relativè victrix Janseniana, basis sit, fundamentum ac principium ex quo quinque Propositiones necessariò fluant, 541. — Concl. Delectatio superior, seu relativè victrix Janseniana, fons est, radix et origo ex quâ quinque Propositiones necessariò dimanant, *Ibid.* — Parag. II. De quinque Propositionibus Jansenii, 548. — Prima Propositio: Aliqua Dei præcepta, etc., *Ibid.*

— Secunda Propositio : Interiori gratiæ, 553.
 — Tertia Propositio : Ad merendum et demerendum, etc. 559. — Quarta Propositio : Semipelagiani admittebant, etc., 574. — Quinta Propositio : Semipelagianum est dicere, etc., 576. — De discrimine systematis Janseniani à systematibus præmotionis physiciæ, et delectationis absolutæ vitricis, 585. — Conclusio I. Jansenii systema à Thomistico longè latèquè distat, *Ibid.* — Concl. II. Jansenii systema plurimùm differt à systemate Augustinianorum qui gratiæ efficaciam in delectatione simpliciter et absolutè vitrici constituunt, 589. — Solvuntur objectiones, 590. — Disputatio XII. De Quesnello, 595. — Art. I. Historica causæ Quesnellianæ Synopsis, 596. — Parag. I. Persona Quesnelli, *Ibid.* — Parag. II. De Quesnelli libro, cui titulus, *Le nouveau Testament en Français*, avec des réflexions morales, etc., 602. — 1^o Quæ fuerit prima libri Observationum moralium origo? *Ibid.* — 2^o Quis fuerit præfati Operis progressus, quæve ipsi subinde accesserint additamenta? 603. — 3^o Quid sentiendum sit de prætensâ illâ generali, quam... celebriores Quesnellistæ ubique jactantiùs venditant libri Reflexionum moralium per 40 annos approbatione; ab anno scilicet 1671 ad annum 1711, quo Opus ad R. Pontificem solemniter delatum fuit, 604. — 4^o Quid pronuntiandum de jactatâ adeò à Quesnellistis libri Observationum justificatione, sub nomine Illustriss. Bossuetii... editâ, 609. — 5^o Quis demùm fuerit dicti libri exitus, sors ac fortuna, 614. — Parag. III. De iis quæ subsecuta sunt Clementis XI damnatorium de Quesnelli libro judicium, 616. — Epôcha I. De iis quæ à Constitutione Unig. ad appellationem usque quatuor Episcoporum gesta sunt, Comitia Cleri Gallic. an. 1713, Regiæ pro Constitutionis Unig. promulgatione Litteræ, Comitiorum ad Pontificem, et Pontificis ad Comitia Epistolæ, Constitutio Unig. à 410 et ampliùs Præsulibus acceptata, Præsulum Bullæ refragantium Mandata Romæ confixa, S. Facultas Parisiensis Bullam suscipit, idem præstitit cæteræ per Regnum et Orbem sparsæ S. Facultates. Moritur anno 1715. Rex Christianissimus. In Comitiiis ejusdem anni duo à Novatoribus maximè accepti damnantur libelli : *Les Hexaples*, etc. et *le Témoignage de la vérité*. Variæ pro reducendis ad officium refractariis, habitiæ collationes, *Ibid.* — Epôcha II. De iis quæ ab interjectâ appellatione 1717. ad Concilium usque Ebredunense 1727 contingere. Quatuor Episcoporum provocatio an.

1717. Memorialia Præsulum Gallicanorum supremo Regni Moderatori oblata, contra Appellantium molitiones, Card. Noallii et quatuor Episcop. provocaciones Romæ proscriptæ. Eod. an. 1718 appellationes à 50 Episcopis reprobatae. Corpus doctrinale Card. Noallii, 622 et seq. — Anno 1720 novo Diplomate Regio confirmata in toto Regno Bullæ auctoritas : interdicta ab eâ qualibet sub quovis prætextu appellatio. Moritur Clemens XI, succedit Innocentius XIII. Is decessoris vestigiis insistens Bullam auctoritate Apostolicâ tuctur. Bulla Unig. Ecclesiæ et Regni lex : ex Gallic. Episcopis, ipsoque etiam Rege Christianissimo. Innocentio XIII sufficitur Benedictus XIII; Romæ convocat Concilium an. 1725; hæc in synodo Constituit. Unig. observantia commendata assertaque debita ipsi obedientia. Bulla Unig. iterùm utrâque potestate Regni et Ecclesiæ lex declarata. Famosi 12. Articuli an. 1727. Romæ vulgati, falsò Parisiis perhibentur Romæ approbati. Scriptum ementitam S. Pontif. approbationem referens, Decreto Regio proscriptum. Duodecim articulorum pravitates et vitia, Cardinal. Epist. et Episc. Mandatis detecta. Concilium Avenionense an. 1725 convocatum : in eo Constituit. Unig. observantia atque obedientia... plurimùm celebrata. Cleri Gallicani Statutis Regiisque Editis rursus Bullæ Unig. firmata auctoritas, *Ibid.* — Epôcha III. De iis quæ ab indictâ Ebredunensi Synodo, et deinceps ad nostra usque tempora subsecuta sunt. Ebredunensis Concilii convocatio. Lata in personam et nstructionem Senecensis Episcopi sententia. Dictæ sententiæ confirmatio, simul et Decretorum Concilii promulgatio. Acta Concilii Pontificiâ auctoritate firmata, *Ibid.* — Regia accedit auctoritas. Causidicorum Parisiensium adversus Ebredunense Concilium consultatio. Duodecim Episcoporum in gratiam Senecensis Episcopi ad Regem Epistola; Gallicanorum Præsulum contra Causidicorum Parisiensium Consultationem judicium; Regium adversus eandem consultationem Edictum. A Præsulibus Gallicanis vindictam Ebredunensis Synodi auctoritas. Interjectæ à Card. Noallio appellationis revocatio puraque ac simplex ab eodem Bullæ acceptatio. Mendaces contra sinceram Card. Noallii acceptationem sparsi rumores, statim ac certò disjecti. Mors Eminent. Noallii; cujus in locum sufficitur Amensis Archiepiscopus. Solemne an. 1729 super acceptatione Constituit. Unig. S. Facultatis Parisiensis decretum. Dicti Decreti multiplex ac disertissima confirmatio. Regium ac

solemne an. 1750 pro Constitut. Unig. observandâ et executioni demandandâ Edictum. Epistolis et diplomatibus Regis eadem confirmata declaratio. Moritur Benedictus XIII succedit Clemens XII huicque Benedictus XIV. Miracula Convulsionesve ab Episcopis et Theologis explosa. Acta et Decreta præclaræ Artium Facultatis super acceptatione Constitut. Unig. Præcedentium Decretorum confirmatio, 650 et seq. — Art. II. Bullæ Unig. auctoritas, æquitas, genuinusque character statuitur ac vindicatur, 650. — Parag. I. Bullæ Unig. asseritur æquitas ac canonicitas, 655. — Concl. Æquissima est ac canonica Clementis XI. Constitutio, quæ incipit Unigenit. 654. — Solvuntur Objectiones, 660. — Parag. II. Statuitur ac vindicatur certa et inconcussa Constitutionis Unigenit. auctoritas, 684. — Concl. Constitutio Clementis XI quæ incipit Unigenit. certissimum est universalis Ecclesiæ iudicium, cui omnes et singuli Fideles corde et animo adharere debent, *Ibid.* — Bullæ acceptationis testimonia, quæ petuntur ex publicis ac solemnibus omnium ferme Orbis Catholici Metropolitanorum testimonibus, 695. — De sparsis per Italian Ecclesiis, 703. — De Ecclesiis Hispaniæ, 707. — De Ecclesiis Lusitanæ, 709. — De catholicis Belgii Ecclesiis, 710. — De Germaniæ Ecclesiis, *Ibid.* — De Hungariæ et Bohemiæ Ecclesiis, 711. — De Ecclesiis Poloniæ, 712. — De Ecclesiis Dalmatiæ, Illyrici, Albanæ, etc., *Ibid.* — Solvuntur Objectiones, 719. — Parag. III. Aperitur Bullæ Unig. natura, genuinusque character, 786. — Concl. Bulla Unig. non est mera disciplina, politiæ ac cautionis lex; sed verum ac propriè dictum iudicium dogmaticum, 787. — Solvuntur Objectiones, 794. — Corollaria, 804. — Art. III. De systemate Quesnelliano, 810. — Principia systematis Quesnelliani, *Ibid.* — De consecrariis Quesnelliani systematis, 815. — Discrimina Quesnelliani systematis à cæteris orthodoxis systematibus, ejusdemque cum Jansenianis et Baiianis placitis, omnimoda consensus, 814. — Clerici à Belliberone vita, 815. — Tractatus de Gratiâ. — Pars dogmatica, 817. — De homine lapso et reparato. — De primi parentis, sive Adæ, peccato. — De peccato generatim inspecto. — Quid sit peccatum generatim acceptum? 829. — Utrum ratio formalis, sive natura peccati quatenus peccati, in positivo, vel in privativo, sit collocanda? 858. — De avitâ maculâ. — De originis delicti existentia, 849. — Delictum avitum ex sacris tabulis eruitur, 855. — Primigenii delicti existen-

tia constanti Ecclesiæ traditione et praxi evincitur, 858. — Utrum peccati originalis dogma rationi repugnet. An ex rationis luce aliquatenus erui possit peccatum originale? 870. — Utrum rationis argumenta ab incredulis adversus peccatum originale vibrata cordato viro demonstrativa videri possint? 875. — De naturâ peccati originalis. — Præcipui circa peccati originalis naturam errores referuntur et exsufflantur, 881. — Præcipuæ theologorum catholicorum de peccati originalis naturâ sententiæ produntur, 885. — De modo quo traducitur peccatum originale. — Quænam sit animæ origo? 902. — Quomodò vitietur anima humana per suam cum corpore unionem? Prima opinio refertur et rejicitur, 918. — Opinio 2^o exponitur cum rationibus pro ipsâ militantibus, 919. — Opinio 3^o discutitur, 926. — De peccati originalis subjecto. — Utrum B. Virgo in suo conceptu à peccato originali fuerit immunis, 956. — Utrum B. Virgo absque originali maculâ concepta fuerit? 958. — Utrum filii fidelium peccatum originale contrahant, 960. De præcipuis peccati originalis effectibus. — De pœnis peccati originalis in præsentî vitâ, 965. — Utrum ignorantia invincibilis excuset à peccato? 968. — De effectibus peccati originalis in futurâ vitâ. — Errores circa parvulorum absque Baptismo pereuntium sortem referuntur, et exploduntur, 985. — Opiniones de sorte parvulorum sine baptismo morientium adducuntur, et una eligitur, 986. — De cœlestis Adam, sive Christi, gratiâ. — De gratiæ essentiâ, 1019. — De vulgatis gratiæ distributionibus, 1028. — De gratiæ necessitate. — De necessitate gratiæ in statu naturæ innocentis. — Utrum Adam cum justitiâ originali, et donis ei affixis creatus fuerit? 1037. — Utrum justitiâ originalis et alia dona recensita Adæ innocentî debita fuerint, et ideo naturalia reputanda sint? 1039. — Quid sentiendum de statu qui dicitur naturæ puræ? 1044. — An, et quâ gratiâ indiguerit insons Adam ad benè agendum et perseverandum. — Referuntur novatorum placita circa naturæ innocentis et lapsæ auxiliorum discrimen, 1064. — Recensentur theologorum opiniones de gratiæ sanitatis et liberationis discrimine, 1066. — De gratiæ necessitate in statu naturæ lapsæ, 1067. — An gratiâ sit necessaria ad veritates supernaturales cognoscendas et credendas? 1071. — An gratia ad bonum opus supernaturale volendum et perficiendum absolutè requiratur? 1075. — An sine fide et claritate aliquod bonum opus elici

possit? — Utrum sine fide theologicâ bonum opus morale possit elici? 1083. — Utrum sine charitate bonum opus morale produci queat? 1100. — An sine gratiâ actuali possit homo aliquod opus moraliter bonum perficere? 1111. — Confutantur diversa dictoria et convicia in Vasquesianam, aut Norisianam doctrinam super gratiâ ad omne opus bonum morale necessariâ contorta, 1123. — An gratia sit necessaria ad vitanda omnia omnino peccata? 1167. — An homo sine gratiâ possit ad gratiam se præparare? — An et quæ gratia sit necessaria ad perseverandum in iustitiâ? 1171. — Utrum iustificati sine speciali Dei auxilio in acceptâ iustitiâ usque in finem perseverare possint? 1173. — Quodnam sit speciale Dei auxilium quo indigent justi ut usque ad finem perseverare possint? 1177. — De gratiâ sufficiente. — De gratiâ sufficientis essentiâ et existentia, 1181. — De gratuitâ gratiâ sufficientis effusione, 1201. — Utrum gratia sufficiens omnibus justis, cum præceptum hic et nunc urget, impertiatur? 1209. — An fidelibus sontibus infundantur gratiæ sufficientes sive ut nova peccata non committant, sive ut commissorum veniam adipiscantur? 1225. — An gratiæ sufficientes ex cæcatis et induratis concedantur? 1228. — An Hebræis in antiquo illuxerit gratia sufficiens? 1235. — An infidelibus dentur gratiæ sufficientes ut fidei lumine collustrari possint? 1240. — An in omnes parvulos è cœlo stillent aliqua adiutoria ad salutem sufficientia? 1249. — Liber 5. — De gratiâ efficaci, 1254. — De novatorum circa gratiæ efficaciam dogmatibus, 1255. — Refellitur Jansenii systema circa gratiæ efficacis agendi modum, et ideò libertatem, 1277. — De intrinseco gratiæ victricis Jansenianæ principio, 1303. — De variis circa gratiam efficacem scholæ systematibus, 1309. — Thomistici systematis synopsis, 1312. — Brevis Augustiniani systematis descriptio, 1318. — Refelluntur hodierni pseudophilosophi prætendentes id, quod certò et infallibiliter fit, liberè non fieri, 1325. — Molinisticum systema perstringitur, 1335. — Concisa Congruistarum systematis delineatio, 1342. — Nupera Thomassini opinio expenditur, 1345. — De insignioribus gratiæ Christi beneficiis, 1347. — De primo Dei gratiæ effectui, sive de hominis justificatione, 1348. — De præcipuis justificationis acceptionibus, 1349.

— Justificatio in fieri, sive conditiones ex Dei institutione justificationi præeuntes, expenduntur. — Fides justificationem impetrans discutitur et retegitur, 1350. — Executitur novatorum sententia circa fidei iustificantis adjuncta, sive expenditur an sola fides iustificet, 1364. — Expenditur modus quo fides ad justificationem concurrat, 1374. — De justificatione in *facto esse*, sive de justificationis naturâ, 1376. — De justificationis *essendi modo*, sive de justificationis qualitatibus effectibusve, 1382. — Utrum demptâ speciali Dei revelatione, quis fide divinâ credere possit et teneatur se esse justum? 1383. — Utrum iustitia ita solis electis competat, ut eâ nunquàm spoliari possint? 1395. — Utrum omnes justi æquali exornentur sanctitate? 1397. — De 2^o gratiæ effectui, sive de merito. — De meriti existentia. — An bona justorum opera æternæ vitæ verè meritoria sint? 1399. — Licetne opera edere æternæ mercedis intuitu? 1405. — De meriti dotibus, sive conditionibus, 1407. — Referuntur conditiones ad meritum de *condigno* necessariae, 1408. — Corollarium. — Referuntur conditiones meriti imperfecti, sive de *congruo*, propriæ, 1413. — De meriti *objecto*, sive quasnam res attingit meritum? — Utrum prima gratia sanctificans, ejusve augmentum merito obnoxia sit? 1415. — Utrum perseverantia usque in finem merito subjaceat? 1417. — Utrum meritum de *condigno* vitam æternam attingat? 1421. — Utrum Deus justorum merita supra *condignum* remuneret? 1427. — Breve N. S. P. Benedicti Papæ XIV ad magnum Hispaniæ Inquisitorem, 1433.

APPENDICES ad tractatum de *Homine lapso et reparato*. — APPENDIX PRIMA. De gratiâ habituali et ei annexis. — De nomine, existentia et essentiâ gratiæ santificantis, 1439. — De virtutibus infusis, 1454. — De donis Spiritûs sancti, 1463. — APPENDIX II. De variis Scholæ systematibus circa gratiæ efficaciam et sufficientiam, 1472. — Argumenta pro Thomistis adversus Molinam et Congruistas, 1475. — Argumenta pro Molinâ et Congruistis adversus Thomistas, 1480. — Arg. I. — Ex verbis Christi ad Corozaitas et Bethsaitas, *ibid.* — Argumentum II. — Ex eo quòd in systemate Thomistarum non detur gratia verè sufficiens, 1481. — Argumentum III. — Ex eo quòd in eodem systemate gratia efficax sit necessitans, 1482.

MIGNE, J.P.

BQT

Theologiae cursus

507

.M5

completus.

v. 10

DATE

ISSUED TO

MIGNE, J.P.

BQT

Theologiae cursus

507

completus.

.M5.

v. 10

